


Tĩrtũm kapẽr ã kagà
nyw



New Testament in Apinayé (BR:apn:Apinayé)

Tĩrtũm kapēr ã kagà nyw
New Testament in Apinayé (BR:apn:Apinayé)

copyright © 1999 Wycliffe Bible Translators, Inc.

Language: Apinayé

Translation by: Wycliffe Bible Translators, Inc.

Apinayé [apn], Brazil

Copyright Information

© 1999, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Apinayé

© 1999, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 21 Feb 2024 from source files dated 29 Jan 2022
 383a4e22-34cd-505f-9cc2-2f9921e7aa9f

Contents

Matêwre	1
Makre	92
Rukre	144
Juãw	239
Atre	306
Rômãn	386
Wam Korît	432
Sikûn Korît	474
Karatas	500
Epes	516
Piripos	531
Korosê	541
Wam Tesarôn	551
Sikûn Tesarôn	559
Wam Ximotre	564
Sikûn Ximotre	576
Xitre	584
Piremõ	589
Eprêw	591
Xiakre	623
Wam Pêtre	634
Sikûn Pêtre	646
Wam Juãw	653
Sikûn Juãw	662
Hapuhã Juãw	664
Jutre	666
Apokarip	670

Matêwre Matêwre kot tanhmã Jejus kot amnhĩ nhĩpêx to ho pa hã kagà

Matêwre na pre kagàja nhĩpêx. Kêp Jejus nhỹ hã hkrajê jahkre xwýnh na pre. Nê kêp Ijaew. Hixi hõ pê na Rewi. Tã na pre mē pamã kagàja nhĩpêx nê kamã Jejus kot pika hwýr wrýk nê kator nê tanhmã ri amnhĩ nhĩpêx to ho pa hã harê nê hã kagà. Nê kêp mē panhõ pahшти mex o mex ã harê nê hã kagà. ã na pre Matêwre mē pamã Jejus jarê nê hã kagà anê.

Apraãw kanrêhã hkra nê htãmnhwýjê nhĩxi

Rukre 3.23-38

¹ Amnepêm Jejus Kris kormã pika hwýr wrýk kêt ri hkukamã higêtjê nhĩxi na jajaja.

Wýj ri higêtjê hõ nhĩxi na pre kêp Tawi.

Nê Tawi xwýj ri higêt nhĩxi pê na pre Apraãw.

² Nê Apraãw kra na pre kêp Ijak.

Nê Ijak kra na pre kêp Jako.

Nê Jako hkra na pre kêp Juta mē htôjaja.

³ Nê Juta hkra na pre wa kêp Pere nê Jera.

Nê Pere mē Jera wa katorxà na pre kêp Tama.

Nê Pere hkra na pre kêp Erõ.

Nê Erõ hkra na pre kêp Ari.

⁴ Nê Ari hkra na pre kêp Amĩnatap.

Nê Amĩnatap kra na pre kêp Nasõ.

Nê Nasõ hkra na pre kêp Samõ.

⁵ Nê Samõ hkra na pre kêp Poas.

Nê Poas katorxà na pre kêp Raap.

Nê Poas kra na pre kêp Opex.

Nê Opex katorxà na pre kêp Rutre.

Nê Opex kra na pre kêp Jese.

⁶ Nê Jese hkra na pre kêp Pahшти Tawija.

Nê Tawi hkra na pre kêp Sarumãw.

Sarumãw katorxàja Uristi hprõ na pre. Tã nhũm pre Uristi ty nhũm Tawija hãmri mýrpê

Uristi hprõ ho hprõ nê kamã hkra. Nhũm wa hkraja kêp Sarumãw.

⁷ Nê Sarumãw kra na pre kêp Ropã.

Nê Ropã hkra na pre kêp Apiasti.

Nê Apiasti kra na pre kêp Asti.

⁸ Nê Asti hkra na pre kêp Josapa.

Nê Josapa hkra na pre kêp Jorã.

Nê Jorã hkra na pre kêp Ojis.

⁹ Nê Ojis kra na pre kêp Jotã.

Nê Jotã hkra na pre kêp Akaj.

Nê Akaj kra na pre kêp Ejekis.

¹⁰ Nê Ejekis kra na pre kêp Manase.

Nê Manase hkra na pre kêp Amõ.

Nê Amõ hkra na pre kêp Josis.

¹¹⁻¹² Nê Josis kra na pre kêp Jekonĩs mē htôjaja.

Kormã mē htĩr ri na pre Papirõn nhõ xwýnhjaja kot mē hkurê kaxàr kaxyw mē hwýr hprõt nê mē unê. Ijaew piitã unênh pa nê ma akupým mē õ pyka hwýr mē ho hapêx nhũm mē hpãnhã Papirõn kamã pa ho pa. Jakamã nhũm Josis mē hkra Jekonĩs mē htôjaja mē hipêêxà pyrã nê Papirõn kamã pa ho pa.

Nê Jekonĩs kra na pre kêp Saraxi.

Nê Saraxi hkra na pre kêp Joropape.

¹³ Nê Joropape hkra na pre kêp Apiux.

Nê Apiux kra na pre kêp Eriakĩ.

Nê Eriakĩ hkra na pre kêp Ajo.

¹⁴ Nê Ajo hkra na pre kêp Satok.

Nê Satok kra na pre kêp Akĩ.

Nê Akĩ hkra na pre kêp Eriux.

¹⁵ Nê Eriux kra na pre kêp Eresa.

Nê Eresa hkra na pre kêp Matã.

Nê Matã hkra na pre kêp Jako.

¹⁶ Nê Jako hkra na pre kêp Juje.

Nê Juje hprõ na pre kêp Marir.

Nê Marir Kra na pre kêp Jejus.

Mê kot kãm: “Tĩrtũm kot mē pakaxyw ãm xwýnh” anhỹr xwýnhhta na pre.

¹⁷ Nhũm Apraãw kanrêhã axte axpên kanrêhã mē àptàr nywjaja Tawija wýr kêp 14. Nê Tawi nhĩrõ pê Papirõn hwýr mē hapêx kêt ri axpên kanrêhã mē àptàr nywjaja mããnhnê kêp 14.

Nê ra Papirôn kamã mẽ pa nhîrô pê axpên kanrêhã Jejus pê Tîrtûm kot mẽ pakaxyw ãm xwýnhhta wýr mãânên kêp 14. ã na pre Jejus Kris xwýj ri higêtjê nhîxi anê.

Jejus Kris kator

Rukre 1.26-38, 2.1-7

¹⁸ Tã ã mẽ hixi jarênh kot anhýr kanrêhã na pre ã Jejus Kris kator anê. Nhùm pre kormã Jujeja Marir o hprô kaxyw. Nom kormã ho hprô hkêt ri nhùm htujarô. Kormã hkukrit tã nhùm Tîrtûm Karô tanhmã ho nhùm htujarô. ¹⁹ Hãmri nhùm Jujeja harênh ma nê tee ri hamaxpêr nê htýx nhãm mêhõ kot kêp htuhã hkamnhîx. Juje kot tãm amnhî nhîpêx nê tãm hamaxpêr jakamã tee ri kot ho hprô hkukamã hamaxpêr. Nê hamaxpêr o:

–Nà pa mãn ixte hturê hã. Nhãm mêhõ ra kot ã hipêx anhýr kênã. Nà kot paj ho ixprô hkêt nê. Nom kot paj ixkwýjê mã ã kot amnhî nhîpêx anhýr o amnhîrit kêt nê. Kot paj anê nhùm mẽ kuma nê ho kapêr punuj nhùm amnhî kamã hpijaam týx nê. Ja pymaj kot paj ixkatat kôt hkaga kurê kumrêx. Nom ixkwýjê hkàx ã hkaga. Anê.

²⁰ Nê ã hamaxpêr anhýrja o ra gôr nê nõ. Nhùm Tîrtûm kapêr o mẽ wrýk xwýnhjê hõ hwýr wrý nê hwýr axàn kuri xa. Hãmri nê kãm:

–Pa Juje? E ot pa awýr tẽ. Kwa tee ri Marir o aprô hkukamã ajamaxpêr punuj kêt nê. Mãmrî ho aprô. Mêhõ kot apê tanhmã ho hkêt. Tîrtûm Karô na pre ã hipêx anê. Jakamã kwa tee ri ajamaxpêr kêt nê mãmrî ho aprô nê war apa. ²¹ Koja hkrare kato nê myre nê hprêk. Hãmri nê mẽ kot hkôt amnhî xunhwýr xwýnhjaja mẽ kot amnhî tomnuj piitã pê mẽ utar pa. Jakamã koja kato ka wa hã hixi mẽ nhùm kêp Jejus. Anê.

Nhùm pre ã Tîrtûm kapêr o mẽ wrýk xwýnhjaja kãm kapêr anê. Ijaew kapêr kãm Jejus jarênhja te kêp “Tîrtûm kêp mẽ papytâr xwýnh” anhýr pyrâk. Jakamã nhùm Tîrtûm kapêr o mẽ wrýk xwýnhja Juje ôt kãm ã kãm Marir jarênh anê. ²²⁻²³ Nom kormã ã kãm

kapêr anhýr xwýj ri na pre ra Tîrtûm nhý hã kapêr xwýnhjê hõja kukamã tanhmã harênh to nê hã kagà. Nê hã kagà ho:

E mẽ inhma nê inhmar týx nê ho apa. Koja nhýrmã pyka já kamã mêhõ kormã hkukrit tã htujarô. Nê hkra kato nê myre. Nhùm mẽ omu nê hã hixi mẽ nhùm kêp Emanuew. Anê.

Ijaew kapêr kãm “Emanuew” jarênhja te kêp “Ota ra Tîrtûm mẽ pahkôt pa ho pa” anhýr jarênhhta pyrâk. Jakamã nhùm pre Tîrtûm nhý hã kapêr xwýnhja Jejus kukamã ã harênh anê nê hã kagà.

²⁴ Jakamã nhùm Tîrtûm kapêr o mẽ wrýk xwýnhja Juje mã kapêr par mẽ nhùm hkrâkato. Hãmri nê kot kãm ujarênh xá hkôt Marir o hprô. ²⁵ Nom kormã tanhmã ho hkêt nê ri o pa rãhã nhùm hkrareja kato. Hãmri nhùm wa hã hixi mẽ nhùm kêp Jejus nê mãânên kêp Emanuew.

2

Kanhêti ho studa xwýnhjê jarênh

¹ Nhùm pre Jejus Perêj kamã kato. Pika pê Jutej kamã. Pahi Eroxo kormã kot Jutej nhõ xwýnhjê ho amnhîptâr o pa ri nhùm õ pika kamã kato. Hãmri nhùm Tîrtûmja kaxkwa kamã Kra kator jarênh xá hã kanhêti raxta õ nhõ nhùm pika hõ kamã kanhêti ho studa xwýnhjaja omu. Kanhêtiija pumu nê hkînh nê axpên mã:

–Kwa ga mẽ kanhêti raxti mũj pumu. Mãn ra Ijaew nhõ pahi nywta kato nhùm kanhêti mũj kêp ho amnhîrit xá hã ajêt. Kwa pu mẽ ma hapêr o mõ nê nhýri tokyx omu nã.

Anê hãmri nê amnhî to pikuprôn pa nê ma hapêr o pa. Mã myt gjêx xá hwýr hapêr o pa hã apkati xohtô nê. Hãmri nê ra Ijaew nhõ pika hwýr pøj nê krî pê Jerujarê hwýr hapêr o mõ. Pahi Eroxo nhõ krîja wýr nhùm mẽ hapêr o mõ hãmri nê kamã pøj nê mẽ hkrare nywta ã krî nhõ xwýnhjê kukjêr o mõ ² nê mẽ kãm:

–Pa? Ot pa mẽ apê Ijaew nhõ pahi nywreta pumunh kaxyw mõ. Ham

kator xwÿnhhta. Mě inhõ pika kamã na pa prem kaxkwa hkrax rÿm kot ho amnhÿrÿt xã hã kanhêti raxta pumu. Hãmri nê nhÿri pahi nywre pumunh nê kutã mẽ ixkõn krã ho ixtêm nê ixkrÿ nê kãm mex o mex ã harênh kaxyw nêtãnh mẽ inhõ krÿ rÿm hapêr o mõi. Kwa mẽ inhmã harê. Nhÿri na? Na pa mẽ inhmã omunh prãm tÿx kumrêx.

Anhÿr o hã mẽ hkukjêr o mõi jakamã nhÿm mẽ piitã pahi nywja jarênh ma nê axpên mã harênh o hprõt. ³Nhÿm pahi Eroxja harênh ma nê tee ri amnhÿ kukamã hamaxpêr. Pahi nyw kot mẽ ho amnhÿptâr ã hkamnhÿx nhÿm já kêp omnuj tÿx nê. Nhÿm krÿ nhõ xwÿnhjaja ã hamaxpêr anhÿr ã omu nê tee ri amnhÿ kukamã hamaxpêr o ra kãm ma nê. ⁴Hãmri nhÿm pahi Eroxja amnhÿ wÿr hkwyjê hã karõ. Mě õ patre krãhtÿmjaja nê Tÿrtÿm kapêr tÿm o mẽ ahkre ho mẽ pa xwÿnhjaja nhÿm amnhÿ wÿr mẽ hã karõ nê Tÿrtÿm kot nhÿrmã mẽ hwÿr mênh mã xwÿnhhta ã mẽ hkukjêr kaxyw. Nê mẽ kãm:

—E Tÿrtÿm kot nhÿrmã mẽ pahwÿr mênh mã xwÿnhhta ã na pa mẽ akukjêr kaxyw mẽ ato akuprõ. Kwa mẽ atõ inhmã harê. Koja nhÿrmã kator kaxyw nê nhÿri koja we kato? Xã jar mẽ panhõ krÿ kamã nã? Xã nhÿri krÿ hõ kamã? Anê.

⁵Hãmri nhÿm mẽ kuma nê mẽ kãm:

—Nã mẽ panhõ pika pê Jutej kamã koja xep kato. Krÿ pê Perêj kamãã. Na pre Tÿrtÿm nhÿ hã kapêr o mẽ pa xwÿnhja ra hkukamã mẽ panhÿgêjtê mã tanhmã harênh to nê hã kagã. Nê hã kagã ho:

⁶Pa Perêj nhõ xwÿnhjaja? E mẽ anhõ krÿ grire htã kamã koja nhÿrmã mẽ panhõ Pahi Maatija kato. Koja mẽ pahpê Ijaewjê piitã mẽ pahto amnhÿptâr mex o pa. Jakamã mẽ anhõ krÿ grire htã koja Ijaew piitã axpên mã mex ã harênh o pa.

Ã na pre Tÿrtÿm kot mẽ pahwÿr mênh mã xwÿnhhta kukamã mẽ kãm harê nê hã kagã anê. Anê.

⁷Hãmri nhÿm pahi Erox tee ri ã harênh anhÿrja ma hãmri nê amnhÿ wÿr mẽ kot hã àhkukjêr o mõi xwÿnhjê hã karõ. Nom nhÿri Ijaew kãx ã. Hãmri nhÿm mẽ ma hwÿr mra nê agjê nhÿm mẽ omu nê pahi nywta ã mẽ hkukja nê mẽ kãm:

—E mẽ aprÿ hã inhmã pahi kator nywta jarê. Tanhmã na pre ra mẽ ate kanhêti pumunh ã mytwrÿ kute? Xã ham na ka prem omu nã amnepê mã? E mẽ aprÿ hã tanhmã inhmã harênh to. Anê.

Hãmri nhÿm mẽ ihõja kãm:

—Nã na ra hã amgrã axkrut kaxyw. Na pa prem omu hãmri nê inhnojarêr nê man ixpa ho ixpa ry rax nê mẽ awÿr pøj. Anê.

⁸Nhÿm mẽ kuma nê mẽ kãm:

—Tÿ. Nom jar amrakati. Perêj kamã na xep kato. E mẽ mãmrÿ ma hwÿr mõi nê kamã hapêr. Hãmri nê nhÿri omu nê akupÿn ixwÿr mõi nê inhmã harê. Pa ijaxwÿja ma hwÿr mõi nê omu nê mẽ apyrã nê kãm mex o mex ã harê. Ijaxwÿja inhmã omunh prãm tÿx kumrêx. Anê.

Nom hêx rom ã ri mẽ kãm kapêr anê. Kot nhÿri harênh mar nê hã àmnênh nhÿm mẽ kot hpÿr kaxyw nhÿm hêx rom ã kãm omunh prãm tÿx ã amnhÿ jarênh anê. ⁹⁻¹⁰Jakamã nhÿm mẽ kuma hãmri nê kato nê ma Perêj wÿr mõi kurê kumrêx. Hãmri nê kormã mẽ õ pika kamã mẽ pa ri kanhêti ho studa xwÿnhhta nhÿm mẽ axte amnhÿ kukamã omu nê hkÿnh nê. Nhÿm ma Perêj wÿr mẽ hkukamã mõi nhÿm mẽ omunh pê ma hkõt pa rãhã hwÿr pøj. Nhÿm kanhêtija pahi nywre nhõrkwÿ mÿri ajêr. ¹¹Jakamã nhÿm mẽ ma hkõt mra nê ixkreja wÿr pøj nê kapem xa. Hãmri nê mẽ kãm kapêr nê mẽ hwÿr agjê nê Jejus mẽ katorxãja wa omu. Hãmri nê Jejus kutã hkõn krã ho hkrÿ hpa nê kãm kapêr nê mẽ kãm:

—Pa Xugitre. Hêxta waa nê. Nã amex o amex. Kot kaj nhÿrmã axãptâr hãmri nê apê mẽ inhõ Pahi Maati. Nã ãm hãmri na pa mẽ apumu nê ixkÿnh nê. Anê.

Hāmri nê ahpÿnhã kãm hkĩnh xà gō. Kãm ôr kwÿ gō nê kãm mēhkuxwa xà hkwy gō nê kãm te kot ràmre kuxware pyræk pē mĩraja nhũm mē kãm hkwy gō. Mē hkĩnh xà hã kàxpore xohtō nhũm prem kãm ôr pa. ¹² Hāmri nê ra akupÿm Jerujarē kamã pahi Eroxx wÿr nojarêt. Nhũm kamãt nhũm mē gōr nê hikwÿ hāmri nê ra amÿti. Nhũm Tĩrtũm mē hpimtir kãm mē kãm kapēr nê mē kãm:

—Pa? E mē inhma. Kêr ka mē akupÿm pahi Eroxx wÿr amrar nê kãm mē hkrata jarēnh kêt nê. ãm kwarĩ ho kwarĩ. Nê kêr ka mē pry hō hã mãn ma mē anhō pika hwÿr akupÿm apa ho apa.

Anhÿr o mē kãm kapēr jakamã nhũm apkati nhũm mē kãnhmã hkrĩ hāmri nê Tĩrtũm kot mē kãm hã karō xà hkôt ma akupÿm mē ô pika hwÿr pa kurē kumrēx nê akupÿm pahi Eroxx wÿr mrrar kêt nê.

Juje mē hprō wa kot Eroxx pymaj ma Jejus o mōr

Apokarip 12.1-6, 12.13-18

¹³ Tã nhũm kanhêti ho studa xwÿnhjaja ma akupÿm hapêx hāmri nhũm Tĩrtũm axte Marir mjên Juje hwÿr kapēr o mē wrÿk xwÿnhjê hō mē. Nhũm kê axte hpimtir kãm hwÿr wrÿ nê kãm kapēr nê kãm:

—Pa Juje. E kwa kãnhmã nhÿ. Na ra pahi Eroxxja aprō pē hkrata ã amÿnê. Koja tokyx pôristi hkwyjaja mē anhō krĩ hwÿr pōj nê war apē hpĩr kaxyw ri hapêr. Jakamã kwa wa tokyx akato nê ma pika pē Ejit wÿr amōr kurē kumrēx. Nê Ejit kamã apa rãhã pa nhÿrmã akupÿn amnê war amê. E kwa tokyx. Anê.

¹⁴ Hāmri nhũm kuma nê kãnhmã nhÿ nê Marir mra nê war amnhĩ to akuprō nê ra nojarêt. Hāmri nê krĩja pē Jejus o kato nê ma o mōr kurē kumrēx. Wa mōr ryy nê hāmri nê Ejit wÿr pōj nê kamã pa ho pa.

¹⁵⁻²⁰ Rôm nhũm pahi Eroxx tee ri amnhĩ wÿr kanhêti ho studa xwÿnhjê kamã hamak o pa nom nhũm mē akupÿm hwÿr mrrar kêt nê. Jakamã nhũm mē kamã gryk nê hamaxpēr o:

—Tk. Kwa nà. Na mē ãm inhmã hêx nê akupÿn ixwÿr mrrar nê nhÿri inhmã pahi nywta jarēnh kêt nê. Nà kwār mē mãmri ã inhĩpêx anê. Mē kot ixpê ho hpimxuure kaxyw ã. Nà kot paj mē kēp kupĩ nhũm mē rĩ amnhĩ pumu. Na xep prem kanhêti kot harēnh xàja pumunh ã ra hã amgrà pyxi nê hkôt mytwrÿ kēp 6. Jakamã mãn mē hkrata ra hã amgrà axkrut kaxyw. Nà na pa ra ijamaxpēr. Kot paj Perēj kamã mē hkra myjaja ra mē hã amgrà axkrut xwÿnhjaja nê kormã mē hã amgrà axkrut kêt xwÿnh piitã mē himex pa. Jao ra mē kamã pahi nywta pĩ. Nà ixte hpĩr mã kênã. Koja hprêk nê ixpãnhã Ijaew o amnhĩptar kêt nê.

Anhÿr o hamaxpēr hāmri nê amnhĩ wÿr ô pôristi hkwyjê hã karō nê mē kãm mē hkrajê hã amÿnê nê mē kãm:

—E kêr ka mē ma Perēj wÿr mra nê kamã mē kēp mē hkra myrejaja ra mē hã amgrà axkrut xwÿnhjê nhĩmex pa. Nê kormã mē hã amgrà axkrut kêt xwÿnhjaja mããnên mē himex par kumrēx. Nê Perēj pu hã ri krĩ hkryre hkôt mããnên ri ajapôj nê ã mē himex par anê. Anê.

Hāmri nhũm mē kuma nê ma mē hwÿr mrrar kurē kumrēx. Hāmri nê Perēj wÿr pōj nê mē kēp mē hkra myre piitã mē himex pa. Jakamã nhũm mē katorxà nê mē hipêxajaja tee ri mē hkra htyk xwÿnhjê pumu nê hkaprĩ htyx nê mÿr rũnh nê. Nom na pre Tĩrtũm nhÿ hã kapēr jarēnh o mē pa xwÿnh finat Jeremĩstija ra amnepêm ã mē kot amnhĩ nhĩpêx anhÿrja kukamã mē panhĩgêtjê mã mē harê nê hã kagà. Na pre mē kãm Ijaew kurē xwÿnhjê pynênh nê ma mē ô pika hwÿr mē ho hapêx par kaxyw. Hāmri nhũm mē panã Rrakewja te ra kot tee ri ja hã mē omunh nê tanhmã amnhĩ nhĩpêx to pyræk nhũm Jeremĩstija tanhmã Ijaewjê jarēnh to nê hã kagà. Nê hã kagà ho:

Amnepêm Perēj kamã na pre mē panã Rrakewja hpijagri ho nōrja ã ra htyk kaxyw nê tee ri hkra kator mã xwÿnhta

kukamã hamaxpêr nê mÿr o nõ. Nhũm hkwÿjaja tee ri akupÿm tam hamaxpêr kaxyw kãm kapêr. Tã jarãhã Rrakew kanrêhã hkra nê htãmnhwÿ nijaja ra urak nê tee ri mē hkrare ho hamak xaj mÿr o pa. Mē kot mē kēp utar nē mē himex par jakamã nhũm mē tee ri mē ho hamak xaj mÿr o pa. Anē.

Nhũm pre finat Jeremÿsja mē hkukamã ã mē harē nē mē hã kagà anē. Tã ra jarãhã mēni piitã Rrakew pyrà nē hkrajê o hamak xaj mÿr o pa.

Wa kot akupÿm wa ò pika hwÿr Jêjus o mōr

Juãw 7.41-42

Tã nhũm mytwrÿ grêre nê hapêx nhũm pahi Erox ty. Jakamã nhũm kamàt nhũm Jujeja gōr nē nõ. Nē kē òt kãm axte amÿti. Nhũm Tirtũm kapêr o mē wrÿk xwÿnhja axte hwÿr wrÿ nē kãm:

—Pa Juje? E na ra Marir pē hkra pÿr mã xwÿnhhta ty. Jakamã kwa wa mãmrÿ ma akupÿm mō. Ma akupÿm mē apē Ijaewjê nhō pika hwÿr axãmnhÿx aprō mē hkrata wa o mō.

Anhÿr o kãm kapêr. Na pre ra amnepê m Tirtũm nhÿ hã kapêr o mē pa xwÿnhjê hōja ja kukamã mē panhÿgêjtjê mã ja jarē nē hã kagà. Nē hã kagà kot: “Ixpê Tirtũm kot paj nhÿrmã Ejit rũm ma akupÿm ò pika hwÿr ixkrata wa mē kumē.” Anhÿr o kot hkukamã harēnh nē hã kagà.

²¹ Jakamã nhũm Tirtũm kapêr o mē wrÿk xwÿnhja ã Juje mã karō anē hãmri nhũm kuma nē ma akupÿm wa o mō. Ma akupÿm mē ò pika hwÿr wa o mō.

²² Tã ra akupÿm hpôx kaxyw htêp o mō. Hãmri nē pahi Erox kra Akêrawja ra hipêexà mÿr pē kot Jutej kamã mē ho amnhÿptar hã harēnh ma. Hãmri nē tee ri mē amnhÿ kukamã hamaxpêr nē kãm mē hwÿr wa o mōr pyma nē.

Tã nhũm kamàt nhũm Juje ra gōr nē nõ nē kē axte amÿti. Nhũm kē

axte Tirtũm kapêr o mē wrÿk xwÿnhja hwÿr wrÿ nē akupÿm ò pika hkwÿ pē Jutej wÿr mōr nē wa mē hkurê nē kãm:

—Pa Juje? E kēr ka Jutej wÿr wa mē amōr kêt nē. Pãnhã nhãm mē anhō pika hō hwÿr mãn mō nē kamã ri apa.

Anē nhũm kuma nē hpãnhã wa mē ma mē ò pika hkwÿ pē Garirej wÿr wa mē juk nē ma mō. ²³ Nē kamã pōj nē krÿ pē Najare hwÿr mō nē kamã amnhÿm òrkwÿ nhÿpêx nē kamã wa mē pa ho pa. Nhũm pre ra amnepê m Tirtũm nhÿ hã kapêr o mē pa xwÿnhjê hōja ra ã mē kot amnhÿ nhÿpêx anhÿrja kukamã mē panhÿgêjtjê mã mē harē nē hã kagà. Nē hã kagà kot:

Tirtũm kot mē pahwÿr mēnh mã xwÿnhhta koja kēp Najare nhō xwÿnh. Anē.

3

Juãw Paxis kot Tirtũm kapêr jarēnh o pa

Makre 1.1-6; Rukre 3.1-14; Juãw 1.19-23

¹ Nhũm pre Juãw Paxisja ã amnhÿ nhÿpêx anē. Nē pika pē Jutej kamã mē kãm Tirtũm kapêr jarēnh o pa. No ãm krÿm pa hkêt nē. ãm mē hpu hã krÿ pē amÿm ri kapôt ã ri mē kãm Tirtũm kapêr jarēnh o pa. ²⁻³ Tirtũm nhÿ hã kapêr o pa xwÿnh finat Ijais ra kot Juãw kukamã mē panhÿgêjtjê mã tanhmã harēnh to nē hã kagà xá hkôt. Na pre hkukamã hã kagà ho:

Koja nhÿrmã mēhō mōn pōj. Kapôt ã mōn pōj nē mē kãm tanhmã mēmoj tã karō hto ho ri pa. Nē mē kãm: “Koja Tirtũm tokyx mē pahwÿr mē panhō Pahihtija mē nhũm wrÿ nhũm mē piitã omu. Jakamã kwa mē tokyx kutêp tãm amnhÿ nhÿpêx o ri apa. Te mē kot mēhō kutêp pry ho mexta pyrà nē amnhÿ nhÿ ho tãm amnhÿ nhÿpêx nē tãm ajamaxpêr mex o ri apa. Kēr ka mē Pahihti kutêp ã amnhÿ nhÿpêx anhÿr o ri apa.” Anhÿr o koja mē kãm ujarēnh o pa. Anē.

Na pre finat Ijaisja Juãw Paxisja kukamã ã mẽ kãm harênh anê nê hã kagà. Tã nhũm hã kagà xàja kôt nhũm Juãw Paxisja môn pôj. Hãmri nê Ijais kot hkukamã harênh xà hkôt kapôt ã ri mẽ kãm ujarênh o pa nhũm mẽ kãm mar prãm xwýnhjaja ma hwýr mra. Nhũm mẽ kãm kapêr nê mẽ kãm:

—E koja Tĩrtũm tokyx kot mẽ pakaxyw ãm xwýnhja o amnhĩrit. Jakamã kwa mẽ tokyx kutêp amã amnhĩ tomnuj kaga hprãm xàj tãm amnhĩ nhĩpêx o apa.

Anhỹr o Jejus kutêp mẽ kãm kapêr o pa.

⁴ Juãw Paxisja hikàxpore hkêt jakamã na pre ê mex kêt nê pa. ãm mẽmo mry pê kamer kĩ ho amnhĩm ê nhĩpêx nê hagjê nê hã pa. Nê mẽmo mry hkà ho amnhĩ pre nê ri pa. Nê mẽo mex kur kêt nê ãm krit ku nê menh ôr o ri pa.

⁵ Jakamã nhũm kapôt ã ri mẽ kãm Tĩrtũm kapêr jarênh o pa nhũm mẽ kot mar kaxyw ma hwýr mra. Pika pê Jutej kamã ri mẽ pa xwýnhjaja. Nê Jutej kamã krĩ pê Jerujarê nhõ xwýnhjaja. Nê pyhti pê Jotãw mýri mẽ pa xwýnhjaja. Nhũm prem pitã harênh ma nê kot mar kaxyw ma hwýr mra. ⁶ Hãmri nê kapêr ma nê Tĩrtũm noo mã mẽ kot amnhĩ tomnuj xwýnh ã kãm amnhĩ jarê. Mẽ kot amnhĩ tomnuj kaga nê tam amnhĩ nhĩpêx o pa hprãm xàj ã kãm amnhĩ jarênh anê. Nhũm Tĩrtũm kaxkwa kamã hkrĩ htã mẽ kuma nê amnhĩ katut kôt mẽ kot amnhĩ tomnuj rênh pa nê axte kãm hamaxpêr kêt nê. Jakamã nhũm pre Juãw Paxisja Tĩrtũm mã gôx kãm mẽ hkrã kumrãr pa. Pyhti pê Jotãw kamã mẽ hkrã kumrã.

⁷ Tã nhũm Parijew mẽ Satusew nhõ xwýnhjaja mãânên mẽ hkôt ma Juãw Paxis wýr mra. Mẽ urak nê mẽ kêp Ijaew jakamã haxwýja Juãw Paxis kot mẽ hkrã kumrãr kaxyw ma hwýr mra. No ãm hkwyjê hkĩnhã mẽ kot amnhĩ tomnuj kaga hprãm xàj kãm amnhĩ jarênh kêt nê. ãm amnhĩ krã hkôt hkwyjê hkôt hwýr mra nê amnhĩ

to kuma. Nom nhũm Juãw Paxisja ra hprĩ hã ã mẽ hamaxpêr anhỹrja kôt mẽ omunh mex nê. Jakamã mẽ kãm:

—Tk kwa nà. Kormã mẽ ate amnhĩ tomnuj pix o ri apa kênã. Xà kot paj mẽ ate amnhĩ tomnuj o apa rãhã mẽ akrã kumrã nhũm Tĩrtũm ja hã mẽ apumu nhũm ja kãm mex nê? Nà koja já kãm mex kêt nê. Koja ja mýrapê nhỹrmã tanhmã mẽ atomnuj tỳx to ka mẽ tee ri umaj apimxur prãm kaprý. ⁸ Na htem amnhĩ tomnuj kaga nê tãm amnhĩ nhĩpêx nê tam axpên nhĩpêx. Jakamã e kwa mẽ ã amnhĩ nhĩpêx o apa anê pa rĩ kormã mẽ akrã kumrã. ⁹ Na ka htem atỳx ri ajamaxpêr o: “Mẽ ixpê finat Apraãw kanrêhã htãmnhwý hkwy na pa mẽ. Jakamã koja Tĩrtũm ja hã mẽ ixpumu hãmri nê mẽ ixte amnhĩ tomnuj o ixpa tã nhũm ja hã tanhmã mẽ ixto hkêt nê. Koja mẽ ixto mex nê.” Anhỹr o atỳx ri amnhĩ kukamã ajamaxpêr. Nom ja kot anhỹr kêt. Mẽ apê Apraãw kanrêhã htãmnhwý htã mẽ ate urak nê tãm amnhĩ nhĩpêxre hã. Kot kaj mẽ apê htãmnhwý htã amnhĩ tomnuj o ri apa hãmri nê Tĩrtũm noo mã te mẽ apê pikap kênre nhĩkwý pix pyrak. ¹⁰ Na ra Tĩrtũm mẽ ate amnhĩ tomnuj mýrapê tanhmã mẽ ato kaxyw. Te ho mẽhõ nhõ mẽmo hpàr ô hkêt nhũm kot tee ri omunh nê krãhyr nê kuwy kamã mẽnh nê ho kaxàr par pyrak o koja mẽ anhĩpêx. Jao amnhĩ nê kuwy hwýr mẽ arê ka mẽ kamã amnhĩ xà htỳx kamã ajamak rãhã ho ri apa. Anê.

Nhũm pre ã Juãw Paxisja Parijew mẽ Satusew nhõ xwýnhjê mã kapêr anê. ¹¹ Hãmri nê hpãnhã axte mẽ kot mar kaxyw hwýr mẽ mrrar xwýnhjê mã kapêr nê mẽ kãm:

—E ra mẽ ate amnhĩ tomnuj kaga xwýnhjaja. Na pa Tĩrtũm mã mẽ akrã kumrãr kaxyw gô pix o mẽ akrã kumrã. Nom koja tokyx ixpãnhã Tĩrtũm kot mẽ pakaxyw ãm mã xwýnhta tãm mẽ pahwýr pôj. àhpumunh tỳx o kot ijakrenh par jakamã na pa hte ãm kukwak ri ixpa nê amnhĩ tã hã ixpijaàm o ri ixpa. Koja mẽ awýr Tĩrtũm Karõ rê

nhũm mẽ akarõ mã agjê. Ka mẽ ý hã tam amnhĩ nhĩpêx o ri apa. Nom kormã mẽ kot tãm amnhĩ nhĩpêx kêt xwýnhjaja koja Tĩrtũm kot mẽ pahwýr mēnh xwýnhja ja hã mẽ omu nē mẽ hipêx o te kuwy kot mẽmoj to kaxàr par pyræk o mẽ hipêx.

¹² —Na htem pur kãm harôj nhĩkê nē ho grà nē hpãnhã kahtwý. Nē kahuk pa hãmri nē hkapĩ nhũm kôk apê nē prýhkà ho htor pa. Nhũm mẽ hpãnhã hy ho pa nē ixkre kamã gôj kãm unhwý. Ja pyrà nē koja tokyx Tĩrtũmja mẽ piitã mẽ kot tanhmã amnhĩ nhĩpêx to ho pa hã mẽ omunh xà hkôt mẽ ho axkjê. Jakamã mẽ kot tãm amnhĩ nhĩpêx o mẽ pa xwýnhjaja koja ma amnhĩ wýr mẽ ho api nhũm mẽ kuri mex rãhã nē pa ho pa. No mẽ kot amnhĩ tomnuj rãhã ho mẽ pa xwýnhjaja koja jajê hkĩnhã tanhmã mẽ homnuj to. Nhũm mẽ ma kuwy raxja wýr pa nē kamã amnhĩ xà htýx kamã hamak rãhã nē pa ho pa.

Anhýr o mẽ kãm kapêr.

Juãw Paxis kot Jejus krã kumrãr
Makre 1.9-11; Rukre 3.21-22; Juãw 1.32-34

¹³ Tã nhũm Jejus pika pê Garirej rũm kato nē ma Juãw Paxis wýr mō. Juãw kot pyhti pê Jotãw kamã hkrã kumrãr kaxyw ma hwýr mō. Hãmri nē omu nē kãm:

—Pa. E ot pa awýr amnhĩ to tē. Ate mẽ kuxwar ixkrã kumrãr kaxyw. Anē.

¹⁴ Hãmri nhũm tee ri kuma nē kãm:
—Kwa nà. Aa ate amnhĩ tomnure hã kot pa kêt ri akrã kumrã. Nà ka kot kaj ixkrã kumrã. Anē.

¹⁵ Hãmri nhũm kãm:
—Kwa nà. Mãmri ixkrã kumrã Juãw Paxis. Tĩrtũm kãm ja prãm kēnã kot ka kêt ri axtem nē ixkaga. Kot puj mẽ Tĩrtũm kãm hprãm xà hkôt tanhmã amnhĩ nhĩpêx to ho ri papa. Anē.

Hãmri nhũm kuma nē kãm:

—Tôe. Nà kot paj akrã kumrã. Anē.

¹⁶ Hãmri nē pyhti hwýr o wrý nē kamã hkrã kumrã. Hãmri nē wa akupým api nē gô mý ri ãm rãhã nhũm kaxkwa axkjê. Hãmri nhũm kurũm

Tĩrtũm Karõja Jejus wýr te tuuti pyrã nē ahpar mã hwýr wrýk o tē nē ãkre hã xa. Nhũm Jejus arĩ amnhĩ wýr wrýk o htēm kãm omunh o xa. ¹⁷ Hãmri nhũm Tĩrtũm kaxkwa rũm kãm kapêr nē kãm:

Pa? E apê ixkra mex na ka. ãm hãmri na ka hte ixkanrēhã ã amnhĩ nhĩpêx mex anē. Inhmã ajapê kamã na ka ri apa ho apa. Anē.

4

Satanasti tee kot amnhĩ tã Jejus kamã hamak

Makre 1.12-13; Rukre 4.1-13; mããnēn Eprêw 2.18, 4.15

¹ Tã nhũm Jejus Tĩrtũm Karõ nhý hã ma kapôt ã ri pa. Satanasti kot amnhĩ tã kamã hamak kaxyw nhũm ma kapôt ã ri pa. ² Ri pa hã apkati xohtô nē. Ra hã arĩgro pê 40. Nē kormã apkur kêt jakamã ra kãm prãm týx kumrēx nē ri pa. ³ Hãmri nhũm Satanastija nhýhýnh hwýr tē nē hēx rom kãm kapêr nē kãm:

—Pa. E kwa mãn ka ra amã prãm týx nē nà? Nom xep apê Tĩrtũm Kra jakamã apê mẽmoj hihtýx kêt. Tĩrtũm pyrã nē axàhpumunh o axàhpumunh kēnã. Jakamã kwa kēn nhĩkwý mýj mã anē kē amã pãwti hã amnhĩ jahkre ka aku nē tokyx ho amnhĩ xihtýx. E kwa tokyx kãm akapêr. Anē.

⁴ Hãmri nhũm kuma nē kãm:

—Tk. Nà kot paj amar xà hkôt ã ri amnhĩ nhĩpêx anhýr kêt nē. Koja Tĩrtũm kãm inhmã mẽmoj nhõr prãm nē inhmã mẽmoj gō pa rĩ kormã kukrē. Kapêr ã kagà htũm kot ja jarēnh kot:

Na htem mẽ apkur xà pix kukwak ri htĩr nē pa hkêt nē. Na htem mããnēn Tĩrtũm kapêr ma nē hkôt amnhĩ nhĩpêx nē htĩr nē pa. Anē.

—ã kapêr ã kagà kamã kot harēnh kot anhýr jakamã kot paj akapêr kôt ri ã amnhĩ nhĩpêx anhýr kêt nē. ãm kwarĩ ho kwarĩ. Anē.

⁵ Hãmri nhũm Satanastija tee ri kuma hãmri nē hpãnhã ma Jerujarē hwýr o mō. Nē Tĩrtũm mã amnhĩ

jarênh xà hã ixkre hprêk nhĩmøk wÿr ho api nê kÿxpê hatur xà hã ãm nhũm xa. Hãmri nê amnhĩ parpê kên rũnh nhĩkwÿ xwÿnhja pumunh o xa nhũm Satanasti kãm:

⁶—E apê Tĩrtũm Kra jakamã kwa ja rũm ahpar mã ajarĩ nê ma tẽ nê pikap tẽm. Koja Anhĩpêêxàja apumunh mex nê ka tanhmã amnhĩ to hkêt nê. Kapêr ã kagà htũm kot harênh kot:

Tĩrtũm koja kapêr o wrÿk xwÿnh kwÿjê mã ajarê ka ajarĩ nê ahpar mã tẽ nhũm mẽ kÿxpê amÿ nhũm mẽmoj akà hyr kêt nê. Anê.

—Ã kapêr ã kagà htũm kot ajarênh anhÿr jakamã e tokyx ajarĩ. Anê.

⁷ Hãmri nhũm Jejus kuma nê kãm:

—Tk kot paj ri ate inhmã karõ xàja kôt ã amnhĩ nhĩpêx anhÿr kêt nê. Koja Tĩrtũm tãm inhmã ijarĩ hã karõ pa rĩ mar xà hkôt ijarĩ. No kot pa ri amar xà hkôt ijarĩ hkêt nê. Tĩrtũm kapêr ã kagà htũm kot ja jarênh kot:

Kêr ka mẽ amnhĩ krã hkôt amnhĩ tã ixkamã ajamak kaxyw inhĩxi jarênh kôt tanhmã amnhĩ nhĩpêx to hkêt nê. Anê.

—Ã kot ja nê kapêr kot anhÿr jakamã kwarĩ ho kwarĩ. Kot paj ri amar xà hkôt ijarĩ hkêt kumrêx. Tĩrtũm tãm kot inhmã ã ixte amnhĩ nhĩpêx anhÿr ã karõre hã. Anê.

⁸ Hãmri nhũm Satanasti tee ri kuma nê hpãnhã ma nhÿri kên prêêti hwÿr o tẽ nê himøk ã axte o xa. Hãmri nê kãm pika piitã ahkre hpa. Nê mẽ hikukrêx piitã nhũm kãm ahkre ho xa. Kàxpore nê mẽmoj mex piitã nhũm kãm ahkre nhũm Jejus piitã omunh o xa. ⁹ Hãmri nhũm kê Satanasti axte kãm:

—E mãn ka kam ri mẽmoj mex mÿj piitã omunh pa. Piitã inhõ na. Nom kot kaj ixkutã tẽm nê inhmã inhmex o inhmex ã ijarê pa ama nê amã piitã õr pa. Ka kam mẽmoj piitã ho anhõ nê ho amnhĩptar o apa. Jakamã e kwa tokyx. Anê.

¹⁰ Hãmri nhũm kuma nê axte kãm kapêr nê kãm:

—Tk kwa ma nhÿhÿm tẽ Satanasti. Kot paj ri amã amex o amex ã ajarênh kêt kumrêx. Tĩrtũm kapêr ã kagà

htũm kot ja nê kapêr kãm hihtÿx kênã. Kapêr kot:

Kêr ka mẽ ixkapêr pix ma nê ixkutã pix mã akõnkrã ho akrĩ nê inhmã inhmex o inhmex ã ijarê. Kêr ka mẽ ã amnhĩ nhĩpêx anhÿr o ri apa.

—Anhÿr o kot hã karõ jakamã kot paj amã amex o amex ã ajarênh kêt kumrêx. Anê.

¹¹ Hãmri nhũm tee ri amnhĩ tã kuma hãmri nê ma tẽ. Tee ri kãm kapêr kaprÿja ã amnhĩ pumu hãmri nê hkaga nê ma tẽ. Hãmri nhũm Tĩrtũm kapêr o mẽ wrÿk xwÿnhjaja Jejus wÿr wrÿ nê tanhmã ho mex to nê kãm õ nhũm kukrê nê akupÿm hihtÿx.

Jejus kot Garirej kamã kapêr o pa Makre 1.14-15; Rukre 4.14-15

¹² Tã nhũm Juãw Paxisja mẽmoj tã pahi Erox mã akir nhũm amnhĩ tã kuma nê gryk xàj haxà nhũm hkrĩ ho hkrĩ. Hãmri nhũm Jejusja harênh ma nê ma akupÿm Garirej kamã krĩ pê Najare hwÿr ma akupÿm tẽ. ¹³ Hãmri nê ra pøj nom kamã ri pa hkêt nê. Nê hpãnhã kurũm kato nê ma krĩ pê Kapanaũ hwÿr tẽ. Gõ rax pê Garirej mÿri na pre. Pika hkwÿ pê Jepurõ mẽ Natari wa mẽ kamã na pre nhũm Jejus ma hwÿr tẽ. Hãmri nê kamã pa. ¹⁴ Nhũm ra amnepêm Tĩrtũm nhÿ hã kapêr jarênh o mẽ pa xwÿnh finat Ijaisja Jejus kukamã ra mẽ panhĩgêjtê mã ã kot amnhĩ nhĩpêx anhÿr ã harê nê hã kagà. Jejus kot ã mẽ hwÿr mõi anhÿrja kukamã nhũm pre harê nê hã kagà. ¹⁵ Pika hkwÿ kamã mẽ pa xwÿnhjaja nhũm pre mẽ hkukamã mẽ harênh mex nê. Nê pika pê Garirej kamã mẽ pa xwÿnhjaja nhũm pre mãânên mẽ hkukamã mẽ harê. Nê pyhti pê Jotãw mẽ gõ xujanãr wa hkaêx kãm pika piitã kamã mẽ pa xwÿnhjaja. Nê krĩ pê Garirej kamã mẽ kêp Ijaew kêt xwÿnhjaja nhũm pre mãânên mẽ harê. ã na pre finat Ijaisja mẽ hkukamã Tĩrtũm nhÿ hã mẽ piitã mẽ harê nê hã kagà anê. Jejus kot ma mẽ hwÿr mõiã kukamã nhũm ra hprĩ hã harê nê hã kagà. Nê hã kagàja o:

16 E. Kot paj mẽ amã mẽmoj mex jarẽ ka mẽ inhma. Mẽ ate Tĩrtũm pumunh kêt jakamã te mẽ ate kamãt kô kamã ri apa pyrãk. Tã koja Tĩrtũm mẽ amã amnhĩ to amnhĩrĩt ka mẽ hpãnhã te mẽ ate hirã kamã ri apa pyrãk o amnhĩ nhĩpêx nẽ ra hkôt amnhĩ xunhwỳ.

Anhỳr o mẽ hkukamã mẽ harẽ nẽ hã kagã. 17 Tã nhũm ra kot hkukamã mẽ kãm ujarẽnh xà hkôt nhũm Jejusja mẽ hwỳr mō nẽ mẽ kãm Tĩrtũm kapêr jarẽnh o ri mẽ hkôt pa. Nẽ mẽ kãm tanhmã amnhĩ jarẽnh to ho pa. Nom kormã hprĩ hã mẽ kãm amnhĩ jarẽnh kêt nẽ. Te ho nhãm mẽhõ jarẽnh pyrãk o mẽ kãm amnhĩ jarẽ nẽ mẽ kãm:

—E na ra Tĩrtũmja kot mẽ akaxyw ãm xwỳnhhta mẽ nhũm mẽ awỳr wrỳ. Jakamã kwa mẽ tokyx tee ri ate amnhĩ tomnuj ã amnhĩ pumu nẽ ã ate amnhĩ nhĩpêx anhỳr kaga nẽ hpãnhã Tĩrtũm kôt mãn amnhĩ nhĩpêx o ri apa.

Anhỳr o mẽ kãm kapêr o pa pẽ mẽ ahkre ho ri mẽ hkôt pa.

Jejus kot amnhĩ wỳr tep pynênh xwỳnhjê hwỳr

Makre 1.16-20; Rukre 5.1-11

18 Tã nhũm Jejus ma gô rax pẽ Garirej mỳ ri pa nẽ gôx kãm ja wa omu. Simãw Pêtre mẽ htõ Andreja nhũm wa gôx kãm kryhti rênh o wa xa. Hãmri nhũm Jejus wa hwỳr tẽ nẽ wa omu nẽ amnhĩ kôt wa kuwỳ nẽ wa kãm:

19 —Pa. E kwa ma ixkôt mãn war apa. Kot paj tanhmã war ajahkre hto ka wa ma mẽ kãm ijarẽnh o ri apa. Mẽ kot war amar nẽ ra ixkôt amnhĩ xunhwỳr kaxyw. Anẽ.

20 Hãmri nhũm wa kuma nẽ kryhti re nẽ wa ma hkôt htẽm kurê kumrêx.

21 Hãmri nhũm mẽ ma nhãm axte mō nẽ ra jajê hwỳr kato. Jepetew mẽ hkra Xiakre mẽ Juãwja nhũm wa mẽ hwỳr kato. Nhũm mẽ õ pàr kãm kryhti ho mex o wa mẽ nhỹ. Hãmri nhũm mẽ hwỳr mra nhũm Jejus amnhĩ kôt ja wa kuwỳ nẽ wa kãm:

—Pa Xiakre mẽ Juãw. E wa ma ixkôt mãn wa apa. Anẽ.

22 Hãmri nhũm wa kuma nẽ hipêêxã mã amnhĩ jarẽ nẽ ma hkôt pa ho pa kurê kumrêx.

Jejus kot tanhmã amnhĩ nhĩpêx to Rukre 6.17-19

23 Tã nhũm Jejus Garirej kamã Ijaew mã Tĩrtũm kapêr jarẽnh o pa. Na pre hte Tĩrtũm kapêr o mẽ ahkre xà hã ixkre hwỳr agjê nẽ kamã mẽ kãm Tĩrtũm kapêr jarẽnh o hkrĩ nẽ mẽ kãm:

—E mẽ tee ri ate amnhĩ tomnuj ã amnhĩ pumu nẽ hpãnhã Tĩrtũm kôt mãn amnhĩ nhĩpêx o ri apa. Kot kaj mẽ ã amnhĩ nhĩpêx anẽ nhũm ja hã mẽ apumu nẽ mẽ ato hkra kurê kumrêx. Anẽ.

Hãmri nẽ akupỹm mẽ kãm mẽ à xwỳnhjê ho mex. Ahpỹnhã tanhmã mẽ à kute xwỳnhjaja nhũm akupỹm mẽ ho mex o pa. 24 Jakamã nhũm mẽ piitã pikaja kamã ri axpẽn mã harẽnh o hprõt. Nẽ pika pẽ Sir kôt mãânẽn ma ri axpẽn mã harẽnh o hprõt. Nhũm mẽ piitã harẽnh ma nẽ ma hwỳr mẽ à xwỳnhjê ho mra. Ahpỹnhã ri tanhmã mẽ à kute xwỳnhjaja. Mẽ à htỳx xwỳnhjaja. Nẽ mẽ ã kamã mẽ htyk xwỳnhjaja. Nẽ mẽ hkrã pipãnh xwỳnhjaja. Nẽ mẽkarõmnuti kot Satanasti nhỹ hã tanhmã ri mẽ ho xwỳnhjaja. Nhũm prem mẽ hamỳ nẽ ma Jejus wỳr mẽ o mra nhũm mẽ omu nẽ akupỹm mẽ ho mex pa. 25 Jakamã nhũm mẽ ohtõ nẽ ma hkôt pa. Krĩ pẽ Garirej rũm nẽ Tekap rũm nẽ Jerujarẽ rũm nẽ pika pẽ Jutej rũm. Nẽ pyhti pẽ Jotãw nhĩkjê rũm mẽ pa xwỳnhjaja. Nhũm mẽ ã ohtõ nẽ ma Jejus kôt omunh o pa anẽ.

5

Jejus kot tanhmã mẽ ahkre hto

Rukre 6.20-23

1 Nhũm Jejus amnhĩ kôt ri mẽ kot omunh o mẽ pa xwỳnhjê pumu hãmri nẽ mẽ ahkre kaxyw ma tẽ nẽ hixêt ã api nẽ himõk ã nhỹ. Hãmri nhũm mẽ ma hkôt mra nẽ pu hã hkrĩ pa. 2 Hãmri nhũm mẽ ahkre nẽ mẽ kãm:

3 E mẽ inhma. Kot kaj mẽ atõ amnhĩ kaxyw tanhmã Tĩrtũm mẽ

- wa inhmã ajamaxpêr to nê ajamaxpêr o: “Koja Tirtûm inhîhkô hã pa hkêt pa ixtýx ri tanhmã amnhî tomnuj to ho ri ixpa rãhã ho ri ixpa.” Anhÿr o ajamaxpêr. Hãmri nhûm Tirtûm ã ajamaxpêr anhÿr ã apumu nhûm ja kãm mex nê. Hãmri nhûm apê hkra hã ato mex nê atãnopxar o akôt pa ho pa ka ajamakêtkati nê axãmnhîx akînh nê ri apa.
- 4 Nê kot ka mẽ atô tanhmã amnhî tomnuj to. Hãmri nê tee ri ja hã amnhî pumu nê api-jaàm nê akaprî nê. Nê akaprî xaj amÿr o nhÿ. Amÿr rax nê. Hãmri nhûm Tirtûm ja hã apumu nhûm ja kãm mex nê. Jakamã nhûm anê akaprî hta nê ato mex nê ka ajamakêtkati nê axãmnhîx akînh nê ri apa.
- 5 Nê kot ka mẽ atô agryk tokyx anhÿr kêt nê. Nê kritpêm amnhî tã amã mẽ hkaprî ho ri apa. Hãmri nhûm Tirtûm ja hã apumu nhûm ja kãm mex nê. Hãmri nhûm ato mex nê ka ajamakêtkati nê axãmnhîx akînh nê ri apa.
- 6 Nê kot ka mẽ atô amã Tirtûm kãm hprãm xà hkôt amnhî nhîpêx o ri apa hprãm nê. Nhûm amnhî tã apumu nhûm ja kãm mex nê. Hãmri nhûm ato mex nê tanhmã akrã hto ka hkôt pix mã amnhî nhîpêx o ri apa. Jao ajamakêtkati nê axãmnhîx akînh nê ri apa.
- 7 Nê mẽ kamã mẽ axukaprî ho ri apa xwÿnhjaja na hte Tirtûm ja hã mẽ apumu nhûm ja kãm mex nê. Jakamã na hte mẽ hã mẽ apyrã nê mẽ akamã ukaprî ho pa. Jao mẽ ato mex nê ka mẽ ajamakêtkati nê axãmnhîx akînh nê ri apa.
- 8 Nê kot ka mẽ atô ã ajamaxpêr anê nê ajamaxpêr o: “Nà kot paj ãm Tirtûm kapêr kôt pix mã ri amnhî nhîpêx o ri ixpa. ãm ja pix na inhmã hprãm.” Anhÿr o ajamaxpêr. Hãmri nhûm Tirtûm amnhî tã mẽ apumu nê mẽ ato mex nê. Ka mẽ ajamakêtkati nê axãmnhîx akînh nê ri apa. Nê nhÿrmã Tirtûm wÿr api nê kuri amex rãhã apa ho apa.
- 9 Nê kot ka mẽ atô mēhō wa kot axpēn kutã amnhî xãm xwÿnhhta axpēn tã wa omu nê wa kot tanhmã axpēn nhîpêx tota nê tanhmã wa kãm akapêr to nê akupÿm tãm wa ãm. Hãmri nhûm Tirtûm ja hã apumu nhûm ja kãm mex nê. Nê apê hkra hã ajarê ka ajamakêtkati nê axãmnhîx akînh nê ri apa.
- 10 Nê koja mēhō mẽ ate Tirtûm kapêr mar xà hkôt amnhî nhîpêx o apa hã mẽ apumu nê hã tanhmã mẽ anhîpêx kati hto. Tã nom koja Tirtûm arî mẽ ato mex nê. Mē apê hkra jakamã mẽ kot tanhmã mẽ anhîpêx hto htã ka mẽ ajamakêtkati nê axãmnhîx akînh nê ri apa.
- 11-12 —Kwãr mẽ mãmri ixtã mẽ ato kapêr rÿ mẽ ato hêx rÿ tanhmã ri mẽ atomnuj to. Kwãr mẽ mãmri ã mẽ anhîpêx anê. Nom kêr ka mẽ arî amnhî kaxyw inhmã ajamaxpêr tÿx rãhã pê ajamakêtkati nê axãmnhîx akînh nê ri apa. Kwãr mẽ mãmri ixtã ã mẽ anhîpêx anê nê mẽ amex kêt ã mẽ ajarê. Amnepêm na prem ã Tirtûm nhÿ hã kapêr jarēnh xwÿnhjê nhîpêx anê. Jakamã koja mẽ urak nê ã mẽ anhîpêx anê. Hãmri nhûm Tirtûm ja hã mẽ apumu nê amnhîm mẽ amex ã mẽ ajarê. Hãmri nê nhÿrmã kaxkwa kamã wa inhō krî kamã mẽ ato mex nê. Jakamã kêr ka mẽ ã amnhî kukamã ajamaxpêr anhÿr pê mãmri akînh nê ajamakêtkati nê axãmnhîx ri apa. Kwãr mẽ mãmri ã wa ixtã mẽ anhîpêx anê. Anê.
- Jejus krajaja te kot kaxwa mẽ kanê hpôk wa urak*
Makre 9.49-50; Rukre 13.34-35
- 13 Nhûm Jejus arî mẽ kãm kapêr nê mẽ kãm:

—Ně mẽ ate ixkôt amnhĩ xunhwỳr xwỳnhjaja te mẽ ate kaxwa pyràk. Kaxwaja mẽ apkur xà ho ành mã mex. No koja mēhō tēn kamā pika hkwỳ mẽ nē ho ahkà. Hāmri tanhmā kot wem ho nē akupỳm ho mex? Nà koja akupỳm mex kêt nē. Ām mẽ kot hkapĩr pix kaxyw koja mex. Ja pyrà nē kot ka mẽ atō ate inhmā tanhmā amnhĩ nhĩpêx to ho apa hã amnhĩ jarēnh tã gaa nē rĩ amã ixkôt amnhĩ nhĩpêx prām kêt nē. Hāmri nē ra te apê kaxwa mẽ pika pihkarta pyràk. Kwa mẽ ixujarēnh ma nē kām aja-maxpēr tỳx rāhã ho ri apa.

14-16 —Ně te mẽ ate kanê hpôk pyràk. Nē te mẽ ate hixêt prêk nhĩmôk ã krĩ xām pyràk. Koja krĩja hixêt prêeti nhĩmôk ã xa nhũm mẽ piitã omu. Nē kanēja. Xà na htem kanê hpôk nē poti ho hpro? Nà na htem hpôk nē kỳx pē mẽmoj nhĩmôk ã unhwỳ nhũm mẽ piitã mẽ kām hirã nhũm mẽ hirã kamā mẽmoj pumunh mex nē. Ja pyrà nē kot kaj mẽ tãm amnhĩ nhĩpêx o ri apa nhũm mẽ piitã ja hã mẽ apumunh kôt ra kaxkwa kamā Tĩrtũm mex ã harēnh o pa. Anē.

Jejus kot tanhmā Mojes kapêr jarēnh to

Rukre 16.16-17

17 Nhũm Jejus arĩ mẽ kām kapêr nē mẽ kām:

—Ně amnepêm Mojes kot Tĩrtũm nhỹ hã Ijaewjê mã tanhmā mẽ kot amnhĩ nhĩpêx to hã mẽ kām karôja. Nē amnepêm Tĩrtũm nhỹ hã kapêr jarēnh o mẽ pa xwỳnhjê kapêrja. Ixte mẽ kapêr o ijapêx kaxyw na pa pre mẽ awỳr ixwryk kêt nē. Jakamã kwa mẽ ri ã axpēn mã ijarēnh anhỹr kêt nē. Kêt ixprĩ hã ixte mẽ amã mẽ kapêr jarēnh nhũm mẽ ate mar mex kaxyw na pa pre kaxkwa rũm mẽ awỳr wrỳ.

18 —Tĩrtũm kapêr ã kagà htũm kot mẽmoj jarēnhja. Koja ujarēnh xà hkôt mẽmoj tanhmā amnhĩ to hpar mẽ nhũm rĩ kormã kaxkwa mẽ pika wa hapêx pa nhũm kapêr ã kagàja mãânēn hapêx. Nom nhũm Tĩrtũm kapêr koja mẽmojja pyrà nē aa hapêx

kêt nē. Koja rāhã ho rāhã nē aa ihkjê ho tanhmā mēnh to hkêt nē. Ām hāmri na pa ã mẽ amã harēnh anē.

19 —Ně kot ka mẽ atō Tĩrtũm kapêr o pixire nē hirôp xa. Hāmri nē ra amnhĩ pyrà nē anhĩō mã ja hã amỹnê. Apyrà nē kot hirôp ãm kaxyw ka kām hã amỹnê. Kot kaj ã amnhĩ nhĩpêx anē hāmri nē apê Tĩrtũm kra hkêt ã amnhĩ to amnhĩrĩt. Nom kot ka kêt mẽ tãm amnhĩ nhĩpêx o ri apa. Nē amnhĩ pyrà nē tãm mẽ kot amnhĩ nhĩpêx kaxyw mẽ kām akapêr o ri apa hāmri nhũm Tĩrtũm ja hã apumu nē ato hkra nē ato mex nē.

20 —No Parijew nhō xwỳnhjaja nē Tĩrtũm kapêr tũm o mẽ ahkre ho mẽ pa xwỳnhjaja. Mẽ kot Tĩrtũm kapêr kôt amnhĩ nhĩpêx mex ã amnhĩ jarēnh tã no ãm hkôt ã amnhĩ nhĩpêx anhỹr kêt nē. Jakamã kot kaj mẽ hkôt amnhĩ nhĩpêx o ri apa hāmri nē mẽ uràk nē nhỹrmã Tĩrtũm mẽ wa inhō krĩ kamã apa hkêt nē. Anē.

Mẽ gryk o mẽ pa xwỳnhjê jarēnh

Rukre 12.58-59; mãânēn Rômãn 12.19; Epes 4.26; Wam Ximotre 2.8; Xiakre 1.19-20

21 Nhũm Jejus arĩ mẽ kām kapêr nē mẽ kām:

—Ně amnepêm na prem mẽ panhĩgêjtê mã Tĩrtũm kapêr kwỳ jarēnh o pa nē mẽ kām:

Kêr ka mẽ axpēn par kêt nē. Kot kaj mẽ mēhōx pĩ nhũm mẽ ja mỳrapê atomnuj nē. Nē ma mẽ anhō pahĩti hwỳr ato tē nhũm mỳrapê tanhmā ato rỳ hkôt apĩ. Anē.

Ām hāmri na prem mẽ kām ja jarē.

22 Tã kot paj ixprĩ hã mẽ amã tanhmā harēnh to ka mẽ inhma. Kot kaj mẽ mẽmoj tã anhĩō kamã agryk. Hāmri nhũm Tĩrtũm tee ri ja hã apumu nhũm ja kām mex kêt nē. Jakamã koja mẽ anhō pahĩti tanhmā ja hã mẽ ato japêr hã koja ja mex nē. Rỳ kot kaj mẽ tanhmā mēhō japryhto. Ho hagrô rỳ ho rop. Mỳrapê kop apu akwỳ kot apynēnh nē anhō pahĩti hwỳr ato htēm nē ĩhkram ajaxar ronhỹx ja inhmā mex nē. Rỳ kot kaj mẽ tanhmā

anhîõ mã akapêr punuj to nê kãm: “Tk. Ate ho warêhti hã. Te apê hagrô pyrâk kênã.” Anhÿr o kãm akapêr. Tã kop apu Tirtûm ra ã akapêr anhÿrja mÿrapê mẽ kot amnhî xà htÿx kamã hamak tûm xàta wÿr amênh ronhÿx ja inhmã mex nê. Ja pumaj kwa kêr ka mẽ ã axpên mã akapêr anhÿr kêt nê. Kêt mẽ axpên mã tãm akapêr pix o ri axpên kôt apa.

²³ —Nê kêr ka mẽ tanhmã ate anhîõ nhîpêx hto kamã Tirtûm mã mex o mex ã harênh kêt nê. Kêr ka mẽ kãm amnhî jarênh o akrî hãmri nê ra mêhõ kot mêmoj tã akamã gryk xwÿnh mã ajamaxpêr japêr. ²⁴ Hãmri nê akato nê ma hwÿr atêm kurê kumrêx nê wa tãm axpên mã akapêr nê tãm akupÿm axpên xãm. Hãmri nê rî kormã ma akupÿm tẽ nê Tirtûm mã amnhî jarênh jatur xàm amê nê kãm mex o mex ã harê. Kêr ka mẽ ã amnhî nhîpêx anhÿr o ri apa.

²⁵⁻²⁶ —Na htem tanhmã axpên nhîpêx to hãmri nê kot tanhmã war axpên to xwÿnhjê hõja ma õ pahi hwÿr tẽ nê kãm tanhmã kot ho xwÿnhnta jarênh kaxyw nojarêt. Hãmri nhÿm ra kamã gryk xwÿnhnta kot pahi mã harênh kaxyw nojarêt ã harênh ma nê tee ri amnhî kukamã hamaxpêr nê ma hwÿr tẽ nê wa akupÿm tãm axpên xãm. Na htem ã amnhî nhîpêx anê. Pahi kot wa harênh mar nê tanhmã axpên tã wa ho pymaj na htem ã amnhî nhîpêx anê nê tokyx tãm akupÿm axpên xunhwÿ. No koja mẽ anhÿr kêt nhÿm pahija wa harênh ma nê wa kot tanhmã axpên to xwÿnhnta õ jaxà nhÿm tee ri kãm kator prãm. Hãmri nê tanhmã amnhî to nê ra amnhî pãnhã kãm amnhîrer pa nhÿm pahitija rî kormã pôristi mã anê nhÿm kãm ure nhÿm kato. Ja pyrã nê kêr ka mẽ Tirtûm tanhmã kot mẽ anhîpêx to pymaj tokyx mẽ ate amnhî tomnuj kaga nê hkôt amnhî nhîpêx rãhã ho ri apa. Anê.

Tanhmã mẽ pahte mẽ pahprõjê nhîpêx to

Matêwre 19.3-9; Makre 9.43-47, 10.2-9; mãânên Rukre 16.18

²⁷ Nhÿm Jejus arî mẽ kãm kapêr nê mẽ kãm:

—Nê na pre finat Mojesja mẽ panhîgêjtê mã Tirtûm kapêr tûm kwÿ jarê nê mẽ kãm: “Kêr ka mẽ amnhî prõ pix tânopxar o ri apa. No mẽ kuhpa hã nhãm mêhõ ho amnhîkati ho ri apa hkêt nê.” Anê. Æm hãmri na pre mẽ kãm ja hã karõ. ²⁸ Tã kot paj ixprî hã mẽ amã tanhmã harênh to ka mẽ inhma. Kot kaj mẽ nhãm mêhõ pumu nê amã ho amnhîkati hprãm mã ajamaxpêr. Jao te ra ate ho amnhîkati pyrâk o amnhî nhîpêx. Kormã ate ho amnhîkati hkêt tã ra hkukamã ajamaxpêr jakamã te ra ate ho amnhîkati pyrâk o amnhî nhîpêx. ²⁹ ã mẽ hamaxpêr punuj anhÿr xwÿnhjaja koja mẽ nhÿrmã ma mẽ kot amnhî xà htÿx kamã hamak tûm xàta wÿr ma mra nê kamã pa rãhã ho pa. Jakamã kêr ka mẽ nhãm mêhõ pumu nê amã hkînh japêr hãmri nê te ate ano kaxàr nê mênh nê axte ate omunh kêt pyrâk o amnhî nhîpêx. Jao hkàx ã rît nê ma nhÿhÿm atêm kurê kumrêx.

³⁰ —Nê kot kaj mẽ anhîhkra ho tanhmã amnhî tomnuj to kaxyw. Hãmri nê tee ri ja hã amnhî pumu nê te ate amnhî nhîhkra krãhyr nê mênh pyrâk o amnhî nhîpêx nê tanhmã amnhî tomnuj to hkêt nê. Mẽ ïhkra ho mẽ kot tanhmã amnhî tomnuj to ho mẽ pa xwÿnhjaja koja mẽ nhÿrmã ma mẽ kot amnhî xà htÿx kamã hamak tûm xàta wÿr ma mra nê kamã pa rãhã ho pa. Anê.

Mẽ pahte axpên kaga hkêt

³¹ Nhÿm Jejus arî mẽ kãm kapêr nê mẽ kãm:

—Nê na pre finat Mojes mẽ panhîgêjtê mã Tirtûm kapêr tûm kwÿ jarê nê mẽ kãm: “Kot kaj mẽ atõ aprõ kaga kaxyw hãmri nê ate hkaga hã amnhî jarênh ã kagà nhîpêx nê kãm agõ nê rî kormã hkaga.” Anê. Æm hãmri na pre ã mẽ kãm Tirtûm kapêr tûm jarênh anê. ³² Tã kot paj ixprî hã mẽ amã tanhmã harênh to ka mẽ inhma. Kêr ka mẽ atÿx ri amã hprãm xà hkôt aprõ kaga hkêt nê. Nom

koja aprô akuhpa hã nhâm mēhō ho amnhīkati ka harēnh ma hāmri nē amā ja hã hkaga hprām nē māmri kam nē hkaga. Ja tanhmā kute hkêt. Nom koja ã amnhī nhīpêx anhÿr kêt tã ka amnhī krã hkôt hkaga. Hāmri nhūm mēhō apānhã ho hprō nē o pa. Hāmri nē ra kot apê aprō ho amnhīkati ho pa pyrāk o hipêx. Nē nija haxwÿja. Te arī kēp aprō htã akuhpa hã nhâm myja o amnhīkati o pa pyrāk o amnhī nhīpêx. Anē.

Tām mē pakapēr ã Jejus kot mē pamã karō

Xiakre 5.12

³³ Nhūm Jejus arī mē kām kapēr nē mē kām:

—Nē na pre finat Mojes mē panhīgēt nē pahpāmjê mã Tirtūm kapēr tūm jarēnh o: “Kêr ka mē Tirtūm mã mēmoj to anhÿr ã amnhī jarē hāmri nē amnhī jarēnh xà hkôt kām tanhmã amnhī nhīpêx to. Nom kêr ka mē atÿx ri kām tanhmã amnhī jarēnh to ho amnhī to axêx kêt nē. ãm akatāt kôt mē ate amnhī jarēnh to xà hkôt kām tanhmã mēmoj to.” Anē. ãm hāmri na pre mē kām ja jarē. ³⁴ Tã kot paj ixprī hã mē amã tanhmã harēnh to ka mē inhma. Kêr ka mēhō mã tanhmã amnhī jarēnh to. Tirtūm mã pix mã amnhī jarēnh kêt nhâm mēhō mã mãānēn tanhmã amnhī jarēnh to. Nē akatāt kôt kām amnhī jarē. Na ka htem mē kot mē axêx kêt kôt mē apumunh kaxyw mēmoj nhīxi jarēnh kôt amnhī jarē. Nom kêr ka mē axte ã mēmo nhīxi hã amnhī jarēnh anhÿr kêt nē. Mēmoj tã amnhī jarē nē akatāt kôt amnhī jarēnh kurê kumrêx. No mē kot axêx kêt kôt apumunh kaxyw mēmoj nhīxi hkôt amnhī jarēnh kêt nē. Tanhmãn kaxkwa nhīxi jarēnh kôt mēmoj tã amnhī jarēnh kêt nē. Kaxkwa kēp Tirtūm krī xà maati kēnã kot ka kêt mē axtem nē atÿx ri amnhī kaxyw hixi jarē. ³⁵ Rÿ mē kot axêx kêt kôt apumunh kaxyw pika nhīxi jarēnh kêt nē. Pika kēp Tirtūm par xãm xà kēnã kot ka kêt mē atÿx ri amnhī kaxyw tanhmã hixi jarēnh to. Nē krī pē Jerujarēja mãānēn kêr ka mē

ri amnhī kaxyw tanhmã hixi jarēnh to hkêt nē. Koja nhÿrmã Tirtūm mē awÿr Jerujarē hwÿr ixpê pahi maati hã inhme pa kamã mē ato amnhīptār o ixkrī. Jakamã kêr ka mē ri atÿx amnhī kaxyw tanhmã hixi jarēnh to ho ri apa hkêt nē.

³⁶ —Nē kêr ka mē kot axêx kêt kôt apumunh kaxyw mē ri tanhmã amnhī krã hkī jarēnh to hkêt nē. Kot kaj mē anē nē ãm tanhmã hã harēnh to kaprÿ. Xà kot kaj mē ajamaxpēr pix o tanhmã amnhī krã hkī hto? Nà kot kaj mē ho anhÿr kêt nē. Jakamã mē ri atÿx tanhmã harēnh to hkêt nē.

Nē mē atÿx ri mēmo nhīxi jarēnh kôt mēmoj tã amnhī jarēnh o apa hkêt nē. ³⁷ ãm akatāt kôt tãm amnhī jarēnh kurê kumrêx. Jao mē kām: “Tÿ. Nà kot paj ho anē.” Anhÿr o mēmoj tanhmã ho. Rÿ mē kām: “Nà kot paj ho anhÿr kêt nē.” Anhÿr o mēmoj tanhmã ho hkêt nē. ãm akatāt kôt tanhmã mēmoj tã amnhī jarēnh to xà hkôt ho anhÿr kurê kumrêx. Mē kot Satanasti hkôt amnhī nhīpêx o mē pa xwÿnh pixjaja na htem hêx rom mēmoj nhīxi jarēnh kôt tanhmã amnhī jarēnh to ho pa. Anē.

Mē pahte tanhmã axpēn nhīpêx to hã Jejus kot mē pamã karō

Rukre 6.27-30, 23.34; mãānēn Atre 7.60; Rômãn 12.14

³⁸ Nhūm Jejusja arī mē kām kapēr nē mē kām:

—Na prem amnepēm mē panhīgētjê mã Tirtūm kapēr tūm jarēnh o: “Koja mēhō apê ano katōk nē hkapa hã koja mē anhō pahija atã mã ho anē nē kēp no kapa. Rÿ koja mēhō apê axwa hō hkwÿr hã koja atã mã ho anē nē atã kēp wa hō hkwÿr.” Anhÿr o mē kām hã karō. ãm hāmri na prem ã ja jarēnh anē. ³⁹ Tã kot paj ixprī hã mē amã tanhmã ja jarēnh to ka mē inhma. Koja mēhō tanhmã mē anhīpêx to ka mē ãm amnhī tã omu nē tanhmã amnhī tã ho hkêt nē. Koja anhīnep akura ka ãm omu nē tanhmã amnhī tã ho hkêt nē. Te ate kām ihkjê hpēr nhūm kot ihkjê kamã hkuranh pyrāk o amnhī nhīpêx nhūm ja amã

mex nê. No amnhî tâ tanhmã ho hkêt nê.

⁴⁰ —Nê koja mēhō anhînhôhkã hã awý nhũm mē anhō pahija amã anê ka māmri kãm agō nê tanhmã hã kãm nê hkêt nê. Te ate hkôt kry pê kãm anhînhôhkã hpakã ry jagjênh xwýnhhta nhõr pyrãk o amnhî nhîpêx. Nom kêr ka mē kamã agryk kamã kãm õr kêr nê.

⁴¹ —Nê koja mēhō ate kãm jênh tur nê hkôt ho amõr ryy kaxyw amã kapêr ka māmri kãm ho anê. Nê kot amã nhÿri hã karõ xàja wýr o pøj nom kamã kãm õr kêr nê. Kãm ho hakrenh ryy nê ri kormã akupÿm kãm agō.

⁴² —Nê koja mēhō õ mēmoj kêr nê awýr tē nê mēmoj tâ awý ka māmri kãm agō. Rý nhũm awýr tē nê apê mēmoj to ïpresta kaxyw ka māmri kãm ho ïpresta. Kêr ka mē ã axpên nhîpêx anhÿr o ri apa. Anê.

Mê pamã axpên kînh ã Jejus kot mê pamã karõ

Rukre 6.32-36; mãânên Rõmãn 12.14

⁴³ Nhũm Jejus arî mē kãm kapêr nê mē kãm:

—Nê na prem amnhî krã hkôt axtem nê tanhmã mē panhîgêjtê mã mēmoj jarênh to nê mē kãm: “Kêr ka mē amã mē akrãmnhwýjê pix kînh nê tanhmã mē ho mex to. No kêr mē kot tanhmã mē ato xwýnhjaja kêr ka mē māmri mē kamã axàhkurê ho ri apa.” Anhÿr o mē kãm karõ.

⁴⁴ Nom pa kot paj mē amã Tirtũm kot tanhmã ja hã karõ hto hã harê ka mē inhma. Kêr ka mē kot tanhmã ri mē atomnuj to xwýnhjaja amnhî tâ tanhmã mē ho hkêt nê. Am tanhmã mē ho mex to pix hkukamã mãn ajamaxpêr. Nê mē ho Tirtũm wýr pix kukamã mãn ajamaxpêr. ⁴⁵ Na hte ã kaxkwa kamã Mēpahpãm Tirtũmja amnhî nhîpêx anhÿr o pa. Mê kot amnhî tomnuj xwýnhjaja nê mē kot amnhî to mex xwýnhjaja nhũm hte mē ho hpimràatã mē ho mex o axpên pyrãk. Jao hamê wa hwýr na rē nê hamê wa hwýr myyti rē nhũm hamê wa kãm hirã ho pa. Jakamã kêr ka mē urãk nê mē piitã tãm mē hipêx o

axpên pyrãk. Mê kot amnhî tomnuj xwýnhjê mē mē kot amnhî to mex xwýnhjê mē ho apimràatã mē ho mex o axpên pyrãk.

⁴⁶ —Nê xat kaj mē amã mē piitã mē ho mex prãm kêr nê am mē kot mē ato mex xwýnh pixjaja ka mē amã mē ho mex prãm nhũm Tirtũm ja hã mē apumu nhũm ja kãm mex nê nà? Nà koja kãm mex kêr nê. Koja mēhō ato mex kêr tâ kêr ka am amnhî rom ho mex nê. Nhũm Tirtũm ja hã apumu nê amnhîm amex ã ajarê. Mê kot amnhî tomnuj xwýnhjaja na htem am mē kot mē ho mex xwýnh pixjaja nhũm mē amnhî xwar mē ho mex. No tãm mē kot amnhî nhîpêx xwýnhjaja na htem mē piitã mē ho mex o axpên pyrãk. Mê kot tãm amnhî nhîpêx xwýnhjaja nê mē kot amnhî tomnuj xwýnhjaja nhũm mē ho hpimràatã mē ho mex o axpên pyrãk.

⁴⁷ —Nê na hte mē hkwýjaja am amnhî kwýjê pix mã kapêr mex o pa. Nom mē piitã tãm mē hipêx kêr nê. Nom kêr ka mē ã amnhî nhîpêx anhÿr kêr nê. Kêr ka mē kurom mē piitã tãm mē hipêx o axpên pyrãk. Mê akwýjê mē mē akwý hkêt xwýnhjaja ka mē hipêx o axpên pyrãk. Nê tãm mē kãm akapêr o axpên pyrãk. ⁴⁸ Kaxkwa kamã Mēpahpãm Tirtũm pyrã nê mē kot amnhî tomnuj xwýnhjê mē mē kot amnhî to mex xwýnhjaja mē ho apimràatã mē ho mex o axpên pyrãk. Na hte ã Tirtũmja mē panhîpêx anê. Anê.

6

Mê pahte mê kêp amrakati xwýnhjê ho mex rãhã hã mê pamã karõ

¹⁻² Nhũm Jejus arî mē kãm kapêr nê mē kãm:

—Nê na htem mē piitã hkwýjê noo mã tanhmã mē kêp amrakati xwýnhjê ho mex to. Nom kãm mē hkaprî kamã tanhmã mē ho mex to hkêt nê. Am hkwýjaja kot ja hã mē omunh nê mē mex ã mē harênh pix kaxyw na htem krî hkôt ri mē kêp amrakati xwýnh piitã mē ho mex o pa. Nê mē pikuprõnh xà hã ixkre kamã kuhê nê

tanhmã mẽ ho mex to. Mẽ hkwýjaja kot ja hã mẽ omunh nẽ amnhĩm mẽ mex ã mẽ ho jarkrar kaxyw. Jakamã koja nhýrmã Tirtũmja axte ja hã mẽ kãm mẽmoj mex nhõr kêt nẽ. Ra jar mẽ hkwýjaja kot ja hã mẽ omunh nẽ amnhĩm mẽ mex ã mẽ harẽnh kẽnã. Jakamã kwa kêt ka mẽ ho mẽ urak kêt nẽ. Nẽ tanhmã mẽhõ ho mex to kaxyw nẽ akwýjê no kuhpa hã mẽ hkàx ã tanhmã mẽ ho mex to. No kot kaj mẽ noo mã tanhmã mẽ ho mex to. Mẽ kot hã apumunh nẽ ato jarkrar kaxyw tanhmã mẽ ho mex to nhũm kaxkwa kamã Mẽpahpãmjã ja hã apumu nẽ mẽ hã tanhmã ato mex to hkêt nẽ. Koja ãm hã apumu.

³ –Ja pymaj kêt ka mẽ mẽ kêp amrakati xwýnhjê mã mẽmoj nhõr kaxyw hãmri nẽ mẽ piitã mẽ no hkàx ã tanhmã mẽ ho mex to. Hãmri nẽ nhãm ri ja hã mẽ kãm amnhĩ to jarkrar kêt nẽ. Aprõ mã rý akrajê mã rý akrãmnhwý mã hã amnhĩ jarẽnh kêt nẽ. ⁴ Kot kaj mẽ no hkàx ã tanhmã ho mex to no nhũm Tirtũm tapxipix apumunh o nhý. Hãmri nẽ ja hã ato mex rax nẽ ka amex nẽ apa. Anẽ.

Tanhmã mẽ pahte Tirtũm mã amnhĩ jarẽnh to hã mẽ pamã karõ Rukre 11.1-13, 18.9-14

⁵ Nhũm Jesus arĩ mẽ kãm kapêr nẽ mẽ kãm:

–Nẽ mããnẽn ja. Na htem hakwa pix o amnhĩ mex ã amnhĩ jarẽnh xwýnhjaja Tirtũm mã amnhĩ jarẽnh kaxyw nẽ mẽ kot Tirtũm kapêr o mẽ ahkre xà hã ixkreja wýr agjê. Nẽ mẽ piitã mẽ noo mã kãm tanhmã amnhĩ jarẽnh to. Rý gáp kuhê nẽ mẽ piitã mẽ noo mã kãm amnhĩ jarê. Tã mẽmo kaxyw na htem mẽ noo mã Tirtũm mã amnhĩ jarê? Nã ãm mẽ kot ja hã mẽ omunh nẽ mẽ mex ã mẽ ho jarkrar pix kaxyw. Nẽ mẽ harẽnh o: “E mũjti pumu. Na hte apkati mẽ ã Tirtũm mã amnhĩ jarẽnh anẽ. Kot amnhĩ to mex xwýnh mãn.” Anhýr ã harẽnh kaxyw. Tã ra mẽ piitã mẽ kot ja hã omunh nẽ amnhĩm mẽ ho jarkrar jakamã koja Tirtũm axte ja hã tanhmã ho mex to hkêt nẽ. Ra pika ja kamã mẽ kot

mẽ omunh nẽ mẽ mex ã mẽ harẽnh kẽnã. ⁶ No mẽ kajaja. Kêt ka mẽ urak nẽ ã amnhĩ nhĩpêx anhýr kêt nẽ. ãm Tirtũm mã amnhĩ jarẽnh kaxyw nẽ akwýjê no hkàx ã hitom wýr agjê nẽ hitom kãm ahte kãm amnhĩ jarê. Hãmri nhũm Tirtũm tapxipix ja hã mẽ apumu. Mẽ amã amnhĩ to amnhĩrít kêt tã mẽ apumu. Hãmri nẽ mẽ ato mex nẽ.

⁷ –Nẽ mẽ kêp Tirtũm kra hkêt xwýnhjaja na htem sãnti mã amnhĩ jarẽnh kaxyw nẽ xatã kãm amnhĩ jarê. Nẽ xatã kàx pêê kãm amnhĩ jarê. Nẽ hamaxpêr o: “Kot paj xatã sãnti mã amnhĩ jarê nhũm inhmãr japêr.” Anhýr o hamaxpêr jakamã xatã kãm amnhĩ jarê. No ãm htýx ã hamaxpêr anhýr kaprý. ⁸ Jakamã kwa kêt ka mẽ ho mẽ urak kêt nẽ. Tirtũm ra kot mẽ ate mẽmoj tã hwýr xata ra ja kukamã kot omunh mex kẽnã kot ka kêt mẽ xatã hã hwýr o akuhê.

⁹ –Nẽ kêt ka mẽ kãm amnhĩ jarẽnh kaxyw nẽ amnhĩ krã hkôt tanhmã kãm amnhĩ jarẽnh to rý kãm amnhĩ jarẽnh o:

Pa Mẽinhĩpêêxà maati pê kaxkwa kamã ri apa xwýnh? Amex o amex Tirtũm.

¹⁰ Apê mẽ ijamãr mex xwýnh maati na ka.

Na hte kaxkwa kamã mẽ kot ri amã tanhmã amnhĩ nhĩpêx to ho mẽ pa xwýnhjaja akôt pix mã amnhĩ nhĩpêx o ri pa. Tã ijaxwýja inhmã mẽ urak nẽ akôt pix mã amnhĩ nhĩpêx o ri ixpa hprãm.

¹¹ Nẽ kwa jarãhã mẽ inhmã mẽmoj gõ pa mẽ akukwak ri ho apku.

¹² Na pa hte tõhã amnhĩ tomnuj nẽ Tirtũm. Nom mẽ kot tanhmã ixtomnuj to xwýnhjaja na pa hte ãm mẽ omu nẽ amnhĩ tã tanhmã mẽ ho hkêt nẽ. Nẽ ja ho ijamakêtkati nẽ axte kãm ijamaxpêr kêt nẽ. ã ixte amnhĩ nhĩpêx anhýr jakamã kwa ja hã ixpumu nẽ ixpyrà nẽ ixte tanhmã amnhĩ tomnuj to hã ixpumu nẽ hã tanhmã ixto hkêt nẽ. ãm ho ajamakêtkati

kurê kumrêx nê axte kãm aja-maxpêr kêt nê.

¹³ Nê kot paj nhÿrmã tanhmã amnhÿ tomnuj to kaxyw ka ja hã ix-pumu nê ixte ã amnhÿ nhÿpêx anhÿrja nê ixto htÿx nê pa tanhmã amnhÿ tomnuj to hkêt nê. ãm mẽmoj punuj pê ixpytâr rãhã ho apa Tÿrtũm. Tã ãm ja pix na hapêx. Anê.

—E kêr ka mẽ ã Tÿrtũm mã amnhÿ jarênh anê. Anê.

¹⁴ —Nê koja mẽhõ tanhmã anhÿpêx to htã ka ho ajamakêtkati nê axte kãm ajamaxpêr pix o ri apa hkêt nê. Hã koja kaxkwa kamã Mẽpahpãm maatija ja hã apumu nê apyrã nê tanhmã ate amnhÿ tomnuj to ho hamakêtkati nê axte kãm hamaxpêr kêt nê. ¹⁵ Nom kot kaj mẽ ã amnhÿ nhÿpêx anhÿr kêt nê. Nê tanhmã mẽ kot mẽ atota ã anohtÿx rãhã ho apa hãmri nhũm Mẽpahpãm maatija mẽ apyrã nê mẽ ate tanhmã amnhÿ tomnuj to ho hamakêtkati hkêt nê. ãm hã nohtÿx rãhã ho pa ho pa. Anê.

Tanhmã mẽ pahte Tÿrtũm mã mex o mex ã harênh to

Rukre 18.11-12

¹⁶ Nhũm Jejus arÿ mẽ kãm kapêr nê mẽ kãm:

—Nê mẽ kot amnhÿ to jarkrar xwÿnhjaja na htem Tÿrtũm mã amnhÿ jarênh kaxyw hãmri nê tõhã ho apkur kêt rãhã kãm amnhÿ jarênh jakamã hkuk kaprÿ nê hkwyjê hkôt pa. Tã mo kaxyw na htem ã mẽ noo mã amnhÿ nhÿpêx anê? ãm mẽ apkur kêt rãhã Tÿrtũm mã amnhÿ jarênh ã mẽ omunh pix kaxyw. Tã ra jar pika ja kamã mẽ kot ja hã mẽ omunh jakamã koja Tÿrtũm nhÿrmã ja hã tanhmã mẽ ho mex to hkêt nê. Jakamã kwa kêr ka mẽ ho mẽ urak kêt nê. ¹⁷ Kêr ka mẽ tõhã Tÿrtũm mã amnhÿ jarênh ryy kaxyw axàpkur kaga hãmri nê amnhÿ krã kahõ nê amnhÿ jaxwÿr mux nê akuk kÿnh nê ri akwÿjê hkôt apa.

¹⁸ Hãmri nê nhÿri mẽ hkàx ã ahte kãm amnhÿ jarê nê kãm mex o mex ã harê. Kot kaj mẽ ã mẽ hkàx ã amnhÿ nhÿpêx anê nhũm mẽ akwÿjaja mẽ axàpkur

kaga hã mẽ apumunh kêt nê. Nhũm Tÿrtũm pix ja hã mẽ apumu. Hãmri nê nhÿrmã ja hã mẽ ato mex nê. Anê.

Kaxkwa kamã mẽmoj mex

Rukre 12.33-34; mãânên Sikũn Ximotre 4.8; Wam Pêtre 1.4; Eprêw 10.34

¹⁹ Nhũm Jejus arÿ mẽ kãm kapêr nê mẽ kãm:

—Nê mãânên ja. Kêr ka mẽ jar pika ja kamã akukrêx rũnh o apa hkêt nê. Kêt jar mẽ hikukrêx koja kritpêm mex kêt nê. Kot kaj mẽ ho akuprõ nhũm amnhõre apê homnu rÿ paratre apê homnu. Nê kàx o mẽ akukrêx nhũm haxwÿja apê omnu rÿ nhũm mẽhõ apê hkwy ho ahkÿ. ²⁰ Jakamã kêr ka mẽ akukrêx rũnh o apa hkêt nê. Kaxkwa kamã Tÿrtũm kot mẽ akutêp mẽ akukrêx o pikuprõnhja na kêt mex kumrêx o jar mẽ hikukrêx jakrenh par. Jakamã kêr ka mẽ amã nhÿrmã kaxkwa kamã akukrêx mex prãm xaj tãm mẽ piitã tãm mẽ hipêx nê mẽ ho mex o ri apa. Nê mẽ kamã axukapri nê. Nê Tÿrtũm kôt ri amnhÿ nhÿpêx mex nê. Hãmri nhũm ã mẽ ate amnhÿ nhÿpêx anhÿr ã mẽ apumu nê mẽ akutêp mẽ amã mẽmoj mex kwÿ jaxwÿ. Kaxkwa kamã mo amnhõre nê mo paratre? Nê kamã mo mẽ ahkÿnh xwÿnh? ãm kamã amrakati kumrêx. ²¹ Kot kaj mẽ jar akukrêx rũnh hãmri nê ãm tanhmã apê homnu hto pix kukamã ajamaxpêr. Nom kot kaj mẽ apê Tÿrtũm kra hã kaxkwa kamã akukrêx mã ajamaxpêr rãhã ho ra akÿnh nê ri apa.

²² —Nê kot kaj mẽ ixkapêr ma nê ixkôt amnhÿ nhÿpêx hãmri nê tãm amnhÿ nhÿpêx. Nê tãm axpên hipêx. Jao te hirã kamã arÿt mex pyrãk o amnhÿ nhÿpêx. ²³ No koja mẽhõ ixkapêr ma nê ãm kuma nê ixkwÿm ri amnhÿ nhÿpêx o pa. Hãmri nê te kamàt kô kamã mẽhõ rÿt mex kêt kot amnhÿ nhÿpêx pyrãk o amnhÿ nhÿpêx. E kêr ka mẽ ã amnhÿ nhÿpêx anhÿr pymaj ixkapêr ma nê kãm ajamaxpêr tÿx rãhã ho ri apa.

²⁴ —Nê kot kaj apyxi nê anhõ patrãw hamêxkrut hãmri nê arÿgro pyxi hã hamê wa kãm axàpênh o amÿkry hkêt

nê. Kot kaj anê nê hō gryk ã ihō kaga. Ja pyrã nê kot kaj mē jar akàxpore nê akukrêx pix mã ajamxpēr nê amã hapê ho akwýjê pê ho anhōxý ho ri apa. Nê gryk ã Tirtüm kãm hprãm xà hkôt tanhmã ho mē ho mex to hkêt nê. Jakamã kwa kêr ka mē Tirtüm pix mã mãn ajamxpēr rãhã nê. Jao akàxpore nê akukrêx pix kukamã ajamxpēr o ri apa hkêt nê. Anê.

Mē pahte tee ri amnhĩ kukamã pajamxpēr kêt ã mē pamã karō

Rukre 12.22-31; mãänën Piripos 4.6; Wam Pêtre 5.7

²⁵ Nhũm Jejus arĩ mē kãm kapēr nê mē kãm:

—E. Kwa kêr ka mē tee ri mēmoj tã amnhĩ kukamã ajamxpēr kêt nê. Tanhmãn axàpkur xà rý axê ka mē tee ri hkukamã ajamxpēr kêt nê. Mēmoj piitã hkukamã tee ri ajamxpēr o ri apa hkêt nê. Tirtümja àhpumunh tỳx o àhpumunh tỳx xwýnh na. Na pre àhpumunh tỳx o mē anhĩpêx ka mē kukwak ri atĩr nê apa. Jakamã xà kot mē amã mē anhō ho pa kaxyw àhpumunh kêt? Nà ja kaxyw àhpumunh tỳx kênã. Kêp mē anhĩpêx xwýnh jakamã mãänën kêp mē amã mē anhō xwýnh. Nê kêp mē amã mē axê nhõr xwýnh.

²⁶ —Mãn ka htem kuwênhre pumu. Na hte tee ri amnhĩ xàpkur xà hkukamã hamxpēr o hkaprĩ nê ri pa hkêt nê. Mē anhĩpêxà maati tãm na hte kãm õ ho pa. Tã kãm mē ajapê htỳx o kot kuwênhre jakrenh jakamã koja uràk nê mē amã mē anhō rãhã ho pa.

²⁷ —Nê xà kot kaj mē kritpêm atĩr prãm xàj ja pix kukamã ajamxpēr rãhã nê ra ajamxpēr kôt kritpêm atĩr nê apa? Nà kot kaj mē anhỹr kêt nê.

²⁸ —Mãn ka htem akunĩ kamã pixôrã pumu. Na hte tee ri tanhmã kute hkukamã hamxpēr o ra hkaprĩ nê harir kêt nê. ²⁹ Tã nom muxre nê harir ka mē omu. Te ho amnepêm pahшти Sarumãw xê mex pyrãk nom mex o hakre. ³⁰ Pixôrãreja koja mēmo arĩgro hã htĩr nê mux nê harir tã mēmo arĩgro hã ra grã pa nê hapêx.

Kêp pixôrã pix nê hapêx tokyx anhỹr tã nhũm Tirtüm ho mex nê nhũm mux nê harir. No mē kajaja na hte mē ato mex o pixôrã ho mexta jakre. Jakamã kwa mēmo kaxyw kot ka kêt mē tee ri amnhĩ xê hkukamã ajamxpēr o ri akaprĩ nê apa? Kot kaj mē ã ajamxpēr anhỹr jao kormã amnhĩ kaxyw Tirtüm mã ajamxpēr tỳx kêt nê.

³¹ —Kwa mē tee ri axàpkur xà hkukamã ajamxpēr o ri akaprĩ hkêt nê. Nê tee ri amnhĩ kukamã tanhmã ajamxpēr to ho ri akaprĩ hkêt nê.

³² Mē kot Tirtüm kôt amnhĩ xunhwýr kêt xwýnhjaja na htem ã ri hamxpēr anhỹr o pa. Tã nom kêr ka mē ho mē uràk kêt nê. Tirtüm ra kot mē panhō mēmoj kêt kôt mē pahpumunh mex kênã. ³³ Jakamã kêr ka mē hkôt ri tanhmã amnhĩ nhĩpêx to rãhã ho ri apa. Nê amã ja pix tãnopxar prãm. Hãmri nhũm Tirtüm amnhĩ tã mē apumu nê apkati mē mē amã mēmoj nhõr o pa.

³⁴ —Jakamã kwa kêr ka mē tee ri amnhĩ kukamã ajamxpēr o akaprĩ nê apa hkêt nê. Tirtüm kot apkati mē mē pajamãr mex jakamã kêr ka mē jarãhã amnhĩ kukamã apkati mē ajamxpēr kêt nê. Kê apkati mãn. Æm jarãhã pix mã mãn mē ate tanhmã amnhĩ nhĩpêx tota kukamã ajamxpēr. Tirtüm kot mē pahpumunh mex o pa rãhã kênã. Anê.

7

Mē pahte axpên to pakapēr punuj kêt ã kot mē pamã karō

Rukre 6.37-38, 6.41-42; mãänën Rômãn 2.1-3; Wam Korĩt 4.5; Xiakre 4.11-12

¹ Nhũm Jejus arĩ mē kãm kapēr nê mē kãm:

—Nê kêr ka mē atỳx ri amnhĩ krã hkôt tanhmã akwýjê hō kot amnhĩ tomnuj to hã harênh kêt nê. Kot kaj mē ã harênh anê nhũm Tirtüm ja hã mē apumu nê mē kajaja ã mē ajarênh anê. ² Na hte tanhmã mē pahte axpên nhĩpêx to hã mē pahpumunh kôt tanhmã mē panhĩpêx

to. ³⁻⁵ Jakamã kwa kêr ka mẽ mẽhõ kot tanhmã amnhĩ tomnuj to hã omu hãmri nê hã kãm kapêr tokyx anhÿr kêt nê. Akumrêx ate tanhmã amnhĩ tomnuj to hã amnhĩ pumu nê hk-aga hãmri nê rĩ kormã ate mẽmoj tã omunh xwÿnhhta wÿr tẽ nê hã tanhmã kãm akapêr to. Kêr ka mẽ ã amnhĩ nhĩpêx anhÿr o ri apa.

—Nê xà koja mẽ akwÿjê hõ tanhmã amnhĩ tomnuj to grire. Ka ate amnhĩ tomnuj tÿx o hakrenh tã ã kot amnhĩ nhĩpêx anhÿr ã omu nê hã kãm akir nhũm amã ja mex nê nà? Nà koja amã ja mex kêt nê. Kot ka akumrêx ate tanhmã amnhĩ tomnuj tota kaga hãmri nê rĩ kormã anhĩõ tanhmã kot amnhĩ tomnuj to grireta nê kãm akapêr nhũm ja amã mex nê.

⁶—Nê xà na htem mẽ apkur xà mex jamÿ nê rop mã kurê? Nà na htem anhÿr kêt nê. Ja pyrã nê kêr ka mẽ kot Tĩrtũm kaga xwÿnhjê mã kapêr jarênh o ri apa hkêt nê. Anê.

Mẽ pahte mẽmoj to presija hã amnhĩ to Tĩrtũm wÿr

Makre 11.24; Rukre 11.5-13; Juãw 14.13-14; mããnên Wam Tesarõn 5.17; Xiakre 1.5-8, 4.1-3

⁷⁻¹¹ Nhũm Jejus arĩ mẽ kãm kapêr nê mẽ kãm:

—Nê xà kot we akraja kãm prãm nê tep ã awÿ ka axtem nê kagã hõ py nê kãm agõ? Rÿ nhũm krãhyre gre hã awÿ ka axtem nê makre hõ py nê kãm agõ? Nà na ka htem ã mẽ hipêx anhÿr kêt. Na ka htem kot mẽmoj tã mẽ awÿr xà hkõt kãm mẽmoj gõ. Mẽ ate amnhĩ tomnuj tã na ka htem akrajê ho mex o ri apa. Tã kaxkwa kamã Tĩrtũmja na hte mẽ ato mex o mẽ ate mẽ akrajê ho mex jakrenh. Kãm mẽ ajapê htÿx kõt na hte mẽ amã mẽmoj mex nhõr o pa. Jakamã kot ka mẽ mẽmoj tã awÿ nhũm mẽ ama nê mẽ ate mẽmoj tã hwÿr xàta kõt amã kugõ. ãm xatã mẽ ate hã axàhwÿr o ri apaja nhũm mẽ amã hprãm xwÿnhhta gõ. ãm mẽmoj tã hwÿr rãhã ho ri apa nhũm mẽ ama nê mẽ amã mẽmoj tanhmã hipêx to. Te ho mẽhõ kãm tep xành nê teprênhxà hpyr nê xatã gõx kãm rênh o ãm pyrã

nê xatã mẽmoj tã awÿ. Hãmri nhũm mẽ ama nê mẽ amã hprãm xwÿnhhta gõ. Te tep kanhêr xwÿnhhta jatã kot tep kanhêr pyrãk. Jao mẽ amã mẽmoj prãm xwÿnhhta gõ.

¹²—Nê mẽ piitã mẽ kot tãm mẽ anhĩpêxja na mẽ amã hprãm. Tã kêr ka mẽ amnhĩ pyrã nê tãm mẽ piitã mẽ hipêx o ri apa. Mẽ kot tãm mẽ anhĩpêx kêt tã kêr ka mẽ axãmnhĩx mẽ kêp anhõxÿ hkêt nê tãm mẽ hipêx. Kot kaj mẽ ã axpên nhĩpêx anê nê finat Mojes mẽ Tĩrtũm nhÿ hã mẽ kapêr o mẽ pa xwÿnhjê xujarênh xà hkõt axpên nhĩpêx mex o ri apa. Anê.

Pry pijakrut jarênh

Rukre 13.24; mããnên Piripos 3.19-21

¹³⁻¹⁴ Nhũm Jejus arĩ mẽ kãm kapêr nê mẽ kãm:

—Tĩrtũm kapêrja mẽ kêp hihtÿx jakamã na htem ohtõ nê hkõt amnhĩ xunhwÿr kêt nê. Na htem ãm hpÿnhre nê hkõt amnhĩ xunhwÿ nê hkõt amnhĩ nhĩpêx. Jakamã te Tĩrtũm nhõ krĩ hwÿr pry grireta ã hpÿnhre nê pa pyrãk. No nhũm Satanasti hkõt mẽ kot amnhĩ xunhwÿr xwÿnhjaja na htem Satanasti kõt pix mã tanhmã amnhĩ tomnuj to hprãm. Mẽ kãm mex jakamã nhũm mẽ amnhĩ nhĩpêx o te pry krepak rax ã axpên kõt mẽ ohtõ nê pa pyrãk o amnhĩ nhĩpêx. Axtem kuwy hwÿr pry krepakja nõi tã nhũm mẽ htÿx kuwyja wÿr amnhĩ to pa. Jakamã Tĩrtũm kapêrja mẽ apê hihtÿx tã kêr ka mẽ mãmrĩ hkõt amnhĩ xunhwÿ. Jao Tĩrtũm nhõ krĩ hwÿr pry grireta ã mãn apa. Anê.

Mẽ kot amnhĩ to hêx xwÿnhjê jarênh

Rukre 6.43-44; mããnên Xiakre 3.9-12; Wam Juãw 3.10, 4.4-6

¹⁵ Nhũm Jejus arĩ mẽ kãm kapêr nê mẽ kãm:

—E kwa mẽ o kora. Mẽ akwÿjjaja kot kêp Tĩrtũm nhÿ hã kapêr jarênh xwÿnh ã amnhĩ jarênh tã na htem ja hã amnhĩ to hêx. Nhũm htem kãm mẽ kapêr mar prãm nê. Te mẽ kapêr mex pyrãk tã no nhũm htem ãm mẽ kãm amnhĩ to hêx pix o ri mẽ

hkôt pa. Mě kot mar nê axtem nê Tirtũm kapêr kwým tanhmã amnhĩ nhĩpêx to kaxyw nhũm htem hêx rom tanhmã mẽ kãm kapêr to. Jakamã kwa mẽ o kora. Mě axkãm ajamak rom nê amnhĩ nê mẽ omunh mex nê. ¹⁶ Kêr ka aprĩ hã mẽ piitã mẽ kot tanhmã amnhĩ nhĩpêx to hã mẽ omu nê rĩ kormã tanhmã mẽ harênh to. Mě hamaxpêr punuj xwýnhjaja kêp Tirtũm nhỹ hã kapêr jarênh xwýnh kêt. No koja mẽ tãm hamaxpêr nê tãm amnhĩ nhĩpêx ka ja hã mẽ omu nê mẽ kêp Tirtũm nhỹ hã kapêr jarênh xwýnh ã mẽ omunh kurê kumrêx. Na htem hprĩ hã mẽ kot tanhmã amnhĩ nhĩpêx to ho pa hã mẽ omu nê rĩ kormã tanhmã mẽ harênh to. ¹⁷ Na htem hamaxpêr punuj hãmri nê hkôt tanhmã amnhĩ tomnuj to. Nom koja mẽhõ hamaxpêr mex nê hãmri nê hkôt tãm amnhĩ nhĩpêx mex o pa. ¹⁸ Na htem tanhmã hamaxpêr to xà hkôt tanhmã amnhĩ nhĩpêx to ho pa.

¹⁹ –Nê koja mẽhõ õ pĩ hpàr ô hkêt japêr nhũm tee ri omu hãmri nê krãhta nê kuwym kumê. Ja pyrã nê koja mẽhõ tanhmã amnhĩ tomnuj to ho pa nhũm Tirtũm tee ri ja hã omu hãmri nê ã kot amnhĩ nhĩpêx anhỹr o paja mýrapê kuwy hwýr kumê. ²⁰ Jakamã kot kaj mẽ tanhmã mẽ kot amnhĩ nhĩpêx to ho pa hã akwýjê pumu nê ra aprĩ hã tanhmã mẽ kute hã mẽ omunh kurê kumrêx. Mě kêp Tirtũm nhỹ hã kapêr xwýnh ã mẽ omu rý mẽ kêp hkwým ri kapêr xwýnh ã mẽ omu. Anê.

Mě kot Tirtũm nhõ krĩ hwýr gjêx mã xwýnhjê jarênh

Rukre 13.25-27; mãânên Sikũn Korĩt 13.5; Wam Juãw 2.3-6

²¹⁻²³ Nhũm Jejus arĩ mẽ kãm kapêr nê mẽ kãm:

–Nê Inhĩpêxã Tirtũm mẽ wa inhõ krĩja wýr koja mẽ piitã gjêx kêt nê. ãm mẽ kot kapêr kôt amnhĩ nhĩpêx o mẽ pa xwýnh pixjaja koja mẽ nhỹrmã ma hwýr agjê. Na hte mẽ hkwýjaja ixto “Pahihti” anhỹr ã ijarênh tã no ãm ixkôt ri amnhĩ nhĩpêx kêt nê. Jakamã koja mẽ nhỹrmã wa inhõ krĩ hwýr

àpir kêt nê. Kot paj nhỹrmã mẽ piitã mẽ htĩr ri tanhmã mẽ kot amnhĩ nhĩpêx to ho pa hã mẽ omunh xà hkôt tanhmã mẽ harênh to. Mě mex ã mẽ hkwýjê jarê nê mẽ kot amnhĩ tomnuj ã mẽ hkwýjê jarê. Hãmri nhũm mẽ hkwý kot ixkôt amnhĩ nhĩpêx o pa hkêt xwýnhjaja kuwyta wýr ma pa pymaj tee ri amnhĩ kukamã hamaxpêr hãmri nê tanhmã inhmã amnhĩ jarênh to nê inhmã: “Kwa Jejus. Xà ate ixpumunh kêt? Na pa pre amnepêem ixtĩr ri pikap ixpare ri anhỹ hã aa mẽ kot mẽmoj pumunh kêt kwý ho anhỹr rax nê. Nê ixkwýjê nê mẽkarõmnuti jano nê mẽ kãm akapêr jarênh o ri ixpa. Kwa xà ate ja hã ixpumunh kêt?” Anhỹr o inhmã amnhĩ jarê.

–Nom mẽ htĩr ri ã mẽ kot amnhĩ nhĩpêx anhỹr o pa htã ixkapêr kôt amnhĩ nhĩpêx kêt jakamã kot paj mẽ kuma nê ãm mẽ kuma nê amnhĩ nê mẽ hano nê mẽ kãm: “Tk kwa mẽ ma mra. Mě apê ixkwý hkêt. Mě ate ixkôt amnhĩ nhĩpêx o apare hã. ãm mẽ ate amnhĩ tomnuj xwýnh na ka mẽ. E mẽ ma kuwy hwýr amrar kurê kumrêx.” Anhỹr o kot paj amnhĩ nê mẽ hano. Hãmri nhũm mẽ kot ixkôt amnhĩ nhĩpêx o mẽ pa xwýnh pixjaja ma Tirtũm mẽ wa inhõ krĩ hwýr gjêx pa. Anê.

Ixkre pijakrut jarênh

Rukre 6.46-49; mãânên Xiakre 1.22-25; Wam Juãw 2.3-6

²⁴ Nhũm Jejus arĩ mẽ kãm kapêr nê mẽ kãm:

–E kot paj mẽ amã awjarê ka mẽ ixujarênh ma. Nà mẽ kot ixkapêr mar nê hkôt amnhĩ nhĩpêx o mẽ pa xwýnhjaja te mẽ kot ixujarênh ja pyrãk. Mě kot amnhĩ nhĩpêx o te mẽhõ kot amnhĩ kukamã hamaxpêr mex nê aptýx kãm amnhĩm òrkwý nhĩpêxja pyrãk. ²⁵ Koja mẽhõ aptýx kãm amnhĩm hipêx nhũm mẽmo arĩgro hã na wryk rax nê gô htãm rax nê hanhi no nhũm arĩ ãm týx nê xa. Tã kot kaj mẽ ixkôt amnhĩ nhĩpêx o ri apa hã kot kaj mẽ te ixkre ja pyrãk. Jao amex nê ajamakêtkati nê ri apa.

Te ho gô htâm kot ixkre janhir nhũm arĩ ãm tỳxta pyræk.

26-27 —No mẽ kot ixkapêr mar nê ãm mar xwỳnhjaja. Te mẽ kot mēhō kot amnhĩ kukamã hamaxpêr mex kêt nê htỳx mōr nê gô mỳri gyw rerek kãm amnhĩm òrkwỹ nhĩpêx pyræk. Kojã mẽmo arĩgro hã òrkwỹ hã kòk xàpêr tỳx nê na wrỳk rax nê. Nê gô htâm nê hanhi nê kêp grành pa. Jakamã kojã mẽhō ixkòt amnhĩ nhĩpêx kêt nê te kot ã kot amnhĩ nhĩpêx anhỹr xwỳnhhta pyræk. Jakamã kwa mẽ ixkapêr mar tỳx nê hkòt amnhĩ nhĩpêx rãhã ho ri apa. Te mẽhō aptỳx kãm òrkwỹ xãm xwỳnhhta pyræk. Anê.

28 Nhũm pre Jejusja ã mẽ kãm ujarênh ry anê nhũm mẽ amnhĩ jaêr pê kot tanhmã mẽ ahkre htoja mar o hkrĩ. 29 Hãmri nê axpên mã harênh o:

—Hêxta waa nê. ãm hãmri na ã mẽ pamã kapêr anê. àhpumunh tỳx kòt na hte ãm hãmri tanhmã mẽ pamã ujarênh to. Pêr ãm Tĩrtũm kapêr tũm o mẽ ahkre xwỳnhjê kurom àhpumunh tỳx kumrêx. Anê.

8

Kà nhy hkro xàpêr o pa xwỳnh jarênh

Makre 1.40-45; Rukre 5.12-16

1 Tã nhũm Jejus mẽ kãm kapêr pa hãmri nê hixêt prêêta rũm akupỹn wrỳ nê ma tẽ nhũm mẽ ohtô nê ma hkòt mra. 2 Hãmri nhũm mẽhō my hkà nhy hkro xàpêr o pa xwỳnhja omu nê hwỳr tẽ. Hãmri nê kutã hkõnkrã ho tẽm nê hipô nê nhỹ nê amnhĩ to kuwỳ nê kãm:

—Pa Pahihti. E ot pa awỳr amnhĩ to tẽ. Akupỹm ate mẽ ixto mex kaxyw axàhpumunh tỳx jakamã kot ka amã akupỹm ixto mex prãm nê mãmrĩ ixto mex. Anê.

3 Hãmri nhũm Jejus kuma nê hkà punuti hã ìhkra xi. Amnhĩ kamã kahak kêt nê hã ìhkra xi nê kãm:

—Nà kot paj ato mex. E akupỹm akà mex. Anê.

Hãmri nhũm hkà akupỹm mex kurê kumrêx. 4 Hãmri nhũm Jejus kãm:

—E kêr ka amnhĩ tã mẽ kãm tanhmã ijarênh to hkêt rãhã ma patre hwỳr tẽ kê akupỹm akà mex ã apumu. Hãmri ka hpãnhã amnepêr finat Mojes kot mẽ ate akupỹm amex ã Tĩrtũm mã tanhmã amnhĩ nhĩpêx to hã karõta ka kãm ho anê. Kê mẽ piitã akupỹm akà mex ã apumu. Anê.

Pôristi krãhtũm mã àpênh xwỳnh jarênh

Rukre 7.1-10

5 Tã nhũm Jejus ma krĩ pê Kapanaũ hwỳr mō. Hãmri nê hwỳr pōj nhũm Rôm nhō xwỳnh pê pôristi krãhtũmja omu nê hwỳr tẽ. Kêp Ijaew kêt tã hwỳr tẽ. Na pre kãm àpênh xwỳnh kêp à htỳx nê nō nhũm omu nê tee ri hkukamã hamaxpêr. Hãmri nê Jejus ra ò krĩ hwỳr hpòx ã omu nê hwỳr tẽ nê kãm harê nê kãm:

6 —Pa Jejus? E ot pa awỳr tẽ. Inhmã àpênh xwỳnhja na ixpê à htỳx nê. Ra ì kamã htyk pa nê nō. O mũj inhòrkwỹ kamã nō. Anê.

7 Nhũm Jejus kuma nê kãm:

—Tỳ? Tôe. Nà pa ma akòt tẽ nê akupỹm amã ho mex. Anê.

8-9 Hãmri nhũm tee ri kuma nê kãm:

—Kwa akĩnhã ixpê Ijaew kêt jakamã ixte amnhĩ kuk ã ixpijaam. ãm ja rũm mãn akapêr pix o akupỹm inhmã ho mex nà? Ixpê mẽ hkrãhtũm na pa hte inhō pôristi mã mẽmoj tã karõ nhũm mẽ inhmar xà hkòt inhmã mẽmoj tanhmã ho. Na pa hte mẽ kãm: “E mẽ ma mra nê ã amnhĩ nhĩpêx anê.” Anê nhũm htem inhma nê ma mrar kurê kumrêx. Rỳ pa mẽ kãm: “E mẽ amnê ixwỳr mra nê ã amnhĩ nhĩpêx anê.” Anê nhũm mẽ inhma nê ixwỳr mra. No kêt ixrom axàhpumunh tỳx kòt na ka hte mẽ àja mã akapêr nhũm ama nê mẽ kêp hapòx nê ma mrar kurê kumrêx. Jakamã kwa ãm ja rũm akapêr pix o akupỹm inhmã ho mex nà? Anê.

10 Hãmri nhũm Jejus amnhĩ jaêr pê kot kãm ã kapêr anhỹrta ma nê hkĩnh nê. Hãmri nê hã hkòt ri mẽ mōr xwỳnhjê mã kãm:

—Kwa xà na ka mẽmyja kapêr ma? Mẽ pahkĩnh ã kêp Ijaew kêt tã mẽ arom amnhĩ kaxyw inhmã

hamaxpêr tỳx nê. Aa mẽ atõ uràk nê ã amnhĩ kaxyw inhmã ajamaxpêr tỳx anhÿr kêt tâ nhũm mẽ arom kãm àpênh xwỳnh kaxyw ã inhmã hamaxpêr tỳx anê. ¹¹ Nà koja nhÿrmã mẽ hkwỳjaja kêp Ijaew kêt tâ ohtõ nê pika piitã kurũm ma Tĩrtũm mẽ wa inhõ krĩ hwỳr api nê hwỳr agjê. Nê wa ixkuri wa inhõ krĩ kamã Ijaew pàr krax pê Apraãw nê Ijak nê Jako mẽ pimràatã pa ho pa. Mẽ kêp Ijaew kêt tâ mẽ ìhkõ hã apkur mex o hkrĩ nhũm Tĩrtũm mẽ ho mex rax o pa. ¹² No pêr mẽ apê Ijaew kwỳjaja kot kaj mẽ hkôt hwỳr agjêx kêt nê. Tĩrtũm kãm hwỳr mẽ agjêx prãm tâ ka mẽ axtem nê hkaga. Jakamã kot kaj mẽ ma kamàt kô xihtỳx rax wỳr ajapêx nê mẽ kêp awry rax nê mẽ kot amnhĩ xà htỳx kamã hamak tũm xàta kamã apa ho apa. Hãmri nê tee ri mẽ ixwỳr agjêx prãm kaprỳ nê akaprĩ xà mur nê amnhĩ kamã agryk tỳx nê. No ãm tee ri amnhĩ kamã agryk kaprỳ. Mẽ ate Tĩrtũm kapêr kaga nê hkôt amnhĩ xunhwỳr kêt jakamã kot kaj mẽ nhÿrmã ã amnhĩ nhĩpêx anê. Anê.

¹³ Nhũm pre ã Jesusja mẽ kãm kapêr anê. Hãmri nê pòristi krãhtũmta mã kãm:

—E mãmrĩ ma akupỳm tẽ nê amã àpênh xwỳnhhta pumu. Ra ate kaxyw inhmã ajamaxpêr tỳx jakamã na pa ra akupỳm amã ho mex. E akupỳm tẽ nê omu.

Anhÿr o kãm kapêr rôm nhũm ra akupỳm kãm mex kurê kumrêx.

Jejus kot ahpỳnhã mẽ à xwỳnhjê ho mex

Makre 1.29-31; Rukre 4.38-41

¹⁴ Tã nhũm Jejus ma Simãw Pêtre nhõrkwỳ hwỳr tẽ nê hwỳr axà. Nhũm Simãw Pêtre xupãnhgêx ra à nê hkà kagro htỳx nê nõ. ¹⁵ Hãmri nhũm Jejus hwỳr axà nê omu nê ìhkra hã kupy nhũm hkà hakry nê akupỳm hihtỳx kurê kumrêx. Jakamã kãnhmã nhÿ nê mẽ kãm mẽõ hã àpênh o ri mra.

¹⁶ Tã nhũm ra awjakry. Ra kamàtre ho mẽ nhũm mẽ piitã Jejus wỳr mẽ à xwỳnhjê ho mra. Nê mẽkarõmnuti kot mẽ hwỳr gjêx xwỳnhjaja nhũm mẽ

hwỳr mẽ o mra. Hãmri nhũm mẽ omu nê akupỳm mẽ piitã mẽ ho mex. Mẽ à xwỳnhjê ho mex nê mẽ hkwỳjê nê mẽkarõmnuti jano. ãm kapêr pix o mẽ nê mẽ hano nhũm mẽ kêp hapôj nê ma hapêx. ¹⁷ Na pre ra Tĩrtũm nhÿ hã kapêr xwỳnh finat Ijaisja ã amnhĩ nhĩpêx anhÿrja kukamã amnepêm mẽ kãm harênh o:

Tĩrtũm kot mẽ pahwỳr mẽnh mã xwỳnhja koja nhÿrmã wrỳ nê mẽ panê mẽ paxà piitã rênh pa nê akupỳm mẽ pahto mex pa. Anê.

Na pre ã finat Ijaisja Jejus kukamã harênh anê. Tã nhũm wrỳ nê kot harênh xà hkôt ã amnhĩ nhĩpêx anhÿr o pa.

Wa kãm Jejus kôt amnhĩ xãm prãm xwỳnh wa harênh

Rukre 9.57-62

¹⁸ Tã nhũm Jejus amnhĩ pu hã rĩt nê tee ri hwỳr mẽ mrrar xwỳnhjê pumu hãmri nê hkôt mẽ pa ho mẽ pa xwỳnhjê mã kãm:

—E ma pu mẽ pàr mã agjê nê ma xarmã mẽ. Anê.

¹⁹ Hãmri nhũm mẽ nojarêt rôm nhũm Tĩrtũm kapêr tũm o mẽ ahkre xwỳnhjê hõ Jejus wỳr tẽ nê kãm:

—Pa mẽ ijahkre xwỳnh? E pa ma akôt ri ixpa ho ixpa nà. Anê.

²⁰ Hãmri nhũm kuma nê kãm:

—Ko ka mã. Kam nê rĩ ma ixkôt ri apa. Nom kêr ka inhmar kumrêx. Xore na hte pika hkre kamã hikwỳ. Nê kuwênhre pĩ nhĩmõk ã hikwỳ. No pa ixpê Tĩrtũm kot mẽ awỳr inhmênh xwỳnh tâ mry hkĩnhã inhõrkwỳ hkêt. Na pa hte amarĩ nhãm krĩ hwỳr ixpa nê nhãm hõ hwỳr ixpa. Tã xà kot ka ixpyrà nê ã amnhĩ nhĩpêx anhÿr o ri apa nà? Anê.

²¹ Hãmri nhũm pãnhã hõja hwỳr tẽ. Ra mẽ kot hkôt amnhĩ xunhwỳr xwỳnhjê hõja hwỳr tẽ nê kãm:

—Pa Pahihti. E pa amã amnhĩ jarê ka inhma. Kot paj ma akôt ixpa ho ixpa no ãm kormã. Koja nhÿrmã inhĩpêxà tanhmã amnhĩ to nê ty mãn. Pa haxà hãmri nê rĩ kormã ma akôt ixpa ho ixpa. Anê.

22 Hāmri nhūm kuma nē kām:
 –Kwa nà ri ã ajamaxpēr anhÿr kêt nē. Ma ixkôt apa ho apa kurê kumrêx. Kê mēmoj inhnê ano kupyr rÿ apê àmnàr kêt nē. Kwār mē htÿr tūm nē mē pa hkêt mã xwÿnhjaja mǎn axwakre kamã amã anhÿpêêxà jamār o pa nē haxà. Anē.

*Jejus kot kôk o pinhkrênh jarênh
 Makre 4.35-41; Rukre 8.22-25*

23 Tã nhūm mē ra xarmã nojarêt nhūm Jejus mē hkôt mē pa ho mē pa xwÿnhjaja pàr wÿr agjê hāmri nē himô raxja ã ma xarmã mō. 24 Hāmri nhūm Jejus ra ôtxwa nē ra gōr nē nō. Puh nhūm naja hkoko ho mō nē kôk xàpêr tÿx kumrêx. Nhūm gô kànhmã harÿ nē axpên tak tÿx nē. Xatã axpên tak nē pàr kre kamã axkapÿ nhūm ra àr o mō. Hāmri nhūm mē tee ri omu nē kām ma htÿx kumrêx. Nē tee ri amnhÿ nhÿpêx. No nhūm Jejusja htÿx gōr nē nō. 25 Hāmri nhūm mē hwÿr hprôt nē kumra nē kām:

–Kwa Pahÿhti. Kot puj mē jarãhã pahtyk pa. Kwa tokyx kànhmã nhÿ nē ri tanhmã amnhÿ nhÿpêx to wehe. Anē.

26 Hāmri nhūm hkrākato nē kànhmã nhÿ nē kôk mã kapêr nē kām:

–E kwa hāmri anhÿkrê. Anē.

Puh nhūm hpinhkrênh pa nhūm gôja tām nōr kurê kumrêx. Hāmri nhūm Jejusja hkôt mē pa ho mē pa xwÿnhjê hwÿr apkjê nē mē kām:

–Hêxta waa nē. Kwa pēr ãm kormã te mē ate amnhÿ kaxyw Tÿrtūm mē wa inhmã ajamaxpēr tÿx kêt pyrāk. Hã na ka mē amã ma xàj tee ri amnhÿ kukamã ajamaxpēr. Anē.

27 Hāmri nhūm mē amnhÿ jaêr pē ã kot amnhÿ nhÿpêx anhÿrja ã omu nē tee ri hamaxpēr nē axpên pumunh pē omunh o kuhê. Hāmri nē axpên mã:

–Kokÿÿ. Pēr Jejus kêp mē panhÿo hkêt. Mē pahtō kot pu we te kot amnhÿ nhÿpêx pyrã nē kôk mã pakapêr nhūm hpinhkrênh kurê kumrêx? Nà Jejusja mē pakurom àhpumunh tÿx o àhpumunh tÿx. Anē.

*Jejus kot wa nê mēkarōmnuti janor
 Makre 5.1-20; Rukre 8.26-39*

28 Tã nhūm mē ra himô rax pē Garirejja ã rê nē pika pē Geras wÿr pōj nē kamã mō. Hāmri nhūm ra mēhō myja wa hamêxkrut nē mē kutã tē. Ra mēkarōmnuti kot hamē wa hwÿr gjêx xwÿnhja wa. Mēkarōmnuti xohtō kot tanhmã wa ho jakamã nhūm wa oprê htÿx nē hihtÿx rax nē wa pa. Jakamã nhūm mē piitã kām wa uma nē amnhÿ nē mē htykjê jagjênh xà hã kên kre kaêx kām wa kumê nhūm wa kamã pa ho pa. Jakamã nhūm wa Jejus kutã tē nē amnhÿ wÿr omu hāmri nē amnhÿ nē tanhmã kām kapêr to. Nom mēkarōmnuti nhÿ hã àmra kamã kām kapêr nē kām:

29 –Pa Tÿrtūm Kra Jejus? Mo kaxyw na ka mē ixwÿr tē? Kwa tanhmã mē ixto hkêt nē. Ate tanhmã mē ixtomnu hto hã arÿgrota kormã katoore hã. Anē.

30 Nhūm ra krÿ nhō xwÿnhjê hkrit hagrô ohtō nē ri mē hpum pa.

31 Nhūm mēkarōmnuti mē omu hāmri nē amnhÿ to Jejus wÿr nē kām:

–Kwa kot ka jahti wa nê mē ijapôx japêr nē mē kot amnhÿ xà htÿx kamã hamak tūm xàta wÿr mē ixrênh kêt nē. Hagrô hkwÿ mÿj wÿr mǎn mē ixrê pa mē hpãnhã hwÿr mǎn hagjê nà? Anē.

32 Hāmri nhūm mē kuma nē mē kām:

–Tôe mē tām mē hwÿr mǎn mra. Anē.

Hāmri nhūm mē kuma nē myta wa kêp hapôj nē hagrô hwÿr mrar kurê kumrêx nē hpãnhã kām gjêx pa. Hāmri nhūm hagrôta mēkarōmnuti py-maj amÿra nē ma hprôt nē himô hã hixêt prêk ã axpum rôrôk nē gôx kām mrô nē pikaprãr pa. 33 Hāmri nhūm hagrô jamār o ri mē pa xwÿnhjaja tee ri omu hāmri nē ma akupÿm krÿm hprôt nē mē kām awjarê. Nē myta wa akupÿm tām hkrã hã harênh o hprôt. 34 Hāmri nhūm krÿ nhō xwÿnhjaja tee ri mē hkrit jarênh ma nē ma piitã Jejus wÿr mra nē hkaxpa. Hāmri nē amnhÿ nē kām:

–E kwa mē ma amrar kurê kumrêx. Anē.

Hāmri nhūm mē kuma nē awjanã nē ma akupÿm pan rê.

9

ĩ kamã htyk xwÿnh jarēnh

Makre 2.1-12; Rukre 5.17-26; Juãw 10.37-38

¹ Nhũm Jejus mẽ hkôt mẽ pa ho mẽ pa xwÿnhjaja awjanã nẽ ma akupÿm pãr wÿr mra nẽ gjêx pa nẽ akupÿm xarmã rê nẽ akupÿm Jejus nhõ krĩ hwÿr mõi. ² Hãmri nẽ hwÿr pøj nhũm krĩ nhõ xwÿnh kwÿyjaja mẽ omu nẽ ĩ kamã htyk xwÿnhja mÿ nẽ Jejus wÿr o tẽ. Nõr xà kamã nõr rãhã nhũm mẽ hã hije nẽ kumÿ nẽ hwÿr o tẽ. Hãmri nhũm amnhĩ tã mẽ omu. Ra mẽ kot hkrãmnhwÿta kaxyw kãm hamaxpēr tÿx ã mẽ omu nẽ ĩ kamã htyk xwÿnhhta mã kapēr nẽ kãm:

—Pa? Kwa tee ri amnhĩ kukamã ajamaxpēr kêt nẽ. Na pa ra apê tanhmã ate amnhĩ tomnuj to ho ijapêx pa. Kot paj axte kãm ijamaxpēr kêt nẽ. Anẽ.

³ Hãmri nhũm Tĩrtũm kapēr tũm o mẽ ahkre xwÿnhjaja tee ri ã kot kãm kapēr anhÿrja ã kuma nẽ axpēn mã:

—Tk. Kwa mēhõ myti mÿj kēp Tĩrtũm kêt tã te ri kot amnhĩ nhĩpêx pyrãk ã amnhĩ nhĩpêx. Tĩrtũm pix na kot mẽ nẽ mẽ kot amnhĩ tomnuj o hapêx xwÿnh. Anẽ.

⁴ Hãmri nhũm Jejus amnhĩ tã mẽ kuma nẽ mẽ kãm:

—Kwa mẽ ã ajamaxpēr anhÿr kêt nẽ. ⁵ Ixte mẽ nẽ mẽ kot amnhĩ tomnuj o ijapêx par ã amnhĩ jarēnh tã mẽ ate ja kôt ixpumunh kêt jakamã na ka mẽ ja kaxyw ixkôt ajamaxpēr kêt nẽ. Nom kot paj mẽ anoo mã akupÿm ĩ kamã htyk xwÿnhhta o mex ka mẽ apiitã hã ixpumu hãmri nẽ ixkôt ajamaxpēr kurê kumrêx. Ixpê Tĩrtũm kot mẽ awÿr inhmēnh xwÿnhhta na pa. Ixte mẽ anê mẽ ate amnhĩ tomnuj rēnh kaxyw na pre mẽ awÿr inhmē pa mẽ awÿr wrÿ. ⁶ Tã mẽ ate ja hã ixpumunh kaxyw kot paj mẽ anoo mã ja ho mex.

Anhÿr o mẽ kãm amnhĩ jarē hãmri nẽ ĩ kamã htyk xwÿnhhta mã kãm:

—E kãnhmã xa nẽ anõr xàta py nẽ ma akupÿm anhõrkwÿ hwÿr tẽ. Anẽ.

⁷ Puh nhũm kãnhmã ãm kurê kumrêx nẽ nõr xà py nẽ mẽ noo mã kato nẽ ma akupÿm õrkwÿ hwÿr tẽ.

⁸ Hãmri nhũm mẽ piitã no hapôx rũnh nẽ omunh o kuhê nẽ kamã no pyma htÿx nẽ. Nẽ tee ri omu nẽ axpēn mã:

—Kokÿÿ. Kwa aa mẽ pahte ã mēhõ kot amnhĩ nhĩpêx anhÿr ã omunh kêt tã jarãhã ja pumu.

Anhÿr o Jejus jarē hãmri nẽ ÿ hã Tĩrtũm mã mex o mex ã harē.

Jejus kot amnhĩ kôt Matêwre hwÿr Makre 2.13-17; Rukre 5.27-32

⁹ Tã nhũm Jejus mẽ kēp kato nẽ hkôt mẽ pa xwÿnhjê mẽ nhũm mẽ ma mõi. Hãmri nẽ pa ixpê Matêwre ixpumu. Ixte Rõm kãm mẽ ho amnhĩptãr xwÿnh mã krĩ nhõ xwÿnhjê pē kãxpore hkwÿ jamÿnh xwÿnh na pa pre. Nom mẽ kot ho tewēn kryre htã ixte amnhĩm hkwÿ ho ixãrĩk prãm xàj na pa pre hte mẽ kãm ho rũnh nẽ harē. Jakamã nhũm mẽ piitã kãm ixkĩnh kêt nẽ. Tã pa pre mẽ kēp kãxpore jamÿnh xà hã ixkre kamã mẽ kēp hamÿnh o nhÿ nhũm Jejus mẽ hkwÿyjaja ijãnh mra nẽ ixpumu nẽ amnhĩ kôt ixwÿ nẽ inhmã:

—Pa? E axapēnhhta kaga nẽ hpãnhã amnē mẽ ixkôt mãn tẽ nẽ ixkôt mãn ri apa ho apa. Anẽ.

Hãmri pa kuma nẽ ixapēnh kaga nẽ ma hkôt tẽ. Nẽ hpãnhã hkôt ixpa ho ixpa.

¹⁰ Hãmri nẽ mẽmo arĩgro hã amnhĩ nhõrkwÿ hwÿr Jejus nẽ hkôt mẽ pa ho pa xwÿnhjaja mẽ ixkrãmnhwÿ hkwÿjê hwÿ. Nhũm mẽ piitã mra nẽ inhõrkwÿ hwÿr agjê nẽ ixkutã apkur o hkrĩ. Nẽ ixpyrà nẽ Rõm nhõ pahĩ mã mẽ kēp kãxpore hkwÿ jamÿnh xwÿnh kwÿ haxwÿja ixwÿr mra nẽ mẽ ixkutã apkur o hkrĩ. ¹¹ Hãmri nhũm Parijew nhõ xwÿnhjaja mra nẽ inhõrkwÿ kapem mẽ ixapkur ã mẽ ixpumu. Nẽ tee ri mẽ ixkaêx ã Jejus pumu hãmri nẽ hkôt mẽ pa ho mẽ pa xwÿnhjê hwÿr agjê nẽ mẽ ixtã mẽ kãm akir nẽ mẽ kãm:

—Kwa mẽ kot jajê kutã apkur kêt tã mẽ akrãhtũmja axtem nẽ mẽ kutã apkur o nhÿ. Kwa nã mẽ kot amnhĩ

tomnuj xwÿnh kênã. Jejus kot amnhî to mex ronhÿx mẽ kutã apkur kêt nê. Anê.

¹² Hãmri nhũm Jejus amnhî tã ã mẽ kapêr anhÿrja ma nê mẽ kãm:

—Tk. Nà ixte tãm mẽ unhwÿr kaxyw na pa mẽ kutã ixàpkur o nhÿ. Xà na hte tôtôja mẽ mex xwÿnhjê hwÿr mra nê mẽ hkane? Nà ãm mẽ à xwÿnhjê pix wÿr na hte mra nê tanhmã mẽ hkane hto. Ra mẽ ate ja pumunh mex. Tã ja pyrã nê na pa pre mẽ kot amnhî to mex xwÿnhjê hwÿr ixwÿrk kêt nê. Mẽ kot amnhî tomnuj xwÿnhjê pix wÿr na pa pre wrÿ. Ixte tãm mẽ unhwÿr kaxyw mẽ hwÿr wrÿ nê ã jajê kutã ixàpkur o inhÿr anê.

¹³ Ga mẽ ma mra nê Tirtũm kapêr ã kagã htũm kot ja jarênhja kamã harê nê ama. Harênh kot:

Na ka htem inhmã tanhmã amnhî jarênh to kaxyw hãmri nê inhmã mẽmoj gô nê tanhmã ixto mex to. Nom kêr ka mẽ ãm ja pix ho anhÿr kêt nê. Mẽ mãânên mẽ piitã tanhmã mẽ ho mex to ho ri apa. Anê.

—Ã Tirtũm kapêr ã kagã htũm kot ja jarênh kot anhÿr. Tã ja pyrã nê na pa pre mẽ kot amnhî tomnuj xwÿnhjê hwÿr wrÿ nê mẽ kamã ixukapri ho ixpa. Mẽ kot amnhî tomnuj kaga nê hpãnhã tãm amnhî nhîpêx kaxyw na pa pre ã mẽ hwÿr ixwÿrk anê. Tã ka mẽ ri atÿx amnhî krã hkôt ã ixto akapêr anê. Anê.

*Mẽ kot mẽmoj tã Jejus kujêr
Makre 2.18-20; Rukre 5.33-35*

¹⁴ Tã nhũm Juãw Paxis kôt mẽ pa xwÿnhjaja Jejus wÿr mra nê mẽmoj tã hkukja nê kãm:

—Pa? E ot pa mẽ awÿr mra. Kwa mẽ inhmã mẽmoj jarê. Na pa htem tõiã Parijew nhõ xwÿnhjê pyrã nê ixàpkur kêt kãm Tirtũm mã amnhî jarê. Tã nom akôt mẽ pa ho mẽ pa xwÿnhjaja na htem àmnhix apkur o pa kamã kãm amnhî jarênh o pa. Kwa mo na htem mẽ ixpyrã nê tõiã apkur kêt kamã kãm amnhî jarênh kêt nê? Anê.

¹⁵ Hãmri nhũm mẽ kuma nê mẽ kãm:

—Nà mo kaxyw kot kêt mẽ apkur kêt rãhã kãm amnhî jarê? Mẽ hkaprire hã. Mẽ kot ixkôt pa ho pa hã amnhî pumunh jakamã na htem hkĩnh nê ixkôt pa. Kormã ixte mẽ kamã ixpa kênã kot kêt mẽ apkur kêt rãhã Tirtũm mã tanhmã amnhî jarênh to. Xà na htem hkrãmnhwÿ hã hkĩnh kaxyw hã akuprõ nê hkapri nê apkur kêt o kamãt nê mÿr o hkrĩ? Nà na htem anhÿr kêt nê. Na htem hã akuprõ nê hkĩnh nê hã apkur rũnh nê. Ja pyrã nê na hte ixkôt mẽ pa ho mẽ pa xwÿnhjaja ixkôt kormã àmnhix hkĩnh nê apkati mẽ apkur o pa. Nom koja mẽ kãm ixkurê xwÿnhjaja nhÿrmã tanhmã ixto hãmri nhũm mẽ hkapri htÿx nê rĩ kormã tõiã apkur kêt rãhã Tirtũm mã amnhî jarê. Anê.

*Mẽ pahte Jejus kôt amnhî nhîpêx
Makre 2.21-22; Rukre 5.36-39*

¹⁶ Nhũm Jejus mẽ piitã mẽ kãm kapêr nê mẽ kãm:

—Mẽ kot amnhî tomnuj xwÿnhjaja ra mẽ kot amnhî nhîpêx tũm o amnhî pyrãk jakamã na htem tanhmã mẽ kot amnhî nhîpêx nyw tota kaga. ¹⁷ Tã ixte amnhî nhîpêx nywja te kot mẽ ate amnhî nhîpêx tũm pyrãk kêt jakamã na ka htem ixkapêr ma nê ãm ama. Kwa mẽ inhma nê mẽ ate amnhî nhîpêx tũmja gryk ã ixkaga hkêt nê. Anê.

*Mẽ hkra htyk nê mõiã ni kamrô wa
harênh*

Makre 5.21-43; Rukre 8.40-56

¹⁸ Nhũm pre ã Jejus mẽ kãm kapêr anhÿr o xa. Rôm nhũm mẽõ pahitija tẽ nê mar o xa. Hãmri nê hamaxpêr o:

—Kokÿÿ. Jejusja ãm hãmri kêp pahi maati kumrêx. Hã na ri ã kapêr mex anê. E pa hwÿr tẽ nê ixkrare ho kuwÿ. Anê.

Hãmri nê hwÿr tẽ nê kutã hkõnkrã ho nhÿ nê kãm:

—Pa akupÿm mẽ ixto mex xwÿnh? E ot pa awÿr tẽ. Kwa ma ixkôt tẽ nê inhmã ixkra nire pumu nê tanhmã inhmã ho kê akupÿm inhmã htĩr. Na ham ixpê ty pa kaxyw amã ijamaxpêr nê man awÿr tẽ. Anê.

19 Hāmri nhūm kuma nē kām:

—Tôe. Nà kot paj ma akôt tē. Anē.

Hāmri nē ma hkôt tē. Mē ixpê hkôt ixpa ho ixpa xwýnhjê mē pa mē ma hkôt mō. 20-21 Nhūm mēhō ni kamrô rāhā ho pa xwýnhja ma mē ixkôt tē. Na pre hte hkamrô hkryre rāhā ho pa hā amgrà pē 12 nē tee ri kām amnhī mex prām o pa. Jakamā Jejus jarēnh ma nē amnhī kaxyw kām hamaxpēr kurê kumrēx nē hamaxpēr o:

—Ma pa kop ma hwýr tē nē kēp ē nhîrê pix kupēnh tã akupým inhmex japêr. Anē.

Hāmri nē ma mē ohtôjê kaêx kôt hwýr tē. Nē katut kôt tē nē kēp ē nhîrê kupê. 22 Hāmri nhūm Jejus ho hakēx nē amnhī tã omu nē kām:

—Pa? Kwa tee ri amnhī kukamā ajamaxpēr kêt nē. Ate amnhī kaxyw inhmā ajamaxpēr tỳx jakamā na ka ra akupým amex. E māmri aja-makêtkati nē ri apa. Anē.

Hāmri nhūm akupým mex nē hkĩnh tỳx nē ma akupým tē. 23 Hāmri pa mē ma htyk xwýnh nhîpêêxà hkôt mra nē ôrkwý hwýr agjê nē mē pikuprōnh xwýnhjê pumu. Nhūm mē ra mē hā hturax nē. Nē omũj ri kaprī xà pifti kakôr o hkrī nē omũj ri mur. Kàx pē mur nē amnhī tak o hkrī. 24 Hāmri nhūm Jejus mē hwýr axà nē mē omu. Nē ra kot my hkrata htyk ã omunh tã kuri mē mýr o mē hkrī xwýnhjê mã kapêr nē mē kām ãm ôt nē nôr ã harê nē mē kām:

—Pa? Kwa mon ka mē ri akaprī nē amýr o akrī? E mē ma mra. Na wa hkrata wa kēp htyk kêt nē. Na ãm gôr nē nō. Anē.

Hāmri nhūm mē kot ra htyk ã omunh mex jakamā kuma nē ãm kuma. Nhūm mē hkwýja axtem nē ri axpēn mã hā hpêr o pikēnh o hkrī. 25 Hāmri nhūm kapôt mã mē hano nhūm mē hapôj nē kapôt ã kuhê. Hāmri nhūm Jejusja htyk xwýnhhta wýr axà nē hpa hā kupy nē kànhmã ãm nhūm akupým htír nē kànhmã ãm kurê kumrēx. 26 Hāmri nhūm mē piitã akupým htír kām omu nē ma ri krī piitã hkôt ri mē kām harēnh o hprôt.

Wa nohkre xwýnh wa harēnh

Matêwre 20.29-34

27 Tã nhūm Jejus kato nē ma tē. Pa mē hkôt ixpa ho ixpa xwýnhjaja ma hkôt mō. Hāmri nhūm wa myja wa hamêxkrut. Hamē wa nohkre xwýnh wa Jejus jarēnh ma nē hā ajêt nē hkôt rôrôk o mō. Nē xatã amnhī to hwýr o hkôt rôrôk o mō nē kām:

—Pa Jejus? E Tirtũm kot mē ixkaxyw axãm jakamā kwa wa ixpumu nē wa ixkamã axukaprī kêt wehe. Anē.

28 Hāmri nhūm wa kuma nē wa hkukamã nhýri ixkrem axà nhūm wa hkôt axà nē xa nhūm wa omu nē wa kām:

—Pa? E xàn ka wa ra amnhī kaxyw inhmã ajamaxpēr tỳx nē nà? Anē.

Hāmri nhūm wa kām:

—Tỳ. Wa ixte amnhī kaxyw amã ijamaxpēr tỳx kênã. Anē.

29 Hāmri nhūm wa kuma nē hamē wa no hā ãhkra xi nē wa kām:

—Tôe. Nà war ate tanhmã amnhī kaxyw inhmã ajamaxpēr to xà hkôt kot paj war anhîpêx. Anē.

30 Hāmri nhūm wa akupým rīt mex kurê kumrēx. Hāmri nē akupým kato nē ma htēm kaxyw nhūm wa kām:

—E kêt ka wa nhãm mē kām ixte war ato mex ã ijarēnh kêt nē. ãm kwarī ho kwarī.

31 Anhýr tã no nhūm wa kuma nē ãm kuma nē wa ma tē nē krī pu hā mē piitã mē kām ri war amnhī tã harēnh o mra.

Kapêr kêt xwýnh jarēnh

32 Tã nhūm Jejus ma axte nhýhým mē ixto mō. Hāmri nhūm mēhō my mēkarōmnuti kot hwýr àr nē tanhmã ho nhūm kapêr kêt nē pa xwýnhja nhūm mē Jejus wýr o tē. 33 Hāmri nhūm omu nē nē mēkarōmnuti jano nē kām:

—E kēp akato nē ma tē. Anē.

Hāmri nhūm kuma nē kurũm kato nhūm akupým kapêr mex kurê kumrēx. Hāmri nhūm mē kot hā omunh xwýnhjaja tee ri kot mēkarōmnuti janor ã omu nē kamã no puma nē. Nē axpēn mã:

—Kokÿÿ. Aa mẽ pahte ã mēhō kot anhÿr pumunh kêt kumrēx tã na pu mẽ jarãhã ja pumu. Anē.

³⁴ Nom nhũm mẽ hkwÿ pē Parijew nhō xwÿnhjaja axtem nē hã mẽ kãm kapēr o:

—Tk. Kot amnhĩ krã hkôt mẽ hanor kêt kēnã. Mēkarōmnuti nhō pahi nhÿ hã kot mẽ nē mẽ hanor kēnã. Anē.

Jejus kēp mẽ pakamã ukapri xwÿnh Makre 6.34; Rukre 10.2-3; Juãw 4.35

³⁵ Tã nhũm Jejusja krĩ ho ohtō nē hkôt ri mẽ kãm Tirtũm kapēr jarēnh o pa. Pa mẽ hkôt ixpa. Na pre hte nhÿri krĩ hwÿr pōj nē mẽ kot Tirtũm kapēr o mẽ ahkre xà hã ixkre hwÿr mra nē hwÿr agjē nē mẽ pikuprōnh xwÿnhjē jahkre. Nē mẽ kãm:

—E mẽ inhma. Tirtũm kãm mẽ api-itã mẽ ato hkra hprãm. Jakamã kwa mẽ ate amnhĩ tomnuj kaga hprãm xàj hkôt amnhĩ xunhwÿ nē kapēr kôt amnhĩ nhĩpēx. Jao amnhĩ nhĩpēx nyw o amnhĩ nhĩpēx o ri apa.

Anhÿr o mẽ kãm kapēr. Hãmri nē ahpÿnhã ri tanhmã mẽ à kute xwÿnhjē ho mex. Nhũm mẽ ohtō nē hkôt mar o pa. ³⁶ Hãmri nhũm mẽ omu nē kãm mẽ hkapri nē. Na prem tee ri amnhĩ kukamã hamaxpēr o pa jao ra hkapri nē. Nhũm Jejus ja hã mẽ omu nē hamaxpēr o:

—Hêxta waa nē. Na mẽ mex kêt nē pa. Te mẽ kēp ôwēhti jamãr xwÿnh kêt kot amnhĩ nhĩpēx pyrãk o htÿx ri pa. Mēhō koja kãm mẽ hkapri nē tanhmã mẽ ho mex to ho pa? Anē.

Hãmri nē mẽ kamã ukapri nē. ³⁷ Hãmri nē mẽ hã mẽ ixpē hkôt ixpa ho ixpa xwÿnhjē mã kapēr nē mẽ inhmã:

—Nà na mẽ kormã ohtō rax nē Tirtũm kapēr mar kêt nē. No ãm kormã mẽ ate mẽ kãm kapēr jarēnh o apa kaxyw mẽ agrēre. Te pur rax kãm ra harōj kamrēk par nē ãm tã no ãm kaxyw hikēnh xwÿnhjaja grēre pyrãk.

³⁸ Jakamã kwa mẽ ho Tirtũm wÿ kē axte mẽ kaxyw mẽ akwÿjē rē kē mẽ apyrã nē ma mẽ hkôt ri mẽ kãm kapēr jarēnh o pa. Anē.

10

Jejus kot mẽ ho 12 nē mẽ rēnh Makre 3.13-19; Rukre 6.12-16

¹⁻⁴ Tã nhũm Jejusja hkôt mẽ ixpa ho mẽ ixpa xwÿnhjē ho 12 nē mẽ ixrē. Mē ixte ma krĩ piitã hwÿr inhmrar nē ÿ hã mẽ ahkre nē tanhmã mẽ à kute xwÿnhjē ho mex o ixpa kaxyw. Nē ÿ hã mẽ nē mẽkarōmnuti janor o ixpa kaxyw nhũm mẽ ixrē. Na pre mẽ ixto 12 nē mẽ ixrē. ã mẽ inhĩxi kot anhÿr.

Pêtre kumrēx na pre kuta. Hixi hō pē Simãw.

Nē hkôt htō Andreja ta.

Nē hkôt Jepetew kra Xiakreja ta.

Nē hkôt Xiakre htō Juãwja ta.

Nē hkôt Firiptija ta.

Nē hkôt Patoromewja ta.

Nē hkôt Tomasja ta.

Nē hkôt pa ixpē Matêwre nhũm pre mẽ hkôt ixta.

Ixpē pahi nhÿ hã kãm mẽ kēp ixujamÿnh xwÿnh tã nhũm pre jajē hkôt ixta.

Nē ixkôt Apew kra Xiakre hōja ta.

Nē hkôt Tatewja ta.

Nē hkôt Simãw Jeroxja ta.

Nē hkôt Jut Kariotja ta.

Kormã kot mẽ kãm Jejus kurē xwÿnhjē nhĩhkram ôr mã nhũm Jejus kot amnhĩ kukamã omunh mex tã mẽ hkôt amnhĩ kaxyw kuta.

ã mẽ ixte ÿ hã mẽ ahkre o ixpa kaxyw mẽ ixrēnh xwÿnhjē nhĩxi kot anhÿr.

Jejus kot mẽ kēp 12jē mã mẽ ãpēnh ã karō

Makre 6.7-13; Rukre 9.1-6, 10.1-12, 10.14; mãânēn Atre 13.50-51, 18.6

⁵ Hãmri nhũm Jejus mẽ ixrēnh pa nē ma mẽ hwÿr mẽ ixrēnh kaxyw tanhmã mẽ inhmã kapēr to nē mẽ inhmã:

—E. Kêr ka mẽ ma mẽ piitã mẽ kãm ri ijarēnh o apa. No ãm kormã mẽ kēp Ijaew kêt xwÿnhjē nhō pika hwÿr apa hkêt nē. Rÿ mẽ kēp Samar nhō krĩ hwÿr ka mẽ apa hkêt nē. ⁶ ãm mẽ pahpē Ijaew nhō krĩ kôt pix mã mãn ri apa. Mē kot tee ri amnhĩ kukamã hamaxpēr o pa jakamã te mẽ

kêp ôwêhti pikunor nê htÿx ri mex kêt nê pa pyrâk. ⁷ Jakamã kêr ka mē ma mē hwÿr apa nê ã mē hkôt ri mē kãm akapêr o apa anê nê mē kãm: “E kot kaj mē ate amnhî tomnuj kaga nê Tirtûm kôt amnhî xunhwÿ hãmri nhûm amnhî tã mē apumu nê mē ato hkra. Jakamã e kwa mē tokyx hkôt amnhî xunhwÿ.” Anê. Kêr ka mē ã mē kãm akapêr anhÿr o ri mē hkôt apa. ⁸ Hãmri nê akupÿm mē à xwÿnhjê ho mex o ri apa. Nê mē htyk xwÿnhjaja ka mē akupÿm mē ho htÿr o ri apa. Nê mē hkànhy rûnh xwÿnhjaja ka mē akupÿm mē ho mex o ri apa. Nê mē kamã mêkarõmnuti xwÿnhjaja ka mē nê mē hano. E kêr ka mē ã inhÿ hã mē ho mex o ri apa anê. Na pa amarî tanhmã mē ato ka mē inhmã amnhîrer kêt tã ra mē ate tanhmã mē ho mex to mã tãm. Tã kêr ka mē amnhî xwar amarî ri mē ho mex o ri mē hkôt apa. No ri mē ho mex pãnhã kàxpore hã axàhwÿr kêt nê.

⁹⁻¹⁰ —Nê kêr ka mē ma mē hwÿr apa kaxyw anojarêt hãmri nê amnhî kôt akukrêx rûnh o apa hkêt nê. ãm anhÿ kamã mē hwÿr apa. Nê akàxpore ho rax nê ho apa hkêt nê. Rÿ akawà kamã axê hkwy rÿ aparkà hõ xàr nê ho amõr kêt nê. Rÿ kô hõ py nê ri ho apa hkêt nê. ãm anhõ mrykà pix jamÿ nê ma ho apa. Kêr kê mē ate Tirtûm kapêr o mē ahkre nê mē ho mex xwÿnhjaja mãn amnhî pãnhã mē amã mē axàpkur xà gõ ka mē kutã axàpkur o ri mē hkôt apa.

¹¹ —Nê kêr ka mē nhÿri krî hwÿr ajapôj nê kamã mēhõ kot amnhî to mex xwÿnh japêr. Nê ra omu hãmri nê kuri mãn pøj nê hkôt apikamênh tãmtã kurûm akupÿm ajapôj nê ma nhãm krî hõ hwÿr mra.

¹² —Nê kêr ka mē mēhõ nhõrkwy hwÿr pøj nê mē kãm: “E ot pa mē awÿr mõ. Nà koja Tirtûmja mē ato mex nê.” Anhÿr o mē kãm akapêr. ¹³ Koja mē ama nê amnhî wÿr awÿ ka mē amnhî tã mē omu nê mē kãm: “E koja Tirtûm mē ato mex nê ka mē ajamakêtkati nê ri axàmnhix apa.” Anhÿr o mē kãm akapêr. No koja mē amnhî nhõrkwy

nê mē akurê nhûm Tirtûm ja hã mē omu nê mē ho mex kêt nê.

¹⁴ —Nê koja nhÿri krî hõ kamã mē akaga nê akapêr mar kêt japêr. Ka mē tee ri amnhî tã mē kamã ama hãmri nê tokyx mē kurûm ajapôj nê ma akupÿm apa. Nê akupÿm anojarêt nê mē noo mã akuhê nê amnhî par ã aw-jagrô kapî nê ma apa. Mē kot Tirtûm kaga hã amnhî pumunh kaxyw ka mē ã mē noo mã amnhî nhîpêx anê. Hãmri nê ma nhÿhÿm hpãnhã apa. ¹⁵ Koja nhÿrmã Tirtûm mē kot amnhî tomnuj mÿrapê tanhmã mē ho. Na pre ã Sotõ mē Komo nhõ xwÿnhjê nhîpêx anê. Na prem amnhî tomnuj tÿx nê nhûm Tirtûm tee ri ja hã mē omu nê tanhmã hã mē homnuj tÿx to. Tã jar mē kãm ixkapêr mar prãm kêt nê mē kot ixkaga xwÿnhjaja koja ja hã mē omu nê kot Sotõ mē Komo nhõ xwÿnhjê nhîpêx o mē hipêx. No ãm tanhmã mē ho htÿx o mē hakre. Anê.

Nhûm pre Jejus ã mē inhmã mē ixàpênh ã karõ anê.

Jejus kot mē kêp 12jê hkukamã mē harênh

Makre 13.9-13; Rukre 12.11-12, mãânênh Rukre 21.12-17; Wam Pêtre 3.13-17, 4.12-19; Rukre 6.40; Juãw 15.20; Rukre 12.2-9

¹⁶ Nhûm Jejus arî kot mē ixrênh xwÿnhjê mã kapêr nê mē inhmã:

—E kot paj ma mē hwÿr mē arê. Ma mē ate Tirtûm kapêr o mē ahkre ho ri mē hkôt apa kaxyw. Jakamã kot kaj mē te ôwêhti kot mry xoprê hwÿr amnhî to mrar nhûm kot hkwy hpar pyrâk o amnhî nhîpêx. Koja mē hkwyjaja mē ate mē ahkre ma nhûm ja mē kêp omnuj nê nhûm mē hã tanhmã mē anhîpêx to. Tã nom kêr ka mē tee ri amnhî kukamã ajamaxpêr nê amã mē uma hkêt nê.

¹⁷ —E kwa mē o kora. Kêr ka mē ma mē hwÿr mra nê amnhî nê mē htãnopxar o ri apa. Koja mē hkwyjaja mē akapêr ma nê kêp mē aprãm nõkati. Nê mē apynê nê ma mē utar xwÿnhjê hwÿr mē ato mra nê mē kãm tanhmã mē ato hêx to. Hãmri nhûm mē mar xà hkôt mē atak. Tirtûm

kapêr o mẽ ahkre xà hã ixkre kamã koja mẽ ã mẽ anhîpêx anê.

18 —Nê koja mẽ ixtã tanhmã mẽ ato kaxyw mẽ apynê nê ma mẽ õ pahi hwÿr mẽ ato mra nê tanhmã kãm mẽ ato hêx to. Nom kwâr mẽ mamrî ã mẽ anhîpêx anê. Koja mẽ ato anê ka mẽ kutã akrî nê mẽ kãm Tîrtûm kapêr jarê. Ijaewjê mã nê mẽ kêp Ijaew kêt xwÿnhjê mã.

19 —Nê koja mẽ ma mẽ õ pahi hwÿr mẽ ato mra nê ã mẽ anhîpêx anê nom kêt ka mẽ tee ri tanhmã mẽ kãm amnhî jarênh to hkukamã ajamexpêr kêt nê. Koja Tîrtûm Karô tãm tanhmã mẽ akrã hto ka mẽ ô ri mẽ kãm akapêr mex nê. 20 Nê kot kaj mẽ amnhî krã hkôt ri mẽ kãm akapêr kêt nê. Tîrtûm Karô nhÿ hã kot kaj mẽ ô ri mẽ kãm tanhmã axujarênh to.

21-22 —Nê koja mẽ hkwÿjaja ixtã mẽ akamã gryk nê. Nê mẽ atã àmnênh pix o pa. Nê mẽ kot mẽ apar kaxyw mẽ akwÿjê hã amÿnê. Koja mẽ anhîpêxà hkwÿjaja mẽ apê mẽ hkra hã amÿnê. Nhũm mẽ akra hkwÿjaja mẽ apê mẽ hipêêxà hã amÿnê. Nhũm mẽ atõ hkwÿjaja mẽ apê mẽ htõ hã amÿnê. Nhũm mẽ akatorxàjaja mẽ atã amÿnê. Hãmri nhũm mẽ apa. No ãm kwâr mẽ mãmri ã mẽ anhîpêx anê. ã mẽ kot mẽ anhîpêx anhÿr tã kêt ka mẽ tee ri amnhî kukamã ajamexpêr pê ixkaga hkêt nê. Mẽ ãm amnhî to htÿx rãhã ty. Hãmri nê akaxwÿnhja ma Tîrtûm mẽ wa inhõ krî hwÿr axàpir kurê kumrêx nê wa ixkuri akupÿm amex nê atîr tûm nê apa ho apa.

23 —Nê koja mẽ nhÿri krî hkwÿ kamã ixtã tanhmã mẽ anhîpêx hto ka mẽ mãmri mẽ kurûm ajapôj nê ma nhÿhÿm krî hõ hwÿr apa. Nê hpãnhã kamã mẽ kãm ri ijarênh o mẽ hkôt apa. Kot kaj mẽ kormã Ijaewjê nhõ krî piitã hwÿr apa hkêt ri pa akupÿn mẽ awÿr wrÿ. Kwa kêt ka mẽ ixkapêr mã ajamexpêr tÿx rãhã ri apa.

24-25 —Mẽ ate ixkôt apa ho apa xwÿnh na ka mẽ. No pa na ixpê mẽ ajahkre xwÿnh. Jakamã koja mẽ kot tanhmã inhîpêx to ho mãânên mẽ anhîpêx. Koja mẽ nhÿrmã tanhmã

inhîpêx to nê mã ixkôt mẽ ato anê nê. Mẽ pahte amnhî nhîpêxja kot axpên pyrãk. Jakamã koja mẽ ixpê Satanasti hã ijarê nê mãânên tanhmã mẽ ajarênh punuj to ho pa. Mẽ pahte amnhî nhîpêxja kot axpên pyrãk jakamã koja mẽ panhîpêx o axpên pyrãk.

26 —Tã nom kêt ka mẽ tee ri amnhî kukamã ajamexpêr pê amã mẽ uma ho apa hkêt nê. Na htem piitã axpên pê tanhmã hamaxpêr punuj to ho hpimxur o pa nom tee ri ho pimxur prãm kaprÿ. Koja nhÿrmã mẽ hamaxpêr piitã amnhîrît pa. Nê mẽmoj piitã ra hpimxur mex tã koja nhÿrmã amnhîrît par kumrêx.

27 —Nê koja nhÿrmã mẽ piitã ixte amnhî nhîpêx kôt ixpumu. Na pa ra mẽ hkàx ã mẽ amã ixujarênh rax nê. Tã kêt ka mẽ ma mẽ piitã mẽ kãm harênh o ri apa. Nê ra ixte mẽ hkàx ã ahte ixte mẽ amã mẽmoj jarênh ta ka mẽ hpãnhã ma mẽ kãm harênh o ri apa kêt mẽ apyrã nê harênh ma.

28 —E kêt ka mẽ amã mẽ kot tanhmã mẽ ato mã xwÿnhjê puma ho apa hkêt nê. Mẽ kot mẽ apar mã tã koja mẽ ãm mẽ akrãhkà pix pa nom tanhmã mẽ akaxwÿnh to hkêt nê. Tîrtûmja tapxipix na hte mẽ hkrãhkà nê mẽ hkaxwÿnh mẽ ho pimràatã kot amnhî xà htÿx kamã hamak tûm xàta wÿr mẽ rênh pumunh. Tã kot hwÿr mẽ arênh pymaj kêt ka mẽ amã kapêr kwÿm ri tanhmã amnhî nhîpêx to puma ho ri apa.

29-31 —Nê Tîrtûm kot mẽ pahto hapêx par pumunh tã mãânên kot mẽ pajamãr mex. Mãn ka htem kuwênhre pumu. Na hte Tîrtûm kuwênhre jamãr mex o pa. Mẽ piitã mẽ kot ãm omunh tã nom nhũm Tîrtûm mẽ kurom hamãr mex pê mẽ htãnopxar rãhã ho pa. Tã kãm mẽ pajapê htÿx o kot kuwênhre jakrenh jakamã kwa mẽ tee ri amnhî kukamã ajamexpêr o ri akapri nê apa hkêt nê. Koja Tîrtûm mẽ pahtãnopxar rãhã ho pa. Kot mẽ panhî piitã omunh par. Nê ahpÿnhã tanhmã mẽ pahkrã hkî kute hkôt mẽ pahpumunh par. Tã

kot mẽ pahtānopxar rāhā jakamā mo kaxyw kot kaj kêt mẽ ri amā mẽ uma ho apa? Anē.

Mẽ pahte Jejus kôt amnhĩ xunhwỳr rỳ mẽ pahte hkaga jarēnh

³² Nhũm Jejus arĩ kot mẽ hwỳr mẽ ixrēnh xwỳnhjê mã kapēr nē mẽ inhmā:

—E kwa mẽ māmri akwỳjê mã mẽ apê ixkwỳ hā amnhĩ jarēnh o ri apa nē amā mẽ uma xāj tee ri amnhĩ nhĩpêx kêt nē. Kot kaj mẽ kām ra ate ixkôt amnhĩ xunhwỳr ã amnhĩ jarē. Pa ja hā mẽ apumu hāmri nē mẽ apyrà nē kaxkwa kamā Inhĩpêêxà mã ra ate ixkôt amnhĩ xunhwỳr ã mẽ ajarē. ³³ Nom kot kaj mẽ kot ixtā tanhmā mẽ ato pymaj apê ixkwỳ hā amnhĩ jarēnh kêt nē. Pa ja hā mẽ apumu hāmri nē nhỹrmā amnhĩ xwar Inhĩpêêxà mã mẽ apê ixkwỳ hkêt ã mẽ ajarē. Jakamā kwa mẽ māmri mẽ kām apê ixkwỳ hā amnhĩ jarēnh o ri mẽ hkôt apa kê mẽ ama nē amnhĩ kaxyw inhmā hamaxpēr japêr. Anē.

Mẽ kām Jejus ã hkwỳjê kurê xwỳnhjaja

Makre 8.34-35; Rukre 9.24, mãänēn Rukre 12.51-53, 14.26-27; Apokarip 12.11

³⁴ Nhũm Jejus arĩ kot mẽ hwỳr mẽ ixrēnh xwỳnhjê mã kapēr nē mẽ inhmā:

—Ra mẽ awỳr ixwryk tã koja mẽ piitā ixkukwak ri hamakêtkati nē àmnhĩx ri pa hkêt nē. Kormā. Koja mẽ akwỳjaja ixkapēr ma nē mẽ apyrà nē amnhĩ kaxyw ixkôt hamaxpēr. Nhũm mẽ akwỳjaja axtem nē kuma nē ãm kuma. Hāmri nē ixtā tanhmā mẽ atomnuj to ho pa ka mẽ amnhĩ xà htỳx kamā ajamak o ri apa.

³⁵ —Koja mẽ akrajaja ixtā mẽ apê mẽ hipêêxà nē mẽ katorxà kutā amnhĩ xunhwỳ. Nhũm mẽ wỳjjaja ixtā mẽ umregêxjê kutā amnhĩ xunhwỳ.

³⁶ —Koja mẽ ã mẽ akwỳjaja ixtā mẽ akutā amnhĩ xunhwỳr anē. Mẽ anhōrkwỹ kamā mẽ akukwak ri pa htā ixtā mẽ akutā amnhĩ xunhwỳ.

³⁷ —Nē mẽ amā mẽ anhĩpêêxà nē mẽ akatorxà japêê. Nē mẽ amā mẽ akrajê japêê. Tã nom kot kaj mẽ gryk ã ixkôt amnhĩ nhĩpêx mex o ri apa hkêt hāmri nē apê ixkwỳ mã tãm kêt. ³⁸ Rỳ nhũm mẽ nhỹrmā ixtā mẽ apar kaxyw ka mẽ tee ri amnhĩ kukamā ajamxpēr nē mẽ kot mẽ apar pymaj ixkaga hā kot kaj apê ixkwỳ mã tãm kêt nē. ³⁹ Koja mẽ nhỹrmā ixpĩ pa mẽ anē ty. Tã mẽ ate ixkôt amnhĩ nhĩpêx o apa xwỳnhjaja. Koja mẽ ixpyrà nē ixtā mẽ apar mã tã kwa kêr ka mẽ amā atyk pymaj ixkaga hkêt nē. Kwār mẽ māmri tanhmā ixtā mẽ ato. Kot kaj mẽ nhỹrmā Tĩrtũm mẽ wa ixri axte amnhĩ xà kamā ajamak kêt nē atĩr tũm nē amex rāhā apa ho apa. Nom kot kaj mẽ jar amā amex nē apa hprām xāj ixkaga hāmri nē nhỹrmā wa ixri atĩr tũm nē apa ho apa hkêt nē. Anē.

Mẽ kot Jejus krajê ho mex xwỳnhjê jarēnh

Matêwre 25.34-40; Makre 9.41; Juāw 13.20

⁴⁰ Nhũm Jejus arĩ kot mẽ hwỳr mẽ ixrēnh xwỳnhjê mã kapēr nē mẽ inhmā:

—E koja mẽhō nhỹri mẽ apumu nē mẽ apê ixkra hā tanhmā mẽ ato mex to nē te pa kot ixto mex pyrāk. Nē kot kaj mẽ tanhmā pa ixto mex to nē te Tĩrtũm o mex pyrāk.

⁴¹ —Nē kot ka mẽ nhỹri Tĩrtũm nhỹ hā mẽ kām kapēr jarēnh xwỳnhjê hō tanhmā ho mex to nhũm Tĩrtũm hā apumu nē nhỹrmā hā ato mex nē. Rỳ ka mẽ mẽhō kot Tĩrtũm kôt amnhĩ nhĩpêx xwỳnhjê hō pumu nē tanhmā ho mex to. Nhũm Tĩrtũm hā apumu nē mãänēn hā ato mex nē. Te ate mẽhō ho mexta pyrà nē mãänēn ato mex nē. ⁴² Nhũm mẽhō nhỹri mẽ kot ixkôt kormā amnhĩ xām nyw nē kormā àhpumunh tohtuj anhỹr xwỳnhjê hō pumu. Nē kām kôr ã omu nē hamaxpēr o: “Kwa Jejus kôt ri pa xwỳnh mũj kām kôr. Kormā kot Jejus kôt amnhĩ xām tỳx kêt tã kêp hkwỳy. E kot paj kām gô hkwỳ kê ho ixkō.” Anē hāmri nē kām hkwỳ nhũm ho ixkō.

Hāmri nhūm Tīrtūm hā omu nhūm kot kām gô pix nhôr nhūm kot ho hkôm tâ nhūm ja hā ho mex rax nê. Anê.

Nhūm pre ã Jejus kot mē hwÿr mē ixrēnh xwÿnhjê mã kapēr ry rax anê. Mē ixpê 12jê mã ã kapēr anê.

11

Juāw Paxis kot Jejus jarēnh mar Rukre 7.18-23, 7.5, mãññen Rukre 4.16-21

¹ Tã nhūm Jejus ra kot mē hwÿr mē ixrēnh xwÿnhjê mã kapēr pa hāmri nê kato nê ma krī pu hā krī hkwyjê hkôt ri pa. Nê mē kām Tīrtūm kapēr jarēnh o ri mē hkôt pa.

² Nhūm Juāw Paxisja arī kēp prēs nê mē hagjēnh xà kamã hkrī. Nhūm pre hte hkôt mē pa ho mē pa xwÿnhjaja hwÿr mra nê kām Jejus kot tanhmã amnhĩ nhĩpêx to ho pa hā harê. Hāmri nhūm harēnh ma nê tee ri hkukamã hamaxpēr. Hāmri nê hkôt mē pa xwÿnh wa ho axkrut nê wa kuta ³ nê hwÿr wa kumê nê wa kām:

—Kwa wa ma Jejus wÿr tē nê hkukja nê kām: “Xà ka na pre Tīrtūm mē ixwÿr amē nà? Xà kormã axtem mēhō na pa mē ri hamār o ri ixpa?” Anhÿr o hkukja hāmri nê tanhmã kot amnhĩ jarēnh to hā ama nê man akupÿn ixwÿr tē nê inhmã harê. Anê.

⁴ Hāmri nhūm wa kuma nê ma hwÿr tē. Nhūm Jejus kormã tanhmã mē à kute xwÿnhjê ho mex o xa. Mē nohkre xwÿnhjaja nhūm akupÿm mē ho mex. Nê mēkarōmnuti kot mē hwÿr gjêx xwÿnhjaja nhūm mē nê mē hanor o ãm rãhã nhūm Juāw kôt wa pa xwÿnhhta wa hwÿr tēn pōj. Nê kormã mē hā omunh o wa xa. Hāmri nê kām Juāw Paxis kapēr jarē nhūm wa kuma nê wa kām:

—Tÿ. Nà ãm hāmri na ja hā ijarē. Ixpê mē ate ixkamã ajamak o apa xwÿnhhta na pa. Na ka wa kam ã ixte amnhĩ nhĩpêx anhÿr ã ixpumu. Jakamã wa ma akupÿm tē nê aprī hā kām ijarē. ⁵ Na pa hte akupÿm mē nohkre xwÿnhjê ho mex. Nê mē hkànhy xwÿnhjaja pa akupÿm mē hkà ho mex. Nê mē hyk o mē pa

xwÿnhjaja pa akupÿm mē hte ho mex. Nê mē htyk xwÿnhjaja pa akupÿm mē ho mē htīr. Nê mē kēp amrakati nê ri mē pa xwÿnhjaja pa mē kām mēmoj mex jarēnh o ri mē hkôt ixpa. Æ na pa hte mē hipêx anhÿr o ri ixpa. Jakamã e wa ma akupÿm Juāw wÿr tē nê ã kām ijarēnh anê. ⁶ Kê ijarēnh ma nê ixkôt hamaxpēr tÿx nê tee ri ixkukamã hamaxpēr kêt nê. Koja ã amnhĩ nhĩpêx anê nê hamakêtkati nê ri pa. E wa tokyx ma akupÿm tē nê kām ã ijarēnh anê. Anê.

Jejus kot tanhmã Juāw Paxis jarēnh to

Rukre 7.24-35

⁷⁻⁹ Nhūm pre ã Jejus Juāw Paxis kôt wa pa ho wa pa xwÿnhja wa kām amnhĩ jarēnh anê nê akupÿm hwÿr wa kumê nhūm wa ma akupÿm hwÿr tē. Hāmri nhūm Jejus mē kot mar o kuhê xwÿnhjê mã tanhmã Juāw Paxisja jarēnh to nê mē kām:

—Na ka pre htem kapôt ã Juāw Paxis mar kaxyw ma hwÿr mra. Nom ê mex ã omunh kaxyw rÿ hpijaam kām tanhmã kapēr to hā mar kaxyw na ka prem hwÿr amrar kêt nê. Tīrtūm nhÿ hā kapēr o pa jakamã na ka prem ate mar kaxyw ma hwÿr mra. Tīrtūm nhÿ hā ixkukamã ijarēnh o pa xwÿnh na. Ixpê Tīrtūm kot mē akaxyw ixãm xwÿnh ã na hte ijarēnh o pa. Nê hprī hā tanhmã mē amã ijarēnh to. Jakamã kapērja mex o kot wam Tīrtūm nhÿ hā kapēr jarēnh xwÿnhjê kapēr piitã hakrenh par. ¹⁰ Tīrtūm kapēr ã kagã htūm kot Juāw kukamã tanhmã harēnh to nê harēnh kot:

Kot paj Ixkra hkukamã ma mē hwÿr harēnh xwÿnhja mē nhūm ma ri kutêp mē kām harēnh o pa. Mē kot mar nê kutêp tãm amnhĩ nhĩpêx o pa kaxyw.

—Anhÿr o Tīrtūm Juāw Paxis kukamã harē nhūm prem hā kagã. Tã nhūm ixkukamã mē awÿr kumê.

¹¹ Juāw Paxisja na mex kumrêx. Na pre hprī hā ixkukamã tanhmã ijarēnh to ho pa. Tã nom ixkôt mē pa ho mē pa xwÿnhjê hkĩnhã na pre ixkôt

pa ho pa hkêt nê. Jakamã ixkôt mê pa ho mê pa xwÿnhjaja kot ixkôt hprî hã ixkapêr mar o pa jakamã na mê mex o mê kot Juãw Paxisja jakrenh. Anê.

12-13 —Na pre finat Mojes kumrêx mê kãm Tirtûm kapêr kwÿ hã kagà. Tã nhûm hpãnhã Tirtûm nhÿ hã kapêr jarênh xwÿnhjaja Mojes mÿr pê hkwÿ hã kagà. Nhûm prem kamã harê nê kuma nê hkôt amnhî nhîpêx o pa. Hãmri nhûm Juãw Paxisja mê mÿrpê kato nê tãm Tirtûm kapêr o mê ahkre ho ri pa. Tã pa hpãnhã ho mê ajahkre ho ri mê akôt ixpa nhûm mê ohtô nê inhma nê ixkôt amnhî xunhwÿ nê kãm ixkapêr kôt pix mã amnhî nhîpêx o ri pa hprãm nê.

14 —Amnepê m na pre Tirtûm nhÿ hã kapêr jarênh xwÿnhjaja mêhõja kukamã tanhmã harênh to ho pa. Nê mê kãm harênh o: “Koja nhÿrmã mêhõ te Eris kot amnhî nhîpêx pyrãk o amnhî nhîpêx nê mê awÿr mō. Nê mê amã Tirtûm kot mê awÿr mēnh mã xwÿnhja jarênh o pa ka mê ama.” Anhÿr o mê kãm mêhõ jarê. Tã kot paj mê amã kot hkukamã harênh xwÿnhhta nhîxi jarê ka mê inhma. Nã Juãw Paxisja kukamã na prem ã harênh anhÿr o pa.

15 —E kot pa mê amã mê piitã htÿx ri tanhmã mê hamaxpêr to ho mê pa hã mê amã mê harê ka mê harênh ma. 16 Te mêhprîre kot amnhî nhîpêx pyrãk o na htem amnhî nhîpêx. Mêhprîrejaja na htem mê òrkwÿ kapem mēmoj to amnhîkati nê tee ri hkwÿjê kot amnhî nhîpêx pumu nê mê kãm:

17 Kwa na pa mê amã gre htã ka mê ixkutã anhökrepôx kêt nê. Pa mê ja hã mê apumu nê hpãnhã mê amã mê htyk jarê htã ka mê akaprî nê amÿr kêt nê. Kwa mê ri ã amnhî nhîpêx anhÿr kêt nê. Anê.

—Mêhprîjaja na htem ã axpēn mã kapêr anê. Tã te mê ate mê urãk. Tirtûm kot mê awÿr ÿ hã kapêr jarênh xwÿnhjê rēnh tã ka mê te mêhprîre kot amnhî nhîpêx pyrã nê mê ama nê ãm

mê ama nê mê hkôt amnhî nhîpêx kêt nê.

18 —Juãw Paxis na pre mê awÿr mō nê ixkînhã apkur mex o ri pa hkêt nê. Nê ixkînh ã wîhti ho hkôm kêt nê. Ka mê ja hã omu nê hkaga nê atÿx ri Satanasti nhÿ hã tanhmã kot amnhî nhîpêx to hã hkamnhîx. Hãmri nê mêhprîre kot amnhî nhîpêxta pyrã nê hkôt amnhî nhîpêx kêt nê.

19 Tã hãmri pa hpãnhã mê awÿr mō nê Juãw Paxis rom apkati mê ixàpkur mex o ri mê akôt ixpa. Nê kurom mê akutã wîhti hkwÿ ho ixkôm o ri ixpa. Tã ka mê ja hã ixpumu nê atÿx ri ixàpkur rûnh nê ixpîpãnh o ri ixpa hã ixkamnhîx nê ã axpēn mã ixto akapêr anê. Nê mê kot amnhî tomnuj xwÿnhjê hkôt ri ixpa xwÿnh ã axpēn mã ijarê. ã na ka htem axpēn mã ijarênh anê. Jao te mê ate Juãw Paxis nhîpêx pyrã nê ixkaga nê ixkôt amnhî nhîpêx kêt nê. Na hte ã htÿx ri tanhmã mê hamaxpêr to ho mê pa xwÿnhjaja amnhî nhîpêx anê. No tãm ri mê hamaxpêr xwÿnhjaja na htem ahpÿnhã wa ixte amnhî nhîpêx ã wa ixpumu nê axpēn mã wa ijarênh o: “Nã ahpÿnhã wa kot amnhî nhîpêx tã no ãm hamê Tirtûm nhÿ hã kapêr mex o pa. E pu mê wa urãk nê Tirtûm kôt amnhî xunhwÿ.” Anhÿr o axpēn mã wa ijarê. Anê.

Mê kot Tirtûm kôt mê hamaxpêr kêt xwÿnhjê jarênh

Rukre 10.13-15

20 Na pre hte Jejus krî piitã hkôt pa nê krî nhõ xwÿnhjê mã kapêr nê mê kot amnhî tomnuj ã mê kãm kapêr. Korajî mê Pese nhõ xwÿnhjê kumrêx mã kapêr nê mê kãm:

21-22 —E mê inhma. Amnepê m krî pê Sitō mê Xir wa kamã mê pa xwÿnhjaja na prem tanhmã amnhî tomnuj tÿx to ho pa nhûm Tirtûm tee ri ja hã mê omu nê mê kot amnhî tomnujta ã tanhmã mê ho. Tã kwa mê o kora Korajî mê Pesêj nhõ xwÿnhjaja. Ra ixte mê amã aa mê ate mēmoj pumunh kêt kwÿ ho anhÿr rax tã ka mê omu nê ãm omu nê amnhî tomnuj kaga hkêt nê. Arî

tanhmã amnhĩ tomnuj to ho ri apa. Mýrapê kot kaj mẽ amex kêt nê. Kop apu Sitô rý Xir kamã mãn ixte mẽ kãm aa mẽ kot mẽmoj pumunh kêt kwý ho anhýr o ri ixpa ronhýx mẽ omu nê mẽ arom amnhĩ kaxyw ixkôt hamaxpêr týx kurê kumrêx. Nê tee ri kot tanhmã kot amnhĩ tomnuj to hã amnhĩ pumu nê hkaprĩ nê hkaga hpa. No mẽ kajaja na pa hte tee ri mẽ amã aa mẽ ate mẽmoj punuj kêt kwý ho anhýr o ixpa kaprý. Ka mẽ ja hã ixpumu nê âm ixpumu nê amnhĩ tomnuj kaga hkêt nê. Jakamã koja nhýrmã Tirtũm tanhmã mẽ atomnuj týx to. Nê tanhmã Sitô mẽ Xir wa kamã mẽ pa xwýnhjê jarênh to nhũm mẽ kot amnhĩ tomnuj mýrapê amnhĩ xà htýx kamã hamak rãhã ho pa. No mẽ kajaja mẽ ate amnhĩ tomnuj týx o mẽ hakrenh jakamã koja Tirtũm mẽ hkĩnhã mẽ atomnuj týx kumrêx. Ka mẽ amnhĩ xà htýx kamã ajamak rãhã ho ri apa kãm ga. Anê.

23-24 Nhũm pre ã Jejus mẽ kãm kapêr anê. Nê hpãnhã Kapanaũ nhõ xwýnhjê mã kapêr nê mẽ kãm:

—No mẽ apê Kapanaũ nhõ xwýnhjaja. Kot kaj mẽ ajaxwýja mẽ urak nê amex kêt nê. Ra ixte mẽ amã aa mẽ ate mẽmoj pumunh kêt kwý ho anhýr rax nhũm mẽ ate hã ixpumunh tã amnhĩ tomnuj kaga hkêt tã Tirtũm mẽ wa inhõ krĩ hwýr akrã. No âm hwýr akrã kaprý. Kot kaj mẽ atõ hwýr axãpir kêt nê. Kop apu Sotõ nhõ xwýnhjaja mãn kot ã ixte amnhĩ nhĩpêx anhýr ã ixpumunh ronhýx mẽ ra kot amnhĩ tomnuj kaga nê ixkôt amnhĩ xunhwýr kurê kumrêx. No mẽ kajaja na ka mẽ ã amnhĩ nhĩpêx anhýr kêt nê. Jakamã kot kaj mẽ nhýrmã ma kuwy maatita wýr ajapêx pa kãm ga. Anê.

*Jejus kot õ Papaj mã amnhĩ jarênh
Rukre 10.21-22*

25-26 Tã nhũm Jejus Tirtũm mã amnhĩ jarê nê kãm:

—Pa Papaj? Nà apê mẽ inhõ Pahi Maati na ka. Pikap ri mẽ pa xwýnhjaja nê kaxkwa kamã mẽ pa xwýnhjaja

apê mẽ ixpiitã mẽ inhõ Pahi Maati na ka. Âm hãmri na ka hte amnhĩ nhĩpêx mex o ri apa. Na ka hte mẽ àhpumunh týx ã mẽ kot amnhĩ to jarkrar xwýnhjê mã axàhpumunh týx o amnhĩrit kêt nê. Âm mẽ àhpumunh kêt ã mẽ kot amnhĩ jarênh xwýnhjê pix mã na ka hte axàhpumunh týx o amnhĩrit nhũm mẽ tapxipixjaja ja hã apumu. Nà âm hãmri. Âm hãmri na ka hte amã hprãm xà hkôt ã mẽ piitã mẽ hipêx anhýr o ri apa Papaj. Jakamã mẽ kot amnhĩ to hkryre xwýnh pixjaja na htem hprĩ hã ate amnhĩ nhĩpêx kôt apumunh o pa. Anê.

Nhũm pre ã Jejus Tirtũm mã amnhĩ jarênh anê. ²⁷ Hãmri nê hpãnhã mẽ kot mar o kuhê xwýnhjê mã kapêr nê mẽ kãm:

—Nà na pre ra Inhipeêxãja inhĩhkra kamã mẽmoj piitã hagiênh pa. Ixte kãm ho amnhĩptar o ixpa kaxyw. Jakamã tapxipix na kot ixpê Kra hã ixpumunh par. No jar pika ja kamã mẽ pa xwýnhjaja na mẽ kot ja hã ixpumunh kêt. Nê papxipix na ixte Inhipeêxã kot tanhmã amnhĩ nhĩpêx to hã omunh par. Jakamã na pa hte ã amnhĩ nhĩpêx o ri ixpa anê nê inhmã hprãm xà hkôt mẽ hkwýjê mã ho amnhĩrit o ri ixpa. Jakamã nhũm mẽ ixpyrà nê Inhipeêxã kot tanhmã amnhĩ nhĩpêx to ho pa hkôt omu.

28-30 —Nê tee ri amnhĩ kukamã mẽ ajamaxpêr o ri apa xwýnhjaja te mẽ ate mẽmoj pytĩ rax tur nê ahte ho apa pyrak. Kwa mẽ ixkôt amnhĩ xunhwý nê ixte amnhĩ nhĩpêx ã ixpumu. Ixte mẽ akamã ixukaprĩ xwýnh na pa. Na pa hte mẽ akutã inhnojarêt rãhã ho ixpa. Jakamã kot kaj mẽ ixkôt amnhĩ xunhwý pa te ixte mẽ anê mẽmoj pytĩ ho ixwryk pyrak o mẽ anhĩpêx nê tãm mẽ axunhwý ka mẽ tãm ajamaxpêr nê tãm amnhĩ nhĩpêx o ri apa. Mo kaxyw koja ixkôt mẽ kot amnhĩ nhĩpêx o pa xwýnhjaja tee ri amnhĩ kukamã hamaxpêr o pa? Nà na htem ixkamnar rom hamakêtkati nê àmnhix ri pa ho pa. Anê.

12

*Jejus kêp arïgromnu hpãm
Makre 2.23-28; Rukre 6.1-5*

¹ Tã nhũm Ijaew nhõ arïgromnu pê sapja kato. Hãmri nhũm Jejus mẽ hkõt ri mẽ ixpa ho mẽ ixpa xwýnhjê mẽ pa mẽ ma mẽ hpur kõt ri nhỹhỹm ri ixpa. Hãmri nê ra mẽ inhmã prãm nê mẽmo hy te kot harôj pyrãk xwýnhja kwý rê nê kugrà nê ma Jejus kõt hkanhar o mō. Mẽ ixpê Ijaew na pa htem axpên pur kãm ã amnhĩ nhĩpêx anhỹr o ixpa. ² Hãmri nhũm mẽ ixkwý pê Parijew nhõ xwýnhjaja kãm mẽmoj tã Jejus o kapêr prãm jakamã ã mẽ ixte amnhĩ nhĩpêx anhỹr ã mẽ ixpumu nê mẽ ixtã Jejus kukjêr kurê kumrêx nê kãm:

—Kwa Tirtũm kapêr tũm kot mẽ panhõ arïgromnu hã mẽ pahte mẽ hpur kãm mẽmoj nhĩkênh nê mẽ pahkurê htã nhũm ri akõt mẽ pa ho mẽ pa xwýnhjaja axtem nê ã amnhĩ nhĩpêx anhỹr o ri akõt pa. Mẽmo hyta rê nê akõt hkanhar o pa. Kwa mẽ kãm anê kê mẽ ã amnhĩ nhĩpêx anhỹr kêt nê. Na htem arïgromnu hã mẽmoj tã ãpênh kêt kênã. Anê.

³⁻⁴ Hãmri nhũm mẽ kuma nê hprĩ hã mẽ kãm Tirtũm kapêr jarê nê mẽ kãm:

—Tk. Xãn ka htem Tirtũm kapêr ã kagã htũm kot pahi Tawi kot tanhmã amnhĩ nhĩpêx tota kamã harênh nê mar kêt nê? Na pre hkõt ri mẽ pa xwýnhjê mẽ nhũm mẽ prãm xaj Tirtũm mã amnhĩ jarênh xã hã ixkre hwýr agjê. Hãmri nhũm mẽ õ patre maatija mẽ kãm prãm tỳx ã mẽ omu nê kãm mẽ hkaprĩ nê mẽ kãm mẽmoj gō. Mẽ kot Tirtũm noo mã pãwti jaxwýr xwýnhja gō nhũm mẽ kuku. Tirtũm kapêr ã kagã htũm kot ja nê mẽ hkurê htã nhũm mẽ kãm prãm tỳx ã mẽ omu nê mẽ kamã ukaprĩ xaj mẽ kãm kugō. ãm mẽ õ patre pix kot ja hkur kaxyw tã nhũm mẽ kãm kugō nhũm mẽ kuku. Tã nom nhũm Tirtũm ja hã mẽ omu nhũm ja kêp omnuj kêt nê. Kot mẽ kamã ukaprĩ nê mẽ kãm õr ã omu nhũm ja kãm mex nê.

⁵ —Mẽ panhõ arïgromnu htã na hte patrejaja arĩ hã Tirtũm mã amnhĩ

jarênh xã hã ixkre kamã ãpênh o pa. Tirtũm kapêr ã kagã htũm kõt na htem arïgromnu htã nhũm mẽ arĩ hã ãpê nhũm Tirtũm pê jamnuj kêt nê. Kumã mẽ ãpênh xwýnh kênã. ⁶ ãm hãmri na pa mẽ amã ja jarê. Tirtũm mã amnhĩ jarênh xã hã ixkreta mex tã nom ixpê Tirtũm Kra jakamã inhmex o ixte ixkreta jakrenh. ⁷ Tirtũm kapêr ã kagã htũm kot ja harênh kot:

Kêr ka mẽ inhmã amnhĩ jarênh kaxyw nê ãm inhmã mẽmoj nhõr pix pê inhmã amnhĩ jarênh kêt nê. Mẽ mãânên mẽ kamã axukaprĩ o ri apa pê inhmã amnhĩ jarê. Ja na kêt inhmã hprãm.

—Ã harênh kot anhỹr. Tã mẽ ate aprĩ hã ja mar ronhỹx ka mẽ ixkõt mẽ pa xwýnhjê kot mẽmo hy rênh nê hkanhar o mōr ã mẽ omu nê ri tanhmã mẽ ho akapêr to hkêt nê. ãm mẽ kãm prãm ã mẽ omu nê mẽ kamã axukaprĩ nê.

⁸ —Kêt pa na pre Tirtũm mẽ akaxyw ixãm nê mẽ awýr inhmê. Jakamã paxipix na pa hte arïgromnu hã tanhmã mẽ kot amnhĩ nhĩpêx to hã mẽ kãm karō. Kwa mẽ jajê pumu nê mẽ kamã axukaprĩ kêt wehe. Kwãr mẽ mãmrĩ mẽmo hyta rê nê hkanhar o ixkõt mō. Anê.

*ĩhkra grã xwýnh jarênh
Makre 3.1-6; Rukre 6.6-11*

⁹ Nhũm pre ã Jejus Parijew nhõ xwýnhjê mã kapêr anê hãmri nê Tirtũm kapêr o mẽ ahkre xã hã ixkre hwýr tẽ nê axã. ¹⁰ Nhũm Parijew nhõ xwýnhjaja tanhmã ho kapêr to kaxyw htãnopxar o kuhê. Jakamã nhũm ixkre kamã mẽhõ my ĩhkra grã xwýnhja mẽ pikuprõnh xwýnhjê nhĩhkô hã nhỹ nhũm Parijew nhõ xwýnhjaja omu nê axpên mã:

—Kwa pu mẽ jar pakuhê nê Jejus kot tanhmã amnhĩ nhĩpêx to hã omu. Xã koja arïgromnu hã mũjti ho mex nã? Koja ho anê nê Tirtũm kapêr tũm kuhpa hã amnhĩ nhĩpêx. E pu mẽ kop xa nê hã omu. Anê.

Hãmri nê hã Jejus kukja nê kãm:

—E mẽ inhmã mẽmoj jarê. Xà na htem arĩgromnu hã akupÿm mẽ ho mex nhũm Tĩrtũm kãm ja mex nẽ nà? Anẽ.

¹¹ Hãmri nhũm mẽ hamaxpêr kôt mẽ omunh mex nẽ mẽ kãm:

—Kwa tanhmã na htem arĩgromnu hã amnhĩ nhĩpêx to ho pa wehe? Xà koja we mẽ akrit ôwêhti ahkrehti kamã tẽm ka omu nẽ âm omu nẽ arĩgro mex jamãr pê ho axãpir kêt nẽ? Nà kot kaj mẽ tee ri omu nẽ ho axãpir kurê kumrêx. ¹² Arĩgromnu hã mẽ ho mexja ja mex kênã. Tĩrtũm mã mẽ pahpê panhĩja na mẽ pamex o mẽ hkrit jakrenh jakamã kêr pu mẽ tee arĩgromnu htã pu mẽ hã tanhmã axpẽn to mex to ho papa. Ja na Tĩrtũm kãm hprãm.

Anhÿr o mẽ kãm kapêr. ¹³ Hãmri nẽ hpãnhã myta mã:

—E anhĩkra katàt. Anẽ.

Hãmri nhũm ìhkra katàt nẽ mex kurê kumrêx. ¹⁴ Hãmri nhũm Parijew nhõ xwÿnhjaja tee ri ja hã omu nẽ Jeju kamã gryk nẽ. Arĩgromnu pê sap ã kot ho mex jakamã nhũm mẽ kamã gryk tÿx nẽ. Hãmri nẽ ma mra nẽ hapôj nẽ hã axpẽn kukjêr o kuhê nẽ axpẽn mã:

—Kwa ã kot amnhĩ nhĩpêx anhÿrja mÿrapê tanhmã kot puj wem ho? ã kapêr anhÿrja o te mẽ papamjaja mẽ pahte hkĩnhã mẽ kamã paxukaprĩ kêt pyrãk ã mẽ pajarê. Koja mẽ pahkwÿjaja kuma hãmri nẽ mẽ pahte amnhĩ nhĩpêx kaga nẽ amnhĩ kaxyw hkôt pix mã hamaxpêr. Kwa tanhmã kot puj wem ja nê ho?

Anhÿr o axpẽn kukjêr o kuhê.

Jeju kêp Tĩrtũm kot mẽ pahwÿr mẽnh xwÿnh ã harênh

Makre 3.7-12

¹⁵ Hãmri nhũm Jeju amnhĩ tã Parijew nhõ xwÿnhjê jamaxpêr kôt mẽ omu hãmri nẽ mẽ kêp kato nẽ hpãnhã ma nhÿhÿm krĩ hõ hwÿr ma tẽ. Nhũm mẽ ohtô nẽ omu nẽ ma hkôt mra nhũm mẽ omu nẽ akupÿm mẽ kãm mẽ à xwÿnh piitã ho mex. ¹⁶ Hãmri nẽ mẽ kãm:

—E na pa akupÿm mẽ ato mex. Nom kêr ka mẽ amnhĩ tã ixto axãmra ho ri apa hkêt nẽ. Ixpê Tĩrtũm Kra hã mẽ kãm ijarênh kêt nẽ. Âm kwarĩ kumrêx.

Anhÿr o mẽ kãm kapêr. ¹⁷ Na pre ra amnepêem Tĩrtũm nhÿ hã kapêr xwÿnh finat Ijaisja Jeju kukamã mẽ kãm tanhmã harênh to nẽ hã kagà. Te Tĩrtũm tãm kapêr pyrãk o harê nẽ hã kagà. Nẽ hã kagà ho:

¹⁸ Ota ixkôt amnhĩ nhĩpêx o pa xwÿnhhta xa. Pa na pa amnhĩ kaxyw âm. Inhmã hapêê. Na pa hte tanhmã kot amnhĩ nhĩpêx to ho pa hã omu nẽ ixkĩnh tÿx nẽ. Kot paj hwÿr amnhĩ karô mẽ nhũm hwÿr axà nhũm ma ÿ hã pika piitã hkôt mẽ piitã mẽ kãm ijarênh o ri mẽ hkôt pa. Mẽ kot hprĩ hã ixte tanhmã amnhĩ nhĩpêx to nẽ tanhmã ijamaxpêr to hã ixpumunh kaxyw.

¹⁹ Nom koja ri amnhĩ to àmra o pa hkêt nẽ. Rÿ kãm amnhĩ to rax prãm o mẽ kãm tanhmã amnhĩ nhĩpêx to ho pa hkêt nẽ.

²⁰ âm kapêr xukaprĩ pix o koja mẽ hirerek xwÿnhjê mã kapêr o pa. Nẽ mẽ kot tee ri amnhĩ nhĩpêx ã amnhĩ pumunh xwÿnhjê kamã ukaprĩ o pa. Nẽ mẽ kot htÿx ri amnhĩ nhĩpêx o mẽ pa xwÿnhjê kutã nojarêt rãhã ho pa jakamã nhũm mẽ hpãnhã tãm amnhĩ nhĩpêx o pa. Koja ã amnhĩ nhĩpêx anhÿr o ri mẽ hkôt pa rãhã ra akupÿm mẽmoj piitã tãm haxwÿr pa.

²¹ ã kot amnhĩ nhĩpêx anhÿr o pa jakamã koja pika piitã hkôt mẽ pa xwÿnh kwÿjaja kukwak ri amnhĩ kaxyw Tĩrtũm kôt hamaxpêr nẽ hkôt amnhĩ xunhwÿ. Anẽ.

Na pre ã finat Ijaisja Tĩrtũm nhÿ hã kormã Jeju wrÿk nẽ kator kêt ri tanhmã kot amnhĩ nhĩpêx to ho pa hkukamã harênh nẽ hã kagà anẽ. Tã nhũm mẽ hwÿr wrÿ nẽ ã mẽ hkôt amnhĩ nhĩpêx anhÿr o pa.

*Jejus mē mēkarōmnuti wa harēnh
Makre 3.20-30; Rukre 11.14-23,
11.31-32, 12.10*

²² Tã nhũm prem Jejus wỳr mēhō myja o mō. Mēkarōmnuti kot hwỳr àr nē ho nohkre nē ho kapēr kêt xwỳnhhta nhũm mē hwỳr o mō. Hāmri nhũm omu nē nē mēkarōmnuti jano nē akupỹm ho mex kurê kumrēx nhũm akupỹm rīt mex nē akupỹm kapēr mex nē. ²³ Hāmri nhũm mē amnhĩ jaēr pē omu nē kamã no puma nē hã axpēn kukjēr o:

—Kokỹỹ. Jejus na hte ãm mē ho mex o mē ho mex o pa. Mãn kēp Tĩrtũm kot mē pahwỳr mēnh mã xwỳnhhta na nã? ã na hte ã amnhĩ nhĩpēx anhỹr o pa. Mãn kēp pahi finat Tawi kanrēhã tãmnhwỳta na nã? Anē.

²⁴ Nom nhũm Parijew nhō xwỳnhjaja ã Jejus kot amnhĩ nhĩpēx anhỹr ã omu nē kēp mēkarōmnuti hkwỳ hã hkamnhĩx. Jakamã mē kot hã axpēr kukjēr ã mē kuma nē mē kãm:

—Tk pēr hinhu nhĩkōōti nhỹ hã na hte mē nē amnhĩ kwỳjê japōx o pa. Anē.

Hinhu nhĩkōōti nhĩxi hō pē Satanasti nhũm prem ã Satanasti nhỹ hã Jejus kot amnhĩ nhĩpēx ã hkamnhĩx anē. ²⁵ Nhũm ra mē hamaxpēr kôt mē omunh mex jakamã mē kãm:

—Kwa mē inhma mē ate ixpē Satanasti hkwỳ hã ixkamnhĩx xwỳnhjaja. Koja pika nhō xwỳnhjaja axpēn kutã amnhĩ xunhwỳ nē axpu hāmri nē angrã nē ma ahpỹnhã ri pa. Hāmri nē amnhĩ krã hkôt ri tanhmã amnhĩ nhĩpēx to ho pa. Jakamã nhũm mē ò pahija mē hamãr kêt nē. Nē koja krĩ nhō xwỳnhjaja. Rỳ mē kot axpēn to hkwỳ xwỳnhjaja mēmoj tã axpēn kãm gryk nē axpēn kutã amnhĩ xunhwỳ. Hāmri nē ahpỹnhã awry hã pa nhũm mē ò pahija tee ri kãm mē hamãr prãm kaprỳ. Mo mē hkwỳjaja kot ri mē hamãr o pa? No koja pahija tãm amnhĩ nē amnhĩ kwỳjê janor kêt nē. ²⁶ Tã ja pyrã nē ixte Satanasti nhỹ hã tanhmã amnhĩ nhĩpēx to ho ri

ixpa ronhỹx pa ri mē nē amnhĩ kwỳjê janor kêt nē.

²⁷ —No mē akwỳjaja? Xà Satanasti nhỹ hã na htem mē nē mēkarōmnuti japōx o pa? Kēp apu pa ixte ÿ hã mē nē amnhĩ kwỳjê japōx ronhỹx mē akwỳjaja ixpyrà nē ÿ hã mē nē amnhĩ kwỳjê japōx o pa. Nã Tĩrtũm nhỹ hã mē ixte mē nē mē hapōx o ixpa kēnã. Jakamã mē ate ã ijarēnh anhỹrja mex kêt. ²⁸ Tĩrtũm Karō nhỹ hã ixte mē nē mē hapōx jakamã kwa mē ja hã ixpumu nē ixte mē ato amnhĩptār kaxyw Tĩrtũm kot mē awỳr inhmēnh kôt ixpumu kêt wehe. Pa na ka htem ijamãr o apa.

²⁹ —Satanastija àhpumunh tỳx jakamã na htem tee ri kēp hkôt mē kot amnhĩ xunhwỳr xwỳnhjê pytār kaxyw nhũm mē nē mē omunh mex nē. Tã nom ixàhpumunh tỳx o ixte Satanasti jakrenh par jakamã na pa hte kēp mē utã nhũm mē hpãnhã ixkôt ri amnhĩ nhĩpēx.

³⁰ —Ra mē amã ixkapēr mar prãm tã nom kormã ixkôt amnhĩ xunhwỳr kêt nē. Kwa wem ma amnhĩ to amōr gri nē tokyx ixkôt amnhĩ xunhwỳ kêt wehe. Kot kaj mē anhỹr kêt hāmri nē mē apē ixkutã amnhĩ xunhwỳr xwỳnh pyrãk o amnhĩ nhĩpēx.

³¹⁻³² —Nē koja mēhō ixkapēr ma nē kãm ixprãm kêt nhũm Tĩrtũm ixtã omu nom tokyx tanhmã ixtã ho hkôt nē. Koja kormã amnhĩ tã hamã. Karō kot axte kãm ijarēnh o amnhĩrīt nhũm jatã kot mar nē kãm ixprãm nē ixkôt amnhĩ xãm prãm xaj nhũm kormã amnhĩ tã hamã. Nom koja Karō xatã mē kãm tanhmã ixto amnhĩrīt to htã nhũm mē kuma nē ãm kuma nē te mē kēp amnhĩ jamak pro pyrãk. Jao ra Karō hã hpijaàm kêt o amnhĩ nhĩpēx. Mỳrapē koja Tĩrtũm nhỹrmã amnhĩ xwar te kēp amnhĩ jamak pro pyrãk o mē hipēx nhũm mē tee kãm amnhĩ kaprĩ kaprỳ. Hāmri nē amnhĩ xà htỳx kamã hamak o pa xatã wỳr ma pa nē kamã pa rãhã nē pa ho pa. Anē.

Mē pajamaxpēr xà hkôt tanhmã ri

mê pakapêr to

Rukre 6.43-45

³³ Nhũm Jejus arĩ Parijew nhõ xwýnhjê mã kapêr nê mê kãm:

—Nê kot kaj mê atõ anhõ mêmõ pàr nhũm amã ô mex nê. Ô rax nê. Ka omu nê akĩnh nê amnhĩm mex ã harê. No koja apê ô hkêt ka tee ri omu nê mex kêt ã harê. Na htem ã amnhĩm mêmõ xô hpàr pumunh kôt tanhmã kute hã harênh anê. Ja pyrã nê na htem tanhmã mê kot amnhĩ nhĩpêx to hã mê omunh kôt tanhmã mê harênh to. Mê kot amnhĩ tomnuj xwýnh ã mê harê rý mê kot amnhĩ to mex xwýnh ã mê harê.

³⁴⁻³⁵ —Nê koja mêmõ hamaxpêr mex nê hãmri nê kapêr mex o pa. Nom koja hamaxpêr punuj nê kapêr punuj pix o pa. Nê htýx ri tanhmã amnhĩ tomnuj to ho pa. Na htem ahpýnhã amnhĩ jamaxpêr xã hkôt tanhmã kapêr to ho pa. No mê kajaja na ka htem kagã xoprê jamaxpêr pyrãk o ajamaxpêr punuj pix o ri apa. Jao akapêr punuj nê. No tãm ajamaxpêr o tãm akapêr o ri apa hkêt nê. Na htem tanhmã hamaxpêr to xã hkôt tanhmã ri kapêr to ho pa. ³⁶⁻³⁷ Koja nhýrmã Tĩrtũm mê piitã tanhmã mê kapêr to hã mê mar xã hkôt tanhmã mê harênh to. Jakamã mê akapêr mex o mê apa xwýnhjaja koja mê amex ã mê ajarê. Nom mê atýx ri akapêr punuj o mê apa xwýnhjaja koja mê amex kêt ã mê ajarê. Hãmri nê mê akapêr punuj o apaja mýrapê mê atomnuj týx nê. Anê.

Jejus kot Jõhti jarênh

Makre 8.11-12; Rukre 11.29-32

³⁸ Hãmri nhũm Tĩrtũm kapêr tũm o mê ahkre xwýnh mê Parijew nhõ xwýnh kwýjaja mêmõj tã Jejus wý nê kãm:

—Kwa Pahihti. Mê inhmã aa mê ixte mêmõj pumunh kêt õ ho anê. Kot paj mê omu hãmri nê Tĩrtũm kot mê ixwýr amênh ã apumunh kurê kumrêx. Jakamã e mê inhmã mêmõj to anê nã. Anê.

³⁹ Hãmri nhũm mê kuma nê mê kãm:

—Tk. Pêr ãm mê ajamaxpêr punuj pix o na ka htem apa. Ixpê Tĩrtũm kot mê awýr inhmênh xwýnh tã mê ate ja hã ixpumunh kêt. Nê mê ate ja hã axpên mã ijarênh kêt tã ixte mê amã aa mêmõj pumunh kêt õ ho anhýr kaxyw hã ixwý. Nã pa mê amã ho anhýr kêt nê. Kormã. ãm amnepêm Jõhti kot tanhmã amnhĩ nhĩpêx toja pix kot paj mê amã harê.

⁴⁰ —Tĩrtũm nhý hã kapêr xwýnh Jõhtija amnepêm na pre tep rax kumrêxja htĩr rãhã kukrê. Nhũm õxãhkre kamã htĩr nê hkrĩ hã apkati axkrunêpxi hãmri nê htĩr rãhã õxãhkre rũm kato. Tã ixpê Tĩrtũm kot mê awýr inhmênh xwýnh kot paj nhýrmã kên kre kamã ixtyk nê inhnõr ã apkati axkrunêpxi. Jõhti hkĩnhã ixtyk kumrêx nê inhnõr ã apkati axkrunêpxi hãmri nhũm Tĩrtũm akupým ixto ixtĩr.

⁴¹ —Nê koja nhýrmã Tĩrtũm akupým mê htyk nê mê hikwý xwýnh piitã akupým mê ho htĩr hãmri nhũm mê piitã Inhĩpêxã mê wa ixkutã hkrĩ pa wa tanhmã mê harênh to. Tĩrtũm mê wa ixkuri mê htĩr tũm nê mê pa ho mê pa mã xwýnhjê hã mê hkwyjê jarê nê wa ixkuri mê pa ho mê pa hkêt xwýnhjê jarê. Mê piitã ã ahpýnhã mê harênh anê. Amarĩ mê pa xwýnhjaja nê mê õ pahijaja. Jakamã nhũm Nĩnĩwe nhõ xwýnhjaja tanhmã wa inhmã mê ajarênh to. Jõhti kot mê hwýr mõr nê mê kãm Tĩrtũm kapêr jarênh o pa xwýnhjaja nhũm mê tanhmã wa inhmã mê ajarênh to nê wa inhmã: “Na pre Jõhtija man mê inhõ krĩ hwýr mõ nê mê inhmã akapêr jarênh o ri mê ixkôt pa. Pa prem kuma nê mê ixte amnhĩ tomnuj kaga nê akôt amnhĩ xunhwýr kurê kumrêx Tĩrtũm. No or war akutã mê hkrĩ xwýnh kwý ata mê na pre Akra Jejus tãm mê hwýr mõ nê mê kãm kapêr o ri mê hkôt pa nhũm prem mar tã mê ixkĩnhã mê kot amnhĩ tomnuj kaga nê hkôt amnhĩ xunhwýr kêt nê. Mê ixkurom mê kot Akra mar tã amnhĩ kaxyw kãm hamaxpêr kêt nê.” Anhýr o koja mê wa inhmã mê ajarê

ka mẽ tee ri mẽ ama nẽ ra mẽ amã ma nẽ. Nom ãm mẽ amã ma kaprý.

⁴² —Nẽ sur kãm mẽ õ pahi nitita koja mẽ hpãnhã tanhmã wa inhmã mẽ ajarẽnh to nẽ wa inhmã: “Na pa pre inhmã pahi Sarumãw kot war anhỹ hã àhpumunh týx ã harẽnh ma hãmri nẽ inhmã mar prãm xàj ma awry hã õ pika hwýr mõ nẽ omu nẽ kapër ma. Hãmri nẽ ma akupým inhõ pika hwýr mõ nẽ ixkwýjê mã àhpumunh týx ã harẽnh o ri ixpa. Tã Akra Jejus na kot àhpumunh týx o pahi Sarumãw jakrenh tã or war akutã mẽ hkrĩ xwýnh kwý ata mẽ. Mẽ kot kapër mar tã ixkĩnhã kãm mar prãm kêt. Na prem kuma nẽ ãm kuma.” Anhỹr o koja wa inhmã mẽ ajarẽ. Hãmri nẽ ja hã mẽ amã akir ka mẽ tee ri mar o akrĩ nẽ amnhĩ kamã agryk o akrĩ. Nom ãm amnhĩ kamã agryk kaprý. Anẽ.

Mẽkarõmnuti kot tanhmã mẽhõ hto hã harẽnh

Rukre 11.24-26

⁴³ Nhũm Jejus arĩ Parijew nhõ xwýnhjê mẽ Tĩrtũm kapër tũm o mẽ ahkre xwýnhjê mã kapër nẽ mẽ kãm:

—Te mẽ ate ixte mẽhõ nẽ mẽkarõmnuti japõx xwýnhhta pyrãk. Nhũm te kęp kator nẽ ma htẽm pyrãk. Nẽ nhỹri amgrã kamã ri pa pyrãk. Koja ja kęp omnuj nhũm tee ri kamã nhỹri hkõt xà japër o pa. Nom tee ri hapër o pa kaprý. ⁴⁴ Hãmri nẽ tanhmã amnhĩ kukamã hamaxpër to nẽ hamaxpër o: “E kot paj ma akupým mẽ kot nẽ ixkator xwýnhhta wýr tẽ nẽ axà nẽ kamã mãn ri ixpa.” ⁴⁵ Anhỹr o hamaxpër hãmri nẽ ma akupým hwýr tẽ. Nom kormã akupým hwýr àr kêt ri nhũm kamã amrakati nẽ ri pa. Jakamã nhũm akupým hwýr axà. Nom ahte hwýr àr kêt nẽ. Amnhĩ kõt hkwyjê ho 7 nẽ hwýr mẽ ho gjêx pa. Mẽ kęp 7jaja nẽ wamta mẽ nhũm mẽ piitã hwýr gjêx pa. No mẽ kęp 7jaja na omnuj týx o kot wamta jakrenh jakamã nhũm mẽ kot hwýr gjêx xwýnhhta mẽ ý hã ra amnhĩ tomnuj týx nẽ oprê htýx o pa. Wam pyxire kot hwýr àrta nhỹ hã nhũm

amnhĩ tomnuj o ri pa nom kawax pê oprê. Tã nhũm ra axte hwýr mẽ ohtõ nẽ gjêxta nhỹ hã hãmri oprê htýx kumrêx. Ja pyrã nẽ kot kaj mẽ tokyx ixkõt amnhĩ xunhwýr kêt nẽ hãmri nẽ amnhĩ tomnuj týx pix o ri apa. Anẽ.

Jejus kot tanhmã hkwyjê jarẽnh to hã harẽnh

⁴⁶ Nhũm Jejus arĩ mẽ ahkre ho nhỹ. Rõm nhũm katorxà nẽ htõjaja nhỹhỹnh hwýr mõn pøj. Nom kormã hwýr gjêx kêt nẽ. Mẽ kot hã htu rax jakamã nhũm mẽ tee ri hwýr gjêx kaxyw kormã kapõt ã hã mẽ omunh o kuhê. ⁴⁷ Hãmri nhũm mẽhõja kapõt ã mẽ omu nẽ Jejus mã mẽ harẽ nẽ kãm:

—Kwa Pahihti. Ota akatorxà mẽ atõjaja awýr mõn pøj nẽ tee àr kaxyw. O mũj mẽ kapõt ã kuhê. Anẽ.

⁴⁸⁻⁵⁰ Hãmri nhũm kuma nẽ kãm:

—Tõe. Nà kot pa ixkato nẽ mẽ omu. Inhmã mẽ hapêê. Nom kot kaj mẽ atõ Tĩrtũm kapër ma nẽ hkõt amnhĩ xãm nẽ hkõt amnhĩ nhĩpêx. Hã kot kaj te apê ixtõ rý ixkatorxà pyrãk o pu mẽ axpẽn nhĩpêx o ri papa. Pa inhmã ixkatorxà nẽ ixtõjê japê pyrã nẽ mãânẽn inhmã mẽ ajapê nẽ. Anẽ.

13

Mẽmo hy hkre xwýnh jarẽnh

Matêwre 13.18-23; Makre 4.1-9; Rukre 8.4-8

¹ Hãmri nhũm Jejus mẽ kãm kapër pa nẽ ixkre rũm kato nẽ ma himõ rax wýr tẽ nẽ gõ mýri mẽ kãm ujarẽnh kaxyw nhỹ. Pa mẽ ixpê hkõt mẽ ixpa ho ixpa xwýnhjaja ma hkõt mra. ²⁻³ Hãmri nẽ gõta wýr pøj nẽ mýri ixkrĩ. Nhũm mẽ Jejus ã htu rax nẽ nhũm tee ri mẽ omunh o nhỹ. Hãmri nẽ hamaxpër nẽ kãnhmã xa nẽ tẽ nẽ pàr krem axà nẽ pàr kre kamã mütũm awry rũm mẽ ahkre ho nhỹ nhũm mẽ piitã omunh nẽ mar mex o hkrĩ. Nhũm mẽ kãm ujarẽnh o mẽ ahkre ho nhỹ. Nom mẽ kãm tãm ujarẽnh kêt nẽ. Mẽ kot Tĩrtũm kapër mar nẽ tanhmã hkõt amnhĩ nhĩpêx to ho paja nhũm hã kuxi nẽ mẽ kãm harẽnh o nhỹ nhũm mẽ amgrã kamã kýx pê mar o hkrĩ. Nhũm mẽ kãm:

⁴ —E mẽ inhma. Koja mẽhõ ma pur mã mõi mẽ pur kãm mẽmo hy ho ukapêr o ri pa. Nom nhũm hy piitã amex kãm rôrôk kêt mẽ. Koja hkwyja ahpyñhã nhỹri rôrôk. Kwỳ aptỳx kãm rôrôk nhũm kuwênhre omu mẽ hwỳr mra mẽ hkrêr pa.

⁵ —Nẽ koja kên kãm hkwy rôrôk mẽ ra higrõt kutã nojarêt mẽ higrõt pa. Nom nhũm kamã aptỳx mẽ kêp pika hkryre. ⁶ Jakamã nhũm higrõt nhũm hã myt apha mẽ arigro htỳx mẽ nhũm grã pa. Harê hkryre jakamã grã pa.

⁷ —Nẽ koja mrônhi kamã hkwy rôrôk mẽ higrõt tã no nhũm utija kêp amýtã nhũm ô hkêt mẽ.

⁸ —No kêt hirã kamã pika mex kãm rôrôk xwỳnhja hirã kamã rôrôk jakamã higrõt mex mẽ piitã ô rũnh mẽ. Kamã ô hkwy kêp 30 mẽ kamã hkwy kêp 60 mẽ kamã hkwy kêp 100. ã mẽ ujarênh kot anhỹr. ⁹ Kwa kêr ka mẽ ixujarênhja ma mẽ kãm ajamaxpêr tỳx rãhã ho apa. Anẽ.

Mẽmo kaxyw Jejus kot mẽ ujarênh o mẽ ahkre

Makre 4.10-25; Rukre 8.9-15

¹⁰ Hãmri pa mẽ ixpê Jejus kôt mẽ ixpa ho ixpa xwỳnhjaja Jejus kot mẽ kãm ã ujarênh anhỹrja ã kuma mẽ tee ri hkukamã ijamaxpêr. Hãmri mẽ hã hkukja mẽ kãm:

—Kwa axujarênhhta na pa mẽ ixprĩ hã hkôt mẽmoj pumunh kêt mẽ. Mon ka hte ãm mẽ ujarênh pix o mẽ ahkre? Anẽ.

¹¹ Hãmri nhũm mẽ inhma:

—Tõe. Nã kot paj mẽ amã harê. Tirtũm kãm mẽ ate aprĩ hã mar prãm jakamã kot paj ixprĩ hã mẽ amã harê. Mẽ kot amnhĩ tomnuj kaga nhũm Tirtũm kot ja hã mẽ omunh mẽ mẽ ho hkra. Ja na pa harê. No mũjjaja mẽ akĩnhã kãm ja mar prãm kêt jakamã na htem ixujarênhja ma mẽ ãm kuma mẽ htỳx ri pa.

¹² —No kêt mẽ kajaja na ka mẽ ixkôt ri apa ho apa. Nẽ xatã ixkapêr mar o apa jakamã na ka mẽ aprĩ hã ixkapêr ma. Tã mẽ ate ixkôt amnhĩ nhĩpêx o apa jakamã na pa tanhmã mẽ akrã hto ka mẽ aprĩ hã mar mex o mõi.

No mẽ kot ixkapêr mar mẽ ãm mar xwỳnhjaja na mẽ akĩnhã inhmar tỳx kêt mẽ. Jakamã nhũm Tirtũm tanhmã mẽ hkrã hto nhũm mẽ hã no hkêt tokyx anẽ htỳx ri pa.

¹³ “Ixte mẽ kãm aa mẽ kot mẽmoj pumunh kêt kwỳ ho anhỹr rax tã nhũm mẽ omu mẽ ãm omu. Nẽ ixte amnhĩ nhĩpêxja nhũm mẽ kãm hkĩnh kêt mẽ. Nẽ mẽ kot ixkapêr mar tã ãm inhma mẽ kãm hprĩ hã inhmar prãm kêt mẽ.”

—Jakamã na pa hte ã mẽ kãm mẽmoj te ho tãm pyrã mẽ harê no ãm hã haxwỳ mẽ mẽ kãm ixujarênh anẽ.

¹⁴⁻¹⁵ —Na pre ra Tirtũm nhỹ hã kapêr o pa xwỳnh Ijaisja amnepêm mẽ hkukamã tanhmã mẽ harênh to mẽ hã kagã. Mẽ kot inhmar mẽ ãm inhmar xwỳnhjê jarê mẽ tanhmã mẽ hkukamã mẽ harênh to mẽ mẽ harênh o:

Koja mẽ ujarênh mex mar pymaj amnhĩ jamak pro mẽ amnhĩ no hpro mẽ hkôt hamaxpêr kêt mẽ. Jakamã koja mẽ kãm mẽ kot amnhĩ nhĩpêx mex prãm kêt mẽ harênhja ma mẽ ãm kuma. Nẽ omu mẽ ãm omu. Mẽ kãm hprãm kêt jakamã koja mẽ ã amnhĩ nhĩpêx anẽ. ã mẽ kot amnhĩ nhĩpêx anhỹr kêt ronhỹx mẽ ra Tirtũm kapêr ma mẽ hkôt amnhĩ xunhwỳ. Hãmri nhũm amnhĩ tã mẽ omu mẽ mẽ nẽ mẽ kot amnhĩ tomnuj rênh pa. Hãmri nhũm mẽ hkôt amnhĩ nhĩpêx mex mẽ kapêr mar mex o pa. Tã no nhũm mẽ ã amnhĩ nhĩpêx anhỹr kêt mẽ. Anẽ.

—ã Ijaisja mẽ hkukamã mẽ harê mẽ mẽ hã kagã anẽ.

¹⁶ —No kêt mẽ kajaja na ka htem ano ho ixte tanhmã amnhĩ nhĩpêx to ho ixpa hã ixpumunh o ixkôt apa. Nẽ mẽ ajamak o ixkapêr mar o ri ixkôt apa. ¹⁷ Amnepêm mẽ akukamã pahijaja mẽ Tirtũm nhỹ hã mẽ kãm kapêr o ri mẽ pa xwỳnhjaja na prem kãm ixpumunh prãm tỳx o pa. Nẽ mẽ kãm ixkapêr mar prãm tỳx o pa. No ãm mẽ

akĩnhã ixpumunh nê ixkapêr mar kêt rãhã htyk pa. Kormã ixwryk nê jar ixkator kêt jakamã na prem arĩ htĩr nê pa ri ixpumunh kêt rãhã ra htyk pa. Æm mẽ kapxipixjaja na ka mẽ mÿr pê ixte amnhĩ nhĩpêx ã ixpumunh nê ixkapêr mar o ixkôt apa. Tã mẽ kurom mẽ ate ano ho ixpumunh nê ajamak o ixkapêr mar o ixkôt apa jakamã kwa mẽ ja hã amnhĩ pumu nê tãm amnhĩ nhĩpêx o ri apa pê akĩnh nê ri apa. Anê.

Nhũm pre ã Jejus mẽ ixpê hkôt ixpa ho ixpa xwÿnhjê mã kapêr anê.

*Jejus kot hprĩ hã mẽmo hy jarênh
Makre 4.13-20; Rukre 8.11-15*

¹⁸ Hãmri nhũm Jejus mẽ ixpê hkôt ixpa ho ixpa xwÿnhjê mã hprĩ hã mẽ ujarênhhta jarê nê mẽ inhmã:

—E kot paj ixprĩ hã mẽ amã mẽmo hy ho ukapêr xwÿnh ã ixujarênhhta jarê ka mẽ inhma. Nà mẽmo hyta te kêp Tĩrtũm kapêr pyræk. Nê ahpÿnhã mẽmo hy rôrøk ã pikata te kêp mẽ apê panhĩ ahpÿnhã mẽ ate Tĩrtũm kapêr mar nê ahpÿnhã hkôt tanhmã amnhĩ nhĩpêx tota pyræk. ¹⁹ Jakamã mẽ kot mar xwÿnh kwÿjjaja te mẽ kot aptÿx kãm hy rôrøk nhũm kuwênh kot hwÿr mrrar nê hkrêr par xwÿnhhta pyræk. Jao Tĩrtũm kapêr ma no nhũm Satanasti te kuwênh kot hy krêr parta pyræk nê mẽ kot mar nê amnhĩ kaxyw hkôt hamaxpêr nê hkôt amnhĩ xunhwÿr pymaj hãmri ra tanhmã kapêrja nê mẽ hkrã hto. Jakamã nhũm mẽ kuma nom ho hamakêtkati tokyx anê nê axte kãm hamaxpêr kêt nê pa.

²⁰ —Nê mẽ kot mar xwÿnh kwÿjjaja te mẽ kot kênre kamã hy hkwÿ rôrøk nê higrôt nê grà par tokyx anhÿr xwÿnhhta pyræk. Jao Tĩrtũm kapêr ma nê hkĩnh nê. Nê kãm mar prãm nê. ²¹ Tã nhũm mēhō Tĩrtũm nê tanhmã mẽ kãm kapêr to nhũm mẽ kuma nê Tĩrtũm kaga. Te mẽmo hy higrôt nom ra grà par tokyx anhÿrta pyræk.

²² —Nê mẽ kot mar xwÿnh kwÿjjaja te mrônhi kamã hy hkwÿ rôrøk nê higrôt nhũm mrônhi kot kêp àmnar xwÿnhhta pyræk. Jao mẽ kãm Tĩrtũm

kapêr mar prãm tã mãânên kãm mẽ hikukrêx rũnh nê mẽ hikàxpore rũnh prãm. Hãmri nê ãm ja pix kukamã hamaxpêr o pa. Nê ja gryk ã axte Tĩrtũm kapêr mã hamaxpêr nê hkôt amnhĩ nhĩpêx kêt nê.

²³ —Nê mẽ kot mar xwÿnh kwÿjjaja te hirã kamã pika mex kãm hy hkwÿ rôrøk nê higrôt nê ô rũnhhta pyræk. Jao ixkapêr ma nê amnhĩ krã him hagjênh tÿx nê. Nê ixkôt ri amnhĩ nhĩpêx mex rãhã ho pa. Jakamã te mẽmo hy ô rũnh nê ô mex pyræk o amnhĩ nhĩpêx. E ã ixujarênhja kot anhÿr. Anê.

Harôj kaàkre jarênh

Matêwre 13.36-43; Makre 4.26-29

²⁴ Nhũm Jejus axte mẽ kot mar o hkrĩ xwÿnhjê mã awjarê nom hprĩ hã mẽ kãm ujarênh kêt nê. Axte mẽ kãm mẽmoj tã kuxi nê awjarê nê mẽ kãm:

—Nà nhÿrmã Tĩrtũm mẽ kot kormã htĩr ri tanhmã amnhĩ nhĩpêx to ho pa hã mẽ omunh xà hkôt ahpÿnhã tanhmã mẽ harênh toja te mẽ ujarênh ja pyræk. Kojã mēhō harôj y mex o ukapêr kaxyw ma hpur mã mō. Hãmri nê hkre hpa nê ma akupÿm mō.

²⁵ Tã nhũm kamàt nhũm ra gôr nê nō. Hãmri nhũm kãm hkurê xwÿnhja ma kêp ihpur wÿr tē nê harôj mexta nhĩpy axtem nê kêp harôj kaàkre hkre. Harôj kaàkreja te kot harôj mex pyræk nom mẽ kot hkur kêt. Tã nhũm kêp harôj y mex nhĩpy hkre hpa hãmri nê ma akupÿm tē.

²⁶ —Tã nhũm hamē higrôt nê anhĩpê ô. ²⁷ Nhũm kãm mẽ àpênh xwÿnhjaja tee ri harôj mex kaêx ã harôj kaàkreta pumu nê hpur nhō dōn wÿr tē nê kãm harē nê kãm: “Kwa ate harôj mex pix kre htã pêr hkaêx ã harôj kaàkre mãânên kato. Kwa tanhmã na pre amnhĩ to nê hkaêx ã kato?” Anê. ²⁸ Hãmri nhũm tee ri mẽ kuma nê mẽ kãm: “Nà mēhō kãm ixkurê xwÿnh na pre ã inhĩpêx anê.” Anê hãmri nhũm kãm mẽ àpênh xwÿnhhta kãm: “Kwa xà kot paj mẽ tokyx ma hwÿr mra nê nê harênh pa nê kurē nà?” Anê. ²⁹ Nhũm mẽ kãm: “Nà kot kaj mẽ anê

nê harôj mexta mê ho apimràatã ixpê harênh pa. ³⁰ Kwâr māmri harôj mex mê hpimràatã ô hpa măn. Ka mê rî ma hwÿr mra nê harôj kaàkre kumrêx jarênh pa nê axpên tâ harê ho ê nê ma o mra nê hpôk. Hāmri nê rî kormã hpānhã harôj mex jakà nê ho akuprô nê ô ho mra nê ixkre kamã haxwÿ.” Anê. Æ mê ujarênh kot anhÿr.

Anhÿr o mê kãm kapêr.

Jejus te kot mêmō hy hkryre pyrāk ã harênh

Makre 4.30-32; Rukre 13.18-19

³¹⁻³² Hāmri nhūm Jejus arî mê kãm amnhî tâ kuxi nê ujarênh o nhÿ. Nê tanhmã mê kãm amnhî tâ ujarênh to nê mê kãm:

–Nà Tirtūm kot mê awÿr ixte mê ato amnhîptār kaxyw inhmēnh ã ijarênhja. Te ixte mêmō hy pixire nhūm mê kot hkre nhūm higrôt pyrāk. Koja gaa nê hprêk. Hāmri nê hpa anhgrã nhūm kuwēnhre hwÿr mra nê hōptî kamã amnhîm haê nhîpêx nê kamã hikwÿ. Tã kot paj nhÿrmã mêmō hy jarênhhta pyrã nê ixpyxi htã pika piitã hkôt mê ho amnhîptã nê mê omunh mex rãhã ho ixpa. Anê.

Jejus te kot pãwti kaxkrit xà pyrāk ã harênh

Rukre 13.20-21

³³ Nhūm Jejus arî mê kãm amnhî tâ kuxi nê ujarênh o nhÿ nê mê kãm:

–E kot pa hpānhã mê amã tanhmã pãwti kaxkrit xà jarênh to ka mê inhma. Na hte mēnijaja pãwti nhîpêx kaxyw hāmri nê kaxkrit xà hkwy ho grire nê kupy nê trik xôm mê ho ahkã. Hāmri nê ho pãwti nhîpêx. Kaxkrit xàja grire htã pãwti piitã ho kaxkrit mex nê. Tã ja pyrã nê ixpyxi htã koja mê nhÿrmã pika piitã hkôt ixkôt amnhî nhîpêx mex o pa.

Anhÿr o mê kãm amnhî jarê.

Jejus kot mê ujarênh pix kãm mê ahkre hã harênh

Makre 4.33-34

³⁴ Na pre ã Jejusja mê ujarênh o mê ahkre ho pa anê. Æ mê ujarênh pix o mê ahkre ho pa. Te tãm ujarênh pyrāk no ãm mêmōj tã haxwÿ rÿ

amnhî tâ haxwÿ nê mê kãm tanhmã amnhî jarênh to. ³⁵ ã kot mê ahkre ho pa anhÿr kukamã na pre ra amnepēm Tirtūm nhÿ hã kapêr o mê pa xwÿnhjê hōja harê nê hã kagã. Te Jejus tãm tanhmã amnhî jarênh to pyrāk o hkukamã harê nê hã kagã nê hã hkagã ho:

Kot paj mê kãm ixujarênh pix kãm mê ahkre ho ri ixpa. Mêmōj te ho tãm pyrã nê harê nom mêmōj tã haxwÿ nê tanhmã mê kãm ixujarênh to. Nê aa mê kot mêmōj mar kêt xwÿnh kwÿ kot paj mê kãm harê kê mê kuma. Anê.

Jejus kot hprî hã harôj kaàkre jarênh Matêwre 13.24-30, 13.47-50

³⁶ Tã nhūm Jejus mê kãm ujarênh pa nê mê kure nê ma tēn ixkrem axã. Hāmri pa mê ixpê hkôt ixpa ho ixpa xwÿnhjaja ma hkôt mra nê ixkrem agjê. Hāmri nê harôj kaàkre hã ujarênhhta ã hkukja nê kãm:

–Kwa aprî hã mê inhmã harôj kaàkre jarênhhta jarê nã. Na pa mê kormã ixprî hã mar mex kêt nê. Anê.

³⁷ Hāmri nhūm mê inhmã:

–Tōe pa ixprî hã mê amã harê. Æm paa.

Ixpê Tirtūm kot mê awÿr inhmēnh xwÿnh te ixte mêmō hy mex o ukapêr xwÿnhhta pyrāk.

³⁸ Nê purta te kēp pika piitã pyrāk. Nê harôj mexta te ra mê ate ixkôt amnhî xunhwÿr nê ixkôt amnhî nhîpêx o apa xwÿnhjê pyrāk.

Nê harôj kaàkreta te mê kot Satanasti hkôt amnhî nhîpêx o mê pa xwÿnhjê pyrāk.

³⁹ Nê kot harôj kaàkre hkre xwÿnhhta te Satanasti pyrāk.

Nê harôj jakār xà hã arîgrota te Tirtūm kot ahpÿnhã tanhmã mê harênh to xà hã arîgrota pyrāk.

Nê mê kot harôj jakār xwÿnhjaja te Tirtūm kapêr o wrÿk xwÿnhjê pyrāk.

⁴⁰ Mē ujarênhja kamã na prem harôj kaàkre kumrêx jarê nê hã hpôk jarê. Ja pyrã nê koja nhÿrmã Tirtūm kot

ahpÿnhã tanhmã mẽ harênh to xà hã arĩgrota ã hãmri ã mẽ kot amnhĩ tomnuj o mẽ pa xwÿnhjê nhĩpêx anê.

⁴¹ —Kot paj nhÿrmã kãm mẽ piitã mẽ ho amnhĩptâr kaxyw hãmri nê kapêr o mẽ wrÿk xwÿnhjê mã anê nhũm mẽ ma mran wrÿ nê mẽ kot amnhĩ tomnuj xwÿnhjê pix o akuprô. Nê mẽ kot nhãm mẽ hkwyjê kot mẽ urak nê tanhmã amnhĩ tomnuj to ho pa kaxyw mẽ kãm anhÿr xwÿnhjaja nhũm mẽ mãânên mẽ ho akuprô.
⁴² Hãmri nê mẽ ho pikuprôn pa nê te mẽ kot harôj kaàkreta nhĩpêx pyrã nê kuwy kamã mẽ rên pa. Hãmri nhũm mẽ kamã amnhĩ xà htÿx kamã hamak rãhã nê pa ho pa. Nê amnhĩ xà htÿx ã maj tee ri mÿr rãhã ho pa. Nê tee ri amnhĩ xà hã maj amnhĩ nham o axpên kamnhar tÿx kaprÿ.

⁴³ —No ixkôt mẽ kot amnhĩ nhĩpêx xwÿnhjaja koja mẽ mẽ kurom mex kumrêx nê pa. Kot paj mẽ ho mex rax nê nhũm mẽ mex rãhã nê pa ho pa. Tirtũm kot kormã pika nyw nhĩpêx mã xwÿnhhta kamã nhũm mẽ mex kumrêx nê pa ho pa. E kêr ka mẽ ixujarênhja ma nê kãm ajamaxpêr tÿx rãhã ho apa. Anê.

Mẽ hikukrêx mex o hpimxur jarênh Piripos 3.7

⁴⁴ Nhũm Jejus arĩ mẽ ixpiitã mẽ inhmã tanhmã ujarênh to. Nom hprĩ hã ujarênh kêt nê. Kê axte mẽmoj tã kuxi nê mẽ inhmã tanhmã ujarênh to nê mẽ inhmã:

—Mê ate ixkôt amnhĩ xunhwÿr xwÿnhjaja te mẽ apê mẽ hikukrêx mex ã pika japrôr xwÿnhhta pyrãk. Koja mẽhõ mẽ hikukrêx mex jamÿ nê o tẽ nê nhÿri amnhĩm ho amũxu. Kaxyw kakwÿ nê kamã hagjê nê hity hpa nê ma akupÿm tẽ. Hãmri nhũm jãã nhũm mẽhõ tẽn kãm kato. Hã pikata kakwÿ nê kãm kato nê omu nê hkĩnh nê. Nê hamaxpêr o: “E pa ma tẽ nê inhôrkwÿ kamã ixkukrêx piitã ho wênê hpa nê hpãnhã kàxpore jamÿ nê ho amnhĩm mẽ hikukrêx mex ã pika japrô nê amnhĩm mẽmoj mexta o ixarĩk pa.” Anhÿr o hamaxpêr nê akupÿm hity

hpa nê ma akupÿm tẽ. Hãmri nê mẽmoj mexta gryk ã ò mẽmoj piitã ho wênê hpa. Hikukrêx nê ôrkwy nhũm piitã ho wênê hpa. Hãmri nê hpãnhã kàxpore jamÿ nê ma o tẽ nê amnhĩm pikata japrô. Hãmri nê ma akupÿm hwÿr tẽ nê kamã mẽ hikukrêx mexta kwÿrnh pa nê ho ò kumrêx.

—Tã te mẽ ate mẽhõ kot ã amnhĩ nhĩpêx anhÿr xwÿnhhta pyrãk. Na ka mẽ urak nê inhgryk ã amnhĩ tomnuj kaga hpa nê hpãnhã ixkôt amnhĩ nhĩpêx. Te mẽhõ kot mẽmo mẽ hikukrêx mex gryk ã hikukrêx tũm piitã kaga hpar nê mẽ hikukrêx mex o hpimxur xà hã pikata japrôr pyrãk. Anê.

Mẽhõ kot kên jaxênh japrôr jarênh

⁴⁵ Nhũm Jejus arĩ mẽ inhmã awjarê nê mẽ inhmã:

—Nê ja. Na htem kãm hkĩnh nê hamakêtkati nê ri hpa hprãm xaj Tirtũm kôt amnhĩ xunhwÿ nê hkôt ri amnhĩ nhĩpêx rãhã ho pa. Te mẽhõ my kãm kên jaxênh mex prãm nê ma ri hapêr o pa xwÿnhhta pyrãk. ⁴⁶ Nê ra nhÿri omu nê ma tẽ nê prês ã mẽ hkukja. Nhũm mẽ kãm hã ho ohtô nê harê nhũm ma akupÿm tẽ nê kãm ho ò hprãm xaj hikukrêx piitã ho wênê hpa. Hãmri nê kàxpore jamÿ nê o tẽ nê amnhĩm ho haprô. Kên jaxênh mexta pix gryk ã hikukrêx piitã ho wênê hpa nê hpãnhã ho amnhĩm haprô.

—Tã ja pyrã nê na ka htem amex nê ajamakêtkati nê axamnhĩx ri apa hprãm xaj ixkôt amnhĩ xunhwÿ nê ixkôt pix mã amnhĩ nhĩpêx o apa. Anê.

Kryhti jarênh

Matêwre 13.24-30, 13.36-43

⁴⁷⁻⁴⁸ Nhũm Jejus arĩ mẽ inhmã awjarê nê mẽ inhmã:

—E Tirtũm kot nhÿrmã tanhmã mẽ harênh to xà hã arĩgro kot paj ixprĩ hã tanhmã mẽ amã harênh to. Te ho mẽmyjaja kot himô kamã kryhti rên pa pyrãk. Koja mẽ gôx kãm kumê nê akupÿm ho api nhũm kamã tep ohtô nê. Nhũm omu nê kÿx pê amgrã kamã hkapĩ nê ahpÿnhã ri tanhmã kamã kute kawrà. Nê kamã mex kawrà

nê kawà kamã kugjê nê mẽ kot hkur kêtja nhũm nhãm kurê. ⁴⁹ Ja pyrã nê Tirtũm kot ahpÿnhã ri tanhmã mẽ kot amnhĩ nhĩpêx to hã mẽ omunh xà hkôt tanhmã mẽ hipêx to kaxyw arĩgrota ã ã mẽ hipêx anê. Koja kapêr o mẽ wrÿk xwÿnhjaja mẽ kot hkôt amnhĩ xunhwÿr xwÿnhjê nê mẽ kot amnhĩ tomnuj o mẽ pa xwÿnhjê kawrà hpa. ⁵⁰ Nê te mẽ kot tep mex nê tep punu kawrà nê nhãm rênhta pyrãk o mẽ hipêx nê ma kuwy hwÿr mẽ o mra nê kamã mẽ kurê. Nhũm mẽ tee ri amnhĩ xà htÿx ã maj amÿra nê tee ri amnhĩ nhĩpêx kaprÿ. Anê.

Nhũm pre ã Jejusja axte mẽ ixpê hkôt mẽ ixpa ho mẽ ixpa xwÿnhjê mã ujarênh anê. ⁵¹ Hãmri nê mẽ inhmã:

—E xàn ka mẽ atã aprĩ hã ixu-jarênhhta ma nà?

Anê pa mẽ kãm:

—Tÿ. Nà na pa mẽ atã ixprĩ hã mar mex nê. Anê.

⁵² Hãmri nhũm mẽ inhmã:

—Tõe. Nà ãm hãmri. Na ka xep mẽ ra ixte mẽ ahkre nywta mar mex nê. Nê mẽ akwÿjaja mãânên Tirtũm kapêr tũm mar mex nê. Te mẽ apê mēhõ apkur xà rax pyrã nê ma ho mẽ piitã mẽ hipêx o ri mẽ hkôt paja pyrãk. Ja pyrã nê kêr ka mẽ ma mẽ piitã mẽ hkôt Tirtũm mẽ wa ixkapêr o mẽ ahkre ho ri mẽ hkôt apa. Anê.

Najare nhõ xwÿnhjaja kot Jejus kaga hã mẽ harênh

Makre 6.1-6; Rukre 4.16-30; Juãw 1.11

⁵³ ã Jejus mẽ inhmã ujarênh par anê. ⁵⁴ Hãmri nê ma akupÿm Najare hwÿr mō nê Tirtũm kapêr o mẽ ahkre xà hã ixkre hwÿr tē nê axà nê mẽ ahkre ho nhÿ. Nhũm mẽ amnhĩ jaêr pē tanhmã kot mẽ ahkre hto hã kuma nê tee ri hkukamã hamaxpêr nê axpên mã:

—Tk. Kwa kêp mẽ panhĩõ htã tanhmã kot we amnhĩ to nê ã àhpumunh tÿx kôt mẽ pamã kapêr anê nê ri mẽ kãm aa mẽ kot mẽmoj pumunh kêt kwÿ ho anhÿr o pa? ⁵⁵⁻⁵⁶ Na pre mẽ panoo mã hprêk nhũm mẽ pahte pahprĩ hã hkwÿjê pumunh.

Kêp pĩ kuprãr xwÿnh Juje mẽ hprõ Marir wa hkraa. Nê kêp Xiakre nê Juje nê Simãw nê Jut mẽ htõõ. Nê htõxjaja jar mẽ pakamã pa nhũm mẽ pahte mẽ piitã mẽ omunh mex kênã kot kêt we mẽ kurom ã àhpumunh tÿx anê. Anê.

⁵⁷ Hãmri nê kamã gryk nê hkaga. Hãmri nhũm tee ri amnhĩ tã mẽ omu nê mẽ kãm:

—Nà Tirtũm nhÿ hã kapêr jarênh o mẽ pa xwÿnhjaja na htem krĩ hkwÿ kamã kãm mẽ mar prãm nê. Nom õ krĩ kamã mẽ kot karãre rũm hprêk kãm omunh xwÿnhjaja na htem kuma nê ãm kuma. Anê.

⁵⁸ Tã mẽ kot amnhĩ kaxyw hkôt hamaxpêr kêt jakamã nhũm tee ri mẽ kãm aa mẽ kot mẽmoj pumunh kêt kwÿ ho anhÿr rax prãm. No ãm mẽ kãm mẽmoj to grêre nê ho anê.

14

Mẽ kot Juãw Paxis pĩr ã mẽ harênh Makre 6.14-29; Rukre 9.7-9

¹ Tã nhũm pika pē Garirej kamã mẽõ pahihtĩ Erox Jejus jarênh ma ² nê tee ri hkukamã hamaxpêr nê hã õ pōristi mã kapêr nê mẽ kãm:

—Kwa pêr Juãw Paxis na nà? Ra ixte hã ixãmnhên nhũm mẽ kot hpĩr tã mã tanhmã amnhĩ to nê akupÿm htĩr. Nà pêr tãm kênã. Jakamã na hte aa mẽ kot mẽmoj pumunh kêt kwÿ ho anhÿr o pa. Anê.

³⁻⁵ Na pre ra Erox htõ pē hprõptàn ho hprõ. Tõ arĩ htĩr tã nhũm axtem nê kêp utã nê ho hprõ. Hãmri nhũm Juãw Paxisja harênh ma nê hã kãm akir nê kãm:

—Kwa Eroxis kêp atõ hprõ kênã na ka kêt axtem nê kêp utã nê ho aprõ. Kwa ja omnuj tÿx o omnuj tÿx. Anê.

Hãmri nhũm amnhĩ tã kuma nê kamã gryk nê kot hpĩr kaxyw. Tã nom nhũm ljaew kot axpên mã kêp Tirtũm nhÿ hã kapêr jarênh xwÿnh ã harênh jakamã nhũm mẽ umaj hpĩr kêt nê. ãm ho prês nê haxà nhũm hkrĩ ho hkrĩ.

⁶ Tã nhũm jãã nhũm Erox kator ã arĩgro kato nhũm mẽ hã akuprõ nê hã hkĩnh. Hãmri nhũm hprõ nyw kra

niti mē hwÿr axà nē ahte mē hipôk ri mē kām gre. Mē kot omunh nē kamã hkurē kaxyw nhũm mē noo mã hpi-jaàm kêt nē mē kām gre o xa. Hãmri nhũm pahî Eroxo omu nhũm ja kām mex nē nhũm hkĩnh nē kamã nopyma nē. ⁷ Hãmri nē kām:

—Nà ãm hãmri na ka ã mē inhmã amnhĩ nhĩpêx anē. Jakamã kwa mãmrĩ mēmoj tã ixwÿ. Amã mēmoj prãm xà hkôt hã ixwÿ kot paj amã kugõ. ãm hãmri na pa amã anē. E mēmoj na amã hprãm? Anē.

⁸ Hãmri nhũm kuma nē kām:

—Ma Juãw Paxis krã na pa inhmã hprãm. Inhmã hkrã krãhta nē pasiiti kamã axà nē ixwÿr o tē nē inhmã agõ. Anē.

Ra katorxà kot kaxyw kãm karõ jakamã nhũm ã hã hwÿr anē. ⁹ Hãmri nhũm Eroxa tee ri kuma nhũm ja kēp omnuj nē. Nom ra mē pikuprõnh rax xwÿnhjê nhĩpôk ri mē noo mã kot kãm: “E mãmrĩ amã mēmoj prãm xà hkôt hã ixwÿ pa amã kugõ.” Anhÿr jakamã kãm kot kēp nē hprãm kêt nē. Hãmri nē Juãw Paxis wÿr õ pôristi hkwy rē ¹⁰ nhũm mē ma mē hagjênh xàta wÿr mra nē unē nē mut krãhta. ¹¹ Hãmri nē hkrã mÿ nē pasiiti kamã kuxà nē ma akupÿm nita wÿr o tē nē kãm kugõ nhũm kumÿ nē ma katorxà hwÿr o tē nē kãm kugõ.

¹² Hãmri nhũm Juãw Paxis kôt mē pa xwÿnhjaja tee ri mē kot hpĩr ã harênh ma nē ma hwÿr mra nē kumÿ nē ma o mõn haxà. Hãmri nē ma Jejus wÿr mra nē kãm harē.

Jejus kot mē ho ohtô nē mē kãm mē õ hã harênh
Makre 6.30-44; Rukre 9.10-17; Juãw 6.1-14

¹³ Hãmri nhũm Jejus Juãw Paxis jarênh ma nē hkaprĩ nē. Nē ma himõ nhĩkjê hwÿr kapôt ã mõr kaxyw pãr krem axà nē ma mō. Pa mē hkôt ixpa ho ixpa xwÿnhjaja ma hkôt mra. Hãmri nhũm krĩ hkwy kamã mē pa xwÿnhjaja harênh ma nē ohtô nē ma mē inhĩkrep pikap mra. Nē ra amnhĩ to wa nē mē inhmõr xàja wÿr pøj nē mē ixkutêp hkrĩ. ¹⁴ Jakamã pa

mē mō nē mē hwÿr pøj nē mē omu. Hãmri nhũm Jejus mē omu nē kãm mē hkaprĩ nē mē kãm mē à xwÿnhjê ho mex pa.

¹⁵ Tã nhũm ra myt àr kaxyw pa mē hkôt ixpa ho ixpa xwÿnhjaja tee ri mē omu nē Jejus wÿr mra nē kãm:

—Kwa na ra amÿkry htÿx nē. Amnhĩ nē mē hano kē mē ma nhÿri krĩ hkwy hwÿr mra nē tokyx amnhĩm mēmoj japrõ nē kuku. Mo jar mē apkur xà hã mēõ? Jar akunĩ pix kēnã. Anē.

¹⁶ Hãmri nhũm mē inhma nē mē inhmã:

—Nà kot paj mē hanor kêt nē. Mē kajaja kot kaj mē kãm õ nhũm mē apku. Anē.

¹⁷⁻²¹ No nhũm mē ohtô rax kumrêx. Mēmyjaja kēp 5.000. Nē kaxyw mē hprõ nē mē hkrajaja. Jakamã nhũm Jejus ã mē inhmã kapêr anē pa mē tee ri mē hkukamã ijamaxpêr nē kãm:

—Kwa nà mē panhõja raxti hã. Mē panhõ pãwti kēp sĩk pix. Nē kaxyw tep grãja pijakrutre kēnã kot kêt mē piitã mē hipêx. Nà xà kot paj mē ma mra nē nhÿri mē kãm mē mēmoj japrõ nhũm mē kuku? Anē.

Hãmri nhũm mē inhmã:

—Nà pu mē kãm mēmoj japrõr kêt nē. Kot puj mē kãm mē panhõta o anhgrã. E mē kãm anē kē mē ahpÿnhã ri hije nē hkrĩ hpa. Anē.

Hãmri pa mē kuma nē mē kãm anē nhũm mē piitã hkrĩ hpa. Hãmri nhũm Jejus pãwti mē tepja jamÿ nē kaxkwa hwÿr rĩt nē ho Tĩrtũm wÿr nē kãm:

—Pa Papaj? Nà apê mē inhmã mē inhõ ho apa xwÿnh jakamã amex o amex. Anē.

Hãmri nē mē kãm ho hkry hpa nē hkôt mē ixpa ho mē ixpa xwÿnhjê mã kugõ pa mē õ ri ho mē hipêx pa. Nhũm mē piitã apkur o hkrĩ. Mēõja grire htã nhũm Jejus tanhmã mē kãm ho rax to nhũm mē ohtô rax kumrêx tã piitã kuku nē ho õhy htũ hpa nhũm arĩ mēõ jakrêx prã. Hãmri pa mē akupÿm hakrêx o akuprõ nē ho kawã ho 12 nē ho nÿt pa.

Jejus kot gõ krãhkã hã ãm nē htēm ã harênh
Makre 6.45-52; Juãw 6.15-21

22-23 Tã nhũm Jejus mẽ ixpê hkôt ixpa ho ixpa xwýnhjê mã anê pa mẽ akupỹm pàr mã agjê nê ma xarmã hkukamã mō. Hãmri nhũm mẽ kot mar o kuhê xwýnhjê jano nhũm mẽ ma akupỹm hapêx. Hãmri nhũm Jejus kot Tĩrtũm mã amnhĩ jarênh kaxyw ahte tẽ nê hixêt ã api nê himōk ã kãm amnhĩ jarênh o nhỹ.

Gaa nhũm ra kamàt nhũm arĩ ahte hixêt nhĩmōk ã nhỹ.

24 Rôm pa mẽ pàr kãm mẽ inhmōr xwýnhjaja kormã himô nhĩpōk ri mō. Pu nhũm kōk xàpêr tỳx mẽ ixkaxpa. Nê gō axpên tak tỳx nê pa mẽ tee ri rrêmti ho gō rênh nhĩpêx nê tee ri axpên pumu.

25 Tã nhũm krãhyre kà nhũm Jejus man mẽ ixkôt gō krãhkà hã xan tẽ 26 pa mẽ amnhĩ wỳr omu. No nhũm kormã hirã mex kêt jakamã pa mẽ ixprĩ hã omunh mex kêt nê. Hãmri nê tee ri omu nê mẽkarō hã hkamnhĩx nê umaj ixàmra rax nê. 27 Hãmri nhũm mẽ inhmã kapêr nê mẽ inhmã:

—Tk. Kwa mẽ amã ma hkêt nê. Pa na pa mẽ akôt tẽ. Anê.

28 Hãmri nhũm Simãw Pêtre kuma nê kãm:

—Kwa xà ka na ka tẽ? Tõe apê mẽ inhō Pahĩti jakamã kwa amnhĩ wỳr ixwỳ pa apyrà nê gō krãhkà hã xa nê awỳr tẽ nà? Anê.

29 Hãmri nhũm kãm:

—Tõe mamrĩ amnê ixwỳr tẽ. Anê.

Hãmri nhũm kuma nê pàr rũm kato nê hwỳr tẽ. Uràk nê gō krãhkà hã hwỳr tẽ. 30 Hãmri nê kormã htêp o htêm mẽ kōk xàpêrta kamã ama nê tee ri amnhĩ kukamã hamaxpêr pê ra àr o mō. Hãmri nê àmra kamã Jejus mã amnhĩ to akir nê kãm:

—Kwa tokyx ixto api Pahĩti. Anê.

31 Hãmri nhũm hpa hã kupy nê ho àpir kurê kumrêx nê kãm:

—Kwa pêr ãm kormã ate amnhĩ kaxyw inhmã ajamaxpêr tỳx kêt. Mon ka we ixkamnàr rom mãmri man ixwỳr atêmre hkêt nê? Anê.

32 Hãmri nhũm wa akupỹn mẽ ixwỳr tẽ nê wa axà. Hãmri nhũm kōk katàt kôt pinhkrênh pa nhũm gō tãm nōr kurê kumrêx. 33 Hãmri pa mẽ

Jejus kot ã amnhĩ nhĩpêx anhỹrja ã omu hãmri nê kãm mex o mex ã harê nê kãm:

—Kwa ãm hãmri na hte amnhĩ pê Tĩrtũm Kra hã amnhĩ jarê. Nà apê Kra kênã. Anê.

Jenêjare kamã Jejus kot akupỹm mẽ ho mex ã harênh

Makre 6.53-56

34 Tã pa mẽ ra himô hã rê nê Jenêjare hwỳr pōj. 35 Hãmri nê ma kapê hã ri ixpa. Hãmri nhũm pika nhō xwýnh kwỳjaja Jejus pumu nê mẽ piitã mẽ kãm harênh o hprôt nê ahpýnhã hwỳr nhỹhỹnh mẽ à xwýnhjê hã karō. Nhũm mẽ man mẽ ixwỳr mẽ o mra 36 nê mẽ ho Jejus wỳ nê kãm:

—Pa? Kwa kê mẽ à xwýnhjaja akupỹm mex kaxyw apê axê kupê nà? Anê.

Hãmri nhũm mẽ kãm:

—Tõe. Kwâr mẽ mãmri mran hkupê. Anê.

Hãmri nhũm mẽ kuma nê axpên pãnhã hwỳr mra nê kêp ê pix kupênh tã ra akupỹm mex nê ma akupỹm mra.

15

Parijew nhō xwýnh mẽ Tĩrtũm kapêr tũm o mẽ ahkre xwýnhjê jarênh

Makre 7.1-13

1 Tã nhũm Parijew nhō xwýnh mẽ Tĩrtũm kapêr tũm o mẽ ahkre ho mẽ pa xwýnhjaja Jerujarê rũm ma Jejus wỳr mra. Na htem mẽ ixkukamã mẽ inhĩgêttjê pyrà nê apkur kaxyw nê amnhĩ nhĩhkra kuhōnh ryy nê. Amnhĩ nhĩhkra htyk pix kuhōnh nê hkrĩ hkêt nê ãm amnhĩ nhĩhkra kuhōnh japjêê nê. Nê õ prat kuhōnh japjêê nê kormã apkur kaxyw hkrĩ. Tĩrtũm kot ja hã mẽ omunh nê mẽ mex ã mẽ harênh ã amnhĩ kamnhĩx jakamã na pre ã amnhĩ nhĩpêx anhỹr o pa. Jakamã nhũm mẽ ma Jejus wỳr mra. 2 Hãmri nê omu nê kãm:

—Pa Jejus? E kwa mẽ inhmã mẽmoj jarê. Amnepêm mẽ panhĩgêttjaja na prem apkur kaxyw nê amnhĩ nhĩhkra kuhōnh japjê nê rĩ kormã apku. Tã pa htem arĩ ijaxwỳja ã amnhĩ nhĩpêx anê. No akôt mẽ pa ho mẽ pa

xwÿnhjaja na htem më ixpyrà nê ã amnhî nhîpêx anhÿr kêt nê. Kwa mo na htem amnhî nhîhkra tyk kuhõnh tokyx anê nê hkrî nê apku? Anê.

³ Hãmri nhùm më kuma nê më kãm:

–Tk. Na ka htem ãm më panhîgêjtê hkôt pix mã amnhî nhîpêx o apa no Tirtûm kapêr kôt amnhî nhîpêx kêt nê.

⁴ Tirtûm na pre mëmoj tâ më pamã karõ ho:

Kêr ka më anhîpêxà nê më akatorxà wa hã apijaàm nê më ho ajuta rãhã ho ri apa. Kot kaj më ã amnhî nhîpêx anhÿr kêt nê tanhmã më kãm akapêr punuj to ho ri apa. Hã koja më akwÿjaja ja mÿrapê më apa. Anê.

–Na pre ã Tirtûmja më pamã karõ anê. ⁵ No më kajaja na ka htem ã akwÿjê mã karõ anhÿr kêt nê. ãm kapêrja kwÿm na ka htem më kãm karõ nê më kãm:

Kot kaj më mëmo arîgro hã akàxpore japêr nom kêr ka më ho tanhmã akatorxà rÿ anhîpêxà ho ajuta hto kaxyw wa kãm hkwÿ nhõr kêt nê. ãm ho ate wa ho ajuta hkêt ã wa kãm amnhî jarê hãmri nê Tirtûm mã amnhî jarênh xà hã ixkre hwÿr o tẽ nê më ixte tanhmã ixkreta ho mex to kaxyw më inhmã agõ. Kot kaj më ã amnhî nhîpêx anê nhùm Tirtûm ja hã më apumu nhùm ja kãm mex nê. Kêr ka më ã amnhî nhîpêx anhÿr o ri apa.

–Anhÿr o na ka htem më kãm karõ ho ri apa. ⁶ Nom Tirtûm kapêr tûm kot ã ja jarênh anhÿr kêt. ãm amnhî krã hkôt na ka htem ã më kãm karõ punuj o ri apa anê. Te më akapêrja mex o kot Tirtûm kapêr jakrenh pyrãk. ⁷ Më ate Tirtûm kôt amnhî nhîpêx ã amnhî jarênh tâ ãm amnhî to axêx nê hkôt amnhî nhîpêx kêt nê. Na pre Tirtûm amnepêm më akukamã tanhmã më ajarênh to. Nhùm ÿ hã më kãm kapêr jarênh xwÿnh Ijaisja ô ri më kãm më ajarê nê hã kagã. Te Tirtûm tãm

kot më ajarênh pyrãk. ⁸ Na pre më akukamã më ajarênh o:

Më kãm ixkînh ã më kot amnhî jarênh tâ më kãm ixkînh kêt. Na htem kãm ixprãm ã amnhî jarênh kaprÿ.

⁹ Më kot ixkuhpa hã amnhî krã hkôt mëmoj tâ hkwÿjê mã karõ ho pa jakamã na htem kot ixkôt amnhî nhîpêx o pa hã amnhî jarênh kaprÿ. Anê.

–Na pre ã Ijaisja Tirtûm nhÿ hã më akukamã më ajarê nê më atã kagã anê. Anê.

Nhùm pre ã Jejus Parijew nhõ xwÿnhjê më Tirtûm kapêr tûm o më ahkre xwÿnhjê mã kapêr anê.

Mëmoj kot më pahomnu hã harênh Makre 7.14-23

¹⁰ Tã nhùm Jejus amnhî wÿr më kot mar o kuhê xwÿnhjê hwÿ nê axte më kãm kapêr nê më kãm:

–E më inhma nê inhmar tÿx nê.

¹¹ Na hte Tirtûm kapêr tûm o më ahkre xwÿnhjaja amnhî krã hkôt më ate amnhî nhîhkra kuhõnh japjê hã më amã karõ ho pa. Nê amnhî krã hkôt më axàpkur xà hã tanhmã më amã karõ hto ho pa. Tirtûm kot ja hã më apumunh kôt më amex ã më ajarênh kaxyw ã mëmoj tâ më amã karõ anê. Nom na hte Tirtûm tanhmã më kot amnhî nhîhkra kuhõnh to hã më omunh xà hkôt tanhmã më harênh to hkêt nê. Rÿ më axàpkur xà pumunh kôt më mex ã më ajarênh kêt nê. Ja tanhmã kãm kute hkêt. Na hte ã më kot amnhî nhîpêx anhÿr ã më omunh xà hkôt më mex ã më harênh rÿ më mex kêt ã më harênh kêt nê. Na hte mëmoj kur ã më omu nê ãm më omu nê hã tanhmã më harênh to hkêt nê. ãm më kapêr punuj rÿ më kapêr mex ã më mar kôt pix mã na hte tanhmã më harênh to. Anê.

¹² Nhùm pre ã Jejus më kãm kapêr anê pa më hkôt më ixpa ho më ixpa xwÿnhjaja kuma hãmri nê hwÿr mra nê kãm:

–Kwa na ka ã më kãm akapêr anê nhùm Parijew nhõ xwÿnhjaja tee ri ama nhùm ja më kêp omnuj nê. Anê.

13-14 Hāmri nhūm mē inhma nē tanhmā mē inhmā Parijew nhō xwŷnhjē jarēnh to nē hprī hā mē hkukamā mē harēnh o:

—Tk. Kwār māmri mē kēp omnuj. Mē kot Tirtūm kapēr tūm o mē ahkre ho pa htā na htem hkôt amnhī nhīpêx kêt. Jakamā te mē nohkre xwŷnh kot amnhī nhīpêx pyrāk. Koja mēhō nohkre htā amnhī kôt nhŷhŷm nohkre hō ho mō hāmri nē wa hamē pry pumunh kêt nē htŷx mō hāmri nē nhŷri ahkrehti kamā tēm. Tā Parijew nhō xwŷnhjaja te kot wam htēm xwŷnhhta pyrāk nhūm mē kot mē mar xwŷnhjaja te kot wam htēm xwŷnh kôt hō htēmta pyrāk. Jakamā Parijew nhō xwŷnhjaja mē kot mē mar o pa xwŷnhjē mē koja mē hpimràatā nhŷrmā te ahkrehti kamā rôrôk par pyrāk o amnhī nhīpêx nē mex kêt nē pa ho pa. Koja kaxkwa kamā inhō Papaj nhŷrmā amnhī nē mē hanor pa.

—Inhō Papaj te kēp mēmo hy hkre ho pa xwŷnhhta pyrāk. Na htem mēmo hy hkre nhūm higrôt hapôj nē higrôt mex nē. Hāmri nhūm mē hwŷr mra nē omu nē nē mēmoj nhīgrôt punuj jarē nē kurē. Ja pyrā nē koja nhŷrmā inhō Papaj amnhī nē Parijew nhō xwŷnhjē janor pa nhūm mē mex kêt nē pa ho pa. Jakamā kwa kêr ka mē hkôt ri amnhī nhīpêx kêt nē. Anē.

Nhūm pre ā Jejus mē ixte hkôt ixpa ho ixpa xwŷnhjē mā hprī hā Parijew nhō xwŷnhjē hkukamā ā mē harēnh anē pa mē mar o ixkrī. ¹⁵ Hāmri nhūm Simāw Pêtre tee ri Tirtūm kot mē apkur xā hā mē omunh xā hkôt tanhmā mē harēnh to hkêt ā harēnh ma. Nē ām tanhmā mē kapēr to pix ā mē mar kôt tanhmā mē harēnh toja ma hāmri nē hā Jejus kukja nē kām:

—Kwa mon ka ri ā ja jarēnh anē Pahihtī? Anē.

¹⁶ Hāmri nhūm kuma nē hprī hā mē inhmā awjarē nē mē inhmā:

—Kwa xān ka mē kormā aprī hā ja mar kêt nē? ¹⁷ E pa ixprī hā mē amā harē ka mē inhma. Nā na htem mēmoj ku nhūm hte mē hkrā hi hwŷr gjêx kêt nē. Na hte mē ôhy pix wŷr agjê nē gaa nē nhām hapôj nē

hapêx. Na htem mē apkur xāja ku nē ŷ hā tanhmā amnhī tomnu hto hkêt nē. Jakamā na hte Tirtūm ja hā mē omunh xā hkôt tanhmā mē harēnh to hkêt nē. ¹⁸ ām mē hkrā kamā mē hamaxpēr punuj pix nhŷ hā mē kot tanhmā amnhī tomnuj to jakamā na hte Tirtūm mē hamaxpēr ā mē omunh xā hkôt tanhmā mē harēnh to. ¹⁹ Koja mēhō tanhmā hamaxpēr punuj to nē ra hkôt amnhī tomnuj pix o pa. Na htem nhām mē hpar o pa nē mē kēp ahkī nē amnhī to hêx nē mē hakwa kamā nhām axpēn mā mē hixi jarēnh o pa. Nē nhām mē kēp mē hprō ho amnhīkati nē mē hkuprŷ hwŷr mra nē mē ho amnhīkati. Nē tanhmā ri axpēn tomnuj to ho pa. ²⁰ Mē hamaxpēr punuj nhŷ hā na htem ā amnhī nhīpêx anhŷr o pa. No na hte Tirtūm mē kot amnhī nhīhkra kuhōnh japjê hkêt ā mē omunh xā hkôt mē kot amnhī to mex xwŷnh ā mē harēnh kêt nē. Ja tanhmā kām kute hkêt. Anē.

Jejus kot Ijaew kêt xwŷnh ni kamā ukapri hā harēnh

Makre 7.24-30

²¹ Tā nhūm Jejus mē inhmā kapēr pa hāmri nē mē inhmā anē pa mē ma hkôt mō. Ma Xir mē Sitōja wa pu hā ri ixpa. ²² Nhūm mēhō nija omu nē hwŷr tē. Mē ixkīnhā kēp Ijaew kêt tā hwŷr tē. Kanaā nhō xwŷnh na pre. Tā Jejus wŷr tē nē kām:

—Ka Pahihtī Jejus? Apē Tirtūm kot mē ixwŷr amēnh xwŷnh jakamā xē ixujarēnh ma nē ixkamā axukapri hkêt wehe. Na mēkarōmnutija tanhmā ixpē ixkra ho nhūm ixpē omnuj tŷx kumrêx. Anē.

²³ Hāmri nhūm Jejus kuma nē ām kuma nē kām tanhmā nē hkêt nē. Jakamā pa mē ixpē hkôt ixpa ho ixpa xwŷnhjaja kām:

—Kwa hano kê ma akupŷm tēē ri. Na ām ri mē pahkôt xatā hkrata jarēnh pix o ri pa. Anē.

²⁴ Nom nhūm kot amnhī tā kamā hamak kaxyw tanhmā mē inhmā hā kapēr to nē mē inhmā:

—Nā ām Ijaewjê pix wŷr na pre Tirtūm inhmē. Te mē kēp ôwêhti pikunor pyrāk o na htem htŷx ri

amnhĩ nhĩpêx o pa. Jakamã ãm mẽ hwÿr pix mã na pre inhmẽ. Na kormã inhmã tanhmã nhãm mẽ hkwÿjê jarênh to hkêt nê. Anê.

²⁵ Hãmri nhũm nitita tee ri amnhĩ tã kuma nê hwÿr tẽ nê kutã hkônkrã ho htêm nê nhÿ nê kãm:

—Xê ma we ixkamã axukapri hkêt wehe. Anê.

²⁶ Hãmri nhũm kãm:

—Nà kormã. Na pre Tirtũm mẽ kêp Ijaewjê pix wÿr inhmẽ. Jakamã na pa kormã nhãm tanhmã mẽ akwÿjê ho mex to hkêt nê. Anê.

²⁷ Hãmri nhũm kãm:

—Ma ãm hãmri na ka akapêr. Nom ixpê Ijaew kêt tã mẽ kuxwar ãm ixto mex grire kêt wehe. Anê.

²⁸ Hãmri nhũm kuma nê kãm:

—Nà ãm hãmri na ka ã akra kaxyw inhmã ajamaxpêr tÿx anê. Jakamã kot paj nê mẽkarõmnutita jano. Kojaxte tanhmã apê ho hkêt kumrêx.

Anhÿr o kãm kapêrja rôm nhũm hkraja akupÿm mex kurê kumrêx.

Jejus kot mẽ à xwÿnhjê ho ohtô nê mẽ ho mex ã harênh

Makre 7.31-37

²⁹ Tã nhũm Jejus mẽ inhmã anê pa mẽ ixrohã krĩa pê ixkato nê ma himô rax pê Garirej wÿr mō. Nê nhÿri gô mÿri hixêt wÿr mō nê hã api nê ixkrĩ. ³⁰ Hãmri nhũm mẽ ohtô nê ma mẽ ixkôt mra. Nê mẽ à xwÿnhjaja nhũm mẽ hamÿ nê Jejus wÿr mẽ o mra. Na prem ohtô rax kumrêx. Ra ri mẽ pa hkêt xwÿnhjaja nê mẽ nohkre xwÿnhjaja nê mẽ hyk o mẽ pa xwÿnhjaja. Nê mẽ kapêr kêt xwÿnhjaja nê ahpÿnhã ri tanhmã mẽ à kute xwÿnhjaja nhũm mẽ hamÿ nê ma Jejus wÿr mẽ o mra nê kutã mẽ haxwÿ. Hãmri nhũm mẽ omu nê ahpÿnhã akupÿm mẽ ho mex pa. ³¹ Jakamã na pre mẽ kapêr kêt xwÿnhjaja akupÿm kapêr mex nê. Nê ri mẽ pa hkêt xwÿnhjaja akupÿm mrar mex nê. Nê mẽ hyk o mẽ pa xwÿnhjaja akupÿm tãm ri mra. Nê mẽ nohkre xwÿnhjaja akupÿm rît mex nê. ã ahpÿnhã akupÿm mex par anê. Hãmri nhũm mẽ kot hwÿr mẽ hamÿnh nê Jejus wÿr

mê o mrar xwÿnhjaja amnhĩ jaêr pê akupÿm mẽ mex ã mẽ omu nê mẽ kamã no puma nê hkĩnh nê. Hãmri nê Tirtũm mã mex o mex ã harê nê axpên mã harênh o:

—Nà ãm hãmri mẽ panhō Tirtũmja ãm mex o mex. Anê.

Jejus kot mẽ ho 4.000 nê mẽ kãm mẽ õ hã harênh

Makre 8.1-10

³² Tã nhũm Jejus mẽ ixte hkôt ixpa ho ixpa xwÿnhjaja amnhĩ wÿr mẽ ixwÿ nê mẽ ixkôt mẽ mrar xwÿnhjê jahkre nê mẽ inhmã:

—E. Ka mẽ rĩ kam jajê pumu. Na pa ra inhmã mẽ hkapri nê. Na mẽ pahkôt ri pa hã apkati axkrunêpxi nhũm ra mẽ kêp mẽõja hapêx pa. Kojam mẽ apkur kêt rãhã ma akupÿm mẽ õ krĩ hwÿr pa hãmri nê pry hã hirot nê rôrôk o pa. Mẽ õ krĩ hwÿr awryy. Anê.

³³ Nhũm pre ã mẽ inhmã mẽ harênh anê pa mẽ tee ri kuma hãmri nê kãm:

—Kwa nom nhÿri kot pu mẽ kãm mẽmoj japrô nhũm mẽ tokyx kuku? Ja kapôt pix kênã. Nê mẽ ohtô griiã. Anê.

³⁴ Hãmri nhũm mẽ inhmã:

—No mẽ panhō pãwtita? Tanhmã na arĩ kute nê hikwÿ? Anê.

Hãmri pa mẽ kãm:

—Nà ãm kêp 7 pix. Nê kaxyw tep kwÿ no ãm grêre. Kot mẽ ho dare kaxyw ã. Anê.

³⁵ Hãmri nhũm mẽ inhma nê mẽ ixkôt mẽ mrar xwÿnhjê mã anê nhũm mẽ hkrĩ pa. ³⁶ Hãmri nhũm pãwti mẽ tep grêreta jamÿ nê ho Tirtũm wÿ nê kãm:

—Pa Papaj. Nà apê mẽ inhmã mẽ inhō ho apa xwÿnh jakamã amex o amex. ãm amex kumrêx. Anê.

Hãmri nê mẽ kãm mẽmojta o hkry hpa nê mẽ inhmã kugō pa mẽ ô ri ho xa nê ho mẽ hipêx pa. ³⁷⁻³⁸ Hãmri nhũm mẽ piitã apku nê õhy htu hpa. Nhũm prem mẽmyjaja kêp 4.000 nê kaxyw mẽnijaja nê mẽhprĩjaja. Mẽ ohtô rax kumrêx tã nhũm Jejus mẽõ ho mẽ hipêx pa. Hãmri pa mẽ hakrêx o akuprô nê ho kawà ho 7 nê ho nÿt.

³⁹ Hãmri nhũm Jejus ma akupÿm mẽ

õ krĩ hwÿr mẽ hano pa mẽ pàr krem agjê hãmri nê ma ijaxwÿja mō. Ma pika pê Makatã hwÿr mō.

16

Parijew nhõ xwÿnh kwÿ kot aa mẽ kot mẽmoj pumunh kêt õ ho anhÿr ã Jejus wÿr ã mẽ harênh

¹ Tã pa mẽ ra hwÿr pøj nhũm Parijew mẽ Satusew nhõ xwÿnhjaja Jejus pumu nê hwÿr mra. Nê hêx rom kot kamã hamak kaxyw hwÿr mra nê kãm:

—Pa Jejus? E kwa mẽ inhmã aa mẽ ixte mẽmoj pumunh kêt õ ho anê nà? Pa mẽ ate ho anhÿr ã apumu nê Tirtũm kot mẽ ixwÿr amênh ã akôt ijamaxpêr kurê kumrêx. E kwa tokyx. Anê.

²⁻³ Hãmri nhũm mẽ kuma nê mẽ kãm:

—Tk. Nà kot paj mẽ amã ho anhÿr kêt nê. Mẽ ate hã ixpumunh nê ixkôt ajamaxpêere kaxyw ã. Na ka htem kaxkwa kamã kakrã pumu nê axpên mã na wrÿk ã harê. Nê kaxkwa mex pumu nê axpên mã amgrã hã harê. Tã ixte tanhmã mẽ amã mẽmoj nhÿpêx to hã ixpumu nom Tirtũm kot mẽ awÿr inhmênh xwÿnh ã ixkôt ajamaxpêr kêt nê. ⁴ ãm mẽ ajamaxpêr punuj pix o na ka htem ri ajamaxpêr o apa. Ixpê Tirtũm kot mẽ awÿr inhmênh xwÿnh tã ka mẽ ja hã ixkôt ajamaxpêr kêt nê. Tã mẽ ate aa mẽmoj pumunh kêt kwÿ ixte mẽ amã ho anhÿr kaxyw ka mẽ inhmã hã karõ. Nà kot paj mẽ amã ho anhÿr kêt nê. Kormã. Kot paj ãm nhÿrmã te ampêm Jõhti kot amnhÿ nhÿpêx pyrãk o amnhÿ nhÿpêx. E ja pix kot paj mẽ amã harê. Nom kot paj mẽ amã aa mẽ ate mẽmoj pumunh kêt õ ho anhÿr kêt nê. Anê.

Nhũm pre ã Jejus mẽ kãm kapêr anê hãmri pa mẽ ixrohã mẽ kêp ixkato nê ma ixpa.

Jejus kot hkôt mẽ pa xwÿnhjê jahkre hã harênh

Makre 8.14-21

⁵ Tã pa mẽ Jejus mẽ ixrohã ma mō nê pàr mã agjê nê ma xarmã akupÿm

rê nê hikjê hã mō. Hãmri nê tee ri mẽ ixàpkur xà japêr nê axpên mã:

—Kwa na pu mẽ panhõ pãwti ho pajamakêtkati nê kure. Anê.

⁶ Hãmri nhũm Jejus mẽ inhma nê tanhmã mẽ inhmã Parijew mẽ Satusew nhõ xwÿnhjê jarênh to. Nom pãwti hã kuxi nê mẽ inhmã mẽ harê nê mẽ inhmã:

—Kwa mẽ o kora. Kêr ka mẽ Parijew mẽ Satusew nhõ xwÿnhjê mẽ kêp pãw kaxkrit xà hkwy hpyr kêt nê. Anê.

⁷ Hãmri pa mẽ tee ri kuma nê ixprĩ hã mar mex kêt nê. Nê arĩ kapêrta ã axpên kukjêr o hkôt mō nê axpên mã:

—Kwa mẽ pahte mẽ panhõ pãwti rer jakamã mãn mẽ pahte mẽ õ pãw kaxkrit xà kwÿ hpyr nê mẽ pahkurê nà? Anê.

⁸ Hãmri nhũm mẽ inhma nê mẽ inhmã:

—Hêxta waa nê. Mon ka mẽ ãm axpên mã mẽ panhõ pãwti hkêt pix jarênh o mō? Pêr kormã mẽ ate amnhÿ kaxyw inhmã ajamaxpêr tÿx kêt. ⁹ Jãã ixte mẽ anoo mã pãwti kêp 5 pix tã nhũm ixte ho mẽ kêp 5.000tajê nhÿpêx par. Nhũm mẽ kot hkur nê ho õhy htu hpar nhũm mẽ ate mẽõ jakrêx o apikuprõnh par nê ho kawà ho 12 nê ho hipu. ¹⁰ Nê ham pãwti kêp 7 o mẽ kêp 4.000 nhÿpêx par nhũm mẽ kot hkur nê ho õhy htu hpar nhũm mẽ ate mẽõ jakrêx o apikuprõnh raxja.

¹¹ Ra ixte mẽ anoo mã ja ho anhÿr o axkrut tã ka mẽ ra hã ano hkêt nê arĩ axpên mã mẽ paxàpkur xà pix jarênh o ixkôt mō. Nà mẽ paxàpkur xàja na pa harênh kêt nê. Parijew mẽ Satusew nhõ xwÿnhjê nhõ pãwti kaxkrit xà pix na pa hã kuxi nê mẽ amã tanhmã harênh to. Anê.

¹² Nhũm pre ã mẽ inhmã kapêr anê hãmri pa mẽ atã kuma nê kãm:

—Nà na pa xep mẽ hãmri tã ama. Xep mẽ ixte Parijew mẽ Satusew nhõ xwÿnhjê kapêr kôt amnhÿ nhÿpêx nê na ka mẽ ixkurê nê ã mẽ harênh anê. Anê.

Jejus kot amnhÿ tã hkôt mẽ pa xwÿnhjê kukjêr ã harênh

Makre 8.27-30; Rukre 9.18-21

13 Tã pa mẽ axte Jejus kôt mō mẽ pika pê Sejarej Piripos kamã kormã mō nhũm Jejus amnhĩ tã mẽ ixkukja mẽ mẽ inhmã:

—E mẽ inhmã mẽmoj jarẽ. Tanhmã na hte mẽ akwỳjaja axpẽn mã ijarẽn hte wehe? Anẽ.

14 Hãmri pa mẽ kãm:

—Nà na htem ahpỳnhã tanhmã ajarẽn to. Na hte kamã mẽ hkwỳjaja ajarẽn o finat Juãw Paxis ã ajarẽ. Nhũm kamã mẽ hkwỳjaja ato finat Eris ã ajarẽ nhũm mẽ hkwỳjaja tōhã apê Tĩrtũm nhỹ hã akapěr o apa xwỳnhjê hō akupỳm atĩr ã ajarẽ. Nẽ tōhã finat Jeremĩstija rỳ axtem hō hã ajarẽ. ã na htem ahpỳnhã axpẽn mã ajarẽn anẽ. Anẽ.

15 Hãmri nhũm mẽ inhma mẽ mẽ inhmã:

—No mẽ kajaja? Ixpê mẽhō hã na ka htem axpẽn mã ijarẽ? Anẽ.

16 Hãmri nhũm Simãw Pêtre kãm:

—Nà apê Tĩrtũm kot mẽ ixkaxyw axãm mẽ mẽ ixwỳr amẽn xwỳnh na ka. Nẽ apê mẽ ixpiitã mẽ inhō Pahi Maati na ka. ã na pa htem axpẽn mã ajarẽn anẽ. Anẽ.

17 Hãmri nhũm kuma mẽ mẽ kãm:

—Nà ãm hãmri na ka ã ijarẽn anẽ Simãw Pêtre. Nom amnhĩ krã hkôt na ka ã ijarẽn anhỹr kêt mẽ. Tĩrtũm tãm kot amã ixto amnhĩrĩt xà hkôt na ka ã ijarẽn anẽ. 18 Nà akumrẽx na ka ã ijarẽn anẽ. Tã koja mẽ apyrã mẽ nhỹrmã mẽ kot ixkôt amnhĩ xunhwỳr xwỳnhjaja ma hkwỳjê mã ja hã ijarẽn o ri krĩ piitã hkôt pa. Hãmri nhũm mẽ hkwỳjaja mẽ kuma mẽ mẽ apyrã mẽ ixkôt amnhĩ xunhwỳ. Hãmri nhũm mẽ kęp ixprãm nõkati xwỳnhjaja tee ri tanhmã mẽ kot ijarẽn toja ma mẽ ã ijarẽn anhỹrja mẽ mẽ kãm kapěr tã nom ho hkapyr. ã koja ixkôt mẽ kot amnhĩ xunhwỳr xwỳnhjaja mẽ kãm ijarẽn o pa anẽ. Jao te mẽ apê kẽn nhũm ixte mẽ ato amnhĩm inhõrkwỹ nhĩpêx pyrãk. Tã akumrẽx ate ã ijarẽn kot anhỹr jakamã kot paj te ixte akumrẽx amỳnh mẽ ato ixtẽm mẽ inhõrkwỹ nhĩpêx kaxyw

amnhĩm akumrẽx axãm pyrãk o anhĩpêx Simãw Pêtre.

19 —E kêt ka ma inhỹ hã tanhmã mẽ piitã mẽ kãm ijarẽn to ho ri apa. Mẽ kot hprĩ hã amar kaxyw. Koja mẽ hkwỳjaja ama mẽ amnhĩ kaxyw ixkôt hamaxpěr mẽ ixkôt amnhĩ xunhwỳ. Ka ja hã mẽ omu mẽ mẽ kãm: “E ra mẽ ate Jejus kôt amnhĩ xunhwỳr jakamã kot ka mẽ nhỹrmã ty mẽ ma kaxkwa hwỳr api mẽ Tĩrtũm mẽ wa kuri amex kumrẽx mẽ atĩr tũm mẽ apa ho apa.” Anhỹr o mẽ kãm ijarẽn o apa. No mẽ kot akapěr mar mẽ ãm mar mẽ ixkôt amnhĩ xunhwỳr kêt xwỳnhjaja ka mẽ kãm: “No mẽ kajaja mẽ ate Jejus kôt amnhĩ xunhwỳr kêt jakamã kot kaj mẽ nhỹrmã Tĩrtũm mẽ Krata wa kuri atĩr tũm mẽ apa ho apa hkêt mẽ.” Anhỹr o ã inhỹ hã mẽ kãm akapěr anhỹr o ri mẽ hkôt apa. Jao te ate kaxkwa hwỳr saf pyr mẽ Tĩrtũm krajê mã kahê xà rẽn mẽ Tĩrtũm kra hkêt xwỳnhjê pê kahê pyrãk o amnhĩ nhĩpêx o apa. Anẽ.

Nhũm pre ã Jejus Simãw Pêtre mã kapěr anẽ. 20 Hãmri mẽ hpãnhã mẽ ixpiitã mẽ inhmã kapěr mẽ mẽ inhmã:

—E. Kwa kêt ka mẽ kormã mẽ piitã mẽ mẽ kãm Tĩrtũm kot mẽ awỳr inhmẽn ã mẽ kãm ijarẽn o ri apa hkêt mẽ. Kormã. Anẽ.

Jejus kot amnhĩ kukamã amnhĩ jarẽn ã harẽn

Makre 8.31-33; Rukre 9.22

21 Hãmri nhũm Jejus hprĩ hã amnhĩ kukamã tanhmã mẽ inhmã amnhĩ jarẽn to mẽ mẽ inhmã:

—Nà mẽ kajaja mẽ ate aprĩ hã ixpumunh mex. No mẽ pahkwỳjaja kãm hprĩ hã ijarẽn mar mẽ ixpumunh prãm kêt. Ijaew krãhtũmjaja mẽ Tĩrtũm kapěr tũm o mẽ ahkre xwỳnhjaja mẽ patre krãhtũmjaja. Mẽ kãm hprĩ hã ixpumunh mẽ mẽ kãm ixkapěr mar prãm kêt jakamã kot paj tokyx ma Jerujarẽ hwỳr mō nhũm mẽ kamã ixpynẽ mẽ ixtak rax mẽ ixpĩ. Nom kot paj ixtyk ã apkati axkrunẽpxi nhũm Tĩrtũm akupỳm ixto ixtĩr. Anẽ.

22 Hãmri nhũm Simãw Pêtre tee ri kot ã mẽ kãm amnhĩ jarẽn anhỹrja ã

kuma nê hwÿr tē nê hpa hã kupy nê mē ixpê ho kato nê mē ixkàx ã o xa. Nê ã kot amnhĩ jarēnh anhÿrja nê kãm kapēr nê kãm:

—Kwa nà Pahihti. Ri ã amnhĩ jarēnh anhÿr kêt nê. Mo kot kêt mē ri axtem nê ã anhÿpêx anê? Anê.

²³ Hãmri nhũm kuma nê hwÿr apkjê nê omu nê kãm:

—Tk. Te apê Satanasti kapēr pyræk o na ka ã inhmã akapēr anê. Kot kaj ã akapēr anê hãmri nê ixkôt apa hkêt nê. Tĩrtũm kãm hprãm xà hkôt na ã mē kot inhÿpêx anhÿr kaxyw kênã. Tã ka Tĩrtũm jamaxpēr o ajamaxpēr kêt nê amnhĩ jamaxpēr o ã inhmã akapēr anê. Te apê ixpê axamnãr xwÿnh pyræk o amnhĩ nhÿpêx. Anê.

Jejus krajaja kot tanhmã amnhĩ nhÿpêx to hã mē harēnh

Makre 8.34-9.1; Rukre 9.23-27; Juãw 12.24-26; mãänēn Rômãn 15.1; Wam Korīt 10.23-24; Karatas 5.24; Piripos 2.4; Wam Pêtre 4.1; Apokarip 2.10, 12.11

²⁴ Nhũm pre ã Jejus Simãw Pêtre mã kapēr anê hãmri nê hpãnhã mē ixpê hkôt ixpa ho ixpa xwÿnh piitã mē inhmã kapēr nê mē inhmã:

—E kot kaj mē ixkôt amnhĩ xunhwÿr ã amnhĩ jarē hãmri nê mãänēn amnhĩ jarēnh o: “Jejus kēp inhõ Pahihti jakamã kot paj kapēr kôt pix mã amnhĩ nhÿpêx rãhã ho ri ixpa. Kwãr ixkwÿjaja tanhmã hã inhÿpêx hto.” Anhÿr o amnhĩ jarē.

²⁵ —Koja mē ixtã mē atõx pĩ rÿ tanhmã mē atõ hto ka ty. Tã nom koja akaxwÿnh ma ixwÿr àpir kurê kumrēx. Hãmri ka ixkuri atĩr tũm nê amex rãhã nê apa ho apa. Nom kot kaj mē jar atĩr prãm xàj ixkaga hãmri nê inhõ krĩ hwÿr axàpir kêt nê.

²⁶ —Nê koja mēhõ hikukrēx rax gryk ã Tĩrtũm kaga. Tã nhÿrmã ty hãmri nê amnhĩ kôt hikukrēx õ hpyr nê o mör kêt nê. Koja tee ri kuwy hwÿr mör pymaj amnhĩ nê hikukrēx rax o amnhĩ pãnhã amnhĩrer prãm kaprÿ. Tanhmã koja amnhĩ to nê Tĩrtũm mã amnhĩre nê ma õ krĩ hwÿr

api? Koja ã amnhĩ nhÿpêx anhÿr kêt nê.

²⁷ —Nê ixpê Tĩrtũm kot mē awÿr inhmēnh xwÿnh kot paj nhÿrmã kaxkwa rũm akupÿn mē awÿr wrÿ nhũm Tĩrtũm kapēr o mē wrÿk xwÿnhjaja man ixkôt wrÿ. Hãmri pa inhõ Papaj nhÿ hã ixte mē piitã tanhmã mē kot amnhĩ nhÿpêx to hã mē omunh xà hkôt ahpÿnhã tanhmã mē harēnh to. ²⁸ ãm hãmri na pa ã mē amã amnhĩ jarēnh anê. Kot paj nhÿrmã akupÿn ixte mē ato amnhĩptàr kaxyw man mē awÿr wrÿ. Tã kot kaj mē akwÿjaja akupÿn ixwÿrÿta kukamã tokyx ixte tanhmã ixte amnhĩ nhÿpêx to hã ixpumu. Anê.

17

Jejus kot hixêt præk nhĩmök ã hirã kamã ãm ã harēnh

Makre 9.2-13; Rukre 9.28-36; mãänēn Sikũn Pêtre 1.16-18

¹ Tã nhũm semãnja hapêx nhũm Jejus ma nhÿri hixêt præk wÿr mō. Nê kaxyw Simãw Pêtre nê Xiakre nê Xiakre htõ Juãwja nhũm ma amnhĩ kôt wa mē o mō. Nhũm wa mē mō nê hixêt præk ã api nê himök ã kuhê.

² Hãmri nhũm Jejus xep ra axtem nê xa. Axtem hkuk nhĩrã htÿx nê xa. Te myyti nhĩrã htÿx pyræk. Nê ê haka htÿx kumrēx. ³ Hãmri nhũm xep ja wa kaxkwa rũm hwÿr wrÿ nê kuri kãm kapēr o xa. Mojes mē Erisja wa nhũm hwÿr wrÿ nê kuri xa. Tĩrtũm amnepēm amnhĩ wÿr wa ho àpir tã wa akupÿn wrÿ nê Jejus mã kapēr o xa. ⁴ Hãmri nhũm Jejus kôt mē mör xwÿnhjaja wa mē omu nhũm Simãw Pêtre tanhmã hamaxpēr to nê Jejus wÿr tē nê kãm:

—Kwa Pahihti. Nã ãm hãmri na pu mē amnē mō. Kwa pu mē kritpēm jar axkamē nê tokyx panojarêt kêt nê. Pa mē amã pô nhĩrõnh o axkrunēpxi nê hipêx. Amã hõ nhÿpêx nê Mojes mã hõ nhÿpêx nê Eris mã hõ nhÿpêx ka mē kamã akrĩ. E kwa pa mē amã ho anê nã?

Anhÿr o kãm kapēr. Nom amnhĩ krã hkôt ã kapēr anê. ⁵ Hãmri nê kormã ã

kãm kapêr anhÿr rôm nhũm ra kakrà jaka htÿxja wrÿ nê wa mẽ hkunor pa nhũm wa mẽ kamã kuhê. Nhũm kakrà kamã Tirtũm mẽ kãm kapêr nê mẽ kãm:

–E ota Ixkra xa. Inhmã hapê ho inhmã hapê. E kêr ka mẽ kapêr mar tÿx rãhã ho ri apa. Anê.

⁶ Hãmri nhũm mẽ tee ri kuma nê kãm ma htÿx nê umaj pikap rôrôk nê htu mÿrpê hikwÿ. ⁷ Hãmri nhũm Jejus mẽ hwÿr tẽ nê mẽ hã ïhkra jaxwÿ nê mẽ kãm:

–E mẽ kãnhmã akuhê nê amã ma hkêt nê. Anê.

⁸ Hãmri nhũm mẽ kuma nê kãnhmã rÿt nê Jejus pix pumu nhũm ahte xa nhũm kuri wa âm xwÿnhta wa ra ma akupÿm api. ⁹ Hãmri nhũm mẽ kormã akupÿm hixêt nhĩmök rũm mẽ ixwÿr wrÿk o mẽ nhũm Jejus mẽ kãm:

–E kêr ka mẽ ham ate mẽmoj pumunh xwÿnhta kormã nhãm mẽ kãm harênh kêt nê. Kot paj nhÿrmã ty nê akupÿm ixtÿr ka mẽ rÿ kormã mẽ kãm ja hã ijarênh o ri apa. Anê.

¹⁰ Hãmri nhũm mẽ kormã akupÿn mẽ ixwÿr wrÿk o mẽ nhũm mẽ Jejus mã:

–Kwa mẽ inhmã mẽmoj jarê. Na htem Tirtũm kapêr tũm o mẽ ijahkre xwÿnhjaja mẽ inhmã: “Eris kumrêx koja Tirtũm mẽ pahwÿr kumê nhũm Krisja kormã hapu hã wrÿ.” Anê. Na htem ã mẽ inhmã war ajarênh anê. Tã ka ra wrÿ nom kormã akukamã Erisja wrÿk kêt. Anê.

¹¹ Hãmri nhũm mẽ kãm:

–Nã âm hãmri na prem ã wa ijarênh anê. Na pre ra ixkukamã te Eris kot amnhĩ nhĩpêx pyrãk xwÿnhta tẽ nê ixkutêp mẽ kãm ijarênh o pa. ¹² Tã nom nhũm mẽ ja hã omunh kêt nê. Na prem axtem nê kãm hprãm xà hkôt tanhmã hipêx to nê kupi. Tã koja mẽ nhÿrmã ã hipêx anhÿr pyrãk o inhĩpêx. Anê.

¹³ Hãmri nhũm mẽ ra hprĩ hã kuma nê axpên mã:

–Kwa Juãw Paxis pimràata na ã mẽ pamã harênh anê. Tapxipix na pre te Eris kot amnhĩ nhĩpêx pyrãk o amnhĩ

nhĩpêx o pa. Tã tãm na mẽ pamã harê. Anê.

Jejus kot mēhō hkra nē mēkarōmnuti kator ã harēnh

Makre 9.14-29; Rukre 9.37-43

¹⁴ Tã nhũm mẽ ra akupÿm ahpar mã man mẽ ixwÿr hpôx o mẽ nhũm mẽ ohtô rax nê Jejus kutêp kuhê. Hãmri nhũm mēhō myja mẽ omu nê mẽ kutã tẽ nê mẽ hkaxpa nê Jejus kutã hkôn krã ho tēm nê nhÿ nê hkra ho kuwÿ nê mẽ kãm:

¹⁵ –Pa Jejus. Kwa inhmã ixkra kamã axukapri nê. Na hte mēkarōmnutija xatã tanhmã ixpê ho nhũm hte ÿ hã mra nê rôrôk nê tōhã kuwy kamã rôrôk nê tōhã gôx kãm mran mrô nê ixpê homnuj tÿx nê. ¹⁶ Tã pa akôt mẽ pa ho mẽ pa xwÿnhjê hwÿr o tẽ nom nhũm mẽ kot inhmã ho mex kaxyw tee ri tanhmã ho hkapry. Kwa xà kot kaj akupÿm inhmã ho mex nã? Anê.

¹⁷ Hãmri nhũm kuma nê mẽ ixte hkôt ixpa ho ixpa xwÿnhjê mã kapêr nê mẽ inhmã:

–Hêxta waa nê. Ra mẽ ate ixte Tirtũm nhÿ hã mẽ ho mex ã ixpumunh o ixkôt apa ryy htã kormã ixpyrà nê ã mẽ hipêx anhÿr kêt nê. Nã kormã mẽ kaxyw Tirtũm kôt mẽ ajamxpêr tÿx kêt jakamã na ka mẽ tee mẽ ho mex kaxyw. Anê.

Hãmri nê myta mã kãm:

–E amnê ixwÿr akrata o tẽ pa omu. Anê.

¹⁸ Hãmri nhũm kuma nê hwÿr o tẽ nhũm omu nê nê mēkarōmnutija kator nhũm akupÿm mex kurê kumrêx.

¹⁹ Hãmri pa mẽ ixte Jejus kôt ixpa ho ixpa xwÿnhjaja ja hã omu mẽ hkàx ã amnhĩ tã hkukja nê mẽ kãm:

–Kwa na pa mẽ axwakre kamã tee ri nê hanor prãm kapry. Kwa mon pa mẽ apyà nê nê hanor nhũm kator nê ma htēm kêt nê? Anê.

²⁰⁻²¹ Hãmri nhũm mẽ inhmã:

–Nã kormã mẽ ate mẽ kaxyw Tirtũm kôt ajamxpêr tÿx kêt. Nom kot ka mẽ kaxyw hkôt ajamxpêr tÿx hãmri nê hkôt amnhĩ nhĩpêx kukwak ri mẽmoj tã awÿ nhũm mẽ ama nê mẽ ate mẽmoj tã axàhwÿr xà hkôt mẽ amã

tanhmã mëmoj nhîpêx to. Te më ate pî hpâr mûj mã akapêr nê kãm: “Kwa amnhî jarê nê ma tẽ nê gô xujanâr kãm mân mrõ.” Anhÿr nhûm kot amar nê amar xà hkôt ã amnhî nhîpêx anhÿr kurê kumrêx pyrâk. Ja pyrâ nê kot kaj më amnhî kaxyw Tirtûm kôt ajamaxpêr tÿx kukwak ri mëmoj tâ awÿ nhûm më ama nê më amã mëmoj tanhmã ho rÿ më amã mëmoj gô. Anê.

Jejus kot htyk kukamã amnhî jarênh ã harênh

Makre 9.30-32; Rukre 9.43-45

²²⁻²³ Tã hãmri pa më Jejus kôt ma mō nê nhÿri pika pê Garirej kamã kormã ixpa. Hãmri nhûm Jejus axte amnhî kukamã më inhmã tanhmã htyk ã amnhî jarênh to nê më inhmã:

—Nà koja më tokyx më kãm ixtã amÿnê nhûm më ixpî. Më kot ixpîr tâ kot paj ixtyk ã apkati axkrunêpxi nhûm Tirtûm akupÿm ixto ixtîr. Anê.

Hãmri pa më tee ri ã kot amnhî jarênh anhÿrja ã kuma nê ixkaprî htÿx kumrêx.

Jejus kot Tirtûm nhôrkwÿ hwÿr ãr Rômân 13.5-7; Wam Korît 10.32-11.1

²⁴ Tã pa më Jejus kôt ma mō nê ra Kapanau hwÿr pōj. Hãmri nhûm më kot Tirtûm mã amnhî jarênh xà hã ixkre ho mex kaxyw më kêp kàxpore hkwÿ jamÿnh xwÿnhjaja më ixpumu nê më ixwÿr mra nê Simãw Pêtre mã kãm:

—Pa. Kwa xà na hte më ajahkre xwÿnhja më pahpê hkwÿjê pyrâ nê Tirtûm mã amnhî jarênh xà hã ixkre ho mex kaxyw kàxpore hkwÿ nhôr kêt nê nà? Anê.

²⁵ Hãmri nhûm më kuma nê më kãm:

—Tÿ kot më kãm òr o pa kênã. Anê.

Hãmri nê ma më ixkôt tẽ nê më ixkôt mëhō nhôrkwÿ hwÿr axà. Hãmri nê kot Jejus mã më harênh mã tâ nhûm ra hamaxpêr ã omu nê kumrêx kãm kapêr nê kãm:

—Kwa inhmã mëmoj jarê Simãw Pêtre. Xà na hte pahi hkrajaja ò papaj mã kàxpore hkwÿ nhôr o pa nà? Xà na

hte ãm hkra hkêt xwÿnh pixjaja kãm hkwÿ nhôr o pa? Anê.

²⁶ Hãmri nhûm kuma nê kãm:

—Nà më kêp hkra hkêt xwÿnh pixjaja na hte kãm òr o pa. Anê.

Hãmri nhûm Jejus kãm:

—Tÿ. Nà ãm hãmri na ka ja jarê. Na hte pahi hkrajaja ò papaj mã kàxpore nhôr kêt nê. Më kêp hkra kênã. Tã ixpê Tirtûm Kra jakamã mo kaxyw kot pa kêt òrkwÿ hwÿr inhgjêx kaxyw kãm kàxpore hkwÿ gô? ²⁷ Tã nom kot paj òr kêt nhûm kàxpore hkwÿ jamÿnh xwÿnhjaja tee ri ja hã ixpumu nê axpên mã ixte amnhî tomnuj xwÿnh ã ijarê. Jakamã e ma gônhamã tẽ nê tep ò kanhê. Hãmri nê ho api nê apy nê hakwa jakjê nê kamã kàxpore htÿxre pumu. Nê apy nê man o tẽ nê pahpãnhã kàxpore jamÿnh xwÿnhnta mã agô. Anê.

Nhûm pre ã Jejus Simãw Pêtre mã karō anê nhûm kuma nê ma hwÿr tẽ nê kot kãm karō xà hkôt ã amnhî nhîpêx anê.

18

Më kot amnhî to rÿnh xwÿnhjê jarênh

Makre 9.33-37; Rukre 9.46-48; mããñên Piripos 2.3-7; Wam Pêtre 3.4, 5.5-6

¹ Tã më ixte Jejus kôt ixpa ho ixpa xwÿnhjaja amnhî kukamã ijamaxpêr nê amnhî tâ Jejus kukja nê kãm:

—Kwa më inhmã mëmoj jarê Pahihtî. Nhÿrmã më ixpê pahi nê anhîhkô hã më ho amnhîptâr o ri ixpata ã më ixtō kot paj we më ho amnhîptâr rax o ixkwÿjê jakre? Anê.

² Hãmri nhûm më inhma nê amnhî wÿr mëhprîre hō mã hpa ho apê nhûm hwÿr tẽ nê më ixkuri xa. ³ Hãmri nhûm Jejus omu nê hã më inhmã:

—E më inhma. Kêr ka më apê pahi pyrâk o tanhmã amnhî jarênh to ho ri apa hkêt nê. ãm te amarî ri më apa pyrâk o amnhî nhîpêx. Te mëhprîre kot amnhî nhîpêx pyrâk. Kot kaj më ã amnhî nhîpêx anhÿr o apa hkêt hãmri nê nhÿrmã inhîhkô hã më ho amnhîptâr kêt nê. ⁴ Jakamã kot kaj

mê amã nhÿrmã inhîhkô hã mê ho amnhîptâr o apa hprãm. Hã kot kaj mê te mêhprîre kot amnhî nhîpêx pyrã nê amã amnhî to rûnh prãm kêt nê apa.

⁵—Nê kêr ka mê apê pahi kot amnhî nhîpêx pyrãk o tanhmã amnhî jarênh to ho apa hkêt nê. ãm te amarî ri mê apa pyrãk o amnhî nhîpêx. Jao nhÿri mêhprîjê hõ pumu nê kamã axukaprî nê kãm mêmoj tanhmã ho rÿ kãm mêmoj gõ. Hãmri nê te pa ate tanhmã ixto mex to pyrãk o amnhî nhîpêx. Kot kaj mê ã amnhî nhîpêx anhÿr o apa hãmri nhÿm Tîrtÿm ja hã mê apumu nê mê ate amnhî to rûnh kêt tã mê ate amnhî to rûnh xwÿnh ã mê ajarê. E kot kaj mê amã amnhî to rûnh prãm hã kot kaj mê ã amnhî nhîpêx anhÿr o ri apa. Anê.

Mê kot amnhî tomnuj xwÿnhjê hkukamã mê harênh

⁶ Nhÿm Jejus arî mê inhmã mêhprî jarê nê mê inhmã:

—Nê mêhprîre na htem amnhî kaxyw ixkôt hamaxpêr o pa. Tã koja mêmõ inhnê tanhmã mê kãm kapêr to. Mê kot tanhmã amnhî tomnuj to hprãm xaj tanhmã mê kãm kapêr to ho pa. Hãmri nhÿm mê kuma nê mê kapêr xà hkôt tanhmã amnhî tomnuj to. Hã koja Tîrtÿm ja hã omu hãmri nê kot inhnê tanhmã kãm kapêr to xwÿnhhta pumu nê homnuj tÿx nê. Te mê kot mêmõ pynênh nê mut ã kên pytî hõ nhôr nê ma o htêm nê gô xupÿm kãm mêmnh pyrãk o hipêx. Te ho ja pyrãk no ãm homnuj tÿx o hakre.

⁷—Nê koja mêmõ inhnê tanhmã mê kot ixkôt amnhî xunhwÿr xwÿnhjê hõ mã kapêr to. Kot tanhmã amnhî tomnuj to hprãm xaj tanhmã kãm kapêr to. Rÿ kot ixkaga hprãm xaj tanhmã kãm kapêr to. Hãmri nhÿm kuma nê mar xà hkôt ixkapêr kwÿm tanhmã amnhî tomnuj to. Tã koja Tîrtÿmjã ja hã omu nê mãânên kot inhnê kêp àmnâr xwÿnhhta pumu nê ã inhnê kãm kapêr anhÿrja mÿrapê homnuj tÿx kumrêx.

⁸⁻⁹—E kwa mê okora. Kot kaj mê anhîhkra ho tanhmã amnhî tomnuj to rÿ apar o tanhmã amnhî tomnuj to. Hã kêr ka mê axte ã amnhî nhîpêx anhÿr pymaj te mê ate amnhî pê krãhyr nê mêmnh pyrãk o amnhî nhîpêx nê axte ã amnhî tomnuj anhÿr kêt nê. Rÿ ka mê ano ho mêmoj punuj pumu. Hã kêr ka kãm ajamaxpêr pix o apa pymaj te mê ate amnhî pê ano katök nê kaxâr nê mêmnh pyrãk o amnhî nhîpêx nê nhãm arît kurê kumrêx. Kêr ka mê ã amnhî nhîpêx anhÿr o ri apa. Hãmri nê nhÿrmã ty nê ma Tîrtÿm nhõ krî hwÿr api. No kot ka mê arî akutã ano nê arî akutã apar nê arî akutã anhîhkra rãhã ri apa htã ho amnhî tomnuj o apa. Hãmri nê nhÿrmã ty nê ate amnhî tomnuj mÿrapê ma mê kot amnhî xà htÿx kamã hamak tÿm xà hwÿr ma mõ.

¹⁰⁻¹¹—Nê kêr ka mê mêhprîrejê kamã axukaprî rãhã ho apa. Na hte kaxkwa kamã Tîrtÿm kapêr o mê wrÿk xwÿnh kwÿyjaja Tîrtÿm mã mê hamâr mex o pa. Tã koja mêmõ tanhmã kêp hõ hto nhÿm mê hã omu nê ma tẽ nê Tîrtÿm mã harênh kurê kumrêx. Anê.

ôwêhti pikunor jarênh

Rukre 15.3-7

¹² Nhÿm Jejus arî mê inhmã kapêr nê mê inhmã:

—E pa mê amã awjarê ka mê ixu-jarênh ma. Nã koja mêmõ my hkrit ôwêhti xohtô nê. Nê apkati mê ma hamâr o pa. Hãmri nhÿm pyxire nê tanhmã amnhî to nê kêp akunok. Kwÿ kaga nê ma nhÿhÿm ahte tẽ nê kêp akunok. Hãmri nhÿm mytita ma akupÿm o môr kaxyw hkwÿ ho pikuprõnh pa hãmri nê tee ri hkwÿ kaêx ã pikunor xwÿnhhta japêr nom nhÿri omunh kêt nê. Hãmri nê tee ri hkukamã hamaxpêr nê ma hkwÿ ho mõ nê nhÿri kure. Kutêp apkur kaxyw nhÿri kure hãmri nê ma akupÿm pikunor xwÿnhhta japêr o tẽ. ¹³ Hãmri nê hapêr ryy nê nhÿri hwÿr kato nê omu nê hkînh nê. Hãmri nê kutu nê ma akupÿm o tẽ. Na hte pikunor kêt xwÿnhjê nhÿ hã hkînh tã

pikunor xwÿnhta mã kato nê hkĩnh tÿx nê. Krit xohtô htã nom ãm kãm ho pixi nê ho hpikunor prãm kêt. Æ mã ujarênh kot anhÿr. ¹⁴ Ja pyrã nê Tĩrtũm kãm mêhõ pyxi nê nhÿrmã ma kuwy wÿr mõr prãm kêt kumrêx. Mê piitã mã kot hkôt amnhĩ xunhwÿrja na kãm hprãm. Anê.

Jejus kôt mã pahtõjê hõ kot mã pah-tomnuj jarênh

¹⁵ Nhũm Jejus arĩ mã inhmã kapêr nê mã inhmã:

—Nê ja. Koja ixkôt mã atõ rÿ mã atõx tanhmã atomnuj to. Hã kêr ka ma hwÿr tẽ nê kot tanhmã anhĩpêx to hã amnhĩ tã kãm akapêr. Nom kêr ka mã nhãm mêhõ mã harênh kêt nê. Æm tanhmã kot ato xwÿnhta pix wÿr tẽ nê kumê war axpên mã akapêr nê war axpên ma. Nhũm ama nê akupÿm tãm anhĩpêx hã kêr ka akupÿm te ixkôt kêp atõ rÿ atõx pyrãk o ka wa axpên nhĩpêx nê axte jam ajamaxpêr kêt nê. ¹⁶ Nom koja ama nê ãm ama rÿ tanhmã ato hkêt ã amnhĩ jarênh japêr. Hã kêr ka ma akupÿm tẽ nê akupÿm amnhĩ kôt Kris kôt atõ rÿ atõx o axkrut rÿ mã ho axkrunêpxi nê amnhĩ kôt hwÿr mã o mra kê mã axpên tã war ama. Amnepêm Tĩrtũm kapêr ã kagã htũm kot ja jarênh o:

Kêr ka mã atõ tanhmã axpên nhĩpêx to. Hãmri nê hã axpên mã akapêr kaxyw nê amnhĩ kôt akwÿjê ho axkrut rÿ ho axkrunêpxi nê akupÿm hwÿr mã o mra kê mã axpên tã war ama. Anê.

—Æ Tĩrtũm kapêr ã kagã htũm kot ja jarênh kot anhÿr. ¹⁷ Jakamã kêr ka mã amnhĩ kôt akupÿm kot tanhmã ato xwÿnhta wÿr mã o mra kê mã atã kuma. Hãmri nhũm arĩ mã kãm kot tanhmã ato hkêt ã amnhĩ jarê ka tee ri amnhĩ tã omu nê ikrêsti hwÿr tẽ nê Kris kwÿ hã mã pikuprõnh xwÿnhjê mã harê. Kê mã ama hãmri nê ja hã axte kot tanhmã ato xwÿnhta mã kapêr. Nhũm mã mar kêt nê arĩ kot tanhmã ato hkêt ã amnhĩ jarê ka mã amnhĩ nê hanor kurê kumrêx. Hãmri

nê te kêp Kris kôt mã atõ rÿ mã atõx kêt pyrãk o hipêx.

¹⁸ —Nê koja mêhõ ixkôt amnhĩ xãm nê Inhĩpêêxã Tĩrtũm kôt ri amnhĩ nhĩpêx o pa. Ka mã ja hã omu nê inhÿ hã tanhmã kãm akapêr to nê kãm: “E ra ate Jejus kôt amnhĩ xãm jakamã kot kaj nhÿrmã Tĩrtũm mã wa kuri amex kumrêx nê atĩr tũm nê apa ho apa.” Anhÿr o kãm akapêr. Nom mã kot ixkôt amnhĩ xunhwÿr kêt xwÿnhjaja ka mã ã mã kãm akapêr anhÿr kêt nê. Æm inhÿ hã mã kãm: “No mã kajaja mã ate Jejus kôt amnhĩ xunhwÿr kêt jakamã kot kaj mã Tĩrtũm mã Krata wa kuri atĩr tũm nê amex nê apa hkêt nê.” Anê. Kêr ka mã inhÿ hã ã ahpÿnhã tanhmã mã kãm akapêr to ho apa anê.

¹⁹⁻²⁰ —Nê kot kaj mã Tĩrtũm mã amnhĩ jarênh kaxyw te axkrutre rÿ axkrunêpxire htã axpên wÿr akuprõ nom mã kapxipixjaja apikuprõnh kêt nê. Kot paj mã akaêx ã mã anhĩkõ hã mã amar o xa. Mê ate ano ho ixpumunh kêt tã pa wa mã anhĩkõ hã mã amar o xa. Jakamã kot kaj mã axpên wÿr akuprõ nê mêmõj tã Tĩrtũm wÿ nhũm kaxkwa kamã ja hã mã ama. Nê mã ate hã axãhwÿr xwÿnhta nhũm mã amã tanhmã ho. Kêr ka mã ã ixkamnãr rom axãmnhix amnhĩ to Inhĩpêêxã hwÿr anê. Anê.

Nhũm pre ã Jejus mã inhmã kapêr anê.

Mê pahte tanhmã axpên nhĩpêx to hã mã pamã karõ

Matêwre 6.14-15; Rukre 17.3-4; mããnên Epes 4.32; Korosê 3.13

²¹ Tã nhũm Simãw Pêtre Jejus wÿr tẽ nê mêmõj tã hkukja nê kãm:

—Kwa inhmã mêmõj jarê Pahiti. Xã koja akôt ixtõ rÿ ixtõx tanhmã inhĩpêx to pa amnhĩ tã omu nê ãm omu nê amnhĩ tã tanhmã ho hkêt nê. Nhũm axte tanhmã ixto nê axte tanhmã ixto ho 6 tã pa ãm amnhĩ tã omu nê amnhĩ tã tanhmã ho hkêt nê. Æm ho ijamakêtkati nê axte kãm ijamaxpêr kêt nê. Æ amnhĩ tã hipêx anhÿr o 7 nhũm ja amã mex nê nã? Anê.

²² Hāmri nhūm kām:

—Nà kot kaj ā amnhī tā hipêx anhÿr o 7 pix kêt nê. Koja mēhō xatā tanhmā ato rāhā nê ka amnhī tā omu nê ajaxwÿja amnhī tā xatā tanhmā ho hkêt nê. Ām amnhī tā omu nê ām omu nê tām hipêx rāhā ho ri apa. Māmri ho anhÿr o apa rāhā nê aa jam anhÿrer kêt nê.

²³ —E kot paj ixprī hā mē amā tanhmā ja jarēnh to ka mē inhma. Tirtūm na hte xatā mē ate tanhmā amnhī tomnuj to hā mē apumu nê mē anē rēnh o pa. Te kot pahi kot ā hkwÿjê nhīpêx anhÿr pyrāk. Koja mē ō pahija kām mē āpēnh xwÿnhjaja kot kēp kàxpore ho ĩpresta hā mē omunh kaxyw nhÿ. ²⁴ Hāmri nhūm mē hwÿr ja ho tē nê kutā ām. Ra kot kēp hikàxpore ho ĩpresta rax xwÿnhja. ²⁵ Tā no ām aa akupÿm kām ōr kêt nê ra kēp ho hapêx pa. Hāmri nhūm pahija tee ri amnhī tā omu nê hkwÿjê mā hā amÿnê nê mē kām: “E. Mē ma o tē nê hprō nê hkrajaja nê ōrkwÿ nê hikukrêx mērohā ho wēnê hpa nê hpānhā kàxpore py nê man inhmā o tē. Kot ixpê ixkàxpore ho ĩpresta nê akupÿm inhmā ōr kêt mÿrapê.” Anē.

²⁶ —Hāmri nhūm kot ho ĩpresta xwÿnhhta tee ri amnhī tā kuma nê kutā hkōnkrā ho nhÿ nê amnhī to hwÿr kām hihtÿx nê kām: “Kwa nà ri ixto anhÿr kêt nê pahihti. Ixkamā axukaprī nê hkêt wehe. Nà kot paj akupÿm amā kugō kām ga.” Anē.

²⁷ —Hāmri nhūm amnhī tā kuma nê kām hkaprī nê. Hāmri nê kām: “Tōe. Nà kot paj ā anhīpêx anhÿr kêt nê. Kot paj anhō kōt kaxōnh pa nê kumē ka māmri ma ajamakêtkati nê axāmnhīx apa.” Anē. ²⁸ Nhūm ā kām kapēr anē nhūm kuma nê hkīnh nê. Hāmri nê ma tē nê kato nê ixkre kapem pōristi hō pumu. Na pre ra kēp kàxpore hkwÿ ho grire nê ho ĩpresta nhūm kato nê omu. Hāmri nê hwÿr tē nê amnhī kīnhā ōkre hā kumÿ nê kām: “Kwa tokyx akupÿm ate ixpê kàxpore ho ĩpresta pānhā inhmā agō.” Anē. ²⁹ Hāmri nhūm tee ri amnhī tā omu nê ra ham kot pahi kutā amnhī nhīpêxta pyrā nê kutā hkōnkrā ho nhÿ

nê kām: “Kwa nà. Kwa ri ixto anhÿr kêt nê. Nà kot paj hpānhā amā kugō. Kwa ixkamā axukaprī nê hkêt wehe.”

³⁰ Anhÿr tā nom nhūm kuma nê ām kuma nê hā amÿnê. Hā hkwÿjê mā amÿnê nê mē kām: “E mē ma jahti ho tē nê haxà. Koja kot ixpê kàxpore ho ĩpresta pānhā inhmā kugō nê rī kormā kato nê rī amnhī pumu.” Anē. Hāmri nhūm mē kuma nê ma o tē nê haxà.

³¹ —Hāmri nhūm hkwÿjaja tee ri mar o kuhē nhūm mē kēp ja omnuj nê nhūm mē pahi hwÿr agjê nê kām harē. ³² Hāmri nhūm tee ri harēnh ma nê kamā gryk tÿx nê akupÿm amnhī wÿr hā karō nhūm akupÿm hwÿr axà nhūm kām: “Tk. Kwa na ka pre amnhī tomnuj tÿx nê. Ate amnhī to ixwÿr nhūm inhmā akaprī nê ixte anhō kōt kaxōnh nê mēnh tā ³³ ka amnhī kīnhā anhīōta kamā axukaprī hkêt nê ri ā hipêx anē.” Anē. ³⁴ Hāmri nê kamā gryk nê hā ō pōristi mā amÿnê nhūm mē ma o tē nê haxà. Mē kot mē hagjēnh xà hā ixkre kamā apkati mē tanhmā mē kot hipêx to kaxyw nhūm mē kām hā amÿnê. Tanhmā mē kot hipêx to rāhā nhūm kot akupÿm kàxpore raxta nhōr par nê rī kormā kator kaxyw nhūm mē ma o tēn haxà. Ā mē ujarēnh kot anhÿr. Anē.

³⁵ Nhūm pre ā Jejus mē ixte hkōt ixpa ho ixpa xwÿnhjê mā kapēr anē. Hāmri nê mē inhmā:

—Ja pyrā nê koja ixkōt mē atō rÿ mē atōx tanhmā mē atomnuj to ka mē amnhī tā omu nê ām omu nê ho ajamakêtkati kurē kumrêx nê axte kām ajamaxpēr kêt nê. Te pahi kot mēhō nhō kōt kaxōnh par nê axte kām hamaxpēr kēeta pyrāk. No kot kaj mē ā amnhī nhīpêx anhÿr kêt nhūm kaxkwa kamā inhō Papaj ja hā mē apumu nê te ho pahi tee ri kot amnhī tomnuj xwÿnhhta kot amnhī nhīpêx ā omunh nê hā āmnēnh nhūm mē kot apkati mē tanhmā omnuj tota pyrāk o mē anhīpêx. Anē.

19

Jejus kot mē pahte axpēn kaga né

mê pahkurê

Matêwre 5.31-32; Makre 10.1-12; Rukre 16.18; mãânên Wam Korît 7.10-16

¹ Tã nhũm Jejus mê inhmã kapêr pa nê mê inhmã anê pa mê ixrohã Garirej rûm ixkato nê pyhti pê Jotãw hã rê nê hpãnhã ihkjê hã ri ixpa. Pika pê Jutej kamã. ² Hãmri nhũm mê ohtô nê Jejus pumu nê man mê ixwÿr mra nhũm mê omu nê mê kãm akupÿm mê à xwÿnhjê ho mex. ³ Hãmri nhũm Parijew nhõ xwÿnh kwÿjaja hwÿr mra. Hêx rom kot kamã hamak nê tanhmã ho kapêr punuj to kaxyw hwÿr mra nê kãm:

—Pa? Kwa mê inhmã mêmoj jarê. Tanhmã na pre amnepê m finat Mojesja mê pahte mê pahprô kaga hã mê panhîgêjtê mã karô hto? Xà kot mê pahprô pahkwÿm ri tanhmã amnhî nhîpêx to pu mê hkaga nhũm ja Tirtũm mã mex nê nà? Anê.

⁴ Hãmri nhũm mê kãm:

—Nà na ka mê aprî hã Mojes kot tanhmã ja jarênh to mar mex kêt nê. Ja kot anhÿr kêt. Amnepê m mêmoj piitã hkra x kãm na pre Tirtũm my nê nija wa hipêx. Axpên kaxyw wa hipêx. ⁵ Hãmri nê wa hkukamã tanhmã wa kot amnhî nhîpêx to hã wa harê nê wa harênh o:

Koja mêmjaja hprô kaxyw hãmri nê gryk ã katorxã mê hipêêxã wa hkaga nê ãm hprô kôt pix mã pa ho pa. Te wa tipxi nê ri wa pa pyrãk o amnhî nhîpêx. Anê.

—Na pre ã Mojes Tirtũm nhÿ hã mê kãm ja jarênh anê. ⁶ Jakamã koja te wa tipxi nê ri wa pa pyrãk o axpên nhîpêx o pa. Tirtũm tãm kot axpên mã wa ôr kênã kot kêt wa axtem nê ri htÿx ri hamaxpêr nê axpên kaga. Anê.

⁷ Hãmri nhũm mê kuma nê kãm:

—Tÿ. Nom finat Mojes na pre mê pakukamã mê panhîgêjtê mã ã ja hã karô anê nê mê kãm:

Kot kaj mê aprô kaga kaxyw hãmri nê ra kêp aprô hkêt ã hã kaga nhîpêx nê kãm agô nê amnhî nê hano kê ma tẽ.

—Anhÿr o na pre mê kãm hã karô. Tã ka na ka mê ixte axpên kaga hkêt ã mê inhmã karô. Anê.

⁸ Hãmri nhũm mê kuma nê mê kãm:

—Tÿ no ãm mê kãm Tirtũm kapêr kôt amnhî nhîpêx prãm kêt jakamã na pre ã mê kãm ja jarênh anê. No amnepê m mêmoj piitã hkra x kãm na prem ã amnhî nhîpêx anhÿr o pa hkêt nê. ⁹ Jakamã kêr ka mê aprô kaga hkêt nê apa. Kot kaj mê hkaga nê hpãnhã nhãm mêmô ho aprô nhũm Tirtũm noo mã te ate wam aprô kamã nhãm aprô nyw o amnhîkati pyrãk. Tirtũm pê ja omnuj tÿx nê. Rÿ koja mêmô hprô kaga ka hpãnhã ho aprô nhũm Tirtũm noo mã te ate wam mjên pê ho amnhîkati pyrãk. Ja mãânên Tirtũm pê omnuj tÿx nê. Anê.

Nhũm pre ã Parijew nhõ xwÿnhjê mã kapêr anê. ¹⁰ Hãmri pa mê ixte hkôt ixpa ho ixpa xwÿnhjaja ã kapêr anhÿrja ã kuma nê kãm:

—Xà na hte mê mjên ra kãm mê hprô hkÿnh kêt tã hkaga hkêt nê arî hkôt pa ho pa nhũm hte Tirtũm mã ja mex nê nà? Jakamã kwa xà kot paj mê nhÿrmã ixprô kaga pymaj ixprô hkêt kumrêx nê ixpa ho ixpa nhũm ja mê inhmã mex nê nà? Anê.

¹¹ Hãmri nhũm mê inhmã:

—Nà ãm hãmri na ka mê ja jarê. No mê ate harênhja na mê piitã mê kãm mex kêt. Koja Tirtũm tãm amã aprô hkêt ã ajarê ka rî aprô hkêt nê ahte ajamakêtkati nê ri apa. ¹² Na htem piitã hprô nê pa hkêt nê.

Na hte kamã tanhmã mê kute xwÿnhjaja kormã hprîre ri tanhmã kute mÿrapê kãm hprô hprãm kêt nê pa.

Nê kamã tanhmã mê ho mÿrapê nhũm mê hkurê hkêt nê hprô hkêt nê pa.

Nê kamã mê kãm Tirtũm mã tanhmã amnhî to ho pa pix prãm xã kãm hprô hprãm kêt nê pa.

Tã kot kaj mê jajê pyrã nê ã amnhî nhîpêx anhÿr prãm nê rî kam nê aprô hkêt nê apa. Anê.

Jejus kot amnhĩ nê mēhprjê janor kêt ã harēnh

Makre 10.13-16; Rukre 18.15-17

¹³ Tã nhũm Ijaew kwỳjaja Jejus pumu nê hwỳr mē hkrarejê jamỳ nê mē o mra. Kot mē hã ãhkra jaxwỳr nê mē ho Tĩrtũm wỳr kaxyw hwỳr mē o mra. Hãmri pa mē ixte hkôt ixpa ho ixpa xwỳnhjaja tee ri mē omu nê tanhmã nê mē kãm ixkapēr to nê mē kãm:

—Tk. Mo kaxyw na ka mē Jejus wỳr mē o mra? Kormã mē ràxre kēnã. Kwa mē ma akupỳm mē o mra nà? Anē.

¹⁴ Hãmri nhũm Jejus mē inhma nê mē inhmã:

—Kwa nà mē ri inhnê mēhprjê kurê hkêt nê. Kwār mē mãmri ixwỳr mē o mra. Anē.

Hãmri nê amnhĩ wỳr mē mē kãm hpa ho apê nhũm mē hwỳr mē o mra nhũm mē kuri kuhê nhũm mē omu nê mē hã mē inhmã:

—E mē jarejê pumu. Na htem hamakêtkati nê hkĩnh nê ri pa. Nê mē kãm amnhĩ to rũnh prãm kêt nê. Tã Tĩrtũm kôt mē kot amnhĩ nhĩpêx o mē pa xwỳnhjaja te mē kot jajê pyrãa nê kãm amnhĩ to rũnh prãm kêt nê pa. Anē.

¹⁵ Hãmri nê mē hã ãhkra jaxwỳ nê mē ho Tĩrtũm wỳ hãmri nê mē inhmã anê pa mē ma axte mē kurũm mō.

Kàxpore rũnh xwỳnh jarēnh

Makre 10.17-22; Rukre 18.18-23; mãänēn Rōmãn 3.19-20; Wam Ximotre 6.6; Xiakre 2.10

¹⁶ Tã nhũm Ijaew òja Jejus wỳr tē nê kãm:

—Pa mē ijahkre xwỳnh? Kwa inhmã mēmoj jarē. Tanhmã kot pa nhỹrmã Tĩrtũm ri ixtĩr tũm nê ixpa ho ixpa kaxyw amnhĩ nhĩpêx to wehe? Anē.

¹⁷ Hãmri nhũm kãm:

—Tk. Ra Tĩrtũm kot nhỹrmã mē atĩr tũm nê apa kaxyw mēmoj tã mē amã karō nhũm ate mar mex kēnã kot ka kêt ri axte ja hã ixkukja. Nà Tĩrtũmja mex o mex jakamã kot kaj amã kuri atĩr tũm nê apa hprãm hã kot kaj kapēr kôt amnhĩ nhĩpêx no ri apa. Anē.

¹⁸ Hãmri nhũm kãm:

—No nhỹ kapēr kôt kot paj amnhĩ nhĩpêx o ri ixpa wehe? Anē.

Hãmri nhũm kãm:

—Na pre mē amã mēmoj tã karō ho: Kêr ka mē axpên par kêt nê.

Nê nhãm mē hprō ho amnhĩkati hkêt nê.

Nê mē kêp axàhkĩnh kêt nê.

Nê tanhmã mē ho axêx to hkêt nê.

¹⁹ Nê anhĩpêxà mē akatorxà wa hã apijaãm nê wa ho mex pē wa kutã anojarêt o ri apa.

Nê amã akwỳjê hã ma ho te ka amã amnhĩ tã ma pyrãk o mē hipêx. Jao tãm mē hipêx o ri apa.

E kot kaj amã nhỹrmã Tĩrtũm kuri atĩr tũm nê apa hprãm hã kêr ka ã amnhĩ nhĩpêx anhỹr o ri apa. Anē.

²⁰ Hãmri nhũm kuma nê kãm:

—Ku nhũm. Ra ã ixte amnhĩ nhĩpêx anhỹr o ri ixpa kēnã. Nom te kormã ixtĩr tũm nê ixpa kaxyw ixte tãm kêt pyrãk. Kwa axte inhmã mēmoj jarē nà? Anē.

²¹ Hãmri nhũm kãm:

—Nà kormã mēmoj pyxi nê arĩk. Na ka amã akukrêx rax prãm tỳx o amã Tĩrtũm prãm jakre. Jakamã ma akupỳm tē nê akukrêx rax o wēnê hpa nê hpãnhã kàxpore jamỳ nê ma mē kêp amrakati xwỳnhjê mã òr pa. Hãmri nê rĩ akupỳn ixwỳr tē nê rĩ ixkôt apa ho apa. Anē.

²² Hãmri nhũm kuma nê tee ri amnhĩ kukamã hamaxpēr. Kãm hikukrêx rax japê nê kãm kamã ãhkra karo hprãm kêt nê. Hãmri nê tee ri Jejus kot ã kãm hã karō anhỹrja ma nhũm ja kêp omnuj nê nhũm ma akupỳm htēm kurê kumrêx. ²³ Hãmri nhũm Jejus tee ri omu nê mē inhmã:

—Hêxta waa nê. Kojã mē hikukrêx rũnh xwỳnhjaja ohtó nê kãm mē hikukrêx japê xàj Tĩrtũm mē wa ixri htĩr tũm nê pa ho pa hkêt nê. Wa ixte amnhĩ nhĩpêxja mē kêp hihtỳx.

²⁴ Mē kãm hikukrêx rũnh mã ãhkra karo hprãm kêt rãhã tee ri kãm Tĩrtũm kôt amnhĩ nhĩpêx prãm kaprỳ. Te ho mēhō kot menh kagô hã hkre nê kãm kagô katōk prãm kêt rãhã kãm

guhkrax kãm àr prãm kaprÿta pyræk. Anê.

Nhùm pre ã Jejus mẽ inhmã kapêr anê. ²⁵ Hãmri pa mẽ kuma nê tee ri amnhĩ kukamã ijamaxpêr nê kãm:

—Kwa mẽ ixpiitã mẽ inhmã mẽ ixkukrêx japê kênã. Jakamã xà kot paj mẽ ixpiitã nhÿrmã war ari ixtÿr tùm nê ixpa ho ixpa hkêt nê nà? Anê.

²⁶ Hãmri nhùm mẽ inhmã:

—Nà kot kaj mẽ amnhĩ krã hkôt mẽ amã mẽ akukrêx japêja mã anhũrer kêt nê. ãm Tÿrtùm pix na hte ja kaxyw tanhmã mẽ akrã hto ka mẽ amã akukrêx japê hkêt nê. Jao ra mẽ apê Tÿrtùm mẽ wa ixri atÿr tùm nê mẽ apa ho mẽ apa mã xwÿnh. Anê.

²⁷ Hãmri nhùm Simãw Pêtre kãm:

—Kwa no we mẽ pajaja Pahihti? Na pa prem agryk ã mẽmoj piitã hkaga hpa nê akôt ixpa ho ixpa. Jakamã kot paj mẽ nhÿrmã war ari ixtÿr tùm nê ixpa ho ixpa nà? Anê.

²⁸ Hãmri nhùm kuma nê mẽ ixpiitã mẽ inhmã:

—Tÿ. Kot paj nhÿrmã mẽmoj piitã ho nyw pa hãmri nê ixte mẽ ho amnhĩptàr o ixkrĩ xà maati kamã nhÿ nê mẽ piitã mẽ kot tanhmã amnhĩ nhĩpêx to hã mẽ omunh xà hkôt tanhmã mẽ harênh to. Tã mẽ kajaja mẽ ate ixkôt apa ho apa xwÿnhjaja kot kaj mẽ inhmã Ijaew kot amnhĩ nhĩpêx ã mẽ omunh xà hkôt ahpÿnhã tanhmã inhmã mẽ harênh to. Mẽ mex ã mẽ harê rÿ mẽ mex kêt ã mẽ harê. Kot kaj mẽ ã inhmã mẽ harênh anê. ãm hãmri na pa mẽ amã ixkapêr anê.

²⁹ —Nê ka mẽ atõ inhmã tanhmã amnhĩ nhĩpêx to ho apa kaxyw akwÿjê re nê ma inhmã mẽmoj to anhÿr o ri apa. Tanhmã anhõrkwÿrÿ atõ rÿ atõx re. Rÿ aprõ nê akrajê re. Rÿ akatorxà mẽ anhĩpêxà war are. Rÿ akukrêx piitã rer pa hãmri nê ma mẽ piitã mẽ kãm ixkapêr o mẽ ahkre ho ri mẽ hkôt apa. Hã kot paj mẽ apumu nê mẽ ato mex rax nê. Hãmri ka mẽ ma mẽ hkôt apa nê mẽ kãm ixkapêr jarênh o apa nhùm mẽ kot mẽ amar xwÿnh kwÿjaja mẽ ama nê kãm mẽ akĩnh nê. Nê ra mẽ ate akwÿjê

rer par tã mẽ tãmjaja te mẽ apê mẽ hkra rÿ mẽ htõ rÿ mẽ htõx pyræk o mẽ anhĩpêx nê mẽ ato mex o pa. Hãmri ka mẽ nhÿrmã ty nê ma Tÿrtùm mẽ wa inhõ krĩ hwÿr api nê wa ixkuri amex kumrêx nê atÿr tùm nê apa ho apa. ³⁰ Nom kwa kêr ka mẽ amnhĩ tã ja ma nê amnhĩ to rÿnh xwÿnh ã amnhĩ kamnhix kêt nê. Jar mẽ kot amnhĩ to rÿnh ã amnhĩ to jarkrar xwÿnhjaja koja mẽ nhÿrmã amnhĩ to hkryre hã amnhĩ pumu. No jar mẽ kot amnhĩ to hkryre xwÿnh ã amnhĩ jarênh xwÿnhjaja koja mẽ nhÿrmã amnhĩ to rÿnh ã amnhĩ pumu. Anê.

20

Jejus kot nhÿrmã hkrajê ho mex ã harênh

Rõmãn 9.14-16

¹ Nhùm Jejus arĩ mẽ ixte hkôt ixpa ho ixpa xwÿnhjê mã awjarê nê mẽ inhmã:

—Nê kot paj nhÿrmã tanhmã mẽ ato mex to. Te ixpê hpur nhõ dõn kot amnhĩ nhĩpêx pyræk o mẽ anhĩpêx. Koja pur nhõ dõnja ihpur kãm mẽmo xõ ra hkà hpa nhùm omu hãmri nê kaxyw mẽ àpênh xwÿnhjê japêr kaxyw ma gãm tẽ. Nê gáp xa nê mẽ kãm akir nhùm mẽ hã akuprõ. ² Hãmri nhùm mẽ kãm: “E. Kot kaj mẽ jarãhã inhmã ixpur kãm apê. Kot kaj mẽ inhmã axàpênh o amÿkry pa hpãnhã mẽ kot apkati pixi hã mẽ àpênh pãnhã mẽ kãm amnhĩrer xàja kôt mẽ amã amnhĩre.” Anê hãmri nhùm mẽ kuma nê kãm: “Tõe. Nà kot paj mẽ amã apê.” Anê nhùm pur wÿr mẽ kurê nhùm mẽ ma kãm àpênh mã mra.

³ —Tã nhùm arĩ kÿx mã myt tẽ nhùm pur nhõ dõn akupÿm gãm tẽ nhùm mẽ hkwyja arĩ kuhê. ⁴ Nhùm tee ri mẽ omu nê mẽ kãm: “Kwa mon ka mẽ axàpênh kêt nê arĩ akuhê? E. Mẽ ma wamtajê hkôt mra nê inhmã apê pa hpãnhã mẽ amã amnhĩrer mex nê.” Anê. ⁵ Hãmri nhùm mẽ kuma nê ma mẽ hkôt mra. Tã nhùm ra myt kaxkwa nhĩpõk ri ajêt nhùm hpur nhõ dõnja mã hkwyjê ho anê nê. Kê axte mẽ hkôt jajê jano nhùm mẽ ma mẽ

hkôt mra. Tã nhũm ra myt ahpanh grire nhũm ma akupỹm kêwe gãm tẽ nẽ mã mẽ ho anẽ nẽ axte mẽ hkôt jajê rẽ.

6 –Tã nhũm ra myt grire nhũm ma akupỹm kêwe gãm tẽ nẽ jajê pumu nhũm kê wem arĩ gáp kuhê. Hãmri nhũm tee ri mẽ omu nẽ mẽ kãm: “Kwa mon ka mẽ axapênh kêt nẽ atýx gáp akuhê ho akuhê?” Anẽ. 7 Hãmri nhũm mẽ kãm: “Nà mēhō kot mẽ inhmã mẽ ixapênh ã karōre hã.” Anẽ. Hãmri nhũm mẽ kãm: “Tōe. Mẽ ma mẽ hkôt ixpur wýr mra nẽ inhmã mãn apê.” Anẽ hãmri nhũm mẽ kuma nẽ ma hkwyjê hkôt mra.

8 –Tã nhũm ra kamát. Hãmri nhũm hpur nhõ dōnja kãm apênh xwýnhjê krãhtũm wýr tẽ nẽ kãm: “E. Ma mẽ hwýr tẽ nẽ mẽ kãm anẽ kê mẽ apênh kaga nẽ man akôt mra ka inhmã mẽ kãm amnhĩre. Nom kêr ka hapu hã mẽ mōr xwýnhjê kumrêx mã amnhĩre nẽ wam mẽ mōr xwýnhjê ho hapu nẽ mẽ kãm amnhĩre.” Anẽ. Hãmri nhũm kãm: “Tōe. Nà kot paj mẽ ho anẽ.” Anẽ. 9 Hãmri nẽ ã mẽ kãm amnhĩrer anẽ. Hapu hã mẽ mrar xwýnhjê kumrêx mã amnhĩre. Te mẽ kot kwýhtã apênh o amýkry pyrãk o nhũm hpãnhã mẽ kãm amnhĩre. 10 Hãmri nhũm wam mẽ mrar xwýnhjaja ja hã mẽ omu nẽ hkĩnh nẽ. Hãmri nẽ htýx hamaxpêr o: “Nà kot paj xep kãxpore jamýnh rax o mẽ hakre. Ixapênh rax o ixte mẽ hakrenh kēnã.” Anhýr tã no nhũm mẽ piitã mẽ kãm amnhĩrer o axpēn pyrãk. Ra pur nhõ dōn kot kãm hã karō xà hkôt. 11 Hãmri nhũm mẽ hamý nẽ tee ri hkre kamã omu nẽ we ra hpur nhõ dōnja kamã gryk nẽ. 12 Hãmri nẽ hwýr mra nẽ kãm: “Kwa jajaja na mẽ amã apênh o ore pyxi nẽ. No kêt mẽ pajaja na pa mẽ kwýhtã ixapênh rax o kamát. Arĩgro htýx kãm ixapênh o ixãm o ixtã kamát tã ka pēr ãm mẽ inhmã amnhĩrer o axpēn pyrãk. Kwa na ka mẽ ixtomnuj nẽ.” Anẽ. 13 Hãmri nhũm mẽ kuma nẽ mẽ kãm: “Tk. Nà na pa mẽ atomnuj kêt nẽ. Na pa kwýhtã tanhmã mẽ amã amnhĩrer to xà jarẽ ka mẽ inhma nhũm ja mẽ amã mex nẽ ka mẽ ma

hwýr axapênh mã mra. 14 Kwa mẽ akãxpore jamý nẽ ma mra. ãm pa inhmã hprãm xà hkôt na pa ã mẽ amã amnhĩrer anẽ. 15 Ixkãxpore jakamã kot paj nhãm inhmã mēhō mã òr prãm xà hkôt kãm kugō. Tã ka mẽ ã mẽ hã ixkamã agryk anẽ. E mẽ akãxporeja mý nẽ ma mra.” Anẽ. Nhũm ã hpur nhõ dōn mẽ kãm kapêr anẽ. ã mẽ ujarēnh kot anhýr. Anẽ.

16 Nhũm pre ã Jejus mẽ inhmã ujarēnh anẽ nẽ mẽ inhmã:

–Ja pyrã nẽ wam mẽ ate ixkôt amnhĩ xunhwýr xwýnhjaja nẽ hapu hã mẽ kot kormã ixkôt amnhĩ xunhwýr mã xwýnhjaja kot paj nhýrmã mẽ apiitã mẽ ato mex kumrêx o axpēn pyrãk. Anẽ.

Jejus kot htyk kukamã amnhĩ jarēnh

Makre 10.32-34; Rukre 18.31-34

17 Tã nhũm Jejus mẽ inhmã anẽ pa mẽ ixrohã ma Jerujarē hwýr mō. Mẽ ohtōjê hkôt mō. Hãmri nhũm Jejus mẽ ixpê 12jê mã anẽ nẽ mẽ ixkwýjê hkãx ã mẽ inhmã kapêr kaxyw ahte hapu hã mẽ ixto mō. 18 Hãmri nẽ mẽ inhmã amnhĩ kukamã tanhmã amnhĩ jarēnh to nẽ mẽ inhmã:

–E na pu mẽ ra Jerujarē hwýr mō. Kamã koja mẽ pahkwýjaja inhĩpêx kati nẽ. Koja mẽ patre krãhtũmjê mẽ Mojes kapêr o mẽ ahkre xwýnhjê nhĩhkram ijaxà nhũm mẽ kot ixpĩr kaxyw ixtã amýnê. 19 Koja mẽ kãm ixkurê xwýnhjaja ixpyné nẽ Rōm nhõ xwýnhjê nhõ pōristijê hwýr ixto tẽ nẽ mẽ kãm tanhmã ixto hêx to. Hãmri nhũm mẽ kuma nẽ mẽ mar xà hkôt tanhmã inhĩpêx to. Nhũm mẽ hkwyjaja ixtã hpêr o axkê nẽ ixtã akunha nhũm mẽ hkwyjaja ixto kapêr punuj nẽ tanhmã ijapry hto nẽ ixtak. Hãmri nẽ ma ixto tẽ nẽ pĩ kahpa hã inhô nẽ ixpĩ. ã koja mẽ inhĩpêx anẽ. Nom kot paj ixtyk ã ixtã apkati axkrunēpxi nhũm Tirtũm akupỹm ixto ixtĩr. Anẽ.

Xiakre mē Juāw wa katorxà kot wa ho Jejus wÿr ā harēnh

Makre 10.35-45; mǎānēn Rōmān 12.3, 12.10, 12.16; Epes 4.2; Piripos 2.3-8; Xiakre 4.6; Wam Pêtre 5.3

²⁰Tā nhūm Jepetew prōja amnhī kōt Jejus wÿr hkra Xiakre mē Juāwja wa o tē. Kot wa ho Jejus wÿr kaxyw hwÿr wa o tē. Mē ixpyrà nē wa kot Jejus kōt pa ho pa xwÿnhjē hō na pre wa nhūm wa katorxàja Jejus wÿr wa o tē. Hāmri nē kutā hkōnkrā ho tēm nē nhÿ

²¹nhūm kām:

—Pa mo na? Anē.

Hāmri nhūm kām:

—Ma ixkrata na pa ixte wa ho awÿr kaxyw awÿr wa o tē. Xē kot kaj nhÿrmā ate mē piitā mē ho amnhīptār kaxyw nhÿ nhūm ixkrata wa akutā anhījē nē wa kēp anhō kōwenatō nē akutā anhījē nē wa ato nhÿ. Ja prām xāj na pa ā wa ho awÿr anē. Anē.

²²Hāmri nhūm kuma nē Xiakre mē Juāw wa omu nē wa kām:

—Nà na war akatorxàja htÿx ā war ato ixwÿr anē. Koja mē tokyx ixpī kot paj amnhī xà htÿx kām ijamak kām ty. Tā xà koja mē ixpyrà nē ā war anhīpēx anē ka wa ixpyrà nē amnhī xà htÿx kamā ajamak rax kām ty nà? Anē.

Hāmri nhūm wa kām:

—Tÿ. Nà kot pa wa ijaxwÿja anē nē apyrà nē amnhī xà htÿx kām ijamak kām ty. Anē.

²³Hāmri nhūm wa kām:

—Nà ām hāmri na ka wa amnhī jarē. War ate ixpyrà nē ixkōt amnhī xà htÿx kām ajamak kām atyk mā kēnā. Tā nom war akatorxà kot war ato ixwÿrta ā kot paj tanhmā war amā nē hkēt nē. Kēt inhō Papaj tām koja ixkaxyw mēhō japēr nhūm inhīhkō hā nhÿ. No pa kot paj amnhī kaxyw mēhō jarēnh kēt nē.

Anhÿr o wa kām kapēr. ²⁴Hāmri pa mē ixte wa urāk nē Jejus kōt ixpa ho ixpa xwÿnhjaja wa katorxà kot ā wa ho Jejus wÿr anhÿrja ā kuma nē wa kamā inhgryk nē. Hāmri nē axpēn mā ixkapēr o:

—Tk. Nà koja Juāw mē Xiakre wa nhÿrmā kēp ō kōwenatō nē mē pahto amnhīptār kēt kumrēx. Anē.

²⁵Nhūm Jejus mē inhma nē amnhī wÿr mē ixpiitā mē inhmā hpa ho apē nē mē inhmā:

—E mē amnē ixwÿr axkamē pa mē amā awjarē mān. Anē.

Hāmri pa mē hwÿr axkamē nhūm mē inhmā:

—E mē inhma. Na hte Ijaew kēt xwÿnhjē nhō pahijaja ā amnhī nhīpēx anhÿr o ri pa nē amarī hkrī xà kamā hkrī ho hkrī. āhpumunh tÿx jakamā amarī ixkre hkre jakry kamā hkrī ho hkrī nē kām mē àpēnh xwÿnhjē pix mā mēmo mē àpēnh ā karō. Na htem ā amnhī nhīpēx anhÿr o hkrī. Nē mē kot mex ā harēnh kaxyw tanhmā mē ho mex to ho pa. ²⁶⁻²⁷Tā no mē kajaja. Kēr ka mē ho mē urāk kēt nē. Ām te amarī ri mē apa pyrāk o axpēn nhīpēx o ri apa. Nē te mē apē mē kām axàpēnh xwÿnh pyrāk o amnhī nhīpēx o ri mē hkōt apa. No kēr ka mē ho amnhīptār mā ajamaxpēr o ri apa hkēt nē. ²⁸Mē ate mēmoj tā pa ixkutā anojarēt ho apa kaxyw na pa pre mē awÿr ixwÿr kēt nē. Ixte amarī mēmoj to mē kamjaja mē akutā inhnojarēt o ixpa kaxyw na pa pre mē awÿr wrÿ. Nē mē ate ixkōt amnhī xunhwÿr xwÿnhjē nē ixtyk kaxyw na pa pre wrÿ. Anē.

Jejus kot no hkre xwÿnh wa ho mex ā harēnh

Matêwre 9.27-31; Makre 10.46-52; Rukre 18.35-43

²⁹Tā pa mē Jejus kōt kormā Jeru-jarē hwÿr ra Jeriko htēp o mō. Hāmri nē kurūm ixkaton mō nhūm mē ohtō nē mē ixkōt mra. ³⁰Nhūm pry nhīhkjē hā no hkre xwÿnh wa āhwÿr o hkrī xwÿnhja wa amnhī wÿr mē inhmrar mar o nhÿ. Mē ohtō nē Jejus kōt mē mrar xwÿnhjē mrar ma nē mē kām:

—Kwa mo na? Mēmoj wÿr na ka mē axohtō nē mra? Anē.

Hāmri nhūm mē wa kām:

—Nà Jejus pē Najare nhō xwÿnhhta kōt na pa mē mra. Anē.

Hāmri nhūm wa mẽ kuma hāmri nē kàx pē Jejus mā kapēr nē kām:

—Pa Pahihti? E apê mẽ inhō Pahihti mex na ka. Te apê amnepēm anhīgēt pahihti Tawita pyrāk. Jakamā kwa wa ixkamā axukapri nē akupŷm wa ixto mex. Anē.

³¹ Hāmri nhūm Jejus kōt mẽ mōr xwŷnhjaja wa kuma nē wa kām:

—Tk. Kwa war akapēr kēt nē nhŷ nà. Anē.

Tā no nhūm wa ãm mẽ kuma nē xatā amnhī to kuwŷ. Kàx pē amnhī to kuwŷ. ³² Hāmri nhūm Jejus wa kuma nē xa nē wa omu nē wa kām:

—Pa mo na? Tanhmā kot pa wa ato? Anē.

³³ Hāmri nhūm wa kām:

—Nà akupŷm wa inhmā wa ixrit mex prām. Anē.

³⁴ Hāmri nhūm kām wa hkapri nē wa no htok nhūm wa akupŷm rit mex kurê kumrēx. Hāmri nē rit mex ã amnhī pumu nē hkīnh tŷx nē ma Jejus kōt hkŷjê hkōt mō.

21

Jejus kot Jerujarē hwŷr àr ã harēnh Makre 11.1-11; Rukre 19.28-40; Juāw 12.12-19

¹ Tā nhūm Jejus kormā Jerujarē hwŷr kormā mō. Pa mẽ hkōt mō nē ra Petake hwŷr ixàhtēp o mō. Hixēt pē Oriwēhti kahti ri na pre krīja xa. Jakamā pa mẽ wa hwŷr ixàhtēp o mō nhūm Jejus mẽ ixte hkōt ixpa ho ixpa xwŷnhjê wa ho axkrut nē amnhī kukamā wa kumē. ² Nē wa kām:

—E wa ma krī mŷj wŷr mẽ ixkukamā wa tē. Nē wa hwŷr axà nē nhŷri jumēnre mẽ hkra wa kām ê nē wa ãm xwŷnh wa omu hāmri nē kām ê xà hpôt nē man akupŷn amnē hamē wa o tē. ³ Koja mēhō ja hā war apumu nē hā tanhmā war amā kapēr to ka wa kām ã ijarēnh anē nē kām: “Nà mẽ panhō Pahihti na hā karō pa wa hwŷr tē.” Anhŷr o wa kām ijarē. Hāmri nhūm war ama nē war amā òr kurê kumrēx. E wa ma hwŷr tē. Anē.

⁴ Tirtūm kapēr ã kagà htūm ra kot ja kukamā harēnh. Na pre ra Tirtūm

nhŷ hā kapēr xwŷnhjê hō ja jarē nē hā kagà ho:

⁵ Pa Jerujarē nhō xwŷnhjaja. Kwa mẽ tee ri amnhī kukamā ajamaxpēr ho amā ma hkēt nē. Ota mẽ anhō pahi nywta ra jumēnre hā nhŷ nē mẽ awŷr hpôx o tē. Te kot amnhī to grire xwŷnh pyrāk o amnhī nhīpēx nē tē.

⁶ Anhŷr o kot hkukamā harēnh jakamā nhūm Jejus amnhī kukamā ja wa kumē hāmri nhūm wa ma hwŷr htēm kurê kumrēx. ⁷ Nē krīta wŷr pōj nhūm Jejus kot wa kām harēnh xà hkōt nhūm wa jumēnreta pumu. Hāmri nē hamē wa kām ê xà hpôt nē ma Jejus wŷr wa o tē. Hāmri nē kaxyw amnhī xē hkŷy hkŷrŷ nē kām ho jumēnre nywta kō kahty. Nē kām ho htŷx nē o xa nhūm Jejus hā nhŷ nē hā mō. ⁸ Kormā Jerujarē hwŷr hixēt ã àpir o mō. Nhūm mẽ kot omunh o kuhē xwŷnhjaja hkīnh nē ma hkukamā pry ho mex kaxyw amnhī xē hkŷyptyr ho mō. Nē pô hkŷy jakà nē utyr o mō. ⁹ Nhūm mẽ hkŷyjaja Jejus kukamā mra nhūm mẽ hkŷyjaja hapu hā hkōt mra. Nē piitā kàx pē Tirtūm mex o mex ã harēnh o hkōt mō nē harēnh o:

Ota Tirtūm kot mẽ pahwŷr mēnh xwŷnhhta ra pōj. ãm hāmri na mẽ pahwŷr wrŷ. Ja na mex kumrēx. Kēp mẽ panhō Pahihti mex na. ãm hāmri na pre Tirtūm mẽ pahwŷr kumē. Tirtūm mex kumrēx. ãm mex o mex.

Anhŷr o Jejus kōt Jerujarē hwŷr harēnh o mō. Kot mẽ ho amnhīptār kurê kumrēx ã hkamnhix jakamā hkīnh nē hkōt ã harēnh anhŷr o mō.

¹⁰ Hāmri nhūm krī nhō xwŷnhjaja tee ri mẽ kuma nē axpēn mā:

—Kwa mēhō na we hpôx o mō nhūm mẽ ã hkōt harēnh anhŷr o mō? Anē.

¹¹ Hāmri nhūm Jejus kōt mẽ mrar xwŷnhjaja mẽ kuma nē mẽ kām:

—Nà Tirtūm nhŷ hā kapēr jarēnh xwŷnh pē Jejus na. Kēp Garirej kamā krī pē Najare nhō xwŷnhhta na. Anē.

Jejus kot Tirtûm nhôrkwÿ hwÿr àr ã harênh

Makre 11.15-19; Rukre 19.45-48; Juãw 2.13-22

12-13 Tã hãmri nhũm Jejus Jerujarê wÿr axà nê jumênre rûm wrÿ nê ma Tirtûm mã amnhĩ jarênh xà hã ixkre hwÿr tẽ nê axà. Hãmri nê tee ri mẽ kot tanhmã ixkre kamã amnhĩ nhĩpêx to hã mẽ omunh o xa. Nhũm mẽ axtem nê môx nê ôwêhti nê tuuti ho wênê ho kuhê. Mẽ kot haprôr nê Tirtûm mã amnhĩ jarênh kaxyw kãm hpar nê ôr kaxyw mẽ kãm ho wênê ho kuhê. Nom axtem nê mẽ kãm hã ohtô rax kãm mẽ kãm ho wênê. Hãmri nhũm Jejus mẽ hwÿr axà nê tee ri mẽ omu nhũm ja kêp omnuj tÿx kumrêx. Hãmri nhũm mẽ hwÿr tẽ nê mẽ kot kãxpore ho pinhpanh xwÿnhjê pê mẽ ô mêsti rênh pa. Nê mẽ kot tuuti ho wênê xwÿnhjê pê hkrĩ xà hkujate nê rênh pa. Hãmri nê mẽ kãm:

—Tk. Kwa Tirtûm kapêr ã kagà htûm kot ixkreja jarênh kot:

Inhôrkwÿja ãm mẽ ate inhmã amnhĩ jarênh xà hã ixkre pix kaxyw na.

Anhÿr o kot harênh tã ka mẽ axtem nê kamã ã amnhĩ nhĩpêx anê. E kwa mẽ ajapôx tokyx anê. Anê.

Hãmri nê mẽ kator pa nhũm mẽ ma hapêx. ¹⁴ Hãmri nhũm mẽ no hkre xwÿnhjaja nê mẽ hyk o mẽ pa xwÿnhjaja mra nê agjê nê Jejus kutã kuhê nhũm mẽ omu nê akupÿm mẽ ho mex. ¹⁵⁻¹⁶ Hãmri nhũm mẽhprĩ hkwÿjaja hwÿr mra nê kuri kãm mex o mex ã gre nê kãm grer o:

Amex kumrêx Pahшти.

Tirtûm na pre mẽ ixwÿr amê.

Kot kaj te anhĩgêht Tawi pyrã nê mẽ ixto amnhĩptãr o apa.

Anhÿr o kãm grer o kuhê. Hãmri nhũm patre krãhtûm mẽ Tirtûm kapêr tûm o mẽ ahkre ho mẽ pa xwÿnhjaja tee ri ã mẽ grer anhÿr ã mẽ kuma. Nê tee ri Jejus kot mẽ no hkre xwÿnhjê mẽ mẽ hyk o mẽ pa xwÿnhjê ho mex ã omunh o kuhê nê gryk nê Jejus wÿr tẽ nê kãm:

—Kwa na mẽhprĩjaja mẽ grer kãm ã ajarênh anê ka mẽ mar kêt nê? Mẽ grerja mexti hã. Anê.

Hãmri nhũm mẽ kãm:

—Tÿ ixte mẽ mar kênã. Tirtûm kãm hprãm xà hkôt na mẽ ã inhmã inhmex o inhmex ã ixtã grer anê. Tirtûm kapêr ã kagà htûm kot ã mẽ hkukamã harênh kot anhÿr. Mẽ harênh kot:

Koja mẽhprĩjaja Pahшти mã mex o mex ã grer o kuhê.

Anhÿr o kot mẽ hkukamã harênh kênã. Tã mãn ka mẽ kormã kamã harênh kêt jakamã na ka mẽ ja jarênh mar kêt nê. Kwãr mẽ mãmri ã inhmex ã grer anê.

¹⁷ Anhÿr o mẽ kãm kapêr hãmri nê mẽ inhmã anê pa mẽ ixkreta rûm ijapôj nê ma akupÿm Petãn wÿr mra nê kamã amnhĩm hikra.

Jejus kot mẽmo hpãr mã kapêr ã harênh

Makre 11.12-14; mããnên Xiakre 1.6

¹⁸ Tã nhũm kwÿhtã nhũm Jejus kãnhmã nhÿ nê mẽ inhmã anê pa mẽ ixrohã ma akupÿm Jerujarê hwÿr mra. Hãmri nê kormã mō nhũm Jejus pry kahti ri ra kãm prãm nê. ¹⁹ Hãmri nê mẽmo pĩ pê fikêhti jarênhja pumu nê kot ô hkwÿ rênh nê hkrêr kaxyw hwÿr màt. Hãmri nê tee ri ô japêr nhũm ô hkêt nê ãm hô hpix harir. Hãmri nhũm tee ri omu nê kãm:

—E kot kaj axte axô hkêt kumrêx.

Anhÿrja o nhũm grã par kurê kumrêx. ²⁰ Hãmri pa mẽ ixte hkôt ixpa ho ixpa xwÿnhjaja omu nê Jejus mã:

—Kokÿÿ. Kwa tanhmã na we amnhĩ nhĩpêx to nê grã kurê kumrêx? Anê.

²¹ Nhũm mẽ inhmã:

—Nà kot kaj mẽ ixpyrà nê fikêhti kot tanhmã amnhĩ nhĩpêx to kaxyw Tirtûm mã ajamxpêr tÿx nê nhũm amã hprãm xà hkôt amã tanhmã hipêx to. Nom kêr ka mẽ ajamxpêr kati ho tee ri hkukamã ajamxpêr kêt nê. ãm kaxyw Tirtûm kôt ajamxpêr tÿx nê nhũm mẽ amã tanhmã mẽmoj nhĩpêx to. ãm hãmri na pa mẽ amã ja jarê. No ãm ja pix kêt. Kot kaj mẽ

määnên hixêt mûj mã akapêr nê kãm: “E anhÿr xàta rûm akato nê ma tẽ nê gô rax kãm mrõ.” Anê nhùm amar xà hkôt ã amnhĩ nhĩpêx anê.

²² —Nê kot kaj mẽ mẽmoj tã Tĩrtũm wÿ nê kaxyw kãm ajamaxpêr tÿx kãm hã awÿ nhùm amã mẽmoj prãm xwÿnhãtã gõ. Anê.

Mêhõ nhÿ hã Jejus kot mẽ ahkre hã harênh

Makre 11.27-33; Rukre 20.1-8

²³ Nhùm arĩgro hõ hã nhùm Jejus kêwe axte Tĩrtũm mã amnhĩ jarênh xà hã ixkreja wÿr axà nê kamã mẽ ahkre ho nhÿ. Mẽ kãm tanhmã mẽ kot amnhĩ nhĩpêx to nê nhÿrmã Tĩrtũm mẽ wa kuri htĩr tũm nê pa kaxyw tanhmã mẽ kãm kapêr to ho nhÿ. Hãmri nhùm Ijaew krãhtũmjê mẽ mẽ õ patre krãhtũmjaja hãmri hwÿr mra nê hêx rom mẽmoj tã hkukja nê kãm:

—Kwa mẽ inhmã amnhĩ jarê. Mêhõ nhÿ hã na ka hte ã amnhĩ nhĩpêx anhÿr o apa? Na ka hte akupÿm mẽ ho mex o apa nê tanhmã mẽ ahkre hto ho apa. Xà amnhĩ krã hkôt na ka hte ã amnhĩ nhĩpêx anê nã? Anê.

²⁴ Hãmri nhùm mẽ kãm:

—Nã kot pa ixkumrêx mẽmoj tã mẽ akukja. Ka mẽ inhma nê tanhmã inhmã harênh to pa rĩ kormã mẽ amã amnhĩ jarê. ²⁵⁻²⁶ Finat Juãw Paxis ã kot paj mẽ akukja. Mêhõ nhÿ hã na pre hte mẽ hkrã kumrãr o pa? Xà amnhĩ krã hkôt nã? Xà Tĩrtũm nhÿ hã? E mẽ atõ inhmã ja jarê. Anê.

Hãmri nhùm mẽ kuma nê tee ri kot tanhmã kutã kãm harênh to hkukamã hamaxpêr pẽ axpên pumunh o kuhê nê axpên mã:

—Kwa tanhmã kot puj wem kãm ja jarênh to? Or mẽ kot mar o kuhê xwÿnhjaja na htem kêp Tĩrtũm nhÿ hã kapêr jarênh xwÿnh ã harê. Tã kot puj mẽ kãm kot amnhĩ krã hkôt kot mẽ hkrã kumrãr ã harê nhùm mẽ tee ri mẽ pama nê mẽ pakamã gryk tÿx nê. Nê mẽ paxêx rom ã mẽ pahte kãm pakapêr anhÿr ã mẽ pahpumu nê kên o mẽ pahtak o mẽ panhĩmex. No kot puj mẽ kãm Tĩrtũm nhÿ hã kot mẽ hkrã kumrãr ã harê hãmri nhùm

mẽ pamã: “Kwa ã kot anhÿr kênã na ka prem kapêr ma nê hkôt ajamaxpêr kêt nê?” Anê. Jakamã kot puj mẽ ja pymaj tanhmã kãm harênh to hkêt nê. Kot puj mẽ ãm kãm aa te mẽ pahte ja jarênh mar kêt pyrãk o harê. Anê.

Mẽ kot tanhmã Jejus mã nê nhùm kot ta pãnhã tanhmã mẽ kãm nê pymaj nhùm mẽ tee ri kãm tanhmã nê hprãm kaprÿ o kuhê. ²⁷ Hãmri nê kãm: —Konên. Mẽ ixte mêhõ nhÿ hã kapêr o pa hã omunhre hã. Anê.

Hãmri nhùm mẽ kuma nê mẽ kãm: —Tk. Tôe kot pa xep ijaxwÿja mẽ amã tanhmã amnhĩ jarênh to hkêt nê. Ijaxwÿja ixte mêhõ nhÿ hã ã ixte amnhĩ nhĩpêx anhÿr o ri ixpa hã amnhĩ pumunhre hã. Anê.

Mêhõ my mẽ hkra wa pijakrut ã wa harênh

Matêwre 7.21-23; Rukre 7.29-30

²⁸ Hãmri nhùm Jejus axte Ijaew krãhtũmjê mẽ mẽ õ patre krãhtũmjê mã kapêr nê mẽmoj tã kuxi nê tanhmã mẽ kãm ujarênh to nê mẽ kãm:

—E pa mẽ amã awjarê ka mẽ inhma. Kojã mêhõ hkra my hamêxkrut. Hãmri nê hkra kot waja mã tanhmã kapêr to nê kãm: “E kêr ka jarãhã ma tẽ nê inhmã pur kãm apê.” Anê. ²⁹ Hãmri nhùm kuma nê pur mã htêm kaga nê hitõt nê. Tãã no ãm hã ahtũmre nê tanhmã hamaxpêr to hãmri nê ma hwÿr tẽ nê kamã ãpênh o xa. ³⁰ Hãmri nhùm wa hipêêxãja hpãnhã hkra kot hapu hwÿr tẽ nê mã kãm kapêr anê nê kãm: “E kêr ka ajaxwÿja atõ hkôt tẽ nê wa inhmã apê.” Anê nhùm kuma nê kãm: “Tôe. Nã kot paj ma tẽ.” Anhÿr tã no ãm hõta kĩnhã htêm kêt nê.

³¹ —Jakamã e. Nhÿ hkra na pre hipêêxã kapêr ma nê hkôt amnhĩ nhĩpêx nê kapêr nhĩrõp ãm kêt nê? Xà kot waja nã? Xà kot haputa? E mẽ atõ tanhmã inhmã wa harênh to. Anê.

Hãmri nhùm mẽ kuma nê kãm:

—Nã kot wata. Kot wata na hitõt tã tanhmã hamaxpêr to nê ma tẽ nê kãm apê. Anê.

Hãmri nhùm mẽ kãm:

—Tỳ âm hāmri na ka harē. No mẽ kajaja te mẽ ate hkra kot ha-puta kot amnhĩ nhĩpêx pyrāk. Mẽ ate Tĩrtũm kapêr kôt amnhĩ nhĩpêx o apa hã amnhĩ jarēnh tã hkwỳm ri amnhĩ nhĩpêx o apa. Te mẽ ate kot hapu kot hipêêxà mã àpēnh ã amnhĩ jarēnh tã kãm àpēnh kēeta pyrāk. No kêt mẽ kot amnhĩ tomnuj o mẽ pa xwỳnh kwỳjaja na mẽ arom Tĩrtũm kapêr ma nẽ hkôt amnhĩ nhĩpêx. Jao ra tãm amnhĩ nhĩpêx o pa. Jakamã mẽ arom ma kaxkwa hwỳr pa kaxyw ra tãm nẽ. Âm hāmri na pa mẽ amã ixkapêr.
³² Na ka mẽ finat Juãw Paxis ã ixkukja. Juãw Paxisja na pre hte mẽ ate tãm amnhĩ nhĩpêx ã mẽ amã karō ho pa. Tã no ka mẽ âm ama nẽ âm ama nẽ aa kapêr kôt amnhĩ nhĩpêx kêt nẽ. Nom mẽ kot amnhĩ tomnuj o mẽ pa xwỳnh kwỳjaja mẽ arom kuma nẽ Tĩrtũm kôt amnhĩ nhĩpêx. Ka mẽ ja hã mẽ omu nẽ âm mẽ omu nẽ mẽ urāk nẽ ã amnhĩ nhĩpêx anhỳr kêt nẽ. Anẽ.

*Mẽ àpēnh punu xwỳnhjê jarēnh
 Makre 12.1-12; Rukre 20.9-18*

³³ Nhũm Jejus arĩ Ijaew krãhtũmjê mẽ mẽ õ patre krãhtũmjê mã kapêr. Nẽ mẽ kot tanhmã hipêx to hkukamã mẽ kãm tanhmã amnhĩ jarēnh to. No âm amnhĩ tã kuxi nẽ mẽ kãm awjarē nẽ mẽ kãm:

—Koja mēhō mẽ kot kãm pur kãm àpēnh kaxyw hkwỳjê mã karō nhũm mẽ ma hwỳr mra nẽ kamã mẽmo hy hkre nẽ hkre pa. Hāmri nhũm hpur nhõ dõn nhỹhỹm nojarê nẽ kãm mẽ àpēnh xwỳnhjê mã tanhmã hpur jarēnh to nẽ mẽ kãm: “E or ixpur nõ. Kê kamã mẽmoj kà hpa ka mẽ mãmri kamã axujamỳnh pa nẽ ho axkjê. Nẽ ixkutêp inhmã inhõ jaxwỳ nẽ mãmri anhõ tanhmã ho hprãm xã hkôt tanhmã ho.”

—Anhỳr o mẽ kãm kapêr hāmri nẽ ma nhỹhỹm mō. ³⁴ Tã nhũm ra pur kãm mẽmoj hkà pa nom nhũm hpur nhõ dõn arĩ krĩ hõ kamã hã ujahkre ho ri pa htã kuri kãm àpēnh xwỳnhjê ho axkrunēpxi nẽ akupỹm mẽ hwỳr mẽ kurē. Mẽ kot mẽ kãm hkwỳ nhõ nhũm mẽ ma kot kãm o mōr kaxyw

nhũm ma mẽ hwỳr mẽ kurē. ³⁵ Nhũm mẽ ma hwỳr mō. Mōõ nẽ ra hwỳr pøj nhũm mẽ amnhĩ wỳr mẽ omu nẽ axtem nẽ mẽ homnuj nẽ. Nẽ mẽ unê nẽ ja tak nẽ ja pĩ nẽ hõja nhũm mẽ kēn o htak hāmri nẽ amnhĩ nẽ wa hano nhũm wa ma akupỹm ý kamã mō. ³⁶ Hāmri nhũm mẽ õ patrãwja tee ri wa omu nẽ hamaxpêr o: “Kwa nà na mẽ ixpê inhmã mẽ àpēnh xwỳnhjê homnuj tỳx nẽ. Nà kot paj axte mẽ hwỳr mẽ hkwỳjê rē. Nom hpãnhã mẽ ho ohtō nẽ mẽ kurē. Kê mẽ ohtō nẽ mẽ hwỳr mō nẽ tã inhmã inhõ hkwỳ jamỳ nẽ man ixwỳr o mō.”

—Anhỳr o hamaxpêr hāmri nẽ mẽ hwỳr jajê rē nhũm mẽ ma akupỹm mẽ hwỳr mō. Nhũm mẽ amnhĩ wỳr mẽ ohtō hã nẽ mã mẽ ho anẽ nẽ mẽ hipêx kati nẽ nhũm mẽ ý kamã ma õ patrãwja wỳr akupỹm mō. ³⁷ Hāmri nhũm tee ri mẽ omu nẽ hamaxpêr o: “Hêxta waa nẽ. Tanhmã kot paj amnhĩ nhĩpêx to? Nà kot paj pêr mẽ hwỳr ixkraja mãn mẽ. Inhmã hapê htỳx tã kot paj mẽ hwỳr kumê kê ma mẽ hwỳr mō. Hāmri nhũm mẽ kêp ixkra hã omu nẽ tanhmã ixpê ho hkêt nẽ. Nẽ tã inhmã kãm inhõja kwỳ gō.” Anẽ.

—Hāmri nẽ mẽ hwỳr kumê nhũm ma mō. ³⁸ Tã hāmri ra mẽ hwỳr hpõx o mō nhũm mẽ amỳm amnhĩ wỳr omu nẽ kêp hkra hã omu nẽ axtem nẽ hã axpēn mã amỳnê nẽ axpēn mã: “E oněj hpur nhõ dõn krata tẽ. Koja nhỹrmã õ papaj mỳr pē amnhĩm hpur ã pykata pytà nẽ ho õ. Jakamã kwa pu mẽ hpĩr kurê kumrēx nẽ kêp hpur ho arĩk nẽ ho panhõ. E tokyj pu mẽ kupĩ ri.” Anẽ.

³⁹ —Hāmri nhũm ra tẽ nẽ mẽ hwỳr pøj nhũm mẽ unê nẽ hpur nẽ ho kato nẽ mã ho anẽ nẽ kupĩ. ã mẽ ujarēnh kot anhỳr. Anẽ.

⁴⁰ Nhũm pre ã Jejus mẽ kãm ujarēnh anẽ. Hāmri nẽ hã mẽ hkukja nẽ mẽ kãm:

—E koja pur nhõ dõnja hkra jarēnh ma hāmri nẽ tãm mẽ hwỳr mō hāmri nẽ tanhmã mẽ hipêx to wehe? Anẽ.

⁴¹ Hāmri nhũm mẽ kãm:

—Nà koja ma akupÿm mẽ hwÿr mō hāmri nē mẽ homnuj tÿx nē mẽ himex pa. Hāmri nē hpānhā nhām hpur ā mẽmojjê rē nhūm mẽ tā katāt kōt kām àpēnh o pa. Anē.

⁴² Hāmri nhūm Jejus mẽ kām:

—Tÿ ām hāmri na ka ā mẽ harēnh anē. Kot mẽ ho anhÿr mā tām kēnā. Mān ka prem ra Tirtūm kapēr ā kagā htūm kot tanhmā ja jarēnh toja ma? Harēnh kot:

Mẽ kot kēn o amnhīm ōrkwÿ nhīpēx kaxyw nē kēn maati pumu nē htÿx omnuj ā hkamnhīx nē hkagata. Mẽ kot hkaga htā nhūm Tirtūm mẽ kurom mex o kot kēn piitā hakrenh par ā omunh kurē kumrēx. Tirtūm kot kēn maati mex ā harēnh xwÿnhhta mẽ pamā mex o mex.

Ā Tirtūm kapēr ā kagā htūm kot ja jarēnh kot anhÿr. ⁴³ Ja pyrā nē na pre ra Tirtūm amnhī kaxyw mẽ apē Ijaew xunhwÿ. Mẽ apē hkra nē hkōt mẽ ate amnhī nhīpēx kaxyw amnhī kaxyw mẽ axunhwÿ. Tā ka mẽ axtem nē hkaga. Te mẽ kot kēn maati pumunh nē mex kēt ā hkamnhīx nē hkagata pyrāk. Jakamā koja mẽ apānhā Ijaew kēt xwÿnh kwÿjê xunhwÿ nhūm mẽ arom hkōt amnhī nhīpēx mex o pa. Jao ra mẽ kēp hkra nē. Anē.

⁴⁴ Nhūm pre ā Jejus mẽ kām te kēp kēn maati pyrāk o mẽ kām amnhī jarēnh anē. Hāmri nē axte amnhī tā kuxi nē mẽ kām axte kēn jarēnh pyrāk ā amnhī jarē nē mẽ kām:

—Nà kot kaj mẽ atō ixkaga hāmri nē te mēhō htÿx htēm nē kēn pumunh kēt nē hā htēk nē tēm pyrāk o amnhī nhīpēx. Jao ixkutā amnhī xām. Rÿ ka tanhmā ajamaxpēr to nē ixkaga nhūm te kēn maati kot anhīpy tēm nē axōm par pyrāk o anhīpēx ka mẽ amex kēt kumrēx. Anē.

⁴⁵ Nhūm pre ā mẽ kām ujarēnh kām mẽ harēnh anē. Hāmri nhūm patre krāhtūmjê mẽ Parijew nhō xwÿnhjaja tee ri amnhī tā kuma ⁴⁶ nhūm ja mẽ kēp omnuj tÿx jakamā nhūm mẽ kām unēnh nē haxār prām nē. No mẽ ām amnhī tā kām mẽ kot mar o kuhē

xwÿnhjê puma nē. Mẽ kurom Jejus kēp Tirtūm nhÿ hā kapēr xwÿnh ā hkamnhīx jakamā nhūm mẽ kām mẽ uma nē. Hāmri nē kormā tanhmā ho hkēt nē.

22

Pahi kot hkra hprō kaxyw hkwÿjê hwÿr ā harēnh

Rukre 14.15-24; mǎānēn Wam Korīt 6.9-11; Epes 5.5-6; Apokarip 19.7-8

¹⁻² Tā nhūm Jejus axte mẽ kām awjarē. Ijaew kot Tirtūm kaga hā mẽ kām hā kuxi nē awjarē nē mẽ kām:

—E pa mẽ amā ahpÿnhā mẽ kot Tirtūm kapēr mar nē tanhmā amnhī nhīpēx to xwÿnhjê jarē ka mẽ inhma. Te mẽ kot pahihtti kot hkra hprō kaxyw nhūm kot amnhī wÿr hkwÿjê hwÿr nhūm mẽ kot harēnh mar nē ahpÿnhā tanhmā amnhī nhīpēx to xwÿnhjaja kot amnhī nhīpēx pyrāk. Koja pahihtija hkra hā hkīnh nē hā apkur mex kaxyw amnhī wÿr hkwÿjê hā karō. ³ Hāmri nhūm kām mẽ àpēnh xwÿnhjaja ra kot amnhī wÿr mẽ hā karō xwÿnhjê hwÿr mra nē mẽ kām nojarēt nhūm mẽ kuma nē ām mẽ kuma nē axtem nē mẽ kēp hitōt nē. Hāmri nhūm mẽ tee ri mẽ kuma nē akupÿm tē nē pahihtti mǎ mẽ harē.

⁴ —Hāmri nhūm tee ri amnhī tā mẽ harēnh ma nē hpānhā mẽ hwÿr axtem kām àpēnh xwÿnh kwÿjê rē nhūm mẽ ma mẽ hwÿr mra nē mẽ kām: “Pa. E kwa mẽ tokyx. Na ra pahihtti mẽ akutēp mẽō nhīpēx pa. Na mẽ mōx kwÿ hpa nē ho àr mex nē. Nē mẽ akutēp mẽmoj nhīpēx par jakamā e kwa mẽ tokyx nà.” Anē. ⁵ ā mẽ kām kapēr anhÿr tā nhūm mẽ kuma nē ām mẽ kuma nē ma ahpÿnhā nhÿhÿm mra. Nhūm ja ma àpēnh mǎ mra nhūm ja ma ihpur kām àpēnh mǎ ma tē nhūm ja ma nhÿhÿm mẽmo to wēnē ho tē. ⁶ Nhūm mẽ hkwÿjaja mẽ kām ujarēnh xwÿnhjê pynē nē mẽ htak o mẽ kupa.

⁷ —Hāmri nhūm pahihtija mẽ harēnh ma nē àhkurē nē. Hāmri nē mẽ hwÿr pōristi hkwÿ rē nhūm mẽ

ma mẽ hwÿr mra nê mẽ unê nê mẽ kupa nê mẽ ò krî hã hpôk pa. ⁸ Hãmri nhũm pahшти kãm mẽ àpênh xwÿnh kwÿjê mã kãm: “Kwa ra ixte mẽ kutêp mẽõ mex kwÿ xunhwÿr tâ nhũm mẽ ixwÿr mra kêt nê. Ixtÿx ho mẽ mẽ ã mẽ hkamnhĩx nê amnhĩ wÿr mẽ hã karõ no mẽ mẽ kêt. Mẽ kot mẽ ixkutã apkur mã tam kêt. ⁹ E kwa mẽ ma krî hkôt axtem mẽ hkwyjê japêr o mra. Nê nhÿri mẽhõ pumu nê kãm awjarê kê man ixwÿr tẽ nê ixkra hã hkĩnh nê mẽ ixkutã apku. Mẽ ã mẽ kãm axujarênh o amrar anê.” Anê.

¹⁰ –Hãmri nhũm mẽ kuma nê ma mẽ hapêr o mra nê mẽ piitã mẽ kãm anhÿr o mra. Nhũm mẽ kuma nê wam tajê rom ma mẽ hkôt mra kurê kumrêx. Mẽ kot amnhĩ to mex xwÿnhjaja nê mẽ kot amnhĩ tomnuj xwÿnhjaja hãmri piitã ma mẽ hkôt mra. Hãmri nê ixkreja wÿr mra nê hwÿr gjêx kaxyw nhũm mẽ kãm mẽ ê mex gõ nhũm mẽ hagjê hãmri nê kormã mẽ apkur xà hã ixkre hwÿr agjê nê ho nyt pa. ¹¹ Hãmri nhũm pahштija mẽ hwÿr axà nê mẽ piitã mẽ omu. Nhũm ja pixi nê axtem nê hkwyjê hkĩnhã mẽ kot kãm ê mex nhõrja jaxàr kêt rãhã axà nê apkur o nhÿ. ¹² Hãmri nhũm tee ri ja hã omu nê hwÿr tẽ nê kãm: “Pa. Tk. Kwa na htem ixkrem gjêx kaxyw nê mẽ kot mẽ kãm mẽ ê mex nhõr jagjê nê rĩ kormã hwÿr agjê nê apku. Tã mon ka akwyjê hkĩnhã haxàr kaga? Kwa na htem ã amnhĩ nhĩpêx anhÿr kêt nê.” Anhÿr o kãm kapêr nom nhũm kuma nê ãm kuma nê tanhmã kutã kãm nê hkêt nê. ãm htÿx apkur o nhÿ. ¹³ Jakamã nhũm tee ri omu hãmri nê hã mẽ kot kãm àpênh xwÿnhjê mã amÿnê nê mẽ kãm: “E mẽ hwÿr tẽ nê unê nê hpa nê hte hpre nê ma o tẽ nê kamãt kô kamã amê. Kê tee ri mur nê amnhĩ xà htÿx kamã hamak o amnhĩ nham o axpênh kamnar tÿx kaprÿ ho nõ nê rĩ amnhĩ pumu.” Anê. Hãmri nhũm mẽ kuma nê kãm ho anê. ã mẽ ujarênh kot anhÿr. Anê.

¹⁴ Nhũm pre Jejus ã mẽ kãm ujarênh anê hãmri nê mẽ kãm:

–Nà Tirtũm kot pahштita pyrã nê amnhĩ wÿr mẽ ho ohtõ nê mẽ hwÿr tâ

na hte mẽ piitã hkôt amnhĩ xunhwÿr kêt nê. Jakamã na hte ãm mẽ ho grêre nê amnhĩ wÿr mẽ ho api. Anê.

Parijew nhõ xwÿnh kot Jejus kamã hamak ã mẽ harênh
Makre 12.13-17; Rukre 20.20-26; mããnênh Rõmã 12.1, 13.7

¹⁵⁻¹⁶ Tã nhũm Parijew nhõ xwÿnhjaja ã Jejus kot mẽ kãm ujarênh anhÿrja ma hãmri nê kurũm kato nê tanhmã hkukamã axpênh mã hã àmnênh to. Hãmri nê hwÿr mẽ hkwyjê mẽ Erox kôt mẽ pa xwÿnh kwÿjê rê. Hêx rom mẽ kot mẽmoj tâ hkukjêr kaxyw hwÿr mẽ kurê nhũm mẽ ma hwÿr mra nê omu nê kãm:

–Kwa Jejus. Nã ãm hãmri na ka hte Tirtũm kapêr o mẽ ahkre mex o ri apa nê mẽ kamã akahak o apa hkêt nê. Mẽ kot tanhmã ato kapêr punuj to htã ka aprĩ hã mẽ ahkre mex o ri apa. ¹⁷ E kwa mẽ inhmã mẽmoj jarê. Rõm nhõ pahшти kot mẽ pahpê Ijaew mẽ pahte kãm kàxpore hkwy nhõr ã mẽ pamã karõta. Kwa xà ja amã mex nã? Xà kot pu mẽ kãm hkwy gõ? Nã xà kot pu mẽ kãm òr kêt nê? E kwa mẽ inhmã tanhmã ja jarênh to. Anê.

¹⁸ Nhũm prem ã hêx rom àhkukjêr anhÿr tâ no nhũm ra mẽ hamaxpêr ã mẽ omu nê mẽ kãm:

–Tk. Kwa mon ka mẽ ã axêx rom ja hã ixkukjêr anê? ¹⁹⁻²⁰ E mẽ atõ inhmã kàxpore htÿxre hõ gõ pa omu. Anê.

Hãmri nhũm mẽ kãm ja gõ nhũm kupy nê kãnhmã mẽ kãm kupê nê mẽ kãm:

–E mẽhõ nhĩxi nê mẽhõ karõ na ja hã? Anê.

²¹ Hãmri nhũm mẽ kãm:

–Pahi Sesti karõ nê hixi na hã. Anê.

Hãmri nhũm mẽ kuma nê mẽ kãm:

–Tÿ. Tô kêr ka mẽ mãmrĩ kãm hkwy nhõr o apa. Hã hkarõ nê hã hixi. Tãm kot hipêx xwÿnh jakamã ò na. No mẽ kajaja na pre Tirtũm mẽ anhĩpêx nhũm mẽ apê ò jakamã kwa kêr ka mẽ kapêr kôt pix mã ri amnhĩ nhĩpêx o ri apa. Anê.

²² Hãmri nhũm mẽ amnhĩ jaêr pê ã kot kàxpore jarênh anhÿrja ma nê axte kãm tanhmã nê hkêt nê. Hãmri nê akryk omu hãmri nê ma akupÿm mra.

Akupÿm mẽ htÿr ã mẽ harênh

Makre 12.18-27; Rukre 20.27-40; Juãw 5.21, 6.39-40; mãânên Wam Korÿt 6.14, 15.12-28; Wam Tesarôn 4.13-18

²³ Tã nhũm Satusew nhõ xwÿnh kwÿjaja mẽ kot akupÿm mẽ htÿr kêt ã mẽ hkamnhÿx kêt xwÿnhjaja na pre mẽ. Na pre htem mẽ htyk mẽ mẽ hapêx kumrêx ã mẽ hkamnhÿx jakamã axpên mã tanhmã Jejus jarênh to mẽ axpên mã:

—E kwa pu mẽ hwÿr mra mẽ mẽmoj xihtÿx ã hkukja. Kê mẽ pama mẽ tee ri tanhmã mẽ pamã kapêr to hkukamã hamaxpêr kaprÿ. Kê mẽ piitã ja hã omu mẽ ãhpumunh kêt ã omunh kurê kumrêx. E tokyx pu mẽ hwÿr.

Anhÿr jakamã Parijew nhõ xwÿnhjê pyrã mẽ hêx rom ma hwÿr mra mẽ hkukja mẽ kãm:

²⁴—Pa Jejus? Kwa mẽ inhmã mẽmoj jarê. Na pre finat Mojesja Tÿrtũm nhÿ hã ã mẽ panhÿgêjtê mã karõ anê. Mẽ hkra hkêt rãhã mẽ pa mẽ mẽ htyk xwÿnhjaja nhũm mẽ harênh o:

Koja mẽhõ hprõ mẽ kamã hkra hkêt rãhã pan ty. Hã koja hkôt htõja hpãnhã hprõ ho hprõ mẽ kamã hkra. Hãmri nhũm kato mẽ te kêp htõ htyk xwÿnhhta hkra pyrãk. Anê.

Ã na pre Mojesja Tÿrtũm nhÿ hã mẽ kãm karõ anê. ²⁵ Jakamã kwa ga mẽ ixujarênh ma. Koja mẽ kot axpên to htõ xwÿnhjaja kêp 7. Nhũm kot waja hãmri hprõ mẽ wa pa nhũm kamã hkra hkêt rãhã ty. Nhũm hkôt htõja hpãnhã ho hprõ ²⁶ mẽ wa axpên to pa. Nhũm mãânên kamã hkra hkêt rãhã ty. Nhũm htõ hõta haxwÿja hpãnhã tãm o hprõ mẽ we wa axpên to pa grire nhũm haxwÿja kamã hkra hkêt rãhã ty. Hãmri nhũm htõ hkwyjaja ni pyxi mẽ axpên pãnhã ho hprõ hpa no mẽhõ kamã hkra hkêt rãhã htyk pa. ²⁷ Hãmri nhũm mẽ hprõta mẽ hkôt amnhÿ to hitep mẽ ty. ²⁸ Tã Tÿrtũm kot akupÿm nhÿrmã mẽ ho htÿr ronhÿx nhÿ nhÿx kêp nija mjên kumrêx? Ra piitã kot ho hprõ kênã. E mẽ inhmã ja jarê. Anê.

²⁹⁻³⁰ Hãmri nhũm Jejus mẽ kuma mẽ mẽ kãm:

—Nã kaxkwa kamã mẽ kot amnhÿ nhÿpêxja axtem na. Mẽ htÿr ri mẽ kot Tÿrtũm kôt amnhÿ xunhwÿr xwÿnhjaja na htem ty hãmri mẽ Tÿrtũm nhõ krÿ kamã axte kãm hprõ hprãm kêt mẽ pa. Jakamã hprõ hkêt mẽ pa. Rÿ ni japêr mẽ mjên kêt mẽ pa. Nom ri kãm mjên rÿ hprõ hprãm kêt mẽ pa. Hãmri mẽ Tÿrtũm kapêr o mẽ wrÿk xwÿnhjê pyrã mẽ axte htyk kêt mẽ. ãm htÿr tũm rãhã mẽ pa ho pa. Pêr mẽ ate Tÿrtũm kapêr ã kagã htũm mar mex kêt jakamã na ka mẽ ã ja hã ixkukjêr anê. Tÿrtũm ãhpumunh tÿx o ãhpumunh tÿx jakamã kumã mẽ ate mẽmoj tã ixkukjêr xwÿnhhta na tanhmã kêp kute hkêt. Ra ja kukamã ãhpumunh tÿx kênã.

³¹⁻³²—Nom mẽ ate akupÿm mẽ htÿr kêt ã mẽ hkamnhÿxja kot paj ixprÿ hã mẽ amã harê. Amnepêm na pre Tÿrtũm pÿ hpõkja kamã tanhmã Mojes mã kapêr to. Mãn ra mẽ ate mar. Na pre kãm:

Ixpê Apraãw nhõ Tÿrtũm na pa. Nẽ mãânên ixpê Apraãw kra Ijak mẽ htãmnhwÿ Jako wa õ Tÿrtũm na pa.

Anhÿr o Mojes mã amnhÿ jarê nhũm kuma mẽ hã kagã. Kêp apu arÿ mẽ htyk rãhã nhÿx pre ã mẽ harênh anhÿr kêt mẽ. Nhÿx pre mẽ harênh o: “Amnepêm Apraãw mẽ hkra mẽ htãmnhwÿ mẽ htÿr ri ixpê mẽ õ Tÿrtũm na pa pre.” Anhÿr o nhÿx pre mẽ harê. Nom na pre ã amnhÿ jarênh anhÿr kêt mẽ. Mẽ pamã te Apraãwja mẽ htyk mẽ mẽ hapêx pyrãk. Nom nhũm prem ra Tÿrtũm ri ra akupÿm htÿr mẽ mex mẽ pa ho pa. Tã ka htem Tÿrtũm kapêr kwÿm ri akupÿm mẽ htÿr kêt ã mẽ harênh o apa.

Anhÿr o Satusew nhõ xwÿnhjê mã kapêr. ³³ Hãmri nhũm mẽ kot mar o kuhê xwÿnhjaja amnhÿ jaêr pê kot mẽ ahkreja ma.

Tÿrtũm kapêr maati jarênh
Matêwre 10.37; Makre 12.28-34;
Rukre 10.25-28; mãânên Wam Juãw 5.3

³⁴ Tã nhũm Parijew nhõ xwýnhjaja Satusew nhõ xwýnhjê jarênh ma. Mẽ kot tee ri kãm hamaxpêr o Jejus jakrenh prãm kaprý hã mẽ harênhjaja ma hãmri nê axpên wýr akuprô nê Jejus wýr mra. Kot mẽ uràk nê hêx rom àhkukjêr nê hamaxpêr o hakrenh kaxyw hwýr mra. ³⁵ Hõja kêp Tirtũm kapêr tũm o mẽ ahkre o mẽ pa xwýnh jakamã hêx rom kamã hamak kaxyw kãm kapêr nê kãm:

³⁶ —Kwa Jejus. Ot pa mẽ awýr mra. Kwa mẽ inhmã mẽmoj jarê. Na pre Tirtũm ahpýnhã mẽmoj to 10 nê hã mẽ pamã karõ. Mẽ pahte hkôt amnhĩ nhĩpêx kaxyw hã mẽ pamã karõ. Tã nhỹ kapêr na mex o kot hkwy jakrenh wehe? Anê.

³⁷ Hãmri nhũm kuma nê mẽ kãm: —Nà kot mẽ pamã hã karõ kot: Kêr ka mẽ anhĩ piitã ho amã Tirtũm kĩnh tỳx o apa. Mẽ amã hkĩnh tỳx o mẽmoj piitã hakrenh par o apa.

³⁸ E Tirtũm kot mẽ pamã hã karõ ja na mex o piitã hakrenh par. ³⁹ Nê hkôt ja:

Kêr ka mẽ amã akwýjê hã ma ho te ka amã amnhĩ tã ma pyràk. Jao ra tãm mẽ hipêx.

⁴⁰ ã Tirtũm kapêr ã kagà htũm kot mẽ pamã hã karõ kot anhýr. ã mẽ pahte amnhĩ nhĩpêx anhýr o papaja na Tirtũm kãm hprãm tỳx kumrêx. Kot kaj mẽ ja wa hkôt amnhĩ nhĩpêx rãhã ho ri apa nê mãânê ra Tirtũm kot mẽ pamã mẽmoj tã karõ xwýnh piitã hkôt amnhĩ nhĩpêx. Ja na pre Mojes mẽ Tirtũm nhỹ hã kapêr xwýnhjaja anepêm Tirtũm nhỹ hã mẽ panhĩgêjtê mã hã karõ ho pa. Anê.

Jejus kot amnhĩ tã mẽ hkukjêr ã harênh

Makre 12.35-37; Rukre 20.41-44; mãânê Rômã 1.3-4

⁴¹ Nhũm Parijew nhõ xwýnhjaja arĩ Jejus mar o kuhê nhũm amnhĩ tã tanhmã mẽ hkukjêr to. Nom te nhãm mẽhõ hã mẽ hkukjêr pyràk o mẽ hkukja nê mẽ kãm:

⁴² —E mẽ inhmã mẽmoj jarê. Tanhmã na ka htem axpên mã Tirtũm

kot mẽ akaxyw ãm mã xwýnhja jarênh to? Kêp mẽhõ kanrêhã htãmnhwý koja wehe? Anê.

Hãmri nhũm mẽ kãm:

—Nà koja kato nê kêp pahi finat Tawi kanrêhã htãmnhwý koja.

⁴³ Anê nhũm Jejus mẽ kuma nê mẽ kãm:

—Tý. ãm hãmri na ka mẽ harê. No mo na htem axpên mã kêp pahi Tawi hkanrêhã htãmnhwý pix ã harê nê mãânê kêp ò pahihti hã harênh kêt nê? Tawi na pre Tirtũm Karõ nhỹ hã tanhmã harênh to nê harênh o:

⁴⁴ Na pre Tirtũm inhõ Pahihti mã ã kapêr anê nê kãm: “E amnê ixwýr tẽ nê inhĩhkô hã nhỹ nê inhmã mẽ ho amnhĩptar o akrĩ. Kot paj mẽ kot kãm akurê xwýnh piitã mẽ unênh pa nê awýr mẽ o mra nê anhĩhkram mẽ haxar pa.” Anhýr o pre kãm kapêr.

⁴⁵ ã Tawija Tirtũm kot Kris mã kapêr jarênh nê kêp ò pahi hã kagà anê. Mẽ kajaja na ka htem ãm kêp Tawi tãmnhwý pix ã axpên mã harênh o ri apa. No kêt Tawija na pre kêp ò Pahihti hã harênh o pa. Anê.

⁴⁶ Hãmri nhũm mẽ kuma nê tee ri kot tanhmã kutã kãm kapêr to hkukamã hamaxpêr nê axte mẽmoj tã hkukjêr kêt nê. Tanhmã kot mẽ amnhĩ to nê hamaxpêr o hakre? Na prem tee ri kãm hamaxpêr o hakrenh prãm kaprý. Jejus mẽmoj piitã hkukamã àhpumunh tỳx o àhpumunh tỳx.

23

Jejus kot tanhmã Parijew nhõ xwýnhjê jarênh to

Makre 12.38-40; Rukre 11.43-46, 20.45-47

¹ Tã nhũm Jejus mẽ ixte hkôt ixpa ho ixpa xwýnhjê mẽ mẽ kot mar o kuhê xwýnhjê mã kapêr nê mẽ inhmã tanhmã Parijew nhõ xwýnh mẽ Mojes kapêr o mẽ ahkre xwýnhjê jarênh to nê mẽ inhmã:

² —Nà Parijew nhõ xwýnh mẽ Tirtũm kapêr tũm o mẽ ahkre

xwÿnhjaja na htem hprĩ hã Tĩrtũm kapër ã kagà htũm mar mex nẽ. ³ Jakamã kêr ka mẽ mar tÿx nẽ mẽ kot ho mẽ ajahkre kôt amnhĩ nhĩpêx. No mẽ kot amnhĩ nhĩpêxja kêr ka mẽ hkôt amnhĩ nhĩpêx kêt nẽ. Mẽ kot Tĩrtũm kapër tũm o mẽ ajahkre htã hkôt amnhĩ nhĩpêx kêt nẽ. ⁴ Te mẽ kot mẽhõ kot mẽ katut ã mẽ kãm mẽ jênh pytĩ janhõr tã no ãm mẽ kuxwar hkwy htur kêt kot amnhĩ nhĩpêx pyrãk o na htem amnhĩ nhĩpêx o pa. Jao mẽ amã mẽmoj tã karõ nẽ mẽ amã: “E kêr ka mẽ ã amnhĩ nhĩpêx anẽ nẽ ã amnhĩ nhĩpêx anẽ.” Anhÿr pix o mẽ amã kapër o pa. Nom mẽ tãmjaja amnhĩ kapër kôt amnhĩ nhĩpêx kêt nẽ.

⁵ —Na htem hkwyjê kot mẽ omunh nẽ mẽ kot amnhĩ to mex ã mẽ harênh kaxyw mẽ noo mã tanhmã amnhĩ nhĩpêx to. Nẽ mẽ mẽ noo mã mẽ ê mex pix kãm pa. Nẽ amnhĩm Tĩrtũm kapër ã kagà htũm kwÿ hã kagà nẽ amnhĩ nhõkrã hã hanhõ nẽ amnhĩ pa hã hanhõ nẽ hã pa. Mẽ kot hã nohtÿx rãhã hã mẽ hkamnhĩx kaxyw nhũm htem ã amnhĩ nhĩpêx anhÿr o pa. Nẽ mẽ kãm mẽ piitã mẽ kot amnhĩm mẽ rũnh ã mẽ harênh o paja nhũm htem kãm hprãm.

⁶ —Nẽ mẽ pahpê Ijaewjê nhõ Tĩrtũm kapër o mẽ ahkre xà hã ixkre kamã mẽ kot amnhĩ to rũnh xwÿnhjê hkrĩ xà mex pix kamã kãm hkrĩ hprãm. Nẽ mẽmoj tã mẽ apkur xà mex ã arĩgro hã nhũm htem ma mẽ apkur xà hã ixkre hwÿr akuprõ nhũm mẽ kot amnhĩ to rũnh xwÿnhjê hkrĩ xà mex pix kamã kãm hkrĩ hprãm. ⁷ Nẽ nhÿri pry hã mra nhũm mẽ kot mẽ omunh nẽ mẽ kêp mẽ ahkre xwÿnh maati hã mẽ hã hpijaam kãm tanhmã mẽ kãm kapër mex toja nhũm htem kãm hprãm. Æ na hte Parijew nhõ xwÿnh mẽ Tĩrtũm kapër tũm o mẽ ajahkre xwÿnhjaja hêx rom mẽ anoo mã amnhĩ nhĩpêx anhÿr o pa.

⁸⁻¹⁰ —No mẽ kajaja. Kêr ka mẽ ho mẽ urak kêt nẽ. Kê mẽ axpên mã mẽ ajarênh o: “Pahi Maati” anhÿr o mẽ ajarênh kêt nẽ. Rÿ mẽ ajarênh o: “mẽ ijahkre xwÿnh maati” anhÿr o axpên

mã mẽ ajarênh hkêt nẽ. Kêt paxipix na pre Tĩrtũm mẽ akaxyw ixãm jakamã paxipix na ixpê mẽ anhõ Pahi Maati. Nẽ paxipix na ixpê mẽ ajahkre xwÿnh maati. No mẽ kajaja ixkôt mẽ apê axpên to atõx nẽ atõ na ka mẽ.

—Nẽ kêr ka mẽ ri axpên jarênh o: “Mẽpahpãm” anhÿr kêt nẽ. Kêt kaxkwa kamã na Mẽpahpãmja.

¹¹⁻¹² —Nẽ kot ka mẽ amnhĩ to rax prãm xaj tanhmã amnhĩ to jarkrar to ho apa htã no nhũm akwyjaja ama nẽ ãm ama nẽ akôt hamaxpêr kêt nẽ. No kot kaj mẽ piitã mẽ kutã tanhmã anojarêt to ho apa nhũm mẽ amnhĩ tã mẽ apumu nẽ axpên mã mẽ amex ã mẽ ajarê. Jakamã kot kaj mẽ amã mẽ piitã mẽ kot mẽ amex ã mẽ ajarênh prãm hãmri nẽ ri mẽ piitã mẽ kãm tanhmã amnhĩ nhĩpêx to pê mẽ kutã anojarêt rãhã ho ri apa. Anẽ.

Jejus kot mẽ hkwyjê mã kapër tÿx ã harênh

Makre 12.40; Rukre 11.39-52, 20.45-47

¹³⁻¹⁴ Tã nhũm Jejus hpãnhã Parijew nhõ xwÿnh mẽ Tĩrtũm kapër tũm o mẽ ahkre ho mẽ pa xwÿnhjê mã kapër. Nẽ mẽ kãm kapër kãm hihtÿx nẽ mẽ kãm:

—E mẽ apê Parijew nhõ xwÿnh mẽ Tĩrtũm kapër tũm o mẽ ahkre xwÿnhjaja. E mẽ inhma. Kot kaj mẽ amex kêt nẽ. Mẽ apê mẽ no kupyw xwÿnh na ka mẽ. Nẽ mẽ amã Tĩrtũm kôt amnhĩ nhĩpêx prãm kêt. Nẽ nhÿrmã atyk nẽ mẽ amã õ krĩ hwÿr axapir prãm kêt. Nẽ akwyjaja kot hwÿr apir pymaj na ka htem akwyjê nẽ tanhmã mẽ kãm axêx to ho apa. Mẽ kot mẽ apyrã nẽ Tĩrtũm kapër kwÿm amnhĩ nhĩpêx prãm xaj na ka htem amnhĩ mẽ tanhmã mẽ kãm axêx to ho ri apa. Jao te mẽ ate mẽ kêp Tĩrtũm nhõ krĩ hwÿr kahêxà kahê htÿx pyrãk o apa.

¹⁵ —Nẽ mẽ akwyjaja kot mẽ akôt amnhĩ xunhwÿr nẽ mẽ akôt amnhĩ nhĩpêx prãm xaj na ka htem ma awry hã nhÿhÿm tanhmã mẽ kãm ri axujarênh to ho ri apa. Jakamã nhũm mẽhõ mẽ ama nẽ mẽ akôt amnhĩ

xãm hãmri nê ra amnhĩ tomnuj tỳx o mẽ ajakre. Jakamã koja mẽ nhỹrmã mẽ apyrà nê ma mẽ kot amnhĩ xà htỳx kamã hamak tũm xàta wỳr pa. Jakamã kwa mẽ o kora. Kot kaj mẽ amex kêt nê.

¹⁶ —Hêxta waa nê. Mẽ apê Parijew nhõ xwỳnhjê mẽ mẽ apê Tĩrtũm kapêr tũm o mẽ ahkre xwỳnhjaja kot kaj mẽ amex kêt kumrêx. Na ka htem mẽ kêp mẽ hikàxpore jamỳnh prãm xàj atỳx ri tanhmã mẽ ahkre hto ho apa nê mẽ kãm: “Kot kaj mẽ âm hãmri mẽmoj tã amnhĩ jarênh kaxyw hãmri nê Tĩrtũm mã amnhĩ jarênh xà hã ixkre nhĩxi jarênh kôt mêhõ mã amnhĩ jarê nhũm ama nê hamaxpêr o: ‘Ko. Apu âm hãmri na inhmã amnhĩ jarê rỳ ko na apu âm amnhĩ to hêx.’ Anhỹr o hamaxpêr. Nom kot kaj mẽ ixkreta ho mex kaxyw mẽ kãm kàxpore hkwy gõ hãmri nê ate mẽ kãm ôr xàta jarênh kôt âm hãmri mẽmoj tã mêhõ mã amnhĩ jarê. Hãmri nhũm ama nê hamaxpêr o: ‘Nà âm hãmri na ã inhmã amnhĩ jarênh anê. Kot ixkre ho mex kaxyw kàxpore hkwy nhõr kôt ã amnhĩ jarênh anê. Jakamã na amnhĩ to hêx kêt nê.’” Anhỹr o hamaxpêr. Na ka htem ã mẽ ahkre ho apa anê. ¹⁷ Nom mẽ ate mẽ ahkreta mex kêt. Pêr mẽ ajamaxpêr mexti hã. Tĩrtũm mã amnhĩ jarênh xà hã ixkreta mex o ixkre ho mex kaxyw kàxpore nhõrta jakrenh. Tã ka htem axtem nê mẽ kot kãm kàxpore nhõrta mex o ixkre jakrenh ã harê. No mẽ pahte âm hãmri mẽmoj tã amnhĩ jarênh nê aa paxêx kêt rãhã ho papaja na Tĩrtũm kãm hprãm.

¹⁸ —Nê na ka htem mẽ kêp mẽ hikukrêx jamỳnh prãm xàj ã atỳx ri mẽ ahkre anê nê mẽ kãm: “Kot kaj mẽ âm hãmri mẽmoj tã amnhĩ jarênh kaxyw nê Tĩrtũm mã mẽmoj nhõr xà hã mêtija jarênh kôt mêhõ mã tanhmã amnhĩ jarênh to. Hãmri nhũm mẽ ama nê hamaxpêr o: ‘Nà âm hãmri na inhmã amnhĩ jarê rỳ ko na apu âm inhmã amnhĩ to hêx.’ Anhỹr o hamaxpêr. Nom kot kaj mẽ Tĩrtũm mã mẽmoj nhõr xà hã

mêtija ã kãm mẽmoj xi. Hãmri nê ra mẽ ate kãm ôr xàta jarênh kôt âm hãmri mẽmoj tã mêhõ mã amnhĩ jarê. Hãmri nhũm ama nê hamaxpêr o: ‘Nà âm hãmri na ã inhmã amnhĩ jarênh anê. Kot Tĩrtũm mã mẽmoj nhõr ã amnhĩ jarênh kôt kot amnhĩ jarênh anhỹr jakamã na amnhĩ to hêx kêt nê.’ Anhỹr o hamaxpêr.” Anê. Na ka htem ã mẽ ahkre anê. ¹⁹ Mẽ ajamaxpêr kêt xwỳnh na ka mẽ. Tĩrtũm mã mẽmoj nhõr xà hã mêtija na mex o mẽ kot hã kãm mẽmoj nhõrta jakrenh. Tã na ka htem axtem nê mẽ kot hã kãm mẽmoj nhõrta mex o mêtija jakrenh ã harê. ²⁰ Nom Tĩrtũm mã mêtija mẽ mẽ kot hã kãm mẽmoj nhõrta te kot axpên pyràk jakamã kot kaj mẽ mêtija jarênh kôt mẽmoj tã amnhĩ jarê nê mãânên mẽ ate hã Tĩrtũm mã mẽmoj xirja jarênh kôt amnhĩ jarê. Hamê wa kot axpên pyràk jakamã hamê wa harênh pê amnhĩ to axêx kêt nê. Jakamã kêr ka mẽ mẽmoj tã amnhĩ jarênh kaxyw nê hamê wa harênh kôt âm hãmri mẽmoj tã amnhĩ jarê nê ho axêx kêt nê. ²¹ Tã kot kaj mẽ âm hãmri amnhĩ jarênh ã mẽmoj tã amnhĩ jarênh kaxyw nê Tĩrtũm mã amnhĩ jarênh xà hã ixkre hkôt hã amnhĩ jarê nê mãânên Tĩrtũm kêp ixkre hpãm kôt hã amnhĩ jarê. Jakamã kêr ka mẽ hamê wa harênh pê amnhĩ to axêx kêt nê.

²² —Nê kot kaj mẽ âm hãmri amnhĩ jarênh ã mẽmoj tã amnhĩ jarênh kaxyw nê kaxkwa jarênh kôt amnhĩ jarênhja o mãânên kaxyw kaxkwa kamã Tĩrtũm krĩ xà maati hkôt amnhĩ jarê. Nê mãânên Tĩrtũm kôt amnhĩ jarê. Jakamã kwa hamê wa harênh pê amnhĩ to axêx kêt nê.

²³ —Hêxta waa nê. Mẽ apê Parijew nhõ xwỳnh mẽ mẽ apê Tĩrtũm kapêr tũm o mẽ ahkre xwỳnhjaja kot kaj mẽ amex kêt nê. Mẽ ate mẽ no kupyw xwỳnh na ka mẽ. Na ka htem Tĩrtũm kapêr piitã hkôt amnhĩ nhĩpêx kêt nê âm hkwy kôt pix mã amnhĩ nhĩpêx o ri apa. Na ka htem âm kapêr o hpỳnhre nê hkôt amnhĩ nhĩpêx ã amnhĩ pumu nê ate amnhĩ to mex xwỳnh ã amnhĩ jarênh o

apa. No Tirtûm kãm hprãm xà piitã hkôt amnhĩ nhĩpêx kêt nê. Mẽ ate tãm mẽ hipêx nê mẽ ho mex nê mẽ kamã axukapri hã kot mẽ amã karõja. Nê mẽ amã Tirtûm kĩnh ã kapêr kôt amnhĩ nhĩpêx hã karõja ra mẽ ate mar tã hkôt amnhĩ nhĩpêx kêt nê. Mẽ ate kapêr piitã hkôt amnhĩ nhĩpêx ronhỹx ja mẽ amã mex o mex. ²⁴ Mẽ ate ãm kapêr o hpỹnh nê hkôt amnhĩ nhĩpêx jakamã te mẽ ate atỹx ri tanhmã axàpkur to ho mẽ akri pyrãk. Jao te mẽ axàpkur xà hã mẽõ kamã pure pumunh nê nê hanhir nê rênh tã mãânên kamã kên rax pumunh tã nê hanhir nê rênh kêt rãhã hkur pyrãk. Jao Tirtûm kapêr o hpỹnhre nê hkôt amnhĩ nhĩpêx no piitã hkôt amnhĩ nhĩpêx kêt nê. Pêr mẽ ajamxpêr kêt tã na ka htem atỹx mẽ ahkre ho ri apa.

²⁵ —Hêxta waa nê. Mẽ apê Parijew nhõ xwỹnh mẽ mẽ apê Tirtûm kapêr tũm o mẽ ahkre xwỹnhjaja kot kaj mẽ amex kêt nê. Mẽ ate mẽ no kupyx xwỹnh na ka mẽ. Nã mẽ apê Parijew nhõ xwỹnhjaja te mẽ ate mẽ kot apkur kaxyw prat kre kuhõnh punuj tã mex ã harênh nê kamã apkur pyrãk o na ka mẽ. Jao ãm mẽ akrãhkã rũm pix mã mẽ amex. Nê mẽ noo mã te mẽ amex pyrãk no mẽ anhõxãhkre kaxwỹnh kãm mẽ ajamxpêrja mex kêt. Mẽ akapêr prãm nê mẽ axàhkurê nê mẽ anhõxyỹ. ²⁶ Mẽ ajamxpêr mex kêt kênã. Kwa kêt ka mẽ tãm ajamxpêr o tãm akwỹjê nhĩpêx o ri apa. Nê axãmnhĩx ri mẽ kêp amrakati xwỹnhjê mã mẽmoj nhõr o ri apa. Kot kaj mẽ ã amnhĩ nhĩpêx anê nhũm Tirtûm ja hã mẽ apumu nê amnhĩm mẽ amex ã mẽ ajarê. No na ka htem amã mẽ amnhĩ to mex prãm xaj ãm tee ri amnhĩ kuhõnh japjê kaprỹ.

²⁷ —Hêxta waa nê. Mẽ apê Parijew nhõ xwỹnhjê mẽ mẽ apê Tirtûm kapêr tũm o mẽ ahkre ho mẽ apa xwỹnhjaja kot kaj mẽ amex kêt nê. Te mẽ ate mẽ htykjê jagjênh xà pyrãk. Na htem mẽ hagjênh xà ho mex o pa nom kamã mẽ hi nê ahpunuj pix. ²⁸ Ja pyrã nê ã mẽ ate amnhĩ nhĩpêx

anhỹr. Kapôt rũm mẽ anhĩja na mex. Te mẽ ate mẽ ho mex o apa pyrãk o na ka htem amnhĩ nhĩpêx nhũm mẽ ãm akrãhkã pix pumu nom ãm mẽ akrã hi kaxwỹnh kãm mẽ ajamxpêr punuj rãhã hã mẽ apumunh kêt nê. Mẽ ate tanhmã mẽ no kupyx to pix kukamã ajamxpêr jakamã te mẽ ate mẽ htykjê jagjênh xà pyrãk.

²⁹⁻³⁰ —Hêxta waa nê. Mẽ apê Parijew nhõ xwỹnh mẽ mẽ apê Tirtûm kapêr tũm o mẽ ahkre xwỹnhjaja kot kaj mẽ amex kêt nê. Mẽ ate mẽ no kupyx xwỹnh na ka mẽ. Na ka htem ma mẽ hã pika hwỹr apa nê Tirtûm nhỹ hã kapêr o mẽ pa xwỹnhjê hã pika ho mex. Nê mẽ kot amnhĩ to mex xwỹnhjê hã pika ho mex. Nê axpên mã mẽ harênh o: “Hêxta waa nê. Na pre amnepêm mẽ pakukamã mẽ panhĩgêjtaja Tirtûm nhỹ hã mẽ kãm kapêr xwỹnhjê homnuj nê mẽ kupa. No kêt mẽ papajaja mẽ kamã ri papa ronhỹx pu prem mẽ urãk nê ã mẽ hipêx anhỹr kêt nê.” Anhỹr o axpên mã mẽ hkapri ho ri apa. ³¹⁻³² Nom ãm amnhĩ to axêx. Mẽ ate ã amnhĩ nhĩpêx anhỹr o apa kênã. ã mẽ ate amnhĩ nhĩpêx anhỹr jao ra apê mẽ hkanrêhã mẽ hkra kumrêx ã amnhĩ to amnhĩrit mex o apa. ³³ Te mẽ ate kagã xoprê kot mẽ hkamnhar nê mẽ homnuj tỹx pyrãk jakamã koja Tirtûm nhỹrmã ma mẽ kot amnhĩ xà htỹx kamã hamak tũm xàta wỹr mẽ ajano ka mẽ ma hwỹr ajapêx. Hãmri nê tee ri amã ajapôx prãm kaprỹ nê ri amnhĩ pumu.

³⁴ —Kot paj nhỹrmã ma mẽ awỹr inhỹ hã ixkapêr jarênh o mẽ pa xwỹnh kwỹ rê. Nê inhỹ hã mẽ àhpumunh xwỹnh kwỹ rê. Nê ixkapêr o mẽ ahkre xwỹnh kwỹ rê. Nom kot kaj mẽ ãm mẽ kapêr ma nê apê mẽ hprãm nõkati nê tanhmã mẽ homnuj tỹx to ho apa. Nê ixpê mẽ hkwỹjê hpar o apa. Jao pi kahpa hã mẽ hanhõr o mẽ hkwỹjê hpa. Nhũm mẽ hkwỹjaja Tirtûm kapêr o mẽ ahkre xà hã ixkre kamã mẽ ahkre ho hkrĩ ka mẽ omu nê mẽ unê nê ixkreja kamã mẽ htak. Hãmri nhũm mẽ apymaj nhãm ahpỹnhã krĩ

hkwÿ hwÿr hprôt nê mra. Æ kot kaj mē inhÿ hã ixkapēr jarēnh xwÿnhjê nhÿpêx anhÿr o apa. ³⁵⁻³⁶ Na prem ra mē himex rax nê. Amnepēm panhÿ kator krax rūm Atāw kra Apewta na pre Tirtūm nhÿ hã kapēr o pa nhūm htōja kām mar prām kêt nê kupī. Tã nhūm Tirtūm axte mē hwÿr ÿ hã kapēr o mē pa xwÿnh kwÿjê rē nhūm prem mã mē ho anē nê mē hkwÿjê nhimex. Nhūm pre xatã mē hwÿr mē hkwÿjê rē nhūm mē xatã mē kupa. Apew rūm Parakis kra Jakaris wÿr na prem mē himex rūnh nê. Hāmri nhūm prem Tirtūm mã amnhÿ jarēnh xà hã ixkre kamã Jakarisja pī. Tã mē kajaja mē ate mē urāk nê mē amã Tirtūm kapēr mar prām kêt nê mē urāk nê amã Tirtūm nhÿ hã kapēr xwÿnhjê nhimex prām nê. Æ mē ate mē anhÿgêtjê pyrã nê mē hipêx anhÿr mÿrapê koja Tirtūm mē apê mē hkanrêhã mē hkra nê mē htãmnhwÿjaja mē ato hpim-ràatã tanhmã mē ato htÿx to ka mē amnhÿ xà htÿx kamã ajamak rãhã ho ri apa. Anê.

Jejus kãm Jerujarē nhō xwÿnhjê japê htÿx ã harēnh

Rukre 13.34-35; määnen Römån 11.25-27

³⁷ Hāmri nhūm Jejus te ra kot Jerujarē nhō xwÿnhjê pumunh nê mē kãm kapēr pyrāk o tanhmã kapēr to ho xa. Nê mē kãm:

—Hêxta waa nê Jerujarē nhō xwÿnhjaja. Tirtūm kot xatã mē awÿr ÿ hã kapēr jarēnh xwÿnhjê rēnh nhūm mē kot mē akôt mē amã kapēr jarēnh o pa htã ka mē kapēr mar kêt kumrêx. Nê axtem nê kēn o mē htak o mē himex o apa. Æ na ka htem amnhÿ tomnuj o apa anê. Tã nom arÿ inhmã mē ajamãr o ri ixpa hprãm. Te ho krãhyre kot nore hpro nê ho hikwÿ pyrāk o na pa inhmã mē anhÿpêx prãm nê. Nom mē amã ixprãm nōkati nê mē ate ixkaga kumrêx.

³⁸ Mÿrapê koja Tirtūm mē anhō krÿ jamãr kêt nê. ³⁹ Kot paj tokyx ty nê mē apiitã mē are nê ma akupÿm api ka mē axte ixpumunh kêt nê. Æm

akupÿn ixwÿrÿk xà hã arÿgrota pix ã koja mē akwÿjaja mē amÿrpê krÿ ja kamã ixpôx ã ixpumu. Hāmri nê mē akurom ixpumu nê hkÿnh tÿx nê. Nê tã ixkôt amnhÿ xunhwÿr kurê kumrêx. Hāmri nê axpēn mã ijarēnh o:

Ota Tirtūm kot mē pahwÿr mēnh xwÿnhhta wrÿ. Nã ãm hāmri na mē pahwÿr wrÿ. Ja mex o mex. Koja mē ã axpēn mã ijarēnh anê. Anê.

24

Jejus kot mē pakukamã mēmoj jarēnh

Makre 13.1-13; Rukre 21.5-19; määnen Wam Ximotre 4.1-3; Sikün Ximotre 3.1-9; Apokarip 6.1-17

¹ Tã nhūm Jejus Tirtūm mã amnhÿ jarēnh xà hã ixkre rūm kato nê ma tē. Pa mē ixte hkôt ixpa ho ixpa xwÿnhjaja kormã ixkreja pumunh o ixkuhé nê kãm harē nê kãm:

—Kwa Pahÿti. Hêxta waa nê. Ixkreja ãm mex kumrêx. Anê.

Hāmri nhūm mē inhmã:

² —Tÿ mex nom koja nhÿrmã mē kãm Tirtūm kurê xwÿnhjaja grãnh pa. Koja arÿ kēn ò axkrutre nê axpēn mÿnh nê nōr kêt nê. Koja piitã angrã nê ahpÿnhã ri hikwÿ. Anê.

³ Hāmri pa mē kuma nê tee ri hkukamã ijamaxpēr. Hāmri nhūm Jejus ma tē nê hixêt pé Oriwêhti hã api nê hã nhÿ pa mē ma hkôt mra nê mē kot ã ixkre nhÿpêx anhÿrta ã hkukja nê kãm:

—Kwa xà ãm hāmri koja mē ã ixkreta nhÿpêx anê? Kwa mē inhmã aprÿ hã harē. Xà koja mē nhÿrmã ho anê nã? Xà koja mē tokyx ho anê? Nê akupÿn mē ixwÿr awrÿk nhūm mēmoj piitã hapêxja. Kwa mēmo koja we wÿj ri tanhmã amnhÿ nhÿpêx to wehe? Anê.

⁴ Hāmri nhūm mē inhmã hprÿ hã tanhmã mēmoj kot amnhÿ nhÿpêx to hkukamã ujarēnh o nhÿ nê mē inhmã:

—Nã nhÿrmã mēmoj piitã hapêx kaxyw tanhmã amnhÿ nhÿpêx toja kumrêx kot paj mē amã harē ka mē inhma. Nã koja mē ohtô nê mē awÿr

mra nê hêx rom te pa ixte amnhî nhîpêx pyrâk o amnhî nhîpêx o mē akôt pa. ⁵ Nê mē amā amnhî jarēnh o: “E Tirtūm na pre mē awÿr inhmē. Ixpê kaxkwa rŭm ixwÿrÿk xwÿnhhta na pa.” Anhÿr o mē akôt mē amā amnhî to hêx o pa. Jao ohtô nê mē nokupÿr o pa.

⁶ —Nê koja mē nhÿri awry hā axpēn par o pa nê mē atā axpēn par o pa. Nom kêr ka mē harēnh ma nê ri tokÿx mēmoj piitā hapêx ā hkamnhîx kêt nê. Kormā mēmoj piitā hapêx xà hā arĭgroja kormā. ⁷ Koja mēmoj piitā hapêx kaxyw nhŭm ahpÿnhā ri pika piitā hkôt mē pa xwÿnhjaja pika hō nhō xwÿnhjê kutā kuhê nê pijapu ho kuhê. Jao ra axpēn par o pa. Hāmri nhŭm nhÿri pika hkwÿ htertēt tÿx kumrêx. Nê mē hpur kām mēōja hapêx nhŭm mē kām prām tÿx nê pa. Jakamā nhŭm mē ohtô nê prām xàj axkaprā. ⁸ Nom ja kormā mēmoj hapêx kaxyw krax pix na. Te ho mēnijê hō hpijagri kaxyw nê kormā kawax pê ôhy xà pyrâk.

⁹ —Nê koja mē piitā ixkôt mē akamā gryk nê kām mē akurê htÿx o pa. Nê mē awÿr mra nê ixtā mē apynê nê mē atomnuj tÿx nê mē apa. ¹⁰ Jakamā koja mē kot ixkôt amnhî xunhwÿr xwÿnh kwÿjaja mē umaj tee ri amnhî kukamā hamaxpēr hāmri nê ixkaga. Nê ixkôt mē kām axpēn tā amÿnê nê axpēn kām gryk o pa. ¹¹ Nhŭm nhÿri mē hkwÿjaja Tirtūm nhÿ hā kapēr jarēnh xwÿnh ā amnhî to hêx o pa. Jao mē ohtô nê mē nokupÿr o pa. ¹² Koja mē ā amnhî nhîpêx anhÿrja o ra piitā kām axpēn kamā ukapri hkêt o pa. ¹³ Koja mē ā ixtā mē atomnuj o pa anê. Tā nom kêr ka mē amnhî to htÿx nê ixkaga hkêt nê. Mē kot mē apar tā ka mē kaxkwa kamā akupÿm atir kurê kumrêx.

¹⁴ —Nê kot kaj mē apê ixkwÿjaja ma krĭ piitā hkôt Tirtūm kapēr o mē ahkre ho apa. Mē kot amnhî tomnuj kaga nê ixkôt amnhî xunhwÿr nhŭm Tirtūm kot ja hā mē omunh nê mē ho hkra hā mē kām harēnh o ri mē piitā mē hkôt apa. Kot kaj mē piitā mē

kām ijarēnh pa pa rĭ kormā akupÿn mē awÿr wÿr. Anê.

Mē pahomnuj tÿx xwÿnh maati hā harēnh

Makre 13.14-23; Rukre 21.20-24; mǎānēn Sikŭn Tesarōn 2.3-4

¹⁵ Nhŭm Jejus arĭ mēmoj kukamā mē inhmā kapēr nê mē inhmā:

—Amnepēm Tirtūm nhÿ hā kapēr xwÿnh finat Tānĭewja na pre tanhmā mē atomnuj tÿx xwÿnh maati ja jarēnh to. Tā koja nhÿrmā ra kot harēnh xà hkôt axtem nê Tirtūm mā amnhî jarēnh xà hā ixkre hwÿr axà nê Tirtūm xām xà kamā xa. Ka mē ja hā omu hāmri nê mē kot krĭ grānh par ā hkamnhîx kurê kumrêx. ¹⁶ Koja ā amnhî nhîpêx anê ka mē amÿm amnhî wÿr mē omu hāmri nê ajapōj nê ma aprôt nê amrar kurê kumrêx. Mē apê jar pika pê Jutej kamā mē apa xwÿnhjaja kaj mē omu hāmri nê mē kot mē apar pymaj aprôt nê ma amrar kurê kumrêx. ¹⁷ Rÿ ka mē anhōrkwÿ hkrāmnhēnh o akrĭ japēr nê amÿm amnhî wÿr mē omu nê akukrêx wÿr axàr nê hō hpyr mā ajamaxpēr kêt nê. Ām wÿr nê aprôt nê ma atēm kurê kumrêx. ¹⁸ Rÿ ka mē apur kām axàpēnh o apa japēr nê amÿm mē omu hāmri nê akupÿm anhōrkwÿ hwÿr axê jamÿnh kaxyw atēm kêt nê. Ām mē umaj aprôt nê ma atēm kurê kumrêx.

¹⁹ —No mē htujarô nê mē hkra karàre xwÿnhjaja koja mē kêp mēmoj omnuj tÿx nê. Tanhmā kot mē amnhî to nê mē umaj hprôt tÿx? Nà pika ja kamā koja mē mex kêt o mex kêt. Mē kot amnhî tomnuj mÿrapê koja Tirtūm tanhmā mē homnuj tÿx to.

²⁰ —Nê kwa kêr ka mē amnhî to Tirtūm wÿ kê ā mē kot amnhî nhîpêx anhÿr xà hā arĭgroja na wÿrÿk pê ā amnhî nhîpêx anhÿr kêt nê. Rÿ mē hkôt xà hā arĭgro pê sap ā ā amnhî nhîpêx anhÿr kêt nê.

²¹ —Nê ā mē kot amnhî nhîpêx anhÿr ā arĭgroja ā koja mē piitā amnhî xà htÿx kām hamak tÿx kumrêx. Amnepēm Tirtūm kot pika ho kator krax rŭm annē mē pa xwÿnhjaja kormā

aa kot ã amnhĩ xà htỳx kamã hamak anhỳr kêt tã arĩgroja ã koja mẽ amnhĩ xà htỳx kumrêx kamã ama. Hãmri nê axte pika ja kamã ã amnhĩ xà htỳx kumrêx kamã hamak anhỳr kêt nê. ²² Kop apu Tĩrtũm kot mẽ kot amnhĩ xà htỳx kamã hamak xà hã arĩgro hkwỳ ho gri hkêt ronhỳx ka mẽ apiitã apikaprãr pa. Ja pymaj koja mẽ amã ho gri. Kot ra amnhĩ kaxyw mẽ arênh xwỳnhjê japê xaj mẽ amã ho gri.

²³⁻²⁴ –Tã ã mẽmoj kot amnhĩ nhĩpêx anhỳr jakamã koja mẽmojaja tanhmã mẽ amã ixto hêx to nê mẽ amã: “Ota ra Kris akupỳn wrỳ. Kwa mẽ hwỳr mra nê omu.” Anê. Rỳ mẽ amã: “Krisja krĩ mũj kamã na raa. Kwa mẽ ma hwỳr mra nê omu.” Anhỳr o mẽ amã ixto hêx o pa. Rỳ mẽ awỳr mra nê mẽ amã amnhĩ to hêx nê mẽ amã: “E. Ot pa ixpê Kris ã mẽ awỳr wrỳ. Tĩrtũm na mẽ awỳr inhmẽ pa wrỳ.” Anê. Rỳ mẽ amã: “E ixpê Tĩrtũm nhỹ hã ixkapêr xwỳnh na pa mẽ awỳr mõn pøj.” Anhỳr o mẽ amã amnhĩ to hêx. Hãmri nê mẽ anokupyr kaxyw mẽ amã aa mẽ kot mẽmoj pumunh kêt kwỳ ho anhỳr o pa. Tĩrtũm kot amnhĩ kôt mẽ arênh xwỳnhjaja kãm mẽ ate ja hã mẽ omunh nê mẽ gryk ã ixkaga hprãm xaj koja mẽ ã mẽ anoo mã amnhĩ nhĩpêx anhỳr o pa. Nom ãm ã amnhĩ nhĩpêx anhỳr kaprỳ ka mẽ ixkaga hkêt nê.

²⁵ –E kwa mẽ inhmar tỳx nê. Na pa ra ixprĩ hã ã mẽ kot amnhĩ nhĩpêx anhỳrja kukamã ã mẽ amã mẽmoj jarênh anê. Tã kêr ka mẽ amnhĩ nê ã mẽ kot amnhĩ to hêx anhỳr o mẽ pa xwỳnhjê pumunh mex o apa nê axkãm ajamak rom. ²⁶ Rỳ koja mẽ tanhmã mẽ amã ixto hêx to nê mẽ amã: “Ota Tĩrtũm kot mẽ pahwỳr mẽnh xwỳnhhta kapôt ã mõn pøj. E mẽ tokyx ma hwỳr mra nê omu.” Anhỳr o mẽ amã ijarê ka mẽ ama nê ãm mẽ ama nê hwỳr amrar kêt nê. Rỳ nhũm mẽ amã: “Ota hitom kãm xa. E mẽ mamrĩ hwỳr agjê nê omu.” Anê no ka mẽ ãm mẽ ama nê ãm mẽ ama nê hwỳr agjêx kêt nê. ²⁷ Kot paj nhỹrmã akupỳn mẽ awỳr

ixwrỳk kaxyw hãmri nê ixpimxur kãm ixwrỳk kêt nê. Koja pika piitã hkôt mẽ pa xwỳnhjaja anhĩpê ixwrỳk kãm ixpumu. Te mẽ piitã anhĩpê mẽ kot na haxênh pumunh pyrãk o kot kaj mẽ anhĩpê apiitã ixpumu. ²⁸ Te nhỹri mẽmoj kro nê nõr nhũm nhõnhti kot omunh nê hã htor nê hpinhpanh nhũm mẽ piitã hã omunh pyrãk o kot paj amnhĩ nhĩpêx. Anê.

Jejus akupỳn wrỳk xwỳj ri mẽmoj kukamã harênh

Makre 13.24-31; Rukre 21.25-33; mãânên Wam Tesarõn 4.16-17

²⁹ Nhũm Jejus arĩ mẽ ixte hkôt ixpa ho ixpa xwỳnhjê mã kapêr nê mẽ inhmã:

–Nê kot paj akupỳn mẽ awỳr inhnojarêth nhũm rĩ Tĩrtũm kaxkwa kamã tanhmã mẽmoj nhĩpêx to. Kapêr ã kagà htũm kot tanhmã ja kukamã harênh to nê harênh kot: Koja Tĩrtũm kaxkwa ho àk nhũm kanhêti piitã rôrøk pa nhũm myyti ahtyk nhũm mytwrỳre urãk nê axte hpøk kêt nê. Anê.

³⁰ Koja ã mẽmoj amnhĩ nhĩpêx anhỳr pa hãmri pa kaxkwa hã mẽ amã mẽmoj nhõ. Hãmri nhũm pika piitã hkôt ri mẽ pa xwỳnhjaja piitã omu nê tee ri amnhĩ kukamã hamaxpêr o hkaprĩ nê mỳr rax kumrêx. No mẽ kajaja kot kaj mẽ omu hãmri nê akupỳn mẽ awỳr ixwrỳk nê mẽ ato amnhĩptar mã ajamaxpêr kurê kumrêx. Kot paj kakrã kamã hirã htỳx kãm akupỳn ixihỳx kãm mẽ awỳr wrỳ. ³¹ Hãmri nê Tĩrtũm kapêr o mẽ wrỳk xwỳnh maati mã anê nhũm pifti kakô hãmri nhũm hkwỳjaja kuma nê ma mẽ awỳr pika piitã hkôt angrà nê ma mra nê inhmã mẽ ato akuprõ. Ixte amnhĩ kaxyw mẽ axunhwỳr xwỳnhjê o akuprõ nê man akupỳn ixwrỳk mẽ ato hapêx. Anê.

Jejus kot mẽmo pàr o ejêp jarênh

Makre 13.28-31; Rukre 21.29-33

³² Nhũm Jejus arĩ mẽ inhmã kapêr nê mẽ inhmã:

–E ka mẽ pĩ hpàr mũj pumu. Na hte mẽmo mytwrỳ hã rã nhũm mẽ omu nê ô hkukamã hamaxpêr kurê

kumrêx. ³³ Ja pyrâ nê koja â ixte mêmôj jarênh anhÿr xwÿnhja amnhÿ nhÿpêx par mē ka mē omu nē akupÿn mē awÿr ixwrÿk mǎ ajamaxpêr kurê kumrêx. Kot paj te ra mē anhôrkwÿ kapem ixâm pyrâk o amnhÿ nhÿpêx. ³⁴ Nom akupÿn ixwrÿk kêt ri koja â mē kot mêmôj kot amnhÿ nhÿpêx anhÿr pumunh xwÿnhjaja kormǎ piitǎ htyk kêt ri pa akupÿn wrÿ.

³⁵ —Nê koja nhÿrmǎ pika nê kaxkwa wa hapêx pa. Tǎ no âm ixkapêrja koja wa urâk nê aa hapêx kêt nê. Koja âm rǎhǎ ho rǎhǎ. Kot paj aa ihkê ho tanhmǎ mēnh to hkêt nê. Anê.

Mē pahte akupÿn Jejus wrÿk xǎ hǎ arÿgro pumunh kêt â mē pajarênh

Makre 13.32-37; Rukre 12.37, 17.26-30, 17.34-36; mǎânên Wam Tesarôn 5.2

³⁶ Nhÿm Jejus arÿ mē inhmǎ kapêr nê mē inhmǎ:

—Nê ixte akupÿn mē awÿr ixwrÿk xǎ hǎ arÿgroja mē ate omunh kêt. Nê kaxkwa kamǎ Tÿrtÿm kapêr o mē wrÿk xwÿnhjaja haxwÿja kot ja pumunh kêt. Nê ijaxwÿja ixpê Tÿrtÿm Kra htǎ ixte ja hǎ amnhÿ pumunh kêt. Âm inhô Papaj pix na kot ja pumunh.

³⁷ —Nê kot paj nhÿrmǎ man akupÿn mē awÿr wrÿ. Akupÿn mē awÿr ixwrÿk xǎ hǎ arÿgrota â koja mē htÿx ri amnhÿ tomnuj o pa. Te amnepêm Nohti kormǎ htÿr ri mē pa xwÿnhjaja kot htÿx ri amnhÿ tomnuj o pata pyrâk. ³⁸ Na pre htem amnhÿ kaxyw Tÿrtÿm mǎ hamaxpêr kêt nê. Âm jar mē kot amnhÿ nhÿpêx pix kukamǎ hamaxpêr kêt pix mǎ amnhÿ nhÿpêx o pa. Rôm nhÿm Nohtija gô htâm py-maj pǎr rax nhÿpêxta mǎ axà. ³⁹ Nhÿm mē ja hǎ omu nê âm omu nê tanhmǎ ri amnhÿ kukamǎ hamaxpêr to hkêt nê. Hǎmri nhÿm naja mē haêr pê wrÿ nê wrÿk rax o mē hanhir pa. Tǎ akupÿn ixwrÿk xǎ hǎ arÿgroja â koja mē htÿx ri â amnhÿ nhÿpêx anhÿr o paja o pa mē haêr pê naja pyrâ nê akupÿn wrÿ.

⁴⁰ —E kot paj mē amǎ nhÿrmǎ akupÿn ixwrÿk nê tanhmǎ mē

anhÿpêx to hǎ amnhÿ jarê. Te kot ja pyrâk. Koja mêmÿjê hǎ wa hamêxkrut nê hpur kǎm âpênh o xa. Nhÿm hǎja ra ixkôt amnhÿ xǎm nhÿm hǎja ixkôt amnhÿ xǎm kêt japêr. Hǎmri pa amnhÿ wÿr ra kot ixkôt amnhÿ xǎm xwÿnhta o api nhÿm kot ixkôt amnhÿ xǎm kêt xwÿnhta hpur kǎm ahte arÿ xa. Hǎmri nê tee ri hkràmnhwÿ japêr rÿt o xa. ⁴¹ Rÿ nhÿm mēnijê wa hamêxkrut nê harôj kahuk o xa. Nhÿm hǎja ra ixkôt amnhÿ xǎm nhÿm hǎja ixkôt amnhÿ xǎm kêt japêr. Hǎmri pa amnhÿ wÿr kot ixkôt amnhÿ xǎm xwÿnhta ho api nhÿm kot ixkôt amnhÿ xǎm kêt xwÿnhja tee ri hkràmnhwÿ japêr rÿt o xa hǎmri nê hamaxpêr rax kumrêx. Kot paj nhÿrmǎ akupÿn wrÿ nê â mē anhÿpêx anê. ⁴² Tǎ mē ate akupÿn ixpôx xǎ hǎ arÿgro pumunh kêt jakamǎ kwa kêr ka mē ijamâr rǎhǎ ho ri apa. ⁴³ Na htem htÿx ri nhÿri tanhmǎ amnhÿ nhÿpêx to ho pa nhÿm mē kêp âhkÿnh xwÿnh mē ôrkwÿ hwÿr agjê nê mē kêp ahkÿ. ⁴⁴ Tǎ mē ate akupÿn ixwrÿk xǎ hǎ arÿgro pumunh kêt jakamǎ kwa kêr ka mē ixwakre kamǎ te mē apê mē ôrkwÿ nhô dôn kot amnhÿ nhÿpêx pyrâ nê atÿx ri tanhmǎ amnhÿ tomnuj to ho apa hkêt nê. Ixkutêp axkǎm ajamak rom nê ri apa. Jao tǎm ixkutêp amnhÿ nhÿpêx rǎhǎ ho ri apa. Anê.

Mē kǎm mē âpênh mex xwÿnhjê jarênh

Rukre 12.41-48

⁴⁵ Nhÿm Jejus arÿ mē inhmǎ kapêr nê mē inhmǎ:

—E koja mē kǎm âpênh xwÿnhjê hǎ âpênh mex o pa hǎmri nhÿm ô patrǎw âpênh â omu hǎmri nê ma nhÿhÿm môr kaxyw nê ïhkram mêmôj piitǎ haxâr pa nê kǎm: “E kêr ka ixwakre kamǎ inhmǎ inhôrkwÿ tǎnopxar mex nê. Nê inhmǎ mē âpênh xwÿnhjê mǎ mē apkur xǎ nhôr o apa.” Anhÿr o kǎm mêmôj tǎ karô hǎmri nê kato nê ma nhÿhÿm mō. ⁴⁶ Hǎmri nhÿm kot kǎm âpênh mex xwÿnhja wakre kamǎ kǎm âpênh mex o pa. Jakamǎ nhÿm ô patrǎw akupÿn hpôx o mō nhÿm

amnhĩ wÿr harênh ma nê hkĩnh nê. Nê tee ri amnhĩ kukamã hamaxpêr o kãm uma hkêt nê. Kot wakre kamã kutêp kãm àpênh mex jakamã tee ri tanhmã amnhĩ kukamã hamaxpêr to hkêt nê. ⁴⁷ Jakamã nhũm ò patrãwja akupÿn pøj nê kot kãm àpênh mex ã omu nê hkĩnh nê. Hãmri nê kot kãm ò mêmoj piitã hamãr o pa kaxyw ïhkram haxàr pa. ⁴⁸ No koja axtem nê wakre kamã kãm àpênh mex kêt japêr. Nê hamaxpêr o: “Tk. Nà koja tokyx akupÿn mör kêt nê.” Anhÿr o hkamnhĩx. ⁴⁹ Hãmri nê wakre kamã kãm mē àpênh xwÿnhjê htak nê pipãnh pix o pa. Nê kãm kagôxyhti xãnh xwÿnhjê kôt pix mã pa. ⁵⁰ Hãmri nhũm ò patrãwja haêr pē akupÿn pøj nê tee ri ja hã omu. ⁵¹ Hãmri nê kamã gryk tÿx nê tanhmã homnuj htÿx to nê kãm mē àpênh punuj xwÿnhjê mē mē ho hpimràatã amnhĩ nê mē kator pa. Hãmri nê mē kot kapêr kwÿm amnhĩ nhĩpêx xwÿnhjê mē mē ho hpimràatã tanhmã mē homnuj to nê amnhĩ nê mē kator. Hãmri nhũm mē tee ri amnhĩ kukamã hamaxpêr nê mur nê tee ri amnhĩ nhĩpêx. Tã kêr ka mē ixwakre kamã ho mē urak kêt nê. Mē kurom ixwakre kamã ixkapêr kôt amnhĩ nhĩpêx mex rãhã ho ri apa. Anê.

25

Kormã mē mjên kêt xwÿnhjê ho 10 nê mē harênh

Wam Tesarôn 5.1-3

¹ Nhũm Jejus arĩ mē inhmã kapêr nê mē inhmã:

–Nê mē ate Tirtũm kôt amnhĩ nhĩpêx o mē apa xwÿnhjaja kêr ka mē akupÿn amnhĩ wÿr ixkãm ajamak rom nê ri apa. Nom mē kêt Tirtũm prãm nõkati xwÿnhjaja koja mē akĩnhã ãm htÿx tanhmã amnhĩ to pix kukamã hamaxpêr o pa. Te kormã mē mjên kêt xwÿnhjaja kot amnhĩ nhĩpêxta pyrak. E pa mē amã tanhmã mē harênh to ka mē inhma. Koja kormã mē mjên kêt xwÿnh kêt 10jaja ma hkrãmnhwÿ mjên mã xwÿnh kutã pry hã mra. Amnhĩ kôt kanê jamÿ nê o mra nê kutêp pry nhĩkrep hkrĩ.

²⁻⁴ Nhũm mē kêt 5jaja hkwyjê rom amnhĩ kukamã hamaxpêr mex nê kanê kaxyw amnhĩ kôt orti hkwy ho mō. No nhũm mē kêt 5 nê mē hkĩnhã ãm htÿx kanê pix jamÿ nê o mra. ⁵ Hãmri nê mē mjên mã xwÿnhja kutêp axpên mã kapêr o hkrĩ. Nhũm tokyx htêm kêt nhũm mē kutêp hkrĩ nê gaa nê ra òtxwa nê gaa nê hikwÿ nê ra òt pa.

⁶ –Tã nhũm kôt ã kamàt hãmri nhũm mjên mã xwÿnhhta hpôx o tē. Hãmri nhũm kot hkukamã harênh xwÿnhja mē òt o mē hikwÿ xwÿnhjê mã amÿra nê mē kãm: “Kwa mē hãmri. Ota mjên mã xwÿnhhta tē. Mē tokyx kãnhmã akrĩ pu mē kutã mra.” Anê. ⁷ Hãmri nhũm mē hkrã hapøj nê kanê hpök. ⁸ Nom nhũm mē hkwyjê hkĩnhã ò kanê kaxyw orti ho pa hkêt xwÿnhjaja ra mē kêt mē kanêja hkapyr hpa nhũm mē tee ri kot hpök kaxyw. Hãmri nê orti hkwy hã hkwyjê hwÿ nê mē kãm: “Xê mē inhmã orti ho inhõ kanê go.” Anê. ⁹ Nom nhũm mē kêt nê nê mē kãm: “Ma mē inhõ kanê kamã orti grire kênã kot pa kêt mē amã ho go. Xê mē tokyx ma mra nê nhÿri amnhĩm hkwy japrô mē.” Anê. ¹⁰ Hãmri nhũm mē tee ri mē kuma nê ma amnhĩm hkwy japrô mã ma mra.

–Rôm nhũm mjên mã xwÿnhhta mē hãnh tē nhũm kanê kamã arĩ mē orti xwÿnhjaja omu nê hã jêt kurê kumrêx. Hãmri nê ma hkôt mōn mē pikuprõnh xã hã ixkreja wÿr wa hã hkĩnh nê apkur kaxyw gjêx pa nhũm mē hã kahê. Mē gjêx xã hã oreja ra hwÿr hpôx jakamã nhũm mē hã kahê.

¹¹ –Tã nhũm ma mē kot orti japrô mã mrar xwÿnhjaja hãmri amnhĩ to hapu nê mra nê tee ri mē hã hakwakre kupê nê htatak nê tee ri mē kãm akir nê mē kãm: “Xê mē inhmã kahê xã mē pa mē awÿr agjê.” Anê. ¹² Hãmri nhũm hprô mã xwÿnhhta mē kuma nê mē kãm: “Tk. Nà ixte mē apumunhre hã kot pa kêt mē amã kahê xã mē. Kwa mē ma akupÿm mra.” Anê. ã mē ujarênh kot anhÿr. Anê.

13 Nhũm pre ã Jejus mẽ inhmã ujarênh anê. Hãmri nê mẽ inhmã:

—E kêr ka mẽ te kot amnhĩ kôt orti hkwȳ ho mōr xw̄ynhja kot amnhĩ nhĩpêx pyrāk. Mẽ ate akup̄yn ixw̄r̄yk xà hã arĩgro pumunh kêt jakamã kêr ka mẽ apkati mẽ ixkamã ajamak rãhã ho apa. Anê.

Mẽ kãm mẽ àpênh xw̄ynhje jarênh

Rukre 19.11-27

14 Nhũm Jejus arĩ mẽ inhmã kapêr nê mẽ inhmã:

—E kêr ka mẽ ixwakre kamã inhmã tanhmã amnhĩ nhĩpêx mex to ho ri apa pa hpãnhã mẽ amã amnhĩrer mex nê. Mẽ ate tanhmã inhmã amnhĩ nhĩpêx to ho apa xà hkôt kot paj mẽ amã amnhĩre. Te mēhō my kot kãm mẽ àpênh xw̄ynhje nhĩpêx pyrāk. Kojã nhỹhỹm nojarêt nê kãm mẽ àpênh xw̄ynhje mã hikukrêx piitã hkaga hpa. Ōrkwȳ nê hpur nê hkrit. Âm mẽmoj piitã mẽ kot wakre kamã kãm hamār o pa kaxyw mẽ kãm hkaga hpa. 15 Hãmri nê ahp̄ynhã mẽ kãm kãxpore hkwȳ gō. Mẽ kot kutêp kãm tanhmã ho rũnh to kaxyw ahp̄ynhã mẽ kãm òr pa. Kot kãxpore pumunh mex xw̄ynhja mã nhũm ho 5.000 nê kugō. Nê kot hkôt kax pê omunh xw̄ynhja mã nhũm ho 2.000 nê kugō. Nê kormã kot omunh t̄yx kêt xw̄ynhja mã nhũm âm ho 1.000 pix nê kugō. Hãmri nê mẽ kãm amnhĩ jarê nê ma nhỹhỹm mō. 16 Hãmri nhũm kot ho 5.000 nê ham̄ynh xw̄ynhja kãxporeta py nê ma o mōr kurê kumrêx nê tanhmã ho àpênh to ho mōr kãm ra hipy axte ho 5.000 nê kumê. 17 Nhũm kot ho 2.000 nê ham̄ynh xw̄ynhja mããnhen tanhmã ho àpênh to ho mōr kamã ra hipy axte ho 2.000 nê kumê. 18 Nom nhũm kot ho 1.000 pix nê hpyr xw̄ynhja wa hkĩnh ã axtem nê ma o tē nê kãm kakwȳ nê kamã haxà nê hity hpa nê ma akup̄ym tē.

19 —Tã nhũm mẽ ò patrãwja akup̄yn mōn pōj nê mẽ kãm: “E mẽ amnê ixw̄r̄ mra nê ixte mẽ amã kãxpore ho ixpigrãnh xw̄ynhta jarê. Tanhmã na ka prem ixkutêp inhmã hipêx to?” Anê. 20 Hãmri nhũm kot ho 5.000

nê hpyr xw̄ynhta kumrêx hw̄r̄ tē nê kãm: “E ota akãxporeta. Ate inhmã ho 5.000 pix nê òr tã pa amã ho rax nê amã hipy axte ho 5.000 nê kumê nhũm ho axkamur nê ra ho 10.000. Tã ota.” Anh̄r̄ o kãm kapêr hãmri nê kãm kugō 21 nhũm amnhĩm ham̄y nê omu nê hkĩnh nê. Hãmri nê kãm: “Nà âm hãmri na ka inhmã ho anê. Ixte amã ho 5.000 pix nê òr tã ka ra inhmã ho rax jakamã kot kaj apê inhmã mẽ àpênh xw̄ynhje hkrãhtũm. E amnê ixw̄r̄ axà pu mẽ apku nê pahkĩnh.” Anê.

22 —Hãmri nhũm hpãnhã kot ho 2.000 nê hpyr xw̄ynhta hw̄r̄ tē nê ò patrãwta mã kãm: “E ota akãxporeta. Ate inhmã ho 2.000 pix nê òr tã pa amã ho rax nê amã hipy axte ho 2.000 nê kumê. Tã ota.” Anê.

23 Hãmri nhũm kuma nê amnhĩm ham̄y nê omu nê hkĩnh nê. Hãmri nê kãm: “Nà âm hãmri na ka ã inhmã ho rax anê. Ixte amã ho 2.000 pix nê òr tã ka inhmã ho rax jakamã kot kaj apê inhmã mẽ àpênh xw̄ynhje hkrãhtũm. E amnê ajaxw̄yja ixw̄r̄ axà pu mẽ apku nê pahkĩnh.” Anê.

24 —Tã nhũm kot ho 1.000 pix nê hpyr xw̄ynhta hapu hã wa hkôt tē. Hãmri nê ò patrãw mã tanhmã kapêr to nê kãm: “Nà ra ixte apumunh tũm. Pêr axàhkurê pix kãm na ka hte apa. Nê amã akãxpore ho rax nê anhō ho rax pix kukamã ajamaxpêr o ri apa. Nom mẽ pajaja mẽ ixapênh rax pix kukwak ri na ka hte akãxpore rax nê apa. 25 Jakamã na pa inhmã apyma nê. Nê akãxporeta py nê ma o tē nê kaxyw kre nê kamã haxà. Tã ka akup̄yn mōn pōj pa ajarênh ma hãmri nê hkapa nê man akup̄yn amã o tē. Tã ota anhō 1.000ta.” Anê. 26-27 Hãmri nhũm tee ri kuma nê kãm: “Tk. Kwa amã ixpyma nê ate ixpumunh mex anh̄r̄ tã na ka ixte amã kãxpore nhōrta pyr nê ma ho atēm. Nê mẽ kot mẽ kêp kãxpore jam̄ynh o kuhê xà kamã mẽ kãm òr nhũm mẽ ixkutêp tanhmã inhmã ho rax to hkêt nê? Pêr âm amã kaga nê ate amnhĩ tomnu pix o ri apa xw̄ynh.” Anê. 28-30 Hãmri nê kêp kãxporeta py

ně nhâm jam kugõ ně kãm: “E amý ně o tẽ ně kot inhmã ho 10.000 ně õr xwýnhta mã agõ. Hãmri ně jahti pynê ně ma o tẽ ně kamàt kô kamã amẽ. Apênh mexti hã. Koja tee amýra ně amnhĩ xà htýx kamã hamak xaj tee ri amnhĩ nham o axpên kamnhar týx kaprý ně rĩ amnhĩ pumu.” Anhýr o kãm kapêr nhũm kuma ně hpa hã kupy ně ma o tẽ. Hãmri nhũm mẽ õ patrãwja mẽ àpênh xwýnhjê mã kãm: “E mẽ ate ixwakre kamã mẽ axàpênh mex xwýnhjaja kot paj ã mẽ ato mex rax anẽ ka mẽ akĩnh ně. Nom mẽ kot inhmã mẽ àpênh mex kêt xwýnhjaja kot paj mẽ kêp mẽõ mẽmojta jamý ně nhâm mẽhõm kugõ nhũm hkaprĩ ně.” Anẽ. ã mẽ ujarênh kot anhýr. Anẽ.

Jejus kot nhýrmã mẽ piitã tanhmã mẽ harênh to hã harênh
Matêwre 13.35-43, 13.47-50;
mãânên Apokarip 20.11-15

³¹ Nhũm Jejus arĩ mẽ inhmã kapêr ně mẽ inhmã:

–Ně kot paj nhýrmã akupýn mẽ awýr wrý nhũm Tirtũm kapêr o mẽ wrýk xwýnh piitã man ixkõt wrý. Kot paj wrý ně ixpê pahi maati hã ixkrĩ xà maati kamã inhmex ně nhý.

³²⁻³³ Hãmri ně Tirtũm kapêr o mẽ wrýk xwýnhjê mã anẽ nhũm mẽ ma krĩ piitã hkõt mẽ apiitã mẽ ato pikuprõnh pa ně akupýn ixwýr mẽ ato hapêx. Pa mẽ apumu ně tanhmã mẽ axunhwýr to. Te õwêhti jamãr o pa xwýnh kot õwêhti kaêx ã motre pumunh ně nhâm nẽ motre xunhwýr parta pyrãk.

³⁴ Hãmri ně ixupõk rũm mẽ ate ixkõt amnhĩ xunhwýr xwýnhjê mã ixkapêr ně mẽ amã: “E mẽ kajaja kot kaj mẽ amex kumrêx ně ri apa ho apa. Amnepêm kormã mẽmoj piitã hkêt ri na pa pre Inhĩpêêxã mẽ wa mẽ akukamã tanhmã ijamaxpêr to ně mẽ amã mẽmoj mex xunhwýr rũnh ně.

³⁵ Tã ka prem ajapõj hãmri ně ixkõt amnhĩ xunhwýr ně tanhmã ixto mex to ho ri apa.

Na pa pre inhmã prãm ně ixpa ka prem ixpumu ně ixkamã axukaprĩ ně inhmã mẽmoj gõ pa kuku.

Ně na pa pre inhmã kôr ně ixpa ka prem ja hã ixpumu ně inhmã gõ pa ho ixkõ ně akupým ixihtýx.

Ně aa mẽ ate ixpumunh kêt tã ka prem nhýri ixpumu ně amnhĩ nhõrkwý hwýr ixwý.

³⁶ Ně na pa pre ixê pynajti ně ri ixpa ka prem ja hã ixpumu ně inhmã axê gõ pa haxà ně ri hã ixpa.

Ně na pa pre ixà ně inhĩkwý ka prem ixwýr mra ně ixkane ně tanhmã ixto mex to pa akupým inhmex.

Nhũm prem ijaxà pa mẽ hagiênh xà kamã ixkrĩ ka prem ixwýr mra ně tanhmã ixto mex to.

ã mẽ ate ixto mex anhýr o ri apa jakamã nhũm inhõ Papajja ixtã mẽ apumu. Tã koja ixtã mẽ ato mex rax ně.” Anẽ.

³⁷ –Kot paj ã mẽ ate tãm amnhĩ nhĩpêx xwýnhjê mã ixkapêr anẽ. Hãmri ka mẽ tee ri inhma ně amnhĩ tã ixkukja ně inhmã: “Kwa xà mẽ pajaja na pa prem ã ato mex anẽ? Nà mẽ ixte ã anhĩpêx anhýr kãm amnhĩ pumunh kêt tã na ka ã mẽ ijarênh anẽ. Kwa nhýri na ka pre amã prãm ně apa pa prem apumu ně amã mẽmoj gõ ka aku? Ně nhýri na ka pre amã kôr ně apa pa prem amã gõ hkwý ka ho ixkõ?”

³⁸ Ně nhýri na pa prem apumu ně amnhĩ nhõrkwý hwýr awý? Rý ka pre axê pynajti ně apa pa prem amã inhĩnhkã gõ ka hagiê? ³⁹ Ně nhýri na ka pre axà ně anhĩkwý pa prem apumu ně akane? Ně nhýri na prem ajaxà pa mẽ hagiênh xaja wýr mra ně kamã tanhmã ato mex to? Nà mẽ pa hkêt.” Anhýr o amnhĩ tã ixkukja.

⁴⁰ Hãmri pa mẽ amã: “Nà mẽ kêp amrakati xwýnhjaja na pre htem pa pyrãk. Tã ka prem mẽ kamã axukaprĩ hã tanhmã mẽ kutã anojarêt to ho ri apa jao te pa tanhmã ixto mex to ho apa pyrãk. ãm hãmri na ka prem ã mẽ ho mex anhýr o ri apa.” Anẽ. Kot paj ã mẽ ate amnhĩ to mex xwýnhjê mã ixkapêr anẽ.

⁴¹ —Hāmri nê hpānhā apke rūm mē kot ixkôt amnhī xunhwÿr kêt xwÿnhjê mā tanhmā ixkapēr to nê mē kām: “No mē kajaja kot paj ixupôk rūm mē unhwÿr xwÿnhtajê hkīnhā mē ato mex kêt nê. Amnepēm na pre Tirtūmjā Satanasti mē mē kot tanhmā kām amnhī nhīpêx to ho mē pa xwÿnhjê mē mē ho hpimràatā mē kaxyw kuwy rax kumrêxja nhīpêx. Mē kot amnhī tomnuj tÿx mÿrapê nhÿrmā kamā amnhī xà htÿx kamā hamak rāhā nê pa ho pa kaxyw. Tā kot kaj mē ajaxwÿja ma mē hkôt hwÿr ajapêx. Mē apê Satanasti hkôt mē ate amnhī nhīpêx o apa xwÿnh jakamā kot kaj mē uràn ma hwÿr ajapêx pa. ⁴² Aa mē ate tanhmā ixto mex to hkêt. Na ka pre htem inhmā prām nê ixpa hā ixpumu nom inhmā mēmoj nhôr kêt nê. Nê inhmā kôr nê ixpa hā ixpumu nom inhmā gô hkwÿ hkêt nê. ⁴³ Nê nhÿri ahte ixpa hā ixpumu nom amnhī nhôrkwÿ hwÿr ixwÿr kêt nê. Nê ixê pynajre nê ixpa hā ixpumu nom inhmā axê nhôr kêt nê. Nê ixà nê inhīkwÿ hā ixpumu nom ixkane hkêt nê. Nê mē kot ijaxâr nhūm arī ixkrī hā ixpumu nom ixwÿr amrar nê tanhmā ixto mex to hkêt nê. Ā mē ate inhīpêx anhÿr o apa jakamā e mē ma kuwy hwÿr apa kurê kumrêx.” Anê. Kot paj ā mē kām ixkapēr anê. ⁴⁴ Hāmri nhūm mē tee ri inhma nê amnhī tā ixkukja nê inhmā: “Kwa nà ā mē ijarēnh anhÿr kêt nê. Aa mē ixte ā anhīpêx anhÿÿre hā. Nhÿri na pa prem tanhmā akute hā apumu? Nà aa mē ixte nhÿri ā ate amnhī nhīpêx anhÿr ā apumunhre hā.” Anê.

⁴⁵ —Koja mē ā inhmā amnhī tā aprār anhÿr kaprÿ. Kot paj mē kām: “Nà na ka pre htem mē kēp amrakati xwÿnhjê pumu nê ām mē omunh o ri apa nê mē kamā axukaprī hkêt nê. Ā mē hipêx anhÿr jao te pa ā inhīpêx anhÿr pyrāk. Jakamā kwa mē tokyx ma kuwy hwÿr ajapêx kurê kumrêx.” Anê. Kot paj ā kuwy hwÿr mē hanor anê. ⁴⁶ Hāmri nê hwÿr mē rēnh pa nhūm mē ma hwÿr hapêx nê kamā amnhī xà htÿx kām hamak rāhā nê

pa ho pa nê aa kator kêt kumrêx. No kêt mē ate tām amnhī nhīpêx o mē apa xwÿnhjaja kot kaj mē kurom ma Tirtūm mē wa inhō krī hwÿr api nê kamā amex nê atir tūm nê apa ho pa. Kot paj ā ahpÿnhā mē apiitā mē anhīpêx anê. Anê.

Nhūm pre ā Jejus akupÿn wrÿk ā amnhī kukamā mē inhmā ujarēnh anê. Hāmri nê mē inhmā ujarēnh pa.

26

Mē kot Jejus ā àmnēnh ā amnhī jarēnh

Makre 14.1-2; Rukre 22.1-2; Juāw 11.45-53

¹ Tā nhūm Jejus mē ixte hkôt ixpa ho ixpa xwÿnhjê mā ujarēnh pa nê mē inhmā:

² —E kot puj mē axte pahtā apkati axkrut hāmri nhūm arīgro pē Pas kato. Jakamā koja mē piitā amnepēm Tirtūm kot Ejit nhō xwÿnhjê pē mē pakukamā mē panhīgētjê kator mā hamaxpēr nê hā hkīnh kaxyw Jeru-jarē hwÿr akuprō. Kamā koja mē ixpynê nê pī kahpa hā inhō nê ixpī. Koja mē tokyx ā inhīpêx anê. Anê.

Nhūm pre ā amnhī kukamā mē inhmā amnhī jarēnh anê. ³ Rôm nhūm Jerujarē kamā patre krāhtūmjê mē Ijaew pigētjaja patre maati Kajpasja nhôrkwÿ kamā axpēn wÿr akuprō. ⁴⁻⁵ Ra mē kām Jejus pīr prām tā mē kām mē kot hkôt kapēr mar o pa xwÿnhjê puma nê. Hāmri nê tee ri hamaxpēr nê axpēn mā:

—Hêxta waa nê. Tanhmā kot puj wem ho nê kupī? Kot puj mē pahkīnh kām tanhmā ho nhūm mē hkīnh xwÿnhjaja hā mē pakamā gryk tÿx nê. Pu mē hā axpu nê hā tanhmā axpēn to. Jakamā kwa pu mē kormā tanhmā ho hkêt nê.

Anhÿr o axpēn ma.

Mêhō ni kot Jejus krā gregrer ā harēnh

Makre 14.3-9; Rukre 7.36-50; Juāw 12.1-8

⁶ Tā nhūm Jejus kormā krī pē Petān kamā Simāw nhôrkwÿ kamā apkur o nhÿ. Simāwja na pre hkà kro xàpēr

tÿx o pa nhũm Jejus ra arĩgro hõ hã akupÿm hkà ho mex. Hãmri nẽ akupÿm õ krĩ hwÿr pøj nẽ õrkwÿ hwÿr tẽ nẽ kuri apkur o nhÿ. ⁷ Hãmri nhũm mẽhõ nija hpõx ã omu nẽ hamaxpër o:

—Ma koja për Jejusja pa hã apkati grêre hãmri nẽ ty. An pa ma hwÿr tẽ nẽ mẽhkuxwa xà ho hkuxwa.

Anẽ hãmri nẽ kën jaka ho kàx kãm mẽhkuxwa xàja nhũm kumÿ nẽ ma hwÿr o tẽ. Hãmri nẽ ho hkrã gregrer nẽ hã hkapÿr pa nẽ ho hkuxwa hpa. Mẽhkuxwa xà hã kàxpore xohtô rax tã nhũm ã hã hkapÿr par anẽ. ⁸ Hãmri pa mẽ ixte Jejus kôt ixpa ho ixpa xwÿnhjaja tee ri ã kot hipêx anhÿr ã omu nẽ axpën mã:

—Tk. Kwa na hã mẽhkuxwa xàta kapÿr pa. ⁹ Kop apu ma kot o htêm nẽ ho wênê nẽ hpãnhã kàxpore ho rax kumrêx nẽ hamÿnh nẽ ho mẽ kêp amrakati xwÿnhjê nhĩpêx par o nhÿx ja kãm mex nẽ. Kwa mo na we ã amnhĩ nhĩpêx anhÿr kêt nẽ? Anẽ.

¹⁰ Hãmri nhũm Jejus amnhĩ tã mẽ inhma nẽ mẽ inhmã:

—Kwa kot ixto mex kaxyw kênã na ka mẽ axtem nẽ ixtã kãm akir. ¹¹ Mẽ kêp amrakati xwÿnhjaja koja mẽ arĩ mẽ akôt pa rãhã nẽ. Ka mẽ amã mẽmo arĩgro hã tanhmã mẽ ho ajuta hto hprãm nẽ tanhmã mẽ ho ajuta hto nẽ mẽ kãm mẽmoj gõ. No pa kot paj ri mẽ akôt ixpa ka mẽ ixto mex ry ho apa hkêt nẽ. Kot paj tokyx mẽ apiitã mẽ are. ¹² Ixtyk nhũm mẽ kot ijaxar kukamã na ã ixkuxwa anẽ. ãm hãmri na ã inhĩpêx anẽ. ¹³ ãm hãmri na pa mẽ amã kot ã inhĩpêx anhÿrja jarê. Koja mẽ krĩ piitã hkôt axpën mã ijarênh ã kagã kamã ijarênh o pa nẽ kamã nija kot ã inhĩpêx anhÿr kamã harê nẽ kuma. Anẽ.

Jut Kariot kot mẽ kãm Jejus ã àmnênh

Makre 14.10-11; Rukre 22.3-6

¹⁴ Tã nhũm Jut Kariotja. Kêp mẽ ixpê Jejus kôt ixpa ho ixpa xwÿnh pê 12 hõ htã ra tanhmã hamaxpër to nẽ axtem nẽ Satanasti nhÿ hã ma patre

krãhtũmjê hwÿr tẽ nẽ tanhmã Jejus o mẽ mar to nẽ mẽ kãm:

¹⁵ —E ot pa mẽ amã Jejus jarênh o tẽ. Xà kot paj mẽ amã hã amÿnê ka mẽ hpãnhã inhmã amnhĩre nà? Anẽ.

Hãmri nhũm mẽ kuma nẽ hkĩnh nẽ. Hãmri nẽ kãm:

—Nà kot paj mẽ amã amnhĩre.

Anẽ hãmri nẽ kãm kàxpore ho 30 nẽ õr kurê kumrêx nhũm hamÿ nẽ hkĩnh nẽ kato nẽ ma tẽ. ¹⁶ Hãmri nẽ mẽ kãm Jejus pynênh kaxyw tânopxar o ri hkôt ri pa. Mẽ kot mar o ri pa xwÿnhjê hkàx ã unênh nẽ ma mẽ hwÿr o htêm kaxyw.

Jejus kot hkôt mẽ pa xwÿnhjê kutã apkur

Makre 14.12-21; Rukre 22.7-13; Juãw 13.21-30

¹⁷ Tã nhũm mẽ hkĩnh pê Pasja kato. Amnepêm kormã Ejit kãm mẽ pa ri na pre mẽ inhĩgêjtjaja ôwêhti hkrare hkwy hpa nẽ ho anẽ nẽ kuku. Tĩrtũm kot ja hã mẽ omunh nẽ Ejit nhõ xwÿnhjê nẽ mẽ kator kaxyw nhũm prem ã amnhĩ nhĩpêx anẽ. Tã mẽ ixpê mẽ hkanrêhã mẽ htãmnhwÿjaja na pa htem arĩ amgrã mẽ arĩgro pê Pasja ã axpën wÿr akuprõ nẽ jam ijamaxpër pê mẽ urak nẽ ôwêhti hkrare hkwy pa nẽ pãwti kaxkrit kêt kãm kuku. Jakamã pa mẽ ixte Jejus kôt ixpa ho ixpa xwÿnhja wa axkrut nẽ Jejus wÿr tẽ nẽ amnhĩ tã hkukja nẽ kãm:

—Kwa nhÿri kot paj we wa tẽ nẽ mẽ akutêp Pas ã mẽ panhõ hã apê? Anẽ.

¹⁸ Hãmri nhũm wa kãm:

—Nà wa mãmrĩ ma Jerujarêja wÿr wa tẽ. Nẽ krĩm axà nẽ mẽhõ myti pumunh kurê kumrêx nẽ kãm: “E Jejus na wa inhmẽ pa wa awÿr tẽ. Na awÿr hpër mênh o: ‘E na pa ra inhnojarêt. Jakamã nhÿri kot paj we ixkôt ri mẽ pa ho mẽ pa xwÿnhjê mẽ Pas ã axpën kutã apku?’ Anhÿr o awÿr hpër mẽ.” Anẽ. E wa ã kãm akapër anẽ kê war ama nẽ war amã õrkwÿ nhĩmõk ã ixkre rax õ jahkre. Kamã ra kaxyw mẽ paxàpkur xà hã mẽmoj piitãã. Ka wa omu hãmri nẽ mãmrĩ mẽ ixkutêp kamã mẽmoj tã apê. Anẽ.

¹⁹ Hāmri nhūm wa kuma nē ma Jerujarē hwȳr tē. Nē hwȳr axà hāmri nē ra kot wa kām mēmoj jarēnh xà hkôt mēmoj piitā omu hāmri nē mē ixkutêp mēō hā àpēnh o wa xa.

²⁰ Tā nhūm kamàt pa mē Jejusja kôt ixkreta wȳr ixpôx pa nē hwȳr agjê nē ixàpkur kaxyw ixkrī. Mē ixte Jejus kôt ixpa ho ixpa xwȳnhjê pê 12jaja pa mē ixpiitā Jejus kutā ixàpkur o ixkrī.

²¹ Hāmri nhūm Jejus tanhmā mē inhīō jarēnh to nē mē inhmā:

—E pa mē amā mēmoj jarē ka mē inhma. Kot kaj mē atō mē kām ixkurē xwȳnhjê nhīhkram ijaxà. Anē.

²² Hāmri pa mē tee ri kuma nē ixkaprī htȳx nē. Hāmri nē axpēn pānhā amnhī tā hkukja nē kām:

—Kwa xà pa? Nà pa hkêt. Kot paj ā anhīpêx anhȳr kêt kumrêx Pahihti.

Anhȳr o axpēn pānhā kām amnhī tā aprā. ²³ Hāmri nhūm mē inhmā:

—Nà ām hāmri na pa mē amā ixkapēr. Mē ate ixkutā guhkrax kām anhō pāwti ho mry kagô nhek o akrī xwȳnhjê hō kot kaj mē kām ixtā amȳnē. ²⁴ Tīrtūm kapēr ā kagà htūm ra kot ixkukamā harēnh xà hkôt koja mē tanhmā ixto rax nē ixpī. Nom kot mē kām ixtā àmnēnh mā xwȳnhta hēxta waa nē. Ā kot amnhī nhīpêx anhȳrja mȳrapê koja amnhī xà htȳx kām hamak rax kumrêx. Kop apu aa ō māmāj nhōxà hkre rūm kator kêt ronhȳx ja kām mex nē. Anē.

²⁵ Hāmri nhūm Jut Kariot kot mē kām hā àmnēnh mā xwȳnhta hāmri amnhī tā kuma nē kām:

—Kwa xà we pa Jejus? Xà pa kot paj ā anhīpêx anē? Kwa nà pa hkêt. Anē.

Hāmri nhūm kām:

—Tȳ. Ka ā ate inhīpêx anhȳr mā kēnā. Anē.

Jejus kot amnhī kamrô pikapīr kukamā harēnh

Makre 14.22-26; Rukre 22.14-23; määnēn Wam Korīt 11.23-26

²⁶ Tā nhūm Jejus pāwti hō py nē Tīrtūm mā harē nē mē inhmā ho hkry nē ho mē inhīpêx pa nē mē inhmā:

—E na pa ā mē amā pāwti ho hkry nē mē amā ōr anē. Ja pyrā nē koja

mē ā inhīpêx anē nē te ixto hkry hpar pyrāk o inhīpêx pa amnhī xà htȳx kamā ijamak kām ty. Nom mē anē kot paj ty. E mē māmri aku.

Anhȳr o mē inhmā amnhī jarē pa mē kuma nē kot mē inhmā ho hkry xwȳnhja ku. ²⁷⁻²⁸ Hāmri nhūm hpānhā kop py nē mā ho anē nē Tīrtūm mā harē nē mē inhmā kugō nē mē inhmā:

—Mē kot ixpīr xà hā arīgroja ā koja ixkamrô axkapī. Nom koja mē amarī ixpīr nhūm amarī ixkamrô hpikapīr kêt nē. Ām paa. Pa kot paj mē anē mē ĩhkram amnhī jaxà nhūm mē ā inhīpêx anē nē ixpī. Koja ixkamrô axkapī nhūm Tīrtūm omu nē ixkukwak ri mē ate ixkôt amnhī xunhwȳr xwȳnhjê nē mē ate amnhī tomnuj piitā te amnhī katut kôt rēnh par pyrāk o hipêx nē mē ato hkra. Ra amnepēm kot ā amnhī jarēnh anhȳr xà hkôt. Jakamā e mē ixkamrô pikapīr mā ajamaxpēr pê wīhti ho akōm o axpēn nhīpêx. ²⁹ ām hāmri na pa ā mē amā amnhī jarēnh anē. Kot paj axte wīhti ho ixkōm kêt rāhā nhūm nhȳrmā inhō Papaj akupȳn mē awȳr inhmē. Hāmri pu mē akupȳn ixwȳr xà hā arīgrota ā pahkīnh rax kumrêx. No ām axtem tanhmā hā pahkīnh to. Anē.

Nhūm pre ā Jejus mē inhmā amnhī jarēnh anē. Pa mē axpēn pānhā kopta py nē wīta kwȳ ho ixkō. ³⁰ Hāmri nē mē ixpiitā ho ixkōm pa nē Tīrtūm mā mex ā gre. Hāmri nē ijapōj nē hixēt prêk pê Oriwēhti hwȳr ma mra.

Jejus kot Simāw Pêtre mā kapēr ā harēnh

Makre 14.27-31; Rukre 22.31-34; Juāw 13.36-38

³¹ Tā nhūm Jejus tanhmā mē ixte hkôt ixpa ho ixpa xwȳnhjê jarēnh to nē mē inhmā:

—E Tīrtūm kapēr ā kagà htūmta kot tanhmā mē akukamā mē ajarēnh to nē mē ajarēnh kot:

Kot paj ōwēhti jamār o pa xwȳnhja pī hāmri nhūm ōwēhti hpigrānh pa nē ma angrā nē ri mra.

Anhȳr o kot mē ajarēnh. Te ho mē apē ōwēhti pyrā nē ā mē ajarēnh anē.

Tã kamàt ja kamã koja mẽ tanhmã inhîpêx to ka mẽ ixtã mẽ omu mẽ mẽ umaj ôwêhti pyrã mẽ apiitã ixkaga hpa mẽ ma aprôt mẽ mra. ³² Nẽ mẽ kot ixpîr tã kot paj akupÿm ixtîr. Hãmri mẽ ma akupÿm mẽ akukamã pika pê Garirej wÿr mō. Kamã kot puj mẽ axte axpên pumu. Anẽ.

³³ Hãmri nhũm Simãw Pêtre tee ri tanhmã mẽ kot amnhî nhîpêx to hkukamã amnhî jarênhja ma mẽ hkaprî mẽ kãm:

—Tk. Nà kot paj ã amnhî nhîpêx anhÿr kêt mẽ Pahihti. Koja pahkwÿja akaga japêr no pa kot paj aa akaga hkêt mẽ. Kot paj akôt ixpa rãhã mẽ. Anẽ.

³⁴ Hãmri nhũm Jejus kãm:

—Nà ra ixte akukamã ixàhpumunh mex. Koja apkati hkôt krãhyre hkàr kêt ri ka ra mẽ umaj ate ixkôt apa hkêt ã mẽ kãm amnhî tã axàprãr o axkrunêpxi kãm ga. Kwa jam ajamaxpêr tÿx mẽ. Anẽ.

³⁵ Hãmri nhũm tee ri kuma mẽ axte kãm:

—Kwa nà. Mẽ kot ajaxàr mẽ apîr tã kot paj arî akôt ri ixpa nhũm mẽ pahto amÿrà mẽ tanhmã panhîpêx to. Nà kot paj aa akaga hkêt mẽ.

Anhÿr o kãm amnhî jarê. Pa mẽ ijaxwÿja ã kãm amnhî jarênh anẽ.

*Jejus kot Tirtũm mã amnhî jarênh
Makre 14.32-42; Rukre 22.39-46*

³⁶ Tã nhũm Jejus mẽ inhmã anẽ pa mẽ ma nhÿri mẽ kot kãm “Gesêm” anhÿr xwÿnhja wÿr mra. Hãmri nhũm mẽ inhmã:

—E mẽ jar ixkutêp akrî. Pa ma mûtũm tẽ mẽ Tirtũm mã amnhî jarê mân. Anẽ.

³⁷ Hãmri mẽ mẽ ixkwÿjê ho axkrunêpxi mẽ amnhî kôt mẽ kuwÿ. Simãw Pêtre mẽ Jepetew kra pijakrut pê Xiakre mẽ Juãwja wa nhũm amnhî kôt mẽ kuwÿ nhũm mẽ ma hkôt mra. Hãmri nhũm Jejus tee ri mẽ kot tanhmã hipêx tota kukamã hamxpêr o hkaprî mẽ amnhî kamã kahak tÿx mẽ. ³⁸ Hãmri mẽ mẽ kãm:

—Hêxta waa mẽ. Na pa tee ri amnhî xà htÿx kamã ijamakja kukamã ijamaxpêr mẽ amnhî kamã ixkahak tÿx o ra ixkaprî mẽ. Te ixkaprî kot ixpîr o mör pyrãk. Jakamã e mẽ jar anohtÿx mẽ ixto Tirtũm wÿr o akrî kê tanhmã ixto pa mẽ kot tanhmã ixtoja kutã ixihtÿx mẽ. Anẽ.

³⁹ Hãmri mẽ mẽ kurũm htêm grire mẽ Tirtũm mã amnhî jarênh kaxyw htu mÿr pê tẽm mẽ pikap nõ mẽ kãm:

—Kwa Papaj. Hêxta waa mẽ. Inhmã amnhî xà htÿx kãm ijamak prãm kêt kumrêx. Na pa tee ri amnhî kukamã ijamaxpêr mẽ amnhî kamã ixkahak tÿx mẽ. Jakamã kot kaj amã inhnê ja ho ajapêx prãm mẽ mãmrî inhnê ho ajapêx nhũm mẽ kãm ixkurê xwÿnhjaja tanhmã ixto hkêt mẽ. Rÿ ko. Kot kaj amã mẽ kot tanhmã ixto hprãm kê mẽ mãmrî tanhmã inhîpêx to. Nom pam inhmã hprãm xà hkôt kêt. Anẽ.

⁴⁰ Hãmri mẽ kãnhmã xa mẽ akupÿm Simãw Pêtreja mẽ hwÿr tẽ mẽ tee ri mẽ omu nhũm mẽ ra ôt pa mẽ hikwÿ. Nhũm mẽ omu mẽ Simãw Pêtre mã kãm:

—Kwa Simãw Pêtre. E mẽ hãmri akrã hapôj. Kwa wem anohtÿx grire ⁴¹ mẽ ixkutêp amnhî to Inhō Papaj wÿr o akrî kê mẽ ixkôt tanhmã mẽ ato htã ka mẽ amã mẽ uma xãj ixkaga hkêt mẽ arî mẽ kutã amnhî to htÿx mẽ akuhê. ã mẽ amã mẽ ate amnhî nhîpêx anhÿr prãm nom kormã mẽ amã maa.

⁴² Anhÿr o mẽ kãm kapêr hãmri mẽ akupÿm tẽ mẽ axte Tirtũm mã amnhî jarê mẽ kãm:

—Kwa Papaj. Nà inhmã amnhî xà htÿx kãm ijamak prãm kêt. Na pa amnhî kukamã ijamaxpêr mẽ amnhî kamã ixkahak tÿx kumrêx. Jakamã kot kaj amã inhnê ja ho ajapêx prãm mẽ mãmrî inhnê ho ajapêx kê mẽ kãm ixkurê xwÿnhjaja tanhmã ixto hkêt mẽ. Nom ko. Kot kaj amã mẽ kot tanhmã ixto hprãm kê mẽ mãmrî tanhmã inhîpêx to. Nom pam inhmã ja prãm xà hkôt kêt. Anẽ.

⁴³ Hãmri mẽ kãnhmã xa mẽ Simãw Pêtreja mẽ hwÿr akupÿm tẽ. Nẽ mẽ

omu nhũm kê mẽ axte gôr nê hikwỹ. Ra mẽ õtxwa htỳx nê axte gôr nê hikwỹ. Nhũm Jejus tẽ nê tee ri mẽ omunh o xa ⁴⁴ nom axte tanhmã mẽ kãm nê hkêt nê. ãm awjanã nê akupỹm tẽ nê kê wam kot Tĩrtũm mã amnhĩ jarẽnh xà hkôt axte kãm amnhĩ jarẽ. ⁴⁵⁻⁴⁶ Hãmri nê akupỹm mẽ hwỳr tẽ nê mẽ kãm:

—Kwa xàn ka mẽ arĩ gôr nê anhĩkwỹ? E mẽ tokyx akrã hapôj. Na mẽ ra mẽ kot ixwỳr mrrar nê ixpynênh mã. Koja mẽ tokyx ixkutã mẽ kot amnhĩ xunhwỳr xwỳnhjaja mẽ kãm ixtã amỹnê. Ota ra kot ixtã mẽ kãm àmnênh xwỳnhnta tẽ. E mẽ tokyx kànhmã akrĩ pu mẽ kutã mra. Anê.

*Mẽ kot Jejus pynênh ã harênh
Makre 14.43-50; Rukre 22.47-53;
Juãw 18.2-11*

⁴⁷ Nhũm Jejus mẽ kãm kapêr o ãm rãhã nhũm Jut Kariot pê mẽ inhĩõja hwỳr tẽ. Nê amnhĩ kôt mẽ ohtô nê hwỳr mẽ o tẽ nhũm mẽ wapohti nê kô jamý nê hkôt o mra. Patre krãhtũm mẽ Ijaew krãhtũmjaja kot Jejus wỳr mẽ rênh xwỳnhjaja nhũm mẽ man hkôt Jejus wỳr mra. ⁴⁸ Na pre ra Jut Kariot amnhĩ kukamã mẽ kãm amnhĩ jarênh o:

—Kot paj ixkumrêx hwỳr tẽ ka mẽ ixkôt hapu hã mra. Kot paj hwỳr tẽ nê kãm ixkapêr nê kahti hkôt kumý. Ka mẽ hã ixpumu nê hwỳr mra nê unênh kurê kumrêx. Ixte kahti hkôt mynh xwỳnhnta kot kaj mẽ unê. Anê.

⁴⁹ Hãmri nê Jejus wỳr tẽ nê kãm:

—Pa Jejus? Xàn ka kormã anhõt kêt nê xa?

Anê nê kahti hkôt kumý. ⁵⁰ Hãmri nhũm amnhĩ tã omu nê kãm:

—Kwa Jut. Ate tanhmã ixto kaxyw mã xwỳnh jakamã e kam nê mãmrĩ tanhmã ixto. Anê.

Hãmri nhũm Jut kôt mẽ mrrar xwỳnhjaja Jut kot kahti hkôt mynh ã omu nê hwỳr mra nê unênh kurê kumrêx. ⁵¹ Hãmri nhũm mẽ inhĩõja tee ri ja hã mẽ omu nê õ wapo kapa nê patre maati mã àpênh xwỳnh kot mẽ hkôt htêm xwỳnhnta mã ho apê. Nê kot ho hkrã nhĩpônã mã tã kuhpaw

nê upôk rũm hamak nhĩkjê pix krãhta. ⁵² Hãmri nhũm Jejus omu nê nê kãm kapêr nê kãm:

—Kwa akupỹm awapota hkàm haxà nê amarĩ xa. Na htem wapo ho mẽ oprê ho pa nhũm mẽ amnhĩ xwar wapo ho mẽ kupa. ⁵³ Xà kot paj amnhĩ to Tĩrtũm wỳ nhũm ãm inhma nê tanhmã jajê pê ixpytãr to hkêt nê? Nà kot paj amnhĩ to kuwỳ nhũm ixwỳr kapêr o mẽ wrỳk xwỳnhjê rênh kurê kumrêx nhũm mẽ ohtô rax kumrêx nê wrỳ nê mẽ kêp ixpytã. ⁵⁴ Nom kot paj ã amnhĩ to hwỳr anhỳr kêt nê. Tĩrtũm kapêr ã kagà htũm kot amnepênh ixkukamã ã mẽ kot inhĩpêx anhỳr ã mẽ harênh jakamã kwãr mẽ mãmrĩ Tĩrtũm kãm hprãm xà hkôt ã inhĩpêx anê. Anê.

⁵⁵ Hãmri nê hpãnhã mẽ kot unênh xwỳnhjê mã kapêr nê mẽ kãm:

—Kwa na pa pre apkati mẽ Tĩrtũm mã amnhĩ jarênh xà hã ixkre kamã mẽ kãm ixujarênh o ixpa. Ka prem tokyx ixpynênh kêt tã jarãhã te ixte amnhĩ tomnuj xwỳnh pyrãk o inhĩpêx nê ixwỳr wapohti nê kô hã akapên nê ixwỳr tẽ. ⁵⁶ Tã nom ra Tĩrtũm kapêr ã kagà htũm kamã Tĩrtũm nhỹ hã mẽ kapêr xwỳnh kot mẽ akukamã mẽ ajarênh nê mẽ atã kagà xà hkôt na ka mẽ ri ã inhĩpêx anê. Anê.

Nhũm pre ã Jejusja amnhĩ tã mẽ kãm kapêr anê. Hãmri pa mẽ ixte hkôt ixpa ho ixpa xwỳnhjaja mẽ omu nê tee ri amnhĩ kukamã ijamaxpêr nê mẽ umaj ixprõt nê angrã nê ma inhmrrar kurê kumrêx.

Mẽ kot patre maati hwỳr Jejus o mõi ã harênh

Makre 14.53-65; Rukre 22.54-55, 22.63-71; Juãw 18.12-14, 18.19-24

⁵⁷ Nhũm pre Ijaew krãhtũmjê mẽ Tĩrtũm kapêr tũm o mẽ ahkre xwỳnhjaja ra patre maati Kajpas nhõrkwỹ hwỳr akuprõ nê Jejus kutêp hkrĩ. Hãmri nhũm mẽ kot unênh xwỳnhjaja ma mẽ hwỳr o tẽ. ⁵⁸ Hãmri nê mẽ hwỳr ho axà nê hkôt gjêx pa. Nhũm Simãw Pêtre mẽ hkôt hapu hã mẽ htãnopxar o tẽ nê kĩtare hwỳr axà nê pôristi nhĩhkô hã nhỹ. Hãmri nê tee

ri Jejus kukamã hamaxpêr o nhỹ nê hamaxpêr o:

—Kwa tanhmã koja mẽ ixpê mẽ inhõ Pahihti nhĩpêx to? E pa jar amỹm tanhmã mẽ kot hipêx to hã mẽ omunh o nhỹ. Anê.

⁵⁹ Hãmri nhũm patre krãhtũmjê mẽ juistijaja kãm Jejus pĩr prãm tỹx nê. Jakamã na prem Ijaew wa ho hamêxkrut nê axpên kôt tanhmã mẽ kãm ho hêx to nhũm mẽ kot hã wa mar nê ra hpĩr kaxyw mẽ pikuprõnh xwỹnhjê kapi. ⁶⁰ Jakamã nhũm prem axpên pãnhã mẽ hwỹr mra nê tanhmã ho hêx to. Nom axpên kôt harênh kêt nê. ãm ahpỹnhã tanhmã ri harênh to nom wahõ wa axkrut nê axpên kôt harênh kêt nê. Jakamã nhũm mẽ tee ri hã mẽ kuma.

Tã nhũm ja wa mẽ hwỹr tẽ nê axpên kôt harê nê mẽ kãm:

⁶¹ —Nà na pre tanhmã Tĩrtũm mã amnhĩ jarênh xà hã ixkre jarênh to nê harênh o: “Kot paj nhỹrmã inhmã ixkreja grãnh par prãm nê kugrà hãmri nê ãm ixtã apkati axkrunêpxi pix nê akupỹm hipêx pa. Ja kaxyw ixãhpumunh tỹx.” Anhỹr o na amnhĩ jarê pa wa kuma.

⁶² Anhỹr o mẽ kãm ho hêx. Hãmri nhũm patre maatija wa kuma nê kãnhmã xa nê Jejus mã kapêr nê kãm:

—Kwa xà ãm hãmri na wa ã ajarênh anê nà? Xãn ka pre ã amnhĩ jarênh anê? E mẽ inhmã tanhmã amnhĩ jarênh to. Anê.

⁶³ Nom nhũm amarĩ mẽ kãm xa nê mẽ kãm tanhmã nê hkêt nê. Hãmri nhũm patre maatija tee ri omu nê axte kãm kapêr nê kãm:

—Kwa aprĩ hã mẽ inhmã tanhmã amnhĩ jarênh to. Tĩrtũm noo mã amã ixkapêr jakamã kêr ka akatãt kôt mẽ inhmã amnhĩ jarê nê amnhĩ to axêx kêt nê. Xà apê Tĩrtũm Kra? Xà ka na pre Tĩrtũm mẽ ixkaxyw axãm? Kwa akatãt kôt mẽ inhmã amnhĩ jarê. Anê.

⁶⁴ Hãmri nhũm tã hprĩ hã mẽ kãm amnhĩ jarê nê mẽ kãm:

—Tỳ. Nà ãm hãmri na ka ã ijarênh anê. Ixpê Tĩrtũm kot mẽ akaxyw ixãm xwỹnhta na pa. Na pre mẽ

awỹr inhmẽ pa mẽ awỹr wrỹ. Tã kot paj nhỹrmã axte kaxkwa rũm amnê akupỹn kakrã kamã mẽ awỹr wrỹ. Hãmri nê Tĩrtũm xãhpumunh o ãhpumunh xwỹnhta nhĩhkõ hã nhỹ hãmri nê pam tanhmã mẽ ajarênh to ka mẽ amnhĩ tã ixpumu nê inhma. Anê.

⁶⁵ Hãmri nhũm patre maatija tee ri ã kot amnhĩ jarênh anhỹr ã kuma nê kamã gryk tỹx nê. Hãmri nê gryk xaj kêp patre maati hã ê kapa nê hkaxõnh pa nê kumê nê hkwyjê mã kãm:

—Tk. Kwa mo kaxyw kot puj mẽ axte ri tanhmã kot amnhĩ tomnuj to hã harênh xwỹnh õ japêr? Tãm kot amnhĩ pê Tĩrtũm Kra hã amnhĩ jarênh ã amnhĩ to hêx nhũm mẽ pahte mar kênã. ⁶⁶ Jakamã e kwa tanhmã kot puj mẽ hipêx to? Anê.

Hãmri nhũm mẽ kãm:

—Nà ã kot amnhĩ jarênh anhỹr mýrapê koja ty. Ra htyk mã tãm kênã. Anê.

⁶⁷ Hãmri nê tanhmã hipêx kati hto. Mẽ hkwyjaja hkuk kuhtõ nê ãhkra ho htak nhũm mẽ hkwyjaja ãhkra hpo ho htak nê hã hpêr o axkê nê kãm:

⁶⁸ —E apê Tĩrtũm Kra hã ate amnhĩ jarênh jakamã mãn urak nê axãhpumunh tỹx. Jakamã e mẽ kot atak xwỹnhta nhĩxi jarê pa mẽ ama. Anê.

Simãw Pêtre kot Jejus kôt pa hkêt ã amnhĩ jarênh

Makre 14.66-72; Rukre 22.56-62; Juãw 18.15-18, 18.25-27

⁶⁹ Rôm nhũm Simãw Pêtre arĩ kĩtare kamã nhỹ. Hãmri nhũm mẽ kãm àpênh xwỹnh nitita omu nê hprĩ hã omunh kurê kumrêx. Hãmri nê kãm:

—Xê pêr apê Jejus kôt mẽ pa xwỹnhjê hõ na ka. Anê.

⁷⁰ Hãmri nhũm tee ri amnhĩ tã kuma nê kãm mẽ uma xaj mẽ kãm amnhĩ tã aprã nê kãm:

—Tk. Kokỹ. Ixte mēhõ my ata pumunhre hã. Anê.

⁷¹ Hãmri nê mẽ umaj kãnhmã xa nê tẽ nê kĩtare hwỹr hakwakrem ahte mẽ hkax ã xa. Tã nhũm hpãnhã hõja omu nê hã mẽ kãm:

—Xê ma pēr âm hāmri na mẽ harê. Kêp Jejus kôt ri mẽ pa xwỳnhjê hō na pēr. Anê.

⁷² Hāmri nhũm amnhĩ tã kuma nê kãm:

—Tk. Nà mẽ ri ã amnhĩ krã hkôt ri ixto axêx anhỹr kêt nê. Ixte aa mēhōta pumunh kêt kumrêx. Anê.

⁷³ Tã nhũm mẽ hkwyjaja hwỳr mra nê kãm kapêr nhũm tanhmã mẽ kãm kapêr to nhũm mẽ kuma nê kãm:

—Kwa pēr âm hāmri na mẽ ajarê. Apê Jejus kwỳ na ka. War akapêr kot axpên pyrak kênã. Anê.

⁷⁴ Hāmri nhũm tee ri mẽ kuma mẽ kãm amnhĩ tã aprâr kãm hihtỳx nê mẽ kãm:

—Kwa nà. Na pa Tirtũm noo mã mẽ amã amnhĩ jarê. Kot paj amnhĩ to ixêx japêr nhũm inhma nê hã tanhmã ixto. Nà urak ixpê Garirej nhō xwỳnhre hã. Ixte mēhō mũj pumunh kêt kumrêx tã ka mẽ xatã axpên kôt ixte hkôt ixpa ho ixpa xwỳnh ã ixkamnhĩx o xa.

Anhỹrja o ra mẽ kãm amnhĩ tã aprâr o axkrunêpxi nhũm krãhyre hkàr kurê kumrêx. ⁷⁵ Hāmri nhũm Simãw Pêtre kuma nê ra Jejus kot hkukamã krãhyre hkàr kêt ri kot hã amnhĩ aprâr o axkrunêpxi hã harênhta mã hamaxpêr kurê kumrêx. Hāmri nê kànhmã hakry hpar o tẽ nê hkaprĩ htỳx kumrêx nê kítare pê kato nê tẽ nê awry hã xa nê mỳr rax nê.

27

Mẽ kot pahшти Pirat wỳr Jejus o htêm ã mẽ harênh

Makre 15.1; Rukre 23.1-2; Juãw 18.28-32

¹ Tã nhũm ra myt kator o mōr mẽ nhũm mẽ hkrãhtũmjê mẽ patre krãhtũmjaja axpên wỳr pikuprōnh pa. Hāmri nê Jejus ã axpên mar o hkrĩ nê axpên mã:

—Nà kot puj mẽ hã amỹnê kê mẽ kupĩ. Kêp Tirtũm Kra hã kot amnhĩ jarênh o amnhĩ to hêx kênã. Anê.

² Hāmri nê mẽo pôristijê mã anê nhũm mẽ hpa hpre hpa nê ma pahшти Pirat wỳr o tẽ. Pirat kêp Rôm nhō pahшти nhỹ hã mẽ ixpê Ijaewjê

ho amnhĩptar jakamã nhũm mẽ ma hwỳr o tẽ nê ìhkram haxà.

Jut Kariot kot amnhĩ pĩr ã harênh
Atre 1.15-19

³ Rôm nhũm Jut Kariot tee ri mẽ kot Jejus pĩr kaxyw mẽ harênh ma nê hkaprĩ nê. Ra kot mẽ kãm hã àmnênh tã mẽ kot hpĩr kaxyw ã mẽ harênh ma nê tee ri amnhĩ kukamã hamaxpêr o hkaprĩ htỳx nê. Hāmri nê hamaxpêr o:

—Hêxta waa nê. Mo na pa pre ri axtem nê ã amnhĩ nhĩpêx anê? Nà na pa pre amnhĩ tomnuj tỳx kumrêx. Anê.

Hāmri nê ra mẽ kot kãm kàxpore ho 30 nê òrta jamỳ nê ma akupỹm patre krãhtũmjê mẽ Ijaew pigêtjê hwỳr o tẽ. Hāmri nê mẽ kot Tirtũm mã amnhĩ jarênh xà hã ixkreja wỳr mẽ hwỳr axà ⁴ nê nhỹri mẽ omu nê mẽ hwỳr tẽ nê mẽ kãm:

—E ota mẽ akàxporeta. Na pa ã mẽ amã Jejus ã ixàmnênh anhỹrja o amnhĩ tomnuj tỳx nê. Kot tãm amnhĩ nhĩpêx o pa htã pa axtem nê ã mẽ amã hã ixàmnênh anê. Jakamã e mĩ. Mẽ akupỹm akàxporeta jamỳ. Kot paj amnhĩm hamỳnh kêt nê. Anê.

Hāmri nhũm mẽ tee ri kuma nê kãm:

—Kokỹ. Nom ka na ka pre mẽ ixwỳr tẽ nê ho mẽ inhmar kênã. Anê.

⁵⁻⁷ Hāmri nhũm tee ri mẽ kuma hāmri nê pikap kàxpore rênh pa nê ma tẽ nê kato. Hāmri nê hkaprĩ htỳx kumrêx nê hamaxpêr o:

—Kwa tanhmã kot pa we amnhĩ to? Nà kot paj amnhĩ pĩ. Anê.

Hāmri nê krĩ pê kato nê ma mẽ kot pika kakwỳnh nê ho amnhĩm poti nhĩpêx xà hã pika hwỳr tẽ hāmri nê amnhĩ mut mã ê nê ho amnhĩ pĩ. Hāmri nhũm patre krãhtũmjaja harênh ma nê tee ri kot kàxpore rênhta kawrà nê hã axpên kukja nê axpên mã:

—Kwa tanhmã kot puj wem ja ho? Jut kot mẽ pamã Jejus ã àmnênh nhũm mẽ pahte hpĩr xà hã kàxpore na. Jakamã kot puj mẽ ho Tirtũm mã amnhĩ jarênh xà hã ixkre ho mex kêt nê. Finat Mojes kot ja nê mẽ

panhîgêtjê kurê jakamã na htem mê hpar xà hã kàxpore ho ixkreta ho mex kêt nê. Jakamã kwa tanhmã kot puj mê ho? Anê.

Hãmri nhùm ja mê kãm:

—E na pa ra ijamaxpêr. Pu mê ho jut kot amnhî pîr xà hã pikata japrô hãmri nê kamã jar mê kêp mê pahkwý hkêt htyk xwýnhjê jagjênh o papa. Anê.

Hãmri nhùm mê kuma nhùm ja mê kãm mex nê. Jakamã nhùm arîgro hõ hã nhùm mê ma hwýr mra nê haprô. ⁸ Hãmri nê hã hixi mê nhùm kêp “mê hkamrô pikapîr xà kamã pika”. Mê kot Jejus pîr xà hã kàxpore ho haprô jakamã nhùm prem ã hã hixi mênh anê. Nhùm htem arî axpên mã ã hixi jarênh anhýr o pa. ⁹⁻¹⁰ Nhùm pre ra amnepêm Tîrtüm nhý hã kapêr o pa xwýnh finat Jeremîsti mê hkukamã hprî hã ja jarê nê hã kagà. Nê hã kagà o:

Koja Ijaew nhõ patrejaja mēhõ kot mê kãm mēhõ my hã àmnênh pãnhã kãm kàxpore ho 30 nê òr xwýnhja jamý. Hãmri nê ma o tē nê nhýri mê kot amnhîm pika kakwýnh nê ho poti nhîpêx o pa xà hã pika hkwy japrô. Ra Tîrtüm kot inhmã mê harênh xà hkôt koja mê ã amnhî nhîpêx anê. Anê.

ã finat Jeremîsti kot Tîrtüm nhý hã mê hkukamã mê harênh nê hã kagà anhýr xàja kôt nhùm prem ã amnhî nhîpêx anê.

Pahihti Pirat kot Jejus kukjêr ã harênh

Makre 15.2-5; Rukre 23.3-5; Juãw 18.33-38

¹¹ Rôm nhùm mê pahihti Pirat wýr Jejus o tē nê hwýr ho axà nê kutã ãm nhùm xa nhùm Piratja omu nê kãm:

—E. Kwa inhmã amnhî jarê. Xà apê Ijaew nhõ pahi na ka nà? Xà ka na htem amnhî wýr ajamãr o pa? Anê.

Hãmri nhùm kãm:

—Tý. Nà ãm hãmri na ka ijarê. Anê.

¹² Hãmri nhùm mê hkrãhtümjê mê patre krãhtümjaja pahihti Pirat mã tanhmã ho kapêr punuj to. Nhùm

amnhî tâ mê kuma nom tanhmã kãm amnhî tâ àprãr to hkêt nê. ¹³ Jakamã nhùm pahihti Pirat tee ri ja hã omu nê kãm:

—Kwa xà na ka ã mê kot ato kapêr anhýrja mar kêt nê nà?

¹⁴ Anhýr tâ nom nhùm Jejus akryk xa nê axte tanhmã kãm nê hkêt nê. Hãmri nhùm Pirat tee ri kot ã amnhî nhîpêx anhýr ã omu nê hamaxpêr o:

—Kokýý. Mê kot ho kapêr punuj tâ nhùm ãm mê kuma nê te kãm mê uma hkêt pyrã nê tanhmã inhmã amnhî tâ àprãr to hkêt nê. Anê.

Pirat kot Jejus pîr kaxyw hã àmnênh ã harênh

Makre 15.6-15; Rukre 23.13-26; Juãw 18.39-19.16

¹⁵⁻²¹ Tã nhùm Pirat kormã mê kot axpên mar xà hã ixkre kamã ýr rãhã nhùm hprôja hwýr hpêr mê nê kãm:

—Xê tanhmã mê kãm Jejusja ã axàmnênh to hkêt nê. Na pa kamãt ja kamã hkôt amýti nê tee ri hkukamã ijamaxpêr. Kot amnhî to mex xwýnh na. Aa tanhmã kot amnhî tomnuj to hkêt jakamã xê tanhmã mê kãm hã axàmnênh to hkêt nê. Kwarî. Anê.

Hãmri nhùm Piratja kuma nê hamaxpêr o:

—Nà ixte Ijaew krãhtümjê pumunh tùm. Ijaew kwýjaja kãm Jejus kînh nhùm mê hkrãhtümjaja kot mê hã Jejus kamã gryk nê. Jakamã ixte tanhmã mê kãm hã ixàmnênh to kaxyw na mê ã ixwýr o htêm anê. Anê.

Na htem Pas nhõ arîgrota hapôx mê nhùm pre htem Ijaew o amnhîptãr xwýnhja mê kãm mê hagjênh xà kamã hkrî xwýnhjê ho hpýnh nê mê hapôj. Mê kãm hprãm xà hkôt nhùm mê kãm mê hapôj nhùm mê akupým kapôt ã hamakêtkati nê amnhîx pa. Jakamã nhùm ra mê hagjênh xà kamã mēhõ my pē Parapasja hkrî. Na pre tanhmã amnhî tomnuj to nhùm mê mýrapê unê nê haxà. Jakamã nhùm Ijaewjaja mê ho amnhîptãr xwýnh Pirat wýr akuprô nê kuhê nhùm mê kãm:

—E kot paj jarãhã mê amã mê hagjênh xà kamã mê hkrî xwýnhjê hõ mã inhûre kê àmnhîx kato nê ri pa.

Nhỹ kot paj mẽ amã kãm inhũre? Xà Parapas nà? Xà mẽ akwỳ kot amnhĩm ho mẽ anhõ pahihiti Jejus pê Tĩrtũm kot mẽ akaxyw ãm xwỳnh ta kot paj mẽ amã kãm inhũre? Nhỹ wehe? E mẽ inhmã nhỹ jarẽ. Anẽ.

Pirat na pre mẽ inhõ patre krãhtũmjê pumunh mex nẽ. Ijaew kãm Jejus kapẽr mar prãm tỳx ã nhũm mẽ hã kamã gryk tỳx nẽ hwỳr o mrarja kôt nhũm mẽ omunh mex nẽ. Jakamã ã hã mẽ hkukjêr anẽ. Hãmri nhũm mẽhpigêt mẽ patre krãhtũmjaja kuma hãmri nẽ mẽ pikuprõnh nẽ mẽ kuhê xwỳnhjê mã kãm:

—Kwa mẽ kãm anẽ kê mẽ pamã Parapas mã mãn ure nẽ mãmri Jejus Kris pĩ. E kwa mẽ tokyx kãm anẽ kê Parapas mã ure. Anẽ.

Hãmri nhũm mẽ mẽ kuma nẽ pahihiti Pirat mã kãm:

—Nà mẽ inhmã Parapas mã mãn anhũre. Anẽ.

²² Hãmri nhũm tee ri mẽ kuma nẽ mẽ kãm:

—Kwa no mẽ ate Jejus pê Tĩrtũm kot mẽ akaxyw ãm xwỳnh ã harẽnh xwỳnh ta? Tanhmã kot paj hipêx to? Anẽ.

Hãmri nhũm mẽ mẽ kãm:

—Apĩ ri. Tokyx pĩ kahpa hã anhõ kê ty. Anẽ.

²³ Hãmri nhũm tee ri mẽ kuma nẽ mẽ kãm:

—Tk. Kwa nà. Tanhmã kot amnhĩ tomnuj tore hã kot pa kêt ri pĩ kahpa kunhõ nhũm ty. Anẽ.

Hãmri nhũm mẽ xatã àmra kamã kãm:

—Kwa pĩ kahpa hã mãn anhõ kê ty. Kwa tokyx ã mẽ inhmã hipêx anẽ. Anẽ.

²⁴ Hãmri nhũm tee ri ja nê tanhmã mẽ kãm kapẽr to no nhũm mẽ mar kêt nẽ. Nhũm tee ri mẽ àmra mar o xa. Hãmri nẽ kãm Jejus pĩr prãm kêt jakamã amnhĩm gô hkwỳjanhi nẽ mẽ piitã mẽ noo mã amnhĩ nhĩhkra kuhõnh o xa. Mẽ kot hã omunh xà hkôt kãm hpĩr prãm kêt ã omunh kaxyw. Hãmri nẽ mẽ kãm:

—E na pa mẽ anoo mã ã amnhĩ nhĩhkra kuhõnh anẽ ka mẽ ja hã ixpumu. Nà inhmã hpĩr prãm kêt.

Tanhmã kot amnhĩ tomnuj tore hã. Mẽ kaxipixjaja mẽ amã hpĩr hprãm jakamã mẽ kam nẽ tanhmã ho. No pa kot paj tanhmã ho hkêt nẽ. ãm kwarĩ ho kwarĩ. Anẽ.

²⁵ Hãmri nhũm mẽ kuma nẽ mẽ kãm:

—Tõe. Nà ãm hãmri. Kot paj mẽ pamjaja amnhĩ tã htykja nhõ. Nẽ mẽ ixkra nẽ mẽ ixtãmnhwỳjê mẽ amnhĩ to ixpimràatã amnhĩ tã kunhõ. Kê Tĩrtũm kãm tanhmã hã mẽ ixtõ hto hprãm nẽ mãmri tanhmã hã mẽ ixtõ hto. Anẽ.

²⁶ Hãmri nhũm mẽ kuma nẽ mẽ kãm hprãm xà hkôt mẽ kãm Jejus ã amỳnê nẽ mẽ kãm Parapas mã ure. Ra Parapas kot pahi Pirat pê õ pôristi kutã amnhĩ xãm nẽ kêp hõxpĩrja mỳrapê nhũm mẽ kot unênh nẽ haxàr tã Ijaew kãm hprãm xà hkôt akupỳm kãm ure. Hãmri nẽ õ pôristijê mã anẽ nhũm mẽ Jejus tak. Nẽ htak rax nẽ hãmri nhũm Pirat mẽ kãm hã amỳnê nhũm mẽ kot pĩ kahpa hã nhõr o hpĩr kaxyw ma o tẽ.

Pôristi kot Jejus ã hpẽr o pikẽnh ã harẽnh

Makre 15.16-20; Juãw 19.2-3

²⁷ Tã nhũm pôristijaja mẽ kot pĩ kahpa hã Jejus nhõr kaxyw ma o tẽ nẽ pahihiti Pirat nhõrkwỳ kamã ixkre hõ hwỳr ho axà. Nhũm pôristi ohtõ nẽ hwỳr akuprõ nẽ hã pẽr o pikẽnh kaxyw axpẽn mã:

—E kwa tokyj pu mẽ kãm pahi xê jaxà ri. Kêp pahi hã kot amnhĩ jarẽnh kênã. Anẽ.

²⁸ Hãmri nẽ kêp ê kapa nẽ hpãnhã kêp pahi hã mẽ ê kamrêk mexja py nẽ kãm haxà. ²⁹ Nẽ kãm pahi hã mẽ ahkà nhĩpêx nẽ hkrãm haxà. Nom axtem akunĩ kamã mẽmo mrõ nhĩ te kot ronh kanêre pyrãk xwỳnhja nhũm mẽ hikãx nẽ hkrãm haxà. Nẽ kãm pahi hã kô gõ nhũm kupy nẽ o xa. Hãmri nhũm mẽ ho anhỹr pa nẽ kutã hkõn krã ho rôrõk nẽ hkrĩ hpa nẽ hã pẽr o pikẽnh kamã kãm:

—E ãm hãmri. Apê Ijaew nhõ pahi punuti na ka. Anẽ.

³⁰ Hãmri nẽ kãnhmã kuhê nẽ hkuk kuhtõ nẽ kêp kô pytà nẽ xatã ho hkrãx pê htak. Nhũm prem ã pẽr o pikẽnh

kâm hipêx anê. ³¹ Hâmri nê kêp pahi hã ê kapa nê akupÿm kâm ê jaxà nê mẽ kot pĩ kahpa hã nhôr kaxyw ho kato nê ma o tẽ.

Pôristi kot pĩ kahpa hã Jejus nhôr ã harênh

Makre 15.22-32; Rukre 23.27-43; Juãw 19.17-25

³² Nhũm pôristijaja Jejus o kato nê ma kapôt mã o tẽ. Nê kâm pĩ kahpa pytĩja gõ nhũm kumÿ nê mẽ hkôt o hkwy. Nom ra hiro tÿx nê nhũm mẽ tee ri ja hã omu nê mēhõ kot ho ajuta kaxyw mẽ kot omunh xwÿnhjê kapi ho xa. Hâmri nê Sirên nhõ xwÿnh Simãw kà htyk pumu nê unê nê kâm kot Jejus o ajuta kaxyw hã karõ nhũm hwÿr tẽ nê kêp pĩ kahpata mÿ nê hkôt kâm kumÿ nê o tẽ. ³³ Hâmri nhũm mẽ kên nhixêt te kot mẽ hkrã hi pyrãk xwÿnhhta wÿr mẽ o pøj. Mẽ kapêr kâm na prem hixêtja jarênh o: “Korkot.” No mẽ pakapêr kâm Korkot jarênhja kêp “mẽ hkrã hi xà” nhũm mẽ ma hwÿr Jejus o pøj. ³⁴ Hâmri nê mẽ kot pĩ kahpa hã nhôr kaxyw nhũm à htÿx kumrêx kamã hamak pymaj kâm mẽmo mẽ hkanexàja gõ. Wĩhti mẽ mẽmo mry ma xà ho pihkãr nhũm mẽ kâm hkwy gõ. Nom nhũm hkaki nê mẽ kot amnhĩ xà htÿx kamã hamak kêt xà hã omunh kurê kumrêx nê hkaga. Nhũm mẽ tee ri ja hã omu hãmri nê kêp ê kapa nê kumẽ nê pĩ kahpa hã kuxi nê prek o ãhkra nê hpar o htÿx pa. Hâmri nê kãnhmã pĩ jari nê ahkre kamã ãm nê ho htÿx nhũm kÿxpê ajêt. ³⁵ Hâmri nhũm pôristi hkwyjaja axpên mã ê hkwy ho pigrãnh kaxyw hã kênre ho jôka. ³⁶ Hâmri nê ho anhÿr pa nê pikap Jejus jamãr o hkrĩ.

³⁷ Na htem mẽ hpar kaxyw nê tanhmã mẽ kot amnhĩ tomnuj to hã kagà nê mẽ mÿri pĩ kahpa hã hanhõ. Jakamã na prem tapti hõ py nê tanhmã Jejus ã kagà hto nê hã kagà ho:

IJA EW NHÕ PAHI NA JA
HIXI PÊ JEJUS

Hâmri nê hwÿr ho api nê mÿri kunhõ. ã Jejus kot amnhĩ jarênh anhÿrja mÿrapê na prem kupĩ.

³⁸ Hâmri nhũm mẽ hpãnhã wa àhkĩnh xwÿnh wa ho axkrut nê mããnên pĩ kahpa hã wa kunhõ. Nê akutã ho Jejus nhjê nhũm war ajêt.

³⁹ Tã nhũm pry hã mẽ mrar xwÿnhjaja Jejus pumu nê hã hpêr o pikênh o mra nê kãm:

⁴⁰ —Kwa ka na ka pre ate Tĩrtũm mã amnhĩ jarênh xà hã ixkre grãnh par nê atã apkati axkrunêpxi nê akupÿm hipêx par ã amnhĩ jarê. Nê apê Tĩrtũm Kra hã amnhĩ jarê. Nê axãhpumunh o axãhpumunh jakamã e kwa amnhĩ kapa nê wrÿ pa mẽ ja hã apumu. Kwa tokyx. Anê.

⁴¹ Nê patre krãhtũmjê mẽ Tĩrtũm kapêr tũm o mẽ ahkre o mẽ pa xwÿnh mẽ mẽ hkrãhtũmjaja piitã hwÿr mra nê hã hpêr o axkê. ⁴² Nê axpên mã harênh o:

—E jahti na xep pre mẽ kamã ukapri ho pa nê tanhmã mẽ ho ajuta hto ho pa. Tã nom tãm tanhmã amnhĩ to nê wrÿk kêt nê. Kwa pu mẽ arĩ pakuhê nê kot amnhĩ kaxãr nê wrÿk kãm omu. Kojã wrÿ pu mẽ omu nê kêp mẽ panhõ pahĩhti hã hkôt pajamaxpêr kurê kumrêx. E tokyx wrÿ Jejus. Pa mẽ awrÿk kãm apumu. Nã kot kaj awrÿk rax nê. ⁴³ Na hte amnhĩ kaxyw Tĩrtũm mã hamaxpêr o pa. Nê kêp Kra hã amnhĩ jarênh o pa. Jakamã e. Kê Tĩrtũm tãm hwÿr tẽ nê kêp Kra hã akupÿm mẽ pahpê utã. Anê.

⁴⁴ Hâmri nhũm wa kot akutã hijê nê jêt xwÿnhhta wa haxwÿja mẽ mar xà hkôt mã ho kapêr anê.

Jejus tyk ã harênh

Makre 15.33-41; Rukre 23.44-49; Juãw 19.28-30; mããnên Eprêw 10.19-20

⁴⁵ Tã nhũm kaxkwa nhĩpõk ri myt ÿr mẽ nhũm te kamãt pyrãk nhũm kamãt kô rax kumrêx. Jao hã awry mẽ nhũm ra akupÿm myt katêr o mõ.

⁴⁶ Hâmri nhũm Jejus kapêr kãm hihtÿx nê àmra htÿx kãm Tĩrtũm mã kapêr nê kãm:

—Inhō Tirtūm inhō Tirtūm. Kwa mon ka ixkaga? Anē.

Nom kapēr kamā kām kapēr o:

—Eri Eri. Rāmā sapatani. Anē.

⁴⁷ Hāmri nhūm mē kot mar xwýnhjaja kot Eri jarēnh ā kuma nē htýx ho finat Eris mā kapēr ā hkamnhix. ⁴⁸ Nhūm Jejus par pē guhkrax kām wīhti punure xa. Jakamā nhūm mē ā kapēr anhýr ā kuma nhūm mēhō kām hkaprī nē. Hāmri nē mēmo rerek py nē o tē nē kaxyw pī rytija py nē ho hkanhwý. Nē akupýn o tē nē ho wīhti nhek nē Jejus kot hkaôr kaxyw kām kupē. ⁴⁹ Hāmri nhūm hkwyjaja tee ri ja hā omu nē nē kām kapēr nē kām:

—Tk. Kwa nhām xa. Pu mē kop Eris jamā mán. Koja hwýr tē nē ho wrýk japēr. Anē.

⁵⁰ Hāmri nhūm kamát kô mē nhūm Jejus ra htyk kaxyw nē axte amra htýx nē hāmri nē ty. ⁵¹ Tykja kôt nhūm Tirtūm mā amnhī jarēnh xà hā ixkre kamā hakwakre hā kupēxēja kýj rūm ahpar mā axkjē nē amnhī kahē xà mēnh kurē kumrēx. Utī rax tā axkjē nē amnhī kahē xà mē. Te Jejus htyk o te kot mē pahte hkôt amnhī xunhwýr xwýnhjē mā Tirtūm wýr pry jakwa kre kahē xà mēnh pyrāk o ā amnhī nhīpēx anē. Nhūm pika htertēt týx kumrēx o kēn rūnh kwý ohtô nē hkrakrak pa. ⁵² Hāmri nhūm mē htyk ā pika kamā mē htykjē nhōrkwy ho ohtô nē mē hā axkjē nhūm mē hikwy xwýnhjaja akupým htír nē hapôj nē kuhé. Na prem kormā htyk kêt ri amnhī kaxyw Tirtūm kôt hamaxpēr. Tā nhūm Jejus ty nhūm mē ohtô nē akupým htír nē hapôj nē kuhé. ⁵³ Nom kormā nhýhým mrar kêt nē. Arī mē hā pika nhīpy Jejus akupým htír ā hamār o kuhé. Tā nhūm Jejus apkati hō hā akupým htír ā arīgrota ā nhūm mē rī kormā ma Jerujarē hwýr mra nē hwýr agjē nhūm mē ohtô nē akupým mē htír ā mē omu.

⁵⁴ Nhūm kormā Jejus htyk o mōrta ā nhūm pôristi krāhtūm mē pôristi hkwyjaja hāmri hparpē hamār o kuhé nē htyk kām omu. Nē pika htertēt

kamā ama nē mēmoj kot tanhmā amnhī nhīpēx toja pumu nē tee ri hamaxpēr nē kām ma htýx kumrēx. Hāmri nē axpēn mā:

—Hêxta waa nē. Pēr am hāmri na pre htyk xwýnhta amnhī jarē. Kêp Tirtūm Kra kēnā. Tā pu mē amarī pahýtýx kupī. Anē.

⁵⁵⁻⁵⁶ Nhūm pre mēnijaja ohtô nē amým Jejus tyk kām omunh o kuhé. Marir Matarēn nē Xiakre mē Juje wa katorxà Marir nē Xiakre hō mē Juāw wa katorxàja nhūm mē kormā htyk kām omunh o kuhé. Na prem Garirej rūm hkôt tanhmā ho ajuta hto ho hkôt Jerujarē wýr mō.

Mē kot Jejus jaxàr ā harēnh

Makre 15.42-47; Rukre 23.50-56; Juāw 19.38-42

⁵⁷ Tā nhūm ra myt grire nhūm krī pē Arimatej rūm hikāxpore rax xwýnh pē Jujeja tē. Nom axtem Juje hō na pre. Ra kot Jejus kôt amnhī xām jakamā kām ho wrýk nē haxà prām nē. ⁵⁸ Hāmri nē ma pahi Pirat wýr tē nē ī hā kuwý nē kām:

—E ot pa awýr tē. Kwa inhmā htyk xwýnhta gō pa ma o tē nē haxà nà? Anē.

Hāmri nhūm kuma nē kām harē nhūm ma o tē nē haxà. ⁵⁹ Kaxyw kupēxē mex ō py nē ho hkupu pa ⁶⁰ nē ma o tē nē ō kēn kre kamā haxà. Na pre htyk kukamā kēn kre kakwý nhūm mē kot kormā kamā mēhō jaxàr kêt tā kamā na pre Jejus jaxà. Hāmri nē hā kēn rax ō xām nē ho hitom nē ma akupým tē. ⁶¹ Nhūm Marir Matarēn mē Marir ōja wa kēn kreta kapem omunh o wa nhý.

Pôristi kot kēn kre jamār o kuhé ā harēnh

⁶² Tā nhūm apkati nhūm mē inhō arīgromnu pē sap kato. Hāmri nhūm Parijew nhō xwýnhjē mē patre krāhtūmjaja ma pahi Pirat wýr mra nē kām:

⁶³ —Kwa pahihti. Nà amnhī to hēx o pa xwýnhta na pre kormā htír nē pa ri tanhmā amnhī jarēnh to ho pa. Nē nhýrmā ty nē htyk ā apkati axkrunēpxi pix nē akupým

htîr ã amnhî jarê. ⁶⁴ Jakamã kwa hwÿr anhõ pôristi hkwy rê kê mê ma hwÿr mra nê hamãr mex o apkati axkrunêpxi. Kot ka anhÿr kêt nhũm hkôt mê pa ho mê pa xwÿnhjaja ma hwÿr mra nê ho ahkî nê ma o mra nê nhÿri haxà nê mê piitã mê kãm ra akupÿm htîr ã harênh o hêx o pa. Te tãm kot amnhî kukamã amnhî jarênh pyrãk. Nom mê kot axte ã harênh anhÿrja koja omnuj tÿx o tãm kot ã amnhî jarênh anhÿrja jakre. Anê.

⁶⁵ Hãmri nhũm mê kuma nê mê kãm:

—Tôe. Nà koja mê ho anê. E mê ma hwÿr amnhî kôt pôristi hkwy ho mra kê mê hakwakre kahê xà jamãr mex o kuhê. Anê.

⁶⁶ Hãmri nhũm mê kuma nê ma hwÿr mra nê hakwakre hã kên raxta o htÿx pa. Nê mēhõ kot omunh nê kahê mēnh pymaj menh ê ho hkukõ. Hãmri nê ho anhÿr pa nê pôristi mã kãm:

—E Kêr ka mê jar kuri hamãr mex o akuhê. Kê mēhõ tē nē tanhmã ho hkêt nē. Anê.

28

Jejus akupÿm htîr ã harênh

Makre 16.1-8; Rukre 24.1-12; Juãw 20.1-10

¹ Tã nhũm apkati nhũm tãmik. Hãmri nhũm Marir Matarên mê Marir ôja kwÿhtã kãnhmã nhÿ nê ma akupÿm kên kreta wÿr wa tē. ² Puh nhũm pika htertēt tÿx nê nhũm Tirtũm kapêr o mê wrÿk xwÿnhja kên kre wÿr wrÿ nê nhãm hakwakre nê kên raxta mê nê hã nhÿ. ³ Hirã htÿx kãm nhÿ. Te na jaxênh pyrãk. Nê ê haka htÿx kumrêx. ⁴ Nhũm pôristijaja tee ri omu nê kãm ma htÿx nê htertēt nê umaj pikap rôrôk pa nê te htyk pyrã nê hikwÿ. ⁵ Hãmri nhũm wa nita kên kre hwÿr pøj nê tee ri Tirtũm kapêr o mê wrÿk xwÿnhhta pumu. Nhũm wa kãm:

—Kwa wa amã ma hkêt nê. War ate Jejus pumunh kaxyw na ka wa tē. Mê kot pĩ kahpa hã nhôr xwÿnhhta. ⁶ Nom jar amrakati. Na ra akupÿm htîr nê

kato nê ma tē. E wa kam nê amnê axà nê nôr xà kaprÿ pumu. Anê.

Hãmri nhũm wa kuma nê tee ri kên kre kamã Jejus japêr nhũm kamã amrakati. ⁷ Hãmri nhũm Tirtũm kapêr o wrÿk xwÿnh wa kãm:

—E wa tokyx ma akupÿm tē nê hkôt mê pa ho mê pa xwÿnhjê mã harê. Koja ma Jejus mê akukamã akupÿm Garirej wÿr mō. Garirej kamã kot kaj mê axte axpên pumu. Ra kot mê amã amnhî jarênh xà hkôt. E kwa wa tokyx ma akupÿm mê hwÿr tē. Anê.

⁸ Hãmri nhũm wa kuma nê ma akupÿm hprôt nê htêm kurê kumrêx. Kãm ma htã hkînh nê. Nê ma Jejus kôt mê pa ho mê pa xwÿnhjê mã ujarênh kaxyw ma mê hwÿr hprôt nê wa tē.

⁹ Pu nhũm ra Jejus tãm wa kutã tē nê wa hkaxpa. Hãmri nê wa haêr pê wa kãm kapêr nê wa kãm:

—Pa? Nhÿhÿm na ka wa tē? Anê.

Hãmri nhũm wa omu nê hkînh tÿx kumrêx nê hwÿr hprôt nê hpar pê hkôn krã ho tēm nê akutã hpar ã kumÿ nê kãm mex o mex ã harê nê kãm:

—Hêxta gàà nê. Ma amex kumrêx. Amex o amex. Anê.

¹⁰ Hãmri nhũm wa kãm:

—E war amã ma hkêt nê. Mamrĩ ma tē nê ixkôt mê pa ho mê pa xwÿnhjê mã ijarê kê mê ma Garirej wÿr mra. Kamã kot paj mê axte axpên pumu. Anê.

Pôristi kot kãxpore hprãm xà Jejus o hêx ã harênh

¹¹ Rôm nhũm pôristi hkwyjaja akupÿm tãm hkrã hãmri nê ma kên kreta rûm akupÿm krîm mra. Hãmri nê patre krãhtũmjê hwÿr mra nê mê kãm ujarênh pa. ¹² Hãmri nhũm mê tee ri mê kuma nê mēhpigêtjê ho akuprô nê mê hã axpên mar o hkrĩ. Hãmri nê axpên mar pa nê pôristi mã amnhîrer rax nê mê kãm:

¹³ —E mê amnhîm kãxpore jamÿ nê ma ri ã mê kãm amnhî jarênh anhÿr o apa. Nom kêr ka mê kãm amnhî to axêx nê mê kãm: “Na pa prem kên kre kapem ixtÿx gôr nê inhîkwÿ nhũm Jejus kôt mê pa ho mê pa xwÿnhjaja mra nê mê ixpê ï ho ahkî nê ma o

mra.” Anhÿr o mẽ kãm amnhĩ to axêx o apa. Mẽ ixte kàxpore ho mẽ amã amnhĩrerta pãnhã. ¹⁴ Koja pahihiti Piratja mẽ anhõt ã mẽ ajarênh ma nẽ hã tanhmã mẽ ato kaxyw hã kot paj mẽ axy pẽ tanhmã kãm ixkapêr to nhũm tanhmã mẽ ato hkêt nẽ. Jakamã e. Mẽ tee ri amnhĩ kukamã ajamaxpêr kêt nẽ. Mẽ mãmri ma mra nẽ ã mẽ kãm axujarênh anhÿr o ri apa. Anẽ.

¹⁵ Hãmri nhũm mẽ kuma nẽ mẽ kot amnhĩ to hêxta pãnhã kàxpore jamÿ nẽ ma mẽ mar xà hkôt mẽ piitã mẽ kãm Jejus kôt mẽ pa xwÿnhjê ho hêx o pa. Tã na htem arĩ jarãhã Ijaewjaja ã axpêr mã mẽ harênh anhÿr rãhã ho pa.

Jejus kot hkôt mẽ pa ho mẽ pa xwÿnhjê mã mẽ àpênh ã karõ

Makre 16.14-18; Rukre 24.36-49; Juãw 20.19-23; Atre 1.6-8

¹⁶ Tã pa mẽ ixte Jejus kôt ixpa ho ixpa xwÿnh pẽ 11jaja hãmri akupÿm Jejus htĩr ã harênh ma hãmri nẽ ma Garirej wÿr mra. Nhÿri Jejus kot mẽ inhmã mẽmo hixêt prêk jarênhja wÿr.

¹⁷ Nẽ ra hwÿr ixpôx o mrrar mẽ Jejus pumu. Tã nom nhũm mẽ ixkwÿjaja tee ri omu nẽ htÿx ho nhãm mẽhõ hã hkamnhĩx. No kêt mẽ pajaja na pa prem ixprĩ hã omunh kurê kumrêx nẽ ixkĩnh tÿx nẽ. Nẽ ixkĩnh nẽ hwÿr ixprõt nẽ kãm:

—Pa Jejus? Hêxta waa nẽ. Amex o amex. Anẽ.

¹⁸ Hãmri nhũm mẽ inhmã:

—E na pre Tĩrtũm ã inhmã kapêr anẽ nẽ inhmã: “E kêr ka amnhĩ nhÿ hã mẽmoj piitã tanhmã ho ho apa. Kaxkwa kamã nẽ pika kamã. Mamri nhÿhÿm amnhĩ krã hkôt amã tanhmã amnhĩ to hprãm xà hkôt tanhmã amnhĩ nhĩpêx to ho ri apa.” Anẽ. Na pre mẽ akaxyw ã inhmã kapêr anẽ.

¹⁹ —Jakamã e. Kêr ka mẽ ma pika piitã hkôt ri mẽ kãm ijarênh o ri apa. Kê mẽ ixte mẽ nẽ tanhmã amnhĩ nhĩpêx to hã ijarênh ma hãmri nẽ ixkôt amnhĩ xunhwÿ nẽ ixkôt ri amnhĩ nhĩpêx o pa. Nẽ kêr ka mẽ ja hã mẽ omu nẽ Tĩrtũm mẽ wa inhmã mẽ hkrã kumrã. Wa ixkarõ nhÿ hã mẽ hkrã kumrã.

Mẽ kot wa inhÿ hã pix mã tanhmã amnhĩ nhĩpêx to ho pa kaxyw.

²⁰ —Nẽ mẽ kãm anẽ kê mẽ ixkapêr piitã hkôt amnhĩ nhĩpêx rãhã ho pa. E kêr ka mẽ ma mẽ kãm ã ijarênh anhÿr o ri mẽ hkôt apa. Kot paj mẽ anhĩhkô hã ri ixpa rãhã nhũm nhÿrmã pikaja hapêx o hapêx. Anẽ.

Na pre ã Jejus mẽ inhmã mẽ ixapênh ã karõ anẽ.

Matêwre kot Jejus jarênh nẽ hã kagàja ja kôt na hapêx.

Makre Makre kot tanhmã Jejus kot amnhĩ nhĩpêx to ho pa hã kagà

Juãw Makre na pre kagàja nhĩpêx. Na pre hte ma hkwỳjê hkôt mẽ kãm Jejus kot tanhmã amnhĩ nhĩpêx to hã harênh o ri pa. Na pre ra Simãw Pêtreja hprĩ hã Tĩrtũm kapêr o ahkre nhũm kuma nê mar tỳx nê. Hãmri nê mẽ pamã tanhmã Jejus ã kagà hto. Simãw Pêtre xô ri tanhmã kot amnhĩ nhĩpêx to hã kagà. Jejus kêp Tĩrtũm Kra hã hihtỳx o hihtỳx nê àhpumunh o àhpumunh ã nhũm pre harê nê hã kagà. Nê kêp mẽ pakutã nojarêt xwỳnh ã harê nê hã kagà. ã Juãw Makreja mẽ pamã Jejus jarê nê hã kagà anê.

Matêwre 3.1-10; Rukre 3.1-9; Juãw 1.6-8, 1.19-23

¹ Pa Kris kôt ixkràmnhwỳjaja. E kot paj mẽ amã tanhmã Jejus kot amnhĩ nhĩpêx to ho pa hã kagà ka mẽ kamã harê nê ama. Kêp Tĩrtũm Kra na. Tãm na pre mẽ pakaxyw ãm nê mẽ pahwỳr kumê. Tã tãm kot mẽ pahwỳr wrỳk nê tanhmã amnhĩ nhĩpêx to ho paja kot paj mẽ amã ixprĩ hã harê nê hã kagà ka mẽ kamã harê nê ama.

Juãw Paxis kot Jejus kukamã harênh

² Kormã Jejus mẽ pahwỳr wrỳk xwỳj ri na pre Tĩrtũm nhỹ hã kapêr o pa xwỳnhjê hõ pê Ijaisja kukamã tanhmã harênh to nê hã kagà. Nê Jejus kukamã harênh o mõi xwỳnh Juãw Paxisja nhũm pre mãânên hkukamã tanhmã harênh to nê hã kagà. Te Tĩrtũm tãm hamaxpêr pyræk o harê nê harênh o:

E kot paj Ixkra hkukamã ma mẽ hwỳr kot harênh xwỳnhjê hõmê kê ma kutêp mẽ kãm harênh o ri pa. Kê mẽ kuma nê kutêp tãm amnhĩ nhĩpêx mex o pa.

³ Koja kukamã harênh xwỳnhja ma kapôt ã ri hwỳr mẽ mrar

xwỳnhjê mã harênh o ri pa. Nê kỳx pê mẽ kãm kapêr nê mẽ kãm: “E mẽ inhma. Koja Tĩrtũm tokyx mẽ pahwỳr mẽ panhõ Pahihti mẽ nhũm wrỳ pu mẽ pahpiitã omu. Jakamã kwa mẽ tokyx kutêp tãm amnhĩ nhĩpêx. Te ho mẽ kot mẽhõ kutêp pry ho mex pyræk o amnhĩ nhĩpêx. Nom pry kumrêx o mex kêt nê. ãm amnhĩ nhĩ ho tãm amnhĩ nhĩpêx nê tãm axpên nhĩpêx. Pahihtita kutêp. Mẽ pahte amnhĩ nhĩpêx tũmja te kot pry nhĩnur nê krã hakỳx nê pry juk nhũm mẽ tee ri kot kãm hã mrar mex prãm kaprỳ pyræk. Jakamã kot kaj mẽ Pahihti nyw kutêp ate amnhĩ tomnuj kaga nê tãm amnhĩ nhĩpêx nê tãm axpên nhĩpêx. Hãmri nê te mẽ kot pry nhĩnur o mex nê ho katàt nhũm ra katàt mux nê nõi pyræk o amnhĩ nhĩpêx. E kwa kêr ka mẽ ã kutêp amnhĩ nhĩpêx anê.” Anhỳr o koja mẽ kãm harênh o pa. Anê.

Na pre ã Tĩrtũm Juãw Paxis kukamã harênh anê nhũm ã hã kapêr xwỳnh pê Ijaisja mẽ pamã hã kagà.

⁴ Tã ra kot harênh xà hkôt nhũm Juãw Paxisja tẽ. Hãmri nê kapôt ã ri mẽ kãm Tĩrtũm kapêr jarênh o pa nê mẽ kãm:

—Kwa mẽ tokyx amnhĩ tomnuj kaga nê tãm ri amnhĩ nhĩpêx. Kê Tĩrtũm ja hã mẽ apumu nê mẽ anê mẽ ate amnhĩ tomnuj rênh pa nê mẽ ato hkra. Pa mẽ piitã mẽ kot ra mẽ apê hkra hã mẽ apumunh kaxyw mẽ akrã kumrã. Anê.

⁵ Hãmri nhũm mẽ ohtô nê kot kapêr mar kaxyw ma nhỹhỹnh hwỳr kapôt mã mra. Pyka pê Jutej rũm nê Jutej kamã krĩ pê Jerujarê rũm nhũm mẽ ohtô nê hwỳr mra. Hãmri nê nhỹri omu nê kãm:

—E ixte amnhĩ tomnuj kaga hprãm xà na pa awỳr amnhĩ to tẽ. Na pa hte amnhĩ tomnuj pix o ri ixpa. Tã tee ri ja hã amnhĩ pumu nê ixkaprĩ

nē. Hāmri nē ra inhmā amnhī tomnuj kaga nē tām amnhī nhīpêx prām nē.

Anhÿr ã amnhī jarē. Hāmri nhūm Tirtūmja kaxkwa kamā hkrī htā mē kuma nē amnhī katut kôt mē kot amnhī tomnuj piitā rēnh pa nē axte kām hamaxpēr kêt nē. Jakamā nhūm Juāw Paxis gôx kām mē hkrā kumrā. Pyhti pē Jotāw kamā. ⁶ Juāw Paxisja hikàxpore hkêt jakamā na pre ê mex kêt nē pa. ãm mēmo mry pē kamer kī ho amnhīm ê nhīpêx nē hagjê nē hā pa. Nē mēmo mry hkà ho amnhī pre nē ri pa. Nē mēo mex kur kêt nē ãm krit ku nē menh ôr o ri pa. ⁷ Hāmri nē mē kām tanhmā Jejus jarēnh to ho pa nē mē kām:

–E mē inhma. Koja tokyx Tirtūm kot mē pakaxyw ãm xwÿnhhta mē pahwÿr wrÿ. Ahpumunh tÿx o kot ijakrenh jakamā na pa hte ãm kukwak ri ixpa nē amnhī tā hā xpijaàm rāhā ho ri ixpa. Te ixkrām ã xpijaàm o amnhī nhīpêx pyrāk. ⁸ Na pa hte gô pix o Tirtūm mā mē akrā kumrār o ri ixpa. Nom mē pahwÿr wrÿk mā xwÿnhja koja mē awÿr Tirtūm Karō rē nhūm mē akaxwÿnh mā agjê. Ka mē ÿ hā tām ri amnhī nhīpêx rāhā ho ri apa. Anē.

Juāw Paxis kot Jejus krā kumrār ã harēnh

Matêwre 3.13-17; Rukre 3.21-22; Juāw 1.32-34

⁹ Tā nhūm Jejusja tām Juāw Paxis wÿr tē. Garirej kamā krī pē Najare rūm ma hwÿr tēn pōj. Hāmri nhūm Juāwja hkrā hkumrā. Pyhti pē Jotāw kamā hkrā kumrā. ¹⁰ Hāmri nē wa gôj rūm api nē mÿr ri kaxkwa pumunh o xa. Nhūm kaxkwa axkjê nhūm kurūm Tirtūm Karō te tuuti pyrā nē Jejus wÿr wrÿk o tē nē ïkre hā xa nhūm amnhī tā omunh o xa. ¹¹ Hāmri nhūm Tirtūm kaxkwa rūm kām kapēr nē kām:

E apê Ixkra mex na ka. ãm hāmri na ka hte ixkanrēhā amnhī nhīpêx mex o apa. Inhmā ajapê kamā na ka ri apa ho apa. Anē.

Jejus kot Satanasti kaga hā harēnh
Matêwre 4.1-11; Rukre 4.1-13; määñēn Eprêw 2.18, 4.15

¹² Tā nhūm Tirtūm Karōja ma kapôt mā Jejus o mō ¹³ nhūm kapôt ã mry xoprê kaêx ã ri mrar o hā arïgro pē 40. Hāmri nhūm Satanasti omu nē ma hwÿr tē nē ri hkôt pa. Kapôt ã ri hkôt hêx rom tanhmā kām kapēr to nhūm kot mar nē hkôt amnhī xām prām xāj ma hkôt pa. Nom nhūm Jejus hkaga kumrêx nhūm tee ri ho anhÿr kaprÿ nē ma akupÿm tē. Hāmri nhūm Tirtūm kapēr o mē wrÿk xwÿnhjaja Jejus wÿr wrÿ nē tanhmā ho mex to.

Jejus kot Tirtūm mā àpēnh krax ã harēnh

Matêwre 4.12-17; Rukre 4.14-15

¹⁴ Nhūm pre ra mē ixpê Ijaew o amnhīptār xwÿnh pē Eroxja Juāw Paxis kot mēmoj tā kām àkjêr mÿrapê nhūm pre ra unê nē haxà. Tā kot haxār jakành pē nhūm Jejus ma akupÿm pyka pē Garirej wÿr mō nē kamā mē kām Tirtūm kapēr jarēnh o pa. Nē Tirtūm kot mē hwÿr mēnh ã amnhī jarēnh o pa. Nom te nhām mēhō jarēnh pyrāk o amnhī jarē ¹⁵ nē mē kām:

–E na Tirtūm kām mē ato hkra hprām nē. Jakamā na ra kot mē awÿr ãm xwÿnhhta mē nhūm mē awÿr wrÿ. Kwa mē tokyx kapērja ma nē amnhī kaxyw hkôt ajamaxpēr. Hāmri nē ate amnhī tomnuj kaga nē Tirtūm kôt mām amnhī nhīpêx o ri apa. Kot kaj mē ã amnhī nhīpêx anē nhūm Tirtūm amnhī tā mē apumu nē mē ato hkra. Anē.

Jejus kot amnhī kôt tep pynēnh xwÿnh wa hwÿr ã harēnh

Matêwre 4.18-22; Rukre 5.1-11

¹⁶ Tā nhūm Jejus ma Garirej kamā gô rax pē Garirej mÿri mō. Hāmri nē Simāw mē htō Andreja wa hwÿr kato nē wa omu. Wa kot tep pynēnh xwÿnh jakamā na pre wa gôx kām kryhti rēnh o xa nhūm Jejus wa hānh tē nē wa omu. ¹⁷ Hāmri nē amnhī kôt wa kuwÿ nē wa kām:

–E war amnē ixkôt tē nē ixkôt mān apa. War apê tep kanhêr rax o ri

apa xwÿnh tâ kêr ka war axapênhta kaga nê hpânã ixkôt apa ho apa. Kot paj tanhmã war akrã hto ka wa tep pynênh pânã ma ri mẽ hkôt mẽ kãm ixkapêr jarênh o ri apa. Mẽ ohtô nê mẽ kot war amar nê Tirtũm kôt amnhĩ xunhwÿr kaxyw. Jao kot kaj te war ate tep kanhêr rax nê Tirtũm mã òr pyrak o amnhĩ nhĩpêx.

Anhÿr o wa kãm kapêr. ¹⁸ Hãmri nhũm wa kuma nê kryhti kaga nê ma hkôt pa ho pa kurê kumrêx. ¹⁹ Hãmri nê mẽ gô mÿri mō nê Jepetew kra Xiakre mẽ htō Juãw wa hwÿr kato nê wa omu. Nhũm wa kormã hipêêxà nhĩhkô hã pàr kãm kryhti ho mex o wa nhÿ nhũm Jejus wa mẽ hwÿr kato nê wa omu nê amnhĩ kôt wa kuwÿ. ²⁰ Hãmri nhũm wa kuma nê mã hkôt pa ho pa. Pàr kre kamã mẽ kãm apênh xwÿnhjê ri hipêêxà re nê ma Jejus kôt pa ho pa.

Jejus kot mēhō nē mēkarōmnuti janor ã harēnh

Rukre 4.31-37

²¹ Hãmri nhũm Jejus mẽ hkôt mẽ pa ho mẽ pa xwÿnhjaja ma krĩ pē Kapanau hwÿr mō hãmri nê hwÿr pōj. Hãmri nhũm mẽ ixpê Ijaewjê nhō arīgromnu pē sap kato nhũm Jejus ma Tirtũm kapêr o mẽ ahkre xà hã ixkre hwÿr tē nê hwÿr axà. Hãmri nê kamã mẽ kot Tirtũm kapêr mar kaxyw axpên wÿr mẽ pikuprōnh xwÿnhjê jahkre ho nhÿ. ²² Nê mẽ ahkre mex nhũm mẽ kuma nê tee ri hamaxpêr nê axpên mã:

—Hêxta waa nê. Pêr ãm hãmri na ã mẽ pamã mẽmoj jarênh anê. Tirtũm kapêr tũm o mẽ ahkre xwÿnhjê rom àhpumunh tÿx kôt na hprĩ hã mẽ pajahkre mex nê. Anê.

²³ Hãmri nhũm mẽhō myja mẽ hwÿr axà. Na pre ra mẽkarōmnuti hwÿr axà nhũm ÿ hã amnhĩ tomnuj o pa. Hãmri nê mẽ hwÿr axà nê Jejus pumu nê kãm kapêr. Nom tãm kapêr kêt nê. Mēkarōmnuti nhÿ hã kãm kapêr. Kàx pē kãm kapêr nê kãm:

²⁴ —Pa Jejus? Kwa tanhmã mẽ ixto hkêt nê. Ixte apumunh mex. Apê Najare nhō xwÿnhjê mãânên apê Tirtũm

kot mẽ ixwÿr amênh xwÿnh maati na ka. Tirtũm rũm na ka pre mẽ ixwÿr wrÿ. Kwa xà kot kaj mẽ ixto ajapêx nà? Anê.

²⁵ Hãmri nhũm kãm:

—Tk. Kwa anhĩkrê nê myta kurũm akator kurê kumrêx. Anê.

²⁶ Hãmri nhũm kuma nê àmra htÿx kãm myja o àk tÿx nê kēp kato nê mã tē nhũm akupÿm mex. ²⁷ Hãmri nhũm mẽ piitã omu nê kamã no puma nê. Hãmri nê xatã axpên mã harênh o pa nê axpên mã:

—Kokÿÿ. Jejus na pre àhpumunh tÿx kôt mẽkarōmnuti jano nhũm kuma nê mẽ kurũm hapôx kurê kumrêx. Anê.

²⁸ Hãmri nhũm Garirej kamã mẽ piitã ri axpên mã harênh o pa.

Jejus kot akupÿm Simãw xupãnhgêx o mex ã harēnh

Matêwre 8.14-15; Rukre 4.38-39

²⁹ Tã nhũm Jejus Xiakre mẽ Juãw mẽrohã Tirtũm kapêr o mẽ ahkre xà hã ixkre rũm kato nê mã Simãw mẽ Andre wa òrkwÿ hwÿr mō. ³⁰ Hãmri nê mẽ hwÿr agjê. Nhũm Simãw xupãnhgêxja ra à nê hkà kagro htÿx nê nō nhũm Jejus mẽ hwÿr axà nhũm mẽ kãm harê. ³¹ Hãmri nhũm mẽ kuma nê hwÿr axà nê omu nê hpa hã kupy nê kànhmã ÿr nhũm hkà hakry nê akupÿm mex kurê kumrêx. Hãmri nê kànhmã xa nê tē nê mẽ kãm mẽmoj nhĩpêx nhũm mẽ hkur o hkrĩ.

Jejus kot akupÿm mẽ hkwÿjê ho mex ã harēnh

Matêwre 8.16-17; Rukre 4.40-41

³²⁻³³ Tã nhũm myt axà nhũm mẽ ohtô nê Simãw mẽ Andre wa òrkwÿ hwÿr mra nê hakwakrem Jejus ã akuprō. Nê amnhĩ kôt mẽ à xwÿnhjê ho mra. Nê mẽkarōmnuti kot mẽ hwÿr gjêx xwÿnhjaja nhũm mẽ hwÿr mẽ o mra. ³⁴ Hãmri nhũm Jejus mẽ omu nê akupÿm ahpÿnhã mẽ piitã mẽ ho mex pa. Nê mẽkarōmnutija nhũm mẽ kurũm mẽ hapôj. Mēkarōmnuti kot kēp Tirtũm Kra hã omunh tã no nhũm kapêr nê mẽ hkurê nê mẽ hano nhũm mẽ kapêr kêt rãhã mẽ kurũm hapôj nê ma mra.

Jejus kot Tirtũm mã amnhĩ jarẽnh ã harẽnh

Rukre 4.42-44

³⁵ Tã nhũm apkati nhũm kormã myt kator kêt ri nhũm Jejus kãnhmã nhỹ nẽ tẽ nẽ kato. Hãmri nẽ ma kapôt ã ahte nhỹhỹm tẽ nẽ nhỹri Tirtũm mã amnhĩ jarẽnh o nhỹ.

³⁶ Hãmri nhũm Simãw Pêtre mẽ hkwỳjaja hkrã hapôj nẽ tee ri ixkre kamã hapêr. Hãmri nẽ hapôj nẽ ma hpri jakop o mō. ³⁷ Hãmri nẽ hwỳr kato nẽ omu nẽ kãm:

—Pa. Kwa na mẽ piitã tee ri ajapêr. Anẽ.

³⁸ Hãmri nhũm mẽ kãm:

—Tô ma pu mẽ mō. Nom kot puj mẽ akupỹm mẽ hwỳr pamōr kêt nẽ. Kot puj mẽ hpãnhã nhãm krĩ hkwỳ hkôt mãn ri pajapôj. Pa kamã mẽ kãm Tirtũm kapêr jarẽ mãn. Ja kaxyw na pre mẽ awỳr inhmẽ. Krĩ piitã hkôt mẽ pa xwỳnhjaja kot kapêr mar kaxyw. Anẽ.

³⁹ Hãmri nẽ mẽ ma axte Garirej kamã krĩ hkwỳ hkôt pa. Nẽ krĩ piitã hkôt Tirtũm kapêr o mẽ ahkre xã hã ixkre kamã mẽ kãm Tirtũm kapêr jarẽnh o pa. Nẽ mẽ kurũm mẽkarõmnuti japôx o pa.

Jejus kot akupỹm mẽhõ hkãmnu ho mex ã harẽnh

Matêwre 8.1-4; Rukre 5.12-16

⁴⁰ Tã nhũm mẽhõ hkã hkro xapêr tỳx xwỳnhja Jejus wỳr tẽ. Hãmri nẽ hã hpijaam kaxyw kutã hkõnkrã ho tẽm nẽ nhỹ nẽ kãm:

—Pa Pahihti. E ot pa awỳr amnhĩ to tẽ. Akupỹm ate mẽ ixto mex kaxyw axãhpumunh tỳx jakamã kot ka akupỹm amã ixto mex prãm nẽ mãmri akupỹm ixto mex. Anẽ.

⁴¹ Hãmri nhũm kuma nẽ kamã ukapri nẽ hã ãhkra xi nẽ kãm:

—Nà kot paj ato mex. E akupỹm akã mex.

⁴² Anhỳrja kôt nhũm akupỹm hkã mex kurê kumrêx. ⁴³⁻⁴⁴ Hãmri nhũm Jejus kãm kapêr kãm hihtỳx nẽ hano nẽ kãm:

—E kêt ka amnhĩ tã akwỳjê mã tanhmã ijarẽnh to hkêt rãhã ma pa-tre hwỳr tẽ kê akupỹm akã mex ã apumu. Hãmri ka amnepêm Mojes

kot mẽ ate akupỹm mẽ amex ã Tirtũm mã tanhmã amnhĩ nhĩpêx to hã karõ xwỳnhta ka kãm ho anẽ. Kê mẽ piitã akupỹm akã mex ã apumu. Anẽ.

⁴⁵ Hãmri nhũm kuma nẽ ma tẽ. Nom axtem nẽ ma mẽ piitã mẽ kãm amnhĩ jarẽnh o ri mra. Jejus kot kãm karõ xã kuhpa hã ma mẽ kãm amnhĩ jarẽnh o ri mra. Jakamã nhũm mẽ kuma nẽ piitã nhỹhỹnh Jejus wỳr mra. Mẽ ohtõ rax kumrêx nẽ hwỳr mra nhũm tee ri mẽ noo mã nhỹri krĩm pa mã. Hãmri nẽ ãm krĩ pu hã ri pa htã nom nhũm mẽ arĩ ohtõ nẽ hwỳr mra.

2

Jejus kot akupỹm ã kamã htyk xwỳnh o mex ã harẽnh

Matêwre 9.1-8; Rukre 5.17-26; Juãw 10.37-38

¹ Tã nhũm Jejus hã apkati grêre nẽ hkôt mẽ pa ho mẽ pa xwỳnhjê mẽrohã ma akupỹm Kapanau wỳr mō. Hãmri nẽ hwỳr pøj nhũm mẽ piitã nhỹri mẽhõ nhõrkwỹ kamã hpõx kôt harẽnh ma nẽ hã akuprõ. ² Ra hã pikuprõnh rax nẽ ixkre nhĩtom pa. Nhũm mẽ hkwỳjaja kapôt ã kuhê nhũm Jejus Tirtũm kapêr o mẽ ahkre ho nhỹ. ³ Hãmri nhũm mẽmyjaja kêt kwat nẽ ã kamã htyk xwỳnhja mỳ nẽ Jejus kot ho mex kaxyw hwỳr o tẽ.

⁴ Hãmri nẽ tee ri hã mẽ pikuprõnh rax xwỳnhjê pumu nẽ nhỹhỹnh kot hwỳr o ãr kaxyw tee ri amnhĩ kukamã ho ukapi ho pa. Hãmri nẽ hamaxpêr nẽ ixkre nhĩmõk po hwỳr ho api nẽ himõk kwỳ grã nẽ hkôt ã kamã htyk xwỳnhta nõr xã mẽrohã hkôt Jejus wỳr haxã. ⁵ Hãmri nhũm mẽ kot kaxyw kãm hamaxpêr tỳx ã mẽ omu nẽ ã kamã htyk xwỳnhta mã kapêr nẽ kãm:

—Pa? Kwa tee ri amnhĩ kukamã ajamaxpêr kêt nẽ. Na pa ra anê ate amnhĩ tomnuj piitã ho ijapêx. Kot paj axte kãm ijamaxpêr kêt nẽ. Anẽ.

⁶ Hãmri nhũm Tirtũm kapêr tũm o mẽ ahkre xwỳnhjaja tee ri ã kapêr anhỳrja ã kuma nẽ hamaxpêr o:

⁷ —Tk. Kwa pêt mẽhõ myti mũj kêt Tirtũm kêt tã te kapêr pyrãk o amnhĩ nhĩpêx nẽ mẽ nẽ mẽ kot amnhĩ

tomnuj o hapêx ã amnhĩ jarẽ. Tĩrtũm pix kot mẽ nẽ mẽ kot amnhĩ tomnuj o hapêx kênã. Anẽ.

⁸ Nom nhũm Jejus mẽ hamaxpêr kôt mẽ omunh mex nẽ. Mẽ kot Tĩrtũm pix kot mẽ nẽ mẽ kot amnhĩ tomnuj rênh nẽ akupỹm mẽ à xwýnhjê ho mex kôt mẽ hamaxpêrja nhũm mẽ omunh mex nẽ mẽ kãm:

–Kwa mẽ ã ajamaxpêr anhỹr kêt nẽ. ⁹ Ixte mẽ nẽ mẽ kot amnhĩ tomnuj o ijapêx par ã amnhĩ jarênh tã mẽ ate mẽ ano ho ja kôt ixpumunh kêt jakamã na ka htem ja hã ixkôt ajamaxpêr kêt nẽ. Nom kot paj mẽ anoo mã akupỹm myja o mex. Ka mẽ ja hã ixpumu hãmri nẽ ixkôt ajamaxpêr kurê kumrêx. ¹⁰ Ixpê Tĩrtũm kot mẽ awýr inhmênh xwýnh na pa. Ixte mẽ anẽ mẽ ate amnhĩ tomnuj rênh kaxyw na pre mẽ awýr inhmẽ pa wrý. Tã mẽ ate ja kôt ixpumunh kaxyw kot paj mẽ anoo mã mytija ho mex.

¹¹ Anhỹr o mẽ kãm kapêr hãmri nẽ ã kamã htyk xwýnhnta mã kapêr nẽ kãm: –E kãnhmã xa nẽ anõr xã mý nẽ ma akupỹm anhõrkwỹ hwýr tẽ. Anẽ.

¹² Hãmri nhũm kuma nẽ kãnhmã ãm kurê kumrêx. Hãmri nẽ akupỹm mex ã amnhĩ pumu nẽ hkĩnh tỳx nẽ nõr xã mý nẽ mẽ noo mã kato nẽ ma akupỹm õrkwỹ hwýr tẽ. Hãmri nhũm mẽ kot omunh xwýnhjaja amnhĩ jaer pẽ omu nẽ no hapõx kaxyw nẽ hkôt omunh o kuhê nẽ kamã no pyma htỳx nẽ. Nẽ tee ri omu nẽ axpên mã:

–Hêxta waa nẽ. Aa mẽ pahte ã mẽhõ kot amnhĩ nhĩpêx anhỹr ã omunh kêt kumrêx tã jarãhã ja pumu. Nã Tĩrtũmja ãm mex o mex. Anẽ.

Jejus kot amnhĩ wýr Rewi hwýr ã harênh

Matêwre 9.9-13; Rukre 5.27-32

¹³ Hãmri nhũm Jejus mẽ ma mra nẽ akupỹm gô rax pẽ Garirej wýr mra nẽ gô mý ri pa. Hãmri nhũm mẽ piitã omu nẽ hwýr mra nẽ hã akuprõ nhũm Tĩrtũm kapêr o mẽ ahkre ho nhỹ. ¹⁴ Hãmri nẽ mẽ kure nẽ axte hkôt mẽ pa ho mẽ pa xwýnhjê mẽrohã ma axte mra nẽ nhỹri Apew kra Rewija pumu. Rõm kãm mẽ õ pahiht

mã amnhĩ kwýjê pẽ kãxpore hkwy jamýnh xwýnh na pre. Jakamã nhũm àpênh o nhỹ nhũm Jejus hãnh tẽ nẽ omu nẽ amnhĩ kôt kuwý nẽ kãm:

–Pa? E kwa axápênhta kaga nẽ hpãnhã amnẽ mẽ ixkôt mãn ri apa ho apa. Anẽ.

Hãmri nhũm kuma nẽ àpênh kaga nẽ ma hkôt mõ nẽ hkôt pa ho pa.

¹⁵ Hãmri nhũm mẽmo arĩgro hã nhũm Rewi nhõ mẽ apkur xã hã mẽõ rax nẽ. Jakamã nhũm amnhĩ nhõrkwỹ hwýr hkrãmnhwýjaja nẽ Jejus mẽ hkôt mẽ pa ho mẽ pa xwýnhjê hwý. Hãmri nhũm mẽ ma hkôt mra nẽ õrkwỹ hwýr agjê nẽ kuri apkur o hkrĩ. Nẽ mããnẽn mẽ kêp Rõm nhõ pahi mã mẽ kêp kãxpore hkwy jamýnh xwýnh kwý nẽ mẽ ohtô nẽ mẽ kutã apkur o hkrĩ.

¹⁶ Hãmri nhũm Tĩrtũm kapêr tũm o mẽ ahkre xwýnh kwý pẽ Parijew nhõ xwýnhjaja mra nẽ mẽ apkur ã mẽ omu. Nẽ tee ri mẽ hkaêx ã Jejus pumu nẽ hkôt mẽ pa ho mẽ pa xwýnhjê hwýr agjê nẽ hã mẽ kãm akir nẽ mẽ kãm:

–Kwa na htem mẽ kot amnhĩ tomnuj xwýnhjê kutã apkur kêt tã ka mẽ Jejus mẽ apimràatã axtem nẽ mẽ kutã axàpkur o akrĩ. Mẽ ate amnhĩ to mex ronhỹx ka mẽ kutã axàpkur kêt nẽ. Anẽ.

¹⁷ Hãmri nhũm Jejus amnhĩ tã mẽ kapêr ma nẽ mẽ kãm:

–Tk. Ixte tãm mẽ unhwýr kaxyw ixte mẽ kutã ixàpkur o inhỹr kênã. Xã na hte tõtô mẽ mex xwýnhjê hwýr mra nẽ mẽ hkane? Nã na hte ãm mẽ à xwýnhjê pix kane ho pa. Ra mẽ ate ja pumunh mex. Ja pyrã nẽ na pa pre mẽ kot amnhĩ to mex xwýnhjê hwýr ixwryk kêt nẽ. ãm mẽ kot amnhĩ tomnuj xwýnhjê pix wýr na pa pre wrý. Ixte tãm mẽ unhwýr kaxyw mẽ hwýr wrý nẽ jajê kutã ixàpkur o nhỹ. Mẽ ate amnhĩ tomnuj mã anhũrer nẽ hpãnhã tãm amnhĩ nhĩpêx o apa kaxyw na pa pre mẽ awýr wrý nẽ mẽ akamã ixukaprĩ ho ri mẽ akôt ixpa. Tã ka mẽ atỳx ã ixte mẽ kutã ixàpkur anhỹrja ã ixto akapêr anẽ. Anẽ.

Mē kot Tirtūm mā amnhī jarēnh kaxyw mēō kaga hā mē harēnh

Matêwre 9.14-17; Rukre 5.33-39

¹⁸ Juāw Paxis kôt mē pa xwýnhjê mē Parijew nhō xwýnhjaja na prem tōhā Tirtūm mā amnhī jarēnh kaxyw nē apkur kêt rāhā kamā kām amnhī jarē. Nom nhūm Jejus kôt mē pa ho mē pa xwýnhjaja na prem kām amnhī jarēnh prām nē apkur kām amnhīx kām amnhī jarēnh o pa. Jakamā nhūm Ijaew kwýjaja tee ri ja hā mē omu nē Jejus wýr mra nē mē hā hkukja nē kām:

—Pa? Kwa aprī hā mē inhmā mēmoj jarē. Na hte Parijew nhō xwýnhjê mē Juāw Paxis kôt mē pa xwýnhjaja tōhā Tirtūm mā amnhī jarēnh kaxyw nē apkur kêt rāhā kām amnhī jarē. No akôt mē pa ho mē pa xwýnhjaja na htem àmnhīx apkur o pa kamā kām amnhī jarēnh o pa. Kwa mo na htem mē urāk nē tōhā apkur kêt rāhā kām amnhī jarēnh kêt nē? Anē.

¹⁹ Hāmri nhūm Jejus mē kām:

—Tk. Mo kaxyw kot mē ā amnhī nhīpêx anē? Mē hkaprī hkêt kênā. Mē kot ixkôt pa ho pa hā amnhī pumunh jakamā na htem hkīnh nē pa. Kormā ixte mē hkôt ixpa kênā kot kêt mē Tirtūm mā kapêr kaxyw nē ho apkur kêt kamā kām amnhī jarē. Xà na htem hkràmnhwý hā hkīnh kaxyw hā akuprō nē hkaprī nē apkur kêt nē mýr o hkrī? Nà na htem hā akuprō nē hkīnh nē apkur rūnh nē. Ja pyrā nē na hte ixkôt mē pa ho mē pa xwýnhjaja ixkôt kormā àmnhīx hkīnh nē apkati mē apkur kām kām amnhī jarēnh o pa. ²⁰ Nom koja mē kām ixkurê xwýnhjaja nhýrmā tanhmā ixto hāmri nhūm mē rī kormā hkaprī htýx kām ho apkur kêt rāhā Tirtūm mā amnhī jarē. Anē.

Nhūm pre ā Jejus mē kām hkôt ri mē pa ho mē pa xwýnhjê jarēnh anē hāmri nē axte mē kām kapêr nē mē kām:

²¹⁻²² —Mē kot amnhī tomnuj xwýnhjaja mē kot amnhī nhīpêx tūm o amnhī pyrāk jakamā na htem mē kot amnhī nhīpêx nyw kaga. Tā ixte

amnhī nhīpêx nywja te kot mē ate amnhī nhīpêx tūm pyrāk kêt jakamā na ka htem inhma nē ām inhma. Kwa mē inhma nē mē ate amnhī nhīpêx tūm gryk ā ixkaga hkêt nē. Anē.

Jejus kêp arīgromnu hpām ā kot amnhī jarēnh

Matêwre 12.1-8; Rukre 6.1-5

²³ Tā nhūm mē ixpê Ijaew nhō arīgromnu pê sap kato nhūm Jejus mē hkôt mē pa ho mē pa xwýnhjaja ma nhýhým mō. Ma mē hpur kahti hkôt nhýhým mō nhūm hkôt mē pa ho mē pa xwýnhjaja ra kām prām nē. Hāmri nē prām xàj purta kamā amnhīm mēmo hy te kot harōj pyrāk xwýnhhta kwý rê nē ma Jejus kôt hkanhar o mō. Mē ixpê Ijaewjaja na pa htem axpên pur kām ixpa nē ā amnhī nhīpêx anē. ²⁴ Hāmri nhūm Parijew nhō xwýnhjaja mē hkôt mra nē tee ri ja hā mē omu nē Jejus wýr mra nē mē hā kām akir nē kām:

—Kwa jarāhā sap tā akôt mē pa ho mē pa xwýnhjaja mēmo hy hkwy rê nē akôt hkanhar o pa. Tirtūm kapêr ā kagà htūm kot mē panhō arīgromnu hā mē pahte mēmoj nhīkēnh nē mē pahkurê kênā. Kwa mē kām anē kē mē ā amnhī nhīpêx anhýr kêt nē. Anē.

²⁵⁻²⁶ Hāmri nhūm Jejus mē kuma nē hprī hā mē kām Tirtūm kapêr tūm jarē nē mē kām:

—Kwa xàn ka mē kormā Tirtūm kapêr ā kagà htūm kamā pahī Tawi kot tanhmā amnhī nhīpêx to kamā harēnh nē mar kêt nē? Kormā Apiatar kêp patre maati ri na pre Tawi hkôt ri mē pa xwýnhjê mē prām xàj Tirtūm mā amnhī jarēnh xà hā ixkre hwýr agjê. Hāmri nhūm Apiatar mē kām prām týx ā mē omu nē mē kamā ukaprī nē mē kām mēmoj gō. Mē kot Tirtūm noo mā pāwti jaxwýr xwýnhhta nhūm mē kām kugō nhūm mē kuku. Tirtūm kapêr ā kagà htūm kot ja nē mē kurê htā nhūm mē kām prām týx ā mē omu nē mē kamā ukaprī xàj mē kām kugō. Patre pix kot ja hkur kaxyw tā nhūm mē kām kugō nhūm mē kuku. Tā nom nhūm Tirtūm ja hā mē omu nhūm ja kêp omnuj kêt nē. Patre kot

mê kamã ukaprĩ nê mê kãm òr nhũm ja hã omu nhũm ja kãm mex nê. Anê.

Hãmri nê mê kãm:

²⁷ —Na pre Tĩrtũm panhĩ kumrêx o kato nê kormã mê hkôkôt nê Tĩrtũm mã hamaxpêr o hkrĩ kaxyw arĩgromnu ho kato. No na pre arĩgromnu kumrêx o kato nê hpãnhã kaxyw panhĩ ho kator kêt nê. ²⁸ Tã pa na pre Tĩrtũm mê akaxyw ixãm nê mê awÿr inhmê. Jakamã papxpix na pa hte arĩgromnu hã tanhmã mê kot amnhĩ nhĩpêx to hã mê kãm karõ ho ri ixpa. Jakamã kwãr mê mãmri mẽmojta rê nê ixkôt hkanhar o mō. Anê.

3

Jejus kot akupÿm ïhkra grã xwÿnh o mex ã harênh

Matêwre 12.9-14; Rukre 6.6-11

¹ Tã nhũm mê ixpê Ijaewjê nõ arĩgromnu pê sapja axte kato. Hãmri nhũm Jejus Tĩrtũm kapêr o mê ahkre xã hã ixkreja wÿr tẽ nê axã nê kamã Tĩrtũm kapêr o mê ahkre ho nhÿ. Nhũm mẽhõ my ïhkra grã xwÿnhja mê ïhkô hã mar o nhÿ. ² Nhũm Parijew nõ xwÿnhjaja kãm mê hkrãhtũmjê mã Jejus o kapêr prãm jakamã htãnopxar o kuhê nê axpên mã:

—E kwa pu mê jar pakuhê nê kot tanhmã amnhĩ nhĩpêx to hã omu. Xã koja jarãhã ïhkra grã xwÿnh mũj o mex nã? Jarãhã arĩgromnu kênã kot kêt kãm ïhkra ho mex. Koja ho anê nê ra Tĩrtũm kapêr tũm nhĩrõp xa. E pu mê xa nê hã omu. Anê.

³ Hãmri nhũm Jejus ïhkra grã xwÿnhhta pumu nê kãm:

—Pa? E kãnhmã xa nê amnê ixwÿr tẽ. Anê.

Hãmri nhũm kãnhmã xa nê hwÿr tẽ nê mê piitã mê noo mã xa. ⁴ Hãmri nhũm Jejus mê kot omunh o hkrĩ xwÿnhjê hwÿr rĩt nê arĩgromnu hã tanhmã mê kot amnhĩ nhĩpêx to hã mê hkukja nê mê kãm:

—E mê inhma. Tanhmã na htem arĩgromnu hã axpên nhĩpêx to wehe? Xã kot ka mê arĩgromnu hã axã htÿx nê amex prãm xaj ma mẽhõ hwÿr amnhĩ to tẽ nhũm apumu nê apkatim arĩgro

mex jamãr pê akane hkêt ka ty nhũm ja amã mex nê? Rÿ nhũm apumu nê tanhmã atomnuj to nê akupÿm amnhĩ nê ajano nhũm ja amã mex nê? Nã koja ã anhĩpêx anê nhũm ja amã mex kêt nê. E mê inhmã mẽmoj jarê. Tanhmã na pre finat Mojesja Tĩrtũm nhÿ hã arĩgromnu hã mê pahte axpên nhĩpêx ã mê pamã karõ hto? Xã kot puj mê hã axpên kãm paxukaprĩ rÿ hã mê pamã axpên kurê ho papa? Xã kot puj mê hã mẽmoj punuj pê mê utã rÿ kot puj mê ãm arĩgro mex pix ã mê utãr kaxyw arĩgro mex jamã? E mê atõ inhmã ja jarê. Anê.

Ra kot hprĩ hã mê hamaxpêr ã mê omunh mex nê ã hêx rom mê hkukjêr anê. Nom nhũm mẽhõ tanhmã kutã kãm nê hkêt nê. Mẽ ãm piitã akryk mar pê omunh o hkrĩ. Mẽ kot tanhmã kãm nê nhũm ta pãnhã tanhmã mê kãm nê pymaj nhũm mê tee ri kãm tanhmã nê hprãm nom akryk mar o hkrĩ. ⁵ Hãmri nhũm Jejus tee ri mê ukaprĩ hkêt ã mê omu nê hkaprĩ nê mê kamã gryk nê. Hãmri nê ïhkra grã xwÿnhja mã kãm:

—Tk. Mẽ kot tanhmã inhmã ujarênh tore hã. E anhĩhkra katãt. Anê.

Hãmri nhũm ïhkra katãt nê akupÿm mex kurê kumrêx. ⁶ Hãmri nhũm Parijew nõ xwÿnhjaja tee ri ã Jejus kapêr anhÿrja ã kuma nê kot sap ã akupÿm myta o mex ã omu nê kamã gryk tÿx nê. Nê hapõj nê ma pahi Erox kôt mẽ pa xwÿnhjê hwÿr mra nê mê kãm harê nê tanhmã hã axpên kukjêr to nê axpên mã:

—Kwa tanhmã kot puj mê ho? Na ã kapêr anhÿrja o mẽ pahto kapêr punuj nê. Te hkĩnhã mẽ papamjaja mẽ kamã paxukaprĩ hkêt pyrãk ã mẽ pajarê. Koja mẽ pahkwÿjaja kuma hãmri nê mẽ pahte amnhĩ nhĩpêx kaga nê amnhĩ kaxyw hkôt pix mã hamaxpêr o pa. Ja pymaj kwa tanhmã kot puj mê ho? Anê.

Mẽ ohtõ nê kot Jejus kapêr mar kaxyw hwÿr mra ã mẽ harênh

Matêwre 4.23-25; Rukre 6.17-19

7-8 Tã nhũm Jejus mẽ hkôt mẽ pa ho mẽ pa xwỳnhjê mẽrohã ma akupỹm gô rax wỳr mỗ nhũm mẽ ohtô nẽ omu nẽ ma hkôt mra. Pyka pẽ Garirej mẽ Jutej wa kurũm nẽ krĩ pẽ Jerujarẽ rũm nẽ pyka pẽ Itumẽj rũm nẽ pyhti pẽ Jotãw nhĩkjê hã krĩ hkwỳ rũm nẽ krĩ hkwỳ pẽ Xir mẽ Sitõ wa pu hã krĩ hkwỳ rũm ohtô nẽ ma hwỳr mra. Na prem ra harẽnh ma nẽ nhỹhỹm mỗr ã omu nẽ axpẽn mã harẽnh o:

—E kwa tokyj pu mẽ ma hwỳr mẽ à xwỳnhjê o mỗ kẽ akupỹm mẽ ho mex. Anẽ.

Hãmri nẽ hwỳr mẽ o mra nẽ hã pikuprõnh rax nẽ. 9-10 Hãmri nhũm Jejus akupỹm mẽ à xwỳnhjê ho mex. Gô mỳri xa nẽ tanhmã mẽ ho mex to. Jakamã nhũm mẽ axte ohtô nẽ hwỳr mra nẽ piitã kot htok nẽ akupỹm mex kaxyw hwỳr axpẽn nhĩgã. Hãmri nhũm tee ri amnhĩ wỳr mẽ omu nẽ hkôt mẽ pa ho mẽ pa xwỳnhjê mã:

—Kwa mẽ ma mra nẽ amnẽ kanõre jêt mũj kjẽn h o tẽ nẽ jar inhmã anhõ. Kẽ mẽ ixtã axpẽn nhĩgãnh o ijanẽnh japẽr pa hwỳr axà nẽ amỹm mẽ ho hpỹnh nẽ akupỹm mẽ ho mex. Anẽ.

Hãmri nhũm mẽ kuma nẽ ma mra nẽ kãm ja o tẽ nẽ kunhõ. 11 Na pre mẽkarõmnuti hkwỳja mẽ hkwỳjê hwỳr agjê. Jakamã nhũm mẽ Jejus pumu nẽ mẽkarõmnuti nhỹ hã kẽp Tĩrtũm Kra hã omunh kurê kumrẽx. Hãmri nẽ hã hpijaam kaxyw kutã hkõnkrã ho hkrĩ nẽ mẽkarõmnuti nhỹ hã kãm kapẽr nẽ kãm:

—Kwa apẽ Tĩrtũm Kra na ka. Anẽ.

12 Hãmri nhũm tee ri amnhĩ tã mẽ kuma. Kãm mẽkarõmnuti ã kot harẽnh anhỹr prãm kêt nẽ. Am mẽ piitã mẽ kot kapẽr mar nẽ kot amnhĩ nhĩpẽx ã omunh pẽ kẽp Tĩrtũm Kra hã omunhja na kãm hprãm. Jakamã nhũm mẽkarõmnuti ã harẽnh anẽ nhũm ja nẽ mẽ kãm kapẽr nẽ mẽ kãm:

—Tk kwa nà kẽr ka mẽ tanhmã ijarẽnh to hkêt nẽ. Anẽ.

Jejus kot amnhĩ kaxyw mẽ kẽp 12 rẽn h ã harẽn h

Matêwre 10.1-4; Rukre 6.12-16

13 Tã nhũm Jejus hkôt mẽ pa ho mẽ pa xwỳnh kwỳjê mã kãm:

—E pu mẽ ma mỗ nẽ krãhakỳx mũj ã api. Anẽ.

Hãmri nẽ mẽ ma hwỳr mỗ nẽ hã api 14 nhũm Jejus amnhĩ kaxyw mẽ ho 12 nẽ mẽ kurê. Mẽ kot ma ã hã Tĩrtũm kapẽr o mẽ ahkre 15 nẽ ã hã mẽ nẽ mẽkarõmnuti janor o pa kaxyw. 16 ã mẽ hixi kot anhỹr.

Na pre ja kẽp Simãw no nhũm Jejus hpãnhã hã hixi hõ mẽ nhũm hpãnhã mããnẽn kẽp Pêtre.

17 Nẽ hkôt Jepetew kra Xiakre mẽ htõ Juãwja wa kuta.

Hãmri nẽ kot Simãw nhĩpẽx pyrà nẽ wa hã hixi hõ mẽ nhũm wa hpãnhã mããnẽn kẽp Poanes. Wa kot amnhĩ prẽprẽk jakamã nhũm ã wa hã hixi mẽn h anẽ.

18 Nẽ hõ pẽ Andreja ta.

Nẽ hkôt Andre htõ Firiptija ta.

Nẽ hkôt Patoromewja ta.

Nẽ hkôt Matêwreja ta.

Nẽ hkôt Tomasja ta.

Nẽ hkôt Arpêw kra Xiakreja ta.

Nẽ hkôt Tatewja ta.

Nẽ hkôt Simãw õja ta.

Simãwja na pre kãm mẽ ixpê Ijaewjê nhõ pika pẽ Ijaew kĩnh tỳx nẽ. Jakamã na pre kãm nhãm pika hõ nhõ pahi kot mẽ ho amnhĩptar prãm kêt nẽ pa.

19 Nẽ hkôt Jut Kariotja ta.

Kormã kot mẽ kãm Jejus kurê xwỳnhjê nhĩhkram õr mã nhũm Jejus kot amnhĩ kukamã omunh mex tã mẽ hkôt amnhĩ kaxyw kuta.

Ã mẽ kot ã hã mẽ ahkre o pa kaxyw mẽ rẽn h xwỳnhjê nhĩxi kot anhỹr.

Jejus mẽ mẽkarõmnuti wa harẽn h
Matêwre 12.22-32; Rukre 11.14-23,
12.10; Juãw 10.19-21

20 Hãmri nhũm Jejus hkôt mẽ pa ho mẽ pa xwỳnh kwỳjê rẽn h pa nẽ ma amnhĩ kôt mẽhõ nhõrkwỹ hwỳr mẽ o mỗ. Na prem apkur kêt ry rax nẽ ra kãm prãm tỳx nẽ nhũm ma mẽ apkur kaxyw amnhĩ kôt mẽ o mỗ. Hãmri nhũm axte mẽ à xwỳnhjaja mẽ omu nẽ Jejus wỳr pikuprõnh rax nhũm mẽ

tokyx apkur kêt nê. ²¹ Hâmri nhũm Je-
jus katorxà nê htôjaja tee ri mẽ apkur
kêt ã mẽ harênh ma nê axpên mã:

–Kwa măn ãm ra tanhmã hkrã
amnhĩ to nà? Hã na mẽ kot omunh
kaxyw hã hpikuprõnh rax jakamã
nhũm kormã apkur kêt nê. E tokyx pu
mẽ ma hwÿr mra nê omu nê mẽ kêp
utà nê akupÿn amnhĩ kôt o mō. Anê.

²² Rôm nhũm Tirtũm kapêr tũm o
mẽ ahkre xwÿnhjaja Jerujarê rũm Je-
jus wÿr mōn pōj. Hâmri nê tanhmã
ho kapêr punuj to. Kêp mẽkarõmnuti
hkwÿ hã hkamnhĩx jakamã harênh o:

–Tk pêr hinhu nhĩkôôti nhỹ hã na
hte mẽ nê amnhĩ kwÿjê japôx o pa.
Anê.

Hinhu nhĩkôôti nhĩxi hõ pê Sa-
tanasti nhũm prem ÿ hã Jesus kot
amnhĩ nhĩpêx o pa hã hkamnhĩx.
²³ Hâmri nhũm amnhĩ tã mẽ omu nê
amnhĩ wÿr mẽ kãm hpa ho apê nê mẽ
kãm amnhĩ jarê. Nom amnhĩ tã kuxi
nê mẽ kãm mẽmoj jarê nê mẽ kãm:

–Kwa mẽ inhma mẽ ate ixpê
Satanasti hkwÿ hã ixkamnhĩx
xwÿnhjaja. Xà na hte Satanasti mẽ nê
amnhĩ kwÿjê janor o pa? Nà na hte ã
amnhĩ nhĩpêx anhÿr kêt nê. ²⁴ Na hte
pika nhõ xwÿnhjaja axpên kutã amnhĩ
xunhwÿ nê axpu hãmri nê anhgrà
nê ma ahpÿnhã ri pa nê amnhĩ krã
hkôt ri tanhmã amnhĩ to ho ri pa.
Jakamã nhũm mẽ õ pahija mẽ hamãr
o pa hkêt nê. ²⁵ Nê krĩ nhõ xwÿnhjaja
haxwÿja. Mẽ kot axpên to hkwÿ
xwÿnhjaja koja mẽmoj tã axpên kãm
gryk nê axpên kutã amnhĩ xunhwÿ
hãmri nê anhgrà nê ahpÿnhã pa hãmri
nhũm mẽ õ pahi tee ri kãm mẽ hamãr
o pa hprãm. Mo hkwÿjaja kot kêt ri
mẽ hamãr o pa? Nom tãm kot amnhĩ
nê mẽ hanoore hã. Mẽ tãmjaja na
prem axpên kãm gryk nê anhgrà nê
ahpÿnhã pa. ²⁶ Tã ja pyrã nê ixte Sa-
tanasti nhỹ hã tanhmã amnhĩ nhĩpêx
to ho ixpa ronhÿx pa ri mẽ kurũm
amnhĩ kwÿjê japôx o ri ixpa hkêt
nê. Mẽkarõmnutijaja kêp Satanasti
hkwÿ kênã. Kojã Satanasti ixte mẽ
kurũm mẽ hapôx kaxyw tanhmã
inhmã nê hkêt nê. ²⁷ àhpumunh tÿx

jakamã na hte mẽ kot hkôt amnhĩ
xunhwÿr xwÿnhjê pumunh tÿx o pa
nhũm mēhõ tee ri kêp mẽ utàr kaxyw.
Tã ixàhpumunh tÿx o ixte hakrenh
jakamã ixte kêp mẽ utàrja inhmã
tanhmã kute hkêt. Na pa hte kêp mẽ
utà nhũm mẽ hpãnhã ixkôt amnhĩ
nhĩpêx o pa nhũm Satanasti tee ri mẽ
hã ixpumunh o pa kaprÿ.

²⁸ –Ãm hãmri na pa mẽ amã
ixkapêr. Kot kaj mẽ tanhmã amnhĩ
tomnuj to ho apa. Nê amnhĩ tomnuj
tÿx kumrêx rãhã ho apa. Rÿ tanhmã
akapêr punuj to ho apa. Rÿ tanhmã
Tirtũm o akapêr punuj to ho apa. Tã
tee ri ja hã amnhĩ pumu nê akaprĩ
nê ã ate amnhĩ nhĩpêx anhÿrja kaga
nê Tirtũm kôt amnhĩ xunhwÿ. Hãmri
nhũm amnhĩ tã mẽ apumu nê amnhĩ
katut kôt mẽ ate amnhĩ tomnuj nê
mẽ akapêr punuj rēnh pa nê axte kãm
hamaxpêr kêt nê. Kojã ho hapêx par
kumrêx. ²⁹ Nom kojã Tirtũm Karõ
xatã mẽ amã ixto amnhĩrit tã ka mẽ
ama nê ãm ama nê te kêp amnhĩ
jamak pro pyrãk o amnhĩ nhĩpêx. Jao
Tirtũm Karõ hã apijaãm kêt ã amnhĩ
to amnhĩrit. Ja mÿrapê kojã Tirtũm
nhÿrmã amnhĩ xwar te mẽ apê amnhĩ
jamak pro pyrãk o mẽ anhĩpêx ka
mẽ tee ri kãm amnhĩ kaprĩ kaprÿ.
Hãmri nê mẽ kot amnhĩ xà htÿx kamã
hamak o pa htũm xà wÿr ma apa nê
kamã apa rãhã apa ho apa. Anê.

³⁰ Mẽ kot Satanasti nhỹ hã mẽ nê
mẽkarõmnuti janor o pa hã hkamnhĩx
jakamã nhũm pre Jesus ã mẽ kãm
kapêr anê.

*Jejus katorxà mẽ htôjê jarēnh
Matêwre 12.46-50; Rukre 8.19-21;
mããnēn Eprêw 2.11-12*

³¹ Rôm nhũm Jejus katorxà mẽ
htôjaja hwÿr mra no ãm kormã hwÿr
gjêx kêt nê. Mẽ kot hã htu rax jakamã
nhũm mẽ tee ri hwÿr gjêx kaxyw ko-
rmã kapôt ã kuhê. Hãmri nê mẽ kot
mar o kuhê xwÿnhjê hõ mã kapêr nê
kãm:

–Kwa ma tēn Jejus mã mẽ ijarê kê
mẽ ixwÿr kato. Anê.

³² Rôm nhũm ixkre kamã mẽ hkrĩ xwýnhjaja mẽ omu nê Jejus mã mẽ harê nê kãm:

—Kwa Pahihtĩ. Ota akatorxà mẽ atõjaja awýr mra nê pøj nê tee ri awýr gjêx mã nê kormã kapõt ã kuhê nê atã karõ. Anê.

³³⁻³⁵ Hãmri nhũm mẽ kuma nê mẽ kãm:

—Tõe pa ixkato nê mẽ omu. Inhmã mẽ hapêê. Nom kot kaj mẽ atõ Tĩrtũm kapêr ma nê hkõt amnhĩ xãm nê hkõt amnhĩ nhĩpêx. Hã kot kaj te apê ixtõ rý ixkatorxà kot amnhĩ nhĩpêx pyræk o pu mẽ axpên nhĩpêx. Pa te inhmã mẽ hapê pyrã nê inhmã mẽ ajapê nê. Anê.

4

Mẽmo hy hkre xwýnh jarênh Matêwre 13.1-9; Rukre 8.4-8

¹ Tã nhũm Jejus axte gõ jakax ã mẽ ahkre ho nhỹ. Hãmri nhũm mẽ axte hã htu rax jakamã nhũm tee ri mẽ omu hãmri nê pàr krem axà nê gõx kãm amým mẽ ahkre ho nhỹ. Nhũm mẽ piitã kýxpê omunh nê mar mex o kuhê. ² Hãmri nhũm mẽ ahkre ho nhỹ. Nom mẽ ujarênh pix kãm mẽ ahkre. Mẽ kot Tĩrtũm kapêr mar nê tanhmã hkõt amnhĩ nhĩpêx to ho paja nhũm hã kuxi nê mẽ kãm hã ujarênh o nhỹ nê mẽ kãm:

³ —E mẽ inhma. Koja mẽhõ ma pur mã mõi nê pur kãm mẽmo hy ho ukapêr o pa nom nhũm hy piitã amex kãm rôrøk kêt nê. Koja ahpýnhã rôrøk.

⁴ Koja hkwý aptýx kãm rôrøk nhũm kuwênhre omu nê hwýr mra nê hkrêr pa. ⁵⁻⁶ Nê koja kên kãm hkwý rôrøk hãmri nê higrõt kutã nojarêr nê higrõt pa. Nom nhũm kamã aptýx nê kamã kêp pika hkryre jakamã nhũm higrõt nhũm hã myt apha nê arĩgro htýx mẽ nhũm grã pa. Harê hkryre jakamã grã pa. ⁷ Nê koja hkwý mrõnhĩ kamã rôrøk nê higrõt tã no nhũm utĩja kêp amýtã nhũm ô hkêt nê.

⁸ —No koja hirã kamã pika mex kãm hkwý rôrøk. Hãmri nê hirã kamã rôrøk jakamã higrõt mex nê piitã ô rax nê. Kamã ô hkwý kêp 30 nê kamã hkwý kêp 60 nê kamã hkwý kêp 100.

Ã mẽ ujarênh kot anhýr. ⁹ Kwa mẽ ama nê kãm ajamaxpêr týtã rãhã ho ri apa. Anê.

Jejus kot hprĩ hã mẽmo hy jarênh Matêwre 13.10-23; Rukre 8.9-15

¹⁰ Hãmri nhũm mẽ Jejus xujarênh mar pa nê anhrã nê ma akupým mra nhũm hkõt mẽ pa ho pa xwýnh pê 12 mẽ hkwýjaja pix Jejus ri arĩk. Hãmri nê ujarênhã ã hkukja nê kãm:

—Kwa mon ka hte ã mẽ kãm axujarênh anê Pahihtĩ? Na pa mẽ ixprĩ hã amar mex kêt nê. Anê.

¹¹⁻¹² Hãmri nhũm mẽ kãm:

—Nà kot paj ixprĩ hã mẽ amã harê. Tĩrtũm kãm mẽ ate aprĩ hã mar prãm jakamã kot paj ixprĩ hã tanhmã mẽ amã harênh to. Nà mẽ kot amnhĩ tomnu kaga nhũm Tĩrtũm kot ja hã mẽ omunh xà hkõt mẽ ho hkra hã harênhja na pa hte mẽ kãm harê. No mũjjaja mẽ akĩnhã mẽ kãm mar prãm kêt jakamã na pa hte mẽ kãm mẽmoj tã haxwý nê awjarê nhũm mẽ ãm ixujarênh pix ma.

Na htem kuma nê ãm kuma nê htýx ri hã pa. No kêp apu mẽ kãm hprĩ hã mar prãm ronhýtã mẽ ra hprĩ hã kuma nê Tĩrtũm kõt amnhĩ xunhwý nhũm amnhĩ tã mẽ omu nê mẽ kot amnhĩ tomnuj o hapêx. Nom mẽ kãm mar prãm kêt. Anê.

¹³ Tã mẽ ate aprĩ hã ixujarênhja mar mex kêt jakamã tanhmã kot kaj mẽ amnhĩ to nê ixujarênh piitã ama? E kot paj ixprĩ hã mẽ amã mẽmo hyta jarê ka mẽ inhma.

¹⁴ —Nà mẽmo hyta te kêp Tĩrtũm kapêr pyræk. Nê ahpýnhã rôrøk xà hã pikata te kêp ahpýnhã mẽ kot Tĩrtũm kapêr mar xwýnhjê kot mar nê ahpýnhã tanhmã amnhĩ nhĩpêx to pyræk. ¹⁵ Jakamã mẽ kot mar xwýnh kwýjaja hte kot aptýx kãm hkwý rôrøk nhũm kuwênh kot hwýr mrar nê hkrêr par xwýnhã pyræk. Jakamã na htem Tĩrtũm kapêr ma nom nhũm Satanasti te kuwênh kot hy hkrêr parta pyræk o mẽ hipêx. Nê mẽ kot amnhĩ kaxyw hkõt hamaxpêr nê hkõt amnhĩ xunhwýr pymaj tanhmã nê mẽ hkrã

hto. Jakamã nhũm mẽ Tĩrtũm kapẽr ma nom ho hamakêtkati tokyx anẽ nẽ axte kãm hamaxpẽr kêt nẽ.

¹⁶—Nẽ mẽ kot mar xwỳnh kwỳjaja te kot kẽnre kamã hkwỳ rôrôk nẽ higrôt nhũm te hã myt apha nhũm grà par tokyx anhỹr xwỳnhhta pyrãk. Na htem Tĩrtũm kapẽr ma nẽ hkĩnh nẽ. Nẽ kãm mar prãm nẽ. Te hy higrôt tokyx anhỹrta pyrãk. ¹⁷Tã nhũm mễhõ tẽ nẽ Tĩrtũm nẽ tanhmã mẽ kãm kapẽr to nhũm mẽ kuma nẽ hkaga. Rỳ nhũm mẽ Tĩrtũm ã tanhmã mẽ homnuj to nhũm mẽ tee ri amnhĩ tã mẽ omu nẽ hkaga. Te mẽmo hy higrôt nẽ grà par tokyx anhỹrta pyrãk.

¹⁸—Nẽ mẽ kot mar xwỳnh kwỳjaja te kot mrõnhĩ kamã hkwỳ rôrôk nẽ higrôt nhũm mrõnhĩ kot kệp àmnàr xwỳnhhta pyrãk. Nẽ mẽ kãm Tĩrtũm kapẽr mar prãm nẽ. ¹⁹Nom mãănẽn kãm hikukrêx rax nẽ hikàxpore rax prãm jakamã ãm ja pix kukamã hamaxpẽr o ri pa. Jao ra gryk ã axte Tĩrtũm kapẽr mã hamaxpẽr nẽ hkôt amnhĩ nhĩpêx kêt nẽ. Te mrõnhĩ kot higrôt pẽ àmnàr nhũm ô hkêêta pyrãk.

²⁰—No mẽ kot mar xwỳnh kwỳjaja te hirã kamã pika mex kãm hy hkwỳ rôrôk nẽ higrôt nẽ ô raxta pyrãk. Na htem ixkapẽr ma nẽ amnhĩ krã him hagrênh tỳx nẽ. Nẽ ixkôt ri amnhĩ nhĩpêx mex rãhã ho ri pa. Te mẽmo hy hkre kamã ô hkwỳja kệp 30 nẽ kamã kệp 60 nẽ kamã kệp 100ta pyrã nẽ Tĩrtũm kapẽr kôt amnhĩ nhĩpêx mex rãhã ho pa. E ã ixujarênhja kot anhỹr. Anẽ.

Kanê hpimxur ã harênh

Rukre 8.16-18, 8.24-25; Matêwre 13.10-15, 25.14-30

²¹Nhũm Jejus arĩ hkôt mẽ pa ho pa xwỳnhjê jahkre nẽ mẽ kãm:

—Xà na htem kanê hpôk nẽ poti ho hpro rỳ hitom kãm par krak ri unhwỳ? Nà na htem hpôk hãmri nẽ kỳx pẽ mẽmoj nhĩmôk ã unhwỳ. ²²Ja pyrã nẽ mẽ piitã kot hkwỳjê pẽ tanhmã hamaxpẽr punuj to ho hpimxur prãm tã tee ri kot ho hpimxur prãm kaprỳ. Kojã nhỹrmã mẽ hamaxpẽr piitã amnhĩ to amnhĩrĩt pa. Nẽ mẽmoj

piitã ra hpimxur mex tã kojã nhỹrmã amnhĩ to amnhĩrĩt pa. Te mẽ kot kanê hpôk nẽ kỳx pẽ unhwỳr nhũm amnhĩrĩt mex pyrãk. Ja pyrã nẽ na pa hte Tĩrtũm kapẽr o ri ixpimxur o ixpa hkêt nẽ. Na pa hte ixprĩ hã mẽ amã harênh mex o ixpa. ²³Kwã mẽ ixujarênhja ma nẽ kãm ajamaxpẽr tỳx rãhã ho ri apa. Anẽ.

Nhũm pre ã Jejus mẽ kãm kapẽr anẽ. ²⁴Hãmri nẽ mẽ kãm:

—Nẽ kêt ka mẽ axpẽn kãm axukaprĩ ho ri tanhmã axpẽn to mex to ho ri apa. Kêt kê Tĩrtũm ja hã mẽ apumu nẽ mẽ apyrã nẽ mẽ akamã ukaprĩ pẽ mẽ ato mex o pa. ²⁵Kojã mễhõ inhmã tanhmã amnhĩ nhĩpêx mex to pa ja hã omu nẽ kot inhmã àpênh mexta pãnhã ho mex nẽ. No kojã inhmã àpênh mex kêt pa ja hã omu nẽ hã ho mex kêt nẽ.

—Nẽ kojã mễhõ kãm ixkapẽr mar prãm nom kormã hprĩ hã mar mex kêt tã arĩ mar o pa nẽ gaa nẽ mar tỳx o mỗ. No kojã kuma nẽ ãm kuma hãmri nẽ gaa nẽ hã no hkêt. Anẽ.

Pur kãm mẽmo hy hkre xwỳnh jarênh Matêwre 13.24-30

²⁶Nhũm Jejus arĩ hkôt mẽ pa ho mẽ pa xwỳnhjê jahkre ho nhỹ nẽ mẽ kãm:

—E pa mẽ amã tanhmã mẽ kot ixkapẽr mar tỳx xwỳnhjê jarênh to ka mẽ inhma. Kojã mễhõ ixkapẽr mar tỳx nẽ ra hkôt ri amnhĩ nhĩpêx o pa. Hãmri nẽ hamaxpẽr nyw o hamaxpẽr o pa nẽ amnhĩ nhĩpêx nyw o amnhĩ nhĩpêx o pa. Te mẽ hpur kãm mễhõ kot mẽmo hy hkre xwỳnh kot amnhĩ nhĩpêx pyrãk. Na hte hyja kre ho pa. ²⁷Hãmri nẽ hkre hpa nẽ kamàt mẽ ôt o hikwỳ nẽ arĩgro mẽ mẽmoj tã àpênh o pa. Rãhã nhũm mẽmo hyja arĩ hikwỳ ho hikwỳ hkêt nẽ. Kojã amnhĩ nhĩpêx ô ho amnhĩ nhĩpêx nẽ higrôt kato nẽ hprêk. Kre xwỳnh kot tanhmã kot amnhĩ nhĩpêx to hã omunh kêt tã nhũm kãm hprêk.

²⁸—Na hte hpôm hapôx o pa nẽ higrôt o pyka kahte. Hãmri nẽ hprêk nẽ hô axpôt nẽ gaa nẽ hpãnhã ô. Hãmri nẽ hkamrêk pa nẽ xa. ²⁹Hãmri nẽ mẽ kot hikênh mã mex nẽ nhũm kot hkre

xwýnhta omu nê amnhĩm hamýnh pa. Tã mẽ kot ixkapêr mar mex xwýnhjaja te mẽmo hy ra higrôt kator nê hprêk nê hô pipôt nê ô xwýnhta pyrâk. Nê urâk nê amnhĩ nhĩpêx ô ho amnhĩ nhĩpêx o pa. Anê.

Jejus te kot mẽmo hy pyrâk ã kot amnhĩ jarênh

Matêwre 13.31-32; Rukre 13.18-19

³⁰⁻³² Nhũm Jejus arĩ mẽ ahkre ho nhỹ nê mẽ kãm:

–Tĩrtũm kot mẽ awýr ixte mẽ ato amnhĩptâr kaxyw inhmênh ã ijarênhja. Te ixte mẽmo hy pixire pyrâk. Kojã mēhō mẽmo hy hō pixire nê hkre nhũm ra higrôt. Nê gaa nê hprêk. Hãmri nê hpa angrã nhũm kuwênhre hwýr mra nê hoptĩ kamã amnhĩm haê nhĩpêx. Mẽmo hyta grire htã nhũm hkre nhũm higrôt nê ã amnhĩ nhĩpêx anê. Tã kot paj nhỹrmã urã nê ixpyxi htã kot paj pika piitã hkôt mẽ ho amnhĩptã nê mẽ omunh mex rãhã ho ri ixpa. Anê.

Ã na pre Jejusja hkôt mẽ pa ho mẽ pa xwýnhjê mã amnhĩ tã kuxi nê ujarênh anê. ³³ Mẽ kãm ujarênh kãm mẽ ahkre ho pa. Te nhãm mẽmoj jarênh pyrã nê amnhĩ tã haxwý nê harê. Mẽ kot tanhmã mar to hã mẽ omunh xà hkôt tanhmã mẽ kãm ujarênh to. ³⁴ Na pre ãm ujarênh pix kãm mẽ kãm kapêr mar prãm kêt xwýnhjê mã amnhĩ jarênh rãhã ho pa. No mẽ kot hkôt pa ho pa xwýnhjê mã nhũm hprĩ hã ujarênh jarê nhũm mēhprĩ hã mar mex nê.

Jejus kot kôk o pinhkrênh ã harênh

Matêwre 8.23-27; Rukre 8.22-25

³⁵ Tã nhũm amýkry nhũm Jejus arĩ pâr kre kamã nhỹ. Hãmri nê hkôt mẽ pa ho mẽ pa xwýnhjê mã kãm: “E pu mẽ ma xarmã mō.” ³⁶ Anê hãmri nê mẽ kot mar o hkrĩ xwýnhjê re nê pâr mã agjê nê ma xarmã mō. Garirej rũm kato nê ma xarmã pika hō hwýr mō. Nhũm pâr kwýja ma mẽ hkôt mō. ³⁷⁻³⁸ Nhũm Jejus ra ôt xwa nê tẽ nê pâr kre kamã hkrã japar xà hã hkrã xi nê ra ôt týx nê nō. Nhũm kôk àpêr týx nê nhũm gô kãnhmã harĩ nê axpên

tak. Ra ri xatã axpên tak nê pâr kre kamã axkapĩ nhũm ra mẽ kêp àr o mō. Hãmri nhũm mẽ tee ri amnhĩ nhĩpêx nê tee ri amnhĩ kukamã hamaxpêr nê Jejus wýr hprôt nê kumra nê kãm:

–Kwa kãnhmã nhỹ Pahihtĩ. Kot puj mẽ jarãhã pahtyk pa. Anê.

³⁹ Hãmri nhũm hkrãkato nê kãnhmã nhỹ nê kôk mẽ gôta pumu nê wa kãm kapêr o:

–E kwa wa anhĩkrê. Anê.

Hãmri nhũm gô mẽ kôk hpinhkrênh kurê kumrêx.

⁴⁰ Hãmri nhũm Jejus hkôt mẽ pa ho mẽ pa xwýnhjê mã kãm:

–Hêxta waa nê. Kormã mẽ ate amnhĩ kaxyw Tĩrtũm mẽ wa inhmã ajamaxpêr týx kêt. Hã na ka mẽ ri amã ma nê tee ri amnhĩ kukamã ajamaxpêr. Anê.

⁴¹ Hãmri nhũm mẽ amnhĩ jaêr pê ã kot amnhĩ nhĩpêx anhỹr ã omu nê tee ri axpên pumunh pê omunh o kuhê. Hãmri nê axpên mã:

–Kokýỹ. Jejus kêp mẽ panhĩo hkêt. Mẽ pahtõ kot pu te kot amnhĩ nhĩpêx pyrã nê kôk mã pakapêr nhũm anhĩkrê? Nã mẽ pakurom àhpumunh týx o àhpumunh týx. Anê.

5

Jejus kot mēhō nê mẽkarōmnuti janor ã jarênh

Matêwre 8.28-33; Rukre 8.26-34

¹ Tã nhũm Jejus mẽ hkôt mẽ pa ho mẽ pa xwýnhjê mẽrohã mō nê xarmã Geras wýr pøj. ²⁻⁴ Hãmri nê pâr rũm hapôj nhũm mēhō myja Jejus pumu nê hwýr tẽ. Mẽkarōmnuti kot hwýr àr nhũm ý hã oprê htýx kumrêx. Hãmri nê hkwýjê hkàx ã kapôt ã mẽ hã pika kamã ri hkênh nê pa ho pa. Nhũm mẽ xatã kàx o hte hpre nê hpa hpre htã no nhũm kurê. ⁵ Nê kamãt kãm nê arĩgro hã àmra htýx o mrar pê kên o amnhĩ tak o mra. Mẽ hã pyka kamã nê kapôt ã hixêt ã amnhĩ tak týx rãhã ho mra. ⁶ Tã amým Jejus pumu nê hwýr hprôt nê hã hpijaàm kaxyw kutã hkôn krã ho tēm nê hparpê nhỹ. ⁷⁻⁸ Hãmri nhũm omu nê nê mẽkarōmnuti mã kapêr nê kãm:

—Kwa kurũm akato nẽ ma tẽ. Anẽ.
Hãmri nhũm kuma nẽ tanhmã myta o nhũm tãm mẽkarõmnuti nhỹ hã Jejus mã kapẽr nẽ àmra kamã kãm:

—Pa Tĩrtũm Kra Jejus? Mo kaxyw na ka ixwỳr tẽ? Kwa tanhmã ixto hkõt nẽ nà?

⁹⁻¹⁰ Anẽ nhũm kãm:

—Tanhmã na anhĩxi te? Anẽ.

Nhũm kãm:

—Nà ixpẽ Mẽohtõhti. Mẽkarõmnuti ohtõ nẽ kot ixwỳr gjẽx jakamã na htem ã inhĩxi jarẽnh anẽ. Kwa nẽ mẽ ijanor kêt nẽ nà? Anẽ.

¹¹⁻¹² Hãmri nhũm mẽkarõmnuti tãm amnhĩ to kuwỳ nẽ kãm:

—Kwa kêt ka jahti nẽ mẽ ijapõx japẽr nẽ mẽ kot amnhĩ xà htỳx kamã hamak o mẽ pa htũm xàta wỳr mẽ ixrẽnh kêt nẽ. Hagrõ hkwỳ mũj wỳr mãn mẽ ixrẽ pa mẽ hpãnhã hwỳr mãn hãgĩ? Anẽ.

¹³ Hãmri nhũm mẽ kãm:

—Tõe. Mẽ tãm hwỳr mra. Anẽ.

Hãmri nhũm mẽmyta pẽ hapõx pa nẽ ma hagrõ hwỳr mrrar kurẽ kumrẽx nẽ mẽ kãm gjẽx pa nhũm myja akupỹm tãm hkrã. No nhũm hagrõja mẽkarõmnuti pymaj amỹra nẽ axkahkũm nẽ hprõt nẽ himõ hã krã hixêt ã axpum rõrõk nẽ gõx kãm mrõ nẽ hpikaprãr pa. Ohtõ rax kumrẽx. Kẽp 2.000 tã hpikaprãr pa.

¹⁴ Hãmri nhũm hagrõ jamãr o ri mẽ pa xwỳnhjaja tee ri ja hã omu nẽ ma mẽ õ patrãw wỳr akupỹm mẽ piitã mẽ kãm harẽnh o hprõt nẽ mra. Hãmri nẽ mẽ kãm ujarẽnh pa. ¹⁵⁻¹⁶ Nhũm mẽ tee ri mẽ kuma nẽ ma Jejus wỳr mra nẽ hkaxpa nẽ kuri myta pumu. Nhũm ra akupỹm tãm hkrã nẽ ê kamã tãm amnhĩ nhĩpẽx nẽ nhỹ. Nhũm mẽ kot hã omunh xwỳnhjaja mẽ kãm ujarẽnh pa nhũm mẽ kuma nẽ myta pumu hãmri nẽ tee ri amnhĩ kukamã hamaxpẽr o kãm Jejus puma nẽ.

¹⁷ Hãmri nẽ amnhĩ nẽ kãm kapẽr nẽ kãm:

—Kwa mẽmo kaxyw na ka mẽ ixwỳr rẽ? Mẽ ma akupỹm amrar tokyx anẽ. Anẽ.

¹⁸ Hãmri nhũm mẽ kuma nẽ akupỹm pãr wỳr agjẽ nhũm akupỹm

mex xwỳnhta tee ri ja hã mẽ omu nẽ mẽ hkõt hkrã. ¹⁹ No nhũm Jejus kãm:

—Nà kot kaj mẽ ixkõt amõr kêt nẽ. Ma akupỹm anhõ krĩ hwỳr mãn tẽ nẽ mẽ kãm Tĩrtũm kot akupỹm ato mex ã amnhĩ jarẽnh o ri mẽ hkõt apa. Anẽ.

²⁰ Hãmri nhũm kuma nẽ ma akupỹm tẽ. Hãmri nẽ õ pyka pẽ Tekap kãm mẽ kãm Jejus kot tanhmã ho mex to hã harẽnh ri mẽ hkõt pa nhũm mẽ amnhĩ jaer pẽ kuma nẽ tee ri hkukamã hamaxpẽr.

Jejus kot akupỹm mẽhõ ho mex nẽ akupỹm mẽhõ ho htĩr ã harẽnh

Matêwre 9.18-26; Rukre 8.40-56

²¹ Tã nhũm Jejus mẽ hkõt mẽ pa ho pa xwỳnhjẽ mẽrohã akupỹm xarmã mõ nẽ rẽ. Hãmri nẽ pãr nhõ nẽ api nẽ gõ mỳri kuhẽ nhũm pika nhõ xwỳnhjaja Jejus pumu nẽ hã pikuprõnh rax nẽ. ²²⁻²³ Hãmri nhũm mẽhõ my pẽ Jajtija hwỳr tẽ nẽ kutã hkõnkrã ho htẽm nẽ nhỹ. Kẽp Tĩrtũm kapẽr o mẽ ahkre xà hã ixkre jamãr xwỳnh maati na pre. Nhũm hkra nija kẽp à htỳx nẽ htyk kaxyw nẽ nõ. Kormã nyw. Kormã hã amgrã pẽ 12 pix tã ra kẽp htyk kaxyw. Hãmri nhũm Jajtija tee ri hkukamã hamaxpẽr nẽ ma Jejus wỳr tẽ nẽ hpar pẽ hkõn krã ho tẽm nẽ ho hwỳr kãm hihtỳx nẽ kãm:

—Pa akupỹm mẽ ixto mex xwỳnh maati. E awỳr na pa tẽ. Na ra ixkra ixpẽ htyk kaxyw. Pa tee ri omu nẽ kaxyw amã ijamaxpẽr nẽ awỳr tẽ. Jakamã kwa ma ixkõt inhõrkwỹ hwỳr tẽ nẽ inhmã omu nẽ hã anhĩkra xi nẽ akupỹm inhmã ho mex. Anẽ.

²⁴ Hãmri nhũm kuma nẽ ma hkõt tẽ. Nhũm mẽ ohtõ nẽ axpẽn nhĩgãnh nẽ axpẽn kujahẽk o wa hkõt mra.

²⁵ Nhũm mẽhõ nija haxwỳja wa hkõt tẽ. Na pre hte hkamrõ hkryre rãhã ho pa hã ra hã amgrã kẽp 12. ²⁶ Nẽ tõtõ mã amnhĩrer rax nẽ nhũm mẽ tee ri kot ho mex kaxyw nom xatã hkane kaprỹ. Hãmri nhũm ra hikãxpore kẽp hapẽx nhũm arĩ ãm rãhã nẽ pa. ²⁷⁻²⁸ Hãmri nẽ tee ri amnhĩ kukamã hamaxpẽr nẽ Jejus jarẽnh ma nẽ hamaxpẽr o:

—Ma kot paj ma hwÿr tē nē kēp ê pix kupênh tã akupÿm inhmex japêr. Ma kot paj ho anê.

Anhÿr o hamaxpêr hãmri nē ma mē hkôt hwÿr htēm kurê kumrêx. Nhũm mē ohtô raxja kaêx ã mē hkôt hwÿr tē. Hãmri nē katut kôt kēp ê nhĩrê kupê. ²⁹ ãm ê pix kupênh tã akupÿm mex ã amnhĩ pumunh kurê kumrêx. ³⁰ Hãmri nhũm Jejus kot kēp ê kupênh ã amnhĩ tã omu nē hêx rom xa nē mē ho hakêx nē amnhĩ tã mē kãm kapêr nē mē kãm:

—Kwa mē atō na ka ri amnhĩ kaxyw inhmã ajamaxpêr tÿx pē ixpê ixê kupê? Anê.

Hãmri nhũm mē piitã kuma nē tee ri axpên pumu nē kãm amnhĩ tã aprã. ³¹ Hãmri nhũm hkôt mē pa ho pa xwÿnhjaja kãm:

—Mē kot apê amnàr griã kot ka kêt ri mēhō kot apê hkupênh xwÿnh ã ri mē hkukja. Kwa mãn ãm mēhō amarĩ apê hkupê. Anê.

³² Hãmri nhũm mē kãm:

—Nà na amarĩ ixpê hkupênh kêt nē. Na amnhĩ kaxyw inhmã hamaxpêr tÿx pē ixpê hkupê. Tã na ixàhpumunh tÿx xà ho akupÿm mex. Nom ra ixte mēhō kot ixpê hkupênh xwÿnh ta pumunh jakamã na pa ixêx rom ã amnhĩ tã ri mē hkukjêr anê. E kwa mē atō inhmã amnhĩ jarê. Anê.

³³ Hãmri nhũm nija kuma nē tee ri kēp kot amnhĩ to hpimxur prãm. Hãmri nē hpijaàm nē hwÿr htertet o tē nē kutã hkôn krã ho tēm nē nhÿ nē kãm amnhĩ jarê nē kãm:

—Ma pa na pa inhmã inhmex prãm xàj apê axê kupê. Tã na pa akupÿm inhmex. Anê.

³⁴ Hãmri nhũm kuma nē kãm:

—Tÿ. Nà ate amnhĩ kaxyw inhmã ajamaxpêr tÿx kôt ã ate amnhĩ nhĩpêx anhÿr jakamã na ka akupÿm amex. Kot kaj axte akamrô rãhã ho ri apa hkêt nē. E mãmri ajamakêtkati nē ma akupÿm anhōrkwÿ hwÿr tē. Anê.

Hãmri nhũm kuma nē hkĩnh nē ma akupÿm tē.

³⁵ Rôm nhũm Jajti mã mē àpênh xwÿnhjaja òrkwÿ rúm ma ò patrãw

kutã mra nē wa hkaxpa nē Jajti mã kãm:

—Kwa na ra akra apê ty. Mo kaxyw kot ka kêt amnhĩ kôt Jejus o mō? Kwãr mãmri ma akupÿm awjanã nē tē. Anê.

³⁶ Hãmri nhũm Jejus mē kuma nē Jajti mã kãm:

—Kwa tee ri akra hkukamã ajamaxpêr kêt nē. ãm kaxyw inhmã mã ajamaxpêr tÿx rãhã nē. Anê.

³⁷⁻⁴⁰ Hãmri nhũm mē axte mō nē mē òrkwÿ hwÿr pōj nē mē omu. Nhũm mē ra hã htu rax nē mÿr o hkrĩ. Hãmri nhũm Jejus mē hwÿr axà nē mē omu nē kot mē hkra htyk kumrêx ã omunh tã mē kãm:

—Kwa mē hãmri amÿr kêt nē. Na nireta htyk kêt nē. Na ãm gōr nē nō. Anê.

Hãmri nhũm mē kot ra htyk ã omunh mex jakamã kuma nē ãm kuma nē axtem nē ri axpên mã hã hpêr o axkê. Hãmri nhũm Jejus mē hanor pa nē hitom kãm htyk xwÿnh wÿr àr kaxyw nē amnhĩ kôt Juãw nē Xiakre nē Simãw Pêtre nē kaxyw htyk xwÿnh katorxà nē hipêêxà pix amnhĩ kôt mē ho axà. ⁴¹ Hãmri nē htyk xwÿnh ta wÿr tē nē hpa hã kupy nē kãm kapêr nē kãm:

—Pa? E kwa kànhmã nhÿ. Anê.

Nom amnhĩ kapêr kãm harê nē kãm:

—Tarit kũm. Anê.

⁴² Hãmri nhũm kànhmã ÿr kurê kumrêx nē kànhmã xa nē ri mra. Na pre ra hprêk nē ty. Na ra hã amgrà kēp 12 tã ty nhũm Jejus akupÿm ho htĩr nē kànhmã ÿr nhũm kànhmã xa nē ri mra. ⁴³ Hãmri nhũm kuri omunh xwÿnhjaja amnhĩ jaêr pē omu nē kamã no puma nē hkĩnh tÿx kumrêx. Hãmri nhũm Jejus katorxà mē hipêêxàja wa kãm:

—E mãn ra kãm prãm nē. Wa tokyx kãm mēmoj japêr kê kukrê. Nom kêr ka wa inhmar kumrêx. Kêr ka wa akupÿm ixte ho htĩr ã ri mē kãm ijarênh o ri apa hkêt nē. ãm kwarĩ ho kwarĩ. Anê.

6

Najare nhõ xwýnhjaja kot Jejus kaga hã mẽ harēnh

Matêwre 13.53-58; Rukre 4.16-30; Juãw 1.11

¹ Tã nhũm Jejus ma õ krĩ pẽ Najare hwýr ma akupým mõ nhũm hkõt mẽ pa ho mẽ pa xwýnhjaja ma hkõt mõ. ² Hãmri nẽ hwýr pøj. Nhũm mẽ õ arĩgromnu pẽ sap kator jakamã nhũm Jejus ma Tĩrtũm kapẽr o mẽ ahkre xà hã ixkre hwýr tẽ. Hãmri nẽ kamã mẽ ahkre ho nhỹ nhũm mẽ amnhĩ jaẽr pẽ kapẽr mex ã kuma nẽ tee ri axpẽn pumunh pẽ hamaxpẽr o hkrĩ. Jejus kęp mẽ hkwy hã hkamnhĩx nom nhũm mẽ kurom àhpumunh tỳx nẽ kapẽr mex jakamã nhũm mẽ kuma nẽ tee ri hamaxpẽr o hkrĩ. Hãmri nẽ axpẽn mã:

³ —Kwa kęp mẽ panhiõ htã tanhmã kot we amnhĩ to nẽ ã àhpumunh tỳx kõt mẽ pamã kapẽr anẽ nẽ ri mẽ kãm aa mẽ kot mẽmoj pumunh kêt kwý ho anhỹr o pa? Mẽ panoo mã na pre hprẽk. Kęp pĩ kuprãr xwýnh Juje mẽ hprõ Marir wa hkra na. Nẽ htõ Xiakre nẽ Juje nẽ Simãw nẽ Jutja ra mẽ pahte mẽ kęp htõ hã omunh mex. Nẽ htõxjaja jar mẽ pakamã pa nhũm mẽ pahte mẽ omunh mex kẽnã kot kêt we mẽ kurom ã àhpumunh tỳx anẽ. Anẽ.

Anhỹr o axpẽn mã harẽ. Hãmri nẽ kamã gryk nẽ hkaga ⁴⁻⁶ nhũm tee ri amnhĩ tã mẽ omu nẽ hamaxpẽr o:

—Hêxta waa nẽ. Mẽ kãm amnhĩ kaxyw ixkõt hamaxpẽr prãm kêt kumrẽx. Anẽ.

Hãmri nẽ mẽ kãm:

—Nà Tĩrtũm nhỹ hã kapẽr jarēnh o mẽ pa xwýnhjaja na htem krĩ hkwy kamã kãm mẽ mar prãm nẽ. Nom õ krĩ kamã mẽ kot karàre rũm hprẽk o mõr kãm omunh xwýnhjaja na htem kuma nẽ ãm kuma. Anẽ.

Hãmri nhũm mẽ kot amnhĩ kaxyw hkõt hamaxpẽr kêt jakamã nhũm tee ri mẽ kãm aa mẽ kot mẽmoj pumunh kêt kwý ho anhỹr rax prãm kaprý. Nẽ ãm mẽ à xwýnhjẽ ho grẽre nẽ mẽ hã ãhkra jaxwý nẽ akupým mẽ ho mex.

Hãmri nẽ mẽ kurũm kato nẽ ma krĩ hkwy hkõt ri Tĩrtũm kapẽr o mẽ ahkre ho pa.

Jejus kot mẽmoj tã mẽ kęp 12jẽ mã karõ hã harēnh

Matêwre 10.5-15; Rukre 9.1-6, 10.1-12; mãânẽn Atre 13.50-51, 18.6

⁷ Tã nhũm Jejus amnhĩ wýr mẽ kot ý hã mẽ ahkre ho pa xwýnh pẽ 12jẽ hwý. Ra kot amnhĩ kaxyw mẽ rēnh xwýnhhtaja nhũm amnhĩ wýr mẽ kuwý. Hãmri nẽ axpẽn kaxyw mẽ ho axkrut nẽ mẽ kurẽ nẽ mẽ kãm mẽ àpẽn ã karõ nẽ ma mẽ hkwyjẽ hwýr mẽ kurẽ. Nẽ mẽ kãm:

—E kęp ka mẽ ma mẽ pahkwýjẽ hwýr mra nẽ inhỹ hã Tĩrtũm kapẽr jarēnh o ri mẽ hkõt apa. Nẽ mẽ kurũm mẽkarõmnuti japõx o ri mẽ hkõt apa. ⁸⁻⁹ Nom kęp ka mẽ amnhĩ kõt akukrẽx rax nẽ ri apa hkêt nẽ. Nẽ kawà htu nẽ ho ri apa hkêt nẽ. Nẽ amnhĩ kõt axàpkur xà ho ri apa hkêt nẽ. Rý akàxpore rax nẽ ri ho apa hkêt nẽ. ãm mẽ anhõ Kamis nẽ mẽ apar kà ho pixire nẽ agjẽ nẽ ri hã apa. Nẽ mẽ amnhĩ kaxpar xà hã mẽ anhõ kô pix o apa. Mẽ ã anhỹ kamã mẽ hkõt ri apa anẽ.

¹⁰ —Nẽ kęp ka mẽ nhỹri krĩ hõ hwýr pøj. Nẽ apõx xà kamã mẽhõ nhõrkwý kamã hkõt ri apikamēnh tãmtã kurũm akupým ajapõj nẽ ma hpãnhã nhãm krĩ hõ hwýr apa. Nom atỳx ri nhãm mẽ hwýr amrar nẽ nhãm mẽ hwýr amrar kêt nẽ.

¹¹ —Nẽ koja mẽ nhỹri mẽ akapẽr kaga ka mẽ tee ri amnhĩ tã mẽ kamã ama hãmri nẽ tokyx mẽ kurũm ajapõj nẽ ma apa. Nẽ anojarêt nẽ mẽ noo mã akuhẽ nẽ amnhĩ par ã awjagrõ kapĩ. Mẽ kot Tĩrtũm kaga hã amnhĩ pumunh nhũm kot amnhĩ pyrã nẽ mẽ hkaga hã omunh kaxyw ka mẽ ã mẽ noo mã amnhĩ nhĩpẽx anẽ. Hãmri nẽ hpãnhã ma nhỹhỹm apa.

¹² Anhỹr o mẽ kãm mẽ àpẽn ã karõ. Nhũm mẽ kuma nẽ hapõj nẽ ma mẽ hkwyjẽ hkõt pa. Ma krĩ piitã hkõt Tĩrtũm kapẽr o mẽ ahkre ho ri mẽ hkõt pa nẽ mẽ kãm:

—E kwa mẽ tokyx amã ate amnhĩ tomnuj kaga hprãm xàj Tĩrtũm kõt mãn amnhĩ xunhwỳ. Aně.

¹³ Hãmri nẽ mẽ nẽ mẽkarõmnuti jano. Nẽ akupỹm mẽ à xwỳnhjê ho mex kaxyw mẽmo htwỳm o mẽ hkrã gregrer nẽ Jejus nhỹ hã akupỹm mẽ ho mex.

Mẽ kot Juãw Paxis pĩr ã mẽ harěnh Matêwre 14.1-12; Rukre 9.7-9

¹⁴ Tã nhũm mẽ piitã Jejus jarěnh ma nẽ axpẽn mã tanhmã harěnh to ho pa. Nom ahpỹnhã tanhmã harěnh to. Na prem kamã harěnh o:

—Nà Juãw Paxis pimràata na. Pěr akupỹm htĩr jakamã na hte ã mẽ kot aa mẽmoj pumunh kêt kwỳ ho anhỹr o pa. Aně.

¹⁵ Nẽ kamã axtem harěnh o:

—Nà tãm kêt. Pěr finat Eris na. Aně.

Nẽ kamã axtem harěnh o:

—Nà tãm kêt. Pěr Tĩrtũm nhỹ hã kapěr jarěnh xwỳnhjê hõ na. Te kot amnepê mã mẽ kot Tĩrtũm nhỹ hã tanhmã amnhĩ nhĩpêx to xwỳnhjê kot amnhĩ nhĩpêx pyrãk o kot amnhĩ nhĩpêx kẽnã.

Anhỹr o ahpỹnhã harě. ¹⁶ Hãmri nhũm Ijaew o amnhĩptãr xwỳnh pẽ Eroxo ãxipasja mẽ kot ã harěnh anhỹr ã mẽ kuma nẽ Juãw Paxis mã hamaxpěr kurê kumrêx. Hãmri nẽ mẽ kãm:

—Nà pěr Juãw Paxista na. Ixte mẽ kãm hã ixãmnenh nhũm mẽ kot inhmã mut krãhyr xwỳnhhta mãn ra tanhmã amnhĩ to nẽ akupỹm htĩr. Aně.

¹⁷⁻²⁰ Na pre ra pahi Eroxo ãxipasja htõ Pirip pẽ hprõ Eroxois pytà nẽ ho hprõ nhũm hkra niti mẽ wa hwỳr ahpã. Hãmri nhũm Juãw Paxisja tee ri ja hã pahihiti Eroxo ãxipasja pumu nẽ hã kãm akir nẽ kãm:

—Tk. Kwa Tĩrtũm kęp ja omnuj. Ra kot ja nẽ mẽ pahkurê htã ka axtem nẽ ã amnhĩ nhĩpêx aně.

Anhỹr jakamã nhũm hprõ Eroxoisja amnhĩ tã kuma nẽ kamã gryk tỳx nẽ. Nẽ kãm hpĩr prãm nẽ. No nhũm pahi Eroxo ãxipas kãm hpĩr prãm kêt nẽ. Juãw Paxis kot Tĩrtũm kõt amnhĩ nhĩpêx nhũm kot hã omunh mex jakamã kãm hpĩr prãm kêt nẽ.

Juãw na pre hte xatã kãm Tĩrtũm kapěr jarěnh o pa. Nhũm pahihiti Eroxo ãxipasja kormã hprĩ hã mar mex kêt tã hã hpijaam nẽ kãm mar prãm nẽ. Nom nhũm hprõ kãm hpĩr prãm jakamã nhũm kęp mẽ kãm hã amỹnẽ nhũm mẽ ma o tẽ nẽ haxà nhũm mex nẽ mẽ hagiěnh xà kamã hkrĩ ho krĩ.

²¹⁻²⁴ Tã nhũm jãã nhũm pahi Eroxo ãxipas kator ã arĩgro kato nhũm mẽ piitã hwỳr mra nẽ hã akuprõ nẽ hã hkĩnh nẽ hã apkur o hkrĩ. Õ kôwenatõjaja nẽ hkrãmnhwỳjaja nẽ krĩ hkwy kamã mẽõ pahijaja nhũm mẽ ohtõ nẽ hã akuprõ nẽ hã hkĩnh. Hãmri nhũm hprõ Eroxois kra nitija mẽ hwỳr axà nẽ mẽ kãm gre. Mẽ kot omunh nẽ kamã hkurẽ pix kaxyw mẽ noo mã hpijaam kêt nẽ ã mẽ kãm gre aně. Hãmri nhũm pahi Eroxo omu nhũm ja kãm mex nẽ nhũm mẽ piitã hkĩnh nẽ kamã nopyma nẽ. Nẽ gre kãm hpijaam kêt nẽ tanhmã mẽ kãm gre to nhũm mẽ omu nẽ kamã no puma nẽ. Hãmri nhũm pahi Eroxo ãxipasja kãm:

—Nà ãm hãmri. Na ka mẽ inhmã agrer mex nẽ. Jakamã kwa mãmrĩ mẽmoj tã ixwỳ. Amã mẽmoj prãm xà hkõt inhmã mẽmoj jarẽ pa amã kugõ. ãm hãmri na pa amã amnhĩ jarẽ. Na pa Tĩrtũm noo mã ã amã amnhĩ jarěnh aně. Ka mãmrĩ ixkukrêx mex kwỳ hã ixwỳ pu axpẽn mã ho axkjê. E mẽmo na amã hprãm? Aně.

Hãmri nhũm kuma nẽ ma katorxã hwỳr tẽ nẽ kãm harẽ nẽ kãm:

—Xê mẽmoj tã kot paj we kuwỳ? Aně.

Hãmri nhũm kuma nẽ hamaxpěr o:

—Ma ãm hãmri koja mẽ tã jarãhã inhmã Juãw Paxis pĩ. Aně.

Hãmri nẽ hkrata mã kãm:

—Ma Juãw Paxis krã hã kot kaj awỳ kẽ mẽ amã kugõ ka man ixwỳr o tẽ. Aně.

²⁵ Hãmri nhũm kuma nẽ akupỹm pahi hwỳr axà nẽ kãm:

—Ma Juãw Paxis krã kot kaj inhmã agõ. Pasiiti kamã axà nẽ inhmã agõ pa ma amnhĩm o ixtẽm kurê kumrêx. ãm ja pix na inhmã hprãm. Aně.

26 Hāmri nhũm tee ri kuma nē hkaprī nē. Nē hamaxpēr o:

—Hêxta waa nē. Inhmā hpīr prām kêt. Nom ra ixte ixkutā mē hkrī xwýnhjê noo mā inhmā kām mēmoj prām xwýnh nhõr ã amnhĩ jarēnh nhũm ixte kām õr ã amnhĩ jarēnh nhũm mē piitā mē kot inhmār jakamā tanhmā kot pa we amnhĩ to nē kēp nē? Nà pa nē hkêt nē. Anē.

27 Hāmri nē õ pôristijê mā kām:

—E mē ma Juāw Paxis wýr mra nē mut krāhta nē pasiiti kamā hkrā xà nē akupýn o tē nē kām agõ. Anē.

Hāmri nhũm mē kuma nē ma mē hagiēnh xà hwýr mra nē Juāw wýr axà hāmri nē mut krāhta. 28 Hāmri nē pasiiti kamā hkrā xà nē akupým o tē nē kot hã hwýr xwýnh mā kugõ nhũm kumý nē ma katorxà hwýr o tē nē kām kugõ.

29 Hāmri nhũm Juāw Paxis kôt mē pa ho mē pa xwýnhjaja tee ri harēnh ma nē hkaprī htýx nē. Hāmri nē pahi Erox äxipas wýr mra nē ĩ hã kuwý nhũm mē kām kugõ nhũm mē kumý nē ma o mra nē kēn kre kamā haxà.

Jejus kot mē ho 5.000 nē mē kām õ hã harēnh

Matêwre 14.13-21; Rukre 9.10-17; Juāw 6.1-14

30 Tã hāmri nhũm mē kot Jejus nhý hã mē ahkre ho mē pa xwýnhjaja akupýn Jejus wýr mõn pøj nē kām amnhĩ jarē. Tanhmā mē kot mē ahkre hto ho pa nē tanhmā mē ho mex to ho pa hã kām amnhĩ jarēnh pa.

31 Tã nhũm mē piitā axpēn pãnhã kot Jejus mar kaxyw mē hwýr mra nhũm mē kormã apkur kêt nē. Jakamā nhũm Jejus hkôt mē pa ho mē pa xwýnhjê mā:

—E ma pu mē awrã kaprý hwýr mõ nē nhýri pahkrī nē pakókôt nē apku.

32 Anē hāmri nhũm mē gõx kām kanõre wýr agjê nē ma ahte xarmã awrã kaprý hwýr mõ. 33 Nhũm krī hkwý nhõ xwýnhjaja mē omu hāmri nē nhýhým mē mõr xà hã mē omunh kurê kumrêx. Hāmri nē krī hkwý rüm ma mē ĩhkrep mra nē mē kām amnhĩ to wa nē pøj nē mē kutêp hkrī.

34 Hāmri nhũm mē mõ nē mē hwýr pøj nē kre kura nē kanõre nhõ. Hāmri nhũm Jejus mē hwýr api nē mē omu nē hamaxpēr o:

—Hêxta waa nē. Na mē omnu nē pa. Te mē kēp õwēhti jamār xwýnh kêt nē htýx ri pa xwýnh kot amnhĩ nhípêx pyrāk. Mēhõ kot mē kamā ukaprī nē tanhmā mē ho mex to ho pa? Anē.

Hāmri nē mē kamā ukaprī nē xa nē Tirtüm kapēr o mē ahkre rax nē.

35-36 Tã nhũm myt àr kaxyw nhũm hkôt mē kot pa ho pa xwýnhjaja hwýr mra nē kām:

—Kwa hāmri na ra amýkry htýx nē. Mē hano kê mē ma nhýri krī hkwý hwýr mra nē tokyx amnhĩm mēmoj japrõ nē kuku nē hikwý nē gõr. Mo jar kapõt ã mē apkur xà? Anē.

37 Hāmri nhũm mē kuma nē mē kām:

—Kwa nà mē kamjaja mē kām mēmoj gõ kê mē kuku. Anē.

Hāmri nhũm mē kuma nē tee ri hamaxpēr nē kām:

—Kwa mo mē kaxyw mē pakàxpore rax? Kot pu mē pakàxpore ho 200 nē ho mē kām mēmoj japrõr tã nom nhũm mē ãm ho hkryre nē kuku nē ho õhy htu hkêt nē. Mē ohtõ rax kumrêx kēnã. Anē.

38 Hāmri nhũm mē kām:

—Nà kot puj mē kām mēmoj japrõr kêt nē. No mē panhõ pãwtita? Tanhmã na arĩ kute? E mē atõ tē nē omu nē akupýn tē nē inhmã harē. Anē.

Hāmri nhũm ja ma tē nē omu nē akupýn tē nē kām:

—Nà pãwti ãm kēp 5 pix. Nē kaxyw tep ãm pijakrutre. Anē.

39 Hāmri nhũm Jejus kuma nē mē kām:

—Tõe. Mē kām anē kê mē ahpýnhã ri hije nē hkrī. Anē.

40 Hāmri nhũm mē piitã ahpýnhã kēp 50 nē hije nē hkrī hpa.

41 Nhũm Jejus pãwti mē tepta jamý nē kãnhmã kaxkwa hwýr rīt nē Tirtüm mã kupē nē kām harē nē kām:

—Pa Papaj? Nà ka na apê mē inhmã mē inhõ ho apa xwýnh jakamã amex o amex. Anē.

Hāmri nē mē kām ho hkry hpa nē hkôt mē pa ho mē pa xwýnhjê mã kugõ nhũm mē ô ri ho mra nē ho mē hipêx pa. Pāwti mē tepta nhũm mē ho mē hipêx pa. ⁴²⁻⁴⁴ Nhũm mē piitã apkur mex nē. Mēõja mē kêp grire htã nhũm Jejus tanhmã mē kām ho rax to nhũm mē ohtô rax tã piitã kuku nē ho õhy htu hpa. Mēmyjaja kêp 5.000 nē kaxyw mē hprõ nē mē hkrajaja nhũm mēõja ho mē hipêx pa nhũm arĩ hakrêx prã. Jakamã nhũm Jejus kôt mē pa ho mē pa xwýnhjaja akupým hakrêx o pikuprõnh pa nē ho kawà o 12 nē ho nyt.

Jejus kot gô krãhkã hã htēm ã harēnh

Matêwre 14.22-33; Juãw 6.15-21

⁴⁵⁻⁴⁶ Tã nhũm Jejus hkôt mē pa ho mē pa xwýnhjê mã kãm:

—E mē kanôre mã axà nē ma akupým ixkukamã krĩ pē Petsêj wýr rê. Pa jajê jano hāmri nē ma tē nē nhýri Tirtũm mã amnhĩ jarē nē rĩ ma mē akôt tē. Anē.

Hāmri nhũm mē kuma nē kanôre mã gjêx pa nē ma mō nhũm Jejus mē kot mar xwýnhjê janor pa nē ma hixêt prêk ã api nē Tirtũm mã amnhĩ jarēnh o nhý.

⁴⁷ Tã nhũm kamãt nhũm arĩ ahte kýxpê nhý. Nhũm hkôt mē pa ho mē pa xwýnhjaja kormã kanôre kamã mō.

⁴⁸ Hāmri nhũm Jejus amým mē omu nhũm kôk ra mē kutã àpêr tỳx kumrêx nhũm mē tee ri amnhĩ nhĩpêx nē tee ri rrēmti ho gô rēnh nhĩpêx o hkrĩ.

Tã nhũm ra krãhyre kã nhũm Jejus Tirtũm mã amnhĩ jarēnh pa nē kãnhmã xa nē ma mē hkôt tē. Nom kanôre kamã htēm kêt nē gô krãhkã hã xa nē mē hwýr hpar o tē.

⁴⁹⁻⁵⁰ Hāmri nē mē hwýr kato nē mē kamã hamak kaxyw hêx rom kot mē hakrenh mã. Nhũm mē amnhĩ wýr omu nē mēkarõ hã hkamnhix nē tee ri amnhĩ kukamã hamaxpêr nē umaj htertet nē àmra rax nē. Hāmri nhũm mē kãm:

—Tk. Kwa mē amã ma hkêt nē. Pa na pa mē akôt tē. Anē.

⁵¹ Hāmri nē mē hwýr kanôre hkrem axà nhũm kôk xàpêr tỳxta hapêx.

Hāmri nhũm mē Jejus kamã no pyma nē tee ri hamaxpêr nē axpên mã:

—Kokýy. Tanhmã na we amnhĩ to nē gô krãhkã hã hpar o man mē pahkôt tē mē pahwýr àr mē nhũm kôk hapêx par kurê kumrêx. Anē.

Hāmri nē tee ri kot ã amnhĩ nhĩpêx anhýrja kukamã hamaxpêr o hkrĩ. ⁵² Kormã mē kot hprĩ hã Jejus tanhmã kute hã omunh kêt jakamã. Tirtũm pyrã nē àhpumunh o àhpumunh ã omunh mex kêt jakamã tee ri pãwti grêre ho mē hipêx par nē gô krãhkã hã htēm nē kôk o pinhkrēnh ã omu nē tee ri ã kot amnhĩ nhĩpêx anhýrja kukamã hamaxpêr.

Kenêjare kamã Jejus kot akupým mē ho mex ã harēnh

Matêwre 14.34-36

⁵³ Tã nhũm mē xarmã rê nē krĩ pē Jenêjare hwýr pøj. Hāmri nē kanôre nhô ⁵⁴ nē api nē kuhê nhũm krĩ nhõ xwýnhjaja Jejus pumunh kurê kumrêx nē axpên mã:

—Kwa pêr Jejusta na mō. Nã tãm kēnã. Anē.

⁵⁵ Hāmri nē hkĩnh nē ma kape hã mē à xwýnhjê hkôt mmar kurê kumrêx nē mē harir xà rãhã mē hamý nē akupým Jejus wýr mē o mra. Nhýri hpôx xà kamã omu nē hwýr mē o mra.

⁵⁶ Na pre htem ã Jejus nhĩpêx anē. Jakamã nhũm hte ma nhýhým mra. Krĩ rũnh kôt mra nē krĩ hkryre hkôt mra nhũm mē omu nē hwýr mē à xwýnhjê ho mra nē mē ho kuwý nē kãm:

—Pa? Kwa kê jajaja akupým mex kaxyw apê axê pix kupê nã? Anē.

Hāmri nhũm mē kãm:

—Tôe. Nã kwãr mē mãmrĩ hkupê. Anē.

Hāmri nē mē kot kêp ê kupênh xwýnh piitã akupým mex pa.

7

Mē higêt hkôt mē kot amnhĩ nhĩpêx xwýnhjê jarēnh

Matêwre 5.21-48, 15.1-20

¹⁻⁴ Tã nhũm Mojes kapêr o mē ahkre o mē pa xwýnh kwýjaja Jerujarē rũm

Jejus wÿr mō. Hāmri nē hā akuprō nē hkôt mē pa ho mē pa xwÿnhjê kot amnhĩ nhĩpêx ã mē omunh o kuhê. Ijaew na prem mē hkukamã mē higêtjê kapêr kôt ri tanhmã amnhĩ nhĩpêx to ho pa. Jakamã mē uràk nē apkur kaxyw nē xatã amnhĩ nhĩhkra kuhōnh japjê nē rĩ kormã apku. No mē amnhĩ nhĩhkra grã pix kuhōnh nē hkrĩ nē apkur kêt nē. Kuhōnh japjê nē kormã hkrĩ nē apku. Tĩrtũm kot ja hã mē omunh nē amnhĩm mē mex ã mē harēnh ã amnhĩ kamnhĩx jakamã na prem ã amnhĩ nhĩpêx anhÿr o pa. Nē nhÿri amnhĩm mēō hkwÿ japrō nē akupÿm òrkwÿ hwÿr o mra nē haxwÿ nē mē higêt pyrã nē wÿr japjê rũnh kumrêx nē rĩ kormã apku. Nē mē uràk nē poti nē gôj nē papêre hkre kahōnh japjê rũnh nē rĩ kormã kamã ò nhĩpêx. Mē higêt pyrã nē ã amnhĩ nhĩpêx anhÿr o pa. Tĩrtũm kot ja hã mē omunh nē amnhĩm mē mex ã mē harēnh prãm xaj. Nom nhũm Jejus kôt mē pa xwÿnhjaja na prem ã amnhĩ nhĩpêx anhÿr kêt nē. Na prem apkur kaxyw nē katat kôt amnhĩ nhĩhkra kuhō nē ãmnhĩx apkur o hkrĩ. Jakamã nhũm Parijew nhō xwÿnh mē Tĩrtũm kapêr tũm o mē ahkre xwÿnhjaja tee ri ã mē kot amnhĩ nhĩpêx anhÿr ã mē omu nē mē hã Jejus kukja nē kãm:

⁵ —Pa Jejus? Kwa mē inhmã mēmoj jarê. Amnepê mē panhĩgêtjaja na pre htem apkur kaxyw nē amnhĩ nhĩhkra kuhōnh japjê rũnh kumrêx nē arĩ kormã hkrĩn apku. Jakamã na pa htem mē uràk nē ã amnhĩ nhĩpêx anê. No akôt mē pa ho mē pa xwÿnhjaja na htem ho mē ixpyrà kêt nē. Kwa mo na htem ã amnhĩ nhĩpêx anhÿr kêt nē? Anê.

⁶ Hāmri nhũm mē kuma nē mē kãm amnepê mē Tĩrtũm nhÿ hã kapêr xwÿnh pē Ijais kapêr jarê nē mē kãm:

—Nà ãm hāmri na pre finat Ijaisja amnepê mē tanhmã mē ajarēnh to. Te Tĩrtũm tãm kapêr pyrãk o mē ajarē nē mē ajarēnh o:

Mē kãm ixkĩnh ã amnhĩ jarēnh tã mē kãm ixkĩnh kêt. Na htem

ãm kãm ixprãm ã amnhĩ jarēnh kaprÿ.

⁷ Mē kot ixkapêr kuhpa hã amnhĩ krã hkôt mēmoj tã hkwÿjê mã karō ho pa jakamã na htem ãm kot ixkôt amnhĩ nhĩpêx ã amnhĩ jarēnh kaprÿ. Anê.

Ã na pre mē ajarēnh anê. ⁸⁻⁹ ãm hāmri na pre mē ajarê. Na ka htem mē panhĩgêt kapêr kôt pix mã amnhĩ nhĩpêx o apaja gryk ã ra Tĩrtũm kapêr kaga hpa. Te mē akapêr mex o kot Tĩrtũm kapêr jakrenh pyrãk. ¹⁰ Na pre finat Mojes Tĩrtũm nhÿ hã mēmoj tã mē pamã karō ho:

Ker ka mē anhĩpêêxà nē mē akatorxà wa hã apijaàm o ri apa. Jao wa kutã anojarê rãhã nê. Nom kot kaj mē ho mex hkêt nē tanhmã mē kãm akapêr punuj to hāmri nhũm mē akwÿjaja ja mÿrapê mē apa. Anê.

Na pre ã finat Mojesja Tĩrtũm nhÿ hã mē pamã karō anê. ¹¹ No mē kajaja na ka mē axtem nē tanhmã akwÿjê mã ja hã karō hto nē mē kãm: “Kot kaj mē mēmo arĩgro hã akãxpore hkwÿ nom anhĩpêêxà ho ajuta kaxyw kãm hkwÿ nhōr kêt nē. ãm wa kãm ate ho ajuta kêt ã amnhĩ jarê hāmri nē Tĩrtũm mã amnhĩ jarēnh xà hã ixkre hwÿr mãn o tē nē mē ixte ixkre ho mex kaxyw mē inhmã agō. Kot kaj mē ã amnhĩ nhĩpêx anê nhũm Tĩrtũm ja hã mē apumu nhũm ja kãm mex nē. E kêt ka mē ã amnhĩ nhĩpêx anhÿr o ri apa.” Anhÿr o na ka htem akwÿjê mã karō. ¹² Jao mē kot mē hipêêxà nē mē katorxà ho ajuta nē mē hkurê. ¹³ Te mē amã mē panhĩgêt kapêr mex o kot Tĩrtũm kapêr jakrenh pyrãk o na ka htem amnhĩ nhĩpêx. Jao te Tĩrtũm kapêr mex kêt pyrãk o hipêx nē mar kêt nē apa. ã na ka htem Tĩrtũm kapêr kuhpa hã amnhĩ nhĩpêx anhÿr o ri apa. Anê.

*Mē pajamaxpêr punuj kôt mē pah-
tomnu hã harēnh*

Matêwre 15.10-20

¹⁴ Tã nhũm Jejus Parijew nhō xwÿnhjê mē hkwÿjê mã kapêr pa

hāmri nē amnhī wỳr ra mē kot mar o kuhê xwỳnhjê mã hpa ho apê nē mē kām:

—E pa mē amā mēmoj jarē ka mē inhma nē inhmar mex nē. ¹⁵⁻¹⁶ Na hte Tirtūm kapēr tūm o mē ahkre xwỳnhjaja amnhī krā hkôt mē ate amnhī nhīhkra kuhōnh japjê hā mē amā karō ho pa. Nē amnhī krā hkôt mē axàpkur xà hā tanhmā mē amā karō hto ho pa. Mē ate ā amnhī nhīpêx anhỳr nhūm Tirtūm kot ja hā mē apumunh kôt amnhīm mē amex ā mē ajarēnh kaxyw nhūm htem ā mēmoj tā mē amā karō anē. Nom na hte Tirtūm tanhmā mē panhīhkra kuhōnh to hā mē pahpumu nē ām hā mē pa hpumu. Nē mēmo mē paxàpkur xà hā mē pahpumu nē ām hā mē pahpumu. Ja kām tanhmā kute hkêt. Na hte ja hā mē omunh xà hkôt amnhīm mē mex ā mē harēnh rỳ mē mex kêt ā mē harēnh kêt nē. Rỳ mē hakwa ho mēmoj kur ā mē omunh xà hkôt tanhmā mē harēnh to hkêt nē. Ām mē hakwa ho tanhmā kapēr to pix ā mē mar kôt na hte tanhmā mē harēnh to.

Anhỳr o mē kām kapēr. ¹⁷ Hāmri nē mē kot mar o kuhê xwỳnhjê re nē hkôt mē pa ho mē pa xwỳnhjê mē mē amnhīm hikranh xà hā ixkre hwỳr agjê. Hāmri nhūm hkôt mē pa ho mē pa xwỳnhjaja tee ri Jejus kot tanhmā mē hakwa jarēnh to hā kuma nē hā hkukja nē kām:

—Kwa mon ka ri mē inhma ā ja jarēnh anē? Anē.

¹⁸ Hāmri nhūm mē kām:

—Kwa xàn ka mē kormā aprī hā ja mar mex kêt nē? E pa ixprī hā mē amā harē ka mē inhma. Nà mē apkur xà na hte mē hkrā hi kamā mē hamaxpēr wỳr gjêx kêt nē. ¹⁹ Na hte ām mē ôhy pix wỳr agjê nē gaa nē nhām hapôj nē hapêx. Na htem mē apkur xà nhỹ hā tanhmā amnhī tomnu to hkêt nē. Jakamā na hte Tirtūm mē apkur xà hā mē omunh xà hkôt tanhmā mē harēnh to hkêt nē. Anē.

Nhūm pre ā mē kām kapēr anhỳr o mē paxàpkur xà piitā mex ā harē. Jakamā na hte Tirtūm krajaja àmnhix

mēmoj piitā hkur o pa nē kām mēmoj kur pyma hkêt nē. Jakamā nhūm Jejus ā mē kām kapēr anē nē mē kām:

²⁰ —Mē hkrā hi kamā mē hamaxpēr punuj pix nhỹ hā na htem tanhmā amnhī tomnuj to. Jakamā na hte Tirtūm tanhmā mē hamaxpēr to ho pa hā mē omunh xà hkôt tanhmā mē harēnh to. Nom mē kot mēmoj kur ā mē omunh xà hkôt rỳ mē ĩhkra kuhōnh japjê hā mē omunh xà hkôt tanhmā mē harēnh to hkêt nē. Ja tanhmā kêp kute hkêt. ²¹⁻²² Nom koja mēhō hamaxpēr punuj nē ra hkôt tanhmā amnhī tomnuj to.

Ja axpên kamā hpijaam kêt nē.

Rỳ mēhōx pī rỳ mē kêp ahkī.

Rỳ mē kêp mē hprō rỳ mēhkuprỳ ho amnhīkati.

Rỳ ri axpên pê ôxỳ.

Rỳ tanhmā hkwỳjê homnuj to.

Rỳ tanhmā mē ho kapēr punuj to.

Rỳ hêx rom mē no kupyri o ri pa.

Rỳ mēmoj tā amnhī to jarkrar o pa.

Rỳ axpên kukrêx pumu nē kām ho ô hprām xàj hā ô xwỳnhta kamā gryk.

Rỳ htỳx ri tanhmā amnhī nhīpêx to.

Mē hamaxpēr punuj jakamā na htem ā ri amnhī nhīpêx anhỳr o pa. ²³ Tā ā mē kot amnhī nhīpêx anhỳr ā mē omunh xà hkôt na hte Tirtūm mē kot amnhī tomnuj xwỳnh hā mē harē. Anē.

Mēhō kot hkra kaxyw Jejus mã hamaxpēr ā harēnh

Matêwre 5.21-28

²⁴ Tā nhūm Jejus mē hkôt mē pa ho mē pa xwỳnhjaja nhỹhỹm nojarêt hāmri nē krī rūm hapôj nē ma krī pê Xir pu hā ri pa. Hāmri nhūm Jejus hkwyjê mã:

—E kwa pu mē tokyx ixkre mỳj wỳr mō mē kuri pōj nē kamā amnhīm hikra. Pu mē pahpôx tokyx anē kē krī nhō xwỳnhjaja mē pahpôx ā mē pahpumunh kêt nē.

Anhỳr tā nom nhūm mē piitā mē harēnh ma nē mē hā akuprō. ²⁵⁻²⁶ Nhūm mēhō ni haxwỳja Jejus hpôx ā harēnh ma nē ma hwỳr tē. Nom kêp Ijaew kêt axtem Gres

nhõ xwýnh na pre. Pika pê Sir kamã krĩ mẽ kot kãm “Wẽnĩs” anhÿr xwýnh kamã na pre kato. Nhũm pre mẽkarõmnuti kệp hkra ni mã axà. Hãmri nhũm õ mãmãj tee ri omu nẽ ra Jejus hpõx ã harẽnh ma nẽ ma hwÿr tẽ. Hãmri nẽ hwÿr axà nẽ hparpẽ hkõnkrã ho htẽm nẽ nhÿ nẽ kãm:

—Xê Pahihti. Inhmã ixkra nẽ mẽkarõmnuti jano kê ma tẽ kê akupÿm inhmã mex. Anẽ.

²⁷ Hãmri nhũm kãm:

—Nà kormã. Na pre Tirtũm taxy kormã Ijaewjê pix wÿr inhmẽ. Jakamã na pa kormã nhãm mẽ akwÿjê hõ tanhmã mẽ ato mex to hkêt nẽ. Anẽ.

²⁸ Hãmri nhũm tee ri amnhĩ tã kuma nẽ kãm:

—Ma ãm hãmri na ka ja jarẽ. Ixpê Ijaew kêt tã nom mẽ kuxwar we ixto mex grire kêt wehe. Anẽ.

²⁹ Hãmri nhũm kãm:

—Nà ãm hãmri na ka ã akra kaxyw inhmã ajamaxpẽr tÿx anẽ. Jakamã kot paj nẽ mẽkarõmnutita jano. Koja axte tanhmã apê ho hkêt nẽ. E ma akupÿm hwÿr tẽ nẽ omu. Anẽ.

³⁰ Hãmri nhũm kuma nẽ ma akupÿm õrkwÿ hwÿr tẽ nẽ omu. Nhũm ra mẽkarõmnutija kệp kato nẽ ma tẽ nhũm akupÿm tãm hkrã nẽ hkĩnh nẽ par kãm hkõkõt o nõ.

Hamak kro nẽ kapẽr krok xwýnh jarẽnh

Matêwre 15.29-31

³¹ Tã nhũm Jejus mẽ hkõt mẽ pa ho mẽ pa xwýnhjaja krĩ pê Xir rũm hapõj nẽ akupÿm gõ rax pê Garirej wÿr ma mra. Pyka pê Sitõ jakre nẽ mõ nẽ pyka pê Tekap jakre. ³² Hãmri nẽ kormã hpõx o mõr rôm nhũm mẽ amnhĩ wÿr Jejus pumu nẽ hwÿr mẽhõ myja o tẽ. Kapẽr krok nẽ umar kêt xwýnhhta nhũm mẽ wÿr o tẽ nẽ kãm:

—Pa? Ot pa mẽ awÿr ixkrãmnhwÿta o tẽ. Kwa hã anhĩhkra xi kê akupÿm mẽ inhmã mex. Anẽ.

³³ Hãmri nhũm omu nẽ hpa hã kupy nẽ mẽ kệp o kato nẽ nhÿri mẽ hkàx ã o xa. Nẽ akutã hamak kre kupê nẽ argõx mẽ nẽ ho õhto htok. ³⁴ Hãmri nẽ kaxkwa hwÿr rĩt nẽ htyk xà mẽnh tÿx nẽ kãm kapẽr. Mẽ pakapẽr kãm kãm:

“E ajamak katêr nẽ anhõhto kaxkrit.” Anẽ. Nom kapẽr kãm kãm: “Epata.” Anẽ. ³⁵ Hãmri nhũm hamak katêr nẽ õhto kaxkrit kurê kumrẽx nẽ tãm kapẽr nẽ tãm ama. ³⁶⁻³⁷ Hãmri nhũm mẽ kot omunh xwýnhjaja amnhĩ jaêr pê Jejus kot ho mex ã omu nẽ kamã no puma nẽ. Hãmri nhũm mẽ kãm:

—Kwa kër ka mẽ akwÿjê mã ja hã ijarẽnh kêt nẽ.

Anhÿr tã no nhũm mẽ kuma nẽ ãm kuma nẽ ma mẽ piitã mẽ kãm harẽnh o ri hprõt nẽ mẽ kãm:

—Kwa Jejus na mex o mex. Na hte mẽ ho mex o pa nhũm mẽ umar kêt xwýnhjaja akupÿm tãm ama nhũm mẽ kapẽr kêt xwýnhjaja akupÿm tãm kapẽr. ãm hãmri na hte ã mẽ hipêx anhÿr o pa. Nà ãm mex o mex. Anẽ.

8

Jejus kot mẽ ho 4.000 nẽ mẽ kãm mẽ õ hã harẽnh

Matêwre 15.32-39

¹⁻² Tã nhũm arĩgro hõ hã nhũm mẽ ohtõ nẽ nhÿri kapõt ã Jejus ã htu rax nẽ kot mẽ ahkre mar o kuhê hã apkati axkrunẽpxi. Nhũm mẽ apkur xà hã mẽõja ra mẽ kệp hapêx. Hãmri nhũm Jejus ja hã mẽ omu hãmri nẽ hkõt mẽ pa ho mẽ pa xwýnhjê mã akir nẽ mẽ kãm hpa ho apê nẽ mẽ kãm:

—E mẽ amnẽ ixwÿr mra nẽ ixkapẽr ma. Anẽ.

Nhũm mẽ hwÿr mra nẽ kuhê nhũm mẽ kãm:

—Kwa na pa inhmã mẽ kot inhmar o kuhê xwýnhjê kaprĩ nẽ. Na mẽ ra mẽ pahkõt ri pa hã apkati axkrunẽpxi nhũm mẽ apkur xà hã mẽõja mẽ kệp hapêx. ³ Mẽ õ krĩ hwÿr awry jakamã koja mẽ mẽmoj kur kêt rãhã ma akupÿm pa hãmri nẽ pry hã hirot nẽ rôrõk o pa. Hãmri pa inhmã mẽ hkaprĩ nẽ. Anẽ

⁴ Hãmri nhũm mẽ kuma nẽ axte tee ri hamaxpẽr nẽ kãm:

—Kwa nã nhÿhÿnh kot puj kêt mẽ kãm mẽmoj to mra? Jar ãm kapõt pix kênã. Anẽ.

Hãmri nhũm mẽ kãm:

⁵ —Nà tanhmã na mẽ anhõ pãwtija kute? Anẽ.

Nhũm mẽ kãm:

—Ăm kệp 7 pix. Nẽ kaxyw tep kwỳ no ăm grêre. Anẽ.

⁶ Hãmri nhũm mẽ kuma nẽ mẽ kot mar o kuhê xwỳnhjê mã anẽ nhũm mẽ kuma nẽ hkrĩ pa. Hãmri nhũm pãwti jamỳ nẽ ho Tĩrtũm wỳ nẽ kãm:

—Pa Papaj. Nà ka na apê mẽ inhmã mẽ inhõ ho apa xwỳnh. Jakamã amex o amex. Ăm amex kumrêx. Anẽ.

Hãmri nẽ mẽ kãm ho hkry pa nẽ hkôt mẽ pa ho mẽ pa xwỳnhjê mã kugõ nhũm mẽ ho mẽ hipêx pa.

⁷ Nhũm hpãnhã tepta py nẽ mã ho anẽ nẽ ho Tĩrtũm wỳ. Hãmri nẽ hkôt mẽ pa ho mẽ pa xwỳnhjê mã kugõ nhũm mẽ mã ho anẽ nẽ hamỳ nẽ ho mẽ hipêx pa. ⁸⁻⁹ Hãmri nhũm mẽ ohtô rax kumrêx tã piitã apku nẽ õhy htu pa. Mẽmyjaja kệp 4.000 nẽ kaxyw mẽ hprõjaja nẽ mẽ hkrajaja. Tã nhũm Jesus mẽ apkur xàja o mẽ hipêx pa. Nhũm hkôt mẽ pa ho mẽ pa xwỳnhjaja hakrêx o akuprõ nẽ ho kawà ho 7 nẽ ho nýt. Hãmri nhũm Jesus ma akupỹm mẽ õ krĩ hwỳr mẽ kot mar xwỳnhjê jano nhũm mẽ ma akupỹm hapêx. ¹⁰ Hãmri nhũm Jesus hkôt mẽ pa ho mẽ pa xwỳnhjê mẽ ro hã kanõre hkrem agjê nẽ mẽ hkwỳm ma Tamanut wỳr mỗ.

Parijew nhõ xwỳnh kwỳ kot mẽmoj tã Jesus kamã hamak ã mẽ harênh

Matêwre 12.38-42, 16.1-4; Rukre 12.54-59

¹¹ Tã nhũm mẽ Tamanut wỳr pỏj nhũm Parijew nhõ xwỳnh kwỳjaja Jesus pumu nẽ ma hwỳr mra nẽ mẽmoj tã kuwỳ nẽ kãm:

—Pa. Ot pa mẽ awỳr mra. Kwa mẽ inhmã aa mẽ ixte mẽmoj pumunh kêt õ ho anẽ. Pa mẽ ja hã apumu nẽ Tĩrtũm kot mẽ ixwỳr amênh ã akôt ijamaxpêr kurê kumrêx. E tokyx. Anẽ.

Kot tee ri mẽ kãm mẽmoj to anhỹr kaxyw nẽ ho anhỹr kêt nhũm mẽ kot hã omunh nẽ ma hkwỳjê mã ho kapêr punuj kaxyw nhũm mẽ ã hêx rom kãm kapêr anẽ. ¹² Nhũm ra kãm mẽ kot amnhĩ kaxyw hkôt hamaxpêr kêt kãm ã kapêr anhỹr mar kaga nẽ. Hãmri nẽ tee ri amnhĩ tã mẽ

hamaxpêr ã mẽ omu nẽ htyk xà mênh tỳx nẽ mẽ kãm:

—Hêxta waa nẽ. Mẽ ajamaxpêr punuj pix o na ka htem ri ajamaxpêr o apa. Ixpê Tĩrtũm kot mẽ awỳr inhmênh xwỳnh tã ka mẽ ja hã ixkôt ajamaxpêr kêt nẽ. Nà mo kaxyw kot pa kêt mẽ amã mẽmoj to anẽ? Kot paj ho anẽ ka mẽ omu nẽ ăm omu nẽ ixkôt ajamaxpêr kêt nẽ. Nà kot paj mẽ amã mẽmoj to anhỹr kêt nẽ. Anẽ.

¹³ Hãmri nẽ mẽ kure nẽ hkôt mẽ pa ho mẽ pa xwỳnhjê mẽrohã ma mra nẽ akupỹm kanõre hkrem agjê nẽ ma xarmã mỗ.

Jesus kôt mẽ pa xwỳnhjaja kot hprĩ hã omunh kêt ã mẽ harênh

Matêwre 16.5-12; mããnhẽn Makre 6.52

¹⁴ Tã nhũm mẽ kormã kanõre kamã xarmã mỗr rôm nhũm Jesus kôt mẽ pa ho mẽ pa xwỳnhjaja tee ri mẽ apkur xà japêr nẽ axpên mã:

—Kwa hêxta waa nẽ. Na pu mẽ panhõ pãwti re nẽ amnhĩ kôt o pamõr kêt nẽ. Nẽ ăm pixire nẽ o mỗ. Anẽ.

¹⁵ Hãmri nhũm Jesus tee ri mẽ kuma nẽ tanhmã hã mẽ kãm kapêr to. Nom mẽmoj tã kuxi nẽ mẽ kãm awjarê nẽ mẽ kãm:

—Kwa oko kêt ka mẽ amnhĩ nê Parijew nhõ xwỳnh mẽ Pahi Erox nhõ pãw kaxkrit xà pumunh mex nẽ. Anẽ.

¹⁶ Hãmri nhũm mẽ kuma nẽ tee ri kapêrja kukamã hamaxpêr pê hã axpên kukjêr o hkrĩ nẽ axpên mã:

—Kwa mo na ri ã mẽ pamã pãw kaxkrit xà jarênh anẽ? Mãn mẽ panhõ pãwti hkêt ã mẽ pahpumu hã na ri ã harênh anẽ nà? Anẽ.

¹⁷ Hãmri nhũm Jesus mẽ kapêr ã mẽ kuma nẽ mẽ kãm:

—Kwa mon ka wem ăm xatã axpên mã mẽ panhõ pãwti hkêt jarênh pix o mỗ? Xàn pa hte mẽ apyrà nẽ tee ri mẽ paxàpkur xà hkêt kukamã ijamaxpêr o ixpa? Nà inhmã ja tanhmã kute hkêt. ¹⁸ Ra mẽ ano ho mẽ ate ixpumunh mex tã kormã aprĩ hã tanhmã ixkute hã ixpumunh mex kêt. Nẽ mẽ ajamak o ixkapêr mar mex tã aprĩ hã mar tỳx kêt.

Kwa wem ixte amnhĩ nhĩpêx mã aja-maxpêr tỳx nê. E mẽ inhmã mẽmoj jarê. ¹⁹ Jãã ixte mẽ kêp 5.000 mã pãwti kêp 5 nhĩrênhta. Tanhmã na ka prem hakrêx o akuprô nê ho kawà ho nýt to? E mẽ atô inhmã harê. Anê

Hãmri nhũm ja kãm: “Na pa prem ho kawà ho 12 nê ho nýt.” Anê. ²⁰ Nhũm kuma nê mẽ kãm:

–Tỳ na pre hakrêx ã kawà kêp 12. Tã ham ixte mẽ kêp 4.000 mã pãwti kêp 7 nhĩrênhta. Tanhmã na ka prem hakrêx ho akuprô nê ho kawà ho nýt to? Anê.

Nhũm ja kãm: “Na pa prem ho 7.” Anê. ²¹ Hãmri nhũm kuma nê mẽ kãm:

–Tỳ ra ixte mẽ anoo mã ã ja ho anhỹr o axkrut tã ka mẽ ra hã ano hkêt nê arĩ xepên mã mẽ panhõ pãwti hkêt pix jarênh o ixkôt mỗ. Kormã mẽ ate ixãhpumunh tỳx ã ixpumunh kêt. Anê.

Jejus kot akupỹm nohkre xwỳnh o mex ã harênh
Juãw 9.1-7

²² Tã nhũm mẽ ma krĩ pê Pesêj wỳr mỗ nê ra hwỳr pỏj. Hãmri nhũm krĩ nhõ xwỳnh kwỳjaja mẽ omu nê Jejus wỳr mẽhõ myja o tẽ. Ra nohkre nê rĩt kêt nê pa xwỳnhja nhũm mẽ hpa hã kupyn hwỳr o tẽ. Hãmri nê ho kuwỳ nê kãm:

–Pa Pahihti? Ot pa mẽ awỳr ja ho tẽ. Kwa hã anhĩhkra xi nê akupỹm mẽ inhmã no ho mex. Anê.

²³ Hãmri nhũm mẽ kuma nê nohkre xwỳnhhta pumu nê hpa hã kupy nê o tẽ nê krĩ pê ho kato nê nhỹri mẽ hkàx ã o xa. Hãmri nê no hã argôx mẽ nê hã ãhkra xi nê kãm:

–E mãn ka mẽmoj pumu nà? Anê.

²⁴ Hãmri nhũm kuma nê hkrãkato nê ri rĩt hãmri nê kãm:

–Tỳ na pa mẽmoj pumu. Nom ixprĩ hã omunh mex kêt nê. Te mẽmo pĩ hpàr kwỳ ri mrar pyràk. Anê.

²⁵ Hãmri nhũm axte no hã ãhkra xi nhũm tã rĩt mex nê. Ri hprĩ hã mẽmoj piitã omunh mex nê. ²⁶ Hãmri nhũm Jejus akupỹm òrkwỹ hwỳr kumẽ nê kãm:

–E kêr ka kape hã ri amrar kêt nê. ãm ma ma akupỹm anhõrkwỹ hwỳr atêm kurê kumrêx. Anê.

Jejus kot amnhĩ tã hkôt mẽ pa xwỳnhjê kukjêr ã harênh

Matêwre 16.13-20; Rukre 9.18-21

²⁷ Tã hãmri nhũm Jejus ma hkôt mẽ pa ho mẽ pa xwỳnhjê mẽ mẽ ma mỗ. Ma krĩ pê Sejarej Pìrìpos pu hã krĩ hkwỳ hkôt mỗ. Nê kormã pry hã mỗ nhũm Jejus amnhĩ tã hkôt mẽ pa ho mẽ pa xwỳnhjê kukja nê mẽ kãm:

–Kwa mẽ inhmã mẽmoj jarê. Tanhmã na htem ahpỹnhã ri xepên mã ijarênh to wehe? Anê.

²⁸ Hãmri nhũm mẽ kãm:

–Nà na htem ahpỹnhã tanhmã ajarênh to. Na hte kamã mẽ hkwỳjaja xepên mã ato finat Juãw Paxis ã ajarê. Nê kamã mẽ hkwỳjaja ato finat Eris ã ajarê nê mẽ hkwỳjaja apê Tĩrtũm nhỹ hã kapêr o pa xwỳnh ra htyk xwỳnhjê hõ hã ajarê. ã na htem ahpỹnhã xepên mã ajarênh anhỹr o pa. Anê.

²⁹ Hãmri nhũm mẽ kuma nê mẽ kãm:

–No we mẽ kajaja? Ixpê mẽhõ hã na ka htem xepên mã ijarê? Anê.

Hãmri nhũm Simãw Pêtre kãm:

–Nà mẽ pajaja na pa htem apê Tĩrtũm kot mẽ ixkaxyw axãm nê mẽ ixwỳr amênh xwỳnh ã ajarê. Nê apê mẽ ixpiitã mẽ inhõ Pahi Maati hã ajarê. ã na pa htem xepên mã ajarênh anê. Anê.

³⁰ Hãmri nhũm kuma nê mẽ kãm:

–Nà ãm hãmri na ka htem ã ijarênh anê. ã ixte anhỹr. Kwa nom kwa kêr ka mẽ inhma. Kêr ka mẽ kormã ã akwỳjê mã ijarênh anhỹr kêt nê. Anê.

Jejus kot amnhĩ kukamã amnhĩ jarênh ã harênh

Matêwre 16.21-23; Rukre 9.22

³¹ Tã nhũm Jejus amnhĩ kukamã hkôt mẽ pa ho mẽ pa xwỳnhjê mã tanhmã amnhĩ jarênh to nê mẽ kãm:

–Nà ra mẽ ate Tĩrtũm kot mẽ akaxyw ixãm ã ixpumunh mex. No mẽ pahkwỳjaja kãm ja hã ijarênh mar nê ixpumunh prãm kêt. Ijaew krãhtũmjê mẽ Tĩrtũm kapêr tũm o mẽ ahkre o mẽ pa xwỳnhjê mẽ

patre krähtümjaja na mẽ kãm ja hã ixpumunh prãm kêt. Jakamã koja mẽ nhÿrmã ixpynê nê ixtak rax nê ixpĩ. Nom kot paj ixtyk ã ixtã apkati axkrunëpxi hãmri nhÿm Tirtÿm akupÿm ixto ixtĩr. Anê.

³² Hãmri nhÿm mẽ kot hpĩr ã amnhĩ jarënh ma nê tee ri hkukamã hamaxpër. Hãmri nhÿm Simãw Pêtreja hwÿr tẽ nê hkwÿjê pê ho kato nê mẽ hkàx ã o xa nê kãm:

–Kwa nà Pahihti. Koja Tirtÿm anê mẽ omunh mex nê nhÿm mẽ ã anhĩpêx anhÿr kêt nê. Kwa ri ã kapër anhÿr kêt nê. Anê.

³³ Hãmri nhÿm kuma nê hwÿr apkjê nê pu hã hkôt mẽ pa ho mẽ pa xwÿnh piitã omu. Hãmri nê mẽ hamak mã Simãw Pêtre mã kapër nê kãm:

–Tk. Kwa na ka ã inhmã akapër anhÿrja o te Satanasti nhÿ hã akapër pyrãk. Tirtÿm nhÿ hã na ka ã inhmã akapër anhÿr kêt nê. ãm jar mẽ kãm Tirtÿm kapër mar prãm kêt xwÿnhjê jamaxpër o na ka ajamaxpër nê ã inhmã akapër anê. No Tirtÿm jamaxpër o ajamaxpër kêt nê. Anê.

Jejus krajaja tanhmã kot amnhĩ nhĩpêx hto hã mẽ harënh

Matêwre 6.24-28; Rukre 9.23-27; Juãw 12.24-26; mããnën Apokarip 2.10, 12.11

³⁴ Tã nhÿm Jejus amnhĩ wÿr mẽ kot mar o kuhê xwÿnhjê mẽ hkôt mẽ pa ho mẽ pa xwÿnhjê mã anê nhÿm mẽ hwÿr axkamê nê kuhê. Hãmri nhÿm tanhmã mẽ ahkre hto nê mẽ kãm:

–E mẽ inhma. Kot kaj mẽ ixkôt amnhĩ xunhwÿr ã amnhĩ jarë hã kot kaj mẽ mããnën amnhĩ jarënh o: “Jejus kęp inhõ Pahihti jakamã kot paj ãm kapër kôt pix mã amnhĩ nhĩpêx rãhã ho ri ixpa. Kwãr ixkwÿjaja tanhmã hã inhĩpêx to pa arĩ hkôt amnhĩ nhĩpêx rãhã ho ixpa.” Anhÿr o amnhĩ jarë.

³⁵ –Koja mẽ ixtã mẽ atõx pĩ rÿ ixtã tanhmã mẽ ato ka ty. Ate tanhmã ijarënh to ho apa hã nhÿm mẽ apĩ. Tã nom koja akaxwÿnh ma inhõ krĩ hwÿr àpir kurê kumrêx nê kamã atĩr tÿm nê amex rãhã nê apa ho apa.

Nom kot kaj mẽ jar atĩr prãm xàj ixkaga hãmri nê hwÿr axàpir kêt nê.

³⁶⁻³⁷ –Nê koja mẽhõ hikukrêx gryk ã Tirtÿm kaga. Hãmri nê nhÿrmã ty nê ÿ kamã kuwy hwÿr ma mõi nê amnhĩ kôt kukrêx õ hpyr nê o mõi kêt nê. Koja tee ri kuwy hwÿr mõi py-maj amnhĩ nê hikukrêx rax o amnhĩ pãnhã amnhĩrer prãm kaprÿ. Tanhmã koja amnhĩ to nê Tirtÿm mã amnhĩre nê ma õ krĩ hwÿr api? Koja ã amnhĩ nhĩpêx anhÿr kêt nê.

³⁸ –Nê koja mẽhõ ixte mẽ ahkre hã inhma nhÿm ja kęp omnuj japër. Nhÿm kot mẽ kãm ixprãm nõkati xwÿnhjê hkôt pa gryk ã ixkaga. Hã kot paj nhÿrmã mẽ ato amnhĩptàr kaxyw akupÿn wrÿ nê amnhĩ xwar kot ixkaga xwÿnhhta kaga. ãm hãmri na pa mẽ amã ja hã amnhĩ jarë. Kot paj nhÿrmã inhõ Papaj nhÿ hã ixte mẽ ho amnhĩptàr kaxyw akupÿn wrÿ nhÿm kapër o mẽ wrÿk xwÿnhjaja man ixkôt wrÿ. Pa mẽ wrÿ hãmri nê ra mẽ kot ixkaga xwÿnhjaja pa amnhĩ pyrã nê amnhĩ xwar mẽ hkaga hpa. Anê.

9

¹ Nhÿm Jejus arĩ mẽ kãm kapër nê mẽ kãm:

–ãm hãmri na pa mẽ amã amnhĩ jarë. Kot paj nhÿrmã akupÿn ixte mẽ ato amnhĩptàr kaxyw mẽ awÿr wrÿ kãm ga. Tã kot kaj mẽ akwÿjaja kormã atĩr ri ja kukamã tanhmã ixte amnhĩ nhĩpêx to hã ixpumu. Anê.

Jejus hirã htÿx kãm ãm ã harënh

Matêwre 17.1-9; Rukre 9.28-36; mããnën Sikÿn Pêtre 1.16-18

² Tã nhÿm arĩgro kęp 6 nê hapêx nhÿm Jejus ma nhÿri hixêt prêk wÿr tẽ. Nê Simãw Pêtre nê Xiakre nê Juãwja nhÿm ma amnhĩ kôt wa mẽ o mõi. Nhÿm wa mẽ ahte mõi nê hixêt prêk ã api nê himõk ã kuhê. Hãmri nhÿm Jejus axtem nê xa. ³ Ra ê haka htÿx kumrêx nê xa. ⁴ Hãmri nhÿm ja wa kaxkwa rÿm hwÿr wrÿ nê kuri kãm kapër. Finat Mojes mẽ finat Erisja wa wrÿ nê kuri kãm kapër o xa. Tirtÿm amnepêm amnhĩ wÿr wa ho àpir tã nhÿm wa akupÿn wrÿ

ně kām kapēr. ⁵⁻⁶ Nhũm wa mẽ mex kumrêx nê hirã htỳx kām kuhê nhũm Jejus kôt mẽ mõi xwỳnhjaja wa mẽ omu nê mẽ kamã no pyma nê. Nê tee ri mẽ kām tanhmã kapēr to hkukamã hamaxpēr. Hãmri nhũm Simãw Pêtre hamaxpēr nê Jejus mã kām:

—Kwa Pahihti. Nà ãm hãmri na pu mẽ amnê mõi. Kwa pu mẽ kritpêm jar axkamê nê tokyx panojarêt kêt nê. Pa mẽ amã pô nhĩrõnh o axkrunêpxi nê hipêx. Amã nê Mojes mã nê Eris mã hõ nhĩpêx ka mẽ kamã akrĩ. Kwa xàt pa mẽ amã ho anê nà? Anê.

⁷ Hãmri nhũm kakrã jaka htỳx wrỳ nê wa mẽ hkunor pa nhũm wa mẽ kamã kuhê. Hãmri nhũm kakrã kamã Tĩrtũm mẽ kām kapēr nê mẽ kām:

—Ota Ixkra xa. Inhmã hapê ho inhmã hapê. Kêr ka mẽ kapēr mar tỳx rãhã ho ri apa. Anê.

⁸ Hãmri nhũm mẽ kuma nê amnhĩ pu hã rĩt nhũm ãm Jejus pix mẽ kuri xa nhũm Mojes mẽ Erisja wa ra ma akupỹm api nhũm mẽ ãm Jejus pix pumu.

⁹ Hãmri nhũm mẽ ma akupỹm hkwyjê hwỳr wrỳk o mõi nhũm Jejus mẽ kām:

—Kwa kêr ka mẽ ham mẽ ate mẽmoj pumunh xwỳnhhta kormã nhãm mẽ kām harênh kêt nê. Koja mẽ mẽmo arĩgro hã ixpĩ hãmri nhũm Tĩrtũm akupỹm ixto ixtĩr ka mẽ rĩ kormã mẽ kām ja hã ijarênh o ri apa.

¹⁰ Anê hãmri nhũm mẽ kuma nê mẽ kām harênh kêt nê. ãm axpên mã pix mã harê nê kot akupỹm htĩr ã amnhĩ jarênhja ã axpên kukjêr o pa nê axpên mã:

—Kwa mo na ri ã akupỹm htĩr ã amnhĩ jarênh anê? Tanhmã kot we amnhĩ to nê htyk tã akupỹm htĩr? Anê.

Hãmri nê tee ri hkukamã hamaxpēr o hkôt pa.

Juãw Paxis te kot Eris pyrãk ã harênh

Matêwre 11.13-15, 17.10-13

¹¹ Hãmri nhũm mẽ kormã ahpar mã wrỳk o mõi mẽ nhũm Jejus kôt mẽ

mõi xwỳnhjaja mẽmoj tã hkukja nê kām:

—Kwa mẽ inhmã mẽmoj jarê. Na hte Tĩrtũm kapēr tũm o mẽ ahkre xwỳnhjaja mẽ inhmã: “Eris kumrêx koja Tĩrtũm mẽ pahwỳr kumê nhũm Krisja hapu hã wrỳ.” Anê. Na htem ã mẽ inhmã war ajarênh anê. Tã ka na ka ra wrỳ nom nhũm kormã Erisja akukamã wrỳk kêt nê. Anê.

¹²⁻¹³ Hãmri nhũm mẽ kām:

—Nà ãm hãmri na htem mẽ amã ã ja jarênh anê. Na pre ra ixkukamã te kot Eris kot amnhĩ nhĩpêx pyrãk xwỳnhhta tẽ nê ixkutêp mẽ kām ijarênh o pa. Nom mẽ kot ixkukamã ijarênh xwỳnh ã omunh kêt jakamã na prem axtem nê kām tanhmã hipêx to hprãm xà hkôt tanhmã hipêx kati hton kupĩ. Tã koja mẽ ã hipêx anhỳr pyrã nê mã ixto anê nê inhĩpêx kati nê tokyx mẽ kām ixprãm kêt xwỳnhjaja ixpynê nê ixpĩ pa amnhĩ xà htỳx kamã ijamak kãm ty. Tĩrtũm kapēr ã kagã htũm kot wa ijamê wa ixkukamã wa ijarênh xà hkôt. Anê.

Jejus kot mẽhõ hkra nê mẽkarõmnuti janor ã harênh

Matêwre 17.14-21; Rukre 9.37-43

¹⁴ Hãmri nhũm Jejus nê Simãw Pêtre nê Xiakre nê Juãwja mẽ akupỹm hkwyjê hwỳr hpõx o mra nê amnhĩ kukamã hkwyjê pumu nhũm mẽ ohtõ nê mẽ hã akuprõ nê mẽ kām kapēr. Nhũm Tĩrtũm kapēr tũm o mẽ ahkre ho mẽ pa xwỳnhjaja mẽmoj tã mẽ hkukjêr o kuhê. ¹⁵ Jakamã nhũm Jejus mẽ hwỳr hpõx o tẽ nhũm mẽ pikuprõnh xwỳnhjaja amnhĩ wỳr omu nê hkĩnh nê. Hãmri nê kutã hprõt nê kām:

—Pa. Nà ãm hãmri na ka akupỹn mẽ ixwỳr tẽ. Anê.

¹⁶ Hãmri nhũm mẽ kām:

—Kwa mẽmoj tã na ka mẽ axpên mã axãkjêr o akuhê? Anê.

¹⁷⁻¹⁸ Hãmri nhũm mẽhõ myja kãm:

—Nà ixkra hã na pa mẽ axpên mã ixkapêr. Na pre mẽkarõmnuti ixpê hwỳr axà nê tanhmã ixpê ho nhũm kapêr kêt nê pa. Nhũm hte xatã tanhmã ixpê ho nhũm pykap amnhĩ

rē nē hakwa jamrô ho hikwỹ. Hāmri nē à htỳx kamã ama nē amnhĩ nham o axpēn kamnhar tỳx kumrēx pē htỳx pa nē hikwỹ nē ixpē omnuj tỳx nē. Na hte ã mēkarōmnuti nhỹ hã amnhĩ nhĩpēx anhỹr o pa. Jakamã na pa ate inhmã ho mex kaxyw man o tē nē tee ri ajapēr. Hāmri nē ho akôt mē pa ho mē pa xwỳnhjê hwỳ nhũm mē kot inhmã ho mex kaxyw tee ri tanhmã ho hkapyr. Anē.

¹⁹ Hāmri nhũm Jejus kuma nē hkôt mē pa ho mē pa xwỳnhjê mã kãm:

–Hêxta waa nē. Ra mē ate Tĩrtũm nhỹ hã ixte mē ho mex ã ixpumunh ryy htã ixpyrà nē ã amnhĩ nhĩpēx anhỹr kêt nē. Mãn ka mē kormã kaxyw Tĩrtũm kôt ajamaxpēr tỳx kêt nē. E amnē ixwỳr akra ho tē pa omu. Anē.

²⁰ Hāmri nhũm mē hwỳr o tē nhũm mēkarōmnuti Jejus pumu nē tanhmã hkrata o htỳx to nhũm pykap tēm nē hakwa jamrô nē amnhĩ rēnh o nō.

²¹ Nhũm Jejus omu nē hipêêxã mã:

–Kwa tanhmã na ra kot amnhĩ nhĩpēx ã mytwrỳ kute? Anē.

Nhũm kãm:

–Nà hprĩre rũm na hte ã amnhĩ nhĩpēx anhỹr o pa. ²² Na hte mēkarōmnuti xatã ixpē hpĩr kaxyw kuwy kamã kurē nē gôx kãm kurē. Kwa kot ka ate ho mex kukamã axàhpumunh japēr nē wa ixkamã axukapĩ nē akupỹm inhmã ho mex. Anē.

²³ Hāmri nhũm Jejus kãm:

–Xàn ka tee ri ixte ho mex kaxyw ixkukamã ajamaxpēr? Nà ixte mēmoj piitã ho anhỹr kaxyw ixàhpumunh tỳx kēnã. Kot ka mē atō mēmoj tã amnhĩ kaxyw ixkôt ajamaxpēr tỳx hã kot paj amã ho anē. Anē.

²⁴ Hāmri nhũm kuma nē kãm hkra mex prãm tỳx xaj kapēr tỳx nē kãm:

–Nà na pa amnhĩ kaxyw akôt ijamaxpēr. Nom kot kaj tanhmã ixkrã hto pa akôt ijamaxpēr tỳx rãhã ho ri ixpa Pahihti. Anē.

²⁵ Rôm nhũm mē ohtô rax nē hwỳr kormã mra nhũm Jejus amnhĩ wỳr mē omu hāmri nē mēkarōmnutija mã

kapēr kurē kumrēx. Nē kãm kapēr kãm hihtỳx nē kãm:

–Pa mēkarōmnuti. E apê mē ho mē kapēr kêt nē mē umar kêt o apa xwỳnh ã pa amã ixkapēr ka inhma. Kêr ka mē hkrata pē akato nē ma amōr o mō nē axte tanhmã ho hkêt nē. Anē.

²⁶ Hāmri nhũm tee ri kot kãm karōja ma nē gryk xaj xatã amỹra nē mē hkrata o htỳx kumrēx nhũm htertēt tỳx o nō. Hāmri nhũm kêp kato nē ma tē nhũm te htyk pyrà nē nō nhũm mē tee ri omu nē ra htyk ã hkamnhĩx. ²⁷ Hāmri nhũm Jejus hpa hã kupy nē kànhmã ãm nhũm akupỹm mex nē kànhmã xa nē ri mra. Nē tãm kapēr o mra nē umar mex nē.

²⁸ Tã nhũm Jejus hkôt mē pa ho mē pa xwỳnhjê mērohã ma akupỹm amnhĩm hikranh xã hã ixkreja wỳr mra nē hwỳr agjê nē hkrĩ. Hāmri nhũm Jejus kôt mē pa ho mē pa xwỳnhjaja amnhĩ tã hkukja nē kãm:

–Kwa mē inhmã mēmoj jarē Pahihti. Na pa mē tee ri axwakre kamã mē hkrata nē mēkarōmnuti janor kaprỳ. Kwa mon pa mē apyrã nē ja ho anhỹr mex kêt nē? Anē.

²⁹ Hāmri nhũm mē kãm:

–Nà axtem na mēkarōmnuti ja. Na htem mē nē hanor tokyx anhỹr kêt nē. Na htem ho Tĩrtũm wỳr tỳx nē rĩ kormã hano. Anē.

Jejus kot htyk kukamã amnhĩ jarēnh

Matêwre 17.22-23; Rukre 9.44-45

³⁰⁻³¹ Tã nhũm Jejus mē hkôt ri mē pa ho pa xwỳnhjê mē krĩa rũm hapôj nē ma nhãm mō. Nē ma pyka pē Garirej kahti hkôt mō. Nom mē piitã mē hkãx ã mō. Jejus kormã kot amnhĩ tã tanhmã hkôt mē pa ho mē pa xwỳnhjê jahkre hto ho pa jakamã kãm mē hkãx ã mē o pa hprãm nē. Hāmri nē amnhĩ kukamã mē kãm tanhmã amnhĩ jarēnh to nē mē kãm:

–E kot paj mē amã tanhmã amnhĩ jarēnh to ka mē inhma nē inhmar tỳx nē. Koja mē kãm ixprãm kêt xwỳnhjaja tokyx mē kãm ixtã amỹnê

nhũm mẽ ixpĩ. Kot paj ixtyk ã ixtã apkati axkrunẽpxi hãmri nhũm Tĩrtũm akupỹm ixto ixtĩr. Kwa kêr ka mẽ ja ma nẽ hã anohtỳx nẽ ho apa. Anẽ.

³² Hãmri nhũm mẽ tee ri ã kot amnhĩ jarẽnh anhỹrja ma nẽ axpẽn mã:

—Kwa mo na ri ã mẽ pamã amnhĩ jarẽnh anẽ? Nà kêp mẽ panhõ Pahi Maati hã kot amnhĩ jarẽnh kẽnã kot kêt mẽhõ kupĩ.

Anhỹr o axpẽn mã harẽnh o hkõt mỗ. Hãmri nẽ ã kot amnhĩ jarẽnh anhỹr mar prãm kêt jakamã hprĩ hã tanhmã hkukjêr to hkêt nẽ. ãm akryk hkõt mar o mỗ.

Mẽ kot amnhĩ to rũnh xwỳnh jarẽnh Matêwre 18.1-5; Rukre 9.46-48

³³⁻³⁴ Tã nhũm Jejus mẽ hkõt mẽ pa ho pa xwỳnhjaja kormã ma krĩ pẽ Kapanau hwỳr mỗ nhũm hkõt mẽ pa ho mẽ pa xwỳnh pẽ 12jaja tanhmã amnhĩ kukamã hamaxpêr to hãmri nẽ axpẽn mã:

—Kwa mẽ pahtõ kot puj we nhỹrmã pahpê pahi nẽ mẽ ho amnhĩptàr rax o ri pahkwỳjê jakre?

Anhỹr o axpẽn kukjêr o Jejus kõt mỗ. Nẽ axpẽn mã: “Nà pa.” Nhũm mẽ hkwỳjaja: “Nà kêt pa.” Anhỹr o hkõt mỗ. Hãmri nhũm Jejus mẽ mar o mỗ. Hãmri nhũm mẽ mỗ nẽ nhỹri amnhĩm hikranh xà hã ixkre hwỳr pỏj nẽ hwỳr agjê nhũm mẽ kãm:

—Kwa mẽmoj tã na ka mẽ pry hã amnhĩ jarẽnh o mỗ? Anẽ.

Hãmri nhũm mẽ tee ri kuma nẽ hpijaam nẽ. Nẽ kãm tanhmã amnhĩ jarẽnh to hkêt nẽ. ³⁵ Jakamã nhũm Jejus nhỹ nẽ mẽ kãm anẽ nhũm mẽ kuri hkrĩ pa nhũm mẽ kot mẽ kãm mẽ ho amnhĩptàr rax prãmta ã mẽ kãm kapêr nẽ mẽ kãm:

—E mẽ inhma. Ka mẽ atõ amã mẽ ho amnhĩptàr rax prãm. Hã kêr ka te apê mẽ piitã mẽ kãm amarĩ axapênh xwỳnh pyrãk o amnhĩ nhĩpêx o mẽ hkõt apa. Jao mẽmoj to mẽ kutã anojarêt rãhã nẽ. Anẽ.

³⁶ Hãmri nẽ amnhĩ wỳr mẽhprĩre hõ mã hpa ho apê nhũm hwỳr tẽ nhũm

kumỳ nẽ o nhỹ nẽ hã mẽ kãm kapêr nẽ mẽ kãm:

³⁷ —E mẽ inhma. Kêr ka mẽ apê pahi pyrãk o tanhmã amnhĩ jarẽnh to ho ri apa hkêt nẽ. ãm te amarĩ ri mẽ apa pyrãk o amnhĩ nhĩpêx o ri apa. Jao nhỹri mẽhprĩre hõ pumu nẽ kamã axukaprĩ nẽ kãm mẽmoj tanhmã ho rỳ kãm mẽmoj gõ. Hãmri nẽ ã amnhĩ nhĩpêx anhỹr o te pa ate tanhmã ixto mex to pyrãk o amnhĩ nhĩpêx. Nẽ kot ka mẽ atõ pa tanhmã ixto mex to nẽ te ate Tĩrtũm o mex pyrãk o amnhĩ nhĩpêx. E kêr ka mẽ amã amnhĩ to rũnh prãm nẽ ã amnhĩ nhĩpêx anhỹr o ri apa. Anẽ.

³⁸ Hãmri nhũm Juaw nhỹhỹnh tẽn mẽ hwỳr axà nẽ Jejus mã:

—Kwa Pahihti. O mũj mẽhõ kêp mẽ pahkwỳ hkêt tã anhỹ hã mẽ nẽ mẽkarõmnuti janor o pa. Pa mẽ tee ri ja hã omu nẽ kêp mẽ pahkwỳ hkêt jakamã pa mẽ ã kot amnhĩ nhĩpêx anhỹrja nẽ kãm ixkapêr. Anẽ.

³⁹⁻⁴⁰ Hãmri nhũm kuma nẽ kãm:

—Kwa nà nẽ tanhmã kãm nẽ hkêt nẽ. Koja mẽhõ inhỹ hã aa mẽ kot mẽmoj pumunh kêt kwỳ ho anẽ hãmri nẽ kêp mẽ panhĩõ nẽ ri mẽ pahkwỳm tanhmã mẽ ahkre hto ho pa hkêt nẽ. Ra mẽ pahkõt kot amnhĩ nhĩpêx mã kẽnã. Jakamã kwa mẽ ja nẽ tanhmã kãm nẽ hkêt nẽ. Kwãr mãmrĩ ã amnhĩ nhĩpêx anẽ. Ja mex kẽnã.

⁴¹ —Koja mẽhõ nhỹri mẽ atõ amã kôr ã apumu nẽ hamaxpêr o: “Kwa Jejus kõt ri pa xwỳnh mũj kãm kôr. E pa kãm gỏ hkwỳ kê ho ixkõ.” Anhỹr o hamaxpêr nẽ apê ixkwỳ hã amã gỏ hkwỳ ka ho ixkõ. Nhũm ãm kot amã gỏ pix nhõr nhũm ate ho akõm tã nhũm Tĩrtũm atã omu nẽ ho mex rax nẽ. Anẽ.

Mẽ pahte amnhĩ tomnuj pymaj tanhmã amnhĩ nhĩpêx to hã mẽ pajarẽnh

Matêwre 18.6-9; Rukre 17.1-2

⁴² Nhũm Jejus arĩ hkõt mẽ pa ho mẽ pa xwỳnhjê mã kapêr nẽ mẽ kãm:

—Nẽ mẽ kot ixkõt amnhĩ xunhwỳr tohtuj anhỹr xwỳnhjaja. Koja mẽhõ ma mẽ hwỳr tẽ nẽ inhnê mẽ kãm

kapër. Më kot më mar nê tanhmã amnhĩ tomnuj to hprãm xàj hêx rom më kãm kapër nhũm më mar xà hkôt tanhmã amnhĩ tomnuj to. Hã koja Tirtũm ja hã omu nê kot inhnê tanhmã kãm nê xwýnh ta pumu nê homnuj tỳx nê. Te më kot mēhō pynênh nê mut ã kên pytĩ hō nhôr nê ma o htēm nê gō xupým rax kãm mēnh pyrāk o hipêx. Te ho ja pyrāk no ãm homnuj tỳx o hakre.

43-47 —E kwa më o kora. Kot kaj më anhĩkra rỳ apar o tanhmã amnhĩ tomnuj to. Hã kēr ka më axte ã amnhĩ nhĩpêx anhỹr pymaj te ate amnhĩ pē anhĩkra rỳ apar krãhyr nê mēnh pyrāk o amnhĩ nhĩpêx nê axte ã amnhĩ tomnuj anhỹr kêt nê. Rỳ ka më ano ho mēmoj punuj pumu. Hãmri nê kãm ajamaxpēr pix o apa pymaj te ate amnhĩ pē ano katōk nê mēnh pyrāk o amnhĩ nhĩpêx nê nhãm arīt kurê kumrêx. Kēr ka më ã amnhĩ nhĩpêx o apa rãhã nê. Hãmri nê nhỹrmã ty nê ma Tirtũm më wa inhō krĩ hwýr api. No kot ka më arĩ akutã ano nê arĩ akutã apar nê arĩ akutã anhĩkra rãhã ri mrar tã tōhã tanhmã ho amnhĩ tomnuj to. Hãmri nê nhỹrmã ty nê ma më kot amnhĩ xà htỳx kamã hamak tũm xà pē kuwy maatita wýr ma apa.

48 Kuwyja kamã na htem më kot amnhĩ tomnuj mýrapê amnhĩ xà htỳx kamã hamak rãhã ho pa ho pa hãmri nê aa hapōx kêt nê.

49 ã koja më kot amnhĩ tomnuj o më pa xwýnh piitã amnhĩ nhĩpêx anhỹr rãhã nê pa ho pa. 50 Jakamã kwa kēr ka më axpēn to mex rãhã ho ri apa. Nom axpēn kãm agryk nê tanhmã axpēn nhĩpêx to ho ri apa hkêt nê. Anê.

Nhũm pre ã Jejus hkôt ri më pa ho më pa xwýnhjê jahkre anê.

10

Më pahte axpēn kaga nê Jejus kot më pahkurê

Matêwre 5.31-32, 19.1-12; Rukre 16.18; määnên Wam Korit 7.10-16

1 Tã nhũm Jejus më hkôt më pa ho pa xwýnh mērohã ma pyka pē Jutej wýr mō. Hãmri nê pyhti pē Jotãw ã rê nê hpãnhã ma xarmã mō. Nhũm më axte më hã akuprō nhũm kē Jejus axte më ahkre ho xa. 2 Hãmri nhũm Parijew nhō xwýnh kwýjaja hwýr mra. Më kot hêx rom kamã hamak nê mar nê tanhmã ho kapēr punuj to kaxyw hwýr mra nê kãm:

—Pa. Ot pa më mēmoj tã akukjêr kaxyw awýr mra. Kwa tanhmã na pre amnepēm finat Mojesja më pahte më pahprō kaga hã më panhĩgêtjê mã karō hto? Xà koja më pahprō më pakapēr hkwým tanhmã amnhĩ nhĩpêx to pu më mýrapê hkaga nhũm Tirtũm ja hã më pahpumu nhũm ja kãm mex nê nà? Anê.

3 Hãmri nhũm më kãm:

—Tanhmã na pre Mojes Tirtũm nhỹ hã ja hã më amã karō hto? Anê.

4 Nhũm më kãm:

—Nà na pre harēnh o:

Kēr ka më aprō kaga kaxyw hãmri nê ate hkaga hã amnhĩ jarēnh ã kagà nê kãm agō nê rĩ kormã hkaga. Anê.

Na pre ã më inhmã ja hã karō anê. Anê.

5 Hãmri nhũm më kãm:

—Tỳ nom më kãm Tirtũm kapēr kôt amnhĩ nhĩpêx prãm kêt jakamã na pre ã më kãm ja jarēnh anê.

6 Amnepēm mēmoj piitã hkrax kãm na prem axpēn kaga hkêt nê. Na pre Tirtũm wam myja nhĩpêx nê hpãnhã kãm hprō nhĩpêx. Axpēn kaxyw wa hipêx. 7 Jakamã na hte mēmyjaja hprō kaxyw nê gryk ã katorxà nê hipêxà wa hkaga nê ãm hprō kôt pix mã pa ho pa. 8 Te wa tipxi nê ri wa pa pyrāk o axpēn nhĩpêx o pa. 9 Tirtũm tãm kot axpēn mã wa òr kēnã kot kêt mēhō wa kot axpēn kaga kaxyw tanhmã wa hipêx to rỳ tanhmã wa kãm kapēr to. Anê.

Nhũm pre ã Jejus më kãm kapēr anê. 10 Hãmri nê hkôt më pa ho më pa xwýnhjê më akupým ixkrem agjê nhũm më kãm:

—Kwa aprī hā mẽ inhmā mẽ kot axpēn kaga hā mẽ harēnh̄ta jarē pa mẽ ixprī hā kuma nà. Anē.

Hāmri nhūm mẽ kām:

11 —Nà kot kaj mẽ aprō kaga nē hpānhā nhām mēhō ho aprō nhūm Tirtūm noo mā te ate wam aprō kamā nhām aprō nyw o amnhīkati pyrāk. Tirtūm pē ja omnuj t̄yx nē. R̄y koja mēhō hprō kaga ka hpānhā ho aprō nhūm Tirtūm noo mā te ate wam mjēn pē ho amnhīkati pyrāk. Ja määnēn Tirtūm pē omnuj t̄yx nē.

12 —Nē mēnijaja. Koja mēhō ni ra mjēn kaga nē hpānhā nhām mēhō ho mjēn. Ja mex kēt. Mjēn krax kēp mjēn kumrēx kēnā kot kēt hkaga nē hpānhā nhām hō ho mjēn. Koja anē nhūm Tirtūm noo mā te kot wam mjēn kamā nhām hō ho amnhīkati pyrāk nhūm Tirtūm pē ja omnuj t̄yx nē. Anē.

Jejus kot amnhī nē mēhprījē janor kēt ā harēnh̄

Matēwre 19.13-15; Rukre 18.15-17

13 Tā nhūm Ijaew kw̄ȳjaja Jejus w̄yr mẽ hkrarejē jam̄y nē mẽ o mra. Kot mẽ hā ĩhkra jaxw̄yr nē mẽ ho Tirtūm w̄yr kaxyw hw̄yr mẽ o mra. Hāmri nhūm hkōt mẽ pa ho pa xw̄ȳnhjaja tee ri ja hā mẽ omu nē mẽ kām:

—Kwa mo kaxyw na ka mẽ Jejus w̄yr mẽ o mra? Kormā mẽ rāxre kēnā. Mē ma akup̄ym mẽ o mra nà? Anē.

14 Hāmri nhūm Jejus ja hā mẽ kuma nē mẽ kām:

—Kwa nà kwār mẽ māmrī ixw̄yr mẽ o mra. Mē ri inhnē mēhprījē kurē hkēt nē. Anē.

Hāmri nē mẽ kām hpa ho apē nhūm mẽ hw̄yr mẽ o mra nhūm mẽ kuri kuhē. Hāmri nhūm mẽ hā hkōt mẽ pa ho mẽ pa xw̄ȳnhjē mā kām:

—E mẽ jarejē pumu. Na htem hamakētkati nē hk̄inh̄ nē ri pare. Mē kām amnhī to rūnh prām kēt nē ri pare. Tā Tirtūm kōt mẽ kot amnhī nhīpēx o ri mẽ pa xw̄ȳnhjaja na htem mẽ urāk nē kām amnhī to rūnh prām kēt nē ri pa.

15 —Na hte jarejaja hipēêxà nē katorxà wa kapēr ma nē wa hkōt ri amnhī nhīpēx o ri pare. Tā ixpē

Tirtūm kot mẽ aw̄yr inhmēnh xw̄ȳnh na pa. Kot ka mẽ amā ixkōt amnhī xunhw̄yr prām hā kot kaj mẽ jarejē kot amnhī nhīpēx pyrāk o amnhī nhīpēx. Jao ixkapēr ma nē ixkōt ri amnhī nhīpēx mex o ri apa. Anē.

16 Hāmri nē mēhprīrejē jam̄y nē mẽ hā ĩhkra jaxw̄ȳ nē mẽ ho Tirtūm w̄ȳ nē mẽ kām:

—Pa Papaj. E kêr ka jarejē ho mex rāhā nē kê mẽ mex nē pa. Anē.

Hikàxpore rax xw̄ȳnh jarēnh̄

Matēwre 19.16-22; Rukre 18.18-23; määnēn Wam Ximotre 6.6-10; Xiakre 5.1-6

17 Tā nhūm Jejus mẽ hkōt mẽ pa ho pa xw̄ȳnhjaja nh̄yri pry hā mō nhūm Ijaew krāhtūmja omu nē hw̄yr tē nē mēmoj tā hkukja nē kām:

—Pa mẽ ijahkre xw̄ȳnh maati? E kwa inhmā mēmoj jarē. Nh̄yrmā Tirtūm ri ixt̄ir tūm nē ixpa hprām xāj mēmo kot pa we ho anhyr o ri ixpa? Ate amnhī to mex pix o ri apa xw̄ȳnh jakamā kwa inhmā tanhmā ja jarēnh̄ to. Anē.

18 Hāmri nhūm kām:

—Xà ate ixpē Tirtūm kw̄ȳ hā ixpumunh kōt na ka ixte urāk nē amnhī to mex xw̄ȳnh ā ijarē? Tirtūm pix na kot amnhī to mex rāhā xw̄ȳnh jakamā kot kaj ā ijarēnh̄ anē nē ixpē Tirtūm Kra hā ijarē. Jao urāk nē ixte amnhī to mex xw̄ȳnh ā ijarē. Nà xàn ka ām at̄yx ri amnhī krā hkōt ā ijarēnh̄ anē?

19 —Tirtūm mex o mex jakamā kot kaj amā nh̄yrmā kuri at̄ir tūm nē apa hprām hāmri nē ra kot mēmoj tā mẽ amā karō xà hkōt amnhī nhīpēx o ri apa. Ra ate mar mex kēnā. Na pre mẽ amā:

Kêr ka mẽ axàhk̄inh̄ o ri apa hkēt nē.

Nē mẽ hpar kēt nē.

Nē tanhmā axēx kēt nē.

Nē axēx rom tanhmā mẽ nokupyri to hkēt nē.

Nē mẽ kēp mẽ hprō ho amnhīkati hkēt nē.

Nē anhīpēêxà mẽ akatorxà wa hā apijaàm nē wa ho mex pē wa kutā anojarēt rāhā ho ri apa.

E kot kaj amã nhÿrmã Tirtÿm kuri atÿr tÿm nÿ apa hprãm hã kot kaj ã amnhÿ nhÿpÿx anhÿr o ri apa. Anÿ.

²⁰ Hãmri nhÿm kuma nÿ kãm:

—Kwa ixprÿre ri ra ã ixte amnhÿ nhÿpÿx anhÿr o ri ixpa kÿnã. Nom te ixtÿr tÿm nÿ ixpa kaxyw ixte kormã tãm kÿt pyrãk. Anÿ.

²¹ Hãmri nhÿm kuma nÿ hprÿ hã omu nÿ kãm hapÿ nÿ. Hãmri nÿ kãm:

—Nã kormã mÿmoj pyxire nÿ arÿk. Na ka amã akukrÿx rax kÿnh tÿx o Tirtÿm jakre. Jakamã kÿr ka ma akupÿm anhÿrkwÿ hwÿr tÿ nÿ akukrÿx rax o wÿnÿ hpa. Nÿ kãxpore jamÿ hãmri nÿ ma mÿ kÿp amrakati xwÿnhjÿ mã òr o ri apa. Hãmri nÿ akupÿn tÿ nÿ arÿ ri ixkÿt apa ho apa. Anÿ.

²² Hãmri nhÿm kuma nÿ tee ri hikukrÿx rax kukamã hamaxpÿr. Kãm hapÿ jakamã kãm kãm ÿhkra karo hprãm kÿt nÿ. Hãmri nÿ tee ri Jesus kot ã kãm hã karÿ anhÿrja ma nhÿm ja kãm mex kÿt nhÿm awjanã nÿ hkaprÿ nÿ ma akupÿm tÿ. ²³ Hãmri nhÿm Jesus tee ri omu nÿ hkÿt mÿ pa ho mÿ pa xwÿnhjÿ mã kãm:

—Hÿxta waa nÿ. Koja mÿ hikukrÿx rÿnh xwÿnhjaja ohtÿ nÿ kãm mÿ hikukrÿx japÿ xaj Tirtÿm mÿ wa ixri htÿr tÿm nÿ pa ho pa hkÿt nÿ. Wa ixte amnhÿ nhÿpÿxja mÿ kÿp hihtÿx. Anÿ.

²⁴ Hãmri nhÿm mÿ tee ri kapÿrja ma nhÿm Jesus mÿ hamaxpÿr kÿt mÿ omunh mex jakamã axte tanhmã mÿ kãm harÿnh to nÿ mÿ kãm:

—Nã Tirtÿm mÿ wa ixte amnhÿ nhÿpÿxja na mÿ hikãxpore rÿnh xwÿnhjaja pÿ ja hihtÿx. ²⁵ Mÿ kãm hikukrÿx rax mã ÿhkra karo hprãm kÿt rãhã tee kãm Tirtÿm kÿt amnhÿ nhÿpÿx prãm kaprÿ. Te ho mÿhÿ kot menh kagô hã hkre nÿ kãm kagô katÿk prãm kÿt rãhã kãm guhkrax kãm àr prãm kaprÿta pyrãk. Anÿ.

²⁶ Hãmri nhÿm mÿ kuma nÿ tee ri amnhÿ kukamã hamaxpÿr nÿ kãm:

—Kwa no mÿ ixpiitã mÿ inhmã mÿ ixkukrÿx japÿ kÿnã. Jakamã xã kot paj mÿ ixpiitã nhÿrmã war ari ixtÿr tÿm nÿ ixpa ho ixpa hkÿt nÿ? Anÿ.

²⁷ Hãmri nhÿm mÿ kãm:

—Nã kot kaj mÿ amnhÿ krã hkÿt mÿ amã mÿ akukrÿx japÿ mã anhÿrer kÿt nÿ. ãm Tirtÿm pix na hte ja kaxyw tanhmã mÿ akrã hto ka mÿ amã akukrÿx japÿ hkÿt nÿ. Jao ra mÿ apÿ Tirtÿm mÿ wa ixri atÿr tÿm nÿ mÿ apa ho mÿ apa mã xwÿnh. Anÿ.

²⁸ Hãmri nhÿm Simãw Pÿtre kãm:

—Kwa Pahihti na pa prem agryk ã mÿmoj piitã hkaga hpa nÿ akÿt ixpa ho ixpa. Jakamã xã kot paj mÿ nhÿrmã war ari ixtÿr tÿm nÿ ixpa ho ixpa kÿt nÿ nã? Anÿ.

²⁹ Hãmri nhÿm kuma nÿ hkÿt mÿ pa ho pa xwÿnh piitã mÿ kãm:

—Nã ka mÿ atÿ inhmã tanhmã amnhÿ to ho apa kaxyw akwÿjÿ re nÿ ma inhmã tanhmã amnhÿ nhÿpÿx to ho ri apa. Anhÿrkwÿ re rÿ atÿ rÿ atÿx rÿ aprÿ nÿ akrajÿ re. Rÿ akatorxã nÿ anhÿpÿxã wa are. Rÿ akukrÿx piitã rer pa hãmri nÿ ma ixkapÿr o mÿ piitã mÿ ahkre ho ri mÿ hkÿt apa. ³⁰ Hã kot paj amnhÿ mã apumu nÿ mÿ ato mex rax nÿ. Hãmri ka mÿ ma mÿ kãm ixkapÿr jarÿnh o mÿ hkÿt apa nhÿm mÿ kot mÿ amar xwÿnh kwÿjaja mÿ ama nÿ kãm mÿ akÿnh nÿ. Nÿ ra mÿ ate akwÿjÿ rer par mã mÿ tãmjaja te mÿ apÿ mÿ hkra rÿ mÿ htÿ rÿ mÿ htÿx pyrãk o mÿ anhÿpÿx. Jao tanhmã mÿ ato mex to ho pa.

—Nÿ koja mÿ kãm ixprãm kÿt xwÿnhjaja ixtã tanhmã mÿ atomnuj to hã ka mÿ nhÿrmã ma Tirtÿm mÿ wa inhÿ krÿ hwÿr api nÿ wa ixkuri amex nÿ atÿr tÿm nÿ apa ho apa. ³¹ Nom kÿr ka mÿ ja hã amnhÿ pumunh kÿt amnhÿ to rax xwÿnh ã amnhÿ to jarkrar kÿt nÿ. Mÿ kot amnhÿ to rÿnh xwÿnh ã amnhÿ jarÿnh xwÿnhjaja koja mÿ nhÿrmã amnhÿ to rÿnh kÿt ã amnhÿ pumu. Nÿ mÿ kot amnhÿ to hkryre xwÿnhjaja koja mÿ nhÿrmã amnhÿ to rÿnh ã amnhÿ pumu. Anÿ.

Jesus kot amnhÿ kukamã axte amnhÿ jarÿnh

Matêwre 20.17-19; Rukre 18.31-34

³² Tã nhÿm Jesus hkÿt ri mÿ pa ho mÿ pa xwÿnhjÿ mã kapÿr pa hãmri nÿ ma Jerujarÿ hwÿr mÿ o mÿ. Ra

kamã kãm hkurê xwýnhjaja kot hpîr ã amnhî jarênh tã ma hwÿr mẽ o mõi. Jakamã nhũm mẽ tee ri hkukamã hamaxpêr o hkõt mõi. Nhũm mẽ amarî mẽ hkõt mrar xwýnhjaja haxwÿja kãm ma nê. Hãmri nhũm Jejus mẽ kêp 12ta o mõi nê hkwÿjê hkàx ã amnhî kukamã tanhmã mẽ kãm amnhî jarênh to ho mõi nê mẽ kãm:

³³ –E na pu mẽ ra Jerujarê hwÿr mõi. Kot puj mẽ hwÿr pøj nhũm mẽ kãm ixkurê xwýnhjaja patre krãhtũmjê mẽ Tirtũm kapêr tũm o mẽ ahkre xwýnhjê nhĩhkram ijaxã. Hãmri nhũm mẽ kãm Tirtũm kapêr kõt amnhî nhĩpêx prãm kêt xwýnhjaja ixpîr kaxyw mẽ kãm ixtã amÿnê ³⁴ nhũm mẽ mar xà hkõt tanhmã inhĩpêx kati hto. Nê mẽ hkwÿjaja ixtã hpêr o axkê nê ixtã akunha. Nê mẽ hkwÿjaja tanhmã ijapry hto nê ixtã argõx rê nê ixtak hãmri nê ixpî. Kojã mẽ ã inhĩpêx anê. Nom kot paj ixtyk ã ixtã apkati axkrunêpxi nhũm Tirtũm akupÿm ixto ixtîr. Anê.

Xiakre mẽ Juãw wa kot amnhî to Jejus wÿr ã wa harênh

Matêwre 20.20-28; Rukre 22.24-30; mããnên Piripos 2.3-8; Wam Pêtre 5.3

³⁵ Tã nhũm Jepetew kra Xiakre mẽ Juãw wa tanhmã hamaxpêr to nê Jejus mã kãm:

–Kwa mẽ ijahkre xwýnh. Pa wa amã mẽmoj jarê ka wa inhmã “ÿ” anê nã? Anê.

Hãmri nhũm wa kãm:

³⁶ –Ko wa mamrî inhmã mẽmoj jarê pa wa ama mãn. Anê.

³⁷ Hãmri nhũm wa kãm:

–Nã kot kaj nhÿrmã ate mẽ piitã mẽ ho amnhĩptãr kaxyw nhÿ pa wa akutã anhĩjê. Nê wa papxipix ixpê anhõ kôwenatõ nê akutã anhĩjê nê ato nhÿ. Ja na pa wa inhmã hprãm. Anê.

³⁸ Hãmri nhũm wa kãm:

–Nã na ka wa ãm atÿx ri ã amnhî to ixwÿr anê. Kojã mẽ tokyx ixpî pa amnhî xà htÿx kamã ijamak rax nê ty. Tã xà kojã mẽ ixpyrà nê ã war anhĩpêx anê ka wa ixpyrà nê amnhî

xà htÿx kamã ajamak rax kãm ty nã? Anê.

³⁹ Hãmri nhũm wa kãm:

–Tÿ. Nã kot pa wa ijaxwÿja anê nê apyrã nê amnhî xà htÿx kamã ijamak kãm ty. Anê.

Hãmri nhũm wa kãm:

–Nã ãm hãmri na ka wa ja hã amnhî jarê. War ate ixpyrà nê ixkõt amnhî xà htÿx kãm ajamak kãm atyk mã kênã. ⁴⁰ Tã nom war ate amnhî to ixwÿrta ã kot paj tanhmã war amã nê hkêt nê. Inhõ Papaj tãm kojã ja kaxyw mēhõ japêr nhũm inhĩhkõ hã nhÿ. No pa kot paj ri ja kaxyw mẽ atõ rênh kêt nê. Anê.

⁴¹ Hãmri nhũm wa urak nê Jejus kõt mẽ pa ho mẽ pa xwýnh kwÿjaja ã wa kot amnhî to hwÿr anhÿr ã wa kuma nê wa kamã gryk nê. ⁴² Jakamã nhũm Jejus mẽ piitã mẽ ho akuprõ nê mẽ kãm:

–E mẽ inhma. Na hte Ijaew kêt xwýnhjê nhõ pahihtijaja ã amnhî nhĩpêx anhÿr o ri pa nê amarî hkrî xà kamã hkrî ho hkrî. àhpumunh jakamã amarî ixkre kre jakry kamã hkrî ho hkrî nê kãm mẽ àpênh xwýnhjê pix mã mẽmo mẽ àpênh ã karõ ho hkrî. Na htem ã amnhî nhĩpêx anê. Nê mẽ kot amnhĩm mex ã harênh prãm xà tanhmã mẽ ho mex to ho pa. ⁴³⁻⁴⁵ Tã no mẽ kajaja kêr ka mẽ atõ amã amnhî to rax prãm hãmri nê ho mẽ kot amnhî nhĩpêx pyràk kêt nê. Mẽ piitã mẽ kutã anojarêt rãhã ho ri apa. Kêt paa. Mẽ ate inhmã axàpênh o apa kaxyw na pa pre mẽ awÿr ixwÿyk kêt nê. ãm pa ixte tanhmã mẽ amã amnhî nhĩpêx to ho ixpa kaxyw na pa pre mẽ awÿr wÿr. Mẽ ate nhÿrmã kuwy wÿr apa pymaj mẽ anê ixtyk kaxyw na pa pre mẽ awÿr wÿr. Jakamã kot kaj mẽ atõ amã amnhî to rax prãm hã kêr ka ixpyrà nê akwÿjê kutã anojarêt rãhã ho ri apa. Hãmri nê inhmã te ate amnhî to rax o amnhî nhĩpêx pyràk o amnhî nhĩpêx. Anê.

Jejus kot akupÿm Paximew o mex ã harênh

Matêwre 20.29-34; Rukre 18.35

⁴⁶ Tã nhũm Jejus mẽ hkôt mẽ pa ho mẽ pa xwýnhjaja kormã Jerujarẽ hwýr mõi ri ra krĩ pê Jeriko hkôt mõi. Hãmri nhũm mẽ ohtô mẽ mẽ hã ajêt mẽ mẽ hkôt mõi. Nhũm mẽhõ myja pry nhĩhkrep nhỹ. Ximew kra Paximew nohkre xwýnhja pry kamã ahwýr o hkrĩ. ⁴⁷ Hãmri nhũm Jejus mẽ hkwýjaja hwýr htêp o mõi nhũm amnhĩ wýr mẽ kuma mẽ mẽ kot Jejus nhĩxi jarẽnh o mõi ã kuma hãmri mẽ kax pê kãm kapêr mẽ amnhĩ to kuwý mẽ kãm:

—Pa Jejus? Nà apê mẽ inhõ Pahihti mex kumrêx na ka. Te apê amnepêm anhĩgêt pahihti Tawi kot amnhĩ nhĩpêx pyrãk. Jakamã kwa we ixkamã axukaprĩ mẽ akupým ixto mex kêt wehe. Ixte amnhĩ kaxyw akôt ijamaxpêr xwýnh na pa. Anẽ.

⁴⁸ Hãmri nhũm Jejus kukamã mẽ mrrar xwýnhjaja kuma mẽ kãm:

—Tk. Kwa akapêr kêt mẽ nhỹ nã. Anẽ.

Tã nom nhũm ãm mẽ kuma mẽ xatã amnhĩ to kuwý. Kýx pê amnhĩ to kuwý mẽ axte kãm:

—Kwa ixkamã axukaprĩ mẽ akupým ixto mex Pahihti. Anẽ.

⁴⁹ Hãmri nhũm Jejus kuma mẽ xa mẽ hkôt mẽ pa ho mẽ pa xwýnhjê mã kãm:

—E mẽ atõ hwýr tẽ mẽ hpa hã apy mẽ amnẽ ixwýr o tẽ. Anẽ.

Hãmri nhũm mẽ kuma mẽ nohkre xwýnhta mã kapêr mẽ kãm:

—E tee ri amnhĩ kukamã ajamaxpêr kêt mẽ. Na atã karõ. E tokyx kãnhmã xa. Anẽ.

⁵⁰ Hãmri nhũm mẽ kuma mẽ hkĩnh tỳx mẽ. Nẽ kãnhmã harĩ mẽ amnhĩ nê õ kajaati mẽ mẽ hwýr htêm kurê kumrêx. ⁵¹ Hãmri nhũm Jejus kãm:

—Pa mo na? Tanhmã kot pa ato? Anẽ.

Hãmri nhũm kãm:

—Nã akupým inhmã ixrĩt mex prãm Pahihti.

⁵² Anẽ nhũm kãm:

—Tõe. Nã ra ate amnhĩ kaxyw inhmã ajamaxpêr tỳx jakamã kot kaj akupým arĩt mex kurê kumrêx. E mãmrĩ ma akupým tẽ. Anẽ.

Nhũm akupým rĩt mex ã amnhĩ pumu mẽ hkĩnh o hkĩnh. Hãmri mẽ Jejus ã ajêt mẽ ma hkôt hkĩnh mẽ tẽ.

11

Jejus kot Jerujarẽ hwýr àr ã harẽnh Matêwre 21.1-11; Rukre 10.28-40; Juãw 12.12-19

¹ Tã nhũm Jejus mẽ hkôt mẽ pa ho mẽ pa xwýnhjê mẽ kormã Jerujarẽ hwýr mõi. Hãmri mẽ krĩ pê Petake mẽ hõ pê Petãn wýr ahtêp o mõi. Hixêt pê Oriwêhti kahti ri na pre krĩja wa xa. Jakamã nhũm Jejus hkôt mẽ pa ho mẽ pa xwýnh wa ho axkrut mẽ mẽ amnhĩ kukamã wa kumẽ ² mẽ wa kãm:

—E wa ma krĩ mũj wýr mẽ ixkukamã wa tẽ. Hãmri mẽ hwýr pøj mẽ nhỹri jumênre nyw mã ê mẽ ãm xwýnhta pumu. Kormã mẽ kot hã hkrĩ hkêt kumrêx xwýnhta. ³ Ka wa omu mẽ kãm ê xà hpôt mẽ man akupýn ixwýr o tẽ. Kojã mẽhõ war apumu mẽ mẽ hã tanhmã war amã kapêr to ka wa ã kãm ijarẽnh anẽ mẽ kãm: “Nã mẽ panhõ Pahihti na hã karõ pa wa hwýr tẽ.” Anhỹr o kãm ijarẽ. E wa ma hwýr tẽ. Anẽ.

⁴ Hãmri nhũm wa kuma mẽ ma hwýr htêm kurê kumrêx mẽ hwýr pøj. Nhũm Jejus kot wa kãm hã karõ xà hkôt jumênre nywreta pumu. ⁵ Hãmri mẽ kãm ê xà hpôt o xa nhũm kuri mẽ kuhê xwýnhjaja tee ri hã wa omu mẽ wa kãm:

—Kwa mo kaxyw na ka wa kãm ê xà hpôt o xa? Kwa kot ka wa mẽ ixpê ho ahkĩ nã? Anẽ.

⁶ Hãmri nhũm wa mẽ kãm:

—Nã mẽ panhõ Pahihti na wa inhmã hã karõ pa wa hwýr tẽ. Wa ixte ma hwýr o ixtêm kaxyw. Anẽ.

Hãmri nhũm mẽ wa kãm:

—Tỳ? Tõe wa mãmrĩ ma kãm o tẽ. Anẽ.

⁷ Hãmri nhũm wa ma akupým Jejus wýr o tẽ. Hãmri mẽ kaxyw amnhĩ xê hkwý hkwýr mẽ mẽ kãm ho hkô kahty hpa mẽ kãm ho htỳx mẽ o xa nhũm Jejus hã nhỹ mẽ mẽ. ⁸ Nẽ kormã Jerujarẽ hwýr hixêt ã àpir o mõi. Nhũm mẽ kot omunh o kuhê xwýnhjaja hkĩnh mẽ ma hkukamã pry ho mex kaxyw amnhĩ

xê hkwỳ hkwỳrỳ nê ho kãm uty. Nhũm mẽ hkwỳjaja nhỹri pô hkwỳ jakà nê o mra nê hkukamã kãm uty. ⁹⁻¹⁰ Nhũm mẽ hixêt ã api nê ahpar mã wrỳk o mō nhũm mẽ piitã kàx pê Tĩrtũm mex o mex ã harênh o hkôt mō. Nhũm mẽ hkwỳjaja kukamã mra nhũm mẽ hkwỳjaja hapu hã mra nhũm prem piitã hkôt Tĩrtũm mex o mex ã harênh o mō. Nê harênh o:

E ota Tĩrtũm kot mẽ pahwỳr mẽnh xwỳnhhta ra pôj. Nà ãm hãmri na mẽ pahwỳr wrỳ. Ja mex kumrêx.

Kêp mẽ panhõ Pahihti mex na. Koja mẽ panhĩgêt pahi Tawi pyrà nê mẽ pahto amnhĩptà nê mẽ pahto mex o pa.

Ãm hãmri na Tĩrtũm mẽ pahwỳr kumê.

Tĩrtũm mex kumrêx. Ãm mex o mex. Kukwak ri pix mã na pu htem pajamakêtkati nê paxãmnhĩx papa rãhã ho papa.

Anhỹr o Jejus kôt harênh o mō. Kot mẽ ho amnhĩptàr kurê kumrêx ã hkamnhĩx nê hkĩnh nê ã hkôt kapêr anhỹr o mō. ¹¹ Jao ra Jerujarê hwỳr pôj nhũm Jejus Tĩrtũm mã amnhĩ jarênh xà hã ixkre hwỳr tẽn axà. Nom nhũm ra amỹkry htỳx jakamã nhũm hwỳr axà nê ãm hkre pumunh o xa hãmri nê akupỹm kato nê hkôt mẽ pa ho mẽ pa xwỳnh pê 12jê mẽ nhũm mẽ ma akupỹm Petãn wỳr mra.

Jejus kot pĩ hpàr pê fikêhti mã kapêr ã harênh

Matêwre 21.18-22

¹² Tã nhũm apkati nhũm Jejus mẽ hkôt mẽ pa ho pa xwỳnhjê mẽrohã Petãn rũm hapôj nê ma akupỹm Jerujarê hwỳr mra. Nhũm Jejus ra kãm prãm nê mō. ¹³ Hãmri nê amỹm mẽmo pĩ hpàr hoptĩ rax pê fikêhti pumu nê hamaxpêr o:

—E pa hwỳr tẽn nê ô hkwỳ rê nê kuwô mãn. Anê.

Hãmri nê hwỳr tẽn. Nhũm kormã ô kaxyw õ mytwrỳ kator kêt jakamã nhũm ô hkêt nê ãm hô pix nê xa.

¹⁴ Hãmri nhũm hwỳr tẽn nê tee ri ô

japêr nê ãm hô pix pumu. Hãmri nê tee ri omu nê kãm:

—E kot kaj axte axô hkêt kumrêx.

Anhỹr o kãm kapêr nhũm hkôt mẽ pa ho mẽ pa xwỳnhjaja hã kuma.

Jejus kot Tĩrtũm nhõrkwỳ hwỳr ãr ã harênh

Matêwre 21.12-17; Rukre 19.45-46; Juãw 3.13-22

¹⁵⁻¹⁷ Tã nhũm Jejus mẽ hkôt mẽ pa ho mẽ pa xwỳnhjaja Jerujarê hwỳr agjê nê Tĩrtũm mã amnhĩ jarênh xà hã ixkre hwỳr agjê. Nhũm Jejus tee ri kamã mẽ kuhê xwỳnhjê pumu. Nhũm mẽ ra ixkre kamã axtem nê môx nê ôwêhti nê tuuti ho wênê ho kuhê. Ixkre hwỳr mrrar xwỳnhjaja kot haprôr nê Tĩrtũm mã amnhĩ jarênh kaxyw kãm hpar nê ôr kaxyw mẽ kãm ho wênê. Nom axtem nê hã ohtô rax kãm mẽ kãm ho wênê nhũm mẽ hkwỳjaja mẽ kãm mẽ hikàxpore ho anhĩpa. Hãmri nhũm Jejus mẽ hwỳr axà nê tee ri mẽ kot ã amnhĩ nhĩpêx anhỹr ã mẽ omu nê mẽ kãm akir nê mẽ kãm:

—Tk. Kwa Tĩrtũm kapêr ã kagà htũm kot ôrkwỳ jarênh kot:

Inhõrkwỳja ãm pika piitã hkôt mẽ piitã kot inhmã amnhĩ jarênh xà hã ixkre pix kaxyw na.

Anhỹr o kot harênh tã ka mẽ axtem nê kamã ã amnhĩ nhĩpêx anhỹr o akuhê. E kwa mẽ ma mra nê ajapôx tokyx anê. Anê.

Nhũm pre ã mẽ kãm kapêr anhỹr pê mẽ ahkre hãmri nê ixkreja nê mẽ kator pa. ¹⁸ Hãmri nhũm patre krãhtũmjê mẽ Tĩrtũm kapêr tũm o mẽ ahkre xwỳnhjaja tee ri ã mẽ hipêx anhỹr ã omu nê kapêr ma nê kamã gryk tỳx nê. Hãmri nê mẽ kot hã àmnênh kaxyw tanhmã axpên mar to nê axpên mã:

—Tk. Kwa na mẽ ohtô nê kãm mar prãm nê. Koja mẽ anê nê gryk ã mẽ pahkaga nê axte mẽ pakapêr mar kêt nê. Kwa pu mẽ kupĩ ri. E tanhmã kot puj mẽ ho nê kupĩ? Anê.

¹⁹ Tã nhũm myt axà nhũm Jejus mẽ hkôt mẽ pa ho pa xwỳnhjaja Jerujarê rũm hapôj nê ma nhỹri amnhĩm hikranh kaxyw mra.

Mē pahte tanhmā mēmoj tā Tirtūm wỳr to hã mē pamã karõ

Matêwre 6.14-15, 17.20; Makre 11.13; Juãw 14.13; mããnen Xiakre 1.6; Wam Juãw 3.22

²⁰ Tã nhũm apkati nhũm Jejus mē hkõt mē pa ho mē pa xwỳnhjaja Jeru-jarē hwỳr akupỳm mra. Hãmri nē axte pĩ hpār pē fikēhtita pumu. Jejus ra kot kãm kapēr xwỳnhta pumu nhũm ra grà pa nē xa. ²¹ Hãmri nhũm Simãw Pêtre Jejus kot tanhmã pĩ mã kapēr toja mã hamaxpēr nē hã kãm:

—Kwa mē ijakre xwỳnh. Ga mēmoj mũj pumu. Jãã ate fikēhti mã akapēr xwỳnhta na grà par kumrēx nē xa. Anē.

²²⁻²³ Hãmri nhũm kuma nē mē piitã mē kãm:

—Tỳ nã ãm hãmri na pa mē amã ixkapēr. Kot kaj mē mēmo kaxyw Tirtūm mã ajamaxpēr tỳx pē mēmoj tã awỳ nhũm ama nē amã hprãm xà hkõt tanhmã amã hipêx to. Ka mē amnhĩ kaxyw Tirtūm mã ajamaxpēr tỳx pē hixêt mũj mã akapēr nē kãm: “E xa nē ma tē nē gô xujanãr kãm mrõ.” Anhỳr o kãm akapēr nhũm amar xà hkõt ã amnhĩ nhĩpêx anē nē tēn kamã mrõ. ²⁴ Kot kaj mē mēmoj tã Tirtūm wỳ nē kaxyw ãm pix mã ajamaxpēr tỳx nē nhũm amã ho anē.

²⁵⁻²⁶ —Nē kot kaj mē Tirtūm mã amnhĩ jarēnh kaxyw nē ra mēhõ kot tanhmã ato mã ajamaxpēr. Hãmri nē ja ho ajamakêtkati kurê kumrēx nē axte kãm ajamaxpēr kêt nē. ãm mēmoj nyw pix mã ajamaxpēr o tãm amnhĩ nhĩpêx o apa. Hãmri nhũm Tirtūm kaxkwa rũm ja hã apumu nē apyrã nē ate tanhmã amnhĩ tom-nuj to ho hamakêtkati nē axte kãm hamaxpēr kêt nē. Anē.

Mēhõ kapēr kõt Jejus kot mē ahkre hã mē kot hkukjêr

Matêwre 21.23-27; Rukre 20.1-8

²⁷ Nhũm mē akupỳm Jerujarē hwỳr agjê nhũm Jejus kē axte Tirtūm mã amnhĩ jarēnh xà hã ixkre hwỳr axã. Nhũm hkõt mē pa ho mē pa xwỳnhjaja

hkõt hwỳr mra nē hkõt agjê nē ko-rmã kamã kuhê. Hãmri nhũm Ijaew krãhtũmjê mē mē kot Tirtūm kapēr tũm o mē ahkre xwỳnh mē mē õ patre krãhtũmjaja Jejus pumu nē hwỳr mra nē hêx rom tanhmã kãm kapēr to. Na pre ra Jejus ixkreja nē mēmoj to wēnê xwỳnh mē kàxpore o mē hpinhpanh xwỳnhjê jano nhũm mē tee ri ja hã omu nē kamã gryk tỳx nē. Jakamã nhũm akupỳn mē hwỳr axã nhũm mē axte omu nē hwỳr mrrar kurê kumrēx ²⁸ nē kãm:

—Kwa mē inhmã amnhĩ jarē. Mēhõ nhỹ hã na ka hte ã amnhĩ nhĩpêx anhỳr o ri apa? Mēhõ na pre mē ixwỳr amē ka pre mõ? Nã xã amnhĩ krã hkõt na ka hte ã amnhĩ nhĩpêx anhỳr o ri apahti? E kwa mē inhmã amnhĩ jarē. Anē.

²⁹ Nhũm Jejus kot tanhmã mē hamaxpēr to hkõt mē omunh mex jakamã mē kãm:

—Nã kot pa ixkumrēx mēmoj tã mē akukja. Ka mē inhmã harē pa rĩ ko-rmã mē amã tanhmã amnhĩ jarēnh to. ³⁰ Finat Juãw Paxisja ã kot paj mē akukja. Mēhõ nhỹ hã na pre hte mē hkrã kumrãr o pa? Xã amnhĩ krã hkõt nã xã Tirtūm nhỹ hã? E mē atõ inhmã harē. Anē.

³¹⁻³² Hãmri nhũm mē kuma nē tee ri kot tanhmã kutã kãm harēnh to hkukamã hamaxpēr nē axpēn mã:

—Kwa tanhmã kot puj mē kãm ja jarēnh to? Mē kot mar o kuhê xwỳnhjaja na htem Juãw Paxis kēp Tirtūm nhỹ hã kapēr jarēnh xwỳnh ã axpēn mã harēnh o pa. Jakamã kot puj mē kãm kot amnhĩ krã hkõt mē hkrã kumrãr o pa hã harē nhũm mē tee ri mē pama nē mē pakamã gryk nē. Nē mē paxêx rom ã kãm mē pakapēr anhỳr ã mē pahpumu nē kēn o mē pahtak o mē panhĩmex. No kot puj mē kãm Tirtūm nhỹ hã mē hkrã kumrãr ã harē nhũm mē pama nē mē pamã: “Kwa ã kot anhỳr kēnã na ka prem kapēr mar tã ixkõt amnhĩ xunhwỳr kêt nē?” Anē. Nã kot puj pēr mē kãm tanhmã harēnh to hkõt

nē. Kot puj mē ãm kãm aa te mē pahte ja jarēnh mar kêt pyræk o harē. Anē.

Mē kot tanhmã kãm nē nhũm kot ta pãnhã tanhmã mē kãm nē py-maj nhũm mē tee ri tanhmã kãm nē hprãm kaprÿ ho kuhê.

³³ Hãmri nē Jejus mã kãm:

–Konēn. Mē ixte mēhõ nhÿ hã kapēr o pa hã omunhre hã. Anē.

Hãmri nhũm mē kuma nē mē kãm:

–Tk. Tôe kot pa xep ijaxwÿja mē amã tanhmã amnhĩ jarēnh to hkêt nē. Ijaxwÿja ixte mēhõ nhÿ hã ã ixte amnhĩ nhĩpêx anhÿr o ri ixpa hã amnhĩ pumunhre hã. Anē.

12

*Mē àpênh punuj xwÿnhjê jarēnh
Matêwre 21.33-46; Rukre 20.9-18*

¹ Nhũm Jejus arĩ Ijaew krãhtũm mē mẽõ patre krãhtũm mē Tĩrtũm kapēr tũm o mē ahkre xwÿnhjê mã kapēr o xa. Nē mē kãm mē kot tanhmã hipêx to hkukamã mē kãm tanhmã amnhĩ jarēnh to. No ãm hã kuxi nē mē kãm awjarē nē mē kãm:

–Koja mēhõ hpur ã hkwÿjê mã karõ. Mē kot kamã kãm àpênh kaxyw mē kãm karõ. Hãmri nhũm mē ma hwÿr mra nē kamã mẽmo hy hkre nē hkre pa. Hãmri nē pu hã kahê hpa nē pur kaêx kãm ixkre hprêk nhĩpêx. Mē kot himõk ã mē kot kêp àhkĩnh pymaj mē hapêr o hkrĩ kaxyw. Hãmri nē hipêx pa nhũm mẽõ patrãwja awry hã krĩ hõ hwÿr nojarêt nē mē kãm tanhmã hpur jarēnh to nē mē kãm: “E or ixpurta nõ. Kê kamã mẽmoj kã hpa ka mē mãmrĩ kamã awjamÿ nē ho axkjê. Hãmri nē ixkutêp inhõ jaxwÿ nē mãmrĩ anhõ tanhmã ho hprãm xã hkôt tanhmã ho.”

–Anhÿr o mē kãm kapēr hãmri nē ma mẽõ. ² Tã nhũm ra pur kãm mẽmoj hkã pa. Nhũm hpur nhõ dõn arĩ krĩ hõ kamã hã ujahkre ho pa htã kuri kãm àpênh xwÿnhjê hõja nhũm akupÿm mē hwÿr kumê. Mē kot kãm õ hkwÿ nhõr nhũm ma kot kãm o mõi kaxyw ma mē hwÿr kumê nhũm ma akupÿm mē hwÿr mẽõ. Mõi nē ra mē hwÿr pøj. ³ Hãmri nhũm mē

omu nē axtem nē homnuj nē. Nē unê nē htak nē akupÿm hano nhũm ÿ kamã ma akupÿm mẽõ. ⁴ Hãmri nhũm õ patrãwja tee ri omu nē hpãnhã ja mē nhũm ma mē hwÿr mẽõ. Mõi nē mē hwÿr pøj. Hãmri nhũm kê wem omu nē mã ho anê nē. Unê nē htak nē hkrãx pē htak nē akupÿm hano nhũm wamta pyrã nē ma akupÿm ÿ kamã mẽõ. ⁵ Hãmri nhũm axpên pãnhã kãm mē àpênh xwÿnh kwÿjê rē nhũm mē axpên pãnhã ma mē hwÿr pa. Ma mē hwÿr pa nē pøj nhũm mē te ho wamtajê mē hipêx pyrã nē mē hkwÿjê pynê nē htak rax nē mē hano nē mē hkwÿjê pa. ⁶ Nhũm mē õ patrãw mē harēnh ma nē tee ri amnhĩ kukamã hamaxpêr nē hamaxpêr o: “Hêxta waa nē. Tanhmã kot paj we amnhĩ nhĩpêx to nē inhõta kwÿ jamÿ? Nã kot paj mē hwÿr ixkraja mē. Inhmã hapê htã kot paj mē hwÿr kumê kê ma mē hwÿr mẽõ. Hãmri nhũm mē kêp ixkra hã omu nē tanhmã ixpê ho hkêt nē. Nē jatã inhmã kãm inhõja kwÿ gõ nhũm man ixwÿr o tē. Nã kot paj anê.”

–Anhÿr o hamaxpêr hãmri nē ma mē hwÿr hkraja mē nhũm ma mē hwÿr mẽõ.

⁷ –Tã mē hwÿr hpõx o mẽõ nhũm mē amÿm amnhĩ wÿr omu nē kêp hkra hã omunh kurê kumrêx nē hã axpên mã amÿnê nē axpên mã: “E. Nã onêj hpur nhõ dõn krata tē. Koja nhÿrmã õ papaj mÿrpê amnhĩm pur ã pyka pytà nē ho õ. Jakamã e pu mē kupĩ nē kêp hpur ho arĩk nē ho panhõ. E kwa tokyj pu mē kupĩ ri.” Anê.

⁸ –Rõm nhũm ra mē hwÿr hpõx o tē nē ra pøj nhũm mē unê nē pur nē ho kato nē ahkã kamã kupĩ. ã mē ujarēnh kot anhÿr. Anê.

⁹ Nhũm pre ã Jejus Ijaew krãhtũmjê mã ujarēnh anê. Hãmri nē hã tanhmã mē hkukjêr to nē mē kãm:

–E mē inhmã mẽmoj jarê. Koja pur nhõ dõnja tee ri mē kot hkra hpĩr ã harēnh ma hãmri nē tãm mē hwÿr mẽõ hãmri nē tanhmã mē hipêx to wehe? Nã koja ma mē hwÿr mẽõ nē mē himex

pa hāmri nē hpānhā nhām hpurta ā mēmojjē rē. ¹⁰ Mān ka prem ra Tirtūm kapēr ā kagā htūm kot ja jarēnh ma nā? Harēnh kot:

Na prem kēn o amnhīm ōrkwỹ nhīpēx kaxyw hāmri nē kēn maati pumu nē htỹx omnuj ā hkamnhīx nē hkaga. Mē kot hkaga htā nom nhūm Tirtūm mē kurom mex o kot kēn piitā hakrenh par ā omunh kurē kumrēx.

¹¹ ām hāmri na pre ā mex ā omunh anē. Anē.

Ā Tirtūm kapēr ā kagā htūm kot harēnh kot anhỹr. Anē.

¹² Nhūm pre ā Jejus mē kām ujarēnh kām mē harēnh anē nhūm mē amnhī tā kuma. Tirtūm kapēr tūm o mē ahkre xwỹnh mē mē ō patre krāhtūm mē Ijaew krāhtūmjaja nhūm mē kot mē kām kēn maati kaga xwỹnhjē jarēnh o te mē tām harēnh pyrākja ma nhūm ja mē kēp omnuj nē. Jakamā nhūm mē kām unēnh nē haxār prām nē. Nom amnhī tā kām mē kot mar o kuhē xwỹnhjē puma nē. ¹³ Jakamā na prem ma mra nē hapōj hāmri nē Jejus wỹr Parijew nhō xwỹnh mē pahi Erox kōt mē pa xwỹnh kwỹjē rē. Mē kot hēx rom mēmoj tā hkukjēr nhūm kot mē mar nē tanhmā Rōm nhō xwỹnhjē nhō pahi Sesti kapēr kuhpa hā ri tanhmā mē kām nē nhūm mē kot mar kaxyw. ¹⁴ Jakamā nhūm mē ma hwỹr mra nē hēx rom kām kapēr nē kām:

—Kwa Jejus? Nā ām hāmri na ka hte Tirtūm kapēr o mē ahkre mex nē. Na ka hte mē kamā akahak o apa hkēt nē. Nē mē kot tee ri mē kot tanhmā ato kapēr punuj to htā ka hte arī aprī hā mē ahkre mex o ri apa. E kwa mē inhmā mēmoj jarē. Rōm nhō pahihiti kot mē pahpē Ijaew mē pahte kām kàxpore hkwy nhōr ā mē pamā karōta. Kwa xā ja amā mex nā? Xā kot pu mē kām kugō? Xā kot pu mē kām ōr kēt nē? E kwa mē inhmā harē. Anē.

¹⁵ Nhūm prem ā hēx rom ja hā hkukjēr anhỹr tā no nhūm Jejus mē hamaxpēr ā mē omunh mex mē mē kām:

—Tk. Kwa mon ka mē axēx rom ja hā ixkukja? E mē atō inhmā kàxpore htỹxre hō gō pa omu. Anē.

¹⁶ Hāmri nhūm ja kām ja gō nhūm kupy nē kànhmā kupē nē mē kām:

—E mēhō nhīxi nē mēhō karō na hā? Anē.

Anē nhūm mē kām:

—Pahi Sesti karō nē hixi na hā.

¹⁷ Anē nhūm mē kām:

—Tỹ. Tō kēr ka mē māmri kām hkwy nhōr o apa. Hā hkarō nē hā hixi. Tām kot hipēx xwỹnh jakamā ō na. No mē kajaja na pre Tirtūm mē anhīpēx nhūm mē apē ō jakamā kwa kēr ka mē kapēr kōt pix mā ri amnhī nhīpēx o ri apa. Anē.

Nhūm pre ā mē kām kapēr anē nhūm mē piitā mar o kuhē. Nhūm mē kot hēx rom hkukjēr xwỹnhjaja amnhī jaēr pē ā kàxpore jarēnh anhỹrja ā kuma nē axpēn mā:

—Kwa mē paxēx rom mē pahte hā hkukjēr tā nhūm ām hāmri mē pakutā mē pamā harē. Kwa tanhmā kot puj wem hkukjēr to nhūm pahi Sesti kapēr kwỹm ri mē pamā mēmoj jarē? Anē.

Hāmri nē tee ri tanhmā hkukjēr to hkukamā hamaxpēr o kuhē.

Akupỹm mē htĩr xwỹnhjē jarēnh

Matēwre 22.23-33; Rukre 20.27-40; Juāw 6.21, 6.38-40; määnēn Wam Korĩ 6.14, 15.12-28; Wam Tesarōn 4.13-18

¹⁸ Tā nhūm Satusew nhō xwỹnh kwỹjaja. Mē kot akupỹm mē htĩr mā hamaxpēr kēt xwỹnhjaja na pre mē. Tā mē kot mē htyk nē mē hapēx ā mē hkamnhīx jakamā na prem axpēn mā Jejus jarēnh o:

—E kwa pu mē ma hwỹr mra nē mēmoj xihtỹx ā hkukja kē mē pama nē tee ri tanhmā mē pamā kapēr to hkukamā hamaxpēr. Hāmri nhūm mē piitā ja hā omu nē āhpumunh kēt ā omunh kurē kumrēx. E tokyx ma pu mē hwỹr. Anē.

Hāmri nē ma hwỹr mra nē Parijew nhō xwỹnhjē pyrā nē hēx rom kām:

¹⁹ —Pa Jejus? Kwa mē inhmā mēmoj jarē. Na pre finat Mojesja Tirtūm nhỹ hā ā mē panhīgētjē mā karō anē. Mē

hkra hkêt rāhā mẽ pa nē mẽ htyk xwýnhjaja nhũm mẽ harēnh o:

Koja mēhō hprō hāmri nē kamā hkra hkêt rāhā pa nē ty. Hā koja hkôt htōja hpānhā hprō o hprō nē kamā hkra. Hāmri nhũm kato nē te kēp htō htyk xwýnhhta hkra pyrāk. Anē.

Na pre ā Mojes Tirtũm nhỹ hā ja hā mẽ kām karō anē. ²⁰ Jakamā kwa ga mẽ ixujarēnh ma. Koja mẽmojjaja mẽ kot axpēn to htō xwýnhjaja kēp 7. Nhũm kot waja hprō. Nē wa pa nhũm myja kormā hprō kamā hkra hkêt rāhā ty. ²¹ Nhũm hkôt htō hōta hpānhā hprō ho hprō nē wa axpēn to pa. Nhũm haxwýja kamā hkra hkêt rāhā ty. Nhũm hkôt htō hōta haxwýja ho hprō nē wa axpēn to pa grire nhũm wamta wa urāk nē kamā hkra hkêt rāhā ty. ²² Hāmri nhũm htō hkwyjaja piitā nija pyxi nē axpēn pānhā ho hprō nom mēhō kamā hkra hkêt rāhā htyk pa. Hāmri nhũm mẽ hprōta mẽ hkôt amnhĩ to hitep nē ty. ²³ Tā Tirtũm kot akupým nhỹrmā mẽ ho htĩr ronhỹx nhỹ nhỹx kēp nija mjēn kumrēx? Ra piitā kot ho hprō kēnā. E kwa mẽ inhmā ja jarē. Anē.

²⁴ Hāmri nhũm Jejus ā mẽ ujarēnh anhỹrja ma nē mẽ kām:

—Tk. Nà mẽ ate Tirtũm kapēr ā kagā htũm mar mex kêt. Nē mẽ aprĩ hā tanhmā Tirtũm kute hā omunh kêt jakamā na ka mẽ ā atýx ja hā ixkukjēr anē. ²⁵ Kormā mẽ htĩr ri mẽ kot Tirtũm kôt amnhĩ xunhwýr xwýnhjaja na htem ty hāmri nē Tirtũm nhō krĩ kamā axte kām hprō hprām kêt pa. Rý ni japēr nē kām mjēn prām kêt nē pa. Hāmri nē Tirtũm kapēr o mẽ wrýk xwýnhjē pyrā nē axte htyk kêt nē. Ām htĩr tũm rāhā nē pa ho pa.

²⁶—Nom mẽ ate akupým mẽ htĩr kêt ā mẽ hkamnhĩxja kot paj ixprĩ hā mẽ amā harē. Amnepēm na pre Tirtũm pĩ hpōk kamā tanhmā Mojes mā kapēr to. Mān ra mẽ ate mar. Na pre kām:

Ixpē Apraāw nhō Tirtũm na pa. Nē mǎānēn ixpē Apraāw kra Ijak mẽ htāmnhwý jako wa õ Tirtũm na pa.

Anhỹr o Mojes mā amnhĩ jarē nhũm kuma nē hā kagā. ²⁷ Kēp apu arĩ mẽ htyk rāhā nhỹx pre ā mẽ harēnh anhỹr kêt nē. Nhỹx pre mẽ harēnh o: “Amnepēm Apraāw nē hkra nē htāmnhwý mẽ htĩr ri ixpē mẽ õ Tirtũm na pa pre.” Anhỹr o nhỹx pre mẽ harē. Nom na pre ā amnhĩ jarēnh anhỹr kêt nē. Mẽ pamā te Apraāwja mẽ htyk nē mẽ hapēx pyrāk. Nom nhũm prem ra Tirtũm ri akupým htĩr nē mex nē pa ho pa. Tā ka htem Tirtũm kapēr kwým ri akupým mẽ htĩr kêt ā mẽ harēnh o apa. Anē.

Tirtũm kapēr maati jarēnh

Matēwre 10.37, 22.34-40; Rukre 10.25-27; mǎānēn Wam Juāw 2.15, 5.3; Apokarip 2.4

²⁸ Tā nhũm Tirtũm kapēr tũm o mẽ ahkre xwýnhjē hō mẽ hwýr tē nē mẽ kot axpēn mā kapēr ā mẽ omunh o xa. Hāmri nē Jejus kot tanhmā Satusew nhō xwýnhjē mā kapēr mex toja ma nē kām:

—Nà ām hāmri na ka ā mẽ kām ja jarēnh anē Pahihti. Kwa inhmā mẽmojj jarē. Na pre Tirtũm ahpýnhā mẽmojj to 10 nē mẽ pamā hā karō. Mẽ pahte hkôt amnhĩ nhĩpēx o ri papa kaxyw hā mẽ pamā karō. Tā nhỹ kapēr na mex o kot hkwyjē jahkrenh wehe? Anē.

²⁹ Hāmri nhũm kām:

—Nà Tirtũm kapēr xohtō. Kapēr piitā hkôt mẽ pahte amnhĩ nhĩpēx o papaja na kām hprām. No pixi na mẽ pahte hkôt amnhĩ nhĩpēx o papaja nhũm kām hprām týx o kot hkwyj jakrenh. Kapēr mex maati na ja. Na pre kapēr o:

E mẽ apē Ijaew nhō xwýnhjaja. Ixpē mẽ anhō Tirtũm ā ixpíxi mex na pa.

³⁰ Jakamā kēr ka mẽ amā ixkĩnh týx o mẽmojj piitā hakrenh pa. Jao mẽ anhĩ piitā ho amā ixkĩnh týx kumrēx o ri apa.

³¹ Anhỹr o na pre mẽ pamā karō. Nē hkôt ja:

Kēr ka mẽ nhām mẽ hipēx o te ka amā amnhĩ tā ma pyrāk o mẽ hipēx

o ri apa. Jao tãm mẽ hipêx rãhã ho ri apa. Anê.

E ja wa kumrêx na Tirtũm kãm mẽ pahte hkôt amnhĩ nhĩpêx o ri papa hprãm tỳx nê. Anê.

³² Hãmri nhũm kuma nê kãm:

—Nà ãm hãmri na ka ja jarê Mějajakre xwỳnh. Tirtũm pyxi mex kênã. ³³ Amnepêm na pre htem kãm amnhĩ jarênh kaxyw nê kãm mẽmoj gõ nê rĩ kormã tanhmã kãm amnhĩ jarênh to. Tã nom kot puj mẽ ã ate harênhta kôt amnhĩ nhĩpêx anhỹr o papa jao mẽ panhĩ piitã pamã Tirtũm kĩnh. Nê mẽ pamã hkĩnh o mẽmoj piitã hakrenh pa. Nê nhãm mẽ hipêx o te mẽ papamjaja pamã amnhĩ tã ma pyrãk o mẽ hipêx. Jao tãm mẽ hipêx rãhã ho ri papa. Kot puj mẽ ã amnhĩ nhĩpêx anê nhũm Tirtũm kãm ja mex o mẽ pahte kãm mẽmoj nhõrta jakre.

Anhỹr o kãm kapêr. ³⁴ Hamaxpêr mex pê ã Jejus mã kapêr anê nhũm kuma nê kãm:

—Nà ãm hãmri na ka ja jarê. Na ka ra mẽ kot Tirtũm kôt amnhĩ nhĩpêx o amnhĩ nhĩpêx nyw pumunh mex o mõi. Nà te ate tokyx hkôt amnhĩ xãm kaxyw pyrãk. Anê.

Hãmri nhũm mẽ kãm hkurê xwỳnhjaja tee ri wa kot axpên mã kapêr mar o kuhê nê axte kãm mẽmoj tã hkukjêr pyma nê. Ra tee ri mẽ kot hêx rom mẽmoj tã hkukjêr kaprỹ jakamã axte tanhmã hkukjêr to hkêt nê.

Jejus kêp pahi finat Tawi nhõ Pahihti hã harênh

Matêwre 22.41-46; Rukre 20.41-44; mããnên Rõmãn 1.3-4

³⁵ Hãmri nhũm Jejus arĩ Tirtũm mã amnhĩ jarênh xà hã ixkre kamã amnhĩ tã mẽ ahkre. Nom te nhãm mẽhõ hã mẽ hkukjêr pyrãk amnhĩ tã mẽ hkukja nê mẽ kãm:

—E mẽ inhmã mẽmoj jarê. Tirtũm kapêr tũm o mẽ ajakre xwỳnhjaja na htem tanhmã mẽ amã Tirtũm kot mẽ akaxyw ãm mã xwỳnh jarênh to nê mẽ amã harênh o: “Koja kêp pahi finat Tawi kanrêhã htãmnhwỳ koja.” Anhỹr o kot mẽ amã harê. ãm kêp kanrêhã

htãmnhwỳ pix ã mẽ amã harênh o pa. No na pre pahi Tawija kêp kanrêhã htãmnhwỳ hã harê nê mããnên kêp õ pahihti hã harê. Tã nom nhũm Tirtũm kapêr tũm o mẽ ajakre xwỳnhjaja na htem urà nê kêp pahihti hã mẽ amã harênh kêt nê. ãm kêp kanrêhã htãmnhwỳ pix ã harê. Kwa mo na htem Tawi pyrã nê kêp õ pahi hã harênh kêt nê? ³⁶ Na pre Tawi tãm Tirtũm kapêr tũm kwỳ hã kagà nê tanhmã Tirtũm kot mẽ akaxyw ãm mã xwỳnhja jarênh to. Tirtũm Karõ nhỹ hã tanhmã harênh to. Tirtũm mex ã mẽ grex xàja kwỳ hã kagà nê hã kagà ho:

Tirtũm na pre inhõ Pahihti mã ã kapêr anê nê kãm: “E amnê ixwỳr tẽ nê inhĩhkõ hã nhỹ nê inhmã mẽ ho amnhĩptar o akrĩ. Kot paj mẽ kot kãm akurê xwỳnh piitã mẽ unênh pa nê awỳr mẽ o mra nê anhĩhkram mẽ haxar pa.” Anhỹr o pre kãm kapêr. Anê.

³⁷ —Na pre ã Tawi Tirtũm kot Kris mã kapêr jarênh nê kêp õ pahi hã kagà anê. Tã nom Tirtũm kapêr tũm o mẽ ajakre xwỳnhjaja na htem kêp Tawi htãmnhwỳ pix ã ri axpên mã harênh o ri pa. No kêt Tawija na pre kêp õ Pahihti hã harênh o pa. Anê.

Nhũm pre ã Jejus mẽ kãm amnhĩ jarênh anê nhũm mẽ mar o kuhê xwỳnhjaja kuma nê hkĩnh nê. Nê kãm axte mar prãm nê.

³⁸ Hãmri nhũm arĩ mẽ ahkre ho nhỹ nê mẽ kãm:

—Kwa mẽ o kora. Kêr ka mẽ Tirtũm kapêr tũm o mẽ ahkre ho mẽ pa xwỳnhjê kot amnhĩ nhĩpêx o amnhĩ nhĩpêx kêt nê. Mẽ omu nê ãm mẽ omu nê mẽ kot amnhĩ nhĩpêx kôt amnhĩ nhĩpêx kêt nê. Na htem piitã mẽ hã hpijaãm kaxyw ê mex pix kãm ri pa. Nê mẽ kot amnhĩm mẽ rũnh ã mẽ harênh nhũm mẽ kot amnhĩ jarênh marja na htem kãm hprãm. ³⁹ Nê Tirtũm kapêr o mẽ ahkre xà hã ixkre kamã mẽ kãm amnhĩ to rũnh xwỳnhjê hkrĩ xà mex pix kamã na mẽ kãm hkrĩ hprãm. Nê mẽmoj tã mẽ apkur xà hã

arĩgro hã ma hkwỳjê hkôt mẽ apkur xà hã ixkre hwỳr akuprõ nẽ kãm mẽ kot amnhĩ to rũnh xwỳnhjê hkrĩ xà mex pix kamã hkrĩ hprãm.

⁴⁰ –Nẽ mẽ kot mẽ mjên htyk xwỳnhjê ho mex o pa hã amnhĩ jarẽnh tã amnhĩ to hêx. Nẽ na htem axtem nẽ mẽ nokupyr kaxyw mẽ hwỳr mra nẽ mẽ kãm: “E ot pa awỳr ato ajuta kaxyw tẽ. Ra amjên apê htyk jakamã kot paj pam amã akukrêx jamãr o ixpa.” Anẽ hãmri nẽ mẽ kêp mẽ òrkwỳ pytà nẽ amnhĩm mẽ kêp mẽ hikukrêx piitã ho hapêx. Te tãm kot mẽ hipêx o pa pyrãk nom tãm mẽ hipêx kêt nẽ. Nẽ te tãm amnhĩ nhĩpêx pyrã nẽ Tĩrtũm mã amnhĩ jarẽnh japjêê ho kuhê. Te mẽ kot Tĩrtũm mã ãm hãmri amnhĩ jarẽnh pyrãk tã hkwỳjaja kot ja hã mẽ omunh pix kaxyw nhũm mẽ ã kãm amnhĩ jarẽnh anẽ. Mỳrapê koja mẽ mex kêt nẽ. Koja Tĩrtũm tanhmã mẽ hipêx kati hto. Jakamã kwa kêt ka mẽ ã mẽ kot amnhĩ nhĩpêx anhỳr o mẽ pa xwỳnhjê kôt amnhĩ nhĩpêx o ri apa hkêt nẽ. ãm kwarĩ ho kwarĩ. Anẽ.

*Kêp mjên htyk xwỳnh jarẽnh
Rukre 21.1-4*

⁴¹ Nhũm Jejus arĩ Tĩrtũm mã amnhĩ jarẽnh xà hã ixkre kamã mẽ omunh o xa. Na pre hte Ijaew ixkreja o mex kaxyw ixkre jamãr xwỳnhjê mã hikàxpore hkwỳ nhõr o pa. Nhũm mẽ hikàxpore rũnh xwỳnhjaja hwỳr agjê nẽ kàxpore gjênh xà kamã hkwỳ ho rax nẽ hagjê nẽ ma akupỳm mra. ⁴² Tã nhũm mẽhõ ni pẽ mjên htyk xwỳnhja haxwỳja hwỳr axà. Kêp amrakati kumrêx. Nẽ hikàxpore tỳxre ãm pijakrutre htã kàxpore rũnh xwỳnhjê hpãnhã ixkreta wỳr tẽ. Nẽ kãm Tĩrtũm kĩnh xàj kàxpore gjênh xà kamã hamẽ kumẽ hãmri nẽ kato nẽ ma akupỳm tẽ. ⁴³ Hãmri nhũm Jejus amỳm ã kot amnhĩ nhĩpêx anhỳr ã omunh o xa nhũm ja kãm mex nẽ. Hãmri nẽ hkôt mẽ pa ho mẽ pa xwỳnhjê mã harẽ nẽ mẽ kãm:

–E mãn ka mẽnire htẽm mỳj pumu. Na pre mjên kêp ty nhũm kêp amrakati nẽ hikàxpore grire htã amnhĩ pẽ òr pa. Kwỳjê rom kãm Tĩrtũm

kĩnh xàj amnhĩ pẽ òr pa. Apkur xà hã hikàxpore na. ⁴⁴ Kêt mẽ hkwỳjaja na hte hikàxpore hkwỳ pix o mra nẽ gjênh xà kamã hagjê nom arĩ mẽ hikàxpore rũnh. No nija na mẽ urãk nẽ kãm hikàxpore japê hkêt nẽ. Nẽ ho òxỳ hkêt nẽ ãmnhĩx piitã o tẽ nẽ òr pa. Anẽ.

13

Jejus kot nhỹrmã mẽmoj piitã ho hapêx ã harẽnh

Matêwre 24.1-14; Rukre 21.5-9, 21.17-19; mããnhẽn Wam Ximotre 4.1; Sikũn Ximotre 3.1

¹ Tã hãmri nhũm Jejus kôt mẽ pa ho mẽ pa xwỳnhjaja arĩ Tĩrtũm mã amnhĩ jarẽnh xà hã ixkre kaxwỳnh pumunh o kuhê nẽ hã Jejus mã:

–Hêxta waa nẽ. Ixkreja mex kumrêx Pahшти. Kẽn rũnh o mẽ kot hipêx jakamã mex o mex. Nẽ mẽ kot ri Tĩrtũm mã hkĩnh xà nhõr nẽj haxwỳja piitã mex kumrêx. Anẽ.

² Hãmri nhũm mẽ kãm:

–Nà mex tã koja nhỹrmã mẽ kãm Tĩrtũm kurê xwỳnhjaja grãnh pa. Koja arĩ kẽn axkrutre axpẽn mỳnh nẽ nõr kêt kumrêx. Koja piitã anhgrã nẽ ahpỳnhã ri hikwỳ.

Anhỳr o mẽ kãm kapêr. ³ Hãmri nẽ ixkreja rũm kato nẽ ma tẽ nẽ hixêt pẽ Oriwêhti hã api nẽ hã nhỹ. Tĩrtũm nhõrkwỳ kutã hixêtja nhũm hã api nẽ hã nhỹ. Hãmri nhũm Simãw Pêtre mẽ Xiakre mẽ Juãw mẽ Andreja ma hkôt mra. Ahte hkôt mra nẽ mẽ kot Tĩrtũm mã amnhĩ jarẽnh xà hã ixkre grãnh par ã hkukja nẽ kãm:

⁴ –Kwa xà ãm hãmri koja mẽ ã ixkreja nhĩpêx anẽ? E aprĩ hã mẽ inhmã harẽ. Xà koja mẽ nhỹrmã ku-grã nà xà koja mẽ tokyx ho anẽ? Kwa mẽmo koja we wỳj ri tanhmã amnhĩ nhĩpêx to? Anẽ.

⁵⁻⁶ Hãmri nhũm mẽ kãm:

–Nà kot paj mẽ amã harẽ. Nom nhỹrmã mẽmoj piitã hapêx kaxyw tanhmã amnhĩ nhĩpêx to kumrêx kot paj mẽ amã harẽ ka mẽ inhma. Koja mẽ ohtõ nẽ mẽ apê ixkwỳjê hwỳr mra nẽ hêx rom te pa ixte amnhĩ nhĩpêx pyrãk o amnhĩ nhĩpêx o pa.

Ně tanhmã mẽ amã amnhĩ jarēnh to nẽ mẽ amã: “E pa na pre Tĩrtũm mẽ awỳr inhmẽ. Ixpẽ kaxkwa rũm ixwỳr kxwỳnhhta na pa.” Anhỳr o mẽ akõt mẽ amã amnhĩ to hẽx o pa. Nẽ mẽ amã: “E na pa mẽ ato amnhĩptàr kaxyw mẽ awỳr wrỳ.” Anhỳr o mẽ amã amnhĩ jarẽ. Nom kẽr ka mẽ ama nẽ ãm mẽ ama. Mẽ kot amnhĩ to hẽx xwỳnh na mẽ. Kormã akupỳn ixpõx xà hã arĩgroja kormã.

7—Ně koja mẽ nhỹri awry hã axpẽn par o pa. Nẽ mẽ atãã axpẽn par o pa. Nom kẽr ka mẽ harēnh ma nẽ ri tee ri tokyx mẽmoj piitã hapẽx ã hkamnhĩx kêt nẽ. Mẽmoj piitã hapẽx xà hã arĩgroja kormã.

8 —Ně koja mẽmoj piitã hapẽx kaxyw nhũm ahpỳnhã ri pika piitã hkõt mẽ pa xwỳnh piitã pika hõ nhõ xwỳnhjẽ kutã amnhĩ xunhwỳ nẽ axpu nẽ axpẽn pa.

—Ně koja pika piitã hkõt tanhmã mẽ à kuteja mẽ hamỳ nhũm mẽ amnhĩ xà htỳx kãm hamak o pa. Nhũm nhỹri pika htertet tỳx nẽ. Nẽ nhỹhỹnh pika hkwy kamã mẽ pa xwỳnhjaja prãm xàj pikaprãr pa. Tã nom kormã mẽ kot amnhĩ xà htỳx kãm hamak xà hkrax pix na ja. Te mẽnijaja pijagri kaxyw nẽ kormã õhy xà hpỳnh pyrãk. Koja mẽmoj piitã hapẽx kaxyw nẽ ã amnhĩ nhĩpẽx anẽ.

9 —E pa hpãnhã mẽ kot Tĩrtũm mã amnhĩ jarēnh xà hã ixkre grãnh par xwỳj ri mẽmoj tanhmã kot hkukamã amnhĩ nhĩpẽx to hã hã harẽ. Mẽ ate hã ixkukjẽr xwỳnhhta kot paj mẽ amã harẽ. Nã koja mẽ kãm ixkurẽ xwỳnhjaja mẽ awỳr mra nẽ ixtã mẽ apynẽ nẽ mẽ atomnuj nẽ. Nẽ ma mẽ pikuprõnh xà hã ixkre hwỳr mẽ ato mra nẽ kamã mẽ kãm mẽ ato kapẽr punuj nẽ nhũm mẽ kuma nẽ ma mẽ ato mra nẽ mẽ ajagjẽ. Mẽ ate ixkõt apa ho apa xwỳnh ã ã mẽ anhĩpẽx anẽ. Nẽ mẽ õ pahшти hwỳr mẽ ato mra nẽ mẽ kãm tanhmã mẽ ato kapẽr punuj to. ¹⁰ Tã nom kwa kẽr ka mẽ kutã akuhẽ nẽ mãmrĩ tãm mẽ kãm ijarēnh o akuhẽ. ¹¹ Nom kẽr ka mẽ kãm amnhĩ jarēnh kukamã

tee ri ajamxpẽr o ri amã mẽ uma hkẽt nẽ akuhẽ. Rỳ mẽ ajamxpẽr o: “Hẽxta waa nẽ. Mẽ kot ixkukjẽr ã arĩgrota ã tanhmã kot pa we ri mẽ kãm amnhĩ jarēnh to?” Anhỳr o tee ri amnhĩ kukamã ajamxpẽr kêt nẽ. Koja Tĩrtũm Karõ tanhmã mẽ akrã hto ka mẽ ỹ hã akatàt kõt tanhmã mẽ kãm amnhĩ jarēnh to.

12 —Ně mẽ atõ nẽ mẽ anhĩpẽxã nẽ mẽ akrajaja koja mẽ ixtã mẽ atã amỳnẽ nẽ ma pahi hwỳr mẽ ato mra nẽ kãm mẽ ajarẽ nhũm mẽ kuma nẽ mẽ ajagjẽ nẽ mẽ akwỳjẽ pa. ¹³ Koja mẽ piitã ixkõt mẽ akamã gryk nẽ ã kãm mẽ akurẽ ho pa anẽ. Nom mẽ kot ã mẽ anhĩpẽx anhỳr mã tã kẽr ka mẽ amnhĩ to htỳx nẽ ixkaga hkẽt nẽ. Mẽ kot mẽ apar tã ka mẽ kaxkwa kamã akupỳm atĩr kurẽ kumrẽx. Hãmri nẽ mẽ kurom Tĩrtũm mẽ wa ixri atĩr tũm nẽ amex rãhã nẽ apa ho apa. Mẽ kot tanhmã mẽ ato htã mẽ apẽ akupỳm kaxkwa kamã atĩr tũm nẽ apa mã xwỳnh jakamã kwa tee ri amnhĩ kukamã ajamxpẽr o ri apa hkẽt nẽ. Anẽ.

Mẽ pahomnuj tỳx xwỳnh maati hã harēnh

Matẽwre 24.15-28; Rukre 21.20-24; mããnẽn Sikũn Tesarõn 2.3-4; Apokarij 13.11-17

¹⁴⁻¹⁶ Nhũm Jejus arĩ mẽ kãm kapẽr nẽ mẽ kãm:

—Ně koja nhỹrmã kot mẽ atomnuj tỳx kumrẽx xwỳnh maatija axtem nẽ Tĩrtũm mã amnhĩ jarēnh xà hã ixkreja kamã amnhĩ xãm. Hãmri ka mẽ ja hã omu nẽ mẽ kot krĩ grãnh par mã ajamaxpẽr kurẽ kumrẽx. Koja ã amnhĩ nhĩpẽx anẽ ka mẽ amỳm amnhĩ wỳr mẽ omu hãmri nẽ ajapõj nẽ ma aprõt nẽ amrar kurẽ kumrẽx. Mẽ apẽ jar pika pẽ Jutej kamã mẽ apa xwỳnhjaja mẽ omu hãmri nẽ mẽ kot mẽ apar py-maj ma aprõt nẽ amrar kurẽ kumrẽx. Hixẽt prẽk wỳr ajapõj nẽ aprõt nẽ ma mra. Nẽ jar Jerujarẽ nhõ xwỳnhjaja kẽ mẽ umaj haxwỳja hapõj nẽ ma hprõt nẽ ma mrar o mra. Nẽ kapõt ã ri mẽ pa xwỳnhjaja kẽ mẽ ê jamỳnh kaxyw akupỳm krĩ hwỳr gjẽx kêt nẽ. ãm ma

mê umaj hprôt nê mrar o mrar kurê kumrêx.

¹⁷ —Nê mê htujarô xwýnhjaja nê mê hkra karàre xwýnhjaja. Jajê pê koja mêmoj omnuj tỳx nê. Tanhmã kot wem amnhĩ to nê hprôt tỳx? Nà pika ja kamã koja mê mex kêt nê. Mê kot amnhĩ tomnuj mỳrapê koja Tĩrtũm tanhmã mê homnuj tỳx to.

¹⁸⁻¹⁹ —Koja ã mêmoj amnhĩ nhĩpêx anê hãmri nhũm mê piitã amnhĩ xà htỳx kãm hamak rũnh o pa. Tĩrtũm kot mê piitã mê ho kator krax rũm amnê mê pa xwýnhjaja na mê kormã à htỳx kamã hamak rũnh kêt nê. Kormã amnhĩ xà kamã hamak kryre. No nhỹrmã mê hprôt xà hã arĩgrota ã koja mê amnhĩ xà htỳx kamã hamak rax kumrêx.

—Tã akupỹn ixte mê awỳr ixwryk xà hã arĩgrota ã kot pa mêmoj punuj o ijapêx pa ka mê axte ã mêmoj kot anhỹr pumunh kêt nê. Nom kormã akupỹn ixwryk xwỳj ri kot kaj mê amnhĩ xà htỳx kamã ajamak o apa. Jakamã kêr ka mê ã amnhĩ nhĩpêx anhỹrja kukamã amnhĩ to Tĩrtũm wỳ nê kãm: “Pa Tĩrtũm. Kwa kê mêmoj ã amnhĩ nhĩpêx anhỹr kaxyw hãmri kê amgrã pê ã amnhĩ nhĩpêx anê. Koja na pê ã amnhĩ nhĩpêx anê nhũm omnuj tỳx nê.” Anhỹr o amnhĩ to awỳ.

²⁰ —Mê hprôt xà hã arĩgrota ã koja Tĩrtũm kãm mê apê hkrajaja mê atyk par pymaj mê anê mêmo punuta ã arĩgro hkwy grã nê mê akukamã mê amã ho grêre. Koja mê akamã ukapri xaj ã mê anê hipêx anê.

²¹ —Nê koja ã mêmoj amnhĩ nhĩpêx anhỹr kaxyw hãmri nhũm mê hêx o mê pa xwýnhjaja ma mê awỳr mra nê hêx rom tanhmã mê amã kapêr to nê mê amã: “E ota ra Tĩrtũm kot mê pakaxyw ãm xwýnhhta pøj. Kwa mê tokyx hwỳr mra nê omu nê hkôt ri apa.” Anhỹr o mê amã hêx. Hãmri nhũm mê hkwyjaja tee ri mê kuma nê mê amã: “Nà tãm kêt. Jar mê ixkamã na. E mê tokyx amnê hwỳr mãn mra nê omu.” Anhỹr o mê amã hêx o pa. Nom kêr ka mê ama nê ãm mê ama nê mê hkôt amrar kêt nê.

²²⁻²³ —E kwa mê inhma. Na pa ra ixpri hã mêmoj kot ã amnhĩ nhĩpêx anhỹrja kukamã mê amã tanhmã harênh to. Tã kêr ka mê axkãm ajamak rom nê ri apa. Koja mê kot amnhĩ to hêx xwýnhjaja axpên pãnhã mê awỳr mra nê mê amã kêp Tĩrtũm kot mê akaxyw ãm xwýnh ã amnhĩ to hêx. Nê mê hkwyjaja kêp Tĩrtũm nhỹ hã kapêr jarênh xwýnh ã amnhĩ to hêx. Hãmri nê aa mê kot mêmoj pumunh kêt kwỳ ho anhỹr o pa. Te Tĩrtũm nhỹ hã kot ho anhỹr pyrãk nom hêx rom mê apê Tĩrtũm kot amnhĩm mê arênh xwýnhjê nokupyr kaxyw ã amnhĩ nhĩpêx anhỹr o pa. Anê.

Akupỹn Jejus wryk xà hã arĩgro jarênh

Matêwre 24.29-31; Rukre 21.25-28; mããnên Sikũn Pêtre 3.10; Apokarip 1.7, 19.11-16

²⁴⁻²⁵ Nhũm Jejus arĩ mê kãm kapêr nê mê kãm:

—Tã koja mê kot amnhĩ xà htỳx kamã hamak xà hã arĩgrota hapêx nhũm Tĩrtũm ã mêmoj nhĩpêx anê. Koja kaxkwa ho àk tỳx nê nhũm myyti ahtyk.

Nhũm mytwryre axte hirã hkêt nê.

Nhũm kanhêti piitã axrê nê rôrôk pa.

²⁶ Hãmri pa man akupỹn pika hwỳr wry nhũm mê piitã ixwryk kãm ixpumu. Kakrã kamã kot paj ixihtỳx o inhĩrã rax kãm akupỹn mê awỳr wry.

²⁷ Hãmri nê ma krĩ piitã hwỳr Tĩrtũm kapêr o mê wryk xwýnhjê rê nhũm mê ma mra nê amnepêm ixte amnhĩ kaxyw mê axunhwỳr xwýnh piitã ho akuprô nê akupỹn ixwỳr mê ho mra. Anê.

Jejus kot mêmo pĩ hpàr ã ejêp jarênh

²⁸ Nhũm Jejus arĩ mê kãm kapêr nê mê kãm:

—E ka mê pĩ hpàr mũj pumu. Na hte mêmo mytwry hã rã nhũm mê omu nê ô hkukamã hamaxpêr kurê kumrêx. ²⁹ Ja pyrã nê koja mêmoj ã amnhĩ nhĩpêx anhỹr mê ka mê akupỹn mê awỳr ixwryk mã ajamaxpêr kurê kumrêx. ³⁰ Koja akupỹn ixpôx kêt ri ã mê kot mêmoj kot amnhĩ

nhîpêx anhÿr pumunh xwÿnhjaja kormã piitã htyk par kêt ri pa akupÿn mẽ awÿr wrÿ.

³¹ –Nê koja nhÿrmã pika nê kaxkwa wa hapêx pa. Tã no âm ixkapêr koja wa uràk nê aa hapêx kêt nê. Koja âm rãhã ho rãhã. Kot paj aa ihkjê ho tanhmã mênh to hkêt nê. Anê.

Mẽ pahte akupÿn Jejus wrÿk xà hã arÿgro pumunh kêt ã mẽ pajarênh

Matêwre 24.36-44; Rukre 12.37-40; mãânên Atre 1.9-11; Wam Tesarôn 5.2; Sikÿn Pêtre 3

³² Nhÿm Jejus arÿ mẽ kãm kapêr nê mẽ kãm:

–Nom akupÿn ixwrÿk xà hã arÿgroja mẽ ate omunh kêt. Nê kaxkwa kamã Tÿrtÿm kapêr o mẽ wrÿk xwÿnhjaja kot ja pumunh kêt. Nê pa ixpê Tÿrtÿm Kra htã ijaxwÿja ixte ja hã amnhÿ pumunh kêt. Âm Mêpahpãm maatija tapxipix kot ja pumunh.

³³ –Tã mẽ ate akupÿn ixwrÿk xà hã arÿgro pumunh kêt jakamã kwa kêr ka mẽ axkãm ajamak rom nê ri apa. Nê apkati mẽ amnhÿ wÿr ijapêr arÿt rãhã ho ri apa.

³⁴⁻³⁵ –E pa tanhmã mẽ amã akupÿn ixwrÿk xà hã arÿgro jarênh to ka mẽ inhma. Koja mênh nhÿhÿm nojarêh hãmri nê kãm mẽ àpênh xwÿnhjê mã mẽ àpênh ã karô nê ôrkwÿ jamãr xwÿnh mã tanhmã kãm karô hto. Hãmri nê ôrkwÿ kahê xà jamãr xwÿnh mã kãm: “E kêr ka ixwakre kamã ijapêr arÿt rãhã ho ri apa.” Anê hãmri nê ma nhÿhÿm mō. Tã mẽ kot ijapêr rÿt rãhã ho mẽ pa xwÿnhjaja te kot ixkre kahê xà jamãr xwÿnh kot amnhÿ nhîpêx pyræk. Ô patrãwja akupÿn hpôx xà hã arÿgro hã omunh kêt jakamã na hte kahê xà jamãr rãhã ho pa. Koja apu axpêr kamàt nhÿm akupÿn hpôx japêr. Rÿ kôt ã kamàt rÿ krãhyre kã nhÿm akupÿn hpôx japêr. Rÿ kwÿhtyk nhÿm akupÿn hpôx japêr. Tã uràk nê mẽ ate akupÿn ixwrÿk xà hã arÿgro pumunh kêt jakamã kêr ka mẽ ijamãr rãhã ho ri apa. Jao ixkutêp inhma tanhmã amnhÿ nhîpêx to rãhã

nê. Ra ixte mẽ amã hã karô xà hkôt. ³⁶ Kop ixkre kahê xà jamãr xwÿnhjaja tee ri ô patrãw kamã ama hãmri nê ra ôtxwa nê htÿx ôt o ÿr rôm nhÿm haêr pê hwÿr hpôx ronhÿx ja kêp mex kêt nê. Ja pyrã nê kêr ka mẽ ixkutêp ixkôt amnhÿ nhîpêx rãhã ho ri apa. Nom tee ri amnhÿ wÿr ixkãm ama hãmri nê axte inhma ajamaxpêr kêt pê atÿx ri tanhmã amnhÿ tomnuj to ho apa hkêt nê.

³⁷ –E ixte mẽ amã mẽmoj jarênhja na pa hte ixkwÿjê piitã mẽ kãm harê. Jakamã kwa kêr ka mẽ akupÿn ixwrÿk ã ijapêr arÿt rãhã ho ri apa. Anê.

Nhÿm pre ã Jejus amnhÿ kukamã mẽ kãm ujarênh anê.

14

Mẽ kot Jejus pÿr kukamã hamaxpêr ã mẽ harênh

Matêwre 26.1-5; Rukre 22.1-2; Juãw 11.45-53

¹ Tã nhÿm Ijaew hkÿnhã ã arÿgro pê Pas wÿr apkati axkrut. Pas ã na hte mẽ ixpê Ijaewjaja amnepêm Tÿrtÿm kot pika pê Ejit pê mẽ inhÿgêt nê mẽ ixpãmjê kator mã ijamaxpêr kaxyw axpên wÿr akuprô nê hã ixkÿnh. Na pa htem arÿgroja mã: “Pas” anê. Nê harênh o: “Mẽ pahte pãw kaxkrit kêt kur ã arÿgro” anê. ² Jakamã nhÿm mẽ inhô patre krãhtÿmjê mẽ Tÿrtÿm kapêr tÿm o mẽ ahkre xwÿnhjaja kãm Jejus pÿr prãm nê. Nom mẽ kãm hkôt kapêr mar o mẽ pa xwÿnhjê puma nê. Nê tee ri hã amnhÿ jahkre nê axpên mã:

–Hêxta waa nê. Tanhmã kot puj wem ho nê kupÿi? Kot puj mẽ pahkÿnh kãm tanhmã ho nhÿm mẽ hkÿnh xwÿnhjaja hã mẽ pahpumu nê mẽ pakamã gryk tÿx nê. Pu mẽ hã axpu nê hã tanhmã axpên to. Jakamã kwa pu mẽ kormã tanhmã ho hkêt nê. Anê.

Mênh ni kot Jejus krã gregrer ã harênh

Matêwre 26.6-13; Rukre 7.36-50; Juãw 12.1-8

³ Rôm nhÿm Jejus Simãw nhôrkwÿ kamã kormã apkur o nhÿ. Krÿ pê

Petân kamã. Simãwja na pre hkà kro xàpêr tỳx o pa nhũm Jejus akupÿn ho mex. Jakamã akupÿm ò krĩ hwÿr pòj nê kutã apkur o nhÿ. Hãmri nhũm mêhõ nija harênh ma nê mê hkuxwa xà hã kàx ò py nê ma hwÿr o tẽ. Nê mê hwÿr axà nê nhÿhÿnh kàx kahte nê mê hkuxwa xà ho hkrã gregrer pa. ⁴ Hãmri nhũm mê apkur o hkrĩ xwÿnhjaja tee ri ã kot amnhĩ nhĩpêx anhÿr ã omu nê kamã gryk nê. Nê axpên mã:

–Tk. Kwa nà na hã mê hkuxwa xàta kapĩr par kumrêx. ⁵ Kop apu ma o htêm nê ho wênê nê hpãnhã kàxpore ho rax kumrêx nê hamÿnh nê ho mê kêp amrakati xwÿnhjê nhĩpêx par nhÿx ja kãm mex nê. Mo na ri ã amnhĩ nhĩpêx anhÿr kêt nê?

Anê nê hã kãm akir. ⁶ Hãmri nhũm Jejus mê kuma nê mê kãm:

–Tk. Kwa mê kãm axàkjêr kêt nê. ãm hãmri na ã inhĩpêx anê. ⁷ Mê kêp amrakati xwÿnhjaja koja mê arĩ mê akôt pa rãhã nê. Ka mê amã mêmõ arĩgro hã mê ho ajuta hprãm nê tanhmã mê ho ajuta hto nê mê kãm mêmõj gõ. No pa kot paj ri mê akôt ixpa ka mê ixtõ mex ry ho apa hkêt nê. Kot paj tokyx mê are. ⁸ Ixtyk nhũm mê kot ijaxàr kukamã na ã ixkrã gregrer anê. ãm hãmri na ã inhĩpêx anê. ⁹ ãm hãmri na pa mê amã ja jarê. Koja mê krĩ piitã hkôt axpên mã ixte tanhmã mê anê amnhĩ nhĩpêx to hã ijarênh o pa nê mãânên kot ã inhĩpêx anhÿrja mãânên harênh o pa. Nhũm mê piitã kot tanhmã ixtõ mex to hã harênh ma. Anê.

Jut Kariot kot mê kãm Jejus ã àmnênh kaxyw ã harênh

Matêwre 26.14-16; Rukre 22.3-6; Juãw 13.21-30

¹⁰ Tã nhũm Jut Kariotja. Jejus kôt mê pa ho mê pa xwÿnh pê 12 hõ na pre. Tã axtem nê Satanasti nhÿ hã ma patre krãhtũmjê hwÿr tẽ nê axtem nê tanhmã Jejus o mê mar to nê mê kãm:

–E ot pa mê amã Jejus jarênh o tẽ. Xà kot paj mê amã hã amÿnê ka mê hpãnhã inhmã amnhĩre nà? Anê.

¹¹ Hãmri nhũm mê kuma nê hkĩnh nê. Hãmri nê kãm:

–Nà kot paj mê amã amnhĩre. Anê.

Hãmri nhũm mê kuma nê kato nê ma tẽ nê Jejus pynênh kaxyw htãnopxar o hkôt ri pa.

Jejus kot ÿ hã kapêr o mê pa xwÿnhjê kutã apkur ã harênh

Matêwre 26.17-19; Rukre 22.7-13

¹² Tã nhũm arĩgro pê Pas kato. Amnepêm mê inhĩgêjtaja na prem ôwêhti hkrare hkwy pa. Tĩrtũm kot ja hã mê omunh nê Ejit kãm mê kãm mê hkurê xwÿnhjê nhĩhkra nê mê kator kaxyw na prem ã amnhĩ nhĩpêx anê. Jakamã na pa htem arĩ mê ixpê mê hkanrêhã mê htãmnhwÿjaja Pas ã axpên wÿr akuprõ nê jam ijamaxpêr pê mê urak nê ôwêhti hkrare hkwy hpa nê pãwti kaxkrit kêt kãm kuku.

Jakamã nhũm Jejus kôt mê pa ho pa xwÿnh pê 12jaja Pas ã mê apkur xà hã Jejus kukja nê kãm:

–Kwa nhÿri kot paj mê akutêp Pas ã mê panhõ hã apê? Anê.

¹³ Hãmri nhũm mê kuma nê ja wa ho axkrut nê mê amnhĩ kukamã wa kumê nê wa kãm:

–E wa ma Jerujarê hwÿr wa tẽ. Nê hwÿr axà nê mêhõ myja pumunh kurê kumrêx. Nhũm amnhĩm gõ ru nê amnhĩ kre hã poti xãm nê o tẽ ka wa omu nê hã ajêt nê ma ôrkwÿ hwÿr hkôt tẽ. ¹⁴ Hãmri nê ixkre nhõ dõn pumu nê kãm: “E Jejus na wa inhmê pa wa awÿr tẽ. Na awÿr pêr mênh o: ‘Nhÿri kot paj we ixkôt ri mê pa ho pa xwÿnhjê mê Pas ã axpên kutã apku?’ Anhÿr o na awÿr pêr mê.”

¹⁵ –Wa ã kãm akapêr anê kê war ama nê war amã ôrkwÿ nhĩmõk ã ixkre rax ò jahkre. Ra kamã kaxyw mê paxàpkur xà hã mêmõj piitãã. Ka wa omu nê mãmrĩ kamã mê ixkutêp mê panhõ hã apê. Anê.

¹⁶ Hãmri nhũm wa kuma nê ma hwÿr tẽ. Nê krĩm axà nê ra kot wa kãm mêmõj jarênh xà hkôt mêmõj piitã omu nê mê kutêp mê kãm mêmõ hã àpênh o wa xa.

*Jejus kot mēhō kot mē kām hā
àmnhēn ā harēnh*

*Matēwre 26.20-25; Rukre 22.21-23;
Juāw 13.21-30*

¹⁷ Tā nhūm kamàtre nhūm Jejus mē hkôt mē pa ho pa xwýnhjaja wa hkôt mō. ¹⁸ Hāmri nē kýxpē ixkreja wýr api nē hwýr agjē nē apkur kaxyw hkrī hpa nē kormā apkur o hkrī nhūm Jejus mē kām:

—E pa mē amā mēmoj jarē ka mē inhma nē amnhī krām haxàr tỳx nē. Kot kaj mē ixkutā axàpkur o akrī xwýnhjē hō mē kām ixkuré xwýnhjē mā ixtā amýnē. Anē.

¹⁹ Hāmri nhūm mē tee ri kuma nē hkaprī htỳx nē. Nē axpēn pānhā amnhī tā hkukja nē kām:

—Kwa xà pa kot paj ā anhīpēx anē? Nà pa hkēt. Anē.

²⁰ Hāmri nhūm mē kām:

—Nà mē apē 12jē hō kot kaj ā inhīpēx anē. Mē ate ixkutā guhkrax kām anhō pāwti ho mry kagō nhek o akrī xwýnhjē hō kot kaj ixtā amýnē. ²¹ Tirtūm kapēr ā kagà htūm kot ixkukamā harēnh xà hkôt koja mē tanhmā ixto rax nē ixpī. Nom kot mē kām ixtā àmnēnh mā xwýnhta hēxta waa nē. Ā kot amnhī nhīpēx anhýrja mýrapē koja amnhī xà htỳx kām hamak rax kumrēx. Kop apu aa ō māmāj nhōxà hkre rūm kator kēt ronhỳx ja kām mex nē.

²² Anē nē kormā mē apkur o hkrī rōm nhūm pāwti hō py nē ho Tirtūm wý. Hāmri nē mē kām ho hkry nē mē piitā mē kām ōr pa nē mē kām:

—E na pa mē amā pāwti ho hkry nē mē amā kugō. Ja pyrā nē koja mē ā inhīpēx anē nē te ixto hkry hpar pyrāk o inhīpēx pa amnhī xà htỳx kamā ijamak kām ty. Nom mē anē kot paj ty. E mē māmri aku. Anē.

²³⁻²⁴ Nē hpānhā wīhti hā kop py nē mā ho anē nē Tirtūm mā harē. Hāmri nē mē kām kugō nē mē kām:

—E mē kot ixpīr xà hā arīgrota ā koja ixkamrō axkapī. Nom koja mē amarī ixpīr nhūm amarī hpikapīr kēt nē. Ām paa. Pa kot paj mē anē mē ĩhkram amnhī jaxà nhūm mē ā inhīpēx anē.

Koja ixkamrō axkapī nhūm Tirtūm omu nē ixkukwak ri mē anē mē ate amnhī tomnuj piitā amnhī katut kôt rēnh pa nē mē ato hkra. Ra amnepēm kot ja hā amnhī jarēnh xà hkôt. Jakamā e. Mē axpēn pānhā ixkamrō pikapīr mā ajamaxpēr pē ixte mē amā kop kām wīhti nhōrta o akōm o axpēn nhīpēx. Anē.

Nhūm pre ā mē kām amnhī jarēnh anē nhūm mē piitā ho hkōm o axpēn nhīpēx. ²⁵ Hāmri nhūm mē kām:

—Ām hāmri na pa mē amā amnhī jarē. Kot paj axte wīhti ho ixkōm kēt rāhā nhýrmā Inhō Papaj akupýn mē awýr inhmē. Hāmri pu mē rī kormā akupýn ixpōx xà hā arīgrota ā pahkīnh nē. Nom axtem tanhmā hā pahkīnh to. Anē.

²⁶ Nhūm pre ā mē kām kapēr anē hāmri nhūm mē Tirtūm mā mex o mex ā gre hāmri nē hapōx pa nē ma hixēt pē Oriwēhti hwýr mra.

*Jejus kot Simāw Pētre hkukamā
tanhmā harēnh to*

*Matēwre 26.31-35; Rukre 22.31-34;
Juāw 13.36-38*

²⁷ Tā nhūm Jejus hkôt mē pa ho pa xwýnhjē hkukamā tanhmā mē kām ujarēnh to nē mē kām:

—E mē inhmā. Tirtūm kapēr ā kagà htūm kot ā mē pajarēnh kot anhýr.

Kot paj ōwēhti jamār o pa xwýnhja pī hāmri nhūm ōwēhti hpigrānh pa nē ma anhgrā nē ri mra.

Anhýr o te ixpē ōwēhti jamār xwýnh nhūm mē apē ōwēhti pyrāk ā mē pajarēnh. Tā kot puj mē ā amnhī nhīpēx anē. ²⁸ Mē kot ixpīr tā koja Tirtūm akupým ixto ixtīr. Pa akupým ixtīr nē ma mē akukamā pika pē Garirej wýr mō. Kamā kot puj mē axte axpēn pumu. Anē.

²⁹ Hāmri nhūm Simāw Pētre tee ri mē amnhī tā kuma nē kām:

—Kwa nà. Ri ā mē ijarēnh anhýr kēt nē Pahīhti. Kot paj akaga hkēt nē. Jajaja koja anhgrā nē hprōt nē ma mrrar japēr no pa kot paj anhýr kēt nē. Anē.

³⁰ Hāmri nhūm kām:

—Nà kot kaj anē Simāw Pētre. Koja apkati hkôt krāhyre hkār kēt ri ka ra

mē umaj ate ixkôt apa hkêt ã mē kãm amnhĩ tã axaprâr o axkrunēpxi kãm ga. Kwa jam ajamaxpēr tỳx nē. Anē.

³¹ Hāmri nhũm tee ri amnhĩ tã kuma kãm amnhĩ tã aprâr kãm hihtỳx nē kãm:

—Tk. Kwa nà. Kot paj ã amnhĩ nhĩpêx anhỹr kêt nē. Koja mē tee akôt ixpĩr mã tã no pa ãm aa akaga hkêt kumrêx. Kot paj akôt ixpa ho ixpa rãhã nē. Anē.

Hāmri nhũm hkôt mē pa ho mē pa xwỳnh kwỳjê piitã ã kãm amnhĩ jarēnh anē.

*Jejus kot Tĩrtũm mã amnhĩ jarēnh
Matêwre 26.36-46; Rukre 22.39-46*

³² Tã nhũm Jejus ma nhỹri mē kot kãm “Gesēm” anhỹr xwỳnhja wỳr hkôt mē pa ho pa xwỳnhjê ho mō. Hāmri nē mē kãm:

—E mē jar ixkutêp akrĩ. Pa ma mĩtũm tē nē Tĩrtũm mã amnhĩ jarē mãn. Anē.

³³ Hāmri nē amnhĩ kôt mē ho axkrunēpxi nē mē o mō. Simãw Pêtre mē Jepetew kra pijakrut pê Xiakre nē Juãwja nhũm amnhĩ kôt mē o mō.

³⁴ Hāmri nē amnhĩ kukamã mē kãm hkurê xwỳnhjaja kot tanhmã hipêx tota kukamã hamaxpēr o ra amnhĩ kamã kahak tỳx o ra hkaprĩ nē. Hāmri nē hkôt mē mrar xwỳnhjê mã kãm:

—Hêxta waa nē. Na pa tee ri amnhĩ xà htỳx kamã ijamakja kukamã ijamaxpēr nē amnhĩ kamã ixkahak tỳx o ixkaprĩ nē. Te ra ixkaprĩja kot ixpĩr o mōr pyræk. Jakamã e mē jar anohtỳx nē ixto Tĩrtũm wỳr o akrĩ kêt tanhmã ixto pa mē kot tanhmã ixtoja kutã ixihtỳx nē. Anē.

³⁵ Hāmri nē mē kurũm htēm grire nē amnhĩ kamã kahak o Tĩrtũm mã amnhĩ jarēnh kaxyw htu mỳr pê htēm nē pikap nõ nē kãm:

³⁶ —Kwa Papaj. Hêxta waa nē. Inhmã amnhĩ xà htỳx kãm ijamak prãm kêt kumrêx. Na pa tee ri amnhĩ kukamã ijamaxpēr nē amnhĩ kamã ixkahak tỳx nē. Jakamã kot kaj amã inhnê ja ho ajapêx prãm nē mãmrĩ ho ajapêx nhũm mē kãm ixkurê xwỳnhjaja tanhmã ixto hkêt

nē. Rỳ ko. Kot kaj amã mē kot tanhmã ixto hprãm kêt mē mãmrĩ tanhmã inhĩpêx to. Nom pam inhmã hprãm xà hkôt kêt.

³⁷ Anhỹr o Tĩrtũm mã amnhĩ jarē hāmri nē kãnhmã xa nē akupỹm Simãw Pêtreja mē hwỳr tē nē mē omu nhũm mē ra htỳx gōr nē hikwỹ. Hāmri nhũm tee ri mē omu nē Simãw Pêtre mã kãm:

—Kwa Simãw Pêtre. E mē hāmri akrã hapōj. Kwa wem anohtỳx grire nē ixkutêp amnhĩ to Inhō Papaj wỳr o akrĩ ³⁸ kêt mē ixkôt tanhmã mē ato htã ka mē amã mē uma xàj ixkaga hkêt nē arĩ mē kutã amnhĩ to htỳx nē akuhê. ã mē amã mē ate amnhĩ nhĩpêx anhỹr prãm nom kormã mē amã maa. Anē.

³⁹ Hāmri nē akupỹm tē nē axte Tĩrtũm mã tanhmã amnhĩ jarēnh to.

⁴⁰ Nē akupỹm mē hwỳr tē nē mē omu nhũm mē axte ôt pa nē hikwỹ. Nhũm tē nē tee ri mē omu hāmri nē tanhmã mē kãm nē hkêt nē. ãm awjanã nē ma akupỹm tē nē axte Tĩrtũm mã amnhĩ jarē. ⁴¹⁻⁴² Hāmri nē akupỹm mē hwỳr tē nē mē kãm:

—Kwa xàn ka mē arĩ gōr nē anhĩkwỹ? E mē tokyx akrã hapōj. Na mē ra ixwỳr mrar nē kot ixpynēnh mã. Koja mē tokyx ixkutã mē kot amnhĩ xunhwỳr xwỳnhjaja mē kãm ixtã amỹnê. Ota ra kot ixtã mē kãm àmnēnh xwỳnhhta tē. E mē tokyx kãnhmã akrĩ pu mē kutã mra. Anē.

*Mē kot Jejus pynēnh ã mē harēnh
Matêwre 26.47-56; Rukre 22.47-53;
Juãw 18.1-11*

⁴³ Nhũm Jejus kormã mē kãm kapēr o ãm rãhã nhũm Jut Kariotja tē. Mē hkôt mē pa ho mē pa xwỳnhjê hō htã nhũm ra amnhĩ kôt mē ohtô nē Jejus wỳr mē o tē nhũm mē wapohti nē kô jamỳ nē hkôt o mra. Patre krãhtũm mē Ijaew krãhtũmjê mē Tĩrtũm kapēr tũm o mē ahkre xwỳnhjaja ra Jut kôt mē kurê nhũm mē man hkôt Jejusja wỳr mra. ⁴⁴ Na pre ra Jut Kariotja mē kãm tanhmã amnhĩ jarēnh to nē mē kãm:

—E kot paj nhỹri mē pahte unēnh mã xwỳnhhta pumu nē hwỳr tē nē

kahti hkôt kumỳ nē tanhmā kām ixkapēr to. Ka mē ixpumu nē hwỳr tē nē unē nē ma akupỳm o tē.

Anē hāmri nē ma hwỳr mē o tē. ⁴⁵Nē Jejusja pumu nē hwỳr tē nē kām: “Pa mē ijahkre xwỳnh.” Anē hāmri nē kahti hkôt kumỳ. ⁴⁶Hāmri nhũm hkôt mē mrar xwỳnhjaja omu nē Jejus wỳr mra nē unēnh kurē kumrēx. ⁴⁷Hāmri nhũm Jejus kôt mē pa ho mē pa xwỳnhjaja tee ri ja hā mē omu nhũm hōja õ wapo kapa nē patre maati mā àpēnh xwỳnh kot mē hkôt htēm xwỳnhhta mā wapo ho apē. Nē kot ho hkrā nhĩpōnh mā tā kuhpaw nē upōk rūm hamak nhĩkjē krāhta. ⁴⁸⁻⁴⁹Hāmri nhũm Jejus amnhĩ tā mē kot unēnh xwỳnhjē mā kām:

—Kwa na pa pre apkati mē Tĩrtũm mā amnhĩ jarēnh xà hā ixkre kamā mē kām ixujarēnh o ixpa ka prem tokyx ixpynēnh kēt nē. Tā jarāhā te ixte amnhĩ tomnuj xwỳnh pyrā nē ixwỳr wapohti nē kō hā akapēn nē ixwỳr atēm rax nē. Nom ra mē ate tanhmā ixto kaxyw arĩgro kator jakamā mē māmri tanhmā amā ixto hprām xà hkôt tanhmā ixto. Tĩrtũm kapēr ā kagā htũm kot mē akukamā ā mē ate inhĩpēx anhỳr ā mē ajarēnh xà hkôt. Anē.

⁵⁰Hāmri nhũm hkôt mē pa ho mē pa xwỳnhjaja tee ri mē kot unēnh ā mē omu hāmri nē mē umaj Jejus kaga nē ma hprōt pa nhũm ahte mē kuri xa. ⁵¹⁻⁵²Hāmri nhũm mē ma o tē. Nhũm kormā mēhō nyw xwỳnhja tee ri ja hā mē omu nē ma Jejus kôt tē. Nhũm mē amnhĩ kôt omu nē kot unēnh kaxyw kahty xà hā kupy nhũm mē umaj mē ĩhkra kamā kahty xāja re nē ma hkēnh nē hprōt nē tēn akunok.

Ijaew nhõ patre maati kot Jejus kujjēr ā harēnh

Matēwre 26.57-68; Rukre 22.63-71; Juāw 18.12-14, 18.19-24

⁵³Tā nhũm mē ma mē õ patre maati nhõrkwỳ hwỳr Jejus o tē. Hāmri nhũm patre krāhtũmjē mē Ijaew krāhtũmjē mē Tĩrtũm kapēr tũm o mē ahkre xwỳnhjaja õrkwỳ hwỳr Jejus ā akuprõ.

⁵⁴Hāmri nhũm Simāw Pētre mē hkôt tē nē mē hkôt patre maati nhõ kĩtare hwỳr axà nē amỳm hā mē omunh o xa. Nhũm ra pōristijaja kĩtare kamā amnhĩm kuto nē hā ànhunh o hkrĩ nhũm mē hwỳr tē nē mē ĩhkō hā ànhunh o nhỹ.

⁵⁵⁻⁵⁶Rõm nhũm ixkre kamā mē pikuprõnh xwỳnhjaja tee ri Jejus ā krĩ nhõ xwỳnhjē kukja nē mē kām:

—E mē atõ na ka pre Jejus kot tanhmā amnhĩ tomnuj to hā omu? Mē atõ mē inhmā harē pa mē ama nē Rõm nhõ xwỳnhjē nhĩhkram haxà kē mē pamā kupĩ. Anē.

Hāmri nhũm mē axpēn pānhā tanhmā harēnh to. Tanhmā kot amnhĩ tomnuj to hā harēnh to htā nom ri ho hēx jakamā axpēn kwỳm ri tanhmā ri harēnh to nhũm mē tee ri mē kuma nē mē kām:

—Tk. Kwa mē axpēn kwỳm ri tanhmā harēnh to hkēt nē. Axpēn kôt mǎn ri tanhmā mē inhmā harēnh to. Anē.

⁵⁷Hāmri nhũm mē hkwỳjaja kànhmā kuhē nē axpēn kôt tanhmā ho hēx to nē mē kām:

⁵⁸—Nà kot paj mē amā tanhmā kot amnhĩ nhĩpēx to hā harē. Na pa prem ā kapēr anhỳr ā kuma. Na pre tanhmā Tĩrtũm mā amnhĩ jarēnh xà hā ixkreta jarēnh to nē harēnh o: “Kot paj ixkreja grānh pa hāmri nē ixtā apkati axkrunēpxi nē akupỳm hipēx. Nom kot paj amnhĩ nhĩhkra ho hipēx kēt nē.” Anhỳr ā ā amnhĩ jarēnh anē pa mē kuma.

⁵⁹Anhỳr o harēnh tā nom axpēn kôt harēnh kēt nē. Arĩ axpēn kwỳm ri harē. ⁶⁰Hāmri nhũm mēõ patre maati tee ri mē kot tanhmā ho kapēr toja ma nē mē aptār tũmjē noo mā kànhmā xa nē Jejus mā kām:

—E na ka ra mē kot ā ajarēnh anhỳrja ma. Xà kot kaj tanhmā mē inhmā amnhĩ tā axàprār to hkēt nē? Xà am hāmri na mē ajarē? E kwa mē inhmā tanhmā amnhĩ jarēnh to. Anē.

⁶¹No nhũm akryk xa nē tanhmā kām nē hkēt nē. Hāmri nhũm tee ri ā kot amnhĩ nhĩpēx anhỳr ā omu nē axte kām:

—Kwa mẽ inhmã amnhĩ jarẽ. Xà apê Tirtũm Kra na ka? Xà ka na apê Tirtũm kot mẽ ixwỳr amẽnh xwỳnh na ka? Anẽ.

⁶² Hãmri nhũm tã kãm amnhĩ jarẽ nẽ kãm:

—Tỳ. Ixpê tãmta na pa. Ra mẽ ate jarãhã tanhmã ijarẽnh to kaxyw apikuprõnh tã nom kot paj nhỹrmã mẽ kamjaja tanhmã mẽ ajarẽnh to ka mẽ amnhĩ tã ixpumu. Kot kaj mẽ Tirtũm kot mẽ ato amnhĩptàr xà kutã akrĩ hãmri pa hwỳr tẽ nẽ ìhkô hã nhỹ. Kakrã kamã kot paj hwỳr tẽ nẽ ìhkô hã nhỹ hãmri nẽ ý hã tanhmã mẽ ajarẽnh to ka mẽ amnhĩ tã ixpumu. Anẽ.

⁶³⁻⁶⁴ Hãmri nhũm tee ri ã kot amnhĩ jarẽnh anhỹrja ã kuma nẽ gryk xàj amnhĩ xê kaxô nẽ mẽ àptàr tũmjê mã kãm:

—Kwa mo kaxyw kot puj mẽ axte ri ho tanhmã kot amnhĩ tomnuj to hã harẽnh xwỳnhjê hõ japêr? Ra tãm kot amnhĩ pê Tirtũm Kra hã amnhĩ to hêx nhũm mẽ pahte pajamak o mar kênã. E tanhmã kot puj mẽ ho? Anẽ.

Hãmri nhũm mẽ kãm:

—Nà kot puj mẽ kupĩ. Ra htyk mã tãm kênã. E kwa tokyx pu mẽ ma Rõm nhõ pahĩti hwỳr o tẽ kê mẽ pamã hã amỹnê kê mẽ kupĩ. Anẽ.

⁶⁵ Hãmri nhũm mẽ hipêx kati rax nẽ. Nẽ hkuk kuhtô nẽ hpãnhã no hpro nẽ htak nẽ kãm:

—E mẽ kot atak xwỳnhjê nhĩxi jarẽ. Apê Tirtũm Kra hã ate amnhĩ jarẽnh jakamã mãn uràk nẽ axàhpumunh tỳx. Jakamã e mẽ hixi jarẽ. Anẽ.

Nhũm prem ã hipêx anẽ hãmri nẽ pôristijê nhĩhkram haxà nhũm mẽ htak rax o kuhê.

Simãw Pêtre kot Jejus kôt pa hkêt ã kot amnhĩ jarẽnh

Matêwre 26.60-75; Rukre 22.54-62; Juãw 18.15-18, 18.25-27

⁶⁶⁻⁶⁷ Rõm nhũm Simãw Pêtre arĩ kĩtare kamã mẽ ìhkô hã ànhunh o nhỹ. Hãmri nhũm mẽõ patre maati mã àpênh xwỳnh nitita mẽ hwỳr kato nẽ xa. Hãmri nẽ hirã kamã hprĩ hã Simãw Pêtre pumu nẽ omunh mex kurê kumrêx nẽ kãm:

—Xê pêr apê Najare nhõ xwỳnh Jejus kôt mẽ pa ho mẽ pa xwỳnhjê hõ na ka. Anẽ.

⁶⁸ Hãmri nhũm tee ri kuma nẽ ra kãm ma nẽ. Nẽ kãm amnhĩ tã aprã nẽ kãm:

—Tk. Kokỹ. Ixte mẽhõ my ata pumunhre hã. Anẽ.

Hãmri nẽ kànhmã xa nẽ ma tẽ nẽ kĩtare hwỳr kahê hkôt ã mẽ hkax ã ahte xa nhũm krãhyre kà. ⁶⁹ Nẽ gaa nhũm hpãnhã mẽ kãm àpênh xwỳnhjê hõja omu nẽ hã mẽ kãm:

—Xê ma ãm hãmri na harẽ. Kôt ri mẽ pa xwỳnhjê hõ na pêr. Anẽ.

⁷⁰ Hãmri nhũm amnhĩ tã kuma nẽ kãm:

—Tk. Kwa nà. Mẽ ri ã amnhĩ krã hkôt ri ixto axêx anhỹr kêt nẽ. Aa ixte mẽhõ ata pumunh kêt kumrêx. Anẽ.

Hãmri nhũm mẽ hkwỳja gaa nẽ kê axte hprĩ hã omu nẽ kãm:

—Kwa ãm hãmri na mẽ ajarẽ. Apê Jejus hkwỳ na ka. Ajaxwỳja apê Garirej nhõ xwỳnh kênã. Anẽ.

⁷¹ Hãmri nhũm tee ri mẽ kuma nẽ kãm ma htỳx nẽ. Hãmri nẽ mẽ kãm:

—Kwa nà. Na pa Tirtũm noo mã mẽ amã amnhĩ jarẽ. Kot paj amnhĩ to ixêx japêr nhũm inhma nẽ hã tanhmã ixto. Nà uràn ixpê Garirej nhõ xwỳnhre hã. Ixte mẽhõ mũj pumunh kêt kumrêx tã ka mẽ xatã axpên kôt ixte hkôt ixpa ho ixpa xwỳnh ã ixkamnhĩx o xa.

Anhỹr o ra mẽ kãm amnhĩ tã aprãr o axkrunêpxi. ⁷² Hãmri nhũm axte krãhyre kà. Jao ra hkàr o axkrut. Hãmri nhũm Simãw Pêtre kuma nẽ Jejus kot ra hkukamã ã amnhĩ nhĩpêx anhỹr ã harẽnhja mã hamaxpêr kurê kumrêx. Krãhyre kormã hkàr o axkrut kêt ri kot mẽ kãm amnhĩ tã àprãr o axkrunêpxi hã harẽnhja mã hamaxpêr. Hãmri nẽ ra kànhmã hakry hpar o tẽ nẽ hkaprĩ htỳx kumrêx. Hãmri nẽ tee ri amnhĩ kukamã hamaxpêr nẽ amnhĩ mã:

—Hêxta waa nẽ. ãm hãmri na pre Jejus ijarẽ. Tã pa kot ijarẽnh xà hkôt ã amnhĩ nhĩpêx anẽ. Kwa mo na pa axtem nẽ ã mẽ kãm amnhĩ to ixêx anẽ?

Anẽ hãmri nẽ hkaprĩ xàj mỳr rax nẽ.

15

Pirat kot Jejus kujêr ã harênh
Matêwre 27.1-2, 27.11-14; Rukre
23.1-5; Juãw 18.28-38

¹ Tã nhũm myt kato nhũm mẽ axte Jejus ã axpên wÿr akuprô. Patre krãhtũmjê mẽ Ijaew krãhtũmjê mẽ Tirtũm kapêr tũm o mẽ ahkre xwÿnhjê mẽ Ijaew nhõ juistijaja nhũm mẽ piitã hã akuprô. Hãmri nê pôristi mã anê nhũm mẽ Jejus pa hpre nhũm mẽ ma Rôm nhõ xwÿnhjê nhõ pahi Pirat wÿr o tẽ. Piratja na pre hte Rôm nhõ xwÿnhjê nhõ pahi Sesti nhÿ hã Ijaew o amnhĩptàr o pa nhũm prem ma hwÿr o tẽ. ² Hãmri nê kutã ãm nê tanhmã kãm harênh to nê kãm:

—E ot pa mẽ awÿr jahti ho tẽ. Na hte mẽ inhmã hêx rũnh o pa. Mẽ ixte Pahihti Sesti kapêr kwÿm ri amnhĩ nhĩpêx prãm xaj tanhmã mẽ inhmã hêx to. Nê axtem nê mẽ ixte Sesti mã kãxpore hkwy nhõr kêt ã mẽ inhmã karõ. Nê Tirtũm kot mẽ ixkaxyw kêp mẽ inhõ pahi hã ãm ã amnhĩ jarênh o pa. Na hte ã mẽ inhmã amnhĩ to hêx anhÿr o pa. Anê.

Hãmri nhũm Pirat mẽ kuma nê Jejus pumu nê tanhmã hkukjêr to nê kãm:

—E inhmã amnhĩ jarê. Xà ãm hãmri na mẽ ã ajarênh anê nà? Xà apê Ijaew nhõ pahi na ka? Xà ka na htem amnhĩ wÿr akãm hamak o pa? Anê.

Hãmri nhũm kãm:

—Tÿ. Nà ãm hãmri na ka ã ijarênh anê. Anê.

³ Hãmri nhũm patre krãhtũmjaja tanhmã kãm ho kapêr to. ⁴ Nhũm mẽ kuma nê axte hkukja nê kãm:

—Kwa na mẽ ã ajarênh anê ka mẽ ama nê ãm mẽ ama nê inhmã tanhmã amnhĩ tã axaprãr to hkêt nê. Anê.

⁵ Nom nhũm Jejus ãm akryk xa nê tanhmã axte kãm nê hkêt nê. Jakamã nhũm Pirat tee ri omunh pẽ hamaxpêr o nhÿ.

Pirat kot Jejus pÿr ã àmnênh ã harênh
Matêwre 27.15-26; Rukre 23.13-25;
Juãw 18.39-19.16

⁶ Na pre hte pahi Pirat arĩgro pẽ Pasja ã Ijaewjaja kãm hprãm xà hkôt

mẽ hagjênh xwÿnhjê ho hpÿnh nê mẽ kãm ure. ⁷⁻¹⁰ Jakamã nhũm Ijaew kwÿjaja hwÿr mra nê kãm:

—Pa. Kwa xà kot kaj jarãhã mẽ inhmã mẽ hagjênh xwÿnhjê hõ mã anhÿre nà? Anê.

Hãmri nhũm mẽ kuma nê hamaxpêr o:

—E paj Jejus ã mẽ kuma nê kãm inhÿre. Mẽ piitã mẽ kãm kapêr mar prãm nhũm mẽõ patre krãhtũmjaja pix kot mẽ hkôt kamã gryk nê ã ixwÿr o mrrar anhÿr kênã. Anê.

Hãmri nê mẽ kãm:

—Tÿ. Nà kot paj mẽ amã hõm inhÿre. Kwa xà kot pa mẽ amã mẽ anhõ “pahihti” jarênhja mã inhÿre nà? Anê.

¹¹ Hãmri nhũm patre krãhtũmjaja tee ri kuma nê mẽ kãm:

—Kwa mẽ kãm anê kê Parapas mã mãn ure. Anê.

Hãmri nhũm mẽ kuma nê Pirat mã kãm:

—Nà Jejus mã anhÿrer kêt nê. Parapas mã mãn anhÿre. Anê.

¹² Hãmri nhũm mẽ kãm:

—No mẽ ate mẽ anhõ pahi hã harênh xwÿnhnta? Tanhmã kot paj ho? Anê.

¹³ Hãmri nhũm mẽ àmra kamã kãm hã amÿnê nê kãm:

—Kwa pĩ kahpa hã anhõ kê ty. Anê.

¹⁴ Hãmri nhũm tee ri mẽ kuma nê mẽ kãm:

—Tk. Kwa nà. Tanhmã kot amnhĩ tomnuj tore hã kot pa ã hipêx anê.

Anhÿr tã nhũm mẽ xatã anhĩpê kãm kapêr kãm hihtÿx nê kãm:

—Kwa pĩ kahpa hã mãn anhõ kê ty. Tokyx ã mẽ inhmã hipêx anê.

Anhÿr o kuhê. Kãx pẽ kãm anhÿr o kuhê. ¹⁵ Nhũm tee ri mẽ kuma hãmri nê mẽ kãm hprãm xà hkôt mẽ kãm Parapas mã ure. Nê pôristi hkwyjê mã Jejus ã amÿnê nê mẽ kãm:

—Tõe. Mẽ mamrĩ hwÿr tẽ nê htak hãmri nê kapôt ã mẽ hpar xà hã pika hwÿr o tẽ nê pĩ kahpa hã anhõ. Anê.

Mẽ kot Jejus tak ã mẽ harênh

Matêwre 27.27-32; Juãw 19.2-3

¹⁶ Tã nhũm pôristijaja akupÿm ixkreja wÿr Jejus o axà nê amnhĩ wÿr hkwyjê hã karõ nhũm mẽ hwÿr agjê

ně Jejus ã akuprõ. ¹⁷ Hãmri në kęp pahi hã hpër o pikënh kaxyw kãm pahi hã mẽ ahkà nhĩpêx në hkrãm haxà. Nom axtem në akunĩ kamã mẽmo mrõ nhĩ te kot ronh kanêre pyrãk xwýnhja nhũm mẽ kãm hikãx në hkrãm haxà. Hãmri në kęp ê kapa në pahi hã mẽ ê kamrêk õ py në kãm haxà. ¹⁸ Hãmri në kãm:

–E apê Ijaewjê nhõ pahi na ka. Anê.

¹⁹ Hãmri në xatã axpën pãnhã hwýr mra në pĩ ho hkrãx pê htak në hkuk kuhtõ në hã hpër o pikënh pê hã hpijaãm pyrã në kutã hkõn krã ho hkrĩ. ²⁰ Hãmri në kęp pahi xê kapa në akupým kãm ê jaxà në pĩ kahpa hã nhõr kaxyw ma o kato në o tẽ.

²¹ Nom nhũm ra hiro týt në nhũm mẽ tee ri omu hãmri në mẽhõ kot ho ajuta kaxyw mẽ kot hkõt omunh o mõr xwýnhjê kapi ho xa. Hãmri në Sirën nhõ xwýnh Simãw hkã htykreja pumu. Aresãn mẽ Rupti wa hipêxà na pre. Nhũm htýt hamakêtkati në mẽ kutã krĩm tẽ. Hãmri nhũm mẽ haê në unê në kãm Jejus o ajuta kaxyw hã karõ nhũm kãm pĩ kahpaja mý në mẽ hkõt o tẽ.

Mẽ kot pĩ kahpa hã Jejus nhõr ã mẽ harënh

Matêwre 27.33-44; Rukre 23.33-43; Juãw 19.17-27

²² Nhũm mẽ ra kën nhĩxêt te kot mẽ hkrã hi pyrãk xwýnhja wýr Jejus o pøj. Mẽ kot kãm “Korkot” anhýr xwýnhja wýr. Mẽ pakapër kãm na htem Korkotja jarënh o: “Mẽ hkrã hi xà” anê. Jakamã nhũm mẽ ra hwýr o pøj. ²³ Hãmri në kot pĩ kahpa hã nhõr kaxyw wĩhti hkwý ho mẽ mẽmo mẽhkanexà pê mĩra ho ahkã. Kot ho kõm në amnhĩ xà htýt kãm hamak kêt kaxyw hipêx në kãm kugõ nom nhũm hkaga në ho hkõm kêt në. ²⁴⁻²⁶ Hãmri nhũm myt kaxkwa nhĩpõk wýr tẽ nhũm mẽ pĩ kahpata ã Jejus xi në prek o ãhkra ho htýt në hpar o htýt. Nê hpãnhã kaxyw kakwý në kãnhmã pĩ kahpa jarĩ në kre kamã ãm në hity hpa. Nhũm Jejus kýt pê amnhĩ xà htýt kumrêx kamã hamak o ajêt.

Nhũm põristi hõja tẽ në tapti hõ py në hã kagã ho:

IJAEWJÊ NHÕ PAHI NA JA

Hãmri në Jejus wýr ho api në mý ri kunhõ. Hãmri nhũm hparpê põristi hkwýja axpën mã ê hkwý ho hpigrãnh kaxyw hã kënre ho jõka ho hkrĩ.

²⁷⁻²⁸ Tã nhũm mẽ wa kot amnhĩ tomnuj xwýnh wa ho axkrut në mã wa ho anê në. Nê pĩ kahpa hã prek o wa ãhkra ho htýt në wa hpar o htýt hãmri në akutã ho Jejus nhĩjê nhũm wa ajêt.

²⁹ Hãmri nhũm mẽ kot omunh mã mrar xwýnhjaja Jejus pumu në hã hpër o pikënh punuj në hkrã ho apê në kãm:

–Kwa na ka pre ate Tĩrtũm mã amnhĩ jarënh xà hã ixkre grãnh par në atã apkati axkrunêpxi në akupým hipêx par ã amnhĩ jarënh o apa. Nê axãhpumunh o axãhpumunh ã amnhĩ jarënh o apa. ³⁰ Jakamã e kwa amnhĩ kapa në wrý pa mẽ ja hã apumu. E kwa tokyx. Anê.

³¹ Nê patre krãhtũmjê mẽ Tĩrtũm kapër tũm o mẽ ahkre xwýnhjaja piitã hwýr mra në hã hpër o pikënh o kuhê. Nê axpën mã kapër o:

–E jahti na xep pre mẽ kamã ukapri ho pa në tanhmã mẽ ho ajuta hto ho pa. Tã tãm tanhmã amnhĩ to në wrýk kêt në. ³² Kwa pu mẽ arĩ pakuhê në kot amnhĩ kaxãr në wrýk kãm omu. Kojã wrý pu mẽ omu në kęp mẽ panhõ pahĩti hã hkõt pajamaxpër kurê kumrêx. E tokyx wrý Jejus pa mẽ awrýk kãm apumu. Nã kot kaj awrýk rax në. Anê.

Hãmri nhũm akutã wa kot hijê në jêt xwýnh wa haxwýja kãm kapër punuj o ajêt.

Jejus htyk ã harënh

Matêwre 27.45-46; Rukre 23.44-49; Juãw 19.28-30

³³ Tã nhũm ra kaxkwa nhĩpõk ri myt nhýr mẽ nhũm te kamãt pyrãk. Nhũm kamãt kô rax kumrêx o ra hã awry mẽ nhũm akupým myt katêr o mõ. ³⁴ Hãmri nhũm Jejus ãmra kamã Tĩrtũm mã kapër në kãm:

—Inhō Tirtūm inhō Tirtūm. Kwa mon ka ixkaga? Anē.

Nom kapēr kām kapēr o:

—Eri Eri rāmā sapanā. Anē.

³⁵ Hāmri nhūm mē kot mar o kuhē xwýnhjaja kot Eri hā harēnh ma nē htýx ho finat Eris mā kapēr ā hkamnhīx. ³⁶ Hāmri nhūm ja hprōt nē mēmo rereeti py nē pī ho hkanhwý nē o tē nē ho wīhti nhek nē Jejus wýr o tē nē kot hkaōr kaxyw kām kupē. Hāmri nē hkwyjē mā kām:

—E hāmri pu mē jar hkàx ā pakuhē nē Eris jamā mǎn. Kojā kuma nē hwýr tē nē o wrý nà? Anē.

³⁷ Nom nhūm Jejus ra htyk kaxyw nē àmra htýx nē ty.

³⁸ Hāmri nhūm Tirtūm mā amnhī jarēnh xà hā ixkre kamā hakwakre hā kupēxēja axkjē nē amnhī kahē xà mēnh kurē kumrēx. Utī rax tā kýj rūm ahpar mā axkjē nē amnhī kahē xà mē. Te Jejus htyk o mē pahte hkōt amnhī xunhwýr xwýnhjē mā Tirtūm wýr pry jakwa kre kahē xà mēnh pyrāk o ā amnhī kaxōnh anē. ³⁹ Nhūm pôristi krāhtūmjē hōja Jejus parpē kutā htyk kām omunh o xa. Hāmri nē tee ri omu nē hamaxpēr o:

—Hēxta waa nē. Ām hāmri na pre hte kēp Tirtūm Kra hā amnhī jarēnh o pa. Tā pa mē amarī kupī. Anē.

⁴⁰⁻⁴¹ Rôm nhūm mēni kwýjaja amým htyk kām omunh o kuhē. Na pre htem Garirej kamā Jejus mē hkōt mē pa ho mē pa xwýnhjē mā mē apkur xà hā àpēnh o mē hkōt pa nē mē hkōt Jerujarē hwýr mō. Marir Matarēn nē Xiakre mē Jojes wa katorxà Marirja. Nē Sarome. Nē mǎānēn mēni hkwyjaja nhūm mē amým Jejus htyk kām omunh o kuhē.

Mē kot Jejus jaxàr ā harēnh

Matêwre 27.57-61; Rukre 23.50-56; Juãw 19.38-42

⁴² Nhūm prem arīgro pē sēsta hā Jejus pī nhūm ra amýkry htýx nē. Sap kukamā na pre htem Ijaewjaja amnhīm apkur xà hā mēō nhīpēx pa nhūm sap kato nhūm mēmoj to anhýr kêt nē. ⁴³ Jakamā nhūm Juje hō pē

Arimatej nhō xwýnhja. Kēp Ijaewjē nhō juisti hō na pre. Nhūm mē piitā kām hkīnh nē axpēn mā mex o mex ā harēnh o pa. Na pre Tirtūm kot mē pahwýr Jejus mēnh kōt hamaxpēr o pa. Tā Jejus htyk ā omu hāmri nē hamaxpēr o:

—E pa ma pahi Pirat wýr tē nē Jejus nhī hā kuwý. Inhmā uma htā kot paj ma hwýr tē nē hā kuwý kē inhmā kugō pa ma o tē nē tokyx haxà. Kot paj ho anhýr tokyx anhýr kêt nhūm mē panhō arīgromnu pē sapja wýr ra myt axà hāmri pa haxàr kêt nē.

Anhýr o hamaxpēr nē ma Pirat wýr tē nē hā kuwý. ⁴⁴ Hāmri nhūm amnhī jaēr pē ra htyk ā harēnh ma nē amnhī wýr pôristi krāhtūmjē hō hā karō nē hā hkukja nē kām:

—Kwa xà na ra Jejus ty? Anē.

Hāmri nhūm kām:

—Tý na ra ty. Anē.

⁴⁵ Hāmri nhūm kuma nē Juje mā kām:

—Tōe. Mamrī ma o tē nē haxà. Anē.

⁴⁶ Hāmri nhūm kuma nē akupým Jejus wýr tē nē pôristi mā anē nhūm mē kām ho wrý. Nhūm kumý nē kupēxē ho hkupu hpa nē o tē nē kēn kre kakwýnh kām haxà. Hāmri nē kēn rax o hitom mex nē ma akupým krīm tē. ⁴⁷ Nhūm Marir Matarēn mē Juje katorxà Marir ōja wa ma hkōt tē nē kot haxàr kām omunh o xa. Kot mē hkuxwa xà ho gregrer kêt rāhā haxàr kām omu.

16

Jejus akupým htīr ā harēnh

Matêwre 28.1-10; Rukre 24.1-12; Juãw 20.1-10

¹⁻² Tā nhūm apkati. Nom nhūm ra mē inhō arīgromnu pē sap kator jakamā nhūm mē kormā akupým kēnkreta wýr mmar kêt nē. Hāmri arīgro mex jamār pē kōkōt o hkrī. Hāmri nhūm axte apkati nhūm tōmīk nhūm ra mē inhō arīgromnu hapēx nhūm Marir Matarēn mē Sarome mē Xiakre katorxà Marirja mē ma akupým kēnkreta wýr mra. Kormā kwýhtāã. Kormā myt kator o mōr mē nhūm mē kànhmā hkrī hāmri nē mē

kot Jejus gregrer kaxyw mẽ hkuxwa xà hkwỳ jamỳ nẽ ma hwỳr o mra. ³ Hãmri nẽ kormã mõi ri tee ri amnhĩ kukamã hamaxpẽr nẽ axpẽn mã:

—Xê gòa nẽ. Mẽhõ koja mẽ pamã nhãm kẽnkre nẽ hitom raxta xãm pu mẽ Jejus wỳr agjê nẽ gregrer? Utĩ rax kumrẽx kẽnã. Anẽ.

⁴ Hãmri nẽ hwỳr pøj nẽ omu nhũm ra hitom xàja kàx ã nõ nhũm mẽ tee ri omu. Utĩ rax tã ra kàx ã nõ. ⁵ Hãmri nhũm mẽ kẽnkre hwỳr agjê nẽ upòk rũm mẽhõ nyw pumu. Nhũm ê jaka-jre kamã nhỹ nhũm mẽ amnhĩ jaêr pẽ omu nẽ tee ri hamaxpẽr. ⁶ Hãmri nhũm mẽ kãm:

—Kwa mẽ amã ma hkêt nẽ. Mẽ ate Najare nhõ xwỳnh pẽ Jejus pumunh kaxyw na ka mẽ mra. Mẽ kot pĩ kahpa hã nhõr xwỳnhhta. Nom jar amrakati. Na ra Tirtũm akupỹm ho htĩr. E mẽ kam nẽ amnẽ agjê nẽ ano ho nõr xà kaprỳ pumu ⁷ nẽ tokyx ma akupỹm mra nẽ hkõt mẽ pa ho pa xwỳnhjê mã harẽ. Koja ma Jejus mẽ akukamã akupỹm Garirej wỳr mõi. Garirej kamã kot kaj mẽ axte axpẽn pumu. Ra kot mẽ amã amnhĩ jarẽnh xà hkõt. Kwa mẽ tokyx ma akupỹm mẽ hwỳr mra. Nẽ kwa kê Simãw Pêtreja harẽnh mar mex nẽ. Anẽ.

⁸ Hãmri nhũm mẽ kuma nẽ awjanã nẽ ma akupỹm hprõt. Nẽ tee ri hamaxpẽr nẽ kãm ma xàj htertet tỳx jakamã kormã nhãm mẽhõ mã harẽnh kêt nẽ.

Jejus kot Marir Matarẽn wỳr kator ã harẽnh
Juãw 20.11-18

⁹ Nhũm semãn nyw mã àr xà hã arĩgro pẽ tòmĩkja ã nhũm Jejus akupỹm htĩr. Hãmri nẽ Marir Matarẽn kumrẽx wỳr kato. Kot nẽ mẽkarõmnuĩ ho ⁷ nẽ nẽ hanor xwỳnhhta kumrẽx wỳr kato. ¹⁰ Hãmri nhũm akupỹm htĩr kãm omu nẽ hkĩnh tỳx kumrẽx. Nẽ ma akupỹm tẽ nẽ Jejus krãmnhwỳjê mã harẽ. Nhũm mẽ hkaprĩ nẽ mỳr o hkrĩ nhũm mẽ hwỳr axà nẽ mẽ omu nẽ mẽ kãm:

¹¹ —Xê mẽ amỳr kêt nẽ. Na ra Jejus akupỹm htĩr nẽ ham ixwỳr kato pa

inhno ho omu. Xê mẽ hãmri axte amỳr kêt nẽ.

Anhỹr tã nom nhũm mẽ htỳx ho amnhĩ krã hkõt kot ri ã harẽnh anhỹr ã hkamnhĩx jakamã kuma nẽ ãm kuma.

Jejus kot hkwỳjê hwỳr kator ã harẽnh
Rukre 24.13-35

¹² Tã nhũm Jejus axte ja wa hwỳr kato. Kõt mẽ pa ho pa xwỳnh wa ho axkrut nẽ wa hwỳr kato. Na pre wa Jerujarẽ rũm kato nẽ akupỹm wa õ krĩ hwỳr mõi mẽ nhũm wa hwỳr kato. Nom axtem tanhmã amnhĩ nhĩpêx to nẽ wa hwỳr kator jakamã nhũm wa tokyx hprĩ hã kęp Jejus ã omunh kêt nẽ. ¹³ Tã kęp Jejus ã omu hãmri nẽ akupỹm Jerujarẽ hwỳr mõi nẽ hkwỳjê mã harẽnh kurê kumrẽx. Nom nhũm mẽ wa kuma nẽ ãm wa kuma nẽ akupỹm htĩr kõt hamaxpẽr kêt nẽ.

Jejus kot hkwỳjê mã mẽmoj tã karõ hã harẽnh
Matêwre 28.18-20; Rukre 24.44-49; Juãw 20.19-23; mããnẽn Atre 1.6-8

¹⁴ Tã nhũm Jejus tã hkõt mẽ pa ho mẽ pa xwỳnh pẽ 11 wỳr kato nhũm mẽ kamã no puma nẽ hkĩnh tỳx nẽ omunh o kuhê. Hãmri nhũm mẽ kãm: —Kwa hêxta waa nẽ. Marir Matarẽn mẽ akwỳta mẽ kot akupỹm ixtĩr kãm ixpumunh nẽ mẽ amã ijarẽnh tã ka mẽ ama nẽ ãm mẽ ama. Pẽr ãm mẽ akrã hihtỳx jakamã na ka mẽ ama nẽ mẽ hkõt ajamaxpẽr kêt nẽ. Anẽ.

¹⁵ Hãmri nẽ mẽ kot tanhmã kãm amnhĩ nhĩpêx to ho pa hã mẽ kãm karõ nẽ mẽ kãm:

—E kër ka mẽ ma krĩ piitã hkõt mẽ kãm ijarẽnh o ri mẽ hkõt apa. Ixte tanhmã mẽ nẽ amnhĩ nhĩpêx toja ka mẽ aprĩ hã mẽ kãm ijarẽnh o ri mẽ hkõt apa. ¹⁶ Nẽ mẽ kot mẽ akapẽr mar nẽ amnhĩ kaxyw ixkõt hamaxpẽr xwỳnhjaja kër ka mẽ hkrã kumrã nhũm mẽ nhỹrmã Tirtũm mẽ wa ixri htĩr tũm nẽ mex rãhã nẽ pa ho pa. No mẽ kot amnhĩ kaxyw ixkõt hamaxpẽr kêt xwỳnhjaja koja Tirtũm nhỹrmã amnhĩ nẽ mẽ hano nhũm mẽ ma kuwy hwỳr pa.

17 –Ně amnhĩ kaxyw ixkôt mẽ aja-maxpěr xwýnhjaja kot kaj mẽ inhỹ hã tanhmã amnhĩ nhĩpêx to ho ri apa. Aa mẽ kot mẽmoj pumunh kêt kwý ho anê nê inhỹ hã inhĩxi jarênh kôt mẽ nê mẽkarõmnuti janor o ri mẽ hkôt apa. Nê mẽ ate nhãm mẽ kapěr mar kêt tâ inhỹ hã ho akapěr mex o apa. Mẽ ate mar kêt tâ ra ho akapěr nhũm mẽ kot mẽ kapërta mar xwýnhjaja hprĩ hã mẽ amar mex nê. 18 Nê kot kaj mẽ nhỹri atýx kagã xoprê hõ hpyr tâ no nhũm tanhmã mẽ ato hkêt nê. Rý atýx mẽmoj to mẽ hpar xà hkwý ho akôm tâ no nhũm tanhmã mẽ ato hkêt nê. Nê inhỹ hã mẽ à xwýnhjê hã mẽ anhĩhkra jaxwý nhũm mẽ akupým mex. Kot kaj mẽ amnhĩ kaxyw ixkôt mẽ ajamaxpěr xwýnhjaja ã inhỹ hã amnhĩ nhĩpêx anhỹr o ri apa. Anê.

Jejus kot akupým kaxkwa hwýr àpir ã harênh

Rukre 24.50-53; mããnên Atre 1.6-11

19 Tã nhũm mẽ panhõ Pahihti Jejusja hkôt mẽ pa ho mẽ pa xwýnhjê mã kapěr pa hãmri nhũm Tirtũm ma akupým amnhĩ wýr kaxkwa hwýr ho api. Hãmri nhũm kaxkwa kamã Tirtũm nhĩhkô hã upôk rũm nhỹ. Kot ãhkô hã mẽmoj piitã ho amnhĩptàr kaxyw hkrĩ ho hkrĩ. 20 Hãmri nhũm hkôt mẽ pa ho pa xwýnhjaja ma akupým àpir kãm omu hãmri nê angrã nê ma krĩ piitã hkôt mẽ kãm Tirtũm kapěr jarênh o pa nhũm Pahihti Jejus mẽ ãhkô hã pa ho pa. Nhũm mẽ ma ý hã hkwýjê mã aa mẽ kot mẽmoj pumunh kêt kwý ho anhỹr o ri mẽ hkôt pa nhũm mẽ ja hã mẽ omu nê axpên mã mẽ harênh o:

–Nà ãm hãmri na mẽ pamã Tirtũm kapěr jarênh o pa nê ho hêx kêt nê. ý hã mẽ kot aa mẽ pahte mẽmoj pumunh kêt kwý ho anhỹr o pa kênã. Nà ãm hãmri na ã mẽ pamã kapěr jarênh anhỹr o pa. Anê.

Ja kôt na Makre kot Jejus jarênhja hapêx.

Rukre Rukre tanhmã Jesus kot amnhĩ nhĩpêx to ho pa hã kagà

Rukre na pre kagàja nhĩpêx. Kêp Ijaew kêt xwýnh na pre. Tã amnhĩ kaxyw Jesus kôt hamaxpêr. Na pre kêp tôtô nê mẽ hkane ho pa. Nê Jesus nhỹ hã kapêr o pa xwýnhjê hõ pê Pawreja kôt pa ho pa. Tã tanhmã hamaxpêr to nê hkràmnhwý Teopre mã kagàja nhĩpêx nê kamã tanhmã Jesus kot amnhĩ nhĩpêx to ho pa hã harê nê hã kagà.

Nê Jesus kêp Tirtũm nhỹ hã kapêr o pa xwýnh ã harê. Nê mẽ pahpyrà nê ĩ ho ĩ hã harê. Nê kêp mẽ pakamã ukaprĩ xwýnh ã harê. Nê kêp mẽ pahte amnhĩ tomnuj o hapêx xwýnh ã harê. ã na pre Rukreja hkràmnhwý Teopre mã Jesus jarê nê hã kagà anê. Nê mãânên mẽ pahpiitã mẽ pakaxyw harê nê hã kagà.

Rukre kot Teopre mã amnhĩ jarênh Atre 1.1-2

¹ Pa pahi Teopre. Xà amex? E ot pa awýr kagà nhĩpêx nê awýr kumê. Ixte amã Jesus jarênh kaxyw. Na prem ra ohtô nê jar mẽ pahkôt Jesus kot amnhĩ nhĩpêx o pa hã kagà rax nê. ² Jesus nhỹ hã Tirtũm kapêr jahkre ho mẽ pa xwýnhjaja na prem Jesus kot tanhmã amnhĩ nhĩpêx to hkrax kãm kot amnhĩ nhĩpêx o pa hã omunh o hkôt pa. Hãmri nê hprĩ hã mẽ inhmã harê nê hã kagà nhũm mẽ ohtô nê mẽ mar xà hkôt mẽ urà nê kot tanhmã amnhĩ nhĩpêx to ho pa hã kagà. ³ Tã pa mẽ harênh ma nê ijamaxpêr o:

—E kot paj ijaxwýja Jesus kot amnhĩ nhĩpêx kwý hã kagà. Nà kot paj ho anê.

Anhýr o ijamaxpêr jakamã ot pa ra ixte amã hã kagà kaxyw.

⁴ Tã kêr ka kamã harê nê ixpyrà nê ama nê aprĩ hã harênh mar tỳx nê mẽ kot amã harênh xwýnhjê hkôt ajamaxpêr tỳx o apa. ãm hãmri na prem

mẽ amã harê. E kot paj amã hkwy hã kagà. Ixpê akràmnhwý Rukre kot paj ixprĩ hã amã harê nê hã kagà.

Tirtũm kapêr o wrýk xwýnh kot Juãw Paxis jarênh

⁵ Juãw Paxis nhĩpêxà finat Jakarisja kumrêx kot paj amã harê. Kêp finat Apiasti kanrêhã htàmnhwý jakamã uràk nê kêp mẽ apê Ijaew nhõ patre na pre. Pahihti Eroxja kormã kot mẽ anhõ pika kamã mẽ ho amnhĩptàr ri nhũm Jakaris kêp patre nê pa. Nê hprõ Ijapew mẽ wa kêp Parãw kanrêhã htàmnhwý. ⁶ Nê wa hamẽ na pre Tirtũm kôt tãm amnhĩ nhĩpêx o wa pa. ãm Tirtũm kapêr kôt pix mã ri amnhĩ nhĩpêx rãhã ho wa pa.

⁷ Nom Ijapewja tanhmã hkra xà kute jakamã nhũm wa hkra hkêt nê wa pa rãhã wa ra hpigêx tỳx nê.

⁸ Jakamã nhũm Jakaris ma mẽ kot Tirtũm mã amnhĩ jarênh xà hã ixkre hwýr tẽ. Kwýjê pyrà nê kot Tirtũm mã tanhmã amnhĩ nhĩpêx to kaxyw ma mẽ hpãnhã hwýr tẽ nê axà. ⁹⁻¹⁰ Hãmri nê kamã Tirtũm mã amnhĩ jarênh pê kãm mẽ hkuxwaxà ho xêt o xa. Nhũm Ijaew kwýjaja ixkreta wýr akuprõ nê kapem kutêp Tirtũm mã amnhĩ jarênh o kuhê. ¹¹ Pu nhũm kaxkwa rũm Tirtũm kapêr o mẽ wrýk xwýnhja wrý nê Jakaris kutã xa. Mẽ hkuxwa xà ho xêt xà hã mès kunĩhti xupòk rũm xa. ¹² Hãmri nhũm amnhĩ jaêr pê amnhĩ kutã omu nê akryk omunh o xa. ¹³ Hãmri nhũm kãm:

—Pa Jakaris? Kwa tee ri ajamaxpêr o amã ma hkêt nê. Na pre Tirtũm ate akra hã hwýr o apa hã ama nê hã apumu. Jakamã koja tanhmã aprõ hkra xà ho ka kamã akra. Nhũm nõ nê rax nê kato nê myre. Ka wa hã hixi mẽ nhũm kêp Juãw. ¹⁴ Koja kato ka wa omu nê akĩnh tỳx kumrêx. Nhũm akwýjaja haxwýja ohtô nê war akra jarênh ma nê war anhỹ hã hkĩnh nê. ¹⁵ Koja kormã akra kator kêt ri nhũm Tirtũm Karõja hkarõ hwýr axà. Hãmri nhũm kato nê gaa nê hprêk nê Tirtũm mã tanhmã amnhĩ nhĩpêx to ho pa. Tirtũm kãm hprãm xà hkôt pix mã

tanhmã amnhĩ nhĩpêx to ho pa. Nom kêr ka inhmar kumrêx. Kê mẽmoj to wĩhti ho hkôm kêt nê pa. Nê kagôxyhti ho hkôm kêt nê pa. ãm kwarĩ ho kwarĩ. ¹⁶ Koja hprêk hãmri nê mẽ apê Ijaew mã Tĩrtũm kapêr jarênh o mẽ hkôt pa. Nhũm mẽ ohtô nê kuma nê kot amnhĩ tomnuj kaga nê Tĩrtũm kôt amnhĩ xunhwý nê hkôt amnhĩ nhĩpêx mex o pa.

¹⁷ –Tĩrtũm kot mẽ awýr mẽ apytàr xwýnh maati mẽnh mã xwýnh kukamã koja mẽ kãm harênh o pa. Te Tĩrtũm nhỹ hã kapêr jarênh xwýnh finat Eris kot amnhĩ nhĩpêx pyrãk o koja amnhĩ nhĩpêx. Nê urãk nê Tĩrtũm Karô nhỹ hã mẽ amã Tĩrtũm kapêr jarênh o mẽ akôt pa. Jakamã nhũm mẽ akwýjaja kuma hãmri nê amnhĩ tomnuj kaga hpa nê Tĩrtũm kôt pix mã amnhĩ nhĩpêx o pa. Nê tãm mẽ hkrajê nhĩpêx o pa. Koja mẽ ã akra Juãwja kôt amnhĩ nhĩpêx anê. Jao Tĩrtũm kot mẽ awýr mẽnh mã xwýnhhta kutêp tãm amnhĩ nhĩpêx o pa. Anê.

¹⁸ Nhũm pre ã Tĩrtũm kapêr o wrýk xwýnh Jakaris mã hkrata jarênh anê. Hãmri nhũm tee ri kuma nê kãm:

–Kwa xà we ãm hãmri na ka ã inhmã ixkra jarênh anê nà? Ra ixprô mẽ wa ijamê wa ixpigêx týx kênã kot pa kêt wa ixkra. Anê.

¹⁹ Hãmri nhũm kãm:

–Nã ãm hãmri na pa ã amã harênh anê. Ixpê Gapriew na pa ã awýr ixwrýk nê Tĩrtũm nhỹ hã amã harênh anê. Ixte Tĩrtũm nhĩhkô hã ixkuhê xwýnhjê hõ na pa. Tãm na awýr inhmê pa awýr wrý nê ã amã akra jarênh anê. ²⁰ Tã ate ixkôt ajamaxpêr kêt jakamã kot kaj axte axumar kêt nê akapêr kêt rãhã nhũm akra kato. Koja kato ka rĩ kormã akupým akapêr nê akupým ama. Ate ixkôt ajamaxpêr kêt jakamã kot kaj ã amnhĩ nhĩpêx anê nê rĩ amnhĩ pumu. ãm hãmri na pa ã amã ixkapêr anê. Anê.

Nhũm pre ã Tĩrtũm kapêr o wrýk xwýnhja Jakaris mã kapêr anê. Jakamã nhũm tokyx ixkre rũm kator kêt nê.

²¹ Hãmri nhũm ixkre kapem mẽ kuhê xwýnhjaja tee ri kamã ama nê axpên mã:

–Tk. Kwa mo na we ri hitom kãm ho anhýr kãm unê nê tokyx kator kêt? Anê.

²² Tã nhũm akupým mẽ hwýr kato. Nê tee ri kot mẽ kãm kapêr kaxyw no ãm ãhkra pix o ri mẽ kãm tanhmã ujahkre hto. Hãmri nhũm mẽ amnhĩ jaêr pê kot ã amnhĩ nhĩpêx anhýr ã omu nê tee ri hkukamã hamaxpêr nê axpên mã:

–Kwa tanhmã na we amnhĩ to? Mãn hitom kãm mẽmoj tanhmã kute hã omu hã na ri ã amnhĩ nhĩpêx anê nà? Anê.

²³ Hãmri nhũm Jakaris ixkre kamã mẽmoj tã ãpênh pa hãmri nê ma akupým òrkwý hwýr tẽ.

²⁴⁻²⁵ Tã nhũm hprô Ijapewja htujarô. Hãmri nê amnhĩ tujarô hã amnhĩ pumu nê hkĩnh týx nê. Nê hamaxpêr o:

–Hêxta gàa nê. Ma ãm hãmri na pa pre ixkra hkêr nê amnhĩ kamã ixpijaam o ri ixpa. Tã ra ixtujarô. Kot paj wa axte ri amnhĩ kamã ixpijaam kêt nê. Ma ãm hãmri na Tĩrtũm ã wa inhiĩpêx anê. Na pa wa ixkĩnh týx kumrêx. Anê.

Nhũm pre ã hamaxpêr anê hãmri nê arĩ òrkwý kamã hkrĩ ho hkrĩ. Aa nhỹhým kator nê mõi kêt rãhã hã mytwrý kêp 5.

Tĩrtũm kapêr o wrýk xwýnh kot Marir mã hkra jarênh

Matêwre 1.18-21

²⁶ Tã nhũm Ijapew ra htujarô hã mytwrý kêp 6 nhũm Tĩrtũm axte kapêr o wrýk xwýnh pê Gapriewja mẽ. Nhỹri Garirej kamã krĩ pê Najare hwýr kumê nhũm ma hwýr wrý.

²⁷ Mẽhõ pê Marir wýr wrý. Nhũm ra Juje ho mjên kaxyw. No ãm kormã hkukrit rãhã ho mjên kaxyw. Jujeja Marir pyrã nê kêp pahi finat Tawi kanrêhã htãmnhwý na pre. ²⁸ Jakamã nhũm Gapriew Marir wýr wrý nê kãm:

–Pa Marir? E ot pa amã Tĩrtũm kapêr jarênh kaxyw awýr wrý. Kot

akôt pa ho pa jakamã koja ato mex rax kumrêx. Anê.

²⁹ Hãmri nhũm amnhĩ tã kuma nê tee ri hamaxpêr nê hamaxpêr o:

—Xê mẽmo na we ri ã inhmã kapêr anê? Tanhmã koja we Tĩrtũmja ixto mex rax to? Anê.

³⁰ Hãmri nhũm Gapriew kãm:

—Kwa tee ri amnhĩ kukamã ajamaxpêr kêt nê. Tĩrtũm kãm ajapêê.

³¹ Kot kaj atujarô nhũm akra kato nê myre. Ka hã hixi mẽ nhũm kêp Jejus. ³²⁻³³ Koja Tĩrtũm amã ho mex rax nê. Nê koja mẽ piitã mẽ kãm kêp amnhĩ Kra hã ho amnhĩrit. Nê mẽ apê Ijaew o amnhĩptâr kaxyw koja mẽ akaxyw ãm nhũm higêt pahi Tawi pyrã nê mẽ ato amnhĩptâr o pa. Mẽ ate amnhĩ wỳr kamã ajamak o apa xwỳnhnta koja. Tĩrtũm kãm hprãm xà hkôt koja mẽ ato amnhĩptâr rãhã ho pa. Anê.

³⁴ Nhũm pre ã kãm kapêr anê nhũm amnhĩ tã kuma nê tee ri amnhĩ kukamã hamaxpêr hãmri nê kãm:

—Xê gòa nê. Tanhmã kot pa kêt we amnhĩ to nê ixtujarô? Kormã ixkukrit nê mo kormã inhmjên? Mê. Xà Juje kot ixkamã hkra hkukamã na ka ã ri inhmã axujarênh anê? Anê.

³⁵ Hãmri nhũm kãm:

—Nà koja Tĩrtũm Karô tãm tanhmã ato ka ã hã tanhmã amnhĩ to hkêt tã atujarô. Jakamã koja akra kêp Tĩrtũm Kraa. ³⁶⁻³⁷ Na ra haxwỳja anã Ijapewja htujarô. Ra hpigêx tỳx nê aa hkra hkêt nhũm hkwyjaja kot axpên mã ôhy kamã hkra hkêt kumrêx ã harênh o pa htã ra htujarô. Tĩrtũm kot tanhmã mẽ ho nhũm mẽ htujarô tanhmã kêp kute hkêt. Jakamã nhũm tanhmã ho nhũm mjên tãm htu nhũm ra htujarô hã mytwrỳ kêp 6. Tĩrtũm tãm kot mẽmoj piitã tanhmã ho kaxyw àhpumunh xihtỳx. Jakamã koja urak nê mã ato anê nê ka kormã akukrit tã atujarô. Anê.

³⁸ Nhũm pre ã Gapriew Marir mã kapêr anê nhũm amnhĩ tã kuma nê kãm:

—Ko. Kê mãmri kãm tanhmã ixto hprãm xà hkôt mãmri tanhmã inhĩpêx to. Inhmã Tĩrtũm kapêr kôt amnhĩ

nhĩpêx prãm. Kê mãmri kãm tanhmã ixto hprãm xà hkôt tanhmã inhĩpêx to.

Anê nhũm kuma nê ma akupỹm api.

Marir kot Ijapew wỳr mõi ã harênh Rukre 11.27

³⁹⁻⁴⁰ Tã nhũm Marir amnhĩ tujarô hã amnhĩ pumu nê nã Ijapew wỳr hkrã kurê kumrêx. Hãmri nê nojarêt nê ô krĩ rũm kato nê ma hwỳr mõi. Ma Ijapew papxã hwỳr mõi. Ijapew nhõ krĩja pika pê Jutej kamã nhỹri hixêt kamã na pre. Nhũm ma hwỳr mõi hãmri nê hwỳr pøj nê Ijapew wỳr axã nê omu nê kãm:

—Ka? Xà wa amex? Anê.

⁴¹ Hãmri nhũm kuma nê kãm:

—Ỗ ma wa inhmex na pa wa ixpa.

Anhỹrja kôt nhũm ôhy kamã hkraja haxwỳja te kot Marir kapêr mar nê amnhĩ nhĩpêx pyrãk o htu kamã àxônhtỳx o nõ. Hãmri nhũm Ijapew Tĩrtũm Karô nhỹ hã tanhmã Marir mã kapêr to. ⁴² Kax pê kãm kapêr nê kãm:

—Xê gòa nê. Ra Tĩrtũm kot ato mex jakamã na ka akĩnh rax o mẽ inhni hkwyjê jakrenh pa. Anhõhy kamã akraja koja Tĩrtũm amã ho mex rax nê. ⁴³ Xê mon ka ã ixto mex nê ixwỳr amõi anê? Apê inhõ Pahшти katorxã htã ixto mex nê ã ixwỳr amõi anê. Hêxta gòa nê. ãm hãmri na ka ixwỳr mõi Marir. ⁴⁴ Na ka ixwỳr mõi pøj nê inhmã akapêr hãmri nhũm ixtu kamã ixkrare akapêr ma nê hkĩnh xaj ixtu kamã ixkamnãr tỳx o nõ. ⁴⁵ Na ka pre Tĩrtũm kapêr o wrỳk xwỳnh kot amã kapêrja ma nê hkôt ajamaxpêr tỳx nê. Jakamã kot kaj Tĩrtũm nhỹ hã akĩnh nê ajamakêtkati nê amex nê ri apa. Anê.

Marir kot Tĩrtũm mã mex o mex ã grer ã harênh

Rukre 6.20-26

⁴⁶ Hãmri nhũm Marir Ijapew kot ã kãm kapêr anhỹrja ma nê kãm Tĩrtũm mex o mex ã gre nê grer o:

Tĩrtũm na mex o mex.

⁴⁷ Kêp ixkaprĩ xwỳnh na.

Kêp ixkaprĩ xwỳnh jakamã na pa inhmex nê ixkĩnh nê ri ixpa.

48-49 Ixte amnhĩ to grire nhũm ja hã
ixpumu nẽ ixkamã ukaprĩ nẽ
ixto mex rax kumrẽx.
Jakamã koja mẽ piitã axpẽn
kanrẽhã axpẽn mã ijarẽnh rãhã
ho pa. Tĩrtũm kot tanhmã ixto
mex to hã ijarẽnh rãhã ho pa.
Tĩrtũm na mex o mex nẽ hihtỳx o
hihtỳx. Tã na ã inhĩpêx anẽ.
50 Ma na hte ã amnhĩ nhĩpêx anẽ
nẽ axpẽn kanrẽhã mẽ kot hã
hpijaãm xwỳnhjê pumu nẽ mẽ
kutã nojarêt rãhã ho pa.
Nẽ mẽ kamã ukaprĩ rãhã ho pa.
ã na hte mẽ hipêx mex anhỹr o
pa.
51 Nẽ hihtỳx o hihtỳx jakamã na hte
mẽ kot amnhĩ to jarkrar o ri
mẽ pa xwỳnhjaja tanhmã mẽ
ho nhũm mẽ axkaprã.
52 Nẽ pahĩti hkwy kot kapêr mar nẽ
ãm mar xwỳnhjaja.
Na hte amnhĩ tã mẽ omu nẽ
mẽ ãpênh nẽ mẽ hapôj nẽ
mẽ hpãnhã mẽ kot amnhĩ to
hkryre xwỳnh kwỳ jagjê.
53 Na hte mẽ kãm kapêr kôt amnhĩ
nhĩpêx prãm xwỳnhjê ho mex o
pa nhũm mẽ mex nẽ pa.
No mẽ kãm hprãm kêt xwỳnhjaja
nhũm tanhmã mẽ ho mex to
hkêt nẽ.
54-55 ãm hãmri na pre amnepê mã mẽ
panhĩgêt mã amnhĩ jarẽnh xà
hkôt mẽ pahpê Apraãw rũm
axpẽn kanrẽhã hkrajaja mẽ
pahto mex o pa.
Mẽ pahpê Ijaew mẽ pahte kãm
tanhmã amnhĩ nhĩpêx to ho
papa nhũm kãm mẽ pajapê xàj
mẽ pahto mex rãhã ho pa.
Nẽ mẽ pakamã ukaprĩ rãhã ho pa.
Anẽ.
Nhũm pre ã Marir Ijapew mã Tĩrtũm
mex o mex ã grer anẽ. 56 Hãmri nẽ ri
hkôt pa hã mytwrỳ axkrunẽpxi nẽ ma
akupỹm õ krĩ hwỳr mỗ.

Juãw Paxis kator ã harẽnh

57 Tã nhũm Ijapew hpijagri kaxyw
õhy xà nhũm hkrare kato nẽ myre.
58 Hãmri nhũm omu nẽ hkĩnh tỳx nẽ.
Hãmri nhũm hkwyjaja Tĩrtũm kot wa

kamã ukaprĩ hã wa kãm wa hkra
myre nhõr ã harẽnh ma nẽ wa ỹ hã
hkĩnh nẽ.

59 Tã nhũm wa hkraja ra hã arĩgro
pê 8 nhũm mẽ hkwyjaja kot my
kwryt kà krãhyr kaxyw hwỳr akuprõ.
Tĩrtũm kot mẽ kãm hã karõ xà
hkôt nhũm mẽ kot kãm õr ã amnhĩ
to amnhĩrit kaxyw ã hipêx anhỹr
kaxyw. Na htem ã mẽ kêp Ijaew krajê
piitã mẽ hipêx anẽ. Jakamã nhũm
prem ã hipêx anẽ hãmri nẽ hpãnhã
tanhmã kot hã hixi mẽnũ to kaxyw
ri hã axpẽn kukja. Hãmri nẽ hipêxà
hkôt kot hã Jakaris mẽnũ kaxyw.
60 Hãmri nhũm katorxà tee ri axpẽn
tã mẽ kuma nẽ mẽ kãm:

—Ma koja kêp Jakaris kêt nẽ. Koja
kêp Juãw. Anẽ.

61 Hãmri nhũm mẽ tee ri kuma nẽ
kãm:

—Kokỹ. Mo jar mẽ pahtõ pê Juãw
kot kêt ri kêp Juãw? Jar amrakati kênã
kot ka kêt wa ri ã hã hixi rẽnũ anẽ.
Anẽ.

62 Hãmri nẽ hixi hã hipêxà kukja.
Nom nhũm arĩ umar kêt nẽ kapêr kêt
jakamã nhũm mẽ tanhmã ri kãm mẽ
ĩhkra nhĩpêx to. 63 Hãmri nhũm ãhkra
ho kagã hã ahwỳ nhũm mẽ kãm ja
gõ nhũm kupy nẽ hã mẽ kãm hixi
nhĩpêx. Nhũm mẽ kupy nẽ omu hãmri
nẽ hixi pê Juãw kôt omu. Hãmri nẽ tee
ri hixija kukamã hamaxpêr. 64 Rôm
nhũm Jakaris akupỹm ama nẽ kapêr
mex kurê kumrẽx nẽ Tĩrtũm mã mex
o mex ã harẽnh o xa. 65-66 Hãmri
nhũm mẽ omu nẽ ma mẽ piitã mẽ kãm
wa hkra jarẽnh o ri axpẽn kôt hprõt.
Pika pê Jutej kamã hixêt kape hã krĩ
hkôt nhũm mẽ ri mẽ piitã mẽ kãm
harẽnh o hprõt. Tĩrtũm kot wa hkra
kôt tãnopxar o pa nẽ ho mex ã harẽnh
o hprõt. Hãmri nhũm mẽ kuma nẽ tee
ri hkukamã hamaxpêr nẽ axpẽn mã:

—Hêxta waa nẽ. Tĩrtũm tãm na xep
hte jare hkôt ri pa ho pa. Jakamã koja
nhỹrmã hprêk hãmri nẽ tanhmã koja
we amnhĩ nhĩpêx to ho pa wehee?
Anẽ.

*Jakaris kot Tĩrtũm nhỹ hã kapêr ã
harẽnh*

⁶⁷ Hāmri nhūm Jakaris Tīrtūm Karō nhỹ hā Tīrtūm mex o mex ā harēnh o xa. Tīrtūm kot mē kēp Ijaew o mex ā harē nē mē kām:

⁶⁸ Hēxta waa nē. Nà Tīrtūmja mex o mex. Na pre hte mē pahpāmja ām hkôt pix mā amnhĩ nhĩpēx o pa. Jakamā nhūm hte Tīrtūm mē pahpē hkrajē kamā ukaprĩ nē mē pahto mex o pa.

E kwa pu mē kām mex o mex ā harēnh rāhā nē.

⁶⁹ Ra kot mē pahwỳr mē pahkaprĩ xwỳnh pē mē panhō pahihiti mēnh mā. Ja kaxyw àhpumunh xihtỳx o hihtỳx jakamā na pre ra mē pahwỳr mēnh ā amnhĩ jarē.

Koja kēp amnepēm Tīrtūm mā tanhmā amnhĩ nhĩpēx to ho pa xwỳnh Tawija hkanrēhā htāmnhwỳ.

⁷⁰ Amnepēm Tīrtūm nhỹ hā kapēr xwỳnhjaja na prem mē kām Tīrtūm kapēr jarēnh o pa nē mē kām:

⁷¹ “Koja Tīrtūm mē panē mē kām mē pahkurē xwỳnhjē pumunh mex o pa.” Anē.

⁷² Tīrtūm ra kot mē pahpāmje mā amnhĩ jarēnh xà hkôt kām mē pakamā ukaprĩ rāhā ho pa hprām.

Koja aa ja ho anhỳr o hamakētkati hkēt nē.

⁷³⁻⁷⁵ Na pre ra mē pahpām Apraāw mā mē pakukamā ā mē pahtā amnhĩ jarēnh anē nē kām: “Kot paj mē anē mē kām mē akurē xwỳnhjē pumunh mex nē mē ìhkra nē mē ato ixkato. Jakamā kot kaj mē amnhĩ kamā amā mē uma hkēt nē axāmnhĩx ri ajamakētkati nē mē kamā apa. Nē kot kaj mē māmri axāmnhĩx ri inhmā tanhmā amnhĩ nhĩpēx to ho ri apa rāhā nē. Nē ixkôt amnhĩ nhĩpēx o ri apa rāhā ty.” Anhỳr o na pre Tīrtūm mē pakukamā mē pahtā amnhĩ jarē. Anē.

Nhūm pre ā Jakaris mē kām Tīrtūm kapēr jarēnh anē. Hāmri nē hkrareja mỳ nē o xa nē kām:

⁷⁶ —No ka Xugitre. Kot kaj aprêk hāmri nē apē Tīrtūm maati nhỹ hā kapēr jarēnh o apa xwỳnh. Jakamā kot kaj Pahihti hkukamā mē piitā mē kām harēnh o ri mē hkôt apa. Mē kot amar nē kutēp tām amnhĩ nhĩpēx kaxyw.

⁷⁷ —Tīrtūm kot mē nē mē kot amnhĩ tomnuj rēnh nē mē ho hkra hā harēnhja kot kaj mē hkôt mē kām harēnh o ri apa.

⁷⁸ —Na hte Tīrtūm mē pakamā ukaprĩ ho pa nē mē pakamā gryk tokyx anhỳr kēt nē. Jakamā koja mē pahwỳr mē pahkaprĩ xwỳnhja mē. Kormā mē pahwỳr wrỳk kēt jakamā te mē pahte kamāt kô kamā tee ri mē paxàhkupēnh o ri papa xwỳnh pyrāk.

—Nom koja mē pahwỳr wrỳkja o te ra myt kator nē mē pamā hirā nē mēmoj to amnhĩrit mex pyrāk o mē panhĩpēx. Ja kaxyw koja Tīrtūm mē pahwỳr mē pahkaprĩ xwỳnhja mē nhūm man mē pahwỳr wrỳ nē mē pamā mē pahtyk pyma xwỳnhjē mā Tīrtūm kapēr o amnhĩrit o pa. Mē pahte mar nē ra pajamakētkati nē paxāmnhĩx ri papa nē pahtyk kaxyw.

⁷⁹ —Mē kām mē htyk pyma xwỳnhjaja te kamāt kô kamā ri pa pyrāk. Tā koja mē pahkaprĩ xwỳnhja wrỳ hāmri nē tanhmā mē hkrā hto nhūm mē te arĩgro hā ri mē pa xwỳnh kot amnhĩ nhĩpēx pyrāk o amnhĩ nhĩpēx. Jao hamakētkati nē axte kām htyk pyma hkēt nē ri pa. Anē.

Nhūm pre ā Jakaris Tīrtūm Karō nhỹ hā hkrare mā kapēr anē.

⁸⁰ Tā nhūm Juāwja gaa nē aptār. Nē Tīrtūm kôt amnhĩ nhĩpēx o pa. Nom kormā kot Ijaew jahkre ho pa hkēt ri kapôt ā ri mē puhā pa.

Ā na pre Juāw kator nē amnhĩ nhĩpēx anhỳr o pa anē. Na pre kato nē hā mytwrỳ grēre hāmri nhūm Jejusja hkôt kato.

2

Jejus kator ã harënh

Matêwre 1.18-25

¹⁻² Na pre ã Jejus kator anë. Nhùm pre Rôm nhõ xwýnhjê nhõ pahi Sesti Akusja õ pika piitã hkõt mẽ ho kõta kaxyw. Aa kot mẽ ho kõta hkêt tâ ra kot mẽ ho kõta kaxyw. Kormã pahi Sirën haxwýja kot pika pê Sir kamã mẽ ho amnhĩptàr ri nhùm pahi Sesti Akus kot mẽ ho kõta kaxyw. Jakamã kãm àpënh xwýnhjê mã kapër nẽ mẽ kãm:

—E kêr ka mẽ ho kõta kaxyw nẽ mẽ piitã mẽ hixi hã kagã hpa. Anë.

³ Hãmri nhùm mẽ piitã ã kot mẽ hipêx anhÿr ã amnhĩ tâ harënh ma hãmri nẽ mẽ kot mẽ hixi hã kagã kaxyw piitã akupÿm papxà hwÿr ma hapêx. ⁴ Nhùm pre Marir mjên Juje haxwýja ma krĩ pê Perěj wÿr mõ. Garirej kamã õ krĩ pê Najare rùm kato nẽ ma hwÿr mõ. Pika pê Jutej kamã na Perějja. Kamã na pre Juje nhĩgêt Tawija kato. ⁵ Nhùm Juje kęp kanrêhã htàmnhwÿ jakamã na pre ma akupÿm hwÿr mẽ hkwÿjê hkõt mõ. Nẽ ma amnhĩ kõt kot ho hprõ mã xwýnh Marir o mõ. Arĩ htujarõ rax rãhã nhùm ma amnhĩ kõt o mõ. ⁶ Nhùm wa mõõ hãmri nẽ hwÿr pøj. Nhùm Marir hpijagri xà hã mytwrÿ mã àr jakamã nhùm kamàt nhùm õhy xà. ⁷ Nom nhùm Perěj wÿr mẽ hpõx nyw xwýnhjaja ra ixkre piitã ho nyt pa nhùm wa tee ri hpijagri kaxyw amnhĩ to ukapi ho pa. Hãmri nẽ nhÿri mõx nhõrkwÿ punajre hwÿr axà nhùm Marir kamã hpijagri. Nhùm hkra kato nẽ myre. Kra kot wa na pre. Hãmri nhùm kumÿ nẽ kupêxê ho hkupu hpa nẽ mõx xàpkur xà hã kõi kápřÿ kamã kuxi nhùm hamakêtkati nẽ gõr nẽ nõ.

õwêhti jamãr xwýnhjê jarënh

⁸ Rôm nhùm õwêhti jamãr o mẽ pa xwýnhjaja kapõt ã ri hkrit õwêhti jamãr o pa. Nhùm ra kamàt nhùm mẽ hamãr o hkrĩ. ⁹ Pu nhùm kaxkwa rùm Tirtũm kapër o wrÿk xwýnhja wrÿ nẽ mẽ mÿri ajêt. Hãmri nẽ tanhmã

amnhĩ to nẽ mẽ hpuhã ho hirã rax kumrêx. Nom nhùm Tirtũm tãm ã mẽ hipêx anë. Hãmri nhùm mẽ tee ri jawÿ Tirtũm kapër o wrÿk xwýnhja pumu nẽ kãm ma htÿx nẽ akryk omunh o hkrĩ. ¹⁰ Hãmri nhùm mẽ kãm:

—Pa? Kwa mẽ amã ixpyma hkêt nẽ. Ixte mẽ amã mẽmoj mex jarënh kaxyw na pa mẽ awÿr wrÿ. Kot kaj mẽ harënh ma nẽ akĩnh nẽ. Nom mẽ kapxipixjaja kaj mẽ akĩnh kêt nẽ. Koja mẽ piitã ja jarënh ma nẽ mẽ apyrã nẽ hkĩnh nẽ pa. ¹¹ Na ra ham mẽ akamã ukapřÿ xwýnhhta kato. Pahi Tawi nhõ krĩ mẽ mẽ anhõ krĩ pê Perěj kamã. Kęp mẽ apiitã mẽ anhõ pahihti na. Mẽ ate amnhĩ wÿr kamã ajamak o apa xwýnh pê Kris na. Tãm na ham kato. ¹² E pa ixprĩ hã mẽ amã tanhmã harënh to ka mẽ inhma. Na kato nhùm katorxà kupêxê ho kupu hpa nẽ kõi kamã kuxi nhùm nõ. Kwa mẽ tokyx ma hwÿr mra nẽ kęp mẽ anhõ pahihti hã omu. Anë.

¹³ Nhùm pre ã mẽ kãm ujarënh anë. Hãmri nhùm hkwÿjaja wamta kõt ohtõ nẽ mẽ hwÿr wrÿ nẽ puhã harir. Hãmri nẽ Tirtũm mã mex o mex ã gre o harir. ¹⁴ Nẽ hã gre o:

Tirtũm maati na mex o mex.

Jakamã mẽ kãm hprãm xà kõt pix mã amnhĩ nhĩpêx o mẽ pa xwýnhjaja koja amnhĩ tâ mẽ omu nẽ tanhmã mẽ ho nhùm mẽ hamakêtkati nẽ àmnhix hkĩnh nẽ pa ho pa.

¹⁵ Anhÿr o gre o harir hãmri nẽ ma akupÿm kaxkwa hwÿr àpir pa nẽ akunok. Hãmri nhùm õwêhti jamãr xwýnhjaja mẽ kapër ma nẽ ma akupÿm àpir ã mẽ omu nẽ axpën mã:

—E tokyx pu mẽ krĩm nẽ Tirtũm kot mẽ pamã ho amnhĩrĩt xwýnhhta japër nẽ tokyx nhÿri omu. Kwa ma pu mẽ tokyx hwÿr nẽ omu. Anë.

¹⁶ Hãmri nhùm mẽ ma hwÿr mra. Hãmri nẽ krĩm agjê nẽ mõx nhõrkwÿ wÿr agjê nẽ mẽ hkrareta pumu. Nhùm kõi kamã nõ nhùm mẽ omu nẽ kuri Marir mẽ Juje wa omu. ¹⁷ Hãmri nẽ akupÿm hapøj nẽ ma mẽ piitã mẽ hkõt ri mẽ kãm harënh o pa. Ra Tirtũm kapër o wrÿk xwýnh kot mẽ

kām harēnh xàja kôt nhũm mẽ ma mẽ kām harēnh o ri mẽ hkôt pa. ¹⁸ Nhũm mẽ amnhĩ jaêr pê mẽ kot harēnh ma mẽ tee ri hkukamã hamaxpēr. ¹⁹ Nom nhũm Marir mẽ kot kām hkrax rũm tanhmã hkra jarēnh to xàta kukamã pix mã hamaxpēr rāhã ho pa.

²⁰ Jakamã nhũm ôwêhti jamār xwýnhjaja ma akupým hkrit wýr mra. Tĩrtũm kapēr o wrýk xwýnh ra kot mẽ kām ujarēnh xà hkôt nhũm mẽ kot Jejus pumunh jakamã ma akupým hkĩnh mẽ Tĩrtũm mã mex o mex ã harēnh pê mã grer o akupým mra.

Mẽ kot Jejus ã hixi mẽnh ã harēnh Matêwre 1.21; Rukre 1.31

²¹ Tã nhũm wa hkrareta ra mã arĩgro pê 8 nhũm mẽ hwýr akuprõ mẽ kām my kwýrýt kà krãhta. Na hte Ijaew mẽ hkra myre piitã ã mẽ hipêx anê. Mẽ piitã mẽ kot Tĩrtũm mã òr ã mẽ omunh kaxyw. Jakamã nhũm mẽ kām ho anê mẽ hpãnhã mã hixi mẽ. Marir kormã kot ho htujarõ hkêt ri Tĩrtũm kapēr o wrýk xwýnh kot hkukamã kãm hixi jarēnh xàja kôt nhũm mẽ mã hixi mẽ nhũm hixi kêp Jejus.

Mẽ kot Tĩrtũm mã Jejus nhõr pyrãk o hipêx

²²⁻²⁴ Tã nhũm Marir hpijagri ho hapêx. Jakamã nhũm Juje ma krĩ pê Jerujarê hwýr mẽ kot Tĩrtũm mã amnhĩ jarēnh xà mã ixkre hwýr amnhĩ kôt o mõi. Na pre ra finat Mojes amnepêm Tĩrtũm nhỹ mã mẽ hkukamã mẽ hpãmjê mã ja mã karõ. Nẽ mẽ kãm mã karõ ho:

Koja mẽ aprõ hpijagri. Hãmri mẽ hpijagri ho hapêx ka mẽ ma Tĩrtũm mã amnhĩ jarēnh xà mã ixkre hwýr o mra mẽ hpãnhã Tĩrtũm mã mẽmoj gõ. Kãm tutre ho gõ rý kãm tuuti hõ ho axkrut mẽ agõ kê patre hamý mẽ kãm kupa. Kot ja mã omunh mẽ hpijagri xwýnhhta akupým mex ã harēnh kaxyw.

Anhýr o kot mẽ kãm ja mã karõ jakamã nhũm wa mã ã amnhĩ nhĩpêx anhýr kaxyw hwýr mõi. Nẽ amnhĩ kôt

Jejus mý mẽ o mõi. Tĩrtũm kot mẽ kãm ja mã karõ nhũm mẽ kot mã kagã xà hkôt. Na pre ra finat Mojes mẽ kãm ja jarē mẽ mẽ kãm:

Kot kaj mẽ akra my kot wa hãmri mẽ te mẽ ate Tĩrtũm mã òr kaxyw hipêx pyrãk o hipêx. Kê tãm amnhĩ nhĩpêx o pa mẽ ý mã tanhmã kãm amnhĩ nhĩpêx to ho pa.

Anhýr jakamã nhũm wa ra Jerujarê hwýr nojarêt mẽ amnhĩ kôt Jejus mý mẽ ma amnhĩ kôt o mõi.

Simeãw kot Jejus kukamã harēnh

²⁵⁻²⁶ Rõm nhũm Jerujarê kamã Simeãwja. Tĩrtũm Karõ nhỹ mã kot tanhmã amnhĩ to mex to ho pa xwýnh na pre. Na pre hte Tĩrtũm kapēr kôt pix mã tãm amnhĩ nhĩpêx o pa. Jakamã nhũm pre ra Tĩrtũm Karõ ã kãm kapēr anê mẽ kãm:

—E inhma Simeãw. Kot kaj atĩr rãhã nhỹrmã Tĩrtũm kot mẽ akaxyw ãm mã xwýnhja ka ano ho omu mẽ rĩ kormã ty.

Anhýr o kãm kapēr jakamã nhũm kuma mẽ hkĩnh mẽ ãm pix kamã hamak o pa. Mẽ kêp Ijaew wýr wrýk mẽ mẽ ho mex mã xwýnhhta pix kamã hamak rãhã ho pa. ²⁷ Jakamã nhũm Jejus katorxã mẽ hipêxã purota wa Tĩrtũm mã amnhĩ jarēnh xà mã ixkreja wýr Jejus o axã mẽ kormã o xa. Finat Mojes kot mẽ kãm mã karõ xà hkôt. Hãmri nhũm Tĩrtũm Karõ mẽ hwýr Simeãwja mẽ nhũm ma mẽ hwýr tẽ mẽ axã. ²⁸ Hãmri mẽ wa hkrata pumu mẽ hkĩnh týx mẽ. Hãmri mẽ wa kêp kumý mẽ o xa mẽ mã Tĩrtũm mã mex o mex ã harê mẽ kãm:

²⁹⁻³² Pa Pahi Maati. E ot pa ixte amã tanhmã amnhĩ nhĩpêx to ho ixpa xwýnh ã amnhĩ jarê.

Nã ãm hãmri na ka pre ã inh mã jare hkukamã harēnh anê. Tã ate inh mã harēnh xà hkôt pa ra inhno ho omu. Kêp mẽ ixkamã ukapĩ xwýnh ã omu. Nẽ kêp ate mẽ ixwýr mẽnh xwýnh ã omu.

Nã koja te arĩgro mã myt hirã mẽ mẽmoj piitã ho amnhĩrĩt mex

pyràk o koja mẽ inhìpêx o pa. Jakamã koja hprêk hãmri nê ma Ijaew kêt xwýnhjê mã apê Tirtũm ã akapêr o amnhĩrĩt o pa nhũm mẽhprĩ hã ajarênh ma. Nê mẽ ixpê Ijaew kot paj mẽ ijaxwýja kuma nê hã ixpijaàm o ri ixpa.

Jakamã kot paj ixàmnhĩx ri tanhmã amnhĩ nhìpêx to ho ri ixpa nê ixàmnhĩx ty. Ra ixte inhno ho ate inhmã harênh xwýnhhta pumunh kênã. Anê.

³³ Nhũm pre ã Simeãw Jejus jarênh anê. Nhũm katorxà mẽ hipêêxà purota wa amnhĩ jaêr pê kot ã harênh anhýrja mar o xa. ³⁴⁻³⁵ Hãmri nhũm Simeãw wa ho Tirtũm wý nê kãm:

—E Tirtũm. Kêr ka ja wa ho mex nê. Wa ho mex o wa ho mex rãhã ho apa. Anê.

Hãmri nê Marir mã kapêr nê kãm:

—Nã ãm hãmri na pre Tirtũm mẽ pakaxyw akrata xãm. Mẽ pahpê Ijaew kaxyw ãm. Jakamã koja hprêk nê ma Tirtũm kapêr o mẽ piitã mẽ ahkre ho ri mẽ hkôt pa. Nhũm mẽ kuma hãmri nê ahpýnhã tanhmã hamaxpêr to xà hkôt tanhmã hipêx to. Jakamã nhũm mẽ hkwýjaja kuma nê hkôt amnhĩ xunhwý nê hkôt amnhĩ nhìpêx o pa. Jao tãm hipêx o pa. No nhũm mẽ hkwýjaja kuma nê axtem nê kãm hkĩnh kêt nê. Hãmri nê tanhmã hipêx to. Jakamã kot kaj tee ri ja hã mẽ omu nê akaprĩ htýx nê. Te mẽ kot wapo ho akanhwýr nê akamã ho kaxkep nhũm apê omnuj týx pyrãk o kot kaj amnhĩ kamã ama nê mẽ omu. Anê.

ãnti kot Jejus pumunh ã harênh

Wam Ximotre 5.5

³⁶⁻³⁸ Rôm nhũm mẽhõ ni pê ãntija mẽ hwýr axà nê Jejus pumu. ãntija Panuew kra na pre. Nê Ase hkwý na pre. Ni htã kêp Tirtũm nhý hã kapêr jarênh o pa xwýnh. Na pre ra mjên no ãm kormã mjên nê pa hã amgrà pê 7 pix nhũm pre kêp ty. Hãmri nhũm axte mjên kêt nê pa rãhã ra hpigêx týx nê. Ra hã amgrà pê 84. Na pre hte Tirtũm mã amnhĩ jarênh xà hã ixkre

hwýr pa nê kãm amnhĩ jarênh rãhã ho pa. Nê kot kãm amnhĩ jarênh kaxyw nê apkur kêt rãhã kãm amnhĩ jarê. Nê arĩgro hã hwýr pa nê kamàt kãm hwýr pa. ã na pre hte amnhĩ nhìpêx anhýr rãhã ho pa anê. Jakamã mẽ hwýr axà nê Jejus pumu nê hkĩnh nê. Hãmri nê hã Tirtũm mã mex o mex ã harê nê kãm:

—Hêxta gàu nê Tirtũm. ãm hãmri na ka mẽ ixwýr Jejus mẽ. Ma amex o amex. Anê.

Hãmri nê Ijaew kot amnhĩ wýr mẽ kamã ukaprĩ xwýnh kamã hamak xwýnhjê mã ra Jejus kator ã harênh o ri mẽ hkôt pa.

Marir mẽ Juje wa kot akupým Najare hwýr mör ã wa harênh

Matêwre 2.19-23

³⁹ Tã nhũm Marir mẽ Juje wa Tirtũm kapêr ã kagà htũm kôt Tirtũm mã amnhĩ jarênh xà hã ixkre kamã tanhmã amnhĩ nhìpêx to hpa hãmri nê kato nê ma akupým mō. Ma Garirej kamã õ krĩ pê Najare hwýr wa ma akupým mō.

⁴⁰ Tã nhũm wa hkrata ra wa kãm hprêkre ho mō. Nê mex nê àhpumunh týx nê. Tirtũm kot tãnopxar nê mẽmoj to kutã nojarêt rãhã ho pa jakamã nhũm mex nê hkĩnh nê pa.

Marir mẽ Juje wa kot tee ri Jejus japêr ã wa harênh

Rukre 4.22

⁴¹ Nhũm pre hte Marir mẽ Juje wa amgrà mẽ hkwýjê hkôt ma Jerujarê hwýr pa. Mẽ kot arĩgro pê Pas ã hkĩnh kaxyw. Pas ã na hte mẽ kêp Ijaew amnepêm Tirtũm kot pika pê Ejit rũm mẽ hpãmjê katorja mã hamaxpêr kaxyw axpên wýr akuprõ nê hã hkĩnh. Jakamã nhũm wa ma mẽ hkôt hã hkĩnh kaxyw Jerujarê hwýr hkwýjê hkôt mō. ⁴² Nhũm ra Jejus hprêk o mō. Ra hã amgrà pê 12 jakamã nhũm wa ma amnhĩ kôt o mō. ⁴³⁻⁴⁴ Tã nhũm mẽ hkĩnh pa hãmri nê akupým nojarêt nhũm Marir mẽ Juje wa ma hkwýjê hkôt akupým mō. Nhũm Jejus Jerujarê kamã ahte arĩk nê akupým wa hkôt mör kêt nê. Nhũm

wa htỳx wam ma hkwyjê hkôt htêm ã hkamnhĩx jakamã wa hapêr kêt nê. Hãmri nê wa hapu hã hamakêtkati nê mẽ hkôt môr o môr ã ra hã kamàt. Hãmri nê mẽ kot amnhĩm hikranh xàja wỳr mẽ hkôt pôj nê tee ri mẽ hkaêx ã hkra japêr o ri mra nom omunh kêt nê. ⁴⁵ Jakamã nhũm apkati nhũm wa awjanã nê ma akupỳm Jerujarê hwỳr mō nê kamã hapêr o ri pa. ⁴⁶ Nom tokyx kãm kator kêt nê. Mẽ hkaêx ã tee ri hapêr o pa hã apkati axkrut. Nê nõ nhũm apkati nhũm wa tã Tirtũm mã amnhĩ jarênh xà hã ixkreja wỳr hapêr o mō nê hwỳr axà. Hãmri nê omunh kurê kumrêx. Nhũm arĩ mẽ kot Tirtũm kapêr tũm o mẽ ahkre xwỳnhjê mar o mẽ kutã nhỹ. Nê mẽmoj tã ri mẽ hkukja nê tanhmã mẽ kãm ujarênh to. ⁴⁷ Nhũm mẽ kot mar xwỳnhjaja tee ri kapêr ã kuma nê àhpumunh tỳx ã omu hãmri nê akryk mar o hkrĩ. ⁴⁸ Hãmri nhũm Marir mẽ Juje mẽ hwỳr axà nê mẽ kuri wa hkraja pumunh kurê kumrêx. Hãmri nhũm katorxàja hwỳr tẽ nê kãm:

—Xê Jejus. Mon ka axtem nê ã ri amnhĩ nhĩpêx anê nê akupỳm wa ixkôt amôr kêt nê? Na pa wa mō nê mẽ pahkwỳjê hkôt pôj nê tee ri mẽ hkaêx ã ajapêr nê tee ri akukamã ijamaxpêr. Anê.

⁴⁹ Hãmri nhũm amnhĩ tã wa kuma nê wa kãm:

—Tỳ. Nom Inhĩpêêxà nhõrkwỳ kamã ixarĩk kênã na ka wa tee ri ixkukamã ajamaxpêr nê ijapêr o ri apa. Anê.

⁵⁰ Hãmri nhũm wa kuma nê ã kot amnhĩ jarênh anhỳrja kukamã tee ri hamaxpêr. ⁵¹ Hãmri nê mẽ ma akupỳm mō nê Najare hwỳr pôj nê kamã pa. Nhũm pre Jejus wa kapêr kôt ri amnhĩ nhĩpêx rãhã ho pa. Hãmri nhũm katorxàja hkrax rũm mẽ kot kãm tanhmã hkra kot amnhĩ nhĩpêx to hkukamã harênhja pix kukamã hamaxpêr rãhã ho pa.

⁵² Gaa nhũm Jejus ra àptàr o mō. Nê àhpumunh tỳx nê. Nhũm mẽ piitã ã kot amnhĩ nhĩpêx anhỳr ã omu nê kãm hkĩnh nê. Nhũm Tirtũm haxwỳja kãm hapê nê.

3

Juãw Paxis kot Tirtũm kapêr jarênh o pa hã harênh

Matêwre 3.1-10; Makre 1.1-8; Juãw 1.19-28

¹⁻² Tã nhũm kormã pahihtĩ Tipeja mẽ ho amnhĩptàr o pa. Na pre ra mẽ ho amnhĩptàr ã amgrà pê 15. Nhũm Põn Piratja pahihtĩ Xipe mã pika pê Ijaew nhõ xwỳnhjê ho amnhĩptà. Nhũm Eroxa kãm pika pê Garirej nhõ xwỳnhjê ho amnhĩptà. Nhũm Erox tō Firipja kãm pika pê Iturej nê hõ pê Takonit wa kamã mẽ pa xwỳnhjê ho amnhĩptà. Nhũm Risãnja kãm pika pê Apirên kamã mẽ ho amnhĩptà. Nhũm Anas mẽ Kajpasja wa kêp Ijaew nhõ patre maati.

Rôm nhũm Jejus mẽ Jakaris kra Juãwja wa ra hamê anhĩpê àptàr. Jakamã nhũm Tirtũm tanhmã Juãw mã kapêr to. Kormã kapôt ã ri pa ri nhũm kãm kapêr nê kãm tanhmã kot amnhĩ nhĩpêx to ho pa hã kãm karõ nê kãm:

—Pa Juãw. E inhma. Kêr ka ma mẽ kãm ixkapêr jarênh rãhã ho ri apa. Anê.

³ Hãmri nhũm kuma nê ma ri mẽ kãm kapêr jarênh o pa. Pyhti pê Jotãw mỳri mẽ piitã mẽ kãm harênh o ri pa nê hpãnhã ihkjê hã ri mẽ pa xwỳnhjê mã harênh o ri pa. Nê mẽ kãm:

—E kwa mẽ tokyx amã amnhĩ tomnuj kaga hprãm xàj tãm ri amnhĩ nhĩpêx. Kê Tirtũm ja hã mẽ apumu nê mẽ anê mẽ ate amnhĩ tomnuj o hapêx pa. Pa mẽ piitã mẽ kot mẽ apê Tirtũm kra hã mẽ apumunh kaxyw mẽ akrã kumrà.

Anhỳr o mẽ kãm kapêr o ri pa. ⁴⁻⁵ Na pre ra amnepêm mẽ hkukamã Tirtũm nhỹ hã kapêr o pa xwỳnh Ijais ra Juãw kukamã kot tanhmã amnhĩ nhĩpêx to hã harê nê hã kagà. Nê hã kagà ho:

Koja nhỹrmã mēhõ mōn pōj. Kapôt ã mōn pōj nê mẽ kãm ujarênh o ri pa. Nê mẽ kãm ujarênh o: “E mẽ inhma. Koja Tirtũm tokyx mẽ pahwỳr mẽ panhõ pahihtĩ mẽ nhũm wrỳ nhũm mẽ piitã omu. Jakamã kwa mẽ tokyx

kutêp tãm amnhĩ nhĩpêx o apa. Te ho mẽ kot mēhō kutêp pry ho mex pyrāk o amnhĩ nhĩpêx. Jao tãm amnhĩ nhĩpêx. Nē tãm axpēn nhĩpêx. Pahihtita kutêp. Mē pahte amnhĩ nhĩpêx te kot pry nhĩnur pyrāk nhũm mẽ tee ri kot kām hã mrrar mex prām kaprý pyrāk. Hinur nē krā hakýx nē pry juk pyrāk o na mẽ pahte amnhĩ nhĩpêxja. Jakamã kot kaj mẽ ate amnhĩ tomnuj kaga nē tãm amnhĩ nhĩpêx. Nē tãm axpēn nhĩpêx. Hãmri nē te mẽ kot pry nhĩnur o mex nē ho katàt nhũm katàt muux nē nōr pyrāk o kot kaj mẽ amnhĩ nhĩpêx. Pahihti nywta kutêp. Kwa kēr ka mẽ ã amnhĩ nhĩpêx anē.

6 Kot kaj mẽ anē nhũm mẽ ohtō nē ja hã mẽ apumu hãmri nē mẽ apyrà Tirtũm kot mẽ ho hkra kaxyw amnhĩ to kuwý.” Anhỹr o mẽ kām ujarēnh o pa. Anē.

Nhũm pre ã finat Ijaisja Juãw Paxis kukamã mẽ kām ujarēnh anhỹr o pa. 7 Jakamã nhũm àptàr nē Ijais kot ra hkukamã harēnh xà hkôt ma Tirtũm kapēr o mẽ ahkre ho pa. Nhũm prem kuma hãmri nē kot mẽ hkrã kumrãr kaxyw hwýr amnhĩ to mra. Nhũm mẽ omu nē tanhmã mẽ ahkre hto. Nē mẽ kām kapēr kām hihtýx nē mẽ kām:

—Tk. Kwa kormã. Mē ate amnhĩ tomnuj pix o ri apa xwýnh kēnã. Xà kot paj mẽ ate amnhĩ tomnuj rãhã mẽ akrã kumrã nhũm Tirtũm ja hã mẽ apumu nhũm ja kām mex nã? Nà koja ja kām mex kêt nē. Koja ja mýrapê nhỹrmã tanhmã mẽ anhĩpêx to ka mẽ tee ri umaj apimxur prām kaprý.

8 —Na htem amnhĩ tomnuj kaga nē hpãnhã tãm amnhĩ nhĩpêx. Nē tãm ri axpēn nhĩpêx. Jakamã e kwa mẽ ã amnhĩ nhĩpêx anhỹr o apa. No na ka htem atýx ri ajamaxpēr o: “Mē ixpê finat Apraãw kanrēhã htãmnhwý jakamã koja Tirtũm ja hã mẽ ixpumu hãmri nē mẽ ixte amnhĩ tomnuj mýrapê tanhmã mẽ ixto hkêt nē. Koja ãm mẽ ixto mex rãhã nē.”

Anhỹr o atýx ri amnhĩ kukamã ajamaxpēr o apa. Nom ja kot anhỹr kêt. Mē apê Apraãw kanrēhã htãmnhwý htã urāk nē tãm amnhĩ nhĩpêx o apare hã. Kot ka mẽ apê kanrēhã htãmnhwý htã amnhĩ tomnuj o ri apa hãmri nē Tirtũm noo mã te mẽ apê pikap kēnre nhĩkwý pix pyrāk.

9 —Na ra Tirtũm kot mẽ ate amnhĩ tomnuj mýrapê tanhmã mẽ ato kaxyw. Koja mẽ anhĩpêx o te mēhō nhō mẽmoj pàr ô hkêt nhũm kot tee ri omunh hãmri nē krãhyr nē kuwy kamã mēnh nē ho xêt par pyrāk o mẽ anhĩpêx. Jao amnhĩ nē kuwy hwýr mẽ arēnh pa ka mẽ kamã amnhĩ xà htýx kamã ajamak rãhã ho ri apa. Anē.

Nhũm pre ã Juãw Paxisja mẽ kām kapēr anē. 10 Hãmri nhũm mẽ kuma nē tee ri amnhĩ kukamã hamaxpēr nē kām:

—Kwa xō wehe? Xà koja ã mẽ inhĩpêx anē? Kwa tanhmã kot paj mẽ kot ã mẽ inhĩpêx anhỹr pymaj amnhĩ nhĩpêx to wehe? Anē.

11 Hãmri nhũm mẽ kām:

—Nà kēr ka mẽ axpēn kām axukaprĩ ho ri apa. Nē mẽ kēp amrakati xwýnhjê mã amnhĩ kutã mẽmoj nhōr o ri apa. Nē mẽ anhĩnôhkã axkrut nē mẽhō hinôkã hkêt xwýnhjê mã ho pyxi nē agō nē pyxi nē ho arĩk. Nē mẽ axàpkur xà ho anhōxý ho apa hkêt nē. ãm axãmnhĩx ri mẽ kēp amrakati xwýnhjê mã amnhĩ kutã mẽ kām mẽmoj to hkryre nē agō. E kēr ka mẽ ã axpēn nhĩpêx anhỹr o ri apa. Anē.

12 Hãmri nhũm Rõm kām mẽ õ pahiti mã mẽ piitã mẽ kēp kàxpore hkwy jamýnh xwýnhjaja mẽ urāk nē hwýr mra. Kot mẽ urāk nē mẽ hkrã kumrãr kaxyw hwýr mra nē kām:

—No we mẽ pajaja? Tanhmã kot paj wem amnhĩ nhĩpêx to? Anē.

13 Hãmri nhũm mẽ kām:

—Nà mẽ kajaja kēr ka mẽ Rõm nhō pahi kot mẽ amã mẽ ate mẽ kēp kàxpore hkwy jamýnh jarēnh xà hkôt pix mã hamýnh o ri apa. No mẽ atýx ri amnhĩ krã hkôt amnhĩm hkwy jamýnh prām xàj mẽ kām hkre kamã

ho rŭnh nē mē kām harēnh o ri apa hkēt nē. Anē.

¹⁴ Hāmri nhŭm hpānhā pōristi hkwyjaja hwŷr mra nē kām:

—Kwa no we mē pajaja? Tanhmā kot paj wem ri amnhī nhīpēx to ho ixpa? Anē.

Hāmri nhŭm mē kām:

—Nā kēr ka mē anhō pahшти kot mē axāpēnh pānhā mē amā kāxpore nhōrta pix jamŷ nē ajamakētkati nē axāmnhīx ri ho amnhīm axujaprōr o ri apa. No mē akwyjaja kām apyma nē mē amā kāxpore nhōr prām xāj ri mē kām tanhmā amnhī pyma hto ho ri apa hkēt nē. E kēr ka mē ā amnhī nhīpēx anhŷr o ri apa. Anē.

Juāw Paxis kot tanhmā Jejus jarēnh to hā harēnh

Matēwre 3.11-12; Makre 1.7-8; Juāw 1.19-28; māānēn Atre 19.4

¹⁵ Nhŭm pre ā Juāw Paxisja mē kām kapēr anē. Nhŭm mē kuma nē htŷx kēp Tirtŭm kot mē pakaxyw ām mā xwŷnhhta ā hkamnhīx. ¹⁶ Hāmri nhŭm amnhī tā ā mē hamāxpēr anhŷr ā mē omu hāmri nē mē kām amnhī tā aprā nē mē kām:

—Nā pa hkēt. Na pa hte ām Tirtŭm mā gō pix o mē hkrā kumrār o ri ixpa. No koja tokyx ixpānhā Tirtŭm kot mē pakaxyw ām xwŷnhhta tām mē pahwŷr pōj. āhpumunh tŷx o kot ijakrenh jakamā na pa hte ām kukwak ri ixpa nē hā ixpijāam o ri ixpa. Tirtŭm kot mē pakaxyw ām xwŷnhhta koja mē awŷr Karō rē nhŭm mē akaxwŷnh mā agjē ka mē ŷ hā tām ri amnhī nhīpēx rāhā ho ri apa. Nom kormā mē kot tām amnhī nhīpēx hkēt xwŷnhjaja koja ja hā mē omu hāmri nē mē hipēx o te kuwy kot mēmoj to kaxār par pyrāk o mē hipēx.

¹⁷ —Na htem pur kām harōj nhīkē nē ho grā nē hpānhā kahtwŷ. Nē kahuk pa hāmri nē hkapī nhŭm kōk apē nē prŷkhā ho htor nē ho hapēx pa. Nhŭm mē hy ho pa nē ixkre kamā gōj kām unhwŷ. Ja pyrā nē koja tokyx Tirtŭm mē piitā mē kot tanhmā amnhī nhīpēx to ho pa hā mē omunh xā hkōt mē ho axkjē. Mē kot tām

amnhī nhīpēx o mē pa xwŷnhjaja koja ma amnhī wŷr mē ho api nhŭm mē kuri mex nē hkīnh rāhā nē pa ho pa. No mē kot amnhī tomnuj xwŷnhjaja koja mē hkīnhā tanhmā mē hipēx to nhŭm mē ma kuwy raxja wŷr pa nē kamā amnhī xā htŷx kamā hamak rāhā nē pa ho pa. Anē.

¹⁸ Nhŭm pre ā Juāw Paxis Tirtŭm kapēr o mē ahkre anhŷr o pa.

Juāw Paxis kot Jejus krā kumrār ā harēnh

Matēwre 3.13-17; Makre 1.9-11

¹⁹ Tā nhŭm Ijaew nhō pahi Eroxis ra htō hprō pē Eroxis pytā nē ho hprō nhŭm Juāw Paxisja harēnh ma nē ma hwŷr tē nē hā kām akir. No ām ja pix ā kām ākjēr kēt nē. Māānēn tanhmā kot amnhī tomnuj tŷx to ho pa hā kām akir. ²⁰ Nhŭm amnhī tā kuma nē kamā gryk tŷx nē amnhī tā mē kām hā amŷnē nhŭm prem unē nē haxā. Jao amnhī tomnuj tŷx nē. ²¹ Nom kormā mē kot haxār kēt ri nhŭm Juāw Paxis Ijaew kwŷjē krā kumrār o xa. Rōm nhŭm Jejusja hāmri tām nhŷhŷnh hwŷr tē nē kot hkrā kumrār kaxyw kām anē nhŭm kuma nē hkrā kumrā. Hāmri nhŭm Jejus gōj rŭm api nē kormā gō mŷ ri Tirtŭm mā amnhī jarēnh o xa. ²² Pu nhŭm kaxkwa axkjē nhŭm kurŭm Tirtŭm Karō te tuuti pyrā nē hwŷr wrŷk o tē nē ikre hā xa. Hāmri nhŭm kaxkwa rŭm Tirtŭm kām kapēr nē kām:

Pa? E apē Ixkra mex na ka. Ām hāmri na ka hte ixkanrēhā amnhī nhīpēx o apa. Inhmā ajapē kamā na ka ri apa ho apa. Anē.

Jejus kukamā higēt nē hpāmjē nhīxi hā harēnh

Matēwre 1.1-17

²³ Tā nhŭm Jejus Tirtŭm mā kapēr o mē ahkre ho pa hkrax. Na pre ra hā amgrā pē 30 hāmri nē kām ho hkrax.

E kot paj hpānhā amā Jejus kukamā hpāmjē nhīxi jarē Teopre. Ijaewjaja na prem htŷx ho Juje kēp Jejus nhīpēxā kumrēx ā hkamnhīx nom kēp hipēxā kumrēx kēt ām kēp hipēxā puro na pre.

Jejus kēp Eri htāmnhwŷ na pre.

24 Nē Eri kēp Matat kra na pre.
 Nē Matat kēp Rewi hkra na pre.
 Nē Rewi kēp Mewki hkra na pre.
 Nē Mewki kēp Jānaj kra na pre.
 Nē Jānaj kēp axtem Juje hō hkra na pre.
 25 Nē Juje kēp Matatis kra na pre.
 Nē Matatis kēp Amōs kra na pre.
 Nē Amōs kēp Naū hkra na pre.
 Nē Naū kēp Eri hkra na pre.
 Nē Eri kēp Nakai hkra na pre.
 26 Nē Nakai kēp Mate hkra na pre.
 Nē Mate kēp axtem Matatis ō hkra na pre.
 Nē Matatis kēp Semeī hkra na pre.
 Nē Semeī kēp Juje hō hkra na pre.
 Nē Juje kēp Jotre hkra na pre.
 27 Nē Jotre kēp Joanān kra na pre.
 Nē Joanān kēp Rej kra na pre.
 Nē Rej kēp Joropape hkra na pre.
 Nē Joropape kēp Saraxi kra na pre.
 Nē Saraxi kēp Neri hkra na pre.
 28 Nē Neri kēp axtem Mewki hō hkra na pre.
 Nē Mewki kēp Axi hkra na pre.
 Nē Axi kēp Kojā hkra na pre.
 Nē Kojā kēp Ematā hkra na pre.
 Nē Ematā kēp Erti hkra na pre.
 29 Nē Erti kēp Jojue hkra na pre.
 Nē Jojue kēp Eries kra na pre.
 Nē Eries kēp Jorī hkra na pre.
 Nē Jorī kēp Matat hkra na pre.
 Nē Matat kēp axtem Rewi hō hkra na pre.
 30 Nē Rewi kēp Simeāw kra na pre.
 Nē Simeāw kēp Juta hkra na pre.
 Nē Juta kēp axtem Juje hō hkra na pre.
 Nē Juje kēp Janā hkra na pre.
 Nē Janā kēp Eriakī hkra na pre.
 31 Nē Eriakī kēp Merea hkra na pre.
 Nē Merea kēp Mena hkra na pre.
 Nē Mena kēp Matata hkra na pre.
 Nē Matata kēp Natā hkra na pre.
 Nē Natā kēp Tawi hkra na pre.
 32 Nē Tawi kēp Jese hkra na pre.
 Nē Jese kēp Opex kra na pre.
 Nē Opex kēp Poas kra na pre.
 Nē Poas kēp Sarā hkra na pre.
 Nē Sarā kēp Nasō hkra na pre.
 33 Nē Nasō kēp Amīnatap kra na pre.
 Nē Amīnatap kēp Amī hkra na pre.

Nē Amī kēp Ari hkra na pre.
 Nē Ari kēp Erō hkra na pre.
 Nē Erō kēp Pere hkra na pre.
 Nē Pere kēp Juta hkra na pre.
 34 Nē Juta kēp Jako hkra na pre.
 Nē Jako kēp Ijak kra na pre.
 Nē Ijak kēp Apraāw kra na pre.
 Nē Apraāw kēp Tera hkra na pre.
 Nē Tera kēp Nako hkra na pre.
 35 Nē Nako kēp Jeruk kra na pre.
 Nē Jeruk kēp Rakau hkra na pre.
 Nē Rakau kēp Parek kra na pre.
 Nē Parek kēp Epti hkra na pre.
 Nē Epti kēp axtem Sara hō hkra na pre.
 36 Nē Sara kēp Kajnā hkra na pre.
 Nē Kajnā kēp Apaxat kra na pre.
 Nē Apaxat kēp Sēre hkra na pre.
 Nē Sēre kēp Noehti hkra na pre.
 Nē Noehti kēp Ramek kra na pre.
 37 Nē Ramek kēp Metujarē hkra na pre.
 Nē Metujarē kēp Enok kra na pre.
 Nē Enok kēp Jarate hkra na pre.
 Nē Jarate kēp Marerer kra na pre.
 Nē Marerer kēp axtem Kajnā hō hkra na pre.
 Nē Kajnā kēp Enos kra na pre.
 38 Nē Enos kēp Set kra na pre.
 Nē Set kēp Atāw kra na pre.
 Nē Atāw kēp Tirtūm kra na pre.
 Tirtūm kot wam my pē Atāwja pika ho hipêx jakamā te kēp hkra pyrāk.
 Ā Jejus kukamā hpāmĵē nhīxi kot anhÿr.

4

Satanasti kot amnhī tā Jejus kamā hamak ā harēnh
Matēwre 4.1-11, 16.23; Makre 1.12-13, 8.33; māñēn Eprēw 2.18, 4.15

¹ Tā nhūm Jejus pyhti pē Jotāw rūm akupÿm ma mō. Hāmri nē Tirtūm Karō nhÿ hā mēmoj kutā amnhī to htÿx nē. Jakamā nhūm nhÿhÿm ma kapôt wÿr o mō ² nhūm Satanasti omu nē ma hwÿr tē nē ri hkôt pa. Kapôt ā ri hkôt hēx rom tanhmā kām nē ho pa. Kot mar nē Tirtūm kapēr nhīrôp ām prām xāj ma hkôt tanhmā kām kapēr to ho pa. Hāmri nē hkôt pa o hā arĳgro

pê 40 nhũm Jejus kormã apkur kêt o hã arĩgro pê 40 nê hapêx nhũm ra kãm prãm tỳx nê. ³ Hãmri nhũm Satanasti kãm:

—Kwa mãn ka ra amã prãm tỳx kumrêx nà? Nom xep apê Tĩrtũm Kra jakamã mẽmoj tanhmã apê kute hkêt. Kwa kên nhĩkwỹ mũj mã anê kê amã pãwti hã amnhĩ jahkre ka aku nê tokyx ho amnhĩ xihtỳx. E kwa tokyx kãm anê. Anê.

⁴ Hãmri nhũm kuma nê kãm:

—Tk. Nà kot paj akapêr mar xà hkôt tanhmã amnhĩ nhĩpêx to hkêt nê. Koja Tĩrtũm kãm inhmã mẽmoj nhõr prãm nê inhmã mẽmoj gõ pa arĩ kormã kukrê. Kapêr ã kagã htũm kot ja jarênh kot:

Na htem mẽ apkur xà pix kukwak ri htĩr nê pa hkêt nê. Na htem mããnên Tĩrtũm kapêr mar xà hkôt tanhmã ri amnhĩ nhĩpêx to ho pa ho htĩr nê mex nê pa. Anê.

Ã kapêr ã kagã kot ja jarênh kot anhỹr jakamã kot paj amar xà hkôt ã ri amnhĩ nhĩpêx anhỹr kêt nê. ãm kwarĩ ho kwarĩ. Anê.

⁵ Nhũm pre ã Jejus Satanasti mã kapêr anê nhũm tee ri kuma hãmri nê hpãnhã ma nhỹhỹm o mõi nê nhỹri kỳx pẽ mẽmoj prêeti nhĩmõk ã o xa. Hãmri nê kãm pika piitã ahkre ho xa. Nê kãm mẽ hikukrêx piitã ahkre. Kàxpore nê mẽmoj piitã nhũm kãm ahkre hpa nhũm anhĩpê omunh o xa. ⁶ Hãmri nhũm Satanasti kãm:

—E mãn ka kam ri mẽmoj mũj piitã omu. Piitã inhõ na. Inhmã na pre Tĩrtũm piitã õr pa. Kot paj inhmã mēhõ mã õr prãm nê kãm kugõ. ⁷ Tã amã kot paj kugõ. Jakamã e. Kwa tokyx ixkutã tẽm nê inhmã inhmex o inhmex ã ijarẽ pa ama nê rĩ amã piitã õr pa. E tokyx. Anê.

⁸ Hãmri nhũm kuma nê kãm:

—Tk. Kot paj amã amex o amex ã ajarênh kêt kumrêx. ãm kwarĩ ho kwarĩ. Amexti hã. Tĩrtũm kapêr ã kagã htũm kot ja nê kapêr kãm hihtỳx kênã. Kapêr kot:

Kêr ka mẽ ixkapêr pix ma. Nê ixkutã pix mã mãn akõnkrã ho akrĩ nê inhmã inhmex o inhmex ã ijarênh o ri apa. Kêr ka mẽ ã amnhĩ nhĩpêx anhỹr o ri apa.

Anhỹr o kot harênh jakamã kot paj ri amã amex o amex ã ajarênh kêt nê Satanasti. Anê.

⁹ Nhũm pre ã Jejus amnhĩ nê kãm kapêr anê. Hãmri nhũm tee ri kuma nê hpãnhã ma krĩ pê Jerujarẽ hwỹr o mõi. Nê mẽ kot Tĩrtũm mã amnhĩ jarênh xà hã ixkre hprêk nhĩmõk wỹr ho api nê kỳxpê hatur xà hã ãm nhũm xa. Nhũm amnhĩ parpê kên rũnh nhĩkwỹ pumunh o xa. Hãmri nhũm Satanasti kãm:

—E apê Tĩrtũm Kra jakamã kwa ja rũm ahpar mã ajarĩ nê ma tẽ nê pikap tẽm. Koja Anhĩpêxã apumunh mex nê ka tanhmã amnhĩ to hkêt nê. ¹⁰⁻¹¹ Kapêr ã kagã htũm kot ja jarênh kot:

Tĩrtũm koja kapêr o wrỳk xwỳnh mã ajarẽ ka ajarĩ nê ahpar mã tẽ nhũm mẽ kỳx pẽ amỹ nhũm mẽmoj akã hyr kêt nê.

Ã kapêr ã kagã kamã ajarênh kot anhỹr jakamã e tokyx ajarĩ nê ma tẽn pikap ahto. Anê.

¹² Hãmri nhũm kuma nê kê axte amnhĩ tã kãm kapêr nê kãm:

—Tk. Kwa nà. Kot pa ri amar xà hkôt ã amnhĩ nhĩpêx anhỹr kêt nê. Koja Tĩrtũm tãm inhmã ijarĩ hã karõ pa rĩ mar xà hkôt ijarĩ no kot pa ri amar xà hkôt ijarĩ hkêt nê. Tĩrtũm kapêr ã kagã htũm kot ja jarênh kot:

Kêr ka mẽ amnhĩ krã hkôt amnhĩ tã ixkamã ajamak kaxyw inhĩxi jarênh kôt tanhmã amnhĩ nhĩpêx to hkêt nê.

Ã ja nê kapêr kot anhỹr jakamã ãm kwarĩ ho kwarĩ. Kot paj ri amar xà hkôt ã amnhĩ nhĩpêx anhỹr kêt nê. Tãm kot inhmã ijarĩ hã karõre hã. Anê.

¹³ Nhũm pre ã Jejus Satanasti mã kapêr anê hãmri nhũm tee ri mẽmoj piitã ho mar kaprỹ hãmri nê hkaga nê ma nhỹhỹm tẽ. Hãmri nê kot nhỹrmã axte hwỹr htẽm nê kot mẽmoj punuj o

mar kaxyw kormã amnhĩm hamãr o ri pa.

Jejus kot Tirtũm kapẽr o mẽ ahkre ho hkrax ã harẽnh

Matẽwre 4.12-17; Makre 4.14-15

¹⁴ Tã nhũm Jejus ma akupỹm Garirej wỳr mō. Nẽ Tirtũm Karō nhỹ hã àhpumunh tỳx nẽ hkwyjẽ mã kapẽr jarẽnh o ri pa. Nhũm mẽ kuma nẽ piitã pikaja kamã axpẽn mã tanhmã harẽnh to. ¹⁵ Na pre hte mẽ kot Tirtũm kapẽr o mẽ ahkre xà hã ixkre hwỳr agjẽ nẽ kamã mẽ ahkre ho hkrĩ. Nhũm mẽ piitã kuma nẽ kãm mar prãm nẽ. Hãmri nẽ axpẽn mã mex ã harẽnh o ri pa.

Najare kamã mẽ kot Jejus kaga hã mẽ harẽnh

Matẽwre 13.53-58; Makre 6.1-6; Juãw 1.11

¹⁶ Tã nhũm Jejus ma akupỹm krĩ kamã àptàr xàja wỳr ma mō. Najare hwỳr. Hãmri nẽ kamã pōj.

Nhũm Ijaew nhõ arĩgromnu pẽ sap kato nhũm Jejus ma mẽ hkõt Tirtũm kapẽr o mẽ ahkre xà hã ixkre hwỳr tẽ. Hãmri nẽ hwỳr axà nẽ mẽ kuri nhỹ. Hãmri nẽ kamã mẽ kãm Tirtũm kapẽr ã kagà htũm kamã harẽnh kaxyw kãnhmã xa ¹⁷ nhũm mẽ omu nẽ kãm ja gō. Finat Ijais pẽ Tirtũm nhỹ hã kapẽr xwỳnh kot Tirtũm kapẽr kwỳ hã kagàja nhũm mẽ kãm kugō. Hãmri nhũm kupy nẽ kamã kormã Tirtũm kot tanhmã mẽmoj jarẽnh to hõ japẽr o xa. Nẽ kãm kato hãmri nẽ mẽ kãm kamã harẽ. Nom amnhĩ tã kamã mẽ kãm harẽnh o xa nẽ mẽ kãm:

¹⁸ Na pre ra Tirtũm Karōja ixto ixàhpumunh tỳx nẽ mẽ kęp amrakati xwỳnhjẽ hwỳr inhmẽ pa ra mō. Ixte mẽ kãm mẽmoj mex jarẽnh o ixpa kaxyw. Nẽ Satanasti kot amnhĩ kõt mẽ unhwỳr xwỳnhjẽ hwỳr nhũm pre mãanẽn inhmẽ. Ixte mẽ nẽ Satanasti japõx o ixpa kaxyw. Nẽ mẽ kot hprĩ hã Tirtũm kapẽr mar kêt xwỳnhjẽ hwỳr nhũm pre mãanẽn inhmẽ. Ixprĩ hã ixte mẽ kãm kapẽr jarẽnh o ri mẽ hkõt ixpa kaxyw. Nẽ

mẽ kot amnhĩ tomnuj o mẽ pa xwỳnhjẽ hwỳr nhũm pre mãanẽn inhmẽ. Ixte mẽ nẽ mẽ kot amnhĩ tomnuj rẽn pa nhũm mẽ hamakêtkati nẽ àmnhĩx ri pa kaxyw. ã na pre Tirtũm jajẽ piitã hwỳr inhmẽn anẽ pa ra man mōn pōj.

¹⁹ Nẽ amgrã ja kęp Tirtũm kot mẽ ato mex xà hã amgrãja nhũm ixte mẽ amã harẽnh o ixpa kaxyw na pre inhmẽ pa mōn pōj. Anẽ.

²⁰ Nhũm pre ã Jejus Tirtũm kapẽr ã kagà htũm kamã mẽ kãm amnhĩ jarẽnh anẽ. Hãmri nẽ akupỹm mẽ kãm kagàja gō nẽ ho mẽ ahkre kaxyw akupỹm nhỹ nhũm mẽ piitã omunh pẽ mar o hkrĩ. ²¹ Hãmri nhũm mẽ kãm tanhmã amnhĩ jarẽnh to nẽ mẽ kãm:

—E ra Ijais kot ã ixkukamã ijarẽnh anhỹr xà hkõt na pa mẽ awỳr wrỳ nẽ mẽ anoo mã ã amnhĩ nhĩpẽx anhỹr o hkrax. Anẽ.

²² Hãmri nhũm mẽ amnhĩ jaer pẽ ã kot amnhĩ jarẽnh anhỹr ã kuma. Nẽ tee ri kuma nẽ axpẽn pumunh pẽ hamaxpẽr o hkrĩ. Jejus mẽ kurom àhpumunh tỳx nẽ kapẽr mex tã nhũm mẽ ãm kęp amnhĩ kwỳ pix ã hkamnhĩx kãm hihtỳx nẽ. Hãmri nẽ axpẽn mã:

—Tk. Kwa kęp Juje hkra pix kẽnã koja we ri ã amnhĩ jarẽnh anẽ. Anẽ.

²³ Hãmri nhũm amnhĩ tã mẽ kuma nẽ mẽ kãm:

—Nà na ka mẽ ixte amnhĩ jarẽnh ma nom ixkõt ajamaxpẽr kêt nẽ. Jakamã axpẽn mã ijarẽnh o: “Tk. Kęp mẽ pahkaprĩ xwỳnh ro nhỹx jar mẽ panhõ krĩ kamã aa mẽ pahte mẽmoj pumunh kêt kwỳ tanhmã mẽ pamã hipẽx to pu mẽ hã omu. Te ra kot krĩ pẽ Kapanau kamã mẽ kãm mẽmoj kwỳ ho anhỹrta pyræk. Pu mẽ omu nẽ hkõt pajamaxpẽr kurẽ kumrẽx.” Anhỹr o ri axpẽn mã ijarẽ. ²⁴ Koja nhãm krĩ hõ kamã mẽhõ kęp Tirtũm kapẽr jarẽnh xwỳnh ã amnhĩ jarẽ ka mẽ harẽnh ma nẽ amã ma hwỳr amrar nẽ mar prãm nẽ. No kêt jar mẽ panhõ krĩ kamã ixpẽ mẽ anhĩõ hã ã

amnhĩ jarēnh anē ka mẽ amā inhmar prām kêt nē.

²⁵ —Kwa mẽ inhma. Amnepēm kormã finat Eris htĩr ri na pre mẽ hã na wrỳk kêt ry rax nē. Jao hã amgrà axkrunēpxi nē hkôt mytwrỳ pē 6. Nhũm mẽ õ hkêt nē pa. Ra mẽ kēp mẽmoj grà pa nē hapēx nhũm mẽ kãm prām tỳx kumrēx nē pa. Nhũm mẽ kēp mẽ mjèn tyk xwỳnhjaja kãm prām xàj hirot o pa. ²⁶ Tã nom Tĩrtũm mẽ ho mex kaxyw mẽ hwỳr Eris mẽnh kêt nē. Erisja mẽ uràk nē kēp Ijaew tã nhũm Tĩrtũm kot mẽ ho ajuta kaxyw mẽ hwỳr mẽnh kêt nē. Mẽ kot amnhĩ kaxyw Tĩrtũm kôt hamaxpēr kêt jakamã nhũm mẽ hwỳr mẽnh kêt nē. Axtem Ijaew kêt xwỳnhjê hõ hwỳr na pre kumē. Nhãm Sitõ kamã krĩ pē Sarep kamã mjèn htyk xwỳnhhta wỳr. Tokyx kot tanhmã ho mex to kaxyw. Jakamã nhũm ma hwỳr mõ nē tanhmã kãm kapēr to nhũm kuma nē amnhĩ kaxyw Tĩrtũm kôt hamaxpēr kurē kumrēx.

²⁷ —Nē finat Eriasti haxwỳja. Eris pyrà nē kēp Tĩrtũm nhỹ hã kapēr o pa xwỳnh tã amnhĩ kwỳ pē Ijaew tanhmã mẽ ho ajuta hto hkêt nē. Na prem ohtõ nē hkà nhy nē hkro xàpēr o pa. Jao ra omnuj tỳx nē. Tã nhũm Tĩrtũm kot akupỹm mẽ ho mex kaxyw mẽ hwỳr Eriasti mẽnh kêt nē. Amnhĩ kaxyw mẽ kot hkôt hamaxpēere hã. Âm Sir nhõ xwỳnh Namãja pix na pre Tĩrtũm Eriasti mã anē nhũm akupỹm ho mex. Kēp Ijaew kêt tã nhũm akupỹm ho mex. Tã ja pyrà nē na pa âm mẽ kot amnhĩ kaxyw ixkôt hamaxpēr pix xwỳnhjê mã tanhmã amnhĩ nhĩpēx to ho ri ixpa. No mẽ ate amnhĩ kaxyw ixkôt ajamaxpēr kêt xwỳnhjê mã tanhmã ri amnhĩ nhĩpēx to hkêt nē. Anē.

Nhũm pre ã Jejus mẽ kãm amnhĩ jarēnh anē.

²⁸ Hãmri nhũm mẽ kuma nē kamã gryk tỳx nē axpèn mã hã amỳnē nē axpèn mã:

—Tk. Kwa pu mẽ ixkre nē kator nē ma o tē nē kupĩ ri. Anē.

²⁹ Hãmri nē kaxyw kànhmã kuhē hpa nē hwỳr hprõt nē unē. Mẽ kot ma o htēm nē hixêt præk jatur xà hã hkujaêk nhũm ahpar mã tēn htēm nē htyk kaxyw. Mẽ õ krĩa hixêt præk nhĩmõk ã na pre. Jakamã nhũm prem unē nē hatur xàta wỳr o tē. ³⁰ Tã nom nhũm tanhmã amnhĩ nhĩpēx to nē mẽ kēp akunok nē hpãnã nhãm ma tē nhũm mẽ tee ri hapēr nom nhỹri omunh kêt nē.

Jejus kot mēhõ nē mẽkarõmnuti kator ã harēnh
Makre 1.21-28

³¹ Tã nhũm Jejus ma akupỹm Garirej kamã krĩ pē Kapanau hwỳr mõ. Nhũm mẽ õ arĩgromnu pē sap kato nhũm ma mẽ kot Tĩrtũm kapēr o mẽ ahkre xà hã ixkre hwỳr tē nē mẽ ahkre ho nhỹ. ³² Hãmri nhũm mẽ kot mar o hkrĩ xwỳnhjaja kuma nē kãm mar prām nē. Nē axpèn mã:

—Hêxta waa nē. Âm hãmri na ã mẽ pamã kapēr anē. Ahpumunh tỳx xà hkôt na hte âm hãmri mẽ pamã awjarē. Anē.

³³ Nhũm mẽhõ myja mẽ ãhkõ hã haxwỳja mar o nhỹ. Mẽkarõmnuti na pre ra hwỳr axà nhũm ã hã tanhmã amnhĩ tomnuj to ho pa. Hãmri nē mẽ ãhkõ hã Jejus mar o nhỹ nē ra àmra kamã tanhmã kãm kapēr to. Nom nhũm tãm kãm kapēr kêt âm kamã mẽkarõmnutija kãm kapēr. ³⁴ Nē kãm:

—Pa? Jejus pē Najare nhõ xwỳnh? Nà ate mẽ ixto ajapēx par kaxyw na ka mẽ ixwỳr mõ. Ra ixte apumunh mex kēnã. Apē Tĩrtũm kot mẽ ixwỳr amēnh xwỳnh maatita na ka. Jakamã kwa tanhmã kot kaj mẽ ixto? Mo kaxyw na ka pre mẽ ixwỳr mõ? Anē.

³⁵ Hãmri nhũm kuma nē mẽkarõmnuti kot kãm ã kapēr anhyr ã omunh kurē kumrēx. Jakamã kutã kãm kapēr nē kãm:

—Tk. Kwa anhĩkrē nē kēp akato. Anē.

Hãmri nhũm kuma nē myta o pika kura nē kēp kato nē ma tē. Âm ho pika kuranh pix nhũm nõ. Hãmri nē akupỹm kànhmã nhỹ nē akupỹm mex.

³⁶ Hāmri nhũm mẽ piitã omu nẽ kamã no puma nẽ. Hāmri nẽ axpẽn mã:

–Kokỹy. Na hte Jejus amnhĩ krã hkõt àhpumunh tỳx xà hkõt mẽkarõmnuti mã kapër nẽ mẽ hano nhũm htem kuma nẽ mẽ kệp hapôx kurê kumrêx. Anẽ.

³⁷ Hāmri nhũm mẽ mẽõ pika kamã piitã ri axpẽn mã harênh o pa.

Jejus kot Simãw Pêtre xupãnhgêx o mex ã harênh

Matêwre 8.14-15; Makre 1.29-31

³⁸ Tã nhũm Jejus Tĩrtũm kapër o mẽ ahkre xàja rùm kato nẽ ma Simãw Pêtre nhõrkwỹ hwỳr tẽ. Nẽ mẽ hwỳr axà nhũm Simãw Pêtre omu nẽ kãm upãnhgêx tanhmã kute hã harẽ nẽ kãm:

–Kwa Pahihti. Tẽ nẽ inhmã ix-upãnhgêx pumu. Na hkà kagro htỳx nẽ amnhĩ to àpêr o nõ. Kwa tẽn inhmã omu. Anẽ.

Hāmri nhũm kãm:

–Tõe. Nà kot paj amã omu. Anẽ.

³⁹ Hāmri nẽ hwỳr tẽn kuri xa nẽ kãm:

–Pa? E kwa akà hakry. Anẽ.

Hāmri nhũm kuma nẽ hkà hakry nẽ akupỹm hihtỳx kurê kumrêx. Hāmri nẽ kànhmã nhỹ nẽ mẽ kãm mẽõ hã àpênh o ri mra.

Jejus kot mẽ ho ohtô nẽ mẽ ho mex ã harênh

Matêwre 8.16-17; Makre 1.32-34

⁴⁰ Tã nhũm ra amỹkry htỳx mẽ nhũm mẽ Jejus wỳr ahpỹnhã ri mẽ à xwỳnhjê ho mra. Nhũm amnhĩ wỳr mẽ omu hāmri nẽ mẽ piitã ri mẽ hã ãhkra jaxwỳ nẽ akupỹm mẽ ho mex pa.

⁴¹ Nhũm ra mẽkarõmnuti mẽ hkwỳjê hwỳr agjê nhũm mẽ kurũm mẽ hano nhũm mẽ tee ri amnhĩ tã omu nẽ mẽ kệp hapôx kurê kumrêx. Hāmri nẽ mẽ kệp hapôx kaxyw nẽ àmra kamã kãm kapër nẽ kãm:

–Kwa tanhmã kot pa wem amnhĩ nẽ ato? Hêxta waa nẽ. Apê Tĩrtũm Kra hã axàhpumunh tỳx kênã.

Anhỹr o kãm kapër. ãm hāmri na prem ã harênh anẽ. Kệp Tĩrtũm kot mẽ pakaxyw ãm xwỳnh kênã. No nhũm Ijaew nhõ pahijaja kot

mẽ kapër mar nẽ kệp mẽkarõmnuti hkwỳ hã hkamnhĩx pymaj nhũm Jejus amnhĩ nẽ mẽ kãm kapër nẽ mẽ kãm:

–Kwa mẽ ri ã ijarênh anhỹr kêt nẽ.

Anhỹr o mẽ kãm kapër hāmri nẽ mẽ hano nhũm mẽ hapôj nẽ ma mra.

Mẽmo kaxyw Tĩrtũm kot mẽ pahwỳr Jejus mẽnh ã harênh

Makre 1.35-39

⁴² Tã nhũm apkati nẽ myt kator grire nhũm Jejus kot Tĩrtũm mã amnhĩ jarênh kaxyw kànhmã nhỹ nẽ kato nẽ ma nhỹhỹm kapôt mã tẽ. Hāmri nhũm krĩ nhõ xwỳnhjaja hkrã hapôj nẽ tee ri hapêr nẽ ma hkõt hpri jakop o mō. Nẽ nhỹri hwỳr kato nẽ omu hāmri nẽ ma nhỹhỹm mōr nẽ kurê nẽ kãm:

–Kwa Jejus. Kêr ka tokyx ma nhỹhỹm amōr kêt nẽ. Kritpêm mẽ ixkõt axkamẽ măn. Anẽ.

⁴³ Hāmri nhũm mẽ kuma nẽ amnhĩ tã mẽ kãm:

–Nà kot paj kritpêm mẽ akõt ix-pikamênh kêt nẽ. Kot paj ma krĩ piitã hkõt ri Tĩrtũm kapër o mẽ ahkre ho ri mẽ hkõt ixpa. Tĩrtũm kot tanhmã mẽ ho hkra hto hã harênhja kot paj mẽ hkõt ri mẽ kãm harênh o ri ixpa. Ja kaxyw na pre Tĩrtũm mẽ awỳr inhmẽ. Anẽ.

⁴⁴ Nhũm pre ã mẽ kãm amnhĩ jarênh anẽ. Hāmri nẽ mẽ kệp kato nẽ ma Ijaew nhõ pika piitã hkõt Tĩrtũm kapër o mẽ ahkre ho ri pa. Ijaew nhõ Tĩrtũm kapër o mẽ ahkre xà hã ixkre kamã mẽ piitã ho mẽ ahkre ho ri pa.

5

Jejus kot amnhĩ kôt mẽ hkwỳjê hwỳr ã harênh

Matêwre 4.18-22; Makre 1.16-20

¹ Tã nhũm Jejus ma gô rax pê Jenêjare hwỳr mō. Hāmri nẽ hwỳr pôj nẽ gô mỳri Tĩrtũm kapër o mẽ ahkre ho xa nhũm mẽ ohtô nẽ pu hã mar o kuhê. Nẽ kot hpri hã mar nẽ hkõt omunh kaxyw hã axpẽn nhĩgãnh o kuhê. ² Hāmri nhũm tee ri amnhĩ tã mẽ omu nẽ amnhĩ pu hã hakêx nẽ rĩt nẽ gôx kãm pàr kaprỳ hamêxkrut nẽ

jêlja wa omu. Nhũm ò dôn wa gôx kãm kryhti kuhôn h o xa. Nhũm pàr hamê hkapyr nê ajêl nhũm Jejus omu. ³ Hãmri nê hwÿr tẽ nê hõm axà nê ò dôn pẽ Simãwja mã anê nhũm hkôt axà nê kii mẽ kêp pàrja amÿm kunhõ nhũm ajêl. Hãmri nhũm pàr kre rũm amÿm mẽ ahkre ho nhÿ nhũm mẽ piitã omu nê mar mex o kuhê.

⁴ Tã nhũm mẽ ahkre hpa nê Simãw mã kãm:

—E gô xupÿm wÿr anhõ pàr o axkamẽ nê axte anhõ kryhti mẽ nê ho amnhĩm tep kwÿmnê. Anê.

⁵ Hãmri nhũm tee ri kuma nê kãm:
—Kwa na pa mẽ ra kamàt kãm tee rên h o apkati nê ho hõmnên h kêt tã ka ri inhmã anê. Nom kot paj amar xà hkôt kop kumẽ. Anê.

⁶ Hãmri nê upÿm wÿr pàr o axkamẽ nê htõ Andre mẽ wa axte kryhti mẽ. Nê ãm mên h tipxi htã ho tep pynên h rax kumrêx. Jakamã nhũm kryhtija ra pikaxôn h kaxyw. ⁷ Hãmri nhũm wa tee ri ho anê nê amnhĩ wÿr pàr ò ho mrrar xwÿnhta wa kãm akir. Jepetew kra Juãw mẽ Xiakreja wa nhũm wa amnhĩ wÿr wa kãm akir nhũm wa hwÿr pàr ò ho tẽ hãmri nê mẽ kryhti hã hije nê pàr wÿr ho api. Hãmri nê pãrta hamẽ tep o ho nÿt pa nê hamẽ ho hipu mex nê. Jao nhÿx gôn h mã wa axà. ⁸⁻¹⁰ Hãmri nhũm mẽ amnhĩ jaêr pẽ tep xohtõ raxta pumu nê kamã no puma nê. Hãmri nhũm Simãwja Jejus kutã hkõn krã ho tẽm nê hipõ nê nhÿ nê hã hpijaàm kamã kãm kapêr nê kãm:

—Kwa Pahihti. Kii tamũ axkamẽ. Akĩnhã ixte amnhĩ tomnuj tÿx xwÿn h na pa. Anê.

Hãmri nhũm kuma nê ãm kuma nê kãm:

—Kwa nã tee ri amnhĩ kukamã ajamaxpêr kêt nê. Kot kaj jarãhã hpãnhã tãm amnhĩ nhĩpêx o apa. Na ka ra tep pynên h rũn h o apa. Tã kot kaj ja kaga nê hpãnhã ma ri mẽ hkôt Tĩrtũm kapêr o mẽ ahkre ho ri apa. Kojã mẽ ohtõ nê ama nê Tĩrtũm kôt amnhĩ xunhwÿ nê hkôt amnhĩ nhĩpêx o pa. Jakamã kot kaj te ate tep pynên h

rũn h nê Tĩrtũm mã òr pyrãk o amnhĩ nhĩpêx o apa. Anê.

Nhũm pre ã Jejus Simãw mã kapêr anê. ¹¹ Hãmri nhũm mẽ gô jakãx ã pàr janhõr tÿx nê kamã hikukrêx piitã hkaga hpa nê ma Jejus kôt pa ho pa.

Jejus kot hkà nhy kro tÿx xwÿn h o mex ã harên h

Matêwre 8.1-4; Makre 1.40-45

¹² Tã nhũm Jejus ma krĩ hõ hwÿr mõ. Hãmri nhũm mên hõ my hkà nhy hkro htÿx xwÿnhja omu nê hwÿr tẽ nê hã hpijaàm kaxyw kutã hkõnkrã ho nhÿ nê kãm:

—Pa Pahihti. E ot pa awÿr amnhĩ to tẽ. Kwa akupÿm ate mẽ ixto mex kaxyw axãhpumun h tÿx jakamã kot ka akupÿm amã ixto mex prãm nê mãmri akupÿm ixto mex. Anê.

¹³ Hãmri nhũm kuma nê hkà punuti hã ìhkra xi. Amnhĩ kamã kahak kêt nê hã ìhkra xi nê kãm:

—Nã kot paj ato mex. E akupÿm akã mex kurê kumrêx.

Anhÿrja kôt hãmri nhũm hkàja akupÿm mex pa. ¹⁴ Hãmri nhũm Jejus kãm:

—E kêr ka amnhĩ tã akwÿjê mã tanhmã ijarên h to hkêt rãhã ma patre hwÿr tẽ kê akupÿm akã mex ã apumu. Hãmri ka amnepêm Mojes kot mẽ ate akupÿm amex ã Tĩrtũm mã tanhmã amnhĩ nhĩpêx to hã karõta ka kãm ho anê. Kê mẽ mẽ piitã akupÿm akã mex ã apumu. Anê.

Hãmri nhũm kuma nê kãm:

—Tõe. Nã kot paj anê. Anê.

Hãmri nê ma hwÿr htẽm kurê kumrêx.

¹⁵ Hãmri nhũm mẽ piitã axpên mã Jejus jarên h o ri hprõt nhũm mẽ kot kapêr mar kaxyw ma hwÿr mra. Nê mẽ ã xwÿnhjaja nhũm kot mẽ ho mex kaxyw nhũm mẽ hwÿr amnhĩ to mra. ¹⁶ Jakamã nhũm pre hte Jejus tõhã mẽ kêp hapõj nê ahte ma kapõt ã Tĩrtũm mã amnhĩ jarên h kaxyw mra. Nê kãm amnhĩ jarên h pa hãmri nê ma akupÿm mẽ hwÿr mra.

Jejus kot ï kamã htyk xwÿnh o mex ã harënh

Matêwre 9.1-8; Makre 2.1-12; Juãw 10.37-38

¹⁷ Tã nhũm Jejus ma Tirtũm kapër o Ijaew jahkre ho pa. Jakamã nhÿri mēhõ nhõrkwy kamã ho mē ahkre ho xa nhũm Parijew nhõ xwÿnhjê mē Tirtũm kapër tũm o mē ahkre ho mē pa xwÿnhjaja kot mar kaxyw ma hwÿr mra. Na pre ra Garirej rũm mē hkwÿjaja ma hwÿr mra. Nē pika pē Jutej rũm mē hkwÿ haxwÿja ma hwÿr mra. Nē krï pē Jerujarē rũm. ã na prem ohtõ nē krï piitã kurũm kot mar kaxyw hwÿr akuprõ nhũm mē ahkre anē. Nē Tirtũm kot ho àhpumunh tÿx jakamã nhũm ÿ hã akupÿm mē à xwÿnhjê ho mex. ¹⁸ Hãmri nhũm hkwÿjaja ï kamã htyk xwÿnh mÿ nē Jejus wÿr o tē. Nõr xà kamã nõr rãhã nhũm mē hã hije nē hwÿr o tē. Hãmri nē tee ri kot hwÿr ho àr kaxyw ri mē hkupu ho pa. ¹⁹ Nom nhũm mē ra ixkre ho nyt rax jakamã nhũm mē tee ri amnhÿ kukamã ho ukapi ho ri pa. Hãmri nē ra hamaxpër nē ixkre nhĩmõk po hwÿr ho api nē ixkre nhĩmõk kwÿ grã nē hkõt ï kamã htyk xwÿnhhta jaxã. Nõr xà kamã nõr rãhã Jejus wÿr haxã nē mē hipõk ri ho wrÿ nē kutã kuxi nhũm nõ. ²⁰ Hãmri nhũm Jejus amnhÿ tã mē kot kaxyw kãm hamaxpër tÿx ã mē omunh mex nē. Hãmri nē ï kamã htyk xwÿnhhta mã kapër nē kãm:

—Pa? E na pa ra anē tanhmã ate amnhÿ tomnuj to ho apaja o ijapêx pa. Kot paj axte kãm ijamaxpër kêt nē. Anē.

²¹ Hãmri nhũm Parijew nhõ xwÿnhjê mē Tirtũm kapër tũm o mē ahkre ho mē pa xwÿnhjaja tee ri kot ã kãm kapër anhÿrja ã kuma nē axpën mã:

—Tk. Kwa kēp Tirtũm kêt tã te ri kot amnhÿ nhĩpêx pyrãk o ri mē nē mē kot amnhÿ tomnuj o hapêx ã amnhÿ jarënh o kuhê. Tirtũm pix na kot mē nē mē kot amnhÿ tomnuj o hapêx xwÿnh kênã. Anē.

²² Nhũm mē ã axpën mã Jejus jarënh anē nhũm amnhÿ tã mē kuma nē mē hamaxpër kõt mē omunh mex nē. Jakamã mē kãm:

—Kwa mē ã ajamaxpër anhÿr kêt nē. ²³ Ixte mē nē mē kot amnhÿ tomnuj o ijapêx par ã amnhÿ jarënh tã mē ate ja kõt ixpumunh kêt jakamã na ka mē ixkõt ajamaxpër kêt nē. Nom kot paj mē anoo mã akupÿm ï kamã htyk xwÿnhhta o mex ka mē apiitã ja hã ixpumu hãmri nē ixkõt ajamaxpër kurê kumrêx. ²⁴ Ixpê Tirtũm kot mē awÿr inhmēnh xwÿnhhta na pa. Ixte mē anē mē ate amnhÿ tomnuj rēnh kaxyw na pre mē awÿr inhmē pa mē awÿr wrÿ. Tã mē ate ja kõt ixpumunh kaxyw kot paj mē anoo mã myja o mex. Anē.

Hãmri nē hpãnhã ï kamã htyk xwÿnhhta mã kapër nē kãm:

—E kãnhmã xa nē anõr xà py nē ma akupÿm anhõrkwy hwÿr tē. Anē.

²⁵ Nhũm kãnhmã ãm kurê kumrêx. Hãmri nē amnhÿ pumu nē hkĩnh tÿx nē nõr xà py nē mē noo mã kato nē akupÿm õrkwÿ hwÿr ma Tirtũm mã mex o mex ã harënh o tē. ²⁶ Hãmri nhũm mē amnhÿ jaêr pē omu. Nē no hapõx kaxyw hkõt omunh o kuhê nē kamã no puma nē. Nē tee ri omu hãmri nē axpën mã:

—Kokÿÿ. Aa mē pahte ã mēhõ kot amnhÿ nhĩpêx anhÿr ã omunh kêt tã na pu mē jarãhã ja pumu. Anē.

Hãmri nē Tirtũm mã mex o mex ã harënh o kuhê.

Jejus kot amnhÿ kõt Rewi hwÿr ã harënh

Matêwre 9.9-13; Makre 2.15-17; Rukre 15.1-2

²⁷ Tã nhũm Jejus ma hkõt mē pa ho mē pa xwÿnhjê mērohã ma nhÿhÿm mõ. Hãmri nē nhÿri Rewi pumu. Rewi nhĩxi hõ pē na Matêwre. Rõm kãm mē õ pahihtĩ mã amnhÿ kwÿjê pē kãxpore hkwÿ jamÿnh xwÿnh na pre. Jakamã nhũm ujamÿnh xã hã ixkre kamã mē kēp hkwÿ jamÿnh o nhÿ nhũm Jejus mē hkõt mē pa o mē pa xwÿnhjaja hãnh mra. Hãmri nhũm Jejus àpēnh ã omu nē amnhÿ kõt kuwÿ nē kãm:

—Pa? E kwa axàpênhta kaga nê hpânã amnê mẽ ixkôt măn tẽ. Nê ixkôt măn ri apa ho apa. Anê.

²⁸ Hãmri nhũm kuma nê àpênh kaga hpa nê ma hkôt mō nê hkôt pa ho pa.

²⁹ Hãmri nhũm mẽmo arĩgro hã nhũm Rewi nhõ mẽ apkur xà hã mẽo rax nê. Jakamã nhũm amnhĩ nhõrkwỹ hwỳr hkràmnhwỳjaja nê Jejus mẽ hkôt mẽ pa ho mẽ pa xwỳnhjê hwỳ. Mẽ kot kutã apkur kaxyw nhũm amnhĩ kôt mẽ kuwỳ nhũm mẽ ma hkôt mra nê òrkwỹ hwỳr agjê nê apkur o hkrĩ. Nê mẽ kêp Rôm nhõ pahĩ mã mẽ kêp kàxpore hkwy jamỳnh xwỳnh kwỳjaja nê mẽ ohtô nê hwỳr akuprõ nê axpên kutã apkur o hkrĩ. ³⁰ Hãmri nhũm Parijew nhõ xwỳnhjê mẽ Tĩrtũm kapêr tũm o mẽ ahkre ho mẽ pa xwỳnh kwỳjaja mra nê mẽ apkur ã mẽ omu nê tee ri mẽ hkaêx ã Jejus pumu hãmri nê Jejus kôt mẽ pa ho mẽ pa xwỳnhjê hwỳr agjê nê hã mẽ kãm akir nê mẽ kãm:

—Kwa mẽ kot amnhĩ tomnuj ho mẽ pa xwỳnhjê kutã mẽ apkur kêt tã ka mẽ apytãr xwỳnhja mẽ apimràatã axtem nê mẽ kutã axàpkur o akrĩ. Kwa mẽ ate amnhĩ to mex ronhỹx ka mẽ kutã axàpkur kêt nê. Anê.

³¹ Hãmri nhũm Jejus amnhĩ tã mẽ kapêr ã mẽ kuma nê mẽ kãm:

—Tk. Nà ixte tãm mẽ unhwỳr kaxyw na pa mẽ kutã ixàpkur o nhỹ. Xà na hte tõtôja mẽ mex xwỳnhjê hwỳr mra nê mẽ hkane? Nà ãm mẽ à xwỳnhjê pix wỳr na htem mra. Ra mẽ ate ja pumunh mex kênã. Ja pyrã nê na pa pre mẽ kot amnhĩ to mex xwỳnhjê hwỳr ixwryk kêt nê. Mẽ kot amnhĩ tomnuj xwỳnhjê pix wỳr na pa pre wrỳ. Ixte tãm mẽ unhwỳr kaxyw na pa pre mẽ hwỳr wrỳ nê ã jajê kutã ixàpkur o inhỹr anê. ³² ãm mẽ kot amnhĩ tomnuj xwỳnhjê hwỳr na pa pre wrỳ nê mẽ kamã ixukaprĩ ho ri ixpa. Mẽ kot amnhĩ tomnuj mã urer nê hpânã tãm amnhĩ nhĩpêx o pa kaxyw na pa pre mẽ hwỳr wrỳ. Tã ka mẽ atỳx ã ri mẽ ixto akapêr anê. Anê.

Mẽ hpãmjaja kot amnhĩ nhĩpêx gryk ã Jejus kaga hã mẽ harênh

Matêwre 9.14-17; Makre 2.18-22

³³ Tã nhũm Ijaew kwỳjaja Jejus wỳr mra nê kãm:

—Pa? E ot pa mẽ awỳr mra. Kwa aprĩ hã mẽ inhmã mẽmoj jarê. Na hte Parijew nhõ xwỳnhjê mẽ Juãw kôt mẽ pa xwỳnhjaja tōhã Tĩrtũm mã amnhĩ jarênh kaxyw nê apkur kêt rãhã kãm amnhĩ jarê. No akôt mẽ pa ho mẽ pa xwỳnhjaja na htem àmnhĩx apkur o pa kamã kãm amnhĩ jarê. Kwa mo na htem mẽ urak nê tōhã apkur kêt ri kãm amnhĩ jarênh hkêt nê? Anê.

³⁴ Hãmri nhũm mẽ kuma nê mẽ kãm:

—Tk. Nà mo kaxyw koja mẽ apkur kêt rãhã kãm amnhĩ jarê? Mẽ hkaprĩ hkêt kênã. Mẽ kot ixkôt pa ho pa hã amnhĩ pumunh jakamã hkĩnh nê pa. Kormã ixte mẽ kamã ixpa kênã kot kêt mẽ Tĩrtũm mã amnhĩ jarênh kaxyw nê apkur kêt rãhã kãm amnhĩ jarê. Xà na htem hkràmnhwỳ hã hkĩnh kaxyw hã akuprõ nê hkaprĩ nê apkur kêt nê mỳr o hkrĩ? Na htem hã akuprõ nê hkĩnh nê hã apkur rũnh nê. Ja pyrã nê na hte ixkôt mẽ pa ho mẽ pa xwỳnhjaja ixkôt kormã àmnhĩx ri hkĩnh nê apkati mẽ apkur o pa. ³⁵ Nom koja mẽ kãm ixkurê xwỳnhjaja nhỹrmã tanhmã ixto hãmri nhũm mẽ rĩ kormã ixtã hkaprĩ htỳx kãm apkur kêt ri tanhmã amnhĩ nhĩpêx to. Anê.

³⁶ Nhũm pre ã Jejus mẽ kãm hkôt ri mẽ pa ho mẽ pa xwỳnhjê jarênh anê hãmri nê mẽ kãm:

—Nà mẽ kot amnhĩ tomnuj xwỳnhjaja mẽ kot amnhĩ nhĩpêx tũm o amnhĩ pyrãk jakamã na htem mẽ kot amnhĩ nhĩpêx nyw kaga. ³⁷⁻³⁹ Ixte amnhĩ nhĩpêx nywja te kot mẽ ate amnhĩ nhĩpêx tũm pyrãk kêt jakamã ka htem inhma nê ãm inhma. Kwa mẽ ixkapêr ma nê mẽ ate amnhĩ nhĩpêx tũm gryk ã ixkaga hkêt nê. Anê.

6

Jejus kêp arĩgromnu hpãm ã harênh
Matêwre 12.1-8; Makre 2.23-28

¹ Tã nhũm Ijaew nhõ arĩgromnu pẽ sapja axte kato. Hãmri nhũm Jejus mẽ hkõt ri mẽ pa ho mẽ pa xwỳnhjê mẽ ma mẽ hpur kõt ri nhỹhỹm ri pa. Hãmri nhũm hkõt mẽ pa ho mẽ pa xwỳnhjaja ra kãm prãm nẽ mra hãmri nẽ prãm xàj mẽmo hy te kot harõj pyræk xwỳnhhta kwỳ rê nẽ kugrà nẽ ma Jejus kõt hkanhar o mõi. Ijaew kot amnhĩ nhĩpêx xà hkõt. ² Hãmri nhũm Parijew nhõ xwỳnhjaja kãm mẽmoj tã Jejus o kapêr prãm jakamã ã mẽ kot amnhĩ nhĩpêx anhỹr ã mẽ omu nẽ mẽ hã Jejus kukjêr kurê kumrêx nẽ kãm:

—Kwa Tĩrtũm kapêr tũm kot mẽ panhõ arĩgromnu hã mẽ pahte mẽ pahpur kãm mẽmoj nhĩkênh nẽ mẽ pahkurê htã nhũm ri akõt mẽ pa ho mẽ pa xwỳnhjaja axtem nẽ mẽmo hyta kwỳ rê nẽ akõt hkanhar o mõi. Kwa mẽ kãm anẽ kê mẽ ã amnhĩ nhĩpêx anhỹr kêt nẽ. Na htem arĩgromnu hã ã amnhĩ nhĩpêx anhỹr kêt nẽ. Anẽ.

³⁻⁴ Hãmri nhũm Jejus mẽ kuma nẽ hpri hã mẽ kãm Tĩrtũm kapêr tũm jarẽ nẽ mẽ kãm:

—Kwa xà na ka mẽ Tĩrtũm kapêr ã kagà htũm kamã pahi Tawi kot tanhmã amnhĩ nhĩpêx tota kamã harênh nẽ mar kêt nẽ? Na pre Tawija hkõt ri mẽ pa xwỳnhjê mẽ nhũm mẽ prãm xàj Tĩrtũm mã amnhĩ jarênh xà hã ixkre wỳr agjê nhũm patre maatija mẽ kãm prãm tỳx ã mẽ omu nẽ mẽ kãm mẽmoj gõi. Mẽ kot Tĩrtũm noo mã pãwti jaxwỳr xwỳnhhta nhũm mẽ kãm kugõ nhũm mẽ kuku. Tĩrtũm kapêr ã kagà htũm kot ja nẽ mẽ kurê htã nhũm mẽ kãm prãm tỳx ã mẽ omu nẽ mẽ kamã ukapri xàj mẽ kãm kugõ. Patre pix kot ja kur kaxyw tã nhũm mẽ kãm kugõ nhũm mẽ kuku. Tã nhũm Tĩrtũm ja hã mẽ omu nhũm ja kęp omnuj kêt nẽ. Kot mẽ kamã ukapri nẽ mẽ kãm õr nhũm mẽ hã omu nhũm ja kãm mex nẽ. ⁵ Tã pa na pre Tĩrtũm mẽ akaxyw ixãm nẽ mẽ awỳr inhmênh jakamã papxipix na pa hte arĩgromnu hã tanhmã mẽ kot amnhĩ nhĩpêx to hã mẽ kãm karõ ho ri ixpa. Ixpê arĩgromnu hpãm na pa. Anẽ.

Jejus kot ìhkra grà xwỳnh o mex ã harênh

Matêwre 12.9-14; Makre 3.1-6

⁶ Tã nhũm Ijaew nhõ arĩgromnu pẽ sapja axte kato. Hãmri nhũm Jejus Tĩrtũm kapêr o mẽ ahkre xà hã ixkre hwỳr tẽ nẽ axà nẽ Tĩrtũm kapêr o mẽ ahkre ho nhỹ. Nhũm mẽhõ myja upøk rũm ìhkra grà xwỳnhja mẽ ìhkõ hã mar o nhỹ. ⁷ Nhũm Parijew nhõ xwỳnhjê mẽ Tĩrtũm kapêr tũm o mẽ ahkre ho mẽ pa xwỳnhjaja mẽ kãm mẽ hkrãhtũmjê mã Jejus o kapêr prãm xàj htãnopxar o kuhê. Nẽ ìhkra grà xwỳnhhta pumu nẽ hã axpẽn mã:

—Kwa pu mẽ jar pakuhê nẽ Jejus tanhmã kot amnhĩ nhĩpêx to hã omu. Xà koja jarãhã mũjti ho mex nà? Jarãhã arĩgromnu kênã kot kêt kãm ìhkra hõ mex. Koja anẽ nẽ Tĩrtũm kapêr kwỳm ri amnhĩ nhĩpêx. E pu mẽ kop pakuhê nẽ hã omu. Anẽ.

⁸ Nhũm Jejus ra kot mẽ hamaxpêr kõt mẽ omunh mex jakamã amnhĩ wỳr myta mã hpa ho apê nẽ kãm:

—Pa? E kànhmã xa nẽ amnẽ ixwỳr tẽ. Anẽ.

Hãmri nhũm kuma nẽ kànhmã xa nẽ hwỳr tẽ. ⁹ Hãmri nhũm Jejus amnhĩ pu hã ri mẽ ho hakêx nẽ mẽ kot mar o hkrĩ xwỳnhjê pumu nẽ mẽ kãm:

—E mẽ inhmã mẽmoj jarẽ. Tanhmã na htem arĩgromnu hã axpẽn nhĩpêx to ho pa wehe? Xà kot ka arĩgromnu hã axà htỳx nẽ nõ hãmri nẽ amnhĩ mex prãm xàj ma mẽhõ hwỳr amnhĩ to tẽ. Hãmri nhũm ãm apumu nẽ apkatim arĩgro mex jamãr pẽ akane hkêt ka ty nhũm ja amã mex nẽ nà? Rỳ nhũm tanhmã atomnuj to nẽ akupỹm amnhĩ nẽ ajano nhũm ja amã mex nẽ nà? Nà koja ã anhĩpêx anẽ nhũm ja amã mex kêt nẽ. Na ka htem ã amnhĩ nhĩpêx anhỹr o apa hkêt nẽ. E mẽ inhmã mẽmoj jarẽ. Tanhmã na pre finat Mojesja Tĩrtũm nhỹ hã mẽ pamã arĩgromnu hã mẽ pahte axpẽn nhĩpêx ã karõ hto? Xà kot puj mẽ axpẽn kãm paxukapri ho papa nà? Kot puj mẽ pamã axpẽn kurê ho papa? Xà kot puj mẽ hã mẽmoj punuj pẽ axpẽn pytà nà? Xà kot puj mẽ hã axpẽn pytàr pymaj

arĩgro mex jamã? E mẽ atõ inhmã ja jarẽ. Anẽ.

Nhũm pre ã mẽ hkukjêr anẽ. ¹⁰ Mẽ hamaxpêr ã mẽ omunh mex pê ã mẽ hkukjêr anhÿr o xa. Nom nhũm arĩ mẽhõ tanhmã kutã kãm nẽ hkêt nẽ. Âm akryk mar pê omunh o hkrĩ. Mẽ kot tanhmã kãm nẽ nhũm ta pãnhã tanhmã kot mẽ kãm nẽ pymaj nhũm mẽ tee ri kãm tanhmã nẽ hprãm nom akryk mar o hkrĩ. Hãmri nhũm Jejus tee ri mẽ omu hãmri nẽ myta mã kãm:

–Tk. Mẽ kot tanhmã inhmã kapêr tore hã. E anhĩhkra katåt. Anẽ.

Hãmri nhũm ãhkra katåt nẽ akupÿm mex kurê kumrẽx. ¹¹ Hãmri nhũm mẽ kãm Jejus kurê xwÿnhjaja tee ri ja hã omu nẽ kamã gryk tÿx nẽ. Arĩgromnu hã kot ho mex jakamã nhũm mẽ kamã gryk tÿx nẽ. Nẽ hã axpên kukjêr o kuhê nẽ axpên mã:

–Kwa ã kot amnhĩ nhĩpêx anhÿr mÿrapê tanhmã kot puj wem ho? Na ã kapêr anhÿrja o tanhmã mẽ pahto kapêr punuj to. Te mẽ papamjaja mẽ pahte hkĩnhã pahkwÿjê kamã paxukaprĩ hkêt pyrãk ã mẽ pajarẽ. Kojã mẽ pahkwÿjaja kuma hãmri nẽ mẽ pahte amnhĩ nhĩpêx kaga nẽ amnhĩ kaxyw ãm hkôt pix mã hamaxpêr o pa. Jakamã kwa tanhmã kot puj mẽ ja nê ho? Anẽ.

Jejus kot amnhĩ kaxyw mẽ ho 12 nẽ mẽ rênh ã harênh

Matêwre 10.1-4; Makre 3.13-19

¹² Tã nhũm arĩgro hõ hã nhũm Jejus ma kot Tirtũm mã amnhĩ jarênh kaxyw ma hixêt prêk wÿr tẽ nẽ hã api. Hãmri nẽ kãm amnhĩ jarênh o apkati.

¹³ Tã nhũm kwÿhtã nhũm amnhĩ kôt kot ri mẽ o pa xwÿnhjê hwÿ nẽ amnhĩ kaxyw mẽ ho 12 nẽ mẽ kurê. Nẽ mẽ kãm:

–E mẽ kajaja kot paj ma mẽ pahkwÿjê hwÿr mẽ arẽ ka mẽ ma inhÿ hã Tirtũm kapêr o mẽ ahkre ho ri mẽ hkôt apa. Kot kaj mẽ apê inhÿ hã mẽ ahkre ho apa xwÿnh. Anẽ.

¹⁴ Kot amnhĩ kaxyw mẽ rênh xwÿnhjê nhĩxi na jajaja:

Simãw kumrẽx na pre kuta nẽ axte hã hixi mẽ nhũm kêp Pêtre.

Nẽ Simãw Pêtre hkôt htõ Andreja ta.

Nẽ hkôt Xiakre hta.

Nẽ hkôt Juãw ta.

Nẽ hkôt Firiptija ta.

Nẽ hkôt Patoromew ta.

¹⁵ Nẽ hkôt Matêwreja ta.

Nẽ hkôt Tomasja ta.

Nẽ hkôt Apew kra axtem Xiakre hõja ta.

Nẽ hkôt Simãw Jeroxja ta.

¹⁶ Nẽ hkôt Xiakre hõ hkra Jutja ta.

Nẽ hkôt Jut Kariot ta.

Jut Kariotja na pre kormã kot mẽ kãm Jejus kurê xwÿnhjê nhĩhkram õr mã. Nhũm kot amnhĩ kukamã omunh mex tã mẽ hkôt amnhĩ kaxyw kuta.

Ã mẽ kot Jejus nhÿ hã mẽ ahkre o pa kaxyw mẽ rênh xwÿnhjê nhĩxi kot anhÿr.

Jejus xapênh ã harênh

Matêwre 4.23-25

¹⁷ Tã nhũm Jejus akupÿm ÿ hã mẽ ahkre ho pa xwÿnhjê mẽ hãmri hixêt prêêta kurũm wrÿ nẽ nhÿri hinur kãm kuhê. Hãmri nhũm nhÿhÿnh mẽ kot mar mã xwÿnhjaja hã akuprõ. Kôt mẽ pa ho mẽ pa xwÿnh kwÿjaja nẽ nhÿhÿnh krĩ hkwy rũm mẽ hkwyjaja. Pika pê Jutej kurũm mẽ hkwyjaja. Nẽ krĩ pê Jerujarê kurũm mẽ hkwyjaja. Nẽ gô mÿ ri Xir mẽ Sitõja wa kamã mẽ pa xwÿnh kwÿjaja. Âm ahpÿnhã ri nhÿhÿnh krĩ hkwy rũm mẽ kot mar mã xwÿnhjaja hã pikuprõnh rax nẽ. ¹⁸⁻¹⁹ Mẽ kot kapêr mar nhũm kot akupÿm mẽ ho mex kaxyw nhũm prem ma hwÿr amnhĩ to pa. Mẽ hkwyjaja tanhmã ri à kute. Nhũm mẽ hkwyjaja mẽkarõmnuti kot mẽ hwÿr gjêx xwÿnhjaja nhũm mẽ piitã ma hwÿr amnhĩ to pa. Na prem ra amnhĩ kaxyw kãm hamaxpêr o:

–E pa ma hwÿr tẽ nẽ ãm hkupênh pix tã akupÿm inhmex japêr. Anẽ.

Hãmri nẽ ma hwÿr mra nhũm mẽ omu nẽ Tirtũm xãhpumunh tÿx o akupÿm mẽ ho mex pa.

Jejus kot hkôt mẽ pa ho mẽ pa xwÿnhjê jahkre hã harênh

Matêwre 5.1-12

²⁰ Tã nhũm Jejus hkôt mẽ pa ho mẽ pa xwýnhjê jahkre nê mẽ kãm:

E kot kaj mẽ atõ amnhĩ kaxyw tanhmã inhmã ajamaxpêr to nê ajamaxpêr o: “Nà ixkukrêx rax kêt tã na hte Tĩrtũm ixkôt pa ho pa. Kojã ixkôt pa hkêt pa ixtỳx ri tanhmã amnhĩ nhĩpêx to ho ri ixpa rãhã nê. Tĩrtũmja mex kumrêx o kot mẽ hikukrêx raxta jakrenh par.” Anhỹr o ajamaxpêr. Hãmri nhũm Tĩrtũm ã ajamaxpêr anhỹr ã apumu nhũm ja kãm mex nê. Hãmri nhũm apê hkra hã ato mex nê atãnopxar o akôt pa ka ajamakêtkati nê akĩnh nê axãmnhĩx ri apa.

²¹ Nê kot kaj mẽ atõ amã Tĩrtũm kãm hprãm xà hkôt tanhmã amnhĩ nhĩpêx to ho ri apa hprãm tỳx nê. Nhũm amnhĩ tã apumu nhũm ja kãm mex nê nhũm ato mex nê. Nê tanhmã ato ka hkôt pix mã amnhĩ to mex o ri apa nê ajamakêtkati nê akĩnh nê axãmnhĩx ri apa.

Nê kot kaj mẽ tanhmã amnhĩ tomnuj to. Hãmri nê tee ri ja hã amnhĩ pumu nê ajamaxpêr. Nê api-jaãm nê akaprĩ xà amỹr o nhỹ. Amỹr rax nê. Hãmri nhũm Tĩrtũm ja hã apumu nhũm ja kãm mex nê. Jakamã nhũm anê akaprĩ hta nê ato mex nê. Ka ajamakêtkati nê akĩnh nê axãmnhĩx ri apa.

²²⁻²³ Nê kwãr mẽ mãmri ixtã tanhmã mẽ ato kapêr punuj to nê tanhmã mẽ ato hêx to nê tanhmã ri mẽ atomnuj to ho pa. Kwãr mẽ mãmri ã mẽ anhĩpêx anhỹr o pa. Ka mẽ ãm inhmã pix mã ajamaxpêr rãhã ho apa pê ajamakêtkati nê axãmnhĩx ri apa. Kwãr mẽ mãmri ã mẽ anhĩpêx anê nê mẽ amex kêt ã mẽ ajarênh o pa. Amnepêm na pre Tĩrtũm nhỹ hã kapêr xwýnhjaja nhũm prem ã mẽ hipêx anê. Jakamã kojã mẽ urak nê ã mẽ anhĩpêx

anhỹr o pa. Nhũm Tĩrtũm ja hã mẽ apumu nê amnhĩm mẽ amex ã mẽ ajarê. Hãmri nê nhỹrmã kaxkwa kamã wa inhõ krĩ kamã mẽ ato mex rax nê. Ka mẽ akĩnh nê ajamakêtkati nê axãmnhĩx ri apa. Jakamã kwãr mẽ mãmri pika jakamã ã ixtã mẽ anhĩpêx anê. Anê.

Jejus kot arĩ mẽ kot mar xwýnhjê jahkre hã harênh

Xiakre 5.1-5

²⁴ Nhũm Jejus nhãm hkôt mẽ pa ho mẽ pa xwýnhjê nhĩhkô hã mẽ kot Tĩrtũm kôt amnhĩ nhĩpêx o pa hkêt xwýnhjê hwýr apkjê. Nê mẽ omu nê tanhmã mẽ kãm kapêr to. Mẽ hikukrêx rũnh xwýnhjê kumrêx mã kapêr nê mẽ kãm:

E kwa mẽ o kora mẽ akukrêx rũnh xwýnhjaja. Na ka htem ãm akukrêx rũnh pix mã ajamaxpêr o ri apa nê gryk ã Tĩrtũm mã ajamaxpêr o apa hkêt nê. Jao mẽ amã kapêr mar prãm kêt nê. Nê ãm akukrêx rũnh mã ajamaxpêr pê akĩnh nê ri apikunhar o ri apa. Tã kot ka mẽ nhỹrmã ty hãmri nhũm akĩnh xàja apê hapêx.

²⁵ Nê mẽ amã Tĩrtũm kôt ri amnhĩ nhĩpêx prãm kêt xwýnhjaja. Kot kaj mẽ nhỹrmã akaprĩ htỳx kãm tee ri amnhĩ to hwýr kaprỳ kãm ga. Kojã mẽ amar kêt nê.

Nê mẽ atỳx ri mẽ ate tanhmã amnhĩ tomnuj to hkukamã ajamaxpêr nê apikunhar pê amnhĩ tomnuj o apa xwýnhjaja. Kot kaj mẽ nhỹrmã ã mẽ ate amnhĩ nhĩpêx anhỹrja mýrapê mẽ kot amnhĩ xà htỳx kamã hamak o pa htũm xà hwýr ma apa. Hãmri nê kamã akaprĩ xà amỹr rãhã ho ri apa. Jakamã kwa mẽ o kora mẽ amã Tĩrtũm prãm kêt xwýnhjaja. Kêr ka mẽ ixkapêr ma nê axkãm ajamak rom nê ri apa.

²⁶ Amnepêm mẽ pakukamã mẽ pa xwýnhjaja na prem Tĩrtũm

kapēr o hkwỳjê jahkre ho pa. Nom axtem nê hkwỳm ri tanhmã mẽ kãm ho hêx to nhũm mẽ kuma nhũm ja mẽ kãm mex nê nhũm mẽ amnhĩm mẽ mex ã mẽ harê. No ãm mẽ mex kêt. Tã mẽ kajaja. Mẽ kot mẽ urak nê axpên mã mẽ amex ã mẽ ajarênh tã Tĩrtũm mã mẽ amex kêt. Jakamã kot kaj mẽ amex kêt nê. Anê.

Mẽ kãm mẽ pahkurê xwỳnhjê jarênh Matêwre 5.38-48; Rukre 23.34; mãânên Atre 7.60; Rômãn 12.14

²⁷ Hãmri nhũm Jejus hpãnhã mẽ piitã mẽ ahkre nê mẽ kãm:

—E mẽ ate inhmar xwỳnhjaja. Kêr ka mẽ kot mẽ atomnuj xwỳnhjaja amnhĩ tã tanhmã mẽ ho hkêt nê. ãm mẽ ho mex pix o ri apa hkukamã mãn ajamaxpêr.

²⁸ —Nê mẽ kot mẽ ato kapêr punuj xwỳnhjaja. Kêr ka mẽ amnhĩ xwar amnhĩ tã tanhmã mẽ ho akapêr punuj to hkêt nê. ãm tãm mẽ kãm akapêr pê mẽ kãm akapêr mex o ri apa. Nê mẽ kot tanhmã ri mẽ ato ho pa xwỳnhjaja ka mẽ ho mex pix o ri apa. Nê mẽ ho Tĩrtũm wỳr pix kukamã mãn ajamaxpêr.

²⁹ —Nê koja mẽhõ anhĩnep akura ka ãm omu nê tanhmã amnhĩ tã ho hkêt nê. Te ate kãm ihkjê pêr nhũm kot ihkjê kamã akuranh pyrak o amnhĩ nhĩpêx nhũm ja amã mex nê. No kêr ka mẽ amnhĩ tã tanhmã mẽ ho hkêt nê.

—Nê koja mẽhõ apê anhĩnôhkã py ka tanhmã hã kãm nê hkêt nê. Kwãr mãmrĩ apê kupy. Ka mãânên te ate kry pê anhĩnôhkã hpakã ry jagjênh xwỳnhhta anhĩnôhkã hkôt kãm ôr pyrak o hipêx. Nom kamã agryk kãm kãm ôr kêt nê.

³⁰ —Nê koja mẽhõ kêp amrakati kumrêx nê awỳr tẽ nê mẽmoj tã awỳ. Ka anhõ mẽmoj japêr nê mãmrĩ kãm mẽmoj gõ. Kêp anhõxỳ hkêt kamã kãm mẽmoj gõ. Rỳ koja mẽhõ apê mẽmoj to ahkĩ ka axàhkurê hkêt nê. Nê tanhmã hã ho hkêt nê. ³¹ Mẽ piitã mẽ kot tãm mẽ anhĩpêxja na mẽ amã hprãm. Tã kêr ka mẽ amnhĩ pyrã nê tãm mẽ piitã

mẽ hipêx o ri apa. Mẽ kot tãm mẽ anhĩpêx kêt tã kêr ka mẽ axàmnhĩx ri anhõxỳ hkêt nê tãm mẽ hipêx o ri apa.

³² —Nom kot kaj mẽ amã mẽ piitã mẽ ho mex o apa hprãm kêt japêr. Nê ãm mẽ kot mẽ ato mex xwỳnhjê pix ka mẽ amã mẽ ho mex prãm. Xà koja Tĩrtũm ja hã mẽ apumu nhũm ja kãm mex nê? Nà koja kãm mex kêt nê. Koja mẽhõ mẽ ato mex kêt tã ka mẽ amnhĩ rom ho mex nê nhũm Tĩrtũm ja hã mẽ apumu hãmri nê mẽ amex ã mẽ ajarê. Mẽ kot amnhĩ tomnuj o mẽ pa xwỳnhjaja na htem ãm mẽ kot mẽ ho mex xwỳnhjê pixjaja nhũm htem amnhĩ xwar mẽ ho mex o pa. No tãm mẽ kot amnhĩ nhĩpêx o mẽ pa xwỳnhjaja na htem mẽ piitã mẽ ho mex o pa. Mẽ kot tãm amnhĩ nhĩpêx xwỳnhjaja nê mẽ kot amnhĩ tomnuj xwỳnhjaja nhũm mẽ ho hpimràatã mẽ ho mex o axpên pyrak o pa.

³³⁻³⁶ —Nê mẽ kot amnhĩ tomnuj xwỳnhjaja na htem ãm mẽ kot mẽ ho mex xwỳnh pixjaja nhũm htem amnhĩ xwar mẽ ho mex o pa. No mẽ kajaja. Kêr ka mẽ mãmrĩ mẽ piitã mẽ kamã axukaprĩ pix nê. Jao axàmnhĩx ri mẽ piitã mẽ kãm mẽmoj nhõr o ri apa. Nhũm Tĩrtũm ja hã mẽ apumu nê ja hã mẽ ato mex nê.

—Jakamã kêr ka mẽ amarĩ mẽ kãm akurê xwỳnhjê ho mex nê. Nê mẽ kamã axukaprĩ nê. Nê mẽ piitã mẽ kãm mẽmoj nhõr o ri apa. Kê nhỹrmã Tĩrtũm maati mẽ hã mẽ amã mẽmoj nhõr rax nê. Nê mẽ ate kot amnhĩ nhĩpêx kôt amnhĩ nhĩpêx xwỳnh ã mẽ ajarê. Tĩrtũm na hte mẽ kot amnhĩ tomnuj xwỳnhjê kamã ukaprĩ ho pa. Jakamã kêr ka mẽ urak nê ã mẽ hipêx anhỹr o ri apa. E kêr ka mẽ ã axpên nhĩpêx anhỹr rãhã nê. Anê.

Mẽ pahte axpên to pakapêr punuj kêt ã mẽ pamã karõ

Matêwre 7.1-5; mãânên Rômãn 2.1-3, 14.1; Wam Korõt 4.5; Xiakre 4.11-12

³⁷ Nhũm Jejus arĩ mẽ ahkre nê mẽ kãm:

—Nê kêr ka mẽ atỳx ri amnhĩ krã hkôt tanhmã mẽ kot amnhĩ tomnuj to hã tanhmã axpên jarênh to ho ri apa

hkêt nê. Kêr kê Tirtûm mẽ apyrà nê ã mẽ ajarênh anhÿr kêt nê.

—Nê kêr ka mẽ tanhmã mēhō kot ra atomnuj tota mã ajamaxpēr rāhã hkêt nê. Âm ho ajamakêtkati tokyx anê nê axte kãm ajamaxpēr kêt nê. Kêr kê Tirtûm ja hã mẽ apumu nê mẽ apyrà nê axte tanhmã mẽ ate amnhĩ tomnuj to mã hamaxpēr kêt nê.

³⁸ —Nê kêr ka mẽ axpên kamã axukaprĩ pê tanhmã axpên to mex to ho ri apa. Kêr kê Tirtûm ja hã mẽ apumu nê mẽ apyrà nê mẽ akamã ukaprĩ pê tanhmã mẽ ato mex to ho pa. Na hte mẽ pahte axpên kamã paxukaprĩ hã mẽ pahpumunh xà hkôt tanhmã mẽ pakamã ukaprĩ to.

³⁹ —Nom kêr ka mẽ atÿx ri tanhmã axpên to akapêr to hkêt nê. Mẽ ate aprĩ hã axpên jamaxpēr kôt axpên pumunhre hã. Jakamã kot kaj mẽ atÿx ri mēhō ho akapêr punuj hãmri nê te mẽ nohkre xwÿnhjê hō kot mẽmoj pumunh kêt tãã te kot no ho omunh nê tanhmã harênh to pyràk o amnhĩ nhĩpêx. ⁴⁰ Tirtûmja tapxipix na kot mẽ pajamaxpēr kôt mẽ pahpumunh par. Mẽ axàhpumunh tÿx o mẽ pahte hakrenh kêt jakamã kwa kêr ka mẽ âm hkôt pix mã amnhĩ nhĩpêx o ri apa. Kot kaj mẽ ã amnhĩ nhĩpêx anê hãmri nê gaa nê uràk nê mẽ piitã mẽ kamã axukaprĩ pix o ri apa. ⁴¹⁻⁴² Jao mēhō kot tanhmã amnhĩ tomnuj to hã omu hãmri nê tanhmã hã kãm nê tokyx anhÿr kêt nê. Akumrêx ate tanhmã amnhĩ tomnuj to hã amnhĩ pumu nê hkaga hãmri nê rĩ kormã mēhōta hwÿr tē nê kot tanhmã amnhĩ tomnuj to hã kãm akapêr to. Anê.

Mẽ pajamaxpēr xà hkôt mẽ pakapêr ã mẽ pajarênh

Matêwre 7.16-20, 12.33-37

⁴³⁻⁴⁵ Nhũm Jejus arĩ mẽ ahkre nê mẽ kãm:

—Nê koja mẽmo pĩ hpàr mex nê ô mex nê. Nom koja pàr punuj hãmri nê ômnuj nê.

—Nê na htem mẽmo xô pumu nê hkôt tanhmã pàr kute hã omu. No

na htem rārāj pumu nê kêp akunĩ kamã mrônhi xô hã hkamnhĩx kêt nê. Na htem mẽmo xÿ hpàr pumu nê ô xànhre hã hkamnhĩx kêt nê. Ja pyrà nê koja mēhō hamaxpēr punuj nê mãânên hakwa ho kapêr punuj pix nê. Nê htÿx tanhmã amnhĩ tomnuj to ho ri pa. Nom koja hamaxpēr mex nê hãmri nê mãânên hakwa ho kapêr mex o pa. Na htem ahpÿnhã amnhĩ jamaxpēr xà hkôt tanhmã hakwa ho kapêr to ho ri pa. Anê.

Ixkre pijakrut jarênh

Matêwre 7.24-27; mãânên Xiakre 1.22-25; Wam Juãw 2.3-6

⁴⁶ Nhũm Jejus arĩ mẽ hkôt mẽ pa ho pa xwÿnhjê jahkre ho nhÿ nê mẽ kãm: —Nê kot kaj mẽ ixpê mẽ anhō pahihiti hã ijarê hã kot kaj mẽ ixkapêr kôt amnhĩ nhĩpêx rāhã ho ri apa.

⁴⁷ —E pa mẽ amã ixprĩ hã mẽ kot ixkôt amnhĩ nhĩpêx xwÿnhjê kot amnhĩ nhĩpêx jarê ka mẽ aprĩ hã inhma. ⁴⁸ Mẽ kot amnhĩ nhĩpêxja te mēhō hamaxpēr mex pê aptÿx kãm amnhĩm òrkwÿ nhĩpêx pyràk. Koja aptÿx kãm òrkwÿ nhĩpêx nhũm mẽmo arĩgro hã na wrÿk rax nê. Nê gô htàm rax nê hanhi nom nhũm arĩ âm tÿx nê xa. Tã kot kaj mẽ ixkôt amnhĩ nhĩpêx ã kot kaj mẽ te ixkre jarênhja pyràk. Jao amex nê ajamakêtkati nê ri apa. Te gô htàm kot ixkre janhir tã nhũm âm tÿxta pyràk. ⁴⁹ Nom koja mēhō hamaxpēr mex kêt nê htÿx mō nê gô mÿri gyw rerek kãm amnhĩm òrkwÿ nhĩpêx. Hãmri nhũm mẽmo arĩgro hã na wrÿk rax nê. Nê hã gô htàm rax nê òrkwÿ janhi nê kêp grành pa. Tã koja mēhō ixkôt amnhĩ nhĩpêx kêt nê te ho mēhō kot gô mÿri gyw rerek kãm ixkre nhĩpêxta pyràk. Jao mex kêt nê pa. Jakamã kwa mẽ ixkapêr mar tÿx nê te gô htàm kot ixkre janhir nê grành parta pyràk o amnhĩ nhĩpêx o apa hkêt nê. Anê.

7

Jejus kot mēhō mã àpênh xwÿnh o mex ã harênh

Matêwre 8.5-13

¹ Tã nhũm Jejus mẽ kãm ujarēnh pa hãmri nē ma akupỹm Kapanaũ hwỳr mō. ² Nē mōō nē ra hwỳr pōj. Nhũm krĩ kamã pôristi krãhtũm mã àpēnh xwỳnhja à htỳx nē nō. Ra htyk kaxyw nē nō nhũm ò patrãw tee ri omu nē kãm hapê jakamã tee ri hkukamã hamaxpēr o hkaprĩ nē. ³ Hãmri nē Jejus pōx ã harēnh ma nē hwỳr Ijaew pigêt kwỳjê rē nē mẽ kãm:

—Kwa mẽ ma Jejus wỳr mra nē kãm ijarē kê tokyx man ixwỳr tē nē inhmã àpēnh xwỳnhta o mex. Anē.

⁴⁻⁵ Hãmri nhũm mẽ kuma nē ma hwỳr mra nē omu nē kãm:

—Pa. Na pôristi krãhtũm na awỳr mẽ inhmē pa mẽ mra. Mẽ pahkĩnhã kêp Ijaew kêt tã kãm mẽ pahkĩnh nē. Tãm na pre mẽ inhō krĩ kamã mẽ inhmã Tĩrtũm kapēr o mẽ ahkre xà hã ixkreja nhĩpêx. Tã na kãm àpēnh xwỳnhta kêp à htỳx nē nō nhũm apōx hã ajarēnh ma nē man awỳr mẽ inhmē. Kwa ma hwỳr tē nē kãm ho mex nà? Anē.

⁶ Hãmri nhũm mẽ kuma nē mẽ kãm:

—Tõe. Ma pu mẽ hwỳr. Anē.

Hãmri nē ma mẽ hkôt tē. Hãmri nē kormã òrkwy htēp o htēm mẽ nhũm axte kutã hkrãmnhwỳ hkwy rē nhũm mẽ ma kutã mra. Hãmri nē mra nē mẽ hkaxpa nē Jejus pumu nē kãm:

—Pa? Kwa na pôristi krãhtũmta ã awỳr karō anē. Na mẽ inhmã: “E kêr ka mẽ mra nē nhỹri Jejus kaxpa nē kãm awjarē kê ãm ata rũm kapēr pix o inhmã à xwỳnhta o mex. Kĩnh ã ixpê Ijaew kêt jakamã ixte amnhĩ kuk ã ixpijaãm tỳx. Jakamã kot paj pam hwỳr ixtēm kêt nē. Kwa kãm anē kê ata rũm kapēr pix o inhmã akupỹm ho mex. ⁷⁻⁸ Ixpê mẽ hkrãhtũm jakamã na pa hte inhō pôristi mã mẽmoj tã karō nhũm mẽ inhmar xà hkôt inhmã mẽmoj tanhmã hipêx to. Na pa hte mẽ kãm: ‘E mẽ ma mra nē ã amnhĩ nhĩpêx anē.’ Anē nhũm mẽ inhma nē ma mrar kurê kumrêx. Rỳ pa mẽ kãm: ‘E mẽ amnē ixwỳr mra nē ã amnhĩ nhĩpêx anē.’ Anē nhũm mẽ inhma nē ixwỳr mra. No kêt Jejus na hte ixrom tanhmã mẽ à kuteja mã kapēr nhũm kuma nē mẽ kêp hapôj nē ma mrar

kurê kumrêx. Jakamã koja ata rũm kapēr pix o inhmã ho mex.” Anhỳr o awỳr karō. Jakamã na pa mẽ akutã mra nē akaxpa nē ã amã kapēr jarēnh anē. Anē.

⁹ Hãmri nhũm Jejus amnhĩ jaēr pē mẽ kapēr ma nē hkĩnh nē. Hãmri nē hkôt mẽ kot mar o pa xwỳnhjê mã kãm:

—Kwa xà na ka mẽ ã kot ixwỳr karō xwỳnh jamaxpēr anhỳrta ã ama? Mẽ pahkĩnhã kêp Ijaew kêt tã mẽ arom amnhĩ kaxyw inhmã hamaxpēr tỳx nē. Aa mẽ atō uràk nē ate amnhĩ kaxyw ã inhmã ajamaxpēr tỳx anhỳr kêt tã nhũm mẽ arom kãm àpēnh xwỳnh kaxyw inhmã hamaxpēr tỳx nē. Anē.

¹⁰ Nhũm pre ã mẽ kãm kapēr anē hãmri nhũm pôristi krãhtũm krãmnhwỳjaja kuma nē awjanã nē ma akupỹm hkrãhtũm nhõrkwyja wỳr mra. Nhũm ra Jejus kãm àpēnh xwỳnhta akupỹm ho mex nhũm mex nē ri mra. Hãmri nhũm mẽ akupỹm pōj nē akupỹm mex ã omu.

Jejus kot akupỹm mēhō hkra ho htĩr ã harēnh
Juãw 11.1-46

¹¹ Tã nhũm Jejus ma krĩ pē Naĩ hwỳr hkôt mẽ pa ho mẽ pa xwỳnhjê mẽrohã mō nhũm mẽ ohtō nē mẽ hkôt mra. ¹² Nhũm mẽ ra Naĩ hwỳr hpōx o mō. Nē hwỳr agjê. Axpēr kãm agjê nē mō nhũm kêp mjên htyk xwỳnhja mẽ kutã tē. Nhũm hkra myja ham kêp ty. Kra pyxi htã kêp ty nhũm mẽ kasãw kamã kuxà nē kumy nē kot haxàr kaxyw o mō nhũm katorxà mẽ hkôt mỳr o mō. Nhũm krĩ nhõ xwỳnh kwỳjaja ma hkôt mō. Piitã hkaprĩ nē hkôt mỳr o mō. ¹³ Tã nhũm Jejus mẽ hkwyja mẽ mō nē mẽ hkaxpa nē katorxà mỳr ã omu nhũm Jejus kãm hkaprĩ nē. Hãmri nē xa nē kãm:

—Pa? Kwa amỳr kêt nē. Anē.

¹⁴ Hãmri nē kasãwta wỳr tē nē hã ìhkra xi nhũm mẽ kot mỳnh xwỳnhjaja omu nē amarĩ kãm o xa. Hãmri nhũm htyk xwỳnhta mã kapēr nē kãm:

—E kwa kànhmã nhỹ. Anē.

15 Pu nhũm kànhmã ыр kurê kumrêx. Nê kapêr o nhỹ. Hãmri nhũm Jejus nita mã kãm:

—E ota akrata. Na akupỹm amã htĩr. Anê.

Hãmri nhũm akupỹm htĩr ã omu nê hkĩnh tỳx kumrêx. ¹⁶ Hãmri nhũm mẽ kot omunh xwỳnhjaja amnhĩ jaêr pê akupỹm hkra htĩr kãm omu nê ỹ hã haxwỳja hkĩnh nê. Nê Tĩrtũm mã mex o mex ã harê nê axpên mã:

—Kwa ãm hãmri na Tĩrtũm ã mẽ panhĩpêx anê nê mẽ pahwỳr ỹ hã kapêr jarênh xwỳnhhta mẽ nhũm mẽ pahwỳr mỗ. Tĩrtũm mẽ pakamã ukapĩrĩ jakamã na ã mẽ panhĩpêx anê. Nà ãm hãmri na ã mẽ panhĩpêx anê. Anê.

¹⁷ Hãmri nê piitã ma pikaja rũm mẽ kãm harênh o hprôt nhũm mẽ piitã harênh ma.

Juãw Paxis tee ri Jejus kukamã hamaxpêr ã harênh

Matêwre 11.2-6, 11.22; Rukre 4.16-21

¹⁸ Rôm nhũm Juãw Paxisja kêp prês nê hkrĩ nhũm hte hkôt mẽ pa xwỳnhjaja hwỳr mra nê kãm Jejus kot tanhmã amnhĩ nhĩpêx to ho pa hã harê. Hãmri nhũm harênh ma nê tee ri hkukamã hamaxpêr. Hãmri nê hkôt mẽ pa xwỳnh wa ho axkrut nê wa kuta ¹⁹ nê Jejus wỳr wa kumê nê wa kãm:

—Kwa wa ma hwỳr tẽ nê hkukja. Nê kãm: “Xà ka na pre Tĩrtũm mẽ ixwỳr amê nà? Nà xà kormã axtem hõ na pa mẽ kormã amnhĩ wỳr hamãr o ri ixpa?” Anê. E wa ma hwỳr tẽ nê ã hkukjêr anê nê tanhmã kot amnhĩ jarênh to hã ama hãmri nê man akupỹn tẽ nê inhmã harê. Anê.

²⁰⁻²¹ Hãmri nhũm wa kuma nê ma hwỳr tẽ. Nhũm Jejus kormã mẽ ho mex o xa. Mẽ nohkre xwỳnhjaja nhũm akupỹm mẽ no ho mex. Nê mẽkarõmnuti kot mẽ hwỳr gjêx xwỳnhjaja nhũm mẽ nê mẽ hapôx o ãm rãhã nhũm wa ra hwỳr tẽ nê kormã hã mẽ omunh o xa. Hãmri nê kãm Juãw Paxis kapêr jarê. ²² Hãmri nhũm wa kuma nê wa kãm:

—Tỳ. Nà ãm hãmri na ja hã ijarê. Ixpê mẽ ate ixkamã ajamak o apa xwỳnhhta na pa. Jakamã e. Wa kam nê tanhmã ixte amnhĩ nhĩpêx to hã ixpumu hãmri nê ma akupỹm hwỳr tẽ nê aprĩ hã kãm ijarê. Mẽ nohkre xwỳnhjaja na pa akupỹm mẽ no ho mex. Nê mẽ hkànhy xwỳnhjaja pa akupỹm mẽ hkà ho mex. Nê mẽ hyk o mẽ pa xwỳnhjaja pa akupỹm mẽ ho mex. Nê mẽ htyk xwỳnhjaja pa akupỹm mẽ ho htĩr. Nê mẽ kêp amrakati nê ri mẽ pa xwỳnhjê mã mẽmoj mex jarênh o ri ixpa. Na pa hte ã mẽ ho mex o ri mẽ hkôt ixpa anê. Jakamã e kwa wa ma akupỹm hwỳr tẽ nê ã kãm ijarênh anê. ²³ Kê ijarênh ma nê arĩ amnhĩ kaxyw ixkôt hamaxpêr tỳx rãhã nê. Kojã ã amnhĩ nhĩpêx anê nê hamakêtkati nê ri pa. Nê tee ri ijarênh kukamã hamaxpêr kêt nê. E wa tokyx ma akupỹm hwỳr tẽ nê ã kãm ijarênh anê. Anê.

Jejus kot Juãw Paxis mex ã harênh
Matêwre 11.7-19

²⁴⁻²⁵ Nhũm pre ã Jejus wa kãm amnhĩ jarênh anê nhũm wa kuma nê ma akupỹm Juãw Paxis wỳr tẽ. Hãmri nhũm Jejus mẽ kot mar o kuhê xwỳnhjê mã tanhmã Juãw Paxis jarênh to nê mẽ kãm:

—Na ka prem kapôt ã mar kaxyw ma hwỳr mra. Nom ê mex ã omunh kaxyw rỳ hpijaàm kãm tanhmã kapêr to hã mar kaxyw hwỳr amrar kêt nê. ²⁶ Kêp Tĩrtũm nhỹ hã kapêr xwỳnh jakamã na ka prem mar kaxyw ma hwỳr mra. Tĩrtũm nhỹ hã kot ixkukamã ijarênh o pa xwỳnh na. Ixpê Tĩrtũm kot mẽ akaxyw ixãm xwỳnh ã na pre mẽ amã ijarênh o pa. Nê hprĩ hã tanhmã mẽ amã ijarênh to. Jakamã na kapêr mex o kot wam Tĩrtũm nhỹ hã kapêr jarênh o mẽ pa xwỳnhjê kapêr jakrenh. ²⁷ Tĩrtũm kapêr ã kagà htũm kot Juãw kukamã tanhmã harênh to nê harênh kot: Kot paj Ixkra hkukamã ma mẽ hwỳr harênh o pa xwỳnh mẽ kê ma ri hkukamã mẽ kãm harênh o ri pa. Kê mẽ kuma nê kutêp tãm amnhĩ nhĩpêx.

Anhÿr o Tirtÿm Juāw Paxis kukamā harē nhÿm mē hā kagà. Tā nhÿm mē awÿr kumē. ²⁸ Juāwja mex kumrēx. Na pre hprī hā ixkukamā tanhmā ijarēnh to ho pa. Nom ixkôt mē pa ho mē pa xwÿnhjê hkīnhā ixkôt pa ho pa hkêt ãm ixkukamā ijarēnh o pa. Jakamā ixkôt mē pa ho mē pa xwÿnhjaja na mex o kot Juāw Paxisja jakrenh. Mē kot ixkôt hprī hā inhmar o pa jakamā mē mex o kot hakrenh. Anē.

²⁹ Nhÿm pre ã Jejus mē kām Juāw Paxis jarēnh anē. Mē kot Juāw mar o kuhé xwÿnh kwÿjaja na pre htem tanhmā amnhī tomnuj to ho pa. Tā Juāw kot mē kām Tirtÿm kapēr jarēnh ma nē axpēn mā Tirtÿm mex ã harē. Nē axpēn mā:

—Nà ãm hāmri. Tirtÿm kapēr na mex kumrēx. Anē.

Hāmri nē amnhī tomnuj kaga nē Tirtÿm kôt amnhī xunhwÿ. Jakamā nhÿm Juāw Paxis Tirtÿm mā mē hkrā kumrā.

³⁰ No nhÿm Parijew nhō xwÿnhjê mē Tirtÿm kapēr tÿm o mē ahkre ho mē pa xwÿnhjaja jajê hkīnhā Juāw Paxis kaga kumrēx. Jakamā nhÿm mē hkrā kumrār kêt nē. Mē kot Tirtÿm kapēr kaga jakamā na pre htem Jejus kapēr ma nē ãm kuma. ³¹ Hāmri nhÿm Jejus mē kām:

—E pa mē amā mē piitā htÿx ri hamaxpēr ã tanhmā mē harēnh to ka mē kot amnhī nhīpêx ã mē harēnh ma. ³² Te mē kot mēhprīre kot amnhī nhīpêx pyrāk. Mēhprīrejaja na htem ōrkwÿ kapem hije nē mēmoj to amnhīkati ho hkrī. Nē tee ri hkwÿjê kot amnhī nhīpêx pumu nē mē kām:

Kwa na pa mē amā gre htā ka mē ixkutā anhōkrepôx kêt nē. Pa mē ja hā mē apumu nē hpānhā mē amā mē htyk jarē htā ka mē akaprī nē amÿr kêt nē. Kwa mē ri ã amnhī nhīpêx anhÿr kêt nē.

Anhÿr o axpēn mā kapēr. Tā te mē ate mē urāk. Tirtÿm kot mē awÿr ÿ hā kapēr xwÿnhjê rēnh tā ka mē te mēhprīre kot amnhī nhīpêxta pyrā

nē mē ama ãm mē ama nē mē hkôt amnhī nhīpêx kêt nē.

³³ —Juāw Paxis na pre mē awÿr mō nē ixpyrà nē apkur mex o ri pa hkêt nē. Nē ixpyrà nē wīhti ho hkôm kêt nē pa. Tā ka mē ja hā omu nē hkaga nē atÿx ri Satanasti nhÿ hā kot tanhmā amnhī nhīpêx to ho pa hā hkamnhīx nē ri harēnh o ri apa. Hāmri nē mēhprīre kot amnhī nhīpêx pyrā nē hkôt amnhī nhīpêx kêt nē.

³⁴ Tā pa Juāw pānhā mē awÿr mō. Nē kurom apkati mē ixàpkur mex o ri ixpa. Nē kurom wīhti hkwÿ ho ixkôm o ri ixpa. Ka mē ja hā ixpumu nē atÿx ri ixàpkur rÿnh nē ixpipānh o ri ixpa hā ixkamnhīx nē ã axpēn mā ixto akapēr anhÿr o ri apa. Nē mē kot amnhī tomnuj xwÿnhjê hkôt ri ixpa hā axpēn mā ijarēnh o ri apa. ã na ka htem axpēn mā ijarēnh anē. Jao te mē ate Juāw Paxis nhīpêx pyrā nē ixkaga nē ixkôt amnhī nhīpêx kêt nē. Na hte ã htÿx ri tanhmā mē hamaxpēr to ho mē pa xwÿnhjaja amnhī nhīpêx anhÿr o ri pa.

³⁵ —No tām ri mē hamaxpēr o mē pa xwÿnhjaja na htem ahpÿnhā Juāw mē wa ixte amnhī nhīpêx ã wa ixpumu nē axpēn mā wa ijarēnh o: “Nà ahpÿnhā wa kot amnhī nhīpêx tā wa hamē ãm hāmri Tirtÿm nhÿ hā kapēr jarēnh mex o pa. E pu mē wa urāk nē Tirtÿm kôt amnhī xunhwÿ.” Anhÿr o axpēn mā wa ijarēnh o pa. Anē.

Parijew nhō xwÿnh pê Simāwre jarēnh

Matêwre 26.6-13; Makre 14.3-9; Juāw 12.1-8

³⁶ Tā nhÿm Parijew nhō xwÿnh pê Simāwreja amnhī nhōrkwÿ hwÿr Jejus mē hkôt mē pa ho pa xwÿnhjê mē kuwÿ. Mē kot kutā apkur kaxyw amnhī wÿr mē kuwÿ nhÿm mē ōrkwÿ hwÿr mra nē mē hwÿr agjê nē apkur kaxyw hkrī. ³⁷ Hāmri nhÿm mēhō nija mē hwÿr axà. Na pre hte amnhī tomnuj pix o pa. Hāmri nē Jejus ō krī hwÿr hpôx nē Simāwre nhōrkwÿ kamā apkur ã harēnh ma nē ma hwÿr tē. Mē hkuxwaxà hā à py nē ma hwÿr

o tē. ³⁸ Hāmri nē hwÿr axà nē Jejus pumu nē hwÿr tē nē pum xa. Nē tee ri tanhmā kot amnhĩ tomnuj to ho paja mā hamaxpēr nē hpijaàm nē hkaprĩ nē mÿr o xa. Hāmri nē Jejus kutā hkōn krā ho tēm nē nhÿ nē no kagô ho hpar go. Hāmri nē amnhĩ krā kī ho hpar grà nē kupā hāmri nē hpānhā mē hkuxwa xà ho kuxwa. Kām hkĩnh xàj ā hipêx anē. ³⁹ Hāmri nhũm Simāwre tee ri ja hā omu nē hamaxpēr o:

—Tk. Kwa jahti kot amnhĩ tomnuj pix o pa xwÿnh tā mē ixwÿr axà nē ā Jejus nhĩpêx anē nhũm amnhĩ nē hanor kêt nē. Kêp ām hāmri Tĩrtũm nhÿ hā kapēr jarēnh o pa xwÿnh ronhÿx ja hā omu nē amnhĩ nē hanor kurê kumrêx. Anē.

⁴⁰ Hāmri nhũm Jejus amnhĩ tā hamaxpēr ā omu nē hêx rom kām kapēr nē kām:

—E Simāwre. Pa amā awjarē ka inhma. Anē.

Hāmri nhũm kām:

—Tôe. Mex. Māmri inhmā awjarē pa ama. Anē.

⁴¹ Hāmri nhũm kām:

—Nà koja mēhō my wa hamēxkrut. Nhũm hōja mēhō pē kàxpore ho rax kumrêx nē ho ĩpresta. Nhũm hōja ām kêp ho grire nē ho ĩpresta. Hāmri nē wa hamē kàxpore ho hapêx pa.

⁴² Hāmri nē akupÿm kot kêp ho ĩpresta xwÿnhhta mā hpānhā ōr kaxyw tee ri amnhĩ kukamā hamaxpēr. Ra kot ho hapêx par jakamā tee ri amnhĩ kukamā hamaxpēr. Tā nhũm kot wa kām ho ĩpresta xwÿnhhta wa hwÿr tē nē wa kām: “Kwa wa tee ri amnhĩ kukamā ajamaxpēr kêt nē. Na pa ra war ate ixto tewēn ā kagàta kaxônh pa nhũm ja hapêx. Kot paj axte kām ijamaxpēr kêt nē. Jakamā wa māmri ajamakêtkati nē axàmnhĩx ri apa.” Anhÿr o wa kām kapēr. Ā mē ujarēnh kot anhÿr. Anē.

Nhũm pre ā Jejus Simāwre mā ujarēnh anē. Hāmri nē hā hkukja nē kām:

—E nhÿ myja koja we kām ho tewēn xwÿnhhta kĩnh tÿx nē wehe? Anē.

⁴³ Hāmri nhũm kām:

—Nà kot kêp ho rax nē ho ĩpresta xwÿnhhta koja kām hkĩnh tÿx o hōta jakre. Anē.

Hāmri nhũm kām:

—Tÿ. Nà ām hāmri na ka ā harēnh anē. ⁴⁴ Tā mān ka ni kot ā inhĩpêx anhÿr xwÿnhhta pumu. Na ka amnhĩ nhōrkwÿ hwÿr ixwÿ pa axà nom ka inhmā gô hkwy pa ho amnhĩ par kuhōnh kêt nē. Tā nhũm nija arom ā inhĩpêx anē nē no kagô ho ixpar kuhō nē amnhĩ krā kī ho grà ho nhÿ.

⁴⁵ —Nē anhōrkwÿ hwÿr ixarta ā ka ixkahti hkôt inhmÿnh nē ixpār kêt nē. Tā kêt nija arom xatā ixpar pār o nhÿ. ⁴⁶ Nē ate orti ho ixkrā gregrer kêt tā nhũm arom mē hkuxwaxà ho ixpar kuxwa ho nhÿ. Mēhkukwaxà hā kàxpore xohtô htā nhũm àmnhĩx ho ixpar kuxwa ho nhÿ. ⁴⁷ ām hāmri na pa amā ja jarē. Nija kot amnhĩ tomnuj tÿx tā pa ra nē kot amnhĩ tomnuj o ijapêx pa. Ra kot amnhĩ tomnuj tÿx xwÿnh ā amnhĩ pumunh jakamā na amnhĩ kaxyw inhmā hamaxpēr pē kām ixkĩnh nē ā inhĩpêx anē. No ka na ka hte uràk nē amnhĩ tomnuj tÿx o apa htā uràk nē tee ri ja hā amnhĩ pumunh kêt nē. Tā nita kĩnhā ate amnhĩ tomnuj kaga hkêt jakamā na ka ām amā ixkĩnh grire. Anē.

Nhũm pre ā Jejus Simāwre mā kapēr anē. ⁴⁸⁻⁵⁰ Hāmri nē nija mā kapēr nē kām:

—E kànhmā xa. Ra ate amnhĩ kaxyw inhmā ajamaxpēr jakamā na pa ra ate amnhĩ tomnuj piitā amnhĩ katut kôt rēnh pa. Kot paj axte kām ijamaxpēr kêt nē. Jakamā māmri ma ajamakêtkati nē axàmnhĩx anhōrkwÿ hwÿr tē. Anē.

Hāmri nhũm mē kot axpēn kutā apkur xwÿnhjaja tee ri kot kām kapēr anhÿrja ā kuma nhũm ja mē kām mex kêt nē. Jakamā nhũm mē ri axpēn mā harēnh o:

—Tk. Kwa mēhō na hte ri kot Tĩrtũm kot amnhĩ nhĩpêx pyrāk o amnhĩ nhĩpêx nē mē kot amnhĩ tomnuj o hapêx ā amnhĩ jarēnh o we ri pahti? Anē.

8

Mėnijė hkwy kot Jejus kōt pa hã mē harėnh

Makre 15.40-41, 16.9

¹ Tã nhũm Jejus ma mē piitã mē kãm Tirtũm kapēr o mē ahkre ho ri mē hkōt pa. Krĩ rūnh kamã nē krĩ hkryre kamã. Mē kot amnhĩ tomnuj kaga nē Tirtũm kōt amnhĩ xunhwyr nhũm kot amnhĩ tã mē omunh nē mē ho hkra kaxyw nhũm ri mē hkōt mē kãm harėnh o pa. Nhũm y hã mē ahkre ho mē pa xwýnh pē 12jaja ma hkōt ri pa. ² Nē mėni hkwyjaja. Na pre ra Jejus mē hkwyjė nē mēkarōmnuti japōj. Nē mē hkwyjaja tanhmã mē à kute xwýnhjaja nhũm akupym mē ho mex. Xwýnhjaja nhũm prem haxwýja ma hkōt ri pa. Hō pē na pre Marir Matarėn nhũm pre ra Jejus nē mēkarōmnuti ho 7 nē hapōj. ³ Nē Joanã. Joanã mjėn Kujahiti na pre kėp pahihtu Erox mã mē àpėnh xwýnhjė krãhtũm. Nē Sujãre. Nē kaxyw mėnijė ohtō nē Jejus kōt tanhmã mē ho ajuta hto ho mē hkōt pa. Jao mē hikãxpore ho mėmoj japrō nē ho mē kãm mē õ nhĩpėx o ri mē hkōt pa.

Mėmo hy hkre xwýnh

Matėwre 13.1-9; Makre 4.1-9

⁴ Tã nhũm mē ra krĩ piitã rūm Jejus wýr akuprō. Jakamã nhũm mē ohtō rax kumrėx nhũm Jejus mē kãm ujarėnh o nhỹ. No ãm hprĩ hã ujarėnh kėt nē. Mē kot Tirtũm kapēr mar nē tanhmã hkōt amnhĩ nhĩpėx to nhũm hã kuxi nē mē kãm hã ujarėnh o nhỹ.

⁵ Nē mē kãm:

—E mē inhma. Kojã mėhō ma pur mã mō nē pur kãm mėmo hy ho ukapēr o ri pa. Nom nhũm piitã amex kãm rôrōk kėt nē. Kwý ahpýnhã nhỹri rôrōk. Hãmri nhũm hkwy aptýx kãm rôrōk nhũm kuwėnhre omu nē hwýr mra nē hkrēr pa.

⁶ —Nē kėn kãm hy hkwy rôrōk nē higrōt kutã nojarėt nē higrōt pa. No nhũm kamã aptýx nē kamã kėp pika hkryre jakamã nhũm higrōt nhũm hã myt ahpa nē arĩgro htýx mē nhũm grã

pa. Kamã kėn nhũm amgo mex kėt jakamã nhũm grã pa.

⁷ —Nē mrōnhĩ kamã rôrōk xwýnhja haxwýja higrōt tã no nhũm utĩ kėp amýtã nhũm õ hkėt nē.

⁸ —No hirã kamã pika mex kãm rôrōk xwýnhja. Hãmri hirã kamã rôrōk nē higrōt mex nē piitã õ rax nē. Piitã kamã õ kėp 100. Ā mē ujarėnh kot anhýr. E kwa mē ixujarėnh ma nē kãm ajamaxpēr týx rãhã ho ri apa. Anė.

⁹ Nhũm pre ã Jejus mē kãm ujarėnh anė. Hãmri nhũm hkōt mē pa ho mē pa xwýnhjaja kuma nē tee ri hkukamã hamaxpēr nē kãm:

—Kwa na pa mē ixprĩ hã axujarėnh kōt mėmoj pumunh kėt nē. Aprĩ hã mē inhmã tanhmã harėnh to pa mē ixprĩ hã kuma nã? Anė.

¹⁰ Hãmri nhũm mē kãm:

—Tõe. Nã kot paj mē amã harė. Tirtũm kãm mē ate aprĩ hã mar prãm jakamã kot paj ixprĩ hã mē amã harė. Mē kot amnhĩ tomnuj kaga nhũm Tirtũm kot ja hã mē omunh nē mē ho hkra. Ja na pa harė.

—No mũjjaja na mē akĩnhã kãm mar prãm nõkati. Jakamã na htem ixujarėnh ma nē ãm kuma nē htýx ri pa. Anė.

Jejus kot prĩ hã mėmo hy jarėnh

Matėwre 13.18-23; Makre 4.13-20

¹¹ Hãmri nhũm Jejus hkōt mē pa ho mē pa xwýnhjė mã:

—E kot paj ixprĩ hã mē amã mėmo hy ho ukapēr ã mē ujarėnhhta jarė ka mē inhma.

—Nã mėmo hyta te kėp Tirtũm kapēr pyrãk. Nē ahpýnhã hy rôrōk ã pikata te kėp ahpýnhã mē kot Tirtũm kapēr mar xwýnhjė kot amnhĩ nhĩpėx pyrãk.

¹² Mē kot mar xwýnh kwýjaja te kot aptýx kãm hy rôrōk nhũm kuwėnh kot hwýr mrrar nē hkrēr par xwýnhhta pyrãk. Jao Tirtũm kapēr ma nhũm Satanasti te kuwėnh kot hy hkrēr parta pyrã nē mē kot amnhĩ kaxyw Tirtũm kapēr kōt hamaxpēr nē hkōt amnhĩ xunhwyr pymaj tanhmã nē mē hkrã hto. Jakamã nhũm mē kapēr ma nom ho hamakėtkati tokyx anė nē axte

kām hamaxpēr nē hkôt amnhĩ nhĩpêx kêt nē.

¹³ –Nē mẽ kot mar xwýnh kwýjaja te kot kēnre kamā hkwý rôrôk nē higrôt nē grà par tokyx anhýr xwýnhhta pyræk. Jao Tirtũm kapēr ma nē hkĩnh nē. Nē kām mar prām nē. Tã nhũm mēhõ tē nē Tirtũm nē tanhmã kām kapēr to nhũm mẽ kuma nē Tirtũm kaga. Te mẽmo hy higrôt nē grà par tokyx anhýrta pyræk.

¹⁴ –Nē mẽ kot mar xwýnh kwýjaja te kot mrônhi kamā hkwý rôrôk nē higrôt nhũm mrônhi kot kēp àmnar xwýnhhta pyræk. Jao kām Tirtũm kapēr mar prām nē. No ãm mãânēn kām hikukrêx rax nē hikàxpore rax prām xàj ãm ja pix mã hamaxpēr o pa. Nē gaa nē ra gryk ã axte Tirtũm kapēr mã hamaxpēr nē hkôt amnhĩ nhĩpêx kêt nē.

¹⁵ –Nē mẽ kot mar xwýnh kwýjaja te hirã kamã pika mex kām hy hkwý rôrôk nē higrôt nē ô raxta pyræk. Nē ixkapēr ma nē amnhĩ krã him hagiênh týx nē ixkôt ri amnhĩ nhĩpêx mex rãhã ho ri pa. Jakamã te ra mẽmo hy hkreta ô rax mex pyræk. E. ã ixujarēnh kot anhýr. Anē.

Kanê mẽ guhkrax wa harēnh
Makre 4.21-25

¹⁶ Nhũm Jejus arĩ mẽ kām ujarēnh o nhỹ nē mẽ kām:

–E mẽ inhma. Xà na htem kanê hpôk hãmri nē guhkrax o hpro rý par krak ri unhwý? Nà na htem ã hipêx anhýr kêt nē. Na htem hpôk nē kýxpê kuhê xà kamã unhwý nhũm hirã mex o kuhê. Nhũm htem ixkrem agjê nē hirã kamã mẽmoj pumunh mex nē. Ja pyrã nē na pa hte mẽ ate inhmar týx kaxyw ixprĩ hã mẽ amã awjarē.

¹⁷ Kormã mẽ ate mẽmoj pumunh nē aprĩ hã mar kêt tã kot kaj mẽ tokyx aprĩ hã omu nē ama. Te mẽmoj kot mẽ apê hpimxur pyræk tã koja tokyx mẽ amã amnhĩ to amnhĩrit ka mẽ aprĩ hã omunh pa. Te mẽ ate kanê hpôk kām aprĩ hã mẽmoj pumunh mexta pyræk.

¹⁸ Jakamã kêr ka mẽ ixkapēr mar týx nē hkôt ajamaxpēr rãhã ho ri apa. Jao ixkapēr piitã mar týx nē. Nom kot ka

mẽ mar týx kêt nē hã ano hkêt pa nē axte kām ajamaxpēr o apa hkêt nē. Anē.

Jejus kot tanhmã katorxà mẽ htõjê jarēnh to hã harēnh

Matêwre 12.46-50; Makre 3.31-35; mãânēn Eprêw 2.11-12

¹⁹ Nhũm Jejus arĩ mẽ ahkre ho nhỹ. Rôm nhũm katorxà nē htõjaja nhỹhnh hwýr mōn pøj. No nhũm mẽ kot mẽ hã htu rax jakamã nhũm mẽ tee ri hwýr gjêx kaxyw nē kormã kapôt ã kuhê. ²⁰ Hãmri nhũm mēhõja mẽ omu nē Jejus mã mẽ harē nē kām: –Kwa Pahihti. Ota ra akatorxà mẽ atõjaja awýr pøj nē tee ri awýr gjêx mã. O mũj mẽ kormã kapôt ã kuhê. Anē.

²¹ Hãmri nhũm mẽ kuma nē mẽ kām:

–Tõe pa ixkato nē mẽ omu. Inhmã mẽ hapêê. Nom kot kaj mẽ atõ Tirtũm kapēr ma nē hkôt amnhĩ xãm nē hkôt amnhĩ nhĩpêx. Hã kot kaj te apê ixtõ rý ixkatorxà kot amnhĩ nhĩpêx pyræk o pu mẽ axpēn nhĩpêx. Pa te inhmã mẽ hapê pyrã nē inhmã mẽ ajapê nē. Anē.

Jejus kot kôk mã kapēr ã harēnh
Matêwre 8.23-27; Makre 4.35-41

²² Tã nhũm apkati hõ hã nhũm Jejus himô rax ã rēr kaxyw nojarêt nē hkôt mẽ pa ho mẽ pa xwýnhjê mã kām:

–E kot puj mẽ jarãhã ma xarmã mō. Anē.

Hãmri nē mẽ pãr mã gjêx pa nē ma xarmã mō. Garirej rũm kato nē ma xarmã pika hõ hwýr kormã mō.

²³ Nhũm ra Jejus õtxwa nē pãr kre kamã gōr nē nõ. Pu nhũm kôk apêr týx nē nhũm gô axpēn tak týx nē kãnhmã harĩ. Nē pãr kre kamã pikapĩr rax nhũm pãrta mẽ kãm àr o mō nhũm mẽ tee ri amnhĩ nhĩpêx. No nhũm Jejus arĩ htýx gōr nē nõ. ²⁴ Hãmri nhũm mẽ tee ri amnhĩ kukamã hamaxpēr nē kumra nē kãm:

–Kwa Pahihti kãnhmã nhỹ. Kot puj mẽ jarãhã pahtyk pa. Anē.

Hãmri nhũm kãnhmã nhỹ nē kôk mã kapēr nē kãm:

–E. Kwa hãmri anhĩkrê. Anē.

Hāmri nhūm hpinhkrênh par mē nhūm gô tām nōr kurê kumrêx.
²⁵ Hāmri nhūm Jejus hkwỳjê hwỳr apkjê nē mē kām:

—Kwa kormã te mē ate amnhĩ kaxyw Tirtūm mē wa inhmã aja-maxpêr tỳx kêt pyrãk. Anê.

Hāmri nhūm mē amnhĩ jaêr pê kot ã amnhĩ nhĩpêx anhỳr ã omu nē no hawênh rūnh nē tee ri axpên pumunh pê hamaxpêr o kuhê nē axpên mã:

—Kokỳy. Jejus kêp mē panhĩo hkêt. Mē pahtō kot pu we te kot amnhĩ nhĩpêx pyrã nē we kôk mã pakapêr nhūm we pama anhĩkrê? Nã Jejus mē parom àhpumunh tỳx o àhpumunh tỳx. Jakamã na ã anê. Anê.

Jejus kot mēhō nē mēkarōmnuti kator ã harênh

Matêwre 8.28-34; Makre 5.1-20

²⁶ Tã nhūm mē ra himô nhĩhkjê hã krĩ pê Geras wỳr rê. Himô nhĩkjê hã na pre pika pê Garirej. Nê Garirej nhĩkjê hã na Gerasja. Jakamã nhūm mē ra hwỳr rê. ²⁷⁻²⁹ Hāmri nē pàr kre rūm hapôj nē api nē mra nhūm mēhō myja mē kutã tē. Na pre ra hwỳr mēkarōmnuti hkwỳ agjê nhūm mē y hã oprê htỳx nē hkênh nē ri mra. Nê òrkwỳ kamã hkrĩ hkêt nē. ãm ri kapôt ã pa ho pa. Mē htykjê hã pika kamã kên kre kaêx kôt ri pa. Na pre ra krĩ nhō xwỳnhjaja xatã tee ri unê nē hkaxpre. Tee ri kàx o ri hkaxpre htã no nhūm amnhĩ nē rênh pa. Nhūm mēkarōmnutija tanhmã hkrã hto nhūm kapôt pix ã ri mra. Jakamã nhūm Jejus mē pàr rūm hapôj nē api nhūm mē omu nē mē kutã tē nē Jejus kaxpa. Nhūm amnhĩ wỳr omu nē nē tanhmã mēkarōmnuti mã kapêr to. Hāmri nhūm my xoprêja hwỳr tē nē kutã hkôn krã ho tēm nē nhỹ. Hāmri nē kàxpêe amnhĩ tã kãm kapêr. Nom tãm kapêr kêt nē. Mēkarōmnuti nhỹ hã kãm kapêr nē kãm:

—Pa Tirtūm Kra Jejus? Kwa mo kaxyw na ka mē ixwỳr tē? Kwa tanhmã mē ixto hkêt nē. Anê.

³⁰ Hāmri nhūm mē kãm:

—Kwa tanhmã na mē anhĩxi kute? Anê.

Nhūm mē kãm:

—Nã mē ixpê Mēohtōhti. Anê.

Mēkarōmnuti ra kot hwỳr ohtō nē gjêx jakamã na prem ã kãm amnhĩ nhĩxi jarênh anê. ³¹⁻³² Hāmri nē Jejus mã:

—Kwa jahti nē mē ijapôj nē mē kot amnhĩ xà htỳx kamã hamak tūm xà hwỳr mē ixrênh kêt nē. Hagrô hkwỳ mūj wỳr mãn mē ixrê pa mē hpãnhã hwỳr mãn hagjê nã? Anê.

Hagrôja kii mē kêp amỳm hixêt ã ri apkur o pa nhūm mē ã Jejus mã mē hwỳr amnhĩ to hwỳr anê. Hāmri nhūm mē kãm:

—Tôe. Tô mē tãm hwỳr mãn mra. Anê.

³³ Hāmri nhūm mē kuma nē myta pê hapôj nē ma hagrôja wỳr mra kurê kumrêx nē mē kãm gjêx pa. Hāmri nhūm myja akupỳm tãm hkrã. No nhūm hagrôja mēkarōmnuti py-maj amỳra nē axkahkūm nē hprôt nē himô hã krã hixêt ã axpum rôrôk nē gôx kãm mrô nē pikaprãr pa. ³⁴ Hāmri nhūm hagrô jamãr xwỳnhjaja tee ri omu hāmri nē ma mē ò patrãw wỳr akupỳm mē piitã mē kãm harênh o hprôt nē mra. ³⁵⁻³⁶ Nhūm mē tee ri mē kuma hāmri nē ma kot Jejus pumunh mã hwỳr mra nē hkaxpa. Nê kuri myta pumu nhūm ra akupỳm tãm hkrã nē tãm amnhĩ nhĩpêx nē é kamã mex nē nhỹ. Nhūm mē kot hã omunh xwỳnhjaja mē kãm ujarênh pa. Nhūm mē kuma nē tee ri amnhĩ kukamã hamaxpêr o ra kãm ma nē. ³⁷⁻³⁹ Hāmri nē amnhĩ nē Jejus mã kapêr nē kãm:

—E kwa mē tokyj ma akupỳm amrar kurê kumrêx. Anê.

Hāmri nhūm mē kuma nē awjanã nē ma akupỳm pàr wỳr mra nē agjê. Nhūm akupỳm mex xwỳnhhta mē hkôt hkrã nom nhūm Jejus kãm:

—Nã kot kaj mē ixkôt amôr kêt nē. Ma akupỳm anhō krĩ hwỳr mãn tē nē Tirtūm kot tanhmã akupỳm ato mex to hã mē kãm amnhĩ jarênh o ri mē hkôt apa. Anê.

Hāmri nhūm kuma nē ma akupỳm krĩm tē nē ri mē kãm Jejus kot tanhmã ho mex to hã harênh ri mē hkôt pa.

Jejus kot wa ho axkrut nē wa ho mex ā harēnh

Matēwre 9.18-26; Makre 5.21-43

⁴⁰ Tā nhūm Jejus mē ma akupỹm xarmā mō nē rē nē mē kutēp mē pikuprōnh xwỹnhjē pumu. Nhūm mē ra amnhĩ wỳr mē omu nē mē kutēp gō jakàx ā pikuprōnh rax nē. Jakamā nhūm mē mē hwỳr pōj nhūm mē amnhĩ wỳr Jejus pumu nē hkĩnh nē. ⁴¹⁻⁴² Hāmri nhūm Jajti ma hwỳr tē. Ijaew nhō Tirtūm kapēr o mē ahkre xà hā ixkre jamār xwỹnh na pre. Nhūm pre hkra ni pyxire. Hā amgrà pē 12. Tā ra kēp à htỳx nē htyk kaxyw nē nō. Hāmri nhūm hipêxàja tee ri omu hāmri nē Jejus wỳr tē nē kutā hkōnkrā ho tēm nē nhỹ nē ho kuwỳ nē kām:

—Pa akupỹm mē ixto mex xwỹnh maati. E awỳr na pa tē. Na ra ixkra ixpē htyk kaxyw. Pa tee ri omu nē kaxyw amā ijamaxpēr nē awỳr tē. Kwa ma ixkōt inhōrkwỹ hwỳr tē nē inhmā omu nē tokyx inhmā ho mex nà? Anē.

Hāmri nhūm kuma nē ma hkōt tē. Nhūm mē ohtō nē wa hkōt pry hā mra nē axpēn nhīgā nē axpēn kujahēk o hkōt mra. ⁴³ Hāmri nhūm mēhō nija haxwỳja wa hkōt tē. Na pre hte hkamrō hkryre rāhā ho pa hā ra amgrà kēp 12. Nhūm tōtō tee ri kot ho mex kaxyw hkane kaprỳ ho pa. ⁴⁴ Jakamā nhūm tee ri amnhĩ kukamā hamaxpēr hāmri nē Jejus jarēnh ma nē ma mē hkōt hwỳr htēm kurē kumrēx. Nom nhūm mē ohtō rax nē hkōt mōr jakamā nhūm mē hkaēx kōt hwỳr tē nē hkatut kōt kēp ē nhĩrē kupē. Hāmri nē ām kēp ē pix kupēnh tā akupỹm mex. ⁴⁵ Hāmri nhūm Jejus kot kēp ē kupēnh ā amnhĩ tā omunh tā hēx rom mē ho hakēx nē mē omu nē mē kām:

—Kwa mē atō na ka ri amnhĩ kaxyw inhmā ajamaxpēr tỳx pē ixpē ixē kupē? Anē.

Hāmri nhūm mē piitā tee ri axpēn pumu nē kām amnhĩ tā aprā. Hāmri nhūm Simāw Pētre kām:

—Mē kot apē amnār griā kot ka kēt ri mēhō kot apē hkupēnh xwỹnh ā ri

mē hkukja. Kwa mǎn ām mēhō amarĩ apē hkupē. Anē.

⁴⁶ Hāmri nhūm kām:

—Nà mēhōja amarĩ hkupēnh kēt nē. Na amnhĩ kaxyw inhmā hamaxpēr tỳx pē ixpē hkupē. Tā ixāhpumunh tỳx xàja kōt na akupỹm mex. Nom ixte mēhō kot ixpē hkupēnh xwỹnhja pumunh jakamā na pa ixēx rom ā amnhĩ tā ri mē hkukjēr anē. Kwa mē atō inhmā amnhĩ jarē. Anē.

⁴⁷ Hāmri nhūm mēhō nita kuma nē tee ri kēp kot amnhĩ to hpimxur prām kaprỳ. Hāmri nē hpijaām kām hwỳr htertēt o tē nē kutā hkōn krā ho tēm nē nhỹ nē kām amnhĩ jarē nē kām:

—Ma pa na pa inhmā inhmex prām xà apē axē kupē. Tā na pa akupỹm inhmex. Anē.

⁴⁸ Hāmri nhūm Jejus kuma nē kām:

—Tōe. Nà ra ate amnhĩ kaxyw inhmā ajamaxpēr tỳx kōt ate ā amnhĩ nhĩpēx anhỹr jakamā na ka akupỹm amex. E māmri ajamakētkati nē ma akupỹm tē. Anē.

Hāmri nhūm kuma nē hkĩnh nē ma akupỹm tē. ⁴⁹ Rōm nhūm Jajti mǎ àpēnh xwỹnhjē hō ōrkwỹ rūm ma ō patrāw kutā tē nē wa hkaxpa nē Jajti mǎ kām:

—Kwa na ra apē akra ty. Jakamā mo kaxyw kot ka kēt amnhĩ kōt hwỳr Jejus o mō? Kwār māmri ma akupỹm tē. Anē.

⁵⁰ Hāmri nhūm Jejus kuma nē Jajti mǎ kām:

—Kwa tee ri akra hkukamā ajamaxpēr kēt nē. Kaxyw inhmā mǎn ajamaxpēr tỳx nē. Kōja te ra apē htyk tā kōja akupỹm amā htīr. Anē.

⁵¹⁻⁵³ Hāmri nhūm mē mō nē ōrkwỹ hwỳr pōj nē hwỳr axà nē mē omu nhūm mē ra htyk xwỹnhhta ā htu rax nē. Nē omũj ri mur. Hāmri nhūm Jejus mē hwỳr axà nē mē mỳr ā mē omu nē mē kām:

—Kwa mē hāmri amỳr kēt nē. Na nireta mē apē htyk kēt na ām gōr nē nō. Anē.

Hāmri nhūm ra mē kot htyk ā omunh mex jakamā kuma nē ām kuma nē axtem nē ri axpēn mǎ hā hpēr o axkē. Hāmri nhūm Jejus htyk

xwýnhta wýr hitom wýr àr kaxyw nē amnhĩ kôt Juāw nē Xiakre nē Pêtre nē kaxyw htyk xwýnh katorxà nē hipêêxàja. Jajé pix na pre amnhĩ kôt mē ho agjé.⁵⁴ Hāmri nē htyk xwýnhta wýr tē nē hpa hā kupy nē kām:

—Pa? Kwa tokyx kànhmā nhỹ. Anē.

⁵⁵ Hāmri nhũm akupým htír nē kànhmā ýr kurê kumrêx. Hāmri nhũm Jejus mē kām:

—E kwa mē tokyx kām mēmoj japêr kê kukrê. Mãn ra kām prām nē. Anē.

⁵⁶ Hāmri nhũm katorxà mē hipêêxà wa amnhĩ jaer pē akupým htír kām omu nē kamā no pyma ho hkĩnh tỳx nē. Hāmri nhũm Jejus wa kām:

—E wa inhma. Kêr ka wa akupým ixte war amā ho htír ã ri mē kām ijarênh o ri apa hkêt nē. Ām kwarĩ ho kwarĩ. Anē.

9

Jejus kot mē ho 12 nē ahpýnhã mē rēnh ã harēnh

Matêwre 10.1, 10.5-15; Makre 6.7-13; Rukre 10.1-12; mãânēn Atre 13.49-50, 18.6

¹⁻² Tã nhũm Jejus hkôt mē pa ho mē pa xwýnh pē 12jê mã kapêr nē mē kām:

—E mē amnē ixwýr mra nē ixkapêr ma. Na pa ra mē amā ixàhpumunh tỳx xà hkwý gō. Jakamā kêr ka mē inhỹ hã ma ri akwýjê hkôt tanhmã mē ho mex to ho ri mē hkôt apa. Mē à xwýnhjê ho mex o ri mē hkôt apa. Nē mē hkwýjê nē mēkarômnuti japôj. Nē mē piitã mē kām anē kê mē tokyx Tirtüm kôt amnhĩ xunhwý kê mē ho hkra. ³ Nom kêr ka mē amnhĩ kôt akukrêx ho ohtô nē ri ho apa hkêt nē. Nē amnhĩ kaxpar xà hã kô ho apa hkêt nē. Nē kawà htur nē ho apa hkêt nē. Nē amnhĩ kôt axàpkur xà hã anhõ ho apa hkêt nē. Rỳ akàxpore rax nē ho apa hkêt nē. Ām mē anhõ kamĩs ho pixi nē haxà nē ri hã apa. Nē anhỹ kamā ã ri mē hkôt apa anē. Kê mē kot mē akapêr mar xwýnhjaja tãm mãn mē amā mē anhõ ho pa.

⁴ —Nē kêr ka mē nhỹri krĩ hõ hwýr pôj nē apôx xà kamā mēhõ nhõrkwý

kamā hkôt ri apikamēnh tãmtã kurũm akupým ajapôj nē ma hpãnhã nhãm krĩ hõ hwýr apa. Nom atỳx ri nhãm mē hwýr amrar nē nhãm mē hwýr amrar kêt nē.

⁵ —Nē koja mē nhỹri mē akapêr kaga ka mē amnhĩ tã mē kamā ama nē tokyx mē kurũm ajapôj nē ma nhãm apa. Nē anojarêt nē mē noo mã akuhê nē amnhĩ par ã awjagrô kapĩ. Mē kot Tirtüm kaga hã amnhĩ pumunh nhũm Tirtüm kot amnhĩ pyrà nē mē hkaga hã mē kot omunh kaxyw ka mē ã mē noo mã amnhĩ nhĩpêx anē. Hāmri nē ma hpãnhã krĩ hõ hwýr apa. Anē.

⁶ Nhũm pre ã Jejus mē kām mē àpênh ã karõ anē. Nhũm mē kuma hāmri nē hapôj nē ma mē hkôt pa. Ma krĩ piitã hkôt akupým mē à xwýnhjê ho mex nē Tirtüm kapêr o tanhmã mē ahkre hto ho ri mē hkôt pa.

Pahi Eroxe tee ri kot Jejus kukamã hamaxpêr ã harēnh

Matêwre 14.1-12; Makre 6.14-29

⁷⁻⁸ Hāmri nhũm pika pē Garirej kamā mē piitã Jejus jarēnh ma nē ahpýnhã ri tanhmã axpên mã harēnh to. Mē hkwýjaja kêp finat Juāw Paxis akupým htír ã ri harē. Nhũm mē hkwýjaja amnepêr mē hkukamã Tirtüm nhỹ hã kapêr jarēnh xwýnhjê hõ ra akupým htír ã harē. Nhũm mē hkwýjaja kêp finat Eris ã axpên mã harē. Jakamã nhũm pahihti Eroxe mē kot ahpýnhã tanhmã ri harēnh toja ma nē tee ri hkukamã hamaxpêr.

⁹ Nē hamaxpêr o:

—Kwa mēhõ na hte we ri ã amnhĩ nhĩpêx anhỹr o pa wehe? Nã finat Juāw Paxis kêt. Ra ixte amnepêr hã ixàmnēnh nhũm mē kot inhmã mut krãhyr nē hpĩr kênã. Kwa mēhõ na hte we ri ã amnhĩ nhĩpêx anē?

Anhỹr o hamaxpêr hāmri nē kām omunh prām nē.

Jejus kot mē ho ohtô nē mē kām mē õ hã harēnh

Matêwre 14.13-21; Makre 6.30-44; Juāw 6.1-14

¹⁰ Tã nhũm Jejus nhỹ hã kapêr o mē pa xwýnhjaja akupýn hwýr mran pôj

ně mẽ kot ri tanhmã amnhĩ nhĩpêx to ho pa hã kãm amnhĩ jarẽ. Hãmri nhũm mẽ kuma nẽ ma krĩ pẽ Pesêj wỳr kormã mẽ o mỗ. ¹¹ Hãmri nhũm krĩ hkwỳ nhõ xwỳnhjaja ra ma mẽ mỗr ã mẽ harẽnh ma nẽ ohtô nẽ ma mẽ hkôt mra nẽ nhỹri mẽ hkôt pỏj. Nhũm Jejus amnhĩ kôt mẽ omu hãmri nẽ tanhmã mẽ ho mex to ho xa. Kôt mẽ à nẽ mẽ pa xwỳnhjaja nhũm akupỳm mẽ ho mex. Hãmri nẽ Tĩrtũm kapêr o mẽ ahkre nẽ mẽ kãm:

—E kot kaj mẽ atõ amã amnhĩ tomnuj kaga hprãm xàj Tĩrtũm kôt amnhĩ xãm nhũm amnhĩ tã apumu nẽ ato hkra. Hãmri ka ajamakêtkati nẽ amex nẽ axãmnhĩx ri apa.

Anhỹr o mẽ kãm kapêr pẽ mẽ ahkre ho xa.

¹² Tã nhũm myt àr kaxyw nhũm Jejus nhỹ hã mẽ ahkre ho mẽ pa xwỳnh pẽ 12jaja hwỳr mra nẽ kãm:

—Kwa na ra kamàt o mỗ. Mẽ hano kê mẽ amnhĩ to krĩ hõ japêr nẽ tokyx amnhĩm mẽmoj japrô nẽ kuku nẽ hikwỳ nẽ gờ. Mo mẽ panhõ? ãm jar kapôt pix kênã. Anẽ.

¹³⁻¹⁴ Hãmri nhũm mẽ kuma nẽ mẽ kãm:

—Kwa ka mẽ kamjaja mẽ kãm mẽmoj gờ kê mẽ kuku. Anẽ.

Nhũm mẽ ohtô rax nẽ mẽ hkôt mra. Mẽmyjaja kệp 5.000 nẽ kaxyw mẽ hprô nẽ mẽ hkrajaja. Jakamã nhũm mẽ kệp 12jaja Jejus kot ã mẽ kãm kapêr anhỹrja ma nẽ tee ri mẽ hkukamã hamaxpêr nẽ kãm:

—Kwa nà mo mẽ panhõ rax? Mẽ panhõ pãwti kệp sĩk nẽ kaxyw tep grà axkrutre kênã kot kêt we mẽ piitã mẽ hipêx pa. Xà kot paj mẽ ma mra nẽ nhỹri mẽ kãm mẽ apkur xà japrô nhũm mẽ kuku? Anẽ.

Hãmri nhũm mẽ kãm:

—Nà pu mẽ kãm mẽmoj japrôr kêt nẽ. Mẽ panhõta kot puj mẽ kãm ho anhgrà. E mẽ kãm anẽ kê mẽ ahpỳnhã ri hije nẽ hkrĩ nẽ apku. Anẽ.

¹⁵ Hãmri nhũm mẽ kuma nẽ mẽ kãm anẽ nhũm mẽ piitã hkrĩ pa. ¹⁶ Hãmri nhũm Jejus pãwti mẽ tepta jamỳ nẽ kànhmã kaxkwa hwỳr rĩt nẽ kànhmã kupẽ nẽ Tĩrtũm mã harẽ nẽ kãm:

—Pa Papaj? Apê mẽ inhmã mẽ inhõ xwỳnh jakamã amex o amex. Anẽ.

Hãmri nẽ mẽ kãm ho hkry hpa nẽ hkôt mẽ pa ho mẽ pa xwỳnhjê mã kugõ nhũm mẽ ô ri ho xa nẽ ho mẽ hipêx par kumrêx. ¹⁷ Nhũm mẽ piitã apkur mex o hkrĩ. Mẽõja mẽ kệp grire htã nhũm Jejus tanhmã mẽ kãm ho rax to nhũm mẽ ohtô rax tã piitã kuku nẽ ho õhy htu hpa. Nhũm arĩ mẽõ jakrêx prã nhũm Jejus kôt mẽ pa ho mẽ pa xwỳnhjaja akupỳm hakrêx o pikuprõnh pa nẽ ho kawà ho 12 nẽ ho nỳt pa.

Jejus kot amnhĩ tã hkôt mẽ pa xwỳnhjê kukjêr ã harẽnh

Matêwre 16.13-19; Makre 8.27-29

¹⁸ Tã nhũm arĩgro hõ hã nhũm Jejus nhỹri ahte Tĩrtũm mã amnhĩ jarẽnh o nhỹ nhũm hkôt ri mẽ pa ho mẽ pa xwỳnhjaja ma hwỳr mra. Hãmri nhũm amnhĩ wỳr mẽ omu nẽ amnhĩ tã tanhmã mẽ hkukjêr to nẽ mẽ kãm:

—Kwa mẽ inhmã mẽmoj jarẽ. Tanhmã na htem ahpỳnhã axpên mã ijarẽnh to wehe? Anẽ.

¹⁹ Hãmri nhũm mẽ kãm:

—Nà na htem ahpỳnhã tanhmã ajarẽnh to. Na hte kamã mẽ hkwỳjaja ato finat Juãw Paxis ã ajarẽ. Nhũm kamã mẽ hkwỳjaja ato finat Eris ã ajarẽ nhũm mẽ hkwỳjaja tỡhã apê Tĩrtũm nhỹ hã kapêr jarẽnh xwỳnhjê hõ ra akupỳm htĩr ã ajarẽ. Æ na htem ahpỳnhã ajarẽnh anẽ. Anẽ.

²⁰ Hãmri nhũm mẽ kuma nẽ mẽ kãm:

—No mẽ kajaja? Ixpê mẽhõ hã na ka htem ixkamnhĩx? Anẽ.

Hãmri nhũm Simãw Pêtre kãm:

—Nà mẽ pajaja na pa htem apê Tĩrtũm kot mẽ ixkaxyw axãm nẽ mẽ ixwỳr amẽnh xwỳnh ã ajarẽ. Nẽ apê mẽ ixpiitã mẽ inhõ Pahi Maati hã ajarẽ. Æ na pa htem ajarẽnh anẽ. Anẽ.

²¹ Hãmri nhũm kuma nẽ mẽ kãm:

—Tỳ. Nà ãm hãmri na ka htem ã ijarẽnh anẽ. Æ ixte anhỹr kênã. Nom kêr ka mẽ inhmar kumrêx. Kêr ka mẽ kormã ã akwỳjê mã ijarẽnh anhỹr o ri apa hkêt nẽ. Anẽ.

Jejus kot amnhĩ kukamã amnhĩ jarēnh

Matêwre 16.21; Makre 8.31-33

²² Nhũm Jejus arĩ hkõt mẽ pa ho pa xwýnhjê mã kapēr nê hprĩ hã tanhmã mẽ kãm amnhĩ jarēnh to nê mẽ kãm:

—Nà ãm hãmri na Simãw Pêtre ijarē. Mẽ kajaja ra mẽ ate ja hã ixpumunh mex. No mẽ pahkwýjaja na mẽ akĩnhã mẽ kãm ja hã ijarēnh mar nê ja hã ixpumunh prãm kêt. Ijaew pigêtjaja nê Tĩrtũm kapēr tũm o mẽ ahkre o mẽ pa xwýnhjaja nê patre krãhtũmjaja mẽ kãm ja hã ixpumunh prãm kêt. Jakamã koja mẽ nhỹrmã ixpyné nê ixtak rax nê. Hãmri nê ixpĩ. Nom kot paj ixtyk ã apkati axkrunēpxi nhũm Tĩrtũm akupým ixto ixtĩr. Anê.

Jejus krajaja tanhmã kot amnhĩ nhĩpêx to hã mẽ harēnh

Matêwre 10.31, 16.24-28; Makre 8.34-9.1; Rukre 14.25-33; Juãw 12.24-26; mããnēn Karatas 5.24; Piripos 2.4; Wam Pêtre 4.1-2; Apokarip 2.10-12

²³ Nhũm pre ã Jejus amnhĩ kukamã hkõt mẽ pa ho mẽ pa xwýnhjê mã amnhĩ jarēnh anê hãmri nê hpãnhã mẽ kot mar o kuhê xwýnh piitã mẽ kãm kapēr nê mẽ kãm:

—E kot ka mẽ atõ ate ixkõt amnhĩ xãm ã amnhĩ jarē hãmri nê mããnēn ã amnhĩ jarēnh anê nê amnhĩ jarēnh o: “Jejus kêp inhõ Pahihtijakamã kot paj kapēr kõt pix mã amnhĩ nhĩpêx rãhã ho ri ixpa. Kwãr ixkwýjaja tanhmã hã inhĩpêx to.” Anhỹr o apkati mẽ ã amnhĩ jarēnh anê.

²⁴ —Koja mẽ ixtã mẽ atõx pĩ rý tanhmã mẽ atõ hto ka ty. Tã koja akaxwýnh ma inhõ krĩ mex wýr àpir kurê kumrêx. Hãmri nê kamã atĩr tũm nê amex rãhã apa ho apa. Nom kot kaj mẽ jar atĩr prãm xaj ixkaga hãmri nê hwýr axàpir kêt nê.

²⁵ —Nê koja mēhõ hikukrêx rax gryk ã Tĩrtũm kaga. Hã koja nhỹrmã ty nê ý kamã kuwy hwýr ma mō nê amnhĩ kõt hikukrêx õ hpyr nê o mōr kêt nê. Koja tee ri kuwy hwýr mōr pymaj amnhĩ nê hikukrêx rax o amnhĩ pãnhã amnhĩrer prãm kaprý.

²⁶ —Nê koja mēhõ ixte mẽ ahkre hã inhma nhũm ja kêp omnuj nhũm ixkaga japêr. Hã kot paj nhỹrmã akupým mẽ ato amnhĩptàr kaxyw akupým wrý nê amnhĩ xwar kot ixkaga xwýnhhta kaga. ãm hãmri na pa ã mẽ amã amnhĩ jarēnh anê. Kot paj nhỹrmã man akupým inhõ Papaj nhỹ hã ixte mẽ ho amnhĩptàr kaxyw akupým wrý. Nhũm kapēr o mẽ wrýk xwýnhjaja man ixkõt wrý. Pa mẽ wrý hãmri nê mẽ kot ixkaga xwýnhjaja pa amnhĩ pyrã nê mẽ hkaga. ²⁷ ãm hãmri na pa ã mẽ amã amnhĩ jarēnh anê. Kot paj nhỹrmã akupým ixte mẽ ato amnhĩptàr kaxyw mẽ awýr wrý. Tã kot kaj mẽ akwýjaja kormã atĩr ri ja kukamã tanhmã ixte amnhĩ nhĩpêx to hã ixpumu. Anê.

Jejus kot kēn prêk nhũmōk ã hirã kamã ãm ã harēnh

Matêwre 17.1-8; Makre 9.2-8; mããnēn Sikũn Pêtre 1.16-18

²⁸ Tã nhũm semãnja hapêx nhũm Jejus Simãw Pêtre nê Xiakre nê Juãw wa mẽ kãm kapēr nê mẽ kãm:

—E pu mẽ ma hixêt prêk mũj wýr mō nê hwýr api nê himōk ã Tĩrtũm mã amnhĩ jarē. Anê.

Hãmri nê ma amnhĩ kõt hwýr mẽ o mō nê hwýr mẽ ho api. ²⁹⁻³² Hãmri nhũm Jejus Tĩrtũm mã amnhĩ jarēnh o xa. Nom nhũm hkõt hixêt wýr mẽ mōr xwýnhjaja õtxwa htýx nê ra gōr nê hikwý. Pu nhũm Jejus axtem hkuk nê xa. Nê ê haka htýx nê xa. Hãmri nhũm ja wa kaxkwa rũm wrý nê kuri kãm kapēr o xa. Finat Mojes mẽ finat Erisja wa kuri kãm kapēr o xa. Na pre ra amnepêm Tĩrtũm amnhĩ wýr wa ho api. Tã nhũm wa ra akupým wrý nê Jejus mã kapēr o xa. Mẽ hpimrãatã hirã htýx kãm axpēn mã kapēr o kuhê. Jejus kormã krĩ pê Jerujarē kapem mẽ kot hpĩr kêt ri nhũm wa mẽ axpēn mã htyk kukamã harēnh o kuhê. Nhũm wa kãm:

—Nà Tĩrtũm jamaxpēr xà hkõt kot kaj ã amnhĩ nhĩpêx anê.

Anhỹr o Jejus tyk kukamã kãm hamaxpēr o hihtýx o wa xa.

Rôm nhũm mẽ õt xwýnhjaja hkrã hapôj nê tee ri Jejus pumu. Nhũm mex kumrêx nê hirã htýx kãm xa nhũm mẽ omu nê kuri wa ãm xwýnhhta wa omu. ³³ Hãmri nhũm Mojes mẽ Eris wa ra akupým nojarêt nhũm Simãw Pêtre tee ri ja hã wa omu nê Jejus mã kãm:

—Kwa Pahihti. Nà ãm hãmri na pu mẽ amnê mō. Kwa pu mẽ kritpêm jar axkamê nê tokyx panojarêt kêt nê. Pa mẽ amã pô nhĩrõnh o axkrunêpxi nê hipêx. Amã hõ nhĩpêx nê Mojes mã hõ nhĩpêx nê Eris mã hõ nhĩpêx ka mẽ kamã akrĩ. E kwa pa mẽ amã ho anê nà? Anê.

Nhũm amnhĩ krã hkôt ã kãm kapêr anê. ³⁴ Hãmri nê kormã kãm kapêr rôm nhũm kakrã jaka týtja wrý nê mẽ hkunor nhũm wa mẽ kamã kuhê. Hãmri nhũm Simãw Pêtre mẽ Juãw mẽ Xiakreja mẽ tee ri kakrã kot amnhĩ nhĩpêx ã omu nê kãm ma nê. ³⁵ Hãmri nhũm kakrã kamã Tĩrtũm mẽ kãm kapêr nê mẽ kãm:

—E ota Ixkra xa. Mẽ ate kamã ajamak o apa xwýnhhta na. Inhmã hapêê. Kêr ka mẽ ãm tapxipix kapêr mar týt o ri apa. Anê.

³⁶ Hãmri nhũm mẽ kuma nê kãnhmã rĩt nê ãm Jejus pix pumu nhũm ahte xa. Nhũm kuri wa ãm xwýnhhta wa ra ma akupým api nhũm mẽ Jejus pix pumu.

Mẽ tapxipixjaja na prem ã Jejus kot amnhĩ nhĩpêx anhýr ã omu nom taxy kormã nhãm hkwyjê mã harênh kêt nê. ãm axpên pix mã harênh pê hkukamã hamaxpêr o ri Jejus kôt pa.

Jejus kot mēhō nē mẽkarōmnuti janor ã harēnh

Matêwre 17.14-21; Makre 9.14-29

³⁷ Tã nhũm apkati nhũm mẽ ma akupým ahparmã hkwyjê hwýr wrýk o mō. Nê mẽ hwýr hpôx o mō nhũm mẽ ra mẽ kutêp pikuprõnh rax nê kuhê. ³⁸ Hãmri nhũm mẽhõ myja amnhĩ wýr mẽ omu nê mẽ kutã tẽ nê mẽ hkaxpa nê Jejus pumu nê kãm:

—Pa Jejus. Kwa ixkamã axukapri nê inhmã ixkra ho mex. ãm ixpê pyxire. ³⁹ Na hte mẽkarōmnuti xatã

ixpê tanhmã ho nhũm ý hã amýra nê mra nê rôrôk nê hakwa jamrô ho hikwý nhũm tokyx kãm urer kêt nê. Nhũm ra ixpê homnuj týt nê. ⁴⁰ Hãmri pa akôt mẽ pa ho mẽ pa xwýnhjê hwýr o tẽ nhũm mẽ kot inhmã ho mex kaxyw tee ri tanhmã ho hkapyrý. Anê.

⁴¹ Hãmri nhũm kuma nê hkôt mẽ pa ho pa xwýnhjê mã kãm:

—Hêxta waa nê. Na ka mẽ ra ixte Tĩrtũm nhý hã mẽ ho mex ã ixpumunh o ixkôt apa ryy tã kormã ixpyrà nê ã mẽ hipêx anhýr kêt nê. Mãn ka mẽ kormã mẽ kaxyw Tĩrtũm kôt ajamaxpêr týt kêt nê. Anê.

Hãmri nê myta mã kãm:

—E amnê ixwýr akra ho tẽ pa inhno ho omu. Anê.

⁴² Hãmri nhũm hwýr o tẽ nhũm mẽkarōmnuti axte kêp ho pika kura nhũm amýra nê tẽm nê nō. Hãmri nhũm Jejus omu nê nê mẽkarōmnuti kator nhũm akupým mex nê kãnhmã nhý. Hãmri nhũm akupým hipêêxã mã kugō. ⁴³ Hãmri nhũm mẽ amnhĩ jaêr pê Jejus kot ã hipêx anhýrja ã omu nê ri axpên mã harênh o:

—Kokýý. Hêxta waa nê. Pêr ãm Tĩrtũmja ãm ahpumunh o ahpumunh. Anê.

Jejus kot htyk kukamã amnhĩ jarēnh

Matêwre 17.22-23; Makre 9.30-32

⁴⁴ Hãmri nhũm Jejus hkôt mẽ pa ho mẽ pa xwýnhjê mã kãm:

—E kot paj mẽ amã tanhmã amnhĩ jarênh to ka mẽ inhmar týt nê. Na pa pre mẽ ate aa mẽmoj pumunh kêt kwý ho anhýr o ixpa pix kaxyw mẽ awýr ixwryk kêt nê. Kojã mẽ tokyx mẽ kãm ixtã amýnê nhũm mẽ ixpĩ. E kwa kêr ka mẽ ja ma nê hã anohtýt nê ho apa. Anê.

⁴⁵ Hãmri nhũm mẽ tee ri kot ã amnhĩ jarênh anhýrja ma nê axpên mã:

—Kwa mo na pêr ri ã amnhĩ jarênh anê? Kêp mẽ panhō Pahi Maati hã kot amnhĩ jarênh kênã kot kêt mẽhõ kupĩ.

Anhýr o axpên mã ri harênh o kuhê. Hãmri nê mẽ kãm ã kot amnhĩ jarênh anhýrja mar prãm kêt jakamã hprĩ hã

tanhmã hã hkukjêr to hkêt nê. Ām akryk mar o kuhé.

Mê kot amnhĩ to rũnh xwỳnhjê jarēnh

Matêwre 18.1-5; Makre 9.33-37; Rukre 22.24-27; mǎānēn Piripos 2.3-9; Wam Pêtre 5.5

⁴⁶ Tã nhũm Jejus kôt mẽ pa ho mẽ pa xwỳnhjaja tanhmã amnhĩ kukamã hamaxpêr to hãmri nê axpēn mã:

—Kwa mẽ pahtō kot puj we nhỹrmã pahpê pahi nê mẽ ho amnhĩptār rax o pahkwỳ jakre? Anê.

Hãmri nê ja hã axpēn kukjêr o Jejus kôt mō nê axpēn mã: “Nà pa.” Nhũm mẽ hkwỳja: “Nà kêt pa.” Anhỹr o hkôt mō. ⁴⁷ Hãmri nhũm Jejus mẽ kuma nê mẽ hamaxpêr kôt mẽ omu. Hãmri nê xa nê amnhĩ wỳr mēhprĩjê mã hpa ho apê nhũm hwỳr tē nê kuri xa. ⁴⁸ Hãmri nhũm Jejus hkôt mẽ pa ho pa xwỳnhjê mã tanhmã harēnh to nê mẽ kām:

—E mẽ inhma. Kêr ka mẽ apê pahi pyrāk o tanhmã amnhĩ jarēnh to ho ri apa hkêt nê. Ām te amarĩ ri mẽ apa pyrāk o amnhĩ nhĩpêx o ri apa. Jao nhỹri mēhprĩre hō pumu nê kamã axukaprĩ ho kām mẽmoj tanhmã ho rỳ kām mẽmoj gō. Hãmri nê te pa ate tanhmã ixto mex to pyrāk o amnhĩ nhĩpêx. Nê kot ka mẽ atō pa tanhmã ixto mex to nê te ate Tĩrtũm tanhmã ho mex to pyrāk o amnhĩ nhĩpêx. Kot kaj mẽ ã amnhĩ nhĩpêx anhỹr o ri apa nhũm Tĩrtũm ja hã mẽ apumu nê mẽ ate amnhĩ to rũnh kêt tã nhũm tãm mẽ ate amnhĩ to rũnh xwỳnh ã mẽ ajarē. E kot kaj mẽ amã amnhĩ to rũnh prãm nê ã amnhĩ nhĩpêx anhỹr o ri apa. Anê.

Mēhō kot Jejus nhỹ hã tanhmã amnhĩ nhĩpêx to hã harēnh

Makre 9.38-41

⁴⁹ Hãmri nhũm Jejus kôt mẽ pa ho pa xwỳnhjê hō pē Juãwja nhỹhỹnh hwỳr hpōx o tē nê kām:

—Kwa Pahihti. O mũj mēhō kêp mẽ pahkwỳ hkêt tã anhĩxi jarēnh kôt mẽ nê mẽkarōmnuti janor o pa. Pa mẽ tee ri kot ã amnhĩ nhĩpêx anhỹr ã omu nê nê kām ixkapêr. Kêp mẽ pahkwỳ hkêt

kênã kot kêt ã mẽ hanor anhỹr o pa. Anê.

⁵⁰ Hãmri nhũm kuma nê kām:

—Kwa nà ja nê tanhmã kām nê hkêt nê. Koja mēhō mẽ pahkwỳm ri tanhmã mẽ ahkre hto hkêt nê hãmri nê kêp mẽ panhĩōō. Ra mẽ pahkôt kot amnhĩ nhĩpêx o pa mã kênã. Jakamã kwa mẽ ja nê tanhmã kām akapêr to hkêt nê. Kwār māmri ã amnhĩ nhĩpêx anhỹr o ri pa. Ja mex kênã. Anê.

Samar nhō xwỳnhjaja kot Jejus kaga hã mẽ harēnh

Atre 8.14-15

⁵¹ Hãmri nhũm Jejus akupỹm kaxkwa hwỳr àpir kaxyw ra hwỳr apkati grêre ho mōr jakamã nhũm hamaxpêr o:

—E pa ma akupỹm Jerujarē hwỳr mō. Nà kot paj anê. Mẽ kot kamã tanhmã ixto mã tã kot paj ma akupỹm mẽ hwỳr mō. Anê.

⁵² Hãmri nê amnhĩ kukamã mẽ hkwỳjê rē nhũm mẽ ma mẽ hkukamã Samar nhō krĩ kamã nhỹri mẽ kot amnhĩm hikranh xà japêr o mō.

⁵³ Nom nhũm Samar nhō xwỳnhjaja kêp Jerujarē nhō xwỳnhjê hprãm nōkati jakamã Jerujarē hwỳr mōr ã mẽ harēnh ma nê amnhĩ nê mẽ hkurê. ⁵⁴ Hãmri nhũm mẽ tee ri amnhĩ tã mẽ kuma nê awjanã nê akupỹm Jejus wỳr mra nê kām mẽ harē. Hãmri nhũm Juãw mẽ Xiakre wa mẽ harēnh ma nê mẽ kamã gryk nê nê Jejus mã:

—Kwa Pahihti. Nà na mẽ axtem nê amnhĩ nê mẽ pahkurê. Jakamã e kwa pu mẽ kaxkwa rũm mẽ hipy kuwy hpōk kwỳ rē kê mẽ hkaxàr pa nà? Anê.

⁵⁵ Hãmri nhũm wa kuma nê wa kām:

—Tk. Kwa nà wa ajamaxpêrja mex kêt. Pu mẽ ã ri mẽ hipêx anhỹr kêt nê. Koja Tĩrtũm kām ja ho anhỹr prãm nê rĩ tãm tanhmã mẽ ho. No mẽ papajaja pu mẽ ri mẽ kamã pagryk xàj tanhmã mẽ hipêx to hkêt nê. Pu mẽ ã mẽ hipêx anê nê ra amnhĩ tomnuj tỳx nê. Kwa wa ri ã ajamaxpêr anhỹr kêt nê. Anê.

⁵⁶ Hãmri nê mẽ ma Samar rũm hapōj nê hpãnhã nhãm krĩ hō hwỳr pa.

Mê hkwỳjaja kãm Jejus kôt pa hprãm ã mẽ harênh

Matêwre 8.18-22

⁵⁷ Tã nhũm Jejus mẽ kormã mör ri nhũm mēhōja hwỳr tē nē kãm:

—Pa Jejus? E kot paj ma akôt ixpa ho ixpa. Anē.

⁵⁸ Hãmri nhũm kuma nē kãm:

—Ko ka mã. Kam nē rĩ ma ixkôt ri apa ho apa. Nom kêr ka inhmar kumrêx nē rĩ kormã ixkôt apa. Na hte xore pika hkre kamã hikwỳ xà. Nē kuwēnhre pĩ nhĩmōk ã hikwỳ xà. No pa na Tĩrtũm kot mẽ awỳr inhmēnh xwỳnh tã jajê hkĩnhã inhōrkwỳ hkêt. Na pa hte ãm nhãm krĩ hō hwỳr ixpa nē nhãm ixpa. Tã xà kot kaj ixpyrà nē ã amnhĩ nhĩpêx anhỳr o ri apa nà? Anē.

⁵⁹ Nhũm pre ã kãm kapêr anē hãmri nē nhãm mēhōja wỳr apkjê nē kãm:

—Pa? No ka? Xà kot ka ma ixkôt apa ho apa nà? Anē.

Hãmri nhũm kãm:

—Tỳ no ãm kormã. Kojã nhỹrmã inhĩpêxàja tanhmã amnhĩ to nē ty mãn. Pa haxà hãmri nē rĩ kormã ma akôt ixpa ho ixpa. Anē.

⁶⁰ Hãmri nhũm Jejus kuma nē kãm:

—Kwa nà ri ã ajamaxpêr anhỳr kêt nē. Ma ixkôt apa ho apa kurê kumrêx. Kê mẽmoj ano kupyrrỳ inhnê apê amnàr kêt nē. Kwãr mẽ htĩr tũm nē mẽ pa hkêt mã xwỳnhjaja mãn axwakre kamã amã anhĩpêxà jamãr o pa nhũm nhỹrmã ty kê mẽ amã haxà. Ka mãmrĩ ma Tĩrtũm kapêr o mẽ ahkre ho ri mẽ hkôt apa. Kê mẽ ama nē mẽ hkwỳjaja hkôt amnhĩ xunhwỳ nhũm mẽ ho hkra. Anē.

⁶¹ Nhũm pre ã kãm kapêr anē hãmri nhũm nhãm mēhō myja haxwỳja hwỳr tē nē kãm:

—E. Pa kot pa ma akôt ri ixpa ho ixpa. Nom kormã. Pa ma akupỳm tē nē ixkwỳjê mã amnhĩ jarē nē tanhmã amnhĩ to hpa mãn. Hãmri nē mẽmo arĩgro hã rĩ kormã ma akôt ixpa ho ixpa. Anē.

⁶² Hãmri nhũm tee ri kuma nē kãm:

—Kwa nà. Kot kaj ã ajamaxpêr anē hãmri nē ixkôt apa htã te amnhĩ katut kôt arĩt rãhã ho ri apa pyrãk o amnhĩ

nhĩpêx. Kwa ã ajamaxpêr anhỳr kêt nē ma ixkôt apa kurê kumrêx. Anē.

10

Jejus kot mẽ hwỳr mẽ kêp 72 rēnh ã harênh

Matêwre 10.1, 10.5-15; Makre 6.7-13; Rukre 9.1-6, 9.10-11; mããnēn Atre 13.50-51, 18.6

¹ Tã nhũm Jejus axte amnhĩ kaxyw mẽ ho 72 nē mẽ kurê. Hãmri nē mẽ ho axkrut kapēn nē ma nhỹhỹm krĩ hkwỳ hkôt amnhĩ kukamã mẽ kurê. Mẽ kot mẽ hkôt ri Tĩrtũm kapêr o mẽ ahkre ho pa kaxyw. ² Hãmri nē mẽ kãm:

—Na mẽ ohtô rax nē kormã Tĩrtũm kapêr mar kêt nē. No ãm kormã mẽ ate mẽ kãm harênh o apa kaxyw mẽ agrêre. Te pur kãm harôj kamrêk pa nē ãm tã no ãm kaxyw hikēnh xwỳnh grêre pyrãk. Jakamã kwa mẽ ho Tĩrtũm wỳ kê axte mẽ kaxyw mẽ hkwỳjê rê.

³ —E kot paj ma mẽ hwỳr mẽ arê. Ma mẽ hkôt mẽ ate Tĩrtũm kapêr o mẽ ahkre ho ri apa kaxyw. Jakamã kot kaj mẽ te ate ôwēhti kot mry xoprê hwỳr amnhĩ to mrar nhũm kot hkwỳ hpar pyrãk o amnhĩ nhĩpêx. Kojã mẽ hkwỳjaja mẽ ate mẽ ahkre ma nhũm ja mẽ kêp omnuj nē nhũm mẽ hã tanhmã mẽ anhĩpêx to. Tã kêr ka mẽ tee ri amnhĩ kukamã ajamaxpêr nē amã mẽ uma hkêt nē.

⁴ —Nē kêr ka mẽ hwỳr anojarêt nē amnhĩ kôt amrykà rỳ akawà rỳ aparkà hō ho apa hkêt nē. ãm anhỹ kamã ma mẽ hwỳr apa. Nē mẽ hwỳr mra nhũm mẽ nhỹri pry hã mẽ atō kaxpa nē amã kapêr o xa ka wa axpēn mã akapêr ry hkêt nē. Anojarêt kãm kãm akapêr krãnre nē mẽ hakre nē ma krĩm apa.

⁵ —Nē kêr ka mẽ hwỳr pōj nē nhỹri mẽ ôrkwỳ hwỳr agjê nē mẽ kãm: “Xà kot paj mẽ ato Tĩrtũm wỳ kê mẽ ato mex nē ka mẽ ajamakêtkati nē ri apa?” Anē. ⁶ Hãmri nhũm mẽ ama nhũm ja mẽ kãm mex japêr nhũm mẽ hkĩnh nē amã: “ỳ kam nē mãmrĩ mẽ ixto awỳ.” Anē. Hãmri ka mẽ ama nē

tanhmã mẽ ho Tĩrtũm wỳr to. No koja mẽ apê ja kaga ka mẽ ho hwỳr kêt nẽ.

7 —Nẽ kêr ka mẽ nhỹri mẽ òrkwỹ kamã mẽ hwỳr pòj hãmri nẽ mẽ hkòt ri apikamẽnh tãmtã nẽ akupỹm mẽ kurũm ajapòj nẽ ma hpãnhã krĩ hõ hwỳr apa. Nẽ mẽ axàmnhĩx mẽ kuri axàpkur o ri apa. Mẽmoj to akòm o ri apa. Ra mẽ ate mẽ ho mex pê mẽ kãm Tĩrtũm kapêr o mẽ ahkre ho apa kênã. Jakamã kwãr mẽ mãmri amnhĩ pãnhã mẽ amã mẽ axàpkur xà gõ ka mẽ kuri mẽ apku.

8 —Nẽ kêr ka mẽ nhỹri mẽ hwỳr pòj nhũm mẽ ato mex nẽ. Nẽ mẽ amã mẽmo mẽ apkur xà gõ ka mẽ mãmri axàmnhĩx aku. Aa kormã mẽ ate mẽmojta kur kêt tã mãmri ajamakêtkati nẽ aku. No tee ri amnhĩ kukamã tanhmã ajamexpêr to hkêt nẽ.

9 —Nẽ kêr ka mẽ ã mẽ kãm akapêr anẽ nẽ mẽ kãm: “Tĩrtũm kãm mẽ ato hkra hprãm. Na hte amnhĩ wỳr mẽ awỳ.” Anẽ hãmri nẽ akupỹm mẽ kãm mẽ à xwỳnhjê ho mex. Á kot kaj mẽ mẽ kãm amnhĩ nhĩpêx anhỹr o ri mẽ hkòt apa.

10 —Nẽ kêr ka mẽ nhỹri mẽ hwỳr pòj nhũm mẽ ãm mẽ apumu nẽ amnhĩ nhòrkwỹ hwỳr mẽ awỳr kêt japêr. Hãmri ka mẽ tee ri amnhĩ tã mẽ omu hãmri nẽ ra ma nhãm apa kaxyw.

11 Hãmri nẽ anojarêt nẽ mẽ kãm: “E mẽ inhma. Tĩrtũm kot mẽ pahwỳr mẽnh xwỳnhhta na mẽ awỳr wa inhmẽ pa wa mẽ awỳr mō. Wa ixte Tĩrtũm kapêr o mẽ ajahkre kaxyw. Kãm mẽ ato hkra hprãm nhũm wa ixte mẽ amã harẽnh kaxyw na pa pre wa ã mẽ awỳr inhmōr anẽ. Tã ka mẽ harẽnh ma nẽ wa ixkaga. Jakamã kot paj wa jar mẽ anhō krĩ kamã amnhĩ par kà hã awjagrō kapĩ. Mẽ ate Tĩrtũm kaga hã amnhĩ pumunh nhũm Tĩrtũm kot amnhĩ pyrã nẽ mẽ akaga hã mẽ ate omunh kaxyw kot paj wa mẽ anoo mã ã amnhĩ par kà hã awjagrō kapĩr anẽ. Kot kaj mẽ nhỹrmã tee ri ã amnhĩ nhĩpêx anhỹrja mã ajamexpêr nẽ akapĩrĩhtỳx kumrêx kãm ga. ãm hãmri na pa wa mẽ amã ja

jarẽ.” Anhỹr o mẽ kãm akapêr nẽ mẽ kêp ajapòj nẽ ma hpãnhã nhãm krĩ hõ hwỳr apa kurê kumrêx.

12 —Koja nhỹrmã Tĩrtũm mẽ kot amnhĩ tomnuj mỳrapê tanhmã mẽ ho. Na pre ra ã krĩ pê Sotō nhõ xwỳnhjê nhĩpêx anẽ. Na prem amnhĩ tomnuj tỳx o pa nhũm Tĩrtũm tanhmã mẽ kot amnhĩ tomnuj tỳx ã tanhmã mẽ ho. Tã jar mẽ kot kãm ixkapêr mar prãm kêt nẽ mẽ kot ixkaga xwỳnhjaja. Kojã Tĩrtũm ixtã mẽ omu nẽ kot Sotō nhõ xwỳnhjê nhĩpêx pyrãk o mẽ hipêx nom tanhmã mẽ ho htỳx o mẽ hakre.

—E kêr ka mẽ ma krĩ hkwy hkòt apa nẽ ã mẽ kãm akapêr anhỹr o ri apa. Anẽ.

Mẽ kot Tĩrtũm kòt hamaxpêr kêt xwỳnhjê jarẽnh

Matêwre 11.20-24

13-14 Tã nhũm Jejus krĩ hkwy nhõ xwỳnhjê mã kapêr o xa nẽ mẽ kot amnhĩ tomnuj ã mẽ kãm akir. Krĩ pê Korajĩ mẽ Pesêj nhõ xwỳnhjê kumrêx mã kapêr nẽ mẽ kãm:

—E mẽ inhma. Amnepêm krĩ pê Sitō mẽ Xir wa kamã mẽ pa xwỳnhjaja na prem tanhmã amnhĩ tomnuj tỳx to ho pa nhũm Tĩrtũm mẽ omu nẽ hã mẽ homnuj tỳx nẽ. Tã kwa mẽ o kora Korajĩ mẽ Pesêj wa kamã mẽ apa xwỳnhjaja. Ra ixte mẽ amã mẽ ate mẽmoj pumunh kêt o anhỹr rax o ixpa htã ka mẽ omu nẽ arĩ amnhĩ tomnuj o ri apa nẽ tokyx amnhĩ tomnuj kaga hkêt nẽ. Jakamã kot kaj mẽ amex kêt nẽ. Kop apu Sitō rỳ Xir kamã mãn ixte mẽ kãm aa mẽ kot mẽmoj pumunh kêt kwỳ ho anhỹr o ri ixpa ronhỹx mẽ omu nẽ mẽ arom amnhĩ kaxyw ixkòt hamaxpêr kurê kumrêx. Nẽ tee ri tanhmã amnhĩ tomnuj to ho pa hã amnhĩ pumu nẽ hkapĩrĩ nẽ ã amnhĩ nhĩpêx anhỹr kaga hpa. No mẽ kajaja na pa tee ri mẽ amã tanhmã amnhĩ nhĩpêx to ho ri ixpa kaprỳ. Ka mẽ ja hã ixpumu nẽ ãm ixpumu nẽ amnhĩ tomnuj kaga hkêt nẽ. Tã koja nhỹrmã Tĩrtũm mẽ piitã mẽ kot amnhĩ tomnuj mỳrapê tanhmã mẽ hipêx to. Hãmri nẽ tanhmã Sitō mẽ Xir wa kamã mẽ pa xwỳnhjê jarẽnh to nhũm mẽ kot

amnhĩ tomnuj mÿrapê amnhĩ xà htÿx kamã hamak o ri pa. No mẽ kajaja mẽ ate amnhĩ tomnuj tÿx o mẽ hakrenh jakamã koja Tĩrtũm mẽ hkĩnhã mẽ atomnuj tÿx o mẽ atomnuj tÿx. Ka mẽ amnhĩ xà htÿx kamã ajamak rãhã ho ri apa ho apa. Anẽ.

¹⁵ Nhũm pre ã Jejus mẽ kãm kapêr anẽ. Hãmri nẽ hpãnhã Kapanaũ nhõ xwÿnhjê mã kapêr nẽ mẽ kãm:

—No mẽ apê Kapanaũ nhõ xwÿnhjaja. Kot kaj mẽ ajaxwÿja mẽ amex kêt nẽ. Mẽ ate amnhĩ tomnuj kagare pyrã nẽ Tĩrtũm nhõ krĩ hwÿr akrã ho apa. Nom kot kaj mẽ atõ hwÿr axàpir kêt nẽ. Kot kaj mẽ ma kuwy maati hwÿr ajapêx pa kãm ga.

¹⁶ Anhÿr o mẽ kãm kapêr hãmri nẽ hpãnhã hkõt mẽ pa ho mẽ pa xwÿnhjê mã kapêr nẽ mẽ kãm:

—Kot kaj mẽ Tĩrtũm kapêr o mẽ ahkre ho ri apa nhũm mẽhõ ama nẽ akapêr kõt amnhĩ nhĩpêx. Hã koja te pa kot ixkõt amnhĩ nhĩpêx pyrãk o amnhĩ nhĩpêx. No koja amar kêt nẽ akaga hãmri nẽ te pa kot inhmar kêt nẽ ixkaga pyrãk o amnhĩ nhĩpêx. Jao mããnhẽn Tĩrtũm kaga.

Anẽ hãmri nhũm mẽ kuma hãmri nẽ anhrã nẽ axkrut kapên nẽ ma ahpÿnhã krĩ hkõt anhrã.

Mẽ hkĩnh nẽ ri mẽ pa xwÿnhjê jarênh Apokarip 3.5

¹⁷ Tã nhũm mẽ kêp 72jaja krĩ hkwy rũm akupÿn Jejus wÿr pøj. Piitã hkĩnh nẽ hpõx pa. Hãmri nẽ kãm:

—Kwa Pahihti. Na pa prem anhÿ hã mẽ nẽ mẽkarõmnuti japõx rax nẽ. Na pa prem mẽ nẽ mẽ hano nhũm mẽ ãm mẽ kurũm hapõx kurê kumrêx. Anẽ.

¹⁸ Hãmri nhũm mẽ kuma nẽ mẽ kãm:

—Tõe. Ixãhpumunh tÿx o ixte Satanasti jakrenh jakamã na ka htem inhÿ hã mẽ hano nhũm mẽ tee ri mẽ akutã hihtÿx prãm. Hãmri nẽ te na haxênh prêprêk pyrãk o amnhĩ nhĩpêx nẽ mẽ kurũm hapõx kurê kumrêx pa ja hã mẽ omu. ¹⁹⁻²⁰ Mẽkarõmnuti te kot kagã xoprê rÿ te kot makre pyrãk. Tã ra ixte mẽ amã ixãhpumunh tÿx xà hkwy nhõr jakamã na ka prem mẽ

kãm akapêr nhũm mẽ tee ri akutã tanhmã amnhĩ tÿx to hprãm. Tã koja Satanasti tee ri mẽ ate nhÿrmã Tĩrtũm mẽ wa ixri atĩr tũm nẽ apa pymaj tanhmã mẽ ano kupyw to kaprÿ. Ra Tĩrtũm kot õ kagã kamã mẽ atĩr tũm nẽ mẽ apa kaxyw mẽ anhĩxi hã kagã kênã. Jakamã kwa mẽ jam ajamaxpêr o akĩnh nẽ ajamakêtkati nẽ ri apa. No kêt mẽkarõmnuti kot mẽ akapêr mar nẽ mẽ kurũm hapõxta ã mẽ omunh xà hkõt pix mã akĩnh nẽ ri apa hkêt nẽ. Anẽ.

Jejus kĩnh kãm kot Hipêêxã mã amnhĩ jarênh

Matêwre 11.25-27

²¹ Tã nhũm Tĩrtũm Karõ tanhmã Jejus to nhũm ÿ hã hkĩnh nẽ xa. Hãmri nẽ Tĩrtũm mã kapêr nẽ kãm:

—Pa Papaj? Nà apê mẽ ixpiitã mẽ inhõ Pahi Maati na ka. Pikap ri mẽ pa xwÿnhjaja nẽ kaxkwa kamã mẽ pa xwÿnhjaja apê mẽ ixpiitã mẽ inhõ Pahi Maati na ka. ãm hãmri na ka hte amnhĩ nhĩpêx mex o ri apa. Na ka hte mẽ àhpumunh tÿx ã mẽ kot amnhĩ jarênh xwÿnhjê mã axãhpumunh tÿx o amnhĩrĩt kêt nẽ. ãm mẽ àhpumunh kêt ã mẽ kot amnhĩ jarênh xwÿnhjê pix mã na ka hte ja ho amnhĩrĩt nhũm mẽ tapxipixjaja ja hã apumu. ãm hãmri na ka hte amã hprãm xà hkõt ã mẽ piitã mẽ hipêx anhÿr o ri apa. Jakamã mẽ kot amnhĩ to hkryre xwÿnh pixjaja na htem ate amnhĩ nhĩpêx ã apumunh o pa.

²² —Na ka pre inhĩhkra kamã mẽmoj piitã haxàr pa. Ixte ho amnhĩptar o ri ixpa kaxyw. Jakamã kapxipix na ka hte ixpê akra hã ixpumunh par. No jar ri mẽ pa xwÿnhjaja na mẽ kot ja hã ixpumunh kêt. Nẽ mããnhẽn papxipix na ixte ate tanhmã amnhĩ nhĩpêx to hã apumunh par. Jakamã na pa hte ã amnhĩ nhĩpêx anẽ nẽ inhãm hprãm xà hkõt mẽ hkwyjê mã ato amnhĩrĩt o ri ixpa nhũm mẽ ixpyrà nẽ ate tanhmã amnhĩ nhĩpêx to ho apa hkõt apumu. Anẽ.

Jejus kôt mẽ pa xwỳnhjaja kot hkôt omunh o pa hã mẽ harẽnh

Matêwre 13.16-17

²³⁻²⁴ Nhũm pre Jejus ã Tĩrtũm mã amnhĩ jarẽnh anẽ hãmri nẽ hpãnhã hkôt mẽ pa ho mẽ pa xwỳnhjê mã kapẽr nẽ mẽ kãm:

—E na ka htem ixkôt mẽ ano ho ixte tanhmã amnhĩ nhĩpêx to hã ixpumunh o ri apa. Nẽ mẽ ajamak o ixkapẽr mar o ri ixkôt apa. No amnepêm mẽ akukamã pahijaja nẽ Tĩrtũm nhỹ hã kapẽr jarẽnh o ri mẽ pa xwỳnhjaja kãm ixpumunh prãm tỳx o pa htã mẽ akĩnhã ixpumunh kêt rãhã htyk pa. Kormã ixwryk nẽ jar ixkator kêt jakamã na prem ixpumunh kêt rãhã ty. Nẽ mẽ kãm ixkapẽr mar prãm tã mẽ akĩnhã ixkapẽr mar kêt nẽ. ãm mẽ kapxipixjaja na ka mẽ mỳr pẽ ixte amnhĩ nhĩpêx ã ixpumunh nẽ ixkapẽr mar o ixkôt apa. Tã mẽ kurom mẽ ate ano ho ixpumunh nẽ ajamak o ixkapẽr mar jakamã kwa mẽ ja hã amnhĩ pumu nẽ tãm amnhĩ nhĩpêx o akĩnh nẽ ri apa. Anẽ.

Samar nhõ xwỳnh jarẽnh

Matêwre 22.34-40; Makre 12.28-34; mãânẽn Wam Juãw 3.17-18

²⁵ Tã nhũm Tĩrtũm kapẽr tũm o mẽ ahkre o mẽ pa xwỳnhja Jejus wỳr tẽ nẽ hêx rom kot kamã hamak kaxyw kãm:

—Pa? E kwa inhmã mẽmoj jarẽ. Tanhmã kot paj we nhỹrmã Tĩrtũm ri ixtĩr tũm nẽ ixpa kaxyw amnhĩ nhĩpêx to wehe? Anẽ.

²⁶ Hãmri nhũm kãm:

—Tanhmã na ka hte Tĩrtũm kapẽr ã kagà htũm kot mẽ htĩr tũm nẽ pa hã kagà kamã harẽnh nẽ mar to? Anẽ.

²⁷ Hãmri nhũm kãm:

—Nà harẽnh kot:
Kêr ka mẽ anhĩ piitã ho amã Tĩrtũm kĩnh o ri apa. Mẽ amã hkĩnh tỳx o mẽmoj piitã hakrenh par o ri apa.

Nẽ kêr ka mẽ amã mẽ piitã hã ma ho te ka amã amnhĩ tã ma pyrãk o mẽ hipêx o ri apa. Jao tãm mẽ hipêx o ri apa. Anẽ.

Ã Tĩrtũm kapẽr ã kagà htũm kamã ja jarẽnh kot anhỹr. Anẽ.

²⁸ Hãmri nhũm Jejus kuma nẽ kãm:

—Tỳ. Nà ãm hãmri na ka harẽ. Kot kaj ã mẽ hipêx anhỹr o ri apa nẽ nhỹrmã Tĩrtũm mẽ wa ixri atĩr tũm nẽ apa ho apa. Anẽ.

²⁹ Hãmri nhũm kuma nom kãm mẽ piitã mẽ ho mex prãm kêt nẽ. ãm amnhĩ kwỳ pixjaja nhũm kãm mẽ ho mex o pa hprãm. Jakamã hêx rom kãm:

—Kwa no mẽmojaja kot pa we ri ã mẽ hipêx anhỹr o ri ixpa? Xà mẽ pahkwỳ pẽ Ijaew pixjaja nà? Anẽ.

³⁰ Hãmri nhũm kuma nẽ tanhmã kãm ujarẽnh to. Nom hã kuxi nẽ kãm awjarẽ nẽ kãm:

—E pa amã awjarẽ ka inhma. Kojã Ijaew nhõ xwỳnhja ma Jerujarẽ rũm Jeriko hwỳr ahpar mã ma mõi. Mõi nhũm ra mẽ ahkĩnh xwỳnhjaja kutã mra. Hãmri nẽ pry kahti ri hwỳr kato nẽ unẽ nẽ htak rax nẽ. Nẽ kệp ê hkwrỳnh pa nẽ ma kurũm hprõt nẽ mra nẽ akunok nhũm mẽ kot htak o hkà rênh rãhã ra htyk kaxyw nẽ nõ. ³¹ Hãmri nhũm patreja tẽ nẽ omu. No ãm omunh o hãnh tẽ nẽ hkupu nẽ ma tẽ. Uràk nẽ kệp Ijaew tã ãm omu nẽ tanhmã ho ajuta hto hkêt nẽ hãnh omunh o tẽ nẽ hkupu nẽ ma tẽ. ³² Hãmri nhũm patre ho ajuta xwỳnhja mãânẽn tẽ. Nẽ patre pyrã nẽ omu nẽ ãm omu nẽ hkupu nẽ ma tẽ. Uràk nẽ kệp Ijaew tã omu nẽ ãm omu nẽ hkupu nẽ ma tẽ.

³³ —Tã nhũm Samar nhõ xwỳnhja mãânẽn mõi. Samar nhõ xwỳnhjê mẽ Ijaew na prem kãm axpẽn kĩnh kêt tã nhũm mõi nẽ omu nẽ kamã ukapĩ nẽ. Kệp Ijaew ã omunh tã tee ri omu nẽ kamã ukapĩ nẽ. ³⁴ Hãmri nẽ hwỳr tẽ nẽ omu nẽ kãm mẽ kot htak o hkà rênh xà kane nẽ kãm hkupu pa. Hãmri nẽ kãnhmã ãm nẽ hkrit jumẽnre hã kumẽ nẽ ma nhỹri mẽ kot amnhĩm hikranh xà hã ixkre hwỳr o mõi nẽ hwỳr o pøj. Hãmri nẽ omunh mex o apkati. ³⁵ Hãmri nẽ akupỹm nojarêt nẽ kàxpore hkwy jamy nẽ o tẽ nẽ kot mẽ kãm õ xwỳnhja mã kugõ nẽ kãm: “E kot paj hãmri ma mõi. Ota ixkàxporeta. Kêr ka inhmã à xwỳnhhta

tānopxar mex nē. Nē inhmā omunh mex kê akupÿm mex. Koja kàxporeja apê grire hã kot paj nhÿrmã akupÿn mō nē axte hkôt amã hkwÿ gō.” Anhÿr o kãm kapêr nē ma akupÿm mō. Ā mẽ ujarênh kot anhÿr. Anē.

³⁶ Nhÿm pre ã Jejus kãm ujarênh anē. Hãmri nē kãm:

–E nhÿ na pre kãm mẽ kot htak xwÿnhhta kaprÿ ho te tãm kãm amnhÿ tã ma pyrãk wehe? Anē.

Hãmri nhÿm Tÿrtÿm kapêr tÿm o mẽ ahkre xwÿnhhta kãm:

–Nà kot kamã ukaprÿ xwÿnhhta na pre omu nē kamã ukaprÿ nē ho mex o te tãm kãm amnhÿ tã ma pyrãk o hipêx. Anē.

³⁷ Hãmri nhÿm Jejus kãm:

–Tÿ. Nà ãm hãmri na ka harē. Urãk nē kēp Ijaew kêt tã kamã ukaprÿ nē ho mex nē. Tã kêt ka urãk nē ã mẽ piitã mẽ hipêx anhÿr o ri apa. Urãk nē mẽ kēp akwÿ hkêt tã mẽ kamã axukaprÿ ho ri apa. Anē.

Jejus kot Matre mẽ Marir wa hwÿr mōr ã harênh

Rukre 12.29-31

³⁸ Tã nhÿm Jejus krÿ rÿm kato hãmri nē hkôt mẽ pa ho mẽ pa xwÿnhjê mẽ mẽ ma nhãm krÿ hō hwÿr mō. Mōō nē hwÿr pōj. Hãmri nhÿm Matre mẽ omu nē amnhÿ nhōrkwÿ hwÿr mẽ kuwÿ nhÿm mẽ ma hwÿr mō nē òrkwÿ hwÿr pōj. ³⁹ Hãmri nhÿm Jejus mẽ ahkre ho nhÿ nhÿm Matre htōx Marirja arÿ hpar pē mar o nhÿ. ⁴⁰ Hãmri nhÿm Matre mẽ hwÿr axã nē omu. Nē tee ri àpênh rax kukamã hamaxpêr nē Jejus wÿr tē nē kãm:

–Xê ma Pahihti. Kormã ixàpênh rax tã nhÿm Marir ixto ajuta hkêt nē. Ām akapêr pix mar gryk ã ixkôt htēm nē ixto ajuta hkêt nē. Pa ahte mẽ panhō hã ixàpênh o xa. Xà amã ja mex? Xê kãm anē kê tokyx ixkôt tē pa wa hã axkrut nē mẽ panhō hã ixàpênh tokyx anē. Anē.

⁴¹ Hãmri nhÿm tee ri kuma nē kãm:

–Kwa Matre. Na ka ãm mẽ panhō pix kukamã ri ajamxpêr nē gryk ã tee ri amnhÿ nhÿpêx. ⁴² ãm hãmri

na Marir kãm ixkapêr mar prãm nē. Jakamã kot paj ri amnhÿ nē akôt hanor kêt nē. Anē.

11

Mẽ pahte tanhmã Tÿrtÿm mã amnhÿ jarênh to hã mẽ pamã karō

Matêwre 6.9-13, 7.7-11

¹ Tã nhÿm apkati hō hã nhÿm Jejus nhÿri Tÿrtÿm mã amnhÿ jarênh o nhÿ. Nē kãm amnhÿ jarênh pa nhÿm hkôt mẽ pa ho mẽ pa xwÿnhjaja kot kãm amnhÿ jarênh ã omu nē hwÿr mra nē kãm:

–Kwa Pahihti. Amnhÿ pyrã nē mẽ ixte Tÿrtÿm mã amnhÿ jarênh kaxyw tanhmã mẽ ijahkre hto. Kêr pa mẽ apyrã nē tanhmã kãm amnhÿ jarênh to ho ri ixpa. Na pre finat Juãw Paxisja hkôt mẽ pa ho mẽ pa xwÿnhjê mã ja jahkre nhÿm mẽ kuma nē tãm kãm amnhÿ jarê. E kwa mẽ inhmã tanhmã ja jahkre hto nà? Anē.

² Hãmri nhÿm mẽ kãm:

–Tōe. Nà kêt ka mẽ kãm amnhÿ jarênh kaxyw nē mãmri amnhÿ krã hkôt tanhmã kãm amnhÿ jarênh to. Rÿ kãm amnhÿ jarênh o:

Pa Mēinhÿpêêxà maati? Nà amex o amex Tÿrtÿm.

Apê mẽ ijamãr mex xwÿnh maati na ka.

³ Nē kwa kêt ka apkati mẽ mẽ inhmã mẽmo gō pa mẽ akukwak ri ho ixàpkur o ri ixpa.

⁴ Nē na pa hte tōhã amnhÿ tomnuj nē Tÿrtÿm. Nom mẽ kot tanhmã ixtomnuj to xwÿnhjaja na pa hte ãm mẽ omu nē amnhÿ tã tanhmã mẽ ho hkêt nē. Nē ja ho ijamakêtkati kurê kumrêx. Ā na pa hte amnhÿ nhÿpêx anhÿr o ri ixpa.

Jakamã kwa kêt ka ja hã ixpumu nē ixpyrã nē ixte tanhmã amnhÿ tomnuj to hã ixpumu nē hã tanhmã ixto hkêt nē. Ām ho ajamakêtkati kurê kumrêx nē axte kãm ajamxpêr kêt nē.

Nē kot paj tanhmã amnhÿ tomnuj to kaxyw japêr ka ja hã ixpumu nē ixte ã amnhÿ nhÿpêx anhÿrja

nê ixto htỳx nê pa ja ho anhỳr kêt nê.
E ãm ja pix na hapêx. Anê.
E kêr ka mẽ ã Tĩrtũm mã amnhĩ jarênh anhỳr o ri apa. Anê.

Mẽ pahte amnhĩ to Tĩrtũm wỳr rãhã hã mẽ pamã karõ

Matêwre 7.7, 15.21-28; Makre 11.24; Rukre 18.1-8; Juãw 14.13-14; mããnêñ Rõmãn 12.12; Epes 6.18; Wam Tesarõn 5.17-18

⁵⁻⁶ Nhũm Jejus arĩ hkõt mẽ pa ho pa xwỳnhjê jahkre ho nhỹ nê mẽ kãm:

—Nê ja. Koja mẽ akràmnhwỳjê hõ. Nhũm kõt ã kamàt nhũm nhỹhỹnh awỳr mõn pøj. Ka anhõ mẽmoj kêt hãmri nê anhĩjuk ri akràmnhwỳ hwỳr tẽ. Hãmri nhũm ra amnhĩ tã kahê nê nõ. Ka tee ri omu hãmri nê hakwa krem xa nê kãm akapêr nê kãm: “Pa ixkràmnhwỳ. Na ka mẽ ra gõr? Kwa kànhmã nhỹ nê inhmã anhõ mẽmoj japêr. Na ra ham ixkràmnhwỳta mõn pøj. Nê kãm prãm tỳx nê mõ nom kaxyw inhõ hkêt. Kwa kànhmã nhỹ nê inhmã anhõ mẽmoj japêr nê inhmã hkwỳ pa ma o tẽ kẽ kukrê. ãm inhõ hkêt kumrêx. ãm hãmri na pa amã amnhĩ jarê. Kwa tokyj kànhmã nhỹ nê inhmã mẽmoj japêr nã?” Anhỳr o kãm akapêr. ⁷ Hãmri nhũm ama nom kãm kànhmã ỳr prãm kêt nê. Nê amã: “Tk. Nà ra mẽ ixte amnhĩ tã kahê hpar nê inhĩkwỳ kênã kot pa kêt kànhmã nhỹ nê amã mẽmoj japêr.” Anê. ⁸ Ka tee ri ama nê xatã kãm: “Kwa ã inhĩpêx anhỳr kêt nê ixkràmnhwỳ. Kwa tokyx.” Anhỳr o xa. Nê xatã kãm anojarêt o xa. Hãmri nhũm ra kãm amar kaga hãmri nê tã kànhmã nhỹ nê amã ate ho presija xwỳnhhta gõ. No ãm kệp akràmnhwỳ hã ate hã axàhwỳr tipxi hã amã òr kêt nê. ãm xatã ate ho presija htỳx xwỳnhja mã hamaxpêr nê tã kànhmã nhỹ nê amã kugõ. ã mẽ ujarênh kot anhỳr.

⁹⁻¹⁰ —Tã kêr ka mẽ ja pyrã nê amnhĩ to Tĩrtũm wỳr rãhã ho ri apa nhũm ama nê ate mẽmoj tã hwỳrta amã kugõ. ãm xatã ate hã axàhwỳr o ri apa nhũm amã kugõ. ãm mẽmoj to hwỳr rãhã ho ri apa nhũm ama hãmri

nê amã mẽmoj tanhmã hipêx to. Te ho mẽhõ kãm tep xành nê gõx kãm xatã tep rênh xà rênh o ãm pyrã nê xatã mẽmoj tã hwỳr o ri apa. Hãmri nhũm ama nê amã hprãm xwỳnhhta gõ. Te ho tep kanhêr xwỳnhhta tã kot tep ò kanhêr pyrãk o anhĩpêx nê amã mẽmoj prãm xwỳnhhta gõ. Anê.

Tĩrtũm kot hkrajê mã mẽmoj mex nhõr ã harênh

Makre 7.9-11

¹¹ Nhũm Jejus arĩ hkõt mẽ pa ho mẽ pa xwỳnhjê jahkre nê mẽ kãm:

—Nê xà koja akra kãm tep xành nê hã awỳ ka ama nê axtem nê kãm kagã xoprê hõ py nê agõ? ¹² Rỳ nhũm krãhyre gre hã awỳ ka axtem nê kãm makre hõ py nê agõ? Nà na ka htem ã akrajê nhĩpêx anhỳr kêt nê. Na ka htem mẽ kot mẽmoj tã àhwỳr xà hkõt kãm mẽmoj gõ. ¹³ Mẽ kamjaja mẽ ate amnhĩ tomnuj o ri apa htã ka htem akrajê ho mex o ri apa. Tã kaxkwa kamã Tĩrtũmja na hte mẽ pahto mex o mẽ ate mẽ akrajê ho mexta jakrenh. Kãm mẽ pajapê htỳx kõt na hte mẽ pamã mẽmoj mex nhõr o pa. Nê mããnêñ amnhĩ Karõja na hte mẽ pamã kugõ. Jakamã kot kaj mẽ atõ Karõ hã awỳ nhũm ama nê awỳr kumê nhũm wrỳ nê akarõ mã axà. ã na hte Tĩrtũm kãm mẽ pajapê xàj mẽ pamã mẽmoj mex nhõr o pa anê. Anê.

Jejus mẽ Satanasti wa harênh

Matêwre 12.22-32; Makre 3.20-30

¹⁴ Tã nhũm Jejus nhỹri axte mẽhõ nê mẽkarõmnuti kator. Na pre ra mẽkarõmnuti tanhmã ho nhũm kapêr kêt nê pa. Hãmri nhũm Jejus omu nê nê kator nhũm akupỹm kapêr mex nê. Nhũm mẽ piitã amnhĩ jaêr pẽ omu nê no hawênh rũnh nê omunh o kuhê. ¹⁵ Nom nhũm mẽ hkwỳjaja Jejus kot ã hipêx anhỳr ã omu nê htỳx ho kệp mẽkarõmnuti hkwỳ hã hkamnhĩx nê xapêñ mã harênh o:

—Tk pêr hinhu nhĩkõoti nhỹ hã na hte mẽ nê amnhĩ kwỳjê japõx o pa. Anê.

Hinhu nhĩkõoti nhĩxi hõ pẽ Satanasti nhũm prem Satanasti nhỹ hã

Jejus kot ã amnhĩ nhĩpêx anhÿr o pa hã hkamnhĩx. ¹⁶ Jakamã nhũm mẽ hkwyjaja hwÿr mra nẽ kãm:

—Kwa mẽ inhmã aa mẽ ixte mẽmoj pumunh kêt õ ho anẽ. Pa mẽ omu nẽ ate Tirtũm nhÿ hã tanhmã amnhĩ nhĩpêx to ho apa hã apumunh kurê kumrêx. Anẽ.

Nom hêx rom mẽ kot kamã hamak kaxyw ã kãm kapêr anẽ. ¹⁷ Nhũm ra Jejus mẽ hamaxpêr kôt mẽ omunh mex jakamã mẽ kapêr ma nẽ mẽ kãm:

—Kwa mẽ inhma mẽ ate ixpê Satanasti hkwy hã ixkamnhĩx xwÿnhjaja. Koja pika nhõ xwÿnhjaja xpên kutã amnhĩ xunhwÿ nẽ axpu hãmri nẽ angrã nẽ ma ahpÿnhã ri pa. Hãmri nẽ amnhĩ krã hkôt ri tanhmã amnhĩ to ho ri pa. Jakamã nhũm mẽ õ pahi mẽ hamãr o pa hkêt nẽ. Rÿ koja krĩ nhõ xwÿnhjaja. Mẽ kot xpên to hkwy xwÿnhjaja mẽmoj tã xpên kãm gryk nẽ axpên kutã amnhĩ xunhwÿ hãmri nẽ axpên pẽ angrã nẽ ahpÿnhã pa hãmri nhũm mẽ õ pahi tee ri kãm mẽ hamãr o pa hprãm. Mo õ krĩ kamã mẽ hkwy kot ri mẽ hamãr o pa? No na pre mẽ õ pahi tãm amnhĩ nẽ mẽ hanor kêt nẽ.

¹⁸—Tã ja pyrã nẽ ixte Satanasti nhÿ hã tanhmã amnhĩ nhĩpêx to ho ixpa ronhÿx pa mẽ nẽ amnhĩ kwÿjê janor o ri ixpa hkêt nẽ. Nhÿx Satanasti ixte mẽ nẽ mẽ hanor kaxyw tanhmã inhmã nẽ hkêt nẽ.

¹⁹—No kêt mẽ akwÿjaja? Xà Satanasti nhÿ hã na htem mẽ nẽ mẽ hapôx o pa nã? Kêp apu pa ixte ÿ hã mẽ nẽ mẽ hapôx ronhÿx mẽ akwÿjaja ixpyrà nẽ ÿ hã mẽ nẽ mẽ hapôx o pa. Nã Tirtũm nhÿ hã mẽ ixte mẽ nẽ mẽ hapôx o mẽ ixpa kênã. Jakamã ã mẽ ate ijarênh anhÿr o apaja mex kêt. ²⁰ Tirtũm Karõ nhÿ hã ixte mẽ nẽ mẽ hapôx o ri ixpa kênã. Jakamã kwa mẽ ja hã ixpumu nẽ Tirtũm kot ixte mẽ ato amnhĩptar kaxyw mẽ awÿr inhmênh kôt ixpumunh kurê kumrêx kêt wehe. Pa na ka htem ixkamã ajamak o apa.

²¹⁻²²—Satanastija àhpumunh tÿx jakamã na htem tee ri kêp mẽ kot

hkôt amnhĩ xunhwÿr xwÿnhjê pytar kaxyw nhũm mẽ nẽ mẽ omunh mex nẽ. Nom ixàhpumunh tÿx o ixte Satanasti jakrenh jakamã pa na pa hte kêp mẽ utã nhũm mẽ hpãnhã ixkôt ri amnhĩ nhĩpêx.

²³—Mẽ amã ixkapêr mar prãm tã na ka mẽ kormã ixkôt amnhĩ xunhwÿr kêt nẽ. Kwa wem ma amnhĩ to amõr gri nẽ tokyx ixkôt amnhĩ xunhwÿ kêt wehe. Kot kaj mẽ anhÿr kêt nẽ hãmri nẽ te mẽ ate ixkutã amnhĩ xunhwÿr xwÿnh pyrãk o amnhĩ nhĩpêx. ²⁴ Mẽ ate ixkôt amnhĩ xunhwÿr kêt xwÿnhjaja te mẽ ate mẽhõ nẽ mẽkarõmnuti japôx xwÿnh pyrãk. Nhũm te kêp kator nẽ ma mõ nẽ nhÿri amgrã kamã ri pa. Nhũm ja kêp omnuj nhũm tee ri kamã nhÿri hkôkôt xã japêr o pa. Nom tee ri hapêr o pa nẽ hamaxpêr o: “E kot paj ma akupÿm mẽ kot nẽ ixkator xwÿnhnta wÿr tẽ nẽ hwÿr axã nẽ hkôt mãn ixpa.” Anẽ. ²⁵ Hãmri nẽ ma akupÿm hwÿr tẽ. Nom kormã akupÿm hwÿr àr kêt ri nhũm kamã amrakati nẽ pa. ²⁶ Jakamã nhũm ma akupÿm hwÿr tẽn axã. Nom ahte àr kêt nẽ. Ra amnhĩ kôt amnhĩ kwÿjê ho 7 nẽ hwÿr mẽ ho agjê. Nẽ hwÿr gjêx pa. Mẽ kêp 7jaja nẽ wamta mẽ nhũm mẽ piitã hwÿr gjêx pa. No mẽ kêp 7jaja omnuj tÿx o kot wamta jakrenh jakamã nhũm mẽ kot hwÿr gjêx xwÿnhnta mẽ ÿ hã amnhĩ tomnuj tÿx o pa. Oprê htÿx nẽ. Wam pyxire nẽ kot hwÿr àr nhÿ hã amnhĩ tomnuj o ri pa nom ãm kawax pẽ oprê. Tã axte hwÿr mẽ ohtô nẽ gjêxta nhÿ hã oprê htÿx kumrêx. Ja pyrã nẽ kot kaj mẽ tokyx ixkôt amnhĩ xunhwÿr kêt nẽ hãmri nẽ ãm amnhĩ tomnuj tÿx pix o ri apa. Anẽ.

Mẽ hkĩnh nẽ mẽ pa xwÿnhjê jarênh Rukre 8.19-21

²⁷ Nhũm pre ã Jejus mẽ ahkre anẽ nhũm mẽhõ nija kuma nẽ kãm:

—Hêxta gòa nẽ. Mãn akatorxã ã ate amnhĩ nhĩpêx anhÿr o apa hã apumu nẽ hkĩnh nẽ. Anẽ.

²⁸ Hãmri nhũm kãm:

—Tỳ. Nà kot anhÿr kênã. Nom kot ka mẽ atõ Tirtũm kapêr ma nê hkõt amnhĩ nhĩpêx hãmri nê akĩnh rax o ixkatorxà kot ixpumunh nê hkĩnh ta jakre. Anê.

Jejus kot tanhmã Jõhti jarênh to Matêwre 12.38-42; Makre 8.12

²⁹ Tã nhũm mẽ ohtõ nê Jejus ã akuprõ nê mẽmoj tã kuwỳ nê kãm:

—Pa. Kwa mẽ inhmã aa mẽ ixte mẽmoj pumunh kêt õ ho anê pa mẽ omu. Anê.

Hãmri nhũm mẽ kuma nê mẽ kãm:

—Tk. Kwa mẽ ajamaxpêr punuj pix o na ka htem ri ajamaxpêr o apa. Ixpê Tirtũm kot mẽ awỳr inhmênh xwỳnh tã ka mẽ ja hã ixkõt ajamaxpêr kêt nê. Tã mẽ ate aa mẽmoj pumunh kêt kwỳ ixte mẽ amã ho anhÿr kaxyw hã inhmã karõ. Nà kot paj kormã mẽ amã ho anhÿr kêt nê. Kot paj nhÿrmã te amnepêm finat Jõhti kot amnhĩ nhĩpêx pyrãk o amnhĩ nhĩpêx ka mẽ hã ijarênh ma nê kormã ja hã ixpumu. ³⁰ Tirtũm nhÿ hã kapêr xwỳnh pê Jõhtija amnepêm na pre tep rax kukrê. Tã nom nhũm htĩr rãhã õxàhkre rũm kato nhũm mẽ omu nê Tirtũm kot mẽ hwỳr mẽnh ã omu. Tã kot paj nhÿrmã Jõhti pyrã nê tanhmã amnhĩ nhĩpêx to nhũm mẽ ja hã ixpumu nê Tirtũm kot mẽ awỳr inhmênh xwỳnh ã ixpumunh kurê kumrêx.

³¹ —Nê koja nhÿrmã Tirtũm akupỳm mẽ htyk nê mẽ hikwỳ xwỳnh piitã akupỳm mẽ ho htĩr hãmri nhũm mẽ piitã Inhipeêxà mẽ wa ixkutã hkrĩ. Pa wa mẽ piitã tanhmã mẽ harênh to. Tirtũm mẽ wa ixkuri mẽ htĩr tũm nê mẽ pa ho mẽ pa mã xwỳnh ã mẽ hkwyjê jarê. Nê wa ixkuri mẽ pa ho mẽ pa hkêt xwỳnhjê jarê. Mẽ piitã ã mẽ harênh anê. Amarĩ mẽ pa xwỳnhjaja nê mẽ õ pahijaja. Hãmri nhũm sur kãm mẽ õ pahi niti Tirtũm mã tanhmã amnhĩ jarênh to hãmri nê hpãnhã tanhmã mẽ ajarênh to nê kãm mẽ ajarênh o: “Na pa pre inhmã pahi Sarumãw kot anhÿ hã àhpumunh tỳx ã harênh ma hãmri nê inhmã mar prãm xàj ma awry hã õ pika hwỳr

ixpa nê omu nê kapêr ma. Hãmri nê ma akupỳm inhõ pika hwỳr ixpa nê ixkwỳjê mã àhpumunh tỳx ã harênh o ixpa. Tã Akra Jejus na àhpumunh tỳx o pahi Sarumãw jakrenh tã or war akutã mẽ hkrĩ xwỳnh kwỳ mũj na prem kapêr ma no ãm ixkĩnhã kãm mar prãm kêt nê. Na prem kuma nê ãm kuma.” Anhÿr o wa inhmã mẽ ajarê. Hãmri nê ja hã mẽ amã akir ka mẽ tee ri mar o akrĩ nê amnhĩ kamã agryk o akrĩ.

³² —Hãmri nhũm hpãnhã Nĩnĩwe nhõ xwỳnhjaja wa inhmã tanhmã amnhĩ jarênh to. Jõhti kot mẽ hwỳr mõi nê mẽ kãm Tirtũm kapêr jarênh o pa xwỳnhjaja nhũm mẽ tanhmã wa inhmã amnhĩ jarênh to. Hãmri nê pahi nita pyrã nê wa inhmã tanhmã mẽ ajarênh to nê wa inhmã: “Na pre Jõhti man mẽ inhõ krĩ hwỳr mõi nê mẽ inhmã akapêr jarênh o ri mẽ ixkõt pa. Pa prem kuma nê mẽ ixte amnhĩ tomnuj kaga nê akõt amnhĩ xunhwỳr kurê kumrêx Tirtũm. Nom or war akutã mẽ hkrĩ xwỳnh kwỳ mũj na pre Akra Jejus tãm mẽ hwỳr mõi nê mẽ kãm kapêr o ri mẽ hkõt pa nhũm prem kuma no ãm mẽ ixkĩnhã amnhĩ tomnuj kaga nê hkõt amnhĩ xunhwỳr kêt nê. Mẽ kot Akra mar tã amnhĩ kaxyw kãm hamaxpêr kêt nê.” Anhÿr o koja mẽ wa inhmã mẽ ajarê ka mẽ tee ri mẽ ama nê amnhĩ kamã agryk tỳx nê. Jakamã e kwa ixte mẽ amã ã ixkapêr anhÿrja ma nê kãm ajamaxpêr tỳx rãhã ho ri apa. Anê.

Mẽ pajamaxpêr mex te kot kanê hpôk mex pyrãk ã harênh

Matêwre 5.15, 6.22-23

³³ Nhũm Jejus arĩ mẽ ahkre ho nhÿ nê mẽ kãm:

—Xà na htem kanê hpôk nê poti ho hpro? Nà na htem ho anhÿr kêt nê. Na htem hpôk nê kỳx pê mẽmoj nhĩmõk ã unhwỳ nhũm mẽ piitã mẽ kãm hirã mex nhũm htem ixkrem agjê nê hirã kamã mẽmoj pumunh mex o mra. ³⁴ Ja pyrã nê kot ka mẽ atõ ixkapêr ma nê ixkõt amnhĩ nhĩpêx nê tãm amnhĩ nhĩpêx o ri apa. Nê tãm mẽ hipêx o ri apa. Jao te hirã kamã mẽ

rīt mex xwýnhjaja kot amnhĩ nhĩpêx pyrək. Nom koja mēhō inhma nē ām inhma nē ixkwým ri tanhmā amnhĩ nhĩpêx to ho pa. Jao te kamət kō kamā mē rīt mex kêt xwýnhjaja kot htýx amnhĩ nhĩpêx o pa pyrək o amnhĩ nhĩpêx.

³⁵ –E kêt ka mē ā amnhĩ nhĩpêx anhýr pymaj ixkapêr ma nē kām ajamaxpêr týx rāhā ho ri apa. ³⁶ Kot kaj mē ixkapêr ma nē ixkôt amnhĩ nhĩpêx. Hāmri nē te mē ate kanê hpók mex nhĩrā kamā ri apa pyrək o amnhĩ nhĩpêx. Jao aprĩ hā ixkapêr ma nē aprĩ hā ixte tanhmā amnhĩ nhĩpêx to hā ixpumunh mex nē. Anē.

Jejus kot tanhmā Parijew nhō xwýnhjê jarēnh to

Matêwre 23.25-26

³⁷ Tā nhūm Jejus ra mē ahkre pa. Hāmri nhūm Parijew nhō xwýnhja hwýr tē nē kām:

–Pa. E kwa ma ixkôt tē nē mē ixkutā apku. Anē.

Hāmri nhūm kuma nē kām:

–Tōe. Nà kot paj ma akôt tē. Anē

Hāmri nē ma hkôt tē nē ōrkwý hwýr axà nē apkur kaxyw mē ìhkō hā nhý. ³⁸ No ām mē hkukamā mē hpāmjê pyrà nē amnhĩ nhĩhkra kuhōnh ryy hkêt nē. Ām amnhĩ nhĩhkra htyk pix kuhōnh tokyx anē nē nhý. Nē ō prat kuhōnh ryy hkêt rāhā apkur kaxyw nhý. Jakamā nhūm kot amnhĩ kôt hwýr xwýnhhta tee ri ja hā omu nē hamaxpêr o:

–Tk. Kwa na hte mē ixte amnhĩ nhĩpêx kôt amnhĩ nhĩpêx mex kêt nē.

³⁹ Anē nhūm Jejus amnhĩ tā hamaxpêr ā omu nē kām:

–Nā mē apê Parijew nhō xwýnhjaja te mē ate mē kot apkur kaxyw prat kre kuhōnh punuj tā mex ā harēnh pyrək o amnhĩ nhĩpêx. Nē ām mē akrā hkà rūm pix mā na mē amex. Nē mē noo mā te mē amex pyrək no ām mē anhōxàhkre kaxwýnh kām mē ajamaxpêr mex kêt. Ām mē akapêr prām. Nē mē axàhkurêê. Nē mē anhōxyý. ⁴⁰ Mē ate atýx ri amnhĩ nhĩpêx o ri mē apa xwýnh kēnā. Kwa kêt ka mē ām

akrāhkà pix rūm amex nē ri apa hkêt nē. Mē mēānēn anhōxàhkre kaxwýnh kām ajamaxpêr mex o ri apa. Nē tām mē piitā mē hipêx o ri apa. ⁴¹ Kêt ka mē tām ajamaxpêr o tām mē hipêx o ri apa. Nē axāmnhĩx ri mē kêp amrakati xwýnhjê mā mēmoj nhōr o ri apa. Kot kaj mē ā amnhĩ nhĩpêx anē hāmri nhūm Tirtūm ja hā mē apumu nē amnhĩm mē amex ā mē ajarē. No na ka htem mē amā mē amnhĩ to mex prām xāj tee ri amnhĩ kuhōnh japjê kapry. Anē.

Jejus kot Parijew nhō xwýnhjaja mex kêt kukamā mē harēnh

Matêwre 23.4, 23.7, 23.13-24, 23.27-38; Makre 12.38-39

⁴² Nhūm Jejus arĩ Parijew nhō xwýnhjê jahkre nē mē kām:

–Kwa mē okora Parijew nhō xwýnhjaja. Kot kaj mē amex kêt nē. Na ka htem Tirtūm kapêr piitā hkôt amnhĩ nhĩpêx o apa hkêt nē ām hkwý kôt pix mā amnhĩ nhĩpêx o ri apa. Nē ām kapêr o hpýnhre nē hkôt amnhĩ nhĩpêx hāmri nē hā amnhĩ pumu nē ate amnhĩ to mex xwýnh ā amnhĩ to jarkrar o ri apa. Nom Tirtūm kām hprām xà piitā hkôt amnhĩ nhĩpêx hkêt nē. Mē ate tām mē piitā mē hipêx o ri apa hā kot mē amā karōja. Nē mē amā Tirtūm kīnh ā kapêr kôt amnhĩ nhĩpêx o ri apa hā karōja mē ate mar mex tā hkôt amnhĩ nhĩpêx kêt nē. Mē ate kapêr piitā hkôt amnhĩ nhĩpêx ronhýx ja mē amā mex kumrêx.

⁴³ –Kwa mē o kora. Mē piitā mē kot amnhĩm mē ate amnhĩ to rūnh xwýnh ā amnhĩm mē ajarēnhja na mē amā hprām. Nē mē piitā mē kot amnhĩm mē apê mē ahkre mex xwýnh maati hā mē ajarēnhja na mē amā hprām.

⁴⁴ –Kwa mē o kora. Kot ka mē amex kêt nē. Mē kot mē akapêr mar nē mē akôt amnhĩ nhĩpêx xwýnhjaja te mē kot htýx ri mē hā pika nhĩmōk ā ri mē pa xwýnh kot amnhĩ nhĩpêx pyrək. Jao mē ate amnhĩ to mex ā amnhĩ kamnhĩx nom mē ate amnhĩ to mex kêt. Te mē kot pika mex ā hkamnhĩx nē htýx ri mē hā pika nhĩmōk ā ri mē

pata pyrək o na htem amnhĩ nhĩpêx. Anê.

Nhũm pre ã Jejus Parijew nhõ xwýnhjê mã mẽ kot amnhĩ nhĩpêx jarênh anê.

Jejus kot Tirtũm kapêr tũm o mẽ ahkre xwýnhjê mã kapêr

Matêwre 23.1-4, 23.13, 23.29-36

⁴⁵ Hãmri nhũm Tirtũm kapêr tũm o mẽ ahkre ho pa xwýnhja kuma nê kãnhmã xa nê kãm:

—Kwa na ka ã Parijew nhõ xwýnhjê jarênh punuj anhỹr jao mããnên ã mẽ paja jarênh anê nà? Mẽ ixte amnhĩ nhĩpêxja ãm tipxi kênã. Anê.

⁴⁶ Hãmri nhũm kãm:

—Tỳ. Mããnên mẽ kajaja. Kwa o kora mẽ apê Tirtũm kapêr tũm o mẽ ahkre xwýnhjaja. Kot kaj mẽ urək nê amex kêt nê. Na ka htem mẽ kãm mẽmoj tã karõ ho ri apa nê mẽ kãm: “E kêt ka mẽ ã amnhĩ nhĩpêx anê nê ã amnhĩ nhĩpêx anê.” Anhỹr tã no ãm mẽ kajaja amnhĩ kapêrja kôt amnhĩ nhĩpêx kêt nê. Te mẽ ate mẽhõ kot mẽ katut ã mẽ kãm mẽ jênh pytĩ janhõr tã mẽ ho ajuta nê hkwý htur kêtta pyrək o na ka htem amnhĩ nhĩpêx o ri apa.

⁴⁷⁻⁴⁹ —Na pre Tirtũm amnepê m mẽ pahpãmje hkukamã tanhmã mẽ harênh to. àhpumunh tỳx xà hkôt tanhmã mẽ hkukamã mẽ harênh to nê mẽ harênh o: “Kot paj ma mẽ hwýr inhỹ hã ixkapêr jarênh xwýnhjê rê. Nom koja mẽ omu nê ãm mẽ omu nê kêp mẽ hprãm nõkati nê tanhmã mẽ hipêx to ho pa. Nê ixpê mẽ hkwýjê hpar o pa. ã koja mẽ inhỹ hã ixkapêr jarênh xwýnhjê nhĩpêx anê.” Anhỹr o mẽ hkukamã mẽ harê. Tã ã mẽ harênh anhỹr xà hkôt nhũm prem ã mẽ hipêx anê nê mẽ hkwýjê hpa nê mẽ hkwýjê pynê nê mẽ hagjê.

—Amnepê mẽ akukamã mẽ kot ã mẽ hipêx anhỹr nhũm mẽ ate mẽ ano ho ja hã mẽ omunh kêt tã ka htem arĩ mẽ hã pika ho mex o ri apa. Te mẽ amã mẽ hapê nê mẽ ho ajamak pyrã nê mẽ hã pika ho mex o ri apa. Nom mẽ amã mẽ hapê hã ho mex hkêt nê. ãm ra mẽ htyk nê hapêx nê mẽ amã Tirtũm kapêr jarênh o pa hkêtja ã na

ka htem akĩnh nê ã axêx rom mẽ hã pika ho mex anhỹr o ri apa.

⁵⁰⁻⁵¹ —Na prem Tirtũm nhỹ hã kapêr jarênh o mẽ pa xwýnhjê nhĩmex rax nê. Amnepê m panhĩ kator krax rũm finat Atãw kra finat Apewja na pre Tirtũm nhỹ hã kapêr o pa nhũm htõ kãm mar prãm kêt nê kupĩ. Tã nhũm Tirtũm axte mẽ hwýr ý hã kapêr jarênh o mẽ pa xwýnh kwýjê rê nhũm prem mã mẽ ho anê nê mẽ hkwýjê nhĩmex. Nhũm pre xatã mẽ hwýr mẽ hkwýjê rê nhũm mẽ xatã mẽ kupa. ã Apew rũm finat Jakaris wýr na prem mẽ himex rax anê. Nê hpãnhã Jakarisja nhũm prem Tirtũm mã amnhĩ jarênh xà hã ixkre kamã kupĩ. Tã ka mẽ ajaxwýja amã Tirtũm kapêr mar prãm kêt nê mẽ urək nê amã ý hã kapêr jarênh o mẽ pa xwýnhjê nhĩmex prãm. Tã ã mẽ pahpãmje mẽ ato hpimràatã mẽ ate mẽ hipêx anhỹrja mýrapê koja Tirtũm ja hã mẽ apê mẽ hkanrêhã mẽ htãmnhwýjaja tanhmã mẽ ato htỳx to ka mẽ amnhĩ xà htỳx kamã ajamak o ri apa rãhã nê kãm ga.

⁵² —Jakamã kwa mẽ o kora mẽ apê Tirtũm kapêr tũm o mẽ ahkre xwýnhjaja. Mẽ ajaxwýja na ka htem Parijew nhõ xwýnhjê pyrã nê Tirtũm kapêr o mẽ ahkre ho apa. Nê aprĩ hã mar mex tã no ãm amnhĩ kaxyw hkôt ajamaxpêr nê hkôt amnhĩ nhĩpêx kêt nê. Hãmri nê mẽ kot mẽ amar o pa xwýnhjê mã atỳx ri tanhmã mẽ ahkre hto nhũm htem mẽ ama nê mẽ apyrã nê amnhĩ kaxyw Tirtũm kôt hamaxpêr nê hkôt amnhĩ nhĩpêx kêt nê. Mẽ kãm hprĩ hã kapêr mar mex prãm tã mẽ amar xà hkôt mẽ ate amnhĩ nhĩpêx pyrək o amnhĩ nhĩpêx o pa. Nom mẽ kajaja na ka htem mẽ kãm mẽ hamaxpêr mex nhõr kêtja mýrapê nhũm htem ã amnhĩ nhĩpêx anhỹr o pa. Jakamã kwa mẽ o kora kot kaj mẽ amex kêt nê. Anê.

Nhũm pre ã Jejus mẽ kãm kapêr anê. ⁵³⁻⁵⁴ Hãmri nê kato nê ma tẽ. Nhũm Tirtũm kapêr tũm o mẽ ahkre ho mẽ pa xwýnhjê mẽ Parijew nhõ xwýnhjaja hãmri kot tanhmã mẽ kãm

kapër toja ma nê kamã gryk tỳx nê. Jakamã ma hkôt mra. Hêx rom mẽmoj tã hkukjêr o hkôt mra. Nê hã hkukjêr kãm hihtỳx o hkôt mra. Kot tanhmã mẽ kãm ujarênh to nhũm mẽ kot mar nê ra hã àmnênh kaxyw ma hkôt àhkukjêr o mra.

12

Mẽ pahte Tirtũm pẽ mẽ pajamaxpêr punuj o pahpimxur kêt

Matêwre 10.26-33

¹⁻³ Tã nhũm mẽ Jesus ã htu rax kumrêx nê hã axpên nhĩgãnh o kuhê. No nhũm kormã mẽ kãm tanhmã kapêr to hkêt nê. ãm kormã hkôt mẽ pa ho mẽ pa xwỳnhjê kumrêx mã kapêr nê mẽ kãm:

—Mẽ piitã kãm amnhĩ kwỳjê pẽ hamaxpêr punuj o hpimxur hprãm tã koja nhỹrmã mẽ hamaxpêr piitã amnhĩrít pa. Nê mẽmoj piitã ra hpimxur mex tã koja nhỹrmã piitã amnhĩrít pa. Nê mẽ kot kamàt kô kamã hpimxur pẽ mẽmoj jarênh tã koja mẽ piitã nhỹrmã kot mẽmoj jarênh ta ma. Nê mẽ kot hitom kãm kawax pẽ axpên mã mẽmoj punuj jarênh tã koja nhỹrmã mẽ piitã mẽmoj jarênh ta ma. Jakamã kwa kêr ka mẽ tanhmã Parijew nhõ xwỳnhjaja kot amnhĩ nhĩpêx to ho pa hã mẽ omu nê ãm mẽ omu nê mẽ hkôt amnhĩ nhĩpêx kêt nê. Te mẽ kot tãm amnhĩ nhĩpêx pyrãk o amnhĩ nhĩpêx tã no ãm tãm amnhĩ nhĩpêx o pa hkêt. Na htem ãm htỳx ri tanhmã amnhĩ to hêx to ho pa. Tã kêr ka mẽ urãk nê ã amnhĩ nhĩpêx anhỹr kêt nê. Anê.

Mẽ pahte pahkwỳjê pumaj Tirtũm kaga hkêt ã mẽ pamã karõ

Matêwre 10.28-31

⁴ Nhũm Jesus arĩ hkôt mẽ pa ho mẽ pa xwỳnhjê mã kapêr nê mẽ kãm:

—E ixkrãmnhwỳjaja. Kêr ka mẽ amã akwỳjê puma rỳ nhãm mẽ hkwỳjê puma ho ri apa hkêt nê. Koja mẽ apar tã ãm mẽ anhĩ pix pa nom tanhmã mẽ akarõ hto hkêt nê. ⁵ Tirtũmja tapxipix na hte mẽ ì nê mẽ hkarõ ho hpimràatã mẽ kot amnhĩ xà htỳx kamã

hamak tũm xà hwỳr mẽ kurê. Tã kêr ka mẽ ja pumaj Tirtũm kapêr kwỳm tanhmã ri amnhĩ nhĩpêx to ho apa hkêt nê.

⁶⁻⁷ —Nê Tirtũm kot mẽ pahto hapêx par pumunh tã mãnên kot mẽ pajamãr pumunh mex. Mãn ka htem kuwênhre pumu. Na hte Tirtũm hamãr mex o pa. Mẽ piitã mẽ kot ãm kuwênhre pumunh o pa htã nhũm Tirtũm mẽ kurom hamãr mex o pa. Nê htãnopxar rãhã ho pa. Nom kãm mẽ pajapê htỳx o kuwênhre jakrenh jakamã kwa mẽ tee ri amnhĩ kukamã ajamaxpêr o ri akaprĩ nê apa hkêt nê. Koja Tirtũm mẽ pahtãnopxar rãhã ho pa. Ra kot tanhmã mẽ pakute hã mẽ pahpumunh par. Nê ahpỳnhã tanhmã mẽ pahkrã hkĩ kute hkôt mẽ pahpumunh par. Tã kot mẽ pahtãnopxar rãhã jakamã mo kaxyw kot kaj kêt mẽ ri amã mēhõ puma ho ri apa?

⁸ —Jakamã kwa mẽ mãmrĩ mẽ kãm mẽ apê ixkra hã amnhĩ jarênh o ri apa nê amã mẽ uma xàj tee ri amnhĩ nhĩpêx o ri apa hkêt nê. Kot ka mẽ kãm ra mẽ ate ixkôt amnhĩ xunhwỳr ã amnhĩ jarê. Pa ja hã mẽ apumu hãmri nê mẽ apyrã nê kaxkwa kamã Tirtũm kapêr o mẽ wrỳk xwỳnhjê mã ra mẽ ate ixkôt amnhĩ xunhwỳr ã mẽ ajarê.

⁹ Nom kot ka mẽ kot ixtã tanhmã mẽ ato pymaj apê ixkwỳ hã amnhĩ jarênh kêt japêr. Pa ja hã mẽ apumu hãmri nê nhỹrmã amnhĩ xwar mẽ kãm mẽ apê ixkwỳ hkêt ã mẽ ajarê. Jakamã kwa mẽ mãmrĩ mẽ kãm apê ixkwỳ hã amnhĩ jarênh o ri mẽ hkôt apa kê mẽ ama nê tanhmã inhmã hamaxpêr to.

¹⁰ Koja mẽ ama nê ãm ama nê kãm ixprãm kêt japêr. Hãmri nhũm Tirtũm ixtã mẽ omu nom tokyx ixtã tanhmã mẽ ho hkêt nê. Koja kormã amnhĩ tã mẽ hamãr o pa. Karõ kot axte mẽ kãm ijarênh o amnhĩrít nhũm mẽ hkwỳjaja kot mar nê kãm ixprãm nê ixkôt amnhĩ xunhwỳr kaxyw nhũm kormã amnhĩ tã mẽ hamãr o pa. Nom koja Karõ xatã mẽ kãm ixto amnhĩrít tã nhũm mẽ kuma nê ãm kuma nê te mẽ kot kêp amnhĩ jamak pro pyrãk o

amnhĩ nhĩpêx o pa. Jao Karō hã hpi-jaàm kêt mýrapê koja Tĩrtũm nhỹrmã amnhĩ xwar te kot mẽ kêp amnhĩ jamak pro pyrək o mẽ hipêx nhũm mẽ tee kãm amnhĩ kaprĩ kaprỹ. Hãmri nẽ amnhĩ xà htýx kamã hamak tũm xàta wýr ma pa nẽ kamã pa ho pa. Jakamã kwa mẽ mãmri mẽ kãm mẽ apê ixkra hã amnhĩ jarēnh o ri mẽ hkôt apa nẽ tanhmã mẽ kãm ijarēnh to ho ri apa. ¹¹ Koja mẽ ama nẽ kãm mẽ amar prãm kêt japêr hãmri nẽ ixtã mẽ apynê nẽ tanhmã mẽ anhĩpêx to kaxyw. Nẽ Ijaew nhõ Tĩrtũm kapêr o mẽ ahkre xà hã ixkre hwýr mẽ ato mrrar japêr. Rý mẽ õ pahi hwýr mẽ ato mrrar nẽ tanhmã kãm mẽ ato hêx to. Nom kër ka mẽ mẽ kãm amnhĩ jarēnh kaxyw nẽ tee ri amnhĩ kukamã ajamaxpêr o amã mẽ uma kêt nẽ. ¹² Koja Tĩrtũm Karō ja kaxyw mẽ amã mẽ ajamaxpêr mex gõ hãmri ka mẽ õ ri mẽ kãm amnhĩ jarē. Jakamã kwa mẽ tee ri mẽ kãm amnhĩ jarēnh kukamã ajamaxpêr o ri mẽ amã mẽ uma ho apa hkêt nẽ. Anẽ.

Mẽ hikukrêx rũnh pix kukamã hamaxpêr xwýnhjê jarēnh

Wam Ximotre 6.9-10; Xiakre 4.13-17, 5.1-6

¹³ Nhũm Jejus arĩ mẽ ahkre o xa nhũm mẽ mar o kuhê. Rôm nhũm mēhõ myja hwýr tẽ nẽ kãm kapêr nẽ kãm:

—Pa? Kwa ot pa awýr amã mẽmoj jarēnh mã tẽ. Na pre inhĩpêxà ty nhũm ixtõ ixrom amnhĩm õ mẽmoj piitã ho àrĩk pa. Õ pika nẽ hkrit nẽ hikukrêx nẽ ãm mẽmoj piitã ho àrĩk par kumrêx. Kwa ma ixkôt tẽ nẽ kãm anẽ pa wa amnhĩm ho axkjê nà? Anẽ.

¹⁴ Hãmri nhũm kuma nẽ kãm:

—Tk. Kokỹ. Na pa pre mẽ amã mẽ mẽmoj to ixpikjêr kaxyw mẽ awýr ixwryk kêt nẽ. Anẽ.

¹⁵ Hãmri nẽ mẽ kot mar o kuhê xwýnhjê piitã mẽ kãm kapêr nẽ mẽ kãm:

—Kwa kër ka mẽ amã anhõ mẽmoj rũnh prãm o ri apa hkêt nẽ. Na htem mẽmoj rũnh kukwak ri Tĩrtũm wýr apir kêt nẽ. Mẽmojta kêp pika pix nhõ xwýnh na.

¹⁶ Anhýr o mẽ kãm kapêr hãmri nẽ mẽ kãm awjarê. Mẽ hkukrêx rax ã kuxi nẽ mẽ kãm awjarê nẽ mẽ kãm:

—Nà koja mēhõ õ mẽmoj rax nẽ. Nẽ hpur kãm õ rax nẽ. No ãm õ jaxwýr xà hã ixkre kêp grire. ¹⁷ Hãmri nhũm tee ri hpur kãm õ rax kukamã hamaxpêr nẽ hamaxpêr o: “Kwa tanhmã kot pa amnhĩ to nẽ ja piitã nhỹri haxwýr wehe? Inhmã amarĩ mẽ kêp amrakati xwýnhjê mã hkwy nhõr prãm kêt. Kot paj ãm amnhĩm piitã ir pa nẽ kritpê m hkur o ixpa. Nom ixpê haxwýr xà hã ixkreja ixpê grire.” Anẽ.

¹⁸ —Hãmri nẽ hamaxpêr o: “Nà na pa ra ijamaxpêr. Kot paj ixkre grireta grã nẽ hpãnhã rax õ nhĩpêx. Hãmri nẽ ixpur kãm inhõta jamý nẽ kamã ir pa. Nẽ ixápênh xà hã ixkukrêx piitã kamã haxwýr pa. Nà kot paj ho anẽ.” Anẽ.

¹⁹ —Hãmri nẽ ra ixkreja grãnh pa nẽ hpãnhã rax õ nhĩpêx. Nẽ hipêx pa hãmri nẽ kamã hpur kãm õta xir pa. Nẽ àpênh xà hã hikukrêx piitã kamã unhwý. Hãmri nẽ omu nẽ hkĩnh nẽ. Nẽ hamaxpêr o: “Nà hãmri. Kot paj tokyx axte mẽmoj tã ixápênh kêt nẽ. Ra inhõ rax kumrêx kênã. Kot paj kritpê m ho ixápkur mex o ixpa. Nà ãm hãmri na pa amnhĩ kukamã ijamaxpêr mex pẽ ixkre rax nhĩpêx.” Anẽ. ²⁰ Tã nhũm Tĩrtũm tee ri ã kot amnhĩ nhĩpêx anhýr ã omu nhũm ja kãm mex kêt nẽ. Hãmri nhũm hã kãm kapêr nẽ kãm: “Nà na ka atýx ri anhõ rax mẽ akukrêx rax o apikuprõnh kaprỹ. Na ka ãm amnhĩ pix kukamã ajamaxpêr o apa pẽ ã amnhĩ nhĩpêx anẽ. Nom kot kaj kamàt ja kamã ty nẽ anhỹ kamã ma mõ nẽ amnhĩ kôt anhõ mẽmoj rax õ ho amõr kêt nẽ. Koja hpãnhã mēhõ amýr pẽ ho amnhĩptar pa ka rĩ amnhĩ pumu.” Anẽ. Nhũm ã Tĩrtũm kãm kapêr anẽ. ã mẽ ujarēnh kot anhýr.

²¹ —Mẽ kot amnhĩ nhõ nẽ amnhĩ kukamã pix mã hamaxpêr o mẽ pa xwýnhjaja na htem myja pyrã nẽ Tĩrtũm mã hamaxpêr o pa hkêt nẽ. Jakamã koja mẽ nhỹrmã ty hãmri nẽ hkukrêx pix kukamã hamaxpêr nẽ

amnhĩ mã pix mã hamaxpêr o paja mýrapê Tĩrtũm mẽ wa ixri htĩr tũm nẽ mex nẽ pa ho pa hkêr nẽ. Mẽ kot amnhĩ nhõ pix kukamã hamaxpêr xwýnhjaja nẽ amnhĩ kukamã pix mã mẽ hamaxpêr xwýnhjaja nẽ mẽ kamã ukapĩrĩ hkêr xwýnhjaja mẽ õ mẽmoj rũnh tã koja mẽ nhỹrmã ty hãmri nẽ amnhĩ kôt hõ ho pixi nẽ o mõi kêt nẽ. Koja mẽ mẽmoj piitã rer pa nẽ ma ý kamã ma mõi. Jakamã kwa kêt ka mẽ jajê pyrà nẽ anhõ mẽmoj to anhõxy ho ri apa hkêr nẽ. Anẽ.

Mẽ pahte tee ri amnhĩ kukamã pajamaxpêr kêt ã mẽ pamã karõ

Matêwre 6.25-34; mããnẽn Wam Pêtre 1.3-9

²² Tã nhũm Jejus hpãnhã tanhmã hkôt mẽ pa ho mẽ pa xwýnhjê jahkre hto nẽ mẽ kãm:

—Kwa kêt ka mẽ tee ri amnhĩ kukamã ajamaxpêr o ri apa hkêr nẽ. Amnhĩ xàpkur xà rý axê ka mẽ tee ri hkukamã ajamaxpêr kêt nẽ. Nẽ mẽ ãm mẽmoj piitã hkukamã tee ri ajamaxpêr kêt nẽ. ²³ Tĩrtũm àhpumunh tỳx o àhpumunh tỳx xwýnh na. Na pre àhpumunh tỳx o mẽ anhĩpêx ka mẽ kukwak ri atĩr nẽ apa. Tã xà kot mẽ amã mẽ anhõ ho pa hkukamã àhpumunh kêt? Nà ja kukamã àhpumunh xihtỳx kẽnã. Kêp mẽ anhĩpêx xwýnh jakamã mããnẽn kêp mẽ amã mẽ anhõ ho pa xwýnh. Nẽ kêp mẽ amã mẽ axê nhõr o pa xwýnh.

²⁴ —Mãn ka htem kuwênhre pumu. Na hte tee ri amnhĩ xàpkur xà hkukamã hamaxpêr o hkapĩrĩ nẽ ri pa hkêr nẽ. Na hte Tĩrtũm tãm kot kãm õ ho pa. Tã kãm mẽ pajapê htỳx o kuwênhre jakrenh jakamã koja uràk nẽ mẽ pamã mẽ panhõ mex o pa rãhã nẽ. ²⁵⁻²⁶ Jakamã kwa kêt ka mẽ mẽmo arĩgro hã axàpkur xà hkryre pumu nẽ ate amnhĩ pê hkrêr par nẽ amã prãm o akapĩrĩ nẽ apa hkukamã tee ri ajamaxpêr kêt nẽ. ãm Tĩrtũm kamnàr rom axãmnhĩx anhõ hkryreta ku nẽ akĩnh kãm tanhmã amnhĩ nhĩpêx to ho ri apa. Xà kot ka anhõ mry grire pumu nẽ akapĩrĩre nhũm ra tanhmã

amã amnhĩ to rax to? Na htem ãm tee ri mẽmo hkukamã hamaxpêr o hkapĩrĩ nẽ pa kaprỳ. Jakamã kêt ka mẽ ã ri ajamaxpêr anhỹr o akapĩrĩ nẽ apa hkêr nẽ.

²⁷ —Mãn ka htem akunĩ kamã pixôrãre pumu. Na hte tee ri tanhmã amnhĩ kute hkukamã hamaxpêr o hkapĩrĩ nẽ harir kêt tã muxre nẽ harir ka mẽ omu. Te ho amnepêm finat pahшти Sarumãw xê mex pyràk nom ãm mex o kot hakrenh.

²⁸ —Pixôrãreja arĩgro ja hã htĩr nẽ muxre nẽ harir tã koja mẽmo arĩgro hã grà pa nẽ hapêx. Kêp pixôrã pix nẽ hapêx tokyx anhỹr tã na hte Tĩrtũm ho mex nẽ nhũm mux nẽ harir. Nom mẽ pajaja na hte mẽ pahto mex o pixôrãre ho mexja jakrenh. Jakamã kwa mẽmo kaxyw kot ka mẽ tee ri amnhĩ xê hkukamã ajamaxpêr o akapĩrĩ nẽ apa? Nà kot kaj mẽ anẽ nẽ amnhĩ kaxyw Tĩrtũm mã ajamaxpêr tỳx kêt nẽ.

²⁹ —Kwa mẽ tee ri amnhĩ xàpkur xà hkukamã ajamaxpêr rãhã o ri akapĩrĩ nẽ apa hkêr nẽ. Nẽ mẽ tee ri amnhĩ kukamã tanhmã ajamaxpêr to ho ri akapĩrĩ nẽ apa hkêr nẽ. ³⁰ Mẽ kot Tĩrtũm kôt amnhĩ xunhwỳr kêt xwýnhjaja na htem ã ri hamaxpêr anhỹr o hkapĩrĩ nẽ pa. Tã kêt ka mẽ ho mẽ uràk kêt nẽ. Tĩrtũm kot mẽ panhõ mẽmoj kêt kôt mẽ pahpumunh mex kẽnã. ³¹ Jakamã kêt ka mẽ ãm hkôt ri amnhĩ nhĩpêx rãhã nẽ. Nẽ amã ja pix kukamã ajamaxpêr o ri apa hprãm. Hãmri nhũm amnhĩ tã mẽ apumu hãmri nẽ apkati mẽ tãm mẽ amã mẽmoj nhõr o pa. Anẽ.

Kaxkwa kamã mẽ pakukrêx rax jarênh

Matêwre 6.19-21; mããnẽn Sikũn Ximotre 4.8; Eprêw 10.34; Wam Pêtre 1.4

³² Nhũm Jejus arĩ mẽ kãm kapêr nẽ mẽ kãm:

—E mẽ ate ixkôt amnhĩ xunhwỳr xwýnhjaja. Ra Tĩrtũm kot mẽ ato hkra jakamã kwa mẽ axãmnhĩx hkamnàr rom ri tanhmã amnhĩ nhĩpêx to ho ri apa. Na hte mẽ apê hkra hã mẽ apumu nẽ hkĩnh nẽ. Koja nhỹrmã

kaxkwa kamã õ krĩ hwỳr mẽ ato api ka mẽ kamã wa ixkuri amex nẽ atĩr tũm nẽ apa ho apa. Ja na mex o kot jar pika ja kõt mẽ õ mẽmoj rũnh nẽ pa xwỳnhhta jakrenh. ³³ Jakamã kër ka mẽ axàmnhĩx ri akukrêx kwỳ ho wẽnẽ nẽ hpãnhã kàxpore jamỳ nẽ mẽ kệp amrakati xwỳnhjẽ mã ho api-grànħ o ri mẽ hkõt apa. Kot kaj mẽ ã amnhĩ nhĩpêx anẽ hãmri nẽ kaxkwa kamã akukrêx rax nẽ. Mo kaxkwa kamã mẽ àhkĩnh xwỳnh koja mẽ apê ho ahkĩ? Nẽ kamã mo amnhõre kot mẽ apê homnu? Kaxkwa kamã ja amrakati kumrêx. Jakamã Tĩrtũm kot mẽ amã mẽ akukrêx nhõr mã xwỳnhhta koja aa apê omnuj nẽ hapêx kêt kumrêx. ³⁴ Kot kaj mẽ jar pika ja kamã akukrêx rax hãmri nẽ tanhmã apê omnu hto pix kukamã ajamaxpêr rãhã ho ri apa. Nom kot kaj mẽ apê Tĩrtũm kra hã kot kaj mẽ jar akukrêx rax kêt tã kaxkwa kamã akukrêx pix kukamã ajamaxpêr rãhã ho ra akĩnh nẽ ri apa. Anẽ.

Mẽ pahte Jejus kutêp tanhmã amnhĩ nhĩpêx to hã mẽ pamã karõ

Matêwre 24.42-43; Makre 13.32-37; Rukre 21.34-36; mããnẽn Wam Tesarõn 5.4-8

³⁵ Nhũm pre Jejus arĩ mẽ ahkre nẽ mẽ kãm:

—E na pa pre ra mẽ apê ixkõt mẽ apa ho apa xwỳnhjẽ mã tanhmã amnhĩ kukamã amnhĩ jarênh to. Ixtyk nẽ akupỹm ixtĩr nẽ ma akupỹm ixàpir hãmri nẽ mẽmo arĩgro hã akupỹn mẽ awỳr ixwrykja na pa pre ra mẽ amã ja hã amnhĩ jarê. Tã kwa kër ka mẽ ixwakre kamã ixte mẽ amã ã amnhĩ jarênh anhỳrja mã ajamaxpêr tỳx pê ixkõt amnhĩ nhĩpêx rãhã ho ri apa.

³⁶⁻³⁸ —Te mẽ õ patrãw mã mẽ àpênh mex xwỳnhjaja kot amnhĩ nhĩpêx pyrãk o amnhĩ nhĩpêx o ri apa. Koja mẽ õ patrãw ma mẽ kot axpên mã wa rer mã xwỳnh pumunh mã ma nhỹhỹm tẽ. Hãmri nhũm kãm mẽ àpênh xwỳnhjaja arĩ kutêp õrkwỳ kamã hkrĩ. Axkãm hamak rom nẽ kutêp hkrĩ. Akupỹn htẽm nhũm mẽ kot amnhĩ wỳr mar nẽ kãm kahê xà

mẽnħ tokyx anhỳr kaxyw arĩ kutêp õt kêt nẽ hkrĩ. Kõt ã kamãt nhũm akupỹn hpõx o htẽm rỳ arĩgro hwỳr hpõx o htẽm nhũm mẽ kot amnhĩ wỳr mar nẽ kãm kahê xà mẽnħ tokyx anhỳr kaxyw kutêp õt kêt nẽ hkrĩ. Akupỹn hpõx ã omunh hãmri nẽ tokyx apkur kaxyw kãm õ nhĩpêx kaxyw. Kër kê akupỹn pøj nẽ ã mẽ kot amnhĩ nhĩpêx anhỳr ã mẽ omu nẽ hkĩnh nẽ. Tã kër ka mẽ àpênh xwỳnhhtajẽ pyrã nẽ ixwakre kamã inhmã ajamaxpêr rãhã ho ri apa. Jao ixkamã ajamak o apa ho ixkõt amnhĩ nhĩpêx mex rãhã nẽ. No kot paj akupỹn mẽ awỳr wrỳ hãmri ka mẽ àpênh xwỳnhjẽ pyrã nẽ inhmã mẽmoj nhõr kêt nẽ. Kêt pa kot paj mẽ õ patrãwta kurom mẽ amã mẽmoj mex gõ.

³⁹ —Na htem mẽ kệp àhkĩnh pymaj amnhĩ nhõrkwỳ jamãr rãhã ho pa. ⁴⁰ Ja pyrã nẽ mẽ ate akupỹn ixwryk xà hã arĩgro pumunh kêt jakamã kër ka mẽ õrkwỳ nhõ dõnta pyrã nẽ ixkutêp axkãm ajamak rom rãhã nẽ ri apa. Jao tãm amnhĩ nhĩpêx rãhã nẽ. Anẽ.

Mẽ õ patrãw mã mẽ àpênh mex xwỳnhjẽ jarênh

Matêwre 24.45

⁴¹ Nhũm pre ã Jejus hkõt mẽ pa ho pa xwỳnhjẽ jahkre anẽ. Hãmri nhũm Simãw Pêtre kuma nẽ kãm:

—Kwa Pahĩti. Xàn ka mẽ piitã mẽ kãm ã akapêr anẽ nà? Xà ãm mẽ papxipixjẽ mã? Anẽ.

⁴² Hãmri nhũm kãm:

—Nà ãm ixwakre kamã mẽ ate ixkõt tanhmã inhmã amnhĩ nhĩpêx to ho mẽ apa xwỳnh piitã mẽ amã na pa ã ixkapêr anẽ. Koja mẽ àpênh xwỳnhjẽ hõ õ patrãw mã àpênh mex o pa nhũm amnhĩ tã omu nẽ ma nhỹhỹm mõi kaxyw nẽ ìhkram mẽmoj piitã haxàr pa. Hãmri nẽ kãm: “E kër ka ixwakre kamã inhmã inhõrkwỳ htãnopxa. Nẽ mẽ àpênh xwỳnhjẽ mã õ mex kè mẽ apkur mex o pa.” Anẽ. Koja ã kãm mẽmoj tã karõ anẽ hãmri nẽ kato nẽ ma nhỹhỹm mõi. ⁴³ Hãmri nhũm kãm àpênh mex xwỳnhhta wakre kamã kãm àpênh mex o pa. Jakamã

nhũm õ patrāw akupÿn hpôx o mō
nhũm amnhĩ wÿr harēnh ma nē hkĩnh
nē. Nē mẽmoj tã amnhĩ tã kamã ka-
hak kêt nē. Rÿ tee ri wakre kamã
kãm àpēnh punuj ã amnhĩ pumu nē
tee amnhĩ kukamã hamaxpēr kêt nē.
Kot wakre kamã kutēp àpēnh mex
jakamã akupÿn hpôx ã harēnh ma nē
hkĩnh nē.

⁴⁴ —Jakamã nhũm õ patrāwja
akupÿn pōj nē kot kãm àpēnh mex
ã omu nē haxwÿja hkĩnh nē. Hãmri
nē kot kãm hamār o pa kaxyw kãm
mẽmoj piitã ĩhkram haxār pa. ⁴⁵ Nom
koja kãm àpēnh xwÿnhta axtem nē
wakre kamã kãm àpēnh mex kêt
nē. Nē tokyx akupÿn mōr kêt ã
hkamnhĩx nē wakre kamã kãm mẽ
àpēnh xwÿnhjē htak nē pipānh pix
nē mẽ kãm gō xành xwÿnhjē kôt pix
mã pa japēr. ⁴⁶ Hãmri nhũm õ patrāw
haēr pē akupÿn pōj nē tee ri ã amnhĩ
nhĩpēx anhÿr ã omu. Hãmri nē gryk
tÿx nē tanhmã homnuj to. Hãmri nē
kãm mẽ àpēnh punuj xwÿnhjē mẽ mẽ
ho pimràatã amnhĩ nē mẽ hanor pa.
Tã kēr ka mẽ ixwakre kamã ho mẽ
urāk kêt nē. Mē kurom ixkapēr kôt
tãm amnhĩ nhĩpēx mex rāhã ho ri apa.

⁴⁷⁻⁴⁸ —Nē koja mẽhō kormã Tĩrtũm
kapēr mar kêt nē htÿx ri tanhmã
amnhĩ tomnuj to ho pa. Hã koja
Tĩrtũm ja hã omu nē nhÿrmã kot
amnhĩ tomnuj o pata mÿrapē tanhmã
ho nhũm amnhĩ xà htÿx kamã hamak
tũm xà kamã pa. Nom akrānhmã
amnhĩ xà kamã hamak o pa. Aa kot
Tĩrtũm kapēr mar kêt jakamã koja ãm
akrānhmã amnhĩ xà kamã hamak o
pa. Nom koja mẽhō kapēr mar mex
tã ãm kuma nē hkôt amnhĩ nhĩpēx kêt
nē. Nē xatã hirōp kuhē nē tanhmã
amnhĩ tomnuj to. Hã koja Tĩrtũm tee
ri ja hã omu nē nhÿrmã tanhmã hom-
nuj tÿx to. Hãmri nhũm wamtajē pyrà
nē amnhĩ xà htÿx kamã hamak tũm
xàta kamã pa ho pa nom mẽ kĩnhã
amnhĩ xà htÿx kamã hamak rāhã ho
pa. Anē.

*Jejus kot nhÿrmã mẽ kot amnhĩ
tomnuj xà ho hapēx ã harēnh*
Matēwre 10.34-36

⁴⁹ Nhũm Jejus arĩ hkôt mẽ pa ho mẽ
pa xwÿnhjē jahkre nē mẽ kãm:

—Nà ixte mẽ omnu xà piitã ho
ijapēx par nē mẽ kot tanhmã amnhĩ
tomnuj to piitã ho ijapēx par kaxyw
na pa pre wrÿ. Tã ra ixte piitã ho
ijapēx par o inhmōr ronhÿx ja inhmã
mex kumrēx. Nom kormã. ⁵⁰ Kot paj
amnhĩ xà htÿx kãm ijamak rax o mẽ
kot amnhĩ tomnuj o ijapēx o hkrax.
Hãmri nē nhÿrmã ho ijapēx pa. Na
pa ra ixtyk kaxyw ixte amnhĩ kà xà
kamã ijamak kukamã ijamaxpēr o ra
amnhĩ kamã ixkahak nē ri ixpa. Tã
kot paj ja ho ijapēx pa nē ixkĩnh tÿx
kumrēx. Anē.

*Mẽ kot Jejus ã axpēn kutã amnhĩ
xunhwÿr ã mẽ harēnh*

Matēwre 10.21, 10.34-35

⁵¹ Nhũm Jejus arĩ mẽ ahkre nē mẽ
kãm:

—Nē ra mẽ awÿr ixwrÿk tã koja
mē piitã ixkukwak ri hamakētkati nē
àmnhĩx ri pa hkêt nē. Kormã. Koja
mē akwÿjaja ixkapēr ma nē mẽ apyrà
nē amnhĩ kaxyw ixkôt hamaxpēr. No
nhũm mẽ akwÿjaja mẽ akĩnhã kuma
nē ãm kuma. Hãmri nē ixtã tanhmã
mē anhĩpēx to ka mẽ ixpyrà nē amnhĩ
xà htÿx kamã ajamak o ri apa.

⁵² —Nē koja tanhmãn ixkre pyxi
kamã mẽmojaja ohtōn pa. Nhũm war
axkrutre nē ixkôt amnhĩ xunhwÿ
nhũm mẽ axkrunēpxi nē ixkwÿm ri
amnhĩ nhĩpēx nē ixkutã amnhĩ xun-
hwÿ. ⁵³ Nhũm mẽ hipēxà hkra my
mē wa ixtã axpēn kutã amnhĩ xun-
hwÿ. Nhũm mẽ katorxà hkra ni
mē wa ixtã axpēn kutã amnhĩ xun-
hwÿ. Nhũm mẽ wÿj umregēx mẽ wa
haxwÿja ixtã axpēn kutã amnhĩ xun-
hwÿ. Koja mẽ ã ixtã axpēn nhĩpēx
anhÿr o pa. Anē.

*Mẽ pahte amnhĩ tomnuj kaga nē
Tĩrtũm kôt amnhĩ nhĩpēx ã mẽ pamã
karō*

Matēwre 5.25-26, 16.2-4

⁵⁴ Nhũm Jejus hpānhã mẽ kot hkôt
amnhĩ xunhwÿr kêt xwÿnhjē mã
kapēr nē mẽ kãm:

—Kwa mẽ inhma mẽ ate ixkôt
amnhĩ xunhwÿr kêt xwÿnhjaja. Na

htem kaxkwa kamã na htyk rax pumu nẽ na wrÿk mã hamaxpẽr kurẽ kumrẽx. Hãmri nhũm na wrÿ. ⁵⁵ Nẽ amgrà pẽ kòk krihkritja nhũm htem kuma nẽ arĩgro htÿx mã hamaxpẽr kurẽ kumrẽx. Hãmri nhũm arĩgro htÿx nẽ. ⁵⁶⁻⁵⁷ ã na ka htem aprĩ hã mẽmoj pumunh kòt mẽmoj kukamã ajamaxpẽr mex o ri apa anẽ. Nom nhũm Tirtũmja mẽ ate tanhmã amnhĩ tomnuj to mÿrapê tanhmã mẽ ato kaxyw nhũm mẽ ate ja hã amnhĩ pumunh tã tokyx amnhĩ tomnuj kaga hkêt nẽ.

⁵⁸⁻⁵⁹ —Na htem tanhmã axpẽn tomnuj to. Hãmri nhũm kot tanhmã war axpẽn to xwÿnhta pahi hwÿr htẽm nẽ kãm tanhmã kot ho xwÿnhta jarẽnh kaxyw. Hãmri nhũm kamã gryk xwÿnhta kot pahi mã harẽnh kaxyw ã harẽnh ma nẽ hãmri tokyx hwÿr tẽ nẽ wa tãm akupÿm axpẽn xãm. Na htem ã amnhĩ nhĩpêx anẽ. Pahi kot ja mar nẽ tanhmã mẽ ho pymaj na htem ã amnhĩ nhĩpêx anẽ nẽ tokyx akupÿm tãm axpẽn xunhwÿ. No koja mẽ ã amnhĩ nhĩpêx anhÿr kêt nẽ nhũm pahija mẽ harẽnh ma hãmri nẽ tanhmã kot hõ ho xwÿnhta pynê nẽ haxà nhũm tee kãm kator prãm o hkrĩ kaprÿ. Hãmri nẽ tanhmã amnhĩ to nẽ amnhĩ pãnhã kãm amnhĩ rer pa nhũm pahihtija kormã mẽ kãm anẽ nhũm mẽ kãm ure nhũm kato. Ja pyrà nẽ kêr ka mẽ Tirtũm tanhmã kot mẽ anhĩpêx to pymaj tokyx mẽ ate amnhĩ tomnuj kaga nẽ hkòt amnhĩ nhĩpêx rãhã ho ri apa. Anẽ.

13

¹ Tã nhũm axtem mẽ hkwyjaja Jejus wÿr mra nẽ kãm:

—Pa? Kwa xàn ka ra Garirej nhõ xwÿnh kwÿjê jarẽnh ma nà? Na xep prem Jerujarẽ hwÿr mra nẽ ham mẽ kot Tirtũm mã amnhĩ jarẽnh xà hã ixkre kamã kãm amnhĩ jarẽnh kaxyw kormã kãm mry hpar o kuhê nhũm xep pahшти Piratja mẽ harẽnh ma nẽ mẽ hã amÿnê nhũm mẽ ma mẽ hwÿr mra nẽ mẽ himex pa. Kwa mãn mẽ kot amnhĩ tomnuj tÿx o mẽ

pajakrenh ã na prem mẽ himex nà? Anẽ.

²⁻³ Hãmri nhũm mẽ kãm:

—Nà mẽ kot amnhĩ tomnuj tÿx mÿrapê mẽ kot mẽ himex kêt. Mẽ apiitã mẽ ate amnhĩ tomnuj o axpẽn pyræk kênã. Tã kot ka mẽ amnhĩ tomnuj kaga nẽ Tirtũm kòt amnhĩ xunhwÿr kêt hã kot ka mẽ nhÿrmã ty hãmri nẽ õ krĩ hwÿr axàpir kêt nẽ. ⁴ No Jerujarẽ kamã ixkre prêkja mẽ kot kãm “Siroe” anhÿr xwÿnhta mẽ ho 18 nẽ mẽ hipy htem nẽ mẽ himex par xwÿnhjaja. Xà mẽ kot amnhĩ tomnuj tÿx mÿrapê na prem ty? Xà mẽ kot amnhĩ tomnuj tÿx o Jerujarẽ kamã arĩ mẽ htĩr xwÿnhjê jakrenh? ⁵ Nà kot anhÿr kêt. Mẽ apiitã mẽ ate amnhĩ tomnuj o axpẽn pyræk. Jakamã kot kaj mẽ ã amnhĩ nhĩpêx anhÿr kaga nẽ Tirtũm kòt amnhĩ nhĩpêx kêt nẽ hãmri nẽ mẽ uræk nẽ nhÿrmã ty hãmri nẽ Tirtũm nhõ krĩ hwÿr axàpir kêt nẽ. Jakamã kwa mẽ ixkapêr ma nẽ kãm ajamaxpêr tÿx rãhã ho ri apa. Anẽ.

Tirtũm kot mẽ pakamã gryk tokyx anhÿr kêt ã harẽnh

Ròmãn 2.4; Sikũn Pêtre 3.8-9

⁶ Tã nhũm Jejus kê axte tanhmã mẽ ahkre hto. Nẽ Tirtũm kot tanhmã mẽ panhĩpêx to hã kuxi nẽ mẽ kãm awjarẽ nẽ mẽ kãm:

—Koja hpur nhõ dõn mẽmo pàr kre nhũm ra hprêk mex nẽ ô mã tãm nẽ. Tã aa ô hkêt ã ra hã amgrà axkrunêpxi. ⁷ Hãmri nhũm kot hkre xwÿnhja tee ri omu nẽ kãm àpênh xwÿnh wÿr tẽ nẽ kãm: “E kwa ma tẽ nẽ mẽmo pàr mÿj krãhta nẽ amẽ. Mexti hã. Ra ô hkêt ã amgrà axkrunêpxi kênã. Kojã pêr aa ô hkêt nẽ. Mo kaxyw kot kêt ô hkêt tã ô mex xwÿnh kaêx ã mẽ kêp àmnàr o kuhê? E hwÿr tẽ nẽ krãhta nẽ amẽ.” Anẽ. ⁸⁻⁹ Hãmri nhũm tee ri kot kãm hã karõja ma nẽ kãm: “Kwa nà kormã. Pa kop ixàmnhix pàr krax ã mẽmo japòk kwÿ kapĩ nẽ kop hamã mãn. Kê axte hã amgrà pyxi nẽ hapêx nẽ ô hkêt pa kormã krãhta nẽ kumẽ. Kojã amgrà ja kamã amã ô japêr ka omu nẽ akĩnh

ně.” Aně. Ā mẽ ujarēnh kot anhÿr. Aně.

Nhũm Jejus ā mẽ kām ujarēnh aně. Mě kot amnhĩ tomnuj tÿx o pa htã nhũm Tĩrtũm kot pur nhõ dõn mã àpēnh xwÿnhhta pyrã nẽ mẽ kamã gryk tokyx anhÿr kêt ã nhũm ã hã kuxi nẽ mẽ kām ujarēnh aně.

Jejus kot arĩgromnu hã mēhõ ho mex ã harēnh

Rukre 14.1-6; Juãw 5.16-17

¹⁰ Tã nhũm mẽ õ arĩgromnu pē sap kato nhũm Jejus Ijaew pikuprõnh xã hã ixkre hwÿr axã nẽ kamã Tĩrtũm kapēr o mẽ ahkre ho nhÿ. ¹¹ Nhũm kamã mēhõ ni hikõt rãhã nẽ pa xwÿnhja nhÿ. Na pre ra amnepēm mẽkarõmnuti tanhmã ho nhũm katat nẽ ri mrrar kêt kumrēx. Ām hikõt rãhã nẽ ri pa hã ra hã amgrã pē 18. ¹²⁻¹³ Hãmri nhũm Jejus omu nẽ amnhĩ wÿr kãm hpa ho apē nhũm hwÿr tē nhũm hã ĩhkra xi nẽ kãm:

—E na ka ra akupÿm amex.

Aně nhũm akupÿm katat nẽ mex kurē kumrēx. Hãmri nẽ amnhĩ pumu nẽ hkĩnh tÿx nẽ Tĩrtũm mã mex o mex ã harēnh o xa. ¹⁴ Nom nhũm mẽ pikuprõnh xã hã ixkre jamãr xwÿnh maatija tee ri ja hã omu hãmri nẽ Jejus kamã gryk tÿx nẽ. Mě õ arĩgromnu hã akupÿm kot ho mex jakamã nhũm kamã gryk tÿx nẽ. Hãmri nẽ mẽ pikuprõnh xwÿnhjē mã kãm:

—Tk. Kwa semãn ã mẽ àpēnh xã hã arĩgro xohtõ. Kēp 6. Kot kaj mẽ mãmri tãmik nẽ sikũn nẽ tēs nẽ kwata nẽ kĩa nẽ sēsta ja ã ka mẽ apē rÿ mãmri Jejus wÿr amnhĩ to mra kē akupÿm tanhmã mẽ ato mex to. No sap ã kwarĩ. Sap kēp mẽ pahpē Ijaew nhõ arĩgromnu kēnã. Na pu htem hã paxàpēnh kêt nẽ. Jakamã arĩgro ja hã kot akupÿm mẽ ato mexja mex kêt. Aně.

¹⁵ Hãmri nhũm Jejus kuma nẽ kãm:

—Kwa xã mẽ kajaja na ka htem sap ã axàpēnh kêt nẽ apa? Nã mẽ ate hã axàpēnh kēnã. Xãn ka htem sap ã akrit kawar nẽ akrit mōx ma mẽ ho apa nẽ mẽ hkõm kêt nẽ? Nã na ka htem ma mẽ ho apa nhũm htem ixkõ. Mot ka kêt mẽ ri axtem nẽ mẽ kot

sap ã tanhmã amnhĩ toja nẽ mẽ kãm akapēr? ¹⁶ Ixte ni ho mex xwÿnhhta mẽ pahpyrà nẽ kēp finat Apraãw kagrõt nyw õ na. Nhũm pre Satanasti te kot kãm ê nẽ ri o pa pyrãk o hipēx jakamã nhũm ÿ hã hikõt nẽ ri paja ã ra hã amgrã kēp 18. Tã pa nẽ te ixte Satanasti ho ixkrihkrit nẽ ixte kēp utar pyrãk o hipēx nẽ akupÿm ho mex. Mo kot pa kêt ri omu nẽ ãm omu nẽ arĩgromnu hã ho mex kêt nẽ? Nã ixte arĩgro piitã hã akupÿm mẽ ho mex o ixpa xwÿnh kēnã. Aně.

¹⁷ Hãmri nhũm mẽ kot kãm kapēr mar prãm kêt xwÿnhjaja kuma nẽ kamã gryk nẽ. Te ho mēhprĩjē mã mẽ hamaxpēr nhõr pyrãk o mẽ hipēx pyrãk jakamã nhũm mẽ amnhĩ tã kuma nẽ kamã gryk nẽ. No nhũm mẽ kot ra ã amnhĩ nhĩpēx anhÿr o pa hã omunh xwÿnhjaja ja hã omu nẽ kãm hkĩnh nẽ.

Jejus te kot mēmo hy pyrãk ã harēnh Matēwre 13.31-33; Makre 4.30-32

¹⁸⁻¹⁹ Nhũm Jejus arĩ mẽ ahkre nẽ tanhmã mẽ kãm amnhĩ tã ujarēnh to nẽ mẽ kãm:

—Nẽ Tĩrtũm kot mẽ awÿr ixte mẽ ato amnhĩptar kaxyw inhmēnh ã ijarēnhja. Te ixte mēmo hy pixire pyrãk. Na htem hkre nhũm higrõt. Nẽ gaa nẽ rĩ hprêk. Hãmri nẽ pa anhrã nhũm kuwēnhre hwÿr mra nẽ hõ pytĩ kamã amnhĩm haē nhĩpēx. Tã kot paj nhÿrmã mēmo hy jarēnhhta pyrã nẽ ixpixi htã kot paj pika piitã hkõt mẽ ho amnhĩptã nẽ mẽ omunh mex rãhã ho ri ixpa. Aně.

Jejus te kot pãwti kaxkrit xã pyrãk ã harēnh

Matēwre 13.33-35

²⁰⁻²¹ Nhũm Jejus arĩ mẽ ahkre ho xa. Nom hprĩ hã amnhĩ jarēnh kêt nẽ. Ām amnhĩ tã kuxi nẽ mẽ kãm awjarē nẽ mẽ kãm:

—E kot pa hpãnhã tanhmã mẽ amã pãwti kaxkrit xã jarēnh to. Kojã mēnijē hõ ãm hkwÿ ho grire nẽ kupy nẽ kaxyw mēmo xõm kãm kumē nẽ ho pihkãr pa nẽ ho pãwti nhĩpēx. Nhũm kaxkrit xãja grire htã pãwti piitã ho kaxkrit mex nẽ. Ja pyrã nẽ kot paj

ixpyxi htã koja mẽ nhÿrmã pika piitã hkôt ixkôt amnhĩ nhĩpêx mex o pa. Anẽ.

Nhũm pre ã Jejus mẽ kãm amnhĩ tã pãw kaxkrit xaja xi nẽ harẽnh anẽ.

Kaxkwa hwÿr hakwa kre kahê xà jarẽnh

Matêwre 7.13-14, 7.21-23; Juãw 10.7-10

²² Tã nhũm Jejus arĩ krĩ pẽ Jerujarẽ hwÿr krĩ hkôt ri mẽ ahkre ho mẽ hkôt ri pa. ²³ Hãmri nhũm mẽhõ myja hwÿr tẽ nẽ mẽmoj tã hkukja nẽ kãm:

—Pa. Kwa inhmã mẽmoj jarẽ. Xà koja mẽ ohtõ nẽ nhÿrmã Tirtũm ri htĩr tũm nẽ papa ho nà koja mẽ grêre? Anẽ.

²⁴ Hãmri nhũm kuma nẽ mẽ kot mar o kuhê xwÿnh piitã kãm:

—Nà mẽ kot Tirtũm kôt amnhĩ xunhwÿr xwÿnhjê pix koja mẽ õ krĩ hwÿr agjê. Wÿr mẽ gjêx xaja ãm pixii nom koja mẽ ohtõ nẽ kãm hkôt wÿr gjêx prãm kêt nẽ. Na htem te hwÿr mẽ gjêx xà hõ japêr o pa pyrãk. Nom pa na te ixpê hwÿr mẽ gjêx xà pixita pyrãk. Jakamã kwa kêr ka mẽ tokyx ixkôt amnhĩ xunhwÿr tÿx nẽ ixkôt ri amnhĩ nhĩpêx o ri apa. Na htem ohtõ nẽ kãm ixkôt amnhĩ xunhwÿr prãm kêt nẽ. Ixte amnhĩ nhĩpêxja mẽ kęp hihtÿx jakamã nhũm htem ixkaga.

²⁵ —Tã koja mẽ nhÿrmã ty nẽ tee ri kãm Tirtũm wÿr gjêx prãm kaprÿ. Kot paj te mẽ kęp kahê pyrãk o mẽ hipêx nhũm mẽ kapõt ã kuhê nẽ tee ri amnhĩ tã ixpumu nẽ inhmã: “Kwa mẽ inhmã kahê xà mẽ pa mẽ awÿr agjê Pahihti.” Anẽ. Hãmri pa mẽ kãm: “Nà ixte mẽ apumunhre hã kot pa kêt ri mẽ amã kurẽ.” Anẽ.

²⁶ —Hãmri nhũm mẽ tee ri inhma nẽ inhmã: “Kwa nà ra ate mẽ ixpumunh mex kênã. Na ka pre mẽ inhõ krĩ kamã mẽ ijahkre ho ri apa nẽ mẽ ixkutã axãpkur o ri apa.” Anẽ.

²⁷ Hãmri pa mẽ kãm: “Tk. Ixte mẽ akutã ixãpkur tã mẽ ate ixkôt amnhĩ xunhwÿyẽ hã. Jakamã e mẽ ma mra. Mẽ ate amnhĩ tomnuj pix o mẽ apa xwÿnh jakamã kot kaj mẽ ixwÿr agjêx

kêt nẽ.” Anẽ. Kot paj ã mẽ kãm ixkapêr anẽ.

²⁸ —Hãmri nhũm mẽ amÿm ri mẽ inhmex ã mẽ ixpumunh o kuhê. Kaxkwa kamã mẽ ixkĩnh nẽ ri mẽ inhmex nẽ ixpa hã amÿm mẽ ixpumunh o kuhê. Apraãw nẽ Ijak nẽ Jako nẽ Tirtũm kapêr jarẽnh o mẽ pa xwÿnh piitã nhũm mẽ amÿm mẽ ixkĩnh nẽ mẽ ixãpkur mex ã mẽ ixpumunh o kuhê. Hãmri nẽ tee ri mẽ ixwÿr kãm gjêx prãm kaprÿ nẽ hkaprĩ nẽ mur nẽ amnhĩ krã hkĩ jarê nẽ amnhĩ kà nhê nẽ amnhĩ kamã gryk tÿx nẽ. No ãm tee ri amnhĩ kamã gryk kaprÿ. ã koja mẽ amnhĩ nhĩpêx anẽ. ²⁹ Nom Tirtũm kôt mẽ kot amnhĩ xunhwÿr xwÿnhjaja koja mẽ kurom pika piitã kurũm axpên wÿr akuprõ nẽ Tirtũm wÿr agjê nẽ kuri hkĩnh nẽ apkur mex o hkrĩ. Mẽ akwÿjaja nẽ pika piitã kurũm hohtõ rax nẽ axpên wÿr akuprõ nẽ hwÿr agjê nẽ kuri apkur mex nẽ hkĩnh nẽ pa ho pa.

³⁰ —Mẽ apê Ijaewjaja mẽ amã Ijaew kêt xwÿnhjê hprãm nõkati htã koja mẽ hkwyjaja mẽ akwÿjê rom Tirtũm ri axpên wÿr akuprõ nẽ hkĩnh nẽ axpên kutã apkur mex o hkrĩ. Jakamã kwa kot kaj mẽ urãk nẽ amã Tirtũm mẽ wa ixwÿr agjêx prãm hã kot kaj mẽ ixkôt amnhĩ xunhwÿ nẽ ixkapêr kôt amnhĩ nhĩpêx mex o ri apa. Anẽ.

Jejus kãm Jerujarẽ nhõ xwÿnhjê japê hã harẽnh

Matêwre 23.37-39

³¹ Hãmri nhũm Parijew nhõ xwÿnh kwÿjaja Jejus wÿr mra nẽ kãm:

—Pa. E ot pa mẽ awÿr mra. Kwa kêr ka ma Jerujarẽ hwÿr amõr kêt nẽ. Na ra mẽ hkĩnh wÿr pahi Eroxxja pøj nẽ kot tanhmã ato kaxyw atã amnhĩ jarẽ pa mẽ kuma. Jakamã kwa mẽ hwÿr amõr kêt nẽ. Nhãm krĩ hõ hwÿr mãn mõ. Anẽ.

³² Hãmri nhũm mẽ kuma nẽ mẽ kãm:

—Tk. Nà kot pa umaj nhãm krĩ hõ hwÿr inhmõr kêt nẽ. Kot paj ma mẽ hkwyjê nẽ mẽkarõmnuti japõx pẽ mẽ hkwyjê ho mex o ma hwÿr mõ. Pahi Eroxx kãm mẽ hpar pix prãm. E mẽ

māmri ma akupým hwýr mra nē ā kām ixkapēr jarēnh anē. No kot paj umaj nhỹhým ixprõt nē ixtēm nē kēp ixpimxur kēt nē. Ra ixte õ krī hwýr inhnojarēt kēnā. Anē.

³³ Hāmri nē mē kot mar xwýnhjē mā amnhĩ jarē nē mē kām:

–Kot paj tanhmā amnhĩ nhĩpêx to ho ri ixpa rāhā Jerujarē hwýr mōn pōj nē kamā ty. Kamā na htem mē kot Tirtūm nhỹ hā kapēr jarēnh xwýnhjē nhĩmex. Tā hwýr kot paj mō. Anē.

Nhũm pre ā Jejus mē kām amnhĩ jarēnh anē. ³⁴ Hāmri nē te ra kot Jerujarē nhõ xwýnhjē pumunh o ām nē mē kām kapēr pyrāk o kapēr nē mē kām:

–Hêxta waa nē mē apē Jerujarē nhõ xwýnhjaja. Tirtūmja xatā mē awýr ý hā kapēr jarēnh o mē pa xwýnhjē rēnh tā ka mē kapēr mar kēt nē. Nē axtem nē kēn o mē htak o mē himex o apa. Na ka htem ā amnhĩ tomnuj o apa anē. Tā arĩ inhmā mē ajamār o ri ixpa hprām. Te ho krāhyre kot nore hpro nē ho hikwý pyrāk o na pa inhmā mē anhĩpêx prām tā ka mē apē ixprām nōkati nē ixkaga. ³⁵ Mýrapē koja Tirtūm mē anhõ krī jamār kēt nē. Kot paj tokyx ty nē mē apiitā mē are nē ma akupým api ka mē axte ixpumunh kēt nē. Ām akupýn ixwrýk xā hā arĩgrota pix ā koja mē akwýjaja mē amýr pē krī ja hwýr ixwrýk kām ixpumu. Hāmri nē mē akurom ixpumu nē hkĩnh tỳx nē. Nē tā ixkõt amnhĩ xunhwý nē axpēn mā ijarēnh o:

E ota Tirtūm kot mē pahwýr mēnh xwýnhta pōj. Nā ām hāmri na mē pahwýr wrý. Na mex kumrēx. Anē.

14

Jejus kot axte arĩgromnu hā mēhõ ho mex ā harēnh

Rukre 13.10-17

¹ Tā nhũm sap nhũm Jejus ma Parijew nhõ xwýnhjē krāhtūm kutā apkur kaxyw õrkwý hwýr tē. Hāmri nhũm mē wa hā htu rax nē Jejus apkur ā tãnopxar o kuhê. Mē kot

amnhĩ nhĩpêx kwým ri tanhmā amnhĩ nhĩpêx to nhũm mē kot hā omunh nē ra hā àmnēnh kaxyw nhũm mē kuri htãnopxar o kuhê. ² Nhũm ixkreja kamā mēhõ my hte hikot xwýnh mē kuri xa. ³ Hāmri nhũm Jejus omu nē hā Parijew nhõ xwýnhjē mē Tirtūm kapēr tūm o mē ahkre xwýnhjē kukja nē mē kām:

–Kwa mē inhmā mēmoj jarē. Jarāhā na mē panhõ arĩgromnu pē sap. Tanhmā na pre finat Mojesja Tirtūm nhỹ hā mē pahte sap ā tanhmā amnhĩ nhĩpêx to hā mē pamā karõ hto? Xā kot puj mē akupým mē ho mex nā? Kot puj mē ām mē omu nē akupým mē ho mex kēt nē? E mē atõ inhmā ja jarē. Anē.

⁴ Hāmri nhũm mē kuma nē tanhmā kutā kām nē hkēt nē. Ām akryk mar o kuhê. Mē kot tanhmā kām nē nhũm kot ta pānhā mē kām tanhmā nē py-maj nhũm mē akryk mar o kuhê nē tanhmā kutā kām nē hkēt nē. Hāmri nhũm tee ri mē omu hāmri nē myja ā ĩhkra xi nē akupým ho mex. Hāmri nē hano nhũm ma akupým mex nē hkĩnh nē ma tē. ⁵ Hāmri nhũm Jejus mē kām:

–E mē inhma. Xā koja mē akra sap ā mē apē ahkrehti xupým kām tēm ka mē ām omu nē arĩgro mex jamār pē tokyx ho axāpir kēt nē? Nā kot kaj mē ho axāpir kurē kumrēx. Rý koja akrit mōx gyw mā axā xāt ka mē omu nē ām omu nē arĩgro mex jamār pē tokyx hkaxār kēt nē? Nā kot kaj mē hkaxār kurē kumrēx. Na htem sap ā tanhmā mē ho mex to ho pa. Mē panhõ arĩgromnu htā pu htem hā tanhmā mē ho mex to. Jakamā na pa ā hā myta ho mex kurē kumrēx anē nē ri arĩgro mex jamār kēt nē. Anē.

⁶ Nhũm pre ā Jejus mē kām amnhĩ jarēnh anē nhũm mē kuma nom kutā kām mēmoj jarēnh kēt nē. Ra kot akupým ho mex jakamā nhũm mē tanhmā hā kām nē hkēt nē kuhê.

Mē pahte amnhĩ to hkryre hā mē pajarēnh

Matêwre 23.6-14; Rukre 6.32-36; määnēn Xiakre 4.10; Wam Pêtre 5.5-6

⁷ Hāmri nhūm mẽ apkur kaxyw mẽ hkrĩ xà hã hkrĩ hpa. Nhūm mẽ hkwỳjaja hkwỳjê pẽ amnhĩ to wa nẽ mẽ hkrĩ xà mex kãm hkrĩ hpa. Hāmri nhūm Jejus ja hã mẽ omunh o xa nẽ axte mẽ kãm mẽmoj jarẽ. No âm mẽmoj tã kuxi nẽ mẽ kãm awjarẽ nẽ mẽ kãm:

⁸ –Nà koja mẽ axpẽn mã mẽhõ rer kaxyw nẽ amnhĩ wỳr mẽ atã karõ. Mẽ ate kutã axàpkur kaxyw. Hāmri kêr ka mẽ hwỳr mra nẽ axàpkur kaxyw nẽ kupĩp kãm akrĩ kurẽ kumrẽx. No kot kaj mẽ kêp amnhĩ to wa nẽ mẽ hkrĩ xà mex pytã nẽ hã akrĩ nhūm ra kot amnhĩ to rax xwỳnhjê hõja hapu hã mẽ akõt tẽn axà. ⁹ Hāmri nhūm ixkre nhõ dõn kot amnhĩ wỳr mẽ awỳr xwỳnhta mẽ hkrĩ xà mexta ã mẽ awỳ nẽ mẽ amã: “Kwa mẽ atõ kànhmã xa nẽ kãm mẽ hkrĩ xà kaprã.” Anẽ. Hāmri ka nhãm xa nẽ kãm anhỳr xàta gõ. Hāmri nẽ apijaàm kãm hpãnhã kupĩp kãm nhỹ. ¹⁰ Ja pymaj kêr ka mẽ kupĩp kãm akrĩ kurẽ kumrẽx. Kê ixkre nhõ dõnja tee ri ja hã mẽ apumu nẽ mẽ amã: “Tk. Kwa ixkràmnhwỳjaja. Mẽ kupĩp kãm akrĩ hkêt nẽ. Kwa mẽ mra nẽ jar mẽ hkrĩ xà mex ã mãn akrĩ.” Anẽ hāmri nhūm ja mẽ amã mex nẽ. Nhūm mẽ piitã kot mẽ ato mex ã mẽ atã omu ka mẽ ajaxwỳja amnhĩ tã omu nẽ akĩnh nẽ ajamakêtkati nẽ akrĩ.

¹¹ –Nẽ koja mẽhõ te amnhĩ to rax o hkwỳjê jakrenh pyræk o amnhĩ nhĩpêx o ri pa hāmri nhūm Tĩrtũm ja hã omu nẽ tanhmã hã ho. Hāmri nhūm ra amnhĩ to grire hã amnhĩ pumunh o ri pa nẽ rĩ amnhĩ pumu. Nom koja mẽhõ amnhĩ to rax o hkwỳjê jakrenh pyræk o amnhĩ nhĩpêx o ri pa hkêt nhūm Tĩrtũm ja hã omu hāmri nẽ tãm amnhĩm kot amnhĩ to rax xwỳnh ã harẽ. Anẽ.

Mẽ pahte mẽ kêp amrakati xwỳnhjê ho mex ã mẽ pamã karõ

¹² Nhūm pre ã Jejus mẽ ahkre anẽ hāmri nẽ hpãnhã mẽ apkur xà hã ixkre nhõ dõnja mã kapêr nẽ kãm:

–Nà na ka hte amnhĩ wỳr akwỳjê pix wỳ. Atõjê hwỳ nẽ akràmnhwỳjê hwỳ. Nẽ mẽ hikàxpore rũnh xwỳnhjê

hwỳ. Nom nhỹrmã mẽ kot amnhĩ xwar amnhĩ nhõrkwỹ hwỳr awỳr pix kaxyw na ka hte ã amnhĩ wỳr mẽ hwỳr anẽ. ¹³ No kêt amnhĩ wỳr mẽ no kre xwỳnhjê mãn wỳ. Nẽ mẽ hyk o mẽ pa xwỳnhjê mãn wỳ. Nẽ mẽ hkrã pipãnh puro xwỳnhjê mãn wỳ. Nẽ mẽ hpigêx tỳx xwỳnhjê mãn wỳ. Nẽ mẽ hirok nẽ àpênh kêt xwỳnhjê mãn wỳ. Kêr ka amnhĩ wỳr jajê mãn wỳ kê mẽ awỳr mra nẽ akutã apku. ¹⁴ Mo mẽ kot amnhĩ xwar awỳr kaxyw mẽ õ mẽmoj? Mẽ kêp amrakati. Tã kot kaj mãmrĩ amnhĩ wỳr mẽ awỳ nhūm Tĩrtũm mẽ hã apumu hāmri nẽ nhỹrmã kot akupỹm mẽ ho hĩr xà hã arĩgrota ã mẽ hã amã mẽmoj mex gõ nẽ ato mex nẽ. Hāmri ka akĩnh nẽ. Anẽ.

Tĩrtũm kutã mẽ paxàpkur xà maati jarênh

Matêwre 8.11, 25.1-10, 26.29; mããnên Apokarip 19.9

¹⁵ Hāmri nhūm mẽ apkur kaxyw hkrĩ pa nhūm Jejus nhĩhkõ hã mẽ apkur o mẽ krĩ xwỳnhjê hõja tanhmã Jejus mã kapêr to nẽ kãm:

–Hêxta waa nẽ. Kot puj mẽ nhỹrmã Tĩrtũm nhõ krĩ hwỳr api nẽ kutã paxàpkur o pahkrĩ nẽ pahkĩnh tỳx kumrẽx. Anẽ.

¹⁶ Hāmri nhūm kuma nẽ kê axte mẽ ahkre. Mẽ kot Tĩrtũm kutã apkur kaxyw kot amnhĩ wỳr mẽ hwỳrta ã nhūm mẽ ahkre. No âm hã kuxi nẽ tanhmã mẽ kãm ujarênh to nẽ mẽ kãm:

–Koja mẽhõ amnhĩ wỳr mẽ ho ohtõ nẽ mẽ kot kutã mẽ apkur mex kaxyw mẽ kuwỳ. ¹⁷ Hāmri nẽ mẽ hwỳr kãm àpênh xwỳnh mẽ nẽ kãm: “E ma tẽ nẽ mẽ kãm awjarẽ kê mẽ tokyx mra pa mẽ apku.” Anẽ. ¹⁸ Hāmri nhūm kuma nẽ ma mẽ hwỳr mẽ kãm ujarênh o tẽ. Hāmri nẽ wamta mã anẽ nhūm kuma hāmri nẽ hitõt nẽ kãm: “Nà kot paj hwỳr ixtêm kêt nẽ. Na pa ham amnhĩm pika hkwỳjaprõ. Jakamã kot paj ma hwỳr tẽ nẽ ixprĩ hã omu mãn. Kwa kêr ka kãm ijarẽ kê ixte tanhmã hã nẽ xà hkõt ã ixte amnhĩ nhĩpêx anhỳrja mã hamaxpêr kêt nẽ.” Anẽ.

19 —Hāmri nhūm kuma nē hpānhā nhām ja wỳr tē nē kām awjarē nhūm kuma nē haxwỳja hitōt nē kām: “Nà kot paj hwỳr ixtēm kēt nē. Na pa ham amnhīm mōx o 10 nē haprō. Jakamā kot paj ma hwỳr tē nē ixprī hā ri omu mǎn. Kwa kēr ka kām ijarē kē tee ri tanhmā hamaxpēr to hkēt nē. Ixte tanhmā hā nē xà hkōt ā ixte amnhī nhīpêx anhỳr kēt.” Anē.

20 —Hāmri nhūm kuma nē hpānhā ma ihōta wỳr tē nē kām awjarē nhūm kuma nē haxwỳja hitōt nē kām: “Nà kot pa hwỳr ixtēm kēt nē. Na pa kormā ham ixprō. Kormā ixprō nyw nē inhmā rer prām kēt jakamā kot paj ma hwỳr ixtēm kēt nē.” Anē.

21 —Hāmri nhūm kām àpēnh xwỳnhhta tee ri mē kuma nē awjanā nē ma akupỳm tē. Kot ma mē hwỳr mēnh xwỳnhhta wỳr ma akupỳm tē nē kām mē harē. Hāmri nhūm tee ri mē harēnh ma nē mē kamā gryk nē. Hāmri nē hpānhā mē kēp amrakati xwỳnhjē hwỳr kām àpēnh xwỳnhhta mē. Mē hkrā pipānh puro xwỳnhjē hwỳr kumē. Nē mē hpigêx tỳx xwỳnhjē hwỳr kumē. Nē mē hirot nē àpēnh hkēt xwỳnhjē hwỳr kumē nhūm ma mē kām ujarēnh o tē. Hāmri nē amnhī kōt mē kuwỳ nhūm mē kuma nē wamtajē rom hkōt mrar kurē kumrêx. Hāmri nē agjē nē apkur kaxyw mē hkrī xà kamā hkrī hpa.

22 Hāmri nhūm kām àpēnh xwỳnhja ò patrāw wỳr tē nē kām mē harē nē kām: “E ate mē hā karō xàta kōt na mē ra hkrī hpa htā arī mē hkrī xà hkwy hkaprỳ.” Anē.

23 —Hāmri nhūm kuma nē kām: “Hêxta waa nē. Kēt ām mē hkrī xàta hipu mex ronhỳx pa omu nē ixkīnh nē. No ām kormā piitā hipu hkēt. Kwa ma krī pu hā ri mē hapêr o mra. Nē nhỳri mē hkwyjē pumu nē mē haprō nē mañ amnhī kōt mē o mra kē mē hkrīxà ho hipu hpa. 24 No kēt wam ixte amnhī wỳr mē hwỳr xwỳnhhtaja. Mē hitōt xwỳnhhaja kot paj axte amnhī wỳr mē hwỳr kēt nē.” Anē. Ā mē ujarēnh kot anhỳr. Na hte ā Tirtūm amnhī wỳr mē piitā mē hwỳr anē.

Anē.

Mē pamā Jejus kīnh tỳx ā mē pamā karō

Matêwre 10.37-38; Makre 8.34; Rukre 9.23-25; Juāw 12.26

25 Tā nhūm Jejus mē òrkwỳ rūm kato nē kormā Jerujarē hwỳr mō nhūm mē hohtō rax nē hkōt mō. Hāmri nhūm Jejus xa nē mē ho hakêx nē mē omu nē mē kām:

26 —E kot ka mē atō amā ixkōt amnhī xām prām nē ā amnhī nhīpêx anē. Nē amā atō nē atōx nē anhīpêxà nē akatorxà japê htỳx tā kēr ka amā ixkīnh tỳx o wa mē hakrenh pa. Nē amā aprō nē akrajē japê htỳx tā kēr ka amā ixkīnh tỳx o wa mē piitā mē hakrenh pa. Nē amā ixkīnh tỳx o amā amnhī japê jakre. Kēr ka mē atō ixkōt amnhī xām kaxyw nē ā amnhī nhīpêx anē.

27 —Koja mē ixpī pa mē anē ty. Tā mē ate ixkōt amnhī nhīpêx o mē apa xwỳnhhaja. Koja mē ixtā mē apar mā tā kēr ka mē amā ixkīnh tỳx o mē umaj ixkaga hkēt nē. Kwār mē māmri tanhmā ixtā mē ato. Kot kaj mē nhỳrmā Tirtūm mē wa ixri axte amnhī xà kamā ajamak kēt nē atīr tūm nē amex rāhā apa ho apa. Nom kot kaj mē ixkīnhā jar pika ja kamā amā amex nē apa hprām xàj ixkaga hāmri nē nhỳrmā wa ixri atīr tūm nē apa hkēt nē. Anē.

Mē pahte amnhī kukamā paja-maxpēr mex ā mē pamā karō

28 Nhūm Jejus arī mē kām kapēr nē mē kām:

—Kwa kēr ka mē ixkōt amnhī xunhwỳr kaxyw nē amnhī kukamā ajamaxpēr mex nē. Na htem amnhīm òrkwỳ rūnh nhīpêx kaxyw hāmri nē hkukamā hamaxpēr mex nē. Nē kaxyw krax mā kuhê xà hkukamā hamaxpēr. Nē kaxyw kỳx pē kām hikwỳ xàja kukamā hamaxpēr. Nē òkwaêja kukamā hamaxpēr. Nē hā pōja kukamā hamaxpēr. Ā na htem amnhīm òrkwỳ rūnh nhīpêx kaxyw hkukamā hamaxpēr mex anē. 29 Nom kot kaj mē hkukamā ajamaxpēr mex kēt nē ām kaxyw pī ho grêre nē hakà.

Rỳ ra hã axàpênh rax kurê ra amã ho anhÿr kaga nê hkaga hpa nê hatur xàm mênh kêt nê. Hãmri nhũm mẽ hkwỳjaja hãnh mra nê omu nê atã hpêr o axkê. ³⁰Nê axpên mã ri ajarênh o: “E ga mẽ ixkre mũj pumu. Na pre hipêx xwỳnhja hkurê kãm kaga nê hipêx par kêt nê.” Anhÿr o axpên mã ajarê. Ja pyrã nê kêr ka mẽ ixkôt amnhĩ xunhwỳr kaxyw nê amnhĩ kukamã ajamaxpêr mex nê. Nê ajamaxpêr o: “Nà mẽ kot Jejus ã tanhmã ixto htỳx tã kot paj hkaga hkêt nê. Kot paj hkôt amnhĩ nhĩpêx rãhã ho ri ixpa.” Anhÿr o amnhĩ kukamã ajamaxpêr. Hãmri nê rĩ kormã ixkôt amnhĩ xãm. No kot ka mẽ umaj ixkaga hkukamã ajamaxpêr hãmri nê ixkôt amnhĩ xãm kêt kurê kumrêx.

³¹—Nê koja krĩ hõ kamã pahihiti nhõ pôristi xohtô nê. Nê kutã nhãm krĩ hõ kamã pahihiti nhõ pôristija grêre. Tã nhũm wa hpijapu kaxyw nhũm krĩ hõ rũm pahihiti nhõ pôristi xohtôja mẽ grêreta wỳr mra. Hãmri nhũm kutã krĩ hõ kamã mẽ õ pôristi grêre nhõ pahi nhỹ nê tee ri mẽ amnhĩ kukamã hamaxpêr nê hamaxpêr o: “Kwa koja apu krĩ hõ rũm pôristi xohtô raxja nhũm inhõ pôristi grêreja mẽ axpên kutã kuhê nê axpu nhũm mẽ inhnê mẽ himex. Nà inhõ pôristi grêre kênã.” Anhÿr o hamaxpêr.

³²—Hãmri nê pahi hõta wỳr õ kôwenatô mẽ. Kormã krĩ hõ rũm mẽ hohtôtaja mẽ htêp kêt nhũm mẽ kutã kumê nhũm ma mẽ kutã tẽ. Hãmri nê awry hã mẽ hkaxpa nê mẽ õ pahihiti mã kãm: “E na mẽ inhõ pahihiti akutã inhmẽ pa tẽ. Na inhmã: ‘Ma tẽ nê mẽ kãm awjarê. Kot puj pêr mẽ papijapu hkêt nê. Kwarĩ. Kot puj mẽ tãm axpên xunhwỳ.’ Anhÿr o kapêr nê mẽ akutã inhmẽ pa tẽ.” ã mẽ ujarênh kot anhÿr. Ja pyrã nê na htem mẽmoj kukamã hamaxpêr mex nê rĩ kormã tanhmã amnhĩ nhĩpêx to.

³³—Tã kêr ka mẽ atõ amã ixkôt amnhĩ xãm prãm hãmri nê pahita pyrã nê amnhĩ kukamã ajamaxpêr tỳx nê rĩ kormã tanhmã amnhĩ nhĩpêx to. Kêr ka ate inhmã tanhmã

amnhĩ nhĩpêx to ho apa kaxyw hãmri nê inhgryk ã te ate amã amnhĩ japê hkêt pyrãk o mẽmoj piitã mã anhĩhkra karo pyrãk o amnhĩ nhĩpêx. Hãmri nê rĩ kormã ixkôt amnhĩ xãm. ³⁴⁻³⁵No kot kaj mẽ amnhĩ kukamã ajamaxpêr kêt nê atỳx ri ixkôt amnhĩ xunhwỳr japêr. Hãmri nê mẽmo arĩgro hã mẽ kot ixtã tanhmã mẽ ato xwỳnhjê pymaj ra ixkaga mã. Hã kot kaj mẽ te mẽ ate kaxwa punu pyrãk o amnhĩ nhĩpêx. Kaxwaja mẽ apkur xà kamã mex. Na htem amnhĩm ho õ xành nê kuku. Nom koja mẽhõ kamã pika hkwỳ mẽ nê ho ahkã hãmri tanhmã kot mẽ ho nê akupỳm ho mex? ãm mẽ kot hkapĩr pix kaxyw koja mex. Ja pyrã nê kot ka mẽ atõ ate inhmã tanhmã amnhĩ nhĩpêx to ho apa hã amnhĩ jarênh tã gaa nê amã ixkôt amnhĩ nhĩpêx prãm nõkati. Hãmri nê ra te ate kaxwa punu kapĩr mã tãmta pyrãk. E kwa mẽ mẽmoj tã ixujarênhja ma nê mẽ urak nê amnhĩ kukamã ajamaxpêr mex nê. Anê.

15

ôwêhti pikunor jarênh

Matêwre 18.12-14

¹Tã nhũm mẽ kot pahihiti mã hkwỳjê pê kàxpore hkwỳ jamỳnh xwỳnhjê mẽ mẽ kot amnhĩ tomnuj xwỳnhjaja Jejus kapêr mar kaxyw hwỳr mra. ²Hãmri nhũm Parijew nhõ xwỳnhjê mẽ mẽ kot Tirtũm kapêr tũm o mẽ ahkre xwỳnhjaja mẽ hã Jejus pumu. Hãmri nê kê wem axte axpên mã tanhmã ho kapêr punuj to nê axpên mã:

—Tk. Kwa na hte mũjti axtem nê mẽ kot amnhĩ tomnuj xwỳnhjaja amnhĩ wỳr mẽ kuwỳ nê tõhã mẽ kutã apku. Kwa mẽ kot amnhĩ tomnuj xwỳnh kênã kot kêt mẽ kutã apkur o pa. Anê.

³Hãmri nhũm Jejus amnhĩ tã mẽ kuma nê tanhmã mẽ kãm kapêr to. Nom hprĩ hã mẽ kãm kapêr kêt nê. Kê ãm amnhĩ tã kuxi nê mẽ kãm ôwêhti pikunor jarê nê mẽ kãm:

⁴—Koja mẽhõ õ ôwêhti xohtô nê. Nê ma nhỹri hamãr o pa. Hãmri nhũm pyxire nê hkwỳ kaga nê ma

nhÿhÿm ahte tē nē akunok. Hāmri nhūm ò dōnja ma kot akupÿm piitā o mōr kaxyw hkwÿ ho pikuprōnh pa hāmri nē tee ri hkwÿ kaēx ā pikunor xwÿnhhta japêr. Hāmri nē ma hkwÿ ho mō nē nhÿri kure. Kot nhÿri kutêp apkur o ri pa kaxyw kure hāmri nē ma akupÿm pikunor xwÿnhhta japêr o tē. Hāmri nē hapêr ryy nē nhÿri hwÿr kato. ⁵ Nē omu nē hkÿnh tÿx nē. Hāmri nē amnhÿ kre hā kumē nē ma akupÿm hkwÿ hwÿr o tē. ⁶ Hāmri nē mē ïhkô hā kumē nē hkÿnh nē hkrāmnhwÿjê ho akuprō nē òrkwÿ htā mē òrkwÿ xwÿnhjê ho akuprō nē mē kām: “Kwa na pre ixpê ixkriita ò akunok. Pa pre hapêr kām ixihÿtÿx nē kām ixkato nē omu nē ixkÿnh nē. Jakamā kwa wem määnēn inhÿ hā akÿnh.” Anē.

—Ā mē ujarēnh kot anhÿr. ⁷ Ja pyrā nē koja mē kot amnhÿ tomnuj tÿx xwÿnhjê hō tee ri amnhÿ pumu nē kot amnhÿ tomnuj kaga nē Tirtūm kôt amnhÿ xām. Hāmri nhūm kaxkwa kamā mē piitā ja hā omu nē hkÿnh tÿx nē. Te ho my kot ôwêhti hpikunor xwÿnh mā kator nē hkÿnh tÿxta pyrāk. Na hte Tirtūm tām mē kot amnhÿ nhÿpêx o mē pa xwÿnhjê pumu nē hkÿnh nē. Tā koja mēhō kot amnhÿ tomnuj tÿx tā ā amnhÿ nhÿpêx anhÿrja kaga nē Tirtūm kôt amnhÿ xām hāmri nhūm amnhÿ tā omu nē hkÿnh tÿx nē. Jakamā na pa hte mē akurom ā mē kot amnhÿ tomnuj xwÿnhjê hkôt Tirtūm kapêr o mē ahkre rāhā ho ri ixpa. Anē.

Nhūm pre ā Jejus mē kot tanhmā ho kapêr punuj to xwÿnhjê mā amnhÿ jarēnh anē.

Kàxpore pikunor jarēnh

⁸ Nhūm Jejus arÿ mē kām awjarē nē mē kām:

—Nē ja. Koja mēhō ni hikàxpore kêp 10. àpēnh o arÿgro pē 10 pānhā kàxpore kêp 10. Tā ho pyxi nē ho akunok. Hāmri nē tee ri hapêr nē hkaprÿ nē. Hāmri nē kanē hpôk nē hitom kapōnh pē hprÿ hā hapêr o ri pa nē kām kato. ⁹ Hāmri nē kupy nē hkÿnh nē hkrāmnhwÿjê ho akuprō nē òrkwÿ htā

mē òrkwÿ xwÿnhjê ho akuprō nē mē kām amnhÿ jarē nē mē kām: “Xê na pre ixpê ixkàxpore hōta akunok pa tee ri hapêr tā akupÿm kām ixkato nē kupy nē ixkÿnh nē. Jakamā xê wem inhÿ hā määnēn akÿnh.” ā mē ujarēnh kot anhÿr.

¹⁰ —Ja pyrā nē koja mē kot amnhÿ tomnuj xwÿnhjê hō pyxire nē amnhÿ tomnuj kaga nē ixkôt amnhÿ xām. Hāmri nhūm kaxkwa kamā mē piitā ja hā omu nē hkÿnh nē. Te mēhō ni kot kàxpore pikunor xwÿnh mā kator nē hkÿnhhta pyrāk. Anē.

Mē hkra pikunor jarēnh

¹¹ Nhūm Jejus arÿ mē ahkre ho xa. Tirtūm kām mē piitā mē hapê htÿx ā mē ahkre ho xa. No kê ām hā kuxi nē kê we tanhmā mē kām ujarēnh to nē mē kām:

—Nē koja mēhō hkra my wa axkrut.

¹² Hāmri nhūm kot hapu ò papaj wÿr tē nē kām: “E papaj. Ot pa awÿr tē. Kot kaj nhÿrmā ty pa wa amÿr pē akukrêx o ixàrik. Jakamā e kwa tokyx atÿr ri amnhÿ kamā wa inhmā ho axkjê pa inhō ho amnhÿptār kurê kumrêx nà?” Anē. Hāmri nhūm kuma nē wa kām hikukrêx o axkjê. Kot wa mā hkwÿ gō nē kot hapu mā hkwÿ gō. ¹³ Hāmri nhūm kot haputa ām ri hipêêxā hkôt pa hkrānre hāmri nē kot kām hikukrêx nhōr jamÿnh pa nē ma nhÿhÿm o mō nē ho wēnē hpa. Hāmri nē hpānhā kàxpore jamÿ nē ma nhÿhÿm mō. Nhÿhÿm awry hā pika hō hwÿr ma mō. Mōō hāmri nē krÿ hō kamā htÿx ri tanhmā amnhÿ tomnuj to ho ri pa. Hāmri nē gaa nē ra mē hkuprÿjê hā kàxpore ho hapêx pa. Nē kagôxÿhti hā ho hapêx pa. Nē gaa hāmri nē hikàxpore hkêt nē ri pa.

¹⁴ —Rôm nhūm pikaja kamā mē hā na wrÿk kêt ry rax nē. Nē gaa nhūm mē hpur kām mē kêp mē apkur xā hā mēōja hapêx pa. Jakamā nhūm mē hkra kot haputa kêp amrakati nē kām prām tÿx nē ri pa. Hāmri nē tee ri amnhÿ kukamā hamaxpêr. ¹⁵ Hāmri nē amnhÿ to krÿ nhō xwÿnhjê mar o ri pa. Kot mē kām tanhmā àpēnh to nē hpānhā apkur kaxyw.

Hāmri nhūm mēhō kot kām hkrit hagrō jamār kaxyw hā kumē nhūm ma hwȳr tē nē kām hamār o pa. Nom kot kām hamār o pata pānhā ām kām mēmoj nhōr kryre nhūm arī kām prām tȳx kumrēx.

¹⁶ Nē tee ri kot hagrō kutā ōta kur prām nē tee ri omunh o pa. ¹⁷ —Nē gaa hāmri nē tanhmā hamaxpēr to. Nē tee ri kot tanhmā amnhī tomnuj toja ā amnhī pumu nē hamaxpēr o: “Hēxta waa nē. Mān mūtār inhō krī kamā inhō papaj mā mē àpēnh xwȳnhjaja ixrom apkur mex o pa. àpkur mex nē nhūm mēō jakrēx prār rūnh tā pa jar mē hkīnhā prām xāj ra ixtyk o mō.

¹⁸ Nà kot paj ma akupȳm mō. Hāmri nē inhō papaj pumu nē ā kām amnhī jarēnh anē nē kām: ‘Kwa Papaj. Na pa pre ixpē akra hā amnhī tomnuj tȳx kumrēx nhūm ja apē omnuj nē. Nhūm Tīrtūm pē ja omnuj nē. ¹⁹ Jakamā na pa ixpē akra hā amā amnhī jarēnh ā xpijaām nē. Ixte tām kēt kumrēx. Jakamā kwa xà kot pa amā mēmoj tā ixàpēnh o ri ixpa ka hpānhā inhmā inhō pa apku nà?’ Anhȳr o kot pa kām amnhī jarē. Nà kot paj anē.”

²⁰ —Anhȳr o amnhī kukamā hamaxpēr hāmri nē ma akupȳm mō. Mōō nē ra hpōx o mō. Nē kormā amȳm mōr ri nhūm ō papaj hwȳr rīt nē omu nē amnhī kra hā omunh kurē kumrēx nē hkīnh nē ma kutā hprōt nē tē. Omu nē kām hkaprī nē. Nē hwȳr hprōt nē hkaxpa nē kahti hkōt kumȳ.

²¹ Hāmri nhūm kām amnhī jarē nē kām: “Kwa papaj. Na pa pre amnhī tomnuj nē nhūm ja apē omnuj nē. Nē Tīrtūm pē ja omnuj nē. Jakamā ixte ixpē akra hā amā amnhī jarēnh ā xpijaām. Ixte tām kēt kumrēx.” Anē.

²² Nom kormā kām amnhī jarēnh par kēt ri nhūm hipēêxà kām mē àpēnh xwȳnhjē mā akir nē mē kām: “E kwa mē atō ma tē nē kām ê mex ō py nē akupȳn ixkrata wȳr ho aprōt nē kām haxà. Nē hpar kà nē ihkra kamā kàx nē amnē kām hamȳ nē ho aprōt. ²³ Nē akupȳm aprōt nē mōx kra htwȳm mexta ō pumu nē unē nē apī. Nē mē ho anē pu mē ixkra hā pahkīnh nē

apku. E mē amnhī prēprêk nē tokyx ā amnhī nhīpêx anē. ²⁴ Na pre ma ixpē mōr o te ixpē htyk pyrāk. Tā akupȳn mō nē ixwȳr pōj nē te akupȳm inhmā htīr pyrāk. Jakamā e mē tokyj.” Anhȳr jakamā nhūm mē hā mōx kra pī nē ho anē nē hkīnh nē hā apkur o hkri.

²⁵ —Rôm nhūm hkra kot wata kormā pur kām htȳx àpēnh o xa. àpēnh o ām tā akupȳn hpōx o tē. Hāmri nē amnhī kukamā mē kot ri mēmoj tatak nē mē grer ma. ²⁶ Hāmri nē tee ri hamaxpēr o tē nē ōrkwȳ hwȳr pōj nē kormā kapem xa nē mē hā mē àpēnh xwȳnhjē hō kukja nē kām: “Kwa mēmoj tā na ka wem ā akīnh rax anē?” ²⁷ Anē nhūm kām: “Nà mēhō hkēt. Atō na akupȳn pōj nhūm anhīpēêxà omu nē hkīnh tȳx nē. Nē mē inhmā anē pa mē hā mōx kra htwȳm mexja pī nē hā ho anē nē hā ixkīnh nē hkur o ixkrī.” Anē. ²⁸ Hāmri nhūm tee ri htō jarēnh ma nē gryk tȳx nē. Hāmri nē gryk xāj kapem hkuk punuj o mē omunh o xa nē mē hwȳr àr kēt nē. Hāmri nhūm hipēêxàja tee ri omu nē hwȳr kato nē tee ri kot mē hwȳr ho àr kaxyw ho anhȳr kaprȳ. ²⁹ Hāmri nhūm kām: “Tk. Kwa na pa hte amā ixàpēnh rūnh rāhā ho ri ixpa hā ra ixtā amgrà xohtō nē. Nē aa akapēr nhīrōp tanhmā ixām to hkēt. Tā ka hte ixpumunh nē akīnh nē ixtā mēmoj tōx pīr kēt nē. ³⁰ Tā nhūm akra kot haputa apē akukrēx kwȳ jamȳnh pa nē ma o mō nē axtem nē mē hkuprȳjē mā ōr par tā akupȳn mō nē pōj. Ka omu nē akīnh nē hā mōx kra twȳmta pī. Nà kot paj mē awȳr ixàr kēt nē.” Anē.

—Hāmri nē gryk tȳx nē xa. ³¹ Hāmri nhūm ō papaj tee ri kuma nē kām: “Kwa nà ri ā akapēr anhȳr kēt nē. Inhmā ajapē kēnā. Na ka hte ixkōt apa ho apa rāhā nē. Nē ixkukrēx piitā kēp anhōō. ³² No atōja na pre te ixpē htyk pyrāk tā arī htīr. Nē te pikunor pyrāk tā te ra akupȳm kator pyrāk jakamā na pa omu nē ixkīnh nē. Nē inhmā hapē ho te māānēn inhmā ajapē pyrāk.” Anē.

—Ā mē ujarēnh kot anhȳr. Ja pyrà

ně koja mēhō te kot amnhī tomnuj tỳx o ri pa htā amnhī kaxyw Tirtūm mā hamaxpēr nē amnhī to kuwỳ nē hkôt amnhī xām. Hāmri nhūm amnhī tā omu nē hkīnh nē. Nē kām hprām nē. No mē kajaja. Mē apē Parijew nhō xwỳnhjē mē Tirtūm kapēr tūm o mē ahkre xwỳnhjaja. Na ka htem mē kot amnhī tomnuj xwỳnhjaja kot Tirtūm kapēr mar o kuhē hā mē omu nē Tirtūm kīnhā akīnh kêt nē. Nē te hkra kot wata jamaxpēr pyrāk o ajamaxpēr nē tee ri ja hā mē omu nē mē kamā agryk nē. Nē mē amā mē hprām nōkati. Anē.

16

Mē panhōxỳ nē Jejus kot mē pamā karō

¹ Tā nhūm kê Jejus axte hkôt ri mē pa ho mē pa xwỳnhjē jahkre. No âm mēmoj tā kuxi nē mē kām tanhmā ujarēnh to nē mē kām:

—Nà koja mēhō hikàxpore rax xwỳnhja kām àpēnh xwỳnh mā mēmoj to wēnē ho pa kaxyw âm. No nhūm kām ho mex kêt nē. Axtem nē kēp amarī mē kām mēmoj to fiat par o mō. Hāmri nhūm ra mēhō kot ā amnhī nhīpēx anhỹr ā omu nē ma ò patrāw wỳr tē nē kām harē. ² Hāmri nhūm tee ri harēnh ma nē amnhī wỳr hā karō. Hāmri nhūm hwỳr tē nē axà nhūm kām: “Pa. Kwa xà âm hāmri na mē inhmā ajarē? Kwa nà mon ka ri axtem nē ā ixpē inhō mēmoj nhīpēx anē? E inhmā ate mē kām ho fiat par xwỳnhjē nhīxi hā kagà nē inhmā agō hāmri nē ma tē. Kot ka axte inhmā axàpēnh kêt nē rī amnhī pumu.” Anē.

³ —Hāmri nhūm kuma nē tee ri amnhī kukamā hamaxpēr nē hamaxpēr o: “Hēxta waa nē. Tanhmā kot paj amnhī to? Ixihtỳxre hā kot pa mēhō mā pur ā apē. Nom inhmā amarī ri ixàhwỳr o ri ixpa hprām kêt. Ixte amnhī kuk ā xpijaàm.” Anē.

⁴ Hāmri nē tanhmā amnhī kukamā hamaxpēr to nē hamaxpēr o: “Nà kot paj amnhī wỳr ixte mē kām ho fiat xwỳnhjē hā karō. Nē mē kām mē ò kōōta ahpar mā hkamē kê mē âm inhō patrāw mā hkwyỳ pix gō. Kêr kê

mē amnhī tā ixpumu nē kām ixkīnh nē. Hāmri nē inhō patrāw kot ixkaga hā ixtā harēnh ma nē ixkamā ukaprī japêr. Hāmri nē amnhī wỳr ixwyỳ pa ahpỳnhā mē kutā ixàpkur o ri ixpa nhūm prām ixpīr kêt nē. Nà kot paj anē.” Anē.

⁵ Hāmri nē amnhī wỳr mē hā karō nhūm mē hwỳr mra. Nhūm mē omu nē ja mā kām: “E tanhmā na ka pre inhō patrāw pē mēmoj to fiat to? E inhmā harē.” Anē. ⁶ Hāmri nhūm kām: “Na pa pre kēp orti hā à ho 100 nē ho fiat. Ota hā kagàta. Tā pa kormā kām amnhīrer kêt nē.” Anē nhūm kuma nē kām: “Tōe ka inhma. Kot paj amā anhō kôt o gri ka âm kām ho 50 pix nē agō pa ixte anhō kôt ho ijapēx par pyrāk o anhīpēx.” Anē. ⁷ Hāmri nē hpānhā nhām ja mā kām: “No ka. Tanhmā na ka pre kēp mēmoj to fiat to?” Anē nhūm kām: “Na pa pre kēp pây hā xak o 1.000 nē ho fiat. Tā pa kormā hpānhā kām amnhīrer kêt nē.” Anē nhūm kām: “Tōe. Kot paj hāmri amā anhō kôt o gri ka âm kām ho 800 pix nē agō pa ixte anhō kôt ho ijapēx par pyrāk o anhīpēx.” Anē. Nhūm ā mē hipēx anē. Hāmri nē hamaxpēr o: “E. Na pa mē kām mē ò kôt o hkry pa. Kojaja mē amnhī tā kām ixkīnh japêr.” Anē.

⁸ —Hāmri nhūm ò patrāwja ā kot mē hipēx anhỹr ā harēnh ma nē kām: “Tk. Kwa ate pa ixkukamā ajamaxpēr nē inhmā mēmoj to anhỹr mex kêt tā ka amnhī kukamā ajamaxpēr mex pē ā mē hipēx mex anē.” Anē. Á mē ujarēnh kot anhỹr. Anē.

Nhūm pre ā Jejus mē kām ujarēnh anē. Hāmri nē mē kām:

—Tā ja pyrā nē na hte mē kot Tirtūm kôt amnhī xunhwỳr kêt xwỳnhjaja âm amnhī pix kukamā hamaxpēr mex o pa. Jao amnhī kaxyw pix mā mē piitā tanhmā mē ho mex to ho pa. Mē kot amnhī tā mē omunh nē mē kām mē hkīnh nē amnhī xwar tanhmā mē ho mex to kaxyw nhūm htem ā amnhī nhīpēx anhỹr o pa. Tā mē ate ixkôt amnhī xunhwỳr xwỳnhjaja. Tirtūm kot tanhmā mē ate amnhī kwỳjē ho mex to hā amnhīm mē ajarēnh kaxyw

kêr ka mẽ amnhĩ mẽ mẽ piitã mẽ hkukamã ajamaxpêr mex nê. Pê tanhmã mẽ ho mex to ho ri apa. ã mẽ ate amnhĩ nhĩpêx anhÿrja na mex. Nom kormã mẽ ate ã amnhĩ nhĩpêx anhÿr kêt.

9 —Hêxta waa nê. Mon ka htem mẽ urak nê ã axpên to mex anhÿr kêt nê? Kwa mẽ àpênh xwÿnhhta kot amnhĩ nhĩpêx pyrã nê tanhmã axpên to mex to o ri apa hkêt wehe. Jao akukrêx nê akàxpore ho anhõxÿ hkêt nê. Kêr ka nhÿrmã ty nê Tirtũm wÿr api nhũm ja hã mẽ ato mex rax nê. Te ho kot õ patrãw mã àpênh xwÿnhhta kot tanhmã mẽ ho mex to xwÿnhjê hwÿr mrrar nhũm mẽ kot amnhĩ xwar tanhmã ho mex tota pyrãk.

10-11 —Na hte Tirtũm tanhmã mẽ pakute hã mẽ pahpumunh mex nê. Koja mẽ amã mẽmoj gõ ka mẽ kãm hprãm xà hkôt ho anhõxÿ hkêt nhũm ja hã mẽ apumu nê axte mẽ amã mẽmoj gõ. Nom hpãnhã mẽ amã õr rax o wamta jakre nê kugõ. Nom kot ka mẽ ri mẽmojta o anhõxÿ ho ri apa nhũm tee ri ja hã mẽ apumu nê axte mẽ amã mẽmoj nhõr kêt nê. Koja mẽ amã mẽmoj gõ ka mẽ ho anhõxÿ ho ri apa nhũm ja kêp homnuj nê.

12 —Nê kot kaj mẽ jar Tirtũm kot mẽ amã mẽmoj nhõr xwÿnhja ho anhõxÿ ho ri apa. Hã koja nhÿrmã kaxkwa kamã mẽ amã mẽmoj mex nhõr kêt nê.

13 —Nê kot kaj apyxi nê anhõ patrãw hamëxkrut nê arĩgro pyxi hã hamë wa kãm axàpênh o amÿkry hkêt nê. Kot kaj anê nê hõ gryk ã hõ kaga. Ja pyrã nê kot kaj mẽ jar pika ja kamã akàxpore nê akukrêx pix kukamã ajamaxpêr o ri apa hã kot kaj mẽ amã hapê htÿx nê mẽ kêp ho anhõxÿ ho ri apa. Nê akukrêx rax gryk ã Tirtũm kãm hprãm xà hkôt akukrêx o tanhmã axpên to ajuta hto ho ri apa hkêt nê. Ja pymaj kwa kêr ka mẽ ãm Tirtũm pix mã mãn ajamaxpêr rãhã ho ri apa. Jao te akukrêx nê akàxpore mã axãmnhix ri anhĩhkra karo ho ri apa pyrãk. Anê.

Nhũm pre ã Jejus mẽ ahkre anê.
14 Hãmri nhũm Parijew nhõ xwÿnhjaja mar o kuhê. Na prem ra mẽ hikàxpore rax gryk ã Jejus kaga. Jakamã ã kot mẽ kãm kàxpore jarênh anhÿrja ma nhũm ja mẽ kêp omnuj nê nhũm mẽ hã hpêr o pikênh o kuhê. 15 Hãmri nhũm amnhĩ tã mẽ kuma nê mẽ kãm: —Nà na ka htem te mẽ ate tãm mẽ kot amnhĩ nhĩpêx xwÿnh pyrãk o amnhĩ nhĩpêx nom ri mẽ kãm amnhĩ to axêx o ri apa. No nhũm Tirtũmja kot tanhmã mẽ ate amnhĩ nhĩpêx to nê tanhmã mẽ ajamaxpêr to hkôt mẽ apumunh par. Nê hprĩ hã mẽ anhõxÿ hã mẽ apumu. Te mẽ ate tãm amnhĩ nhĩpêx pyrãk nom mẽ anhõxÿ kamã na ka htem apa. Mẽmoj te mex pyrãk nhũm htem omu nê mex ã hkamnhix. No nhũm Tirtũm àhpumunh tÿx xà hkôt hprĩ hã mẽmojta pumu nhũm kêp omnuj nê. Mẽ akurom omnuj ã omunh kurê kumrêx. Na hte hprĩ hã mẽ ate amnhĩ nhĩpêx ã mẽ apumu. Anê.

Tirtũm kapêr aa hapêx kêt ã harênh Matêwre 5.17-18

16 Nhũm Jejus arĩ mẽ ahkre nê mẽ kãm:

—Nê na pre finat Mojesja kumrêx mẽ kãm Tirtũm kapêr kwÿ hã kagã. Tã nhũm hpãnhã Tirtũm nhÿ hã kapêr jarênh xwÿnh kwÿjaja mãânên mẽ kãm hkwy hã kagã. Nhũm prem kuma nê mẽ hkôt amnhĩ nhĩpêx o ri pa. Tã nhũm finat Juãw Paxisja mẽ hpãnhã kato nê Tirtũm kapêr o mẽ ahkre ho ri pa. Tã pa hpãnhã ho mẽ ajahkre ho ri ixpa nhũm mẽ ohtô nê ixkôt amnhĩ xunhwÿ nê kãm ixkapêr kôt pix mã amnhĩ nhĩpêx o ri pa hprãm nê.

17 —Tirtũm kapêr tũmja mex o mex. Koja aa hapêx kêt nê. Koja nhÿrmã kaxkwa nê pika wa hapêx pa no nhũm Tirtũm kapêr tũmja aa hapêx kêt nê. Koja rãhã ho rãhã nê aa ihkjê ho mênh kêt nê. Anê.

Mẽ pahte axpên kaga hkêt ã mẽ pamã karõ

Matêwre 5.31-32, 19.9-12; Makre 10.2-12

18 Nhũm Jejus arĩ mẽ ahkre nẽ mẽ kãm:

—Nẽ kêr ka mẽ aprõ kaga hkêt nẽ apa. Kot kaj mẽ hkaga nẽ hpãnhã nhãm hõ ho aprõ nhũm Tĩrtũm noo mã te ate wam aprõ kamã nhãm ho amnhĩkati pyræk. Nhũm ja kêp omnuj nẽ. Rỳ ka ra mẽhõ kot hprõ kaga xwỳnhhta ka hpãnhã ho aprõ. Nhũm Tĩrtũm noo mã te ate wam mjên pẽ ho amnhĩkati pyræk. Nhũm Tĩrtũm pẽ ja omnuj nẽ. Anẽ.

Hikàxpore rax xwỳnh mẽ kêp amrakati xwỳnh wa harẽnh

Rukre 6.20-26

19 Nhũm Jejus arĩ mẽ ahkre kamã mẽ kãm awjarẽ nẽ mẽ kãm:

—Koja mẽhõ kàxpore rax xwỳnh ê mex pix kãm ri pa. Nẽ apkati mẽ apkur mex o pa. 20 Nhũm amrakati xwỳnh pẽ Rajareja hkà nhyre nẽ arĩ pry kamã àhwỳr o hkrĩ. Nhũm htem hamỳ nẽ ma o pa nẽ hikàxpore rax xwỳnh nhõrkwỳ jakwakrem haxwỳ. 21 Nhũm õ jakrẽx kwỳ hkrẽr prãm xaj hakwa krem àhwỳr o hkrĩ. Nhũm rop hwỳr mra nẽ hkà nhy kunhnwỳnh o kuhê.

22 —Tã nhũm Rajare ty nhũm Tĩrtũm kapẽr o mẽ wryk xwỳnhjaja hwỳr wry nẽ ma akupỳm kaxkwa hwỳr hkarõ ho mõi nẽ ho api. Hãmri nhũm kaxkwa kamã mẽ pahpãm Apraãw nhĩhkõ hã hkĩnh nẽ apkur mex o hkrĩ.

—Tã nhũm hikàxpore rax xwỳnhhta mããnẽn hkõt ty. Nhũm hkwỳjaja hã akuprõ nẽ hã mur nẽ ma o tẽ nẽ haxà. 23 Hãmri nhũm hkarõ ma mẽ kot amnhĩ xà htỳx kamã hamak tũm xà pẽ kuwy maatita wỳr ma mõi. Nẽ kamã amnhĩ xà htỳx kãm hamak rãhã ho pa. Hãmri nẽ amnhĩ xà hã maj kãnhmã rĩt nẽ kaxkwa kamã Apraãw pumu. Nhũm Rajare ra kuri mex nẽ nhỹ. 24 Hãmri nhũm tee ri wa omu nẽ Apraãw mã akapẽr nẽ kãm: “Kwa Apraãw. Kwa we ixkamã axukapri nẽ ixwỳr Rajare mẽ kê ixwỳr tẽ nẽ ìhkrakrã ho gõ htok nẽ ho inhõhto jakry. Na pa kuwy kamã amnhĩ xà htỳx kãm ijamak tỳx kumrẽx.” Anẽ.

25 Hãmri nhũm kuma nẽ kãm: “Tk. Nà

kot pa awỳr mẽnh kêt nẽ. Na ka pre atĩr ri amex nẽ akĩnh nẽ ri apa. No nhũm Rajare akĩnhã hkà nhy rax nẽ amnhĩ xà htỳx kãm hamak rãhã ho ri pa. Tã ra jar inhĩhkõ hã hkĩnh nẽ pa. Ka pre kurom amex nẽ apa htã kot kaj hpãnhã amnhĩ xà htỳx kãm ajamak rãhã ho ri apa. 26 Nẽ pahkaêx kãm ahkaprỳ griã. Jakamã nhỹhỹnh kot kêt awỳr rẽ? Ka ajaxwỳja nhỹhỹnh kot ka kêt mẽ ixwỳr rẽ?” Anẽ.

27 —Nhũm ã kãm kapẽr anẽ nhũm tee ri kuma nẽ kãm: “Kwa tõi ma inhõ krĩ hwỳr mãn amẽ kê ma ixkwỳjê hwỳr wry. 28 O mũj arĩ inhõ krĩ kamã ixtõ kêp 5 nẽ arĩ htĩr nẽ pa. Kê wa mẽ kãm awjarẽ kê mẽ amnẽ kuwy hwỳr pa pymaj tokyx amnhĩ tomnuj kaga nẽ Tĩrtũm kõt mãn amnhĩ xunhwỳ nẽ hkõt ri amnhĩ nhĩpêx o pa.” Anẽ.

29 —Hãmri nhũm Apraãw kãm: “Nà pa mẽ hwỳr mẽnh kêt nẽ. Ra mẽ kuri Tĩrtũm kapẽr jarẽnh xwỳnhjê mẽ Mojes kot Tĩrtũm kapẽr ã kagà kẽnã. Kê mẽ kamã harẽ nẽ ja ma nẽ rĩ tãm tanhmã amnhĩ nhĩpêx to.” Anẽ.

30 Hãmri nhũm tee ri kuma nẽ kãm: “Kwa nà. Koja mẽ kagàja mar kêt nẽ. No kêt Rajare na pre ra htyk tã akupỳm htĩr jakamã koja mẽ hwỳr wry nẽ mẽ kãm awjarẽ nhũm mẽ akupỳm htĩr ã omu nẽ kapẽr ma hãmri nẽ amnhĩ tomnuj kaga kurẽ kumrẽx. Kwa nà ã ri anhỹr kêt nẽ mẽ hwỳr amẽ hẽxta waa nẽ.” Anẽ.

31 —No nhũm kãm: “Nà koja mẽ Tĩrtũm kapẽr ã kagà mar kêt ã koja mẽ mããnẽn Rajare tyk nẽ akupỳm htĩr nẽ mẽ hwỳr wryk nẽ kot mẽ kãm tanhmã ujarẽnh to hã mar kêt nẽ. Jakamã kwarĩ pa mẽ hwỳr mẽnh kêt nẽ. Kot paj ho anẽ nẽ ãm ixte mẽ hwỳr mẽnh kaprỳ pyræk o amnhĩ nhĩpêx.” Anẽ. ã mẽ ujarẽnh kot anhỹr. Anẽ.

17

Mẽ kot Jejus nẽ mẽ no kupyri ã mẽ harẽnh

Matêwre 18.6; Makre 9.42; mããnẽn Rõmãn 1.32; Sikũn Pêtre 2.1, 2.18

1-2 Tã nhũm Jejus hkõt mẽ pa ho mẽ pa xwỳnhjê jahkre ho nhỹ nẽ mẽ kãm:

—E kot paj mẽ kot ixkôt amnhĩ xunhwỳr tohtuj anhỳr xwỳnhjê jarẽ ka mẽ inhma. Nà koja mẽhõ mẽ hwỳr tẽ nẽ inhnẽ mẽ kãm kapêr. Mẽ kot mẽ mar nẽ amnhĩ tomnuj prãm xàj tanhmã mẽ kãm kapêr to. Hãmri nhũm mẽ mar xà hkôt tanhmã amnhĩ tomnuj to. Hã koja Tĩrtũm ja hã omu nẽ kot inhnẽ tanhmã kãm nẽ xwỳnhhta pumu nẽ ja hã homnuj tỳx nẽ. Te mẽ kot mẽhõ pynênh nẽ mut ã kên pytĩ hõ nhôr nẽ ma o htêm nẽ gô rax kãm mênh pyræk o koja hipêx. Te ho ja pyræk no ãm homnuj tỳx o ja jakre. Jakamã kwa mẽ ixkapêr ma nẽ kãm ajamaxpêr tỳx rãhã ho ri apa. Anẽ.

Mẽ pahte amnhĩ tã tanhmã mẽhõ hto hkêt ã mẽ pamã karõ

Matêwre 18.21; Makre 11.25-26; mããnên Epes 4.32; Korosẽ 3.13

³ Nhũm Jejus arĩ mẽ ahkre nẽ mẽ kãm:

—Nẽ koja ixkôt atõjê hõ tanhmã atomnuj to. Ka amnhĩ tã omu hãmri nẽ ma hwỳr tẽ nẽ ja hã kãm akapêr nẽ kãm: “Kwa mon ka axtem nẽ ri ã inhĩpêx anẽ ixtõ? Kwa nà ri ã inhĩpêx anhỳr kêt nẽ.” Anẽ hãmri nhũm amnhĩ tã ama nẽ amã: “Nà na pa tee ri ixte tanhmã atota ã amnhĩ pumu nẽ ixkaprĩ nẽ. Nà kot paj axte ã ri anhĩpêx anhỳr kêt nẽ. Kwa kêt ka axte tanhmã ja mã ajamaxpêr to hkêt nẽ. Te ate amnhĩ katut kôt mênh pyræk o hipêx pu akupỳm tãm axpên nhĩpêx o papa.” Anẽ. Koja ã amã kapêr anẽ ka amnhĩ tã ama hãmri nẽ axte tanhmã kot atoja mã ajamaxpêr kêt nẽ.

⁴—Koja arĩgro pyxi hã xatã tanhmã atomnuj to japêr. Hãmri nẽ xatã tee ri ja hã amnhĩ pumu nẽ awỳr mra nẽ xatã amnhĩ tã amã kapêr nẽ amã: “Pa ot pa awỳr tẽ. Na pa ra ixkaprĩ nẽ. Kwa ixte ã anhĩpêx anhỳrja pumu nẽ ãm omu. Kot paj axte hkêt nẽ.” Anhỳr o xatã amã kapêr. Nẽ ra axte tanhmã atomnuj to nẽ kê axte awỳr tẽ nẽ ã amnhĩ tã amã kapêr anẽ. Nom kêt ka ama nẽ kamã agryk kêt nẽ. ãm xatã kãm: “Nà kot puj anẽ nẽ akupỳm tãm axpên nhĩpêx. Kot paj axte tanhmã

ate ixtota mã ijamaxpêr kêt nẽ. Kot puj ja ho pajapêx nẽ tãm axpên nhĩpêx o akupỳm papa.” Anhỳr o kêt ka mẽ xatã axpên nhĩpêx anhỳr rãhã ho ri apa nẽ aa jam anhũrer kêt nẽ. Anẽ.

Mẽ pahte mẽmoj tã Tĩrtũm wỳr hã mẽ pajarênh

Matêwre 17.20-21, 21.21-22; Makre 11.23

⁵Tã nhũm Jejus nhỹ hã mẽ ahkre ho mẽ pa xwỳnhjaja hãmri kãm:

—Kwa Pahihti. Tanhmã mẽ ixto pa mẽ amnhĩ kaxyw Tĩrtũm kôt ijamaxpêr tỳx rãhã ho ri ixpa. Anẽ.

⁶Hãmri nhũm mẽ kãm:

—Nà ra mẽ ate amnhĩ kaxyw hkôt ajamaxpêr jakamã na ra amnhĩ tã mẽ apumu. Jakamã mẽ ate hkôt amnhĩ nhĩpêx kukwak ri na ka htem mẽmoj tã awỳ nhũm mẽ ate mẽmoj tã hwỳr xà hkôt mẽ amã tanhmã mẽmoj nhĩpêx to. Te mẽ ate pĩ hpàr mỳj mã akapêr nẽ kãm: “E amnhĩ jarẽ nẽ ma tẽ nẽ gô xujanãr kãm mãn mrõ.” Anẽ nhũm kot amar nẽ amar xà hkôt ã kot amnhĩ nhĩpêx anhỳrta pyræk. Ja pyrã nẽ kot kaj mẽ ate Tĩrtũm kôt amnhĩ nhĩpêx o apa kukwak ri mẽmoj tã awỳ nhũm mẽ ama nẽ mẽ amã mẽmoj tanhmã ho. Rỳ mẽ amã mẽmoj gõ. Anẽ.

Te mẽ pahpê Tĩrtũm mã paxàpênh xwỳnh pyræk

⁷ Nhũm Jejus arĩ mẽ ahkre nẽ mẽ kãm:

—Nẽ ja. Kot kaj mẽ amã mẽ àpênh xwỳnh kwỳjaja nhũm hõ amã mẽmoj tã àpênh o pa ã ho anhỳr pa. Hãmri tanhmã kot kaj kãm akapêr to wehe? Xà kot kaj kãm: “E hãmri axàpênhta kaga nẽ tẽ nẽ nhỹ nẽ apku.” Anhỳr o kãm akapêr? ⁸ Nà kot kaj kãm anhỳr kêt nẽ. Kot kaj kãm: “E kwa tokyx tẽ nẽ hpãnhã inhmã inhõ hã apê. Kot pa ixàpkur pa ka ixpãnhã nhỹ nẽ apku.” Anhỳr kãm akapêr. Kêp amã àpênh xwỳnh jakamã ka ã kãm akapêr anẽ.

⁹Ja pyrã nẽ kot puj mẽ Tĩrtũm kot mẽ pamã mẽmoj tã karõ xà hkôt tanhmã kãm amnhĩ nhĩpêx to ho ri papa. Mẽ õ patrãwta pyrã nẽ kot tanhmã mẽ

pamã karõ hto xà hkõt pu mẽ amnhĩ nhĩpêx.

—Xà na htem mẽ õ patrãw mã mẽmoj tã àpênh pa hãmri nê hkwỳjê mã amnhĩ to jarkrar o ri pa nê mẽ kãm: “E ka mẽ ixpumu. Na pa hte inhõ patrãw mã ixàpênh mex o mẽ hakre ka mẽ ja hã ixpumu. Hêxta waa nê. Mon pa hte ri axtem ã amnhĩ nhĩpêx anê?” Anhỹr o xà kot kaj mẽ kãm amnhĩ to jarkrar o ri apa? Nà na ka htem ã amnhĩ nhĩpêx anhỹr kêt nê.

10 —Tã pa hte mẽ õ patrãwta pyrã nê tanhmã mẽ amã mẽmoj tã karõ hto ho ixpa. Jakamã kêr ka mẽ inhma nê ixte mẽ amã mẽmoj tã karõ xà hkõt tanhmã inhma amnhĩ nhĩpêx to ho ri apa. Hãmri nê hã amnhĩ to jarkrar pẽ amnhĩ jarênh o: “Ăm hãmri na pa ã Jejus mã amnhĩ nhĩpêx anê. Hêxta waa nê. Ixpê Jejus mã tanhmã ixte amnhĩ nhĩpêx to mex xwỳnh na pa.” Anhỹr o amnhĩ to jarkrar kêt nê. Kêt ăm amnhĩ jarênh o: “Nà ixte kãm tanhmã amnhĩ nhĩpêx to ho ixpa xwỳnh pix na pa. Na hte mẽmoj tã inhma karõ pa kuma nê ỹ hã tanhmã kãm amnhĩ nhĩpêx to.” Anhỹr o amnhĩ jarênh o ri apa. No ri amnhĩ krã hkõt atỳx tanhmã amnhĩ to jarkrar to ho ri apa hkêt nê. Anê.

Jejus kot mẽ ho 10 nê akupỹm mẽ ho mex ã harênh

Matêwre 8.1-4

11 Tã nhũm Jejus arĩ Garirej rũm pika pẽ Samar hkàx ã Jerujarẽ hwỳr kormã mõi. 12 Nê nhỹri krĩ hõ htêp o mõi mẽ nhũm krĩ pu hã ri mẽ pa xwỳnhjaja kêp 10 nê kutã mra. Mẽ hkànhy hkro htỳx xwỳnhjaja kutã mra nê hkaxpa nê amỳm kuhê nê omu.

13 Hãmri nê kãm:

—Pa Pahihti. Kwa mẽ ixpumu nê mẽ ixkamã axukaprĩ nê tanhmã mẽ ixto mex to. Anê.

14 Hãmri nhũm mẽ kãm:

—Tõe. Nà kot paj mẽ ato mex. E mẽ mãmri awjanã nê ma akupỹm mẽ anhõ patrejê hwỳr mra kê mẽ akupỹm mẽ akà mex ã mẽ apumu. Anê.

Hãmri nhũm mẽ kuma nê kapêr mar xà hkõt awjanã. Kà nhy rãhã awjanã nê ma akupỹm patre hwỳr mra. Nê kormã akupỹm hwỳr pry hã mra rãhã piitã hkà mex pa. 15 Hãmri nhũm ăm pyxi nê hkwỳjê rom awjanã nê akupỹm Jejus wỳr Tirtũm mã mex o mex ã harênh o hwỳr tẽ. 16 Hãmri nê Jejus kaxpa nê kutã hkõnkrã ho tẽm nê nhỹ nê amnhĩ tã kãm kot ho mex ã kãm amnhĩ jarê. Kwỳjê hkĩnhã kêp Ijaew kêt axtem kêp Samar nhõ xwỳnh tã mẽ kurom akupỹn hwỳr tẽ nê kãm mex o mex ã harê. 17-19 Hãmri nhũm amnhĩ tã kuma nê kãm:

—No mẽ akwỳjaja? Ixte mẽ ato 10 nê mẽ ato mex tã ka ăm kapxipix awjanã nê akupỹn ixwỳr tẽ. Akwỳjê hkĩnhã apê Ijaew kêt tã akupỹm amnhĩ mex ã amnhĩ pumu hãmri nê mẽ kurom awjanã nê Tirtũm mã mex o mex ã harênh o ixwỳr tẽ. Hêxta waa nê. Mo na hte ixkwỳjaja apyrã nê amnhĩ kaxyw ixkõt hamaxpêr kêt nê? E kànhmã xa nê mãmri ma ajamakêtkati nê akĩnh nê ma akupỹm tẽ. Anê.

Jejus akupỹn wryk xà hã arĩgro jarênh

Matêwre 24.23-24, 24.37-44; Makre 13.32-37; mãânên Wam Tesarôn 5.2-8; Sikũn Pêtre 3.3-10

20-21 Tã nhũm Parijew nhõ xwỳnh kwỳjaja Jejus wỳr mra nê omu nê kãm:

—Kwa mẽ inhma mẽmoj jarê. Xà koja apu Tirtũm tokyx kot mẽ pahwỳr mênh mã xwỳnhhta mẽ nhũm mẽ pahwỳr wry nê mẽ pahto amnhĩptar kurê kumrêx nà kormã? Anê.

Hãmri nhũm mẽ kuma nê mẽ kãm amnhĩ jarê. Te ho nhãm mêmõ jarênh pyrã nê mẽ kãm:

—Nà ra kot mẽ ho amnhĩptar o pa kênã. Nom nhỹri hkrĩ xà kamã mẽ ho amnhĩptar o hkrĩ hkêt nê. Na htem amnhĩ kaxyw hkõt hamaxpêr nê hkõt amnhĩ xunhwỳ hãmri nhũm kêp mẽ õ pahihti hã mẽ ho amnhĩptar o pa. Nê mẽ kãm mẽ hamaxpêr mex gõ nhũm htem hkõt ri hamaxpêr mex o pa. Anê.

22 Hãmri nê hpãnhã hkõt mẽ pa ho mẽ pa xwỳnhjê mã kapêr. Mẽ kot

nhỹrmã tee ri kamã hamak o pa hã mẽ kãm kapër nẽ mẽ kãm:

—Kot kaj mẽ nhỹrmã tee ri amã tokyx akupỹn ixwryk nẽ ixte mẽ ato amnhĩptâr prãm xaj tee ri inhmã anojarêt kaprý ho ri apa. Nẽ axpẽn mã ri ijarênh o: “Hêxta waa nẽ. Mo na we Pahihti tokyx akupỹn mẽ pahwyr wryk kêt nẽ?” Anhỹr o inhmã anojarêt o ri apa pẽ ixkamã ajamak rãhã ho apa.

²³ —Nẽ koja mẽ ra akupỹn ixwryk ã tanhmã mẽ amã ixto hêx to ho pa. Nhỹri ixkuhê nhũm mẽ kot ixpumunh ã mẽ amã ixto hêx o pa. Nom kêr ka mẽ ama nẽ ãm mẽ ama. ²⁴ Kot paj nhỹrmã akupỹn mẽ awyr ixwryk kaxyw nhũm mẽ pika piitã hkôt akupỹn ixwryk kãm anhĩpê ixpumu. Te mẽ piitã mẽ kot anhĩpê na jaxênh pumunh pyrãk o kot kaj mẽ apiitã ixpumu. ²⁵ Nom kormã jar pika ja kamã ixpa ri koja mẽ ohtô nẽ ixkaga pa amnhĩ xà htýx kamã ijamak kãm ty. Hãmri nẽ mẽmo arĩgro hã ma akupỹm kaxkwa hwyr api. Hãmri nẽ nhỹrmã akupỹn mẽ awyr wry.

²⁶ —Nà kot paj nhỹrmã man akupỹn mẽ awyr wry. Akupỹn ixwryk xà hã arĩgrota ã koja jar pika ja kamã mẽ pa xwýnhjaja htýx ri tanhmã amnhĩ tomnuj to ho pa. Te amnepêm finat Nohti htĩr ri mẽ kot htýx ri tanhmã amnhĩ tomnuj to ho pa pyrãk o koja mẽ amnhĩ nhĩpêx o pa. ²⁷ Na prem amnhĩ kaxyw Tĩrtũm mã hamaxpêr o pa hkêt nẽ. Nẽ ãm jar pika ja kamã mẽ kot amnhĩ nhĩpêx pix kukamã hamaxpêr o ri paja o ãm kôt pix mã tanhmã ri amnhĩ nhĩpêx to ho pa. Rôm nhũm Nohti gô htàm pymaj pàr raxja nhĩpêx nẽ kãm axà. Nhũm prem hã omu nẽ ãm omunh o pa nẽ tanhmã ri amnhĩ kukamã hamaxpêr to hkêt nẽ. Tã nhũm nata mẽ haêr pẽ wry. Hãmri nẽ wryk rax o ra pika piitã hanhi nhũm mẽ piitã pikaprãr pa.

²⁸ —Akupỹn ixwryk xà hã arĩgrota ã koja mẽ mãânên te amnepêm Sotõ nhõ xwýnhjaja kot htýx ri tanhmã amnhĩ tomnuj to pyrãk o amnhĩ nhĩpêx. Finat Rohti kormã htĩr ri

mẽ kot htýx ri tanhmã amnhĩ tomnuj to ho pata pyrãk o koja mẽ amnhĩ nhĩpêx. Na pre hte Sotõ nhõ xwýnhjaja ãm pika ja kamã mẽ kot amnhĩ nhĩpêx pix kukamã hamaxpêr o ri pa. Nẽ ãm kôt pix mã ri amnhĩ nhĩpêx o pa. Nẽ htýx ri amnhĩ xàpkur xà pix kukamã hamaxpêr. Nẽ mẽ hpur kãm ri àpênh pix kukamã hamaxpêr. Nẽ ri amnhĩ xujaprôr pix kukamã hamaxpêr nẽ axpẽn mã mẽmoj to wênê pix kukamã hamaxpêr. Nẽ amnhĩm òrkwỹ nhĩpêx pix kukamã hamaxpêr. ã na prem pika ja kamã mẽ kot amnhĩ nhĩpêx pix kukamã hamaxpêr o ri pa anhỹrja o amnhĩ kaxyw Tĩrtũm mã hamaxpêr o pa hkêt nẽ.

²⁹ —Tã nhũm Rohti mẽ ò krĩ rũm kator mẽ nhũm Tĩrtũm krĩ nhõ xwýnhjaja kot amnhĩ tomnuj týx o paja mýrapê mẽ himex pa. Jao kaxkwa rũm mẽ hipy mẽmo hpòk kwý rẽ nhũm mẽ hkaxàr pa. ³⁰ Tã akupỹn mẽ awyr ixwrykja mẽ koja mẽ te Rohti nhõ krĩ kamã mẽ kot amnhĩ nhĩpêx pyrã nẽ htýx ri amnhĩ tomnuj pix o pa.

³¹ —Nẽ akupỹn ixwryta ã ka mẽ anhòrkwỹ nhĩmòk ã hkrãmnênh o akrĩ japêr nẽ akupỹn ixwryk kãm ixpumu. Hãmri nẽ akukrêx wyr axàr nẽ hõ hpyr mã ajamaxpêr kêt nẽ. Rý ka mẽ apur kãm axàpênh o akuhê japêr nẽ akupỹn ixwryk kãm ixpumu. Hãmri nẽ akupỹm anhòrkwỹ hwyr atêm mã ajamaxpêr kêt nẽ. Mo kaxyw kot ka kêt hwyr tẽ? Kêt ãm inhmã mẽ ajapê hã akupỹn mẽ awyr ixwryk mã ajamaxpêr o akĩnh nẽ ixpumunh o akuhê.

³² —Nẽ kêr ka mẽ Rohti prõ kot tanhmã amnhĩ nhĩpêx toja mã ajamaxpêr rãhã ho ri apa. Na pre Tĩrtũm kapêr nhĩròp xa nẽ amnhĩ katut kôt Sotõta wyr rĩt hãmri nẽ ã amnhĩ nhĩpêx anhỹrja mýrapê htyk kurê kumrêx. Tã kêr ka mẽ ho urãk nẽ amã akukrêx rax japê xaj ixkôt amòr kaxyw anhĩtõt kêt nẽ.

³³ —Nẽ kwa kêr ka mẽ jar pika ja kamã tanhmã mẽ ate amnhĩ nhĩpêx to pix kukamã ajamaxpêr o ri apa

hkêt nê. Nê mẽ akukrêx rax pix kukamã ajamxpêr kêt nê. Koja nhÿrmã ja piitã mẽ apê hapêx pa. Mẽ ate kãm anhÿkra karo hpar pyrãk o piitã hipêx hãmri nhÿm Tÿrtÿm ja hã mẽ apumu nê hpãnhã nhÿrmã mẽ amã mẽmoj mex nhôr rax nê.

³⁴ –Nê kot paj kamãt kãm akupÿn ixwryk japêr nhÿm nhÿri mẽhõ ra ixkõt amnhÿ xãm xwÿnh mẽ mẽhõ kot ixkõt amnhÿ xãm kêt xwÿnh wa par kãm nôr japêr. Hãmri pa amnhÿ wÿr ra ixkõt kot amnhÿ xãm xwÿnhhta o api nhÿm kot ixkõt amnhÿ xãm kêt xwÿnhhta arÿ gôr nê nõ. ³⁵ Rÿ pa arÿgro hã akupÿn ixwryk japêr nhÿm mẽnijê hõ wa hamêxkrut nê harôj kahuk o ãm japêr. Hãmri pa ra kot ixkõt amnhÿ xãm xwÿnhja ho api nhÿm kot ixkõt amnhÿ xãm kêt xwÿnhja ahte arÿ harôj kahuk o xa. Hãmri nê hamaxpêr mex kêt kumrêx o xa. ³⁶ Rÿ koja mẽmyjê hõ wa axkrut nê hpur kãm ãpênh o ãm japêr. Pu pa amnhÿ wÿr kot ixkõt amnhÿ xãm xwÿnhhta o api nhÿm kot ixkõt amnhÿ xãm kêt xwÿnhhta pur kãm ahte arÿ apênh o xa. Hãmri nê tee ri hkrãmnhwÿ hkukamã hamaxpêr o xa. Anê.

Nhÿm pre ã Jejus hkõt mẽ pa ho mẽ pa xwÿnhjê mã amnhÿ jarênh anê.

³⁷ Hãmri nhÿm mẽ kuma nê kãm:

–Kwa nhÿri koja mẽmoj ã amnhÿ nhÿpêx anê? Anê.

Hãmri nhÿm mẽ kãm:

–Nã koja nhÿri mẽmojja ã amnhÿ nhÿpêx anê ka mẽ omunh kurê kumrêx. Te nhÿri mẽmoj kro nê nôr nhÿm nhônhti kot omunh nê hã htor nê hpinhÿpanh nhÿm mẽ kot hã omunh kurê kumrêxta pyrãk. Anê.

18

Mẽ pahte Tÿrtÿm mã amnhÿ jarênh rãhã ho papa hã mẽ pamã karõ

Rukre 11.5-8; mããnên Wam Tesarõn 5.17

¹ Tã nhÿm Jejus hkõt mẽ pa ho mẽ pa xwÿnhjê mã mẽmoj tã karõ. Mẽ kot tanhmã Tÿrtÿm mã amnhÿ jarênh to hã mẽ kãm karõ. Mẽ kot xatã kãm amnhÿ jarênh o pa nê amnhÿ kaxyw

kãm hamaxpêr rãhã ho pa kaxyw. No ãm hã kuxi nê tanhmã mẽ kãm hã ujarênh to nê mẽ kãm:

² –Koja nhÿri krÿ hõ kamã juistija kãm Tÿrtÿm prãm nõkati. Nê mããnên kãm amnhÿ kwÿjê hprãm nõkati htã kêp juisti nê tanhmã mẽ kãm kapêr to ho hkrÿ. ³ Jakamã nhÿm mẽhõ ni pê mjên htyk xwÿnh. Nhÿm hte mẽhõ xatã tanhmã kêp õ mẽmoj to ho pa. Hãmri nhÿm tee ri amnhÿ tã omu nê xatã juistita wÿr mra nê kãm harê nê kãm: “Xê gàa nê. Na hte pahkwÿjê hõja ixtomnuj rãhã ho pa. Xê ixtã tanhmã kãm akapêr to kê tãm inhÿpêx.” Anê. Nê xatã hwÿr mra nê amnhÿ to kuwÿ nê xatã hwÿr mra nê amnhÿ to kuwÿ. ⁴⁻⁵ No nhÿm kuma nê ãm kuma. Kãm hkwyjê ho ajuta hprãm kêt jakamã ãm kuma. Tã nhÿm xatã hwÿr mra. Gaa nhÿm rÿ kãm mar kaga nê. Hãmri nê hamaxpêr o: “Tk. Hêxta waa nê. Jahti na hte xatã ixwÿr mra nê tanhmã inhmã amnhÿ jarênh to. Nê ãm xatã ixwÿr mra. Nã na pa ra inhmã mar kagyk nê. E pa tokyx tanhmã nê kot tanhmã ho xwÿnhhta mã ixkapêr to. Inhmã Tÿrtÿm puma kamã rÿ inhmã ixkwÿjê kaprÿ kamã pa tanhmã nê kãm nê hkêt tã kot pa anhÿr kêt nhÿm amnhÿ tã inhmã harênh pix nê pa ra mar kurê ixkrã tãtãk nê.” Anhÿr o hamaxpêr. ã mẽ ujarênh kot anhÿr.

⁶ –Juisti tãm hamaxpêr kêt tã nhÿm nija xatã hwÿr mrar nê amnhÿ to hwÿr jakamã nhÿm jatã tanhmã ho ajuta hto. ⁷⁻⁸ No kêt Tÿrtÿmja. Xãn ka htem mẽmoj tã awÿ nhÿm juisti punutita pyrã nê mẽ ama nê ãm mẽ ama? Nã koja ã amnhÿ nhÿpêx anhÿr kêt nê. Kot ka mẽmoj tã kãm amnhÿ jarê nhÿm ama nê tanhmã amã mẽmoj to rÿ tanhmã amã amnhÿ nhÿpêx to. Juistita rom mẽ pakamã ukaprÿ xwÿnh na. Tã kot paj nhÿrmã akupÿn wrÿ nê mẽ apumu ka mẽ arÿ amnhÿ kaxyw hkõt ajamaxpêr mex pê kãm amnhÿ jarênh rãhã ho ri apa pa ja hã mẽ apumu nê ixkÿnh tÿx nê. Ja na inhmã hprãm. Anê.

Tanhmã mẽ kot Tirtũm mã amnhĩ jarẽnh to hã mẽ harẽnh

Matêwre 6.5-8; mããnẽn Wam Pêtre 5.5-6

⁹ Tã nhũm Jejus mẽ kot amnhĩ to mex o hkwýjê jakrenh ã amnhĩ to jarkrar o ri mẽ pa xwýnhjê pumu nẽ tanhmã mẽ kãm kapêr to. Nom mẽ kot amnhĩ to jarkrarta ã kuxi nẽ mẽ kãm awjarẽ nẽ mẽ kãm:

¹⁰ —Koja mẽhõ wa hamẽxkrut nẽ Tirtũm mã amnhĩ jarẽnh kaxyw wa tẽ. Ja kêp Parijew nhõ xwýnh nhũm hõja kêp mẽ õ pahi mã hkwýjê pê kãxpore hkwý jamýnh xwýnh. Nhũm wa Tirtũm mã amnhĩ jarẽnh xà hã ixkre hwýr wa tẽn axà. ¹¹⁻¹² Hãmri nhũm Parijew nhõ xwýnhhta kumrêx tẽ nẽ nhýri mẽ piitã mẽ noo mã Tirtũm mã amnhĩ jarẽ. Nẽ amnhĩ to jarkrar pê kãm amnhĩ jarẽnh o: “Pa Tirtũm. E ra ate ixpumunh mex. Na pa hte amnhĩ to mex pix o ri ixpa. Ra ate ja hã ixpumunh mex. Na pa hte kãxpore hkwý jamýnh xwýnh nẽj rom tãm amnhĩ nhĩpêx. Nẽ semãn piitã hã ixàpkur kêt rãhã amã amnhĩ jarẽnh rãhã ho ixtã apkati axkrut. Nom ja pix kêt. Na pa hte mããnẽn ixàpênh pãnhã kãxpore jamý nẽ mẽ kot amã tanhmã amnhĩ nhĩpêx to ho pa xwýnhjê mã hkwý nhõr o ixpa. Nẽ na pa hte ri ixàhkĩnh o ri ixpa hkêt nẽ. Nẽ nhãm mẽ kêp mẽ hprõ ho amnhĩkati ho ri ixpa hkêt nẽ. Na pa hte mẽ piitã mẽ kurom tãm amnhĩ nhĩpêx ã amnhĩ pumu nẽ ixkĩnh tỳx kumrêx. Hêxta waa nẽ. Mon pa hte ri ã amnhĩ to mex o ixpa anẽ?” Anhýr o Tirtũm mã amnhĩ to jarkrar pê kãm amnhĩ jarẽnh o xa.

¹³ —Hãmri nhũm hpãnhã mẽ kêp kãxpore hkwý jamýnh xwýnhhta haxwýja Tirtũm mã amnhĩ jarẽ. No ãm Parijew nhõ xwýnhhta rom ki hkwýjê pê awry nẽ ahte hipô nẽ kãm amnhĩ jarẽ. Nẽ kãm amnhĩ jarẽnh pê amnhĩ tak nẽ mur nẽ kãm: “Kwa Tirtũm. Na pa hte amnhĩ tomnuj tỳx o ri ixpa. Nẽ ixtỳx ri amã prãm xà kuhpa hã tanhmã amnhĩ nhĩpêx to. Na pa tee ri ja hã amnhĩ pumu

nẽ ixkaprĩ htỳx nẽ. Æ inhmã amnhĩ nhĩpêx anhýr o ri ixpa hprãm kêt tã pa hte ã amnhĩ nhĩpêx anhýr o ri ixpa. Kwa xà kot ka ixkamã axukaprĩ nẽ amnhĩ katut kôt ixte amnhĩ tomnuj rẽnh pa Tirtũm?” Anhýr o kãm amnhĩ jarẽ.

¹⁴ —Hãmri nhũm Tirtũm hamẽ wa kot kãm amnhĩ jarẽnh ma no ãm wamta ma nẽ ãm kuma. No kêt hkôt hõja ma hãmri nẽ kot kãm amnhĩ tã àhwýr xà hkôt amnhĩ katut kôt kot amnhĩ tomnuj rẽnh pa nẽ ho hkra. Jakamã nhũm mex nẽ hkĩnh nẽ pa. Ra tãm hkrã hãmri nẽ hkĩnh nẽ ma htêm kurê kumrêx. Æ mẽ ujarẽnh kot anhýr. Æm hãmri na pa mẽ amã ja jarẽ. Koja mẽhõ Parijew nhõ xwýnhhta pyrã nẽ kot amnhĩ to mex xwýnh ã amnhĩ kamnhĩx hãmri nẽ Tirtũm kot amnhĩ katut kôt kot amnhĩ tomnuj rẽnh kaxyw amnhĩ to hwýr kêt nẽ. Koja ãm kãm amnhĩ to jarkrar pix nẽ. Jakamã koja Tirtũm te kot mar nẽ ãm mar pyrãk o hipêx. No koja mẽhõ kot kãxpore hkwý jamýnh xwýnhhta pyrã nẽ tee ri tanhmã amnhĩ tomnuj to hã amnhĩ pumu nẽ hkaprĩ nẽ. Hãmri nẽ amnhĩ to Tirtũm wý nhũm kuma nẽ tanhmã ho mex to. Anẽ.

Jejus kot amnhĩ wýr mẽhprĩrejê hwýr ã harẽnh

Matêwre 19.13-15; Makre 10.13-16

¹⁵ Tã nhũm Jejus mẽ hkôt mẽ pa ho mẽ pa xwýnhjaja arĩ pry hã Jerujarẽ hwýr mõ nhũm Ijaew kwýjaja mẽ omu nẽ mẽ hkrare jamý nẽ Jejus wýr mẽ o mra. Kot mẽ hã ãhkra jaxwýr nẽ mẽ ho Tirtũm wýr kaxyw. Hãmri nhũm hkôt mẽ pa ho mẽ pa xwýnhjaja tee ri ja hã mẽ omu nẽ nẽ mẽ kãm kapêr nẽ mẽ kãm:

—Tk. Kwa mẽ ma akupým mẽ akrata o mra nà? Mo kaxyw na ka mẽ Jejus wýr mẽ o mra? Kormã mẽ ràxre kênã. Anẽ.

¹⁶ Hãmri nhũm amnhĩ tã mẽ kuma nẽ mẽ kãm:

—Tk. Kwa nà mẽ ri inhnê mẽhprĩjê kurê hkêt nẽ. Kwãr mẽ mãmrĩ ixwýr mẽ o mra. Anẽ.

Hãmri nẽ amnhĩ wýr mẽ kãm hpa ho apê nhũm mẽ hwýr mẽ o mra

nhũm mẽ kuri kuhê. Hãmri nhũm hkôt mẽ pa ho mẽ pa xwýnhjê mã kãm:

—E mẽ jareja mẽ omu. Na htem hamakêtkati nê hkĩnh nê ri pare. Nê kãm amnhĩ to rũnh prãm kêt nê ri pa. Tã Tĩrtũm kôt mẽ kot amnhĩ nhĩpêx xwýnhjaja na htem mẽ uràk nê kãm amnhĩ to rũnh prãm kêt nê ri pa.

17 —Jarejaja na htem hipêêxà nê katorxà wa kapêr ma nê wa hkôt ri amnhĩ nhĩpêx mex o ri pa. Tã ixpê Tĩrtũm kot mẽ awýr inhmênh xwýnh kot ka mẽ amã ixkôt amnhĩ xunhwýr prãm. Hã kot kaj mẽ te ho jarejê kot amnhĩ nhĩpêx pyràk o amnhĩ nhĩpêx. Jao ixkapêr ma nê ixkôt ri tanhmã amnhĩ nhĩpêx mex to ho ri apa. Anê.

*Kàxpore rax xwýnh jarênh
Matêwre 19.16-30; Makre 10.17-31;
mããnên Wam Ximotre 6.6*

18 Tã nhũm Ijaew nhõ pahihiti hõja Jejus wýr tẽ nê kãm kapêr nê kãm:

—Pa? Mẽ ijahkre xwýnh maati? Kwa inhmã mẽmoj jarê. Tanhmã kot pa we nhỹrmã Tĩrtũm ri igtĩr tũm nê ixpa kaxyw amnhĩ nhĩpêx mex to ho ri ixpa wehe? Anê.

19 Hãmri nhũm kãm:

—Xà ate ixpê Tĩrtũm kwý hã ixpupunh kôt na ka ixte uràk nê amnhĩ to mex xwýnh ã ijarê? Tĩrtũm pix na kot amnhĩ to mex rãhã xwýnh jakamã kot kaj ã ijarênh anhỹr jao ixpê Kra hã ijarê. Nê uràk nê ixte amnhĩ to mex xwýnh ã ijarê. Nà xàn ka ãm atýx ri amnhĩ krã hkôt ã ijarênh anê?

20 —Tĩrtũmja mex o mex xwýnh jakamã kot kaj amã nhỹrmã kuri atĩr tũm nê apa hprãm hãmri nê ra kot mẽmoj tã mẽ amã karõ xà hkôt amnhĩ nhĩpêx o ri apa. Ra ate mar mex kênã. Na pre mẽ amã:

Kêr ka mẽ axpên pê axàhkĩnh hkêt nê.

Nê mẽ axpên par kêt nê.

Nê mẽ axpên to axêx o ri apa hkêt nê.

Nê mẽ axpên pê aprõ ho amnhĩkati hkêt nê.

Nê mẽ anhĩpêêxà mẽ akatorxà wa hã apijaàm pê wa kutã anojarêt pix o ri apa.

E kot kaj amã nhỹrmã Tĩrtũm kuri atĩr tũm nê apa hprãm hã kêr ka ã amnhĩ nhĩpêx anhỹr o ri apa. Anê.

21 Nhũm pre ã Jejus kãm kapêr anê nhũm kuma nê kãm:

—Kwa ixprĩre ri ra ã ixte amnhĩ nhĩpêx anhỹr o ri ixpa kênã. Nom ixte igtĩr tũm nê ixpa kaxyw kormã ixte tãm kêt pyràk. Anê.

22 Hãmri nhũm Jejus kãm:

—Nà kormã mẽmoj pyxire nê arĩk. Na ka amã akukrêx rax japê htýx o Tĩrtũm jakre. Jakamã kêr ka ma akupým tẽ nê akukrêx o wênê hpa nê hpãnhã kàxpore jamý hãmri nê ma mẽ kêp amrakati xwýnhjê mã õr pa. Hãmri nê rĩ akupýn ixwýr tẽ nê ixkôt apa ho apa. Anê.

23 Hãmri nhũm kuma nê tee ri amnhĩ kukamã hamaxpêr. Kãm kukrêx rax japê nê kãm ãhkra karo hprãm kêt nê. Jakamã tee ri Jejus kot ã kãm hã karõ anhỹrja ma nê awjanã nê ma akupým tẽ. 24 Hãmri nhũm tee ri ja hã omu nê hã mẽ kot mar xwýnhjê mã kapêr nê mẽ kãm:

—Hêxta waa nê. Kojã mẽ hikukrêx rũnh xwýnhjaja ohtõ nê kãm mẽ hikukrêx japê xàj Tĩrtũm mẽ wa ixri htĩr tũm nê pa ho papa hkêt nê. Wa ixte amnhĩ nhĩpêxja mẽ kêp hihtýx.

25 Na htem kãm hikukrêx rax mã ãhkra karo hprãm kêt rãhã tee ri kãm Tĩrtũm kôt amnhĩ nhĩpêx prãm kaprý. Te ho mẽhõ kot menh kagõ hã hkre nê kãm kagõ katõk prãm kêt rãhã kãm guhkrax kãm àr prãm kaprýta pyràk. Anê.

Nhũm pre ã Jejus mẽ kãm kapêr anê. 26 Hãmri nhũm mẽ kuma nê tee ri amnhĩ kukamã hamaxpêr nê kãm:

—Kwa nom mẽ ixpiitã mẽ inhmã mẽ ixkukrêx japê kênã. Jakamã xà kot paj mẽ ixpiitã nhỹrmã war ari igtĩr tũm nê ixpa ho ixpa hkêt nê nà? Anê.

27 Hãmri nhũm mẽ kãm:

—Nà kot kaj mẽ amnhĩ krã hkôt mẽ amã mẽ akukrêx japêja mã anhũrer kêt nê. Tĩrtũm pix na hte ã mẽ kot

amnhĩ nhĩpêx anhÿr kaxyw tanhmã mẽ hkrã hto nhũm mẽ kãm mẽ hikukrêx japê htÿx kêt nê. Jao mẽ kêp Tĩrtũm mẽ wa ixri htĩr tũm nê mẽ pa ho pa mã xwÿnh. Anê.

²⁸ Hãmri nhũm Simãw Pêtre kãm:

—Kwa Pahihti no mẽ pajaja? Na pa prem agryk ã mẽmoj piitã hkaga hpa nê akôt ixpa ho ixpa. Jakamã kot paj mẽ nhÿrmã war ari ixtĩr tũm nê ixpa ho ixpa nà? Anê.

²⁹ Hãmri nhũm kãm:

—Tÿ. Nà ka mẽ atõ inhmã tanhmã amnhĩ nhĩpêx to ho apa kaxyw akwÿjê re nê ma inhmã tanhmã amnhĩ nhĩpêx to ho ri apa. Anhõrkwÿ re rÿ atõ rÿ atõx rÿ aprõ nê akrajê re. Rÿ akatorxà nê anhĩpêxà war are. Rÿ akukrêx piitã rer pa hãmri nê ma ixkapêr o mẽ piitã mẽ ahkre ho ri mẽ hkôt apa. ³⁰ Hã kot paj ja hã mẽ apumu nê mẽ ato mex rax nê. Hãmri ka mẽ ma nhÿhÿm apa nê nhÿri mẽ kãm ixkapêr jarênh o ri mẽ hkôt apa nhũm mẽ kot mẽ amar xwÿnh kwÿjaja mẽ ama nê ra kãm mẽ akĩnh nê. Nê ra mẽ ate akwÿjê rer par tã nhũm mẽ tãmjaja te mẽ apê mẽ hkra rÿ mẽ htõ rÿ mẽ htõx pyrãk o mẽ anhĩpêx nê tanhmã mẽ ato mex to ho pa. Hãmri ka mẽ nhÿrmã ty nê ma Tĩrtũm mẽ wa inhõ krĩ hwÿr api hãmri nê wa ixkuri amex kumrêx nê atĩr tũm nê apa ho apa. Anê.

Nhũm pre ã Jejus Simãw Pêtre mẽ hkwÿjê mã kapêr anê.

Jejus kot axte htyk kukamã amnhĩ jarênh

Matêwre 20.17-19; Makre 10.32-34

³¹ Tã nhũm Jejus mẽ kot ÿ hã kapêr jarênh o mẽ pa xwÿnh pê 12jaja mẽ hkwÿjê pê mẽ ho kato. Nê nhÿri mẽ hkàx ã mẽ o xa nê tanhmã mẽ kãm amnhĩ jarênh to nê mẽ kãm:

—Amnepêm Tĩrtũm nhÿ hã kapêr jarênh xwÿnhjaja na prem ixkukamã tanhmã mẽ kot inhĩpêx to hã ijarê nê ixtã kagà. Tã pu mẽ ra Jerujarê hwÿr mẽ. Kamã koja mẽ tanhmã ixto rax nê. Ra mẽ kot ixkukamã ijarênh nê ixtã kagà xà hkôt koja mẽ ixto anê.

³²⁻³³ Koja mẽ kãm ixkurê xwÿnhjaja ixpynê nê Rõm nhõ xwÿnhjê nhõ pôristi hwÿr ixto tẽ nê mẽ kãm ixto hêx nhũm mẽ kuma nê mẽ mar xà hkôt tanhmã inhĩpêx to. Nê mẽ hkwÿjaja ixtã hpêr o axké nê akunha. Nê mẽ hkwÿjaja ixto kapêr punuj nê ijaprÿ nê ixtã argôx rê nê ixtak. Hãmri nê ixpĩ. ã koja mẽ inhĩpêx anê. Nom kot paj ãm ixtyk ã apkati axkrunêpxi nhũm Tĩrtũmja akupÿm ixto ixtĩr. Anê.

³⁴ Hãmri nhũm mẽ kuma nê tee ri htyk nê akupÿm htĩrja kukamã hamaxpêr no ãm hprĩ hã hkôt hamaxpêr kêt nê.

Jejus kot no hkre xwÿnh o mex ã harênh

Matêwre 20.29-34; Makre 10.46-52

³⁵ Tã nhũm Jejus mẽ kormã Jerujarê hwÿr Jerikoja tẽp o mẽ. Hãmri nhũm pry nhĩhkjê hã no hkre xwÿnhjaja àhwÿr o nhÿ. ³⁶ Hãmri nê amnhĩ wÿr mẽ mrar ma. Mẽ ohtô nê Jejus kôt mẽ mrar xwÿnhjê mrar ma nê mẽ kãm:

—Kwa mẽmo ri? Mẽmoj wÿr na ka mẽ axohtô nê mra? Anê.

³⁷ Hãmri nhũm mẽ kãm:

—Nà Jejus pê Najare nhõ xwÿnh kôt na pa mẽ mẽ. Anê.

³⁸ Hãmri nhũm mẽ kuma nê kàx pê Jejus mã kapêr nê kãm:

—Pa Jejus? Apê mẽ inhõ Pahihti mex na ka. Te apê amnepêm anhĩgêt pahihiti Tawi kot amnhĩ nhĩpêx pyrãk. Jakamã kwa ixkamã axukapri nê akupÿm ixto mex kêt wehe. Ixte amnhĩ kaxyw akôt ijamaxpêr xwÿnhjê hõ na pa. Anê.

³⁹ Hãmri nhũm Jejus kukamã mẽ mrar xwÿnhjaja tee ri kuma nê kãm:

—Tk. Kwa akapêr kêt nê nhÿ nà. Anê.

Tã no nhũm ãm mẽ kuma nê xatã amnhĩ to hwÿr o nhÿ. Kàx pê kãm kapêr o nhÿ. ⁴⁰ Hãmri nhũm Jejus kuma nê xa nê amnhĩ wÿr hã karõ nhũm mẽ hpa hã kupy nê hwÿr o tẽ nhũm kãm:

⁴¹ —Pa mo na? Tanhmã kot pa ato? Anê.

Nhũm kãm:

—Nà akupÿm inhmã ixrit mex prãm. Anê.

⁴² Hāmri nhūm kām:
 –Tôe. Nà ra ate amnhī kaxyw inhmā ajamxpēr tỳx jakamā kot kaj akupỹm ri rīt. Anē.

⁴³ Hāmri nhūm akupỹm rīt mex kurê kumrêx nē ja hā amnhī pumu nē hkĩnh tỳx nē. Hāmri nē ma Jejus kôt Tĩrtũm mã mex o mex ã harēnh o mẽ hkôt tē. Hāmri nhūm mẽ kot hā omunh xwỳnhjaja haxwỳja Tĩrtũm mã mex o mex ã harēnh o Jejus kôt mō.

19

Jakew kām Jejus pumunh prām ã harēnh

Rukre 3.8, 3.12-13

¹ Tã nhūm Jejus arĩ Jerujarē hwỳr mō nē Jeriko hwỳr pōj. Hāmri nē krĩ kahti hkôt pry hā mō. ² Nhūm mẽ ra hkôt htu rax nē hkôt omunh o mō. Jakamā nhūm Jakew pē Rôm nhō pahi mã kwỳjê pē kàxpore hkwỳ jamỳnh xwỳnhjê krãhtũm xwỳnhja. Na pre hikàxpore rax nē. ³ Tã haxwỳja kām Jejus pumunh prām nē. Nom ãm hakooti nē hprĩhti jakamā tee ri kot omunh kaxyw amnhī nhĩpêx nhūm mẽ kêp àmnār rax nē. ⁴ Hāmri nhūm ra hamaxpēr nē ma kukamā hprôt nē tē nē nhỹri pry mỳri pĩ xãm pumu nē hā api nē kutêp ajêt. Hāmri nhūm Jejus mō nē hapa. ⁵ Nē kànhmã rīt nē omu nē kām:

–Pa Jakew. E kwa tokyx tẽn wry pa ma akôt anhōrkwỹ hwỳr tē nē ari amnhĩm hikra. Anē.

⁶ Hāmri nhūm kuma nē hkĩnh nē. Nē wryk kurê kumrêx nē ma amnhĩ kôt nē o tē. ⁷ Hāmri nhūm mẽ kot omunh o kuhê xwỳnhjaja tee ri ja hā omu nhūm ja mẽ kêp omnuj nē nhūm mẽ axpẽn mã harēnh o:

–Tk. Kwa nà. Jakew kot amnhĩ tomnuj xwỳnh tã nhūm Jejus ma hkôt tē nē kuri pōj. Anē.

⁸ Hāmri nhūm wa òrkwỹ hwỳr axà nē nhỹ nhūm Jakew Jejus mã amnhĩ jarēnh o:

–E. Nà ra ixte pahĩhti mã kàxpore jamỳnh xwỳnhhta na pa pre hte ho prês jakre nē amnhĩm hamỳnh rax nē. Tã kot paj akupỹm mẽ kām òr pa. Na pa pre hte mẽ hkwỳjê pē ho 10 nē

hamỳ. Tã kot paj hipy ho 40 nē kurê nē akupỹm mẽ kām ho ixpigràn pa. ã kot paj mẽ hipêx anē. Nē ixkàxpore jakrêx kot paj ho axkjê nē mẽ kêp amrakati xwỳnhjê mã ho ixpigràn pa. Anē.

⁹ Hāmri nhūm kuma nhūm ja kām mex nē. Jakamā nhūm kām:

–Nà ãm hāmri. Ate pahkukamã panhĩgêt Apraãw pyrà nē jarãhã ate amnhĩ tomnuj kaga jakamã na ra jarãhã anhōrkwỹ hwỳr mẽ mex xà axà. Kojã Tĩrtũm jarãhã amnhĩ katut kôt ate amnhĩ tomnuj rēnh pa nē axte kām hamaxpēr kêt nē. ¹⁰⁻¹¹ Mẽ ate amnhĩ tomnuj xwỳnhjê hwỳr na pre Tĩrtũm inhmē pa wry. Te nhỹri mẽ apikunor nhūm ixte mẽ ajapêr o ixpa kaxyw Tĩrtũm kot mẽ awỳr inhmēnh nhūm ixwryk nē nhỹri ixte mẽ ajapêr o ixpa nē mẽ amã ixkator nē ixkĩnh nē ma akupỹm hwỳr mẽ ato inhmōrta pyræk. Anē.

Mẽ pahte Tĩrtũm mã tanhmã amnhĩ nhĩpêx to

Matêwre 25.14-30

Hāmri nhūm mẽ ohtô nē Jejus mar o hkôt Jerujarē hwỳr mra. Na prem htỳx tanhmã kot amnhĩ nhĩpêx to hã hkamnhĩx o hkôt mō nē axpẽn mã:

–E ma pu mẽ hkôt. Kojã Jerujarē hwỳr pōj hāmri nē kêp mẽ pahpê Ijaew nhō pahi nē mẽ pahto amnhĩptār kurê kumrêx. E kwa ma pu mẽ hkôt. Anē.

¹² Nhūm Jejus mẽ hamaxpēr kôt mẽ omunh mex nē. Jakamã kot mẽ piitã mẽ ho amnhĩptār xà hã arĩgro hã mẽ kām amnhĩ jarēnh kaxyw. Kormã Jerujarē hwỳr ahtêp kêt ri mẽ kām amnhĩ jarēnh kaxyw. Nom hprĩ hã mẽ kām hã amnhĩ jarēnh kêt nē. ãm amnhĩ tã kuxi nē mẽ kām awjarē nē mẽ kām:

–Kojã nhỹri krĩ hō kamã mēhō myja. Kot amnhĩ to rax o hkwỳjê jakrenh xwỳnhja. Nē krĩ hō kamã krĩ piitã hkôt pahi nhō pahĩhtija hāmri harēnh ma nē amnhĩ wry kuwỳ. Kot ma hwỳr mōr nhūm ò krĩ kamã nē mããnēn krĩ hkwỳ kamã kêp mẽ ò pahi

kaxyw kot ãm kaxyw nhũm hwÿr no-jarêt. ¹³ Hãmri nê amnhĩ wÿr kãm mẽ àpênh xwÿnhjê ho 10 nê tanhmã mẽ hã karõ hto. Nhũm mẽ hwÿr mra nhũm mẽ kãm amnhĩ jarê nê mẽ piitã mẽ kãm kàxpore hkwÿ gõ. Ahpÿnhã mẽ kãm hpÿnh nê kugõ nê mẽ kãm: “E ota ixkàxpore hkwÿta. Kot kaj mẽ ixkutêp tanhmã ri inhmã ho rax to. Kêr pa mẽmo arĩgro hã akupÿn mō kê ra ixahã inhmã ho ohtō nê pa hamÿ.” Anhÿr o mẽ kãm kapêr hãmri nê ma mō. ¹⁴ Hãmri nhũm õ krĩ nhõ xwÿnhjaja ra kêp mẽ õ pahi kaxyw harênh ma nhũm ja mẽ kêp omnuj nê. Nê mẽ kãm hkĩnh kêt jakamã ma krĩ hõ kamã kot mẽ kaxyw ãm xwÿnhhta wÿr hkwÿ rê nhũm mẽ ma hwÿr mra nê hwÿr pōj. Hãmri nê kot mẽ kaxyw ãm mã xwÿnhhta pumu nê kãm: “Pa. E ot pa mẽ awÿr mra. Kwa na ka xep ra mẽ ixkaxyw mẽ inhĩõja xãm kaxyw. Kwa nà mẽ inhmã jahti hkĩnhti hã. Kwa mẽ ixkaxyw ãm kêt nê nà?” Anhÿr o kãm kapêr.

¹⁵ —Tã no nhũm ãm mẽ kuma nê ãm mẽ kuma nhũm mẽ awjanã nê mã akupÿm mra. Hãmri nhũm pahija mẽ kaxyw mẽ kãm hkĩnh kêt xwÿnhhta xãm nhũm ma akupÿm õ krĩ hwÿr mō. Mōõ nê ra pōj hãmri nê amnhĩ wÿr kãm mẽ àpênh xwÿnhjê hã karõ nê mẽ kãm: “E no ixte mẽ amã kàxpore nhõr xwÿnhhta? Tanhmã na ka prem ixkutêp inhmã ho rax to? E mẽ inhmã agõ pa omu.” Anê.

¹⁶ —Hãmri nhũm wamta kãm: “Ota akàxpore ate inhmã õr xwÿnhhta. Na ka pre inhmã ho pyxi nê agõ pa kupy nê ho mẽmo hy hkwÿ japrō nê hkre. Nhũm ô pa mẽ kãm ho wênê ho ri ixpa nê hpãnhã kàxpore jamÿ nê hipy amã kurê nhũm ra kêp 10. Ota. E amÿ.” Anê.

¹⁷ —Hãmri nhũm kuma nê hkĩnh nê. Hãmri nê kãm: “Nà ãm hãmri na ka ã inhmã ho rax anê. Ixte amã ho pyxi nê õr tã ka pre inhmã hamãr mex nê nhũm kànhamã axkamê nê ra kêp 10. Tã ra ixpê krĩ hkwÿ kamã mẽ õ pahi jakamã kot ka inhmã krĩ ho 10 nê inhmã hamãr o ri apa. Jakamã kwa mãmri amnhĩm kàxporeta o arĩk.” Anê.

¹⁸ —Hãmri nhũm hpãnhã hõja hwÿr tẽ nê kãm: “E ota akàxporeta. Na pa pre ho mẽmo hy hkwÿ japrō nê hkre nhũm ô pa mẽ kãm ho wênê nê hpãnhã kàxpore jamÿ nê hipy amã kurê nhũm ra kêp 5. Tã ota. E amÿ.” Anê. ¹⁹ Hãmri nhũm kuma nê kãm: “Nà ãm hãmri. Hãmri na ka ã inhmã ho rax anê. Jakamã kot kaj hpãnhã inhmã krĩ ho 5 nê ho amnhĩptar o apa. E mãmri amnhĩm kàxporeta o arĩk.” Anê.

²⁰⁻²¹ —Hãmri nhũm hpãnhã hkôt hõta tẽ. Nom hkwÿjê hkĩnhã õ patrãw mã tanhmã kàxpore ho rax to hkêt nê. ãm tanhmã hamaxpêr punuj to nê htÿx ri kot kêp ho õxÿ nê amnhĩm piitã hamÿnh par nê akupÿm kãm hkwÿ nhõr kêt ã hkamnhĩx. Jakamã tanhmã kãm ho rax to hkêt nê. ãm hkupu nê o tẽ nê nhÿri kutêp kuxi. Hãmri nhũm õ patrãw amnhĩ wÿr hã karõ nhũm hwÿr tẽ nê amnhĩ nê kãm kapêr punuj nê kãm: “Tk. Ota akàxporeta. Ixte amã tanhmã ho rax tore hã. Ixte amã ho rax ronhÿx ka amnhĩm piitã hamÿnh pa nê akupÿn inhmã hkwÿ nhõr kêt nê. Rÿixte tanhmã apê homnuj to ronhÿx ka hã inhmã akir. Jakamã na pa tanhmã amã ho rax to hkêt nê. ãm hkupu nê o tẽ nê ho amũxu nhũm arĩ akutêp hikwÿ. Tã ota.” Anhÿr o amnhĩ nê õ patrãw mã kapêr punuj nê. ²²⁻²³ Hãmri nhũm tee ri amnhĩ tã kuma. Kot amnhĩ to mex xwÿnh nê kãm mẽ àpênh xwÿnhjê ho mex o pa xwÿnh tã ã kãm àpênh xwÿnh kot kãm kapêr anhÿrja ma nê amnhĩ tã kamã gryk nê. Hãmri nê kãm: “Tk. Kwa xà ã ixte amnhĩ nhĩpêx anhÿr? Nà ixte ã amnhĩ nhĩpêx anhÿr kêt. ã ixte amnhĩ nhĩpêx anhÿr nhũm amã ixpuma ronhÿx ka pre amã ixpuma xaj ixkàxporeta py nê ixwakre kamã amnhĩ krã hkôt tanhmã inhmã ho rax to. Tã nhÿx pa pre ra akupÿn awÿr tẽ nê hamÿ. Nà na ka ã ijarênh anhÿr o axêx nê amnhĩ krã hkôt tanhmã inhmã ho rax to hkêt nê. Mÿrapê kot paj atomnuj tÿx nê ka rĩ amnhĩ pumu. Pêr ãm ajamaxpêr punuj.”

²⁴ —Nhũm pre ã kãm kapêr anê

hāmri nē mẽ kot mar o kuhê xwýnhjê mã kãm: “E mẽ atõ kêp kàxpore py nē wam kot ho 10 nē hamýnh xwýnhhta mã agõ.” Anê. ²⁵ Hāmri nhũm mẽ tee ri kuma nhũm ja mẽ kêp omnuj nhũm mẽ kãm: “Kwa nà ra hikàxpore rax kênã. Ra ate kãm ho 10 nē õr kênã.” Anê. ²⁶ Hāmri nhũm mẽ kãm: “ÿÿ nom tãã. Mãmrĩ kãm agõ. Koja mēhõ inhmã àpênh mex pa amnhĩ tã omu nē kot inhmã àpênh mexta pãnhã ho mex nē. No koja inhmã àpênh mex kêt nē pa tee ri ja hã omu nē ho mex kêt nē. E mãmrĩ kãm agõ.” Anê. ²⁷ Hāmri nē hpãnhã mẽ kãm: “E hpãnhã mẽ kãm ixprãm nõkati xwýnhjaja. Ixte mẽ ho amnhĩptàr mã tã mẽ kãm ixprãm nõkati xwýnhjaja. Mẽ ma mẽ hwýr mra nē mẽ ho akuprõ nē akupýn amnē ixwýr mẽ o mra nē inhnoo mã mẽ himex pa.” Anê. ã mẽ ujarênh kot anhýr. Anê.

Nhũm pre Jejus ã mẽ kãm ujarênh anê. Te tãm kêp patrãwta pyrã nē ã amnhĩ jarênh anê. Mẽ kot tanhmã amnhĩ nhĩpêx to ho pa hã mẽ omunh xà hkôt tanhmã mẽ hipêx to hã amnhĩ jarê.

Jejus kot Jerujarê hwýr àr ã harênh Matêwre 12.1-11; Makre 11.1-11; Juãw 12.12-19

²⁸ Nhũm Jejus kormã Jerujarê hwýr mõi. ²⁹ Hāmri nē ra Petake mẽ Petãn wa htêp o mõi. Hixêt pê Oriwêhti kahti ri na krĩ wa xa. Jakamã nhũm Jejus hkôt mẽ pa ho mẽ pa xwýnh wa ho axkrut nē amnhĩ kukamã wa kumê. ³⁰ Nē wa kãm:

—E. Wa ma krĩ mũj wýr mẽ ixkukamã wa tẽ. Nē wa hwýr põi nē nhýri jumênre nyw mã ê nē ãm ata pumu. Kormã mẽ kot hã hkrĩ hkêt xwýnhhta. Ka wa omu nē kãm ê xà hpôt nē man akupýn ixwýr o tẽ. ³¹ Nhũm mēhõ ja hã war apumu nē hã tanhmã war amã kapêr to ka wa kãm ã ijarênh anê nē kãm: “Mẽ panhõ Pahihti na hã karõ pa wa hwýr tẽ.” Anhýr o wa kãm ijarê. E wa ma hwýr tẽ. Anê.

³² Hāmri nhũm wa kuma nē ma hwýr htêm kurê kumrêx. Nē wa krĩm põi nhũm Jejus kot wa kãm harênh xà

hkôt jumênreta pumu. ³³ Hāmri nē kãm ê xà hpôt o xa nhũm õ dõnjaja mra nē hã wa omu nē wa kãm:

—Tk. Kwa mo kaxyw na ka wa ri mẽ ixpê mẽ ixkrit mã ê xà pôt o wa xa? Kwa xà kot kaj wa mẽ ixpê ho ahkĩ nà? Anê.

³⁴ Hāmri nhũm wa mẽ kãm:

—Nà mẽ panhõ Pahihti na wa inhmã anê pa wa tẽ. Wa ixte ma akupým kutã ho inhmõr kaxyw. Anê.

Hāmri nhũm mẽ wa kuma nē wa kãm:

—Tõe. Nà wa mãmrĩ ma kãm o tẽ. Anê.

³⁵ Hāmri nhũm wa ma akupým Jejus wýr o tẽ. Hāmri nē kaxyw amnhĩ xê hkwy hopõj nē kãm ho hkô kahty nē kãm ho htýx nē o xa nhũm hã nhý nē mõi. ³⁶ Kormã Jerujarê hwýr hixêt ã àpir o mõi. Nhũm mẽ kot omunh o mrar xwýnhjaja hkĩnh nē ma hkukamã kot pry ho mex kaxyw amnhĩ xê hkwyptyr o mõi. ³⁷ Hāmri nhũm mẽ hixêt ã api nē kormã ahpar mã wrýk o mõi. Hāmri nhũm Jejus kôt mẽ pa ho pa xwýnhjaja kàx pẽ Tirtũm mex o mex ã harênh o hkôt mõi. Ra mẽ kot hkôt pikamênh ry nē kot mẽ kãm aa mẽmoj pumunh kêt kwý ho anhýr rax ã omunh jakamã hkĩnh nē nē Tirtũm mex o mex ã harênh o hkôt mõi. ³⁸ Nē harênh o:

E ota Tirtũm kot mẽ pahwýr mēnh xwýnhhta na ra põi.

ãm hāmri na mẽ pahwýr wrý. Na mex kumrêx.

Kêp mẽ panhõ Pahihti mex na.

ãm hāmri na pre Tirtũm mẽ pahwýr kumê.

Tirtũmja mex kumrêx. Mex o mex.

Kukwak ri pix mã na pu htem pajamakêtkati nē paxãmnhix ri papa rãhã ho papa.

Anhýr o Jejus kôt harênh o mõi. Ra kot mẽ ho amnhĩptàr kurê kumrêx ã hkamnhix jakamã hkĩnh nē hkôt ã kapêr o mõi anê. ³⁹ Hāmri nhũm Parijew nhõ xwýnh kwýjaja mẽ hkôt mra nē tee ri mẽ kuma hāmri nē Jejus mã kãm:

—Kwa Jejus. Mẽ kãm anê kê mẽ anhĩkrê nà? Anê.

⁴⁰ Hāmri nhũm mẽ kãm:

—Tk. Nà kot paj mẽ kãm anhÿr kêt nê. ã mẽ kapêr anhÿrja na inhmã mar hprãm. Kwãr mẽ mãmrĩ Tĩrtũm mã mex o mex ã harênh o ixkôt mỗ. Kot mẽ anhÿr kêt nhũm ra pikap kên nhĩkwÿ xwÿnhja tee ri ja hã mẽ omu hãmri nê tãm tanhmã amnhĩ nhĩpêx to nê mẽ hpãnhã tãm Tĩrtũm mã mex o mex ã harênh o hikwÿ. Jakamã kwãr mẽ mãmrĩ kapêr anê. Anê.

Jejus tee ri kot Jerujarê hkukamã hamaxpêr ã harênh

Rukre 23.27-31

⁴¹ Nhũm mẽ kormã Jerujarê hwÿr hpôx o mỗ. Kormã hixêr rũm ahpar mã hwÿr wrÿk o mỗ. Hãmri nhũm Jegus amÿm amnhĩ hkukamã Jerujarê nhỗ xwÿnhjê pumunh o mỗ nê mẽ hkukamã hamaxpêr o hkaprĩ nê. Hãmri nê hkaprĩ xaj mÿr o mỗ. ⁴² Hãmri nê te kot mẽ kuri mẽ omunh o ri pa pê mẽ kãm kapêr pyrãk o mẽ kãm kapêr nê mẽ kãm:

—Hêxta waa nê Jerujarê nhỗ xwÿnhjaja. Kot kaj mẽ amex kêt nê. Mẽ ate amnhĩ kukamã axãhpumunh mex ronhÿx ka mẽ ra mẽ kãm mẽ akurê xwÿnhjê pumaj ixkôt amnhĩ xunhwÿr kurê kumrêx nhũm mẽ tee ri tanhmã mẽ ato mã. Ka mẽ ra ixkukwak ri amex nê ajamakêtkati nê akĩnh nê ri apa ho apa. ⁴³⁻⁴⁴ Tĩrtũm tãm kot mẽ awÿr inhmênh tã ka mẽ amã ixprãm kêt nê. Jakamã koja nhÿrmã mẽ kãm mẽ akurê xwÿnhjaja mẽ awÿr mra nê mẽ anhỗ krĩm hipòk pa. Hãmri ka mẽ amnhĩ wÿr mẽ omu nê tee ri ajapôx kaxyw nhũm mẽ awÿr agjê nê mẽ anhĩmex pa nê mẽ anhỗ krĩja grãnh pa. Nê ahpÿnhã ri mẽ anhòrkwÿ grãnh pa. ã koja mẽ mẽmoj piitã grãnh par anê. Anê.

Jejus kot Tĩrtũm nhòrkwÿ hwÿr àr ã harênh

Matêwre 21.12-17; Makre 11.15-19; Juãw 2.13-22

⁴⁵⁻⁴⁶ Tã nhũm Jegus Jerujarê hwÿr axà nê jumênre rũm wrÿ hãmri nê ma Tĩrtũm mã amnhĩ jarênh xà hã ixkreja wÿr tẽ. Hãmri nê hwÿr axà nê tee ri kamã mẽ pa xwÿnhjê pumunh o

xa. Nhũm mẽ ra axtem nê môx nê ôwêhti nê tuuti ho wênê ho kuhê. Mẽ kot haprôr nê Tĩrtũm mã hpar nê kãm ôr pê kãm amnhĩ jarênh kaxyw mẽ kãm ho wênê ho kuhê. Nê axtem nê mẽ kãm hã ohtô rax kãm mẽ kãm ho wênê. Hãmri nhũm Jegus mẽ hwÿr axà nê tee ri mẽ omu mẽ kãm akir nê mẽ kãm:

—Tk. Kwa nà. Tĩrtũm kapêr ã kagà htũm kot ôrkwÿ jarênh kot:

Inhòrkwÿja ãm mẽ ate inhmã amnhĩ jarênh xà hã ixkre pix kaxyw na.

Anhÿr o kot harênh tã ka mẽ axtem nê kamã ã amnhĩ nhĩpêx anhÿr o apa. E mẽ ajapôj nê ma ajapêx tokyx anê.

Anhÿr o mẽ kãm kapêr hãmri nê ixkre nê mẽ kator nhũm mẽ ma hapêx pa.

⁴⁷ Tã nhũm Jegus apkati mẽ Tĩrtũm mã amnhĩ jarênh xà hã ixkreja wÿr mra nê kamã mẽ ahkre ho hkrĩ. Hãmri nhũm mẽ ô patre krãhtũm mẽ Tĩrtũm kapêr tũm o mẽ ahkre xwÿnhjê mẽ mẽ kot amnhĩ to rũnh xwÿnhjaja kot mẽ ahkre ma nhũm ja mẽ kêp omnuj nê nhũm mẽ kãm hpĩr prãm nê. ⁴⁸ Nom nhũm amarĩ mẽ pa xwÿnhjaja mẽ kurom kãm mar prãm nê akryk mar o kuhê. Jakamã nhũm mẽ tee ri ja hã mẽ omu nê tanhmã mẽ kot hpĩr to hkukamã hã axpên ma.

20

Mêhõ nhÿ hã Jegus kot mẽ ahkre hã harênh

Matêwre 21.23-27; Makre 11.27-33

¹ Nhũm arĩgro hõ hã nhũm Jegus kê axte Tĩrtũm mã amnhĩ jarênh xà hã ixkreja wÿr axà nê mẽ ahkre ho nhÿ. Tanhmã mẽ kot amnhĩ nhĩpêx to nê nhÿrmã Tĩrtũm mẽ wa kuri htĩr tũm nê pa hã mẽ kãm kapêr o nhÿ. Hãmri nhũm Ijaew nhỗ pahijê mẽ mẽ kot Tĩrtũm kapêr tũm o mẽ ahkre xwÿnhjê mẽ mẽ ô patre krãhtũmjaja hêx rom mar o kuhê. ² Hãmri nê kãm:

—Kwa mẽ inhmã amnhĩ jarê. Mêhõ nhÿ hã na ka hte ã amnhĩ nhĩpêx anhÿr o ri apa? Na ka hte akupÿm mẽ ho mex o apa nê tanhmã mẽ ahkre

hto ho apa. Xà amnhĩ krã hkôt na ka hte ã amnhĩ nhĩpêx anê nà? Anê.

³ Hãmri nhũm mẽ kãm:

—Nà ixkumrêx kot paj mẽmoj tã mẽ akukja. Ka mẽ inhma nê inhmã harê pa rĩ kormã tanhmã mẽ amã amnhĩ jarênh to. ⁴ Finat Juãw Paxisja ã kot paj mẽ akukja. Mêhõ nhỹ hã na pre mẽ hkrã kumrãr o pa? Xà amnhĩ krã hkôt nà xà Tĩrtũm nhỹ hã? E mẽ atõ inhmã harê. Anê.

⁵⁻⁶ Hãmri nhũm mẽ kuma nê tee ri kot tanhmã kutã kãm harênh to hkukamã hamaxpêr nê axpên mã:

—Kwa tanhmã kot puj mẽ kãm harênh to? Jar mẽ kot mar xwỳnhjaja na htem kêp Tĩrtũm nhỹ hã kapêr jarênh o pa xwỳnh ã harênh o pa. Tã kot puj mẽ kãm kot amnhĩ krã hkôt mẽ hkrã kumrãr o pa hã harê nhũm mẽ tee ri mẽ pama nê mẽ pakamã gryk tỳx nê. Nê mẽ paxêx rom mẽ pahte kãm pakapêr ã mẽ pahpumunh kurê kumrêx nê kên o mẽ pahtak o mẽ panhĩmex. Nom kot puj mẽ kãm Tĩrtũm nhỹ hã mẽ hkrã kumrãr ã harê nhũm mẽ pamã kapêr o: “ã kot anhỹr kênã na ka prem kapêr ma nê ra ixkôt amnhĩ xunhwỳr kêt nê?” Anê. Nà kot puj mẽ kãm tanhmã harênh to hkêt nê. Kot puj mẽ ãm kãm aa te mẽ pahte ja jarênh mar kêt pyrãk o harê. Anê.

Mẽ kot tanhmã kãm nê nhũm kot ta pãnhã tanhmã mẽ kãm nê pymaj nhũm mẽ ãm tee ri kãm tanhmã nê hprãm kaprỹ o kuhê.

⁷ Hãmri nê kãm:

—Konên. Mẽ ixte mêhõ nhỹ hã kapêr o pa hã omunhre hã. Anê.

⁸ Hãmri nhũm mẽ kuma nê mẽ kãm:

—Tk. Tôe kot pa xep ijaxwỳja mẽ amã tanhmã amnhĩ jarênh to hkêt nê. Ijaxwỳja ixte mêhõ nhỹ hã ã ixte amnhĩ nhĩpêx anhỹr o ri ixpa hã amnhĩ pumunhre hã. Anê.

*Mẽ àpênh punuj xwỳnhjê jarênh
Matêwre 21.33-46; Makre 12.1-12*

⁹ Nhũm Jejus arĩ Ijaew nhõ pahijê mã kapêr. Nê mẽ kot tanhmã hipêx to hkukamã mẽ kãm tanhmã amnhĩ jarênh to. No ãm amnhĩ tã kuxi nê mẽ kãm awjarê nê mẽ kãm:

—Koja mêhõ hpur ã hkwỳjê kot kamã kãm àpênh kaxyw mẽ kãm karõ. Hãmri nhũm mẽ ma hwỳr mra nê kamã mẽmo hy hkre nê hkre pa. Hãmri nhũm ra hpur nhõ dõnja nhỹhỹm nojarêt nê kãm mẽ àpênh xwỳnhjê mã tanhmã hpur jarênh to nê mẽ kãm: “E or ixpur nõ. Kê kamã mẽmoj hkà hpa ka mẽ mãmrĩ kamã axujamỳnh pa nê ho axkjê. Nê ixkutêp inhõ jaxwỳ nê mãmrĩ mẽ anhõ tanhmã ho hprãm xà hkôt tanhmã ho.” Anê.

—Nhũm ã mẽ kãm kapêr anê hãmri nê ma nhỹhỹm mẽ.

¹⁰ —Tã nhũm ra hkà hpa. Nom nhũm hpur nhõ dõnja kormã krĩ hõ kamã ri hã ujahkre ho ri pa. Tã kuri kãm àpênh xwỳnhjê hõja nhũm akupỹm mẽ hwỳr kumê. Mẽ kot kãm kwỳ nhõr nhũm ma kot kãm o mõi kaxyw ma mẽ hwỳr kumê nhũm ma mẽ hwỳr mẽ. Mõi nê mẽ hwỳr pøj nhũm mẽ omu nê axtem nê unê nê htak nê akupỹm hano nhũm ma akupỹm ã kamã mẽ. ¹¹ Hãmri nê pøj nhũm õ patrãwja tee ri omu nê hpãnhã ja mẽ nhũm ma mẽ hwỳr mẽ. Mõi nê mẽ hwỳr pøj nhũm kê wem mã ho anê nê unê nê htak nê akupỹm hano nhũm wamta pyrã nê ma akupỹm ã kamã mẽ.

¹² —Hãmri nhũm kê axte hkôt ja mẽ nhũm ma mẽ hwỳr mãănên mẽ. Ma mẽ hwỳr mẽ nê pøj nhũm mẽ te ho wamta wa hipêx pyrãk o hipêx nê unê nê htak rax nê amnhĩ nê hano nê pur nê kapôt ã kumê. Hãmri nhũm ma akupỹm mãănên ã kamã mẽ. ¹³ Nhũm mẽ õ patrãw tee ri mẽ omu nê hamaxpêr o: “Hêxta waa nê. Tanhmã kot paj amnhĩ nhĩpêx to? Nà kot paj mẽ hwỳr ixkra mãn mẽ. Inhmã hapê htã kot paj mẽ hwỳr kumê kê ma mẽ hwỳr mẽ. Hãmri nhũm mẽ kêp ixkra hã omu nê tanhmã ixpê ho hkêt nê. Nê tã inhmã kãm inhõja kwỳ gõ.” Anhỹr o hamaxpêr hãmri nê ma mẽ hwỳr kumê nhũm ma mẽ hwỳr mẽ.

¹⁴ —Tã ra mẽ hwỳr hpõx o mẽ nhũm mẽ amỳm amnhĩ wỳr omu nê kêp hkra hã omu nê hã axpên mã amỳnê

ně axpěn mã: “E oněj hpur nhõ dõn krata tẽ. Koja nhÿrmã õ papaj mÿr pẽ amnhĩm pur ã pyka pyta nẽ ho õ. Kwa pu mẽ hpĩr kurê kumrẽx nẽ kęp hpurja o panhõ. E tokyj pu mẽ kupĩ ri.” Anẽ.

¹⁵—Hãmri nhũm tẽ nẽ mẽ hwÿr põj nhũm mẽ unẽ nẽ pur nẽ ho kato nẽ ma o tẽ nẽ kupĩ. ã mẽ ujarẽnh kot anhÿr. Anẽ.

Nhũm pre ã Jejus mẽ kãm ujarẽnh anẽ nẽ hã tanhmã mẽ hkukjêr to nẽ mẽ kãm:

—E koja hpur nhõ dõnja hkra jarẽnh ma hãmri nẽ tãm mẽ hwÿr mõ nẽ tanhmã mẽ hipêx to wehe? ¹⁶ Koja ma mẽ hwÿr mõ hãmri nẽ mẽ himex pa. Hãmri nẽ hpãnhã hpur ã nhãm mẽmojjê rẽ nhũm mẽ tã kãm hamãr mex o pa. Anẽ.

Nhũm pre ã Jejus mẽ kãm ujarẽnh anẽ hãmri nhũm mẽ kot mar xwÿnhaja ujarẽnh kamã amnhĩ jarẽnh mar kurê kumrẽx. Mẽ kot Tĩrtũm kot mẽ hwÿr rẽnh xwÿnhjê kapêr mar kêt nhũm mÿrapê mẽ kãm mẽ hkurê xwÿnhjaja kot mẽ kęp mẽ õ pika pytar nẽ mẽ himex par ã amnhĩ jarẽnh ma nhũm ja mẽ kęp omnuj tÿx nẽ. Hãmri nẽ hẽx rom Jejus mã kãm:

—Tk. Kwa nã nhÿx pre kêt pur nhõ dõnja ã mẽ hipêx anhÿr kêt nẽ. Anẽ.

¹⁷ Hãmri nhũm mẽ kuma nẽ mẽ omunh o xa. Nẽ mẽ omunh pẽ mẽ no kagà mã mẽ kãm kapêr nẽ mẽ kãm:

—Nã ã mẽ hipêx anhÿr mã mẽ tãm kẽnã. Mãn ka prem ra Tĩrtũm kapêr ã kagà htũm kot ja jarẽnh ma. Harẽnh kot:

Mẽ kot kẽn o amnhĩm õrkwÿ nhĩpêx kaxyw nẽ kẽn maati pumu nẽ htÿx omnuj ã hkamnhĩx nẽ hkaga.

Mẽ kot hkaga htã Tĩrtũm mẽ kurom mex o kot kẽn piitã hakrenh par ã omunh kurê kumrẽx. Anẽ.

ã Tĩrtũm kapêr ã kagà htũm kot mẽ ajarẽnh te mẽ kot kẽn maati punuj ã hkamnhĩx nẽ hkaga xwÿnhjê jarẽnh pyrãk o ã mẽ ajarẽnh kot anhÿr. Anẽ.

¹⁸ Nhũm pre ã Jejus mẽ kãm te kęp kẽn maati pyrãk o mẽ kãm amnhĩ

jarẽnh anẽ. Hãmri nẽ axte amnhĩ tã kuxi nẽ mẽ kãm axte kẽn jarẽnhata pyrã nẽ mẽ kãm:

—Nã kot kaj mẽ atõ ixkaga hãmri nẽ te mẽhõ htÿx htẽm nẽ kẽn pumunh kêt nẽ hã htêk nẽ tẽm pyrãk o amnhĩ nhĩpêx. Jao ixkutã amnhĩ xãm. Rÿ ka tanhmã amnhĩ to nẽ ixkaga nhũm te kẽn maati hõ htẽm nẽ kot anhĩpy htẽm nẽ axõm par pyrãk o anhĩpêx ka amex kêt nẽ. Anẽ.

¹⁹ Nhũm pre ã Jejus mẽ kãm ujarẽnh kãm mẽ harẽnh anẽ. Hãmri nhũm Tĩrtũm kapêr tũm o mẽ ahkre xwÿnhjê mẽ mẽ õ patre krãhtũmjaja kot mẽ kãm kẽn jarẽnh o te mẽ tãm harẽnh pyrãkja ma nhũm ja mẽ kęp omnuj tÿx nẽ. Jakamã nhũm mẽ kãm Jejus pynênh nẽ haxàr prãm nẽ. Nom amnhĩ tã kãm mẽ kot mar o kuhê xwÿnhjê puma nẽ.

Mẽ kot hẽx rom Jejus kukjêr ã mẽ harẽnh

Matêwre 22.15-22; Makre 12.13-17; mããnên Rõmãn 12.1, 13.6-7

²⁰ Hãmri nhũm Tĩrtũm kapêr tũm o mẽ ahkre xwÿnhjê mẽ mẽ õ patre krãhtũmjaja Jejus tãnopxar o kuhê. Hãmri nẽ ra amnhĩ wÿr mẽmy hkwy hã karõ nẽ mẽ kãm:

—E. Mẽ ma Jejus wÿr mra nẽ te mẽ ate hkõt amnhĩ xunhwÿr kaxyw pyrãk o amnhĩ nhĩpêx nẽ mẽmoj tã ri hkukja. Mẽmoj tã hkukjêr rax nẽ. Kêr kê Rõm nhõ pahi Sesti kapêr kwÿm ri tanhmã mẽ amã kapêr to ka mẽ ama nẽ man akupÿn mra nẽ mẽ inhmã harẽnh kurê kumrẽx. Pa mẽ ama nẽ ma hwÿr mra nẽ hã unẽ nẽ ma Sesti nhÿ hã mẽ pahto amnhĩptãr xwÿnhata wÿr o tẽ nẽ ìhkram haxà. Anẽ.

²¹ Hãmri nhũm mẽ kuma nẽ mẽ kãm:

—Tõe. Nã kot paj mẽ anẽ. Anẽ.

Hãmri nẽ ma hwÿr mra nẽ hẽx rom kãm kapêr nẽ kãm:

—Pa Jejus? Nã ãm hãmri na ka hte Tĩrtũm kapêr o mẽ ahkre mex o ri apa. Na ka hte mẽ kamã akahak kêt nẽ. Nẽ mẽ kot tee ri tanhmã ato kapêr punuj to htã ka aprĩ hã mẽ ahkre mex o ri apa. ²² Kwa mẽ inhmã mẽmoj jarẽ. Rõm nhõ pahiti kot mẽ pahte kãm

kàxpore hkwỳ nhõr ã mẽ pahpê Ijaew mã karõta. Kwa xà we ja amã mex nà? Xà kot pu mẽ kãm kugõ nà xà kot pu mẽ kãm õr kêt nê? E kwa mẽ inhmã tanhmã harênh to. Anê.

²³ Nhũm prem ã hêx rom kãm kapêr anhÿr tã nhũm ra mẽ hamaxpêr ã mẽ omu mẽ mẽ kãm:

²⁴ —E mẽ atõ anhõ kàxpore htÿxre japêr mẽ inhmã hõ gõ pa omu. Anê.

Hãmri nhũm mẽ kãm ja gõ nhũm kupy mẽ omu mẽ kànhmã mẽ kãm kupê mẽ mẽ kãm:

—E mẽhõ nhĩxi mẽ mẽhõ karõ na ja hã? Anê.

Hãmri nhũm mẽ kãm:

—Pahi Sesti karõ mẽ hixi na hã kênã. Anê.

²⁵ Hãmri nhũm mẽ kuma mẽ mẽ kãm:

—Tỳ. Tô kêt ka mẽ mãmrĩ kãm hkwỳ nhõr o apa. Hã hkarõ mẽ hã hixi. Tãm kot hipêx xwỳnh jakamã õ na. No mẽ kajaja na pre Tirtũm mẽ anhĩpêx nhũm mẽ apê õ jakamã kwa kêt ka mẽ kapêr kôt pix mã ri amnhĩ nhĩpêx o ri apa. Anê.

²⁶ Nhũm pre ã Jejus mẽ kãm kapêr anê nhũm mẽ piitã mar o kuhê. Nhũm mẽ kot hêx rom kãm kapêr mã xwỳnhjaja amnhĩ jaêr pê ã kot kàxpore jarênh anhÿrja ma. Hãmri mẽ tee ri axte mẽmoj tã hkukjêr nhũm kot pahi Sesti kwỳm ri kot tanhmã harênh to kaxyw ãm tee ri tanhmã hkukjêr to kaprỳ. Hãmri mẽ axte tanhmã kãm mẽ hkêt mẽ ãm akryk omunh pê mar o kuhê.

Akupÿm mẽ htĩr jarênh

Matêwre 22.23-33; Makre 12.18-27; Juãw 5.21, 6.39; mãânên Wam Korĩt 6.14, 15.12-28; Wam Tesarõn 4.13-18; Apokarip 20.4

²⁷ Tã nhũm Satusew nhõ xwỳnh kwỳjaja. Mẽ kot akupÿm mẽ htĩr mã hamaxpêr kêt jakamã mẽ htyk mẽ mẽ hapêx ã mẽ hkamnhĩx. Jakamã na prem tanhmã axpên mã Jejus jarênh to mẽ axpên mã:

—E kwa pu mẽ ma hwÿr mra mẽ mẽmoj xihtÿx ã hkukja kê mẽ pama mẽ tee ri tanhmã mẽ pamã harênh to hkukamã hamaxpêr. Hãmri nhũm mẽ

piitã ja hã omu mẽ àhpumunh tÿx kêt ã omunh kurê kumrêx. E ma pu mẽ hwÿr.

Anê mẽ ma hwÿr mra mẽ Parijew nhõ xwỳnhjê pyrã mẽ hêx rom ahkukja mẽ kãm:

²⁸ —Pa Jejus? Kwa mẽ inhmã mẽmoj jarê. Na pre finat Mojesja Tirtũm nhÿ hã mẽ panhĩgêt mã ã karõ anê. Mẽ hkra hkêt rãhã mẽ pa mẽ mẽ htyk xwỳnhjaja nhũm mẽ harênh o:

Koja mẽhõ hprõ mẽ kormã kamã hkra hkêt rãhã pa mẽ ty. Hã koja hkôt htõja hpãnhã hprõta o hprõ mẽ kamã hkra. Hãmri nhũm kato mẽ te kêt htõ htyk xwỳnhhta hkra pyrãk. Anê.

Na pre ã Mojes mẽ kãm karõ anê.

²⁹ Jakamã kwa ga mẽ ixujarênh ma. Koja mẽ kot axpên to htõ xwỳnhjaja kêt 7. Nhũm kot waja mẽhõ ho hprõ mẽ wa pa nhũm kamã hkra hkêt rãhã ty. Nhũm hkôt htõ hõta hpãnhã hprõ ho hprõ ³⁰ mẽ wa axpên to pa. Nhũm mãânên ty. Kamã hkra hkêt rãhã ty.

³¹ —Nhũm htõ hõta. Haxwÿja hpãnhã tãm o hprõ mẽ wa axpên to pa grire nhũm haxwÿja kamã hkra hkêt rãhã ty. Hãmri nhũm htõ hkwỳjaja piitã nija pyxi mẽ axpên pãnhã ho hprõ hpa. No ãm mẽhõ kamã hkra hkêt rãhã ra htyk pa. ³² Hãmri nhũm mẽ hprõta mẽ hkôt amnhĩ to hapu mẽ ty. ³³ Tã Tirtũm kot akupÿm nhÿrmã mẽ ho htĩr ronhÿx nhÿ nhÿx kêt nija mjên kumrêx? Ra piitã kot ho hprõ kênã. E mẽ inhmã ja jarê. Anê.

³⁴ Hãmri nhũm Jejus mẽ kãm:

—Nà kaxkwa kamã mẽ kot amnhĩ nhĩpêxja axtem na. Pika ja kamã na htem pa mẽ àptàr nhũm mẽ axpên mã mẽ kure. Ja mex. ³⁵ No mẽ kot Tirtũm kôt amnhĩ xunhwÿr xwỳnhjaja na htem ty hãmri mẽ Tirtũm nhõ krĩ kamã kuri axte kãm hprõ hprãm kêt mẽ ri pa. Rỳ ni japêr mẽ kãm mjên prãm kêt mẽ ri pa. ³⁶ Hãmri mẽ Tirtũm kapêr o mẽ wrÿk xwỳnhjê pyrã mẽ axte htyk kêt mẽ. ãm htĩr tũm rãhã mẽ pa ho pa. Tirtũm ra akupÿm kot mẽ ho htĩr jakamã koja mẽ kêt hkra mẽ kuri htĩr

tùm nê mex nê pa ho pa nê axte kãm hprô rý mjên prãm kêt nê ri pa.

³⁷—Nom mê ate akupým mẽ htír mã ajamaxpêr kêt ã harênhja kot paj mẽ amã harê. Amnepêm na pre Tirtùmja pĩ hpôk kamã Mojes mã kapêr nê kãm: Ixpê Apraãw nhõ Tirtùm na pa. Nê mãânên ixpê Apraãw kra Ijak mẽ htãmnhwý Jako wa õ Tirtùm na pa.

Anhýr o Mojes mã amnhĩ jarê nhũm kuma nê hã kagà. ³⁸ Kêp apu arĩ mẽ htyk rãhã nhỹx pre ã mẽ harênh anhýr kêt nê. Nhỹx pre mẽ harênh o: “Amnepêm Apraãw nê hkra nê htãmnhwý mẽ htír ri ixpê mẽ õ Tirtùm na pa pre.” Anhýr o nhỹx pre mẽ harê. Nom na pre ã amnhĩ jarênh anhýr kêt nê. Mẽ pamã te Apraãwja mẽ htyk nê mẽ hapêx pyrãk. Nom nhũm prem ra Tirtùm ri akupým htír nê mex nê pa ho pa. Tã ka htem Tirtùm kapêr kwým ri akupým mẽ htír kêt ã mẽ harênh o apa. Anê.

³⁹ Nhũm pre ã Jejus mẽ kãm kapêr anê. Hãmri nhũm Tirtùm kapêr tùm o mẽ ahkre ho mẽ pa xwýnh kwýjaja kuma nê tee ri axte tanhmã kãm nê hprãm kaprý nê kãm:

—Tý. Nã ãm hãmri na ka ã ja jarênh anê. Anê.

⁴⁰ Hãmri nhũm mẽ axte mẽmoj tã hkukjêr kêt nê. Tanhmã kot wem amnhĩ to nê hamaxpêr o hakre? Na prem ãm tee ri kãm hamaxpêr o hakrenh prãm kaprý ho kuhê. Jejus kot mẽmoj piitã hkukamã àhpumunh týx o àhpumunh týx.

Jejus kêp pahi finat Tawi nhõ Pahihti hã kot amnhĩ jarênh

Matêwre 22.41-46; Makre 12.35-37; mãânên Rõmãn 1.3-4

⁴¹ Tã nhũm Jejus kànhmã xa nê amnhĩ tã tanhmã mẽ kot mar o kuhê xwýnhjê hkukjêr to. Nom te nhãm mẽhõ hã mẽ hkukjêr pyrã nê mẽ kãm:

—E kwa mẽ inhmã mẽmoj jarê. Tirtùm kot mẽ akaxyw ãm mã xwýnhta ã na pa mẽ akukja. Mo na htem axpên mã kêp finat pahi Tawi kanrêhã htãmnhwý pix ã harê nê mãânên kêp õ pahihti hã harênh kêt

nê? ⁴² Na pre Tawi Tirtùm kapêr kwý hã kagà nê tanhmã harênh to. Tirtùm mex ã mẽ grer xàja kwý kamã harê nê hã kagà nê hã kagà ho:

Na pre Tirtùm inhõ Pahihti mã ã kapêr anê nê kãm: “E amnê ixwýr tẽ nê inhĩhkô hã nhỹ nê inhmã mẽ ho amnhĩptar o akrĩ.

⁴³ Kot paj mẽ kot kãm akurê xwýnh piitã mẽ unênh pa nê awýr mẽ o mra nê anhĩhkram mẽ haxar pa.” Anhýr o pre kãm kapêr. Anê.

⁴⁴ Na pre ã Tawija Tirtùm kot Kris mã kapêr jarênh anê. Mẽ kajaja na ka htem ãm kêp Tawi kanrêhã tãmnhwý pix ã ri axpên mã harênh o ri apa. No kêt Tawi na pre kêp õ Pahihti hã harênh o pa. Anê.

Jejus kot tanhmã Tirtùm kapêr tùm o mẽ ahkre xwýnhjê jarênh to

Matêwre 23.1-12; Makre 12.38-40

⁴⁵ Nhũm pre ã Jejus mẽ kãm kapêr anê nhũm mẽ piitã mar o kuhê. Hãmri nhũm hpãnhã hkôt mẽ pa ho mẽ pa xwýnhjê mã kapêr nê mẽ kãm:

—Kwa mẽ o kora. Kêr ka mẽ Tirtùm kapêr tùm o mẽ ahkre xwýnhjê kot amnhĩ nhĩpêx o amnhĩ nhĩpêx kêt nê.

Ãm mẽ omu nê ãm mẽ omu nê mẽ kot amnhĩ nhĩpêx kôt amnhĩ nhĩpêx o ri apa hkêt nê. ⁴⁶ Na htem mẽ piitã mẽ kot mẽ hã hpijaàm kaxyw mẽ ê mex pix kãm ri pa. Nê mẽ kãm mẽ piitã mẽ kot amnhĩm mẽ rũnh xwýnh ã mẽ harênh o mẽ paja na mẽ kãm hprãm. Nê mẽ panhõ Tirtùm kapêr o mẽ ahkre xà hã ixkre kamã mẽ kãm amnhĩ to rũnh xwýnhjê hkrĩ xà mex pix ã na mẽ kãm mẽ hkrĩ hprãm. Nê mẽmoj tã mẽ hkĩnh ã arĩgro hã nhũm htem mẽ apkur xà hã ixkre hwýr akuprô nê mẽ kãm mẽ kot amnhĩ to rũnh xwýnhjê hkrĩ xà mex pix ã mẽ kãm mẽ hkrĩ hprãm. ã na htem amnhĩ nhĩpêx anhýr o pa.

⁴⁷ —Nê mẽ kêp mẽ mjên htyk xwýnhjê ho ajuta ho pa hã amnhĩ jarênh tã ãm amnhĩ to hêx nê axtem nê mẽ nokupyr pê mẽ kêp mẽ hikukrêx piitã ho hapêx par o pa. Nê mẽ kêp mẽ òrkwý pytà. Nê mẽ hêx

rom te tām mẽ kot amnhĩ nhĩpêx pyrà nê Tĩrtũm mã amnhĩ jarênh japjêê ho kuhê. Mýrapê koja mẽ mex kêt nê. Koja Tĩrtũm tanhmã ja hã mẽ hipêx to rax nê. Jakamã kwa kêr ka mẽ ã mẽ kot amnhĩ nhĩpêx anhỹr xwýnhjê hkôt amnhĩ nhĩpêx o apa hkêt nê. ãm kwarĩ ho kwarĩ. Anê.

21

Kêp mjên htyk xwýnh jarênh

Makre 12.41-44

¹ Nhũm Jejus kormã Tĩrtũm mã amnhĩ jarênh xà hã ixkre kamã mẽ omunh o xa. Na pre hte Ijaew piitã ixkreta ho mex kaxyw kãm mẽ hikàxpore hkwý nhõr o pa. Jakamã nhũm mẽ hikàxpore rũnh xwýnhjaja hwýr agjê nê kamã kàxpore gjênh xà kamã hkwý gjê nê ma akupým mra. ² Jakamã nhũm mēhõ ni pê mjên htyk xwýnh haxwýja hwýr axà. Kêp amrakati kumrêx nê hikàxpore tỳxre ãm axkrut্রে htã mẽ hpãnhã hwýr axà. Nê kãm Tĩrtũm kĩnh xàj hamê kamã kuxà hãmri nê kato nê ma akupým tē. ³⁻⁴ Hãmri nhũm Jejus arĩ omunh o xa. Kot ã amnhĩ nhĩpêx anhỹr ã omunh o xa nhũm ja kãm mex nê. Hãmri nê hkôt mẽ pa ho pa xwýnhjê mã harê nê mẽ kãm:

—E mãn ka mēnire htēm mũj pumu. Kêp amrakati nê hikàxpore ãm kêp grire htã amnhĩ pê õr pa. Kwýjê rom kãm Tĩrtũm kĩnh xàj amnhĩ pê õr par kumrêx. Apkur xà hã hikàxpore na. Mẽ hkwýjaja na htem hikàxpore hkwý ho mra nê kugjê nom arĩ mẽ hikàxpore rax. No nhũm nire nêj mẽ kurom kãm hikàxpore japê hkêt nê. Nê ho õxý hkêt nê àmnhĩx piitã Tĩrtũm mã õr pa. Anê.

Mẽ kot amnhĩ tomnuj xwýnhjê hkukamã mẽ harênh

Matêwre 24.1-2; Makre 13.1-2

⁵ Tã hãmri nhũm Jejus kôt mẽ pa ho mẽ pa xwýnhjaja kormã Tĩrtũm mã amnhĩ jarênh xà hã ixkre kaxwýnh pumunh o kuhê nê axpên mã harê nê axpên mã harênh o:

—Hêxta waa nê. Ixkreja mex kumrêx. Kên rũnh o mẽ kot hipêx

jakamã mex o mex. Nê mẽ kot ri Tĩrtũm mã hkĩnh xà nhõr nêj haxwýja piitã mex. Anê.

Hãmri nhũm Jejus mẽ kuma nê mẽ kãm:

⁶ —Nà mex tã koja nhỹrmã mẽ kãm Tĩrtũm kurê xwýnhjaja grãnh pa. Koja arĩ kên õ axkrut্রে nê axpên mýnh nê nõr kêt nê. Koja piitã anhgrã nê ahpýnhã ri hikwý. Anê.

⁷ Nhũm pre ã mẽ kot hipêx anhỹrja kukamã mẽ kãm mẽ harênh anê nhũm mẽ tee ri hkukamã hamaxpêr nê kãm:

—Kwa xà koja mẽ ã hipêx anê? Kwa mẽ inhmã aprĩ hã mẽ kot ixkre grãnh parta jarê. Xà koja mẽ tokyx ho anê nà xà kormã? Kwa mẽmo koja wýj ri tanhmã amnhĩ nhĩpêx to? Anê.

⁸ Hãmri nhũm mẽ kãm:

—Nà nhỹrmã mẽmoj piitã hapêx kaxyw tanhmã amnhĩ nhĩpêx to kumrêx kot paj mẽ amã harê ka mẽ inhma. Koja mẽ ohtô nê mẽ apê ixkrajê hwýr mra nê hêx rom te pa ixte amnhĩ nhĩpêx pyràk o amnhĩ nhĩpêx o pa. Nê tanhmã mẽ amã amnhĩ jarênh to nê amnhĩ jarênh o: “E mẽ ixpumu. Pa na pre Tĩrtũm mẽ awýr inhmê. Ixpê kaxkwa rũm ixwryk xwýnh na pa.” Anhỹr o mẽ akôt mẽ amã amnhĩ to hêx o pa. Hãmri nê mẽ amã: “E ot pa ra mẽ ato amnhĩptãr kaxyw mẽ awýr wrý.” Anhỹr o amnhĩ jarênh o mẽ akôt pa. Nom kêr ka mẽ ãm mẽ ama nê ãm mẽ ama. ãm mẽ kot mẽ amã amnhĩ to hêx o pa kênã. Kormã akupýn ixpõx xà hã arĩgrota kormã.

⁹ —Nê koja mẽ nhỹri awry hã axpên par o pa. Nê mẽ atãã axpên par o pa. Nom kêr ka mẽ harênh ma nê ri tee ri tokyx mẽmoj piitã hapêx kukamã ajamaxpêr kêt nê. Mẽmoj piitã hapêx xà hã arĩgrota kormã.

¹⁰ Koja mẽmoj piitã hapêx kaxyw nhũm ahpýnhã ri pika piitã hkôt mẽ pa xwýnhjaja axpên kutã amnhĩ xunhwý nê pijapu nê axpên pa.

¹¹ Nê koja pika piitã hkôt tanhmã ahpýnhã mẽ à kute mẽ hamý

nhũm mẽ amnhĩ xà htỳx kamã hamak o pa.

Nẽ koja pikaja tertet tỳx nẽ.

Nẽ koja mẽ nhỹri pika hkwy kamã prãm xàj hpikaprãr pa.

Nẽ koja kaxkwa kamã mẽmoj tanhmã amnhĩ anhĩpêx to nhũm pika nhõ xwỳnhjaja tee ri omu nẽ kãm ma htỳx kumrêx nẽ htertet o kuhê.

Koja mẽmoj ã amnhĩ nhĩpêx anẽ pa rĩ kormã akupỹn mẽ awỳr wrỳ nhũm mẽmoj piitã hapêx pa. Koja mẽmoj ã amnhĩ nhĩpêx anẽ.

12 —E Tĩrtũm mã amnhĩ jarênh xà hã ixkre grành par xwỳj ri mẽmoj tanhmã hkukamã kot amnhĩ nhĩpêx to hã mẽ ate ixkukjêr xwỳnhhta kot paj hpãnhã mẽ amã harê ka mẽ inhma. Koja mẽ kãm ixkurê xwỳnhjaja mẽ awỳr mra nẽ ixtã mẽ apynê nẽ tanhmã ixtã mẽ anhĩpêx to. Nẽ ma mẽ pikuprõnh xà hã ixkreja wỳr mẽ ato mra nẽ kamã mẽ kãm tanhmã mẽ ato kapêr punuj to. Nhũm mẽ kuma hãmri nẽ ma mẽ ato mra nẽ mẽ ajagjê. Mẽ ate ixkõt apa ho apa jakamã koja mẽ ã mẽ anhĩpêx anẽ. Nẽ mẽ õ pahĩti hwỳr mẽ ato mra nẽ mẽ kãm tanhmã mẽ ato kapêr punuj to. 13 Tã kêr ka mẽ kutã akrĩ nẽ axãmnhĩx mãmrĩ tanhmã mẽ kãm ijarênh to ho akrĩ.

14 —Nom kwa kêr ka mẽ kãm tanhmã amnhĩ jarênh to hkukamã tee ri ajamexpêr o ri mẽ amã mẽ uma hkêt nẽ. Rỳ mẽ ajamexpêr o: “Hêxta waa nẽ. Tanhmã koja we mẽ kot ixkukjêr ã arĩgrota ã pa we ri mẽ kãm ixkapêr to?” Anhỹr o tee ri amnhĩ kukamã ajamexpêr kêt nẽ. ãm amnhĩ kaxyw inhmã pix mã ajamexpêr tỳx rãhã nẽ. 15 Tanhmã mẽ kot mẽ anhĩpêx to hã arĩgrota ã kot paj tanhmã mẽ akrã hto ka mẽ inhỹ hã tanhmã mẽ kãm amnhĩ jarênh to. Hãmri nhũm mẽ amnhĩ tã mẽ ama nẽ axte tanhmã mẽ ato kapêr to hkukamã tee ri hamexpêr o kuhê.

16 —Nẽ koja mẽ anhĩpêxà nẽ mẽ akatorxã nẽ mẽ atõ nẽ mẽ akrãmnhwỳjaja. Nẽ kaxyw krĩ hkõt mẽ akwỳjaja ixtã mẽ atã amỹnê nẽ

ma mẽ õ pahi hwỳr mẽ ato mra nhũm mẽ ajagjê nẽ mẽ akwỳjê pa. 17 Koja mẽ piitã ixtã mẽ akamã gryk nẽ kãm mẽ akurê nẽ. 18-19 Nom mẽ kot ã mẽ anhĩpêx anhỹr mã tã kêr ka mẽ amnhĩ to htỳx nẽ ixkaga hkêt nẽ. Mẽ kot mẽ apar tã ka mẽ kaxkwa kamã akupỹm atĩr kurê kumrêx. Hãmri nẽ ã mẽ kot mẽ anhĩpêx anhỹr xwỳnhjê rom Tĩrtũm mẽ wa ixri atĩr tũm nẽ amex rãhã apa ho apa. Mẽ kot tanhmã mẽ ato htã mẽ ate kaxkwa kamã atĩr tũm nẽ apa mã xwỳnh jakamã kwa kêr ka mẽ tee ri amnhĩ kukamã ajamexpêr o ri apa hkêt nẽ.

20 —Koja nhỹrmã nhỹhỹnh põristi ohtõ nẽ mra nẽ Jerujarê hwỳr pøj hãmri nẽ mẽ kãm hipòk pa nẽ kuhê. Ka mẽ ja hã mẽ omu nẽ mẽ kot krĩja grành par mã ajamexpêr kurê kumrêx. 21 Koja mẽ ã amnhĩ nhĩpêx anẽ ka mẽ amỹm amnhĩ wỳr mẽ omu hãmri nẽ ajapøj nẽ ma aprõt nẽ amrar kurê kumrêx. Mẽ apê jar pika pê Jutej kamã mẽ apa xwỳnhjaja ka mẽ omu nẽ mẽ kot mẽ apar pymaj ma aprõt nẽ amrar kurê kumrêx. Hixêt prêk wỳr ajapøj nẽ aprõt nẽ ma mra.

—Nẽ kê Jerujarê nhõ xwỳnhjaja mẽ umaj haxwỳja hapøj nẽ ma hprõt nẽ ma mrrar o mra.

—Nẽ jar kapõt ã ri mẽ pa xwỳnhjaja kê mẽ akupỹm krĩ hwỳr gjêx kêt nẽ. ãm ma mẽ umaj hprõt nẽ mrrar kurê kumrêx.

22 —Mẽ kot amnhĩ tomnuj mỳrapê koja Tĩrtũm ã mẽ hwỳr mẽ kãm mẽ hkurê xwỳnhjê rênh anẽ. Kapêr ã kagà htũm ra kot mẽ hkukamã ja jarênh kot anhỹr. Jakamã koja mẽ nhỹrmã mẽ hkukamã mẽ harênh xàja kõt ã mẽ hipêx anẽ.

23 —No mẽ htujarõ xwỳnhjaja nẽ mẽ hkra karàre xwỳnhjaja koja mẽ kêp mẽmoj omnuj tỳx nẽ. Tanhmã kot mẽ amnhĩ to nẽ hprõt tỳx? Nà pika ja kamã koja mẽ piitã mex kêt nẽ. Mẽ kot amnhĩ tomnuj mỳrapê koja Tĩrtũm ã mẽ hipêx anẽ. 24 Koja mẽ nhỹhỹnh krĩ hõ rũm mẽ hwỳr mra nẽ mẽ unê nẽ mẽ hkamnhwỳr o mẽ kupa. Nẽ mẽ hkwyjê pynê nẽ ma nhỹhỹm ahpỹnhã

mê õ pika hwÿr amnhĩ kôt mê o pa nhũm mê kamã mê hkôt pa ho pa. Koja mê kêp Ijaew kêt xwÿnhjaja Jerujarê o amnhĩptã nê ã mê hipêx anê. Nê kamã pa ho pa rãhã nhũm Tĩrtũm nhÿrmã akupÿm nê mê kator pa. Tã koja mê nê mê kator parja o pa ra akupÿn mê awÿr inhnojarê. Anê.

Nhũm pre ã Jejus mê kãm mê kot Jerujarê grãnh par xwÿnhjê hkukamã harênh anê.

Akupÿn Jejus wrÿk xwÿj ri mêmoj kot tanhmã amnhĩ nhĩpêx to

Matêwre 24.29-35; Makre 13.24-31; mããnên Sikũn Pêtre 3.10; Apokarip 1.7

²⁵ Nhũm Jejus arĩ hkôt mê pa ho pa xwÿnhjê mã kapêr nê mê kãm:

—Nê kot paj nhÿrmã akupÿn mê awÿr inhnojarê nhũm kaxkwa kamã kanhêti nê myyti nê mytwrÿre axtem tanhmã ri amnhĩ nhĩpêx to. Nhũm gô xujanãr haxwÿja hkoço htÿx jao axpên tak tÿx nê. Hãmri nhũm pika piitã hkôt mê pa xwÿnhjaja kuma nê omu nê nê kãm ma htÿx nê mur nê htertet nê tee ri amnhĩ kukamã hamaxpêr.

²⁶—Nê koja Tĩrtũm tanhmã kaxkwa ho àk to nhũm kanhêti piitã pikarêr pa. Hãmri nhũm pika hkôt ri mê pa xwÿnhjaja omu nê tee ri amnhĩ kukamã hamaxpêr o amnhĩ japrãr pa nê hikwÿ. ²⁷⁻²⁸ Koja ã mêmoj amnhĩ nhĩpêx anê ka mê ja hã omu nê akupÿn mê awÿr inhnojarê mã ajamaxpêr kurê kumrêx. Hãmri nê mê kot ixkôt amnhĩ xunhwÿr kêt xwÿnhjê rom akĩnh kãm ijapêr arĩt o akuhê.

—Nã kot paj akupÿn mê awÿr wrÿ. Kakrã kamã hirã htÿx kãm akupÿn ixihitÿx kãm mê awÿr wrÿ. Hãmri ka mê apiitã pika piitã hkôt ano ho ixpumu. Kot paj ã ixwrÿk anê hãmri nê mêmoj punuj piitã pê mê apytãr pa. Jakamã ka mê ã mêmoj kot amnhĩ nhĩpêx anhÿrja ã omu hãmri nê tokyx ixkôt axãpirta mã ajamaxpêr nê akĩnh tÿx nê. Anê.

²⁹—E ga mê pĩ hpãr mÿj pumu. ³⁰ Na hte mêmo mytwrÿ hã rã nhũm mê omu nê ô hkukamã hamaxpêr.

³¹ Ja pyrã nê koja ã mêmoj amnhĩ nhĩpêx par anhÿr mê ka mê omu nê akupÿn mê awÿr ixwrÿkja mã ajamaxpêr kurê kumrêx. ³² Koja akupÿn ixpôx kêt ri mê kot ã mêmoj kot amnhĩ nhĩpêx anhÿr pumunh xwÿnhjaja kormã piitã htyk kêt ri pa ra akupÿn wrÿ.

³³—Nê koja nhÿrmã pika nê kaxkwa wa hapêx pa. Tã no ãm ixkapêr koja wa urãk nê aa hapêx kêt nê. Koja ãm rãhã ho rãhã. Kot paj aa ihkê ho tanhmã mênh to hkôt nê.

³⁴⁻³⁵—Nê kwa mê o kora. Mê axkãm ajamak rom. Mê kot ixkôt amnhĩ xunhwÿr kêt xwÿnhjaja na htem kãm tanhmã amnhĩ nhĩpêx to hprãm xã hkôt pix mã tanhmã amnhĩ nhĩpêx to ho ri pa. Jao ãm amnhĩ xãpkur xã nê amnhĩ to mex xã nê kãxpore pix kukamã hamaxpêr o pa. Nê htÿx ri tanhmã amnhĩ tomnuj to ho pa. Nê pipãnh kãm tanhmã amnhĩ to ho pa. Tã koja mê ã amnhĩ nhĩpêx anhÿr o pa rãhã pa ra mê haêr pê akupÿn wrÿ nhũm mê tee ri ixpumu nê kãm ma htÿx kumrêx. Te tutre htÿx ri harôj kajyr o pa nê rapuuti hwÿr àr nhũm kot haê nê unênh nhũm tee kãm kator prãm pyrãk. Koja mê ã amnhĩ nhĩpêx anê. Nom kêr ka mê ho mê urãk kêt nê. ãm pa inhmã hprãm xã hkôt pix mã tanhmã inhmã amnhĩ nhĩpêx to rãhã ho ri apa.

³⁶—Tã kêr ka mê ã mê kot amnhĩ tomnuj o pa anhÿrja kôt amnhĩ nhĩpêx o apa pymaj amnhĩ to Tĩrtũm wÿr rãhã ho apa. Kê tanhmã mê ato hihtÿx to ka mê ÿ hã ho mê urãk kêt nê. Kêr pa nhÿrmã akupÿn wrÿ ka mê ixpumu nê mê kurom amnhĩ kamã akahak kêt nê akĩnh tÿx nê man ixwÿr mra. Anê.

Nhũm pre ã Jejus hkôt mê pa ho mê pa xwÿnhjê jahkre anê.

³⁷ Hãmri nê apkati mê Tĩrtũm mã amnhĩ jarênh xã hã ixkre kamã mê pikuprõnh xwÿnhjê jahkre ho hkrĩ. Nhũm kamãt nhũm hkôt mê pa ho mê pa xwÿnhjê mê mê krĩ rũm hapôj nê ma hixêr prêk pê Oriwêhti hwÿr mra nê kamã amnhĩm hikra nê hikwÿ.

38 Nhũm kwÿhtã nhũm mẽ kànhmã hkrĩ nẽ ma akupÿm krĩm mra nẽ ixkreja wÿr agjê. Hãmri nhũm mẽ piitã hã akuprõ nẽ kot mẽ ahkre hã mar o hkrĩ.

22

Mẽ kot Jejus ã àmnênh ã mẽ harênh
Matêwre 26.14-16; Makre 14.1-2;
Juãw 11.47-57

¹ Tã nhũm Ijaew kĩnhã arĩgro pẽ Pasja àhtêp o mõi. Pas ã na htem amnepêm Tĩrtũm kot pika pẽ Ejit pẽ mẽ hpãmjê kator mã hamaxpêr kaxyw axpên wÿr akuprõ nẽ hã hkĩnh. Na htem arĩgroja jarênh o: “Pas” anhÿr ã harê. Nẽ mãânên harênh o: “Mẽ pahte pãw kaxkrit kêt kur ã arĩgro.” Anhÿr o harê. ² Jakamã nhũm mẽ õ patre krãhtũmjê mẽ Tĩrtũm kapêr tũm o mẽ ahkre xwÿnhjaja ra kãm Jejus pĩr prãm nẽ. No mẽ kãm hkõt mẽ kot kapêr mar xwÿnhjê pyma nẽ. Nẽ tee ri kot tanhmã ho hkukamã hamaxpêr nẽ axpên mã:

—Hêxta waa nẽ. Kwa tanhmã kot puj wem ho nẽ mẽ kêp kupĩ? Kot puj mẽ noo mã tanhmã ho nhũm mẽ hã mẽ pakamã gryk tÿx kumrêx. Anê.

Jut Kariot kot Jejus ã àmnênh ã harênh

Matêwre 26.14-16; Makre 14.10-11;
Juãw 13.21-30

³⁻⁴ Tã nhũm Jut Kariotja. Jejus nhÿ hã mẽ ahkre ho pa xwÿnh pẽ 12 hõ na pre. Tã axtem nẽ tanhmã hamaxpêr to nẽ Satanasti nhÿ hã ma mẽ õ patre krãhtũm mẽ Tĩrtũm mã amnhĩ jarênh xà hã ixkre jamãr xwÿnh krãhtũmjê hwÿr tẽ. Hãmri nẽ tanhmã Jejus o mẽ mar to nẽ mẽ kãm:

—E ot pa mẽ amã Jejus jarênh o tẽ. Xà kot paj mẽ amã hã amÿnê ka mẽ hpãnhã inhmã amnhĩre nà? Anê.

⁵ Hãmri nhũm mẽ kuma nẽ hkĩnh nẽ. Hãmri nẽ kãm:

—Nà kot paj mẽ amã amnhĩre.

⁶ Hãmri nhũm mẽ kot kãm amnhĩrer ã harênh ma nẽ hkĩnh nẽ mẽ kãm:

—Tõe. Nà kot paj mẽ amã ho anê. Anê.

Hãmri nẽ ma tẽ nẽ kato. Nẽ Jejus pynênh kaxyw htãnopxar o ri hkõt pa.

Mẽ kot mar o pa xwÿnhjê hkàx ã nhÿri unênh nẽ ma mẽ hwÿr o htêm kaxyw.

Jejus kot ÿ hã mẽ ahkre xwÿnhjê kutã apkur ã harênh

Matêwre 26.17-25; Makre 14.12-21;
Juãw 13.21-30

⁷ Tã nhũm Pasja kato. Amnepêm Ijaewjê nhĩgêjtaja na prem ôwêhti hkrare hkwy hpar o pa. Tĩrtũm kot ja hã mẽ omunh nẽ Ejit kãm mẽ kãm mẽ hkurê xwÿnhjê nhĩhkra nẽ mẽ kator kaxyw nhũm prem ã amnhĩ nhĩpêx anê. Jakamã na htem arĩ mẽ kêp mẽ hkanrêhã mẽ htãmnhwÿjaja arĩgro pẽ Pas ã axpên wÿr akuprõ nẽ mẽ mẽ kãm hamaxpêr pẽ mẽ uràk nẽ ôwêhti hkrare hkwy hpa. Hãmri nẽ pãwti kaxkrit kêt kãm kuku. ⁸ Jakamã nhũm Jejus ÿ hã mẽ ahkre ho mẽ pa xwÿnhjê wa ho axkrut nẽ mẽ amnhĩ kukamã wa kumẽ. Simãw Pêtre mẽ Juãwja nhũm wa mẽ amnhĩ kukamã wa kumẽ nẽ wa kãm:

—E wa ma mẽ ixkukamã tẽ nẽ mẽ ixkutêp Pas ã mẽ panhõ hã apê. Anê.

⁹ Hãmri nhũm wa kuma hãmri nẽ kãm:

—Tõe. Nhÿri kot paj we wa tẽ nẽ mẽ akutêp hã apê? Anê.

¹⁰ Hãmri nhũm wa kãm:

—Nà wa mãmrĩ ma Jerujarê hwÿr wa tẽ. Nẽ hwÿr axà nẽ mēhõ mytita pumunh kurê kumrêx. Nhũm amnhĩm gô ru nẽ amnhĩ kre hã poti xãm nẽ o tẽ. Ka wa omu nẽ hã ajêt nẽ ma hkõt òrkwÿ hwÿr tẽ. ¹¹ Hãmri nẽ ixkre nhõ dõn pumu nẽ kãm: “E jar na pa wa awÿr tẽ. Jejus na wa inhmẽ pa wa awÿr tẽ. Na awÿr pêr mēnh o: ‘Nhÿri kot paj ixkõt ri mẽ pa ho mẽ pa xwÿnhjê mẽ axpên kutã Pas ã apku?’ Anê. Na ã awÿr hpêr mēnh anê.” Anê.

¹² —E ã kãm akapêr anê kê war ama nẽ ra war amã òrkwÿ nhĩmõk ã ixkre rax ò jahkre. Kamã ra kaxyw mẽ paxàpkur xà hã mẽmoj piitãã. Ka wa omu hãmri nẽ mãmrĩ mẽ ixkutêp kamã mẽmoj tã apê. Anê.

¹³ Hãmri nhũm wa kuma nẽ ma krĩm tẽ. Ma tẽ nẽ hwÿr axà hãmri nẽ ra kot wa kãm mẽmoj jarênh xà hkõt

měmoj piitã omu hãmri nẽ mẽ kutêp mẽõ hã àpênh o wa xa.

¹⁴ Tã nhũm myt axà nhũm mẽ wa hkôt mō nẽ ixkreta wýr àpir pa. Hãmri nẽ apkur kaxyw hkrĩ hpa nhũm Jejus mẽ ìhkô hã nhỹ. ¹⁵ Hãmri nẽ mẽ kãm tanhmã amnhĩ jarênh to nẽ mẽ kãm:

—E na pa inhmã Pas ã mẽ anhĩhkô hã ixàpkur prãm nẽ. Kormã ixte amnhĩ xà htýx kãm ijamak xwýj ri. ¹⁶ Kwa mẽ inhma. Kot paj axte mẽ akutã Pas ã ixàpkur kêt ry rax nẽ. Nom koja nhỹrmã Tirtũm akupýn ixte mẽ ato amnhĩptâr kaxyw inhmẽ hãmri pu mẽ rĩ kormã axte arĩgro mex maatija ã pahkĩnh kãm axpên kutã paxàpkur rax nẽ. Anẽ.

¹⁷ Nhũm ã mẽ kãm amnhĩ jarênh anẽ nẽ hpãnhã wĩhti py nẽ o xa nẽ Tirtũm mã harẽ nẽ kãm:

—Pa Papaj. Nà ãm hãmri na ka hte mẽ inhnẽ mẽ kãm mẽ ixkurê xwýnhjê pumunh mex nẽ mẽ ìhkra pẽ mẽ ijapôj. Amex o amex. Anẽ.

Hãmri nẽ hpãnhã hkôt mẽ pa ho mẽ pa xwýnhjê hõ mã kugõ nẽ kãm:

—E mĩ. Apy nẽ mẽ axpên pãnhã hkwý ho ixkõ. ¹⁸ ãm hãmri na pa mẽ amã amnhĩ jarẽ. Kot paj axte wĩhti ho ixkõm kêt rãhã nhũm nhỹrmã Inhõ Papaj akupýn mẽ awýr inhmẽ. Hãmri pu mẽ rĩ kormã akupýn ixpõx xà hã arĩgrota ã pahkĩnh rax nẽ. No ãm ra axtem tanhmã hã mẽ pahkĩnh to. Anẽ.

¹⁹ Hãmri nẽ hpãnhã pãwti py nẽ mã ho anẽ nẽ Tirtũm mã harẽ. Hãmri nẽ ho hkry hpa nẽ mẽ piitã mẽ kãm òr pa nẽ mẽ kãm:

—E na pa ã pãwti ho hkry nẽ mẽ amã òr anẽ. Koja mẽ ã inhĩpêx anẽ nẽ te mẽ kot ixto hkry hpar pyrãk o inhĩpêx pa amnhĩ xà htýx kamã ijamak kãm ty. Nom mẽ anẽ kot paj ty. Jakamã kêt ka mẽ ixwakre kamã tōhã axpên wýr akuprõ nẽ ixte mẽ ate amnhĩ tomnuj pãnhã amnhĩrer kaxyw mẽ anẽ ixtykja mã ajamaxpêr pẽ akĩnh nẽ pãwti hkur o akrĩ. E mẽ mãmri axãmnhĩx aku. Anẽ.

Nhũm pre ã mẽ kãm amnhĩ jarênh anẽ nhũm mẽ mar pẽ pãwtita hkur o

hkrĩ. ²⁰ Hãmri nẽ ra hkur pa. Hãmri nhũm Jejus axte kopta py nẽ mẽ kãm:

—Mẽ kot ixpĩr xà hã arĩgro hã koja ixkamrõ axkapĩ. Nom koja mẽ amarĩ ixpĩr nhũm ixkamrõ amarĩ hpikapĩr kêt nẽ. ãm paa. Pa kot paj mẽ anẽ mẽ ìhkram amnhĩ jaxà nhũm mẽ ã inhĩpêx anẽ. Koja ixkamrõ axkapĩ nhũm Tirtũm omu nẽ ixkukwak ri mẽ anẽ mẽ ate amnhĩ tomnuj piitã te amnhĩ katut kôt rênh par pyrãk o hipêx nẽ mẽ ato hkra. Amnepêm kot ja hã amnhĩ jarênh xà hkôt. Jakamã e mẽ ixkamrõ pikapĩrta mã ajamaxpêr pẽ wĩhti hkwý ho ixkõ. Anẽ.

Jejus ã mẽ kãm àmnênh xwýnh jarênh Matêwre 26.21-25; Makre 14.18-21; Juãw 13.18-19

²¹ Nhũm Jejus arĩ mẽ kãm kapêr nẽ mẽ kãm:

—Nẽ kot mẽ kãm ixtã àmnênh mã xwýnhhta na jar mẽ pahkaêx ã mẽ pakutã apkur o nhỹ. ²² Tirtũm kãm hprãm xà hkôt koja mẽ tanhmã ixto rax nẽ ixpĩ. Nom kot mẽ kãm ixtã àmnênh mã xwýnhhta hêxta waa nẽ. ã kot inhĩpêx anhỹrja mýrapê koja amnhĩ xà htýx kãm hamak rax kumrêx. Anẽ.

²³ Nhũm pre ã Jejus mẽ kãm amnhĩ jarênh anẽ. Nhũm mẽ kuma nẽ tee ri axpên pumunh o hkrĩ. Hãmri nẽ ri axpên kukja nẽ axpên mã:

—Kwa nà mẽ pahtõ kot pu we ã ri hipêx anẽ? Nà pa hkêt.

Anhỹr o tee ri axpên kukjêr o hkrĩ.

Mẽ pamã amnhĩ to rũnh prãm kêt ã mẽ pamã karõ

Matêwre 20.20-28; Makre 10.35-45; mããnên Rõmãn 12.3-5, 12.10, 12.16; Epes 4.2-4; Piripos 2.3-8; Xiakre 4.1-10; Wam Pêtre 5.3

²⁴ Tã nhũm Jejus nhỹ hã mẽ ahkre ho mẽ pa xwýnhjaja axpên mã tanhmã kapêr to ho hkrĩ nẽ axpên mã:

—Kwa mẽ pahtõ kot puj wem nhỹrmã pahpê pahi nẽ mẽ ho amnhĩptâr rax o ri papa? Anẽ.

Hãmri nẽ mẽ axpên mã: “Nà pa.” Anẽ nẽ nhãnh axpên mã: “Nà kêt paa.” Anẽ. Hãmri nhũm mẽ nêtãnh

axpën mã: “Nà kêt pa kênã.” ²⁵ Anhÿr o axpën mã kapër o hkrĩ. Hãmri nhũm Jejus tee ri axpën mã mẽ kuma nhũm mẽ ã hamaxpër anhÿrja kệp omnuj nẽ nhũm mẽ kãm tanhmã mã kapër to nẽ mẽ kãm:

—E mẽ inhma. Na hte Ijaew kêt xwÿnhjê nhõ pahijaja ã amnhĩ nhĩpêx anhÿr o ri pa nẽ amarĩ hkrĩ xà kamã hkrĩ ho hkrĩ. àhpumunh tÿx jakamã na htem amarĩ ixkre hkre jakry kamã kãm mẽ àpênh xwÿnhjê mã mẽmo mẽ àpênh ã karõ ho hkrĩ. Na htem ã amnhĩ nhĩpêx anhÿr o pa. Nẽ mẽ kot amnhĩm mex ã harênh kaxyw tanhmã mẽ ho mex to ho pa. ²⁶⁻²⁷ Tã kêt ka mẽ ho mẽ urak kêt nẽ. Kêt ãm te amarĩ ri mẽ apa xwÿnh pyrak o axpën nhĩpêx. Ixpyrà nẽ amarĩ mẽmoj to mẽ kutã anojarêt rãhã ho ri apa. No mẽ ate mẽ ho amnhĩptar rax kukamã ajamaxpër kêt nẽ. ²⁸ Na prem axpën mã ixto hêx nẽ tanhmã ixto kapër punuj to htã ka mẽ ama nẽ ãm mẽ ama nẽ arĩ ixkõt ri apa rãhã nẽ. ãm hãmri na ka htem arĩ ixkõt ri apa anẽ. ²⁹⁻³⁰ Kot paj amnhĩ mã mẽ ato mex rax nẽ. Na pre ra Tĩrtũm nhÿrmã ixte mẽ ato amnhĩptar o ixkrĩ kaxyw ixãm. Tã ot pa amnhĩ pyrã nẽ mẽ pahkwÿ Ijaew kaxyw mẽ axunhwÿ ka mẽ nhÿrmã mẽ piitã mẽ ho amnhĩptar o apa. Nẽ mẽ apê ixkrãmnhwÿ mã nhÿrmã ixkutã axàpkur o apa. Anẽ.

Jejus kot Simãw Pêtre mã kapër ã harênh

Matêwre 26.31-35; Makre 14.27-31; Juãw 13.36-38

³¹ Tã nhũm Jejus Simãw Pêtre mã kapër nẽ kãm:

—Kwa Simãw. Na Satanasti kãm hprĩ mã ixtã mẽ apiitã mẽ kamã hamak prãm nẽ. Tanhmã kot mẽ akrã hto nhũm mẽ ate mẽ kãm ixkurê xwÿnhjê pumaj ixkaga mã kãm mẽ akamã hamak prãm tÿx nẽ. Jakamã ã kot mẽ anhĩpêx anhÿr kaxyw na pre ra amnhĩ to Inhõ Papaj ma nhũm kãm: “Tõe. Kam nẽ mãmrĩ tanhmã mẽ kamã ajamak to.” Anẽ.

³² —Tã ate mẽ umaj ixkaga nẽ axte ate amnhĩ kaxyw inhmã ajamaxpër

kêt pymaj na pa ra ato Inhõ Papaj wÿr kãm ixihÿtÿx nẽ Simãw Pêtre. Jakamã kêt ka mẽmo arĩgro mã tee ri ixkaga mã amnhĩ pumu hãmri nẽ tokyx tãm akupÿm ixkõt amnhĩ xãm tÿx nẽ. Kêr kêt nhÿrmã akwÿjê hõ tanhmã amnhĩ tomnuj to nẽ tee ri amnhĩ kukamã hamaxpër ka ja mã omu hãmri nẽ kãm ate tanhmã amnhĩ tomnuj tota jarê. Kê mẽ ã ate amnhĩ nhĩpêx anhÿr ã ajarênh ma nẽ apyrã nẽ tokyx akupÿm tãm ixkõt amnhĩ xãm tÿx kurê kumrêx. E kêt ka ã akupÿm ixkõt mẽ piitã mẽ hipêx anhÿr o ri apa Simãw Pêtre. Anẽ.

Nhũm pre ã Simãw Pêtre kot tanhmã amnhĩ nhĩpêx to hkukamã kãm ujarênh anẽ. ³³ Hãmri nhũm tee ri amnhĩ mã mẽ kãm:

—Kwa mã Pahĩti. Kot paj ri akwÿm tanhmã amnhĩ tomnuj to hkêt nẽ. Koja mẽ te ajaxã nẽ apĩ htã kot paj arĩ akõt ri ixpa ho ixpa nhũm mẽ pahto amÿrà nẽ tanhmã pahto. Anẽ.

³⁴ Hãmri nhũm kuma nẽ kãm:

—Nã koja apkati hkõt krãhyre hkàr kêt ri ka ra mẽ umaj ate ixkõt apa hkêt ã mẽ kãm amnhĩ mã axàprãr o axkrunêpxi kãm ga. Anẽ.

Jejus kot hkwÿjê mã mẽmoj mã karõ Matêwre 10.5-15; Rukre 9.1-3

³⁵ Hãmri nhũm Jejus arĩ hkõt mẽ pa ho pa xwÿnhjê mã kapër nẽ mẽ kãm:

—E wam ixte mẽ hwÿr mẽ arênhã ã na ka prem amnhĩ kõt aparkã hkwy ho apa hkêt nẽ. Nẽ kawã jamãnh nẽ ho apa hkêt nẽ. Nẽ mrykã jamãnh nẽ amnhĩ kõt ho apa hkêt nẽ. ãm mẽ anhÿ kamã mẽ hwÿr apa mã na pa pre mẽ amã karõ. Tã xãn ka prem ã mẽ hwÿr apa anẽ nhũm mẽ amnhĩ wÿr awÿr kêt nẽ? Nã xã na prem amnhĩ wÿr mẽ awÿr? Anẽ.

Hãmri nhũm mẽ kãm:

—Tÿ na prem amnhĩ wÿr mẽ ixwÿ. Mẽ ixte amnhĩ kõt mẽmoj to ixpa hkêt mã na pa prem amarĩ mẽ kutã ixàpkur mex o ri mẽ hkõt ixpa. Anẽ.

³⁶⁻³⁷ Hãmri nhũm mẽ kãm:

—Tõe. Nã mẽ kot mẽ ato mex mã nom koja mẽ hpãnhã axtem hõ ho mẽ anhĩpêx. Jakamã kêt ka mẽ akupÿm

mē kām ijarēnh o apa kaxyw anojarēt hāmri nē anhō mrykà rỳ akawà htu nē ma amnhĩ kôt ho apa. Nē awapo. Kot kaj mē awapo hkêt japêr hāmri nē apipro xà ho wēnē nē amnhĩm hō japrō nē ma amnhĩ kôt ho apa. E kêr ka mē ã amnhĩ nhĩpêx anē.

—Nē Tirtũm kapêr ã kagà htũm kot ra ixkukamã tanhmã ijarēnh to nē kot ijarēnh kot:

Koja mē hipêx o te mē kot amnhĩ tom-
nuj tỳx xwýnh nhĩpêx pyræk.
Anē.

Ã mē kot inhĩpêx anhÿr kukamã ijarēnh kot anhÿr. Tã na mē ra ã inhĩpêx anhÿr kaxyw. Anē.

³⁸ Nhũm pre ã Jejus mē kām kapêr anē nhũm mē kuma nē kām:

—Ota mē panhō wapohti hamẽxkrut Pahшти. Anē.

Hāmri nhũm mē kām:

—Tõe. Nà hāmri. Mē amnhĩm axi nē ho amnhĩm mēmoj to anē. Anē.

*Jejus kot Tirtũm mã amnhĩ jarēnh
Matêwre 26.36-46; Makre 14.32-42*

³⁹ Tã nhũm Jejus kê axte krĩa rũm kato nē hixêt pē Oriwêhti hwÿr tē nē api nhũm hkôt mē pa ho mē pa xwýnhjaja ma hkôt mra. ⁴⁰ Hāmri nē nhÿri hixêt kahti ri hkrĩ nhũm Jejus mē kām:

—E kwa kêr ka mē ixkutêp amnhĩ to Inhō Papaj wÿr o akrĩ. Kê mē ixkôt tanhmã mē ato htã ka mē amã mē uma xà ixkaga hkêt nē. Arĩ mē kutã amnhĩ to htỳx nē akuhê. Anē.

⁴¹ Hāmri nē mē kurũm htēm grire nē Tirtũm mã amnhĩ jarēnh kaxyw hkõn krã ho tēm nē nhÿ. ⁴² Hāmri nē kām:

—Kwa Papaj. Nà na pa ra amnhĩ xà htỳx kukamã ijamaxpêr nē amnhĩ kamã ixkahak tỳx kumrêx. Inhmã amnhĩ xà kamã ijamak prãm kêt o ijamak prãm kêt. Jakamã kot kaj amã inhnê ho ajapêx prãm nē mãmri inhnê ho ajapêx nhũm mē kām ixkurê xwýnhjaja tanhmã ixto hkêt nē. Rỳ ko. Kot kaj amã mē kot tanhmã ixto hprãm hã kê mē mãmri tanhmã inhĩpêx to. Nom pam inhmã hprãm xà hkôt kêt. Anē.

Nhũm pre ã Jejus amnhĩ to Hipêêxà Tirtũm wÿr anē. ⁴³ Hāmri nhũm kuma nē hwÿr kapêr o wrÿk xwýnhja mē nhũm hwÿr wrÿ nē kuri xa. Hāmri nē õxàhkre kaxwýnh kām tanhmã ho hihtỳx to. ⁴⁴ Nhũm kê axte amnhĩ to Hipêêxà hwÿr kām hihtỳx nē. Tee ri amnhĩ kukamã hamaxpêr pē amnhĩ kamã kahak tỳx kumrêx. Jao hã gô rax nē te hkamrô xàhàr pyræk o pikap ahà. ⁴⁵ Hāmri nē kànhmã xa nē akupÿm hkôt mē pa ho mē pa xwýnhjê hwÿr tē nē mē omu nhũm mē ra õt pa nē hikwÿ. Mē kot tee ri Jejus kot mē kām amnhĩ jarēnhja kukamã hamaxpêr o hkaprĩ nē õt pa nē hikwÿ. ⁴⁶ Hāmri nhũm Jejus tē nē tee ri mē omu nē mē kumra nē mē kām:

—Kwa nà. Mē ri ã amnhĩ nhĩpêx anhÿr kêt nē. Kwa mē kànhmã akrĩ nē amnhĩ to Inhō Papaj wÿr kê mē ato mē axihtỳx. Hāmri nhũm mē tanhmã ixkôt mē ato ka mē inhÿ hã mē kutã amnhĩ to htỳx nē akuhê. Anē.

*Mē kot Jejus pynênh ã mē harênh
Matêwre 26.47-56; Makre 14.43-50;
Juãw 18.1-11*

⁴⁷ Nhũm pre ã Jejus mē kām kapêr anhÿr rôm nhũm hkôt pa ho pa xwýnh pē Jut Kariotja amnhĩ kôt mē kot Jejus pynênh xwýnhjê ho tē. Mē ho htēm rax nē. Hāmri nē kot Jejus kahti hkôt mÿnh kaxyw hwÿr tē ⁴⁸ nhũm amnhĩ tã omu nē kām:

—Kwa Jut. Xà mē kahti hkôt mē hamÿnh nē mē hpār o na htem mē kām mē hã amÿné? Anē.

⁴⁹ Hāmri nhũm hkôt mē pa ho mē pa xwýnhjê hõja tee ri mē kot amnhĩ nhĩpêx ã mē omu hāmri mē õ wapota mã hamaxpêr kurê kumrêx nē Jejus mã:

—Kwa Pahшти. Xà kot paj mē panhō wapohti py nē ho mē panê mē hkwy hpa? Anē.

⁵⁰ Hāmri nhũm hõta kuma nē mē kaxyw ja kapa. Nhũm mē õ patre maati mã àpênh xwýnhja mē hkôt tē nhũm omu nē kām wapo ho apê. Nē kot ho hkrã nhĩpônã mã tã kuhpaw nē ho upòk rũm hamak nhĩkjê pix krãhta.

⁵¹ Hāmri nhūm Jejus omu nē nē kām kapēr nē kām:

—Kwa nà ri ã amnhĩ nhĩpêx anhÿr kêt nē. Amarĩ xa. Anē.

Hāmri nē hamakja py nē akupÿm kām hamak ã kuxi nē ho mex. ⁵²⁻⁵³ Hāmri nē mẽ kot unênh mã xwÿnhjê mã tanhmã kapēr to. Mẽ õ patre krãhtũmjê mẽ Tĩrtũm mã amnhĩ jarênh xà hã ixkre jamār xwÿnhjê krãhtũm mẽ Ijaew nhõ pahijê mẽ nhūm mẽ ho pimràatã mẽ kām kapēr nē mẽ kām:

—Kwa na pa pre apkati mẽ Tĩrtũm nhõrkwÿ kamã mẽ kām ixkapēr o ixpa ka prem tokyx ixpynênh kêt tã jarãhã te ixte amnhĩ tomnuj xwÿnh pyrãk o inhĩpêx nē ixwÿr wapo nē kô hã akapên nē ixwÿr ã atêm rax anē. No ãm ra mẽ ate tanhmã ixto kaxyw arĩgro kator kênã. Jakamã kot kaj mẽ mãmrĩ tanhmã amã ixto hprãm xà hkôt mãmrĩ tanhmã ixto. Satanasti nhÿ hã ã mẽ ate inhĩpêx anhÿr mã kênã. Anē.

Simãw Pêtre kot Jejus kôt pa hkêt ã kot amnhĩ jarênh

Matêwre 26.69-75; Makre 14.66-72; Juãw 18.15-18, 18.25-27

⁵⁴ Tã nhūm mẽ Jejus pynê nē ma o tē. Ma mẽ õ patre maati nhõrkwÿ hwÿr o tē. Nhūm Simãw Pêtre ma hapu hã mẽ hkôt hã mẽ omunh o tē. ⁵⁵ Nhūm mẽ patre maati nhõrkwÿ hwÿr Jejus o axà nē hkôt gjêx pa hāmri nhūm Simãw Pêtre kītare hwÿr axà nē mẽ kuri xa. Nhūm mẽ kītare kamã amnhĩm kuto nē hã ànhunh o hkrĩ nhūm ⁵⁶ mẽ ìhkô hã ànhunh o nhÿ. Hāmri nhūm mẽ kām àpênh xwÿnh niti hirã kamã hprĩ hã omunh kurê kumrêx nē mẽ kām:

—Xê pēr myti ja kêp Jejus kôt mẽ pa ho mẽ pa xwÿnhjê hõ na. Anē.

⁵⁷ Hāmri nhūm tee ri amnhĩ tã kuma nē kām mẽ uma nē mẽ kām amnhĩ tã aprã nē kām:

—Tk. Kokÿ. Ixte mēhõ my ata pumunhre hã. Anē.

⁵⁸ Tã nhūm hpãnhã mēhõ myja kām: —Kwa nà. ãm hāmri na ajarê. Apê Jejus kôt ri mẽ pa xwÿnhjê hõ na ka.

Anē nhūm kuma nē kê axte kām:

—Kwa mẽ ri ã amnhĩ krã hkôt ri ixto axêx anhÿr kêt nē. ãm ixte aa mēhõta pumunh kêt kumrêx. Anē.

⁵⁹ Tã nhūm ja haxwÿja axte omu nē kām:

—Kwa ãm hāmri na mẽ ajarê. Apê Jejus kwÿ hõ na ka. Urak nē te apê Garirej nhõ xwÿnh pyrãk kênã. Anē.

⁶⁰ Hāmri nhūm tee ri kuma nē mẽ kām amnhĩ tã aprãr kām hihtÿx nē mẽ kām:

—Tk. Ixpê Garirej nhõ xwÿnh kêt. ãm ixte mēhõ mũj pumunh kêt kumrêx tã ka mẽ ãm xatã hkôt ixpa ho ixpa xwÿnh ã ixkamnhix o akuhê.

Anhÿrja o ra mẽ kām amnhĩ tã aprãr o axkrunêpxi mẽ nhūm krãhyre kà.

⁶¹ Hāmri nhūm Jejus arĩ ixkre kamã ãm tã Simãw Pêtre ho hakêx nē omu. Hāmri nhūm amnhĩ tã no pumu nē kot hkukamã kām ã amnhĩ nhĩpêx anhÿr jarênhja mã hamaxpêr kurê kumrêx. Krãhyre hkàr kêt ri kot mẽ kām amnhĩ tã aprãr o axkrunêpxi hã harênhja mã hamaxpêr nē kànhmã hakry hpar o tē nē hkaprĩ htÿx nē. ⁶² Hāmri nē hkaprĩ xaj kītare pê kato nē tē nē awry hã xa nē mÿr rax kumrêx.

Mẽ kot Jejus tak ã mẽ harênh

Matêwre 26.67-68; Makre 14.65

⁶³ Hāmri nhūm mẽ kot Jejus pumunh o kuhê xwÿnhjaja hã hpêr o axkê nē htak o kuhê. ⁶⁴ Nē no hpro nē htak nē kām:

—E atak xwÿnh nhixi jarê. Apê Tĩrtũm Kra hã ate amnhĩ jarênh jakamã mãn urak nē axàhpumunh tÿx. Jakamã e hixi jarê. Anē.

⁶⁵ Hāmri nē xatã haprÿ nē kām kapêr punuj nē.

Mẽ kot mẽ hkrãhtũm wÿr Jejus o htêm ã mẽ harênh

Matêwre 26.57-68; Makre 14.53-65; Juãw 18.19-24

⁶⁶ Tã nhūm myt kator o mör mẽ nhūm Ijaew nhõ pahijê mẽ patre krãhtũmjê mẽ Tĩrtũm kapêr tũm o mẽ ahkre xwÿnhjaja axpên wÿr pikuprõnh pa. Hāmri nhūm mẽ ma mẽ hwÿr Jejus o tē. ⁶⁷⁻⁶⁸ Nhūm mẽ omu nē tanhmã kot amnhĩ jarênh to hã hkukja nē kām:

—Kwa mẽ inhmã amnhĩ jarẽ. Xà ka na apê Tirtũm kot mẽ ixkaxyw axãm xwỳnhhta? Xà ka kot kaj Rõm nhõ xwỳnhjê pẽ mẽ ixpytã nẽ mẽ ixto amnhĩptãr o apa? Anẽ.

Hãmri nhũm mẽ kãm:

—Nà kot paj tanhmã mẽ amã amnhĩ jarẽnh to ka mẽ ixkõt ajamaxpẽr kêt nẽ. Ixte ãm hãmri mẽ amã amnhĩ jarẽnh tã ka mẽ inhma nẽ ãm inhma. Nẽ kot pa amnhĩ xwar mẽmoj tã mẽ akukja ka mẽ amnhĩ xwar inhmã tanhmã harẽnh to hkêt nẽ. ãm mẽ axêx rom mẽ ate ã ixkukjêr anhỹr kênã. ⁶⁹ Tã nom kot paj tokyx ma akupỹm Inhĩpêxã Tirtũm wỳr api. Hihtỳx o hihtỳx rãhã nẽ pa ho pa xwỳnh na. Jakamã kot paj hwỳr api nhũm amnhĩ nhĩhkõ hã inhỹr pa upõk rũm mẽ apiitã mẽ ato amnhĩptãr o ixkrĩ. Hãmri nẽ nhỹrmã paa tanhmã mẽ ajarẽnh to. Anẽ.

⁷⁰ Hãmri nhũm mẽ tee ri kot ã amnhĩ jarẽnh anhỹrja ma nẽ kãm:

—Tk. Kwa akatãt kõt mẽ inhmã amnhĩ jarẽ nã. Xà apê Tirtũm Kra na ka? Anẽ.

Hãmri nhũm mẽ kãm:

—Tỳ ixpê Kra na pa. Anẽ.

⁷¹ Hãmri nhũm mẽ tee ri ã amnhĩ jarẽnh anhỹrja ã kuma nẽ axpẽn mã:

—Kwa mo kaxyw kot puj mẽ axte mẽ hkwyjê japêr nhũm mẽ tanhmã kot amnhĩ tomnuj to hã harẽ? Tãm kêp Tirtũm Kra hã amnhĩ to hêx nhũm mẽ pahte pahpiitã mar kênã. E kwa tokyx pu mẽ ma Rõm nhõ pahihtĩ hwỳr o tẽ kê mẽ pamã hã amỹnê nẽ mẽ pamã kupĩ. Anẽ.

23

Mẽ kot pahi Pirat wỳr Jejus o htẽm ã mẽ harẽnh

Matêwre 27.1-2, 27.11-26; Makre 15.1-5; Juãw 18.28-38

¹ Tã nhũm mẽ Jejus o kato nẽ nhãm Pahihti Pirat wỳr o tẽ. ² Hãmri nẽ kutã ãm nẽ tanhmã kãm ho hêx to nẽ kãm:

—E ot pa mẽ awỳr jahti ho tẽ. Na hte mẽ inhmã hêx rũnh o pa. Mẽ ixte Pahihti Sesti kapêr kwỳm ri amnhĩ nhĩpêx prãm xaj tanhmã mẽ inhmã mẽmoj tã karõ hto ho pa. Nẽ axtem nẽ

mẽ ixte Sesti mã kàxpore hkwy nhõr kêt ã mẽ inhmã karõ. Nẽ Tirtũm kot mẽ pakaxyw kêp mẽ panhõ pahi hã ãm xwỳnh ã amnhĩ jarẽ. ã na hte mẽ inhmã amnhĩ to hêx anhỹr o pa. Anẽ.

³ Hãmri nhũm Pirat mẽ kuma nẽ Jejus pumu nẽ kãm:

—E kwa inhmã amnhĩ jarẽ. Xà apê Ijaew nhõ pahi na ka? Xà ka na htem amnhĩ wỳr akãm hamak o pa? Anẽ.

Hãmri nhũm kãm:

—Nà ãm hãmri na ka ã ijarẽnh anẽ. Anẽ.

⁴ Hãmri nhũm Pirat tanhmã hkukjêr to nẽ tee ri kot amnhĩ jarẽnh ã kuma hãmri nẽ patre krãhtũmjê mã kãm:

—Kwa mẽmo mỳrapê kot pa tanhmã mẽ amã hã ixãmnhẽnh to? Kot tanhmã amnhĩ tomnuj tore hã. Nà kot pa kãm inhũre. Anẽ.

⁵ Hãmri nhũm mẽ tee ri kuma nẽ kot mẽ kãm hã ãmnhẽnh prãm xaj hã kãm kapêr kãm hihtỳx nẽ. Nẽ kãm:

—Kwa nã. Na pre hte pika pẽ Jutej kamã tanhmã mẽ kãm hêx to ho pa. Hãmri nhũm mẽ ra hã axpẽn kutã amnhĩ xunhwỳ nẽ hã pijapu rũnh o pa. Tã mããnẽn Garirej kamã ã amnhĩ nhĩpêx anhỹr o hkrax nẽ hpãnhã amnẽ mẽ pahwỳr ã amnhĩ nhĩpêx anhỹr kaxyw mõi anẽ. Anẽ.

Mẽ kot Erox wỳr Jejus o htẽm ã mẽ harẽnh

Rukre 9.7-9

⁶ Hãmri nhũm Pahi Pirat mẽ kuma nẽ mẽ kãm:

—Kwa xà kêp Garirej nhõ xwỳnh na? Anẽ.

Hãmri nhũm mẽ kãm:

—Tỳ. Kêp Garirej nhõ xwỳnh kênã.

⁷ Anẽ nhũm mẽ kãm:

—Tõ mẽ ma pahihtĩ Erox ãxipas wỳr mãn o tẽ. Kêp Garirej nhõ xwỳnhjê nhõ pahi na. Tã ra jar Jerujarẽ kamã ham pøj. No axtem ixpê Jutej kamã mẽ pa xwỳnhjê nhõ pahi jakamã kwa mẽ ma õ pahita wỳr mãn o tẽ kê tãm tanhmã mẽ amã ho. Anẽ.

⁸ Hãmri nhũm mẽ kuma nẽ ma pahi Erox ãxipas wỳr o tẽ. Na pre ra Erox ãxipasja xatã Jejus jarẽnh ma nẽ kãm omunh prãm nẽ. Kãm aa kot mẽmoj pumunh kêt õ ho anhỹr ã omunh

prām tỳx jakamā nhūm mẽ ma hwỳr o tē nhūm omu nē hkĩnh nē. ⁹ Hāmri nē tee ri mẽmoj tã hkukja no nhūm akryk xa nē tanhmã kãm nē hkêt nē. ¹⁰ Hāmri nhūm mẽ õ patre krãhtũmjê mẽ Tĩrtũm kapēr tũm o mẽ ahkre xwỳnhjaja kãm ho kapēr punuj nē ho hêx kãm hihtỳx nē. ¹¹ Hāmri nhūm pahĩ Erox ãxipas mẽ kuma hāmri nē õ pōristi mẽ wa kãm kapēr punuj nē hã hpēr o axkē nē tanhmã ri haprỳ to. Hāmri nē hã hpēr o pikēnh kãm kēp pahĩ hã mẽ ê mexja py nē kãm haxà nē akupỹm pahĩ Pirat wỳr kumẽ.

¹² Na pre Pahi Pirat mẽ Pahi Erox ãxipasja wa kãm axpēn kĩnh kêt nē. Tã hāmri nhūm Erox ãxipasja tee ri Jejus kot kãm tanhmã amnhĩ jarēnh to hã mar prãm xàj tee ri hkukamã hamaxpēr hāmri nē Pirat ã hpijaàm kaxyw akupỹm hwỳr kumẽ. Hāmri nhūm amnhĩ tã omu hāmri nē wa ra akupỹm kãm axpēn kĩnh nē. Nē akupỹm axpēn mã hpēr o axkē nē pikunhar o pa pē akupỹm axpēn to hkrãmnhwỳ.

Pirat kot Jejus pĩr ã àmnēnh

Matêwre 27.15-26; Makre 15.6-15; Juãw 18.39-19.16; mããnēn Atre 3.13-14

¹³ Tã nhūm Pirat akupỹm amnhĩ wỳr mẽ hã karõ. Ijaew kwỳjaja nē mẽ õ pahijaja nē mẽ õ patre krãhtũmjaja nhūm akupỹm amnhĩ wỳr mẽ piitã mẽ hã karõ. ¹⁴ Hāmri nhūm mẽ akupỹm hwỳr gjêx pa nē kuhê nhūm mẽ kãm:

—E na ka mẽ ixwỳr mytita o tē nē tanhmã inhmã harēnh to. Kot mẽ akwỳjê mã tanhmã hêx to ho pa hã harê. Tã pa ra jar mẽ anoo mã tanhmã hkukjêr to nē tee ri kot inhmã tanhmã amnhĩ jarēnh to hã kuma. Te kot amnhĩ to mex xwỳnh pyrãk. Mẽ ate tanhmã ho akapēr to htã nom kot anhỳr kêt. Kot amnhĩ to mex xwỳnh na. ¹⁵ Pahi Eroxja ra ixpyrà nē tee ri tanhmã hkukjêr to nom nhūm tanhmã kãm nē hkêt nē. Nhūm tee ri ja hã omu nē akupỹn ixwỳr kumẽ. Jakamã kwa mẽmo mỳrapê kot paj mẽ amã hã amỳnê nhūm mẽ amã kupĩ? Tanhmã kot amnhĩ tomnuj

tore hã. ¹⁶ Kot paj ãm mẽ kãm anē kē mẽ htak nē kãm ure kē mãmrĩ ma tē. Anē.

¹⁷ Arĩgro pē Pas ã na pre hte mẽ õ pahĩ mẽ kot mẽ ho prēs nhūm mẽ hkrĩ xwỳnhjaja nhūm pre htem mẽ ho hpỳnh nē mẽ kãm ure. Jakamã na pre ã mẽ kãm kapēr anē nē kot Jejus tak nē kãm urer mã. ¹⁸⁻¹⁹ Nom nhūm mẽ kuma nhūm ja mẽ kēp omnuj nē nhūm mẽ kãm:

—Kwa nà. Apĩ ri. Apĩ nē mẽ inhmã Parapas mã mãn anhũre. Anē.

Parapas na pre mẽ õ krĩ kamã õ pōristi mẽ pahĩ Piratja mẽ kutã amnhĩ xãm nē kēp õ pōristi hõxpĩ. Mỳrapê na prem ra haxà nhūm hkrĩ ho hkrĩ. Jakamã nhūm mẽ Pirat kot kãm urer kaxyw ã kãm kapēr anē. ²⁰ Nom nhūm kãm Jejus mã urer prãm jakamã axte hã mẽ hkukja nē mẽ kãm:

—Kwa nom mẽmoj mỳrapê kot paj mẽ kãm hã amỳnê nhūm mẽ amã kupĩ?

²¹ Anhỳr tã nhūm mẽ kuma nē ãm kuma. Nē xatã kãm:

—Kwa tokyx pĩ kahpa hã anhô kē ty. Anē.

²² Hāmri nhūm tee ri mẽ kuma nē mẽ kãm:

—Tk. Kwa nà. Tanhmã kot amnhĩ tomnuj tore hã kot pa kêt hã kunhõ nhūm ty. Nà kot paj ãm mẽ kãm anē kē mẽ htak nē kãm ure kē ma tē. Anē.

²³ Hāmri nhūm mẽ xatã hã kãm kapēr kãm hihtỳx nē kãm:

—Kwa nà. Pĩ kahpa hã mãn anhô kē ty.

Anhỳr o ãm xatã kàx pē àmra kamã kãm hã amỳnê. ²⁴ Hāmri nhūm Pirat tee ri mẽ kuma hāmri nē tã mẽ kãm hprãm xà hkôt mẽ kãm ã amỳnê. ²⁵ Hāmri nē mẽ kãm Parapas mã ure. Ra kot pahĩ Pirat pē õ pōristi kutã amnhĩ xãm nē kēp hõx pĩr tã nhūm mẽ kãm hprãm xà hkôt akupỹm kãm ure. Hāmri nē mẽ ãhkram Jejus jaxà. Mẽ kãm hprãm xà hkôt ri mẽ kot tanhmã hipêx to kaxyw.

Mē kot pī kahpa hã Jejus nhôr ã mē harēnh

Matêwre 27.31-43; Makre 15.21-32; Juãw 19.17-20, 19.27-31; mãânēn Atre 7.59-8.1

²⁶ Tã nhũm pôristijaja Jejus o kato nē ma kapôt mã o tē. Nē kãm õ pī kahpa gõ nhũm amnhĩ kaxyw kumy nē o tē. Nom mē kot htak rax kurē nhũm hirot týx nē nhũm mē ja hã omu nē mēhõ kot ho ajuta kaxyw mē hkapi ho xa. Hãmri nē Sirēn nhõ xwýnh Simãw hkà htyk pumu. Nhũm pre htýx hamakêtkati nē mē kutã krĩm tē. Hãmri nhũm mē haēr pē unē nē kãm Jejus o ajuta kaxyw hã karõ nhũm kãm õ pī kahpaja my nē mē hkôt o tē.

²⁷ Hãmri nhũm mē ohtõ nē Jerujarē rũm Jejus kôt mõ. Nhũm mēni hkwyjaja omu nē kãm hkaprĩ xàj myr o hkôt mõ. ²⁸ Hãmri nhũm mē myr ã mē kuma nē mē ho hakēx nē mē omu nē mē kãm:

—Kwa nà Jerujarē nhõ xwýnhjaja. Mē amã ixkaprĩ xàj amyr kêt nē. Kêt mē kamjaja amã amnhĩ kaprĩ xàj mãn mur. Nē mē akrajê kamã axukaprĩ xàj mãn mur. ²⁹ Koja mē nhỹrmã mē apē mē anhõ krĩ grành pa ka mē apunuj nē amnhĩ xà htýx kamã ajamak o ri apa. Nē tee ri mē akrajê hkukamã tanhmã ajamaxpēr to nē ajamaxpēr o: “Hêxta gãà nē. Na ixkrajaja ixpē amnhĩ xà htýx kãm hamak o pa. Kêp apu mē hkra hkêt xwýnhjê pyrã nē ixkra hkêt nē ixpa ro nhýx inhãmã mex nē. Nhýx pa ixkĩnh nē.” Anhỹr o kot kaj mē nhỹrmã ajamaxpēr nom ã ajamaxpēr anhỹr kaprỹ.

³⁰ —Nē kot kaj mē apiitã mēmo punujta pymaj tee ri amã tokyx atyk nē ajapēx par prãm kaprỹ nē axpēn mã akapēr o: “Hêxta gãà nē. Kot kēn prêk mũj mē panhĩpy rôrõk nē tokyx mē panhĩmex par ronhỹx mē pamã ja mex.” Anhỹr tã no ãm tee ri ã ajamaxpēr anhỹr kaprỹ. ³¹ Nom kêt pa. Aa ixte tanhmã amnhĩ tomnuj to hkêt tã nhũm mē ã inhĩpēx anē. Nom mē ate amnhĩ tomnuj myrapê koja mē nhỹrmã tanhmã mē ato rax o

ã mē kot inhĩpēx anhỹrja jakrenh pa. Hêxta waa nē. Na pa mē akukamã ijamaxpēr nē ixkaprĩ htýx nē. Anē.

³² Tã nhũm mē ja wa ho hamēxkrut nē tanhmã wa kot amnhĩ tomnuj toja myrapê Jejus kôt wa hpĩr kaxyw hkôt mãânēn wa o tē. ³³ Jakamã nhũm mē ra kēn nhĩxêt te kot mē hkrã hi pyrãk xwýnhhta wýr mē o pøj. Mē kot kãm “mē hkrã hi xà” anhỹr jarēnhja wýr mē o pøj. Hãmri nē Jejus pē ê kapa nē pī kahpa hã kuxi nē prek o ãhkra nē hpar o htýx pa. Hãmri nē kãnhãmã pī kahpa xãm nē ho htýx nhũm xa. Hãmri nhũm mē hpãnhã wa kot amnhĩ tomnuj xwýnhhta mã wa ho anē nē. Nē prek o wa ãhkra nē wa hpar o htýx pa hãmri nē akutã ho Jejus nhĩjê nē wa ãm nhũm wa ajêt. ³⁴ Hãmri nhũm Jejus kýx pē amnhĩ xà htýx kumrēx kamã hamak o jêt rãhã mē ho Tĩrtũm wý nē kãm:

—Kwa Papaj. ãm ixtã jajê pumu. Mē kot mēmoj mex pumunh kêt jakamã na mē ã inhĩpēx anē. Jakamã ãm ixtã mē omu nē mē kamã axukaprĩ nē. Anē.

Hãmri nhũm hparpê pôristi hkwyjaja axpēn mã ê hkwy ho pigrành kaxyw hã kēnre ho jõka ho hkrĩ. ³⁵ Nhũm mē ohtõ rax nē Jejus parpê omunh o kuhê. Nhũm mē õ pahijaja mē noo mã hã hpēr o axkē nē mē kãm:

—E jahti na pre te kēp mē pakaprĩ xwýnh ã amnhĩ jarēnh o ri pa. Nē Tĩrtũm kot mē pakaxyw ãm xwýnh ã amnhĩ jarēnh o ri pa. Jakamã e kwa pu mē xa nē kot amnhĩ kaxàr nē wryk kãm omu. Anē.

³⁶ Nhũm pôristi mãânēn tanhmã hã hpēr o pikēnh to. Nē hparpê kãm wĩhti punuti jahkre nē kãm:

—Kwa wry nē mē ixkutã ja hkwy ho ixkõ nà. Anē.

³⁷ Hãmri nē kãm:

—E apē Ijaew nhõ pahi hã kot kaj amnhĩ kapa nē akupýn wry. Kwa tokyx pa mē ja hã apumu. Anē.

³⁸ Nhũm pôristija tapti hõ py nē tanhmã hã kagà hto. Nē hã kagà ho:

IJA EW NHÕ PAHI NA JA

Anhÿr o hã kagà hãmri nẽ Jejus wÿr api nẽ mÿ ri kunhõ.

Wa kot Jejus nhÿjẽ nẽ wa jêt xwÿnh wa harẽnh

Matêwre 27.44; Makre 15.32

³⁹ Hãmri nhÿm wa kot ìhkõ hã jêt xwÿnhhta õ haxwÿja kãm kapër punuj nẽ kãm:

—Kwa kot kaj apê Tirtÿm kot mẽ ixkaxyw axãm xwÿnh hã kot kaj amnhÿ kapa nẽ wrÿ. Nẽ mãânẽn amnhÿ kõt wa ixto wrÿ. Anẽ.

⁴⁰⁻⁴¹ Hãmri nhÿm ihõta kuma nẽ hã kãm akir nẽ kãm:

—Tk. Kwa amarÿ ajêt. Xà amã Tirtÿm puma hkêt ã na ka ã kęp Krata mã akapër anẽ? Nà koja kãm wrÿk prãm nẽ kot wrÿ. No pajamẽ pahte amnhÿ tomnuj mÿrapê koja mẽ pahpÿ. No tãm kot tanhmã amnhÿ tomnuj to hkêt tã nhÿm mẽ amarÿ ã hipêx anẽ.

⁴² Anhÿr o kãm kapër hãmri nẽ Jejus mã kãm:

—Kwa Jejus. Kêr ka nhÿrmã mẽ ixto amnhÿptã hãmri nẽ inhmã ajamaxpër nẽ ixkamã axukaprÿ nẽ ixto mex nẽ. Anẽ.

⁴³ Hãmri nhÿm kãm:

—Nà kot kaj jarãhã ma ixkõt kaxkwa hwÿr api nẽ hpãnhã ixkuri amex nẽ atÿr tÿm nẽ apa ho apa. ãm hãmri na pa ã amã ixkapër anẽ. Anẽ.

Jejus tyk ã harẽnh

Matêwre 27.45-56; Makre 15.33-41; Juãw 19.28-30

⁴⁴ Tã nhÿm kaxkwa nhÿpõk ri myt nhÿr mẽ nhÿm te ra kamãt pyrãk nhÿm kamãt kô rax kumrẽx. Nẽ kamãt kô ho ra hã awry nẽ. Ja mẽ nhÿm akupÿm myt katêr o mõ.

⁴⁵⁻⁴⁶ Nom nhÿm kormã kamãt kõtã ã nhÿm Jejus ra htyk kaxyw nẽ àmra kamã Tirtÿm mã kapër nẽ kãm:

—E Papaj. Mãmrÿ ixkarõ ho amnhÿptã.

Anhÿrja kõt hãmri ty. Pu nhÿm Tirtÿm mã amnhÿ jarẽnh xà hã ixkre kamã hakwakre hã kupêxêja axkjê nẽ amnhÿ kahê xà mẽnh kurê kumrẽx. Utÿ rax tã kõt ã axkjê nẽ amnhÿ kahê xà mẽ. Te Jejus htyk o kot mẽ pahte hkõt amnhÿ xunhwÿr xwÿnhjê mã

Tirtÿm wÿr pry jakwa kre kahê xà mẽnh pyrãk o ã amnhÿ nhÿpêx anẽ. ⁴⁷⁻⁴⁹ Hãmri nhÿm mẽ piitã mẽmoj ã kot amnhÿ nhÿpêx anhÿr ã omunh o kuhê xwÿnhjaja. Nẽ kaxyw Jejus krãmnhwÿjaja nhÿm mẽ amÿm omunh o kuhê. Nẽ Garirej rÿm mẽni kot Jejus kõt mẽ pa ho mẽ pa xwÿnhjaja mãânẽn mẽ kuri amÿm hkaprÿ nẽ omunh o kuhê. Nhÿm põristi krãhtÿmjê hõja ã mẽmoj kot amnhÿ nhÿpêx anhÿr ã omu nẽ tee ri hamaxpër o:

—Hêxta waa nẽ. Pêr ãm hãmri na pre hte tãm amnhÿ nhÿpêx o pa. Tã pa mẽ amarÿ mẽ mar xà hkõt ixtÿx kupÿ. Anẽ.

Nhÿm ã hamaxpër anhÿrja kõt Tirtÿm mã mex o mex ã harẽnh o xa. Nhÿm amarÿ mẽ kuhê xwÿnhjaja mãânẽn mẽmoj ã kot amnhÿ nhÿpêx anhÿrta pumu nẽ tee ri hkukamã hamaxpër o ra kãm ma htÿx nẽ. Hãmri nẽ awjanã nẽ ma akupÿm krÿm mrar kurê kumrẽx.

Mẽ kot Jejus jaxàr ã mẽ harẽnh

Matêwre 27.57-61; Makre 15.42-47; Juãw 19.38-42

⁵⁰⁻⁵¹ Tã nhÿm axtem Juje pẽ Ari-matej nhõ xwÿnhja. Arimatejja pika pẽ Ijaew kamã na. Nhÿm Jujeja kõt amnhÿ to mex jakamã Tirtÿm kõt amnhÿ nhÿpêx o pa. Jakamã na pre hkwyjê rom Tirtÿm kot mẽ pahwÿr Jejus mẽnh xwÿnh ã omu nẽ hkõt hamaxpër. Kęp Ijaew nhõ pahi hõ htã hkwyjê hkõt hamaxpër kêt nẽ. Jakamã nhÿm prem kot Jejus pÿr ã amÿnê nhÿm tee ri harẽnh ma nhÿm ja kęp omnuj nẽ. ⁵² Jakamã nhÿm Jejus ty nhÿm Juje ma pahi Pirat wÿr tẽ nẽ ì hã kuwÿ nẽ kãm:

—Pa? E ot pa awÿr tẽ. Kwa inhmã htyk xwÿnhhta gõ pa ma o tẽ nẽ haxã. Anẽ.

⁵³ Hãmri nhÿm kuma nẽ kãm kugõ nhÿm ma o tẽ nẽ haxã. Kaxyw kupêxê hõ py nẽ ho hkupu nẽ ma o tẽ nẽ kën kre kaprÿ kamã haxã. Mẽ kot kormã kamã mẽhõ jaxàr kêt nhÿm mẽ kamã Jejus jaxã. ⁵⁴ Arÿgro pẽ sêsta hã nhÿm prem kupÿ nhÿm myt xàr o mõr mẽ nhÿm Juje ma o tẽ nẽ haxã.

Ijaew kôt xà hã arĩgromnuja wỳr haxà.
⁵⁵ Nhũm Garirej rũm mēni hkwỳ kot
 Jejus kôt pa xwỳnhjaja ma hkôt mra
 nē kot haxàr kãm omu. Mē hkwuxwaxà
 ho gregrer kêt rãhã haxàr kãm omu.
⁵⁶ Hãmri nē ma akupỹm krĩm mra nē
 kaxyw mē hkwuxwaxà hkwỳ ho anē.

Tã nhũm apkati nhũm mē õ
 arĩgromnu pē sap kator jakamã nhũm
 mē kormã akupỹm hwỳr mrrar kêt nē.
 Hãmri arĩgro mex jamãr pē arĩ hkòkôt
 o hkrĩ.

24

Jejus akupỹm htĩr jarēnh

*Matêwre 28.1-10; Makre 16.1-8;
 Juãw 20.1-10*

¹ Tã nhũm apkati nhũm tòmĩk.
 Hãmri nhũm mēnijaja kwỳhtã kãnhmã
 hkrĩ nē ma akupỹm kēn kreta wỳr mē
 hkwuxwaxà ho mra. ² Hãmri nē hwỳr
 àhtêp o mra nhũm ra hakwakre kahê
 xà raxta kahê xà hkàx ã xa nhũm mē
 tee ri omu. ³ Hãmri nē kēn kre wỳr
 agjê nē kamã tee ri Jejus japêr no
 nhũm kamã amrakati. ⁴ Nhũm mē
 tee ri axpēn pumunh pē hkukamã
 hamaxpēr.

Hãmri nhũm Tĩrtũm kapēr o wrỳk
 xwỳnh wa axkrut nē mē haēr pē mē
 hwỳr kato nē wa xa. Wa ê jaka nē hirã
 htỳx kãm wa xa. ⁵ Nhũm mē tee ri wa
 omu nē kãm wa uma htỳx nē. Nē wa
 umaj hkõn krã ho rôròk nē hkrĩ hpa.
 Nhũm wa mē omu nē mē kãm:

—Kwa mon ka mē ri mē htykjê
 kamã ra akupỹm htĩr xwỳnhhta japêr o
 ri apa? ⁶ Jar amrakati. Na ra akupỹm
 htĩr. Kormã Garirej kamã pa ri kot
 mē amã amnhĩ jarēnh xà hkôt na ra
 akupỹm htĩr. Mãn ka mē arĩ kot ã mē
 amã amnhĩ jarēnh anhỳrja ã anohtỳx
 japêr. ⁷ Mē kot unēnh nē pĩ kahpa
 hã nhôr nhũm htyk nē htyk ã apkati
 axkrunēpxi hãmri nē akupỹm htĩr ã
 kot mē amã amnhĩ jarēnhhta mãn ka
 mē arĩ hã anohtỳx japêr.

⁸ Anhỳr o mē kãm kapēr nhũm mē
 kuma hãmri nē ra Jejus kot mē kãm ã
 amnhĩ jarēnh anhỳrja mã hamaxpēr
 kurê kumrēx. ⁹ Hãmri nē awjanã
 nē ma akupỹm krĩm hkĩnh nē mra.

Nē hwỳr pøj nē mē kot Jejus nhỹ hã
 mē ahkre ho mē pa xwỳnhjê mã aw-
 jarē. Mē kēp 11 xwỳnhhtajê mē kaxyw
 hkwỳjê mã awjarē. ¹⁰ Mēni kot mē
 kãm ujarēnh xwỳnhhtajê nhĩxi na pre
 Marir Matarēn nhũm ja kēp Joanã.
 Nē Xiakre katorxà Marir õta. Nē
 kaxyw mēni hõja. Jakamã nhũm mē
 ma akupỹm Jejus nhỹ hã mē ahkre
 ho mē pa xwỳnhjê hwỳr mra nē mē
 kãm awjarē. ¹¹ Nom nhũm mē kuma
 nē ãm mē kuma nē htỳx ho amnhĩ
 krã hkôt mē kot ri ã harēnh anhỳr
 ã mē hkamnhĩx nē ãm mē kuma.
¹² Nhũm Simãw Pêtre hamaxpēr hãmri
 nē kãnhmã xa nē ma kēn kreta wỳr
 hprõt nē htēm kurê kumrēx. Hãmri nē
 tee ri kēn kre kaprỳ kamunh o xa nē
 kamã Jejus kupu xà pix pumu nē tee
 ri hkukamã hamaxpēr hãmri nē ma
 akupỹm tē.

*Jejus kot Emau hwỳr wa mõi xwỳnh
 wa hwỳr kator ã harēnh*

Makre 16.12-13

¹³ Tã nhũm ra amỹkry ho mõi nhũm
 Jejus kwỳjê hõ wa hamēxkrut nē
 Jerujarē rũm kato nē ma akupỹm wa
 õ krĩ pē Emau hwỳr wa mõi. Jerujarē
 rũm Emau hwỳr ahkrãnre. ¹⁴ Jakamã
 nhũm wa hwỳr pry hã axpēn mã
 tanhmã Jejus jarēnh to ho mõi. Kēn
 kre kamã mē kot haxàr nhũm ra
 ã pikunorja nhũm wa axpēn mã
 harēnh o wa mõi. Nē tee ri hkukamã
 hamaxpēr o wa mõi. ¹⁵ Hãmri nhũm
 Jejus tãm tē nē wa hã ajêt nē wa
 hkôt tē. ¹⁶ Nom nhũm wa hprĩ hã
 omunh kêt nē. Tỳx ho nhãm mēhõ
 hã hkamnhĩx nē wa arĩ axpēn mã
 harēnh o wa mõi. ¹⁷ Hãmri nhũm Jejus
 hēx rom wa kãm:

—Kwa mēmon ka wa axpēn mã
 harēnh o wa mõi? Anē.

Hãmri nhũm wa hkaprĩ kamã kãm
 harē. ¹⁸ Ihõ pē Kroptija kãm:

—Kwa xà na ka Jerujarē kamã ri
 apa htã kamã mē kot tanhmã amnhĩ
 nhĩpēx toja jarēnh mar kêt nē? Kurũm
 amõi kēnã na ka ri mēmoj mar kêt nē
 ri apa. Anē.

¹⁹ Hãmri nhũm wa kãm:

—Nà amrakati ixte mëmoj maare hã. Kwa mo na wehe? Kwa war aprĩ hã inhmã harẽ pa kuma. Anẽ.

Hãmri nhũm wa kãm:

—Nà mẽ kot mẽ ixpê tanhmã Jesus pê Najare nhõ xwỳnh ta to kênã. Kêp Tĩrtũm nhỹ hã kapêr jarênh o pa xwỳnh na pre. Nẽ Tĩrtũm nhỹ hã tanhmã amnhĩ nhĩpêx to ho pa nhũm prem piitã amnhĩm mex ã harẽ. ²⁰ Tã nhũm mẽ panhõ patre krãhtũmjê mẽ mẽ panhõ pahijaja axtem nẽ mẽ kãm hã amỹnê. Mẽ kot pĩ kahpa hã nhõr nhũm htyk kaxyw mẽ kãm hã amỹnê. ²¹ Pa prem ixtỳx ho kêp Tĩrtũm kot mẽ pahwỳr mênh xwỳnh ã hkamnhĩx nẽ kot Rõm nhõ xwỳnhjê pê mẽ ixpytãr ã hkamnhĩx tã nhũm prem mẽ ixpê kupĩ. Jãã na prem ã hipêx anẽ nẽ kupĩ. Na ra htyk ã apkati axkrunêpxi.

²²⁻²³ —Nẽ jarãhã kwỳhtã mênih kwỳjaja ma haxàr xà hã kên kre hwỳr mra nẽ xep tee kamã hapêr nẽ omunh kêt nẽ. Xep ãm Tĩrtũm kapêr o wrỳk xwỳnhja wa ho axkrut nẽ wa omu nhũm wa xa. Nhũm mẽ kãm ra akupỹm htĩr ã harẽ nhũm mẽ akupỹn mẽ ixwỳr mra nẽ mẽ ijaêr pê mẽ inhmã harẽ. ²⁴ Hãmri nhũm mẽ ixkwỳjaja ma mẽ hpãnhã kên kreta wỳr mra nhũm ra mẽ kot harênh xà hkôt tee ri kamã hapêr nom nhũm kamã amrakati kumrêx. Anẽ.

²⁵ Hãmri nhũm Jesus amnhĩ tã wa kuma nẽ wa kãm tanhmã amnhĩ jarênh to nẽ wa kãm:

—Hêxta waa nẽ. Pêr ãm mẽ ate mëmoj mã ajamaxpêr tỳx mex kêt kumrêx. Na pre ra Tĩrtũm nhỹ hã kapêr jarênh xwỳnhjaja Tĩrtũm kapêr ã kagà htũm kamã ã kot amnhĩ nhĩpêx anhỹrja kukamã hprĩ hã harẽ nẽ hã kagà. Mẽ akukamã mẽ anhĩgêjtê mã harẽ nẽ hã kagà. Tã ka mẽ kormã aprĩ hã mar tỳx kêt nẽ. ²⁶ Kêt mẽ anê na Tĩrtũm kot ãm xwỳnh ta ty. Tã ra akupỹm htĩr nẽ akupỹm kaxkwa hwỳr àpir kaxyw. Kot mẽ ato amnhĩptãr kaxyw ra akupỹm hwỳr àpir mã. ²⁷ Amnepêr na pre finat Mojesja tanhmã hkukamã mẽ anhĩgêjtê mã harênh to nẽ hã kagà.

Nẽ hprĩ hã harênh o pa. Nhũm hpãnhã Tĩrtũm nhỹ hã kapêr jarênh o mẽ pa xwỳnhjaja ma anẽ nẽ mẽ kãm harênh o pa. Anẽ.

Nhũm pre ã Jesus wa hkôt hprĩ hã wa kãm amnhĩ jarênh anhỹr o tẽ. Te ho nhãm mēhõ jarênh pyrãk nom tãm wa kãm amnhĩ jarênh o wa hkôt tẽ. No nhũm kormã wa hprĩ hã kêp Jesus ã omunh kêt nẽ.

²⁸⁻²⁹ Nhũm ã wa kãm amnhĩ jarênh anhỹr o mõr rãhã nhũm mẽ ra wa õ krĩ hwỳr hpõx o mõ. Nhũm ra kamãtre nhũm Jesus te kot wa rer nẽ nhỹhỹm ma htẽm kaxyw pyrãk o amnhĩ nhĩpêx nhũm wa tee ri omu nẽ kãm:

—Kwa xà kot kaj wa ixre nẽ ma tẽ? Ra kamãt o mõr kênã. Kwa ma wa ixkôt tẽ nẽ wa inhõrkwỹ kamã mãn wa ixri pøj. Anẽ.

Hãmri nhũm wa kuma nẽ ma wa hkôt tẽ. ³⁰ Nẽ mẽ wa õrkwỹ hwỳr pøj nẽ hwỳr agjê. Hãmri nẽ apkur kaxyw hkrĩ nhũm Jesus tãm pãwti py nẽ Tĩrtũm mã harẽ nẽ hpãnhã ho axkjê nẽ wa kãm kugõ. ³¹ Hãmri nhũm wa atã kêp Jesus ã omunh kurê kumrêx. Jao nhũm wa kêp akunok nhũm wa tee ýr xà kamã hapêr nhũm hkapyr mex nẽ xa. ³² Hãmri nhũm wa tee ri axpên pumu nẽ ri hkukamã hamaxpêr nẽ axpên mã:

—Hêxta waa nẽ. Xep tãm na. Tãm na pahkôt mõ nẽ pry hã hprĩ hã pamã Tĩrtũm kapêr ã kagà jarẽ pu hkôt pahkĩnh nẽ mar o mõ. Hêxta waa nẽ. Xep tãm na. Anẽ.

³³⁻³⁵ Hãmri nẽ wa kãnhmã xa nẽ kato nẽ ujanãr kurê kumrêx. Hãmri nẽ ma akupỹm Jerujarê hwỳr wa hkwyjê hwỳr tẽ. Nẽ mẽ hwỳr pøj nẽ axà. Nhũm Jesus nhỹ hã mẽ ahkre ho mẽ pa xwỳnh pê 11jaja ra axpên wỳr akuprõ nẽ hkrĩ. Mẽ hkwyjê mẽ axpên wỳr akuprõ nẽ axpên mã tanhmã Jesus jarênh to ho hkrĩ. Hãmri nhũm wa mẽ hwỳr axà nhũm mẽ wa omu nẽ wa kãm:

—Kwa na xep ra Jesus akupỹm htĩr nẽ Simãw Pêtre hwỳr kato. Anẽ.

Hãmri nhũm wa mẽ kuma nẽ mẽ kãm:

—Tỳ na akupỹm htĩr kēnā. Na pa wa ijaxwỳja ham omu. Na pry hā wa ixtā ajēt nē ma wa ixkōt mō nē wa inhōrkwỹ kamā pōj. Hāmri pa mē ixàpkur kaxyw ixkrĩ nhũm pāwti py nē Tĩrtũm mā harē nē ho axkjē nē wa inhmā kugō pa wa ixprĩ hā kēp Jejus ā omunh kurē kumrēx. Ixprĩ hā omunh jao nhũm wa ixpē hapēx. Anē.

Jejus kot hkwyjē piitā hwỳr kator ā harēnh

Matêwre 28.16-17; Makre 16.14; Juāw 20.19-23

³⁶ Nhũm mē kormā axpēn mā Jejus jarēnh o hkrĩ rôm nhũm tām nhỹhỹnh mē hwỳr axà nē xa. Mē haēr pē mē hwỳr nhỹhỹnh axà nē mē kām:

—Pa? Xàn ka mē arĩ akrĩ? Anē.

³⁷ Hāmri nhũm mē amnhĩ jaēr pē omunh jao kànhmā hakry hpar o mra. Jao hakryk kām ma htỳx kām omunh o hkrĩ. ³⁸ Hāmri nhũm mē kām:

—Kwa mon ka mē amā ixpyma kamā tee ri ixpumunh o akrĩ? Kwa mē ixkarō hā ixkamnhĩx nē amā ixpyma hkēt nē. ³⁹ Na pa akupỹn inhĩ ho mē awỳr ixkato nē xa. Ga mē inhĩkra kamā prek tatak xāja pumu. Nē ixpar kām omu. Kwa mē amā ixpyma hkēt nē. E mē māmri mra nē anhĩkra ho ixkupē. Kēp apu ixkarō hpix ronhỹx ka mē inhĩ kupēnh kēt nē. Mo mēhkarōja ĩ? Nà na pa akupỹm ixtĩr nē inhĩ ho mē awỳr ixkato. Anē.

⁴⁰ Hāmri nē mē kām amnhĩ nhĩkra hpē nē mē kām amnhĩ par pē. ⁴¹ Tā nom nhũm mē arĩ akryk omunh o hkrĩ. Mē kot omunh nē hkĩnh tā tee ri omunh o hkrĩ. Hāmri nhũm tee ri ja hā mē omu nē mē kām:

—E kwa mē inhmā mēmoj japēr pa kukrē. Anē.

⁴² Hāmri nhũm mē kām tep gōj kām āmta gō ⁴³ nhũm kupy nē hkur o nhỹ nhũm mē arĩ hā omunh o hkrĩ. Jao ra akupỹm htĩr ā omunh kurē kumrēx.

Jejus akupỹm nojarēt nē hkwyjē mā mēmoj tā karō

Matêwre 28.18-20; Makre 16.15-18; määnēn Atre 1.6-8

⁴⁴⁻⁴⁵ Hāmri nhũm Jejus hprĩ hā mē kām Tĩrtũm kapēr ā kagà htũm kot

hkukamā harēnh ā amnhĩ jarē nē mē kām:

—Nà kormā ixtyk kêt ri na pa pre ixprĩ hā mē amā amnhĩ kukamā amnhĩ jarē. Tĩrtũm kapēr ā kagà htũm kot tanhmā mē kot inhĩpēx to hkukamā ijarēnhja. Na pre finat Mojes Tĩrtũm nhỹ hā ixkukamā tanhmā ijarēnh to. Nē Tĩrtũm nhỹ hā kapēr jarēnh o mē pa xwỳnhjaja Mojes mỳr pē haxwỳja ixkukamā tanhmā ijarēnh to. Nē Tĩrtũm mex o mex ā mē grer ā kagà xwỳnhjaja haxwỳja ixkukamā tanhmā ijarēnh to. Jajē piitā na prem Tĩrtũm kapēr ā kagà htũm kamā ixkukamā ijarē. ⁴⁶ Nē ijarēnh o:

Tĩrtũm kot mē pakaxyw ām xwỳnh pē Krisja koja nhỹrmā ty. Nē htyk o apkati axkrunēpxi nē akupỹm htĩr.

Anhỹr o mē kot ijarēnh. Tā pa ra mē kot ixkukamā ijarēnh xà hkōt ā mē anē amnhĩ nhĩpēx anē.

⁴⁷ —No ām Tĩrtũm kapēr ā kagà htũm kot papxipix ixkukamā ijarēnh kêt. Kamā määnēn mē kajaja tanhmā mē akukamā mē ajarēnh kute. Mē apē ixkōt amnhĩ xunhwỳr xwỳnhjaja ixwakre kamā tanhmā mē ate inhmā amnhĩ nhĩpēx to ho apa hkukamā tanhmā mē ajarēnh kute. Nē mē ajarēnh kot:

E mē ate ixkōt amnhĩ xunhwỳr xwỳnhjaja. Kêr ka mē ma pika piitā hkōt mē kām Tĩrtũm kot mē awỳr mēnh xwỳnhhta jarēnh o ri mē hkōt apa. Mē kot mē amar nē amnhĩ tomnuj kaga nē Tĩrtũm kōt amnhĩ xunhwỳr kaxyw. Kêr kê Tĩrtũm ja hā mē omu nē amnhĩ katut kōt mē kot amnhĩ tomnuj rēnh pa. E kêr ka mē ma krĩ piitā hkōt mē kām ā ja jarēnh anhỹr o ri mē hkōt apa. Krĩ pē Jerujarē kumrēx kām hāmri nē rĩ kormā pu hā krĩ kuhē xwỳnh piitā hkōt ajapōj nē mē kām harēnh o ri apa. Anē.

Ā Tĩrtũm kapēr ā kagà htũm kot mē akukamā mē ajarēnh kot anhỹr. ⁴⁸ Tā kêr ka mē ā mē kām tanhmā ijarēnh to

ho ri apa anē. ⁴⁹No ãm kormã. Kêr paj ma akupÿm kaxkwa hwÿr api hãmri nē amnhĩ pãnhã mē awÿr Tĩrtũm Karõ rē mãn. Tĩrtũm kot ixte amnhĩ nhĩpêx ã ijarēnh xà hkôt kot paj amnhĩ pãnhã mē awÿr kurē. Tã kêr ka mē kormã krĩ ja kamã kutêp apa. Kêr kê mē awÿr wrÿ nē mē amã agjê ka mē rĩ kormã angrã nē ma ÿ hã mē kãm ijarēnh o ri mē hkôt apa. Anē.

Jejus kot akupÿm kaxkwa hwÿr àpir ã harēnh

Makre 16.19-20; mããñēn Atre 1.9-11

⁵⁰Tã nhũm Jejus Jerujarē rũm hkôt mē pa ho pa xwÿnhjê kator nē ma krĩ pē Petãn wÿr mē o mō. Nē kormã hwÿr mē o mōr ri nhÿri mē o xa nē kãnhmã ãhkra pē nē mē ho Tĩrtũm wÿ. ⁵¹ã mē ho hwÿr anhÿrja rôm nhũm Tĩrtũm amnhĩ wÿr ho àpir o mō nhũm mē noo mã ma akupÿm tēn api. ⁵²Hãmri nhũm mē kãm mex o mex ã harēnh pē ma akupÿm àpir kãm omunh o kuhê. Nhũm ma tē nē mē kēp kakrãm axà nē mē kēp akunok. Hãmri nhũm mē awjanã nē ma akupÿm Jerujarē hwÿr hkĩnh nē pa. ⁵³Hãmri nē apkati mē Tĩrtũm mã amnhĩ jarēnh xà hã ixkre hwÿr agjê nē kamã Tĩrtũm mã mex o mex ã harēnh o hkrĩ rãhã nē.

Tã ãm ja pix ixkrãmnhwÿ Teopre. Ixpê Rukre na pa awÿr kagãja nhĩpêx nē kamã Jejus kot tanhmã amnhĩ nhĩpêx to hã harē nē hã kagã nē awÿr kumē.

Juāw Juāw kot tanhmã Jesus kot amnhĩ nhĩpêx to ho pa hã kagà

Juāw na pre kagàja nhĩpêx. Na pre mãânên Wam Juāw nê Sikũn Juāw nê Hapuhã Juāw nê Apokarip nhĩpêx. Juāw Paxis kêt axtem Juāw õ. Nê Jesus kôt mẽ pa ho mẽ pa xwýnhjê hõ na pre. Nê ÿ hã mẽ ahkre ho pa xwýnhjê hõ na pre. Nom kormã ã amnhĩ nhĩpêx anhÿr o pa hkêt ri na pre kêp tep kanhêr xwýnh. Nê kêp Jesus krãmnhwý mex na pre. Jakamã na pre kagàja nhĩpêx nê kamã Jesus kot tanhmã amnhĩ nhĩpêx hã harê nê hã kagà. Nê tanhmã kapêr to hã kagà.

Na pre Jesus kêp Tĩrtũm Kra hã harê nê hã kagà. Nê ãm pix kukwak ri Tĩrtũm wa kuri mẽ pahtĩr tũm nê mẽ papa ho mẽ papa hã harê nê hã kagà. Æ na pre Juāwja mẽ pamã Jesus jarê nê hã kagà anê.

*Jesus te kot Tĩrtũm pyrãk ã harênh
Matêwre 1.23; Juāw 8.12, 8.58,
10.30, 20.28; mãânên Atre 10.36; Sikũn
Korĩt 4.4; Piripos 2.6-11; Korosê 1.13-
17, 2.9; Xitre 2.13; Eprêw 1.1-4; Wam
Juāw 1.1-4, 5.20; Apokarip 1.17-18*

¹ Amnepê mã kormã mẽmoj kêt ri nhũm kot Tĩrtũm kapêr o amnhĩrĩt xwýnhja Tĩrtũm kôt pa ho pa. Te kêp urãk nê pa. Wa kot amnhĩ nhĩpêxja ãm tipxi. Nê wa ãhpumunh ãm tipxi. Nê wa hkarõ mãânên ãm tipxi. Æm wa tipxi rãhã nê pa ho pa. ² Kormã mẽmoj kêt ri na pre Tĩrtũm kapêr o amnhĩrĩt xwýnhja Tĩrtũm kôt ri pa ho pa. ³ Nê Tĩrtũm nhÿ hã na pre mẽmoj piitã hã apê nê ho kato. Jao pyka ho kato nê kaxkwa ho kato nê gô xujanãr o kato. Nê kamã mẽmoj piitã Tĩrtũm nhÿ hã ho kator pa. Kop apu mẽmoj to kator kêt ronhÿx mẽmoj amrakati kumrêx.

⁴ Nê Tĩrtũm o amnhĩrĩt xwýnhja pix kukwak ri na hte mẽmoj piitã htĩr nê pa. Nê ãm pix kukwak ri na htem

Tĩrtũm ri htĩr tũm nê pa ho pa. Nê te myyti kot mẽ pamã mẽmoj piitã hirã ho pa pu mẽ kukwak ri mẽmoj piitã omunh mexja pyrã nê na pre hte mẽ pahpiitã mẽ pamã mẽ pahte amnhĩ nhĩpêx nyw nê mẽ pajamaxpêr nyw o amnhĩrĩt pu mẽ pahprĩ hã mar mex nê. ⁵ Ja kaxyw na pre wrý nê ri mẽ kãm Tĩrtũm kapêr jarênh o ri mẽ hkôt pa. Jao mẽ kot amnhĩ nhĩpêx nyw jarê nhũm mẽ kot amnhĩ tomnuj xwýnhjaja tee ri kuma nê kãm mar prãm kêt nê. Nê tee ri kãm kapêr o hapêx prãm kaprý.

*Juāw Paxis kumrêx kot tanhmã Je-
sus jarênh to hã harênh*

*Matêwre 3.1-3; Makre 1.1-4; Rukre
3.2-6*

⁶ Tã nhũm kormã Jesus mẽ kãm kapêr o pa hkêt ri nhũm Juāw Paxis kumrêx mõ nê hkukamã Tĩrtũm nhÿ hã mẽ kãm tanhmã harênh to ho pa. ⁷ Mẽ kãm mẽ kot amnhĩ nhĩpêx nyw nhõr xwýnh pê Jesus Kris kukamã mẽ kãm harênh o ri mẽ hkôt pa. Mẽ kot mar nê amnhĩ kaxyw Jesus kôt hamaxpêr kaxyw. ⁸ No Juāw Paxisja na pre hte mẽ kãm mẽ kot amnhĩ nhĩpêx nyw nhõr o pa hkêt nê. Na pre ãm kot mẽ kãm õr xwýnhja kukamã mẽ kãm harênh o pa. ⁹ Jakamã na pre hte mẽ kãm harênh o ri pa nê mẽ kãm harênh o:

—E ot pa mẽ amã mẽhõ jarênh o ri ixpa. Kot mẽ pamã mẽ pahte amnhĩ nhĩpêx nyw nhõr xwýnhja. Koja tokyx mẽ pakamã pøj pu mẽ omu. Koja pøj nê mẽ piitã mẽ kãm Tĩrtũm kapêr jarênh o ri pa. Mẽ pahte pahprĩ hã mar mex kaxyw. Anê.

*Tĩrtũm kot mẽ ho hkra hprãm
xwýnhjê jarênh*

Rõmãn 8.14; Karatas 3.26; Epes 1.5

¹⁰ Tã nhũm Jesus man kot mẽmoj piitã ho kator xwýnhja wýr wrý nê mẽ hkôt ri pa. No nhũm mẽ kot kêp mẽmoj piitã ho kator xwýnh ã omunh kêt jakamã na prem kapêr ma nê ãm kuma nê amnhĩ kaxyw hkôt hamaxpêr kêt nê. ¹¹ Na pre wrý nê

mē pakamã ĩ ho kato. Kêp mē pah-piitã mē pahto kator xwÿnh tã nhũm mē ohtô nẽ omu nẽ ãm omu nẽ hkôt amnhĩ nhĩpêx kêt nẽ. ¹² Na prem ãm grêre nẽ kuma nẽ amnhĩ kaxyw hkôt hamaxpêr nẽ hkôt amnhĩ xunhwÿ. Hãmri nhũm amnhĩ tã mē omu nẽ mē kãm:

—E nã ãm hãmri. Ra mē ate amnhĩ kaxyw ixkôt ajamaxpêr nẽ ixkôt amnhĩ xunhwÿr jakamã na ka mē ixkukwak ri apê Tĩrtũm kraa. Anẽ.

¹³ Na htem ã kêp Tĩrtũm kra hprãm xaj Jejus kôt amnhĩ xunhwÿr anẽ. No na htem mē katorxã nhõxã hkre rũm hapõx kôt kêp Tĩrtũm kra hkêt nẽ. Rÿ amnhĩ krã hkôt tanhmã amnhĩ nhĩpêx to kukwak ri kêp hkra hkêt nẽ. ãm Tĩrtũm tãm kot mē ho hkra pix kukwak ri na htem kêp hkra.

Jejus wrÿk nẽ ĩ ho kator ã harênh
Matêwre 1.20; mãânên Rômãn 1.2-4; Píripós 2.6-7; Eprêw 2.9, 4.15; Wam Juāw 4.2

¹⁴ Jakamã na pre Tĩrtũm o amnhĩrĩt xwÿnhnta mē pahwÿr wrÿ nẽ mē pakamã ĩ ho kato nẽ mē pakamã pa. Kêp Tĩrtũm Kra hã pixi mex na pre. Nẽ kot amnhĩ nhĩpêxja te Tĩrtũm kot amnhĩ nhĩpêx pyrãk. Urãk nẽ mex o mex. Nẽ urãk nẽ mē pakutã nojarêt xwÿnh. Na pre hte katãt kôt Tĩrtũm kapêr jarênh o ri mē hkôt pa. Pa prem kuma nẽ mex o mex ã omu.

¹⁵ Nhũm Juāw Paxis na pre hkukamã mē kãm harênh o ri pa nẽ mē kãm:

—E ra ixte mē amã harênh o ri ixpa xwÿnhnta na ra pøj. Te pa ixte wa nẽ ixkator pyrãk nom amnepê mã kormã ixkêt ri nhũm htĩr rãhã nẽ pa ho pa. Ham ĩ ho kator tã kêp Tĩrtũm Kra jakamã urãk nẽ rãhã ho rãhã hã pa xwÿnh na. Jakamã kot amnhĩ to rax o kot ijakrenh par. Anẽ.

¹⁶ Nẽ kêp mē pakutã nojarêt rãhã nẽ pa ho pa xwÿnh jakamã na hte mē pahto mex rãhã pu mē kukwak ri pamex nẽ ri papa ho papa.

¹⁷ Na pre finat Mojesja mē panhĩgêjtjê mã Tĩrtũm kapêr jarênh o ri mē hkôt pa nẽ mē kãm:

—Na pre Tĩrtũm mē pahte tãm amnhĩ nhĩpêx o papa hã mē pamã karõ. Jakamã kot puj mē kot mē pamã mẽmoj tã karõ xã hkôt ã amnhĩ nhĩpêx anhÿr o papa nẽ ra tãm amnhĩ nhĩpêx o papa. Anẽ.

Nhũm pre Mojesja ã mē kãm kapêr o pa anẽ. Hãmri nhũm mē kuma no ãm tee ri kãm Tĩrtũm kôt tãm amnhĩ nhĩpêx o pa hprãm kaprÿ. Jakamã nhũm hpãnhã Jejus Krisja wrÿ nẽ mē pamã kapêr õ ho kapêr o pa nẽ mē pamã:

—E mē ate Tĩrtũm kôt amnhĩ nhĩpêx o apa hkêt tã nhũm arĩ kãm mē ajapê nẽ. Nẽ kãm mē ato mex prãm. Jakamã kot kaj mē amnhĩ to awÿ nhũm tanhmã mē akrã hto ka mē ra tãm ri amnhĩ nhĩpêx o apa. ãm hãmri na pa ã mē amã ja jarênh anẽ.

Anhÿr o mē pamã Tĩrtũm kapêr jarênh o pa. Tĩrtũm kapêr na mex o mex.

¹⁸ Nẽ aa mē pahtõ mē pahte pano ho Tĩrtũm pumunh kêt. ãm Kraja pix na kot no ho omunh. Kaxkwa kamã kuri ri pa ho pa jakamã kot omunh mex. Nẽ te kot Hipêêxãja pyrãk jakamã na pre wrÿ nẽ hprĩ hã tanhmã kute hã mē pamã harênh o pa. Jakamã na pu mē ra pahpiitã Tĩrtũm kot amnhĩ nhĩpêx ã omu nẽ mar mex nẽ.

Juāw Paxis kot mē kãm Jejus jarênh o pa hã harênh

Matêwre 3.1-12; Makre 1.1-8; Rukre 3.15-17; mãânên Atre 19.4

¹⁹⁻²⁸ Na pre Juāw Paxis ma hkwyjê hkôt mē kãm Jejus jarênh o pa nhũm mē hkwyjêja kuma nẽ amnhĩ kaxyw Jejus kôt hamaxpêr nẽ hkôt amnhĩ xunhwÿ. Hãmri nhũm Juāw Paxis ja hã mē omu nẽ Tĩrtũm mã mē hkrã kumrã. Pyhti pê Jotãw nhĩkjê hã krĩ pê Petãn tã ri mē hkrã kumrãr o pa. Hãmri nhũm krĩ pê Jerujarê kamã Ijaew krãhtũmjaja harênh ma nẽ ma hwÿr hkwyjê rē. Mē kot tanhmã hkukjêr to nhũm kot mē kãm tanhmã amnhĩ jarênh to kaxyw. Jakamã nhũm mẽõ patre hkwyjê mē Tĩrtũm mã amnhĩ jarênh xã hã ixkre kamã

mē ho ajuta xwýnh kwýjê mē Parijew nhõ xwýnh kwýjê mē nhũm mē ma hwýr mra. Juāw Paxis wýr mra nē omu nē kām:

—Pa. E ot pa mē awýr mra. Kwa mē inhmā amnhĩ jarē. Apê mē atõ na ka we? Xà ka na apê Tirtũm kot mē ixkaxyw axām mā xwýnhhta na ka nà? Xà ka na pa htem amnhĩ wýr akamā ijamak o ixpa? Anē.

Hāmri nhũm mē kuma nē mē kām: “Nà pa hkêt.” Anē hāmri nhũm mē kām:

—Tõ mǎn xep apê amnepê mā Tirtũm nhỹ hã kapēr jarēnh xwýnh pê finat Erisja. Hã na ka tanhmā amnhĩ to nē akupým atĩr nē mē ixkõt apa nà? Anē.

Hāmri nhũm mē kām:

—Nà ixpê Eris kêt. Anē.

Hāmri nhũm mē kām:

—Tõ mǎn xep apê finat Mojes kot mē kām harēnh o pa xwýnhhta na ka nà? Anē.

Hāmri nhũm mē kuma nē kê axte mē kām:

—Nà ixpê tām kêt. Anē.

Hāmri nhũm mē tee ri kot ã amnhĩ tã aprār anhýrja ma nē kām:

—Kwa apê jajê hõ hkêt tã na ka hte mē hkrã kumrār o ri apa. Kwa nà akatāt kõt mē inhmā amnhĩ jarē. Pa mē ama nē ma akupým mra nē mē kot awýr mē ixrēnh xwýnhjê mā tanhmā ajarēnh to. Tanhmā na ka hte mē kām amnhĩ jarēnh to ho ri apa? E kwa mē inhmā amnhĩ jarē pa mē ama. Anē.

Hāmri nhũm tã hprĩ hã mē kām amnhĩ jarē. Amnepê mā mē hkukamā Tirtũm nhỹ hã kapēr jarēnh xwýnh pê finat Ijais kot hkukamā tanhmā harēnh to nē hã kagà xà hkõt nhũm mē kām amnhĩ jarē nē mē kām:

—Tõe. Nà kot paj ixprĩ hã mē amā amnhĩ jarē ka mē inhma. Amnepêm Tirtũm kapēr jarēnh xwýnhjê hõ pê finat Ijaisja na pre hte mē kām mēhõ hkukamā harēnh o ri pa. Mēhõ kot mē panhõ Pahihti hkukamā htēm nē kapõt ã kutêp mē kām harēnh o pa xwýnhhta nhũm pre hkukamā harēnh o ri pa. Nē mē kām harēnh o:

Koja nhýrmā mēhõja kapõt ã mõn põj nē mē kām tanhmā ujarēnh to ho ri pa. Nē mē kām ujarēnh o: “E mē inhma. Koja Tirtũm tokyx mē pahwýr mē panhõ Pahihti mē nhũm wrý nhũm mē piitã omu. Jakamā kwa mē tokyx kutêp tām amnhĩ nhĩpêx o ri apa. Te ho mē kot mēhõ kutêp pry ho mex pyræk o amnhĩ nhĩpêx o ri pa. Jao amnhĩ nhĩ ho tām amnhĩ nhĩpêx nē tām axpên nhĩpêx o ri apa. Pahihtita kutêp.”

—Anhýr o na pre hte finat Ijaisja kot Pahihti hkukamā harēnh o ri pa xwýnhhta kukamā harēnh anē. Tã paa. Pa na pre Ijaisja ã ixkukamā ijarēnh anhýr o pa. Pa na pa hte ã Pahihti kutêp mē kām harēnh o ri ixpa anē. Tã ã ixte harēnh anhýr xwýnhhta na ra mē pakamā pa ka mē kormã ja hã omunh kêt nē. Kukamā na pa hte mē piitã mē kot hkõt amnhĩ xunhwýr ã mē omunh kaxyw gõ pix o mē hkrã kumrār o ri mē hkõt ixpa. Nom na pre ra mē pahwýr Tirtũm kot mē pakaxyw ãm xwýnhhta tām mē pahwýr wrý. Àhpumunh týx o kot ijakrenh jakamā na pa hte ãm kukwak ri ixpa nē amnhĩ tã hã ixpijaàm o ri ixpa. Anē.

Juāw Paxis kot mē kām Jejus jahkre hã harēnh

Matêwre 3.11; Makre 1.10; Rukre 3.22

²⁹ Tã nhũm apkati nhũm Juāw Paxis amnhĩ wýr Jejus pumu nē mē kot mar o kuhê xwýnhjê mā ìhkra ho ahkre nē mē kām:

—E. Oněj Tirtũm kot mē pakaxyw ãm xwýnhhta tē. Mē pahpê Ijaew na pu htem xatã pahte amnhĩ tomnuj pãnhã amnhĩrer kaxyw Tirtũm mā pahkrit ôwêhti hkra nyw kwý hpa nē ho amnhĩ pãnhã kām amnhĩrer o papa. No kêt htēm nēj koja nhýrmā kām mē pahpiitã mē pahte amnhĩ tomnuj pãnhã amnhĩrer pa. ³⁰ Na pa pre ra mē amā harēnh o: “Te pa ixte wa nē ixkator nē ixtĩr nē ixpa pyræk. Nom amnepêm kormã ixkêt

ri na pre htîr rāhā nē pa ho pa. Nē ĩ ho wrÿk nē jar kator tā kēp Tirtūm Kra jakamā urāk nē rāhā nē pa ho pa xwÿnh na. Jakamā kot amnhĭ to rax o kot ijakrenh par.” Anhÿr o pa pre mē amā harēnh o ri ixpa ka prem inhma.

³¹ —Ixte mē amā ā harēnh anhÿr tā ijaxwÿja kormā ixte kēp Tirtūm Kra hā omunh kêt nē ām hkukamā Tirtūm nhÿ hā mē amā ā harēnh anhÿr o ri ixpa. Nē hkukamā Tirtūm mā mē akrā kumrār o ri ixpa. Tā na pa kēp Tirtūm Kra hā omu nē ā mē amā ahkre anē ka mē omu. Anē.

³²⁻³³ Nhūm pre ā Juāw Paxis mē kām Jejus jahkre anē nē mē kām:

—Nā Tirtūm na pre ixte mē akrā kumrār o ixpa kaxyw inhma hā karō. Tā na inhma kot mē pakaxyw ām xwÿnhhta o amnhĭrĭt nē inhma harēnh o: “Koja nhÿrmā Ixkarōja mēhō hwÿr wrÿ nē kuri arĭk. Ka ja hā omu nē kēp Ixkra hā omunh kurē kumrēx. Kojā amnhĭ xō ri amnhĭ pyrā nē mē kām Ixkarō nhōr o pa nhūm mē hkarō mā agjē.” Anhÿr o inhma harē. Tā na pa ra omu. Na pre Tirtūm Karō kaxkwa rūm te tuuti pyrā nē hwÿr wrÿk o tē nē ĩkre hā xa. ³⁴ Pa ā kot hipēx anhÿr ā omu nē kēp Tirtūm Kra hā omunh kurē kumrēx. Jakamā na pa ā mē amā ahkre nē mē amā harēnh anē. Anē.

Juāw Paxis kôt pa xwÿnh wa kot Jejus kôt pa hā wa harēnh

Atre 19.4

³⁵ Tā nhūm apkati nhūm Juāw Paxis axte Jejus pumu. Kot hkôt ri pa ho pa xwÿnh mē wa nhÿri xa nē omunh o xa. ³⁶ Nhūm ra mē hānh tē nhūm Juāw Paxis omu nē hkôt ri pa xwÿnh wa kām:

—E onēj Tirtūm kot mē pakaxyw ām xwÿnhhta tē. Nēj koja mē pahte amnhĭ tomnuj pānhā amnhĭre. Anē.

³⁷ Hāmri nhūm wa kuma nē omu nē ma hkôt tē nē hā ajēt. ³⁸ Nhūm wa omu nē wa kām: “Pa mo na?” Anē nhūm wa kot kēp mē ahkre xwÿnh ā omunh jakamā kām:

—Nā wa ixte ma akôt ixtēm nē nhÿri anhōrkwÿ pumunh mā na pa wa akôt tē. Anē.

³⁹ Hāmri nhūm wa kām:

—Tōe. Nā wa kam nē rĭ ma ixkôt tē. Anē.

Hāmri nhūm wa kuma nē ma hkôt wa tē nē ōrkwÿ hwÿr pōj nhūm ra amÿkry nhūm wa hkôt axā nē kuri ŷr o kamāt hāmri nē kato nē ma akupÿm tē. ⁴⁰ Kôt htēm xwÿnhjē hōta na pre kēp Andre. Simāw Pêtre htō na pre. Nē kaxyw hōja. Wa kumā na pre Juāw Paxis Jejus jahkre nē harē nhūm wa ma hkôt tē. Tā wa ra akupÿm wa tē. ⁴¹ Hāmri nhūm Andreja htō Simāw wÿr tē nē kām:

—Kwa na pa wa jarāhā Tirtūm kot mē pakaxyw ām xwÿnhhta pumu. Ma pu hwÿr ka wa ixwar ano ho omu nā. Anē.

Ijaew kapēr kām “Tirtūm kot mē pakaxyw ām xwÿnh” anhÿrja te kot Gres kapēr kām “Kris” anhÿr jarēnh pyrāk. Ijaew na prem ā Jejus jarēnh anē nē harēnh o: “Tirtūm kot mē pakaxyw ām xwÿnh.” Anhÿr o harē.

⁴² Jakamā nhūm ā Andreja htō mā harēnh anē nē ma akupÿm hwÿr o tē. Nē wa hwÿr pōj nhūm wa omu. Wa kēp Juāw kra hā wa omu hāmri nē Simāw mā kapēr nē kām:

—Pa Simāw. Nā apē Simāw tā kot paj axte atā anhĭxi hō mē. Kot kaj māānēn apē Septi. Anē.

Mē pakapēr kām Septija te kēp “kēn” jarēnh pyrāk. No Gres kapēr kām te kēp “Pêtre” jarēnh pyrāk. No Ijaew kapēr kām kēp “Septi.” Jakamā nhūm pre Jejus ā Simāw Pêtre hā hixi mēnh anē.

Jejus kot amnhĭ kôt Firipti mē Natānaew wa hwÿr ā harēnh

⁴³⁻⁴⁴ Tā nhūm apkati nhūm ra Jejus pyka pē Garirej wÿr nojarēt nē nhÿri Firipti pumu. Firiptija Andre mē Simāw Pêtre wa urāk nē krĭ pē Pesēj nhō xwÿnh na pre. Jakamā nhūm Jejus nhÿri omu nē amnhĭ kôt kuwÿ nē kām:

—E kwa ma ri ixkôt apa ho apa. Anē.

⁴⁵ Hāmri nhūm kuma nē ma tē nē nhÿri Natānaew pumu nhūm nhÿri pĭ hpār parpē nhÿ nhūm omu nē kām:

—Kwa na pa jarāhā finat Mojes kot amnepēm mēhō hā kagā xwýnhhta pumu. Tirtūm kot mē pakaxyw ām xwýnhhta na. Tirtūm nhỹ hā kapēr jarēnh o mē pa xwýnhjaja kot hkukamā harēnh nē hā kagā xwýnhhta. Kēp Najare nhō xwýnh nē mǎānēn kēp finat Juje hkra. E kwa tokyx pu hwýr ka ixkuxwar ano ho omu. Anē.

⁴⁶ Hāmri nhūm tee ri kot tanhmā harēnh toja ma nē kām:

—Tk. Kokỹ. Najare nhō xwýnh piitā kot amnhĩ to mexti hā kot kēt we hō kēp Tirtūm kot mē pakaxyw ām xwýnh. Anē.

Hāmri nhūm kām:

—Kwa nà ā akapēr anhỹr kēt nē. Ma ixkōt tē nē ixpyrà nē ano ho omu mǎn. Nē rĩ ā ri akapēr anē. Anē.

Hāmri nhūm kuma nē ma hkōt tē. ⁴⁷ Hāmri nhūm Jejus amnhĩ wýr wa omu nē kuri mē kuhē xwýnhjē mǎ Natānaew jarēnh kurē kumrēx nē harēnh o:

—E oněj Ijaew ōja mē pahwýr hpōx o tē. Ām hāmri na hte tām amnhĩ nhĩpēx o pa. Na hte higēt finat Jako kurom hēx rom ri tanhmā mē kām amnhĩ to hēx to ho pa hkēt nē. Na hte ām kapēr mex pix o ri kapēr o pa. Anē.

⁴⁸ Hāmri nhūm tee ri amnhĩ tā kuma nē kām:

—Kwa mēhō na pre ā amā ijarēnh anē? Aa ixte nhỹri apumunh kēt kumrēx tā ka ri ām hāmri ā ijarēnh anē. Anē.

Hāmri nhūm kām:

—Nà mēhō kot tanhmā inhmā ajarēnh to hkēt. Ām pa na pa hte inhno ho apumunh o ixpa. Kormā Firipti kot awýr htēm nē amā ijarēnh kēt ri pa ra ixprĩ hā inhno ho apumu. Na ka kormā pĩta parpē nhỹ pa apumu. Anē.

⁴⁹ Hāmri nhūm tee ri kot hprĩ hā harēnh ā amnhĩ tā kuma nē kām:

—Kwa mē ijahkre xwýnh. Pēr ām hāmri apē Tirtūm Kra kumrēx jakamā na ka ā ijarēnh anē. Xep ka na mē ixte amnhĩ wýr akām ijamak o ixpa xwýnhhta na ka. Nà ka na apē mē ixpē Ijaew nhō Pahĩti. Anē.

⁵⁰ Hāmri nhūm Jejus kuma nē kām:

—Nà ām hāmri na ka ixte pĩ hpar pē apumunh ā ajarēnhja ma nē hkōt pix mǎ ixpē Tirtūm Kra hā ixpumu. Tā kot kaj ja nhĩrō pē axte mēmoj mex o kot ja jakrenh pumu. ⁵¹ Koja nhỹrmā kaxkwa axkjē nhūm Tirtūm kapēr o mē wrýk xwýnhjaja kurūm axpēn japa ka mē omu. Finat Jako pyrā nē mē omu. Ixte Tirtūm kot mē akaxyw ixām xwýnh wýr koja mē ā wrýk nē amnhĩ nhĩpēx anē ka ja hā mē omu. Kwa jam ajamaxpēr tỳx rāhā ho apa. Anē.

2

Jejus kot gō ho mē kām wĩhti nhĩpēx ā harēnh

¹ Tā nhūm apkati axkrut nē hapēx nhūm Jejus arĩ Garirej kamā pa. Nhūm krĩ pē Kanā kamā axpēn mǎ wahōj wa rer kaxyw nhūm Jejus katorxà ma mē hwýr mō. ² Hāmri nhūm mē amnhĩ wýr Jejus mē hkōt ri mē ixpa xwýnhjē wý pa mē ijaxwýja ma mē hwýr mō nē ra mē hwýr pōj. ³ Hāmri nē mē hkōt wa hā ixkĩnh nē apku nē wĩhti hkwý ho ixkōm o ixkrĩ. Tā nhūm ra wĩhti mē kēp hapēx nhūm Jejus katorxàja harēnh ma nē Jejus mǎ harē nē kām:

—Xē Jejus. Na xep ra mē kēp wĩhti hapēx pa. Xàt ka tanhmā mē ho ajuta hto mē? Anē.

⁴ Hāmri nhūm kām:

—Tōe. Kwa tee ri ajamaxpēr kēt nē. Kot paj tanhmā mē kām ho. Nom kot paj kormā ixpē Tirtūm kot mē akaxyw ixām xwýnh ā pa kormā amnhĩ to amnhĩrit kēt nē. Anē.

⁵ Hāmri nhūm katorxà kuma nē mē kām mē àpēnh xwýnhjē hwýr tē nē mē kām:

—An koja Jejus mē awýr tē nē tanhmā mē amā mēmoj tā karō hto ka mē ama nē kām ho anhỹr kurē kumrēx. Anē.

⁶ Nhūm mē kuri kēn o poti kēp 6 nē kuhē. Piitā umpým rũnh kumrēx. Koja hō pyxi nē nýt nē kamā gō kēp 80 rit nē hkwý kamā kēp 100 rit. Ijaew na htem apkur kaxyw nē amnhĩ nhĩhkra kuhōnh japjē rũnh nē kormā apku. Nē apkur pa nē axte amnhĩ nhĩhkra kuhō. Ā mē kot xatā

amnhĩ nhĩkra kuhõnh jakamã nhũm pre htem amnhĩ ri ã poti rũnh kwỳ xunhwỳr anẽ. No nhũm ra hkapyr nẽ kuhê. ⁷ Hãmri nhũm Jejus tẽ nẽ omu mẽ àpênh xwỳnhjê mã kãm:

—E mẽ ma mra nẽ gô ru nẽ ho poti kuhê mũj piitã ho nýt pa. Anẽ.

Nhũm mẽ kuma nẽ ma mra nẽ ho nýt pa. ⁸ Hãmri nhũm mẽ kãm:

—Nà hãmri. Pãnhã hõ kamã gô hkwỳjanhi nẽ o tẽ nẽ mẽ anhõ patrãw mã agõ kê hkwỳ ho ixkõ nẽ kamã ama. Anẽ.

Hãmri nhũm mẽ mar xà hkõt kãm hkwỳjanhi nẽ hwỳr o tẽ nẽ kãm kugõ. ⁹⁻¹⁰ Nom nhũm gõja arĩ kệp gô kumrêx kêt nẽ. Jejus kot tanhmã ho jakamã nhũm ra hpãnhã kệp wĩhti. Jakamã nhũm mẽõ patrãw wỳr hkwỳ ho tẽ nẽ kãm kugõ nhũm hkaki nẽ kamã ama. Nom Jejus kot gô ho hipêx ã omunh kêt nẽ. Âm htỳx ho wĩhti kumrêx ã hkamnhĩx nẽ mex kumrêx ã hkaki. Hãmri nẽ amnhĩ wỳr mjên nyw xwỳnh mã hpa ho apê nhũm hwỳr tẽ nhũm kãm:

—Kwa na htem wĩhti mex o wa nẽ mẽ kãm kugõ hãmri nhũm mẽ hpenh pa nhũm mẽ rĩ kormã hkõt omnu ho hapu nẽ mẽ kãm kugõ. Tã ka pẽr mẽ axtem nẽ wam mẽ kãm omnu nhõr pa hãmri nẽ kormã mex kumrêxja o hapu nẽ mẽ kãm agõ. Kêt wĩhti ja na mex kumrêx. Âm mex o mex. Anẽ.

Jejus kot gô ho hipêx ã omunh kêt jakamã nhũm ã kãm kapêr anẽ. Âm mẽ àpênh xwỳnh pixjaja na prem ja hã omu. ¹¹ Nhũm Jejus kormã mẽ kãm aa mẽ kot mẽmoj pumunh kêt õ ho anhỳr kêt tã krĩ pẽ Kanã kamã ã mẽ kãm amnhĩ nhĩpêx anhỳr o hkrax. Jao amnhĩ to rax o amnhĩ to rax ã mẽ inhmã amnhĩ to amnhĩrit. Pa mẽ ixpê hkõt ri ixpa xwỳnhjaja ã kot amnhĩ nhĩpêx anhỳr ã omu hãmri nẽ kệp Tĩrtũm kot mẽ pakaxyw âm xwỳnh ã omunh kurê kumrêx.

¹² Tã nhũm Jejus hpãnhã ma krĩ pẽ Kapanaũ hwỳr mõ. Pa mẽ hkõt ri ixpa xwỳnhjaja nẽ katorxà nẽ htõjaja pa mẽ ma ixpiitã hkõt mõ. Hãmri nẽ hwỳr pøj nẽ kamã mẽ hkõt ixpa hã

ixtã apkati grêre nẽ ma hpãnhã krĩ hõ hwỳr ixpa.

Jejus kot Tĩrtũm nhõrkwỳ hwỳr àr ã harẽnh

Matêwre 21.12-13; Makre 11.15-19; Rukre 19.45-46

¹³ Tã nhũm ra arĩgro pẽ Pas ahtêp o mõ. Pasja ã mẽ ixpê Ijaew na pa htem amnepêh Tĩrtũm kot pika pẽ Ejit rũm mẽ inhĩgêjtê kator mã ija-maxpêr kaxyw axpên wỳr akuprõ nẽ hã ixkĩnh. Jakamã nhũm Jejus ma hkwỳjê hkõt krĩ pẽ Jerujarê hwỳr mõ. Pa mẽ ixpê hkõt ri ixpa xwỳnhjaja pa mẽ ma hkõt ixpa. Hãmri nẽ hwỳr pøj ¹⁴ nẽ Tĩrtũm mã amnhĩ jarẽnh xà hã ixkre hwỳr mra nẽ ixkre puhã kahêja wỳr agjê. Nhũm mẽ kamã axtem nẽ mẽmoj to wênê ho kuhê. Mõx o wênê nẽ ôwêhti ho wênê nẽ tutre ho wênê ho kuhê. Mẽ kot haprõr nẽ ho Tĩrtũm mã hkĩnh xà kaxyw mẽ kãm ho wênê. Nẽ kàxpore ho pinhpanh xwỳnhjaja haxwỳja mẽ kuri hkrĩ. ¹⁵ Hãmri pa mẽ Jejus kõt mẽ hwỳr agjê nẽ ja hã mẽ omu hãmri nhũm Jejus pẽ ja omnuj tỳx nẽ. Jakamã nhũm tee ri mẽ omu hãmri nẽ amnhĩm mry hkà ho mẽ htak xà nhĩpêx nẽ ho ixkreja nẽ mẽ piitã mẽ kator pa. Nẽ mõx nẽ ôwêhti nẽ mẽmoj piitã kator pa. Nẽ kàxpore ho pinhĩpanh xwỳnhjaja nhũm mẽ kệp mẽ õ mêtei rẽnh pa nhũm mẽ hikàxpore pykap rôrõk pa nẽ anhgrà nẽ hikwỳ. ¹⁶ Hãmri nhũm Jejus tutre ho wênê xwỳnhjê mã kãm:

—Kwa mẽ anhõ tutre jamỳ nẽ tokyx ma mra. Na htem Inhĩpêxà nhõrkwỳ kamã mẽmoj to wênê hkêt nẽ. Kệp mẽ ujaprõr xà hã ixkre hkêt. E kwa mẽ tokyx ma mra. Anẽ.

Nhũm pre ã mẽ kãm kapêr anẽ nhũm mẽ tee ri kuma hãmri nẽ ma mrar kurê kumrêx. ¹⁷ Pa mẽ hkõt mẽ ixpa ho ixpa xwỳnhjaja ã kot mẽ hipêx anhỳr ã omu hãmri nẽ ra Tĩrtũm kapêr ã kagà htũm kot ã amnhĩ nhĩpêx anhỳrja kukamã hã kagàta mã ija-maxpêr kurê kumrêx. Kagà kot amnepêh Jejus kukamã te ra ã kapêr anhỳr pyræk o harẽnh. Nẽ harẽnh kot:

Na pa hte Tirtūm nhōrkwỹ ho mex rāhā ho ixpa. Nhūm mẽmoj punuj hwỳr axà pa omu nhūm ja inhmā mex kêt nē.

Anhỹr o kot hkukamā harēnh jakamā na pa mē ā Jejus kot mē hipêx anhỹrja ā omu hāmri nē ra hkukamā hā kagāta mā ijamaxpēr kurê kumrêx.

Ijaew krāhtūmjaja kot Jejus kukjêr ā mẽ harēnh

¹⁸ Tā nhūm Ijaew krāhtūmjaja tee ri Jejus kot ixkreja nē mẽ kator ā omu hāmri nē hwỳr mra nē kām:

—Pa. Kwa mon ka ri ā Tirtūm mā amnhĩ jarēnh xà hā ixkreja nē mẽ kator anē? Mēhō na we mẽ ixwỳr amē ka y hā ā mẽ hipêx anēhti? Nà xà Tirtūm na mẽ ixwỳr amē? E mẽ inhmā aa mẽ ixte mẽmoj pumunh kêt õ ho anē. Pa mẽ ja hā apumu hāmri nē Tirtūm kot mẽ ixwỳr amēnh xwỳnh ā apumunh kurê kumrêx. E kwa tokyx mẽ inhmā ho anē. Anē.

¹⁹ Hāmri nhūm mẽ kuma nē mẽ kām amnhĩ jarē. Nom amnhĩ tā kuxi nē mẽ kām awjarē nē mẽ kām:

—Nà kot paj aa mẽ ate mẽmoj pumunh kêt õ ho pixi nē mẽ amā ho anē ka mẽ omu. Tirtūm nhōrkwỹ jaa. Kot kaj mẽ agrà pa ixtā apkati axkrunēpxi nē akupỹm hipêx ka mẽ ja hā ixpumu.

²⁰⁻²² Anhỹr o mẽ kām kapēr. No ām ixkreja jarēnh kêt nē. Na pre ām amnhĩ tā kuxi nē ā mẽ kām kapēr anē. Mē kot hpĩr nhūm htyk ā apkati axkrunēpxi nē akupỹm htĩr ā mẽ kām ā amnhĩ jarēnh anē. Te mẽ kot Tirtūm mā amnhĩ jarēnh xà hā ixkreta grānh nhūm hā apkati axkrunēpxi nē akupỹm kot hipêx parta pyrāk ā hā kuxi nē ā mẽ kām amnhĩ jarēnh anē. Jakamā nhūm mẽhprĩ hā mar mex kêt nē. Ām tee ri kuma nē kām:

—Tk. Kwa ixkre ja na prem hipêx kaxyw nē hā amgrà xohtō rax nē hipêx. Hā amgrà pē 46 nē hipêx par kēnā kot ka kêt atā apkati axkrunēpxi pix nē akupỹm hipêx. Anē.

Mē kot hprĩ hā mar kêt jakamā na prem ā kām kapēr anē. Pa mẽ hkôt mẽ ixpa ho ixpa xwỳnhjaja ā mẽ kām

kapēr anhỹrja ā kuma nē hā inhnohtỹx rāhā ho ri ixpa. Tā nhūm mẽ kot Jejus pĩr nhūm hā apkati axkrunēpxi nē akupỹm htĩr nhō arĩgrota ā pa mẽ kot ā amnhĩ jarēnh anhỹrja mā ijamaxpēr kurê kumrêx. Nē axpēn mā:

—Hêxta waa nē. Xep ām hāmri na pre Pahihti amnhĩ kukamā ā amnhĩ jarēnh anē. Mē kot hpĩr nhūm htyk ā apkati axkrunēpxi nē akupỹm htĩr ā amnhĩ kukamā amnhĩ jarēnh mex nē. Te mẽ kot Tirtūm nhōrkwỹ grānh par nhūm hā apkati axkrunēpxi nē akupỹm hipêx ā amnhĩ jarēnh pyrāk. Ām hāmri na pre amnhĩ kukamā ā amnhĩ jarēnh anē. Anē.

Jejus kot mẽ pajamaxpēr kôt mẽ pahpumunh ā harēnh

²³ Tā nhūm Jejus mẽ hkôt mẽ ixpa ho ixpa xwỳnhjaja arĩ Jerujarē kamā ri ixpa ho ixpa. Nhūm ra arĩgro pē Pasja kato nhūm mẽ piitā hkĩnh kaxyw axpēn wỳr akuprō. Nhūm Jejus mẽ kām aa mẽ kot mẽmoj pumunh kêt kwỳ ho anhỹr o ri mẽ hkôt pa. Nhūm mẽ omu nhūm mẽ hkwỳjaja Tirtūm kot mẽ pakaxyw ām xwỳnh ā hkôt hamaxpēr tā no ām hkôt hamaxpēr tỳx kêt nē. ²⁴ Jakamā nhūm Jejus amnhĩ tā mẽ hamaxpēr ā mẽ omu nē hamaxpēr o:

—Nà mẽ kot ixkôt hamaxpēr kryre xwỳnhjaja koja mẽ hā apkati grēre nē ixto hamakêtkati nē htỹx ri pa. Anē.

²⁵ Jejus kot mẽ pahte pahtỹx ri amnhĩ tomnuj o papa hā mẽ pahpumunh par. Nē pahtỹx ri pajamaxpēr punuj o papa hā mẽ pahpumunh par. Jakamā na pre ā mẽ harēnh anē.

3

Jejus mẽ Nĩkotē wa kot axpēn mā kapēr ā wa harēnh

Juāw 1.12-13; mǎānēn Wam Pêtre 1.23

¹ Tā nhūm Parijew nhō xwỳnhjē õ pē Nĩkotē. Mǎānēn kēp Ijaew krāhtūmjê hō. ² Jakamā na pre Jejus jarēnh ma nē kām omunh prām

nē. Hāmri nē hkwỳ pymaj kamàt kām hwỳr tē nē omu nē kām:

—Pa mẽ ijahkre xwỳnh. E ot pa awỳr tē. Ra mẽ ixte apumunh mex. Tirtùm na pre ate mẽ ijahkre ho apa kaxyw mẽ ixwỳr amē ka mẽ ixwỳr wrỳ. Mēhō koja apyrà nē aa mẽ inhmā mẽ kot mẽmoj pumunh kêt kwỳ ho anhỳr o pa? Nà amrakati kumrēx. Kop apu Tirtùm kot mẽ ixwỳr amēnh kêt ronhỳx ka ã amnhĩ nhĩpēx anhỳr kêt nē. Anē.

³ Hāmri nhũm kuma nē tanhmã kām kapēr to. No ãm amnhĩ tã kuxi nē kām awjarē nē kām:

—Na htem piitã mẽ katorxà nhōxà hkre rũm hapōj. Tã Tirtùm kām mẽ piitã axte mẽ hapōx prām. Jakamã kot kaj mẽ akator o axkrut kêt nē hāmri nē nhỹrmã Tirtùm ri atĩr tũm nē apa ho apa hkêt nē. ãm hkrajē pix na htem kuri htĩr tũm nē pa ho pa. Jakamã kwa jam ajamxpēr tỳx nē ri ho apa. Anē.

⁴ Hāmri nhũm Nĩkotēja kuma nē tee ri ã kot kām kapēr anhỹrja kukamã hamaxpēr nē kām:

—Kwa ra ixaptār kēnã kot pa kêt tanhmã amnhĩ to nē akupỹm ixkatorxà nhōxà hkre hwỳr axà nē axte kurũm ixkato. Anē.

⁵⁻⁷ Hāmri nhũm Jejus kām:

—Nà na hte mẽ hkrarejaja mẽ katorxà nhōxà hkre rũm kagō hkôt hapōj hāmri nē kēp katorxà mẽ hipēēxà wa hkwỳy. Jao wa kot amnhĩ nhĩpēx kôt amnhĩ nhĩpēx o pa. Ja pyrà nē ka mẽ atō amã apē Tirtùm kra hprãm hã kot kaj amnhĩ to awỳ nhũm wa Ixkarōja akarō mã axà hāmri ka ra apē hkraa. Te ra axte akator pyràk o amnhĩ nhĩpēx. Nē te mẽ hkra kot katorxà nē hipēēxà wa kot amnhĩ nhĩpēx kôt amnhĩ nhĩpēx o pata pyrà nē apãm Tirtùm kot amnhĩ nhĩpēx kôt amnhĩ nhĩpēx o ri apa. Nom koja Tirtùm mẽ wa Ixkarōja akarō mã àr kêt nē ka apē hkra hkêt nē. Jao te axte akator kêt pyràk o amnhĩ nhĩpēx. Jakamã na pa amã te ate akator pijakrut o amnhĩ nhĩpēx pyràk o amã ã ja jarēnh anē. Kwa jam ajamxpēr

tỳx rãhã ho ri apa. No ama nē tee ri amnhĩ kukamã ajamxpēr kêt nē.

⁸ —E pa ixprĩ hã amã ja jarē ka inhma. Na hte kôk kām nhỹhỹm àpēr prãm xà hkôt àpēr o pa. Pu mẽ kamã ama no ãm pano ho nhỹhỹnh mōr xà hkôt omunh kêt nē. Nē nhỹhỹm ma mōr xà hkôt omunh kêt nē. Ja pyrà nē na hte Tirtùm mẽ wa Ixkarōja mẽ hkaxwỳnh mã agjē nē mẽ ho Tirtùm kra nom nhũm mẽhprĩ hã kot tanhmã mẽ ho hã amnhĩ tã omunh kêt nē. Anē.

⁹ Hāmri nhũm Nĩkotē ã Jejus kot kām kapēr anhỳr ã kuma nē tee ri hamaxpēr nē kām:

—Kwa na pa ixprĩ hã amar kêt nē. Anē.

¹⁰ Hāmri nhũm kām:

—Kwa mon ka hte Tirtùm kapēr tũm o Ijaew jahkre ho apa tã aprĩ hã ixkapēr mar kêt nē? ¹¹ Ixte mẽmoj pumunh xà hkôt ixte mẽ amã harēnh o ixpa htã ka mẽ apē Ijaew krãhtũmjaja mẽ amã ixkapēr mar prãm kêt nē. ã mẽ ate anhỳr kumrēx. Kwa jam ajamxpēr tỳx nē. ¹² Na pa ra Tirtùm kot jar tanhmã amnhĩ nhĩpēx to hã harēnh o ixpa htã ka mẽ ãm ama nē ixkôt ajamxpēr kêt nē. Jakamã xà kot pa hpãnhã mẽ amã kaxkwa kamã tanhmã kot amnhĩ nhĩpēx to hã harē ka mẽ ama nē mar tỳx nē? Nà kot ka mẽ ama nē ãm ama nē hkôt ajamxpēr kêt nē. ¹³ Mēhō na we ra ma kaxkwa hwỳr api nē kamã mẽmoj mex pumu nē man akupỹn mẽ awỳr wrỳ nē mẽ amã tanhmã harēnh to? Nà amrakati kumrēx. ãm paxipix ixpē Tirtùm kot mẽ akaxyw ixãm xwỳnh na pa pre amnē kurũm mẽ awỳr wrỳ hāmri nē ixprĩ hã mẽ amã tanhmã harēnh to ho ri ixpa.

¹⁴ —Amnepēm finat Mojesja kormã kapôt ã mẽ o pa ri na pre mẽ kām kax o kagã karōja nhĩpēx nē kỳxpē mẽ kām kunhō. Kagã kot mẽ hkamnhar xwỳnhjaja kot hwỳr rĩt nē omunh nē akupỹm mex kaxyw mẽ kām kunhō. Tã ixpē Tirtùm kot mẽ akaxyw ixãm xwỳnh kot paj nhỹrmã kagã karōta pyrà nē kỳx pē pĩ kahpa hã ajēt. ¹⁵ Ka

mē te mē kot kagā karō pumunh nē akupŷm mexta pyrā nē amnhī kaxyw inhmā ajamaxpēr nē ixkôt amnhī xunhwŷ hāmri nē nhŷrmā Tirtūm mē wa ixri atīr tūm nē amex rāhā nē apa ho apa.

¹⁶ –Tirtūm kām pika piitā hkôt mē apiitā mē ajapē htŷx. Nē mē ajapē xāj na pre ixpē Kra hā ixpyxi hā mē awŷr inhmē. Ka mē atō amnhī kaxyw ixkôt ajamaxpēr nē ixkôt amnhī xām. Hāmri nē nhŷrmā atyk tā nhūm Tirtūm akupŷm ato atīr ka wa ixkuri atīr tūm nē amex rāhā nē apa ho apa. Hāmri nhūm Tirtūm aa amnhī nē nhŷhŷm amēnh kêt kumrēx. ¹⁷ No mē ate amnhī tomnuj mŷrapē tanhmā ixte mē anhīpēx to kaxyw na pre mē awŷr inhmēnh kêt nē. Ām ixkukwak ri mē atīr tūm nē mē amex rāhā apa ho apa hprām xāj na pre mē awŷr inhmē pa mē awŷr wrŷ. ¹⁸ Jakamā kot ka mē atō amnhī kaxyw ixpē Tirtūm Kra hā ixkôt ajamaxpēr nē ixkôt amnhī xām nhūm Tirtūm ixtā apumu nē ate amnhī tomnuj mŷrapē tanhmā anhīpēx to hkêt nē. No kêt mē kot ixkôt amnhī xunhwŷr kêt xwŷnhjaja na Tirtūm ma mē kot amnhī xā htŷx kamā hamak tūm xā hwŷr mē pa mā xwŷnhjē hā mē harē. Mē kot ixkôt amnhī xunhwŷr kêt mŷrapē. Anē.

Mē kot amnhī tomnuj o hpimxur prām kaprŷ ā mē harēnh

¹⁹ Nhūm Jejus arī Nīkotē mā kapēr nē kām:

–Na pre Tirtūm amnē pika hwŷr mē awŷr inhmē. Mē ate amnhī tomnuj xwŷnh ā amnhī pumunh kaxyw mē awŷr inhmē. Tā nhūm mē ohtō nē amnhī tomnuj gryk ā kām kapēr mar prām kêt nē. Jao ixkaga nē kām ixkapēr mar prām kêt nē. ²⁰ Ra ixprī hā ixte mē kot tanhmā amnhī tomnuj to ho pa hā mē omunh mex jakamā mē kām ixkapēr mar prām kêt. Nē ixte mē kot tanhmā amnhī tomnuj to ho pa hā mē harēnh pymaj ixkôt kām pa hprām hkêt nē. ²¹ No kêt mē kot ixkôt amnhī xunhwŷr xwŷnhjaja na mē kot amnhī nhīpēx o pa hā hpijaàm

kêt. Na htem àmnhīx ixkôt amnhī nhīpēx o pa. Jakamā koja mē piitā ja hā mē omu nē Tirtūm kot tanhmā mē hkrā hto nhūm mē ra kām hkôt pix mā amnhī nhīpēx ho pa hprām ā mē omunh kurē kumrēx. Anē.

Nhūm pre ā Jejus Nīkotēja mā kapēr anē.

Juāw Paxis kot Jejus jarēnh o pa hā harēnh

Juāw 1.19-28

²² Tā pa mē ixpē Jejus kôt ri ixpa ho ixpa xwŷnhjaja Jejus kôt Jerujarē rūm ijapōj nē pika pē Jutej kwŷ kamā ixpa. Jejus nhŷ hā Tirtūm mā mē hkrā kumrār o ri mē hkôt ixpa. ²³ Nhūm finat Juāw Paxis haxwŷja mē ixpyrā nē mē hkrā kumrār o pa. Krī pē Sarī htā krī pē Enō mŷri pyhti rax jakamā nhūm pre htem hwŷr mra nhūm kamā mē hkrā kumrā. ²⁴ Kormā mē kot haxār kêt ri nhūm kamā mē hkrā kumrār o pa.

²⁵ Rôm nhūm Ijaew hōja Juāw Paxis kôt mē pa ho mē pa xwŷnhjē hwŷr tē nē Juāw Paxis kot mē hkrā kumrār ā tanhmā mē hkukjēr to nhūm mē kuma nē tee ri hā axpēn kukjēr o kuhē. ²⁶ Hāmri nē akupŷm Juāw Paxis wŷr tē nē kām:

–Kwa mē ijahkre xwŷnh. Pyhti pē Jotāw nhīkjē hā ate mēhō pumunh nē tanhmā mē inhmā harēnh to xwŷnhhta kôt mē pa ho mē pa xwŷnhjaja na xep htem apyrā nē mē hkrā kumrār o pa nhūm xep mē ra ohtō nē mē pahkaga nē mē hkôt pa. Kwa xā ja amā mex nā? Anē.

²⁷ Hāmri nhūm mē kuma nē mē kām:

–Tŷ ja mex kēnā. Tirtūm kām hprām xā hkôt na htem mē hwŷr mra nhūm mē ixpānhā mē hkrā kumrā. Nā ja mex. ²⁸ Ixpē Tirtūm kot mē pakaxyw ām xwŷnh kêt. Na pa pre ra mē amā ja hā amnhī jarē ka prem inhma. Ām hkukamā na pre Tirtūm amnē inhmē pa mō nē ā jar ri ixpa anē.

²⁹ –Te ixte mē umre kot amnhī nhīpēx pyrāk. Na htem axpēn mā mē rer kaxyw nhūm mē umreja myta wŷr tē nē hpa hā kupy nē ma ni hwŷr

o tē nē axpēn mā wa kure. Hāmri nhūm hpānhā mēhōja axpēn tā wa hakre. Nhūm umreja wa kuri hkīnh nē mar o xa. Tā te ixte mē umre kot amnhī nhīpēx pyrāk jakamā koja mē ma Tīrtūm kot mē pakaxyw ām xwýnhhta wýr mra nē kapēr ma pa mē harēnh ma nē ixkīnh nē. ³⁰ Na htem mē umre hā hkīnh kēt nē. Mjēn nyw xwýnhja ā na htem hkīnh. Tā ja pyrā nē koja mē axte ixte mē kām Jejus jarēnh mar kaxyw ixwýr mrrar kēt nē. Ām hwýr koja mē hpānhā mra nē tām mar o kuhē. Ja mex kumrēx. ³¹ Jejus kēp kaxkwa rūm amnē mē pahwýr wrýk xwýnh jakamā kot amnhī to rax o kot mē pahpiitā mē pajakrenh par. Mē papajaja mē pahpē pika nhō xwýnh jakamā Jejus kīnhā mē pahte mēmoj piitā omunh tohtuj anhýr. Nē pika nhō xwýnhjē jamaxpēr pix o pajamaxpēr o ri papa.

³² –Na hte Jejus mē kām kaxkwa kamā kot mēmoj pumunh xwýnh kwýjē jarēnh o pa. Nē kamā kot mēmoj mar xwýnh kwý jarēnh tā nhūm mē ohtō nē kuma nē ām kuma. ³³ No mē kot mar nē amnhī kaxyw hkôt hamaxpēr xwýnhjaja na htem kuma nē axpēn mā harēnh o: “Nà ām hāmri na ā Tīrtūm kapēr jarēnh anē. Nà Tīrtūm kapēr mex kumrēx.” Anhýr o axpēn mā harē.

³⁴ –Tīrtūm na pre mē pahwýr Jejus mē nhūm amnē mē pahwýr wrý nē Tīrtūm Karō nhý hā mē pamā kapēr jarēnh o ri mē pahkôt pa. ³⁵ Tīrtūm kām Krata japē htýx kumrēx jakamā na pre ĩhkram mēmoj piitā haxàr pa nhūm urāk nē hihtýx o hihtýx nē mēmoj piitā ho amnhīptàr o pa. ³⁶ Jakamā mē kot amnhī kaxyw hkôt hamaxpēr nē hkôt amnhī xunhwýr xwýnhjaja koja mē nhýrmā wa kuri htīr tūm nē mex rāhā nē pa ho pa. No mē kot hkaga xwýnhjaja koja mē ā amnhī nhīpēx anhýr kēt nē. Koja Tīrtūm mē kot amnhī xà htýx kamā hamak tūm xàta wýr mē rēnh pa. Anē.

4

¹ Tā nhūm Parijew nhō xwýnhjaja

Jejus jarēnh ma. Nē hkôt mē pa xwýnhjaja ohtō rax o Juāw Paxis kôt mē pa xwýnhjē jakrenh ā mē harēnh ma. Nē Jejus kot mē hkrā kumrār rax o Juāw Paxis jakrenh ā harēnh ma. ² Nom Jejus na pre mē hkrā kumrār kēt nē. Ām mē ixte hkôt ri mē ixpa ho mē ixpa xwýnhjaja na pa prem kām mē hkrā kumrār o ri ixpa. ³ Jakamā nhūm Jejus amnhī tā Parijew nhō xwýnhjē jarēnh ma hāmri nē mē kēp kato nē hpānhā ma akupým Garirej wýr mō pa mē ma hkôt ixpa.

Mēhō ni kot amnhī nhīpēx nyw o amnhī nhīpēx ā harēnh

Juāw 7.37-39; mǎānēn Apokarip 22.1, 22.17

⁴ Tā pa mē mō nē kormā pyka pē Samar mā axà nē hkôt ixpa. ⁵ Hāmri nē krī pē Sika hwýr ixpōx o mō. Amnepēm finat Jako kot hkra Juje mā pyka nhōr xwýnh tā krīja xa pa mē ra hwýr ixpōx o mō. ⁶ Nē amnepēm Jako kot gōm kakwýnhhta wýr pōj. Nhūm ra kaxkwa nhīpōk ri myt nhýr mē nhūm Jejus ra mrrar ryy kurē hkēngrà nē. Hāmri nē gōm kakwýnh mý ri tēm nē hkōkôt o nhý. ⁷⁻⁸ Hāmri pa mē kure nē mē ixàpkur xà japrōr kaxyw ma krīm ijapēx.

Rôm nhūm Samar nhō xwýnh nija amnhīm gō runh mā tē nhūm Jejus omu nē kām:

–Kwa inhmā anhō gōta kwý pa ho ixkō. Anē.

⁹ Nhūm amnhī jaēr pē amnhī tā kuma. Ijaew na pre htem Samar nhō xwýnhjē kutā apkur rý mē hkôt ri pa rý mē ho mjēn kēt nē. Rý mē kutā hkōm kēt nē. Tā nhūm Jejus ā gō hā nija wýr anē nhūm tee ri amnhī tā kuma nē kām:

–Xē pēr apē Ijaew tā axtem nē ri gō hā ixwý. Xà ate ixpē Samar nhō xwýnh ā ixpumunh kēt? Hān ka ri hā ixwý. Anē.

¹⁰ Hāmri nhūm kuma nē kām amnhī jarē. No ām amnhī tā kuxi nē kām kapēr nē kām:

–Nà aprī hā ate ixpumunh ro nhýx ka kam gō hā ixwý pa amā hkwy. Inhō gō na axte mā. Tīrtūm kām

amarĩ mẽ amã õr prãm. Na htem ho ixkõ hãmri nẽ mex nẽ htĩr tũm nẽ pa ho pa. Anẽ.

¹¹ Hãmri nhũm tee ri kot ã õ gô jarẽnh anhỹrja ã kuma nẽ htỹx ho gôm kakwỹnh kamã gô hã hkamnhĩx nẽ tee ri hkukamã hamaxpẽr nẽ kãm:

—Xê tanhmã kot ka kêt amnhĩ to nẽ inhmã gôta kwỹ janhi? Mo kaxyw anhõ gô janhir xà? Gôm kakwỹnhta upỹm rax kênã kot ka kêt tanhmã amnhĩ to nẽ hkwy janhi. Nhỹhỹnh kot ka anhõ gô jarẽnh xwỹnhta kwỹ janhi pa ho ixkõ hãmri nẽ ixtĩr tũm nẽ ixpa ho ixpa? ¹² Mẽ inhõ gôm kakwỹnhja amnepê mã mẽ panhĩgêt finat Jako nhõ gôm kakwỹnh na pre. Jako hkwyjaja na prem hkakwỹ nhũm kamã gô kato nhũm pre htem hanhi nẽ ho hkõm o pa. Nẽ hkrajaja nẽ hkrit piitã ho hkõm o pa. Jakamã na pre mẽ ixpê hkanrẽhã htãmnhwỹjê mã hkaga. Tã xep axtem anhõ gô. Mẽ kot ho hkõm nẽ htĩr tũm kaxyw na xep. Jakamã xê xà ate amnhĩ to rax o mẽ panhĩgêt Jako jakrenh mẽ? Anẽ.

¹³ Hãmri nhũm Jejus kãm:

—Nà mẽ anhõ gôta na htem ho ixkõ nẽ arĩ kãm kôr o pa. ¹⁴ No ixte amã gô jarẽnh xwỹnhta kot ka hkwy ho ixkõ hãmri nẽ axte amã kôr kêt kumrẽx nẽ apa. Nhũm te akaxwỹnh kãm hinore hprõt pyrãk o ka amnhĩ nhĩpêx. Hãmri nẽ te hinore kamã gôja aa grã hkêt pyrã nẽ aa ajapêx kêt kumrẽx. Nhỹrmã atyk tã akupỹm atĩr nẽ atĩr tũm nẽ amex rãhã apa ho apa. Anẽ.

¹⁵ Nhũm nija kuma hãmri nẽ kãm:

—Xôwehe? Xê tô tokyx inhmã anhõ gôta kwỹ. Pa ho ixkõ nẽ axte inhmã kôr kêt nẽ ixpa. Nẽ axte amnẽ amnhĩm gô janhir mã inhmarr kêt nẽ. Xê tokyx inhmã hkwy mẽ? Anẽ.

Tỹx gô kumrẽx ã hkamnhĩx nẽ ã hã àhwỹr anẽ. ¹⁶ Hãmri nhũm kãm:

—Tô ma akupỹm krĩm tẽ nẽ amjên japrõ nẽ man akupỹn ixwỹr wa tẽ. Anẽ.

¹⁷ Hãmri nhũm tee ri kuma nẽ kãm:

—Ma mo inhmjên? Inhmjên kêt na pa hte ri ixpa. Anẽ.

Hãmri nhũm kãm:

—Tỹ. Nà ãm hãmri na ka ã amnhĩ jarẽnh anẽ. ¹⁸ Na ka pre ra amjên kêp 5. Nẽ my mẽ ri war apa xwỹnh ata te kêp amjên pyrãk nom kêp amjên kumrẽx kêt. Anẽ.

¹⁹ Hãmri nhũm amnhĩ jaer pẽ kot ã kãm kapêr anhỹrja ma hãmri nẽ kãm:

—Xê pẽr aprĩ hã ate ixpumunh par pyrãk. Mãn apê Tĩrtũm nhỹ hã kapêr jarẽnh o mẽ pa xwỹnhjê hõ mãn ka mẽ? ²⁰ Xê inhmã mẽmoj jarẽ. Nhỹhỹm kot paj wem axpên kôt mra nẽ Tĩrtũm mã mex o mex ã harẽ? Amnepê mã mẽ panhĩgêtjaja na prem hixêt mũj nhĩmõk ã apĩ nẽ hã kãm amnhĩ jarẽ nẽ kãm mex o mex ã harẽ. No mẽ apê Ijaew na ka htem krĩ pẽ Jerujarẽ pix kãm mẽ ixte axpên kôt mrrar nẽ ã amnhĩ nhĩpêx anhỹr ã mẽ inhmã karõ. Xà hixêt nhĩmõk ã mẽ ixte kãm amnhĩ jarẽnhja xà apê omnuj mẽ? Ma xà apê omnuj kêt? Anẽ.

²¹ Hãmri nhũm Jejus kãm:

—Nà kot kaj mẽ nhỹrmã ãm Jerujarẽ pix kãm rỹ hixêt mũj nhĩmõk pix ã axpên wỹr akuprõ nẽ Tĩrtũm mã amnhĩ jarẽnh kêt nẽ. ²² Mẽ apê Samar nhõ xwỹnhjaja mẽ ate Tĩrtũm mã mex o mex ã harẽnh o apa htã aprĩ hã kot amnhĩ nhĩpêx ã omunh kêt. Nẽ tanhmã hamaxpẽr to ho pa hã omunh kêt. No mẽ ixpê Ijaew na pa mẽ arom kot tanhmã amnhĩ nhĩpêx to nẽ tanhmã hamaxpẽr to hã omunh mex. Mẽ inhĩõ kukwak ri koja Tĩrtũm mẽ kot hkôt amnhĩ xunhwỹr xwỹnh piitã nẽ mẽ kot amnhĩ tomnuj rên pa. ²³ Tã koja mẽ piitã Mẽpahpãm Tĩrtũm mã mex o mex ã harẽnh kaxyw nhỹhỹm pa hkêt nẽ. Koja mẽ nhỹri pa xà kamã mẽ õpinh xà kaxwỹnh kãm ã kãm amnhĩ jarẽnh anhỹr o pa. Ja na Tĩrtũm kãm hprãm. No nhỹhỹm mrrar nẽ nhỹri kuhê xà pix kamã kãm amnhĩ jarẽnhja nhũm kãm hprãm kêt nẽ.

²⁴ —Nẽ Tĩrtũmja mẽ pahpyrà nẽ ã hkêt jakamã na te kaxkwa nẽ pika piitã hkôt pa ho pa. Jakamã na htem nhỹri pa nẽ õpinh xà kaxwỹnh kãm amnhĩ kaxyw kãm hamaxpẽr nẽ kãm mex o mex ã harẽ nhũm ra amnhĩ tã

mē kuma. Ā mē kot amnhī nhīpêx anhÿrja na kām hprām. Anē.

²⁵ Nhūm pre ā Jejus nija mā kapêr anē nhūm kuma nē kām:

—Ma koja xep nhÿrmā Tirtūm kot mē pakaxyw ām mā xwÿnh pê Krisja mē pahwÿr wrÿ hāmri nē hprī hā mē pamā mēmoj piitā ho amnhīrīt pu mē kuma. Anē.

²⁶ Hāmri nhūm kām:

—Kwa nhūm paa. Ixte amā ixkapêr xwÿnhja ixpê Kris na pa. Jakamā na pa ixprī hā amā ā ixkapêr anē. Anē.

²⁷ Nhūm pre ā kām amnhī jarēnh anhÿrja rôm pa mē ixte hkôt ri mē ixpa ho ixpa xwÿnhjaja ra ixujaprôr pa nē akupÿn hwÿr ixpôx o mra. Hāmri nē amnhī jaēr pé kot Samar nhō xwÿnh nita mā kapêr ā omu nē tee ri hkukamā ijamaxpêr nom tanhmā hā hkukjêr to hkêt nē. Nija kêp Samar nhō xwÿnh tā nhūm àmnhīx kām kapêr o nhÿ. Pa mē omu nē ām omu nē tanhmā hā kām nē hkêt nē. ²⁸ Hāmri nhūm nita gôm kakwÿnh mÿr ri ô poti re nē ma akupÿm krīm tē nē hkwyjê mā awjarê. ²⁹ Nē mē kām:

—Xê mē tokyx ma ixkôt gôm kakwÿnh wÿr mra nē mÿ ri mēhō my mÿj pumu. Tirtūm kot mē pahwÿr mēnh mā xwÿnhhta na. Aa kot nhÿri ixpumunh kêt tā kot hprī hā ixpumunh par. Ixte tanhmā amnhī nhīpêx to hā ixpumunh par. Xê mē ma ixkôt mra nē ixpyrà nē kapêr ā ama. Anē.

³⁰ Hāmri nhūm mē kuma nē ma hkôt Jejus wÿr mra kurê kumrêx.

³¹ Rôm pa mē ixte Jejus kôt ri ixpa ho ixpa xwÿnhjaja tee ri mē ixàpkur xà ho Jejus ma nē kām:

—E ota mē panhōta. Kwa mēmoj py nē aku măn.

³² Anhÿr tā nhūm mē inhma nē tanhmā mē inhmā amnhī jarēnh to. Nom amnhī tā kuxi nē amnhī jarē nē mē inhmā:

—Nà kormā. Inhōja axtem na. Mē ate inhōja pumunh kêt. Anē.

³³ Hāmri pa mē kuma nē tee ri hā axpên kukja nē axpên mā:

—Kwa măn ra mēhō mē paxwakre kamā kām mēmoj to tē nhūm kukrê nà? Anē.

³⁴ Hāmri nhūm mē inhma nē mē inhmā:

—Nà mēhō kot kêt ri inhmā mēmoj to mra pa kuku? Kot paj kot mē awÿr inhmēnh xwÿnhhta mā tanhmā amnhī nhīpêx to hāmri nē te ra ixàpkur mex nē hā ixihtÿx mex pyrāk o amnhī nhīpêx. Tā kot paj ā kām amnhī nhīpêx anhÿr o ri ixpa rāhā ho ijapêx pa. Jao te ixàpkur rax pyrāk.

³⁵ Anhÿr o mē inhmā amnhī jarê. Hāmri nē ra Samar nhō xwÿnhjaja mē ixwÿr mra ā mē omu nē mē inhmā tanhmā mē harēnh to nom mē hā kuxi nē mē harē nē mē harēnh o:

—Kot kaj mē axte mē atā mytwrÿ kêp 4 hāmri nhūm ra mē apur kām mē anhōja hamÿnh mā tām nē. Nom kormā. E ka mē pahwÿr mē mra xwÿnh nēj pumu. Ra mē kot amnhī kaxyw ixkôt hamaxpêr nē ixkôt amnhī xunhwÿr mā tām jakamā te mē apur kām ra mē anhō jamÿnh mā tām pyrāk. Jakamā ka mē atō ma mē hwÿr mō nē mē kot amnhī kaxyw ixkôt hamaxpêr nē ixkôt amnhī xunhwÿr kaxyw mē kām ijarê. Hāmri nē te ate ixpur kām inhmā inhō jamÿnh xwÿnh pyrāk o amnhī nhīpêx.

³⁶ —Jakamā koja mēhō kumrêx mē hwÿr tē nē mē kām Tirtūm kapêr jarê hāmri nē te kêp ô pahi mā hpur kām ahkre ho pa pyrāk. Nhūm mē kot mar xwÿnhjaja kuma nom kormā hprī hā mar tÿx kêt nē. Tā kot kaj mē atō wamta kôt mē hwÿr tē nē mē kot ixkôt amnhī xunhwÿr kaxyw aprī hā mē kām ijarēnh o mē hkôt apa hāmri nē te apé mē anhō pahi mā hpur kām axujamÿnh xwÿnh pyrāk. Hāmri nhūm mē hkwyjaja mē ama nē ixkôt amnhī xunhwÿ nē ixkôt ri amnhī nhīpêx o pa. Hā koja nhÿrmā mē apyrà nē Tirtūm mē wa ixri mex rāhā nē htirtūm nē pa ho pa. Ka mē amnhī tā mē omu nē akīnh nē apa. Te mē kot mē hpur kām ahkre xwÿnhjaja nē mē kot hamÿnh xwÿnhjaja mēō rūnh pumunh nē hkīnhhta pyrāk.

37 —Na htem tōhã ã mẽ pur kãm mẽ àpênh xwỳnhjê jarênh anê nê mẽ harênh o: “Axtem mẽ ahkre xwỳnhjaja nê axtem mẽ kot hamỳnh xwỳnhjaja.” Anê. Tã te mẽ ate mẽ ujarênh ja pyràk. 38 Na pa pre ra ma mẽ hwỳr mẽ arê. Mẽ ate aprĩ hã mẽ kãm ijarênh nhũm mẽ kot mẽ amar nê amnhĩ kaxyw ixkôt hamaxpêr nê ixkôt amnhĩ xunhwỳr kaxyw. Nom mẽ kajaja na ka prem akumrêx mẽ hwỳr amrar nê mẽ kãm ijarênh kêt nê. Tĩrtũm kapêr jarênh o mẽ pa xwỳnhjaja na prem kumrêx mẽ hwỳr mra nê ixkukamã mẽ kãm ijarênh o ri mẽ hkôt pa. Te mẽ kot hpur kãm ahkre ho pata pyràk. Tã kot kaj mẽ hpãnhã mẽ kot amnhĩ kaxyw ixkôt amnhĩ xunhwỳr kaxyw aprĩ hã mẽ kãm ijarênh o apa. Jakamã te mẽ ate mẽ hpur kãm mẽõ jamỳnh xwỳnh kot amnhĩ nhĩpêxta pyràk. Anê.

Mẽ hkwỳ kot amnhĩ nhĩpêx nyw o amnhĩ nhĩpêx ã mẽ harênh

Sikũn Korĩt 5.17; Wam Juāw 4.14

39 Rôm nhũm Samar nhõ xwỳnh kwỳjaja nija kot mẽ kãm amnhĩ jarênh ma hãmri nê uràk nê amnhĩ kaxyw Jejus kôt hamaxpêr. Na pre ra amnhĩ tã tanhmã mẽ kãm Jejus jarênh to nê mẽ kãm harênh o:

—Ma aa kot nhỹri ixpumunh kêt tã ra kot hprĩ hã ixpumunh par. Ixte tanhmã amnhĩ nhĩpêx to hã ixpumunh par.

Anhỹr jakamã nhũm mẽ kuma nê uràk nê amnhĩ kaxyw hkôt hamaxpêr kurê kumrêx.

40 Hãmri nê man mẽ ixwỳr mra nê Jejus pumu nê amnhĩ wỳr kuwỳ nê kãm:

—Pa. E kwa mẽ tokyx anojarêt kêt nê. Mẽ ma mẽ ixkôt mẽ inhõ krĩ hwỳr mō nê mẽ ixkôt ri apa grire nê arĩ ma mō. Anê.

Hãmri nhũm mẽ kuma nê mẽ kãm:

—Tõe. Nà kot paj mẽ anê. Anê.

Hãmri pa mẽ ma mẽ hkôt mō nê mẽ õ krĩ kamã mẽ hkôt ri ixpa hã apkati axkrut. 41 Nhũm Jejus mẽ kãm Tĩrtũm kapêr jarênh o ri mẽ hkôt pa nhũm mẽ axte ohtô nê kuma nê nita pyrà nê

hkôt amnhĩ xunhwỳ. 42 Hãmri nê nita wỳr mra nê kãm:

—E nà ãm hãmri. Akumrêx na ka mẽ inhmã Jejus o amnhĩrĩt. Pa mẽ akôt ma hwỳr mra nê mẽ pam omu nê kapêr ã kuma. Jao apyrà nê amnhĩ kaxyw hkôt ijamaxpêr nê hkôt amnhĩ xunhwỳ. Pêr ãm hãmri kêp pyka piitã hkôt mẽ pahte amnhĩ tomnuj pãnhã amnhĩrer mã xwỳnhnta na. Anê.

Garirej nhõ xwỳnhjaja kot Jejus pumunh ã mẽ harênh

Matêwre 13.57

43 Tã pa mẽ Jejus kôt Samar rũm ixkato nê ma pika pê Garirej wỳr mō. Kamã Jejus nhõ krĩ pê Najare htã pa mẽ hwỳr inhmōr kêt nê. 44 Na pre ra Jejus mẽ inhmã tanhmã õ krĩ nhõ xwỳnhjê jarênh to nê mẽ harênh o:

—Tĩrtũm nhỹ hã kapêr jarênh o mẽ pa xwỳnhjaja na htem amnhĩ nhõ krĩ kamã mẽ kãm Tĩrtũm kapêr jarênh o pa nhũm mẽ kuma nê ãm kuma. Jakamã kot paj Najare hwỳr inhmōr kêt nê. Mẽ kãm ixkapêr mar prãmre hã.

45 Anhỹr jakamã na pa prem hwỳr inhmōr kêt nê. Pãnhã nhãm krĩ hõ hwỳr mō nê hwỳr pøj hãmri nhũm mẽ amnhĩ wỳr Jejus pumu nê hkĩnh nê. Na prem ra krĩ pê Jerujarê kamã arĩgro pê Pas ã mẽ hkĩnh kãm tanhmã kot amnhĩ nhĩpêx to ho pa hã omu. Jakamã amnhĩ wỳr omu nê hkĩnh nê.

Jejus kot mēhõ hkra ho mex ã harênh

46 Tã pa mẽ kormã Garirej kamã ixpa nê akupỹm krĩ pê Kanã hwỳr mō. Kamã na pre Jejus mẽ kãm gō ho wĩhti nhĩpêx. Jakamã pa mẽ akupỹm mẽ hwỳr mō. Nhũm mẽõ pahĩ nhõ kōwenatōjê hõ hkra myja kêp à htỳx nê nō. Nom Kanã kamã hkêt axtem krĩ hõ pê Kapanaũ kamã. 47 Jakamã nhũm hipêxàja tee ri hkra pumu hãmri nê ra Jejus kot Jutej rũm Kanã hwỳr hpōx ã harênh ma nê hkra kaxyw kãm hamaxpêr nê ma hwỳr mōr kurê kumrêx. Hãmri nê nhỹri omu nê hwỳr tẽ nê kãm kapêr kãm hihtỳx nê kãm:

—Pa. E ot pa awȳr tē. Na ra ixkra ixpē htyk kaxyw. Kwa ixkamā axukapri nē ma ixkôt mō nē akupȳm inhmā ho mex. Anē.

⁴⁸ Hāmri nhūm kuma nē kām:

—Kwa pēr ām ixte mē amā aa mē ate mēmoj pumunh kêt kw̄y ho anh̄ȳr ā ixpumunh kôt pix mā na ka htem amnh̄i kaxyw ixkôt ajamaxpēr. Nom amarī amnh̄i kaxyw ixkôt ajamaxpēr kêt nē. Anē.

⁴⁹ Hāmri nhūm tee ri kuma nē kām:

—Kwa tokyx. Kot kaj tokyx ixkôt amōr kêt koja ixpē ty. Anē.

⁵⁰ Hāmri nhūm kām:

—Nā koja apē htyk kêt nē. Ra ixte akupȳm amā ho mex kēnā. Māmri ma akupȳm mō nē tokyx omu. Na ra akupȳm amā mex. Anē.

Hāmri nhūm kuma nē kaxyw hkôt hamaxpēr kurē kumrēx nē ma akupȳm hw̄ȳr mō. Nē mōr o apkati. ⁵¹ Nē kormā ō krī hw̄ȳr hpōx o mōr ri nhūm ra kām mē apēnh xw̄ȳnhjaja kutā mra nē nh̄yri pry hā hkaxpa nē kām:

—Pa. Kwa na ra akra hkà hakry nē akupȳm amā mex. Anē.

⁵² Hāmri nhūm mē kuma nē hkīnh t̄yx nē. Nē mē kām:

—Kwa xō wehe? Mēmo ore hā na pre we ra hkà hakry? Anē.

Nhūm mē kām:

—Nā jāā na pre kaxkwa nh̄ipōk ri myt nh̄y nhūm hkà hakry nē akupȳm amā mex kurē kumrēx. Anē.

⁵³ Hāmri nhūm mē kuma nē mē kām:

—Hēxta waa nē. Kwa pēr ām hāmri Jejus kot inhmā akupȳm mex ā harēnh xā hā ore kamā na pre akupȳm inhmā mex. Nā ām hāmri. Anē.

Hāmri nē amnh̄i kaxyw Jejus kôt hamaxpēr kurē kumrēx. Nhūm ōrkw̄y kamā ri mē pa xw̄ȳnhjaja urāk nē amnh̄i kaxyw hkôt hamaxpēr.

⁵⁴ Nhūm Jejus ā kām hkra ho mex anē. Na pre ra pika pē Garirej kamā mē kot mēmoj pumunh kêt ō ho anh̄ȳr o tipxi nē mē kām gō pix o wīhti nh̄ipēx. Tā ra pyka pē Jutej rūm akupȳm mē hw̄ȳr mō nē ā akupȳm mē hkrata o mex anē.

5

Jejus kot himô mȳ ri akupȳm mēhō ho mex ā harēnh

Juāw 7.23, 10.30-33

¹ Tā mē ixpē Ijaew mē ixte Tirtūm ā ixkīnh kaxyw Jerujarē hw̄ȳr akuprō nhūm Jejus haxw̄ȳja ma hw̄ȳr mō. Pa mē hkôt mē ixpa ho mē ixpa xw̄ȳnhjaja ma hkôt mō. ² Jerujarē kamā na himōja hikw̄ȳ. Nh̄ȳh̄ȳnh mē kot krī hw̄ȳr ōwēhti ho gjēx xā htā hikw̄ȳ. Himōja nh̄ixi pē na Petes. Nē pu hā mē à xw̄ȳnhjē nh̄ikw̄ȳ xā hā ixkre kēp 5. ³ Piitā kamā na pre hte tanhmā mē à kute xw̄ȳnhjaja hikw̄ȳ. Mē nohkre xw̄ȳnhjaja nē mē hyk o mē pa xw̄ȳnhjaja nē mē ī kamā mē htyk xw̄ȳnhjaja. Ām ahp̄ȳnhā tanhmā mē à kute xw̄ȳnhjaja ixkre hkwȳja kamā akupȳm mex prām xāj hikw̄ȳ. ⁴ Na pre hte Tirtūm kapēr o mē wr̄yk xw̄ȳnhja tōhā himô hw̄ȳr wr̄ȳ nē gō xok. Hāmri nhūm mē à xw̄ȳnhjē hō kot amnh̄i to wa nē kumrēx hw̄ȳr wr̄yk nē kamā mrōr xw̄ȳnhja akupȳm mex. Kw̄ȳjē rom akupȳm mex kurē kumrēx. Jakamā nhūm pre hte mē à xw̄ȳnhjaja akupȳm mex prām xāj gō xok jamār o hikw̄ȳ. ⁵ Jakamā nhūm mēhō myja ixkre hō kamā hikw̄ȳ. Te omnuj nē arī hikw̄ȳ hā amgrā xohtō rax nē. Ra hā amgrā kēp 38. ⁶ Jakamā nhūm Jejus mē hw̄ȳr tē nē omu. Nē hprī hā omu nē hamaxpēr o:

—Kwa mūj na hte omnuj nē ri pa hkēt ā amgrā xohtō rax nē. E pa akupȳm ho mex.

Anh̄ȳr o hamaxpēr hāmri nē kām:

—Pa. E kwa inhmā amnh̄i jarē. Xā amā akupȳm amex prām? Anē.

⁷ Hāmri nhūm kuma nē kām:

—Ku nhūm. Inhmā tokyx akupȳm inhmex prām t̄yx kumrēx kēnā. No mēhō kot tokyx inhm̄y nē mē kēp ixto wa nē ixkumrēx gō xok kamā inhm̄rōr? Na pa tee ri ixkumrēx hw̄ȳr ixtēm nē inhmā inhm̄rōr prām nhūm mē xatā ixpē amnh̄i to wa nē mra nē kamā mrō. Anē.

⁸ Hāmri nhūm Jejus kām:

–Tỳ? Tôe. E na ka akupỹm amex. E kànhmã xa nẽ akupĩp py nẽ ma akupỹm anhõrkwỹ hwỳr tẽ. Anẽ.

⁹ Hãmri nhũm kuma nẽ ra akupỹm mex nẽ kànhmã xa nẽ ri mra. Nẽ hkĩnh tỳx nẽ hikupĩp py nẽ ma akupỹm õrkwỹ hwỳr tẽ. Ijaew nhõ arĩgromnu pê sap ã nhũm Jejus kot akupỹm ho mex ¹⁰ nhũm ma akupỹm pry hã hikupĩp py nẽ o tẽ. Nhũm Ijaew nhõ pahi hkwỹja nhỹhỹnh mra nẽ tee ri kot sap ã hpyr nẽ o htẽm ã omu nẽ kãm:

–Tk. Kwa mẽ pahpê Ijaew na pu htem mẽ panhõ arĩgromnu hã paxàpênh kêt nẽ. Finat Mojes kot ja nẽ mẽ pahkurê htã ka axtem nẽ akupĩpta py nẽ nhỹhỹm o tẽ. Anẽ.

¹¹ Hãmri nhũm mẽ kuma nẽ mẽ kãm:

–Tỳ. Kot anhỹr tã kot ixto mex xwỳnhta na ã inhmã kapêr anẽ pa mar xà hkôt kupy nẽ akupỹm inhõrkwỹ hwỳr tẽ. Anẽ.

¹² Hãmri nhũm mẽ tee ri kuma nẽ kãm:

–Kwa mẽhõ na we ã ri amã karõ anẽ? Anẽ.

¹³ Nhũm kormã kot Jejus nhĩxi mar kêt jakamã kot mẽ kãm ahkre kaxyw hakêx nẽ tee ri hkwỳjê kaêx ã hapêr rĩt o xa. Nom nhũm mẽ ohtô nẽ pry hã mrrar jakamã nhũm tee ri hapêr nhũm Jejus ra ma nhỹhỹm tẽ.

¹⁴ Tã nhũm hã ahtũmre nhũm Jejus Tĩrtũm mã amnhĩ jarênh xà hã ixkre hwỳr tẽ nẽ axà nẽ kot ho mex xwỳnhta pumu nẽ kãm:

–Pa. E na ka ra akupỹm amex. Nom kwa kêr ka axte tanhmã amnhĩ tomnuj to ho ri apa hkêt nẽ. Kot kaj axte ã amnhĩ nhĩpêx anẽ hãmri nẽ apunuj tỳx o wam ate apunujta jakre kãm ga. Anẽ.

¹⁵ Hãmri nhũm kuma nẽ ma tẽ nẽ kato. Nẽ ma mẽ õ pahijê hwỳr tẽ nẽ mẽ kãm:

–E na pa ra kot ixto mex xwỳnhta nhĩxi ma. Xep kêp Jejus. Anẽ.

¹⁶ Hãmri nhũm mẽ hixi ma nẽ hã tanhmã axpên mã ho kapêr punuj to. Mẽ õ arĩgromnu hã kot mẽ ho mex o pa jakamã nhũm mẽ axpên jakwa kamã

ri hixi ho rê nẽ nhỹri omu nẽ tanhmã hã kãm àkjêr to. ¹⁷ Hãmri nhũm amnhĩ tã mẽ kuma nẽ mẽ kãm:

–Ku nhũm. Inhĩpêêxà Tĩrtũm na hte apkati mẽ tanhmã mẽ pahto mex to ho pa. Jakamã pa hte uràk nẽ ã mẽ ho mex rãhã ho ri ixpa anẽ nẽ aa mẽmo arĩgro hã ja ho anhỹr kaga hkêt nẽ.

¹⁸ Anhỹr o mẽ kãm amnhĩ jarê nhũm mẽ kuma nẽ kamã gryk tỳx nẽ. Nom mẽ õ arĩgromnu hã kot mẽ ho mexja pix mỳrapê kamã gryk kêt. Mãânên Tĩrtũm kêp hipêêxà hã harênhja mỳrapê nhũm prem kamã gryk tỳx kumrêx nẽ axpên mã:

–Tk. Kwa na ã amnhĩ jarênh anhỹr jao te kêp Tĩrtũm pyràk ã amnhĩ jarê. E kwa pu mẽ kupĩ ri. Anẽ.

Tĩrtũm Kra kot Hipêêxà nhỹ hã amnhĩ nhĩpêx ã harênh

Juāw 14.10-13

¹⁹ Hãmri nhũm Jejus axte mẽ kêp Ijaew nhõ pahijê mã kapêr nẽ mẽ kãm:

–Na pa hte amnhĩ krã hkôt tanhmã amnhĩ nhĩpêx to ho ri ixpa hkêt nẽ. Na pa hte Inhĩpêêxà kot tanhmã amnhĩ nhĩpêx to hã omunh xà hkôt uràk nẽ mẽ ho mex o ri ixpa. Kwa mẽ amnhĩ krã him ja jaxà nẽ kãm ajamaxpêr tỳx nẽ ho apa.

²⁰ –Inhĩpêêxàja kãm ijapêê. Na hte inhmã kot tanhmã mẽ ho mex to piitã ho amnhĩrĩt. Ixte omunh nẽ uràk nẽ ý hã tanhmã mẽ ho mex to ho ri ixpa kaxyw. Jakamã kot paj âm akupỹm mẽ à xwỳnhjê ho mex pix o ri ixpa hkêt nẽ. Kot paj mãânên mẽ kãm mẽmoj mex o ja jakrenh o anhỹr o ri ixpa ka mẽ hã ixpumu nẽ ixkamã ano puma ho apa.

²¹ –Nẽ Inhĩpêêxà kot akupỹm mẽ htyk xwỳnhjê ho htĩr jakamã kot paj uràk nẽ akupỹm mẽ htyk xwỳnhjê ho htĩr o ri ixpa. Anẽ.

Mẽ htĩr tũm nẽ mẽ pa mã xwỳnhjê jarênh

Juāw 3.16-17, 3.36, 6.27, 6.40, 6.60, 10.28, 17.2-3; Rõmãn 6.23; Karatas 6.8; Xitre 1.2; Wam Juāw 2.25, 5.11-13

22 Nhūm Jejus arī mẽ kêp Ijaew nhō pahijê mã kapêr nê mẽ kām:

—Koja nhỹrmã Inhĩpêêxàja mẽ htĩr tũm nê mẽ pa ho mẽ pa mã xwỹnhjê jarênh kêt nê. Ja kaxyw na pre pa ixãm. 23 Tã mẽ piitã mẽ kot ja hã ixpumunh nê ixtã hpijaàm o ri pa kaxyw na pre mẽ kaxyw ixãm. Te mẽ kot Inhĩpêêxà hã hpijaàmta pyrã nê pa ixtã hpijaàm o pa kaxyw. Jakamã koja mẽhō ixtã hpijaàm kêt nê hãmri nê mãânên Inhĩpêêxà hã hpijaàm kêt ã amnhĩ to amnhĩrĩt. Tãm kot mẽ awỹr inhmênh kênã. 24 Jakamã koja mẽhō ixkapêr ma nê amnhĩ kaxyw kot mẽ awỹr inhmênh xwỹnhhta kôt hamaxpêr nê ixkôt amnhĩ xãm. Hã koja nhỹrmã htyk tã ma mẽ kot amnhĩ xà htỹx kamã hamak o pa htũm xàta wỹr mōr kêt nê. Koja Inhĩpêêxà akupỹm ho htĩr nhūm wa ixri htĩr tũm nê mex kumrêx nê pa ho pa. Jakamã koja mẽhō ixkôt amnhĩ xãm hãmri nê ra kêp wa ixri htĩr tũm nê pa ho pa mã xwỹnh. Kwa mẽ jam ajamaxpêr tỹx rãhã ho apa.

25 —No mẽ kãm ixkapêr mar prãm kêt xwỹnhjaja kêp Inhĩpêêxà mẽ wa ixri mẽ htĩr tũm nê mẽ pa mã xwỹnh kêt. Tã ixpê Tĩrtũm Kra jakamã koja mẽ ixkapêr ma nê ixkôt amnhĩ xunhwỹ. Hã kot paj amnhĩ tã mẽ omu nê mẽ htĩr tũm nê mẽ pa mã xwỹnh ã mẽ harê nhūm mẽ àmnhĩx ri hkĩnh nê pa ho pa. Kwa mẽ jam ajamaxpêr tỹx rãhã ho apa.

26 —Nê Inhĩpêêxà tãm kêp mẽ ho mẽ htĩr xwỹnh. Tã ixpê Kra jakamã na pre amnhĩ pyrã nê ja kaxyw ixãm.

27 —Ra kot mẽ akaxyw ixãm jakamã na pre mãânên ixte tanhmã mẽ ajarênh to kaxyw ixãm. Wa ixri mẽ atĩr tũm nê apa ho apa mã xwỹnhjê hã mẽ ajarênh rỹ wa ixri mẽ atĩr tũm nê apa hkêt mã xwỹnhjê hã mẽ ajarênh kaxyw. 28-30 Jakamã kot paj nhỹrmã ra mẽ htyk nê mẽ hikwỹ xwỹnh piitã mẽ kãm ixkapêr nhūm mẽ inhma. Koja mẽ ixkapêr ma hãmri nê akupỹm htĩr nê pika rũm hapôx pa. Hãmri nhūm mẽ kot kormã htĩr ri Tĩrtũm kapêr kôt amnhĩ nhĩpêx

hkêt xwỹnhjaja mẽ kot amnhĩ tomnuj mỹrapê ma mẽ kot amnhĩ xà htỹx kamã hamak tũm xàta wỹr ma hapêx pa. Nom nhūm mẽ kot amnhĩ to mex xwỹnhjaja. Ra mẽ kot Tĩrtũm kôt amnhĩ nhĩpêx jakamã koja mẽ ma Tĩrtũm mẽ wa ixwỹr api nê wa ixri mex nê hkĩnh rãhã htĩr tũm nê pa ho pa.

—Kot paj ja kaxyw tanhmã mẽ apitã mẽ ajarênh to. Nom kot paj amnhĩ krã hkôt inhmã hprãm xà hkôt tanhmã mẽ ajarênh to hkêt nê. Kot paj Inhĩpêêxà kot mẽ awỹr inhmênh xwỹnhhta nhỹ hã àhpumunh tỹx xà hkôt tanhmã mẽ ajarênh to. Jao ãm hãmri mẽ ajarê. Kwa mẽ jam ajamaxpêr tỹx nê. No ã ixte mẽ amã amnhĩ jarênh anhỹrja ma nê tee ri ajamaxpêr kêt nê. Anê.

Mẽ kot Jejus kêp Tĩrtũm Kra hã harênh xwỹnhjê jarênh

Juāw 8.18; Wam Juāw 5.6-8

31 Nhūm Jejus arī mẽ kêp Ijaew nhō pahijê mã kapêr nê mẽ kãm:

—E na pa ra tanhmã mẽ amã amnhĩ jarênh to. Nom kop ãm papxipix ixte ã amnhĩ jarênh anhỹr ronhỹx ka mẽ inhma nê ajamaxpêr o: “Ko. Na apu ãm hãmri ã mẽ inhmã amnhĩ jarênh anê rỹ apu ãm amnhĩ to hêx.” Anhỹr o ajamaxpêr. 32 Nom papxipix na pa hte ã amnhĩ jarênh anhỹr kêt nê. Inhĩpêêxà haxwỹja na hte ã ijarênh anê. Nê ãm hãmri na hte tanhmã ijarênh to ho pa. Tĩrtũmja hêx kêt. 33 No mẽ amã pika nhō xwỹnhjê pix kapêr mar prãm jakamã na ka prem finat Juāw Paxisja wỹr akwỹjê rê nhūm mẽ ma hwỹr mra nê ixtã hkukja nhūm mẽ kãm tanhmã ijarênh to. Nê hprĩ hã mẽ kãm ijarê. 34 No mẽ apê pika nhō xwỹnhjaja mẽ ate axpên mã tanhmã ijarênh toja na ixpê tanhmã kute hkêt. Koja mẽhō tanhmã ixto kapêr punuj to rỹ tanhmã ijarênh mex to pa amnhĩ jarênh ma nê tee ri amnhĩ kukamã ijamaxpêr o ixkaprĩ hkêt nê. Tã nom Juāw Paxis kapêrja mẽ amã mex jakamã na pa ã mẽ amã harênh anê.

Ka mẽ ra kot tanhmã ijarẽnh toja ma mẽ amnhĩ kaxyw ixkõt ajamxpẽr mẽ ixkõt amnhĩ xunhwỳ mẽ nhỹrmã ty mẽ ma mẽ kot amnhĩ xà htỳx kamã hamak tũm xàta wỳr apa hkết mẽ.

³⁵ —Juāw Paxis na pre te kanê hpòk mex mẽ mẽmoj to amnhĩrĩt mex pyrà mẽ mẽ amã Tĩrtũm kapẽr o amnhĩrĩt mex o pa. Ka prem te maripòtre kot kanê hã htu pyrà mẽ hwỳr akuprõ mẽ mar o akuhê. Nom hkõt ajamxpẽr tỳx kêt mẽ. ³⁶ Na pre hprĩ hã mẽ amã ijarẽnh o ri pa.

—Tã pa pam mẽ awỳr wrỳ mẽ Inhĩpêêxà nhỹ hã mẽ akamã aa mẽ ate mẽmoj pumunh kêt kwỳ ho anhỹr o ri ixpa. Mẽ ate ja hã ixpumunh mẽ Inhĩpêêxà tãm kot mẽ awỳr inhmẽnh kõt ixpumunh kaxyw.

³⁷ —Nẽ Inhĩpêêxàja mãânẽn ixpê Kra hã mẽ amã ixto amnhĩrĩt. Ra mẽ anhòpinh xà kaxwỳnh kãm kot mẽ amã ixto amnhĩrĩt tã ka mẽ ama mẽ amã ama mẽ ixkõt ajamxpẽr kêt mẽ. ³⁸ Mẽ amã mẽ ate hkõt amnhĩ nhĩpêx o apa hprãm kêt. Mẽ ate kapẽr mar tỳx ronhỹx ka mẽ ixkapẽr ma mẽ amnhĩ kaxyw ixkõt ajamxpẽr kurê kumrêx. Ixpê Tĩrtũm kot mẽ awỳr inhmẽnh xwỳnh kênã.

³⁹ —Nẽ Tĩrtũm kapẽr ã kagà htũm haxwỳja kot tanhmã ijarẽnh to. Ka htem wa ixri atĩr tũm mẽ apa ho apa hprãm xàj kamã harẽnh rãhã ho ri apa. Nẽ kot tanhmã pa ijarẽnh to htã ka mẽ ixkapẽr ma mẽ amnhĩ kaxyw ixkõt ajamxpẽr kêt mẽ. Anẽ.

Ijaew nhõ pahijaja kot Jejus kaga hã mẽ harẽnh

⁴⁰ Nhũm Jejus arĩ mẽ kêp Ijaew nhõ pahijê mã kapẽr mẽ mẽ kãm:

—Nẽ pa na ixte Inhĩpêêxà mẽ wa ixri ixte mẽ ho mẽ htĩr tũm mẽ mẽ pa mã xwỳnh ã mẽ harẽnh tã ka mẽ amnhĩ kaxyw ixkõt ajamxpẽr kêt mẽ. ⁴¹ Nom mẽ ate inhmex ã ijarẽnh kêt tã ja ixpê tanhmã kute hkết. Am Inhĩpêêxà pix kot inhmex ã ijarẽnhja na inhmã hprãm. ⁴² Ra ixte mẽ apumunh mex. Mẽ amã Tĩrtũm kĩnh kêt. ⁴³ Tãm kot mẽ awỳr inhmẽnh tã ka mẽ ixpumu mẽ ixkaga

nẽ ixkõt amnhĩ nhĩpêx kêt mẽ. Nom koja mẽhõ amnhĩ krã hkõt mẽ awỳr mẽ mẽ tanhmã mẽ ajahkre hto ka mẽ ama mẽ hkõt amnhĩ nhĩpêx kurê kumrêx.

⁴⁴ —Am pika nhõ xwỳnh pixjaja kot mẽ amex ã mẽ ajarẽnhja na mẽ amã hprãm. No Tĩrtũm kot amnhĩm mẽ amex ã mẽ ajarẽnhja mẽ amã hprãm ã mẽ ate amnhĩ jarẽnh tã mẽ amã ja prãm kêt. Jakamã na ka htem ixkaga kumrêx. ⁴⁵⁻⁴⁶ Tã nom kot paj pam nhỹrmã Tĩrtũm mã mẽ apê ixkwỳ hkết ã mẽ ajarẽnh kêt mẽ. Mo kaxyw kot pa kêt ri ã kãm mẽ ajarẽnh anẽ? Finat Mojes tãm koja ja hã kãm mẽ ajarẽ. Na ka htem tanhmã ajamxpẽr to mẽ ajamxpẽr o: “Kot paj finat Mojes kot mẽ inhmã tanhmã kapẽr to hkõt amnhĩ nhĩpêx o ri ixpa hãmri mẽ nhỹrmã Tĩrtũm ri ixtĩr tũm mẽ inhmex mẽ ixpa ho ixpa.” Anhỹr o ajamxpẽr nom hkõt amnhĩ nhĩpêx kêt mẽ. Mojes na pre hte pa ijarẽnh o pa. Tã mẽ ate kapẽr kõt amnhĩ nhĩpêx ronhỹx ka mẽ amnhĩ kaxyw ixkõt ajamxpẽr mẽ ixkõt amnhĩ xunhwỳ. No mẽ ate ixkaga jakamã koja Mojes tãm Tĩrtũm mã mẽ apê ixkwỳ hkết ã mẽ ajarẽ. ⁴⁷ Mẽ ate Mojes kapẽr kõt amnhĩ nhĩpêx kêt jakamã kot kaj mẽ mãânẽn ixkõt amnhĩ nhĩpêx hkết mẽ. Anẽ.

Nhũm pre ã Jejus Ijaew nhõ pahijê mã kapẽr anẽ.

6

Jejus kot mẽ ho 5.000 mẽ mẽ kãm mẽ õ hã harẽnh

Matêwre 14.13-21; Makre 6.30-44; Rukre 9.10-17

¹⁻⁴ Tã nhũm ra arĩgro pê Pas ahtêp o mỗ. Pasja ã mẽ ixpê Ijaewjaja na pa htem axpên wỳr akuprõ mẽ hã òwêhti hkra nyw kwỳ pa mẽ ì hkur o ixkrĩ. Amnepêm Tĩrtũm kot pika pê Ejit rũm mẽ inhĩgêjtjê kator kaxyw nhũm prem nojarêt mẽ ã hkwy hpar mẽ ì hkur anẽ. Tã arĩ mẽ ixpê mẽ hkanrêhã mẽ htãmnhwỳjaja jam ijamxpẽr pê ixkĩnh kaxyw ã amnhĩ nhĩpêx anẽ. Jakamã nhũm Jejus pàr krem axà mẽ ma himô pê Garirej ã rêr kaxyw ma xarmã mỗ mẽ rê. Himôja nhĩxi hõ pê

na Tipe nhūm hā xarmā mō nē rē. Pa mē hkôt ixpa ho ixpa xwýnhjaja ma hkôt ixpa.

Hāmri nhūm pika nhō xwýnh kwýjaja Jejus ma mōr kām omu hāmri nē ma gō kape hā pikap mē inhīhkrep mra. Na pre ra Jejus mē kamā mē à xwýnhjê ohtô nē akupým mē ho mex nhūm mē axte omu hāmri nē ma mē inhīhkrep gō mý ri hpar o pa.

Tā pa mē xarmā rē nē pàr rūm ijapôj nē gō mý ri kýxpê ixkrī hpa.

⁵ Hāmri nhūm mē inhīhkrep mē mra xwýnhjaja mē ixwýr hpôx o mra nhūm Jejus amnhī wýr mē omu nē mē inhīō pé Firipti mā kapēr nē kām:

—Kwa Firip. Měmoj kot puj mē pahwýr mē mōr nējjé mā ho anē nhūm mē kuku? Tanhmā kot puj mē amnhī to nē nhýri mē kām mēmoj japrô nhūm mē kuku? Anē.

⁶ Ra tām kot tanhmā mē kām ô hto hā amnhī pumunh mex tā ã mē hā Firipti kamā hamak kaxyw mē hā hkukjêr anē. ⁷ Hāmri nhūm kuma nē tee ri mē hkukamā hamaxpēr nē kām:

—Konên. Mē ohtô rax kumrêx kênâ. Mo mē kaxyw mē pakàxpore rax? Kot pu mē pakàxpore ho 200 nē ho mē kām mēmoj japrôr tā nhūm mē ãm ho hkryre nē kuku nē ho ôhy htu hkêt nē. Mē ohtô rax o mē ohtô rax kênâ. Anē.

⁸⁻⁹ Hāmri nhūm mē inhīōja kuma nē Jejus wýr tē nē kām kapēr. Simāw Pêtre htô Andreja hwýr tē nē kām:

—E ota mēhō hkrata amnhī kôt ô hkwy ho mō. No ãm grire. Na pāwti kêp 5 nē kaxyw ô tep axkrutre. No mē ohtô gri ã kot kêt mē hipêx pa. Anē.

¹⁰ Hāmri nhūm kuma nē hkôt mē ixpa ho mē ixpa xwýnhjê mā kapēr nē mē inhmā:

—Tôe. Nà hāmri. E mē kām anē kē mē hkrī pa. Anē.

Hāmri pa mē kām anē nhūm mē pō kamā hkrī hpa. Na prem ohtô kumrêx. Měmyjê pixjaja kêp 5.000. Nē kaxyw mē hprô nē mē hkrajaja. Na prem ohtô ho ohtô. Tā piitā hkrī pa. ¹¹⁻¹² Hāmri nhūm Jejus mēhō hkrata pé ô pāwti jamý nē o xa nē Tirtūm mā harē nē kām:

—Pa Papaj. Na ka hte mē inhmā mē inhō ho apa. ãm kapxipix amex o amex. Anē.

Hāmri nē mē inhmā pāwtija gō pa mē ô ri mē hkrī xwýnhjê mā ôr o mra nē ho mē piitā mē hipêx pa. Pāwtija ãm hkryre htā nhūm Jejus tanhmā ho nhūm ra ohtô rax kumrêx. Jakamā pa mē ô ri mē kām ôr o mra nē ho mē piitā mē hipêx pa. Nhūm Jejus hpānhā tep axkrutreta py nē mā ho anē nē Tirtūm mā harē hāmri nē amnhī xô ri mē inhmā kugō pa mē mā ho anē nē. Te ho pāwti nhīpêx pyrā nē ho mē piitā mē hipêx. Hāmri pa mē xpiitā apku nē inhōhy htu nhūm arī mēō jakrêx kwý hprā. Hāmri nhūm Jejus mē inhmā:

—E kwa mē hkôt mra nē mēō jakrêx o akuprô kē omnu hkêt nē. Anē.

¹³ Hāmri pa mē kuma nē ho akuprô nē kawà o 12 nē ho nýt. Pāwti hkryreja ãm kêp 5 pix tā nhūm Jejus tanhmā ho nhūm rŭnh kumrêx. Jakamā pa mē hakrêx prār o kawà ho 12 nē ho nýt pa. ¹⁴ Hāmri nhūm mē inhīhkrep mē mōr xwýnhjaja amnhī jaêr pé Jejus kot mē kām mēō ho rax ã omu nē ri axpên mā harēnh o:

—Kokýy. Tām mán pre finat Mojesja amnepêm mē panhīgêjtjê mā harēnh o ri pa. Tā ra mē pahwýr wrý nà? ¹⁵ Kwa pu mē kām pakapēr kām paxihtýx nē ma akupým amnhī kôt o mō nē amnhī kaxyw ãm kē mē pahto amnhīptâr o pa. Anē.

Hāmri nhūm Jejus amnhī tā mē kapēr ma nhūm ja kêp omnuj nē. Jakamā nhūm mē kêp kato nē ma hpānhā ahte nhýri hixêt ô hwýr tē.

Jejus kot gō krāhkà hā htēm ã harēnh

Matêwre 14.22-27; Makre 6.45-52

¹⁶ Tā nhūm ra kamàtre pa mē Jejus kôt ri ixpa ho ixpa xwýnhjaja ma akupým himô hwýr mra. ¹⁷ Nhūm kormā Jejus mē ixwýr akupýn htēm kêt jakamā pa mē tee ri kamā ama hāmri nē akupým pàr mā axà nē ma akupým Kapanaũ hwýr xarmā ixrêr o mō.

18 Pu nhũm ra kôk àpêr tỳx nhũm gô xatã kànhmã harĩ nê axpên wỳr mra nê axpên tak tỳx nê. 19 Pa mẽ kormã gô nhĩpôk ri mỗ. Nê tee ri rrēmti ho gô rēnh nhĩpêx kaprỳ nom kormã ixrêr kêt nê. Nê kormã inhmôr o ixtã 5 kirôm pix nê. Hãmri nhũm ra Jejus gô krãhkã hã hpar o mẽ ixkôt tẽ. Pa mẽ ixprĩ hã amnhĩ wỳr omunh mex kêt nê ixtỳx mẽkarõ hã hkamnhĩx nê mẽ inhmã uma htỳx kumrêx. 20 Tã nhũm mẽ inhmã ixkapêr nê mẽ inhmã:

—Tk. Kwa mẽ amã ma hkêt nê. Pa na pa mẽ akôt tẽ. Anê.

21 Hãmri pa mẽ kapêr ma nê ixkĩnh nê. Nê amnhĩ wỳr pàr kre hwỳr ho api nhũm axà pa mẽ xarmã ixrêr kurê kumrêx nê pàr kre rũm ijapôx pa.

Mẽ kot Jejus japêr mrar ã mẽ harênh

22 Tã nhũm apkati nhũm xarpê mẽ kot Jejus wỳr mrar nhũm kot mẽ kãm ô xwỳnhjaja tee ri hapêr o pa nê axpên mã:

—Kwa nhỹhỹm mãn pre we tẽẽ? Na pre hkôt ri mẽ pa xwỳnhjaja pix mẽ ô pàr kãm ma akupỹm xarmã mỗ nom nhũm Jejusja mẽ hkôt htēm kêt nê. Nà mãn kormã jar nhỹhỹm ri mrar jakamã pu mẽ kormã omunh kêt nê. Anê.

23 Rôm nhũm Tipe rũm pàr kwỳja mẽ hwỳr pôj. Jejus kot mẽ apkur xà ho Tĩrtũm wỳr nê mẽ kãm ho rax xà hã pikata wỳr nhũm mỗn pôj. 24 Hãmri nhũm mẽ amnhĩ wỳr omu nê tee ri pàr kãm Jejus mẽ hkôt mẽ ixpa ho mẽ ixpa xwỳnhjê japêr hãmri nê axpên mã:

—E kwa pu mẽ ma mẽ hkôt xarmã mỗ nê Kapanaũ kamã mẽ hapêr. Anê.

Hãmri nê mẽ kãm amnhĩ jarê nê mẽ ô pàr kwỳ hwỳr agjê nê ma mẽ hkôt xarmã mỗn rê. 25 Hãmri nê ra mẽ ixwỳr rê nê mẽ ixkôt pôj nê mẽ ixkaêx ã Jejus pumu nê hwỳr mra nê kãm:

—Pa mẽ ijahkre xwỳnh. Kwa na pa prem tee ri xarpê ajapêr hãmri nê man akôt mỗn rê. Kwa tanhmã na ka pre we amnhĩ to nê man tẽn rê? Anê.

26 Hãmri nhũm mẽ kãm:

—Nà mẽmo kaxyw na ka wem ri ijapêr o ri ixkôt apa? ãm jãã mẽ ate

ixkutã axàpkur nê anhõhy htu jakamã na ka mẽ axte ixkutã axàpkur pix kaxyw ijapêr o ri apa. No ixte ã mẽ amã amnhĩ nhĩpêx anhỹr ã ixpumu nê ixpê Tĩrtũm Kra hã ixkôt ajamaxpêr kêt nê. Kwa mẽ ixpê Kra hã inhmã ajamaxpêr tỳx nê kêt wehe. Anê.

Jejus te kêp kaxkwa rũm mẽ paxàpkur xà maati pyrãk ã kot amnhĩ jarênh

27 Nhũm Jejus arĩ hwỳr mẽ mrar xwỳnhjê mã kapêr nê mẽ kãm:

—Kwa kêr ka mẽ ri axàpkur xà pix kukamã ajamaxpêr o ri apa hkêt nê. Na htem mẽ apkur xà kukwak ri Tĩrtũm mẽ wa ixri htĩr tũm nê pa ho pa hkêt nê. No kot kaj mẽ amnhĩ kaxyw pa ixkôt ajamaxpêr nê ixkôt amnhĩ xunhwỳ. Hã kot kaj mẽ ixkukwak ri nhỹrmã atĩr tũm nê wa ixri amex nê apa ho apa. Te ixpê mẽ kot mẽ apkur xà hkur nê ã hã htĩr tũm nê pa ho pa xwỳnh pyrãk. Ja kaxyw na pre Inhĩpêxà Tĩrtũm mẽ awỳr papxipix inhmẽ pa mẽ awỳr wrỳ. Anê.

28 Hãmri nhũm mẽ kuma nê kãm:

—Kwa tanhmã kot paj wem amnhĩ nhĩpêx to nhũm Tĩrtũm hã mẽ ixpumu nê mẽ ixto mex nê? Anê.

29 Hãmri nhũm mẽ kuma nê axte mẽ kãm amnhĩ jarê nê mẽ kãm:

—Nà kot kaj mẽ amnhĩ kaxyw pa Tĩrtũm kot mẽ awỳr inhmēnh xwỳnh kôt ajamaxpêr hãmri nhũm ixtã mẽ apumu nê tanhmã mẽ akrã hto ka mẽ ajamakêtkati nê axàmnhĩx akĩnh nê tanhmã amnhĩ nhĩpêx to ho ri apa. Anê.

30 Hãmri nhũm mẽ kuma nê kãm:

—Tõe. Kwa axte mẽ inhmã aa mẽ ixte mẽmoj pumunh kêt ô ho anê. Pa mẽ ja hã apumu nê amnhĩ kaxyw akôt ijamaxpêr kurê kumrêx. E mẽmo kot ka mẽ inhmã ho anê? Kwa tokyx mẽ inhmã axte mẽmoj tanhmã ho pa mẽ omu. 31 Annepēm finat Mojes pyrã kot kapôt ã mẽ panhĩgêjtjê ho pa ri na pre hte apkati mẽ mẽ kãm mẽo mẽ kot kãm “manã” anhỹr xwỳnhhta gõ nhũm pre htem hkur o pa. Tĩrtũm kapêr ã kagà htũm kot ja jarênh kot:

Na pre kaxkwa rūm mẽ hwỳr mẽ apkur xà rē nhũm mẽ hkur o pa. Anhỹr o kot harēnh. Tã kot kaj Mojes nẽ apkati mẽ mẽ inhmã mẽ inhõ ho ri apa pa mẽ ja hã apumu nẽ rĩ kormã amnhĩ kaxyw akõt ijamaxpēr japēr. Anẽ.

³² Hãmri nhũm mẽ kãm:

—Xà Mojes na pre hte mẽ kãm kaxkwa rūm mẽ apkur xà rēnh o pa? Nà tãm kêt. Inhĩpêêxà na pre hte mẽ hwỳr kurẽ nhũm mẽ hkawrà nẽ kuku nẽ kukwak ri hihtỳx nẽ htĩr nẽ pa. Tã nhũm ra mẽ awỳr hpãnhã pa ixpê Kra hã inhmẽ. Kwa mẽ ixkapēr ma nẽ amnhĩ krãm haxàr tỳx nẽ. ³³ Na pre Tĩrtũm inhĩpêx o te amnepêm kot mẽ hwỳr kaxkwa rūm mẽ apkur xà rēnh ta pyrã nẽ amnẽ pika hwỳr inhmẽ. Jakamã te ixpê kaxkwa rūm mẽ apkur xà maati wrỳk xwỳnh ta pyrãk. Mẽ ate amnhĩ kaxyw ixkõt ajamaxpēr nẽ ixkõt amnhĩ xunhwỳr hãmri nẽ ixkukwak ri wa ixri atĩr tũm nẽ apa ho apa kaxyw. Anẽ.

³⁴ Nhũm pre ã Jejus mẽ kãm amnhĩ jarēnh anẽ nhũm mẽ kuma nom hprĩ hã mar mex kêt nẽ. ãm htỳx ho axtem mẽ apkur xà mex pix ã harēnh ã hkamnhĩx nẽ kãm:

—Kwa tô mẽ inhmã mẽ apkur xà maata kwỳ gõ pa mẽ apkati mẽ hkur o ri ixpa. Anẽ.

³⁵ Hãmri nhũm mẽ kuma nẽ amnhĩ tã mẽ kãm:

—Nà mẽ apkur xà kumrẽxja ãm paa. Te ixpê mẽ apkur xà maati pyrãk. Jakamã kot kaj mẽ atõ amnhĩ kaxyw ixkõt ajamaxpēr nẽ ixkõt amnhĩ nhĩpêx o apa hã kot kaj mẽ akĩnh nẽ apa. Te ra axàpkur nẽ anhõhy htũ nẽ akĩnh o ri apa pyrãk. Jao amnhĩ tã ixpumu nẽ akĩnh nẽ ajamakêtkati nẽ ri apa.

³⁶ —Ra mẽ ate ixpumunh mex tã kormã amnhĩ kaxyw ixkõt ajamaxpēr kêt nẽ. Kwa mẽ ixkapēr ma nẽ amnhĩ krãm haxàr tỳx nẽ. ³⁷ Tĩrtũm kot inhmã mẽ õr mã xwỳnhjaja koja mẽ ixpumu nẽ amnhĩ kaxyw ixkõt hamaxpēr mex kurẽ kumrẽx. ã mẽ

kot amnhĩ nhĩpêx anhỹr xwỳnhjaja kot paj aa amnhĩ nẽ mẽ hanor kêt nẽ.

³⁸ —Nẽ ixte amnhĩ krã hkõt kaxkwa rūm ixwrỳk nẽ inhmã hprãm xà hkõt tanhmã amnhĩ nhĩpêx to ho ixpa kaxyw na pa pre ixwrỳk kêt nẽ. Inhĩpêêxà kot mẽ awỳr inhmēnh jakamã kãm hprãm xà hkõt pix mã na pa hte tanhmã amnhĩ nhĩpêx to ho ri ixpa.

³⁹ —Tã mo na hte Inhĩpêêxà kãm hprãm? Nà kot inhmã mẽ õr mã xwỳnh piitã nhỹrmã wa ixkuri htĩr tũm nẽ mex nẽ pa ho paja na kãm hprãm. Jakamã nhỹrmã akupỹm mẽ htĩr ã arĩgrota ã ixte akupỹm mẽ ho htĩr nhũm ixte ãm pixire nẽ ho ixpikunor kêtja na kãm hprãm.

⁴⁰ —Tã kot ka mẽ atõ ixpê Tĩrtũm Kra hã ixpumu nẽ amnhĩ kaxyw ixkõt ajamaxpēr nẽ ixkõt amnhĩ xãm. Hã kot kaj nhỹrmã atyk tã pa akupỹm mẽ atĩr xà hã arĩgrota ã akupỹm ato atĩr ka wa ixkuri atĩr tũm nẽ amex nẽ apa ho apa. Ja na Inhĩpêêxàja kãm hprãm. Anẽ.

Nhũm pre ã Jejus mẽ kãm amnhĩ jarēnh anẽ. ⁴¹ Hãmri nhũm Ijaew nhõ pahijaja mẽ kuri mar o kuhẽ nẽ tee ri kệp kaxkwa rūm mẽ apkur xà maati pyrãk ã amnhĩ jarēnh ma nhũm ja mẽ kãm mex kêt nhũm mẽ kamã gryk nẽ. ⁴² Jakamã axpẽn mã ri harēnh o:

—Tk. Kwa mo na ri ã amnhĩ jarēnh anẽ? Kệp mẽ panhiõ kênã kot kêt ri kệp kaxkwa nhõ xwỳnh ã amnhĩ jarẽ. Kệp Juje mẽ Marir wa hkra na. Mẽ pahte katorxà mẽ hipêêxà wa omunh mex kênã kot kêt axtem nẽ kệp kaxkwa nhõ xwỳnh ã amnhĩ jarẽ. Anẽ.

⁴³ Hãmri nhũm amnhĩ tã mẽ kuma nẽ mẽ kãm:

—Kwa mẽ ã ijarēnh anhỹr kêt nẽ. ⁴⁴ Koja Inhĩpêêxà kot mẽ awỳr inhmēnh xwỳnh ta tanhmã mẽ hkrã htũ nhũm mẽ rĩ kormã amnhĩ tã ja hã ixpumu nẽ amnhĩ kaxyw ixkõt hamaxpēr. Tã ã mẽ kot amnhĩ nhĩpêx anhỹr xwỳnhjaja koja mẽ nhỹrmã htyk tã pa akupỹm mẽ ho mẽ htĩr nhũm mẽ

wa ixri htīr tūm nē mex kumrēx nē pa ho pa.

⁴⁵ —Amnepēm Tirtūm kapēr jarēnh o mē pa xwýnhjaja na prem ā ja jarēnh anhýr o:

Koja Tirtūm mē hkrā kaxwýnh kām tanhmā mē kām kapēr o amnhīrīt to ho pa.

Anhýr o harēnh. Jakamā mē kot Tirtūm kapēr mar nē hkôt amnhī nhīpēx xwýnhjaja koja mē māānēn amnhī kaxyw pa ixkôt hamaxpēr nē ixkôt ri amnhī nhīpēx o pa.

⁴⁶ —Nē mē apē pika nhō xwýnhjē hō aa mē ate ixkīnhā ano ho Inhīpēēxā pumunh kēt. Ām papxipix na ixte omunh. Kurūm na pa pre mē awýr wrý. ⁴⁷ Tā kot ka mē atō amnhī kaxyw ixkôt ajamaxpēr. Hā kot kaj nhýrmā wa ixkuri atīr tūm nē amex nē apa ho apa. Kwa mē jam ajamaxpēr týx nē.

⁴⁸ —Nē ixpē mē axàpkurxā maati jakamā pa na ixpē akupým mē ho mē htīr xwýnh. ⁴⁹ Amnepēm mē panhīgētjaja kormā kapôt ā mē pa ri mē kot “manā” anhýr xwýnhhta kur o ri pata ā na prem kukwak ri htīr tūm nē pa ho pa hkēt nē. Na prem ri pa nē gaa nē rī hpigēt nē htyk pa. ⁵⁰ Axtem kaxkwa rūm mē apkur xā maati jarēnh xwýnhhta pix kukwak ri na htem nhýrmā htyk tā akupým htīr nē wa ixri htīr tūm nē mex nē pa ho pa. ⁵¹ Ām paa. Pa na htem inhī hkwý hkrē hāmri nē wa ixri htīr tūm nē mex nē pa ho pa. Na pa pre ra amnhī grōnh kôt mē awýr wrý. Jakamā ka mē atō inhī hkwý hkrē hāmri nē nhýrmā atyk tā pa akupým ato atīr ka Tirtūm mē wa ixri atīr tūm nē amex nē apa ho apa. Anē.

⁵² Nhūm pre ā Jejus Ijaew mā amnhī jarēnh anē. No ām mē kām amnhī tā kuxi nē amnhī jarē. Jakamā nhūm mē tee ri kuma hāmri nē tanhmā hā axpēn mā kapēr to. Mē kot hprī hā mar kēt nē ām mē kot ī hkwý hkrērja pix jarēnh mar jakamā tee ri hamaxpēr nē axpēn mā:

—Kwa tanhmā kot kēt we amnhī to nē mē pamā amnhī nhī hkwý gō pu mē kuku? Anē.

⁵³⁻⁵⁴ Hāmri nhūm amnhī tā mē kuma nē mē kām:

—Nā mē kot inhī hkwý hkrēr nē ixkamrō hkwý ho hkōm xwýnh pixjaja koja mē nhýrmā Tirtūm mē wa ixri htīr tūm nē pa ho pa. Ixte akupým mē ho mē htīr xā hā arīgrota ā kot paj mē ho mē htīr nhūm mē wa ixri htīr tūm nē mex nē pa ho pa. No kot kaj mē inhī hkwý hkrēr kēt nē ixkamrō hkwý ho akōm kēt hāmri nē wa ixri atīr tūm nē amex nē apa ho apa hkēt nē. Kwa mē jam ajamaxpēr týx rāhā nē. ⁵⁵ Kēt inhīja kēp mē apkur xā maati na. Nē ixkamrōja kēp mē hkōm xā maati na. Jakamā na htem inhī hkwý hkrē nē ixkamrō hkwý ho ixkō nē ra kēp wa ixri mē htīr tūm nē mē pa ho mē pa mā xwýnh. ⁵⁶ Jakamā kot ka mē atō inhī hkwý hkrē nē ixkamrō hkwý ho ixkō. Hāmri pa amnhī tā apumu nē akarō mā axā ka te apē pa pyrāk o amnhī nhīpēx o apa. ⁵⁷ Inhīpēēxā kot mē awýr inhmēnh xwýnhhta kukwak ri na pa hte ixtir tūm nē ixpa ho ixpa. Tā ja pyrā nē kot kaj mē inhī hkwý hkrē hāmri nē ixkukwak ri wa ixri atīr tūm nē apa ho apa mā xwýnh.

⁵⁸ —Jakamā na pa ā mē amā ixpē kaxkwa rūm mē axàpkur xā maati hā amnhī jarēnh anē. Amnepēm mē panhīgētjaja na pre htem kapôt ā mēōta kur o pa hāmri nē gaa nē hpigēt nē htyk pa. No kēt pa koja mē inhī hkwý hkrē hāmri nē mē kurom wa ixri htīr tūm nē mex nē pa ho pa. Anē.

⁵⁹ Nhūm pre ā Jejus mē kām amnhī jarēnh anē. Kormā Kapanau kamā Tirtūm kapēr o mē ahkre xā hā ixkre kamā ā mē ahkre anhýr o xa.

Mē ohtō nē mē kot Jejus kaga hā mē harēnh

Sikūn Korīt 3.6; Sikūn Pētre 3.16

⁶⁰ Hāmri nhūm mē kot Jejus kōt mar o mē pa xwýnhjaja ohtō nē ā kapēr anhýrja ma nē tee ri amnhī kukamā hamaxpēr nē hā axpēn mā:

—Tk. Kwa pēr kapērja ām ri katii. Mēhō koja we kuma nē hkôt hamaxpēr nē hkamrō nē ī kur o ri

hkôt pa? Nà mẽ piitã mẽ kãm ja mexti hã. Anẽ.

⁶¹ Hãmri nhũm amnhĩ tã mẽ kuma nẽ mẽ kãm:

—Kwa xà ixkapêrja mẽ apê omnuj? ⁶² Nà kot paj nhỹrmã ma akupỹm kaxkwa hwỳr api. Ixpê Tĩrtũm kot mẽ akaxyw ixãm xwỳnh ã ma akupỹm hwỳr api. Hãmri ka mẽ ã ixte amnhĩ nhĩpêx anhỹr ã ixpumu nẽ rĩ kormã ixkôt amnhĩ xunhwỳr japêr. ⁶³ Na htem mẽmoj kur kukwak ri kêp Tĩrtũm mẽ wa ixri htĩr tũm nẽ pa ho pa xwỳnh kêt nẽ. Rỳ amnhĩ krã hkôt tanhmã amnhĩ nhĩpêx to ho kêp wa ixri htĩr tũm nẽ pa ho pa mã xwỳnh kêt nẽ. Tĩrtũm mẽ wa Ixkarõ tãm na hte mẽ hkarõ mã agjẽ nẽ mẽ ho Tĩrtũm wa ixkuri mẽ htĩr tũm nẽ mẽ pa ho mẽ pa mã xwỳnh. Tã ỹ hã na pa ã mẽ amã ixkapêr anẽ. Nom mẽ amã amnhĩ tã kuxi nẽ amnhĩ jarẽ. Tã kot kaj mẽ ixkapêr ma nẽ ixkôt amnhĩ nhĩpêx. Hã kot kaj mẽ nhỹrmã wa ixri atĩr tũm nẽ amex nẽ apa ho apa. ⁶⁴⁻⁶⁵ No mẽ akwỳjaja na ka mẽ ixkapêr ma nẽ ãm ama nẽ ixkôt ajamaxpêr kêt nẽ. Jakamã na pa ã mẽ amã ixkapêr anẽ nẽ mẽ amã: “Koja Inhiĩpêxãja tanhmã mẽ akrã hto ka mẽ rĩ kormã amnhĩ tã ixpumu nẽ amnhĩ kaxyw ixkôt ajamaxpêr.” Anhỹr o mẽ amã ixkapêr. Anẽ.

Nhũm ã Jejus mẽ kãm kapêr anẽ. Ra kot mẽ hkukamã mẽ omunh mex. Ra kot amnhĩ kaxyw mẽ kot hkôt hamaxpêr mã xwỳnhjê pumunh nẽ mããnẽn mẽ kamã kot mẽõ pahi nhĩhkram haxàr mã xwỳnhja nhũm mããnẽn ra kot amnhĩ kukamã omunh mex. Jakamã nhũm ã mẽ kãm kapêr anẽ. ⁶⁶ Hãmri nhũm mẽ kot hkôt kapêr mar o mẽ pa xwỳnh kwỳjaja tee ri kuma hãmri nẽ hkaga nẽ axte hkôt pa hkêt nẽ. ⁶⁷ Hãmri nhũm tee ri mẽ kot hkaga nẽ ma mẽ mrar ã mẽ omu nẽ mẽ ixpê hkôt ixpa ho ixpa xwỳnh pẽ 12jê mã kapêr nẽ mẽ inhmã:

—Pa? No mẽ kajaja. Xà kot kaj mẽ urak nẽ ixkaga nẽ ma akupỹm mra nã? Anẽ.

⁶⁸ Hãmri nhũm Simãw Pêtre kãm:

—Nà kot paj mẽ akaga hkêt nẽ. Kapxipix na htem amnhĩ kaxyw akôt hamaxpêr jao kêp Tĩrtũm mẽ war akuri htĩr tũm nẽ pa ho pa mã xwỳnh. ⁶⁹ Ka na pre Tĩrtũm mẽ ixwỳr amẽ. Jakamã na pa mẽ amnhĩ kaxyw akôt ijamaxpêr o ri ixpa. Nà kot paj mẽ aa akaga hkêt nẽ. Anẽ.

⁷⁰ Hãmri nhũm kuma nẽ kãm:

—Nà ixte amnhĩ kaxyw mẽ apê 12jê rênh tã na ka mẽ atõ akwỳjê hkĩnhã axtem nẽ Satanasti hkôt amnhĩ xãm. Anẽ.

⁷¹ Nhũm pre ã finat Jut Kariot kot mẽ inhõ pahijê nhĩhkram haxàrja kukamã mẽ inhmã harênh anẽ. Mẽ inhĩ õ na pre. Nẽ kêp Simãw Kariot kra na pre. Tã ra kot mẽ ìhkram haxàr kaxyw nhũm Jejus kot amnhĩ kukamã omunh jakamã ã mẽ inhmã harênh anẽ.

7

Jejus tõjaja kot mẽ hkĩnh wỳr amnhĩ kôt hwỳr ã mẽ harênh

Matêwre 10.36, 13.57-58

¹ Tã nhũm Jejus arĩ Garirej kamã ri pa nẽ kormã akupỹm Jutej wỳr mõi kêt nẽ. Jutej kamã Ijaew nhõ pahijaja ra kot hã àmnênh nhũm mẽ kot hpĩr ã harênh jakamã nhũm mẽ umaj kormã hwỳr mõi kêt nẽ.

² Tã mẽ ixpê Ijaew mẽ ixte ixkre hkryre nhĩpêx nẽ hã ixkĩnh ã arĩgroja ra ahtêp o mõi. Mẽ ixkĩnhhta ã na pa pre htem ixpiitã Jutej wỳr axpên wỳr akuprõ nẽ ahpỹnhã ri amnhĩm ixkre hkryre nhĩpêx nẽ kamã ixkrĩ.

³ Jakamã nhũm Jejus tõjaja hwỳr mra nẽ kãm nojarêt nẽ amnhĩ kôt kuwỳ nẽ kãm:

—E kwa tokyx pu mẽ pahkwỳjê hkôt. Ka mẽ kãm aa mẽ kot mẽmoj pumunh kêt kwỳ ho anhỹr o ri mẽ hkôt apa kê mẽ kãm akapêr mar prãm xwỳnhjaja ja hã apumu. ⁴ Na ka hte jar te apimxur pyrak o amnhĩ nhĩpêx. E kwa tokyx ma pu mẽ hkôt. Anẽ.

⁵ Katorxà hkôt mẽ kêp Jejus tõ htã kormã amnhĩ kaxyw hkôt hamaxpêr kêt jakamã na prem ã kãm kapêr anẽ.

⁶ Hãmri nhũm mẽ kãm:

—Nà kormā. Kormā ixte mē kām amnhĩ to amnhĩrĩt xà hã arĩgro kormā kator kêt. Jakamā kot ka mē amā mē hkôt amrar prām nē māmri ma mē hkôt mra. ⁷ Koja mē apumu nē kām mē akurê hkêt nē. Nē mē akamā gryk kêt ka mē ri tanhmā amnhĩ nhĩpêx to ho mē hkôt apa. No pa kot paj mē hwÿr mō nē mē kām mē kot amnhĩ tomnuj o pa hã mē harênh o ri mē hkôt ixpa nhũm mē tee ri amnhĩ tã inhma nē ixkamā gryk nē. ⁸ Jakamā mē māmri ma mē hkôt mō. Kot paj kormā. Kormā ixte mē kām amnhĩ to amnhĩrĩt xà hã arĩgroja kormā kator kêt.

⁹ Anē nhũm mē tee ri kuma hāmri nē kure nē ma mē hkwÿjê hkôt Jutej wÿr mō. Nhũm Jejus kormā Garirej kamā ri pa hã apkati grêre. ¹⁰ Hāmri nē kormā ma hapu hã mē hkôt mō. Pa mē hkôt ri ixpa ho ixpa xwÿnhjaja ma hkôt ixpa.

Mē kot ahpÿnhã tanhmā Jejus jarênh to hã mē harênh

Juāw 7.37-44, 9.22, 10.19-21, 12.42-43

¹¹ Rôm nhũm ra mē ixpê Ijaew nhõ pahijaja mē hkĩnhja kamā mē pikuprõnh xwÿnhjê kaêx ã Jejus japêr o ri mra. Nē hã axpên kukjêr o mra nē axpên mã:

—Kwa nok? Nhÿri mãn we? Anē.

¹² Nhũm Ijaew piitã tanhmā axpên mã Jejus jarênh to ho pa. Nē kamā mē hkwÿjaja harênh o:

—Nà kot amnhĩ to mex o pa xwÿnh na.

Anhÿr o harênh o pa. Nē kamā mē hkwÿjaja axtem nē harê nē harênh o:

—Tk. Kot mē no kupyw o pa xwÿnh kênã. Anē.

¹³ Nom mē õ pahi pymaj mē piitã mē nom tanhmā harênh to hkêt nē. ãm axpên mã pix mã tanhmā harênh to ho pa.

Jejus kot mē hkĩnh xwÿnhjê jahkre hã harênh

Makre 3.22; Juāw 5.16

¹⁴ Tã pa mē mē hwÿr pøj. Jejus mē pa mē hkôt ixpa ho ixpa xwÿnhjaja mē hwÿr pøj. Kormā mē hkĩnhja hapêx

kêt ri. Hāmri pa mē Jejus kôt Tĩrtũm mã amnhĩ jarênh xà hã ixkreja wÿr mra nē agjê nhũm Jejus mē ahkre ho nhÿ. ¹⁵ Hāmri nhũm mē inhõ pahijaja tee ri kot tanhmā mē ahkre hto hã kuma nē hã axpên kukja nē axpên mã:

—Kwa mē pahkĩnhã kot Tĩrtũm kapêr o istuda hkêt tã ã mē ahkre anē. Anē.

¹⁶ Hāmri nhũm amnhĩ tã mē kuma nē mē kām:

—Nà na pa hte amnhĩ krã hkôt tanhmā ri mē ajahkre hto hkêt nē.

ãm kot mē awÿr inhmênh xwÿnhhta nhÿ hã na pa hte ã mē ajahkre anhÿr o ri mē akôt ixpa. ¹⁷ Tã kot kaj mē amā Tĩrtũm kām hprãm xà hkôt amnhĩ nhĩpêx prãm hã kot kaj mē ixte ÿ hã ixkapêr ã ixpumunh kurê kumrêx. ¹⁸ Amnhĩ krã hkôt mē kām kapêr o ri mē pa xwÿnhjaja na htem mē kot mē mar nē mē hã hpijaam pix kaxyw tanhmā mē kām kapêr to ho ri pa.

No kêt pa na mē ate ixkapêr mar nē kot mē awÿr inhmênh xwÿnhhta ã apijaam pix kaxyw na pa hte tanhmā mē amā ixkapêr to ho ri ixpa. Jakamā ãm hāmri na pa hte mē amā ixkapêr o ri ixpa.

¹⁹ —Finat Mojes na pre mē panhĩgêjtaja kot tanhmā amnhĩ nhĩpêx to ho pa nhũm Tĩrtũm kot mē kām hã karõ jarênh o ri mē hkôt pa htã ka mē hkôt amnhĩ nhĩpêx kêt nē. Tã ixte hkôt amnhĩ nhĩpêx kêt ã ixto axêx nē mē ate ixpĩr kaxyw ixtã amnhĩ jarênh ri apa. Anē.

²⁰ Hāmri nhũm mē ã Jejus kot mē kām kapêr anhÿrja ma nē hêx rom kām:

—Kwa mē ixtõ na pa apĩr mã ka ri ã mē ijarênh anē? Amrakati kênã. Kwa mãn ka akrã axpã nà? Hã na ka ã ri akapêr anē. Anē.

²¹ Hāmri nhũm mē kām:

—Nà ixte mē pahkôt xà hã arĩgro hã akupÿm mēhõ myta ho mex jakamã na ka prem ja hã ixpumu nhũm ja mē apê omnuj nē. Nē te ixte mē pahkôt xà hã arĩgro hã ixpijaam kêt xwÿnh pyràk ã ijarê. ²² Nom na ka htem ixpyrà nē mē panhõ arĩgromnu

hã mēmoj tã axàpēnh o ri apa. E pa mē amã mēmoj jarē ka mē inhma. Na pre finat Mojes mē pamã mē pahte mē pahkra myre pē my kwryt kà jakàr ã mē pamã karō. Kukamã higētjaja kot kãm ja hã karō xà hkôt. Jakamã na htem mē hkra myre hapôj nē hã semãn pyxi nē hapêx nhũm mē kēp mēmy hkwryt kà jakà. ²³ Mē pahkôt xà hã arıgro hã hõ kator tãã nhũm mē hã semãn pyxi nē mē panhõ arıgromnu hõ hã kēp my kwryt kà hkwýkrãhta. Mojes kot Tirtũm nhỹ hã ja hã mē pamã karō xà hkôt. Jao mē panhõ arıgromnu hã apê. Tã pa pre mē apyrã nē arıgromnu hã ixàpēnh pē akupỹm mēhõ myta ho mex ka mē ja hã ixpumu nē axtem nē ixtýx ri ixte amnhĩ nhĩpêx o ixpa xwýnh ã ijarē nē mē ate ixpĩr kaxyw ã amnhĩ jarē. ²⁴ Kwa mē amnhĩ krã hkôt tanhmã mē harēnh to ho ri apa hkêt nē. ãm mē kot tanhmã amnhĩ nhĩpêx to ho pa hã mē omu nē ajamaxpēr o: “Kwa xà we Tirtũm kãm ja mex nà?” Anhỹr o mãn kêt mē ajamaxpēr nē rĩ kormã tanhmã mē harēnh to. Anē.

²⁵ Hãmri nhũm Jerujarē nhõ xwýnh kwýjaja ja hã kuma nē tee ri hkukamã hamaxpēr. Hãmri nē hã axpēn kukja nē axpēn mã:

–Kwa xà tãm na mē panhõ pahijaja mē kot hpĩr kaxyw hã amýnê? ²⁶ Ota jar mē pakamã ri pa htã nhũm mē ãm omu nē kãm tanhmã nē hkêt nē. Mãn mē ãm hãmri kēp Kris ã hkamnhĩx jakamã kapēr ma nē ãm kuma nē kēp Kris ã tanhmã ho hkêt nē. Anē.

²⁷ Hãmri nhũm mēhõja kuma nē kãm:

–Tk. Nà kēp Tirtũm kot mē pahwýr mēnh xwýnhre hã. Kēp Najare nhõ xwýnh kēnã. Mē pahte hipéêxã mē katorxã wa omunh mex. No kêt Tirtũm kot mē pahwýr mēnh mã xwýnhhta koja xep mē pahwýr kato pu mē nhỹhỹnh htēm xà hkôt omunh kêt nē. Anē.

²⁸ Rôm nhũm Jejus arĩ Tirtũm mã amnhĩ jarēnh xà hã ixkreja kamã mē ahkre ho nhỹ. Jakamã mē kot axpēn mã harēnh ã amnhĩ tã mē kuma nē mē kãm:

–Xà mē ate aprĩ hã ixpumunh nē nhỹhỹnh ixtēm xà hkôt ixpumunh? Nà mē ate ja hã ixpumunh kêt. Na pa pre amnhĩ hkrã hkôt mē awýr inhmör kêt nē. Na pre mēhõ mē awýr inhmē. Nom kot mē awýr inhmēnh xwýnhja kormã mē ate omunh kêt. ²⁹ ãm papxipix na ixte omunh. Kurũm ixwryk xwýnh na pa. Kot mē awýr inhmēnh nhũm kurũm ixwryk jakamã ixte ixprĩ hã omunh par. Anē.

³⁰ Hãmri nhũm mē hkwýjaja tee ri ã kot amnhĩ jarēnh anhỹrja ma nē ri axpēn mã harēnh o:

–Kwa Tirtũm kot mē pahwýr mēnh ã kot amnhĩ to hêx kēnã. E kwa pu mē ã kot amnhĩ to hêx anhỹr ja ã unē nē haxà nà?

Anhỹr o axpēn mã hã amýnê. Nom kormã mē kot unēnh nē haxàr xà hã arıgroja kormã kator kêt jakamã nhũm Tirtũmja nē mē omunh mex nē nhũm mē ãm kãm unēnh prãm kapry. ³¹ No nhũm mē hkwýja mē kurom kuma nē kēp Tirtũm kot mē pakaxyw ãm xwýnh ã omunh kurê kumrêx nē amnhĩ kaxyw hkôt hamaxpēr. Hãmri nē axpēn mã harēnh o:

–Kwa mãn kēp Tirtũm kot mē pahwýr mēnh mã xwýnhhta mãn nà? Mē pahtõ kot pu urak nē aa mē kãm mē kot mēmoj pumunh kêt o anhỹr rax o ri papa? Amrakati kumrêx. Nà pēr tãm kēnã. Anē.

Pôristi hkwý kot Jejus pynēnh kaxyw ã mē harēnh

³² Nhũm prem ã axpēn mã Jejus jarēnh anhỹr o kuhê hãmri nhũm Parijew nhõ xwýnhjaja hã mē kuma. Hãmri nē patre krãhtũmjê mē mē ma Jejus wýr mēõ pôristi hkwý rē nē mē kãm:

–E mē ma Jejus wýr mra nē unē nē man akupỹn o tē. Anē.

³³ Hãmri nhũm mē kuma nē ma hwýr mra nē omu nom tokyx unēnh kêt nē. Kormã kapēr ã mar o kuhê. Nhũm Jejus arĩ mē kãm kapēr o xa nē mē kãm:

–Nà kot paj jar mē akôt ri ixpa hã mytwry grêre hãmri nē ma akupỹm

kot mẽ awỳr inhmēnh xwỳnhhta wỳr api. ³⁴ Ka mẽ tee ri jar ijapêr o ri apa nom nhỳri ixpumunh kêt nê. Nê ma inhmōr xàta wỳr kot kaj mẽ atō ma ixkôt amōr kêt nê. Anê.

³⁵ Hāmri nhũm mẽ tee ri ã kot amnhĩ jarēnh anhỳrja ma nê axpēn mã:

—Kwa nhỹhỹm koja we ma mō pu mẽ hkôt papa hkêt nê? Mãn mẽ pahkwỳjaja kot Gresjê kamã mẽ pa xwỳnhjê hwỳr koja ma mō nê hpānhã mẽ hkôt mẽ ahkre ho pa nà? Hã na ã mẽ pamã amnhĩ jarēnh anê? ³⁶ Mo na ri mẽ pahte tee ri hapêr o papa hã mẽ pajarê nê mẽ pahte hkôt pamrar kêt ã mẽ pajarê? Anê.

Tĩrtũm Karō te kêp gô nyw pyrāk ã harēnh

Juāw 4.13-14; Apokarip 22.1, 22.17

³⁷ Tã nhũm ra mẽ hkĩnhja hapêx kaxyw hitep xà hã arĩgro maatija kato. Jakamã nhũm Jejus kànhmã xa nê kỳxpê mẽ hpikuprōnh xwỳnhjê mã kapêr nê mẽ kãm:

—E te mẽ amã kôr o apa pyrāk xwỳnhjaja. Mẽ amnê ixwỳr akuprō. Kot kaj mẽ amnhĩ kaxyw ixkôt ajamaxpêr pa tanhmã mẽ ato ka mẽ apê Tĩrtũm mẽ wa ixri atĩr tũm nê apa ho apa mã xwỳnh.

³⁸ —Kot kaj mẽ ja hã amnhĩ pumu hāmri nê ma mẽ kãm ixkapêr jarēnh o ri mẽ hkôt apa. Te mẽ kãm kôr nhũm mẽ ate mẽ kãm gô hkwy nhũm mẽ kot ho hkôm pyrāk o mẽ hipêx o ri mẽ hkôt apa. Hāmri nhũm mẽ ama nê mẽ apyrà nê amnhĩ kaxyw ixkôt hamaxpêr. Pa ixte tanhmã mẽ atoja pyrà nê tanhmã mẽ ho nhũm mẽ apyrà nê kêp wa ixri htĩr tũm nê pa ho pa mã xwỳnh. Anê.

³⁹ Nhũm pre ã Jejus mẽ kãm kapêr anê. No ãm hã kuxi nê mẽ kãm kapêr nê hprĩ hã harēnh kêt nê. Tĩrtũm Karō kot nhỹrmã mẽ kot amnhĩ kaxyw Jejus mã hamaxpêr xwỳnhjê karō mã gjêxja nhũm ã mẽ kãm hã kuxi nê harēnh anê. No kormã akupỹm kaxkwa hwỳr àpir nê mex o mex nê hkrĩ hkêt jakamã kormã mẽ hwỳr Karō rēnh kêt nê.

Mẽ kot ahpỳnhã tanhmã Jejus jarēnh to hã mẽ harēnh

Juāw 7.11-13, 7.25, 10.19-21

⁴⁰ Hāmri nhũm mẽ kot Jejus mar o hkrĩ xwỳnhjaja ã kapêr anhỳrja ã kuma nê ahpỳnhã tanhmã harēnh to nê harēnh o:

—Kwa finat Mojes pyrà nê kêp Tĩrtũm nhỹ hã kapêr jarēnh o pa xwỳnh na nà? Anê.

⁴¹ Nhũm kamã mẽ hkwyjaja mẽ kãm:

—Nà Tĩrtũm kot mẽ pakaxyw ãm xwỳnhhta na. Anê.

Nhũm kamã mẽ hkwyjaja ja hã mẽ kuma nê mẽ kãm:

—Tk. Nà kêp Garirej nhõ xwỳnh kênã kot kêt Tĩrtũm mẽ pakaxyw ãm.

⁴² Tĩrtũm kapêr ã kagà htũm kot kêp Garirej nhõ xwỳnh ã harēnh kêt. Kêp Pahi Tawi hkanrêhã hkagrôt nyw jakamã koja uràk nê Jutej kamã krĩ pê Perěj kamã kato. Jao koja uràk nê kêp Jutej nhõ xwỳnh.

Anhỳr o ri axpēn mã harê. Mẽ kot htỳx Jejus pika pê Garirej kamã kator ã hkamnhĩx jakamã ã axpēn mã harēnh anê. Nom pika pê Jutej kamã na pre kato. Krĩ pê Perěj kamã. Tã no nhũm mẽ hkwyjaja ja hã mar kêt jakamã kêp Tĩrtũm kot mẽ pahwỳr mēnh xwỳnh kêt ã hkamnhĩx.

⁴³ Jakamã nhũm mẽ ã ahpỳnhã axpēn mã harēnh anê. ⁴⁴ Nhũm mẽ hkwyjaja ra kot unēnh kaxyw tã tokyx unēnh kêt nê.

Pôristi kot Jejus pynēnh kêt ã mẽ harēnh

Matêwre 7.28-29

⁴⁵ Tã nhũm patre nhõ pôristijaja. Mẽ kot Jejus pynēnh mã hwỳr mrar tã hāmri ã kapêr anhỳrja ã kuma nê tee ri hamaxpêr nê unēnh kêt nê. Nê awjanã nê ahte ỹ kamã ma akupỹm patre krãhtũmjê mẽ Parijew nhõ xwỳnhjê hwỳr mra. Hāmri nhũm mẽ omu nê mẽ kãm:

—Pa nok? Tanhmã na ka mẽ amnhĩ to nê unēnh nê ho amōr kêt nê? Anê.

⁴⁶ Hāmri nhũm mẽ kãm:

—Nà na pa mẽ unēnh kêt nê. Kapêr mex kênã. Te kot mẽ pakapêr pyrāk

kêt jakamã pa mẽ tee ri kapêr ã kuma nê unênh kêt nê. Anê.

⁴⁷ Hãmri nhũm Parijew nhõ xwýnhjaja mẽ kuma nê mẽ kãm:

—Tk. Kwa mãn ka mẽ ra mẽ uràk nê tanhmã kot amnhĩ to hêx toja ma nê hkôt ajamaxpêr nà? ⁴⁸ Mẽ ixpê Parijew nhõ xwýnhjaja nê mẽ panhõ pahijaja na pa htem hkôt ijamaxpêr kêt nê. ⁴⁹ No kêt mẽ kot mar nê hkôt hamaxpêr xwýnhhtijaja na htem mẽ ixkĩnhã finat Mojes kapêr mar kêt nê. ãm Jejus kapêr pix na htem kuma nê hkôt hamaxpêr. Mýrapê koja Tĩrtũm tanhmã mẽ homnuj týx to nhũm mẽ rĩ amnhĩ pumu. Anê.

Nĩkotê kot Jejus xyr pê kapêr ã harênh
Juāw 3.1-21

⁵⁰ Hãmri nhũm Nĩkotêja mẽ mar o xa. Mẽ uràk nê kêp Parijew nhõ xwýnh tã na pre ra kamàt õ hã Jejus wýr tẽ nê kãm kapêr. Jakamã tee ri hã mẽ kapêr ma hãmri nê yr pê mẽ kãm kapêr nê mẽ kãm:

⁵¹ —Tk. Kwa kormã mẽ pahte pahprĩ hã kapêr mar nê tanhmã kot amnhĩ nhĩpêx to hã omunhre hã. Na pre finat Mojesja Tĩrtũm nhỹ hã mẽ panhĩgêjtjê mã ja jarênh o:

Kêr ka mẽ aprĩ hã mẽ kapêr ã mẽ ama nê mẽ kot amnhĩ nhĩpêx ã mẽ omu nê rĩ kormã tanhmã mẽ harênh to.

Anhỹr tã ka mẽ kormã aprĩ hã Jejus kot amnhĩ nhĩpêx ã omunh kêt tã ra kot amnhĩ tomnuj xwýnh ã harê. Anê.

⁵² Hãmri nhũm mẽ tee ri kuma nê kãm:

—Tk. Kwa xà we uràk nê apê Garirej nhõ xwýnh hã na ka ã yr pê akapêr anê? Xà Tĩrtũm kapêr ã kagà htũm kot Garirej nhõ xwýnhjê hõ kêp ý hã kapêr jarênh o pa xwýnh ã harênh? Nà ã kot harênh anhỹr kêt. Anê.

⁵³ Nhũm mẽ ã Nĩkotê mã kapêr anê hãmri nê anhgrà nê Tĩrtũm nhõrkwy rũm hapôj nê ma akupým õrkwy hwýr àhkurê ho mra.

8

Mêhõ ni kot nhãm mẽ mjên o amnhĩkati hã harênh
Xiakre 2.10-13

¹ Tã nhũm Jejus Tĩrtũm nhõrkwy kamã mẽ ahkre hpa hãmri nê kato nê ma hixêt prêk pê Oriwêhti hwýr tẽ. Hãmri nê hã api nê nhỹri nõ nê ra gõr.

² Tã nhũm apkati nê myt kator o mõi mẽ nhũm kànhmã nhỹ nê akupým wrý nê Tĩrtũm mã amnhĩ jarênh xà hã ixkre hwýr tẽ. No ãm kormã ixkre pu hã kahê hkre kamã nhỹ. Nhũm krĩ nhõ xwýnhjaja omu nê hã hturax nê nhũm tanhmã mẽ ahkre hto ho nhỹ. ³ Hãmri nhũm Parijew nhõ xwýnhjê mẽ Tĩrtũm kapêr tũm o mẽ ahkre ho mẽ pa xwýnhjaja hwýr mêhõ nija o tẽ. Na ra ham mêhõ pê mjên o amnhĩkati ho nõ nhũm mẽ ja hã omu nê unê nê hpa hã kupy nê ma Jejus wýr hkjênh o mõi. Hãmri nê mẽ kot mar o kuhê xwýnhjê kutã ãm nhũm xa. ⁴ Hãmri nhũm mẽ Jejus mã:

—E ot pa mẽ awýr jahti ho tẽ ka omu. Na ham mêhõ pê mjên o amnhĩkati ho nõ. Pa mẽ ja hã omu nê unê nê man awýr o tẽ. ⁵ E tanhmã kot puj mẽ hipêx to? Na pre finat Mojes Tĩrtũm nhỹ hã mẽ panhĩgêjtjê mã ja jarênh o:

Koja mênijê hõ axtem nê nhãm mêhõ pê mjên o amnhĩkati ho nõ ka mẽ ja hã omu nê apiitã ahpýnhã kên rũnh jamý nê ho htak o api.

Anhỹr o kot harênh. No ka? Tanhmã kot kaj mẽ inhmã ja jarênh to? Tanhmã kot paj mẽ hipêx to nhũm amã mex nê? E mẽ inhmã tanhmã mẽ ixte hipêx to jarê. Anê.

⁶ Nhũm mẽ ã hêx rom nija ã Jejus kukjêr anê. Kot mẽ kot hpĩr nê mẽ kãm kapêr nhũm mẽ kot hã mar nê mẽ hkrãhtũmjê hwýr mõi nê kãm kot Mojes kapêr kwým ri mẽ ahkre hã harênh kaxyw nhũm mẽ hêx rom ã hkukjêr anê. Hãmri nhũm mẽ kuma nê tanhmã hã mẽ kãm nê hkêt nê. ãm htýx hikôt nê ãhkarakã ho pyka kagà ho nhỹ. ⁷ Nhũm mẽ tee ri omu nê

axte hã hkukja nhũm kànhmã xa nẽ mẽ kãm:

—Tôe. Nà kot ka mẽ atõ aa tanhmã amnhĩ tomnuj to hkêt kumrêx ã amnhĩ pumu hãmri nẽ kam nẽ rĩ kaxyw kên õ py nẽ akumrêx ho hkura. Kê akwỳjaja rĩ kormã akôt hkwy jamy nẽ ho htak. Anẽ.

⁸ Hãmri nẽ akupỹm hikôt nẽ pyka kagà ho nhỹ. ⁹ Hãmri nhũm mẽ tee ri kapêrja kôt kuma hãmri nẽ mẽ kot mar o kuhê xwỳnhjê rũm anhrà nẽ ma mra. Mẽ piitã mẽ kot amnhĩ tomnuj xwỳnh ã amnhĩ pumunh mex jakamã tee ri ã kot mẽ kãm kapêr anhỹrja ma nẽ anhrà nẽ ma akupỹm hpỹnh nẽ axpên kôt mrar o xa. Mẽhpigêt kumrêx nẽ hpãnhã mẽ nywjaja nhũm mẽ hpỹnh nẽ ma axpên kôt mrar o ãm kãm hapêx. Nhũm Jesus mênija pix wa ahte mẽ kot mar xwỳnhjê kutã wa arĩk. ¹⁰ Hãmri nhũm Jesus kànhmã xa nẽ nita mã kapêr nẽ kãm:

—Pa? No mẽ kot ato kapêr xwỳnhhta mẽ? Xà na mẽhõ kên o akuranh kêt nẽ? Anẽ.

¹¹ Nhũm kãm: “Ma amrakati.” Anẽ nhũm kãm:

—Tôe. Nà kot paj ijaxwỳja tanhmã ato hkêt nẽ. E mamrĩ ma akupỹm anhõrkwỹ hwỳr tẽ. No ãm kêr ka axte ã amnhĩ nhĩpêx anhỹr kêt nẽ. ãm kwarĩ ho kwarĩ. Anẽ.

Jejus kot hprĩ hã amnhĩ jarênh

Juāw 1.4; Rõmãn 13.12-14; Epes 5.8-14; Wam Tesarõn 5.5-8

¹² Tã nhũm arĩgro hõ hã nhũm Jesus axte Tĩrtũm nhõrkwỹ hwỳr tẽ nẽ kamã mẽ ahkre ho nhỹ nẽ mẽ kãm:

—Nà te ixpê mẽ piitã mẽ õ kanê pyrãk. Na hte kanêja mẽ kãm hirã mex nẽ nhũm mẽ kamã rĩt mex o pa. Jao kamãt kô kamã ri pa hkêt nẽ. Ja pyrã nẽ na pa hte Tĩrtũm kot amnhĩ nhĩpêx o amnhĩrĩt mex o ri ixpa. Kot ka mẽ atõ amnhĩ kaxyw inhmã ajamaxpêr nẽ ixkôt amnhĩ xãm hãmri nẽ tanhmã amnhĩ tomnuj to ho apa hkêt nẽ. ãm Tĩrtũm kãm hprãm xà kôt pix mã tanhmã ri amnhĩ nhĩpêx to ho ri apa. Jao te ate kanê hpõk nhĩrã kamã

arĩt mex pyrã nẽ apê wa ixri atĩr tũm nẽ apa ho apa mã xwỳnh. Anẽ.

¹³ Hãmri nhũm Parijew nhõ xwỳnhjaja tee ri ã kapêr anhỹr ã kuma nẽ kãm:

—Tk. Kapxipix na ka ã amnhĩ jarênh anẽ. Mẽhõ kot ã ate amnhĩ jarênh anhỹrja kôt kot mẽ inhmã ajarênhre hã. Jakamã kot paj mẽ ama nẽ ãm ama. Anẽ.

¹⁴ Hãmri nhũm mẽ kãm:

—Nà mẽhõ kot ã ijarênh anhỹr kêt tã no ãm hãmri na pa mẽ amã amnhĩ jarê. Ixêx kêt. Mẽ arom ixte nhỹhỹnh ixwryk xà hã amnhĩ pumunh mex. Nẽ mẽ arom ma akupỹm nhỹhỹm ixapir xà hã amnhĩ pumunh mex. Jakamã ãm hãmri na pa ã mẽ amã amnhĩ jarênh anẽ. ¹⁵ Na ka htem amnhĩ krã hkôt tanhmã ri ijarênh to. No pa na pa kormã amnhĩ swar tanhmã mẽ ajarênh to hkêt nẽ. ¹⁶ Ixte tanhmã mẽ ajarênh to ronhỹx pa ãm hãmri mẽ ajarê. Nhỹx pa ãm papxipix amnhĩ krã hkôt tanhmã mẽ ajarênh to hkêt nẽ. Nhỹx mãânên Inhĩpêêxà pê kot mẽ awỳr inhmênh xwỳnhhta inhĩkô hã pa wa ãm hãmri axpên kôt tanhmã mẽ ajarênh to. Mẽ ate amnhĩ to mex ã mẽ ajarê rỳ mẽ ate amnhĩ tomnuj ã mẽ ajarê. ¹⁷ Tĩrtũm kapêr ã kagà htũm kot ja jarênh kot:

Koja mẽhõ wa hamêxkrut nẽ tanhmã mẽmoj jarênh to nẽ ãm axpên kôt harênh o htipxi. Hã kot kaj mẽ wa ama nẽ ãm hãmri wa kot harênh kôt ajamaxpêr kurê kumrêx.

¹⁸ Anhỹr o kot harênh. Tã pa ã amnhĩ jarênh anẽ nhũm Inhĩpêêxà kot mẽ awỳr inhmênh xwỳnhhta mãânên ã ijarênh anẽ. Wa xpijakrut tã ã wa ixte axpên kôt amnhĩ jarênh anhỹr jakamã kwa mẽ ixte tanhmã amnhĩ jarênh toja ma nẽ ixkôt ajamaxpêr kêt wehe. Anẽ.

¹⁹ Nhũm pre ã Jesus mẽ kãm kapêr anẽ. Hãmri nhũm mẽ kuma nẽ kãm:

—No nhỹri na we anhĩpêêxà ja? Anẽ.

Hãmri nhũm mẽ kãm:

—Nà mẽ ate Inhĩpêêxà pumunhre hã. Mẽ ate aprĩ hã ixpumunh ronhỹx

ka mẽ mãănĕn aprĩ hã Inhĩpĕêxà pumunh mex kurĕ kumrĕx. Nom mẽ ate ixpumunh mex kĕt jakamã na ka mẽ mãănĕn omunh mex kĕt nĕ. Anĕ.

²⁰ Nhũm pre ã Jejus mẽ kãm kapĕr anĕ. Arĩ Tĩrtũm mã amnhĩ jarĕnh xà hã ixkreja kamã mẽ ahkre ho xa. Mẽ kot kàxpore gjĕnh xà kuri mẽ ahkre ho xa. Nhũm mẽ kãm hkurĕ xwỳnhjaja tee ri kot tanhmã mẽ ahkre htoja ma nĕ kãm unĕnh nĕ haxàr prãm nĕ. Nom kormã mẽ kot ã hipĕx anhỹr ã arĩgro kormã kator kĕt jakamã nhũm Tĩrtũmja nĕ mẽ omunh mex nĕ nhũm mẽ ãm kãm unĕnh prãm kaprỳ.

²¹ Hãmri nhũm Jejus arĩ mẽ kãm kapĕr o xa nĕ mẽ kãm:

—Nà kot paj nhỹrmã mẽ arũm ixkato nĕ ma akupỹm api. Ka mẽ tee ri ijapĕr nom nhỹri ixpumunh kĕt nĕ. Hãmri nĕ mẽ ate amnhĩ tomnuj o apa rãhã ty nĕ mẽ atõ ixwỳr axàpir kĕt nĕ. Anĕ.

²² Hãmri nhũm Ijaew nhõ pahijaja tee ri ã kapĕr anhỹrja ã kuma nĕ axpĕn mã hã hpĕr o pikĕnh o kuhĕ nĕ axpĕn mã:

—Kwa mãn ra kot amnhĩ pĩr kaxyw ã na ri hkôt mẽ paxàpir kĕt ã mẽ pajarĕnh anĕ nà? Anĕ.

²³ Hãmri nhũm amnhĩ tã mẽ kuma nĕ mẽ kãm:

—Nà mẽ kajaja mẽ apĕ pyka nhõ xwỳnh na ka mẽ. No pa na mẽ arom ixpĕ kaxkwa nhõ xwỳnh jakamã mẽ pajamaxpĕr kot axpĕn pyràk kĕt. ²⁴ Kot kaj mẽ ixpĕ kaxkwa rũm ixwryk xwỳnh ã ixpumu nĕ amnhĩ kaxyw inhmã ajamaxpĕr nĕ ixkôt amnhĩ xunhwỳr kĕt hã kot kaj mẽ ate amnhĩ tomnuj o apa rãhã nhỹrmã atyk o mẽ kamjaja Tĩrtũm mã amnhĩ pãnhã amnhĩre. Anĕ.

²⁵ Nhũm Jejus ã mẽ inhõ pahijĕ hkukamã mẽ kot amnhĩ nhĩpĕx jarĕnh anĕ nhũm mẽ tee ri amnhĩ tã kuma nĕ kãm:

—Kwa mẽ atõ na ka we ri ã mẽ inhmã akapĕr anĕ? Anĕ.

Hãmri nhũm mẽ kãm:

—Nà ra ixte mẽ amã amnhĩ jarĕnh kĕnã. Xàn ka mẽ kormã aprĩ hã inhmar kĕt nĕ? ²⁶ Kot paj nhỹrmã

mẽ amã mẽ ate amnhĩ tomnuj piitã ho amnhĩrĩt pa. Na pa kot mẽ awỳr inhmĕnh xwỳnhhta pix xõ ri tanhmã mẽ amã ixkapĕr to ho ri ixpa. ãm hãmri na hte tanhmã mẽmoj jarĕnh to. Na hte hĕx kĕt nĕ. Anĕ.

²⁷ Nhũm pre ã Jejus mẽ kãm Hipĕêxà kot mẽ hwỳr mĕnh ã harĕnh anhỹr tã no nhũm mẽ Hipĕêxà kĕp Tĩrtũm ã hkôt hamaxpĕr kĕt nĕ.

²⁸ Jakamã nhũm mẽ kãm:

—Nà koja mẽ nhỹrmã pĩ kahpa hã inhõ ka mẽ rĩ kormã aprĩ hã ixpĕ Tĩrtũm rũm mẽ awỳr ixwryk xwỳnh ã ixpumu. Nĕ ixte amnhĩ krã hkôt ixkapĕr o ri ixpa hkĕt ã ixpumu. Nĕ ãm Inhĩpĕêxà xõ ri ixprĩ hã ixkapĕr o ri ixpa hã ixpumu. ²⁹ Ixte kãm hprãm xà hkôt pix mã tanhmã ri amnhĩ nhĩpĕx to ho ri ixpa jakamã na hte ixtãnopxar mex o ixkôt pa ho pa. Koja aa ixkaga hkĕt nĕ. Anĕ.

³⁰ Hãmri nhũm mẽ hkwyja kuma nĕ hkwyjĕ rom kapĕr kôt hamaxpĕr ³¹ nhũm amnhĩ tã mẽ omu nĕ mẽ kãm:

—Nà ãm hãmri na ka mẽ tã ixkôt ajamaxpĕr. Tã kĕr ka mẽ ixkôt amnhĩ xunhwỳ nĕ ixkapĕr kôt pix mã ri amnhĩ nhĩpĕx mex o ri apa. Hãmri pa ja hã mẽ apumu nĕ mẽ apĕ ixkwỳ kumrĕx ã mẽ ajarĕ. ³² ãm hãmri na pa hte ã ixkapĕr anhỹr o ri ixpa. Tã kot kaj mẽ ixkôt ri amnhĩ nhĩpĕx o ri apa hãmri nĕ aprĩ hã inhmar tỳx nĕ. Nom na hte kormã mẽmoj kot amnhĩ tã mẽ ato htỳx pyràk o mẽ anhĩpĕx ka mẽ tee ri amnhĩ krã hkôt kãm anhũrer prãm kaprỳ. Tã kot kaj mẽ ixkôt amnhĩ xunhwỳ nĕ ixkôt ri amnhĩ nhĩpĕx hãmri nĕ Tĩrtũm nhỹ hã tãm amnhĩ nhĩpĕx. Jao ỹ hã ate amnhĩ tomnuj mã anhũre. Anĕ.

³³ Nhũm pre ã Jejus mẽ kãm kapĕr anĕ hãmri nhũm mẽ tee ri kuma nĕ kãm:

—Kwa mẽ ixpĕ mẽ pahpàr krax finat Apraãw kanrĕhã htãmnhwỳ kĕnã. Na pre mẽmoj te kot amnhĩ tã ho htỳx pyràk o hipĕx kĕt nĕ. Jakamã mẽmo kot we mẽ ixpĕ hkanrĕhã htãmnhwỳjĕ ho htỳx ka we ri ã mẽ ijarĕnh anĕ? Nà

amrakati kênã. Tã kwa mon ka ã mẽ ijarênh anê? Anê.

³⁴Hãmri nhũm Jejus hprĩ hã mẽ kãm awjarê mẽ mẽ kãm:

—Kwa mẽ ixkapêr ma mẽ amnhĩ krãm haxàr tỳx nê. Nà mẽ kot amnhĩ tomnuj o mẽ pa xwỳnhjaja te mẽ kot amnhĩ tomnuj tãm ri kot amnhĩ tã mẽ ho htỳx pyrək o mẽ hipêx. Jakamã nhũm mẽ urer kêt rãhã nê pa ho pa. Nê ã amnhĩ nhĩpêx anhỹr rãhã ho pa. ³⁵Jakamã ixkĩnhã mẽ kêp Tĩrtũm kwỳ hkêt. No pa na ixpê Tĩrtũm Kra jakamã mãânên ixpê hkwỳ na pa. ³⁶Tã mẽ kajaja. Kot kaj mẽ ixpê Tĩrtũm Kra hã ixkôt amnhĩ xunhwỳ hã kot pa tanhmã mẽ ato ka mẽ ixpyrà nê apê wa ixkwỳy. Hãmri nhũm mẽ ate amnhĩ tomnuj te kot mẽ amã urer pyrək o mẽ anhĩpêx ka mẽ ra wa ixkôt amnhĩ nhĩpêx o ri apa. Anê.

Mê kêp Tĩrtũm kra hkêt xwỳnhjê jarênh

³⁷Nhũm Jejus arĩ mẽ kãm kapêr nê mẽ kãm:

—Nà ãm hãmri na ka mẽ apê finat Apraãw kanrêhã htàmnhwỳ hã amnhĩ jarê. Nom mẽ apê hkanrêhã htàmnhwỳ htã urək nê amnhĩ kaxyw Tĩrtũm kôt ajamaxpêr kêt nê. Jakamã na ka htem ixkapêr ma mẽ ãm ama nê ixkaga. Nê axtem nê ixpĩr mã. Kop apu Apraãw arĩ mẽ akamã pa ronhỹx ã inhĩpêx anhỹr kêt nê. ³⁸Na pa hte Inhĩpêxà hkôt pix mã ri amnhĩ nhĩpêx o ri ixpa. No mẽ kajaja axtem nê mẽ ate nhãm mẽ kapêr kôt amnhĩ nhĩpêx jakamã na ka htem ixkĩnhã Inhĩpêxà hkôt amnhĩ nhĩpêx kêt nê. Anê.

³⁹Hãmri nhũm mẽ tee ri amnhĩ tã kuma nê kãm:

—Tk. Kwa mon ka ã mẽ ijarênh anê? Mẽ ixte Apraãw kôt amnhĩ nhĩpêx o ri ixpa kênã. Anê.

Hãmri nhũm mẽ kãm:

—Nà. Mẽ ate hkôt ri amnhĩ nhĩpêx o apa ronhỹx ka mẽ urək nê Inhĩpêxà kapêr kôt amnhĩ nhĩpêx. ⁴⁰No na ka mẽ ra axtem nê ixpĩr mã. ãm hãmri na pre Tĩrtũm inhmã awjarê pa ô ri tanhmã mẽ amã mẽmoj jarênh to ho

ri ixpa htã ka mẽ ra axtem nê ixpĩr mã. Kwa xà na pre Apraãwja ã mẽ hipêx anhỹr o pa? Nà na pre ã mẽ hipêx anhỹr kêt nê. ⁴¹Mẽ ate hkôt amnhĩ nhĩpêx xwỳnhta axtem na. Kêp Apraãw kêt. Nê mãânên kêp Tĩrtũm kêt. Anê.

Hãmri nhũm mẽ tee ri kuma nê kãm:

—Tk. Kwa nà ã mẽ ijarênh anhỹr kêt nê. Mẽ ixte Apraãw kôt amnhĩ nhĩpêx xwỳnh kênã. Tã ka ri axtem nê ã mẽ ijarênh anê. Mẽhõ hkôt kot pa kêt wem ri axtem amnhĩ nhĩpêx o ri ixpa? Anê.

⁴²Hãmri nhũm mẽ kãm:

—Nà mẽ ate Apraãw kôt amnhĩ nhĩpêx ronhỹx ka mẽ ixpumu nê urək nê amã ixprãm nê. Apraãw kot hkôt amnhĩ nhĩpêx o pa xwỳnhta tãm kot mẽ awỳr inhmên nhũm mẽ awỳr ixwryk kênã. Na pa pre amnhĩ krã hkôt man mẽ awỳr ixwryk kêt nê. Tãm na pre mẽ awỳr inhmê pa wry.

⁴³Kwa mon ka mẽ aprĩ hã ixkapêr mar mex kêt nê? Nà mẽ amã ixkôt amnhĩ nhĩpêx prãm kêt jakamã na ka mẽ tee ri ixkapêr ma mẽ aprĩ hã mar mex kêt nê. ⁴⁴Mẽ ate hkôt amnhĩ nhĩpêx xwỳnhta Satanasti na. Aa tãm kot amnhĩ nhĩpêx kêt kumrêx. Kêp mẽ hpar o pa xwỳnhjê hpãm maati na. Nê kêp mẽ kãm hêx o pa xwỳnhjê pãm maati na. ã kot amnhĩ nhĩpêx kot anhỹr. Nê kãm mẽ kapêr mex mar prãm kêt o pa. Nê ãm hêx pix o pa jakamã kêp mẽ hêx xwỳnhjê pãm. ã kot amnhĩ nhĩpêx anhỹr xwỳnh tã ka htem hkôt amnhĩ nhĩpêx o ri apa.

⁴⁵—Na pa hte kurom ãm hãmri ixkapêr o ri ixpa. No mẽ kajaja mẽ apê hêx nhi xwỳnh maati ja hkra jakamã mẽ amã ixkapêr mar prãm kêt. ⁴⁶Xà na ka pre mẽ atõ ixte tanhmã amnhĩ tomnuj to hã ixpumu? Nà amrakati. Ixte amnhĩ to mex o ri ixpa xwỳnh na pa. Nê tãm ixkapêr o ri ixpa xwỳnh tã ka mẽ inhma nê ãm inhma nê ixkôt ajamaxpêr kêt nê. Kwa mon ka mẽ ja hã ixpumunh nê ixkôt ajamaxpêr nê ixkôt amnhĩ xunhwỳr kêt nê?

⁴⁷ Tirtūm krajaja na htem kapēr mar tỳx nē hkôt amnhĩ nhĩpêx o pa. No mē apê hkra hkêt jakamã mē amã kapēr mar prãm kêt. Anē.

Mē kot Jejus kêp Satanasti hkwȳ hã harēnh

⁴⁸ Hāmri nhũm mē ã Jejus kot mē harēnh anhỹrja ma nē kamã gryk tỳx kumrêx. Hāmri nē kãm:

–Tk. Kwa ate amnhĩ tomnuj o apa xwỳnh̄ti kênã. Ra Satanasti hkwȳ pē mēkarōmnuti tanhmã kot akrã hto jakamã na ka ã mē inhmã akapēr anē. Anē.

⁴⁹ Hāmri nhũm mē kãm:

–Nà mēkarōmnuti kot tanhmã ixto hkêt. Na pa hte Inhĩpêxã hã ixpijaàm pix o ri ixpa. Tã mē ate ixkĩnhã hã apijaàm kêt jakamã mãânēn pa ixtã apijaàm kêt nē. ⁵⁰ Na pa hte amnhĩ krã hkôt mē piitã mē kot ixtã hpijaàm prãm xàj tanhmã mē kãm ixkapēr to hkêt nē. No mē piitã mē kot ixtã hpijaàm o paja na Inhĩpêxã kãm hprãm. Tã koja nhỹrmã amnhĩ nē ixtã mē hpijaàm kêt xwỳnhjaja mē kot amnhĩ xã htỳx kamã hamak tũm xàta wỳr mē rēnh pa.

⁵¹ –Nē kot ka mē atō wa ixkapēr ma nē ixkôt amnhĩ nhĩpêx. Hã kot kaj wa ixri atĩr tũm nē apa ho apa. Kwa mē ixkapēr ma nē amnhĩ krãm haxàr tỳx nē. Anē.

Nhũm pre ã Jejus Ijaew nhõ pahijê mã kapēr anē. ⁵² Nhũm mē kuma nē kãm:

–Kwa pēr ãm hāmri na ka hte Satanasti nhỹ hã ã mē htĩr tũm nē mē pa ho pa hã mē harēnh anhỹr o ri axêx o ri apa. Finat Apraãw na pre ri paa nē ty. Tã mē kot Tirtūm nhỹ hã kapēr jarēnh o mē pa xwỳnhjaja na prem urak nē ri paa nē mãânēn htyk pa. Tã ka axtem nē mē kot akapēr kôt amnhĩ nhĩpêx o mē pa xwỳnhjaja ari htĩr tũm nē pa ho pa hã mē harē. Nà na ka ãm mē inhmã mē ho axêx o xa. ⁵³ Na pre mē pahpãm Apraãwja kot amnhĩ to rax tã ty nē hapêx. Nhũm mē kot Tirtūm nhỹ hã kapēr jarēnh xwỳnhjaja mãânēn mē kot amnhĩ to rũnh tã htyk pa nē hapêx. Mē kot

amnhĩ to rũnh tã htyk pa nē hapêx kênã kot kêt mē tanhmã amnhĩ to nē ari htĩr tũm nē pa. ãm mē ixte akapēr mar nē atã ixpijaàm pix prãm xàj na ka ã mē inhmã mē htĩr tũm nē pa hã mē harēnh anē. Nom na ka ã mē harēnh anhỹr kaprỳ. Kot paj mē ri akapēr mar kêt nē. Anē.

⁵⁴ Hāmri nhũm mē kuma nē mē kãm:

–Nà na pa hte amnhĩ krã hkôt mē ate ixtã apijaàm hprãm xàj tanhmã mē amã ixkapēr to hkêt nē. Kot paj anē nē ãm ixtỳx ã amnhĩ nhĩpêx anhỹr kaprỳ. No Inhĩpêxã tãm kãm mē apiitã mē ate ixtã apijaàm o apaja nhũm kãm hprãm. Mē ate Tirtūm kôt amnhĩ nhĩpêx o apa hã amnhĩ to axêx xwỳnh̄ta tãm na kãm mē ate ixtã apijaàmja nhũm kãm hprãm. Tã ka htem ã amnhĩ nhĩpêx anhỹr kêt nē. Na ka htem ixkuk pumu nē axtem nē ixte Satanasti nhỹ hã mē amã ixêx o ri ixpa hã ijarē. ⁵⁵ Mē ate Inhĩpêxã hkôt amnhĩ nhĩpêx ã amnhĩ jarēnh tã ãm amnhĩ to axêx o ri apa. No pa na pa hte mē arom ãm hāmri hkôt amnhĩ nhĩpêx mex o ri ixpa. ⁵⁶ Amnepêm mē pahpàr krax Apraãwja na pre mē awỳr ixwryk kukamã ijarēnh ma nē mē arom inhỹ hã hkĩnh tỳx nē pa. Anē.

Nhũm pre ã Jejus mē kãm amnhĩ jarēnh anē. ⁵⁷ Hāmri nhũm mē kuma nē tee ri kot mē kãm tanhmã Apraãw jarēnh toja ma nē kãm:

–Tk. Xà na ka pre finat Apraãwja ano ho omu? Nà kormã anyw kênã. Apraãw amnepêm htyk nē hapêx kênã kot ka kêt kot akukamã ajarēnh mar nē hkĩnh tỳx ã harē. Xàn ka pre ano ho omu? Kormã akator kêt ri na pre amnepêm htyk nhũm mē haxàr kênã. Nà na ka ãm mē inhmã amnhĩ to axêx. Te amnepêm mē hkukamã apa nē ate mē omunh nē mē harēnh pyrak. Kwa akatàt kôt mē inhmã awjarē. Anē.

Jejus kêp rãhã ho rãhã xwỳnh ã harēnh

⁵⁸ Hāmri nhũm Jejus mē kãm:

—Nà ixêx kêt. Ām hāmri na pa ā mẽ amā amnhĩ jarēnh anē. Amnepēm kormā Apraāw kator kêt ri na pa pre ixrāhā ho ixrāhā ixpa na pa. Ixrāhā ho ixrāhā ixpa xwýnh jakamā na pa pre hte inhno ho Apraāw pumunh mex o ri ixpa. Kwa mẽ ixkapēr ma nē amnhĩ krā him haxàr tỳx nē. Anē.

⁵⁹ Hāmri nhũm mẽ tee ri kot ā amnhĩ jarēnh anhỹrja ā kuma nē kamā gryk tỳx nē. Nē axpēn mã:

—Kwa tanhmā kot we amnhĩ to nē amnepēm rāhā nē pa ho pa xwýnh ā amnhĩ jarē? Tĩrtũm pix na rāhā ho rāhā pa xwýnh. Anē.

Hāmri nē kamā gryk xàj kēn rũnh kwý kawrà ho ri hprôt nē kot ho htao o hpĩr kaxyw. Nom nhũm ra amnhĩ tã mẽ omu nē mẽ kēp akunok nē Tĩrtũm mã amnhĩ jarēnh xà hã ixkreja rũm kato nē ma tē.

9

Jejus kot no hkre xwýnh o mex ā harēnh

Makre 8.22-26

¹ Hāmri nhũm Jejus ma tē pa mẽ hkôt ri mẽ ixpa ho mẽ ixpa xwýnhjaja ma hkôt mra. Hāmri nē nhỹri no hkre xwýnh pumu. Katorxà nhõxà hkre rũm na pre no hkre nē kato. Hāmri nē ra hprék nē hpriy kamā àhwýr o hkrĩ. ² Tã hāmri pa mẽ mra nē omu nē hã Jejus kukja nē kãm:

—Kwa mẽmoj mýrapê na pre we myti nēj no hkre nē kato? Xà tãm kot tanhmā amnhĩ tomnuj to mýrapê nà? Xà katorxà rỳ hipéexà kot amnhĩ tomnuj mýrapê na pre ā no hkre nē kator anē? Anē.

³ Hāmri nhũm mẽ inhmã:

—Nà mēhõ kot tanhmā amnhĩ tomnuj to mýrapê no hkre nē kator kêt. Ām Tĩrtũm kot ho mex nhũm mẽ kot ja hã omunh kaxyw na pre ā no hkren kator anē. Tã kot paj Tĩrtũm nhỹ hã no ho mex ka mẽ ja hã ixpumumu. Na pa hte kormā jar pikap ri ixpa ri Tĩrtũm mã tanhmā amnhĩ nhĩpêx mex to ho ri ixpa. ⁴ Na htem arĩgro hã mẽmoj tã apê nhũm kamàt nhũm mẽ kãm ure nē àpēnh kêt nē. Ja pyrà nē na pu htem kormā pahtĩr ri jar pikap

ri papa ri Tĩrtũm mã tanhmā amnhĩ nhĩpêx to ho ri papa. Tã kot puj mẽ nhỹrmã ty hāmri nē axte jar ā amnhĩ nhĩpêx anhỹr kêt nē. Jakamā kwa kēr pu mẽ ri jar pikap ri papa ri kãm tanhmā amnhĩ nhĩpêx mex to ho ri papa. ⁵ Na pa hte ā kãm amnhĩ nhĩpêx anhỹr jao te kanê hirã mex pyrà nē ixprĩ hã mẽ kãm Tĩrtũm kot amnhĩ nhĩpêx o amnhĩrĩt mex o ri ixpa. Anē.

⁶ Nhũm pre ā Jejus mẽ inhmã amnhĩ jarēnh anē. Hāmri nē kot nohkre xwýnhnta no o mex kaxyw hikôt nē argôx mẽ nē ho gyw kwý nhĩpêx nē kãnhmã xa nē ho no kukõ.

⁷ Hāmri nē kãm:

—E ma gô gjēnh xà pē Siroe hwýr tē nē kamā amnhĩ no kuhõ. Anē.

Mē pakapēr kãm Siroeja mẽ kot kãm: “Nhỹhỹm mēnh xwýnh” anhỹr jarēnh pyrāk. Tã nhũm Jejus hwýr kumē nhũm ma hwýr tē. Hāmri nē kamā amnhĩ no hã gyw kuhõnh pa jao rĩt mex kurê kumrēx. Hāmri nē rĩt mex ā amnhĩ pumu nē hkĩnh tỳx nē ma akupỹm òrkwý hwýr tē. ⁸ Hāmri nhũm òrkwý kuri mẽ òrkwý xwýnhjaja nē mẽ kot pry kamā ahwýr o hkrĩ hã omunh xwýnhjaja amnhĩ jaêr pē ra rĩt mex ā omu nē tee ri hã axpēn kukja nē axpēn mã:

—Kwa pēr pry kamā àhwýr o hkrĩ xwýnhnta na nà? Anē.

⁹ Hāmri nhũm kamā mẽ hkwyjaja mẽ kãm:

—Tỳ. Tãm na. Anē.

Nhũm kamā mẽ hkwyjaja mẽ kãm:

—Nà tãm kêt. Axtem mēhõ na. Te kot urāk nom tãm kêt. Anē.

Anhỹr o ri axpēn mã harē. Tã nhũm tãm mẽ kãm amnhĩ jarē nē mẽ kãm:

—Tỳ pa kēnã. Pa na pa pre hte inhno hkre nē ri ixpa htã ra ixrĩt mex. Anē.

¹⁰ Hāmri nhũm mẽ tee ri kuma nē kãm:

—Kwa no tanhmã na ka we amnhĩ to nē ra arĩt mex?

¹¹ Anē nhũm mẽ kãm:

—Nà mẽ kot kãm “Jesús” anhỹr xwýnhnta na ixwýr tē nē ixkaxyw gyw kwý kagõ nē ho inhno kukõ. Hāmri nē mẽ kot gô mã: “Siroe” anhỹr xwýnhnta

kamã ixte amnhĩ no kuhõnh kaxyw hwÿr inhmã anẽ pa ma hwÿr tẽ nẽ kamã amnhĩ no kuhõ nẽ ixrĩt mex kurê kumrẽx. Anẽ.

¹² Hãmri nhũm mẽ kuma nẽ kãm:

—No nhÿhÿm na ato mex xwÿnhja ma tẽ? Anẽ.

Hãmri nhũm mẽ kãm:

—Konẽn. Ixte nhÿhÿm htẽm xà hkõt omunhre hã. Anẽ.

¹³ Hãmri nhũm mẽ kuma nẽ ma Par-ijew nhõ xwÿnhjê hwÿr o mõi nẽ mẽ kãm harẽ. ¹⁴ Nẽ mẽ kãm:

—E ot pa mẽ awÿr jahti ho tẽ. Na xep Jejsja jarãhã akupÿm kãm no ho mex. Mẽ panhõ arĩgromnu htã nhũm hã no ho mex. Anẽ.

¹⁵ Hãmri nhũm mẽ tee ri mẽ kuma nẽ myta pumu nẽ kãm:

—E mẽ inhmã amnhĩ jarẽ. Tanhmã na ka pre we amnhĩ to nẽ anohkre nẽ akrĩ htã ra ano mex nẽ? Anẽ.

Hãmri nhũm mẽ kãm:

—Nà na pre Jejs gyw o inhno kukõ nẽ inhmã anẽ pa gõi ho amnhĩ no kuhõ nẽ ixrĩt kurê kumrẽx. Anẽ.

¹⁶ Hãmri nhũm mẽ kuma nẽ tee ri Jejs ã axpẽn kukjêr o kuhê nẽ axpẽn mã harẽnh o:

—Kwa mẽ panhõ arĩgromnu hã kot ho mex jakamã kêp Tĩrtũm rũm mẽ pahwÿr wrÿk xwÿnh kêt. ãm kot amnhĩ tomnuj xwÿnh kênã. Anẽ.

Nhũm mẽ hkwyjaja harẽnh o:

—Kwa nà. Kot amnhĩ tomnuj xwÿnh ronhÿx àhpumunh tÿx kõt no ho mex kêt nẽ. Anẽ.

¹⁷ Hãmri nẽ hpãnhã no mex xwÿnhhta mã kãm:

—No ka? Ate kot ano ho mex xwÿnh ã amnhĩ tã harẽnh jakamã mẽhõ hã na ka hkamnhĩx? Mẽhõ na wehe? Anẽ.

Hãmri nhũm mẽ kãm:

—Konẽn. Mãn kêp Tĩrtũm kapêr jarẽnh o ri mẽ pa xwÿnh mãn. Hã na ã inhno ho mex anẽ. Anẽ.

¹⁸ Hãmri nhũm mẽ tee ri kuma nẽ axpẽn mã:

—Kwa pẽr aa nohkre hkêt kênã. Na pre ãm amnhĩ to hẽx o pa. E kwa pu mẽ amnhĩ wÿr katorxà nẽ hipêêxà wa hã karõ kê wa man tẽ nẽ tanhmã mẽ pamã harẽnh to. Anẽ.

Hãmri nẽ wa hã karõ ¹⁹ nhũm wa mẽ hwÿr tẽn axà nhũm mẽ wa kãm:

—Pa. E mẽ inhmã mẽmoj jarẽ. Xà we wa akrata na ãm ja nà? Xà tãm na ka hte wa nohkre nẽ kator ã harẽ? Kwa tanhmã na we amnhĩ to nẽ ra rĩt mex? Anẽ.

²⁰ Hãmri nhũm wa mẽ kãm:

—ÿÿ wa ixkra kênã. Na pre wa ixpê nohkre nẽ kato. ²¹ Tã ra tanhmã amnhĩ to nẽ ra rĩt mex. No wa ixte kot ho mex xwÿnhhta pumunh kêt. Kwa mẽ tãm mãn hkukja nẽ ama. Ra àptàr kênã. Kê tãm mãn mẽ amã tanhmã amnhĩ jarẽnh to ka mẽ ama.

²² Anhÿr o mẽ kãm wa hkrata jarẽ. No ãm wa kãm mẽ uma nẽ ã mẽ kãm kapêr anẽ nẽ mẽ kãm Jejs nhĩxi jarẽnh kêt nẽ. Na pre Parijew nhõ xwÿnhjaja ra Jejs nẽ mẽ kãm kapêr nẽ mẽ kãm:

—Ka mẽ atõ Tĩrtũm kot mẽ pakaxyw Jejs xãm ã harẽ hãmri nẽ axte Tĩrtũm kapêr o mẽ ahkre xà hã ixkreja wÿr agjêx kêt kumrẽx nẽ rĩ amnhĩ pumu.

²³ Anhÿr o nẽ mẽ hkurê jakamã nhũm wa mẽ umaj ã mẽ kãm hkra jarẽnh anẽ nẽ kot ho mex xwÿnh nhĩxi jarẽnh kêt nẽ. ²⁴ Hãmri nhũm mẽ axte amnhĩ wÿr no mex xwÿnhhta ã karõ nẽ kãm:

—Kwa akatàt kõt mẽ inhmã amnhĩ jarẽ. Ate kot ano ho mex ã harẽnh xwÿnhhta na kot amnhĩ tomnuj pix o pa xwÿnh kênã kot kêt ano ho mex. Jakamã kwa Tĩrtũm noo mã akatàt kõt mẽ inhmã amnhĩ jarẽ nẽ axêx kêt nẽ. Anẽ.

²⁵ Hãmri nhũm mẽ kãm:

—Ko ixte ja hã omunh kêt. ãm ja pix na ixte omunh. Na pa pre inhno hkre nẽ ri ixpa htã ra ixrĩt mex nẽ. Anẽ.

²⁶ Hãmri nhũm mẽ tee ri kot amnhĩ jarẽnhja ã kuma nẽ kãm:

—No tanhmã na we mytita amnhĩ to nẽ amã ano ho mex? Anẽ.

²⁷ Hãmri nhũm tee ri axte mẽ kot hã hkukjêr ã mẽ kuma nẽ mẽ kãm:

—Kwa ra ixte mẽ amã ãm hãmri amnhĩ jarẽnh griã. Tã ka mẽ inhma nẽ ãm inhma nẽ arĩ hã ixkukja. Mãn ka mẽ amã hkõt amnhĩ xunhwÿr prãm hã na ka mẽ aprĩ hã ixkukja nà? Mẽ ate kot amnhĩ nhĩpêx ã aprĩ

hã harēnh mar nē hkôt amnhĩ xunhwÿr prãm xaj na ka mē aprĩ hã amã harēnh prãm nē. Anē.

²⁸ Hãmri nhũm mē tee ri kuma nē kamã gryk nē. Nē hã kãm akir nē kãm:

—Tk. Ka na ka hte kapēr kôt amnhĩ nhĩpêx. No kêt mē pajaja na pa htem finat Mojes kapēr kôt pix mã amnhĩ nhĩpêx. ²⁹ Mojes mã na pre hte Tĩrtũm kapēr o pa. Jakamã pa htem ãm hkôt pix mã amnhĩ nhĩpêx o ri ixpa. No ate kot ano ho mex ã harēnh xwÿnhhta mē ixte omunh kêt. Nē mēhõ nhỹ hã kot tanhmã amnhĩ nhĩpêx to ho pa xwÿnhja mē ixte omunh kêt. Anē.

³⁰ Hãmri nhũm tee ri mē kuma nē mē kãm:

—Kwa kot inhmã inhno ho mex nhũm ra ixrĩt mex tã ka mē tee ri hkukamã ajamaxpēr nē mēhõ nhỹ hã kot ã amnhĩ nhĩpêx anhÿr o pa hã omunh kêt ã amnhĩ jarē. ³¹ Mē pahte Tĩrtũm kot amnhĩ nhĩpêx ã omunh mex. Koja mēhõ kot amnhĩ tomnuj xwÿnh mēmoj tã kuwÿ nhũm kuma nē ãm kuma. No kêt mē kot hkôt ri amnhĩ nhĩpêx xwÿnhjaja. Nē mē kot kãm mex o mex ã harēnh xwÿnhjaja na htem mēmoj tã kuwÿ nhũm mē kuma nē mē kãm tanhmã mēmoj nhĩpêx to rÿ mē kãm mēmoj gō. ³² Tã aa mē pahte mēhõ kot mē no ho mex ã harēnh mar kêt tã nhũm ã Jejus inhmã inhno ho mex anē. ³³ Kêp Tĩrtũm kwÿ hkêt ronhÿx pre inhno ho mex kêt nē. Anē.

³⁴ Hãmri nhũm mē kuma hãmri nē kãm:

—Tk. Kwa pēr ãm akator kôt ate amnhĩ tomnuj o ri apa htã na ka ã mē inhmã akapēr anē. Kwa ixkreja rũm akato nē ma atēm kurē kumrêx.

Anhÿr o kãm kapēr hãmri nē mē amnhĩ nē hano nhũm kato nē ma tē.

³⁵ Tã nhũm Jejus ra mē kot amnhĩ nē hanor ã harēnh ma nē ma hapēr o tē nē nhÿri omu. Hãmri nē amnhĩ tã hkukja nom te nhãm mēhõ hã hkukjêr pyrã nē kãm:

—Pa? Xàn ka ra Tĩrtũm kot mē awÿr mēnh xwÿnhhta amnhĩ kaxyw hkôt ajamaxpēr nà? Anē.

³⁶ Hãmri nhũm kormã kot no ho omunh kêt jakamã kêp Jejus ã omunh

kêt nē. Na pre kormã no hkre nē ãm kapēr pix ma. Tã ra akupÿm rĩt mex nom kormã no ho omunh kêt nē. Jakamã nhũm Jejus hwÿr tē nē ã kãm kapēr anē nhũm omu nē kormã kêp Jejus ã omunh kêt nē kãm:

—Tÿ kot kaj inhmã ahkre pa omu nē hkôt amnhĩ xãm kurē kumrêx. Anē.

³⁷ Hãmri nhũm kãm:

—Kwa paa. Ixte amã ixkapēr xwÿnhhta pa na pa. Anē.

³⁸ Hãmri nhũm kãm:

—Kwa xôwehe Pahihtĩ? Nà kot paj amnhĩ kaxyw akôt pix mã ijamaxpēr nē akôt pix mã amnhĩ nhĩpêx o ri ixpa. Anē.

Hãmri nē kutã hkôn krã ho tēm nē nhỹ nē kãm mex o mex ã harēnh o nhỹ. ³⁹ Hãmri nhũm Jejus kãm:

—Nà ixte mē apiitã tanhmã mē ajarēnh to kaxyw na pa pre kaxkwa rũm man mē awÿr wrÿ. Ahpÿnhã mē amã ixprãm xwÿnhjê jarēnh nē ahpÿnhã mē kãm ixprãm kêt xwÿnhjê jarēnh kaxyw. Mē kãm ixprãm kêt xwÿnhjaja kot hprĩ hã Tĩrtũm kapēr mar mex kêt tã na htem htÿx ri kot mar mex ã amnhĩ jarēnh o pa. Jakamã te mē nohkre xwÿnhjaja kot amnhĩ nhĩpêx pyrãk. Nom koja mē Tĩrtũm kapēr ma nē ixkôt amnhĩ xunhwÿr japêr. Hãmri nē te ra rĩt mex pyrãk o amnhĩ nhĩpêx. Jao ra hprĩ hã Tĩrtũm kapēr mar mex o pa. Anē.

⁴⁰ Nhũm pre ã Jejus kãm kapēr anē. Nhũm Parijew nhõ xwÿnh kwÿjaja kot kuri mar o kuhê xwÿnhjaja ã kapēr anhÿr ã kuma nē amnhĩ tã kãm:

—Kwa nà. Xà we mē pajaja na ka ã mē inhnohkre hã mē ijarēnh anē? Xà mē ixte ixprĩ hã Tĩrtũm kapēr mar mex kêt ã na ka mē ijarē nà? Anē.

⁴¹ Hãmri nhũm mē kãm:

—ÿÿ kop apu mē ate aprĩ hã kapēr mar mex kêt ã amnhĩ jarēnh ronhÿx ja mē amã mex nē. Tã mē ate aprĩ hã mar mex ã amnhĩ to axêx o apa jakamã na ka mē ra amnhĩ tomnuj tÿx nē. Na hte Tĩrtũm ja hã mē apumu nē amnhĩm mē ate amnhĩ tomnuj xwÿnh ã mē ajarē. Anē.

10

ôwêhti jarênh

Matêwre 9.36, 12.11-12; Rukre 15.3-

7

¹ Nhũm Jejus arĩ Ijaew mã kapêr nê mẽ kãm:

—E pa mẽ amã awjarê ka mẽ inhma nê amnhĩ krã him haxàr tỳx nê ho apa. Mẽ hkrit ôwêhti kot paj mẽ amã harê ka mẽ inhma. Na hte ôwêhti jamãr o pa xwỳnhjaja ôwêhti apkur kaxyw mẽ o pa hãmri nhũm kamàt nhũm akupỳm kahê hwỳr mẽ o pa. Kahê jakwakreja ãm pixii. Tã koja mēhō kahê xà hkôt hwỳr àr kêt nê axtem nê tē nê nhỹhỹnh kahê hã api nê ôwêhti hwỳr àr japêr nhũm mẽ omu nê kot hkwȳ ho àhkĩnh ã omunh kurê kumrêx.

² —No ôwêhti jamãr o pa xwỳnhja na hte mẽ kurom katàt kôt kahê jakwakre rũm ôwêhti hwỳr agjê.

³ Nhũm kahê xà jamãr xwỳnhja amnhĩ wỳr omu nê kãm kahê xà rēnh kurê kumrêx nhũm axà. Na hte apkati mẽ ma nhỹhỹm apkur kaxyw mẽ o pa. Nê nojarêt nê mẽ kãm akir. Ahpỳnhã tanhmã mẽ hixi kute hã mẽ omunh xà hkôt mẽ kãm àkjêr o pa. Hãmri nhũm mẽ kuma nê hwỳr mra nê hã pikuprōnh pa nhũm mẽ ho hapôj nê ma nhỹhỹm ri mẽ apkur kaxyw mẽ o pa. ⁴ Ma mẽ apkur kaxyw nhỹhỹm mẽ o pa. Nhũm ôwêhti ra kot kapêr mar mex jakamã ma àmnhĩx ri hkôt apkur o pa.

⁵ —Na hte hamãr o pa xwỳnh pix kapêr ma nê hkôt pa nê nhãm mēhō hkôt ri pa hkêt nê. Kot kapêr mar kêt jakamã tee ri kuma nê umaj axkakhũm nê hprôt nê ma mra. Na hte ôwêhti ã amnhĩ nhĩpêx anê. Anê.

Jejus te kêp ôwêhti gjênh xà hã hakwakre pyrãk

⁶ Nhũm pre ã Jejus mẽ kãm ujarênh anê. Nê ujarênhja kamã amnhĩ kwỳjê jarê nê mããnēn tãm amnhĩ jarê. Nom mẽ amnhĩ tã kuxi nê mẽ kãm amnhĩ jarênh o te ho ôwêhti jarênh pyrãk nhũm mẽ tee ri kuma nê mar mex kêt nê. ⁷ Jakamã nhũm axte mẽ kãm awjarê nê mẽ kãm:

—E pa ixprĩ hã mẽ amã ixujarênhja jarê ka mẽ inhma. Te ixpê ôwêhti jagjênh xà hã hakwakre pyrãk. Kwa mẽ ja ma nê amnhĩ krã him haxàr tỳx nê. ⁸ Na pre ra ixkukamã mẽ ohtō nê te ãm hãmri mẽ amã Tĩrtũm kapêr jarênh pyrãk o mẽ akôt ri pa. Nom mẽ amã hêx o pa. Te mẽ kot ôwêhti o àhkĩnh xwỳnhja kot amnhĩ nhĩpêx pyrãk. Nom na hte ôwêhtija ãm hamãr xwỳnh pix kapêr ma nê nhãm mēhō kapêr mar kêt nê. Ja pyrã nê mẽ kot ixkôt amnhĩ xunhwỳr xwỳnhjaja na htem Tĩrtũm kapêr o hêx o mẽ pa xwỳnhjê ma nê ãm mẽ kuma nê mẽ hkôt amnhĩ nhĩpêx kêt nê. Na htem ãm ixkapêr pix ma nê ixkôt pix mã amnhĩ nhĩpêx o pa.

⁹⁻¹⁰ —Te ixpê ôwêhti gjênh xà hã hakwakre pyrãk. Na hte ôwêhti mẽmoj punuj pymaj kahê hwỳr agjê nê kamã mex nê kuhê. Nê kurũm hapôj nê ma apkur o pa. Ja pyrã nê mẽ kot ixkôt amnhĩ xunhwỳr xwỳnhjaja koja mẽ ixkukwak ri hkĩnh nê mex nê hamakêtkati nê pa ho pa. Nê nhỹrmã Tĩrtũm mẽ wa ixri htĩr tũm nê pa ho pa. Ja kaxyw na pa pre man mẽ awỳr pika hwỳr wrỳ.

—No ôwêhti ho àhkĩnh xwỳnhjaja na htem amnhĩm ho ahkĩ nê kupa nê ma amnhĩm o pa. Tã mẽ kot Tĩrtũm kapêr o hêx o mẽ pa xwỳnhjaja te mẽ kot jajaja kot amnhĩ nhĩpêx pyrãk. Anê.

Jejus te kêp ôwêhti jamãr xwỳnh pyrãk

Eprêw 13.20; Apokarip 7.17

¹¹ —Nê ôwêhti jamãr mex xwỳnhja koja nhỹri mēhō kêp ôwêhti hōxpĩr kaxyw hwỳr htēm ã omu nê wa hã axpu. Nhũm ho àhkĩnh mã xwỳnhja ôwêhti jamãr xwỳnh pĩ nhũm ôwêhti nê ty. Tã ixkwỳjaja hamakêtkati nê mex nê pa kaxyw na pa pre amnhĩ grōnh kôt mẽ hwỳr wrỳ. Jakamã kot paj te ôwêhti jamãr xwỳnh kot amnhĩ nhĩpêx pyrãk o amnhĩ nhĩpêx.

¹²⁻¹³ —Nê na htem tōhã ôwêhti jamãr xwỳnh nhỹhỹm pa kaxyw nê mēhō mã amnhĩre nhũm wakre kamã kãm hkrit jamãr o pa. Kãxpore pix prãm

xàj kãm hamãr o pa. Jakamã koja nhỹhỹnh mry xoprê ra hwýr kato nhũm amnhĩ wýr omu nê umaj ôwêhti re nê ma hprôt nê tẽ. Kãm ôwêhti japê hkêt ãm kãm htír pix prãm xàj ôwêhti mã hamaxpêr kêt nê rer pa nê ma tẽ. Nhũm mry xoprêta ôwêhti hwýr hprôt nê hkwy pynê nhũm hkwy umaj axkakhũm nê hprôt nê ma mra. No kêt pa na te ixte ôwêhti mã hamaxpêr kêt nê kot rer nê ma hprôt nê htẽm xwýnhhta pyrãk kêt. Kot paj aa ixkwýjê rer kêt nê. Kot paj mẽ hkôt ixpa ho ixpa rãhã nê.

14-15 —Te ixte ôwêhti jamãr xwýnh mex pyrãk jakamã na pa hte urãk nê ahpỹnhã mẽ kot ixkôt amnhĩ xunhwýr xwýnhjê pumunh mex o ri mẽ hkôt ixpa. Te mẽ kêp ixkrit ôwêhti pyrãk nhũm te ixpê mẽ hamãr mex o ri mẽ hkôt ixpa nê aa mẽ rer kêt xwýnhhta pyrãk.

—Nê mẽ kot ixkôt amnhĩ xunhwýr xwýnhjaja ra mẽ ixte amnhĩ nhĩpêx kôt axpên pumunh mex. Nê mẽ inhmã axpên japêê. Te Inhĩpêêxã mẽ wa inhmã axpên japê pyrãk. Tã kot paj nhỹrmã mẽ nê tanhmã amnhĩ nhĩpêx to.

16 —Mẽ kot ixkôt amnhĩ xunhwýr xwýnhjaja piitã kêp Ijaew pix kêt. Koja Ijaew kêt xwýnh kwýjaja mãânên ixkapêr ma nê ixkôt amnhĩ xunhwý nê ixkôt amnhĩ nhĩpêx. Jao ra te kêp ixkrit ôwêhti pyrãk. Tã kot paj mẽ ho ixpimràa tã mẽ ho tipxi nê mẽ hamãr o ri mẽ hkôt ixpa.

17 —Nê mẽ kot ixkôt amnhĩ nhĩpêx o mẽ pa xwýnhjaja mẽ mex kaxyw na pa pre amnhĩ grõnh kôt mẽ hwýr wrý. Jakamã kot paj nhỹrmã mẽ nê ty. Tã inhmã mẽ nê ixtyk puma hkêt jakamã na Inhĩpêêxã kãm ijapêê. Koja akupým ixto ixtír. 18 Kop apu inhmã mẽ nê ixtyk prãm kêt ronhỹx mẽ kãm ixkurê xwýnhjaja tee ri kãm ixpír prãm kaprý. Nom ixte mẽ kot ixkôt amnhĩ nhĩpêx xwýnhjê nê amnhĩ grõnh kôt mẽ hwýr ixwrýk kênã. Jakamã kot paj arĩ mẽ kãm amnhĩ grõnh kôt amnhĩ gõ nê arĩ mẽ

kãm xa nhũm mẽ ixpĩ. Nom kot paj akupým ixtír. Mẽhõ koja tanhmã ixto nê ixpír o ixpĩ? Nà koja mẽhõ ixpír o ixpír kêt nê. Inhĩpêêxã nhỹ hã kot paj nhỹrmã ã amnhĩ nhĩpêx anê nê akupým ixtír. Anê.

Nhũm pre ã Jejus mẽ kãm amnhĩ jarênh anê. 19 Hãmri nhũm Ijaew tee ri ã kot amnhĩ jarênh anhýr ã kuma nê kê axte axpên kwým ri tanhmã harênh to ho kuhê. 20 Nê kamã mẽ hkwyjaja harênh o:

—Tk. Kwa mẽ mar kêt nê. Satanasti nhỹ hã na hte htýx ri ã mẽ pamã amnhĩ jarênh anhýr o pa. Anê.

21 Hãmri nhũm mẽ hkwyjaja mẽ kuma nê mẽ kãm:

—Nà kot anhýr kêt. Xà na htem Satanasti nhỹ hã ã kapêr mex anê nê ã mẽ no hkre xwýnhjê ho mex anê? Nà kot anhýr kêt. Satanastija ukaprĩre hã. Anê.

Ijaew nhõ pahijaja kot Jejus kaga hã mẽ harênh
Juãw 5.18, 8.59

22 Tã nhũm ra amgrã hapêx pa mẽ ixpê Ijaew akupým krĩ pê Jeru-jarê kamã axpên wýr akuprõ. Axte mẽ ixte mẽ ixkĩnh kaxyw axpên wýr akuprõ. Amnepêm mẽ inhĩgêjtaja kot akupým Tirtũm mã amnhĩ jarênh xà hã ixkre ho mex pa nê ho Tirtũm wýr mã hamaxpêr nê hã ixkĩnh ã arĩgroja ã pa mẽ hwýr akuprõ. 23 Hãmri nhũm Jejus ma mẽ ixkôt Tirtũm mã amnhĩ jarênh xà hã ixkreta wýr tẽ no ãm hwýr àr kêt nê. ãm ixkre hpu hã kahê xà kape hã ri pa. Mẽ kot kãm: “Pahi finat Sarumãw pa xà” anhýr xwýnhhta kamã ri pa. 24 Hãmri nhũm kê ra mẽ inhõ pahijaja omu nê hã akuprõ nê hêx rom kãm kapêr nê kãm:

—Kwa tokyx aprĩ hã mẽ inhmã amnhĩ jarê. Xà apê Tirtũm Kra na ka nã? Xà ka na pre Tirtũm mẽ ixkaxyw axãm? Kwa aprĩ hã mẽ inhmã amnhĩ jarê pa mẽ ama. Mon ka hte aprĩ hã mẽ inhmã amnhĩ jarênh kêt nê? Na pa mẽ tee ri ate amnhĩ nhĩpêx ã apumu nê akukamã ijamaxpêr rũnh kumrêx o ri ixpa. Xà ãm hãmri apê

Tirtūm kot mẽ ixkaxyw axām xwýnhnta na ka? Aně.

²⁵ Hāmri nhūm mẽ kām:

—Tk. Ra ixte mẽ amā amnhĩ jarēnh xohtō htā ka mẽ inhma nē ām inhma. Na pa hte xatā Inhĩpēêxà nhỹ hā mẽ amā mẽ ate aa mẽmoj pumunh kêt kwý ho anhỹr o ri ixpa ka mẽ ja hā ixpumu nē ām ixpumu nē ixkôt ajamaxpēr kêt nē. ²⁶ Mě apê ixkwý hkêt jakamā na ka mẽ ixkôt ajamaxpēr kêt nē. Te mẽ apê ixkrit ôwēhti pyrāk kêt. ²⁷ Ixkwýjaja na te ho ôwēhti kot hamār xwýnh kapēr mar nē hkôt ri pata pyrā nē ixkapēr ma nē ixkôt amnhĩ nhĩpêx o pa. Ixpê mẽ õ pahihtĩ hā mẽ kot ixpumunh mex jakamā na htem ixkôt amnhĩ nhĩpêx mex o pa. Ixte ja hā mẽ omunh mex nē. ²⁸ Koja mẽ nhỹrmā htyk tā no ām ixkukwak ri akupým htĩr hāmri nē Tirtūm mẽ wa ixri htĩr tūm nē pa ho pa nē aa hapêx kêt nhūm mēhō ixpê mẽ utār kêt nē. Te inhĩhkra hpo nhĩpôk ri mẽ hkrĩ nhūm te mẽ hā inhĩhkra pikamýr pyrāk nhūm mẽmoj tee ri ixpê tanhmā mẽ ho hprām kaprý. ²⁹⁻³⁰ Inhĩpēêxà tām kot inhmā mẽ õr kēnā. Hihtýx o kot mẽ piitā mẽ hakrenh par jakamā koja mẽ inhĩhkra po nhĩpôk ri hkrĩ nē määnēn Inhĩpēêxà nhĩhkra hpo nhĩpôk ri hkrĩ. Te ixpê Inhĩpēêxà Tirtūm pyrāk jakamā mēhō kot wa ixpê wa inhĩhkra rūm mẽ utā? Nà amrakati kumrēx.

Anhỹr o mẽ kām amnhĩ jarē.

³¹ Hāmri nhūm mẽ te kēp Tirtūm pyrāk ā amnhĩ jarēnh ā kuma nē kamā gryk týt nē. Hāmri nē kot kēn o htak kaxyw ra kaxyw hkwý kawrà ho ri hprôt.

³² Hāmri nhūm amnhĩ tā mẽ omu nē mẽ kām:

—Kwa ra ixte Inhĩpēêxà nhỹ hā mẽ amā aa mẽ ate mẽmoj pumunh kêt kwý ho anhỹr rax o ixpa. Jao tanhmā mẽ ho mex to pix o ri ixpa. Tā ka mẽ axtem nē ā inhĩpêx anhỹr kaxyw. Aně.

³³ Hāmri nhūm mẽ kām:

—Nà ā ate amnhĩ nhĩpêx anhỹr ja mýrapê hkêt. Kêt apê mẽ inhĩõ htā ri axtem nē te apê Tirtūm pyrāk ā amnhĩ jarēnhja mýrapê na pa mẽ kēn o atak

kaxyw. Na pu htem ā amnhĩ jarēnh anhỹr o papa hkêt nē. Aně

³⁴ Hāmri nhūm mẽ kām:

—No ām hāmri ixte ā amnhĩ jarēnh anhỹr kēnā. Tanhmā na Tirtūm kapēr ā kagà htūm kot ja jarēnh to wehe? Na pre Tirtūm Ijaew nhõ pahijê mã kapēr nē mẽ kām:

E mẽ ate inhỹ hā mẽ ho amnhĩptār jakamā te mẽ apê pa ixpê Tirtūm pyrāk.

Anhỹr o kot mẽ harēnh. ³⁵ Ām hāmri na Tirtūm kapērja. Tām kot ā mẽ harēnh kot anhỹr. Mě kot ý hā mẽ kām kapēr jakamā te mẽ kēp urāk ā mẽ harēnh anhỹr kēnā. ³⁶ Tā tām kot ā mẽ harēnh anhỹr tā hpānhā mẽ akaxyw pa ixpê Kra hā ixām nē mẽ awýr inhménh nhūm ixwryk nē ixpê Kra hā amnhĩ jarēnh tā ka mẽ ja hā inhma nē ām inhma nē ixkôt ajamaxpēr kêt nē. Kwa mon ka mẽ ja hā ixpumunh nē ixkôt ajamaxpēr kêt nē? ³⁷ Kot paj Inhĩpēêxà mẽ wa ixàhpumunh kôt mẽ amā aa mẽ ate mẽmoj pumunh kêt kwý ho anhỹr kêt ka mẽ ja hā ixpumu nē mẽ rĩ kam nē māmri ixkôt ajamaxpēr kêt nē. ³⁸ Mě amā ixkapēr mar prām kêt tā kwa ixte Tirtūm pyrā nē aa mẽ ate mẽmoj pumunh kêt kwý ho anhỹr ā ixpumu nē Inhĩpēêxà mẽ wa ixte amnhĩ nhĩpêx tipxi hkôt ajamaxpēr. Aně.

³⁹ Hāmri nhūm mẽ kuma nhūm ja mẽ kēp omnuj týt nē. Te kot Tirtūm pyrāk ā amnhĩ jarēnhja nhūm mẽ kēp omnuj nē. Jakamā nhūm mẽ ra kot unēnh nē ixkre rūm ho kator nē kapôt ā mēnh nē kēn ho htak kaxyw nhūm kê axte mẽ kēp akunok nē ma nhỹhým tē.

Jejus kot Jotāw nhĩhkjê hā ri pa hā harēnh

⁴⁰ Tā nhūm Jejus ma tē nē pyhti pē Jotāw ā rē. Pa mẽ hkôt ri ixpa ho ixpa xwýnhjaja ma hkôt mō. Finat Juāw Paxis kot Tirtūm mã wam mẽ hkrā kumrār o pa xàta wýr. ⁴¹ Hāmri nhūm mẽ ohtō nē mẽ ixwýr mra nē Jejus kapēr ma nē kot tanhmā amnhĩ nhĩpêx to hā omunh o kuhê. Hāmri

ně hã tanhmã axpën mã kapër to ně axpën mã:

—Kwa ãm hãmri na pre finat Juāw Paxisja mẽ pamã Jejus jarënh o pa. Aa kot mẽ pamã mẽ pahte mẽmoj pumunh kêt kwý ho anhÿr kêt tã ãm xatã hkukamã mẽ pamã harënh o pa. Kêp Tirtũm Kra hã Juāw rom hihtýx o hihtýx ã harënh o pa. Nẽ Tirtũm kot mẽ pakaxyw ãm xwýnh ã nhũm mẽ pamã harënh o pa. Nã ãm hãmri na pre ã mẽ pamã harënh anẽ. Anẽ.

⁴² Hãmri nhũm mẽ ohtô ně amnhĩ kaxyw Jejus kôt hamaxpër ně hkôt amnhĩ xunhwý.

11

Rajare htyk jarënh *Juāw 5.21-29, 6.40*

¹ Rôm nhũm krĩ pẽ Petãn kamã mẽhõ my pẽ Rajareja ra à htýx ně nõ. Na pre htõx wa hamëxkrut. Hõ kêp Matre nhũm hõ kêp Marir. ² Marir na pre kormã arĩgro hõ hã kot Jejus o mex kaxyw mẽ hkuxwaxà ho hkuxwa ně amnhĩ kĩ ho hpar põnh kaxyw. Nom kormã. Jakamã nhũm wa hkamyja wa kêp à htýx ně nõ. ³ Hãmri nhũm wa tee ri hkukamã hamaxpër ně ma krĩ hõ hwýr Jejus wýr mẽhõ mẽ nhũm ma hwýr tẽ. Nẽ hwýr pøj ně omu ně kãm:

—Pa Pahihti. E ot pa awýr tẽ. Na ra amã akrãmnhwý japê htýx xwýnhnta à htýx ně nõ nhũm htõx wa tee ri hkukamã hamaxpër ně awýr inhmẽ pa tẽ. Kwa tokyx pu ma hwýr tẽ ka akupým wa kãm ho mex nà? Anẽ.

⁴ Hãmri nhũm kuma ně kãm:

—Nã à htýx ně nõr tã koja akupým mex. Mẽ kot akupým mex ã harënh mar hãmri ně Tirtũm mẽ wa ixtã hpijaàm ně wa ixihtýx o wa ixihtýx ã wa ixpumunh kaxyw na ã à htýx ně nõr anẽ. Nẽ pa ixpê Tirtũm Kra hã akupým ho mex ã ixpumunh ně ixkôt hamaxpër kaxyw na ã à htýx ně nõr anẽ. Anẽ.

⁵ Na pre Jejus kãm Rajare mẽ htõx wa mẽ hapê ně. ⁶ Tã à htýx ã harënh ma ně hwýr mõr tokyx anhÿr kêt ně. Pa mẽ arĩ amnhĩm hikranh xà kamã

ri ixpaja o ixtã axte apkati axkrut. ⁷ Hãmri nhũm rĩ kormã hwýr nojarêt ně mẽ inhmã:

—E ma pu mẽ jarãhã akupým Jutej kamã Rajare hwýr mõ ně omu. Anẽ.

⁸ Hãmri pa mẽ tee ri ja hã kuma ně kãm:

—Kwa ham mẽ panhõ pahijaja kot kën o atak o apĩr mã tã ka ra akupým mẽ hwýr akrà. Kwa pu mẽ hwýr pamõr kêt ně nà? Anẽ.

⁹ Hãmri nhũm mẽ inhmã:

—Nã koja mẽ kormã tanhmã ixto hkêt ně. Kormã ixte Tirtũm mã tanhmã amnhĩ nhĩpêx to jatur xàm mẽnhre hã. Te ixte kormã arĩgro hã ixrĩt mex ně ixpa pyrà ně kormã Tirtũm kot mẽmoj tã inhmã karõ xà hkôt pix mã tanhmã amnhĩ nhĩpêx to ho ri ixpa. ¹⁰ Tã kot paj hatur xàm kumẽ nhũm te myt àr nhũm ra kamát kô pyræk nhũm mẽ rĩ kormã tanhmã ixto ně ixpĩ. Jakamã e ma pu mẽ hwýr. Koja mẽ tokyx tanhmã ixto hkêt ně. Anẽ.

¹¹ Hãmri ně mẽ inhmã Rajare jarënh o:

—Na mẽ pahkrãmnhwý Rajareta ra gõr ně nõ. Tã kot puj mẽ ma hwýr mõ pa kumra. Anẽ.

¹²⁻¹³ Ra htyk ã omunh tã ã mẽ inhmã harënh anẽ. Pa mẽ kuma ně ixtýx ho ãm õt ně nõr ã hkamnhĩx ně kãm:

—Kwa mãn ra akupým amnhĩ kãm hamak o mõr jakamã na ra amnhĩ krit ně gõr ně nõ. Kwa pu mẽ awjanã ně hwýr pamõr kêt ně nà? Anẽ.

¹⁴ Hãmri nhũm mẽ inhma ně hprĩ hã mẽ inhmã harẽ ně mẽ inhmã:

—Nã na pre ty. ¹⁵ Nom kormã à ně hikwýta ã na pa hwýr inhmõr kêt ně. Tã kot paj ma hwýr mõ ně hã mẽ amã ixàhpumunh týx ã amnhĩ to amnhĩrĩt. Ka mẽ ja hã ixpumu ně amnhĩ kaxyw ixkôt ajamaxpër týx o ri apa. ã mẽ ate amnhĩ nhĩpêx anhÿr kaxyw na pa kormã à ně nõr ã hwýr inhmõr kêt ně. E ma pu mẽ hwýr. Anẽ.

¹⁶ Hãmri nhũm mẽ inhĩõ pẽ Tomas pihpohti tee ri ã kapër anhÿrja ã kuma ně mẽ inhmã:

—Tôe ma pu mẽ hkôt. Kê mẽ mamrĩ hkôt mẽ pahto hpimràatã mẽ panhĩmex pa ri. Anẽ.

¹⁷ Tã pa mẽ ma hkôt mẽ hwỳr mỗ nẽ ra Rajare nhõ krĩ hwỳr ixpôx o mỗ hãmri nẽ harẽnh ma. Ra htyk nhũm mẽ kot haxàr ã arĩgro pẽ kwat ã harẽnh ma. ¹⁸⁻¹⁹ Nhũm Matre mẽ Marir wa hkamy ho hamak xàj arĩ mỳr o hkrĩ. Jakamã nhũm Ijaew kwỳjaja Jerujarẽ rùm ma wa hwỳr mra. Mẽ kot wa kãm kapẽr nhũm tokyx akupỹm tãm wa hkrã kaxyw nhũm mẽ wa hwỳr mra. Wa õ krĩ pẽ Petãnja Jerujarẽ hwỳr ãm 3 kirõm pix jakamã nhũm mẽ ma wa hwỳr mra nẽ wa kuri wa kãm kapẽr o hkrĩ. ²⁰ Rõm nhũm Matre Jejus hpôx o mỗr ã harẽnh ma nẽ kànhmã xa nẽ man mẽ ixkutã tẽ. No nhũm Marir arĩ mỳr o nhỹ nẽ hkôt htẽm kêt nẽ. ²¹ Hãmri nhũm Matre mẽ ixkutã tẽ nẽ mẽ ixkaxpa nẽ Jejus pumu nẽ mỳr kamã kãm kapẽr nẽ kãm:

—Hêxta gàa nẽ Pahihti. Na pre ra wa ixkamy wa ixpê ty. Kop apu jar mẽ ixkôt ri apa ronhỹx pre htyk kêt nẽ. Xê mon ka pre we tokyx mẽ ixwỳr atẽmre hkêt nẽ? ²² Tã na pa arĩ akôt ijamaxpẽr tỳx nẽ. Kot kaj mẽmoj tã tanhmã Tĩrtũm wỳr to nhũm ama nẽ tanhmã amã mẽmoj to. Ra ixte ja hã apumunh mex kẽnã. Anẽ.

²³ Hãmri nhũm Jejus kuma nẽ kãm:

—Kwa tee ri ajamaxpẽr nẽ akapri hkêt nẽ. Koja akamy akupỹm war amã htĩr kãm ga. Anẽ.

²⁴ Hãmri nhũm kuma nẽ kãm:

—Ma koja anẽ. Nhỹrmã Tĩrtũm kot mẽ piitã akupỹm mẽ ho htĩr xà hã arĩgrota ã koja akupỹm htĩr. Anẽ.

Kamy akupỹm htĩr ã harẽnh mar tã Jejus kot akupỹm ho htĩr tokyx anhỹr ã hkamnhĩx kêt nẽ ã kãm kapẽr anẽ.

²⁵⁻²⁶ Jakamã nhũm kãm:

—Nà pa na ixpê akupỹm mẽ ho mẽ htĩr xwỳnh. Jakamã mẽ kot amnhĩ kaxyw ixkôt hamaxpẽr nẽ ixkôt amnhĩ xunhwỳr xwỳnhjaja koja mẽ htyk tã koja mẽ hkarõ Tĩrtũm mẽ wa ixri htĩr tũm nẽ mex nẽ pa ho pa.

Xà ate ja kaxyw ixkôt ajamaxpẽr tỳx nà? Anẽ.

²⁷ Hãmri nhũm Matre kuma nẽ kãm:

—Xê nhũm. Apê Tĩrtũm Kra hã na pre mẽ ixkaxyw axãm. Ka na pa htem amnhĩ wỳr akãm ijamak o ixpa. Anẽ.

Hãmri nhũm Jejus kãm:

—Nà ãm hãmri na ka ã ijarẽnh anẽ. E ma akupỹm tẽ nẽ atõx mã anẽ kêt tokyx man ixwỳr tẽ pa omu. Anẽ.

²⁸ Hãmri nhũm kuma nẽ ma akupỹm tẽ. Hãmri nẽ Marir wỳr axà nẽ kãm Jejus jarẽ. Kôt mẽ hkrĩ xwỳnhjê hkàx ã kãm harẽ nẽ kãm:

—An xê hãmri amỳr kêt nẽ. Na ra mẽ pajahkre xwỳnhta hpôx o mỗ nẽ mũtar nhỹ nẽ atã karõ. Anẽ.

²⁹ Hãmri nhũm kuma nẽ kànhmã xa nẽ ma mẽ ixwỳr htẽm kurê kumrẽx.

³⁰ Hãmri pa mẽ kormã krĩm ixpôx kêt nẽ. Arĩ Matreja Jejus wỳr htẽm xà kamã arĩ ixkrĩ. ³¹ Jakamã nhũm Matre ma tẽ nẽ Marir mã Jejus jarẽ nhũm kato nẽ man mẽ ixwỳr tẽ. Hãmri nhũm Jerujarẽ rùm wa hwỳr mẽ mrar xwỳnhjaja omu nẽ htỳx kot hkamy hã pika pumunh nẽ mỳr kaxyw htẽm ã hkamnhĩx nẽ man hkôt mra. ³² Hãmri nhũm Marir mẽ hkukamã mẽ ixwỳr tẽ nẽ Jejus pumu nẽ hpar pẽ tẽm nẽ kãm kapẽr pẽ hipô nẽ mỳr o nhỹ. Nẽ kãm:

—Hêxta gàa nẽ Pahihti. Na pre ra wa ixkamy wa ixpê ty. Kop apu jar mẽ ixkôt ri apa ronhỹx pre htyk kêt nẽ. Hô mon ka pre we tokyx man mẽ ixwỳr atẽmre hkêt nẽ? Anẽ.

³³ Hãmri nhũm Jejus kuma nẽ mỳr ã omu. Nẽ hkôt mẽ mrar xwỳnhjaja mẽ mỳr ã mẽ omu nẽ kãm mẽ hkapri nẽ.

³⁴ Hãmri nẽ mẽ kãm:

—Nhỹri na ka prem haxà? E mẽ hwỳr ixto tẽ pa omu. Anẽ.

Hãmri nhũm mẽ kuma nẽ ma hã pyka hwỳr mẽ ixto mỗ ³⁵ nhũm Jejus mẽ urak nẽ hwỳr mỳr o tẽ ³⁶ nhũm mẽ ja hã omu nẽ axpẽn mã:

—Kwa mãn kãm hapê htỳx. Hã na ho ama nẽ hwỳr mỳr o tẽ. Anẽ.

³⁷ Nom nhũm mẽ hkwỳjaja axtem nẽ mẽ kãm:

—Tk. Ra kot no hkre xwỳnhta o mex tã mo na we tokyx man kormã htĩr ri

hwÿr htēm nē omunh nē akupÿm ho mex kêt nē? Anē.

Jejus kot akupÿm Rajare ho htÿr ā harēnh

³⁸ Tā pa mē ra kēn kre kamā mē kot Rajare jaxàr xàta wÿr ixpôx o mō nhūm Jejus hkaprī nē hwÿr tē nē omu. Nhūm prem ra kēn rax o hitom ³⁹ nhūm omu nē mē kām:

—E mē akwÿjaja nhām inhmā nē kahē xà mē. Anē.

Hāmri nhūm Matre kuma nē tee ri hamaxpēr nē kām:

—Xē ma Jejus. Mē ri ā anhÿr kêt nē. Ra htyk ā arīgro kēp 4 kēnā. Mān ra hkatōk nē hkro htÿx kumrēx. Anē.

⁴⁰ Hāmri nhūm kuma nē kām:

—Kwa ri ā ajamaxpēr anhÿr kêt nē Matre. Na pa ra amā ixkapēr nē amā ixkapēr o: “Kot kaj amnhī kaxyw ixkôt ajamaxpēr tÿx nē. Hā kot kaj Tirtūm mē wa ixihÿtÿx o wa ixihÿtÿx xàja pumu.” Anhÿr o amā ixkapēr. Jakamā kwa ja kaxyw Tirtūm mē wa ixkôt mān ajamaxpēr tÿx nē hkêt wehe. Anē.

Hāmri nhūm kuma nē kām:

—Ma ām hāmri na ka inhmā akapēr. Ma kot paj kaxyw war amā ijamaxpēr tÿx nē. Anē.

⁴¹ Rôm nhūm mē kām nhām kēn jakwa kre kahē xà mē. Hāmri nhūm Jejus Tirtūm mā amnhī jarēnh kaxyw kànhmā kaxkwa hwÿr rīt nē kām:

—Pa Papaj. Nà na pa hte tanhmā mēmoj tā awÿr to ka inhma nē tanhmā inhmā mēmoj nhīpēx to. Amex o amex Papaj. ⁴² Na ka hte ā inhmā amnhī nhīpēx anē. Tā pa jajē noo mā ā amā ixkapēr anē. Ate inhmar nē tanhmā Rajare hto nhūm mē kot ja hā ixpumunh nē ixte anhÿ hā pix mā tanhmā amnhī nhīpēx to ho ri ixpa hā ixpumunh kaxyw. Nē ka ate mē hwÿr inhmēnh ā apumunh kaxyw. Anē.

⁴³ Nhūm pre ā Tirtūm mā kapēr anē. Hāmri nē kÿx pē Rajare mā kapēr nē kām:

—Pa Rajare. Kwa tokyx kànhmā nhÿ nē amnē mē ixwÿr tē nē akato. Anē.

⁴⁴ Puh nhūm akupÿm htÿr nē hkupu xà rāhā tē nē mē ixwÿr kato nē xa. Arī

hkuk nē ìhkra nē hpar kupu rāhā mē ixwÿr kato nē xa. Hāmri nhūm Jejus mē kām:

—Kwa mē atō nē kupu xà hpôt kê ma akupÿm ōrkwÿ hwÿr tē. Anē.

⁴⁵ Hāmri nhūm mē kot Marir mē Matre wa hwÿr mrar xwÿnh kwÿjaja ā Jejus kot Rajare nhīpēx anhÿr ā omu nē amnhī kaxyw hkôt hamaxpēr nē hkôt amnhī xunhwÿr kurē kumrēx.

⁴⁶ Nom nhūm mē hkwyjaja axtem nē omu nhūm ja mē kēp omnuj nē. Jakamā nhūm mē ma Parijew nhō xwÿnhjē hwÿr mra nē mē kām harē.

Mē kot Jejus pÿr ā amnhī grōnh

Matēwre 26.1-5; Makre 14.1-2; Rukre 22.1-2

⁴⁷ Hāmri nhūm Parijew nhō xwÿnhjaja tee ri Jejus kot akupÿm Rajare ho htÿr ā harēnh ma hāmri nē patre krāhtūmjē mē amnhī wÿr mē inhō juisti ho akuprō nē axpēn mā Jejus o kapēr punuj pē hā axpēn mar o hkrī. Hāmri nhūm mēhō mē kām:

—Kwa tanhmā kot puj mē ho? Na ra mē kām mēmoj pumunh kêt kwÿ ho anhÿr rax o pa. ⁴⁸ Kot puj mē ām omu nē tanhmā ho hkêt nhūm mē pahkwÿjaja kot ā amnhī nhīpēx anhÿr ā omu nē htÿx ām hāmri ā kot amnhī nhīpēx anhÿr ā hkamnhīx. Hāmri nē amnhī kaxyw hkôt hamaxpēr nē hkôt amnhī xunhwÿ. Jao ra amnhī kaxyw kēp mē ō pahihiti hā ām. Koja mē ā amnhī nhīpēx anē nhūm Rôm kamā pahihitija mē kot kator nē hpānhā Jejus xām ā harēnh ma. Hāmri nē gryk xàj mē pahwÿr ō pōristi hkwy rē nhūm mē pahwÿr mra nē mē panhīmex pa nē Tirtūm nhōrkwÿ grānh pa. Kwa tanhmā kot puj wem tokyx amnhī nē ho? Anē.

⁴⁹ Hāmri nhūm Kajpas mē kām kapēr. Kajpasja na pre amgrāja kamā kēp mēō patre nhō pahi maati. Jakamā mē kām:

—Nà na pa ra ijamaxpēr. Kwa mē inhma. ⁵⁰ Nà kot puj mē hpÿr tokyx anē kê tapxipix ty pu mē arī mÿrpe pahpiitā pajamakêtkati nē ri papa. Anē.

⁵¹ Nhūm pre ã mẽ kām kapēr anē. Nom amnhĩ krā hkôt ã mẽ kām kapēr anhỹr kêt nē. Arĩ kēp mẽõ patre krāhtūmjê nhõ pahi maati jakamã Tĩrtūm nhỹ hã Jejus kot Ijaew nē tykja kukamã ã harēnh anē. Nom ja hã amnhĩ pumunh kêt nē. ⁵² Na pre Jejus mẽ ixpê Ijaew pix nē htyk kêt nē. Krĩ piitã hkôt Tĩrtūm krajê nē na pre ty. Mẽ piitã mẽ kot axpēn to hkwý nē ri axpēn to pa kaxyw na pre mẽ nē ty. ⁵³ Hãmri nhūm ã Kajpas mẽ kām kapēr anē nhūm mẽ inhõ pahijaja kuma nhūm ja mẽ kām mex nē. Jakamã nhūm mẽ kot tanhmã Jejus ã àmnēnh to nhūm mẽ kot mẽ kām tanhmã hpĩr to kaxyw ã axpēn mar anhỹr o pa. ⁵⁴ Jakamã nhūm Jejus axte mẽ noo mã ri pa hkêt nē. Hãmri ma krĩ pē Epraĩ hwýr ma mẽõ. Pa mẽ hkôt ixpa ho ixpa xwýnhjaja ma hkôt ixpa. Epraĩja kapôt ã krĩ na pre. Jakamã pa mẽ ma hwýr mẽõ hãmri nē kamã ri ixpa.

⁵⁵ Tã nhūm arĩgro pē Pasja ra ahtêp o mẽõ. Amnepēm finat Mojes kot Ejit rūm mẽ panhĩgêjtjê kator mã hamaxpēr kaxyw na pa pre htem hã ixkĩnh kaxyw Pas ã Jerujarê hwýr akuprõ. Na pa pre htem hwýr pøj nē kamã Tĩrtūm noo mã mẽ inhmex kaxyw tanhmã amnhĩ nhĩpêx to.

⁵⁶⁻⁵⁷ Jakamã nhūm ra Ijaew ohtô nē ma Jerujarê hwýr pa. Nē kām Jejus pumunh prãm xaj Tĩrtūm mã amnhĩ jarēnh xà hã ixkre wýr mra nē hwýr agjê nē kamã hapêr nē axpēn mã:

—Kwa nok? Xà koja mẽ hpakĩnh wýr mōr kêt nē nà? Anē.

Nhūm Parijew nhõ xwýnhjê mẽ mẽ inhõ patre krāhtūmjaja haxwýja hapêr o kuhê. Nom mẽ kot axtem nē unê nē haxàr kaxyw. Jakamã mẽ kām hã karõ nē mẽ kām:

—E kēr ka mẽ nhỹri Jejus pumu nē man mẽ ixwýr mra nē mẽ inhmã harēnh kurê kumrêx. Anē.

12

*Marir kot Jejus kuxwa hã harēnh
Matêwre 26.6-13; Makre 14.3-9;
Rukre 7.36-50*

¹ Tã nhūm ra Pas wýr apkati grêre. Ra hwýr apkati kēp 6. Jakamã pa mẽ ma akupým krĩ pē Petãn wýr Jejus kôt mẽõ. Jejus kot akupým Rajare ho htĩr xwýnhta mẽ õ krĩ hwýr pa mẽ akupým mẽõ nē Rajare nhõrkwý hwýr pøj nē mẽ hwýr agjê. ² Hãmri nhūm mẽ Jejus pumu nē hkĩnh nē. Nē mẽ inhmã mẽmoj mex nhĩpêx pa mẽ ixàpkur o ixkrĩ. Nhūm Rajare haxwýja mẽ ixkutã apkur o nhỹ. Nhūm htõx Matre mẽ inhmã mẽõ ho pa nē mẽsti hã unhwýr o xa. ³ Hãmri nhūm wa htõx Marir Jejus kukamã tanhmã hamaxpēr to nē hamaxpēr o:

—Ma kot paj tokyx mẽ kot mẽ ixpê hpĩr kukamã mẽ hkuxwaxà ho hkuxwa. Anē.

Hãmri nē kàx rax kām mẽ hkuxwaxàja py nē o tē. Ra rit kahti hkôt hitep xà nhūm kupy nē hwýr o tē. Mẽ kot mẽmo htwým o mẽ hkuxwaxà mex nhĩpêxja na pre hã kàxpore xohtô rax kumrêx. Jakamã nhūm kupy nē Jejus wýr o tē nē hpar ã hkapĩr pa nē amnhĩ krā hkĩ ho hpar grã ho nhỹ nhūm ra ixkre kuxwa htýx kumrêx. ⁴ Hãmri nhūm mẽ inhõ pē Jut Kariotja. Kot kormã mẽ ìhkram Jejus nhõr mã xwýnhta tee ri ã kot amnhĩ nhĩpêx anhỹr ã omu nhūm ja kēp omnuj nē ⁵ nhūm mẽ inhmã:

—Tk. Kwa pēr mẽ hkuxwaxà hã kàxpore xohtô rax kumrêx tã nhūm ri axtem nē Jejus par ã hkapĩr pa. Mo na ma o htēm nē ho wēnē nē hpānhã kàxpore ho rax nē hpyr nē ho mẽ kēp amrakati xwýnhjê nhĩpêx kêt nē? Kot ho wēnē ronhỹx hpānhã kàxpore ho rax kumrêx nē kupy nē ho mẽmoj japrôr rax o rax. Tã axtem nē amarĩ Jejus par ã hkapĩr pa. Anē.

⁶ Te kām mẽ kēp amrakati xwýnhjê japê pyræk tã kām mẽ hapê hkêt. Âm hêx rom ã kapēr anē. Na pre hte mẽ inhmã mẽ ixkàxpore jamý nē mẽ ixkôt mẽ inhmã hamãr o pa. Nom tōhã axtem nē mẽ ixpê hkwý ho ahkĩ nē ho amnhĩm mẽmoj japrô. Jakamã Marir kot mẽ hkuxwaxà ho hapêx par ã omu nē tee ri hpānhã kàxpore rax mã hamaxpēr nē kamã gryk nē ã

mē inhmā kapēr anē. ⁷ Hāmri nhūm Jejus amnhī tā hamaxpēr ā omu nē kām:

—Tk. Kwa tanhmā kām akapēr to hkêt nē. Ixtyk nhūm mē kot ixkuxwa hkukamā na ā inhīpêx anē. ⁸ Na hte mē kēp amrakati xwýnhjaja mē akôt pa rāhā nē. Ka mē amā mēmo arīgro hā tanhmā mē ho ajuta hto hprām nē rī mē ho ajuta nē mē kām mēmoj gō. No kêt pa kot paj ri mē akôt ixpa ka mē ixto mex ry ho apa hkêt nē. Kot paj tokyx mē apiitā mē are. Jakamā ām hāmri na ā inhīpêx anē. Anē.

Patre krāhtūmjaja kot Rajare hā àmnēnh ā harēnh

⁹ Rôm nhūm Jerujarē nhō xwýnhjaja ra Jejus Petān wýr hpôx ā harēnh ma nē kot omunh mā ma hwýr mra. No ām tapxipix pumunh mā hwýr mrar kêt nē. Māānēn kot akupým ho htír xwýnhta pumunh mā nhūm mē ma hwýr mra. ¹⁰⁻¹¹ Na pre ra Ijaew ohtō nē Jejus kot akupým Rajare ho htír ā harēnh ma hāmri nē mē inhō patre kaga nē Jejus kôt amnhī xunhwý. Jakamā nhūm patre krāhtūmjaja tee ri ja hā mē omu nē axpēn mā:

—Nà kot puj mē Jejus pix pír kêt nē. Kot puj mē māānēn hkôt Rajare pī hāmri nhūm wa hixi hamē mē kēp hapêx japēr. Anē.

Jejus kot Jerujarē hwýr àr ā harēnh Matêwre 21.1-11; Makre 11.1-11; Rukre 19.28-40

¹² Tā nhūm apkati nhūm Ijaew Jerujarē kamā mē hkīnhja kryx nē Jejus ra mē hwýr àhtêp o mōr ā harēnh ma.

¹³ Hāmri nē axpēn mā:

—Kwa ma pu mē mō nē pô hkwy jakà nē kutā ho mra. Anē.

Hāmri nē hkwy jakà nē hamy nē ma kutā ho mra. Hāmri nē ra hkaxpa nē omu nē hkīnh nē. Nē kām:

Pa. Nà ām hāmri na ka mē ixwýr mō.

Tirtūm na pre mē ixwýr amē ka ā amōr anē.

Tirtūmjaja mex o mex. Ām hāmri na pre mē ixwýr amē.

Kot kaj mē inhō pahi hpānhā mē ixto amnhīptār o ri apa. Anē.

¹⁴ Hāmri nhūm Jejus nhýri jumēnre pumu nē hwýr tē nē hā nhý nhūm mē pimràatā ma akupým Jerujarē hwýr mō. Tirtūm kapēr ā kagà htūm ra kot ja jarēnh kot:

¹⁵ Pa Jerujarē nhō xwýnhjaja. Kwa mē tee ri amnhī kukamā ajamaxpēr ho amā ma hkêt nē.

Ota mē anhō pahi nyw ra mē awýr jumēnre hā nhý nē hpôx o tē. Anē.

¹⁶ No Jejus kôt mē ixpa ho mē ixpa xwýnhjaja pa mē ā kot amnhī nhīpêx anhýrja ā omu nē tee ri hkukamā ijamaxpēr nē axpēn mā:

—Kwa mo na ri ā amnhī nhīpêx anē nē jumēnre hā nhý nē mē hkôt mō? Anē.

Tā nhūm arīgro hō hā ty nē akupým kaxkwa hwýr api pa prem hā omu hāmri nē kormā Tirtūm kapēr ā kagà htūm kot hkukamā ā harēnh kot anhýrja mā ijamaxpēr kurê kumrêx. Hāmri nē axpēn mā harēnh o:

—Kwa ām hāmri na Tirtūm kapēr ā kagà htūm kot ra ā Kraja jumēnre hā ýr nē mē hkôt mōr ā hkukamā kot harēnh anhýrta. Anē.

¹⁷ Hāmri nhūm Jejus kot Rajare mā kapēr pē akupým ho htír ā omunh xwýnhjaja arī nhām mē hkwyjê mā ujarēnh o pa. ¹⁸ Nhūm mē kuma nē ma Jejus wýr omunh mā mra. ¹⁹ Hāmri nhūm Parijew nhō xwýnhjaja tee ri ja hā mē omu nē axpēn mā:

—Kwa na pu mē tee ri Jejus nē mē kām pakapēr kaprý nhūm mē pamar kêt nē ra piitā hkôt amnhī nhīpêx o pa. Kwa nà. Anē.

Ijaew kêt xwýnhjê jarēnh

²⁰ Tā nhūm ra Gres kwýjaja Ijaew kôt hkīnh kaxyw ma Jerujarē hwýr mē hkôt mra nē mē íhkô hā Tirtūm mā mex o mex ā harēnh o hkôt mra. ²¹ Jakamā nhūm mē nhýri mē inhīō pē Firipti pumu nē hwýr mra. Firipti kēp pyka pē Garirej kamā krī pē Peséj nhō xwýnh nhūm Gres nhō xwýnhjaja omu nē hwýr mra nē kām:

—Pa. Kwa na pa mē inhmā Jejus pumunh prām nē. Tanhmā kot

pa wem amnhĩ to nẽ omu nẽ kãm ixkapẽr? Anẽ.

²² Hãmri nhũm mẽ kuma nẽ ma Andre hwỳr mẽ o mra nẽ kãm mẽ harẽ. Hãmri nẽ wa ma Jejus wỳr mẽ o mra nẽ kãm mẽ harẽ nẽ kãm:

—Pa Pahihti. Ota Gres nhõ xwỳnhjaja kãm apumunh prãm nẽ awỳr mō. Mẽ pahkĩnhã mẽ kęp Ijaew kêt tã mẽ kãm apumunh prãm nẽ. Anẽ.

Jejus kot amnhĩ kukamã amnhĩ jarẽnh

Matêwre 16.24-28; mããnẽn Apokarip 2.10, 12.11

²³ Hãmri nhũm Jejus mẽ omu nẽ mẽ kãm tanhmã amnhĩ jarẽnh to. Kot mẽ ohtô nẽ mẽ nẽ htyk nhũm mẽ kukwak ri Tĩrtũm wa kuri htĩr tũm nẽ pa ho pa hã mẽ kãm amnhĩ jarẽ nẽ mẽ kãm:

—Nà na ra ixtyk ã arĩgro hwỳr apkati grẽre. Ixpê Tĩrtũm kot mẽ akaxyw ixãm xwỳnh jakamã kot paj mẽ apiitã mẽ anẽ ty hãmri nẽ akupỹm ixtĩr nẽ ma kaxkwa hwỳr akupỹm api. ²⁴ Mẽ axohtô nẽ nhỹrmã Tĩrtũm mẽ wa ixri atĩr tũm nẽ apa ho apa kaxyw kot paj ã amnhĩ nhĩpêx anẽ. Kwa mẽ ã ixte amnhĩ jarẽnh anhỹrja ma nẽ mẽ amnhĩ krãm haxàr tỳx nẽ ri hã apa. Te ixte mẽmo hy kot amnhĩ nhĩpêx pyræk. Na htem pikap haggê nhũm te htyk pyrã nẽ pika kaxwỳnh kãm hikwỹ. Tã gaa nẽ higrõt nẽ hprêk nẽ ô. Nẽ ô rax kumrêx. Hyja pyxire nẽ hikwỹ htã kamã ô rax kumrêx. Nom koja mẽ hkre hkêt nẽ nhũm ô hkêt nẽ. Na hte ã mẽmo hyja amnhĩ nhĩpêx anẽ. Ja pyrã nẽ kot paj mẽ anẽ ixtyk kêt nẽ te mẽ kot mẽmo hy hkre hkêt nhũm hprêk nẽ ô hkêeta pyræk ka mẽ ixkukwak ri Tĩrtũm mẽ wa ixri atĩr tũm nẽ apa hkêt nẽ. Jakamã kot paj mẽ anẽ ty nhũm mẽ ijaxã. Hãmri pa akupỹm ixtĩr ka mẽ axohtô nẽ ixkukwak ri wa ixri atĩr tũm nẽ apa ho apa.

²⁵ —Nẽ koja mẽ ixpĩ pa mẽ anẽ ty. Tã mẽ ate ixkôt amnhĩ nhĩpêx o apa xwỳnhjaja. Kojã mẽ ixtã mẽ apar mã tã kwa kêt ka mẽ atyk pymaj ixkaga hkêt nẽ. Kwār mẽ mãmrĩ tanhmã ixtã mẽ ato ka mẽ nhỹrmã Tĩrtũm mẽ wa

ixri axte amnhĩ xà kamã ajamak kêt kumrêx nẽ atĩr tũm nẽ amex nẽ apa ho apa. No kot kaj mẽ ixkĩnhã jar amã amex pix prãm hãmri nẽ nhỹrmã wa ixri atĩr tũm nẽ apa hkêt nẽ. ²⁶ Kot kaj mẽ ã ixkôt amnhĩ nhĩpêx anhỹr o ri apa hãmri nhũm mẽ kot inhĩpêx pyræk o mẽ anhĩpêx. Hãmri ka mẽ nhỹrmã ma ixkôt kaxkwa hwỳr api nẽ kamã ixri atĩr tũm nẽ apa ho apa. Hãmri nhũm Inhĩpêêxã ixtã mẽ apumu nẽ mẽ ato mex kumrêx. Anẽ.

Tĩrtũm kot Jejus mã kapẽr ã harẽnh Matêwre 3.17, 17.5

²⁷ Tã nhũm Jejus tee ri amnhĩ kukamã htyk mã hamaxpẽr nẽ hkaprĩ htỳx nẽ. Nẽ hkôt mẽ ixpa ho mẽ ixpa xwỳnhjê mã amnhĩ jarẽ nẽ mẽ inhmã:

—Hêxta waa nẽ. Na pa tee ri amnhĩ kukamã ijamaxpẽr. Nẽ tee ri amnhĩ xà htỳx kamã ijamak kukamã ijamaxpẽr pẽ ra amnhĩ kamã ixkahak nẽ. Nom ixte pika piitã hkôt mẽ kot ixkôt amnhĩ xunhwỳr xwỳnhjê nẽ ixtyk kaxyw ixwryk kênã. Jakamã kot paj Inhĩpêêxã kot mẽ kęp ixpytãr kaxyw tanhmã amnhĩ to hwỳr to hkêt nẽ. Anẽ.

²⁸ Hãmri nẽ hpãnhã Hipêêxã mã kapẽr nẽ kãm:

—Pa Papaj. ãm mẽmoj pixi na inhmã hprãm. Kê mẽ piitã ixkukwak ri amex o amex ã apumu. Ja na kêt inhmã hprãm tỳx kumrêx.

Anhỹr o Tĩrtũm mã amnhĩ jarẽ. Hãmri nhũm kuma nẽ kaxkwa rũm kãm kapẽr. Kỳxpê kãm kapẽr nẽ kãm:

—Nà na pa pre ra ã mẽ kãm amnhĩ to amnhĩrit anẽ nhũm mẽ ja hã ixpumu. Tã kot paj axte akukwak ri amnhĩ to amnhĩrit nhũm mẽ piitã axte inhmex o inhmex ã ixpumu. Anẽ.

²⁹ Nhũm pre ã Tĩrtũm Jejus mã kapẽr anẽ. Hãmri nhũm mẽ kot mẽ ixkuri mar o kuhê xwỳnhjaja kuma no ãm hprĩ hã kot kãm tanhmã kapẽr toja mar mex kêt nẽ. Nẽ htỳx ho ãm mẽmoj tã hkamnhĩx. Jakamã nhũm mẽ hkwyjaja axpẽn mã:

—Kwa mo na wehe? Na mǎn katōtōk nà? Anē.

Nhũm mẽ hkwyjaja mẽ kām:

—Nà na katōtōk kêt. Tĩrtũm kapēr o wryk xwỳnh mǎn tanhmǎ kām kapēr to. Anē.

³⁰ Hāmri nhũm Jejus mẽ kām:

—Nà Tĩrtũm tǎm na inhmǎ kapēr. Nom pa ixte mar kaxyw inhmǎ kapēr kêt nē. Mẽ kajaja mẽ ate ixtǎ mar kaxyw na kỳx pē ã inhmǎ kapēr anē. Anē.

Hāmri nē mẽ kām:

³¹ —E hāmri. Kot paj tokyx mẽ apiitǎ mẽ ate amnhĩ tomnuj pǎnhǎ amnhĩrer kaxyw tanhmǎ amnhĩ nhĩpêx to. Jao mǎǎnēn Satanasti pē hihtỳx xà ho ijapêx. ³² Koja mẽ pĩ kahpa hǎ inhô pa kỳxpê ajêt. Tĩrtũm kot mẽ awỳr inhmēnh tǎ nhũm mẽ ã inhĩpêx anē pa ty. Jakamǎ koja pika piitǎ hkôt mẽ ohtô nē ixkôt amnhĩ xunhwỳ nē amnhĩ kaxyw inhmǎ hamaxpēr rǎhǎ ho pa. Anē.

³³ Mẽ ixte tanhmǎ htyk to hǎ harēnh mar kaxyw nhũm pre ã mẽ inhmǎ amnhĩ jarēnh anē. ³⁴ Hāmri nhũm mẽ kot mẽ ixkuri mar o kuhê xwỳnhjaja tee ri kot htyk ã amnhĩ jarēnhja ma nē kām:

—Kwa mẽ ixte amnhĩ wỳr kamǎ ijamak o ixpa xwỳnhja htĩr tũm nē pa ho pa xwỳnh na. Tĩrtũm kapēr ã kagà htũm kot ã harēnh kot anhỳr tǎ ka ã ri mẽ kot apĩr nhũm atyk ã amnhĩ jarēnh anē. Ate Tĩrtũm kot mẽ ixwỳr amēnh xwỳnh ã amnhĩ jarēnh tǎ ã ri atyk ã amnhĩ jarēnh anē. Kwa xà apê mẽ ixte amnhĩ wỳr kamǎ ijamak o ixpa xwỳnh kêt? Anē.

³⁵ Hāmri nhũm mẽ kuma nē amnhĩ tǎ mẽ kām:

—Tỳ ixpê tǎm kēnǎ. Tǎ kot paj tokyx mẽ are. Jakamǎ kêr ka mẽ ixte arĩ mẽ akamǎ ixpa ri ixkôt amnhĩ xunhwỳ nē amnhĩ kaxyw ixkôt ajamaxpēr o ri apa. Te ixpê kanê hpôk pyræk jakamǎ na pa hte mẽ kām Tĩrtũm kapēr o mẽ ahkre o ri ixpa. Nom kot paj kritpēm mẽ akôt ixpa ry hkêt nē. Jakamǎ kwa kêr ka mẽ tokyx te mẽ kot kanê hpôk nhĩrǎ kamǎ ri mẽ pa xwỳnh kot amnhĩ nhĩpêx pyræk

nē Tĩrtũm kôt amnhĩ nhĩpêx o ri apa. Kormǎ mẽ akôt ixpa ri. Kot paj tokyx ma mǎ nhũm te ra kamàt kô pyræk. Na hte kamàt kô kamǎ mẽ pa xwỳnhjaja tee ri rīt mex mǎ nom rīt mex kêt nē. Nē mẽmoj pumunh mex kêt nē.

³⁶ Jakamǎ kwa mẽ tokyx ixte arĩ mẽ akamǎ ixpa ri amnhĩ kaxyw inhmǎ ajamaxpēr nē ixkôt amnhĩ xunhwỳ. Te ixpê kanê hpôk nhũm kamǎ mẽ arīt mex pyræk. Jao ixpyrà nē te mẽ apê kanê hpôk nhĩrǎ mex pyræk o amnhĩ nhĩpêx. Nē ixpyrà nē tǎm ri amnhĩ nhĩpêx o apa. Anē.

Nhũm pre ã mẽ kām kapēr anē hāmri pa mẽ kêp ixkato nē ma nhām mǎ.

Mẽ hkwyjaja kot Jejus kôt hamaxpēr kêt ã mẽ harēnh

³⁷ Na pre hte Jejus mẽ noo mǎ mẽ kot aa mẽmoj pumunh kêt kwỳ ho anhỳr rax o pa. Tǎ nom nhũm mẽ ohtô nē hǎ omu nē ãm hǎ omu nē kêp Tĩrtũm kot mẽ pahwỳr mēnh xwỳnh ã hkôt hamaxpēr kêt nē. ³⁸ Nom ra mẽ hkukamǎ Tĩrtũm nhỹ hǎ kapēr jarēnh o pa xwỳnh pē finat Ijaisja mẽ hkukamǎ ja hǎ mẽ harē nē hǎ kagà. Nē hǎ kagàja o:

Pa Pahi Maati. Nà ra ixte mẽ kām ajarēnh o ixpa ryy htǎ no nhũm mẽ inhma nē ãm inhma.

Nē mẽ kot axihtỳx o axihtỳx ã ajarēnh mar tǎ no ãm ajarēnh ma nē amnhĩ kaxyw akôt hamaxpēr kêt nē. Anē.

³⁹ Mẽ kām Tĩrtũm kapēr mar prǎm kêt jakamǎ na prem mǎǎnēn Jejus kêp Tĩrtũm kot mẽ pahwỳr mēnh xwỳnh hkôt hamaxpēr kêt nē. Nhũm pre finat Ijaisja axte mẽ hkukamǎ ja hǎ mẽ harē nē mẽ hǎ kagà. Nē hǎ kagà ho:

⁴⁰ Na pre Tĩrtũmja tanhmǎ amnhĩ nē mẽ hkrǎ hto nhũm mẽ hkôt hamaxpēr kêt nē.

Ra mẽ kot hihtỳx o hihtỳx ã omunh tǎ omu nē ãm omu.

Nē mẽ kot kapēr mar tǎ amnhĩ tomnuj kaga hkêt nē.

Nē Tĩrtũm kot mẽ nē mẽ kot amnhĩ tomnuj o hapêx prǎm xàj hkôt amnhĩ xunhwỳr kêt nē. Anē.

41 Kormā Jejus mē hwÿr wrÿk kêt ri nhÿm finat Ijaisja hpimtir kām kot amnhÿ to rax kumrêx ã omu nê hkukamã ã harênh nê hã kagà anê.

42 Hāmri nhÿm Ijaew krãhtÿm kwÿjaja hkwÿjê rom amnhÿ kaxyw Jejus kôt hamaxpêr nê hkôt amnhÿ xunhwÿ. Tã Parijew nhô xwÿnhjaja kot ã mē kot amnhÿ nhÿpêx anhÿr ã mē harênh mar pymaj ja hã amnhÿ to amnhÿrÿt kêt nê. Mē kot Tÿrtÿm kapêr o mē ahkre xà hã ixkreja nê mē kator pymaj nhÿm mē kām amnhÿ to amnhÿrÿt kêt nê. 43 Na prem hamaxpêr o:

—Nà kot paj ja hã amnhÿ to amnhÿrÿt nhÿm mē amnhÿ nê ixtomnuj nê. Hāmri nê amnhÿ pyrã nê axpên mã inhmex ã ijarênh kêt nê.

Anhÿr o mē umaj amnhÿ kukamã hamaxpêr o pa. Nom Tÿrtÿm tãm kot amnhÿm mē mex ã mē harênhja nhÿm mē hkukamã hamaxpêr kêt nê.

Jejus kot Hipêêxà nhÿ hã kapêr ã harênh

44 Nhÿm Jejus axte mē kām kapêr nê kÿx pê kapêr nê mē kām:

—Nà koja mēhō amnhÿ kaxyw ixkôt hamaxpêr hāmri nê ixkôt pix mã hamaxpêr kêt nê. Mãânên amnhÿ kaxyw kot mē awÿr inhmênh xwÿnhja kôt hamaxpêr. 45 Wa ixte amnhÿ nhÿpêxja te tipxi pyrãk jakamã koja mē tanhmã ixte amnhÿ nhÿpêx to hã ixpumu nê te kot Tÿrtÿm kot amnhÿ nhÿpêx ã omunh pyrãk.

46 —Nê te ixpê kanê hpôk nhÿm inhÿrã kamã mē apa pyrãk kaxyw na pre Inhÿpêêxà mē awÿr inhmê pa mē awÿr wrÿ. Ixte kapêr o mē ajahkre ho ri mē akôt ixpa kaxyw. Jakamã koja mēhō amnhÿ kaxyw ixkôt hamaxpêr nê ixkôt amnhÿ xãm hāmri nê te kanê hpôk nhÿrã kamã rÿt mex o pa pyrãk o amnhÿ nhÿpêx. Jao amnhÿ nhÿpêx nyw o amnhÿ nhÿpêx o pa. 47-48 No mē kot ixkapêr mar nê ãm mar xwÿnhjaja te mãânên Inhÿpêêxà kapêr mar nê ãm mar pyrãk. Mÿrapê koja mē nhÿrmã ma kuwy hwÿr pa nê mē kot amnhÿ tomnuj mÿrapê kamã pa ho pa. Tã no ã mē ate amnhÿ nhÿpêx anhÿr o ri mē

apa kaxyw na pa pre mē awÿr ixwrÿk kêt nê. Ixte mē ate amnhÿ tomnuj pãnhã amnhÿrer par kaxyw na pa pre mē awÿr wrÿ.

49 —Nê na pa hte amnhÿ krã hkôt tanhmã ri mē amã ixkapêr to ho ri ixpa hkêt nê. ãm kot mē awÿr inhmênh xwÿnhja nhÿ hã na pa hte tanhmã mē amã ixkapêr to ho ri mē akôt ixpa. 50 Tã mē kot Tÿrtÿm kapêr mar nê amnhÿ kaxyw hkôt hamaxpêr xwÿnhjaja koja mē nhÿrmã wa ixri htÿr tÿm nê mex nê pa ho pa. Jakamã na pa hte tanhmã kot inhmã karô hto xà hkôt pix mã tanhmã mē amã ixkapêr to ho ri ixpa. Anê.

13

Jejus kot hkwÿjê hpar kuhōnh ã harênh

Rukre 22.24-27

1 Tã nhÿm ra Pas ã mē ixkÿnhhta ahtêp. Pas ã na hte mē ixpê Ijaewjaja axpên wÿr akuprô nê hã ôwêhti hkra nyw pa nê ho anê nê hkur o ixkrÿ. Amnepêm Tÿrtÿm kot pika pê Ejit rÿm mē inhÿgêxjê kator kaxyw nhÿm mē nojarêr nê ã hkwÿ hpar nê ho anhÿr nê hkwÿ hkurta pyrãk. Na prem nojarêr nê mē hkra my kot wa mē kêp htyk pumaj ôwêhti hkra nyw kwÿ hpa nê ho anê nê ï hku. Jakamã nhÿm arÿ mē ixpê mē hkanrêhã mē htãmnhwÿjaja ã mē kot amnhÿ nhÿpêx anhÿrja mã ijamaxpêr nê hã ixkÿnh kaxyw mē urãk nê hkwÿ hpa nê kuku. Jakamã nhÿm ra Pas ahtêp nhÿm Jejus amnhÿ kukamã tanhmã hamaxpêr to kurê kumrêx. Ra ma akupÿm Hipêêxà hwÿr àpir xà hã arÿgro hwÿr apkati grêre. Jakamã nhÿm akupÿm nojarêr ã amnhÿ pumu nê kām mē pahte hkôt amnhÿ xunhwÿr xwÿnhjê japê jakamã kām mē pajapê rãhã mē panê htyk mã. 2 Tã nhÿm myt axà pa mē Pas ã ixàpkur o ixkrÿ. Nhÿm Simãw Kariot kra Jut Kariotja mãânên mē ixkutã apkur o nhÿ. Kêp mē ixkwÿ htã nhÿm pre Satanasti tanhmã hkrã hto nhÿm ra axtem nê kot mē kām Jejus kurê xwÿnhjê nhÿhkram haxàr kaxyw.

3-4 Tā pa mẽ kormã axpẽn kutã ixàpkur kaxyw ixkrĩ hpa nhũm Jejus kànhmã xa nẽ hinôkà kapa nẽ toajtĩ py nẽ ho amnhĩ krax pre. Kot amnhĩ to rax ã amnhĩ pumunh tã ja hã amnhĩ to jarkrar pẽ tanhmã ri mẽ inhnoo mã amnhĩ nhĩpêx to ho pa hkêt. Kêp mẽ inhõ pahi htã te kêp mẽ inhmã àpênh xwýnh pyrãk o amnhĩ nhĩpêx o pa. ⁵ Jakamã toajtĩ py nẽ ho amnhĩ krax pre nẽ pasiiti hõ py nẽ kamã gô hkwý ru nẽ ho mẽ ixpar kuhõ nẽ toajtĩ o mẽ ixpar grã ho mõi. ⁶ ã mẽ inhĩpêx anhỹr o mõi. Pẽ ra hpãnhã Simãw Pêtre hpar kuhõnh kaxyw nhũm tee ri amnhĩ tã omu nẽ kãm:

–Tk. Kwa apê inhmã axàpênh xwýnh kêt kênã kot ka kêt ri axtem nẽ ixpar kuhõ Pahihti. Apê mẽ inhõ Pahi kênã kot ka kêt ã mẽ inhĩpêx anẽ. Anẽ.

⁷ Hãmri nhũm kãm:

–Kwa nã. Kormã ate ja hã amnhĩ tã ixpumunh mex kêt. Nom kot kaj nhỹrmã aprĩ hã amnhĩ tã ixpumu. Anẽ.

⁸ Hãmri nhũm kãm:

–Nã nom kot kaj ãm ixpar kuhõnh kêt nẽ. Kwarĩ. Anẽ.

Hãmri nhũm Jejus kãm:

–Tõe. Kot paj apar kuhõnh kêt nẽ ka te apê ixkwý hkêt pyrãk. Anẽ.

⁹ Hãmri nhũm tee ri kuma nẽ kãm:

–Tõe mamrĩ ixpar kuhõ. Nom ixpar pix kuhõnh kêt nẽ. Mãânẽnh inhĩkra kuhõ nẽ ixkuk kuhõ. Inhmã ixte apyrãk prãm tỳx kumrêx kênã. Anẽ.

¹⁰ Hãmri nhũm Jejus kãm:

–Nã amỹkry hkõt mẽ wýr xwýnhjaja na htem mex nẽ axte wýr kêt rãhã hikwỹ. Na htem ãm amnhĩ par pix kuhõ nẽ hikwỹ. Ja pyrã nẽ Tĩrtũm kot mẽ anê mẽ ate amnhĩ tomnuj ho hapêx par xwýnhjaja te amỹkry hwýr mẽ axwýr nẽ amex pyrãk. Ka mẽ te mẽ kot amnhĩ par pix kuhõnh ta pyrã nẽ axte tanhmã amnhĩ tomnuj to hãmri nẽ Tĩrtũm mã amnhĩ jarênh kurê kumrêx kê anê amnhĩ katut kõt ate amnhĩ tomnujta mẽ nẽ ho hapêx. Na pre ra mẽ anê mẽ ate amnhĩ tomnuj o hapêx. No ãm mẽ apiitã

hkêt. Ota arĩ mẽ anhĩõja pyxire nẽ arĩ amnhĩ tomnuj rãhã ri pa. Jakamã te wýr kêt nẽ arĩ grã htyk rax kãm ri pa pyrãk. Anẽ.

¹¹ Nhũm pre ã Jejus mẽ inhmã kapêr anẽ. Ra kot hprĩ hã mẽ kot kãm hkurê xwýnhjê mã õr mã xwýnhja pumunh jakamã te wýr kêt nẽ arĩ grã htyk rax kãm ri pa pyrãk ã ã harênh anẽ.

¹² Tã mẽ ixpar kuhõnh pa nẽ akupým hinôkà py nẽ haxà nẽ nhỹ hãmri nẽ mẽ inhmã:

–E mẽmo kaxyw na pa we ã mẽ apar kuhõnh anẽ? Kot paj ixprĩ hã mẽ amã amnhĩ jarê ka mẽ inhma. ¹³⁻¹⁴ Na ka htem ixto “mẽ ijahkre xwýnh” nẽ ixto “pahihti” anhỹr o ijarênh o ri apa. ãm hãmri na ka htem ã axpẽn mã ijarênh anẽ. Ixpê mẽ ajahkre xwýnh nẽ mãânẽnh ixpê mẽ anhõ pahihti htã inhmã mẽ ate tanhmã axpẽn nhĩpêx to ho apa hprãm xàj na pa ã mẽ apar kuhõnh anẽ. Tã kêr ka mẽ ixpyrà nẽ tanhmã axpẽn to mex to ho ri apa. ¹⁵ Jao amnhĩ kuxwar axpẽn to mex pẽ mẽmoj to axpẽn kutã anojarêt rãhã ho ri apa. ¹⁶ Kwa mẽ ixkapêr ma nẽ kãm amnhĩ krãm haxàr tỳx rãhã ho ri apa. Mẽ ate amnhĩ to rax o ijakrenh kêt. Te ixpê mẽ anhõ patrãw nhũm mẽ ate inhmã tanhmã amnhĩ nhĩpêx to ho apa xwýnh pyrãk. Nẽ te ixte mẽmoj tã mẽ amã karõ nhũm mẽ ate inhmar nẽ inhmã tanhmã mẽmoj nhĩpêx to pyrãk. Tã te ixpê mẽ anhõ patrãw pyrãk tã pa ã mẽ apar kuhõnh anẽ. Ka mẽ amnhĩ tã ixpumu hãmri nẽ amnhĩ xwar tanhmã axpẽn to ajuta hto ho ri apa. No ri axpẽn pumu nẽ ajamxpêr o: “Tk. Nã ixte amnhĩ to rax o hakrenh kênã kot pa kêt ri tanhmã ho ajuta hto. Kê tãm mãn pa ixto ajuta.” Anhỹr o ajamxpêr o ri apa hkêt nẽ.

¹⁷ –E na pa ã mẽ amã ixujarênh anẽ. Kot kaj mẽ inhma nẽ ixujarênh kõt ã axpẽn nhĩpêx anhỹr o ri apa. Hã kot kaj mẽ akĩnh nẽ ri apa. Anẽ.

Jejus kot amnhĩ tā hã àmnênh xwýnh o amnhĩrĩt ã harênh

Matêwre 26.20-25; Makre 14.17-21; Rukre 22.21-23

¹⁸ Nhũm Jejus arĩ mẽ inhmã kapër nẽ mẽ inhmã:

—Kot kaj mẽ apiitã mẽ akĩnh nẽ apa hkêt nẽ. Ixte mẽ arênh xwýnhjaja mẽ apiitã mẽ apumunh mex. Jakamã na pa Tĩrtũm kot mẽ apiitã mẽ ate amnhĩ tomnuj o hapêx par kêt ã mẽ anhĩõja jarẽ. Tĩrtũm kapër ã kagà htũm kot harênh kot:

Ixkutã apkur o ýr xwýnhjê hõ koja axtem nẽ mẽ kot kãm ixkurê xwýnhjê nhĩhkram ijaxà. Kêp ixkõt pa ho pa xwýnh tã koja axtem nẽ ã inhĩpêx anẽ.

Anhýr o kot harênh. Tã koja tokyx ã inhĩpêx anẽ. ¹⁹ Nom kormã kot ã inhĩpêx anhýr kêt ri na pa hkukamã mẽ amã harẽ. Jakamã koja ã inhĩpêx anẽ ka mẽ ja hã ixpumu nẽ ra ixte amnhĩ kukamã mẽ amã amnhĩ jarênhta mã ajamexpër nẽ ixpê Tĩrtũm rũm mẽ awýr ixwryk xwýnh kõt ajamexpër tỳx kurê kumrêx.

²⁰ —Kwa mẽ ixkapër ma nẽ amnhĩ krã kamã kãm ajamexpër tỳx o ri apa. Koja mẽhõ ixte mẽ hwýr mẽ arênh xwýnhjê hã tanhmã mẽ ato mex to. Hãmri nẽ te pa kot tanhmã ixto mex to pyrãk. Nẽ koja mẽhõ tanhmã pa ixto mex to nẽ mãânên te kot mẽ awýr inhmênh xwýnhhta tanhmã ho mex to pyrãk. Anẽ.

²¹ Nhũm pre ã Jejus mẽ inhmã kapër anẽ. Hãmri nẽ tee ri amnhĩ kukamã hamexpër nẽ hkaprĩ nẽ mẽ inhmã:

—Hêxta waa nẽ. Nà kot kaj mẽ atõ mẽ kot kãm ixkurê xwýnhjê nhĩhkram ijaxà. Kwa mẽ amnhĩ krã kamã ixkapërja mã ajamexpër tỳx nẽ. Anẽ.

²² Hãmri pa mẽ amnhĩ tã kuma nẽ tee ri axpên pumunh o ixkrĩ.

²³ Ixpê Juāw na pa pre ixpê Jejus kràmnhwý mex ã ãhkô hã ixãpkur o inhýr ²⁴ nhũm Simāw Pêtreja ixpumu nẽ inhmã nomgõr nẽ kawax pẽ inhmã:

—Kwa mẽ pahtõ nhĩxi hã hkukja nà? Anẽ.

²⁵ Hãmri pa kuma nẽ Jejus mã kãm: —Kwa Pahihti. Mẽ ixtõ koja we ã anhĩpêx anẽ? Anẽ.

²⁶ Hãmri nhũm mẽ inhmã:

—Nà kot paj pãwti hõ py nẽ guhkrax kãm ho mry kagô nhek nẽ kot mẽ ãhkram ijaxàr mã xwýnhhta mã kugõ ka mẽ hkõt omu. Anẽ.

Hãmri nẽ kupy nẽ ho mry kagô nhek nẽ Simāw Kariot kra Jut Kariotja mã kugõ nhũm kupy. ²⁷ Pyrja kõt nhũm Satanasti tanhmã hkrã hto. Hãmri nhũm Jejus te kot kãm amnhĩ to nojarêt pyrãk o amnhĩ tã kãm kapër nẽ kãm:

—E kwa tokyx nã. Anẽ.

²⁸⁻³⁰ Hãmri nhũm kuma nẽ kato nẽ ma kamãt kô kamã htêm kurê kumrêx. Hãmri pa mẽ ixãpkur o ixkrĩ xwýnhjaja Jejus kot ã kãm kapër anhýrja ã kuma nẽ tee ri hkukamã ijamexpër. Hãmri nẽ kot ma mẽ hkĩnh ã mẽõ hkwý japrôr kaxyw ma htêm ã hkamnhĩx. Nhũm mẽ ixkwýjaja axtem Jejus kot mẽ kêp amrakati xwýnhjê mã mẽmoj nhõr ã kãm karõ nhũm ma mẽ hwýr htêm ã hkamnhĩx. Kêp mẽ inhmã mẽ ixkãxpore jamãr o pa xwýnh jakamã pa mẽ ã ixtỳx mẽmoj tã hkamnhĩx anẽ.

Jejus akupým nojarêt nẽ mẽ kãm mẽmoj tã karõ hã harênh

Matêwre 22.39-40; mãânên Wam Juāw 3.11-24

³¹⁻³² Hãmri nhũm Jejus mẽ inhmã:

—Nà kot kaj mẽ tokyx mẽmoj pumu nẽ Tĩrtũm mã mex o mex ã harẽ nẽ ijaxwýja inhmã inhmex o inhmex ã ijarẽ. Kot kaj mẽ tokyx mẽmojta pumu kãm ga.

³³ —Te mẽ apê ixkra pyrãk tã kot paj arĩ ri mẽ akõt ixpa grire hãmri nẽ ma akupým api. Kot kaj mẽ tee ri jar ijapêr o ri apa nom nhýri ixpumunh kêt nẽ. Nẽ kormã tokyx ma ixkõt apa hkêt nẽ.

³⁴ —E kot paj axte mẽ amã mẽmoj tã karõ. Kormã ixte mẽ amã ja hã karõ hkêt. Kêr ka mẽ amã axpên kĩnh o ri apa. Te pa inhmã mẽ ajapê pyrãk o axpên nhĩpêx rãhã ho ri apa. ³⁵ Kot kaj mẽ ã amnhĩ nhĩpêx anẽ nhũm mẽ

akwỳjaja ja hã mẽ apumu nẽ mẽ apê
ixkwỳ hã mẽ apumunh kurê kumrêx.
Anẽ.

*Simãw Pêtre kot Jejus ã amnhĩ to hêx
kukamã harênh*

*Matêwre 26.31-35; Makre 14.27-31;
Rukre 22.31-34*

³⁶ Nhũm Jejus ã kot mẽ ixrer nẽ
ma nhỹhỹm mōr ã amnhĩ jarênh anẽ
hãmri nhũm Simãw Pêtre tee ri kot
amnhĩ jarênh ma nẽ kãm:

—Kwa Pahihti. Nhỹhỹm kot kaj kêt
mō pa mẽ akôt ixpa hkêt nẽ? Anẽ.

Hãmri nhũm kãm:

—Nà ma inhmōr xàta wỳr kot kaj
mẽ kormã ma ixkôt apa hkêt nẽ. Nom
kot kaj mẽ nhỹrmã ma ixkôt apa. Anẽ.

³⁷ Hãmri nhũm Simãw Pêtre kãm:

—Kwa mo kot pa mẽ omu nẽ tokyx
ma akôt inhmōr kêt nẽ? Inhmã
akôt ixtyk puma hkêt kênã. Kwār mẽ
mãmri atã ixpĩ. Inhmã ajapê htỳx
kumrêx kênã. Anẽ.

³⁸ Hãmri nhũm Jejus kãm:

—Xà ãm hãmri na ka ã inhmã amnhĩ
jarênh anẽ Simãw Pêtre? Xà amã ixkôt
atyk puma hkêt? Kwa o kora. Koja
apkatĩ hkôt krãhyre hkàr kêt ri ka ra
mẽ umaj ate ixkôt apa hkêt ã amnhĩ
tã axaprãr o axkrunêpxi kãm ga. Kwa
amnhĩ krã kamã ixkapêrja mã aja-
maxpêr tỳx nẽ. Anẽ.

14

*Jejus kot Tirtũm nhõ krĩ jarênh
Eprêw 11.16*

¹ Nhũm Jejus arĩ mẽ inhmã kapêr
nẽ mẽ inhmã:

—Kwa ã ixte mẽ amã amnhĩ
jarênh anhỹrja ma nẽ tee ri amnhĩ
kukamã ajamaxpêr nẽ akapri hkêt
nẽ. Arĩ amnhĩ kaxyw Tirtũm mẽ
wa inhmã ajamaxpêr tỳx rãhã ho ri
apa. ² Inhĩpêxà nhõ krĩ kamã ixkre
xohtô. ãm hãmri na pa ã mẽ amã
harênh anẽ. Tã kot paj ma akupỹm
hwỳr api nẽ mẽ akutêp mã amã mẽ
anhõrkwỳ ho mex. ³ Hãmri nẽ ho mex
pa nẽ rĩ man akupỹn mẽ awỳr wrỳ.
Hãmri nẽ ma akupỹm amnhĩ kôt mẽ
ato ixàpir pa ka mẽ Tirtũm mẽ wa
ixkôt apa rãhã apa ho apa. Jakamã
kwa mẽ ri akapri nẽ apa hkêt nẽ. Anẽ.

*Jejus te kêp Tirtũm wỳr pry pyræk
Epes 2.18*

⁴ —Nẽ ma nhỹhỹm inhmōr xàta ra
mẽ ate harênh mar mex. Nẽ hwỳr
prya mãânên mẽ ate harênh mar
mex. Anẽ.

⁵ Hãmri nhũm Tomas tee ri kuma nẽ
kãm:

—Kwa mẽ ixte nhỹhỹm amōr xàta
pumunhre hã kot pa kêt mẽ hwỳr
prya pumu. Anẽ.

⁶ Hãmri nhũm kãm:

—Kwa paa. Te ixpê Inhĩpêxà hwỳr
pry pyræk. Na htem amnhĩ kaxyw
inhmã hamaxpêr nẽ ixkôt amnhĩ
xunhwỳ hãmri nẽ nhỹrmã ixkukwak
ri pix mã ma Inhĩpêxà mẽ wa inhõ
krĩ hwỳr api. Ixkukwak ri pix mã na
htem hprĩ hã Tirtũm kapêr ma. Nẽ
ixkukwak ri pix mã na htem wa ixri
htĩr tũm nẽ pa ho pa. ⁷ Kot kaj mẽ
apri hã ixpumu nẽ mãânên te apri hã
Inhĩpêxà pumunh pyræk. Tã ra mẽ
ate tanhmã ixte amnhĩ nhĩpêx to hã
ixpumunh mex jakamã mãânên te ra
mẽ ate Inhĩpêxà kot amnhĩ nhĩpêx ã
omunh mex pyræk. Anẽ.

*Jejus mẽ Tirtũm wa kot amnhĩ
nhĩpêx tipxi hã wa harênh*

*Juāw 1.1, 10.30; Piripos 2.6; Korosẽ
2.9*

⁸ Nhũm Jejus ã mẽ inhmã kapêr anẽ
nhũm Firipti kuma nẽ kãm:

—Kwa nom mẽ inhmã inhno ho
Anhĩpêxà pumunh prãm. Kot pa mẽ
omu nẽ ixkĩnh tỳx kumrêx. Anẽ.

⁹ Hãmri nhũm Jejus kãm:

—Kwa na pa pre ra mẽ akôt ri
ixpa ryy nẽ. Ka mẽ apri hã ix-
pumunh mex nẽ. Kêt ra mẽ kot
ixpumunh mex xwỳnhjaja te mẽ kot
mãânên Inhĩpêxàja no ho omunh
mex pyræk. ¹⁰ Wa ixte amnhĩ nhĩpêxja
ãm tipxi. Xà ate kormã amnhĩ krã hi
mã ixkapêr jaxàr tỳx kêt? Inhĩpêxà
mẽ wa ixte amnhĩ nhĩpêxja ãm tipxi.
Nẽ kot axpên pyræk. Jakamã na pa
hte amnhĩ krã hkôt ri tanhmã amnhĩ
nhĩpêx to ho ri ixpa hkêt nẽ. ãm
Inhĩpêxà nhỹ hã na pa hte ri tanhmã
mẽ amã ixkapêr to ho ri ixpa. Nẽ
hihtỳx xà ho tanhmã amnhĩ nhĩpêx to

ho ri ixpa. Ka mẽ ja hã ixpumu nẽ te ano ho Inhĩpêêxà pumunh pyrāk. ¹¹ Kwa mẽ ixkapêr ma nẽ hkôt ajamaxpêr tỳx nẽ. Inhĩpêêxà mẽ wa ixte amnhĩ nhĩpêxja âm tipxi. Nẽ kot axpên pyrāk. Rỳ ka mẽ tee ri ja kukamã ajamaxpêr japêr hãmri nẽ ixte aa mẽ ate mẽmoj pumunh kêt kwỳ ho anhỹr ã mãn ixpumu nẽ ja hã wa ixte amnhĩ nhĩpêx tipxi kôt ajamaxpêr.

¹² —Kwa mẽ ixkapêr ma nẽ amnhĩ krã kamã amnhĩ krãm haxàr tỳx nẽ. Mẽ ate amnhĩ kaxyw ixkôt ajamaxpêr xwỳnhjaja kot kaj mẽ ixte tanhmã amnhĩ nhĩpêx to ho ixpa hã ixpumu nẽ ixkôt ã amnhĩ nhĩpêx anhỹr o ri apa. Kot paj akupỹm Inhĩpêêxà hwỳr api nẽ kuri ixpa ho ixpa. Ka mẽ ixwakre kamã ixihitỳx xà ho tanhmã mẽ akwỳjê mã amnhĩ nhĩpêx to ho ri apa.

¹³ —Nẽ kot kaj mẽ apê ixkwỳ hã tanhmã mẽmoj tã ixwỳr to pa mẽ ama nẽ mẽ amã tanhmã mẽmoj nhĩpêx to. Mẽ kot omunh nẽ Inhĩpêêxà mex o mex ã omunh kurê kumrêx kaxyw. ¹⁴ Nà kot kaj mẽ apê ixkwỳ hã mẽmoj tã ixwỳ pa mẽ ama nẽ mẽ amã tanhmã mẽmoj to. Anẽ.

Jejus kot mẽ pahwỳr Tĩrtũm mẽ wa Karõ rênh ã kot amnhĩ jarênh

Juāw 7.37-39, 16.7-17; Atre 2.1-4; mããnên Rõmãn 5.5; Wam Korõt 12.7-11; Epes 3.16; Wam Juāw 2.27

¹⁵ Nhũm Jejus arĩ mẽ inhmã kapêr nẽ mẽ inhmã:

—Nà kot kaj mẽ amã ixkĩnh hã kot kaj mẽ ixkapêr kôt pix mã ri amnhĩ nhĩpêx rãhã ho ri apa.

¹⁶ —Kot paj akupỹm kaxkwa hwỳr api hãmri nẽ mẽ ato Inhĩpêêxà wỳ nhũm inhma nẽ mẽ awỳr kot mẽ ato ajuta xwỳnh maatita rẽ nhũm man mẽ awỳr wrỳ nẽ mẽ akaxwỳnh mã agjê. Hãmri nẽ mẽ akôt tanhmã mẽ ato ajuta hto ho pa rãhã ho pa. ¹⁷ Wa Ixkarõ koja mẽ awỳr kurê nhũm mẽ amã agjê. Hãmri nẽ hprĩ hã mẽ amã Tĩrtũm kapêr o amnhĩrĩt o mẽ akôt pa ka mẽ aprĩ hã mar mex nẽ. No mẽ kêp Tĩrtũm kra hkêt xwỳnhjaja koja

hprĩ hã wa Ixkarõ jarênh mar kêt nẽ. Mẽ kot wa ixkôt amnhĩ xunhwỳr kêt jakamã koja mẽ hkarõ mã gjêx kêt nẽ. Âm mẽ ate ixkôt amnhĩ nhĩpêx o apa xwỳnhjê pix wỳr koja wrỳ nẽ mẽ awỳr agjê nẽ mẽ akamã pa ho pa.

¹⁸ —Nẽ ixte mẽ arer nẽ ma inhmõr mã tã kot kaj mẽ te mẽ hã awrãre pyrã nẽ ahte atỳx ri apa pyrāk kêt nẽ. Kot paj te pa akupỹn mẽ awỳr ixwrỳk pyrã nẽ mẽ awỳr wa Ixkarõ rẽ nhũm mẽ akãm agjê nẽ mẽ akamã pa ho pa.

¹⁹ —Nẽ koja tokyx mẽ kot amnhĩ kaxyw Tĩrtũm mã hamaxpêr kêt xwỳnhjaja axte ixpumunh kêt nẽ. No mẽ papajaja kot puj mẽ tokyx axte nhỹri axpên pumu.

—Nẽ kot paj akupỹm ixtĩr hãmri nẽ ixtĩr tũm nẽ ixpa ho ixpa ka mẽ ixkukwak ri ajaxwỳja nhỹrmã Tĩrtũm mẽ wa ixri atĩr tũm nẽ apa ho apa.

²⁰ —Tã koja wa Ixkarõ mẽ awỳr wrỳ nẽ mẽ akarõ mã agjê ka mẽ aprĩ hã Tĩrtũm mẽ wa ixte amnhĩ nhĩpêx ã wa ixpumunh mex kurê kumrêx. Te wa ixte amnhĩ nhĩpêx tipxi pyrāk o ka mẽ hã wa ixpumu. Nẽ mããnên mẽ papajaja te ra mẽ pahtipxi nẽ ri mẽ papa pyrāk ka mẽ hã amnhĩ pumunh mex kurê kumrêx.

²¹ —Nẽ mẽ kãm ixkĩnh xwỳnhjaja na htem ixkapêr ma nẽ hkôt amnhĩ nhĩpêx o pa. Jakamã nhũm Tĩrtũm ixtã mẽ omu nẽ kãm mẽ hapê htỳx nẽ. Pa mããnên amnhĩ tã mẽ omu nẽ inhmã mẽ hapê htỳx nẽ. Jakamã kot paj mẽ kãm amnhĩ to amnhĩrĩt nhũm te mẽ kot no ho ixpumunh pyrāk. Anẽ.

Nhũm pre ã Jejus hkôt mẽ ixpa ho mẽ ixpa xwỳnhjê mã amnhĩ jarênh anẽ. ²² Hãmri nhũm Jutre hõja. Jut Kariot kêt axtem Jutre hõja Jejus axte kot mẽ inhmã pix mã kot amnhĩ to amnhĩrĩt ã harênhja ma nẽ kãm:

—Kwa aprĩ hã mẽ inhmã mẽmoj jarẽ mẽ ijahkre xwỳnh. Mon ka mẽ kêp akwỳ hkêt xwỳnhjê mã axte amnhĩ to amnhĩrĩt kêt ã amnhĩ jarẽ? Nẽ âm mẽ papxipix mã amnhĩ to amnhĩrĩt ã amnhĩ jarẽ? Anẽ.

²³ Hãmri nhũm kãm:

—Nà mẽ amã ixkĩnh xwýnhjaja na ka htem ixkapēr ma nē hkôt amnhĩ nhĩpêx. Nhũm Inhĩpêêxà ja hã mẽ apumu nē ixtã kãm mẽ ajapê htỳx nē. Hãmri pa wa mẽ akôt ixpa ho ixpa. Jao mẽ amã amnhĩ to amnhĩrĩt mex o ixpa. ²⁴ Na pa hte amnhĩ krã hkôt ri mẽ kãm ixkapēr o ixpa hkêt nē. ãm Inhĩpêêxà nhỹ hã na pa hte mẽ kãm ixkapēr o ri ixpa. Kot mẽ awỳr inhmēnh xwýnhhta nhỹ hã. Tã nhũm mẽ kãm inhmār prãm kêt jakamã na pa hte wa mẽ kãm mẽ apyrà nē amnhĩ to amnhĩrĩt o ixpa hkêt nē.

²⁵ —E na pa kormã ixte mẽ akôt ri ixpa ri ã mẽ amã amnhĩ jarēnh anē. ²⁶ Tã koja Inhĩpêêxà ixpãnhã mẽ awỳr wa Ixkarõ rē. Ixte hã mẽ amã ixàhwỳr xà hkôt. Hãmri nhũm man mẽ awỳr wrỳ nē mẽ akaxwýnh mã agjê nē mẽ akôt ri tanhmã mẽ ato ajuta hto ho pa. Nē ra ixte ã mẽ amã ixkapēr anhỹrja koja hprĩ hã mẽ amã ho amnhĩrĩt mex nē. Ka mẽ amnhĩ krã kamã kãm ajamaxpēr nē hã ano htỳx nē ho apa. Anē.

Jejus kệp mẽ pajamakêtkati nhõr xwýnh

Rõmãn 5.1; Karatas 5.22; Piripos 4.7; Korosẽ 3.15

²⁷ Nhũm Jejus arĩ mẽ inhmã kapēr nē mẽ inhmã:

—Nē mẽ kệp ixkwỳ hkêt xwýnhjaja na htem tee ri amnhĩ kukamã hamaxpēr o ri pa. Jao hkaprĩ nē pa. No pa na pa hte mẽ kurom ijamakêtkati nē ixkĩnh nē ri ixpa ho ixpa. Tã kot paj tanhmã mẽ ato ka mẽ ixpyrà nē ajamakêtkati nē axàmnhĩx akĩnh nē ri apa. Jakamã kwa mẽ ixte amnhĩ jarēnh ma nē tee ri amnhĩ kukamã ajamaxpēr o amã ma ho ri apa hkêt nē.

²⁸ —Na pa pre ra mẽ amã ma ixàpir nē nhỹrmã man akupỹn mẽ awỳr ixwrỳk ã mẽ amã amnhĩ jarē. Tã na pa ra ma akupỹm Inhĩpêêxà hwỳr ixàpir mã. Kot amnhĩ to rax o kot ijakrenh. Kot paj akupỹm hwỳr api nē kuri inhmex nē ixpa ho ixpa. Tã ka mẽ amã ixkĩnh hã kot kaj mẽ ma

akupỹm hwỳr ixàpir ã ijarēnh ma nē inhỹ hã akĩnh nē.

²⁹ —Kormã ma akupỹm ixàpir kêt ri na pa ã mẽ amã amnhĩ kukamã amnhĩ jarēnh anē. Kêr pa mẽmo arĩgro hã ma akupỹm api ka mẽ ja hã ixpumu nē ajamaxpēr o: “Nà ãm hãmri na pre mẽ inhmã amnhĩ kukamã akupỹm Hipêêxà hwỳr àpir ã amnhĩ jarē.” Anhỹr o ajamaxpēr. Jao ixkôt ajamaxpēr tỳx rãhã ho ri apa.

³⁰ —Kot paj tokyx axte tanhmã mẽ amã ixkapēr to hkêt nē. Mẽ kệp ixkwỳ hkêt xwýnhjê nhõ pahiti Satanas-tija na ra kot tanhmã ixto kaxyw. Nom koja tee ri tanhmã kãm ixto hprãm kaprỳ. Kurom ixihtỳx o ixihtỳx o ixte hakrenh par jakamã koja tanhmã ixto hkêt nē. ³¹ Kwãr kãm tanhmã ixto hprãm xà hkôt tanhmã ixto pa omu. Inhmã Inhĩpêêxà hkôt ixte amnhĩ nhĩpêx prãm jakamã kot paj jahti mã arĩ xa nhũm te tanhmã kot ixto pyræk o inhĩpêx nom tanhmã ixto hkêt nē. Mẽ ate inhmã Inhĩpêêxà japê htỳx ã ixpumunh kaxyw kot paj ã mẽ anoo mã amnhĩ nhĩpêx anē. Nē mẽ ate ixte kãm tanhmã amnhĩ nhĩpêx to ho ri ixpa rãhã mẽ kot ixpĩr ã ixpumunh kaxyw. E hãmri. Ma pu mẽ mỗ nē amnhĩ to Tĩrtũm wỳ. Anē.

Nhũm pre ã Jejus hkôt mẽ ixpa ho mẽ ixpa xwýnhjê mã kapēr anē. Pa mẽ kuma nē kànhmã ixkuhê nē inhnojarêt nhũm axte mẽ inhmã aw-jarē.

15

*Jejus te kệp mẽmo krô pyræk
Karatas 2.20; Wam Juāw 2.28*

¹ Nhũm Jejus arĩ mẽ inhmã kapēr nē mẽ inhmã:

—Nà te ixpê mẽmo pĩ pē “uwa” anhỹr xwýnhhta kahkô maati pyræk. Nē Inhĩpêêxàja te kot uwa hkre nē hamār o pa xwýnhhta pyræk. ² Nē mẽ kot ixkôt amnhĩ xunhwỳr xwýnhjaja te mẽ kot uwa kahkô rũm krô pyræk. Na hte mẽ hkwyjaja htỳx ri kệp ixkwỳ hã amnhĩ jarēnh ã amnhĩ to hêx. Jao te kot krôja rã htã ô hkêt pyræk. Koja rã htã ô hkêt nē nhũm kot hamār

xwýnhja tee ri omu nê kahkô nê krâhta nê kumê. No koja ô mex nê nhũm omu nê hkĩnh nê. Hãmri nê rã nê ô rax kaxyw tanhmã ho mex to. Tã na hte Tĩrtũm uwa krô jamãr xwýnhhta pyrã nê ã mẽ ate ixkôt amnhĩ xunhwýr xwýnhjê nhĩpêx anê. ³ No mẽ kajaja na ka prem mẽ kot ixkwý hã amnhĩ to hêx xwýnhjê rom ixkapêr mar tỳx nê. Nê amnhĩ kaxyw inhmã ajamaxpêr nê ixkôt amnhĩ nhĩpêx mex o apa. Jao te mẽ ate krô rã nê ô rũnh pyrãk o amnhĩ nhĩpêx.

⁴ —Na hte krôja amnhĩ krã hkôt ô hkêt nê. ãm kahkô pix kukwak ri na hte rã nê ô. Ja pyrã nê kot kaj mẽ ixkukwak ri pix mã inhmã hprãm xã hkôt ri tanhmã amnhĩ nhĩpêx to ho apa. Jakamã kwa kêr ka mẽ ixkapêr pix mãn mar o apa pa mẽ akôt ixpa ho ixpa. ⁵ Te ixpê kahkô nhũm te mẽ apê krô pyrãk jakamã kot kaj mẽ inhmã hprãm xã hkôt tanhmã amnhĩ nhĩpêx to ho ri apa nê te krô rã nê ô rũnh pyrãk o amnhĩ nhĩpêx. No kot kaj mẽ amnhĩ krã hkôt ri amnhĩ nhĩpêx o ri apa nê te krô grã nê ô hkêt pyrãk o amnhĩ nhĩpêx.

⁶ Na hte uwa krô nhõ dõnja nhỹri hã krô grã pumu hãmri nê kahkô nê hakà nê ma o mra nê kuwy kamã kurê nê ho hxêt pa. Ja pyrã nê mẽ kot htỳx ri ixkôt amnhĩ xunhwýr ã amnhĩ jarênh xwýnhjaja koja mẽ nhỹrmã amnhĩ xã htỳx kamã hamak rãhã ho pa.

⁷ —Tã no mẽ kajaja. Kêr ka mẽ ixkapêr kôt pix mã amnhĩ nhĩpêx rãhã ho ri apa. Te mẽ pahtipxi nê ri papa pyrãk o amnhĩ nhĩpêx. Hãmri nê mãmrĩ amã hprãm xã hkôt mẽmoj tã Tĩrtũm wý nhũm ama nê amã mẽmoj tã ate hwýr xãta kôt kugõ. ⁸ Kot kaj mẽ Inhĩpêêxã mẽ wa ixkapêr kôt amnhĩ nhĩpêx o ri apa nhũm mẽ piitã ja hã mẽ apumu nê hamaxpêr o: “Hêxta waa nê. Jajaja na htem Tĩrtũm kot amnhĩ nhĩpêx o amnhĩ nhĩpêx o pa. Mãn Tĩrtũmja mex o mex.” Anhỹr o hamaxpêr.

⁹ —Nê na pa hte Inhĩpêêxã kãm ijapê

pyrãk o inhmã mẽ ajapê nê. Tã kêr ka mẽ amarĩ inhmã mẽ ajapê hã ri ixkôt amnhĩ nhĩpêx mex o apa. ¹⁰ Na pa hte ãm Inhĩpêêxã kapêr kôt pix mã ri amnhĩ nhĩpêx o ri ixpa. Jakamã na pa hte kãm ijapê hã ixkĩnh nê ri ixpa. Tã kêr ka mẽ ixpyrã nê ixkapêr kôt pix mã tanhmã amnhĩ nhĩpêx to ho ri apa. Nê ixpyrã nê inhmã mẽ ajapê hã amnhĩ pumu nê akĩnh nê ri apa.

¹¹ —E na pa ã mẽ amã ixkapêr anê. Mẽ ate inhmar nê ixpyrã nê axãmnhĩx ajamakêtkati nê akĩnh nê ri apa kaxyw. Tã kêr ka mẽ ã amnhĩ nhĩpêx anê nê te pa ixte ã amnhĩ nhĩpêx anhỹr pyrãk. Anê.

Jejus kot mẽ pamã axpên kĩnh tỳx ã mẽ pamã karõ

¹² Nhũm Jejus arĩ mẽ inhmã kapêr nê mẽ inhmã:

—E kêr ka mẽ te inhmã mẽ ajapê pyrãk o mẽ amã axpên japê ho mẽ amã axpên kĩnh o ri apa. Jao axpên to mex o ri axpên kôt apa. ¹³ Koja mẽhõ kãm hkrãmnhwý japê htỳx nê nhũm ra mẽhõ mẽmo mýrapê kot kêp hpĩr mã nhũm tee ri hã omu nê nê kãm amnhĩ mẽ nhũm kupĩ. Hãmri nhũm mẽ ja hã omu nê kãm hkrãmnhwý japê htỳx ã nê htyk ã axpên mã harê.

¹⁴⁻¹⁵ —E kot paj axte mẽ apê inhmã mẽ axapênh xwýnh ã mẽ ajarênh kêt nê. Na hte mẽ ô patrãwjaja hprĩ hã kãm mẽ apênh xwýnhjê mã amnhĩ jarênh kêt nê. Na htem ãm mẽ apênh pix ã mẽ kurê. Nom mẽ kajaja mẽ ate ixkapêr mar nê hkôt pix mã amnhĩ nhĩpêx jakamã kot paj hpãnhã mẽ apê ixkrãmnhwý hã mẽ ajarê. Na htem axpên to hkrãmnhwý nê ma nhỹhỹm pa kaxyw nê tanhmã amnhĩ kukamã hkrãmnhwý mã amnhĩ jarênh to. Tã mẽ apê ixkrãmnhwý jakamã na pa hte ã amnhĩ kukamã mẽ amã amnhĩ jarênh anê. Nom ja pix jarênh kêt nê. Na pa hte mããnên Inhĩpêêxã xõ ri mẽ amã mẽmoj piitã ho amnhĩrĩt o mẽ akôt ixpa.

¹⁶ —Nê mẽ kajaja na ka prem ixpê mẽ akrãmnhwý kaxyw ixãm kêt nê. Pa na pa pre amnhĩ kaxyw inhmã

mē aprām. Ixkapēr kôt pix mā ri mē ate tanhmā amnhī nhīpêx to ho apa kaxyw. Te uwa krô ô rŭnh nē aa grà hkêeta pyrāk. Jakamā kot kaj mē mēmoj tā Inhīpêxà wý nhŭm mē ama nē mē ate mēmoj tā hwýr xà hkôt amā kugō.

17 —E. Kwa kêr ka mē amā axpēn kīnh nē tanhmā axpēn to ajuta hto ho axpēn mā mēmoj kutā anojarēt pix o mǎn kêt ri apa. Nà ja na kêt inhmā hprām. Anē.

Mē kot Jejus kwýjé kamā gryk xwýnhjé jarēnh

Matêwre 10.22; mǎānēn Juāw 7.7, 17.14; Wam Juāw 3.13

18 —Nē koja ixkwý hkêt xwýnhjaja kām mē aprām nōkati. Tā kêr ka mē amnhī tā mē omu nē tee ri amnhī kukamā ajamaxpēr kêt nē. Ixkumrēx na prem kām ixprām nōkati. Tā koja mē mā ixtā mē ato anē nē kām mē aprām kêt nē. 19 Mē apê mē hkwy rōnhýx mē amnhī tā mē apumu nē kām mē ajapê nē. Nom apê mē hkwy hkêt. Ra ixte amnhī kaxyw mē arēnh jakamā na htem tee ixtā mē apumu nē kām mē akīnh kêt o kām mē akurê nē. 20 Koja mē ixtā hpijaàm kêt nē nē mǎānēn mē atā hpijaàm kêt nē. Nē mē anhīpêx o te mē kot pa ixpê mē anhō patrāw nhīpêx pyrāk. Ka mē ixpyrà nē amnhī xà htýx kām ajamak o ri apa. Na pa pre ra mē amā ja jarē. Nom koja mē akwýjaja jajê rom te ra mē kot ixkapēr mar nē hkôt amnhī nhīpêxta pyrà nē mǎānēn mē akapēr ma nē hkôt amnhī nhīpêx o pa. Kwa kêr ka mē ixkapērja mǎ mǎn ajamaxpēr týx rāhā ho ri apa.

21 —Koja mē ixtā tanhmā mē anhīpêx to. Mē kot Tirtŭm kapēr kôt amnhī nhīpêx kêt jakamā koja mē ā ixtā mē anhīpêx anē. Tirtŭm kot mē awýr inhmēnh kôt hamaxpēr kêt nē ā mē anhīpêx anē. 22 Ixwryk nē mē kām Tirtŭm kapēr jarēnh o ri ixpa htā nhŭm mē inhma nē ām inhma nē ixkôt amnhī nhīpêx kêt nē. Jakamā koja mē kot amnhī tomnuj xwýnh ā amnhī to hpimxur kêt nē.

23 —Nē koja mēhō kêp ixprām nōkati nē mǎānēn te kêp Inhīpêxà prām nōkati pyrāk. 24 Na pa pre mē piitā mē hkôt aa mē kot mēmoj pumunh kêt kwý ho anhýr o ri mē hkôt ixpa nhŭm mē hā ixpumu. Ām papxipix na pa pre ā amnhī nhīpêx anhýr o ri mē hkôt ixpa nhŭm mē hā ixpumu. Kêp ām mē kot ja hā ixpumunh kêt rōnhýx prem axpēn mā ijarēnh o: “Tk. Mē pahte mēhōja nhýhýnh mē pahwýr hpōx ā omunhre hā kot puj kêt mē ri hā pahpijaàm o ri papa.” Anhýr o nhýx prem axpēn mā ijarē. Tā ra mē kot ja hā ixpumunh mex tā axtem nē Inhīpêxà mē wa mē kām wa ixkurê nē. Jao mē kot amnhī tomnuj xwýnh ā amnhī to hpimxur kêt nē. 25 No Tirtŭm kapēr ā kagà htŭm kot mē hkukamā mē harēnh nē mē hā kagà nē kot mē hā kagà kot:

Mēmo tanhmā kute mýrapê na htem kām ixkurê? Nà ām amarī na htem kām ixkurê ho pa. Anē.

Tā ā ixtā kagà kot anhýr xà hkôt na htem ā kām ixkurê anē. Jakamā koja mē mǎānēn ixtā kām mē akurê nē. Nom kêr ka mē arī mē kām ixkapēr jarēnh o ri mē hkôt apa nē tee ri amnhī kukamā ajamaxpēr kêt nē.

26 —Nē tokyx ma akupým Inhīpêxà hwýr ixàpir mā tā kot paj hwýr pōj nē aa mē ato ijamakêtkati hkêt nē. Kot paj amnhī pānhā mē awýr wa Ixkarō rē. Mē kot kām: “Mē kutā nojarēt xwýnh maati” anhýr xwýnhnta kot paj mē awýr kurê nhŭm ixpānhā mē awýr wrý nē mē amā agjê nē hprī hā mē amā Tirtŭm mē wa ixto amnhīrīt o ri mē akôt pa. 27 Kot kaj mē ama hāmri nē ma mē piitā mē hkôt ri mē kām ixkapēr jarēnh o ri apa. Na pa pre ra mē kām Tirtŭm kapēr jarēnh ryy ho mē hkôt ri ixpa ka mē ixkôt ri inhmar o apa ry nē. Jakamā kêr ka mē ixwakre kamā arī mē kām ixkapēr jarēnh o ri mē hkôt ri apa. Anē.

16

1 Nhŭm Jejus arī mē inhmā kapēr nē mē inhmā:

—Ně mẽ kot nhỹrmã ixtã tanhmã mẽ anhĩpêx to nhũm mẽ ate tee ri amnhĩ kukamã ajamxpêr nẽ mẽ umaj ixkaga pymaj na pa hte ã mẽ amã ixprĩ hã mẽmoj jarênh ry anê.
² Kot kaj mẽ kãm ixkapêr jarênh o ri apa nhũm mẽ hkwyjaja tee ri mẽ ama nhũm ja mẽ kêp omnuj nẽ. Nhũm mẽ Tĩrtũm kapêr o mẽ ahkre xà hã ixkreja rũm amnhĩ nẽ mẽ ajano nẽ mẽ akwýjê hpar o pa. Hãmri nẽ hamxpêr o: “E pu mẽ axte mẽ hkwyjê pyné nẽ mẽ kupa. Tĩrtũm kãm ja mex kênã.” Anhỹr o htýx hamxpêr o pa.
³ Mẽ kot hprĩ hã Inhĩpêêxà mẽ wa ixkapêr mar mex kêt nẽ ã htýx wa inhmã ja mex ã wa ijarênh anê.
⁴ Nom mẽ ate ixkôt amnhĩ xunhwýrta krax kãm na pa pre ã mẽ amã mẽ harênh anhỹr kêt nẽ. Arĩ mẽ akôt ixpa kênã. Kot ka mẽ ixkôt apa rãhã amã mẽ uma hkêt nẽ. Tã pa ra akupým inhnojarêt nẽ ã mẽ amã mẽ harênh anê. Jakamã koja mẽ nhỹrmã ã mẽ anhĩpêx anê ka mẽ amnhĩ tã mẽ omu nẽ ra ixte mẽ akukamã ã mẽ harênh anhỹrja mã ajamxpêr kurê kumrêx nẽ tee ri amnhĩ kukamã ajamxpêr kêt nẽ. E kwa ixkapêrja mãn mẽ amnhĩ krã him haxàr týx nẽ ri hã apa. Anê.

Jejus mẽ Tĩrtũm wa hkarõ jarênh

⁵⁻⁶ Nhũm Jejus arĩ mẽ inhmã kapêr nẽ mẽ inhmã:

—E na pa ra kot mẽ awýr inhmênh xwýnhhta wýr ra akupým inhnojarêt ka mẽ ixte amnhĩ jarênh ã inhma nẽ akaprĩ nẽ. Nẽ tee ri amnhĩ kukamã ajamxpêr tã mẽ atõ aprĩ hã ma inhmõr xà ã ixkukjêr kêt nẽ. Rý inhmã: “Kwa mo kaxyw kot kaj kêt mẽ ixre nẽ ma akupým mō? Xà we ja amã mex?” Anhỹr o mẽ atõ ixkukjêr kêt nẽ.
⁷ Kêt ma akupým ixàpirja mẽ amã mex kumrêx. Kop ãm akupým ixàpir kêt ronhỹx mẽ amã mẽmoj kutã nojarêt xwýnhhta ixpãnhã mẽ awýr wrýk kêt nẽ. Tã kot paj ma akupým api nẽ amnhĩ pãnhã mẽ awýr kurê. Jakamã kwa mẽ ja ma nẽ tãm ajamxpêr o ri apa.
⁸ Koja ixpãnhã mẽ awýr wrý hãmri nẽ mẽ

kêp ixkwý hkêt xwýnhjê mã mẽmoj to axkrunêpxi nẽ ho amnhĩrĩt. Koja mẽ kãm mẽ kot tanhmã amnhĩ tomnuj to xà ho amnhĩrĩt. Nẽ mãânên mẽ kãm tanhmã mẽ kot amnhĩ to mex to xà ho amnhĩrĩt. Nẽ mãânên Tĩrtũm kot nhỹrmã mẽ kot amnhĩ tomnuj mýrapê tanhmã mẽ homnuj to xàta nhũm mãânên mẽ kãm ho amnhĩrĩt. Koja mẽ kãm ja piitã ho amnhĩrĩt.

⁹ —Jakamã koja mẽ ja kukamã tanhmã hamxpêr to nẽ hamxpêr o: “Kwa kot paj xep amnhĩ tomnuj kaga nẽ amnhĩ kaxyw Tĩrtũm Kra Jejus mã ijamxpêr nẽ hkôt amnhĩ xãm kêt nhũm Tĩrtũm nhỹrmã ixte amnhĩ tomnuj mýrapê tanhmã ixto.
¹⁰ Nà kot paj hkôt amnhĩ xãm hãmri nẽ ra urak nẽ Tĩrtũm kapêr kôt tãm ri amnhĩ nhĩpêx o ixpa. Na pre Jejus tãm ri amnhĩ nhĩpêx o pa nhũm Tĩrtũm amnhĩ wýr ho api pa mẽ axte jar nhỹri omunh kêt nẽ.
¹¹ Na xep Tĩrtũm nhỹrmã kot ma kuwy hwýr mẽ kêp Jejus kwý hkêt xwýnhjê nhõ pahi maatiya mênh ã ra amnhĩ kukamã hã amnhĩ jarê. Jakamã kwa arĩ ixpê hkwy jakamã kot paj tokyx Jejus kôt amnhĩ xãm kêt nhũm hkôt kuwy hwýr inhmẽ.” Anhỹr o hamxpêr. Koja ã wa Ixkarõja mẽ kêp ixkwý hkêt xwýnhjê mã mẽmoj to amnhĩrĩt mex anê.

¹² —Nẽ na pa kormã mẽ amã mẽmoj piitã ho amnhĩrĩt kêt nẽ. Kormã mẽ ate aprĩ hã mẽmoj pumunh nẽ mar mã tãm kêt.
¹³ Tã koja ixpãnhã wa Ixkarõ mẽ awýr wrý nẽ mẽ akarõ mã agjê hãmri nẽ hprĩ hã mẽ amã Tĩrtũm kot amnhĩ nhĩpêx o amnhĩrĩt o mẽ akôt pa ho pa. Nom koja amnhĩ krã hkôt tanhmã mẽ amã ho amnhĩrĩt to hkêt nẽ. Koja ãm Tĩrtũm pix xô ri mẽ amã ho amnhĩrĩt o mẽ akôt pa. Jao hprĩ hã mẽ amã ixkôt mẽ ate amnhĩ nhĩpêx nyw o mẽ amã amnhĩrĩt o mẽ akôt pa. Á koja hprĩ hã ra ixte mẽ amã ixujarênh xà hkôt axte mẽ amã mẽmoj to amnhĩrĩt mex o pa anê.

¹⁴ —Nẽ koja hprĩ hã mẽ amã pa ixto amnhĩrĩt o pa. Jao mẽ amã inhmex o inhmex ã ixto amnhĩrĩt o mẽ akôt pa.
¹⁵ Inhĩpêêxà mẽ wa ixkapêrja ãm

htipxi. Tã koja wa Ixkarō ixkapēr xō ri ã mẽ amã mẽmoj to amnhĩrĩt anē. Jao ra wa ijamē wa ixkapēr o amnhĩrĩt mex o pa. Koja ã wa mẽ apē ixkwỳ hã mẽ ato mex o pa anē. Anē.

Mē kot akupỹm Jejus tĩr ã omunh ã mẽ harēnh

¹⁶ Nhũm Jejus arĩ mẽ inhmã kapēr nē mẽ inhmã:

—Nē kot paj tokyx mẽ ano pē akunok ka mẽ axte amnhĩ kaēx ã ixpumunh kêt nē. Nom kwa kēr ka mẽ tee ri ixkapērja kukamã ajamaxpēr kêt nē. Kot paj ixtã apkati grēre ka mẽ axte ixpumu. Anē.

¹⁷⁻¹⁸ Nhũm pre ã Jejus hkôt mẽ ixpa ho mẽ ixpa xwỳnhjê mã kapēr anē. Pa mẽ tee ri ã kapēr anhỹr ã kuma nē axpēn mã:

—Kwa mo na ri ã amnhĩ jarēnh anē? Nē tokyx mẽ pano pē pikunor tã hã apkati grēre nhũm axte mẽ pahte omunh ã amnhĩ jarē nē akupỹm Hipēêxà hwỳr àpir ã amnhĩ jarē. Pēr kapērja ãm ri katii. Anē.

¹⁹ Nhũm amnhĩ tã mẽ inhma nē mẽ inhmã:

—Kwa xà na ka mẽ kormã aprĩ hã ixkapēr ã inhmar kêt nē? ²⁰ Kot paj ty nhũm mẽ kēp ixkwỳ hkêt xwỳnhjaja ijarēnh ma nē hkĩnh nē. No mẽ kajaja kot kaj mẽ akaprĩ nē amỳr o apa. Nē gaa nē akupỹm akĩnh nē. Kwa mẽ ixkapērja ma nē kãm ajamaxpēr tỳx o apa. ²¹ Te mẽ ate mẽ hpijagri xwỳnh kot amnhĩ nhĩpêx pyrãk. Na htem õhy xà nē gaa nē ra õhy xà htỳx nē. Nē hkĩnh kêt nē tee ri amnhĩ nhĩpêx o hikwỳ. Tã gaa nē hpijagri nhũm hkrare kato nhũm omu nē akupỹm hkĩnh nē axte õhy xà htỳx mã hamaxpēr kêt nē. ²² Tã ã mẽ ate amnhĩ nhĩpêx anhỹr kaxyw. Kot kaj mẽ akĩnh kêt nē ri apa. Tã kot paj akupỹm tokyx ixtĩr nē axte mẽ awỳr ixkato ka mẽ ixpumu nē akĩnh nē. Hãmri nē akĩnh rãhã ri apa ho apa. Nhũm mēhō mẽ apumu nē tee ri tanhmã mẽ akĩnh nē mẽ ato kaprỳ ka mẽ arĩ akĩnh rãhã ri apa ho apa.

²³ —Nē ixte akupỹm kaxkwa hwỳr ixàpir nē amnhĩ pãnhã mẽ awỳr wa

Ixkarō rēnh nhũm mẽ awỳr wrỳk nē hprĩ hã mẽ amã mẽmoj piitã ho amnhĩrĩt jakamã kot kaj mẽ axte amã mẽmoj tã ixkukjēr prãm kêt nē. Anē.

Jejus kwỳjaja kot àmnhĩx mẽmoj tã Tĩrtũm wỳr

Matêwre 18.19-20; Juāw 14.13-14

Nhũm Jejus arĩ mẽ inhmã kapēr nē mẽ inhmã:

—E kwa mẽ ã ixkapēr anhỹrja ma nē amnhĩ krã kamã kãm ajamaxpēr tỳx nē ho apa. Kot kaj mẽ apē ixkwỳ hã mẽmoj tã Inhĩpêêxà wỳ nhũm mẽ ama nē mẽ ate hã axàhwỳr xà hkôt mẽ amã mẽmoj tanhmã ho rỳ mẽ amã mẽmoj gō. ²⁴ Na ka mẽ kormã apē ixkwỳ hã mẽmoj tã axàhwỳr kêt nē. Tã kēr ka mẽ amã mẽmoj tã hwỳr prãm nē mãmri mẽmoj tã hwỳr o apa. Kê mẽ ama hãmri nē tanhmã mẽ amã mẽmoj nhĩpêx to ka mẽ amnhĩ tã omu nē akĩnh nē.

²⁵ —Nē na pa pre mẽ amã mẽmoj jarēnh kaxyw nē mẽmoj tã haxwỳ nē mẽ amã ixujarēnh rax nē. Nom kot paj axte ã mẽ amã ri ixujarēnh anhỹr kêt nē. Kot paj tã ixprĩ hã mẽ amã tanhmã Inhĩpêêxà jarēnh to ka mẽ aprĩ hã mar mex kurê kumrēx. ²⁶ Hãmri nē mẽ kamjaja mẽ apē ixkwỳ hã tanhmã amnhĩ to hwỳr to ho apa. Jakamã mo kaxyw kot pa kêt axte tanhmã mẽ ato hwỳr to? Kot kaj mẽ kamjaja amnhĩ to hwỳr jakamã arĩ ixte mẽ ato hwỳr kaxyw ixto presija hkêt nē.

²⁷ —Na ka mẽ ra amã ijapê nē. Nē ixte Inhĩpêêxà rũm mẽ awỳr ixwrỳk ã ixpumu. Jakamã nhũm Inhĩpêêxàja ixtã mããnēn kãm mẽ ajapê nē. Tã kot kaj mẽ kamjaja mẽmoj tã amnhĩ to hwỳr o apa nhũm mẽ ama nē kãm mẽ ajapê htỳx kãm mẽ amã mẽmoj gō.

²⁸ —Na pa pre Inhĩpêêxà rũm amnē mẽ awỳr wrỳ. Hãmri nē kãm hprãm xà hkôt tanhmã amnhĩ nhĩpêx to hpar o mō nē ra akupỹm hwỳr inhnojarēt kaxyw. Anē.

Nhũm pre ã Jejus mẽ inhmã amnhĩ jarēnh anē. ²⁹ Pa mẽ tã ixprĩ hã mar mex nē. Hãmri nē kãm:

–Tỳ. Nà na pa mẽ tã ixprĩ hã ate amnhĩ jarēnh ma. Ka amnhĩ tã haxwỳr nē axujarēnh kêt jakamã pa mẽ tã ixprĩ hã amar mex nē. ³⁰ Pēr ãm ate mẽmoj piitã omunh par xwỳnh na ka. Jakamã ate mẽ ijamaxpēr piitã hkôt aprĩ hã mẽ ixpumunh par kumrēx kēnã kot ka tanhmã mẽ ijamaxpēr to hã mẽ ixkukja. ãm hãmri na ka Tĩrtũm rũm awrỳk ã amnhĩ jarē. Anē.

³¹ Hãmri nhũm mẽ inhma nē mẽ inhmã:

–Xà ãm hãmri na ka mẽ ixkôt ajamaxpēr tỳx nē? ³² Kwa mẽ o kora. Kot kaj mẽ tokyx mẽ umaj ixre nē anhrã nē ma ahpỹnhã mẽ anhõ krĩ hwỳr mra. Mẽ kot ixkôt tanhmã mẽ anhĩmex to pymaj kot kaj mẽ ã amnhĩ nhĩpêx anē kãm ga. Kot paj ahte mẽ kãm ixãm pyrãk o amnhĩ nhĩpêx nom ahte ixãm kêt nē. Inhipeêxã aa kot ixrere hã.

³³ –E ixkukwak ri mẽ ajamakêtkati nē axãmnhĩx mẽ apa kaxyw na pa ã mẽ amã ixkapēr anē. Nom mẽ kēp ixkwỳ hkêt xwỳnhjaja koja nhỹrmã ixtã mẽ atomnuj tỳx o pa. Tã kēr ka mẽ amã mẽ uma nē tee ri amnhĩ kukamã ajamaxpēr o ri apa hkêt nē. Nhỹrmã ixte mẽmoj punuj piitã ho ijapêx par ã arĩgrota ã kot paj mẽ atã mẽ ho ijapêx par kumrēx. Anē.

17

Jejus kot amnhĩ to Tĩrtũm wỳr ã harēnh

Rômãn 8.34; Eprêw 7.25

¹ Tã nhũm Jejus mẽ inhma kapēr pa nē hpãnhã kaxkwa hwỳr rĩt nē Tĩrtũm mã amnhĩ jarē nē kãm:

“Pa Papaj. E na pa ra amã hprãm xà hkôt tanhmã amã amnhĩ nhĩpêx to hpar o mō nē akupỹm awỳr inhnojarêt kaxyw. Jakamã kot kaj ixpê Akra hã ma akupỹm amnhĩ wỳr ixto api. Mẽ kot ja hã ixpumunh nē amã amex o amex ã ajarēnh o pa kaxyw. ² Na ra pyka piitã hkôt ri mẽ pa xwỳnh kwỳjaja amnhĩ kaxyw ixkôt hamaxpēr nē ixkôt amnhĩ xunhwỳ nom ka na

ka pre inhma mẽ agō. Ixte mẽ htĩr tũm nē mẽ pa mã xwỳnh ã mẽ harēnh kaxyw. Jakamã koja mẽ nhỹrmã ixkukwak ri pakuri htĩr tũm nē pa ho pa. ³ Na mẽ ra ixkapēr mar mex nē. Nē ixpê Jejus Kris pē ate mẽ hwỳr inhmēnh xwỳnhja kôt hamaxpēr mex nē. Nē apê Tĩrtũm ã ãm apyxi mex ã mããnēn akôt hamaxpēr mex nē. Nē amex o amex ã akôt hamaxpēr nē kãm akĩnh nē. Jakamã koja mẽ nhỹrmã pakuri htĩr tũm nē pa ho pa. Nà koja mẽ anē.

⁴ Amnepêm amnē pyka ja hwỳr inhnojarêt nhũm ate tanhmã ixte amnhĩ nhĩpêx to hã inhma karõta na pa ra hatur xãm mēnh kaxyw. Na pa xatã mẽ kãm akapēr jarēnh o ri mẽ hkôt ixpa. Jao ra mẽ kãm apê Pahi Maati hã apixi mex ã ajarē nē amex o amex nē axàhpumunh o axàhpumunh ã mẽ kãm ajarēnh o ri ixpa. ⁵ Jakamã e Papaj. Kēr ka tokyx ixpê akra hã ma akupỹm amnhĩ wỳr ixto api. Pa akupỹm awỳr pōj nē te amnepêm akuri ixpaja pyrã nē axte akuri ixpa ho ixpa.” Anē.

Jejus kot hkwỳjê ho Tĩrtũm wỳr ã harēnh

Nhũm Jejus arĩ Tĩrtũm mã kapēr nē kãm:

⁶ “E Papaj. Nà ra ate pyka hkôt inhma mẽ õr xwỳnhjaja na pa ra mẽ kãm akapēr jarēnh ryy ho ri mẽ hkôt ixpa nhũm mẽ akapēr kôt pix mã amnhĩ nhĩpêx o pa. ⁷ Tã ixte anhỹ hã tanhmã amnhĩ nhĩpêx to ho ri ixpaja ra mẽ kot ja hã ixpumunh mex. ⁸ Na pa pre hte axô ri mẽ ahkre ho ri ixpa nhũm mẽ amnhĩ kaxyw ixkôt hamaxpēr mex nē. Nē ate mẽ hwỳr inhmēnh nhũm mẽ hwỳr ixwỳkja ã mẽ kot ixpumunh mex.

⁹⁻¹⁰ Tã ot pa mẽ ho awỳr o xa. Nom na pa mẽ kēp ixkwỳ hkêt xwỳnhjê ho awỳr kêt nē. ãm ate inhma mẽ õr xwỳnhjê pix o na pa awỳ. Mẽ kēp akra jakamã mããnēn

mē kēp ixkraa. Jakamã na htem pamã pamex o pamex ã pajarēnh o ri pa.

¹¹ Axihtỳx o axihtỳx jakamã na ka pre amnhĩ xwar inhmã axihtỳx xà hkwỳ gō pa te ixte axihtỳx pyrāk. Tã na pa ra akupỹm awỳr inhnojarēt kaxyw. Kot paj jar pyka hkôt ri ixpa ry hkêt nē. Nom ixkwỳjaja koja mē arĩ kamã pa jakamã kwa Papaj. Kēr ka inhmã mē omunh mex nē kē mē inhỹ hã tãm ri amnhĩ nhĩpêx o pa. Nē pahpyrà nē te ixkre tipxi kamã mē htipxi nē mē pa pyrāk o axpēn kôt pa.

¹² Kormã mē kamã ixpata ã ate inhmã axihtỳx xà hkwỳ nhōrta o pa mē htānopxar mex o ri mē hkôt ixpa. Jakamã nhũm mē ri ixkôt amnhĩ nhĩpêx o pa. Ām Jut Kariot pix koja mē hkĩnhã tanhmã amnhĩ tomnuj to nē hapêx. No ãm ra akapēr ã kagà kot hkukamã ã kot amnhĩ nhĩpêx anhỹr ã harēnh xàja kôt koja ã amnhĩ nhĩpêx anē nē hapêx.

¹³ Tã na pa ra akupỹm awỳr inhnojarēt kaxyw jakamã na pa ixte tokyx mē rer mã xwỳnhjê ho awỳr o xa. Kormã mē hkôt ri ixpa ri. Mē kot inhmar nē ixpyrà nē hkĩnh nē hamakêtkati nē ri pa kaxyw. ¹⁴ Na pa pre ra mē kãm akapēr jarēnh ry nē nhũm mē ixpyrà nē akôt pix mã amnhĩ nhĩpêx o ri pa. Jakamã nhũm hte mē kēp ixkwỳ hkêt xwỳnhjaja tee ri ja hã mē omu nē axtem nē kãm mē hkurê nē. Nom mē kēp mē hkwỳ hkêt jakamã na htem ã mē kamã gryk anē.

¹⁵ Tã na pa ã mē ho awỳr anhỹr o xa. Nom mē kot amnhĩ tomnuj xwỳnhjê hkàx ã mē pa kaxyw na pa mē ho awỳr kêt nē. Koja mē arĩ mē hkôt ri pa. Nom mē urāk nē amnhĩ tomnuj o pa pumaj na pa ã mē ho awỳr anē. ¹⁶ Mē kēp mē hkwỳ hkêt. Axtem mē kot amnhĩ nhĩpêx. Te mē kot mē pahte amnhĩ nhĩpêx pyrāk jakamã kē mē amarĩ mē hkôt pa htã mē kot amnhĩ nhĩpêx kôt amnhĩ

nhĩpêx o pa hkêt nē. Ām pahkôt pix mã amnhĩ nhĩpêx o pa. ¹⁷ Akapēr pix na mex o mex jakamã koja mē hkôt amnhĩ nhĩpêx o pa nē gaa nē te pahte amnhĩ nhĩpêx pyrāk o amnhĩ nhĩpêx.

¹⁸ Na ka pre amnē mē hwỳr inhmē pa pre ixte mē kãm akapēr jarēnh o ri ixpa kaxyw mē hwỳr wrỳ. Nē amnhĩ pyrã nē mē kot akapēr jarēnh o mē hkôt pa kaxyw pa mē kurê nē ma mē hwỳr mē kurê. ¹⁹ Inhmã mē hapê jakamã kot paj amnhĩ grōnh kôt nhãm mē kot axpēn mã ri inhgrōnh o pa xwỳnhjê mã amnhĩ gō. Amã hprãm xà hkôt. Ixkwỳjaja kot ja hã ixpumunh nē ixpyrà nē amã hprãm xà hkôt pix mã tanhmã amnhĩ nhĩpêx to ho pa kaxyw.” Anē.

Jejus kot hkrajê piitã ho Tirtũm wỳr

²⁰ Nhũm Jejus arĩ Tirtũm mã amnhĩ jarē nē kãm:

“Tã na pa ã jajê ho awỳr anē Papaj. Nom ixkôt mē pa ho mē pa xwỳnhjê pix o na pa awỳr kêt nē. Määnēn mē ô ri nhỹrmã mē kot ixkôt amnhĩ xunhwỳr mã xwỳnhjaja na pa mē ho ixpimràa tã mē ho awỳ. ²¹ Kē mē pahpyrà nē te hamaxpēr tipxi pyrã nē ri axpēn to pa. Nē pahte amnhĩ nhĩpêx kôt pix mã amnhĩ nhĩpêx o pa. Koja mē ã amnhĩ nhĩpêx anhỹr o pa nhũm mē kēp pahkwỳ hkêt xwỳnhjaja pahtã mē omu nē ate mē hwỳr inhmēnh ã apumunh kurê kumrêx.

²² Nē koja mē ixkukwak ri panhỹ hã te pahpyrà nē hamaxpēr tipxi nē ri pa pyrāk o amnhĩ nhĩpêx o pa. ²³ Na pa htem te ixkre tipxi kamã mē ixtipxi pyrāk o axpēn nhĩpêx o ri ixpa. Te pahte axpēn nhĩpêxta pyrāk. Tã koja mē ixwakre kamã ã axpēn nhĩpêx anhỹr o pa nhũm mē kēp pahkwỳ hkêt xwỳnhjaja ja hã mē omu nē hamaxpēr o: ‘Nà pēr ãm hãmri na pre Tirtũm tãm mē pahwỳr Jejus mē. Kãm hapê htỳx tã mē pahwỳr kumē nhũm wrỳ nē amnhĩ xwar kãm hkwỳjê japê nē.’

Anhÿr o koja axpën mã pajarënh o pa.

²⁴ Amnepêem amrakati ri pa pre amã ijapê hã ri ixpa. Tã ot pa jajê ho awÿ. Ka na ka pre inhmã mẽ agõ. Tã ma awÿr inhmõr mã xàta wÿr na pa inhmã mẽ àpir prãm nê. Koja mẽ nhÿrmã ma pahwÿr api pu mẽ pahpiitã pahpimràatã pamã axpën japê hã ri papa ho papa.

²⁵ E Papaj. Amex o amex tã mẽ kêp ixkwÿ hkêt xwÿnhjaja na kormã ate mẽ hwÿr inhmên xwÿnh ã ixkõt hamaxpêr kêt nê. Nom mẽ kot ixkõt amnhÿ xunhwÿr xwÿnhjaja na mẽ kurom ja hã ixkõt hamaxpêr mex nê.

²⁶ Na pa ra ixprÿ hã mẽ kãm akapêr o amnhÿrÿt o ri ixpa. Tã kot paj axte mẽ kãm akapêr kwÿ jarê. Amã ijapêta pyrã nê mẽ kãm axpën kÿnh ã axpën to pa kaxyw na pa mẽ kãm hã karõ. Kot paj inhÿ hã mẽ hkõt ixpa hkêt tã koja Pahkarõja mẽ hwÿr wrÿ nê mẽ hkarõ mã agjê nê te pa mẽ hkõt ixpa pyrãk o mẽ hipêx. Ja na pa inhmã hprãm. Tã koja anê. Jakamã na pa ã mẽ ho awÿr anê. Tã ãm ja pix Papaj.” Anê. Nhũm pre ã Jesus õ Papaj mã mẽ inhnoo mã amnhÿ jarënh anê pa mẽ ixpiitã hã kuma.

18

Mẽ kot Jesus pynênh ã mẽ harênh
Matêwre 26.47-56; Makre 14.43-50;
Rukre 22.47-53

¹ Tã nhũm Jesus mẽ ixto Hipêêxa hwÿr pa. Hãmri nê ixkreja rũm ma tẽ nê Jerujarê rũm kato nê ma gõ pê Kirõ hwÿr tẽ pa mẽ hkõt ixpa ho ixpa xwÿnhjaja ma hkõt mra. Nê gõ hã rê nê hikjê hã mẽ kot mẽmo pÿ hkô hkre xwÿnhja wÿr mra nê parpê ixkrÿ hpa.
² Na pre hte Jesus xatã hwÿr amnhÿ kõt mẽ ixto pa ho kuhê. Jakamã nhũm Jut Kariot kot mẽ kãm õr mã xwÿnhhta ra kot hwÿr mẽ ixpa ho ixkuhê xàta pumunh mex. ³ Jakamã pa mẽ hwÿr pøj nê ixkrÿ hpa nhũm mẽ mẽ ixwÿr mra. Jut Kariot mẽ pôristijaja. Rõm nhõ xwÿnhjê nhõ pôristijê mẽ patre

nhõ pôristijaja nhũm mẽ mẽ ixwÿr Jut Kariot kõt mra. Ijaew nhõ pahijê nhÿ hã mẽ ixwÿr mra. Piitã wapohti jamÿ nê pô hpøk nê kanê jamÿ nê mẽ ixwÿr hpøk o kato. ⁴⁻⁵ Hãmri nhũm Jesus amnhÿ wÿr mẽ omu nê kãnhmã xa nê ma mẽ kutã tẽ. Jut Kariot kot mẽ kãm õr kaxyw nhũm amnhÿ tã omunh mex jakamã amnhÿ wÿr mẽ omu nê ma mẽ kutã tẽ. Hãmri nê mẽ hkaxpa nê mẽ omunh o xa nhũm Jut Kariot mẽ kuri xa nhũm Jesus mẽ omu nê mẽ kãm:

—Pa. Mẽmoj japêr na ka mẽ pô hpøk o ri apa? Anê.

Hãmri nhũm mẽ kãm:

—Nà Jesus pê Najare nhõ xwÿnh japêr o na pa mẽ ri ixpa. Anê.

Hãmri nhũm mẽ kãm:

—Tÿ ot pa xa. Pa na ixpê Jesus. Anê.

⁶ Hãmri nhũm mẽ kuma nê tee ri axpën pumu nê umaj katê ho axkamê nê kuhê. Nom katê ho pikamênh o ra rôrøk pa nê hikwÿ. ⁷ Hãmri nê kãnhmã kuhê hpa nhũm Jesus axte mẽ kãm:

—Kwa mẽ inhmã amnhÿ jarê. Mẽhõ japêr o na ka mẽ apa? Anê.

Hãmri nhũm mẽ kãm:

—Jesus pê Najare nhõ xwÿnhhta japêr o na mẽ ri ixpa kênã. Anê.

⁸ Hãmri nhũm mẽ kãm:

—Kwa ra ixte mẽ amã amnhÿ jarënh kênã. Paa. Ijapêr o na ka mẽ ri apa. Jakamã kwa kër ka mẽ ixkõt ri mẽ pa xwÿnhhtaja tanhmã mẽ ho hkêt nê. Kê mẽ mãmri anhgrã nê ma mra.

⁹ Anhÿr o mẽ inhnê mẽ kãm kapêr. Na pre ra ham Hipêêxa mã mẽ ixtã kãm amnhÿ jarê nê kãm:

—Kormã mẽ kamã ixpa ri ate inhmã ixihtÿx xà nhõrta o na pa mẽ htãnopxar mex o ri mẽ hkõt ixpa.

Anhÿr o mẽ ixtã kãm amnhÿ jarënh jakamã nhũm ã mẽ inhnê mẽ kot unênh mã xwÿnhjê mã kapêr anê.

Simãw Pêtre kot mẽhõ pê hamak
krãhyr ã harênh

Matêwre 26.51-54; Makre 14.47;
Rukre 22.49-51

¹⁰ Hãmri nhũm Simãw Pêtre tee ri Jesus ã mẽ omu hãmri nê õ wapo kapa nê jam ho apê nê ho hamak nhÿkê krãhta. Mawti jamak krãhta. Mawtija

mêõ patre mã apênh xwýnhjê hõ na pre nhũm Simãw Pêtre hamak krãhta.

¹¹ Hãmri nhũm Jejus ja hã omu nê nê kãm kapêr nê kãm:

—Tk. Kwa nà amarĩ xa nê akupým awapota hkàm haxà. Ixte mẽ anê amnhĩ xà htýx kamã ijamak kaxyw na pa pre Inhĩpêêxà rũm amnê mẽ awýr pika hwýr wrý. Kêt inhmã kãm hprãm xà hkôt pix mã na inhmã tanhmã amnhĩ nhĩpêx to ho ixpa hprãm. Jakamã kwãr mẽ mãmrĩ tanhmã kãm ixto hprãm xà hkôt mãmrĩ tanhmã ixto. Anê.

Mẽ kot Anas wýr Jejus o htêm ã mẽ harênh

Matêwre 26.57-58; Makre 14.53-54; Rukre 22.54

¹² Tã nhũm pôristi mẽ mẽ hkrãhtũm nê mẽõ patre nhõ pôristijaja Jejus pynê nê hpa hpre hpa ¹³ nê ma Anas wýr o tẽ. Anasja Kajpas piinhõ na pre. Nhũm Kajpas kormã amgrãja ã Anas pyrã nê kêp mẽõ patre maati. ¹⁴ Jakamã na pre ra Ijaew nhõ pahijê mã Jejus jarênh o:

—Nà kot puj mẽ Jejus pĩr tokyx anê. Kê tapxipix ty pu mẽ arĩ mýrpê pah-
piitã pajamakêtkati nê ri papa. Anê.

Jakamã nhũm mẽ Jejus pynê nê ko-
rmã ma patre maati hwýr o tẽ.

Simãw Pêtre kot Jejus kôt pa hkêt ã kot amnhĩ jarênh

Matêwre 26.69-75; Makre 14.66-72; Rukre 22.54-62

¹⁵ Hãmri pa ixpê Juãw mẽ ixkrãmnhwý Simãw Pêtre mẽ pa wa ma mẽ hkôt wa tẽ. Nhũm mẽ ra mẽ inhõ patre maati nhõrkwý hwýr Jejus o axà. Nhũm patre maati kot ixpumunh jakamã nhũm kãm àpênh xwýnhja ixpumu nê inhmã anê pa mẽ hkôt axà. ¹⁶ Nom nhũm Simãw Pêtre arĩ kapôt ã hakwa krem xa. Hãmri pa omu nê akupým hwýr tẽ nê mẽhõ niti kot hakwa kre jamãr o ãm xwýnhja mã anê nhũm kãm kahê xà mẽ nhũm mẽ ixkôt axà. ¹⁷ Hãmri nhũm nita hprĩ hã omu nê kãm:

—Xêê. Pêr apê mẽ kot unênh nê o mõi mũj kôt ri mẽ pa xwýnhjê hõ na ka mê? Anê.

Hãmri nhũm kuma nê kãm:

—Tk. Nà ixte mẽhõ myti ata pumunhre hã. Anê.

¹⁸ Hãmri nhũm ra kôt ã kamàt nê ra kryy nê nhũm mẽ àpênh xwýnh kwý mẽ mẽõ patre nhõ pôristi hkwyjaja amnhĩm kuto nê hã ànhunh o kuhê. Nhũm Simãw Pêtre mẽ omu nê mẽ hwýr tẽ nê mẽ ìhkô hã ànhunh o xa.

Patre maati kot Jejus kukjêr ã harênh

Matêwre 26.59-66; Makre 14.55-64; Rukre 22.66-71

¹⁹ Rôm nhũm Anasja hêx rom tanhmã Jejus kukjêr to nê kãm:

—E kwa inhmã amnhĩ jarê. Tanhmã na ka hte we akôt mẽ pa ho mẽ pa xwýnhjê jahkre hto ho apa wehe? Anê.

²⁰ Hãmri nhũm amnhĩ tã kãm:

—Nà na pa hte mẽ piitã mẽ noo mã ri mẽ kãm ixkapêr o ixpa. Tĩrtũm kapêr o mẽ ahkre xà hã ixkre kamã nê Tĩrtũm mã amnhĩ jarênh xà hã ixkre kamã pa hte mẽ piitã mẽ noo mã ri mẽ kãm tanhmã ixkapêr to ho ri ixpa. Na pa hte nhýri ixpimxur pê ri mẽ kãm tanhmã ixkapêr to ho ri ixpa hkêt nê. ²¹ Tã ka ixtã mẽ kot inhmar o kuhê xwýnhjaja tanhmã ixtã mẽ hkukjêr to hkêt nê. ãm papxipix ri ixkukja. Kwa ixtã mẽ hkukja kê mẽ kot tanhmã ixkapêr mar to xà hkôt tanhmã amã ijarênh to nà? Anê.

²² Hãmri nhũm patre nhõ pôristi hõja kuma nê hwýr tẽ nê kãm:

—Tk. Kwa na htem ã patre maati mã kapêr anhýr kêt nê. Na htem hã hpjiaãm o kãm kapêr. Tã na ka axtem nê ri ã kãm akapêr anê. Anê.

Hãmri nê hinep hkura.

²³ Hãmri nhũm Jejus amnhĩ tã omu nê kãm:

—Kwa kot pa tanhmã mẽ amã amnhĩ to ixêx to ka mẽ hã inhma nê rĩ kormã tanhmã axpên mã ixto akapêr to rý hã ixtak. Nom ãm hãmri ixte mẽ amã amnhĩ jarênh tã ka axtem nê ri inhĩnep ixtak. Anê.

²⁴ Hãmri nhũm Anas tanhmã mar to hpa hãmri nê umre Kajpas wýr kumê. Nà pre Kajpasja kormã hitom kãm ri tanhmã amnhĩ nhĩpêx to ho nhý

nhūm Anas mẽ kām anē nhūm mẽ kuma nē hwỳr Jejus o tē nē ho axà. Arī hpa hpre rāhā hwỳr o tē nē ho axà nhūm xa nē kām amnhĩ jarē.

Simāw Pêtre kot axte Jejus kôt pa hkêt ã amnhĩ tã aprār ã harēnh

Matêwre 26.71-75; Makre 14.69-72; Rukre 22.58-62

²⁵ Nhūm Simāw Pêtre arī mẽ ìhkô hã ànhunh o xa nhūm mẽhōja kām kapēr nē kām:

—Kwa pēr apê Jejus kôt ri mẽ pa xwỳnhjê hõ na ka. Anē.

Hāmri nhūm kuma nē kām:

—Tk. Kokỹ ixte mẽhõ nēj pumunhre hã. Anē.

²⁶ Hāmri nhūm hpānhã mẽõ patre maati mã àpēnh xwỳnhja mãānēn omu. Simāw Pêtre kot kēp hamak krāhyr xwỳnhja kwỳ na pre. Jakamã nhūm hpri hã omunh mex kurê kumrēx nē kām:

—Kwa nà ka na ka mūtār pĩ hkôta kamã mẽ ìhkô hã xa pa apumu. Anē.

²⁷ Hāmri nhūm tee ri kuma nē axte mẽ kām amnhĩ tã aprār kām hihtỳx nē. Jao ra mẽ kām amnhĩ tã aprār o axkrunēpxija mẽ nhūm krāhyre hkār kurê kumrēx. Ra Jejus kot hkukamã harēnh xà hkôt kēp hkwyỳ hkêt ã amnhĩ tã aprār o axkrunēpxi.

Jejus kot Pirat mã amnhĩ jarēnh

Matêwre 27.1-2, 27.11-31; Makre 15.1-20; Rukre 23.1-5, 23.13-25

²⁸ Hāmri nhūm mẽ ixpê Ijaew hkrāhtũmjaja ra Kajpas rũm Jejus o kato nē ma Pirat wỳr o tē. Piratja na pre te Rõmjê nhõ pahi pē Sesti mã mẽ ixpê Ijaew jamār o pa nhūm mẽ ma hwỳr o tē. Nhūm ra myt kator grire nhūm mẽ hwỳr o tē nē òrkwỹ kapem o xa. Pirat kēp Ijaew kêt jakamã nhūm mẽ òrkwỹ hwỳr gjêx kêt nē kapôt ã kuhê. Na hte Ijaew kormã Pas ã hkĩnh hāmri nē nhām mẽ kēp Ijaew kêt xwỳnhjê nhõrkwỹ hwỳr gjêx kêt nē. Kojã mẽ hwỳr agjê nē amnhĩ tomnu nē Pas ã apkur kêt nē. Jakamã nhūm mẽ Pirat wỳr Jejus o tē no ãm hwỳr o àr kêt nē. ãm ixkre kapem o xa. ²⁹ Hāmri nhūm Pirat mẽ hwỳr kato nē omu nē hã mẽ hkukja nē mẽ kām:

—Kwa tanhmã na we amnhĩ tomnuj to ka mẽ ixwỳr o tē? Anē.

³⁰ Hāmri nhūm mẽ kām:

—Nà kot amnhĩ tomnuj o pa xwỳnhjê kēnã. Jakamã na pa mẽ awỳr o tē. Ate tanhmã kot amnhĩ tomnuj to hã harēnh mar nē mỳrapê tanhmã ho kaxyw. Anē.

³¹ Hāmri nhūm mẽ kuma nē mẽ kām:

—Tk. Kwa mẽ kamjaja ma amnhĩ kôt o tē nē amnhĩ krã hkôt tanhmã ho. Mẽ ate tanhmã kot amnhĩ nhĩpêx to hã omunh xà hkôt. Anē.

Hāmri nhūm mẽ tee ri kuma nē kām:

—Kwa amnepêm mẽ ixpê Ijaewjaja na pa pre htem kēn o mẽ kot amnhĩ tomnuj xwỳnhjê tak o mẽ kupa. Tã na ra Rõm nhõ pahitija mẽ pamjaja mẽ ixte mẽ hpar nē mẽ ixkurê. Tapxipix kām mẽ hpar ã àmnēnh prām. Jakamã kot kaj y hã mẽ inhmã tanhmã hã axàmnēnh to kē mẽ kupi. Ra ja kaxyw mẽ kot mẽ ixkaxyw axām kēnã. Anē.

³² Rõm nhõ xwỳnhjaja na htem mẽ kot amnhĩ tomnuj xwỳnhjê hpar kaxyw nē pĩ kahpa hã mẽ hanhõ nē mẽ kupa. Nhūm Jejus amnhĩ kukamã tanhmã mẽ kot hpri to hã mẽ omunh mex jakamã ra hpri hã mẽ inhmã mẽ kot tanhmã hipêx to hã mẽ harē. Jakamã nhūm pre ã Ijaew Pirat kot mẽ kām hpri prām xàj ã kām kapēr kām xihtỳx anē. ³³ Hāmri nhūm mẽ kuma nē akupỹm òrkwỹ hwỳr axà nē amnhĩ wỳr Jejus ã karõ nhūm hwỳr axà nhūm kām:

—E kwa inhmã amnhĩ jarē. Xà apê Ijaew nhõ pahi na ka? Xà ka na htem amnhĩ wỳr akām hamak o pa? Anē.

³⁴⁻³⁶ Hāmri nhūm kām:

—Tỳ ãm hāmri na ka ã ijarēnh anē. Nom jar pika ja kamã ixpê mẽõ pahi hkêt. Axtem ixpê mẽõ pahi na pa. Mo kaxyw na ka ã ixkukjêr anē? Xà na pre mẽhõ ixte mẽ anhõ pahi Sesti kutã ixām ã amã ijarē ka ama nē tee ri ixkukamã ajamaxpēr? Nà xà ãm hāmri amã Tirtũm kot Ijaew wỳr inhmēnh ã ixpumunh prām? Mo kaxyw na ka ã ixkukjêr anē? Anē.

Hāmri nhūm tee ri kuma nē kām:

—Tk. Mo kot pa kêt ri axtem nê Tirtûm kot Ijaew wÿr amênh ã akukja? Mê apyrà nê ixpê Ijaew kêt kênã. Mê kot ixwÿr ato htêm xwÿnhjaja na mê ã ate amnhî jarênh anhÿr ã ajarênh anê. Nà mê akwÿjê mê mê anhô patre krähtûmjaja na mê ã inhmã ajarênh anê. Jakamã e aprî hã inhmã amnhî jarê. Tanhmã na ka we amnhî tomnuj to nhûm mê ixwÿr ato tê? Anê.

Hãmri nhûm kuma nê kê axte kãm:

—Nà ixpê pyka ja kamã mê ò pahi hkêt. Kop ãm ixpê pyka ja kôt mê ò pahi ronhÿx ra ixkôt ri mê pa xwÿnhjaja tanhmã ixtã mê ato. Nom jar ixpê mê ò pahi hkêt. ãm axtem ixpê mê ò pahi na pa. ãm hãmri na pa ã amã amnhî jarênh anê. Anê.

³⁷ Nhûm ã kãm amnhî jarênh anê hãmri nhûm tee ri kuma nê kãm:

—Xà apê mê ò pahi hõ na ka? Anê.

Hãmri nhûm kãm:

—Tÿ. Nà ãm hãmri na ka ã ijarênh anê. Na pa pre amnê pikaja wÿr wrÿ nê jar mê akamã ixkato nê mê akamã ixaptàr. Ixte tanhmã mê kãm ixkapêr to ho ri ixpa kaxyw na pa pre wrÿ nê mê akamã ixpa nê ãm hãmri mê kãm ixkapêr o ri ixpa. Na pa hte tãm ixkapêr o ri ixpa. Tã mê kot ixkapêr mar nê ixkôt ri amnhî nhîpêx o mê pa xwÿnhjaja na htem ixpê mê ò pahihti hã ijarênh o pa. Anê.

³⁸ Hãmri nhûm Pirat kot tãm kãm kapêr ã amnhî jarênhja ã kuma nê kãm:

—Tk. Aa ixte pika ja kamã mēhõ pumunh nhûm tãm kapêr o pare hã. Anê.

Hãmri nê kapêr ã kuma nê tee ri hkukamã hamaxpêr. Hãmri nê akupÿm Ijaew wÿr ho kato nê mê kutã o xa nê mê kãm:

—Kwa tanhmã kot amnhî tomnuj tore hã. ³⁹ E mê inhma. Na pa hte amgrà mê arîgro pê Pas kãm mê amã mê hagiênh xà rûm mê akwÿjê ho hpÿnh nê mê hapôj nhûm mê hamakêtkati nê amnhîx ri pa. Ka mê ja hã omu nê Pas ã akînh nê. Jakamã e. Pa mê amã mê anhô “pahihti” jarênhja mã inhÿre. E na pa ra kãm inhÿre. Anê.

⁴⁰ Hãmri nhûm mê tee ri ã kapêr anhÿr ã kuma nhûm ja mê kêp omnuj tÿx nê. Nhûm mê hã kàx pê gryk kamã kãm kapêr kãm hihtÿx nê kãm:

—Tk. Kwa nà kãm anhÿrer kêt nê. Kêt Parapas mã mãn anhÿre. Anê.

Parapasja na pre hte tanhmã amnhî tomnuj tÿx to ho ri pa nhûm prem mÿrapê unê nê haxà. Tã nhûm mê axtem nê Pirat kot kãm urer prãm xàj Jejus kaga.

19

Mê kot Jejus tak ã mê harênh

Matêwre 27.27-31; Makre 15.16-21; Rukre 23.20-25

¹ Tã nhûm Pirat akupÿm ôrkwÿ hwÿr Jejus o axà nê ò pôristijê mã hã amÿnê nhûm mê hwÿr mra nê htak o kuhê. ² Hãmri nê kêp pahi hã hpêr o pikênh kaxyw kãm pahi hã mê ahkã nhîpêx nê hkrãm haxà. Nom axtem mēmo mrônhi te kot ronh kanêre pyrãk xwÿnhja nhûm mê hikãx nê hkrãm haxà. Nê kêp pahi hã mê ê kamrêk py nê kãm haxà. ³ Hãmri nê xatã hwÿr mra nê hinep htak nê hã hpêr o pikênh o xa nê kãm:

—E apê Ijaew nhõ pahi punuti na ka. Anê.

⁴ Hãmri nhûm Piratja akupÿm Ijaew wÿr kato nê mê kãm:

—E koja inhõ pôristi akupÿm mê awÿr ho kato ka mê omu. Na pa tee ri kot tanhmã amnhî tomnuj to hã hkukja. Pêr tanhmã kot amnhî tomnuj to hkêt kênã. Anê.

⁵ Hãmri nhûm Jejus kato nê arî pahi hã àhkã tu nê ê kamrêk jaxà nê o xa nhûm Pirat mê kãm:

—E kwa mê omu nê kamã axukapri hkêt wehe. Anê.

⁶ Hãmri nhûm patre krähtûmjê mê mēõ pôristijaja tee ri ja hã kuma nhûm ja mê kêp omnuj nê. Hãmri nê hã kãm kapêr kãm hihtÿx nê kãm:

—Tk. Kwa nà pî kahpa hã mãn anhô. Kê pî kahpa hã mãn ajêt nê ty. Anê.

Hãmri nhûm tee ri hã mê kuma nê mê kãm:

—Nà mê kam nê ma amnhîm o tē nē mê kam amnhîm ho anê. No pa kot

paj ho anhÿr kêt nê. Mo mÿrapê kot pa kêt hã amÿnê nhÿm mē kupi? Nã kwarĩ kot pa ho anhÿr kêt nê. Anê.

⁷ Hãmri nhÿm mē tee ri kuma nê kãm:

—Kwa kēp Tĩrtũm Kra hã amnhĩ jarēnh kēnã. Mē inhĩgētjaja na prem ã mē ixte amnhĩ jarēnh anhÿrja nê mē inhmã kapēr pa htem ã amnhĩ jarēnh anhÿr kêt nê. Kojã mēhõ ã ri amnhĩ jarēnh anê nhÿm mē ja mÿrapê kupi. Anê.

⁸ Hãmri nhÿm Pirat tee ri Jejus kēp Tĩrtũm Kra hã amnhĩ jarēnhja ma nê kãm uma nê kãm tanhmã ho hprãm kêt nê. ⁹ Hãmri nê akupÿm ōrkwÿ hwÿr ho axã nê axte hkukja nê kãm:

—Kwa aprĩ hã inhmã amnhĩ jarē. Nhÿhÿnh na ka pre mē ixwÿr mō? Anê.

Nom nhÿm axte tanhmã kãm nê hkêt nê. Am arĩ akryk mar o xa.

¹⁰ Nhÿm tee ri omu hãmri nê kãm:

—Kwa xã ate ixpumunh kêt? Inhÿ hã na htem mē kupa nê inhÿ hã akupÿm mē hapōj. Tã ka pēr aprĩ hã inhmã tanhmã amnhĩ jarēnh to hkêt nê ri akryk akuhê. Anê.

¹¹ Hãmri nhÿm Jejus kãm:

—Nom Tĩrtũm nhÿ hã pix mã na ka hte ã amnhĩ nhĩpêx anê. Kēp ãm Tĩrtũm kãm ja prãm kêt ronhÿx ka tee ri tanhmã amã ixto hprãm hkapyr. Tãm kot mē ixkaxyw axãm kēnã. Tã mē kot awÿr inhmēnh nê ri ixtyk ã ijarēnh xwÿnh pē Ijaew nhõ pahijaja. Ra mē kot ixkaga jakamã na mē ã amã ijarēnh anê. Jakamã mē kot amnhĩ tomnuj tÿx o ajakrenh. Anê.

¹² Hãmri nhÿm Piratja tee ri ã kapēr anhÿr ã kuma nê kot kãm urer prãm nê. Hãmri nê akupÿm Ijaew wÿr kato nê hã mē kãm kapēr nhÿm mē tee ri kot kãm urer kaxyw ã amnhĩ jarēnhja ma nê kãm ja prãm kêt kumrēx. Jakamã kãxpê nê kãm kapēr nê kãm:

—Kwa nã ra kēp mē inhõ pahi hã kot amnhĩ to hēx kēnã. Kot mēhõ ã ri amnhĩ jarēnh anê nhÿm Rõm kamã mē panhõ pahi Sestija ja hã harēnh ma nê kamã gryk tÿx nê. Tã kot kaj kãm anhÿre nhÿm ajarēnh ma nê akamã gryk nê. Anê.

¹³ Hãmri nhÿm tee ri mē kuma hãmri nê ma pahi kot tanhmã mē harēnh to xã hã kēn pota wÿr ma tē nê hã nhÿ. Mē ixpē Ijaew kapēr kãm mē ixte kãm: “Kapata” jarēnh xwÿnhnta wÿr kot tanhmã Jejus jarēnh to kaxyw ma hwÿr tē nê hã nhÿ nhÿm mē hwÿr o tē.

¹⁴ Hãmri nhÿm ra arĩgro pē sēsta. Mē ixpē Ijaewjaja mē ixte Pas ã amnhĩ tomnuj mÿrapê mry hkwy hpar nê Tĩrtũm kôt pix mã amnhĩ nhĩpêx ã amnhĩ jarēnh xã hã arĩgroja kato. Jakamã nhÿm kaxkwa nhĩpōk ri myt nhÿ nhÿm Piratja mē kot Jejus kator ã harēnh prãm xãj arĩ mē kãm ho mē ō pahi hã harē nê mē kãm:

—E ota mē anhõ Pahihtita. Anê.

¹⁵ Hãmri nhÿm mē tee ri ã harēnh anhÿrja ã kuma nê kãm:

—Kwa apĩ ri. Ma o tē nê pĩ kahpa hã anhõ kē tokyx ty.

Anê nhÿm tee ri mē kuma nê mē kãm:

—Kwa nã. Kēp mē anhõ pahi kēnã kot paj kêt ri axtem nê mē apē kupi. Anê.

Hãmri nhÿm mē kãm:

—Nã kēp mē inhõ pahi hkêt. Pahi Sesti pix na kēp mē inhõ pahi. Anê.

Mē kãm Sesti hkĩnh kêt tã ã kãm Jejus htyk prãm xãj ri harēnh anê.

¹⁶ Hãmri nhÿm Pirat tee ri ja hã mē kuma nê tã Jejus ã pōristi mã karõ nê mē kãm:

—E mē mãmri ma o tē nê pĩ kahpa hã anhõ kē ty. Anê.

Hãmri nhÿm mē kuma nê ma o tē.

Mē kot pĩ kahpa hã Jejus nhõr ã mē harēnh

Matêwre 27.32-44; Makre 15.21-32; Rukre 23.26-43

¹⁷ Hãmri nhÿm pōristija Jejus mã ō pĩ kahpa gō nhÿm kutu nê ma mē hkôt hkjēnh o mō. Nhÿm mē krĩ rÿm ho kato nê ma hixēt prēk wÿr o tē. Hixēt prēkja mē kot harēnh o: “Kor-kot” anê. No mē ixpē Ijaewjē kapēr kãm na pa pre htem harēnh o “Mē hkrã hi xã” anhÿr xwÿnhnta wÿr nhÿm mē ma o tē nê hã ho api. ¹⁸ Hãmri nê pikap pĩ kahpa xi nê hã Jejus xi nhÿm hã nõ nhÿm mē prek o ïkra ho

htỳx nê hpar o htỳx. Hāmri nê kaxyw hkakwỳ nê hkakwỳnh pa nê kamã pĩ kahpata xãm nê hity hpa nhũm Jejus kỳx pê ajêt. Hāmri nhũm mẽ mãănên wa ho hamêxkrut nê pĩ kahpa hã wa kunhō nhũm wa kuri ajêt. Wa kot tanhmã amnhĩ tomnuj to xwỳnhja wa ho akutã Jejus nhĩjê nhũm wa urak nê kỳxpê ajêt.

¹⁹ Hāmri nhũm Piratja õ pōristi mã anê nhũm mẽ tap õ py nê hã tanhmã kagã hto nê kagã ho:

IJAEW NHÕ PAHI JEJUS NA JA
KÊP NAJARE NHÕ XWỠNH

²⁰ Nom mẽ ixpê Ijaew kapêr pix kãm hã kagã hkêt nê. Mãănên Gresjê kapêr kãm nê Raxijê kapêr kãm nhũm mẽ mãănên hã kagã nê Jejus mỳri kunhō. Hāmri nhũm Ijaew kwỳjaja Jerujarê rũm hwỳr mra nê mẽ kot ã hã kagã nhĩpêx anhỳrta pumu nê kamã harê. Jerujarêja hixêt prêêta wỳr jawỳ jakamã nhũm mẽ kurũm ohtô nê hwỳr mra nê omunh o kuhê.

²¹ Hāmri nhũm patre hkrãhtũmjaja tee ri ã Jejus jarênh anhỳr ã kagãta pumu nhũm ja mẽ kêp omnuj nê. Jakamã nhũm mẽ ma Pirat wỳr mra nê kãm:

—Kwa mon ka ri hã mẽ kãm anê nhũm mẽ axtem nê ã ri kagã nhĩpêx anê? Kwa nã kêp mẽ inhō pahi hkêt. ãm htỳx ri kot ã kot amnhĩ jarênh anhỳr o pa kênã. Kwa hã kagãja o anhĩpa nê hpãnhã hã kagã ho: “Kêp Ijaew nhõ pahi hã kot amnhĩ to hêx xwỳnh.” Anhỳr o hpãnhã hã hipêx nê anhō nã? Anê.

²² Hāmri nhũm mẽ kuma nê mẽ kãm:

—Tk. Nã pa ho ixpinhpanh kêt nê. Ra ixte hã kagã hpar kênã. Anê.

Pōristijaja kot axpên mã Jejus xê ho pigrành

Matêwre 27.35-36, 27.55-56; Makre 15.24; Rukre 23.34

²³ Hāmri nhũm pōristijaja kot axpên mã Jejus xê o pigrành kaxyw amnhĩ tã haxwỳr o tẽ. Mẽ kêp 4 no nhũm Jejus xê kêp 5 jakamã nhũm mẽ amnhĩ kôt ho 4 nê haxwỳ nhũm pyxi nê hprã. ê rytita. Na pre hipêx muxre. Nhỹhỹnh hkayr xã pumunh

kêt kumrêx. ²⁴ Jakamã nhũm mẽ omu nê kãm hkĩnh nê. Hāmri nhũm hõ kot amnhĩm hpyr nê ho arĩk kaxyw nhũm mẽ hã kênre ho jôka. Na pre ra Tĩrtũm kapêr ã kagã htũm kot mẽ hkukamã ja hã mẽ harênh nê mẽ harênh kot: Na prem axpên mã ixê o anhgrã nê hã kênre ho jôka ho hkrĩ.

Anhỳr o kot mẽ hkukamã mẽ harênh. Tã nhũm mẽ ra hkôt ã amnhĩ nhĩpêx anhỳr o hkrĩ.

Jejus kot Juāw nhĩhkram katorxã jaxà ã harênh

²⁵ Nhũm Jejus par pê katorxã xa. Nê htõx nê Kropti hprõ Marir nê Marir Matarên mẽ nhũm mẽ Jejus katorxã nhĩhkô hã Jejus pumunh o kuhê. Nhũm amnhĩ tã mẽ omu ²⁶ nê mẽ kuri pa ixpê Juāw pumu. Hāmri nê kêp ixkrãmnhwỳ mex ã ixtã katorxã mã kapêr nê kãm:

—E ota Juāwta. Koja ixpãnhã te kêp akra pyrãk o anhĩpêx nê tanhmã ato ajuta hto ho pa. Anê.

²⁷ Hāmri nê hpãnhã pa inhmã kapêr nê inhmã:

—E Juāw. Kêr ka te kêp akatorxã pyrãk o inhmã hipêx mex o ri apa.

Anhỳr jakamã pa kuma nê kot inhmã hã karõ xã hkôt inhõrkwỳ hwỳr haxã nê amnhĩ kôt ri ho ixpa.

Jejus htyk ã harênh

Matêwre 27.45-56; Makre 15.33-41; Rukre 23.44-49

²⁸ Tã nhũm Jejus ra amnhĩ pumu hãmri nê hamaxpêr o:

—Nã Inhĩpêxã kot mẽmoj tã inhmã karõta na pa ra kãm ho anhỳr o hitep xã xir kaxyw. Anê.

Hãmri nê kãm kôr ã amnhĩ jarê. Nom ra hkukamã Tĩrtũm kapêr ã kagã htũm kot htyk kaxyw nê kãm kôr kukamã harênh jakamã nhũm ã amnhĩ jarênh anê nê kapêr o: Nã na pa ra inhmã kôr nê. Anê.

²⁹ Nhũm hpar pê guhkrax kãm wĩhti punureta ãm jakamã nhũm mẽ ã kot amnhĩ jarênh anhỳrja ma nê kaxyw mẽmo rerek py nê o tẽ nê kaxyw pĩ ryti hõ py nê ho hkanhwỳ. Nê akupỳn o tẽ nê ho wĩhti mã haxã nê kãm kupê.

³⁰ Nhūm hkaô nē hkaôr pa hāmri nē kapēr o:

E nà hāmri na pa ra mē piitā mē kot amnhī tomnuj pānhā amnhīrer pa. Jao ra Inhīpêêxà kām hprām xà hkôt kām tanhmā amnhī nhīpêx to jatur xàm kumē.

Anhÿr o amnhī jarēnhja kôt ahpar mā hkrā nē ty.

Mē kot kô xwa ho Jejus kamnhwÿr ã harēnh

Wam Juāw 5.6-8

³¹ Nhūm ra sēsta nhūm apkati nhūm mē inhō arīgromnu pē sap kaxyw. Sapja ã na hte mē ixpê Ijaew mē ixkīnh pē Pas ã ixkīnh rūnh o ixpa. Nhūm mē kām sap ã arī mē htyk nē mē harir xwÿnhjê pumunh prām kêt jakamā nhūm Ijaew krāhtūmjaja ma Pirat wÿr mra nē kām:

—Kwa pôristi mā anē kê mē tokyx mē hte hi kukē kê mē htyk tokyx anē. Kê mē tokyx mē o wrÿ nē ma mē o mra nē mē hagjê. Kormā sap kêt ri. Anē.

³² Hāmri nhūm mē kuma nē ò pôristijê mā anē nhūm mē ma mē hwÿr mra nē akutā wa kot Jejus nhījê nē jêt xwÿnhhta wa kumrêx wa hte hi hkwÿr. ³³ Hāmri nē hpānhā Jejus wÿr tē nē omu nhūm ra htyk mex nē ajêt nhūm mē ja hā omu nē kêt hte hi hkwÿnh kêt nē. ³⁴ Nhūm pôristi hōja kô xwa py nē ho ihkjê rūm hkanhwÿ nhūm hkamrô mē ĩ kagô ahkà nē hprôt nhūm mē hkwÿja omunh o kuhê. ³⁵ Nē ixpê Juāw na pa pre ijaxwÿja mē ĩhkô hā xa nē ja hā omunh jakamā pa ã mē amā hā kagà anē. Ām hāmri na pa mē amā harē nē hā kagà. Mē ate kamā harēnh nē harēnh mar nē hkôt ajamaxpēr kaxyw. ³⁶ Na pre ra Tirtūm kapēr ã kagà htūm kamā ra hkukamā tanhmā kot mē pahwÿr mēnh xwÿnhhta jarēnh to nē hā kagà. Nē hā kagà kot:

Koja mē nhÿhÿnh hi hkwÿnh kêt nē. Anē.

Tā nhūm mē ra hā kagàja kôt ã hipêx anē nē kêt hi hkwÿnh kêt nē. ³⁷ Nē

Tirtūm kapēr ã kagà htūmja määnēn ja hā harēnh kot:

Mē kot hpÿr nē hkanhwÿr xwÿnhja koja mē hpar pē omunh o kuhê. Anē.

Tirtūm kapēr ã kagà htūm kamā ã Jejus tyk kukamā harēnh kot anhÿr.

Mē kot Jejus jaxàr ã mē harēnh

Matêwre 27.57-61; Makre 15.42-47; Rukre 23.50-56

³⁸ Tā nhūm Juje pē Arimatej nhō xwÿnhja Jejus ra htyk ã omu nē ma Pirat wÿr tē nē hā kām kapēr. Kot ma o mōr nē tokyx haxàr kaxyw. Na pre ra Jejus kôt amnhī xām nom Ijaew krāhtūmjê pymaj mē kām amnhī to amnhīrīt kêt nē. Jakamā nhūm ma Pirat wÿr tē nē hā kām kapēr nē kām:

—Pa e ot pa awÿr tē. Ixte mēmoj tā amā ixkapēr kaxyw. Kot kaj apu inhmā “ÿ” anhÿr japêr. Kwa xà kot pa ma Jejus o mō nē haxà? Anē.

Hāmri nhūm kuma nē kām: “Nà māmri ho anē.” Anē hāmri nhūm ma hwÿr tē nē ho wrÿ nē kumÿ nē ma haxàr mā o mō. ³⁹ Nhūm Nīkotēja ma hkôt tē. Annepê mā kot kamàt kām Jejus wÿr htēm nē wa axpēn mā kapēr o ÿr xwÿnhhta. Jakamā ma Juje hkôt tē. Nē amnhī kôt mē hkuxwa xà hkwÿ ho mō. Ām ho mōr rax kumrêx. Ho 34 kir nē kutu nē o mō. Mē hkuxwa xàja na pre mē kot mēmo kuxwa xà mā “mīra” nē “aroe” anhÿr jarēnhja nhūm kaxyw hkwÿ jakà nē ho ahkà nē ho mē hkuxwa xà nhīpêx. Hāmri nē kutu nē ma Juje kot Jejus jaxàr nhūm kot ho hkuxwa kaxyw hkôt o mō. ⁴⁰ Hāmri nhūm wa ho kupêxê kukōnh pa nē ho Jejus kupu. Mē ixpê Ijaew mē ixte mē htykjê jagjēnh kaxyw ã mē hipêx anhÿr xà hkôt nhūm wa ã hipêx anē nē haxà. ⁴¹ Nhūm ra mē kot pī kahpa hā nhôr xà tā mē kot mēmo pī ho pa nē hkre xwÿnh kwÿ kuhê. Nē kamā kēn kre nyw. Kormā mē kot kamā mē htykjê hō jaxàr kêt xwÿnhhta. ⁴² Jakamā nhūm wa omu nē axpēn mā:

—E kwa pu hwÿr Jejus o tē nē kamā mǎn tokyx haxà. Kêr pu kormā sap kêt ri ra tanhmā amnhī to hpa. Anē.

Hāmri nē hwỳr kumỳ nē o tē nē kamā haxà nē hā hitom pa hāmri nē ma akupỹm krĩm wa tē.

20

Jejus akupỹm htĩr ã harēnh

Matêwre 28.1-10; Makre 16.1-8; Rukre 24.1-12

¹ Tã nhũm sap tē nē hapêx nē hpānhã semān nyw krax xà pē tōmĩk. Hāmri nhũm Marir Matarēn kwỳhtã kànhmã nhỹ. Kormã myt kator kêt ri kànhmã nhỹ nē ma kēn kreta wỳr tē. Nē hwỳr pōj nē tee ri hitom xà hā kēn rax pumu. Nhũm ra nhām hakwa kre kuhpa hā ri hikwỹ nhũm omu nē tee ri hkukamã hamaxpēr pē omunh o xa. ² Hāmri nē awjanã nē ma akupỹm hprõt nē nhỹri Simāw Pêtre nē pa ixpê Jejus kràmnhwỳ mex ã wa ixpumu nē hkaprĩ kamã wa inhmã harē nē wa inhmã:

—Xê na pēr mē pahpê mē panhō Pahihiti kapa nē nhỹhỹm ma o tē. Xê nhỹhỹm mǎn pre wem o tē? Anē.

³ Hāmri pa wa kuma nē hwỳr ixprõt kurê kumrēx. ⁴ Hāmri pa Simāw Pêtre mã wa nē ixkumrēx hwỳr pōj. ⁵ Nom kormã kēn kre hwỳr ixàr kêt ri kormã hakwa krem inhĩkôt nē kaxwỳnh kām nōr xà kamã Jejus japêr ixrĩt o xa. Nhũm kupêxê nhĩrê pix nō pa omu. ⁶ Hāmri nhũm Simāw Pêtre ixkôt tē nē ixrom krem àr kurê kumrēx nē kupêxê nhĩrêta pumu. ⁷ Nē hkrã kupu xà pumu nhũm axtem hkrã muxre nē ahte nō. ⁸ Hāmri pa hkôt axà nē nōr xà kaprỳ pumu nē ijamaxpēr o:

—Hêxta waa nē. Nà mǎn akupỹm htĩr. Hā na nōr xà hkaprỳ mex nē. Nà mǎn akupỹm htĩr kām ga. Anē.

⁹ Ra Tĩrtũm kapēr ã kagà htũm kot ja kukamã akupỹm htĩr ã harēnh tã pa wa kormã ixprĩ hā ja hā omunh kêt nē. Tã kēn kre kaprỳ pumu nē kām ijamaxpēr kurê kumrēx. ¹⁰ Hāmri nē wa ixkato nē awjanã nē ma akupỹm wa ixkwỳjê hwỳr wa tē.

Jejus kot Marir Matarēn wỳr kator ã harēnh
Makre 16.9-11

¹¹ No nhũm Marir Matarēnja arĩ kēn kre kapem hkaprĩ nē mỳr o xa. Nē mỳr pē hikôt nē kēn kre kamu ¹² nē kamã Tĩrtũm kapēr o wrỳk xwỳnh wa ho axkrut nē wa omu. Nhũm wa ê jakajre kamã wa nhỹ. Nhũm hōja hkrām nhỹ nhũm hōja htem nhỹ. ¹³ Hāmri nē wa Marir Matarēn mã kapēr nē kām:

—Kwa mon ka ri omu nē amỳr o xa? Anē.

Nhũm kām:
—Xê nhũm. Na prem ma nhỹhỹm mē ixpê mē inhō Pahihiti mỳ nē ma o tē nē hpānhã nhỹri kuxi. Anē.

¹⁴ Rôm nhũm Jejus tām tē nē hkatut kôt xa nhũm Marir Matarēn ho hakēx nē omu nom hprĩ hā omunh kêt nē. Omu nē htỳx ho axtem mēhō hā hkamnhĩx. ¹⁵ Hāmri nhũm kām:

—Kwa mon ka ri amỳr o xa? Mēhō na ka ri hapêr arĩt pē amỳr o xa? Anē.

Hāmri nhũm kuma nē htỳx ho pĩ hkre jamār xwỳnh ã hkamnhĩx nē kām:

—Xê xà ka na ka mē ixpê mē inhō Pahihiti ho ahkĩ nē ma o tē nē nhỹri axi mē? Xê ka japêr nē akatàt kôt inhmã harē. Nhỹri inhmã nōr xà jarē pa ma hwỳr tē nē kumỳ nē man akupỹn o tē nē akupỹm kēn kre kamã kuxi. Anē.

¹⁶ Hāmri nhũm Jejus kām hixi jarē nē kām:

—Kwa Marir Matarēn. Amnē ixpumu nē arĩ ã akapēr anē nà. Anē.

Hāmri nhũm jatã hprĩ hā kuma nē ho hakēx nē amnhĩ jaêr pē hprĩ hā omu nē kām:

—Xê Pahihiti. Xep ka na ka. Hêxta gàà nē. Anē.

Nom mē ixpê Ijaew kapēr kām Pahita jarēnh o: “Raponĩ” anē. Nhũm ã kām kapēr anē hāmri nē axte ma nhỹhỹm kêp htēm pymaj hpa hā kupy.

¹⁷ Hāmri nhũm kām:

—Kwa inhmã anhũre. Na pa kormã ma akupỹm Inhĩpêxà hwỳr ixàpir kêt nē. E tokyx ma akupỹm tē nē ixtō nē ixtōxjê mã ijarē. Na ka prem apê ixkràmnhwỳ pix tã ra mē apê ixtō nē ixtōx na ka mē. Jakamã ma akupỹm mē hwỳr tē nē mē kām ijarē. Nē mē kām: “Na Jejus mē awỳr pēr

mēnh o: ‘Kot paj tokyx ma akupỹm Inhĩpêêxà Tĩrtũm wỳr api. Nom kēp pa Inhĩpêêxà pix kēt mǎānēn kēp mē Anhĩpêêxà na. Nē mǎānēn kēp mē anhō Tĩrtũm na.’ Anhỹr o mē awỳr pēr mē.” Anē. E ma akupỹm mē hwỳr tē nē tokyx ã mē kām ijarēnh anē. Anē.

¹⁸ Hāmri nhũm kuma nē ma akupỹm mē ixwỳr tē nē mē inhmā awjarē nē mē inhmā:

–Xē na pa ham mē panhō Pahihtita pumu. Na akupỹm mē pamā htĩr. Anē.

Hāmri nē mē inhmā kot tanhmā kām kapēr to hā harē pa mē kuma nē tee ri hkukamā ijamaxpēr.

Jejus kot hkwyjē hwỳr kator ã harēnh

Rukre 24.36-43

¹⁹ Tã nhũm tōmĩk nē kamāt pa mē Jejus kōt ixpa ho ixpa xwỳnhjaja xypēn wỳr akuprō hāmri nē Ijaew krāhtũmjē pymaj hakwakre kahē hpa nē xypēn mǎ ixkapēr o ixkrĩ. Nhũm Jejus mē ijaēr pē nhỹhỹnh mē ixwỳr axà nē mē ixkuri xa nē mē inhmā:

–Pa. Xà kormā mē anhōt kēt? Anē.

²⁰ Hāmri nē mē inhmā amnhĩ nhĩhkra kamā prek tatak xà jahkre nē hakỳx kōt mē kot hkanhwỳr xàja nhũm mē inhmā hahkre. Pa mē akupỹm htĩr kām omu nē ixkĩnh tỳx kumrēx. ²¹ Hāmri nhũm mē inhmā:

–E kwa kēr ka mē tee ri amnhĩ kukamā ajamaxpēr o amā ma ho ri apa hkēt nē. Na pre Inhĩpêêxàja mē awỳr inhmē pa pre wrỳ. Tã kot paj amnhĩ pyrā nē mē piitā mē hwỳr mē arē. Anē.

²² Hāmri nē mē ixkaxyw htyyxà mē nē mē inhmā Tĩrtũm mē wa Karō jarē nē mē inhmā:

–E koja Tĩrtũm mē wa Ixkarōja wry nē mē akarō mǎ gjēx pa. ²³ Ka mē ỹ hā ma mē piitā mē hwỳr apa nē mē kām Tĩrtũm kapēr jarēnh o ri mē hkōt apa. Nē nhỹri mēhō pumu nē inhỹ hā kām: “Kot kaj Tĩrtũm kōt amnhĩ xām nhũm amnhĩ tã apumu nē anē ate amnhĩ tomnuj rēnh pa.” Anē. Ka mē ã kām akapēr anē nhũm mē ama nē hkōt amnhĩ xām nhũm Tĩrtũm amnhĩ tã omu nē nē kot amnhĩ tomnuj rēnh

pa. Nom koja mē ama nē ãm mē ama nē hkōt amnhĩ xām kēt japēr ka mē inhỹ hā kām: “Nà kot kaj Tĩrtũm kōt amnhĩ xām kēt nē nhũm anē ate amnhĩ tomnuj rēnh kēt nē.” Anhỹr o kām akapēr nhũm Tĩrtũm ho anē nē nē rēnh kēt nē. E kēr ka mē ã inhỹ hā amnhĩ nhĩpêx anhỹr o ri apa. Anē.

Nhũm pre ã Jejus mē inhmā kapēr anē hāmri nē kato nē ma nhỹhỹm tē.

Jejus kot Tomas mǎ kapēr ã harēnh Matēwre 28.17

²⁴ No nhũm mē inhĩō pē Tomas pih-pohitita kormā mē ixkĩnhā akupỹm Jejus htĩr kām omunh kēt nē. Na pre ma kape hā tē nhũm wakre kamā mē ixwỳr axà nē mē inhmā kapēr hāmri nē ma nhỹhỹm tē. Jakamā nhũm Tomas akupỹn mē ixwỳr tē nē axà pa mē kām harē nhũm tee ri mē inhma nē mē ixkōt hamaxpēr kēt nē. ²⁵ Nē mē inhmā:

–Nà kot pa ĩhkra kamā prek tatak xà pumu nē kamā inhĩhkra hkrā jaxà. Nē hakỳx kōt hkanhwỳr xàta pa mǎ ho anē nē omu nē kamā inhĩhkra hkrā jaxà nē rĩ kormā akupỹm htĩr kōt ijamaxpēr. Anē.

²⁶ Tã nhũm semān pyxi nē hapēx pa mē axte xypēn wỳr akuprō nē axte Ijaew krāhtũmjē pymaj amnhĩ tã kahē htỳx nē ixkrĩ. Nhũm Tomas tã mē ixkuri nhỹ. Hāmri nhũm Jejus axte nhỹhỹnh mē ixwỳr axà nē mē inhmā:

–Pa. Na ka mē rĩ akrĩ. Anē.

²⁷ Hāmri nē Tomas pumu nē hwỳr tē nē kām ĩhkra pē nē kām:

–E ota inhĩhkra kamā prek tatak xàta. Māmri kamā anhĩhkra hkrā jaxà. Nē hpānhā ijakỳx kōt mē kot ixkanhwỳr xà kamā mǎ ho anē nē haxà nē akupỹm ixtĩr kōt ixpumunh kurē kumrēx. Anē.

²⁸ Hāmri nhũm kuma nē kām:

–Nà pēr ãm hāmri apē inhō Pahihti Tĩrtũm na ka. Anē.

²⁹ Hāmri nhũm kām:

–Tỳ. Ām ano ho ixpumunh kōt pix mǎ na ka ixkōt ajamaxpēr. Tã no ãm koja mē nhỹrmā mē amỳr pē mē pa xwỳnhjaja mē akĩnhā mē no ho ixpumunh kēt tã akupỹm ixtĩr ã

ijarēnh mar pix tā ixkôt hamaxpēr. Ja na mex kumrēx. Anē.

Juāw kot tanhmā amnhī jarēnh to hā harēnh

Rōmān 15.4; Wam Juāw 5.13

³⁰ Na pre Jejus kormā mẽ ixto pa ri mẽ inhnoo mā mẽmoj tanhmā hipêx to rax nē nom kot paj kagàja kamā piitā hā kagà hpar kêt nē. ³¹ Ām hkwȳ pix na pa mẽ amā hā kagà. Mẽ ate mẽ ixpyrà nē omunh nē kêp Tĩrtũm Kra hā kot mẽ pakaxyw ãm xwỳnh ã omunh nē hkôt amnhī xunhwỳr kaxyw na pa ã mẽ amā harēnh nē hā kagà anē. Tā kot kaj mẽ amnhī kaxyw hkôt ajamaxpēr nē hkôt amnhī xunhwỳ hāmri nē nhỹrmā atyk tā nhũm akupỹm mẽ ato mẽ atĩr ka mẽ ixpyrà nē kuri amex nē atĩr tũm nē apa ho apa. Tā pa ã mẽ amā mẽmoj piitā harēnh nē hā kagà anē.

21

Jejus kot hkwȳjê hwỳr kator ã harēnh

Matêwre 26.32, 28.7, 28.10

¹ Tā nhũm Jejus axte hkôt mẽ ixpa ho mẽ ixpa xwỳnh kwỳjê hwỳr kato. Himô pê Tipeja mỳri. ² Pa mẽ ixpê 7 nē axpēn wỳr akuprō. Na pre Simāw Pêtre nē Tomas pihpohti nē Natānaew. Natānaewja Garirej kamā krĩ pê Kanā nhō xwỳnh na pre. Nē wa pa wa ixpê Jepetew krata wa nē wa inhĩō wa pijakruuta wa. Pa prem wa mẽ nhỹri axpēn wỳr akuprō. ³ Hāmri nhũm Simāw Pêtre mẽ inhmā:

—E pa jarāhā ma tep wỳr tē nē hkwȳmnê. Anē.

Pa mẽ kuma nē kām:

—Tôe. Nà pa mẽ ijaxwỳja ma akôt mō. Anē.

Hāmri nē mẽ ma himô rax pê Tipeja wỳr mō nē kanôre mã agjê nē gôx kām kryhti rēnh o ixkuhê. Nom tee ri ho tep òmnēnh kaxyw rēnh o ixkuhê nē hōmnēnh kêt nē ixtā apkati nhũm tep amrakati kumrēx.

⁴ Tā nhũm myt kato nhũm Jejus gô mỳri xa. Pa mẽ ixpiitā omu no ãm ixprĩ hā kêp Jejus ã omunh kêt nē. Tā

no nhũm tām xa. ⁵ Hāmri nē mẽ inhmā kapēr nē mẽ inhmā:

—Pa. E mǎn ka mẽ ra tep kwỳmnēnh rax nē nà? Anē.

Hāmri pa mẽ kām:

—Tk. Nà mo tep? Amrakati kumrēx kênā. Anē.

⁶ Hāmri nhũm mẽ inhmā;

—Xô wehe? Tôe. Axte mẽ axupòk rũm kryhti mẽ nē omu. Anē.

Hāmri pa mẽ mar xà hkôt ho anē nē kumē. Hāmri nhũm kamā tep hipu rax kumrēx nhũm utĩ rax nē. Pa mẽ tee ri ixte ho ixàpir kaxyw ri hkukjê.

⁷ Hāmri pa kêp Jejus ã omunh kurê kumrēx nē Simāw Pêtre mã kām:

—Kwa pēr mẽ panhō Pahihtita na. Anē.

Hāmri nhũm inhma nē hkĩnh tỳx nē akupỹm hinôkà jaxà nē gôx kām mrō nē ma hwỳr ho nana ho tē. ⁸ Hāmri pa mẽ hkôt kanôre kamā kryhti kjēnh o mō. Ra amgrà hwỳr amgrire. Wỳr 100 met pix jakamā pa mẽ hwỳr ixpòx tokyx anē. ⁹ Nē pàr o hkre kura nē kuxi nē ijapòx pa nē Jejus wỳr ixprôt nē mra. Nhũm ra mẽ ixkutêp kuto nē par nhĩpêx nē nhỹhỹnh tep kwỳ par kām haxwỳ nē ho àr o nhỹ. Nē kaxyw pāwti nē amnhī ri haxwỳ nē o nhỹ.

¹⁰ Hāmri nē mẽ ixpumu nē mẽ inhmā:

—E mẽ amnē anhō tep o mra pu mẽ hkuxôt nē kuku. Anē.

¹¹ Hāmri nhũm Simāw Pêtre akupỹm pàr wỳr tē nē kryhti ho htỳx xà hpôt nē amgrà hwỳr hkjēnh o mō. Kamā tep rũnh pix. Nē ohtô nē. Kamā kêp 153 nē hikwỹ htā nhũm nhỹhỹnh kryhti hkwȳ pikaxôn kêt nē. ¹² Hāmri nhũm Jejus mẽ inhmā:

—E kwa mẽ tokyx mra pu mẽ apku. Anē.

Hāmri pa mẽ kuma nē hwỳr mra nē ixkrĩ pa. Hāmri nē tee ri omunh o ixkrĩ. Mẽ ixprĩ hā omunh mex kêt tā kot ã mẽ inhmā amnhī nhĩpêx anhỹr ã omu nē kêp mẽ inhō Pahihti hkôt omunh kurê kumrēx jakamā hixi hā hkukjêr kêt nē. Ām akryk omunh o ixkrĩ. ¹³ Hāmri nhũm mẽ inhmā pāwti ho hkry pa. Nē hpānhā tep jamỳ nē mã ho anē nē ho hkry pa nē ho mẽ inhĩpêx pa pa mẽ ixàpkur o ixkrĩ.

14 Nhũm Jejus akupÿm htĩr kãm ra ahpÿnhã mẽ ixwÿr hapôx o axkrunẽpxi.

Jejus kot akupÿm tãm Simãw Pêtre xãm

Atre 20.28-31; Wam Pêtre 5.1-4

15 Tã pa mẽ ra ixàpkur pa nẽ kànhmã ixkuhẽ nẽ gô mÿ ri mra. Hãmri nhũm Jejus Juāw hkra Simãw Pêtre mã tanhmã kapẽr to. Nom ixpê Juāw nhũm kêp ixkra hkêt axtem Juāw õ hkra na pre. Jakamã nhũm Jejus kãm kapẽr nẽ kãm:

–Kwa Simãw. Xà we amã ijapê ho ate pika hkôt mẽmoj piitã hakrenh par nà? Anẽ.

Hãmri nhũm kuma nẽ kãm:

–Tÿ inhmã ajapê htÿx kênã Pahihti. Ra ate ja hã amnhĩ tã ixpumunh mex. Inhmã ajapêê. Anẽ.

Hãmri nhũm kuma nẽ kãm:

–Tõe. Nà kër ka inhmã mẽ kot ixkôt amnhĩ xunhwÿr xwÿnhjẽ jahkre mex o ri mẽ hkôt apa. Te ho ôwêhti hkrare jamãr xwÿnh kot hamãr mex o ri hkôt pata pyræk. Anẽ.

Hãmri nhũm kãm:

–Tõe. Nà kot paj amã mẽ ho anẽ. Anẽ.

16 Tã nhũm hã ahtũmre nhũm kê axte kãm:

–Kwa Simãw. Xà we ãm hãmri na ka inhmã amnhĩ jarẽ. Xà we amã ijapêê nà? Anẽ.

Hãmri nhũm kãm:

–Tÿ. Ra ate inhmã ajapê hã ixpumunh kênã. Anẽ.

Hãmri nhũm kê axte kãm:

–Tõe. Kër ka inhmã mẽ kot ixkôt amnhĩ xunhwÿr mã xwÿnhjẽ jahkre mex o ri mẽ hkôt apa. Te ho ôwêhti jamãr xwÿnh kot ôwêhti jamãr mex o hkôt pa xwÿnh kot amnhĩ nhĩpêx pyræk. Anẽ.

Hãmri nhũm kãm:

–Nà kot paj amã mẽ ahkre mex o ri mẽ hkôt ixpa. Anẽ.

17 Tã hãmri nhũm hã ahtũmre nhũm kê axte kãm:

–Kwa Simãw. Xà we ãm hãmri na ka inhmã amnhĩ jarẽ? Xà we amã ijapê htÿx kumrêx nà? Anẽ.

Hãmri nhũm tee ri amnhĩ tã kuma nẽ hkaprĩ nẽ. Ra kot amnhĩ tã

hkukjêr o axkrunẽpxi jakamã nhũm hkaprĩ nẽ tee ri hamaxpêr. Hãmri nẽ kãm:

–Kwa Pahihti. Ate mẽmoj piitã omunh par. Nẽ ate inhmã ajapê htÿx ã ixpumunh par kênã. Anẽ.

Hãmri nhũm kê axte kãm:

–Tõe. Kër ka inhmã mẽ kot ixkôt amnhĩ xunhwÿr mã xwÿnhjẽ jahkre mex o ri mẽ hkôt apa. Te ho ôwêhti jamãr xwÿnh kot hamãr mex o ri pata pyræk. Anẽ.

Hãmri nhũm kãm:

–Nà kot paj amã mẽ ho anẽ Pahihti. Anẽ.

Simãw Pêtre tanhmã htyk to hkukamã harênh

18 Nhũm Jejus arĩ Simãw Pêtre mã kapẽr nẽ kãm tanhmã htyk to hkukamã harênh to nẽ kãm:

–Kwa ixkapẽr ma nẽ amnhĩ krã him haxàr tÿx nẽ hã apa Simãw Pêtre. Nà kormã anyw ri na ka pre hte ma nhÿhÿm apa kaxyw nẽ anojarêt hãmri nẽ anhĩnôhkã mex jagjê nẽ ma nhÿhÿm amã apa hprãm xà hkôt ri apa. Tã kot kaj apigêt nhũm mẽ apynê nẽ akahti hpre nẽ apa hpre nẽ ma nhÿhÿm ato mō ka mẽ kãm amnhĩ gō nẽ amnhĩ nẽ tanhmã mẽ kãm nẽ hkêt nẽ. Amã mẽ hkôt amōr prãm kêt tã mãmrĩ mẽ kãm amnhĩ gō kê mẽ ma nhÿhÿm ato mō. 19 Tã kër ka arĩ ixkôt amnhĩ xãm tÿx nẽ atĩr prãm xaj mẽ umaj axte ixkaga hkêt nẽ. Hãmri nhũm mẽ apĩ nẽ tanhmã atyk to hã apumu nẽ amã Tĩrtũm kĩnh ã apumunh mex kurê kumrêx. Hãmri nẽ atã Pahi Maati Tĩrtũm mex o mex ã harê. Anẽ.

Nhũm pre ã Jejus Simãw Pêtre tyk kukamã kãm ujarênh anẽ. Hãmri nẽ kãm:

–E kër ka ixte amnhĩ to htÿx nẽ amarĩ mẽ kãm ixãm nhũm mẽ kot ixpĩrja pyrã nẽ ã amnhĩ nhĩpêx anẽ. Anẽ.

Hãmri nhũm kuma nẽ kãm:

–Tõe. Nà kot paj hãmri tã ã amnhĩ nhĩpêx anẽ Pahihti. Anẽ.

Juāw tyk kukamã tanhmã harênh to hkêt ã harênh

²⁰ Nhūm pre ã Jejus Simāw Pêtre mā tanhmã htyk to hkukamã harēnh anē. Hāmri nhūm kuma nē ixpê Juāw ã ixto hakēx nē ixpê Jejus krāmnhwý mex ã ixpumu. Kormã Jejus htyk kêt ri kamãt kãm mē ixàpkur o ixkrīta ã na pa pre ãhkô hã ixàpkur o nhỹ nē kot mē kãm ôr mã xwýnhta nhĩxi hã hkukja. ²¹ Jakamã nhūm Simāw Pêtre ixto hakēx nē ixpumu nē ixtã Jejus kukja nē kãm:

—Kwa no pēr pahkôt mōr mūj? Tanhmã koja we htyk to? Anē.

Hāmri nhūm kãm:

²² —Nà kot paj amã tanhmã htyk to hkukamã harēnh hkêt nē. Kot pa inhmã arĩ kritpēm pa rãhã pa akupýn ixwryk prãm nhūm arĩ pa nē htyk kêt rãhã pa akupýn wrý. Kêr ka ri htyk kukamã tee ri tanhmã ajamaxpēr to hkêt nē. ãm ixkôt pix mã ate amnhĩ nhĩpêx tỳx pix kukamã mãn ajamaxpēr o ri apa.

²³ Anhỹr o kãm ijarēnh jakamã nhūm mē ixkwýjaja kot ã ijarēnh anhỹrja ã kuma ma nē htỳx nhỹrmã ixtyk kêt ã ixkamnhĩx. Nē gaa nē rĩ piitã axpēn mã ã ijarēnh anhỹr o pa. Nom na pre ã ijarēnh anhỹr kêt nē. Na kêt pre ijarēnh o:

—Kot pa inhmã arĩ ri kritpēm pa rãhã pa akupýn ixwryk prãm nhūm arĩ pa nē htyk kêt rãhã pa akupýn wrý.

Anhỹr o ijarē. Nom ãm hāmri ixtyk kêt rãhã nhūm akupýn wrýk ã ijarēnh kêt nē.

*Juāw kot Jejus kot tanhmã amnhĩ to hã kagà hpar kêt ã kot amnhĩ jarēnh
Juāw 20.30-31*

²⁴ E na pa mē amã Jejus kot tanhmã amnhĩ nhĩpêx to ho pa hã harē nē hã kagà. Ixpê hkôt ri ixpa ho ixpa xwýnhjé hō na pa ãm hāmri ã hã kagà anē. Ka mē kamã harē nē ama nē ãm hāmri ixte kagà nhĩpêx kôt ixpumunh mex kurê kumrēx. ²⁵ No na pre Jejus ãm ja pix o anhỹr o pa hkêt nē. Na pa ãm mē amã hkwy pix jarē nē hã kagà. Na pre tanhmã ri mẽmoj to rax kumrēx o ri pa. Nom kēp ãm ixte kot

tanhmã ri amnhĩ nhĩpêx to piitã hã kagà hpar ronhỹx hã kagàja katutxô rax kumrēx. Jao te ra kaxkwa htêp o mōr pyrāk.

Tã ãm ja pix. Na hapêx.

Atre
Jejus nhỹ hã mẽ ahkre ho
mẽ pa xwỳnhjaja kot
tanhmã amnhĩ nhĩpêx to
ho pa hã mẽ harênh

Rukre na pre kagàja nhĩpêx. Na pre kêp tôtô nê hkwỳjê kane ho pa. Nê Jejus nhỹ hã mẽ ahkre ho pa xwỳnh pê Pawre kôt pa ho pa. Hãmri nê hamaxpêr nê hkràmnhwỳ Teopre mã kagàja nhĩpêx nê hwỳr kumê. Nê kagàja kamã Jejus nhỹ hã mẽ ahkre ho mẽ pa xwỳnh maatijaja kot Jejus mỳr pê tanhmã amnhĩ nhĩpêx to ho pa hã mẽ harê.

Nê Ijaew nhõ patrejaja nê mẽ hkwỳ pê Parijew nhõ xwỳnhjaja nê mẽ hkwỳ pê Satusew nhõ xwỳnhjaja kot Tĩrtũm kapêr ã kagà htũm kamã harênh nê mar nê hkôt amnhĩ nhĩpêx tã Tĩrtũm Kra Jejus kôt amnhĩ nhĩpêx kêt ã mẽ harê. Mẽ kot kêp Tĩrtũm Kra hkêt ã hkamnhĩx jakamã na prem kãm mẽ kot hkôt amnhĩ xunhwỳr xwỳnhjê kurê nê. Tã nhũm Simãw Pêtre mẽ Pawre mẽ Jejus nhỹ hã mẽ ahkre ho mẽ pa xwỳnh kwỳjaja mẽ urak nê kêp Ijaew tã mẽ kurom Jejus hkôt amnhĩ xunhwỳ nhũm mẽ tee ri ja hã mẽ omu mẽ kamã gryk tỳx nê tanhmã mẽ hipêx to ho pa. Tã nom nhũm mẽ tee ri amnhĩ kukamã hamaxpêr nê Jejus kaga hkêt nê. Mẽ kot mẽ hipêx kati htã na prem arĩ Tĩrtũm Karõ nhỹ hã mẽ piitã mẽ kãm tanhmã Jejus kot mẽ panê amnhĩ nhĩpêx to hã harênh o pa. Kam nê kapit 1 kamã wesik 8 japêr nê kamã harê. Hãmri nhũm Rukre ã mẽ kot amnhĩ nhĩpêx anhỹrja piitã hã kagà nê Teopre hwỳr kumê. Nê kãm mẽ harênh o:

Tĩrtũm Karõ jarênh

Matêwre 28.16; Makre 16.14; Rukre 24.36; Juãw 20.19

¹ Pa Teopre? Xà amex? E ot pa axte awỳr kagà nhĩpêx nê kumê. Nà wam ixte awỳr kagà nhĩpêx nê

mênhta kamã na pa pre amã Jejus kot tanhmã amnhĩ nhĩpêx to hã harê nê hã kagà. Kot tanhmã amnhĩ nhĩpêx to ho pa nê tanhmã mẽ ahkre hto ho paja krax rũm pa pre piitã hã kagà hpa nê awỳr kumê. ²⁻⁴ Kormã akupỳm kaxkwa hwỳr àpir xwỳj ri na pre ÿ hã mẽ ahkre ho pa kaxyw hkôt mẽ pa xwỳnh kwỳjê rê. Tã nhũm mẽ kãm hkurê xwỳnhjaja kupĩ nhũm amnhĩ xà htỳx kãm hamak rax kãm ty. Hãmri nhũm Tĩrtũm akupỳm ho htĩr. Nom nhũm ma akupỳm kaxkwa hwỳr àpir kurê kumrêx kêt nê. Na pre xatã mẽ kot ÿ hã mẽ ahkre ho mẽ pa xwỳnh maatijê hwỳr hapôj nhũm mẽ akupỳm htĩr kãm omu. Na pre hte nhỹri mẽ hwỳr hapôj nê tanhmã mẽ ahkre hto nê mẽ kãm:

—Na pre Tĩrtũm mẽ ato hkra nê tãm mẽ ate amnhĩ nhĩpêx o apa kaxyw mẽ axunhwỳ.

Anhỹr o mẽ ahkre hã arĩgro ho 40. Hãmri nê kormã mẽ kamã pa ri axte tanhmã mẽ kãm kapêr to. Tĩrtũm Karõ nhỹ hã mẽ kãm kapêr nê mẽ kãm:

—E kêr ka mẽ krĩ ja kamã ri apa nê tokyx ma nhỹhỹm apa hkêt nê. Kê Inhĩpêxà Tĩrtũm mẽ awỳr amnhĩ Karõ rê mãn. Ra ixte mẽ amã harênh xà hkôt koja mẽ awỳr kurê nhũm mẽ awỳr wrỳ nê mẽ akarõ mã agjê ka mẽ rĩ kormã angrà nê ma nhỹhỹm krĩ hkôt ri mẽ kãm kapêr jarênh o ri mẽ hkôt apa.

⁵—Juãw Paxis na pre hte Tĩrtũm mã gôx kãm mẽ hkrã kumrãr o pa. Tã koja Tĩrtũm tokyx mẽ awỳr amnhĩ Karõ rê. Kot ixpãnhã amnhĩ kaxyw mẽ ato mẽ amã ma hkêt kaxyw mẽ awỳr kurê. Koja hã apkati grêre nhũm mẽ awỳr kurê nhũm ixpãnhã mẽ awỳr wrỳ nê mẽ amã agjê nê mẽ akamã mẽ akôt pa ho pa. Ka mẽ rĩ kormã Jerujarê rũm ajapôj nê ma mẽ kãm Tĩrtũm kapêr jarênh o ri mẽ hkôt apa. Anê.

Jejus akupỳm kaxkwa hwỳr àpir ã harênh

Makre 16.19; Rukre 24.50

⁶ Tã nhũm mẽ axte akuprõ. Jejus nê ÿ hã mẽ ahkre ho mẽ pa xwỳnh

maatijaja nhũm mẽ hixêt pê Oriwêhti nhĩmõk ã axte axpên wỳr akuprõ. Hãmri nhũm mẽ amnhĩ tã Jejus kukja nẽ kãm:

—Kwa Pahihti mẽ inhmã mẽmoj jarê. Xà kot kaj tokyx apê Tĩrtũm kot mẽ ixwỳr amẽnh xwỳnh ã amnhĩ jarê nẽ Rõm nhõ xwỳnhjê nẽ mẽ pahpê Ijaew kator nà? Hãmri pa mẽ pamjaja amnhĩ to amnhĩptàr o ri ixpa. Anẽ.

⁷ Hãmri nhũm mẽ kãm:

—Nà Inhĩpêxà pix na ã mẽmoj kot anhỳrja kukamã àhpumunh. Tapxipix na kot mẽmoj tanhmã ho hã arĩgro nẽ mẽmoj tanhmã ho hã mytwrỳ pumunh mex. No mẽ kajaja mo kaxyw kot ka mẽ amnhĩ katorta kukamã amnhĩ jarẽnh ma? ⁸ Nà kot paj ãm mẽ amã mẽmoj to pyxire nẽ hkukamã harẽ. Koja Tĩrtũm tokyx mẽ awỳr amnhĩ Karõ rẽ nhũm ixpãnhã kot mẽ ato amnhĩptàr kaxyw mẽ akarõ mã agjê. Hãmri ka mẽ ma pyka piitã hkõt anhrã nẽ ma mẽ kãm ixkapêr jarẽnh o ri mẽ hkõt apa. Jar Jerujarẽ kamã nẽ pika pê Jutej kõt nẽ nhãm pika pê Samar kamã nẽ pika piitã hkõt mẽ kãm ijarẽnh o ri mẽ hkõt apa. ã mẽ ate amnhĩ nhĩpêx anhỳr pix kukamã kot paj mẽ amã harẽ. Anẽ.

⁹ Nhũm pre ã Jejus mẽ kãm kapêr anẽ hãmri nẽ mẽ kêp kãnhmã àpir o tẽ nẽ mẽ noo mã ma kaxkwa hwỳr àpir o tẽ nẽ kakrãm axà nẽ mẽ kêp akunok. ¹⁰ Hãmri nhũm mẽ tee ri hapêr o kuhê rãhã nhũm mẽhõ myja wa axkrut nẽ mẽ hwỳr wrỳ nẽ mẽ kutã wa xa. Wa ê hakaj nẽ wa xa. ¹¹ Hãmri nẽ mẽ kãm:

—Pa Garirej nhõ xwỳnhjaja? Kwa mo kaxyw na ka mẽ tee ri kaxkwa pumunh o akuhê? Tĩrtũm na akupỳm amnhĩ wỳr Kra Jejus o api ka mẽ àpir kãm omu. E mẽ tee ri hkukamã ajamaxpêr kêt nẽ. Koja nhỹrmã man akupỳn mẽ awỳr wrỳ. Te mẽ arũm kaxkwa hwỳr àpirja pyrã nẽ akupỳn mẽ awỳr wrỳ ka mẽ omu. Anẽ.

Akupỳm Jerujarẽ hwỳr mẽ mrar ã mẽ harẽnh
Rukre 24.52

¹² Tã nhũm Jejus nhỹ hã mẽ ahkre ho mẽ pa xwỳnh maatijaja wa kuma nẽ awjanã nẽ ma akupỳm krĩm mra. Hixêt pê Oriwêhti rũm ma akupỳm Jerujarẽ hwỳr mra. Wỳr jawỳ nhũm mẽ akupỳm hpõx tokyx anẽ. ¹³ Hãmri nẽ akupỳm kỳx pê ixkreja wỳr api nẽ agjê. Na pre

Simãw Pêtre nẽ

Juãw nẽ

Xiakre nẽ

Andrehti nẽ

Firipti nẽ

Tomas nẽ

Patoromew nẽ

Matêwre nẽ

Xiakre hõ pê Apew kraja nẽ

Simãw Jerox nẽ

Jut pê Xiakre hkraja.

Mẽ piitã Jejus nhỹ hã mẽ ahkre ho mẽ pa xwỳnh maatijaja na pre mẽ. ¹⁴ Nẽ mãânẽn mẽ hkõt mẽ hkwỳjaja. Jejus katorxà Marir nẽ Jejus tøjaja nẽ Jejus kot tanhmã mẽni ho mex to xwỳnh kwỳjaja nhũm prem kỳx pê ixkreja wỳr Jejus nhỹ hã mẽ ahkre ho mẽ pa xwỳnh maatijê hkõt gjêx pa. Hãmri nẽ xatã axpên wỳr akuprõ nẽ Tĩrtũm mã amnhĩ jarẽnh o hkrĩ.

Tĩrtũm kot Jut Kariot pãnhã mẽhõ xãm ã harẽnh

Matêwre 27.3-10; Juãw 15.27

¹⁵⁻¹⁹ Tã nhũm mẽ kot Jejus kõt amnhĩ xunhwỳr xwỳnhjaja ra kêp 120. Jakamã nhũm mẽmo arĩgro hã axpên wỳr akuprõ nẽ hkrĩ. Nhũm Simãw Pêtre kãnhmã xa nẽ tanhmã mẽ kãm Jut Kariot jarẽnh to nẽ mẽ kãm:

—E Jejus kõt ixtõ nẽ ixtõxjaja. Pa mẽ amã tanhmã finat Jut Kariot jarẽnh to ka mẽ inhma. Na pre axtem nẽ mẽ pahkwỳjê mã Jejus ã amỳnê nẽ hpãnhã kàxpore hkwỳ jamỳ nẽ o tẽ nẽ ho amnhĩm pyka hkwỳ japrõ. Tã tanhmã amnhĩ to nẽ nhỹri õ pyka kamã tẽm nẽ amnhĩ tu katõk nẽ hkrêx kato nẽ ty nẽ hkamrõ ho õ pyka xy hpa. Jakamã nhũm Jerujarẽ nhõ xwỳnhjaja harẽnh ma nẽ pykaja ã hixi mẽ nhũm kêp “pyka kamrõhti.” No mẽ pahpê Ijaew kapêr kãm kêp “Ajetãm.” Amnepêm na pre Tĩrtũm Karõ finat Tawi mã Jut Kariot

kukamã tanhmã harênh to. Kormã kator nê kot tanhmã amnhĩ to hkêt tâ nhũm ra hkukamã omu nê Tawi mã harê. Kot axtem nê mẽ kãm Jejus ã àmnênhja nhũm hkukamã omu nê Tawi mã harê nhũm kuma nê ô ri hã kagã. Tã nhũm kot hkukamã hã kagã hkôt nhũm ã Jejus nhĩpêx anê. Jut Kariotja mẽ panhĩõ na pre. Na pre Jejus mẽ pahpyrà nê amnhĩm kuta. Mẽ pahpyrà nê ÿ hã kapêr jarênh o pa kaxyw. Tã nhũm axtem nê ã hipêx anê.

²⁰ Nom na pre Tawi kot Tĩrtũm mex ã grer ã kagã kot ra hkukamã tanhmã harênh to. Kagã hkwý pê Sam kamã kot harênh kot:

Kot amnhĩ tomnuj xwýnhhta nhõrkwý koja hkaprýn kuhê ho kuhê nhũm mēhõj mýr pê kamã pa hkêt kumrêx. Kojã ãm arĩ hkaprýn kuhê ho kuhê.

Nom kot Jejus mã tanhmã amnhĩ nhĩpêx to ho paja kê mēhõ mýr pê ho amnhĩptã nê hpãnhã Jejus nhỹ hã mẽ ahkre ho pa. Anê.

Ã Tĩrtũm kapêr ã kagã htũm kot Jut Kariot kukamã harênh kot anhýr.

²¹ Jakamã e ixkwýjaja. Kot puj mẽ hpãnhã mẽ atõ xãm ka Jut mýr pê mẽ pahpê Jejus nhỹ hã mẽ ahkre ho ixpa xwýnhjê hkôt Jejus akupým htĩr ã harênh o apa. ²² E mẽ atõ na ka pre mẽ ixpyrà finat Juãw Paxis kot Jejus hkrã kumrãr ã omu? Nê Jejus kot ri tanhmã amnhĩ nhĩpêx to ho pa xà hkrax rũm ka mẽ ixkôt ri omunh o ri apa? Nê htyk kãm omu nê akupým htĩr kãm omu nê ma akupým kaxkwa hwýr àpir kãm omu? E mẽ atõ na ka pre mẽ ixpyrà ã kot amnhĩ nhĩpêx anhýr ã omunh par o ri hkôt apa? ã mẽ ate kot amnhĩ nhĩpêx anhýr ã omunh o apa xwýnhjê hõ kot paj mẽ ata ka Jut Kariot mýr pê mẽ ixpyrà ma mẽ kãm Jejus akupým htĩr ã harênh o ri apa. Anê.

²³ Nhũm pre ã Simãw Pêtre mẽ kãm kapêr anê. Hãmri nhũm mẽ kuma nê axpên pumunh o hkrĩ hãmri nê Maxitre mẽ Jujere wa kãm hamaxpêr. Jujere na pre hixi axkrunêpxi. Na pre

kêp Jujere nê kêp Pasapas nê kêp Justi. ²⁴⁻²⁵ Hãmri nhũm mẽ wa hã Tĩrtũm kukja nê kãm:

—Pa Tĩrtũm? Nà na pre finat Jut Kariotja Jejus kaga nê ty nê kot amnhĩ tomnuj mýrapê ma mẽ kot amnhĩ xà htýx kamã hamak tũm xàta wýr ma mō. Tã ot pa mẽ ixte mēhõ kot mýr pê mẽ ixpyrà nê Jejus nhỹ hã mẽ ahkre ho pa kaxyw mēhõ hã akukjêr kaxyw akuprõ. Ate mẽ ixpiitã tanhmã mẽ ixte amnhĩ nhĩpêx to ho ixpa hã mẽ ixpumunh par Tĩrtũm. Ate mẽ ijamaxpêr kôt mẽ ixpumunh par nê mẽ ixte tanhmã amnhĩ nhĩpêx to hã mẽ ixpumunh par. Jakamã e. Ota Maxitre mẽ Jujereja wa nhỹ. Nhỹ kot kaj amnhĩm ata? Kot paj mẽ kên pijakrutja ã wa hixi xi nê ho àk nê hõ py. Hãmri ka amã hprãm xwýnhhta ta. Kêr pa mẽ kên pumunh kêt rãhã hõ py nê hã hixi pumu nê amã hprãm xwýnh kôt omunh kurê kumrêx. Anê.

²⁶ Nhũm prem ã Tĩrtũm mã kapêr anê hãmri nê kênja o axkamur nê ho àk nê omunh kêt rãhã ja py nê omu nhũm hã Maxitre nhĩxi nõ. Jakamã nhũm Jejus nhỹ hã mẽ ahkre ho mẽ pa xwýnh maatiijaja amnhĩ kôt kumê nhũm mẽ akupým kêp 12.

2

Tĩrtũm Karõ kot mẽ hwýr wrýk ã harênh

Rukre 24.49; Atre 4.31, 8.15, 10.44, 19.2

¹ Tã nhũm mẽ hkĩnh pê Pêtekos kato nhũm mẽ kot Jejus kôt amnhĩ xunhwýr xwýnhjaja nhỹri axpên wýr akuprõ nê hã hkĩnh. Pêtekosja ã na pre hte Ijaew mẽ hpur kãm mẽõ rũnh ã hkĩnh kaxyw axpên wýr akuprõ nê hã hkĩnh. Jakamã nhũm mẽ kot Jejus kôt amnhĩ xunhwýr xwýnhjaja haxwýja axpên wýr akuprõ. ² Hãmri nê kaxkwa kamã mẽmoj ma. Nhũm mẽmoj te kók xapêr týx krihkrit pyrãk o mẽ hwýr wrýk o mō nê mẽ pikuprõnh xà hã ixkreja wýr axà nhũm mẽ piitã kuma. ³ Hãmri nhũm mẽmoj te kuwy jakrax pyrãkja ahpýnhã mẽ hwýr anhrã nê mẽ hkrã

nhĩmõk ã hikwÿ. ⁴⁻¹³ Tĩrtũm Karõ na pre. Tãm mẽ hwÿr wrÿk jakamã ã ri mẽ hipêx anẽ. Hãmri nẽ kot mẽ ho amnhĩptar kaxyw mẽ hkarõm gjêx pa nhũm mẽ ý hã tanhmã kapêr to ho kuhê. Nom mẽ kapêr o kapêr kêt nẽ. Axtem mẽ kapêr kwÿ ho kapêr. Tĩrtũm Karõ kot tanhmã mẽ ho jakamã nhũm mẽ axtem mẽ kapêr kwÿ ho kapêr. Jao ahpÿnhã mẽ kapêr kwÿ ho Tĩrtũm mã mex o mex ã harê. Na pre Ijaew kwÿjaja ahpÿnhã pyka hõ kamã ri mẽ hkõt pa nẽ mẽ kapêr ma nẽ ho kapêr o pa. Tã akupÿm Jerujarẽ hwÿr pan pøj nẽ kamã ri pa ho pa. Hãmri nẽ mẽmojta ma nẽ ma Jejus kwÿjê hwÿr hprõt nẽ ahpÿnhã mẽ kapêr ã mẽ kuma nẽ tee ri mẽ omunh o kuhê. Amnhĩ jaêr pẽ mẽ kuma nẽ tanhmã axpẽn mã mẽ harênh to ho:

–Kokÿÿ. Garirej nhõ xwÿnhjaja kot mẽ pakapêr mar kêt tã ra tanhmã amnhĩ to nẽ ahpÿnhã ri mẽ pakapêr o kapêr. Ahpÿnhã mẽ pakapêr nẽ ahpÿnhã mẽ panhõ pyka htã nhũm mẽ ã ri mẽ pakapêr o kapêr anẽ.

Na pika pẽ Pat
nẽ Met
nẽ Erãw
nẽ Mêsopotãm
nẽ Jutej
nẽ Kapatos
nẽ Põt
nẽ As
nẽ Prik
nẽ Pãpir
nẽ Ejit
nẽ Sirên wÿr Ripja
nẽ krĩ pẽ Rõm
nẽ gõ hipõk pẽ Kret
nẽ Arap.

Nẽ mẽ pahkwÿjaja mẽ pahpê Ijaew kumrêx
nẽ mẽ pahkwÿjaja amarĩ ri amnhĩ to Ijaew.

Ãm ahpÿnhã mẽ panhõ pyka nẽ ahpÿnhã ri mẽ pakapêr.

–Tã pu mẽ ahpÿnhã mẽ pakapêr kãm mẽ kapêr ma. Tĩrtũm mex ã mẽ kot axpẽn mã harênhja pu mẽ hã mẽ mar mex nẽ. Anẽ.

Nhũm prem ã axpẽn mã mẽ harênh anẽ nẽ tee ri mẽ omunh o kuhê. Amnhĩ jaêr pẽ amnhĩ kapêr kãm mẽ kapêr ma nẽ tee ri hamaxpêr nẽ axpẽn mã:

–Kokÿÿ. Tanhmã mãn pre wem amnhĩ to nẽ ra mẽ pakapêr ma nẽ mẽ pakapêr o kapêr? Anẽ.

Nhũm mẽ hkwÿjaja axtem nẽ ri mẽ hã hpêr o axkê nẽ axpẽn mã:

–Tk. Ãm mẽ pipãnh ã ã ri mẽ kot amnhĩ nhĩpêx anhÿr kênã. Anẽ.

Simãw Pêtre kot mẽ kãm ujarênh

Atre 3.12-26

¹⁴ Hãmri nhũm Simãw Pêtre ã mẽ kapêr anhÿrja ma hãmri nẽ kÿx pẽ mẽ kãm kapêr nẽ mẽ kãm:

–E Jerujarẽ nhõ xwÿnhjaja nẽ mẽ apê ixkwÿ Ijaew. Pa mẽ amã mẽmoj jarẽ ka mẽ inhma nẽ inhmar tÿx nẽ.

¹⁵ Na ka mẽ atÿx ri mẽ ixpipãnh ã mẽ ixkamnhĩx. Mẽ ixkrã pipãnh kêt. Kormã myt kaxkwa nhĩpõk wÿr htêm kênã. Na hte Ijaew kwÿhtã kagõxÿhti ho hkõm kêt nẽ. ¹⁶ Ja na pre Tĩrtũm amnepê mã ã mẽ ixte amnhĩ nhĩpêx anhÿrja kukamã mẽ ijarê nhũm ý hã kapêr o pa xwÿnh finat Joew mẽ ixkukamã hã kagã. Nẽ hã kagã ho:

¹⁷ Koja nhÿrmã mẽmoj piitã hapêx kaxyw pa mẽ piitã mẽ hwÿr Ixkarõ rẽ nhũm ma mẽ hwÿr wrÿ nẽ mẽ hkarõ mã agjê. Hãmri nhũm mẽ hkanrêhã mẽ hkra xaptar nywjaja ma mẽ kãm ixkapêr jarênh o ri mẽ hkõt pa. Koja mẽ hpimtir kãm amnhĩ kukamã mẽmoj pumu. Nẽ mẽhpigêttjaja haxwÿja. Kot paj mẽ hpimtir kãm tanhmã mẽ kãm ixkapêr to.

¹⁸ Nẽ kot paj mẽ kot ixkõt ri tanhmã amnhĩ nhĩpêx to ho mẽ pa xwÿnhjê hwÿr Ixkarõ rẽ nhũm mẽ ý hã ma mẽ kãm tanhmã ixkapêr jarênh to ho ri mẽ hkõt pa.

¹⁹ Kot paj kaxkwa kamã nẽ pyka kamã aa mẽ kot mẽmoj pumunh kêt kwÿ ho anẽ nhũm mẽ amnhĩ jaêr pẽ omu. Jao nhÿri mẽ hkamrõ pumu nẽ

kuwy pumu nē kuwy hkūm pumu hāmri nē tee ri amnhī kukamā hamaxpēr.

20 Nē koja myyti ahtyk nhūm mytwrýre haxwýja te mry kamrō pyrāk. Pahihti Jejus akupýn hpôx xà hã arīgro xwýj ri koja mẽmoj ã amnhī nhīpêx anē. Akupýn hpôx xà hã arīgro koja mex kumrêx.

21 Tã koja mẽhō mẽmoj kot ã amnhī nhīpêx anhýr ã omu nē amnhī kaxyw inhmã hamaxpēr nē amnhī to ixwý pa kuma nē ho ixkra nē mẽmoj punujta pê utà. Anē.

Na pre ã Tirtūm kapēr anē nhūm finat Joewja mẽ pamã hã kagà. 22 E pa mẽ amã tanhmã Jejus jarēnh to ka mẽ inhma. Nà Najare nhō xwýnh na pre. Mẽ pahte Tirtūm nhý hã kot tanhmã amnhī nhīpêx to ho pa hã omunh kaxyw na pre Tirtūm mẽ pahwýr kumē nhūm ý hã mẽ panoo mã tanhmã amnhī nhīpêx to ho pa. Nē aa mẽ pahte mẽmoj pumunh kêt kwý ho anhýr o pa pu prem hã omu.

23 —Tã ka prem tanhmã kaxyw ajamaxpēr punuj to nē apī. Tirtūm ra kot amnepē mã ja kukamã ja hã mẽ apumunh mex tã mẽ pahwýr kumē ka mẽ axtem nē apī. Jao mẽ kot htýx ri amnhī nhīpêx o mẽ pa xwýnhjê mã agō nhūm mẽ kupī. Pī kahpa hã kunhō nhūm ty. No ãm mẽ kajaja na ka prem mẽ kãm hã amýnê nhūm mẽ ã mẽ amã hprãm xà hkôt hipêx anē nē mẽ amã kupī.

24 —Tã nhūm Tirtūm akupým ho htír nhūm akupým htír o htír nhūm mẽ htykja tee ri kot amnhī kôt mẽnh prãm kaprý. 25 Amnepêm na pre finat Tawija Jejus akupým htír kukamã harē. Te Jejus tãm kapēr pyrāk o kapēr nē kapēr o:

Na hte Pahi Maati ixkôt pa ho pa rãhã nē. Kot inhīhkô hã ixtãnopxar o pa jakamã kot paj inhmã ma hkêt nē ri ixãmnhix ijamakêtkati nē ri ixpa.

26-27 Pa Tirtūm? Nà kot paj nhýrmã ixytk tã arī amnhī wýr akãm

ama. Kot kaj mẽ htykjê kamã ixkarō rer kêt nē. Ixte akapēr kôt amnhī nhīpêx mex o ri ixpa jakamã koja inhī kormã omnu nē hkro hkêt ri ka akupým ixto ixtír. Jakamã na pa inhmã ixytk puma hkêt nē ixkính nē ijamakêtkati nē ri ixpa. Nē amnhī kính jarēnh rãhã ho ri ixpa.

28 Na ka pre akupým ixto ixtír ã amnhī jarē pa ixtír tūm nē ixpa ho ixpa kaxyw. Tã ate ixkôt ri apa rãhã jakamã pa ixkính nē ri ixpa. Anē.

29 Æ na pre mẽ panhīgêt finat Pahi Tawija Jejus htyk nē akupým htír kukamã harēnh anē. No tãm amnhī jarēnh kêt nē. Tawija na pre ty nhūm mẽ haxà nhūm htem arī haxàr xà hã pika ho mex o pa. Tã tãm ã kot amnhī jarēnh anhýr ro nhýx akupým htír nhūm mẽ arī haxàr xà kaprý ho mex o pa hkêt nē. 30 Pahi Tawi kêp Tirtūm nhý hã kapēr jarēnh o pa xwýnh jakamã nhūm Tirtūm kãm hkanrêhã htãmnhwý Jejusja kukamã harē nē kãm:

Koja nhýrmã akanrêhã atãmnhwýjê hō amýr pê apyrà nē mẽ ho amnhiptàr o pa. Æm hāmri na pa amã ja jarē. Anē.

31 Nhūm pre ã Tirtūm Tawi mã mẽ pakaxyw ãm mã xwýnhhta jarēnh anē nhūm kuma. Nē mar týx jakamã hkukamã htyk nē akupým htír ã harē nē hã kagà. Nē hã kagà ho:

Koja Tirtūm mẽ htykjê kamã hkarō rer kêt nē nhūm aa ì omnu nē hkro kêt. Anē.

Æ na pre finat Tawija Jejus Kris kukamã harē nē hã kagà anē. 32 Kot harēnh xwýnh Jejusja tãm na pre Tirtūm akupým ho htír pa mẽ pamjaja akupým htír kãm omu. Hāmri nē mẽ ixte omunh xà hkôt ã mẽ amã harēnh anē. Anē.

Nhūm pre ã Simãw Pêtre mẽ kãm Jejus jarēnh anē. Hāmri nē mẽ kãm:

33 —Na pre Tirtūm akupým amnhī wýr Kra Jejus o apī. Hāmri nē kãm anē nhūm ìhkô hã mẽmoj piitã ho amnhiptàr o hkrī. Hāmri nhūm Tirtūm

kot kām amnhĩ jarēnh xà hkôt kām amnhĩ Karō gō. Tã nhũm ra amnhĩ pyrà nē mẽ ixwỳr kurē nhũm jarāhã mẽ ixwỳr te kuwy jakrax pyrà nē mẽ ixwỳr wrỳ nē mẽ ixkarō hwỳr gjēx pa. Hāmri pa mẽ ý hã ahpỳnhã mẽ akapēr o ixkapēr ka mẽ inhma. Tã mẽ akwỳjaja axtem nē mẽ xpipānh ã mẽ ixkamnhĩx. ³⁴ No finat Tawija na pre tãm kaxkwa hwỳr àpir ã amnhĩ jarēnh kêt nē. Jejus kot ĩ ho kaxkwa hwỳr àpirja na pre harē nē harēnh o: Na pre Tĩrtũm inhō Pahihti mã kapēr nē kām:

³⁵ “E jar inhĩhkô hã nhỹ.

Pa amã mẽ kām akurē xwỳnhjê gō ka mẽ ho amnhĩptār o akrĩ.” Anē.

Ã na pre finat Tawija Tĩrtũm kapēr jarēnh anē. Nom tãm ĩ rāhã kaxkwa hwỳr àpir ã amnhĩ jarēnh kêt nē. Pahihti Jejus na pre ã hã harēnh anē. ³⁶ Jakamã kwa ixkwỳ Ijaew. Mẽ inhma nē inhmar tỳx nē. Mẽ ate Jejus ã axàmnēnh nhũm mẽ kot mẽ amã pĩ kahpa hã hpĩr xwỳnhta. Tãm na pre Tĩrtũmja kệp mẽ panhō Pahihti kaxyw ãm. Nē kệp mẽ papytār xwỳnh kaxyw mẽ pakaxyw ãm. Anē.

³⁷ Nhũm pre ã Simãw Pêtre mẽ kām ujarēnh anhỹr o xa. Hāmri nhũm mẽ tee ri ujarēnhja ma nē hkaprĩ nē. Nē tee ri amnhĩ kukamã hamaxpēr nē hamaxpēr o:

—Hêxta waa nē. Pēr ãm hāmri na pre Jejus mẽ pamã amnhĩ jarēnh tã pu prem amnhĩ kaxyw hkôt paja-maxpēr kêt nē axtem nē kupĩ. Anē.

Hāmri nē amnhĩ tã mẽ hkukja nē Simãw Pêtre mã:

—Kwa ã kot anhỹr jakamã tanhmã kot paj mẽ amnhĩ nhĩpêx to? Anē.

³⁸ Hāmri nhũm mẽ kām:

—Nà kêt ka mẽ tee ri ate amnhĩ tomnuj mã ajamaxpēr nē akaprĩ nē. Hāmri nē Jejus Kris kôt amnhĩ xunhwỳ. Pa mẽ ja hã mẽ apumu nē Jejus nhỹ hã mẽ akrã kumrã. Hāmri nhũm Tĩrtũm ja hã mẽ apumu nē te amnhĩ katut kôt mẽ ate amnhĩ tomnuj piitã rēnh par pyrà nē axte kām hamaxpēr kêt nē. Hāmri nē mẽ ixkuxwar mẽ awỳr amnhĩ Karō rē. ³⁹ Kām mẽ awỳr

rēnh prãm. Mẽ amã nē mẽ akanrēhã mẽ akra nē mẽ atàmnhwỳjê mã nē mẽ kot kormã Tĩrtũm kapēr mar kêt xwỳnhjê mã. ãm mẽ kot amnhĩ to hwỳr xwỳnh piitã nhũm kām mẽ hwỳr rēnh prãm. Anē.

⁴⁰ Nhũm pre ã Simãw Pêtre mẽ kām ujarēnh anē. Mẽ kām kapēr xihtỳx o kapēr ry nē. Hāmri nē mẽ kām:

—Koja nhỹrmã Tĩrtũm mẽ kot tanhmã amnhĩ tomnuj to ho mẽ pa xwỳnhjaja tanhmã mẽ homnuj tỳx to. Jakamã kwa mẽ tokyx mẽ ate amnhĩ tomnuj kaga kêt tanhmã mẽ ato hkêt nē. Anē.

⁴¹ Hāmri nhũm mẽ hkwỳjaja kapēr mar tỳx nē amnhĩ kaxyw Jejus kôt hamaxpēr nē hkôt amnhĩ xunhwỳ. Mẽ ohtô rax nē hkôt amnhĩ xunhwỳ. Mẽ kệp 3.000 nē hkôt amnhĩ xunhwỳ. Hāmri nhũm mẽ kot Jejus nhỹ hã kapēr jarēnh o mẽ pa xwỳnhjaja mẽ hkrã kumrār pa. Mẽ kệp Jejus kwỳ hã amnhĩ to amnhĩrit kaxyw mẽ hkrã kumrār pa. ⁴² Hāmri nhũm mẽ ra mẽ kot Jejus kôt amnhĩ nhĩpêx xwỳnhjê hkôt amnhĩ nhĩpêx o pa nhũm Jejus nhỹ hã mẽ ahkre xwỳnh maatiijaja apkati mẽ Jejus kapēr o mẽ ahkre nhũm mẽ mar tỳx nē ra Jejus kôt amnhĩ nhĩpêx mex o mō. Nē gaa nē hkôt amnhĩ nhĩpêx mex o pa. Mẽ kām kapēr mar prãm tỳx jakamã na pre htem axpēn wỳr akuprō nē axpēn kutã apku nē Tĩrtũm mã amnhĩ jarēnh o hkrĩ. Nē mẽ kām axpēn to mex pix prãm o axpēn kôt pa ho pa.

Jejus kwỳ kot tanhmã amnhĩ nhĩpêx to hã mẽ harēnh
Atre 4.32-35

⁴³ Tã nhũm Jejus nhỹ hã mẽ ahkre ho mẽ pa xwỳnh maatiijaja xatã Tĩrtũm nhỹ hã aa mẽ kot mẽmoj pumunh kêt kwỳ ho anhỹr o ri krĩ nhō xwỳnhjê hkôt pa nhũm mẽ piitã ja hã mẽ omu. Amnhĩ jaêr pē mẽ omu nē mẽ kamã no pyma ho tee ri tanhmã Tĩrtũm mã hamaxpēr to. ⁴⁴ Nhũm mẽ kot Jejus kôt amnhĩ xunhwỳr xwỳnh piitã mẽmoj to axpēn kutã nojarêt o pa. Jao axpēn pē ri

mëmoj to õxý hkêt në pa. ⁴⁵ Jakamã nhũm mëhõ kệp amrakati nhũm mẽ ja hã omu hãmri në õ pyka hkwý ho wênê rý mẽ hikukrêx kwý ho wênê në kàxpore jamý në ma o mra në mẽ kãm kugõ. Na pre hte ã mẽ kot Jejus kôt amnhĩ xunhwýr xwýnhjaja axpên nhĩpêx anhýr o pa. ⁴⁶ Hãmri në apkati mẽ Tirtũm mã amnhĩ jarênh xà hã ixkre hwýr mra në kãm mex o mex ã harê. Nê hamakêtkati në àmnhĩx ri hkĩnh kãm axpên nhõrkwy hkôt ri apkur o pa. ⁴⁷ Pê Tirtũm mã mex o mex ã harênh o ri axpên kôt pa. ã mẽ kot amnhĩ nhĩpêx anhýr o pa jakamã nhũm krĩ nhõ xwýnh piitã kãm mẽ hkĩnh nê. Nê mẽ hkwýjaja apkati mẽ mẽ hwýr mra në mẽ hkôt axkamê mẽ mẽ urak nê Jejus kôt amnhĩ xunhwý nhũm Tirtũm ja hã mẽ omu mẽ mẽ ho hkra. Jakamã nhũm mẽ ra ohtô rax kumrêx o mõ.

3

*Te grà xwýnh jarênh
Juãw 14.12-14; Atre 14.8-10*

¹ Tã nhũm apkati hõ hã nhũm Simãw Pêtre mẽ Juãw wa ma Tirtũm mã amnhĩ jarênh xà hã ixkre hwýr wa tẽ. Na pre hte myt àhpanh grire nhũm mẽ piitã kot Tirtũm mã amnhĩ jarênh kaxyw hwýr mra. Jakamã nhũm Simãw Pêtre mẽ Juãw wa haxwýja ma hwýr wa mra. ² Nhũm mëhõja hakwakrem hkrĩ. Katorxà nhõxà hkre rũm hte grà nê kator xwýnhta. Nê arĩ hkrĩ ho hkrĩ nê aa kãnhmã ãm nê ri pa hkêt nê. Nhũm hte hkrãmnhwýjaja apkati mẽ hamý nê ma o pa nê Tirtũm mã amnhĩ jarênh xà hã ixkre jakwakrem hkrĩ nhũm mẽ hwýr o hkrĩ. Hakwakreja mẽ kot kãm: “Mẽ gjêx xà mex” anhýr xwýnhta kapem hwýr mẽ mrar xwýnhjê hwýr o hkrĩ. ³ Tã nhũm Simãw Pêtre mẽ Juãw wa tẽ nê ixkreja wýr wa àr o tẽ nhũm hte grà xwýnhta wa omu nê kàxpore hã wa kuwý ⁴ nhũm Simãw Pêtre omu nê kãm:

—E amnê wa ixpumu. Anê.

⁵ Hãmri nhũm kuma nê htýx ho wa kot kãm kàxpore hkwý nhõr ã wa

hkamnhĩx nê wa omu ⁶ nhũm Simãw Pêtre kãm:

—Nà ixkàxpore hkêt. Nom kot paj Jejus Kris xàhpumunh xà ho tanhmã anhĩpêx to. E pa Jejus Kris pê Najare nhõ xwýnhta nhỹ hã amã ixkapêr jakamã tokyx kãnhmã xa nê ri mra. Anê.

⁷ Hãmri nê upôk rũm hpa hã kupy nê kãnhmã ãm nhũm hte mex nê kãnhmã xa nê amnhĩ te karo ho ri mra. ⁸ Hãmri nê hte mex ã amnhĩ pumu nê hkĩnh týx nê. Nê hkĩnh xàj ma wa hkôt harĩ ho tẽ nê wa hkôt ixkrem axà. Tirtũm mã mex o mex ã harênh pê harĩ ho wa hkôt tẽn axà. ⁹ Hãmri nhũm mẽ piitã amnhĩ jaêr pê akupým mex ã omu nê kamã no puma nê. ¹⁰ Nê axpên mã:

—Kokýy mũjti na pre hte mẽ gjêx xà mex kamã mẽ hwýr rãhã ho hkrĩ htã nhũm Tirtũm tanhmã ho nhũm kãnhmã xa nê ri mrar mex kurê kumrêx. Hêxta waa nê. Anê.

*Simãw Pêtre kot mẽ kãm ujarênh
Rukre 24.46-47; Atre 2.14-36*

¹¹ Hãmri nhũm hte mex xwýnhja Simãw Pêtre mẽ Juãw wa hkôt ixkre hwýr axà nê wa kuri xa. Nhũm mẽ piitã amnhĩ jaêr pê harênh ma nê hwýr hprôt nê agjê nê omu. Mẽ kot ixkre nhĩkjê jarênh o: “Pahi Sarumãw nhõ” anhýr xwýnh jarênhja wýr nhũm mẽ hprôt nê hte mex xwýnhta kamã no puma ho kuhê. Nê kuri Simãw Pêtre mẽ Juãw wa omu nê axpên mã wa harênh o:

—Hêxta waa nê. Tanhmã na we wa amnhĩ to nê akupým kãm hte ho mex nhũm ri mra?

Anê nê wa kamã no puma nê. ¹² Hãmri nhũm Simãw Pêtre mẽ kuma nê mẽ kãm:

—Pa ixkwýjaja. Kwa mẽmo na ka mẽ ri mẽ ixkamã ano puma ho akuhê? Xà wa ixàhpumunh týx xà ho na pa wa ho mex? Nà ja kot anhýr kêt. Rý xà wa ixte Tirtũm kôt amnhĩ nhĩpêx mex o ixpaja o na pa wa ho mex? Nà mãânên ja kot anhýr kêt. ¹³⁻¹⁷ Mẽ ate omunh xwýnhta Jejus tãm kot ho mex kênã. Kot amnhĩ kaxyw kãm hamaxpêr týx jakamã nhũm akupým ho mex ka mẽ omu.

—Finat Apraãw nê Ijak nê Jako mē hkwýjaja kot hkôt amnhĩ nhĩpêx o pa xwýnh pê Tĩrtũmja. Tãm na pre akupỹm Kra Jejus o htĩr nê mex o mex ã harê. Mē ate hã axãmnhênh nhũm mē kot hpĩr xwýnhhta. Pahihti Pirat kot kãm urer kaxyw tã ka mē nê kãm akapêr kãm axihtýx nê. Nom Jejus tãm kot amnhĩ nhĩpêx o pa xwýnh na pre. Na pre hte amnhĩ nhĩpêx mex rãhã ho pa htã ka mē axtem nê hkaga. Nhũm pahihti Pirat mē ate kot kãm urer kêt ã axihtýx nhũm kãm urer kêt nê õ pôristi mã kugõ nhũm mē amã kupĩ. Mē kajaja mē amã hprãm xà hkôt mē amã kupĩ. Tĩrtũm kot mē pahwýr mênh tã ka mē axtem nê apĩ.

—Nom mē ate kêp Tĩrtũm Kra hã omunh kêt jakamã na ka prem ã hipêx anê. Mē kot mē ato amnhĩptãr xwýnhjê mē na ka prem amarĩ apĩ. Na prem mē axãmnhênh xà hkôt mē amã pĩ kahpa hã kunhõ nê ã hpĩr anê. Kêp akupỹm mē pahto mē pahťĩr xwýnh tã ka prem axtem nê apĩ. No nhũm Tĩrtũm akupỹm ho htĩr pa prem akupỹm htĩr kãm omu.

18 —Amnepê m Tĩrtũm nhỹ hã kapêr jarênh o mē pa xwýnhjaja na prem Tĩrtũm kot mē pakaxyw ãm xwýnhja kukamã tanhmã harênh to nê hã kagã nê mē kãm harênh o pa. Kot amnhĩ xà htýx kãm hamak kãm htykja kukamã nhũm pre htem harênh o pa. Tã ã Tĩrtũm kot kukamã harênh anhỹr xãja kôt ka mē ã hipêx anê nê apĩ.

19 —Jakamã kwa mē tee ri mē ate amnhĩ tomnuj ã amnhĩ pumu nê tokyx hkaga. Hãmri nê amnhĩ to Tĩrtũm wý kê mē anê mē ate amnhĩ tomnuj piitã amnhĩ katut kôt rênh pa. 20 Hãmri nê mē ato mex nê ka mē kukwak ri akĩnh nê ajamakêtkati nê axãmnhĩx ri apa. Koja nhỹrmã akupỹn mē pahwýr Jejus mē. Ra kot mē pakaxyw ãm kênã.

21 —Nom koja tokyx akupỹn wrýk kêt nê. Koja kormã kaxkwa kamã pa rãhã nhũm Tĩrtũm akupỹm kot mēmoj piitã ho mex par mē nhũm rĩ kormã akupỹn mē pahwýr wrý. Amnepê m Tĩrtũm nhỹ hã kapêr jarênh o

pa xwýnhjaja kot ja kukamã harênh nê hã kagã xà hkôt.

22 —Na pre finat Mojes haxwýja Tĩrtũm nhỹ hã mē pahpãmjê mã tanhmã ja jarênh to nê harênh o:

Koja nhỹrmã mē panhõ Pahi Maati Tĩrtũmja te kot ra mē akaxyw pa ixãmja pyrã nê axte mē panhĩõ xãm. Mē panhĩõ koja. Koja nhỹrmã inhmýr pê mõn pøj nê mē amã Tĩrtũm kapêr jarênh o pa. Ka mē kapêr ma nê mar týx nê kapêr kôt amnhĩ nhĩpêx o ri apa.

23 Koja mēhõ kuma nê ãm kuma nê hkôt amnhĩ nhĩpêx kêt nê nhũm Tĩrtũm tee ri ja hã omu nê kêp hkra hkêt ã harênh kurê kumrêx. Anê.

24 ã na pre finat Mojesja mē kãm Jejus kukamã ujarênh anê. No ãm tapxipix na pre ã harênh anhỹr kêt nê. Tĩrtũm nhỹ hã mē kapêr o mē pa xwýnh piitã na prem ã mē kãm harênh anhỹr o pa. Kot harênh o pa xwýnh kot wa finat Sãmuewja nê hkôt mē hkwýjê piitã ã Jejus kukamã hkwýjê mã harênh anhỹr o pa.

25 —Tã mē pahpê mē hkamrõ hkwý na pu mē. Mē pahpê mē hkanrêhã mē htãmnhwýy. Mē pakaxyw na pre Tĩrtũm ã mē kãm kapêr anê. Nê Kraja kukamã finat Apraãw mã kãm:

Koja nhỹrmã akanrêhã atãmnhwýjê hõ pyka piitã hkôt mē piitã mē ho mex o pa nhũm mē kukwak ri mex kumrêx nê ri pa. Anê.

26 ã kot Kra hkukamã harênh anhỹr tã mē pakumrêxjê hwýr na pre kumê. Kot mē pahto mex nhũm mē pahte amnhĩ tomnuj kaga kaxyw nhũm mē pahpê Ijaew kumrêxjê hwýr kumê. Anê.

Nhũm pre ã Simãw Pêtreja hte grã xwýnh pumunh o mē kuhé xwýnhjê mã ujarênh anê.

4

Simãw Pêtre mē Juãw wa kot mē aptãr tũmjê mã kapêr ã wa harênh Rukre 21.12-13

1-4 Nhũm Simãw Pêtre mē Juãw wa arĩ mē kãm Tĩrtũm kapēr jarēnh o wa xa nē mē kãm:

—Nà na pre Jejus ty nhũm Tĩrtũm akupỹm ho htĩr. Tã kot akupỹm ho htĩr jakamã koja nhỹrmã uràk nē akupỹm mē htyk xwỹnh piitã mē ho htĩr pa. Anē.

Hãmri nhũm mē kot wa mar o kuhê xwỹnh kwỹjaja wa kuma nē wa hkôt hamaxpēr nē wa urà nē Jejus kôt amnhĩ xunhwỹ. Jakamã nhũm ra mē kot Jejus kôt amnhĩ xunhwỹr xwỹnhjaja ohtô rax kumrēx. Ra mē kēp 5.000.

Hãmri nhũm axtem mē hkwỹjaja wa hwỹr mra nē wa mar o kuhê. Mē õ patre nhõ pôristi krãhtũm mē Satusew nhõ xwỹnh kwỹjê mē nhũm mē ma Simãw Pêtre mē Juãw wa hwỹr mra nē tee ri wa kot mē ahkre hã wa mar o kuhê. Nē mē kãm akupỹm mē htĩr jarēnhja ma nē wa kamã gryk nē. Satusew nhõ xwỹnhjaja na pre htem akupỹm mē htĩr kôt hamaxpēr kêt jakamã nhũm wa akupỹm mē htĩr jarē nhũm mē tee ri wa kuma nē hamaxpēr punuj nē wa kamã gryk kato. Hãmri nē wa hã amỹnê nhũm mē wa unê nē ma wa o tē nē mē hagjēnh xà kamã wa haxà. Ra myt grire nhũm mē wa haxà. Wa kot mē hagjēnh xà kamã hã apkati nhũm rĩ kormã mē kot ujarēnh ã tanhmã wa ho kaxyw.

5-6 Tã nhũm apkati nhũm mē ohtô nē wa ujarēnh ã wa mar kaxyw Jeru-jarē kamã axpēn wỹr akuprô. Ijaew pigêtjaja nē mē àptàr tũm kwỹjaja. Nē mē kot finat Mojes kapēr o mē ahkre ho mē pa xwỹnhjaja. Nē mē õ patre maati Anas mē hkwỹja. Nē Ijaew nhõ juisti Kajpas mē Juãw õ mē Aresãnja. Nhũm mē kot Simãw Pêtre mē Juãw wa mar kaxyw axpēn wỹr akuprô. 7 Hãmri nē wa hã karõ nhũm pôristi wa hwỹr tē nē wa haprô nē ma mē hwỹr wa o tē nē wa ho axà nē mē kutã wa ỹr nhũm wa nhỹ. Hãmri nhũm mē wa omu nē wa kãm:

—E mē inhmã amnhĩ jarē. Mēhõ xàhpumunh xà ho na ka pre wa hte grã

xwỹnhja ho mex? Mēhõ na pre hwỹr war amē ka wa ho mex? Anē.

8 Hãmri nhũm Simãw Pêtre mē kãm awjarē. Tĩrtũm Karõ kot kãm hamaxpēr o hihtỹx jakamã nhũm ỹ hã Ijaew pigêtjê mē mē àptàr tũmjê mã awjarē nē mē kãm:

9 —Tõe mēhõ kot ho mex xwỹnhja ã mē ate wa ixkukjêr 10 jakamã kot paj mē amã harē ka mē ixte harēnhja ma. Wa ixpyrà nē mē apê Ijaew kēr ka mē wa ixkapēr mar tỹx nē. Jejus Kris pê Najare nhõ xwỹnhja. Mē ate hpĩr nhũm Tĩrtũm kot akupỹm ho htĩr xwỹnhja. Tãm na pre àhpumunh tỹx o akupỹm hte grã xwỹnhja o mex. ỹ hã ixte kaxyw kãm ixkapēr nhũm tãm akupỹm ho mex. 11 Tĩrtũm kot mex o mex ã harēnh nē mē pakaxyw ãm tã ka prem axtem nē hkaga. Nom Tĩrtũm kapēr ã kagà htũm kot ra mē akukamã ã mē ate amnhĩ nhĩpêx anhỹr ã mē ajarēnh nē mē ajarēnh kot:

Mē kot kēn o amnhĩm òrkwỹ nhĩpêx kaxyw nē nhỹri kēn maati pumu nē htỹx omnuj ã hkamnhĩx nē hkaga. Mē kot hkaga htã nhũm Tĩrtũm mē kurom mex o kot kēn piitã hakrenh par ã omunh kurê kumrēx.

Anhỹr o kot mē ajarēnh. Te mē ate kēn maati kaga xwỹnh ã mē ajarēnh pyrãk. Tã ka mē ã mē kot mē akukamã mē ajarēnh anhỹrja kôt te mē ate kēn maati kaga pyrã nē Jejus kaga nē apĩ. Tĩrtũm kot amnhĩm mex o mex ã omunh nē harēnh tã ka prem axtem nē hkaga. 12 Tapxipix na hte mē panê mē pahte amnhĩ tomnuj rē. Mēhõ koja uràk nē àhpumunh tỹx o mē panê kurê? Mēhõ koja ahpỹnhã pyka piitã hkôt uràk nē ã mē panhĩpêx mex anē? Nà ãm amrakati kumrēx. ãm Jejus pix. Tapxipix na pre Tĩrtũm ja kaxyw ãm jakamã tapxipix na kēp mē pahkaprĩ xwỹnh maati. Anē.

13 Nhũm pre ã Simãw Pêtreja mē kãm kapēr anē. Hãmri nhũm mē amnhĩ jaêr pê kuma nē axpēn mã:

—Kwa wa kām mẽ pahpyma wa hã hkwỳ jêt kêt kumrêx. Te ri wa htỳx ri wa pa pyræk tã wa hamaxpêr tỳx kumrêx. Mãn wa kêp Jejus kôt mẽ pa ho mẽ pa xwỳnh kwỳ jakamã na wa ã kapêr anê nà? Anê.

¹⁴ Hãmri nê tee ri kot tanhmã mẽmoj tã wa kãm àkjêr to hkukamã hamaxpêr. No nhũm hte grà xwỳnh ra kot mẽ hwỳr àr nê Simãw Pêtre wa kuri mex nê ãm nhũm mẽ kot no ho omunh jakamã wa kãm àkjêr kêt nê. ¹⁵ Hãmri nê wa kãm anê nhũm wa mẽ kêp kato nê kapôt ã xa nhũm mẽ tanhmã wa kãm nê kaxyw wa hã axpên ma nê axpên mã:

¹⁶ —Kwa tanhmã kot puj mẽ wa ho? Ra jar Jerujarê kamã mẽ piitã mẽ kot akupỹm hte grà xwỳnhhta mex ã wa omunh kênã kot puj kêt mẽ kãm wa kot ho mex hkêt ã wa harê. ¹⁷ Tã mẽ kot harênh o hprôt pymaj kot puj mẽ axte Jejus jarênh o pa nê wa hkurê. Kê hte grà xwỳnh jarênhja ãm jar mẽ pakamã hapêx. Nà kot puj mẽ ã wa kãm karô anê. Anê.

¹⁸ Nhũm mẽ wa hã axpên mar pa hãmri nê akupỹn wa hã karô nhũm wa akupỹn mẽ hwỳr axà nhũm mẽ wa kãm:

—E Simãw Pêtre mẽ Juãw wa. Wa mãmri ma tẽ. Nom kêr ka wa mẽ ixkapêr mar kumrêx. Kêr ka wa axte ri tanhmã mẽ kãm Jejus jarênh to ho ri apa hkêt nê. ãm kwarĩ ho kwarĩ. Anê.

¹⁹ Hãmri nhũm wa tee ri mẽ kuma nê mẽ kãm:

—Nà Tirtũm tãm kot ja hã wa inhmã karô kênã kot pa kêt wa mẽ akapêr ma nê harênh o ixpa hkêt nê. ²⁰ Na pa pre wa Jejus kôt ri ixpa nê xatã kot tanhmã amnhĩ nhĩpêx to hã omunh o hkôt ixpa. Nê xatã tanhmã mẽ ahkre hto hã mar o hkôt ixpa. Nê akupỹm htĩr kãm omu. Jakamã tanhmã kot pa wa amnhĩ to nê mẽ kãm ja jarênh kêt nê? Nà kot pa wa mẽ akapêr mar xà hkôt ã amnhĩ nhĩpêx anhỹr hkêt nê. Anê.

²¹⁻²² Hãmri nhũm mẽ kuma nê tee ri mẽ kot tanhmã wa ho kaxyw. Te grà xwỳnhhta hte grà nê hkrĩ ho hã amgrà

pê 40 tã ra akupỹm mex nhũm mẽ piitã ja hã omu nê hã axpên mã Tirtũm mex o mex ã harênh o ri pa. Jakamã nhũm mẽ utàr xwỳnhjaja mẽ kuma nê kãm mẽ uma nê. Hãmri nê mẽ umaj tanhmã Simãw Pêtre mẽ Juãw wa ho hkêt nê. ãm axte wa kot Jejus jarênh o pa nê wa kãm kapêr kãm hihtỳx nê wa hano nhũm wa ma tẽ.

Mẽ kot amnhĩ to Tirtũm wỳr ã mẽ harênh

Matêwre 18.19-20

²³ Tã nhũm Simãw Pêtre mẽ Juãw wa ma akupỹm Jejus kôt htõ nê htõxjê hwỳr wa tẽ nê mẽ kãm amnhĩ jarê. Nê patre krãhtũmjê mẽ mẽ àptàr tũmjaja kot Jejus kapêr jarênh nê wa hkurê kamã hihtỳxja nhũm amnhĩ tã mẽ kãm mẽ harê. ²⁴ Hãmri nhũm mẽ wa kuma nê amnhĩ to Tirtũm wỳr kurê kumrêx nê kãm:

—Pa Pahi Maati? Nà mẽmoj piitã ho akator xwỳnhhta na ka. Na ka pre kaxkwa ho akato nê pyka ho akato nê gô xujanãr o akato. Hãmri nê kamã mẽmoj piitã ho akator pa. ²⁵⁻²⁶ Amnepêm na pre mẽ inhĩgêt Tawija amã tanhmã amnhĩ nhĩpêx to ho pa. Nê Akarô nhỹ hã akapêr kwỳ jarê nê hã kagà. Nê kagàja kamã mẽ kot Pahihti Jejus kutã amnhĩ xunhwỳr xwỳnhjê jarê nê mẽ hã kagà. Mẽ hkukamã mẽ hã kagà nê mẽ hã kagà ho:

Mẽmo mỳrapê na prem Ijaew kêt xwỳnhjaja Tirtũm kutã amnhĩ xunhwỳ?

Nê Ijaew haxwỳja. Mẽmo mỳrapê na prem htỳx ri hamaxpêr o ri pa? Nê pyka piitã hkôt pahijaja na prem Pahi Maati kutã amnhĩ xunhwỳr pa.

Nê kot mẽ pakaxyw ãm xwỳnh Jejus Krisja nhũm mẽ mãânên kutã amnhĩ xunhwỳr pa.

Nê mẽ kot hpĩr kaxyw mẽ kãm hã amỹnê.

Kwa mẽmo mỳrapê na prem axtem nê ã amnhĩ nhĩpêx anê? Anê.

ã na pre finat Tawija Akarô nhỹ hã mẽ harê nê hã kagà anê Tirtũm. ²⁷ ãm hãmri na pre mẽ hkukamã mẽ hã

kagà. Ra mẽ kot ã amnhĩ nhĩpêx anhỹr kênã. Krĩ ja kamã na prem ã amnhĩ nhĩpêx anhỹr kaxyw axpên wỳr akuprô. Pahi Erox nê pahi Pôn Pirat nê mẽ ixkwỳjaja nê mẽ kêp Ijaew kêt xwỳnhjaja axpên wỳr akuprô nê Akra Jejus kutã amnhĩ xunhwỳ nê mẽ kot hpĩr kaxyw hã amỹnê. Kot tãm amnhĩ nhĩpêx o pa nhũm ate mẽ ixkaxyw ãm xwỳnhja nhũm mẽ axtem nê kutã amnhĩ xunhwỳ.

²⁸ –Nom amnepêm kormã mẽ ixkêt ri na ka pre mẽ hkukamã ã mẽ kot amnhĩ nhĩpêx anhỹr ã mẽ omu. Mẽ kot tanhmã apê Akra Jejus to nê hpĩrta kukamã ka pre hã mẽ omu. Tã mẽ ixwỳr amê nhũm prem kupĩ. No ãm ajamaxpêr xà hkôt.

²⁹ –Tã ka mẽ omu. Na mẽ Jejus ã mẽ ixkamã gryk tỳx nê tanhmã hã mẽ ixto kaxyw. Jakamã kot kaj mẽ ixpê amã tanhmã amnhĩ nhĩpêx to ho ixpa xwỳnhjaja ka tanhmã mẽ ixkrã hto pa mẽ inhmã mẽ uma hkêt nê mẽ hkôt ixpa ho ixpa. Mẽ kot tanhmã mẽ ixto hã mẽ ixkagrôn h tã pa mẽ inhmã mẽ uma hkêt nê ixamnhĩx ri ixkĩnh nê ri ixpa. Nê anhỹ hã mẽ kutã amnhĩ to htỳx nê arĩ mẽ kãm akapêr jarênh o ri mẽ hkôt ixpa. Mẽ kot Jejus ã tanhmã mẽ ixto htãã.

³⁰ –Akra Jejus mex o mex jakamã kot paj mẽ àhpumunh tỳx xà ho tanhmã mẽ piitã mẽ ho mex to ho ri mẽ hkôt ixpa. Mẽ à xwỳnhjaja akupỹm mẽ o mex. Nê mẽ kot aa mẽmoj pumunh kêt kwỳ ho anê. Kê mẽ omu nê axàhpumunh o axàhpumunh ã apumunh mex kurê kumrêx. E ãm ja pix na ra hapêx. Anê.

³¹ Nhũm prem ã amnhĩ to Tĩrtũm wỳr anê. Puh nhũm ixkreja mẽ kãm htertet tỳx nê nhũm Tĩrtũm Karô axte tanhmã mẽ hkrã hto nhũm mẽ ỹ hã kãm mẽ uma hkêt nê. ãm amnhĩ to htỳx nê mẽ kãm Tĩrtũm kapêr jarênh rãhã ho ri mẽ hkôt pa.

Jejus kwỳjaja tanhmã kot axpên nhĩpêx to hã mẽ harênh

Atre 2.42-47

³²⁻³³ Nhũm Jejus nhỹ hã mẽ ahkre ho mẽ pa xwỳnh maatijaja. Na pre

Tĩrtũmja mẽ ho mẽ kãm ma hkêt jakamã nhũm pre htem akupỹm Jejus htĩr kôt mẽ kãm harênh o ri mẽ hkôt pa. Nhũm Tĩrtũm mẽ kot Jejus kôt amnhĩ xunhwỳr xwỳnh piitã mẽ kutã nojarêr rãhã ho pa nhũm mẽ ra ohtô rax nê. Nê mẽ kãm axpên to mex pix prãm o ri axpên kôt pa. Mẽ ohtô htã te mẽ tipxi pyrãk. Nê axpên pê mẽmoj to õxỳ hkêt nê. Na pre htem axpên mã mẽ hikukrêx nê mẽ apkur xà jarênh o: “Inhõ pix kêt mẽ pahpiitã mẽ panhõ na.” Anhỹr o ri mẽmoj tã axpên kutã nojarêr o ri pa. No kêt axpên mã mẽmoj jarênh o: “Tk. Nà ãm inhõ pix na.” Anhỹr o harênh kêt nê. ³⁴⁻³⁵ Na pre htem tũhã õ ixkre hõ ho wênê. Rỳ õ pyka hkwỳ ho wênê nê kàxpore jamỳ nê ma o mra nê Jejus nhỹ hã mẽ ahkre ho mẽ pa xwỳnhjê mã kugõ nhũm mẽ hamỳ nê mẽ kêp amrakati xwỳnhjê mã ho anhgrà. Hãmri nhũm mẽ amnhĩm hamỳ nê ho amnhĩm awjaprô. Jakamã na pre hte mẽ hkwỳjaja kãm prãm nê ri pa rỳ ê hkêt nê ri pa hkêt nê.

³⁶⁻³⁷ Jujere na pre ã amnhĩ nhĩpêx anê nê mẽ kaxyw õ pika hkwỳ ho wênê. Hãmri nê kàxpore py nê o tẽ nê Jejus nhỹ hã mẽ ahkre xwỳnh maatijê mã kugõ. Jujereja Ijaew nhõ patre ho ajuta xwỳnh na pre. Gô hipôk pê Sipre kamã na pre kato. Kêp Jujere htã no nhũm Jejus nhỹ hã mẽ ahkre ho mẽ pa xwỳnhjaja na prem kãm: “Panãpe” Anê. Mẽ kapêr kãm Panãpeja te kêp “mẽ hamaxpêr o mẽ hihtỳx o pa xwỳnh” anhỹr pyrãk. Jakamã nhũm õ pika hkwỳ ho wênê nê kàxpore py nê o tẽ nê Jejus nhỹ hã mẽ ahkre xwỳnhjê mã kugõ nhũm mẽ kupy nê mẽ kêp amrakati xwỳnhjê mã ho anhgrà.

5

Ananĩs mẽ Sapire wa kot amnhĩ to hêx ã wa harênh

Karatas 6.7; Eprêw 10.26-31

¹ Tã nhũm Ananĩs mẽ hprô Sapire wa Jujere jarênh ma nê uràk nê õ pyka hkwỳ ho wênê. ² Hãmri nê kàxpore py. Nom na pre wa ra hã

xpën ma. Jakamã nhũm Ananĩs Jujere kĩnhã kàxpore hkwỳ pix py nẽ o tẽ nẽ Jejus nhỹ hã mẽ ahkre xwỳnh maatijẽ mã kugõ. Nom katàt kôt mẽ kãm òr ã amnhĩ jarẽnh kêt nẽ. Kot kàxpore ho pikjêr nẽ amnhĩm hkwỳ ho àrĩk ã amnhĩ jarẽnh kêt nẽ. Æm mẽ kãm amnhĩ jarẽnh o hêx. Te piitã òr par pyræk o amnhĩ nhĩpêx nẽ mẽ kãm:

–E ota ixkàxporeta. Na pa wa inhõ pika hkwỳ ho wênẽ nẽ kàxpore hpy nẽ hpãnhã Jujere pyrã nẽ man mẽ awỳr piitã o tẽ. Anẽ.

³ Hãmri nhũm Simãw Pêtre ra ã kot amnhĩ nhĩpêx anhỹr ã omu hãmri nẽ kãm:

–Tk. Kwa mon ka axtem nẽ Satanasti kapêr ma nẽ hkôt amnhĩ nhĩpêx nẽ te akàxpore piitã òr pyræk ã amnhĩ to axêx anẽ? Te ate piitã òr pyræk tã no ãm hkwỳ pix gõ. Hêxta waa nẽ. Na ka axtem nẽ Tĩrtũm Karõ mã akàxpore nhõr par o axêx. ⁴ Anhõ pyka kênã. Nẽ hpãnhã kàxporeja anhõ kênã. Kot kaj amã tanhmã ho hprãm xà hkôt mãmrĩ tanhmã ho. Amã piitã ho axàrĩk prãm nẽ mãmrĩ piitã ho arĩk. Rỳ amã hkwỳ hpix nhõr prãm nẽ mãmrĩ hkwỳ pix gõ. No ri ate òr par pyræk o amnhĩ to axêx kêt nẽ. Te ate mẽ inhmã pix mã axêx pyræk nom mẽ inhmã pix mã hkêt. Na ka mãânẽn te Tĩrtũm mã axêx pyræk. Anẽ.

⁵⁻⁶ Nhũm pre ã Simãw Pêtre Ananĩs mã kapêr anẽ nhũm kuma nẽ pykap tẽm nẽ htyk kurê kumrêx. Hãmri nhũm mẽ ãptàr nywjaja hwỳr tẽ nẽ kupêxê ho hkupu nẽ kumỳ nẽ ma o tẽ nẽ haxà. Hãmri nhũm mẽ kot ã kot amnhĩ nhĩpêx anhỹr ã harẽnh mar xwỳnhjaja tee ri harẽnh ma nẽ kãm ma htỳx nẽ.

⁷ Tã nhũm ra hã ahtũm nẽ. Ra hã 3 ore nẽ hapêx nhũm Ananĩs prõ Sapireja htỳx hamakêtkati nẽ mẽ hwỳr tẽ nẽ axà. Kormã mjên htyk ã harẽnh mar kêt nẽ hamakêtkati nẽ hkĩnh nẽ mẽ hwỳr tẽ nẽ axà. ⁸ Hãmri nhũm Simãw Pêtre omu nẽ hêx rom hkukja nẽ kãm:

–Pa? E kwa inhmã mẽmoj jarẽ. Tanhmã na prem war anhõ pykaja pãnhã war amã amnhĩrer to? Xà ãm

hãmri na amjên mẽ inhmã harẽ nà? Anẽ.

Hãmri nhũm kuma nẽ mjên pyrã nẽ kãm ho hêx nẽ kãm:

–ỖỖ. Æm hãmri kot amã harẽnh kênã. Anẽ.

⁹ Hãmri nhũm Simãw Pêtre tee ri kuma nẽ kãm:

–Tk. Hêxta waa nẽ. Kwa mon ka war ajamẽ war akàxpore ho te Tĩrtũm mã axêx pyræk? Mãn ka wa ajamaxpêr o: “Koja Tĩrtũm ja hã wa ixpumu nẽ ãm hã wa ixpumu nẽ tanhmã hã wa ixto hkêt nẽ.” Anhỹr o mãn ka wa ajamaxpêr nà? Nom na ka wa ãm kãm axêx kaprỳ. Onẽj ra mẽ kot amjên jaxàr xwỳnhjaja akupỹn hpõx o mra. Koja mẽ anhĩpêx o te hipêx pyrã nẽ mãânẽn ato tẽ nẽ ajaxà ka rĩ amnhĩ pumu.

¹⁰ Anẽ nhũm kuma nẽ mjên pyrã nẽ pykap tẽm nẽ htyk kurê kumrêx. Hãmri nhũm mẽ kot mjên jaxàr xwỳnhjaja mra nẽ mẽ hwỳr agjê nẽ omu nhũm ra htyk mex nẽ nõ nhũm mẽ kumỳ nẽ ma o tẽ nẽ mjên nhĩhkõ hã haxà. ¹¹ Hãmri nhũm mẽ piitã wa harẽnh ma nẽ kãm ma htỳx nẽ. Mẽ kot Jejus kôt amnhĩ xunhwỳr xwỳnhjê mẽ amarĩ ri mẽ pa xwỳnhjaja nhũm mẽ tee ri wa hkukamã hamaxpêr o kãm ma htỳx kumrêx.

Mẽ kot aa mẽmoj pumunh kêt kwỳ ho anhỹr ã mẽ harẽnh

Makre 16.17-20; Atre 19.11-12

¹²⁻¹⁴ Na pre hte Jejus kôt mẽ kot amnhĩ xunhwỳr xwỳnhjaja xatã Tĩrtũm mã amnhĩ jarẽnh xà hã ixkre hwỳr akuprõ. Mẽ kot ixkre nhĩkjê mã: “Pahi Sarumãw nhõ” anhỹr xwỳnh jarẽnhja wỳr nhũm pre htem akuprõ. Nhũm mẽ piitã kãm mẽ hkĩnh nẽ mẽ ohtõ nẽ mẽ hkôt akuprõ nẽ mẽ uræk nẽ Jejus kôt amnhĩ xunhwỳ. Mẽnijaja nẽ mẽmyjaja. No nhũm mẽ hkwỳja Ananĩs mẽ Sapire wa kot amnhĩ nhĩpêxja mã hamaxpêr nẽ kãm mẽ hkôt mrar puma nẽ. Kãm mẽ hkĩnh tã kãm mẽ hkôt mrar puma nẽ.

Nhũm pre hte Jejus nhỹ hã mẽ ahkre ho mẽ pa xwỳnhjaja aa mẽ kot mẽmoj pumunh kêt kwỳ ho anhỹr o

ri mẽ piitã mẽ hkôt pa. ¹⁵ Jakamã nhũm pre htem mẽ à xwýnhjê jamý nẽ ma mẽ hwýr mẽ o mra nẽ Simãw Pêtre kutêp pry kamã mẽ haxwý nẽ mẽ kãm:

–E mẽ jar anhĩkwỹ. Kê Simãw Pêtre ja kôt mẽ ajãnh tẽ nẽ mẽ akupênh o akupỹm mẽ ato mex rý nhũm hkarõ pix mẽ atã harir ka mẽ akupỹm amex japêr.

Anhỹr o mẽ kãm kapêr hãmri nhũm mẽ kupíp kãm kutêp hikwỹ. ¹⁶ Nẽ Jerujarẽ pu hã krĩ hkwý kamã. Mẽ à xwýnhjaja nẽ mẽkarõmnuti kot tanhmã mẽ ho xwýnhjaja nhũm pre htem mẽ hamý nẽ ma mẽ ìhkrep mẽ o mra nhũm mẽ piitã akupỹm mex pa.

Mẽ kot Jejus kwýjê jagjênh ã mẽ harênh

Rukre 21.12-15; Juãw 15.26-27; Atre 4.1-22

¹⁷ Tã nhũm mẽ õ patre maati mẽ hkrãmnhwý Satusew nhõ xwýnhjaja tee ri akupỹm mẽ mex ã mẽ harênh ma nẽ axpên mã:

–Tk. Kwa na mẽ ra ohtô nẽ Jejus gryk ã mẽ pahte mẽ ahkre kaga nẽ ãm hkôt pix mã ri amnhĩ nhĩpêx o pa. Anẽ.

Hãmri nẽ Jejus nhỹ hã mẽ ahkre maati xwýnhjê kamã gryk nẽ ra tanhmã mẽ ho kaxyw. ¹⁸ Hãmri mẽ unê nẽ mẽ hagjê nhũm mẽ hagjênh xà kamã hkrĩ hpa.

¹⁹ Tã nhũm kamàt nhũm Tirtũm kapêr o mẽ wrýk xwýnhja ma mẽ hagjênh xà hwýr mẽ hwýr wrý nẽ mẽ hwýr axà nẽ mẽ kãm hakwakre kahê xà mẽ nẽ mẽ kator pa. Hãmri nẽ mẽ kãm:

²⁰ –E mẽ ma akupỹm Tirtũm mã amnhĩ jarênh xà hã ixkre hwýr mra nẽ axte mẽ kãm awjarẽ. Tanhmã mẽ kot amnhĩ nhĩpêx to nẽ Jejus kôt amnhĩ nhĩpêx nyw o amnhĩ nhĩpêx ã mẽ kãm hã karõ kê mẽ ama. Anẽ.

²¹ Hãmri nhũm mẽ kuma nẽ ma akupỹm hwýr hapêx kurê kumrêx. Nhũm myt kator o mõi mẽ nhũm mẽ hwýr agjê nẽ mẽ kãm Tirtũm kapêr jarênh o kuhê.

Tã nhũm mẽõ patre maati mẽ hkôt ri mẽ pa xwýnhjaja amnhĩ wýr mẽ àptàr tũm xwýnhjê hwý nhũm mẽ piitã axpên wýr pikuprõnh pa. Hãmri nẽ htýx arĩ Jejus kwýjaja mẽ hagjênh xà kamã mẽ hkrĩ hã mẽ hkamnhĩx nẽ amnhĩ wýr mẽ hã karõ. ²² Nhũm pòristijaja ma kot mẽ haprõr kaxyw mẽ hagjênh xà hã ixkre hwýr mra nẽ tee ri kamã mẽ hapêr nhũm mẽ kamã amrakati. Hãmri nhũm mẽ akupỹm mẽ pikuprõnh xwýnhjê hwýr hprõt nẽ mẽ kãm:

²³ –Nà na pòristi hkwýjaja arĩ hakwakrem ixkre jamãr mex nhũm hakwakre arĩ kahê htýx nẽ xa. Tã pa mẽ hwýr agjê nẽ tee ri hkre kamã mẽ hapêr nhũm mẽ kamã amrakati kumrêx. Anẽ.

²⁴ Hãmri nhũm mẽ kuma nẽ tee ri hamaxpêr. ²⁵ Rõm nhũm ja mẽ hwýr tẽn axàn mẽ kãm:

–Kwa jãã mẽ ate mẽ hagjênh xwýnhjaja na mẽ axte Tirtũm mã amnhĩ jarênh xà hã ixkre kamã mẽ ahkre ho kuhê pa ham mẽ omu nẽ mẽ kurũm tẽ. Anẽ.

²⁶ Hãmri nhũm patre nhõ pòristi krãhtũmja kuma nẽ mẽ hwýr pòristi hkwý rê nhũm mẽ ma mẽ hwýr mra nẽ mẽ hwýr agjê nẽ kê axte mẽ unê nẽ akupỹm mẽ o mra. Nom tanhmã mẽ ho hkêt nẽ. Mẽ kot hkôt ri mẽ pikamênh xwýnhjê pymaj mẽ ho mex nẽ mẽ o mõi. Nẽ mẽ hã axpên mã:

–Nà kot puj mẽ tanhmã mẽ ho nhũm mẽ ja hã mẽ pahpumu nẽ kẽn o mẽ pahkapê nẽ tanhmã amnhĩ to nẽ hã mẽ panhĩmex. Anẽ.

²⁷ Hãmri nẽ mẽ ho mex nẽ akupỹm mẽ o mõi mẽ hwýr mẽ ho agjê nẽ mẽ pikuprõnh xwýnhjê kutã mẽ hkrĩ. Hãmri nhũm mẽõ patre maati ja mẽ kãm:

²⁸ –Kwa ra mẽ ixte Jejus kapêr jarênh nẽ mẽ akurê htã ka xep mẽ ãm mẽ inhma nẽ arĩ mẽ kãm harênh o ri apa. Nẽ jar Jerujarẽ kamã mẽ piitã mẽ kãm harê. Nẽ mẽ pajaja mẽ ixte Jejus pĩr ã ka mẽ ri mẽ kãm mẽ ijarênh o apa. Anẽ.

29 Hāmri nhūm Simāw Pêtre mẽ kuma nê mẽ amnhĩ tã mẽ kãm kapêr nê mẽ kãm:

—Tỳ kot kaj mẽ Tĩrtũm kapêr kuhpa hã mẽ inhmã mẽmoj tã karõ pa mẽ ama nê ãm mẽ ama nê ãm Tĩrtũm kapêr pix ma nê hkõt ri amnhĩ nhĩpêx. ³⁰ Amnepê m mẽ panhĩgêjtaja na prem Tĩrtũm kõt pix mã amnhĩ nhĩpêx o pa. Tã ka prem axtem nê kêp mẽ kãm Kra Jejus ã amỹnê nhũm mẽ pĩ kahpa hã kunhõ nê kupĩ. Nom nhũm Tĩrtũm akupỹm ho htĩr ³¹ nê kêp mẽ panhõ Pahihtĩ hã harê. Nê kêp mẽ pahkaprĩ xwỹnh mex ã harê. Hāmri nê ra amnhĩ ri ỹr nhũm ãhkõ hã mẽmoj piitã ho amnhĩptar o hkrĩ. Nhũm kãm: “Koja Ijaew mẽ kot amnhĩ tomnuj kaga nê akõt amnhĩ xunhwỳ pa ja hã mẽ omu nê amnhĩ katut kõt mẽ kot amnhĩ tomnuj rênh pa nê mẽ ho ixkra.” Anê. ³² Tã mẽ pajaja mẽ ixte Jejus htyk nê akupỹm htĩr ã omunh mex jakamã na pa hte Tĩrtũm Karõ nhỹ hã ã mẽ amã harênh anê. Karõja na pre Tĩrtũm mẽ ixte hkõt amnhĩ nhĩpêx xwỹnhjê hwỳr kurê nhũm mẽ ixwỳr wrỳ nê mẽ ixkarõ mã agjê. Tã ỹ hã na pa htem ri ã harênh anhỹr o ri mẽ akõt ixpa. Anê.

³³ Hāmri nhũm mẽ kuma nê mẽ kamã gryk tỳx nê. Nê mẽ kãm mẽ himex prãm nê mẽ kãm mẽ hã amỹnê. ³⁴ Hāmri nhũm Kamariewtija tee ri ja hã mẽ omu hãmri nê kãnhmã xa nê Jejus nhỹ hã mẽ ahkre xwỹnh maatijê xyr pê hkwỳjê mã kapêr. Parijew nhõ xwỹnh na pre. Nê kêp Tĩrtũm kapêr ã kagà htũm o mẽ ahkre ho pa xwỹnhjê hõ na pre. Nhũm mẽ piitã kãm hkĩnh nê. Jakamã nhũm kãnhmã xa nê pōristi mã anê nhũm mẽ amnhĩ nê Jejus nhỹ hã mẽ ahkre ho mẽ pa xwỹnhjê kator nhũm mẽ kapõt ã kuhê. ³⁵ Hāmri nhũm Kamariewtija mẽ nê tanhmã mẽ kãm kapêr to nê mẽ kãm:

—E ixkwỳjaja. Kwa kêt pu mẽ tanhmã mẽ ho hkukamã pajamaxpêr mex nê. ³⁶ Mãn arĩ mẽ ate finat Tetastija jarênh ã anohtỳx nê ho apa japêr. Mytwrỳ hõ hã na pre mẽ kãm amnhĩ to rax ã amnhĩ jarênh o pa.

Hāmri nhũm hkõt ri mẽ pa xwỹnhjaja ohtõ nê. Mẽ kêp 400. Tã nhũm prem mẽ kêp Tetasti pĩ nhũm hkõt ri mẽ pa xwỹnhjaja axpên pê angrà nê ma hapêx.

³⁷ —Tã nhũm mẽ kot mẽ piitã mẽ ho kōta xà hã arĩgroja ã nhũm Garirej nhõ xwỹnh pê finat Jut haxwỳja hkõt mẽ pa xwỹnhjaja ohtõ nê. Tã nhũm mẽ mãänên mẽ kêp kupĩ nhũm hkõt ri mẽ pa xwỹnhjaja haxwỳja axpên pê angrà nê ma hapêx.

³⁸ —Jakamã kwa pu mẽ tanhmã jajê ho hkêt nê. Pu mẽ ãm mẽ omu. Kojã mẽ amnhĩ krã hkõt ã ujarênh anhỹr o pa japêr hã kojã Tetasti mẽ Jut wa hkõt pa xwỹnhjê pyrã nê tokyx axpên pê angrà nhũm Jejus jarênh o paja hapêx o hapêx. ³⁹ Nom kojã mẽ ãm hãmri Tĩrtũm nhỹ hã ã mẽ ahkre ho pa anhỹr japêr hã kot puj mẽ tee ri ja ho pajapêx mã. Jakamã kwarĩ. Kot puj mẽ tanhmã mẽ ho nê te mẽ pahte Tĩrtũm kutã amnhĩ xunhwỳr pyrãk. Anê.

Nhũm pre ã Kamariewti Jejus nhỹ hã mẽ ahkre ho mẽ pa xwỹnh maatijê xyr pê hkwỳjê mã kapêr anê. ⁴⁰ Hāmri nhũm mẽ kuma nê mẽ kãm:

—Tỳ nã ãm hãmri na ka ã akapêr anê. Kot puj xep mẽ tanhmã mẽ ho hkêt nê. Anê.

Hãmri nê akupỹn mẽ hã karõ nhũm mẽ akupỹn mẽ hwỳr agjê. Hãmri nhũm mẽ pōristi mã mẽ hã amỹnê nhũm mẽ htak. Hãmri nhũm mẽ àptar tũmrejaja mẽ kãm:

—E mẽ mãmri ma akupỹm mra. Nom kêt ka mẽ axte mẽ kãm Jejus kapêr jarênh o ri apa hkêt kumrêx. Anê.

⁴¹ Hāmri nhũm mẽ kãm ure nhũm mẽ ma mra. Kĩnh nê ma mra nê axpên mã:

—Nã kwār mẽ Jejus ã mẽ pahtak nê tanhmã hã mẽ pahto. Kwār mẽ mãmri ã hã mẽ pahto anê. Kot pu mẽ hkaga hkêt nê. Ra Tĩrtũm kot ja hã mẽ pahpumunh mex kênã.

Anhỹr o axpên mã kapêr o axpên jamaxpêr o hihtỳx mex o pa.

⁴² Hāmri nē arī apkati mē hkwỳjê mā Jejus kapēr jarēnh o mē ahkre ho mē hkôt pa. Tirtūm mā amnhī jarēnh xà hā ixkre kamā nē nhām mē ōrkwỳ kamā ri mē ahkre ho pa. Tirtūm kot mē pakaxyw Jejus xām ā mē kām harēnh o ri mē hkôt pa.

6

Mē kēp mē mjên htyk xwỳnhjê jarēnh Wam Ximotre 3.8-9

¹ Tā nhūm mē kot Jejus kôt amnhī xunhwỳr xwỳnhjaja ohtô rax kumrēx o mō. Mē piitā kēp Ijaew no nhūm mē hkwỳjaja axtem Gres kapēr o kapēr nhūm mē hkwỳjaja Ijaew kapēr o kapēr. Na pre hte Ijaew kapēr o kapēr xwỳnhjaja apkati mē mē kēp mē mjên htyk xwỳnhjê mā mēō ho pa. No ām mē piitā mē hipêx o axpēn pyrāk kêt jakamā nhūm Gres kapēr o mē kapēr xwỳnhjaja tee ri ā mē kot amnhī nhīpêx anhỳr ā mē omu nē mē kamā gryk nē. Hāmri nē mē kām:

—Kwa na ka htem amnhī kamā mē kēp mē mjên htyk xwỳnhjê mā mēō ho rūnh nē agō. No mē ixkamā jajê mā na ka htem ām ho hkryre nē agō. Kwa mē ri ā mē hipêx anhỳr kêt nē. Mē hipêx o axpēn pyrāk nà. Anē.

² Hāmri nhūm Jejus nhỹ hā mē ahkre xwỳnh maatijaja mē hā mē kapēr ma hāmri nē mē piitā mē ho akuprō nē mē kām:

—Kwa kēr ka mē ja hā axpēn mā axàkjêr kêt nē. E pu mē kot mē kēp mē mjên htyk xwỳnhjê mā ō ho pa kaxyw mē akwỳjê ré. No mē pajaja kot paj ja ho anhỳr o ri ixpa hkêt nē. Kot pa mē anē nē Jejus kapēr o ri mē ajahkre hkêt nē nhūm ja mex kêt nē. Jakamā mē atō kot kaj mē akatāt kôt mē kām mē ō ho apa? ³ E mē amnhī kamā mē ho 7 nē mē arê pu mē kēp mē mjên tyk xwỳnhjê mā ō ho pa kaxyw mē unhwỳ.

Tām mē hamaxpēr xwỳnhjaja.

Nē mē ate axpēn mā mē mex ā mē harēnh xwỳnhjaja.

Nē Tirtūm Karō nhỹ hā mē kot amnhī nhīpêx o mē pa xwỳnhjaja.

Ā mē kot amnhī nhīpêx anhỳr xwỳnhjaja ka mē ho 7 nē arê pu mē kaxyw mē unhwỳ. ⁴ Nom mē pajaja kot paj mē akôt arī mē amā Tirtūm kapēr jarēnh o ri mē ajahkre pix tănopxar o ri ixpa. Anē.

⁵ Hāmri nhūm mē kuma nhūm ja mē kām mex nē. Nhūm mē ma mra nē axpēn mā hkwỳjê nhīxi jarē hāmri nē mē ho 7 nē mē kurê. Ā mē hixi kot anhỳr.

Estewāw. Estewāwja na pre Jejus kôt amnhī nhīpêx mex o pa.

Tirtūm Karō kaxwỳnh mā àr nē ho amnhīptār jakamā nhūm pre hte tām ri amnhī nhīpêx o pa.

Nē kaxyw Firipti

nē Prokot

nē Nīkanō

nē Timā

nē Parmēnti

nē Nīkoraw. Nīkorawja krī pē āxiok nhō xwỳnh na pre. Kēp Ijaew kêt tā kām Tirtūm kīnh o pa. Tā ra määnēn Kra Jejus kôt amnhī xām.

⁶ Jakamā nhūm mē mē kēp 7tajê ré nē Jejus nhỹ hā mē ahkre xwỳnh maatijê hwỳr mē o mra. Hāmri nhūm mē omu nē mē àpēnh ā mē unhwỳr kaxyw mē hā ĩhkra jaxwỳ nē mē ho Tirtūm wỳ. Hāmri nhūm mē kēp mē mjên htyk xwỳnhjê mā mē ō ho pa nē mē piitā mē hipêx o axpēn pyrāk.

⁷ Tā nhūm mē ra ohtô rax nē Tirtūm kapēr ma nē hkôt amnhī nhīpêx o pa. Jakamā nhūm Jerujarē kamā mē kot Jejus kôt amnhī xunhwỳr xwỳnhjaja ra ohtô rax kumrēx. Nē mē ō patre hkwỳ haxwỳja ohtô nē mē urāk nē amnhī kaxyw hkôt hamaxpēr nē hkôt amnhī xunhwỳ.

Mē kot Estewāw pynēnh ā mē harēnh

Rukre 21.14-15

⁸ Tā nhūm Estewāwja. Kot mē kēp mē mjên htyk xwỳnhjê mā mē ō ho pa xwỳnhjê hōja. Tirtūm kot kutā nojarêt mex jakamā na pre hte ỹ hā àhpumunh tỳx o aa mēmoj pumunh kêt kwỳ ho anhỳr o ri mē hkôt pa. ⁹ Hāmri nhūm Ijaew kwỳjaja tee ri ja hā omu nhūm ja mē kēp omnuj tỳx nē nhūm

mê hã kãm akir. Uràk nê mê kêp Ijaew nê Jerujarê kamã ri mê hkôt pa htã ahpÿnhã mê õ pyka. Mê kot kãm “Ripetat” xwÿnh kwÿ na pre mê. Nê ahpÿnhã mê õ krĩ.

Mê hkwÿjaja kêp Sirën nhõ xwÿnh.

Nê mê hkwÿjaja kêp Aresãn nhõ xwÿnh.

Nê mê hkwÿjaja kêp Siris nhõ xwÿnh.

Nê mê hkwÿjaja kêp As nhõ xwÿnh. Ahpÿnhã mêõ pika nê mê õ krĩ htã na prem Jerujarê kamã ri axpën kôt pa ho pa. Tã Estewãw kot ã amnhĩ nhĩpêx anhÿr o pa hã omu nhũmja mê kêp omnuj tÿx nê nhũm mê hã kãm akir. ¹⁰ No nhũm Tirtũm Karõ nhÿ hã hamaxpêr tÿx o mê kãm kapêr nhũm mê kuma nê tee ri kutã tanhmã kãm nê hprãm kaprÿ. ¹¹ Hãmri nê ma mra nê tanhmã ho hêx to kaxyw amnhĩ kwÿjê rê nê mê kãm hã amÿnê nê mê kãm:

—E kêr ka mê krĩ nhõ xwÿnhjê mã Estewãw o axêx nê tanhmã mê kãm ho akapêr punuj to ho ri mê hkôt apa. Kê mê ama nê kamã gryk kato. Kot kaj mê ã amnhĩ nhĩpêx anê pa mê hpãnhã mê amã amnhĩre. Anê.

Hãmri nhũm mê kuma nê ma mra nê hapôj nê ma krĩ nhõ xwÿnhjê mã tanhmã ho hêx to ho ri mê hkôt pa nê mê kãm:

—E mê amnê akuprõ nê mê inhma. Kwa kêr ka mê Estewãwti kapêr mar kêt nê. Na hte finat Mojes mê Tirtũm wa ho kapêr punuj pix o ri pa. Pa mê ra kot wa ho kapêr punuj ã kuma. Anê.

¹² Hãmri nhũm mê kuma. Krĩ nhõ xwÿnhjê mê nê mê àptàr tũmrejê mê Tirtũm kapêr tũm o mê ahkre ho mê pa xwÿnhjaja nhũm mê tee ri mê kot Estewãw o hêxja ma nê kamã gryk nê. Hãmri nê ma hwÿr mra nê unê nê ma mê õ juisti hwÿr o tẽ. ¹³ Hãmri nhũm mê kãm ho hêx xwÿnhjaja mê hkôt mra nê juisti mã tanhmã ho hêx to nê mê kãm:

—E jahti na hte finat Mojes kot Tirtũm nhÿ hã mê pahte tanhmã amnhĩ nhĩpêx to hã karõ ho hêx rãhã ho pa. Nê Tirtũm mã amnhĩ jarênh xà

hã ixkreja nhũm tanhmã ho hêx to pa mê kuma. ¹⁴ Na hte mê kãm: “Koja nhÿrmã Jejus pê Najare nhõ xwÿnh Tirtũm mã amnhĩ jarênh xà hã ixkreja grãnh pa kãm ga.” Anhÿr o mê kãm hêx o pa. Nê Mojes kot mê pahte amnhĩ nhĩpêx ã karõ nê mê pahkurê pa prem kuma. Anê.

¹⁵ Nhũm prem ã mêõ juisti mã Estewãw o hêx anê. Hãmri nhũm mê kuma nê Estewãw wÿr rít nê hkuk pumu nhũm te kot Tirtũm kapêr o mê wrÿk xwÿnhjê kuk nhĩrã rax pyrã nê xa nhũm mê tee ri omu nê kamã no puma nê.

7

Estewãw kot juistijê mã ujarênh

¹ Hãmri nhũm mê õ patre maatija Estewãw mã kapêr nê kãm:

—E mê inhma amnhĩ jarê. Xà ãm hãmri na mê ri ã ajarênh anê nà? Anê.

² Hãmri nhũm kuma nê mê piitã mê kãm kapêr. Mê kãm kapêr ryy nê mê kãm:

—Tõe kot paj mê amã mê panhigêt finat Apraãw tanhmã harênh to ka mê inhma. Amnepêm na pre Tirtũm maatija Apraãw wÿr kato. Kormã pyka pê Mêsopotãm kamã pa ri. Kormã kot ma krĩ pê Arã hwÿr mör kêt ri nhũm hwÿr kato nê kãm: ³ “E kêr ka mê anhõ krĩ pê akato nê akwÿjê re nê ma mō. Kot paj ma nhÿhÿm hpãnhã pyka hõ hwÿr mê ato mō.” Anê.

⁴ —Hãmri nhũm kuma nê amnhĩ to akuprõ nê ma mō. Õ pyka pê Katej pê kato nê ma krĩ pê Arã hwÿr mō nê hpãnhã kamã pa. Tã nhũm hipêêxã Terahti kêp ty nhũm Tirtũm amnê jar mê panhõ pyka hwÿr kumê. Jar mê papapxã hwÿr kumê.

⁵ —Nom nhũm kormã kãm pykaja nhõr kêt nê. Kormã kãm hkwÿ ho grire nê õr kêt nê. Na pre ãm kãm:

E kot paj nhÿrmã amã pykaja gō. Amã nê akanrêhã akra nê atãmnhwÿjê mã kugō ka mê kamã ri apa ho apa.

Anhÿr o kãm mê panhõ pika pê Kanaãja jarê. Apraãw kormã hkra

hkêt ri nhũm ã kãm kapêr anê. ⁶ Hãmri nê kãm:

Koja akanrêhã atàmnhwỳjaja nhỹrmã ma nhỹhỹm pyka hõ hwỳr pa nê hpãnhã kamã pa. Mẽ õ pyka kamã pa hkêt tâ nhãm pyka hõ kamã pa hãmri nê pika nhõ xwỳnhjê mã àpênh rũnh o pa nhũm pyka nhõ xwỳnhjaja mẽ hipêx kati rũnh o pa. Nê mẽ àpênh ã mẽ kãm amnhĩrer kêt nê. ãm mẽ homnuj o pa hã amgrà xohtô rax kumrêx. Nhũm mẽ hã amgrà pê 400.

⁷ Nom kot paj mẽ hã mẽ homnuj tỳx nê. Akanrêhã atàmnhwỳjê hã mẽ homnuj tỳx nê nhũm mẽ rĩ kormã mẽ kurũm kato nê man akupỹn pa nê jar pøj. Hãmri nê jar inhmã inhmex o inhmex ã ijarênh rãhã ho pa. Anê.

⁸ Hãmri nê kãm:

E pu axpên ma. Koja ka nê akanrêhã akra nê atàmnhwỳjaja ka mẽ ixkôt ri amnhĩ nhĩpêx o apa hã kot paj mẽ ato ixkra. Tã koja ja amã mex japêr hã kêr ka mẽ amnhĩ my kwỳt kà hkwy jakà. Nê koja mẽ akrajaja hapøj nê my ka mẽ mã mẽ ho anê nê mẽ kêp mẽmy kwỳt kà hkwy jakà. Mẽ piitã mẽ kot mẽ apê ixkra hã mẽ apumunh kaxyw kot kaj mẽ ã amnhĩ nhĩpêx anê.

Anhỹr o Apraãw mã kapêr nhũm kuma nê mar xà hkôt hkra Ijak my kwỳt kà hkwy krãhta. Kormã hkaràre ri. Kormã hã arĩgro pê 8 pix ri nhũm kêp hkwy krãhta.

—Tã nhũm Ijak hprêk nê hprõ nê hkra. Hãmri nê mã hkra Jako ho anê nê. Nhũm Jako hprêk nê mã hkra pê 12jê ho anê nê mẽ piitã mẽmy kwỳt kà hkwy jakà pa. ã na pre mẽ pahpàr kraxjaja amnhĩ nhĩpêx anhỹr o pa.

⁹ —Jako hkrajê hõ na pre kêp Juje. Nhũm Juje htõjaja hipêêxà hkôt kamã gryk nê axtem nê mẽ urojê mã ho wênê nhũm mẽ kêp haprô nê ma pyka pê Ejit wỳr o mõi. Amarĩ Ejit nhõ xwỳnhjê mã àpênh o pa kaxyw. Tã no nhũm Tĩrtũm arĩ tãnopxar rãhã ho

hkôt pa. ¹⁰ Hãmri nê Ejit kãm mẽ kot homnuj xwỳnhjê nhĩhkra rũm hkapa nê tanhmã hkrã hto nhũm àhpumunh tỳx nê hamaxpêr mex nê. Jakamã nhũm Ejit nhõ xwỳnhjê nhõ pahi Parahtija omu nê kãm hkĩnh nê. Kot tãm amnhĩ nhĩpêx nê àhpumunh tỳx kôt omu nê kãm hkĩnh nê. Hãmri nê amnhĩ ri kumê nhũm ãhkô hã àpênh o pa. Kãm òrkwỳ pumu nê Ejit nhõ xwỳnhjê ho amnhĩptàr o pa.

¹¹ —Rôm nhũm mẽ hpur kãm mẽmoj nhĩgrôt mex kêt nê nhũm mẽ kêp mẽ apkur xà hã mẽ õja ra ri mẽ kêp kryre. Ejit kamã nê jar Kanaã kamã nhũm mẽ apkur xà hã mẽ õja mẽ kêp hapêx par o mõi. Nhũm mẽ piitã prãm xàj ra hiire nê kãm prãm tỳx o pa nhũm mẽ panhĩgêjtaja hãmri prãm xàj tee ri amnhĩ xàpkur xà hã mẽmoj japêr.

¹² —Tã nhũm Jakoja Ejit kãm arĩ mẽ apkur xà hã mẽ õ rax ã harênh ma nê ma hwỳr hkra hkwyjê rê. Mẽ panhĩgêjtaja nhũm ma mẽ hwỳr mẽ kurê nhũm mẽ ma mẽ hwỳr mra. Hãmri nê mẽ hwỳr pøj nê mẽ kêp mẽmo hy hkwy japrô nê ma akupỹm o mra. Wam mẽ mõiarta ã mẽ kêp mẽmoj japrô nê ma akupỹm o mra.

¹³ —Tã nhũm mẽ kêp mẽmo hy japrôr xwỳnhja hapêx nhũm mẽ axte akupỹm mẽ hwỳr mra. Hãmri nhũm mẽ htõ Juje mẽ kãm amnhĩ to amnhĩrit nê kêp mẽ htõ hã mẽ kãm amnhĩ jarê. Mẽ kot ra htyk ã hkamnhĩx tã nhũm mẽ kãm amnhĩ jarê. Hãmri nhũm Parahtija mẽ kêp Juje htõ hã mẽ harênh ma.

¹⁴ —Tã nhũm Juje amnhĩ wỳr hipêêxà Jako mẽ htàmnhwỳjaja mẽ hã karõ nhũm mẽ piitã ma Ejit wỳr hapêx. Mẽ kêp 75 nê ma Ejit kamã Juje hwỳr hapêx hãmri nê kamã pa ho pa.

¹⁵ —ã kot anhỹr jakamã nhũm Jakoja ma Ejit wỳr mõi nê hpãnhã kamã pa ho pa. Tã hãmri kamã ty. Nhũm hkrajê piitã Ejit kãm pa hãmri nê gaa nê htyk pa. ¹⁶ Hãmri nhũm mẽ hkanrêhã mẽ hkrajaja mẽ hamỳ nê ma akupỹm Kanaã hwỳr krĩ pê Sikê hwỳr mẽ o pa nê kamã mẽ hagjê. Na

pre mẽ hkukamã finat Apraãw kot Amõr krajê pê kênkre japrõ nê kamã hprõ jaxà. Jakamã nhũm prem mỳr pê ma hwỳr mẽ o pa nê kamã mẽ hagjê hãmri nê ma akupỹm Ejit wỳr pa.

¹⁷ —Tã gaa nê rĩ ohtô rax kumrêx o mõi. Mẽ panhĩgêjtjaja ohtô rax kumrêx o mõi. Hãmri nhũm Tĩrtũm kot Apraãw mã mẽ õ pyka jarênh xwỳnhja nhũm kot mẽ kãm õr kaxyw. ¹⁸ No nhũm Ejit nhõ pahi kot Juje ho mex xwỳnhhta na pre ra ty nhũm axtem hpãnhã hõja mẽ ho amnhĩptàr o pa. Nê aa Juje jarênh mar kêt nê. Kormã pahi xàr nyw kêt ri htyk jakamã nhũm mỳr pê harênh mar kêt nê. ¹⁹ Hãmri nê hkwỳjê homnuj o pa. Tanhmã mẽ panhĩgêjtjê nhĩpêx to ho pa. Nê mẽ kãm mẽ hkra my hapõx xwỳnhjê hã amỹnê. Mẽ hapõx nhũm mẽ kot pikap mẽ rênh nhũm mẽ htyk kaxyw nhũm mẽ kãm mẽ hã amỹnê.

²⁰ —Rõm nhũm finat Mojesja kato. Nê mexre. Hãmri nhũm katorxà Ejit nhõ xwỳnhjê kot kêp hpĩr pymaj õrkwỹ kamã ri mẽ kêp ho hpimxur o pa hã mytwrỳ axkrunêpxi.

²¹ —Tã nhũm ra htỳxre nhũm katorxà mẽ hipêêxà wa tee ri hkukamã hamaxpêr hãmri nê mẽ kot wa kêp hpĩr pymaj kumỳ nê ma o tẽ nê kaxyw à nhĩpêx nê nhỹri gõ nhĩpõk ri põ kamã ho amũxu. Tã nhũm Paraohiti hkra nija ra gõx mã wỳr mã tẽ nê ra omu hãmri nê amnhĩm kumỳ nê ma o tẽ nê ho hkra. ²² Jakamã nhũm Mojes Ejit nhõ xwỳnhjê kamã hprêk. Hãmri nê mẽ àhpumunh xà hã kagà pumunh pa. Nê hihtỳx nê mẽ kãm kapêr kãm hihtỳx mex o pa.

²³ —Tã hãmri ra hã amgrà pê 40 nê hapêx nhũm Mojes hamaxpêr nê ra kãm amnhĩ kwỳ pê Ijaewjê pumunh prãm nê ma mẽ hwỳr tẽ. ²⁴⁻²⁵ Hãmri nê htêm kõt ja wa omu. Nhũm Ejit nhõ xwỳnhja Ijaewja homnuj o xa nhũm Mojes tẽn tee ri hã omu nê hamaxpêr o: “E pa ma wa hwỳr tẽ nê ixkwỳ mũj ã Ejit nhõ xwỳnhhta pĩ kê ixkwỳjaja ja hã ixpumu nê Tĩrtũm kot mẽ hwỳr inhmênh ã ixpumu. Ixte Ejit nhõ

xwỳnhjê nê mẽ kator kaxyw mẽ ja hã ixpumunh kurê kumrêx.”

—Anhỹr o hamaxpêr hãmri nê wa hwỳr tẽ nê amnhĩõja nê Ejit nhõ xwỳnh pĩ. Tã no nhũm hkwỳjaja kot hpĩr ã harênh mar tã tanhmã amnhĩ kaxyw kãm hamaxpêr to hkêt nê. ²⁶ Nhũm apkati nhũm mẽhõja war axkrut nê axte pijapu ho wa xa. Hamẽ wa kêp Ijaew. Jakamã nhũm Mojes akupỹm mẽ hwỳr tẽ nê tee ri axpên tã wa omu nhũm ja kêp omnuj nê. Hãmri nhũm wa hwỳr tẽ nê axpên nê wa kãm kapêr nê wa kãm: “Pa? Kwa war ajamẽ war apê Ijaew kênã na ka wa ri axtem nê ã axpên nhĩpêx anê.” Anê. ²⁷ Hãmri nhũm kot amnhĩ kaxyw hkryx xwỳnhja kuma nê nhãm amnhĩ nê hkujate nê kãm: “Tk. Kwa xà apê mẽ inhõ pahi hã na ka ã wa inhmã akapêr anê? Nà apê mẽ inhõ pahi hkêt kênã. ²⁸ Kot kaj inhĩpêx o te ate Ejit nhõ xwỳnhhta nhĩpêx pyrã nê wa ixtõ hpĩr kêt nê.” Anê.

²⁹ —Hãmri nhũm tee ri kuma nê ra kãm ma nê Ejit rũm kator kurê kumrêx nê ma pyka pê Mijiã hwỳr mõi nê kamã hpãnhã pa. Kamã hprõ nê hkra. Nhũm hkra myja wa hamêxkrut.

³⁰ —Tã nhũm Mijiã kamã pa hã axte hã amgrà pê 40. Hãmri nê mẽmo arĩgro hã kapõt ã krã hakỳx pê Sinai kape hã ri pa nhũm Tĩrtũm kãm kapêr. Nom nhũm Mojes omunh kêt nê. ãm utĩ kaõk kamã kuwy hpõk pix pumu. ³¹ Amnhĩ jaêr pê ã kot amnhĩ nhĩpêx anhỹr ã omu hãmri nê amnhĩ tã hprĩ hã omunh kaxyw hwỳr tẽ nhũm Tĩrtũm kãm:

³² Pa Mojes? E ixpê Tĩrtũm na pa. Ixpê akukamã anhĩgêjt Apraãw nhõ Tĩrtũm na pa. Nê ixpê Apraãw kra Ijak mẽ htãmnhwỳ Jako wa õ Tĩrtũm na pa. Anê.

Hãmri nhũm tee ri kuma nê kãm ma xàj htertet tỳx nê. Hãmri nê umaj axte pĩ hpõkja wỳr rĩt kêt nê. ãm nhãm hkrã nê rĩt o xa. ³³ Hãmri nhũm Tĩrtũm kãm:

E kwa ixpê Tĩrtũm maati hã ixtã api-jaãm ã aparkà kapa nê apar

kênh nê xa.

³⁴ Na pa ra ixkra Ijaewjaja Ejit kãm mē omu. Na ra Ejit nhō xwÿnhjaja ixpê mē homnuj tÿx kumrêx rãhã ho pa nhũm mē amnhĩ xà hã maj tee ri amnhĩ nhĩpêx. Pa ja hã mē omu nê inhmã mē hkaprĩ nê. Jakamã kot paj Ejit nhō xwÿnhjê nhĩhkra rũm mē kator pa. E ka kot paj mē hwÿr amê ka ma akupÿm mē hwÿr mō nê mē kurũm mē kator.

Anhÿr o kãm mē kaxyw karō. ³⁵ Ra Ijaew kot Mojes hkaga tã nhũm mē kaxyw ãm nê ma akupÿm kot mē hwÿr mēnh kaxyw. Na prem ra omu nê hkaga. Te mē ate Jejus kagaja pyrã nê hkaga. Jakamã nhũm pijapu xwÿnhhta tee ri amnhĩ tã omu nê kamã gryk nê amnhĩ nê kãm kapêr nê kãm: “Tk. Kwa xà apê mē inhō pahi hã na ka ã wa inhmã akapêr anê? Nà apê mē inhō pahi kêt.” Anhÿr tã nhũm Tirtũm mē kaxyw tãm xãm. Kot mē ho amnhĩptar nê Ejit nhō xwÿnhjê rũm mē kator kaxyw. Ja kaxyw na pre pĩ hpòk kamã kãm kapêr nê mē kaxyw ãm.

³⁶ —Jakamã nhũm Mojes ma akupÿm Ejit wÿr mō nê mē kurũm hkwÿjê kator nê ma mē o pa. Na pre mē ho mex nê Tirtũm nhÿ hã mē kãm aa mē kot mēmoj pumunh kêt kwÿ ho anhÿr o ri mē o pa. Ejit kamã nê mãânên mē kot gô xujanãr mã: “Gô kamrêk” anhÿr xwÿnhhta kamã. Nê kapôt ã mē kãm ã amnhĩ nhĩpêx anhÿr o mē o pa. Nê kapôt ã ri mē o pa ho ra hã amgrã pê 40.

³⁷ —Tã tãm na pre mē panhĩgêjtê mã mēhō hkukamã mē kãm tanhmã harênh to nê mē kãm harênh o: “Koja Tirtũm nhÿrmã te ra mē akaxyw pa ixãm pyrã nê inhmÿr pê mē panhĩõ xãm. ÿ hã mē amã kapêr jarênh o pa kaxyw nhũm nhÿrmã mē akaxyw ãm ka mē omu.”

—Anhÿr o ã Jejus kukamã harênh anê. ³⁸ Na pre Mojes kapôt ã mē panhĩgêjtê ho pa nhũm mē krã hakÿx pê Sinaija wÿr pa. Mē panhĩgêjtaja

hãmri hwÿr pa nhũm Tirtũm kapêr o mē wrÿk xwÿnhja mē kaxyw Mojes mã kapêr nhũm ô ri mē kãm awjarê nê hã kagã. Mē kot mar nê hkôt amnhĩ nhĩpêx nyw o amnhĩ nhĩpêx o pa kaxyw nhũm mē kãm Tirtũm kapêr jarênh o pa. Nê mē pajaxwÿja. Mē pahte hkôt amnhĩ nhĩpêx nyw o amnhĩ nhĩpêx o papa kaxyw na pre mē pamã hã kagã. ³⁹ Tã no nhũm mē panhĩgêjtaja Mojes ma nê ãm kuma nê hkaga kumrêx nê akupÿm Ejit wÿr hkrã. ⁴⁰ Jakamã nhũm Mojes kormã nhÿri mē kaxyw Tirtũm mã kapêr o ãm rôm nhũm mē wakre kamã htõ Arãw wÿr mra nê kãm: “Kwa Mojes ra kot tanhmã amnhĩ to kênã. Kot Ejit rũm mē pakator nê mē pahto mör tã ra nhÿri arík nê tanhmã amnhĩ to. Jakamã e. Kwa hpãnhã mē inhmã mēmo karō nhĩpêx pu mē ho panhõ sãnti kê tãm ma akupÿm Ejit wÿr mē pahto pa.” Anê.

⁴¹ —Hãmri nhũm mē kuma nê mē kãm kãx o môx krare karō ho sãnti nhĩpêx nê mē kãm ãm. Hãmri nhũm mē axtem nê te ho Tirtũm nhĩpêx pyrãk o hipêx nê kãm ôwêhti hkwÿ pa nê kãm haxwÿ nê hã apku. Hãmri nê ã amnhĩ nhĩpêx anhÿr ã amnhĩ pumu nê hkĩnh nê. ⁴² Hãmri nhũm Tirtũm tee ri ja hã mē omu nhũm ja kêp omnuj tÿx nê nhũm mē hkaga hpa. Jakamã nhũm prem amnhĩ krã hkôt ri myyti nê mytwrÿre nê kanhêti karō nhĩpêx nê te mē kot Tirtũm nhĩpêx pyrãk o hipêx o pa. Hãmri nê amnhĩ kaxyw kumã pix mã hamaxpêr o pa hã amgrã xohtô nê. Tã nhũm Tirtũm nhÿ hã kapêr jarênh o mē pa xwÿnhjaja tanhmã mē kãm kapêr to nê mē hã kagã. Te Tirtũm tãm mē kãm kapêr pyrãk o mē kãm kapêr nê hã kagã kot:

Pa mē apê Ijaewjaja? E mē inhma. Amnepê mē ate kapôt ã ri mē apa hã amgrã pê 40ta ã. Xà wa inhmã na ka prem akrit kwÿ hpar o apa?

⁴³ Nà inhmã hkêt. Na ka prem axtem nê ri amnhĩ krã hkôt amnhĩm mēmo karō nhĩpêx nê hipêx o te mē ate pa inhĩpêx pyrãk. Pê

kām akrit kwỳ hpar nē òr o ri apa.
 Mē anhō mēmo karō nhīpēxta mē ate amnhīm hā hixi pē Mōrok mēnh xwỳnhja ka pre htem à kamā amnhī kòt ho apa.
 Nē amnhīm kanhēti karō nhīpēx nē hā hixi mē nhūm kēp Repā. Ka mē ixkuhpa hā wa kēp mē apām ā harēnh o ri apa.
 Tā ā mē ate amnhī nhīpēx anhỹrja mỳrapē kot paj pānhā nhỹhỹm mē arē.
 Koja mē akutā amnhī xunhwỳr xwỳnhjaja mē apynē nē ma pyka pē Papirōn rùm hamū mē ato hapēx ka mē amarī mē kām axāpēnh rūnh o ri apa kām ga. Anē.

Ā na pre Tīrtūm mē panhīgētjē mā kapēr anē nhūm ŷ hā kapēr jarēnh o pa xwỳnhja mē kām hā kagà.

44 —Tā nhūm mē panhīgētjaja kormā kapòt ā ri pa ri amnhī kòt mry kà ho ixkre ho pa. Tīrtūm mā kapēr xà hā ixkreja nhūm prem amnhī kòt ri o pa. Mē kot kām “Tīrtūm nhōrkwỹ kaàkre” anhỹr xwỳnhja. Tīrtūm kot mē kām hā karō xà hkòt nhūm mē hipēx nē amnhī kòt ri o pa. Na pre Tīrtūm hprī hā Mojes mā tanhmā kot hipēx to hā karō nhūm mē hkòt hipēx nē amnhī kòt ri o pa.

45 —Tā nhūm Mojes ty nhūm hpānhā Jojueja amnhī kòt mē o pa. Ma Tīrtūm kot mē kām pyka mex nhōrta wỳr Mojes mỳr pē mē o pa. Hāmri nē hwỳr mē o pòj nhūm Tīrtūm mē nē mē kot ra kamā mē pa ho mē pa xwỳnhjē japòj nhūm mē pānhā kamā pa ho pa. Nē amnhī kòt Tīrtūm nhōrkwỹ kaàkreta o pa. Rāhā nhūm finat Tawija mē hpānhā mē ho amnhīptà. 46 Na pre Tīrtūm Tawi kot tanhmā amnhī nhīpēx to ho pa hā omu nē kām hapē nē. Jakamā nhūm Tawi kām kapēr nē kām: “Pa Tīrtūm? Kwa xà kot paj amā ixkre mex ò nhīpēx nà? Mē ixpē Ijaewjaja mē ixte kamā amā amex o amex ā ajarēnh o ixkrī kaxyw pa hipēx. Xà kot paj amā hipēx?” Anhỹr tā no nhūm Tīrtūm kormā kām

ja prām kêt nē. 47 Jakamā nhūm Tawi hkra Sarumāwja hipēxà mỳr pē hpānhā kēp mē ò pahi nē kām hipēx. 48 Nom xà na hte Tīrtūm maatija mē pahte kām panhīhkra ho ixkre nhīpēx xwỳnh kamā hkrī? Nà kaxkwa kamā na hkrī xà. Na pre ra Tīrtūm nhỹ hā kapēr jarēnh o pa xwỳnhja Tīrtūm kot tanhmā mē pajamār to ho pa hā kagà nē hā kagà ho:

49 Na pa hte kaxkwa rùm pyka hkòt mē piitā mē hamār mex o ixkrī.

Tā tanhmā kot paj amnhī to nē mē ĩhkra ho mē kot inhmā ixkre nhīpēxta wỳr axà nē kamā ixpa ho ixpa?

50 Nà ixte mēmoj piitā ho ixkator xwỳnh kēnā kot pa kêt ā amnhī nhīpēx anē. Anē.

Nhūm pre ā Tīrtūm amnhī tā mē kām kapēr anē nhūm ŷ hā kapēr jarēnh xwỳnhja ô ri mē pamā hā kagà.

51 —E kwa mē inhma ixkwỳjaja. Mē akrā hihtỳx kumrēx jakamā mē amā Tīrtūm kapēr mar prām kêt. Na ka htem mē panhīgētjē pyrā nē amnhī nē Tīrtūm Karō kaga nē kapēr mar kêt nē. 52 Na pre hte Tīrtūm nhỹ hā kapēr o mē pa xwỳnhjaja mē panhīgētjē hwỳr mra nē mē kām kapēr jarēnh o ri mē hkòt pa. Tā nhūm mē hkaga nē mē hipēx kati ho pa. Na pre htem Jejus wrỳk kukamā mē kām: “E koja nhỹrmā kot Tīrtūm kapēr mar nē hkòt amnhī nhīpēx mex rāhā xwỳnh maatija mē pahwỳr wrỳ.” Anhỹr o mē kām harēnh o pa. Tā no nhūm mē kām ja mar prām kêt jakamā axtem nē hā mē hpar o pa. Mē kot mē kām Jejus jarēnh o mē pa xwỳnhjē hpar o pa. Tā nhūm tām mē pahwỳr wrỳ ka mē omu nē mē kot amnhī nhīpēxta pyrā nē hā amỹnē nhūm prem mē amā kupī.

53 —Tīrtūm kapēr o mē wrỳk xwỳnhjaja kot Tīrtūm nhỹ hā tanhmā mē pahte amnhī nhīpēx to ho papa hā mē pamā karō nhūm mē ate mar tā mē apē hprām nōkati. Nē ama nē ām ama nē hkòt amnhī nhīpēx o ri apa hkêt nē. Anē.

*Mê kot Estewãw pîr ã mê harênh
Rukre 21.16-19, 23.34; Atre 22.20*

⁵⁴ Hãmri nhùm juistijaja tee ri Estewãw xujarênh ma nê kamã gryk tỳx nê kãm kapêr punuj nê. ⁵⁵ Nom nhùm Tirtùm Karôja tanhmã hkrã hto nhùm kãm mê uma hkêt nê. Hãmri nê kãnhmã rît nê kaxkwa pumunh o xa nê kamã Tirtùm rùm hirã rax pumu. Nhùm Jejus Tirtùm nhĩhkô hã xa nhùm omu nê hkĩnh nê mê kãm:

⁵⁶ —Kokýy. Na kaxkwa axkjê nhùm kamã Tirtùm nhỹ pa omu. Nhùm kuri kot mê pahwỳr mênh xwỳnh Jejusja xa. Hêxta waa nê. Nà na pa jarãhã wa omu nê ixkĩnh tỳx kumrêx. Anê.

⁵⁷ Hãmri nhùm mê kuma nê kamã gryk tỳx nê. Hãmri nê kãm mar prãm kêt nê kêp amnhĩ jamak pro. Hãmri nê gryk xàj àmra htỳx nê hwỳr hprôt ⁵⁸ nê unê nê krĩ pê ho kato nê ma o tẽ nê nhỹri o xa. Hãmri nê kên o htak o hpĩr kaxyw amnhĩ nhĩnôkà hkwrỳ nê mēhõ my pê Sawti mã kugõ nhùm mê kãm hamỳ. Hãmri nhùm mê kên rũnh kwỳ jamỳ nê o mra nê Estewãw wỳr rênh prêprêk o kuhê. Nê ho ì kamã htak nê hkrãx pê htak. ⁵⁹ Hãmri nhùm ra htyk kaxyw nê Jejus mã amnhĩ jarê nê kãm:

—Pa Pahihti Jejus? E koja ixkarõ awỳr api ka ixto amnhĩptã. Anê.

⁶⁰ Hãmri nê hkõn krã ho tẽm nê nhỹ nê axte kãm amnhĩ jarê nê mê kot hpĩr xwỳnhjê nê kãm kapêr nê kãm:

—Kwa Pahihti. Mê kot ixpĩr tã kwa tanhmã ixtã mê ho hkêt nê.

Anhỹr o mê nê Jejus mã kapêrja kôt ra ty.

8

*Mê kot Estewãw jaxàr ã mê harênh
Atre 22.4, 26.9-11*

¹⁻² Hãmri nhùm mê kot Jejus kôt amnhĩ nhĩpêx xwỳnhjaja Estewãw wỳr mra nê htyk kãm omu nê hkaprĩ nê. Nê mur nê kumỳ nê ma o mõ nê haxà. Nom nhùm Sawtija mê kot hpĩr ã omu nhùm ja kãm mex nê.

*Sawti kot Jejus kwỳjê nhĩpêx kati ho
pa hã harênh
Atre 1.8*

Tã nhùm Jerujarê kamã Ijaewjaja mê kot Jejus kôt amnhĩ xunhwỳr xwỳnhjê homnuj tỳx o pa. Hãmri nhùm mê tee ri amnhĩ kukamã hamaxpêr nê mê hkwỳjaja mê umaj hapôj nê ma pika hkwỳ hkôt hpigrành pa. Mê hkwỳjaja Jutej wỳr ma pa nhùm mê hkwỳjaja Samar hwỳr ma pa. ã na prem mê umaj nhỹhỹm hpigrành par anê. ãm Jejus nhỹ hã mê ahkre xwỳnh maati pixjaja na prem Jerujarê kamã arĩk nê nhỹhỹm mör kêt nê. Simãw Pêtre nê Juãw nê Xiakre nê Andre nê Firipti nê Patoromew nê Matêwre nê Makre nê Tomas nê Xiakre hõja nê Simãw õ nê Maxitreja. ãm jajaja pix na prem arĩk.

³ Nhùm Sawti haxwỳja Jejus kôt mê kot amnhĩ xunhwỳr xwỳnhjê homnuj o pa. Mê kot Jejus kaga hprãm xàj tanhmã mê hipêx to ho pa. Na pre hte mê òrkwỹ hwỳr agjê nê mê unê. Měmyjê pynê nê mēnijê pynê nê ma mê o mra nê mê hagjênh xà kamã mê hagjê. Mê uràk nê kêp Ijaew tã ã mê hipêx anhỹr o pa.

⁴ Tã nhùm mê umaj Jerujarê rùm pika hõ hwỳr mê hpigrành xwỳnhhtaja amarĩ pika hkwỳ hkôt ri pa hkêt nê. Na prem ma mê piitã mê kãm Jejus kapêr jarênh o ri mê hkôt pa. Kêp Tirtùm kot mê pakaxyw ãm xwỳnh ã harênh rãhã ho ri mê hkôt pa.

*Wajaga kot amnhĩ tã Firipti mar ã
harênh*

Juãw 2.23-24

⁵⁻¹² Tã nhùm Firipti haxwỳja ma mõ. Ma krĩ pê Samar hwỳr mõ nê kamã mê kãm Tirtùm kot mê pakaxyw ãm xwỳnhhtaja jarênh o pa. Samar kamã na pre wajaga Simãwti ri Samar nhõ xwỳnhjê hkôt mê no kupyrrãhã ho ri mê hkôt pa. Nê àhpumunh tỳx ã amnhĩ to jarkrar o ri pa. Jakamã nhùm mê kot amnhĩ nhĩpêx ã omu nê kamã no puma nê. Nê htỳx ho ãm hãmri kot amnhĩ jarênh ã hkamnhĩx. Jakamã nhùm pre mê kãm tanhmã ri amnhĩ to hêx to ho pa pê mê no kupyrrãhã ho ri pa nhùm mê amnhĩ jaêr pê omu. Mê kot amnhĩ

to hkryre xwýnhjaja nê mẽ kot amnhĩ to rũnh xwýnhjaja nhũm mẽ amnhĩ jaêr pê kot tanhmã amnhĩ nhĩpêx to hã omunh o hkôt pa. Nê ri axpên mã harênh o:

—Kokỹỹ. Wajagaja àhpumunh tỳx kumrêx. Tĩrtũm nhỹ hã mãn te ã amnhĩ nhĩpêx anhỹr o pa nà? Mãn pre Tĩrtũm kãm àhpumunh xà hkwy gõ nhũm ỹ hã ã amnhĩ nhĩpêx anhỹr o pa. Anê.

Hãmri nê hkôt hamaxpêr o ri hkôt amnhĩ nhĩpêx o pa.

Tã nhũm Firipti mẽ õ krĩ hwýr mỗ nê mẽ kãm Jejus Kris jarênh o ri mẽ hkôt pa nê mẽ kãm:

—Jejus kêp Tĩrtũm kot mẽ pahwýr mênh xwýnh jakamã kot kaj mẽ amnhĩ kaxyw hkôt ajamaxpêr nê hkôt amnhĩ xunhwý nhũm Tĩrtũm hã mẽ apumu nê mẽ ato hkra. Anê.

Hãmri nê Tĩrtũm nhỹ hã akupỹm tanhmã mẽ kute xwýnhjê ho mex to ho pa. Mẽ ĩ kamã mẽ htyk xwýnhjaja nê mẽ hyk o mẽ pa xwýnhjaja nhũm mẽ ohtô nê akupỹm mẽ ho mex o pa. Nê mẽ hkwyjê nê mẽkarõmnuti hkwy jano nhũm mẽ àmra htỳx o mẽ hkaga nê ma mẽ kurũm hapôx nê mra. ã Firiptija Jejus nhỹ hã mẽ ho mex o pa anê nhũm mẽ piitã ja hã omu nê kapêr ma nê hkĩnh nê. Nê kapêr mar tỳx nê hkôt hamaxpêr. Jao wajaga Simãwti kaga nê hpãnhã amnhĩ kaxyw Jejus kôt pix mã hamaxpêr nê hkôt amnhĩ xunhwý. Hãmri nhũm Firipti ja hã mẽ omu nê mẽ hkrã kumrã. Měmyjaja nê mēnijaja nê mẽ piitã mẽ hkrã kumrã. Ra mẽ kot Jejus kôt amnhĩ xunhwýr ã mẽ piitã mẽ kãm amnhĩ to amnhĩrĩt kaxyw nhũm mẽ hkrã kumrãr pa.

¹³ Hãmri nhũm wajaga Simãwti haxwýja Jejus kapêr ma nê mẽ uràk nê amnhĩ kaxyw hkôt hamaxpêr nê hkôt amnhĩ xãm nhũm Firipti hkrã kumrã. Hãmri nhũm hkĩnh nê Firipti hkôt ri pa. Nê aa mẽ kot mēmoj pumunh kêt kwý ho anhỹr o ri pa hã omu nê kamã no pyma ho hkôt ri pa. Nê kot Tĩrtũm nhỹ hã akupỹm mẽ ho mex ã omu nê tee ri hamaxpêr.

¹⁴ Tã hãmri nhũm Jerujarê kamã Jejus nhỹ hã mẽ ahkre xwýnh maatiijaja Samar nhõ xwýnhjê jarênh ma. Ra mẽ kot Tĩrtũm kapêr kôt amnhĩ nhĩpêx ã mẽ harênh ma nê hkĩnh nê. Hãmri nê ma mẽ hwýr Simãw Pêtre mẽ Juaw wa kumê. ¹⁵⁻¹⁷ Hãmri nhũm wa ma mẽ hwýr wa mỗ nê pøj. Hãmri nhũm Firipti wa omu nê wa kãm krĩ nhõ xwýnhjê jarê nê wa kãm:

—Nà na pa pre mẽ kãm Jejus kapêr jarê nhũm mẽ inhma nê hkôt amnhĩ xunhwý. Jakamã pa pre mẽ hkrã kumrã. Nom na kormã Tĩrtũm Karõja mẽ hkarõ mã gjêx kêt nê. Anê.

Hãmri nhũm wa mẽ harênh ma nê mẽ himõk ã wa ĩhkra jaxwýr o ri mẽ hkôt mra. Ja kôt nhũm Tĩrtũm Karõ mẽ hwýr wrý nê mẽ hkarõ mã gjêx pa. ¹⁸⁻¹⁹ Hãmri nhũm wajaga Simãwja mẽ amnhĩ tã wa omunh o xa nê hamaxpêr o:

—Kokỹỹ. Kwa wa kot mẽ hã ĩhkra jaxwýrja kôt na hte Tĩrtũm Karõ mẽ hkarõ mã agjê. Hêxta waa nê. Inhmã ã mẽ hipêx anhỹr o ri ixpa hprãm tỳx. E pa ixkàxpore hkwy jamý nê o tẽ nê wa kãm kugõ kê wa tanhmã ixto pa wa uràk nê ã mẽ hipêx anhỹr o ri ixpa. Nà kot paj anê. Anê.

Hãmri nê wa hwýr tẽ nê wa kãm:

—E ota ixkàxporeta. Kwa amnhĩm apy nê hpãnhã tanhmã ixto pa war apyrà nê mẽ hã inhĩhkra jaxwýr o ri mẽ hkôt ixpa kê Tĩrtũm Karõja mẽ hkarõ mã agjê. Inhmã ja ho anhỹr prãm tỳx. Anê.

²⁰⁻²³ Hãmri nhũm wa tee ri ã kapêr anhỹrja ã omu nhũm Pêtre kãm:

—Tk. Kwa ajamaxpêrja mex kêt. Xà na htem kàxpore ho Tĩrtũm mã amnhĩrer pê ỹ hã mẽ ho hwýr o pa nhũm Karõ mẽ hwýr agjê? Nà na htem kàxpore ho Tĩrtũm Karõ japrôr kêt nê. Kot kaj wa ixpyrà nê ã mẽ hipêx anhỹr kêt nê. Ajamaxpêrja mexre hã. Kormã ate Tĩrtũm kôt amnhĩ xãm tỳx kêt jakamã na ka atỳx ã ri ajamaxpêr anê.

—Na ka ã wa ixte Tĩrtũm nhỹ hã mẽ hipêx anhỹr ã wa ixpumu nê amã wa ixpyrà nê ã mẽ hipêx anhỹr o ri

apa hprām xāj ajamaxpēr punuj nē. Nhūm ajamaxpēr punuj te kot apa hã apyr ka tee ate kēp amnhĩ kjēnh pyrāk. Kwa tokyx ajamaxpēr punuj ã amnhĩ pumu nē akaprĩ nē tokyx hkaga. Hãmri nē amnhĩ to Tĩrtũm wý kē amnhĩ katut kôt ajamaxpēr punujja mē ka axte ã ajamaxpēr anhýr kêt nē. ã mē hamaxpēr punuj anhýr xwýnhjaja koja mē nhýrmã ma kuwy hwýr pa. Anē.

²⁴ Hãmri nhūm tee ri amnhĩ tã kuma nē hkaprĩ nē wa kãm:

—Kwa xà wehe? Tô tokyx ixto Tĩrtũm wý kē ã ijamaxpēr anhýrja mýrapê hwýr inhmēnh kêt nē. Anē.

²⁵ Tã nhūm Simãw Pētre mē Juãw wa Samar nhõ xwýnhjē mã Pahihti Jejus kapēr jarēnh pē ho mē ahkre hãmri nē ma akupým Jerujarē hwýr mō. Ma pyka pē Samar hkôt mē kãm Jejus kapēr jarēnh o ma akupým mō.

Firipti mē Exiop nhõ xwýnh wa harēnh
Ijais 53.7-8

²⁶ Hãmri nhūm Firipti arĩ Samar kamã arĩk. Hãmri nhūm Tĩrtũm kapēr o mē wrýk xwýnhja hwýr wrý nē kãm:

—Pa? E ot pa awýr wrý nē tē. Nà kēr ka tokyx akato nē ma mō nē Jerujarē rŭm kãnhmã Kas wýr pry kahpēr ta nē hã juk nē ma hã mō. Kapôt ã pry nōrta kahpēr ta nē hã mō. E kwa tokyj.

Anhýr o kãm kapēr hãmri nē ma akupým tē nē kaxkwa hwýr api.

²⁷ Hãmri nhūm Firipti kuma nē kato nē ma hwýr mōr kurē kumrēx. Mōõ hãmri nē pryja kahpēr ta nē hã mō.

Hãmri nhūm ra mēhõ myja mō. Exiop nhõ xwýnh na pre. Exiop kamã mēõ pahi na pre niti. Hixi pē na pre Kãtatre. Nhūm pry hã mōr xwýnhja kēp kãm kãxpore jamãr o pa xwýnh. Exiop kamã te kēp mē õ kōwenatõ pyrāk. Tã kot Tĩrtũm mã mex o mex ã harēnh kaxyw ma Jerujarē hwýr mō. ²⁸ Hãmri nē akupým Exiop wýr kormã mō. Õ pàr kãm nhý nē Tĩrtũm kapēr ã kagà htũm kamã kapēr o mō. Tĩrtũm nhý hã kapēr o pa xwýnh pē Ijais kot Tĩrtũm kapēr ã kagà htũmja

nhūm kamã kapēr o mō. ²⁹ Hãmri nhūm Tĩrtũm Karõ Firipti mã harē nē kãm:

—E mēhõ mŭj wýr aprõt nē tē nē hã ajêt nē ma hkôt tē. Anē.

³⁰ Hãmri nhūm kuma nē ma hwýr hprõt nē hã ajêt nē kot kagà kamã kapēr ã kuma. Ijais kot Tĩrtũm kapēr ã kagà htũm kamã kapēr ã kuma nē kãm:

—Pa? Mãn ka aprĩ hã ate kamã akapēr xwýnhhta ma nà? Anē.

³¹ Hãmri nhūm kãm:

—Nà ixte maare hã. Mēhõ kot hprĩ hã inhmã harē pa ixprĩ hã kuma? Xát ka ixwýr api nē ixri nhý nē aprĩ hã inhmã harēnh o ixkôt mō nà? Anē.

Hãmri nhūm kuma nē hwýr api nē ìhkô hã nhý nē kagàta pumunh o nhý.

³² Nhūm hã kagà kot:

Na htem ôwēhti par kaxyw nhūm amarĩ mē kãm akryk kuhê.

Nē mē kot kēp hkĩ jakàr kaxyw nhūm ma anē nē amarĩ mē kãm akryk kuhê.

Tã na pre mēhõja ôwēhti kot amnhĩ nhĩpêx pyrāk o amnhĩ nhĩpêx.

Jakamã nhūm mē kot tanhmã hipêx to htã no nhūm arĩ mē kãm akryk xa. Amnhĩ nē tanhmã mē kãm kapēr punuj to hkêt nē.

ãm arĩ mē kãm xa.

³³ Na prem homnuy tỳx nē ri hipêx kati rax nē.

Aa kot tanhmã amnhĩ tomnuy to hkêt kumrēx tã nhūm mē ã hipêx anē nhūm mēhõ yr pē tanhmã nē mē kãm kapēr to hkêt nhūm prem kupĩ.

Nhūm amnhĩ kanrēhã hkra hkêt rãhã ty. Jakamã kot puj mē hkrajê nhĩxi mar kêt nē. Kra hkêt rãhã htyk kēnã. Anē.

³⁴ Nhūm pre ã Exiop nhõ xwýnh Tĩrtũm kapēr ã kagà htũm kamã harēnh anē. Hãmri nē tee ri ã kot mēhõ jarēnh anhýrja kukamã hamaxpēr nē hã Firipti kukja nē kãm:

—Kwa aprĩ hã inhmã mēhõja jarē. Mēhõ na prem ã hipêx rax anē? Xà kot kagà xwýnhhta na prem ã hipêx anē nà xà nhãm mēhõ na prem ã hipêx anē? E kwa aprĩ hã inhmã harē

pa ã mẽ kot hipêx anhÿr xwÿnh kôt omu. Anê.

³⁵ Hãmri nhũm kãm:

–Tôe kot paj amã harê. Nà Jejus na prem ã hipêx anê nhũm prem hã kagà. Anê.

Hãmri nê hprĩ hã kãm kot kamã harênh xwÿnh ta jarê. Jejus kot tanhmã mẽ panê amnhĩ nhĩpêx toja nhũm hprĩ hã kãm harênh o hkôt mō.

³⁶ Hãmri nhũm wa kormã mō nê pry htã himô hãnh mō nhũm Exiop nhō xwÿnh omu nê Firipti mã kãm:

–E mÿj gō mÿj nō. Xà kot kaj kamã ixkrã kumrã nà? Anê.

³⁷ Nhũm kãm:

–Nà kot kaj amnhĩ kaxyw Jejus Kris kôt ajamxpêr nê hkôt amnhĩ xãm hã kot paj akrã kumrãr kurê kumrêx. Anê.

Hãmri nhũm kãm:

–Tÿ. Kêp Tirtũm Kra kênã kot paj kêt amnhĩ kaxyw hkôt ijamxpêr kêt. Anê.

³⁸ Hãmri nê pàr o mrar xwÿnh mã anê nhũm pàr o nō nhũm wa kato nê himô hwÿr wrÿ nhũm Firipti hkrã kumrã. Kot Jejus kôt amnhĩ xãm ã hkrã kumrã. ³⁹ Hãmri nê wa akupÿm api nhũm Tirtũm Karō Firipti mÿ nê ma nhÿhÿm o mō nhũm Exiop nhō xwÿnhja axte omunh kêt nê. Hãmri nê ma akupÿm papxà hwÿr mō. Ra kot Jejus kôt amnhĩ xãm jakamã hkĩnh nê ma akupÿm mō.

⁴⁰ Rôm nhũm Firipti krĩ pê Ajôt kamã pōj. Tirtũm Karō kot Exiop nhō xwÿnh pê kator nê tanhmã ho nê Ajôt wÿr o mō hãmri nê kamã kumê. Hãmri nhũm mẽ kãm Jejus kot tanhmã mẽ panê amnhĩ nhĩpêx to hã harênh pê ma krĩ hō hwÿr mẽ kãm ujarênh anhÿr o pa rãhã krĩ pê Sejarej wÿr mō nê pōj.

9

Sawti kot Jejus kôt amnhĩ xãm ã harênh

Atre 22.6-11, 26.12-18

¹ Rôm nhũm Sawtija xatã Jerujarê kamã Pahihti Jejus kôt mẽ kot amnhĩ xunhwÿr xwÿnhjaja tanhmã mẽ homnuj tÿx to ho ri mẽ hkôt pa. Kãm mẽ

himex par prãm jakamã na pre hte ã amnhĩ nhĩpêx anhÿr pix o pa. Tã ra hamaxpêr nê ma patre maati hwÿr tẽ nê mẽ hã amnhĩ jarê nê kãm:

² –E ot pa awÿr tẽ. Kwa inhmã kagà nhĩpêx pa kupy nê ma krĩ pê Tamas kãm mẽ pahpê Ijaew xàptar tũmrejê hwÿr o mō nê mẽ kãm kugō. Kê mẽ kamã harê nê omu hãmri nê hkôt inhĩkra kamã Jejus kôt mẽ kot amnhĩ nhĩpêx xwÿnhjê jagjê. Mênijaja nê mẽmyjaja. Hãmri pa mẽ unê nê man akupÿn awÿr mẽ o mō ka mẽ omu nê kam tanhmã mẽ hipêx to. Anê.

Hãmri nhũm kuma nhũm ja kãm mex nê. Hãmri nhũm kãm kagà nhĩpêx nê kugō nhũm kupy nê hkôt mẽ pa xwÿnhjê mẽ ro hã ma Tamas wÿr mẽ hwÿr mōr kurê kumrêx.

³ Mōo mẽ ra hpōx o mōr mẽ nhũm puh kaxkwa rũm hirã rax kumrêx wrÿ nê hã ajêt nhũm hipōk ri xa.

⁴ Hãmri nê tee ri omu nê kãm ma xàj pykap tẽm nê akryk nō. Hãmri nhũm kaxkwa rũm mēhō kãm kapêr nê kãm:

–Pa Sawti? Hêxta waa nê. Kwa mon ka hte ixtomnuj tÿx o ri apa? Anê.

⁵ Hãmri nhũm amnhĩ jaêr pê kuma nê kãm:

–Kwa mẽ atō na ka ã inhmã akapêr anê pahihti? Anê.

Hãmri nhũm kãm:

–Kwa nhũm ixpê Jejus ixte amã ixkapêr kênã. Pa na ka hte ixpê ixkôt mẽ kot amnhĩ xunhwÿr xwÿnhjê nhĩpêx kati ho apa. Jao te pa ate ixtomnuj tÿx pyrãk. ⁶ Nom kot kaj axte ã amnhĩ nhĩpêx anhÿr kêt kumrêx. E kãnhmã xa nê mãmrĩ ma krĩ hwÿr tẽ. Kot kaj hwÿr pōj nhũm mēhō awÿr tẽ nê mẽmoj tã amã karō ka ama nê hkôt amnhĩ nhĩpêx. Anê.

⁷ Nhũm pre ã Jejus Sawti mã kapêr anê. Nhũm hkôt mẽ pa xwÿnhjaja mẽmoja ma no ãm hprĩ mar nê mẽmoj pumunh kêt nê. Hãmri nê tee ri hamaxpêr nê kãm ma xàj akryk kapêr kêt kumrêx nê kuhê. ⁸ Hãmri nhũm Sawti kãnhmã xa nom rĩt kêt nê tee ri rĩt mã nhũm mẽ hpa hã kupy nê ma krĩm o mō. ⁹ Nê Tamas wÿr o pōj

ně nhÿri mēhō nhōrkwÿ hwÿr ho axà nhũm kamā nohkre nē arĭ hkrĭ. Tee ri amnhĭ kukamā hamaxpēr o hkrĭ. Nē apkur kēt nē hkōm kēt o ra hā apkati axkrunēpxi.

¹⁰ Tamas kamā na pre mēhō my pē Ananĭsja pa. Kot Jejus kōt amnhĭ xunhwÿr xwÿnhjē hō na pre. Jakamā nhũm Jejus hwÿr kato nē kām kapēr. Te hpimtir kām hwÿr kator nē kām kapēr pyrā nē kām:

—Pa Ananĭs? Anē.

Nhũm kām:

—Ÿ? Ot pa xa. Mo na Pahihti? Anē.

¹¹ Nhũm Jejus kām:

—E kēr ka akato nē ma mē kot kām: “Pry katāt” anhÿr xwÿnhnta wÿr tē. Hāmri nē kamā Jut nhōrkwÿ japēr. Kamā na Tas nhō xwÿnh pē Sawtija hkrĭ. Na no hkre nē inhmā amnhĭ jarēnh o hkrĭ. Ka hwÿr axà nē omu. ¹² Ate hwÿr atēm nē inhÿ hā hā anhĭkra xir nhũm akupÿm rĭt mex kaxyw na ato amÿti. Jakamā e ma hwÿr tē nē ā hipēx anē. Anē.

¹³ Hāmri nhũm Ananĭs tee ri kuma nē kām Sawti puma ho amnhĭ kamā kahak nē. Hāmri nē kām:

—Kwa nà Pahihti. Tām na xep hte Jerujarē kamā mē kot amnhĭ kaxyw akōt mē hamaxpēr xwÿnhjē nhĭpēx kati ho pa. Pa ra mē hā harēnh ma. ¹⁴ Tā na xep ra jar Tamas wÿr pōj. Patre krāhtŭm kapēr nhÿ hā kot mē ixpē akōt amnhĭ xunhwÿr xwÿnhjē pynēnh nē ma akupÿm hwÿr mē ixto mōr kaxyw. Tān ka ri hwÿr ijano. Kwa nà ri ixto anhÿr kēt nē Pahihti. Anē.

¹⁵ Nhũm Jejus kām:

—Nà mamrĭ ma hwÿr tē. Ra ixte amnhĭ kaxyw ām kēnā. Jakamā koja ā mē anhĭpēx anhÿrta hpānhā ma mē piitā mē kām ixkapēr jarēnh o pa. Mē apē Ijaew mā nē mē anhō pahi hkwyjē mā nē mē kēp Ijaew kēt xwÿnhjē mā. Koja mē piitā mē kām ixkapēr jarēnh mex o ri mē hkōt pa. ¹⁶ Koja mē ixtā homnuj tÿx nē nhũm amnhĭ xà htÿx kamā hamak o pa. Nom kot paj ixprĭ hā mē kot tanhmā ixtā hipēx to hkukamā kām ixujarēnh pa nhũm amnhĭ kukamā

amnhĭ jarēnh ma. E tokyx māmri ma axāmnhĭx hwÿr tē. Anē.

¹⁷ Hāmri nhũm kuma nē kato nē ma Sawti hwÿr htēm kurē kumrēx. Hāmri nē ixkre hwÿr axà nē omu nē hkrā hā ĭhkra xi nē kām:

—Pa Jejus kōt ixtō Sawti? E na Pahihti Jejus awÿr inhmē pa awÿr tē. Pry kahti ri kot awÿr kator xwÿnhnta. Tā akupÿm arĭt nhũm Tĭrtŭm Karō kot akarō mā àr kaxyw na awÿr inhmē pa tē. Anē.

¹⁸ Hāmri nhũm mēmoj te tep kà pyrākja Sawti no rŭm hapōj nē rôrōk nhũm akupÿm rĭt mex kurē kumrēx. Hāmri nē kànhmā xa nhũm Ananĭs hkrā kumrā. Ra amnhĭ kaxyw Jejus kōt hamaxpēr ā hkrā kumrā. ¹⁹ Hāmri nhũm nhÿ nē apku nē akupÿm hihtÿx.

Sawti kot Tamas kamā Jejus kapēr jarēnh

Sikŭn Korĭt 11.22-23

Nhũm Sawti Tamas kām mē kot Jejus kōt amnhĭ xunhwÿr xwÿnhjē hkōt amnhĭ xām nē mē hkōt ri pa nē tokyx ma akupÿm mōr kēt nē. ²⁰ Kormā mē hkōt ri pa nē Ijaew nhō Tĭrtŭm kapēr o mē ahkre xà hā ixkre hwÿr mra nē kamā mē kām Jejus kapēr jarē. Kēp Tĭrtŭm Kra hā harēnh o kuhé. ²¹ Hāmri nhũm mē amnhĭ jaēr pē ā harēnh anhÿrja ma nē tee ri hamaxpēr nē axpēn mā:

—Kokÿÿ. Kwa tām na xep pre Jerujarē kamā amnhĭ kaxyw Jejus kōt mē kot amnhĭ xunhwÿr xwÿnhjē homnuj tÿx o pa. Tā xep jar kot mē hkwyjē pynēnh nē ma mē o mōr nē Jerujarē kamā patre krāhtŭmjē mā mē ōr kaxyw na pre man mē pahwÿr mō. Tā ra tanhmā hamaxpēr to nē axtem nē mē pamā Jejus kapēr jarēnh o mē pajahkre ho pa. Anē.

²² Hāmri nhũm Sawti arĭ Tamas kām Ijaew mā tanhmā Jejus jarēnh to kamā hihtÿx o mē hkōt pa nē mē kām:

—Nà Jejus Krisja na pre Tĭrtŭm mē pakaxyw ām nē mē pahwÿr kumē. Ām hāmri na pa mē amā ja jarē. Anē.

Hāmri nhũm mē kuma nē tee ri kutā tanhmā kapēr to hkukamā hamaxpēr.

²³ Tã ra hã apkati xohtô nê nhũm Tamas kãm Ijaew kwỳjaja kot Sawti pĩr kaxyw hã axpẽn ma. ²⁴ Hãmri nhũm mēhōja hã ama nê Sawti hwỳr tē nê kãm mē harē nê kãm:

—Kwa Sawti kēr ka axkãm ajamak rom. Na mē pahkwỳjaja atã amỹnē. Na mē ra krĩ puhã kahē xà hã hakwakre piitã hamār ho kuhē. Kot kaj nhỹhỹm akato nhũm mē apumu nē apynē nē apĩ. Anē.

²⁵ Jakamã nhũm kamàt nhũm Sawti hkôt ri mē pa xwỳnhjaja kawà rax ò mỳ nê hwỳr o tē nê kãm ãm nhũm hwỳr axà nê nhỹ. Hãmri nhũm mē hkagrĩ nê kēn o krĩ puhã kahēja nhĩrô pē ho wrỳ nhũm mē kēp kato nē ma mō.

Sawti kot Jejus kwỳjê hkôt pikamēnh ã harēnh

Karatas 1.15-24

²⁶ Tã nhũm Sawti krĩ pē Tamas rũm kato nē ma akupỹm Jerujarē hwỳr mō hãmri nē hwỳr pōj. Hãmri nē mē kot Jejus kôt amnhĩ xunhwỳr xwỳnhjê hkôt amnhĩ jarēnh kaxyw mē hwỳr tē. Hãmri nhũm mē tee ri amnhĩ wỳr omu nē kot Jejus kôt amnhĩ xãm ã amnhĩ to hēx ã hkamnhĩx hãmri nē amnhĩ kamã kahak o amnhĩ nē hkurē nē mē piitã kãm uma nē. ²⁷ ãm Panape pix ãm hãmri kot Jejus kôt amnhĩ xãm kôt hamaxpēr. Hãmri nē ma hwỳr tē nē haprô nē ma Jejus nhỹ hã mē ahkre xwỳnh maatijê hwỳr o tē nē yr pē mē kãm kapēr nē mē kãm:

—Kwa ãm hãmri na Sawti amnhĩ jarē. Na ra mē pahpyrà nē Jejus kôt amnhĩ xãm. Na xep pre Tamas wỳr pry hã kormã mō nhũm xep Pahihti Jejus hwỳr kato nē kaxkwa rũm kãm kapēr nhũm kuma nē hkôt amnhĩ xãm. Jakamã nhũm xep ra axtem kot amnhĩ nhĩpēx nyw o Tamas nhō xwỳnhjê mã Jejus kapēr jarēnh o ri mē hkôt pa. Ra amnhĩ kamã kãm mē uma hkôt nē àmnhĩx ri mē kãm harēnh o ri mē hkôt pa. Anē.

²⁸ Hãmri nhũm mē kuma nē amnhĩ kôt Sawti mē nhũm mē hkôt ri pa. Hãmri nē Jerujarē kamã mē piitã mē kãm Jejus kapēr jarēnh o pa. Kãm

Jejus kôt amnhĩ xunhwỳr kēt xwỳnhjê pyma hkôt nē àmnhĩx ri mē kãm kapēr jarēnh o ri mē hkôt pa. ²⁹ Nē Ijaew kwỳ pē Gresjê kapēr o mē kapēr xwỳnhjê mã nhũm xatã mē kãm Jejus jarēnh o ri mē hkôt pa. Kēp Tĩrtũm kot mē pakaxyw ãm xwỳnh ã harēnh rãhã ho ri mē hkôt pa. No nhũm mē kãm mar prãm kēt nē ra kot Jejus ã hpĩr mã. ³⁰ Hãmri nhũm mē kot Jejus kôt amnhĩ xunhwỳr xwỳnh kwỳjaja mē harēnh ma nē mē kēp ho kato nē ma krĩ pē Sejarej wỳr o mō. Hãmri nē kurũm ma akupỹm ò krĩ pē Tas wỳr kumē nhũm ma akupỹm mō.

³¹ Tã ra Sawti kot Jejus kôt amnhĩ xãm jakamã nhũm mē kãm mē hkurē xwỳnhjaja axte Jejus ã tanhmã hkwyjê hto hkôt nhũm mē piitã hamakētkati nē àmnhĩx ri pa. Pika pē Jutej kamã nē Garirej kamã nē Samar kamã nhũm mē piitã hamakētkati nē àmnhĩx ri pa. Hãmri nē Tĩrtũm mã mex o mex ã harēnh o ri pa. Nhũm Tĩrtũm Karō tanhmã mē hkrã hto nhũm mē ra kapēr kôt amnhĩ nhĩpēx mex o mō. Hãmri nhũm mē ohtô rax nē mē urak nē Jejus kôt amnhĩ xunhwỳ nē hkwyjê hkôt axkamē.

Enejti akupỹm mex ã harēnh

Atre 3.1-10

³² Tã nhũm Simãw Pētreja ma mē kot Jejus kôt amnhĩ xunhwỳr xwỳnhjê mã Tĩrtũm kapēr jarēnh o mē ahkre kaxyw ma krĩ piitã hkôt pa. Jakamã krĩ pē Rit wỳr mō ³³ nē hwỳr pōj nē kamã Enejti pumu. Nhũm ĩ kamã htyk pa nē kupĩp kãm hikwỹ rãhã hã amgrà pē 8. ³⁴ Hãmri nhũm Simãw Pētre omu nē Jejus nhỹ hã kãm kapēr nē kãm:

—Pa Enejti? E na Jejus Kris akupỹm ato mex. Jakamã e kãnhmã xa nē akupĩpta py. Anē.

Hãmri nhũm akupỹm mex nē kãnhmã xa nē amnhĩ pumu nē hkĩnh o hkĩnh. ³⁵ Hãmri nhũm krĩja kamã nē krĩ hō pē Sarō kamã mē piitã harēnh ma nē mē kot amnhĩ tomnuj kaga hpa nē hpãnhã Jejus kôt amnhĩ xunhwỳ nē hkôt amnhĩ nhĩpēx o pa.

Tapitre akupÿm htÿr ã harÿnh
Rukre 8.49-56; Atre 20.7-12

³⁶ Nhÿm Tapitreja krÿ pÿ Jope kamã na pre pa. Gres kapÿr kãm hixi pÿ Nokre. Mÿ kapÿr kãm Nokreja te kÿp “karã” anhÿr jarÿnh pyrãk. Na pre ra Tapitre pÿ Nokreja Jejus kôt amnhÿ xãm nÿ mÿ piitã mÿ ho mex o ri mÿ hkôt pa. Nÿ mÿ kÿp amrakati xwÿnhjÿ kamã ukaprÿ ho ri mÿmoj to mÿ kutã nojarÿt o ri mÿ hkôt pa. ³⁷ Tã ra à htÿx nÿ hãmri ty. Hãmri nhÿm mÿ tee ri omu nÿ hkaprÿ nÿ mÿr rax nÿ. Nÿ kumÿ nÿ kuhõ hãmri nÿ kormã haxàr kÿt ri kÿx pÿ ixkre kamã kuxi nÿ kuri mÿr o hkrÿ.

³⁸ Nhÿm Simãw Pÿtre kormã krÿ hõ pÿ Rit kamã ri pa. Rit rÿm Jope hwÿr jawÿ jakamã nhÿm Jope kamã mÿ kot Jejus kôt amnhÿ xunhwÿr xwÿnhjaja Simãw Pÿtre jarÿnh ma hãmri nÿ hwÿr ja wa ho hamÿxkrut nÿ wa kumÿ. Nhÿm wa ma hwÿr tÿ nÿ hwÿr pøj nÿ omu nÿ kãm:

—Pa? E jar na pa wa awÿr tÿ. Na Jejus kôt mÿ pahtõx Tapitre ham mÿ pahpÿ ty. Kwa tokyx kormã mÿ kot haxàr kÿt ri ma wa ixkôt hwÿr tÿn omu nã? Anÿ.

³⁹ Hãmri nhÿm wa kuma nÿ ma wa hkôt htÿm kurÿ kumrÿx. Hãmri nÿ Jope hwÿr pøj nÿ mÿ hwÿr tÿ nhÿm mÿ kÿx pÿ htyk nÿ nÿr xwÿnhja wÿr ho api nhÿm hwÿr axà. Nhÿm kuri mÿ kÿp mÿ mjÿn htyk xwÿnhjaja hkaprÿ nÿ mÿr o hkrÿ. Hãmri nhÿm Simãw Pÿtre mÿ hwÿr axà nhÿm mÿ omu nÿ kãm Tapitre kormã htÿr ri kot tanhmã mÿ ho mex to hã harÿ. Nÿ mÿ ê hkwy jamÿ nÿ kãm kupÿ nÿ kãm:

—Ga ja pumu. Tyk xwÿnhhta na pre mÿ inhmã hkay nÿ kugõ. Na pre hte mÿ ixto mex o pa. Tã mÿ ixpÿ ty. Hÿxta gãa nÿ. Na pa mÿ ixkaprÿ htÿx kumrÿx. Anÿ.

⁴⁰ Hãmri nhÿm mÿ kuma nÿ mÿ kator pa hãmri nÿ htyk xwÿnhhta ri hkõn krã ho nhÿ nÿ ho Tÿrtÿm wÿ. Hãmri nÿ htyk xwÿnhhta mã kapÿr nÿ kãm:

—Pa Tapitre? E kwa kãnhmã nhÿ. Anÿ.

Pu nhÿm no amra nÿ Simãw Pÿtre pumu nÿ kãnhmã nhÿ. ⁴¹ Hãmri nhÿm

hpa hã kupy nÿ kãnhmã ãm nÿ kapôt ã mÿ kuhÿ xwÿnhjÿ mã anÿ nhÿm mÿ akupÿm wa hwÿr agjÿ nhÿm mÿ kãm:
 —E ota. Na Tÿrtÿm akupÿm mÿ amã ho htÿr. Anÿ.

Hãmri nhÿm mÿ amnhÿ jaÿr pÿ omu nÿ hkÿnh tÿx nÿ. ⁴² Hãmri nhÿm Jope kamã mÿ piitã harÿnh ma nÿ mÿ ohtõ nÿ amnhÿ kaxyw Jejus kôt hamaxpÿr nÿ hkôt amnhÿ xunhwÿ. ⁴³ Hãmri nhÿm Simãw Pÿtre Jope kamã ri pa hã apkati xohtõ nÿ tokyx mÿ kurÿm kato nÿ ma krÿ hõ hwÿr mÿr kÿt nÿ. Na pre mry kã ho mÿmoj nhÿpÿx o pa xwÿnh pÿ Simãw ri pøj nÿ kuri pa hã apkati xohtõ nÿ.

10

Konÿre kot Simãw Pÿtre hã karõ hã harÿnh

Rukre 7.1-10

¹ Tã nhÿm Ijaew kÿt xwÿnh Konÿre. Kÿp Rõmjÿ nhõ pÿristi krãhtÿm na pre. Õ pÿristija pika pÿ Itar nhõ xwÿnh na pre mÿ nhÿm Konÿre kÿp mÿ hkrãhtÿm. Krÿ pÿ Sejarej kamã.

² Konÿreja kot amnhÿ to mex o pa xwÿnh na pre. Kÿp Ijaew kÿt tã na pre hte òrkwy kamã hkwyjÿ mÿ Tÿrtÿm ã hpjiaàm nÿ kãm mex o mex ã harÿnh o pa. Apkati mÿ kãm amnhÿ jarÿ. Nÿ mÿ kÿp amrakati xwÿnhjÿ mã kãxpore hkwy nhõr o pa. ³ Jakamã nhÿm mÿmo arÿgro hã ra myt japanh grire nhÿm mÿmoj pumu. Te hpimtir kãm kot omunh pyrã nÿ kaxkwa kamã Tÿrtÿm kapÿr o wrÿk xwÿnh pumu. Nhÿm hwÿr wrÿ nÿ tanhmã kãm kapÿr to nÿ kãm:

—Pa Konÿre? Anÿ.

⁴ Nhÿm tee ri omu nÿ kãm ma htÿx kumrÿx. Hãmri nÿ kãm:

—Mo na? Anÿ.

Hãmri nhÿm kãm:

—Nã ate amnhÿ to Tÿrtÿm wÿr o apaja nhÿm ra amnhÿ tã ama nhÿm ja kãm mex nÿ. Nÿ ate mÿ kÿp amrakati xwÿnhjÿ mã kãxpore hkwy nhõr o apaja nhÿm ja mãânÿn kãm mex nÿ.

⁵ —Jakamã e inhma. Kÿr ka ma Jope hwÿr amã mÿ àpÿnh xwÿnh kwÿ rÿ kÿ mÿ ma hwÿr mra nÿ kamã mÿhõ pÿ Simãw Pÿtre japrõ nÿ man akupÿn

awÿr o mō. ⁶ Simāw kot mry kà ho mēmoj nhîpêx o pa xwÿnhhta nhōrkwÿ kamā na hte pa. Ōrkwÿja gō mÿ ri na. E hwÿr mē arē kē mē ma hwÿr mō nē haprō nē man awÿr o mō kē amā mēmoj mex jarē ka ama. Anē.

⁷ Nhūm pre ã Tîrtūm kapēr o wrÿk xwÿnhja Konēre mā kapēr anē hāmri nē kato nē ma akupÿm api. Hāmri nhūm kot mar xà hkôt jajē rē nē Simāw Pêtre hwÿr mē kurē. Kām àpēnh xwÿnhjê ho hamēxkrut nē kaxyw ò pôristi hō. Pôristija na pre hte Konēre pyrā nē Tîrtūm ã hpijaam o pa. ⁸ Jakamā nhūm mē kurē nē mē kām kapēr hāmri nē ma Jope hwÿr Simāw Pêtre hwÿr mē kurē nhūm mē kato nē ma hwÿr mō. ⁹ Hāmri nhūm apkati nhūm kaxkwa nhîpōk ri myt nhÿ nhūm mē hwÿr hpōx o mō.

Simāw Pêtre tanhmā hpimtir to hā harēnh

Atre 11.5; Karatas 2.11-21

Rôm nhūm Simāw Pêtre kot Tîrtūm mā amnhî jarēnh kaxyw ixkre nhîmōk ã api nē himōk po hā kām amnhî jarēnh o nhÿ. ¹⁰ Hāmri nē ra kām prām nē nom nhūm mē kormā kām ò hā àpēnh jakamā nhūm arî ixkre nhîmōk ã Tîrtūm mā amnhî jarē.

Hāmri nē Konēre pyrā nē te hpimtir kām kot mēmoj pumunh pyrā nē mēmoj pumu nhūm Tîrtūm Konēre hkukamā tanhmā kām mēmoj to amnhîrit to. No ãm hā kuxi nē kām harēnh jakamā nhūm Simāw Pêtre te hpimtir kām kot mēmoj pumunh pyrā nē mēmoj pumu. ¹¹ Nhūm kaxkwa katēr nhūm kurūm mēmoj te kot mē hpiipro xà pyrāk xwÿnhja pyka hwÿr wrÿk o mō. Nē hatur xà piitā axpēn tā akuprō nē ajēt nē wrÿk o mō nhūm omu. ¹² Mē hpiipro xàta kamā mēmo mry piitā hikwÿ. Mēmo mry hpar o ri pa xwÿnhjaja nē htu mÿr pē ri pa xwÿnhjaja nē mēmo àk kÿx pē htor o ri mrrar xwÿnh piitā mē hpiipro xàja kamā hikwÿ nhūm omu. ¹³ Hāmri nhūm Tîrtūm kām:

—Pa Simāw Pêtre? Mãn ka ra amā prām nē nà? E kànhmā xa nē axàmnhîx māmri mryta ò kapi nē apî

nē ho anē nē aku. Piitā mē ate hkur mā mex. Anē.

¹⁴ Hāmri nhūm tee ri kuma nē kām: —Kwa nà Pahi Maati. Mē ixpē Ijaew mē ixte mry piitā hkur kêt. ãm hkwy pix na pa htem kuku. No mry jaja aa mē ixte hō hkwy hkrēr kêt. Anē.

¹⁵ Hāmri nhūm Tîrtūm kām: —Nà kot anhÿr tā kot paj pam amā mēmoj jarē ka kamā anhōkre kahak kêt nē. Māmri amnhîm hō kapi nē apî nē ho anē nē axàmnhîx hkwy hkre. Anē.

¹⁶ Nhūm pre ã kām mry hā karō anhÿr o axkrunēpxi. Simāw Pêtre kot māmri Ijaew kêt xwÿnhjê hkôt pa nē àmnhîx ri mē kutā apkur nhūm Tîrtūm kām ja mex nhūm kot hā amnhî pumunh kaxyw nhūm ã kām harēnh anhÿr o axkrunēpxi. Hāmri nhūm mē hpiipro xàja ma akupÿm kaxkwa hwÿr àpir o mō nē akunok. ¹⁷ Hāmri nhūm Pêtre te hkrākator pyrāk jao tee ri hpimtir kukamā hamaxpēr o nhÿ nē hamaxpēr o:

—Kwa mo kaxyw na Tîrtūm ã inhmā ja hā karō anē? Anē.

Rôm nhūm Konēre kot hwÿr mē rēnh xwÿnhjaja ra hwÿr hpōx o mō. Ijaew kêt xwÿnhjtaja Simāw nhōrkwÿ hā mē hkukjēr o mō nē hwÿr pōj nē hakwakrem kuhê. ¹⁸ Hāmri nē ōrkwÿ nhō xwÿnhjê mā kām:

—Pa na ka mē arî akrî? E Simāw Pêtre hwÿr na pa mē mō. Xà jar na hte pa nà? Anē.

Hāmri nhūm mē kām: —Tÿ. Omÿj kÿx pē ixkre nhîmōk ã na nhÿ. Anē.

¹⁹ Nhūm Simāw Pêtre arî kot mēmoj pumunhta kukamā hamaxpēr o nhÿ nhūm Tîrtūm Karō kām mē hpōx xwÿnhjê jarē nē kām:

—E Simāw Pêtre. Ota Ijaew kêt xwÿnhjaja axkrunēpxi nē ajapēr o mō nē ra anhōrkwÿ hwÿr pōj. ²⁰ Mē hwÿr wrÿ nē mē kot amā mēmoj jarēnh ma nē māmri axàmnhîx ma mē hkôt mō. Tanhmā ajamaxpēr to hkêt nē. Pa na pa awÿr mē kumē nhūm mē mō. Anē.

²¹ Hāmri nhūm kuma nē mē hwÿr wrÿ nē mē omu nē mē kām:

—Pa? Xà pa na ka mẽ ijapêr o mõi? E ot pa xa. Kam nẽ mẽ inhmã mẽmoj jarẽ pa mẽ ama. Mẽmo kaxyw na ka mẽ ixwỳr mõi? Anẽ.

²² Hãmri nhũm mẽ kãm:

—Nà mẽ inhõ patrãw Konẽre na awỳr mẽ inhmẽ pa mẽ mõi. Na hte tãm amnhĩ nhĩpêx o pa. Nẽ Tĩrtũm ã hpijaàm nẽ kãm mex o mex ã harẽnh o pa. Nhũm mẽ inhõ krĩ kamã Ijaew kãm hkĩnh nẽ. Tã na Tĩrtũm kapêr o wrỳk xwỳnhja ham hwỳr wrỳ nẽ kãm ajarẽ. Kot amnhĩ wỳr atã karõ nhũm ate hwỳr amõr nẽ kãm axujarẽnh kaxyw kãm ajarẽnh jakamã nhũm mẽ ixte ajaprõr kaxyw awỳr mẽ inhmẽ pa mẽ man awỳr mõi. Anẽ.

²³ Hãmri nhũm mẽ kuma nẽ mẽ kãm:

—Tõe nà na pa mẽ ama. E mẽ agjê nẽ akrĩ nẽ jar mẽ ixri nõ kê apkati pu mẽ rĩ ma akupỹm mõi. Anẽ.

Hãmri nhũm mẽ kuma nẽ mẽ hwỳr agjê.

Tã nhũm apkati nhũm mẽ akupỹm nojarêt nhũm Simãw Pêtre ma mẽ hkõt mõi. Nhũm Jope kamã mẽ kot Jejus kõt amnhĩ xunhwỳr xwỳnh kwỳjaja ma mẽ hkõt mõi. Nhũm mẽ mõi o kamãt.

²⁴ Hãmri nhũm apkati nhũm mẽ Sejarej wỳr hpõx o mõi. Nhũm ra Konẽre mẽ kutêp amnhĩ wỳr hkwỳjê ho akuprõ nhũm mẽ Simãw Pêtre kutêp õrkwỹ kamã akuprõ nẽ hkrĩ.

²⁵ Hãmri nhũm mẽ hwỳr pøj nẽ mẽ hwỳr àr kaxyw nhũm Konẽre amnhĩ wỳr omu nẽ kànhmã xa nẽ kutã tẽ nẽ hpar pẽ hkõnkrã ho tẽm nẽ nhỹ.

²⁶ Hãmri nhũm tee ri ja hã omu nẽ pa hã kupy nẽ kànhmã ãm nẽ kãm:

—Kwa kànhmã xa. Ixpê Tĩrtũm kêt tã ka ri ã inhĩpêx anẽ. Anẽ.

²⁷ Hãmri nẽ hkõt õrkwỹ hwỳr axà nẽ kutêp mẽ pikuprõnh xwỳnhjê pumu nẽ mẽ kãm:

²⁸ —Pa na ka mẽ arĩ akrĩ? E mãn ra mẽ ate mẽ ixpê Ijaew kot amnhĩ nhĩpêx ã mẽ ixpumunh mex. Na pa htem mẽ apê axtem nhõ xwỳnhjê hkõt ri ixpa hkêt nẽ. Nẽ mẽ anhõrkwỹ hwỳr inhgjêx kêt nẽ. Tã ham Tĩrtũm

inhmã mẽ ixte ã amnhĩ nhĩpêx anhỹr o ixpaja nẽ ixkurê nẽ inhmã: “Kot paj pam mẽ hkwỳjaja mex ã mẽ harẽ ka mẽ kamã anhõkre kahak kêt nẽ.”

²⁹ —Anhỹr jakamã ka xep pre ixtã karõ pa inhĩtõt kêt nẽ man mẽ awỳr inhmõr kurê kumrêx. E mẽ inhmã mẽmoj jarẽ pa mẽ ama. Mẽmo kaxyw na ka mẽ ixtã karõ? Anẽ.

³⁰ Hãmri nhũm Konẽre kãm:

—Nà jãa na pa pre jar inhõrkwỹ kamã Tĩrtũm mã amnhĩ jarẽnh o nhỹ. Ra myt xàpanh grire pa kãm amnhĩ jarẽ. Hãmri nhũm Tĩrtũm kapêr o wrỳk xwỳnh ixwỳr wrỳ nẽ hirã rax kãm xa. ³¹ Hãmri nẽ inhmã: “Pa Konẽre? E na hte Tĩrtũm ate kãm amnhĩ jarẽnh ta mar o hkrĩ. Nẽ ate mẽ kêp amrakati xwỳnhjê ho mex o apaja nhũm hã apumu.

³² Jakamã e ma Jope hwỳr amã mẽ àpênh xwỳnh kwỳ rẽ kê mẽ ma hwỳr mõi nẽ kamã Simãw Pêtre japrõ nẽ man akupỹn awỳr o mõi. Mry kà ho mẽmoj nhĩpêx o pa xwỳnh Simãw nhõrkwỹ kamã na hte pa. Õrkwỹja gõ mỳ ri na.” Anẽ.

³³ —Ã kot inhmã kapêr anhỹr jakamã na pa kuma hãmri nẽ awỳr jajê rênh kurê kumrêx. Tã ka mẽ hkõt man mẽ ixwỳr mõi nẽ ã apõx anẽ. ãm hãmri na ka mẽ hkõt mõi. Mẽ apê Ijaew kot amnhĩ nhĩpêx kuhpa hã amnhĩ nhĩpêx nẽ axãmnhix man mẽ ixwỳr mõi. Tã ot pa mẽ Tĩrtũm noo mã ixkrĩ. Kam nẽ mãmri ã hã mẽ inhmã mẽmoj jarẽ pa mẽ ama. Anẽ.

Simãw Pêtre kot Konẽre mã ujarênh

³⁴ Hãmri nhũm Simãw Pêtre Konẽre kot kãm amnhĩ jarẽnhja ma nẽ mẽ kãm awjarẽ nẽ mẽ kãm:

—Nà ãm hãmri na Tĩrtũm mẽ akukamã tanhmã inhmã kapêr to. Xep kãm mẽ ixpê Ijaew pix japê hkêt. Kãm mẽ pahpiitã mẽ pajapê nẽ mẽ panhĩpêx o axpên pyrãk. ³⁵ Kojã ahpỹnhã pyka piitã hkõt mẽhõ mẽ ixpyrà nẽ kêp Ijaew kêt tãã hkõt amnhĩ xãm nẽ hã hpijaàm pẽ kãm mex o mex ã harẽ nẽ tãm amnhĩ nhĩpêx. Hãmri nhũm Tĩrtũm ja hã omu nhũm ja kãm mex nẽ.

36 —Na pre ra mẽ ixpê Ijaew mã tanhmã Kra Jejus Kris jarênh to. Jejus kot mẽ panê htyk kukwak ri na hte mẽ ixte hkôt amnhĩ xunhwÿr xwÿnhjê ho hkra. Tã ra mãânên ã mẽ apê Ijaew kêt xwÿnhjê mã ã amnhĩ jarênh anê nê Jejus htyk kukwak ri mẽ ate mẽ ixpyrà nê hkôt amnhĩ xunhwÿr xwÿnhjê ho hkra. Jakamã Jejus Krisja kêp mẽ pahpiitã mẽ panhõ Pahihtĩ.

37-38 —Mãn ka prem ra harênh ma. Mẽ ixpê Ijaew nhõ pika pê Jutej kumrêx kãm na pre Juãw Paxisja Jejus kukamã mẽ kãm harê nê mẽ hkrã kumrãr o pa. Mẽ piitã mẽ kot amnhĩ tomnuj kaga nê Tirtũm kôt amnhĩ xunhwÿr ã mẽ omunh xà hkôt mẽ hkrã kumrã. Jejusja krĩ pê Najare kamã na pre hprêk. Tã hwÿr na pre Tirtũm amnhĩ Karõ mẽ nhũm wrÿ nê hkarõ mã axà nê hkôt pa ho pa. Jakamã nhũm àhpumunh o àhpumunh nê ma krĩ piitã hkôt tanhmã mẽ ho mex to ho ri mẽ hkôt pa. Pika pê Garirej kumrêx kamã mẽ piitã ri mẽ kãm Tirtũm kapêr jarênh o pa. Nê mẽkarõmnuti kot Satanasti nhÿ hã tanhmã mẽ ho xwÿnhjaja nhũm mẽ nê mẽkarõmnuti japôx o pa. ã na pre Tirtũm nhÿ hã amnhĩ nhĩpêx anhÿr o pa.

39 —Tã Jejus nhÿ hã hkrajê jahkre ho mẽ ixpa xwÿnhjaja na pa prem kot ri tanhmã amnhĩ to ho pa hã omunh par o ri hkôt ixpa. Mẽ ixpê Ijaew nhõ pyka kamã nê mẽ inhõ krĩ pê Jerujarê kamã kot ri tanhmã amnhĩ nhĩpêx to ho paja pa prem piitã omunh o hkôt ri ixpa. Tã nhũm prem axtem nê mẽ ixpê pĩ kahpa hã kunhõ nê kupĩ. 40 Hãmri nhũm htyk o apkati axkrunêpxi nhũm Tirtũm akupÿm ho htĩr nê akupÿm mẽ ixwÿr kumẽ pa prem akupÿm htĩr kãm omu. 41 No nhũm mẽ piitã akupÿm htĩr kãm omunh kêt nê. ãm mẽ ixwÿr pix na pre kato nê mẽ ixkutã apku pa mẽ papxipixjaja akupÿm htĩr ã omu. Hãmri nhũm Tirtũm mẽ ixte ma mẽ piitã mẽ kãm akupÿm htĩr ã harênh o ri ixpa kaxyw mẽ ixrê.

42-43 Amnepêm Tirtũm nhÿ hã kapêr jarênh o mẽ pa xwÿnhjaja na prem Jejus kukamã tanhmã hã kagà hto nê mẽ kãm harênh o pa. Nê mẽ kãm:

Koja nhÿrmã mēhōja man mẽ pahwÿr wrÿ nê mẽ panê tanhmã amnhĩ nhĩpêx to. Ka mẽ atõ amnhĩ kaxyw hkôt ajamaxpêr nê hkôt amnhĩ xãm hã koja Tirtũm ja hã apumu nê mēhō kot tanhmã mẽ panê amnhĩ nhĩpêx to xwÿnhhta kukwak ri amnhĩ katut kôt ate amnhĩ tomnuj rēnh pa nê axte kãm hamaxpêr kêt nê. Anê.

Na pre Tirtũm nhÿ hã kapêr jarênh o mẽ pa xwÿnhjaja Jejus kukamã ã harênh nê hã kagà anê. Tã koja Jejus nhÿrmã akupÿn wrÿ hãmri nê mẽ htyk xwÿnhjê nê arĩ mẽ htĩr xwÿnhjê mẽ pahto pimràatã tanhmã mẽ pajarênh to. Mẽ pahte tanhmã amnhĩ nhĩpêx to ho papa hã mẽ pahpumunh kôt tanhmã mẽ pajarênh to. Hãmri nê Tirtũm mẽ wa kuri mẽ pahtĩr tũm nê mẽ papa ho papa mã xwÿnhjê jarê nê mãânên wa kuri mẽ htĩr tũm kêt xwÿnhjê jarê. Mẽ pahpiitã tanhmã mẽ pajarênh to kaxyw na pre Tirtũm mẽ pakaxyw Jejus xãm. Tã ã kot mẽ pajarênh anhÿrja kukamã na pre mẽ ixte mẽ amã tanhmã harênh to ho ixpa kaxyw mẽ awÿr mẽ ixrê. Mẽ ate kapêr mar nê tokyx Jejus kôt amnhĩ xunhwÿr kaxyw. Anê.

44 Nhũm Simãw Pêtre ã mẽ kãm ujarênh anhÿr rôm nhũm Tirtũm mẽ kot mar o hkrĩ xwÿnhjê hwÿr amnhĩ Karõ rē nhũm mẽ hwÿr wrÿ nê mẽ hkarõ mã gjêx pa. 45-46 Hãmri nhũm mẽ Tirtũm mã mex o mex ã harênh o hkrĩ. No ãm mẽ kapêr kãm harênh kêt nê. Mẽ kapêr kwÿ hõ ho kãm mex o mex ã harê. Aa mẽ kot mẽ kapêr mar kêt tã ra ho kapêr mex nê. Jakamã nhũm Jope rũm mẽ kot Simãw Pêtre hkôt mẽ mōr xwÿnhjaja. Ijaew kwÿ kot ra Jejus kôt amnhĩ xunhwÿr xwÿnhjaja amnhĩ jaer pēja hã mẽ omu nê axpēn mã:

—Hêxta waa nê. Mẽ kêp Ijaew kêt tã nhũm Tirtũm kot mẽ panhĩpêx pahpyrà nê mẽ hwÿr amnhĩ Karõ rē

nhũm mẽ hwỳr wrỳ nē mẽ kām agjê. Nà ãm hāmri na mẽ pahpyrà nē ã mẽ hipêx anê. Anê.

Hāmri nhũm Simāw Pêtre mẽ kuma nē mẽ kām:

⁴⁷ –Kwa pu mẽ hkrã kumrãr kurê kumrêx. Ra Tirtũm Karõ kot mẽ pahpyrà nē mẽ hkarõ mã gjêx kênã kot kêt mēhõ mẽ nē tanhmã mẽ pahpê àmnàr to. Ra mẽ kot mẽ pahpyrà nē Jejus kôt amnhĩ xunhwỳr kênã. Anê.

⁴⁸ Hāmri nē Konêre mẽ hkwỳjê mã kām:

–E kot paj mẽ ate Jejus Kris kôt amnhĩ xunhwỳr ã mẽ akrã kumrã. Anê.

Hāmri nē mẽ hkrã kumrãr pa nhũm mẽ Simāw Pêtre mã kām:

–Kwa kormã anojarêt kêt nê. Kritpêm ri mẽ ixkôt ri apa hã atã apkati grêre nê kormã ma akupỹm mō. Anê.

Hāmri nhũm mẽ kuma nē mẽ hkôt ri pa hã apkati grêre hāmri nē nojarêt nē ma akupỹm mō.

11

Simāw Pêtre kot hkwỳjê mã Konêre jarênh

Atre 10.1-48

¹⁻² Hāmri nhũm Simāw Pêtre ma akupỹm mō. Jutej kamã krĩ pê Jeru-jarê wỳr ma akupỹm mō hāmri nē pøj. Hāmri nhũm Jutej kamã Jejus nhỹ hã mẽ ahkre xwỳnh maatijê mẽ mẽ kot Jejus kôt amnhĩ xunhwỳr xwỳnhjaja Ijaew kêt xwỳnhjê jarênh ma. Konêre mẽ hkwỳ kot mẽ uràk nē Jejus kôt amnhĩ xunhwỳr ã mẽ harênh ma. Jakamã nhũm Simāw Pêtre akupỹm mẽ hwỳr pøj nhũm mẽ omu nē mẽ hã àhkukjêr kurê kumrêx. Hāmri nhũm mẽ hkwỳjaja mẽ hã kām akir nē kām:

³ –Kwa mẽ pahpê Ijaew pyrà nē mẽ kot amnhĩ my kwryt kà jakàr kêt tã ka mẽmo hwỳr mẽ hwỳr mō mẽ kuri pøj nē mẽ kutã apku. Anê.

⁴ Hāmri nhũm Pêtre tee ri mẽ kuma hāmri nē hprĩ hã mẽ kām amnhĩ jarê. Nē tanhmã Tirtũm kot kām Ijaew kêt xwỳnhjê jarênh to hã mẽ kām harê nē mẽ kām:

⁵ –Kwa mẽ ã ri ajamaxpêr anhỳr kêt nê. E pa mẽ amã amnhĩ jarê ka mẽ inhma măn. Nà na pa pre jãã Jope kamã Tirtũm mã amnhĩ jarênh o nhỹ nê te ixpimtir kām mẽmoj pumunh pyràk. Nhũm mẽmojja te mẽ hpiipro xà pyrà nē kaxkwa rũm ixwỳr wrỳk o mō pa ixprĩ hã omu. ⁶ Nhũm kamã mry piitãã. Mry xoprê nē mry xuwapô nē mry hpar o ri pa xwỳnhjaja nē mry htu mỳr pê ri pa xwỳnhjaja nê àk. Nē mẽ pahte hkur xwỳnhjaja nē mẽ pahte hkur kêt xwỳnhjaja. ⁷ Kamã mry piitã pa omu. Hāmri nhũm Tirtũm inhmã: “Pa Simāw Pêtre? Mãn ka ra amã prãm nē nà? E kànhmã xa nē axàmnhĩx mãmri mryta õ kapi nē apĩ nē ho anê nē aku. Piitã mẽ ate hkur mã mex.” Anê.

⁸ –Pa tee ri kuma nē kām: “Kwa Pahi Maati. Mẽ ixpê Ijaewjaja mẽ ixte mryja piitã hkur kêt. Æm hkwỳ hpix na pa htem kuku. No ja hkwỳ aa mẽ ixte hõ hkwỳ hkrêr kêt.” Anê. ⁹ Nhũm inhmã: “Nà nom kot anhỳr tãã. Kot paj pam amã mẽmoj jarê ka kamã anhõkre kahak kêt nê. Jakamã e mãmri amnhĩm hõ kapi nē apĩ nē ho anê nē axàmnhĩx hkwỳ hkrê.” Anê.

¹⁰ –Na pre ã Ijaew kêt xwỳnhjê hwỳr inhmõr kukamã inhmã karõ ho axkrunêpxi anê. Nom hã kuxi nē inhmã mẽ pahte mry kur kêtta jarê. Hāmri nhũm mẽ hpiipro xàja ma akupỹm kaxkwa hwỳr api nē kakrãm axà nē akunok. ¹¹ Hāmri nhũm Ijaew kêt xwỳnhjaja mẽ ixwỳr axkrunêpxi nē mra nē pøj. Konêreja Sejarej rũm ixwỳr mẽ rênh xwỳnhjaja nhũm mẽ mra nē ixwỳr pøj. ¹² Hāmri nhũm Tirtũm Karõ ma mẽ hkôt inhmẽ. Mẽ kêp Ijaew kêt tã nhũm ixàmnhĩx ma mẽ hkôt ixpa kaxyw mẽ hkôt inhmẽ pa ma mẽ hkôt mō. Nhũm Jope kamã mẽ kot Jejus kôt amnhĩ xunhwỳr xwỳnh kwỳjaja kêp 6ja ma mẽ ixkôt mō. Pa mẽ mō nē Sejarej kamã Konêreja wỳr pøj. ¹³ Hāmri nhũm mẽ ixpumu nē mẽ inhmã amnhĩ jarê. Tirtũm kapêr o wrỳk xwỳnh kot hwỳr wrỳk nē õrkwỹ hwỳr àr nē tanhmã kãm kapêr toja nhũm inhmã harê. Na

xep pre kām: “E kêr ka ma Jope hwÿr amā mẽ àpênh xwÿnh kwÿjê rē kê mẽ ma hwÿr mō. Hāmri nē kamā Simāw Pêtre japrō nē man akupÿn awÿr o mō kê tanhmā mẽ amā ujarênh to. ¹⁴ Koja mẽ amā tanhmā mẽ apê Tirtūm kra hprām xàj tanhmā mẽ ate amnhĩ nhĩpêx to hã mẽ amā karō ka mẽ ama nē mar tÿx nē hkôt amnhĩ nhĩpêx. Ka mẽ anhōrkwÿ kamā akwÿjê mẽ apim-ràatā ama nē mar tÿx nē. Hāmri nē kot mẽ amā hã karō xà hkôt amnhĩ nhĩpêx nhũm Jejus mẽ ate amnhĩ tomnuj pē mẽ apytār pa.” Anē.

—Na xep pre ã Tirtūm kapêr o wrÿk xwÿnhja kām ijarênh anē. Jakamā nhũm ixwÿr jajê rē pa ma mẽ hkôt mō. ¹⁵ Hāmri nē kormā mẽ kām tanhmā Jejus jarênh to. Tanhmā kot mẽ panê amnhĩ nhĩpêx to hã harê. Nē kormā mẽ kām ixujarênh o ixām rôm nhũm Tirtūm Karō te wam kot mẽ panhĩpêxta pyrā nē mẽ hwÿr wrÿ nē mẽ hkarō mã gjêx pa. ¹⁶ Pa ja hã mẽ omu nē Pahihti Jejus kot akupÿm kaxkwa hwÿr nojarêr nē tanhmā mẽ pamā kapêr tota mã ijamaxpêr kurê kumrêx. Na pre mẽ pamā: “Finat Juāw Paxis na pre hte gō ho mẽ hkrā kumrār o pa. Tã koja Tirtūm ta hpānhã mẽ awÿr amnhĩ Karō rē nhũm mẽ akarō mã agjê.” Anē.

—Ã na pre Pahihti Jejus akupÿm nojarêr nē mẽ pamā kapêr anē. Jakamā pa ã kot mẽ hipêx anhÿr ã mẽ omu nē ã kapêr anhÿrja mã ijamaxpêr kurê kumrêx. ¹⁷ Na pu prem Pahihti Jejus Kris kôt amnhĩ xunhwÿ nhũm Tirtūm ja hã mẽ pahpumu nē mẽ pahwÿr amnhĩ Karō rē. Tã te kot mẽ panhĩpêxta pyrā nē mãänên Ijaew kêt xwÿnhtajê hwÿr kurê nhũm mẽ hkarō mã agjê. Mẽ kêp Ijaew kêt tã nhũm mẽ pahpyrà nē mẽ hwÿr kurê nhũm mẽ hkarō mã agjê. Tirtūm tãm kot amnhĩ krā hkôt mẽ hwÿr rênh kênã kot pa kêt mẽ nē tanhmā kêp ixamnār to. Anē.

¹⁸ Nhũm pre ã Simāw Pêtre mẽ kām amnhĩ jarênh anē nhũm mẽ kuma nē tãm hamaxpêr nē hkĩnh nē. Nē axte mẽ hã tanhmā kām nē hkêt nē. ãm

mẽ hã Tirtūm mã mex o mex ã harê. Hāmri nē axpên mã:

—Nà ãm hāmri. Mẽ kêp Ijaew kêt tã na prem Jejus kôt amnhĩ xunhwÿ nhũm Tirtūm kot mẽ panhĩpêxta pyrā nē amnhĩ katut kôt mẽ kot amnhĩ tomnuj rênh pa. Nhÿrmã wa hkuri mẽ pahpyrà nē htÿr tũm nē pa ho pa kaxyw nhũm ã mẽ hipêx anē. Nà ãm hāmri na ã kot mẽ panhĩpêx pyrā nē mẽ hipêx anē. Anē.

ãxiok kamā Jejus kwÿ jarênh

Atre 4.36-37

¹⁹ Tã ra mẽ kot kên o Estewāw kapêr o hpÿr xwÿj ri mẽ kot ã hipêx anhÿrta pyrā nē mẽ kot Jejus kôt amnhĩ xunhwÿr xwÿnhjaja omnuj tÿx o pa. Jakamā nhũm mẽ hkwyjaja mẽ umaj ma ahpÿnhã krĩ hkwy hkôt pigrānh pa. Wênis wÿr nē Sipre hwÿr nē ãxiok hwÿr nhũm mẽ ma ahpÿnhã krĩ hkwy hkôt anhgrā nē kamā pa ho pa. Nē mẽ kām tanhmā Pahihti Jejus kot mẽ panê amnhĩ nhĩpêx to hã harênh o ri mẽ hkôt pa. No ãm kormā Ijaew pix mã harênh o pa.

²⁰ Tã hāmri nhũm mẽ hkwyjaja Sipre mẽ Sirên rũm ãxiok hwÿr pan pōj. Hāmri nē kamā mẽ kêp Ijaew kêt xwÿnhjê mã Pahihti Jejus kot amnhĩ nhĩpêx jarênh o pa. ã mẽ kot amnhĩ nhĩpêx anhÿr jakamā na mẽ ra ahpÿnhã ri mẽ kām harênh o ri pa. Ijaew mã nē mãänên Ijaew kêt xwÿnhjê mã ²¹ nhũm mẽ ma mẽ hkôt ri Pahihti Jejus nhÿ hã mẽ kām kapêr jarênh o ri mẽ hkôt pa. Hāmri nhũm mẽ ohtō nē amnhĩ nhĩpêx tũm kaga hpa nē hpānhã amnhĩ kaxyw Jejus kôt hamaxpêr nē hkôt amnhĩ xunhwÿ.

²² Hāmri nhũm Jerujarê kamā Jejus kwÿjaja mẽ harênh ma nē mẽ hwÿr Panāpe mẽ. ãxiok hwÿr mẽ hwÿr kumê. Ma mẽ hwÿr mōr nē Jejus kôt mẽ hamaxpêr o hihtÿx kaxyw. ²³ Hāmri nhũm mã mẽ hwÿr mō nē mẽ hwÿr pōj nē mẽ omu. Tirtūm kot mẽ ho mex ã mẽ omu hāmri nē mẽ ÿ hã hkĩnh nē. Nē mẽ kām:

—Nà ãm hāmri na ka mẽ ra Jejus kôt amnhĩ xunhwÿ nē hkôt amnhĩ

nhîpêx mex o ri apa. Tã kêr ka mẽ ãm kapêr kôt pix mã ri amnhî nhîpêx rãhã ho ri apa nê aa hkaga hkêt nê. Anê.

²⁴ Panãpeja na pre tãm amnhî nhîpêx o pa. Nê amnhî kaxyw Jejus kôt pix mã hamaxpêr mex o pa. Nê Tirtũm Karõ hkôt amnhî nhîpêx rãhã jakamã na pre hte ÿ hã mẽ kãm Pahihti Jejus kot mẽ panê tanhmã amnhî nhîpêx to hã harênh o ri mẽ hkôt pa. Hãmri nhũm mẽ kuma nê ohtõ nê Jejus kôt amnhî xunhwý.

²⁵ Tã nhũm Panãpe ãxiok rũm kato nê kot Sawti japrõr kaxyw ma krĩ pê Tas hwýr mõ. ²⁶ Hãmri nê hwýr pøj nê Sawti pumu nê haprõ nê ma akupým amnhî kôt ãxiok hwýr o mõ. Hãmri nê kamã mẽ kot Jejus kôt amnhî xunhwýr xwýnhjê hkôt wa ri pa hã amgrã pyxi nê hapêx. Nê mẽ ho ohtõ nê ri mẽ kãm Jejus kapêr o mẽ ahkre ho ri mẽ hkôt pa. Jakamã nhũm krĩ nhõ xwýnhjaja mẽ kot Jejus kôt amnhî nhîpêx xwýnhjê pumu nê mẽ hã mẽ hixi rê nê mẽ harênh o: “Kris tõ nê htõxjaja” anhýr o mẽ harê. ãxiok kumrêx kãm na prem ã mẽ kot Jejus kôt amnhî xunhwýr xwýnhjê jarênh anê. Jakamã nhũm mẽ piitã ã mẽ harênh anhýr o pa.

²⁷ Tã nhũm Panãpe mẽ Sawti wa kormã ãxiok kamã paja rôm nhũm Tirtũm nhý hã kapêr jarênh xwýnh kwýjaja mẽ hwýr mran pøj. Jerujarê rũm mẽ hwýr mran pøj. ²⁸ Hãmri nhũm mẽ piitã mẽ kot mẽ kapêr mar kaxyw mẽ hwýr akuprõ. Jakamã nhũm hõ pê Akapõja kãnhmã xa nê tanhmã mẽ kãm ujarênh to. Tirtũm Karõ nhý hã mẽmoj kukamã mẽ kãm awjarê nê mẽ kãm:

—Kwa okora kêr ka mẽ axkãm ajamak rom. Koja tokyx pika piitã hkôt mẽ apkur xà hã mẽõja mẽ kêp hkryre nê mẽ piitã mẽ hipêx kêt nê. Anê.

Tã nhũm gaa nê ujarênh xàja kôt mẽmoj ã amnhî nhîpêx anê. Kormã Pahihti Krawti kot mẽ ho amnhîptãr ri nhũm mẽmoj ã amnhî nhîpêx anê. No nhũm kormã ã amnhî nhîpêx anhýr kêt ri nhũm Akapõja kukamã ã

mẽ kãm ujarênh anê. ²⁹ Hãmri nhũm mẽ kuma nê tee ri Jutej kamã Jejus kôt mẽ hkwyjê hkukamã hamaxpêr nê axpên mã:

—E kwa pu mẽ Jutej kamã Jejus kôt mẽ pahtõ nê pahtõxjê mã pahkàxpore hkwy gõ kê mẽ ho amnhîm awjaprõ nê hkur o pa. Anê.

Hãmri nê mẽ kaxyw kàxpore hkwy ho akuprõ. Nhũm mẽ hikàxpore hkryre xwýnhjaja ãm mẽ kãm ho hkryre nê kugõ nhũm mẽ hikàxpore rũnh xwýnhja mẽ kãm ho rũnh nê kugõ. ³⁰ Jakamã nhũm mẽ ho hpikuprõnh pa nê Panãpe mẽ Sawti wa kot mẽ hwýr o mõr nê mẽ kãm õr kaxyw wa kãm kugõ. Hãmri nhũm wa hamý nê ma Jutej kamã Jerujarê hwýr mẽ hwýr o mõ. Hãmri nê hwýr pøj nê mẽ kot Jejus kapêr o mẽ ahkre xwýnhjê mã kugõ. Hãmri nhũm mẽ kãm Jejus kôt mẽ htõ nê htõxjê mã o anhgrã nhũm mẽ hamý nê hkĩnh nê ho amnhîm awjaprõ.

12

Mê kot Simãw Pêtre pynênh nê haxàr ã mẽ harênh

Matêwre 18.19-20

¹ Tã nhũm mẽ õ pahi Eroxa õ pòristi mã Kris kwýjê hã amýnê nhũm mẽ mẽ hipêx kati nê nhũm mẽ amnhî xà htýx kamã hamak o pa. ² Juãw tõ Xiakreja nhũm mẽ pahi Erox nhý hã unê nê hkanhwýr o kupĩ. ³ Hãmri nhũm Ijaew kãm ja mex jakamã nhũm pahi Erox hpãnhã mẽ kãm Simãw Pêtre hã amýnê nhũm unê nê haxà. Mẽ kot pãwti kaxkrit kêt kur ã mẽ hkĩnh xà hã arĩgro pê Pasja ã nhũm prem unê. ⁴ Na pre Erox Simãw Pêtre hkukamã hamaxpêr o:

—Nà koja mẽ hkĩnh hapêx pa Ijaew nom kupĩ nhũm rĩ amnhî pumu. Anê.

Hãmri nhũm pòristi kot Simãw Pêtre jamãr xwýnhjaja kêp 16. Nhũm mẽ axpên pãnhã kêp 4 kapên nê hamãr rãhã ho kuhê. ⁵ Nhũm arĩ mẽ hagjênh xà kamã hkrĩ ho hkrĩ. Hãmri nhũm Kris kôt htõ nê htõxjaja harênh ma nê tee ri hkukamã hamaxpêr hãmri nê

xpën wÿr akuprô nê ho Tirtûm wÿr rãhã ho hkrĩ.

Tirtûm kapêr o wrÿk xwÿnh kot Simãw Pêtre kator ã harênh

⁶Tã nhûm ra mẽ hkĩnh hapêx nhûm kamàt. Hãmri nhûm pahi Eroxo kot tanhmã Simãw Pêtre ho xà hã arĩgroja wÿr nhûm kamàt nhûm pôristijaja arĩ mẽ hãgjenh xà kamã hamãr mex o kuhê. Nhûm kuri wa hamêxkrut nê akutã hijê nê hamãr o nô. Kãx o akutã kãm ê nê wa ho nô nhûm wa hkaêx kãm htÿx gôr nê nô. Nhûm ja wa hakwa krem mãânên hamãr o xa. ⁷Puh nhûm Tirtûm kapêr o wrÿk xwÿnhjê hõja mẽ hwÿr axà nê wrÿhtak rax kãm xa. Hãmri nê Simãw Pêtre grêk nê kumra nê kãm:

—Pa Simãw Pêtre? E kwa tokyj kãnhmã xa pu mỗ. Anê.

Hãmri nhûm hkrãkato nê omu nê kãnhmã ãm kurê kumrêx nhûm kaxprexã hã kãxja axrê nê pykap rôrôk nê hikwÿ. No nhûm kuri pôristi wa nôr xwÿnhta wa mar kêt nê. Wa arĩ ôt tÿx nê nô. ⁸Hãmri nhûm Tirtûm kapêr o wrÿk xwÿnhja Simãw Pêtre mã:

—E tokyx anhõ kamıs jaxà nê amnê ixkôt tẽ pu pakato nê ma tẽ. Anê.

⁹Hãmri nhûm kamıs nê hparkà jaxà nê ma hkôt tẽ. No ãm kormã amnhĩ pumunh mex kêt nê. Te hpimtir kãm ã kot amnhĩ nhĩpêx anhÿr pyrãk ã amnhĩ kamnhĩx. ¹⁰Hãmri nhûm wa hakwakrem pôristi wa kot hamãr o wa ãm xwÿnhja hãnh wa tẽ nê wa hakre nê hpãnhã ihõja wa hãnh wa tẽ no nhûm mẽ ôt tÿx nê hkrĩ nê wa omunh kêt nê. Nhûm wa hakwakre nhĩtep xà hkôt wa tẽn kato nê hpãnhã krĩ nê kahê xà hã hakwakreja wÿr wa tẽ. Hãmri nhûm tãm wa kãm amnhĩ kahê xà mẽ nhûm wa kato nê pry hã tẽ. Ja kôt nhûm Tirtûm kapêr o wrÿk xwÿnhja akunok nhûm Simãw Pêtre axte omunh kêt nê. ¹¹Hãmri nê hprĩ hã amnhĩ pumunh kurê kumrêx nê hamaxpêr o:

—Kwa te ixpimtir kãm ã ixte amnhĩ nhĩpêx anhÿr pyrãk tã xep ixpimtir kêt. Tirtûm na ixwÿr kapêr o wrÿk xwÿnhja mẽ nhûm ixwÿr wrÿ nê mẽ kêp ixkator. Pahi Eroxo ra kot ixpĩr

nhûm ixkwÿ Ijaew kãm ja prãm tã nhûm mẽ kêp ixkator. Nà ãm hãmri na Tirtûm ã mẽ kêp ixkator anê. Anê.

¹²Hãmri nê Marir nhõrkwÿ hwÿr htêm kurê kumrêx. Juãw Makre katorxã Marirja nhûm õrkwÿ hwÿr tẽ nhûm mẽ ra kamã hpikuprõnh rax nê ho Tirtûm wÿr o hkrĩ nhûm tãm mẽ hwÿr tẽ. ¹³Hãmri nê kormã kapôt ã hakwa krem mẽ kãm kahê xà tatak o xa nhûm ixkre kamã mẽ kãm ãpênh xwÿnh Rotreja kuma nê hwÿr tẽ. ¹⁴Hãmri nhûm kãm kapêr nhûm amnhĩ jaêr pẽ kuma nê hkĩnh nê. Nê kormã kãm kahê xà mênh kêt ri ma akupÿm tẽ nê mẽ kot ho Tirtûm wÿr xwÿnhjê hwÿr axà nê mẽ kãm:

—Xê pêr Simãw Pêtre na tẽ nê kapôt ã hakwakrem xa nê inhmã kapêr.

¹⁵Hãmri nhûm mẽ tee ri kuma nê kãm:

—Kwa arĩ mẽ hãgjenh xà kamã hkrĩ kênã. Mãn ka tanhmã amnhĩ krã amnhĩ to hã na ka ri atÿx ã akapêr anê. Anê.

Hãmri nhûm mẽ kãm:

—Ma tanhmã kot pa kêt ri ixkrã amnhĩ to? ãm hãmri na pa mẽ amã harê. Mẽ kam nê mra nê omu. Anê.

Nom nhûm mẽ kuma nê ãm kuma nê kãm:

—Nà tãm kêt. Kaxkwa rûm Tirtûm mã hamãr o pa xwÿnh mãm amã kapêr nom tãm kêt. Anê.

¹⁶Rôm nhûm Simãw Pêtre arĩ hakwakre tatak o xa. Hãmri nhûm mẽ jatã hwÿr mra nê kãm kahê xà mẽ nê amnhĩ jaêr pẽ omu nê hkĩnh nê.

¹⁷Hãmri nhûm kãnhmã mẽ kãm ãhkra hpê nê mẽ ho hpinhkrênh pa nê mẽ kãm:

—Nà Tirtûm na ixwÿr kapêr o wrÿk xwÿnhja mẽ nhûm ixwÿr wrÿ nê pôristi pẽ ixkator. Anê.

Hãmri nê mẽ kãm:

—E kêr ka mẽ Xiakre nê Jejus kôt mẽ pahtõ nê pahtõxjê mã ijaré kê mẽ ijarênh mar kurê kumrêx. Nom kot paj ixkato nê ma krĩ hõ hwÿr mỗ. Anê.

Hãmri nê mẽ kêp kato nê ma mỗ.

¹⁸Tã nhûm apkati nhûm pôristi kot hamãr o hkrĩ xwÿnhjaja hkrã hapôj nê tee hapêr nê nhÿri omunh kêt nê. Hãmri nê tee ri amnhĩ kukamã

hamaxpêr o kãm ma htÿx kumrêx nê axpên mã:

—Kwa tanhmã na pre we amnhĩ to nê mẽ pahpê akunok? Tanhmã koja we pahi Erox hã mẽ pahkukja pu mẽ harênh to? Anê.

¹⁹ Hãmri nhũm pahi Erox hpikunor ã harênh ma nê axtem pôristi hkwyjê mã anê nhũm mẽ mra nê tee ri mẽ hagiênh xà kamã hapêr nom nhÿri omunh kêt nê. Hãmri nhũm Erox mẽ kot hamãr xwÿnhjê kamã gryk tÿx kumrêx nê amnhĩ wÿr mẽ hã karõ nê mẽ kãm:

—Kwa nok? Mẽ ate hamãr rãhã ho akuhê hã ixte mẽ amã karõ htã nhũm tanhmã amnhĩ to nê akunok. Nà kot paj mẽ anhĩmex ka mẽ rĩ amnhĩ pumu. Anê.

Hãmri nhũm mẽ tee ri kãm amnhĩ tã àprãr kaprÿ nhũm mẽ hã amÿnê nhũm mẽ ho kator nê ma mẽ o mra nê mẽ himex. Hãmri nhũm pahi Erox Jutej rũm kato nê ma Sejarej wÿr mō nê hpãnhã kamã pa ho pa.

Pahi Erox tanhmã htyk to hã harênh

Wam Pêtre 1.24-25

²⁰ Krĩ pê Xir mẽ Sito wa kamã mẽ pa xwÿnhjaja na pre htem pahi Erox nhõ pyka hwÿr pa nê mẽ kêp amnhĩm apkur xà hã mẽõ japrôr o pa. Tã nhũm Erox kot mẽmoj mÿrapê mẽ kamã gryk jakamã nhũm mẽ tee ri mẽ kêp ujaprôr kaxyw mẽ hwÿr mra nom nhũm mẽ kãm mẽmoj kwÿ ho wênê hkêt nê. Hãmri nhũm mẽ tee ri amnhĩ kukamã hamaxpêr nê pahi Erox nhõ kôwenatô Pratôja wÿr mra nê kãm:

—E awÿr na pa mẽ mra. Kwa mẽ ixyr pê pahi Erox mã tanhmã akapêr to kê ama nê mẽ ixkamã gryk kêt nê. Pa mẽ axte mẽ awÿr mra nê mẽ apê mẽmoj kwÿ japrôr o ri ixpa. Anê.

²¹ Hãmri nhũm mẽ kuma nê hwÿr tẽ nê mẽ yr pê tanhmã kãm kapêr to nhũm kuma hãmri nê kot tanhmã mẽ kãm kapêr to kaxyw mẽ kãm arĩgro hta.

Tã nhũm ra kot arĩgro hyr xwÿnhhta kato nhũm Erox kêp pahi hã ê mex jaxà nê tẽ nê kêp pahi hã mẽ hkrĩ xà kamã nhÿ nê tanhmã mẽ kãm kapêr

to. ²² Mẽ kãm kapêr ryy nê. Hãmri nhũm mẽ kuma nê hêx rom kãm mex o mex ã harê. Nê kÿx pêê axpên mã harê nê harênh o:

—Kwa pahi Erox kêp mẽ panhĩõ hkêt. Pêr kaxkwa rũm Mẽpahpãm na pre mẽ pahwÿr wÿr nê ã mẽ pamã kapêr mex anê. Anê.

Hãmri nê te kêp Tĩrtũm pyrãk o hipêx nê kãm mex o mex ã harê. Nom hêx rom ã harênh anê. Kot mẽ mar nê kãm mẽ hkĩnh nê akupÿm mẽ kãm mẽmoj to wênê hprãm xaj nhũm mẽ hêx rom ã axpên mã mex ã harênh anê. ²³ Hãmri nhũm mẽ kuma nhũm ja kãm mex nê nhũm hkĩnh nê mẽ mar o nhÿ nê kêp Tĩrtũm pyrãk ã harênhja nê tanhmã mẽ kãm nê hkêt nê. Jakamã nhũm tee ri amnhĩ tã omu nê hwÿr kapêr o wÿr k xwÿnhjê hõ mẽ nhũm hwÿr wÿr nê tanhmã ho nhũm õhy kamã kutõj rax nê htyk tokyx anê.

Panãpe mẽ Sawti wa akupÿm ãxiok hwÿr mōr ã wa harênh

Atre 11.27-30

²⁴ Tã nhũm mẽ ra ohtô nê Tĩrtũm Kra Jejus kot tanhmã mẽ panê amnhĩ nhĩpêx to hã harênh ma nê hkôt amnhĩ xunhwÿ.

²⁵ Hãmri nhũm Panãpe mẽ Sawti wa ra Kris kôt htõ nê htõxjê mã kàxporeta jamÿ nê ma Jerujarê hwÿr o mō nê mẽ kãm kugõ. Hãmri nê ma akupÿm ãxiok hwÿr nojarêr nê war amnhĩ kôt Juãw Makre o mō. Hãmri nê mẽ ma mō nê akupÿm mẽ hwÿr pøj.

13

Tĩrtũm kot Panãpe mẽ Sawti wa hyr Atre 9.15-16; Rômãn 1.1

¹ ãxiok kamã Kris kôt mẽ kot axpên to htõjaja kot Tĩrtũm nhÿ hã kapêr o mẽ ahkre ho pa xwÿnhjê nhĩxi ã kot anhÿr. Na pre Panãpe nê Sawti nê Simeãw kà htykre nê Rusti pê Sirên nhõ xwÿnh nê pahi Erox krãmnhwÿ Mãnahêja. ² Jakamã nhũm prem mẽmo arĩgro hã axpên wÿr akuprõ nê Tĩrtũm mã mex o mex ã harênh kaxyw apkur kêt rãhã kãm amnhĩ jarênh o hkrĩ. Hãmri nhũm

Tirtùm Karõ mẽ kãm tanhmã kapër o amnhĩrit to nẽ mẽ kãm:

—E kêr ka mẽ Panãpe mẽ Sawti war ata nẽ wa kot inhmã tanhmã amnhĩ nhĩpêx to ho pa kaxyw wa ãm. Anẽ.

³ Hãmri nhũm mẽ kuma nẽ wa hyr kurê kumrêx nẽ wa himõk ã mẽ ìhkra jaxwỳ nẽ wa ho Tirtùm wỳ. Hãmri nẽ wa kot Tirtùm mã tanhmã amnhĩ nhĩpêx to ho pa kaxyw wa kumẽ nhũm wa ma mõi.

Wajaga kot Jejus nẽ hkràmnhwỳ kurê hã harẽnh
Atre 8.9-24

⁴⁻⁵ Tã nhũm Tirtùm Karõ krĩ pẽ Serêw wỳr Panãpe mẽ Sawti wa kumẽ nhũm wa ma hwỳr mõi. Nẽ amnhĩ kõt Juãw Makre ho mõi. Kot tanhmã wa ho ajuta hto ho wa hkõt pa kaxyw. Hãmri nẽ wa mẽ mõi nẽ Serêw wỳr pøj nẽ pàr krem axà nẽ ma gô hipòk pẽ Sipre hwỳr mõi. Hãmri nẽ gô hipòk ã krĩ pẽ Saramĩn wỳr pøj nẽ Ijaew nhõ Tirtùm kapër o mẽ ahkre xà hã ixkre hwỳr tẽ nẽ kamã Jejus kot mẽ panẽ tanhmã amnhĩ nhĩpêx to hã mẽ kãm harẽnh o wa xa.

⁶⁻⁸ Tã nhũm mẽ krĩja rùm kato nẽ hpãnhã gô hipòk kõt mõi nẽ hatur xà kamã krĩ pẽ Papos wỳr pøj. Hãmri nẽ kamã wajaga Pajejus pumu. Gresjê kapër kãm hixi pẽ Erĩm. Erĩm haxwỳja kęp Ijaew. Na pre hte hêx rom te kęp Tirtùm nhỹ hã kapër jarẽnh o pa xwỳnh pyræk o amnhĩ nhĩpêx nẽ ma mẽ kãm ujarẽnh o ri mẽ hkõt pa. No ãm mẽ kãm amnhĩ to hêx o pa. Gô hipòkja ã pahi Sejupaw hkràmnhwỳ na pre. Pahi Sejupawja àhpumunh tỳx jakamã na pre Panãpe mẽ Sawti wa harẽnh ma nẽ kãm wa kapër mar prãm nẽ wa kot kãm Tirtùm kapër jarẽnh kaxyw amnhĩ wỳr wa kuwỳ. Nom nhũm hkràmnhwỳ wajaga Erĩmja kãm wa hkĩnh kêt nẽ wa nẽ kãm kapër kãm hihtỳx nẽ kãm:

—Kwa nà wa kapër mar kêt nẽ. Kot kaj war ama nẽ wa uræk nẽ amnhĩ kaxyw Jejus kõt ajamxpêr nẽ hkõt amnhĩ xãm. Kwarĩ wa kapër mar kêt nẽ. Anẽ.

⁹ Hãmri nhũm Sawti ra axtem pãnhã hixi. Ra hpãnhã kęp Pawre. Nhũm

Tirtùm Karõ ra hkarõ mã àr jakamã nhũm ÿ hã wajagata pumu nẽ wa nẽ hkràmnhwỳ mã kapër ã kãm akir nẽ kãm:

¹⁰ —Tk. Kwa pẽr apê Satanasti hkwy hã na ka ã wa inhnê kãm akapêr anẽ. Na ka hte mẽmoj punuj pix kukamã ajamxpêr nẽ mẽmoj mex nẽ mẽ no kupyw o apa. Tirtùm kapêr mex kumrêx tã ka axtem nẽ nẽ mẽ hkurê ho ri apa. ¹¹ ã ate amnhĩ nhĩpêx anhỹrja mỳrapê koja Tirtùm tanhmã ato ka ano hkre nẽ arĩt kêt o atã apkati xohtõ nẽ kãm ga. Anẽ.

Hãmri nhũm no hkre kurê kumrêx nẽ tee ri rĩt kaxyw no pikrar pỳnh o xa nom mẽmoj pumunh kêt nẽ. Hãmri nẽ mẽhõ kot hpa hã hpyr nẽ òrkwỳ hwỳr ho mõi kaxyw ri amnhĩ pu hã mẽ hapêr pênh o xa. ¹² Hãmri nhũm hkràmnhwỳ pahĩtija tee ri ja hã omu nẽ amnhĩ kaxyw Jejus kõt hamxpêr nẽ hkõt amnhĩ xãm kurê kumrêx. Hãmri nẽ Pawre mẽ Panãpe wa kot tanhmã Tirtùm kapêr jarẽnh to hã wa kuma nẽ hamxpêr o:

—Hêxta waa nẽ. Aa ixte ã mẽhõ kapêr kot anhỹr mar kêt tã pa jarãhã kuma. Nà ãm hãmri na Jejus jarẽnhja. Anẽ.

Pawre mẽ Panãpe ãxiok õ hwỳr wa mõi ã wa harẽnh

Atre 15.38

¹³ Tã nhũm Pawre mẽ Panãpe mẽ Juãw Makre wa mẽ krĩ pẽ Papos rùm kato nẽ hpãnhã ma pyka hõ hwỳr mõi. Pàr kãm ma pyka pẽ Pãpir wỳr mõi nẽ kamã krĩ pẽ Perke hwỳr pøj. Hãmri nhũm Juãw Makre tanhmã hamxpêr to nẽ tee ri axte wa hkõt mõi kukamã hamxpêr hãmri nẽ wa hkaga nẽ awjanã nẽ ma akupỹm Jerujarê hwỳr ahte mõi. ¹⁴ Jakamã nhũm Pawre mẽ Panãpe wa ahte Perke rùm kato nẽ hamũ pika pẽ Pisit kãm krĩ pẽ ãxiok wỳr mõi nẽ hwỳr pøj. Nhũm Ijaew nhõ arĩgromnu pẽ sap kato nhũm wa Tirtùm kapêr o mẽ ahkre xà hã ixkre hwỳr wa tẽ nẽ hwỳr axà nẽ nhỹ. ¹⁵ Hãmri nhũm mẽhõ mẽ kãm Tirtùm kapêr ã kagà htũm kwỳ kamã harẽnh o xa. Mojes mẽ Tirtùm nhỹ hã kapêr o mẽ pa xwỳnh kot kapêr ã kagà hkwy

kamã nhũm mẽ kãm kamã harênh o xa. Hãmri nê kamã harênh pa nhũm mẽ ahkre xwýnhjaja Pawreja wa omu nê wa hwýr mēhō mẽ nhũm wa hwýr tē nê wa kãm:

—E na mẽ ijahkre xwýnhjaja war ate mẽ inhmã axujarênh prãm nê mãmri mẽ inhmã mẽmoj jarênh kaxyw nhũm mẽ war atã anê. Anê.

¹⁶ Hãmri nhũm wa kuma nhũm Pawre kãnhmã xa nê mẽ hpinhkrênh kaxyw mẽ kãm kãnhmã ãhkra nhũm mẽ omu nê hpinhkrênh pa nhũm mẽ kãm awjarê. Amnhĩ kwý pê Ijaewjê mẽ mẽ kêp Ijaew kêt xwýnhjê kãm Tirtũm kĩnh xwýnhjê mã nhũm mẽ kãm awjarê. Nê mẽ kãm kapêr ryy nê. Tirtũm kot tanhmã mẽ hkukamã Ijaew nhĩgêt nê pãmjê nhĩpêx to hã mẽ kãm awjarê nê mẽ kãm:

—E kot paj mẽ amã awjarê ka mẽ inhma. ¹⁷ Nà mẽ ixpê Ijaew nhõ Tirtũmja amnepêm na pre mẽ ixpê Ijaew pãmjê rê. Kormã Ejit kãm mẽ pa ri nhũm amnhĩ kaxyw mẽ kurê nê mẽ ho ohtô rax kumrêx. Hãmri nê mẽ kaxyw hihtýx jakamã Ejit rũm mẽ kator pa. ¹⁸ Hãmri nê mẽ ho mex ryy ho mẽ hkôt pa. Mẽ kot kapôt ã ri pa hã amgrà pê 40 kamã mẽ kot htýx ri tanhmã amnhĩ nhĩpêx to ho pa htã nhũm mẽ kamã ukapri ryy ho mẽ hkôt pa. ¹⁹⁻²⁰ Na pre mẽ kãm pyka pê Kanaã kamã mẽ pa xwýnhjê nhĩmex pa. Kanaã kamã mẽ pa xwýnhjaja ahpýnhã axpên kaxyw mẽõ krĩ pê 7ja nhũm mẽ kãm mẽ ho hapêx pa. Hãmri nê hpãnhã mẽ inhĩgêtjê mã pykaja o hpigrãnh pa. Mẽ ixpê Ijaew nhĩgêtjê mã ho hpigrãnh pa nhũm mẽ kamã pa hã amgrà xohtô nê. Hã amgrà pê 450. Tã nhũm Tirtũm hpãnhã mẽ kãm juisti hkwy rê nê mẽ kaxyw mẽ unhwý nhũm mẽ ho pa. Tã nhũm hpãnhã Sãmuew mẽ ho amnhĩptã nê mẽ o pa. Kêp Tirtũm nhỹ hã kapêr jarênh o pa xwýnhjê hõ nhũm Tirtũm mẽ kaxyw ãm.

²¹ —Tã nhũm mẽ ixpãmjaja axpên ma nê ra te krĩ hkwy kamã mẽ urak nê mẽõ pahi kot Sãmuew pãnhã mẽ ho amnhĩptã o pa hprãm xàj amnhĩ to

Tirtũm wý nê kãm: “Pa Tirtũm. Kwa mẽ ixkaxyw pahi hõ xãm kê mẽ ixto amnhĩptã o pa nã. Ja na mẽ inhmã hprãm týx kumrêx.”

—Anhýr o amnhĩ to hwýr jakamã nhũm mẽ kuma nê mẽ kaxyw Sawti xãm. Kisti hkra na pre. Nê mẽ inhĩgêt Pêjamĩ kanrêhã htãmnhwý na pre. Hãmri nhũm Tirtũm mẽ kaxyw ãm nhũm kêp mẽõ pahi nê mẽ ho amnhĩptã o pa hã amgrà pê 40. ²² Tã nhũm Tirtũm kator nê hpãnhã mẽ kaxyw Tawi xãm. Hãmri nê harênh o: “Nã Jese hkra Tawija na hte inhmã hprãm xà hkôt amnhĩ nhĩpêx mex o pa.” Anê.

²³ —Tã Jejus kêp Tawi hkanrêhã htãmnhwý na pre. Kukamã na pre Tirtũm mẽ ixpê Ijaew nhĩgêtjê mã harê nê harênh o: “Koja nhỹrmã Tawi hkanrêhã htãmnhwýjê hõ mẽ ate amnhĩ tomnuj pê mẽ apytã.” Anhýr o hkukamã mẽ kãm harê. ²⁴ No nhũm kormã Jejus kot mẽ ixpê Ijaewjê mã amnhĩ to amnhĩrit kêt ri nhũm Juãw Paxis kumrêx hkukamã mẽ ixwýr mō nê mẽ inhmã Tirtũm kapêr jarênh o ri mẽ ixkôt pa. Nê mẽ ixte amnhĩ tomnuj kaga nê hpãnhã tãm amnhĩ nhĩpêx o ixpa hã mẽ ixpumunh kôt mẽ ixkrã kumrãr ã mẽ inhmã karō ho pa.

²⁵ —Tã mẽ kãm kapêr o pa ryy nê ra hatur xãm mēnh kaxyw nê amnhĩ tã tanhmã mẽ inhmã kapêr to nê mẽ inhmã: “Na ka mẽ ixpumu nê atýx Tirtũm kot mẽ akaxyw pa ixãm ã ixkamnhĩx nom pa hkêt. Kot mẽ pakaxyw ãm mã xwýnhta kukamã na pa pre mō. Tãm kot amnhĩ to rax o ijakrenh. Nê kot amnhĩ to mex o kot ijakrenh. Jakamã na pa hte ãm kukwak ri ixpa nê amnhĩ tã hã ixpijaãm o ixpa.” Anê.

—Na pre ã Juãw Paxisja mẽ inhmã Jejus jarênh anhýr o pa.

²⁶ —Tã kwa mẽ inhma mẽ apê Apraãw kanrêhã htãmnhwýjaja nê mẽ apê Ijaew kêt xwýnh kãm Tirtũm kĩnh xwýnhjaja. E mẽ apiitã ixkapêr ma nê kãm ajamaxpêr týx rãhã ho ri apa. Nã mẽ pahpiitã mẽ pakaxyw na

Tirtüm kapërja. Kot mẽ pahte amnhĩ tomnuj pẽ mẽ papytâr ã amnhĩ jarẽnhja mẽ ixpẽ Ijaew pix kaxyw kêt. Mẽ pahpiitã mẽ pakaxyw na. Mẽ pahpiitã mẽ pahte ja mar nẽ hkõt amnhĩ nhĩpêxja na Tirtüm kãm hprãm. ²⁷ Nom Jerujarẽ nhõ xwýnhjẽ mẽ mẽ àptâr tũmrejaja na prem Jejus kęp Tirtüm kot mẽ pakaxyw ãm xwýnh ã harẽnh mar tã hkõt hamaxpër kêt nẽ. Na pre htem mẽ inhõ arĩgromnu pẽ sap ã akuprõ nẽ axpẽn mã Tirtüm kapër ã kagà htũm kamã ujarẽnh o hkrĩ. Kagàja kamã Tirtüm nhỹ hã mẽ kapër o mẽ pa xwýnhjaja kot hprĩ hã Jejus jarẽnh nẽ hã kagà nhũm mẽ kot mar tã hprĩ hã mar tỳx kêt nẽ. Jakamã na prem axtem nẽ mẽ kãm hã amýnẽ. Tirtüm nhỹ hã kapër jarẽnh xwýnhjaja kot mẽ hkukamã mẽ harẽnh xàja kõt nhũm mẽ kot hpĩr kaxyw mẽ kãm hã amýnẽ.

²⁸⁻²⁹ Kot tanhmã amnhĩ tomnuj to hkêt tã nhũm mẽ amarĩ hã pahi Pirat wỳ. Kot mẽ kãm hã àmnẽn nhũm õ pòristijaja kot hpĩr kaxyw nhũm mẽ hã kuwỳ nhũm mẽ kãm kupĩ. Ra Tirtüm kapër ã kagà htũm kot mẽ hkukamã mẽ harẽnh xà hkõt. Hãmri nhũm mẽ kot hkõt pa ho pa xwýnhjaja pĩ kahpa nẽ ho wrỳ nẽ ma o tẽ nẽ kẽn kre kamã haxà. ³⁰ Tã nhũm Tirtüm akupỹm ho htĩr ³¹ nhũm xatã hkõt mẽ pa ho pa xwýnhjẽ hwỳr hapõj. Kormã htyk kêt ri ra Garirej rũm Jerujarẽ hwỳr hkõt mẽ pa ho mẽ pa xwýnhjẽ hwỳr xatã mẽ hwỳr hapõx o pa. Jao hã arĩgro xohtõ nẽ nhũm prem piitã omu. Tã mẽ tãmjaja na htem mẽ ixpẽ Ijaew mã harẽnh o pa.

³²⁻³³ —Amnepêm Tirtüm na pre mẽ ixpẽ Ijaew nhĩgêjtjẽ mã tanhmã Kra Jejus jarẽnh to. Kormã mẽ pahwỳr wrỳk kêt ri tanhmã mẽ kãm harẽnh to. Jakamã ra kot hkukamã harẽnh xà hkõt nhũm pre mẽ pahwỳr wrỳ nẽ tanhmã mẽ panẽ amnhĩ nhĩpêx to. Tã mẽ ate harẽnh mar kaxyw na pa wa man mẽ awỳr mõ. Amnepêm finat Tawi na pre Tirtüm kapër kwỳ hã kagà. Tirtüm mex ã mẽ grex xà pẽ Sam 2ja kamã hã kagà. Te Tirtüm tãm

Jejus mã kapër pyræk o hã kagà nẽ hã kagà ho:

Apê Ixkra na ka.

Tã mẽ piitã mẽ kot apê Ixkra hã apumunh kurê kumrêx kaxyw na pa jarãhã mẽ kãm ato amnhĩrĩt. Anẽ.

Nhũm pre ã Tirtüm Jejus mã kapër anẽ nhũm Tawi ô ri mẽ pamã hã kagà.

³⁴ —Amnepêm na pre Tirtüm tanhmã Kra Jejus kukamã harẽnh to. Mẽ kot hpĩr nhũm kot akupỹm ho htĩr kukamã hã amnhĩ jarẽ. ĩ hkro pymaj kot mẽ htykjẽ pẽ hkaxàr nẽ akupỹm ho htĩr ã nhũm hkukamã hã amnhĩ jarẽ. Te Kraja mã amnhĩ jarẽnh pyrã nẽ amnhĩ jarẽnh o:

E kot paj ato mex rax nẽ. Ixte Tawi mã amnhĩ jarẽnh xà hkõt.

Anhỹr o hkukamã harẽnh xà hkõt akupỹm ho htĩr nhũm axte htyk kêt ã harẽ.

³⁵ —Nẽ kagàja nhãm hõ hõ kot tanhmã Jejus jarẽnh kute. Te Jejus tãm Tirtüm mã kapër pyrã nẽ harẽnh o:

Ixpẽ Akra hã ixte akapër kõt ri amnhĩ nhĩpêx rãhã ho ixpa jakamã kot kaj ixpumunh mex pa inhĩ hkro hkêt nẽ. Anẽ.

Tirtüm kapër ã kagà htũm kot ã Jejus jarẽnh kot anhỹr. ³⁶ Nom ã Tawi jarẽnh anhỹr kêt nẽ. Tawi na pre Tirtüm kapër kõt amnhĩ nhĩpêx mex o pa hãmri nẽ ty nhũm prem mẽ panhĩgêjtjẽ nhĩhkõ hã haxà hãmri nhũm ĩ hkro nẽ hapêx.

³⁷ —Tã no Jejusja Tirtüm kot akupỹm ho htĩr jakamã nhũm Tawi pyràn ĩ hkro nẽ hapêx kêt nẽ.

³⁸ —E mẽ inhmar tỳx nẽ ixkwỳjaja. Kra Jejus pix kukwak na hte Tirtüm amnhĩ katut kõt mẽ pahte amnhĩ tomnuj rẽ. ³⁹ Jakamã kot kaj mẽ ãm Mojes kapër kõt pix mã ri amnhĩ nhĩpêx nhũm Tirtüm tee ri ja hã mẽ apumu nẽ amnhĩ katut kõt mẽ ate amnhĩ tomnuj rẽn kêt nẽ. Jejusja tapxipix na pre htyk o Tirtüm mã mẽ pahte amnhĩ tomnuj piitã hpãnhã amnhĩrer pa. ⁴⁰⁻⁴¹ Amnepêm na pre Tirtüm kapër nhỹ hã kapër xwýnhjẽ

hōja mẽ kãm Tĩrtũm kapẽr jarẽ nẽ hã kagà. Te Tĩrtũm tãm mẽ kot kapẽr ã hpẽr o pikẽnh xwỳnhjẽ mã kapẽr pyrà nẽ mẽ kãm:

E kot paj aa mẽ ate mẽmoj pumunh kêt õ ho anẽ.

Nhũm mẽhõ mẽ amã harẽ ka mẽ harẽnh ma nẽ ãm ama.

Nhũm mẽ kot omunh mex xwỳnhjẽ hõ kot hprĩ hã mẽ amã harẽnh tã ka mẽ ãm ama nẽ hkõt aja-maxpẽr kêt nẽ.

Hãmri nẽ tee ri tanhmã kãm aja-maxpẽr to ho ri apa. Anẽ.

Ã Tĩrtũm mẽ kãm kapẽr anhỹr jakamã kwa mẽ o kora. Apu mẽ kajaja na pre ã mẽ ajarẽnh anẽ rỳ ko. Anẽ.

⁴² Nhũm pre ã Pawre mẽ kãm ujarẽnh ryy anẽ. Hãmri nẽ Panãpe mẽ wa ixkreta rũm kator kaxyw nhũm mẽ kot mar o hkrĩ xwỳnhjaja tee ri ma wa mõi ã wa omu nẽ ma wa hkõt mra nẽ wa kãm:

—Kwa war axujarẽnhja na mex kumrẽx. Mẽ inhmã axte mar prãm. Xà koja axte sap kato ka wa akupỹn mẽ ixwỳr wa tẽ nẽ axte mẽ inhmã awjarẽ? Anẽ.

Hãmri nhũm wa mẽ kãm:

—Tõe. Nà kot paj war anẽ. Anẽ.

⁴³ Hãmri nẽ wa ma tẽ nhũm mẽ hkwyja ma wa hkõt mra. Ijaew kwỳjaja nẽ Ijaew kêt xwỳnh kãm Tĩrtũm kĩnh xwỳnhjaja nhũm mẽ ma wa hkõt mra. Hãmri nhũm wa pry hã mẽ kãm kapẽr o mõi. Tĩrtũm kot mẽ kutã nojarêt rãhã ho pa nhũm mẽ kot amnhĩ tã omunh nẽ hkõt amnhĩ nhĩpẽx tỳx rãhã ho pa nẽ hkaga hkêt ã mẽ kãm kapẽr o mõi.

⁴⁴ Tã nhũm axte sap nhũm krĩ nhõ xwỳnh piitã axte Tĩrtũm kapẽr mar kaxyw ixkre wỳr akuprõ. Ijaewjaja nẽ Ijaew kêt xwỳnhjaja. ⁴⁵ Hãmri nhũm Ijaew kwỳjaja tee ri mẽ amnhĩ wỳr Ijaew kêt xwỳnhjẽ pumu nẽ mẽ hã Pawre mẽ Panãpe wa kamã gryk nẽ. Mẽ kãm Ijaew kêt xwỳnhjaja kot Tĩrtũm kapẽr mar prãm kêt jakamã mẽ hã wa kamã gryk nẽ. Hãmri nẽ Pawre kapẽr ma nẽ xatã kãm kapẽr punuj nẽ kãm:

—Tk. Kwa na ka Tĩrtũm kapẽr jarẽnh o axêx. Ja kot anhỹr kêt. Anẽ.

⁴⁶ Nom nhũm wa kãm mẽ uma hkêt nẽ. Wa ãm Tĩrtũm Karõ nhỹ hã amnhĩ to htỳx nẽ wa mẽ kãm kapẽr. Nẽ amnhĩ tã tanhmã mẽ kãm kapẽr to nẽ mẽ kãm:

—Nà wa ixpyrà nẽ mẽ apê Ijaew jakamã na pa mẽ akumrẽxjẽ mã Tĩrtũm kot mẽ pakaxyw Jejus xãm ã harẽ. Tã ka mẽ ama nẽ ãm ama nẽ te mẽ ate hkaga pyrà nẽ ã wa inhmã akapẽr anẽ nẽ wa ixte kapẽr o ixêx ã wa ijarẽ. Pẽr ãm mẽ ate mẽ amã Tĩrtũm mẽ Kra wa kuri mẽ atĩr tũm nẽ mẽ apa hprãm kêt. Jakamã kot paj wa mẽ apê ixkato nẽ hpãnhã ma Ijaew kêt xwỳnhjẽ mã Jejus kapẽr jarẽnh o ri mẽ hkõt ixpa. ⁴⁷ Tĩrtũm kapẽr ã kagà htũm ã kot mẽ ixte amnhĩ nhĩpẽx anhỹrja kukamã mẽ ijarẽ nẽ mẽ ijarẽnh o:

Mẽ ate Ijaew kêt xwỳnhjẽ mã ixkapẽr jarẽnh o ri apa kaxyw na pa pre mẽ kaxyw mẽ arẽ.

Jakamã koja pyka piitã hkõt mẽ pa xwỳnhjaja ohtõ nẽ mẽ akapẽr ma nẽ ixkra hkõt amnhĩ xunhwỳ.

Koja mẽ ã amnhĩ nhĩpẽx anẽ pa ja hã mẽ omu nẽ mẽ ho ixkra. Anẽ. Tĩrtũm kot ã ja kukamã mẽ ijarẽnh anhỹr jakamã kot paj wa mẽ apê ixkato nẽ mẽ apãnhã ma Ijaew kêt xwỳnhjẽ mã Tĩrtũm kapẽr jarẽnh o ri mẽ hkõt ixpa. Anẽ.

⁴⁸ Hãmri nhũm Ijaew kêt xwỳnhjaja amnhĩ tã wa kapẽrja ma nẽ hkĩnh nẽ Tĩrtũm kapẽr mex o mex ã harẽ. Hãmri nhũm ra Tĩrtũm kot nhỹrmã amnhĩ ri mẽ htĩr tũm nẽ mẽ pa ho mẽ pa kaxyw mẽ rẽnh xwỳnhjaja amnhĩ kaxyw Pahihti Jejus kõt hamaxpẽr nẽ hkõt amnhĩ xunhwỳ.

⁴⁹ Tã nhũm pika pẽ ãxiok kamã mẽ piitã Tĩrtũm kapẽr jarẽnh ma. ⁵⁰ Nom nhũm Ijaew xaptãr tũmrejaja kãm Pawre mẽ Panãpe wa hkĩnh kêt jakamã na prem krĩ hkõt mẽ kot amnhĩ to rũnh xwỳnhjẽ mã wa ho kapẽr punuj o pa. Mẽ õ pahi mẽ mẽni kot amnhĩ to rũnh xwỳnhjaja

nhũm mẽ kãm tanhmã wa ho kapêr to nhũm mẽ kuma nê mẽ hkôt hamaxpêr. Mênijaja kãm Tirtũm prãm tã amnhĩ kaxyw Jejus kôt hamaxpêr kêt jakamã tanhmã mẽ kot Pawre mẽ Panãpe wa ho hêx toja ma nê hkôt hamaxpêr nê wa kamã gryk nê. Jakamã nhũm mẽ ohtô nê tanhmã wa hipêx to nê amnhĩ nê wa hano. ⁵¹ Hãmri nhũm wa mẽ kêp kato nê xa nê mẽ kot Tirtũm kapêr kaga hã amnhĩ pumunh kaxyw mẽ noo mã wa hparkã kapa nê nê awjagrô kapĩ nê ma wa tẽ. Hãmri nê ma krĩ pẽ Ikôn wỳr hpãnhã wa mỗ. ⁵² Hãmri nhũm ãxiok kamã mẽ kot Jejus kôt amnhĩ xunhwỳr xwỳnhjaja hkĩnh nê ri pa. Tirtũm Karõ kot mẽ hkarõ mã gjêx jakamã nhũm mẽ hkĩnh nê ri pa ho pa.

14

Pawre mẽ Panãpe wa kot Ikôn wỳr mỗr ã wa harênh

Matêwre 10.34-35

¹ Hãmri nhũm Pawre mẽ Panãpeja wa ãxiok rũm kato nê hpãnhã ma krĩ pẽ Ikôn wỳr wa mỗ. Hãmri nê hwỳr pøj nê Ijaew nhõ Tirtũm kapêr o mẽ ahkre xà hã ixkre hwỳr wa tẽ nê kamã mẽ kãm Jejus jarênh o nhỹ. Mẽ kãm harênh kãm hihtỳx jakamã nhũm mẽ hkwyjaja wa kuma nê amnhĩ kaxyw hkôt hamaxpêr nê hkôt amnhĩ xunhwỳ. Ijaew kwỳjaja nê mẽ kêp Ijaew kêt xwỳnh kwỳjaja nhũm mẽ ohtô nê Jejus kôt amnhĩ xunhwỳ.

² Tã nhũm mẽ hkwyjaja kãm Jejus jarênh mar prãm kêt nê. Hãmri nê kato nê ma Ijaew kêt xwỳnh kwỳjê hwỳr mra nê tanhmã mẽ kãm Pawre mẽ Panãpe wa ho hêx to nê wa ho kapêr punuj nê nhũm mẽ mar xà hkôt wa kamã gryk nê. ³ Nom nhũm wa tokyx kator nê ma mỗr kêt nê arĩ Tirtũm Karõ nhỹ hã amnhĩ to htỳx nê mẽ kãm Tirtũm kapêr jarênh o ri mẽ hkôt pa. Nê kêp mẽ kutã nojarêt xwỳnh ã harênh o pa. Nê y hã mẽ kãm aa mẽ kot mẽmoj pumunh kêt kwỳ ho anhỹr o ri mẽ hkôt pa. Jakamã

nhũm mẽ hkwyjaja ja hã wa omu nê wa kapêr ma nê hamaxpêr o:

—Kwa ãm hãmri na wa Tirtũm kêp mẽ pakamã ukapri xwỳnh ã harê. Pêr y hã wa kot ã amnhĩ nhĩpêx anhỹr o pa kênã. Anê.

⁴ Hãmri nhũm Ijaew kêt xwỳnh kwỳjaja wa hkôt hamaxpêr nê wa hkôt amnhĩ xunhwỳ. No nhũm mẽ hkwyjaja wa hkôt hamaxpêr kêt nê. Ra mẽ kot Ijaew kwỳ kot tanhmã wa ho kapêr punuj toja ma nê mẽ hkôt hamaxpêr jakamã nhũm krĩ nhõ xwỳnhjaja axpên kwỳm ri tanhmã wa hkôt hamaxpêr to ho pa. Jao axpên kwỳm ri wa hkôt hamaxpêr o pa.

⁵ Tã nhũm wa hkôt hamaxpêr kêt xwỳnhjaja axpên wỳr akuprõ nê wa hã amỹnê. Ijaew kwỳjaja nê Ijaew kêt xwỳnh kwỳjaja nê mẽ õ pahijaja nhũm mẽ kot kên o wa htak o wa hpĩr kaxyw wa hã amỹnê. ⁶ Hãmri nhũm wa amnhĩ tã ama nê mẽ kêp kato nê hpãnhã ma pika hõ hwỳr mỗ. Ma Rikôn kãm krĩ hkwy hwỳr hpãnhã mỗ. Risti wỳr nê Tepe wỳr nê pu hã krĩ hkwy hwỳr wa mỗ. ⁷ Wa mỗ nê pøj nê ma mẽ kãm Jejus kot tanhmã mẽ panê amnhĩ nhĩpêx to hã harênh o ri mẽ hkôt pa.

Te grã xwỳnh jarênh

Atre 3.1-10

⁸ Nhũm Risti kamã mễhõ my hte grã nê hkrĩ xwỳnhja. Katorxà nhõxà kre rũm hte grã nê kator jakamã ri pa hkêt nê arĩ hkrĩ xà kamã hkrĩ ho hkrĩ. ⁹ Jakamã nhũm Pawre mẽ kãm ujarênh o xa nhũm kuri mar o nhỹ. Hãmri nê hamaxpêr o:

—Nà pêr Tirtũm àhpumunh o àhpumunh. Mãn kot ixto mex kaxyw àhpumunh tỳx. Nà koja ixto mex. Anê.

Hãmri nhũm Pawre ã hamaxpêr anhỹr ã omu ¹⁰ nê kàx pẽ kãm kapêr nê kãm:

—E kwa kànhmã xa. Anê.

Hãmri nhũm kuma nê kànhmã ãm kurê kumrêx nê ri mra. Nê amnhĩ te kamã hamak o ri mra nê hkĩnh tỳx kumrêx. ¹¹ Hãmri nhũm kuri mẽ kuhê xwỳnhjaja Pawre kot ã hipêx anhỹrja ã omu nê htỳx wa kêp kaxkwa kamã

mēhpām ā wa hkamnhīx nē hkīnh nē
axpēn mā:

—Kwa pēr mēpahpām na wa.
Mēpahpām Jupti mē Mēkurtija na
wa panhī hā amnhī jahkre nē mē
pahwyr wrý. Nà ām hāmri na wa mē
pahwyr wrý. Anē.

Nom mē kapēr pē Rikaôn o axpēn
mā kapēr jakamā nhūm Pawre mē
Panāpe wa mē mar kēt nē. Wa
kot mē kapēr mar kēt jakamā ā mē
kot wa harēnh anhýrja mar kēt nē
htýx wa xa. ¹² Nhūm mē ā wa kēp
mēhpām ā wa harēnh anē nē hkīnh
týx nē. Panāpeja nhūm prem kēp mē
hpām Jupti hā hkamnhīx no Pawreja
nhūm prem kēp mēhpām Mēkurti hā
hkamnhīx. Pawreja Mēkurti pyrā nē
kapēr japjē rūnh jakamā nhūm mē
kēp hā hkamnhīx. ¹³ Na prem krī
htā mēhpām Juptija mā amnhī jarēnh
xà hā ixkre nhīpēx nē hkarō nhīpēx.
Hāmri nē hwyr akuprō nē kām mex
o mex ā harē nē amnhī to hwyr o
pa. Jakamā nhūm Jupti nhō patrejaja
Pawre mē Panāpe wa kēp mēhpām ā
wa harēnh ma hāmri nē wa hā hkwýjē
mā kām:

—Kwa pu mē wa kām môx kwý hpa
nē pixōrā hkwý rē. Hāmri nē wa kām
wa mex o wa mex ā wa harē nē wa
kēp mēpahpām ā amnhī to wa kuwý.
Wa kēp mēpahpām kēnā. Anē.

Hāmri nē ra ā wa hipēx anhýr
kaxyw ¹⁴ nhūm wa tee ri mē kot
amnhī nhīpēx ā mē omu nhūm ja wa
kēp omnuj týx nē. Jakamā nhūm wa
amnhī pē hinôkà kaxônh pa nē mē
kutā hprôt nē ā mē kot wa hipēx
anhýrja nē mē kām kapēr kām hihtýx
nē. ¹⁵ Nē mē kām:

—Kwa mē ri ā wa inhīpēx anhýr kēt
nē. Wa ixpē mēapām kēt kēnā kot
ka kēt mē ā wa inhīpēx anē. Nom
mēapāmja na ka htem ām amnhī to
hwyr kaprý nē kām mex o mex ā
harēnh kaprý o ri apa. Tā mē ate ā
amnhī nhīpēx anhýr kaga nē hpānhā
Tirtūm kôt amnhī xunhwyr nē amnhī
to pix wýr o apa kaxyw na pa pre wa
mē awyr mō nē pōj. Tirtūmja mē ate
mē apām jarēnhhta rom htír o htír. Na

pre mēmoj piitā ho kato. Kaxkwa ho
kato nē pyka ho kato nē gô xujanār o
kato. Nē kamā ri mēmoj piitā ho kator
pa.

¹⁶ —Amnepēm mē pa xwýnhjaja na
pre htem amnhī krā hkôt pix mā
tanhmā ri amnhī nhīpēx to ho pa
nhūm Tirtūm ja hā mē omu nē ām mē
omu nē tanhmā mē ho hkēt nē. ¹⁷ Mē
pahte amnhī tā omunh kaxyw na hte
amarī tanhmā mē pahto mex to ho
pa. Na hte mē pahwyr na rē nhūm mē
pahpur go mex nē. Nhūm mē pamā
tanhmā mē pahpur kām mēmo hyja to
nhūm ra mē pamā ô rūnh nē. Pu htem
hamý nē ho paxàpkur mex nē pahkīnh
nē ri papa. Tirtūm pix kukwak ri na
pu htem ā amnhī nhīpēx anhýr o ri
papa. Anē.

¹⁸ Nhūm pre ā Pawre mē kot wa
kām môx parja nē mē kām kapēr kām
hihtýx anē. No nhūm mē kuma nē
ām kuma nē wa kām mry hkwý hpar
kaxyw wa hā hihtýx nē. Jakamā
kritpēm nhýx prem wa kām hkwý pa.
Tā tanhmā hamaxpēr to nē hkaga nē
wa kām hpar kēt nē.

*Mē kot Pawre pír ā àmnēnh ā mē
harēnh*

Sikūn Ximotre 3.10-11

¹⁹ Tā nhūm Ijaew kwýjaja mē hwyr
mran pōj. Krī pē āxiok mē Ikōn rūm
ma mē hwyr mran pōj nē mē kām
Pawre ho hēx o mē hkôt pa nhūm
mē kuma nē axtem nē Pawre kamā
gryk kato. Hāmri nē mē kot hpír
kaxyw kēn runh kwý jamý nē ho htak
prēprék o kuhê. Hāmri nhūm amnhī
xà htýx kamā ama nē tēm nē akryk
nō nhūm mē omu nē htýx ho ra htyk
ā hkamnhīx. Hāmri nē hwyr tē nē
hpa hā kupy nē ma hkjēnh o mō nē
krī pum kumē nē ma akupým mra.
²⁰ Hāmri nhūm Jejus kôt mē kot axpēn
to htōjaja tee ri ā mē kot hipēx anhýr
ā omu nē hkaprī htýx nē hwyr hprôt
nē omu nē mýr o kuhê. Hāmri nhūm
te htyk pyrā nē nōr tā Jejus nhý hā
akupým hihtýx mex nē kànhmā nhý
hāmri nē ma akupým mē hkôt krīm té.

Tã nhũm apkati nhũm Panãpe mẽ wa krĩa rũm kato nẽ ma wa mō. Pãnhã ma krĩ pẽ Tepe hwỳr wa mō.

Pawre mẽ Panãpe akupỹm ãxiok wỳr wa mōr ã wa harẽnh

²¹⁻²² Tã nhũm wa ma Tepe hwỳr mō nẽ pōj. Hãmri nẽ kamã mẽ kãm Jejus tanhmã kot mẽ panẽ amnhĩ nhĩpêx to hã harẽnh o ri mẽ hkõt wa pa nhũm mẽ wa kuma nẽ ohtô nẽ Jejus kõt amnhĩ xunhwỳ.

Tã nhũm wa kato nẽ awjanã nẽ ma akupỹm pika pẽ Pisit wỳr wa mō. Nẽ kamã krĩ hkwy hkõt ri ra mẽ kot Jejus kõt amnhĩ xunhwỳr xwỳnhjê jahkre ho ri mẽ hkõt pa. Krĩ pẽ Risti nẽ Ikõn nẽ ãxiokja kõt. Nẽ mẽ ahkre kamã Jejus kõt mẽ ho mẽ hihtỳx o wa pa nẽ mẽ kãm:

—E ra mẽ ate Jejus kõt amnhĩ xunhwỳr jakamã koja mẽ kãm Jejus kurê xwỳnhjaja tee ri ja hã mẽ apumu nẽ hã tanhmã mẽ anhĩpêx to. Tã kær ka mẽ ãm amnhĩ tã mẽ omu nẽ ãm mẽ omu nẽ Jejus kaga hkêt nẽ. Nẽ arĩ hkõt amnhĩ nhĩpêx mex o ri apa rãhã nhỹrmã ma õ krĩ hwỳr api nẽ Tĩrtũm wa kuri amex kumrêx nẽ atĩr tũm nẽ apa ho apa. Anẽ.

²³ Hãmri nẽ ahpỹnhã krĩ piitã hkõt ri mẽ kot pastô nhỹ hã mẽ ahkre kaxyw mẽ hkwyjê rê nẽ mẽ kaxyw mẽ unhwỳ nẽ mẽ ho Tĩrtũm wỳ. àpkur kêt rãhã mẽ ho kuwỳ nẽ kãm:

—Pa Tĩrtũm? E jajê pumu. Mẽ kot krĩ ja kamã pastô nhỹ hã akrajê jahkre ho pa kaxyw na pa wa mẽ unhwỳ. Jakamã e kær ka mẽ kutã anojarêt rãhã ho ri mẽ hkõt apa. Anẽ.

Hãmri nẽ wa mẽ kęp kato nẽ ma hpãnhã nhỹhỹm wa mō. ²⁴ Pyka pẽ Pisit kamã mō nẽ hpãnhã nhãm pyka pẽ Pãpir kõt mō. Wa ma mẽ kãm tanhmã Jejus kapêr jarẽnh to ho mẽ hkõt mō. ²⁵ Hãmri nẽ krĩ pẽ Perke hwỳr wa pōj nẽ kamã mẽ kãm Jejus kot tanhmã amnhĩ nhĩpêx to hã harẽ hãmri nẽ mẽ kurũm kato nẽ axte mō. Pãnhã ma krĩ pẽ Atari hwỳr wa mō. ²⁶ Hãmri nẽ hwỳr pōj nẽ hpãnhã kurũm akupỹm ãxiok wỳr wa mō. Pàr rax kãm ma akupỹm mō.

Ãxiokja kamã na pre wa nojarêt nhũm Jejus kõt wa htõ nẽ wa htõxjaja wa ho Tĩrtũm wỳ nẽ ma krĩ hkwy hwỳr wa kumẽ. Wa kot ma mẽ hkõt tanhmã Jejus kot mẽ panẽ amnhĩ nhĩpêx to hã harẽnh o wa pa kaxyw wa kumẽ. Jakamã nhũm wa ra ja ho anhỹr pa nẽ akupỹm mẽ hwỳr wa mō. ²⁷ Hãmri nẽ wa akupỹm pōj nẽ Jejus kõt mẽ kot axpẽn to htõ nẽ htõxjê ho akuprõ nẽ mẽ kãm amnhĩ jarẽ nẽ mẽ kãm:

—Nà ãm hãmri na pa wa ra ixkãhkĩnh pẽ akupỹn mẽ awỳr pōj. Na pre Tĩrtũm wa ixkutã nojarêt rãhã ho wa inhĩhkõ hã pa. Jakamã pa pre wa ma ÿ hã Ijaew kêt xwỳnhjê mã Jejus jarẽnh o ixpa nhũm mẽ hkwyjaja wa inhma nẽ hkõt amnhĩ xunhwỳ.

²⁸ Anhỹr o wa mẽ kãm kapêr hãmri nẽ wa tokyx ma nhỹhỹm krĩ hõ hwỳr axte mōr kêt nẽ. War arĩ ãxiok kamã Jejus kõt wa htõ nẽ htõxjê hkõt ri pa.

15

Jerujarẽ kamã Jejus kwỳ hpikuprõnh ã mẽ harẽnh

Matêwre 23.1-4; Karatas 2.1-5, 5.1-16

¹ Tã hãmri nhũm Ijaew kwỳjaja ãxiok wỳr Jejus kwỳ pẽ Ijaew kêt xwỳnhjê hwỳr mōn pōj. Pika pẽ Jutej rũm mẽ hwỳr pōj nẽ tanhmã mẽ ahkre hto ho pa. Nom axtem nẽ Tĩrtũm kapêr kuhpa hã mẽ ahkre nẽ mẽ kãm:

—Kot ka mẽ amã Jejus kõt amnhĩ xunhwỳr prãm hãmri nẽ mẽ ixpyrà nẽ finat Mojes kot mẽ pamã karõ xã hkõt amnhĩ my kwryt kà kwỳ jakà nẽ rĩ kormã hkõt amnhĩ xunhwỳ. Kot kaj mẽ ã amnhĩ nhĩpêx anhỹr kêt nẽ nhũm Tĩrtũm tee ri ja hã mẽ apumu nẽ amnhĩ katut kõt mẽ ate amnhĩ tomnuj rẽnh nẽ mẽ ato hkra hkêt nẽ. Anẽ.

² Hãmri nhũm Pawre mẽ Panãpe tee ri mẽ kapêr anhỹrja ma nhũm wa kęp ja omnuj tỳx nẽ. Hãmri nhũm wa mẽ kãm:

—Tk. Kwa kot anhỹr kêt. Na hte Tĩrtũm mẽ pahte amnhĩ my kwryt kà jakàr ã mẽ pahpumunh kõt mẽ pahto hkra hkêt nẽ. Anẽ.

Hāmri nē tee ri mē kapērja nē mē kām kapēr no nhūm mē ãm wa kuma nē wa hkôt hamaxpēr kêt nē. Nē arī ã mē ahkre anhÿr o mē hkôt pa. Jakamã nhūm mē ja hã axpën mã kapēr rax nē. Hāmri nhūm Jejus kwÿ pē Ijaew kêt xwÿnhjaja amnhĩ tã Pawre mē Panãpe wa hkukja nē wa kãm:

—Kwa xà kot paj mē apyrà nē amnhĩ my kwÿt kã jakã nhūm Tirtūm kãm ja mex nē nã? Kwa wa ma akupÿm Jerujarē hwÿr mō nē ja hã Jejus nhÿ hã mē ahkre xwÿnh maatijê mē mē kot Jejus kwÿ jahkre xwÿnhjê kukja nē hã mē ama. Nē ota mē ixkwÿjjaja koja ma war akôt mra. Kê mē tanhmã mē amã ja jarēnh to ka mē ama nē man akupÿn mē ixwÿr mra nē tanhmã mē inhmã mē kapēr jarēnh to. Anē.

Hāmri nhūm wa mē kãm: “Tôe. Nã kot paj mē anē.” Anē. ³ Hāmri nē wa mē ma Jerujarē hwÿr mō. Ma pyka pē Wēnīs mē Samar hkôt ma hwÿr mō. Hāmri nē nhÿri Jejus kôt mē htō nē htōxjê pumu nē mē kãm Ijaew kêt xwÿnhjê jarē. Mē hkwÿjjaja mē urak nē Jejus kôt amnhĩ xunhwÿr ã mē harēnh o mō. Hāmri nhūm mē harēnh ma nē mē ý hã hkĩnh nē. ⁴ Hāmri nhūm mē ra Jerujarē hwÿr Jejus kôt mē htōjê hwÿr mōn pōj. Hāmri nē mē ahkre xwÿnhjê mē Jejus nhÿ hã mē ahkre xwÿnh maatijê pumu nhūm mē haxwÿja amnhĩ wÿr mē omu nē hkĩnh nē. Nē tanhmã mē ho mex to nē mē kãm kapēr mex nē. Hāmri nhūm Pawre mē Panãpe wa mē kãm amnhĩ jarē. Tirtūm kot wa ìhkô hã wa hkôt pa nhūm wa ý hã kot Ijaew kêt xwÿnhjê mã kapēr o pa nhūm mē hkwÿja kot wa mar nē Jejus kôt amnhĩ xunhwÿr ã nhūm wa mē kãm amnhĩ jarē. ⁵ Nhūm Jejus kwÿjê kamã mē kēp Parijew nhō xwÿnh kwÿjjaja. Mē kēp Parijew tã hkwÿjê rom Jejus kôt amnhĩ xunhwÿ. Jakamã nhūm mē tee ri Pawre mē Panãpe wa kot Ijaew kêt xwÿnhjê jarēnh ma nē kãnhmã kuhē nē wa kãm:

—Kwa kê mē pahpyrà nē amnhĩ my kwÿt kã jakã nē finat Mojes kot

Tirtūm nhÿ hã mē pamã mēmoj tã karō hkôt amnhĩ nhĩpêx o pa. No kot mē ã amnhĩ nhĩpêx anhÿr kêt nhūm ja mē pahpê omnuy nē. Anē.

⁶ Hāmri nhūm Jejus nhÿ hã mē ahkre xwÿnh maatijê mē mē hkwÿjê jahkre xwÿnhjaja mē kuma nē hapôj nē nhÿri akuprō. Ijaew kêt xwÿnh kot Jejus kôt amnhĩ xunhwÿr xwÿnhjaja kot tanhmã amnhĩ nhĩpêx to hã axpën mar kaxyw nhÿri akuprō. ⁷ Hāmri nē mē hã axpën mar ryy nē. Hāmri nhūm Simãw Pêtre tã kãnhmã xa nē mē kãm:

—Nã na pre Tirtūm mē pahkapi nē Ijaew kêt xwÿnhjê kaxyw pa ixta. Ixte mē kãm Jejus kot tanhmã mē panē amnhĩ nhĩpêx to hã harēnh o ri mē hkôt ixpa nhūm mē kot inhmar nē hkôt amnhĩ xunhwÿr kaxyw nhūm mē kaxyw ixta. Ra mē ate ja hã ixpumunh mex. ⁸⁻⁹ Tirtūm kot tanhmã ri mē pakute hkôt mē pahpumunh par jakamã te kot ra mē panhĩpêxta pyrà nē mãänēn Ijaew kêt xwÿnhjê nhĩpêx. Mē kot mē pahpyrà nē amnhĩ kaxyw Jejus kôt hamaxpēr jakamã nhūm Tirtūm te ra mē panhĩpêx pyrà nē amnhĩ katut kôt mē kot amnhĩ tomnuj rē nē mē ho hkra. Hāmri nē mē hwÿr amnhĩ Karō rē nhūm mē hkarō mã agjê. Tirtūm tãm kot amnhĩm mē rēnh kēnã.

¹⁰ —Tã xà mē pahpê Ijaew na pu htem wam Tirtūm kot finat Mojes mã kapēr kôt amnhĩ nhĩpêx mex o papa? Nã na pu htem hkôt amnhĩ nhĩpêx mex kêt nē. Nē mē panhĩgêtjjaja na xep prem haxwÿja hkôt amnhĩ nhĩpêx mex o pa hkêt nē. Mē pahpiitã mē pahpê hihtÿx kēnã. Tã Ijaew kêt xwÿnhjaja kot hkôt amnhĩ nhĩpêx o pa hã ka mē ra mē kãm karō kaxyw. Kwa kot kaj mē anē nhūm Tirtūm tee ri ja hã mē apumu nhūm ja kēp omnuy nē. Kãm ja prãm kêt. ¹¹ Kwa mē ã mē kãm hã karō anhÿr kêt nē. Mē panhō pahihtti Jejus na hte mē pahpiitã mē pakutã nojarêt o axpën pyràk. Jakamã Ijaew kêt xwÿnhjaja nē mē pahpê Ijaewjaja kot puj mē amnhĩ kaxyw hkôt pajamaxpēr nē hkôt amnhĩ xunhwÿ. Hāmri nhūm

Tirtūm ja hã mẽ pahpumu nẽ mẽ panhĩpêx o axpẽn pyrã nẽ Jejus kukwak ri amnhĩ katut kôt mẽ pahte amnhĩ tomnuj rẽ nẽ mẽ pahto hkra. No na hte mẽ pahte amnhĩ my kwyr̃t kã jakar̃ r̃y finat Mojes kapêr kôt amnhĩ nhĩpêx ã mẽ pahpumunh kôt mẽ pahto hkra hkêt nẽ. Anẽ.

¹² Nhũm pre ã Simãw Pêtre mẽ kãm kapêr anẽ. Hãmri nhũm hpãnhã Panãpe mẽ Pawreja mẽ kãm amnhĩ jarẽ. Tirtūm kot tanhmã wa ho nhũm wa kot Ijaew kêt xwýnhjê hwýr wa mõi ã amnhĩ jarẽ. Nẽ Tirtūm nhỹ hã mẽ kãm aa mẽ kot mẽmoj pumunh kêt kwý ho anhýr o ri mẽ hkôt pa hã mẽ kãm amnhĩ jarẽ nhũm mẽ piitã akryk wa mar o hkrĩ nẽ wa ujarênhta hkukamã hamaxpêr. ¹³ Hãmri nhũm Simãw Pêtre mẽ Panãpe wa mẽ kãm ujarênh pa hãmri nhũm Xiakre wa hpãnhã kãnhmã xa nẽ mẽ kãm kãnhmã ãhkra pẽ nẽ mẽ kãm:

¹⁴ —E pa ijaxwýja mẽ amã ixkapêr ka mẽ inhma. Nã na pu mẽ ra Simãw Pêtre kapêr ma. Tirtūm kot wam amnhĩ kaxyw Ijaew kêt xwýnh kwýjê rênh ã mẽ harênhja pu mẽ ra kuma.

¹⁵ Æm hãmri na ã mẽ harênh anẽ. Amnepêm Tirtūm kapêr nhỹ hã mẽ kapêr o mẽ pa xwýnhjaja na prem raja kukamã Tirtūm kot tanhmã mẽ hipêx to hã amnhĩ jarênh kukamã hã kagã. Te ho tãm kot kãm kapêr pyrã nẽ hã kagã ho:

¹⁶ Amnepêm finat Tawija na pre hte inhmã amnhĩ kwýjê ho amnhĩptar o pa.

Mẽ kêp Ijaewjaja nhũm pre inhmã mẽ ho amnhĩptar o pa.

Hãmri nhũm mẽ gaa nẽ axpẽn pẽ an-grã nẽ ahpýnhã ri pa.

Tã ixpê Tirtūm kot paj nhýrmã ma mẽ hwýr wrý nẽ axte mẽ ho akuprõ nẽ tãm mẽ unhwýr pa.

¹⁷ Jakamã Ijaewjê kukwak ri koja Ijaew kêt xwýnh kwýjaja mãânên ixkôt amnhĩ xunhwý.

Pa te ixte Ijaewjê nhĩpêx pyrã nẽ mẽ ho ixkra.

¹⁸ Æ mẽ hkukamã ijamaxpêr anhýr xã hkôt.

¹⁹ Anhýr o mẽ harênh jakamã nhũm ra mẽ hkwyjaja mẽ higêt kot amnhĩ nhĩpêx kaga hpa nẽ hpãnhã Tirtūm kôt amnhĩ xunhwý. Jakamã kwa kêt pu mẽ axte ja nhĩjuk ri mẽ kãm mẽmoj tã karõ hkêt nẽ. Ja pix na mex. ²⁰ Æm ja pix kot puj mẽ kãm hã karõ nẽ hã kagã nẽ mẽ hwýr kumẽ:

Mẽ kot sãnti hã mẽ õ hkur nẽ kot puj mẽ hkurê.

Nẽ mẽ kot mẽmo mry hpar nẽ hkamrõ runh kêt rãhã hkur nẽ mẽ hkurê.

Nẽ mẽ kot mẽmo mry kamrõ kur nẽ mãânên mẽ hkurê.

Nẽ mẽmyjaja kot amnhĩ prõ pix tânopxar ã mẽ kãm karõ.

Nẽ mẽnijaja haxwýja kot amnhĩ mjên pix tânopxar ã mẽ kãm karõ.

—Æm ja pix kot puj mẽ kãm hã kagã nẽ mẽ kãm hã karõ. ²¹ Mẽ panhĩgêtjê mã finat Mojes kot ã mẽ kãm karõ anhýrja na htem arĩ krĩ piitã hkôt ã mẽ kãm hã karõ anẽ. Mẽ panhõ arĩgromnu pẽ sap ã na htem arĩ ri Tirtūm kapêr o mẽ ahkre xã hã ixkre kamã ã mẽ kãm hã karõ anẽ. Anẽ.

Mẽ kot Ijaew kêt xwýnhjê hwýr kagã mênh ã mẽ harênh

Karatas 5.1

²² Hãmri nhũm mẽ Xiakre kapêr mar o hkrĩ. Jejus nhỹ hã mẽ ahkre ho mẽ pa xwýnh maatijaja nẽ mẽ kot hkwyjê jahkre xwýnhjaja nẽ Kris kwýjê piitã Xiakre kapêr ma nhũm ja mẽ kãm mex nẽ. Jakamã nhũm mẽ axpẽn mã:

—Tõe. Nã ãm hãmri na Xiakre ã Ijaew kêt xwýnhjê jarênh anẽ. Nã ja mex. Pu mẽ ã ãxiok nhõ xwýnhjê mã ja hã kagã anẽ hãmri nẽ mẽ hwýr kumẽ. Koja Pawre mẽ Panãpeja wa kupy nẽ ma akupým mẽ hwýr o mõi nẽ mẽ kãm kugõ. E mẽ pahtõ kot puj mẽ ma wa hkôt mẽ hwýr mõi? Anẽ.

Hãmri nhũm mẽ kuma nẽ Siras mẽ Jut Pasapas wa kuta. Jejus kôt mẽ kot axpẽn to htõ nẽ htõxjaja kot axpẽn mã hamẽ wa kot amnhĩ to mex xwýnh ã wa harênh jakamã nhũm mẽ ma Pawre mẽ Panãpe wa hkôt mõi kaxyw wa kuta. ²³ Hãmri nẽ ãxiok

kamã Kris kwỳ pê Ijaew kêt xwýnhjê kaxyw kagà nhîpêx nê kamã ã mē kãm kapêr anê nê mē kãm:

Pa? ãxiok mē Sir mē Siris kamã Ijaew kêt xwýnhjaja? Xà mē amex? Mē ixpê Jejus kôt mē atōjaja na pa mē awýr kagàja nhîpêx nê mē awýr kumê. Mē ixpê Jejus kôt mē kot amnhî xunhwýr xwýnhjê jahkre ho ixpa xwýnhjaja nê Jejus nhỹ hã mē ahkre ho mē pa xwýnh maatijaja pa mē awýr kumê.

²⁴ Na xep ra ja rûm mē ixkwýjaja ma mē awýr mō nê mēmoj tã tanhmã mē amã karō hto. Mē ate amnhî my kwryt kà jakàr nê amnepê mē inhîgêt Mojes kapêr kôt amnhî nhîpêx o apa hã mē amã karō. Ka xep mē tee ri ja kukamã ajamaxpêr. No mē pajaja na pa prem mē awýr mē rēnh kêt nê. ãm amnhî krã hkôt na prem mē awýr mō nê ã mē amã ja hã karō anê.

²⁵ Tã pa tee ri mē harēnh ma nhũm ja mē ixpê omnuj tỳx nê. Jakamã na pa mē jar akuprō nê mē akaxyw mē inhîōja wa kuta. Wa kot ma Panãpe mē Pawre wa hkôt mē awýr wa mōr nê mē amã mē ixkapêr jarēnh kaxyw. Panãpe mē Pawreja mē inhmã wa hapê htỳx. ²⁶ Na hte mē amã Pahihti Jejus Kris kapêr jarēnh o pa kaxyw wa amnhî grōnh kôt mē amã harēnh o pa.

²⁷ Tã pa mē akupým mē awýr wa kumê nê wa hkôt mē pahtō Jut mē Siras wa kumê. Mē ixte mē amã kagà kamã mē ixkapêrja nhũm wa kot hprî hã mē amã harēnh kaxyw pa mē wa hkôt mē awýr wa kumê.

²⁸⁻²⁹ E ja pix nê kot paj mē akurê: Kêr ka mē sãnti hã mē õ hkur kêt nê.

Nê mēmo mry kamrô kur kêt nê. Jao mēmo mry pa nê hkamrô runh kêt rãhã hkur kêt nê. Kamrô runh pa nê rî kormã tanhmã ho nê aku.

Nê kêr ka mē amyjaja amnhî prō pix tãnopxar o apa.

Nê mē anijaja ajaxwýja amnhî mjên pix tãnopxar o apa.

E ãm ja pix kot paj mē amã hã

karō. Tirtũm Karō kãm ja mex. Nê mē inhmã mãânên ja mex. Kot kaj mē ã amnhî nhîpêx anhýr o ri apa nê amex nê apa.

Tã ãm ja pix. Mē ixpê Jejus kwýjê jahkre xwýnhjê mē Jejus nhỹ hã mē ahkre xwýnh maatijê mē pa mē mē awýr kagàja nhîpêx nê kumê. E kêr ka mē amex nê akĩnh nê ri axpên kôt apa. ãm ja pix na hapêx. Anê. Nhũm prem ã kagà kamã mē kãm mēmoj tã karō anê. ³⁰ Hãmri nê Jut wa mē kãm kugō nê ma ãxiok wýr wa mē kumê nhũm wa mē ma akupým hwýr o mō. Jut nê Siras nê Pawre nê Panãpeja nhũm wa mē ma akupým mē hwýr o mē mō. Mōõ hãmri nê mē hwýr pōj. Hãmri nê Jejus kwýjê ho akuprō nê mē kãm kagàja gō ³¹ nhũm mē kupy nê kamã harê nê kuma. Kamã mē kot mē kãm mēmoj tã karō kamã harê nê kuma nê ý hã hkĩnh nê akupým tãm hamaxpêr.

³² Jut mē Siras wa kêp Tirtũm nhỹ hã kapêr o pa xwýnh na pre wa. Jakamã na prem mē hwýr mōn pōj hãmri mē kãm tanhmã ujarēnh to ho pa. Mē kot Jejus kôt pix mã hamaxpêr o pa kaxyw mē kãm ujarēnh o pa nê mē kãm:

—E kêr ka mē mãmrî Jejus kôt amnhî nhîpêx mex rãhã ho ri apa nê aa hkaga hkêt nê. Anê.

³³ Hãmri nê mē hkôt ri pa hã apkati xohtō nê. Hãmri nê wa akupým Jeru-jarê hwýr nojarêt nê mē kãm amnhî jarê nhũm mē wa kuma nê wa kãm:

—Tôe. Nà wa mãmrî ma akupým mō. Kojã Tirtũm war apumunh mex nê ka wa ma akupým amex nê akà hkĩnh pê akwýjê hwýr akato. Anê.

³⁴ Hãmri nhũm wa nojarêt tã nhũm Siras tanhmã hamaxpêr to nê hitôt nê mē kuri arík nhũm Jut Pasapas pix ma akupým hkwyjê kot mē hwýr wa mēnh xwýnhjê hwýr mō.

³⁵ Hãmri nhũm Pawre mē Panãpe wa Siras pyrã nê kormã ãxiok kamã pa. Hãmri nê Jejus kôt mē htō hkwyjê mē pimràatã mē ahkre ho pa. Tirtũm kapêr o mē hkôt mē ahkre ho pa.

Pawre mẽ Panãpe wa kot axpën pë pikjêr ã wa harënh

Atre 13.13; Korosê 4.10

³⁶ Hãmri nhũm Pawre mẽ Panãpe war arĩ mẽ hkôt ri pa hã apkati xohtô nê. Tã nhũm Pawre hamaxpër nê Panãpe mã:

–Kwa ma pu ma akupÿm ra pahte krĩ hkwÿ hkôt mẽ kãm Jejus jarënh o papa xwÿnhjê hkôt akupÿm mō. Pu ma mẽ hwÿr mō nê Jejus kôt pahtō nê pahtōxjê kot tanhmã ri amnhĩ nhĩpêx to hã mẽ omu. Anê.

³⁷ Hãmri nhũm kuma nê kãm:

–Tõe. Nà pu ma mō. Nom kêr pu ma amnhĩ kôt Juãw Makre ho mō kê axte pahto ajuta ho pahkôt mō. Anê.

³⁸ Hãmri nhũm Pawre tee ri kuma nhũm ja kêp omnuj nê nhũm kãm:

–Tk. Kwa na pre pahkôt pa htã Pãpir kamã tanhmã hamaxpër to nê pahkaga nê ma akupÿm Jerujarê hwÿr mō. Jakamã kwarĩ koja axte pahkôt mōr kêt nê. Anê.

³⁹ Hãmri nhũm Panãpe tee ri hã hihtÿx no nhũm kêp hkaga kumrêx. Jakamã nhũm wa ja hã axpën pë axkjê nê ma ahpÿnhã mō. Nhũm Panãpe amnhĩ kôt Juãw Makre ho mō nê wa ma pàr kãm gô hipôk pë Sipre hwÿr wa mō. ⁴⁰ Nhũm Pawre axtem amnhĩ kôt Siras wÿ nê ma wa mō. Hãmri nê wa nojarêr nhũm Jejus kôt wa htōjaja wa ho Tĩrtũm wÿ nê kãm:

–Pa Tĩrtũm. E koja Pawre mẽ Siras wa ma krĩ hkwÿ hkôt mẽ kãm akapër jarënh o ri wa pa. Jakamã kêr ka wa htãnopxar o ri wa hkôt apa. Anê.

Hãmri nhũm wa kato nê ma krĩ hkôt ri Jejus kapër o mẽ ahkre ho wa pa.

⁴¹ Wa ma pyka pë Sir mẽ Siris kôt Jejus kôt mẽ htō nê mẽ htōxjê pumunh nê Jejus kôt mẽ ho mẽ hihtÿx o wa pa kaxyw.

16

Ximotre kot Pawre mẽ Siras wa hkôt ri pa hã harënh

Wam Ximotre 1.1-2; Sikũn Ximotre 1.5; Piripos 2.19-22

¹⁻³ Tã nhũm Pawre mẽ Siras wa ma akupÿm krĩ pë Tepe hwÿr wa mō nê

hwÿr pøj nê hpãnhã kurũm ma Risti hwÿr mō. Hãmri nê wa hwÿr pøj nê kamã Ximotre pumu. Ximotre na pre ra katorxà pyrà nê Jejus kôt amnhĩ xãm nhũm mẽ kot Jejus kôt axpën to htō xwÿnhjaja kãm hapê nê. Nê kot Jejus kapër kôt amnhĩ nhĩpêx mex o pa hã axpën mã harê.

Krĩ pë Risti mẽ Ikõn kamã nhũm prem ã axpën mã Ximotre jarënh anhÿr o pa. Jakamã nhũm Pawre mẽ Siras wa mō nê mẽ hwÿr pøj nê Ximotre kot amnhĩ nhĩpêx ã omu nhũm Pawre kãm war amnhĩ kôt o mōr prãm nê. Nom Ximotre hkamrô pihkàr na pre. Katorxà kêp Ijaew nhũm hipêêxà kêp Gres jakamã nhũm ã Ximotre hkamrô pihkàr anê. Nhũm Ijaew kot katorxà hkôt kêp Ijaew ã omunh jakamã nhũm Pawre hamaxpër nê mẽ kaxyw kêp my kwÿr kà krãhta nê arĩ kormã mẽ hwÿr amnhĩ kôt o mō. ⁴ Hãmri nê mẽ ma krĩ hkwÿ hkôt mō. Mōo nê Ijaew kêt xwÿnhjaja ra kot amnhĩ kaxyw Jejus kôt hamaxpër xwÿnhjê jahkre ho mẽ hkôt pa. Ra Jerujarê kãm mẽ kot Jejus kwÿjê jahkre ho pa xwÿnhjê mẽ Jejus nhÿ hã mẽ ahkre xwÿnh maatijaja mẽ kot mẽ kãm mēmoj tã karõta nhũm mẽ ma mẽ kãm harënh o ri mẽ hkôt pa. ⁵ Hãmri nhũm mẽ kuma nê ra Jejus kôt amnhĩ nhĩpêx mex o mō. Hãmri nhũm apkati mẽ krĩ nhõ xwÿnh kwÿjaja mẽ uràk nê Jejus kôt amnhĩ xunhwÿ. Jakamã nhũm mẽ ra ohtō rax o mō.

Pawre tanhmã hpimtir to hã harënh

Rõmãn 15.18-21

⁶ Tã nhũm Pawre mẽ Siras mẽ Ximotre mẽ ma pyka pë As wÿr nojarêr. Mẽ kot mẽ kãm tanhmã Jejus jarënh to ho pa kaxyw mẽ hwÿr nojarêr tã nhũm Tĩrtũm Karõ kormã mẽ nê mẽ hkurê. Jakamã nhũm mẽ hpãnhã ma pyka hkwÿ pë Prik mẽ Karatas wa hkôt pa. Ixpê Rukre na pa pre mẽ hã ajêt nê ma mẽ hkôt ixpa ho ixpa. ⁷ Hãmri nê mẽ pyka pë Mĩs ã mō nê hpãnhã ma Pitĩn wÿr inhmōr mã tã no nhũm Tĩrtũm Karõ axte kê mẽ nê mẽ

ixkurê. ⁸ Jakamã pa mẽ arĩ Mĩs jakàr ã mẽ nê gô xujanãr mỳ ri krĩ pê Tôx wỳr pôj.

⁹ Tã nhũm kamàt pa mẽ ixpiitã gôr nê inhĩkwỳ nhũm Pawre tanhmã hpimtir to. Nhũm xep pika pê Masetõn nhõ xwỳnhja mẽ amnhĩ wỳr hwỳr kãm hihỳx o xa nhũm hprĩ hã omu nê kapêr ma. Nhũm xep pre kãm:

–Pa Pawre? Kwa amnê Masetõn wỳr mẽ ixwỳr mẽ nê tanhmã mẽ ijahkre hto. Anê.

¹⁰ Hãmri nhũm Pawre hkrãkato nê mẽ inhmã hpimtir jarê. Pa mẽ kuma nê axpên mã:

–Tô kwa tokyx pu mẽ hwỳr. Tĩrtũm kot mẽ hwỳr mẽ parênh kênã. E pu mẽ ma mẽ hwỳr mẽ nê mẽ kãm Jejus jarênh o mẽ ahkre. Anê.

Hãmri nê amnhĩ to akuprõ nê mẽ hwỳr inhnojarêr kurê kumrêx.

Ritre kot Jejus kôt amnhĩ xãm ã harênh

Piripos 1.1

¹¹ Hãmri pa mẽ ma Masetõn wỳr mẽ. Tôx rũm ma pàr kãm hwỳr mẽ. Hãmri nê gô nhĩpòk pê Samõtas wỳr pôj nhũm mẽ hã pàr nhõ. Hãmri nhũm apkati pa mẽ axte mẽ nê Masetõn kamã krĩ pê Nêap wỳr pôj. ¹² Hãmri nê pàr rũm ijapôj nê hpãnhã kurũm hamũ krĩ pê Piripos wỳr ixpar o mẽ. Piriposja Masetõn kamã krĩ maati na. Rõm nhõ xwỳnhjaja na prem ho kato. Jakamã pa prem ma hwỳr mẽ nê pôj nê tokyx axte kurũm nhỹhỹm inhmõr kêt nê. ¹³ Hãmri nhũm sap kato pa mẽ axpên mã:

–Kwa pyhti mỳri mãn hte Ijaewjaja axpên wỳr akuprõ nê Tĩrtũm mã amnhĩ jarênh o hkrĩ nà. E kwa pu mẽ hwỳr nê gô mỳri mẽ hapêr o ri papa. Anê.

Hãmri nê ma hwỳr mra nê mẽ hapêr o ri ixpa nhũm ãm mẽni pixjaja axpên wỳr akuprõ. Pa mẽ omu nê mẽ kuri ixkrĩ nê mẽ kãm Jejus kapêr jarênh o mẽ ahkre o ixkrĩ. ¹⁴ Nhũm mẽ kot mẽ inhmar o hkrĩ xwỳnhjê hõ pê Ritreja. Krĩ pê Xijaxir nhõ xwỳnh na pre. Nê kêp kupêxê mex o wênhê xwỳnh. Na pre hte kãm Tĩrtũm prãm

o pa. Jakamã nhũm Pawre kot mẽ ahkre ho ỳrja rôm nhũm Pahihti Jejus tanhmã Ritre hkrã hto nhũm hprĩ hã Pawre kapêr mar tỳx nê. ¹⁵ Hãmri nê amnhĩ kaxyw Jejus kôt hamaxpêr nê hkôt amnhĩ xãm kurê kumrêx. Òrkwỳ kamã hkwỳjê mẽ nhũm mẽ hkôt amnhĩ xunhwỳr pa. Jakamã pa mẽ kêp Jejus kwỳ hã mẽ hkrã kumrã. Mẽ piitã mẽ kot mẽ kêp Tĩrtũm kra hã mẽ omunh kaxyw. Hãmri nhũm Ritre amnhĩ kôt mẽ ixwỳr nê mẽ inhmã:

–An kot kaj mẽ ixte Jejus kôt amnhĩ xãm tỳx ã ixpumu hã kot kaj mẽ ma ixkôt mẽ nê hpãnhã inhõrkwỳ kamã pôj nê apa. Anê.

Pa mẽ kuma nê ma hkôt mẽ.

Mẽ kot Pawre mẽ Siras wa haxàr ã mẽ harênh

Makre 1.23-26, 1.34

¹⁶ Tã nhũm arĩgro hõ hã pa mẽ Tĩrtũm mã amnhĩ jarênh kaxyw axte pyhti mỳri mẽ pikuprõnh xàja wỳr mẽ. Hãmri nê pry kamã mẽ kãm àpênh xwỳnh nija pumu. Ra mẽkarõmnuti kot tanhmã hkrã hto nhũm ỳ hã àhpumunh tỳx xwỳnhja. Nhũm hte mẽkarõmnuti nhỹ hã mẽ kãm mẽmo hkukamã tanhmã ujarênh to ho pa. Jakamã nhũm õ patrãwjaja kukwak ri ujamỳnh rũnh pê hkĩnh nê pa. ¹⁷ Jakamã pa mẽ mẽ nhũm nija mẽ ixpumu nê mẽ ixtã ajêt nê ma mẽ ixkôt mẽ. Hãmri nê mẽ kãm mẽ ijarênh o mẽ ixkôt mẽ nê mẽ kãm:

–Xê mẽ mran jajê pumu. Na htem Tĩrtũm maati mã tanhmã amnhĩ nhĩpêx mex to ho pa. Tĩrtũm kot mẽ ate amnhĩ tomnuj pê tanhmã mẽ apytãr to hã mẽ amã ujarênh kaxyw na mẽ awỳr mra. Anê.

¹⁸ Nê ãm xatã mẽ kãm mẽ ijarênh o mẽ ixkôt paja o ra hã apkati xohtõ nê. Tã nhũm Pawre ra kãm mar kaga nê nê mẽkarõmnuti mã kapêr nê kãm:

–Tk. Kwa kêp akato nê ma tẽ. Pa Jejus Kris nhỹ hã amã ixkapêr ka inhma nê kêp akato nê ma atêm kurê kumrêx. Anê.

Hãmri nhũm kuma nê kêp kato nhũm akupỹm tãm hkrã. ¹⁹ Jakamã

nhũm ò patrāwjaja tee ri ja hã omu nẽ gryk tỳx nẽ axpẽn mã:

—Kwa ra mẽkarõmnutijaja kệp kator jakamã koja axte mẽmoj kukamã tanhmã ujarẽnh to hkêt nẽ. Pu mẽ kukwak ri axte paxujamỳnh kêt nẽ. Anẽ.

Hãmri nẽ Pawre mẽ Siras wa kamã gryk tỳx nẽ. Hãmri nẽ wa unẽ nẽ ma mẽ kot axpẽn mar xà hã ixkre hwỳr wa hkjẽnh o tẽ ²⁰ nẽ mẽ kot mẽ ho amnhĩptàr xwỳnhjê mã tanhmã wa ho hẽx to nẽ mẽ kãm:

—Kwa mẽ amnẽ Ijaewja wa omu. Na hte wa mẽ panhõ krĩ kamã hẽx pix o pa nhũm mẽ tee ri wa kapẽr ma nẽ wa kamã gryk tỳx nẽ. ²¹ Mẽ ixte amnhĩ nhĩpêx te kot axpẽn pyræk kêt tã nhũm wa mẽ kot amnhĩ nhĩpêx o mẽ pajahkre kaxyw nhỹhỹnh mẽ pahwỳr mỗ. Nom mẽ pahpê Rõm nhõ xwỳnhjaja axtem mẽ pahte amnhĩ nhĩpêx kẽnã kot pu kêt wa kuma nẽ wa kapẽr kôt amnhĩ nhĩpêx. Anẽ.

²² Hãmri nhũm mẽ kuma nẽ piitã wa kamã gryk tỳx nẽ. Hãmri nhũm mẽ ho amnhĩptàr xwỳnhjaja wa kệp wa ê kaxõnh o hkapa nẽ wa hã mẽ ò pòristi mã amỳnẽ nẽ mẽ kãm:

—E mẽ ma wa o tẽ nẽ mẽ htak xà ho wa htak. Anẽ.

²³ Hãmri nhũm mẽ kuma nẽ ma wa o tẽ nẽ wa htak rax nẽ. Hãmri nẽ wa haxà nẽ mẽ hagjẽnh xà jamãr xwỳnh mã kãm:

—E kêt ka ja wa omunh mex nẽ kẽ wa kator kêt nẽ. Anẽ.

²⁴ Hãmri nhũm mẽ kuma nẽ wa o tẽ nẽ ixkre jatur xà kamã wa haxà nẽ wa kator pymaj hamẽ wa htem pĩ jaxà nẽ ho htỳx nhũm wa arĩ hte tỳx nẽ nhỹ.

²⁵ Tã nhũm kamàt. Nẽ kôt ã kamàt nhũm wa Tirtũm mã amnhĩ jarẽ nẽ mex o mex ã wa grer o wa nhỹ nhũm wa uræk nẽ mẽ hagjẽnh xwỳnhjaja wa mar o hkrĩ. ²⁶ Puh nhũm pyka mẽ kãm htertet tỳx nẽ nhũm mẽ hã ixkreja amnhĩ to àpêr tỳx nẽ amnhĩ kahê xà rẽnh pa. Nhũm mẽ hagjẽnh xwỳnhjê kaxpre xà piitã mẽ nẽ pirẽnh pa. ²⁷ Hãmri nhũm mẽ hamãr o kuhê xwỳnhjaja pika tertet kamã ama nẽ

hkrākato. Hãmri nẽ mẽ hã ixkre jakwakre kahê xà rẽnh parja pumu nẽ mẽ hagjẽnh xwỳnhjaja hapôx par ã mẽ hkamnhĩx nẽ tee ri amnhĩ kukamã hamaxpẽr. Hãmri nẽ pahĩ kot mẽ hã hpĩr pymaj ò wapo kapa nẽ ra tãm kot ho amnhĩ pĩr kaxyw. ²⁸ Hãmri nhũm Pawre tee ri ja hã omu nẽ kax pẽ kãm amỳra nẽ kãm:

—Kwa amnhĩ pĩr kêt nẽ. Ot pa mẽ arĩ ixpiitã ixkuhê. Na pa mẽ ixtõ ixkator nẽ ixprõt kêt nẽ. Anẽ.

²⁹ Hãmri nhũm kuma nẽ kanê hã ahwỳ nẽ kuwy nẽ mẽ hwỳr axà nẽ mẽ piitã mẽ omu. Hãmri nẽ Pawre mẽ Sirasja wa omu nẽ wa hwỳr kãm ma ho htertet o tẽ. Hãmri nẽ wa hã hpijaam kaxyw wa kutã tẽm nẽ hkõnkrã ho nhỹ. ³⁰ Hãmri nẽ kànhmã xa nẽ wa ho kato nẽ ixkre kapem wa o xa nẽ wa kãm:

—Kwa tanhmã kot pa amnhĩ nhĩpêx to kẽ Tirtũm war apyrà nẽ ixte amnhĩ tomnuj pẽ ixpytã? Anẽ.

³¹ Hãmri nhũm wa kãm:

—Nà kot kaj amnhĩ kaxyw Jejus Kris kôt ajamaxpẽr nẽ hkôt amnhĩ xãm nhũm Tirtũm ja hã apumu nẽ amnhĩ katut kôt ate amnhĩ tomnuj piitã rẽnh pa. Nhũm anhõrkwỹ kamã akwỳjaja apyrà nẽ Jejus kôt amnhĩ xunhwỳ nhũm ã mẽ hipêx anẽ. Anẽ.

³² Hãmri nẽ wa ma hkôt õrkwỹ hwỳr tẽ nẽ hprĩ hã mẽ kãm Tirtũm kapẽr jarẽ nhũm mẽ wa mar o hkrĩ. ³³ Hãmri nhũm mẽ hagjẽnh xà jamãr xwỳnhja wa kãm wa htak xà kuhõ. Kormã kamàt kô hkwy kamã wa kãm kuhõ nẽ hkane. Hãmri nhũm wa mẽ kot Jejus kôt amnhĩ xunhwỳr par ã mẽ omu nẽ mẽ hkrã kumrã. Mẽ hamãr xwỳnh mẽ hkwyjê mẽ hkrã kumrãr pa. ³⁴ Hãmri nhũm mẽ kot amnhĩ kaxyw Tirtũm kôt hamaxpẽr jakamã piitã hkĩnh nẽ. Hãmri nhũm mẽ hamãr xwỳnhja õrkwỹ hwỳr Pawre mẽ Siras wa o tẽ nẽ wa kãm ò nhũm wa apku nhũm ma akupỳm mẽ hagjẽnh xà hwỳr wa o tẽ nẽ akupỳm wa haxà.

*Mẽ kot Pawre mẽ Siras wa kãm urer ã mẽ harẽnh
Atre 22.25-29*

³⁵ Hāmri nhūm apkati nhūm krī pytār xwýnhjaja mẽ õ pôristi mã anē nhūm mẽ hagjênh jamār xwýnh wýr tē nē kām:

—E na mẽ papytār xwýnhjaja ate Pawre mẽ Siras wa kām anhūrer nhūm wa mãmrī ma akupým htēm kaxyw hā karõ. Anē.

³⁶ Hāmri nhūm mẽ kuma nē wa hwýr axà nē wa kām:

—E na krī pytār xwýnhjaja ixte war akator kaxyw war atā inhmā karõ. Jakamā e wa mãmrī axàmnhĩx ma mẽ. Anē.

³⁷ Hāmri nhūm Pawre kām:

—Nà wa ixte tanhmā amnhĩ tomnuj to hkêt tã nhūm mẽ kot wa ixpynênh nē wa ixtak. Wa ijaxwýja wa ixpê Rôm nhõ xwýnh tã nhūm prem axtem nē mẽ piitã mẽ noo mã wa ixtak nē wa ijaxà. Mẽ kot amarĩ Rôm nhõ xwýnh tak nē mẽ hagjênh kêt tã nhūm mẽ ã mẽ noo mã ã wa inhĩpêx anē. Kormã wa ixte tanhmā amnhĩ tã ixàprār to hkêt tã nhūm mẽ ã wa inhĩpêx anē. Jakamā kwarĩ kot kaj mẽ no hkàx ã wa ixkator kêt nē. Kê mẽ kot wa ijaxàr xwýnhjaja tãm man mra nē wa ixkator pa war arĩ ma mẽ. Anē.

³⁸ Hāmri nhūm pôristija kuma nē ma akupým mẽ hwýr mra nē mẽ kām wa kapêr jarê. Hāmri nhūm mẽ tee ri mẽ uràn wa kêp Rôm nhõ xwýnh ã wa harênh ma nē kām ma htýx nē.

³⁹ Hāmri nē ma wa hwýr tē nē wa hwýr axà nē wa kām:

—Pa? E mãmrī war akato nē axàmnhĩx ma mẽ. Na pa prem war anhĩpêx kati rax nē. Tã kêt ka wa axte ja mã ajamaxpêr hkêt nē. Kê ja ãm jar mẽ pakamā hapêx. Anē.

Hāmri nē wa kator nē wa kām:

—E kwa wa mẽ inhõ krī pê akato nē ma nhýhým mẽ. Anē.

⁴⁰ Hāmri nhūm wa kuma nē kato nē ma akupým Ritre nhõrkwý hwýr wa tē. Hāmri nē Jejus kôt wa mẽ htõjê pumu nē wa mẽ kām amnhĩ jarê nē mẽ kām:

—E kot paj hāmri wa mã mẽ. Nom kêt ka mẽ arĩ Jejus Kris kôt amnhĩ nhĩpêx mex rãhã ho ri apa nē aa hkaga hkêt nē. Anē.

Hāmri nē wa mẽ kurũm kato nē ma krī hõ hwýr wa mẽ.

17

Tesarõn kamã mẽ kot wa kamã gryk ã mẽ harênh

Wam Tesarõn 1.1, 2.13-14

¹⁻² Tã nhūm Pawre mẽ Sirasja wa ma krī hkwý hkôt pa. Piripos rũm ma Apiporip mẽ Apôrõn kôt wa mẽ hāmri nē ra Tesarõn wýr wa pøj. Na pre hte Pawre nhýri pøj nē Ijaew nhõ Tirtũm kapêr o mẽ ahkre xà hã ixkre hwýr agjê nē kamã mẽ kām Jejus kapêr jarênh o kuhê. Jakamã nhūm wa mẽ nē Tesarõn wýr pøj nē ixkre hwýr mẽ hwýr tē nē mẽ kām ujarênh o xa. Nē mẽ kām ujarênh o hã arĩgromnu pê sap o axkrunêpxi. ³ Nē hprĩ hã mẽ kām tanhmã Tirtũm kapêr jarênh to nē mẽ kām:

—Nà Tirtũm kapêr ã kagà htũm kot mẽ pakaxyw ãm xwýnh jarênh. Amnhĩ xà htýx kamã hamak kãm htyk hāmri nē akupým htĩr ã nhūm kot hkukamã harênh. Tã na pre Jejusja ã amnhĩ nhĩpêx anē. Tãm kêp Krisja. Tirtũm kot mẽ pakaxyw ãm xwýnhnta na. Anē.

⁴ Hāmri nhūm mẽ hkwýja kuma nē wa hkôt hamaxpêr nē wa urak nē Jejus kôt amnhĩ xunhwý. Ijaew kwýjê nē Ijaew kêt xwýnh kwýjaja nē mẽni kot amnhĩ to rũnh xwýnh kwýjaja nhūm mẽ ohtõ nē amnhĩ kaxyw Jejus kôt hamaxpêr nē hkôt amnhĩ xunhwý. ⁵ Tã nhūm Ijaew kwýjaja tee ri hkwý kot wa hkôt amnhĩ xunhwýr ã mẽ omu nē mẽ hã Pawre mẽ Siras wa kamã gryk týx nē. Hāmri nē ma mra nē wa kaxyw mẽ kot amnhĩ tomnuj týx xwýnh kwýjê ho akuprõ nē mẽ kãm wa hã amýnê. Jakamã nhūm mẽ ma kapêr punuj pê wa hapêr o ri mra nhūm mẽ piitã mẽ omu nē mẽ kuma. Hāmri nhūm mẽ wa hapêr o ra Jasãw nhõrkwý hwýr mra. Nē mẽ kot Pawre mẽ Siras pynênh nē ma mẽ utār xwýnhjê hwýr wa o htēm kaxyw mẽ kêp kahê xà mẽ nē mẽ hwýr agjê. ⁶ Hāmri nē tee ri õrkwý kamã wa hapêr nhūm wa kamã amrakati.

Jakamã nhũm mẽ Jasãw mẽ kot Jejus kôt axpên to htõ xwýnh kwýjê pynê nê ma mẽ kot mẽ ho amnhĩptâr xwýnhjê hwýr mẽ o mra. Hãmri nê mẽ kãm tanhmã Pawre mẽ Siras wa ho hêx to. Âm kapêr punuj kãm kàx pê mẽ kãm wa harê nê mẽ kãm:

—Kwa na hte Pawre mẽ Siras wa pyka piitã hkôt mẽ kãm ri mẽmoj to hêx o pa. Tã wa ra mẽ panhõ krĩ hwýr pøj nê jar mẽ pamã ri tanhmã hêx to ho ri mẽ pahkôt pa. ⁷ Jasãw nhõrkwý kamã na pre wa pøj nhũm amnhĩ wýr wa kuwý. Na hte wa hkôt mẽ hamaxpêr xwýnhjaja pahihtĩ Sesti kapêr kwým ri kuhpa hã kapêr o pa nê axtem nê mẽõ pahi pê “Jejus” anhýr xwýnhja kapêr kôt amnhĩ nhĩpêx o pa. Anê.

⁸ Hãmri nhũm mẽ kot mẽ ho amnhĩptâr xwýnhjê mẽ krĩ nhõ xwýnhjaja mẽ kuma nê gryk tỳx kumrêx. ⁹ Hãmri nê Jasãw mã kãm:

—E kot paj mẽ apê mẽ akàxpore hkwý jamý. Ka mẽ ajapøj nê ma mẽ panê Pawre mẽ Siras wa hano nhũm wa kato nê ma mõi pa rĩ akupým mẽ amã kugõ. Anê.

Hãmri nê mẽ kêp mẽ hikàxpore hkwý jamý.

Pawre mẽ Siras kot Perej wýr mõi ã wa harênh

¹⁰ Tã nhũm ra kamãt nhũm mẽ kot Jejus kôt axpên to htõjaja hãmri Pawre mẽ Sirasja wa ma krĩ pê Perej wýr wa kumê. Hãmri nhũm wa kato nê ma hwýr mõi nê hwýr pøj. Hãmri nê Ijaew nhõ Tĩrtũm kapêr o mẽ ahkre xà hã ixkre hwýr htêm kurê kumrêx nê wa axà. ¹¹ Perej kamã Ijaew na pre te mẽ kot Tesarõn kamã Ijaew pyrãk kêt nê. Mẽ kurom mẽ kãm Tĩrtũm kapêr mar prãm nê. Jakamã nhũm pre Pawre mẽ Siras Tĩrtũm kapêr o mẽ ahkre ho pa. Apkati mẽ mẽ ahkre mex o pa nhũm mẽ wa kuma nê hkĩnh nê. Nê Tĩrtũm kapêr ã kagà htũm kamã wa kot mẽ ahkreta japêr nê kamã omu nê axpên mã wa harênh o:

—Nà ãm hãmri na wa ã Tĩrtũm kapêr o mẽ pajahkre anê. Tĩrtũm kapêr ã

kagà htũm hkôt na hte wa mẽ pajahkre. Anê.

¹² Hãmri nê ohtõ nê Jejus kôt amnhĩ xunhwý. Ijaew kwý nê Ijaew kêt xwýnh kwý nê mẽni kot amnhĩ to rũnh xwýnhjaja nhũm mẽ ohtõ nê Jejus kôt amnhĩ xunhwý.

¹³ Tã nhũm Tesarõn kãm Ijaewjaja Pawre jarênh ma. Kot Perej nhõ xwýnhjê mã Tĩrtũm kapêr jarênh o pa hã harênh ma. Hãmri nê ma mẽ hwýr mra nê mẽ kãm tanhmã ho hêx to nhũm krĩ nhõ xwýnhjaja mẽ kuma nê ra Pawre kamã gryk tỳx nê. ¹⁴ Jakamã nhũm Jejus kôt mẽ htõjaja mẽ harênh ma nê mẽ umaj Pawre kator nê ma gõ xujanãr wýr o mõi. No nhũm Siras mẽ Ximotre wa Perej kamã mẽ kuri arĩk. ¹⁵ Hãmri nhũm mẽ hkwýjaja ma Pawre o mõi. Ma krĩ pê Atenas wýr o mõi. Hãmri nê hwýr o pøj nê kamã kure. Hãmri nê ra akupým Perej wýr nojarêt nhũm Pawre mẽ kãm:

—E kêr ka mẽ ma akupým mõi nê Siras mẽ Ximotre wa kãm ijarê kê war amnhĩm nojarêt nê tokyx man ixkôt wa mõi. Anê.

Pawre kot Atenas nhõ xwýnhjê mã kapêr ã harênh

Rõmãn 1.18-20

¹⁶ Tã nhũm Pawreja kormã Atenas kamã pa. Siras mẽ Ximotre wa kamã hamak o ri kormã kamã mẽ kot amnhĩ nhĩpêx ã mẽ omunh o pa. Na pre Atenas nhõ xwýnhjaja sãnti ho ohtõ rax nê mẽ õ krĩ kamã unhwý nhũm Pawre ri omunh o ri kuhê ho pa. Na pre htem ahpýnhã mẽmo karõ nhĩpêxja o te Tĩrtũm nhĩpêx pyrã nê kutã hkõn krã ho rôrõk nê hkrĩ nê kãm mex o mex ã harênh o pa. Hãmri nhũm Pawre tee ri ja hã mẽ omunh o ri mẽ hkôt pa nê hkaprĩ nê. ¹⁷ Hãmri nê ma amnhĩ kwýjê nhõ Tĩrtũm kapêr o mẽ ahkre xà hã ixkre hwýr pa nê kamã mẽ ahkre ho kuhê. Ijaewjê mẽ Ijaew kêt xwýnh kot Tĩrtũm ã hpijaam xwýnhjê mã nhũm Tĩrtũm kapêr jarênh o kuhê. Nê apkati mẽ mẽ kot mẽmoj to wênê xà hwýr mra nê mẽ ujaarõr xwýnhjê mã Tĩrtũm kapêr jarênh o kuhê. ¹⁸ Hãmri nhũm mẽ mar

pahte amnhĩ nhĩpêx to ho papa hã mẽ pahpumunh kôt tanhmã mẽ pajarênh to. Nê amnhĩ ri mẽ htĩr tũm nê mẽ pa ho pa xwýnhjê jarê nê amnhĩ ri mẽ pa hkêt xwýnhjê jarê. Na pre ra ã mẽ harênh anhÿr kaxyw arĩgro hta. Arĩgrota ã kot hprĩ hã kãm tanhmã mẽ pajarênh to kaxyw na pre ra Jejusja xãm. Kaxyw na pre akupÿm ho htĩr. Nê akupÿm ho htĩr jao kot nhÿrmã kãm tanhmã mẽ pajarênh to xwýnh ã ho amnhĩrĩt. Anê.

³² Nhũm pre ã Pawre mẽ kãm Tĩrtũm kapêr jarênh anê nhũm mẽ mar o kuhê. Kot mẽ kãm Jejus tyk nê akupÿm htĩr ã harê nhũm mẽ mar o kuhê. Nhũm mẽ hkwyjaja kuma nê ãm kuma nê axtem nê ri hã akunha. Nom nhũm mẽ hkwyjaja mẽ kurom mar tÿx nê Pawre mã kãm:

—E kwa mẽ inhmã ja mar prãm. Apkati hõ hã ka axte mẽ inhmã ja jarê pa mẽ ixprĩ hã mar mex nê. Anê.

³³ Hãmri nhũm Pawre akupÿm nhÿri hpõx xà hã ixkre hwÿr ma tẽ. ³⁴ Hãmri nhũm Xiõnĩs pê Areop kãm mẽ kãm kapêr xwýnh nê mēhõ ni pê Tãmaris nê mẽ hkwyjaja kapêr mar tÿx nê amnhĩ kaxyw Jejus kôt hamaxpêr nê hkôt amnhĩ xunhwÿ. Hãmri nê Pawre kôt pa.

18

Pawre Korĩt wÿr mõi ã harênh Wam Korĩt 1.1-3

¹ Tã nhũm Pawre krĩ pê Atenas rũm kato nê ma krĩ pê Korĩt wÿr mõi nê pøj. ² Hãmri nê nhÿri Akirti pumu. Haxwÿja kêp Ijaew. Krĩ pê Põt kamã na pre kato. Tã ma pyka pê Itar wÿr mõi nê Itar kamã krĩ pê Rõm kamã hpãnhã pa. Pa ho pa htã nhũm mẽ õ pahĩti Krawti tanhmã hamaxpêr to hãmri nê mẽ amnhĩ nê Ijaew piitã mẽ hanor pa. Jakamã nhũm Akirti kato nê hprõ Prisire mẽ wa ma Korĩt wÿr mõi. Hãmri nê hwÿr pøj nê kamã pa ho pa. Jakamã nhũm Pawre Korĩt wÿr pøj nê wa omu ³ nê wa kuri pøj nê wa hkôt ri pa. Nê Siras mẽ Ximotre wa kamã hamak pê wa ãhkõ hã ãpênh o pa. Wa uràk nê kupêxê

pytĩ ho ixkre nhĩpêx nê ho wênê ho ri wa hkôt pa. ⁴ Hãmri nhũm sap kato nhũm ma Tĩrtũm kapêr o mẽ ahkre xà hã ixkre hwÿr pa nê kamã mẽ kãm Tĩrtũm kapêr jarênh o hkrĩ. Ijaew mẽ Ijaew kêt xwýnhjê mã nhũm mẽ kãm ujarênh o hkrĩ. Nê mẽ kãm Jejus kot mẽ panê tanhmã amnhĩ nhĩpêx to hã harê.

⁵ Tã nhũm Siras mẽ Ximotre wa ma Masetõn rũm Pawre wÿr mõi pøj. Jakamã nhũm Pawre axte ixkre nhĩpêx ã ãpênh kêt nê. Pãnhã apkati mẽ Ijaewjê jahkre ho pa. Mẽ kãm tanhmã Jejus jarênh to ho ri mẽ hkôt pa. Kêp Tĩrtũm kot mẽ pakaxyw ãm xwýnh ã harênh o ri mẽ hkôt pa. Xatã mẽ kãm ujarênh o pa. ⁶ Nom nhũm mẽ kãm mar prãm kêt nê kamã gryk kato nê kãm kapêr punuj nê. Nhũm Pawre tee ri amnhĩ tã mẽ kuma nê mẽ kãm:

—E ixte mẽ amã Jejus kot mẽ panê tanhmã amnhĩ nhĩpêx to hã harênh tã ka mẽ amã mar prãm kêt nê. Nà mẽ kam nê mẽ mãmri ate amnhĩ tomnuj kãm ty nê arĩ kam amnhĩ pumu no ãm amnhĩ tã tanhmã inhmã nê hkêt nê. Ra mẽ ate Tĩrtũm kapêr kaga kênã. Nà kot paj mẽ akaga nê ma hpãnhã Ijaew kêt xwýnhjê hkôt ri mẽ kãm ja jarênh o ri ixpa. Anê.

Hãmri nê kãnhmã xa nê hinõkà kapa nê ho apê. Mẽ kot hkaga hã amnhĩ pumunh kaxyw nhũm mẽ noo mã ã amnhĩ nhĩpêx anê. ⁷ Hãmri nê ixkre rũm kato nê hijuk ri Ijaew kêt xwýnh pê Xijutre nhõrkwÿ hwÿr tẽ nê hpãnhã Xijutre hkôt pa ho pa. Xijutre kêp Ijaew kêt tã amnhĩ kaxyw Tĩrtũm mã hamaxpêr rãhã ho pa.

⁸ Tã nhũm Ijaew õ pê Kriptija hkwyjê rom amnhĩ kaxyw Pahĩti Jejus kôt hamaxpêr nê hkôt amnhĩ xãm. Kêp Ijaew nhõ Tĩrtũm kapêr o mẽ ahkre xà hã ixkre kamã mẽ ahkre xwýnh na pre. Jakamã õrkwÿ kamã hkwyjê mẽ mẽ hpimràatã Pahĩti Jejus kôt amnhĩ xunhwÿr pa. Nê krĩja kamã ra Ijaew kêt xwýnh ohtõ nê Kripti pyrã nê amnhĩ kaxyw Jejus kôt hamaxpêr nê hkôt amnhĩ xunhwÿ.

Jakamã nhũm Pawre mẽ kêp Jejus kwỳ hã mẽ piitã mẽ hkrã kumrã.

⁹ Tã nhũm kamàt nhũm Pawre gõr nẽ nõ nẽ amỹti nhũm kêwe Pahihiti Jejus axte hwỳr kato nẽ kãm kapêr nẽ kãm:

—Pa Pawre? E kwa kêr ka mãmri axãmnhix ri atar mẽ kãm ijarênh rãhã ho ri apa nẽ amnhĩ kamã akahak o ri mẽ hkôt apa hkêt nẽ. ¹⁰ Kot paj atãnopxa nhũm mễhõ tanhmã ato hkêt nẽ. Krĩ ja kamã koja mẽ ohtô nẽ ixkôt amnhĩ xunhwỳ. Anẽ.

¹¹ Nhũm pre ã Pahihiti Jejus Pawre hpimtir kãm kãm kapêr anẽ. Jakamã nhũm Korĩt kãm arĩ ri mẽ hkôt pa ryy nẽ. Arĩ mẽ hkôt pa hã amgrà pyxi nẽ hkôt mytwrỳ kêp 6. Jao Tĩrtũm kapêr o mẽ ahkre ho ri mẽ hkôt pa.

¹² Tã nhũm Korĩt nhõ xwỳnhjê nhõ pika pẽ Gres kamã mẽ ho amnhĩptar xwỳnh nyw Gartija. Korĩt kãm pa jakamã nhũm Ijaew xaptar tũmrejaja Pawre pynê nẽ ma hwỳr o tẽ nẽ kãm tanhmã ho hêx to. ¹³ Jakamã nhũm Ijaew pikuprõnh xà hã ixkre kamã mẽ kãm kapêr xwỳnh Sostenesja Garti mã Pawre o hêx nẽ kãm:

—Kwa jahti na hte mẽ ixpê Ijaew kot amnhĩ nhĩpêx kwỳm ri mẽ ahkre ho pa. Jao mẽ ixte axtem nẽ tanhmã Tĩrtũm kôt ri amnhĩ nhĩpêx to ho ri ixpa kaxyw mẽ inhmã karõ ho pa. Nom mẽ ixte amnhĩ nhĩpêx kuhpa hã mẽ inhmã karõ. Anẽ.

¹⁴ Hãmri nhũm ra Pawre kot Garti mã amnhĩ jarênh mã tã nhũm Garti amnhĩ to wa nẽ hã mẽ kãm kapêr nẽ mẽ kãm:

—Tk. Kwa kot tanhmã amnhĩ tomnuj tore hã. Kot tanhmã amnhĩ tomnuj to nhũm mẽ ate inhmã harênh ronhỹx pa arĩ mẽ ama nẽ tanhmã mẽ amã hipêx to. ¹⁵ No xep ãm kot mẽ axaptar tũmrejaja kot amnhĩ nhĩpêx kuhpa hã pix mã kot amnhĩ nhĩpêx o pa kênã. Nẽ mẽ ate mẽ ahkre kuhpa hã kot ri mẽ ahkreja pix mỳrapê na ka mẽ kamã agryk nẽ ã inhmã ho akapêr anẽ. Nà kot paj ja hã tanhmã ho hkêt nẽ. Ka mẽ kam nẽ amnhĩ krã hkôt tanhmã ho hprãm xà hkôt tanhmã ho. Anẽ.

¹⁶ Hãmri nẽ amnhĩ nẽ mẽ hano. ¹⁷ Hãmri nhũm mẽ tee ri kuma nẽ ra Sostenes kamã gryk nẽ. Kot Garti mã tanhmã Pawre jarênh to htã nhũm kuma nẽ ãm mar jakamã nhũm mẽ hã Sostenes kamã gryk. Hãmri nẽ unê nẽ Garti noo mã htak o xa. Nẽ htak rax nẽ. Nom nhũm hã mẽ omu nẽ ãm mẽ omu nẽ nẽ tanhmã mẽ kãm nẽ hkêt nẽ.

Pawre kot akupỹm ãxiok wỳr mõi ã harênh

¹⁸ Tã nhũm Pawre arĩ Korĩt kamã mẽ hkôt pa nẽ gaa nẽ nojarêr nẽ Jejus kôt htõjê mã amnhĩ jarê nẽ mẽ kãm:

—E kot paj ma akupỹm pika pẽ Sir wỳr mõi. Anẽ.

Hãmri nẽ mẽ kêp kato nẽ ma hwỳr mõi. Nẽ ma amnhĩ kôt Akirti mẽ hprõ Prisire wa o mõi. Mõi nẽ krĩ pẽ Sênkrej wỳr põi. Nhũm Pawre amnhĩ kukamã mễmoj tã tanhmã Tĩrtũm mã amnhĩ jarênh to nẽ amnhĩ jarênh xà hkôt amnhĩ krã hkênh pa. Ijaew kot amnhĩ nhĩpêx xà hkôt ã amnhĩ nhĩpêx anẽ. Hãmri nẽ mẽ pàr wỳr agjê nẽ Sênkrej rũm kato nẽ ma Sir wỳr mõi. ¹⁹⁻²¹ Mõi nẽ krĩ pẽ Epes wỳr põi. Hãmri nhũm Pawre mẽ hkwỳjaja pàr rũm hapõi nẽ krĩ hwỳr agjê nẽ Ijaew nhõ Tĩrtũm kapêr o mẽ ahkre xà hã ixkre hwỳr mra nẽ hwỳr agjê nhũm Pawre mẽ kãm Tĩrtũm kapêr jarênh o nhỹ. Hãmri nhũm mẽ kuma nẽ kãm mar prãm nẽ. Nẽ kãm:

—Kwa anojarêr kêt nẽ. Kritpêm mẽ ixkôt ri apa ryre nẽ Tĩrtũm kapêr o mẽ ijahkre. Mẽ inhmã ja mar prãm.

Anhỹr tã no nhũm mẽ kãm:

—Nà kot paj ma mõi. Nom koja Tĩrtũm nhỹrmã akupỹn mẽ awỳr inhmẽ pa man akupỹn mẽ awỳr mõi nẽ axte kapêr o mẽ ajahkre. Anẽ.

Hãmri nẽ ma mõi. Ma Epes rũm pàr kãm mõi. Nom nhũm Akirti mẽ Prisireja wa Epes kamã arĩk nẽ hpãnhã kamã pa ho pa.

²² Tã nhũm Pawre krĩ pẽ Sejarej wỳr põi. Hãmri nẽ hpãnhã kurũm ma akupỹm Jerujarê hwỳr mõi. Kot Jejus kôt htõjê pumunh mã ma mẽ hwỳr mõi. Hãmri nẽ mẽ hwỳr põi nẽ mẽ omu nẽ tanhmã mẽ kãm amnhĩ jarênh to

ně mẽ kệp kato ně ma akupỹm āxiok wỳr mō. ²³ Hāmri ně hwỳr pōj ně kamā mẽ hkôt ri pa ryy ně mẽ kurũm kato ně hpānhā ma akupỹm pyka pē Prik mẽ Karatas wa hwỳr mō. Nē kamā mẽ kot Jejus kôt amnhĩ xunhwỳr xwỳnhjē jahkre ho pa. Mē kot Jejus kôt amnhĩ nhĩpêx tỳx rāhā ho pa kaxyw mẽ hkôt mẽ ahkre mex o ri mẽ hkôt pa.

Apor kot Epes kām Tĩrtũm kapēr jarēnh

Epes 1.1-2; Wam Korĩt 3.6-9

²⁴ Tā nhũm Epes wỳr Ijaew ò pē Aporja mō ně hwỳr pōj. Krĩ pē Aresān kamā na pre kato. Na pre hte amnhĩ kaxyw Tĩrtũm kôt pix mā hamaxpēr ně kapēr ā kagà htũm mar tỳx ně. Jakamā mẽ kām harēnh mex o pa nhũm mẽ piitā kām mar prām ně. ²⁵ Nom kormā Jejus jarēnh jatur xà mar kêt jakamā ām mẽ kām hkrax pix jarēnh o pa. Juāw Paxis kot tanhmā mẽ ahkre htoja nhũm mar tỳx ně. Nē tanhmā kot mẽ hkrā kumrār to ho paja nhũm mǎānēn mar tỳx ně. Jakamā na pre hte mẽ kām ja pix jarēnh o pa. No Jejus kệp Tĩrtũm kot mẽ pahwỳr mēnh xwỳnh ā harēnhja nhũm kormā mar kêt ně. Tā Epes wỳr mō ně pōj. ²⁶ Hāmri ně Ijaew nhō Tĩrtũm kapēr o mẽ ahkre xà hā ixkre hwỳr axà ně kamā mẽ kām ujarēnh o nhỹ. Amnhĩ kamā kahak kêt ně àmnhĩx ri mẽ kām ujarēnh mex ně. Hāmri nhũm Prisire mẽ Akirti wa kot mẽ kām ujarēnh ā kuma ně war axpēn mā:

—Kwa mǎn kormā Jejus jarēnh piitā mar kêt. E pu amnhĩ kôt panhōrkwỹ hwỳr o tē ně pahprĩ hā kām harēnh jatur xàm kumē kê hprĩ hā mar pa. Anē.

Hāmri ně war amnhĩ kôt kuwỳ ně hprĩ hā kām ujarēnh jatur xàm kumē nhũm hprĩ hā harēnh piitā mar tỳx ně.

²⁷ Tā ra pyka pē Gres wỳr nojarêt ně Jejus kôt htōjē mā amnhĩ jarē nhũm mẽ kuma nhũm ja mẽ kām mex ně. Hāmri ně Gres kamā Jejus kôt mẽ htōjē mā kagà nhĩpêx. Apor kot mẽ hwỳr amnhĩ kôt o mōr ně mẽ kām òr

nhũm mẽ kot omunh ně kamā harēnh ně ho mex kaxyw mẽ kām hipêx. Hāmri ně hipêx pa ně kām kugō nhũm kupy ně mẽ kurũm kato ně ma mẽ hwỳr mō. Hāmri ně mẽ hwỳr pōj. Gres nhō xwỳnh kwỳjaja na prem ra Jejus kôt amnhĩ xunhwỳ. Tĩrtũm kot mẽ kutā nojarêt jakamā nhũm mẽ ra hkôt amnhĩ xunhwỳ. Jakamā nhũm Apor mẽ hwỳr pōj hāmri ně mẽ ĩhkô hā tanhmā mẽ ho ajuta hto ho pa. ²⁸ Nē xatā Ijaew mā tanhmā Jejus jarēnh to kamā hihtỳx o mẽ hkôt pa ně mẽ kām: —Nà Jejusja tām na pre Tĩrtũm mẽ pakaxyw ām. Tĩrtũm kapēr ā kagà htũm kamā ā harēnh kot anhyr. Anē.

19

Pawre akupỹm Epes wỳr mōr ā harēnh

Rukre 3.15-16

¹ Tā nhũm Apor kormā Korĩt kām pa ri nhũm Pawre ma akupỹm Epes wỳr mō. Ma krāhakỳx kôt akupỹm hwỳr mō. Hāmri ně hwỳr pōj ně mẽ kot Jejus kôt amnhĩ nhĩpêx o mẽ pa xwỳnhjē pumu. Nhũm mẽ kormā Jejus jarēnh jatur xà mar kêt ně. ² Jakamā nhũm Pawre mẽ hwỳr mō ně mẽ omu ně Tĩrtũm Karō hā mẽ hkukja ně mẽ kām: —Kwa mẽ ate Jejus kôt amnhĩ xunhwỳr xà hā arĩgrota ā xà na pre Tĩrtũm Karō mẽ akarō mā agjê? Anē.

Hāmri nhũm mẽ kuma ně kām:

—Nà mẽ ixte Tĩrtũm Karō jarēnh mar kêt. Anē.

³ Hāmri nhũm mẽ kām:

—No mẽmoj kôt na prem mẽ akrā kumrā? Anē.

Nhũm mẽ kām:

—Nà Juāw Paxis kot mẽ hkrā kumrār o paja kôt na prem mẽ ixkrā kumrā. Anē.

⁴ Hāmri nhũm Pawre mẽ kām:

—Nà Juāw Paxis na pre Ijaew mā kapēr o: “Kot kaj mẽ mẽ ate amnhĩ tomnuj kaga ně hpānhā tām amnhĩ nhĩpêx pa hā mẽ akrā kumrā.” Anhyr o mẽ kām kapēr o pa. Nē mẽ kām Jejus jarēnh o: “Koja tokyx mēhō ixkôt hapu hā mẽ pahwỳr kato ně tanhmā amnhĩ nhĩpêx to ho pa. Ka mẽ omu ně amnhĩ kaxyw hkôt ajamaxpēr ně

hkôt amnhĩ xunhwỳ.” Aně. Tã Jejusja na pre ã mẽ kãm harěnh anhỳr o pa. Aně.

⁵ Nhũm pre ã Pawre mẽ kãm Juãw Paxis mẽ Jejus wa harěnh aně nẽ hpãnhã Jejus nhỹ hã mẽ hkrã kumrã. ⁶ Hãmri nẽ hpãnhã mẽ hã ìhkra jaxwỳ nhũm Tĩrtũm Karõ mẽ hwỳr wrỳ nẽ mẽ hkarõ mã gjêx pa. Hãmri nhũm mẽ ÿ hã ahpỹnhã axtem mẽ kapěr kwỳ ho kapěr nẽ ÿ hã Tĩrtũm mex o mex ã harěnh o kuhê. ⁷ ã mẽ kot amnhĩ nhĩpêx anhỳr xwỳnhjaja kệp 12.

⁸ Tã nhũm Pawre Epes kãm Ijaew nhõ Tĩrtũm kapěr o mẽ ahkre xà hã ixkre hwỳr mrar ã mytwrỳ axkruněpxi. Amnhĩ kamã kahak kêt nẽ hprĩ hã Ijaew mã hprĩ hã Jejus jarě nẽ mẽ kãm:

—E pa mẽ amã Jejus jarě ka mẽ inhma. Nà Tĩrtũm kot mẽ pahwỳr mēnh xwỳnhta na. Nẽ mẽ pahte kamã pajamak o papa xwỳnhta na. Jakamã kot ka mẽ amnhĩ kaxyw hkôt ajamaxpěr nẽ hkôt amnhĩ xunhwỳ nhũm Tĩrtũm ja hã mẽ apumu nẽ mẽ ato hkra. Aně.

Hãmri nhũm mẽ hkwỳjaja kuma nẽ hkôt hamaxpěr kurê kumrêx. ⁹ Nom nhũm mẽ hkwỳjaja kuma nẽ ãm kuma nẽ Jejus o kapěr punuj nẽ. Mẽ piitã mẽ noo mã kuhê nẽ ho kapěr punuj tỳx nẽ. Nhũm Pawre tee ri ja mẽ omu hãmri nẽ mẽ kurũm kato. Mẽ pikuprõnh xà hã ixkreta rũm kato nẽ hpãnhã nhãm mẽ kot kãm “Xirãn kot mẽ ahkre xà hã ixkre” anhỳr xwỳnhja wỳr hpãnhã mō. Nẽ amnhĩ kôt mẽ kot Jejus kôt amnhĩ xunhwỳr xwỳnhjê ho pa nẽ hpãnhã ixkreta kamã mẽ ahkre ho pa. Apkati mẽ hwỳr mra nẽ mẽ ahkre. ¹⁰ Jao hã amgrà axkrut. Jakamã nhũm pyka pẽ As kamã mẽ piitã Pahihti Jejus jarěnh ma. Ijaew nẽ Ijaew kêt xwỳnhjaja nhũm mẽ piitã harěnh ma.

Wajaga hkwỳ jarěnh

¹¹ Tã nhũm Pawre Tĩrtũm nhỹ hã mẽ kãm aa mẽ kot mẽmoj pumunh kêt kwỳ ho anhỳr o ri mẽ hkôt pa. ¹² Jakamã nhũm pre htem hwỳr mra nẽ kệp ê hkwỳ jamỳ nẽ ma mẽ

à xwỳnhjê hwỳr o mra nẽ mẽ hã haxwỳ nhũm mẽ akupỹm mex. Nẽ mẽkarõmnuti kot tanhmã mẽ ho ho pa xwỳnhjê hã nhũm prem mãănēn mẽ hã ê kwỳ jaxwỳ nhũm mẽkarõmnutija mẽ kurũm hapôj nẽ ma mrar kurê kumrêx nhũm mẽ akupỹm tãm hkrã.

¹³⁻¹⁴ Tã nhũm mẽõ patre maati Sewahtija hkra my kệp 7 nẽ piitã kệp wajaga. Hãmri nẽ mẽ kãm Pawre pyrã nẽ mẽ nẽ mẽkarõmnuti japôx o pa hprãm nẽ. Jakamã kormã Jejus kôt amnhĩ xunhwỳr kêt tã mẽ kot ÿ hã Pawre pyrã nẽ mẽhõ nẽ hkwỳ janor kaxyw nẽ kãm:

—E Pawre kot Jejus jarěnh o ri pa xwỳnhta nhỹ hã kot paj amã ixkapěr. Jakamã e kwa tokyx myta rũm akato nẽ ma tẽ. Aně.

¹⁵ Hãmri nhũm mẽkarõmnutija mẽ kuma nẽ ãm mẽ kuma nẽ mẽ kãm:

—Tk. Mẽ apẽ Jejus mẽ Pawre wa hkwỳ hkêt tã mẽ nẽ ã mẽ inhmã akapěr anhỳr o apa. Nà Jejus mẽ hkwỳ pixjaja na htem Tĩrtũm nhỹ hã mẽ kệp mẽ ijapôx o pa. Mẽ apẽ mẽ hkwỳ hkêt kênã. Nà pa ixkatoore kaxyw ã. Aně.

¹⁶ Hãmri nhũm mẽkarõmnuti kot tanhmã ho xwỳnhta mẽkarõmnuti nhỹ hã wajagajê pynê nẽ mẽ hta rax o kệp mẽ ê kaxõnh pa nhũm mẽ tee ri amnhĩ nhĩpêx. Hãmri nẽ hkênh nẽ õrkwỳ rũm hapôj nẽ ma umaj hprõt nẽ mra. ¹⁷ Hãmri nhũm Epes kamã mẽ piitã ã kot mẽ hipêx anhỳr ã mẽ harěnh ma nẽ tee ri hamaxpěr nẽ kãm ma nẽ. Ijaew nẽ Ijaew kêt xwỳnhjaja nhũm mẽ piitã tee ri kãm hamaxpěr o pa. Nẽ Pahihti Jejus mã mex o mex ã harẽ. ¹⁸ Jakamã nhũm mẽ kot Jejus kôt amnhĩ xunhwỳr nyw xwỳnhjaja piitã tanhmã amnhĩ jarěnh to. Nẽ mẽ hkwỳjaja amnhĩ jarěnh o:

—Nà kormã ixte Jejus kôt amnhĩ xãm kêt ri na pa pre ã amnhĩ tomnuj anhỳr o ri ixpa. Tã Jejus kôt amnhĩ xãm hãmri nẽ axte ã amnhĩ nhĩpêx anhỳr kêt nẽ. Aně.

Nhũm mẽ hkwỳjaja kệp wajaga htã mẽ urak nẽ Jejus kôt amnhĩ xunhwỳ hãmri nẽ amnhĩ jarěnh o:

—Nà ijaxwỳja kormã Jejus kôt amnhĩ xãm kêt ri na pa pre hte nẽ mẽ no kupyri nẽ mẽ y pix o ri mẽ hkôt ixpa. Tã Jejus kôt amnhĩ xãm hãmri nẽ axte ã amnhĩ nhĩpêx anhỹr kêt nẽ. Pãnhã axtem amnhĩ nhĩpêx nyw o amnhĩ nhĩpêx o ri ixpa. Anẽ.

¹⁹ Hãmri mẽ õ wajaga xàhpumunh xà hã kagà jamỳ nẽ ma o mra nẽ kaxyw kuto nẽ kamã rēnh pa nẽ mẽ piitã mẽ noo mã ho xêt pa. Wajaga xàhpumunh xà hã kagàja ã kàxpore xohtô rax kumrêx tã nhũm mẽ Jejus gryk ã hamỳ nẽ o mra nẽ ho hxêt pa nhũm hapêx. ²⁰ Hãmri nhũm krĩ nhõ xwỳnhjaja ã mẽ kot amnhĩ nhĩpêx anhỹr ã mẽ omu nẽ ohtô rax nẽ mẽ urak nẽ Jejus kôt amnhĩ xunhwỳ.

Pawre kot Rõm wỳr hkrà hã harēnh Rõmã 1.13-15, 15.22-29

²¹ Tã nhũm Pawre ra akupỹm Jeru-jarē hwỳr nojarêt nẽ hamaxpēr o:

—E kot paj ixkato nẽ hpãnhã ma Masetõn mẽ Gres wa hkôt ma akupỹm Jerujarē hwỳr mō. Ma mẽ kot Jejus kôt amnhĩ xunhwỳr xwỳnhjê pumunh o mẽ hkôt mō. Hãmri nẽ Jerujarē hwỳr pōj nẽ kamã tanhmã amnhĩ to hpa hãmri nẽ hpãnhã ma Rõm wỳr mō. Anẽ.

²² Hãmri nẽ hkôt ho ajuta ho wa pa xwỳnh Ximotre mẽ Eras wa kãm amnhĩ jarē nẽ wa kãm:

—E kêr ka wa ma ixkukamã Masetõn wỳr wa mō. Kot paj kormã jar As kamã ixpa grire hãmri nẽ ma war akôt mō pu mẽ hamũ ma Jerujarē hwỳr mō. Anẽ.

Hãmri nhũm wa kuma nẽ kato nẽ ma hkukamã Masetõn wỳr mō.

Mẽ kot sãnti hã Pawre mã àkjêr ã mẽ harēnh

Sikũn Korõt 1.8-9

²³ Rõm nhũm Epes nhõ xwỳnhjaja tee ri Pawre kot tanhmã Pahihti Jejus jarēnh to hã kuma nhũm ja mẽ kêp omnuj nẽ. Nhũm mẽ Jejus ã kamã gryk tỳx nẽ. ²⁴ Na prem amnhĩ kaxyw Tĩrtũm kôt hamaxpēr kêt nẽ. Na prem axtem sãnti ho mẽ hpãm nẽ amnhĩ to hwỳr pẽ hã hpijaam nẽ kãm mex o

mex ã harēnh o pa. Mẽ õ sãntija ni Xiãre na pre. Nhũm mẽ kãm ixkre nhĩpêx nẽ kamã hkarõ nhĩpêx xãm. Hãmri nẽ hwỳr akuprõ nẽ hã hkĩnh nẽ hkarõ hã hpijaam nẽ kãm mex o mex ã harē. Nhũm pre hte Temētja Xiãre nhõrkwỹ karõ hkryre hkwy nhĩpêx nẽ mẽ kãm ho wēnê ho pa. Prat o hipêx nẽ ho wēnê ho pa. Jao ra hã mẽ àpēnh xwỳnhjê mẽ nhũm mẽ kot haprõr xwỳnhjê kukwak ri kàxpore jamỳnh rũnh o pa.

²⁵ —Jakamã nhũm Pawre mẽ hwỳr mō nẽ pōj nẽ mẽ kãm Mēpahpãm Tĩrtũm jarēnh o ri mẽ hkôt pa nhũm Temēt tee ri kuma nhũm ja kêp omnuj nẽ. Hãmri nhũm hamaxpēr nẽ mẽ kot urak nẽ Xiãre nhõrkwỹ karõ hkryre nhĩpêx nẽ ho wēnê ho pa xwỳnhjê ho akuprõ nẽ mẽ kãm:

—E kwa mẽ inhma. Na pu htem mēpanã Xiãre nhõrkwỹ karõ hkryre pãnhã kàxpore jamỳnh rũnh o papa. ²⁶ Tã mãn ka mẽ ra ham hpõx xwỳnh Pawreja pumu nẽ kapēr ma. Na hte jar mẽ panhõ krĩ kamã nẽ As piitã hkôt mẽ kãm mēpanã Xiãre karõ nẽ mẽ kãm kapēr o pa. Xep mẽ pahte mẽ hkarõ nhĩpêxja kêp mēpanã kumrêx kêt ã mẽ kãm harēnh o pa nhũm xep mẽ ohtô nẽ kuma nẽ ra hkôt hamaxpēr.

²⁷ —Kwa ja mex kêt. Koja mẽ kapēr ma nẽ hkôt amnhĩ nhĩpêx hãmri nẽ axte mẽ pahte ixkre karõ hkryre nhĩpêx xwỳnhhta japrõr kêt nẽ. Hãmri nẽ mẽ paxápēnh o kapēr punuj nẽ. No ãm ja pix omnuj kêt. Koja mēpanã Xiãre mã amnhĩ jarēnh xà hã ixkreja kaga hpa. Nẽ haxwỳja karõja kaga. Mẽ piitã kãm hapê kēnã. As kamã nẽ pyka piitã hkôt mẽ piitã kãm hapê nẽ hwỳr mra nẽ amnhĩ to hwỳr o pa. Kêp mēpanã mex kumrêx tã koja mẽ Pawre kapēr gryk ã hkaga hpa nẽ axte kãm hamaxpēr kêt nẽ. Hãmri pu mẽ axte mẽ kukwak ri pakàxpore rax nẽ papa hkêt nẽ. Kwa tanhmã kot puj mẽ amnhĩ nhĩpêx to? Anẽ.

²⁸ Hãmri nhũm mẽ tee ri ã kapēr anhỹr ã kuma nẽ Pawre kamã gryk

tÿx kumrêx. Nê gryk xàj kàx pêê kapêr nê xatã kapêr tÿx kãm kapêr punuj nê. Nê kapêr o:

—Xiãnre na mex kumrêx. Kêp mē pahpê Epes nhõ xwÿnhjê nã maati na.

Anhÿr o kàxpêê kapêr o kuhê. ²⁹ Hãmri nhũm krĩ nhõ xwÿnh piitã mē kuma nê mē hwÿr hprõt nê haxwÿja gryk nê kàxpêê mē hkõt ã harênh anhÿr o kuhê. Hãmri nê gryk xàj Pawre hkõt ri wa pa xwÿnhja wa unê nê ma mē kot axpên mar xà hã ixkre hwÿr wa hkjênh o tē. Masetõn nhõ xwÿnh wa kêp Gajore mē Aristakja nhũm mē wa unê. ³⁰ Hãmri nhũm Pawre mē kot wa unênh ã mē omu nê tee ri wa hkukamã hamaxpêr nê mē hkõt hprõt nê mē kãm tanhmã kapêr to kaxyw nom nhũm mē kot Jesus kõt amnhĩ xunhwÿr xwÿnhjaja ja nê kãm kapêr kãm hihtÿx nê. ³¹ Hãmri nhũm As kamã mē kot mē ho amnhĩptãr xwÿnh kwÿjaja ã mē kot amnhĩ nhĩpêx anhÿr ã mē omu nê Pawre hwÿr hpêr mē. Mē kãm hkĩnh jakamã kot mē hkõt htêm nhũm mē kot hpĩr pymaj hwÿr hpêr mē nê mē hkõt htêm nê hkurê kamã hihtÿx nê.

³² Rõm nhũm mē piitã mē kot axpên mar xà hã ixkre hwÿr pikuprõnh pa nê kàx pê kapêr punuj o kuhê. Nom axpên kõt kapêr kêt nê. ãm axpên kwÿm ri kàx pê tanhmã kapêr punuj to ho. Nhũm mē hkwÿjaja hprĩ hã mē mar kêt tã amarĩ amnhĩ krã hkõt kàx pê kapêr punuj nê. ³³ Nhũm Ijaew kwÿjaja tee ri ja hã mē omu nê axpên mã:

—Tk. Kwa okora. Kojã mē nã Xiãnre hã gryk hãmri nê tanhmã mē pahpê Ijaew to nã? Anê.

Hãmri nê hamaxpêr nê mē hwÿr amnhĩõ pê Aresãnja mē nê kãm:

—Kwa ma mē hwÿr tē nê mē kãm tanhmã mē pahtã axaprãr to. Pawre kêp mē pahkwÿ htã tãm na mē kãm mē gryk jaxà. No mē papajaja na pu mē kãm mē gryk jaxàr kêt nê. Anê.

Hãmri nhũm mē kuma nê mē hwÿr tē nê xa nê tee ri kot mē ho hpinhkrênh kaxyw kãnhmã mē kãm

ihkra pêr kaprÿ. ³⁴ Nhũm mē omu nom hpinhkrênh kêt nê arĩ kàx pêê kapêr punuj ã 2 or. Nê kàx pê kapêr o:

—Mêpanã Xiãnreja mex o mex. Kêp mē pahpê Epes nhõ xwÿnhjê nã mex na. Anê.

³⁵ Tã nhũm mē õ pahi nhõ kôwenatõ jatã tanhmã Epes nhõ xwÿnhjê ho hpinhkrênh to hãmri nê ja nê mē kãm kapêr nê mē kãm:

—Kwa mē anhĩkrê. Mē piitã kot Xiãnre mex o mex ã omunh kênã. Nê mē pahpê kãm amnhĩ jarênh xà hã ixkre jamãr xwÿnh ã mē kot mē pahpumunh mex. Nê kaxkwa rũm karõ kot mē pahwÿr tēm nhũm mē pahpê hamãr o papa xwÿnh ã nhũm mē kot mē pahpumunh mex. ³⁶ Jakamã mēhõ kot kêt we mē pahpê hamãr xwÿnh kêt ã mē pajarê? Ra mē piitã mē kot ja hã mē pahpumunh jakamã kwa mē anhĩkrê nê ri ã akapêr anhÿr kêt nê. ³⁷ No mē ate wa unênh nê amnhĩ kõt wa ho atēm xwÿnhhta wa. Wa kot tanhmã mêpanã Xiãnre ho kapêr punuj to rÿ kêp õ ixkre kamã àhkĩnh kêt tã ka mē amarĩ wa unê nê amnê amnhĩ kõt wa o tē.

³⁸ —Kwa kê Temêt mē hkwÿjaja kãm tanhmã wa ho kapêr to hprãm nê ma pahihtĩ hwÿr wa o tē nê kumã mãn tanhmã wa ho kapêr to. Mēmoj tã axpên mã mē kapêr xà hã arĩgrota ãã. ³⁹ Rÿ ka mē amã mēmoj jarênh prãm nê arĩgroja ã mãn rĩ kormã mēmoj jarê. ⁴⁰ No jarãhã mē ate amnhĩ nhĩpêxja te mē ate pahihtĩ kutã amnhĩ xunhwÿr nê ho akapêr punuj pyrãk. Kojã Rõm nhõ xwÿnhjê nhõ pahi mē ajarênh ma hãmri nê mē ate kamã agrÿk ã amnhĩ kamnhĩx. Hãmri nê mē atã ixkukja pa tanhmã kãm mē ajarênh to? Mēhõ nhÿ hã na ka mē ã apikuprõnh nê amnhĩ nhĩpêx anê? Nã amnhĩ krã hkõt na ka mē akuprõ nê ã amnhĩ nhĩpêx anê. Anê.

⁴¹ Hãmri nê mē kãm kapêr pa nê mē hano nhũm mē anhgrã nê ma akupÿm õrkwÿ hwÿr hapêx.

20

Pawre ma Masetôn mẽ Gres wa hwÿr mōr ã harēnh

¹ Hāmri nhūm Pawre ra nojarēt. Jerujarē hwÿr mōr mã nom kormã pika pê Masetôn kumrēx wÿr mōr nē kurūm ma akupÿm Jerujarē hwÿr mōr mã. Hāmri nē nojarēt nē mẽ kot Jesus kôt amnhĩ xunhwÿr xwÿnhjê ho akuprō nē mẽ kãm amnhĩ jarē nē mẽ kãm:

—E kot paj ma mō. Nom kêr ka mẽ arĩ ixwakre kamã Tirtūm kapēr kôt amnhĩ nhĩpêx mex rãhã ho ri apa nē aa hkaga hkêt nē. Anē.

Hāmri nē mẽ kãm:

—E mẽ māmri ixwa kre kamã axamnhĩx ajamakêtkati nē ri apa. Anē.

Hāmri nē kato nē ma Masetôn wÿr mō. ² Nē hwÿr pōj nē kamã krĩ hkwỳ hkôt mō nē nhÿri mẽ kot Jesus kôt amnhĩ xunhwÿr xwÿnhjê pumu nē Tirtūm kapēr o mẽ ahkre. Mẽ kot hkôt amnhĩ nhĩpêx mex nē kãm hprãm xã hkôt pix mã amnhĩ nhĩpêx kaxyw mẽ kãm kapēr o ri mẽ hkôt pa. Hāmri nē kato nē ma mō nē pyka pê Gres wÿr pōj. ³ Nē kamã mẽ hkôt pa hã mytwrÿ axkrunēpxi hāmri nē akupÿm pyka pê Sir wÿr nojarēt. Nē ma pãr kãm hwÿr mōr kaxyw nē amnhĩ tã Sir kamã Ijaew kwÿ kot tanhmã harēnh to hã amnhĩ jarēnh ma. Na prem ra hã axpēn mã amÿnē nē axpēn mã:

—E koja amnē mẽ pahwÿr mō pu mẽ nhÿri omu nē hpĩr kuré kumrēx. Anē.

Hāmri nhūm Pawre amnhĩ tã mẽ kapēr ma nē pãr kaga nē mẽ hwÿr mōr kêt nē. Hāmri nē awjanã nē Jerujarē hwÿr Masetôn kamã pa. ⁴ Nhūm Jesus kôt htō hkwỳjaja ma hkôt mō. ã mẽ hixi kot anhÿr.

Perej nhō xwÿnh Sopatōja. Piro hkra na pre.

Nē Tesarōn nhō xwÿnh Aristak mẽ Sikūn wa.

Nē Tepe nhō xwÿnh Gajoreja.

Nē As nhō xwÿnh Xikitre mẽ Torow wa.

Nē Ximotreja.

Jajaja na prem ma Pawre hkôt Jerujarē hwÿr mō. ⁵ Nē pa ixpê Rukre ixte

mẽ amã ja jarēnh nē hã kagã xwÿnhja na pa axte Pawre hã ajêt nē hkôt mō. Jakamã nhūm jajaja piitã ma wa ixkukamã Tôx wÿr mō nē kamã wa ixkãm hamak o pa.

⁶ Tã pa wa ma krĩ pê Piripos rūm ixkato nē pãr kãm ma mẽ hkôt mō. Arĩgro pê Pas jakành mẽ ma mẽ hkôt mō.

Tã wa ixtã arĩgro pê 5 nē mẽ hkôt Tôx wÿr pōj nē kamã mẽ omu nē mẽ hkôt ixpa hã ixtã ù semãn.

Pawre kot akupÿm Exik o htĩr ã harēnh

Juãw 5.21; Atre 9.36-43

⁷ Tã nhūm sap nē kamãt pa mẽ kot Jesus kôt amnhĩ xunhwÿr xwÿnhjê hkôt akuprō nē axpēn kutã apku nhūm Pawre mẽ kãm kapēr. Ra apkati hkôt mẽ inhnojarēt kaxyw jakamã nhūm mẽ kãm Tirtūm kapēr jarēnh ryy nē. Ra kôt ã kamãt nhūm arĩ mẽ kãm harēnh o nhÿ. ⁸⁻⁹ Ixkre hprêk axpēn nhĩpy axkrunēpxi nhĩtep xã kamã na pa prem akuprō nē mar o ixkrĩ. Ixkreja kamã kanê ohtō nē hpòk o harir. Jakamã nhūm Pawre arĩ mẽ kãm ujarēnh o nhÿ nhūm mēhō xãptàr nyw Exikja ra òtxwa htÿx nē mẽ ixkuri òt o nhÿ. Janere hã òt o nhÿ. Tã ra gōr nē janere pê kato nē ahparmã tē nē pykap tēm. Pa mẽ tee ri omu nē ahparmã hwÿr ixprôt nē wrÿ nē omu nhūm htyk mex nē nõ. Kÿj rūm ahpar mã htēm ryy jakamã htyk mex nē nõ. Hāmri nhūm hkwỳjaja tee ri omu nē hkapri htyx nē kumÿ nē mÿr o hkrĩ. ¹⁰ Hāmri nhūm Pawre mẽ ixkôt wrÿ nē hwÿr tē nē htyk ã omu nē kumÿ nē mẽ kãm:

—E mẽ amÿr kêt nē. Ra htyk tã koja Tirtūm akupÿm mẽ pamã ho htĩr.

Anhÿrja kôt nhūm akupÿm htĩr. ¹¹⁻¹² Hāmri nhūm mẽ akupÿm htĩr ã omu nē hkĩnh tÿx kumrēx. Hāmri pa mẽ akupÿm kÿx pê ixkre hwÿr api nhūm Pawre mẽ inhmã pãwti hkwỳ nhĩrê nē mẽ inhmã kugō pa mẽ Jesus kot mẽ panê htyk mã ijamaxpēr pê kuku. Hāmri nhūm Pawre axte mẽ kãm kapēr o ÿr rãhã nhūm myt kato pa mẽ kēp anhgrã nē ma ixpa.

Pawre Mîrêt wÿr môr ã harênh

¹³ Hāmri pa mẽ inhnojarêt nhũm Pawre mẽ ixte hkôt mẽ inhmôr xwÿnhjê mã:

—E kêr ka mẽ ma pàr kām ixkukamã mō. Kot paj ahte ma kÿx pē mẽ akôt ixpar o Asôt wÿr mō. Hāmri nê hwÿr pōj nê mẽ anhō pàr mã axà pu mẽ ma pahpimràatã ma hamũ mō. Anê.

¹⁴ Hāmri pa mẽ kuma nê ma mō nê mẽmo arîgro hã Asôt kamã axpên wÿr pōj. Hāmri nhũm Pawre mẽ ixkôt pàr wÿr axà pa mẽ ma krī pē Mîtirên wÿr mō. ¹⁵ Nê hwÿr pōj nê kurũm kormã mō nhũm apkati pa mẽ gô hipôk pē Kiw jakrenh o mō. Nê hakre nê mō nhũm apkati pa mẽ gô hipôk pē Sãm wÿr pōj nê hã pàr nhô. Hāmri nhũm apkati pa mẽ axte mō nê Mîrêt wÿr pōj. ¹⁶ Nom nhũm ra Pawre nojarêt nê. Kãm tokyx As rũm kator nê Jeru-jarê hwÿr môr nê tokyx hpôx prãm nê. Kãm mẽ hkĩnh pē Pêtekos xwÿj ri hwÿr hpôx prãm jakamã nojarêt tÿx pa mẽ Epes wÿr inhmôr kêt nê.

Pawre kot Epes kamã Kris kwÿjê mã amnhĩ jarênh

¹⁷ Tã pa mẽ Mîrêt wÿr pōj nhũm Pawre amnhĩ wÿr Epes wÿr Jejus kwÿ jahkre ho mẽ pa xwÿnhjê hã karō. ¹⁸ Hāmri nhũm mẽ man mẽ ixwÿr mō nhũm Pawre mẽ omu nê mẽ kãm amnhĩ jarê nê mẽ kãm:

—Nà ixte mẽ amã amnhĩ jarênh kaxyw na pa mẽ atã karō. Ra mẽ ate tanhmã ixte amnhĩ nhĩpêx to hã ixpumunh mex. Wam mẽ awÿr As wÿr ixpôxta ã ka prem aprĩ hã ixpumunh mex nê. ¹⁹ Na pa pre mẽ akôt ri mẽ amã tanhmã amnhĩ nhĩpêx to ho ri ixpa. Te ixpê mẽ amã ixàpênh xwÿnh pyræk. Nê Pahihtì Jejus mã tanhmã amnhĩ nhĩpêx to ho ri mẽ akôt ixpa. Nê ixkwÿ Ijaew kwÿ kot Je-jus kapêr kaga hã mẽ omu nê ixkaprĩ nê inhmÿr o ixpa. Nhũm prem Jejus ã ixtomnuj pa amnhĩ xà htÿx kamã ijamak o ri mẽ hkôt ixpa. ²⁰ Nom arĩ ri Tirtũm kapêr o mẽ ajahkre ho ri mẽ akôt ixpa rãhã nê aa hkaga hkêt nê.

Mê anhōrkwÿ kamã nê mẽ ahkre xà hã ixkre kamã. Mê ate tãm amnhĩ nhĩpêx prãm xàj pa pre ã mẽ ajahkre mex anhÿr rãhã ho ri mẽ akôt ixpa.

²¹ —Nê mẽ ixpê Ijaewjê mẽ mẽ apê Ijaew kêt xwÿnhjê mẽ pa pre mẽ ajahkre ho axpên pyræk. Mê apiitã mẽ ate amnhĩ tomnuj kaga nê hpãnhã Tirtũm kôt amnhĩ nhĩpêx kaxyw. Nê amnhĩ kaxyw mẽ panhō Pahihtì Jejus Kris kôt ajamaxpêr kaxyw na pa pre mẽ akôt ri mẽ ajahkre rãhã ho ri ixpa.

²² —Tã ra Tirtũm Karō kot akupÿm Jerujarê hwÿr inhmênh jakamã pa kormã hwÿr mō. Kot paj hwÿr pōj nhũm krī nhô xwÿnhjaja Jejus ã ixtomnuj nê nom tanhmã mẽ kot ixtoja kukamã ixte ixprĩ hã ixàhpumunh kêt. ²³ Ja pix na ixte omunh. Na pa hte nhÿri pōj nhũm htem Jejus ã ixpynê nê mẽ hãgênh xà kamã ijagjê nê tanhmã inhĩpêx to. Tirtũm Karō na pre ra ã mẽ kot inhĩpêx anhÿrja kukamã inhmã mẽ harê. Jakamã ixte amnhĩ kukamã amnhĩ tã ixàhpumunh mex. Kot paj xep akupÿm Jerujarê hwÿr pōj nhũm mẽ ixpumu nê Jejus ã tanhmã inhĩpêx to. ²⁴ Tã no pa amnhĩ kamã ixkahak kêt o inhmã mẽ uma hkêt nê. Koja mẽ kãm ixpĩr prãm nê mãmrĩ ixpĩ. Inhmã ixtyk pyma hkêt. Æm mẽmoj pixi na inhmã hprãm. Ra Pahihtì Jejus kot mẽmoj tã inhmã karō xàja na inhmã kormã ixtĩr ri hatur xàm mênh prãm. Tirtũm kãm mẽ pajapê hã kot mẽ pahto mex prãm xàj mẽ pahwÿr Kra Jejus mênh nhũm mẽ panê tanhmã amnhĩ nhĩpêx to hã harênhja na inhmã mẽ piitã mẽ kãm harênh jatur xàm mênh prãm.

²⁵ —Tã e ixkrãmnhwÿjaja. Na pa pre mẽ akôt mẽ ajahkre rãhã ho ri ixpa. Mê ate Jejus kôt amnhĩ nhĩpêx mex rãhã ho ri apa kaxyw. Tã kot puj pêr mẽ axte axpên pumunh kêt nê.

²⁶⁻²⁷ —Na pa pre ra mẽ amã Tirtũm kapêr piitã harênh pa. Mê ate mar tÿx nê hkôt pix mã amnhĩ nhĩpêx o apa kaxyw. Jakamã koja mẽ anhō krī nhô xwÿnhjê hō amnhĩ kaxyw Jejus kôt hamaxpêr prãm kêt nê rĩ tãm. Kwãr mãmrĩ kot amnhĩ tomnuj kamã ty nê

arĩ tãm amnhĩ pumu no ãm kê amnhĩ tã tanhmã inhmã nẽ hkêt nẽ.

28 —E mẽ ate Kris kwỳ jahkre ho apa xwỳnhjaja. Kêr ka mẽ amnhĩ pumunh mex o ri apa. Nẽ mẽ kot Jejus kôt amnhĩ xunhwỳr xwỳnhjê jamãr mex o ri apa. Ja kaxyw na pre Tĩrtũm Karõ mẽ kaxyw mẽ axunhwỳ. Tĩrtũm Kra Jejus kot htyk o Tĩrtũm mã mẽ pahte amnhĩ tomnuj piitã hpãnhã amnhĩrer pa jakamã kêr ka mẽ kãm mẽ omunh mex o ri mẽ hkôt apa. Te ôwêhti jamãr xwỳnh kot ôwêhti jamãr mex o ri pata pyrãk.

29 —Kot paj ma mỗ nhũm mẽmojjaja ixpãnhã mẽ awỳr pỏj nẽ mẽ ate Jejus kaga hprãm xàj tanhmã mẽ amã hêx to ho ri mẽ akôt pa. 30 Nẽ mẽ akwỳjjaja mẽ urà nẽ tanhmã hamaxpêr punuj to nẽ mẽ ate Jejus kaga hprãm xàj hêx rom tanhmã mẽ amã kapêr to ho ri mẽ akôt pa. 31 Jakamã kwa mẽ o kora. Kêr ka mẽ axkãm ajamak rom nẽ ri apa. Kê jajaja nhỹrmã ã mẽ amã kapêr anẽ ka mẽ ama nẽ mẽ hkôt ajamaxpêr kêt nẽ. Mẽ ate mẽ mar nẽ mẽ hkôt ajamaxpêr pymaj na pa pre mẽ akôt ri mẽ ajahkre ho ri ixpa hã ixtã amgrà axkrunẽpxi. Arĩgro hã nẽ kamàt kãm mẽ ajahkre rũnh o ri ixpa. Nẽ mẽ ate mẽ amã mẽ hêx xwỳnhjê hkôt amnhĩ xunhwỳr pymaj mẽ ajahkre pê te inhmỳr pyrãk o ri mẽ akôt ixpa.

32 —E kot paj Tĩrtũm nhĩhkram mẽ ajagjênh pa. Koja mẽ atãnopxar o ri mẽ akôt pa nẽ mẽ akutã nojarêr rãhã ho pa. Hãmri ka mẽ ãm hkôt pix mã amnhĩ nhĩpêx. Jao Jejus kaga hkêt nẽ. Hãmri nhũm nhỹrmã Tĩrtũm mẽ pahpê hkrajê piitã tanhmã mẽ pahto mex to.

33 —Na pa pre mẽ akôt ixpa ry htã no ãm aa mẽmojjaja tã mẽ awỳr kêt nẽ. Mẽ axê hkwy hã mẽ awỳ rỳ mẽ akàxpore hã mẽ awỳr o ri ixpa hkêt nẽ. 34 Na pa pre amnhĩ pa kukwak ri amnhĩm ixujaprỏr pê ixàpkur o ri mẽ akôt ixpa. Nẽ ixkôt mẽ pa xwỳnhjê mã ixujaprỏr o ri ixpa. Ra mẽ ate ja hã ixpumunh mex.

35 —Tã mẽmo kaxyw na pa pre ã mẽ akôt amnhĩ nhĩpêx anhỹr o ri ixpa? Nà mẽ ate ja hã ixpumunh nẽ ixpyrà nẽ ã amnhĩ nhĩpêx anhỹr o ri apa kaxyw. Nẽ ixpyrà nẽ tanhmã mẽ kute xwỳnhjê ho ajuta hto ho ri mẽ apa kaxyw. Na pre Pahihti Jejus ja jarênh o: “Koja mẽhõ amã mẽmojjaja gõ ka amnhĩm apy nẽ akĩnh nẽ. Nom kot kaj kam nhãm mẽhõ mã mẽmojjaja gõ hãmri nẽ akĩnh tỳx o ate mẽhõ mã mẽmojjaja nhõrta jakre.” Anẽ.

36 Na pre ã Pawre mẽ kãm ujarênh anhỹr pa hãmri pa mẽ ra inhnojarêr. Hãmri nhũm mẽ piitã hkõnkrã ho hkrĩ pa nhũm Pawre mẽ ho Tĩrtũm wỳ. 37-38 Hãmri nhũm mẽ piitã kãm Pawre hkĩnh tỳx jakamã mỳr rax o kuhê. Tee ri kot axte mẽ kot axpên pumunh kêt ã mẽ kãm amnhĩ jarênhja ma nẽ hkaprĩ htỳx nẽ. Nẽ hkaprĩ xàj kahti hkôt hamỳ nẽ mur. Hãmri nẽ ma Jeru-jarê hwỳr hkujaêk kaxyw mẽ ixkôt pàr wỳr hkaprĩ nẽ mẽ ixkôt mỳr o mỗ.

21

Pawre kot Jerujarê hwỳr hpỏx ã harênh

1 Tã pa mẽ gỏ mỳri Jejus kôt mẽ ixtỏjê re nẽ pàr krem agjê nẽ axte mỗ. Ma gỏ hipỏk pê Kosti hwỳr ixkatàt kôt mỗ nẽ hã ajêr. Hãmri nhũm apkati pa mẽ axte hamũ mỗ nẽ hpãnhã gỏ hipỏk pê Roxti hwỳr mỗ nẽ hwỳr pỏj nẽ hã pàr xi. Hãmri nẽ hpãnhã axte krĩ pê Patar wỳr mỗ. 2 Hãmri nẽ hwỳr pỏj nẽ pàr rũm ijapỏj nẽ pàr õ pumu. Nhũm ra pyka pê Wẽnĩs wỳr nojarêr pa mẽ hwỳr agjê nẽ ma kamã axte mỗ. 3 Mỗ nẽ amỳm amnhĩ kukamã gỏ hipỏk pê Sipre pumu. Hãmri nẽ upỏk rũm hakrenh mã mỗ nẽ pyka pê Sir wỳr mỗ nẽ kamã Xir hwỳr pỏj nẽ hã pàr nhỏ. Pàr pãm kot krĩ kamã pàr kukrêx rer kaxyw pa mẽ kormã hã ajêr nẽ tokyx axte nhãm inhmỏr kêt nẽ. 4 Hãmri pa mẽ kutêp api nẽ krĩ kamã mẽ kot Jejus kôt axpên to htỏ nẽ htỏx xwỳnhjê japêr o mỗ. Hãmri nẽ nhỹri mẽ omu nẽ mẽ hkôt ri ixpa

ho ixtã ù semãn. Nhũm prem Tirtũm Karõ nhỹ hã Pawre mã kapër nẽ kãm:

—Kwa Pawre mẽ inhma. Kot ka Jerujarẽ hwỳr pøj nhũm xep mẽ kãm akurẽ xwỳnhjaja tanhmã anhĩpêx to. Tirtũm Karõ na ã akukamã mẽ inhmã ajarẽnh anẽ. Jakamã kwa hwỳr amõr kêt nẽ. Na pa mẽ tee ri akukamã ijamaxpër. Anẽ.

⁵ Hãmri nhũm amnhĩ tã mẽ kuma nẽ ãm mẽ kuma nẽ Jerujarẽ wỳr hkrà kamã hihtỳx nẽ. Jakamã nhũm semãn hapêx pa mẽ axte inhnojarêt. Axte Jerujarẽ hwỳr kormã inhmõr kaxyw inhnojarêt. Nhũm Jejus kõt mẽ ixtõjaja mẽ kot mẽ ixkujaêk kaxyw piitã pàr wỳr mẽ ixkõt mõi. Mẽ hprõ nẽ mẽ hkrajê mẽ nhũm mẽ pimràatã mẽ ixkõt mõi. Hãmri pa mẽ pàr wỳr pøj nẽ gõi mỳ ri ixpiitã ixkõnkrã ho ixkrĩ hpa nẽ amnhĩ to Tirtũm wỳ. ⁶ Hãmri nẽ mẽ kãm amnhĩ jarẽnh pa nẽ mẽ noo mã pàr krem agjê nẽ ma axte mõi nhũm mẽ awjanã nẽ ma akupỳm õrkwỹ hwỳr hapêx. Hãmri pa mẽ kurũm kormã ma Jerujarẽ hwỳr mõi. ⁷ Mõi nẽ krĩ pẽ Poremax wỳr pøj nẽ hã ajêt. Hãmri nẽ pàr rũm ija pøj nẽ axte krĩ kamã Jejus kõt mẽ ixtõ nẽ mẽ ixtõxjê japêr o mõi nẽ nhỹri mẽ omu nẽ mẽ kuri amnhĩm hikra.

⁸ Tã nhũm apkati pa mẽ axte mõi. Pãnhã ma krĩ pẽ Sejarej wỳr mõi. Hãmri nẽ hwỳr pøj nẽ Firipti kuri pøj. Firiptija kormã nyw ri mẽ kot Jerujarẽ kamã mẽ mjên htyk xwỳnhjê mã mẽ apkur xà nhõr ho pa kaxyw mẽ ho ⁷ nẽ mẽ unhwỳr xwỳnhjtajê hõ na pre. Tã hpãnhã kệp Tirtũm kapër jarẽnh o pa xwỳnh. ⁹ Nhũm hkra nijaja kệp kwat. Piitã mjên kêt nẽ hkukrit rãhã pa. Mẽ kệp Tirtũm nhỹ hã kapër o mẽ pa xwỳnh na pre mẽ. Jakamã pa mẽ mẽ kuri pøj. ¹⁰ Hãmri nẽ mẽ hkõt ri ixpa hã ixtã apkati grêre nhũm Akapõ Jutej rũm man mẽ ixwỳr mõi pøj. Kệp Tirtũm nhỹ hã kapër jarẽnh o pa xwỳnh na pre. ¹¹ Hãmri nẽ mẽ ixwỳr pøj nẽ Pawre pumu nẽ hkukamã kot tanhmã harẽnh to kaxyw hwỳr tẽn kệp hprexà kapa nẽ ho amnhĩ te hpre nẽ ho amnhĩ pa hpre nẽ xa. Hãmri

nẽ mẽ inhnoo mã Tirtũm Karõ nhỹ hã mẽ kot tanhmã hipêx to hkukamã kãm awjarẽ nẽ kãm:

—E kot kaj Jerujarẽ hwỳr pøj nhũm Ijaew xaptàr tũmjaja apumu nẽ ã anhĩpêx anẽ nẽ apa hpre nẽ ate hpre hãmri nẽ Ijaew kêt xwỳnhjê nhĩhkram ajaxà. Koja mẽ ã anhĩpêx anẽ. Anẽ.

¹² Hãmri pa mẽ tee ri ã ujarẽnh anhỹrja ma nẽ Pawre kamã ixkahak tỳx nẽ ixkaprĩ nẽ inhmỳr o ixkrĩ. Nẽ xatã kot mẽ hwỳr mõi nẽ kãm ixkapër kãm ixihỳtỳx nẽ kãm:

—Kwa mẽ ixkapër ma Pawre. Mẽ hwỳr amõr kêt o mẽ hwỳr amõr kêt. Anẽ.

¹³ Hãmri nhũm mẽ inhmã:

—Tk. Kwa mẽ amỳr kêt nẽ. Na pa mẽ apumu nẽ ixkaprĩ nẽ. Nã kot paj ma mẽ hwỳr mõi. Kwãr mẽ mãmri Pahihtĩ Jejus ã tanhmã ixto rỳ hã ixpĩ. Ixte amnhĩ kamã ixkahak kêt. Anẽ.

¹⁴ Hãmri pa mẽ tee ri mẽ hwỳr mõi nẽ hkurê kaprỳ nẽ kãm:

—Tõe. Nã kam nẽ Tirtũm kãm hprãm xà hkõt mãmri mẽ hwỳr mõi rỳ mẽ hwỳr amõr kêt nẽ. Anẽ.

¹⁵ Tã pa mẽ ra inhnojarêt nẽ amnhĩ to ixpikuprõnh pa nẽ ma Pawre hkõt Jerujarẽ hwỳr tã ma mõi. ¹⁶ Hãmri nhũm Sejarej kamã Jejus kõt mẽ ixtõ hkwyjaja ma mẽ ixkõt mõi. Pa mẽ mõi nẽ Jerujarẽ hwỳr pøj. Hãmri nhũm mẽ ixkõt mẽ mõi xwỳnhjaja mẽ ixto mõi nẽ Mẽnasõ nhõrkwỹ hwỳr mẽ ixto pøj. Mẽnasõja Sipre kamã na pre kato. Tã hpãnhã Jerujarẽ hwỳr ahpa nẽ kamã ri pa ho pa. Na pre ra Jejus kõt amnhĩ xãm ã hã amgrà xohtõ nẽ. Tã pa mẽ kuri pøj.

*Pawre mẽ Xiakre wa harẽnh
Atre 15.3-21; Wam Korõt 9.19-22,
10.32-33*

¹⁷ Tã pa mẽ Jerujarẽ hwỳr pøj nhũm Jejus kõt mẽ ixtõjaja mẽ ixpumu nẽ hkĩnh nẽ. ¹⁸ Hãmri nhũm apkati pa mẽ ma Pawre hkõt Xiakre hwỳr mõi. Nhũm mẽ kot Tirtũm kapër o mẽ ahkre xwỳnh piitã ra kuri akuprõ nẽ mẽ ixkutêp hkrĩ. ¹⁹ Jakamã nhũm Pawre mẽ hwỳr axà nẽ mẽ kãm

tanhmã amnhĩ nhĩpêx to ho pa hã amnhĩ jarê nê mẽ kãm:

—Pa na ka mẽ rĩ akrĩ. E ot pa axte mẽ apumunh mã mỗ. Ixte mẽ amã amnhĩ jarênh ã amnhĩ jarênh kaxyw. Nà na pa pre ma Ijaew kêt xwýnhjê hkôt ixpa nê mẽ kãm Jejus kot mẽ panê tanhmã amnhĩ nhĩpêx to jarênh o ri mẽ hkôt ixpa. Nhũm Tĩrtũm inhĩkhô hã ixkutã nojarêr mex jakamã nhũm prem inhma nê ohtô rax nê mẽ pahpyrà nê Jejus kôt amnhĩ xunhwỳ. Anê.

20-25 Hãmri nhũm mẽ Ijaew kêt xwýnh kwỳjaja kot Jejus kôt amnhĩ xunhwỳr ã mẽ harênh ma nê mẽ ý hã hkĩnh nê mẽ hã Tĩrtũm mã mex o mex ã harê. Hãmri nê Pawre mã kãm:

—Nà na pa prem ra mẽ harênh ma. Hãmri nê mẽ kãm kagà nhĩpêx nê mẽmoj tã mẽ kãm karô nê mẽ hwỳr kumê. Mẽ kot omunh nê kamã harênh nê hkôt amnhĩ nhĩpêx o pa kaxyw.

Na pa prem kagàja kamã mẽ kot sãnti nhõ hkur nê mẽ hkurê.

Nê mry kamrô hkur nê mẽ hkurê.

Nê mẽmo mry hpar nê hkamrô runh kêt rãhã hkur nê mẽ hkurê.

Nê mẽ kot amnhĩ prô pix tãnopxar kaxyw mẽ kãm hã karô.

Nê mẽnijaja kot amnhĩ mjên pix tãnopxar kaxyw mẽ kãm hã karô.

Nê nhãm mẽ kot axpên to amnhĩkati nê mẽ hkurê.

Ã na pa prem ja hã kagà nê mẽ hwỳr mẽnh anê. Jakamã e mẽ inhma. Na ra mẽ pahpê Ijaew kwỳjaja ohtô rax kumrêx nê mẽ pahpyrà nê Jejus kôt amnhĩ xunhwỳ. Mãn ka pre mẽ harênh ma. Na htem Jejus kôt amnhĩ nhĩpêx o pa jao mãânên Tĩrtũm nhỹ hã Mojes kapêr kôt amnhĩ nhĩpêx mex o pa. Tã nhỹri mẽ kot tanhmã ato hêx to hã ajarênh ma. Na ka xep hte Ijaew kêt xwýnhjê nhõ krĩ kamã pôi hãmri nê mẽ õ krĩ kamã Ijaew kwỳjê pumu nê mẽmoj nê tanhmã mẽ kãm akapêr to ho ri apa. Nom Ijaew kêt xwýnhjê mã ka xep hte ã mẽmoj nê akapêr anhỹr kêt nê. ãm Ijaew

mã pix mã ka xep hte mẽ kot finat Mojes kapêr kôt amnhĩ nhĩpêx nê mẽ hkurê ho ri apa. Nê mẽ panhĩgêr kot amnhĩ nhĩpêx kuhpa hã mẽ kot mẽ hkra my kwỳr kà jakàr nê ka xep hte mẽ hkurê ho ri apa. Nê mẽ kot mẽ panhĩgêr kôt amnhĩ nhĩpêx nê ka xep hte mãânên mẽ hkurê ho ri apa. Mẽ kêp Ijaew tã ka xep pre hte ã mẽmoj nê mẽ hkurê anhỹr ho ri apa. Na prem jar ã Ijaewjê mã ato hêx o pa anê nhũm mẽ kuma nê mẽ hkôt hamaxpêr kurê kumrêx. Jao ra ate mẽ pahpê Ijaew kot amnhĩ nhĩpêx kôt amnhĩ nhĩpêx kêt ã akamnhĩx.

—Tã ra mẽ kot apôx ã ajarênh mar jakamã tanhmã kot kaj we mẽ kãm amnhĩ tã axaprãr to? Nê tanhmã kot kaj we mẽ noo mã amnhĩ nhĩpêx to kê mẽ arĩ mẽ pahte amnhĩ nhĩpêx kôt ate amnhĩ nhĩpêx o apa hã apumu? E na pa mẽ ra ijamaxpêr. Kot ka ã amnhĩ nhĩpêx anê. Na ra jar mẽ pahkwỳjaja kêp kwat nê Tĩrtũm mã tanhmã amnhĩ jarênh to jatur xãm mẽnh kaxyw amnhĩ krã hkênh mã. Jakamã e kêr ka ma mẽ hkôt tẽ nê mẽ urak nê amnhĩ krã hkênh nê kam nê mẽ ate amnhĩ krã kênhta pãnhã amnhĩre. Kot kaj ã mẽ hkôt amnhĩ nhĩpêx anê hãmri nhũm mẽ pahkwỳjaja arĩ mẽ pahte amnhĩ nhĩpêx o ate amnhĩ nhĩpêx o apa hã apumu nê mẽ kot ato hêx ã apumunh kurê kumrêx. Nê arĩ ate finat Mojes kapêr kôt amnhĩ nhĩpêx o ri apa hã apumu. Anê.

26 Hãmri nhũm Pawre mẽ kuma nê mẽ kãm:

—Tôe. Nà ãm hãmri na ka mẽ inh mã awjarê. Nà kot paj ã amnhĩ nhĩpêx anê. Anê.

Jakamã nhũm apkati nhũm ma mẽ kêp 4tajê o mỗ nê mẽ mex kaxyw tanhmã amnhĩ nhĩpêx to. Hãmri nê Tĩrtũm mã amnhĩ jarênh xã hã ixkre hwỳr mra nê agjê nê mẽ õ patre mã mẽ amnhĩ jarê nê kãm:

—E ot pa mẽ awỳr mra. Na pa prem ra mẽmoj tã tanhmã Tĩrtũm mã amnhĩ jarênh to. Tã kot paj mẽ axte ixtã ù semãn hãmri nê hatur xãm mẽnh kaxyw akupỹn awỳr mra nê amã mẽmoj gõ ka mẽ inh mã Tĩrtũm

mã agõ nê hkôt kãm mẽ ijarê. Nê pa kot paj mẽ ixpiitã hpãnhã amã amnhĩre. Anê.

*Mẽ kot Pawre pynênh ã mẽ harênh
Atre 24.12*

²⁷ Tã nhũm semãnja hapêx kaxyw nhũm pika pê As rũm Ijaew kwýjaja ma mra nê Tirtũm mã amnhĩ jarênh xà hã ixkre hwýr agjê. Hãmri nê kamã Pawre pumu nê kamã gryk týx nê hwýr hprôt nê unê nê tanhmã hkwýjê mã ho hêx to nê ho kapêr punuj nê. Nê mẽ kãm:

²⁸ –E mẽ amnê mra nê jahti pumu. Na hte krĩ piitã hkôt ri mẽ pahkwýjê mã tanhmã ri hêx to ho pa. Tirtũm nhỹ hã finat Mojes kapêr nhũm mẽ kãm ho kapêr punuj o pa. Nê mẽ pahte Tirtũm mã amnhĩ jarênh xà hã ixkreja nhũm hte mããnen tanhmã mẽ kãm ho kapêr punuj to. Mẽ pahpyrà nê kêp Ijaew tã mẽ pahpê hkwý ho kapêr o pa. Tã ra axtem nê amnhĩ kôt Tirtũm nhõ ixkre hwýr Ijaew kêt xwýnh kwýjê ho agjê. Mẽ kot hwýr gjêx kêt kumrêx tã nhũm axtem nê amnhĩ kôt mẽ ho agjê. Anê.

²⁹ Na pre krĩa kamã Ijaew kêt xwýnh Topĩa Pawre hkôt pa nhũm mẽ omu. Kêp Epes nhõ xwýnh nhũm mẽ kot pry ã Pawre hkôt pa hã omu. Tã hã ahtũm nê Tirtũm mã amnhĩ jarênh xà hã ixkre kamã Pawre pumu nê htýx amnhĩ kôt Topĩ ho àr ã hkamnhĩx nê ã mẽ kãm harênh anê. ³⁰ Hãmri nhũm mẽ kuma nê Pawre kamã gryk týx nê. Nê hwýr hprôt nê unê nê ixkre rũm ho kato nê kêp hakwa kre kahê. ³¹⁻³² Hãmri nê ma o tẽ nê htak rax nê. Ra mẽ kot htak o hpĩr mã tã nhũm mēhōja pōristi krāhtũm wýr hprôt nê kãm awjarê nê kãm:

–Kwa o mũj mẽ ra kot axpên nhĩmex kaxyw pijapu ho kuhê. Anê.

Hãmri nhũm tee ri kuma nê pōristi hkwýjê mã anê nê mẽ ma mẽ hwýr hprôt kurê kumrêx. Nhũm mẽ arĩ Pawre htak tã amnhĩ wýr mẽ omu nê mẽ umaj kãm ure. ³³ Hãmri nhũm pōristi krāhtũm Pawre hã amýnê nhũm pōristijaja unê nê kàx o mẽ hkaxprexà ho axkrut nê ho hkaxpre

pa. Hãmri nhũm mẽ hkrāhtũm Pawre hã mẽ hkukja nê mẽ kãm:

–Kwa mẽ atõ inhmã jahti jarê. Tanhmã na hixi te? Tanhmã na we amnhĩ tomnuj to hã na ka mẽ ã hipêx anê? Anê.

³⁴ Hãmri nhũm mẽ kuma nê piitã anhĩpê kàxpê kãm tanhmã harênh to. Nom axpên kwým tanhmã ri kãm harênh to. Hãmri nhũm tee ri hprĩ hã kot mẽ mar kaxyw hãmri nê pōristi mã anê nhũm mẽ kêp Pawre ho kato nê ma mẽ àpênh xà hã ixkre hwýr o tẽ. ³⁵⁻³⁶ Hãmri nhũm Ijaew kwý ohtô nê pry hã axpên nhĩgãnh o hkôt mra. Nê gryk xàj kapêr punuj týx o mẽ hkôt mō nê kàx pê pōristi mã kapêr nê mẽ kãm:

–Kwa mẽ apĩhti ri. Mexti hã. Mẽmo kaxyw na ka mẽ ri amã hapê ho apahti? Anê.

Jakamã nhũm pōristija tee ri mẽ kuma hãmri nê mẽ kot tanhmã ho pymaj kumý nê kýx pê mẽ kêp kupê nê o mō. Jao ixkreja wýr mẽ àpir xà hã ho àpir o mō. ³⁷ Nê kot ho àr kaxyw tã nhũm Pawre mẽ hkrāhtũm mã kãm:

–E pa amã mẽmoj jarê ka inhma. Anê.

Mẽ kapêr o kãm kapêr hãmri nhũm amnhĩ jaêr pê kuma nê kãm:

–Kwa xà na ka mẽ ixpyrà nê Gresjê kapêr o akapêr? ³⁸ Na pa ixtýx apê Ejit nhõ xwýnh pê mẽ hpar o apa xwýnhhta ã akamnhĩx. Ham na pre mẽ inhõ pahihtĩ kutã amnhĩ xãm nê kot hkurê kaxàr kaxyw mẽ ho ajuta xwýnhjê ho 4.000 nê mẽ hkurê nê ma kapôt ã mẽ o pa. Nom tãm na xep Gresjê kapêr o kapêr kêt nê. Anê.

³⁹ Hãmri nhũm Pawre kãm:

–Nà ixpê Ejit nhõ xwýnhhta kêt. Ixpê Ijaew na pa. Pyka pê Siris kamã krĩ rax pê Tas kamã na pa pre ixkato. E xà kot paj ixkôt mẽ mōr xwýnh nêj mã ixkapêr nà? Anê.

⁴⁰ Hãmri nhũm kãm:

–Tõe. Kam nê mãmrĩ tanhmã mẽ kãm akapêr to. Anê.

Hãmri nhũm mẽ àpir xàta ã kýx pê mẽ mýri xa nê kànhmã mẽ kãm ìhkra pẽ nhũm mẽ omu nê hpinkrênh pa nhũm mẽ kãm amnhĩ jarê.

22

Pawre kot kām hkurê xwýnhjê mā amnhĩ jarênh

Atre 9.1-19, 26.1-23

¹⁻² Nhũm Pawre amnhĩ kwý Ijaew kapêr o mẽ kām kapêr nê mẽ kām:

—E ixkwýjaja. Pa mẽ amā amnhĩ jarê ka mẽ inhma. Anê.

Hāmri nhũm kot mẽ kapêr o kapêr ma nê hpinkrênh pa nê akryk mar o kuhê nhũm mẽ kām:

³ —Nà ixpê mẽ anhĩõ na pa. Ijaxwýja ixpê Ijaew. Pyka pê Siris kamā krĩ pê Tas kamā na pa pre ixkato no ãm jar Jerujarê kamā na pa pre ixàptàr. Kamariew na pre hte ijahkre ho pa. Finat Mojes kot Tĩrtũm nhỹ hã mẽ panhĩgêjtjê mã kapêrja nhũm pre hprĩ hã ho ijahkre ho pa. Na pa pre mẽ apyrà nê inhmā Tĩrtũm kôt amnhĩ nhĩpêx prãm nê.

⁴ —Jakamā na pa pre mẽ pahkwý kot Jejus kôt amnhĩ xunhwýr xwýnhjê japêr o ixpa nê nhỹri mẽ kām ixkato nê mẽ unê. Měmyjê pynê nê mēnijê pynê. Hāmri nê mẽ kot mẽ hpar kaxyw mẽ hagjênh o ri ixpa. ⁵ Na pa pre ã mẽ hipêx o ri ixpa anê. Mẽ panhõ patre maati nê mẽ àptàr tũmrejaja ra mẽ kot ja hã ixpumunh mex. Mẽ tãmjaja na prem krĩ pê Tamas kām mẽ pahkwýjê kaxyw kagà nhĩpêx nê inhmā kugõ pa kupy nê ma mẽ hwýr o mō. Ixte mẽ õ krĩ kamā Jejus kwýjê pynênh par nê man akupýn Jerujarê hwýr mẽ ho inhmōr nhũm mẽ kot tanhmā mẽ ho kaxyw.

⁶ —Tã ra myt aha pa mẽ hwýr ixàhtêp o mō. Puh nhũm kaxkwa rũm hirã rax kumrêxja ixwýr wrý nê ixtã ajêt pa hipôk ri xa. ⁷ Hāmri nê umaj pykap tẽm nhũm mēhõ kapêr nê inhmā: “Pa Sawti? Hêxta waa nê. Kwa mon ka hte axtem nê ixtomnuj tỳx o ri apa?” Anê. ⁸ Hāmri pa kām: “Kwa mẽ atõ na ka ri ã inhmā akapêr anê pahihiti?” Anê nhũm inhmā: “Ixpê Najare nhõ xwýnh Jejus. Pa na ka hte ixpê ixkôt mẽ kot amnhĩ xunhwýr xwýnhjê homnuj tỳx o ri apa. Jao te pa ixtomnuj pyrāk.”

⁹ —Anhỹr o inhmā kapêr nhũm ixkôt mẽ pa xwýnhjaja kuma no ãm hprĩ hã mar mex kêt nê. ãm hirã raxta pix pumu. ¹⁰ Tã pa kām: “No tanhmā kot pa we amnhĩ to Pahihiti?” Anê nhũm inhmā: “E kànhmã xa nê māmri ma Tamas wýr mō. Kot kaj hwýr pøj nhũm mēhõ awýr tẽ nê mẽmoj tã amā karõ ka ama nê hkôt amnhĩ nhĩpêx.” Anê.

¹¹ —Nhũm pre ã inhmā kapêr anê. Hāmri pa hirã rax pumunh o ixãm kurê ra inhno hkre nê ixrĩt kêt nhũm ixkôt mẽ pa xwýnhjaja ixpa hã ixpy nê ma Tamas wýr ixto mō nê ixto pøj.

¹² —Tã nhũm Tamas nhõ xwýnh pê ãnãniĩsti ixwýr tẽ. Na pre hte Tĩrtũm kapêr ã kagà htũm kôt amnhĩ nhĩpêx mex nhũm Tamas kamā Ijaew piitã kām hkĩnh nê axpên mã mex ã harê. ¹³ Jakamā nhũm ixwýr tẽ nê inhmā: “Pa Jejus kôt ixtõ Sawti? E akupým rĩt.” Anhỹrja kôt pa akupým ixrĩt mex kurê kumrêx nê omu. ¹⁴ Hāmri nhũm inhmā: “Nà mẽ panhĩgêjtjê nhõ Tĩrtũm na amnhĩ kaxyw ata. Ate kapêr mar nê hkôt tanhmā amnhĩ nhĩpêx to ho apa kaxyw. Nê ate kaxkwa kamā Kra mex pumunh nê kapêr mar kaxyw. Tã ka xep ham hirã rax kamā omu nê kapêr ma. ¹⁵ Jakamā kêr ka ma mẽ piitã mẽ kām ate omunh xwýnhja jarênh o ari mẽ hkôt apa. Nê mẽ kām kapêr jarênh o mẽ ahkre ho ri apa. ¹⁶ E tokyx kànhmã xa nê Jejus mã amnhĩ jarê nê hkôt amnhĩ xãm kê anê ate amnhĩ tomnuj rênh pa. Hāmri pa apê hkwy hã akrã kumrã ka ma mẽ kām kapêr jarênh o ri apa.” Anê.

—Nhũm pre ã ãnãniĩsti inhmā kapêr anê.

¹⁷ —Tã pa man akupýn jar Jerujarê hwýr mẽ awýr mō. Hāmri nê jar Tĩrtũm mã amnhĩ jarênh xà hã ixkre kamā kām amnhĩ jarênh o ixãm rôm axte mẽmoj pumu. ¹⁸ Nhũm Jejus axte ixwýr kato nê xa nê inhmā kapêr nê inhmā: “E inhma. Jerujarê nhõ xwýnhjaja kām ixkapêr mar prãm kêt jakamā kot kaj mẽ kām ixkapêr jarê nhũm mẽ amar kêt nê. Jakamā kwa

tokyx akato nê hpânhã ma nhÿhÿm mō.” Anê.

—Hãmri pa tee ri ã kapêr anhÿrja ã kuma nê kãm: ¹⁹ “Kwa na koja mē inhma Pahihtî. Ra mē kot ixte amnhÿ nhÿpêx ã ixpumunh mex. Ixte amnhÿ nhÿpêx tũmta kôt mē kot ixpumunh mex. Na pa pre hte krÿ piitã hkôt mra nê Tÿrtũm kapêr o mē ahkre xà hã ixkre kamã mē kot akôt amnhÿ kaxyw hamaxpêr xwÿnhjê pynê nê mē htak nê mē hagjênh xà kamã mē hagjê nhũm mē kot ja hã ixpumunh mex. ²⁰ Nhũm mē kot akapêr jarênh o pa xwÿnh Estewãw pÿrta pa pre hã mē omu nhũm ja inhã mex pa mē kãm mē hinôkã jamÿnh o hã mē omunh o xa. Na pa pre ã amnhÿ nhÿpêx anhÿr o ri ixpa. Tã hpânhã akôt amnhÿ xãm hãmri nê akôt amnhÿ nhÿpêx o ri ixpa. Jakamã koja mē ixte amnhÿ nhÿpêx nyw ã ijarênh ma nê kãm ixkapêr mar prãm nê.” Anê.

²¹ —Pa pre ã Jejus mã amnhÿ jarênh anê nhũm inhã: “Nà. Kêr ka mãmrÿ krÿja rũm akato nê ma nhÿhÿm mō. Kot paj hpânhã ma Ijaew kêt xwÿnhjê hwÿr amê ka hpânhã ma mē hwÿr mō nê mē hkôt mē kãm ixkapêr jarênh o ri apa.” Anê.

²² Nhũm pre Pawre ã amnhÿ hkwÿjê mã amnhÿ jarênh anê nhũm mē arÿ mar o kuhê rãhã Ijaew kêt xwÿnhjê jarênh ma nê kamã gryk tÿx nê. Ijaew kêt xwÿnhjaja kot mē urak nê Tÿrtũm kapêr marja nhũm mē kãm hprãm kêt jakamã nhũm Pawre ã mē harênh anê nhũm mē kuma nê kamã gryk tÿx kumrêx. Nê gryk xàj kapêr punuj nê kapêr o:

—Kwa mē mãmrÿ apÿhti ri. ãm hpÿr mã htãmti kênã. Anê.

²³ Hãmri nê gryk xàj amnhÿ nhÿnôkã hkwÿrÿ nê ho apê nê pyka jamÿ nê kãnhmã ri ho ahkapê.

Pawre kot pôristi krãhtũm mã amnhÿ jarênh

Atre 16.35-39

²⁴ Hãmri nhũm pôristi krãhtũmja tee ri ã mē kot amnhÿ nhÿpêx anhÿr ã mē omu nê mē kapêr ma nê pôristijê mã kapêr nê mē kãm:

—Kwa tanhmã na we jahti amnhÿ tomnuj to nhũm mē ã kamã gryk tÿx anê? E mē tokyx ixkre hwÿr ho axà nê mē htak xà ho htak kê mē pamã tanhmã amnhÿ jarênh to. Anê.

²⁵ Hãmri nhũm mē kuma nê ho axà nê htak kaxyw kormã hpre ho xa. Hãmri nhũm pôristi krãhtũm nhõ kôwenatôja mē hkôt axà nê hã mē omunh o xa nhũm Pawre omu nê amnhÿ tã kãm kapêr nê kãm:

—Kwa kormã ixte tanhmã mē amã amnhÿ jarênh to hkêt tã ka mē ixtak kaxyw. Ixpê Ijaew tã mãânên ixpê Rôm nhõ xwÿnh kênã. Xà na htem ã Rôm nhõ xwÿnhjê nhÿpêx anê? Anê.

²⁶ Hãmri nhũm tee ri ã amnhÿ jarênh anhÿrja ã kuma nê pôristi krãhtũmja wÿr hprôt nê kãm:

—Kwa taxy pu mē tanhmã ho hkêt nê. Xep kêp Rôm nhõ xwÿnh kênã. Anê.

²⁷ Hãmri nhũm tee ri kuma nê Pawre hwÿr axà nê kãm:

—Kwa xà ãm hãmri na ka amnhÿ jarê? Xà apê Rôm nhõ xwÿnh na ka? Anê.

Hãmri nhũm kãm:

—Tÿ. ãm hãmri ixte mē amã amnhÿ jarênh kênã. Ixpê Rôm nhõ xwÿnh na pa. Anê.

²⁸ Hãmri nhũm kãm:

—Kwa pa na pa pre amnhÿ to Rôm nhõ xwÿnh prãm xàj amnhÿ pãnhã mē kãm amnhÿrer rax nê. Anê.

Nhũm Pawre kãm:

—Tÿ nom pa na pa pre amnhÿ pãnhã mē kãm amnhÿrer kêt nê. Inhÿpêxã hkôt ixpê Rôm nhõ xwÿnh na pa. Anê.

²⁹ Hãmri nhũm mē kuma nê tee ri hamaxpêr o kãm ma nê. Nê kãm ma ho hkaga kurê kumrêx. Nhũm mē hkrãhtũm nhõ pahija mãânên kãm ma nê. Kêp Rôm nhõ xwÿnh tã nhũm mē axtem nê kot unênh nê kàx o hkaxpreja mã hamaxpêr nê kãm ma nê. Na htem ã Rôm nhõ xwÿnhjê nhÿpêx anhÿr kêt nê. Na htem tanhmã mē hkukjêr to nê hprÿ hã mē kuma nê rÿ kormã tanhmã mē hipêx to.

Pawre kot Ijaew xaptàr tũmrejê mã amnhÿ jarênh

Matêwre 23.27-28

30 Tã nhũm apkati nhũm pôristi krãhtũmjaja Ijaew kwỳ ho akuprõ. Mẽõ patre maati nẽ patre krãhtũmjaja nẽ mẽ àptàr tũmrejaja nhũm kot mẽ kãm tanhmã Pawre jarẽnh to kaxyw mẽ ho hpikuprõnh pa. Hãmri nẽ Pawre pẽ hkaxpre xà rê nẽ ma mẽ hwỳr o tẽ nẽ mẽ kutã ỳr.

23

¹ Hãmri nhũm mẽ omu nẽ mẽ kãm amnhĩ jarẽ nẽ mẽ kãm:

—E ixkwỳjaja. Pa mẽ amã amnhĩ jarẽ ka mẽ inhma. Na pa hte Tĩrtũm nom tãm amnhĩ nhĩpêx o ixpa nẽ mẽ pahpê Ijaew mẽ pahte amnhĩ nhĩpêx kwỳm ri tanhmã amnhĩ nhĩpêx to hkêt nẽ. Anẽ.

² Hãmri nhũm mẽ õ patre maati ânãnĩsti kuma nẽ kamã gryk nẽ. Axtem ânãnĩsti hõ na pre. Hãmri nẽ ã Pawre kot amnhĩ jarẽnh anhỳrja ã kuma nẽ kamã gryk nẽ. Hãmri nẽ mẽ kot mar o kuhê xwỳnhjê mã kãm:

—Kwa mẽ atõ hakwap hkurahti ri. Tãm kot amnhĩ nhĩpêxti hã. Na ãm mẽ pamã amnhĩ to hêx o xa. Anẽ.

³ Hãmri nhũm Pawre kuma nẽ hwỳr rĩt nẽ omu nẽ kãm:

—Nà ka koja Tĩrtũm akura kãm ga. Te ate finat Mojes kot ỳ hã kapêr kôt amnhĩ nhĩpêx pyrãk tã ri axtem nẽ ri mẽ kot ijakwap ixkuranh kaxyw ri mẽ kãm ixtã amỳnê. Anẽ.

⁴ Hãmri nhũm kuri mẽ kuhê xwỳnhjaja tee ri ã kãm kapêr anhỳrja ã kuma nẽ kãm:

—Kwa kêp patre maati kênã kot ka kêt ri ã kãm akapêr anẽ. Anẽ.

⁵ Hãmri nhũm amnhĩ jaêr pẽ ja hã kuma nẽ kãm:

—Kwa ixte ja hã omunh kêt jakamã na pa ã ixtỳx kãm ixkapêr anẽ. Ixte kêp patre maati hã omunh ronhỳx pa ã kãm ixkapêr anhỳr kêt nẽ. Tĩrtũm kapêr ã kagã htũm kot ja nẽ mẽ pamã kapêr kênã. Mẽ pahte tanhmã mẽ panhõ pahi ho pakapêr punuj to nẽ mẽ pamã kapêr. Tã pa ãm ixtỳx ã kãm ixkapêr anẽ. Anẽ.

⁶⁻⁸ Hãmri nẽ hprĩ hã mẽ kot mar o hkrĩ xwỳnhjê pumu. Nhũm mẽ kamã Satusew nhõ xwỳnh kwỳ nẽ Parijew

nhõ xwỳnh kwỳ. Satusew mẽ Parijew nhõ xwỳnhjaja na htem axpẽn kwỳm ri tanhmã mẽ htykjê jarẽnh to. Satusew nhõ xwỳnhjaja na htem mẽ htyk nẽ mẽ hkarõ mẽ ro hã mẽ hapêx o mẽ hapêx ã mẽ hkamnhĩx. Nẽ Tĩrtũm kapêr o mẽ wrỳk xwỳnh kêt ã mẽ harẽnh o pa. No Parijewjaja na hte mẽ kurom mẽ htyk nẽ akupỳm mẽ htĩr ã mẽ hkamnhĩx nẽ Tĩrtũm kapêr o mẽ wrỳk xwỳnh ã mẽ hkamnhĩx. Nhũm Pawre kot ja hã mẽ omunh jakamã tanhmã hamaxpêr to hãmri nẽ mẽ kãm kapêr. Na pre Parijew nhõ xwỳnhjê pyrã nẽ mẽ htyk nẽ akupỳm mẽ htĩr kôt hamaxpêr nẽ Tĩrtũm kapêr o mẽ wrỳk xwỳnh kôt hamaxpêr. Jakamã mẽ omu nẽ kàx pẽ mẽ kãm kapêr nẽ mẽ kãm:

—Nà ijaxwỳja ixpê Parijew nhõ xwỳnh. Nhũm inhĩpêêxà haxwỳja kêp Parijew nhõ xwỳnh. Jakamã na pa hte mẽ apê Parijew nhõ xwỳnhjê pyrã nẽ mẽ htyk nẽ akupỳm mẽ htĩr kôt ijamaxpêr. Tã ãm ja pix mỳrapê na ka mẽ ixpynê nẽ ã inhĩpêx anẽ. Anẽ.

Hãmri nhũm Parijew mẽ Satusew nhõ xwỳnhjaja kuma nẽ ja hã axpẽn kãm gryk nẽ. Nẽ hã axpẽn mã akir. ⁹ Hãmri nẽ ra axpẽn mã àkjêr rax nẽ. Hãmri nhũm Parijew kwỳ pẽ Mojes kapêr o mẽ ahkre ho mẽ pa xwỳnhjaja kànhmã kuhê nẽ mẽ kãm Pawre hã àprãr kãm hihtỳx nẽ mẽ kãm:

—Kwa pêr tanhmã kot amnhĩ tomunuj tore hã. Mãn ãm hpimtir kãm na pre ã ri kaxkwa kamã mẽmoj mar anẽ. Rỳ apu Tĩrtũm kapêr o wrỳk xwỳnh kãm tanhmã kapêr to nhũm pre Tamas wỳr pry kamã mar o xa rỳ ko. Anẽ.

¹⁰ Hãmri nhũm Satusew nhõ xwỳnhjaja tee ri Tĩrtũm kapêr o mẽ wrỳk xwỳnh kot kãm kapêr ã harẽnhja ma nẽ hã axpẽn mã àkjêr rax nẽ. Hãmri nhũm pôristi krãhtũmjaja tee ri mẽ kot axpẽn mã àkjêr ã mẽ omu hãmri nẽ pôristi mã kãm:

—Kwa mẽ Pawre hwỳr tẽ nẽ mẽ kêp utã nẽ ma akupỳm o tẽ nẽ haxã. Kot ka mẽ ho anhỳr kêt nhũm mẽ tanhmã hamaxpêr to nẽ gryk xàj

axpën nhĩhkra kamã hkaxôn pa. Anë.

Hãmri nhũm mẽ kuma nẽ hwỳr tẽ nẽ mẽ kęp utà nẽ akupỹm o tẽ nẽ ixkre hwỳr ho axà.

Jejus kot Pawre jamaxpër o hihtỳx ã harënh

Atre 18.9-10

¹¹ Tã nhũm kamàt nhũm Jejus tãm Pawre hwỳr kato nẽ kãm:

—Pa Pawre? Kwa tee ri amnhĩ kukamã ajamexpër o amnhĩ kamã akahak kêt nẽ. Kot kaj te ra ate jar Jerujarẽ kamã mẽ kãm ijarënh ta pyrà nẽ ma krĩ pẽ Rõm wỳr mỗ nẽ krĩ nhõ xwỳnhjẽ mã ijarẽ. Anë.

Mẽ kot Pawre hã àmnênh ã mẽ harënh

Sikũn Ximotre 4.18

¹²⁻¹³ Tã nhũm apkati nhũm Ijaew kwỳjaja axpën wỳr akuprõ. Měmyjaja kęp 40 nẽ axte hkôt mẽ hkwỳjaja axpën wỳr akuprõ. Mẽ kot Pawre pĩr kaxyw hã axpën mar kaxyw hã akuprõ nẽ hã axpën mã amỹnê nẽ axpën mã:

—Tõe. Nà kot puj mẽ hpĩr kaxyw amnhĩ jagri htỳx o paxàpkur kêt rãhã kupĩ nẽ rĩ kormã apku nẽ ixkõ. Nà kot puj mẽ ho anë. Ra Tĩrtũm noo mã mẽ pahte ja hã amnhĩ jarënh kênã. Anë.

¹⁴ Hãmri nẽ mẽ ma mẽ õ patre krãhtũmjẽ mẽ mẽ àptàr tũmrejẽ hwỳr mra nẽ mẽ kãm hã amnhĩ jarẽ nẽ mẽ kãm:

—Ot pa mẽ amã amnhĩ jarënh mã mra. Nà kot paj mẽ tã Pawre pĩ. Kot paj mẽ kormã hpĩr kêt ri ixàpkur kêt rãhã kupĩ. Ra mẽ ixte Tĩrtũm noo mã ja hã amnhĩ jarënh xà hkôt. ¹⁵ Jakamã e mẽ inhma. Kêr ka mẽ axêx rom pòristi krãhtũm mã anë kęp apkati kęp man mẽ awỳr Pawre ho tẽ. Te mẽ ate aprĩ hã hkukjêr kaxyw pyràk o kãm axêx. Kojã mẽ kormã mẽ awỳr ho hpõx kêt ri pa mẽ unên kupĩ. Anë.

¹⁶ Hãmri nhũm Pawre tãmnhwỳ mẽ kot ã hã amnhĩ jarënh anhỹrja ma hãmri nẽ ma pòristi xàpênh xà hã ixkrej wỳr Pawre hwỳr hprõt nẽ kãm mẽ harẽ. ¹⁷ Hãmri nhũm kuma nẽ

amnhĩ wỳr pòristi krãhtũm nhỹ hã mẽ hamãr xwỳnh ã karõ nẽ kãm:

—Kwa ma mẽ akrãhtũm wỳr ixtãmnhwỳta o tẽ kęp kãm mẽmoj jarẽ nà? Anë.

¹⁸ Hãmri nhũm kuma nẽ ma hwỳr o tẽ nẽ kãm:

—E Pawre na inhmã anë pa awỳr htãmnhwỳ ho tẽ. Kot tanhmã amã ujarënh to kaxyw. Anë.

¹⁹ Hãmri nhũm omu nẽ hpa hã kupy nẽ o tẽ nẽ ahte mẽ hkàx ã o xa nẽ kãm:

—E mãmri inhmã mẽmoj jarẽ pa ama. Měmo na ka te inhmã harënh kaxyw? Anë.

²⁰⁻²¹ Hãmri nhũm kãm:

—Nà Ijaew xàptàr tũmrejaja na mẽ kot inhĩgêt Pawre pĩr kaxyw hã amnhĩ jarẽ pa amã harënh o tẽ. Kojã xep mẽ hã awỳ. Xep apkati nhũm ate ma mẽ hwỳr mẽ hkukjêr xà hã ixkre hwỳr ho amõr nhũm mẽ kot hprĩ hã kot amnhĩ nhĩpêx ã hkukjêr kaxyw. Nom kojã mẽ ãm amã amnhĩ to hêx. Kojã xep mẽ kęp 40 nẽ pry kamã kutêp amũxu nẽ kuhê. Na mẽ ra hã axpën mar pa nẽ axpën mã: “Kot puj mẽ paxàpkur kêt rãhã Pawre pĩ nẽ rĩ kormã apku nẽ ixkõ.” Anhỹr o amnhĩ jarẽ pa mẽ kuma. Jakamã na mẽ kormã ate mẽ hwỳr mẽnh kaxyw akãm ama. Kwa mẽ hwỳr ho amõr kêt nẽ. Anë.

²² Hãmri nhũm kuma nẽ kãm:

—Tõe. Nà na pa ra ama. Mãmri ma akupỹm tẽ. Nom kêr ka inhmar kumrêx. Kêr ka nhãm mẽhõ mã ja jarënh kêt kumrêx. ãm kwarĩ ho kwarĩ. Anë.

Hãmri nhũm kuma nẽ kato nẽ ma akupỹm tẽ.

Mẽ kot Ijaew pymaj nhỹhỹm Pawre mẽnh ã mẽ harënh

²³⁻²⁴ Tã nhũm pòristi krãhtũmja amnhĩ wỳr ÿ hã pòristi jamãr o mẽ pa xwỳnh wa ho hamëxkrut nẽ wa hã karõ nẽ wa kãm:

—E wa inhma. Kojã kôt ã kamàt ka wa ma krĩ pẽ Sejarej wỳr Pawre ho mỗ kęp hkà hkĩnh pẽ pahĩti Peris wỳr pøj.

Nẽ amnhĩ kôt pòristi ho 200 nẽ o mỗ.

Nē kē mē kēp 70 nē kawar ā hkrī nē mē akôt mō.

Nē kē mē kēp 200 nē wapo jamy nē mē akôt o mō.

Kē mē ā ohtô rax anē.

Nē Pawre kot kawar ā ȳr nē mōr kaxyw ka mē kām hō ho mō.

E kēr ka mē ā axohtô nē hkôt amōr anē kē hkā hkīnh pē pahшти Peris wȳr pōj. Anē.

²⁵ Hāmri nē pahшти Peris mā kagā nhīpēx nē kamā kām Pawre jarē nē kām:

²⁶ Pa pahшти Peris? Xà amex? Ixpē Kraw Risas na pa awȳr kagā mē.

²⁷ E ot pa awȳr Ijaew pē Pawre mē. Na pre hkwyja kot hpīr kaxyw unēnh tā pa māānēn kēp Rōm nhō xwȳnh ā harēnh ma hāmri nē hwȳr inhō pōristi rē nhūm mē hwȳr hprōt nē mē kēp utā. ²⁸ Hāmri nē Ijaew xāptār tūmrejē hwȳr o tē. Mē kot inhmā tanhmā kot amnhī tomnuj to hā harēnh kaxyw. ²⁹ Tanhmā kot amnhī tomnuj to nhūm mē kot haxār rȳ hpīr ronhȳx ja mex nē. No xep ām kot mē higētjē kot amnhī nhīpēx kōt amnhī nhīpēx kēt pix mȳrapē na mē kamā gryk.

³⁰ Tā pa mē kot hpīr kaxyw hā mē harēnh ma nē mē umaj awȳr kumē. Hāmri nē kamā mē gryk xwȳnhjē mā ajarē. Jakamā koja mē mēmo arīgro hā awȳr pōj nē tanhmā kot amnhī nhīpēx to hā amā harē ka kam ja hā mē ama nē tanhmā ho.

Tā ām ja pix na pa amā harē. Ixpē Kraw Risas na pa awȳr kagāja mē. Tā mān ka arī ixte amā harēnhja ma. Anē.

³¹ Tā nhūm kamāt nhūm mē hkrāhtūm kot mē kām karō xā hkôt nhūm pōristijaja ma Pawre o mō. Hāmri nē krī pē āxipat wȳr pōj nē kamā amnhīm hikra.

³² Nhūm apkati nhūm mē kot mē hkôt pykap mōr xwȳnhjaja mē ō pahшти kot mē kām hā karō xā hkôt awjanā nē ma akupȳm mō nhūm kawar ā mē mōr xwȳnh pixjaja ma Pawre ho mō.

³³ Hāmri nē mō nē Sejarej wȳr pōj nē pahшти Peris nhīhkram Pawre jaxā

nē kām kagāja gō nē awjanā nē ma akupȳm hapēx. ³⁴ Hāmri nhūm Perisa kagāja py nē omu. Nē omunh pa nē Pawre mā kām:

—E inhmā amnhī jarē. Tanhmā na anhō pyka hixi te? Anē.

Nhūm kām:

—Kēp Siris. Anē.

³⁵ Nhūm kām:

—Tōe. Kē mē kot ato kapēr xwȳnhjaja pōj pa kormā ixprī hā mē kot tanhmā ajarēnh to ma mān. Anē.

Hāmri nē ō pōristi mā anē nhūm mē ma Pawre o tē. Ma pahшти Erox htyk xwȳnh nhōrkwy hwȳr o tē nē kamā haxā nhūm hkrī ho hkrī.

24

Ijaew kot tanhmā Pawre ho kapēr punuj to hā mē harēnh

Rukre 21.12-13; Atre 25.7

¹ Tā nhūm arīgro kēp 5 nē hapēx nhūm Ijaew kwȳjaja Sejarej wȳr pōj. Mē ō patre maati ānānīsti nē Tetur nē kaxyw mē āptār tūmrejaja nhūm mē ma hwȳr mō nē pōj. Tetur kēp axiwōkat ā mē yr pē kapēr xwȳnh jakamā nhūm mē kot tanhmā Pawre o kapēr punuj to kaxyw pahшти Peris wȳr amnhī kōt o mō. ² Hāmri nhūm mē amnhī wȳr Pawre hā karō nhūm pōristi haprō nē mē hwȳr o tēn ho axā. Hāmri nhūm Teturja pahшти Peris mā Pawre kot tanhmā amnhī tomnuj to hā harē nē kām:

—E pahшти inhma. Nā na ka hte tām mē inhīpēx nē mē ixto mex o apa. Jakamā nhūm hte nhām pika hkwy nhō xwȳnhjaja mē ixkurē kaxār kaxyw mē ixwȳr hprōt kēt nē. Pa htem ixpiitā akukwak ri ijamakētkati nē ixāmnhīx inhmex nē ixpa. ³ Nē mē ixkīnh rāhā ho ixpa. Hēxta waa nē. Mē ixpiitā inhmā akīnh. ⁴ E kot paj amā awjarē ka inhma. Kot paj ixujarēnh o hakotre ka inhma nē tokyx ma akupȳm tē. ⁵ Nā Pawre na hte amnhī tomnuj pix o pa. Kēp Jejus pē Najare nhō xwȳnhhta kōt amnhī nhīpēx o mē pa xwȳnhjē nhō pahшти na. Jakamā na hte pyka piitā hkôt mē ixpē Ijaew tanhmā axpēn kaxyw mē

ixkryx to ho pa. ⁶ Jãã na pre Tirtũm mã amnhĩ jarẽnh xà hã ixkre hwÿr amnhĩ kôt mẽ kęp Ijaew kêt xwÿnh kwÿjê ho agjê nẽ mẽ ixpê ixkreja omnu kaxyw mã tã pa mẽ omu nẽ unê. ⁷ Tã nhũm pôristi krãhtũm Risasja mẽ ixpê utã ⁸ nẽ awÿr mẽ ixte tanhmã amã harẽnh to xwÿnhjê rẽ. Tã ot pa mẽ ixkrĩ. Nẽ ota Pawre nhÿ. Kam kot amnhĩ nhĩpêx ã hkukja kêt tanhmã amã amnhĩ jarẽnh to ka ama nẽ ixte amã harẽnh xà hkôt tanhmã mar to. Anê.

⁹ Hãmri nhũm Ijaew hkwÿ haxwÿja kãm:

—Nà ãm hãmri na ã amã harẽnh anê pahihiti. Anê.

Pawre kot pahihiti mã amnhĩ jarẽnh Rukre 21.14-19

¹⁰ Hãmri nhũm pahihiti Peris Pawre mã anê nhũm kot kãm amnhĩ tã àprãr kaxyw kãnhmã xa nẽ kãm:

—Nà na ka ra inhõ pyka kamã mẽ ixto amnhĩptãr mex o atã amgrã xohtô nẽ pahihiti. Jakamã na pa pre ate ixkapêr mar kaxyw ã ajarẽnh ma nẽ ixkĩnh nẽ.

¹¹ —E kot paj amã amnhĩ jarẽ ka inhma. Ham na pa pre Jerujarẽ hwÿr mõi nẽ pøj. Na pa hwÿr ixpõx ã ixtã arĩgro pẽ 12 pix. Kam nẽ ixtã ixkwÿjê kukja nẽ mẽ ama. Ixte Tirtũm mã amnhĩ jarẽnh xà hã ixkre kamã Tirtũm mã mex o mex ã harẽnh kaxyw na pa pre hwÿr mõi. ¹² No na pa pre nhÿri axpẽn kaxyw tanhmã ri mẽ hkryx to hkêt nẽ. Nẽ mẽ ixte Tirtũm mã amnhĩ jarẽnh xà hã ixkre kamã rÿ kapêr o mẽ ahkre xà hã ixkre kamã rÿ nhÿri pry kamã tanhmã axpẽn kaxyw ri mẽ hkryx to hkêt nẽ. ãm amrakati ho amrakati. ¹³ Mẽ kot ã ri ijarẽnh anhÿrja amrakati kumrêx. Mẽhõ kot ã ixte amnhĩ nhĩpêx anhÿr ã ixpumunh kêt tã na htem amnhĩ krã hkôt amã ijarẽnh o hêx. ¹⁴ Na htem mẽ ixte Jesus kôt amnhĩ nhĩpêx xwÿnhjaja mẽ ixte amnhĩ nhĩpêx mex kêt ã mẽ ijarẽ nom kot anhÿr kêt. ãm mẽ inhĩgêtjê nhõ Tirtũm kapêr nywja kôt na pa hte amnhĩ nhĩpêx mex o ri ixpa rãhã nẽ. Nhũm ixkwÿjaja htÿx

axtem kapêr õ hkôt ixte amnhĩ nhĩpêx o ixpa hã ixkamnhĩx no ãm kapêr õ hkêt. Ijaxwÿja na pa hte mẽ urak nẽ finat Mojes kapêr ã kagã mar o ixpa. Nẽ Tirtũm nhÿ hã mẽ kapêr o mẽ pa xwÿnh kot kapêr ã kagã pa hte mẽ urak nẽ hkôt amnhĩ nhĩpêx mex o ri ixpa. ¹⁵ Nẽ mẽ urak nẽ Tirtũm kot nhÿrmã akupÿm mẽ ho htĩr kôt pa hte ijaxwÿja ijamaxpêr tÿx nẽ. Mẽ htyk xwÿnh piitãã. Mẽ kot amnhĩ to mex xwÿnhjê mẽ mẽ kot amnhĩ tomnuj xwÿnhjê mẽ mẽ ho hpimràatã akupÿm mẽ ho htĩrja kôt pa hte mẽ urak nẽ ijamaxpêr tÿx o ri ixpa. ¹⁶ Jakamã na pa hte tãm amnhĩ nhĩpêx rãhã nẽ. Tirtũm noo mã nẽ mẽ piitã mẽ noo mã tãm ri amnhĩ nhĩpêx mex rãhã nẽ.

¹⁷ —Tã na pa pre pyka hkwÿ hkôt ri ixpa hã ixtã amgrã xohtô nẽ. Hãmri nẽ ma akupÿm Jerujarẽ hwÿr ixkwÿjê hwÿr mõi. Amarĩ ixte mẽ kãm kãxpore hkwÿ nhõr kaxyw pa akupÿm mẽ hwÿr mõi. Nẽ mããnen Tirtũm mã mẽmoj nhõr kaxyw. ¹⁸ Hãmri nẽ mẽ ixte amnhĩ nhĩpêx xà hkôt pa mẽ amnhĩ to mex pa nẽ ma tẽn Tirtũm mã amnhĩ jarẽnh xà hã ixkre hwÿr axã nhũm mẽ kamã ixpumu. Nom na pa pre ri ixkreja kamã tanhmã amnhĩ tomnuj to hkêt nẽ. Rÿ tanhmã ixkapêr punuj to hkêt nẽ. Na pa prem ãm inhgrêre nẽ akryk ixkuhê nhũm mẽ ixpumu. ¹⁹ Pika pẽ As rũm Ijaew kwÿjaja na prem ixkre kamã ixpumu. Nar mẽ tãmjaja mãn awÿr mra nẽ tanhmã amã ijarẽnh to.

²⁰ —Nẽ jar mẽ kot ixto kapêr xwÿnhjaja. Na pa pre mẽ àptãr tũmrejê mã amnhĩ jarẽnh pa nhũm mẽ inhma nẽ tanhmã inhma nẽ hkêt nẽ. Kam nẽ ja hã mẽ hkukja nẽ mẽ ama. ²¹ Rÿ ko. Kojã apu mẽ amã ãm ja pix ã ijarẽnh japêr. Na pa pre mẽ kãm ixkapêr nẽ mẽ kãm: “Na pa hte mẽ htyk nẽ akupÿm mẽ htĩr kôt ijamaxpêr tÿx nẽ. Tã ja pix mÿrapê na ka prem ixpynê nẽ ã inhĩpêx anê.” Anhÿr o mẽ kãm ixujarẽnh jakamã nhũm apu mẽ hkwÿjaja kęp ja omnuj nẽ. Jakamã kojã apu mẽ amã ja hã ijarẽnh japêr.

Nom ja pix jarē. Anē.

Ā na pre Pawreja pahi Peris mā amnhī jarēnh anē.

Peris mē hprō wa kot Pawre mar ā wa harēnh

²² Tā nhūm pahihti Peris kot mē kot Jejus kōt amnhī xunhwūr xwūnhjē kot amnhī nhīpēx ā mē omunh mex jakamā hāmri Pawre mar pa nē ho kapēr xwūnhjē mā kām:

—Nā hāmri. Na pa ra mē ama. E mē mamrī ma mra. Kē pôristi krāhtūm Risasja mō nē pōj pa wa ixprī hā mē ate tanhmā harēnh toja ma nē rī komā tanhmā Pawre jarēnh to. Anē.

²³ Hāmri nē hpānhā pôristi pytār xwūnh mā Pawre jarē nē kām:

—E mē ma akupým ixkre hwūr o tē nē kamā hamār o apa. No ām kwār māmri àmnhīx ri ixkre kamā tanhmā amnhī to ho ri pa. Nē kē hkrāmnhwījaja māmri hwūr mēmoj to mra kē kuku. Anē.

Hāmri nhūm mē kuma nē ma o tē nē akupým ixkre hwūr ho axà nhūm kamā pa ho pa.

²⁴ Tā ra hā apkati grēre nhūm Peris mē hprō wa ma Pawre hwūr tē. Prō haxwūja kēp Ijaew. Hixi pē na pre Turujire. Jakamā nhūm wa ma Pawre nhōrkwū hwūr wa tē. Nhūm Peris Pawre hā karō nhūm kato nē wa hwūr tē nē wa kām awjarē. Tanhmā wa kot amnhī to nē amnhī kaxyw Jejus Kris kōt hamaxpēr nē hkōt amnhī xām prām xàj hprī hā wa kām harē. ²⁵ Nē wa kām:

—Nā na htem Jejus Kris kōt amnhī nhīpēx nē tām ri amnhī nhīpēx o pa. Kām tanhmā amnhī tomnuj to hprām tā ho anhūr kēt nē. Nē arī Jejus kot amnhī nhīpēx kōt amnhī nhīpēx o pa. Kōja Tirtūm nhūr mā mē pahpiitā mē pahte tanhmā amnhī nhīpēx to ho papa hā mē pahpumunh xà hkōt tanhmā mē pajarēnh to. Mē pahte tām amnhī nhīpēx xwūnh ā mē pajarē rý mē pahte amnhī tomnuj xwūnh ā mē pajarē. Anē.

Nhūm pre ā Pawre Peris mē Turujire wa kām kapēr anē. Hāmri nhūm Peris tee ri ujarēnhja ma nē kām ma

nē. Kot amnhī tomnuj o pa xwūnh ā amnhī pumu nē ā kām kapēr anhūrja mar puma nē. Hāmri nē Pawre mā kām:

—E hāmri. Nā na pa wa ra ama. Mamrī ma akupým tēn axà. Kot paj mēmo arīgro hā mēmoj to anhūr kēt nē axte amnhī wūr atā karō ka axte tanhmā wa inhmā axujarēnh to. Anē.

²⁶ Nē htýx hamaxpēr o:

—Nā kot paj mēmo arīgro hā axte amnhī wūr hā karō kē ixwūr tē nē ixte kator prām xàj inhmā amnhīrer japēr. Anē.

Hāmri nē xatā amnhī wūr hā karō htā no nhūm aa kot kator kaxyw tanhmā kām nē hkēt nē.

²⁷ Tā nhūm amgrā axkrut nē hapēx nhūm Pos Pesti pahi Peristi hpānhā kēp mē ō pahi nē mē ho amnhīptā. Jakamā nhūm Peris akupým ō krī hwūr nojarēt nē Pawre mā ĩhkra karo hkēt rāhā ma mō. Na pre hamaxpēr o:

—Nā kot paj Pawre kator nhūm Ijaew ja hā ijarēnh ma nē ixkamā gryk nē. Nā kwār mē hagiēnh xà hā ixkre kamā hkrī ho hkrī. Kot paj kator kēt nē. Anē.

Hāmri nē kām ĩhkra karo hkēt rāhā ma akupým ō krī hwūr mō. Jakamā nhūm Pawre arī ixkre kamā kēp prēs nē hkrī ho hkrī.

25

Pawre Rōm wūr hkrā ā harēnh

¹ Tā nhūm pahi nyw Pos Pesti krī pē Sejarej wūr mōn pōj. Hāmri nē kamā ri pa hā apkati axkrunēpxi pix nē ma Jerujarē hwūr mō. ² Hāmri nē hwūr pōj nhūm Ijaew kwūjaja omu nē hwūr mra nē kām Pawre ho kapēr nē hā hwūr kurē kumrēx. Mēō patre krāhtūmjē mē Ijaew xàptār tūmrejaja nhūm mē hwūr mra nē kām:

³ —Pa pahihti? E ot pa mē awūr mra. Kwa xà kot ka Pawre hā karō kē man awūr mō ka jar kot tanhmā amnhī tomnuj to hā hkukja nē ama? Anē.

No ām hēx rom ā hā kām kapēr anē. Kot hā karō nhūm mē kot pry hā hpīr kaxyw nhūm mē hēx rom ā kām kapēr

anë. ⁴ Hāmri nhūm mẽ kuma nẽ mẽ kām:

—Tk. Kwa ra Sejarej kamā kệp prês nẽ hkrĩ kênã kot pa kêt amnhĩ wỳr hã karõ. Kot pa tokyx ma akupỹm hwỳr mỗ. ⁵ Jakamã kêr ka mẽ axaptàr tũmjaja ma ixkõt mra. Hāmri nẽ Sejarej kamã inhmã tanhmã kot amnhĩ tomnuj to hã harênh to pa mẽ ama nẽ rĩ kormã tanhmã harênh to. Anë.

⁶ Hāmri nẽ mẽ kamã pa hã apkati grêre nẽ ma akupỹm Sejarej wỳr mỗ. Hāmri nẽ hwỳr pỏj nhūm apkati nhūm mẽ hkukjêr xà hã ixkre hwỳr tẽ nẽ mẽ kot mẽ mar xà hã mẽ hkrĩ xà kamã nhỹ nẽ amnhĩ wỳr Pawre hã karõ. ⁷ Nhūm mẽ hwỳr o tẽ nẽ ỳr nhūm hkwy kot Jerujarẽ rũm mẽ mỗr xwỳnhjaja kãm hipỏk nẽ pahi Pos Pesti mã tanhmã ho kapêr to nẽ ho kapêr punuj tỳx nẽ. Kot tanhmã amnhĩ tomnuj to ho pa hã ho kapêr o kuhê. Nom mẽ kot ã kot amnhĩ nhĩpêx anhỹr ã omunh kêt tã ãm amnhĩ hkrã hkõt ri tanhmã ho hêx to. ⁸ Jakamã nhūm Pawre tee ri amnhĩ tã mẽ kot ho hêxja ma nẽ kànhmã xa nẽ Pos Pesti mã amnhĩ tã aprã nẽ mẽ kãm:

—Nà aa ixte ã amnhĩ nhĩpêx anhỹr kêt. Na pa finat Mojes kot Tĩrtũm nhỹ hã kapêr nhĩrỏp ixãm nẽ hkwy m ri tanhmã amnhĩ nhĩpêx to hkêt nẽ. Nẽ mẽ ixte Tĩrtũm mã amnhĩ jarênh xà hã ixkre kamã ri tanhmã ixtỳx ri amnhĩ nhĩpêx to hkêt. Nẽ pahihti Sesti kapêrja pa pre hirỏp ixãm nẽ tanhmã amnhĩ tomnuj to hkêt nẽ. Aa ixte ã amnhĩ nhĩpêx anhỹr kêt kumrêx. Anë.

⁹ Hāmri nhūm Pos Pesti kuma nẽ tanhmã hkukamã hamaxpêr to nẽ hamaxpêr o:

—Kwa nhỹ krĩ kamã kot pa we Pawre kot inhmã tanhmã amnhĩ jarênh toja ma nhūm Ijaew ja hã kãm ixkĩnh japêr? Nà mẽõ krĩ pê Jerujarẽ hwỳr kot paj akupỹm mẽ hwỳr o mỗ nẽ kamã mãn hkukja nẽ kuma. Nà ja na mex. Nà kot paj anë. Anë.

Hāmri nẽ Pawre mã kãm:

—E xà kot puj ma akupỹm Jerujarẽ hwỳr mỗ pa kamã axte mẽ kot

ajarênh ma nẽ tanhmã ajarênh to nà? Anë.

¹⁰ Hāmri nhūm kãm:

—Nà jar ixte pahihti Sesti nhỹ hã mẽ kot mẽ hkukjêr xà hã ixkre kamã inhỹr nẽ amnhĩ jarênh kênã. Jar na htem mẽ hkukja nẽ tanhmã ri mẽ mar to. Na pa pre tanhmã ixkwỳjê ho hkêt nẽ. Mẽmo kaxyw kot pa akupỹm mẽ hwỳr mỗ nẽ axte mẽ kãm amnhĩ jarê? ¹¹ Kop apu pa tanhmã ixte amnhĩ tomnuj to ronhỹx mẽ mãmrĩ ja hã ixpĩ pa mẽ kệp tanhmã ri amnhĩ to hkêt nẽ. Nom mẽ kot ixto hêx pix o ã ijarênh anhỹr kênã. Jakamã mẽmo mỳrapê kot kaj mẽ ãhkram ijaxà? E Rõm kãm pahi maati Sesti hwỳr mãn inhmẽ pa kumã mãn amnhĩ jarê. Anë.

Pahi Sesti kệp pyka piitã hkõt mẽ ho amnhĩptàr xwỳnh maati jakamã nhūm Pawre kot mar kaxyw hwỳr hkrã. ¹² Hāmri nhūm Pos Pesti kuma nẽ ma tẽ nẽ hã õ kôwenatỏjê ma. Hāmri nẽ hã axpên mar pa nẽ akupỹm hwỳr tẽ nẽ kãm:

—Tỏe. Nà kot paj pahi maati Sesti wỳr amẽ. Ra hwỳr akrà kênã. Anë.

Pos Pesti kot Akrip mã Pawre jarênh

¹³ Tã nhūm apkati grêre nẽ hapêx nhūm pahi hỏ pê Akripja ma Pos Pesti hwỳr mỗ. Tỏx Perênĩs mẽ wa mỗ. ¹⁴ Hāmri nẽ wa hwỳr pỏj nẽ kuri wa pa hã apkati grêre nhūm Pos Pesti wa kãm Pawre jarê nẽ wa kãm:

—E pa war amã mẽhỏ jarê. Na pre pahi Perisja mẽ hagjênh xà kamã mẽhỏ jaxà nẽ kormã kator kêt ri nhūm mẽ àpênh nê kator pa hpãnh ãpênh o amnhĩptã. ¹⁵ Tã ra ma Jerujarẽ hwỳr mỗ nhūm Ijaew nhỏ pa-tre krãhtũmjê mẽ mẽ aptàr tũmrejaja inhmã ho kapêr punuj rax nẽ. Nẽ ixte mẽ kãm hpĩr kaxyw inhmã hã àmnênh kãm hihtỳx nẽ. ¹⁶ Nom pa mẽ kệp ja kaga nẽ mẽ kãm: “Nà mẽ ixpê Rõm nhỏ xwỳnhjaja na pa htem ã mẽ hipêx anhỹr kêt nẽ. Na pa htem mẽ kot ho kapêr xwỳnh noo mã tanhmã hkukjêr to nhūm tanhmã amnhĩ tã aprãr to pa htem kuma nẽ rĩ kormã tanhmã

mê ho. No na pa htem kormã mê kot tanhmã amnhĩ jarênh to hkêt ri tanhmã mê ho hkêt nê.” Anê.

¹⁷ —Jakamã nhũm prem kaxyw Se-jarej wÿr pøj nhũm apkati pa hã mê hkukjêr kurê kumrêx. Nê mê kot mê hkukjêr xà hã mê hkrĩ xà kamã nhỹ nê ixte hkukjêr kaxyw amnhĩ wÿr Pawre hã karõ. ¹⁸ Na pa pre ija-maxpêr o: “Mãn pre tanhmã amnhĩ tomnuj tÿx to hã na mê inhmã harênh kaxyw.” ¹⁹ Anhÿr ã hkamnhĩx tã te kot amnhĩ to mex xwÿnh pyrãk. Æm kot mê hkôt amnhĩ nhĩpêx kêt pix ã nhũm mê inhmã harê. Nê kaxyw mēhõ htyk xwÿnh jarê. Mê kot kãm “Jejus” anhÿr xwÿnhja na xep hte mê kãm akupÿm htĩr ã harênh o pa. Æm ja pix na prem inhmã harê. ²⁰ Pa tee ri ixte nhÿri ixprĩ hã tanhmã mê kot harênh to hã mê mar kaxyw hkukamã ijamaxpêr. Hãmri nê hã Pawre kukja nê kãm: “Xà kot puj ma akupÿm Jerujarê hwÿr mō pa axte akwÿ kot tanhmã ajarênh to ma nê rĩ kormã tanhmã ajarênh to nà?”

²¹ Anhÿr tã no nhũm akupÿm Jerujarê hwÿr mōr kaga kumrêx nê amnhĩm Rôm kãm pahi maati Sesti jarê. Ixte ma hwÿr mēnh nhũm kot kãm amnhĩ jarênh nhũm kot mar nê tãm tanhmã harênh to kaxyw. Jakamã pa kormã ixte hwÿr mēnh kaxyw amnhĩ xa hã akupÿm mê hagjênh xà kamã haxà nhũm arĩ hkrĩ ho hkrĩ. Anê.

²² Hãmri nhũm Akrip kuma nê kãm: —Xôwehe? Kwa na pa inhmã tanhmã kapêr to mar prãm nê. Anê.

Hãmri nhũm kãm:

—Tõe. Nà kê apkati pa hã karõ ka tanhmã kapêr mar to. Anê.

²³ Jakamã nhũm apkati nhũm Akrip mê htõx Perênĩs wa pahi hã mê ê mex jagjê nê ma mê hkukjêr xà hã ixkre hwÿr wa tē. Pōristi krãhtũm kwÿjê mê Se-jarej kamã mê kot amnhĩ to rũnh xwÿnh kwÿjê mê nhũm mê hwÿr akuprõ. Nhũm mê piitã Akrip mê htõx wa kêp pahi hã wa ê mex ã wa omu nê wa kamã no puma nê. Hãmri nhũm Pos Pesti Pawre hã karõ nhũm mê haprõ nê ma mê hwÿr o

tē. ²⁴ Hãmri nhũm Pos Pesti omu nê Akrip mê htõx mê mê kot mar o hkrĩ xwÿnhjê mã kãm:

—E pahihtĩ Akrip mê mê apikuprõnh xwÿnhjaja. Ota Pawre xa. Jerujarê kamã nê jar Se-jarej kamã na pre hkwyjaja inhmã ho kapêr rax nê. Hãmri nê ixte hpĩr kaxyw inhmã hã àmnênh kãm hihtÿx nê. ²⁵ Nom mēmoj mÿrapê kot pa kêt kupĩ? Tã nhũm amnhĩm pahi maati Sesti jarê pa ma hwÿr mēnh kaxyw. ²⁶⁻²⁷ Nom na htem amarĩ pahi maati Sesti hwÿr mê rēnh kêt nê. Na htem kãm mê kot tanhmã amnhĩ tomnuj to hã kagà nê hwÿr kagà mê ro hã mê kurê. No jahti kot tanhmã amnhĩ tomnuj toja na ixte omunh kêt. Te inhmã tanhmã kot amnhĩ tomnuj to hkêt pyrãk. Jakamã na pa mê awÿr o tē. Mê ate kapêr mar nê kot tanhmã amnhĩ tomnuj to hã inhmã harênh nhũm ixte hã kagà nê pahi Sesti hwÿr mēnh kaxyw. Jakamã e mê kam nê hkukja nê ama nê tanhmã mar to. Anê.

26

Pawre kot pahihtĩ Akrip mã amnhĩ jarênh

Atre 8.3, 9.1-19, 22.1-21

¹ Hãmri nhũm Akrip Pos Pesti kot tanhmã Pawre jarênh toja ma nê Pawre mã kãm:

—E mãmri mê inhmã amnhĩ jarê pa mê ama. Anê.

Hãmri nhũm kuma nê kãm amnhĩ jarênh kaxyw kãnhmã kãm ìhkra pē nē kãm:

²⁻³ —Hêxta waa nê. Nà na pa amã amnhĩ jarênh kaxyw nê ixkĩnh nê pahi Akrip. Ra ate mê ixpê Ijaew kot amnhĩ nhĩpêx ã mê ixpumunh mex. Nê mê ixte tanhmã amnhĩ nhĩpêx to hã mê ixte axpēn kukjêrta ate hã mê ixpumunh mex. Jakamã na pa amã amnhĩ jarênh kaxyw nê ixkĩnh nê. E tokyx anojarêt kêt nê inhma. Pa amã ixujarênh jatur xãm kumê ka aprĩ hã inhma. ⁴ Nà ixkwÿjaja ra mê kot ixte amnhĩ nhĩpêx ã ixpumunh mex. Ixprĩre rũm ixpapxà kamã nê määnēn Jerujarê kamã ixte tanhmã amnhĩ nhĩpêx to ho ixpaja mê kot hã

ixpumunh mex. ⁵ Ixpê mē hkwỳ pē Parijew nhō xwỳnh kwỳjê hã mē kot ixpumunh. Koja mē apu ja hã amã ijarēnh japêr rỳ ko. Mē ixpê Parijew nhō xwỳnhjaja na pa htem amnepê m finat Mojes kot Tirtũm nhỹ hã mē inhĩgêjtjê mã mēmoj tã karō xà hkôt amnhĩ nhĩpêx mex o ixkwỳjê jakre.

⁶ –Amnepê m na pre Tirtũm mē inhĩgêjtjê mã tanhmã amnhĩ jarēnh to. Kot nhỹrmã mē piitã akupỹm mē ho htĩr ã amnhĩ jarē. Tã ixte ja kôt ijamaxpêr pix mỳrapê na prem kot hã amã ixto kapêr kaxyw awỳr ixto mō. ⁷ Mē ixpê Ijaew nhĩgêjtjê piitã na prem Tirtũm kapêr kôt hamaxpêr o ri pa. Kot nhỹrmã akupỹm mē ho htĩr ã amnhĩ jarēnh kôt hamaxpêr tỳx o pa. Amnepê m finat Jako mē hkra pē 12jaja na prem hkôt hamaxpêr. Nē ixpê mē hkanrêhã mē htãmnhwỳ na pa hte ijaxwỳja ja kôt ijamaxpêr tỳx rãhã ho ri ixpa. Tã ãm mēmoj pixi mỳrapê na ixkwỳjaja ã amã ixto kapêr punuj anê. ⁸ Mē kot ixpyrà nē ja kôt hamaxpêr ã amnhĩ jarēnh tã nhũm pre Tirtũm akupỹm Kra Jesus o htĩr nom nhũm mē ixkĩnhã ja kôt hamaxpêr kêt. Nom Tirtũm kêp akupỹm mē pahto pahtĩr xwỳnh kênã.

⁹ –Amnepê m kormã Jesus kôt ijamaxpêr kêt ri na pa pre ijaxwỳja mē uràk nē akupỹm htĩr kôt ijamaxpêr kêt nē. Nē ixtỳx ijamaxpêr o: “Kot paj Jesus pē Najare nhō xwỳnh kôt mē kot amnhĩ xunhwỳr xwỳnhjê nhĩpêx kati ho ixpa nhũm Tirtũm ja hã ixpumu nhũm ja kãm mex nē.”

¹⁰ –Anhỹr jakamã pa pre hte tanhmã mē homnuj tỳx to ho ri ixpa. Jao Jerujarê kamã mē inhō patre krãhtũmjê nhỹ hã mē unê nē mē hãgĩnh xà kamã mē hãgĩnh o ixpa nhũm mē kot mē himex kaxyw mē hã inhmã amnhĩ jarē nhũm ja inhmã mex nē. Pa mē harēnh ma nē ixkĩnh nē. ¹¹ Pa pre hte xatã tanhmã mē hipêx to nē mē kot Jesus kaga hprãm xàj mē hipêx kati rũnh nē. Tirtũm kapêr o mē ahkre xà hã ixkre piitã kamã pa pre hte ã mē hipêx anê. Nē mē kamã inhgryk tỳx jakamã ma krĩ

hkwỳ hkôt mē hapêr o ri ixpa. ã na pa pre mē hipêx anhỹr o ri ixpa.

¹² –Tã axte ixte mē hkwỳjê pynēnh nē mē hãgĩnh kaxyw ma Tamas wỳr mō. Mē inhō patre krãhtũmjê nhỹ hã ma mē hwỳr mō. ¹³ Hãmri nhũm ra kaxkwa nhĩpôk ri myt nhỹ pa kormã pry hã inhmôr ri kaxkwa rũm mēmo nhĩrãja pumu. Nhũm hirã htỳx o myt jakre nē ixtã ajêt pa ixkôt ri mē pa xwỳnhjê mē hipôk ri ixkuhê. ¹⁴ Hãmri nē mē inhmã ma xàj pykap ixrôrok pa nhũm kaxkwa rũm mēhōj inhmã kapêr. Mē ixpê Ijaew kapêr o kapêr nē inhmã: “Pa Sawti? Hêxta waa nē. Kwa mon ka hte axtem nē ixtomnuj tỳx o ri apa? Nom na ka tee ri ã amnhĩ nhĩpêx anhỹr kaprỳ.” Anê. ¹⁵ Hãmri pa tee ri kuma nē kãm: “Kwa mē atō na ka ã inhmã akapêr anê?” Anê.

–Hãmri nhũm inhmã: “Ixpê Jesus na pa amã ixkapêr. Pa na ka hte ixpê ixkôt mē kot amnhĩ xunhwỳr xwỳnhjê homnuj tỳx o apa ho te pa ixtomnuj tỳx pyràk. ¹⁶ E kãnhmã xa. Ate inhmã tanhmã amnhĩ nhĩpêx to ho apa kaxyw na pa amã amnhĩ to amnhĩrit. Jarãhã ate ixpumunh xà hkôt ate mē kãm ma ijarēnh nē mē kãm ixkapêr jarēnh o mē ahkre ho ri mē hkôt apa kaxyw na pa amnhĩ kaxyw ata. Kot paj nhỹrmã axte awỳr ixkato nē tanhmã amã ixkapêr to ka inhma nē ma mē kãm ixkapêr jarēnh o ri mē hkôt apa. Ja kaxyw na pa amnhĩm ata.” Anhỹr o inhmã kapêr. ¹⁷ Hãmri nē inhmã: “E kot paj Ijaew mē Ijaew kêt xwỳnhjê hwỳr amê nē anê mē omunh mex nē nhũm mēhō apĩr kêt nē. ¹⁸ Kêr ka ma mē hkôt mē kãm ixkapêr jarēnh o ri apa kê mēhprĩ hã kuma. Mē kot amnhĩ tomnuj kaga nē amnhĩ kaxyw ixkôt hamaxpêr nē ixkôt amnhĩ xunhwỳr kaxyw. Hãmri nhũm Tirtũm ja hã mē omu nē ixkukwak ri amnhĩ katut kôt mē kot amnhĩ tomnuj piitã rēnh pa nē axte kãm hamaxpêr kêt nē. Hãmri nē mē ho hkra. Koja mē ã amnhĩ nhĩpêx anê hãmri nē axte Satanasti nhỹ hã tanhmã amnhĩ nhĩpêx to hkêt nē. Pãnhã Tirtũm kôt pix mã amnhĩ

nhîpêx o pa.” Anê.

19 —Ă na pre Pahihti Jejus inhmă kapêr anê. Tă kot kaxkwa rŭm inhmă ixăpênh jarênh ă karôja pa pre mar tÿx nê hkôt amnhî nhîpêx răhă ho ri ixpa pahi Akrip. 20 Jakamă na pa pre ma mē hkôt mē kām kapêr jarênh o ri ixpa. Tamas kumrêx hwÿr nê hpănhă Jerujarê hwÿr nê hpănhă pika pê Jutej piită hkôt Ijaew mă kapêr jarênh o ri ixpa. Tă hpănhă Ijaew kêt xwÿnhjê mă harê. Na pa hte mē kām ixkapêr o: “Kwa mē ate amnhî tomnuj kaga nê hpănhă Tirtŭm kôt amnhî xunhwÿ. Hămri nê hkôt pix mă amnhî nhîpêx o ri apa. Mē piită mē kot apê hkwy hă mē apumunh kaxyw.” Anê.

21 —Ăm ja pix mÿrapê na pre ixkwÿjaja ixpynê. Tirtŭm mă amnhî jarênh xă hă ixkre kamă ixpynê nê ra mē kot ixpîr kaxyw. 22-23 Nom na hte Tirtŭm ixtănopxa nê ixto ixihtÿx mex răhă ho pa pa arî mē kām harênh o ri ixpa. Mē kot amnhî to rŭnh xwÿnhjê mă nê mē kêp amrakati xwÿnhjê mă nê mē piită mē kām harênh o ri ixpa. Finat Mojes mē Tirtŭm nhÿ hă kapêr jarênh o mē pa xwÿnhjaja kot ra hkukamă tanhmă harênh to xă hkôt pa hte mē kām harênh o ri ixpa. Nê mē kām: “Tirtŭm kot mē pakaxyw ăm xwÿnhta na pre amnhî xă htÿx kamă hamak kām ty. Tă nhŭm Tirtŭm akupÿm ho htîr. Kumrêx na pre akupÿm ho htîr jakamă kumrêx na pre tanhmă mē kām kapêr to ho ri mē hkôt pa. Mē kot amnhî kaxyw hkôt hamaxpêr nê hkôt amnhî xunhwÿr xwÿnh piită urăk nê nhÿrmă Tirtŭm mē wa ô krî kamă htîr tŭm nê pa ho pa hprăm xăj mē harênh o pa. Mē ixpê Ijaew nê măănên mē apê Ijaew kêt xwÿnhjaja nhŭm pre ă mē pajarênh anê.” Anhÿr o pa hte mē kām harênh o ri mē hkôt ixpa pahi Akrip. Anê.

24 Nhŭm Pawre kormă kot mē kām amnhî jarênh par kêt ri nhŭm Pos Pesti tee ri tanhmă Jejus jarênh to hă kuma nê kăx pê kām kapêr nê kām:

—Kwa na ka akră axpă nă? Pêr ate kaga pumunh tÿx kurê akră pipănh

pyrăk o ri atÿx ă ri mē inhmă axujarênh anê. Anê.

25 Hămri nhŭm kām:

—Nă ixkră pipănh kêt. Ăm hămri na pa mē amă awjarê. 26 Jerujarê kamă na prem Jejus pî nhŭm mē piită omu. Tă nhŭm akupÿm htîr hămri nê hpimxur pê ri pa hkêt nê. Na pre mē ohtô nê akupÿm htîr kām omu. Pahi Akrip ra kot ja mar mex jakamă na pa ixămnhîx ă mē amă harênh anê.

27 Anhÿr o kām kapêr hămri nê pahi Akrip wÿr rît nê kām:

—Kwa pahi Akrip. Xă Tirtŭm nhÿ hă kapêr jarênh o mē pa xwÿnhjaja kot Jejus kukamă tanhmă harênh toja kôt na ka hte ajamaxpêr? Nă ra hkôt ajamaxpêr kênă. Ra ixte ajamaxpêr kôt apumunh mex. Anê.

28 Hămri nhŭm tee ri kuma nê kām:

—Tk. Kwa xă kot kaj ă inhmă akapêr anê pa ama nê apyră nê amnhî kaxyw Jejus kôt ijamaxpêr? Nă na ka ixte ă ate Jejus jarênh anhÿrja kôt ijamaxpêr ă ixkamnhîx kaprÿ. Anê.

29 Hămri nhŭm Pawre kām:

—Ko. Kot kaj ixpyră nê amnhî kaxyw hkôt ajamaxpêr pa ixkînh nê. Nom kaxipix kêt. Mē apiită mē ate inhmar o akrî xwÿnhjaja măănên. Mē ate mē ixpyră nê Jejus kôt amnhî xunhwÿr na inhmă hprăm. Ăm ixpyră nê mē apê prês pix na inhmă hprăm kêt. Anê.

30 Hămri nhŭm pahi Akrip nê htôx Perênîs nê pahi Pox Pesti nê mē hkôt mē môr xwÿnhjaja kănhmă kuhê nê ma mrar kaxyw. 31 Nê nojarêt nê Pawre hă axpên mă:

—Kwa tanhmă kot amnhî tomnuj to hkêt kênă kot kêt mē haxă rÿ kupî. Anê.

32 Hămri nhŭm Akripja Pos Pesti mă kām:

—Kwa kop apu kot amnhî kaxyw pahi maati Sesti hwÿr hkră hkêt ronhÿx pu mē ra kator. Anê.

27

Mē kot Rōm wÿr Pawre mēnh ã mē harēnh

Atre 23.11, 25.12

¹ Tã nhũm mē pyka pē Itar wÿr pahi maati Sesti hwÿr Pawre mēnh kaxyw. Itar kamã mē ò krī maati na pre kēp Rōm. Jakamã nhũm Pawre mē mē kot mē hagjēnh xà kamã mē hkrī xwÿnh mē ho hpimràatã ma mē o mra nē pôristi krãhtũm Jurti nhĩhkram mē haxàr pa. Kot ma Rōm wÿr mē o mōr kaxyw. Jurtija kēp Itar kamã mē ò pahi maati hã pôristi krãhtũm nhũm prem ma mē kãm mē o mōr kaxyw ĩhkram mē hagjēnh pa. Ixpē Rukre na pa pre inhmã Pawre hkôt inhmōr prãm nē mē hã ajēt nē mē hkôt mō.

² Tã pa mē ra inhnojarēt nhũm Aris-tak haxwÿja ma mē ixkôt mō. Pyka pē Masetōn nhõ xwÿnh na pre. Ò krī pē na pre Tesarōn. Jakamã nhũm ma wa ixkôt mō. Hãmri nhũm pãrja nojarēt. Atamĩx rũm pãr nhũm ra As wÿr nojarēt pa mē hwÿr inhgjēx pa nē ma kamã mō. ³ Hãmri nhũm apkati pa mē krī pē Sito hwÿr pōj nē hã pãr xi. Nhũm pôristi krãhtũm Jurtija Pawre ho mex jakamã pa mē Sito hwÿr pōj nhũm Pawre mã anē pa mē ixkato nē ma ixkrãmnhwÿjē hwÿr mra nē mē kutã apku nē ma akupÿm pãr wÿr mra.

⁴ Tã pa mē axte mō. Nom nhũm kôk mē ixkutã àpēr tÿx jakamã pa mē umaj juk nē gô hipôk kupu ho mō. Gô hipôk pē Sipreja pa mē upôk rũm ma hkupu ho mō nhũm mē inhnê kôk pē àmnàr mex nē. ⁵ Hãmri pa mē mōõ nē pyka pē Siris mē Pãpir wa hakrenh o mō nē pyka pē Ris kamã Mira hwÿr pōj nē hã pãr xi nē ijapôx pa. ⁶ Hãmri nhũm pôristi krãhtũmja Aresãnrir rũm pãr pumu nhũm ra Itar wÿr nojarēt. Pa mē hwÿr inhgjēx kurê kumrēx hãmri nē ma kamã axte mō. ⁷ Hãmri nhũm pãrja kôk kutã tee ri mōr prêprêk kaxyw nē ãm amnhĩm hprī nē mōr ã apkati xohtô nē pa mē tokyx ixpôx kêt nē. Tã Sito hwÿr ixãhtêp o mō nom nhũm kôk mē ixkutã hihtÿx rax kumrēx.

Jakamã pa mē juk nē gô hipôk pē Kret jatur xà jahpa nē ma kape hã mō nhũm mē inhnê kôk pē àmnàr mex nē. Hãmri pa mē ma Sarmōn jakrenh o mō ⁸ nhũm pãr kôk kutã amnhĩm hprī nē kape hã mō. Pa mē mō nē jatã Rasej tã pãr nhĩkwÿ xà mex wÿr pōj nē kamã pãr xi. ⁹ Nom pãr kot amnhĩm hprī nē mōr jakamã nhũm ra kôk xàpēr tÿx nē kamã kry htÿx ã mytwrÿ mē ixtã kato. Mytwrÿja ã mē kot kôk xàpēr tÿx pymaj nhÿhÿm pãr kãm mrar kêt. Jakamã nhũm Pawre tokyx mē inhmōr nē pãr nhõ xwÿnhjē mã kapēr kãm hihtÿx nē mē kãm:

¹⁰ —Kwa pu mē jar kôk xàpēr tÿx jamãr o ri papa nã. Kê kôk mē kry htÿxja hapêx pu mē rĩ kormã axte mō. Kot puj mē anhÿr kêt nē kôk xàpēr tÿx kãm mō nhũm nhÿri pãrja mē pahpê axà nhũm gô mē apê mē akukrêx o hapêx pa. Pu mē pajaxwÿja axkaprã.

¹¹ Anhÿr o mē kãm kapēr tã no nhũm mē kuma nē ãm kuma. Pãr pãm mē pãr o mrar xwÿnh wa nojarēt tÿx nē kapēr ma nē ãm kuma. Nhũm pôristi krãhtũm wa nojarēt ã wa kuma nē haxwÿja Pawre mar kêt nē. ¹² Nhũm mē kot pãr nhĩkwÿ xà mex jarēnhja mē kot mex ã harēnh tã mē kēp omnuj nē. Hã na wrÿk nē kôk xàpēr tÿx nhũm mē kēp omnuj tÿx nē. Jakamã nhũm mē piitã Pawre rom ra nojarēt nē. Mē kãm tokyx krī pē Wēnĩs wÿr hpôx prãm jakamã nojarēt tÿx nē. Gô hipôk pē Kret kamã na Wēnĩsja. Nē kamã kôk xàpēr tÿx kêt jakamã nhũm mē hwÿr nojarēt nē axpēn mã:

—E kwa pu mē tokyx Wēnĩs wÿr mō nē kamã mãn kôk xàpēr tÿx japêx jamãr o papa. Anē.

Hãmri nē piitã hwÿr nojarēt.

Kôk kot pãr o àpēr tÿx ã harēnh

¹³ Tã nhũm kahpa hkôt kôk xàpērja katat kôt kawax pē apê nhũm mē kamã ama nē axpēn mã:

—E hãmri. Tokyx pu mē mō. Anē.

Jakamã pa mē pãr o htÿx xà ho api nē axte mō. Ma gô hipôk pē Kret jakãr ã mō. ¹⁴ Puh nhũm na wrÿ nē kôk

àpêr tỳx kumrêx. Mě kot kām “kôk xàpêr tỳx maati” anhÿr xwÿnhja gô hipôk rûm mẽ ixto àpêr tỳx kumrêx o mō. ¹⁵ Hāmri nê mẽ ixkutã àpêr tỳx nhũm pàr tee ri kutã hkarôt. Pa mẽ kormã Wênĩs wÿr ixpôx kêt ri ra ho awjanã nhũm amnhĩ krã hkôt kôk kôt mō. ¹⁶⁻¹⁷ Hāmri nê mō nê gô hipôk pê Krawtijahpa nê hakàr ã mō nhũm mẽ inhnê kôk pê amÿtã nhũm amnhĩm hprĩ nê kawax pê apê. Hāmri pa mẽ pàr krare kot mẽ ixkôt mōr xwÿnhja pa mẽ kumÿ nê pàr rax kãm kumê. Ra kamã gô rax tã pa mẽ ixkarôt tỳx nê nê hkapĩr pa nê ho api nê pàr rax kãm kumê nê ho htỳx. Hāmri nê hpãnhã kôk xàpêr tỳx pymaj pàr rax kaxpre hpa. Hāmri nê kôk kot pykahti grã maati pê Sirteja wÿr pàr mẽnh nhũm kot amnhĩ to pykahti xãm o htêm pymaj nhũm mẽ kot ho mrar xà hã kupêxê rax o wrÿ nhũm pàr amnhĩ krã hkôt ma kôk kôt mō.

¹⁸ Tã nhũm apkati nhũm kôk arĩ mẽ ixpê pàr o àpêr tỳx nê arĩ na wrÿk rax rãhã nê. Jakamã pa mẽ pàr àr pymaj nê mẽ hikukrêx kwÿ gôx kãm rênh pa. Kaxkritre nê àr kêt kaxyw.

¹⁹ Tã nhũm apkati pa mẽ hpãnhã pàr kre kamã ri nê hikukrêx kwÿ rê nê gôx kãm kurê. ²⁰ Nhũm kôk arĩ àpêr tỳx kumrêx ã apkati xohtô nê. Nê na wrÿk rax rãhã jakamã pa mẽ kanhêti pumunh kêt nê myt pumunh kêt o mẽ ixtã apkati xohtô rax kumrêx. Hāmri nê tee ri ahkapi nê tee ri amnhĩ kukamã ijamaxpêr. Nê ixtyk par pix kukamã ijamaxpêr o ixkaprĩ nê ixkrĩ.

²¹ Hāmri nê mẽ inhmã ma xàj ixàpkur kêt ryy nê. Hāmri nhũm Pawre tee ri ja hã mẽ ixpumu nê pàr nhõ xwÿnh wa kãm kapêr nê wa kãm:

—Kwa na pa pre tee ri Kret kãm man mẽ pamōr nê war amã ixkapêr. Kop apu mũtar mãn mẽ kuri arĩ ri mẽ hkôt mẽ papa ronhÿx pu mẽ pajamakêtkati nê paxamnhĩx ri papa. Tã nhÿx pu mẽ ri mẽ hikukrêxja gôx kãm rênh par kêt nê. ²² Nom kwa kêr ka mẽ tee ri amnhĩ kukamã ajamaxpêr kêt nê. Kot puj mẽ pahtõ pahtyk kêt

nê. ãm pàrja pix koja axà nê hapêx. ²³ Ixpê Tirtũm krajê hõ na pa. Na pa hte kãm tanhmã amnhĩ nhĩpêx to ho ri ixpa. Jakamã na pre kamàt ja kamã ixwÿr kapêr o wrÿk xwÿnhjê hõ mẽ nhũm ixwÿr wrÿ nê inhmã awjarê ²⁴ nê inhmã: “Pa Pawre? Kwa tee ri amnhĩ kukamã ajamaxpêr o amã ma hkêt nê. Kot kaj akà hkĩnh pê ma Itar kamã Rôm wÿr mō nê pøj nê pahi maati Sesti pumu nê kãm amnhĩ jarê. Jakamã koja Tirtũm akôt mẽ mōr xwÿnh piitã omunh mex nê ka mẽ atõ tanhmã amnhĩ to hkêt nê.” Anê.

²⁵ —ã kot inhmã kapêr anhÿr jakamã kwa mẽ amnhĩ to htỳx nê tee ri amnhĩ kukamã ajamaxpêr kêt nê. Tirtũm kapêr o wrÿk xwÿnh kot inhmã ujarênh xà hkôt koja Tirtũm ã mẽ panhĩpêx anê. Ixte ja hã omunh mex kênã. ²⁶ Koja xep kôkja nhÿri gô hipôk ã pàr krakrak pa. Nom mẽ papajaja kot puj mẽ pahkà hkĩnh pê hwÿr pahpôx pa. Anê.

²⁷ Tã pa mẽ mōõ nê ã inhmōr anhÿrja ã ixtã semãn axkrut nê ra gô rax pê Ariax kôt axà. Kamàt kãm hkôt axà nhũm kôkja arĩ pàr o apêr tỳx rãhã ho mō. Hāmri nhũm kôt ã kamàt nhũm pàr o mrar xwÿnhja ra pàr kot pykahti grã htêp ã hkamnhĩx. ²⁸ Jakamã nhũm mẽ gô xupÿm pumunh xà ho gô pumu nhũm upÿm kêp 36 met. Hāmri nhũm hã ahtũmre nê axte omu nhũm ra hpãnhã kêp 27 met pix. Jao ra pàr kot gô kokwe htêp o mōr ã omu. ²⁹ Hāmri nê kot kên kuranh nê hã pikrakrak pymaj katê rûm ho htỳx xà ho 4 nê gôx kãm kurê nhũm arĩ ajêt. Hāmri nhũm mẽ tokyx kãm arĩgro hprãm o arĩgro mã nojarêt o hkrĩ. ³⁰ Hāmri nhũm pàr kãm mẽ àpênh xwÿnhjaja tanhmã hamaxpêr to nê hêx rom pàr krare ho wrÿk o tẽ. Mě kot mẽ ixrer nê ahte xarmã mōr nê rêr nê tokyx gô hipôk wÿr hpôx kaxyw. No ãm hêx rom te mẽ kot axte pàr krã rûm ho htỳx xà hõ mẽnh kaxyw pyrãk o amnhĩ nhĩpêx nê kaxyw ho wrÿk o tẽ. ³¹ Nom nhũm Pawre mẽ hamaxpêr ã mẽ omu hāmri

ně pôristi mẽ mẽ hkrähtüm mã mẽ harẽ ně mẽ kãm:

—Kwa koja mũjjaja mẽ pare ně ahte pàr krare kamã xarmã mõn rê ka mẽ apikaprãr pa kãm ga. Anẽ.

³² Hãmri nhũm mẽ tee ri kuma ně mẽ hwýr hprõt ně mẽ kęp pàr krare pê hkaxpre xà jakà nhũm gôx kãm tẽm ně ma gô hkôt hkaprýn mõ.

³³ Tã hãmri nhũm ra myt kator o mõ nhũm Pawre akupým mẽ piitã mẽ ho mẽ hamaxpěr o hihtýx kaxyw mẽ kãm:

—Kwa na ka mẽ tee ri amnhĩ kukamã ajamaxpěr o akapři ně axàpkur kêt o atã semãn axkrut. ³⁴ E pu mẽ mẽmoj krẽ ně ho amnhĩ xihtýx. Kot puj mẽ pahtõ pahtyk kêt ně. Âm hãmri na pa mẽ amã ixkapěr. Anẽ.

³⁵ Hãmri ně mẽmoj py ně mẽ noo mã Tirtüm mã harẽ ně hkur o xa ³⁶ nhũm mẽ ja hã omunh xà hkôt akupým tãm hamaxpěr o mõ. Hãmri ně amnhĩm mẽõ hkwý jamý ně kumẽ kuku. ³⁷ Pàr kãm mẽ inhmõr xwýnhjaja na pa prem ixpê 276. ³⁸ Tã pa mẽ ra ixàpkur pa. Hãmri ně pàr kaxkrit kaxyw mẽ apkur xà hã mẽmoj y jakrêxja gôx kãm hkapĩr pa.

Pàr mẽ kęp pikrakrak ã harẽnh

³⁹ Tã nhũm ra myt kator mex ně nhũm mẽ amnhĩ kukamã gô hipòk pumu ně axpẽn mã:

—Kwa nhỹ pika na mũj wehe? Anẽ.

Hãmri ně nhỹri hakàx ã amnhĩm nõr xà mex pumu ně hwýr pàr o mõr kaxyw hã axpẽn ma. ⁴⁰ Hãmri ně kaxyw pàr o htýx xà jakà nhũm axrẽ ně gôx kãm rôròk pa. Nẽ pĩ ho pàr o juk xà nhõ xê xàja nhũm mẽ mããnẽn krãhta. Hãmri ně akupým mrar xà hã kupêxê nhõ nhũm kòk ho hikot ně ma gô jakàx wýr o mõ. ⁴¹ Nom nhũm pàr kormã hakàx pê awry hã mõr ri amnhĩ to kokwe kura ně pyka nhĩmòk ã nõ nhũm mẽ tee ri kot hkaxàr ně akupým gô xupým mã mẽnh kaxyw. Nom nhũm gô kot pàr nhĩxò htak týx kurê nhũm mẽ ixpê pikrakrak par o mõ. ⁴² Jakamã nhũm pôristijaja tee ri omu hãmri ně ra mẽ kęp prêsjê nhĩmex kaxyw. Mẽ kot gôx kãm rôròk ně gô

hipòk wýr hpa ho nana ně mẽ kęp pikunor pymaj kot mẽ himex kaxyw.

⁴³ Nom nhũm mẽ hkrähtümja kãm Pawre pĩr prãm kêt jakamã ja ně mẽ hkurê ně mẽ inhmã:

—E mẽ ate apa ho gô rẽnh mex xwýnhjaja. Akumrêx mra ně mrõ ně ho nana ho mra ně rê. ⁴⁴ No mẽ ate apa ho nana punuj xwýnhjaja kêt ka mẽ tapti rý pàr kukrêx õ my nõ hã ajêt ně hã ma mõn rê. Anẽ.

Hãmri pa mẽ ã amnhĩ nhĩpêx anẽ ně ixpiitã ixkà hkĩnh pê ixrêr pa.

28

Gô hipòk pê Maw kamã mẽ pa hã mẽ harẽnh

Makre 16.17-18

¹ Tã pa mẽ ixpiitã ixkà hkĩnh pê ixrêr pa. Nhũm gô hipòk ã mẽ pa xwýnhjaja mẽ inhmã gô hipòk nhĩxi jarẽ nhũm xep kęp Maw. ² Nhũm Maw nhõ xwýnhjaja mẽ ixto mex ně. Nhũm axte na wrýk rax ně nhũm kry htýx kumrêx nhũm mẽ ixkamã ukapři ně mẽ inhmã kuto ně mẽ inhmã kapěr mex ně. ³ Hãmri nhũm Pawre kuwy kaxyw ri pĩ kawrà ho mra ně kuwy hwýr o tẽ ně hã haxwýr o xa. Hãmri nhũm kagã xoprê õ wẽnẽn xihtýxja kuwy kagro pymaj pĩ rùm kato ně ìhkra hã kunha ně hã àpěr o ajêt. ⁴⁻⁵ Hãmri nhũm Pawre omu ně amnhĩ ně ho apê ně kuwy kamã kumẽ nhũm kamã tẽm ně xêt pa. Hãmri nhũm gô hipòk nhõ xwýnhjaja tee ri ja hã omu ně axpẽn mã:

—Kwa ga mẽmyti mũj pumu. Mãn kęp mẽ hpar o pa xwýnh na. Hã na kagã õ wẽnẽn xihtýxta kunha. Nà koja ty ně rĩ amnhĩ pumu. Ra hkà hkĩnh pê gô rùm mẽ pahwýr rêt tã koja tã ty kãm ga. Anẽ.

⁶ Hãmri nhũm mẽ tee ri kot tanhmã amnhĩ to hã hkamnhĩx ně hamãr o kuhê. à htýx ně ìhkra hikot rý htyk kurê kumrêx ã hkamnhĩx tã nhũm tanhmã amnhĩ kamã hamak to hkêt ně. Âm htýx ri hkĩnh ně kapěr ně hpikunhar o ri mra. Hãmri nhũm mẽ tee ri omu ně axpẽn mã:

—Kwa tanhmã kot amnhĩ tore hã. Kęp mẽ hpar o pa xwýnh kêt. Mãn kęp

kaxkwa kamã mēpahpãmjê hõ nà? Hã na kagã kunha nhũm tanhĩ to hkêt nē. Anē.

⁷ Nhũm gô hipôk ã mē ò pahihtĩ pē Puptija. Ōrkwỹ hã jawỳ jakamã nhũm amnhĩ kôt mē ixwỳ pa mē ma hkôt mō nē kuri hkôt ixpa ho ixtã apkati axkrunēpxi nhũm mē ixto mex nē. ⁸ Nhũm ra Pupti nhĩpêxà kêp à nē nō. Kà kagro htỳx nē haôk. Hãmri nhũm Pawre hwỳr tē nē omu nē hã ìhkra xi nē ho Tirtũm wỳ nhũm akupỹm ho mex kurê kumrêx. ⁹ Hãmri nhũm gô hipôk nhõ xwỳnhja harēnh ma nē Pawre hwỳr mē à xwỳnh piitã o mra nhũm mē omu nē Tirtũm nhỹ hã akupỹm mē ho mex pa. ¹⁰⁻¹¹ Hãmri nhũm gô hipôk nhõ xwỳnhjaja mē ixto mex rax nē.

Pawre axte Rõm wỳr nojarêt ã harēnh

Rõmãn 1.10-12, 15.30-32

Tã pa mē gô hipôôta kamã ixpa hã mytwrỳ axkrunēpxi. Hãmri nhũm kôk xàpêr tỳxta hapêx pa mē axte inhnojarêt nē ma mō. Pàr ò kamã hpãnhã mō. Aresãnrir rũm pàrja pa mē hpãnhã kamã mō. Mē kot kãm “sãnti pihpo” anhỹr xwỳnhhta kamã. Na pre gô hipôk kamã haxwỳja kôk xàpêr tỳx hapêx jamãr xa hã hikwỳ htã ra axte nojarêt. Hãmri nhũm gô hipôk nhõ xwỳnhja ma mē inhmõr xà hã mē inhmã mē ixàpkur xà hkwỳ nhõr rax nē. Hãmri pa mē pàr wỳr inhgìx pa nē ma kamã mō. ¹² Mõõ nē Sirakus wỳr pøj nē hã pàr xi. Hãmri nē krĩja kamã mē ixtã apkati axkrunēpxi nē axte mō. ¹³ Mõõ hãmri nē Rekre hwỳr pøj nē hã pàr xi. Hãmri nē kamã mē ixtã apkati. Nhũm ra kahpa hkôt kôkja kawax pē àpêr mex jakamã pa mē ma hkôt mō. Nē mē ixtã apkati axkrut nē Potew wỳr pøj nē hã pàr xi. ¹⁴ Hãmri nē pàr rũm ijapøj nē krĩ kamã Jesus kôt mē ixtõ nē htõx kwỳjê pumu nhũm mē amnhĩ wỳr mē ixwỳ. Pa mē ma mē hkôt mra nē mē hkôt ri ixpa hã ixtã ù semãn. Hãmri nē ma Rõm wỳr hpãnhã ixpar o mō. ¹⁵ Hãmri nē kormã amỳm inhmõr ri nhũm Rõm kãm Jejus kôt mē ixtõ nē ixtõxjaja mē

ijarēnh ma nē man mē ixkutã mra. Ma krĩ pē Prasxi Apja mē “Wēn Pijakrunēpxi” anhỹr xwỳnh jarēnhja wa hwỳr mē ixkutã mra. Hãmri pa mē axpēn kaxpa nhũm Pawre mē omu nē hkĩnh nē. Nē mē hã Tirtũm mã amnhĩ jarē nē kãm:

—Pa Tirtũm? Nà ãm hãmri na ka mē ixkutã jajê rē. Na pa mē omu nē ixkĩnh nē. Nà amex o amex Tirtũm. Anē.

¹⁶ Hãmri pa mē ma mē hkôt Rõm wỳr mō nē pøj. Jatã Itar kãm Rõm wỳr pøj. Hãmri nhũm pōristi krãhtũm Pawre mã:

—E kot paj mē hagjēnh xà kamã ajaxàr kêt nē. Kot kaj amã nhỹri ixkre kamã apa hprãm nē mamrĩ kamã apa. Nom koja pōristi hõ akôt pa ho pã.

Anhỹr jakamã nhũm nhỹri ixkre kamã pahihtĩ Sesti kot mar kaxyw kamã hamak o pa.

Pawre kot Rõm kamã tanhmã amnhĩ nhĩpêx to hã harēnh

Atre 17.5-6

¹⁷ Tã nhũm Pawre Rõm kamã hã apkati axkrunēpxi nē amnhĩ wỳr Ijaew xàptàr tũmrejê hwỳ nhũm mē hã akuprõ nhũm mē kãm amnhĩ jarē nē mē kãm:

—E ixkwỳjaja. Pa mē amã amnhĩ jarē ka mē inhma. Nà na pa pre mē panhìgêtjê kapêr nhĩrõp tanhmã ixãm to hkêt nē rỳ ixte tanhmã mē pahkwỳjê hõ hto hkêt tã nhũm mē pahkwỳjaja amarĩ ixpynê. Jerujarê kamã ixpynê nē Rõm nhõ xwỳnhjê nhĩhkram ijaxà. ¹⁸ Hãmri nhũm mē ixte amnhĩ nhĩpêx ã ixkukja nē tee ri mē kot mēmoj mỳrapê ixpĩr kaxyw tanhmã ixkukjêr to kaprỳ. Jakamã nhũm mē kãm ixkator prãm nē. ¹⁹ Nom nhũm mē pahkwỳjaja kãm ja mex kêt jakamã pa pre jar pahĩ maati Sesti kot ixte kãm amnhĩ jarēnh ã inhmar kaxyw amnhĩm harē nē man hwỳr mō. Kot paj tanhmã kãm mē pahkwỳjê ho ixkapêr punuj to hkêt nē. ãm ixte amnhĩ tã tanhmã mar to hpix kaxyw na pa hwỳr mō.

²⁰ —Tã pa amnhĩ wỳr mē awỳ. Ixte mē amã amnhĩ jarēnh kaxyw. Mē

pahkaprī xwýnhhta. Mē pahte kormā kamā pajamak o papa xwýnh Jejusta. Ām ixte amnhī kaxyw hkôt ijamaxpēr pix mýrapê na prem ā kàx o ixkaxpre anē. Anē.

²¹ Hāmri nhūm mē kuma nē kām:

—Nà jar tanhmā ajarēnh kute hkêt. Na pre Jutej kamā mē pahkwýjaja tanhmā ajarēnh to hā kagà nē mē ixwýr mēnh kêt nē. Nē ham mē kurūm mē hpôx xwýnhjaja na prem tanhmā mē inhmā ajarēnh to hkêt nē. ²² No na xep hte pyka piitā hkôt mē kām mē ate Jejus kôt amnhī xunhwýr xwýnhjê kurê nē. Na pa pre mē ajarēnh ma nē mē inhmā axujarēnh mar prām nē. Anē.

²³ Hāmri nhūm mē kot mar kaxyw arīgro hta.

Tā nhūm mē kot arīgro hyr kato nhūm mē Pawre nhōrkwý hwýr pikuprōnh rax nē nhūm mē kām awjarê. Mē kām ujarēnh ry nē. Nē ho kamāt. Nē mē kām:

—Nà mē pahte amnhī wýr kamā pajamak o papa xwýnh Jejusja. Kot kaj mē atō amnhī kaxyw hkôt ajamaxpēr nē hkôt amnhī xām nhūm Tīrtūm ja hā apumu nē ato hkra. Anē.

Nhūm pre ā mē kām kapēr anē. Nē finat Mojes kot Tīrtūm nhỹ hā Jejus kukamā tanhmā hā kagà htoja nhūm mē kām harê. Nē Tīrtūm nhỹ hā kapēr jarēnh o mē pa xwýnhjaja kot tanhmā hā kagà htoja nhūm mē kām harê.

²⁴ Hāmri nhūm mē hkwýjaja kuma nē hkôt hamaxpēr nē amnhī kaxyw Jejus kôt hamaxpēr nē hkôt amnhī xunhwý. No nhūm mē hkwýjaja kuma nē ām kuma nē kām axte mar prām kêt nē.

²⁵⁻²⁹ Jakamā kànhmā kuhê nē nojarêt nhūm Pawre mē kām:

—Nà amnepēm na pre Tīrtūm finat Ijaisti mā tanhmā kapēr to. ŷ hā kot mē panhīgêtjê mā tanhmā kapēr jarēnh to kaxyw. Tīrtūm Karō nhỹ hā kot mē kām kapēr nē tanhmā mē harēnh to kaxyw. Te Tīrtūm tām mē kām kapēr pyrāk mē kām kapēr. Nē ām hāmri tanhmā mē pahkwýjê jarēnh to. Na pre mē kām:

E Ijaisti. Kêr ka ma akwýjê hkôt ri mē kām tanhmā ixkapēr jarēnh to ho ri apa.

Nē mē kām: “Kot kaj mē ajamak o axumar tỳx tā aprī hā ixkapēr mar kêt nē.

Nē mē ano ho arīt tỳx tā aprī hā ixte amnhī nhīpêx ā ixpumunh kêt nē.

Mē amā ixkapēr mar prām kêt jakamā te mē ate mar pymaj amnhī jamak pro pyrāk o amnhī nhīpêx o ri apa.

Nē mē amā ixte amnhī nhīpêx ā ixpumunh prām kêt jakamā te mē ate ixte amnhī nhīpêx ā ixpumunh pymaj te mē anomnhôt pyrāk o amnhī nhīpêx o ri apa.

Jao amnhī kaxyw ixkôt ajamaxpēr kêt nē.

Kop mē amā ixkapēr mar prām ronhỹx ka mē aprī hā inhmar tỳx nē.

Nē aprī hā ixte amnhī nhīpêx ā ixpumunh mex nē.

Jao amnhī tomnuj kaga hpa nē ixkôt amnhī xunhwý.

Pa ja hā mē apumu nē mē ato mex nē.

Tā ka mē ā amnhī nhīpêx anhỹr kêt nē.” Anhỹr o kêr ka mē kām ixkapēr jarēnh o ri mē hkôt apa Ijaisti. Anē.

Na pre ā Tīrtūm mē panhīgêtjê kaxyw Ijaisti mā kapēr anē nhūm ô ri mē kām ujarēnh o pa nē mē pamā hā kagà. Jakamā kwa mē okora. Kêr ka mē jajê pyrà nē ā amnhī nhīpêx anhỹr hkêt nē. Kwa mē inhma nē inhmar tỳx nē. Ijaew kêt xwýnhjaja kot kapēr marja na ra Tīrtūm kām hprām nē. Jakamā koja mē hwýr mē kot kapēr jarēnh o mē pa xwýnh kwýjê rē nhūm mē hkôt mē kām ujarēnh o pa nhūm mē kuma nē mē akurom kām mar prām nē. Anē.

Hāmri nhūm mē kuma nē hapôx pa nē ma akupým axpēm mā tanhmā kapēr jarēnh to ho mra. ³⁰ Hāmri nhūm pahi maati Sesti tokyx amnhī wýr Pawre hwý nē tanhmā mar to hkêt nhūm ôrkwý kamā kêp prês nē pa

ho hã amgrà axkrut. Nê tãm òrkwỹ pãnhã mẽ kãm amnhĩre. Nhũm pre krĩ nhõ xwỳnhjaja ohtô nê hwỳr mra nhũm amnhĩ wỳr mẽ omu nê hkĩnh nê. ³¹Na pre hte amnhĩ wỳr mẽ kuwỳ nê mẽ kãm Tĩrtũm kapẽr jarẽnh o hkrĩ. Mẽ kot Tĩrtũm Kra Pahihti Jejus Kris kôt amnhĩ xunhwỳr nhũm Tĩrtũm kot ja hã mẽ omunh nê amnhĩ katut kôt mẽ kot amnhĩ tomnuj rẽnh par nê mẽ ho hkra hã mẽ kãm ujarẽnh o hkrĩ. Nê mẽ kot hkôt amnhĩ xunhwỳr xwỳnhjê jahkre. Tanhmã mẽ kot Jejus kôt amnhĩ nhĩpêx mex to ho pa hã mẽ kãm karõ ho hkrĩ. Hãmri nhũm mẽhõ ja nê tanhmã kãm kapẽr to hkêt nê.

Tã ãm ja pix Teopre. Ixpê Rukre na pa awỳr kagàja nhĩpêx nê kumẽ. Nê kamã amã tanhmã mẽ pahkwỳjê jarẽnh to. Tã ãm ja pix na hapêx.

Rômân Pawre kot Rôm kãm Jejus kôt hkwÿjê hwÿr kagà nê mênh

Kagà ja na pre Pawre hipêx. Kêp Jejus nhÿ hã mẽ ahkre ho pa xwÿnh na pre. Na pre hte mry kà ho ixkre nhÿpêx nê mẽ kãm ho wênê ho mẽ hkôt pa pê mẽ piitã mẽ kãm Tirtũm kapêr jarênh o pa. Tã krÿ pê Rôm kamã mẽ kot Jejus kôt amnhÿ xunhwÿr xwÿnhjê hwÿr kagàja nhÿpêx nê mẽ hwÿr kumê. Kormã ma mẽ hwÿr môr nê mẽ omunh kêt ri.

Nê Jejus kêp Tirtũm mã tanhmã mẽ pajarênh to xwÿnh ã nhũm pre mẽ kãm harê nê hã kagà. Jejus kot mẽ pahte amnhÿ tomnuj pãnhã mẽ panê htyk jakamã na hte Tirtũm mẽ pahte hkôt amnhÿ xunhwÿr ã mẽ pahpumu nê Jejus kukwak ri mẽ pahte amnhÿ to mex xwÿnh ã mẽ pajarê.

Nê Tirtũm Karõ nhÿ hã mẽ kot amnhÿ nhÿpêx nyw nê hamaxpêr nyw o pa hã nhũm Pawre mẽ kãm karõ nê hã kagà. ã na pre mẽ kãm mẽmoj jarê nê hã kagà anê. Nê hã kagà ho:

¹ Pa Rôm nhõ xwÿnhjaja? Xà mẽ amex? E ot pa mẽ awÿr kagà nhÿpêx nê kumê. Tirtũm na pre mẽ akaxyw ixãm. Ixte mẽ amã Jejus kot tanhmã mẽ panê amnhÿ nhÿpêx to hã harênh o ri ixpa kaxyw. Na pre ixpê Pawre hã ixpumu nê ixãm. Jakamã na pa ã mẽ awÿr kagà nhÿpêx nê mẽnh anê. Ixte Jejus nhÿ hã mẽ ahkre ho ri ixpa xwÿnh na pa. Na pa hte kãm tanhmã amnhÿ nhÿpêx to ho ri ixpa. Tã ã mẽ awÿr kagà nhÿpêx nê mẽnh anê.

² Amnepêm na pre Tirtũm nhÿ hã kapêr jarênh o ri mẽ pa xwÿnhjaja mẽ pakukamã mẽ panhÿgêjtjê mã Jejus kukamã tanhmã harênh to ho ri pa. Nê mẽ kãm kapêr jarênh o mẽ hkôt pa nê mẽ kãm:

—Koja nhÿrmã Tirtũm mẽ pahpiitã mẽ panê tanhmã kot amnhÿ nhÿpêx to

mã xwÿnh mẽ nhũm mẽ hpiitã hprÿ hã harênh ma nê omu. Anê.

Nhũm prem ã Jejus kukamã mẽ kãm harênh anhÿr o ri mẽ hkôt pa. Tirtũm kapêr ã kagà htũm kamã harênh xà hkôt tanhmã mẽ kãm harênh to. ³ Tirtũm Kra Jejus Krisja na pre mẽ kãm harênh o ri mẽ hkôt pa. Mẽ panhõ Pahihti na. Kêp Tirtũm Kra htã na pre mẽ pahpyrà nê ï ho amnhÿ nhÿpêx nê wrÿ nê katorxà nhõxà hkre rũm kato. Jakamã kêp Tirtũm Kra pix kêt mãânên katorxà hkôt kêp higêt Tawi hkanrêhã htãmnhwÿ.

⁴ Kêp Tirtũm Kra htã nhũm prem axtem nê tanhmã hamaxpêr to nê kupÿ. Nom nhũm Tirtũm kêp amnhÿ Kra hã akupÿm ho htÿr. Jakamã na pu htem harênh ma nê kãm pajamaxpêr o:

—Jejus kêp Tirtũm Kraa. Mẽ kot kêp hpÿr tã nhũm akupÿm ho htÿr. Jakamã nhũm Tirtũm pyrà nê hihtÿx o hihtÿx. Anê.

⁵ Tã ã Tirtũm kot Kra nhÿpêx anhÿrja ri na mãânên pa ixto mex nê mẽ akaxyw ixãm. Jakamã na pa hte ma krÿ piitã hkôt mẽ kãm tanhmã Jejus Kris jarênh to ho ri mẽ hkôt ixpa. Ijaew mã nê Ijaew kêt xwÿnhjê mã. Mẽ kot harênh mar nê amnhÿ kaxyw kãm hamaxpêr nê kapêr kôt pix mã amnhÿ nhÿpêx mex kaxyw. ⁶⁻⁷ Nê mẽ apê Rôm nhõ xwÿnhjaja. Na ka prem Jejus kôt amnhÿ xunhwÿ nhũm Tirtũm ja hã mẽ apumu nê mẽ ato hkra nê mẽ apê Jejus mẽ wa hkwÿ hã mẽ ajarê. Mẽ ate hkôt amnhÿ nhÿpêx kaxyw nhũm pre ã mẽ ajarênh anê.

Tã ot pa kagà nhÿpêx nê mẽ awÿr mẽnh kaxyw. Tirtũm kot mẽ ato hkra xwÿnhjê hwÿr. Tirtũm kãm mẽ ajapêê.

Na pa hte mẽ ato mẽ panhÿpêêxã maati Tirtũm mẽ Pahihti Jejus Kris wa hwÿr rãhã ri ixpa. Nê mẽ ato wa hwÿr o:

—Kwa kêr ka wa Rôm kamã war akrajê pumunh mex nê mẽ kutã anojarê rãhã nê. Kê mẽ hamakêtkati nê àmnhÿx ri tanhmã amnhÿ nhÿpêx to ho ri pa. Anê.

Pawre kot Rôm nhõ xwýnhjê pumunh prãm ã amnhĩ jarênh

Atre 28.15-16; Rômân 15.22-29

⁸Nê na ka prem amnhĩ kaxyw Jejus Kris mã ajamaxpêr nê hkôt amnhĩ xunhwý nhũm krĩ piitã hkôt mē pa xwýnhjaja mē ajarênh ma. Nê mē ate amnhĩ nhĩpêx nyw ã mē ajarênh ma nê axpên mã tanhmã mē ajarênh to ho pa. Nê mē ajarênh o:

–Kwa na xep Rôm kãm mē hkwyjaja amnhĩ kaxyw Jejus mã hamaxpêr tỳx nê. Nê hkôt amnhĩ nhĩpêx mex rãhã ho ri pa. Anê.

Pa ã mē kot mē ajarênh anhýrja ma nê ixkĩnh tỳx nê. Nê Tirtũm mã mē anhý hã ixkĩnh ã amnhĩ jarênh o ri ixpa. ⁹Na pa hte mē ato hwýr rãhã ho ri ixpa. Nê nhýri mē kãm Tirtũm Kra Jejus kapêr jarênh o ri ixpa nê mē amã ijamaxpêr nê mē ato kuwý. Nê tanhmã Tirtũm mã amnhĩ nhĩpêx to ho ixpa pē mē amã ijamaxpêr nê mē ato kuwý. Tirtũm kot ja hã ix-pumunh mex. ¹⁰Na pa hte tanhmã kãm amnhĩ jarênh to kaxyw nê mē akaxyw amnhĩ to kuma nê kãm:

–Pa Tirtũm? Na pa ra inhmã ma Rôm wýr inhmõr nê kamã akôt ixkwýjê pumunh prãm tỳx kumrêx. Xà kot ka tokyx mē hwýr inhmẽ nà? Anê.

¹¹Na pa ra inhmã mē awýr inhmõr prãm tỳx nê. Na pre Tirtũm Karõ tanhmã ixkrã hto pa ý hã kapêr ã kagà mar tỳx nê. Nê hkôt mēmoj mex pumunh rax nê. Tã ra inhmã ma mē awýr inhmõr nê amnhĩ xô ri mē amã harênh prãm nê. Mē ate inhmar nê aprĩ hã Jejus Kris kôt amnhĩ xunhwýr tỳx nê hkôt amnhĩ nhĩpêx mex rãhã ho ri apa kaxyw. ¹²Kot paj nhýrmã ma mē awýr mō. Nê mē awýr pōj pu mē axpên pumu nê pahkĩnh nê. Mē pahte amnhĩ kaxyw Jejus Kris mã pajamaxpêr mex o papa hã axpên pumu nê pahkĩnh nê. Nê mē pahpiitã hkôt amnhĩ nhĩpêx mex o ri papa.

¹³E ixkwýjaja. Xatã ixte mē awýr ixkrã htã nhũm mēmoj xatã tanhmã ixpê àmtàr to pa kormã jar ixpa. Nom kot paj nhýrmã ma mē awýr mō. Mē

ate ja hã inhmar kaxyw na pa ã Tirtũm noo mã mē amã amnhĩ jarênh anê. Na pa pre krĩ hkwy kamã mē apê Ijaew kêt xwýnh kwýjê hwýr ixpa. Nê mē kãm Jejus kot mē panê tanhmã amnhĩ nhĩpêx to hã harênh o ri mē hkôt ixpa. Nhũm mē hkwyjaja inhma nê hkôt amnhĩ xunhwý. Ja kaxyw na pa inhmã ma mē anhõ krĩ hwýr inhmõr prãm nê. Mē akwyjaja kot ixkapêr mar nê mē apyrà nê Jejus kôt amnhĩ xunhwýr kaxyw. ¹⁴Na pre ra Tirtũm ixte kapêr o mē ajahkre ho ixpa kaxyw mē piitã mē kaxyw ixãm. Tanhmã ri mē kute xwýnhjê kaxyw. Mē kãm ma ho mē pa xwýnhjê mē mē kãm ma hkêt o mē pa xwýnhjê mã. Nê mē kot kagà pumunh xwýnhjê mē mē kot kagà pumunh kêt xwýnhjê mã. Mē piitã mē kaxyw na pre ixãm. Ixte mē kãm Jejus kot tanhmã mē panê amnhĩ nhĩpêx to hã harênh o ri mē hkôt ixpa kaxyw. ¹⁵Jakamã na pa ra inhmã mē apê Rôm nhõ xwýnhjê hwýr inhmõr prãm nê. Ixte mē anhõ krĩ kamã mē piitã mē kãm ja jarênh o ri ixpa nhũm mē kot inhmar nê mē pahpyrà nê Jejus kôt amnhĩ xunhwýr kaxyw.

Jejus kot mē panê htyk ã harênh Sikũn Ximotre 1.6-12

¹⁶Nê Jejus kot mē panê htyk ã harênhja ãm hãmri na. Harênhja mex o mex. Na htem kuma nê kãm hamaxpêr nê amnhĩ kaxyw hkôt hamaxpêr nê hkôt amnhĩ xunhwý. Hãmri nhũm Tirtũm ja hã mē omu nê mē nê mē kot amnhĩ tomnuj o hapêx pa nê mē ho hkra. Nom mē ixpê Ijaew nhõ xwýnhjê pix kêt. Mãänên mē apê Ijaew kêt xwýnhjaja nhũm kãm mē pajapê ho axpên pyræk. Jakamã na pu htem Jejus kôt amnhĩ xunhwý nhũm Tirtũm ja hã mē pahpumu nê mē pahto hkra. Ja kaxyw àhpumunh tỳx o àhpumunh tỳx. ¹⁷Am mē kot amnhĩ kaxyw Jejus mã hamaxpêr xwýnh pixjaja na hte mē ho hkra. Kapêr ã kagà htũm kot tanhmã ja jarênh to nê harênh kot:

Na hte Tîrtûm mẽ kot amnhî kaxyw Kra mã hamaxpêr ã mẽ omunh xà hkôt mẽ ho hkra nhùm mẽ amnhî kaxyw kãm hamaxpêr rãhã ho pa. Jao ra ô ri tãm amnhî nhîpêx o pa. Anê.

Mẽ pahpiitã mẽ pahte amnhî tomnuj xwýnh ã mẽ pajarênh
Atre 14.15, 17.22-29; Apokarip 9.20-21

¹⁸ Nê mẽ kot amnhî tomnuj o ri mẽ pa xwýnhjaja na hte Tîrtûm axtem tanhmã mẽ harênh to. Na htem Tîrtûm kapêr ma nom amnhî tomnuj gryk ã ãm kuma. Nê mẽ hkwyjaja kot kapêr mar pymaj kapêr ô ho mẽ kêp àmnar rãhã ho ri pa nhùm Tîrtûm ja hã mẽ omu nhùm ja kêp omnuj nê. ¹⁹⁻²⁰ Te mẽ kot Tîrtûm kot amnhî nhîpêx ã omunh kêt pyræk o amnhî nhîpêx tã mẽ kot omunh mex. Tîrtûm kot mẽmoj to kator krax rùm ra kot mẽ pamã amnhî to amnhîrit mex. Pu mẽ pano ho omunh kêt tã no ãm kot amnhî nhîpêx kôt ra kêp Tîrtûm ã omunh mex nê. Nê kêp mẽmoj piitã ho kator xwýnh ã omunh mex nê. Nê mẽ o mex ã omu nê hihtýx o hihtýx hã omu. Tîrtûm kot amnhî nhîpêx kot amnhîrit mex nhùm mẽ kot omunh mex tã hkôt amnhî xunhwýr kêt nê. Nê axtem nê hamaxpêr o:

–Tk. Tîrtûm kot inhmã amnhî to amnhîritre hã kot pa kêt ri hkôt amnhî nhîpêx. Kot pa inhno ho omu nê rĩ kormã hkôt amnhî nhîpêx japêr. Anê.

Ra mẽ kot amnhî nhîpêx ã omunh mex tã ri ã hamaxpêr anê. Jakamã nhùm Tîrtûm tee ri ja hã mẽ omu nhùm ja kêp omnuj týx nê. ²¹ Mẽ kot amnhî nhîpêx ã omunh mex tã amnhî kaxyw tanhmã kãm hamaxpêr hto hkêt. Rý arĩ hamaxpêr japêr nê kãm:

–Nã Tîrtûm. ãm hãmri amex kumrêx. ãm amex o amex. Apê Tîrtûm ã ãm apixi mex kumrêx na ka. ãm hãmri na ka hte mẽ ixto mex o apa.

Anhýr o amnhî kaxyw kãm kapêr kêt nê. Nê ãm htýx tanhmã hamaxpêr punuj to pix o ri pa. Te kamát kô kamã ri mẽ pa xwýnhjê kot amnhî

nhîpêx pyræk nê mẽmoj mex pumunh kêt nê.

²² Mẽ kot àhpumunh týx ã amnhî to jarkrar o ri pa htã no ãm te mẽ hkrã kanhîn kêt nê mẽ hamaxpêr kêt pyræk o amnhî nhîpêx. ²³ Jakamã na htem amnhîm mẽmo karõ nhîpêx. Mẽmo htyk mã xwýnhjê hõ karõ nhîpêx. Tanhmãn panhî karõ rý mẽmo mry karõ rý mẽmo kuwênh karõ. Rý mẽmo kagã karõ nhîpêx. Hãmri nê ho õ sãnti nê te ri ho Tîrtûm nhîpêx pyræk o hipêx. Jao hpar pê hkôn krã ho rôrök nê amnhî to kuwý nê kãm amnhî jagrer pê kãm mex o mex ã harê. Tîrtûmja sãnti rom htír o htír tã nhùm mẽ axtem nê sãnti gryk ã hkaga nê ã amnhî nhîpêx o pa anê. ²⁴ Jakamã nhùm tee ri ã mẽ kot amnhî nhîpêx anhýr ã mẽ omu nê amnhî pyræk nê mẽ hkaga nê ãm mẽ omu. Jakamã nhùm mẽ ãm amnhî krã hkôt tanhmã ri amnhî tomnuj to ho pa. Nê axpên kãm ri tanhmã hpijaàm kêt to. ã na htem htýx ri amnhî tomnuj anhýr o pa.

²⁵ Tîrtûm kapêrja ãm hãmri htã nhùm mẽ axtem nê te amnhî pumrênh pyræk o hipêx nê kãm hamaxpêr kêt nê. Nê hpãnhã ri mẽ hêx xwýnhjê kapêr pix ma nhùm ja te mẽ kãm mex pyræk. Na htem ã amnhî nhîpêx anê hãmri nê axtem nê Tîrtûm kot mẽmoj nhîpêx pix parpê rôrök nê amnhîm mex o mex ã harê. Nom kot hipêx xwýnh Tîrtûm parpê mãn ã amnhî nhîpêx anhýr kêt nê. Nom kot mẽmoj nhîpêx xwýnhhta mex o mex jakamã koja mẽ kot hkôt amnhî nhîpêx xwýnhjaja jajê rom kãm mex o mex ã harênh tùm rãhã ho ri pa. ²⁶ No mẽ kot amnhî tomnuj xwýnhjaja na hte Tîrtûm amnhî pyræk nê mẽ hkaga nhùm mẽ htýx amnhî krã hkôt ri tanhmã amnhî tomnuj to ho ri pa. Jao mẽni hkwyjaja axtem nê axpên gryk ã mjên kaga nê axpên nhĩõ ho mjên. ²⁷ Nhùm mẽmy hkwyjaja mãânên axtem nê amnhî kwýjê my gryk ã hprõ kaga nê axpên nhĩõ ho hprõ. Na htem ã axpên kamã hpijaàm kêt o pa anê. Mýrapê koja mẽ à pix

kãm amnhĩ xà htỳx kamã hamak o pa. ²⁸ Na htem amnhĩ tomnuj gryk ã Tĩrtũm mã hamaxpěr kêt nhũm tee ri amnhĩ tã mẽ omu nê hamaxpěr o:

–Mẽ kãm amnhĩ tomnuj pix prãm jakamã kwār mẽ mãmri ã amnhĩ nhĩpêx anê. Kot paj axte ja nê tanhmã mẽ kãm ixkapěr to hkêt nê. Anê.

Jakamã nhũm mẽ arĩ htỳx ri amnhĩ krã hkôt tanhmã amnhĩ tomnuj to ho ri pa rãhã nê.

²⁹ Hãmri nê mẽmoj punuj pix mã hamaxpěr.

Nê kãm amnhĩ mex pix prãm mã hamaxpěr.

Nê kãm axpên tomnuj pix prãm.

Nê mẽmoj tã axpên kãm gryk pix prãm.

Nê mẽ kãm axpên par pix prãm.

Nê mẽmoj tã ri kãm axpên mã àkjêr prãm.

Nê mẽmoj tã kãm axpên mã hêx prãm.

Nê kãm axpên kaxyw tanhmã hamaxpěr punuj to pix prãm.

Nê kãm tanhmã axpên to kapěr punuj to pix prãm.

³⁰ Nê kãm mẽmoj tã axpên to hêx pix prãm.

Nê kãm Tĩrtũm prãm kêt o ri pa.

Nê mẽmoj tã axpên mã àkjêr o ri pa.

Nê mẽmoj tã amnhĩ to jarkrar rãhã ho ri pa.

Nê tanhmã amnhĩ tomnuj to pix kukamã hamaxpěr. Nhũm mẽ katorxà nê mẽ hipêêxà tee ri ja nê tanhmã mẽ kãm kapěr to no nhũm mẽ mar kêt kumrêx.

³¹ ã mẽ kot amnhĩ nhĩpêx anhỹr o ri mẽ pa xwỳnhjaja na hte Tĩrtũm kãm mẽmoj mex nhũm mẽ kêp omnuj nê nhũm Tĩrtũm kêp mẽmoj omnuj nhũm mẽ kãm mex nê. Nê axpên mã mẽmoj tanhmã ho hã amnhĩ jarênh tã ho anhỹr kêt nê. Nê axpên kãm ukapri ho ri pa hkêt nê. ³² Tĩrtũm kapěr ã kagà htũm kot tanhmã mẽ hkukamã mẽ harênh to nê mẽ harênh kot:

ã mẽ kot amnhĩ nhĩpêx anhỹr o ri mẽ pa xwỳnhjaja koja mẽ nhỹrmã ty hãmri nê amnhĩ xà htỳx

kamã hamak rãhã ho ri pa ho pa. Anê.

Nhũm mẽ kot amnhĩ tã ja mar tỳx tã aa amnhĩ tomnuj kaga hkêt nê. Arĩ ã amnhĩ nhĩpêx anhỹr o pa rãhã nê. Nhũm mẽ hkwyjaja mẽ kot amnhĩ tomnuj ã mẽ omu nê mẽ uràk nê ã amnhĩ nhĩpêx anhỹr o ri mẽ hkôt pa nhũm mẽ amnhĩ pyrã nê mẽ omu nê hkĩnh nê. Na htem ã amnhĩ nhĩpêx anhỹrja gryk ã Tĩrtũm kaga nhũm tee ri amnhĩ tã mẽ omu nê amnhĩ pyrã nê mẽ hkaga nê ãm mẽ omu. Jakamã nhũm mẽ amnhĩ tomnuj tỳx pix rãhã ho pa.

2

Mẽ kot amnhĩ tomnuj xwỳnhjê hkukamã mẽ harênh

Matêwre 7.1-5; Sikũn Tesarõn 1.6; Eprêw 9.27; Sikũn Pêtre 2.4, 3.7; Jutre 6-14; Apokarip 6.15, 20.11

¹ Nê kot ka mẽ atõ ã mẽ kot amnhĩ tomnuj anhỹr xwỳnhjê kot amnhĩ nhĩpêx ã mẽ harênh ma nê ã aja-maxpěr anê nê ajamaxpěr o:

–Tk. Mẽ kot amnhĩ tomnuj pix o ri pa xwỳnh kênã. No pa na ã ixte amnhĩ nhĩpêx anhỹr o ri ixpa hkêt. Mẽ kurom ixte tãm amnhĩ nhĩpêx o ri ixpa xwỳnh na pa.

Anhỹr o amnhĩ jarê. Kwa nà mẽ ã ajamaxpěr anhỹr kêt nê. Mẽ pajaxwỳja na pu htem tõhã mẽ uràk nê tanhmã amnhĩ tomnuj to. Tã ka mẽ ã mẽ kot amnhĩ tomnuj ã mẽ harênh anê nê te ka ate amnhĩ jarênh pyrãk.

² Tĩrtũm kapěr ã kagà htũm kot mẽ kot amnhĩ tomnuj o ri mẽ pa xwỳnhjê jarênh kot:

Mẽ kot amnhĩ tomnuj mỳrapê koja mẽ nhỹrmã amnhĩ xà htỳx kamã hamak rãhã ho ri pa. Anê.

ãm hãmri ã mẽ harênh kot anhỹr.

³ Mãn ka mẽ atõ tanhmã amnhĩ kukamã ajamaxpěr to nê ajamaxpěr o:

–Nà koja Tĩrtũm nhỹrmã amnhĩ nê kuwy hwỳr mẽ kot amnhĩ tomnuj xwỳnhjê rê. No pa koja hwỳr inhmênh kêt nê. Anê.

Kwa mẽ ã ajamaxpēr anhÿr kêt nê. Kot ka mẽ ã amnhĩ kukamã ajamaxpēr anhÿr tã tōhã mẽ uràk nê tanhmã amnhĩ tomnuj to. Jakamã koja Tirtũm mẽ uràk nê hã tanhmã mẽ ato. ⁴ Kot kaj mẽ atō tanhmã amnhĩ tomnuj to hãmri nê ãm ja hã amnhĩ pumu nê ajamaxpēr o:

–Ixte amnhĩ tomnuj xwÿnh tã na hte Tirtũm ja hã ixpumu nê ãm ixpumu nê hã tanhmã ixto hkêt nê. Kêp mẽ ixkamã ukapri xwÿnh jakamã na hte gryk tokyx anhÿr kêt nê. Jakamã kot paj arĩ tanhmã amnhĩ tomnuj to ho ri ixpa nê aa jam inhũrer kêt nê. Tirtũm kot ja hã tanhmã ixtore kaxyw hã.

Anhÿr o ajamaxpēr. No ãm ja kot anhÿr kêt. Na hte Tirtũm kormã amnhĩ tã mẽ pajamã. Mẽ pahte amnhĩ tomnuj kaga nê hpãnhã hkôt amnhĩ xunhwÿr kaxyw na hte kormã amnhĩ tã mẽ pajamã. Jakamã na kormã tanhmã ate amnhĩ tomnuj tota ã tanhmã ato hkêt nê.

⁵ Mẽ akrã hihtÿx jakamã mẽ amã hkôt amnhĩ xunhwÿr prãm kêt. Na ka htem tanhmã amnhĩ tomnuj to pix kukamã ajamaxpēr o ri apa. Nê gaa nê ra anhÿr kumrêx. Nhũm Tirtũm tee ri ja hã mẽ apumu nhũm ja kêp omnuj tÿx o mō. Jakamã koja nhÿrmã tanhmã mẽ ajarênh to nê gryk tÿx kãm tanhmã mẽ atomnuj tÿx to. ãm hãmri na hte mẽ pahte amnhĩ nhĩpêx ã mẽ pahpumunh xà hkôt ahpÿnhã tanhmã mẽ panhĩpêx to.

⁶ Koja nhÿrmã mẽ pahpiitã kormã mẽ pahtĩr ri mẽ pahte amnhĩ nhĩpêx ã mẽ pahpumunh xà hkôt tanhmã mẽ panhĩpêx to. Mẽ kot amnhĩ to mex o ri mẽ pa xwÿnhjaja nhũm mẽ ho mex nê. Nê mẽ kot amnhĩ tomnuj o ri mẽ pa xwÿnhjaja nhũm mẽ homnuj nê. Koja nhÿrmã mẽ pahpiitã mẽ pahto hpimràatã ã mẽ panhĩpêx anê. ⁷ Mẽ kot hkôt tãm ri amnhĩ nhĩpêx o pa pê kãm Tirtũm kot amnhĩm mẽ mex ã mẽ harênh prãm xwÿnhjaja koja nhÿrmã amnhĩm mẽ mex ã mẽ harê. Hãmri nhũm mẽ kuri htĩr tũm nê hkĩnh nê mex kumrêx nê pa ho

pa. ⁸ Nom mẽ kot amnhĩ mã pix mã ri hamaxpēr o ri mẽ pa xwÿnhjaja. Nê mẽ kot tanhmã amnhĩ tomnuj to gryk ã Tirtũm kapêr kaga xwÿnhjaja koja kãm mẽ hkĩnh kêt nê tanhmã mẽ homnuj tÿx to. ⁹ Mẽ kot amnhĩ tomnuj xwÿnh piitã koja mẽ nhÿrmã amnhĩ xà htÿx kamã hamak rãhã nê pa ho pa. Ijaew kumrêxjaja nê hpãnhã Ijaew kêt xwÿnhjaja nhũm mẽ amnhĩ xà htÿx kamã hamak rãhã nê pa ho pa. Mẽ kot amnhĩ tomnuj tÿx o paja mÿrapê.

¹⁰ No kêt tãm mẽ kot amnhĩ nhĩpêx xwÿnhjaja koja Tirtũm mẽ ho mex rax rãhã ho pa ho pa. Nê amnhĩm mẽ kot amnhĩ to mex xwÿnhjê hã mẽ harê. Nê tanhmã mẽ ho mex to nhũm mẽ kamã amnhĩ krit nê pa ho pa. Hamakêtkati nê hkĩnh nê àmnhĩx ri pa ho pa. Ijaew kwÿ kumrêxjaja nê mãânên Ijaew kêt xwÿnh kwÿjaja nhũm mẽ mex nê hamakêtkati nê hkĩnh nê àmnhĩx ri pa ho pa. ¹¹ Koja Tirtũm nhÿrmã ahpÿnhã mẽ pahte amnhĩ nhĩpêx ã mẽ pahpumunh xà hkôt tanhmã mẽ pajarênh to pê tanhmã mẽ panhĩpêx to. Mẽ ixpê Ijaewjaja nê mẽ apê Ijaew kêt xwÿnhjaja nhũm ã mẽ pahpiitã mẽ panhĩpêx anê.

¹² Amnepêm na pre finat Mojes mã tanhmã kapêr to nhũm kuma nê ô ri hã kagà hpa. Mẽ ixpê Ijaew ri na kapêr ã kagàja. Ra mẽ ixte mar tÿx jakamã koja mẽ ixtō ra kapêr mar tÿx tã hkôt amnhĩ nhĩpêx kêt hãmri nhũm Tirtũm tee ri amnhĩ tã omu nê ã amnhĩ nhĩpêx anhÿrja mÿrapê nhÿrmã ma mẽ kot amnhĩ xà htÿx kamã hamak tũm xàta wÿr kumê. Kot kapêr mar tÿx tã hkôt amnhĩ nhĩpêx kêt mÿrapê nhũm ã hipêx anê. No kêt mẽ apê Ijaew kêt xwÿnhjaja mẽ ixkĩnhã mẽ ari Tirtũm kapêr ã kagà hkêt jakamã koja mẽ ate kapêr nhĩrōp mẽ akuhê hã mẽ apumunh kôt tanhmã mẽ anhĩpêx to hkêt nê. Koja hpãnhã mẽ ate tanhmã amnhĩ tomnuj to ho apa mÿrapê mẽ kot amnhĩ xà htÿx kamã hamak o pa tũm xàta wÿr mẽ arê.

13 Na hte mẽ kot kapêr mar ã mẽ omunh xà hkôt amnhĩm mẽ kot amnhĩ to mex xwýnh ã mẽ harênh kêt nê. ãm mẽ kot kapêr kôt amnhĩ nhĩpêx ã mẽ omunh xà hkôt pix mã na hte amnhĩm mẽ kot amnhĩ to mex xwýnh ã mẽ harê. ¹⁴ No mẽ hkwýjaja kormã kot kapêr mar kêt tâ te ra mẽ kot mar mex pyræk o amnhĩ nhĩpêx. Jao amnhĩ krã hkôt tãm ri amnhĩ nhĩpêx kurê kumrêx. Te kot Ijaew pyrã nê Tĩrtũm kapêr mar tỳx nê hkôt amnhĩ nhĩpêx o ri pata pyræk. ¹⁵ Na htem amnhĩ krã hkôt tanhmã amnhĩ nhĩpêx mex to. Te Tĩrtũm kapêr kot mẽ hkrãm gjêx pyræk o amnhĩ nhĩpêx o pa. Jakamã tee ri tanhmã amnhĩ tomnuj to hã amnhĩ pumu nê hkaprĩ nê. Nê tãm amnhĩ nhĩpêx ã amnhĩ pumu nê hkĩnh nê.

¹⁶ Tã koja nhỹrmã Tĩrtũm Jejus Kris mã anê nhũm kuma hãmri nê mẽ piitã kormã mẽ htĩr ri tanhmã mẽ kot amnhĩ nhĩpêx to hã mẽ omunh xà hkôt tanhmã mẽ harênh to. Nê mẽ hamaxpêr kôt mẽ omunh mex xà hkôt tanhmã mẽ harênh to. Mẽ papajaja mẽ pahte axpên jamaxpêr kôt axpên pumunh kêt tâ Jejus kot mẽ pajamaxpêr kôt mẽ pahpumunh par.

Tã na pa hte mẽ kãm Jejus kot tanhmã amnhĩ nhĩpêx to hã harênh o ixpa pê ã mẽ kãm ixujarênh anhỹr o ri ixpa.

Pawre kot hkwýjê mã kapêr

Rômãn 3.19-20

¹⁷ Nê ixpyrà nê mẽ apê Ijaew kwýjaja na ka mẽ axtem nê Ijaew kêt xwýnhjê mã tanhmã amnhĩ to jarkrar o ri apa nê mẽ kãm:

—Nà mẽ ixpê Ijaew ri Tĩrtũm kapêr ã kagà jakamã ãm mẽ papxipixjaja na hte Tĩrtũm amnhĩm mẽ inhmex ã mẽ ijarê. Nê ãm mẽ papxipixjaja na hte mẽ ixto hkra. ¹⁸ Nê mẽ papxipixjaja na mẽ ixte Tĩrtũm kãm hprãm xà hkôt mẽmoj pumunh par nê mẽ kot amnhĩ to mex xà pumunh par nê mẽ kot amnhĩ tomnuj xà pumunh par. Mẽ apê Ijaew kêt xwýnhjê rom mẽ ixte mẽmoj piitã omunh par kumrêx. Anê.

¹⁹⁻²⁰ Nê amnhĩ jarênh o:

—Nà te mẽ ixpê mẽ nohkre xwýnhjê pa hã mẽ hamýnh nê ri mẽ ho ixpa xwýnh pyræk. Jakamã Ijaew kêt xwýnh pê htỳx ri mẽ pa xwýnhjaja na pa htem mẽ kãm Tĩrtũm kapêr tũm o mẽ ahkre mex o ri ixpa. Kormã mẽ kot hprĩ hã mar kêt jakamã na pa htem ho mẽ ahkre ho ri mẽ hkôt ixpa. Mẽ kurom mẽ ixte mar par kênã.

²¹ Anhỹr ã amnhĩ jarênh nê mẽ ate kapêr o mẽ ahkre ho apa htã hkôt amnhĩ nhĩpêx kêt nê.

Nê mẽ ate mẽ kot axpên pê àhkĩnh nê mẽ hkurê htã no ãm mẽ kamjaja axpên pê axàhkĩnh o ri apa.

²² Nê mẽ amã sãnti hkĩnh kêt ã amnhĩ jarênh tâ axtem nê hwýr agjê nê hpar pê kàxpore nhĩkwý xwýnh o axàhkĩnh o ri apa.

Nê mẽ kot axpên prõ ho amnhĩkati nê mẽ hkurê ho apa htã mẽ kamjaja ã ri amnhĩ nhĩpêx anhỹr o ri apa.

²³ Nê mẽ ate Tĩrtũm kapêr ã kagà mex o mex ã harênh tâ hkôt amnhĩ nhĩpêx hkêt nê. Jakamã nhũm mẽ akwýjaja ja hã mẽ apumu nê mẽ apyrã nê Tĩrtũm ã hpijaàm kêt o pa.

²⁴ Tĩrtũm kapêr ã kagà htũm kot tanhmã mẽ ate amnhĩ nhĩpêx ã mẽ ajarênh to nê mẽ ajarênh kot:

Mẽ kêp Ijaew kêt xwýnhjaja na htem Ijaew kot htỳx ri amnhĩ nhĩpêx o ri mẽ pa hã mẽ omu nê mẽ ý hã tanhmã Tĩrtũm o kapêr punuj to ho ri pa. Anê.

²⁵ Mẽ pahpê Ijaew na pu htem mẽ pahkrajaja mẽ hapôx kôt kormã mẽ hkryre ri pu htem mẽ kêp mẽmy kwryt kà jakà. Finat Mojes kot Tĩrtũm nhỹ hã mẽ panhĩgêjtê mã hã karõ xà hkôt na pu htem ã mẽ hipêx anê. Mẽ pahte Tĩrtũm mã mẽ pahkrajê nhõr ã amnhĩ to amnhĩrĩt kaxyw. Jakamã na pu htem arĩ Mojes kapêr kôt ã mẽ hipêx anê nhũm Tĩrtũm kãm ja mex nê. Nom kot pu mẽ kapêr kwým ri tanhmã amnhĩ nhĩpêx to ho papa nhũm ja kêp omnuj tỳx nê hãmri pu mẽ tee ri mẽ pahkrajê my kwryt kà jakàr kaprỳ. Na hte Tĩrtũm ã mẽ

pahkrajê nhîpêx anhÿr ã mẽ pahpumunh kôt amnhîm mẽ pamex ã mẽ pajarênh kêt nê. Nom mẽ pahte kapêr kôt amnhî nhîpêx mex o papa pè mẽmy kwryt kà jakàrja nhùm kãm mex nê. ²⁶ Ijaew kêt xwÿnhjaja kot ã mẽ hkrajê nhîpêx anhÿr kêt tã ra mẽ hkwyjaja Tirtùm kapêr ma nê hkôt amnhî nhîpêx o ri pa. Jao te mẽ kot amnhî my kwryt kà jakàr pyrak o amnhî nhîpêx. Jakamã nhùm Tirtùm ja hã mẽ omu nê mẽ kãm:

—Nà ãm hãmri. Mẽ ate amnhî my kwryt kà jakàr kêt tã mẽ apê ixkra na ka mẽ. Anê.

²⁷ Mẽ kot amnhî jakàr kêt tã Tirtùm kapêr kôt amnhî nhîpêx mex o ri pa nhùm amnhî tã mẽ omu nê mẽ arom amnhîm mẽ kot amnhî to mex xwÿnh ã mẽ harê. Mẽ kot amnhî jakàr kêt tã.

No mẽ kajaja mẽ ate Tirtùm nhÿ hã Mojes kapêr ã kagà mar tÿx tã hkôt amnhî nhîpêx kêt nê. Ja mÿrapê koja ja hã mẽ apumu nê Ijaew kêt xwÿnhjê kînhã mẽ ate amnhî tomnuj xwÿnh ã mẽ ajarê. Ra mẽ ate amnhî jakàr tã mẽ ate amnhî tomnuj xwÿnh ã mẽ ajarê.

²⁸ Nê kot ka mẽ atõ tanhmã amnhî to jarkrar to nê amnhî jarênh o:

—Nà ixpê Ijaew jakamã na hte Tirtùm mẽ kot inhmy kwryt kà krãhyr kôt ixto kraa. Anê.

Nom xà na hte Tirtùm ã mẽ pahte amnhî nhîpêx anhÿr ã mẽ pahpumunh kôt mẽ pahto hkra? Nà kot anhÿr kêt. Na htem ãm htÿx ã amnhî to jarkrar anhÿr kaprÿ ho pa.

²⁹ Nê Tirtùm Karõ kot mẽ hkarõ mã gjêx xwÿnhjaja kêp Tirtùm kra jakamã na htem Tirtùm kãm hprãm xà hkôt amnhî nhîpêx. Nom ri amnhî krã hkôt tanhmã amnhî nhîpêx to ho pa hkêt nê. Rÿ htÿx hamaxpêr o:

—Nà kot paj Mojes kapêr ã kagà hkôt amnhî nhîpêx nhùm Tirtùm ja hã ixpumu nê amnhîm inhmex ã ijarê nê ixto hkra.

Anhÿr o hamaxpêr kêt nê. Na htem hamaxpêr o:

—Nà ra Tirtùm Karõ kot ixkarõm àr jakamã ixpê hkra nhùm amnhîm

inhmex ã ijarê. Jakamã kot paj ãm kôt pix mã ri amnhî nhîpêx o ri ixpa rãhã ty. Kwãr mãmrî ixkwÿjaja amnhîm inhmex kêt ã ijarê. Anê.

Kêr ka mẽ ã ajamaxpêr anhÿr o ri pa. Æ mẽ hamaxpêr anhÿr na mex o mex.

3

¹ Nê mãn ka mẽ ra tee ri tanhmã amnhî kukamã ajamaxpêr to nê ajamaxpêr o:

—Kwa mo kaxyw na pa ixpê Ijaew? Mon pa pre we ixpê Ijaew kêtêre hkêt nê? Mẽ kêp Ijaew kêt xwÿnhjaja kot amnhî jakàr kêt tã nhùm Tirtùm mẽ pahpyrà nê mẽ ho hkra. Anê.

Kwa mẽ ã ri ajamaxpêr anhÿr kêt nê. ² Mẽ pahpê Ijaew na pre Tirtùm Ijaew kêt xwÿnhjê rom mẽ pahto mex rax nê. Na pre amnepê mã mẽ panhîgêt mã tanhmã kapêr to. Mẽ pahpiitã mẽ pahte mar nê hkôt amnhî nhîpêx kaxyw. Nom Ijaew kêt xwÿnhjê nhîgêt mã ã kapêr anhÿr kêt nê. Æ mẽ pahpê Ijaew nhîgêt pix mã kapêr. Jakamã mẽ pahpê Ijaew mã ja mex kumrêx. ³ Nom kot kaj mẽ atõ ja ma nê ajamaxpêr o:

—Nà Tirtùm kot mẽ ixto mex mã mẽ ixtã amnhî jarênh tã no nhùm xep mẽ inhîgêt kwÿjaja hkôt amnhî nhîpêx kêt nê. Na xep prem kapêr kwÿm ri amnhî tomnuj o pa. Jakamã ko. Koja Tirtùm mẽ ixpê mẽ hkanrêhã mẽ htãmnhwÿjaja tanhmã mẽ ixto mex to japêr ko. Anê.

⁴ Kwa mẽ ri ã ajamaxpêr anhÿr kêt nê. Tirtùm na hte mẽ pahpiitã mẽ pakuum mẽmoj tã amnhî jarênh o hêx kêt nê. Tã ra kot tanhmã mẽ pahpê amnhî jarênh to xà hkôt koja ã mẽ pahto mex anê. Kapêr ã kagà htùm kot mêmõ tanhmã Tirtùm mã kapêr to nê harênh kot:

Pa Tirtùm. Nà ãm kapxipix na ka hte mẽmoj tã amnhî jarênh xà hkôt amnhî nhîpêx o ri apa.

Jakamã na htem ãm axpên mã axêx ã akapêr ã ajarênh kaprÿ. Anhÿr o harê.

⁵ No kot ka mẽ atõ atÿx ajamaxpêr nê ajamaxpêr o:

—Xà koja Tirtûm tanhmã mẽ ixte amnhĩ tomnuj to hã mẽ ixpumu nê gryk? Nà koja gryk kêt nê. Jakamã kot paj arĩ amnhĩ tomnuj o ri ixpa. Kê mẽ piitã ja hã ixpumu nê ixrom Tirtûm tapxipix kot amnhĩ to mex o pa xwýnh ã harênh o pa. Nà ja mex. Jakamã kot paj arĩ amnhĩ tomnuj rãhã ho ri ixpa nhũm mẽ Tirtûm pix mã mãn kot tãm amnhĩ nhĩpêx xwýnh ã harê. Hãmri nhũm Tirtûm amnhĩ tã ixpumu nê tanhmã ixto hkêt nê. Kojã tanhmã ixto japêr hãmri nê ixpyrà nê amnhĩ tomnuj nê. Anê.

Kot kaj mẽ ã ajamaxpêr anê nê ãm amnhĩ krã hkôt ã ajamaxpêr anhÿr kaprÿ. Nom ã ajamaxpêr anhÿrja Tirtûm jamaxpêr kôt kêt. ⁶ Kwa mẽ ri ã ajamaxpêr punuj anhÿr kêt nê. Tirtûm kot mẽ pahpyrà nê aa kot amnhĩ tomnujre hã. Kop ãm mẽ pahpyrà nê tanhmã kot amnhĩ tomnuj to ronhÿx tanhmã kot we amnhĩ to nê mẽ pahte amnhĩ tomnuj xwýnh ã mẽ pajarê? Nhÿx mẽ pahpyrà nê ã amnhĩ jarênh anê. Nà ã mẽ ajamaxpêr anhÿrja mex kêt.

⁷⁻⁸ E pa ixprĩ hã mẽ amã ja jarê ka mẽ inhma. Kot kaj mẽ atõ amnhĩ kukamã ajamaxpêr o:

—E kot paj mãmrĩ ri mẽmoj tã ixêx o ri ixpa kê mẽ ixêx nhi hã ixpumu nê ixrom Tirtûm pix mã mãn kot amnhĩ to mex ã harê. Nê ãm pix mã mãn hêx kêt xwýnh ã harê. Hãmri nhũm Tirtûm amnhĩ tã ixpumu nê mẽ ã mẽ kot harênh anhÿrja ma nhũm ja kãm mex nê nhũm hkĩnh nê. Jakamã ixêx o ri ixpaja ã tanhmã ixto hkêt nê. Ra mẽ kot ixrom tãm kot amnhĩ nhĩpêx o pa xwýnh ã harênh jakamã nhũm ixêx nhita ã tanhmã ixto hkêt japêr. Jakamã kot paj ixte amnhĩ tomnuj o ri ixpaja mã inhũrer kêt nê. Kêr kê mẽ ja hã ixpumu nê ixrom Tirtûm tapxipix kot amnhĩ to mex xwýnh ã harê.

Anhÿr o ajamaxpêr nom mẽ ajamaxpêrja kot anhÿr kêt. Na hte akwÿjaja pa ixpê Pawre ixêx o ixpa hã ri axpên mã ijarê no na pa hte ixêx o ri ixpa hkêt nê. ã mẽ ajamaxpêr

anhÿr o ri apa xwýnhjaja koja Tirtûm mẽ atomnuj tÿx nê kãm ga.

Mẽ mẽ pahte amnhĩ tomnuj xwýnh ã mẽ pajarênh

Wam Korît 6.9; Karatas 3.22; Xitre 3.3

⁹ Tã tanhmã kot puj mẽ pahpê Ijaew amnhĩ jarênh to? Xà kot pu mẽ pahte amnhĩ to mex o Ijaew kêt xwýnhjê jakrenh ã amnhĩ jarê? Nà mẽ pahte ã amnhĩ nhĩpêx anhÿÿre hã. Mẽ pahpê Ijaew nê Ijaew kêt xwýnhjaja. Mẽ pahpiitã mẽ pahte amnhĩ tomnuj o axpên pyràk. Na pa pre ra mẽ amã ja jarê. ¹⁰ Tirtûm kapêr ã kagã htũm kot ja jarênh kot:

Mêhõ na we aa kot amnhĩ tomnuj kêt kumrêx nê pa?

¹¹ Nê mêhõ na we kot mẽmoj mex piitã omunh par?

Nê mêhõ na kãm Tirtûm prãm?

¹² Nà amrakati kumrêx. Na mẽ ra piitã hkaga hpa.

Nê kapêr kwÿm ri tanhmã amnhĩ tomnuj to ho pa.

ãm mêhõ pyxire nê amnhĩ to mex o ri pa hkêt kumrêx.

¹³ Na htem kapêr punuj pix o ri pa.

Jakamã Tirtûm noo mã mẽ kot amnhĩ nhĩpêxja te kot mẽmoj tyk nê hkro punuj pyràk.

Na htem ãm ri hêx pix kukamã ri hamaxpêr o pa. Tanhmã mẽ hêx to xàja te kêp kagã xoprê nhõ wenên xihtÿx pyràk.

¹⁴ Nê na htem mẽ piitã mẽmoj nhĩxi ho ri axpên mã mẽ hixi jarênh o pa. Nê ri tanhmã axpên japrÿ hto ho pa.

¹⁵ Nê tanhmã kapêr mã gêt kãm mẽ kãm kapêr to.

¹⁶ Nê tanhmã mẽ hkwyjê homnuj to. Jakamã nhũm mẽ piitã ri hkaprĩ nê mex kêt nê pa.

¹⁷ Nhũm htem ãm axpên mã mẽ gryk xà pix o kapêr o pa.

¹⁸ Nê Tirtûm ã hpijaàm kêt o pa. Na htem kapêr ma nê ãm kuma nê kãm hkĩnh kêt o pa.

ã na htem amnhĩ nhĩpêx anhÿr rãhã ho pa. Anê.

Ã Tirtũm kapêr ã kagà htũm kot mẽ pajarênh anhÿr. ¹⁹ Mẽ pahpê Ijaew ra mẽ pahte ja jarênh mar týx. Tirtũm kapêr ã kagà htũm kwý na. Na hte ã mẽ kot amnhĩ tomnuj xwýnhjê jarênh anê. Nẽ mãânên mẽ papajaja. Mẽ pahpê Ijaew na hte ã mẽ pajarênh anê. No ãm mẽ papapxipix hkêt. Krĩ piitã hkôt ri mẽ pa xwýnhjaja nhũm ã mẽ harênh kot anhÿr. Ijaew kêt xwýnhjaja nê mẽ pahpê Ijaew. Mẽ pahpiitã mẽ pahte amnhĩ tomnuj xwýnh jakamã mẽmo kaxyw kot pu mẽ pahte amnhĩ tomnuj kêt ã ri amnhĩ to jarkrar o papa? Kot puj mẽ ã amnhĩ jarênh anhÿr kaprý. Jakamã koja Tirtũm mẽ pahpiitã mẽ pahte amnhĩ tomnuj mÿrapê tanhmã mẽ panhĩpêx to. ²⁰ Mẽ pahtõ koja mẽ pahte kapêr kôt pix mã amnhĩ nhĩpêx o papa hã mẽ pajarê? Nẽ mẽ pahtõ mã koja mẽ pamã kapêr nê mẽ pamã:

–Nà na ka hte akatãt kôt ixkapêr kôt pix mã amnhĩ nhĩpêx mex nê. ãm hãmri na ka hte ã amnhĩ nhĩpêx anhÿr o apa.

Anhÿr o mẽ pahtõ mã kot we ã kapêr anê? Nà aa kot mẽ pahtõ mã kapêr anhÿr kêt. Na pu htem ãm kapêr ma nê tee ri amnhĩ kukamã pajamaxpêr. Mẽ pahte amnhĩ tomnuj ã amnhĩ pumunh kaxyw na pre mẽ pamã kapêr ã kagà htũmja gõ. Mẽ pahtõ mẽ pahte kapêr ã kagà hkôt amnhĩ nhĩpêx mex o papa hkêt kênã kot kêt ri amnhĩm mẽ pahte amnhĩ to mex xwýnh ã mẽ pajarê.

Tanhmã Tirtũm kot mẽ pahto hkra to hã harênh

Atre 17.30-31; Karatas 2.16-21; Piripos 3.7-9; Xitre 3.5; Xiakre 2.10

²¹ Nẽ na hte Tirtũm mẽ pahte kapêr kôt amnhĩ nhĩpêx ã mẽ pahpumunh kôt amnhĩm mẽ pahte amnhĩ to mex xwýnh ã mẽ pajarênh kêt nê. Jakamã mẽhõ kukwak ri koja we ã mẽ pajarênh anê? Nà nhãm mẽhõ kot tãm amnhĩ nhĩpêx rãhã ho pa hã omunh pix kukwak ri koja ã mẽ pajarênh anê. Tã mẽhõ kukwak ri kot ã mẽ pajarênh anhÿr xwýnhhta na pre ra mẽ pamã ho amnhĩrĩt. Amnepêm Tirtũm

kapêr ã kagà htũm kamã na pre mẽhõ hkukamã tanhmã harênh to. Nẽ Tirtũm nhÿ hã mẽ kapêr jarênh o pa xwýnhjaja haxwýja kukamã tanhmã harênh to ho pa. ²² Jejus Krisja na prem hkukamã harênh o pa. Tãm na pu htem hkôt amnhĩ xunhwý nê amnhĩ kaxyw kãm pajamaxpêr rãhã ho papa nhũm Tirtũm ja pix ã mẽ pahpumunh kôt amnhĩm mẽ pahte amnhĩ to mex xwýnh ã mẽ pajarê. Mẽ kot Jejus kôt amnhĩ xunhwýr xwýnh piitãã. Mẽ ixpê Ijaew nê mẽ apê Ijaew kêt xwýnhjaja. Mẽ pahpiitã mẽ pahte axpên pyrãk jakamã kot puj mẽ pahtõ Jejus kôt amnhĩ xãm nhũm Tirtũm Kra Jejus kot amnhĩ to mex pix o pa kukwak ri mẽ pahpumu nê amnhĩm pajarênh o:

–Nà ãm hãmri. Ra kot ixkra Jejus kôt amnhĩ xãm jakamã ra inhmã te Jejus kot amnhĩ nhĩpêx pyrã nê amnhĩ to mex o pa. Anê.

²³ No mẽ pahtõ na mẽ pahte Tirtũm mẽ Jejus wa urãk nê amnhĩ nhĩpêx mex rãhã ho ri papa? Nà amrakati kumrêx. Mẽ pahpiitã mẽ pahte amnhĩ tomnuj xwýnh kênã. ²⁴ Tã Tirtũm kot mẽmoj tã mẽ pakutã nojarêt rãhã jakamã na hte Jejus Kris kukwak ri amarĩ amnhĩm mẽ pahte amnhĩ to mex xwýnh ã mẽ pajarênh o pa. Mẽ pahte Jejus kôt amnhĩ xunhwýr xwýnh piitãã nhũm ã mẽ pajarênh anê. Ra Jejus kot htyk o mẽ pahte amnhĩ tomnuj piitã hpãnhã amnhĩrer par jakamã na hte Tirtũm Jejus kukwak ri amarĩ mẽ pahte amnhĩ to mex xwýnhjê hã mẽ pajarê. Te mẽ pahte amnhĩ tomnuj kêt kumrêx pyrãk mẽ pajarê. ²⁵⁻²⁶ Na pre mẽ pahwýr Jejus mẽ nhũm mẽ pahwýr wrý nê mẽ panê ty nê htyk o mẽ pahte amnhĩ tomnuj piitã hpãnhã amnhĩrer pa. Jakamã kot pu mẽ pahtõ amnhĩ kaxyw hkôt pajamaxpêr nhũm Tirtũm ja hã mẽ pahpumu nê Kra kukwak ri amnhĩ katut kôt mẽ pahte amnhĩ tomnuj piitã rênh pa. Jao te aa mẽ pahte amnhĩ tomnuj kêt kumrêx pyrãk ã mẽ pahpumu.

No kêt amnepê m kormã Jejus wrÿk nê mê panê htyk kêt ri mê pa xwÿnhjaja. Tanhmã na pre Tÿrtÿm mê kot hkôt amnhÿ xunhwÿr xwÿnhjê nhÿpêx to? Kormã Jejus mê panê htyk kêt ri mê pa xwÿnhjaja tanhmã na pre mê hipêx to? Nã na pre mê hkwyÿjaja amnhÿ kaxyw Tÿrtÿm kôt hamaxpêr nê hkôt amnhÿ xunhwÿ nhÿm amnhÿ tã mê omu nê amnhÿm mê harênh o:

—Nã ãm hãmri. Koja nhÿrmã Ixkra ma mê hwÿr wrÿ nê mê nê ty nê htyk o mê kot amnhÿ tomnuj pãnhã amnhÿrer pa. Jakamã koja mê tãmjaja amnhÿ tomnuj pãnhã amnhÿrer kêt nê. Anê.

Tã nhÿm Jejus tãm mê pahwÿr wrÿ nê mê pahpiitã mê panê ty. Jakamã nhÿm Tÿrtÿm ra mê pahte hkôt amnhÿ xunhwÿr xwÿnhjaja Kra kukwak ri amnhÿ katut kôt mê pahte amnhÿ tomnuj piitã rênh pa. No na hte amarÿ ã mê panhÿpêx anhÿr kêt nê. ãm Jejus tyk pix kukwak ri na hte ã mê panhÿpêx anê. ãm hãmri na hte ã mê panhÿpêx mex anê. Na hte tãm mê panhÿpêx rãhã ho pa. ²⁷ Jakamã kot puj mê ã pajamaxpêr anê nê pajamaxpêr o:

—Nã na pa hte amnhÿ to mex rãhã o ri ixpa. Amnhÿ to mex o mê piitã mê hakrenh pa.

Anhÿr o pajamaxpêr kêt nê. Koja mêhõ ã hamaxpêr anê nê ãm amnhÿ jarênh o hêx. Na hte Tÿrtÿm mê pahte amnhÿ to mex ã mê pahpumunh kôt amnhÿm mê pahte amnhÿ to mex xwÿnh ã mê pajarênh kêt nê. Mê pahte amnhÿ to mex rãhãre hã. Nom na pu htem amnhÿ kaxyw Jejus mã pajamaxpêr nê hkôt amnhÿ xunhwÿ nhÿm ja hã mê pahpumu nê rÿ kormã amnhÿm mê pamex ã mê pajarê.

²⁸ E pa axte tanhmã mê amã ja jarênh to ka mê aprÿ hã inhma. Mêmoj pumunh kôt na hte Tÿrtÿm mê pahte amnhÿ to mex xwÿnh ã mê pajarênh wehe? Xã mê pahte kapêr tÿm kôt amnhÿ nhÿpêx o ri papa hã mê pahpumunh kôt? Nã na hte ja hã mê pahpumunh kôt ã mê pajarênh anhÿr kêt nê. Mê pahte hkôt amnhÿ nhÿpêx

rãhã ho papare hã. ãm mê pahte amnhÿ kaxyw Kra Jejus kôt pajamaxpêr nê hkôt amnhÿ xunhwÿr ã mê pahpumunh kôt pix mã na hte mê pahte amnhÿ to mex xwÿnh ã mê pajarê. Ja pix ã mê pahpumunh kôt na hte ã mê pajarênh anê.

²⁹ Nê xã Tÿrtÿm kêp mê ixpê Ijaew pix nhõ Tÿrtÿm pix na? Nã kêp mê ixpix nhõ Tÿrtÿm kêt. Kêp mê ixpê Ijaew nhõ Tÿrtÿm nê mãânênh kêp mê apê Ijaew kêt xwÿnhjê nhõ Tÿrtÿm.

³⁰ Nê Tÿrtÿm ãm pyxi mex. Axtem hõ kêt. Na hte mê pahpiitã mê panhÿpêx o axpên pyrãk. Jakamã na hte mê kot amnhÿ kaxyw Jejus kôt hamaxpêr o mê pa xwÿnhjê pumu nê mê kot amnhÿ to mex xwÿnh ã mê harê. Mê ixpê Ijaew nê mãânênh mê apê Ijaew kêt xwÿnhjaja.

³¹ Tã koja mêhõ htÿx hamaxpêr o:

—Nã ixte amnhÿ kaxyw Jejus kôt ijamaxpêr mex o ixpa nhÿm Tÿrtÿm kot amnhÿm inhmex ã ijarênh jakamã kot paj axte kapêr kôt amnhÿ nhÿpêx kêt nê. Kot paj ãm amnhÿ krã hkôt amnhÿ nhÿpêx o ri ixpa. Ra Tÿrtÿm kot ixto hkra kênã.

Anhÿr o ajamaxpêr japêr. Kwa mê ã ri ajamaxpêr anhÿr kêt nê. Na htem amnhÿ kaxyw Jejus kôt hamaxpêr hãmri nê kãm hkôt amnhÿ nhÿpêx prãm rãhã nê pa ho pa.

4

Apraãw kot amnhÿ kaxyw Tÿrtÿm kôt hamaxpêr

Karatas 3.6-18; Xiakre 2.23

¹ Nê mê panhÿgêt finat Apraãwja kêp mê pahpê Ijaew pãr krax. Tã mêmoj tã na pre Tÿrtÿm omu nê kot amnhÿ to mex xwÿnh ã harê? ² Xã kot kãm tanhmã amnhÿ nhÿpêx to hã karõ xã hkôt amnhÿ nhÿpêx mex ã omunh xã hkôt nhÿm pre ã harênh anê? Nã ja kôt kêt. Kop apu ja kôt ã kot harênh anhÿr ronhÿx Apraãw amnhÿ tã omu nê Tÿrtÿm mã amnhÿ to jarkrar nê kãm:

—Pa Tÿrtÿm? E mãn ka ixpumu. Na pa hte akapêr kôt amnhÿ nhÿpêx mex o ri ixpa.

Anh̄yr o nh̄yx pre kām amnh̄i to jarkrar. No na pre tanhmā kām amnh̄i to jarkrar to hkêt nē. ³ Tā mēmoj tā omunh xà hkôt na pre Tirtūm amnh̄im mex ā harē? Nà Tirtūm kapēr ā kagà htūm kot tanhmā Apraāw jarēnh to kot:

Na pre Apraāw amnh̄i kaxyw Tirtūm kôt hamaxpēr nē hkôt amnh̄i xām nh̄um amnh̄i tā omu nē amnh̄im mex ā harē. Anē.

⁴ Mē ō patrāwjaja na htem kām mē àpēnh xw̄ynhjaja àpēnh mex ā mē omunh xà hkôt mē kām amnh̄ire. ⁵ No Tirtūm na hte ā mē panh̄ipēx anh̄yr kêt nē. Na hte mē pahte tām amnh̄i nh̄ipēx ā mē pahpumunh kôt amnh̄im mē pahte amnh̄i to mex xw̄ynh ā mē pajarēnh kêt nē. Ām mē pahte amnh̄i kaxyw Kra Jejus kôt pajamaxpēr nē hkôt amnh̄i xunhw̄yr ā mē pahpumunh kôt pix mā na hte amnh̄im ā mē pajarēnh anē. Ra mē pahte amnh̄i tomnuj o ri papa htā hpānhā amnh̄i kaxyw Jejus kôt pajamaxpēr xw̄ynh pixjaja na hte ā mē pajarēnh anē.

⁶ Jakamā na hte mē pamā amnh̄i jarēnh o:

–Ixte mē amex ā mē ajarēnh tā no ām mē ate amnh̄i to mex kôt mē apumunh kôt na pa ā mē ajarēnh anh̄yr kêt nē. Ām mē ate amnh̄i kaxyw Ixkra mē wa ixkôt ajamaxpēr nē wa ixkôt amnh̄i xunhw̄yr ā mē apumunh kôt na pa hte ā mē ajarēnh anē. Anē.

Pu mē ā kot pamā kapēr anh̄yr ā amnh̄i tā kuma nē pahk̄inh nē. Pahi finat Tawi na pre haxw̄yja ja jarēnh o:

⁷ Na hte Tirtūm amnh̄i katut kôt mē pahte amnh̄i tomnuj piitā rēnh pa nē axte kām hamaxpēr kêt nē.

Jakamā pu mē ja hā amnh̄i pumu nē pahk̄inh nē.

⁸ Nē amnh̄i kukamā pajamaxpēr o: “Hēxta waa nē. Na pa pre amnh̄i tomnuj o ixpa nē tee ri ja hā amnh̄i pumu nē ixkapri nē.

Hāmri nē amnh̄i to Tirtūm w̄y nh̄um inh̄ma nē ixte amnh̄i tomnuj o hapēx pa nē axte kām hamaxpēr kêt nē.

Nà ām hāmri. Ja mex kumrēx.” Anē.

⁹ Tā mē kot ja hā amnh̄i pumunh nē hk̄inh xw̄ynhjaja mēmojaja na mē? Xà mē kot amnh̄i my kw̄rýt kà jakār xw̄ynh pix kw̄yjaja na pre pahi Tawija ā mē harēnh anē nà? Nà mē tapxipixjaja kêt. Māānēn mē kot amnh̄i jakār kêt xw̄ynh kw̄yjaja. Tanhmā na pre ra Tirtūm kapēr ā kagà htūm kot finat Apraāw jarēnh to? Na pre harēnh o:

Na pre Apraāw amnh̄i kaxyw Tirtūm kôt hamaxpēr nē hkôt amnh̄i xām nh̄um amnh̄i tā omu nē amnh̄im mex ā harē. Anē.

¹⁰ Xà Apraāw ra kot amnh̄i my kw̄rýt kà krāhyr nh̄rô pē na pre Tirtūm amnh̄im mex ā harē? Nà kormā kot amnh̄i krāhyr kêt ri na pre ā harēnh anē. ¹¹ Kormā kot amnh̄i krāhyr kêt ri kām kapēr nē kām:

–E ate amnh̄i kaxyw inh̄mā ajamaxpēr nē ixkôt amnh̄i xām ā ixte apumunh kôt na pa amnh̄im amex ā ajarē.

Anh̄yr o kām kapēr hāmri nē rī kormā kām tanhmā amnh̄i krāhyr to hā kām karō nh̄um kuma nē mar xà hkôt amnh̄i my kw̄rýt kà hk̄w̄y krāhta. Kot Tirtūm mā amnh̄i nh̄or ā amnh̄i to amnh̄irīt kaxyw ā amnh̄i nh̄ipēx anē.

Nom kormā amnh̄i krāhyr kêt ri na pre Tirtūm amnh̄im mex ā harē. Tā Ijaew kêt xw̄ynhjaja kot amnh̄i jakār kêt tā mē hk̄w̄yjaja Apraāw pyrā nē amnh̄i kaxyw Tirtūm mā hamaxpēr nē kām amnh̄i nh̄or jakamā Apraāw te kēp mē hpār krax maati pyrāk. ¹² Nē māānēn mē pahpē Ijaew. Kot puj mē pahtō amnh̄i kaxyw Tirtūm kôt pajamaxpēr nh̄um amnh̄i tā mē pahpumu nē mē pamex ā mē pajarē. No ām mē pahte amnh̄i jakār ā mē pahpumunh kôt ā mē pajarēnh anh̄yr kêt nē. Ām Apraāw pyrā nē amnh̄i kaxyw Tirtūm kôt pajamaxpēr pix ā mē pahpumunh kôt na hte mē pamex ā mē pajarē. Kormā Apraāw kot amnh̄i my kw̄rýt kà

krâhyr kêt ri ra kot amnhî kaxyw Tîrtûm mã hamaxpêr jakamã kêp mẽ pahpê Ijaew mẽ pahte uràk nê amnhî kaxyw Tîrtûm mã pajamaxpêr xwýnhjê hpàr krax maati. Ijaew kêt xwýnhjê pyrà nê kêp mẽ pahpàr krax maati.

Tîrtûm kot Apraãw mã mẽmoj mex jarênh

Karatas 3.22

¹³ Amnepêm na pre Tîrtûm Apraãw mã tanhmã kapêr to nê kãm:

—E koja nhÿrmã akanrêhã akra nê atàmnhwýjaja amÿrpê apyrà nê krî piitã hkôt mẽ kêp mẽ ô pahi. Anê.

Tã tanhmã Apraãw kot amnhî nhîpêx to hã omunh xà hkôt na pre ã kãm kapêr anê? Xà kot kãm tanhmã amnhî nhîpêx to hã karõ nhùm kot hkôt amnhî nhîpêx mex ã omunh xà hkôt na pre hkînh nê ã kãm kapêr anê? Nà kot anhÿr kêt. Mẽ pahtõ kot pu we Tîrtûm kapêr xà hkôt pix mã amnhî nhîpêx mex rãhã ho ri papa? Mẽ pahpê hihtÿx kênã. ãm kot amnhî kaxyw Tîrtûm kôt hamaxpêr nhùm kot amnhî tã omunh nê amnhîm mex ã harênh kôt pix mã na pre ã kãm kapêr anê. ¹⁴ Kop apu kot kãm tanhmã kapêr to nê kãm:

—E Apraãw. Kot kaj ixkapêr piitã ama nê hkôt amnhî nhîpêx mex rãhã ho ri apa. Hã koja nhÿrmã akanrêhã akra nê atàmnhwýjaja kêp krî piitã hkôt mẽõ pahihti.

Anhÿr o kãm kapêr ronhÿx ãm kãm ã kapêr anhÿr kaprÿ. Apraãw aa kot kapêr piitã hkôt amnhî nhîpêx mex o pare hã. Kop apu ã kãm kapêr anhÿr ronhÿx pre kuma nê tee ri amnhî kukamã hamaxpêr nê hamaxpêr o:

—Kwa nà. Ra ixte Tîrtûm kôt amnhî xãm tã tanhmã kot pa amnhî to nê kapêr piitã hkôt amnhî nhîpêx mex rãhã ho ri ixpa? Kot paj tee ri inhmã ã amnhî nhîpêx anhÿr o ixpa hprãm kaprÿ. Jakamã koja nhÿrmã ixkanrêhã ixkra nê ixtàmnhwýjaja kêp mẽ ô pahi hkêt nê pa. Hêxta waa nê. ¹⁵ Koja Tîrtûm ixte kapêr kwÿm ri tanhmã ixte amnhî tomnuj to hã ixpumu nê tanhmã ixtomnuj to. No

mêhõ kot we kapêr piitã hkôt amnhî nhîpêx mex rãhã ho pa? Nà amrakati kumrêx.

Anhÿr o nhÿx pre hamaxpêr. ¹⁶ No na pre Tîrtûm ã kãm kapêr anhÿr kêt nê. Ra kot hprî hã mẽ pahte amnhî nhîpêx ã mẽ pahpumunh mex kênã. Na pre ãm kãm:

—E ate amnhî kaxyw ixkôt ajamaxpêr nê ixkôt amnhî xãm jakamã kot paj amarî ato mex nê. Anê.

Tîrtûm na hte mẽmoj tã amnhî jarênh o amnhî to hêx kêt nê. Na hte mẽmoj tã amnhî jarênh xà hkôt tanhmã mẽmoj nhîpêx to ho ri pa. Jakamã koja mẽ pahte Apraãw pyrà nê amnhî kaxyw hkôt pajamaxpêr xwýnh piitã mẽ pahto mex nê.

Nê xà na pre ã mẽ pamã kapêr anê nê mẽ pamã:

—E kot kaj mẽ ixkapêr kôt pix mã ri amnhî nhîpêx o ri apa hã kot paj mẽ ato mex rax nê.

Anhÿr o mẽ pamã kapêr? Nà na pre ã mẽ pamã kapêr anhÿr kêt nê. Na pre mẽ pamã:

—Kot kaj mẽ finat Apraãw pyrà nê amnhî kaxyw ixkôt ajamaxpêr nê ixkôt amnhî xunhwý hã kot paj mẽ ato mex nê.

Anhÿr o mẽ pamã kapêr. Tã Apraãw kumrêx kot mẽ pakukamã amnhî kaxyw hkôt hamaxpêr jakamã te kêp mẽ pahpiitã mẽ pahte uràk nê ã amnhî nhîpêx anhÿr xwýnhjê pàr krax maati pyràk.

¹⁷ Amnepêm na pre Tîrtûm tanhmã Apraãw mã kapêr to. Kot tanhmã kãm kapêr toja Tîrtûm kapêr ã kagà htùm kamã na. Na pre kãm:

Kot kaj apê ahpÿnhã ri mẽ urojê hpàr krax. Anê.

Kormã Apraãw kra hkêt tã nhùm hkra hkukamã ã kãm kapêr anê. Hãmri nhùm kuma nê hkôt hamaxpêr kurê kumrêx nê hamaxpêr o:

—Hêxta waa nê. Ra ixprõ mẽ wa ijamê wa ixpigêt tÿx nê wa ixkra hkêt kumrêx. Kot paj wa tanhmã amnhî to nê tokyx ty. Tã ra Tîrtûm kot ixkra nê ixtàmnhwýjê hkukamã ã inhmã mẽ harênh anhÿr kênã. Jakamã kot pa

xep wa ixpigêt tỳx tã tanhmã amnhĩ to nê ixkra. Nà kot pa xep wa anê. Nê koja ixkraja tanhmã amnhĩ to nê ixpê htyk japêr tã koja Tirtũm akupỹm inhmã ho htĩr. Nà koja inhmã ho anê. Ra kot inhmã ixkra nê ixkanrêhã ixtãmnhwỳ xohtô jarênh kênã. Anê.

¹⁸⁻¹⁹ Na pre ra hpigêt tỳx nê. Ra hã amgrã pê 100 nê hkurê kêt nê pa. Nhũm hprô mãânên hpigêx tỳx nê. Nê ôhy kamã hkra hkêt kumrêx. Kormã wa hkra hkêt tã nhũm Tirtũm Apraãw mã hkra nê htãmnhwỳ xohtô hã harê. Nê kêp mē urojê xohtôjê pãr krax ã kãm harê. Hãmri nhũm kuma nê amnhĩ kaxyw hkôt hamaxpêr tỳx kurê kumrêx. ²⁰ Nê ã amnhĩ nhĩpêx anhỹr rãhã ho pa. Na pre war amnhĩ kra hã amnhĩ jarênh ma nê tee ri amnhĩ kukamã hamaxpêr kêt nê. ãm Tirtũm tãm kot wa kãm wa hkra jarênh pix mã hamaxpêr pê amnhĩ kaxyw kãm hamaxpêr tỳx o ri wa pa. Nê hamaxpêr o:

—Nà ra wa ixpigêt tỳx kumrêx tã koja xep Tirtũm wa inhmã wa ixkra hõ gõ. Nà koja wa inhmã kugõ. Hêxta waa nê. ãm hãmri Tirtũmja mex o mex. ²¹ Nà kot wa inhmã wa ixkra jarênh xà hkôt koja wa inhmã kugõ. Ja kaxyw àhpumunh o àhpumunh. Tirtũmja hêx kêt. Anê.

²² Hãmri nhũm Tirtũm ã hamaxpêr anhỹr ã omu nê amnhĩm mex ã harê. Nê kot kãm amnhĩ jarênh xà hkôt wa kãm wa hkraja gõ.

²³ Nom na pre amnhĩm Apraãwja pix mex ã harênh kêt nê. ²⁴ Kot puj mē pahtõ uràk nê amnhĩ kaxyw hkôt pajamaxpêr nhũm amnhĩ tã mē pahpumu nê ra kot Apraãw jarênhta pyrã nê amnhĩm mē pamex ã mē pajarê. Na pre mē panhõ Pahihti Jejus ty nhũm Tirtũm akupỹm ho htĩr. Tã mē papajaja na pu prem amnhĩ kaxyw Jejus kôt pajamaxpêr nhũm Tirtũm ja hã mē pahpumunh kôt mē pahte amnhĩ to mex xwỳnh ã mē pajarê. ²⁵ Na pre mē pahwỳr Kra Jejus mē nhũm mē pahwỳr wrỳ. Tã nhũm mē axtem nê kupĩ nom nhũm amarĩ htyk kêt nê. Na pre htyk o mē

pahte amnhĩ tomnuj pãnhã amnhĩrer pa. Ja kaxyw na pre Tirtũm mē pahwỳr kumê. Jakamã nhũm prem kupĩ nhũm akupỹm ho htĩr. Tã mēmo kaxyw na pre Tirtũm ã mē pahwỳr Kraja mēnh nhũm mē panê htyk anê nhũm akupỹm ho htĩr? ãm kot kukwak ri amnhĩm mē pahte amnhĩ kaxyw hkôt pajamaxpêr xwỳnhjaja mē pahte amnhĩ to mex xwỳnh ã mē pajarênh pix kaxyw.

5

Tirtũm kot mē pahto hkwy hã harênh

Matêwre 5.12; Sikũn Korĩt 4.8, 5.18-21; Xiakre 1.2-4; Wam Pêtre 4.12, 5.9

¹ Nê na pu prem amnhĩ tomnuj o ri papa nhũm Tirtũm ja hã mē pahpumu nhũm ja kêp omnuj nê. Jakamã nhũm Jejus amnhĩ grõnh kôt wrỳ nê mē panê ty. Nhũm Tirtũm htykja kukwak ri mē pahto hkwy. Mē pahte amnhĩ kaxyw hkôt pajamaxpêr nê hkôt amnhĩ xunhwỳr ã mē pahpumu hãmri nê ã mē panhĩpêx anê pu mē ra pahpê hkwy hã papa. ² Na pre Jejus Tirtũm mã mē pajarênh o:

—E jajê pumu. Na mē ra amnhĩ kaxyw pamã hamaxpêr nê pahkôt amnhĩ xunhwỳ. Anê.

Hãmri nhũm kuma nê mē pahto mex nê mē pakutã nojarêt rãhã ho pa. Tã kot puj mē pahpê hkrajaja nhỹrmã panõ ho Tirtũm mex o mex xwỳnhja pumu. Jakamã na pu htem amnhĩ kukamã ã pajamaxpêr anhỹr o pahkĩnh nê papa nê pajamaxpêr o:

—Hêxta waa nê. Kot paj nhỹrmã inhno ho Tirtũm mex o mex ã omu nê kuri ixpa ho ixpa. Nà ãm hãmri. Inhmã omunh prãm tỳx kumrêx. Anê.

³⁻⁴ Nê na htem Jejus ã mē pah-tomnuj nê pu mē pahpunuj nê ri papa. Pamex kêt nê tã tee ri amnhĩ kukamã pajamaxpêr o ri pahkaprĩ nê papa hkêt nê. Kwãr mē mãmrĩ ã mē panhĩpêx anê. Pu mē pahpunuj kurê Jejus kôt amnhĩ xunhwỳr tỳx o kormã mõ. Nê mē umaj hkaga hkêt nê. Arĩ amnhĩ wỳr kamã pajamak o papa. Jao amnhĩ kaxyw kumã pix mã kãm

pajamaxpêr tÿx rãhã pahkĩnh nê ri papa.

Kot puj mẽ ã amnhĩ nhĩpêx anhÿr o ri papa nhũm Tĩrtũm ja hã mẽ pahpumu nhũm ja kãm mex nê. Hãmri nhũm ja kaxyw tanhmã mẽ pahto paxihtÿx to pu mẽ pahpunuj tã hkôt pajamaxpêr tÿx rãhã nê.

⁵ Nê ra mẽ kot Jejus ã tanhmã mẽ panhĩpêx to htã pu mẽ amnhĩ kaxyw tee ri kãm pajamaxpêr kaprÿ hkêt nê. Ra kot mẽ pamã amnhĩ Karõ nhõr nhũm kot mẽ pahkarõ mã gjêx kênã kot pu kêt mẽ ri tee ri amnhĩ kaxyw kãm pajamaxpêr kaprÿ. Na hte Karõja mẽ pahkarõ kamã mẽ pamã Tĩrtũm kapêr jarênh o amnhĩrit nê kãm mẽ pajapê htÿx ã harênh o amnhĩrit rãhã nê.

⁶ Amnepê mã na pre mẽ piitã amnhĩ tomnuj o ri pa nê tee ri kãm amnhĩ to mex rãhã hprãm kaprÿ. Mẽhõ kot we ja kaxyw tanhmã mẽ hkrã hto? Jakamã nhũm Tĩrtũm ja hã mẽ omu hãmri nê mẽ kaxyw Kra Jejus mã kãm:

—E inhma. Ka kot kaj mẽ kot tanhmã amnhĩ tomnuj to ho paja ã ma mẽ hwÿr wrÿ. Ixte mẽ nê atyk kaxyw agrõnh kôt mẽ hwÿr amênh jakamã kot kaj wrÿ nê mẽ kãm ixkapêr jarênh o ri mẽ hkôt apa. Rãhã nhũm mẽ hkwyjaja apĩ ka mẽ piitã mẽ nê ty. Anê.

Hãmri nhũm kuma nê kãm:

—Tõe. Nà kot paj amã hprãm xà hkôt ã amnhĩ nhĩpêx anê. Anê.

Hãmri nê man amnhĩ grõnh kôt mẽ pahwÿr wrÿ. ⁷⁻⁸ Xà koja mẽhõ kãm axpên japê xàj axpên nê ty nà? Xà kot mẽhõ tãm kot amnhĩ nhĩpêx xwÿnh tã nhũm mẽ kot hpĩr kaxyw nhũm hkrãmnhwÿja kãm hapê nê. Nê nê amnhĩ grõnh kôt mẽ kãm xa nhũm mẽ kupĩ nhũm nê ty? Nà kot apu nê htyk japêr ko. No mẽ papajaja. Na pu htem mẽhõ hkrãmnhwÿta kĩnhã arĩ amnhĩ tomnuj rãhã ho ri papa htã nhũm Tĩrtũmja arĩ kãm mẽ pajapê nê. Nê kãm mẽ pajapê xàj mẽ pahwÿr Kris mẽ nhũm mẽ panê ty. Arĩ mẽ pahte amnhĩ tomnuj rãhã ho papa tãã. Na

pre ã Tĩrtũmja kãm mẽ pajapê hã ã mẽ pahwÿr mênh anê. ⁹ Na pre ty nhũm hkamrõ hkwy axkapĩ nhũm Tĩrtũm ja hã omunh xà hkôt tãm amnhĩm mẽ paxunhwÿ. Tã Jejus kukwak ri koja ma mẽ kot amnhĩ xà htÿx kamã hamak tũm xàta wÿr mẽ parênh kêt nê. Mẽ pahpê hkwy kênã kot kêt hwÿr mẽ parê.

¹⁰ Nom kormã mẽ pahpê hkwy hkêt ri na pu prem te ra kutã amnhĩ xunhwÿr pyrãk o amnhĩ nhĩpêx. Tã nhũm Kra mẽ panê ty pu mẽ hkôt amnhĩ xunhwÿ. Jakamã nhũm Tĩrtũm Jejus tyk kukwak ri mẽ pahto hkwy. Nê ra akupÿm Kra ho htĩr jakamã kot puj mẽ pahte hkôt amnhĩ xunhwÿr xwÿnhjaja nhÿrmã wa urãk nê wa kuri pahĩr tũm nê pamex kumrêx nê papa ho papa.

¹¹ Nê mẽ pahpê kuwy rax wÿr mẽ papa mã xwÿnh kêt jakamã na pu htem pahkĩnh nê pajamakêtkati nê ri papa. Nom ja pix ã na pu htem ã amnhĩ nhĩpêx anhÿr kêt nê. Mẽ pahpê Tĩrtũm krãmnhwÿ jakamã na pu htem mããnen pahkĩnh nê ri papa. Pahihti Jejus Kris kot mẽ panê htyk ã omunh xà hkôt na pre Tĩrtũm mẽ pahte hkôt amnhĩ xunhwÿr xwÿnhjê ho hkwy jakamã na pu htem pahkĩnh nê pajamakêtkati nê ri papa.

*Atãw mẽ Kris wa harênh
Wam Korit 15.20-22, 45-49*

¹²⁻¹³ Nê amnepêm na pre Tĩrtũm finat Mojes mã tanhmã kapêr to. Hãmri nhũm kuma nê Ijaew kot tanhmã amnhĩ nhĩpêx to ho pa kaxyw mẽ kãm mẽmojta ã karõ nê mẽ kãm hã hkagã. Mẽ kot kamã harênh nê mar nê Tĩrtũm kôt amnhĩ nhĩpêx kaxyw. Hãmri nhũm mẽ tee ri ã kot mẽ kãm mẽmoj tã karõja ma nê tanhmã axpên mã kapêr to nê axpên mã:

—Kwa na pu htem ã amnhĩ nhĩpêx anhÿr kêt nê. Na pu htem ãm amnhĩ tomnuj tÿx kumrêx o ri papa nê amnhĩ to mex kêt kumrêx. Anê.

ãm hãmri na prem ã amnhĩ jarênh anê. Mẽ pahpiitã mẽ pahte amnhĩ tomnuj xwÿnh kênã. My kot wa pê finat Atãwja kumrêx na pre tanhmã

mê pahte amnhî tomnuj to ho hkra. Mÿrapê na pre htîr tûm nê ri pa ho pa hkêt nê. Na pre ri pa nê gaa nê rî hpigêt tÿx nê ty. Tã mÿr pê ri mê papa xwÿnhjaja na pu htem uràk nê tanhmã amnhî tomnuj to ho ri papa. Mÿrapê na pu htem ri papa nê gaa nê Atãw pyrã nê pahtyk pa. Tirtûm kot mê pahtã Atãw mã kapêr xã hkôt. ¹⁴⁻¹⁹ Jakamã na prem kormã Mojes kator xwÿj ri pika piitã hkôt ri pa nê gaa nê haxwÿja htyk pa. Mê kot amnhî tomnuj mÿrapê ty. Atãw pyrã nê Tirtûm kot mêmò xò nê hkurê xwÿnhhta krêr kêt tã uràk nê tanhmã amnhî tomnuj to ho ri pa. Hãmri nê mÿrapê ty.

Na pre ã Atãwja mê pahpiitã mê pamã Tirtûm kapêr nhîrôp ãm nê amnhî tomnuj o hkra anê nê mêmò xòta krê. Jao te mê pahpiitã mê pahte uràk nê kumê hkur pyrãk o mê panhîpêx. Mÿrapê nhûm htem arî pika piitã hkôt hapôj nê kormã hprîre htã ra Atãw pyrã nê tanhmã amnhî tomnuj to ho ri pa. Jakamã nhûm Tirtûm Atãw kot tanhmã amnhî tomnuj to hã omunh xã hkôt mê pakukamã hamaxpêr o:

—Nà koja mê Atãw pyrã nê amnhî tomnuj o ri pa. Mÿrapê kot paj ma mê kot amnhî xã htÿx kamã hamak tûm xãta wÿr mê rênh pa. Anê.

Tã Jejus Kris mê Atãw wa harênhja kot axpên pyrãk jakamã na hte Atãw kanrêhã hkra nê htãmnhwÿjaja Atãw kot amnhî nhîpêx kôt amnhî nhîpêx o ri pa rãhã nê. Uràk nê amnhî tomnuj rãhã ho ri pa. Nhûm axtem Jejus kôt mê kot amnhî xunhwÿr xwÿnhjaja Jejus kôt amnhî nhîpêx rãhã ho ri pa. Te mê kêp hkanrêhã hkra nê htãmnhwÿjê pyrã nê uràk nê tãm amnhî nhîpêx. Na htem ã ahpÿnhã amnhî nhîpêx anhÿr o ri pa. Na pre Jejus mê pahte amnhî tomnuj pãnhã amnhîrer par kaxyw mê panê ty. Jakamã mê pahte hkôt amnhî xunhwÿr xwÿnhjaja na hte Tirtûm ja hã mê pahpumunh kôt mê pahto hkra. Kot puj mê nhÿrmã pahtyk tã nhûm

akupÿm mê pahto mê pahtîr pu mê wa kuri pahtîr tûm nê papa ho papa.

Atãw kot Tirtûm kapêr nhîrôp ãm jakamã na hte Tirtûm mê pahpiitã mê pahte amnhî tomnuj xwÿnh ã mê pajarê. Nom nhûm Jejus Atãw rom kot Tirtûm kapêr mar nê hkôt amnhî nhîpêx rãhã jakamã na hte Tirtûm mê pahte hkôt amnhî xunhwÿr xwÿnhjaja amnhîm mê pahte amnhî to mex xwÿnh ã mê pajarê.

Nhûm Atãw kot Jejus kînhã Tirtûm kapêr nhîrôp ãm mÿrapê na hte mÿr pê mê pa xwÿnhjaja ohtô nê pa nê gaa nê Atãw pyrã nê htyk pa. Hãmri nê kormã htîr ri amnhî to mex o pa hkêt mÿrapê ma mê kot amnhî xã htÿx kamã hamak tûm xãta wÿr ma hapêx. Tã nhûm Tirtûmja mex o mex jakamã na hte Jejus Kris mê wa mê pakamã ukapri nê. Jakamã na pre mê pahwÿr Jejus mê nhûm mê pahwÿr wrÿ hãmri nê htyk o mê pahte amnhî tomnuj pãnhã amnhîre. Nhûm Tirtûm ã kot amnhî nhîpêx anhÿr kukwak ri mê pahte hkôt amnhî xunhwÿr xwÿnhjaja amarî tanhmã mê pahto mex to ho ri pa. Atãw kot amnhî tomnuj pix pumunh kôt na pre Tirtûm mê pahpiitã mê pahte amnhî tomnuj xwÿnh ã mê pajarê. Tã nhûm Jejus mê pakamã ukapri nê mê panê ty nhûm Tirtûm ja hã omunh xã hkôt ra mê pahte amnhî kaxyw hkôt pajamaxpêr xwÿnhjaja te mê pahte aa tanhmã amnhî tomnuj to hkêt pyrãk o mê panhîpêx. Na hte amarî ã mê panhîpêx anê.

Nê Atãw kot amnhî tomnuj mÿrapê na htem piitã ri pa nê tanhmã amnhî to nê ty rÿ ri pa nê gaa nê wejre nê ty. No na pre Jejus Krisja aa kot amnhî tomnuj kêt kumrêx tã amarî mê panê ty. Jakamã nhûm Tirtûm ra kukwak ri mê pahte hkôt amnhî xunhwÿr xwÿnhjê kutã nojarêt rãhã nê mê pakukamã hamaxpêr o:

—Nà mê kot Ixkra hkôt amnhî xunhwÿr xwÿnhjaja na pa mê omunh pa. Tã kot paj Ixkrata kukwak ri tãm mê unhwÿ nhûm mê nhÿrmã wa ixri mex nê htîr tûm nê pa ho pa. Anê.

20-21 Nê na pre Tîrtûm tanhmã finat Mojes mã kapêr to. Mê piitã mê kot amnhî tomnuj o ri mê pa hã amnhî pumunh kaxyw. Hãmri nê mê kot kapêr mar nê hkôt amnhî nhîpêx o pa kaxyw tanhmã mê kaxyw Mojes mã kapêr to. Nhùm kuma nê amnhî xô ri mê kãm hã kagã nê mê kãm harênh o ri mê hkôt pa. No nhùm prem kapêr ma nê ãm kuma nê hkwým pix mã ri tanhmã amnhî tomnuj to ho pa. Nê pika piitã hkôt ja arî rãhãã. Ja mÿrapê koja mê nhÿrmã ty nê ma mê kot amnhî xà htÿx kamã hamak tùm xàta wÿr ma pa. Nom Tîrtûm arî kãm pika piitã hkôt mê papa xwÿnhjê japê nê. Mê pahte amnhî tomnuj o papa tã nhùm kãm mê pahto mex prãm nê. Jakamã na pre mê pahwÿr Kra Jejus Kris mê nhùm mê pahwÿr wrÿ. Mê panê htyk o kot mê pahte amnhî tomnuj pãnhã amnhîrer kaxyw. Tã kukwak ri kot puj mê pahte amnhî kaxyw hkôt pajamaxpêr xwÿnhjaja nhÿrmã Tîrtûm mê wa kuri pahÿr tùm nê pa mex nê papa ho papa.

6

Mê kot mê pahkrã kumrãr ã mê harênh

Sikûn Korît 5.17; Karatas 2.19-20, 5.24, 6.14; Epes 4.17-24; Korosê 3.1-11; Wam Pêtre 4.1-6

¹ Nê mê pahte arî tãhã tanhmã amnhî tomnuj to htã nhùm Tîrtûm arî kãm mê pajapê nê. Nê arî mê pakutã nojarêt rãhã nê. Jakamã xà kot kaj mê atõ ã harênh anhÿrja ma nê atÿx ri ã ajamaxpêr anê nê ajamaxpêr o:

—Nà Tîrtûm kãm ijapê nê kot ixkutã nojarêt rãhã ho ri pa jakamã mo kaxyw kot pa Jejus kôt amnhî nhîpêx o ri ixpa? Nà kot paj ho anhÿr kêt nê. Anê.

Ka ã mê atõ atÿx ri ajamaxpêr anhÿr japêr. Kwa xà ajamaxpêrja mex? Nà mex kêt. ² ã ajamaxpêr anhÿrja mê hamaxpêr mex xà hkôt kêt. Ra mê pahte Jejus kôt amnhî xunhwÿr nê mê pahte amnhî tomnuj kaga jakamã nhùm mê pahte amnhî tomnujja te ra mê pahpê hapêx pyrãk.

Jakamã kot puj mê arî tanhmã amnhî tomnuj to ho ri papa hkêt nê. ³ Mëmo kaxyw na htem Tîrtûm mã mê pahkrã kumrã? Nà mê pahte ra Jejus kôt amnhî xunhwÿr ã amnhî to amnhîrît kaxyw. Te Jejus htyk nhùm mê pahte amnhî tomnujja haxwÿja hkôt htyk nê hapêx par pyrãk o amnhîrît kaxyw. Jakamã na pu htem paja-maxpêr o:

—Nà kot paj axte tanhmã amnhî tomnuj to ho ri ixpa hkêt nê. Anê.

⁴ Na htem Tîrtûm mã gôx kãm mê pahkrã kumrã nhùm mê pahte amnhî nhîpêx tùmja te mê kot Jejus kôt haxwÿja haxàr pyrãk. Hãmri nhùm mê akupÿm mê pahto api. Te Tîrtûm hihtÿx o hihtÿx o kot akupÿm Kra Jejus ho htÿr pyrãk. Te mê pahÿk tã nhùm akupÿm kot mê pahto mê pahÿr pyrãk. Pãnhã mê pahte amnhî nhîpêx nyw o amnhî nhîpêx kaxyw. ⁵ Nhùm mê pahte amnhî nhîpêx tùmja te Jejus kôt htyk nê hapêx par pyrãk. Nê mê pahte amnhî nhîpêx nywja te Jejus akupÿm htÿr pyrãk o amnhî nhîpêx.

⁶ Amnepêem na pu pre htem amnhî tomnuj rãhã ho ri papa. Te mê kãm mê àpênh xwÿnhjaja kot mê õ patrãw mã àpênh rãhãta pyrãk. Tã nhùm Kris mê panê ty. Kot mê panê mê pahte amnhî tomnuj pãnhã amnhîrer nê ho hapêx par kaxyw mê panê ty. Jakamã te mê pahte amnhî tomnuj mê pajamaxpêr punujja te pÿ kahpa hã Jejus kôt harir nê htyk nê hapêx par pyrãk. Pãnhã mê pahte amnhî nhîpêx nyw pix o amnhî nhîpêx kaxyw. Nê mê pajamaxpêr nyw pix o pajamaxpêr papa kaxyw. ⁷ Na hte mê htyk xwÿnhjaja axte tanhmã amnhî tomnuj to hkêt nê. Tã kêr pu mê urãk nê axte ã amnhî nhîpêx anhÿr kêt nê. ⁸ Na pu prem Jejus kot mê panê htyk ã harênh ma nê pajamaxpêr o:

—Nà ra Jejus kot mê panê htyk jakamã kot paj ixte amnhî nhîpêx tùm kaga hpa nê hpãnhã kot amnhî nhîpêx kôt pix mã ri amnhî nhîpêx o ri ixpa. Te ra ixÿk nê axte tanhmã

ixte amnhî tomnuj to ho ri ixpa hkêt pyrâk. Jao amnhî nhîpêx nyw pix o amnhî nhîpêx o ri ixpa. Anê.

⁹ Nê Jejus htyk nhûm Tîrtûm akupÿm ho htîr jakamã koja axte htyk kêt nê. Ra mê pahte ja mar mex. ¹⁰ Na pre âm htyk tipxi htã htykja o mê pahpiitã mê pahte amnhî tomnuj pãnhã amnhîre. Tã ra akupÿm htîr o htîr nê kaxkwa kamã Tîrtûm mã tanhmã amnhî nhîpêx to ho ri pa. ¹¹ Tã mê papajaja kot puj mê ã kot amnhî nhîpêx anhÿrja ma nê ã pajamexpêr anê nê pajamexpêr o:

—Nà âm hãmri. Te ixte Jejus pyrã nê ra ixtyk pyrâk jakamã kot paj axte amnhî tomnuj o ri ixpa hkêt nê. Te ixte Jejus pyrã nê akupÿm ixtîr nê âm Tîrtûm kôt pix mã amnhî nhîpêx o ri ixpata pyrâk o kot paj hpãnhã amnhî nhîpêx o ri ixpa. Anê.

¹² Jakamã kot ka mê atõ nhÿrmã tanhmã amnhî kukamã ajamexpêr punuj to japêr hãmri nê ajamexpêr o:

—Nà inhmã ã amnhî tomnuj anhÿr prãm nê. Omnuj tã kot paj ho anê. Nà ixte ho anhÿr mã kênã.

Anhÿr o ajamexpêr japêr tã kwa mê ã ajamexpêr anhÿr kêt nê.

¹³ Kêt Tîrtûm mã mãn amnhî gõ nê hkôt amnhî nhîpêx o ri apa. Hãmri nê amnhî krã kamã mêmoy mex pix mã ajamexpêr nê tãm akapêr. Nê mê kot amnhî to mex xwÿnhjê kôt pix mã mãn ri apa.

Na ka pre htem akapêr punuj nê.

Nê ajamexpêr punuj nê.

Nê mê kot amnhî tomnuj o mê pa xwÿnhjê hkôt ri apa.

Nê kagôxyhti japrô nê ho akôm o ri mê hkôt apa.

Tã ra hpãnhã Tîrtûm mã amnhî gõ nê axte ã amnhî nhîpêx anhÿr kêt nê.

¹⁴ Amnepêm na pu prem tanhmã mê pahte amnhî nhîpêx to ho papa hkukamã pajamexpêr nê pajamexpêr o:

—Nà kot paj Tîrtûm kapêr kôt pix mã mãn ri amnhî nhîpêx o ri ixpa nê amnhî to mex o ri ixpa nhûm Tîrtûm ja hã ixpumu nê amnhîm inhmex ã ijarê. Nà kot paj anê.

Anhÿr tã no âm tee ri mê pamã hkôt amnhî nhîpêx o ri papa hprãm kaprÿ nê arî ri kapêr kwÿm tanhmã amnhî nhîpêx to ho ri papa. Tã ra hpãnhã axtem pajamexpêr o:

—Nà Tîrtûm kot ixkutã nojarêt rãhã ho pa xwÿnh. Tã ra ixte hkôt amnhî xãm jakamã koja tanhmã ixto pa hkôt amnhî nhîpêx mex o ri ixpa. Nà koja ixto anê.

Anhÿr jakamã ra amnhî kaxyw kãm pajamexpêr tÿx o mêmoy punuj kutã amnhî to htÿx nê.

Mê pahte Tîrtûm mã tanhmã amnhî nhîpêx to hã mê pajarênh

Juãw 8.34

¹⁵ Tã ã kot anhÿr jakamã tanhmã kot puj wem pajamexpêr to? Xà kot pu mê ã pajamexpêr anê nê pajamexpêr o:

—Nà na hte Tîrtûmja ixte kapêr kôt amnhî nhîpêx o ixpa hã ixpumunh kôt amnhîm inhmex ã ijarênh kêt nê. Âm kêp ixkutã nojarêt rãhã nê amarî amnhîm inhmex ã ijarênh xwÿnh jakamã kot paj arî amnhî tomnuj rãhã nê aa ja kaga hkêt nê.

Anhÿr o kot puj mê pajamexpêr? Nà kot puj mê ã pajamexpêr anhÿr kêt nê. Âm mê pajamexpêr anhÿrja mex kêt. ¹⁶ Kojã mêmõ nhÿri kot amnhî tomnuj tÿx xwÿnhjê hõ pumu nê kãm amnhî jarênh japêr nê kãm:

—E inhma. Kot paj âm akôt pix mã tanhmã amnhî nhîpêx to ho ri ixpa. Jakamã e inhmã mêmoy tã karõ pa ama nê amã tanhmã ho ho ri ixpa.

Anhÿr o kãm kapêr japêr. Hãmri nê ã amnhî nhîpêx anhÿr tã amnhî tomnuj pix o ri pa. Tã ã mê kot amnhî nhîpêx anhÿr o mê pa xwÿnhjaja koja nhÿrmã ty hãmri mê kot amnhî xã htÿx kamã hamak tûm xàta wÿr ma hapêx.

No koja mêmõ Tîrtûm mã amnhî jarênh nê kãm:

—Pa Tîrtûm. E kot paj âm akapêr kôt pix mã ri amnhî nhîpêx o ri ixpa.

Anhÿr o kãm amnhî jarê nê hkôt amnhî nhîpêx mex o pa. Nê tãm amnhî nhîpêx o ri pa. Hãmri nê

nhÿrmã ty nê ma õ krĩ hwÿr api nê Jejus mẽ Tĩrtũm wa kuri htĩr tũm nê mex rãhã nê pa ho pa.

¹⁷ Tã mẽ kajaja na ka xep prem tee ri mẽ amã mẽ ate amnhĩ tomnuj mã anhũrer prãm tã nhũm te tãm kot amnhĩ tã mẽ ato htÿx pyrãk o mẽ anhĩpêx ka mẽ tee ri kãm anhũrer prãm kaprÿ. Tã nhũm Tĩrtũm tanhmã mẽ akrã hto ka mẽ kapêr ma nê amnhĩ kaxyw hkõt ajamaxpêr tÿx nê ãm hkõt pix mã amnhĩ nhĩpêx. Pa ja hã mẽ ajarênh ma nê mẽ anhÿ hã ixkĩnh nê. Nê Tĩrtũm mã ixte mẽ ajarênh mar nê mẽ anhÿ hã ixkĩnh ã amnhĩ jarê. ¹⁸ Na pre Tĩrtũm tanhmã mẽ akrã hto ka mẽ amnhĩ tomnuj mã anhũrer pa nê hpãnhã hkõt pix mã amnhĩ nhĩpêx.

¹⁹ E kot paj ixprĩ hã tanhmã mẽ amã ja jarênh to. Te ixte ixkrajê jahkre pyrãk o kot paj mẽ amã awjarê. Nã amnepêm na ka prem ajamaxpêr punuj kõt amnhĩ tomnuj o ri apa. Nê gaa nê ra amnhĩ tomnuj pix kukamã ajamaxpêr. Tã kêr ka mẽ arĩ ã amnhĩ nhĩpêx anhÿr kêt nê. Pãnhã tãm ri ajamaxpêr o ri apa. Jao gaa nê ra Tĩrtũm kãm hprãm xà hkõt tãm amnhĩ nhĩpêx mex nê. ²⁰ Na ka prem tee ri amã amnhĩ tomnuj mã anhũrer prãm kaprÿ. Te tãm kot amnhĩ tã mẽ ato htÿx nê amnhĩ kõt mẽ ato pa pyrãk o mẽ anhĩpêx. ²¹ Xàn ka prem ã amnhĩ tomnuj anhÿr o apa nê akĩnh nê ajamakêtkati nê ri apa? Nã na ka prem akĩnh nê apa hkêt nê. Tã na ka prem Jejus kõt amnhĩ xunhwÿ nê tee ri ate tanhmã amnhĩ tomnuj to hã amnhĩ pumu nê akaprĩ nê apijaàm nê. ã mẽ kot amnhĩ tomnuj anhÿr o pa xwÿnhjaja na htem ja mÿrapê ty nê ma mẽ kot amnhĩ xà htÿx kamã hamak tũm xàta wÿr pa. ²² No na pre ra Tĩrtũm tanhmã mẽ akrã hto ka mẽ amnhĩ tomnuj kaga hpa. Te Tĩrtũm tãm kot hpãnhã amnhĩ tã mẽ ato htÿx nê amnhĩ kõt mẽ ato pa pyrãk ka mẽ ra ãm hkõt pix mã amnhĩ nhĩpêx mex o ri apa. Nê hpãnhã amã kapêr kõt pix mã amnhĩ nhĩpêx mex prãm. Nê hkõt pix mã amnhĩ nhĩpêx hprãm. Jakamã

kot kaj mẽ nhÿrmã kuri amex kumrêx nê atĩr tũm nê ri apa ho apa.

²³ Na hte mẽ kãm àpênh o ri mẽ pa xwÿnhjaja mẽ kãm mẽmoj tã apê nê àpênh pa nê hpãnhã amnhĩrer xà jamÿ. Ja pyrã nê koja mẽ kot amnhĩ tomnuj xwÿnhjaja nhÿrmã ty hãmri nê ma mẽ kot amnhĩ xà htÿx kamã hamak tũm xàta wÿr ma pa.

No mẽ pahte amnhĩ kaxyw Jejus Kris kõt pajamaxpêr xwÿnhjaja na hte Tĩrtũm ja hã mẽ pahpumu nê mẽ pajarênh o:

—Nã ãm hãmri. Jajaja koja nhÿrmã Ixkra mẽ wa Ixkuri mex kumrêx nê htĩr tũm nê pa ho pa. Hêxta waa nê. Nã ãm hãmri koja mẽ anê. Anê.

Xà tãm mẽ pahte amnhĩ nhĩpêx ã mẽ pahpumunh kõt na hte ã mẽ pajarênh anê? Nã ãm mẽ pahte Kra Jejus Kris kõt amnhĩ xunhwÿr ã mẽ pahpumunh kõt pix mã na hte ã mẽ pajarênh anê.

7

Mẽ pahte amnhĩ tomnuj kot axte amnhĩ tã mẽ pahto htÿx kêt ã harênh Rômân 8.2, 10.4; Karatas 4.1; Epes 2.2; Korosê 3.7

¹ E Jejus kõt ixkwÿjaja. Nã Tĩrtũm kot mẽ pakaxyw tanhmã Mojes mã kapêr tota na ka mẽ ra mar tÿx nê. Na pu htem kormã pahĩr ri hkõt amnhĩ nhĩpêx o ri papa. Tã ty hãmri nê axte hkõt amnhĩ nhĩpêx kêt nê. Ra mẽ ate ja mar tÿx. E pa mẽ amã ja hã ejêp jarê ka mẽ inhma. ² Nã finat Mojes kot Tĩrtũm nhÿ hã mênijaja kot tanhmã amnhĩ nhĩpêx to ho pa hã mẽ kãm karõja. Koja mēhõ ho mjên hãmri nê ãm kõt pix mã ri pa ho pa nê aa hkaga hkêt nê. No koja nhÿrmã mjên kêp ty nhũm ahte ri pa. Hãmri nê kãm axte mēhõ ho mjên prãm nê mãmrĩ axte mēhõ ho mjên. Ja tanhmã kute hkêt. ³ Nom koja wam mjên arĩ htĩr japêr nhũm hprõ tanhmã hamaxpêr to nê hkaga nê hpãnhã nhãm mēhõ ho mjên. Hã koja Tĩrtũm pê ja homnuj nê. Nom koja mjên ra kêp ty nhũm mÿrpê axte kãm mēhõ ho mjên prãm nê mãmrĩ ho mjên. Ja na Tĩrtũm pê

homnuj kêt. Ra wam mjênja htyk kênã. Æ Tirtûm kot Mojes mã mẽ pakaxyw mẽmoj tâ karõ kot anhÿr.

⁴ Tã ja pyrã nẽ na pu prem amnepêm pajamaxpêr o:

–Ixte Tirtûm kapêr kôt pix mã amnhĩ nhĩpêx o ri ixpa jakamã nhũm Tirtûm ja hã ixpumu nẽ amnhĩm inhmex ã ijarẽ. Anẽ.

Tã pu mẽ ra tanhmã pajamaxpêr to nẽ hpãnhã pajamaxpêr õ ho pajamaxpêr o:

–Nà na xep hte Tirtûm mẽ ixte kapêr kôt amnhĩ nhĩpêx ã mẽ ixpumunh kôt amnhĩm mẽ inhmex xwÿnh ã mẽ ijarênh kêt nẽ. Mẽ ixte hkôt amnhĩ nhĩpêx mex o ri ixpare hã. Kêt ãm Kris kot mẽ inhnẽ htyk nhũm mẽ ixte amnhĩ kaxyw hkôt ijamaxpêr nẽ hkôt amnhĩ xunhwÿr pix ã mẽ ixpumunh kôt na hte mẽ inhmex ã mẽ ijarẽ. Æm ja pix ã mẽ ixpumunh kôt na hte mẽ ixto hkra nẽ mẽ ixkutã nojarêt o pa. Kra Jejus pix kukwak ri na hte ã mẽ inhĩpêx anhÿr o pa. Anẽ.

Æ mẽ pajamaxpêr nyw kot anhÿr. Jakamã te mẽ pahte mẽhõ kot mjên nyw xwÿnh gryk ã axte mjên htyk xwÿnh mã hamaxpêr kêeta pyrãk o na pu htem amnhĩ nhĩpêx o papa. Jao Kris kapêr kôt pix mã amnhĩ nhĩpêx o ri papa. Nẽ Tirtûm noo mã tãm ri amnhĩ nhĩpêx. Nẽ axte mẽ pahte amnhĩ tomnuj kukamã tanhmã pajamaxpêr to hkêt nẽ.

⁵ Nẽ amnepê mã mẽ pahte amnhĩ krã hkôt tanhmã mẽ pahte amnhĩ nhĩpêx to ho ri papata ã na pu prem amnhĩ tomnuj pix o ri papa. Ra mẽ pahte Tirtûm kapêr mar tÿx tâ kuma nẽ ãm kuma nẽ ri papa nẽ ri hkôt amnhĩ nhĩpêx kêt nẽ. Mÿrapê nhũm Tirtûm tee ri ja hã mẽ pahpumu nẽ mẽ pahtyk nẽ ma mẽ kot amnhĩ xà htÿx kamã hamak tũm xà hwÿr papa mã xwÿnhjê hã mẽ pajarẽ.

⁶ Nẽ amnepêm na pu pre htem ã pajamaxpêr anhÿr o:

–Nà kot paj Tirtûm kapêr kôt pix mã amnhĩ nhĩpêx o ri ixpa nhũm

amnhĩ tâ ixpumu nẽ ixte amnhĩ tomnuj kêt xwÿnh ã ijarẽ.

Anhÿr o pajamaxpêr no ãm tee ri ã pajamaxpêr anhÿr kaprÿ. Nẽ arĩ tanhmã amnhĩ tomnuj to ho ri papa. Tã hpãnhã te Jejus Kris kôt pahtyk pyrãk o amnhĩ nhĩpêx nẽ hpãnhã Karõ nhÿ hã tãm amnhĩ nhĩpêx. Jao ra tee ri mẽ pamã Tirtûm kapêr kôt amnhĩ nhĩpêx prãm kaprÿ hkêt nẽ. Ra Tirtûm Karõ nhÿ hã amnhĩ nhĩpêx nyw o amnhĩ nhĩpêx mex o ri papa.

Tirtûm kapêr ã kagã htũm kot tanhmã mẽ pajarênh to

Rômân 3.20, 5.20; Karatas 3.23-24

⁷ Tã Tirtûm mẽ pahte kapêr kôt ri amnhĩ nhĩpêx ã mẽ pahpumunh kôt amnhĩm mẽ pamex ã mẽ pajarênh kêt jakamã mẽmo kaxyw na kapêr ã kagã htũmja? Nà mẽ pahte mar nẽ pahprĩ hã Tirtûm noo mã mẽ kot amnhĩ tomnuj xà jarênh mar nẽ omunh mex kaxyw na. Na hte mẽ pahkwÿjê kukrêx kĩnh o pamã ho panhõ hprãm nẽ mẽ pamã karõ. Æ kot mẽmoj punuj piitã nẽ mẽ pamã karõ kot anhÿr. Tã mẽ pahte ja mar kêt ronhÿx pu mẽ Tirtûm kêp ja homnuj ã harênh mar kêt nẽ. ⁸ Tã ra mẽ pahte harênh mar nẽ kêp ja homnuj ã harênh ma. Mẽ pamã axpên kukrêx kĩnh o ho pamã panhõ hprãmja mãânên kêp ja homnuj ã harênh mar tâ nom aa hkaga hkêt nẽ arĩ pamã axpên kukrêx kĩnh o pamã ho panhõ hprãm tÿx rãhã ho ri papa. Kõp ãm Tirtûm kapêr kêt ronhÿx pu mẽ kot amnhĩ tomnuj xàja aa mar kêt kumrêx nhũm te mẽ pamã amrakati pyrãk. ⁹ Amnepê mã ixte Tirtûm kapêr mar kêt ri na pa pre ixtÿx ri amnhĩ kukamã ijamaxpêr o ri ixpa nẽ ijamaxpêr o:

–E kot paj nhÿrmã Tirtûm ri ixtÿr tũm nẽ inhmex nẽ ixpa ho ixpa.

Anhÿr tâ hpãnhã pamã axpên kukrêx kĩnh o ho pamã panhõ hprãm nẽ kapêrta ma nẽ ja hã amnhĩ pumunh kurê kumrêx. Hãmri nẽ tee ri amnhĩ kukamã ijamaxpêr nẽ ijamaxpêr o:

—Hêxta waa nê. Nà ã ixte amnhĩ nhĩpêx anhÿr o ixa jakamã kot paj nhÿrmã ty nhũm Tĩrtũm akupÿm ixto ixtĩr pa kuri ixtĩr tũm nê ixa ho ixa hkêr nê. Hêxta waa nê. Ixte amnhĩ tomnuj xwÿnh na pa. Kot paj nhÿrmã ty nhũm Tĩrtũm ma mẽ kot amnhĩ xà htÿx kamã hamak tũm xàta wÿr amnhĩ nê inhmê. Anê.

Hãmri nê ixkaprĩ nê tee ri amnhĩ kukamã ijamaxpêr o ri ixa. ¹⁰ Tã hpãnhã axtem ijamaxpêr o:

—Nà kot paj Tĩrtũm kapêr kôt pix mã mãn ri amnhĩ nhĩpêx o ri ixa hãmri nê nhÿrmã ixtyk tã hwÿr api nê kuri ixtĩr tũm nê inhmex nê ixa ho ixa. Nà kot paj anê.

Anhÿr ã ijamaxpêr tã no ãm tee ri inhmã hkôt amnhĩ nhĩpêx o ixa hprãm kaprÿ. Na pa pre xatã kapêr nhĩrôp ixkuhê nê tee ri ja hã amnhĩ pumu nê ijamaxpêr o:

—Kwa tanhmã kot pa amnhĩ nhĩpêx to nê ãm Tĩrtũm kôt pix mã ri amnhĩ nhĩpêx? Na pa hte tee ri inhmã ã amnhĩ nhĩpêx anhÿr prãm tÿx kaprÿ. ãm ixte amnhĩ tomnuj pix o ri ixa xwÿnh jakamã ãm hãmri koja amnhĩ nê kuwÿta wÿr inhmê. Nà koja ixto anê. Hêxta waa nê. Tanhmã kot paj we ja nê kãm ixkapêr to? Anê.

¹¹ No mẽhõ koja Tĩrtũm kapêr kôt amnhĩ nhĩpêx mex o ri pa? Na pu htem pahpiitã tee ri pamã ho anhÿr prãm kaprÿ. Mẽ pahpê hihtÿx kumrêx jakamã na pa pre ixtÿx ixte Tĩrtũm kuri ixtĩr tũm nê ri ixa hã amnhĩ kukamã amnhĩ jarênh kaprÿ. ãm xatã kapêr nhĩrôp ixkuhê nê amnhĩ tomnuj pix o ri ixpaja mÿrapê koja mẽ kot amnhĩ xà htÿx kamã hamak tũm xàta wÿr amnhĩ nê inhmê. ¹² Kot anhÿr tã tanhmã kot paj mẽ Tĩrtũm kapêr ã kagã htũmta jarênh to? Nà kot mẽ pamã mẽ pahte amnhĩ nhĩpêx ã karõta mex kumrêx. Mex o mex. ¹³ Mex kumrêx tã na htem kuma nê tee ri kãm hkôt amnhĩ nhĩpêx hprãm kaprÿ. Jao nhÿrmã ty nê ma kuwÿ hwÿr pa. Kêr pa na pa pre ra mar nê omunh mex tã hkôt amnhĩ nhĩpêx mex kêt nê. Jao ra ixte

amnhĩ tomnuj xwÿnh ã amnhĩ pumu. Na pa pre tee ri inhmã hkôt amnhĩ nhĩpêx o ri ixa hprãm tã no ãm xatã kapêr nhĩrôp ixkuhê nê hkwyãm ri amnhĩ nhĩpêx rãhã ho ri ixa. Tã ra tee ri ja hã amnhĩ pumu nê amnhĩ kukamã ijamaxpêr o:

—Nà na pa hte ãm tee ri inhmã Tĩrtũm kôt amnhĩ nhĩpêx prãm kaprÿ no ãm ho anhÿr kêt nê. ãm ixte amnhĩ tomnuj pix o ixa xwÿnh na pa. Ja mÿrapê koja Tĩrtũm amnhĩ nê ma kuwÿ hwÿr inhmê. Nà koja ixto anê. Anê.

Mẽ pahte mẽ pamã amnhĩ tomnuj kaga hprãm kaprÿ hã mẽ pajarênh

Karatas 5.17

¹⁴ Nê Tĩrtũm kapêr ã kagã htũmta Tĩrtũm kapêr na. Nê Tĩrtũm kĩnhã ãm inhĩ pix na pa ri ixa jakamã tanhmã kot pa amnhĩ to nê kapêr kôt ri amnhĩ nhĩpêx mex o ri ixa? ¹⁵ Inhmã tãm ixte amnhĩ nhĩpêx prãm tã no ãm amnhĩ tomnuj pix o ri ixa. Mẽmoj ixpê omnuj tã pa hte ra hkôt tanhmã amnhĩ tomnuj to ho ri ixa. Hãmri nê ja hã amnhĩ pumu nê tee ri amnhĩ kukamã ijamaxpêr o:

—Hêxta waa nê. Mon pa hte axtem nê ã amnhĩ nhĩpêx anhÿr o ri ixa? Mẽmoj ixpê omnuj nhũm inhmã ho anhÿr prãm kêt tã ra ho anê. Nhũm mẽmoj mex nhũm inhmã ho anhÿr prãm tã ho anhÿr kêt nê. Mon pa hte axtem nê ã amnhĩ nhĩpêx anhÿr o ri ixa? Anê.

¹⁶ ã ixte amnhĩ nhĩpêx anhÿr o ri ixa htã ra Tĩrtũm kapêr mexta ma hãmri nê ra ijamaxpêr o:

—Nà Tĩrtũm kapêrja mex kumrêx tã pa tee ri inhmã hkôt amnhĩ nhĩpêx mex hprãm kaprÿ ho ri ixa. Hêxta waa nê. Anê.

¹⁷ Inhmã amnhĩ tomnuj prãm kêt tã arĩ ixkaxwÿnh kãm ijamaxpêr punuj nhÿ hã ã amnhĩ nhĩpêx anhÿr o ri ixa. ¹⁸ Nê inhmã tãm amnhĩ nhĩpêx prãm tã no ãm tee ri ã inhmã amnhĩ nhĩpêx anhÿr prãm kaprÿ. Tanhmã kot pa amnhĩ to nê tãm amnhĩ nhĩpêx o ri ixa? Na pa tee ri inhmã ja ho

anhÿr prãm kaprÿ. Ixte amnhÿ tomnuj xwÿnh na pa. Nê aa ixte amnhÿ to mex kêt kumrêx xwÿnh. ¹⁹ Inhmã mẽmoj mex kôt pix mã amnhÿ nhÿpêx prãm tâ no ãm ã amnhÿ nhÿpêx anhÿr kêt nê. Nê ãm hkwÿm ri tanhmã amnhÿ tomnuj to ho ri ixpa. Mẽmoj ixpê omnuj tâ pa hkôt amnhÿ nhÿpêx o ri ixpa. ²⁰ Ixte Tÿrtũm kapêr kôt amnhÿ nhÿpêx kêt jakamã na pa hte ã amnhÿ tomnuj anhÿr o ri ixpa. Mẽmoj ixpê omnuj pa inhmã ho anhÿr prãm kêt tâ ra hkôt amnhÿ nhÿpêx. Ixte Tÿrtũm kapêr kôt amnhÿ nhÿpêx kêt jakamã ã amnhÿ nhÿpêx anhÿr o ri ixpa. ²¹ Nê mẽmoj mex nhũm inhmã hkôt amnhÿ nhÿpêx prãm tâ ra hkwÿm ri amnhÿ nhÿpêx. ã ixte amnhÿ nhÿpêx anhÿr xwÿnh na pa. ²² Nê inhmã Tÿrtũm kapêr mar nê hkôt ri amnhÿ nhÿpêx prãm tâ ²³ nom ixte amnhÿ tomnuj xwÿnh jakamã hkôt amnhÿ nhÿpêx kêt nê. Na pa tee ri ja hã amnhÿ pumu nê amnhÿ kukamã ijamaxpêr o:

—Nà kot paj axte amnhÿ tomnuj kêt nê. Kot paj ãm amnhÿ to mex pix kukamã ijamaxpêr o ri ixpa.

Anhÿr tâ no ãm arÿ amnhÿ tomnuj o ri ixpa nê amnhÿ to mex kêt. Ixte amnhÿ tomnuj xwÿnh jakamã na pa hte ã amnhÿ nhÿpêx anhÿr rãhã ho ri ixpa nê tee ri inhmã amnhÿ tomnuj kaga hprãm kaprÿ. ²⁴ Hêxta waa nê. Na pa ixkaprÿ htÿx nê ri ixpa. ã ixte amnhÿ nhÿpêx anhÿr o ri ixpaja mÿrapê kot paj nhÿrmã ty nê ma mẽ kot amnhÿ xà htÿx kamã hamak tũm xàta wÿr ma mō. Mêhō kot tanhmã ixkrã hto pa ã amnhÿ nhÿpêx anhÿrja kaga? ²⁵ Nà mẽ panhō Pahÿhti Jejus Krisja pix. Tãm koja ixte amnhÿ tomnuj kutã tanhmã ixto ixihtÿx to. Jakamã na pa axte tee ri amnhÿ kukamã ijamaxpêr kêt nê. Pãnhã ixkÿnh nê ri ixpa nê Tÿrtũm mã kãm:

—Pa Tÿrtũm. Nà ãm hãmri amex o amex. Anê.

Tã ra ixte Jejus Kris kôt amnhÿ xãm jakamã koja tãm tanhmã ixto ixihtÿx to pa rÿ kormã Tÿrtũm kapêr kôt amnhÿ nhÿpêx mex o ri ixpa. No

kot pa pam amnhÿ krã hkôt amnhÿ tomnuj rãhã ho ri ixpa. ã ixte anhÿr xwÿnh na pa.

8

Tÿrtũm Karō kot mẽ pahto tãm mẽ pahte amnhÿ nhÿpêx xwÿnh ã harênh

Karatas 5.16-26

¹ Nê Jejus Kris kêp mẽmoj punuj kutã mẽ pahto mẽ paxihtÿx xwÿnh jakamã mẽ pahte hkôt amnhÿ xunhwÿr xwÿnhjaja na pu htem ÿ hã amnhÿ tomnuj o ri papa hkêt nê. Jao mẽ pahte kuwy hwÿr papa mã xwÿnh kêt. ² Te ra mẽ pahtyk nhũm Tÿrtũm kot akupÿm mẽ pahto mẽ pahÿr pyrãk jakamã nhũm Karōja mẽ pahkarō mã agjê pu mẽ ÿ hã tãm amnhÿ nhÿpêx o ri papa. Te tãm kot amnhÿ nhÿpêx pyrãk o amnhÿ nhÿpêx nhũm Karō mẽmoj punuj piitã kutã mẽ pahto mẽ paxihtÿx. Kêp mẽ pajamaxpêr punuj kutã mẽ pahto mẽ paxihtÿx xwÿnh jakamã kot puj mẽ nhÿrmã mẽ kot amnhÿ xà htÿx kamã hamak tũm xàta wÿr papa hkêt nê.

³ Nom kormã mẽ pahte Jejus kôt amnhÿ xunhwÿr kêt ri na pu prem tee ri pamã Tÿrtũm kapêr piitã hkôt amnhÿ nhÿpêx prãm kaprÿ nhũm mẽ pahpê hihtÿx kumrêx. Jakamã tanhmã koja Tÿrtũm amnhÿ to nê amnhÿ mã mẽ pamex xwÿnh ã mẽ pajarê? Na pre tee ri amnhÿ tâ mẽ pajamã hãmri nê mẽ pahwÿr Kraja mẽ nhũm man mẽ pahwÿr wrÿ nê mẽ pahpyrà nê ÿ ho mẽ pakamã kato. Nom mẽ parom aa tanhmã amnhÿ tomnuj to hkêt kumrêx nê ri pa. Tã mẽ kot hpÿr tâ nhũm amarÿ htyk kêt nê. Na pre htyk o mẽ pahte amnhÿ tomnuj piitã hpãnhã amnhÿrer pa. Jakamã tãm kêp mẽ pajamaxpêr punuj kutã mẽ pahto paxihtÿx xwÿnh. Na pu htem hkôt amnhÿ xunhwÿ hãmri nê kukwak ri amnhÿ tomnuj o ri papa hkêt nê.

⁴ Pãnhã Tÿrtũm kot amnhÿ nhÿpêx kôt amnhÿ nhÿpêx o ri papa nê axte mẽ pahte amnhÿ nhÿpêx tũm kôt amnhÿ nhÿpêx kêt nê. Hãmri hpãnhã Tÿrtũm

Karõ kot amnhĩ nhĩpêx kôt pix mã amnhĩ nhĩpêx. Nê hamaxpêr kôt pix mã pajamaxpêr. Ja kaxyw na pre Tirtũm mẽ pahwỳr Kraja mẽ nhũm wrỳ nê mẽ pahpiitã mẽ panê ty.

⁵ Nê mẽ kot amnhĩ krã hkôt tanhmã amnhĩ nhĩpêx to ho ri mẽ pa xwỳnhjaja na htem htỳx ri tanhmã hamaxpêr to xà hkôt amnhĩ nhĩpêx o ri pa. No kêt Tirtũm Karõ kot mẽ pahkarõ mã gjêx xwỳnhjaja na pu htem mẽ kurom te Jejus jamaxpêr pyrãk o pajamaxpêr o papa.

⁶ Nê mẽ kot amnhĩ krã hkôt amnhĩ nhĩpêx xwỳnhjaja koja mẽ nhỹrmã ty nê ma kuwy hwỳr pa nê kamã pa ho pa. No mẽ pahte Tirtũm Karõ hkôt amnhĩ nhĩpêx xwỳnhjaja kot puj mẽ pajamaxpêr nyw o pajamaxpêr nê amnhĩ nhĩpêx nyw o amnhĩ nhĩpêx. Jao paxãmnhĩx ri pajamakêtkati nê ri papa. Nê nhỹrmã ty hãmri nê Tirtũm mẽ Jejus wa kuri akupỹm pahtĩr tũm nê pamex kumrêx nê papa ho papa.

⁷ Nê mẽ kot amnhĩ krã hkôt ri amnhĩ nhĩpêx xwỳnhjaja kãm Tirtũm kĩnh kêt. Nê kãm kapêr mar prãm kêt jakamã tanhmã kot mẽ amnhĩ to nê hkôt amnhĩ nhĩpêx? ⁸ Koja mẽhõ amnhĩ krã hkôt kãm hprãm xà hkôt pix mã amnhĩ nhĩpêx hãmri nhũm Tirtũm tee ri ja hã omu nê hkĩnh kêt nê. ⁹ No mẽ papajaja na pu htem mẽ urak nê ã amnhĩ nhĩpêx anhỹr kêt nê. Ra Tirtũm Karõ kot mẽ pahkarõ mã gjêx jakamã na pu htem hkôt pix mã amnhĩ nhĩpêx hprãm. No koja Tirtũm Karõ mẽhõ kaxwỳnh mã àr kêt nê nhũm kêp hkra hkêt nê.

¹⁰⁻¹¹ Tã mẽ papajaja. Mẽ pahte amnhĩ tomnuj mỳrapê koja mẽ pakrãhkàja nhỹrmã ty. No nhũm Tirtũm ra kot amnhĩm mẽ pahte amnhĩ to mex xwỳnh ã mẽ pajarênh nhũm Kris Karõ kot mẽ pahkarõ mã gjêx jakamã koja mẽ pahkarõja htyk kêt nê. Mẽ pakrãhkà pix koja ty nhũm mẽ pahkarõja ma kaxkwa hwỳr àpir kurê kumrêx. Tã nhũm nhỹrmã Tirtũm akupỹm mẽ pakrãhkà ho htĩr nê akupỹm mẽ pahkarõja mẽ pakrãhkãm hagjê pu mẽ wa

kuri pahtĩr tũm nê papa ho papa. ¹² Jakamã e kwa ixkwỳjaja. Kêr pu mẽ axte ri mẽ pajamaxpêr tũm kôt amnhĩ nhĩpêx o ri papa hkêt nê. ¹³ Kot puj mẽ arĩ ã amnhĩ nhĩpêx anhỹr o ri papa hãmri nê nhỹrmã ty nê ma mẽ kot amnhĩ xà htỳx kamã hamak tũm xàta wỳr papa. Jakamã kêr pu mẽ mẽmo arĩgro hã pamã tanhmã amnhĩ tomnuj to hprãm hãmri nê amnhĩ kukamã pajamaxpêr o:

—Nà inhmã ã amnhĩ nhĩpêx anhỹr prãm tã kot paj Tirtũm Karõ nhỹ hã ja kutã amnhĩ to htỳx nê ho anhỹr kêt nê. Anê.

Kot puj mẽ ã pajamaxpêr anê hãmri nê nhỹrmã kuwy wỳr papa hkêt nê. Pãnhã Tirtũm mẽ Jejus wa kuri pamex nê pahtĩr tũm nê ri papa ho papa. ¹⁴ Mẽ kot Tirtũm Karõ hkôt amnhĩ nhĩpêx xwỳnhjaja kêp Tirtũm kraa.

¹⁵ Nom amnepêm kormã mẽ pahte hkôt amnhĩ xunhwỳr kêt ri. Nê kormã mẽ pamã kapêr mar prãm kêt ri nhũm kot amnhĩ tã mẽ pahpumunh nê tanhmã mẽ pahto pumaj na pu prem pamã uma ho ri papa. Tã hkôt amnhĩ xunhwỳ nhũm Karõja mẽ pahkarõ mã gjêx jakamã na pu htem ra pamã uma hkêt nê ri papa. Karõ kot mẽ pahpê Tirtũm kra hã mẽ pajarênh jakamã pu mẽ amnhĩ kamã kot tanhmã mẽ panhĩpêx to puma hkêt nê ri papa. Nê paxãmnhĩx pajamakêtkati nê kãm amnhĩ jarê nê kãm amnhĩ jarênh o:

—Pa Inhĩpêxà maati? Ot pa ixpê akra hã amã amnhĩ jarênh kaxyw amnhĩ kaxyw amã ijamaxpêr. Anê.

Jao ra mẽ pamã uma hkêt nê ri papa. ¹⁶ Karõ kot mẽ pahkarõ mã gjêx nhũm mẽ pahte amnhĩ tã omunh jakamã na pu htem pajamaxpêr o:

—Nà Tirtũm Karõ kot ixkarõ mã àr jakamã ixpê hkra na pa. Anê.

Nhỹrmã mẽmoj piitã akupỹm mex par ã harênh

Sikũn Korõt 4.16-18; Korosê 3.4; Wam Pêtre 4.13

¹⁷ Nê mẽ kãm Tirtũm prãm kêt xwỳnhjaja na htem te mẽ kot Tirtũm Kra Jejus nhĩpêx pyrãk o mẽ panhĩpêx

pu mẽ pahpunuj nê ri papa. Nom kot puj mẽ nhÿrmã Tÿrtũm mex o mex xwÿnhja kuri pamex kumrêx nê papa. Mẽ pahpê hkra jakamã kot puj mẽ Kra Jejus pyrã nê õ krÿ kamã kuri pamex kumrêx nê ri papa ho papa. ¹⁸ Jar Jejus ã mẽ pahpunuj nê ri papa htã kot puj mẽ nhÿrmã kuri pamex kumrêx nê papa ho papa. Hãmri nê mẽ pamex o pamex ã amnhÿ pumu nê jar pika ja kamã tanhmã mẽ pahpunuj toja mã axte pajamaxpêr kêt kumrêx.

¹⁹ Nê pika hkôt Tÿrtũm kot mẽmoj ho kator xwÿnhjaja na htem Tÿrtũm kot mẽ pahto mex par jatur xãm mẽnh ã arÿgro jamãr rãhã ho pa. àk nê mry nê pÿ nê gô nê mẽmoj piitã mẽ pajamãr o pa. Te kot mẽ pakukamã hamaxpêr o:

—Kwa mẽmo arÿgro hã koja Tÿrtũm hkrajê piitã ho amnhÿrit nê mẽ ho mex par jatur xãm kumê pu mẽ ja hã mẽ omu? Hêxta waa nê. Inhmã tokyx ja hã mẽ omunh prãm tÿx. Koja tokyx ã mẽ hipêx anê pa ixkÿnh tÿx kumrêx.

Anhÿr o hamaxpêr pyrãk. ²⁰ Mẽmo kaxyw na hte mryja ã mẽ pakukamã hamaxpêr anê? Nã amnepê mã Tÿrtũm kot mẽmoj piitã ho katorta ã nhũm pre piitã mex o mex. Pÿ nê mry nê gô. Mẽmoj piitã mex kumrêx rãhã nê. Aa grã nê htyk kêt kumrêx. Tã Atãw kot amnhÿ tomnuy mÿrapê nhũm ra ÿ hã mẽmoj piitã homnu par jakamã na hte mẽmoj htÿr nê pa nê gaa nê ty nê hapêx. Nê mẽ pahpur kãm ahkagrôt punuj hapôj. Atãw kot amnhÿ tomnuy mÿrapê nhũm Tÿrtũm kapêr xà hkôt ã mẽmoj omnu hpar anê. ²¹ Nom koja arÿ rãhã ho rãhã hkêt nê. Koja nhÿrmã Tÿrtũm akupÿm mẽmoj piitã ho mex pa nhũm mex o mex nê axte grã rÿ axte htyk nê hapêx kêt nê. Nê axte omnu nê hikwÿ hkêt nê. Koja mẽ pahpyrã nê mex o mex. Jakamã na htem Tÿrtũm kot mẽ pahto mex par jatur xãm mẽnh xà hã arÿgro jamãr rãhã ho pa. ²² Te mẽhõ ni hpijagri kaxyw õhy xà htÿx nê tokyx kãm hpijagri hprãm xàj àmra ho nõr pyrãk o amnhÿ nhÿpêx pê mẽ pahto

mex jatur xãm mẽnh ã arÿgrota jamãr o pa.

²³ Nê mẽ papajaja na pu htem tanhmã pahpunuj to nê jajê pyrã nê te amnhÿ kamnhêr o ri papa pyrãk. Rÿ tanhmã paxà kute nê ri papa. Rÿ pamã prãm nê paxàà nê ri papa. Nê tanhmã mẽ pahpunuj to nê ri papa. Jao te pÿ nê gô nê mryja pyrã nê amnhÿ tã Tÿrtũm kot mẽ pahto mex par jatur xãm mẽnh ã arÿgro jamãr rãhã ho ri papa.

Na pre Tÿrtũm mẽ pahwÿr Karõ rê nhũm mẽ pahkarõ mã agjê nê mẽ pakukamã Tÿrtũm tanhmã kot mẽ pahto mex to hã mẽ pamã ho amnhÿrit nê mẽ pamã ho amnhÿrit o:

—Koja nhÿrmã Tÿrtũm mẽ ato mex par jatur xãm kumê nê mẽ piitã mẽ kãm mẽ apê hkra hã mẽ ato amnhÿrit. Hãmri nê mẽ amã mẽ anhÿ nyw gô ka mẽ axte axà nê ri apa nê atyk kêt nê. Hãmri nê Tÿrtũm ri amex kumrêx nê ri apa ho apa. Nã kot kaj mẽ nhÿrmã ã amnhÿ nhÿpêx anê. Anê.

Ã Tÿrtũm Karõ kot mẽ pakukamã mẽ pajarênh anhÿr jakamã na pu htem amnhÿ tã kot mẽ pahto mex jatur xãm mẽnh pix jamãr o ri papa. ²⁴ Nom na kormã ã mẽ pahto mex anhÿr kêt nê. Kormã mẽ pamã mẽ panhÿ nyw nhõr kêt nê. Nom ra kot mẽ pahto hkra jakamã pu mẽ ja hã amnhÿ pumu nê pajamaxpêr o:

—Nã ra Tÿrtũm kot ixto hkra jakamã koja nhÿrmã mãânên inhmã inhÿ nyw gô. Nã koja inhmã kugô.

²⁵ Anhÿr o pajamaxpêr tã kormã. Na pu htem kormã amnhÿ tã hamãr rãhã ho ri papa nê aa hkaga hkêt nê papa.

Mẽ pahte Tÿrtũm Karõ nhÿ hã Tÿrtũm mã amnhÿ jarênh

²⁶ Nê na pu htem Tÿrtũm mã amnhÿ jarênh kaxyw nhũm hte Karõja mẽ pahto ajuta pu mẽ ÿ hã pakatãt kôt kãm tanhmã amnhÿ jarênh to. No kot puj mẽ amnhÿ krã hkôt kãm amnhÿ jarênh mex kêt nê. Na pu htem ja kaxyw tee ri amnhÿ kukamã pajamaxpêr o:

—Kwa tanhmã kot pa Tirtũm mã amnhĩ jarẽnh to? Tanhmã kot pa mẽmoj tã ixàhwỳr to rỳ amnhĩ to hwỳr to? Nà kot paj amnhĩ krã hkõt ja ho anhỳr mex kêt nẽ. Hẽxta waa nẽ. Anẽ.

No nhũm Tirtũm Karõ ra kot mẽ pahkarõ mã gjẽx jakamã na hte tanhmã mẽ pahkrã hto pu mẽ ỹ hã kãm amnhĩ jarẽnh mex nẽ pakatàt kõt mẽmoj tã kuwỳ. Te Karõja tanhmã mẽ pakute hã mẽ pahpumunh nẽ mẽ pakamã ukapri xaj tãm mẽ pahto hwỳr pyrãk.

²⁷ Jakamã pu mẽ ỹ hã tanhmã Tirtũm mã amnhĩ jarẽnh to nhũm mẽ pamar kurẽ kumrẽx. Ra kot mẽ pajamxpẽr kõt mẽ pahpumunh par kẽnã. Nhũm ra Karõ kot mẽ pahkarõ mã gjẽx jakamã na pu htem kãm hprãm xà hkõt kãm amnhĩ jarẽ nẽ tanhmã amnhĩ to paxàhwỳr to.

Tirtũm kot mẽ pamã mẽmoj piitã ho mex ã harẽnh

Rômân 8.37; Piripos 1.12; Wam Pẽtre 5.10

²⁸ Nẽ mẽ pamã Tirtũm kĩnh xwỳnhjaja. Tirtũm kot mẽ pahto hkra xwỳnhjaja. Koja mẽmoj mẽ pakamã tanhmã amnhĩ to htã kêt pu mẽ ãm ja hã amnhĩ pumu nẽ tee ri amnhĩ kukamã pajamxpẽr kêt nẽ. Koja te mẽ pahpẽ omnuy pyrãk tã koja nhỹrmã hpãnhã mẽ pamã mex nẽ. Koja Tirtũm nhỹrmã tanhmã mẽ pamã mẽmojta o mex to. ²⁹ Amnepẽ mã mẽmoj piitã hkõt ri na pre Tirtũm mẽ pakukamã tanhmã mẽ pajarẽnh to nẽ mẽ pajarẽnh o:

—E kot paj nhỹrmã mẽ kot Ixkra Jejus kõt amnhĩ xunhwỳr xwỳnhjẽ ho ixkra jakamã nhũm mẽ Jejus pyrã nẽ kẽp ixkraa. Nẽ uràk nẽ ixkapẽr kõt amnhĩ nhĩpẽx o pa. Jao pa ra ixkra xohtõ nẽ. Nà ja na inhmã hprãm. Anẽ.

³⁰ Tã pu htem pajapõj nẽ ri papa. Hãmri nẽ kapẽr ma nẽ amnhĩ kaxyw Kra Jejus kõt pajamxpẽr nẽ hkõt amnhĩ xunhwỳ. Hãmri nhũm Tirtũm ja hã mẽ pahpumu nẽ pahto hkra nẽ amnhĩm mẽ pamex xwỳnh ã mẽ pajarẽ nẽ mẽ pahto mex nẽ. Nẽ te ho Kra Jejus nhĩpẽx pyrãk o mẽ panhĩpẽx. Jao

nhỹrmã wa kuri mẽ pahtĩr tũm nẽ papa ho papa mã xwỳnh ã mẽ pajarẽ.

Mẽhõ kot Tirtũm pẽ aa mẽ papytãr kêt ã harẽnh

Rômân 5.1

³¹ Tã ã Tirtũm kãm mẽ pajapẽ nẽ mẽ pahto mex kot anhỳr. ã kot mẽ panhĩpẽx mex anhỳr jakamã ra mẽ pahkõt pa ho pa rãhãã. Jakamã mẽhõ koja ãhkra pẽ mẽ pahpytã? Nẽ mẽhõ koja tanhmã ri kẽp mẽ pahto? Nà koja kẽp mẽ papytãr rỳ tanhmã kẽp mẽ pahto hkõt nẽ. ³² Tirtũm kãm Kra Jejus japẽ htỳx tã na pre mẽ pahpẽ nẽ hkõt nẽ mẽ pahwỳr kumẽ. Te kot mẽ pamã õr pyrãk o hipẽx nhũm mẽ pahwỳr wrỳ nẽ mẽ panẽ ty. Tã ra Tirtũm kot mẽ pamã õr jakamã koja mããnẽn kãm mẽ pahte Kra hkõt amnhĩ xunhwỳr xwỳnhjẽ japẽ nẽ mẽ pahto mex rãhã ho ri pa. Nà koja ã mẽ pahto mex anẽ.

³³ Jakamã mẽhõ koja kãm mẽ pahte amnhĩ tomnuj xwỳnh ã mẽ pajarẽ? Ra tãm kot mẽ pahto hkra nẽ mẽ pahte amnhĩ to mex xwỳnh ã mẽ pajarẽnh kẽnã kot kêt mẽhõ kãm tanhmã mẽ pahto kapẽr punuj to nhũm mẽ kuma. Koja mẽ tee ri kãm tanhmã mẽ pahto kapẽr to kaprỳ. ³⁴ Na pre ra Jejus Kris mẽ pahte amnhĩ tomnuj pãnhã amnhĩrer kaxyw mẽ panẽ ty nhũm Tirtũm akupỹm ho htĩr. Hãmri nhũm ma akupỹm kaxkwa hwỳr api nẽ Pahi Maati krĩ xà kamã Tirtũm nhĩhkõ hã hkrĩ ho hkrĩ. Nẽ Tirtũm mã mẽ pakutã nojarêt rãhã ho kuri hkrĩ ho hkrĩ. Jakamã mẽhõ koja kẽp mẽ kot amnhĩ xà htỳx kamã hamak tũm xàta wỳr mẽ pajano? Nà amrakati kumrẽx.

³⁵ Nẽ Krisja kaxkwa kamã Tirtũm nhĩhkõ hã hkrĩ ho hkrĩ htã mããnẽn jar mẽ pahkõt pa ho pa. Kãm mẽ pajapẽ htỳx jakamã kot puj mẽ tanhmã pahpunuj to htã nhũm arĩ kãm mẽ pajapẽ nẽ mẽ pahkõt pa ho pa.

Rỳ nhũm mẽ kot hkõt amnhĩ xunhwỳr kêt xwỳnhjaja tanhmã hã mẽ pahto htã nhũm arĩ kãm mẽ pajapẽ kamã mẽ pahkõt pa ho pa.

Rỳ mẽ pamã prãm nẽ ri papa. Rỳ mẽ paxê hkêt nẽ pamã kry nẽ ri papa htã nhũm arĩ kãm mẽ pajapê kamã mẽ pahkôt pa ho pa.

Rỳ ra mẽ kot hã mẽ panhĩmex kaxyw rỳ hã mẽ pahpar kumrêx. Tã nhũm arĩ kãm mẽ pajapê kamã mẽ pahkôt pa ho pa rãhã nẽ.

Kãm mẽ pajapê kamã mẽ pahkôt pa ho pa rãhã jakamã pu mẽ tee ri amnhĩ kukamã pajamexpêr kêt nẽ. Æm hkôt paxãmnhĩx ri pajamakêtkati nẽ ri papa ho papa. ³⁶ Tĩrtũm kapêr ã kagã htũm te mẽ papajaja mẽ pahte kãm tanhmã amnhĩ jarênh to pyrã nẽ mẽ pajarênh kot:

Pa Tĩrtũm. Na htem atã mẽ ixtomnuj tỳx o pa.

Nẽ ra mẽ kot mẽ inhĩmex kaxyw. Nẽ mẽ inhĩpêx o te mẽ kot ôwêhti ho mõi nẽ hpar kaxyw tanhmã hipêx to pyrãk.

Jakamã na pa mẽ ra ixtyk kaxyw. Anhỹr o kot mẽ pajarênh. ³⁷ Tã kwãr mẽ ã mẽ panhĩpêx anẽ. Arĩ Kris kãm mẽ pajapê kamã mẽ pahkôt pa ho pa rãhã jakamã mẽ kot tanhmã mẽ pahto htã pu mẽ arĩ amnhĩ kaxyw kãm pajamexpêr tỳx rãhã ho ri papa. Nhũm arĩ mẽ kutã mẽ pahto paxihtỳx pu mẽ arĩ mẽ kãm pakuhê.

³⁸ Mẽmoj koja tanhmã mẽ pahto nhũm Tĩrtũm tee ri ja hã mẽ pahpumu nẽ kãm mẽ pajapê hkêt nẽ? Nà amrakati kumrêx. Koja mõi hõ rỳ mẽmoj mẽ pahpê àmnàr kêt nẽ. Na hte jar pika ja kamã Kris kãm mẽ pajapê kamã mẽ pahkôt pa ho pa. Nẽ kot puj mẽ nhỹrmã ty nhũm arĩ kãm mẽ pajapê kamã mẽ pahkôt pa ho pa rãhã nẽ. Jakamã koja mẽkarõ rỳ mẽkarõmnuti rỳ jar pika ja kamã mẽ kãm Tĩrtũm prãm kêt xwỳnhjaja mẽ pahpê àmnàr kêt nẽ. Rỳ mẽmoj tanhmã kute. Rỳ kormã hapu hã mẽmoj tanhmã kute. Koja mẽmoj pitã tee ri tanhmã kêp mẽ pahto htã nhũm Kris arĩ kãm mẽ pajapê kamã mẽ pahkôt pa ho pa rãhã nẽ nhũm mẽmoj tee ri mẽ pahpê àmnàr kaprỳ. ³⁹ Nẽ koja kỳj rũm mẽmoj wrỳ nẽ

tanhmã kêp mẽ pahto japêr. Rỳ pyka rũm mẽmoj kato nẽ tanhmã kêp mẽ pahto japêr. Rỳ kuwy rỳ kòk xàpêr tỳx tanhmã kêp mẽ pahto. Tã nhũm mẽ panhõ Pahĩti Jejus Kris arĩ kãm mẽ pajapê kamã mẽ pahkôt pa ho pa rãhã nẽ. Te Tĩrtũm kãm mẽ pajapê pyrãk o kãm mẽ pajapê htỳx kãm mẽ pahkôt pa ho pa rãhã jakamã nhũm mẽmoj tee ri mẽ pahpê àmnàr kaprỳ.

9

Ijaew jarênh

Atre 3.25; Rômãn 3.1-2

¹⁻² Nẽ na pa tee ri ixkwỳ Ijaew kot tanhmã amnhĩ nhĩpêx to ho pa hã mẽ omu nẽ ixkaprĩ nẽ. Ixpyrà nẽ mẽ kêp Ijaew tã ixkĩnhã amnhĩ kaxyw Kris kôt hamexpêr kêt jakamã nhũm Kris tee ri kãm mẽ hamakêtkati nẽ àmnhĩx ri mẽ pa hprãm kaprỳ. Pa tee ri mẽ hkukamã ijamexpêr nẽ ixkaprĩ nẽ ri ixpa. Nẽ aa ixkaprĩ ixpê kator kêt kumrêx. Mẽ kot inhmã mẽ hkĩnh kêt ã amnhĩ tã ijarênh tã inhmã mẽ hkĩnh kênã. Æm hãmri na pa ã amnhĩ jarênh anẽ. Tĩrtũm Karõ kot ja hã ixpumunh mex nẽ inhmã:

—Nà ãm hãmri na ka amã mẽ hkĩnh ã amnhĩ jarê. Anẽ.

³ Mẽ kêp ixkwỳ na mẽ. Mẽ ixpàr kraxja ãm pixi mex. Tã nhũm mẽ ixkĩnhã amnhĩ kaxyw Kris kôt hamexpêr kêt jakamã kop ãm Tĩrtũm kot mẽ nẽ kuwy hwỳr pa inhmênh ronhỹx ja inhmã mex. Nhỹx pa kãm:

—Kwa Tĩrtũm. Amnhĩ nẽ kuwy hwỳr ixkwỳjê rênh kêt nẽ. Inhmã mẽ hapê htỳx kumrêx. Mẽ hpãnhã pa mãn mẽ nẽ hwỳr inhmẽ nà.

Anhỹr o nhỹx pa kãm ixkapêr. Nom kot paj amnhĩ to ã ixàhwỳr anhỹr kaprỳ. Tĩrtũm kot mẽ kamã ukaprĩ htã no nhũm mẽ amnhĩ kaxyw Kris mã hamexpêr kêt jakamã tanhmã koja amnhĩ to nẽ mẽ hpãnhã pa mẽ nẽ kuwy wỳr inhmẽ nhũm mẽ ixrom kuri htĩr tũm nẽ pa ho pa? Mẽ kot hkôt amnhĩ xunhwỳyẽ hã. ⁴ Mẽ ixpê Ijaew nhĩgêjtaja na pre Tĩrtũm anepê mã mẽ ho mex rax nẽ. Nẽ kãm mẽ ho hkra hprãm nẽ. Nhũm prem

tanhmã kot amnhĩ nhĩpêx mex to hã no ho omunh o pa. Nê hirã htÿx kãm ri pa hã omu nhũm mẽ kãm:

—E kot kaj mẽ ixkapêr ma nê ixkôt amnhĩ nhĩpêx o ri apa. Hã kot paj mẽ akôt ixpa ho ixpa nê mẽ ato mex nê ka mẽ axpên kanrêhã axàmnàr rax nê. Hãmri pa mẽ amã pika mex gô ka mẽ kamã ajamakêtkati nê axàmnhĩx ri apa ho apa.

Anhÿr o mẽ kãm kapêr. Hãmri nê mẽ kaxyw Mojes mã tanhmã kapêr to nê mẽ kaxyw kãm mẽmoj piitã hã karô. Mẽ kot tanhmã amnhĩ tomnuj to hãmri nê tee ri ja hã amnhĩ pumunh nê tanhmã amnhĩ to Tirtũm wÿr to nhũm kot mẽ mar nê mẽ nê ja ho hapêx par kaxyw. Finat Mojes kot amnhĩ xô ri mẽ kãm ujarênh nhũm mẽ kot mar nê hkôt amnhĩ nhĩpêx mex o ri pa kaxyw. ⁵ Mẽ ixkukamã mẽ ixpãmjaja. Apraãw nê Ijak nê Jako kanrêhã mẽ hkra nê mẽ htàmnhwÿjaja na pre mẽ. Mẽ hwÿr na pre Tirtũmja Kra Jejus Kris mẽ nhũm mẽ hwÿr wrÿ nê mẽ kamã ï ho ï ho kator jakamã haxwÿja kêp Ijaew na pre. Kêp Měpahpãm nê mex o mex nê hihtÿx o hihtÿx tã Ijaew wÿr wrÿ nê mẽ kamã kato. Hãmri nhũm Ijaew kêt xwÿnhjaja harênh ma nê tee ri hamaxpêr nê hamaxpêr o:

—Hêxta waa nê. Kêp ãm Jejus mẽ papa kamã mãn kator ronhÿx mẽ pamã mex kumrêx. Anê.

⁶No nhũm kormã Ijaew hwÿr wrÿk kêt ri nhũm Tirtũm ra kot mẽ ho hkra kaxyw mẽ hã amnhĩ jarê nhũm mẽ hkwÿja kãm ja prãm kêt nê hkaga. Tã xà na pre Tirtũm kot mẽ ho hkra hã amnhĩ jarênh ã amnhĩ to hêx? Nà aa hêx kêt kênã kot kêt ri mẽmoj tã amnhĩ jarê nê hã amnhĩ to hêx. Jakamã na pre mẽ hkwÿjaja hkwÿjê rom hkaga hkêt nê nhũm amnhĩ tã mẽ omu nê mẽ ho hkra. Nom mẽ piitã mẽ ho hkra hkêt nê. Mẽ hkwÿjaja kot hkaga jakamã nhũm ãm mẽ hkwÿjê pix o hkra.

⁷Nê finat Apraãwja na pre hkanrêhã hkra nê htàmnhwÿ xohtô nê. Tã xà na pre Tirtũm htàmnhwÿ

piitã mẽ ho hkra hã amnhĩ jarê? Nà mẽ piitã ã mẽ harênh anhÿr kêt nê. ãm mẽ hkwÿjê pix na pre mẽ ho hkra hã mẽ harê. Apraãw kra Ijak kôt hkanrêhã htàmnhwÿpixjaja nhũm kot mẽ ho hkra hã mẽ harê.

⁸⁻⁹Nê Apraãw kormã hprô kamã hkra hkêt ri na pre kãm àpênh xwÿnh kamã hkra nhũm kato nê myre nê hixi pê Ismael. Nom kêp Apraãw prô kumrêx kamã hkra hkêt. Prô kuprÿ kamã hkra na pre. Tã nhũm Tirtũm kãm hkra kumrêx kukamã harê nê kãm:

—E kot paj ma tẽ hãmri nê mẽmo arÿgro hã akupÿn awÿr tẽ nhũm ra aprô hpijagri nhũm war akra myre. Anê.

Tã nhũm hprô Saraja htujarô. Nê gaa nê hpijagri nhũm hkraja myre. Hixi pê Ijak. Kêp Apraãw prô kamã hkra jakamã Tirtũm nom kêp Apraãw kra kumrêx. Jakamã hkra Ijak kanrêhã htàmnhwÿjaja na pre Tirtũm kot mẽ ho hkra hã mẽ harê. Ra kot Apraãw mã ja hã amnhĩ jarênh xà hkôt.

¹⁰Tã nhũm Ijakja hprêk nê Repek o hprô. Nê gaa nê ra haxwÿja wa hkra nhũm hkraja wa ahpo nê kato nê wa hamê my. Kot wa pê Ejau nhũm kot hapu pê Jako. ¹¹⁻¹²Nom nhũm kormã wa kator kêt ri nhũm Tirtũm wa hkukamã tanhmã wa harênh to. àhpumunh xà hkôt wa katorxà mã wa harê nê kãm:

—E kot paj amã war akra wa hkukamã tanhmã wa harênh to ka inhma. Nà koja wa kato nê gaa nê hprêk hãmri nhũm kot haputa amnhĩ to rax o kot wa jakre. Anê.

Kot wata koja kot hapu kÿnhã amnhĩ to grire nê ri pa nhũm ã wa hkukamã wa harênh anê. Kãm wa kot tanhmã amnhĩ nhĩpêx to hprãm xà hkôt ã wa harênh anê. Kormã wa kot tanhmã amnhĩ tomnuj to rÿ tanhmã amnhĩ to mex to hã kot wa omunh kêt tã kãm hprãm xà hkôt ã wa hkukamã wa harênh anê. ¹³Tirtũm kapêr ã kagà htũm kot wa harênh nê wa hã kagà kot:

Ejau rom Jako kanrêhã hkra nê htàmnhwÿ pixjaja na pre

Tîrtûm amnhîm mẽ ho hkra.
Anê.

¹⁴ Mân ka mẽ Tîrtûm kot ã wa harênh anhÿrja ma mẽ ajamexpêr o:

–Tk. Kwa ja mexti hã. Mo na pre hamê wa hkanrêhã wa hkra mẽ wa htâmnhwÿ piitã ho hkra hkêt mẽ? Anê.

Kwa mẽ ã ajamexpêr anhÿr kêt mẽ. Tîrtûm na hte kãm hprãm xà hkôt tanhmã mẽ panhîpêx to ho pa pu mẽ kot tanhmã mẽ panhîpêx to hã omu mẽ ãm omu mẽ amnhî tã tanhmã kãm mẽ hkêt mẽ. ¹⁵ Na pre finat Mojes mã amnhî jarênh o:

Inhmã hprãm xà hkôt na pa hte mẽ omu mẽ tanhmã mẽ kamã ixukaprî hto ho ri ixpa.

Nê inhmã hprãm xà hkôt na pa hte ahpÿnhã tanhmã mẽ hipêx to ho ri ixpa.

Anhÿr o kãm amnhî jarê. ¹⁶ Nom tanhmã mẽ pahte amnhî nhîpêx to hã mẽ pahpumunh kôt na hte mẽ pakamã ukaprî hkêt mẽ. ãm tãm kãm hprãm xà hkôt na hte tanhmã mẽ pakamã ukaprî hto ho pa. ¹⁷ Amnepê mã Ejit kãm mẽ õ pahiti Paraohti hwÿr na pre Mojes mẽ nhũm ma hwÿr mō mẽ kãm tanhmã Tîrtûm kapêr jarênh to mẽ kãm:

–E Tîrtûm na awÿr inhmê pa mō. Tãm na pre apê Ejit nhō xwÿnhjê nhō pahî kaxyw axãm. Akrã hihtÿx tã nhũm mẽ kaxyw axãm. Tã ra xatã àhpumunh tÿx o tanhmã anhîpêx to. Krî piitã hkôt ri mẽ pa xwÿnhjaja kot atã harênh mar mẽ àhpumunh o àhpumunh ã omunh kaxyw. Tã ixte amã ja jarênh kaxyw na pre awÿr inhmê pa man awÿr mō. Anê.

¹⁸ ã na hte Tîrtûm kãm hprãm xà hkôt tanhmã mẽ panhîpêx anhÿr to ho pa. Jao mẽ hkwyjê kamã ukaprî ho pa. No mẽ hkwyjaja nhũm tee ri mẽ hkrã hihtÿx ã mẽ omu mẽ ãm mẽ omu nhũm mẽ amnhî krã hkôt ri tanhmã amnhî tomnuj to ho ri pa.

Tîrtûm kêp mẽ pakamã ukaprî xwÿnh ã harênh

¹⁹ Nê kot kaj mẽ atō Tîrtûm kot ã mẽ hipêx anhÿrja ã harênh ma mẽ tanhmã hã ixkukjêr to mẽ inhmã:

–Kwa na xep hte Tîrtûm ahpÿnhã tanhmã mẽ hipêx to. Nê mẽ hkwyjê kamã ukaprî ho pa mẽ mẽ hkwyjaja mẽ hkrã hihtÿx ã mẽ omu mẽ ãm mẽ omu mẽ mẽ mẽ kamã ukaprî hkêt mẽ. Jakamã kwa mo na hte mẽ kot amnhî tomnuj xwÿnh ã mẽ harê? Tãm kot ã mẽ hipêx anhÿr kênã kot kêt mẽ kot amnhî tomnuj xwÿnh ã mẽ harê.

Anhÿr o ajamexpêr japêr. ²⁰ Kwa mẽ ri ã atÿx Tîrtûm jarênh anhÿr kêt mẽ. E pa mẽ amã ejêp jarê ka mẽ inhma. Xà kot mēhō gyw kwÿ ho amnhîm poti nhîpêx nhũm tee ri amnhî tã omu mẽ amnhî tã tanhmã kãm kapêr to mẽ kãm: “Tk. Kwa mon ka ri ã inhîpêx anê?” Anhÿr o amnhî tã kãm kapêr? Nà koja kãm tanhmã mẽ hkêt mẽ. ²¹ Hipêx xwÿnh kãm hprãm xà hkôt kot ã hipêx anhÿr kênã kot kêt amnhî tã kãm akir. Koja amnhîm gyw kwÿ kakwÿ mẽ ho poti ho axkrut mẽ hipêx. Nê hō ho muxre. Ho mex kumrêx nhũm xa. Nhũm ihōja mã ho anê mẽ hipêx no ãm wamta kînhã ho hanhãjti nhũm omnajti mẽ xa. No ãm tãm kot hamê wa hipêx prãm xà hkôt wa hipêx kênã.

²² Tã na hte ã Tîrtûm mẽ panhîpêx anê. Te poti pynajre pyrã mẽ mẽ pahkwÿjê nhîpêx nhũm mẽ kãm kapêr mar prãm kêt mẽ htÿx ri tanhmã amnhî tomnuj to ho ri pa. Hãmri nhũm amnhî tã mẽ omu mẽ te amnhî nê mẽ rênh kaxyw pyrãk o mẽ hipêx no ãm kormã hamaxpêr o:

–Nà kot paj nhÿrmã mẽ kot amnhî tomnuj mÿrapê mẽ ho ijapêx pa nhũm mẽ piitã ja hã ixpumu mẽ inhmã ixàhpumunh o ixàhpumunh ã ijarê. Nê inhmã mẽmoj punuj piitã hkînh kêt kumrêx ã axpên mã ijarê. Anê.

²³ Nom na hte jajê rom mẽ pahkwÿjê nhîpêx o te poti mexta nhîpêx pyrã mẽ amnhî kaxyw mẽ paxunhwÿ mẽ mẽ pahto hkra kaxyw. Nê mẽ pajarênh o:

–Nà koja mẽ amnhî kaxyw Ixkra Jejus mã hamaxpêr mẽ hkôt amnhî xunhwÿ pa ja hã mẽ omu mẽ mẽ kamã ixukaprî ho ri ixpa. Nê mẽ ho mex pê mẽ kutã inhnojarêr rãhã ho ri ixpa.

Hâmri nhùm mẽ nhỹrmã Ixkra mẽ wa ixri htĩr tũm nẽ mex nẽ pa ho pa. Kot paj ã mẽ ho mex anẽ nhùm mẽ amnhĩ tã ixpumu nẽ inhmã inhmex o inhmex ã ijarẽnh o pa. Anẽ.

Ã na hte Tĩrtũm ahpỹnhã mẽ pahpi-itã mẽ panhĩpêx anẽ.

²⁴ Nẽ na hte mẽ ixpê Ijaew pix o hkra hkêt nẽ. Na hte mãânẽn mẽ apê Ijaew kêt xwỹnhjê ho hkra.

²⁵ Amnepê mã mẽ kãm kapêr jarẽnh o ri mẽ pa xwỹnhjê hõ pê finat Ojeja na pre te Tĩrtũm tãm kot Ijaew kêt xwỹnhjê jarẽnh pyrã nẽ mẽ harẽnh o: Amnepê na pa pre mẽ ho ixkra hkêt tã kot paj mẽ hkwỹjê ho ixkra.

Na pa pre mẽ kamã ixukapĩrĩ hkêt tã pa ra inhmã mẽ hapê nẽ.

²⁶ Nẽ ixte mẽ kêp ixkra hkêt ã mẽ harẽnh tã kot paj ra mẽ kêp ixkra hã mẽ harẽ.

Ixpê mẽõ Tĩrtũm kot paj ã mẽ harẽnh anẽ. Anẽ.

²⁷ Hâmri nhùm finat Ijais Ojej pãnhã tanhmã Ijaew jarẽnh to. Ijaisja Tĩrtũm nhỹ hã kapêr jarẽnh o ri pa xwỹnhjê hõ na pre. Jakamã nhùm Tĩrtũm kãm tanhmã mẽ ijarẽnh to nhùm kuma nẽ ô ri mẽ ixkukamã mẽ inhĩgêxjê mã ujarẽnh o pa nẽ hã kagã. Nẽ hã kagã ho:

Ijaew na mẽ ohtô rax kumrêx.

Te gô xujanãr mýri pykahti grã hkryre xohtô pyrãk.

Tã koja mẽ piitã ixkôt amnhĩ xunhwýr kêt nẽ.

Koja mẽ ãm grêre nẽ amnhĩ kaxyw inhmã hamaxpêr nẽ ixkôt amnhĩ xunhwý.

Jakamã mẽ tapxipixjaja koja hkwýjê rom nhỹrmã inhõ krĩ hwýr api.

²⁸ No mẽ kot amnhĩ kaxyw inhmã mẽ hamaxpêr kêt xwỹnhjaja kot paj tokyx tanhmã mẽ harẽnh to.

Mẽ kot amnhĩ tomnuj mýrapê tanhmã mẽ harẽnh to nhùm mẽ ma mẽ kot amnhĩ xã htýx kamã hamak tũm xãta wýr ma pa.

Nã kot paj tokyx ã mẽ hipêx anẽ.

Anhýr o mẽ harẽ. ²⁹ Nom nhùm ko-rmã ã mẽ harẽnh anhýr kêt ri nhùm

ra wam tanhmã mẽ harẽnh to nẽ mẽ harẽnh o:

Amnepêm Sotõ mẽ Komo kamã mẽ pa xwỹnhjaja na prem amnhĩ tomnuj týx rãhã ho ri pa.

Mýrapê nhùm Tĩrtũm xãhpumunh o ãhpumunh xwỹnhja tee ri ja hã mẽ omu hãmri nẽ kaxkwa rũm mẽ ô krĩ wa hipy mẽmoj põõta rê.

Nhùm mẽ hã rôrôk nẽ mẽ ho hkaxãr pa nhùm mẽ hapêx.

Tã na pu htem mẽ urãk nẽ amnhĩ tomnuj o ri papa.

Jakamã kop ãm Tĩrtũm kot mẽ pahkwýjê kamã ukapĩrĩ kêt ronhýx pu mẽ ra mẽ urãk nẽ pahpiitã pajapêx pa. Anẽ.

Ijaew kwý kot Jejus kôt amnhĩ xunhwýr kêt ã mẽ harẽnh

Rômân 10.1-4

³⁰ Nẽ Ijaew kêt xwỹnhjaja na prem Ijaew pyrã nẽ kãm Tĩrtũm prãm kêt tã Jejus jarẽnh ma nẽ Ijaew rom amnhĩ kaxyw hkôt hamaxpêr nẽ hkôt amnhĩ xunhwý. Hãmri nhùm Tĩrtũm ja hã mẽ omu nẽ mẽ ho hkra nẽ mẽ kot amnhĩ to mex xwỹnhjê hã mẽ harẽ.

³¹⁻³² Hãmri nhùm Ijaew tee ri mẽ kot Jejus kôt amnhĩ xunhwýr ã mẽ omu nhùm ja mẽ kãm mex kêt nẽ. Hãmri nhùm mẽ hamaxpêr o:

—Tk. Kwa ra mẽ ixte finat Mojes kapêr kôt amnhĩ nhĩpêx mex o ri mẽ ixpa xwỹnh jakamã koja Tĩrtũm ja hã mẽ ixpumu nẽ mẽ ixte amnhĩ to mex xwỹnhjê hã mẽ ijarê nẽ mẽ inhnẽ mẽ ixte amnhĩ tomnuj rên pa. No kot paj mẽ Ijaew kêt xwỹnhjê pyrã nẽ Jejus kôt amnhĩ xunhwýr kêt nẽ. ãm kwarĩ ho kwarĩ.

Anhýr ã amnhĩ jarẽ. No ãm ã mẽ hamaxpêr anhýrja mex kêt. Na prem htýx Tĩrtũm noo mã kot amnhĩ to mex ã amnhĩ jarẽnh kaprý nẽ arĩ ri tanhmã amnhĩ tomnuj to ho ri pa. Te pry kamã kên nõr nhùm mẽ kot nhãm nẽ mênh kaxyw hkamnãr nẽ ho amnhĩ par krã hi kukên pyrãk o na htem amnhĩ nhĩpêx. Jao amnhĩ krã hkôt tanhmã amnhĩ nhĩpêx to ho pa hprãm xãj te Jejus kapêrja nhãm

amnhî nê rênh pyrâk o hipêx. Jakamã koja mẽ Tirtũm nhõ krî hwÿr àpir kêt nê. ³³Tirtũm kapêr ã kagà htũm kot ja jarênh kot:

E mẽ inhma. Kot paj nhÿrmã Ijaewjê hwÿr mēhõ mẽ nhũm mẽ hkôt kapêr o pa.

Nom koja mẽ kapêr mar kêt nê. Koja mẽ kuma nê ãm kuma.

Te pry kamã kên nôr nhũm mẽ kot nhãm pry nê mēnh kaxyw hkamnâr nê ho amnhî par krã hi kukênh pyrâk o koja mẽ amnhî nhîpêx.

No te mẽ kot nhãm pry nê mēnh kaxyw hkamnâr kêt pyrâk xwÿnhjaja koja mẽ kurom nhÿrmã ma Tirtũm nhõ krî hwÿr api.

Hãmri nê hkînh nê pa ho pa. Anê. Nom kên kumrêx jarênh kêt nê. Na prem Jesus ã kuxi nê ã harênh anê. Ijaew te mẽ kot kên nhîpêx pyrâk o Jesus nhîpêx nê amnhî kaxyw hkôt hamaxpêr kêt nê axtem nê hkaga nê ãm kamã gryk pix o ri pata ã nhũm mẽ harê. No mẽ kot amnhî kaxyw hkôt hamaxpêr ronhÿx Jesus te kên kot mẽ kêp àmnâr pyrâk kêt nê. Jakamã ã mẽ harênh kot anhÿr.

10

¹Hêxta waa nê. Ijaxwÿja ixpê Ijaew. Mẽ kêp ixkwÿ jakamã kêp apu mẽ kot amnhî kaxyw Jesus mã hamaxpêr nê hkôt amnhî xunhwÿr ronhÿx pa ixkînh tÿx kumrêx. Inhmã mẽ kêp Tirtũm kra hprãm tÿx kumrêx kênã. Inhmã ja prãm xàj na pa hte mẽ ho Tirtũm wÿr rãhã ho ri ixpa. ²Ra ixte mẽ omunh mex. Mẽ kãm Tirtũm mã tanhmã amnhî nhîpêx to hprãm tã no ãm mẽ kot hprî hã kapêr mar kêt. Jakamã na htem tee ri tanhmã kãm amnhî nhîpêx to ho ri pa hprãm kaprÿ. ³Nhũm pre Tirtũm tee ri amnhî tã mẽ omu nê hamaxpêr o:

—Koja mēhõ amnhî kaxyw Ixkra Kris kôt hamaxpêr nê hkôt amnhî xãm pa ja hã omu nê kot amnhî to mex xwÿnh ã harê nê ho ixkra kurê

kumrêx. Nom na hte Ijaew ohtô nê ã amnhî nhîpêx anhÿr kêt nê.

Anhÿr o mẽ harê. ãm hãmri na ã mẽ harênh anê. Na htem ãm axtem nê hamaxpêr o:

—Tk. Kot paj amnhî kaxyw Kris kôt ijamaxpêr nê hkôt amnhî xãm kêt nê. Kot paj ãm pam amnhî krã hkôt tãm ri amnhî nhîpêx o ri ixpa. Mẽ ixpê Ijaewjê mẽ ixte amnhî nhîpêx xà hkôt. Hãmri nhũm Tirtũm ja hã ixpumu nê amnhîm inhmex ã ijarê. Nom kot paj Kris kôt amnhî xãm kêt nê. ãm kwarî ho kwarî.

Anhÿr ã amnhî jarê. ⁴Nom na htem ãm htÿx ri amnhî krã hkôt amnhî to mex o pa hã amnhî kamnhîx kaprÿ. Koja mẽ tee ri kãm finat Mojes kapêr kôt amnhî nhîpêx o ri pa hprãm kaprÿ. Jesus tapxipix na pre tãm amnhî nhîpêx mex rãhã ho pa. Na pre Tirtũm kapêr kôt amnhî nhîpêx mex o ri pa nê aa kapêr õ nhîrôp ãm nê hkwÿm ri tanhmã amnhî tomnuj to hkêt nê. Kot amnhî tomnuj kêt xwÿnh ã ãm pixi mex na. Jakamã tapxipix kukwak ri na hte Tirtũm amnhîm mẽ pahte amnhî to mex xwÿnh ã mẽ pajarê.

Tirtũm kãm mẽ pahpiitã mẽ pahto hkra hprãm ã harênh

⁵Nê amnepêm na pre finat Mojes Tirtũm nhÿ hã Ijaew mã tanhmã ujarênh to nê hã kagà. Nê mẽ kãm ujarênh o:

—E kot kaj mẽ atõ Tirtũm nhÿ hã ixujarênh ma nê hkôt amnhî nhîpêx mex o ri apa nê hkwÿm ri tanhmã amnhî nhîpêx to hkêt nê. Hã koja Tirtũm hã apumu nê amnhîm ate amnhî to mex xwÿnh ã ajarê ka nhÿrmã kuri atîr tũm nê amex nê apa ho apa. Anê.

⁶ ã mẽ kãm kapêr anhÿr tã mẽ pahte Mojes kapêr xà hkôt amnhî nhîpêx o papaja na mẽ pahpê hihtÿx kumrêx. Tirtũm kapêr tũm na. Kapêr ã kagà kamã kot mẽ pamã mẽ pahte tanhmã amnhî nhîpêx to hã karôja ohtô rax kumrêx jakamã pu mẽ tee ri pamã piitã hkôt amnhî nhîpêx prãm

kaprÿ. Nhũm Tĩrtũm tee ri amnhĩ tã mẽ pajamã hãmri nẽ mẽ pahwÿr Kra Jejus mẽ. Jakamã na pu htem amnhĩ kaxyw hkõt pajamaxpër nẽ hkõt amnhĩ xunhwÿ nhũm Tĩrtũm hã mẽ pahpumu nẽ kukwak ri mẽ pahto hkra kurê kumrêx. Kra kukwak ri kot mẽ pahto hkra kaxyw kot mẽ pahwÿr mẽnh nhũm mẽ kot hpĩr nhũm akupÿm ho htĩr jakamã na pu htem harênhja ma nẽ pajamaxpër o:

–Nà na xep pre Jejus ixto ixpê Tĩrtũm kra. Anẽ.

Nom xà na hte Tĩrtũmja ã mẽ pamã kapër anẽ nẽ mẽ pamã:

–E kot kaj mẽ ma kaxkwa hwÿr api nẽ Kris japrõ nẽ man amnhĩ kõt akupÿn o wrÿ pa ja hã mẽ apumu nẽ mẽ ato ixkra.

Anhÿr o mẽ pamã kapër? Nà na hte ã mẽ pamã kapër anhÿr kêt nẽ. Tanhmã kot puj mẽ amnhĩ to nẽ ã amnhĩ nhĩpêx anẽ? ⁷ Rÿ xà na hte ã mẽ pamã kapër anẽ nẽ mẽ pamã:

–E na pre Krisja ty. Jakamã mẽ kam nẽ ma hwÿr mra nẽ akupÿm amnhĩm ho htĩr. Hãmri pa ja hã mẽ apumu nẽ mẽ ato ixkra.

Anhÿr o mẽ pamã kapër? Nà na hte ã mẽ pamã kapër anhÿr kêt nẽ. Tanhmã kot pu mẽ amnhĩ to nẽ akupÿm ho htĩr? Ja pyrã nẽ na hte Tĩrtũm mẽ pamã mẽmoj tã karõ pu mẽ kãm ho anhÿr nhũm ja hã mẽ pahpumunh kõt mẽ pahto hkra hkêt nẽ.

⁸ Æm mẽ pahte amnhĩ kaxyw Jejus kõt pajamaxpër nẽ hkõt amnhĩ xunhwÿr ã mẽ pahpumunh kõt pix mã na hte mẽ pahto hkra. Hãmri nẽ mẽ pahwÿr Karõ rê nhũm mẽ pahkarõ mã gjêx jakamã mẽ pahte Tĩrtũm kãm hprãm xà hkõt amnhĩ nhĩpêx o papaja na mẽ pahpê hihtÿx kêt. Te kapër ra mẽ pahkrã hi kaxwÿnh kãm hikwÿ pyrãk o pu mẽ piitã mẽ kãm harênh o ri mẽ hkõt papa. Jakamã na pa hte mẽ piitã mẽ kot amnhĩ kaxyw Jejus kõt hamaxpër kaxyw tanhmã mẽ kãm harênh to ho ri mẽ hkõt ixpa nẽ mẽ kãm:

⁹ –Kot ka mẽ atõ Jejus kêp anhõ Pahihti hã harẽ nẽ Tĩrtũm kot akupÿm

ho htĩr kõt ajamaxpër. Hã koja Tĩrtũm ja hã apumu nẽ anê ate amnhĩ tomnuj o hapêx nẽ ato hkra. Æm ja pix ã mẽ pahpumunh kõt na hte mẽ pahto hkra. Anẽ.

¹⁰ Nẽ na pu htem mẽ pahkrãhi kaxwÿnh kãm amnhĩ kaxyw Jejus mã pajamaxpër. Nẽ mẽ pajakwa ho kêp mẽ panhõ Pahihti hã harẽ. Hãmri nhũm Tĩrtũm ja hã mẽ pahpumu nẽ amnhĩm mẽ pahte amnhĩ to mex xwÿnh ã mẽ pajarẽ nẽ mẽ pahto hkra.

¹¹⁻¹³ Tã mẽ pahte amnhĩ kaxyw Jejus kõt pajamaxpër nẽ hkõt amnhĩ xunhwÿr xwÿnhjaja kot puj mẽ pahkĩnh nẽ papa ho papa. Mẽ pahpiitãã. Ijaew nẽ Ijaew kêt xwÿnhjaja. Mẽ pahpiitã mẽ panhõ Pahi Maatija ãm pyxi mex na. Jakamã koja Ijaewjê hõ rÿ Ijaew kêt xwÿnhjê hõ amnhĩ to kuwÿ nhũm kuma nẽ ho hkra. Kapër ã kagà htũm kot ja jarênh kot:

Mẽ kãm kêp Tĩrtũm kra hprãm xwÿnhjaja koja mẽ amnhĩ to Tĩrtũm wÿ nhũm mẽ kuma nẽ Jejus kot mẽ nê htyk kukwak ri mẽ nê mẽ kot amnhĩ tomnuj o hapêx nẽ mẽ ho hkra nhũm mẽ hkĩnh nẽ pa. Anẽ.

¹⁴⁻¹⁵ Xà na htem kormã amnhĩ kaxyw Kris mã hamaxpër kêt rãhã amnhĩ to Tĩrtũm wÿ nhũm mẽ kuma nẽ mẽ ho hkra? Nà tanhmã kot wem amnhĩ to nẽ amnhĩ kaxyw kãm hamaxpër kêt rãhã amnhĩ to kuwÿ? Na hte Tĩrtũm ma mẽ hwÿr mẽ hkwÿjê rê nhũm mẽ ma mẽ hwÿr mra nẽ Tĩrtũm kapër o mẽ ahkre ho ri mẽ hkõt pa. Nhũm mẽ hkwÿjaja mẽ kuma nẽ amnhĩ kaxyw Jejus kõt hamaxpër nẽ amnhĩ to Tĩrtũm wÿ. Kapër ã kagà htũm kot ja jarênh kot:

Koja mẽmoj mex jarênh xwÿnhjaja ma mẽ hwÿr mra.

Nẽ mẽ hwÿr hpõx o mõ nhũm mẽ amÿm amnhĩ wÿr mẽ omu nẽ hkĩnh nẽ. Anẽ.

¹⁶ Tã ra mẽ piitã kot kapër mar tã piitã amnhĩ kaxyw hkõt hamaxpër kêt nẽ. Jakamã nhũm finat Ijais tee ri ja hã mẽ omu nẽ Tĩrtũm mã mẽ harênh o:

Pa Pahi Maati. Kwa ra mẽ kot akapêr mar tỳx tâ akôt amnhĩ nhĩpêx kêt nê. Mẽ kãm akapêr kôt amnhĩ nhĩpêx o pa hprãm kêt. Na htem ãm grêre nê akôt amnhĩ xunhwỳ nê akôt amnhĩ nhĩpêx o ri pa. Anê.

17 Kot anhỹr tâ ãm mẽ kot Kris kapêr jarênh mar kôt pix mã na htem amnhĩ kaxyw hkôt hamaxpêr. Koja mẽ harênh mar kêt tâ tanhmã koja wem amnhĩ to nê amnhĩ kaxyw hkôt hamaxpêr nê hkôt amnhĩ xunhwỳ?

18 Mãn ka mẽ atô atỳx ã ajamxpêr anhỹr o:

—Kõ mãn Ijaew kormã Jesus kot mẽ panê tanhmã amnhĩ nhĩpêx to hã harênh mar kêt jakamã na mẽ kormã hkôt amnhĩ xunhwỳr kêt nê.

Anhỹr o ajamxpêr. Nom ja kot anhỹr kêt. Ijaew piitã ra mẽ kot harênh mar kênã. Tĩrtũm kapêr ã kagà htũm kot ja hã mẽ harênh kot:

Na prem ma mẽ piitã mẽ kãm ja jarênh o ri mẽ hkôt pa nhũm mẽ piitã kuma. Anê.

19 Tã mãn ka prem ra ja ma nê atỳx ajamxpêr o:

—Kot anhỹr tâ no mãn kormã hprĩ hã Jesus jarênh mar kêt jakamã mẽ hkôt amnhĩ xunhwỳr kêt nê. Anê.

Nom ja haxwỳja kot anhỹr kêt. Ra mẽ kot hprĩ hã harênh mar mex tâ kuma nê ãm kuma nê amnhĩ kaxyw kãm hamaxpêr kêt nê. No mẽ apê Ijaew kêt xwỳnh kwỳjaja na ka mẽ kurom harênh ma nê amnhĩ kaxyw hkôt ajamxpêr nê hkôt amnhĩ xunhwỳr kurê kumrêx. Hãmri nhũm Ijaew tee ri ja hã mẽ apumu nê mẽ akamã gryk tỳx nê. Nom ra Tĩrtũm kot ã mẽ hkukamã mẽ kot amnhĩ nhĩpêx anhỹr ã mẽ omunh nê mẽ harênh kot anhỹr kênã. Na pre finat Mojes mẽ kãm tanhmã hã kagà hto. Te Tĩrtũm tãm kot mẽ hã kagà pyrã nê kapêr ã kagà htũm kamã kot mẽ harênh kot: Mẽ ate mẽ kamã mẽ akahak o apa xwỳnhjaja.

Mẽ kot htỳx ri amnhĩ nhĩpêx o mẽ pa hã mẽ ate mẽ harênh tâ no kot paj mẽ arom amnhĩm mẽ kot

amnhĩ to mex xwỳnhjê hã mẽ harê.

Kot kaj mẽ tee ri ja hã mẽ omu nê mẽ kamã agryk tỳx kumrêx.

Nê mãnên pa ixte mẽ ho mex ã ixpumu nê mẽ hã ixkamã agryk nê. Anê.

20 Nê finat Ijais na pre haxwỳja ã mẽ harênh anê. Na pre kãm amnhĩ kwỳ pê Ijaew puma hkêt nê xatã Tĩrtũm nhỹ hã tanhmã mẽ kãm Ijaew kêt xwỳnhjê jarênh to ho pa. Te Tĩrtũm tãm kot mẽ harênh pyrãk o mẽ kãm:

Nã Ijaew kêt xwỳnhjaja kot Tĩrtũm japêr kêt tâ koja tãm mẽ kãm amnhĩ to amnhĩrĩt nhũm mẽ hkôt amnhĩ xunhwỳ.

Mẽ kot kormã amnhĩ kaxyw kãm hamaxpêr kêt tâ koja tãm mẽ kãm amnhĩ to amnhĩrĩt. Anê.

21 ã Ijaew kêt xwỳnhjê jarênh kot anhỹr. Nê axte mã tanhmã Ijaewjê jarênh to kot:

Te mẽ katorxã kot tanhmã hkrajê ho mex to kaxyw tee ri amnhĩ wỳr mẽ kãm ãkjêr pyrãk o na hte Tĩrtũm Ijaewjê nhĩpêx o pa.

Jao tee ri kãm tanhmã mẽ ho mẽ mex to hprãm tâ no nhũm mẽ amnhĩ tâ kuma nê ãm kuma nê hkôt amnhĩ nhĩpêx kêt nê. Anê.

11

Tĩrtũm kot Ijaew kamã ukapri hã harênh

Matêwre 13.10-17

1 Tã ra Ijaew kot Tĩrtũm kaga jakamã mãn ka mẽ atô mẽ harênh ma nê ajamxpêr o:

—Mãn pre Tĩrtũm tee ri amnhĩ tâ mẽ omu nê amnhĩ pyrã nê mẽ hkaga.

Anhỹr o ajamxpêr. Nom na pre mẽ hkaga hkêt nê. Ijaxwỳja ixpê Ijaew na pa. Mẽ urãk nê ixpê Ijaew pãr krax pê finat Apraãw kanrêhã htãmnhwỳ Pêjamĩ kanrêhã hõ na pa. Tã xã na pre Tĩrtũm ixkaga? Nã kot ixkaga hkêt.

2 Amnepêr kormã mẽmoj piitã hkêt ri na pre mẽ ixpê Ijaew hkukamã mẽ ixto hkra hã amnhĩ jarê. Tã nhũm amgrã xohtô nê hapêx nhũm mẽ hapôj hãmri nê Tĩrtũm kôt amnhĩ nhĩpêx o

pa hkêt nê. Hâmri nhũm finat Erisja tee ri mẽ kot amnhĩ nhĩpêx ã mẽ omunh o pa nê Tĩrtũm mã tanhmã mẽ harênh to nê mẽ hã kagà. Nê hã kagà ho:

³ Kwa Tĩrtũm. Mẽ ixte amã amnhĩ jarênh xà hã mẽsti hkwý na prem ra hkrakrak pa. Nê anhỹ hã akapêr jarênh o ri mẽ pa xwýnh kwý nhĩmex rax nê. Âm papxipix na pa arĩ ixtĩr nê ri ixpa nom nhũm mẽ ra kot ixpĩr kaxyw ixtã amnhĩ jarê. Anê.

⁴ Tã tanhmã na Tĩrtũm kutã kãm kapêr to? Na pre kãm:

Nà kapxipix na ka arĩ atĩr kêt nê. Arĩ mẽ ohtô nê apyrà nê amnhĩ kaxyw ixkôt hamaxpêr. Mẽ ohtôô. Arĩ mẽ kêp 7.000 nê akwýjê rom ri sãnti Paaw kutã hkônkrã ho hkrĩ nê kãm mex ã harênh kêt nê. Anê.

⁵ Tã arĩ ã jarãhã mẽ kot ã amnhĩ nhĩpêx anhỹr kênã. Tĩrtũm kãm Ijaew japê jakamã mẽ kamã ukaprĩ. Jakamã nhũm ra mẽ hkwýjaja mẽ pahpyrà nê amnhĩ kaxyw Kris kôt hamaxpêr nhũm Tĩrtũm mẽ ho hkra.

⁶ Nom mẽ kot amnhĩ to mex ã mẽ omunh xà hkôt mẽ ho hkra hkêt nê. Amarĩ kãm mẽ hapê htũm xà hkôt na hte mẽ ho hkra. Kop apu mẽ kot amnhĩ to mex ã mẽ omunh xà hkôt kot mẽ ho hkra ronhỹx amarĩ mẽ ho hkra hkêt nê. Nhỹx mẽ kot tanhmã amnhĩ nhĩpêx to ho pa hã mẽ omunh xà hkôt pix mã mẽ ho hkra.

⁷ Ijaew piitã Tĩrtũm kot amnhĩm mẽ mex ã mẽ harênh prãm tã no ãm mẽ grêre nê hamaxpêr xà hkôt Jejus kôt amnhĩ xunhwý. Na htem ohtô rax nê kapêr ma nê ãm kuma nê tee ri kot amnhĩm mẽ mex ã mẽ harênh prãm xàj amnhĩ krã hkôt tanhmã amnhĩ nhĩpêx to ho ri pa. Nom ra mẽ kot Jejus kaga jakamã ã amnhĩ nhĩpêx anhỹr kaprý. Mẽ kot hkaga jakamã te ri mẽ hamak kro nê Tĩrtũm kapêr mar kêt pyrà nê pa. ⁸ Tĩrtũm kapêr ã kagà htũm kot mẽ harênh kot:

Tĩrtũm na hte mẽ kãm kapêr mar prãm kêt xwýnhjê pumu nê ãm mẽ omu nhũm htem htýx ri pa

ho pa. Nê Tĩrtũm mã hamaxpêr kêt o ri pa. Mẽ kot kapêr mar tã hprĩ hã mar týx kêt nê. Nê mẽ kot kapêr ã kagà kamã harênh tã hprĩ hã mar týx kêt nê. Jakamã na htem amnhĩ kaxyw hkôt hamaxpêr kêt o pa.

Tã na htem arĩ jarãhã ã amnhĩ nhĩpêx anhỹr o ri pa. Te mẽ nohkre nê mẽ hamak kro xwýnh kot amnhĩ nhĩpêx pyràk. Anê.

⁹ Nê amnepêm na pre pahi finat Taw-ija amnhĩ kwý Ijaew jarênh o:

Na htem htýx ri hkĩnh kãm apkur o pa. Te tutre kãm prãm nê kot rapuuti hwýr àr nê tee ri kãm kator prãm kaprý pyràk.

Ja pyrà nê mẽ kot Tĩrtũm kapêr mar kêt mýrapê koja Tĩrtũm tanhmã mẽ ho nhũm mẽ tee ri kãm mex prãm kaprý.

¹⁰ Te mẽ nohkre xwýnhjaja tee ri mẽ hpa nhĩpêx o pa pyràk.

Nê omnuj nê ã nê ho gjêx o ri pa pyràk o amnhĩ nhĩpêx o ri pa.

Anhỹr o mẽ harê. ¹¹ Tã arĩ Ijaew Jejus kaga nê kãm kapêr mar prãm kêt jakamã xà na Tĩrtũm tee ri ja hã mẽ omu nê mẽ hkaga kumrêx? Nà kot mẽ hkaga hkêt. Âm mẽ tãmjaja kêp Jejus prãm nòkati jakamã nhũm tee ri ja hã mẽ omu nê mẽ hpãnhã Ijaew kêt xwýnhjê mã amnhĩ to amnhĩrĩt nê mẽ hkwýjê ho hkra. Jakamã koja Ijaew kwýjaja ja hã mẽ omu nê tee ri hamaxpêr nê hamaxpêr o:

—Kwa na xep Ijaew kêt xwýnh kwýjaja Jejus kôt amnhĩ xunhwý nhũm Tĩrtũm ja hã mẽ omu nê mẽ ho hkra. Kwa mon pu prem axtem nê ri Jejus kaga? E pu mẽ kuxwar amnhĩ kaxyw hkôt mãn pajamaxpêr nê hkôt amnhĩ xunhwý kê Tĩrtũm ja hã mẽ pahpumu nê Ijaew kêt xwýnhjê pyrà nê mẽ pahto hkra. Hâmri nê amnhĩ mã mẽ pahte amnhĩ to mex xwýnh ã mẽ pajarê. Anê.

Ã Ijaewjaja hamaxpêr anhỹr kaxyw na pre Tĩrtũm Ijaew kêt xwýnhjê mã amnhĩ to amnhĩrĩt. ¹² Hâmri nhũm mẽ amnhĩ tã omu nê hkĩnh nê pa. No nhũm Ijaew kwýjaja.

Mê kãm Jejus prãm nõkati ho mẽ pa xwýnhjaja mẽ hkĩnhã hkaprĩ nẽ pa. Tã koja mẽ nhỹrmã amnhĩ kaprĩ hã amnhĩ pumu nẽ amnhĩ kĩnh kêt ã amnhĩ pumu hãmri nẽ Tĩrtũm kôt amnhĩ xunhwýr nẽ amnhĩ kaxyw Kra Jejus Kris mã hamaxpěr japêr. Koja mẽ ã amnhĩ nhĩpêx anẽ hãmri nẽ Ijaew kêt xwýnhjê pyrã nẽ hkĩnh nẽ ri pa. Hãmri nhũm Tĩrtũm ja hã mẽ omu nẽ Ijaew kêt xwýnhjê mẽ mẽ ho hpimràatã mẽ ho mex rax nẽ nhũm mẽ hkĩnh nẽ hamakêtkati nẽ pa ho pa.

Tĩrtũm kot Ijaew kêt xwýnhjê ho hkra hã harẽnh

¹³ E kot pajhpãnhã mẽ apê Ijaew kêt xwýnhjê mã ixkapêr nẽ mẽ atã kagã. Na pre Jejus ma mẽ awýr inhmẽ. ý hã ixte mẽ ajahkre ho ri mẽ akôt ixpa kaxyw. Pa pre ma krĩ hkwy kamã mẽ akwýjê hwýr mõi nẽ ixkĩnh kãm mẽ kãm kapêr jarẽnh o ri mẽ hkôt ixpa. Nhũm mẽ hkwyjaja inhma nẽ amnhĩ kaxyw Jejus kôt hamaxpěr nẽ hkôt amnhĩ xunhwý. ¹⁴ Tã koja apu ixkwýjaja mẽ harẽnh mar japêr. Ijaew tee ri mẽ apê Ijaew kêt xwýnhjê jarẽnhja ma hãmri nẽ ra amnhĩ kamã gryk japêr. Jao mẽ apyrã nẽ Jejus kôt amnhĩ xunhwý nẽ nhỹrmã kuri htĩr tũm nẽ mex nẽ pa ho pa. ¹⁵ Kormã mẽ kot amnhĩ kaxyw kãm hamaxpěr kêt jakamã na pre Tĩrtũm hpãnhã mẽ apê Ijaew kêt xwýnhjê mã amnhĩ to amnhĩrit. Ka mẽ ra krĩ piitã hkôt axohtõ nẽ hkôt amnhĩ xunhwý nẽ hkôt amnhĩ nhĩpêx mex o ri apa. Tã koja Ijaewjaja nhỹrmã amnhĩ kaxyw Tĩrtũm mã hamaxpěr nẽ mẽ apyrã nẽ Jejus kôt amnhĩ xunhwýr japêr. Hãmri nẽ te mẽhõ hkra kęp htyk nhũm hkaprĩ htã nhũm hkraja tanhmã amnhĩ to nẽ akupým kãm htĩr nhũm kot omunh nẽ hkĩnh tỳx kumrẽxta pyrãk o amnhĩ nhĩpêx. Jao Tĩrtũm mẽ kot hkôt amnhĩ xunhwýr ã mẽ omu nẽ hkĩnh nẽ. Pu mẽ pahpimràatã urãk nẽ pahkĩnh nẽ ri papa.

¹⁶ E pa mẽ amã mẽ ujarẽnhja ã ejêp kwý jarẽ. Koja mẽmo pĩ hpàr jarẽ mex nẽ hã koja pàr mex nẽ xa. Ja

pyrã nẽ Ijaew pàr krax finat Apraãwja kumrẽx na pre amnhĩ kaxyw Tĩrtũm mã hamaxpěr nhũm ho hkra. Jakamã koja nhỹrmã hkanrẽhã htãmnhwýjaja urãk nẽ amnhĩ kaxyw kãm hamaxpěr nhũm mã mẽ ho anẽ nẽ mããnẽn mẽ ho hkra nhũm mẽ mex nẽ pa. Te kot mẽmo pĩ hpàr jarẽ mexja nhỹ hã pàr mexta pyrãk.

¹⁷ Nẽ na htem akunĩ kamã mẽmo pĩ hpa jakà nẽ hamý nẽ ma amnhĩ kôt o mra. Nẽ ixkre kapem ra mẽ kot mẽmo pĩ hkreja hpa jakàr nẽ rẽnh xwýnh xwakre kamã wam pĩ hpa jakàr xwýnhta nhõ nẽ axpẽn tã hkaxpre nẽ gaa nẽ axpẽn jamýnh mex nẽ grã hkêt nẽ. Nẽ arĩ htĩr mex nẽ. Te kęp hpa kumrẽx pyrãk. Tã Ijaew kwý kot amnhĩ kaxyw Jejus kôt hamaxpěr xwýnhjaja te mẽ kęp ixkre kapem pĩ hpàrta pyrãk. No mẽ hkwyjaja mẽ kot Jejus kaga xwýnhjaja te mẽ kęp mẽ kot kęp hpa jakàr nẽ rẽnhta pyrãk. Jakamã nhũm Tĩrtũm te mẽ kot pàr pẽ hpa jakàr nẽ rẽnhta pyrãk o mẽ hipêx nẽ mẽ hkaga. Nẽ axtem te mẽ kot mẽmoj pàr pa jakàr nẽ hpãnhã kamã axtem pĩ hpa janhõr nẽ hã hkaxpreta pyrãk o mẽ apê Ijaew kêt xwýnhjê nhĩpêx nẽ mẽ amã amnhĩ to amnhĩrit. Ka mẽ ra amnhĩ kaxyw Jejus mã ajamaxpěr nẽ hkôt amnhĩ xunhwý nhũm Tĩrtũm mẽ ato mex nẽ.

¹⁸ Tã kër ka mẽ arĩ Ijaew o mex o ri apa. Tanhmã ri mẽ hipêx to mã ajamaxpěr to hkêt nẽ. Rý ajamaxpěr o:

—Nà ãm hãmri na Tĩrtũm mẽ hkaga nẽ ãm kãm mẽ papxipixjê japê.

Anhỹr o ajamaxpěr kêt nẽ. Ijaew te ixkre kapem pĩ hpàr mexta pyrãk. No mẽ kajaja te mẽ ate akunĩ rũm pĩ hpa kot ixkre kapem pàr mex pix kukwak ri htĩr nẽ hã harirta pyrãk. Kêt akunĩ rũm pĩ hpa jakàr kukwak ri na hte ixkre kapem pàrta htĩr nẽ kuhẽ hkêt nẽ. Kop apu pàrta mex kêt ronhỹx ra akunĩ rũm hpaja grã pa. Ja pyrã nẽ Ijaew kukwak ri kot kaj mẽ nhỹrmã Tĩrtũm ri atĩr tũm nẽ apa ho apa. Jakamã kwa kër ka mẽ ate amnhĩ to rũnh o mẽ hakrenh ã amnhĩ

to jarkrar kêt nê. ¹⁹ Mân ka mê atô ajamaxpêr o:

–Ra Tîrtûm kot Ijaew kaga nê hpânhâ mê pajaja mê ixto hkra jakamâ mân kâm mê ijapê ho mê hakre. Ra mê hpânhâ mê ixto hkra kênâ. Anê.

²⁰ Nà âm hāmri na pre Tîrtûm Ijaew kwý kaga. Mê kot Jejus kôt amnhî xunhwýr kêt mýrapê na pre te mēmo pî hpa jakàr nê rēnhta pyrāk o mê hipêx. Ka mê ra mê kurom amnhî kaxyw hkôt ajamaxpêr jakamâ nhūm Tîrtûm te kot akunî kamâ pî hpa jakàr nê ho htēm nê ixkre kapem pî hpār mex ã hanhōr nê hã hkaxpre pyrāk o mê anhîpêx. Nom kwa kêr ka mê ja hã amnhî pumu nê ri hã Ijaewjê mã amnhî to jarkrar kêt nê. Âm amnhî to mex nê Tîrtûm kapêr kôt amnhî nhîpêx mex o ri apa. No kot kaj mê ã amnhî nhîpêx anhýr kêt nhūm amnhî tâ mê apumu nê ra kot Ijaew kwý nhîpêxta pyrâ nê tanhmã mê ato nê mê akaga.

²¹ ã Ijaew jarēnh kot anhýr. Te mê kêp pâr mex pyrāk. Tã nhūm mê kot Jejus kôt amnhî xunhwýr kêt jakamâ nhūm Tîrtûm te kot pî hpa jakàr nê rēnhta pyrāk o mê hipêx nê mê homnuj nê. Kot kaj mê urāk nê ã amnhî nhîpêx anê nhūm mã mê ato anê nê. ²² Ijaew kot Jejus kôt amnhî xunhwýr kêt jakamâ nhūm Tîrtûm mê hpânhâ mê apê Ijaew kêt xwýnhjê mã amnhî to amnhîrît. Tã ka mê Ijaew rom amã Jejus prãm nhūm Tîrtûm ja hã mê apumu nê amnhî pyrâ nê kâm mê aprãm nê mê akamã ukaprî rãhã nê pa ho pa. Tã kwa mê okora. Kêr ka mê hkôt pix mã amnhî nhîpêx o ri apa rãhã ty. Kot kaj mê hkaga nhūm amnhî tâ mê apumu nê te Ijaew kot hkaga xwýnhjê nhîpêx pyrāk o mê anhîpêx nê mê akaga.

²³ Koja Ijaew nhýrmã Jejus kôt amnhî xunhwýr japêr nhūm Tîrtûm ja hã mê omu nê mê ho hkra. Te mê kot pâr pa jakàr nê rēnh nhūm grà par xwýnh nhūm kot akupým amnhîm hamýnh nê ixkre kapem pâr wýr o

htēm nê akupým hã hanhōr nê hã hkaxpre ho htýx nhūm kukwak ri akupým htírta pyrāk. Ja kêp tanhmã kute hkêt. Kot ã hipêx anhýr kaxyw àhpumunh týx. ²⁴ Mê apê Ijaew kêt xwýnhjaja te mê ate akunî kamâ pî hpa jakàr nê ixkre kapem pâr ã hanhōr nê hã kaxpreta pyrāk. Jao Jejus kôt amnhî xunhwý nhūm mê ato hkra kurê kumrêx. No Ijaew te mê kêp ixkre kapem pârta pyrāk jakamã Tîrtûm kot akupým hanhōrta tanhmã kêp kute hkêt. Kêp Tîrtûm kênâ kot tanhmã kêp kute. Jakamã koja mê hkôt amnhî xunhwý nhūm amnhî tâ mê omu nê mê ho hkra kurê kumrêx.

Tîrtûm kot mê piitã mê kamã ukaprî hã harēnh
Matêwre 23.37-39; Rukre 21.24; Juãw 10.16

²⁵ E kot paj mê amã mēmoj to amnhîrît ka mê inhma. Nà na pa ra mê amã Ijaew krã xihtýx xwýnhjê jarê ka mê harēnh ma. Ra mê kot Jejus kaga hã mê harēnhja. Tã koja mê ã amnhî nhîpêx anhýr o pa rãhã hkêt nê. Na hte Tîrtûm kormã amnhî tâ mê apê Ijaew kêt xwýnhjê jamār o pa. Amnepēm na pre amnhî kaxyw mê akukamã tanhmã mê akwýjê jarēnh to. Tã kot kaj mê kot tanhmã mê ajarēnh to xwýnh piitã Jejus kôt amnhî xunhwýr pa nhūm rî Ijaew amnhî to hapu nê kormã hkôt amnhî xunhwý. ã mê kot amnhî nhîpêx anhýr kaxyw. Jakamã kwa kêr ka mê ri ja hã amnhî to jarkrar o ri mê hkôt apa hkêt nê. Mê pahpyrà nê mê kot Jejus kôt amnhî xunhwýr mã xwýnh kênâ. ²⁶ Koja Tîrtûm nhýrmã Ijaew piitã ho hkra. Kapêr ã kaga htûm kot mê harēnh kot:

Nhýrmã kot mê ate amnhî tomnuj pē mê apytâr mã xwýnhja Ijaew ô koja.

Jako hkanrêhã htãmnhwýjê hō koja. Koja nhýrmã wrý nê mê ate amnhî tomnuj pē mê apytã nê mê ate amnhî tomnuj o hapêx pa. Anê.

Anhýr o kot harēnh. ²⁷ Nê mãânēn ja:

Kot paj mẽ nê mẽ kot amnhĩ tomnuj o ijapêx pa.

Amnepê mã ixte mẽ hkukamã mẽ hã amnhĩ jarênh xà hkôt. Anê.

²⁸ Nom arĩ mẽ kãm Jejus mar prãm kêt jakamã te mẽ kot kutã amnhĩ xunhwÿr pyræk o amnhĩ nhĩpêx. Tã ã mẽ kot amnhĩ nhĩpêx anhÿrja ri ka mẽ kamjaja mẽ hpãnhã mẽ apê Tĩrtũm kra. Nom nhũm Tĩrtũm arĩ kãm mẽ hapêê. Na pre amnepê mã kot tanhmã mẽ ho mex to hkukamã tanhmã mẽ hã amnhĩ jarênh to. Mẽ hpàr kraxjê mã tanhmã mẽ hã amnhĩ jarênh to. Finat Apraãw mẽ Ijak mẽ Jakoja mã mẽ hkanrêhã mẽ htàmnhwÿjê hã tanhmã amnhĩ jarênh to.

²⁹ Na hte Tĩrtũm mẽmoj tã tanhmã amnhĩ jarênh to nê ãm hãmri hã amnhĩ jarê nê amnhĩ jarênh xà hkôt tanhmã hipêx to. No na hte mẽmoj tã amnhĩ jarênh tã gaa nê ho hamakêtkati hkêt nê. Rÿ hpãnhã axtem tanhmã hipêx to hkêt nê. Na hte mẽmoj tã amnhĩ jarênh xà hkôt tanhmã hipêx to. Tã ra amnepê mã kot Ijaew o mex ã amnhĩ jarênh jakamã koja nhÿrmã mẽ ho mex rax nê ã mẽ hipêx anhÿrja o hamakêtkati hkêt nê.

³⁰ No mẽ kajaja mẽ apê Ijaew kêt xwÿnhjaja. Amnepêm na ka prem ajaxwÿja Tĩrtũm kôt amnhĩ nhĩpêx kêt nê. Tã nhũm mẽ akamã ukapri nê kãm mẽ ajapê nê. Ka mẽ ra harênh ma nê hkôt amnhĩ xunhwÿ nê hkôt amnhĩ nhĩpêx mex nê. No ãm Ijaew kukwak ri. Mẽ kot kapêr kôt amnhĩ nhĩpêx o pa hkêt jakamã nhũm Tĩrtũm mẽ hpãnhã nhãm mẽ amã amnhĩ to amnhĩrit nê mẽ ato mex rax nê. Jakamã te Ijaew kukwak ri mẽ amex nê ri mẽ apa pyræk. ³¹ Tã koja nhÿrmã kot mẽ anhĩpêxta pyrã nê Ijaew ho hkra. Nê mẽ apyrã nê mẽ kamã ukapri nê. Mẽ kot mẽ apyrã nê amnhĩ kaxyw Kra hkôt hamaxpêr xwÿnhjaja nhũm mẽ apyrã nê mẽ ho hkra nê mẽ ho mex nê. ³² Mẽ apê Ijaew kêt xwÿnhjaja nê mẽ ixpê Ijaew mẽ pahte xypên pyræk. Na pu htem pahpiitã

Tĩrtũm kapêr piitã hkôt amnhĩ nhĩpêx rãhã ho ri papa hkêt nê. Tã kot puj mẽ tee ri ja hã amnhĩ pumu nê amnhĩ to kuwÿ nhũm mẽ pama nê amarĩ mẽ pakamã ukapri nê mẽ pahto mex nê.

Pawre kot Tĩrtũm mex o mex ã harênh

Epês 3.20; Korosê 1.16; Wam Korĩt 2.9, 2.16

³³ Tĩrtũmja àhpumunh tÿx o àhpumunh tÿx. Nê ukapri ho ukapri nê mex o mex. Mẽ pahtõ na pu uræk nê ã amnhĩ nhĩpêx anhÿr o papa? Nà amrakati kumrêx. Nê mẽ pahtõ na pahte Tĩrtũm jamaxpêr kôt omunh? Nà mẽ pahte hamaxpêr kôt omunh kêt. ³⁴ Kapêr ã kagà htũm kot ja jarênh kot:

Mẽ pahte Tĩrtũm jamaxpêr kôt omunh kêt.

Nê kot pu mẽ pahtõ mẽmoj tã hakre hkêt nê.

Mẽ parom àhpumunh o àhpumunh xwÿnh kênã.

³⁵ Nê mẽ pahtõ kot puj we kãm pakapêr nê kãm: “Kwa Tĩrtũm. Ra ixte amã mẽmoj nhõrta pãnhã kwa amnhĩ xwar inhmã mẽmoj gõ.” Anê.

Nà mẽmoj piitã õ kênã kot puj kêt ri ã kãm mẽmoj nhõr ã amnhĩ jarênh anê. Anê.

³⁶ Tãm na pre amnhĩ kaxyw mẽmoj piitã ho kator pa. Nê ãm pix kukwak ri na mẽmoj piitã htĩr nê pa. Jakamã kwa pu mẽ kãm mex o mex ã mãn harênh rãhã ho ri papa.

12

Mẽ pahte Tĩrtũm mã amnhĩ nhõr ã mẽ pajarênh

Wam Korĩt 6.20; Epês 4.1; Piripos 4.8-9; Korosê 1.10; Wam Tesarõn 4.1-3; Wam Pêtre 2.11

¹ Kwa Jejus kôt ixkwÿjaja. Tĩrtũm na hte mẽ pahto mex nê mẽ pakamã ukapri rãhã jakamã na pa ã mẽ amã ixkapêr anê. Kwa mẽ tokyx kãm amnhĩ jarê nê kãm amnhĩ gõ. Te mẽ ate kãm hkĩnh xà nhõr pyræk o amnhĩ nhĩpêx nê kãm amnhĩ gõ. Jao mẽ amã kapêr kôt pix mã amnhĩ nhĩpêx o ri

apa hprâm ã kãm amnhĩ jarẽ. Nẽ kãm hprâm xà hkôt pix mã tanhmã amã amnhĩ nhĩpêx to ho ri apa hprâm ã kãm amnhĩ jarẽ. Kot kaj mẽ ã kãm amnhĩ jarẽnh anẽ nhũm amnhĩ tã mẽ ama nẽ hkĩnh nẽ. ã mẽ pahte kãm amnhĩ jarẽnh anhỹrja na kãm mar prãm.

² Nẽ kær ka mẽ kãm Tĩrtũm prãm kêt xwýnhjaja kot amnhĩ nhĩpêx o ri amnhĩ nhĩpêx o ri apa hkêt nẽ. Nẽ mẽ amnhĩ to Tĩrtũm mãn wý kê mẽ amã mẽ ajamaxpêr mex jagjê. Kojã mẽ ama nẽ mẽ amã hagjê ka mẽ ra aprĩ hã hamaxpêr xà hkôt mẽ pahte amnhĩ to mex xà pumunh mex nẽ. Na pu htem hkôt amnhĩ nhĩpêx o ri papa nhũm amnhĩ tã mẽ pahpumu nẽ hkĩnh nẽ. Pu mẽ pajaxwýja ý hã pahkĩnh nẽ ri papa.

Kris kwýjaja kot tanhmã axpên nhĩpêx to hã mẽ kãm karõ

Rômân 12.1-11; Epes 4.11-16; Wam Pêtre 4.10-11

³ Nẽ na pre Tĩrtũm ixto mex nẽ. Nẽ mẽ akaxyw ixãm. Ixte mẽ amã Kra Jejus kot tanhmã mẽ panê amnhĩ nhĩpêx to hã harẽnh o ri mẽ akôt ixpa kaxyw. Tã na pa ã kagàja kamã mẽ amã harẽnh anẽ.

Jakamã kwa kær ka mẽ amnhĩ to jarkrar o ri mẽ kãm apa hkêt nẽ. ãm kwarĩ ho kwarĩ. Rý atýx ri ajamaxpêr o:

–Nà pa na ixte amnhĩ to mex o ixte ixkwýjê piitã mẽ hakrenh par.

Anhỹr ã amnhĩ to jarkrar o ri mẽ hkôt apa hkêt nẽ. Kêt mẽ ãm amnhĩ jarẽnh o:

–Na pa pre amnhĩ kaxyw Jejus kôt ijamaxpêr nhũm Tĩrtũm ixpumu nẽ ixto hkra. Jakamã na pa hte Jejus Kris pix kukwak ri tãm amnhĩ nhĩpêx o ri ixpa. No amnhĩ krã hkôt ã amnhĩ nhĩpêx anhỹr kêt nẽ. Anẽ.

⁴ E pa mẽ amã mẽmoj jarẽ ka mẽ inhma. Nà mẽ panhĩja pyxi htã kamã mẽmoj xohtô. Na kamã mẽ pano nẽ mẽ pajakwa. Nẽ kamã mẽ pajamak nẽ mẽ pahte. Na pu htem mẽ pano ho rĩt nẽ mẽ pajakwa ho pakapêr. Nẽ mẽ pajamak o ri ama

nẽ mẽ pahte ho ri mra. ⁵ Ja pyrã nẽ Kris kôt mẽ pahte amnhĩ xunhwýr xwýnhja ãm pyxi tã hkôt mẽ pahte amnhĩ xunhwýr xwýnhjaja mẽ paxohtô. Jakamã na pu htem ahpýnhã tanhmã axpên to mex to ho ri papa. Jao Kris kôt axpên to pahtõ nẽ pahtõx o papa.

⁶ Tĩrtũm na hte mẽ pahpê hkwy hã ahpýnhã mẽ pamã tanhmã mẽmoj tã karõ to nẽ kaxyw mẽ pahto mẽ paxihtýx. Tã kær pu mẽ ra kot mẽ pamã mẽmoj tã karõ xà hkôt kãm amnhĩ nhĩpêx rãhã ho ri papa. Jakamã kojã mẽhõ ate Tĩrtũm kapêr jarẽnh o ri apa kaxyw axãm nẽ amã anẽ ka Tĩrtũm kamnàr rom mẽ kãm kapêr jarẽnh mex o ri mẽ hkôt apa.

⁷ Rý ate akwýjê mã tanhmã axapênh to ho ri apa kaxyw axãm ka mẽ kãm axapênh mex o ri mẽ hkôt apa.

Rý ate Tĩrtũm kapêr ho mẽ ahkre ho ri apa kaxyw axãm ka ho mẽ ahkre mex o ri apa.

⁸ Rý ate Tĩrtũm kapêr o ri Jejus kôt mẽ akwýjê jamaxpêr o hihtýx o ri apa kaxyw axãm ka mẽ kãm kapêr jarẽnh pẽ mẽ ho mẽ hihtýx mex o ri mẽ hkôt apa.

Rý ka mẽ atõ akukrêx rax japêr nẽ ate mẽ kêp amrakati xwýnhjê mã mẽmoj nhõr o ri apa kaxyw axãm ka axãmnhĩx ri mẽ kãm mẽmoj nhõr o ri mẽ hkôt apa.

Rý ate akwýjê ho amnhĩptàr kaxyw axãm ka mẽ ho amnhĩptàr mex o ri apa.

Rý ate tanhmã mẽ akwýjê ho mex to nẽ mẽmoj to mẽ kutã anojarêt o ri apa kaxyw axãm ka akĩnh kãm ã mẽ hipêx anhỹr rãhã ho ri apa nẽ tanhmã akapêr punuj to hkukamã ri ajamaxpêr o ri mẽ hkôt apa hkêt nẽ.

⁹ Nẽ kær ka mẽ apiitã amã axpên kĩnh kãm axpên to mex rãhã ho ri apa nẽ ri axêx rom amã axpên kĩnh ã amnhĩ jarẽnh o ri apa hkêt nẽ. Nẽ mẽ kot amnhĩ tomnuj xà piitã hkaga hpa nẽ hpãnhã mẽ kot amnhĩ to mex xà pix pyr týx nẽ hkôt amnhĩ nhĩpêx rãhã ho

ri apa. ¹⁰ Nê mẽ apê Kris kwỳ hã amã axpên kĩnh kãm tãm axpên nhĩpêx o ri apa. Nê mẽ akwỳjaja mẽ kot amnhĩ to mex xwỳnh ã mẽ harênh o ri mẽ hkôt apa. No mẽ ri atỳx ajamaxpêr o:

–Nà koja mēhō ixkumrêx ixte tãm amnhĩ nhĩpêx xwỳnh ã ijarê pa rĩ kormã amnhĩ xwar tãm kot amnhĩ nhĩpêx xwỳnh ã harê.

Anhỹr o ajamaxpêr kêt nê. Kêr ka akumrêx tãm kot amnhĩ nhĩpêx xwỳnh ã harê.

¹¹ Nê kêr ka mẽ Tĩrtũm mã mẽmoj to anhỹr kaxyw nê kamã amã kaga hkêt kãm tanhmã kãm mẽmoj to ho ri apa. Jao akĩnh kamã kãm ho anhỹr mex nê.

¹² Nê mẽ nhỹrmã Tĩrtũm kot kaxkwa kamã mẽ ato mex rax kukamã ajamaxpêr nê akĩnh rãhã kãm mẽmoj to anhỹr o ri apa.

Nê kêr ka mẽ tanhmã amnhĩ to rỳ nhũm mēhō tanhmã mẽ ato ka mẽ akaprĩ nê ri apa htã no ãm tee ri amnhĩ kukamã ajamaxpêr o Tĩrtũm kaga hkêt nê. Arĩ amnhĩ to hwỳr rãhã ho ri apa. ¹³ Nê koja Kris kôt atōjê hō kêp amrakati ka mẽ ja hã omu nê anhō mẽmoj japêr nê mãmri kãm hkwỳ gõ. Nê amnhĩ wỳr awỳ nê tanhmã ho mex to.

¹⁴ Nê mẽ kot tanhmã mẽ atomnuj to xwỳnhjaja kêr ka mẽ amnhĩ tã mẽ omu nê agryk nê wajaga kot tanhmã amã ho kaxyw hwỳr atēm nê kãm tanhmã hã axãmnhēnh to hkêt nê. Kêt ãm ho Tĩrtũm pix wỳ nê kãm:

–Pa mẽ ijamār mex xwỳnh maati. Nà na ixkwỳjê hōja ã inhĩpêx anê. Tã nom kêr ka ixtã tanhmã homnuj to hkêt nê. ãm tanhmã ho mex to.

Anhỹr o mãn mẽ ho awỳ.

¹⁵ Nê koja akwỳjê hō mẽmoj tã hkĩnh nê. Ka omu nê uràk nê ỹ hã akĩnh nê. No koja mẽmoj tã hkaprĩ nê mỳr o nhỹ ka omu nê ra uràk nê ỹ hã akaprĩ nê.

¹⁶ Nê kêr ka mẽ piitã mẽ hipêx o axpên pyràk o ri apa. Te mẽ ate amnhĩ to rax o akwỳjê jakrenh o te mẽmoj kamã akahak o amnhĩ nhĩpêx pyràk kêt nê. Nê axàhpumunh tỳx o ate mẽ piitã mẽ hakrenh par pyràk o ri amnhĩ nhĩpêx o ri apa hkêt nê.

¹⁷ Nê koja mēhō tanhmã ato htã ka ãm amnhĩ tã omu nê tanhmã amnhĩ tã ho hkêt nê. Nê mẽ piitã mẽ noo mã tãm ri amnhĩ nhĩpêx o ri apa.

¹⁸⁻¹⁹ Nê kêr ka mẽ tãm ri axpên mã akapêr rãhã ho ri apa.

Nê kot kaj akrãmnhwỳ mẽ wa tanhmã axpên nhĩpêx to. Hãmri ka wa akupỳm tãm axpên xãm kaxyw kãm akapêr tã nhũm ama nê ãm ama nê akaga. Ka ãm amnhĩ tã omu nê kamã agryk kêt nê. Koja Tĩrtũm tãm tanhmã atã ho. Kapêr ã kagà htũm kot ja jarênh kot:

Kêr ka mẽ amnhĩ tã tanhmã kot ato xwỳnh to hkêt nê. Pa kot paj mẽ atã tanhmã ho. Anê.

Nê harênh kot:

²⁰ Kêr ka mẽ amã mẽ kãm mẽ akurê xwỳnhjê o mex pix o ri apa.

Kê mẽ kãm prãm ka ja hã mẽ omu nê mẽ kamã axukaprĩ nê mẽ kãm mẽmoj kwỳ gõ kê mẽ kuku.

Rỳ nhũm mẽ kãm kôr ka mẽ kãm gõ hkwỳ kê mẽ ho ixkō.

Kot kaj mẽ ã amnhĩ tã mẽ hipêx mex anê nhũm mẽ tee ri amnhĩ tã mẽ apumu nê amnhĩ kamã hpijaàm jao mẽ atã amnhĩ kamã gryk nê. Anê.

²¹ Nom kot kaj mẽ amnhĩ tã tanhmã mẽ homnuj to hãmri nê ajaxwỳja uràk nê amnhĩ tomnuj nê. Ja pymaj kêr ka mẽ amnhĩ rom tãm mẽ hipêx. Hãmri nhũm mẽ amnhĩ tã mẽ apumu nê mẽ apyrà nê tãm mẽ anhĩpêx japêr.

E kêr ka mẽ ã axpên nhĩpêx o ri apa anê.

13

Mẽ pahto amnhĩptàr xwỳnhjê jarênh Matêwre 22.21; Xitre 3.1; Wam Pêtre 2.13-17

¹ Nê kêr ka mẽ kot mẽ ato amnhĩptàr xwỳnhjê kapêr ma nê kapêr kôt ri amnhĩ nhĩpêx rãhã ho ri apa. Tĩrtũm kot mẽ pakaxyw mẽ unhwỳr kênã. Mẽ kot mẽ pahto amnhĩptàr o pa kaxyw na hte mẽ unhwỳ. ² Jakamã koja mēhō mẽ kapêr ma nê ãm kuma nê hkôt amnhĩ nhĩpêx kêt nê hãmri nê te kot Tĩrtũm kapêr mar nê ãm mar pyràk o amnhĩ

nhîpêx. Hâmri nhûm Tîrtûm tee ri ja hã omu nê nhÿrmã tanhmã hã ho.

³ Xà na hte tãm mẽ kot amnhî nhîpêx xwÿnhjaja kãm mẽ kot mẽ ho amnhîptâr xwÿnhjê pyma ho pa? Nà na htem kãm mẽ uma hkêt kãm ri pa. Âm mẽ kot amnhî tomnuj xwÿnh pixjaja na amnhî kamã kãm mẽ uma ho pa. Tã ka mẽ amã mẽ kot mẽ ato amnhîptâr xwÿnhjê pyma hprãm kêt xwÿnhjaja kêr ka mẽ kapêr ma nê hkôt amnhî nhîpêx kê amnhî tã mẽ apumu nê hkînh nê. Nê amnhîm mẽ ate amnhî to mex xwÿnh ã mẽ ajarê. ⁴ Tîrtûm nhÿ hã mẽ panhõ pahi kot mẽ pahto amnhîptâr jakamã na htem mẽ kãm mẽ pahto mex prãm nê. Nê kot pu mẽ pahtõ axtem nê tanhmã amnhî tomnuj to hãmri nhûm tee ri ja hã pajarênh ma nê tanhmã hã mẽ pahto. Âm hãmri na hte ã mẽ pahto amnhîptâr xwÿnhjaja mẽ panhîpêx anê. Tîrtûm kãm hprãm xà hkôt. ⁵ Jakamã kwa mẽ kapêr ma nê hkôt ri amnhî nhîpêx mex rãhã ho ri apa. Nom amã kot tanhmã ato pix pymaj hkôt ri amnhî nhîpêx kêt nê. Mãânên ã amnhî kukamã ajamaxpêr anê nê ajamaxpêr o:

—Nà Tîrtûm kot mẽ ixkaxyw unhwÿr jakamã na pa hte kapêr ma nê hkôt amnhî nhîpêx mex o ri ixpa.

Anhÿr o ajamaxpêr.

⁶ Nê mẽ pahto amnhîptâr xwÿnhjaja kot Tîrtûm nhÿ hã tanhmã mẽ panhîpêx to ho pa jakamã na pu htem mẽ àpênh pãnhã mẽ kãm amnhîre. Mẽ pahpiitã axpên kaxyw kãm kàxpore ho hkryre nê kugõ. Tanhmã kot ho mẽ pamã mẽmoj to mex to kaxyw. ⁷ Jakamã kêr ka mẽ hã apijaàm o ri apa kamã mãmrî mẽ kãm kàxpore hkwÿ ho hkryre nê òr o ri apa. Mẽ kot hã àhwÿr xà hkôt.

Mẽ pahte tanhmã axpên nhîpêx to hã mẽ pamã karõ

Matêwre 22.39-40; Karatas 5.13-15; Wam Juãw 3.11-24

⁸ Nê kêr ka mēhõ ho tewēn japêr nê tokyx kãm amnhîre. Nê mẽ amã axpên kînh o aa ho ajamakêtkati hkêt

nê. Jao mẽmoj to axpên kutã anojarêt rãhã ho ri apa. Kot kaj mẽ ã axpên nhîpêx anê nê Tîrtûm kapêr piitã hkôt amnhî nhîpêx mex o ri apa.

⁹ Amnepê mã na pre finat Mojesja Tîrtûm nhÿ hã Ijaew mã mẽmoj tã karõ nê mẽ kãm:

Kêr ka mẽ aprõ pix tânopxa nê nhãm mēnijê hõ kamã ri akurê ho apijaàm kêt o apa hkêt nê.

Nê mẽ anijaja mẽ amjên pix tânopxa nê nhãm ri mēmyjê hõ kamã akurê ho apijaàm kêt o ri apa hkêt nê.

Nê mẽ ri axpên par kêt nê.

Nê mẽ ri axpên pē axàhkînh o ri apa hkêt nê.

Nê mẽ amã ri axpên kukrêx kînh o ri amã ho anhõ hprãm o ri apa hkêt nê. Anê.

Nê mãânên ja:

Kêr ka mẽ nhãm mẽ axpên nhîpêx o te ka amã amnhî tã ma pyrãk. Jao tãm axpên nhîpêx o ri apa. Anê.

Ã kot mẽ kãm hã karõ kot anhÿr. Kot puj mẽ ã pamã pahkwÿjê kînh anê nê mãânên wam finat Mojes kot mẽmoj tã mẽ panhîgêjtjê mã karõ hkôt amnhî nhîpêx o ri papa rãhã nê. Jao axpên par kêt nê. Nê axpên pē paxàhkînh kêt nê. Nê axpên kutã panojarêt rãhã nê. ¹⁰ Koja mēhõ kãm amnhî tã ma pyrãk o hkwÿjê nhîpêx nê mẽ ho mex pix o pa. Jakamã kot kaj mẽ amã ri axpên kînh nê mẽmoj to axpên kutã anojarêt pix nê. Jao Tîrtûm kapêr piitã hkôt amnhî nhîpêx mex o ri apa.

¹¹ Amnepê mã mẽ pahte amnhî kaxyw Jesus kôt pajamaxpêr xà hã arîgrota ã na pre kormã akupÿn mẽ pahwÿr hpôx xà hã arîgro kormã hwÿr awry rax nê. Tã ra hwÿr ahtêp o mō. Koja tokyx akupÿn mẽ pahwÿr wrÿ nê ma akupÿm kaxkwa hwÿr mẽ pahto api. Jakamã kwa kêr pu mẽ arî hamãr rãhã ho ri apa. Jao tanhmã amnhî tomnuj to kaxyw nê pajamaxpêr o:

—Kwa koja Jesus tanhmã amnhî to nê jarãhã akupÿn wrÿk japêr. Tã kot pa ri ã amnhî nhîpêx anê nhûm wrÿ nê tee ri ja hã ixpumu pa amnhî kamã

ixpijaàm tỳx nê. Nà kot paj ã amnhĩ tomnuj anhỹr kêt nê. Anê.

Hãmri nê Jejus kamã ajamak pê kutêp Tĩrtũm kapêr kôt pix mã ri amnhĩ nhĩpêx mex rãhã ho ri papa.

¹² Na pu htem kamãt kãm gõr nê arĩgro jamãr pê kamã pajamak o panhĩkwỹ. Arĩgro te kêp Jejus akupỹn wrỹk pyrãk. Jakamã kwa pu mẽ kamã pajamak pê kãm panojarêt rãhã ho ri papa nê amnhĩ nê tanhmã mẽ omnu xà kute pumunh mex o ri papa. Te ho pôristi kot amnhĩ nê mẽ kot kãm mẽ hkurê xwỹnhjê pumunh mex pyrãk o Jejus kutêp tãm amnhĩ nhĩpêx o ri papa. Na pre tanhmã mẽ pahkrã htõ pu mẽ ý hã tãm ri amnhĩ nhĩpêx. Tã kêt pu mẽ arĩ ã amnhĩ nhĩpêx anhỹr o ri papa nê te mẽ pahte arĩgro hã mẽ pa xwỹnhjê kot amnhĩ nhĩpêx pyrãk o amnhĩ nhĩpêx. ¹³ Kot puj mẽ ã amnhĩ nhĩpêx anê nê mẽ piitã mẽ noo mã tee ri tanhmã mẽ pahte amnhĩ tomnuj to mã pajamaxpêr kêt nê. Jao amnhĩ kamã pahpijaàm nê ri papa hkêt nê. Nê pajamakêtkati nê paxãmnhĩx ri papa. Te ho hirã kamã ri mẽ pa xwỹnhjê kot amnhĩ nhĩpêx pyrã nê ãm ri paxãmnhĩx tãm amnhĩ nhĩpêx o ri papa.

Nê mẽ pahprõ pix tãnopxar o ri papa. Nê mẽ pahpipãnh nê ri papijapu ho ri papa hkêt nê.

Nê mẽmoj tã axpên mã paxàkjêr hkêt nê.

Nê mẽmoj tã axpên kãm pagryk kêt nê. ¹⁴ Nom kot puj mẽ axtem nê ã amnhĩ tomnuj anê nê mẽ pahte amnhĩ nhĩpêx tũm kôt pix mã amnhĩ nhĩpêx. Tã kêt pu mẽ ã amnhĩ nhĩpêx anhỹr pumaj hpãnhã amnhĩ to Pahĩti Jejus Kris wỹ nê kãm:

—Pa Jejus. Nà kormã jar apa ri na ka pre mẽ kot tanhmã amnhĩ tomnuj to kutã axihtỳx o axihtỳx nê aa tanhmã amnhĩ tomnuj to hkêt nê. Tã inhmã apyrã nê ixte amnhĩ tomnuj kutã ixihtỳx o ixihtỳx o ixpa hprãm. Anê.

Jao mẽ pajamaxpêr tũmja te ra kot amnhĩ tã mẽ pahto htỳx kêt pyrãk o pu mẽ amnhĩ nhĩpêx o ri papa.

14

Mê pahte Kris kôt pahkwỳjê mã paxàkjêr kêt ã mẽ pamã karõ

Matêwre 7.1-5; Rômân 2.1; Wam Korõt 10.23-33; Xiakre 4.11

¹ Nê koja mēhõ kormã Jejus kôt amnhĩ xãm nyw ri kormã hkôt hamaxpêr tohtuj anê. Hãmri nê htỳx tanhmã hamaxpêr to nê mẽmoj mex kaga. Ka mẽ ja hã omu nê ãm omu nê hã tanhmã kãm nê hkêt nê. Kwãr mãmri ã amnhĩ nhĩpêx anê. Koja gaa nê rĩ hprĩ hã Tĩrtũm kapêr mar tỳx nê hãmri nê hkôt mẽmojta pumunh mex nê. ² Jakamã koja Jejus kôt akwỳjê hõ mẽ apkur xà piitã hkur pymaj tanhmã hõ kute hã harê nê hkaga nê hamaxpêr o:

—Nà kot pa ja hkur kêt nê. Kot pa apu kuku nê hkur o amnhĩ tomnuj nê. Anê.

Kwãr mãmri ã hamaxpêr anê nê hkur kêt nê. Nom mẽ pahte Jejus kôt amnhĩ xunhwỳr tỳx xwỹnhjaja na pu htem paxãmnhĩx Jejus kamnãr rom mẽmoj piitã kuku. Nom mẽ pahkĩnhã ham mẽ kot hkôt amnhĩ xunhwỳr xwỹnhjaja kormã kapêr piitã mar kêt jakamã kwãr mẽ mãmri anê nê mẽmoj kur kêt nê. ³ Nom kêt ka mẽ ri tanhmã hã mẽ kãm akapêr to hkêt nê. Rỳ mẽ kãm:

—Kwa mẽ ixpyrà nê mẽmoj piitã aku.

Anhỹr o mẽ kãm akapêr kêt nê. Ano ho ãm hã mẽ omu.

Nê mẽ ate mẽmoj piitã hkur kêt xwỹnhjaja kêt ka mẽ ajaxwỳja mẽ ixte mẽmoj piitã hkur ã tanhmã mẽ inhmã axàkjêr to hkêt nê. Mẽ ixte mẽmoj piitã hkur o ixpa hã mẽ ixpumu nê ãm hã mẽ ixpumu nê hã tanhmã mẽ inhmã axàkjêr to hkêt nê. Rỳ hã mẽ inhmã:

—Kwa nà kot kaj mẽ ja kur o amnhĩ tomnuj nê.

Anhỹr o hã mẽ inhmã akapêr kêt nê. Ano ho ãm ja hã mẽ ixpumu. Mẽ pahte ahpỹnhã tanhmã paxãpkur to htã Tĩrtũm kot mẽ pahte Kra Jejus kôt amnhĩ xunhwỳr xwỹnh piitã mẽ pahto hkra kênã. ⁴ Jakamã kwa mẽmoj tã tanhmã axpên mã axàkjêr to

ho ri apa hkêt nê. Koja Kris kôt atôjê hõ axtem tanhmã hamaxpêr to ka mẽ tee ri ja hã omu nê tanhmã hã kãm nê hkêt nê. Rỳ ajamaxpêr o:

–Tk. Na hte ã ri amnhĩ nhĩpêx anhỹr o pa. Ja omnuj. Pa na pa hte ã amnhĩ nhĩpêx anhỹr kêt nê.

Anhỹr o ri axpên kukamã ajamaxpêr hkêt nê. Mẽ pahpê Tirtũm kêt kênã kot pu kêt mẽ ã ri axpên kukamã pajamaxpêr anê. Tirtũm pix na hte tanhmã mẽ pajarênh to xwýnh. àhpumunh o àhpumunh xwýnh jakamã koja tanhmã mẽ hkrã hto nhũm mẽ rĩ kormã tãm hamaxpêr pê àmnhĩx ri tanhmã amnhĩ nhĩpêx to ho pa.

⁵ Nê koja Jejus kôt atôjê hõ mẽmo arĩgromnu jarê nê hã àpênh kêt nê. Ka mẽ apê hkwyjaja tee ri ja hã omu nê ajamaxpêr o:

–Nà arĩgro piitã mẽ pamã mex kênã. Kot paj mãmri arĩgro piitã hã apê.

Anhỹr o ajamaxpêr japêr. Nom kêr ka mẽ ja hã axpên mã tanhmã axàkjêr to hkêt nê. Na pu htem ahpýnhã pamã tanhmã mẽ pahte amnhĩ nhĩpêx to hprãm xà hkôt tanhmã amnhĩ nhĩpêx to. No tanhmã ri hã axpên mã paxàkjêr to ho ri papa hkêt nê. ⁶ Kêt mẽ kot arĩgromnu jarênh xwýnhjê mẽ mẽ pahte arĩgro piitã mex ã harênh xwýnhjaja mẽ pahpiitã mẽ pahpê Tirtũm kraa. Jakamã mẽ pahpiitã na pu htem pajamaxpêr o:

–Na pa hte Tirtũm kãm hprãm xà hkôt ã amnhĩ nhĩpêx anhỹr o ri ixpa. Anê.

Nê mẽ pahte mẽmoj piitã hkur xwýnhjaja nê mẽ kot mẽmoj kwý hkur kêt xwýnh piitã mẽ pahpê Tirtũm kraa. Mẽ pahpiitã mẽ pamã kãm hprãm xà hkôt amnhĩ nhĩpêx prãm jakamã na pu htem paxàpkur kaxyw nê Tirtũm mã amnhĩ jarê nê kãm:

–Pa mẽ ijamâr mex xwýnh maati. Nà ãm hãmri na ka hte apkati mẽ mẽ inhmã mẽ inhõ ho apa. Amex o amex Tirtũm.

Anhỹr o kãm amnhĩ jarê. Hãmri nê kormã hkamnâr rom paxàmnhĩx ri tanhmã mẽõ kuteta ku. ⁷⁻⁸ Mẽ

pahpê Tirtũm kra jakamã na pre ra mẽ pakukamã tanhmã mẽ pajarênh to. Mẽ pakukamã pahtyk ã arĩgro jarê nê mẽ pahte pahtĩr ri tanhmã ri amnhĩ nhĩpêx to ho papa hkukamã hamaxpêr. No mẽ papajaja na pu htem amnhĩ krã hkôt tanhmã mẽ pahte amnhĩ nhĩpêx to kukamã paxàhpumunh kêt. ⁹ Jakamã na pre Kris ja hã mẽ pahpumu nê tãm mẽ pakaxyw amnhĩ to kêp mẽ panhõ Pahihti nê mẽ panê ty. Hãmri nê akupým htĩr. Kêp mẽ panhõ Pahihti hã akupým htĩr. Kêp mẽ pahte hkôt amnhĩ xunhwýr xwýnhjê nhõ Pahihti kaxyw. Jakamã kêp ra mẽ pahkwý htyk xwýnhjê nhõ Pahihti nê mãânên kêp arĩ mẽ pahtĩr xwýnhjê nhõ Pahihti. ¹⁰ No mẽ papajaja mẽ pahpê Kris kôt mẽ pahkwýjê nhõ pahi hkêt jakamã kêr mẽ Kris kôt akwýjê hõ tanhmã amnhĩ nhĩpêx to hã omu hãmri nê tanhmã ho akapêr to hkêt nê. Rỳ ajamaxpêr o:

–Kwa na ã amnhĩ nhĩpêx anê. Inhmã ja mex kêt.

Anhỹr o ajamaxpêr kêt nê. Koja nhỹrmã Tirtũm tãm mẽ pahpiitã tanhmã mẽ pahte amnhĩ nhĩpêx to hã mẽ pahpumunh xà hkôt tanhmã mẽ pajarênh to. Nom kêr pu mẽ papajaja amnhĩ hkrã hkôt ã axpên jarênh anhỹr kêt nê. ¹¹⁻¹² Kot puj mẽ nhỹrmã pahpiitã Tirtũm kutã pahkrĩ nê kãm tanhmã amnhĩ jarênh to. Kormã mẽ pahtĩr ri tanhmã mẽ pahte amnhĩ nhĩpêx to ho papa hã kãm pahprĩ hã amnhĩ jarê. Kê mẽ pama nê tanhmã mẽ pajarênh to. Kapêr ã kagà htũm kot mẽ pakukamã mẽ pajarênh kot: Kojã nhỹrmã mẽ piitã ixpê mẽ õ pahi hã ixkutã hkõn krã ho rôrõk nê hkrĩ nê inhmã inhmex o inhmex ã ijarê.

Nê mẽ piitã ixpê Tirtũm ã ixpyxi mex ã ijarê. ãm hãmri na pa ã mẽ hkukamã mẽ harênh anê. Anê.

Mẽ pahte Kris kôt pahkwýjê ho mex ã mẽ pamã karõ

Wam Korĩt 8.9-13

¹³ Nê kwa kêr ka mẽ akwý kot Jejus kôt amnhĩ xunhwýr tohtuj anhỹr

xwÿnhjaja tanhmā mẽ kot amnhĩ nhĩpêx to ho pa hã mẽ omu nê ja nê tanhmā mẽ kām akapêr to hkêt nê. Ām mẽ noo mã tām ri amnhĩ nhĩpêx rāhā ho ri apa. Mẽ kot ja hã mẽ apumunh nê mẽ akôt amnhĩ nhĩpêx kaxyw. No kot ka mẽ kot tanhmā amnhĩ nhĩpêx toja ã kām akapêr nhũm ama nê tee ri amnhĩ kukamā hamaxpêr nê hkaprĩ nê.

¹⁴ E kot pa hpānhā mẽ paxàpkur xà hã tanhmā mẽ panhō jarēnh to. Ixte Pahihti Jejus jamaxpêr xà hkôt tanhmā ijamaxpêr to ho ri ixpa jakamā kot paj ixkatāt kôt mẽ amā tanhmā mẽ panhō jarēnh to nê ãm hāmri harē. Nà mẽ paxàpkur xàja ãm pixi nê omnu hkêt. Piitā mex o mex. Nom koja mēhō tee ri mẽmo mẽ apkur xà hō pumu nê hamaxpêr o:

—Nà kot paj ja hkur kêt nê. Kot paj apu kuku nê ho amnhĩ tomnuj nê. Anê.

Hāmri nê hkur kêt nê. Tā kwār māmri ã hamaxpêr anê nê hkur kêt nê. Nom na ãm amnhĩ krā hkôt Tĩrtũm kēp ja omnuj ã hkamnhĩx. Kēp omnuj kêt. Ra kot mẽmo mẽ paxàpkur xà piitā mex ã harēnh. ¹⁵ Tā kot kaj mẽ kot mẽmoj kur kêt xwÿnhhta py nê o tē nê kot hkaga xwÿnh noo mã hkur o xa nhũm apumu nê tee ri hamaxpêr nê hkaprĩ nê. Jakamā kot ka mẽ ã noo mã amnhĩ nhĩpêx anhÿrja o ho mex kêt nê. Kwa mẽ ã ri axpēn nhĩpêx anhÿr hkêt nê. Kot ka mẽ ã axpēn nhĩpêx anê nê te amnhĩ pix kukamā ajamaxpêr pyrāk o amnhĩ nhĩpêx. Jao akwÿjê ho mex kukamā ajamaxpêr kêt nê. Kris kām mẽ hapê htÿx kôt mẽ kot amnhĩ tomnuj pānhā amnhĩrer kaxyw ra nê htyk kēnā kot ka kêt mẽ axtem nê ri ã mẽ noo mã mẽ kot mẽmoj kur kēeta kur anê. Rÿ koja apu tee ri kot mẽmoj kur kēeta kur ã mẽ apumu nê tanhmā amnhĩ tomnuj to. Jao Kris kaga japêr. Jakamā kwa mẽ ã mẽ noo mã mẽmojta kur kêt nê. ¹⁶ Mẽmo mẽ apkur xàja mex tā nhũm mẽ akwÿjê hō kām mex kêt japêr ka mẽ noo mã hkur kêt nê. Nê tanhmā hã kām nê hkêt nê.

Kot kaj mẽ anê nhũm Kris kra hkêt xwÿnhjaja tee ri ja hã mẽ apumu nê tanhmā axpēn mã mẽ apê Kris kwÿjê ho kapêr punuj to. ¹⁷ Mẽ pahpê Tĩrtũm krajaja na pu htem paxàpkur xà nê pahkōm xà pix kukamā pajamaxpêr o ri papa hkêt nê. Na pu htem amnhĩ mẽ pahkwÿjê mex kukamā pajamaxpêr. Nê mẽ pahte tām amnhĩ nhĩpêx kukamā pajamaxpêr. Nê tām axpēn nhĩpêx kukamā pajamaxpêr. Kot puj mẽ ã amnhĩ nhĩpêx anê nhũm Tĩrtũm Karō ja hã mẽ pahpumu nê mẽ pahto mẽ pahkĩnh nê. Pu mẽ pahkĩnh nê pajamakêtkati nê ri axpēn kôt papa. ¹⁸ Tā kot puj mẽ ã Kris mã tanhmā amnhĩ nhĩpêx to ho ri papa anê nhũm Tĩrtũm ja hã mẽ pahpumu nhũm ja kām mex nê. Nê Kris kôt mẽ pahkwÿjê mã haxwÿja ja mex nê.

¹⁹ Jakamā kēp pu mẽ tām axpēn mã pakapêr o ri papa. Nê pajamakêtkati nê axpēn kôt ri pajapōj. Nê Kris kôt tanhmā axpēn to paxihtÿx to ho ri papa. ²⁰ No kot ka mẽ axàpkur xà gryk ã akwÿ hkukamā ajamaxpêr kêt nê atÿx ri mēhō noo mã mẽmoj kur japêr. Kēp omnuj tā ka mẽ ãm amnhĩ pix kukamā ajamaxpêr nê noo mã hkur japêr. Hāmri nhũm ja hã mẽ apumu nê ra kot Tĩrtũm kaga mã. Ra kēp hkra jakamā kwa mẽ noo mã mẽ kot mẽmoj punuj ã harēnh xwÿnhhta kur kêt nê. Nom mẽ paxàpkur xàja piitā mex. Tĩrtũm kot mẽ pamā òr jakamā piitā mẽ panhō. Tā koja akwÿjê hō Tĩrtũm kēp mẽmoj omnuj ã hkamnhĩx tā ka mẽ noo mã aku nê ho amnhĩ tomnuj nê. ²¹ Kēp pu mẽ pahkwÿjajaja tanhmā kot amnhĩ tomnuj to pymaj pu mẽ pahte amnhĩ nhĩpêx kukamā pajamaxpêr mex o papa. Mẽmo mẽō nê mẽmo kagō pē wĩhtija. Tĩrtũm kot mẽ pamā mẽmoj piitā òr tā no nhũm mẽ pahkwÿjajaja kēp ja omnuj nê pu mẽ noo mã hkur rÿ ho pahkōm kêt nê. Mẽmo mry nê mẽmo wĩhti pu mẽ noo mã hkur rÿ ho pahkōm kêt nê.

²² Nê kēp ka mẽ atō mẽmoj krêr kaxyw nê hkukamā ajamaxpêr o:

—Nà kot paj ja krē. Tĩrtũm kām ja mex kēnā. Anê.

Hâmri nê māmri Tirtūm kamnār rom axāmnhix akrē. Kām ja mex kēnā kot ka kêt ri tee ri hkrēr kaxyw hkukamā ajamaxpēr nê hkaga. ²³ No kot kaj mẽ atō mẽmoj to anhÿr kaxyw nê tee ri amnhĩ kukamā ajamaxpēr nê ajamaxpēr o:

—Ko kot paj apu ja ho anē nhūm Tirtūm hã ixpumu nhūm ja kēp omnuj nê rÿ ko. Anē.

Hâmri nê tee ri amnhĩ kukamā ajamaxpēr. Tã ra ã amnhĩ nhĩpêx anē nê akrē rÿ mẽmoj to anē. Hâmri nhūm Tirtūm tee ri ã ate amnhĩ nhĩpêx anhÿr ã apumu nhūm ja kēp omnuj nê. Ate hkamnār rom mẽmoj to anhÿr kêt nê amarĩ amnhĩ krã hkôt ho anhÿr jakamā ho amnhĩ tomnuj nê.

15

Mẽ pahte amnhĩ pix kukamā pajamaxpēr kêt ã mẽ pamã karō

Makre 10.45; Wam Korĩt 10.24; Piriapos 2.3-5

¹ Nê kêt pu mẽ pahte ra Jejus kôt amnhĩ xunhwÿr tÿx xwÿnhjaja amnhĩ kôt kormã mẽ kot Jejus kôt amnhĩ xunhwÿr totuj janhÿr xwÿnhjê jamār mex nê. Jao mẽ kamã pagryk tokyx anhÿr kêt nê. ãm mẽ kutã panojarêt pix o papa. Jao ra amnhĩ pix kukamā pajamaxpēr kêt nê. ² Mãânēn amnhĩ mẽ Kris kôt mẽ pahkwÿjê hkukamā mãn mẽ pajamaxpēr. Jao mẽ kot tãm amnhĩ nhĩpêx kaxyw mẽ ho mex o ri papa. ³ Kris na pre jar pa ri amnhĩ pix kukamā hamaxpēr kêt nê. Na pre mãânēn õ Papaj kukamā hamaxpēr. Jakamã Tirtūm kapēr ã kagã htūm kot kãm kapēr jarēnh kot:

Pa Papaj. Na hte mẽ pahkurê xwÿnhjaja ixto kapēr punuj nê. Nom mãânēn ã ato kapēr o pa anē. Anē.

⁴ Mẽ pakaxyw na Tirtūm kapēr ã kagãja. Mẽ pahte kamã harēnh nê mar nê amnhĩ kaxyw hkôt pajamaxpēr tÿx o ri papa kaxyw. Jakamã na pu htem tanhmã pahpunuj to htã kapēr kwÿ ma nê pahkĩnh nê. Jao tee ri amnhĩ kukamā pajamaxpēr o

ri pahkaprĩ hkêt nê. ãm nhÿrmã Tirtūm kot mẽ pahto mex kukamã pajamaxpēr o akupÿm paxihtÿx nê pahkĩnh nê ri papa. Mẽ pahkĩnh nê ri papa kaxyw na Tirtūm kapēr ã kagãja. ⁵⁻⁶ Na pu htem Tirtūm kamnār rom pahkĩnh nê. Nê axpēn kamã paxukaprĩ ho ri papa. Jakamã na pa hte tanhmã mẽ ato Tirtūm wÿr to nê kãm:

—Pa Tirtūm. Apê mẽ ijamār xwÿnh maati na ka. Nê apê mẽ inhõ Pahihti Jejus Kris nhõ Papaj na ka. Nã xep ra Rôm nhõ xwÿnh kwÿjaja kãm akapēr kôt amnhĩ nhĩpêx prãm jakamã kwa tanhmã mẽ hkrã ho mex to kē mẽ hamakêtkati nê ajamaxpēr kôt hamaxpēr rãhã ho ri akôt pa. Hâmri nhūm mẽ amnhĩ tã apumu nê piitã amex o amex ã ajarē.

Anhÿr o pa hte mẽ ato kuwÿ.

Ijaew kêt xwÿnhjê jarēnh

Atre 10.34; Rômân 9.24; Karatas 3.28

⁷ Nê kwa kêt ka mẽ amã axpēn tã ma ho ri apa. Te ho Kris kãm mẽ pahtã mata pyrãk. Jao axpēn to mex pix o apa. Kot kaj mẽ ã axpēn nhĩpêx anē nhūm mẽ piitã axpēn tã mẽ apumu nê mẽ anhÿ hã Tirtūm mã mex o mex ã harē.

⁸ Amnepēm Tirtūm Ijaew mã tanhmã Kris jarēnh to. Kormã pika hwÿr wrÿk kêt ri nhūm hkukamã nhÿrmã mẽ hwÿr wrÿk nê mẽ kamã kator ã harē.

Tã nhūm mẽ hwÿr wrÿ nê mẽ kamã kato. Ijaew hkanrēhã htãmnhwÿjê kamã kato nê mẽ ho mex o ri mẽ hkôt pa. Mẽ kot amnhĩ tã omunh nê ã hamaxpēr anhÿr kaxyw. Nê hamaxpēr o:

—Amnepēm Tirtūm kot mẽ panhīgêt mã hkukamã harēnh xã hkôt na mẽ ixwÿr Kraja mẽ nhūm wrÿ nê mẽ ixto mex o ri pa. Nã ãm hãmri na pre mẽ ixwÿr kumē.

Anhÿr o hamaxpēr kaxyw. ⁹ Nê mẽ apê Ijaew kêt xwÿnhjaja mẽ ajaxwÿja mẽ ate tanhmã kot amnhĩ nhĩpêx to hã harēnh mar nê Tirtūm mã mex o mex ã harēnh kaxyw. Nê Tirtūm kot mẽ akamã ukaprĩ hã mẽ ate amnhĩ

tã omunh nê mex o mex ã harênh kaxyw na pre wrÿ. Tirtũm kapêr ã kagà htũm kot tanhmã mē ixpê Ijaew jarênh to nê mãânên tanhmã mē apê Ijaew kêt xwÿnhjê jarênh to nê mē pajarênh kot:

Kot paj Ijaew kêt xwÿnhjê jamak mã amã amex ã ajarênh o ri mē hkôt ixpa.

Nê amex ã inhgrer o ri mē hkôt ixpa. Anê.

10 Nê ja:

Kwa mē apê Ijaew kêt xwÿnh mē mē apê Ijaew. Kêr ka mē apiitã Tirtũm nhÿ hã akÿnh nê ri apa. Anê.

11 Nê mãânên ja:

E kêr ka mē apê Ijaew kêt xwÿnhjaja nê krÿ piitã hkôt mē apa xwÿnhjaja mē apiitã Tirtũm mã mex o mex ã harênh o ri apa.

Anhÿr o kot harênh. **12** Nê Tirtũm nhÿ hã kapêr o pa xwÿnh finat Ijais haxwÿja Ijaew mã Jejus jarênh o:

Koja nhÿrmã Jese kanrêhã htãmnhwÿjê hõja mē pahwÿr kato.

Hãmri nê mē pahpê Ijaew mē Ijaew kêt xwÿnhjê ho amnhÿptâr o pa. Jakamã nhũm mē amnhÿ kaxyw hkôt hamaxpêr o pa. Anê.

13 Nê na pa hte tanhmã mē ato Tirtũm wÿr to ho ri ixpa nê kãm:

—Pa Tirtũm. Kwa kêr ka Rôm nhõ xwÿnhjê ho mex kê mē amnhÿ kaxyw Akra hkôt hamaxpêr mex o ri pa. Jao hkôt hkÿnh nê hamakêtkati nê ri axpên to pa. Nê kê Akarõ mē ho mē hihtÿx o pa kê mē amnhÿ kaxyw amã mãn hamaxpêr tÿx rãhã ho ri pa. Anê.

Pawre kot hprÿ hã amnhÿ jarênh

Sikũn Pêtre 1.12-13

14 E Kris kôt ixkwÿjaja. Nà ra ixte mē ajarênh mar mex. Na ka xep htem amnhÿ to mex o ri apa. Nê mēmoj to axpên kutã anojarêr rãhã ho ri apa. Nê mē kot tanhmã Tirtũm kapêr kôt amnhÿ nhÿpêx to xàja ka mē omunh mex nê ho axpên jahkre ho ri apa.

15 Tã ot pa kagà ja kamã mē amã ixujarênh kãm ixihÿtÿx nê. Tirtũm nhÿ hã. Ra mē ate mēmoj mar mex tã pa axte mē amã harê. Mē ate mar tÿx nê

hã anohtÿx kaxyw. Nà ã ixte amnhÿ nhÿpêx anhÿr kaxyw na pre Tirtũm mē akaxyw ixãm. **16** Ixte Jejus Kris mã mē apê Ijaew kêt xwÿnhjê mã kapêr jarênh o ri mē akôt ixpa kaxyw. Nê mē ato hwÿr o ri ixpa kaxyw. Tã pa hte krÿ hkwy kamã ã mē akwÿjê mã harênh anhÿr o ri mē hkôt ixpa. Nê Jejus jarênhja pa hte mē hkôt mē kãm harênh o ri ixpa. Mē kot mar nê hkÿnh kãm hkôt amnhÿ nhÿpêx mex kaxyw. Hãmri nhũm Tirtũm Karõ mē kãm mē hamaxpêr nyw jagjê nhũm Tirtũm hã mē omu nhũm ja kãm mex nê nhũm hkÿnh nê hamaxpêr o:

—Nà ãm hãmri. Koja mē nhÿrmã wa ixri htÿr tũm nê mex nê pa ho pa. Anê.

17 Tã na pa ixte Jejus Kris nhÿ hã Tirtũm mã tanhmã amnhÿ nhÿpêx to ho ixpa hã amnhÿ pumu nê ixkÿnh nê. **18-19** Na pa hte ÿ hã mē apê Ijaew kêt xwÿnhjê mã Tirtũm kapêr jarênh o ri mē akôt ixpa. Nê mē anoo mã tanhmã ri Kris kot mē amã amnhÿ nhÿpêx to hã harê. Nê mē amã aa mē kot mēmoj pumunh kêt kwÿ ho anhÿr o ri mē akôt ixpa. Tirtũm Karõ nhÿ hã. Nhũm hte mē akwÿjaja amnhÿ jaer pê omu nê kamã no puma nê. Hãmri nê mē pahpyrà nê Jejus kôt amnhÿ xunhwÿ. Nom pa hte ã amnhÿ nhÿpêx anhÿr ã amnhÿ pumu nê ri hã amnhÿ to jarkrar kêt nê. ãm ixte Kris pix nhÿ hã mē kãm ixkapêr ã mē kãm amnhÿ jarênh o ri mē hkôt ixpa. Tã pa ra Jerujarê rũm Irir wÿr krÿ piitã hkôt mē kãm Kris kapêr jarê. Tirtũm Karõ kot tanhmã ixto hihtÿx to jakamã pa mē piitã mē kãm harênh mex nê. **20** Na pa hte mē hwÿr inhnojarêr nê ã ijamaxpêr anê nê ijamaxpêr o:

—Kormã mē kot Kris jarênh mar kêt xwÿnhjê hwÿr kot paj mã. Nom ra mē kot harênh mar xwÿnhjê nhõ krÿ hwÿr inhmõrja inhmã prãm kêt. Anê.

21 Tirtũm kapêr ã kagà htũm kot kapêr mar kêt xwÿnhjê jarênh kot:

Kormã mē kot Tirtũm kapêr mar kêt xwÿnhjaja koja mē kuma nê hprÿ hã mar tÿx nê. Anê.

Pawre kot Rôm wÿr hkrà hã amnhĩ jarēnh

Rômân 1.8-15

²² Hêxta waa nê. Inhmã mē apumunh prâm tÿx nê Rôm kãm Jejus kôt ixkwÿjaja. Na pa hte xatã mē awÿr ixkrà nom kormã mē awÿr inhmôr kêt nê. Kormã ixte krĩ hkwÿ kamã mē kãm Kris jarēnh o ri ixpa jakamã kormã mē awÿr inhmôr kêt nê. ²³ Na pa ra xatã mē awÿr ixkrà hã ixtã amgrà xohtô nê. Tã ra jar mē kãm Kris kot mē panê tanhmã amnhĩ nhĩpêx toja jarēnh pa. ²⁴ Jakamã kot paj tokyx ma mē awÿr mō. Hãmri nê mē awÿr pōj pu mē axpēn pumu nê pahkĩnh nê axpēn mã pakapēr o papa. Pa mē akôt ri ixpa tãmtã hamũ pyka pē Espãnhã wÿr ma mō. Nê kot paj inhnojarêt ka mē ixto Tĩrtũm wÿ nê inhmã ixàpkur xà hkwÿ gō pa ma mē hwÿr pry hã hkur o mō.

²⁵⁻²⁶ No na pa kormã mē awÿr inhnojarêt kêt nê. Kot paj ja rũm awjanã nê akupÿm Jerujarē hwÿr mō. Kamã Kris kôt mē pahkwÿjaja kēp amrakati nê ri pa nhũm pika pē Gres mē Masetõn kamã Kris kôt mē pahkwÿjaja mē harēnh ma nê mē kãm kãxpore hkwÿ ho akuprō nê mē kaxyw inhmã kugō. Tã kot paj ma mē hwÿr o mō nê mē kãm kure nê rĩ kormã ma mē awÿr mō. ²⁷ Jerujarē kamã Kris kôt mē pahkwÿjaja Ijaew na mē. Mē kumrēx na prem Kris kôt amnhĩ xunhwÿ. Hãmri nhũm mē hkwÿjaja ma mē apē Ijaew kêt xwÿnhjê mã kapēr jarēnh o ri mē akwÿ hkôt pa. Hãmri nhũm pika pē Gres kamã mē pa xwÿnhjaja mē kapēr ma nê mē uràk nê Kris kôt amnhĩ xunhwÿr kurê kumrēx. Jakamã amnhĩ xwar kãm nhãm krĩ hō kamã Kris kôt mē pahkwÿjê ho mex prãm nê. Hãmri mē kãm kãxpore hkwÿ ho akuprō nê mē kaxyw inhmã kugō.

²⁸⁻²⁹ Tã kot paj ma Jerujarē hwÿr mē kãm o mō nê mē kãm kure hãmri nê awjanã nê rĩ kormã ma Rôm wÿr mē awÿr mō. Hãmri nê mē awÿr pōj pu mē axpēn pumu nê pahkĩnh nê. Nê axpēn mã Jejus Kris mex o mex ã harē

nê kãm tanhmã amnhĩ jarēnh to ho papa. Jao pahkĩnh nê papa. Tã pa hpãnhã hamũ ma Espãnhã wÿr mō.

³⁰ Nê na pu prem Jejus Kris o panhō Pahihti. Jao te mē pahpê hkôt axpēn to pahtō nê pahtōx pyràk o axpēn nhĩpêx. Nê Karō nhĩ hã pamã axpēn kĩnh nê. Jakamã kwa Jejus kôt ixkwÿjaja. Kêr ka mē ixpê mē atō hã ixto Tĩrtũm wÿr kãm axihtÿx nê. ³¹ Kêr pa ma pyka pē Jutej kamã Jerujarē kamã Kris kôt mē pahkwÿjê hwÿr mō nê mē kãm kãxporeta gō nhũm mē omu nê Ijaew kêt xwÿnhjê kot mē kãm òr ã mē omunh tã tee ri hamaxpēr kêt nê. ãm hkĩnh kãm mãmrĩ àmnhĩx hamÿ nê ho amnhĩm awjaprō.

Nê kêr ka mē ixto awÿ kē inhnê mē kēp mē pahkwÿ hkêt xwÿnhjê pumunh mex nê.

³² E kêr ka mē ã ixto Tĩrtũm wÿr anê. Kê ixte ma Jerujarē rũm ma Rôm wÿr pàr kãm inhmōrta ã kē ixpumunh mex nê. Pa inhmex pē mē kurũm ma mē awÿr mōn pōj pu mē tokyx axpēn pumu nê pahkĩnh nê. Pa mē ate tanhmã amnhĩ nhĩpêx to ho ri apa hã mē apumunh o mē akôt ri ixpa nê ixkĩnh nê. ³³ Tã ãm ja pix. Kê Tĩrtũm mē akôt pa ho pa. Tãm na hte tanhmã mē pahto pu mē ÿ hã pajamakêtkati paxãmnhĩx ri pahkĩnh nê ri papa.

16

Pawre kot ahpÿnhã hkrãmnhwÿjê mã kapēr

¹ Ku nê mãânēn ja. Ot pa mē awÿr Kris kôt pahtōx Pepreja mē awÿr kumē. Na hte krĩ pē Sēnkrej kamã Kris kôt mē pahkwÿjê tanhmã mē ho mex to ho ri mē hkôt pa. ² Nê mãânēn pa na hte tanhmã ixto mex to. Tã kē mēmo arĩgro hã mē awÿr pōj ka mē kēp Kris kôt mē pahtōx ã omu nê ho mex nê tanhmã ho ajuta hto.

³ Nê kêr ka mē atar Kris kôt ixkrãmnhwÿjê mã ijarē. Na pa hte mē kãm ijamaxpēr rãhã ho ri ixpa. Nê Akirti mē hprō Prisireta ka mē wa kãm ijarē. Na pre hte wa inhĩhkô hã Jejus Kris mã tanhmã amnhĩ nhĩpêx

mex to ho wa pa. ⁴ Jao wa amnhî grônh kôt mē kām ixkurê xwýnhjê pê ixpytâ. Pa amnhî tã wa omu nē inhmã wa hkînh nē. No ãm papxipix inhmã wa hkînh kêt nē. Na pre Ijaew kêt xwýnh kwý pê Kris kwýjaja ixtã wa harênh ma nē haxwýja kãm wa hkînh nē.

⁵ Nē na hte Kris kwýjaja wa ôrkwý kamã axpēn wýr akuprô. Mē kot Tirtüm mã amnhî jarēnh nē kapēr ã kagã hkwý mar kaxyw axpēn wýr akuprô. Tã kêr ka mē mē kãm ijarē.

Nē Kris kôt mē pahtô Epēnre mã ijarē. Kêp ixkràmnhwý mex na. Inhmã hkînh. Kumrêx na pre jar pika pê As kamã amnhî kaxyw Kris kôt hamaxpēr nē hkôt amnhî xãm.

⁶ Nē Kris kôt mē pahtôx Marir ka mē kãm ijarē. Na xep hte tanhmã mē ato mex to rûnh o pa.

⁷ Nē Kris kôt mē pahtô ārôhti mē Jûhti wa kãm ijarē. Ixpyrà nē wa kêp Ijaew na wa. Kormã ixte Kris kôt amnhî xãm kêt ri na pre wa kumrêx hkôt amnhî xãm. Na hte Jesus nhý hã mē ahkre ho mē pa xwýnhjaja wa kot Kris kapēr jarēnh mex ã wa harê. Tã ã amnhî nhîpêx anhýrja mýrapê na pre mē hkwýjaja wa unê nē wa haxã pa prem ixpimràatã ixpê prês nē mē hagjênh xã kamã ixkrî.

⁸ Nē Kris kôt mē pahtô ãpritre mã ka mē ijarē. Kêp Kris kôt ixkràmnhwý mex na.

⁹ Nē Kris kôt mē pahtô Upãnre mã ijarē. Na hte ixpyrà nē Kris mã tanhmã amnhî nhîpêx to ho ri pa.

Nē Kris kôt mē pahtô Etaki mē ijarē. Kêp ixkràmnhwý mex na.

¹⁰ Nē Kris kôt mē pahtô Apes ka mē kãm ijarē. Na prem ra Kris ã hipêx punuj nē no nhùm mē kutã amnhî to htýx nē Kris kaga hkêt nē.

Nē Aristopti nhôrkwý kamã hkwýjê mã ijarē.

¹¹ Nē Kris kôt mē pahtô Erojãwti mã ijarē. Ixpyrà nē kêp Ijaew na.

Nē Nasisti nhôrkwý kamã Kris kwýjaja ka mē kãm ijarē.

¹² Nē Kris kôt mē pahtôx Xiripêre mē Xiripos wa kãm ijarē. Wa kêp

Pahihti Jesus mã tanhmã amnhî nhîpêx mex to xwýnh na wa.

Nē Kris kôt mē pahtôx Pesixti mã ijarē. Haxwýja kêp ixkràmnhwý na. Na hte Pahihti Jesus mã tanhmã amnhî nhîpêx mex to ho ri pa.

¹³ Nē Kris kôt mē pahtô Rupti mã ijarē. Na hte Kris kôt amnhî nhîpêx mex o ri pa. Nē katorxã mã ijarē. Na pre te ixpê hkra nhîpêx pyrãk o inhîpêx.

¹⁴ Nē Kris kôt mē pahtô Asínre mã nē Prekôxti nē Emes nē Patopas nē Emas mē. Jajê piitã mē pahkwý kot mē hwýr pikuprônh xwýnhjê mē mē ho apimràatã mē kãm ijarē.

¹⁵ Nē Kris kôt mē pahtô Pirorti mã nē mē pahtôx Juure mē Nêrew wa nē htôxja nē mē pahtô Orîpti wa mē kãm ijarē. Nē mē pahkwý kot mē hwýr pikuprônh xwýnhjê mē mē ho apimràatã mē kãm ijarē.

E kêr ka mē jajê piitã mē kãm ijarē. Na pa hte mē kãm ijamaxpēr rãhã ho ri ixpa.

¹⁶ Nom mē tapxipixjaja kêt. ã mē apiitã mã na pa hte ijamaxpēr rãhã ho ixpa.

Nē ota jar Kris kwýjaja mē awýr hpēr mē.

¹⁷ Kwa ixkràmnhwýjaja. Na ka mē ra aprî hã Tirtüm kapēr mar týx nē. Tã kêr ka mē amnhî nê mē kot Tirtüm kapēr o hêx xwýnhjê pumunh mex o apa. Mē kãm axpēn nē mē ato hpigrãnh par prãm. Nē mē ate Kris kaga nē hpãnhã mē kot amnhî nhîpêx o amnhî nhîpêxja mē kãm hprãm jakamã kwa mē amnhî nê mē omunh mex nē axkãm ajamak rom. ¹⁸ Na htem ã amnhî nhîpêx anhýr o Pahihti Kris mã tanhmã amnhî nhîpêx to ho pa hkêt nē. ãm amnhî hkrã hkôt tanhmã ri hkwýjê jahkre hto ho pa. Kot mē no kupyw kaxyw tanhmã mē kãm hêx to ho ri mē hkôt pa. Te mē ahkre mex pyrãk tã mē ahkre mex kêt nē. Jakamã nhùm htýx ri mē pa xwýnhjaja mē kot mē ahkreja ma nhùm te mē kãm mex pyrãk. Jakamã kwa mē okora mē

amnhĩ nê mẽ omunh mex nê. ¹⁹ Na ka htem mẽ kurom Kris kôt amnhĩ nhĩpêx mex nê nhũm xep mẽ piitã mẽ apumu nê axpên mã ja hã mẽ ajarênh o ri pa. Pa mẽ ajarênh ma nê ixkĩnh nê. Tã kêr ka mẽ arĩ ajamaxpêr mex rãhã ho ri ajamaxpêr o apa. Nê amnhĩ nhĩpêx mex rãhã nê. No tanhmã ajamaxpêr punuj to ho ri amnhĩ tomnuj o ri apa hkêt nê. Æ mẽ ate amnhĩ nhĩpêx anhỹrja na inhmã hprãm.

²⁰ Nê na hte Satanasti mẽ hkwyjaja mẽ ate Jejus kaga hprãm xaj mẽ akôt tanhmã ri mẽ anhĩpêx to ho ri pa htã kêr ka mẽ amnhĩ tã mẽ omu nê tee ri amnhĩ kukamã ajamaxpêr kêt nê. Koja gaa nhũm Tĩrtũm mẽ hipêx o te mẽ kot kagã xoprê hkrã xôm nê hpĩr pyrak o mẽ hipêx. Jakamã ã mẽ kot mẽ anhĩpêx anhỹr tã koja Tĩrtũm mẽ amã mẽ ajamakêtkati xaja gõ. Tapxipix na kot mẽ pajamakêtkati xà nhõr kaxyw àhpumunh tỹx.

Nê na pa hte mẽ ato Pahihti Jejus wỳ nê kãm:

–Pa Pahihti. Kwa kêr ka Rõm kãm akwỳjê pumu nê mẽ ho mex nê mẽmoj to mẽ kutã anojarêt rãhã ho ri apa. Anê.

²¹ Nê ota mẽ pahtõ Ximotreja mẽ awỳr hpêr mẽ. Na hte inhĩhkô hã Kris mã tanhmã amnhĩ nhĩpêx to ho ri pa. Nê ixtõ Rusti mẽ Jasãwti mẽ Sosipa wa mẽ haxwỳja mẽ awỳr hpêr mẽ.

²² Nê kot inhmã ixkapêr ã kagã xwỳnh Testi haxwỳja mẽ awỳr hpêr mẽ. Kêp Kris kôt mẽ pahtõ na. ²³ Nê Kris kôt mẽ pahtõ Gajre haxwỳja mẽ awỳr hpêr mẽ. Õrkwỹ kamã na hte Kris kwỳjaja axpên wỳr akuprõ nê kamã Tĩrtũm mã amnhĩ jarẽ nê kapêr ã kagã kamã harẽ nê mar o hkrĩ. Õrkwỹ kamã na pa pre pøj.

Nê mẽ pahtõ Eras haxwỳja mẽ awỳr pêr mẽ. Na hte jar krĩ ja kamã Rõm nhõ pahihti mã õ kàxpore jamãr pê ho mẽmoj to anhỹr o pa.

Nê Kris kôt pahtõ Kwatre haxwỳja mẽ awỳr hpêr mẽ. E jajaja piitã na mẽ awỳr hpêr rê.

²⁴ E kê Pahihti Jejus Krisja mẽ akutã nojarêt rãhã ho pa.

Pawre kot Tĩrtũm mex o mex ã harênh

Epes 1.3, 3.20-21; Wam Ximotre 1.17; Eprêw 13.20; Jutre 24-25

²⁵ Nê kwa kêr pu mẽ Tĩrtũm mã mex ã harênh rãhã ho ri papa.

Nê ixte mẽ amã Jejus Kris jarênh ta ã ka prem ama nê hkôt amnhĩ xunhwỳ. Tã koja mẽ ato mẽ axihtỹx ka mẽ hkôt axihtỹx kãm hkôt ri amnhĩ nhĩpêx mex o ri apa. Amnepêm na pre Tĩrtũm mẽ apê Ijaew kêt xwỳnhjê ho hkra kaxyw hã amnhĩ jarênh kêt nê. Kormã ja ho hpimxur ryy nê. ²⁶ Tã ã mẽ anhĩpêx anhỹrja o amnhĩrit nê ỹ hã mẽ kapêr jarênh o ri pa xwỳnhjê mã kapêr nê mẽ kãm:

–E Jejus kot tanhmã amnhĩ nhĩpêx to ho pata kêr ka mẽ piitã mẽ kãm hã kagã kê mẽ pyka piitã hkôt kamã harẽ nê kuma. Nom kê Ijaew pixjaja mar kêt nê. Kê pika piitã hkôt kamã harẽ nê kuma. Panhĩ nê kupê nê kupê hkà htykre nê mẽ hkà haka nê mẽ hkà kamrêkjaja. Kê mẽ piitã Jejus jarênh ma nê amnhĩ kaxyw hkôt hamaxpêr nê hkôt amnhĩ xunhwỳ. Hãmri nê hkôt amnhĩ nhĩpêx mex o ri pa. Anê.

Nhũm pre ã mẽ pakaxyw mẽ kãm kapêr anê nhũm prem kuma nê hã kagã.

²⁷ Nà Tĩrtũmja tapxipix na àhpumunh tỹx xwỳnh ã ãm pyxi mex. Nê tapxipix kêp mẽ pahpiitã Měpahpãm. Tã kêr pu mẽ Jejus Kris kot mẽ panê htyk ã omunh xà hkôt Tĩrtũm pix mã mex o mex ã mãn harênh rãhã ho papa.

Tã ãm ja pix. Ixpê Pawre na pa ã mẽ awỳr ixpêr mēnh anê. Na hapêx.

Wam Korît Pawre kot Korît kãm Jejus kôt hkwÿjê hwÿr kagà nê mênh

Pawre na pre kagàja nhîpêx. Jejus nhÿ hã kapêr jarênh o pa xwÿnhjê hõ na pre. Na pre hipêx nê ma krî pê Korît kãm Jejus krajê hwÿr kumê. Nê kagàja kamã mē kãm tanhmã mēmoj tã karõ hto. Na pre mē kot àhpumunh tÿx ã amnhî to jarkrar o pa nê mē kãm kapêr. Nê tanhmã amnhî tomnuj to nê mē kãm kapêr. Nê mē hprõ nê mē mjên xwÿnhjaja tanhmã wa kot axpên nhîpêx to hã mē kãm karõ. Nê mē kot Tirtûm mã mex o mex ã harênh kaxyw axpên wÿr mē pikuprõnh nê tanhmã amnhî nhîpêx to hã nhÿm mē kãm karõ. Æ na pre Pawre mē kãm mēmoj tã karõ nê hã kagà anê. Nê mē kãm:

¹ Pa Korît kãm Jejus kôt ixkwÿjaja. Xà mē amex? Ot pa mē awÿr kagàja nhîpêx nê kumê. Ixpê Pawre na pa Kris kôt mē pahtõ Sostenes mē wa awÿr ixpêr mē. Tã kagàja nhîpêx nê mē awÿr kumê. Tirtûm na pre ixte Jejus Kris nhÿ hã mē ajahkre ho ri ixpa kaxyw ixãm. ² Tã ot pa mē awÿr kagà nhîpêx nê mênh mã. Korît kãm ixpyrà nê mē apê Tirtûm krajê hwÿr.

Tirtûm kot amnhî kaxyw mē axunhwÿr jakamã na ka prem amnhî tomnuj kaga nê Kris kôt amnhî xunhwÿr nê hkôt amnhî nhîpêx mex o ri apa. Krî piitã hkôt mē kot amnhî to Jejus Kris wÿr o mē pa xwÿnhjê pyrà nê. Mē panhõ Pahihti Jejus Krisja ãm pixi mex na.

³ Nê Tirtûm kêp Mēpahpãm maati nê Jejus Kris kêp mē panhõ Pahihti jakamã na pa hte mē ato wa hwÿr rãhã o ri ixpa nê mē ato wa hwÿr o:

—Kwa Tirtûm mē Jejus wa. Kêr ka wa Korît nhõ xwÿnhjê kutã anojarêr rãhã ho wa ri apa. Nê mē ho mex rãhã nê. Kê mē amnhî tã war apumunh kôt ri hamakêtkati nê hkÿnh nê àmnhîx

tanhmã ri amnhî nhîpêx to ho ri pa. Anê.

Tirtûm kot Jejus Kris kukwak ri mē pahto mex ã harênh

Sikûn Pêtre 1.2; Wam Tesarõn 5.23-24

⁴ Nê mē ate amnhî kaxyw Jejus Kris kôt ajamaxpêr o ri apa jakamã na hte Tirtûm mē ato mex nê. Tã pa hte kãm amnhî jarênh kaxyw nê kãm mē ajarênh o:

—Pa Tirtûm. Æm hãmri na ka pre Korît nhõ xwÿnh kwÿjê ho akra. Nã ja mex o mex. Anê.

⁵ Nê ra mē ate Kris kôt amnhî xunhwÿr jakamã na ka mē ra amex kumrêx nê ri apa. Nê aprî hã Kris kot amnhî nhîpêx pumunh mex nê aprî hã akwÿjê mã harênh o ri mē hkôt apa. ⁶ Na pa pre mē awÿr mō nê mē amã Kris kot amnhî nhîpêx ã harênh o ri mē akôt ixpa. Ka prem inhma nê hkôt amnhî xunhwÿr tÿx kurê kumrêx. ⁷ Jakamã nhÿm Tirtûm mē ate kãm tanhmã amnhî nhîpêx to ho apa kaxyw mē ato mē axihtÿx. Nê kaxyw mē amã mē ate axpên to mex xà piitã mē amã kugõ. Mē ate Jejus kot akupÿn mē pahwÿr wrÿk jamãr pê hapêr arît o apa pê tanhmã kãm axpên nhîpêx to ho apa kaxyw. ⁸ Koja Tirtûm tanhmã mē akrã hto ka mē hkôt pix mã ri amnhî nhîpêx rãhã nhÿm Pahihti Jejus Krisja akupÿn mē pahwÿr wrÿ. Hãmri nê mē ate amnhî nhîpêx ã mē apumu nê mē ajarênh o:

—Nã ãm hãmri na hte jajaja amnhî to mex pix o ri pa. Anê.

⁹ Nê koja Tirtûm ra kot amnhî jarênh xà hkôt mē ato mex nê. Ra kot mē ate Pahihti Jejus Kris kôt apa kaxyw amnhîm mē axunhwÿr jakamã koja ra kot amnhî jarênh xà hkôt mē ato mex rãhã nê.

Mē pahte mēmoj tã axpên pê pahpi-grãnh kêt ã mē pamã karõ

Rõmãn 15.5-6; Sikûn Korît 13.11; Epes 4.1-6; Piripos 2.1-4; Wam Pêtre 3.8

¹⁰⁻¹¹ E Kris kôt ixkwÿjaja. Na ka xep htem mēmoj tã axpên mã axàkjêr pix o ri apa nhÿm pre Krojre hkwÿjaja

amnê ixwÿr pøj nê inhmã mẽ ajarê. Kwa nà mẽ ã amnhĩ nhĩpêx anhÿr kêt nê. Kêr ka mẽ axpên kôt ri amnhĩ nhĩpêx rãhã ho ri apa. Nê axpên kôt ri ajamaxpêr rãhã nê. Te ixkre tipxi kamã mẽ ri apa pyrãk o mãn kêt mẽ axpên nhĩpêx o ri axpên kôt apa. Nê mẽ axpên kutã anojarêr rãhã ho ri apa. No mẽmoj tã axpên mã axàkjêr pê axpên pê apigràn h kêt nê. Na pa Pahĩti Jejus Kris nhÿ hã mẽ amã ã ja hã karõ anê.

¹² Nê na ka xep htem ahpÿnhã ri mẽ apê mẽ ixkwÿ hã amnhĩ jarênh o ri apa. Jao mẽ akwÿjaja pa ixkôt ri amnhĩ nhĩpêx xwÿnh ã amnhĩ jarê. Nê mẽ akwÿjaja axtem Apor kôt ri amnhĩ nhĩpêx xwÿnh ã amnhĩ jarê. Nê mẽ akwÿjaja axtem Simãw Pêtre hkôt amnhĩ nhĩpêx xwÿnh ã amnhĩ jarê. Nê mẽ akwÿjaja axtem Kris kôt amnhĩ nhĩpêx o ri apa xwÿnh ã amnhĩ jarê. ã na ka xep htem ahpÿnhã amnhĩ jarênh anhÿr o ri pa.

¹³ Kwa nà ka mẽ ã ahpÿnhã amnhĩ jarênh anê nê te mẽ ate Kris o apigràn h pyrãk o hipêx. Kwa mon ka hte mẽ akwÿjaja apê ixkwÿ hã amnhĩ jarê? Xà pa na pa pre pĩ kahpa hã ajêr nê mẽ anê ty? Nà Kris pix na pre mẽ panê hã ajêr nê ty. Xà mẽ apê pa ixkwÿ hã amnhĩ jarênh kaxyw na prem mẽ akrã kumrã? Nà mẽ apê Kris kwÿ hã amnhĩ jarênh kaxyw na prem ã mẽ anhĩpêx anê. Mẽ kot ja hã mẽ apumunh xwÿnhjaja kot mẽ apê Kris kwÿ hã mẽ apumunh kaxyw. Tã na ka xep htem axtem nê ã ri ahpÿnhã mẽ kãm amnhĩ jarênh anhÿr o ri apa.

¹⁴⁻¹⁵ Kop ãm ixte amnhĩ kôt mẽ axunhwÿr prãm ronhÿx pa mẽ ato mẽ axohtõ nê mẽ akrã kumrã nê mẽ amã: “E ra mẽ apê ixkwÿ na ka mẽ.” Anê. Nom na pa pre ã mẽ amã ixkapêr anhÿr kêt nê. ãm hãmri na pa pre ãm mẽ ato grêre nê mẽ akrã kumrã. ãm Kripti mẽ Gajre wa pix. ¹⁶ Ku nê xep mãânên Estepti nê kaxyw mẽ hkwyjaja. ãm jajê pixjaja. Nom ko apu axte mẽ hkwy ko. Ixte mẽ hkrã kumrãr xwÿnhjê mã ijamaxpêr tÿx

kêt. ¹⁷ Na pre Kris ixte mẽ hkrã kumrãr o ri ixpa kaxyw ixãm kêt nê. ãm ixte mẽ kãm kapêr jarênh o ri mẽ hkôt ixpa pix kaxyw na pre ixãm.

Nê na pa hte amnhĩ krã hkôt ri ixujarênh o ri mẽ akôt ixpa hkêt nê. Kot pa ã amnhĩ nhĩpêx anê nhũm mẽ ixkapêr mex ã inhma nê pa ixkôt amnhĩ xunhwÿ. Ja pymaj na pa hte amnhĩ krã hkôt ri tanhmã ixujarênh to ho ri ixpa hkêt nê. Na pa hte ãm ixprĩ hã Kris kot tanhmã mẽ panê amnhĩ nhĩpêx to hã harênh o ri mẽ hkôt ixpa. Mẽ pahpiitã mẽ panê htyk ã harênhja pa hte mẽ kãm harê. Mẽ kot hprĩ hã mar nê hkôt amnhĩ xunhwÿr kaxyw. Jao amnhĩ krãm mẽ ujarênh mexta jagjênh nê hã no htÿx kaxyw. Pa ja hã mẽ omu nê ixkĩnh nê ijamaxpêr o:

—Na htem ixkapêr ma nê Jejus kôt amnhĩ xunhwÿr kurê kumrêx. Nà ãm hãmri na pa hte mẽ kãm ixkapêr kaprÿ ho ri ixpa hkêt nê. Anê.

¹⁸ No kêt mẽ pahte Tirtũm kot mẽ pahto hkra xwÿnhjaja ra mẽ pahte Kris pĩ kahpa hã mẽ panê htyk ã harênh mar nê pahkĩnh nê papa xwÿnh na pu mẽ. Jakamã na pu htem pajamaxpêr o:

—Nà ãm hãmri na Tirtũm Kraja htyk kukwak ri mẽ ixto mex nê mẽ ixto hkra. Mẽ ujarênhja mex kumrêx. Anê.

No kêt mẽ kêp hkra hkêt xwÿnhjaja na htem tee ri Kris tyk ã harênh ma nê hamaxpêr o:

—Tk. Tanhmã kot kêt we amnhĩ to nê mẽ panê ty? ãm amarĩ mẽ kot amnhĩ krã hkôt pĩ kahpa hã nhôr nê hpĩr kênã. Anê.

Tirtũm kra hkêt xwÿnhjê jarênh

Matêwre 11.25-26; Wam Korîit 3.19

¹⁹ Nê Tirtũm kapêr ã kagã htũm kot mẽ kêp hkra hkêt xwÿnhjê jarênh kot: Mẽ kot htÿx ri àhpumunh tÿx ã amnhĩ to jarkrar o pa htã kot paj mẽ kêp ja ho ijapêx pa nhũm mẽ ã amnhĩ jarênh anhÿr kaprÿ. Anê.

²⁰ Jakamã mẽ àhpumunh tÿx ã mẽ kot amnhĩ to jarkrar xwÿnhjaja nê

mê kot Mojes kapêr o mê ahkre ho ri mê pa xwÿnhjaja nê mê kapêr rÿnh xwÿnhjaja. Mê kot Tÿrtÿm Kra hkôt amnhÿ xunhwÿr kêt jakamã te mê àhpumunh kêt pyrãk. Tÿrtÿm kra hkêt xwÿnhjaja kot mê àhpumunh tÿx ã mê harênh tã no ãm Tÿrtÿm noo mã te mê àhpumunh kêt pyrãk. Nê te htÿx ri mê kot amnhÿ nhÿpêx o pa pyrãk. ²¹ Tÿrtÿm àhpumunh o àhpumunh jakamã na pre ra mê hkukamã hamaxpêr o:

–Nà kot paj mê àhpumunh tÿx ã mê omunh xà hkôt mê ho ixkra hkêt nê. ãm mê kot ixkra Jejus kot mê nê htyk ã harênh mar nê amnhÿ kaxyw hkôt hamaxpêr pix ã mê omunh xà hkôt kot paj mê ho ixkra. Anê.

²²⁻²⁴ No Ijaewjaja kãm amnhÿ krã hkôt pix mã amnhÿ nhÿpêx prãm jakamã na pa hte mê ixpê Jejus kwÿjaja mê hwÿr mra nê mê kãm Kris kapêr jarênh o ri ixpa nhÿm mê inhma nê ãm mê inhma. Nê te mê kot mê inhmar kêt pyrã nê mê inhmã:

–Tk. Nà kot paj mê tokyx axujarênh kôt amnhÿ nhÿpêx kêt nê. Kot kaj mê inhmã mê ixte aa mẽmoj pumunh kêt ô ho anê pa mê ja hã apumu nê axihtÿx ã apumu nê rÿ kormã hkôt amnhÿ nhÿpêx.

Anhÿr o inhmã kapêr. Tã no pa mê kãm ã amnhÿ nhÿpêx anhÿr kêt nê. ãm Kris kot mê panê pÿ kahpa hã htykja pix pa htem mê kãm harênh o ri ixpa. Ja kamã nhÿm mê hkwÿjaja mê inhma nê ãm mê inhma nê Kris xihÿtÿx kêt ã ãm amarÿ htyk ã harê. No mê hkwÿjaja. Tÿrtÿm kot amnhÿ kaxyw mê unhwÿr xwÿnhjaja na htem mê kurom mê inhma nê ra mê inhmar tÿx kurê kumrêx. Nê mê inhmã kapêr o:

–Nà ãm hãmri na Krisja Tÿrtÿm pyrã nê hihtÿx o hihtÿx. ãm hãmri na ka ã harênh anê. Anê.

No Ijaew kêt xwÿnhjaja na Ijaew pyrã nê kãm amnhÿ krã hkôt amnhÿ nhÿpêx o pa hprãm kêt nê. Nê mê kãm mê àhpumunh tÿx pix prãm o pa. Jakamã na pa htem mê kãm Kris kapêr jarênh o ri mê hkôt ixpa

nhÿm mê hkwÿjaja mê inhma nê Ijaew kwÿjê pyrã nê ãm mê inhma nê mê inhmã:

–Tk. Nà na ka htem ãm ri axêx o ri apa. Kot pa mê akapêr mar kêt nê. Kot paj mê axàhpumunh tÿx ã mê apumu nê rÿ kormã mê ama nê mê akôt amnhÿ nhÿpêx.

Anhÿr tã pa mê ãm arÿ Kris kot mê panê htykja pix pa mê kãm harênh o ri mê hkôt ixpa. Nhÿm mê hkwÿjaja mê inhma nê mê inhmã:

–Nà mê axàhpumunh kêt jakamã na ka htem atÿx ri ã ja jarênh anê.

Anhÿr tã no nhÿm mê hkwÿjaja. Tÿrtÿm kot amnhÿ kaxyw mê unhwÿr xwÿnhjaja na htem mê inhma nê mê inhmã kapêr o:

–Nà ãm hãmri na ka mê ã Krisja jarênh anê. Tÿrtÿm pyrã nê àhpumunh o àhpumunh kênã. Anê.

²⁵ Tÿrtÿm mê Jejus wa mê pakurom àhpumunh o àhpumunh nê hihtÿx o hihtÿx.

Tÿrtÿm mê parom hihtÿx o hihtÿx ã harênh

Matêwre 11.25; Sikÿn Korît 12.7-10; Xiakre 2.5

²⁶ E Kris kôt ixtô nê ixtôxjaja. Amnepê mã Tÿrtÿm kot amnhÿm mê axunhwÿrta ã tanhmã na ka prem amnhÿ nhÿpêx to ho ri apa? Nà na ka prem axohtô nê jar mê noo mã axàhpumunh kêt nê ri apa. Nê mê apê pahi hkêt nê ri apa. Mê axohtô nê amnhÿ to hkryre nê ri apa. ²⁷ Tã nhÿm Tÿrtÿm amnhÿ kôt mê ate amnhÿ to hkryre xwÿnhjê xunhwÿ. Kojã nhÿrmã kot tanhmã mê pahpiitã mê pajarênh to xà hã arÿgrota kato hãmri nhÿm mê àhpumunh tÿx ã amnhÿ to jarkrar xwÿnhjaja Tÿrtÿm kot mê kurom mê pahto hkra hã mê pahpumu hãmri nê tee ri amnhÿ kukamã hamaxpêr nê amnhÿ kamã hpijaam tÿx nê. Nê mê hihtÿx ã amnhÿ to jarkrar xwÿnhjaja haxwÿja. Nhÿm Tÿrtÿm kot mê kurom mê pahto hkra hã mê pahpumu nê tee ri amnhÿ kukamã hamaxpêr nê amnhÿ kamã hpijaam tÿx nê.

28 Na hte Tîrtûm amnhî kaxyw mē kot amnhî to hkryre xwÿnhjê xunhwÿ. Nē mē kot mē kamā kahak o pa xwÿnhjê xunhwÿ. Jar pyka ja kamā mē hkwÿ kot mē hkaga htā nhūm Tîrtûm amnhî mā mē unhwÿ. Mēmo kaxyw na hte ā amnhîm mē unhwÿr anē? Nà mē kot nhÿrmā tee ri mē àhpumunh tÿx ā amnhî jarēnh xwÿnhjê pumunh nē expēn mā mē harēnh o:

—Kwa mē pahte mē àhpumunh tÿx ā mē harēnh tā nhūm Tîrtûm mē pahpyrà nē amnhî kaxyw mē unhwÿr kêt nē. Nà te mē àhpumunh kêt pyràk.

Anhÿr o expēn mā mē harēnh kaxyw na pre Tîrtûm amnhîm mē kot amnhî to hkryre xwÿnhjê xunhwÿ. 29 Jakamā kot puj mē nhÿrmā Tîrtûm mā amnhî to jarkrar pē tanhmā kām amnhî jarēnh to hkêt nē. Rÿ kām:

—Kwa ga ixpumu Tîrtûm. Na pa hte ā amnhî nhîpêx anē nē ā amnhî nhîpêx anē. Kwa ja hā ixpumu nē ixto akra nà?

Anhÿr o amnhî to hwÿr kêt nē. 30 Ām Jejus pix kukwak ri na hte Tîrtûm mē pahto hkra. Tām na pre Tîrtûm noo mā amnhîm mē paxunhwÿ. Mē pahte uràk nē pahpê hkra kaxyw. Jakamā na pu htem ām pix kukwak ri amnhî nhîpêx mex o ri papa. Nhūm mē pamā àhpumunh tÿx xà hkwÿ gō. Tā ra kot mē pahte amnhî tomnuj pē mē papytār jakamā kot puj mē nhÿrmā pahtyk tā no ām akupÿm pahtîr nē Tîrtûm mē wa kuri pahtîr tûm nē pamex kumrêx nē papa ho papa. 31 Tā ā Jejus kot mē panhîpêx kot anhÿr jakamā Tîrtûm kapêr ā kaga htûm kot ja jarēnh kot:

Kot ka mē amā mēmoj tā jarkrar prām nom kêr ka mē kamjaja amnhî to jarkrar kêt nē. Mē panhō Pahiti ra kot mē panē tanhmā amnhî nhîpêx toja pix ā tanhmā ho jarkrar to ho ri apa. Anē.

2

Pawre kot tanhmā Kris jarēnh to hā harēnh
Sikûn Korîit 4.1-7; Wam Pêtre 3.15

1-2 E Kris kôt ixtō nē ixtōxjaja. Amnepê mā ixte mē awÿr inhmōrta ā na pa pre inhnojarêt nē ijamaxpêr o:

—Kot paj ma mē hwÿr mō nē mē kām Kris kapêr jarē. Kot amnhî grônh kôt mē inhnê htykja pa mē kām harē. Ām ja pix jarēnh o ri mē hkôt ixpa. Nom kot paj mē kapêr japjê xwÿnhjê pyrà nē mē kām ixkapêr japjê hkêt nē. Rÿ mē uràk nē te ixàhpumunh tÿx o ri ixkapêr japjê pyràk o ri mē kām ixkapêr japjê hkêt nē. Kot paj ām ixkatāt kôt ri mē kām tanhmā Jejus jarēnh to pix o ri mē hkôt ixpa.

Anhÿr o mē akukamā ijamaxpêr. Hāmri nē ma mē awÿr mō nē mē awÿr pōj nē mē amā Jejus kot mē panē htyk nē akupÿm htîrja pix jarēnh rāhā ho ri ixpa. 3 Na pa pre tee ri amnhî kukamā ijamaxpêr nē ijamaxpêr o:

—Hêxta waa nē. Tanhmā kot pa we mē kām Tîrtûm kapêr jarēnh to nhūm mē inhmar tÿx nē hkôt amnhî xunhwÿr kurê kumrêx wehe? Kot paj amnhî krā hkôt mē kām harēnh kêt nē. Ja kaxyw ijamaxpêr tÿx kêt kênā. Kot paj amnhî krā hkôt mē kām harē nhūm mē ām inhma nē hkôt amnhî xunhwÿr kêt nē. Nà kot paj Tîrtûm nhÿ hā mē kām tanhmā ixkapêr to kê tām tanhmā mē hkrā hto kê mē inhma nē hkôt amnhî xunhwÿr japêr.

Anhÿr o ijamaxpêr. 4 Nē mē ate inhmar kaxyw na pa pre ixêx rom tanhmā mē ano kupyrt to ho ri ixpa hkêt nē. Rÿ mē pajaja mē ixàhpumunh xà hkôt tanhmā mē amā ixkapêr to hkêt nē. Na pa pre ām Tîrtûm Karō nhÿ hā mē amā awjarē. Mē ate mar nē hihtÿx o hihtÿx ā omunh kaxyw. 5 Jakamā na ka prem Tîrtûm xihtÿx ā omu nē amnhî kaxyw hkôt ajamaxpêr kurê kumrêx. No pa ixàhpumunh tÿx ā ixpumunh kôt ixkôt ajamaxpêr kêt nē. Na ka prem ixkapêr ma nē ajamaxpêr o:

—Nà Tîrtûm na mē parom àhpumunh o àhpumunh nē hihtÿx o hihtÿx.

Anhÿr o ajamaxpêr kôt ajamaxpêr kurê kumrêx.

Tirtûm Karô kot mē pamā àhpumunh xà nhôr ã harēnh

Matêwre 7.6; Juãw 14.22, 16.13-15; Xiakre 3.13-18

⁶ Nē na hte Tirtûm kra hkwyjaja Tirtûm kot amnhî nhîpêx ã omunh mex. Nē hamaxpēr ã omunh mex. Jakamā na pa hte mē ahkre japjê ho mē hkôt ixpa. Nom jar pika ja kamā mē pajamaxpēr tÿx xà ho mē ahkre hkêt nē. Rÿ pika piitā hkôt mē utār xwÿnhjê jamaxpēr tÿx xà ho ri mē ahkre ho ri ixpa hkêt nē. Koja nhÿrmā mē àhpumunh xàja mē kēp hapêx pa. ⁷ Jakamā na pa hte ãm Tirtûm xàhpumunh xà pix o mē ahkre o ri ixpa.

Amnepê mā kormā mēmoj piitā hkêt ri na pre Tirtûm amnhî kukamā amnhî jarēnh o:

—Mē kot amnhî kaxyw Ixkra hkôt mē hamaxpēr o mē pa xwÿnhjaja kot paj mē ho ixkra nhÿm mē mex kumrêx nē pa ho pa.

Anhÿr o mē harē. Nom mē kot hkôt amnhî xunhwÿr kêt xwÿnhjaja nhÿm kormā mē kām ja ho amnhîrît kêt nē. Tā ja na pa hte ra mē kām harēnh rāhā ho ri mē hkôt ixpa nhÿm mē Tirtûm kām mē pahto hkra hprām hā harēnh ma. ⁸ Nom pika piitā hkôt mē ho amnhîptār xwÿnhjaja na mē kormā ja mar kêt nē. Kēp apu mē kot mar ronhÿx prem pî kahpa hā mē panhō Pahihtî nhôr nē hpîr kêt nē. Mex o mex tā nhÿm prem axtem nē ã hipêx anē. ⁹ Mē kot mēmoj mex pumunh kêt tā Tirtûm kapēr ã kagà htûm kot mēmoj mex jarēnh kot:

Na pre Tirtûm mē kām hkînh xwÿnhjê kutêp mēmoj mex kwÿjaxwÿ nhÿm mex o mex nē mē ahā hikwÿ.

Aa mēhō kot mēmoj mex o mexja pumunh kêt.

Nē aa mēhō kot ã mēmoj kot anhÿr pumunh kêt.

Nē aa ã mēmoj mex kot anhÿr kukamā hamaxpēr kêt.

Tā nhÿm Tirtûm mē kutêp hkwyjaxwÿ.

Anhÿr o kot harēnh tā no nhÿm mē kot hkôt amnhî xunhwÿr kêt xwÿnhjaja ã kapēr anhÿrja mar kêt nē. ¹⁰ Mē pamā na pre Tirtûm ja ho amnhîrît. Na pre ra mē pamā Karô gō nhÿm mē pamā gjêx o mē pamā mēmoj to amnhîrît mex nē. Tirtûm Karôja àhpumunh tÿx o àhpumunh tÿx. Nē kot hprî hā Tirtûm jamaxpēr pumunh par. ¹¹ No mē papajaja na pu htem axpēn jamaxpēr kôt axpēn pumunh kêt nē. Na pu htem papam amnhî jamaxpēr ã amnhî pumu. Ja pyrà nē Tirtûm Karô pix na hte Tirtûm jamaxpēr pumunh. ¹² No mē pahpê hkrajaja na hte mē pahkarôja pix mē pakamā pa hkêt nē. Na hte määnēn Tirtûm Karôja mē pakamā pa nē mē pamā tanhmā mēmoj to amnhîrît to ho mē pahkôt pa. Nē Tirtûm kot mē pakutêp mēmoj mexjaxwÿrja nhÿm ja kukamā mē pamā harēnh o amnhîrît.

¹³ Jakamā na pa htem amnhî krā hkôt ri mē kām ixujarēnh kêt nē. ãm Tirtûm Karô nhÿ hā na pa hte ixprî hā mē kām kapēr jarēnh o ri mē hkôt ixpa. Ra Tirtûm Karô kot mē amā gjêx xwÿnhjê mā pa ÿ hā ixkapēr. ¹⁴ No mē kām Tirtûm Karô kapēr mar prām kêt xwÿnhjaja na htem Tirtûm kot amnhî nhîpêx pumu nē hprî hā omunh kêt nē. Mē kām kapēr mar prām kêt jakamā na htem ri kot tanhmā mē pahto mex to hā harēnh ma nē hamaxpēr o:

—Tk. Kwa mo kaxyw na htem ri ã Tirtûm jarēnh anē? Tanhmā kot we amnhî to nē mē pahto mex? Nà kot anhÿr kêt. Anē.

¹⁵ Nom mē pahpê Tirtûm kra hkwy hā mē pahte Karô kapēr mar mex xwÿnhjaja na pu hte mē kurom Tirtûm kot amnhî nhîpêx ã omunh mex nē. Nē Karô xō ri mar mex nē nhÿm mē kot Karô kapēr mar kêt xwÿnhjaja tee ri ã mē pahte amnhî nhîpêx anhÿr ã mē pahpumu. Nom hprî hā mē pahte Tirtûm kôt amnhî nhîpêx pumunh kêt nē. ¹⁶ Tirtûm kapēr ã kagà htûm kot ja jarēnh kot:

Mēhō na kot Tīrtūm jamaxpēr pumunh?

Nē mēhō na pre we kām hamaxpēr gō?

Nà amrakati kumrēx. Tapxipix na àhpumunh tỳx o àhpumunh tỳx. Anē.

Tā mē papajaja mē pahte Tīrtūm Karō kapēr mar tỳx xwỳnhjaja na pu htem Kris xō ri pahprī hā hamaxpēr kōt omunh mex nē.

3

Mē kot Tīrtūm mā tanhmā amnhī nhīpēx to xwỳnhjē jarēnh

Wam Korīt 14.20; Karatas 5.16-21; Epes 4.14; Eprēw 5.11

¹ E Kris kōt ixtō nē ixtōxjaja. Pa mē amā mēmoj jarē ka mē inhma nē kām ajamaxpēr. Nà amnepē mā kormā mē ate Kris kōt amnhī nhīpēx tohtuj anhỹrta ã tanhmā na ka prem amnhī nhīpēx to ho ri apa wehe? Na ka prem arī ajamaxpēr tūm kōt pix mā amnhī nhīpēx. Kormā mē ate Tīrtūm Karō hkōt amnhī nhīpēx mex kēt jakamā na ka pre htem mēhprīre kot amnhī nhīpēx pyrāk o amnhī nhīpēx. Nē mē urāk nē kormā mēmoj piitā omunh kēt nē. Jakamā na pa pre mē amā ixujarēnh kaxyw nē te mē ate kormā Tīrtūm kapēr mar kēt xwỳnhjē pyrāk o mē anhīpēx nē mē amā tanhmā ixujarēnh to. ² Mē hkarāre na htem mē hkā kagō pix kaō nē kormā mē apkur xà mex kur kēt nē. Ja pyrā nē na pa pre te ixte mē ato hpijaōr pyrā nē mē amā Tīrtūm kapēr piitā harēnh par kurē kumrēx kēt nē. Ām mē amā hkwỳ pix jarē ka prem ama nē Jejus kōt amnhī xunhwỳ. Tā na pa hte arī mē amā hkwỳ pix jarēnh o ri ixpa nē kormā piitā ho mē ajahkre jatur xàm mēnh kēt nē. ³ Na ka htem arī te mē apē Kris kwỳ hkēt pyrāk o amnhī nhīpēx o apa. Nē mēmoj kōt axpēn kām agryk axpēn mā axàkjēr o apa. Ā amnhī nhīpēx anhỹr jao arī mē ate amnhī nhīpēx tūm kōt amnhī nhīpēx rāhā nē.

⁴ Na hte mē akwỳjaja amnhī jarēnh o: “Ixpē Pawre hkwỳ na pa.” Anē.

Nē mē akwỳjaja amnhī jarēnh o: “Pa na ixpē Apor kwỳ na pa.” Anē. Kwa na ka htem ã amnhī jarēnh anhỹr o te mē apē Kris kwỳ hkēt pyrāk. ⁵ Apor mē pa ãm wa ixte Tīrtūm kapēr o mē ajahkre xwỳnh pix na pa wa. Wa ixpē mē anhō pahihtī hkēt kēnā kot ka kēt mē axtem nē mē apē ahpỹnhā wa ixkwỳ hā amnhī jarē. Na pa pre wa mē amā Tīrtūm kapēr jarēnh o ri mē akōt ixpa ka prem wa inhma nē amnhī kaxyw hkōt ajamaxpēr tỳx nē. Nē hkōt amnhī xunhwỳ nom wa pa wa ixkōt amnhī xunhwỳr kēt nē. Na pa wa ãm Tīrtūm kapēr o mē ajahkre nom amnhī kōt mē axunhwỳr kēt nē.

⁶⁻⁹ E pa ixprī hā mē amā war amnhī jarē ka mē inhma. Te wa ixpē Tīrtūm pur kām wa ixàpēnh xwỳnh pyrāk no mē kajaja te mē apē hpur pyrāk. Na htem hpur karē nhūm hirā nhūm mē kamā ahkre ho pa. Ja pyrā nē na pa pre ixkumrēx mē awỳr ixpa nē mē amā Tīrtūm kapēr jarēnh o ri mē akōt ixpa. Te mē kot pur kām ahkre ho ri pata pyrāk. Tā nhūm Apor ixpānhā ma mē awỳr pa nē te mē kot pur karēta pyrāk o mē anhīpēx nē mē amā Tīrtūm kapēr o mē ajahkre mex o ri pa. Xà na hte pur karēr xwỳnhja rỳ kamā ahkre xwỳnhja tām tanhmā mēmo hy hto nhūm ra higrōt nē hprēk nē ô? Nà na htem ãm ahkre hpa nhūm arī hikwỳ. Nhūm Tīrtūm tām tanhmā hyta to nhūm higrōt nē hprēk nē ô. Ja pyrā nē na hte Tīrtūm mē ho hkra nē tanhmā mē ho nhūm mē amnhī kaxyw hkōt hamaxpēr tỳx nē hkōt amnhī nhīpēx mex o pa. Nom mē kām harēnh o pa xwỳnhhta kōt amnhī xunhwỳr kēt nē.

Nē na hte pur karēr xwỳnh rỳ kamā ahkre xwỳnhja tām tanhmā hyta to nē ho htīr kēt nē. Tīrtūm pix na hte tanhmā ho nhūm higrōt. Ja pyrā nē na pa hte Tīrtūm kapēr o mē ajahkre o ri mē akōt ixpa nom pa tanhmā mē ato ka mē apē Tīrtūm kra nē ri apa hkēt nē. Tanhmā kot pa mē ato ka mē apē hkra? Tapxipix na kot mē pahto hkra kaxyw àhpumunh. Nē tapxipix na hte tanhmā mē pahkrā

hto pu mẽ kãm hprãm xà hkôt amnhĩ nhĩpêx mex o ri papa.

Ně pur karêr xwýnh mẽ pur kãm ahkre xwýnhja wa. Hamě wa àpênh mex jakamã koja hamě wa kot pur kãm àpênh pãnhã amnhĩm ujamýnh rax ně. Ja pyrã ně kot paj mẽ ixte Tĩrtũm kapêr o mẽ ajahkre ho ri mẽ akôt ixpa xwýnhjaja nhũm Tĩrtũm nhỹrmã mẽ ixàpênh pãnhã mẽ inhmã amnhĩrer mex ně.

Ně te mẽ ate Tĩrtũm nhõ ixkre pyrãk. ¹⁰ Ně pa te ixpê Tĩrtũm mã ixkre hã ixàpênh xwýnh pyrãk jakamã na pre Tĩrtũm mẽ akaxyw tanhmã ixto pa mẽ amã tanhmã kot amnhĩ nhĩpêx to hã harênh o ri mẽ akôt ixpa. Te ixte õ ixkre kaxyw ãm xà maati xãm pyrãk o mẽ anhĩpêx. Jao mẽ amã kapêr jarênh o ri mẽ akôt ixpa. Mě ate amnhĩ kaxyw hkôt ajamaxpêr ně hkôt amnhĩ xunhwýr kaxyw. Tã na ka prem hkôt amnhĩ xunhwý nhũm ixpãnhã Tĩrtũm kapêr o mẽ ahkre ho mẽ pa xwýnh kwýjaja mẽ awýr mra ně mẽ amã kapêr jarênh jatur xãm kurê. Ně hprĩ hã ho mẽ ajahkre ho ri mẽ akôt pa. Te ho mẽ kot ixkre krax nhĩpêx pyrãk o mẽ anhĩpêx.

Ně kwa mẽ ate mẽ ahkre o mẽ apa xwýnhjaja kêr ka mẽ akatãt kôt mẽ ahkre mex rãhã ho ri mẽ hkôt apa.

¹¹ Ně Jexus Kris tapxipix na pu htem hkôt amnhĩ xunhwý nhũm mẽ pané mẽ pahte amnhĩ tomnuj o hapêx. Jakamã te kêp kýxpê ixkre nhĩmõk ã nõr xà maatita pyrãk.

¹² Ně na htem tõhã ixkre nhĩpêx kaxyw ně pĩ htýx jakà ně ho hipêx nhũm kritpêm mẽ kãm mex ry ně kuhê. No na htem tõhã nojarêt kãm ixkre hã apê ně pĩ rerek o hipêx nhũm mẽ kãm mex ry hkêt ně. Koja rôr nhyre hwýr mra ně mẽ kêp hapôk ně homnu. Ja pyrã ně na hte Tĩrtũm kapêr o mẽ ahkre ho ri mẽ pa xwýnh kwýjaja te mẽ kot katãt kôt pĩ htýx o ixkre nhĩpêxta pyrã ně katãt kôt mẽ ahkre ho ri mẽ hkôt pa. No nhũm mẽ hkwýjaja axtem ně te mẽ kot pĩ rerek o ixkre nhĩpêxta pyrãk o amnhĩ

nhĩpêx ně htýx ri Tĩrtũm kapêr kwým ri tanhmã mẽ ahkre hto ho pa. Jao hkwým ri amnhĩ nhĩpêx rãhã ho ri pa.

¹³ Ně koja mēhõ pĩ htýx pix o amnhĩm õrkwý nhĩpêx hãmri nhũm mẽmo arĩgro hã tanhmã amnhĩ to ně kêp pôr. No ãm hã põja pix xêt pa nhũm kãm hikwý xà ně õkwa êja arĩ piitã mex nhũm ixkre hpãm axte hã pô janhôr o nyw. No koja pĩ rerek o hipêx nhũm mẽmo arĩgro hã kêp pôr hãmri ně piitã kêp kaxàr pa. Ja pyrã ně koja nhỹrmã Krisja akupýn mẽ pahwýr wrý hãmri ně mẽ pahte kãm tanhmã amnhĩ nhĩpêx to ho papaja piitã hã mẽ pahpumunh kôt tanhmã mẽ pajarênh to. Koja mẽ pahkwýjaja mẽ pahte mẽ kot pĩ htýx o ixkre nhĩpêxta pyrã ně Tĩrtũm mã mẽ pahte amnhĩ nhĩpêx mex o mẽ papa xwýnhjê xàpênh pumu ně mẽ pahte amnhĩ to mex xwýnh ã mẽ pajarê. Hãmri ně hpãnhã mẽ kot pĩ rerek o ixkre nhĩpêxta pyrã ně mẽ kot kãm amnhĩ nhĩpêx mex kêt xwýnhjê pumu ně mẽ kot amnhĩ to mex kêt xwýnh hã mẽ harê.

¹⁴ Ně pĩ htýxja na hte tanhmã amnhĩ to ně hpôr no ãm arĩ mex ně kuhê nhũm mẽ piitã arĩ mex ã omu. Ja pyrã ně koja Krisja mẽ kot kãm tanhmã amnhĩ nhĩpêx mex to ho mẽ pa xwýnhjê pumu ně mẽ kot tanhmã kãm amnhĩ nhĩpêx to hpãnhã mẽ kãm amnhĩre nhũm mẽ piitã mẽ kot amnhĩ to mex ã mẽ omu. ¹⁵ No pĩ rerekja na hte pôr ně kaxàr pa. Ja pyrã ně mẽ kot Kris mã amnhĩ nhĩpêx mex hkêt xwýnhjaja koja Tĩrtũm mẽ kãm amnhĩrer kêt ně. Nom arĩ mẽ kêp hkra jakamã koja mẽ arĩ kuri htĩr tũm ně pa. No ãm mẽ kot Tĩrtũm mã amnhĩ nhĩpêx mex kêt jakamã koja mẽ hkwýjê hkĩnh ã amnhĩm mẽmoj mex kwý jamýnh kêt ně. Te mēhõ nhõrkwý kêp hpôr nhũm mẽ hkukrêx kwý jamýnh kêt ně ý kamã kurũm hapõx pyrãk.

¹⁶⁻¹⁷ E pa mẽ amã mẽmoj jarê. Ra mẽ ate mar tã mãn ka mẽ ra tanhmã amnhĩ to ně hã ano hkêt rý ko. Nà te mẽ pahpê Tĩrtũm nhõrkwý pyrãk.

Tîrtûm nhôrkwÿja ô na. Tã mẽ pahpê hkra nhûm Karô kot mẽ pakaxwÿnh mã gjêx jakamã te mẽ pahpê ôrkwÿ pyrâk. Jakamã mẽ kot kapêr kwÿm ri mẽ ajahkre o ri mẽ pa xwÿnhjaja te mẽ kot Tîrtûm nhôrkwÿ grânh xwÿnh pyrâk. Koja mẽ nhÿrmã amnhÿ xà htÿx kamã hamak o pa.

Mẽ pahte amnhÿ to jarkrar kêt ã mẽ pamã karô

Wam Korîit 1.10-25

¹⁸ Nê kot kaj mẽ atô axâhpumunh tÿx o amnhÿ to jarkrar o ri apa japêr. Kwa mẽ jam anhÿre nê axte ri ã amnhÿ nhÿpêx anhÿr kêt nê. Nê te mẽ ate amnhÿ nê axâhpumunh tÿx xâja nhâm rênh par pyrâk o amnhÿ nhÿpêx. Mẽ paxâhpumunh xâja pika kamã mẽ âhpumunh pix jakamã kêr ka mẽ te amnhÿ nê nhâm rênh pyrã nê hpãnhã Tîrtûm xâhpumunh xà hkôt pix mã amnhÿ nhÿpêx o ri apa. ¹⁹ No pika kamã mẽ âhpumunh xwÿnhjaja Tîrtûm noo mã te mẽ hkrã pipãnh nê htÿx ri pata pyrâk. Tîrtûm kapêr ã kagã htûm kot mẽ harênh kot:

Pika ja kamã mẽ âhpumunh tÿx ã mẽ kot amnhÿ to jarkrar xwÿnhjaja Tîrtûm noo mã te mẽ kot amnhÿ to hêx o pa pyrâk. Anê.

²⁰ Nê mãânên mẽ harênh kot:

Mẽ kot amnhÿ xâhpumunh tÿx ã amnhÿ to jarkrar o ri mẽ pa xwÿnhjaja na hte Tîrtûm mẽ omu nê mẽ kot ã amnhÿ jarênh anhÿr kaprÿ hã mẽ harê. Anê.

²¹⁻²² Jakamã kwa kêr ka mẽ axte mẽ apê ixkwÿ rÿ mẽ apê Apor kwÿ hã amnhÿ jarênh o ri apa hkôt nê. Mẽ apê wa ixkwÿ hkôt kênã. Nê mẽ apê nhâm mēhō hkwÿ hkôt. Mẽ pahpiitã mẽ pahpê Kris kwÿ na pu mẽ.

Nê kot puj mẽ nhÿrmã pahtÿk tã akupÿm pahtÿr nê Tîrtûm mẽ Jesus wa kuri pamex nê pahtÿr tûm nê ri papa. Jakamã kwa mẽ tee ri amnhÿ kukamã ajamaxpêr kêt nê.

Nê jarãhã mẽmoj piitã mẽ panhō. Nê kormã mẽmoj kot amnhÿrît kêt xwÿnhjaja haxwÿja mẽ panhō na. Æm mẽmoj piitã mẽ panhō jakamã te mẽ pahpê mẽmoj piitã mẽõ pahi pyrâk.

²³ No mẽ papajaja axtem Kris kêp mẽ panhō Pahihti. Nê Tîrtûm kêp Kris nhō Pahihti.

4

Tîrtûm pix kot tanhmã mẽ pajarênh to xwÿnh ã harênh

Eprêw 13.17

¹ Nê mẽ pajaja mẽ ixpê mẽ anhō pahi hkêt. Æm mẽ ixte Kris mã tanhmã amnhÿ nhÿpêx to ho ixpa xwÿnh pix jakamã Tîrtûm kormã kapêr kwÿ ho amnhÿrît kêtja na pa htem mẽ amã ho amnhÿrît o ri mẽ akôt ixpa. Ja kaxyw na pre mẽ ixunhwÿ. ² Na pre Kris tanhmã mẽ inhmã kapêr to nê mẽ inhmã:

—E kêr ka mẽ ixkapêr pix o mãn mẽ ahkre ho ri mẽ hkôt apa. Anê.

³⁻⁴ Kumã pix mã ixte amnhÿ nhÿpêx o ri ixpa jakamã koja tapxipix ixte kãm amnhÿ nhÿpêx ã ixpumunh kôt tanhmã ijarênh to. Ixte kãm amnhÿ nhÿpêx mex ã ijarê rÿ ixte kãm amnhÿ nhÿpêx mex kêt ã ijarê. Æm tapxipix koja tanhmã ijarênh to. No koja nhâm mēhō rÿ mẽ atô ã ijarênh anê pa ama nê ãm ama. Rÿ papam tanhmã kãm ixte amnhÿ nhÿpêx mex to hã kãm amnhÿ jarênh japêr hãmri nê ãm ixtÿx kãm ã amnhÿ nhÿpêx anhÿr ã amnhÿ jarênh kaprÿ. Pahihti Kris pix kot hprÿ hã mẽ pahte amnhÿ nhÿpêx kôt pahpumunh jakamã tapxipix koja tanhmã mẽ pajarênh to.

⁵ Jakamã kwa kêr ka mẽ ri mẽ kot Tîrtûm mã tanhmã amnhÿ nhÿpêx to hã mẽ omunh xà hkôt tanhmã mẽ harênh to hkôt nê. Koja nhÿrmã Pahihti Krisja akupÿn mẽ pahwÿr wÿrÿ nê rÿ tãm tanhmã mẽ pahte amnhÿ nhÿpêx to hã mẽ pahpumunh xà hkôt tanhmã mẽ pajarênh to. Nê mẽ kot hpimxur pê tanhmã amnhÿ tomnuj to ho mẽ pa xwÿnhjaja nhûm mẽ piitã mẽ noo mã mẽ kãm ja ho amnhÿrît nhûm mẽ ja hã mẽ omu. Nê mẽ pahpiitã mẽ pajamaxpêr xà ho amnhÿrît nhûm mẽ piitã hprÿ hã ja hã axpên pumu. Hãmri nhûm Tîrtûm rÿ kormã mẽ pahte kãm tanhmã amnhÿ nhÿpêx mex to ho pa xwÿnhjê jarê.

⁶ E Jejus kôt ixkwÿjaja. Nà na pa ã mẽ amã Apor mẽ wa amnhĩ jarēnh anē. Mẽ ate inhmar nē Tirtūm kapēr ã kagà hkôt tanhmã wa ijarēnh to kaxyw. Kot kaj mẽ ã amnhĩ nhĩpêx anē hãmri nē ahpÿnhã tanhmã mẽ ixte Kris kapēr jarēnh xwÿnhjê jarēnh to hkêt nē. Nē axpēn mã mẽ ijarēnh o:

—Nà tãm kot Kris kapēr jarēnh mex o kot hkwÿjê jakrenh jakamã kot paj hkôt pix mã mãn ri ixpa.

Anhÿr o axpēn mã mẽ ixtō jarēnh kêt nē. Kot kaj mẽ ã mẽ ixtō jarēnh anē nē te mẽ ixto jarkrar pyrāk o amnhĩ nhĩpêx. ⁷ Kwa mēhō na pre mẽ amã tanhmã ri mẽ ijarēnh to ka mẽ mar xà hkôt ã mẽ ijarēnh anē? Nē mẽ ixkapēr mex ã mẽ ixkwÿjê jarē nē mẽ ixkapēr mex kêt ã mẽ ixkwÿjê jarē. Nà na ka mẽ ãm amnhĩ krã hkôt ã mẽ ijarēnh anē nom Kris xàhpumunh xà ho ã mẽ ijarēnh anhÿr kêt nē. ãm mẽ ixte Tirtūm kapēr o mẽ ajahkre xwÿnhjaja na pa prem mẽ amã mẽmoj jarē ka mẽ ama nē mẽ inhÿ hã hkôt axàhpumunh mex nē. No amnhĩ krã hkôt mẽ axàhpumunh kêt kēnã kot ka kêt mẽ ã ahpÿnhã tanhmã mẽ ixto jarkrar anhÿr to ho ri apa.

⁸ Te mẽ ate Apor mẽ wa ixrom Tirtūm kapēr mar par nē hkôt amnhĩ nhĩpêx mex pyrāk. Te wa ixrom mẽ ate Jejus nhĩhkô hã mẽ ho amnhĩptār pyrāk. Hēxta waa nē. Kop apu ãm hãmri mẽ ate ïhkô hã mẽ ho amnhĩptār ronhÿx pa ijaxwÿja mẽ apyrà nē ã amnhĩ nhĩpêx anē. Hãmri nē ixkĩnh tÿx kumrēx. ⁹ Nom ja kot anhÿr kêt.

Jejus nhÿ hã mẽ ahkre xwÿnhjê jarēnh

Sikūn Korîit 4.8-10; Eprêw 12.1

Nē mẽ ixpê Jejus nhÿ hã mẽ ajahkre ho mẽ ixpa xwÿnhjaja te Tirtūmja axtem tanhmã mẽ inhĩpêx to pyrāk pa mẽ inhmex kêt nē ixpa. Te mẽ ixte gyw kãm amnhĩ rēnh nhūm mẽ kot mẽ ixkamã ôkre kahak pyrāk o na htem mẽ inhĩpêx. Jakamã na hte mẽ hkwÿjaja mẽ ixpumu nē mẽ ixkapēr

ma nē ãm mẽ inhma nē axpēn mã mẽ ijarēnh o:

—Tk. Kot mẽ ahkreja mexti hã. Kwa pu mẽ himex ri.

Anhÿr jakamã te ra mẽ ixtyk nē mẽ inhĩkwÿ nhūm mẽ piitã mẽ ixtã htu nē mẽ ixpumunh nē ma pa pyrāk o amnhĩ nhĩpêx. Jakamã na htem mẽ ixte mẽ ahkre ma nē ãm kuma nē ma pa. Nom Tirtūm kapēr o mẽ wrÿk xwÿnhjaja na htem ja hã mẽ pahpumu nē axpēn mã mẽ pajarēnh o:

—Kwa mẽ kot Jejus ã mẽ hipêx kati htã nhūm mẽ arĩ hkôt amnhĩ nhĩpêx mex nē aa hkaga hkêt nē. Hēxta waa nē. Nà ãm hãmri na htem ã amnhĩ nhĩpêx anhÿr o pa. Anē.

¹⁰ Na hte mẽ kot mẽ ixkapēr mar xwÿnh kwÿjaja kãm mẽ ixkĩnh kêt nē tanhmã mẽ ixto kapēr punuj to. No mẽ kajaja nhūm mẽ ã mẽ ato kapēr anhÿr kêt nē. Na htem mẽ ixkrã pipãnh ã mẽ ijarē no mẽ kajaja nhūm mẽ Kris nhÿ hã mẽ axàhpumunh tÿx ã mẽ ajarē. Nē mẽ ixte Tirtūm kapēr kôt amnhĩ nhĩpêx mex kêt ã mẽ ijarē no mẽ kajaja na htem Tirtūm kôt mẽ ate amnhĩ nhĩpêx mex ã mẽ ajarē. Nē mẽ kot mẽ ixkamã ôkre kahak tÿx tã mẽ akamã ôkre kahak kêt nē mẽ kãm mẽ akapēr mar prãm nē. ¹¹ Na pa htem arĩ Kris ã ixpunuj nē ixpa. Nē mẽ inhmã prãm nē mẽ inhmã kôr nē ri ixpa. Nē mẽ ixê pikaxônhre nē ri ixpa. Nhūm htem Kris ã mẽ ixtak rÿnh nē. Pa mẽ inhôrkwÿ hkêt nē nhãm ri ixpa nē nhãm ri ixpa. Na pa htem arĩ ã amnhĩ nhĩpêx anhÿr o ri ixpa. ¹²⁻¹³ Nē ixàpkur xà kaxyw ixàpēnh rÿnh o ri ixpa. Nhūm hte mẽ kãm Jejus prãm kêt xwÿnhjaja mẽ ijapry ho pa htã pa mẽ amnhĩ kurom mẽ kãm ixkapēr mex nē mẽ kãm:

—E kê Tirtūm mẽ ato mex nē ka mẽ amex nē apa. Anē.

Nē mẽ kot mẽ inhĩpêx kati htã pa htem mẽ kutã amnhĩ to htÿx nē arĩ mẽ hkôt ixpa. Na htem te mẽ kot ahpunuj nhĩpêx pyrāk o mẽ inhĩpêx nē mẽ ixwÿr mrar kêt nē. ã na htem mẽ ixte Jejus nhÿ hã mẽ ahkre o mẽ ixpa xwÿnhjê nhĩpêx anē.

Pawre te kêp mē hpām pyrāk ā kot amnhĩ jarēnh

Wam Tesarōn 2.11-12

¹⁴⁻¹⁵ E Kris kōt ixkwỳjaja. Na pa ā mē amā kagà nē mēnh anē. Nom mē ate inhmar nē amnhĩ kamā api-jaàm kaxyw kêt. Inhmā mē ajapê jakamā na pa ā mē amā ixkapêr nē hā kagà nē mēnh anē. Na mē ra ohtō nē ixpānhā mē awỳr pa nē mē amā Tirtūm kapêr o mē ajahkre. Nom ixkumrēx na pa pre mē amā kapêr jarē ka prem inhma nē Kris hkōt amnhĩ xunhwỳnē amnhĩ kaxyw hkōt ajamaxpêr tỳx nē. Jakamā paxipix te ixpê mē apām nhūm te mē apê ixkra pyrāk. ¹⁶ Jakamā kwa mē ixte amnhĩ nhĩpêx kōt ixpumu nē ixkōt mām kêt mē amnhĩ nhĩpêx o ri apa. ¹⁷ Ā mē ate amnhĩ nhĩpêx anhỳr kaxyw na pa pre ijamaxpêr nē ma mē awỳr Ximotre mē. Haxwỳja Kris kōt te kêp ixkra pyrāk. Nē inhmā hapêê. Na hte jar Kris mā tanhmā amnhĩ nhĩpêx mex to ho pa. Tā pa pre mē awỳr kumē. Koja ma mē awỳr mō nē pōj nē mē amā Kris kapêr jarēnh o ri mē akōt pa. Nē mē amā tanhmā ijarēnh to nē mē amā:

–Nā Pawre na hte Jejus Kris jamaxpêr kōt hamaxpêr o pa. Nē kot amnhĩ nhĩpêx kōt amnhĩ nhĩpêx o pa. Nē krĩ piitā hkōt mē kot urāk nē ā amnhĩ nhĩpêx o pa anhỳr kaxyw mē ahkre mex o pa. Anē.

¹⁸ Nē na xep mē akwỳjaja te ra àhpumunh tỳx pyrā nē tanhmā ijarēnh to nē ijarēnh o:

–Pawreja akupỳn mē pahwỳr mōr ā amnhĩ jarēnh tā koja akupỳn mōr kêt nē kām ga. Ām kapêr kati xwỳnh na.

¹⁹ Anhỳr ā ijarēnh tā koja Tirtūm kām tokyx ma mē awỳr inhmōr prām hā kot pa ma mē awỳr inhmōr kurê kumrēx. Hāmri nē pōj nē ixprĩ hā ā mē kot ixto kapêr anhỳr xwỳnhtajê pumu. Nē mēhō kot ā mē kām ijarēnh anhỳr xwỳnhta ā ahkukja. ²⁰ Tirtūm krajaja na htem hkōt pix mā amnhĩ nhĩpêx jakamā na htem hkōt tanhmā amnhĩ nhĩpêx to hā mē omu nē rĩ

kormā kêp hkra hā mē harē. Tā kot paj nhỹrmā mē awỳr pōj nē ā ixto kapêr anhỳr xwỳnhjê pumu nē ixprĩ hā mē kot amnhĩ nhĩpêx ā mē omu nē rĩ kormā tanhmā mē harēnh to. Jao Tirtūm nhỹ hā mē kot mē ajahkre hā mē omu rỳ amnhĩ krā hkōt mē kot mē ajahkre hā mē omu nē rĩ kormā tanhmā mē harēnh to. ²¹ Jakamā kwa mē tokyx ixkutêp tām amnhĩ nhĩpêx o ri apa. Kêr pa mō nē mē awỳr pōj nē mē ate tām amnhĩ nhĩpêx ā mē apumu nē ixkĩnh nē. Nē mēmoj tā mē amā ixàkjêr kêt nē. Nē mē amā ixkapêr mex pix o ri mē amā ixkapêr. Te mē hipêxà kot hkrajê mā kapêr mex pyrāk o mē amā ixkapêr mex nē. Hāmri pu mē axpên pumu nē pahkĩnh nē.

5

Mēhō kot tanhmā amnhĩ tomnuj to hā harēnh

Sikūn Korîit 2.5-11

¹ Nē kwa na pa pre tee ri mē anhĩōja jarēnh ma nē ixkaprĩ htỳx nē. Na xep hte amnhĩ tomnuj tỳx pē nā puro hā hpijaàm kêt o pa. Kwa mē pahpê Kris kwỳjaja mē pahte ā amnhĩ nhĩpêx anhỳr kêt nhūm mē kot Kris kōt amnhĩ xunhwỳr kêt xwỳnhjaja haxwỳja ā amnhĩ nhĩpêx anhỳr kêt tā nhūm ra mē anhĩōja kot Kris kōt amnhĩ xām tā ā amnhĩ nhĩpêx anē. Kwa ja omnuj tỳx kumrēx. ² Na xep ri ā amnhĩ nhĩpêx anhỳr o pa ka mē ja hā omu nē ām omu nē nē tanhmā kām nē hkêt nē. Amarĩ hā omunh o ri hkōt apa. Mē ate Tirtūm kōt axàhpumunh tỳx ā amnhĩ jarēnh tā no ām ja hā omu nē ām hā omu nē nē tanhmā kām nē hkêt nē. Kwa nā. Mē tee ri kot ā amnhĩ nhĩpêx anhỳrja ā omu nē akaprĩ nē hkêt wehe. Nē mē tokyx amnhĩ nē hano kê mē akōt Tirtūm mā amnhĩ jarēnh xā hā ixkre hwỳr axte mmar kêt nē.

³⁻⁵ Ixte mē apê awry htā ā kot amnhĩ nhĩpêx anhỳr ā harēnh ma nē hkukamā tanhmā ijamaxpêr to. Nā ra ixte mē awỳr ixpōx ronhỹx pa mē ato akuprō. Pahihti Jejus nhỹ hā mē ato akuprō nē mē amā kot

amnhî tomnuj xwÿnhhta jarê nê mē anê hanor kurê kumrêx. Jakamã e kêr ka mē māmri ã amnhî nê hipêx anê. Mē panhō Pahihti Jejus nhÿ hã amnhî nê hano nê te Satanasti mã rer pyrãk kê tee ri ja hã amnhî pumu nê tokyx kãm urer japêr. Hãmri nê akupÿm tãm amnhî nhÿpêx. Kê nhÿrmã Pahihti akupÿn mē pahwÿr wrÿ nhÿm ma mē pahkôt ô krÿ hwÿr api.

⁶ Mē ate Tirtÿm kapêr jarênh mar mex ã amnhî jarênh tã kormã amnhî nê ã kot amnhî nhÿpêx anhÿr xwÿnhhta janor kêt nê. Kwa mē tokyx amnhî nê hano. Na htem pãwti nhÿpêx kaxyw nê kamã kot ho hikot xã ho hkryre nê kamã kurê nê gaa nê rÿ ho piitã hikot pa. Ja pyrã nê kot ka mē amnhî nê kot amnhî tomnuj xwÿnhhta janor kêt nê hãmri nê gaa nê ra urãk nê apiitã ã amnhî nhÿpêx anhÿr o ri apa.

⁷ Kwa mē tokyx amnhî nê hano. Kêr ka mē arÿ amnhî to mex pix o ri axpên kôt apa nê tãm ri amnhî nhÿpêx o ri axpên kôt apa. Na pre ra Jejus Kris mē pahte amnhî to mex o papa kaxyw mē panê ty. Mē pahpiitã mē panê ty. ⁸ Jakamã na pu htem ãm amnhî to mex pix o ri papa. Nê tãm amnhî nhÿpêx o ri papa. Jao tanhmã amnhî tomnuj to ho ri papa hkêt nê.

⁹ Nê wam ixte mē awÿr kagã nê mênhta kamã na pa pre mē amã:

–Kêr ka mē nhãm mē kot mênijê kamã hpijaàm kêt o mē pa xwÿnhjê hkôt ri apa hkêt nê. ãm ri mē hkàx ã apa.

Anhÿr o mē amã hã karô. ¹⁰⁻¹¹ Nom na pa pre mē piitã ã mē nê mē akurê anhÿr kêt nê. ãm mē kêp Kris kwÿ hã amnhî jarênh tã ã ri amnhî tomnuj anhÿr xwÿnh pixjaja na pa pre mē nê mē akurê. Koja mēhō kêp Kris kôt mē pahtô rÿ mē pahtôx ã amnhî jarênh tã mē kamã hpijaàm kêt o ri pa ka mē ja hã omu nê hkôt ri apa hkêt kurê kumrêx.

Nê mē kãm nhãm mē hkukrêx kÿnh o kãm ho ô hprãm o ri mē pa xwÿnhjaja.

Nê sãnti kutã hkôn krã ho rôrôk nê hkrÿ nê kãm mex ã harênh o ri mē pa xwÿnhjaja.

Nê mē kot axpên to kapêr punuj o ri mē pa xwÿnhjaja.

Nê mē pipãnh o ri mē pa xwÿnhjaja.

Nê axpên pê ri mē àhkÿnh o mē pa xwÿnhjaja.

Koja mēhō kêp Kris kwÿ hã amnhî jarênh tã ã amnhî nhÿpêx anhÿr o ri pa ka mē ja hã mē omu nê hkôt ri apa hkêt kumrêx. Nê mē kutã axàpkur kêt nê. ãm mē hkàx ã ri mra.

No mē kêp Kris kwÿ hkêt xwÿnhjê nê na pa pre ã mē akurê anhÿr kêt nê. Mē piitã ã mē kot amnhî nhÿpêx anhÿr o pa kênã. Na htem axpên kãm hpijaàm kêt o ri pa.

Nê mē kãm axpên kukrêx kÿnh o kãm ho ô hprãm o ri pa.

Nê sãnti kutã hkôn krã ho rôrôk nê hkrÿ nê kãm amnhî jagrer pê amnhî to hwÿr o pa.

Nê mē axpên pê àhkÿnh pix o pa.

Kris kwÿ hkêt xwÿnhjaja na htem ã amnhî nhÿpêx anhÿr o pa. Tã tanhmã kot ka wem amnhî to nê mē hkàx ã ri apa? Mē piitã ã mē kot amnhî nhÿpêx anhÿr kênã. Kot puj mē nhÿrmã Tirtÿm nhô krÿ mex wÿr api nê rÿ kormã mē hkàx ã ri papa.

¹²⁻¹³ Nê mē kêp Kris kwÿ hkêt xwÿnhjaja na pa hte mē kot amnhî tomnuj ã mē omu nê ãm mē omu nê tanhmã hã mē kãm nê hkêt nê. Tirtÿm tãm koja nhÿrmã ja hã tanhmã mē hipêx to. No koja Kris kôt mē pahtô rÿ mē pahtôxjê hō tanhmã amnhî tomnuj to ho pa pu mē pahtô ja hã omu nê nê tanhmã kãm pakapêr to kurê kumrêx. Tirtÿm kapêr ã kagã htÿm kot ja jarênh kot:

Kêr ka mē amnhî nê Kris kôt akwÿjê hō kot tanhmã amnhî tomnuj to ho pa xwÿnhjê jano. ã harênh kot anhÿr.

6

Mē pahte Kris kwÿjê ho pakapêr kêt Matêwre 5.38-40

¹ Nê na ka xep htem Kris kôt atô rÿ atôxjê hō mē ka wa tanhmã axpên

tomnuj to nē axtem nē juisti hwÿr axpēn to mra. Mē apyrà nē kēp Kris kwÿ hkēt tā ka htem ma hwÿr amnhĩ to mra nhũm war axpēn tā war ama nē tanhmā war ajarēnh to. Kwa mon ka htem axtem nē ā Kris kwÿ hkēt xwÿnhjē hwÿr mē amnhĩ to amrar anē? Kēt mē Kris kōt anhiō hwÿr mǎn kēt mē amnhĩ to mra nē kumā mǎn amnhĩ jarē kē axpēn tā war ama nē axpēn tā tanhmā war amā kapēr to.

²Ra mē ate ja mar tÿx tā hkōt amnhĩ nhĩpēx kēt nē. Mēmoj ām grire htā ka wa tokyx akupÿm hā tām axpēn xām kēt nē. Rÿ Kris kōt war atōjē hō hwÿr wa amnhĩ to atēm nhũm akupÿm tām axpēn tā war axām kēt nē. Ām axtem nē mē kēp Kris kōt mē atō hkēt xwÿnhjē hwÿr amnhĩ to mra. Kwa mē ā amnhĩ nhĩpēx anhÿr kēt nē. Mē pahpē Kris kwÿjaja kot puj mē nhÿrmā Kris nhĩhkō hā mē kēp hkwy hkēt xwÿnhjē tanhmā mē harēnh to. ³Nē Tirtūm kapēr o mē wrÿk xwÿnhjaja kot puj mē mǎānēn nhÿrmā tanhmā mē harēnh to ho pahkrī. Jakamā kwa mǎmrī ā mē pahte amnhĩ nhĩpēx anhÿrja kukamā akupÿm tanhmā axpēn xunhwÿr to ho apa. Mēmoj tā mē atōjē hō wa kot tanhmā axpēn to hā wa omu nē tokyx akupÿm axpēn tā wa kām akapēr kē wa tokyx akupÿm tām axpēn nhĩpēx. Ā mē kot axpēn nhĩpēx anhÿr o paja na kēt mex. ⁴No na ka xep htem arī Kris kōt mē akwÿ hkēt xwÿnhjē hwÿr axpēn to mra nē mē kām amnhĩ jarē. Kwa mē ri ā amnhĩ nhĩpēx anhÿr kēt nē. ⁵Mē tokyx tee ri ja hā amnhĩ pumu nē amnhĩ kamā apijaàm kēt wehe. Xà mē akamā Kris kōt mē atōjē hō pixire nē kot tām akupÿm mē axunhwÿr kaxyw amrakati kumrēx? ⁶Na ka xep htem mēmoj tā axpu. Kris kōt mē atōjē hō mē mēmoj tā axpu nē ra mē kēp Kris kwÿ hkēt xwÿnhjē hwÿr amnhĩ to mra. Kot tām akupÿm mē unhwÿr xwÿnhjē hwÿr amnhĩ to mra.

⁷Mē apijapu ho apa jakamā na ka mē amnhĩ tomnuj tÿx nē. Hāmri nē te mē apē Kris kwÿ hkēt xwÿnh pyrā

nē mē hwÿr amnhĩ to mra. Kwa kwār Kris kōt anhiō mǎmrī apē ahkī rÿ tanhmā anhĩpēx to. Ka mē ām amnhĩ tā omu kē tapxipix tanhmā amnhĩ tomnuj to. ⁸Ja mex tā mē ate ā amnhĩ nhĩpēx anhÿr kēt. Na ka htem axpēn pē ahkī. Mē ate Kris kōt axpēn to atō nē atōx tā axtem nē ā axpēn nhĩpēx anē. Te mē apijaàm kēt pyrāk o amnhĩ nhĩpēx o ri apa. ⁹⁻¹⁰Mē kot tanhmā amnhĩ tomnuj to xwÿnhjaja koja mē nhÿrmā ma Tirtūm nhō krī mex wÿr àpir kēt nē. Ra mē ate ja jarēnh mar tÿx.

Mēmyjē hō kot nhām mēnijē hō ho amnhĩ kati xwÿnhjaja.

Nē mēnijē hō kot nhām mēmyjē hō ho amnhĩ kati xwÿnhjaja.

Nē mēnijaja axtem nē mē kot amnhĩ ho mjēn o ri mē pa xwÿnhjaja.

Nē mēmyjaja haxwÿja axtem nē amnhĩ ho hprō ho ri mē pa xwÿnhjaja.

Nē mē àhkīnh o ri mē pa xwÿnhjaja. Nē mē kām nhām mē hkukrēx kīnh o kām ho ō hprām o ri mē pa xwÿnhjaja.

Nē ri mē pipānh o mē pa xwÿnhjaja. Nē ri axpēn to kapēr punuj o mē pa xwÿnhjaja.

Nē mē kot amnhĩ to sǎnti hwÿr o mē pa xwÿnhjaja.

Ā mē kot amnhĩ nhĩpēx anhÿr xwÿnh piitā koja mē Tirtūm nhō krī hwÿr àpir kēt nē.

¹¹Kormā mē ate Kris kōt amnhĩ xunhwÿr kēt ri na ka pre mē akwÿjaja ā amnhĩ nhĩpēx anhÿr o ri apa. Tā amnhĩ kaxyw Jejus kōt ajamaxpēr nē hkōt amnhĩ xunhwÿ. Hāmri nhũm Tirtūm Karō mē Pahiiti Jejus Krisja wa mē anē mē ate amnhĩ tomnuj piitā rēnh pa nē mē apē Tirtūm kra hā mē axunhwÿ nē amnhĩm mē ate amnhĩ to mex xwÿnh ā mē ajarē.

Mē pahte tām amnhĩ nhĩpēx o papa hā mē pamā karō

Matēwre 5.27; Rōmān 12.1-2; Epes 5.3; Korosē 3.5; Wam Tesarōn 4.1-8

¹²Nē na ka hte mē akwÿjaja amnhĩ jarēnh o:

—Nà na pa hte pa inhmã tanhmã amnhĩ nhĩpêx to hprãm xà hkôt amnhĩ krã hkôt amnhĩ nhĩpêx o ri ixpa. Anê.

Mê ate ã amnhĩ jarênh anhÿr tã no ãm mê ate amnhĩ jarênhja mex kêt. Mëmoj piitã mê pamã mex kêt. Na pu htem pamã hprãm xà hkôt mëmoj to anê nê gaa nê ra ho amnhĩ pyrà nê ho anhÿr pix o papa. Nê gaa nê kãm panhÿrer kêt kumrêx. Jao ra pahpipãnh pix o ri papa. Rÿ paxêx pix o ri papa. Rÿ paxãhkĩnh pix o ri papa. Jakamã kêr pu mê pamã tanhmã amnhĩ nhĩpêx to hprãm xà hkôt tanhmã amnhĩ nhĩpêx to ho papa hkêt nê. ãm amnhĩ mê amnhĩ kaxyw Jejus mã pajamexpêr pix nê.

¹³ Nê na htem amnhĩ jarênh o:

—Nà kot paj inhmã prãm nê mãmrĩ mëmoj ku. Nê inhmã nhãm mëhõ kamã ixpijaàm kêt prãm nê mãmrĩ ã amnhĩ nhĩpêx anê. Ja tanhmã inhmã kute hkêt. Anê.

Tã koja nhÿrmã Tirtÿm mê panhÿja o hapêx pa. Na pre mê pahte nhãm mê kamã pahpijaàm kêt o papa kaxyw mê panhĩpêx kêt nê. ãm mê pahte mê panhĩpêx xwÿnh maatija mã tanhmã amnhĩ nhĩpêx mex to ho papa pix kaxyw na pre mê panhĩpêx.

¹⁴ Nê na pre Pahijtija ty nhÿm Tirtÿm akupÿm ho htír. Ja pyrà nê kot puj mê nhÿrmã mê pajaxwÿja ty nhÿm akupÿm mê pahto mê pahír. Ja kaxyw tapxipix pix na àhpumunh tÿx o àhpumunh tÿx. ¹⁵ Na pu htem Kris kôt amnhĩ xunhwÿr kôt pahpê hkwÿ nê te pahpê í pyràk. Jakamã kwa mê ja hã anohtÿx nê axte nhãm mê hkuprÿjê hwÿr amrar nê mê ho amnhĩkati hkêt nê. Tirtÿm kêp ja omnuj. Te mê pahte Kris nhĩ pyràk jakamã kot kaj mê ã amnhĩ nhĩpêx anhÿr jao te Kris tãm kot ã amnhĩ nhĩpêx anhÿr o pa pyràk. Kwa ja mex kêt. Xà kot we Krisja ã amnhĩ nhĩpêx anê? Nà koja ã amnhĩ nhĩpêx anhÿr kêt nê. ¹⁶ Tirtÿm kapêr ã kagà htÿm kot ja jarênh kot:

Kot ka mê atõ mënijê hõ ho aprõ nhÿm kêp aprõ kumrêx. Hãmri nê te ra war atipxi pyràk o axpên nhĩpêx. Anê.

ã kot aprõ mê wa ajarênh anhÿr jakamã kwa kêr ka mê atÿx ri nhãm mê hkuprÿjê hwÿr apa hkêt nê. Kot kaj mê ã amnhĩ nhĩpêx anê nê Tirtÿm noo mã te ate aprõ kuhpa hã hkuprÿta o aprõ pyràk. Te wam aprõta kuhpa hã war atipxi pyràk. ¹⁷ Na pu htem Pahihti Jejus Kris kôt amnhĩ xunhwÿ nhÿm amnhĩ tã mê pahpumu nê mê pamã Karõ gõ nhÿm mê pamã agjê. Pu mê ra Karõja kôt te ra Jejus mê wa pahtipxi nê ri papa pyràk o axpên nhĩpêx. Jao Kris jamexpêr mê mê pajamexpêrja te wa kot axpên pyràk. Nê Kris kot amnhĩ nhĩpêx mê mê pahte amnhĩ nhĩpêxja te kot axpên pyràk.

¹⁸ Jakamã kwa kêr ka mê amnhĩ prõ pix tânopxar o ri apa. Nê mê anijaja amjên pix tânopxar o ri apa. No mê nhãm mëmyjê ho amnhĩkati ho ri apa hkêt nê. Nê mê amyjaja nhãm mënijê ho amnhĩkati ho ri apa hkêt nê. Kot ka mê nhãm mëmoj tanhmã omnuj kute ho anê no ãm amnhĩ nhĩ homnu hkêt nê. Nom kot kaj mê nhãm mënijê ho amnhĩkati rÿ nhãm mëmyjê ho amnhĩkati hãmri nê ra amnhĩ nhĩ homnu hpa. ¹⁹ Mê panhĩ kamã na hte Tirtÿm Karõ agjê nê kamã hkrĩ. Tirtÿm na pre mê pahwÿr kurê nhÿm mê pahkarõ mã agjê pu mê te mê pahpê òrkwÿ pyràk. Jakamã na pu htem amnhĩ krã hkôt pahpêx ri mëmoj tanhmã ho ho papa hkêt nê. ãm Tirtÿm jamexpêr xà hkôt pix mã na pu htem tanhmã mëmoj nhĩpêx to ho papa. ²⁰ Na pre ra Jejus mê pahte amnhĩ tomnuj pãnhã amnhÿrer kaxyw mê pahpiitã mê panê ty. Te htyk o amnhĩm mê pajaprõr pyràk o mê panhĩpêx. Jakamã kwa kêr pu mê ãm hkôt pix mã mãn ri amnhĩ nhĩpêx rãhã ho ri papa. Kê mê pahkwÿjaja ja hã mê pahpumunh kôt Tirtÿm mã mex o mex ã harênh o ri pa.

7

Mê mjên mê mê hprô wa kot axpên to mex ã mê pamã karô

Epes 5.22; Korosê 3.18; Eprêw 13.4

¹ Nê ota mê ate ixwÿr kagà nê mênhta na pre ixwÿr pôj pa omu. Nê kamã mê ate mê aprô hã ixkukjêr xwÿnhhta pa kamã harê nê omu. Tã kot paj mê amã tanhmã harênh to ka mê inhma.

Nà kot ka mê amyjê hõ amã aprô hkêt nê ahte ri apa hprãm nê kam nê aprô hkêt apa. Ja tanhmã kute hkêt. Nom kêr ka mê hkuprÿjê ho presija ho ri apa hkêt nê. ² Na htem tôhã kãm hprô hprãm kêt nê ri pa nê gaa nê mê hkuprÿjê hõ pumu rÿ mê kêp mê hprôjê hõ pumu nê kamã hpijaàm kêt o ri pa. Ja pymaj kêr ka mê amyjaja mãmri aprô nê mê anijaja mãmri amjên.

³ Nê mê anijaja. Koja mê amjên akamã hkurê ka mê mãmri kãm amnhî gô kê mê anî. Nê mê amyjaja mãânên. Koja mê aprô mê akamã hkurê ka mê mãmri mê anî. ⁴ ãm ka amã tanhmã amnhî nhîpêx to hprãm xà hkôt pix mã amnhî nhîpêx kêt nê. Mãânên amã aprô kot kãm tanhmã amnhî nhîpêx to hprãm xà hkôt mãânên hkôt kãm amnhî nhîpêx.

⁵ Nê kot kaj mê mêmô arîgro hã amã Tirtûm mã amnhî jarênh ryy hprãm japêr. Hãmri nê aprô mã:

–E kot puj jarãhã axpên to amnhîkati hkêt nê. Kot puj ãm Tirtûm pix mã amnhî jarênh o amÿkry. Anê.

Hãmri nê mãmri ã amnhî nhîpêx anê. No kwa kêr ka mê ãm ja ho anhÿr o apkati pixi nê kãm anhÿre. Nhÿm jãã ka mê amã axpên to amnhîkati hprãm nê mãmri tanhmã axpên nhîpêx to. No kot kaj mê ã amnhî nhîpêx anhÿr kêt o hã atã apkati xohtô nê gaa nê ra akurê xà axtem nê Satanasti jamaxpêr o ajamaxpêr. Jao nhãm mêmô ni hwÿr mra nê aprô kuhpa hã kamã akurê ho kamã apijaàm kêt. Rÿ nhÿm mênijaja nhãm mêmÿjê hõ hwÿr mra nê mjên kuhpa hã kamã hkurê ho war axpên kamã hpijaàm kêt.

⁶ E mê ate ja hã ixkukjêr jakamã na pa ã ixprî hã mê amã ja jarênh anê. Ka mê akwÿjjaja amã aprô hprãm nê mãmri aprô nê ri apa. Nê mê akwÿjjaja amã aprô hprãm kêt nê mãmri aprô hkêt nê ri apa. Nom kot pa paa mê amã mê aprô hã ixàmnhênh kêt nê. Ka mê kam amnhî krã hkôt ajamaxpêr xà hkôt tanhmã amnhî nhîpêx to. ⁷ Na pa hte ixprô hkêt nê ri ixpa nom inhma ja mex pa hte ahte ixpa.

Mê mjên kêt nê mê hprô kêt xwÿnhjê jarênh

Nê kormã mê aprô hkêt xwÿnhjaja. Ka mê ixpyrà nê aprô hkêt nê ri apa ronhÿx inhma ja mex nê. Na hte mêmÿ hkwÿjjaja hprô kêt nê ri pa nhÿm Tirtûm ja hã mê omu nê tanhmã mê ho nhÿm mê mex nê ri pa nê mênijê kamã hkurê ho mê kamã hpijaàm kêt o ri pa hkêt nê. No na hte mê hkwÿjjaja hprô hkêt nê ri pa nê gaa nê ra hkurê xàj mênijê kamã hpijaàm kêt. ã mê ate amnhî nhîpêx anhÿr pymaj kêr ka mê amã aprô hprãm nê mãmri aprô. Tirtûm mã ja mex kênã.

⁸ E mê aprô hkêt nê mê amjên kêt xwÿnhjaja. Nê ra mê apê mê aprô htyk rÿ mê amjên htyk xwÿnhjaja. Pa mê amã mêmôj jarê. Nà kot kaj mê ixpyrà nê mê aprô hkêt nê ri apa rÿ mê amjên kêt nê ri apa nhÿm ja inhma mex nê. ⁹ No kot ka mê atô ra akurê japêr nê mãmri aprô rÿ mãmri amjên. Ja mãânên tanhmã kute hkêt.

Mê pahte axpên kaga hkêt ã mê pamã karô

Matêwre 5.31, 19.3-9; Makre 10.2

¹⁰ E kot paj hpãnhã ra mê ate axpên to amjên nê axpên to aprô xwÿnhjê mã ixkapêr. Nom kot paj amnhî krã hkôt tanhmã ixkapêr to hkêt nê. Pahihti Jesus Kris kapêr xà hkôt kot paj mê amã ixkapêr. Jakamã e kêr ka mê anijaja mê amjên kaga hkêt nê. ¹¹ Nom kot kaj mê tanhmã ajamaxpêr to nê hkaga japêr hãmri nê ahte ri apa nê axte nhãm mêmô ho amjên kêt nê. Rÿ tee ri amnhî kukamã ajamaxpêr nê mãmri akupÿm amjênta wÿr tê nê

akupÿm hkôt ri apa. No kêr ka mẽ axte nhãm mẽhõ ho amjên kêt nẽ.

Nẽ ra mẽ amyjaja kêr ka mẽ ajaxwÿja ã amnhĩ nhĩpêx anẽ nẽ mẽ aprõ kaga hkêt nẽ. E kêr ka mẽ ã amnhĩ nhĩpêx anhÿr o ri apa.

¹²Nẽ mẽ ate ixwÿr kagà mẽnh kamã axpên tã ixkukjêrta kot paj hpãnhã mẽ amã harẽ. Na Pahiťi Jejusja ja hã tanhmã inhmã nẽ hkêt nẽ. Æm amnhĩ krã hkôt kot paj mẽ amã tanhmã harênh to ka mẽ inhma.

Ka mẽ amyjê hõ ra Kris kôt amnhĩ xãm nom nhũm aprõ kormã hkôt amnhĩ xãm kêt japêr. Nom koja kãm arĩ ri akôt pa hprãm ka hkaga hkêt nẽ. Kê arĩ ri akôt pa. ¹³Nẽ mẽ anijaja. Ka mẽ ajaxwÿja ra apê Kris kwÿ hã ri apa nhũm amjên kêp hkwy hkêt tã arĩ ri akôt pa hprãm nẽ arĩ ri akôt pa ka hkaga hkêt nẽ. ¹⁴Kêp Kris kwÿ hkêt tã koja akôt Kris kwÿjê hkôt ri pa. Rÿ mẽ aprõ kêp Kris kwÿ hkêt tã koja akôt Kris kwÿjê hkôt ri pa. Jao Tirtũm kapêr mar o pa nẽ gaa nẽ apyrã nẽ hkôt amnhĩ xãm japêr. Nẽ mẽ akra kêp Kris kwÿ hkêt xwÿnhjaja haxwÿja mẽ akôt Kris kwÿjê hkôt ri pa nẽ Tirtũm kapêr mar o pa nẽ gaa nẽ akôt Jejus kôt amnhĩ xunhwÿr japêr.

¹⁵Nom koja aprõ kêp Kris kwÿ hkêt ã kãm akaga hprãm nẽ rĩ tãm mãmri akaga. Rÿ amjên kêp Kris kwÿ hkêt ã kãm akaga hprãm nẽ rĩ tãm mãmri akaga. Kêr ka mẽ kot akaga nẽ tee ri kãm tanhmã akapêr to hkêt nẽ. Kwãr mãmri akaga ka ahte ajamakêtkati nẽ axãmnhix ri apa. Mẽ pajamakêtkati nẽ mẽ pamex nẽ ri papaja na Tirtũm kãm hprãm.

¹⁶No koja amjên kêp Kris kwÿ hkêt tã kãm mẽ akaga hprãm kêt nẽ ka mẽ hkaga hkêt nẽ. Rÿ aprõ kêp Kris kwÿ hkêt tã ka mẽ kam hkaga hkêt nẽ. Koja arĩ ate amnhĩ nhĩpêx ã apumunh o ri akôt pa nẽ gaa nẽ rĩ apyrã nẽ Kris kôt amnhĩ xãm japêr. ¹⁷Jakamã kot ka mẽ aprõ rÿ amjên ra Kris kôt ahte amnhĩ xãm. Hãmri nẽ wa arĩ ri axpên kôt ri apa ho apa. Na pa hte krĩ piitã hkôt Jejus kôt mẽ pahkwÿjê mã

ã ixujarênh anhÿr o ri ixpa. Tã kêr ka mẽ ã amnhĩ nhĩpêx anhÿr o ri apa.

Kris kôt amnhĩ xunhwÿr kêt ri tanhmã mẽ pakute hã mẽ pajarênh

¹⁸Ja pyrã nẽ kot kaj mẽ ra amy kwÿr kã jakàr japêr. Tã ra Kris kôt amnhĩ xãm nẽ arĩ arãhã ri apa. Rÿ amnhĩ jakàr kêt rãhã hkôt amnhĩ xãm japêr nẽ arĩ arãhã ri apa. Mo kaxyw kot ka kêt amnhĩ jakà? ¹⁹Tirtũm na hte mẽ pahte amnhĩ my kwÿr kã jakàr ã mẽ pahpumunh kôt tanhmã mẽ pajarênh to hkêt nẽ. Rÿ mẽ pahte amnhĩ jakàr kêt ã mẽ pahpumunh kôt mããnên tanhmã mẽ pajarênh to hkêt nẽ. Æm mẽ pahte hkôt amnhĩ nhĩpêx pix ã mẽ pahpumunh kôt na hte tanhmã mẽ pajarênh to. ²⁰Jakamã kêr pu mẽ pahte Kris kôt amnhĩ xunhwÿr kêt ri tanhmã mẽ pakuteja arĩ rãhã ri papa. ²¹Ka mẽ akwÿjaja ate nhãm mẽ kãm mẽ axapênh o apa htã Jejus kôt amnhĩ xunhwÿ. Tã kêr ka mẽ mãmri mẽ kãm axapênh o ri apa. Nom koja anhõ patrãwja amnhĩ nẽ mẽ ajano ka mẽ mãmri ma mra nẽ amnhĩ mã tanhmã axapênh to ho ri apa.

²²Nẽ koja mẽhõ Kris kôt amnhĩ xãm. Tanhmãn kêp mẽ õ patrãw rÿ kot mẽ kãm mẽ apênh xwÿnhjê hõ. Tã Kris kôt amnhĩ xãm hãmri nẽ arĩ amnhĩ nhĩpêx tũm kôt ri amnhĩ nhĩpêx o pa hkêt nẽ. Ra Kris kôt amnhĩ nhĩpêx nyw o amnhĩ nhĩpêx o pa. Jao ra tanhmã amnhĩ tomnuj to hkêt nẽ. Te kot õ patrãw punuj kaga nẽ hpãnhã õ patrãw mex kapêr kôt amnhĩ nhĩpêx pix o pa pyrãk.

²³Na pre Jejus mẽ pahte amnhĩ tomnuj piitã hpãnhã amnhĩrer kaxyw mẽ panê ty. Te htyk o kot amnhĩm mẽ pajaprõr pyrãk o mẽ panhĩpêx. Jakamã kwa kêr ka mẽ jar mẽ anhõ patrãw kôt pix mã amnhĩ nhĩpêx o ri apa hkêt nẽ. Mẽ mããnên Tirtũm kapêr kôt amnhĩ nhĩpêx o ri apa. ²⁴Jakamã kêr pu mẽ pahte Kris kôt amnhĩ xunhwÿr kêt ri tanhmã mẽ pakuteta pu mẽ arĩ rãhã ri hã papa.

Ra mẽ pahte amnhĩ jakà rỳ mẽ pahte amnhĩ jakàr kêt.

Rỳ ra mẽ pahte nhãm mēhõ mã paxàpēnh o papa rỳ amnhĩ mã paxàpēnh o papa.

Rỳ ra mẽ pahprõ nē ri papa rỳ mẽ pahprõ hkêt nē ri papa.

Pu mẽ pahte Kris kôt amnhĩ xunhwỳr kêt ri tanhmã mẽ pakuteta ãm arĩ rãhã hã ri papa. Jao Tĩrtũm kãm hprãm xà kôt pix mã amnhĩ nhĩpēx o ri papa.

Mẽ hprõ nē mẽ mjên kêt xwỳnhjê jarēnh

Matêwre 19.10-12

²⁵ Nē mẽ ate ixwỳr kagà mēnhhta kamã na ka mẽ mããnēn kormã mẽ hprõ hkêt xwỳnhjê hã ixkukja. Tã kot paj mẽ amã tanhmã mẽ harēnh to. Nom Pahihti Jejus Kris na pre ja hã tanhmã inhũa nē hkêt nē. ãm pa kot paj ãm amnhĩ krã hkôt tanhmã hã mẽ amã ixkapēr to. Na pre Pahihti mẽ akaxyw tanhmã ixkrã hto pa hte ỹ hã tanhmã mẽ amã mẽmoj tã karõ hto ho ri ixpa. Jakamã e mẽ inhũa nē inhmar tỳx nē.

²⁶⁻²⁷ Nà ra mẽ kãm mẽ pahkurê xwỳnhjaja Kris ã mẽ pahtomnuj o pa jakamã koja ixpyrà nē mẽ hprõ hkêt rãhã mẽ pa xwỳnhjaja ahte ri pa nhũm ja mex nē. Nhũm mẽ umaj amnhĩ pix tãnopxar o ri pa. Nē mẽ aprõ xwỳnhjaja kêt ka mẽ kãm mẽ pahkurê xwỳnhjê pymaj mẽ aprõ kaga hkêt nē. ãm pix tãnopxar o ri apa.

²⁸ Tã kot ka mẽ atõ amã aprõ hprãm nē mãmrĩ aprõ. Ja mããnēn tanhmã ixpê kute hkêt. Nē mẽ anijaja mẽ amã amjên prãm nē mãmrĩ amjên. Ja tanhmã ixpê kute hkêt. Nom kot ka mẽ akwỳjê pyrà nē aprõ rỳ amjên. Nē gaa nē akra. Hãmri nē tanhmã mẽmoj kute kamã ka tee ri wa mẽ amnhĩ kukamã ri ajamaxpēr o ri apa. Ja pymaj na pa hte mẽ amjên kêt nē mẽ aprõ hkêt ã mẽ amã awjarē.

²⁹ Nē Kris tokyx akupỹn mẽ pahwỳr wrỳk kaxyw jakamã kwa ra mẽ aprõ nē apa xwỳnhjaja. Kêt ka mẽ amnhĩ

prõ nē amnhĩ kra pix kukamã ajamaxpēr o ri apa hkêt nē. Te ho mẽ hprõ hkêt nē mẽ pa xwỳnhjaja kot amnhĩ nhĩpēx pyrà nē Kris kutêp kumrêx mã ajamaxpēr pē tanhmã amnhĩ nhĩpēx to ho apa nē arĩ kormã aprõ nē akrajê ho hapu nē tanhmã mẽ kutã anojarêt to ho apa.

³⁰ Kris kot tokyx akupỹn mẽ pahwỳr wrỳk jakamã kwa mẽ ri amỳr o ri mẽ apa xwỳnhjaja. Kêt ka mẽ kutêp tee ri amnhĩ kaprĩ pix mã ajamaxpēr o akaprĩ nē ri apa hkêt nē. Nē mẽ akĩnh nē ri apikunhar o ri mẽ apa xwỳnhjaja kêt ka mẽ Kris kutêp amnhĩ kĩnh xà pix mã ajamaxpēr o ri apa hkêt nē. Nē ri mẽ axujaprõr o ri mẽ apa xwỳnhjaja kêt ka mẽ Kris kutêp tanhmã axujaprõr to pix kukamã ri ajamaxpēr kêt nē. ³¹ Nē mẽ apê mẽ ate mẽmoj to wēnê ho ri mẽ apa xwỳnhjaja Kris kutêp ãm ri mẽ akukrêx pix kukamã ajamaxpēr kêt nē. Koja mẽ panhõ pika piitã hkôt mẽ pakukrêxja nē mẽmoj piitã arĩ rãhã hkêt nē. ³² Jakamã kot kaj mẽ akukrêx pix kukamã ajamaxpēr nē amnhĩ pix kukamã ajamaxpēr nhũm ja apê omnuj nē. Kris kwỳ pē mẽ hprõ hkêt xwỳnhjaja na htem Pahihti Jejus Kris kãm hprãm xà hkôt pix mã kãm tanhmã amnhĩ nhĩpēx to ho ri pa hprãm. Jao ãm pix kutã tanhmã nojarêt to rãhã ho ri pa. ³³ No kêt ra mẽ hprõ nē mẽ pa xwỳnhjaja na htem hprõ pix kukamã kãm tanhmã amnhĩ nhĩpēx to ho pa hprãm. Jao pix kukamã amnhĩ nhĩpēx o pa. ³⁴ Mẽ kãm Tĩrtũm kapēr kôt amnhĩ nhĩpēx prãm tã no ãm mããnēn kãm hprõ kapēr mar nē hkôt kãm tanhmã amnhĩ nhĩpēx to ho ri pa hprãm.

Nē mẽnijaja kot Jejus kôt amnhĩ nhĩpēx nē kormã mẽ mjên kêt xwỳnhjaja na htem kãm Pahihti Jejus kãm hprãm xà hkôt pix mã kãm tanhmã amnhĩ nhĩpēx to ho pa hprãm. Nē ãm pix mã hamaxpēr o pa. Nē ãm hkôt pix mã amnhĩ nhĩpēx o pa. No ra mẽ mjên nē mẽ pa xwỳnhjaja na htem arĩ ri mẽ hikukrêx tãnopxar

o pa. Nē mjên mā hprām xà hkôt tanhmā kām amnhĩ nhĩpêx to ho pa. Jakamā tanhmā kot wem amnhĩ to nē Jejus kām prām xà hkôt pix mā amnhĩ nhĩpêx o pa?

³⁵ E ixte mē ato ajuta kaxyw na pa ā mē amā ixkapêr anē. Jakamā na pa mē ate mēhō ho aprō nē mē akurē hkêt nē. Ām mē ate Tirtūm kapêr kôt pix mā amnhĩ nhĩpêx o apa hā na pa mē amā karō. Mē ate kumā pix mā ajamaxpêr o ri apa pix kaxyw. Nē kumā pix mā tanhmā ri amnhĩ nhĩpêx to ho apa kaxyw na pa mē amā tanhmā mēmoj tā karō hto.

Mē kot mē hprō mā xwỳnhjê jarēnh

³⁶ E kot paj hpānhā mē ate mēhō ho aprō mā xwỳnhjê mā ixkapêr ka mē ixkapêr ma. Nà kot kaj mē atō ate ho aprō mā xwỳnhta kukamā ajamaxpêr o:

—Nà kot paj ho ixprō hkêt nē. Inhmā hkīnh tỳx tā kot paj ho ixprō hkêt nē. Kot paj ām ixprō hkêt nē ahte ri ixpa. Anē.

Hāmri nē ahte ri apa. Tā ra tee amnhĩ kurē kamā ama nē ajamaxpêr o:

—Hêxta waa nē. Mon pa pre ho ixprō hkêt nē ahte ri ixpa? Anē.

Hāmri nē māmri ma hwỳr tē nē kām amnhĩ jarē nē ho aprō. Ra ate aprō hkêt nē ahte ri apa hā amnhĩ jarēnh tā no ām māmri ho aprō. Ja tanhmā kute hkêt kēnā. ³⁷ Nom kot kaj ho aprō hkêt ā amnhĩ jarē nē määnēn akurē hkêt nē ri apa. Hāmri nē māmri ho aprō hkêt nē ri ahte ri apa. Ja määnēn tanhmā kute hkêt. ³⁸ Kot ka ho aprō nē war amex nē apa. Rỳ kot ka ho aprō kêt nē määnēn amex kumrēx nē ri apa. Ja na mex o ate mēhō ho aprō nē ho apata jakrenh.

Mē kēp mē mjên tyk xwỳnhjê jarēnh

³⁹ E kot paj hpānhā mē apē mē amjên tyk xwỳnhjê mā ixkapêr. Nà koja amjên arī htīr ri ka ām hkôt pix mā axkamē nē hkaga hkêt nē. No koja nhỹrmā apē ty hāmri ka tee ri amnhĩ kukamā ajamaxpêr hāmri nē amā axte amjên prām nē māmri axte

amjên. Nom kwa kêr ka mē amnhĩ pyrā nē Kris kôt akwỳjê hō pix o amjên. No māmri nhām mēhō ho amjên kêt nē. ⁴⁰ No kot ka mē axte amjên kêt nē ahte ri apa hāmri nē axāmnhĩx ri ajamakêtkati nē apa. No na pa ām amnhĩ krā hkôt mē amā ā ja jarēnh anē. Mān Tirtūm Karō mā määnēn ja mex nē.

8

Sānti hā mē apkur xà jarēnh

Rōmān 14.13-23; Wam Korīt 10.14-22, 13.2; Karatas 5.13; Wam Pêtre 4.8; Wam Juāw 3.18

¹ Nē mē ate ixwỳr kagà mēnhta kamā na ka prem määnēn sānti hā mē apkur xà hā ixkukja. Tā kot paj mē amā tanhmā ja jarēnh to ka mē inhma.

Nà na hte Kris kôt pahkwỳ hkêt xwỳnhjaja mēmo karō ho sānti nhĩpêx mā mēō hkwy nhĩpêx nē hwỳr o mra. Hāmri nē hpar pē haxwỳ nē kutā hkōn krā ho rōrōk nē hkrī nē kām mex o mex ā harē nē kām amnhĩ jagrer pē amnhĩ to kuwỳ. Hāmri nē kām amnhĩ jagrer pa nē akupỹm amnhĩm mēōta jamỳ nē ma o mra nē hkwyjê mā ho wēnē. Na htem ā amnhĩ nhĩpêx anhỳr o pa. Tā na ka prem kagàta kamā mē ate mē kēp mēō japrōr nē hkur ā ixkukja. Nà ra mē ate sānti pumunh mex. Ām mē kot ĩhkra pix o hipêx ā omunh mex jakamā na pu htem hā pamā mē apkur xàta hkur prām nē māmri paxāmnhĩx ri kuku. Ja tanhmā Tirtūm pē kute hkêt. Ra mē pahte ja pumunh mex. Tā nom kwa kêr pu mē ja hā Kris kôt mē pahkwỳjê mā amnhĩ to jarkrar o ri papa hkêt nē. Nē ja hā mē kurom paxāhpumunh tỳx ā mē kām amnhĩ to jarkrar hkêt nē. Kot pu mē ā amnhĩ nhĩpêx anhỳr o mē hamaxpêr o hihtỳx hkêt nē. Kêr pu mē ām mē kamā paxukapri pē tanhmā mē ho mex to ho papa. Nē Kris kôt mē hamaxpêr o hihtỳx o papa. Ā mē pa hte amnhĩ nhĩpêxja na Tirtūm kām hprām. ² No koja mēhō mēmoj pumunh tỳx ā amnhĩ to jarkrar o ri pa nē ām tee ri ā amnhĩ

jarēnh anhÿr kaprÿ. ³ No koja mēhō àhpumunh tÿx kêt tâ kām Tirtūm kīnh nhūm amnhī tâ omu nē kām hapē nē ho hkra. Kêt ja na mex o mex.

⁴ E kot paj ixprī hā mē amā tanhmā sānti hā mē apkur xàta jarēnh to ka mē inhma. Nà Mēpahpāmja pixii. Axtem hō hkêt. Nom mē kot sānti nhīpēxta ām mē kot īhkra o hipēx jakamā hfīr kêt. Ra mē pahte ja jarēnh mar tÿx nē omunh mex. ⁵ Na htem ohtō nē ri sānti kēp Mēpahpām ā hkamnhīx o pa. Kazkwa kamā mēmo karō nhīpēxja nē pika kamā mēmo karō nhīpēxja nhūm htem kēp Mēpahpām ā harēnh ho pa. Nom ja kot anhÿr kêt. ⁶ Mēpahpāmja ām pixi ho pixi mex. Mē panhō Tirtūmja. Tām na pre mēmoj piitā ho kator pa. Jakamā na pu htem kapēr kôt pix mā amnhī nhīpēx o ri papa.

Nē mē panhō Pahihti haxwÿja pixii. Pahihti Jejus Krisja. Na pre Tirtūm nhīhkō hā mēmoj piitā ho kator pa. Na pu htem ja hā omunh xà hkôt ri pamex nē ri papa. Ra mē pahte ja jarēnh mar tÿx nē omunh mex. Jakamā na pu htem paxāmnhīx ri mēmoj piitā hkur o papa. Tirtūm kot mēmoj piitā ho kator par kēnā. ⁷ Tā no ām ham mē kot Kris kôt amnhī xunhwÿr xwÿnhjaja na htem mē pahkīnhā kām sānti hā mē apkur xà hkur puma nē. Ham mē kot sānti kaga nē amnhī kaxyw Kris kôt amnhī xunhwÿr jakamā kormā Tirtūm kôt amnhī nhīpēx tohtuj anē. Jakamā na htem tee ri sānti hā mē apkur xāja pumu nē hamaxpēr o:

—Nà kot paj ja kur kêt nē. Kot paj anē nhūm apu Tirtūmja pē ja omnuj nē. Anē.

⁸ Nom na kêt hte Tirtūm mē paxàpkur xà hā mē pahpumunh kôt mē pahte amnhī to mex xwÿnh ā mē pajarēnh kêt nē. Kot puj mē mēmoj kur rÿ mēmoj kur kêt nē nhūm ja hā mē pahpumunh kôt tanhmā mē pamex ā pajarēnh to hkêt nē. Jakamā na pu htem māmri paxāmnhīx ri mēmoj tā mē apkur xà hkur o papa nē tanhmā amnhī to hkêt nē. ⁹⁻¹⁰ Nom kwa mē

okora. Kêr ka mē sānti mā amnhī jarēnh xà hā ixkre hwÿr agjēx nē kamā axàpkur hkêt nē. Kot kaj mē atō ā amnhī nhīpēx anē nhūm mēhō kormā kot Kris kôt amnhī xām tohtuj anhÿr xwÿnhja ja hā mē apumu nē tee ri hamaxpēr. Axàhpumunh tÿx ā ate amnhī jarēnh tā sānti nhōrkwÿ kamā axàpkur o nhÿ nhūm ja hā apumu nē tanhmā amnhī nhīpēx to wehe? Koja ja kēp omnuj tā apyrà nē tē nē axà nē mē kutā apku. Hāmri nē apkur pa nē tee ri amnhī kukamā hamaxpēr o:

—Hēxta waa nē. Kwa mon pa axtem nē ri ā mēmojja kur anē? Nà na pa anē nē ra amnhī tomnuj tÿx nē. Anē.

Hāmri nē hkaprī nē pa. ¹¹ Ate axàhpumunh tÿx ā amnhī jarēnh tā amnhī kôt atōja mex kukamā ajamaxpēr kêt nē. Kris ra mÿrapē htyk tā nhūm ā ate sānti hā mēō hkur ā apumu nē tee ri hamaxpēr o Jejus hkôt amnhī nhīpēx mex kêt nē. ¹² Kormā kot Kris kôt amnhī xām tÿx kêt tâ tee ri ja hā mē apumu nē hamaxpēr mex kêt nē. Jakamā ka Kris noo mā amnhī tomnuj nē. ¹³ Tā ā ixte Kris kôt ixkwÿjē nhīpēx anhÿr pymaj koja ixtōjē hō kām mēmoj kur puma nē. Nē htÿx ho Tirtūm kēp omnuj ā hkamnhīx. Pa ja hā omu nē ijaxwÿja axte hkur kêt nē. Ixte mex ā omunh tā no ām kot tee ri ja hā ixpumunh nē hamaxpēr o:

—Kwa Tirtūm kēp ja mex kêt tā nhūm Pawreja ri kuku. Jakamā kot paj ijaxwÿja urāk nē kuku. Omnuj tãã.

Anhÿr o hamaxpēr pymaj kot paj urāk nē mēmota kur kêt nē. Na pa hte ā Kris kôt ixtōjē mex kukamā ri ijamaxpēr anhÿr o ixpa.

9

Pawre kot amarī Tirtūm kapēr o mē ahkre hā amnhī jarēnh

Atre 9.1-18, 20.33-35; Sikūn Korit 11.7-9

¹ Nē ixte Jejus nhÿ hā mē ahkre ho mē pa xwÿnhjē hō jakamā na pa hte Tirtūm kapēr o mē ajahkre ho ri ixpa. Na pa pre inhno ho mē panhō Pahihti

Jejus pumu nê mê amã harênh o ri mē akôt ixpa ka prem inhma nê hkôt amnhî xunhwÿ. ² Mē hwÿjaja kot axpēn mā ixpē Jejus nhÿ hã mē ahkre xwÿnh kêt ã ijarēnh tã mē kajaja mē ate ja hã ixpumunh mex. Ixte mē amã mē ujarēnh mexja jarēnh nhūm mē ate mar nê hkôt amnhî xunhwÿrja kukwak ri na ka mē apē Jejus kwÿÿ. ³ Jakamã koja mē atã ixto kapēr japēr kot paj ã mē kãm mē ajarēnh anē. ⁴ Nē ixte Jejus nhÿ hã kapēr jahkre o ixpa xwÿnh jakamã kot paj inhmã Kris kwÿjê kutã amarĩ ixàpkur prãm nē mãmri mē kutã apku. Ja tanhmã kute hkêt tã kot paj ã amnhî nhîpêx anhÿr kêt nê. Kot paj ixàpkur kaxyw nê amnhî pãnhã amnhîre nê rî kormã apku. Na pa hte ã amnhî nhîpêx anhÿr o ri mē akôt ixpa. ⁵ Rÿ kot pa ixkwÿjê pyrã nê inhmã Kris kôt ixkwÿjê hō ho ixprō hprãm nê mãmri ho ixprō. Nē wa ma krî piitã hkôt Kris kwÿjê kukwak ri ixàpkur o ixpa hprãm nē wa mãmri ã amnhî nhîpêx anhÿr o ixpa. Ja mex kênã. Na hte ã Simãw Pêtre mē Jejus tō kot hapujaja amnhî nhîpêx anhÿr o pa nhūm ja tanhmã kêp kute hkêt. No ãm mē hkînhã ixprō hkêt na pa hte ri ixpa.

⁶ Nē ixkwÿjaja na htem apkur xà hpãnhã àpēnh o pa hkêt nê. Na htem Jejus nhÿ hã kapēr jarēnh o ri pa nhūm hte Jejus kwÿjaja mē kãm mē apkur xà gō nhūm mē amarĩ hkur o pa. Tã no pa na pa hte Panãpe mē wa ã amnhî nhîpêx anhÿr kêt nê. Na pa hte wa mry kà ho ixkre nhîpêx nê mē kãm ho wēnê nê hpãnhã amnhîm awjaprō. Na pa hte wa ã amnhî pa kukwak ri ixujaprōr nê ho ixàpkur o ri ixpa anē.

⁷ Mē kãm pur kãm harôj jamÿnh o mē pa xwÿnhjaja na htem amarĩ hwÿ jamÿ nê ho apkur o pa. Nē motre jamãr o mē pa xwÿnhjaja haxwÿja amarĩ hkà kagô janê nê ho hkōm o pa. Nē pôristijaja na hte mē ò pahija mē àpēnh pãnhã mē kãm amnhîrer o pa. Jajê piitã na htem mē àpēnh pãnhã mē kãm amnhîrer o pa. Ja pyrã nê te ixpē mē amã ixàpēnh o ixpa xwÿnh pyrãk

jakamã ixte mē ajahkreta pãnhã kot ka mē inhmã inhō ho apa nhūm ja mãânēn mex nê. ⁸ No ãm papxipix na pa hte ja mex ã harēnh kêt nê. Tirtūm kapēr ã kagà htūm haxwÿja kot ja mex ã harēnh. ⁹ Kamã na pre finat Mojesja Tirtūm nhÿ hã harēnh kot:

Koja akrit amã àpēnh o pa ka omu nê ho mex nê. Kãm ò mex nê.

Anhÿr o kot harēnh. Xà na pre Tirtūmja ãm mē pahkrit pix kukamã ukapri nê ã harēnh anē nà? Nà kot anhÿr kêt. ¹⁰ Mãânēn mē pahpê panhî kaxyw na pre ã ja jarēnh anē. Mē pahte mē hpur kãm paxàhkre xwÿnhjaja nê mē pahte kamã paxujamÿnh o papa xwÿnhjaja. Jajê kaxyw mē pahte pur kukwak ri amarĩ paxàpkur o ri papa kaxyw ã pre ã ja jarēnh anē. ¹¹ Tã ja pyrã nê na pa hte mē awÿr mō nê mē amã Tirtūm kapēr jarēnh o ri mē akôt ixpa. Nē mē akôt ho mē ajahkre ho ri ixpa ka htem inhmã ixàpēnhã pãnhã amnhîrer kêt nê. Ixkwÿjaja kot Tirtūm kapēr o mē ajahkre hpãnhã mē ate mē kãm amnhîrer tã pa inhmã amnhîrer kêt nê. Na pa pre mē ajahkreta pãnhã mēmoj tã mē awÿr kêt nê. ãm nhãm ixàpēnh òta kukwak ri na pa hte ixàpkur o ri ixpa.

¹² Nē na hte mē ixkwÿjaja mē awÿr mra nê Tirtūm kapēr o mē ajahkre o ri mē akôt pa. Hãmri nê hpãnhã mē apkur xà hã mē awÿ ka mē kãm mēmoj gō. No kêt pa na pa hte mē urãk nê ixàpkur xà hã mē awÿr kêt nê. Kot pa apu hã mē awÿ ka mē tanhmã ixto akapēr to nê axpēn mā ijarēnh o:

—Pēr ãm mē pahte kãm amnhîrer pix kaxyw na hte Pawre mē pahwÿr mra nê mē pamã Jejus Kris kot tanhmã mē panê amnhî nhîpêx to hã harēnh o pa. Pēr ãm apkur xà pix prãm xàj ã kot mē pamã ujarēnh anhÿr o pa. Jakamã kot puj mē kuma nê ãm kuma.

Anhÿr o axpēn mā ijarēnh pymaj na pa hte mē ajahkre hpãnhã mēmoj tã mē awÿr kêt nê. Na pa hte ãm mry kà ho ixkre nhîpêx nê ho wēnê nê ja pix

kukwak ri ixàpkur o ri ixpa. Nê amarî ri mē ajahkre ho ri mē akôt ixpa.

¹³ Nê Tirtûm mǎ amnhî jarēnh xà hǎ ixkre kamǎ mē àpēnh xwýnhjaja na htem hwýr mē mrar xwýnhjaja mē àpēnh pǎnhǎ mē kǎm amnhîre. Nê mē kot mē kǎm Tirtûm mǎ mēmoj nhôr o kuhê xwýnhjaja na htem mǎânēn mē àpēnh pǎnhǎ mē kǎm amnhîre.

¹⁴ Nê Pahihti Krisja na pre ja hǎ mē pakukamǎ pahtǎ karô kot:

–Kêr ka mē kot tanhmǎ mē amǎ ijarēnh to ho ri mē pa xwýnhjê mǎ amnhîrer o ri apa. Anê.

¹⁵ Tǎ no na pa hte aa mēmoj tǎ ixàhwýr kêt nê. Nê mē ate inhmǎ amnhîrer kaxyw pa mē amǎ ja jarēnh kêt nê. Aa ixte mēmoj tǎ mē awýr kêt. Kot paj apu anê nê ixpijaàm nê. Rý kot pa apu anê nê mē akukwak ri ixàpkur o ri ixpa hǎmri nhûm mē akwýjaja ja hǎ ixpumu nê hǎ ijarēnh o:

–Tk. Na hte amarî mē pajahkre o ri pa hkêt nê. ãm mē apkur xà pix prǎm xǎj na hte ã mē pajahkre ho pa anê. Anê.

Jakamǎ na pa hte mēmoj tǎ mē awýr kêt nê. ¹⁶ Ixte mē amǎ mē ujarēnh mexja jarēnh o ri ixpa htǎ na pa hte ja hǎ amnhî to jarkrar o ri ixpa hkêt nê. Pahihti Jejus na pre ja hǎ inhmǎ karô pa hte kǎm ho anhýr o ri ixpa. Kot paj kǎm ho anhýr kêt nê ixpunuj nê ri ixpa. ¹⁷ Kêp ãm amnhî krǎ hkôt mǎn tanhmǎ mē amǎ ijujarēnh to ho mē akôt ri ixpa ronhýx pa hpǎnhǎ ixàmnhîx kǎxpore hǎ mē awý. No ãm ã ixte amnhî nhîpêx anhýr kêt. Tirtûm tǎm kot inhmǎ ja hǎ karô jakamǎ na pa hte amarî ixàmnhîx ri mē amǎ kapêr jarēnh o mē ajahkre ho ri mē akôt ixpa nê mēmoj tǎ ixàhwýr o ri ixpa hkêt nê. ¹⁸ Ixte amarî ri mē amǎ mē ujarēnh mexta jarēnh o ri ixpaja na inhmǎ hprǎm. Ja na inhmǎ mex. Na pa hte ã amnhî nhîpêx anhýr o ri ixpa nhûm ja inhmǎ mex pa ixkính nê ri ixpa. Jakamǎ na pa hte hpǎnhǎ ixàhwýr kêt nê. Nê inhmǎ mēmoj prǎm o ri ixpa hkêt nê.

¹⁹ Nê nhǎm mē kǎm tanhmǎ ixàpēnh to ho ixpa hkêt tǎ pa hte mē piitǎ

tanhmǎ mē kǎm amnhî nhîpêx to ho ri ixpa. Pê mē kǎm Jejus kapêr jarēnh o ri ixpa. Jakamǎ na mē ra ohtô nê ixujarēnh ma nê amnhî kaxyw Jejus kôt hamaxpêr nê hkôt amnhî xunhwý.

Pawre kot tǎm mē piitǎ mē hipêx o pa hǎ amnhî jarēnh

Wam Korît 10.33

²⁰ Nê na pa hte Ijaewjê hwýr ixpa nê mē kot amnhî nhîpêx kôt amnhî nhîpêx o ri mē hkôt ixpa. Ixte mē kurom Tirtûm kot finat Mojes mǎ mēmoj tǎ karô hkôt amnhî nhîpêx o ixpa hkêt tǎ mē hkôt ri ixpa nê mē uràk nê hkôt amnhî nhîpêx o ri ixpa. Mē kot ja hǎ ixpumunh nê ixte mē kǎm Jejus jarēnh mar nê ixpyrà nê amnhî kaxyw hkôt hamaxpêr kaxyw.

²¹ Tǎ pa hpǎnhǎ mē kêp Ijaew kêt xwýnhjê hwýr ixpa nê mē kot amnhî nhîpêx kôt amnhî nhîpêx o ri mē hkôt ixpa. Mē kot ja hǎ ixpumunh nê ixkapêr mar nê ixpyrà nê amnhî kaxyw Jejus kôt hamaxpêr kaxyw. Tirtûm mē Kris wa hamaxpêr xà hkôt na pa hte ahpýnhǎ mē kot amnhî nhîpêx xwýnhjê hwýr mra nê ã amnhî nhîpêx anhýr o ri mē hkôt ixpa.

²² Nê na pa hte kormǎ mē kot Kris kôt amnhî xunhwýr tohtuj anhýr xwýnhjê hkôt ri ixpa nê te ixte ho mē uràk nê kormǎ hkôt amnhî xǎm nyw pyràk o amnhî nhîpêx o ri mē hkôt ixpa. Mē kot ja hǎ ixpumunh nê ixkapêr mar nê hkôt amnhî nhîpêx mex kaxyw. ã na pa hte mē piitǎ mē hkôt ri ixpa nê mē hkôt amnhî nhîpêx o ri ixpa anê. Mē kot ja hǎ ixpumunh nê inhmar nê ixpyrà nê Kris kôt amnhî nhîpêx týx kaxyw. ²³ Mē kot mē ujarēnh mex mar kaxyw na pa hte mē piitǎ mē hkôt ã amnhî nhîpêx anhýr o ri ixpa. Tirtûm kot mē ho hkra nê mē ho mex kaxyw. Nê mǎânēn pa kot mē hǎ ixto mex kaxyw.

Pawre kot htýx ri amnhî nhîpêx kêt ã kot amnhî jarēnh

Sikûn Ximotre 4.7; Eprêw 12.1-3

²⁴ Mē hprôt xwýnhjaja na htem hprôt týx no nhûm mēhó pixi nê wam hkwyjê re nê wam tēn pôj nhûm htem

ja hã omu nê kãm mẽ hkĩnhxà gõ. Ja pyrà nê kêr ka mẽ apiitã tãm amnhĩ nhĩpêx mex rãhã ho ri apa kê Tĩrtũm mẽ apumu nê nhỹrmã ja pãnhã mẽ amã mẽmoj mex gõ.

²⁵ Nê mẽ hprõt xwỳnhjaja na htem mẽ hkĩnhxà hpyr prãm xàj mẽ hprõt xà hã arĩgro hwỳr apkati mẽ hprõt o kuhê. Prõt tỳx prãm xàj. Tã mẽ hprõt xà hã arĩgrota ã nhũm hkwyjê pê amnhĩ to wa nê amnhĩm hkĩnhxà py. Nom koja hkĩnhxàja kritpêm kãm mex ry hkêt nê. Koja gaa nê hapêx tokyx anê. Tã nom kot puj mẽ Tĩrtũm kapêr kôt amnhĩ nhĩpêx mex o ri papa. Nê mẽ hprõt xwỳnhjê kot hkĩnhxà hpyr prãm xàj apkati mẽ hprõt o kuhêta pyrà nê apkati mẽ hkôt amnhĩ nhĩpêx mex o ri papa. Hãmri nhũm amnhĩ tã mẽ pahpumu nê nhỹrmã mẽ pamã hkĩnhxà mex õ gõ. No ãm jar hkĩnhxà kurom koja aa mẽ pahpê hapêx kêt nê. Koja mẽ pamã mex rãhã ho rãhã.

²⁶ Nê na hte mẽ hprõt xwỳnhjaja htỳx ri tanhmã hprõt to ho pa hkêt nê. Na htem hkwyjê pê amnhĩ to wa kaxyw hprõt nê nhỹri mẽ àhuk xàta pix pumunh pê hwỳr hprõt nê mra hãmri nê kamã ahtwỳ. Nê kamã àhuk pix kukamã hamaxpêr o hprõt tỳx nê mra. Ja pyrà nê na pa hte apkati mẽ Tĩrtũm kôt pix mã amnhĩ nhĩpêx o ri ixpa. Nhỹrmã kot inhmã mẽmoj mex nhõr kaxyw.

Nê mẽ pijapu mex xwỳnhjaja na htem htỳx ri nhỹhỹnh axpên tak kêt nê. Na htem nhỹhỹnh kot mẽ htak o mẽ rênh xà pix kamã mẽ htak o mẽ rênh kukamã hamaxpêr pê kamã mẽ htak. Ja pyrà nê na pa hte ixtỳx ri tanhmã amnhĩ nhĩpêx to ho ri ixpa hkêt nê. Na pa hte Tĩrtũm mã ijamaxpêr pê tanhmã amnhĩ nhĩpêx to rãhã ho ixpa. Kot nhỹrmã inhmã mẽmoj mex nhõr kaxyw. ²⁷ No na pa hte ixtỳx ri amnhĩ jamaxpêr xà hkôt tanhmã amnhĩ nhĩpêx to ho ri ixpa hkêt nê. Kot pa ã amnhĩ nhĩpêx anê nê ixte mẽ kãm Jejus kapêr jarênh o ri ixpa htã ãm ri ixtỳx ri ã amnhĩ nhĩpêx anhỹr kaprỳ nhũm Tĩrtũmja

tee ri ja hã ixpumu nê inhmã mẽmoj mex nhõr kêt nê.

10

Ijaew kot amnhĩ nhĩpêx

Rõmãn 15.4; Eprêw 3.8-11; Jutre 5

¹ E Kris kôt ixkwỳjaja. Kot paj mẽ amã amnepê mã mẽ ixpê Ijaew hkukamã mẽ inhĩgêjtaja tanhmã mẽ harênh to ka mẽ inhma. Mẽ kot pahi finat Mojes kôt ri mẽ pa xwỳnhjaja kot paj mẽ amã harê. Mẽ pahte mẽ urak nê pahtỳx ri amnhĩ nhĩpêx pymaj kot paj mẽ amã tanhmã mẽ harênh to ka mẽ inhma. Mãn ka mẽ arĩ mẽ harênh ã anohtỳx japêr. Na prem piitã pika pê Ejit kamã pa htã kurũm kator pa. Hãmri nê ma kapôt ã kakrã pumunh o hkôt pa ho pa. Pry hkêt jakamã nhũm pre Tĩrtũm tanhmã kakrã hto nhũm ma mẽ hkukamã pa nhũm mẽ omu nê hkôt pa. Hãmri nê ra gõ xujanãr mẽ kot kãm: “Gô kamrêk” anhỹr xwỳnhja wỳr pøj nê tee ri rêr prãm xàj amnhĩ kukamã hamaxpêr. Hãmri nhũm Tĩrtũm mẽ kãm hkôt ã ho amgrã nhũm mẽ hkôt mex pê rêr pa nê axte kakrã hkôt pa ho pa. ² Finat Mojes kot mẽ o pa jakamã nhũm prem kêp hkwy hã amnhĩ jarê nê kãm amnhĩ jarênh o:

—Nà kot paj mẽ akapêr ma nê akôt ri amnhĩ nhĩpêx o ixpa. Anê.

Te mẽ pahpê Kris kwỳ hã amnhĩ jarênh kaxyw mẽ kot gôx kãm mẽ pahkrã kumrãr nhũm mẽ pahte Kris mã amnhĩ jarênhta pyràk. ³ Na prem kapôt ã ri pa nhũm Tĩrtũm tãm kaxkwa rũm mẽ hwỳr mẽ apkur xà rê nhũm mẽ hkawrà nê ho apkur o pa. ⁴ Tã ra kôr xàj hirot nhũm Tĩrtũm tanhmã mẽ kãm kên prêkja to nhũm kurũm mẽ kãm gõ axkapĩ nhũm mẽ ho ixkõ nê akupỹm hihtỳx. ã Krisja mẽ hkôt mẽ ho mẽ hihtỳx o pa anê. Mẽ kot no ho omunh kêt tã nhũm mẽ hkôt mẽ ho mẽ hihtỳx o pa.

⁵ Tã no nhũm mẽ ohtô nê Tĩrtũm kôt amnhĩ nhĩpêx kêt nê. Kot mẽ ho mex kumrêx tã nhũm mẽ ãm amnhĩ tã omu nê ãm omu nê kapêr kôt amnhĩ nhĩpêx kêt nê. ãm kapêr kwỳm ri

tanhmã amnhĩ tomnuj to ho pa nhũm tee ri amnhĩ tã mẽ omu nẽ tanhmã mẽ ho nhũm mẽ hkwỳja hpikaprãr pa. Hãmri nhũm arĩ mẽ htĩr xwỳnhjaja kapôt ã mẽ hagjênh pa nẽ axte ma pa.

⁶ Jakamã kwa kêr pu mẽ kot ã amnhĩ nhĩpêx anhỹr ã mẽ harênh ma nẽ hã pano htỳx nẽ ho papa hãmri nẽ ho mẽ uràk kêt nẽ. Mẽ uràk nẽ pahtỳx ri tanhmã amnhĩ nhĩpêx to ho ri papa hkêt nẽ.

⁷ Nẽ na pre mẽ hkwỳjaja sãnti kutã hkõn krã ho rôrôk nẽ hkrĩ nẽ kãm amnhĩ jagrer pê amnhĩ to kuwỳ. Tĩrtũm kapêr ã kagã htũm kot mẽ kot amnhĩ nhĩpêx anhỹr ã mẽ harênh kot: Na prem sãnti kutã apkur o hkrĩ nẽ kãm amnhĩ jagrer o hkrĩ nẽ gaa nẽ pipãnh pix o pa. Jao axpên kamã hpijaàm kêt o pa.

Anhỹr jakamã kwa kêr pu mẽ ã mẽ kot amnhĩ nhĩpêx anhỹrja ã pano htỳx nẽ ho mẽ uràk hkêt nẽ.

⁸ Nẽ na pre mẽ hkwỳjaja htỳx ri mjên nẽ hprô kuhpa hã nhãm ri mẽ kamã hpijaàm kêt o pa. Mýrapê nhũm arĩgro pixi hã mẽ ohtô rax kumrêx nẽ axkaprã. Mẽ kêp 23.000 nẽ pikaprãr pa. Tã ã Tĩrtũm kot mẽ panhĩpêx anhỹr pymaj kêr pu mẽ ja hã pano htỳx nẽ ho mẽ uràk kêt nẽ. ãm kwarĩ ho kwarĩ.

⁹ Nẽ na pre mẽ hkwỳjaja axtem nẽ htỳx ri tanhmã axpên mã Tĩrtũm jarênh to nẽ harênh o:

—Nà Tĩrtũmja gryk tokyx anhỹr kêt jakamã kwa pu mẽ ã amnhĩ tomnuj anhỹr o papa. Koja mẽ pahpumu nẽ tanhmã mẽ pahto hkêt nẽ.

Anhỹr tã nhũm tee ri ja hã mẽ kuma nẽ mẽ omu nhũm ja kãm mex kêt nẽ nhũm mẽ hwỳr kagã xoprê nhõ wenên xihtỳx kwỳ rẽ nhũm mẽ hwỳr mra nẽ mẽ hkamnhar o mẽ hkwỳjê pa. Tã ã kot mẽ panhĩpêx anhỹr pymaj kwa kêr pu mẽ ja hã pano htỳx nẽ mẽ uràk nẽ amnhĩ tã Tĩrtũm kamã pajamak o papa hkêt nẽ. Kwarĩ ho kwarĩ.

¹⁰ Nẽ na pre mẽ hkwỳjaja axtem nẽ Tĩrtũm o kapêr punuj nẽ nhũm tee ri amnhĩ tã mẽ kuma nẽ mẽ hwỳr kapêr o wrỳk xwỳnh mẽ nhũm ma mẽ hwỳr

wrỳ nẽ ý hã mẽ hkwỳjê nhĩmex. Tã ã kot mẽ panhĩpêx anhỹr pymaj kwa kêr pu mẽ ja hã pano htỳx nẽ ho mẽ uràk nẽ Tĩrtũm o pakapêr punuj kêt nẽ.

¹¹ Na pre mẽ ixpê Ijaew nhĩgêjtaja ã htỳx ri amnhĩ nhĩpêx o pa anê. Tĩrtũm kapêr ã kagã htũm kot ã mẽ kot amnhĩ nhĩpêx anhỹr piitã harênh par. Mẽ panhõ ejêp kaxyw. Mẽ pahte kamã harênh nẽ mẽ harênh mar tỳx nẽ mẽ uràk nẽ ã amnhĩ nhĩpêx anhỹr kêt kaxyw. Ra Jejus akupỳn mẽ pahwỳr wrỳk xà hã arĩgro hkukamã grêre jakamã kwa kêr pu mẽ kutêp mẽ kurom kapêr kôt pix mã ri amnhĩ nhĩpêx mex rãhã ho ri papa.

Mẽ pahte mẽmoj punuj nẽ amnhĩ to htỳx ã mẽ pamã karõ

Matêwre 4.1, 6.9-13; Wam Korîit 1.8; Sikũn Pêtre 2.9; Jutre 24

¹² Tã kêr ka mẽ ã Ijaew kot amnhĩ nhĩpêx anhỹr ã mẽ harênhja ma nẽ ã ajamaxpêr anhỹr kêt nẽ. Rỳ mẽ ajamaxpêr o:

—Nà mẽmoj piitã kutã ixihtỳx kênã kot pa hkêt mẽ uràk nẽ ã amnhĩ nhĩpêx anhỹr o ri ixpa.

Anhỹr o mẽ ajamaxpêr kêt nẽ. Kot kaj mẽ ã amnhĩ jarênh anê nẽ ra mẽ uràk nẽ tanhmã amnhĩ tomnuj to.

¹³ Nẽ na prem kapôt ã pare ri omnuj nẽ ri pa. Nhũm mẽkarõmnuti tanhmã mẽ hkrã hto nhũm mẽ tanhmã amnhĩ tomnuj to ho pa. Ja pyrã nẽ na hte arĩ mẽ pahte amnhĩ tomnuj hprãm xaj tanhmã mẽ pahkrã hto ho pa. Mẽ pahpiitã ã mẽ pahto anhỹr o ri mẽ pahkôt pa. Nom nhũm Tĩrtũm ra kot mẽ pamã amnhĩ jarênh xà hkôt mẽ panê omunh mex rãhã ho pa. Jakamã na pu htem tanhmã amnhĩ tomnuj to hkukamã pajamaxpêr nhũm ja hã mẽ pahpumu nẽ mẽ panê mẽkarõmnuti mã kapêr. Nẽ kutã mẽ pahto paxihtỳx nẽ pu mẽ ý hã amnhĩ tomnuj kêt nẽ. Nẽ ãm kôt pix mã amnhĩ nhĩpêx mex o ri papa.

Mê kot sânti mã mẽmoj nhõr xwỳnhjê jarēnh

Wam Korîit 8.1-13; Karatas 4.8; Apokarip 9.20

¹⁴ Jakamã e Kris kôt ixkwỳjaja. Kêr ka mẽ amnhĩ kaxyw sânti hkôt ajamaxpêr o ri apa hkêt nê. Nê amnhĩ to hwỳr kêt nê. Âm kwarĩ ho kwarĩ.

¹⁵ E mẽ axàhpumunh tỳx ã amnhĩ jarēnh jakamã kot paj mẽ amã mẽmoj jarē ka mẽ aprĩ hã inhmar tỳx japêr.

¹⁶ Nà na pu htem tõhã Jejus kot mẽ panê htyk mã pajamaxpêr kaxyw axpên wỳr akuprõ. Hãmri nê mẽmo kagô hkwy ru nê Tirtũm mã mex ã harê nê mẽmoj o pahkõm pê Jejus kot mẽ panê hkamrõ pikapĩr mã pajamaxpêr. Nê hpãnhã pãwti hõ py nê axpên mã ho hkry nê mẽ kot Kris pĩr nê ã kamã hkamnhwỳr nhũm mẽ panê htykja mã pajamaxpêr pê kuku. ¹⁷ Pãwtita âm pixire htã pu htem axpên mã ho hkry nê pahpitã kuku. Mẽ pahpê Kris kwỳ hã mẽ pahte amnhĩ jarēnh nhũm mẽ pahkwỳ kot ja hã mẽ pahpumunh kaxyw. Te mẽ pahtipxi nê ri mẽ papa pyrãk nê pãwti pixire htã pu mẽ pahpiitã kuku.

¹⁸ E kot paj hpãnhã mẽ amã anepê mã Ijaew kot tanhmã amnhĩ nhĩpêx to jarē ka mẽ inhma. Na pre htem Tirtũm mã mex ã harēnh nê kãm amnhĩ nhõr ã kot amnhĩ tã mẽ omunh kaxyw nhũm prem tanhmã amnhĩ nhĩpêx to. Jao kãm mẽ apkur xà hkwy gõ nê kãm mex o mex ã harê. Hãmri nê amnhĩ mã mẽmojta kwỳ xà nê hkur o hkrĩ. Jao ra Tirtũm mã mex o mex ã harê nê kãm kêp hkra hã amnhĩ jarē.

¹⁹ Nom mẽ kot sânti mã mẽmoj nhõr xwỳnhjaja na htem kãm mẽmo mẽ apkur xà hkwy gõ nom âm kãm õr kaprỳ. Tanhmã kot we amnhĩ to nê amnhĩ tã mẽ omu? Mo rĩt kaxyw no? Âm mẽ ãhkra ho mẽ kot amnhĩm hipêx kênã. Jakamã na htem âm kãm mẽ apkur xà hkwy nhõr kaprỳ. ²⁰ Mẽ kot sânti mã mẽmoj nhõr xwỳnhjaja na htem Tirtũm mã õr kêt nê. Mẽkarõmnuti mã na htem kugõ. Jakamã kot kaj

mẽ urãk nê sânti mã mẽmoj gõ nê apê mẽkarõmnuti hkwy hã amnhĩ to amnhĩrĩt nê apê hkwy hã ri apa. Jakamã mẽ ate sânti mã mẽmoj nhõrta na inhmã hprãm kêt kumrêx. ²¹ Kot kaj mẽ panhõ Pahihti Jejus kot mẽ panê htyk ã mẽmoj kagô hkwy ho ixkõ hãmri nê ma mra nê hpãnhã sânti pê mẽkarõmnuti hã mẽmoj to ixkõ. Hãmri nhũm Tirtũmja tee ri ja hã mẽ apumu nhũm ja kêp omnuj tỳx nê. Rỳ ka mẽ Pahihti Jejus kot mẽ panê htyk ã pãwti hkwy hku nê hpãnhã ma mra nê sânti pê mẽkarõmnuti hã mẽmoj hku. Hãmri nhũm Tirtũm kêp ja omnuj tỳx nê. Mẽ pahte ã amnhĩ nhĩpêx anhỹrja na axpên kuhpa hã. ²² Jakamã kot ka mẽ ã amnhĩ nhĩpêx anê nê te ra mẽ amã mẽkarõmnuti hkĩnh nê mããnēn amã Tirtũm kĩnh pyrãk o amnhĩ nhĩpêx. Nê te Tirtũm kurom mẽ kajaja mẽ axàhpumunh tỳx pyrãk o amnhĩ nhĩpêx. Nhũm tee ri amnhĩ tã mẽ apumu nê mẽ akamã gryk tỳx nê. Kwa mẽ okora. Kojã Tirtũm akamã gryk ka amex kêt kumrêx.

Mẽ pamã Kris kôt mẽ pahkwỳjê hkĩnh pê mẽ ho mex ã mẽ pamã karõ

Matêwre 20.28; Rõmãn 14.1-15.7; Piripos 2.1-4

²³ Nê na htem tõhã amnhĩ jarēnh o:

—Nà kot pa inhmã mẽmoj to anhỹr prãm nê ixãmnhĩx ã amnhĩ nhĩpêx anhỹr o ri ixpa. Anê.

Tã no âm mẽmoj piitã mẽ pamã mex kêt. Na htem kãm mẽmoj to anhỹr prãm xà hkôt mẽmoj piitã tanhmã ho ho ri pa nê tanhmã amnhĩ tomnuj to. Hãmri nhũm mẽ hkwyjaja ja hã mẽ omu nê mẽ urãk nê tanhmã ri amnhĩ tomnuj to. Jao Kris kôt amnhĩ xunhwỳr tỳx kêt nê. ²⁴ Jakamã kwa kêr pu mẽ amnhĩ pix kukamã pajamaxpêr pê tanhmã amnhĩ nhĩpêx to ho papa hkêt nê. Mããnēn amnhĩ kwỳjê hkukamã pajamaxpêr pê tanhmã mẽ ho mex to ho ri papa pê tãm ri amnhĩ nhĩpêx o papa.

²⁵ Nê kot kaj mẽ amnhĩ xàpkur xà japrõr kaxyw ma nhỹhỹm mra nê

māmri axàmnhĩx ri amã mēmoj prãm xà hkôt mēmoj japrô. Nom kêr ka mē axujaprôrja kêp sânti xàpkur xà hã mē hkukjêr kêt nê. ãm axàmnhĩx ri mē kêp mēmoj japrô o ri apa. ²⁶ Tĩrtũm kapêr ã kagà htũm kot ja jarênh kot: Pika piitã hkôt mēmoj piitã kêp Tĩrtũm nhõ na. Anê.

Jakamã mē māmri axàmnhĩx ri mēmoj piitã haprô nê mēmoj piitã hkur o apa.

²⁷ Tã koja mē kêp Kris kwỳ hkêt xwỳnhjê hõ ate kutã axàpkur kaxyw amnhĩ wỳr awỳ ka amã hwỳr amõr prãm nê māmri ma hwỳr mõ. Nhũm mēmoj to amã anhõ ka axàmnhĩx ri māmri aku. No ri tee ri amnhĩ kukamã ajamaxpêr nê tanhmã hã hkukjêr to hkêt nê. Rỳ kãm:

—Kwa xà we mryja sânti hã mē apkur xà na nà?

Anhỹr o hã mē hkukjêr kêt nê. ãm māmri axàmnhĩx hkur o akrĩ. ²⁸⁻²⁹ Nom koja Kris kôt mē kot amnhĩ xãm tohtuj anhỹr xwỳnhjê hõ mē awỳr axà nê tee ri ja hã apumu nê amã:

—Kwa sânti hã mē apkur xà na ka ri mē kutã hkur o akrĩ.

Anhỹr o amã kapêr ka ama nê hkaga kurê kumrêx nê hkur kêt nê. Amã mex tã Kris kôt atõja kêp omnuj jakamã ka hkaga nê hkur kêt nê. No kot ka ãm ama nê arĩ hkur o anhỹr japêr. Kot amã harênh xwỳnhhta kêp omnuj tã ka arĩ noo mã hkur japêr. Nhũm ja hã apumu nê tee ri Tĩrtũm kapêr kukamã tanhmã hamaxpêr to. Hãmri nê apyrà nê kuku nê gaa nê tee ri amnhĩ kukamã hamaxpêr nê amnhĩ mã:

—Hêxta waa nê. Sânti nhõja mex kêt tã pa ri kuku. Kwa na pa pêr hkurja o amnhĩ tomnuj nê. Hêxta waa nê. Anê.

Hãmri nê tee ri amnhĩ kukamã hamaxpêr o hkaprĩ nê. ã kot amnhĩ nhĩpêx anhỹr pymaj koja mēhõ ã mēmo mē apkur xà nê amã kapêr anê ka ama nê hkaga kurê kumrêx. Jao amnhĩ pix kukamã ajamaxpêr kêt nê. Mãânên Kris kôt atõ nê atõxjê mex kukamã ajamaxpêr. Nom koja amã kêp sânti hã mē apkur xà hã harê ka

ama nê ã ajamaxpêr anhỹr japêr nê ajamaxpêr o:

—Nà kêp omnuj tã kot paj mamri kuku. Ja inhmã mex kênã. ³⁰ Ra ixte Tĩrtũm mã harênh nê ixàmnhĩx hkur o inhỹr kênã kot kêt ã nê inhmã kapêr anê. Anê.

Kwa mē ã ajamaxpêr anhỹr kêt. Kot kaj mē ã ajamaxpêr anê hãmri nê Kris kôt atõ rỳ atõx mex kukamã ajamaxpêr kêt nê.

³¹ Jakamã kêr ka mē tãm tanhmã amnhĩ nhĩpêx to ho ri apa. Nê axàpênh mex nê. Kêr kê mē piitã ja hã mē apumu nê mē apumunh kôt amnhĩm Tĩrtũm mex ã harê. ³² Nê kêr ka mē piitã mē noo mã tãm ri amnhĩ nhĩpêx o apa. Ijaew noo mã nê Ijaew kêt xwỳnhjê noo mã. Nê Jejus kwỳjê noo mã. Mē piitã mē noo mã tãm ri amnhĩ nhĩpêx rãhã ho ri apa. Mē kot tee ri mēmoj tã mē apumunh nê hpijaàm pymaj ka mē tãm ri mē piitã mē noo mã tanhmã amnhĩ nhĩpêx mex to ho ri apa. ³³ Na pa hte ã amnhĩ nhĩpêx anhỹr o ri ixpa. No na pa hte pa amnhĩ pix kukamã ijamaxpêr kêt nê. Mē piitã mē mex kukamã na pa hte ijamaxpêr o ri ixpa. Pê tanhmã amnhĩ nhĩpêx to ho ri ixpa. Mē kot ja hã xpumunh nê ixpyrà nê Jejus kôt amnhĩ xunhwỳr nê ãm kôt pix mã ri amnhĩ nhĩpêx o pa kaxyw.

11

¹ Na pre hte Kris ã ã amnhĩ nhĩpêx anê nê mē piitã mē mex kukamã hamaxpêr rãhã ho ri pa. Tã na pa hte uràk nê ã amnhĩ nhĩpêx anê. Jakamã kwa kêr ka mē ixpyrà nê ã amnhĩ nhĩpêx anhỹr o mãn ri apa.

Mēnijaja mē mjên ã hpijaàm ã mē kãm karõ

Epês 5.22; Wam Pêtre 3.1-6

² Nê na ka xep htem arĩ ra ixte tanhmã mē amã ixkapêr toja mã ajamaxpêr tỳx o ri apa. Na pa pre Kris kôt mē pahtõ nê mē pahtõxjaja xypên wỳr pikuprõnh nê tanhmã amnhĩ nhĩpêx to hã mē amã karõ ka prem inhma nê mē uràk nê ã amnhĩ nhĩpêx

anê. Æm hãmri na ka htem ã amnhî nhîpêx anhÿr o apa. Ja na inhmã mex.

³ Na pa pre krî hõ kamã mênijaja kot amnhî krã hpro hã mē amã mē harê. Ka prem inhma nhũm mē akwÿjaja kãm ja mex nē nhũm mē akwÿjaja tee ri ja kukamã ajamexpêr. No mēmo kaxyw na hte mênijaja amnhî krã hpro? E kot paj ixprî hã mē amã ja jarê ka mē inhma. Nà Tirtũm kêp Kris jamãr xwÿnh nhũm Kris kêp Tirtũm mã mē inhmyjê jamãr xwÿnh. No mē anijaja mē amjên kêp Kris mã mē ajamãr xwÿnh. Na hte mênijaja ohtô nē ra mē mjên ã amnhî to amnhîrît kaxyw amnhî krã hpro nē ri pa. No mē inhmyjaja na pa htem ã amnhî nhîpêx anhÿr kêt nē. Na pa htem amarî ixkrã hkênh nē ixpa.

⁴ Jakamã na pa htem Tirtũm kapêr mar xã hã ixkre hwÿr axpên wÿr akuprô nē Tirtũm nhÿ hã mē anijê mã kapêr jarênh o ixkuhê. Rÿ Tirtũm mã tanhmã mē pajarênh to. No ãm amnhî krã hpro hkêt rãhã kãm mē ajahkre rÿ kãm mē pajarê. Kot pa mē amnhî krã hpro nē te mē apê ixprôjaja mē apê mē ijamãr xwÿnh ã mē ajarênh pyrãk. Jao te mē ixte mē ijamãr xwÿnh Kris ã xpijaàm kêt pyrãk o amnhî nhîpêx. ⁵ No mē anijaja mē ixte Kris mã mē ajamãr xwÿnh jakamã na ka htem Tirtũm nhÿ hã mē inhmã kapêr jarênh rÿ kãm mē pajarênh kaxyw nē amnhî krã hpro. Mē ixte Kris mã mē ajamãr xwÿnhjê hã apijaàm kaxyw ã amnhî nhîpêx anê nē mē amnhî krã hpro. Kot ka mē ã amnhî nhîpêx anhÿr kêt nē te mē ate mē ixtã apijaàm kêt pyrãk o amnhî nhîpêx nhũm mē amjên tee ri ja hã apumu nē hpijaàm nē. Te ate amnhî krã hkênh nē ri apa nhũm tee ri apumunh nē hpijaàm pyrãk.

⁶ Kot kaj mē amnhî krã hkênh nē ri apa nē amnhî kamã apijaàm nē ri apa. Mē anijaja na ka htem akrã hkî japjê nē kamã amex nē ri apa. No kot ka mē amnhîm akrã hkênh nē apunuj nē amnhî kamã apijaàm nē ri apa. Jakamã kêt ka mē Tirtũm mã amnhî jarênh kaxyw nē amnhî krã

hpro. Nom kot ka mē amjên ã apijaàm kêt nē ri apa hprãm japêr nē mamrî amnhîm akrã hkênh nē ri amnhî kuk ã apijaàm kêt nē ri apa.

⁷ No mē inhmyjaja na pa htem amnhî krã hpro hkêt nē. Te mē ixpê Tirtũm pyrãk nhũm mē anijaja te mē apê Tirtũm kra pyrãk o na pu htem axpên nhîpêx. Tirtũm krajaja na htem mēmoj tã Tirtũm mã karô hkêt nē. Ja pyrã nē mē anijaja na ka htem mē inhmyjê mã mēmoj tã karô kamã axihtÿx o apa hkêt nē. Na ka htem mē ixtã apijaàm kãm mēmoj tã mē ixwÿ.

⁸ Annepê mã Tirtũm kot mēmoj to kator krax rũm na pre myja kumrêx nhîpêx hãmri nē kêp ôkwa i hõ kapa nē ho kãm hprô nhîpêx. No na pre nija kumrêx nhîpêx nē ôkwa i ho kãm mjên nhîpêx kêt nē. ⁹ Myja mã na pre hprô nhîpêx. No nija mã mjên nhîpêx kêt nē. ¹⁰ Jakamã kêt ka mē anijaja amjên ã apijaàm ã amnhî to amnhîrît kaxyw hãmri nē mē inhmã Tirtũm nhÿ hã tanhmã akapêr jarênh to kaxyw rÿ kãm amnhî jarênh kaxyw hãmri nē amnhî krã hpro nē akuhê. Hãmri nhũm Tirtũm kapêr o mē wrÿk xwÿnhjaja ja hã mē apumu nē hkînh nē tee ri mē akukamã hamaxpêr kêt nē.

¹¹⁻¹² Nē wam ni kator xwÿnhnta na pre myja rũm kato. Tã na pa htem jarãhã mē inhmyjaja hpãnhã mē anijê rũm ijapôj. Tirtũm jamaxpêr xã hkôt. Tãm na pre ã mē pahte amnhî nhîpêx anhÿr kaxyw ã mē panhîpêx anê. Tã mē ixpê Pahihti Kris kwÿ hã mē inhmyjaja nē mē anijaja na pu htem ri ahte papa hkêt nē. Na pu htem axpên kutã pamã axpên hkînh o papa nē mēmoj to axpên kutã panojarêt o ri papa. Nē axpên to presija ho papa. Na hte mē anijaja mē amjên o presija ho apa. Nē mē amyjaja na ka htem mē aprô ho presija ho apa. Tã kêt ka mē anijaja mē amjên ã apijaàm o ri hkôt apa.

¹³ Jakamã kwa mē kot amnhî krã hproja kukamã ajamaxpêr tÿx nē. Xã mē anhõ krî kamã mênijaja mē mjên ã hpijaàm ã amnhî to amnhîrît

kaxyw amnhĩ krã hpro nã? Koja mẽ ja kaxyw ã amnhĩ nhĩpêx anhÿr japêr kê mẽ rĩ mẽ anoo mã Tirtũm mã amnhĩ jarênh kaxyw nê kupê xê hkwÿ ho amnhĩ krã hprõ nê rĩ kãm amnhĩ jarê. Nom koja mẽ ã amnhĩ nhĩpêx anhÿr kêt nhũm mẽmyjaja tee ri ja hã mẽ omunh nê ho kapêr hkêt japêr hãmri kê mẽ rĩ amnhĩ krã hpro hkêt nê ri pa.

¹⁴ Mẽ kot mẽ pahte amnhĩ nhĩpêx ã mẽ pahpumunh nê hkĩnh kaxyw na pu htem tanhmã amnhĩ nhĩpêx to ho ri papa. Na htem mẽ pahkrã hkĩ jarênh o: “Koja mẽmyjaja hkrã hkĩ japjê nê ri pa nê ra kamã omnajti.” Anhÿr jakamã na pa htem amnhĩ krã hkênh nê ri ixpa. ¹⁵ No mẽ anijaja na htem mẽ ajarênh o: “Mênijaja na htem hkrã hkĩ japjê nê ri pa nê kamã muxti.” Anhÿr jakamã na ka htem akrã hkĩ japjê nê ri apa. Mẽ akĩ te kêp mẽ akrã hpro xà pyrãk. Na ka htem ã amnhĩ nhĩpêx anhÿr o apa.

¹⁶ E na pa ra mẽ amã krĩ hkwÿ kamã Kris kwÿ nijaja kot mjên ã hpijaam ã amnhĩ to amnhĩrit kaxyw tanhmã amnhĩ nhĩpêx to hã mẽ harê. Tã koja mẽhõ nija tee ri ja ma nhũm ja kêp omnuj japêr. Nhũm amnhĩ jarênh o:

–Kêt. Kot paj tanhmã inhmã amnhĩ nhĩpêx to hprãm xà hkôt tanhmã ri amnhĩ nhĩpêx to ho ri ixpa. Koja inhmjên ja hã ixpumu nê hpijaam nê rĩ tãm.

Anhÿr ã amnhĩ jarê ka mẽ tee ri ã kot amnhĩ jarênh anhÿrja ã ama nê kãm:

–Kwa nã ã ri ajamaxpêr anhÿr kêt nê. Na hte Kris kwÿjaja ã hamaxpêr anhÿr kêt nê. Anê.

Jejus tyk mã mẽ pajamaxpêr pê tanhmã mẽ pahte amnhĩ to hã mẽ pajarênh

Matêwre 26.26-30; Makre 14.22-26; Rukre 22.19-20

¹⁷ Nê na ka xep htem Tirtũm mã amnhĩ jarênh xà hã ixkre hwÿr axpên wÿr akuprõ nê kamã amnhĩ to mex kêt nê. Na ka htem tanhmã amnhĩ tomnuj to pa tee ri mẽ ajarênh ma nê

ixkaprĩ nê. Nê amnhĩm mẽ amex ã mẽ ajarênh kêt nê. ¹⁸ Na ka xep htem axpên wÿr akuprõ nê mẽmoj tã axpên mã akir nê axpên pê anhgrã. Nê ahpÿnhã mẽmoj mã ajamaxpêr jao ra mẽ amã axpên kĩnh kêt nê. Na pa tee ri ã mẽ ajarênh anhÿrja ma nê ixkaprĩ htÿx nê. ¹⁹ Xà na hte Tirtũm ahpÿnhã tanhmã mẽ pahte amnhĩ anhĩpêx to hã mẽ pahpumunh kôt kãm mẽ pajapê hkêt ã amnhĩ jarê? Nã na hte ã amnhĩ nhĩpêx anhÿr kêt nê. Kãm mẽ pajapê ho axpên pyrãk kênã.

²⁰ Nê na hte Kris kwÿjê piitã tõiã axpên wÿr akuprõ nê Jejus tyk mã hamaxpêr kaxyw pãwti hkwÿ hku. Tã mẽ kajaja na ka xep htem ja kaxyw axpên wÿr akuprõ nom axtem nê Jejus tyk mã ajamaxpêr pê axàpkur kêt nê. Æm mẽ axàpkur pix kukamã ajamaxpêr nê axtem nê axàpkur rũnh o akrĩ. ²¹ Jao amnhĩ pix kukamã ajamaxpêr. Mẽ akwÿjaja wam mrar nê hpõx nê mẽ apkur xà hã mẽ hkrĩ xwÿnhjaja na xep htem hkwÿjê rom mẽõta pinh pa. Nê wĩhtija nhũm mẽ mãânên hpenh pa nê axtem nê ho axpã. Jakamã nhũm mẽ akwÿjaja kot amnhĩ to hapu nê hpõx xwÿnhjaja mẽmojta ã hprãr pa. ²² Kwa mon ka mẽ amã hprãm nê anhõrkwÿ kamã axàpkur kêt nê? Mẽ kot Tirtũm mã amnhĩ jarênh xà hã ixkre kamã na htem apkur rũnh hkêt nê. Ka mẽ ã amnhĩ nhĩpêx anê nhũm mẽõ hkêt xwÿnhjaja amnhĩ to hapu nê mra nê mẽõ hã prã nê amnhĩ kamã hpijaam nê. Kwa xà kot pa ã mẽ ate amnhĩ nhĩpêx anhÿr ã mẽ ajarênh ma nê ixkĩnh nê mẽ ate amnhĩ nhĩpêx mex ã mẽ ajarê? Nã kot paj ã mẽ ajarênh anhÿr kêt nê.

²³ Pahihti Jejus na pre ja hã tanhmã inhmã kapêr to nê inhmã:

–Kêr ka mẽ tõiã axpên wÿr akuprõ nê axàpkur pê ixtyk mã mãn mẽ ajamaxpêr pê ã amnhĩ nhĩpêx anê nê ã amnhĩ nhĩpêx anê. Anê.

Jakamã kot paj ixprĩ hã amnhĩ xõ ri mẽ amã kot tanhmã inhmã kapêr tota jarê ka mẽ inhma. Nã Jejus kormã

htyk kêt ri Jut Kariot ra kot pôristi mǎ hǎ àmnênh kaxyw nhũm kamàt nhũm Jejus mē ŷ hǎ mē ahkre xwýnhjê mē apkur kaxyw hkrî hpa. Hāmri nhũm Jejus pǎwti hō py nē o xa ²⁴ nē Tirtũm mǎ harē nē kām:

—Pa Papaj. Nà ãm hāmri na ka hte mē inhmǎ mē inhō mex o apa. Anē.

Nē hpānhǎ pǎwja o hkry pa nē ho mē kot ŷ hǎ mē ahkre ho mē pa xwýnhjê nhĩpêx pa nē mē kām:

—E na pa ã pǎwti ho hkry nē mē amǎ ōr anē. Koja mē ã inhĩpêx anē nē te mē kot ixto hkry hpar pyrǎk o inhĩpêx pa amnhĩ xà htýx kamǎ ijamak kām ty. Nom mē anē kot paj ty. Jakamǎ e kêt ka mē ixwakre kamǎ tōhǎ axpên wýr akuprō nē ixte mē ate amnhĩ tomnuj pānhǎ amnhĩrer kaxyw mē anē ixtyk mǎ ajamaxpêr pē akĩnh nē pǎwta kur o akrĩ. E mē māmri axàmnhĩx aku. Anē.

²⁵ Hāmri nē hpānhǎ kop kām wĩhtita py nē o xa nē mē kām:

—E kop kām wĩhtija te kêt Tirtũm kot mē atǎ amnhĩ jarēnh nyw xà jarēnh pyrǎk. Ixtyk kukwak ri koja mē ato hkra. Kot paj ty nhũm ixkamrō mē anē axkapĩ. Jakamǎ e. Mē kopja kamǎ wĩhti ho akōm o axpên nhĩpêx. Nē ho akōm pē ixte mē anē ixtyk mǎ ajamaxpêr. Anē.

²⁶ Tǎ ã kot amnhĩ jarēnh anhýr jakamǎ na pu htem axpên wýr akuprō nē pǎwti hkwý hku nē mēmo kagō hkwý o ixkō. Nē ho pahkōm pē axpên mǎ Jejus tyk jarēnh o pahkrĩ. Tǎ kêt pu mē arĩ ã amnhĩ nhĩpêx anhýr o ri papa rǎhǎ nhũm Jejus akupýn mē pahwýr wrý. ²⁷ Jakamǎ kot kaj mē tōhǎ mēmo arĩgro hǎ kot mē panē htykja mǎ ajamaxpêr kaxyw axpên wýr akuprō. Hāmri nhũm mē anhĩō mē awýr axà nē nhý. Nom axtem nē Jejus tyk mǎ hamaxpêr kêt japêr. Nē htýx pǎwti kur o nhý. Nē hkôt amarĩ mēmo kagō ho hkōm o nhý. Koja ã htyk mǎ hamaxpêr kêt rǎhǎ amnhĩ nhĩpêx anē nē te Jejus o kapêr pyrǎk o amnhĩ nhĩpêx. Te ho kapêr o:

—Nà Jejus amarĩ htyk nhũm hkamrō amarĩ hpikapĩr kênǎ. Na pre mē panē htyk kêt nē.

Anhýr o ho kapêr pyrǎk. ²⁸ Jakamǎ kwa kêt ka mē ate pǎwta kur kaxyw nē taxy kormǎ tanhmǎ ate amnhĩ nhĩpêx to mǎ ajamaxpêr nē ajamaxpêr o:

—Kwa mǎn pa Tirtũm kapêr kôt amnhĩ nhĩpêx mex rǎhǎ ho ri ixpa nà?

Anhýr o mǎn ajamaxpêr. Hāmri nē ate hkôt amnhĩ nhĩpêx mex ã amnhĩ pumu nē amarĩ axàmnhĩx aku. No kot ka mē kormǎ mēmoj punuj kaga hkêt nē arĩ ri ho anhýr o pa hāmri nē kām ajamaxpêr nē hkur kêt nē. Rý tanhmǎn tee ri tanhmǎ ate amnhĩ tomnuj tota mǎ ajamaxpêr nē akaprĩ nē. Hāmri nē tokyx Tirtũm mǎ amnhĩ jarē nē amnhĩ to mex prǎm xàj amnhĩ to awý hāmri nē arĩ kormǎ axàmnhĩx pǎwtita ku. ²⁹ Koja mēhō mē akôt axà nē mēmoj kukamǎ hamaxpêr pē htýx pǎwti nhĩrēnhata ō py hkur o nhý. Hāmri nhũm Tirtũm tee ri ja hǎ omu nē hǎ tanhmǎ ho. ³⁰ Na ka mē ra axohtō nē ã amnhĩ nhĩpêx anē nē atýx ri mēmoj kukamǎ ajamaxpêr pē pǎwta ku. Jejus kot mē panē htykja mǎ ajamaxpêr kêt pē atýx tanhmǎ ajamaxpêr to pē hkwý hkur o akrĩ. Mýrapê na ka mē ra ja hǎ axà nē ri apa. Nē mē akwýjaja ra htyk rax nē.

³¹ Nom kot ka mē axpên wýr akuprō hāmri nē akupým tām axpên kôt ajamaxpêr nē axpên kôt amnhĩ nhĩpêx nē rĩ kormǎ pǎwtita ku. Hāmri nhũm Tirtũm ja hǎ mē apumu nē tanhmǎ mē ato hkêt nē. ³² Na hte mē pahte tanhmǎ amnhĩ tomnuj to hǎ mē pahpumu nē hǎ tanhmǎ mē pahto. Mē pahte ja hǎ amnhĩ pumunh nē axte ã amnhĩ nhĩpêx anhýr kêt kaxyw na hte ã mē pahpê hkrajê nhĩpêx anē. Jakamǎ kot puj mē nhýrmǎ mē kêt hkra hkêt xwýnhjê hkôt kuwyta wýr ma papa hkêt nē. ³³ Jakamǎ e Kris kôt ixtō nē ixtōxjaja. Kêt ka mē axte Pahihti Jejus tyk mǎ ajamaxpêr kaxyw axpên wýr akuprō. Hāmri nē ra axpên wýr apikuprōnh pa hǎ axpên pumu nē rĩ kormǎ pǎwti hkwý hku nē hkur

pê Jesus kot mẽ panê htyk mã aja-maxpêr o akrî. ³⁴Nê ka mẽ atõ ra amã prãm japêr nê anhõrkwỹ kamã apku nê rĩ kormã mẽ hkõt tẽ. Jao ra anhõhy htu nê ajamakêtkati nê akwỹjê jamãr o nhỹ. Kê mẽ hpõx pa ka mẽ atipxi nê Pahihti Jesus tyk mã ajamaxpêr pê hkur o akrî. Hãmri nhũm Tĩrtũm ja hã mẽ apumu nê hkĩnh nê tanhmã mẽ ato hkêr nê.

Na ka prem mẽ ate inhmã kagã nê mênhta kamã mẽmoj tã ixkukjêr rax nê. Tã na pa ra kagã ja kamã mẽ amã hkwỹ jarênh rax nê. Nom kot paj piitã harênh par kêt nê. Kot paj ãm mẽ amã hkwỹ pix jarê. Hãmri nê nhỹrmã ma mẽ awỹr mõ nê mẽ apumu nê kormã axte mẽ amã harênh jatur xãm kumê.

12

Mẽ kot Tĩrtũm kapêr o hêx xwỹnhjê jarênh

Rõmãn 12.6-8; Wam Korît 14.29; Wam Pêtre 4.10-11; Wam Juãw 4.1-2

¹ Nê kot paj hpãnhã mẽ amã tanhmã Tĩrtũm Karõ jarênh to ka mẽ inhma. Tanhmã kot mẽ pahkrã hto nhũm mẽ pahte ahpỹnhã tanhmã kãm amnhĩ nhĩpêx to ho papaja kot paj mẽ amã harê. ² Amnepê mã kormã mẽ ate Kris kõt amnhĩ xunhwỹr kêt ri na ka prem sãnti hkõt ri amnhĩ nhĩpêx o ri apa. Kapêr kêt tã ka prem hkõt ri amnhĩ nhĩpêx rãhã ho ri apa. Te kot mẽ ano kupyryr pyrãk ka mẽ kãm mex o mex ã harênh o ri apa. Nê kãm amnhĩ jagrer pê amnhĩ to hwỹr o ri apa. ã na ka prem amnhĩ nhĩpêx anhỹr o ri apa. ³ Tã ra hpãnhã Tĩrtũm kõt amnhĩ xunhwỹ.

Na htem ohtõ nê Tĩrtũm nhỹ hã kapêr jarênh o pa hã amnhĩ jarênh tã no ãm mẽ hkwỹjaja ja hã amnhĩ to hêx. Tã kot paj ixprĩ hã mẽ amã tanhmã mẽ harênh to. Koja mẽhõ mẽ kãm Tĩrtũm nhỹ hã kapêr jarênh o pa hã amnhĩ jarê hã koja Jesus o kapêr punuj o pa hkêr nê. Koja harênh o:

—Jesus kêp mẽ panhõ Pahihti jakamã kwa pu mẽ hkõt amnhĩ xunhwỹ nê hkõt amnhĩ nhĩpêx o ri papa.

Anhỹr o harê. Koja mẽhõ ã mẽ amã kapêr anê ka mẽ ama nê mẽ kot Tĩrtũm nhỹ hã kapêr jarênh o pa xwỹnh ã omunh kurê kumrêx. No koja mẽ amã ã kapêr anhỹr kêt nê ka mẽ ama nê Tĩrtũm kapêr o hêx o pa hã omunh kurê kumrêx.

Tĩrtũm Karõ kãm mẽ pahte axpên to mex prãm ã harênh

Rõmãn 12.6; Epes 4.7; Wam Pêtre 4.10

⁴ Nê ahpỹnhã kot tanhmã mẽ panhĩpêx to xwỹnhja ãm pixii. Kêp Tĩrtũm Karõ. Na hte mẽ pahkarõ mã agjê nê ahpỹnhã tanhmã mẽ pahte axpên to mex kaxyw tanhmã mẽ panhĩpêx to. Kot tanhmã mẽ panhĩpêx to xãja ohtõ. Mẽ pahte ahpỹnhã ri tanhmã kãm amnhĩ nhĩpêx to nê tanhmã axpên to mex to ho ri papa kaxyw na. Tĩrtũm Karõ na hte ja kaxyw tanhmã mẽ pahkrã hto.

⁵ Nê mẽ pahte kãm tanhmã amnhĩ nhĩpêx to ho papa xwỹnhja haxwỹja ãm pixii. Kêp Pahihti Jesus. Tã na pu htem ahpỹnhã kãm tanhmã amnhĩ nhĩpêx to ho ri papa.

⁶ Nê kot mẽ pahto ajuta nhũm mẽ pahte ahpỹnhã tanhmã axpên to mex to ho papa xwỹnhja haxwỹja ãm pyxii. Kêp Tĩrtũm. Na pu htem ahpỹnhã tanhmã hkõt axpên xunhwỹr tỹx to kaxyw tanhmã axpên to mex to ho papa.

⁷ Nê Karõja na hte ahpỹnhã tanhmã axpên kaxyw mẽ panhĩpêx to pu mẽ axpên to ajuta mex o ri papa.

⁸ Jakamã na pu hte mẽ pahkwỹjaja Tĩrtũm Karõ nhỹ hã ma mẽ pahkwỹjê mã Tĩrtũm kapêr jarênh o ri mẽ hkõt papa.

Nê mẽ pahkwỹjaja ma ã hã paxãhpumunh mex pê ma ri kapêr o mẽ ahkre ho mẽ hkõt papa.

⁹ Nê mẽ pahkwỹjaja Karõ nhỹ hã Tĩrtũm kot tanhmã mẽ pahto ajuta hto kaxyw hkõt paja-maxpêr tỹx nê.

Nê mẽ pahkwỹjaja akupỹm mẽ ã xwỹnhjê ho mex o papa nhũm mẽ akupỹm mex nê pa.

10 Nê mẽ pahkwỳjaja aa mẽ kot mẽmoj pumunh kêt kwỳ ho anhỳr o ri mẽ hkôt papa.

Nê mẽ pahkwỳjaja Tĩrtũm kapẽr mar tỳx nê ô ri mẽ kãm harẽnh o mẽ hkôt ri papa.

Nê mẽ pahkwỳjaja Tĩrtũm Karõ nhỹ hã tanhmã mẽ kot amnhĩ nhĩpêx to hã mẽ omunh o papa. Rỳ pahprĩ hã mẽkarõmnuti nhỹ hã mẽ kot amnhĩ nhĩpêx ã mẽ omunh o papa.

Nê mẽ pahkwỳjaja nhãm mẽ kapẽr mar kêt tã ra mẽ kapẽr o pakapẽr.

Nê mẽ pahkwỳjaja mẽ kapẽr o pakapẽrja ma nê mẽ kot mar kêt xwỳnhjê mã harẽ. Kormã aa pahte mar kêt tã ra pahprĩ hã mar mex nê mẽ kãm harẽ.

11 ã na hte Tĩrtũm Karõ kãm hprãm xà hkôt tanhmã mẽ panhĩpêx to pu mẽ ahpỳnhã ã hã ã axpẽn nhĩpêx anhỳr o ri axpẽn kôt papa.

Te mẽ pahpê Kris nhĩ pyrãk ã mẽ pajarẽnh

Rõmãn 12.3-8; Epes 1.22-23, 4.11-16; Korosẽ 3.15

12 E pa hpãnhã mẽ amã mẽ panhĩ kamã tanhmã mẽmoj jarẽnh to ka mẽ inhma nê hã anohtỳx nê. Mẽ panhĩja ãm pixi htã no ãm kamã mẽmoj xohtôô. Kamã mẽ pahte nê kamã mẽ pahpa nê kamã mẽ pajakwa. Nê mẽ panhĩnhu nê mẽ pano. ã mẽ panhĩ kamã mẽmoj xohtô kot anhỳr. Ja pyrã nê Kris nhĩja ãm pixi htã te mẽ pahpê ã kamã mẽmoj xohtôta pyrãk. Mẽ pahkwỳjaja te mẽ pahpê hte pyrãk. Nê mẽ pahkwỳjaja te mẽ pahpê ãhkra pyrãk. Nê mẽ pahkwỳjaja te mẽ pahpê no pyrãk.

13 Mẽ pahpê Kris kwỳjaja axpẽn kaxyw mẽ paxohtôô. Mẽ ixpê Ijaewjaja nê mẽ apê Ijaew kêt xwỳnhjaja. Nê amarĩ ri mẽ kãm mẽ axapênh o mẽ apa xwỳnhjaja nê amnhĩ mã ri mẽ axapênh o mẽ apa xwỳnhjaja. ã ahpỳnhã mẽ paxohtô kot anhỳr tã nhũm Tĩrtũm Karõ te mẽ pahpê Kris nhĩ pixi pyrãk o mẽ panhĩpêx. Nhũm Krisja mẽ pahpiitã mẽ pamã Karõ gõ

nhũm mẽ pahkarõ mã agjê. Pixi htã mẽ pahpiitã mẽ pahkarõ mã agjê.

14 Nê mẽ panhĩja pixi tã kamã tanhmã mẽ pakute xàja ohtôô. Tã Kris nhĩja te kot mẽ panhĩja pyrãk. Urãk nê kamã mẽ paxohtôô. Jakamã na pu htem ahpỳnhã tanhmã kãm amnhĩ nhĩpêx to ho ri papa. Karõ kot tanhmã amnhĩ kaxyw mẽ panhĩpêx to xà hkôt.

15 Nê kop ãm mẽ pahparja kapẽr ronhỳx tee ri mẽ panhĩhkra pumu nê amnhĩ mã:

—Hêxta waa nê. Kêp ãm ixpê mẽ ãhkra ronhỳx pa inhmex nê ijarir. No ãm ixpê mẽ hpar pix jakamã pẽr ãm mẽ hkĩnhã ixpê mẽ hkwy hkêt ãm ixpê mẽ hatur xà pix na pa.

Anhỳr o amnhĩ jarẽnh japêr. Nom ja kot anhỳr kêt. Axtem nhỹhỹm kot mẽ pahto pa kaxyw na mẽ pahparja. Nê axtem mẽmoj tã mẽ paxapênh rỳ mẽmoj jamỳnh kaxyw na mẽ panhĩhkraja. Na pu htem hamẽ wa ho presija rãhã ho papa. Ja pyrã nê kot puj mẽ pahkwỳjê hõ mẽ parom Tĩrtũm Karõ nhỹ hã mẽmoj tã apênh tỳx ã omu nê hkĩnhã mẽ pahte amnhĩ to warê hkêt ã amnhĩ jarẽnh o papa hkêt nê.

16 Nê mẽ pajamakja kapẽr ronhỳx kapẽr o:

—Hêxta waa nê. Kêp apu ixpê mẽ no ronhỳx pa inhmex nê ijarir. No ãm ixpê mẽ umar xà pix jakamã pẽr ãm ixte ho warê hkêt kumrêx.

Anhỳr o amnhĩ jarẽnh japêr. Nom ja kot anhỳr kêt. Hamẽ wa mex kênã. Axtem ho mẽ paxumar kaxyw na mẽ pajamakja. Nê axtem ho mẽ parĩt kaxyw na mẽ panoja. 17 Kêp ãm mẽ pano pix ronhỳx pu mẽ parĩt pix nê paxumar kêt nê ri papa. Rỳ kêp ãm pajamak pix ronhỳx pu mẽ paxumar pix nê parĩt kêt nê mẽ paxupãr kêt nê ri papa. 18 Mẽ panhĩja pixi htã kamã hikukrêx xohtôô. Na pre Tĩrtũm amnhĩ krã hkôt kamã mẽmoj piitã hipêx nê hanhõ. 19 Kêp ãm mẽ panhĩja kamã ãm mẽmoj pixi ronhỳx pu mẽ pamex kêt nê papa. 20 Tã no ãm kot anhỳr kêt. Mẽ panhĩja

ãm pixi htã kamã hikukrêx xohtôô.
²¹ Jakamã na hte mẽ panoja amnhĩ nê mẽ panhĩhkra mã kãm:

–Tk kwa ma tẽ. Ixte ato presijare hã.

Anhÿr o kãm kapêr kêt nê. Rÿ mẽ pahkrãja amnhĩ nê mẽ pahpar mã kãm:

–Tk kwa ma tẽ. Na pa ato presija hkêt nê.

Anhÿr o kãm kapêr kêt nê. Ja pyrà nê kot puj mẽ nhÿri Kris kôt panhĩõ pumu nê pamex o pahte hakrenh ã amnhĩ jarênh kêt nê. ²² Nê mẽ panhĩ kamã mẽmoj kwÿ te hirerek pyràk tã no pu mẽ arĩ pamã hapê nê. Ja pyrà nê kêr pu mẽ kormã mẽ kot Kris kôt amnhĩ xunhwÿr tohtuj anhÿr xwÿnhjaja pu mẽ pamã mẽ hkĩnh kãm tanhmã mẽ kutã panojarêt to ho ri papa.

²³⁻²⁴ Nê na pu htem mẽ panhĩ kamã mẽ pakukrêx kwÿ hã pahpijaãm nê hpro nê ri ho papa. Nê hkwÿ hã pahpijaãm kêt nê hpro hkêt nê ho ri papa. Nê hkwÿ mẽ pahpê omnajti htã pu mẽ ho mex nê ri ho papa. Tĩrtũm kot ã mẽ panhĩpêx anhÿr jakamã na pu htem mẽ pakamã mẽ pakukrêx kwÿ mẽ pahpê omnajti htã pu mẽ ho mex nê ri ho papa. Ja pyrà nê kêr pu mẽ Tĩrtũm kôt mẽ pahtõ nê mẽ pahtõx piitã ho mex o ri papa. Nê tãm mẽ hipêx. Mẽ pahkwÿjaja muxre nê mẽ pahkwÿjaja omnajti htãã. Tanhmã mẽ kute htã pu mẽ kêp mẽ Jejus kôt mẽ pahtõ nê mẽ pahtõx ã mẽ ho mex o ri apa.

²⁵ Nê na hte mẽ panhĩ kamã mẽ pahpar nê mẽ panhĩhkra nê piitã axpên kôt àpênh mex o pa. No na hte mẽ pahparja nhÿhÿm ma mra nhũm ihõja hkwÿm nhÿhÿm ma mrar kêt nê. Na hte wa axpên kôt àpênh mex o pa. Ja pyrà nê kêr pu mẽ pahpê Tĩrtũm krajaja axpên kôt amnhĩ nhĩpêx rãhã ho ri papa. Nê axpên to mex rãhã ho ri papa. No ri axpên kwÿm ri tanhmã amnhĩ nhĩpêx to ho ri papa hkêt nê.

²⁶ Na pu htem tõhã nhÿhÿnh panhĩ kamã paxà nê ri papa. Pahkrã tãtãk rÿ pakatut gêk. Jao te mẽ panhĩ piitã

kamã mẽ paxà pyràk. Nê nhÿhÿnh akupÿm pamex nê te panhĩ piitã hkôt akupÿm pamex pyràk. Ja pyrà nê koja Kris kôt panhĩõ nhÿhÿnh ã nê ri pa. Rÿ tanhmã amnhĩ to nê ra hkaprĩ nê ri pa pu mẽ ja hã omu nê ÿ hã pahkaprĩ nê papa. No koja mẽmoj tã hkĩnh nê pa pu mẽ ja hã omu nê ÿ hã pahkĩnh nê papa.

Te mẽ pahpê Kris nhĩ pixi pyràk ã mẽ pa jarênh

²⁷ Nê mẽ pahpê Kris kwÿjaja te mẽ pahpê Kris nhĩ pixi pyràk. Ahpÿnhã mẽ pahte tanhmã amnhĩ nhĩpêx to ho papa htã mẽ pahpê Kris kwÿ jakamã te mẽ pahpê ì pixi pyràk.

²⁸ Nê mẽ pahte Kris kôt tanhmã pahkwÿjê ho ajuta hto ho papa kaxyw na pre Kris ahpÿnhã tanhmã mẽ paxunhwÿr to.

Mẽ pahkwÿjaja mẽ pahte ÿ hã nhãm mẽ kãm kapêr jarênh o papa kaxyw mẽ paxunhwÿ.

Nê mẽ pahkwÿjaja mẽ pahte ÿ hã tanhmã kapêr jarênh to ho ri papa kaxyw mẽ paxunhwÿ.

Nê mẽ pahkwÿjaja Tĩrtũm kapêr jarênh o mẽ ahkre ho ri mẽ papa kaxyw mẽ paxunhwÿ.

Nê mẽ pahkwÿjaja mẽ pahte aa mẽ kot mẽmoj pumunh kêt kwÿ ho anhÿr o ri papa kaxyw mẽ pa xunhwÿ.

Nê mẽ pahkwÿjaja akupÿm mẽ ã xwÿnhjê ho mex o mẽ papa kaxyw mẽ pa xunhwÿ.

Nê mẽ pahkwÿjaja mẽ kapêr o mẽ hihtÿx o mẽ papa kaxyw mẽ pa xunhwÿ.

Nê mẽ pahkwÿjaja mẽ pahte tanhmã mẽ ho ajuta ho ho ri papa kaxyw mẽ pa xunhwÿ.

Nê mẽ pahkwÿjaja nhãm mẽ kapêr ò ho mẽ pakapêr o mẽ papa kaxyw mẽ pa xunhwÿ.

Ã na pre ahpÿnhã mẽ pahpê hkwÿjê piitã mẽ paxunhwÿr anê. ²⁹ No na pu htem pahpiitã axpên kôt Tĩrtũm kapêr o mẽ ahkre ho ri papa hkêt nê.

Nê mẽ pahpiitã ÿ hã tanhmã pakapêr to ho ri papa hkêt nê.

Ně mẽ pahpiitã kapêr jarênh o ri papa hkêt nê.
 Ně mẽ pahpiitã aa mẽ kot mẽmoj pumunh kêt kwỳ ho anhỹr o ri papa hkêt nê.
 30 Ně mẽ pahpiitã akupỹm mẽ à xwỳnhjê ho mex o ri papa hkêt nê.
 Ně mẽ pahpiitã mẽ kapêr õ ho ri pakapêr o ri papa hkêt nê.
 Ně mẽ pahpiitã ri mẽ kapêrja ma mẽ pakapêr kãm pahkwỳjê mã harênh o ri papa hkêt nê.
 Na pu htem ahpỹnhã tanhmã Kris kôt mẽ pahkwỳjê ho ajuta hto ho ri papa.
 31 Tã kêr pu mẽ pahpiitã pamã axpên kĩnh pê tanhmã axpên to mex to ho ri papa. Ja na mex o kot mẽmoj pitã hakrenh par. E kot paj ixprĩ hã tanhmã mẽ amã ja jarênh to ka mẽ inhma.

13

*Mẽ pahte axpên kamã paxukapri ho papa hã mẽ pamã karõ
 Juãw 13.31-35; Karatas 5.13-15;
 Korosẽ 3.12-14*

¹ Kot pa ma mẽ piitã ahpỹnhã mẽ kapêr kãm mẽ kãm Tĩrtũm kapêr jarênh o ri ixpa japêr. Âm mẽ piitã mẽ kapêr o ixkapêr mex o mẽ kãm harênh o ri ixpa japêr. Ně Tĩrtũm kapêr o mẽ wrỳk xwỳnhjê kapêr o mẽ ahkre ho ri ixkwỳjê hkôt ixpa japêr. Tã inhmã mẽ hkĩnh kêt kãm ixte mẽ ahkre ho ri ixpa ronhỹx mẽ inhma mẽ am inhma. Nhũm ixkapêrja te ixte rat tatak pyrãk o pa tee ri Tĩrtũm kapêr o mẽ ahkre kaprỳ ho ri mẽ hkôt ixpa nhũm Tĩrtũm tee ri inhmã mẽ hkĩnh kêt ã ixpumu mẽ inhmã:

—Nà amã mẽ hkĩnh kêt jakamã na ka tee ri ixkapêr o mẽ ahkre kaprỳ. Anê.

² Rỳ kot paj Tĩrtũm xàhpumunh tỳx o mẽ kãm kapêr pimxur kwỳ jarênh o ri ixpa japêr. Rỳ Tĩrtũm mẽ kurom inhmã mẽmoj to amnhĩrit pa omu mẽ mẽ kãm harênh o ri ixpa japêr. Rỳ pa Tĩrtũm kot amnhĩ nhĩpêx pitã omunh par japêr. Rỳ ixte amnhĩ kaxyw hkôt ijamaxpêr tỳx kôt ỹ hã kên krã hprêk õ mã ixkapêr nhũm

kot inhmar mẽ inhmar xà hkôt nhãm pikamênh japêr. Tã inhmã ixkwỳjê hkĩnh kêt kãm ã amnhĩ nhĩpêx anê nhũm Tĩrtũm tee ri ja hã ixpumu mẽ inhmã:

—Nà amã mẽ hkĩnh kêt jakamã te axàhpumunh tỳx kêt kumrêx pyrãk. Na ka tee ri ã mẽ kãm ixkapêr jarênh anhỹr o ri apa kaprỳ. Anê.

³ Rỳ pa mẽ kêp amrakati xwỳnhjê mã ixkukrêx nhõr par japêr. Rỳ Kris ã mẽ kãm amnhĩ grõnh kôt mẽ kãm xa nhũm mẽ hã ixpĩr japêr. Tã inhmã mẽ hkĩnh kêt kãm ã amnhĩ nhĩpêx anê nhũm Tĩrtũm tee ri ja hã ixpumu mẽ inhmã:

—Nà ã ate mẽ kãm amnhĩ nhĩpêx anhỹr o ri apa htã amã mẽ hkĩnh kêt jakamã na ka tee ri ã mẽ kãm amnhĩ nhĩpêx anhỹr kaprỳ. Anê.

⁴ Kot puj mẽ pamã axpên kĩnh hã kot puj mẽ kritpêm mẽ piitã mẽ kãm pahprĩ ho papa.

Ja o axpên kãm pagryk tokyx anhỹr kêt nê.

Ně pamã axpên to mex pix prãm.

Ně mẽmoj tã axpên kamã pagryk kurê kumrêx kêt nê.

Ně mẽmoj tã amnhĩ to jarkrar o ri papa hkêt nê.

Kot puj mẽ pamã axpên kĩnh hã kot puj mẽ ã amnhĩ nhĩpêx anhỹr o ri papa hkêt nê.

⁵ Ně kot puj mẽ axpên kamã paxukapri ho papa hã kot puj mẽ tãm axpên nhĩpêx rãhã ho papa. Ja o amnhĩ pix kukamã pajamaxpêr o ri papa hkêt nê. Ně mẽ pagryk tokyx anhỹr kêt nê. Rỳ axpên kãm pagryk tokyx anhỹr hkêt nê. Rỳ koja mẽhõ tanhmã mẽ panhĩpêx kati hto pu mẽ am amnhĩ tã omu mẽ axte kot tanhmã mẽ panhĩpêx tota mã pajamaxpêr kêt nê.

⁶ Ně kot puj mẽ pamã axpên kĩnh o papa hã kot puj mẽ tee ri mẽhõ kot tanhmã amnhĩ tomnuj to hã omu mẽ pahkapri nê. Rỳ tanhmã kot amnhĩ to mex to hã omu mẽ pahkĩnh nê.

⁷ Ně kot puj mẽ pamã axpên kĩnh o papa hã kot puj mẽ arĩ Tĩrtũm kot mẽ pahto mex par jatur xà mẽnh xà hã arĩgro jamãr rãhã ho ri papa. Ně

mê kot Kris ã tanhmã mê pahto htã pu mê tee ri amnhî kukamã tanhmã pajamaxpêr to hkêt nê. ãm mê kutã amnhî to htýx nê mê kãm pakuhê nê arî amnhî kaxyw Tirtûm mã pajamaxpêr týx rãhã nê.

⁸ Nê kot puj mê pamã axpên kînh o papa hãmri nê aa mê pahte ã amnhî nhîpêx anhÿrja mã panhÿrer kêt nê. Nê arî mê pamã axpên kînh rãhã ho papa ho papa. Jar pika ja kamã mê pahte Tirtûm nhÿ hã mê kãm kapêr jarênh o ri papa htã kot puj mê nhÿrmã ma ò krî hwÿr api hãmri nê kuri axte ã kãm amnhî nhîpêx anhÿr kêt nê. Mo kaxyw kot puj mê axte ri mêhõ mã kapêr jarê? Kot puj mê ò krî hwÿr api nê ra mê pahpiitã paxàhpumunh o axpên pyrãk.

Nê na pu htem tõhã mê kapêr ò ho pakapêr o ri papa. Nom kot puj mê nhÿrmã Tirtûm nhõ krî hwÿr api hãmri nê kuri axte nhãm ri mê kapêr o pakapêr kêt nê.

Nê na pu htem jar mê pahkwÿjaja mê paxàhpumunh mex kôt Tirtûm kapêr jarênh o ri papa. Tã kot puj mê nhÿrmã ò krî hwÿr api hãmri nê axte ã amnhî nhîpêx anhÿr kêt nê. ãm mê pamã axpên kînh pixja kot puj mê arî ò krî kamã mê pamã axpên kînh tûm rãhã papa ho papa. ⁹ Jar mê pahpiitã mê paxàhpumunh tohtuj anhÿr o pakapêr jakamã na pu htem kormã Tirtûm kapêr jarênh tohtuj anhÿr o ri papa. ¹⁰ Tã kot puj mê nhÿrmã ò krî hwÿr api nê kuri paxàhpumunh jatur xãm mênh pa. Jakamã nhÿm jar mê paxàhpumunh tohtuj anhÿr xwÿnhnta mê pahpê hapêx.

¹¹ E pa mê amã ja hã ejêp jarê ka mê inhma. Nã amnepê mã ixprîre ri na pa pre ixtýx ri mêhprîjê kot amnhî nhîpêx o amnhî nhîpêx nê mê hamaxpêr o ijamaxpêr. Nê mê kapêr mex kêt o ixkapêr o ri ixpa. Tã ra ixaptãr hãmri nê mê aptãrjê jamaxpêr o ijamaxpêr o ri ixpa. Te ra mê pahte kaxkwa kamã mê paxàhpumunh jatur xãm mênh parta pyrãk mê aptãrjê jamaxpêr o ijamaxpêr o ri ixpa.

¹² Ja pyrã nê na pu htem kormã Tirtûm kot amnhî nhîpêx ã omunh tohtuj anhÿr. Te mê pahte amnhî pumunh xã pynajre kamã pahprî hã amnhî pumunh mex kêeta pyrãk. Nom kot puj mê nhÿrmã ò krî hwÿr api hãmri nê pahprî hã paxàhpumunh jatur xãm kumê. Te Tirtûm kot hprî hã tanhmã mê pakute hã mê pahpumunh parja pyrãk.

¹³ E arî mê pahte Tirtûm kôt amnhî nhîpêx o papa xãja na axkrunêpxi. Mê pahte hkôt amnhî nhîpêx o papa rãhã ho papa kaxyw. Wamta na ja: Kêr pu mê arî amnhî kaxyw Tirtûm mã pajamaxpêr mex rãhã ho ri papa. Nê hkôt ja: Kêr pu mê arî Tirtûm kot mê pahto mex par jatur xãm mênh xã hã arîgro jamãr rãhã ho papa. Nê hkôt ja: Kêr pu mê arî pamã axpên kînh pê tanhmã axpên to mex to rãhã ho papa. Ja na mex o kot wamta wa hakrenh. E kêr pu mê ã amnhî nhîpêx anhÿr rãhã ho ri papa.

14

Tirtûm Karõ kot mê pahto mê paxi-htýx ã harênh

Wam Korî 12.7-11, 12.27-31

¹ E kêr ka mê arî amã axpên kînh pê axpên to mex rãhã ho ri apa nê aa jam anhÿrer nê ho ajamakêtkati hkêt nê. Nê amnhî to Tirtûm Karõ mãn amnhî to awÿ kê mê amã tanhmã mê ajamaxpêr to ka mê ahpÿnhã tanhmã axpên to mex to ho ri axpên kôt apa. Nê kêr ka mê ã ajamaxpêr anê nê ajamaxpêr o:

—Inhmã mê hkînh o ri ixpa hprãm týx. Nê Tirtûm Karõ kot tanhmã ixto nhÿm ixte ahpÿnhã tanhmã mê ho ajuta hto ho ixpaja pa mãânên inhma ho anhÿr prãm. Nê kot tanhmã ijakwa hto nhÿm ixte ahpÿnhã mê kapêr ò ho ixkapêrja pa mãânên inhma ho anhÿr hprãm. No kêt ixte Tirtûm nhÿ hã mê kãm kapêr jarênhja na inhma ho anhÿr prãm týx kumrêx. Anê.

²⁻⁴ Mê pakamã mê kapêr ò ho Tirtûm mã kapêr xwÿnhjaja na htem Tirtûm Karõ nhÿ hã ãm kumã pix mã

kapêr ôta o kãm kapêr nhũm tapxipix mē kuma. No mē papajaja na pu htem tee ri mar o pahkrī nom mar kêt nē. Ām kapêr xwýnh̄ta pix koja mē pakurom amnhī ma. Nom koja mē pakapêr kãm Tīrtũm mǎ amnhī jarē pu mē mar mex nē. Nhũm mē pakapêr kãm Tīrtũm nhỹ hã mē pamã kapêr jarē pu mē pahprī hã kuma. Jao mē pamã kapêr kôt amnhī nhĩpêx prãm nē. Nē mēmoj tã pahkaprī nē ri papa htã mē kuma nē amnhī kaxwýnh̄ kãm amnhī to paxihtýx.

⁵ Mē apiitã mē ate nhãm mē kapêr ô ho Tīrtũm mǎ amnhī jarēnh̄ja na mex. Nom mē ate mē akapêr o mē akwýjê mǎ Tīrtũm kapêr jarēnh̄ o ri mē apaja na mex o wamta jakre. Kot ka mē nhãm mē kapêr ô ho Tīrtũm mǎ amnhī jarē nhũm mē akwýjaja mē amar kêt jakamã ka mē ã akapêr anhỹrja o Kris kôt mē ho mē hamaxpêr o hihtýx kêt nē. Ām kapxipix amnhī ma. Rý koja kapêr ôja mar mex xwýnh̄jê hõ amar japêr nē mē akapêr kãm akwýjê mǎ harē. Hã koja ja mex nē. Nom kot kaj mē apiitã ma mē kapêr kãm mē kãm Tīrtũm kapêr jarēnh̄ o ri apa nhũm mē piitã hprī hã amar mex nē. Nē amar xà hkôt Tīrtũm kapêr kôt amnhī nhĩpêx mex nē. ⁶ Jakamã e Kris kôt ixtô nē ixtôxjaja. Kot paj apu nhỹrmã ma mē awýr mō hãmri nē nhãm mē kapêr ô ho mē amã ixkapêr japêr ka mē inhmar kêt nē. Nom kot paj mē akapêr o mē amã ixkapêr ka mē apiitã aprī hã inhmar mex nē. Pa Tīrtũm nhỹ hã mē amã mēmoj jarē rý tanhmã kot amnhī nhĩpêx toja pa mē amã harē. Rý Karõ nhỹ hã mē amã mēmoj jarēnh̄ o ã mē amã Tīrtũm kapêr jarēnh̄ anē ka mē aprī hã inhmar mex nē. ⁷ Nom mē kapêr ô ho mē kapêr o mē akôt ri mē pa xwýnh̄jaja te mēhõ kot htýx ri wiorãwti kakrēnh̄ xwýnh̄ pyrãk. Koja htýx ri hkakrēnh̄ o xa nhũm mē tee ri kot grer mar mǎ. Rý nhũm mēhõ htýx ri pifti kakôr o xa nhũm mē tee ri mēmo mē grer mar mǎ.

⁸ Pôristijaja na htem amarī ri tanhmã amnhī nhĩpêx to ho pa nhũm mē hkrãhtũmja mē kãm pifti kakô nhũm mē kuma nē mē pijapu mǎ hamaxpêr kurê kumrêx nē hwýr hprôt. Nom koja kawax pē hkakô rý htýx ri tanhmã hkakôr to nhũm mē kuma nē ãm kuma. ⁹ Ja pyrã nē kot kaj mē kapêr ô ho akwýjê mǎ akapêr nhũm mē ama nē ãm mē ama. Ka te ãm mē kãm ajakwa momok pyrãk o axãm o amnhī nhĩpêx.

¹⁰ Nē ahpýnhã mē pakapêr xohtôô. Na htem ahpýnhã mē kapêr o amnhī kwýjê mǎ kapêr nē axpēn mar mex nē. ¹¹ Nom koja mēhõ nhỹh̄nh̄ pika hõ rũm ixwýr mō nē mē kapêr o inhmã kapêr pa mar kêt nē. Nē amnhī xwar kutã ixkapêr o kãm ixkapêr nhũm ixpyrã nē inhmar kêt nē. ¹² Jakamã kot kaj mē amã Tīrtũm Karõ xihtýx xà ho amã tanhmã kãm amnhī nhĩpêx to ho apa hprãm hã kot kaj mē amnhī to awý nē kãm:

—Kwa amnhī kôt ijamaxpêr o axihtýx Tīrtũm. Pa anhỹ hã ixkapêr o ma Kris kôt ixkwýjê ho mē hamaxpêr o ixihtýx o ri mē hkôt ixpa. Kê mē akapêr ma nē Kris kôt amnhī xunhwýr týx nē. Nē hkôt amnhī nhĩpêx mex o ri pa. Anē.

¹³ Nē kêr ka mē nhãm mē kapêr ô ho Tīrtũm mǎ amnhī jarēnh̄ xwýnh̄jaja amnhī to Tīrtũm Karõ wý nē kãm:

—Ixte mē kapêr ô ho ixkapêr tã ixte amnhī mar kêt. Jakamã kwa tanhmã ixto ijamaxpêr mex to pa amnhī mar mex nē ixkapêr kãm ixprī hã Kris kôt ixkwýjê mǎ ja jarē kê mē inhmar týx nē. Anē.

¹⁴ Nom kot paj nhãm mē kapêr ô ho Tīrtũm mǎ mex ã harēnh̄ tã amnhī mar kêt nē. Te ixpimtir kãm ixkarõ pix kapêr pyrãk. No kot paj pam amnhī krã hkôt ixkapêr o kãm mex ã harē hãmri nē ra amnhī mar mex nē. ¹⁵ Nã ja na inhmã mex jakamã kot paj nhãm mē kapêr ô ho Tīrtũm mǎ mex ã harē nē kãm gre. Nē mǎãnēn ijamaxpêr xà hkôt ixkapêr o mǎãnēn kãm mex ã harē nē kãm gre. Nã ja na inhmã mex. ¹⁶ Nom kot puj mē

ma mẽ kot Tirtũm kapêr mar xà hã ixkre hwÿr mra nê kamã Tirtũm mã mex ã harê. Tã pa nhãm mẽ kapêr õ ho kãm ixkapêr japêr. Ka mẽ ate inhmar o akrî xwÿnhjaja tee ri inhma. Jakamã tee ri inhma nê ixkõt Tirtũm mã akapêr kêt nê. Rÿ kãm:

—Nà ãm hãmri na ã amex ã ajarênh anê Tirtũm.

Anhÿr o kãm akapêr kêt nê. Mẽ ate inhmaare hã kot ka mẽ ã kãm akapêr anê. Jakamã kot paj ri mẽ akamã mẽ kapêr õ ho ixkapêr kêt nê. ãm mẽ akapêr pix o mẽ anom Tirtũm mã mex ã harê. ¹⁷ Kot paj mẽ kapêr õ ho Tirtũm mã mex o mex ã harênh mex tã ka mẽ mẽmo mẽ kapêrja aprî hã mar kêt jakamã inhmar pê Tirtũm kõt amnhî xunhwÿr tÿx kêt nê.

¹⁸ Na pa hte tõhã mẽ arom nhãm mẽ kapêr õ ho Tirtũm mã amnhî jarê. Nom nhÿri ahte nhÿ nê ã kãm amnhî jarênh anê. ãm hãmri na pre Tirtũm ja kaxyw tanhmã ixto pa hte ã amnhî nhîpêx anhÿr o ri ixpa.

¹⁹ Tã na pu htem Tirtũm mã mex o mex ã harênh kaxyw nê ma mẽ kot kãm amnhî jarênh xà hã ixkreta wÿr axpên wÿr mra pa mẽ pikuprõnh xwÿnhjê kapêr o mẽ kãm ixkapêr. Nom kot paj nhãm mẽ kapêr õ ho mẽ kãm ixkapêr ry rax kumrêx tã no nhũm mẽ inhmar kêt nê. Nom kot paj mẽ kapêr o ãm ixkapêr krânre htã no nhũm mẽ inhmar mex kurê kumrêx. Ja na inhma mex. ²⁰ Kwa mẽ ixkapêr ma nê mar tÿx nê. Nê mẽhprîrejê jamaxpêr o ajamaxpêr kêt nê. ãm Kris kõt mẽ àptàr tũmjê jamaxpêr o mãn kêt mẽ ajamaxpêr o ri apa. ãm mẽmoj pixire hkõt kot kaj mẽ ãm hãmri te mẽhprîjê jamaxpêr pyræk o ajamaxpêr. Mẽhprîjaja na htem mẽmoj punuj kukamã hamaxpêr kêt nê. Na htem ãm htÿx pa. Tã kêr ka mẽ uræk nê mẽmoj punuj kukamã ajamaxpêr o ri apa hkêt nê.

²¹ Amnepêm na pre Tirtũm tanhmã Ijaewjê mã kapêr to. Mẽ kapêr o mẽ kãm kapêr tã no nhũm mẽ kuma nê ãm kuma. Jakamã nhũm tee ri ja hã mẽ omu nê amnhî tã tanhmã mẽ

harênh to. Tanhmã mẽ harênh toja Tirtũm kapêr ã kagà htũm kamã na. Kot mẽ harênh kot:

E kot paj ma mẽ hwÿr axtem pika hõ rũm pòristi hkwÿ rê kê mẽ ma mẽ hwÿr mra nê mẽ unê. Hãmri nê amnhî kapêr o mẽ kãm kapêr nhũm mẽ tee ri mẽ kuma no ãm hkõt mẽmoj pumunh kêt nê.

Koja mẽ ã mẽ hipêx anhÿr tã nhũm mẽ arî kãm ixkapêr mar nê amnhî kaxyw ixkõt hamaxpêr prãm kêt nê. Anê.

Tirtũm kapêr ã kagà htũm kot ã mẽ harênh kot anhÿr. ²² Jakamã kot kaj mẽ Tirtũm mã amnhî jarênh xà hã ixkre hwÿr akuprõ nê mẽ kapêr õ ho Tirtũm mã amnhî jarênh japêr. Nhũm Kris kõt amnhî xunhwÿr kêt xwÿnhjaja mẽ akõt agjê nê hkrî nê tee ri mẽ akapêr ma nê Kris kõt amnhî xunhwÿr kêt nê. Tanhmã kot mẽ amnhî to nê hkõt amnhî xunhwÿ? Mẽ kot akapêrta maare hã. No kot ka mẽ akapêr o Tirtũm nhÿ hã mẽ kãm akapêr nhũm mẽhprî hã amar mex nê. Jao tanhmã hamaxpêr to nê mẽ apyrà nê Kris kõt amnhî xunhwÿr japêr. ²³ Nom kot ka mẽ apiitã nhãm mẽ kapêr õ ho Tirtũm mã mex ã harê nhũm amarî ri mẽ pa xwÿnhjaja mẽ awÿr agjê nê mẽ akapêr ã mẽ ama nê hã mẽ apumu. Hãmri nê tee ri hamaxpêr nê mẽ akrã pipãnh ã axpên mã mẽ ajarê. ²⁴ Nom koja mẽ awÿr agjê ka mẽ akatàt kõt mẽ amnhî kapêr o Tirtũm kapêr jarênh o akuhê nhũm mẽhprî hã mẽ amar mex nê. Hãmri nê amnhî kapêr o akapêr ma nê hamaxpêr o:

—Hêxta waa nê. Xep ixte amnhî tomnuj xwÿnh na pa. Nà ãm hãmri na mẽ Tirtũm kapêr jarê. Nà ãm hãmri na kêt ja. Anê.

²⁵ Hãmri nê mẽ amã tanhmã kot amnhî tomnuj to hã amnhî jarênh pa hãmri nê hkaga nê Jejus kõt amnhî xunhwÿ. Nê hkõnkrã ho htêm nê hkrî nê Tirtũm mã mex o mex ã harê. Hãmri nê mẽ amã:

—Nà ãm hãmri na hte Tĩrtũm mẽ akamã pa ho pa. Anẽ.

Tĩrtũm nhõrkwỹ kamã mẽ pahte tanhmã amnhĩ nhĩpêx to hã mẽ pamã karõ

Atre 2.42, 5.12-13; Eprêw 10.25

²⁶ E Jejus kõt ixkwỹjaja. Kot paj hpãnhã axtem mẽ amã mẽmoj tã karõ. Mẽ kot Tĩrtũm mã amnhĩ jarẽnh xà hã ixkre kamã tanhmã mẽ ate amnhĩ nhĩpêx to hã karõ ka mẽ inhma.

Nà kër ka mẽ axpẽn wỳr akuprõ nẽ akrĩ ka mẽ atõ amã Tĩrtũm mã mex ã harẽnh ã mẽ grer o agrer prãm hãmri nẽ mãmri kãm ho gre. Hãmri nẽ agrer pa kê apãnhã mẽhõ kànhmã xa nẽ Tĩrtũm kapër kwỹ ho mẽ ajahkre. Nẽ ho anhỹr pa nhũm hpãnhã mẽhõ kànhmã xa nẽ Tĩrtũm kot tanhmã ho mex to hã mẽ amã amnhĩ jarẽ. Nẽ amnhĩ jarẽnh pa hãmri nhũm mẽhõ nhãm mẽ kapër õ ho mẽ amã ujarẽnh japêr. Hãmri nẽ ujarẽnh pa kê mẽhõ hpãnhã mẽ akapër o hprĩ hã mẽ amã kapërta jarẽ.

E kër ka mẽ axpẽn wỳr akuprõ nẽ Kris kõt axpẽn to axihtỳx kaxyw ã axpẽn pãnhã amnhĩ nhĩpêx anẽ.

²⁷ Nẽ ka mẽ atõ amã nhãm mẽ kapër õ ho mẽ kãm akapër prãm japêr. Nom kër ka mẽ axohtõ nẽ ã mẽ kãm amnhĩ nhĩpêx anhỹr kêt nẽ. ãm mẽ atõ wa axkruttre rỳ axkrunẽpxire nẽ mẽ kapër õ ho mẽ kãm akapër. Hãmri nẽ axpẽn pãnhã akapër pa kê mẽhõ kot hprĩ hã mẽ kapër õta mar japêr nẽ mẽ apãnhã xa nẽ mẽ akapër o mẽ kãm harẽ kê mẽhprĩ hã mar mex nẽ. ²⁸ Nom koja ja kaxyw mẽhõ amrakati japêr ka mẽ kapër õ ho akapër kêt nẽ. ãm kapxipix nhỹri ahte Tĩrtũm mã akapër.

²⁹ Nẽ kê Tĩrtũm nhỹ hã kapër jarẽnh xwỳnhjê hõ wa axkrut rỳ axkrunẽpxi nẽ mẽ ajahkre ka mẽ aprĩ hã mar o akrĩ. Hãmri nẽ mar pa nẽ tanhmã mẽ harẽnh to. ãm hãmri Tĩrtũm nhỹ hã kapër ã mẽ harẽ rỳ ho hẽx ã mẽ harẽ.

³⁰ Nẽ koja mẽhõ Tĩrtũm nhỹ hã mẽmoj jarẽnh o xa. Rôm nhũm Tĩrtũm mẽ kaxyw mẽ atõ mã ajamaxpër kwỹ gõ. Ka kapër o ãm xwỳnhhta

mã kànhmã anhĩhkra pẽ kê apumu nẽ anhĩkrê. Hãmri ka hpãnhã xa nẽ mẽ kãm tanhmã ajamaxpër tota jarẽ. ³¹ Nom kër ka mẽ anhĩpê mẽ kãm akapër hkêt nẽ. ãm axpẽn pãnhã Tĩrtũm kapër o axpẽn jahkre nẽ ho axpẽn jamaxpër o axihtỳx. Ja mex. ³²⁻³⁴ Nom kër ka mẽ axpẽn wỳr akuprõ nẽ apiitã anhĩpê atỳx ri akapër kêt nẽ. Ja na Tĩrtũm kệp hprãm nõkati. Mẽ ate axpẽn pãnhã axpẽn mã akapërja na kãm hprãm. Jakamã kê mẽ kot Tĩrtũm nhỹ hã mẽ kapër jarẽnh o pa xwỳnhjaja taxy axpẽn jahkre hã axpẽn jamã. Nhũm mẽhõ kumrêx kapër pa hãmri ka hpãnhã mẽ kãm akapër.

Nẽ kê mẽnijaja amarĩ mẽ ahkreja mar o hkrĩ. Ijaew kot amnhĩ nhĩpêx xà hkõt. Jakamã kwa mẽ anijaja. Kër ka mẽ amarĩ akryk mẽ mar o akrĩ nẽ axpẽn mã akapër o akrĩ hkêt nẽ. ³⁵ No kot kaj mẽ tee ri mẽmoj ma nẽ mar mex kêt japêr tã hã axpẽn kukjêr kêt nẽ. ãm akryk arĩ mar o akrĩ. Hãmri nẽ akupỳm anhõrkwỹ hwỳr tẽ nẽ rĩ kormã hã amjên kukja. Nom kot ka mẽ apikuprõnh xà hã ixkre kamã axpẽn mã akapër o akrĩ nhũm mẽ amjênjaja tee ri ja hã mẽ apumu nẽ hpijaàm nẽ.

³⁶ E na pa ã Tĩrtũm mã amnhĩ jarẽnh xà hã ixkre kamã tanhmã mẽ pahte amnhĩ nhĩpêx to hã mẽ amã karõ anẽ. Tã te mẽ apê ja mex kêt pyræk. Kwa mon ka wem ja ma nhũm mẽ apê omnuj nẽ? Xà mẽ ate Tĩrtũm kapër mar mex o ijakrenh kõt na ka mẽ ã ajamaxpër anẽ? Xà na pre Tĩrtũm mẽ akumrêx mã kapër? Hã na ka mẽ ã ajamaxpër anẽ? Rỳ xà mẽ kapxipix mã na pre kapër? Hã na ka mẽ ixkapër mã nhũm mẽ apê omnuj nẽ? Nà ixkumrêx na pa pre mẽ awỳr inhmõr nẽ mẽ amã Tĩrtũm kapër jarẽnh kênã kot ka kêt mẽ axtem nẽ ã ajamaxpër anẽ. ³⁷ Kot kaj mẽ atõ ã ajamaxpër anhỹr japêr nẽ ajamaxpër o:

—Nà na pre Tĩrtũm tanhmã inhãm kapër to pa ô ri mẽ kãm ixujarẽnh mex o ri ixpa.

Anhÿr o ajamaxpêr. Rÿ ajamaxpêr o:

—Nà na pre Tîrtûm Karô mê kaxyw tanhmã ixto pa ÿ hã tanhmã mê ho mex to ho ri ixpa.

Anhÿr o ajamaxpêr. Kot kaj mê ã ajamaxpêr anê hãmri nê mãânên pa ã ixte amnhî nhîpêx anhÿr ã ixpumunh mex kurê kumrêx. Amnhî pyrã nê ixte Tîrtûm nhÿ hã mê kãm ixkapêr xwÿnh ã ixpumunh nê hã ijarênh kurê kumrêx. ³⁸ Nom koja ja hã ijarênh kêt ka mê ja hã omu hãmri nê tanhmã kot mê amã kapêr toja ma nê ãm ama.

³⁹ E Kris kôt ixtô nê ixtôxjaja. Kêr ka mê amnhî to Tîrtûm Karô wÿ kê ma mê ate mê kãm Tîrtûm kapêr jarênh o ri apa kaxyw mê ato mê axihtÿx.

Nê koja mēhō kãm nhām mê kapêr ô ho kapêr prām ka mê ja nê kãm akapêr kêt nê. Kwār māmri ã amnhî nhîpêx anê. ⁴⁰ Nom kêr ka mê ate Tîrtûm mã amnhî jarênh xà hã ixkre kamã axpên pãnhã axpên mã akapêr nom anhîpê kãm akapêr hkêt nê.

15

*Kris akupÿm htîr kumrêx ã harênh
Atre 2.23-36, 10.39-41; Wam Korîit
6.14*

¹ E Kris kôt ixkwÿjaja. Kot paj axte mê amã Jesus kot mê panê tanhmã amnhî nhîpêx to hã harê ka mê inhma. Na pa pre ra mê amã ja jarê ka mê ama nê hkôt amnhî xunhwÿ. Nê hkôt amnhî nhîpêx mex o ri apa. ² Na pa pre mê amã harê ka mê amnhî kaxyw kãm ajamaxpêr tÿx nê nhÿm Tîrtûm mê ato hkra. Tã ka htem arî kapêr kôt amnhî nhîpêx mex o ri apa. Koja mēhō kot Tîrtûm kapêr mar tã amnhî kaxyw hkôt hamaxpêr kêt nê nhÿm Tîrtûm tee ri amnhî tã omu nê ho hkra hkêt nê.

³ Na pa pre amnhî krã hkôt mê amã tanhmã Kris jarênh to hkêt nê. Ixte kapêr mar xà hkôt na pa hte amnhî xô ri mê amã tanhmã harênh to ho ri ixpa. Jesus jarênhja na mex o kot mê ujarênh piitã hakrenh par kumrêx. Tã tãm kot paj mê amã harê.

Na pre Krisja mê pahte amnhî tomnuj pãnhã amnhîrer kaxyw mê panê ty. Tîrtûm kapêr ã kagà htÿm kot hkukamã harênh xà hkôt. ⁴ Hãmri nhÿm mê kên kre kamã haxà nhÿm kamã nôr o apkati. Nê axte hã apkati. Hãmri nhÿm Tîrtûm akupÿm ho htîr. Kapêr ã kagà htÿm kot hkukamã harênh xà hkôt. ⁵ Tã nhÿm Simãw Pêtre kumrêx akupÿm htîr ã omu nhÿm hpãnhã Jesus nhÿ hã mê ahkre ho mê pa xwÿnh maatiijaja haxwÿja omu. ⁶ Hãmri nhÿm mê kot hkôt mê pa xwÿnh pê 500 jakrenh xwÿnh piitã anhîpê haxwÿja akupÿm htîr kãm omu. Na pre ra mê hkwyjaja ty nhÿm mê hkwyjaja arî htîr nê pa. ⁷ Jakamã nhÿm prem ra akupÿm htîr kãm omu. Hãmri nhÿm hpãnhã Xiakreja omu. Nhÿm hpãnhã ÿ hã mê ahkre o mê pa xwÿnh piitã omu. Akupÿm htîr kãm omu. ⁸ Tã pa na pa pre ijaxwÿja amnhî to hapu nê akupÿm htîr kãm omu. Te ixpê mê hkra kot hapu pyrã nê amnhî to hapu nê omu. Na pre kaxkwa kamã inhmã kapêr o xa pa ixprî hã omu. ⁹ No mê kot ixpyrã nê Kris nhÿ hã mê ahkre ho mê pa xwÿnh maati hkwyjaja na mê mex o kot ijakrenh. Na pa pre hte mê hkînhã amnhî tomnuj tÿx nê. Jao Kris pê hkrajê homnuj tÿx o ri ixpa. Tã hkôt amnhî xãm hãmri nê tee ri ã amnhî nhîpêx anhÿr ã amnhî pumu nê amnhî kamã ixpijaàm tÿx nê. Jakamã na pa hte Kris nhÿ hã kapêr jarênh o ixpa hã amnhî pumu nê ixte hkôt amnhî xãm kêt ri tanhmã ixte amnhî nhîpêx toja mã ijamaxpêr nê ixpijaàm nê. ¹⁰ Na pa pre amnhî tomnuj tÿx o ixpa htã nhÿm Tîrtûm arî kãm ijapê nê. Nê ixkamã ukapri nê. Pa pre hkôt amnhî xãm nhÿm ixto hkra pa ra kãm tanhmã amnhî nhîpêx to mex rãhã ho ixpa. Jakamã na hte tee ri amnhî tã ixpumu nê tanhmã hamaxpêr to hkêt nê. Rÿ hamaxpêr o:

—Hêxta waa nê. Inhmã Pawre japê nê ixte ho mex tã nhÿm ixkôt amnhî nhîpêx kêt kumrêx.

Anhÿr o tee ri hamaxpêr kêt nê. Na pa hte kãm tanhmã amnhî nhîpêx to ho ixpa rÿnh o ÿ hã mê kapêr o

pa xwÿnh kwÿjê jakre ho ixpa. Nom amnhî krâ hkôt mê ahkre hkêt nê. Ja kaxyw na pre Tîrtûmja ixto ixihÿx pa ÿ hâ kâam tanhmâ amnhî nhîpêx to ho ri ixpa nhûm ja hâ ixpumu nê hkînh nê.

¹¹ Nê Jejus jarênhja âm pixii. Axtem hõ hkêt. Nê ÿ hâ mê ahkre ho mê pa xwÿnhjê kapêrja nê pa ixte mê amâ harênhja kot axpên pyrâk. Harênh tipxi. Kris kot mê pahte amnhî tomnuj mÿrapê mê panê htyk nhûm Tîrtûm kot akupÿm ho htîr ã wa harênhja na pa hte pix jarênh o ri mê akôt ixpa. Ka prem inhma nê amnhî kaxyw hkôt ajamaxpêr tÿx nê.

Tîrtûm kot akupÿm mê pahto mê pahÿr ã harênh

Rukre 20.37

¹² Nê kwa ra ixte mê amâ Kris htyk nê akupÿm htîr ã harênh tâ ka xep mê akwÿjaja axtem nê mê htyk nê akupÿm mê htîr kêt ã mê hkamnhîx o ri apa. ¹³ Kwa mê ajamaxpêrja mex kêt. Kêp apu âm hâamri mê ate ã mê harênh anhÿr ronhÿx pre Kris haxwÿja akupÿm htîr kêt nê. Nhÿx pre htyk o ty.

¹⁴ Nê kêp apu Kris akupÿm htîr kêt ronhÿx pa mê âm mê amâ kapêr jarênh o ixpa kaprÿ. Ka mê ajaxwÿja amnhî kaxyw hkôt ajamaxpêr kaprÿ.

¹⁵ Nê kêp âm akupÿm mê htîr kêt ronhÿx pa mê ixte mê amâ Tîrtûm kapêr jarênh o ri ixpa xwÿnhjaja mê amâ ho ixêx o ri ixpa. Na pa htem mê amâ Tîrtûm ra kot akupÿm Jejus o htîr ã harênh o mê akôt ixpa. Tâ kêp apu akupÿm mê htîr kêt ronhÿx pa mê âm mê amâ harênh o ixêx.

¹⁶ Nê kêp apu akupÿm mê htîr kêt ronhÿx pre Kris haxwÿja akupÿm htîr kêt nê. Nhÿx pre âm amarî tyn hapêx.

¹⁷ Nê Kris amarî htyk nê hapêx ronhÿx kot pu mê ri amnhî kaxyw hkôt pajamaxpêr nê hkôt amnhî xunhwÿr kaprÿ.

Nê Kris amarî htyk nê hapêx ronhÿx pre Tîrtûm Jejus kukwak ri mê panê mê pahte amnhî tomnuj o hapêx kêt nê. Nhÿx pu mê pahpiitâ nhÿrmâ ma kuwy hwÿr pajapêx pa.

¹⁸ Nê kêp apu Kris htyk nê hapêx ronhÿx ra mê kot amnhî kaxyw hkôt hamaxpêr tâ ra htyk xwÿnhjaja ma mê kot amnhî tomnuj mÿrapê kuwyta wÿr hapêx.

¹⁹ Nê kêp apu Kris htyk kumrêx nê hapêx ronhÿx pu mê kormâ pahtyk kêt xwÿnhjaja tee ri amnhî wÿr kamâ pajamak o ri papa kaprÿ. Nê pahpê hkra hâ amnhî jarênh kaprÿ. Jao pahkaprî htÿx o mêmoy piitâ hakrenh par kumrêx nê ri papa.

Kris kumrêx akupÿm htîr ã harênh
Atre 26.23; Sikûn Korîit 4.14; Piri-
pos 3.10-11; Wam Tesarôn 4.15-18;
Apokarip 20.1-15

²⁰ Nâ mê htyk nê nhÿrmâ akupÿm mê htîr kêt ã mê harênhja kot anhÿr kêt. Ra Tîrtûm kot akupÿm Kris o htîr jakamâ koja määnen hkra htyk xwÿnhjaja nhûm mê piitâ Jejus pyrà nê nhÿrmâ akupÿm mê ho htîr pa. Jakamâ na pu htem Kris akupÿm htîrja mâ pajamaxpêr nê amnhî kukamâ pajamaxpêr o:

—Nâ ra Tîrtûm kot akupÿm Jejus o htîr jakamâ koja urâk nê nhÿrmâ akupÿm mê pahte hkôt amnhî xunhwÿr xwÿnh piitâ mê pahto mê pahÿr. Nâ koja ã mê panhîpêx anê. Ja kaxyw àhpumunh tÿx kumrêx xwÿnh kênâ. Anê.

²¹ Nê amnepêm na pre Tîrtûm my kot waja nhîpêx. Hâamri nhûm kot tanhmâ amnhî tomnuj to ho ra mê htykja o hkra. Tâ nhûm wamta kôt my hõta wamta rom amnhî to mex o mê htyk tâ akupÿm mê ho htîr o hkra. ²²⁻²³ Tâ mê pahpê wam my pê Atâw kanrêhâ tâmnhwÿjakamâ kot puj mê urâk nê nhÿrmâ ty. No âm määnen mê pahpê Kris kraa. Kris kumrêx na pre akupÿm htîr. Tâ

koja nhÿrmã akupÿn mẽ pahwÿr wrÿ hãmri nhÿm Tÿrtÿmja kot hipêx pyrà nê akupÿm mẽ pahto mẽ pahtÿr. Mẽ pahte hkôt amnhÿ xunhwÿr ã mẽ pah-pumunh kôt akupÿm mẽ pahto mẽ pahtÿr pa. No ãm kormã.

Kris nhÿrmã kot mẽ htyk o hapêx ã harênh

Juãw 11.25; Rõmãn 6.23; Wam Korîit 15.54; Sikÿn Ximotre 1.10; Eprêw 2.14; Apokarip 20.14

24-28 Nê koja Kris arÿ mẽ ho amnhÿptâr rãhã nhÿm Tÿrtÿm mẽ kot kutã amnhÿ xunhwÿr xwÿnhjê pê mẽ hihtÿx xà ho hapêx pa. Kapêr ã kagã htÿm kot ja jarênh kot:

Koja nhÿrmã Tÿrtÿm Kris kot kãm mẽ ho amnhÿptâr kaxyw ãm. Anê. Jakamã Jejus tapxipix koja mẽ ho amnhÿptâr o pa. Koja Tÿrtÿm pix mẽ ho amnhÿptâr kêt nê. Nom koja pahi hkwyjê hõ axte nhãm mẽ ho amnhÿptâr kêt kumrêx.

Tã mẽ kot mẽkarõmnuti hkôt kãm tanhmã amnhÿ to ho mẽ pa xwÿnhjaja koja Tÿrtÿm ma amnhÿ nê kuwy hwÿr mẽ rênh pa. Nê mẽhtykja o hapêx nhÿm mẽhõ axte htyk kêt kumrêx. Jakamã koja Jejus Kris mẽmoj punuj piitã ho hapêx nê Mẽpahpãm Tÿrtÿm nhÿhkram akupÿm mẽmoj piitã haxàr pa. Tÿrtÿm jamaxpêr xà hkôt ã mẽmoj to anhÿr par anê hãmri nê ïhkram mẽmoj jaxàr pa. Nê mããnên tãm kãm amnhÿ gõ. Jakamã nhÿm Tÿrtÿm tapxipix mẽmoj piitã ho amnhÿptâr pa.

Mẽ htyk xwÿnhjê jarênh

29 Nê na hte mẽ pahkwÿjaja kormã kêp Tÿrtÿm kra hkêt tã Jejus kôt mẽ kot amnhÿ xunhwÿr nê mẽ htyk xwÿnhjê mã hamaxpêr o pa. Hãmri nê mẽ kãm nhÿrmã axte mẽ omunh prãm xà mẽ urak nê Jejus kôt amnhÿ xunhwÿr nhÿm mẽ hkrã kumrã. Tã akupÿm mẽ htÿr kêt ronhÿx mẽ ãm ã pajamaxpêr anhÿr kaprÿ. 30 Nê paa. Na pa hte ma mẽ kãm Tÿrtÿm kapêr jarênh o ri mẽ hkôt ixpa. Nhÿm mẽ hkwyjaja ja hã inhma nê ixkamã gryk nê ixtã amÿnê pa mẽ mÿrapê ixpunuj nê ri ixpa. No ãm amnhÿ to htÿx nê arÿ

ri mẽ kãm Kris kapêr jarênh o ri mẽ hkôt ixpa. Tã kêp ãm nhÿrmã akupÿm ixtÿr mã kêt ronhÿx pa tee ri ã amnhÿ nhÿpêx anhÿr o ri ixpa kaprÿ. 31 Na htem apkati mẽ ixtã tanhmã ãmnênh to ho ri pa. ãm hãmri na pa mẽ amã ã mẽ harênh anê. Nom na pa hte tee ri amnhÿ kukamã ijamaxpêr o ri ixkaprÿ nê ixpa hkêt nê. Mẽ kot ixpÿr mã tã pa hte mẽ ate Pahihti Jejus Kris kôt amnhÿ nhÿpêx mex ã mẽ apumunh kôt ixkÿnh nê ri ixpa. Nhÿm te ixkamã mẽmoj kêt pyrak pa hte ri ixpa. 32 Na pa hte jar Epes kamã mẽ oprê xwÿnhjê kutã amnhÿ to htÿx pê mẽ kãm Jejus kapêr jarênh o ri mẽ hkôt ixpa nhÿm mẽ kãm mar prãm kêt jakamã hã ixtomnuj tÿx nê. No nhÿrmã ixyk nê akupÿm ixtÿr mã kêt ronhÿx pa mẽ kêp Kris kwÿ hkêt xwÿnhjê jamaxpêr o ijamaxpêr nê mẽ urak nê ijamaxpêr o:

Ixte ixyk ã arÿgro pumunh kêt jakamã kot paj mãmrÿ mẽmoj piitã hkur o ri ixpa.

Nê mãmrÿ mẽmoj piitã ho ixkõm o ri ixpa.

Nê mãmrÿ mẽmoj piitã ri tanhmã ho ho ri ixpa.

Ixyk nê axte ixte ã amnhÿ nhÿpêx anhÿr o ixpare kaxyw ã.

Anhÿr o nhÿx pa ijamaxpêr o ixpa. Kêp ãm Tÿrtÿm kot akupÿm mẽ pahto mẽ pahtÿr mã kêt ronhÿx pu mẽ ã mẽ kêp Kris kwÿ hkêt xwÿnhjê jamaxpêr anhÿrja kôt pajamaxpêr pix o ri papa. No ãm ja kot anhÿr kêt.

33 Na htem mẽmoj jarênh o:

—Mẽ kot htÿx ri amnhÿ tomnuj xwÿnhjê hkôt ri mẽ pa xwÿnhjaja koja mẽ gaa nê mẽ kot amnhÿ nhÿpêx kôt amnhÿ nhÿpêx o ri pa. Anê.

ãm hãmri na ã mẽ harênh anhÿrja. Jakamã kwa mẽ okora. Kêr ka mẽ ã amnhÿ nê mẽ kot amnhÿ nhÿpêx anhÿr o mẽ pa xwÿnhjê pumunh mex o ri apa. 34 Kwa mẽ tokyx mẽ ate tanhmã amnhÿ tomnuj to hã amnhÿ pumu nê axte ã amnhÿ nhÿpêx anhÿr kêt nê. Nê mẽ ate Tÿrtÿm kot akupÿm mẽ ho htÿr kêt ã harênh xwÿnhjaja. Te mẽ

ate Tîrtûm kot amnhî nhîpêx ã omunh kêt pyrâk. Tã mẽ ate tokyx ja hã amnhî pumunh nê amnhî kamã api-jaàm kaxyw na pa ã mẽ amã ixkapêr anê.

Mê panhî nyw jarênh

Rukre 20.34-36; Rômân 8.10-11; Sikûn Korîit 5.1; Piripos 3.20-21

³⁵ Nê mãn ka mẽ atõ akupÿm mẽ htîr ã mẽ harênh ma nê tee ri mẽ hkukamã ajamaxpêr nê hã ri tanhmã axpên kukjêr to nê axpên mã:

—Kwa tanhmã koja we Tîrtûm akupÿm hkra htyk xwÿnhjê ho htîr to? Ra mẽ htyk nê mẽ ï katök nê hapêx par mã kênã. Tanhmã kot wem amnhî to nê akupÿm htîr? Nê tanhmã koja we mẽ ï nywja kute wehe? Anê.

³⁶ Nà na ka mẽ atÿx ri ã ajamaxpêr anê nê tee ri mẽ hkukamã ajamaxpêr. E kot paj ixprî hã ja hã ejêp jarê ka mẽ inhma. Nà na htem mẽmo y hkre. Te mẽ kot mẽ htyk jaxàr pyrâk o hipêx nê hkre nhùm hikwÿ nê gaa nê higrôt hapôj. Nom te kêp mẽmo yta pyrâk kêt. ³⁷ ãm hy pix na htem hkre. No higrôt kre hkêt nê. Rÿ tanhmãn pàr nywja kre hkêt nê. ãm hy pix na htem hkre. Tã nhùm higrôt hapôj nê hprêk nê gaa nê ô. ³⁸ Tîrtûm na hte hamaxpêr xà hkôt tanhmã ho nhùm higrôt hapôj nê hprêk nê ô. Tã ja pyrã nê kot puj mẽ Tîrtûm jamaxpêr xà hkôt pahtyk tã koja akupÿm mẽ pahto mẽ pahtîr nê mẽ pamã mẽ panhî nyw gô.

³⁹ Nê mẽmo hy piitã te kot axpên pyrâk kêt. Ahpÿnhã na. Ja pyrã nê ahpÿnhã ri mẽmoj piitã ï. Na axtem mẽ panhî nê axtem mry nhî nê axtem àk nhî nê axtem tep nhî. Mẽmoj piitã ahpÿnhã ri ï.

⁴⁰⁻⁴¹ Nê kaxkwa kamã haxwÿja mẽmoj piitã ahpÿnhã no ãm muxre. Myytija mex. Nê mytwrÿreja axte mã no ãm haxwÿja mex. Nê kanhêti haxwÿja mex. Haxwÿja axte mã. Kamã hkwy hpôk kryre nê kamã hkwy hpôk rûnhti no ãm piitã mex.

Nê jar pika ja kamã haxwÿja mẽmoj piitã mex. No ãm te kot kaxkwa kamã

mẽmoj jarir xwÿnhja mex pyrâk kêt. Axtem na raa.

⁴² Tã koja mẽ panhî nywja haxwÿja axte mã. Te kot panhî htûm pyrâk kêt. Na htem ty nhùm mẽ ma mẽ o mra nê mẽ hagjê. Nhùm mẽ hikwÿ nê gaa nê ï rerek nê hapêx. Tã koja Tîrtûm akupÿm tanhmã mẽ pahto mẽ pahtîr to pu mẽ hpãnhã pamex kumrêx. Hãmri nê axte mã mẽ panhî nyw mex o mex jakamã koja axte htyk nê ï rerek kêt nê.

⁴³ Na htem ty nhùm mẽ hagjê nhùm htyk xwÿnhja tanhmã amnhî to hkêt nê amarî hikwÿ. Omnuj nê ï nhenhek nê hikwÿ. Tã koja Tîrtûm akupÿm mẽ ho mẽ htîr nê mẽ kãm mẽ ï nyw gô nhùm mẽ hpãnhã mex kumrêx nê hihtÿx nê Tîrtûm nhõ krî kamã pa ho pa.

⁴⁴ Mẽ htyk nhùm mẽ kot mẽ hagjênh xwÿnhjaja na htem arî ï htûm ã hikwÿ. ãm jar pika ja pix kãm ri mẽ papa kaxyw na mẽ panhî htûmja. No mẽ panhî nywja axtem Tîrtûm nhõ krî kamã ri mẽ papa kaxyw jakamã koja mẽ panhî nywja axte mã. Tîrtûm Karô koja mẽ pamã kugô.

Mê panhî nyw te kot Kris nhî pyrâk ã harênh

Rukre 20.34-36

⁴⁵⁻⁴⁶ Nê Tîrtûm kapêr ã kagã htûm kot Atãw jarênh kot:

Na pre Tîrtûm my kot wa Atãwja nhîpêx. Jakamã Atãw kêp pika nhõ xwÿnh na pre. Anê.

ã Atãw jarênh kot anhÿr. Ja pyrã nê na pu htem pakatorxã nhõhy rûm pajapôj nê Atãw pyrã nê pahpê pika nhõ xwÿnh. Tã nhùm Atãwja pa nê gaa nê hpigêt nê ty. Jakamã kot puj mẽ urâk nê papa nê gaa nê ty. Nom nhùm Krisja Atãw kurom kêp akupÿm mẽ ho mẽ htîr xwÿnh jakamã kot puj mẽ pahpê hkwyjaja Atãw pyrã nê nhÿrmã mẽ pahtyk tã nhùm Kris akupÿm mẽ pahto mẽ pahtîr. Hãmri nhùm Tîrtûm Karô mẽ pamã mẽ panhî nyw gô pu mẽ axte pahtyk kêt nê. Pãnhã axte mã mẽ pahpê kaxkwa nhõ xwÿnh.

⁴⁷ Nê Atãw na pre Tîrtûm pika ho hipêx nê ho htîr nhùm ri pa. Nom

Kris na pre Atāw rom kaxkwa rūm mē pahwÿr wrÿ. ⁴⁸ Tā mē pahpê pika nhõ xwÿnhjaja te mē pahpê Tirtūm kot wam my nhîpêx xwÿnhhta pyrāk. No mē pahte kaxkwa hwÿr ma papa mā xwÿnhjaja te mē pahte kaxkwa rūm my kot mē pahwÿr wrÿk xwÿnh Krista pyrāk. ⁴⁹ Tā kormā mē pahpê pika nhõ xwÿnh jakamā te mē pahpê my pika ho hipêx xwÿnhhta nhî pyrāk. Nom kot puj mē nhÿrmā ty hāmri nē hpānhā te pahpê kaxkwa rūm my kot mē pahwÿr wrÿk xwÿnhhta nhî pyrāk.

Axte mē pahtyk kêt kumrêx ā mē pajarênh

Juāw 11.25; Sikūn Korît 5.4; Wam Tesarōn 4.13-18

⁵⁰ Nē kot puj mē panhî htūm rāhā Tirtūm nhõ krî hwÿr paxāpir kêt nē. Panhî htūm na hte ty nē rerek nē hapêx. Jakamā koja Tirtūm Karō mē pamā mē panhî nyw gō pu mē rî kormā ma ō krî hwÿr pajapêx pa nē kamā papa ho papa.

⁵¹⁻⁵² E mē inhma. Na pre kormā Tirtūm mē amā mēmoj to amnhîrît kêt tā ra inhmā ho amnhîrît. Jakamā kot paj ŷ hā mē amā harē ka mē inhma. Nā kot puj mē pahpiitā mē pahtyk kêt nē. Koja nhÿrmā Tirtūm kapêr o mē wrÿk xwÿnhjê hōja mē pamā pifti kakō. Mē pajaêr pé hkakō. Hāmri nhūm Tirtūm kra ra mē htyk nē mē hikwÿ xwÿnhjaja akupÿm ī nyw o htîr kurê kumrêx. Nē kormā mē pahtyk kêt xwÿnhjaja kot pu mē mē pahtyk kêt ri mē urāk nē panhî nyw kurê kumrêx. Hāmri pu mē pahpiitā pahtîr o pahtîr tūm nē papa. ⁵³ Koja Tirtūm mē panhîpêx o te mē pahte paxê htūm o papinhîpanh nē hpānhā paxê nyw jagjênh pyrāk. Jao mē panhî htūm o hapêx nē hpānhā mē pamā mē panhî nyw gō pu mē axte pahtyk kêt kumrêx nē ri papa ho papa. ⁵⁴ Tirtūm kapêr ā kagā htūm kot ja jarênh kot: Na ra Tirtūmja mēhtyk ho hapêx pa. Anē.

Te ra kot ho hapêx par pyrāk o ā harênh kot anhÿr. No ām kormā. Jakamā kot puj mē nhÿrmā panhî

nyw nē ri papa nē mē pahtō axte pahtyk kêt kumrêx. ⁵⁵ Mē pahtykja te mē kot makre par nhūm axte kot mē hkamnhwÿr kêtja pyrāk. Urā nē koja Tirtūm akupÿm mē pahto mē pahtîr pu mē axte pahtyk kêt nē. Nē axte ri pamā ma hkêt nē papa. Nē axte paxā hkêt nē. ⁵⁶ Tirtūm kapêr ā kagā htūmja ā mē pakukamā mē pajarênh kot anhÿr. Mē pahte amnhî tomnuj xwÿnh jakamā kot puj mē nhÿrmā ty. ⁵⁷ Nom nhūm Tirtūm àhpumunh tÿx o àhpumunh tÿx jakamā na hte Pahihti Jejus Kris kukwakri mē pahte hkôt amnhî xunhwÿr xwÿnhjê nē mē pahte amnhî tomnuj rênh pa. Pu mē nhÿrmā mē pahtyk tā nhūm akupÿm mē pahto pahtîr.

Mē pahte Jejus mā tanhmā amnhî nhîpêx mex to hā mē pamā karō

Karatas 6.9; Korosē 1.10

⁵⁸ Jakamā e kwa Jejus kôt ixkwÿjaja. Kêr ka mē arî Pahihti Jejus kôt mān amnhî xunhwÿr tÿx rāhā ho ri apa. Nē kapêr kôt pix mā ri amnhî nhîpêx rāhā nē kām tanhmā amnhî nhîpêx mex to ho ri apa. Kot kaj mē ā amnhî nhîpêx anē hāmri nē kām tanhmā amnhî nhîpêx to kaprÿ ho ri apa hkêt nē. Ām hāmri kām mēmoj to anhÿr mex rāhā ho ri apa.

16

Mē kêp amrakati xwÿnhjê jarênh

Atre 11.27-30; Rōmān 15.25-27; Sikūn Korît 8.1-24, 9.1-5; Wam Ximotre 6.18

¹ Nē na pa pre krî pé Karatas kamā tanhmā Jerujarē kamā Kris kwÿjê jarênh to. Ijaew kwÿ kot mē pahpyrā nē Jejus kôt amnhî xunhwÿr ā mē harē nē mē kêp amrakati hā mē harē hāmri nē mē kām:

—E. Kwa kêr ka mē kām mē akāxpore hkwy ho akuprō nē ma mē hwÿr amē.

Anhÿr o mē kām ixkapêr. Jakamā kwa kêr ka mē urāk nē mē kaxyw mē kām kāxpore hkwy ho akuprō. ² Mē panhō arīgromnu pé sap ā hkwy ho akuprō. Kot kaj mē akāxpore rax japêr nē mē kaxyw hkwy ho rax nē

axi. Nom kot kaj akàxpore grire japêr nê mē kaxyw mē kām ho grire nê agō. Kêr pa mēmo arĩgro hã ma mē awÿr mō ka mē ra mē kaxyw ho apikuprōnh rax nê.

³ Nê ma mē kot mē kām ho mōr mǎ xwÿnhjaja ka mē ixkutêp mē akwÿjê rê. Kêr pa pōj nê mē omu hāmri nê mē kaxyw kagà nhĩpêx nê kamã mē harê. Nê mē kām kugō nhũm mē ma Jerujarê hwÿr kàxpore mē ro hã amnhĩ kôt o mō nê mē kām kugō. Mē kot kamã harênh nê mar hāmri nê mē kamjaja mē ate mē kaxyw mē rênh ã mē ajarênh ma. ⁴ Rÿ kot ka mē amã mē hkôt inhmênh prãm nê māmri mē hkôt inhmê pa ma mē hkôt mō.

Pawre kot amnhĩ kukamã amnhĩ jarênh

Atre 19.21-22

⁵ Nom kot paj tokyx mē awÿr inhmōr kêt nê. Kot paj ja rŭm ixkato nê hpãnhã ma pika pê Masetōn wÿr mō. Hāmri nê mē hkôt ixpa grire nê ma kormã mē awÿr Korîit wÿr mō.

⁶ Hāmri nê pōj nê mē akôt ri ixpa ryy nê. Nê ixtã amgrã pixi nê hapêx nê rĩ kormã ma axte nhãm krĩ hō hwÿr mō. Nê inhnojarêr ka mē ixto Tirtŭm wÿ nê inhmã ixàpkur xà hkwÿ gō pa ma mē hwÿr pry hã hkur o mō.

⁷ No ixte mē awÿr ixpōx nê tokyx mē akurŭm ixkator nê hpãnhã ma nhãm krĩ hō hwÿr inhmōrja na inhmã hprãm kêt. Jakamã koja Tirtŭm kām ja mex pa arĩ ri mē akôt ri ixpa hã ixtã mytwrÿ xohtō nê tokyx ma nhãm inhmōr kêt nê. ⁸ Kot paj kormã jar Epes kamã ri ixpa rãhã nhũm mē hkĩnh pê Pêtekos kato nê hapêx pa rĩ kormã ma Masetōn wÿr mō. ⁹ Na pa hte jar kormã mē kām Jejus kapêr jarênh o ri mē hkôt ixpa nhũm mē ohtō nê inhmar o pa. Mē kām mar prãm. Tã no nhũm mē hkwÿjaja ohtō nê mē kêp ja omnuj nê nhũm mē hã ixkamã gryk nê ixtomnu o pa.

Mē kot Ximotre ho mex ã mē harênh Hapuhã Juãw 5

¹⁰ Nê kwa koja Ximotre mēmo arĩgro hã mē awÿr pōj ka mē omu nê

ho mex nê. Nê mē amnhĩ nhōrkwÿ hwÿr awÿr kê mē akutã apkur o pa. Na hte ixpyrà nê Pahihti Jejus mǎ tanhmã amnhĩ nhĩpêx to mex o pa. ¹¹ Kormã mē pahkĩnhã nyw tã kêr ka mē tee ri ja hã omu nê ri axpên mǎ tanhmã harênh to hkêt nê. Mē ãm akapêr mex pix o kām akapêr. Nê koja akupÿn nojarêr ka mē pry hã kām apkur xà hkwÿ gō kê mex pê man akupÿn ixwÿr mō pa tokyx omu. Kot paj jar mē pahkwÿjê mē akupÿn hpōx kamã ijamak o ixpa.

¹² Nê na pa hte xatã jar mē pahtō Aporja ma mē awÿr mōr kaxyw mē awÿr hano. Kot jar mē pahtō hkwÿjê mē ma mē awÿr mōr kaxyw. Nom kormã. Koja xep mē jar tanhmã amnhĩ to hpa nê rĩ kormã ma mē awÿr mō.

Kagà jatur xà kamã Pawre kot mēmoj tã karō

Epes 6.10-12; Sikŭn Ximotre 1.7; Wam Pêtre 5.8-9

¹³ E kwa kêr ka mē arĩ amnhĩ wÿr Jejus kamã ajamak rãhã ho ri apa. Nê hamãr pê kutêp tãm amnhĩ nhĩpêx o ri apa. Nê amnhĩ kaxyw hkôt ajamaxpêr tÿx rãhã nê.

¹⁴ Nê mē amã axpên kĩnh pê tanhmã axpên to mex to.

¹⁵ Mãn ka mē ra Estepti mē hkwÿjê jarênh ma. Mē hkumrêxjaja na prem pika pê Gres kamã Kris kôt amnhĩ xunhwÿ. Tã xep mē ra Kris kôt hkwÿjê ho mex o ri mē hkôt pa. ¹⁶ Kêr ka mē ã mē kot amnhĩ nhĩpêx anhÿr xwÿnhjê kapêr ma nê hkôt ri amnhĩ nhĩpêx o ri apa. Mē kot Kris mǎ mē ajamãr xwÿnh piitã kêr ka mē kapêr ma nê mē hkôt ri amnhĩ nhĩpêx mex nê.

¹⁷ Nê ota Estepti nê Akajkre nê Putunatreta na mē ra jar pōj. Pa mē Sostenes mē wa mē omu nê wa ixkĩnh nê. Te ixte mē apumunh nê ixkĩnh tÿxta pyrãk. ¹⁸ Na xep prem ma mē awÿr mō nê tanhmã mē amã kapêr to ka prem mē ama nê akĩnh nê. Tã mē ra amnê ixwÿr mō nê tanhmã inhmã kapêr mex to pa mē kuma nê ijaxwÿja ixkĩnh nê. Kwa kêr pu mē ã mē kot

mē panhīpêx anhÿr xwÿnhjê ho mex o papa.

¹⁹⁻²⁰ Nē ota jar pika pê As kamā Kris kôt mē pahkwÿjaja piitā mē awÿr hpēr mē. Nē Akir mē hprō Prisireja wa. Nē wa ōrkwÿ kamā mē kot Tirtūm mā amnhī jarēnh kaxyw mē pikuprōnh xwÿnh piitā mē awÿr hpēr mē.

Nē kêr ka mē nhÿri axpēn pumu nē mē apē Kris kôt mē ate axpēn to atō nē atōx ā axpēn mā akapēr mex nē akīnh nē.

²¹ E kot paj kagà jatur xà kamā inhīhkra ho mē amā amnhī nhīxi nhīpêx ka mē omu. Koja inhmā ixkapēr ā kagà xwÿnhhta ja hā kagà hkêt nē. Pa kot paj hipêx. Ixpê Pawre na pa ā amnhī nhīxi nhīpêx anē ka mē omu.

²² Nē kwa kêr ka mē arī amā Pahihti Jejus kīnh o ri apa. Koja mēhō kām hkīnh kêt hā koja Tirtūm ja hā homnuj tÿx kumrêx.

E “maranat.” Mē pakapēr kām na htem maranat jarēnh o: “Kwa tokyx akupÿn mē ixwÿr wrÿ Pahihti.” Anē.

²³ E kê Pahihti Jejus Krisja mē ato mex nē mē akutā nojarêt rāhā ho pa.

²⁴ Ixpyrà nē mē apē Jejus Kris kwÿ jakamā na pa hte inhmā mē akīnh nē.

Tā ām ja pix. Ixpê Pawre na pa ā mē awÿr kagà nhīpêx nē mēnh anē.

Sikūn Korīt
Pawre wam Korīt kām
Jejus kôt hkwýjê hwýr
kagà nê mēnh kôt kagà hō
mēnh

Pawre na pre kagàja nhīpêx. Kêp mry hkà ho ixkre nhīpêx nê ho wēnê ho pa xwýnh na pre. Tã hpãnhã kêp Jejus nhỹ hã hkrajê jahkre ho pa xwýnh. Jakamã na pre kagàja nhīpêx nê Korīt kãm mē kot Jejus kôt amnhĩ xunhwýr xwýnhjê hwýr kumê. Na pre ra mē hwýr wamta nhīpêx nê kumê. Wam kagà nhĩxi pê Wam Korīt. Tã axte hkôt ja nhīpêx nê mē hwýr mēnh jakamã kagà nhĩxi pê Sikūn Korīt.

Na pre Korīt kãm Jejus kôt mē htōjê hō axtem nê nã puro kamã hpijaam kêt o pa nhũm Pawre tee ri harēnh ma nê mē hwýr wam kagàta mē nê kamã tanhmã mē kot hipêx to hã mē kãm karō. Tã kagà ja kamã axte tanhmã hã mē kãm karō hto.

Na pre ra Korīt wýr mē kêp Kris nhỹ hã mē ahkre hã amnhĩ to hêx xwýnhjaja mē hwýr pōj nê tanhmã mē kãm kapêr jarēnh to ho mē hkôt pa. Nê tanhmã mē kãm Pawre ho hêx to. Jakamã nhũm kagàja kamã tanhmã mē kãm amnhĩ tã aprār to nê kãm mē hkĩnh tỳx ã amnhĩ jarê. ã na pre Pawre mē kãm mēmoj jarēnh nê hã kagà anê. Nê mē kãm hã kagà ho:

¹ Pa Korīt kãm Tirtūm krajaja. Xà mē apiitã mē amex na ka mē apa? E ot pa mē awýr kagà nhīpêx nê kumê. Mē amã nê mē anhō pika pê Gres kamã Tirtūm krajê mē mē ato xipim-ràatã mē awýr hipêx nê kumê. Ixpê Pawre na pa hte Tirtūm jamaxpêr xà hkôt ma Jejus Kris nhỹ hã krĩ piitã hkôt hkrajê jahkre ho ri ixpa. Tã Kris kôt mē pahtō Ximotre mē wa mē awýr hipêx nê kumê.

² E kê Mēpahpãm Tirtūm mē Pahihti Jejus Kris wa mē ato mex rãhã ho pa. Nê mēmoj to mē akutã nojarêt rãhã ho

pa. Ka mē wa kukwak ri ajamakêtkati nê amex nê ri akĩnh nê apa ho apa.

Pawre kãm amnhĩ xà htỳx kamã hamak pyma hkêt ã harēnh

Rômãn 1.11-12; Korosê 1.11; Sikūn Tesarôn 2.16

³⁻⁴ Nã Tirtūm kêp mē panhō Pahihti Jejus Kris nhīpêxà na. Nê kêp Mēpahpãm maati jakamã na hte mē pakamã ukapri nê tanhmã mē pahto mex to ho pa. Kot puj mē mēmoj tã tanhmã amnhĩ to nê pahkapri nê ri papa nhũm ja hã mē pahpumu hãmri nê hamaxpêr pix o akupým mē pahto mē paxihtỳx. Mēmo kaxyw na hte ã mē pahto mex anê? Nã mē pahte amnhĩ tã omunh nê amnhĩ pyrãk mē hkapri nê ri mē pa xwýnhjê jamaxpêr o hihtỳx o mē hkôt papa kaxyw. Ja kaxyw na hte mē pajamaxpêr o hihtỳx. Jakamã kwa pu mē kãm mex o mex ã mãn harēnh rãhã ho papa.

⁵ Na htem tōhã ixto Kris nhīpêx pyrã nê tanhmã ixto pa amnhĩ xà htỳx kamã ijamak o ri ixpa. Tã nhũm Tirtūm inhīpêx o te Kris nhīpêx pyrã nê hamaxpêr pix o tanhmã ixkrã hto pa mē kutã amnhĩ to htỳx nê arĩ mē hkôt ixpa. ⁶⁻⁷ Na pa hte mē amã Kris kapêr jarēnh o ixpa. Mē ate inhmar nê hkôt amnhĩ nhīpêx kaxyw. Jakamã na hte mē kãm Tirtūm kapêr mar prãm kêt xwýnhjaja tōhã mē atã ixtomnuj nê pa amnhĩ xà htỳx kamã ijamak o ri ixpa. Tã kwär mē mãmri ã inhīpêx anê. Mē ate Jejus kôt amnhĩ xunhwýr tỳxja na inhmã hprãm. Na htem tanhmã Kris ã inhīpêx to nhũm Tirtūm mē hã ixpumu nê tanhmã ixkrã hto pa inhmã amnhĩ xà htỳx kamã ijamak pyma hkêt nê ixpa. Nê arĩ mē hkôt mē kãm kapêr jarēnh rãhã ho ri ixpa. Na hte Tirtūm amarĩ ã inhīpêx anhýr kêt nê. Mē ate ã kot inhīpêx anhýr ã ixpumunh nê ixpyrà nê amnhĩ kaxyw kãm ajamaxpêr tỳx kaxyw na hte ã inhīpêx anê. Mē ate ja hã ixpumunh nê ã ajamaxpêr anhýr kaxyw nê mē ajamaxpêr o:

—Nã kot pa nhỹrmã Pawre pyrã nê tōhã mē mýrapê amnhĩ xà htỳx kamã

ijamak o ixa. Hāmri nhūm Tirtūm ja hā ixpumu nē te ho Pawre nhīpêx pyrā nē tanhmā ixto pa inhmā amnhī xā htỳx kamā ijamak pyma hkêt nē ixa. Nà koja ā inhīpêx anē.

Anhỹr o mẽ ajamxpêr kaxyw na hte Tirtūm mẽ kutā ixto ixihtỳx. Mẽ ate ja hā ixpumunh nē akupỹm tām ajamxpêr pê Karō nhỹ hā amnhī to axihtỳx kaxyw. Jakamā na pa tee ri mẽ akukamā ijamxpêr kêt nē.

Tirtūm kêp mẽ papytār xwỳnh ā harēnh

⁸ E Kris kôt ixkwỳjaja. Kot paj ixprī hā mẽ amā tanhmā amnhī jarēnh to ka mẽ inhma. Na pa pre ma pika pê As wỳr mō nē mẽ kām Jejus kapêr jarēnh o ri mẽ hkôt ixa. Hāmri nhūm mẽ hkwỳjaja ja hā ixtomnuj tỳx nē pa amnhī xā htỳx kamā ijamak pê mẽ hkôt ixa. Kironhỹx pa pre mẽ kamā ty. ⁹ Na pa pre tee ri amnhī kukamā ijamxpêr o:

—Koja pêr mẽ ixpī. Tanhmā kot pa we amnhī to nē tokyx mẽ kêp amnhī pytā? Kot paj tee ri inhmā mẽ kêp amnhīptār prām. Tirtūm pix na ja kaxyw mẽ kutā àhpumunh tỳx. Rỳ nhūm mẽ kot ixpīr tã nhūm kot akupỹm ixto ixtīr kaxyw tapxipix na àhpumunh tỳx. Nà kot paj amnhī kaxyw tapxipix mǎ mǎn ijamxpêr o ri ixa nhūm amnhī tã ixpumu nē hkĩnh nē. Ā ixte amnhī nhīpêx anhỹr o ixpaja na kām hprām. Anē.

¹⁰ Tã nhūm pre ā inhīpêx anē nē xatā mẽ kêp ixpytār o ixkôt pa. Koja ā mẽ kêp inhīpêx anhỹr rāhā ho pa. Nà ā kot inhīpêx anhỹr mǎ kēnā.

¹¹ Nom kwa kêt ka mẽ apiitā arī ixto Tirtūm wỳr rāhā ho ri apa kē mẽ ama nē mẽ kām ixkurê xwỳnhjê kutā ixto ixihtỳx rāhā ho pa. Nē ixto mex rāhā nē. Hāmri nhūm mẽ ohtō nē kot mẽ kêp tanhmā ixpytār to hā ixtā omu nē ixtā kām mex o mex ā harē.

Pawre kot mẽ kām amnhī tã aprār ā harēnh

Wam Korīt 2.1-5

¹² Nē na xep pre atar Kris kôt mẽ pahkwỳjaja tanhmā ixto kapêr punuj

to nē Jejus kot mẽ awỳr inhmēnh kêt ā mẽ amā ixto hêx. Nē ijakwa nhĩkê ho inhmā mẽ akĩnh nē ijakwa nhĩkê ho mẽ ato ixkapêr punuj ā ijarēnh o ri pa. Nom ixte ā amnhī nhīpêx anhỹr kêt. Aa ixte tanhmā mẽ ano kupyw to hkêt. Ām hāmri na pa mẽ amā amnhī jarē nē tām mẽ amā ixkapêr o ri ixa nē tām ri mẽ anhīpêx o ri ixa. No ijamxpêr tūm kôt tanhmā mẽ anhīpêx to hkêt nē. Ām Tirtūm kot mẽmoj to mẽ pakutā nojarêt ā omunh xā hkôt pix mǎ na pa hte y hā mẽ ato mex o ri ixa. Ijamxpêr nyw o. Na pa hte Tirtūm pyrā nē mẽ piitā mẽ ho mex nē. No mẽ kajaja ixpyrān mẽ apê hkra jakamā na pa hte mẽ ato mex kumrêx o ri ixa. ¹³ Na pa hte mẽ amā kagà hkwỳ nhīpêx nē ixprī hā mẽ amā tanhmā mẽmoj jarēnh to. Mẽ ate kamā harēnh nē mar mex kurê kumrêx kaxyw. No na pa hte mẽ amā tanhmā ixêx to rỳ tanhmā mẽ ano kupyw to hkêt nē. ¹⁴ Ā ixte amnhī nhīpêx anhỹr o ri ixa htā kormā mẽ apiitā ja hā ixpumunh mex kêt nē. Nē Jejus kot mẽ awỳr inhmēnh ā ixpumunh mex kêt nē. Jakamā na hte mẽ akwỳjaja ixto akapêr punuj o pa. Tã kot kaj mẽ nhỹrmā ām hāmri Jejus kot mẽ awỳr inhmēnh ā axpēn mǎ ijarē pa mẽ ama nē ixkĩnh nē. Hāmri nhūm nhỹrmā mẽ panhō Pahihti Jejus mẽ pahwỳr akupỹn wrỳ pa kām mẽ ajarē nē kām:

—E Pahihti. Jajê mǎ na pa pre akapêr jarēnh o ixa nhūm mẽ inhma nē akôt amnhī xunhwỳr kurê kumrêx nē tām amnhī nhīpêx mex o pa.

Anhỹr o kām mẽ ajarē. Hāmri nē ā mẽ ate amnhī nhīpêx anhỹr ā mẽ apumunh kôt ixkĩnh nē. Ka mẽ ajaxwỳja akĩnh pê tanhmā kām ijarēnh to ho akuhē.

Pawre hêx kêt ā kot amnhī jarēnh

Wam Korīt 16.5-6

¹⁵⁻¹⁶ Nē na pa pre ra mẽ awỳr ixkrā. Ixte ma mẽ awỳr inhmōr nhūm mẽ ate ixpumunh nē akĩnh ā mẽ akamnhĩx nē mẽ awỳr ixkrā nē ijamxpêr o:

—Nà ma Masetōn wỳr inhmōr xwỳj ri kot paj ma Korīt kumrēx wỳr mō. Hāmri nē Kris kōt ixkwỳjē pumu nē rī kormā hamū Masetōn wỳr mō. Nē mē kamā ri ixpa tāmtā awjanā nē akupỳn Korīt wỳr mō nē axte mē omu. Jao Tīrtūm kapēr o mē ahkre ho axkrut nhūm mē amnhī tā ixpumu nē hkīnh nē. Hāmri pa akupỳm Jutej wỳr inhnojarēt nhūm mē pry hā ixàpkur xà hā inhmā mēmoj kwỳ nhōr japēr.

Anhỳr o ijamaxpēr. ¹⁷ Tā kormā jar tanhmā amnhī nhīpēx to ho ixpa ka xep mē tee ri amnhī wỳr ixkām ama nē axpēn mā ijarēnh o:

—Kwa Pawre kot ra mē pahwỳr nojarēt ā amnhī jarēnh tā amnhīm nojarēt kēt kumrēx. Mān pre ām mē pamā amnhī to hēx nà? Ra kot mē pamā amnhī jarēnh tā tokyx hpōx kētre hā. Anē.

¹⁸ Kwa mē ri ā inhmā ajamxpēr anhỳr kēt nē. Na pa pre mē amā ixēx kēt nē. Na pa hte Tīrtūm noo mā ām hāmri mēmoj jarēnh o ri ixpa nē mē amā mēmoj jarēnh o ixēx kēt nē. Nà ām hāmri na pa pre ma mē awỳr inhmōr ā amnhī jarē.

¹⁹ Na pa pre ra Ximotre mē Siras mē wa mē amā Jejus Kris jarēnh o ri mē akōt ixpa. Jejus kēp Tīrtūm Kra hā harē nē kot amnhī nhīpēx te kot Tīrtūm kot amnhī nhīpēx pyrāk ā harēnh o ri ixpa. Jejus haxwỳja amnhī to hēx kēt. Kot mēmoj tā amnhī jarēnh xà hkōt na hte ām hāmri tanhmā amnhī nhīpēx to. Tā ā kot amnhī nhīpēx anhỳrja kōt na pa inhmā ixte amnhī nhīpēx o ixpa hprām nē. ²⁰ Ra Tīrtūm Jejus Kris kukwak ri kot mē pahto mex ā amnhī jarēnh jakamā na pu htem axpēn mā harēnh o:

—Koja Tīrtūm Jejus kukwak ri mē pahto mex rax nē. Ra kot mē pahtā amnhī jarēnh xà hkōt. Nà Tīrtūm mex o mex. Anē.

Tīrtūm kot mē pa hwỳr Karō rēnh ā harēnh

Rōmān 8.14; Epes 1.13

²¹ Nà Tīrtūmja mex o mex. Kot mē pahpē hkra kaxyw amnhīm mē paxunhwỳr jakamā na hte tanhmā

mē pahkrā hto pu mē Kris kōt amnhī nhīpēx mex o papa.

²² Na pu htem Kris kōt amnhī xunhwỳ nhūm Tīrtūm ja hā mē pahpumu nē mē pahwỳr Karō rē nhūm mē pahwỳr agjē. Mē piitā mē kot mē pahpē hkra hā mē pahpumunh kaxyw. Te mē kot tanhmā mē hikukrēx kagà hto nhūm mē kot kēp ō dōn ā omunhta pyrāk. Tā koja Tīrtūm Karō mē pakamā hkrī pu mē ja hā amnhī pumunh kōt Tīrtūm kot nhỹrmā mē pahto mex rax ā amnhī tā omunh kurē kumrēx. Ra kot mē pahto mex tā koja nhỹrmā mē pahto mex rax o wam kot mē pahto mex raxta jakre.

Pawre kām mē kām àkjēr prām kēt ā kot amnhī jarēnh

Wam Korīt 4.21; Sikūn Korīt 10.1-2

²³ E Kris kōt ixtō nē ixtōxjaja. Kot paj kormā ma mē awỳr inhmōr kēt ri ixprī hā mē amā tanhmā amnhī jarēnh to ka mē ixte amnhī jarēnh ma. Tīrtūm tām mē arom kot ijamaxpēr kōt ixpumunh mex jakamā kot paj noo mā ixprī hā mē amā tanhmā amnhī jarēnh to ka mē inhma.

Na pa pre ra mē awỳr inhnojarēt tā no ām tee ri amnhī kukamā ijamaxpēr nē ijamaxpēr o:

—Nà kot paj taxy kormā ma mē hwỳr inhmōr kēt nē. Kot paj tokyx mē hwỳr mōn pōj nē kot amnhī tomnuj xwỳnhta ā mē kām akir nē nē tanhmā mē kām ixkapēr to. Hāmri nhūm mē amnhī tā inhma nē hkaprī nē tee ri amnhī kukamā hamaxpēr. Ā mē kot amnhī nhīpēx anhỳr pymaj kot paj kormā mē hwỳr inhmōr kēt nē.

Anhỳr o ijamaxpēr. ²⁴ Inhmā ma mē awỳr inhmōr nē tanhmā mē ate amnhī nhīpēx to hā axte mē amā karō kamā ixihỳx prām kēt. Mē akwỳjē rom ra mē ate Kris hkōt amnhī xunhwỳr tỳx kēnā. Tā mē ate hkōt amnhī nhīpēx mex o akīnh nē apaja na inhmā hprām.

2

¹ Na pa pre ma mē awỳr mō nē mēmoj tā mē amā akir nē nē tanhmā

mê amã ixkapêr to ka prem inhma nê akaprî nê ri apa. Tã inhmã akupÿm mê awÿr inhmôr nê axte mê amã ixàkjêr prãm kêt jakamã na pa kormã mê awÿr inhmôr kêt nê. ² Kot kaj mê akînh nê apa pa ijaxwÿja ixkînh nê ixpa. No kot paj ma mê awÿr mō nê mēmoj tã mê amã akir ka mê tee ri inhma nê akaprî nê. Pa mê apumu nê ijaxwÿja ixkaprî nê.

³ Ja pymaj na pa pre wam ixte mê awÿr kagà mēnh̄ta kamã mēmoj nê tanhmã mê amã ixàkjêr to. Mē ate kamã harēnh nê mar nê tokyx kormã mê awÿr inhmôr xwÿj ri tanhmã mē ate amnhî tomnuj tota kaga nê tãm amnhî nhîpêx kaxyw. Kêr pa mēmo arîgro hã ma mê awÿr mōn pōj nê mē ate tãm amnhî nhîpêx o apa hã mē apumu nê ixkaprî hkêt nê ixkînh nê. Ka mê ajaxwÿja ixpumu nê akînh nê. ⁴ Jakamã na pa pre ã mē amã kagàta nhîpêx nê mê awÿr mēnh̄ anê. Nê kamã mēmojta nê tanhmã mê amã ixàkjêr to. Na pa pre ixkaprî htÿx nê tee ri mē akukamã ijamaxpêr o inhmÿr rax pē mē amã mēmojta ã kagà. No ãm mē akaprî kaxyw na pa pre mē amã hipêx kêt nê. ãm mē ate kamã harēnh nê inhmar nê ajamaxpêr o:

—Hêxta waa nê. Nà Pawre na kãm mē pahkînh tÿx kumrêx. Hã na pre mē pahte tanhmã amnhî tomnuj to hã mē pajarēnh ma nê tee ri mē pakukamã hamaxpêr pē kagàja kamã hã mē pamã akir nê mē pahwÿr kumê. Nà kãm mē pahkînh tÿx kãm na ã mē pamã kapêr kãm hihtÿx anê.

Anhÿr o ajamaxpêr kaxyw na pa pre hipêx nê mê awÿr kumê.

Mê kot axte amnhî tomnuj mã hamaxpêr kêt ã mē kãm karō

Rukre 17.3-4; Wam Korîit 5.1-13; Karatas 6.1-2

⁵⁻⁹ Nê wam kagàta kamã na pa pre mē amã mē akwÿjê hō kot nã kaàkre kamã hpijaàm kêta pa mē amã tanhmã hã karō hto. Ra mē ate harēnh mar tã nê kãm akapêr kêt nê. Tã mē ate inhmar nê nê tanhmã kãm akapêr to nê amnhî nê hanor kaxyw

na pa pre mē awÿr kagàja mē. Hãmri nê ijamaxpêr o:

—Ko. Koja mē ixkapêr mar xà hkôt amnhî nê hanor japêr. Anê.

Tã ka xep prem kamã harē nê ama nê tee ri ja hã amnhî pumu nê akaprî nê. Nê ixpyrà nê apijaàm nê. Hãmri nê ijamaxpêr xà hkôt amnhî nê hanor kãm axihtÿx nê. ãm hãmri na ka prem ã hipêx anê. Nhũm xep tee ri ja hã amnhî pumu nê hkaprî nê hkaprî xaj ri mÿr o pa. Jao ra ã amnhî nhîpêx anhÿrta kaga nê akupÿm tãm amnhî nhîpêx. Tã ra ã kot amnhî nhîpêx anhÿr jakamã kwa mē tokyx akupÿm amnhî wÿr awÿ kē axte mê awÿr mra nê mē akôt pa. Ra kot amnhî tomnujta kaga jakamã kêr ka mē axte kãm ajamaxpêr kêt nê. Akupÿm tãm kãm akapêr kē tokyx akupÿm tãm hamaxpêr nê hkînh nê pa. Kot kaj mē tokyx ã hipêx anhÿr kêt nê nhũm tee ri amnhî kukamã hamaxpêr nê hkaprî nê pa. Ja pymaj kwa mē amã hkînh ã kãm amnhî jarê nê akupÿm tãm kãm akapêr pē tãm hipêx o ri apa. Kê amnhî tã mē apumu nê akupÿm hkînh nê tãm hamaxpêr. ¹⁰ E kêr ka mē axte kot tanhmã amnhî tomnuj tota mã ajamaxpêr kêt nê. Kwarî ho kwarî. Kot kaj mē ã hipêx anê pa ijaxwÿja ma hipêx anê. No pa na pre tanhmã ixtomnuj to hkêt nê. ãm Jejus kapêr kwÿm na pre ri ã amnhî nhîpêx anê. Tã ra kot amnhî tomnujta kaga jakamã kot paj Jejus nhÿ hã akupÿm tãm hipêx nê kot amnhî tomnujta o ijamakêtkati tokyx anê nê axte kãm ijamaxpêr kêt nê. Mē apiitã mē amex nê ri mē apa kaxyw. Jakamã kêr ka mē ajaxwÿja mē amex nê apa kaxyw ã amnhî nhîpêx anê nê axte kãm ajamaxpêr kêt nê. ¹¹ Kwa mē tokyx ja ho ajamakêtkati. Kê Satanasti tee ri ja hã mē apumu nê mē amã mē ate tanhmã amnhî tomnuj to hprãm xaj tee ri tanhmã ri mē ato ho pa kaprÿ. Kêr pu mē Satanasti kot amnhî nhîpêx kôt amnhî nhîpêx o ri papa hkêt nê. Ra mē pahte Tîrtÿm kapêr kuhpa hã tanhmã kot amnhî nhîpêx to ho pa hã

omunh mex kêna.

Pawre kot Xitre japêr o pa hã harênh

¹²Nê na pa pre ja rûm ixkato nê ma Tôx wÿr mō. Ixte mē kām Kris jarênh o mē hkôt ixpa kaxyw ma mē hwÿr mō. Nhûm Pahîhti Kris ixkukamã tanhmã mē hkrã hto jakamã pa pre mē hwÿr pōj nhûm mē piitã kām ixujarênh mar prãm nê. Pa pre mē kām Tîrtûm kapêr jarênh ryy ho mē hkôt ixpa. ¹³Na pa pre Xitre ra mē hwÿr ixkukamã hpôx ã hkamnhîx tâ nhÿri omunh kêt nê. Hãmri nê ijamaxpêr o:

—Hêxta waa nê. Inhmã Korîit kām Jejus kwÿjê jarênh mar prãm. Na pa tee ri mē hkukamã ijamaxpêr o ixpa. Nom kormã Xitre mē kurûm akupÿn hpôx kêt. Mãn kormã Masetôn kamã pa.

Anhÿr o ijamaxpêr hãmri nê mē kām amnhî jarê nê ixkato nê ma Masetôn wÿr krî hkwyê hkôt hapêr o mō. Tã ra hwÿr ixkato nê omu.

Te mē pahpê mēhkuxwa xà pyrãk ã mē pajarênh

Epes 5.2; Piripos 4.18

¹⁴⁻¹⁶Nà Tîrtûmjã mex o mex. Na hte mē pahto mex rãhã ho pa. Nê mē kot mē panê àmnâr xwÿnhjaja nhûm hte tanhmã mē ho pu mē ma paxâmnhîx ri mē hkôt mē kām Kris kapêr jarênh o ri papa. Te mē pahte mē hkuxwa xà ho ri mē hkuxwa ho papa pyrãk. Mē pahte Kris kôt amnhî nhîpêx jakamã Tîrtûm mã te mē pahkuxware nê ri mē papa pyrãk. Nê te mē kām Kris jarênh o ri papa pê te mē hkuxwa xà ho mē hkuxwa ho ri mē hkôt papa pyrãk. Nhûm hte mē hkwyêjaja mē pama nê kām mar prãm nê. Nê mē paxujarênhja haxwÿja te kot mē hkuxwa xà kuxwa mex nhûm htem hpâr nê kām ho amnhî kuxwa hprãm pyrãk. Jao kãm mē pamar prãm nê Kris kôt amnhî xunhwÿ. No nhûm mē hkwyêjaja axtem nê mē kêp mē pamar prãm nôkati. Mē kumã Tîrtûm kapêrja te kêp wenên kuxÿ htÿx nhûm mē kot hpâr nê htyk pymaj amÿm kuhê pyrãk. Jao kapêr kaga nê kêp amÿm amnhî xunhwÿ.

Nê na pu htem amnhî krã hkôt mē kãm Kris kapêr jarênh o ri papa hkêt nê. ãm Tîrtûm nhÿ hã pix mã tanhmã harênh to ho papa.

Pawre kot katàt kôt Tîrtûm kapêr o mē ahkre hã harênh

¹⁷Na hte mē kot mē kêp Kris nhÿ hã mē ahkre hã amnhî to hêx xwÿnhjaja te Tîrtûm kapêr o wênê pyrãk o mē hkôt pa. Jao kãxpore hprãm xàj amnhî krã hkôt tanhmã mē kãm harênh to nhûm htem mē kuma nê hpãnhã tanhmã mē kãm amnhîrer to. Nom pa na pa hte ã amnhî nhîpêx anhÿr kêt nê. Nê mē urãk nê amnhî krã hkôt Tîrtûm kapêr jahkre ho ixpa hkêt nê. Tîrtûm kot mē akaxyw ixãm jakamã na pa hte ixkatàt kôt Kris nhÿ hã amarî mē amã kapêr jarênh o ri mē akôt ixpa. No mē urãk nê kãxpore prãm xàj mē amã harênh kêt nê. Tîrtûm kot ja hã ixpumunh mex.

3

¹Mê kêp Kris nhÿ hã mē ahkre hã amnhî to hêx xwÿnhjaja na htem nhÿhÿm nojarêt nê mē kot mar xwÿnhjê mã:

—E kot paj ma nhãm krî hō hwÿr mō nê Tîrtûm kapêr o mē ahkre. Jakamã kwa mē kaxyw inhmã kagã nhîpêx nê kamã ixte Tîrtûm kapêr o mē ajahkre mex xwÿnh ã ijarê nê hã kagã. Hãmri nê inhmã agō pa ma amnhî kôt o mō nê mē kot inhmar mã xwÿnhjê mã kugō kê mē kamã harê nê ijarênh ma nê kãm ixkapêr mar prãm nê.

Anhÿr o na htem amnhî to mē hwÿr o pa. No pa na inhmã ã amnhî nhîpêx anhÿr prãm kêt. Inhmã nhãm mē kãm amnhî to jarkrar prãm kêt. Mē ate ja hã ixpumunh mex. Ra mē piitã mē kot ixkatàt kôt ixte Tîrtûm kapêr jarênh mex ã ixpumunh mex jakamã mo kaxyw kot pa ri amnhî kôt kagã jamÿ nê ho ixpa? Nà kot pa amnhî kôt hō ho inhmōr kaxyw hã ixãhwÿr kêt nê. ²⁻³Mê kajaja te mē apê inhō kagã pyrãk. Na ka prem ixte mē ajahkre ma nê Jejus kôt amnhî xunhwÿr kurê kumrêx. Hãmri nhûm Tîrtûm mē amã amnhî Karō rê nhûm mē amã agjê

ka mẽ ý hã amnhĩ nhĩpêx nyw o amnhĩ nhĩpêx o apa. Hãmri nhũm mẽ akwỳjaja amnhĩ jaêr pê mẽ ate amnhĩ nhĩpêx nyw ã mẽ apumu nẽ mẽ atã axpên mã ijarênh o:

—Hêxta waa nẽ. Pêr ãm hãmri na pre Kris mẽ hwỳr Pawre mẽ. Na pre ma mẽ hwỳr mỗ nẽ mẽ kãm Tĩrtũm kapêr o mẽ ahkre nhũm mẽ kuma nẽ amnhĩ tomnuj kaga hpa nẽ hpãnhã Tĩrtũm kapêr kôt amnhĩ nhĩpêx nẽ tãm ri amnhĩ nhĩpêx o pa. ãm hãmri na hte Pawre mẽ ahkre mex o pa. Hêxta waa nẽ.

Anhỹr o mẽ atã ijarênh jakamã mo kaxyw kot pa kagã hkwỳ jamỳ nẽ amnhĩ kôt ho ixpa? Nà mẽ kajaja te mẽ apê inhõ kagã pyrãk.

⁴ Na pa pre Jejus kôt amnhĩ xãm nhũm Tĩrtũm ja hã ixpumu nẽ tanhmã inhmã kapêr o amnhĩrĩt to nẽ inhmã:

—E Pawre. Kêr ka ma mẽ kãm ixkapêr jarênh o ri mẽ hkôt apa.

Anhỹr jakamã na pa hte Tĩrtũm kamnãr rom ã amnhĩ nhĩpêx anhỹr o ri mẽ hkôt ixpa. ⁵ Nom amnhĩ krã hkôt mẽ ahkre hkêt nẽ. Tanhmã kot pa we amnhĩ to nẽ amnhĩ krã hkôt mẽ kãm kapêr o mẽ ahkre mex nẽ? Nà Tĩrtũm pix na hte ja kaxyw tanhmã ixkrã hto pa ô ri mẽ ahkre ho ri ixpa.

Tĩrtũm kapêr nyw jarênh

⁶ Nẽ Tĩrtũm na hte tanhmã ixkrã hto pa Karõ nhỹ hã mẽ piitã mẽ kãm kapêr nyw jarênh o ri ixpa. Amnepêm Tĩrtũm kot Ijaew mã mẽmoj tã karõ xwỳnhta. Mojes kot kapêr tũm jarênh o pa xwỳnhta mex tã no nhũm mẽ tee ri hkôt kãm amnhĩ nhĩpêx prãm o pa. Nẽ xatã kamã harẽ nẽ omunh tã tee ri kot hkôt kãm amnhĩ nhĩpêx prãm. Tã mẽ kot hkôt amnhĩ nhĩpêx kêt mỳrapê na prem pikaprãr pan hapêx. No kêt Tĩrtũm kapêr nywja. Jejus jarênhja. Na hte Tĩrtũm Karõ tanhmã mẽ pahkrã hto pu mẽ Jejus kôt amnhĩ nhĩpêx o ri papa. Jao mẽ pahpê pahtĩr tũm nẽ papa mã xwỳnh. No na hte nhãm mẽ hkwỳjaja kãm harênhja mar prãm kêt nẽ amnhĩ jarênh o:

—Nà kot paj amnhĩ krã hkôt ã amnhĩ nhĩpêx anẽ nẽ ã amnhĩ nhĩpêx anẽ nhũm Tĩrtũm ja hã ixpumu nẽ ixtĩr tũm nẽ ixpa mã xwỳnh ã ijarê.

Anhỹr tã no ãm ã amnhĩ jarênh anhỹr kaprỳ. Tĩrtũm Karõ nhỹ hã mẽ kot amnhĩ to mex o mẽ pa xwỳnh pixjaja koja mẽ htĩr tũm nẽ pa ho pa.

⁷ Nẽ Tĩrtũm kapêr tũmta na pre Mojes mẽ kãm harênh kaxyw nhũm mẽmoj tanhmã amnhĩ nhĩpêx to rax kumrêx. Naja hkrakrak nẽ haxênh nẽ kamã kamãt kô htyk. Hãmri nhũm Tĩrtũm mẽ kot hkôt amnhĩ nhĩpêx kaxyw kên po hã mẽ kãm mẽmoj tã karõ nhũm Mojes kumỳ nẽ mẽ hwỳr o wrỳ nẽ mẽ kãm kamã harẽ. Tĩrtũm kot hirã htỳx kamã kãm kapêr nhũm kuri mar o ãm jakamã urãk nẽ ý hã hkuk nhĩrã htỳx kumrêx nẽ mẽ kãm kapêr jarênh o xa. Jakamã nhũm mẽ tee ri kot hprĩ hã omunh mex kaxyw no ãm nom gêk tỳx nẽ. Tã gaa nhũm hkuk kãm hirãja amnhĩm hprĩ nẽ hapêx o mỗ. Na pre ã Tĩrtũm Ijaewjê mã kapêr tũm nhõr anẽ. Hãmri nhũm Mojesja ô ri mẽ kãm kamã harẽ nẽ harênh pa hãmri nẽ mẽ kãm:

—E kêr ka mẽ Tĩrtũm kapêr mar tỳx nẽ hkôt amnhĩ nhĩpêx mex rãhã ho ri apa. Kêr ka mẽ nhỹrmã atyk tã kê akupỳm mẽ ato mẽ atĩr ka mẽ õ krĩ kamã kuri atĩr tũm nẽ amex nẽ apa ho apa. Anẽ.

Hãmri nhũm mẽ kuma nẽ kãm:

—Tõe. Nà kot paj mẽ hkôt pix mã ri amnhĩ nhĩpêx mex rãhã ho ri ixpa.

Anhỹr ã amnhĩ jarênh tã no ãm hkôt amnhĩ nhĩpêx kêt nẽ nhũm Mojes tee ri mẽ kot amnhĩ nhĩpêx ã mẽ omu nẽ mẽ kãm:

—Nà mẽ ate Tĩrtũm kapêr kôt amnhĩ nhĩpêx kêt jakamã kot kaj mẽ nhỹrmã ty nẽ Tĩrtũm pê awry rax kumrêx nẽ ri apa. Anẽ.

⁸ Tã na hte Tĩrtũm jarãhã axtem tanhmã mẽ pamã kapêr to. Pãnhã kapêr nyw o kapêr nẽ mẽ pamã:

—Kot kaj mẽ Ixkra Jejus kôt amnhĩ xunhwỳ pa hã mẽ apumu nẽ mẽ ato ixkra. Hãmri nhũm Ixkarõ mẽ amã agjê. Anẽ.

Kapêr ja na mex kumrêx o kot kapêr tûm jakrenh. ⁹ Kapêr tûmja mex tâ nhûm htem hkôt amnhî nhîpêx kêt nê. Jakamã na htem ty nê Tîrtûm pê awry rax ã ri pa. No kapêr nywja na tûmta rom mex o mex. Na hte Tîrtûm mê pamã kapêr nywja jarênh o:

–Kot paj tanhmã mê akrã hto ka mê amnhî to mex pix o ri apa. Jao ixkôt ri amnhî nhîpêx mex o ri apa. Anê.

¹⁰ Nê kapêr tûmja te kot kanê hpôk kryre pyrãk. No kapêr nywja mex o kot tûm jakrenh jakamã te kot mêmô hpôk rûnh o kanê hpôk kryre jakrenh pyrãk. Jakamã nhûm mê kot hirã rax kãm ri mrar gryk ã hpôk grire nhîrã kamã mrar kêt pyrãk. ¹¹ Tîrtûm kapêr tûm te kot Mojes kuk pyrãk. Na pre kamã hirã rax tâ gaa nê amnhîm hprî nê kamã hirã hapêx o mō. Nê gaa nê hapêx. No kêt Tîrtûm kapêr nywja te kot Tîrtûm nhîrã htýx rãhã ho rãhãta pyrãk. Koja urãk nê aa hapêx kêt kumrêx.

*Ijaewjê jarênh
Rômãn 11.7-10*

¹² Nê Tîrtûm kapêr nywja mex o mex jakamã na pa hte ixãmnhîx mê kãm harênh o ri ixpa. ¹³ Te ixte Mojes kot amnhî nhîpêx pyrãk kêt. Na pre hte Mojes ixkînhã ãmnhîx Ijaewjê mã Tîrtûm kapêr jarênh o ri pa hkêt nê. Mê kot hkuk kãm hirãta ra hapêx o mōr ã omunh nhûm hpijaàm pymaj na pre kupêxê puroore ho amnhî kuk pro nê ri mê hkôt pa. ¹⁴ Jakamã nhûm prem hprî hã hkuk kãm hirã pumunh mex kêt nê. Nê Tîrtûm kapêr ã kagã htûmja nhûm prem mããnen hprî hã mar mex kêt nê. Mê hkrã hihtýx jakamã te mê kot amnhî jamak pro nê mêmôj mar mex kêt pyrãk jakamã mê kot mar tâ hprî hã mar kêt nê. Nê hkôt ri amnhî nhîpêx mex kêt nê. No mê kot Kris kôt amnhî xunhwýr xwýnhjaja na hte Tîrtûm amnhî tâ mê omu nê te mê nê mê hamak hpro xãta rênh par nê rênh pyrãk o mê hipêx nhûm mêmprî hã kapêr mar týx nê.

¹⁵ Tã na hte Ijaewjaja arî jarãhã Mojes kot Tîrtûm kapêr ã kagã htûm

kamã harênh o pa. Nom arî mê hkrã hihtýx jakamã te mê kot amnhî jamak pro nê kamã harênh o pa pyrãk o amnhî nhîpêx jakamã kormã hprî hã mar kêt nê. ¹⁶ Tã koja mê hkwýjaja Pahihti Jejus Kris kôt amnhî xunhwý nhûm amnhî tâ omu nê te kot mê hamak nê hpro xã hpyr nê mêmh pyrãk o mê hipêx nhûm mêmprî hã kapêr nyw mar týx nê. ¹⁷ Pahihti mê Karōja wa htipxi jakamã na hte mê pakamã agjê nê hprî hã mê pamã kapêr o amnhîrît o pa. ¹⁸ Ra mê pahte Pahihti Kris kôt amnhî xunhwýr jakamã te mê pahte mê kot amnhî jamak pro xwýnh kot amnhî nhîpêx pyrãk kêt. Nhûm Pahihti Karōja tanhmã mê panhîpêx to pu mê ra hkôt amnhî nhîpêx mex o mō. Jakamã na htem mê pahte amnhî nhîpêx nyw pumunh kôt Tîrtûm kot tãm amnhî nhîpêx ã omunh kurê kumrêx. Kormã mê pahte hkôt amnhî nhîpêx mex kumrêx kêt tâ ra hkôt amnhî nhîpêx mex o mō. Jao te tãm kot amnhî nhîpêx pyrãk o amnhî nhîpêx o mō.

4

Jejus kapêr te kêp kanê pyrãk ã harênh

Wam Korîit 2.1-5; Sikûn Korîit 1.12; Wam Tesarôn 2.1

¹ Nê na pre Tîrtûm ixto mex nê tanhmã kãm ixãpênh to hã inhmã karō. Ixte ma mê kãm kapêr jarênh o ri mê hkôt ixpa kaxyw. Jakamã na pa hte ixãmnhîx mê hkôt mê kãm harênh o ri ixpa. ² Nhûm mê hkwýjaja axtem nê ixêx o ri ixpa hã ijarênh tâ ixte ã amnhî nhîpêx anhýr kêt. Na pa hte amnhî tomnuj o ri ixpa hkêt nê. Mê hkwýjaja kot mê no kupyr kaxyw mê kãm Tîrtûm kapêr o hêx o pa htã pa na pa hte ã amnhî nhîpêx anhýr kêt nê. Ixprî hã mê kãm harênh o ixpaja na inhmã hprãm jakamã na pa hte ixkatat kôt harênh o ri mê hkôt ixpa. Mê piitã mê kot ixêx kêt kôt ixpumunh mex kaxyw. Tîrtûm kot ixêx kêt kôt ixpumunh mex. ³ No nhýrmã mê htyk nê ma kuwy hwýr mê pa

mã xwýnh pixjaja na htem hprĩ hã ixkapēr mar mex kêt nē. ⁴⁻⁶ Satanasti tãm kēp mē hpãm. Kēp mē kãm Tĩrtũm kapēr mar prãm kêt xwýnh piitã mē hpãm. Jakamã na pa hte mē kãm tanhmã Jejus jarēnh to. Kēp Tĩrtũm Kra hã harē nē te kot Tĩrtũm kot amnhĩ nhĩpēx pyræk ã harēnh o ri ixpa. Hãmri nhũm Satanasti tee ri ja hã ixpumu nhũm ja kēp omnuj nē. Jakamã nhũm tanhmã Tĩrtũm nē mē hkrã hto nē te mē hamak pro pyræk o mē hipēx. Mē kot hprĩ hã Jejus jarēnh mar nē hkôt amnhĩ xunhwýr pymaj nhũm ã nē mē hipēx anē. Jejus jarēnh te kēp kanē hpøk mex pyræk jakamã mē kot mar kêt xwýnhjaja te kamàt kô kamã ri mē pa pyræk. No nhũm Satanasti tãm kot nē mē no kupyw jakamã nhũm htem ã ri kamàt kô kamã mē pa pyræk o amnhĩ nhĩpēx anē.

Amnepê mã kormã mēmoj kêt ri nhũm kamàt kô pix. Tã nhũm Tĩrtũm tanhmã kapēr to nē kapēr o:

—E kê hirã kato. Anē.

Hãmri nhũm ra kapēr xà hkôt hirã kator kurê kumrēx. Tã ja pyrã nē na pa pre kamàt kô kamã ixtýx ri ixpa pyræk nhũm Tĩrtũm te kot inhmã kanē hpøk nhũm hirã pyræk o inhĩpēx pa mex o mex ã omunh kurê kumrēx. Hãmri nē Jejus Kris kot amnhĩ nhĩpēx ã omu nē te Tĩrtũm kot amnhĩ nhĩpēx ã omunh pyræk. Wa kot amnhĩ nhĩpēx te kot axpēn pyræk.

Nē na pa hte pam tanhmã amnhĩ jarēnh to ho ri ixpa hkêt nē. ãm Jejus Krisja pix na pa hte harē. Tapxipix na kēp mē panhõ Pahihti. Jakamã hkĩnhã te ixpē mē amã ixàpēnh xwýnh pyræk o na pa hte mē amã kapēr jarēnh o ri mē akôt ixpa.

Pawre te kēp poti grære nhĩpēx pyræk ã harēnh

Wam Korīt 2.4-5; Sikùn Korīt 11.23, 12.9

⁷ Nē Tĩrtũm ixrom hihtýx o hihtýx. No pa na hkĩnhã ixihtýx kêt. Te ixpē poti grære nhĩpēx pyræk jakamã na pa hte Tĩrtũm xihtýx xwýnh pix nhĩ hã mē kãm kapēr jarēnh o ri mē hkôt

ixpa. Nhũm htem inhma nē ãm hãmri ixte ý hã ixkapēr ã ixpumunh kurê kumrēx. No pa ixte amnhĩ krã hkôt ixkapēr ã ijarēnh kêt nē.

⁸ Na pa hte mē hkôt mē kãm Jejus jarēnh o ri ixpa nhũm mē hkwýja tōhã inhma nē ja hã inhĩpēx kati nē pa amnhĩ xà htýx kamã ama. Nom nhũm Tĩrtũm mē kutã tanhmã ixkrã hto pa inhmã amnhĩ xà kamã ijamak puma hkêt nē arĩ mē kãm kapēr jarēnh o ri mē hkôt ixpa. Nē amnhĩ kaxyw Jejus kôt pix mã ijamaxpēr týx rãhã pē tee ri amnhĩ kukamã ijamaxpēr o ri ixpa hkêt nē.

⁹ Nē mē kãm ixkurê xwýnhjaja ohtôô. Na htem xatã Jejus ã tanhmã ixtomnuj to htã pa kormã ixtýk kêt nē. Na pa hte Tĩrtũm kamnàr rom arĩ mē hkôt ixpa nhũm Tĩrtũm ixkôt pa ho pa. ¹⁰ Na htem Jejus pyrã nē ixpĩr kaxyw tanhmã inhĩpēx to. No ãm ko. Kojã mē nhýrmã ixpĩ rý ko. Ixte amnhĩ kukamã ixàhpumunh kêt. Kot paj ãm arĩ ixtĩr ri mē kãm Jejus jarēnh o ri mē hkôt ixpa. Kēr kê mē hkwýjaja ixkapēr ma nē axpēn mã tanhmã Jejus jarēnh to nē harēnh o:

—Nà pēr ãm hãmri na pre Jejus akupým htĩr nē tanhmã hkwýjê ho mex to. ãm hãmri na hte Pawre ja hã harē. Anē.

¹¹ Mē kot Jejus ã ixpĩr mã tã pa arĩ mē kãm akupým htĩr ã harē. Tĩrtũm na hte ja kaxyw tanhmã ixkrã hto pa arĩ mē kãm harēnh o ri mē hkôt ixpa.

¹² Na pa pre ra mē amã harē ka prem inhma nē Jejus kôt amnhĩ xunhwýr kurê kumrēx nē amnhĩ nhĩpēx nyw o amnhĩ nhĩpēx o ri apa. Jakamã ixpyrà nē mē apē atĩr tũm nē apa mã xwýnh. Nhũm htem piitã mē ate Jejus kôt amnhĩ xunhwýr ã mē apumu. Tã nhũm mē kot Jejus ã ixpĩr kaxyw. Nom kwār mē mãmrĩ ixpĩ. Ja inhmã tanhmã kute hkêt. Mē kot ixpĩr mã tã kot paj arĩ Jejus kapēr jarēnh o ri ixpa rãhã ty. Ra mē kot ixkapēr mar nē Jejus kôt amnhĩ xunhwýr xwýnhjaja mē pahpyrà nē kēp htĩr tũm nē pa ho pa mã xwýnh kēnã. ¹³ Jakamã kwār mē mãmrĩ ixpĩ. Na pa

hte arī amnhī kaxyw Tīrtūm kôt ijamaxpēr mex rāhā nē. Amnepē mā na pre Pahi finat Tawija tanhmā Tīrtūm kapēr jarēnh to nē harēnh o:

Ām hāmri na Tīrtūm kapērja. Hêx kêt jakamā na pa hte mē kām harēnh rāhā ho ri ixpa. Anē.

Tā pa hte Tawi pyrā nē mē piitā mē kām Tīrtūm kapēr jarēnh o ri ixpa. Tīrtūm kot mē pamā tanhmā mēmoj to hêx to hkêt. ¹⁴ Ra kot amnhī jarēnh xā hkôt akupÿm Pahihti Jejus o htīr jakamā kot puj mē nhÿrmā urāk nē ty nhūm akupÿm mē pahto mē pahtīr nē ma war amnhī wÿr mē pahto api.

¹⁵ Amnepēm na pa pre ma mē awÿr mō nē mē akôt mē amā Tīrtūm kapēr jarēnh o ri ixpa. Ka prem inhma nē Jejus kôt amnhī xunhwÿ nē ixpyrā nē Tīrtūm mā mex o mex ā harē. Jakamā kwār mē māmri Jejus ā tanhmā inhīpêx to. Koja mē gaa nē rī mē hkwyjaja mē pahpyrā nē Jejus kôt amnhī xunhwÿ nē Tīrtūm mā mex o mex ā harē.

Pawre tee ri amnhī kukamā hamaxpēr kêt ā kot amnhī jarēnh

Rōmān 8.17; Sikūn Korīt 1.7; Wam Pêtre 1.3-9, 4.12-16, 5.10

¹⁶ Jakamā na pa tee ri amnhī kukamā ijamaxpēr o ixkaprī nē ixpa hkêt nē. Mē kot Jejus ā tanhmā ixtomnuj to htāā pa hte ixamnhīx kapēr jarēnh o ri ixpa. Ra ixpigêt nē ixirerek o inhmōr tā inhōpinh xā kaxwÿnh kām ijamaxpēr o Jejus kôt amnhī nhīpêx mex o mō. ¹⁷ Mē kām ixkurē xwÿnhjaja na htem Jejus ā inhīpêx kati htā ā inhīpêx anhÿr japjê hkêt nē. Nom kot paj nhÿrmā ty nhūm Jejus akupÿm ixtō ixtīr pa Tīrtūm mē wa kuri inhmex kumrêx nē ixpa ho ixpa. Mē kot ixtomnujja na mē ho apkati grēre no kot paj nhÿrmā Tīrtūm mē Krata wa kuri inhmex kumrêx nē ixtīr tūm nē ri ixpa ho ixpa. Jao rāhā ho rāhā.

¹⁸ Jakamā na pa tee ri mē kot tanhmā ixtomnuj tota kukamā ijamaxpēr o ri ixpa hkêt nē. Ja koja tokyx hapêx. Na pa hte ām nhÿrmā Tīrtūm nhō krī kamā inhmex nē

ixkīnh rāhā ri ixpaja pix kukamā ijamaxpēr o ri ixpa.

5

Mē panhī nyw jarēnh

Pirīpos 3.21; Sikūn Pêtre 1.13-14

¹ Nē mē panhīja te kot tyrti hō ho ixkre pyrāk. Na htem tyrti hō ho ixkre nhīpêx nhūm gaa nē hapêx. Tā mē panhīja na hte urāk nē hapêx tokyx anē. Na pu htem ri papa nē gaa nē pawej nē ty. Tā nhūm Tīrtūm hpānhā mē pahpê hkrajê mā mē panhī nyw gō pu mē kuri ō krī kamā pamex kumrêx nē pahtīr tūm nē papa ho papa. ²⁻³ Na pu htem jar pahpunuj nē papa. Nē mē paxā nhi nē mē pahkaprī nē. Mē panhī htūmja te kot mē paxê htūm pyrāk jakamā na pu htem ty nē te paxê htūm kwryñh nē hpānhā nyw jagjênh pyrāk o amnhī nhīpêx. Tā na pu htem amnhī kukamā panhī nywja mā pajamaxpēr o ri papa. Kot pu mē kaxkwa kamā pahkarō pix nē ri papa hkêt nē. Mē panhī nyw ā kot puj mē ri papa ho papa.

⁴ Nē na pu htem jar pahpunuj nē pamex kêt nē ri papa. Nē tokyx mē pahtyk nē panhī htūm o pajapêx nē hpānhā panhī nyw ā mē papa hprām. Tā koja Jejus tokyx akupÿn wrÿk japêr pu mē pahtyk kêt rāhā tokyx panhī nywta o panhī nyw. Nom koja tokyx akupÿn wrÿk kêt japêr pu mē nhÿrmā ty nhūm Tīrtūm akupÿm mē pahto mē pahtīr nē mē pamā mē panhī nyw gō pu mē ho panhī nyw. ⁵⁻⁶ Na pre ra Tīrtūm mē panhī nyw kukamā hamaxpēr nē mē pahtā tanhmā amnhī jarēnh to. Nē mē pahwÿr Karō rē nhūm mē pahkarō mā agjê pu mē ja hā amnhī pumu nē pahkīnh nē pajamaxpēr o:

—Nà ra Tīrtūm kot ixwÿr amnhī Karō mēnh nhūm ixkarō mā àr jakamā koja māānēn nhÿrmā inhmā inhī nyw gō. Kormā inhī htūm kamā ixpa nē Pahihti Jejus mē wa ō krī kamā ixpa hkêt tā koja nhÿrmā inhmā inhī nywja gō pa inhī nyw o wa kuri ixpa ho ixpa. Nà koja ā inhīpêx anē.

Anhŷr o pajamaxpēr pē pahkīnh nē papa.

⁷ Nē mē pahte jar pano ho nhŷri Jejus pumunh kēt tā no ām panhōpinh xà kaxwŷnh kām kām pajamaxpēr mex nē. ⁸ Jakamā na pu mē tee ri amnhī kukamā pajamaxpēr o papa hkēt nē. Na pu htem ām tokyx mē pahtyk nē ma Pahihti Jejus nhō krī hwŷr paxàpir jamār o papa. Ō krīja kēp mē papapxà kumrēx jakamā na pu htem ma hwŷr paxàpir pix kukamā pajamaxpēr rāhā nē. ⁹ No ām mē pamā ja pix prām kēt. Na pu htem määnēn pamā Jejus mā hprām xà hkôt nhŷri tanhmā kām amnhī nhīpēx to ho ri papa hprām o papa. Jar mē panhī htŷm rāhā rŷ mŷtar kuri ō krī mex kām mē panhī nyw ā tanhmā kām amnhī nhīpēx to ho ri papaja na mē pamā hprām.

¹⁰ Nē na hte Krisja jar mē pahte tanhmā amnhī nhīpēx to hā mē pahpumunh o hkrī. Mē pahte tām amnhī nhīpēxja nē mē pahte amnhī tomnujja nhŷm hte hā mē pahpumunh rāhā ho hkrī. Tā koja nhŷrmā kot mē pahte tanhmā amnhī nhīpēx to hā mē pahpumunh kôt tanhmā mē panhīpēx to. Mē pahte tām amnhī nhīpēx o ri papa xwŷnhjaja koja ra mē panē htyk kukwak ri mē pahto mex nē. No mē kot amnhī tomnuj o mē pa xwŷnhjaja koja mē homnuj tŷx nē. Jakamā na pa inhmā kām hprām xà hkôt pix mā amnhī nhīpēx o ixpa hprām nē.

*Mē pajamaxpēr nyw jarēnh
Rōmān 6.4-6; Sikŭn Korīt 4.2; Epes
4.22-24; Korosē 3.9-10*

¹¹ Nē Tirtŷm kot hprī hā mē pahpumunh rāhā ho hkrī jakamā inhmā kām hprām xà hkôt pix mā amnhī nhīpēx o ri ixpa hprām. Mān ka mē ra ja hā ixpumunh mex nē rŷ ko. Mē piitā mē kot hkôt amnhī xunhwŷr prām xāj na pa hte mē kām kapēr jarēnh o ri ixpa. ¹² Nom ixte ja hā amnhī to jarkrar o ri ixpa hkēt. Ām mē ate inhmar nē mē kēp Kris nhŷ hā mē ahkre hā amnhī to hēx xwŷnhjē mā tanhmā ijarēnh to kaxyw na pa ā mē

amā amnhī jarēnh anē. Mē kot Tirtŷm kapēr jahkre mex kumrēx ā amnhī to jarkrar tā na htem hkôt amnhī nhīpēx kēt nē. Tā mē ate aprī hā ixte Tirtŷm kapēr kôt amnhī nhīpēx mex ā ixpumunh nē tanhmā mē kām ijarēnh to kaxyw na pa ā te ixte amnhī to jarkrar pyrāk o mē amā amnhī jarēnh anē. ¹³⁻¹⁴ Mē kot ixkrā pipānh ā ijarēnh tā Tirtŷm na mē akaxyw ixām pa hte mē amā kapēr jarēnh o ri mē akôt ixpa. Ixkrā pipānh kēt. Ixte Tirtŷm kām hprām xà hkôt tanhmā amnhī nhīpēx to xwŷnh na pa. Tā mēmo kaxyw na pa hte ā kapēr jarēnh rŷnh anhŷr o ri mē akôt ixpa? Nā inhmā mē akīnh kēnā. Mē ate Tirtŷm kôt tām amnhī nhīpēx prām xāj na pa hte ā mē amā kapēr jarēnh anhŷr rāhā nē. Kris na pre tanhmā ixto pa inhmā mē akīnh nē. Te tām kām mē ajapē pyrāk. Na pre Kris amnhī grōnh kôt mē pahpiitā mē nē ty. Tirtŷm kot mē pahte amnhī tomnuj mŷrapē tanhmā mē pahto pymaj nhŷm mē pahpiitā mē panē ty. Jakamā te mē pahpiitā Jejus kôt mē pahtyk pyrāk o na pu htem amnhī nhīpēx. Jao te mē pahte amnhī nhīpēx tŷmja mē pahpē hapēx par pyrāk o pu mē amnhī nhīpēx nyw o amnhī nhīpēx o ri papa. ¹⁵ Mē pajamaxpēr nyw o tām mē pahte amnhī nhīpēx o papa kaxyw na pre Jejus mē panē ty. Jakamā na pu htem axte amnhī pix kukamā ri pamā mēmoj prām o ri papa hkēt nē. Na pu htem määnēn Tirtŷm kām hprām xà hkôt tanhmā kām amnhī nhīpēx to ho ri papa. Ja kaxyw na pre Tirtŷm akupŷm Kris o htŷr pu mē kukwak ri pajamaxpēr nyw o amnhī nhīpēx o papa. ¹⁶ Jao mē piitā mē hkrā hkā hā mē omunh xà hkôt pix mā tanhmā mē harēnh to hkēt nē. Mē kot amnhī tomnuj ā mē harēnh rŷ mē kot amnhī to mex ā mē harēnh kēt nē. Amnepē mā na pa pre ā Kris jarēnh anē nē harēnh o:

—Nā Krisja na hte mē pahte amnhī nhīpēx kôt amnhī nhīpēx kēt nē. Ām ri kot mē pahte amnhī nhīpēx kwŷm ri amnhī nhīpēx jakamā kot amnhī

tomnuj tỳx xwỳnh na.

Anhỹr ã harẽnh o ixpa. Tã axte ã harẽnh anhỹr hkêt nẽ. Kot amnhĩ tomnuj xwỳnh kêt jakamã na pa hte hpãnhã hkôt pix mã tanhmã kãm amnhĩ nhĩpêx to ho ri ixpa.

Mẽ pahpê Tĩrtũm kràmnhwỳ hã mẽ pajarẽnh

Rõmãn 5.1, 5.10; Epes 6.20; Korosẽ 1.20

¹⁷ Nẽ koja mẽhõ Kris kôt amnhĩ xãm nhũm kot amnhĩ nhĩpêx tũmja kệp hapêx nhũm hpãnhã kot amnhĩ nhĩpêx nyw pix o amnhĩ nhĩpêx nẽ hamaxpêr nyw pix o hamaxpêr.

¹⁸ Tĩrtũm na hte tanhmã mẽ pahto pu mẽ ã amnhĩ nhĩpêx anhỹr o ri papa. Na pu prem pamã hkurê htã nhũm Kris kukwak ri mẽ pahte hkôt amnhĩ nhĩpêx xwỳnhjê ho hkràmnhwỳ. Hãmri nẽ tanhmã mẽ pahte amnhĩ nhĩpêx to hã mẽ pamã karõ nẽ mẽ pamã:

–E kêr ka mẽ ma krĩ piitã hkôt ri mẽ kãm ixkapêr jarẽnh o ri apa kê mẽ ama nẽ mẽ apyrã nẽ Kris kôt amnhĩ xunhwỳ. Pa ja hã mẽ omu nẽ ixte mẽ anhĩpêx pyrã nẽ mẽ ho ixkràmnhwỳ. Anẽ.

¹⁹ Jakamã na pa hte ma mẽ kãm kapêr jarẽnh o ri mẽ hkôt ixpa nẽ mẽ kãm:

–E pa mẽ amã mẽmoj mex jarẽ ka mẽ inhma. Nà na pre Krisja mẽ pahte amnhĩ tomnuj mỳrapê mẽ panê ty. Nẽ htyk o Tĩrtũm mã mẽ pahpãnhã amnhĩrer par kumrêx. Jakamã na ra Tĩrtũmja Kris kukwak ri kãm mẽ pahpiitã mẽ pahto hkràmnhwỳ prãm. Koja kukwak ri mẽ pahte amnhĩ tomnuj piitã ho hamakêtkati nẽ axte kãm hamaxpêr kêt kumrêx. Kãm mẽ pahto hkràmnhwỳ hprãm jakamã koja ã mẽ panhĩpêx anẽ. Jakamã e kwa mẽ tokyx Kris kôt amnhĩ xunhwỳ kê Tĩrtũm kot inhĩpêx pyrã nẽ mẽ ato hkra nẽ mẽ ato hkràmnhwỳ.

Anhỹr o mẽ kãm harẽnh o ri mẽ hkôt ixpa. ²⁰ Kris kot mẽ apiitã mẽ awỳr inhmẽnh jakamã na pa hte ã hã mẽ amã kapêr jarẽnh o ri mẽ akôt ixpa nẽ mẽ amã:

–E Tĩrtũm kãm mẽ ajapê jakamã na mẽ awỳr inhmẽ pa mỗ. Jakamã kwa mẽ tokyx amnhĩ tomnuj kaga nẽ hkôt amnhĩ xunhwỳ. Kê amnhĩ tã mẽ apumu nẽ mẽ ato hkràmnhwỳ. Anẽ.

²¹ Krisja aa kot tanhmã amnhĩ tomnuj to hkêt kumrêx tã nhũm pre Tĩrtũmja te mẽ kot amnhĩ tomnuj tỳx kumrêx xwỳnh pyrãk o hipêx. Tã mẽmo kaxyw na pre ã hipêx anẽ? Nà mẽ panê kênã. Mẽ pahte hkôt amnhĩ xunhwỳr nhũm kot mẽ panhĩpêx o te aa mẽ pahte amnhĩ tomnuj kêt kumrêx xwỳnh pyrãk o mẽ panhĩpêx kaxyw na pre ã mẽ panê Krata nhĩpêx anẽ.

6

¹ Tã kot ã Kra nhĩpêx anhỹr jakamã kwa mẽ ixkapêr ma nẽ mar tỳx nẽ. No mẽ ama nẽ ãm mar kêt nẽ. Tĩrtũm kãm mẽ pajapê htỳx jakamã mẽ pakutã nojarêt rãhã ho pa. Kumã na pa hte ã mẽ amã kapêr jarẽnh anhỹr o ri mẽ akôt ixpa. ² Amnepê mã na pre Ijaew mã kapêr nẽ mẽ kãm:

Na ka prem amex kêt nẽ ri apa nẽ amnhĩ to ixwỳ pa pre mẽ ama nẽ mẽmojta pẽ mẽ apytã nẽ mẽ ato mex nẽ. Anẽ.

Jakamã kwa mẽ inhma. Tĩrtũm kãm mẽ ate amnhĩ tomnuj pẽ mẽ apytãr prãm tỳx jakamã kwa mẽ tokyx amnhĩ to awỳ kê ã kệp mẽ apytãr anẽ.

Mẽ kot Kris ã tanhmã Pawre nhĩpêx to hã mẽ harẽnh

Sikûn Korîit 4.7, 11.23-33; Korosẽ 1.10

³⁻⁴ Nẽ mẽ kot Tĩrtũm kapêr mar nẽ hã ixtomnuj tã pa hte amnhĩ katut kôt mẽ kot tanhmã ixtomnuj toja rẽ nẽ ho ijamakêtkati tokyx anẽ. Nẽ arĩ mẽ kãm kapêr jarẽnh rãhã ho ri mẽ hkôt ixpa. Mẽ kot mar nẽ ãm mar nẽ hkaga pymaj na pa hte ã amnhĩ nhĩpêx anhỹr rãhã nẽ. Mẽ kot ja hã inhĩpêx punuj tã pa arĩ mẽ kãm harẽnh o ri mẽ hkôt ixpa. ⁵ Mẽ kot Kris ã ixtak nẽ ijagjênh nẽ tanhmã ixto kaxyw ixtã htũ htã pa hte mẽ kutã amnhĩ to htỳx nẽ ixkuhê. Na pa pre hte

Tîrtûm mã mẽ kãm kapêr jarênh rax nê. Jao tõhã inhõt kêt nê inhõtswa ho ri mẽ hkõt ixpa. Nê tõhã inhmã prãm tỳx nê ri ixpa. Tã no ãm arĩ mẽ kãm kapêr jarênh rãhã nê. ⁶ Inhmã tanhmã ixte amnhĩ tomnuj to hprãm kêt. Inhmã Tîrtûm kot amnhĩ nhĩpêx kôt pix mã amnhĩ nhĩpêx prãm. Nê inhmã inhgryk tokyx anhỹr prãm kêt. ãm inhmã mẽ piitã mẽ hkĩnh kãm mẽ ho mex pix prãm. ã na pa hte Tîrtûm Karõ nhỹ hã amnhĩ nhĩpêx anhỹr o ri mẽ hkõt ixpa. Mẽ kot ja hã ixpumu nê ra Tîrtûm kapêr ma nê hkõt amnhĩ xunhwỳr kaxyw. ⁷ Na pa hte ixkatàt kôt mẽ kãm ixkapêr mex pix nê. Tîrtûm xihtỳx xwỳnhja nhỹ hã ri mẽ kãm kapêr jarênh jao tãm amnhĩ nhĩpêx nê tãm ri ijamaxpêr o ri mẽ hkõt ixpa. Jakamã na htem ja hã ixpumu nê ixte Tîrtûm kapêr jarênh ma nê hkõt amnhĩ xunhwỳ. ⁸ Na hte mẽ hkwỳjaja kãm ixkĩnh nê nhũm mẽ hkwỳjaja axtem kãm ixkurê nê. Nê mẽ hkwỳjaja amnhĩm inhmex ã ijarênhũm mẽ hkwỳjaja axtem axpên mã tanhmã ixto kapêr punuj to. Mẽ kot ixêx nhi hã ijarênh tã pa hte ixkatàt kôt mẽ kãm ixkapêr o ri ixpa. Nom kwãr mẽ mãmrĩ tanhmã ri ixto kapêr to. Ja tanhmã inhmã kute hkêt. ⁹ Na hte mẽ hkwỳjaja ixkamã òkre kahak nê pika piitã hkõt axpên mã tanhmã ijarênh to ho pa. Mẽ kãm ixpĩr prãm tã no pa arĩ ixtĩr nê ixpa. Mẽ kot Jesus ã ixtomnuj tỳx tã kormã ixpĩr kêt nê pa ri ixtĩr nê ixpa. ¹⁰ Ixte Kris ã amnhĩ xà htỳx kamã ijamak o ri ixpa htã arĩ ixkĩnh nê ixpa. Nê ixkàxpore hkêt tã nhũm mẽ ohtô nê ixte mẽ kãm Jesus kapêr jarênh kukwak ri mex nê pa. Nê ixkukrêx rax kêt tã nhũm Tîrtûm ixto mex nê pa inhmex nê ixpa. Tã kot paj nhỹrmã ò krĩ kamã kuri inhmex kumrêx nê ixtĩr tũm nê ixpa ho ixpa. Jakamã na pa hte arĩ mẽ kãm Jesus kapêr jarênh o ri mẽ hkõt ixpa. ¹¹ E Korîit kãm ixkràmnhwỳjaja. Na pa ixprĩ hã mẽ amã amnhĩ nhĩpêx jarênh par kumrêx. ¹² Inhmã mẽ akĩnh tỳx tã te

mẽ amã ixkĩnh kêt pyræk. ¹³ Kwa te mẽ ate ixto mẽ akatut nê akuhê pyræk o inhĩpêx kêt nê. Amnhĩ pyræk nê amã ixkĩnh nê hkêt wehe. Te mẽ apê ixkra pyræk o na pa ã mẽ amã ixkapêr anê.

Te mẽ pahpê Tîrtûm nhõrkwỳ pyræk ã mẽ pajarênh

Wam Korîit 10.20-22, 15.33; Epes 5.3-14; Sikûn Ximotre 2.4; Xiakre 4.4-5; Wam Pêtre 2.11, 4.1-6

¹⁴ Nê kêt ka mẽ kot Kris kôt amnhĩ xunhwỳr kêt xwỳnhjê mẽ mẽ mẽmoj tã tanhmã axpên mar to hkêt nê. Rỳ mẽhõ ho amjên rỳ mẽhõ ho aprõ hkêt nê. Ahpỳnhã mẽ pajamaxpêr kênã. Tanhmã kot we mẽ hamaxpêr nyw xwỳnhjaja nê mẽ hamaxpêr tũm xwỳnhjaja amnhĩ to nê axpên kôt hamaxpêr nê ri axpên kôt pa? Nà koja mẽ ã amnhĩ nhĩpêx anhỹr kêt nê. Ahpỳnhã mẽ pajamaxpêr. Na hte hirã htỳxja kamàt kô mẽ pihkàr kêt nê. ¹⁵ Xà na hte Kris mẽ Satanasti wa axpên kôt hamaxpêr? Nà wa kot axpên kôt hamaxpêr kêt. Ahpỳnhã wa hamaxpêr nê ahpỳnhã wa kot amnhĩ nhĩpêx. Nê ahpỳnhã hirã nê ahpỳnhã kamàt kô. Nê mẽ pahpê Kris kwỳjaja nê mẽ kêp hkwy hket xwỳnhjaja ahpỳnhã mẽ pajamaxpêr nê ahpỳnhã mẽ pahte amnhĩ nhĩpêx. ¹⁶ Na pu htem Tîrtûm mã amnhĩ jarênh xà hã ixkre kamã sãnti xunhwỳr nê amnhĩ to hwỳr pê kãm mex o mex ã harênh kêt nê. Axtem na sãntija. Mẽ panhõ Tîrtûmja sãnti rom htĩr tũm rãhã nê pa ho pa xwỳnh. Nê mẽ papajaja te mẽ pahpê Tîrtûm nhõrkwỳ pyræk. Kapêr ã kagà htũm kot ja jarênh kot:

Ixkrajaja te kêp inhõrkwỳ nhũm ixpê ò dõn pyræk. Te ixpê inhõrkwỳ kamã ixpa xwỳnh pyræk jakamã kot paj ixkrajê kamã ri ixpa ho ixpa. Ixpê Mẽhpãm na pa. Anê.

¹⁷⁻¹⁸ ã Tîrtûm xihtỳx xwỳnhja kot amnhĩ jarênh anhỹr jakamã na hte mẽ kot amnhĩ tomnuj xwỳnhjê nê mẽ pahkurê ho:

Kêt ka mẽ hkõt ri apa hkêt nê. Kwarĩ ho kwarĩ.

Nē mẽ hkôt ri amnhĩ nhĩpêx o apa
hkêt nê.
Kot kaj mẽ ixkapêr ma nê ixkôt
amnhĩ nhĩpêx hã kot paj amnhĩ
wỳr mẽ awỳ nê mẽ ato ixkra.
Nê pa kot paj ixpê Mēapām maati.
Anê.

7

¹ Tã ã Tĩrtũm kot mẽ pahto
hkra nê mẽ pahkôt pa ho pa hã
amnhĩ jarênh kot anhỳr jakamã kwa
ixkràmnhwỳjaja. Kêr pu mẽ kapêr ma
nê tanhmã amnhĩ tomnuj to hkêt nê.
Nê mẽmoj punuj kukamã pajamaxpêr
kêt nê. Nê ãm kapêr kôt pix mã amnhĩ
nhĩpêx mex rãhã nê.

*Pawre kot Korīt nhõ xwỳnhjê nhỹ
hã hkĩnh ã harênh*

² Nê kwa Kris kôt ixtõ nê ixtõxjaja.
Kêr ka mẽ tee ri amnhĩ tã tanhmã
inhmã ajamaxpêr to hkêt nê. Na pa
pre tanhmã mẽ atõ hto hkêt nê. Rỳ
tanhmã mẽ atõ hto ka mẽ ja hã ix-
pumu nê ixkôt tanhmã amnhĩ tom-
nuj to hkêt nê. Rỳ pa pre ixêx rom
tanhmã mẽ anokupyr to ho ri ixpa
hkêt nê. Kwa mẽ amã ixkĩnh nê tokyx
ixkôt ajamaxpêr kêt wehe. ³ Mẽ ate
inhmar nê amnhĩ tã apijaàm kaxyw
na pa ã mẽ amã ixkapêr anhỳr kêt
nê. Inhmã mẽ akĩnh kênã. Na pa
pre inhmã mẽ akĩnh ã amnhĩ jarênh
rax nê. Inhmã ri mẽ akôt ixpa rãhã
ho ixpa hprãm. Rỳ ka mẽ nhỹrmã
apiitã apikaprãr par japêr pa inhmã
mẽ akôt ixtyk prãm nê. ⁴ Na pa hte ra
mẽ amã ijamaxpêr pê ixkĩnh nê ixpa.
Nà kot kaj mẽ ixkapêr ma nê Jejus kôt
amnhĩ nhĩpêx mex nê. Tã kêr ka mẽ
ã amnhĩ nhĩpêx anhỳr rãhã nê. Na pa
hte jar ra amnhĩ xà htỳx kamã ijamak
o ri ixpa htã no ãm mẽ amã ijamaxpêr
nê ixkĩnh nê.

⁵ Nê na pa pre amnê Masetõn wỳr
kormã Xitre japêr o mō. Hãmri nê
Masetõnja wỳr pōj nê hapêr pê mẽ
kãm Jejus kapêr jarênh o ri mẽ hkôt
ixpa. Hãmri nhũm mẽ kãm ixkurê
xwỳnhjaja Kris ã inhĩpêx punuj nê hã
inhmã àkjêr pix o pa. Hãmri nê ma
Masetõn kamã krĩ piitã hkôt ri mẽ

kãm ixto kapêr punuj nê pa amnhĩ tã
mẽ mar o ri mẽ hkôt ixpa. Nê mẽ
kajaja mẽ ate Kris kaga nê nhãm mẽ
hamaxpêr kôt amnhĩ nhĩpêx pymaj
na pa pre tee ri mẽ akukamã ija-
maxpêr o ri mẽ hkôt ixkaprĩ nê ixpa.
⁶ Tã Tĩrtũm kêp mẽ hkaprĩ xwỳnhjê
pumunh nê akupỹm mẽ ho mẽ hkĩnh
xwỳnh jakamã na pre ixkaprĩ hã ix-
pumu nê ixwỳr Xitre mẽ. Pa pre
omu nê akupỹm ixkĩnh nê tãm ija-
maxpêr. ⁷ No ãm Xitre pumunh kôt
pix mã ixkĩnh kêt. Na pre ixwỳr
pōj nê tanhmã inhmã mẽ ajarênh
to nê mẽ ate tanhmã ho mex to hã
mẽ ajarê. Nê mẽ amã ixpumunh
prãm tỳx ã mẽ ajarê. Nê Kris kôt
mẽ atõta hpijaàm kêt o pa nhũm ixte
kagà kamã hã mẽ amã ixàkjêr nhũm
mẽ ate ja hã omunh nê ra amnhĩ
kamã apijaàm o akaprĩ htỳx ã mẽ
ajarê. Nhũm Tĩrtũm kot inhnê mẽ kãm
ixkurê xwỳnhjê pumunh mex kaxyw
mẽ ate ixto hwỳr ã mẽ ajarê. Na pre
ã inhmã mẽ ajarênh anê pa kuma nê
mẽ anhỹ hã ixkĩnh tỳx kumrêx.

⁸⁻⁹ Nê wam ixte mẽ amã kagàta
nhĩpêx kêt ri na pa pre tee ri mẽ
ate amnhĩ nhĩpêx ã mẽ ajarênh ma
nê mẽ akaxyw hipêx. Nê kamã mẽ
ate hpijaàm kêt xwỳnhhta kot tanhmã
amnhĩ nhĩpêx to hã omunh nê ãm
omunh o arĩ hkôt apa hã kagàta kamã
mẽ amã akir hãmri nê Xitre mã kugõ
nhũm kupy nê ma mẽ awỳr o mō. Tã
ka xep prem kamã harê nê ama nê
amnhĩ kamã apijaàm nê. Nê akaprĩ
nê ajamaxpêr o:

—Hêxta waa nê. ãm hãmri na Pawre
ã mẽ ijarênh anê. Na pa mẽ ã amnhĩ
nhĩpêx anê nê amnhĩ tomnuj tỳx nê.
Anê.

Tã nhũm Xitre akupỹn ixwỳr pōj nê
inhmã mẽ ajarê. Pa mẽ ajarênh ma nê
tee ri ijamaxpêr nê ijamaxpêr o:

—Hêxta waa nê. Mon pa pre axtem
nê ã ri mẽ kãm ixàkjêr anê? Nà na xep
prem kagàta kamã harê nê kuma nê
hkaprĩ htỳx nê. Anê.

Tã ãm hãmri na pa pre ã mẽ akaxyw
hipêx nê mẽmojta ã mẽ amã ixàkjêr
anê. Na ka xep prem kamã harê nê

ama nē tee ri ajamxpēr o ra akapri nē. Nom Tirtūm kām hprām xà hkôt na ka prem ja hã amnhĩ pumu nē ã akapri anē. Tã xep ra akupỹm tãm amnhĩ nhĩpêx nē akupỹm Tirtūm kôt amnhĩ nhĩpêx mex nē. Jao akupỹm akĩnh nē ri apa. Jakamã ãm hãmri na pa pre mẽ awyr wam kagàta mēnh nē mẽmoj tã ã mẽ amã ixàkjêr anē.

¹⁰ Koja Tirtūm krajê hõ tanhmã amnhĩ tomnuj to. Hãmri nē tee ri ja hã amnhĩ pumu nē amnhĩ kamã hpijaàm nē akupỹm Tirtūm kôt tãm amnhĩ nhĩpêx. Hãmri nē akupỹm mex nē tãm hamaxpēr pē hkĩnh nē ri pa. Nē axte tee ri amnhĩ kukamã hamaxpēr hkêt nē. Ja na Tirtūm kām hprām. Tã koja mẽ kêp hkra hkêt xwýnhjê pyrã nē tanhmã amnhĩ tomnuj to nē ra hpijaàm japêr. Nom hkwyjaja kot ja hã omunh pix myrapê hpijaàm nē arĩ Tirtūm kôt amnhĩ nhĩpêx kêt japêr. Hã koja nhỹrmã ty nē Tirtūm kra kot akupỹm hkôt tãm amnhĩ nhĩpêx xwýnhjê kĩnhã Tirtūm pē awry rax kumrêx nē ri pa.

¹¹ Mē pahte Tirtūm kapêr kwým ri tanhmã amnhĩ nhĩpêx to hã tee ri amnhĩ pumunh nē amnhĩ kamã hpijaàm nē akupỹm tãm amnhĩ nhĩpêxja na Tirtūm kām hprām. Tã na ka xep ã amnhĩ nhĩpêx anē. Wam ixte mẽ awyr kagà mēnhhta na ka xep prem kamã tanhmã ixte nã puro kamã hpijaàm kêt xwýnhhta ã mẽ amã ixàkjêr tota kamã akapêr nē ama. Hãmri nē tee ri mẽ ate kormã kot amnhĩ tomnuj ã kãm axàkjêr kêt ã amnhĩ kukamã ajamxpêr nē amnhĩ kamã apijaàm nē. Nom Tirtūm kām hprãm xà hkôt. Mē ate jam ajamxpêr pē amnhĩ kamã apijaàmja na kãm hprãm. Tã ka mẽ hpijaàm xwýnhhta kamã agryk nē kãm akapêr o:

—Kwa mẽ pahpê Jejus kwýjaja mẽ pahte ã amnhĩ nhĩpêx anhỹr kêt tã ka ã amnhĩ nhĩpêx anē. Nà na ka amnhĩ tomnuj týx kumrêx. Kot kaj ã amnhĩ nhĩpêx anē pa mẽ hã apumu nē gaa nē apyrã nē ã amnhĩ tomnuj anē. Kwa ja kaga nē axte ã amnhĩ nhĩpêx anhỹr kêt nē. Nē akupỹm Tirtūm kôt

amnhĩ xãm týx nē hkôt amnhĩ nhĩpêx rãhã ho ri apa. Anē.

Hãmri nhũm krĩ nhõ xwýnhhaja ja hã mẽ ajarēnh ma nē mẽ apê jamnuj ã mẽ apumunh kurê kumrêx. Æm hãmri na ka prem ã kãm akapêr anē.

¹² Nē ixte mẽ awyr kagà nē mēnhhta kamã na pa pre nã puro kamã hpijaàm kêt xwýnhhta mã tanhmã ixàkjêr to hkêt nē. Rý nã purota mã tanhmã ixàkjêr to hkêt nē. Na pa pre mẽ apê Kris kwýjê hwýr kagà nhĩpêx nē kamã tanhmã mẽ amã hpijaàm xwýnhhta ã karõ hto. Mē ate kamã harēnh hãmri nē inhỹ hã amnhĩ nē hanor nhũm Korīt nhõ xwýnh piitã kot ã mẽ ate amnhĩ nhĩpêx anhỹr ã mẽ apumunh kaxyw. Nē mẽ ate Tirtūm nom ã hipêx anhỹr jao mẽ amã ixkĩnh pē ixkapêr kôt ã hipêx anhỹr ã amnhĩ pumunh kaxyw.

¹³ Tã nhũm Xitre ixwýr pøj nē tanhmã inhmã mẽ ajarēnh to. Na xep pre mẽ awyr nojarêt nē tee ri amnhĩ kukamã hamaxpêr. Mē ate kagàta kamã harēnh nē ijarēnh mar nē kamã agryk pymaj tee ri amnhĩ kukamã hamaxpêr. Tã ma mẽ awyr mōn pøj nē mã amã kugõ. Ka xep prem kamã harē nē ama nē hkôt amnhĩ nhĩpêx kurê kumrêx nhũm mẽ ate amnhĩ nhĩpêx ã mẽ apumu nē hkĩnh nē. Hãmri nē tãm hamaxpêr. Tã ra akupỹn ixwýr mō nē inhmã mẽ ajarē pa mẽ ajarēnh ma nē ijaxwýja ixkĩnh nē. ¹⁴ Na pre kormã mẽ awyr nojarêt pa kãm tanhmã mẽ amex ã mẽ ajarēnh to. Tã nhũm xep ma mẽ awyr mōn pøj nē mẽ apumu nē hamaxpêr o:

—Nà pēr ãm hãmri na pre Pawre inhmã mẽ mex ã harē. Mē mex kēnã. Anē.

¹⁵ Tã nhũm pre mẽ arũm kato nē ra man akupỹn ixwýr mōn pøj nē inhmã mẽ ajarēnh o:

—Na pa pre ma mẽ hwýr mō nē mẽ kãm ixkapêr o ri mẽ hkôt ixpa nhũm mẽ ixkapêr ma nē ixkôt amnhĩ nhĩpêx kurê kumrêx nē ixto mex nē. Kormã ixte mẽ hwýr inhmōr kêt tã mẽ harēnh ma nē inhmã mẽ hkĩnh nē.

Tã pa ma mẽ hwÿr mõ nhũm mẽ ixto mex rax nẽ pa ra inhmã mẽ hkĩnh tÿx kumrẽx. Anẽ.

¹⁶ ã inhmã mẽ ajarẽnh anẽ pa mẽ ajarẽnh ma nẽ ixkĩnh tÿx nẽ. ãm hãmri na ka htem mẽmoj tã amnhĩ jarẽnh xà hkôt tanhmã amnhĩ nhĩpêx to ho apa.

8

Mẽ kot Kris kôt mẽ hkwÿjê pê õxy hkêt ã mẽ kãm karõ

Atre 11.27-30; Rõmãn 15.25-27; Wam Korî 16.1-4

¹ E Kris kôt ixkwÿjaja. Kot paj hpãnhã mẽ amã jar Masetõn kamã tanhmã Jejus kwÿjaja kot amnhĩ nhĩpêx to hã mẽ harẽ ka mẽ harẽnh ma. Na hte Tirtũm mẽ kutã nojarêt nhũm mẽ mex nẽ pa. ² Mẽ hkwÿjaja kot Kris ã mẽ hipêx kati nhũm mẽ kot amnhĩ xà htÿx kãm hamak o pa htã hkĩnh nẽ hamakêtkati nẽ ri pa. Nẽ mẽ hkàxpore hkryre htã ho õxy hkêt nẽ pa. Na htem amnhĩx ri mẽ kêp amrakati xwÿnhjê mã hkwÿ nhõr o pa.

³⁻⁴ Tã na prem Jerujarẽ kamã Kris kôt mẽ pahkwÿjê jarẽnh ma. Mẽ kêp amrakati hã mẽ harẽnh ma nẽ kãm mẽ hkaprĩ nẽ. Nẽ mẽ kãm mẽ hwÿr mẽmoj rẽnh nẽ mẽ ho ajuta hprãm nẽ. No ãm pa ixte mẽ kãm hã karõ xà hkôt kêt. Mẽ tãmjaja mẽ hamaxpêr xà hkôt na prem ã hamaxpêr anẽ nẽ mẽ kaxyw kàxpore ho pikuprõnh rax nẽ. Hãmri nẽ inhmã kugõ nẽ inhmã:

—Kwa na pa prem Jerujarẽ kamã Kris kôt mẽ pahkwÿjê jarẽnh ma nẽ mẽ inhmã mẽ hkaprĩ nẽ mẽ kãm mẽ ixkàxpore hkwÿ ho akuprõ. Jakamã e amÿ nẽ ma mẽ hwÿr o mõ nẽ mẽ kãm agõ kêt mẽ tokyx ho amnhĩm awjaprõ nẽ kuku. Anẽ.

⁵ Pa mẽ kuma nẽ ixtÿx ho ãm kàxpore grire hã hkamnhĩx nẽ ijamaxpêr o:

—Kwa mo mẽ hikàxpore rax koja mẽ ri ho akuprõ nẽ mẽ kãm kugõ? ãm mẽ hikàxpore hkryre kênã.

Anhÿr o ijamaxpêr tã no nhũm mẽ kaxyw ho rax nẽ ho akuprõ. Mẽ

hikàxpore hkryre htã mẽ kãm õr rax nẽ. Hãmri nẽ inhmã amnhĩ jarẽnh o:

—Na pa mẽ ra Pahihti Jejus Kris mã amnhĩ gõ. Mẽ ixte tanhmã kãm amnhĩ nhĩpêx to ho ri ixpa kaxyw. Jakamã e tanhmã mẽ inhmã mẽmoj tã karõ hto. Kot pa mẽ ama nẽ akapêr kôt amnhĩ nhĩpêx. Ja na pa mẽ inhmã hprãm nhũm Tirtũm haxwÿja kãm ja prãm. Anẽ.

⁶ Na pa pre ã mẽ kot amnhĩ nhĩpêx anhÿr ã mẽ omu nẽ mẽ apê Korî nhõ xwÿnhjê mã ijamaxpêr kurê kumrẽx. Hãmri nẽ Xitre mã mẽ ajarẽ. Na pre mẽ awÿr mõ nẽ mẽ amã Jerujarẽ nhõ xwÿnhjê jarẽ. Mẽ ate mẽ kãm kàxpore hkwÿ ho apikuprõnh kaxyw. Tã pa pre jam ijamaxpêr nẽ ra akupÿm mẽ awÿr mẽnh mã nẽ kãm:

—Kwa ma akupÿm Korî wÿr mõ nẽ mẽ kãm anẽ kêt mẽ ra kot amnhĩ jarẽnh xà hkôt Jerujarẽ nhõ xwÿnhjê kaxyw kàxpore hkwÿ ho akuprõ nẽ tokyx mẽ hwÿr kumẽ. Ra mẽ kãm Kris kôt mẽ hkwÿjê hkĩnh ã amnhĩ jarẽnh kênã. E kwa tokyj. Anẽ.

⁷ Na ka htem amnhĩ to mex o ri apa. Nẽ amnhĩ kaxyw Kris hkôt ajamaxpêr tÿx nẽ. Nẽ ma mẽ kãm Tirtũm kapêr jarẽnh mex o ri mẽ hkôt apa. Nẽ mẽ ajamaxpêr mex nẽ. Nẽ mẽ piitã mẽ ho mex o ri apa. Nẽ mẽ amã ixkĩnh o ri apa. Jakamã kwa kêt ka mẽ axamnhĩx mẽ kêp amrakati xwÿnhjê mã mẽ akàxpore hkwÿ nhõr o apa. Jao mẽ amã Tirtũm kĩnh tÿx ã amnhĩ to amnhĩrit. ⁸ Ixte ã mẽ amã ja hã karõ anhÿr tã hã mẽ atã ixihtÿx kêt nẽ. ãm mẽ kamã axukaprĩ hkôt mẽ ate mẽ kãm axamnhõr o apa kaxyw na pa ã mẽ amã ixkapêr anẽ. Masetõn kamã mẽ pahkwÿjaja kot amnhĩ nhĩpêxta pyrã nẽ. ⁹ Ra mẽ ate Jejus Kris kãm mẽ pajapê hã kot tanhmã amnhĩ nhĩpêx to hã mar mex. Amnepêm na pre kaxkwa kamã mex kumrẽx nẽ ri pa ho pa nhũm mẽmoj piitã kêp õ htã nhũm rer pa nẽ mẽ pahwÿr wrÿ nẽ mẽ pakamã kêp amrakati nẽ ri pa. Hikàxpore hkêt nẽ ri pa. Tã mẽmo kaxyw na pre ã mẽmoj mex piitã rer par nẽ mẽ pahwÿr wrÿk anẽ? ãm kot

mê pahto mex pix kaxyw. Kot mê pahto mex nhûm mê pahte kukwak ri mê paxàmnhîx ri mê pajamakêtkati nê mê papa kaxyw na pre ã amnhî nhîpêx anê. Mê pahte nhÿrmã uràk nê kaxkwa kamã pamex kumrêx nê ri papa ho papa kaxyw.

¹⁰ E kwa kêr ka mê tokyx kàxpore hkwÿ ho apikuprôn pa nê Jerujarê nhô xwÿnhjê hwÿr amê. Mê akumrêxjaja na ka prem ham amgrà hapêxta kamã ra mê kaxyw ho apikuprônha krax. Mê amã mê ho mex prãm xàj ham ho hkra x tâ no ãm kormã hatur xàm mênh nê mê hwÿr mênh kêt nê. ¹¹ Kwa mê tokyx ja ho ajapêx nà. Na ka prem ate ho anhÿr krax ã akînh pê kàxpore hkwÿ ho apikuprôn o apa. Tã kêr ka mê arî akînh rãhã ho apikuprôn par jatur xàm amê. No mê ri atÿx tanhmã ajamaxpêr to hkêt nê. Rÿ mê ajamaxpêr o:

—Nà kormã. Kot paj nhÿrmã ixkàxpore rax nê rî kormã mê hwÿr hkwÿ mê.

Anhÿr o mê ri ajamaxpêr hkêt nê. Mê ate tanhmã akàxpore hkre kamã kute hã omunh xà hkôt mê kãm hkwÿ pix gô. ¹² Kêr ka mê axàmnhîx akînh kãm mê kãm ho akuprô. Ate amnhî kàxpore pumunh xà hkôt. Ka mê akàxpore rax nê mê kãm ho rax nê agô. Rÿ mê akàxpore grire nê mê kãm ho grire nê agô. Ja na kêt mex. ¹³ No mê ate mê kãm ôr par nhûm mê arom mê hikàxpore rax nê ri paja mex kêt. ¹⁴ Nom ra mê akàxpore rûnh jakamã kwa mê amnhî kutã mê kãm hkwÿ ho hkryre nê ho akuprô kê mê apyrà nê hikàxpore nê ri pa. Kêr ka mê nhÿrmã tanhmã amnhî to nê axà nê nhûm akàxpore apê hapêx nhûm mê ajarênh ma nê amnhî kuxwar mê ato ajuta nê mê amã hkwÿ ho akuprô nê mê awÿr kumê. Ka mê akàxpore ho axpên pyrà nê ri apa. ¹⁵ Amnepê m Tîrtûm kot kaxkwa rûm Ijaewjê hwÿr mēō rēnh nhûm mê kot apkati mê amnhîm hkawrà nê ho apkur o pata ã na pre Tîrtûm kapêr ã kagà htûmja ã mê harênh anê nê mê harênh kot:

Na pre mê hkra xohtô xwÿnhjaja mê apkur xà hkawrà rûnh nê. Nê gôj kãm unhwÿ nê kuku nê piitã ho ôhy htu. Nhûm mê hkra grêre xwÿnhjaja haxwÿja hkwÿ kawrà no ãm ho hkryre nê hkawrà. Nê gôj kãm unhwÿ nê kuku nê haxwÿja ho ôhy htu hpa. Na pre htem apkati mê ã amnhî nhîpêx anhÿr o pa. Anê. Ja pyrà nê kêr ka mê akàxpore ho axpên pyràk o ri ho apa.

Xitre mê hkràmnhwÿjê jarênh

¹⁶ Nê Xitre na pre ixpyrà nê kãm mê ato ajuta hprãm nê. Na pre inhmã mê atã amnhî jarê pa pre kuma nhûm ja inhmã mex nê pa ixkînh nê. Nê ijamaxpêr o:

—Nà ãm hãmri na Tîrtûm tanhmã Xitre hkrã hto nhûm ã hamaxpêr mex anê. Anê.

¹⁷ Tã pa ma akupÿm mê awÿr mōr ã hkukja nhûm inhma nê hkînh nê mê awÿr nojarê kurê kumrêx. Nom kormã ixte kãm mê ajarênh kêt ri nhûm tãm amnhî kukamã hamaxpêr nê mê awÿr hkrã. ¹⁸ Tã na ra nojarê kaxyw. Kot paj ma hkôt Kris kôt mê pahtôjê hō mê kê ma hkôt mō. Kôt ixte mēnh xwÿnhhta na hte mê kãm Tîrtûm kapêr jarênh mex nê nhûm htem amnhîm mex ã harê. ¹⁹ Na pre jar Jesus kwÿjaja kot ma ixkôt Jerujarê hwÿr kàxpore hkwÿ ho mōr kaxyw nhûm prem amnhîm mê kurê. Tã koja Xitre mê wa mê awÿr mōn pōj ka mê kãm kàxporeta gō nhûm man akupÿn o mō pa wa rî kormã ma Jerujarê hwÿr mê kãm o mō. Mê kot hamÿnh nê mê pamã mê hkînh ã kot amnhî tã mê pahpumunh kaxyw. Nê Tîrtûm mã mex o mex ã harênh kaxyw. ²⁰⁻²¹ Nom kàxpore rax nhûm ixte mê hwÿr o inhmōr nhûm mê kot hã ixkamnhîx pymaj kot paj ma amnhî kôt Kris kôt mê pahtōta o mō. Ixte Xitre hkôt mê awÿr mēnh xwÿnhhta pa ma amnhî kôt o mō. Nom ixàhkînh o ixpare hã. Tîrtûm kot ja kôt ixpumunh mex tã kot paj ma amnhî kôt o mō.

²² Nê ot pa ma Xitre wa hkôt axte mê awÿr ja mê. Kêr kê mê axkrunêpxi

nê ma ixkukamã mē awÿr mō. Ixte wa hkôt mēnh xwÿnhhta ixte kot amnhî nhîpêx ã omunh mex. Na hte kãm mē piitã mē ho ajuta ho pa hprãm nê. Tã mē ajarēnh ma nê inhmã mē ajarēnh o:

—Nà koja mē Jerujarē nhō xwÿnhjê mã kàxpore nhōr rax nê kãm ga. Mē kot amnhî to mex kēnã. Anê.

Jakamã ra mē awÿr hkrã. Tã koja ma Xitre wa hkôt mō nê mē ato ajuta ka mē tokyx kàxpore ho apikuprōnh pa.

²³ Nê koja mēhō tanhmã Xitre hã mē akukjêr to ka mē kēp ixkrãmnhwÿ mex ã harê. Nê kot inhîhkô hã mē ho ajuta mex o pa hã harê. Na pre ra jar Kris kwÿjaja mē akaxyw kuta nê ma mē awÿr kumê. Jakamã koja ma mē awÿr mō nhūm Kris kôt mē pahkôjê hō wa pijakrutja wa ma hkôt mō. Na hte wa haxwÿja Kris kôt amnhî nhîpêx mex o pa. ²⁴ Koja mē awÿr pōj ka mē omu nê mē ho mex nê. Nê mē amã mē hkînh nê. Kê krî piitã hkôt Kris kôt mē pahkwÿjê piitã mē hã mē ajarēnh ma nê axpēn mã mē amex ã mē ajarê. Nê mē ajarēnh o:

—Pêr ãm hãmri na pre Pawreja mē pamã Korîit kãm mē pahkwÿjê jarê. Na xep pre Xitre mē hkwÿta ma mē hwÿr mō nhūm mē ho mex rax nê. Ra Pawre kot mē pamã mē harēnh xà hkôt. Anê.

9

Mē kot kàxpore ho pikuprōnh ã mē harēnh

¹⁻² Kwa ixkrãmnhwÿjaja. Kot paj Jerujarē nhō xwÿnhjê kaxyw mē atã ixihitÿx kêt nê. Ra mē amã mē ho ajuta hprãm jakamã na pa pre Masetōn kamã Kris kôt mē pahkwÿjê mã mē ajarēnh o:

—Pika pê Gres kamã Kris kôt mē pahkwÿjaja na prem ham amgrã hapêxta kamã Jerujarē kamã mē pahkwÿjê jarēnh ma nê kãm mē ho ajuta hprãm. Anê.

Hãmri nhūm mē ajarēnh ma nê mē apyrã nê kãm tanhmã mē ho ajuta hto hprãm. ³⁻⁴ Tã ot pa mē awÿr Xitre mē hōta wa mē ho ixpimràatã

wa mē kumê. Mē kot kàxpore hã mē akukjêr kaxyw. Kêr pa mytwrÿ hō hã ma Masetōn nhō xwÿnh kwÿjê mē mē awÿr mō nê ra ixte mē kãm kàxpore hkwÿ ho mē apikuprōnh ã mē ajarēnh kôt mē ate ho apikuprōnh rax ã mē apumu nê ixkînh nê. Nom kot pa mō nê tee ri hapêr nê te ixte Masetōn nhō xwÿnhjê mã mē ato ixêx pyrã nê ixpijaàm nê. Ka mē ajaxwÿja amnhî kamã apijaàm nê. ⁵ ã mē pahte amnhî nhîpêx anhÿr pymaj na pa ã mē amã kagàja nhîpêx nê Xitre mã òr nê ma amnhî kukamã mē awÿr mēnh anê. Nê hkôt wa mōr mã xwÿnhhta mē ho ixpimràatã amnhî kukamã wa mē kumê. Tã kê mē awÿr pōj nê mē amã kagàja gō ka mē kamã harê nê ama nê tokyx kàxpore ho apikuprōnh jatur xàm amê. Kêr pa mē hapu hã mē awÿr mō ka mē ra mē ixkutêp ho apikuprōnh pa nê mē kãm agō nê ajamakêtkati nê apa. No pa ixte mē amã mē ate ho apikuprōnh kaxyw mē atã ixihitÿx kêt. ⁶ Na htem piitã ã hamaxpêr anhÿr o pa nê hamaxpêr o:

—Kot ka apur rax nê kamã anhō rax nê. Nom kot ka apur grire nê kamã anhō grire.

Anhÿr o hamaxpêr jakamã kêr ka mē apiitã ajamakêtkati nê Jerujarē nhō xwÿnhjê mã kàxpore nhōr mex nê. Kêr ka mē ho apikuprōnh pa nhūm rax nê. Te mēhō ihpur rax nê kamã ò raxta pyrãk. Kê Tîrtūm ã mē ate amnhî nhîpêx anhÿr ã mē apumu nê nhÿrmã mē ato mex nê. ⁷ Nom kêr ka mē anhōxÿ kamã mē kãm òr kêt nê. Mē pahte pahkînh kãm panhōxÿ hkêt kãm mē kēp amrakati xwÿnhjê mã mēmoj nhōr o papaja na Tîrtūm kãm hprãm. ⁸⁻⁹ Koja mē hã mē apumu hãmri nê amnhîm mē amex ã mē ajarēnh rãhã ho pa. Mē kãm Tîrtūm kînh xwÿnhjaja na htem àmnhîx ri mē kēp amrakati xwÿnhjê mã mēmoj nhōr o pa. Te Tîrtūm kot amnhî nhîpêx pyrãk. Na hte àmnhîx ri mē pamã mēmoj nhōr o pa. Mē pahwÿr na rē nhūm wrÿ. Nhūm mē pamã mē paxàpkur xà nhōr o pa. Nê

tanhmã mē pahto pu mē paxà hkêt nē pajamakêtkati nē paxàpēnh o papa. Nē pamex nē ri papa. Panhō rūnh nē ri papa. Jakamã kwa pu mē uràk nē paxàmnhĩx ri mē kēp amrakati xwýnhjē mã mēmoj nhõr o papa.

¹⁰ E pa ixprĩ hã mē amã ja jarē ka mē inhma. Nà na hte ã Tĩrtũm mē pamã mē paxàpkur xà nhõr o pa anē. Kot kaj apur kãm ahkre nhũm tanhmã amã mēmo hyta nhĩpēx to nhũm amã hapôx mex nē amã ô rūnh nē ka anhõ rax nē. Nē hkwý ho axàpkur o apa nē axte hkwý hkre. Tã kêr ka mē ã Tĩrtũm kot mē ato mex anhýr ã amnhĩ pumu hãmri nē uràk nē axàmnhĩx ri mē kēp amrakati xwýnhjē mã axàmnhõr pē mē ho mex o ri apa. Nhũm Tĩrtũm mē hã mē apumu nē mē amã mēmoj nhõr rãhã nē. Ka mē amnhĩ pyrã nē mē kēp amrakati xwýnhjē mã hkwý nhõr o apa. ¹¹ Koja Tĩrtũm mē ato mex rax nē ka mē anhõ mēmoj rax nē. Ja o amnhĩ xwar mē kēp amrakati xwýnhjē kaxyw kàxpore hkwý jaxwý. Kêr pa mē amã hkwý jamý nē ma Tĩrtũm kôt mē pahkwýjē mã o mō nē mē kãm kugõ kê mē omu nē hkĩnh nē. Nē mē atã Tĩrtũm mã mex o mex ã harē. ¹² Hãmri nē mē akukwak ri mex nē ri pa. Nē axpēn mã Tĩrtũm mex o mex ã harēnh o ri pa. ¹³ Koja mē amnhĩ tã mē apumu nē hkĩnh nē. Hãmri nē Tĩrtũm mã amnhĩ tã tanhmã mē ajarēnh to nē kãm:

—Pa Tĩrtũm. Nà ãm hãmri na pre Korīt kãm akôt mē ixkwýjaja amnhĩ jarē. Na htem akôt pix mã amnhĩ nhĩpēx mex o ri pa. Jao mē ixpē õxý hkêt nē mē inhmã kàxpore hkwý nhõr rax nē. àmnhĩx ri hamakêtkati nē mē inhmã hkwý nhõr rax nē. No ãm mē papxipix na htem ã mē inhĩpēx anhýr kêt nē. Na htem mē kēp amrakati xwýnh piitã ã mē hipēx anhýr o pa. ãm hãmri na ka pre tanhmã mē hkrã hto nhũm mē anhý hã ã amnhĩ nhĩpēx anhýr o pa. Amex o amex Tĩrtũm. Anē.

¹⁴ Hãmri nē mē ato hwýr o:

—Pa Tĩrtũm. ãm hãmri na hte Korīt nhõ xwýnhjaja amnhĩ pyrã nē mēmoj

to mē ixkutã nojarêt o pa. Jakamã aa mē ixte amnhĩ tã mē inhno ho mē omunh kêt tã mē inhmã mē hkĩnh nē. Kwa kêr ka mē ixtã mēmoj to mē kutã anojarêt rãhã ho apa Tĩrtũm.

Anhýr o mē ato kuwý. ¹⁵ Tĩrtũmja mex o mex. Nom na hte mē pahto mex pē mē pamã kàxpore nhõr kêt nē. Kra Jejusja na pre mē pamã kugõ. Kãm mē pajapē ho mē pahwýr kumē nhũm mē pahwýr wrý nē mē pahpiitã mē pahte amnhĩ tomnuj pãnhã amnhĩrer kaxyw mē panē ty. Ja na mex o kot mē pamã kàxpore nhõr jakrenh. Mēhõ koja uràk nē ã mē panē htyk anē? Nà amrakati ho amrakati. ãm Jejus pix na pre ã amnhĩ nhĩpēx anē.

10

Pawre kēp Tĩrtũm Karõ nhý hã kapēr xwýnh ã harēnh

Epes 6.10-20; Wam Tesarõn 5.8

¹ E Kris kôt ixkwýjaja. Nà ixpē Pawre kot paj mē akwý kot tanhmã ixto kapēr to xwýnhjē mã amnhĩ jarē ka mē apiitã inhma. Nà na hte Kris mē pakamã gryk tokyx anhýr kêt nē. Na hte mē pahto mex japjē nē. Tã inhmã uràk nē ã mē anhĩpēx anhýr prãm nē. No na hte mē akwýjaja axpēn mã tanhmã ixto kapēr punuj to nē ri axpēn mã:

—Pawre na hte nhýri krĩ kamã pa nē mē pamã kagã nhĩpēx nē mē pahwýr kurē nē kamã mēmoj tã mē pamã kapēr kãm hihtýx nē hã mē pamã akir. Tã amnē mē pahwýr mō hãmri nē te kãm mē pahpyma pyrãk o mē pamã kapēr o pa.

Anhýr o ijarē. ² Nom inhmã mē awýr inhmõr nē mēmoj tã mē amã ixàkjēr prãm kêt tã kot paj nhýrmã mē awýr mō ka mē tanhmã amnhĩ tomnuj to ho apa japēr. Pa ja hã mē apumu nē hã mē amã akir kãm ga. ³ Na pa htem jar pika ja kamã Tĩrtũm kwý hkêt xwýnhjē kaëx ã ri ixpa nom mē uràk nē amnhĩ krã hkôt tanhmã amnhĩ nhĩpēx to ho ixpa hkêt nē. Nē mē uràk nē amnhĩ krã hkôt tanhmã ijamaxpēr to ho ixpa hkêt nē. Na pa

htem Tirtūm Karō nhỹ hã àhpumunh xà ho amnhĩ nhĩpêx o ri ixa. ⁴ Nē Tirtūm xàhpumunh tỳx xà ho mẽ kãm kapêr jarēnh o ri ixa. Mẽ kot mar nē hkôt amnhĩ nhĩpêx kaxyw. Nē àhpumunh tỳx o na pa htem mẽ kot Tirtūm kôt amnhĩ xunhwỳr pymaj mẽ kêp àmnàr xwỳnhjaja tanhmã mẽ nē mẽ ho. ⁵ Na htem htỳx ri tanhmã Tirtūm nē hkwỳjê mã kapêr to ho pa. Amnhĩ kaxyw hkôt mẽ hamaxpêr kêt kaxyw tanhmã nē mẽ kãm kapêr to. Na pa htem ja hã mẽ omu nē Tirtūm xàhpumunh tỳx xà ho tanhmã mẽ kãm ixkapêr to nhũm mẽ tee ri inhma nē axte mẽ kêp àmnàr kêt nē. Pa mẽ kãm Tirtūm kapêr jarē nhũm mẽ ohtô nē kuma nē Kris kôt amnhĩ xunhwỳ nē hkôt amnhĩ nhĩpêx o pa. ⁶ Tã mẽ kajaja kot kaj mẽ Tirtūm kôt amnhĩ nhĩpêx mex tã mẽ atō ra kapêr nhĩrôp xa nē tanhmã amnhĩ tomnuj to. Pa ja hã apumu rỳ hã ajarēnh ma nē hã amã akir. ⁷ Mẽ ate Tirtūm kot mẽ awỳr inhmēnh kêt ã axpēn mã ijarēnh tã kot kaj mẽ atō ãm hãmri apê Kris kwỳ hã amnhĩ pumu nē ra mãănēn pa ixpê hkwy hã ixpumunh kurê kumrêx. Mẽ apyrà nē ixpê hkwy kēnã. ⁸ Na pa pre ma mẽ awỳr mō nē tanhmã mẽ amã amnhĩ jarēnh to nē mẽ amã:

—Tirtūm na pre mẽ awỳr inhmē pa mō. Ixte y hã mẽ amã kapêr jarēnh o ri mẽ akôt ixa kaxyw. Anē.

Tã pa hte arĩ ã amnhĩ jarēnh anhỹr o ri ixa. ãm hãmri na pre Tirtūm mẽ awỳr inhmē pa hte ãm hãmri mẽ amã kapêr jarēnh o ri mẽ akôt ixa. Na pa hte Tirtūm nhỹ hã mẽ amã ixkapêr nē kapêr o ixêx o amnhĩ to jarkrar kêt nē. Ixte tanhmã mẽ atomnuj to ho ri ixa kaxyw na pre Tirtūm mẽ awỳr inhmēnh kêt. Mẽ amã ixkapêr mex nhũm mẽ ate inhmar nē Kris kapêr kôt amnhĩ nhĩpêx mex o apa kaxyw na pre mẽ awỳr inhmē. ⁹ E kwa Kris kôt ixkwỳjaja. Na pa hte mẽ amã ixpuma kaxyw mẽ awỳr kagà rēnh kêt nē. Mẽ ate kamã harēnh nē tee ri amnhĩ kukamã ajamaxpêr o amnhĩ kamã amã ma kaxyw kêt. ¹⁰ Mẽ

akamã mẽ kãm ixkĩnh kêt xwỳnhjaja na htem ijarēnh o:

—Pawre na hte awry hã pa nē mẽ pahwỳr kagà rēnh nē kamã te kêp pahi ho amnhĩ nhĩpêx pyrà nē mẽmoj tã mẽ pamã kapêr kãm hihtỳx nē. Tã mẽ pahwỳr pōj hãmri nē kapêr kaxyw nom kapêr kãm hihtỳx o kapêr kêt nē. Jakamã mo kaxyw kot puj mẽ hwỳr mra nē kapêr ma?

Anhỹr o ijarē. ¹¹ Nom ã ixte anhỹr kêt. Kwa mẽ inhma. Kot paj nhỹrmã ma mẽ awỳr mō hãmri nē te kagà ja kamã mẽ amã ixkapêr pyrak o mẽ amã ixkapêr nē ixkapêr xihtỳx o mẽ amã ixkapêr kãm ga.

¹² Na hte mẽ akwỳjaja kot amnhĩ to mex o mẽ ajakrenh ã amnhĩ to jarkrar o ri pa. No ãm amnhĩ krã hkôt pix mã na htem ã ri amnhĩ jarēnh anē. Na hte Tirtūm ã mẽ harēnh anhỹr kêt nē. ¹³ Tã inhmã mẽ urak nē ã amnhĩ jarēnh anhỹr prãm kêt. ãm ixte Tirtūm kot tanhmã inhmã karō hto xà hkôt amnhĩ nhĩpêx o ixpaja na inhmã hprãm. Tã mẽ kajaja mẽ awỳr na pre inhmē. ¹⁴ Ra kot mẽ awỳr inhmēnh jakamã ixkumrêx na pa pre mẽ awỳr mō nē mẽ akôt ri mẽ amã tanhmã Kris jarēnh to ho ri ixa. Tirtūm kãm nhỹhỹm ixa hprãm xà pix wỳr na inhmã ixa hprãm.

¹⁵ No kêt mẽ kot amnhĩ krã hkôt htỳx ri Tirtūm kapêr jahkre o mẽ pa xwỳnhjaja na htem nhỹri krĩ kamã mẽ kot Kris kôt amnhĩ xunhwỳr ã mẽ harēnh ma nē mẽ hã amnhĩ to jarkrar o ri pa. Te tãm kot mẽ hwỳr mōr nē mẽ kãm ujarēnh nhũm mẽ kot mẽ mar xà hkôt Kris kôt amnhĩ xunhwỳr pyrak. Nē mẽ hã amnhĩ to jarkrar o:

—E na pa pre ma mẽ hwỳr mō nē mẽ kãm Tirtūm kapêr jarē nhũm mẽ inhma nē hkôt amnhĩ xunhwỳr kurê kumrêx. Ixkukwak ri na prem ã amnhĩ nhĩpêx anē. Anē.

Nom ã amnhĩ nhĩpêx anhỹrja ã amnhĩ to hêx. No pa na pa hte ho mẽ urak kêt nē. Kojã Tirtūm ma nhỹri krĩ hwỳr ixkwỳjê hō mẽ nhũm ma hwỳr mō nē mẽ kãm Kris kapêr jarē. Hãmri nhũm mẽ kuma nē Kris kôt

amnhī xunhwỳ. Pa mẽ harēnh ma nē mẽ ý hã ixkīnh nē nom pa ixkukwak ri mẽ kot hkôt amnhī xunhwỳr ã amnhī to jarkrar kêt nē. Ixte mẽ hwỳr ixpa nē mẽ kãm ixujarēnhre hã kot pa hkôt mẽ hã amnhī to jarkrar. Æm Tĩrtũm kãm nhỹhỹm ixpa hprãm xà pix wỳr na pa hte ixpa nē mẽ kãm kapēr jarē. Jakamã kot kaj mẽ nhỹrmã Kris kôt amnhī nhĩpêx mex o ri apa pa ja hã mẽ apumu nē mẽ are nē hpãnhã ma krĩ hõ hwỳr Kris kot mẽ hwỳr inhmēnh xà hõ hwỳr mō. Ka mẽ ja hã ixto Tĩrtũm wỳr o apa. ¹⁶ Kot paj mẽ anhõ krĩ kamã mẽ piitã mẽ kãm Jejus kapēr jarēnh pa hãmri nē hpãnhã ma krĩ hkwỳ hkôt ijapôx o ri ixpa nē kamã mẽ kãm harēnh o ri mẽ hkôt ixpa. Kormã aa mẽ kot mar kêt kumrêx xwỳnhjê mã harēnh o ri mẽ hkôt ixpa. Na pa hte ã mẽ hwỳr ixpa nē mẽ kãm ixujarēnh anē. Jakamã nhũm mẽ ja hã ixpumu nē mẽ kot Tĩrtũm kapēr mar xwỳnhjê pix wỳr ixpa hã ijarēnh kêt nē.

¹⁷ Nē Tĩrtũm kapēr ã kagã htũm kot mẽmoj tã mẽ kot amnhī to jarkrar ã harēnh kot:

Kêr ka mẽ kamjaja amnhī mex ã amnhī to jarkrar kêt nē. Æm Tĩrtũm pix mã mãn mex o mex ã harēnh o ri ho jarkrar o ri apa. Anē.

¹⁸ Kot pu mẽ Tĩrtũm noo mã amnhī to mex ã amnhī to jarkrar nē ãm amnhī to jarkrar kaprỳ. Nom koja Tĩrtũm tãm ja hã mẽ pahto jarkrar nē ãm hãmri mẽ pahte amnhī to mex xwỳnh ã pahto jarkrar.

11

Jejus kot mẽ hwỳr mẽ rēnh ã amnhī to hêx xwỳnhjê jarēnh

Matêwre 7.15; Rõmãn 16.17; Karatas 1.6-9; Korosê 2.8; Sikūn Pêtre 2.1

¹ E kot paj te mẽ hkrã pipãnh xwỳnh kot htỳx ri amnhī jarēnh pyrãk o tanhmã mẽ amã amnhī to jarkrar to. Kwa mẽ inhma nē ixkamã agryk kêt nē. No mẽ ixkapēr kumrêx mãn ma.

² Inhmã mẽ akīnh. Te ho Měpahpãm

Tĩrtũm kãm mẽ akīnh ta pyrãk. Te mẽ apê mẽhõ kukrit kãm my hkīnh nē kot ho mjên prãm xwỳnh ta pyrãk. Kãm mẽmyjê piitã mẽ hkīnh kêt ãm kãm pix kīnh. Ja pyrã nē kêr ka mẽ amã Kris kīnh o nhãm amã mẽ hkīnh xwỳnhjê jakre. Te ho mẽhõ ni kot kãm myta pix kīnh nē kãm ho mjên prãm xwỳnh ta pyrãk. Ja na pa inhmã hprãm. ³ Ra mẽ amã Kris kīnh tỳx o apa nē hkôt amnhī nhĩpêx mex o ri apa htã nhũm mẽ kot amnhī krã hkôt htỳx ri Tĩrtũm kapēr jahkre ho mẽ pa xwỳnhjaja tee ri ja hã mẽ ajarēnh ma nē axpên mã mẽ ajarēnh o:

—Kwa nà ja mex kêt. Koja mẽ Pawre kapēr ma nē ãm kuma nhũm ja mex nē. No mẽ pahkôt mẽ kot amnhī nhĩpêxja na mẽ pamã mex. Ja na kêt mẽ pamã mex o mex. Anē.

Hãmri nē ra kot Kris nē tanhmã mẽ amã hêx to kaxyw. Te amnepê mã kagã kot mẽ panã kot wa pê Ewa mã hêx nhũm kot mar nē hkôt amnhī nhĩpêxta pyrãk. ⁴ Na pa pre ra mẽ awỳr mō nē mẽ amã tanhmã Jejus jarēnh to. Nē tanhmã mẽ amã Tĩrtũm Karõ jarēnh to. Nē tanhmã wa kot mẽ pahto hkra hto hã mẽ amã wa harē ka prem inhma nē mar tỳx nē. Tã nhũm ra mẽ kot htỳx ri Tĩrtũm kapēr jahkre xwỳnhjaja ixpãnhã mẽ awỳr mō nē Jejus kapēr kwỳm ri tanhmã mẽ amã ujarēnh to nē mẽ amã harēnh o hêx rãhã ho pa. Nē Tĩrtũm Karõja nhũm mẽ amã tanhmã ho hêx to. Nē ixte mẽ amã Tĩrtũm kapēr jarēnh kwỳm ri ixpãnhã tanhmã mẽ amã harēnh to ho pa. Na ka prem mẽ ama nē ãm hãmri harēnh ã hkamnhĩx. Kwa kêr ka mẽ ri mẽ ujarēnh piitã mar nē hkôt amnhī nhĩpêx kêt nē. Mẽ kot Jejus jarēnh tã no ãm katãt kôt harēnh kêt nē. Æm ri ho hêx o pa. Ka htem ama nē ãm hãmri harēnh ã hkamnhĩx nē mẽ amã mẽ mar prãm nē. Mẽ kot mẽ amã harēnh o hêx o pa htã ka mẽ ama nē ra mẽ hkôt amnhī nhĩpêx kaxyw. Kwa mẽ ri ã amnhī nhĩpêx anhỹr hkêt nē. ⁵ Kris kot mẽ awỳr mẽ rēnh ã mẽ kot amnhī jarēnh tã amnhī to hêx. Ka prem ama nē ãm hãmri mẽ kot mẽ

amã harênh ã mẽ hkamnhîx. Nom na pre Krisja mẽ awÿr mẽ rênh kêt nê. Kêt pa na pre mẽ awÿr inhmê. ⁶ Mẽ hkînhã ixkapêr krór pyrãk tâ no ãm ixte Tîrtûm kapêr mar tÿx. Nê kot amnhî nhîpêxja na ixte omunh par. Ra mẽ ate ja hã ixpumunh mex.

⁷ Na pa pre mẽ akôt ri mẽ amã Jejus jarênh o ri ixpa no ãm hpãnhã mẽmoj tâ mẽ awÿr o ri ixpa hkêt nê. Xà amarî ixte mẽ amã harênh nê hpãnhã mẽmoj tâ mẽ awÿr kêtja mẽ apê omnuj? ⁸⁻⁹ Kormã ixte mẽ amã Tîrtûm kapêr jarênh o ri ixpata ã na pa pre hte tôhã kàxpore ho presija no ãm aa hã mẽ awÿr kêt nê. Jar Masetôn kamã Kris kôt mẽ pahkwÿjaja na prem ixwÿr hkwy rênh o pa pa ho ixàpkur xà japrôr o ri mẽ akôt ixpa. Mẽ kumã ixte Tîrtûm kapêr jarênh o ri ixpa hkêt tâ pa hte mẽ kukwak ri mẽ akôt ho ixàpkur o ri ixpa. Tã kot paj arî ã mẽ akôt ixpa nê ã amnhî nhîpêx anê nê mẽmoj tâ mẽ awÿr o ri ixpa hkêt nê. ¹⁰ Ja inhmã mex. Jakamã kot paj amarî mẽ anhõ pika pê Gres kãm ã mẽ amã Tîrtûm kapêr jarênh o ixpa anê nê mẽmoj tâ mẽ awÿr kêt nê. ãm hãmri na pa ã mẽ amã amnhî jarênh anê. Kris pyrã nê ixêx kêt kênã. ¹¹ Xà we inhmã mẽ akînh kêt kôt na pa hte ã mẽ amã Tîrtûm kapêr jarênh pãnhã mẽ awÿr kêt anê? Nà inhmã mẽ akînh jakamã na pa hte kapêr jarênh pãnhã mẽ awÿr o ri ixpa hkêt nê. Inhmã mẽ akînh tÿx kênã. Tîrtûm kot ja hã ixpumunh mex. ¹² No mẽ kot amnhî krã hkôt htÿx ri Tîrtûm kapêr jahkre xwÿnhjaja na htem mẽ ajahkre hpãnhã kàxpore hã mẽ awÿr pix o pa. Nê mẽ amã tanhmã amnhî to hêx to nê mẽ amã:

—Nà mẽ ixte Pawre kot amnhî nhîpêx pyrãk. Mẽ ixte amnhî nhîpêxja kot axpên pyrãk.

Anhÿr o mẽ amã amnhî to hêx. Nom ixte ho mẽ urãk kêt kumrêx. Mẽ ixte amnhî nhîpêx kot axpên pyrãk ronhÿx pa mẽ urãk nê kàxpore hã mẽ awÿr o ri ixpa. Nom ixte ã amnhî nhîpêx anhÿr kêt. Kot paj aa ã amnhî nhîpêx anhÿr o ixpa hkêt nê. ¹³ ã mẽ

kot amnhî nhîpêx anhÿr xwÿnhjaja na pre Tîrtûm mẽ awÿr mẽ rênh kêt nê. Mẽ kot Kris nhÿ hã mẽ ahkre xwÿnh ã amnhî jarênh tâ ãm amnhî to hêx. ¹⁴ Mẽ õ pahi Satanastija te mẽmoj mex jarênh pyrãk tâ no ãm na hte mẽ pano kupyrr pê mẽ pamã tanhmã hêx to ho mẽ pahkôt pa. Te kot mẽmoj mex ã ãm hãmri kot harênh pyrãk tâ no ãm ho hêx. ¹⁵ Tã hkôt mẽ kot amnhî nhîpêx xwÿnhjaja na htem urãk nê te tãm mẽ kot amnhî nhîpêx xwÿnhjê pyrã nê mẽ pahwÿr mra nê tanhmã mẽ pamã hêx to. Satanasti pyrã nê mẽ pano kupyrr kaxyw tanhmã mẽ pamã hêx to. Nom koja Tîrtûm nhÿrmã mẽ pahã mẽ homnuj tÿx kumrêx nhũm mẽ rî amnhî pumu.

Tanhmã mẽ kot Kris ã Pawre nhîpêx to ã mẽ harênh
Atre 9.23-25

¹⁶ E kot paj axte te ixtÿx ri amnhî to jarkrar pyrãk o mẽ amã tanhmã amnhî jarênh to ka mẽ inhma nê ixkamã agryk kêt nê. ¹⁷ Pahihti Kris nhÿ hã kot paj mẽ amã amnhî jarênh kêt ãm amnhî krã hkôt kot paj mẽ amã amnhî jarê. ¹⁸ Na htem ohtô nê mẽ ate mẽ hã apijaãm kaxyw tanhmã mẽ amã amnhî to jarkrar to ho pa. Tã kot paj mẽ urãk nê amnhî krã hkôt mẽ amã amnhî to jarkrar ka mẽ inhma. ¹⁹ Mẽ ate amnhî xàhpumunh tÿx ã amnhî jarênh tâ ka htem htÿx ri mẽ kot amnhî to jarkrar o ri mẽ pa xwÿnhjê kapêr ma nê mẽ hkôt ajamaxpêr nê mẽ hkôt amnhî nhîpêx kurê kumrêx. ²⁰ Mẽ kot Kris nhÿ hã mẽ ahkre hã amnhî to hêx xwÿnhjaja mẽ pakurom mẽ kot amnhî to rax xwÿnh ã amnhî jarênh jakamã na htem mẽmoj tâ mẽ amã karõ ho pa.

Nê mẽ kãm hprãm xà hkôt nhÿhÿm mẽ arê nê nhÿhÿm mẽ arê.

Nê mẽ apa pix kukwak ri apkur o pa.

Nê mẽmoj tâ mẽ ajakwap mẽ atak o pa.

ã mẽ kot mẽ anhîpêx anhÿr tâ ka te mẽ ate atũm kêt pyrã nê atÿx ri mẽ kapêr ma nê mẽ hkôt amnhî nhîpêx o ri apa. ²¹ Tã ixte mẽ urãk nê ã mẽ

anhîpêx anhÿr kêt tâ kot paj mẽ uràk nê mẽ amã tanhmã amnhî to jarkrar to ka mẽ inhmar japêr. Te ixtÿx ri amnhî jarênh pyràk o kot paj mẽ amã amnhî jarê nom ãm hãmri mẽ amã amnhî jarê. ²² Mẽ kot Jejus nhÿ hã mẽ ahkre hã amnhî to mẽ hêx xwÿnhjaja na htem mẽ amã tanhmã amnhî to jarkrar to nê mẽ amã:

—E mẽ inhma. Mẽ ixpê Ijaew na pa mẽ. Mẽ arom mẽ ixpê finat Apraãw kanrêhã htãmnhwÿ jakamã kwa mẽ ixkapêr ma nê mẽ ixkôt amnhî nhîpêx. Anê.

Nom ijaxwÿja ixpê Ijaew tâ pa hte mẽ uràk nê ja hã amnhî to jarkrar hkêt nê. ²³ Nê mẽ kot Kris kapêr jarênh mex o pa hã amnhî jarênh tâ pa na pa hte harênh mex o mẽ hakre. Te ixkrã pipãnh pyràk o ã mẽ amã amnhî jarênh anhÿr tãã.

E pa mẽ amã tanhmã amnhî jarênh to ka mẽ inhma. Nà na pre Kris ã mẽ kãm ixkurê xwÿnhjaja mẽ kot amnhî to jarkrar xwÿnhjê hkînhã Kris ã ixpynênh nê ijagjênh xohtô nê. Nê mẽ hkînhã tōhã ixtak rûnh kumrêx. Pa mẽ hkînhã xatã mẽ kot tanhmã ixto hã kritpêm ronhÿx pa pre ty. ²⁴ Na pre Ijaew krãhtũmjaja Kris ã ixkatut kãm ixtak rûnh nê. Nê ixtak xàja pî hã mry kã janhôr o ixtak. Nê ixtak kaxyw nê ixtak xà jatur xà kamã kàx xwa gixre janhô nê ho ixtak rûnh o ixkatut kà rê. Ixtak o 39 hãmri nê rî kormã mẽ kot ixpîr pymaj inhmã ure. Na pre htem nhÿri ixpynê nê ã inhîpêx anê. Na prem ã inhîpêx anhÿr o 5 wês.

²⁵ Nê na prem ra mẽ kot ixpîr kaxyw nê kên rûnh kwÿ jamÿ nê ho ixtak o kuhê. Nê Rôm nhõ xwÿnhjaja haxwÿja pî ho ixtak rax kumrêx. ã inhîpêx anhÿr o axkrunêpxi.

Nê na pa pre hte gô xujanãr kãm nhÿhÿm Jejus jarênh o ri ixpa kaxyw pàr kãm mẽ hwÿr ixpa nhũm pàrja tanhmã amnhî to nê agjê. Kritpêm nhÿx pre hte gôja ixpî. Pa pre ã amnhî nhîpêx anhÿr o axkrut. Tã arîgro hõ hã kê axte pàr õ mã axà nê ma axte krî hõ hwÿr mō. Nhũm kê pàrta axte mẽ ixpê axà nhũm gôja nhÿx kê axte

ixpî. Pa pàr jakà hã kumÿ nê hã ijêt o amÿkry. Nê ho apkati. Tã nhũm nhÿhÿnh pàr ôja mō nhũm kamã mẽ mōr xwÿnhjaja ixpumu nê ixwÿr pàr o mō nê amnhî wÿr ixto api nê ma amnhî kôt ixto mō.

²⁶ Na pa pre amnhî xà htÿx kamã ijamak o ri ã mẽ kãm Kris kapêr jarênh o ri ixpa anê. Kironhÿx pre gô tãmja ixpî. Nhũm mẽ àhkînh nhi xwÿnhjaja kironhÿx prem mããnênh ixpî. Nê Ijaew nê Ijaew kêt xwÿnhjaja tōhã tanhmã ixtomnuj to ho pa. Pa pre krî hkwÿ hwÿr ixpa rÿ kapôt ã ixpa nhũm mẽ ixtã amÿnê. Pa pre gô xujanãr kãm pàr kãm ri ixpa nê nhÿx kamã ty. Nhũm mẽ kêp Kris kwÿ hã amnhî to hêx xwÿnhjaja haxwÿja tanhmã ixtomnuj to pa mẽ ÿ hã amnhî xà htÿx kamã ijamak o ri ixpa. ã na prem Kris ã inhîpêx anhÿr o pa.

²⁷ Nê na pa Jejus kapêr jarênh o ri ixpa kurê ixkêngrà nê ri ixpa. Nê tōhã inhôt kêt ã ixtã apkati. Nê tōhã inhmã prãm nê inhmã kôr nê ri ixpa. Nê tōhã ixê mex kêt nê inhmã kry nê ri ixpa. ²⁸ Na pa hte Kris kapêr jarênh o ri ixpa pê ã amnhî nhîpêx anê. Nom ja pix kêt. Na pa hte krî piitã hkôt Kris kwÿjê hkukamã tee ri ijamaxpêr nê ijamaxpêr o:

—Hêxta waa nê. Mãn mẽ arî Kris kôt amnhî nhîpêx mex japêr rÿ ko. Mãn mẽ ra kapêr kwÿm ri tanhmã amnhî tomnuj to rÿ ra hkaga.

Anhÿr o ijamaxpêr o ixpa.

²⁹ Nê na hte mēhō Tirtũm kapêr nhîrôp xa nê tanhmã amnhî tomnuj to pa tee ri omu nê ixkaprî htÿx kumrêx. Koja mēhō tanhmã Tirtũm nê mēhō mã kapêr to nhũm kuma nê Tirtũm kôt amnhî nhîpêx kêt pa tee ri ja hã omu nê nê kêp ãmnãr xwÿnhta kamã inhgryk tÿx kumrêx.

³⁰ E Kris kôt ixkwÿjaja. Na pa ã mẽ amã amnhî jarênh anê. Te ixte amnhî to ijarkrar pyràk no ãm mẽ ate ixirerek xwÿnh ã ixpumunh pix kaxyw. ³¹ ãm hãmri na pa ã mẽ amã amnhî jarênh anê. Ixêx kêt. Pahihti Jejus nhîpêxã Tirtũm kot ja hã

ixpumunh mex. Tirtûmja mex o mex. Koja mex o mex tûm nê pa rãhã ho pa. Tãm kot ixirerek ã ixpumunh mex. ³² Kormã krî pê Tamas kãm ixpare ri na pre mê õ pahi Arêtja mê kãm ixtã amÿnê nhûm pôristijaja krî hpu hã kahê xà nhõ hakwakre piitã kãm hipok pa nê ixkãm hamak o kuhê. Pa tee inhmã nhÿhÿnh ixkator nê ma mê umaj ixprõt nê ixtêm prãm nê ixirerek xwÿnh ã amnhî pumunh kurê kumrêx. ³³ Tã nhûm Kris kôt mê pahkwÿjaja hamaxpêr nê kawà rax mÿ nê o tẽ nê inhmã ãm pa hwÿr axà nê kamã nhÿ. Hãmri nhûm mê pàr nhõr o kahê nhîrô pê ixto wrÿ pa ixkato nê mê kêp amûxu nê amnhîm ixprî nê ma tẽ nê mê kêp akunok. Æ na pre Tirtûm ixirerek xwÿnh ã inhmã ixto amnhîrit anê.

12

Tirtûm kot Pawre mã mẽmoj to amnhîrit ã harênh

¹ E Kris kôt ixkwÿjaja. Nà inhmã amnhî to jarkrar hprãm kêt tã kot paj tanhmã mẽ amã amnhî jarênh to ka mẽ inhma nê hã ixtã apijaam japêr. Na hte Tirtûm tõhã inhõt kãm ixkarõ mã tanhmã kapêr to. ²⁻³ Amnepê mã amgrã hõ hã na pre tanhmã ixkrã hto nê õ krî hwÿr amnhî wÿr ixto api. Na pre ra hã amgrã pê 14 ãn. Apu inhî rãhã ixto api rÿ apu ãm ixkarõ pix o api rÿ ko. Ixte ja hã amnhî pumunh mex kêt. Tirtûm pix kot ja hã ixpumunh. ⁴ Na pre ixto api pa pøj nê õ krî kamã axtem tanhmã mẽ kapêr to hã mẽ kuma. Na prem mẽmoj mex kumrêx jarê pa kuma nê ixkînh nê. Nê inhmã mar prãm nê. Hãmri nê ijamaxpêr o:

—Hêxta waa nê. Mẽmoj jarênhja mex kumrêx. Nà kot paj akupÿm wrÿ nê ixkwÿjê mã harê kê mẽ ixpyrà nê kuma. Nà kot paj anê.

Anhÿr tã nhûm Tirtûm Karõ ja nê ixkurê nê inhmã:

—Nà kër ka mẽ kãm ja jarênh kêt nê. Æm kapxipix kot kaj ama nê ri hã apa.

⁵ Anhÿr jakamã pa pre paxipix mẽ arom mẽmojja pumu nê kuma nom

kot paj ri hã amnhî to jarkrar kêt nê. Kot paj ãm Jejus pix tanhmã harênh to ho ri ixpa. Jao ixrom mex o mex ã harê. Nê ixrom hihtÿx o hihtÿx nê àhpumunh o àhpumunh ã harênh o ri ixpa.

⁶ Nê ixte Tirtûm nhõ krî hwÿr ixàpirja ãm hãmri ixte hã amnhî jarênh tã kot paj ja hã amnhî to jarkrar o ri ixpa hkêt nê. Mẽ ate ja hã inhmar kôt inhmex ã ijarênhja na inhmã hprãm kêt. Nom kot ka mẽ ixte tãm amnhî nhîpêx ã ixpumu nê tãm ixkapêr ã inhma hãmri nê rî kormã inhmã inhmex ã ijarê. Æ mẽ ate amnhî nhîpêx anhÿrja na inhmã hprãm. ⁷ Na pre Tirtûm inhõt kãm inhmã mẽmoj mex kwÿjarênh rax nê. Hãmri nê hpãnhã inhmã:

—E na ka akwÿjê rom inhõ krî hwÿr api nê mẽ kurom mẽmoj mex pumunh rax nê. Tã ate ja hã amnhî pumunh nê ma mẽ kãm hã amnhî to jarkrar o ri apa pymaj kot paj Satanasti mã anê nhûm inhma nê tanhmã atomnuj to ho pa. Nom ijamaxpêr xà hkôt koja ã anhîpêx anê.

Anhÿr jakamã nhûm tanhmã inhîpêx to pa inhmex kêt nê ixpa. Te mrõnhî rax nhÿhÿnh kot ixkamnhwÿr nhûm inhmã tee ri hkaxàr prãm kaprÿ nê ÿ hã ho inhgjêx rãhã nê ixpaja pyræk. ⁸ Tã pa tee ri ja hã amnhî pumu nê amnhî to Jejus wÿ nê kãm:

—Kwa Pahihti. Na pa ra mẽmojta nhÿ hã ixpunuj nê ixirerek nê ixpa. Kwa inhnê ata pa akupÿm ixihtÿx nê ijamakêtkati nê ri ixpa nà?

Anhÿr o amnhî to hwÿr o axkrunêpxi. ⁹ Hãmri nhûm inhmã:

—Nà kot paj anê hyr kêt nê. Kot paj ãm akutã inhnojarêt rãhã ho ri akõt ixpa. Ka axirerek nê apa htã ixihtÿx xwÿnh ã ixpumunh kôt ixkamnàr rom tanhmã inhÿ hã amnhî nhîpêx to ho ri apa. Anê.

Æ inhmã kapêr anhÿr jakamã na pa ixpunuj nê ri inhîrot nê ixpa htã ixrom hihtÿx xwÿnhhta nhÿ hã ixkînh nê ixpa. Nê kurom ixirerek xwÿnh pix ã amnhî to jarkrar o ri ixpa.

¹⁰ Jakamã kot paj Kris ã ixpunuj nê ri ixpa htã ixkînh nê ijamakêtkati nê ri ixpa. Kwãr mẽ mãmri hã tanhmã ixto kapêr to nê tanhmã hã inhîpêx to pa amnhî xà htýx kamã ijamak o ri ixpa. Nê ixpê amrakati nê inhîrot nê ri ixpa htã Kris nhý hã tanhmã kãm amnhî nhîpêx mex to rãhã ho ri ixpa.

Pawre kot tee ri mẽ hkukamã hamaxpêr ã harênh

¹¹ Tã mẽmo kaxyw na pa ã mẽ amã amnhî jarênh anê? Nà mẽ ate ixtã apijaam kêt jakamã na pa ã mẽ amã amnhî jarênh anê. Mẽ kêp Kris nhý hã mẽ ajahkre xwýnh ã amnhî to hêx xwýnhjaja na ka htem ixrom kot amnhî to rûnh xwýnh ã mẽ harê nê mẽ hã apijaam o ri apa. Nom ixte amnhî to grire xwýnh tã mẽ kot amnhî to rûnh o ijakrenh kêt. ¹² Na pa pre mẽ akamã ri ixpa nê Tirtûm nhý hã aa mẽ ate mẽmoj pumunh kêt kwý ho anhýr rax o ri mẽ akôt ixpa. Nê ý hã akupým mẽ à xwýnhjê ho mex. Nê mẽ nohkre xwýnhjê no ho mex. Na pa pre hte ã mẽ amã mẽmoj nhîpêx anhýr o ri mẽ akôt ixpa. Amnhî xà htýx kamã ijamak o ri ixpa htã Tirtûm xihtýx xà ho amnhî to htýx nê ã mẽ amã mẽmoj to anhýr o ri mẽ akôt ixpa. Mẽ ate omunh nê Tirtûm àhpumunh týx ã omunh kurê kumrêx kaxyw. Nê ixpê Kris nhý hã mẽ ajahkre hã ixpumunh kurê kumrêx kaxyw na pa pre ã mẽ amã amnhî nhîpêx anhýr o ri mẽ akôt ixpa. ¹³ Xàn pa pre nhãm krî hkwý kamã Kris kôt mẽ pahkwýjê ho mex tã mẽ kajaja tanhmã mẽ ato mex to hkêt nê? Nà na pa pre hte mẽ anhîpêx o axpên pyrãk. ãm mẽmoj pixire na pa pre mẽ urãk nê mẽ awýr kêt nê. Nhãm krî hkwý kamã ixpata ã na pa pre mẽmoj to presija nhũm prem inhmã ôr o pa. Tã pa pre mẽ mō nê mẽ akôt ixpa nê mẽmoj to presija htã hã mẽ awýr kêt nê. Kwa mẽ ã ixte amnhî jarênh anhýrja ma nê ixkamã agryk kêt nê.

¹⁴ Tã ot pa ra akupým mẽ awýr inhnojarêt kaxyw. Na pa pre ra mẽ awýr inhmōr o axkrut. Tã ra axte

mẽ awýr inhnojarêt kaxyw. Kot paj mẽ awýr mō nê mẽ akôt ixpa nom te wam ixtêmta pyrã nê mẽmoj tã ri mẽ awýr kêt nê. ãm mẽ amã ixkînh pix na inhmã hprãm. Mẽ apiitã te mẽ apê ixkra pyrãk. Na hte mẽ hkrarejaja mẽ katorxã nê mẽ hipêêxã mã ujaprôr o pa hkêt nê. Mẽ hipêêxã nê mẽ katorxã na hte hkrare mã kot mẽmoj to presija xà hkôt kãm haprôr o pa nom mẽmoj tã hwýr kêt nê. Ja pyrã nê kot paj mẽ apê ixkra pyrãk ã mẽmoj tã mẽ awýr kêt nê. ¹⁵ Kot kaj mẽ mẽmoj to presija japêr nê inhmã harê pa ixãmnhîx ixkînh kãm mẽ amã ixkãxpore piitã ôr par pyrãk o amnhî nhîpêx. Nê mẽ amã tanhmã amnhî nhîpêx to ho ixpa rãhã ixtykja na inhmã hprãm. Inhmã mẽ akînh týx kumrêx tã mẽ kajaja mẽ amã ixkînhja mẽ atã hkwý jêt kêt kumrêx. ¹⁶ Ixte amnhî mã mẽmoj tã mẽ awýr kêt tã na hte mẽ akwýjaja ixêx rom ixte nhãm mẽ kêp amrakati xwýnhjê mã kãxpore hã mẽ awýr o ixpa hã ixkamnhîx.

¹⁷ Kwa tanhmã na pa pre ri mẽ ano kupyw to? Xà ja kaxyw na pa pre mẽ awýr ixkrãmnhwýta wa kumê?

¹⁸ Na pa pre Xitre hã ixihtýx nê mẽ awýr kumê. Nê Kris kôt mẽ pahtōja pa Xitre hkôt kumê nhũm wa ma mẽ awýr mō. Tã xà na pa pre Xitre tanhmã mẽ ano kupyw to? Nà na pre ã mẽ anhîpêx anhýr kêt nê. Tã wa ixte amnhî nhîpêx nê wa ijamaxpêrja kot axpên pyrãk. Nà na pa hte urãk nê mẽ ano kupyw o ri ixpa hkêt nê. ¹⁹ Mãn ka mẽ axpên mã mẽ ijarênh o:

—Nà Pawre mẽ hkwýjaja mẽ kãm amnhî to rûnh xwýnh prãm jakamã na ã Pawre kagãja kamã mẽ pamã amnhî tã àprãr anê.

Anhýr o mẽ ijarênh japêr nom mẽ inhmã amnhî tã tanhmã ixãprãr to hprãm kêt. ãm mẽ inhmã mẽ akînh nê mẽ ato mex prãm jakamã na pa htem tanhmã mẽ amã amnhî nhîpêx to ho ri ixpa. Na pa Tirtûm noo mã Kris nhý hã ã mẽ amã mẽ amnhî jarênh anê.

²⁰ Tã kot paj jatã ma mẽ awýr mō ka mẽ akwýjaja tanhmã amnhî tomnuj

to japêr.

Mêmoj tâ axpên mã axàkjêr o apa.

Rỳ mêmoj tâ axpên kãm agryk.

Rỳ axpên kãm agryk tokyx anhÿr o apa.

Rỳ axpên pê anhõxy.

Rỳ axpên to akapêr punuj o apa.

Rỳ mê ajakwa kamã nhãm mê hixi ho rêr o ri apa.

Rỳ amnhĩ to rûnh prãm xàj anhmã amnhĩ nhĩpêx to ho apa.

Kot kaj mê ã amnhĩ nhĩpêx anhÿr o ri apa pa ja hã mê apumu nê ixkaprĩ htÿx kumrêx ka mê tee ri amnhĩ tâ ixpumu. ²¹ Xà kot paj mê awÿr mō nê mê apumu ka mê akwÿjaja arĩ mê aprō kuhpa hã nhãm mēnijê ho amnhĩkati ho ri apa? Rỳ arĩ tanhmã ajamaxpêr punuj to ho apa? Rỳ atÿx ri apijaàm kêt o apa? Kot ka mê arĩ ã amnhĩ nhĩpêx anê pa ja hã mê apumu nê ixkaprĩ xàj inhmÿr rax nê. Nê mê anhÿ hã Tirtûm noo mã ixpijaàm tÿx kumrêx.

13

Pawre kot tanhmã amnhĩ kukamã mê kãm karō hto

¹ Tirtûm kapêr ã kagà htûm tanhmã mê kot amnhĩ tomnuj to xwÿnhjê jarênh kot:

Koja mēhō tanhmã amnhĩ tomnuj to nhũm mēhō pyxi nê ã amnhĩ nhĩpêx anhÿr ã omu nê awÿr tē nê amã harê ka mê ama nê ãm ama nê hkôt ajamaxpêr kêt nê. No koja mêmojaja axkrut rỳ axkrunêpxi nê hã omu nê awÿr mra nê axpên kôt amã harê ka mê ama nê mê hkôt ajamaxpêr kurê kumrêx. Anê.

Tã ra mê awÿr inhmōr o axkrut tâ kot paj akupÿm mê awÿr mō nê mê apumu. ² Hapu hã mê awÿr inhmōrta ã na pa pre mê akwÿ kot tanhmã amnhĩ tomnuj to hã mê omu nê hã mê kãm akir nê mê kãm:

–Kot kaj mê amnhĩ tomnuj kaga nê tãm amnhĩ nhĩpêx kêt kot paj nhÿrmã akupÿn mê awÿr mō nê ã mê ate amnhĩ nhĩpêx anhÿr ã mê apumu nê hã mê atomnuj tÿx kumrêx kãm ga. Anê.

Jakamã kot paj mê ma mê awÿr mō nhũm mê akwÿjaja arĩ mê ate amnhĩ tomnuj o apa hã inhmã mê ajarê pa mê atã mê kuma nê tanhmã mê ato htÿx nê. ³ Kot kaj mê ja hã ixpumu nê aprĩ hã ixte Kris nhÿ hã ixkapêr xwÿnh ã ixpumunh tÿx kurê kumrêx. Kris ixrom hihtÿx o hihtÿx. Na pre ra mê ate amnhĩ tomnuj o apata mÿrapê tanhmã mê anhĩpêx to. Tã kot kaj mê kormã ã ate amnhĩ nhĩpêx anhÿrja kaga hkêt hã koja tee ri ja hã mê apumu nê mê anhĩpêx kati nê. ⁴ Amnepêr na pre Krisja te hihtÿx kêt pyrã nê ãm arĩ mê kãm xa nhũm mê unê nê pĩ kahpa ã kunhō nê kupĩ. Tã nhũm Tirtûmja ãhpumunh tÿx o akupÿm ho htĩr nhũm akupÿm htĩr o htĩr nê Tirtûm nhÿ hã hihtÿx o hihtÿx ã amnhĩ to amnhĩrĩt. Ja pyrã nê wam mê awÿr inhmōrta ã na pa pre hte mê akamã te Kris kormã htyk kêt ri hihtÿx kêeta pyrã nê mê akôt ixpa. Tã kot paj ma akupÿm mê awÿr mō hãmri nê te Kris ra akupÿm htĩr nê hihtÿx o hihtÿxta pyrã nê Tirtûm xihtÿx xà ho tanhmã mê kot amnhĩ tomnuj xwÿnhjê nhĩpêx to. Hãmri nhũm mê amnhĩ tâ ixpumu nê Tirtûm nhÿ hã ijamaxpêr tÿx ã ixpumunh kurê kumrêx.

⁵ Kwa mê aprĩ hã tanhmã mê ate amnhĩ nhĩpêx to hã amnhĩ pumu. Xàn ka htem ãm hãmri amnhĩ kaxyw Jejus Kris kôt ajamaxpêr o ri apa nà? Kot kaj mê apê hkwy hã koja mê akaxwÿnh kãm mê akamã hkrĩ rãhã nê. Nom koja mê akaxwÿnh kãm mê akamã hkrĩ hkêt ka mê ãm apê hkwy hã amnhĩ jarênh kaprÿ. ⁶ No pa na ixte ja hã amnhĩ pumunh mex. Ixpê Jejus kwÿ na pa. Ra ixkamã hkrĩ nê ixkôt pa ho pa jakamã ixpê hkwy na pa. Tã mê ate ja hã ixpumunh mexja na inhmã hprãm. Na pa hte ixpê Jejus kwÿ hã amnhĩ jarênh kaprÿ hkêt nê.

⁷ Nê na pa hte mê ato tanhmã Tirtûm wÿr to ho ri ixpa nê mê ato hwÿr o:

–Pa Tirtûm. Kwa tanhmã Korîit nhō xwÿnhjê hkrã hto kê mê tanhmã amnhĩ tomnuj to ho pa hkêt nê.

Anhÿr o mẽ ato kuwÿ. Mẽmo kaxyw na pa hte ã mẽ ato hwÿr anẽ? Ixte mẽ ajahkre mex ã amnhĩ to amnhĩrit kaxyw kêt. ãm mẽ ate amnhĩ to mex rãhã ho ri apa kaxyw. Kot kaj mẽ ã amnhĩ nhĩpêx anhÿr o ri apa hãmri nhũm axtem mẽhõ mẽ awÿr mõn pøj nẽ tanhmã mẽ amã mẽ ijarẽnh to nẽ mẽ ijarẽnh o:

—Kwa Pawre mẽ hkwÿjaja na htem Tĩrtũm kapêr kwÿm ri Korîit nhõ xwÿnhjê jahkre ho pa.

Anhÿr tã pa amnhĩ tã mẽ kuma nẽ ãm mẽ kuma. ⁸ Na pa hte Tĩrtũm kapêr kutã amnhĩ xunhwÿr kêt nẽ. Na pa hte ãm mẽ ate hkôt amnhĩ nhĩpêx o ri apa hã mẽ amã karõ kamã ixihitÿx rãhã ho ri mẽ akôt ixpa. ⁹ Jakamã kot kaj mẽ hkôt amnhĩ nhĩpêx mex o apa pa ja hã mẽ apumu nẽ ixkĩnh nẽ. Mẽ kot axpên mã ixirerek ã ijarẽnh o pa htãã. ã mẽ ate amnhĩ nhĩpêx anhÿr o apa kaxyw na pa hte mẽ ato Tĩrtũm wÿr o ri ixpa nẽ kãm:

—Pa Tĩrtũm. Kwa tanhmã Korîit nhõ xwÿnhjê hkrã hto kê mẽ kot amnhĩ tomnuj kaga hpa nẽ hpãnhã akapêr kôt pix mã mãn amnhĩ nhĩpêx rãhã nẽ. Anẽ.

¹⁰ Tã pa kormã mẽ awÿr inhmõr xwÿj ri ã amnhĩ kukamã kagã nhĩpêx nẽ mẽnh anẽ. Mẽ ate kamã harẽnh nẽ mar nẽ tokyx akupÿm tãm amnhĩ nhĩpêx kaxyw. Kot pa mẽ awÿr mõ nẽ Pahihti nhÿ hã mẽ ate amnhĩ tomnuj ã mẽ amã akir. Nom inhmã ã mẽmoj tã mẽ amã ixàkjêr anhÿr prãm kêt. ãm ÿ hã kapêr o mẽ ajahkre mex nhũm mẽ ate inhmar nẽ hkôt amnhĩ nhĩpêx rãhã ho apaja na inhmã hprãm.

¹¹ E Kris kôt ixkwÿjaja. ãm ja pix. Kwa kêr ka mẽ ixkapêr mar tÿx nẽ hkôt amnhĩ nhĩpêx mex nẽ. Nẽ Tĩrtũm kôt pix mã ri tanhmã amnhĩ nhĩpêx to ho apa rãhã ho apa. Nẽ tãm ri amnhĩ nhĩpêx. Nẽ axpên kôt ajamakêtkati nẽ akĩnh nẽ axãmnhix ri apa. Kot kaj mẽ ã amnhĩ nhĩpêx anhÿr o apa nhũm Tĩrtũm mẽ akôt pa ho pa. Kãm mẽ pajapê htÿx kumrêx. Kêp mẽ pamã mẽ

pahkĩnh nẽ mẽ pajamakêtkati jagjênh xwÿnh.

¹²⁻¹⁴ Nẽ ota jar Kris kôt mẽ pahkwÿjaja pa mẽ ixpimràatã mẽ awÿr ixpêr mẽ. Mẽ ixpiitã mẽ inhmã mẽ akĩnh tÿx jakamã na pa mẽ awÿr ixpêr mẽ.

Nẽ kê Pahihti Jejus Kris mẽmoj to mẽ akutã nojarêt rãhã ho pa. Nhũm Tĩrtũm arĩ kãm mẽ ajapê rãhã ho pa. Nhũm Karõ tanhmã mẽ akrã hto ka mẽ axpên to mex pix kukamã mãn ajamaxpêr o apa.

Tã e ixkwÿjaja. ãm ja pix. Ixpê Pawre na pa mẽ awÿr kagãja nhĩpêx nẽ ã mẽnh anẽ.

Karatas Pawre kot Karatas kamã Jejus kôt hkwýjê hwýr kagà nê mênh

Pawre na pre kagàja nhîpêx nê pika pê Karatas kamã Kris kwýjê hwýr kumê. Na pre ra Ijaew kwýjaja mē hwýr mra nê Tirtûm kapêr kwým ri mē ahkre ho pa nê mē kãm:

—Kot kaj mē amnhî kaxyw Jejus Kris kôt ajamaxpêr hãmri nê mãânên mē ixpê Ijaew nhîgêt kot amnhî nhîpêx kôt amnhî nhîpêx. Kê Tirtûm ja hã mē apumu nê mē ato hkra. Anê.

Nom ã mē kapêr anhýrja kot anhýr kêt. Mē pahte amnhî kaxyw Jejus Kris kôt pajamaxpêr nê hkôt amnhî xunhwýr pix ã mē pahpumunh kôt na hte Tirtûm mē pahto hkra. Tã nhùm prem ã mē kãm ho hêx anhýr o pa nhùm Pawre tee ri ã mē kapêr anhýrja ã mē harênh ma nhùm ja kêt omnuj nê. Jakamã nhùm Karatas nhõ xwýnhjê mã kagàja nhîpêx nê mē hwýr kumê. Nê kamã hprî hã Tirtûm kot mē ho hkra kaxyw tanhmã amnhî nhîpêx to hã mē kãm harê nê hã kagà. Nê mē kãm:

1-2 Pa Karatas nhõ xwýnhjaja? Xà mē amex? Ixpê Pawre na pa mē awýr ixpêr mē nê mēmoj tã mē amã karõ.

Mêpahpãm Tirtûm mē Jejus Kris na pre wa mē akaxyw ixãm. Ixte wa ý hã ma ri mē akôt mē ajahkre o ri ixpa kaxyw. Na pre Jejus ty nhùm Tirtûm akupým ho htír. Hãmri nhùm wa mē akaxyw ixãm. Pyka ja kamã na pre mēhõ mē akaxyw ixãm kêt nê. Tirtûm mē Jejus Kris na pre wa ixãm. Jakamã na pa ã mē awýr kagà nhîpêx nê mênh anê. Mē apê Tirtûm krajê hwýr.

Nê ota jar krî ja kamã ixpyrà nê Kris kôt mē pahkwýjaja mē awýr hpêr mē.

³ E kê Mêpahpãm Tirtûm mē Pahihti Jejus Kris wa mēmoj to mē akutã nojarêt rãhã ho pa. Nê mē ato mex rãhã nê. Ka mē wa ý hã akînh nê ajamakêtkati nê axãmnhîx ri apa.

⁴ Nà na pre Krisja amnhî grõnh kôt mē pahwýr wrý nê mē panê ty. Mē pahte amnhî tomnuj pãnhã amnhîrer kaxyw mē panê ty. Mêpahpãm Tirtûm kãm hprãm xà hkôt. Tã mēmo kaxyw na pre ã mē panê amnhî nhîpêx anê? Nà pika ja kamã mē kot amnhî nhîpêxja omnuj týt jakamã nhùm amnhî grõnh kôt te mē kot amnhî tomnuj pê mē papytãr pyrãk o mē panhîpêx nê ã mē panê htyk anê. ⁵ Jakamã kwa kêr pu mē Tirtûm mã mex o mex ã mãn harênh o ri papa. Nà kot puj mē ã amnhî nhîpêx anhýr rãhã ho ri papa.

Mê ujarênh pixi ãm hãmri hã harênh Rõmãn 16.17; Sikûn Korît 11.3-4; Epes 4.14; Korosê 2.8; Sikûn Pêtre 2.1-3

⁶ Kwa ixkrãmnhwýjaja. Na pa pre mē ate tanhmã amnhî nhîpêx to hã mē ajarênh ma nê ixkaprî nê tee ri mē akukamã ijamaxpêr. Na pre Tirtûmja Kris kukwak ri mē ato mex nê. Nê mē ate hkôt amnhî nhîpêx o apa hprãm xà te kot amnhî wýr mē awýr pyrãk o mē anhîpêx ka mē hkôt amnhî xunhwý. Tã xep tanhmã mē ajamaxpêr to nê ra hkaga kaxyw. Ra axtem mē ujarênh õja ma nê gryk ã Tirtûm kaga kaxyw. Pa tee ri mē ajarênh ma nê ixkaprî nê. Kwa mon ka mē axtem nê ri ã amnhî nhîpêx anhýr mã? ⁷ Jejus jarênh pix na ãm hãmri. Mo mē ujarênh mex õ kot ka kêt mē ama nê hkôt amnhî nhîpêx? Nà amrakati kumrêx. ã mē amã ujarênh anhýr xwýnhjaja na htem Kris kapêr o pihkãr rûnh kumrêx o pa nê katãt kôt harênh kêt nê. Ka xep mē ama nê ajamaxpêr kati rûnh nê.

⁸ Na pa pre ma mē awýr mō nê ãm hãmri mē amã Jejus kot tanhmã mē panê amnhî nhîpêx to hã harê ka prem inhma. Tã koja mēhõ mē awýr mō nê mē amã nhãm mē ujarênh õ jarê nhùm Tirtûm ja hã omu nê nhýrmã ma mē kot amnhî xà htýt kamã hamak tûm xà hwýr kumê nhùm ma hwýr mō nê aa kator kêt nê. Mē pahtõ rý Tirtûm kapêr o wrýk xwýnhjê hõ koja ã amnhî nhîpêx anê

nhũm ja hã omu nẽ ma kuwy pẽ himõta wỳr amnhĩ nẽ kumẽ. ⁹ E kot paj axte mẽ amã ja jarẽ ka mẽ aprĩ hã inhma. Koja mẽhõ mẽ awỳr mõ nẽ mẽ ate hkõt amnhĩ xunhwỳr xwỳnhta kwỳm ri tanhmã mẽ amã ujarẽnh to. Hã koja Tĩrtũm omu nẽ nhỹrmã ma mẽ kot amnhĩ xà htỳx kamã hamak tũm xà hwỳr kumẽ nhũm ma hwỳr mõ nẽ kamã pa ho pa nẽ aa kator kêt kumrẽx.

Tĩrtũm pix kãm Pawre hkĩnh hprãm ã kot jarẽnh

Juãw 5.44; Atre 26.9-20; Karatas 2.6

¹⁰ Nẽ koja mẽmojaja ixkapẽr ma nẽ kãm mar prãm kêt o kãm ixkĩnh kêt japẽr nẽ mãmri kãm ixkĩnh kêt. Tĩrtũm kãm ixkĩnhja pix na inhmã hprãm. Kop apu mẽ piitã kãm ixkĩnhja mãn inhmã hprãm ronhỹx pa Kris nhỹ hã kapẽr jarẽnh o ri ixpa hkêt nẽ.

Tĩrtũm kot Pawre mã Kra Jejus o amnhĩrit ã harẽnh

Sikũn Korĩt 1.12; Wam Tesarõn 2.4

¹¹⁻¹² E Jejus kõt ixkrãmnhwỳjaja. Nà ixte mẽ ujarẽnh mex jarẽnh o ixpaja na pre jar pika ja kamã mẽhõ amnhĩ krã hkõt inhmã harẽnh rỳ inhmã ahkre hkêt nẽ. Jejus Kris tãm na pre ixwỳr kato nẽ inhmã ho amnhĩrit. Jakamã mex o kot pika jakamã mẽ ujarẽnh piitã hakrenh par. ¹³⁻¹⁵ E kot paj ixprĩ hã mẽ amã tanhmã amnhĩ jarẽnh to ka mẽ inhma. Tanhmã Tĩrtũm kot amnhĩ kaxyw ixãm to hã pa mẽ amã amnhĩ jarẽ. Nà na pre kormã ixkêt ri ixkukamã hamaxpẽr nẽ amnhĩm ixta nẽ amnhĩ kaxyw ixãm nẽ kot ixto mex ã ixtã amnhĩ jarẽ. Tã pa pre ixkato nẽ gaa nẽ ixaptar nom kormã Jejus Kris kõt amnhĩ xãm kêt nẽ. Na pa pre axtem nẽ inhmã mẽ ixpẽ Ijaew kot amnhĩ nhĩpẽx kõt pix mã amnhĩ nhĩpẽx o ri ixpa hprãm nẽ. Nhũm pre ixpyrà nẽ arĩ mẽ nywjaja haxwỳja kãm mẽ hkõt pix mã ri amnhĩ nhĩpẽx o pa hprãm nẽ. No inhmã mẽ hkõt amnhĩ nhĩpẽx mex o mẽ hakrenh par prãm jakamã na pa pre mẽ inhĩgêt kõt amnhĩ nhĩpẽx mex

kumrẽx o ri ixpa. Mẽ kapẽr piitãã hkõt amnhĩ nhĩpẽx mex nẽ. Tã ã amnhĩ nhĩpẽx anhỹr o ixpa kaprỳ. Na pa pre axtem nẽ mẽ kot Tĩrtũm Kra Jejus Kris kõt amnhĩ xunhwỳr xwỳnhjẽ nhĩpẽx kati ho ri mẽ hkõt ixpa nẽ inhmã mẽ himex prãm tỳx kumrẽx. ã na pa pre amnhĩ nhĩpẽx anhỹr o ri ixpa. Ra mẽ ate ja hã ixpumunh mex.

¹⁶⁻¹⁷ Tã pa pre ma Tamas wỳr mõ. Kamã tanhmã Kris kwỳjẽ nhĩpẽx to kaxyw ma mẽ hwỳr mõ. Hãmri nẽ kormã mẽ hwỳr ixàhtẽp o inhmõr mẽ nhũm Tĩrtũm tanhmã ixto nẽ inhmã Kra Jejus o amnhĩrit pa jatã omu. Kẽp Tĩrtũm Kra hã pa ixprĩ hã omu. Nhũm inhmã kapẽr nẽ ixte kãm tanhmã amnhĩ nhĩpẽx to ho ri ixpa kaxyw ixapẽnh ã inhmã karõ nẽ Ijaew kêt xwỳnhjẽ hwỳr inhmẽ. Ixkwỳ Ijaew wỳr inhmẽnh kêt nẽ. Na pre inhmã:

—E kær ka ma Ijaew kêt xwỳnhjẽ hkõt ri mẽ kãm ixkapẽr jarẽnh o ri apa.

Anhỹr jakamã pa pre kuma nẽ hkõt amnhĩ xãm kurẽ kumrẽx nẽ ã amnhĩ nhĩpẽx anhỹr o ri ixpa. Jao tanhmã ixte kẽp hkwỳjẽ nhĩpẽx tota kaga nẽ ma pyka pẽ Arap wỳr mõ. Nom tanhmã amnhĩ tã Jejus kwỳjẽ kukjẽr to hkêt nẽ. Nẽ Jerujarẽ hwỳr inhmõr nẽ Jejus nhỹ hã mẽ ahkre xwỳnh maatijaja tanhmã amnhĩ tã mẽ kukjẽr to hkêt nẽ. ãm Tĩrtũm kot inhmã hã karõ xà hkõt ma Arap wỳr mõ nẽ kamã kapõt ã ri ixpa. Kamã na pre Tĩrtũmja inhmã Jejus Kris kot tanhmã amnhĩ nhĩpẽx to ho amnhĩrit o pa. Hãmri nẽ inhmã kapẽr pa amnhĩ tã kuma hãmri nẽ ma akupỳm Tamas wỳr mõ.

¹⁸ Tã nhũm ra amgrã axkrunẽpxi nẽ hapẽx pa Tamas rũm ixkato nẽ ma Jerujarẽ hwỳr Simãw Pẽtre hwỳr mõ. Hãmri nẽ kuri pøj nẽ hkõt ixpikamẽnh ã ixtã semãn axkrut. ¹⁹ Nom mẽ kot Jejus nhỹ hã hkwỳjẽ jahkre ho mẽ pa xwỳnh maati hkwỳjẽ hõ pumunh kêt kumrẽx. ãm Simãw Pẽtre mẽ Pahĩti Jejus tõ Xiakreja pix wa omu. ²⁰ ãm hãmri na pa ã amnhĩ jarẽnh anẽ. Tĩrtũm kot ja hã ixpumunh mex. ²¹ Tã

pa pre mẽ kurũm ixkato nẽ hpãnhã ma pika hkwỹ hkõt ijapôx o mẽ hkõt ixpa. Ma pika pê Sir mẽ Sirisja wa hwÿr mō.

Mẽ kot amnhĩ jaêr pê Pawre kot amnhĩ nhĩpêx nyw ã omunh ã mẽ harênh

²² Nom Jutej kamã Kris kwÿjaja na prem kormã ixpumunh kêt nẽ. Æm Simãw Pêtre mẽ Xiakre pix na pre wa ixpumu. ²³ Na pre ra mẽ hkwỹjaja tanhmã hkwỹjê kot axpên mã ijarênh toja ma. Na prem ijarênh o:

–Kwa Jejus ã mẽ panhĩpêx kati htÿx o pa xwÿnhta na pre tanhmã hamaxpêr to nẽ hpãnhã mẽ kãm Jejus kapêr jarênh o ri mẽ hkõt pa. Mẽ kot amnhĩ kaxyw hkõt hamaxpêr kaxyw. Ra kot Jejus nẽ mẽ pahkurê htã hpãnhã mẽ kãm kapêr jarênh o ri mẽ hkõt pa. Anẽ.

²⁴ Hãmri nhũm Kris kwÿjaja amnhĩ jaêr pê ijarênh ma nẽ inhÿ hã hkĩnh nẽ. Nẽ ixtã Tĩrtũm mã mex o mex ã harê.

2

Pawre kot Kris kwÿ hkrãhtũmjê mã amnhĩ jarênh

Atre 15.1-11

¹⁻² Tã nhũm amgrã pê 14 nẽ hapêx nhũm Tĩrtũm akupÿm Jerujarê hwÿr inhmẽ pa ma akupÿm mō. Panãpe nẽ Xitre mẽ pa mẽ mō nẽ mẽ hwÿr pøj. Hãmri nẽ Kris kwÿ hkrãhtũmjê hwÿr mra nẽ mẽ kãm amnhĩ jarê. Mẽ tapxipixjê mã amnhĩ jarê nẽ ixte Ijaew kêt xwÿnhjê mã Jejus kapêr jarênh o ixpa hã amnhĩ jarê. Na pa pre ra amnhĩ kukamã ijamaxpêr o:

–Koonên. Kot pa apu mẽ kãm amnhĩ jarê nhũm mẽ inhma nẽ ixte Tĩrtũm kapêr kwÿm ri mẽ ahkre ho ixpa hã ixkamnhĩx rÿ hã inhmã akir. Na pa hte Ijaew kêt xwÿnhjê mã Kris jarênh o ixpa no ãm mẽ ixpê Ijaew pyrã nẽ finat Mojes kapêr kôt mẽ kot amnhĩ my kwÿrÿt kã jakãr ã mẽ kãm karō hkêt nẽ. Æm mẽ kot Kris kôt amnhĩ xunhwÿr pix kaxyw na pa hte mẽ kãm hã karō ho ixpa. Tã kot paj Kris kôt mẽ ixkrãhtũmjê mã ja

hã amnhĩ jarê nhũm mẽ inhma nẽ tanhmã hamaxpêr to nhũm ja mẽ kêp omnuj japêr nhũm mẽ tanhmã amnhĩ to nẽ ixte Kris kapêr jarênh o ixpaja nẽ ixkurê. Jakamã nhũm ra ixte mẽ kãm Kris kapêr jarênh o ixpa nhũm mẽ kot inhmar xwÿnhjaja ijarênh ma nẽ tee amnhĩ kukamã hamaxpêr o ra hkaprĩ nẽ pa.

Anhÿr o ijamaxpêr. ³ Tã na prem ixte amnhĩ jarênhja ma nẽ ja nẽ tanhmã inhmã nẽ hkêt nẽ. Pa mẽ kãm amnhĩ jarênh pa nhũm mẽ inhma nhũm Ijaew kêt xwÿnhjaja kot amnhĩ jakãr kêtja nhũm mẽ kãm mex nẽ. Mẽ kêp tanhmã kute hkêt nẽ. Nhũm Ijaew kêt xwÿnh Xitre ixkõt pa nhũm mẽ kot omunh tã kot mẽ ixpyrã nẽ amnhĩ my kwÿrÿt kã krãhyr ã kãm karō hkêt nẽ.

⁴ Tã nhũm mẽ kêp Jejus kwÿ hã amnhĩ jarênh o hêx xwÿnhjaja mẽ ixtã akuprō. Nom hêx rom mẽ ixte Kris kôt amnhĩ nhĩpêx ã mẽ ixpumunh pix kaxyw. Hãmri nẽ ixkapêr ma nẽ Xitre hã inhmã akir nẽ inhmã:

–Kwa na pre Xitre Jejus kôt pix mã amnhĩ xãm nom finat Mojes kot mẽ pahpê Ijaew kot amnhĩ nhĩpêx ã karō hkõt amnhĩ nhĩpêx kêt nẽ. Kwa ja mex kêt. Na htem Jejus kôt amnhĩ xunhwÿ nẽ mããnên finat Mojes kapêr kôt amnhĩ nhĩpêx. Jakamã kwa kãm anẽ kê amnhĩ my kwÿrÿt kã krãhta. Finat Mojes kot mẽ panhĩgêtjê mã hã karō xã hkõt.

⁵ Anhÿr tã pa prem mẽ kuma nẽ ãm mẽ kuma. Kot pa ri mẽ kãm ja hã karō hkêt nẽ. Æm Jejus kapêr kôt pix mã kot puj mẽ amnhĩ nhĩpêx o papa nẽ finat Mojes kapêr mẽ Jejus kapêr o papihkãr kêt nẽ. Kot puj mẽ anhÿr o Jejus kapêr o ahkã nhũm ja mex kêt nẽ. Jejus kapêr kãm mo mẽ kot mẽmy kwÿrÿt kã jakãr ã mẽ kãm karō? Amrakati. Jakamã na pa pre ãm mẽ pano kupyrr o mẽ pa xwÿnhtajê kapêr ma nẽ ãm mẽ kuma.

⁶ Tã pa pre ra Ijaew kwÿ pê Jejus kôt ixkwÿ hkrãhtũmjê mã amnhĩ jarênh pa. Tanhmã ixte Ijaew kêt xwÿnhjê mã Jejus kapêr jarênh to hã mẽ kãm

amnhĩ jarē nhũm mē inhma nhũm ja mē kām mex nē. Jakamā Ijaew kêt xwýnhjaja kot mē ixpê Ijaew pyrà nē finat Mojes kapēr kôt amnhĩ nhĩpêxja nhũm mē tanhmā mē kaxyw inhmā hã karō hto hkêt nē. Tĩrtũm na hte mē kêp mē hkrãhtũm ã mē omunh xà hkôt mē hkwyjê rom tanhmā mē ho mex to hkêt nē. Na hte mē pahpiitã mē panhĩpêx o axpên pyrãk. Jakamā na pa hte ijaxwýja Jejus kôt mē ixkrãhtũmjaja kot amnhĩ to rax o ijakrenh ã tanhmā ijamaxpêr to hkêt nē. ⁷ Na pa pre mē kām amnhĩ jarēnh pa nhũm mē inhma nē axpên mã:

—Nà ãm hãmri na pre Tĩrtũm ahpýnhã Pawre mē Simãw Pêtre wa kām wa àpênh ã karō nē Ijaewjê hwýr Simãw Pêtre mē nē axtem Ijaew kêt xwýnhjê hwýr Pawre mē. Wa kot ahpýnhã mē hkôt mē kām Jejus kapêr jarēnh o ri pa kaxyw. Nà ãm hãmri na hte wa ã amnhĩ nhĩpêx anhýr o pa. Nà ja mex. Anê.

⁸ Ra Tĩrtũm kot Ijaew wýr Simãw Pêtre mēnh tã hpãnhã Ijaew kêt xwýnhjê kaxyw pa ixãm. ý hã wa ixte mē kām Jejus kapêr jarēnh o ri mē hkôt wa ixpa kaxyw. ⁹ Jakamā nhũm mē ixkrãhtũm Xiakre mē Simãw Pêtre mē Juãwja ixte mē kām amnhĩ jarēnh ma nē hkĩnh nē. Tĩrtũm kot ixto mex nē Ijaew kêt xwýnhjê hwýr inhmēnh ã ixte amnhĩ jarēnhja ma nē hkĩnh nē. Hãmri nē Panãpe mē wa inhmā kapêr nē wa inhmã:

—Nà ãm hãmri. Kot puj xep mē anê. Ka mē Panãpe wa kot kaj wa ma Ijaew kêt xwýnhjê hkôt mē kām Jejus kapêr jarēnh o ri apa. No mē pajaja kot paj mē axtem mē pahkwý Ijaew kôt harēnh o ri ixpa. ã kot puj mē ahpýnhã mē hwýr papa anê. ¹⁰ Nom kêt ka wa inhmar kumrêx. Kêt ka wa mē ixpyrà nē Kris kôt mē pahkwýjê pê amrakati xwýnhjê ho mex o ri apa. Měmoj to mē kutã anojarêt rãhã ho ri apa.

Anhýr o wa inhmã kapêr pa wa mē kuma nē mē kām:

—Tõe. Nà kot paj wa anê. Ra ã wa ixte amnhĩ nhĩpêx anhýr kaxyw kênã. Anê.

Pawre kot Simãw Pêtre mã àkjêr ã harēnh

Atre 10; Rômãn 3.21-31, 6.1-14

¹¹⁻¹⁴ Tã nhũm Simãw Pêtreja man mē ixwýr krĩ pê ãxiok wýr mō. Nē jar mē ixkôt ri pa. Ixpyrà nē kêp Ijaew tã Kris kôt Ijaew kêt xwýnhjê hkôt pa nē mē kutã apkur o pa. Ixpyrà nē àmnhĩx ri mē kutã apkur o ri mē hkôt pa. Ijaew kêt xwýnhjaja kot amnhĩ my kwýr kà jakàr kêt jakamā na pa htem mē kutã ixàpkur kêt nē. Tã ra mē ixte Kris kôt amnhĩ xunhwýr jakamā ja mē ixpê tanhmā kute hkêt. Na pa htem ixàmnhĩx mē hkôt ixpa nē mē kutã apku. Ra mē ixte Kris kôt amnhĩ xunhwýr kênã kot pa hkêt ri mē hkôt ixpa hkêt. Na pa htem ixàmnhĩx mē hkôt tanhmã amnhĩ nhĩpêx to ho ri ixpa.

Tã nhũm Xiakre kot mē ixwýr mē rēnh xwýnhjaja haxwýja mē ixwýr mō. Mē ixpyrà nē mē kêp Ijaew tã mē ixpyrà nē Kris kôt amnhĩ xunhwý. Jakamā ra mō nē mē ixwýr pøj. Hãmri nhũm Simãw Pêtre mē omu nē mē umaj axte Ijaew kêt xwýnhjê kutã apkur kêt nē. Axtem nē òja py nē o tē nē mē hkàx ã ahte apkur o nhý. Hãmri nhũm ra mē ixri Ijaew kwý pê Kris kôt mē pahkwýjaja ja hã omu nē piitã uràk nē ã amnhĩ nhĩpêx anê nē Simãw Pêtre ri Ijaew kêt xwýnhjê hkàx ã apkur o hkrĩ. Nhũm ixkôt pa xwýnh Panãpeja haxwýja ja hã mē omu nē mē uràk nē ã amnhĩ nhĩpêx anê nē mē hkàx ã apku. Hãmri pa tee ri ja hã mē omu nhũm ja inhmã mex kêt nē. Na prem ã amnhĩ nhĩpêx anhýr o Tĩrtũm kapêr ã kagà htũm kamã mē ujarēnh mex kwým ri amnhĩ nhĩpêx. Jakamā pa ã mē kot amnhĩ nhĩpêx anhýrja nē Simãw Pêtre mã ixkapêr. Mē piitã mē noo mã xa nē ã kot amnhĩ nhĩpêx anhýrja nē kām ixkapêr nē kām:

—Tk. Kwa nà Simãw Pêtre. Ri ã amnhĩ nhĩpêx anhýr kêt nē. Pahpê Ijaew tã kormã pahkwýjaja hpôx kêt ri ka hte ixpyrà nē axàmnhĩx Ijaew kêt xwýnhjê kutã axàpkur o ri apa. Tã amnhĩ wýr mē pahkwýjê pumu nē axtem nē mē hkàx ã axàpkur o akrĩ.

Kwa nà na ka ã amnhĩ nhĩpêx anê nê ra axtem amnhĩ nhĩpêx. Te ate mẽ kãm akapêr nê mẽ kãm: “Kot kaj mẽ ixpyrà nê amnhĩ my kwryt kà jakà pa rĩ mẽ akôt ri ixpa nê mẽ akutã ixàpkur o ixpa.” Anhÿr pyrãk. Kwa ja mex kêt.

15 —Mẽ pahpê Ijaew na pu htem mẽ kêp Ijaew kêt xwÿnhjê jarênh o: “Mẽ kot mẽ pahte amnhĩ nhĩpêx kôt amnhĩ nhĩpêx kêt xwÿnhjaja.” Anê.

16 Tã mẽ pahpê Ijaew tã na hte Tĩrtũmja mẽ pahte mẽ panhĩgêt kot amnhĩ nhĩpêx kôt mẽ pahte amnhĩ nhĩpêx ã mẽ pahpumunh kôt mẽ pahto hkra hkêt nê. Ra mẽ pahte ja pumunh mex. ãm mẽ pahte amnhĩ kaxyw Jejus Kris kôt pajamaxpêr ã mẽ pahpumunh kôt pix mã na hte mẽ pahto hkra. Kot pu mẽ amnhĩ kaxyw hkôt pajamaxpêr nhũm ja hã mẽ pahpumunh kôt pix mã mẽ pahto hkra.

17 —Mẽ pahpê Kris kwÿ jakamã na hte Tĩrtũm amnhĩm mẽ pamex ã mẽ pajarê nê mẽ pahte amnhĩ tomnuj xwÿnh kêt ã mẽ pajarê. Jakamã na pu htem paxãmnhĩx ri Ijaew kêt xwÿnhjê kot Kris kôt amnhĩ xunhwÿr xwÿnhjê hkôt ri papa ho papa. Ra Tĩrtũm kot mẽ pahpyrà nê amnhĩm mẽ mex ã mẽ harênh kênã. Tã koja mēhõ kormã ja mar kêt nê tanhmã hã mẽ pajarênh to nê mẽ pajarênh o: “Tk. Ra mẽ kot amnhĩ kaxyw Kris kôt hamaxpêr tã axtem nê Ijaew kêt xwÿnhjê hkôt ri pa. Jakamã arĩ mẽ kot amnhĩ tomnuj xwÿnh kênã.” Anhÿr o mẽ pajarênh japêr. Nom ãm mẽ pahte amnhĩ tomnuj xwÿnh ã mẽ pajarênh kaprÿ. Na pu htem Kris kôt amnhĩ nhĩpêx nê ra tãm amnhĩ nhĩpêx mex o papa. 18 No kot pu mẽ hkôt ri amnhĩ nhĩpêx o papa htã tanhmã pajamaxpêr to nê pahte amnhĩ nhĩpêx tũm o awjanã hãmri nê amnhĩ tomnuj tÿx kumrêx.

19 —Tã tanhmã kot puj wem amnhĩ to nê mẽ panhĩgêt kot amnhĩ nhĩpêx piitã hkôt amnhĩ nhĩpêx mex o ri papa? Na pu htem pajamaxpêr o: “Kot paj ã amnhĩ nhĩpêx anê nê ã amnhĩ nhĩpêx anê nhũm Tĩrtũm ja hã

ixpumu nê amnhĩm inhmex ã ijarê.” Anhÿr o pajamaxpêr. Hãmri nê finat Mojes kot mẽ panhĩgêtjê mã kapêr piitã hkôt ri mnhĩ nhĩpêx o papa nom tōhã hkwȳm ri tanhmã amnhĩ tomnuj to. Jakamã nhũm Tĩrtũm ja hã mẽ pahpumunh kôt mẽ pamex ã mẽ pajarênh kêt nê. Kapêr ã kagã htũm kot ã ja jarênh kot anhÿr. Nom kot puj mẽ amnhĩ kaxyw Kris kôt pajamaxpêr nhũm ja hã mẽ pahpumunh kôt amnhĩm mẽ pamex ã mẽ pajarê. Hãmri pu mẽ Tĩrtũm kôt amnhĩ nhĩpêx o ri papa nê axte mẽ pahpê Ijaew nhĩgêtjê kot amnhĩ nhĩpêx kôt amnhĩ nhĩpêx hkêt nê. Te ra mẽ pahtyk nê axte hkôt amnhĩ nhĩpêx kêt pyrã nê pãnhã Tĩrtũm kapêr kôt pix mã ri amnhĩ nhĩpêx o ri papa.

20 —Nê na prem pĩ kahpa hã Kris nhô nê kupĩ nhũm mẽ pahte amnhĩ tomnuj te ãhkô hã jêt nê haxwÿja htyk pyrãk. Jakamã na pu htem amnhĩ tomnuj kaga nê Kris kôt amnhĩ xunhwÿ nhũm Karõ mẽ pahkarõm agjê pu mẽ te Jejus Kris kot amnhĩ nhĩpêx pyrãk o amnhĩ nhĩpêx o papa. Jao hpãnhã mẽ pahte amnhĩ nhĩpêx nyw pix o amnhĩ nhĩpêx o ri papa. Kris kãm hprãm xà hkôt pix mã tanhmã ri amnhĩ nhĩpêx to ho papa. Kris kêt Tĩrtũm Kra htã kãm mẽ pajapê kamã mẽ panê htyk jakamã na pu htem amnhĩ kaxyw kôt pix mã pajamaxpêr rãhã ho papa.

21 —ãm hãmri na pre Tĩrtũm mẽ pahto mex kumrêx nê mẽ pahwÿr Krisja mẽ nhũm mẽ pahwÿr wrÿ nê mẽ panê ty. Tã na pa pre kapêrja ma nê mar tÿx nê hã ri ixpa nê ho ijamakêtkati hkêt nê. Tã kop apu Tĩrtũm kot mẽ pahte mẽ panhĩgêtjê kot amnhĩ nhĩpêx o amnhĩ nhĩpêx ã mẽ pahpumunh kôt mẽ pamex ã mẽ pajarênh ronhÿx pre Krisja ãm mẽ panê htyk kaprÿ. Mo kaxyw nhÿx pre mẽ panê ty? Anê.

ã na pa Simãw Pêtre mã ixkapêr anê nhũm mẽ piitã apkur pê hã inhmar o hkrĩ.

3

*Mě pahte amnhĩ krā hkôt pahpê
Tĩrtũm kra hkêt ã mẽ pajarēnh*

*Karatas 5.16-23; Epes 2.8; Piripos
3.9; Sikũn Ximotre 1.9; Xitre 3.4-7*

¹ Kwa Karatas nhõ xwỳnhjaja. Te ri mẽ ajamaxpěr kêt kumrēx pyrāk. Amnepê mã mẽ awỳr inhmõrta ã na pa pre mẽ amã tanhmã Kris htykja jarēnh to. Pĩ kahpa hã mẽ panê htyk ã harē ka mẽ aprĩ hã inhma. Tã nhũm Tĩrtũm kapěr jarēnh o mẽ hēx xwỳnhjaja ixpãnhã mẽ awỳr mra nē tanhmã mẽ amã ujarēnh to ka mẽ ama nē mẽ ajamaxpěr o apihkàr rax nē. Jao axte Kris tyk mã ajamaxpěr kêt nē. ² E mẽ inhmã mẽmoj jarē. Mẽmoj tã mẽ apumunh kôt na pre Tĩrtũm mẽ awỳr amnhĩ Karõ rē nhũm mẽ awỳr agjê? Xà mẽ anhĩgêt kot amnhĩ nhĩpêx kôt mẽ ate amnhĩ nhĩpêx ã mẽ apumunh kôt? Nà na pre ja hã mẽ apumunh kôt mẽ awỳr rēnh kêt nē. Na ka prem Kris jarēnh ma nē amnhĩ kaxyw hkôt ajamaxpěr nhũm ja hã mẽ apumunh kôt mẽ awỳr kurē nhũm mẽ awỳr agjê.

³ Na pu htem amnhĩ krā hkôt tanhmã amnhĩ nhĩpêx to ho pahpê Tĩrtũm kra hkêt nē. Tĩrtũm Karõ pix kukwak ri na pu htem pahpê hkra. Tã ka mẽ axtem nē ajamaxpěr o:

—Nà Tĩrtũm ra kot ixto hkra jakamã kot paj arĩ ri mẽ inhĩgêt kot amnhĩ nhĩpêx kôt amnhĩ nhĩpêx o ixpa rãhã nē inhmex kumrēx nē ri ixpa. Anē.

Kwa ã mẽ ajamaxpěr anhỹrja mex kêt. ⁴ Mẽ akwỳ kot Kris ã mẽ atomnuj tã ka mẽ amnhĩ xà htỳx kamã ajamak o ri apa htã Kris kaga hkêt nē. Tã ra axtem nē mẽ kapěr o mẽ hēx xwỳnhjê jamaxpěr kôt ajamaxpěr o te Kris ã amnhĩ xà kamã ajamak kaprỳ pyrāk. Kwa nà mẽ ri mẽ hkôt ajamaxpěr kêt nē. ⁵ Na pre Tĩrtũm mẽ awỳr amnhĩ Karõ rē nhũm mẽ awỳr agjê nē mẽ amã aa mẽ ate mẽmoj pumunh kêt kwỳ ho anhỹr o ri mẽ akamã pa ho pa. Xà mẽ anhĩgêt kot amnhĩ nhĩpêx kôt mẽ ate amnhĩ nhĩpêx ã mẽ apumunh kôt na pre ã mẽ amã amnhĩ nhĩpêx

anē? Nà ja kôt kêt. Æm mẽ ate Kris kapěr mar nē amnhĩ kaxyw hkôt ajamaxpěr ã mẽ apumunh kôt pix mã na pre ã mẽ amã amnhĩ nhĩpêx anē.

*Tĩrtũm kot amnhĩ tã finat Apraãw
pumunh kôt mex ã harēnh*

Rõmãn 4.1-25; Xiakre 2.23

⁶ Nē mẽ ixpê Ijaew pàr krax finat Apraãw na pre amnhĩ kaxyw Tĩrtũm kôt hamaxpěr nhũm amnhĩ tã omu nē kãm:

Nà ate amnhĩ kaxyw inhmã ajamaxpěr tỳx jakamã na pa amnhĩm amex ã ajarē. Amex kumrēx Apraãw.

⁷ Anhỹr o kãm kapěr jakamã mẽ pahte urāk nē amnhĩ kaxyw hkôt pajamaxpěr xwỳnhjaja te mẽ pahpê Apraãw tãmnhwỳ pyrāk. ⁸ Nē mẽ apê Ijaew kêt xwỳnhjaja. Na hte Tĩrtũm mẽ pahto hpimràk tã mẽ pahte amnhĩ kaxyw kãm pajamaxpěr ã mẽ pahpumunh kôt amnhĩm mẽ pamex ã mẽ pajarē nē mẽ pahto hkra. Amnepēm na pre Apraãw mã kapěr nē kãm:

E ate amnhĩ kaxyw ixkôt ajamaxpěr jakamã kot paj akukwak ri pyka piitã hkôt mẽ piitã mẽ ho mex nē.

Anhỹr o kãm kapěr jao mããnēn mẽ apê Ijaew kêt xwỳnhjê jarē. ⁹ Jakamã mẽ pahte Apraãw pyrã nē amnhĩ kaxyw Tĩrtũm kôt pajamaxpěr xwỳnhjaja kot puj mẽ pahpiitã urāk nē pamex kumrēx nē papa ho papa.

*Tanhmã Tĩrtũm kot mẽ panê pĩ
kahpa hã jêt xwỳnh nhĩpêx to hã harēnh*
Rõmãn 4.14, 7.10; Wam Korĩt 15.56

¹⁰ Nē koja mẽhõ hamaxpěr o:

—E kot paj finat Mojes kapěr kôt ri amnhĩ nhĩpêx o ri ixpa nhũm Tĩrtũm ja hã ixpumu nē amnhĩm inhmex ã ijarē nē ixto hkra. Anē.

No ãm ja kot anhỹr kêt. Tĩrtũm kapěr ã kagà htũm kot ja jarēnh kot:

Ixte amnhĩm mẽ mex ã mẽ harēnh kaxyw mẽ kot Mojes kapěr kôt amnhĩ nhĩpêx xwỳnhjaja koja mẽ ãm mẽmoj pixire nē hirõp kuhê. Rỳ mẽmoj pixire nē hkôt amnhĩ nhĩpêx kêt pa ja hã mẽ

omu nē hā mē homnuj tỳx kumrēx.
 Anhÿr jakamā tanhmā kot pu mē amnhī to nē Mojes kapēr piitā hkôt amnhī nhīpêx nē aa ho pixi nē hirôp pakuhê hkêt? Nà kot puj mē ho anhÿr kêt nē. Kot puj mē tee ri pamā ja ho anhÿr prām kaprÿ. Jakamā Tirtūm kot amnhīm mē mex ā mē harēnh kaxyw mē kot ā amnhī nhīpêx anhÿr mā xwÿnhjaja koja mē mex kêt nē.

¹¹ Na hte Tirtūm mē kot finat Mojes kapēr kôt amnhī nhīpêx o mē pa hā mē omunh xà hkôt mē mex ā mē harēnh kêt nē. Ām mē kot amnhī kaxyw hkôt hamaxpēr xwÿnh pixjaja na hte ā mē harēnh anē. Kapēr ā kagā htūm kot mē harēnh kot:

Mē kot amnhī kaxyw ixkôt hamaxpēr xwÿnhjaja na pa hte mē mex ā mē harēnh o ixpa. Mē tapx-
 ipixjaja koja mē nhÿrmā Ixkra mē wa ixri mex kumrēx nē htÿr tūm nē pa ho pa. Anē.

¹² Nom na htem amnhī kaxyw Tirtūm mā hamaxpēr pē finat Mojes kapēr kôt amnhī nhīpêx o pa hkêt nē. Mojes kapēr ā kagā kot ja jarēnh kot:

Mē kot ixkapēr piitā hkôt amnhī nhīpêx mex o mē pa xwÿnh pix-
 jaja koja mē htÿr tūm nē pa ho pa. Anē.

¹³ Tā kot pu mē ām kapēr o pixire nē hirôp pakuhê hāmri nē mÿrapê pahtÿr tūm nē papa hkêt nē. Nē hpānhā mē kot amnhī xà htỳx kamā hamak tūm xàta hwÿr ma papa. Ja pymaj na pre Krisja ĩ ho mē pahwÿr wrÿ nē mē pahte amnhī tomnuj mÿrapê mē panê ty. Tirtūm kot mē pahte amnhī tomnuj mÿrapê tanhmā mē pahto py-
 maj ā mē panê htyk anē. Jakamā nhūm Tirtūm mē pahte amnhī tomnuj ā mē pahpumunh kôt mē pakuhpa hā Kraja homnuj nē. Kapēr ā kagā htūm kot ja jarēnh kot:

Pĭ kahpa hā jêt xwÿnhhta na pre Tirtūm homnuj tỳx kumrēx. Anē.

Mē kot amnhī kaxyw Kris kôt mē hamaxpēr xwÿnhjê jarēnh

¹⁴ Tā ā Jejus Kris kot mē panê amnhī nhīpêx anhÿr kukwak ri na

pre Tirtūm kot Apraāw nhīpêx pyrā nē mē ixpê Ijaew pix o mex kêt nē. Māānēn mē apê Ijaew kêt xwÿnhjê ho mex nē. Jakamā koja mēhō. Ijaew ô rÿ Ijaew kêt xwÿnhjê hō amnhī kaxyw Kris kôt hamaxpēr nhūm Tirtūm hā omu nē ho hkra nē hwÿr Karō mē nhūm kām axà.

Tirtūm kot finat Mojes kukamā mē pahto mex ā harēnh

Rômān 3.19-20, 5.20-21, 11.32; Eprēw 6.13-18

¹⁵ E ixkrāmnhwÿjaja. Kot paj ixprĭ hā mē amā ja jarē ka mē inhma. Nà koja mēhō wa hamēxkrut nē mēmoj tā axpēn ma. Pika hā war axpēn ma rÿ mēmoj tā war axpēn ma. Hāmri nē wa hā axpēn mar pa nhūm ja ām hāmri nē ām rāhāā. Koja nhām mēhō tē nē axtem tanhmā harēnh to hkêt nē. ¹⁶ Ja pyrā nē na hte ā Tirtūm mēmoj tā amnhī jarēnh anē. Na hte mēmoj jarē nhūm arĭ rāhāā. Na hte jarāhā mēmoj jarē nhūm jāā nhūm axtem hijuk ri mēmoj jarēnh kêt nē. Na hte ām kapēr pÿnh nē. Tā na pre Apraāw mā hkanrēhā htāmnhwÿjê hō kukwak ri Apraāw o mex ā amnhī jarē. Tāmnhwÿ piitā kukwak ri ho mex ā amnhī jarēnh kêt nē. Ām kanrēhā htāmnhwÿ Krisja pix kukwak ri ā Apraāw o mex ā kām amnhī jarēnh anē.

¹⁷ E kot paj hpānhā axtem tanhmā mē amā harēnh to. Na hte Tirtūm kot mēmoj tā amnhī jarēnh xà hkôt tanhmā mēmoj to ho pa rāhā nē. Ā na pre finat Apraāw mā kot ho mex ā amnhī jarēnh anē. Tā ra hā amgrā pē 430 nē hapêx nhūm hpānhā finat Mojes mā kapēr. Kot mar nē amnhī xô ri Ijaew mā harēnh o ri mē hkôt pa kaxyw. Tā no nhūm ra kot Apraāw mā mēmoj jarēnhhta arĭ hā no htỳx rāhā nē aa ho hamakêtkati hkêt nē. Nē kot Mojes mā tanhmā kapēr toja nē Apraāw mā tanhmā kapēr toja nhūm hamē wa ho hamakêtkati hkêt nē. Nhūm wa hamē arĭ rāhā ho rāhā. ¹⁸ Tā mē ano kupyw o ri mē pa xwÿnhjaja na htem htỳx tanhmā mē amā harēnh to nē mē amā harēnh o:

—Kwa kot puj mẽ Mojes kapër kôt amnhĩ nhĩpêx o papa hkêt nê nhũm Tĩrtũm tee ri ja hã mẽ pahpumu nê mẽ pahto mex kêt nê. Anê.

Nom ja kot anhỹr kêt. Kop apu ã kot anhỹr ronhỹx Tĩrtũm ra wam kot tanhmã Apraãw mã kapër tota ra ho hamakêtkati. Nom na hte arĩ kãm hamaxpêr rãhã nê ho pigranh nê ho hapêx kêt nê. Na pre Apraãw mã kãm: Kot kaj amnhĩ kaxyw ixkôt ajamaxpêr hã kot paj ato mex kumrêx. Anê.

Tã kot ho mex ã amnhĩ jarênhja arĩ rãhãã. Na hte arĩ mẽ kot amnhĩ kaxyw hkôt hamaxpêr xwýnhjê ho mex nê. Nom mẽ kot Mojes kapër kôt amnhĩ nhĩpêx o pa hã mẽ omunh xà hkôt mẽ ho mex kêt nê. ãm mẽ kot amnhĩ kaxyw hkôt hamaxpêr xwýnh pixjaja na hte mẽ ho mex.

Mo kaxyw na Mojes kapër ã kagà?

Rõmãn 3.20, 5.20, 7.7

¹⁹⁻²⁰ Tã mo kaxyw na Mojes kapër ã kagàja? Nã mẽ pahte tanhmã amnhĩ tomnuj to ho papa hã amnhĩ pumunh nhũm Tĩrtũm kot ã mẽ pahte amnhĩ nhĩpêx anhỹrja nê mẽ pahkurê kaxyw. Na pre Mojes Tĩrtũm nhỹ hã mẽmoj nê mẽ pahkurê. Mẽ pahte xpên pê paxàhkĩnh nê mẽ pahkurê. Nê mẽ pahte xpên mã paxêx o ri papa nê mẽ pahkurê. ã mẽmoj nê mẽ pahkurê anê. Mẽ pahprĩ hã kapêr mar nê tãm amnhĩ nhĩpêx o papa kaxyw. Ja kaxyw na pre Tĩrtũm Ijaew kaxyw Mojes mã kapêr gõ. Na pre kaxkwa rũm kapêr o wrỹk xwýnhjaja kumrêx kãm harê nhũm kuma nê Ijaew mã hã kagà. Jakamã na htem harênh o: “Mojes kapêr” anhỹr o harê.

Tã Apraãw kanrêhã htãmnhwý Krisja kormã kator kêt ri nhũm Ijaew Mojes kapêr ma nê hkôt ri amnhĩ nhĩpêx o pa. Tã nhũm Krisja kator o Mojes kapêr o hapêx. Ra Tĩrtũm kot Kris kukamã ho mex ã amnhĩ jarênh xà hã arĩgrota kator mẽ nhũm Mojes kapêr hapêx.

No na pre Tĩrtũm Ijaew mã ujarênh kaxyw tãm mẽ kãm ujarênh kêt nê. Kapêr o wrỹk xwýnhjê mã na pre harê

nhũm mẽ amnhĩ xò ri Mojes mã mẽ kaxyw kãm awjarê. Kot mẽ ô ri mẽ kãm harênh kaxyw. No Apraãw mã na pre Tĩrtũm tãm kapêr. Na pre hwýr kapêr o wrỹk xwýnhjê hõ mênh kêt nê. Tãm kot kãm kapêr jakamã kapêrja na mex o Ijaew kaxyw Mojes mã kapêr jakrenh.

²¹ Nê na pre Tĩrtũm tanhmã mẽ pamã kapêr o amnhĩrĩt to nê mẽ pamã:

—E kot paj amnhĩ kaxyw ixkôt mẽ ajamaxpêr ã mẽ apumunh kôt pix mã mẽ amex ã mẽ ajarê.

Anhỹr o mẽ pamã kapêr. Tã xà na pre kapêrja nhĩjuk ri axte amnhĩ jarê nê amnhĩ jarênh o:

—E kot paj mẽ ate Mojes kapêr kôt amnhĩ nhĩpêx mex o apa hã mẽ apumunh kôt mẽ amex ã mẽ ajarê.

Anhỹr o mẽ pamã kapêr? Xà na hte mẽmoj jarê nhũm jãã nhũm ra hijuk ri axtem mẽmoj jarê? Nã Tĩrtũm kapêr ãm hpýnh kênã. Kop ãm mẽ pahte Mojes kapêr kôt amnhĩ nhĩpêx o papa hã mẽ pahpumunh kôt mẽ pamex ã mẽ pajarênh ronhỹx mẽ pamã:

—ãm ja pix ã mẽ apumunh kôt kot paj mẽ amex ã mẽ ajarê. Anê.

²² Nom na pre ã kapêr anhỹr kêt nê. Kapêr ã kagà htũm kot ja jarênh o: Mẽ apiitã mẽ ate amnhĩ tomnuj o mẽ apa xwýnh na ka mẽ.

Anhỹr jakamã tanhmã kot puj mẽ amnhĩ to nê Mojes kapêr kôt amnhĩ nhĩpêx mex o papa? Mẽ pahpiitã mẽ pahte amnhĩ tomnuj xwýnh kênã. Mẽ pahte kapêr piitã hkôt amnhĩ nhĩpêx kêt jakamã koja Tĩrtũm ja hã mẽ pahpumunh kôt mẽ pamex ã mẽ pajarênh kêt nê. Koja ãm mẽ pamã kapêr o:

—Kot kaj mẽ amnhĩ kaxyw Jejus Kris mã ajamaxpêr pa ja hã mẽ apumunh kôt mẽ amex ã mẽ ajarê nê mẽ ato ixkra nê mẽ ato mex o ri ixpa. Anê.

Mojes kapêr te kêp Kris xwýj ri mẽ hamãr xwýnh pyrãk ã harênh

Rõmãn 10.4; Karatas 4.1

²³ Nê kormã Kris kot mẽ pahwýr wrỹk nê mẽ panê htyk xwýj ri na

pre Ijaew Mojes kapër ma nê hkôt amnhî nhîpêx o ri pa. Nhùm kapërja te kot amnhîm mẽ unênh nhùm mẽ kot hkôt pix mã amnhî nhîpêx o ri pa pyræk. Na prem Tirtùm kot mẽ mex ã mẽ harênh prãm xàj ãm pix ma nê hkôt amnhî nhîpêx o pa. Nom kapër piitã hkôt amnhî nhîpêx mex kêt nê.
²⁴ Te mẽhprîre nhùm Mojes kapër te kêt mẽ hamãr xwýnh pyræk. Mẽhprî jamãr xwýnhjaja na htem mẽhprîjê pumu nê tãm mẽ kot amnhî nhîpêx kaxyw tanhmã mẽ ahkre hto ho mẽ hkôt pa. Ja pyrã nê na pre Ijaew tãm amnhî nhîpêx o pa kaxyw Mojes kapër ma nê hkôt amnhî nhîpêx o ri pa. Jejus Kris kutêp ã amnhî nhîpêx anhýr o ri pa. Tã nhùm Jejus tãm kaxkwa rùm wrý pa mẽ ixkwý pixjaja mẽ ixkwýjê rom amnhî kaxyw hkôt ijamaxpêr. Hãmri nhùm Tirtùm ja hã mẽ ixpumunh kôt mẽ inhmex ã mẽ ijarênh kurê kumrêx.

Jejus kukwak ri mẽ pahpê Tirtùm kra ã mẽ pajarênh

Juãw 1.12; Rômãn 8.14; Epes 1.5

²⁵⁻²⁶ Tã ra mẽ ixte amnhî kaxyw Kris kôt ijamaxpêr jakamã na pre Tirtùm mẽ ixto hkra pa mẽ ra te ixpê hkra xàptàr pyræk o amnhî nhîpêx nê kapër kôt amnhî nhîpêx mex o ri ixpa. Jao Mojes kapër kaga. Te mẽhprîre ra mẽ ahkre kamã mẽ àptàr nê kot mẽ ahkre xwýnh kaga pyræk. Hãmri pa mẽ ixpê Tirtùm kra xàptàrjaja hãmri axte Mojes kapër kôt amnhî nhîpêx hkêt nê.

²⁷ Tã mẽ kajaja na ka pre mẽ ixpyrà nê amnhî kaxyw Kris kôt ajamaxpêr nhùm mẽ akwý kot mẽ apê Jejus kwý hã mẽ apumunh kaxyw nhùm mẽ akrã kumrã. Hãmri ka mẽ Jejus kot amnhî nhîpêx kôt pix mã amnhî nhîpêx o ri apa. ²⁸ Tã ra mẽ pahpê Jejus Kris kôt amnhî xunhwýr xwýnh jakamã na hte Tirtùm ahpýnhã ri tanhmã mẽ pakute hkôt mẽ pahpumunh kêt nê. Mẽ pahpê Ijaew rý mẽ pahpê Ijaew kêt xwýnhjaja. Rý mẽ pahpê nhãm mẽ kãm paxàpênh xwýnh rý amnhî mã

mẽ paxàpênh xwýnh nhùm hte ja hã mẽ pahpumunh kôt tanhmã mẽ pajarênh to hkêt nê. Rý mẽ anijê hkôt rý mẽ inhmyjê hkôt mẽ pahpumunh kôt tanhmã mẽ pajarênh to kêt nê. ãm mẽ pahte Jejus Kris kôt amnhî xunhwýr ã mẽ pahpumunh kôt pix mã na hte ã mẽ pahpumunh o pa anê.

²⁹ Nê na pre Tirtùm Apraãw mã hkanrêhã htãmnhwý Jejus Kris o mex ã amnhî jarê. Tã Kris kêt mẽ panhõ Pahihti jakamã pu mẽ Tirtùm noo mã uræk nê te mẽ pahpê Apraãw tãmnhwý pyræk. Jakamã koja Apraãw nhîpêxta pyrã nê mẽ pahto mex rax nê.

4

Mojes kapër te axte mẽ pahpynênh kêt pyræk ã harênh

Rômãn 7.1, 8.14-17; Karatas 3.23

¹ E kot paj axte mẽ amã tanhmã mẽhprîjê jarênh to ka mẽ inhma. Koja mẽhõ ra hkra mã mẽmo hikukrêx nhõr kaxyw. Hikukrêx nê õ pika. Õ mẽmoj piitã õr kaxyw. No nhùm hkraja kormã hprîre nê hamaxpêr mex kêt jakamã nhùm kormã hprêk jamãr o pa. Nhùm hkraja arî te kãm àpênh o pa xwýnh kot amnhî nhîpêx pyrã nê amnhî krã hkôt ri amnhî nhîpêx o pa hkêt nê. Kormã hipêêxã kapêr kôt ri amnhî nhîpêx o pa. Nhùm hipêêxãja kot kãm õ mẽmoj piitã õr kaxyw no ãm kormã hprêk jamã. ² Tã kormã hkraja hprîre ri nhùm hipêêxã tanhmã amnhî to nê ty. Nom nhùm hkraja mýr pê kormã õ mẽmoj o amnhîptàr kêt nê. Kormã hprîre jakamã nhùm hipêêxã mýr pê kot kãm hamãr o pa xwýnhja kormã kãm hamãr o pa. Tã nhùm hipêêxã kot kãm amgrã jarênh xwýnhhta kato nhùm tãm mẽmoj piitã ho amnhîptã. Ra àptàr mex nê hamaxpêr mex nê amnhîm ho amnhîptàr pa. ³ Tã Ijaew na prem ã amnhî nhîpêx anê. Amnepêm kormã mẽ kot Mojes kapêr kôt ri amnhî nhîpêx o pata ã na prem te mẽhprîre hamaxpêr kêêta pyræk. Te kormã mẽ àptàr kêt pyrã nê jar pika ja kamã mẽ kot amnhî nhîpêx tùm

kôt pix mã amnhĩ nhĩpêx o pa. Mẽ kot amnhĩ nhĩpêx tũm te kot amnhĩm mẽ unênh nẽ mẽ kãm ê pyræk o mẽ hipêx nhũm mẽ hkôt pix mã amnhĩ nhĩpêx o ri pa. ⁴ Tã nhũm Tĩrtũm kot Kra hkukamã mẽ pahwỳr mênh xà hã arĩgrota kato hãmri nhũm mẽ pahwỳr kumẽ nhũm mẽ pahwỳr wry nẽ mẽ pahpyrà nẽ mēhõ nhõhy rũm kato. Nẽ mẽ pahpyrà nẽ gaa nẽ hprêk nẽ mẽ ixpê Ijaew rom Mojes kapêr piitã hkôt amnhĩ nhĩpêx mex kumrêx o ri pa. ⁵ Jao te kot Mojes kapêr pẽ mẽ papytãr pyræk o mẽ panhĩpêx pu mẽ hpãnhã pahpê Tĩrtũm kra kaxyw. ⁶ Tã mẽ ixpê Ijaew kwỳjaja nẽ mẽ apê Ijaew kêt xwỳnh kwỳjaja ra mẽ pahpê Tĩrtũm kra jakamã na pre mẽ pahwỳr Kra Jejus Karõja rẽ nhũm mẽ pamã agjê. Hãmri nẽ mẽ pamã kapêr o:

—Ra mẽ apê Tĩrtũm kra jakamã kêt ka mẽ kãm amnhĩ jarênh kaxyw nẽ kãm: “Pa Papaj” anê. Kêt ka mẽ ã kãm akapêr anê. Anê.

⁷ Jakamã na pu mẽ ra te pahpê mẽ kãm paxàpênh xwỳnh pyræk kêt nẽ. Ra mẽ pahpê Tĩrtũm kra jakamã na hte mẽ panhĩpêx o te Kra Jejus nhĩpêx pyrà nẽ mẽ pahto mex nẽ.

Mojes kapêr kôt mẽ kot amnhĩ nhĩpêx xwỳnhjê jarênh

Sikũn Korĩt 11.3-4; Korosẽ 2.16-19; Eprêw 6.1; Wam Pêtre 1.14

⁸ Nẽ amnepê mã kormã mẽ ate amnhĩ kaxyw Jejus kôt ajamaxpêr kêt ri na ka prem Tĩrtũm jarênh mar kêt nẽ. ãm atỳx ri sãnti mã mex ã harẽ nẽ kãm amnhĩ jagrer o ri apa. Nẽ amã mẽmoj kĩnh nẽ amã hprãm xaj tanhmã amnhĩ to hwỳr to ho ri apa. Te mẽ kãm mẽ àpênh o mẽ pa xwỳnhjaja kot amnhĩ nhĩpêx pyrà nẽ sãnti mã tanhmã amnhĩ nhĩpêx to ho ri apa. Nom sãntija kêp Tĩrtũm kêt.

⁹ Tã ka prem Tĩrtũm jarênh ma nẽ hkôt amnhĩ xunhwỳ nhũm amnhĩ tã mẽ apumu. Tã tãm kot amnhĩ kaxyw mẽ paxunhwỳr jakamã kwa mon ka mẽ ra axtem nẽ akupỳm sãnti hkôt amnhĩ nhĩpêx kaxyw? Nà mẽ ajamaxpêrja mex kêt. Sãnti nhĩpêxta

tanhmã koja amnhĩ to nẽ mẽ ato ajuta? ãm mẽ kot ìhkra ho hipêx pix jakamã hihtỳxti hã. Amarĩ kuhê xà kamã kuhê ho kuhê xwỳnh kênã. Tã te kot akupỳm amnhĩ kôt mẽ arênh kaxyw pyræk o mẽ anhĩpêx ka mẽ ra axtem nẽ akupỳm hkôt amnhĩ nhĩpêx kaxyw. Kwa nà mẽ ã ri amnhĩ nhĩpêx anhỳr kêt nẽ.

¹⁰ Nẽ na ka htem amnhĩ kukamã ajamaxpêr o:

—Na pre hte Ijaewjaja Mojes kapêr xà hkôt arĩgro hkwy hã axtem tanhmã amnhĩ nhĩpêx to nẽ mẽmo mytwrỳ hã tanhmã amnhĩ nhĩpêx to nẽ mẽmo amgrà hã tanhmã amnhĩ nhĩpêx to. Tã kot paj mẽ uræk nẽ ã amnhĩ nhĩpêx anhỳr o ixpa. Kê Tĩrtũm ja hã ixpumu nẽ inhmex ã ijarê. Anê.

Kwa mẽ ã ajamaxpêr anhỳr kêt nẽ. Mon ka htem axtem nẽ ri ã ajamaxpêr anê? Na hte Tĩrtũm ã mẽ pahte amnhĩ nhĩpêx anhỳr ã mẽ pahpumunh kôt mẽ pamex ã mẽ pajarênh kêt nẽ. ¹¹ Na pa ja hã mẽ ajarênh ma nẽ tee ri mẽ akukamã ijamaxpêr. Te ixte Tĩrtũm kapêr o mẽ ajahkre kaprỳ ho ri ixpa pyræk.

Karatas nhõ xwỳnhjaja kot Pawre ho mex ã mẽ harênh

Wam Korĩt 9.21-23

¹² Kwa ixkrãmnhwỳjaja. Ixpê Ijaew tã te ixpê Ijaew kêt pyræk o amnhĩ nhĩpêx o ri mẽ apê Ijaew kêt xwỳnhjê hkôt ri ixpa. Jao Kris kapêr gryk ã mẽ inhĩgêtjaja kot amnhĩ nhĩpêx kaga nẽ axte hkôt amnhĩ nhĩpêx kêt nẽ. Tã kwa mẽ ixpyrà nẽ ã amnhĩ nhĩpêx anê. Wem ma amnhĩ to amõr gri kêt wehe. Wam ixte mẽ awỳr inhmõrta ã na pa pre mẽ amã Tĩrtũm kapêr jarênh o ri mẽ akôt ixpa ka prem inhma nhũm ja mẽ amã mex nẽ ka mẽ ja hã tanhmã ixto hkêt nẽ. ¹³ Na pa pre ixàà nẽ mẽ awỳr mõ nhũm ixàja ixto htỳx nẽ pa tokyx ixkator nẽ ma akupỳm mẽ arũm inhmõr kêt nẽ arĩ mẽ amã Tĩrtũm kapêr jarênh o ixpa. ¹⁴ Kormã ixà nẽ tanhmã ixkute htã ka prem ja hã ixpumu nẽ ixto mex nẽ ixkamã anhõkre kahak kêt nẽ. Na ka prem te ixto Jejus Kris nhĩpêx pyræk

o inhîpêx. Nê te ixto Tîrtûm kapêr o wryk xwÿnh nhîpêx pyrâk o inhîpêx. ¹⁵ Jao mê amã ixkînh nê ã inhîpêx anê nê mê amã ixto mex pix prãm. Nê nhÿri ixpumu nê ixkamã axukaprî nê inhmã akapêr o:

–Hêxta waa nê. Anopxàà. Inhmã amnhî no kaxàr nê amã òr prãm nom tanhmã kot pa mê amnhî to nê hkapa nê amã kugô? Anê.

Nê mê amã inhmã mêmoj mex pix nhôr prãm. Tã ra tanhmã ajamxpêr to nê axtem nê te mê amã ixkînh kêt pyrâk o inhîpêx.

Mê no kupyw xwÿnhjaja kot mê hamaxpêr o pihkàr ã mê harênh

¹⁶ Nê na pa pre ãm hãmri mê amã Tîrtûm kapêr jarênh o ri mê akôt ixpa. Nom ra mê amã mar prãm kêt jakamã na ka mê axtem nê inhîpêx o te ixte mê akutã amnhî xãm pyrâk. ¹⁷ Mê amã Tîrtûm kapêr o mê hêx xwÿnhjaja te mê kãm mê akînh pyrâk o mê anhîpêx no ãm mê kãm akînh kêt. Na htem mê amex kaxyw tanhmã mê amã kapêr to hkêt nê. ãm mê ate mê mar nê mê gryk ã ixkaga nê mê hkôt ri amnhî nhîpêx o apa pix prãm xàj na htem mê akôt tanhmã mê amã hêx to ho pa. ¹⁸ Pa mê harênh ma hãmri nê mê kamã inhgryk o ã mê amã mê harênh anhÿr kêt nê. Koja mêmhõ mê awÿr mra nê ixwakre kamã rÿ inhnoo mã mê amã mêmoj mex jarê nhÿm ja inhmã mex nê. No nhÿm mê amã mê hêx xwÿnhjaja axtem nê mê ajamxpêr o pihkàr pix kaxyw na htem mê awÿr mra nê mê amã ã ujarênh o pa anê.

Pawre kot tee ri mê hkukamã hamaxpêr ã harênh

¹⁹ Te mê apê ixkra pyrâk jakamã na pa hte mê ate amnhî nhîpêx ã mê apumu nê tee ri ijamxpêr nê ixkaprî htÿx nê. Te nhÿhÿnh ixà htÿx nê ixte amnhî xà htÿx kamã ijamak o ri ix-paja pyrâk. Rÿ te mê hpijagri ho mê hikwÿ xwÿnh ôhy xà htÿxta pyrâk. Mê ate Kris kôt amnhî nhîpêx mex o apa hprãm xàj na pa hte ã amnhî nhîpêx anhÿr o ri ixpa. ²⁰ Hêxta waa nê. Kop

apu ra mê awÿr ixpôx nê mê akôt ixpa ronhÿx pa ixkînh tÿx kumrêx. Nhÿx pa ra ixprî hã mê amã ixkapêr ka mê inhma. Nê amnhî tã inhmã mê akînh tÿx ã mê akamã inhgryk kêt ã ixpumunh kurê kumrêx. No kagà pix kãm ixkapêrja ka mê kamã harê nom aprî hã inhmar mex kêt nê. Na pa tee ri mê akukamã ijamxpêr o ixkaprî htÿx nê ixpa.

Mojes kapêr kôt mê kot amnhî nhîpêx xwÿnhjê jarênh
Eprêw 12.18-29

²¹ Kwa mê amã arî Mojes kapêr kôt amnhî nhîpêx o ri mê apa hprãm xwÿnhjaja. Mãn ka mê kormã aprî hã Mojes kapêr piitã mar par kêt jakamã na ka mê amã hkôt amnhî nhîpêx prãm. E pa ixprî hã mê amã tanhmã harênh to ka mê inhma. ²² Nã Tîrtûm kapêr ã kagà htÿm kot finat Apraãw jarênhja. Na pre hkra myja wa hamêxkrut. Prô Sara kamã ja nê kot amnhîm haprôr nhÿm ri kãm àpênh o pa xwÿnh Aga kamã ja. ²³ Kãm àpênh xwÿnh kamã ja na pre mê pah-piitã mê pahpyrà nê amarî kato. No hprô Sara kamã ja. Sara na pre ra hpigêx tÿx nê. Ra hkamrô hkêt rÿy nê pa htã nhÿm Tîrtûm kot wa hkra hkukamã wa kãm ujarênh xà hkôt nhÿm Apraãwja htu nhÿm wa hkrata kato. Tîrtûm kot hkukamã wa kãm harênh xà hkôt nhÿm kamã hkra nhÿm kato.

²⁴⁻²⁵ Tã wa nita ã wa harênh kot anhÿr. Na pre Tîrtûm mêmoj jarê. Te ho wa urâk o wa harê no ãm hã kuxi nê ã wa harênh anê. Jakamã ni wa harênhja te kot Tîrtûm kapêr pi-jakruuta pyrâk. Wam ni Agata te kot hixêt prêk pé Sinai nhîmôk ã Tîrtûm kot Mojes mã kapêrta pyrâk. Hixêtja pika pé Arap kamã na pre. Jakamã nhÿm Tîrtûm Ijaew kaxyw Mojes mã kapêr nhÿm kuma nê amnhî xô ri mê kãm hã kagà. Tã na hte arî jarãhã mê hkwyjaja hamaxpêr o:

–E kot paj mê panhîgêt finat Mojes kapêr kôt amnhî nhîpêx o ri ixpa nhÿm Tîrtûm ja hã ixpumu nê amnhîm inhmex ã ijarê nê ixto hkra.

Anhÿr o hamaxpër no ãm ã hamaxpër anhÿr kaprÿ. ã mē hamaxpër anhÿr xwÿnhjaja te mē kēp Apraãw mã àpēnh xwÿnh Aga hkrata pyræk. Nē krī pē Jerujarē kēp Ijaew nhō krī jakamã haxwÿja te kēp Agata pyræk. Nhūm krī nhō xwÿnhjaja haxwÿja te mē kēp Aga hkrata pyræk. Na htem htÿx Tirtūm kot mē omunh nē mē ho hkra hprãm xäj Mojes kapër kôt amnhĩ nhĩpēx o pa hã amnhĩ jarēnh kaprÿ. Jakamã haxwÿja te mē kēp mē kãm mē àpēnh o pa xwÿnh pyræk.

Jejus kôt mē kot amnhĩ kaxyw hamaxpër xwÿnhjē jarēnh

²⁶ Nē hapu hã Tirtūm kapërta. Apraãw prō kumrēx Saraja te kēp kaxkwa kamã Jerujarē ōja pyræk. Krī ja kamã mē pa mã xwÿnhjaja te mē kēp mē kãm mē àpēnh xwÿnhjē pyræk kêt. Ra mē kot amnhĩ kaxyw Kris mã hamaxpër nē hkôt amnhĩ xunhwÿr jakamã na htem hamaxpër o:

–Ixte amnhĩ kaxyw Kris mã ijamaxpër nē hkôt amnhĩ xãm jakamã na Tirtūm ixpumu nē amnhĩm inhmex ã ijarē nē ixto hkra. Anē.

ãm hãmri na mē ã wamtajē rom hamaxpër anē. Tã ã mē hamaxpër anhÿr xwÿnhjaja te mē kēp Sara hkra pyræk.

²⁷ Tirtūm kapër ã kagà htūm kot ja jarēnh kot:

E kormã akra hkêt nē apa htã kêr ka mãmri akĩnh nē ri apa.

Nē kormã apijagri hkêt tã kêr ka akĩnh tÿx nē ri apa.

Kormã amjēn kot akamã hkra hkêt nē te kot akaga pyræk tã kot kaj akra nē akanrēhã atàmnhwÿ xohtô rax nē.

Mē ohtô rax o ra amjēn kot nhãm hprō hō kamã hkrata jakre. Anē.

ã kapër kot anhÿr o mē kot amnhĩ kaxyw Kris kôt hamaxpër xwÿnhjē hkukamã mē ohtô hã mē harē.

²⁸ E ixkràmnhwÿjaja. Te mē apē Ijak kanrēhã htàmnhwÿ pyræk. Kojã mēhō amnhĩ kaxyw Kris kôt hamaxpër hãmri nē te kēp Apraãw mē hprō

Sara wa hkra Ijak kanrēhã htàmnhwÿ pyræk. Na pre Tirtūm amnepē mã kormã Ijak kator kêt ri ra hkukamã hamaxpër nē Apraãw mã harē. Nē mē papajaja nhūm Tirtūm Ijak pyrã nē mē pakukamã mē pamã hamaxpër nē amnhĩm mē paxunhwÿr ã amnhĩ jarē. Tã ra mē ate amnhĩ kaxyw Kris kôt ajamaxpër jakamã te mē apē Ijak kanrēhã htàmnhwÿ pyræk.

²⁹ Nhūm Apraãw kot Aga kamã hkra Ismaewja na pre hprō kumrēx kamã hkrata pumu nē kãm hkĩnh kêt nē kamã gryk pix o pa. Nē tanhmã hipēx to pē ri haprÿ ho ri hkôt pa. Tã mē kot amnhĩ krã hkôt amnhĩ to Tirtūm kra hprãm xwÿnhjaja na htem ã mē pahte Kris kôt amnhĩ xunhwÿr xwÿnhjē nhĩpēx anhÿr o pa. Na htem Tirtūm kot mē pahto hkra hã mē pahpumu nē Ismaew kot Ijak nhĩpēx pyrã nē mē pakamã gryk pix o pa. Nē tanhmã mē pahtomnuj to pē mē pahto kapër o ri pa. ³⁰ Tã no ãm kwār mē mãmri ã mē panhĩpēx anē. Kojã mē pahpyrà nē nhÿrmã Tirtūm nhō krī hwÿr àpir kêt nē. Tirtūm kapër ã kagà htūm kot mē harēnh kot:

Na pre Tirtūm Apraãw mã kapër nē kãm: “E kêr ka amnhĩ nē ate haprōr nhūm kot amã àpēnh o ri pa xwÿnh mē hkrata wa hano. Kojã hkrata amÿr pē amnhĩm mēmoj to àrĩk kêt nē.

Ate aprō kumrēx kamã akrata pix kojã hōja rom amÿr pē mēmoj piitã ho amnhĩptar pa.” Anē.

³¹ Tã te mē pahpē àpēnh xwÿnh kamã hkrata pyræk kêt. Te mē pahpē Apraãw prō kumrēx kamã hkrata pyræk. Te Tirtūm kot Ijak kukamã hamaxpër pyræk o na pre mē pakukamã hamaxpër.

5

¹ Nē Kris kot mē pahte amnhĩ nhĩpēx tūm pē mē papytar jakamã kwa ixkràmnhwÿjaja. Kêr ka mē arĩ ate amnhĩ nhĩpēx tūm kôt amnhĩ nhĩpēx kêt nē. Ra Kris kot ja pē mē

papytâr nhũm mẽ paxàmnhĩx ri papa kênã.

Mẽ pahpê Tirtũm kra hprãm xàj tanhmã mẽ pahte amnhĩ nhĩpêx to Juãw 8.32, 8.36; Korosẽ 2.20

²E mẽ inhma. Kot kaj mẽ atõ Tirtũm kot ato hkra hprãm xàj amnhĩ my kwryt kà krãhta hã kot kaj mẽ ãm amarĩ ã amnhĩ nhĩpêx anhỹr kaprỹ. Na hte Tirtũm ja hã mẽ omu nẽ ãm hã mẽ omu. Kot kaj ã amnhĩ nhĩpêx anẽ nhũm Krisja ãm ate amnhĩ tomnuj mýrapê anẽ htyk kaprỹ pyræk o amnhĩ nhĩpêx. ³Hãmri nhũm Tirtũm tee ri ja hã mẽ apumu nẽ te kot ã mẽ amã kapêr anhỹr pyrã nẽ mẽ amã kapêr o:

–E ra amã apê Kris kwý hprãm xàj amnhĩ my kwryt kà krãhyr jakamã kot kaj mãnẽn Mojes kapêr piitã hkôt amnhĩ nhĩpêx o ri apa.

Anhỹr o mẽ amã kapêr pyræk.

⁴Nom kot kaj mẽ atõ amnhĩ kukamã ajamaxpêr o:

–Nà kot paj Mojes kapêr piitã hkôt amnhĩ nhĩpêx o ri ixpa nhũm Tirtũm ja hã ixpumu nẽ inhmex ã ijarẽ nẽ ixto hkra kãm ga. Anẽ.

No ãm ja kot anhỹr kêt. Na hte Tirtũm ã mẽ pahte amnhĩ nhĩpêx anhỹr ã mẽ pahpumunh kôt mẽ pahto hkra hkêt nẽ. Jakamã kot kaj mẽ ã amnhĩ nhĩpêx anẽ nẽ te ate Kris kutã amnhĩ xãm pyræk nhũm Tirtũm ato mex kêt nẽ. ⁵Nom kot ka mẽ axtem ajamaxpêr o:

–Ra ixte amnhĩ kaxyw Kris kôt ijaxmaxpêr nẽ hkôt amnhĩ xãm jakamã koja Tirtũm hã ixpumu nẽ inhmex ã ijarẽ. Karõ ra kot ã inhmã ja ho amnhĩrĩt anhỹr kênã.

Anhỹr o ajamaxpêr. ãm hãmri ã mẽ ajamaxpêr anhỹrja. ⁶Jakamã mẽ pahpê Kris kôt amnhĩ xunhwýr xwýnhjê kamã ra mẽ kot amnhĩ my kwryt kà jakàr xwýnhjaja nhũm mẽ pahkwýjaja ã amnhĩ nhĩpêx anhỹr kêt nẽ. Tã nhũm Tirtũm ja hã mẽ pahpumu nhũm ja tanhmã kêp kute hkêt. Na hte mẽ pahte amnhĩ my kwryt kà jakàr ã mẽ pahpumu nẽ ãm hã mẽ pahpumu. No kot pu mẽ Jejus Kris

kôt amnhĩ nhĩpêx mex o ri papa. Nẽ amnhĩ kaxyw hkôt pajamaxpêr týx o ri papa. Nẽ mẽ pamã axpên kĩnh pê tãm ri axpên nhĩpêx o ri papa. Ja na kêt Tirtũm kãm hprãm.

⁷Ra mẽ ate Kris kôt amnhĩ nhĩpêx mex o ri apa htã nhũm mẽ hêx xwýnhjaja mẽ awýr mra nẽ tee ri ã mẽ ate amnhĩ nhĩpêx anhỹr ã mẽ apumu nẽ tanhmã mẽ amã Tirtũm kapêr o hêx to. Ka mẽ ama nẽ axte Tirtũm kôt amnhĩ nhĩpêx mex hkêt nẽ. ⁸No ãm ã mẽ kot mẽ amã mẽ ujarênh anhỹr xwýnhjaja na pre Tirtũm mẽ awýr mẽ rênh kêt nẽ. Tirtũm kot amnhĩ wýr mẽ awýr xwýnh kênã kot kêt axtem nẽ mẽ awýr kapêr o mẽ amã hêx o mẽ pa xwýnhjê rẽ.

⁹Nẽ koja mẽhõ pixi nẽ tanhmã amnhĩ tomnuj to nhũm mẽ piitã ja hã omu nẽ uræk nẽ kãm tanhmã amnhĩ tomnuj to hprãm. ¹⁰No kêt mẽ apê Kris kwý na ka mẽ. Ixte ja hã mẽ apumunh mex. Kot kaj mẽ axte ixkapêr ma nẽ akupým Kris kôt amnhĩ nhĩpêx mex o ri apa. Nà kot kaj mẽ ã amnhĩ nhĩpêx anẽ nẽ axte mẽ kot mẽ apê àmnàr xwýnhjê kapêr mar nẽ mẽ hkôt amnhĩ nhĩpêx kêt nẽ. Koja Kris mẽ atã mẽ homnuj týx kumrêx nhũm mẽ rĩ amnhĩ pumu.

Pawre kot mẽ kot amnhĩ jakàr ã mẽ kãm karõ hkêt ã harênh

¹¹Nẽ na hte Tirtũm kapêr o mẽ hêx xwýnhjaja tanhmã mẽ amã ixto hêx to ho pa. Ixte mẽ kãm Tirtũm kot mẽ ho hkra kaxyw mẽ kot amnhĩ my kwryt kà jakàr ã mẽ kãm karõ hã ixto ri hêx o pa. Nom ixte anhỹr kêt ixkràmnhwýjaja. Kop apu ixte mẽ kãm ja hã karõ ho ixpa ronhỹx Ijaew krãhtũmjaja ja hã ijarênh ma nhũm ja mẽ kãm mex nẽ nhũm mẽ axte Kris ã tanhmã inhĩpêx to hkêt nẽ. Nom ixte ja hã mẽ kãm karõ hkêt. ãm ixte mẽ kãm Kris kot mẽ panê pĩ kahpa hã htyk jarênh pix mýrapê na htem ixkamã gryk nẽ.

¹²Hêxta waa nẽ. Mẽ kot mẽ amã hêx o pa pê mẽ ajamaxpêr o pihkàr xwýnhjaja kop mẽ ãm mẽ anhõ krĩ

rũm hapôx nẽ ma nhỹhỹm hapêx ronhỹx pa ixkĩnh tỳx kumrẽx.

Mẽ pahte axpẽn to mex o papa hã mẽ pamã karõ

Wam Korõt 13; Eprêw 13.3, 13.16; Wam Pêtre 1.22; Wam Juãw 3.11

¹³⁻¹⁴ Kwa ixkràmnhwỳjaja. Nà na pre Kris amnhĩ kaxyw mẽ parê. Axte mẽ pahte amnhĩ nhĩpêx tũm kôt amnhĩ nhĩpêx kêt kaxyw. Ra kot ã mẽ pahte amnhĩ nhĩpêx anhỹr pẽ mẽ papytâr jakamã kêr ka mẽ amnhĩ tã ja ma nẽ axte atỳx ri amã hprãm xà hkôt tanhmã amnhĩ nhĩpêx to ho ri apa hkêt nẽ. Mẽ ãm amã axpẽn kĩnh pix o ri axpẽn kôt apa. Nẽ nhãm mẽ hipêx o te ka amã amnhĩ tã ma pyræk o mẽ hipêx. Jao mẽ piitã tãm mẽ hipêx o ri apa. Kot kaj mẽ ã amnhĩ nhĩpêx anẽ nẽ te mẽ ate wam Tĩrtũm kapêr piitã hkôt amnhĩ nhĩpêx pyræk. ¹⁵ No kot kaj mẽ axtem nẽ axpẽn kãm axoprê ho ri apa hãmri nẽ te ra mẽ ate axpẽn to ajapêx par o amõr pyræk o amnhĩ nhĩpêx. Te mry xoprê kot axpẽn par o pata pyræk. Kwa mẽ ã amnhĩ nhĩpêx anhỹr hkêt nẽ. Mẽ ãm axpẽn to mex pix nẽ mẽ axpẽn kãm axukaprĩ ho ri axpẽn kôt apa.

Mẽ pahte amnhĩ nhĩpêx nyw jarênh Matêwre 26.41; Rõmãn 8.1-11

¹⁶ Nẽ kwa kêr ka mẽ amnhĩ to Tĩrtũm Karõ wỳ kê mẽ amã mẽ ate amnhĩ nhĩpêx nyw jagjê ka mẽ axte ate amnhĩ nhĩpêx tũm kôt amnhĩ nhĩpêx hkêt nẽ. ãm mẽ ate amnhĩ nhĩpêx nyw kôt pix mã mãn amnhĩ nhĩpêx o ri apa. ¹⁷ Tĩrtũm Karõ kot amnhĩ nhĩpêxja nẽ mẽ pahte amnhĩ nhĩpêx tũmja wa kot axpẽn pyræk kêt. Te wa kot axpẽn kutã amnhĩ xãm nẽ wa pijapu pyræk. Jakamã kot puj mẽ pahte amnhĩ nhĩpêx tũm o amnhĩ nhĩpêx nẽ Tĩrtũm Karõ mã hprãm xà hkôt amnhĩ nhĩpêx hkêt nẽ. ¹⁸ No kot puj mẽ Tĩrtũm Karõ hkôt amnhĩ nhĩpêx nẽ ra jar pika ja kamã mẽ kot amnhĩ nhĩpêx kôt ri amnhĩ nhĩpêx kêt nẽ. Ra axtem mẽ pahte amnhĩ nhĩpêx nyw o amnhĩ nhĩpêx. ¹⁹ Jar mẽ kot

amnhĩ nhĩpêx tũmta mex kêt. Ra mẽ piitã mẽ kot ja pumunh mex.

Na htem htỳx ri hkwỳjê kamã hpijaàm kêt o pa.

Jao mẽmyjaja hprõ kuhpa hã nhãm mênijê ho amnhĩkati.

Nhũm mẽ hprõjaja mẽ mjên kuhpa hã nhãm mẽmyjê ho amnhĩkati.

Nẽ mẽmy hkwỳjaja axtem nẽ mẽmyjê hkwỳ ho amnhĩkati.

Nẽ mênĩ hkwỳ haxwỳja axtem nẽ mênijê hkwỳ ho amnhĩkati.

²⁰ Nẽ mẽ kãm mẽmoj mẽ hikukrêx japê htỳx o kãm Tĩrtũm kĩnh jakre. Nẽ mẽmoj kaxyw ma wajaga hwỳr amnhĩ to pa.

Nẽ hkwỳjê kamã oprê ho ri pa.

Nẽ mẽmoj tã axpẽn kãm gryk pix nẽ.

Nẽ mẽmoj to axpẽn pẽ õxỳ nẽ.

Nẽ mẽmo mỳrapê axpẽn pẽ angrã nẽ amỳm ahpỹnhã ri pa.

²¹ Nẽ mẽmoj tã axpẽn kamnhĩx rãhã ho ri pa.

Nẽ axpã nẽ mẽ grer kãm ri axpẽn kãm hpijaàm kêt o ri pa.

ã na htem mẽ kot amnhĩ nhĩpêx tũm kôt amnhĩ nhĩpêx o ri mẽ pa xwỳnhjaja amnhĩ nhĩpêx anẽ. ã mẽ kot amnhĩ nhĩpêx anhỹr xwỳnhjaja koja mẽ Tĩrtũm nhõ krĩ hwỳr gjêx kêt nẽ. Ra ixte mẽ amã ja jarênh tã pa axte mẽ amã harê. Mẽ ate hã ano htỳx rãhã ho ri apa kaxyw. ²² No mẽ kot amnhĩ nhĩpêx nywja axtem na.

Tĩrtũm Karõ hkôt mẽ kot amnhĩ nhĩpêx nyw o amnhĩ nhĩpêx xwỳnhjaja na htem axtem kãm axpẽn kĩnh nẽ.

Nẽ hkĩnh nẽ ri hamakêtkati nẽ àmnhĩx ri axpẽn kôt pa.

Nẽ gryk tokyx anhỹr hkêt nẽ. ãm axpẽn to mex pix o ri axpẽn kôt pa.

Nẽ tãm axpẽn nhĩpêx.

Nẽ kot mẽmoj tã amnhĩ jarênh xà hkôt tanhmã mẽmoj to.

²³ Nẽ axpẽn mã kapêr mã hprĩ ho ri axpẽn mã kapêr.

Nẽ mẽmoj punuj piitã nẽ amnhĩ to htỳx o ri pa.

ã na hte mẽ kot Tĩrtũm Karõ hkôt amnhĩ nhĩpêx o mẽ pa xwỳnhjaja Karõ

nhỹ hã amnhĩ nhĩpêx nyw o amnhĩ nhĩpêx anhỹr o pa. Jao mãânên Mojes kapêr kwým ri amnhĩ nhĩpêx hkêt nê. Jakamã koja mēhō mē pahte amnhĩ nhĩpêx nyw nê tanhmã mē pahkurê hto hkêt nê. ²⁴ Tã mē pahpê Jejus Kris kwý jakamã na pu mē pahte amnhĩ nhĩpêx tũmja nhĩpêx o te mē pahte amnhĩ nê hpĩr pyrã nê axte hkôt amnhĩ nhĩpêx kêt nê.

Tĩrtũm Karõ hkôt mē pahte amnhĩ nhĩpêx ã mē pamã karõ

Epes 4.23-24; Korosẽ 3.10

²⁵ Tã ra Tĩrtũm Karõ kot mē pahto hkra jakamã kwa kêt pu mē ãm kôt pix mã amnhĩ nhĩpêx nyw o amnhĩ nhĩpêx o ri papa. ²⁶ Kot puj mē ã amnhĩ nhĩpêx anê hãmri nê mēmoj tã mē pahkwýjê mã amnhĩ to jarkrar o ri papa hkêt nê. Kot puj mē ã amnhĩ nhĩpêx anê nhũm mē pakamã gryk nê. Jakamã kêt pu mē ã amnhĩ nhĩpêx anhỹr o ri papa hkêt nê.

6

Mē pahte tanhmã axpên to ajuta hto hã mē pamã karõ

Matêwre 18.15-17; Rukre 17.3-4; Sikũn Tesarõn 3.14-15; Xiakre 5.19-20

¹⁻³ Kwa ixkrãmnhwýjaja. Mē apê Tĩrtũm Karõ hkôt amnhĩ nhĩpêx o ri mē apa xwýnhjaja. Koja Kris kôt akwýjê hõ tanhmã amnhĩ tomnuj to ka mē ja hã omu nê ã amnhĩ nhĩpêx anhỹrja nê kãm akapêr. Nom kêt ka mē kamã agryk kamã kãm tanhmã nê hkêt nê. ãm kãm akapêr mã aprĩ ho kãm akapêr nê akupým tãm ãm. Nom kwa kêt ka mē amnhĩ pumunh mex nê urak nê ã amnhĩ tomnuj anhỹr kêt nê.

Kot ka mē atõ ã kot amnhĩ nhĩpêx anhỹr ã omu nê ãm omu nê nê tanhmã kãm akapêr to hkêt nê. Nê ajamaxpêr o:

—Tk. Kwãr mãmrĩ ã amnhĩ nhĩpêx anê. Pa ja nê tanhmã kãm ixkapêr to hkêt nê. Kurom ixte amnhĩ nhĩpêx mex o ri ixpa kênã.

Anhỹr o ajamaxpêr japêr. Kwa mē ã ajamaxpêr anhỹr kêt nê. Kot kaj mē

ã ajamaxpêr anê nê nê kãm akapêr kêt nê hãmri nê te ate amnhĩ to mex ã amnhĩ jarênh kaprý pyrãk.

Nê kêt ka mē axpên to ajuta mex o ri axpên kôt apa. Jao Kris kôt amnhĩ nhĩpêx mex nê.

⁴⁻⁵ Nê na htem piitã amnhĩm àpênh pix tãnopxar o pa. Jakamã kêt ka mē amnhĩ tãnopxar pê tãm amnhĩ nhĩpêx rãhã ho ri apa. Hãmri nê ja hã amnhĩ pumu nê akĩnh nê. Nom kwa kêt ka mē ate amnhĩ nhĩpêx mex o akwýjê jakrenh ã mē kãm amnhĩ to jarkrar o ri apa hkêt nê.

⁶ Nê kêt ka mē kot Tĩrtũm kapêr o mē ajahkre xwýnhjê ho mex nê mē kãm mēmoj nhõr o ri apa.

⁷ Koja Tĩrtũm nhỹrmã mē pahtĩr ri mē pahte amnhĩ nhĩpêx ã mē pahpumunh kôt tanhmã mē pajarênh to. Hãmri pu mē tee ri amnhĩ kukamã pajamaxpêr nom amnhĩ nê tanhmã kãm paxêx to hkêt nê. Koja mēhõ kãm amnhĩ to hêx nê te tãm kot amnhĩ mã hêx pyrãk nom kot puj mē Tĩrtũm mã amnhĩ nê tanhmã paxêx to hkêt nê.

⁸ Jakamã kot kaj mē amnhĩ krã hkôt tanhmã ri amnhĩ nhĩpêx to rãhã ho apa hãmri nê nhỹrmã ty nê Tĩrtũm pê awry rax ã ri apa. Nom kot kaj mē Tĩrtũm Karõ mã hprãm xà hkôt pix mã amnhĩ nhĩpêx nê nhỹrmã ty nhũm Tĩrtũm akupým ato atĩr ka kuri amex nê ajamakêtkati atĩr tũm nê ri apa ho apa.

Mē pahte axpên to mex rãhã hã mē pamã karõ

Atre 20.35; Wam Korõt 15.58; Xitre 3.14; Eprêw 13.3, 13.16; Xiakre 1.27

⁹ Jakamã kwa kêt ka mē arĩ tãm ri amnhĩ nhĩpêx nê tãm axpên nhĩpêx o ri axpên kôt apa nê jam anhũrer kêt nê. Mē ã amnhĩ nhĩpêx o ri apa anhỹr rãhã ty nhũm Tĩrtũm nhỹrmã ja hã mē ato mex rax nê. ¹⁰ Tã kêt pu mē arĩ Kris kôt pahtõjê ho mex rãhã ho ri papa. Nom mē tapxipixjê ho mex kêt nê. Pu mē mē piitã mē ho mex o axpên pyrãk.

¹¹ E ixte mē amã kagà nhĩpêx nê mēnh nhũm mē ate ja hã ixpumunh kaxyw kot paj pam kagà jatur xà hã

inhĩkra ho inhĩxi nhĩpêx ka mẽ ixte inhĩxi hã kagà rũnhtita pumu.

Jejus kot mẽ panê htyk ã Pawre kãm harênh prãm ã harênh

Wam Korõt 1.22-24, 2.1-2

¹² Nẽ mẽ amã Tĩrtũm kapêr o mẽ hêx xwýnhjaja na htem hamaxpêr o:

–Nà kot paj Karatas nhõ xwýnhjê mã Kris pĩ kahpa hã htyk ã harênh o ri ixpa hkêt nẽ. Kot pa anẽ nhũm mẽ ixpê Ijaew kwýjaja ja hã inhma nẽ hã tanhmã inhĩpêx to. Ja pymaj kot paj mẽ kãm tanhmã harênh to hkêt nẽ. Kot paj ãm mẽ kot amnhĩ my kwryt kà jakàr pix ã mẽ kãm karõ kê mẽ ixkapêr xà hkôt ã amnhĩ nhĩpêx anẽ. Pa hã mẽ omu nẽ ma ixkwýjê mã mẽ hã amnhĩ to jarkrar o ri ixpa. Anẽ.

¹³ Te mẽ kot finat Mojes kapêr kôt ri amnhĩ nhĩpêx pyræk tã no na htem ã amnhĩ nhĩpêx anhÿr kêt nẽ. Ra mẽ kot amnhĩ jakàr tã no ãm Mojes kapêr piitã hkôt amnhĩ nhĩpêx hkêt nẽ. ãm hkwýhkôt pix mã amnhĩ nhĩpêx o pa. Nom kot kaj mẽ ama nẽ mẽ uræk nẽ amnhĩ jakà nhũm mẽ ja hã mẽ apumu nẽ hkĩnh nẽ. Nẽ ma ri mẽ hkwýjê mã mẽ atã amnhĩ to jarkrar o ri pa nẽ mẽ kãm:

–E Karatas nhõ xwýnhjaja na pa prem mẽ kot amnhĩ my kwryt kà jakàr ã mẽ kãm karõ nhũm mẽ inhma nẽ mẽ pahpyrà nẽ ã amnhĩ nhĩpêx anẽ. Anẽ.

¹⁴ No pa na pa hte ã mẽ kãm mẽmoj tã karõ anhÿr o ri ixpa hkêt nẽ. ãm Tĩrtũm kot mẽ pahto hkra kaxyw mẽ panhõ Pahihti Jejus Kris kot mẽ nê htykja pix na pa hte mẽ kãm harê. Ra kot inhnê htyk jakamã te pa ixte kuri ijêt nẽ ixtyk pyræk. Jakamã ra jar pika ja kamã mẽ kot amnhĩ nhĩpêxja te ixpê htyk nẽ hapêx pyræk pa axte hkôt amnhĩ nhĩpêx kêt pyræk.

¹⁵ No mẽ kot amnhĩ my kwryt kà jakàr xwýnhjaja nẽ mẽ kot amnhĩ jakàr kêt xwýnhjaja na hte Tĩrtũm ja hã mẽ omu nẽ ãm mẽ omu. ãm mẽ pahte amnhĩ nhĩpêx nyw o amnhĩ nhĩpêx o ri papaja pix na kãm hprãm.

¹⁶ Kot kaj mẽ ã amnhĩ nhĩpêx anhÿr o

ri apa nẽ apê Tĩrtũm kra mex nhũm mẽ ato mex rax nẽ. Nẽ mẽmoj to mẽ akutã nojarêt rãhã nẽ. Ka mẽ axàmnhĩx ajamakêtkati nẽ ri apa ho apa.

¹⁷ Nẽ na prem Kris ã ixtak rax nẽ nhũm ixkatut ã ixtak xà arĩ rãhã nẽ pa hte hã ixpa. Ixte Jejus Kris mã tanhmã amnhĩ nhĩpêx to xwýnh ã ixto amnhĩrĩt xà na. Jakamã kê mēhõ axte Jejus kot mẽ awÿr inhmēnh ã tee ri ixpumu nẽ tanhmã hã ixkukjêr to hkêt nẽ.

¹⁸ E ixkràmnhwýjaja. Kê Pahihti Jejus Kris mẽmoj to mẽ akutã nojarêt nẽ mẽ ato mex rãhã ho pa. Nà koja mẽ ato anẽ.

ãm ja pix na hapêx. Ixpê Pawre na pa ã mẽ amã kagà nhĩpêx nẽ mẽ awÿr mēnh anẽ.

Epes

Pawre kot Epes kãm Jejus kôt hkwỳjê hwỳr kagà nẽ mẽn

Pawre na pre kagàja nhĩpêx. Jejus nhỹ hã hkrajê jahkre o pa xwỳnhjê hõ na pre. Jakamã na pre krĩ pẽ Epes kãm Kris kwỳjê hwỳr hipêx nẽ kumẽ. Epes nhõ xwỳnhjaja Ijaew kêt xwỳnh na pre mẽ. Nhũm pre ra Pawre ma mẽ hwỳr mõ nẽ mẽ kãm Tĩrtũm kapêr jarênh o ri mẽ hkôt pa nhũm mẽ hkwỳjaja kuma nẽ Jejus kôt amnhĩ xunhwỳ.

Na pre hte Pawre ma krĩ piitã hkôt ri Tĩrtũm kapêr jarênh o ri mẽ hkôt pa. Hãmri nhũm mẽ hkwỳjaja Jejus ã unê nẽ krĩ pẽ Rõm wỳr kumẽ nẽ kamã haxà nhũm arĩ hkrĩ ho hkrĩ. Nom amarĩ hkrĩ hkêt nẽ. Na pre hte mẽ kot hwỳr mrrar xwỳnhjê mã Tĩrtũm kapêr jarê. Nẽ krĩ hkwỳ hkôt Jejus kôt hkwỳjê mã kagà nhĩpêx nẽ mẽ hwỳr kurẽ. Jakamã na pre Epes kamã hkwỳjê hwỳr kagàja nhĩpêx nẽ mẽ hwỳr kumẽ.

Nẽ kagàja kamã hprĩ hã mẽ kot Jejus kôt amnhĩ xunhwỳr xwỳnhjê kot tanhmã amnhĩ nhĩpêx to ho pa hã mẽ kãm karõ. Ra mẽ kot hkôt amnhĩ xunhwỳr jakamã te mẽ htipxi nẽ ri mẽ pa xwỳnh kot amnhĩ nhĩpêx pyrãk o amnhĩ nhĩpêx o pa hã mẽ kãm hã karõ. Nẽ jar pika hkôt te mẽ kêp Kris nhĩ pyrã nẽ pa hã mẽ harẽ. ã na pre Pawre mẽ kãm mẽmoj jarẽ nẽ hã kagà anẽ nẽ mẽ kãm:

¹ Pa Epes kãm Kris kôt ixkwỳjaja. Xà mẽ amex na ka mẽ apa? E ot pa mẽ awỳr kagà nhĩpêx nẽ kumẽ. Ixpê Pawre na pa hipêx nẽ mẽ awỳr kumẽ. Ixpê Jejus Kris nhỹ hã mẽ ahkre ho mẽ ixpa xwỳnh na pa. Tĩrtũm kãm hprãm xà hkôt. Tã pa ã mẽ awỳr kagà nhĩpêx nẽ mẽ awỳr mẽn anẽ. Mẽ apê Tĩrtũm krajê hwỳr. Na ka xep htem Jejus Kris kôt amnhĩ nhĩpêx mex o ri

apa. ãm hãmri na ka htem ã amnhĩ nhĩpêx anẽ.

² E kê Mẽpahpãm Tĩrtũm mẽ Pahihti Jejus Kris wa mẽ ato mex nẽ mẽmoj to mẽ akutã nojarêr rãhã ho pa. Ka mẽ wa ý hã axãmnhĩx ajamakêtkati nẽ akĩnh pẽ tanhmã amnhĩ nhĩpêx to ho ri apa.

Tĩrtũm kot mẽ pakukamã amnhĩm mẽ parênh ã harênh

Rõmãn 8.28-30; Wam Korĩt 1.21-22; Wam Tesarõn 1.4; Sikũn Tesarõn 2.13; Wam Pêtre 1.2

³ Na hte mẽ panhõ Pahihti Jejus Kris nhĩpêxà Tĩrtũmja mẽ pahto mex rãhã ho pa. Mẽ pahpê Kra Kris kwỳ hã mẽ pahpumunh kôt tanhmã mẽ pahto mex to ho pa. Ra wa Karõja mẽ pahkarõ mã gjêx jakamã te ra mẽ pahte kaxkwa kamã wa kuri mẽ pamex nẽ mẽ papa pyrãk. Tã ra mẽ pahte jar pika ja kamã paxãmnhĩx pajamakêtkati mẽ pamex nẽ ri papa jakamã kwa kêr pu mẽ amnhĩm ãm mex o mex ã harênh rãhã nẽ.

⁴⁻⁵ Amnepê mã kormã mẽmoj kêt ri na pre Tĩrtũm mẽ pakukamã amnhĩm mẽ parê. Kris kukwak ri amnhĩm mẽ parê. Tã mẽmo kaxyw na pre ã mẽ pakukamã mẽ parênh anẽ? ãm mẽ pahte kapêr kôt pix mã amnhĩ nhĩpêx o ri papa kaxyw. Jao tãm kot amnhĩ nhĩpêx pyrã nẽ noo mã tãm amnhĩ nhĩpêx o ri papa. Kãm mẽ pajapê jakamã na pre mẽ pakukamã tanhmã hamaxpêr to nẽ hamaxpêr o:

—Nà Ixkra Jejus Kris koja nhỹrmã ma mẽ hwỳr wrỳ nẽ mẽ nẽ ty. Tã mẽ kot mẽ nẽ htyk ã harênh mar nẽ amnhĩ kaxyw hkôt hamaxpêr xwỳnhjaja kot paj mẽ ho ixkra. Nà kot paj ã mẽ hipêx anẽ. Anẽ.

⁶ No mẽ papajaja tanhmã mẽ pahte amnhĩ nhĩpêx mex to hã mẽ pahpumunh kôt na pre ã mẽ pahto hkra hã mẽ pajarênh anhỹr kêt nẽ. ãm Kra Kris pix kukwak ri na pre ã mẽ pajarênh anẽ. Kãm Kra japê jakamã na hte mẽmoj to mẽ pahpê hkwỳ hã mẽ pakutã nojarêr rãhã ho pa. Jakamã na pu htem amnhĩ tã kãm mex o mex ã harênh o papa.

7-8 Na pre Krisja mẽ panê htyk o Tirtũm mã mẽ pahte amnhĩ tomnuj pãnhã amnhĩre. Nhũm Tirtũm ã kot amnhĩ nhĩpêx anhỹr ã omunh xà hkõt mẽ pahte hkõt amnhĩ xunhwỳr xwỳnhjê nê mẽ pahte amnhĩ tomnuj rênh pa. Koja aa tanhmã mã mẽ pahto hkêt nê. Pu mẽ axte amnhĩ amnhĩ tomnuj o papa hkêt nê. Hêxta waa nê. Kãm mẽ pajapê htyx kumrêx jakamã na pre ã mẽ pahto mex rax anê. Æm mex o mex nê àhpumunh o àhpumunh.

9-10 Amnepêm na pre hamaxpêr o:

—Nà na pa ra kaxkwa ho ixkato nê kamã mẽmoj piitã ho ixkato. Nê pika ho ixkato nê kamã mẽmoj piitã ho ixkato. Tã koja nhỹrmã Ixkra Kris mẽmoj piitã ho amnhĩptàr o pa. Kaxkwa kamã nê pika piitã hkõt mẽmoj piitã ho amnhĩptã nê tapxipix inhỹ mã kêp mẽõ Pahihti. Koja ã amnhĩ nhĩpêx anhỹr xà mã arĩgro kato nhũm ã amnhĩ nhĩpêx o pa anê. Nà ja na inhmã hprãm. Anê.

Æ Tirtũm amnhĩ kukamã hamaxpêr anhỹrja kõt na pre Kris kêp mẽ panhõ Pahihti mã harê. Tã nhỹrmã mẽ pahto amnhĩptàr kaxyw koja mẽ pakaxyw ãm. Amnepêm ri mẽ pa xwỳnhjê mã kot kormã ja ho amnhĩrĩt kêt tã ra jarãhã mẽ pamã ho amnhĩrĩt.

11 Kris kukwak ri na pre amnhĩm mẽ parê. Ra kot mẽ pakukamã mẽ pahtã amnhĩ jarênh xà hkõt. 12 Tã mẽ ixpê Ijaew kwỳ kumrêx mẽ ixte Kris kõt amnhĩ xunhwỳr jakamã koja mẽ piitã mẽ inhỹ mã Tirtũm mã mex o mex ã harênh o ri pa.

13 Nê mẽ kajaja na ka prem mẽ ixpyrà nê Tirtũm kapêr ma nê ajaxwỳja hkõt amnhĩ xunhwỳ. Æm hãmri na Tirtũm kapêrja. Tã ka prem ama nê hkõt amnhĩ xunhwỳ. Hãmri nhũm amnhĩ tã mẽ apumu nê kot inhĩpêx pyrà nê mẽ anê mẽ ate amnhĩ tomnuj piitã rênh pa nê mẽ ato hkra. Hãmri nê mẽ awỳr Karõ rê nhũm mẽ awỳr wrỳ nê mẽ akarõ mã agjê nê mẽ akamã pa ho pa. Kris kukwak ri na pre mẽ awỳr kurê. Amnepê mã na pre mẽ pakukamã hamaxpêr o:

—Koja mẽ Ixkra hkõt amnhĩ xunhwỳ pa ja mã mẽ omu nê mẽ ho ixkra nê mẽ hwỳr Ixkarõ rê. Hãmri nhũm mẽ hkarõ mã agjê nê mẽ kamã hkrĩ ho hkrĩ.

14 Anhỹr jakamã na pre mẽ pahwỳr kurê nhũm mẽ pahwỳr wrỳ nê mẽ pahwỳr agjê nê mẽ pakamã hkrĩ ho hkrĩ. Pu mẽ ja mã amnhĩ pumu nê pajamaxpêr o:

—Nà ra Tirtũm kot ixwỳr Karõ mẽnh jakamã na ixkarõ hwỳr axà nê kamã hkrĩ ho hkrĩ. Tã koja ra kot mẽ ixtã amnhĩ jarênh xà hkõt ja mã ixto mex nê. Ra kot ixto hkra kênã. Jakamã koja nhỹrmã ma amnhĩ wỳr ixto api pa kuri inhmex kumrêx nê ixpa ho ixpa. Hãmri nê kukwak ri axte tanhmã amnhĩ tomnuj to ho ri ixpa hkêt nê. Anê.

Jakamã koja mẽ piitã ã kot mẽ ho mex anhỹr ã amnhĩ tã kamã ama nê amnhĩ tã omu nê kãm mex o mex ã harênh rãhã ho pa.

Pawre kot Epes nhõ xwỳnhjê ho Tirtũm wỳr ã harênh

Piripos 1.9; Korosê 1.9-12; Wam Tesarõn 5.23; Sikũn Tesarõn 1.11, 2.16; Eprêw 13.20

15 Nê na ka xep htem amnhĩ kaxyw Kris kõt ajamaxpêr tỳx pê amã Tirtũm krajê piitã mẽ hkĩnh o mẽ ho mex o apa. Na pa pre mẽ ajarênh ma nê ixkĩnh tỳx nê. 16-18 Nê xatã mẽ ato Tirtũm wỳr o ri ixpa nê mẽ ato hwỳr o:

—Pa Měinhĩpêxà maati Tirtũm. Nà amex o amex. Ka na ka pre mẽ ixwỳr mẽ inhõ Pahihti Jesus Krisja mẽ nhũm mẽ ixwỳr wrỳ nê hprĩ mã mẽ inhmã ate tanhmã amnhĩ nhĩpêx to ho apa mã ato amnhĩrĩt. Tã Epes kãm akrajaja na xep htem akõt pix mã ri amnhĩ nhĩpêx rãhã ho ri pa. Æm hãmri na htem ã amnhĩ nhĩpêx anê.

—Nê kwa Tirtũm. Kê Akarõ tanhmã mẽ hkrã hto kê mẽhprĩ mã akapêr mar tỳx rãhã ho pa. Jao ra ate mẽ ixkukamã mẽ ixtã tanhmã mẽ ixto mex to mã amnhĩ jarênhja kê mẽ kãm hamaxpêr tỳx rãhã ho pa. Nê ate nhỹrmã mẽ ixpê akrajaja mẽ ixpiitã

tanhmã mẽ ixto mex to jarēnhja kê mẽ kãm hamaxpēr tỳx pē hkĩnh rãhã ho pa ho pa.

19-20 –Nē kê mẽ axàhpumunh o axàhpumunh ã ate akupỹm Akra Kris o htĩr ã apumunh mex nē Tĩrtũm. Na ka pre axàhpumunh xà ho akupỹm ho htĩr nē ma akupỹm anhõ krĩ hwỳr ho api nē amnhĩ nhĩhkõ hã ỳr nhũm arĩ hkrĩ ho hkrĩ. Apyrà nē kot mẽ ixto amnhĩptàr kaxyw. ã axàhpumunh xà htỳx kot anhỳr. Tã kê akrajê piitã ja hã apumu nē axàhpumunh tỳx o ate tanhmã mẽ ixto ajuta hto ho apa hã apumu.

Anhỳr o na pa hte mẽ ato hwỳr o ri ixpa.

21 Nē Krisja àhpumunh tỳx o mẽkarõmnuti piitã hakrenh. Nē hihtỳx o mẽ hakrenh jakamã krĩ nhõ xwỳnhjê mã te mẽ àhpumunh tỳx kêt pyrãk o na htem htỳx ri amnhĩ nhĩpêx o pa pyrãk. Nē Krisja hihtỳx o pika piitã hkôt pahi piitã mẽ hakrenh par kumrêx. Nē hihtỳx o kot pika piitã hkôt mẽmoj piitã mẽ hakrenh par. Jakamã mẽhõ koja we tanhmã kot amnhĩ nhĩpêx to hã kãm karõ rỳ kãm hamaxpēr gõ? Nà amrakati kumrêx. Ra kot ã amnhĩ nhĩpêx anhỳr rãhã nē pa ho pa xwỳnh kênã. Nē hihtỳx o hihtỳx rãhã nē pa ho pa xwỳnh. Nē àhpumunh o àhpumunh rãhã nē pa ho pa xwỳnh. Nē hihtỳx o kot jar pika ja kôt mẽ pajakrenh par nē hihtỳx o Tĩrtũm nhõ krĩ kamã mẽ mẽmoj piitã hakrenh par. Tã koja mẽmoj piitã ho amnhĩptàr rãhã htĩr tũm nē pa ho pa.

Kris te kêp mẽ pahkrã pyrãk ã harēnh

Rõmãn 12.4; Wam Korĩt 12.12; Epes 4.16; Korosẽ 3.25

22 Na pre Tĩrtũmja Kra Kris nhĩhkram mẽmoj piitã haxàr pa. ỳ hã kot nhỹrmã ho amnhĩptàr o pa kaxyw. Jakamã kot mẽ pahto amnhĩptàr xwỳnh ã kêp mẽ panhõ Pahihti. Nē te kêp mẽ pahkrã pyrãk. Nē mẽ papajaja te mẽ pahpê ì pyrãk jakamã na pu htem hkôt ri amnhĩ nhĩpêx o papa. 23 Na hte mẽ panhĩja mẽ

pahkrã kamã mẽ pajamaxpēr xà hkôt tanhmã amnhĩ nhĩpêx to. Ja pyrà nē na pu htem mẽ pahkrã pyrãk xwỳnh Krisja kapēr ma nē hkôt tanhmã ri amnhĩ nhĩpêx to ho ri papa.

Koja mẽhõ ãm hkrã pix nē ì hkêt nē pa hãmri nē mex kêt nē. Na htem hkrã nē mãânēn ì nē pa nē mex nē. Ja pyrà nē na hte Kris mẽ pahte hkôt amnhĩ nhĩpêx o papa hã mẽ pahpumu nē hkĩnh nē mex nē pa. Pu mẽ pajaxwỳja hkôt ri amnhĩ nhĩpêx ã amnhĩ pumu nē pahkĩnh nē pamex nē papa ho papa.

2

Tanhmã Tĩrtũm kot mẽ pahto hkra hto ã harēnh

Wam Korĩt 6.11; Xitre 2.11-3.7

1 Nē anepê mã na pu pre htem Tĩrtũm kàx ã tanhmã amnhĩ tomnuj to ho ri papa. 2 Nē jar mẽ kot amnhĩ nhĩpêx o amnhĩ nhĩpêx. Jao amnhĩ tomnuj pix o ri papa. Nē mẽkarõmnuti nhõ pahi Satanasti kapēr kôt pix mã ri amnhĩ nhĩpêx rãhã nē. Na pre hte tanhmã mẽ pahkôt mẽ pahto ho pa. Mẽ pahte tanhmã amnhĩ tomnuj to kaxyw mẽ pamã mẽ pajamaxpēr punuj jagjê. Pu mẽ amnhĩ tã omunh kêt tã ỳ hã amnhĩ tomnuj o papa. Satanastija kêp mẽ kot Tĩrtũm kapēr kwỳm ri amnhĩ nhĩpêx o mẽ pa xwỳnhjê nhõ pahihti na. Tã pu pre htem pahtỳx ri hkôt amnhĩ nhĩpêx pix o ri papa. 3 Mẽ pahpiitã tanhmã amnhĩ tomnuj to hprãm xà hkôt pix mã tanhmã amnhĩ nhĩpêx to. Nē mẽmoj punuj kukamã pajamaxpēr nē ra hkôt ã amnhĩ tomnuj anē. ã na pu prem mnhĩ nhĩpêx anē nhũm Tĩrtũm ja hã mẽ pahpumu nhũm ja kãm mex kêt nē. Jakamã nhũm tee ri mẽ pakukamã hamaxpēr nē hamaxpēr o:

—Hêxta waa nē. Na htem ixkapēr kwỳm ri tanhmã amnhĩ tomnuj to rãhã ho pa. ã mẽ kot amnhĩ nhĩpêx anhỳr o mẽ pa xwỳnhjaja koja mẽ nhỹrmã ixri htĩr tũm nē mex nē pa ho pa hkêt nē. Ixkĩnhã mẽ kot amnhĩ

tomnuj xwÿnh jakamã tanhmã kot mē amnhĩ to nē ixri htĩr tũm nē pa ho pa? Nà mē kot amnhĩ tomnuj mÿrapê koja mē nhÿrmã ma amnhĩ xà htÿx kamã hamak tũm xàta wÿr ma hapêx pa. Nà koja mē anē. Hêxta waa nē. Inhmã ma hwÿr mē pa prãm kêt tâ ra ma hwÿr mē pa kaxyw.

Anhÿr o hamaxpêr. ⁴⁻⁵ Nē amnepê m kormã mē pahte amnhĩ tomnuj o papata ã te mē pahte amnhĩ xà htÿx kamã pajamak tũm xà hwÿr pryta ã mē papa pyrãk. Nom Tĩrtũm kãm mē pajapê nē mē pakamã ukaprĩ jakamã na pre mē pahto mex rax nē. Nē akupÿm Kris o htĩrja ri te ra mē pahte amnhĩ xà htÿx kamã pajamak tũm xà hwÿr pryta nē mē pahto ujanãr pyrãk o mē panhĩpêx. Mē pakamã ukaprĩ nē kãm mē pajapê ho ã mē panhĩpêx anē. Amarĩ ã mē panhĩpêx anē nē mē panê mē pahte amnhĩ tomnuj rên pa. Jakamã kot puj mē pahte Kra hkôt amnhĩ xunhwÿr xwÿnhjaja nhÿrmã amnhĩ xà htÿx kamã mē hamak tũm xàta wÿr papa hkêt nē. ⁶ Ra Tĩrtũm akupÿm Jejus Kris o htĩr jakamã te ra Jejus kôt akupÿm mē pahpê hkwÿjê ho mē pahĩr pyrãk. Jakamã te ra õ krĩ kamã ãhkô hã mē pamex kumrêx nē pahkrĩ pyrãk. ⁷ Mēmo kaxyw na pre Tĩrtũm kãm mē pajapê hkôt ã mē pahwÿr Jejus Kris mēnh nhũm mē panê htyk anē? Nà kãm mē pajapê htÿx ã mē pahte pahprĩ hã amnhĩ tâ omunh kaxyw na pre ã mē pahwÿr mēnh anē. Tã kot puj mē nhÿrmã kaxkwa kamã hwÿr pøj nhũm mē pamã amnhĩ jarênh o:

—E mē amnê ixpumu. Inhmã mē ajapê htÿx jakamã na pa pre mē akamã ixukaprĩ xàj ma mē awÿr Ixkra Jejus Krisja mē nhũm amnhĩ grônh kôt mē awÿr wrÿ nē mē anê ty. Inhmã mē ajapê htÿx jakamã na pa pre ã mē awÿr mēnh nhũm mē anê htyk anē. Inhmã mē apê ixkrajê japê xàj na pa pre ã mē ato mex rax anē.

Anhÿr o mē pamã kapêr hãmri nē mē pahto mex rãhã ho pa. ⁸⁻⁹ Xà na pu prem pahpê hkra hprãm xàj amnhĩ

krã hkôt mē papamjaja kãm tanhmã amnhĩ to mex to nē kãm:

—E kwa Tĩrtũm. Na pa ã amnhĩ to mex anê nē ã amnhĩ to mex anê. Jakamã kwa ja hã ixpumu nē ixto akra nà?

Anhÿr o na pu prem amnhĩ to kuwÿ? Nà na pu prem ã amnhĩ to hwÿr anhÿr kêt nē. Na pu prem amnhĩ kaxyw hkôt pajamaxpêr nē hkôt amnhĩ xunhwÿ nhũm ja pix ã mē pahpumunh kôt mē panê mē pahte amnhĩ tomnuj rē nē mē pahto hkra. Kãm mē pajapê nē mēmoj to mē pakutã nojarêr rãhã ho pa jakamã na hte ã mē panhĩpêx mex anē. Jakamã na pu htem amnhĩ tâ omu nē pajamaxpêr o:

—Nà na xep hte Tĩrtũmja mē pahte tanhmã amnhĩ nhĩpêx to ho papa hã mē pahpumunh kôt mē pahto hkra hkêt nē. ãm mē pahte amnhĩ kaxyw kãm pajamaxpêr ã mē pahpumunh kôt pix mã na hte mē pahto hkra. Anê.

¹⁰ Nē Tĩrtũm tapxipix na hte tanhmã mē pahto pu mē amnhĩ to mex rãhã ho papa. Nom kormã kot mē pahto hkra hkêt ri na pu prem ã amnhĩ nhĩpêx anhÿr kêt nē. Tã Jejus Kris kôt amnhĩ xunhwÿ nhũm Tĩrtũm ja hã mē pahpumu nē mē pamã mē pahte amnhĩ nhĩpêx nyw jagjê pu mē ÿ hã tãm amnhĩ nhĩpêx o ri papa. Amnepê m tanhmã kot mē pakukamã hamaxpêr to xà hkôt. No na hte tanhmã mē pahte amnhĩ krã hkôt amnhĩ nhĩpêx to hã mē pahpumunh kôt mē pahto hkra hkêt nē.

Tĩrtũm krajaja te kot axpên to htõ nē htõx pyrãk

Karatas 3.28; Korosê 1.21-23

¹¹ E mē apê Ijaew kêt xwÿnhjaja. Na ka htem mē akatorxà nhõhy rũm ajapøj hãmri nē mē ixpê Ijaew pyrã nē amnhĩ my kwÿrêt kã jakàr kêt nē. Jakamã na pre ixkwÿjaja mē akurom amnhĩ jakàr ã amnhĩ to jarkrar o ri pa nē amnhĩ jarênh o:

—Ra mē ixte amnhĩ my kwÿrêt kã jakàr ã mē ixpumunh kôt na hte Tĩrtũm mē ixto hkra. Tã Ijaew kêt

xwÿnhjaja kot mẽ ixkĩnhã amnhĩ jakàr kêt jakamã mẽ kệp hkra hkêt. Nẽ mãânẽn mẽ kệp mẽ pahkwÿ hkêt.

Anhÿr o mẽ ajarẽnh o pa. ¹² ãm hãmri na prem mẽ apê mẽ ixkwÿ hkêt ã mẽ ajarẽ. Na pa prem mẽ akurom amnhĩ my kwÿr kà jakà nẽ mẽ akurom Kris kamã ijamak o ri ixpa. Jakamã nhũm Tĩrtũm kot mẽ ixto mex ã amnhĩ jarẽ pa mẽ mẽ apyrà nẽ tee ri amnhĩ kukamã ijamaxpẽr o ri ixpa hkêt nẽ. Nẽ mẽ akurom amnhĩ kaxyw Tĩrtũm mã ijamaxpẽr. Nà ãm hãmri na prem mẽ apê mẽ ixkwÿ hkêt ã mẽ ajarẽ. ¹³ Te Tĩrtũm kàx ã ri mẽ apa pyràk tã ka mẽ arĩ ã amnhĩ nhĩpêx anhÿr kêt nẽ. Jejus Kris kot mẽ panê htyk nhũm mẽ ate hkôt amnhĩ xunhwÿr jakamã ra mẽ apê hkwyÿ. Jao arĩ hkàx ã ri apa hkêt nẽ. Te mẽ ixpê Ijaew kwÿ pyrà nẽ hpãnhã kuri ra ri apa pyràk. ¹⁴ Jakamã na pu htem Kris kukwak ri ra axpẽn nhĩpêx nyw o axpẽn nhĩpêx o ri papa. Mẽ ixpê Ijaewjaja nẽ mẽ apê Ijaew kêt xwÿnhjaja na pu htem te ra ixkre tipxi kamã ri papa pyràk. Nom amnepẽm na pu prem ã axpẽn nhĩpêx anhÿr kêt nẽ. Mẽ pahte amnhĩ nhĩpêx tũmja ahpÿnhã na pre. Na pu prem pamã axpẽn kurê nẽ axpẽn kàx ã ri papa. Nẽ nhÿri axpẽn pumu nẽ te pahte axpẽn pumunh kêt pyrà nẽ nhãm parĩt o ri mra. Tã nhũm Kris mẽ panê htyk o mẽ pahte amnhĩ tomnuj piitã hpãnhã amnhĩrer pa. Mẽ ixpê Ijaew nẽ mẽ apê Ijaew kêt xwÿnhjaja. Nẽ htyk o te ra kot mẽ pahte axpẽn nhõrkwÿ hwÿr axpẽn wÿr o papa pyràk. Jao mẽ pamã axpẽn kurê ho hapêx nẽ hpãnhã tãm axpẽn kaxyw mẽ paxunhwÿ pu mẽ hpãnhã axpẽn to mex rãhã ho ri papa. ¹⁵ Amnepẽm Mojes kot Tĩrtũm nhÿ hã mẽ ixpê Ijaew mẽ ixte tanhmã amnhĩ nhĩpêx to ho ixpa hã karõja. Na pa prem mẽ apê Ijaew kêt xwÿnhjaja mẽ ate Tĩrtũm kôt amnhĩ nhĩpêx kêt ã mẽ apumu nẽ mẽ akamã inhgryk nẽ. Nẽ axpẽn mã mẽ ajarẽnh o:

–Nà mẽ pahkĩnhã mẽ kot Mojes

kapẽr kôt amnhĩ nhĩpêx kêt jakamã koja Tĩrtũm mẽ ho hkra hkêt nẽ.

Anhÿr tã nhũm Kris mẽ pahwÿr wrÿ nẽ mẽ pahpiitã mẽ panê htyk o mẽ pahte hkôt amnhĩ xunhwÿr ã mẽ pahpumunh kôt pix mã mẽ pahto Tĩrtũm kra. Jakamã pa mẽ axte mẽ ate Mojes kapẽr kôt amnhĩ nhĩpêx kêt ã mẽ apumunh kôt mẽ apê Tĩrtũm kra hkêt ã mẽ ajarẽnh kêt nẽ. Hãmri nẽ mẽ ixpê Ijaew nẽ mẽ apê Ijaew kêt xwÿnhjaja pu mẽ axte axpẽn kãm pagryk o ri papa hkêt nẽ. Ra te ixkre tipxi kamã mẽ pahte axpẽn kôt ri papa pyràk.

¹⁶ Kris na pre pĩ kahpa hã mẽ panê htyk o ã mẽ panhĩpêx anẽ nẽ mẽ pahte axpẽn kôt amnhĩ nhĩpêx o papa kaxyw mẽ paxunhwÿ. Nom Tĩrtũm jamaxpẽr xà hkôt ã mẽ panhĩpêx anẽ. Jakamã na pu htem arĩ pamã axpẽn kurê ho papa hkêt nẽ. ¹⁷ Na pre Kris mẽ pahwÿr wrÿ nẽ ã mẽ panhĩpêx anẽ. Mẽ apê Ijaew kêt xwÿnhjaja mẽ ate kormã Tĩrtũm kapẽr mar kêt xwÿnhjaja nẽ mãânẽn mẽ ixpê Ijaew mẽ ixte kapẽr mar mex xwÿnhjaja nhũm pre akupÿm tãm mẽ pahte axpẽn kôt amnhĩ nhĩpêx o papa kaxyw mẽ paxunhwÿ. ¹⁸ Hãmri nhũm Tĩrtũm mẽ pahwÿr amnhĩ Karõ rẽ nhũm mẽ pahkarõ mã agjê. Kris kukwak ri pix mã mẽ pahwÿr kurê pu mẽ ÿ hã paxãmnhĩx ri kãm tanhmã amnhĩ jarẽnh to ho ri papa. ¹⁹ Hãmri nẽ te mẽ pahpê nhãm axpẽn kaxyw mẽ urojê pyrà nẽ axpẽn kàx ã ri papa hkêt nẽ.

Te mẽ pahpê Tĩrtũm nhõrkwÿ pyràk ã mẽ pajarẽnh

Wam Korĩt 3.16; Sikũn Korĩt 6.16; Wam Pêtre 2.5

²⁰ Nẽ mẽ pahpê Jejus kwÿ jakamã te mẽ pahte ixkre tipxikamã ri papa pyràk. Nẽ te mẽ pahpê ixkre nhĩpêx mex pyràk. Nẽ Kris te kệp ixkre hkrax mã kuhê xà nẽ kÿxpê kãm nõr xà maatija pyràk. Nẽ mẽ kot Jejus nhÿ hã mẽ ahkre xwÿnhjaja nẽ mẽ kot Tĩrtũm nhÿ hã kapẽr o ri mẽ pa xwÿnhjaja te mẽ kệp ixkre nhõkwa êja pyràk. Nẽ mẽ papajaja te mẽ pahpê ixkre nhĩmõk

ã pôja pyræk. ²¹ Ixkre mã kuhê xà nê kýxpê kãm nôr xà maati kukwak ri pix mã na hte ôkwa ê nê mã pôja kýxpê mex nê axpên tâ harir. Ja pyrà nê ãm Kris kukwak ri pix mã na pu htem te ixkre tipxi kamã ri papa pyræk o axpên nhîpêx mex o ri papa. Te mẽ pahpê mẽ kot ixkre rax kumrêx nhîpêx o môr nhũm muxre nê ãm xwýnhhta pyræk.

²² Na htem amnhîm ôrkwý nhîpêx nê hipêx pa nê hwýr agjê nê kamã pa ho pa. Ja pyrà nê na hte Tirtũm Karôja mẽ pahpê hkrajê karô mã agjê nê mẽ pakamã pa ho pa. Te mẽ pahpê Tirtũm nhôrkwý pyræk. Mẽ ixpê Ijaew nê mẽ apê Ijaew kêt xwýnhjaja Tirtũm mã te mẽ pahpê ôrkwý pyræk.

3

Pawre kot Ijaew kêt xwýnhjê mã mẽmoj to amnhîrît ã harênh

Rômãn 15.14-21; Korosê 1.24-29

¹ Tã te mẽ pahpê Tirtũm nhôrkwý pyræk jakamã na pa hte jar mẽ hagjênh xà kamã mẽ ato hwýr rãhã ho ixkrî. Na pa pre hte ma mẽ apê Ijaew kêt xwýnhjê hwýr ixpa nê ixprî mã mẽ amã Jejus kapêr jarênh o ri mẽ akôt ixpa. Mýrapê na prem ixpynê nê ijaxà pa arî jar ixkrî ho ixkrî. Nom arî amnhî kaxyw Tirtũm mã ijamaxpêr tỳx pê mẽ ato hwýr rãhã ho ixkrî. ² Na pre kãm ijapê mã mẽ apê Ijaew kêt xwýnhjê kaxyw ixãm. Ma ixte ri mẽ akôt ixpa nê mẽ amã kapêr jarênh o ri mẽ akôt ixpa kaxyw. Ra mẽ ate ja mã ijarênh mar mex. ³ Na pre mẽ pahto hpimràatã tanhmã mẽ pahto mex to mã inhmã amnhî to amnhîrît pa pre omu. Mẽ kajaja nê mẽ pajaja. Pika piitã hkôt mẽ piitãã tanhmã mẽ ho mex to. Na pre kormã kot mẽhõ mã ja jarênh kêt mã inhmã ho amnhîrît pa pre omu. Tã kagà ja kamã kot paj mẽ amã hkwý ho grêre nê ho amnhîrît nê mẽ amã mã kagà ka mẽ ixpyrà nê kamã harê nê ama. ⁴ Jao aprî mã mar mex nê. ⁵ Amnepêm mẽ pahkêt ri mẽ pa xwýnhjê mã Tirtũm kot ja ho amnhîrît kêt mã nhũm Karô mẽ ixkwýjê kumrêx mã ho amnhîrît. ý mã

kapêr o ri mẽ pa xwýnh mẽ mẽ ixpê Jejus nhý mã mẽ ajahkre o mẽ ixpa xwýnhjê kumrêx mã ho amnhîrît. Mẽ ixte kãm tanhmã amnhî nhîpêx to ho ixpa xwýnhjê mã ho amnhîrît pa prem omu. ⁶ Na pre mẽ inhmã tanhmã mẽ ato amnhîrît to pa prem ja mã mẽ apumu nê mẽ akukamã ijamaxpêr o:

—Nà ãm hãmri koja xep Ijaew kêt xwýnhjaja mẽ ixpê Ijaew pyrà nê Tirtũm kapêr ma nê Jejus Kris kôt amnhî xunhwý nhũm Tirtũm ã mẽ kot amnhî nhîpêx anhýr ã mẽ omu nê mẽ ixpyrà nê mẽ ho hkra nê mẽ ho mex o pa. Anê.

⁷ Tã nhũm Tirtũmja mẽ awýr inhmê. Ixte mẽ amã ja jarênh o ri mẽ akôt ixpa nhũm tokyx mẽ ate mar kaxyw. Na pre ixto mex nê kãm hprãm xà hkôt mẽ akaxyw ixãm nê ixte ý mã kãm tanhmã amnhî nhîpêx to ho ixpa kaxyw ixto ixihýtýx nê mẽ awýr inhmê. ⁸ Tã mo kaxyw na pre mẽ akaxyw ixãm? Te ixte ja kaxyw inhmex kêt pyræk. Ixkwýjaja ja kaxyw mex o kot ijakrenh mã nhũm pre ixpumu nê tanhmã hamaxpêr to nê mẽ akaxyw ixãm nê mẽ awýr inhmê. Ixte mẽ amã mẽmoj mex kumrêx jarênh o ri mẽ akôt ixpa kaxyw. Na pre inhmã:

—Kêr ka ma Ijaew kêt xwýnhjê hwýr mō nê mẽ kãm Jejus Kris kapêr jarênh o ri mẽ hkôt apa. Nê mẽ kãm: “Kot kaj mẽ Jejus Kris kôt amnhî xunhwý hãmri nê kukwak ri amex nê apa.” Anê. ⁹ Koja mẽ apê Ijaew kwýjê pyrà nê amnhî kaxyw Ixkra Kris kôt hamaxpêr nê hkôt amnhî xunhwý pa mã mẽ omu nê mẽ ho ixkra. Kormã aa ixte mẽ kãm ja mã amnhî to amnhîrît kêt mã pa akumrêx mã harê. E mã mẽ hkôt ri mẽ kãm ã ijarênh anhýr o ri apa kê mẽ ijarênh ma.

Anhýr o mẽ pahto kator xwýnh maatija inhmã kapêr. ¹⁰ Tã mẽmo kaxyw na hte mẽ pahto hpimràatã mẽ pahto hkra? Nà kaxkwa kamã kapêr o mẽ wrýk xwýnh pytãr xwýnhjaja nê mẽkarõmnuti kot mẽ pahte amnhî nhîpêx nyw o papa mã mẽ pahpumunh kôt axpên mã

tanhmã Tirtũm jarēnh to kaxyw. Nē harēnh o:

—Kokỹỹ. Tirtũm àhpumunh tỳx o àhpumunh tỳx jakamã na hte tanhmã mē hipēx to nhũm mē tãm amnhĩ nhĩpēx mex o pa. Nà Tirtũm àhpumunh o àhpumunh nē hihtỳx o hihtỳx. Anē.

Koja mē ate amnhĩ to mex o apa hã mē apumu nē ã axpēn mã Tirtũm jarēnh anē.

¹¹ Amnepēm kormã mēmoj kēt ri na pre Tirtũm mē pakukamã mē pahtã tanhmã amnhĩ jarēnh to hãmri nē Jesus kukwak ri ã mē panhĩpēx anē. Jao mē piitã mē kãm àhpumunh o àhpumunh ã amnhĩ to amnhĩrīt. ¹² Tã pu mē ra Jesus kukwak ri amnhĩ kamã pamã Tirtũm puma hkēt nē. Kãm mē pajapê kēnã kot pu kēt mē ri amnhĩ kamã pamã uma ho papa. Kot puj mē paxàmnhĩx ri kãm amnhĩ jarēnh rãhã ho ri papa. Te ra pahte hwỳr paxàpir nē pano ho omunh nē kãm pakapēr o pakuhê pyræk. ¹³ Jakamã kwa kêr ka mē kot mē atã tanhmã ixtomnuj to hã ijarēnhja ma nē tee ri ixkukamã ajamaxpēr hkēt nē. Kwār mē mãmri tanhmã inhĩpēx to. ãm ixte mē amã amnhĩ jarēnh ma nē axpēn mã ijarēnh o:

—Hêxta waa nē. Mãn Pawre kãm mē pajapê hã na pre amnhĩ grōnh kôt mē pamex kaxyw mē pahwỳr mra nē mē pamã Tirtũm kapēr jarēnh o pa. Mē kot ja hã tanhmã hipēx kati hto htã nhũm jam urer kēt nē. Anē.

Kris kãm mē pajapê kamã tanhmã mē panē amnhĩ nhĩpēx to Juãw 3.16; Wam Juãw 3.1

¹⁴ Nē na pa hte mē ato Mēpanhĩpêêxã maati hwỳr kãm ixihỳx o ixpa. ¹⁵ Kêp mē pahte hkôt amnhĩ xunhwỳr xwỳnhjê nhõ Pahi Maati mex kumrēx na. Kra hkwyjaja ra kaxkwa kamã kuri htĩr tũm nē pa ho pa nē arĩ pyka ja kamã mē pahpê hkwyjaja kormã jar papa. Nom te mē pahpiitã mē pahte ixkre tipxi kamã Tirtũm kôt ri papa pyræk. ¹⁶ Jakamã na pa hte mē ato hwỳr o:

—Pa Tirtũm. Nà amex o amex. E ot pa Epes nhõ xwỳnhjê ho awỳr o ixkrĩ. Kwa kê Akarõ mē kãm axàhpumunh xà hkwy gō kê mē akôt ri amnhĩ nhĩpēx rãhã ho pa.

¹⁷ —Nē kê mē amnhĩ kaxyw Kris kôt hamaxpēr tỳx o pa. Te mēmo pĩ hpār jarê kot pika kaxwỳnh kãm pimành nē pika jamỳnh tỳxta pyræk. Nhũm kòk xàpēr tỳx tã tee kot kãm mēnh prãmta pyræk. Kê mē pĩ hpār jarê kot pika jamỳnh pyrã nē kãm axpēn kĩnh o pa. Jao mēmoj to axpēn kutã nojarêt rãhã ho pa.

¹⁸⁻¹⁹ —Nē kê krĩ piitã hkôt mē akrajê pyrã nē amnhĩ tã Kris kãm mē hapê htỳx o mē hapê htỳx ã amnhĩ pumu. Jao uræk nē mē kãm axpēn kĩnh tỳx o pa. Nē kê mē ate amnhĩ nhĩpēx pix o amnhĩ nhĩpēx rãhã ho pa. Nē ajamaxpēr pix o hamaxpēr rãhã ho pa. Jao te mēmo pĩ hpàrta pyrã nē akôt hihtỳx nē. Anē.

²⁰ Kot puj mē ã amnhĩ to Tirtũm wỳr anē nhũm mē pama nē ra àhpumunh tỳx xà ho ã mē panhĩpēx anē. Ra kot mē pakamã pa ho pa kēnã. ²¹ ã Tirtũm Jesus Kris kukwak ri mē pahpê hkrajê nhĩpēx anhỳr jakamã kwa pu mē pahpê hkra xwỳnhjaja kêr pu mē kãm mex o mex ã harēnh rãhã ho papa. Nà kot puj mē ã kãm anhỳr o papa.

4

Te ixkre tipxi kamã axpēn kôt ri mē papa pyræk

Rômãn 15.5; Piripos 2.1-4; Korosê 3.12-17; Wam Pêtre 3.8

¹ Nē ra mē kot Kris ã ijaxàr nhũm ixkrĩ htã pa ã inhmã mē akĩnh xàj mē amã ixkapēr nē hã kagà anhỳr o ixkrĩ. Kwa kêr ka mē Tirtũm kot amnhĩ nhĩpēx kôt amnhĩ nhĩpēx mex rãhã ho ri apa. Ja kaxyw na pre amnhĩ kôt mē awỳ ka prem hkôt amnhĩ xunhwỳ.

² Nē kêr ka mē amã amnhĩ to rax o akwỳjê jakrenh prãm o ri apa hkēt nē. Nē mē agryk tokyx anhỳr kēt nē. ãm axpēn kãm axukapri pix o mãn ri axpēn kôt apa. Kê mēhõ tee tanhmã ri mē ato htã ka mē kamã

agryk tokyx anhÿr kêt nê. Æm mē amā ri axpēn hkīnh pix o mǎn ri axpēn kôt apa. ³ Ra Tirtūm Karō kot mē pahkarō mā gjēx par jakamā te mē pahte ixkre tipxi kamā axpēn kôt ri mē papa pyrāk. Jakamā kēr ka mē axpēn to mex pix kukamā mǎn kêt ajamaxpēr o ri axpēn kôt apa. Nē tām axpēn nhīpēx. Jao ajamakētkati nē axāmnhīx ri axpēn kôt ri apa ho apa. ⁴ Te mē pahte ixkre tipxi kamā ri axpēn kôt papa pyrāk jakamā mē pahpiitā mē pahkarō kamā Tirtūm Karōja hkrī ho hkrī. Jakamā kot puj mē nhÿrmā ma ō krī hwÿr api nē kamā mē pamex rāhā papa ho papa.

⁵ Nē mē panhō Pahihtija ām pixii. Na pu prem pahpiitā amnhī kaxyw hkôt pajamaxpēr jao ra mē pahpē hkraa. Tā mē pahpē Kris kwÿ hā amnhī to amnhīrīt kaxyw na prem Tirtūm mā mē pahkrā kumrā. Ā mē panhīpēx anhÿr o axpēn pyrāk o mē panhīpēx o pa anē.

⁶ Nē Tirtūm haxwÿja ām pixii. Kēp mē pahpiitā mē panhīpēēxā maati na. Na hte mē pahpē hkrajē mā āhpumunh xā hkwÿ gō pu mē ŷ hā kām tanhmā amnhī nhīpēx to ho papa. Nhūm hte mē pahkarō kamā pa ho pa. Jakamā te mē pahte ixkre tipxi kamā ri axpēn kôt papa pyrāk.

Kris kot ahpÿnhā tanhmā mē pahto mex to hā harēnh

Rōmān 12.3-8; Wam Korīt 12.1-12; Wam Pētre 4.10-11

⁷⁻⁸ Nē Tirtūm kapēr ā kagā htūm kot Kris jarēnh kot:

Na pre mē kot kutā amnhī xunhwÿr xwÿnhjē pytār pa nē ma akupÿm kaxkwa hwÿr api.

Tā arī jar pika hkôt mē pahpē hkwÿjē mā tanhmā mē pahto paxihtÿx to ho pa.

Na hte Krisja tanhmā mē pahte ahpÿnhā kām amnhī nhīpēx to ho papa kaxyw tanhmā mē pahto paxāhpumunh to. Kām hprām xā hkôt. ⁹ Tirtūm kapēr ā kagā htūm kot akupÿm kaxkwa hwÿr àpir ā harēnh. Ām tapxipix na pre ā pika hwÿr wrÿk

nē akupÿm kaxkwa hwÿr àpir anē. Na pre ty nhūm mē haxā. Hāmri nhūm akupÿm htīr nē kato nē ma akupÿm api. Tapxipix na pre ā amnhī nhīpēx anē. ¹⁰ Tā akupÿm kaxkwa hwÿr àpir xwÿnhata na hte kaxkwa kamā nē pika hkôt amnhīm mēmoj piitā tanhmā ho ho hkrī. ¹¹ Na pre ahpÿnhā tanhmā mē pahto mex to. Ahpÿnhā mē pahte tanhmā kām amnhī nhīpēx to ho papa kaxyw na pre mē paxunhwÿ.

Nē mē pahkwÿjaja mē pahte krī piitā hwÿr pamrar nē ŷ hā hkrajē mā kapēr jarēnh o papa kaxyw mē paxunhwÿ.

Nē mē pahkwÿjaja mē pahte krī pixi kamā Tirtūm nhÿ hā hkrajē jahkre ho ri mē hkôt papa kaxyw mē paxunhwÿ.

Nē mē pahkwÿjaja mē pahte pahprī hā mē piitā mē kām tanhmā mē kot amnhī nhīpēx to nē Jejus kôt amnhī xunhwÿr ā mē kām harēnh o papa kaxyw mē paxunhwÿ.

Nē mē pahkwÿjaja mē pahpē pastō kaxyw mē paxunhwÿ.

Nē mē pahkwÿjaja mē pahte mē kām Tirtūm kapēr ā kagā jarēnh o mē ahkre ho papa kaxyw mē paxunhwÿ.

¹² ā kot puj mē pahpiitā ahpÿnhā Kris mā tanhmā amnhī nhīpēx to ho ri papa anē. Kot puj mē ā mē hipēx anhÿr o ri papa nhūm mē pamar tÿx nē. Nē gaa nē mē pahpyrā nē Tirtūm mā amnhī nhīpēx mex o pa. Pu mē pahpiitā hkôt amnhī nhīpēx mex o papa. ¹³ Nē gaa nē mē pahpiitā mē pahpē Tirtūm kra hā Jejus kot amnhī nhīpēx kôt omunh mex nē. Nē amnhī kaxyw hkôt pajamaxpēr tÿx nē. Jao te ra hkôt mē paxaptār mex pyrāk. Nē te kot amnhī nhīpēx pyrāk o amnhī nhīpēx.

¹⁴ Mēhprīrejaja na htem nhām hamaxpēr nē nhām hamaxpēr o pa. Te kōk xāpēr nē nhām mēmoj to mrar nē nhām mēmoj to mrar pyrāk. Nom kēr pu mē ho mē urāk kêt nē. Ām Kris kôt pix mā pajamaxpēr tÿx o papa.

Jakamã nhũm mẽ tee ri mẽ pahte hkwým ri tanhmã amnhĩ tomnuj to hprãm xàj tanhmã mẽ pahto kaprý. Nom kêr pu mẽ mẽ mar kêt nê. Æm pakatât kôt mẽ àptâr kot amnhĩ nhĩpêx o amnhĩ nhĩpêx o papa. Jao Kris kôt axpên to paxihtýx o papa. ¹⁵ Tãm axpên mã pakapêr nê pamã axpên kĩnh o axpên mã paxêx kêt nê. Kwa kêr pu mẽ ã amnhĩ nhĩpêx anhÿr o mãn papa. Jao te mẽ pahkrã Kris kot amnhĩ nhĩpêx pyræk o amnhĩ nhĩpêx mex o mỗ.

¹⁶ Nê mẽ panhĩ kamã tanhmã mẽ pakuteja piitã na hte mẽ pahkrã kamã mẽ pajamaxpêr xà hkôt axpên kôt ahpÿnhã tanhmã axpên to ajuta hto. Te ixkre pixi kamã mẽ pahte axpên kôt tanhmã axpên to ajuta hto ho ri papa pyræk.

Kris kôt mẽ pahte amnhĩ nhĩpêx nyw ã mẽ pamã karõ

Korosê 3.5-11; Wam Pêtre 4.7

¹⁷ E kot paj Pahihti nhÿ hã mẽ amã mẽmoj jarê nê nê mẽ amã ixkapêr kãm ixihtýx nê ka mẽ inhma. Nà kêr ka mẽ axte mẽ kêp Tĩrtũm kra hkêt xwÿnhjê kot amnhĩ nhĩpêx o amnhĩ nhĩpêx o ri apa hkêt nê. Na htem htýx ri tanhmã hamaxpêr punuj to ho ri amnhĩ tomnuj o pa. ¹⁸ Jao Tĩrtũm mã hamaxpêr kêt nê pa. Kãm hamaxpêr prãm kêt kumrêx nê pa. Te mẽ kot omunh nê nhãm hkrã pyræk o amnhĩ nhĩpêx. Rý te mēhõ wa kot axpên kãm gryk kãm axpên nhĩpêx pyræk o hipêx. Jao te kamàt kô kamã ri pa pyrã nê Tĩrtũm kot amnhĩ nhĩpêx pumunh kêt nê pa. Jakamã koja mẽ nhÿrmã kuri htĩr tũm nê pa hkêt nê. ¹⁹ Na htem tanhmã amnhĩ tomnuj to htã amnhĩ kamã hpijaàm kêt nê pa. Nê axpên kamã hpijaàm kêt rãhã ho pa. Æm amnhĩ pix kukamã hamaxpêr nê tanhmã amnhĩ tomnuj to ho ri pa. ²⁰⁻²¹ Nom Jejus Krisja ã kot amnhĩ nhĩpêx anhÿr kêt. Mẽ kurom tãm kot amnhĩ nhĩpêx mex o pa xwÿnh nê tãm kapêr o pa xwÿnh na. Na pa pre ma mẽ awÿr mỗ nê ixprĩ hã mẽ amã ja hã

harê ka prem inhma nê inhmar tÿx nê. ²² Na pa pre mẽ amã:

—Kwa mẽ ri axte amnhĩ nhĩpêx tũm kôt amnhĩ nhĩpêx o ri apa hkêt nê. Ja na omnuj tÿx. Na ka prem ã amnhĩ nhĩpêx anê nê ajamaxpêr punuj pix o ri apa. Jao amnhĩ tomnuj rãhã nê. Tã kêr ka mẽ amnhĩ nê awry hã mēnh pyrã nê axte ã amnhĩ tomnuj anhÿr o ri apa hkêt nê.

²³ —Nê kêr ka mẽ axte mẽ ajamaxpêr tũm nê mẽ ate amnhĩ nhĩpêx tũm kôt ri amnhĩ nhĩpêx kêt nê. Nê mẽ ajamaxpêr nyw nê mẽ ate amnhĩ nhĩpêx nyw kôt pix mã ri amnhĩ nhĩpêx o ri apa. Te mẽ kot mẽ ê htũm kwrynh nê rēnh nê hpãnhã nyw jagjêx nê ri hã pata pyrã nê ãm amnhĩ nhĩpêx nyw kôt pix mã amnhĩ nhĩpêx o ri apa. ²⁴ Mẽ ajamaxpêr nyw nê mẽ ate amnhĩ nhĩpêx nywja axtem na. Te Tĩrtũm jamaxpêr nê kot amnhĩ nhĩpêxta pyræk. Jakamã kwa kêr ka mẽ kãm hprãm xà hkôt pix mã tanhmã amnhĩ nhĩpêx to ho ri apa. Jao kãm amnhĩ nhĩpêx mex o ri apa. Nê kapêr kôt ri amnhĩ nhĩpêx. Anê.

Na pa pre ã mẽ amã ixkapêr anê. Tã kêr ka mẽ arĩ ixkapêr kôt pix mã amnhĩ nhĩpêx. ²⁵ Mẽ pahpê Kris nhĩ jakamã te pahte ixkre htipxi kamã axpên kôt amnhĩ nhĩpêx pyræk jakamã kwa mẽ axte axpên mã mẽmoj to axêx kêt nê. Nê amarĩ axpên xõ ri axpên mã mẽmoj to axêx kêt nê. Æm tãm axpên mã mẽmoj jarēnh o ri apa.

²⁶ Nê kot kaj mẽ mẽmoj tã agryk japêr. Rý mēhõ kamã agryk rý amarĩ agryk japêr. Tã kêr ka ho ajapêx tokyx anê agryk japjê hkêt nê. Kêr kê kormã kamàt kêt ri ka akupÿm tãm akrã nhũm ja amã mex nê. ²⁷ Nom kot ka mẽ arĩ kamã agryk o ri apa nhũm mẽkarõmnuti nhõ pahi Satanas-tija ja hã mẽ apumu nê te mẽ ate amnhĩ tomnujta ã mẽ apynēnh pyræk o mẽ anhĩpêx. Ka mẽ ra hkôt tanhmã amnhĩ tomnuj to. Ja pymaj kêr ka mẽ agryk japjê hkêt nê. Satanasti kãm hprãm xà hkôt ã amnhĩ nhĩpêx anhÿr kêt nê.

28 Nē mē axàhkĩnh o mē apa xwỳnhjaja kēr ka mē axte mē kēp axàhkĩnh hkēt nē. Mēmoj tā apē nē hpānhā kàxpore jamỳ nē ho amnhĩm awjaprô. Nē mē kēp amrakati xwỳnhjē mā mēmoj japrô o ri apa. Kēr ka mē ate amnhĩ nhĩpêx tũmta pānhā ã amnhĩ nhĩpêx nyw o amnhĩ nhĩpêx anhỹr o ri apa.

29 Nē kēr ka mē amā axpēn kĩnh kamā tām axpēn mā akapēr o ri apa. Nē akapēr mā agēt kām ri axpēn mā akapēr kēt nē. Ām axpēn mā akapēr mā aprĩ ho axpēn mā akapēr. Nē mē amā axpēn kĩnh nē mē amā axpēn to mex pix prām xàj tām axpēn mā ri akapēr o ri apa.

30 Tĩrtũm na pre mē pahwỳr amnhĩ Karō rē nhũm mē pahpê hkra hā mē pahkarō mā agjē nē mē pakamā hkrĩ ho hkrĩ. Koja mē pakamā hkrĩ ho hkrĩ rāhā nhũm nhỹrmā Tĩrtũm amnhĩ wỳr mē pahto apĩ pu mē kuri pahtĩr tũm nē papa ho papa. Jakamā kwa kēr ka mē tanhmā amnhĩ tomnuj to ho amnhĩ kamā Tĩrtũm Karō mā hkaprĩ jagjēnh kēt nē. Nē kām hpijaam jagjēnh kēt nē. Koja mē pahte amnhĩ tomnuj ã mē pahpumu nē mē pahkaga hkēt tā tee ri ja hā mē pahpumu nē hkaprĩ nē. Jakamā kēr pu mē ãm kām hprām xà hkôt pix mā tanhmā ri amnhĩ nhĩpêx to ho ri papa.

31 Nē kēr ka mē axte ri axàhkurê ho ri apa hkēt nē. Nē agryk kām axpēn mā tanhmā akapēr punuj to hkēt nē. Rỳ axpēn japrỳ ho ri apa hkēt nē. Nē atỳx ri axpēn tā apēr o apikēnh kēt nē. Nē ri axpēn tā mē kām axāmnēnh kēt nē. 32 Kēt mē ãm axpēn to mex pix nē axpēn kām axukaprĩ ho ri apa. Nhũm mēhō tanhmā mē ato ka mē ãm amnhĩ tā omu nē tanhmā ho hkēt nē tanhmā kot atoja ho ajamakêtkati kurê kumrêx. Tĩrtũm na pre Kris kukwak ri mē pahte amnhĩ tomnuj grānh pa nē axte kām hamaxpēr kēt nē. Tā kēr ka mē urāk nē mēhō kot tanhmā atomnuj tota tokyx ho ajamakêtkati nē axte kām ajamaxpēr kēt nē.

5

1 Nē koja mēhō kām hkra japê nhũm amnhĩ tā omu nē hkĩnh nē. Hāmri nē nhỹrmā hkra nē amnhĩ pyrā nē kām hapê nē. Ja pyrā nē Tĩrtũm kām mē pahpê hkwyjê japê jakamā kēr pu mē amnhĩ pyrā nē pamā pahkwỳjê hkĩnh tỳx o papa. 2 Kris haxwỳja kām mē pajapê jakamā na pre htyk o mē panê mē pahte amnhĩ tomnuj pānhā amnhĩrer pa. Kēp Tĩrtũm Kra htā amnhĩ mex pix kukamā hamaxpēr kēt nē ã mē panê amnhĩ nhĩpêx anē. Tā ã kām mē pajapê anhỹr jakamā nhũm Tĩrtũm ja hā omu nhũm ja kām mex nē. Te ho mē hkuxwa xà mex kuxwa pyrāk. Jakamā kēr pu mē amnhĩ tā omu nē urāk nē pamā axpēn kĩnh o axpēn to mex o mǎn ri papa.

Mē pahte amnhĩ tomnuj kaga hā kot mē pamā karō

Sikũn Korĩt 6.14-7.1; Korosē 3.16-17; Wam Juāw 1.5-10, 2.15

3 Nē mē pahpê Tĩrtũm kra jakamā kēr pu mē pahprô pix tãnopxar o ri papa nē nhām mēnijê hō kamā pahpijaam kēt o ri papa hkēt nē.

Nē kēr pu mē amnhĩ pix kukamā pajamaxpēr kēt nē. Ām ja ho anhỹr hkēt kumrêx. Mē pahpê Tĩrtũm kra kēnā kot pu kēt axtem nē ã amnhĩ nhĩpêx anhỹr o ri papa. Tĩrtũm krajaja na htem ã amnhĩ nhĩpêx anhỹr kēt nē.

4 Nē mǎnēn mē pakapērja. Kēr pu mē ri tanhmā axpēn mā pakapēr punuj to hkēt nē. Nē ri axpēn japrỳ hkēt nē. Nē amnhĩ krā hkôt pahtỳx ri tanhmā pakapēr to hkēt nē. Ām tām axpēn mā pakapēr mex nē axpēn mā Tĩrtũm mex o mex ã harēnh o ri papa.

5 Nē Tĩrtũm kapēr kôt amnhĩ nhĩpêx kēt xwỳnhjaja nē axpēn kām mē hpijaam kēt xwỳnhjaja nē amnhĩ pix kukamā mē hamaxpēr o pa xwỳnhjaja. Ā mē kot amnhĩ nhĩpêx anhỹr xwỳnhjaja kēp Tĩrtũm mē Kris wa hkra hkēt. Na htem ã amnhĩ nhĩpêx anhỹrja gryk ã wa kām hamaxpēr kēt nē.

6 Nē koja nhỹrmā mēhō mē awỳr mō nē mē ate tanhmā amnhĩ tomnuj to

prām xàj hêx rom amã kapêr nê mē amã:

–Kwa mon ka hte mē ixpyrà nê ã amnhĩ nhĩpêx anhÿr kêt nê? Ja mex kênã. Anê.

Koja ã mē amã kapêr anê ka mē ama nê ãm ama. ã mē kot amnhĩ nhĩpêx anhÿr xwÿnhjaja koja Tirtũm nhÿrmã ja hã mē homnuj tÿx kumrêx. ⁷Jakamã kwa kêr ka mē ate ho mē kot amnhĩ nhĩpêx pyrãk pymaj mē hkôt ri apa hkêt nê. Kwarĩ ho kwarĩ.

Mê pahte amnhĩ nhĩpêx nyw jarênh Juãw 1.4, 3.19, 8.12, 12.35; Rõmãn 13.12; Wam Tesarõn 5.5; Wam Juãw 1.5

⁸ Amnepê m kormã mē ate Tirtũm kôt amnhĩ xunhwÿr kêt ri na ka prem te kamãt kô kamã ri apa pyrã nê atÿx ri tanhmã amnhĩ tomnuj to ho ri apa. Tã ra Jejus kôt amnhĩ xunhwÿ hãmri nê te hirã kamã mē apa xwÿnh pyrãk. Jakamã kwa kêr ka mē hpãnhã Tirtũm kãm hprãm xà hkôt pix mã mãn ri amnhĩ nhĩpêx o apa. Ra mē apê hirã kamã mē apa xwÿnh kênã. ⁹ Kot kaj mē ã amnhĩ nhĩpêx anê nê tãm amnhĩ nhĩpêx mex nê tãm akapêr o apa. ¹⁰ Jao Tirtũm kãm hprãm xà hkôt pix mã amnhĩ nhĩpêx o ri apa ¹¹⁻¹² nê te kamãt kô kamã ri mē pa xwÿnhjaja kot amnhĩ nhĩpêx pyrãk o amnhĩ nhĩpêx kêt nê. ã mē kot amnhĩ nhĩpêx anhÿr xwÿnhjaja na htem hpimxur pê tanhmã amnhĩ tomnuj tÿx to ho pa. Nom kot paj ixprĩ hã mē amã tanhmã mē kot amnhĩ tomnuj to hã mē harênh kêt nê. Kot pa mē amã harê nê ixpijaàm tÿx nê. Ixte harênh mã xwÿnhja omnuju. Tã kêr ka mē urãk nê ã amnhĩ nhĩpêx anhÿr kêt nê. ãm mē noo mã tãm ri amnhĩ nhĩpêx o ri apa. ¹³ Mē kot ja hã mē apumunh nê tee ri tanhmã kot amnhĩ tomnuj to hkukamã hamaxpêr kaxyw. Jao amnhĩ tomnuj kaga japêr. ¹⁴ Te mē kot kanê hpôk rax kãm mēmoj piitã omunh mexta pyrãk. Tirtũm kapêr ã kagã htũm kot ja jarênh kot:

Mê amã Tirtũm prãm kêt xwÿnhjaja te ra mē atyk nê mē anhĩkwÿ pyrãk.

Nê te kamãt kô kamã mē anhõt nê mē anhĩkwÿ pyrãk.

Jakamã kwa te mē akrã hapôx nê kãnhmã mē akrĩ pyrãk o amnhĩ nhĩpêx nê Tirtũm kôt amnhĩ xunhwÿ.

Kê Kris tanhmã mē akrã hto ka mē te myt kato nhũm mē ate arÿgro hã ri apa pyrãk o amnhĩ nhĩpêx. Anê.

Tirtũm krajaja kot tanhmã amnhĩ nhĩpêx to hã mē kãm karõ

Korosê 4.5; Sikũn Ximotre 4.2

¹⁵ Nê kwa kêr ka mē amnhĩ pumunh mex o ri apa. Nê mē ri htÿx ri mē kot amnhĩ nhĩpêx xwÿnhjê hkôt amnhĩ nhĩpêx kêt nê. Nê ãm amnhĩ to mex pix o ri apa. ¹⁶ Na htem ra Kris ã mē pahtomnuj o pa pu mē pamex kêt nê ri papa. Tã nom kêr pu mē apkati mē arĩ Tirtũm mã tanhmã amnhĩ nhĩpêx to ho papa mã panhÿrer kêt nê.

¹⁷ Nê ãm Tirtũm pix mã amnhĩ jarênh o ri papa nê kãm:

–Pa Tirtũm. Inhmã akôt pix mã amnhĩ nhĩpêx prãm jakamã kwa ixte amã mēmoj to anhÿr kaxyw ixkrãm ijamaxpêr mex jagjê nê ho amnhĩrit mex pa tanhmã amã amnhĩ nhĩpêx to ho ri ixpa.

Anhÿr o amnhĩ to kuwÿ. Nom kêr pu mē pahtÿx ri pajamaxpêr kôt tanhmã kãm amnhĩ nhĩpêx to hkêt nê.

¹⁸ Nê kêr pu mē ri pahpipãnh o papa hkêt nê. Kwarĩ ho kwarĩ. Kot puj mē ã amnhĩ nhĩpêx anê nê te kagôxÿhti kot amnhĩ tã mē pahkaxpre pyrãk o mē panhĩpêx pu mē tee ri pamã hkaga hprãm kaprÿ. Te kot amnhĩm mē pahto arĩk pyrãk o mē panhĩpêx nhũm ja mex kêt nê. Na htem pipãnh kãm hamaxpêr mex kêt nê ãm htÿx ri tanhmã amnhĩ nhĩpêx to ho pa. Tã kêr pu mē ã amnhĩ nhĩpêx anhÿr hkêt nê ãm Tirtũm Karõ pix hkôt mãn ri amnhĩ nhĩpêx o ri papa.

¹⁹ Nê kêr pu mē axpên wÿr akuprõ nê pahkĩnh kãm Tirtũm mã mex o

mex ã harēnh pê ho pagrer o pahkrī.
²⁰ Nē mẽ pamex nē ri papa rỳ pahpunuj nē ri papa htã arĩ kãm mex o mex ã harēnh rãhã ho ri papa. Kêp Měpanhĩpêêxã maati jakamã mẽ pahpê Pahihtĩ Jejus Kris kwỳ hã pu mẽ kãm mex ã harēnh rãhã ho papa nē aa ho pajamakêtkati hkêt nē.

²¹ Nē kêr ka mẽ Kris ã apijaàm rãhã o ri apa. Jao axpẽn kôt ajamaxpêr nē axpẽn kôt ri amnhĩ nhĩpêx mex o ri apa.

Tanhmã mẽ hprõ nē mẽ mjên kot axpẽn nhĩpêx to hã mẽ kãm karõ

Wam Korõt 11.3; Korosẽ 3.18-19; Wam Pêtre 3.1-7

²² Nē kêr ka mẽ anijaja mẽ amjên ã apijaàm o ri apa. Nē mẽ hamaxpêr mex ã mẽ omu nē mẽ hkôt ri amnhĩ nhĩpêx o ri apa. Te mẽ ate Pahihtĩ Kris kapêr kôt amnhĩ nhĩpêx o ri apata pyrãk. ²³ Kris kêp mẽ pakamã ukaprĩ xwỳnh nē kêp mẽ papytãr xwỳnh jakamã te kêp mẽ pahpiitã mẽ pahkrã pyrãk. Nē mẽ papajaja te mẽ pahpê ĩ pyrãk. Jakamã na pu htem pahpê ĩja te mẽ pahkrã kot tanhmã hamaxpêr to xà hkôt amnhĩ nhĩpêx o papaja pyrãk. Ja pyrã nē kêr ka mẽ anijaja mẽ amjên jamaxpêr mex ã mẽ omu nē mẽ hkôt amnhĩ nhĩpêx mex nē. ²⁴ Mẽ pahpê Kris kwỳ jakamã na pu htem hkôt amnhĩ nhĩpêx mex o ri papa. Ja pyrã nē kêr ka mẽ amjên kôt amnhĩ nhĩpêx mex o ri apa.

²⁵ Nē mẽ amyjaja. Kêr ka mẽ amã aprõ hã ma ho ri apa. Te ho Kris kot mẽ pahtã ma ho pata pyrãk. Na pre kãm mẽ pajapê xàj amnhĩ grõnh kôt mẽ pahwỳr wrỳ nē mẽ panê ty. Tã kêr ka mẽ urãk nē ã amã aprõ hã ma ho apa anẽ. ²⁶ Na pre Kris kãm mẽ pajapê xàj mẽ pahte amnhĩ tomnuj pê mẽ pahpytã. Te mẽhõ my kãm mẽhõ ni hkĩnh nē mẽmoj punuj pê utãr nē ho hprõta pyrãk. Nhũm te mẽ kot axpẽn mã wa rer kaxyw nhũm nija ma gõx mã htẽm nē wỳr nē amnhĩ to mex nhũm mẽ kot axpẽn kaxyw wa ho mexta pyrãk. Hãmri nē te ra axpẽn mã wa rer nhũm wa kot axpẽn kôt pa ho pata pyrãk.

Ja pyrã nē na pre Jejus kãm mẽ pajapê nē kãm amnhĩ kuri mẽ papa ho mẽ papa hprãm xàj mẽ pahwỳr wrỳ nē mẽ pahte amnhĩ tomnuj pê mẽ pahpytã nē mẽ pamã Tĩrtũm kapêr jarēnh o pa. Tã mẽ pahpê hkraja na pu htem kapêr ma nē hkôt amnhĩ nhĩpêx o papa ho amnhĩ tomnuj kaga. Te gõx kãm mẽ paxwỳr nē mẽ pahte amnhĩ nē amnhĩ grã htyk kuhõnh par pyrãk. Jao Tĩrtũm kapêr kôt pix mã amnhĩ nhĩpêx o ri papa. Te ra paxwỳr nē amnhĩ nē tanhmã mẽ pahte amnhĩ tomnuj to grãnh par pyrãk. Nē te mjên mã xwỳnh wỳr nē amnhĩ to mex pyrãk.

²⁷ ã mẽ pahte amnhĩ nhĩpêx anhỹr jakamã te mẽ pamex nē ri papa pyrãk. Hãmri nhũm Krisja ja hã mẽ pahpumu nē kãm mẽ pajapê htỳx nē. Jakamã koja nhỹrmã akupỹn wrỳ nē ma akupỹm amnhĩ kôt mẽ pahto api pu mẽ kuri pa htĩr tũm nē papa ho papa.

²⁸ Nē xà mẽ amyjaja mẽ amã amnhĩ japêê? Nã mẽ amã amnhĩ japê ho na ka htem amã amnhĩ tã ma ho apa. Tã kêr ka mẽ aprõ nhĩpêx o te ka amã amnhĩ tã mata pyrãk. Jao tãm mẽ hipêx o ri apa. Te war apixire nē war apa pyrãk o wa axpẽn nhĩpêx. Kot kaj mẽ tanhmã hipêx to nē te ate amnhĩ nhĩ tanhmã hipêx to pyrãk. ²⁹⁻³⁰ Na htem amnhĩ nhĩ ho mex pix o pa nē kamã gryk kêt nē. Nē kãm prãm nē apku. Nē kãm kõr nē ixkõ. Nē nhỹhỹnh ã nē amnhĩ kane. Na pu htem ã amnhĩ to mex o ri papa anẽ. Ja pyrã nē te mẽ pahpê Kris nhĩ pyrãk jakamã na hte mẽ pahto mex o pa. Te mẽ pamã mẽ papa mẽ pahte amnhĩ nhĩ hã mata pyrãk. ³¹ Tĩrtũm kapêr ã kagã htũm kot ja jarēnh kot:

Koja mẽmyjê hõ hprõ kaxyw hãmri nē hipêêxã nē katorxã wa õrkwỳ kaga nē ãm hprõ kôt pix mã hpãnhã ri pa ho pa. Te wa tipxi nē ri pa pyrãk o wa axpẽn nhĩpêx o pa. Anẽ.

³² Na pre Tĩrtũm ã ja jarēnh anẽ. Kapêrja mex tã amnepê mã mẽ pa xwỳnhjaja na prem hprĩ hã mar tỳx

kêt nê. Na prem htÿx mẽ mjên kot tanhmã mẽ hprõ nhĩpêx to pix ã hkamnhĩx no ãm ja pix kêt. Mãânên te mẽ pahpê Kris nhĩ pyrã nê tãm mẽ pahte amnhĩ nhĩpêx nê axpên nhĩpêx o papa hã ã mẽ pajarênh kot anhÿr. Te ixkre tipxi kamã mẽ pahte Kris kôt mẽ papa pyrãk o ã mẽ pajarênh anê.

³³ Jakamã kwa kêt ka mẽ amyjaja mẽ amã mẽ aprõ japê ho ri apa. Te ka amã amnhĩ tã ma pyrãk o mẽ hipêx. Jao tãm mẽ hipêx. Nê mẽ anijaja kêt ka mẽ ajaxwÿja mẽ amjên ã apijaàm o ri apa.

6

Mẽ hkrajaja kot tanhmã hipêêxã nê katorxã nhĩpêx to hã mẽ kãm karõ

Korosẽ 3.20-21

¹ Nê mẽ apê mẽ hkrajaja kêt ka mẽ anhĩpêêxã nê mẽ akatorxã wa kapêr ma nê hã ano htÿx nê wa hkôt ri amnhĩ nhĩpêx rãhã ho ri apa. Mẽ amã Pahihti Kris kôt amnhĩ nhĩpêx prãm xaj ã amnhĩ nhĩpêx anhÿr o ri apa. Kot kaj mẽ ã amnhĩ nhĩpêx anhÿrja o amnhĩ nhĩpêx mex o ri apa. ²⁻³ Tirtũm kapêr ã kagã htũm kot ja jarênh kot:

Kêt ka mẽ anhĩpêêxã nê mẽ akatorxã wa kapêr ma nê wa hkôt ri amnhĩ nhĩpêx. Kot kaj mẽ ã amnhĩ nhĩpêx anê nê amex nê kritpêm atĩr nê ri apa ry nê.

Anhÿr jakamã kot kaj mẽ amã kritpêm atĩr nê ri apa hprãm hã kêt ka mẽ ã amnhĩ nhĩpêx anhÿr o ri apa. Kormã mẽ aprĩre htã ã amnhĩ nhĩpêx anê. E kêt ka mẽ ã mẽ anhĩpêêxã nê mẽ akatorxã nhĩpêx anhÿr o ri apa.

⁴ Nê mẽ apê mẽ hipêêxã nê mẽ katorxã kêt ka mẽ akrajê gryk kaxyw mẽ kãm apêr o apikênh hkêt nê. Tãm mẽ kãm akapêr nê Pahihti Jejus kapêr o mẽ ahkre ho ri apa. E kêt ka mẽ ã akrajê nhĩpêx anhÿr o ri apa.

Mẽ pahte mẽ panhõ patrãw kapêr kôt amnhĩ nhĩpêx ã mẽ pamã karõ

Korosẽ 3.22-4.1; Wam Ximotre 6.1-2; Xitre 2.9-10; Wam Pêtre 2.18-25

⁵ Nê mẽ ate mẽ kãm mẽ axapênh o mẽ apa xwÿnhjaja kêt ka mẽ anhõ patrãw kapêr ma nê hkôt amnhĩ nhĩpêx mex o ri apa. Te mẽ ate Kris kapêr mar nê hkôt amnhĩ nhĩpêx pyrãk. Jao mẽ hã apijaàm rãhã nê. ⁶ Nom kêt ka mẽ ãm mẽ noo mã pix mã ri mẽ kãm axapênh mex kêt nê. Mãânên mẽ wa kre kamã mẽ kãm axapênh mex rãhã nê. Ja na Tirtũm kãm hprãm. Mẽ apê Tirtũm Kra Kris mã tanhmã amnhĩ nhĩpêx to ho apa xwÿnh jakamã kêt ka mẽ anhõ patrãw mã axapênh mex o ri apa. ⁷ Nê mẽ akĩnh kãm mẽ kãm axapênh mex nê. Te mẽ ate Pahihti mã akĩnh kãm tanhmã kãm amnhĩ nhĩpêx to pyrã nê mẽ kãm tãm amnhĩ nhĩpêx pê axapênh mex o ri apa. ⁸ Kot puj mẽ amnhĩ kaxyw Tirtũm mã pajamaxpêr pê pahkĩnh kãm tãm amnhĩ nhĩpêx o ri papa nhũm Pahihti ja hã mẽ pahpumu nê nhÿrmã ja hã mẽ pahto mex rax nê. Mẽ pahpê hkrajê piitãã. Mẽ pahte mẽ kãm paxapênh xwÿnhjaja nê amnhĩ mã mẽ paxapênh xwÿnhjaja nhũm nhÿrmã mẽ pahpiitã mẽ pahte tãm amnhĩ nhĩpêx xwÿnhjê ho mex rax nê.

Mẽõ patrãwjaja kot tanhmã kãm mẽ ãpênh xwÿnhjê nhĩpêx to

Korosẽ 4.1

⁹ Nê mẽ apê mẽ õ patrãwjaja kêt ka mẽ amã mẽ ãpênh xwÿnhjê ho mex nê mẽ ãpênh ã mẽ kãm axakjêr o ri apa hkêt nê. Tãm mẽ hipêx. Kaxkwa kamã mẽ panhõ Pahi Maati ja mãânên kêp mẽ õ Pahi Maati jakamã ã mẽ hipêx mex anhÿr o apa. Tãm na kãm mẽ pahpiitã mẽ pajapê ho axpên pyrãk. E kêt ka mẽ ã mẽ hipêx anhÿr o ri apa.

Tanhmã mẽ pahte Satanasti kutã amnhĩ to htÿx to hã mẽ pamã karõ

Rõmãn 16.20; Sikũn Korõt 10.3-5; Wam Tesarõn 5.8-11; Xiakre 4.7; Wam Pêtre 5.8-11

¹⁰ E kot paj hpãnhã tanhmã mẽ pahte mẽkarõmnuti nhõ pahi Satanasti kutã amnhĩ to htÿx to jarê ka mẽ inhma. Kêt ka mẽ Pahihti nhÿ hã kutã amnhĩ to htÿx rãhã nê apa. Ate tanhmã amnhĩ tomnuj to hprãm

xàj tanhmã kot ato htã ka Tirtũm xihtỳx o anhõpinh xà kaxwỳnh kãm kutã amnhĩ to htỳx nẽ. Rỳ koja ate mẽmoj mex o anhỳr nẽ tanhmã ato ka mẽ amnhĩ tã hamaxpẽr ã omu nẽ ãm omu nẽ arĩ Tirtũm xihtỳx nhỹ hã tãm ajamaxpẽr mex rãhã ho ri apa. ¹¹ Na hte põristijaja pijapu kaxyw hãmri nẽ amnhĩ nẽ kàx o mẽ ê jagjê nhũm mẽ tee ri kãm mẽ hkamnhwỳr prãm hkaprỳ. Tã ja pyrã nẽ koja Satanasti mẽ ate kapẽr kõt tanhmã amnhĩ nhĩpêx to hprãm xàj tanhmã mẽ ato ka mẽ amnhĩ tã hamaxpẽr ã omu hãmri nẽ Tirtũm xihtỳx nhỹ hã kutã amnhĩ to htỳx nẽ. Jao mẽ ate amnhĩ nhĩpêx nyw pix o amnhĩ nhĩpêx nẽ mẽ ajamaxpẽr nyw pix o ajamaxpẽr. Kot kaj mẽ ã amnhĩ nhĩpêx anẽ nhũm Satanasti tee ri tanhmã kãm mẽ ato hprãm hkaprỳ.

¹² Mẽ pahpê Tirtũm kra jakamã mẽ kot mẽ pakutã amnhĩ xunhwỳr xwỳnh maatijaja axtem na mẽ. Mẽ kêp mẽkarõmnuti jakamã mẽ pahkĩnhã mẽ ĩ hkêt. ãm mẽ hkarõ kaxkrit pix na mẽ. Na htem kòk kõt tanhmã amnhĩ tomnuj tỳx to ho pa. Nẽ mẽ hihtỳx. Na htem arĩ jar pika ja kamã mẽ kêp Tirtũm kra hkêt xwỳnhjê ho amnhĩpta nhũm htem mẽ hkõt ri htỳx tanhmã ri amnhĩ tomnuj tỳx to ho pa. Nom amnhĩ tã mẽ omunh kêt nẽ. ¹³ Jakamã kwa kêt ka mẽ Tirtũm kot mẽ akarõ mã amnhĩ Karõ jagjênh xwỳnhhta kõt pix mã amnhĩ nhĩpêx o apa. Jao mẽ ate amnhĩ nhĩpêx nyw kõt pix mã mãn ri mẽ amnhĩ nhĩpêx. Kêt kê mẽkarõmnuti tee ri kãm tanhmã mẽ ato hprãm kaprỳ ka mẽ arĩ Tirtũm Karõ xihtỳx nhỹ hã kutã amnhĩ to htỳx rãhã ho apa.

¹⁴ Jakamã kwa kêt ka mẽ axkãm ajamak rom nẽ te ho sòrdat kot pijapu kaxyw ê jagjênh pyrãk o amnhĩ nhĩpêx. Na htem amnhĩ nẽ moux kà ho mẽ ê jagjê nẽ mẽ hpre xà ho amnhĩ pre hpa. Nẽ hipy kàx o mẽ hinô kà jagjê. Hãmri nẽ rĩ kormã ma mẽ kãm mẽ hkurê xwỳnhjê kutã mra nẽ axpu. No mẽ kajaja kêt ka mẽ kurom

amnhĩ krãm Tirtũm kapẽr jaxàr tỳx nẽ hkõt pix mã ri ajamaxpẽr rãhã ho ri apa. Nẽ hkõt ri amnhĩ nhĩpêx mex nẽ. Jao te sòrdat pijapu kaxyw kot amnhĩ nhĩpêxta pyrãk.

¹⁵ Na hte sòrdatjaja hpar kà jagjê nẽ aa hopõx kêt nẽ. ãm rãhã gõr nẽ hikwỳ. Jao ra mẽ kutã pijapu kaxyw amnhĩ grõnh rãhã gõr nẽ hikwỳ. Tã kêt ka mẽ ma mẽ kãm Jejus kot tanhmã mẽ panê amnhĩ nhĩpêx to hã harênh o apa kaxyw nẽ sòrdat pyrã nẽ amnhĩ grõnh kõt ma mẽ hwỳr apa nẽ amnhĩ kamã akahak kêt nẽ.

¹⁶ Nẽ sòrdatjaja na htem amnhĩ nẽ amnàr xà hã kàx po jamỳ nẽ ho kuhê nhũm mẽ tee ri kãm mẽ hkamnhwỳr prãm kaprỳ. Ja pyrã nẽ koja Satanasti tanhmã mẽ ato ka mẽ Tirtũm kêp mẽ anhõ pahi hã hihtỳx o kot Satanasti jakrenhja mã ajamaxpẽr kurê kumrêx nẽ ãm hkõt pix mã amnhĩ nhĩpêx. Na hte Satanasti te kot mẽ pahwỳr krur rênh pyrãk o mẽ panhĩpêx. Jao xatã mẽ pahte Tirtũm kaga hprãm xàj tanhmã mẽ pahto. Nẽ mẽ pahte Tirtũm mã tanhmã amnhĩ nhĩpêx to pymaj xatã tanhmã mẽ pahto kaprỳ. Pu mẽ amnhĩ tã omu hãmri nẽ Tirtũm Karõ xihtỳx nhỹ hã Tirtũm kõt pix mã amnhĩ nhĩpêx.

¹⁷ Nẽ na hte sòrdatjaja kàx o mẽ hkrãjapap jagjê nẽ pijapu kaxyw mẽ kutã mra nhũm mẽ tee ri mẽ hkrã jayr prãm kaprỳ. Ja pyrã nẽ kêt ka mẽ amnhĩ kaxyw Tirtũm kõt pix mã ajamaxpẽr rãhã ho ri apa. Nẽ ra kot mẽ ato hkra mã ajamaxpẽr rãhã nẽ. Kê Satanasti tee ri kãm mẽ akrã kamã mẽ amã mẽ ajamaxpẽr punuj jagjênh prãm hkaprỳ.

Nẽ sòrdatjaja na htem mẽ kutã wapo jamỳ nẽ ho kuhê. Nom mẽ papajaja mẽ panhõ wapoja na axtem kêp Tirtũm kapẽr. Na hte Tirtũm Karõ mẽ pahkrã kamã kapẽr o amnhĩrit pu htem pix mã pajamaxpẽr o papa nhũm Satanasti tee ri kãm mẽ pahkrãm mẽ pajamaxpẽr punuj jagjênh prãm kaprỳ. Te mẽ papijapu nhũm mẽ pahte amnhĩ nẽ ho pakrihkrit pyrãk o hipêx.

¹⁸ ã Satanasti pê mẽ pahte amnhĩ nê amnhĩ nhĩpêx kot anhÿr. Jakamã kêr pu mẽ amnhĩ to Tĩrtũm pix wÿr o ri papa kê Satanasti kutã mẽ pahto paxihtÿx pu mẽ hkôt tanhmã amnhĩ tomnuj to hkêt nê.

Nê kêr pu mẽ mẽmoj to anhÿr kaxyw nê ra Tĩrtũm Karõ nhÿ hã amnhĩ to Tĩrtũm wÿ. Nê kãm amnhĩ jarênh rãhã ho papa nê aa ja ho pajamakêtkati hkêt nê. Nê Tĩrtũm krajê piitã mẽ ho hwÿr rãhã ho ri papa.

¹⁹ Nê kwa kêr ka mẽ mãânên ixto Tĩrtũm wÿr rãhã nê. Kot tanhmã ixto nhũm ixãmnhĩx ixte mẽ kãm kapêr jarênh mex o ri mẽ hkôt ixpa kaxyw. Mẽ kot ja hã tanhmã ixto htã pa arĩ ixãmnhĩx mẽ kãm harênh mex o ri mẽ hkôt ixpa. Nê ixprĩ hã mẽ kãm Jejus kot tanhmã mẽ panê amnhĩ nhĩpêx to hã harê. Kormã mẽ kot hprĩ hã ja mar mex kêt. ²⁰ Tã ixte mẽ kãm ja jarênh kaxyw na pre Tĩrtũm mẽ hwÿr inhmẽ nhũm prem hã ijaxà pa arĩ mẽ hagiênh xà kamã ixkrĩ ho ixkrĩ. Jakamã kwa mẽ ixto Tĩrtũm wÿ kê tanhmã ixto ixihtÿx to pa arĩ mẽ kãm kapêr jarênh o ixkrĩ. Ja na Tĩrtũm kãm hprãm nê ijaxwÿja inhmã ja prãm.

Kagà jatur xà

Korosẽ 4.7-8

²¹ Nê ot pa mẽ awÿr Xikitre mẽ. Kot paj mẽ amã kagàja nhĩpêx pa nê kãm kugõ nhũm kupy nê ma mẽ awÿr o mō. Hãmri nê mẽ awÿr o pōj nê mẽ amã kugõ nê mẽ amã tanhmã ijarênh to ka mẽ ijarênh ma nê akĩnh nê. Xikitre na hte Pahihti mã tanhmã amnhĩ nhĩpêx mex to o pa. Kris kôt mẽ pahtõ na. Nê inhmã hapêê. ²² Tã ot pa mẽ awÿr kumê. Kê mẽ awÿr pōj nê mẽ amã ijarê ka mẽ kam ama nê akupÿm tãm akrã nê tee ri ixkukamã ajamxpêr kêt nê. ²³ E ixkrãmnhwÿjaja. Kê Mẽpahpãm Tĩrtũm mẽ Pahihti Jejus Krisja wa tanhmã mẽ akrã hto ka mẽ ajamakêtkati nê axãmnhĩx ri apa. Nê mẽ amã axpên kĩnh o ri axpên kôt apa. Nê mẽ apiitã wa hkôt ajamxpêr mex o ri apa. ²⁴ E mẽ amã mẽ panhõ Pahihti Jejus Kris kĩnh rãhã ho apa xwÿnhjaja. Kê Tĩrtũm

mẽ ato mex nê mẽmoj to mẽ akutã nojarêr rãhã ho pa.

Tã ãm ja pix na hapêx. Ixpê Pawre na pa mẽ awÿr kagàja nhĩpêx nê kumê.

Piripos

Pawre kot Piripos kamã Jejus kôt hkwýjê hwýr kagà nê mênh

Pawre na pre kagàja nhîpêx. Jejus nhÿ hã mē ahkre o mē pa xwýnhjê hō na pre. Na pre Jejus ã mē kãm hkurê xwýnhjaja unê nê ma krî pê Rôm wýr kumê nê kamã haxà nhũm mē hagiênh xà kamã hkrî ho hkrî. Tã nhũm arî hkrî rãhã Piripos kamã Jejus kôt hkwýjê hwýr kagàja nhîpêx nê kumê. Na prem Pawre jarênh ma nê kãm ukaprî nê. Jakamã axpên kaxyw kàxpore hkwý ho akuprō nê hwýr kumê. Hãmri nhũm omu nê hkînh nê amnhî tã kagàja nhîpêx nê kamã mē kãm amnhî jarê nê mē hwýr kumê. Kot amnhî xà htýx kamã hamak o hkrî htã arî hwýr mē mrar xwýnhjê mã Tirtũm kapêr jarênh rãhã ho hkrî hã amnhî jarê. Nê kãm Jejus kot amnhî nhîpêx kôt pix mã amnhî nhîpêx o pa hprãm ã amnhî jarê. Nê kãm Jejus jamaxpêr kôt pix mã hamaxpêr prãm ã amnhî jarê. Æ na pre Pawre kagàja kamã mē kãm amnhî jarênh anê. Nê mē kãm:

¹ Pa Piripos kamã Jejus Kris kôt ixkwýjaja. Xà mē amex na ka mē apa? E ixpê Pawre na pa mē amã kagàja nhîpêx nê kamã mē amã amnhî jarê nê mē awýr kumê. Nhũm Ximotre haxwýja kãm ja mex nê. Wa ixpê Jejus mã tanhmã amnhî nhîpêx to ho wa ixpa xwýnh jakamã na pa wa mē awýr hipêx nê kumê. Mē ate Tirtũm kapêr o mē ajahkre xwýnhjê hwýr nê mē kãm mē ate tanhmã amnhî to xwýnhjê hwýr nê mē ate mē mar o akrî xwýnhjê hwýr. Mē apê Kris kôt wa ixtō nê wa ixtōxjê ho ixpim-rãatã mē awýr hipêx nê kumê. ² E kê Mēpanhîpêxã maati Tirtũm mē Pahhti Jejus Kris wa mēmoj to mē akutã nojarêr rãhã nê ka mē axãmnhîx ri ajamakêtkati nê ri apa ho apa.

Pawre kot Piripos nhō xwýnhjê ho Tirtũm wýr ã harênh

Epes 1.15-19; Korosê 1.9-12

³ Na pa hte xatã mē amã ijamaxpêr o ixkrî nê mē panhō Tirtũm kot tanhmã mē ato mex toja pa kãm ijamaxpêr nê ixkînh nê ixkrî. ⁴ Nê Tirtũm mã mē ajarênh nê mē ato kuwý. Ixkînh kãm mē ato kuwý.

⁵ Wam ixte mē awýr inhmōrta ã na pa pre mē amã Jejus kot mē panê tanhmã amnhî nhîpêx to hã harênh o ri mē akôt ixpa. Ka prem inhma nê hkôt amnhî xunhwýr týx nê hkôt amnhî nhîpêx o ri apa. Jakamã inhmã axpên kaxyw ri kàxpore hkwý nhōr o apa. Te ham mē ate ixwýr mênhta pyrãk pa pre mē akukwak ri amnhîm ho ixujaprôr o ri ixpa pê nhãm ri mē kãm Jejus jarênh o ri mē hkôt ixpa. Na pa hte arî jam ijamaxpêr rãhã ho ixkînh nê ixkrî. Nê Tirtũm mã mē ate ixtō mex ã kãm mē ajarênh o ixkrî.

⁶ Nê na pa pre ma mē awýr mō nê mē amã Jejus jarê ka prem inhma nê hkôt amnhî xunhwý nhũm Tirtũm ja hã mē apumunh mex nê. Hãmri nê mē ate hkôt amnhî to htýx kaxyw tanhmã mē ato mē axihtýx to. Tã koja arî mē ato mē axihtýx rãhã nhũm Jejus Kris nhÿrmã akupýn mē pahwýr wrý. Koja ã mē ato mex anê. ⁷ Na hte tanhmã ixtō mex tota pyrã nê tanhmã mē ato mex to ho pa nê mē akutã nojarêr rãhã ho pa.

Nê kormã mē kot ijaxàr kêt ri pa pre ma mē piitã mē kãm Jejus jarênh o ri ixpa. Nê ãm hãmri mē kãm harê. Mē kot mar nê hkôt amnhî xunhwýr týx kaxyw pa pre mē hkôt harênh rãhã ho ri ixpa. Ka prem ja kaxyw inhmã kàxpore hkwý gō pa pre ho amnhîm ixujaprôr pê mē hkôt ri mē kãm harênh o ri ixpa. Tã nhũm prem jar Rôm kamã ijaxà pa arî ixkrî htã ka mē axte ixwýr hkwý mē. Jakamã na pa hte mē amã ijamaxpêr rãhã ho ixkrî nê inhmã mē akînh týx nê. ⁸ Te Jejus Kris kãm mē ajapê htýx pyrãk. Tirtũm kot ja hã ixpumunh mex.

⁹⁻¹⁰ Na pa hte mē ato kuwý nê kãm:

—Pa Tirtũm. E Piripos nhõ xwỳnhjê pumu. Na mẽ ra kãm axpẽn kĩnh o axpẽn kõt pa. Kwa tanhmã mẽ hipêx to kê mẽ arĩ kãm axpẽn kĩnh tỳx pix nê. Jao axpẽn to mex rãhã ho pa. Nê tanhmã mẽ hkrã hto kê mẽ amnhĩ krãm akapêr jaxàr tỳx nê. Jao tãm amnhĩ nhĩpêx mex nê hamaxpêr mex o ri pa. Nom kormã mẽ kot ja pumunh tohtuj anhỹr. Tã kêr ka tanhmã mẽ ho kê mẽ ã amnhĩ nhĩpêx anhỹr rãhã Jejus Kris akupỳn mẽ ixwỳr wrỳ.

Anhỹr pa hte mẽ ato hwỳr o ixpa.
¹¹ Nà koja Jejus Kris mẽ akaxwỳnh kãm mẽ ato mẽ axihtỳx ka mẽ ý hã axihtỳx pê tãm ri amnhĩ nhĩpêx nê tãm axpẽn nhĩpêx o ri axpẽn kõt apa. Nhũm mẽ piitã ja hã mẽ apumu nê axpẽn mã Tirtũm mex o mex ã harê.

Pawre kãm Kris kõt amnhĩ nhĩpêx prãm ã harênh

Atre 28.30-31; Epes 6.19-20; Sikũn Ximotre 2.9

¹² E Kris kõt ixtõ nê ixtõxjaja. Kot paj mẽ amã tanhmã amnhĩ jarênh to ka mẽ inhma. Na prem ra Jejus ã ixtomnuj tỳx nê hã ijaxà pa amnhĩ xà htỳx kamã ijamak o ixkrĩ. Nom mẽ kot ã inhĩpêx anhỹr tã pa hte arĩ ixkrĩ xà kamã mẽ kãm Jejus jarênh o ixkrĩ. Jakamã na mẽ ra ohtõ nê tanhmã kot mẽ panê amnhĩ nhĩpêx to hã harênh ma. ¹³ Põristi kot inhĩhkõ hã ixtãnopxar xwỳnhjê mẽ ixwỳr mẽ mrar xwỳnh piitã ixte Kris kapêr jahkre ho ixpa pix ã mẽ kot ijaxà ã ijarênh ma. ¹⁴ Nê jar Kris kõt mẽ pahtõ nê mẽ pahtõxjaja haxwỳja ijarênh ma nê ohtõ nê ixpyrà nê Kris nhỹ hã amnhĩ to htỳx nê arĩ hkwỳjê mã kapêr jarênh rãhã ho pa. Ixpyrà nê kãm mẽ uma hkêt nê mẽ kutã amnhĩ to htỳx pê mẽ kãm harênh rãhã ho pa.

¹⁵⁻¹⁸ Nê na pre mẽ hkwỳjaja ixte mẽ amã Kris jarênh o ixpa hã ijarênh ma nê hã ixkamã gryk nê axtem hamaxpêr nê ixwakre kamã gryk kãm mẽ kãm Kris kapêr jarênh o pa. Na htem hamaxpêr o:

—E kot paj ma Pawre kot ra mẽ hwỳr mõi xwỳnhjê hwỳr mõi nê kot ra mẽ kãm Jejus kapêr jarênh nhĩpy axte mẽ kãm harênh o ri mẽ hkõt ixpa. Hãmri nhũm mẽ inhma nê inhgryk ã Pawre kaga. Hãmri nhũm mẽ hagjênh xà kamã arĩ hkrĩ tã tee ri mẽ hã ijarênh ma nê hkaprĩ nê rĩ amnhĩ pumu. Nà kot paj anê.

Anhỹr o hamaxpêr tã pa mẽ harênh ma nê ixkaprĩ hkêt nê. Mẽ kot mẽ amã hprĩ hã Kris kapêr jarênh kênã kot pa kêt tee ri mẽ harênh ma nê ixkaprĩ. Kwãr mẽ mãmrĩ ri ixkamã gryk kãm kapêr jarênh o ri pa. Pa mẽ harênh ma nê ixkĩnh nê. Nom na hte mẽ hkwỳjaja jajê rom kãm ixkĩnh kãm mẽ kãm Kris kapêr jarênh o pa. Nê tãm hamaxpêr pê mẽ kãm harênh o pa. Ra mẽ kot ixpumunh mex jakamã nhũm Tirtũm kot jar mẽ hwỳr inhmênh nhũm ixte ãm hãmri mẽ kãm kapêr mex jarênh o ri ixkrĩ hã ixpumunh mex. Jakamã kwãr mẽ mãmrĩ tanhmã inhmã hamaxpêr to xà hkõt mẽ ujarênh mexja jarênh o pa. Mẽ kãm ixkĩnh kãm harê rỳ ixkamã gryk kãm ri harênh o pa. ãm hãmri Kris kapêr jarênh o pa jakamã pa mẽ harênh ma nê ixkĩnh nê.

¹⁹ Nê ra mẽ ate ixto Tirtũm wỳr o apa jakamã koja Karõja ixkaxyw tanhmã jar Rõm kamã pahiti nhĩpêx to nhũm tokyx ixkator japêr. Pa ixãmnhĩx ijamakêtkati nê ri ma mẽ akõt ixpa. ²⁰ Nom inhmã Jejus kãm hprãm xà hkõt pix mã tanhmã amnhĩ nhĩpêx to ho ixpa hprãm. Jakamã koja mẽ ixkator pa ixkĩnh nê arĩ kãm tanhmã amnhĩ nhĩpêx to ho ri ixpa. Nom koja mẽ tanhmã hamaxpêr to nê ixpĩ pa mẽ kutã mẽ kãm amnhĩ to htỳx nê ixãm rãhã nhũm mẽ ixpĩ pa ijamakêtkati nê ty. Kê mẽ ja hã ixpumu nê ixtã Kris mex o mex ã harê. ãm Jejus kãm hprãm xà hkõt pix mã na inhmã amnhĩ nhĩpêx prãm. ²¹ Tã kot paj tanhmã amnhĩ to nê arĩ ixtĩr japêr hã kot paj ãm kõt pix mã amnhĩ nhĩpêx rãhã ho ixpa. Nom koja mẽ tanhmã hamaxpêr to nê hã ixpĩ pa ty nhũm Tirtũm ma kaxkwa

hwÿr ixkarō ho àpir kurê kumrêx. Pa Tirtūm mẽ Krata wa kuri inhmex o inhmex nê wa kuri ixpa ho ixpa. ²²⁻²³ Tã nhÿ na we inhmã mex o hō jakrenh wehe? Na pa tee ri amnhĩ kukamã ijamaxpêr. Inhmã tokyx ixtyk nê Kris kuri ixpa hprãm. Ja na inhmã hprãm o inhmã hprãm. Nom ko. Kot pa arĩ ixtĩr nê arĩ mẽ kãm Jejus kot tanhmã mẽ panê amnhĩ nhĩpêx to hã harênh rãhã ho ri ixpa. Ko. Ja mãânên inhmã mex. ²⁴ No mẽ amã na arĩ ixtĩr nê ixpaja mẽ amã hprãm ²⁵ jakamã kot paj pêr tokyx ixtyk kêt nê. Kot paj arĩ ri mẽ amã Kris kôt mẽ ato mẽ axihtÿx o ri mẽ akôt ixpa. Jao ãm ho hkrãnre ka mẽ ra amnhĩ kaxyw kãm ajamaxpêr nê hkôt amnhĩ xunhwÿr tÿx nê. Jao akĩnh nê apa. ²⁶ Tã kot paj nhÿrmã akupÿm ixtĩr rãhã mẽ awÿr mō ka mẽ ixpumu nê akĩnh nê. Jejus Kris kot akupÿm ixkator ã akĩnh nê. Hãmri nê ixtã Jejus mã mex o mex ã harê.

Mẽ pahte Jejus ã pahpunuj tã mẽ pahte amnhĩ to htÿx ã mẽ pamã karō

Rukre 6.22; Sikũn Korĩt 2.14-16; Xiakre 1.12; Jutre 3

²⁷ Jakamã e kêr ka mẽ Jejus Kris kapêr kôt pix mã amnhĩ nhĩpêx. Nê axpên kôt axpên to axihtÿx pê mẽ kãm Jejus kot tanhmã mẽ panê amnhĩ nhĩpêx to hã harênh o ri apa kê mẽ ama nê mẽ pahpyrà nê hkôt amnhĩ xunhwÿ. E kêr ka mẽ ã amnhĩ nhĩpêx anhÿr o ri apa. Kêr pa nhÿrmã mẽ hagiênh xãja rũm ixkator japêr nê nhÿri ja hã mẽ ajarênh ma rÿ ma mẽ anhō krĩ hwÿr mō nê ja hã mẽ apumu nê ixkĩnh nê. ²⁸ Nom kwa kêr ka mẽ amã mẽ kot Kris ã tanhmã mẽ ato xwÿnhjê puma hkêt nê. Mẽ kot tanhmã mẽ anhĩpêx kati hto htã kêr ka mẽ kutã amnhĩ to htÿx nê mẽ hkôt apa. Kêr kê mẽ amnhĩ tã mẽ apumu nê tee ri hamaxpêr hãmri nê axpên mã:

—Kwa mẽ pahte Kris ã tanhmã mẽ hipêx to htã na htem amnhĩ to htÿx nê arĩ mẽ pamã harênh o ri pa. Pêr mẽ kãm mẽ pahpuma hkêt. Mãn hte Tirtūm tanhmã mẽ ho nhũm mẽ ÿ

hã kãm mẽ pahpuma hkêt nã? Kwa tanhmã kot puj mẽ ho nhũm mẽ Jejus kapêr jarênh o pata kaga? Nã kot puj mẽ ãm tee ri hã tanhmã mẽ ho kaprÿ. Mãn ãm hãmri na htem nhÿrmã Tirtūm kuri htĩr tũm nê pa ho pa hã amnhĩ jarênh o pa nã? Anê.

Koja mẽ ã mẽ ajarênh anê. Tirtūm kot mẽ ato mẽ axihtÿx ã mẽ apumunh kôt. ²⁹ Na pre tanhmã mẽ ato ka mẽ Kris kôt amnhĩ xunhwÿ. Tã mẽ kot tanhmã hã mẽ anhĩpêx to htã na hte Tirtūm mẽ kutã tanhmã mẽ ato ka mẽ ÿ hã amnhĩ to htÿx nê apa. ³⁰ Ijaxwÿja na pa hte amnhĩ xã htÿx kamã ijamak o ixkrĩ. Na pre htem Jejus ã ixtomnuj o pa ka prem ja hã ijarênh ma nê hã ixpumu. Tã ota kê mẽ ra axte tanhmã hã inhĩpêx to. Pa kê amnhĩ xã htÿx kãm ijamak o ixkrĩ ka mẽ ijarênh ma. Tã xep mẽ ixpyrà nê Kris ã amnhĩ xã htÿx kamã ajamak o apa. Nom kwa kêr ka mẽ tee ri amnhĩ kukamã ajamaxpêr o akaprĩ nê apa hkêt nê.

2

Jejus kãm mẽ pajapê xaj tanhmã kot amnhĩ nhĩpêx to hã harênh

Rõmãn 15.5-6; Epes 4.1-6; Piripos 2.18

¹ Nê ra mẽ pahte Jejus kôt amnhĩ xunhwÿr jakamã pu mẽ tee ri amnhĩ kukamã pajamaxpêr o pahkaprĩ nê ri papa hkêt nê. ãm kãm mẽ pajapêja mã pajamaxpêr rãhã ho pahkĩnh nê pajamakêtkati nê ri papa. Nhũm Karō mẽ pahkarō mã agjê nê mẽ pahto mex nê mẽmoj to mẽ pakutã nojarêt o ri mẽ pakamã pa. ² Tã kêr ka mẽ axpên mar mex nê mẽmoj tã axpên mã axàkjêr o ri apa hkêt nê. Te ri ixkre pixi kamã mẽ atipxi nê axpên kôt amnhĩ nhĩpêx pyrãk. Nê Tirtūm kãm hprãm xã hkôt pix mã ajamaxpêr o ri apa. Nê mẽ amã axpên kĩnh o ri apa. Kot kaj mẽ ã amnhĩ nhĩpêx anê pa ja hã mẽ apumu rÿ hã mẽ ajarênh ma nê ixkĩnh tÿx kumrêx.

³ Nê kwa kêr ka mẽ axpên pumu nê ã ajamaxpêr anhÿr kêt nê. Mẽ ajamaxpêr o:

–Tk. Kot pa ri tanhmã jahti ho ajuta hto ho ixpa hkêt nê. Ixte amnhĩ to rax o hakrenh kênã kot pa hkêt ri ho ajuta. Kê tãm mãn tanhmã ixto ajuta hto.

Anhÿr o ajamaxpêr kêt nê. Kêt nhÿri mêmhõ pumu nhũm tanhmã kute ka hã omu nê ajamaxpêr o:

–Hêxta waa nê. Kwa tanhmã kot pa we ho ajuta htoo?

Anhÿr o ajamaxpêr hãmri nê ajamaxpêr xà hkôt tanhmã ho ajuta hto.

⁴ Jao Jejus pyrã nê mêmjoj to axpên kutã anojarêt o ri apa. No ri amnhĩ pix kukamã ajamaxpêr o apa hkêt nê. ⁵ Kêr pu mêm te Jejus tanhmã hamaxpêr toja pyrãk o pajamaxpêr o ri papa.

⁶ Kêp Tĩrtũm Kra kumrêx jakamã te urãk tã xà na pre ja hã amnhĩ pumu nê amnhĩ pix kukamã ã hamaxpêr anê nê hamaxpêr o:

Te ixte Tĩrtũm pyrãk jakamã mêmjoj piitã inhõ na. Jakamã kot paj jar kaxkwa kamã inhmex nê ixkĩnh nê ixpa ho ixpa nê aa rer nê nhÿhÿm inhmõr kêt kumrêx. Anhÿr o na pre hamaxpêr? Nà na pre ã hamaxpêr anhÿr kêt nê.

⁷⁻⁸ Kãm mêm pajapê xàj na pre kaxkwa kamã mêmjoj mex piitã rer pa nê man mêm pahwÿr wrÿ nê mêm pahpyrà nê ã ho katorxã nhõhy rũm kato.

Kêp mêm panhõ Pahihti htã te kêp mêm panhõ nê te kot amnhĩ to grire pyrãk o amnhĩ nhĩpêx o ri pa.

Nê Tĩrtũm kãm hprãm xà hkôt pix mã amnhĩ nhĩpêx o pa.

Nê ãm kôt pix mã amnhĩ nhĩpêx o pa rãhã nhũm prem kupĩ nhũm arĩ mêm kãm xa nê tanhmã amnhĩ tã mêmhõ hto hkêt nê.

Na prem hipêx kati nê. Te kêp mêm kot amnhĩ tomnuj tÿx xwÿnhjê nhĩpêx pyrãk o hipêx nê pĩ kahpa hã kunhõ nê kupĩ.

Tã no nhũm mêm kêp tanhmã amnhĩmnuj to hkêt nê arĩ mêm kãm xa. Mêm panê na pre ã amnhĩ nhĩpêx anê.

⁹ Hãmri nhũm Tĩrtũm ã kot amnhĩ nhĩpêx anhÿr ã omu nê akupÿm ho htĩr nê akupÿm amnhĩ wÿr ho api.

Nê mex o mex ã harê.

Nê kot nhÿrmã mêm pahpiitã mêm pahto amnhĩptãr kaxyw mêm pakaxyw ãm.

¹⁰ Jakamã kot puj mêm nhÿrmã pahpiitã Jejus kutã pahkõnkrã ho rôrõk nê pahkrĩ hpa nê kax pêm kãm mex o mex ã harê.

Mêm pahpiitãã. Kaxkwa kamã mêm pa xwÿnhjaja nê pika piitã hkôt mêm papa xwÿnhjaja.

Nê mêm htyk xwÿnh piitã koja mêm akupÿn htĩr pu mêm pahpimràatã Jejus kutã pahkõnkrã ho parõrõk nê pahkrĩ hpa nê kãm mex o mex ã harê.

¹¹ Nê kãm:

Pa Pahihti Jejus. Nã ãm hãmri na apê mêm inhõ Pahi Maati hã apyxi mex na ka.

Jakamã mêm ixtõ kot paj mêmjoj tã tanhmã amã karõ hto? Nã kot paj mêm ixtõ ã amnhĩ nhĩpêx anhÿr kêt nê. Anê.

Kot puj mêm nhÿrmã ã Jejus mã pakapêr anê.

Jao mããnên Tĩrtũm hihtÿx o hihtÿx nê àhpumunh o àhpumunh ã omu. Nê mex o mex ã omu.

Te mêm pahpê kanhêti pyrãk ã mêm pajarênh

Matêwre 5.14-16

¹²⁻¹³ Tã kwa ixkrãmnhwÿjaja. Inhmã mêm akĩnh. Kwa kêr ka mêm arĩ Tĩrtũm kôt amnhĩ nhĩpêx mex rãhã nê. Te ixte mêm akamã ixpare ri mêm ate amnhĩ nhĩpêx mexta pyrãk o ixwakre kamã amnhĩ nhĩpêx mex o ri apa. Na pre ra Tĩrtũm mêm panê mêm pahte amnhĩ tomnuj rê nê tanhmã mêm pahto pu mêm ÿ hã kapêr kôt amnhĩ nhĩpêx o ri papa. Jakamã kwa kêr pu mêm axte tanhmã amnhĩ tomnuj to ho papa hkêt nê. Nê mêm pahte Tĩrtũm kapêr kwÿm ri amnhĩ nhĩpêx pymaj ãm hkôt pix mã amnhĩ nhĩpêx o ri papa.

¹⁴ Nê kêr ka mêm mêmjoj to anhÿr kaxyw nê agryk kãm tanhmã ri ho hkêt nê. Nê mêmjoj tã axapênh kaxyw

ně ri hã axpën mã akapër kati kamã ho anhÿr kêt nẽ. ¹⁵⁻¹⁶ Mẽ kot amnhĩ tomnuj xwÿnhjaja na htem ã amnhĩ nhĩpêx anhÿr o pa. No kêt mẽ kajaja. Mẽ ate mẽ hkôt apa htã kêr ka mẽ hkôt amnhĩ nhĩpêx kêt nẽ. Mẽ kurom mẽ apê Tĩrtũm kra jakamã kêr ka mẽ hkôt pix mã amnhĩ nhĩpêx o ri apa. Nẽ tanhmã amnhĩ tomnuj to rÿ tanhmã ajamaxpër punuj to hkêt nẽ. Mẽ kot amnhĩ tomnuj xwÿnhjaja te ri kamãt kô kamã ri mẽ kêp àhkĩnh o ri mẽ pa xwÿnhjê kot amnhĩ nhĩpêx pyrãk. Tã kot kaj mẽ hkôt tãm ri amnhĩ nhĩpêx o apa nẽ te ate kanhêtija kamãt kô kamã hirã ho harir pyrãk o amnhĩ nhĩpêx. Jao mẽ kãm Tĩrtũm kapër jarënh o ri mẽ hkôt apa. Mẽ kot amar nẽ apyrã nẽ nhÿrmã kuri htĩr tũm nẽ pa ho pa kaxyw. Kot kaj mẽ ã amnhĩ nhĩpêx anẽ nhũm nhÿrmã Jejus Kris akupÿn mẽ pahwÿr wrÿk ã arĩgrota ã pa mẽ apumu nẽ ixkĩnh nẽ. Nẽ ixkĩnh kãm Jejus mã mẽ ajarẽ nẽ kãm mẽ ajarënh o:

–Kwa Pahihti. E jajê pumu. Na pa pre mẽ kãm akapër jarënh o ri mẽ hkôt ixpa nhũm mẽ inhmar tÿx nẽ nẽ akapër kôt amnhĩ nhĩpêx o ri pa. Jakamã na pa pre mẽ kãm akapër jarënh kaprÿ hkêt nẽ.

Anhÿr o kãm mẽ ajarẽ. ¹⁷ Na pa pre mẽ akôt mẽ amã Tĩrtũm kapër jarënh o ri ixpa ka prem inhma nẽ hkôt amnhĩ xunhwÿ. Jakamã te ixte Tĩrtũm mã mẽ ato ixkĩnh xà nẽ kãm mẽ anhõr pyrãk.

Nẽ koja jar Rõm nhõ pahihtija tanhmã ixto hkêt japër. Rÿ tanhmã ixto. Nom kwãr mẽ mãmri tanhmã kãm ixto hprãm xà hkôt tanhmã ixto rÿ ixpĩ. Koja mẽ ã ixte mẽ anhĩpêx anhÿr ã ixpĩ pa ixkĩnh nẽ. Nẽ tanhmã ijamaxpër to hkêt kãm ty. Jakamã na pa ra ã mẽ kot inhĩpêx anhÿrja kukamã mẽ amã amnhĩ kĩnh ã amnhĩ jarẽ ka mẽ inhma. ¹⁸ Tã kêr ka mẽ ixpyrà nẽ ajaxwÿja ixtã akĩnh nẽ apa.

Ximotre mẽ Eparoxit wa harënh

¹⁹ Nẽ koja Pahihti Jejus kãm ja prãm hã kot paj ma mẽ awÿr Ximotre mẽ

nhũm ma mẽ awÿr mō nẽ ri mẽ akôt pa nẽ tanhmã mẽ ate amnhĩ nhĩpêx to hã mẽ apumu. Hãmri nẽ man akupÿn ixwÿr mō nẽ inhmã mẽ ajarẽ pa mẽ ajarënh ma nẽ ixkĩnh nẽ tee ri mẽ akukamã ijamaxpër o ixkrĩ hkêt nẽ. ãm tãm mẽ akukamã ijamaxpër o ixkrĩ. ²⁰ Ximotre tapxipix na ixpyrà nẽ kãm mẽ akĩnh nẽ kãm mẽ ato ajuta hprãm. Na hte mẽ ajarënh rãhã ho pa. ²¹ Nom jar mẽ piitã Ximotre kĩnhã amnhĩ mex pix kukamã hamaxpër o pa nẽ kãm Jejus Kris kôt tanhmã amnhĩ nhĩpêx to ho pa hprãm kêt nẽ.

²² Ximotre te kêp ixkra pyrãk. Na hte ixkôt pa nẽ ixpyrà nẽ Jejus mã tanhmã amnhĩ nhĩpêx mex to ho pa. Pa pre wa ijamẽ mẽ kãm mẽ ujarënh mex jarënh o wa ri mẽ hkôt ixpa. ²³ Tã koja mẽ tanhmã ixtã axpën mar to. Apu mẽ kot ixpĩr ã amnhĩ jarẽ rÿ ixkator ã amnhĩ jarẽ. Pa tanhmã amnhĩ tã mẽ mar to nẽ rĩ kormã ma mẽ awÿr Ximotre mẽ kê ma mẽ awÿr mō nẽ mẽ amã tanhmã ijarënh to.

²⁴ Nẽ koja Pahihti Jejus kãm ja mex pa ijaxwÿja ma mẽ awÿr mō pu mẽ axte axpën pumu.

²⁵ Nẽ kot paj tokyx ma akupÿm mẽ awÿr Kris kôt mẽ pahtõ Eparoxit mẽ. Na ka prem kãm kãxpore gõ nhũm man ixwÿr o mō nẽ inhmã kugõ. Hãmri nẽ jar inhmã àpënh rax nẽ ixpyrà nẽ mẽ ujarënh mexja jarënh o pa. ²⁶⁻²⁷ Tã ra à htÿx nẽ. Kironhÿx pre mẽ pahpê ty. Tã nhũm Tĩrtũm omu nẽ kamã ukapri nẽ. Nẽ mãânën pa ixkamã ukapri nẽ. Nẽ tee ri ixte à htÿx ã omunh nẽ ixkapri htÿx py-maj akupÿm inhmã ho mex nhũm ra akupÿm mex nẽ ri pa. Hãmri nẽ kãm mẽ apumunh prãm nẽ. Mẽ ate à htÿx ã harënh mar nẽ akapri hã mẽ ajarënh ma nẽ tee ri mẽ akukamã hamaxpër. ²⁸ Jakamã inhmã akupÿm tokyx mẽ awÿr mēnh prãm. Tã koja mēmo arĩgro hã mẽ awÿr pōj ka mẽ omu nẽ akĩnh nẽ tãm ajamaxpër. Pa ijaxwÿja jar ixkĩnh nẽ tãm ijamaxpër. ²⁹⁻³⁰ Na ka prem ixwÿr amẽ nhũm man ixwÿr mō nẽ jar ixri mẽ kãm

Kris kapēr jarēnh o ri mē hkôt pa rāhā nhỹx hā ty nom kot amnhĩ kamā kahak kêt. Jakamā kê akupỹm mē awȳr pôj ka mē omu nē akĩnh nē. Nē kahti hkôt amỹ nē ho mex nē. Kêp Kris kôt mē pahťo mex kēnā. Ā na htem Kris mā mē kot tanhmā amnhĩ nhĩpêx to ho mē pa xwỹnhjê nhĩpêx mex anhỹr o pa.

3

*Mēmoj tā mē pahpumunh kôt Tĩrtũm kot tām mē paxunhwỹr ā harēnh
Piripos 2.18, 4.4*

¹ E Kris kôt ixtō nē ixtōxjaja. Kris kêp mē panhō Pahihti jakamā kwa mē jam ajamaxpēr nē akĩnh rāhā ho ri apa.

Na pa ra mē amā mēmoj jarēnh rax nē. Nē hā kagā rax tā kormā inhmā ja ho anhỹr kaga hkêt nē. Kot paj axte mē amā hkwȳ hā kagā. Mē ate hā ano htỹx nē ho apa kaxyw. ² Jakamā e kwa mē okora. Kêr ka mē amnhĩ nē mē kot Tĩrtũm kapēr o hêx xwỹnhjê pumunh mex o ri apa. Na htem tanhmā mē amā kapēr ho pa nē mē amā:

–Kot kaj mē ixpê Ijaewjê pyrā nē amnhĩ my kwrȳt kà jakā hāmri nē apê Tĩrtũm kra. Anē.

³ Nom ja kot anhỹr kêt. Mē pahte amnhĩ jakār kôt mē pahpê Tĩrtũm kra hkêt. Ā kot anhỹr ronhỹx pu mē amnhĩ krā hkôt tanhmā amnhĩ nhĩpêx to ho pahpê hkra. Nom ja kot anhỹr kêt. Mē ate amnhĩ jakār kêt tā mē ixpyrā nē amnhĩ kaxyw Jejus Kris mā ajamaxpēr jakamā mē ixpyrā nē mē apê Tĩrtũm kra na ka mē. Na ka htem mē ixpyrā nē Karō nhỹ hā kām mex o mex ā harēnh o ri apa nē mē ixpyrā nē Jejus kukwak ri akĩnh nē ri apa. Nom na pu htem pahpê hkra kaxyw amnhĩ jakār kêt nē. ⁴ Kop ām amnhĩ krā hkôt mē pahte amnhĩ to Tĩrtũm kra ronhỹx pa ra amnepēm amnhĩ to hkra nē ri ixpa. Na pa pre ixpê hkra hprām xāj amnhĩ krā hkôt tanhmā ri amnhĩ nhĩpêx to rax o ixpa nom ā amnhĩ nhĩpêx anhỹr kaprȳ. E

pa ja hā mē amā amnhĩ jarē ka mē ijarēnh ma.

⁵ Na pa pre ixkato nē kormā ixtā semān pixire nhũm mē ixpê Ijaew ā inhmy kwrȳt kà krāhta. Nom pa ā mē kot inhĩpêx anhỹr kôt ixpê Tĩrtũm kra hkêt nē. Nē inhĩpêxā hkôt ixpê finat Pějāmĩ kanrēhā htāmnhwỹ jakamā ixpê Ijaew mex na pa. Nē Ijaew kapēr o ixkapēr o ri ixpa. Nom ja kôt ixpê Tĩrtũm kra hkêt. Nē määnēn ixpê Parijew nhō xwỹnh jakamā na pa pre Tĩrtũm kot finat Mojes mā mē pakaxyw mēmoj tā karō kôt pix mā amnhĩ nhĩpêx o ixpa hprām. ⁶ Jao tee ri mē kot Jejus kôt amnhĩ nhĩpêx xwỹnhjê pumu nē mē homnuj tỹx o ri ixpa. Na pa pre ijamaxpēr o: “Nā mũjjaja na htem mē ixkwỹm ri amnhĩ nhĩpêx o pa.” Anē nē mē hipêx kati ho ri ixpa. Nē ijamaxpēr o: “Ra ixte finat Mojes kot Tĩrtũm nhỹ hā kapēr piitā hkôt amnhĩ nhĩpêx mex jakamā na pa hte tanhmā ri amnhĩ tomnuj to ho ri ixpa hkêt nē.” Anē.

⁷ ā na pa pre ixpê Tĩrtũm kra hprām xāj amnhĩ nhĩpêx anhỹr o ixpa. Tā nom ām ā amnhĩ nhĩpêx anhỹr hkapȳ. Na htem ā ri amnhĩ nhĩpêx anhỹr kôt kêp Tĩrtũm kra hkêt nē. Tā pa hpānhā amnhĩ kaxyw Kris kôt ijamaxpēr nhũm ixto hkra kurê kumrêx.

⁸ Ra ixte Jejus Kris kôt amnhĩ xām jakamā Jejus kêp inhō Pahihti pa inhmā kapēr kôt pix mā amnhĩ nhĩpêx o ri prām. No hkra x rũm ixte amnhĩ nhĩpêx tũmja na pa ra Jejus gryk ā hkaga hpa. Te ixte mēmoj punuj pyr nē amnhĩ katut kôt mēnh nē axte kām ijamaxpēr kêt pyrāk. Jao amnhĩ kaxyw Jejus kôt pix mā ijamaxpēr o ri ixpa. ⁹ Nom kormā ā ijamaxpēr anhỹr kêt ri na pa pre ixtỹx ri ijamaxpēr o:

–Nā ixte Mojes kot Tĩrtũm nhỹ hā kapēr kôt amnhĩ nhĩpêx o ixpa jakamā koja Tĩrtũm ja hā ixpumu nē ixto hkra.

Anhỹr tā nom ja kot anhỹr kêt. Na htem amnhĩ krā hkôt tanhmā ri amnhĩ nhĩpêx to ho pa nhũm Tĩrtũm ām ja hā mē omu nē ām hā mē omu

ně mẽ ho hkra hkêt nẽ. Nom koja mẽ Kris kôt amnhĩ xunhwỳ nhũm ja hã mẽ omu nẽ mẽ ho hkra kurê kumrẽx. Jakamã ixte Kris kôt amnhĩ xãm ã ix-pumunh kôt pix mã na pre ixto hkra nẽ inhmẽx ã ijarẽ. ¹⁰ Hãmri pa ra inhmã Kris kôt pix mã amnhĩ nhĩpêx o ri ixpa hprãm. Na pre ty tã akupỹm htĩr nẽ hihtỳx nẽ àhpumunh tỳx o tanhmã amnhĩ nhĩpêx to ho pa. Tã ijaxwỳja inhmã uràn ã amnhĩ nhĩpêx anhỹr prãm. Nẽ inhmã uràk nẽ amnhĩ xà htỳx kutã amnhĩ to htỳx nẽ ixpa hprãm. Mẽ kot hã ixpĩr mã tã pa uràk nẽ Tĩrtũm kapêr kaga hkêt nẽ ãm kôt pix mã amnhĩ nhĩpêx o ri ixpa rãhã uràk nẽ hã ty. Ja na inhmã ho anhỹr prãm. ¹¹ Kê Tĩrtũm kot hipêxta pyrã nẽ akupỹm ixto ixtĩr pa wa kuri ixtĩr tũm nẽ ixpa ho ixpa. ¹² Inhmã Kris kôt pix mã amnhĩ nhĩpêx o ixpa hprãm tỳx kumrẽx. Kormã ixte hkôt amnhĩ nhĩpêx o inhmõr nẽ kormã hatur xàm mẽnh kêt tã inhmã tokyx hatur xàm mẽnh prãm. Na pa ã inhmã amnhĩ nhĩpêx anhỹr prãm tỳx kumrẽx.

Nẽ na pa hte ixte amnhĩ tomnuj kêt ã amnhĩ to jarkrar o ri ixpa hkêt nẽ. Na pa hte arĩ tũhã tanhmã amnhĩ tomnuj to nom inhmã ã amnhĩ nhĩpêx anhỹr prãm kêt. Nẽ na pa kormã ixprĩ hã Kris kot amnhĩ nhĩpêx mar o inhmõr nẽ hatur xàm mẽnh kêt tã inhmã hkôt amnhĩ nhĩpêx o inhmõr nẽ tokyx hatur xàm mẽnh prãm. Ja kaxyw na pre Jejus Kris amnhĩ kaxyw ixta. ¹³ Na pa hte mẽ akurom papxipix ixte Jejus kãm hprãm xà hkôt amnhĩ nhĩpêx o ixpa hã amnhĩ to jarkrar kêt nẽ. Nom ra ixte tanhmã amnhĩ tomnuj to ho ix-pata pa axte kãm ijamaxpêr kêt nẽ. Te amnhĩ katut kôt ixte rẽnh par pyrãk o hipêx nẽ axte kãm ijamaxpêr kêt nẽ. Nẽ Jejus kãm hprãm xà hkôt pix mã amnhĩ nhĩpêx prãm xàj amnhĩ kaxyw kãm ijamaxpêr o ri ixpa.

¹⁴ Koja nhỹrmã Tĩrtũm ixpê Kris kwỳ hã amnhĩ wỳr ixwỳ nẽ inhmã:

—E amnẽ ixwỳr api Pawre. Kot kaj jarãhã amnẽ mẽ ixwỳr api.

Anhỹr o nhỹrmã inhmã kapêr jakamã na pa hte amnhĩ tã ãm pix jamãr rãhã ho ixpa. Pê ra Jejus kot amnhĩ nhĩpêx piitã omunh par o mõ. Nà kot paj gaa nẽ hkôt pix mã amnhĩ nhĩpêx mex o ri ixpa. ¹⁵ Kwa kêr pu mẽ pahpiitã ã pajamaxpêr anẽ. Jao amnhĩ wỳr hamãr pê hkôt pix mã amnhĩ nhĩpêx o ri papa. Mẽ pahpiitã mẽ pahpê Kris kwỳ kẽnã. Nom kot ka mẽ atõ ja kaxyw tee ri amnhĩ kukamã ajamaxpêr nẽ ajamaxpêr o:

—Nà tanhmã kot paj we amnhĩ to nẽ Jejus kôt amnhĩ nhĩpêx mex rãhã o ri ixpa? Ja kaxyw ixàhpumunh tỳxre hã. Anẽ.

Hãmri nẽ ã ajamaxpêr anhỹr o apaja apê hihtỳx japêr. Hã koja Tĩrtũm hprĩ hã tanhmã amã ja kukamã harẽnh to nẽ kaxyw ato axihtỳx ka ixpyrà nẽ hkôt pix mã ri amnhĩ nhĩpêx o apa. ¹⁶ Jakamã kêr pu mẽ ãm Tĩrtũm kãm hprãm xà hkôt pix mã tanhmã kãm amnhĩ nhĩpêx to ho papa. Ra mẽ pahte hkôt amnhĩ nhĩpêx o papa xàja kôt pix mã arĩ amnhĩ nhĩpêx rãhã ho papa.

¹⁷ E Kris kôt ixtõ nẽ ixtõxjaja. Na pa ra mẽ anoo mã Jejus kôt tãm ri amnhĩ nhĩpêx o ri ixpa. Tã kêr ka mẽ ja hã ixpumu nẽ ixpyrà nẽ hkôt amnhĩ nhĩpêx o ri apa. Hãmri nẽ nhỹri mẽ kot ixpyrà nẽ ã amnhĩ nhĩpêx anhỹr xwỳnhjê hõ pumu nẽ uràk nẽ ã amnhĩ nhĩpêx anẽ. ¹⁸⁻¹⁹ Jejus kot mẽ pamã mẽ pahte amnhĩ tomnuj mỳrapê pĩ kahpa hã mẽ panê htykja nhũm mẽ ra ohtõ nẽ hprĩ hã mar tã hkôt amnhĩ xunhwỳr kêt nẽ. Mẽ kãm ã kot amnhĩ nhĩpêx anhỹrja ã mar prãm nõkati. Jakamã te mẽ kãm Jejus kurê xwỳnh pyrãk. Na htem hã hpijaam kêt kãm tanhmã ri amnhĩ tomnuj to ho pa. Nẽ kãm amnhĩ mex pix prãm. Nẽ tanhmã amnhĩ tomnuj to nẽ ja hã amnhĩ pumu nẽ hkĩnh nẽ. Nom tee ri ja hã amnhĩ pumu nẽ hkaprĩ nẽ ri pa hkêt nẽ. Tã ã mẽ kot amnhĩ nhĩpêx anhỹr jakamã koja mẽ nhỹrmã ma mẽ kot amnhĩ xà htỳx kamã hamak o pa tũm xàta wỳr hapêx. Nà koja mẽ ã amnhĩ nhĩpêx anẽ. Ra ixte mẽ amã ja hã

mē harēnh rax tā pa axte mē amā mē harē. Inhmā mē hkaprī hkôt na pa hte xatā mē amā ja hā mē harē. ²⁰ Kēt mē papajaja mē kurom mē pahpē kaxkwa nhō xwýnh nom kormā. Koja nhýrmā Jejus Kris akupýn mē pahwýr kaxkwa rúm wrý. Mē papytār xwýnh maati Pahihtija akupýn wrý hāmri nē ma akupým amnhī kôt mē pahto api. Jakamā na pu htem arī pahkīnh pé amnhī wýr kamā pajamak rāhā ho ri papa. ²¹ Na pu htem jar pyka ja kamā Jejus kīnhā paxirerek nē pahpunuj nē ri papa. Nom koja nhýrmā akupýn mē pahwýr wrý hāmri nē amnhī pyrà nē mē pamā mē panhī nyw gō pu mē urāk nē paxihtýx kām pahtír tūm nē papa ho papa. Ā kot mē panhīpēx anhýr kaxyw àhpumunh o àhpumunh. Tā koja àhpumunh týx kām mēmoj piitā ho amnhīptār pa. Pu mē pahpiitā hkôt amnhī nhīpēx mex rāhā ho ri papa.

4

*Pawre kot mēmoj tā mē kām karō
Epes 4.3; Piripos 2.2; Korosē 3.15*

¹ E Kris kôt ixtō nē ixtōxjaja. Inhmā mē ajapēē. Na pa hte mē ato ijamak o ixkrī nē mē amā ijamaxpēr nē ixkīnh nē. Nē jar mē pahkwýjē mā mē ajarēnh o ri ixkrī. E kwa kêr ka mē arī Pahihti kapēr kôt pix mā mǎn amnhī nhīpēx mex rāhā ho ri apa.

² Nē wa ka Ewox mē Sīxika wa. Na ka xep hte wa mēmoj tā axpēn kamā agryk rāhā ho ri apa. Kwa wa ā amnhī nhīpēx anhýrja mā anhūre nē tām axpēn nhīpēx. Pahihti Kris kôt war ate axpēn to war atōx kēnā kot ka kēt wa axtem nē mēmoj tā axpēn kamā agryk o ri apa.

³ Nē ka Xikitre. Apē ixkrāmnhwý mex jakamā kêr ka axpēn tā wa nita wa kām akapēr kām axihtýx nē kê war ama nē akupým tām axpēn nhīpēx. Na pre wa ra Kremēn mē hkwyjē mē hpimràatā ixpyrà nē Jejus kot tanhmā mē panē amnhī nhīpēx to hā harēnh o ri pa. Tirtūm nhō kagà kamā mē hixi piitā hikwý. Mē pahtír tūm nē

mē papa mā xwýnhjaja ra Tirtūm nhō kagà kamā mē panhīxi jaxwýr par.

⁴ Nē kêr ka mē apē Pahihti hkwy hā akīnh nē ri apa. Mē ate ā amnhī nhīpēx anhýr o apaja na pa inhmā hprām týx jakamā kot paj axte mē amā harē. Kwa kêr ka mē akīnh nē ri axpēn kôt apa.

⁵ Pahihti Jejus ra akupýn mē pahwýr nojarēt jakamā kêr ka mē kutēp mē piitā ri mē ho mex o ri mē hkôt apa.

⁶ Nē kêr ka mē tee ri amnhī kukamā ajamxpēr o ri apa hkēt nē. Arī amnhī to Tirtūm wýr rāhā nē. Kot ka mē mēmo arīgro hā apē amrakati japēr nē tee ri ja hā amnhī pumu nē amnhī to awý kê mē ama nē mē amā mēmoj gō. Rý mē ate mēmoj tā hwýr xwýnhta tanhmā mē amā hipēx to ka mē amnhī tā omu nē kām:

—Nà ām hāmri na ka ā inhīpēx anē nē inhmā ja gō Tirtūm. Amex o amex.

Anhýr o kām amnhī jarē. ⁷ Kot kaj mē ā amnhī to hwýr anhýr o ri apa nhūm tanhmā mē akrā hto ka mē mē apē Jejus Kris kwý hā ajamakētkati nē axāmnhīx ri apa. Hāmri nē mēmoj tā tee ri amnhī kukamā ajamxpēr o ri akaprī nē apa hkēt nē. Ām akīnh rāhā ri apa. Tirtūm kot tanhmā mē pahto nhūm mē pajamakētkati nē ri mē papaja mē pahte amnhī tā omunh kēt. Ām tapxipix kot ā mē panhīpēx anhýr kukamā àhpumunh týx.

⁸ E Kris kôt ixtō nē ixtōxjaja. Nā ixkapēr ā kagà jatur xà na ja. Kwa kêr ka mē ixujarēnh mar týx nē hkôt amnhī nhīpēx o apa.

Nē kêr ka mē axapēnh mex pix kukamā ri ajamxpēr o apa.

Nē mēmoj mex pix kukamā ri ajamaxpēr.

Nē axpēn mā akapēr mex pix kukamā ri ajamxpēr.

Nē akatāt kôt akapēr xaptār pix o axpēn mā akapēr hkukamā ri ajamxpēr o ri apa.

Nē tām ri amnhī nhīpēx hkukamā mǎn ajamxpēr o ri apa.

Nē mē piitā ri mē ho mex o apa hkukamā ajamxpēr.

Ně mẽ akapěr mex pix kukamã mãn ajamaxpěr o ri apa.

E kêr ka mẽ ã amnhĩ nhĩpêx anhỹrja kukamã ajamaxpěr rãhã ho ri apa.

⁹ Ně mẽ akôt ixpare ri na pa pre Kris kôt amnhĩ to mex pix ně tãm ixkapěr o ri ixpa. Tã kêr ka mẽ ixpyrà ně ã amnhĩ nhĩpêx aně. Koja Tĩrtũm ja hã mẽ apumu ně mẽ akôt ri pa ho pa. Kêp mẽ pamã mẽ paxãmnhĩx pajamakêtkati xã nhõr xwýnh na.

Mě kot Pawre hwýr mẽmoj mẽnh nhũm kot omunh ně hkĩnh ã harěnh Sikũn Korĩt 11.7-9; Piripos 1.5

¹⁰ Ně amnepêm na ka prem xatã tanhmã ixto mex to ho ri apa. Tã axte ã inhĩpêx anhỹr prãm nom mẽ apê awry ně ixpa jakamã ka xep prem tee ri tanhmã ixto mex to hkukamã ajamaxpěr kaprý. Tã jar mẽ kot ijaxàr ã ijarěnh ma ně ixwýr Eparoxit mẽ nhũm man ixwýr mō ně inhmã kãxporeta gō. Mě amã ijapê hã ixwýr amě pa omu ně ixkĩnh tỳx ně. Ně ixkĩnh kãm Tĩrtũm mã mẽ ajarě. ãm hãmri na ka prem ixwýr amě.

¹¹⁻¹² Ně na pa hte tanhmã ixkute htã arĩ ixkĩnh ně ijamakêtkati ně ri ixpa. Jakamã kot pa mẽmo arĩgro hã ixpê amrakati ně inhmã prãm japêr tã no ãm tee ri amnhĩ kukamã ijamaxpěr o ri ixkaprĩ hkêt ně. Arĩ ixkĩnh rãhã ixãmnhĩx ri ixpa. Rý pa inhõ mẽmoj rax japêr ně mããněn ixkĩnh ně ixãmnhĩx ri ixpa. Na pa pre tōhã inhõ rax ně ixpa. Ně tōhã inhõ hkêt ně ixpa. Tã arĩ ixkĩnh rãhã ně ixpa ho ixpa. ¹³ Na hte Kris mẽmoj piitã hkukamã ixto ixihtỳx pa ý hã mẽmoj kutã ixihtỳx ně ixpa. Jao mẽmo arĩgro hã inhmã prãm tỳx ně ri ixpa htã ý hã kutã ixihtỳx ně ixãmnhĩx ri ixpa. ¹⁴ Tã jar ixpunuj ně ixkrĩ ka mẽ ijarěnh ma ně ixwýr kãxpore hwýr rě. ãm hãmri na ka prem ixwýr arě. ¹⁵ Amnepêm na pa pre mẽ anhõ pika pê Masetõn rũm ixkato ně mẽ piitã mẽ kãm Jejus kot tanhmã mẽ panê amnhĩ nhĩpêx to hã harěnh o ri ixpa ka mẽ xatã ixwýr kãxpore hwýr rě pa ho amnhĩm ixujaprõr o ri mẽ hkôt

ixpa. Mě apê Piripos kamã Kris kôt ixtõ ně ixtõx pixjaja na ka prem ã inhĩpêx aně. Krĩ hwýr kamã Kris kôt mẽ pahkwýjaja na mẽ akĩnhã ã inhĩpêx anhỹr kêt ně. ãm mẽ kapxipix na ka pre ã ixto mex aně. ¹⁶ Tesarõn kamã ixpare ri na pa pre ixpê amrakati kumrěx ně ri mẽ hkôt ixpa ka mẽ xatã ixwýr kãxpore hwýr rě pa pre ho amnhĩm ixujaprõr rãhã ho ri mẽ hkôt ixpa. ¹⁷ Nom mẽ ate ixwýr hwýr rěnh kaxyw mẽ akamã ijamak o ri ixpa hkêt ně. Rý ijamaxpěr o:

—Ko. Koja Piripos nhõ xwýnhjaja ijarěnh ma ně kãm ixkaprĩ ně ixwýr kãxpore hwýr rěnh japêr.

Anhỹr o mẽ akukamã ijamaxpěr kêt ně. Nom ra mẽ ate ixwýr hwýr rěnh jakamã koja Tĩrtũm ja hã mẽ apumu ně mẽ ato mex ně. ã mẽ pahte axpěn kutã panojarêr anhỹrja na kãm hprãm.

¹⁸ Tã nhũm Eparoxitja ham mẽ arũm kato ně man ixwýr mō ně inhmã kãxporeta gō. Kwa na ka mẽ inhmã õr rax ně. Koja tokyx ixpê hapêx kêt pa kritpêm ho ixàpkur o ixkrĩ. Tã ot pa ho kōta ně tanhmã hkre kamã kute pumunh xã hkôt hã kagã ně mẽ awýr kumě. Nã mẽ ate ixwýr axãmnhõrta na Tĩrtũm omu ně ixtã mẽ apumu nhũm ja kãm mex kumrěx. Te mẽ kot mẽ hkuxwaxã hpãr nhũm mẽ kãm mexta pyrãk nhũm ja kãm mex ně. ¹⁹ Nã koja Tĩrtũm mẽ apê Jejus Kris kwý hã mẽ amã mẽ ate mẽmoj to presija xã nhõr rãhã ho pa. Mẽmoj piitã kêp õ kěná.

²⁰ E kêr pu mẽ Měpanhĩpêêxã maati Tĩrtũm mã mex o mex ã harěnh rãhã o papa. Ja na inhmã hprãm.

²¹⁻²² Ně ot pa mẽ jar ixpiitã mẽ apê Jejus Kris kôt mẽ ixkwýjê hwýr kagãja kamã mẽ xpêr mẽ. Mě ixpyrà ně mẽ apê Tĩrtũm kra hã. Pa ně Kris kôt mẽ pahtõ ně mẽ pahtõxjaja. Ně Rõm nhõ pahĩ mã mẽ àpěnh xwýnh kot Kris kôt amnhĩ xunhwýr xwýnhjaja mããněn. ãm jar mẽ ixpê Tĩrtũm krajê piitã pa mẽ awýr xpêr mẽ.

23 E kê Pahihti Jejus Kris mẽmoj to mẽ akutã nojarêr rãhã nẽ. Jao mẽ ato mex o pa.

Tã ãm ja pix. Ixpê Pawre na pa mẽ awỳr kagàja nhĩpêx nẽ kumẽ.

Korosê Pawre kot Koros kamã Jejus kôt hkwyjê hwÿr kagà nê mênh

Pawre na pre kagàja nhîpêx. Je-
jus nhÿ hã hkrajê jahkre o mẽ pa
xwÿnhjê hõ na pre. Tã nhũm mẽ kêp
Jejus kra hkêt xwÿnh kwÿjaja Jejus ã
unê nê haxà nhũm arĩ hkrĩ ho hkrĩ.
Hãmri nê krĩ pê Koros kamã Jejus
krajê mã kagà nhîpêx nê mẽ hwÿr
kumê. Koros kamã Jejus kwÿjê kamã
Ijaew kwÿ nê kamã Ijaew kêt xwÿnh
kwÿ nhũm Pawre mẽ ho hpimràatã
mê hwÿr kumê. Kormã mẽ hwÿr mör
nê mẽ omunh kêt tãã. Nê kagàja kamã
mê kot tanhmã Jejus o hêx to ho pa
xwÿnhjê jarênh to. Jejus kêp Tirtũm
Kra hkêt ã mẽ kot ho hêx xwÿnhjê jarê
nê mẽ nê mẽ kãm kapêr. Mê kot mẽ
hkôt amnhĩ nhîpêx kêt kaxyw mẽ kãm
kapêr nê hã kagà nê mẽ hwÿr kumê
nê mẽ kãm:

¹ Pa Koros kamã Kris kôt ixkwÿjaja.
Xà mẽ amex na ka mẽ apa? Ixpê
Pawre na pa mẽ awÿr kagàja nhîpêx
nê mẽ awÿr kumê. Kris kôt mẽ pahtõ
Ximotre mẽ wa kumê. Ixte Jejus Kris
nhÿ hã mẽ ahkre ho mẽ ixpa xwÿnhjê
hõ na pa. Tirtũm kãm hprãm xà hkôt.
² Tã pa mẽ awÿr kagà nhîpêx nê kumê.
Mê apê Kris kôt mẽ ixtõ nê ixtõx na
ka mẽ. Na ka xep htem Kris kapêr
kôt amnhĩ nhîpêx mex o ri apa. E
kê Tirtũm mẽ apê hkra hã mẽ akutã
nojarêt rãhã nê. Ka mẽ amex nê
ajamakêtkati nê axãmnhĩx ri tanhmã
amnhĩ nhîpêx ho ri apa.

*Koros nhõ xwÿnh kwÿjaja kot Jejus
kôt amnhĩ xunhwÿr ã mẽ harênh*

Wam Tesarõn 1.2-5

³⁻⁴ Na pa ra Ximotre mẽ wa mẽ
ajarênh ma. Mê ate amnhĩ kaxyw
Jejus Kris kôt ajamxpêr tÿx nê hkôt
amnhĩ nhîpêx mex o apa hã mẽ
ajarênhja ma. Nê mẽ kot Tirtũm
kôt amnhĩ xunhwÿr xwÿnh piitã mẽ
amã mẽ hkĩnh ã mẽ ho mex o apa

hã mẽ ajarênhja ma nê wa ixkĩnh
nê. Jakamã na pa wa Pahihti Jejus
Nhîpêxà Tirtũm mã amnhĩ jarênh
kaxyw nê kãm mẽ anhÿ hã wa ixkĩnh
ã amnhĩ jarê. ⁵ Na pre Epas ma
mê awÿr mō nê mẽ amã Jejus kot
tanhmã mẽ panê amnhĩ nhîpêx to
hã harênh o mẽ akôt pa. ãm hãmri
kot mẽ amã harênhja. Tã ka xep
prem ama nê amnhĩ kaxyw hkôt
ajamxpêr nê hkôt amnhĩ xunhwÿ.
Hãmri nê amnhĩ wÿr Jejus jamãr o ri
apa. Kojã nhÿrmã akupÿn mẽ pahwÿr
wÿr nê amnhĩ pyrã nê ma akupÿm
kaxkwa hwÿr mẽ pahto api nê mẽ
pahto mex kumrêx o mẽ pahkôt pa
ho pa. Tã ka xep htem amnhĩ kaxyw
hkôt ajamxpêr tÿx nê ã kot amnhĩ
nhîpêx anhÿr kutêp amnhĩ wÿr kamã
ajamak rãhã nê. Nê mẽ amã mẽ kot
Tirtũm kôt amnhĩ xunhwÿr xwÿnhjê
hkĩnh tÿx nê.

⁶ Na hte Tirtũm ãm hãmri mẽ pahto
mex pix rãhã ho pa. Nê mẽmoj to mẽ
pakutã nojarêt rãhã nê. Tã wam mẽ
ate harênh marta ã ka mẽ hkôt amnhĩ
xunhwÿr kurê kumrêx nê ri kapêr kôt
axpên kôt amnhĩ nhîpêx mex pix o ri
apa. Jao hkôt pix mã amnhĩ nhîpêx
mex nê. Tã na hte pika piitã hkôt
ri mẽ pa xwÿnh kwÿjaja mẽ apyrã nê
Jejus jarênh ma nê hkôt amnhĩ xun-
hwÿ. Nê mẽ apyrã nê axtem hkôt pix
mã amnhĩ nhîpêx nê kapêr kôt amnhĩ
nhîpêx mex o ri pa.

⁷ Nê mẽ awÿr mörta ã na pre
Epasja mẽ amã Tirtũm kapêr jarênh
o ri mẽ akôt pa ka prem ama nê
amnhĩ kaxyw hkôt ajamxpêr nê
hkôt amnhĩ xunhwÿ. Epasja wa ix-
pyrã nê kot Kris mã tanhmã amnhĩ
nhîpêx to ho pa xwÿnh. Nê wa inhmã
hapêê. Na pre katat kôt mẽ amã
Tirtũm kapêr jarênh pa. Kot mẽmoj to
mê pakutã nojarêt rãhã hã harênh o
ri mẽ akôt pa. ⁸ Tã man akupÿn wa
ixwÿr mōn pōj nê wa inhmã tanhmã
mê ajarênh to. Tirtũm Karõ nhÿ hã
mê amã Kris kôt atõ nê atõx piitã mẽ
hkĩnh o ri apa hã mẽ ajarê. Pa wa mẽ
ajarênh ma nê wa ixkĩnh tÿx kumrêx.

Pawre mẽ Ximotre wa kot Koros kãm hkwÿjê ho Tirtũm wÿr ã wa harênh Epes 1.15-23, 3.14-21; Piripos 1.9; Wam Tesarõn 5.23-24; Sikũn Tesarõn 1.11, 2.16

⁹ Nê na pre Epas akupÿn wa ixwÿr pøj nê wa inhmã tanhmã mẽ ajarênh to. Mẽ ate amnhĩ kaxyw Jejus kôt ajamaxpêr o apa nê mẽ amã Kris kôt akwÿjê piitã mẽ hkĩnh o ri apaja nhũm wa inhmã mẽ ajarê. Pa wa mẽ ajarênh ma nê mẽ ato Tirtũm wÿr rãhã o jar mẽ hagdênh xà kamã ixkrĩ. Nê arĩ mẽ ato hwÿr rãhã ho ixkrĩ. Nê mẽ ato hwÿr o:

–Pa Tirtũm. Ot pa Ximotre mẽ wa Korosê nhõ xwÿnhjê ho awÿr kaxyw amã mẽ harê. Kwa tanhmã mẽ hamaxpêr to kê mẽ amã hprãm xà hkôt pix mã amã tanhmã amnhĩ nhĩpêx to ho pa. Nê Akarõ nhÿ hã hprĩ hã akapêr ma nê ãm hkôt pix mã tanhmã amnhĩ nhĩpêx to ho pa. Anê.

¹⁰ Na pa hte wa ã mẽ ato Tirtũm wÿr anhÿr rãhã ho ixkrĩ. Kot kaj mẽ ã amnhĩ nhĩpêx anhÿr o ri apa nê Jejus kot amnhĩ nhĩpêx o amnhĩ nhĩpêx mex o ri apa. Nê aprĩ hã Tirtũm kot amnhĩ nhĩpêx ã omunh mex o mõi. Jao mẽmoj to axpên kutã anojarêt pix o ri apa hprãm. Hãmri nhũm Tirtũm ja hã mẽ apumu nê hkĩnh nê. ¹¹ Tirtũmja mẽ pakurom mẽmoj piitã kaxyw àhpumunh o àhpumunh. Nê mẽmoj piitã kaxyw hihtÿx o hihtÿx. Jakamã na pa hte wa mẽ ato hwÿr o:

–Pa Tirtũm. Kwa tanhmã Koros nhõ xwÿnhjê ho kê mẽ axihtÿx nhÿ hã mẽmoj punuj kutã amnhĩ to htÿx nê. Mẽ kot Jejus ã tanhmã mẽ ho nhũm mẽ kot amnhĩ xà kamã hamak tã kê mẽ tee ri amnhĩ kukamã hamaxpêr o hkaprĩ nê ri pa hkêt nê. ãm anhÿ hã mẽ hkurê xwÿnhjê kutã amnhĩ to htÿx nê hkĩnh kãm ri pa ho pa. Anê.

Na pa hte wa ã mẽ ato hwÿr anê.

¹² Na pre ra Tirtũm amnhĩ ri mẽ pakutêp mẽmoj mex kwÿ jaxwÿ. Mẽ pahpê hkrajê mã haxwÿ. Tã ka mẽ ÿ hã tãm amnhĩ nhĩpêx o apa jao mẽ ate mẽmoj mex jamÿnh mã tãm. Õ krĩ nhĩrã rax kumrêx kamãã. Jakamã

kwa mẽ kot Jejus ã tanhmã mẽ pahto htã kêr pu mẽ arĩ Tirtũm mã mex o mex ã harênh rãhã ho ri papa.

¹³ Nê Satanasti kêp kamãt kõi kamã mẽ kot amnhĩ tomnuj ho mẽ pa xwÿnhjê pãm. Tãm na hte mẽ ho amnhĩptar o pa nê hkôt na pu prem amnhĩ nhĩpêx o papa rãhã nhũm Tirtũm tee ri ja hã mẽ pahpumu. Hãmri nê kãm kêp mẽ papytar prãm xà mẽ pahwÿr Kra japê htÿx kumrêx xwÿnhja mẽ. Nhũm mẽ pahwÿr wrÿ nê mẽ panê htyk o mẽ pahte amnhĩ tomnuj pãnhã kãm amnhĩre. Tã pu prem hkôt amnhĩ xunhwÿ nhũm Tirtũm hã mẽ pahpumu nê mẽ panê mẽ pahte amnhĩ tomnuj o hapêx pa. Te kot amnhĩ katut kôt rênh par pyrãk. Jao Satanasti pê mẽ pahpyta nhũm hpãnhã Jejusja tãm kêp mẽ pahto amnhĩptar o pa xwÿnh.

¹⁴ Ra htyk o mẽ pahte amnhĩ tomnuj piitã hpãnhã amnhĩrer jakamã na pu htem hkôt amnhĩ xunhwÿ nhũm mẽ pahte amnhĩ tomnuj o hapêx pu mẽ axte Satanasti hkôt ri amnhĩ nhĩpêx kêt nê. ãm Jejus kôt pix mã amnhĩ nhĩpêx o ri papa.

Kris mẽ Tirtũm wa kot amnhĩ nhĩpêx te wa kot axpên pyrãk ã harênh

Juãw 1.1-5; Korosê 2.9; Eprêw 1.1-14

¹⁵ Nê Krisja te kot Tirtũm pyrãk. Mẽ pahte pano ho Tirtũm pumunh kêt tã Kra Kris kot amnhĩ nhĩpêx ã harênh mar kôt mããnhên Tirtũm kot amnhĩ nhĩpêx ã omunh mex nê. Amnepê mã kormã mẽmoj kêt ri nhũm Jejus pa ho pa rãhã nê. Jakamã kot amnhĩ to rax o Tirtũm kot mẽmoj to katorja piitã hakrenh par kumrêx. ¹⁶ Na pre hipêêxã Tirtũm nhÿ hã mẽmoj piitã ho kator pa. Kaxkwa kamã nê pika hkôt mẽmoj piitã ho kator pa. Nê kaxkwa kamã mẽ pahte pano ho mẽmoj pumunh par xwÿnhjaja nhũm pre ho kato. Nê kamã mẽ pahte pano ho mẽmoj pumunh kêt xwÿnhjaja nhũm pre mããnhên ho kato. Nê kapêr o wrÿk xwÿnhjaja nê mẽ hkrãhtũmjaja nhũm pre mẽ ho kato. Nê pika kamã

mê ho amnhîptâr xwÿnhjaja nhÿm pre mê piitã mê ho kator pa. Kãm hprãm xà hkôt Tîrtÿm nhÿ hã mëmoj piitã ho kator pa.

¹⁷ Tã na hte arÿ kaxkwa kamã nê pika hkôt mëmoj piitã hamãr rãhã ho pa. Kêp apu kot hamãr kêt ronhÿx mëmoj piitã akupÿm hapêx pa.

¹⁸ Nê tãm na hte mê pahpê hkrajê ho amnhîptâr o pa. Te kêp mê pahkrã nhÿm te mê pahpê ï pyrãk jakamã na pu htem kapêr kôt pix mã amnhî nhîpêx o papa. Kumrêx na pre akupÿm htîr o htîr jakamã kot amnhî to rax o mëmoj piitã hakrenh par.

¹⁹ Nê na pre Tîrtÿm ã hamaxpêr anê nê hamaxpêr o: “Nà Ixkra mê wa ixte amnhî nhîpêxja te kot axpên pyrãk. Nê wa ixihÿtÿx mãânên te kot axpên pyrãk. Nê wa inhmex xà mê wa ixãhpumunhja te kot axpên pyrãk. ã wa ixte amnhî nhîpêx kot anhÿr. Wa ixte amnhî nhîpêxja na mex kumrêx.” Anê.

²⁰ Tã Jejus kot pÿ kahpa hã mê panê tyk nê hkamrô pikapîr kukwak ri na hte Tîrtÿm mê kot hkôt amnhî xunhwÿr xwÿnh piitã mê ho hkra nhÿm mê hamakêtkati nê àmnhîx pa ho pa. Kaxkwa kamã nê pika piitã hkôt mê kot Jejus kôt amnhî xunhwÿr xwÿnhjaja na htem ã amnhî nhîpêx mex anhÿr o pa. ã Jejus kot mê panê htyk anhÿr jakamã kot amnhî to rax o kot mëmoj piitã hakrenh par.

Jejus kêp tãm mê paxunhwÿr xwÿnh ã harênh

²¹ Nê mê papajaja na pu prem pamã Tîrtÿm prãm kêt o ri papa. Te hkãx ã ri papa pyrã nê kutã amnhî xunhwÿ nê pajamaxpêr punuj nê tanhmã amnhî tomnuj to pix o ri papa. ²² Tã Jejus kôt amnhî xunhwÿ nhÿm amnhî tã mê pahpumu. Hãmri nê ra mê panê htyk jakamã amnhî tã mê pahpumu nê Tîrtÿm noo mã tãm mê paxunhwÿ. Te aa mê pahte tanhmã amnhî tomnuj to hkêt pyrãk o mê panhîpêx nê tãm mê paxunhwÿ. Pu mê arÿ pahpê Tîrtÿm kutã amnhî xunhwÿr xwÿnh kêt nê hpãnhã pahpê

hkrãmnhwÿy. ²³ Na pre Tîrtÿm mê pahte amnhî kaxyw Kra Kris kôt pajamaxpêr nê hkôt amnhî xunhwÿr ã mê pahpumu kôt ã mê pahto mex anê. Tã kêr pu mê arÿ hkôt amnhî nhîpêx o ri papa nê aa hkaga hkêt nê. Mê kot Kris ã tanhmã mê pahto htã pu mê arÿ hkôt amnhî nhîpêx mex rãhã ho ri papa.

Kormã mê kot jar ijaxàr kêt ri na pa pre hte mê kãm ã harênh anhÿr o ri mê hkôt ixpa. Tã ka prem Jejus jarênh ma nê hkôt amnhî xunhwÿr kurê kumrêx. Nhÿm krÿ piitã hkôt ri mê pa xwÿnh kwÿjaja mê apyrã nê harênh ma nê hkôt amnhî xunhwÿ nê hkôt amnhî nhîpêx o pa.

*Pawre kêp Ijaew kêt xwÿnhjê mã Jejus jarênh xwÿnh ã harênh
Epes 3.1-13*

²⁴ Nê ixte mê amã Kris kot tanhmã mê panê amnhî nhîpêx to hã harênh o ixpaja ã na prem tanhmã ixto htÿx nê pa amnhî xà htÿx kãm ijamak o ri ixpa. Tã arÿ Tîrtÿm kãm hprãm xà hkôt ã amnhî nhîpêx anhÿr jakamã na pa ixkînh nê jar ixkrÿ. Ixte Kris kwÿjê kaxyw amnhî xà kamã ijamak tÿx o ixkrÿ. Te mê apê Kris nhî pyrãk xwÿnhjê mãã. Tã pa te ixpê Kris kot amnhî nhîpêx pyrãk o mê akaxyw amnhî xà htÿx kãm ijamak o ixkrÿ.

²⁵ Na pre Tîrtÿm mê apê Ijaew kêt xwÿnhjê kaxyw ixãm. Ixte mê amã kapêr piitã harênh par nhÿm mê ate mar nê hkôt amnhî nhîpêx mex o ri apa kaxyw. ²⁶ Na pre kormã mëhõ mê awÿr mör nê mê amã harênh kêt nê. Tã ra Tîrtÿm kãm mê ate mar prãm nê. Kãm mê apê Ijaew kêt xwÿnhjê mê mê pahpê Ijaew xwÿnhjê japê o axpên pyrãk. Nom na pre amnepêm ri mê pa xwÿnhjê mã kormã ja hã amnhî to amnhîrît kêt nê. Tã ra jarãhã mê pahpê Kris kwÿjê mã ja ho amnhîrît. Mãânên kãm mê apê Ijaew kêt xwÿnhjê japê hã amnhî to amnhîrît. ²⁷ Mê apê Ijaew kêt tã na ka prem Kris kôt amnhî xunhwÿ nhÿm Tîrtÿm Karõ mê akarõ mã agjê nê mê akamã pa ho pa. Ka mê ra hkôt amnhî

nhîpêx jakamã kot kaj mẽ ixpyrà nê nhÿrmã kuri atîr tûm nê amex rãhã ho apa ho apa. Ja na mex kumrêx. Tã ja na Tirtûm kãm mẽ ate mar prãm nê mẽ akaxyw ixãm. ²⁸ Jakamã na pa pre Ximotre mẽ wa mẽ apiitã mẽ amã Kris kot mẽ panê tanhmã amnhî nhîpêx to hã harênh kãm ixihýtýx o ri mẽ akôt ixpa. Nê kapêr o mẽ ajahkre ho ri mẽ akôt wa ixpa. Nê jar mẽ hagiênh xà kamã krî piitã hwÿr kagà nhîpêx nê mẽ hwÿr kurê. Mẽ kot kamã harênh nê mar nê amnhî tom-nuj kaga nê hpãnhã Kris kôt amnhî xunhwÿr nê ãm kôt pix mã amnhî nhîpêx o pa kaxyw. Kêr pa nhÿrmã kãm mẽ ate inhmar nê hkôt amnhî xunhwÿr xwÿnhjê jahkre nê kãm:

—E Pahihti. Ota akwÿjaja. Na htem akôt amnhî nhîpêx mex rãhã ho ri pa. Anê.

²⁹ ã ixte kãm mẽ piitã mẽ harênh anhÿrja na inhã hprãm. Ja kaxyw na pre Jejus ixto ixihýtýx. Jakamã na pa hte Tirtûm nhÿ hã tanhmã kapêr o mẽ ahkre hto ho ri mẽ hkôt ixpa. Jao mẽ ho Tirtûm wÿr o ri ixpa nê mẽ kãm kagà nhîpêx nê mẽ hwÿr kurê nê kamã kapêr o mẽ ahkre o ri ixpa.

2

Pawre kot Jejus kapêr o Koros nhô xwÿnhjê o hihýtýx ã harênh

Epes 3.14-19; Piripos 1.9

¹ E kot paj mẽ amã tanhmã amnhî jarênh to ka mẽ inhma. Na pa hte mẽ ato Tirtûm wÿr rãhã ho ixkrî. Mẽ kajaja nê krî pê Ratisej kamã Jejus kôt mẽ pahkwÿjaja. Kormã ixte mẽ apumunh kêt tã pa hte mẽ ato Tirtûm wÿr kãm ixihýtýx ãhã ho ixkrî. ² Mẽmo kaxyw na pa hte ã mẽ ato hwÿr anê? Nê mẽmo kaxyw na pa hte mẽ amã kagà nhîpêx nê mẽ awÿr kurê? Nã ãm mẽ ate kamã harênh nê mar nê Jejus kapêr kôt axpên to axihýtýx o ri apa kaxyw. Nê mẽ amã axpên kînh o ri apa kaxyw. Pê te mẽ ate ixkre tipxi kamã axpên kôt amnhî nhîpêx o ri apa pyrãk. Jao aprî hã Tirtûm kot amnhî nhîpêx pumunh mex nê amnhî kaxyw hkôt ajamaxpêr tÿx nê.

Kot kaj mẽ ã amnhî nhîpêx anê nê Kris kot amnhî nhîpêxta pumunh pa. Na pre Tirtûm tokyx mẽ kãm Kris o amnhîrît kêt tã ra mẽ pamã ho amnhîrît. ³ Tirtûm kot amnhî nhîpêx nê kapêrja na pu htem Kris nhÿ hã pahprî hã omunh nê mar mex nê. ⁴ Jakamã koja mẽmojaja mẽ awÿr mra hãmri nê hêx rom Tirtûm kapêr kwÿm ri tanhmã mẽ amã mẽmoj jarênh to. Te mẽ àhpumunh tÿx pyrãk o mẽ amã harê no ãm mẽ àhpumunh kêt. Ka mẽ ama nê ãm mẽ ama nê Kris kaga hkêt nê.

⁵ Nê kormã arî Jejus ã ijaxàr nê ixkrî nê kormã mẽ akôt ixpa hkêt tã ot pa hte mẽ amã ijamaxpêr rãhã ho ixkrî. Nê ra tanhmã mẽ ajarênh mar to. Na ka xep htem Kris kôt amnhî nhîpêx tÿx o ri apa. Te ahkrô pê kukryt mut kuxêêti kot pî kupu htÿxta pyrãk. Nê ka xep htem arî amnhî kaxyw Kris mã ajamaxpêr tÿx o ri apa. Pa mẽ ajarênh ma nê ixkînh tÿx nê.

⁶ Na ka prem Pahihti Jejus Kris kôt amnhî xunhwÿr pa. Tã kër ka mẽ arî hkôt amnhî nhîpêx mex rãhã ho apa. Kêp mẽ panhõ Pahihti kênã. ⁷ Jakamã mẽ ãm kôt pix mã amnhî xunhwÿr tÿx nê aa hkaga hkêt nê. Te mẽmo pî hpàr jarêja pika kaxwÿnh kãm pimãnh nê kot pika jamÿnh tÿxta pyrãk. Nhũm kôk xapêr tÿx tã tee kot mẽnh kaxyw pyrãk. Tã kër ka mẽ pî hpàrta pyrã nê hkôt amnhî xunhwÿr tÿx nê hkôt amnhî nhîpêx mex o ri apa. Ra Epas kot mẽ ajahkre ho pa xà hkôt. Nê amnhî krãm Kris kapêr jaxàr tÿx nê aa ho ajamakêtkati hkêt nê. Pê akînh kãm Tirtûm mã mex o mex ã harênh rãhã ho ri apa.

⁸ Nê kwa kër ka mẽ kot hêx rom mẽ amã tanhmã kapêr to ho mẽ pa xwÿnhjaja ka mẽ amnhî nê mẽ omunh mex nê. Nê mẽ kapêr mar hkêt nê. Mẽ ate Kris kaga hprãm xàj na htem tanhmã mẽ amã hêx to ho ri mẽ akôt pa. Te amnepêm mẽ kot Tirtûm kapêr kwÿm ri tanhmã mẽ ahkre hto xwÿnhjê pyrãk. Hinhu hikôôti kapêr kôt na htem tanhmã mẽ amã hêx to nom Kris nhÿ hã mẽ amã kapêr kêt

nê. Jakamã kwa mẽ amnhĩ nê mẽ omunh mex nê.

⁹ Nê Kris mẽ Tirtũm wa kot amnhĩ nhĩpêx kot axpên pyræk. Nê wa hamaxpêr kot axpên pyræk. ¹⁰ Tã kêr pu mẽ pajaxwýja wa hamaxpêr o pajamaxpêr nê wa kot amnhĩ nhĩpêx o amnhĩ nhĩpêx. Jakamã kwa mẽ kot Tirtũm kapêr kwým ri tanhmã mẽ kapêr to xwýnhjê kot amnhĩ nhĩpêx o amnhĩ nhĩpêx kêt nê. Nê mẽ kapêr ma nê âm mẽ ama. Kris na hihtýx o hihtýx o kot mẽkarõmnuti nhõ pahi piitã mẽ hakrenh par. Nê hihtýx o hihtýx o kot Tirtũm kapêr o mẽ wrýk xwýnhjê piitã mẽ hakrenh par. Nê àhpumunh o àhpumunh o kot mẽmoj piitã hakrenh par jakamã kêr ka mẽ kapêr kôt pix ma nê hkôt pix mã ri amnhĩ nhĩpêx o ri apa.

Mẽ pahte amnhĩ nhĩpêx nyw jarênh Rômãn 6.3; Karatas 5.24

¹¹ Nê na hte ixkwý Ijaewjaja mẽ hkra nhýrmã hprêk nê Tirtũm kôt amnhĩ nhĩpêx ã mẽ harênh kaxyw mẽ kêp mẽmy kwryt kà jakà. Tã mẽ kajaja. Mẽ apê Ijaew kêt xwýnhjaja na pre Kris mẽ anhiĩpêx o te mẽ kot amnhĩ jakarta pyræk. Jao te kot mẽ anê mẽ ate amnhĩ nhĩpêx tũm jakar par pyræk o mẽ anhiĩpêx ka mẽ ra amnhĩ nhĩpêx nyw o amnhĩ nhĩpêx o apa. Nhũm htem mẽ ate amnhĩ nhĩpêx nyw ã mẽ apumu nê mẽ ate Jesus kapêr kôt amnhĩ nhĩpêx ã mẽ apumunh kurê kumrêx. ¹² Tã na pu htem jarãhã mẽ pahte Tirtũm kôt amnhĩ nhĩpêx o papa hã amnhĩ jarênh kaxyw amnhĩ jakar kêt nê. Na pu htem hpãnhã amnhĩ kaxyw Tirtũm xihtýx o hihtýx xwýnhja kôt pajamaxpêr. Kot mẽ panê pahte amnhĩ tomnuj rênh par kôt pajamaxpêr hãmri nhũm mẽ gôx kãm mẽ pahkrã kumrã. Te mẽ pahte gôx kãm mẽ pahte amnhĩ nhĩpêx tũm rer par pyræk o amnhĩ nhĩpêx. Te Jesus htyk nhũm mẽ kot haxar nhũm nõr nhũm mẽ pahte amnhĩ tomnujja ãhã hã nõr nê hapêx par pyræk. Tã pu htem ra gôj rũm pahkrã hapôj. Te Tirtũm kot akupým Kris o htĩr pyræk. Jao ra mẽ

pahte Kris kôt amnhĩ nhĩpêx nyw o amnhĩ nhĩpêx o papa hkrax ã amnhĩ to amnhĩrĩt. ¹³ Amnepêm kormã mẽ pahte Jesus kôt amnhĩ xunhwýr kêt ri na pu prem ri amnhĩ tomnuj to nê tanhmã pajamaxpêr punuj to ho ri papa. Tirtũm noo mã te ra mẽ pahtyk pyræk. Tã Tirtũm te akupým Kris kôt mẽ pahto pahtĩr pyræk o mẽ panhiĩpêx nê mẽ panê mẽ pahte amnhĩ tomnuj piitã ho hapêx nê axte kãm hamaxpêr kêt kumrêx. ¹⁴ Te mẽ pahte tanhmã amnhĩ tomnuj to ho papa nhũm Tirtũm kot ja hã mẽ pahpumunh nê mẽ pahte amnhĩ tomnuj piitã hã kagà hpar pyræk. Nê kot kagàja pyr nê Kris nhĩhã hã pĩ kahpa hã nhôr pyræk. Jao te kot mẽ pahte amnhĩ tomnuj ã kagàta hkaxõnh nê rênh par pyræk o hipêx. ¹⁵ Hãmri nhũm Krisja pĩ kahpa hã htykja o mẽkarõmnuti mẽ mẽ õ pahi Satanasti wa mẽ ho hirerek pa. Jao hihtýx o kot mẽ hakrenh par ã amnhĩ to amnhĩrĩt. Te mẽ kot kutã amnhĩ xunhwýr xwýnh piitã mẽ noo mã mẽ ho krihkrit par nê ma akupým õ krĩ hwýr hkĩnh nê greer o mõrta pyræk.

¹⁶ Nê koja mẽmojaja mẽ awýr mra nê tee ri mẽ ate mẽmoj kur o akrĩ hã mẽ apumu nê mẽ amã:

—Kwa na hte Tirtũm kôt mẽ kot amnhĩ xunhwýr xwýnhjaja ja kur kêt nê. Nê ja ho hkõm kêt nê. Nê mẽ panhõ arĩgromnu pê sap ã ri mẽmoj tã àpênh kêt nê. Nê mytwry nyw ã mẽmoj tã àpênh kêt nê. Na htem ã Tirtũm ã hkĩnh o pa anê. Tã ã mẽ ate mẽ ixkôt amnhĩ nhĩpêx anhýr kêt jakamã mãn mẽ apê Tirtũm kra hkêt nã. Anê.

Tã nom kêr ka mẽ kapêr ma nê âm ama. ¹⁷ Amnepêm kormã mẽ pahte Kris kôt amnhĩ xunhwýr kêt ri na pu prem ã amnhĩ nhĩpêx anhýr o papa. Tã Jesus kôt amnhĩ xunhwý hãmri nê axte ã amnhĩ nhĩpêx anhýr kêt nê. Pãnhã kapêr pix ma nê hkôt pix mã amnhĩ nhĩpêx o ri papa.

Mẽ pahte mẽ kot Tirtũm kapêr o mẽ hêx xwýnhjê mar kêt ã mẽ pamã karõ

18 Nê koja mëmojaja mẽ awÿr mra nê hêx rom tanhmã mẽ amã amnhĩ jarênh to nê mẽ amã:

—Na pre Tĩrtũm ãm mẽ papxipix mẽ inhmã amnhĩ to amnhĩrĩt. Jakamã kwa mẽ ixkapêr ma. Kot kaj mẽ inhmar kêt nê hãmri nê mẽ amex kêt nê apa.

Anhÿr o mẽ amã kapêr japêr ka mẽ ama nê ãm mẽ ma. Rÿ nhũm mẽ amã:

—Tĩrtũm mẽ parom kot amnhĩ to rax o kot mẽ pahpiitã mẽ pajakrenh par jakamã kwa mẽ tanhmã amnhĩ to hwÿr to hkêt nê. Kot ka mẽ anê nhũm mẽ ama nê mẽ akamã gryk nê. No kêt mẽ amnhĩ to kapêr o wrÿk xwÿnhjê mãn wÿ. Koja mẽ ama nê mẽ akamã gryk kêt nê tanhmã mẽ amã mẽmoj nhĩpêx to. Anê.

Koja mẽ ã mẽ amã kapêr anê ka mẽ ama nê ãm mẽ ama. Te ho mẽ àhpumunh tÿx kãm mẽ kot ã mẽ amã kapêr anhÿr pyrãk no ãm mẽ kapêrja mex kêt. Na htem amnhĩ krã hkôt te amnhĩ to rax pyrãk o ã mẽ amã kapêr jao mẽ hamaxpêr tũm o hamaxpêr o ri pa. No mẽ apyrã nê mẽ hamaxpêr nyw o hamaxpêr kêt nê. 19 ãm mẽ kot Tĩrtũm kapêr kwÿm ri mẽ ahkre jakamã mẽ kêp Jejus kwÿ hkêt. No mẽ papajaja mẽ pahpê Jejus kwÿ na pu mẽ. Nhũm Jejus kêp mẽ panhõ Pahihti jakamã na hte tanhmã mẽ pahto paxihtÿx to pu htem kukwak ri tanhmã axpên to ajuta hto ho ri papa. Nê hkôt axpên to paxihtÿx o ri papa. Mẽ pahpiitã mẽ pahte hkôt amnhĩ nhĩpêx mex o ri papa kaxyw. Tĩrtũm kãm hprãm xà hkôt.

Mẽ pahte amnhĩ krã hkôt tãm amnhĩ nhĩpêx kêt ã mẽ pajarênh

Karatas 3.1-5, 5.1-9; Epes 2.8; Piri-pos 3.9

20-21 Nê wam mẽ pahte amnhĩ nhĩpêx tũm nê mẽ pajamexpêr tũmta te kot Kris kôt htyk nê mẽ pahpê hapêx par pyrãk jakamã na pu htem arĩ hkôt amnhĩ nhĩpêx kêt nê. Nê mẽkarõmnuti hkôt amnhĩ nhĩpêx kêt nê. Tã no nhũm xep ra mēhõja mẽ awÿr mō nê hêx rom mẽmoj nê tanhmã mẽ amã kapêr to nê mẽ amã:

—Kwa mẽ ja jamÿnh kêt nê. Nê ja hkur kêt nê. Nê ja kupênh kêt nê.

Anhÿr o mẽmoj nê mẽ akurê ho pa. Xep mẽ ã mẽmoj nê mẽ akurê anê ka xep mẽ ama nê mẽ hkôt amnhĩ nhĩpêx. Kwa nà mon ka mẽ ri axtem nê mẽ hkôt amnhĩ nhĩpêx? 22 Tĩrtũm kot mẽmojja nê tanhmã mẽ pahkurê htore hã. ãm mẽ kot amnhĩ krã hkôt mẽmoj nê mẽ akurê ka mẽ ama nê mẽ hkôt amnhĩ nhĩpêx. Mẽmoj kur nê mẽ akurê xwÿnhhta na htem kuku nhũm hapêx kurê kumrêx. Mo koja we Tĩrtũm omu nhũm kêp omnuj? Nà ja kot anhÿr kêt kênã. Mẽ ãm amnhĩ krã hkôt mẽ kot ja nê mẽ akurê. 23 Tã ã mẽmoj nê mẽ akurê anhÿr xwÿnhhaja na ka htem nhÿri mẽ omu nê mẽ kapêr ma nê atÿx ajamexpêr o:

—Nà te Tĩrtũm kôt amnhĩ nhĩpêx mex o pa pyrãk. Te mẽ àhpumunh tÿx pyrãk o ã mẽ inhmã mẽmoj jarênh anê. Anê.

No ãm mẽ kot mẽmoj jarênhja kot anhÿr kêt. ã mẽ kot amnhĩ nhĩpêx anhÿr xwÿnhhaja kêp Tĩrtũm kra hkêt. Na htem ãm amnhĩ krã hkôt mẽmoj nê mẽ akurê ho pa. Nê hã amnhĩ to jarkrar o ri pa. Mẽ ate ja hã mẽ mar nê mẽ kot amnhĩ to rũnh ã mẽ hkamnhix kaxyw. Na htem kot amnhĩ tomnuj pymaj tanhmã amnhĩ nhĩ hto ho pa. No ãm ri ã amnhĩ nhĩpêx anhÿr kaprÿ. Nê ãm htÿx Tĩrtũm kapêr o mẽ wrÿk xwÿnhjê hwÿr kaprÿ ho pa.

3

Mẽ pajamexpêr nyw nê mẽ pahte amnhĩ nhĩpêx nyw jarênh

Rõmãn 6.4-11

1 Nê na pre Tĩrtũm akupÿm Kris o htĩr nhũm mẽ pahte hkôt amnhĩ xunhwÿr jakamã te Tĩrtũm kot Kris nhĩpêx pyrã nê akupÿm mẽ pahto mẽ pahtrĩ pyrãk o mẽ panhĩpêx. Jakamã kwa kêr pu mẽ axte pahte amnhĩ nhĩpêx tũm kôt amnhĩ nhĩpêx kêt nê. Te Kris pyrã nê ra kaxkwa hwÿr paxàpir nê kamã ri papa pyrãk o amnhĩ nhĩpêx. Jao pajamexpêr nyw pix o pajamexpêr nê pahte amnhĩ

nhîpêx nyw pix o amnhî nhîpêx o ri papa. Te Kris kot amnhî nhîpêx pyrâk. Na pre akupÿm kaxkwa hwÿr api nê Tîrtûm nhîhkô hã mē ho amnhîptâr xà kamã hkrî ho hkrî.

²⁻³ Nê ra mē pahte Kris kôt amnhî xunhwÿr jakamã te jar pika hkôt pajapêx par nê Tîrtûm wa kuri kaxkwa kamã pamex nê papa ho papa pyrâk. Jakamã kwa kêr pu mē pahte amnhî nhîpêx nyw mã mân pajamexpêr rãhã ho papa. Nê axte mē pahte amnhî nhîpêx tûm mã pajamexpêr kêt nê.

⁴ Kris kêp akupÿm mē pahto mē pahÿr xwÿnh. Koja nhÿrmã akupÿn mē pahwÿr wrÿ hãmri nhÿm Tîrtûm te ho mex raxta pyrâk o mē panhîpêx nê mē pahto mex rax kumrêx.

*Mē pahte akupÿm amnhî nhîpêx tûm o paxujanâr kêt ã mē pamã karô
Epes 4.17-5.2*

⁵ Jakamã kwa kêr ka mē axte ate amnhî nhîpêx tûm kôt amnhî nhîpêx kêt nê. Te ra mē apê hÿk nê hapêx par pyrã nê axte kãm ajamexpêr kêt nê.

Jakamã axte ri axpên mjên rÿ axpên prô ho amnhîkati hkêt nê.

Nê nhãm ri mēmyjê hō rÿ mēnijê hō ho amnhîkati hkêt nê.

Nê mē amã tanhmã amnhî tomnuj to hprãm kêt nê.

Nê mē amã akukrêx rax prãm kêt nê. Kot ka mē ã amnhî nhîpêx anê nê gaa nê akukrêx rax gryk ã axte Tîrtûm mã ajamexpêr kêt nê.

⁶ ã mē kot amnhî nhîpêx anhÿr xwÿnhjaja Tîrtûm kãm mē hprãm kêt. Koja nhÿrmã tanhmã ja hã mē homnuj tÿx to. ⁷ Amnepêm kormã mē ate Kris kôt amnhî xunhwÿr kêt ri na ka prem ã amnhî nhîpêx anhÿr o ri apa. ⁸⁻⁹ Tã kêr ka mē axte ã amnhî nhîpêx anhÿr kêt nê.

Nê mē ri axpên kãm agryk o ano hkã karôt o axpên pumunh kêt nê.

Nê mē axpên kamã axàhkurê hkêt nê. Ri tanhmã axpên tomnuj to ho apa hkêt nê.

Rÿ axpên jakwa kamã mēmoj ma nê ri axpên xô ri tanhmã ri axpên mã ho axêx to ho ri apa hkêt nê.

Nê mē akapêr mã agêt o ri mē kãm akapêr kêt nê.

Nê mē ri mēmoj to axpên mã axêx hkêt nê.

Ã mē ate amnhî nhîpêx anhÿr tûmta ra mē apê hapêx par kênã.

Mē pahte amnhî nhîpêx nyw kôt amnhî nhîpêx ã mē pamã karô

Rômãn 12.2; Epes 4.23; Wam Pêtre 2.11

¹⁰ Nê na ka mē ra mē ate amnhî nhîpêx nyw o amnhî nhîpêx o ri apa. Jao ra mē pahto kator xwÿnh maatija kôt amnhî nhîpêx mex o mō. Kot kaj mē gaa nê rÿ hkôt amnhî nhîpêx mex kumrêx o ri apa. Kãm hprãm xà hkôt.

¹¹ Nê mē pahpê Kris kwÿjaja ahpÿnhã na pu mē. Na mē pakamã Ijaew nê Ijaew kêt xwÿnhjaja. Nê mē pakamã panhî nê kupê. Nê mē kãm àpênh xwÿnhjaja nê mē kot amnhî mã ri àpênh xwÿnhjaja. ãm ahpÿnhã mē pahpê Kris kwÿjaja mē pahte anhÿr tã na hte Tîrtûm tanhmã mē pakute hkôt mē pahpumunh kêt nê. Na hte mē panhîpêx o axpên pyrã nê mē pahpiitã mē pakamã pa ho pa pu htem pahpimràatã hkôt ri amnhî nhîpêx o papa.

¹² Nê Tîrtûm kãm mē pajapê nê kãm mē pajapê xàj mē pakukamã amnhîm mē parê. Mē pahte kãm tanhmã amnhî nhîpêx to ho ri papa kaxyw mē pakukamã mē parê.

Jakamã kêr ka mē axpên kamã axukaprî ho ri axpên kôt apa.

Nê axpên to mex pix o ri axpên kôt apa.

Nê mē amã amnhî to rax o axpên jakrenh prãm kêt nê.

Nê mē ãm amnhî pix kukamã ri ajamaxpêr kêt nê. Amnhî mē nhãm mē hkukamã ajamexpêr o ri apa.

Nê mē ri agryk tokyx anhÿr kêt nê.

¹³ Nê koja mēhō tanhmã mē ato ka mē amnhî tã omu nê tanhmã amnhî tã ho hkêt nê. ãm ja ho ajamakêtkati kurê kumrêx nê axte kãm ajamexpêr o ri apa hkêt

nê. Ra Jejus kot mē panê mē pahte amnhĩ tomnuj piitã rênh par kênã kot pu kêt mē amnhĩ tã tanhmã mēhõ hto. Tã kêt ka mē axpên to mex o ri apa nê amnhĩ tã tanhmã axpên to ho ri apa hkêt nê.

¹⁴ E kêt ka mē ã axpên nhĩpêx anhÿr o ri apa. No ãm ja pix kêt. Nê mē mãânên amã axpên kĩnh pê axpên kutã anojarêt rãhã nê. Kot kaj mē ã amnhĩ nhĩpêx anê nê mãânên ra ixte mēmoj tã mē amã karõta ka mē ho anhÿr mex kurê kumrêx. Mē pamã axpên kĩnhja na mex kumrêx o kot mēmoj piitã hakrenh par.

¹⁵ Nê kêt ka mē Kris kukwak ri anhõxàhkre kaxwÿnh kãm akĩnh nê ajamakêtkati nê tãm ri axpên nhĩpêx o ri axpên kôt apa. Te ixkre tipxi kamã mē ate axpên kôt ri amnhĩ nhĩpêx pyrãk. ã mē pahte amnhĩ nhĩpêx anhÿr o papa kaxyw na pre Tĩrtũm amnhĩ wÿr mē pahwÿ. Mē pahte hkôt amnhĩ xunhwÿr kaxyw.

Nê kêt ka mē Tĩrtũm mã amnhĩ jarênh kaxyw nê kãm Kra Jejus ã akĩnh ã amnhĩ jarênh o ri apa.

Mē pahte Tĩrtũm mã mex ã pagrer ã mē pamã karõ
Epes 5.19

¹⁶ Nê kêt ka mē Kris kapêr piitã hkôt amnhĩ nhĩpêx mex nê. Nê kapêr o axpên jahkre mex o ri axpên kôt apa. Tĩrtũm kot amnhĩ nhĩpêx o axpên jahkre ho ri axpên kôt apa. Nê kãm agrer o ri apa. Kãm mex o mex ã agrer o ri axpên kôt apa. Nê kãm kukwak ri akĩnh ã amnhĩ jarênh o kãm gre.

¹⁷ Nê kêt ka mē Mēpahpãm Tĩrtũm mã amnhĩ jarênh o:

—Pa Tĩrtũm. Nã ãm hãmri na ka pre mē ixwÿr Akra Jejus mē nhũm mē ixwÿr wrÿ nê mē inhnê ty.

Anhÿr o kãm amnhĩ jarê. Hãmri nê ãm Pahihti Jejus kot amnhĩ nhĩpêx kôt pix mã tanhmã ri amnhĩ nhĩpêx to rÿ ãm kôt pix mã tanhmã akapêr to ho ri apa.

Tanhmã mē pahte axpên nhĩpêx to hã mē pamã karõ
Epes 5.22-6.9

¹⁸ Nê mē anijaja. Tĩrtũm kot myja kumrêx nhĩpêx nê hkôt kãm hprõ nhĩpêx jakamã kêt ka mē amjên ã apijaãm o apa. Nê mē hamaxpêr mex ã mē omu nê mē hkôt ri amnhĩ nhĩpêx mex nê. ã mē ate amnhĩ nhĩpêxja na Tĩrtũm kãm hprãm.

¹⁹ Nê mē amyjaja kêt ka mē amã mē aprõ japê nê. Te amã amnhĩ tã ma pyrãk o mē hipêx o ri apa. Jao tanhmã mē homnuj to hkêt nê.

²⁰ Nê mē apê mē hkrajaja kêt ka mē anhĩpêxã nê akatorxã wa hã apijaãm nê wa kapêr ma nê wa hkôt ri amnhĩ nhĩpêx. ã mē ate amnhĩ nhĩpêx anhÿrja na Tĩrtũm kãm hprãm. Kojã ã mē ate amnhĩ nhĩpêx anhÿr ã mē apumu nê hkĩnh nê.

²¹ Nê kêt ka mē apê mē hipêxã nê mē katorxã mē akra gryk kaxyw mē kãm apêr o apikênh kêt nê. Kot kaj mē ã mē hipêx anê nhũm mē tee ri amnhĩ tã mē ama nê hkaprĩ nê.

²² Nê mē ate mē kãm tanhmã amnhĩ nhĩpêx to ho ri mē apa xwÿnhjaja kêt ka mē anhõ patrãw kapêr ma nê hkôt amnhĩ nhĩpêx. Nê mē noo mã mē kãm tanhmã amnhĩ nhĩpêx mex to nê mãânên mē wa kre kamã mē kãm tanhmã amnhĩ nhĩpêx mex to. Nom mē kot axapênh ã apumunh nê hã kãm akĩnh pix kaxyw axapênh mex kêt nê. Mãânên mē amã Pahihti Kris kĩnh ã akatãt kôt mē kãm mēmoj tã axapênh mex nê. Mē noo mã nê mãânên mē wakre kamã. ²³ Nê mē akĩnh kãm mē kãm axapênh mex o ri apa. Te mē ate Pahihti mã akĩnh kãm tanhmã kãm amnhĩ nhĩpêx to pyrã nê tãm amnhĩ nhĩpêx o tãm mē kãm axapênh mex o ri apa. ²⁴ Te mē anhõ patrãw pix mã axapênh pyrãk nom kumã pix mã hkêt. Mãânên mē panhõ Pahihti Krisja mã. Jakamã kot kaj mē ã amnhĩ kaxyw Tĩrtũm mã ajamaxpêr pê akĩnh kãm anhõ patrãw mã mēmoj tã apê nhũm Pahihtija ja hã mē apumu nê nhÿrmã mē ato mex rax nê. ²⁵ E kêt ka mē ã mē anhõ patrãw mã axapênh mex o ri apa anê. No kot kaj mē kapêr kwÿm amnhĩ krã hkôt ri tanhmã amnhĩ nhĩpêx to nhũm

Tirtûm tee ri ja hã mẽ apumu hãmri nê nhÿrmã tanhmã hã mẽ anhÿpêx to. Na hte ã mẽ kot amnhÿ tomnuj xwÿnhjê piitã mẽ hipêx anê nê mẽ hipêx o axpên pyrâk. Jakamã kwa kêr ka mẽ anhõ patrãw mã axâpênh mex rãhã ho ri apa.

4

¹ Nê mẽ apê mẽ õ patrãw kêr ka mẽ kot mẽ amã mẽ âpênh xwÿnhjê ho mex nê tanhmã mẽ homnuj to hkêr nê. Mẽ urâk nê kaxkwa kamã mẽ anhõ Patrãw maatija hkrÿ. Kot mẽ pahte tanhmã amnhÿ nhÿpêx to nê tanhmã mẽ pajamaxpêr to hã mẽ pahpumunh rãhã jakamã kêr ka mẽ noo mã mẽ ho mex rãhã ho ri apa.

E kêr ka mẽ apiitã ã axpên to mex anhÿr o ri apa.

Mẽ pahte Tirtûm mã amnhÿ jarênh rãhã hã mẽ pamã karõ

Matêwre 7.7; Rukre 11.1-8; Atre 1.14; Epes 6.18

² Nê kêr ka mẽ xatã Tirtûm mã amnhÿ jarênh rãhã ho ri apa. Nê tanhmã mēhõ kot amnhÿ nhÿpêx to hã harênh ma nê ho Tirtûm wÿ. Nê mẽ ate kãm amnhÿ jarênh kamã kãm mex o mex ã harê. ³⁻⁴ Nê mãânên ixto awÿ kê mẽ tokyx ixkator japêr. Pa ixâmnhÿx mẽ kot kormã Kris jarênh mar kêr xwÿnhjê mã harênh o ri mẽ hkôt ixpa. ã ixte amnhÿ nhÿpêx anhÿrta ã na prem ixpynê nê ijaxà pa kormã jar ixkrÿ. Jakamã kwa mẽ mãmrÿ ja hã ixto Tirtûm wÿr o apa.

Mẽ pahte apkati mẽ mẽ pahkwÿjê mã Jejus jarênh ã mẽ pamã karõ

Epes 5.16

⁵ Nê kêr ka mẽ kêp Kris kwÿ hkêr xwÿnhjê hkôt nhÿhÿm ri apa nê tãm ri Tirtûm kapêr kôt amnhÿ nhÿpêx o mẽ hkôt ri apa.

⁶ Nê kê mēhõ awÿr tē nê tanhmã Jejus ã akukjêr to ka amã hkÿnh ã aprÿ hã kãm awjarê. Ahpÿnhã tanhmã mẽ kot hã akukjêr to xà hkôt tanhmã mẽ kãm harênh to kê mēhprÿ hã mar mex nê.

Pawre kot Koros wÿr Xikitre mẽ Ones wa mēnh ã harênh

Epes 6.21-22

⁷⁻⁸ Nê ot pa mẽ awÿr mẽ pahtõ Xikitre mēnh mã. Kot ma mẽ awÿr ixte mẽ amã ixkapêr ã kagà nhÿpêx o mör kaxyw. Na hte ixkôt Tirtûm mã amnhÿ nhÿpêx o ri pa. Inhmã hapêê. Tã kot paj mẽ awÿr kumê kê ma mẽ awÿr mõ nê hprÿ hã mẽ amã ijarê. Mẽ ate ijarênh mar nê tãm ajamaxpêr nê akÿnh kaxyw. ⁹ Mẽ akwÿ Onesti hkôt koja ma mẽ awÿr mõ. Mãânên Kris kôt kêp mẽ pahtõ hã mẽ pamã hapê xwÿnh na. Na hte Tirtûm kapêr kôt amnhÿ nhÿpêx mex rãhã ho ri pa. Tã Xikitre mẽ koja wa ma mẽ awÿr mõ. Hãmri nê mẽ awÿr pøj nê jar tanhmã mẽ ixte amnhÿ nhÿpêx to hã mẽ ijarê ka mẽ ama.

Kris kôt mẽ hkwy kot mẽ hwÿr hpêr mēnh ã mẽ harênh

¹⁰ Nê ota Aristakja ixpyrà nê kêp prês nê hkrÿ. Tã mẽ awÿr hpêr mẽ. Nê Panãpe htõ Juãw Makreja mãânên mẽ awÿr hpêr mẽ. Na pa pre ra mẽ amã Juãw Makre jarê. Tã koja mẽmo arÿgro hã akupÿn mẽ awÿr mör japêr ka mẽ omu nê ho mex nê.

¹¹ Nê Jejus Justija mãânên mẽ awÿr hpêr mẽ. Jajaja mẽ ixpyrà nê kêp Ijaew. Tã mẽ tapxipixjaja na htem ixpyrà nê mẽ ixpê Ijaew kwÿjê rom mẽ kãm Tirtûm kapêr nyw o mẽ ahkre ho ri mẽ hkôt pa. Tirtûm kot Kra Kris kôt mẽ kot amnhÿ xunhwÿr xwÿnhjê ho hkra hã harênh nywja na htem mẽ kãm harênh o ri mẽ hkôt pa. Pa ja hã mẽ omu nê ixkÿnh nê. ¹² Nê mẽ anhÿõ Epasja mãânên mẽ awÿr hpêr mẽ. Na hte Jejus Kris mã tanhmã amnhÿ nhÿpêx mex to ho pa. Nê mẽ ato Tirtûm wÿr rãhã ho pa nê mẽ ato hwÿr o:

—Pa Tirtûm. E kwa tanhmã Koros kamã akrajê ho kê mẽ akôt amnhÿ xunhwÿr tÿx nê. Nê amã hprãm xà hkôt pix mã amnhÿ nhÿpêx o ri pa. Nê amnhÿ kaxyw Kris kôt pix mã hamaxpêr tÿx rãhã nê. Anê.

¹³ ãm hãmri na hte mẽ ato hwÿr o pa. Nom mẽ kapxipix o hwÿr kêr nê.

Mãânên krĩ pê Ratisej kamã nê krĩ pê Jerop kamã Kris kôt mẽ pahtôjê ho hwÿr o ri pa. Mẽ ate Tĩrtũm kôt amnhĩ nhĩpêx mex o apa kaxyw. Ixte ja hã omunh mex.

¹⁴ Nê jar mẽ pahtô tôtô Rukre mẽ Tẽmtija wa mãânên mẽ awÿr hpêr mẽ. Tôtô Rukreja kêp ixkràmnhwÿ mex na.

¹⁵ Nê kêr ka mẽ krĩ pê Ratisej kamã Kris kôt mẽ pahkwÿjê mã ijarê. Nê Nĩpare mã nê ôrkwÿ hwÿr mẽ pikuprônh nê Tĩrtũm mã mex o mex ã harênh o mẽ hkrĩ xwÿnhjê mã mãânên ijarê.

¹⁶ Nê e kêr ka mẽ ixte mẽ awÿr kagà mênhja kamã harênh pa nê hpãnhã krĩ pê Ratisej kamã Kris kôt mẽ pahkwÿjê hwÿr amê kê mẽ apyrà nê kamã harê nê piitã kuma. Nê mẽ kãm anê kê ra ixte mẽ hwÿr kagà mênh xwÿnhhta kê mẽ amã kugõ ka mẽ kuxwar kamã harê nê ama.

¹⁷ Nê kêr ka mẽ Akip mã ijarê kê ra Tĩrtũm kot kãm mẽmoj tâ karõ xwÿnhhta kê ho anhÿr jatur xàm kumê. Kêp hkra hã kê tãm kãm àpênh jatur xàm kumê.

¹⁸ Tã ãm ja pix. E paj pam amnhĩ nhĩhkra ho hatur xà hã kagà. Mẽ ate ixte mẽmoj tâ kagà pumunh nê hkôt inhmã ajamaxpêr kaxyw. Nê ixte mẽ awÿr mênh ã ijarênh mar kaxyw. Kwa kêr ka mẽ arĩ ixpê prês ã ixto Tĩrtũm wÿr rãhã ho ri apa.

E kê Tĩrtũmja mẽmoj to mẽ akutã nojarêr nê mẽ ato mex nê ka mẽ amex nê ajamakêtkati nê apa ho apa. Tã ãm ja pix. Ixpê Pawre na pa mẽ awÿr kagàja nhĩpêx nê ã mẽ awÿr mênh anê.

Wam Tesarõn Pawre kot Tesarõn kamã Jejus kõt hkwýjê hwýr kagà nê mênh

Pawre na pre kagàja nhîpêx. Kêp Jejus nhÿ hã mē ahkre ho pa xwýnhjê hõ na pre. Jakamã na pre kagàja nhîpêx nê ma krî pê Tesarõn kamã Jejus kõt hkwýjê hwýr kumê. Tesarõn kamã Jejus ã kãm mē hkurê xwýnhjaja na prem Jejus ã mē homnuj o pa nhũm mē amnhî xà htýx kamã hamak o pa. Hãmri nhũm Pawre mē harênh ma nê kagàja nhîpêx nê mē hwýr kumê. Kot mē kãm mē hamaxpêr o hihtýx kaxyw mē kot arî Jejus kõt amnhî nhîpêx mex o pa nê aa hkaga hkêr ã mē kãm karõ. Nê nhÿrmã Jejus akupÿn kaxkwa rũm mē pahpê hkwýjê hwýr wrýk nê ma akupÿm amnhî kõt mē pahto àpirja nhũm mē kãm harê. ã na pre mē kãm mēmoj jarê nê hã kagà anê nê mē kãm:

¹ Pa mē apê Tesarõn kamã Jejus kwý hã axpên wýr mē apikuprõnh xwýnhjaja? Xà mē amex na ka mē apa? Ixpê Pawre na pa mē awýr kagàja nhîpêx nê mē awýr kumê. Siras mē Ximotre mē pa mē awýr kumê. Mē pahpê Mēpanhîpêxà maati Tirtũm mē Pahihti Jejus Kris wa hkwý jakamã na pa htem mē ato Tirtũm wýr rãhã ho ri ixpa. Kot mē akutã nojarêr rãhã nhũm mē ajamakêtkati nê axãmnhix mē apa kaxyw.

²⁻³ Nà mēmoj kêt. Na pa htem mē amã ijamaxpêr nê mē anhÿ hã ixkînh nê ixpa hãmri nê mē awýr kagàja mē. Na pa htem mē ato Tirtũm wýr rãhã ho ri ixpa nê kãm mē ajarênh o:

–Pa Tirtũm. E mãn ka Tesarõn kamã akrajê pumu. ãm hãmri na ka pre tanhmã mē hkrã hto nhũm mē akõt amnhî nhîpêx mex o pa. Na htem amnhî kaxyw akõt hamaxpêr tÿx nê. Jao mē piitã mē kamã ukapri kamã tanhmã mē ho ajuta hto ho pa.

Nhũm mē kãm mē ixkurê xwýnhjaja Pahihti Jejus Kris ã tanhmã mē ho ho pa htã nhũm mē tee ri amnhî kukamã hamaxpêr o hkapri nê Jejus mē war akaga hkêr nê. Arî war anhÿ hã amnhî to htýx nê Pahihti Jejus kutêp tanhmã kãm amnhî nhîpêx to ho pa. ãm hãmri na htem ã amnhî nhîpêx anê Tirtũm. Na pa htem mē kot ã amnhî nhîpêx anhÿrja mã ijamaxpêr nê ixkînh nê.

Anhÿr o pa htem mē ato kuwý. ⁴ E Kris kõt ixkwýjaja. Nà Tirtũm kãm mē ajapê jakamã na pre amnhim mē arê. Kot mē ato hkra nhũm nhÿrmã kuri mē amex nê atir tũm nê apa ho apa kaxyw. Ra mē ixte ja hã mē ajarênh mar mex.

*Mê piitã mē kot Tesarõn nhõ
xwýnhjê jarênh mar ã mē harênh*

⁵ Nê na pa prem ma mē awýr mõ nê mē amã Jejus jarênh o mē akõt ixpa. Kot mē panê tanhmã amnhî nhîpêx to hã harênh o ri mē akõt ixpa. Nom pa mē amnhî krã hkõt mē amã ixujarênh kêt nê. ãm Tirtũm Karõ nhÿ hã na pa prem hihtýx xà ho tanhmã mē amã ixkapêr to ka prem mē inhma nê mē ixkõt ajamaxpêr kurê kumrêx. Na pa prem tãm amnhî nhîpêx o ri ixpa ka mē ja hã mē ixpumunh o ri mē ixkõt apa. ⁶ Tã Jejus kõt amnhî xunhwý nê hkõt amnhî nhîpêx mex nê. Nê mē ixkõt amnhî nhîpêx mex nê. Mē kot Jejus ã tanhmã mē ato htã ka htem Tirtũm Karõ nhÿ hã akînh nê hkõt amnhî nhîpêx mex rãhã ho ri apa. ⁷ Tã nhũm pika pê Masetõn mē Gres wa kamã Jejus kõt mē pahkwýjaja ã mē ate amnhî nhîpêx anhÿr ã mē ajarênh ma nê mē apyrã nê ã amnhî nhîpêx anhÿr o pa. ⁸ Na ka prem tanhmã Jejus kot mē panê amnhî nhîpêx to hã harênh o ri mē hkõt apa nhũm mē piitã mē akapêr ma. Nom mē tapxipixjaja mar kêt nê. Na mē ra ohtõ nê mē ajarênh ma nê mē apyrã nê ma mē kãm Jejus jarênh o pa. Ra mē ate Jejus kõt amnhî xunhwýr ã amnhî jarênh o ri apa nhũm mē piitã kot mē amar jakamã mē pajaja na pa

hthem mẽ kãm ã mẽ ajarẽnh anhÿr kêt nẽ. Mo kaxyw? Ra mẽ kot mẽ ajarẽnh mar mex kẽnã. ⁹ Na pa htem nhÿri krĩ hõ hwÿr pøj nhũm mẽ ixpumu nẽ ra mẽ tãmjaja mẽ inhmã mẽ ajarẽnh kurê kumrẽx. Nẽ mẽ ajarẽnh o:

—Kwa Tesarõn kamã Kris kôt mẽ pahkwÿjaja na xep kãm mẽ akĩnh nẽ. Amnepẽm na pre htem amnhĩm sãnti nhĩpêx nẽ kęp mẽhpãm ã harẽ nẽ amnhĩ to hwÿr o pa. Tã ka xep prem ma mẽ hwÿr mõi nẽ mẽ kãm Tĩrtũm kapêr jarẽ nhũm mẽ ama nẽ Tĩrtũmja sãnti rom ãm hãmri hã omunh kurê kumrẽx. Hãmri nẽ gryk ã sãnti kaga hpa nẽ Tĩrtũm kôt amnhĩ xunhwÿ nẽ hkôt pix mã amnhĩ nhĩpêx mex o pa. ¹⁰ Nẽ amnhĩ wÿr Tĩrtũm Kra kamã hamak rãhã ho ri pa. Anẽ.

Ãm hãmri na ka htem amnhĩ wÿr kamã hamak rãhã ho apa. Na pre ty nhũm Hipêêxà Tĩrtũm akupÿm ho hũr. Tã koja nhÿrmã akupÿn mẽ pahwÿr kumẽ nhũm akupÿn mẽ pahwÿr wrÿ. Hãmri pu mẽ ãm pix kukwak ri mẽ kot amnhĩ xà htÿx kãm hamak o pa htũm xàta wÿr papa hkêt nẽ.

2

Pawre kot amnhĩ jarẽnh Sikũn Korĩt 1.12, 4.1-6

¹⁻² Nẽ kormã mẽ awÿr mẽ inhmõr kêt ri na pa prem kormã Piripos nhõ xwÿnhjê mã Tĩrtũm kapêr jarẽnh o ri mẽ hkôt ixpa. Nom nhũm mẽ hkwÿjaja kãm mẽ inhmar prãm kêt nẽ. Na prem Jesus ã mẽ inhmã kapêr punuj nẽ mẽ inhĩpêx kati pa prem amnhĩ xà htÿx kamã ijamak o mẽ hkôt ixpa. Na ka prem ja hã mẽ ijarẽnh ma. ã mẽ kot mẽ inhĩpêx anhÿr tã pa mẽ tee ri amnhĩ kukamã ijamaxpêr pê Tĩrtũm kapêr jarẽnh kaga hkêt nẽ. Na pa prem arĩ mẽ kãm Jesus kot tanhmã mẽ panê amnhĩ nhĩpêx to hã harẽnh o ri mẽ hkôt ixpa. Tã mẽ awÿr inhnojarêt nẽ Tĩrtũm nhÿ hã amnhĩ to htÿx nẽ ma mẽ awÿr mõi. Hãmri nẽ mẽ amã tanhmã Jesus jarẽnh to ho ri ixpa. Ka prem mẽ inhma hãmri nẽ axohtõ nẽ

hkôt amnhĩ xunhwÿ. ³ Nom pa prem ixêx rom tanhmã mẽ amã ixkapêr to hkêt nẽ. Rÿ mẽ inhmã mẽmoj prãm xàj mẽ ano kupyrr pê mẽ amã ixkapêr kêt nẽ. ⁴ Rÿ mẽ ate mẽ ixkapêr mar nẽ mẽ inhmex ã mẽ ijarẽnh kaxyw pa tanhmã mẽ amã ixkapêr to hkêt nẽ. ãm Tĩrtũm kot mẽ inhmar nẽ tapxipix mẽ inhmex ã mẽ ijarẽnh pix prãm xàj na pa prem mẽ amã kapêr jarẽnh o ri mẽ akôt ixpa. Tĩrtũm tapxipix na hte tanhmã mẽ pakute hkôt mẽ pahpumunh rãhã ho pa. Tãm na pre mẽ ixte kapêr jarẽnh o ri ixpa kaxyw mẽ ixunhwÿ.

⁵ Xàn pa prem mẽ ijakwa nhĩkjê ho mẽ ate tãm amnhĩ nhĩpêx ã mẽ ajarẽ hãmri nẽ mẽ ijakwa nhĩkjê ho mẽ ato ixkapêr punuj nẽ? Nà na pa prem ã amnhĩ nhĩpêx anhÿr kêt nẽ. Na pa prem ixkatat kôt mẽ ate amnhĩ nhĩpêx ã mẽ apumunh kôt tanhmã mẽ ajarẽnh to ho ri ixpa.

Nẽ xà mẽ ate mẽ ixkapêr mar nẽ akĩnh nẽ hpãnhã mẽ inhmã amnhĩrer kaxyw na pa prem mẽ awÿr mõi nẽ mẽ amã Jesus kapêr o mẽ ajahkre? Nà na pa prem kàxpore prãm xàj mẽ amã ixkapêr kêt nẽ. Tĩrtũm kot ja kôt mẽ ixpumunh mex.

⁶ Rÿ xà mẽ ate mẽ inhmex ã mẽ ixto jarkrar kaxyw na pa prem mẽ awÿr mõi? Nà mããnhẽn ja kaxyw kêt. ã mẽ ate mẽ ijarẽnh anhÿr prãm xàj na pa htem Tĩrtũm kapêr o mẽ ajahkre ho ri ixpa hkêt nẽ.

⁷ Rÿ xàn pa pre mẽ awÿr mõi nẽ mẽ amã amnhĩ jarẽnh o:

—E mẽ ixte Jesus nhÿ hã ixkapêr o ixpa xwÿnh jakamã kot paj mẽ amã tanhmã ixkapêr to ka mẽ inhma nẽ hpãnhã mẽ inhmã amnhĩre.

Anhÿr o mẽ amã ixkapêr? Nà na pa pre ã mẽ amã ixkapêr anhÿr kêt nẽ. Na pa prem te mẽ katorxà kot hkrajê nhĩpêx pyrãk o mẽ anhĩpêx nẽ amarĩ mẽ ajahkre ho ixpa nẽ mẽmoj tã mẽ awÿr kêt nẽ.

⁸ Mẽ inhmã mẽ akĩnh jakamã na pa prem mẽ amã ixprĩ hã Tĩrtũm kapêr piitã harẽnh par o mẽ akôt ixpa nẽ

mê kot ja hã tanhmã mê ixto pymaj tee ri amnhĩ kukamã ijamaxpêr o ri ixkaprĩ hkêt nê. ãm ixãmnhĩx ri tanhmã Jejus kot mê panê amnhĩ nhĩpêx to hã harênh o mê akôt ixpa. ⁹ Mê apê mê ixkwý jakamã na pa prem tanhmã mê amã ixkapêr to hpãnhã mê ixàpkur xà rý mêmoy tã mê awýr kêt nê. Na pa prem mê pamjaja mêmoy tã ixàpênh pê mê amã ixkapêr o ri ixpa. Nê ixàpênh rũnh kumrêx. Arĩgro hã nê kamàt kãm. Mãn arĩ mê ate ã mê ixte amnhĩ nhĩpêx anhýrja ã anohtýx japêr ko. ¹⁰ Na pa prem tãm amnhĩ nhĩpêx o mê akôt ixpa. Tĩrtũm kãm hprãm xà hkôt. Jao tanhmã amnhĩ to mex to rãhã ho ri ixpa ka prem amnhĩ tã mê ixpumu. Nhũm Tĩrtũm haxwýja ja hã mê ixpumu. ¹¹ Na pa pre mê apê mê ixkra pyræk mê anhĩpêx o ri mê akôt ixpa. ¹² Jao mê amã ixkapêr mex nê. Nê mê akaprĩ nê apa xwýnhjaja pa prem akupým mê ajamaxpêr o mê axihtýx hãmri nê mê apiitã mê amã ixkapêr nê mê amã:

—Kwa kêr ka mê Tĩrtũm kôt amnhĩ nhĩpêx mex rãhã ho ri apa nê aa hkaga hkêt nê. Anê.

Tĩrtũm tãm na pre amnhĩ wýr mê pahwý pu prem hkôt amnhĩ xunhwý. Tã koja nhýrmã amnhĩ wýr mê pahto api pu mê Kra Jejus kukwak ri wa kuri pamex kumrêx nê ri papa ho papa. Jakamã kwa kêr ka mê hkôt amnhĩ nhĩpêx mex rãhã ho ri apa.

Jejus kwýjaja kãm Jejus kôt amnhĩ xunhwýr hkêt xwýnhjê pyma hkêt

Atre 17.1-9

¹³ Nê ma mê awýr mê inhmõrta ã na pa prem mê amã Tĩrtũm kapêr jarênh o ri mê akôt ixpa ka prem mê inhma nê mê ixte amnhĩ krã hkôt mê ixkapêr ã mê ixkamnhĩx kêt nê. Na ka prem ãm hãmri mê ixte Tĩrtũm kapêr jarênh ã mê ixpumunh kurê kumrêx nê amnhĩ kaxyw hkôt ajamaxpêr nê Jejus mê Hipêêxà wa hkôt amnhĩ xunhwý. Jakamã na pa hte mê amã ijamaxpêr nê mê anhý hã ixkĩnh nê. Hãmri nê Tĩrtũm mã mê anhý hã ixkĩnh jarênh o ri ixpa. Nà na ka htem

arĩ Tĩrtũm kapêr kôt amnhĩ nhĩpêx mex nê. ¹⁴ Nhũm hte mê akwýjaja tee ri ja hã mê apumu nê Jejus ã mê atomnuj nê. Nom mê kapxipixjaja ã mê anhĩpêx anhýr kêt nê. Jutej kamã Ijaew kwýjaja na prem mê apyrà nê Jejus kôt amnhĩ xunhwý nhũm mê hkwyýjaja tee ri ja hã mê omu nê hã mê hipêx kati ho pa.

¹⁵ Amnepêm Ijaew na prem Tĩrtũm nhý hã mê kãm kapêr o mê pa xwýnhjê homnuj nê mê hkwyýjê hpar o pa. Hãmri nhũm hpãnhã mê hkanrêhã mê htãmnhwýjaja mê uræk nê Pahihti Jejusja pí. Tã jarãhã mãânên ã Jejus ã mê panhĩpêx anê nhũm Tĩrtũm tee ri mê pahtã mê omu nhũm ja kêp omnuj týx kumrêx nhũm mê pahtã mê kamã gryk nê.

Na hte mê apê Ijaew kêt xwýnhjê ho hkra nhũm Ijaew kãm ja prãm kêt ¹⁶ jakamã na htem mê akwý kot Tĩrtũm kôt amnhĩ xunhwýr pymaj mê anê mê ixkurê nê mê inhmã:

—Kwa Ijaew kêt xwýnhjê mã Tĩrtũm kapêr jarênh kêt nê. Ja mex kêt. Anê.

Mê ate Jejus kôt amnhĩ xunhwýr nê nhýrmã Tĩrtũm wa kuri atĩr tũm nê apaja mê kãm hprãm kêt jakamã na htem ã mê anê àmnàr o pa anhýrja o amnhĩ tomnuj nê. Mê kot amnhĩ tomnuj týx o mê pa xwýnh jakamã na Tĩrtũm mê kamã gryk nê. Koja nhýrmã mê kot amnhĩ xà htýx kamã hamak tũm xà hwýr mê rênh pa.

Pawre akupým Tesarôn nhõ xwýnhjê hwýr hkrà hã harênh

Atre 17.10-13

¹⁷ Nê ma mê awýr mê inhmõr tã mê anhõ krĩ kamã mê kêp Kris kwý hkêt xwýnhjaja na pre mê ixpumu nê mê anê mê ijano pa prem ijapôj nê hpãnhã ma nhýhým krĩ hõ hwýr ixpa. Nom arĩ mê amã ijamaxpêr rãhã nê mê ato ijamak o ri ixpa nê xatã akupým mê awýr ixkrà. ¹⁸ Na pa prem inhmã akupým mê awýr inhmõr prãm týx nê. Ixpê Pawre na pa pre xatã mê awýr ixkrà htã nhũm Satanasti tanhmã mê anê ixpê amnàr to pa kormã mê awýr inhmõr kêt

nẽ. Æm tee ri inhmõr prãm kaprÿ.
 19-20 Mẽ inhmã mẽ akĩnh tÿx. Mẽ ate
 Tirtũm kõt amnhĩ nhĩpêx mex jakamã
 koja nhÿrmã Pahihti Jejus akupÿn mẽ
 pahwÿr wrÿ pa mẽ akuri xa nẽ kãm
 mẽ ajarênh o:

—Pa Pahihti. E Tesarõn nhõ
 xwÿnhjê pumu. Na ka pre mẽ hwÿr
 inhmẽ pa mẽ hwÿr mõi nẽ mẽ kãm
 ajarê nhũm prem inhma nẽ amnhĩ
 kaxyw akõt hamaxpêr tÿx nẽ akõt
 amnhĩ xunhwÿ. Tã na htem akõt tãm
 amnhĩ nhĩpêx rãhã ho pa.

Anhÿr o kãm mẽ ajarê nẽ mẽ anhÿ
 hã ixkĩnh tÿx kumrêx.

3

*Pawre kot Tesarõn wÿr Ximotre
 mẽnh ã harênh*

Atre 17.14-15, 18.5

1-5 Nẽ kormã mẽ akõt ixpa ri na pa
 pre Kris kwÿ hkêt xwÿnhjaja kot Kris ã
 tanhmã mẽ atomnuj to hkukamã mẽ
 amã mẽ harê ka prem mẽ inhma. Na
 htem ã Kris ã mẽ pahkurê xwÿnhjaja
 mẽ panhĩpêx anhÿr o pa. Tã nhũm
 prem ã mẽ anhĩpêx anê pa mẽ ajarênh
 ma nẽ tee ri mẽ akukamã ijamaxpêr
 nẽ axpên mã mẽ ajarênh o:

—Hêxta waa nẽ. Kwa mẽ kot Jejus ã
 tanhmã mẽ homnuj toja mÿrapê mãn
 mẽ tee ri amnhĩ kukamã hamaxpêr
 nẽ Jejus kaga rÿ ko. Mãn ra Satanasti
 tanhmã mẽ kãm Jejus o hêx to nhũm
 mẽ kuma nẽ tanhmã hamaxpêr to nẽ
 hkaga. Kwa mãn pu prem ã mẽ kãm
 Tirtũm kapêr jarênh kaprÿ nã? Anê.

Hãmri nẽ tee ri mẽ akukamã ija-
 maxpêr nẽ mẽ awÿr Ximotre mẽnh
 kaxyw nẽ kãm:

—Mãn ra Tesarõn nhõ xwÿnhjaja Je-
 jus ã tanhmã mẽ homnuj to nhũm mẽ
 amnhĩ xà htÿx kamã hamak o ra tee
 ri amnhĩ kukamã hamaxpêr. Kwa ma
 mẽ hwÿr mõi nẽ ja hã mẽ omu. Hãmri
 nẽ mẽ kot Kris kõt amnhĩ xunhwÿr
 tÿx kaxyw mẽ hamaxpêr o axihtÿx.
 Hãmri nẽ akupÿn wa ixwÿr mõi nẽ wa
 inhmã tanhmã mẽ harênh to. Kot paj
 Siras mẽ wa akutêp jar Atenas kamã
 wa arĩk. Anê.

Hãmri nẽ mẽ awÿr kumê. Ximotre
 na hte Siras mẽ wa inhĩhkô hã mẽ kãm
 Tirtũm kapêr jarênh o pa. Nẽ Kris kot
 tanhmã mẽ panê amnhĩ nhĩpêx toja
 nhũm wa inhĩhkô hã mẽ kãm harênh
 o pa. Tã pa pre mẽ awÿr kumê nhũm
 ma mẽ awÿr mõi pa Siras mẽ wa Ate-
 nas kamã kutêp arĩk.

*Ximotre akupÿn mõi nẽ Pawre mã
 mẽ harênh*

6 Tã nhũm ra ham akupÿn mẽ arũm
 wa ixwÿr mõi nẽ wa inhmã tanhmã
 mẽ ajarênh to pa wa mẽ ajarênh ma
 nẽ ixkĩnh nẽ. Na ka xep htem arĩ
 amnhĩ kaxyw Kris kõt ajamaxpêr tÿx
 rãhã nẽ. Jao mẽ amã mẽ piitã mẽ
 hkĩnh nẽ tanhmã mẽ ho mex to ho
 ri apa. Nẽ arĩ mẽ inhmã ajamaxpêr
 nẽ ixpyrà nẽ mẽ amã mẽ xpumunh
 prãm o ri apa. 7 Nã ãm hãmri na
 ka htem ã amnhĩ nhĩpêx anê. Na
 pa wa ra jar ixpunuj nẽ ixpa nẽ
 Kris ã amnhĩ xà htÿx kamã ijamak
 tã mẽ ajarênh ma nẽ tãm ijamaxpêr.
 8 Tesarõn nhõ xwÿnhjaja kot Kris ã
 tanhmã mẽ anhĩpêx to htã ka mẽ arĩ
 hkõt amnhĩ xunhwÿr tÿx rãhã nẽ. Pa
 wa mẽ ajarênh ma nẽ mẽ anhÿ hã
 ixkĩnh pé tanhmã Pahihti Jejus mã
 amnhĩ nhĩpêx to ho ri ixpa. 9 Nã na pa
 hte wa mẽ anhÿ hã ixkĩnh nẽ. Nẽ xatã
 Tirtũm mã mẽ ajarê nẽ kãm:

—Pa Tirtũm. Nã ãm hãmri na ka pre
 amnhĩ kõt Tesarõn kãm akwÿjê xun-
 hwÿr tÿx nẽ nhũm htem akõt amnhĩ
 nhĩpêx mex rãhã ho pa. Æm hãmri na
 ka hte ã mẽ hipêx anê. Na pa hte mẽ
 kot amnhĩ nhĩpêx mã ijamaxpêr o ri
 ixpa nẽ ixkĩnh nẽ.

Anhÿr o kãm mẽ ajarê. 10-11 Nom
 kãm ja pix jarênh kêt nẽ. Na pa
 hte wa mãânên arĩgro hã nẽ kamãt
 kãm amnhĩ to Mẽpanhĩpêêxã Tirtũm
 mẽ Pahihti Jejus Kris wa hwÿr kãm
 ixihtÿx rãhã ho ixpa nẽ wa kãm:

—Kwa Tirtũm mẽ Jejus wa. Na pa
 wa ra inhmã Tesarõn wÿr inhmõr nẽ
 mẽ pahkwÿjê pumunh prãm tÿx nẽ.
 Kormã mẽ kot akapêr jatur xà mar
 kêt. Tã wa inhmã akupÿm mẽ hwÿr
 wa inhmõr nẽ mẽ kãm akapêr jatur
 xãm mẽnh prãm. Mẽ kot mar nẽ akõt

amnhĩ nhĩpêx mex o pa kaxyw. Kwa xat ka wa akupỹm mẽ hwỳr wa inhmẽ nà? Anẽ.

Na pa hte wa ã amnhĩ to wa hwỳr rãhã ho ixpa anẽ. Tã koja wa akupỹm mẽ awỳr wa inhmẽ pa wa ma mẽ awỳr inhmõr kurê kumrêx. ¹² Koja Tĩrtũm tanhmã mẽ akrã hto ka mẽ amã axpẽn kĩnh pẽ tanhmã axpẽn to ajuta hto ho ri apa. Nẽ mẽ amã akwỳjê hã ma ho te mẽ kam amã amnhĩ tã ma pyrãk o ri apa. ã kot kaj mẽ apiitã axpẽn nhĩpêx anẽ. Te wa inhmã mẽ akĩnh pẽ tanhmã mẽ ato mex to pyrãk. ¹³ Koja Tĩrtũm ja kaxyw tanhmã mẽ akrã hto ka mẽ tãm ajamaxpêr mex nẽ. Kêr kê Jejus nhỹrmã akupỹn wrỳ. Mẽ kot hkõt amnhĩ xunhwỳr xwỳnhjê mẽ ro hã akupỹn wrỳ. Hãmri ka mẽ Mẽpanhĩpêexã Tĩrtũm kutã amnhĩ kukamã ajamaxpêr nẽ tãm mẽ ate amnhĩ nhĩpêx ã amnhĩ pumunh kõt akĩnh nẽ apikunhar o kuri akuhê. No ri tee ri amnhĩ kamã ajamaxpêr nẽ ajakwamnajre nẽ akuhê hkêt nẽ.

4

Tĩrtũm kãm mẽmoj prãm ã harênh Rõmãn 13.11-14; Epes 5.3-14

¹ E Jejus kõt ixkwỳjaja. Na pa prem ma mẽ awỳr mõi nẽ Tĩrtũm kapêr o mẽ ajahkre ho ri mẽ akõt ixpa. Mẽ ate mar nẽ Tĩrtũm kãm hprãm xã hkõt tanhmã amnhĩ nhĩpêx to kaxyw. Ka prem mẽ inhma nẽ hkõt amnhĩ nhĩpêx mex o ri apa. Tã kot paj axte ja hã tanhmã mẽ amã karõ hto. Pahihti Jejus nhỹ hã axte mẽmoj tã mẽ amã karõ. Jakamã kwa kêr ka mẽ arĩ Tĩrtũm kapêr kõt pix mã ri amnhĩ nhĩpêx mex nẽ ÿ hã amnhĩ to htỳx pẽ ã amnhĩ nhĩpêx anhỹr o ri apa. ² Na pa prem ra Jejus nhỹ hã mẽ amã mẽmoj tã karõ. Mẽ ate hkõt amnhĩ nhĩpêx prãm xãj mẽ amã hã karõ ka prem mẽ inhma. ³ Nà mẽ pahte tãm amnhĩ nhĩpêx o papaja na Tĩrtũm kãm hprãm. No kêt mẽ pahtỳx ri nhãm mênijê ho amnhĩkati o papaja na kãm hprãm kêt. ⁴ Jakamã kwa kêr ka mẽ amyjaja aprõ pix tãnopxar

o ri apa. No mẽ ri nhãm mênijê ho amnhĩkati ho ri apa hkêt nẽ. Nẽ mẽ anijaja kêr ka mẽ amjên pix tãnopxar o ri apa. No mẽ ri nhãm mẽmyjê ho amnhĩkati ho ri apa hkêt nẽ. ⁵ Jejus kwỳ hkêt xwỳnhjaja kot htỳx ri kãm hprãm xã hkõt mênijê hwỳr mrar nẽ mẽ ho amnhĩkati htã kêr ka mẽ ho mẽ urak kêt nẽ. Kwarĩ ho kwarĩ. ⁶ ã mẽ kot amnhĩ nhĩpêx anhỹr xwỳnhjaja koja Tĩrtũm nhỹrmã mẽ homnuj tỳx kumrêx. Na pa prem ra mẽ amã ja jarê ka prem mẽ inhma. Jakamã kwa kêr ka mẽ ã amnhĩ nhĩpêx anhỹr o ri apa hkêt nẽ. ⁷ Xã na pre Tĩrtũm ã mẽ pahte amnhĩ nhĩpêx anhỹr kaxyw amnhĩ wỳr mẽ pahwỳ nẽ mẽ pahto hkra? Nà ja kaxyw na pre mẽ pahto hkra hkêt nẽ. ãm mẽ pahte tãm amnhĩ nhĩpêx o ri papa kaxyw nẽ tãm ri axpẽn nhĩpêx o ri papa kaxyw na pre mẽ pahto hkra. ⁸ Jakamã kot kaj mẽ atõ ja hã mẽ inhma nẽ ãm mẽ inhma nẽ arĩ ã amnhĩ nhĩpêx anẽ. Hãmri nẽ mẽ pajaja mẽ ixkapêr nhĩrõp axãm kêt nẽ. Tĩrtũm kapêr nhĩrõp kot kaj xa. Nẽ mãânên kot mẽ pahwỳr Karõ mênh xwỳnhja kapêr nhĩrõp kot kaj xa.

⁹ Nẽ mẽ amã axpẽn kĩnh pẽ axpẽn to mex o apa hprãm xãj na pre Tĩrtũm tanhmã mẽ amã kapêr o amnhĩrit to ka htem ã axpẽn nhĩpêx anhỹr o ri apa. Jakamã kot paj mẽ axte ja hã tanhmã mẽ amã nẽ hkêt nẽ. ¹⁰ Na ka mẽ ra amã axpẽn kĩnh pẽ te mẽ kam amã amnhĩ tã ma pyrãk o axpẽn nhĩpêx o ri apa. Nẽ pika pẽ Masetõn kamã Kris kõt mẽ akwỳjaja ka mẽ mãânên amã mẽ hkĩnh pẽ ã mẽ hipêx anẽ. Tã kêr ka mẽ arĩ ã amnhĩ nhĩpêx anhỹr rãhã nẽ. ¹¹ Kot kaj mẽ ã amnhĩ nhĩpêx anẽ hãmri nẽ ajamakêtkati nẽ axãmnhix axapênh pix tãnopxar o ri apa. Jao mẽ hakwa kamã nhãm tanhmã mẽ hixi jarênh to ho ri apa hkêt nẽ. Nẽ ãm amnhĩ pix tãnopxar o ri apa. Nẽ amnhĩ pa kukwak ri axãpkur kaxyw amnhĩm axapênh mex o ri apa. Na pa prem ra ã ja hã mẽ amã karõ anẽ. ¹² Kot kaj mẽ ã amnhĩ nhĩpêx anẽ hãmri nẽ amã prãm xãj axãhwỳr

o ri apa hkêt nê. Nhũm Kris kwỳ hkêt xwỳnhjaja mẽ ate amnhĩ nhĩpêx ã mẽ apumu nê axpên mã mẽ ate tãm amnhĩ nhĩpêx xwỳnhjê hã mẽ ajarênh kurê kumrêx.

Kris kwỳ htyk xwỳnhjê jarênh

Matêwre 24.29-31; Wam Korĩt 15.51-58

¹³ E Kris kôt ixkwỳjaja. Na ka xep mẽ tee ri Kris kôt akwỳ htyk xwỳnhjê hkukamã ajamaxpêr. Jakamã kot paj ixprĩ hã tanhmã mẽ amã mẽ harênh to ka mẽ inhma. Nà Kris kwỳ hkêt xwỳnhjaja na htem ty nhũm mẽ hkwỳjaja tee ri mẽ hkukamã hamaxpêr o hkaprĩ nê. Mẽ htyk nê ma Jejus wỳr àpir kêt jakamã na htem mẽ mỳr pê hkaprĩ htỳx nê pa. No mẽ papajaja na pu htem ho mẽ uràk kêt nê. ¹⁴ Jejus na pre ty nhũm Tĩrtũm akupỹm ho htĩr. Tã ra ã kot hipêx anhỹr jakamã koja nhỹrmã Jejus akupỹn wrỳ nê mẽ kot hkôt amnhĩ xunhwỳr nê htyk xwỳnhjê karõ nhũm man amnhĩ kôt kaxkwa rũm mẽ o wrỳ. Na pu htem ã ja kôt pajamaxpêr anê. ¹⁵⁻¹⁶ Na pre Pahihti Jejus inhmã hkôt mẽ pahkwỳ htyk xwỳnhjê jarênh o:

—Kot paj nhỹrmã akupỹn mẽ awỳr wrỳ ka mẽ ate ixkôt amnhĩ nhĩpêx xwỳnh piitã ma ixkutã axàpir o mỗ. Nom kot kaj mẽ arĩ atĩr nê apa xwỳnhjaja akumrêx axàpir kêt nê. Kormã. Koja Tĩrtũm kapêr o mẽ wrỳk xwỳnh krãhtũmja Tĩrtũm mã pifti kakô. Kakôr tỳx pa ixkwỳ htyk nê hikwỳ xwỳnhjê mã ixkapêr nê ixãmra kamã mẽ kumra. Nhũm mẽ hkarõ akupỹn mẽ hwỳr wrỳ nê mẽ kãm gjêx pa. Hãmri nhũm mẽ akupỹm htĩr nê kànhmã hkrĩ hpa nê ma kumrêx ixkutã àpir o mỗ. ¹⁷ Hãmri ka mẽ ate ixkôt amnhĩ xunhwỳr xwỳnh arĩ mẽ atĩr nê apa xwỳnhjaja ka mẽ hã ajêt nê mẽ atipxi nê ma ixkutã axàpir o mỗ pu mẽ kakrã kamã axpên kaxpa. Hãmri nê mẽ pahpimràatã ma kaxkwam api nê inhõ krĩ hwỳr pøj. Kaj mẽ Tĩrtũm mẽ wa ixkuri amex kumrêx nê atĩr tũm nê apa ho apa. Anê.

¹⁸ ã Pahihti Jejus inhmã mẽ pakukamã mẽ pajarênh anê. Jakamã

kwa kêr ka mẽ tee ri mẽ pahkwỳ htyk xwỳnhjê hkukamã ajamaxpêr hkêt nê. ã ixujarênh anhỹrta ã anohtỳx pê axpên jamaxpêr o axihtỳx o ri axpên kôt apa.

5

Mẽ pahte akupỹn Jejus wrỳk xà hã arĩgro pumunh kêt ã harênh

Matêwre 24.32-25.13; Wam Pêtre 3.8-13

¹⁻² Nê mẽ pahte Jejus akupỹm wrỳk xà hã arĩgro pumunh kêt jakamã kot paj mẽ amã tanhmã hã kagà hto hkêt nê. Koja nhỹrmã akupỹn mẽ pahwỳr nojarêt hãmri nê te kot mẽ ahkĩnh xwỳnh kot amnhĩ nhĩpêx pyrã nê mẽ pajaêr pê mẽ pahwỳr wrỳ. ³ Jakamã koja kormã wrỳk kêt ri nhũm Kris kwỳ hkêt xwỳnh kot amnhĩ wỳr kamã hamak kêt xwỳnhjaja hãmri mex nê pa hã amnhĩ pumu nê hkĩnh nê pa. Nê axpên mã kapêr o:

—Nà koja Tĩrtũm tanhmã mẽ pahto hkêt nê. Arĩ mẽ pamex nê ri mẽ papa kênã. Nà kot puj mẽ paxãmnhĩx ri pajamakêtkati nê ri papa ho papa.

Anhỹr o axpên mã kapêr rôm nhũm puh Jejus mẽ haêr pê akupỹn wrỳ. Hãmri nê ma mẽ kot amnhĩ xà htỳx kamã hamak o pa htũm xà hwỳr mẽ rênh pa nhũm mẽ tee ri kêp hpimxur prãm kaprỳ. Te mẽ htujarõ xwỳnh kot amnhĩ nhĩpêx pyrãk. Na htem mex nê pa htã hpijagri kaxyw õhy xà htỳx kumrêx nê tee ri kãm õhy xà hkêt prãm kaprỳ ho hikwỳ. ⁴ Nom mẽ kajaja kot kaj mẽ urã nê amnhĩ jaêr pê akupỹm wrỳk kãm omu nê tee ri amnhĩ kukamã ajamaxpêr o akaprĩ hkêt nê. ⁵ Mẽ pahpê Jejus kwỳ jakamã na pu htem kapêr kôt ri tãm amnhĩ nhĩpêx o ri papa. Jao te mẽ pahte mẽ kêp Jejus kwỳ hkêt xwỳnhjê kot amnhĩ nhĩpêx pyrãk kêt. ⁶ Na htem mẽ pahkĩnhã akupỹn wrỳk kukamã hamaxpêr kêt nê. Te htỳx ri mẽ õt rãhã ho hikwỳ pyrãk. Nom mẽ papajaja na pu htem akupỹn wrỳk kamã pajamak o papa pê kãm tanhmã amnhĩ nhĩpêx mex to rãhã

ho ri papa. ⁷ Te kot ja pyræk. Na htem kamàt kãm gõr nẽ mẽmoj mã hamaxpër kêt nẽ htỳx hikwỹ. Nẽ mẽ hkwỳjaja kamàt kãm axpã nẽ htỳx ri tanhmã amnhĩ tomnuj to ho pa. Jao hamaxpër mex kêt nẽ. Tã mẽ kêp Jejus kwỳ hkêt xwỳnhjaja hte mẽ uræk nẽ htỳx ri tanhmã amnhĩ tomnuj to ho pa nẽ akupỹn Jejus wrỳk mã hamaxpër kêt nẽ. ⁸ No kêt mẽ papa-jaja. Mẽ pahte hkôt amnhĩ xunhwỳr xwỳnhjaja. Kêr pu mẽ ho mẽ uræk kêt nẽ. Satanasti kãm mẽ pahte amnhĩ tomnuj prãm tã mẽ pahte kãm hprãm xà hkôt amnhĩ nhĩpêx pymaj kêr pu mẽ mẽmoj punuj pê amnhĩ to htỳx rãhã ho ri papa.

Nẽ amnhĩ kaxyw Jejus kôt pajamaxpër tỳx rãhã nẽ.

Nẽ mẽ pamã mẽ piitã mẽ hkĩnh pê mẽ kutã panojarêt rãhã ho ri papa.

Nẽ nhỹrmã Tĩrtũm mẽ hkra Jejus wa kuri pahtĩr tũm nẽ papa ho papa hkukamã mãn pajamaxpër rãhã o ri papa.

Kot puj mẽ ã amnhĩ nhĩpêx anẽ hãmri nhũm Satanasti tee ri mẽ pahte amnhĩ tomnuj prãm xàj mẽ pahkrãm pajamaxpër punuj jagjênh kaprỳ.

⁹ Xà na pre Tĩrtũm mẽ pakamã gryk kãm mẽ kot amnhĩ xà htỳx kamã hamak tũm xà hwỳr mẽ pajanor kaxyw mẽ parê? Nà na pre ja kaxyw mẽ parênh kêt nẽ. ãm Pahihti Jejus Kris kukwak ri kot amnhĩ katut kôt mẽ pahte amnhĩ tomnuj rênh par nẽ mẽ pahto hkra kaxyw na pre mẽ parê.

¹⁰ Tã mẽmo kaxyw na pre Krisja mẽ panê ty? Nà nhỹrmã Tĩrtũm mẽ wa kuri mẽ pamek kumrêx nẽ pahtĩr tũm nẽ papa ho papa hprãm xàj na pre mẽ panê ty. Jakamã koja nhỹrmã akupỹm amnhĩ kôt ma mẽ pahto àpir kaxyw akupỹn mẽ pahwỳr wrỳ pu mẽ amnhĩ kaxyw hkôt pajamaxpër xwỳnh piitã ma hkôt kaxkwa hwỳr api hãmri nẽ Tĩrtũm wa kuri pamek nẽ pahtĩr tũm nẽ papa ho papa. Kormã mẽ pahtĩr ri mẽ papa xwỳnhjaja nẽ ra mẽ htyk nẽ hikwỹ xwỳnhjaja nhũm akupỹm mẽ

ho htĩr. Hãmri nẽ mẽ pahto hpimràatã amnhĩ kôt mẽ pahto àpir pa. Mẽ pahte hkôt amnhĩ xunhwỳr xwỳnh piitã koja Jejus nhỹrmã akupỹn wrỳ nẽ ã mẽ panhĩpêx mex anẽ.

¹¹ Tã ã kot anhỹr jakamã kwa kêr ka mẽ jam ajamaxpër o apa pê axpên jamaxpër o hihtỳx o ri axpên kôt apa. Nẽ Jejus kôt axpên jamaxpër o hihtỳx o ri axpên kôt apa. Ra ã mẽ ate axpên nhĩpêx anhỹr tã kêr ka mẽ arĩ ho anhỹr rãhã ho ri apa nẽ aa hkaga hkêt nẽ.

Tĩrtũm kapêr o mẽ pajahkre xwỳnhjê jarênh

Karatas 6.6; Wam Ximotre 5.17-19

¹² Nẽ kwa Kris kôt ixkwỳjaja. Na hte mẽ kot Tĩrtũm kapêr o mẽ ajahkre xwỳnhjaja mẽ ajahkre mex pê Tĩrtũm mã mẽ ajamãr mex o pa. Na htem ã mẽ anhĩpêx mex anhỹr rãhã ho ri mẽ akôt pa. Tã kwa kêr ka mẽ amnhĩ tã mẽ omu nẽ mẽ kapêr mar tỳx nẽ. ¹³ Nẽ mẽ hã apijaàm pê tanhmã mẽ ho mex to ho apa.

Nẽ kwa kêr ka mẽ tãm axpên nhĩpêx nẽ axãmnhĩx ri ajamakêtkati nẽ axpên kôt ri apa ho apa.

Mẽ pahte tanhmã Kris kôt mẽ pahkwỳjê nhĩpêx to hã mẽ pamã karõ
Epes 4.1-6

¹⁴ Nẽ koja Kris kôt mẽ anhĩõ kãm kaga nẽ pa ka mẽ ja hã omu nẽ kãm anẽ kê ã amnhĩ nhĩpêx anhỹr kêt nẽ. Kê hpãnhã amnhĩ xàpkur xà kaxyw àpênh o pa.

Nẽ mẽ kãm ma ho mẽ pa xwỳnhjaja ka mẽ kãm mẽ hamaxpër o axihtỳx o ri mẽ hkôt apa.

Nẽ kormã amnhĩ kaxyw Jejus kôt mẽ hamaxpër tohtuj anhỹr xwỳnhjaja ka mẽ tanhmã Jejus kôt mẽ ho mẽ axihtỳx to kê mẽ hkôt amnhĩ nhĩpêx mex o pa.

E kêr ka mẽ ã mẽ axpên nhĩpêx anhỹr o ri apa nẽ axpên kamã agryk tokyx anhỹr kêt nẽ.

¹⁵ Nẽ koja mẽhõ tanhmã atomnuj to ka mẽ ãm omu nẽ amnhĩ tã tanhmã ho hkêt nẽ. ãm ho mex o ri apa. Nẽ

mē piitā tanhmā mē ho mex to hpix kukamā ajamaxpēr rāhā nē.

¹⁶ Ā mē pahte amnhī nhīpêx anhÿr o papaja na Tirtūm kām hprām.

Mē pahpê hkra hā pahkīnh rāhā papaja na kām hprām.

¹⁷ Nē mē pahte Tirtūm mā amnhī jarēnh rāhā ho papaja na määnēn kām hprām.

¹⁸ Nē tanhmā mē pakute htā arī Tirtūm mā mex o mex ā harēnh o papaja na määnēn kām hprām. Mē pahkīnh nē papa kamā kām mex o mex ā harē. Rÿ mē pahpunuj nē papa htā arī kām mex o mex ā harē. Rÿ nhūm mēhō tanhmā mē panhīpêx to htā pu mē arī kām mex o mex ā harē.

Ā mē pahte amnhī nhīpêx anhÿr o papaja na Tirtūm kām hprām.

Mē pahte tanhmā Tirtūm Karō nhīpêx to hā mē pamā karō

¹⁹ Nē koja Tirtūm Karō mē amā mēmoj tā tanhmā kapēr o amnhīrīt to ka mē ama nē hkôt amnhī nhīpêx kurē kumrēx. Rÿ mēhō mā tanhmā akapēr to kurē kumrēx. No kêr ka mē ama nē ām ama nē atÿx ri hā apa hkêt nē. ²⁰ Rÿ nhūm mēhō Tirtūm Karō nhÿ hā tanhmā mē amā kapēr to ka mē ama nē agryk nē tanhmā ho akapēr punuj to hkêt nē. ²¹ Koja Tirtūm kapēr kôt tanhmā mē amā mēmoj jarēnh to nē ām hāmri Tirtūm Karō nhÿ hā harēnh ā amnhī jarē. Ka mē ama nē hkôt amnhī nhīpêx. ²² No koja Tirtūm kapēr kwÿm ri tanhmā mēmoj jarēnh to hāmri nē Tirtūm Karō nhÿ hā ja jarēnh kêt nē. Ām amnhī krā hkôt harē. Ka mē tee ri ama nē amnhī krā kamā kapēr xir tÿx kêt nē. Jao hkôt amnhī nhīpêx kêt nē.

Tanhmā Pawre kot mē ho Tirtūm wÿr to hā harēnh

Wam Tesarōn 3.3, 16

²³ Nē na pa hte mē ato Tirtūm wÿr o ri ixpa nē kām:

—Pa Tirtūm. Nà ate mē inhmā mē ijamakêtkati xà nhōr jakamā na pa htem anhÿ hā ixàmnhix ijamakêtkati nē ri ixpa. Jakamā kwa kêr ka

tanhmā Tesarōn kamā akwÿjê ho kê mē amnhī to mex rāhā ri pa. Jao tām amnhī nhīpêx nē tām ri hamaxpēr rāhā nhūm Pahihti Jejus Kris akupÿn mē ixwÿr wrÿ.

Anhÿr o mē ato kuwÿ. ²⁴ Tā koja ā mē anhīpêx anē. Ra kot amnhī jarēnh xà hkôt. Ā mē anhīpêx anhÿr kaxyw na pre amnhīm mē arē.

Kagà jatur xà

²⁵ E Kris kôt ixkwÿjaja. Kwa kêr ka mē amnhī xwar ixto Tirtūm wÿr o apa.

²⁶ Nē kêr ka mē atar Kris kôt mē pahkwÿjê piitā mē kām mē ijarē.

²⁷⁻²⁸ Nē kê Pahihti Jejus Kris mē akutā nojarêt rāhā ho pa. Ixte Pahihti nhÿ hā ā mē amā ixkapēr nē hā kagà anhÿr jakamā kêr ka mē atar Kris kwÿjê piitā mē kām kamā harē kê mē piitā ixkapēr ma.

Tā ām ja pix na hapêx. Ixpê Pawre na pa ā mē amā kagà nhīpêx nē mē awÿr mēnh anē.

Sikūn Tesarōn
Pawre kot Tesarōn kamā
Jejus kōt kwỳjê hwỳr wam
kagà nê mēnh kōt hō kagà
nê mēnh

Pawre na pre kagàja nhīpêx nê ma Tesarōn kamā Jejus kōt hkwỳjê hwỳr kumê. Na pre hte Tesarōn kamā mē kām Jejus ā mē hkurê xwỳnhjaja Jejus ā tanhmā mē homnuj to nhūm mē amnhī xà htỳx kamā hamak o pa. Hāmri nhūm Pawre mē harēnh ma nê kagàja nhīpêx nê mē hwỳr kumê. Nê kamā mē kām mē hamaxpēr o hihtỳx. Nê mē kot arī Tīrtūm kōt amnhī nhīpêx mex o pa nê hamaxpēr kōt hamaxpēr o pa hā mē kām karō. Nê nhỹrmā Jejus akupỳn kaxkwa rūm mē pahpê hkrajê hwỳr wrỳk nê pika ho hapêx par ā mē kām harê. Ā na pre Pawre mē kām kagàja kamā mē kām ujarēnh anê. Nê mē kām:

¹ Pa Tesarōn nhō xwỳnh kot Tīrtūm kapēr mar kaxyw axpēn wỳr mē apikuprōnh xwỳnhjaja? Xà mē amex na ka mē apa? Ixpê Pawre na pa axte mē awỳr kagà nhīpêx nê kumê. Siras mē Ximotre mē pa mē awỳr kumê. Nà mē pahpê Mēpanhīpêxà maati Tīrtūm mē Kra Jejus Kris kwỳ na pu mē. ² Jakamā na pa htem mē ato wa hwỳr rāhā ho ri ixpa. Wa kot mē akutā nojarêr rāhā ka mē ajamakêtkati nê apa kaxyw. Nê mēmoj to mē akutā wa nojarêr rāhā ho pa kaxyw.

Tīrtūm kot nhỹrmā hkrajê nhīpêx kati xwỳnhjê homnuj tỳx ā harēnh

Wam Pêtre 4.12-19

³ Nê na ka htem amnhī kaxyw Tīrtūm mā ajamaxpēr tỳx mex o ri apa. Nê axpēn kutā anojarêr rāhā nê. Na pa htem ā mē ate amnhī nhīpêx anhỹrja mā ijamaxpēr nê mē anhỹ hā ixkīnh nê Tīrtūm mā mē anhỹ hā ixkīnh ā amnhī jarê. ⁴ Nê nhỹhỹm ixpa nê nhỹri krīm agjê nê kamā

Tīrtūm kōt mē pahkwỳjê mā mē ato amỹra nê mē kām:

—E pa mē amā Tesarōn kamā Kris kwỳjê jarê ka mē inhma. Nà mē ō krī kamā mē hkwỳjaja na htem Kris ā mē hipêx kati ho pa nhūm htem amnhī xà htỳx kamā hamak pē mex kêt nê pa. Tā nom tee ri amnhī kukamā hamaxpēr o Jejus kaga hkêt nê. Na htem arī hkôt amnhī nhīpêx mex rāhā ho pa. Anê.

⁵ ā mē ate mē kutā amnhī nhīpêx anhỹr o apaja na hte Tīrtūm hā mē apumu nê hkīnh nê pa. Nê mē akukamā hamaxpēr o:

—Mê kot Ixkra Jejus ā tanhmā mē hipêx to ho pa htā ām hāmri na htem mē kutā amnhī to htỳx o pa nê mē umaj wa ixkaga hkêt nê. Na htem ā amnhī nhīpêx anê nê mē kēp ixkra hā amnhī to amnhīrīt mex nê. Nà koja mē nhỹrmā wa ixri mex kumrêx nê htīr tūm nê pa ho pa.

Anhỹr o hamaxpēr. ⁶ Nê mē kot Kris ā mē anhīpêx punuj xwỳnhjaja koja Tīrtūm nhỹrmā mē atā mē homnuj tỳx nê nhūm mē amnhī xà htỳx kamā hamak rāhā ho pa. Ām hāmri koja ā mē atā mē hipêx anê. ⁷⁻¹⁰ Koja Pahihti Jejusja nhỹrmā man akupỳn pika hwỳr hirā htỳx kām wrỳ nhūm Tīrtūm kapēr o mē wrỳk xwỳnh xihtỳx xwỳnhjaja man hkôt wrỳ. Koja mē wrỳ hāmri nê mē kot amnhī tomnuj xwỳnhjê homnuj tỳx kumrêx. Jao ma mē kot amnhī xà htỳx kamā hamak tūm xàta wỳr mē rēnh pa nhūm mē kamā htīr tūm nê amnhī xà htỳx kamā hamak rāhā ho pa ho pa. Koja ā Pahihtija amnhī nê mē kot hkôt amnhī xunhwỳr kêt xwỳnhjê rēnh anê nhūm mē pahkīnhā Tīrtūm mē Krata wa kuri mex nê pa hkêt nê. Nê mē pahkīnh ā wa mex o wa mex nê wa hihtỳx o wa hihtỳx ā wa omunh kêt nê. Koja Pahihti Jejus nhỹrmā akupỳn wrỳ nê ā mē panê mē hipêx anê. Koja wrỳ pu mē amnhī kaxyw hkôt pajamaxpēr xwỳnhjaja amnhī wỳr omu nê pahkīnh nê. Hāmri nê amnhī nhī nyw ā amnhī pumu nê kām:

—Hêxta waa nê. Amex o amex Pahihtî. Na ka pre mê inhnê ty hãmri nê mê inhmã mê inhî nyw gô. Kot paj mê Tirtûm mê war ari inhmex kumrêx nê ixtîr tûm nê ixpa ho ixpa. Âm hãmri na ka ã mê ixto mex anê. Nà amex kumrêx o amex kumrêx Pahihtî. Anê.

Â kot puj mê pahpê hkwyjaja amnhî tã kãm mex o mex ã harênh anê. Ra mê ate mê ixkapêr mar nê hkôt amnhî xunhwÿr jakamã kot kaj mê ixpyrà nê ã kãm mex o mex ã harênh anê.

Pawre kot Tesarôn nhô xwÿnhjê ho Tirtûm wÿr ã harênh

11-12 Nê na pa htem mê ato Tirtûm wÿr rãhã ho ixpa nê kãm:

—Pa Tirtûm? E Tesarôn kãm akra-jaja na pa mê ho awÿ. Na ka hte Akra Pahihtî Jejus Kris mê wa mê ho mex rax o apa. Jao amnhîm mê arê nhûm mê ra kãm amnhî to mex prãm nê. Na htem amnhî kaxyw Jejus mã hamaxpêr rãhã pê mêmoy to axpên kutã nojarêt o pa. Jakamã kwa tanhmã mê hkrã hto kê mê akôt ã amnhî nhîpêx anhÿr rãhã ho pa. Kêr ka mê kot akôt amnhî nhîpêx o pa hã mê omu nê akînh nê mê kãm mê mex ã mê harê. Nhûm mê ate tanhmã mê ho mex to hã amnhî tã apumu hãmri nê mê amnhî pyrà nê amã amex o amex ã ajarênh rãhã ho pa. Anê.

2

Kot amnhî tomnuj tÿx kumrêx xwÿnh maati jarênh

Matêwre 24.23-25; Makre 13.14-23; Rukre 21.20-24; Wam Juãw 2.18-19; Apokarip 13.1-18

¹ Nê koja nhÿrmã mê panhõ Pahihtî Jejus Kris akupÿn wrÿ pu mê ma kutã api nê kakrã kamã hkaxpa. Jakamã kwa Jejus kôt ixkwÿjaja. ² Koja mêmhõ mê awÿr mō nê mê amã Jejus ra akupÿn wrÿk ã harênh japêr. Rÿ tanhmã mê amã Jejus hpôx xà hã arîgro jarênh o hêx to nê mê amã:

—Kwa na ra Jejus akupÿn nojarêt. Koja tokyx akupÿn mê pahwÿr wrÿ. Semã ja kamã rÿ ko. Apu hõ hã koja apu wrÿ rÿ ko.

Anhÿr o harê. Nê Tirtûm Karõ nhÿ hã ã kot mê amã harênh anhÿr ã amnhî jarê rÿ nhãm mêmhõ kot ã kãm harênh anhÿr ã harê. Rÿ pa ixte harênh nê hã kagà hã ijarê. Nom kwa kêr ka mê kapêr ma nê âm ama nê hkôt ajamaxpêr kêr nê. Rÿ ama nê tee ri amnhî kukamã ajamaxpêr kêr nê. Koja mêmhõ ã mê amã Jejus tokyx wrÿk ã harênh anê nê âm amnhî krã hkôt ã harênh anhÿr o hêx. Nom Tirtûm Karõ nhÿ hã rÿ pa inhÿ hã rÿ nhãm Kris kôt mê panhîõ nhÿ hã ã harênh anhÿr kêr nê. ³⁻⁴ Jakamã kêr ka mê âm mê kot harênh o hêxja ma nê hkôt ajamaxpêr kêr nê. Kormã Pahihtî Jejusja akupÿn nojarêt kêr. E kot paj ixprî hã mê amã ja jarê ka mê inhma. Nà kormã Pahihtî akupÿn nojarêt kêr ri koja mê ohtô rax kumrêx nê Tirtûm kutã amnhî xunhwÿ nê kãm hkurê ho pa. Nê amnhî tomnuj tÿx o pa. Hãmri nhûm ra kot amnhî tomnuj tÿx kumrêx xwÿnh maatija amnhî to amnhîrît. Nom na pre ra Tirtûm tanhmã kot hipêx to hkukamã hã amnhî jarê. Koja xep gaa nê ma mê kot amnhî xà htÿx kamã hamak tûm xàta wÿr kumê nhûm kamã amnhî xà htÿx kamã hamak o pa rãhã nê pa ho pa.

Tã nom kormã Pahihtija akupÿn wrÿk nê ma hwÿr mêmhõ kêr ri koja mê piitã omu nê kêp Mêmhpãm maati pixi hã harênh kaxyw mê kêp mê õ sãnti piitã hkrakrak pa. Nê mê kot mêmoy karõ ho amnhî pãm ã harênh xwÿnhja nhûm piitã hkrakrak pa. Hãmri nê axtem nê Tirtûm mã amnhî jarênh xà hã ixkre jatur xà kamã hitom wÿr axà nê kamã nhÿ nê hêx rom mê piitã mê kãm kêp Tirtûm ã amnhî to hêx nê mê kãm:

—E mê amnê ixpumu. Ixpê mê anhõ Tirtûm na pa. Pa kot kaj mê inhmã inhmex o inhmex ã ijarê. No kêr ka mê anhõ sãnti ho apãm o apa hkêr nê. Kwarî ho kwarî. Âm paxipix ixpê Mêmhpãm maati nê paxipix ixpê mê anhõ Tirtûm.

Anhÿr o amnhî to hêx. ⁵ Na pa pre arî mê akôt ixpa ri ã mê amã harênh

anē. Mān arī mē ate ja hā anohtỳx rỳ ko. ⁶ Nom kormā ã kot amnhĩ nhĩpēx anhỹr xà hā arĩgrota kormā kator kêt. Mēhō kormā kot kēp àmnār jakamā nhũm kormā kator kêt nē. Ra mē ate kēp àmnār xwỳnhja jarēnh mar. Tā koja hpōx xà hā arĩgro kato nhũm kēp àmnār xwỳnhja kām pry kaprā nhũm rĩ kormā mō. ⁷ Nom na hte ra hpimxur pē Tĩrtũm nē mē piitā mē hkurē ho pa. Mē kot Tĩrtũm kôt amnhĩ xunhwỳr pymaj tanhmā nē mē ho ho pa. Nom kormā kēp àmnār xwỳnhja kēp àmnār jakamā nhũm hte mē noo mā tanhmā mē ho hkêt nē. Tā koja Tĩrtũm nhỹrmā kēp àmnār xwỳnhja mā anē nhũm kuma nē kām ure nhũm rĩ kormā amnhĩ to amnhĩrit nē mē piitā mē noo mā mō nē Tĩrtũm nē tanhmā mē kām hēx to ho pa. ⁸⁻¹² Koja kato nē Satanasti mē wa mē piitā tanhmā mē nokupyr to ho ri mē hkôt pa. Nē hēx rom mē kām aa mē kot mēmoj pumunh kêt kwỳ ho anhỹr o ri pa. Koja wa hēx rom te Tĩrtũm kot amnhĩ nhĩpēx pyrāk o ã amnhĩ nhĩpēx anē. Hāmri nhũm mē kot Jejus kôt amnhĩ xunhwỳr kêt xwỳnhjaja ja hā wa omu nē wa hkôt hamaxpēr kurē kumrēx. Nē ãm hāmri wa kapēr ã wa hkamnhĩx. Kop apu ra mē kot Tĩrtũm kapēr mar nē hkôt amnhĩ xunhwỳr ronhỹx ra Tĩrtũm amnhĩ tā mē omu nē mē ho hkra. Nom koja mē kām kapēr mar prām kêt nē. ãm wa kot amnhĩ to hēx o wa pa xwỳnhja kôt pix mā koja mē kām amnhĩ nhĩpēx prām.

Ja mỳrapē koja Tĩrtũm tee ri ja hā mē omu hāmri nē mē nē wa kot amnhĩ tomnuj tỳx xwỳnhja wa omunh kêt nhũm wa tanhmā mē kām amnhĩ nhĩpēx to nhũm mē wa omu nē wa hkôt hamaxpēr kurē kumrēx. Hāmri nē wa gryk ã Tĩrtũm kaga jakamā nhũm nhỹrmā mē kot amnhĩ xà htỳx kamā hamak tũm xàja wỳr mē rēnh pa.

Koja Satanasti mē kot amnhĩ tomnuj tỳx kumrēx xwỳnh maatita ã hēx rom tanhmā mē no kupyr to anhỹr o pa rāhā nhũm Pahihti Jejusja hirā rax kām akupỳn mē pahwỳr wrỳ. Hāmri

nē kot amnhĩ tomnuj tỳx kumrēx xwỳnh maatita ã amỳnē nhũm mē kām hpĩr kurē kumrēx nhũm hapēx. Koja ã amnhĩ nhĩpēx anē.

Tĩrtũm kot tanhmā mē pahto mex to hā harēnh
Rōmān 8.28-30; Wam Tesarōn 2.13, 5.23-24

¹³ Nē amnepēm kormā mēmoj kêt ri na pre Tĩrtũm amnhĩm mē arē. Mē ate kapēr mar nē hkôt amnhĩ xunhwỳr nhũm kot mē ato hkra kaxyw mē arē. Kām mē ajapēē. Na pre mē awỳr amnhĩ Karō rē nhũm mē akarō mā agjē nē tanhmā mē ajamaxpēr to ka mē y hā tām amnhĩ nhĩpēx rāhā ho ri apa. Na pa htem ja hā mē amā ijamaxpēr nē mē anhỹ hā ixkĩnh kām Tĩrtũm mā mē ajarēnh o ri ixpa. ¹⁴ Na pre mē awỳr mē ixrē. Mē ixte mē awỳr ixpa nē mē amā tanhmā Jejus kot mē panē amnhĩ nhĩpēx to hā harēnh o ixpa kaxyw. Mē ate mē inhmar nē Jejus kôt amnhĩ xunhwỳr nhũm Tĩrtũm kot Pahihti Jejus Kris o mex pyrā nē tanhmā mē ato mex to kaxyw. ¹⁵ Jakamā kwa kēr ka mē ra mē ixte wam mē awỳr kagā mēnhja kamā harē nē mar tỳx nē. Nē mē akôt mē ixpa ri tanhmā mē ixte mē ajahkre htoja mā ajamaxpēr mex nē hā ano htỳx nē hkôt amnhĩ nhĩpēx rāhā ho ri apa. Jao Jejus kôt amnhĩ nhĩpēx mex o ri apa Kris kôt ixkwỳjaja.

¹⁶ Mēpanhĩpēxà maati mē Pahihti Jejus Kris wa kām mē pajapē htỳx kumrēx. Na hte wa tanhmā mē pajamaxpēr o hihtỳx to ho pa pu mē wa y hā tām pajamaxpēr o ri papa. Nē wa y hā nhỹrmā wa kuri pamex nē pahĩr tũm nē papa hkukamā pajamaxpēr kaprỳ ho papa hkêt nē. ¹⁷ Na pa htem mē ato wa hwỳr o ixpa nē wa kām:

—Pa Tĩrtũm mē Jejus wa? Kwa kēr ka wa tanhmā Tesarōn kamā akrajē mā mē hamaxpēr o hihtỳx to kē mē war anhỹ hā tām amnhĩ nhĩpēx nē tām hamaxpēr. Jao kapēr mex rāhā nē pa ho pa. Anē.

3

Tanhmã mẽ pahte axpên to Tirtûm wÿr to hã kot mẽ pamã karõ

Korosẽ 4.2-4

¹ Nẽ kwa Kris kôt mẽ ixtõ nẽ ixtõxjaja. Kêr ka mẽ amnhĩ xwar mẽ ixto Tirtûm wÿr rãhã ho ri apa. Mẽ ixte krĩ piitã hkôt mẽ kãm Jejus jarênh o ri mẽ hkôt ixpa nhũm mẽ kot mẽ inhmar nẽ amnhĩ kaxyw Jejus kôt hamaxpêr kaxyw. Jao mẽ apyrã nẽ hkôt amnhĩ nhĩpêx mex o pa kaxyw. ² Nom koja mẽ piitã ã amnhĩ nhĩpêx anhÿr kêt nẽ. Mẽ hkwyjaja kãm Jejus jarênh mar prãm kêt jakamã kwa mẽ ixto Tirtûm wÿr kê mẽ inhnẽ mẽ omunh mex nẽ nhũm mẽ Jejus ã tanhmã mẽ ixto hkêt nẽ.

³ Nẽ koja Pahihti tanhmã mẽ akrã hto ka mẽ ajamxpêr mex nẽ ÿ hã hkôt amnhĩ xunhwÿr tÿx o ri apa. Jakamã nhũm Satanasti mẽ ate amnhĩ tomnuj hprãm xàj tee ri tanhmã mẽ anhĩpêx to kaprÿ nhũm Pahihti mẽ anê omunh mex nẽ. Ra kot mẽ atã amnhĩ jarênh xã hkôt.

⁴ Koja ã mẽ anê hipêx anê ka mẽ ÿ hã tanhmã mẽ ixte mẽmoj tã mẽ amã karõ xã hkôt amnhĩ nhĩpêx mex o ri apa. ⁵ Tã kê Pahihti tanhmã mẽ akrã hto ka mẽ Tirtûm pyrã nẽ mẽ piitã mẽ kamã axukaprĩ ho ri apa. Nẽ Pahihti Kris pyrã nẽ mẽmoj punuj kutã amnhĩ to htÿx nẽ. Jao hkôt amnhĩ nhĩpêx mex rãhã ho ri apa.

Mẽ kãm kaga xwÿnhjê jarênh

Wam Korõt 4.12; Epes 4.28; Wam Tesarôn 4.9-12

⁶ E kot paj hpãnhã Kris kôt mẽ pahkwÿ kãm kaga xwÿnhjê jarê ka mẽ inhma. Pahihti Jejus nhÿ hã kot paj mẽ amã tanhmã mẽ harênh to. Nã koja mẽ akwÿjaja kãm kaga nẽ amnhĩm mẽmoj tã àpênh kêt japêr. Nẽ mẽ ixte mẽ axàpênh mex o apa hã mẽ amã karõja kuhpa hã amnhĩm mẽmoj tã àpênh kêt japêr. Koja mẽ ã amnhĩ nhĩpêx anê ka mẽ ja hã mẽ omu hãmri nẽ mẽ hkôt ri apa hkêt nẽ. ⁷⁻⁸ Xã mẽ pajaja na pa prem ma mẽ awÿr mõ nẽ mẽ akôt inhma kaga nẽ mẽmoj tã ixàpênh kêt nẽ ri

ixpa? Nã na pa prem mẽ apa kukwak ri ixàpkur pymaj ixàpênh rũnh nẽ amnhĩ pa pix kukwak ri ixàpkur o ri ixpa. Na ka prem mẽ inhma mẽmo mẽ apkur xã ho mra pa prem amarĩ amnhĩm hamÿnh nẽ hkur kêt nẽ. Na pa prem hpãnhã mẽ amã amnhĩre nẽ kormã kuku. Tã kêr ka mẽ ã amnhĩ nhĩpêx anhÿr o ri axpên kôt apa nẽ amnhĩ pa pix kukwak ri apku. Nẽ mẽ amã kaga hã nhãm akwÿjê hpa kukwak ri axàpkur o ri apa kêt nẽ. ⁹ Na pa prem amnhĩ pa pix kukwak ri ixàpkur o ri mẽ akôt ixpa. Mẽ ate ja hã mẽ ixpumunh nẽ mẽ ixpyrã nẽ ã amnhĩ nhĩpêx anhÿr kaxyw. Nom mẽ ixte Jejus mã tanhmã mẽ ajahkre hto nhũm mẽ ate mẽ inhmar nẽ hpãnhã mẽ inhma mẽ ixàpkur xã nhõrja Jejus mã tanhmã kute hkêt tã pa prem ã amnhĩ nhĩpêx anhÿr kêt nẽ. Mẽ ate ja hã mẽ ixpumunh nẽ mẽ ixpyrã nẽ ã amnhĩ nhĩpêx anhÿr kaxyw na pa prem amnhĩ pa pix kukwak ri ixàpkur o ri mẽ akôt ixpa. ¹⁰ Na pa prem mẽ amã ja hã karõ ho:

—Koja mẽhõ kãm kaga nẽ àpênh kêt nẽ ka mẽ ja hã omu nẽ kãm õ hkêt nẽ. Kwãr mãmri apkur kêt nẽ kãm prãm nẽ ri pa nẽ amnhĩ pumu. Anẽ.

¹¹ Tã xep ra mẽ akwÿjaja ã amnhĩ nhĩpêx anê nẽ kãm kaga nẽ àpênh kêt nẽ amarĩ ri pa. Nẽ xep htÿx ri axpên jakwa kamã nhãm mẽ hixi ho rêr o ri pa. ¹² Kwa mẽ inhma Jejus kôt ixkwÿjaja. Kot paj Pahihti Jejus nhÿ hã mẽ amã mẽ kot ã amnhĩ nhĩpêx xwÿnhjê jarê ka mẽ inhma nẽ mẽ inhmar tÿx nẽ. Kêr ka mẽ kãm kaga xwÿnhjê mã anê kê mẽ jam ure nẽ hpãnhã àpênh mex o pa. Jao mẽ apyrã nẽ amnhĩ pa kukwak ri apkur o pa. Kêr ka mẽ ã mẽ kãm ixkapêr jarênh anẽ.

¹³ Nẽ kwa kêr ka mẽ axpên to mex o apata kaga hkêt nẽ.

¹⁴ E na pa mẽ ã Tirtûm nhÿ hã mẽmoj tã mẽ amã karõ nẽ hã kaga anẽ. Tã koja mẽhõ kamã harê nẽ kuma nẽ ãm kuma nẽ hkôt amnhĩ nhĩpêx kêt ka mẽ ja hã omu nẽ hkôt ri apa hkêt nẽ. Tokyx kot ja hã amnhĩ

pumunh nẽ amnhĩ tã hpijaàm kaxyw.
¹⁵ Nom arĩ Kris kõt kêp mẽ akwỳ
 jakamã kêr ka mẽ arĩ kêp mẽ atõ rỳ
 atõx ã tãm hipêx nẽ kãm akapêr mex
 o ri apa. Nom te ho kêp mẽ akwỳ hkêt
 pyrãk o kãm akapêr kêt nẽ.

*Tanhmã Pawre kot mẽ ho Jejus wỳr
 to hã harẽnh*

¹⁶⁻¹⁸ Nẽ na pa hte mẽ ato Pahihti
 Jejus wỳr rãhã ho ixpa. Kot mẽ pamã
 mẽ pajamakêtkati xã nhõr jakamã na
 pa htem mẽ ato kuwỳ nẽ kãm:

—Pa Pahihti? Kwa kêr ka Tesarõn
 kamã akwỳjê pumu nẽ mẽmoj to mẽ
 kutã anojarêt rãhã ho ri mẽ hkõt apa.
 Kê mẽ hamakêtkati nẽ àmnhĩx pa ho
 pa. Anẽ.

Tã ãm ja pix. Ixpê Pawre na pa kagà
 jatur xà kamã inhĩhkra ho amnhĩ
 nhĩxi nhĩpêx. Na hte kagà nhĩpêx
 xwỳnh inhmã ixkapêr ã kagà. Nẽ hã
 kagà hpa pa hpãnhã hatur xà kamã
 pam inhĩxi nhĩpêx. Tã na hapêx.

Wam Ximotre Pawre kot Ximotre hwÿr kagà nê mênh

Pawre na pre kagàja nhîpêx. Kêp Jejus nhÿ hã hkrajê jahkre ho pa xwÿnhjê hõ na pre. Nê Ximotre kêp Pawre ho ajuta ho hkôt pa xwÿnh na pre. Tã hpãnhã krî pê Epes kamã arîk nê Tirtûm kapêr o Jejus kôt hkwyjê jahkre ho pa. Hãmri nhûm Pawre krî hõ kamã pa nê kagàja nhîpêx nê hwÿr kumê. Nê kamã kãm mêmôj tã karõ. Na pre ra Epes kamã mê hkwyjêja Tirtûm kapêr o hêx o mê ahkre ho pa nhûm Pawre mê harênh ma nê kagàja kamã Ximotre mã tanhmã mê harênh to. Nê kot Tirtûm kapêr o Jejus kwÿjê jahkre mex xwÿnhjê xunhwÿr kaxyw kãm karõ. Nê Tirtûm kãm hprãm xà hkôt pix mã mê ahkre ho pa hã kãm karõ nê hwÿr kagà nê kumê. Nê kãm:

¹ Pa Ximotre? Xà amex? Ixpê Pawre na pa awÿr kagà nhîpêx nê kumê. Ixte Jejus Kris nhÿ hã mê ahkre ho ixpa kaxyw na pre Mëpapytâr xwÿnh Tirtûm mê Jejus Kris wa ixta nê ixâm. Jejus kamã na pu htem pajamak rãhã ho ri papa.

² Nà ra ate ixkapêr mar xà hkôt Jejus kôt amnhî xãm jakamã te apê ixkra pyrãk Ximotre. Jakamã na pa hte ato Mëpanhîpêxã maati Tirtûm mê panhõ Pahihti Jejus Kris wa hwÿr o ixpa nê ato wa hwÿr o:

—Pa Tirtûm mê Pahihti wa. E Ximotre ho na pa war awÿr kaxyw. Kwa kêr ka wa kamã axukaprî nê kutã war anojarêr rãhã ho wa ri apa. Kot kaj wa ã ho mex anê nhûm war anhÿ hã hamakêtkati nê amnhîx pa ho pa.

Anhÿr o na pa hte war ato kuwÿ

Tirtûm kapêr o mê ahkre xwÿnhjê jarênh

Rômãn 16.17; Wam Ximotre 6.3; Sikûn Ximotre 2.23; Xitre 1.5-16

³ Nê na pu pre wa Epes kamã papa tã pika pê Masetõn wÿr panojarêr nê tee ri Epes kamã Tirtûm kapêr ho

hêx o mê ahkre xwÿnhjê kapêr ma. Jakamã na pa pre amã:

—E Ximotre kêr ka Masetõn wÿr ixkôt amõr kêt nê. ãm jar Epes kamã arîk nê ixwakre kamã Tirtûm kapêr o mê hêx xwÿnhjê mã akapêr nê ã mê hêx anhÿrja nê mê hkurê ho ri mê hkôt apa.

Anhÿr o amã harê hãmri nê Epes kamã are nê ma Masetõn wÿr ahte mõ. ⁴ Mê hêx xwÿnhjêja amnepêm panhîgêjtaja kot tanhmã amnhî nhîpêx to nê tanhmã ujarênh toja nhûm htem mê kãm harênh pix o pa. Nê mê hixi piitã harênh o pa. Na htem ã amnhî krã hkôt hkwyjê mã ujarênh anhÿr o pa. Jao axpên kwÿm ri mê ahkre nê mê hã axpên mã àkjêr o pa. ã mê kot amnhî nhîpêx anhÿr jao Tirtûm nhÿ hã kãm hprãm xà hkôt mê ahkre hkêt nê. Kojã mêmõ Tirtûm nhÿ hã kapêr o mê ahkre hãmri nê amnhî kaxyw kãm hamaxpêr tÿx pê tanhmã mê ahkre hto. Nom ixte amã mê harênh xwÿnhjêja Tirtûm nhÿ hã mê ahkre hkêt jakamã na pa pre inhnojarêr nê ã amã mê harênh anê nê mê kuri Epes kamã are.

⁵ Tã kêr ka arî mê ahkre ho ri mê hkôt apa Ximotre. Nê Kris kôt mê pahkwÿjê mã anê kê mê amnhî kaxyw Jejus kôt hamaxpêr tÿx pê hamaxpêr mex o pa. Jao tanhmã hamaxpêr punuj to hkôt amnhî nhîpêx kêt nê. Nê mê kãm anê kê mê te kãm amnhî tã ma pyrãk o nhãm kãm mê hã ma ho pa. ⁶ Ixte amã mê hêx xwÿnh jarênh xwÿnhjêja na htem ã mê ahkre anhÿr kêt nê. Na htem htÿx ri amnhî krã hkôt tanhmã mê ahkre hto. ⁷ Tirtûm kot finat Mojes mã mêmôj tã karõja mê kot mar tÿx ã amnhî kamnhîx nê ho mê ahkre hprãm tã no ãm hprî hã mar kêt nê htÿx ri ho mê ahkre ho pa. ⁸ Tirtûm kot Mojes mã mêmôj tã karõja mex. Mê kot mar nê hkôt amnhî nhîpêx o pa kaxyw na pre. ⁹ No na pre mê kot tãm amnhî nhîpêx xwÿnhjê mã ã hã karõ anhÿr kêt nê. ãm mê kot amnhî tomnuj xwÿnhjê mã na pre hã karõ.

Mě kot mě õ pahi kapër mar kêt xwýnhjê mã.

Ně mẽ kot Tirtũm kapër nhĩrõp kuhê ho mẽ pa xwýnhjê mã.

Ně Tirtũm ã mẽ hpijaãm kêt xwýnhjê mã.

Ně mẽ kot mẽ hipêêxà ně mẽ katorxà hpar xwýnhjê mã.

¹⁰ Ně mẽ hprõ kuhpa hã nhãm mēnijê ho amnhĩkati xwýnhjê mã.

Ně mẽ mjên kuhpa hã nhãm mēmyjê ho amnhĩkati xwýnhjê mã.

Ně mēmyjaja kot mēnijê kuhpa hã kãm amnhĩ kwý myjê hkĩnh ně mẽ ho amnhĩkati xwýnhjê mã.

Ně mēnijaja kot mēmyjê kuhpa hã kãm amnhĩ kwý nijê hkĩnh ně mẽ ho amnhĩkati xwýnhjê mã.

Ně mẽ kot mẽmoj to àhkĩnh ně nhãm mẽ kãm ho wēnê o mẽ pa xwýnhjê mã.

Ně ri mẽ hêx o mẽ pa xwýnhjê mã.

Ã mẽ kot Tirtũm kapër kwým ri amnhĩ nhĩpêx anhỹr o mẽ pa xwýnh piitã mẽ kaxyw na pre Mojes mã mẽmojta ã karõ. Mě kãm Jejus prãm kêt xwýnhjê mã. Mě kot mar ně tãm amnhĩ nhĩpêx kaxyw. ¹¹ Tã pa na pa hte Pahihti kot tanhmã mẽ panê amnhĩ nhĩpêx to hã harēnh o ri mẽ hkôt ixpa. Ja kaxyw na pre Tirtũm ixãm. Tirtũmja mex o mex. Tãm na pre ja kaxyw ixãm.

Tanhmã Pahihti Jejus Kris kot Pawre ho mex to hã harēnh

Atre 26.9-18

¹² Ně Pahihti Jejus Kris na hte ixto mex rãhã ho pa. Na hte tanhmã ixto pa ÿ hã mẽ piitã mẽ kãm tanhmã kot mẽ panê amnhĩ nhĩpêx to hã harēnh o ri mẽ hkôt ixpa. Na pre ixte ã amnhĩ nhĩpêx anhỹrja kukamã inhmã ixápēnh ã karõ ně inhmã:

—E ate amnhĩ kaxyw ixkôt ajamaxpēr mex jakamã kēr ka ma mẽ piitã mẽ hkôt ri mẽ kãm ixkapēr jarēnh o ri apa. Anē.

¹³ Nom amnepēm na pa pre hkôt ijamaxpēr kêt ně. Æm axtem ně haprý rũnh ně ho ixkapēr punuj o ri ixpa. Ně hkwyjê ho ixkrihkrit ně mẽ haprý ně mẽ htak. Nom kormã amnhĩ kaxyw

Kris kôt ijamaxpēr kêt jakamã ixtýx ã mẽ hipêx anhỹr o ixpa nhũm Pahihti ja hã ixpumu ně ixkamã ukaprĩ ně mẽ hã tanhmã ixto hkêt ně. ¹⁴ Ně kãm ijapê xàj mẽmoj to ixkutã nojarēt rãhã ho pa ně tanhmã ixkrã hto pa ra amnhĩ kaxyw hkôt ijamaxpēr ně hkôt amnhĩ xãm. Hãmri ně kukwak ri ra inhmã hkwyjê hkĩnh ně hpãnhã mẽ ho mex o ri mẽ hkôt ixpa.

¹⁵ Ně Jejus Kris ra wrýk ně mẽ pahte amnhĩ tomnuj piitã hpãnhã amnhĩrer kaxyw mẽ panê htyk ã harēnhja na pa hte harēnh o ri ixpa. Æ kot amnhĩ nhĩpêx anhỹrja na mex o mex. Kê mẽ piitã kuma ně hã nohtýx rãhã ho pa.

Kormã ixte hkôt amnhĩ xãm kêt ri na pa pre amnhĩ tomnuj týx kumrēx o mẽ piitã mẽ hakrenh ¹⁶ nhũm Tirtũm ixpumu ně ixkamã ukaprĩ ně. Hãmri ně amnhĩ kaxyw ixãm. Mě piitã mẽ kot ja hã ixpumunh ně axpēn mã ã ijarēnh anhỹr kaxyw. Ně ijarēnh o:

—Kwa Pawre na pre amnhĩ tomnuj týx kumrēx o pa nhũm Jejus Kris ja hã omu ně kamã gryk tokyx anhỹr kêt ně. Na pre tanhmã hkrã hto nhũm ra tãm amnhĩ nhĩpêx o pa. Kwa pu mẽ urak ně amnhĩ kaxyw Jejus kôt pajamaxpēr ně hkôt amnhĩ xunhwý. Kēr pu mẽ Pawre pyrã ně nhỹrmã Tirtũm mẽ Kraja wa kuri pamex ně pahťir tũm ně papa ho papa.

Anhỹr o axpēn mã ijarēnh ně ixpyrã ně Jejus kôt amnhĩ xunhwýr kaxyw na pre Tirtũm ã ixto mex anē. ¹⁷ Jakamã na pa hte kãm amnhĩ jarēnh kaxyw ně kãm:

—Pa Tirtũm? Nà kapxipix apê Pahi Maati. Ně arãhã ho arãhã ně amex o amex. Mě ixte inhno ho aa apumunh kêt tã kapxipix apê Mēinhĩpêêxã maati. Tã koja nhỹrmã mẽ piitã ã amã amex o amex ã ajarēnh anhỹr o pa. Anē.

Ximotre kot tanhmã Epes nhõ xwýnhjê jahkre hto hã kãm karõ

Wam Korõt 5.1-5

¹⁸ Ně te apê ixkra pyrãk Ximotre. Tã kot paj mẽmoj tã amã karõ ka inhma ně inhmar týx ně. Nà Pahihti Jejus mã ate tanhmã amnhĩ nhĩpêx to ho apa

kaxyw na pa prem axãm nhũm Tĩrtũm nhỹ hã kapẽr o mẽ pa xwỳnhjaja axapẽnh kukamã amã kapẽr nẽ amã:

–E ate ma mẽ kãm Pahihti Jejus jarẽnh o apa kaxyw Tĩrtũm kot axãm jakamã kẽr ka ã amnhĩ nhĩpẽx anhỹr o ri mẽ hkõt apa. Anẽ.

Tã kot paj ijaxwỳja kagàja kamã amã ixkapẽr nẽ mẽmoj tã amã karõ. Ka mar tỳx nẽ hkõt amnhĩ nhĩpẽx mex pẽ Tĩrtũm mã amnhĩ nhĩpẽx mex o ri apa. Jao aprĩ hã mẽ kãm tanhmã Jejus jarẽnh to ho ri mẽ hkõt apa. ¹⁹ Nẽ amnhĩ kaxyw Jejus mã ajamaxpẽr mex nẽ. Nẽ mẽmoj punuj pumu nẽ amã ho anhỹr prãm tã Jejus nhỹ hã nẽ amnhĩ to htỳx nẽ ho anhỹr kêt nẽ. Jao tãm amnhĩ nhĩpẽx ã amnhĩ pumunh mex o ri apa. Nom kot kaj ja nẽ amnhĩ to htỳx kêt nẽ tanhmã amnhĩ tomnuj to hãmri nẽ te ate Pahihti Jejus kaga pyræk. Na pre pahkwỳjaja ã amnhĩ nhĩpẽx anhỹr o hkaga nẽ axte kãm hamaxpẽr kêt nẽ. ²⁰ Imẽnew mẽ Aresãnja na pre wa ã amnhĩ nhĩpẽx anẽ nẽ tanhmã Tĩrtũm o kapẽr punuj to. Mỳrapẽ na pa pre Satanasti nhĩhkram wa haxà. Kot tanhmã wa ho nhũm wa kot tee ri amnhĩ tomnujta ã amnhĩ pumunh nẽ tokyx tãm amnhĩ nhĩpẽx nẽ axte ã amnhĩ nhĩpẽx anhỹr kêt kaxyw.

2

Tanhmã mẽ pahte Tĩrtũm mã amnhĩ jarẽnh to hã mẽ pamã karõ

Rukre 11.2-4; Atre 10.34-35; Epes 6.18

¹ E kot paj hpãnhã tanhmã mẽ pahte Tĩrtũm mã amnhĩ jarẽnh to hã amã karõ Ximotre. Ka inhma nẽ ixõ ri ho mẽ pahkwỳjê jahkre ho ri mẽ hkõt apa. E ja kumrẽx kot paj mẽ kaxyw amã hã karõ. Kẽr ka mẽ piitã mẽ ho Tĩrtũm wỳr ho ri pa. Nẽ kãm mẽ harẽ nẽ mẽ kaxyw mẽmoj tã axahwỳr o ri apa. Kẽr kẽ ama nẽ tanhmã mẽ ho mex to. Kẽ mẽ amnhĩ tã omu nẽ ã kãm kapẽr anẽ nẽ kãm:

–Pa Tĩrtũm? Nà ãm hãmri na ka ã mẽ ixto mex anẽ. Amex o amex. Anẽ.

² Nẽ mẽ kãm anẽ kẽ mẽ õ pahi nẽ mẽ ho amnhĩptar xwỳnh piitã mẽ ho ahwỳr o pa ho:

–Pa Tĩrtũm? Kwa kẽr ka mẽ inhõ pahi mẽ mẽ kot mẽ ixto amnhĩptar xwỳnh piitã tanhmã mẽ ho kẽ mẽ ixto mex o pa. Kẽr pa mẽ ijamakẽtkati nẽ ixamnhĩx ixpa pẽ amã tanhmã amnhĩ nhĩpẽx to ho ri ixpa. Nẽ ixamnhĩx mẽ hkõt tãm amnhĩ nhĩpẽx. Anẽ.

³ Kot puj mẽ ã mẽ ho mẽ papytar xwỳnh Tĩrtũmja wỳr o papa anẽ nhũm mẽ pama nhũm ja kãm mex nẽ.

E kẽr ka ã mẽ kãm ja hã karõ anẽ Ximotre.

Tĩrtũm kãm mẽmoj prãm ã harẽnh Sikũn Pẽtre 3.9

⁴ Nẽ mẽ piitã mẽ kot kapẽr mar nẽ amnhĩ kaxyw Jejus kõt hamaxpẽr nẽ hkõt amnhĩ xunhwỳrja na Tĩrtũm kãm hprãm.

⁵ Ja kaxyw na pre mẽ pahwỳr Kra Jejus mẽ nhũm man mẽ pahwỳr wrỳ. Tĩrtũmja tapxipix na kẽp Mẽpahpãm. Nẽ Kra Jejusja tapxipix na kot Tĩrtũm mã tãm mẽ paxunhwỳr mã xwỳnh. Ja kaxyw na pre amnhĩ grõnh kõt wrỳ mẽ pahpyrà nẽ ã ho ã nẽ kato.

⁶ Hãmri nẽ gaa nẽ àptar hãmri nẽ mẽ pahpiitã mẽ panẽ ty. Jao Tĩrtũm mã mẽ pahte amnhĩ tomnuj piitã hpãnhã amnhĩrer pa. Tã mẽ pahpiitã mẽ pahte kot ã amnhĩ nhĩpẽx anhỹr ã harẽnh mar nẽ tokyx hkõt amnhĩ xunhwỳrja na Tĩrtũm kãm hprãm.

⁷ Ja kaxyw na pre ixãm. Ixte Ijaew kêt xwỳnhjê mã Tĩrtũm kapẽr jarẽnh o ri mẽ hkõt ixpa kaxyw. Nẽ Jejus nhỹ hã tanhmã mẽ kãm ixkapẽr to ho ri ixpa kaxyw. Nẽ tanhmã kot mẽ panẽ amnhĩ nhĩpẽx to hã harẽnh kaxyw. ãm hãmri na pa ã amnhĩ jarẽnh anẽ. Ixẽx kêt. Na pa hte Ijaew kêt xwỳnhjê hkõt ixpa nẽ ã mẽ kãm ixkapẽr anẽ nẽ mẽ kãm:

–E mẽ ate Tĩrtũm Kra Jejus kõt amnhĩ xunhwỳrja na Tĩrtũm kãm hprãm. Jakamã kwa mẽ tokyx amnhĩ kaxyw hkõt ajamaxpẽr nẽ hkõt amnhĩ xunhwỳ. Anẽ.

Ikrêsti kamã tanhmã mẽ pahte amnhĩ nhĩpêx to hã mẽ pamã karõ

⁸ Nẽ kot kaj mẽ tõhã Tĩrtũm kapêr mar kaxyw axpên wÿr akuprõ. Hãmri nẽ Tĩrtũm mã amnhĩ jarẽ nom kêr ka mẽ mẽmoj tã axpên kamã agryk kamã kãm amnhĩ jarênh kêt nẽ. Rÿ mẽmoj tã axpên mã axàkjêr kamã kãm amnhĩ jarênh kêt nẽ. ãm tãm mẽ ajamexpêr pix o kãm amnhĩ jarẽ. Nẽ tãm amnhĩ nhĩpêx kamã kãm amnhĩ jarẽ. Ja na inhmã hprãm. Tã kêr ka ã Epes nhõ xwÿnhjê mã ja hã akarõ anẽ Ximotre.

Mẽnijaja kot tanhmã amnhĩ nhĩpêx to kaxyw mẽ hã kãm karõ

Wam Korõt 14.34; Epes 5.22; Xitre 2.3; Wam Pêtre 3.1-7

⁹ Nẽ kot paj hpãnhã Kris kôt mẽ pah tõxjaja tanhmã kot amnhĩ nhĩpêx to hã mẽ kaxyw amã karõ ka inhma. Nà mẽmyjaja kot mẽ omunh nẽ kãm mẽ hkĩnh prãm xaj kê mẽ htÿx ri mẽ noo mã tanhmã amnhĩ nhĩpêx to hkêt nẽ. Nẽ ja prãm xaj tanhmã ê jagjênh to hkêt nẽ rÿ tanhmã ri mrar to hkêt nẽ. Rÿ mẽ kãm mẽ hkĩnh prãm xaj õkrexê mex jagjênh rÿ mẽ ìhkra kamã kax mex jagjênh nẽ ri hã mẽ hkôt pa kêt nẽ. Rÿ ja kaxyw tanhmã ri amnhĩ kĩ jaxwÿr to nẽ ri hã mẽ hkôt pa kêt nẽ. Rÿ mẽ ê mex jagjê nẽ mẽ noo mã htÿx ri hpijaàm kêt o pa hkêt nẽ. Kê mẽmyjaja kãm mẽ hkĩnh prãm xaj ã htÿx ri amnhĩ nhĩpêx anhÿr o pa hkêt nẽ. ¹⁰ Mẽ kãm anẽ kê mẽ kãm Tĩrtũm mãn kĩnh xaj mẽ piitã mẽ kutã mẽmoj to nojarêt o pa.

¹¹ Nẽ mẽ kãm anẽ kê mẽ Tĩrtũm kapêr mar kaxyw mẽ pikuprõnh xà hwÿr agjê nẽ akryk Tĩrtũm kapêr mar o hkrĩ nẽ htÿx ri axpên mã kapêr o hkrĩ kêt nẽ.

¹² Nẽ kê mẽ ikrêsti kamã Tĩrtũm kapêr o mẽmyjê jahkre hkêt nẽ. Rÿ kamã mẽmoj tã tanhmã mẽ kãm karõ hto hkêt nẽ. ãm akryk Tĩrtũm kapêr mar o hkrĩ. ¹³ Mẽmo mÿrapêr koja mẽ ã amnhĩ nhĩpêx anẽ? Nà na pre Tĩrtũm my kot wa finat Atãwja kumrêx nhĩpêx nẽ kormã hprõ Ewa o hapu nẽ hipêx. ¹⁴ Nẽ Atãwja na

pre kagã kapêr mar nẽ hkôt amnhĩ nhĩpêx kêt nẽ. Prõ na pre mar xà hkôt Tĩrtũm kapêr nhĩrõp xa nẽ tanhmã amnhĩ tomnuj to. ¹⁵ Mÿrapêr na htem mẽnijaja hpijagri ho hikwÿ nhũm mẽ hkrajaja à htÿx kãm hapõj. Tã nom koja mẽ Jesus kôt amnhĩ xunhwÿ nẽ ã ixte mẽ kaxyw amã mẽmoj tã karõ xà hkôt amnhĩ nhĩpêx hãmri nẽ nhÿrmã mex kumrêx nẽ htĩr tũm nẽ pa ho pa. E kêr ka ã mẽnijê mã mẽmoj tã karõ anẽ Ximotre.

3

Pastõ kot tanhmã amnhĩ nhĩpêx to kaxyw mẽ hã kãm karõ

Xitre 1.5-9

¹ E kot paj hpãnhã tanhmã pastõ jarênh to. Koja mẽhõ kãm kêp Kris kwÿjê nhõ pastõ nẽ Tĩrtũm kapêr o mẽ ahkre hprãm nẽ ãm hãmri ã hamaxpêr anẽ. Ja mex. ² Jakamã koja mẽhõ kãm kêp pastõ hprãm hãmri nẽ ã amnhĩ nhĩpêx anhÿr o apa.

Koja mẽ piitã mẽ noo mã tãm ri amnhĩ nhĩpêx.

Nẽ hprõ pix tãnopxar o pa.

Nẽ mẽmoj punuj kutã amnhĩ to htÿx nẽ.

Nẽ tãm hamaxpêr.

Nẽ àmnhĩx amnhĩ wÿr mẽ piitã mẽ kuwÿ.

Nẽ Tĩrtũm kapêr o mẽ ahkre mex nẽ.

³ No kê mẽ kagõxÿhti japrõr nẽ ho pipãnh o pa hkêt nẽ.

Nẽ àhkurê ho pa hkêt nẽ.

Nẽ mẽ piitã mẽ kamã ukapri ho ri mẽ hkôt pa. Jao mẽ kutã nojarêt rãhã ho pa.

Nẽ amnhĩm kaxpore rax o pikuprõnh prãm xaj tanhmã amnhĩ nhĩpêx to hkêt nẽ.

⁴⁻⁵ Nẽ hkrajê jahkre mex o pa nhũm mẽ kapêr ma nẽ hkôt amnhĩ nhĩpêx. Nẽ hã hpijaàm kãm tãm amnhĩ nhĩpêx.

Koja mẽ hkrajê jahkre mex kêt nẽ hãmri nẽ mããnen Kris kwÿjê jahkre mex kêt nẽ. Jakamã nhũm hkrajê mẽ Kris kwÿjaja tãm amnhĩ nhĩpêx kêt nẽ.

6-7 Nē kē mē kot Jejus kôt amnhĩ xunhwÿr kêt xwÿnhjê noo mǎ tǎm amnhĩ nhĩpêx rǎhǎ ho pa.

Mē kot ja hǎ mē omunh nē mē hǎ hpijaàm o pa kaxyw. Nom koja mē tanhmǎ amnhĩ tomnuj to nhũm mē tee ri ja hǎ mē omu nē mē ho kapêr punuj nē. Satanasti kǎm hprǎm xǎ hkôt.

Nē kē mē kot Kris kôt amnhĩ xunhwÿr nyw xwÿnhjaja kêp pastô hkêt nē.

Koja mē kêp pastô hǎmri nē mēmo arĩgro hǎ tanhmǎ hamaxpêr to nē amnhĩ to rax prǎm xǎj tanhmǎ amnhĩ to jarkrar to ho pa. Hǎmri nhũm Tĩrtũm tee ri ja hǎ omu nē te kot Satanasti nhĩpêx pyrǎk o hipêx nē tanhmǎ homnuj to. Ja pymaj kē mē kot Kris kôt amnhĩ xunhwÿr nyw xwÿnhjaja kêp pastô hkêt nē.

E pastô na hte ǎ amnhĩ nhĩpêx anhÿr o pa kamǎ Jejus kwÿjê jahkre nē tanhmǎ mē ho ajuta hto ho mē hkôt pa Ximotre.

Mē kot Kris kôt hkwÿjê ho ajuta xwÿnhjê kaxyw mē hǎ kǎm karô

Atre 6.1

⁸ Nē kot paj hpǎnhǎ amǎ mē kot Kris kôt hkwÿjê ho ajuta xwÿnhjê jarê ka inhma Ximotre. Nǎ koja mēhō kǎm Kris kôt hkwÿjê ho ajuta hprǎm hǎ koja ǎ amnhĩ nhĩpêx anhÿr o pa.

Koja mē htÿx ri mēmoj tǎ mē kǎm hpêr o pikênh o pa hkêt nē.

Nē tanhmǎ mēmoj to hêx to ho pa hkêt nē.

Nē kagôxyhti japrôr nē ho pipǎnh o pa hkêt nē.

Nē amnhĩm kǎxpore ho pikuprôn nē ho rax prǎm xǎj tanhmǎ amnhĩ nhĩpêx to hkêt nē.

⁹ Nē kē Tĩrtũm kapêr piitǎ hkôt hamaxpêr o pa. Ra Tĩrtũm kot mē pamǎ kapêr piitǎ ho amnhĩrit jakamǎ koja Kris kôt hkwÿjê ho ajuta xwÿnhjaja kapêr piitǎ hkôt hamaxpêr pê hkôt amnhĩ nhĩpêx mex rǎhǎ ho pa.

10-13 Nē kē mē amnhĩ prô pix tǎnopxar o pa.

Nē pastô pyrǎ nē mē hkrajê jahkre mex nhũm mē hkôt ri amnhĩ nhĩpêx mex o pa.

Nē kē mē hprôjaja mjên pyrǎ nē mē piitǎ mē noo mǎ tǎm ri amnhĩ nhĩpêx.

Nē hkwÿjê ho kapêr rÿ mē axpên jakwa kamǎ ri axpên mǎ mē hixi ho rêr o pa hkêt nē.

Nē mjên pyrǎ nē mēmoj punuj kutǎ amnhĩ to htÿx o ri pa. Nē amnhĩ to mex rǎhǎ nē.

E koja mēhō kǎm Kris kwÿjê ho ajuta ho pa hprǎm hǎ koja ǎ amnhĩ nhĩpêx anhÿr o pa. Nom kêr ka mē kot mē ho ajuta kaxyw mē unhwÿr tokyx anhÿr kêt nē Ximotre. Taxy mē kamǎ ama nē aprĩ hǎ mē kot ri tanhmǎ amnhĩ nhĩpêx to hǎ mē omu mǎn. Hǎmri nhũm mē piitǎ mē mex ǎ mē harê ka mē hǎ mē ama nē rĩ kormǎ mē kot mē ho ajuta ho pa kaxyw mē unhwÿ. Hǎmri nhũm mē amnhĩ tǎ omu nē axpên mǎ mex ǎ harê. Nē amnhĩ kaxyw Jejus Kris mǎ hamaxpêr mex o pa hǎ mē omu nē mē hǎ hpijaàm o pa.

Pawre kot Ximotre mǎ amnhĩ jarênh

¹⁴ Nē inhmǎ awÿr inhmôr nē apumunh prǎm Ximotre. Nom kot pa amnhĩ kukamǎ ǎ mēmoj tǎ amǎ karô nē hǎ kagà anê. ¹⁵ Kêr pa tokyx awÿr inhmôr kêt japêr ka ixte amǎ mēmoj ǎ kagàta kamǎ harê nē ixkutêp ho mē ahkre ho ri apa. Mē kot mar nē hprĩ hǎ mē ô pastô nē mē kot mē ho ajuta ho mē pa xwÿnhjaja kot tanhmǎ amnhĩ nhĩpêx to hǎ mē harênh mar kaxyw.

Mē pahpê Kris kwÿjaja mē pahpê Tĩrtũm kra jakamǎ na pu htem kapêr kôt ri amnhĩ nhĩpêx nē pakatàt kôt mē piitǎ mē kǎm pakapêr o papa. Jao tanhmǎ mē kǎm Jejus Kris jarênh to ho ri papa.

Pawre kot Jejus mex o mex ǎ mē grer jarênh

¹⁶ Nē Jejusja mex o mex. Amnepêm kormǎ mē pahte harênh mar kêt tǎ pu

prem harēnh ma hāmri nē mex o mex
 ā pagrer o papa. Nē pagrer o:
 Kris kēp Mēpahpām tā na pre mē
 pahwūr wrūr nē mē pahpyrà nē
 ĩ ho ĩ nē kato.
 Nhūm pre Tīrtūm Karōja mex o mex ā
 harē.
 Nhūm Tīrtūm kapēr o mē wrūr
 xwūnhjaja omunh o pa.
 Nhūm ahpūnhā pika piitā hwūr
 tanhmā kot mē panē amnhī
 nhīpēx to hā harēnhja angrā.
 Nhūm hte mē hkwūrjaja harēnh ma nē
 amnhī kaxyw hkōt hamaxpēr
 nē hkōt amnhī xunhwūr.
 Tā nhūm pika kamā àpēnh jatur xām
 kumē nhūm Tīrtūm akupūr
 amnhī wūr ho api.
 Na pu htem ā Jejus mex o mex ā pa-
 grer anē.

4

*Mē kot Tīrtūm kapēr kwūr ri
 tanhmā Kris kwūrjē jahkre hto xwūnhjē
 jarēnh*

*Matēwre 24.4-13; Korosē 2.16-19;
 Sikūn Ximotre 3.1-9; Sikūn Pētre 2.1-3;
 Jutre 3-16*

¹ Nē nhūr mā Jejus akupūr mē
 pahwūr wrūr kaxyw koja pika
 nhō xwūnh kwūrjaja ma hkwūrjē mā
 tanhmā Tīrtūm kapēr o hēx to ho
 pa. Na pre Tīrtūm Karō hprī hā mē
 hkukamā tanhmā mē harēnh to. Koja
 xep Satanasti hkwūrjaja Jejus kwūrjē
 hwūr mra nē hēx rom tanhmā mē
 kām kapēr to. Satanasti nhūr hā mē
 kām hēx o pa nhūm mē hkwūrjaja mē
 kuma nē mē hkōt hamaxpēr nē Jejus
 kaga. Ā koja mē Jejus akupūr mē
 pahwūr wrūr kukamā amnhī nhīpēx
 anē.

² Nē Satanasti nhūr hā mē kām
 mēmoj to hēx xwūnhjaja ām Satanasti
 pix mar o pa jakamā koja mē
 hamaxpēr mex kēt nē. Koja mē
 mēmoj punuj pumu nē htūr mex ā
 hkamnhīx. ³ Tā koja mē Tīrtūm kapēr
 kwūr ri ā Jejus kwūrjē mā hēx ho pa
 anē nē mē kām:

—Kwa kēr ka mē axpēr mā ri mē rer
 o apa hkēt nē. Tīrtūm kām ja prām kēt.

Ām ahte ri mē papaja na kām hprām.
 Anē.

Nē mē kot mēmoj mex kur ā mē
 omu nē nē mē kām kapēr nē mē kām:

—Kwa na htem ata hkur kēt nē.
 Tīrtūm pē omnuj kēnā kot ka kēt ri
 aku.

Anhūr o koja mē kām kapēr o pa.
⁴ Nom Tīrtūm na pre mē pamā mē
 apkur xā piitā ho kato. Mē paxāmhīx
 mē pahte piitā hkur o papa kaxyw.
 Jakamā mē pahpē hkrajaja na pu
 htem mēmoj kaga hkēt nē. Na pu
 htem mēmoj kur kaxyw nē Tīrtūm
 mā harē hāmri nē paxāmhīx kuku.
⁵ Tīrtūm kot mē paxāpkur xā piitā mex
 ā harēnh jakamā na pu htem kām
 harēnh pē paxāmhīx piitā hkur o
 papa.

*Pawre kot mēmoj tā Ximotre mā
 karō*

Sikūn Ximotre 1.6-14; Xitre 2.1-8

⁶ E Ximotre. Ixte mēmoj tā amā
 karōta kēr ka ho Kris kōt pahkwūrjē
 jahkre mex o ri mē hkōt apa. Kot kaj
 ā mē ahkre anhūr jao ra Jejus Kris mā
 axāpēnh mex nē. Na ka pre harēnh
 ma nē hkōt amnhī xām hāmri nē hkōt
 amnhī nhīpēx mex nē. Tā kēr ka arī
 hkōt amnhī nhīpēx mex rāhā kē mē
 piitā ja hā apumu.

⁷ Nē mē ujarēnhja kot paj tanhmā
 amā hā karō hto. Mē panhīgēt xu-
 jarēnh kamā mo Tīrtūm jarēnh? Am-
 rakati kumrēx. Jakamā kēr ka mē
 hkōt ajamaxpēr o ri apa hkēt nē. Ām
 Tīrtūm kapēr kōt pix mā ajamaxpēr
 tūr rāhā ho ri apa. Tīrtūm kapērja ām
 hāmri na.

⁸ Nē na htem amnhī karo hprām xāj
 tanhmā amnhī karo hto ho pa. Ja
 mex. Tanhmā kute hkēt. Na htem
 tanhmā amnhī karo hto nē gaa nē ra
 hkarore nē pa. No kēt mē kot Tīrtūm
 kapēr kōt ri amnhī nhīpēx o paja na
 mex o mē hkarota jakre. Na htem
 Tīrtūm kapēr kōt ri amnhī nhīpēx
 hāmri nē mex nē hkīnh nē pa ho
 pa. Hāmri nē nhūr mā kaxkwa kamā
 Tīrtūm mē Kra Jejus wa kuri mex nē
 htūr tūm nē pa ho pa. Ja na mex o mex.
⁹ ām hāmri ixte amā ja jarēnh jakamā

kwa kêr ka ja hã anohtỳx nẽ ri ho apa Ximotre.

¹⁰ Nẽ Tĩrtũmja rãhã ho rãhã. Tã na pu pre amnhĩ kaxyw Kra Jejus kôt pajamexpēr nẽ hkôt amnhĩ xãm nhũm Tĩrtũm pahto hkra. Kãm mẽ piitã mẽ ho hkra hprãm jakamã na htem pahpyrà nẽ amnhĩ kaxyw Kra hkôt hamexpēr nẽ hkôt amnhĩ xunhwỳ nhũm amnhĩ tã mẽ omunh xà hkôt mẽ ho hkra. Ja kaxyw na pu htem mẽ piitã mẽ kãm Jejus kot tanhmã mẽ panẽ amnhĩ nhĩpêx to hã harēnh rãhã o ri mẽ hkôt papa. Jao Tĩrtũm mã paxàpēnh mex nẽ.

¹¹ E kêr ka ã ja ho pahkwỳjê jahkre anhỹr ho ri mẽ hkôt apa. Mẽ kot amar nẽ akapēr kôt amnhĩ nhĩpêx mex ho pa kaxyw.

¹² Nẽ kormã anyw tã kêr ka mẽ piitã mẽ noo mã tãm ri akapēr nẽ tãm amnhĩ nhĩpêx o apa. Mẽ kot Jejus ã tanhmã ato htã arĩ amnhĩ kaxyw kãm ajamexpēr tỳx nẽ. Nẽ mẽ piitã mẽ kutã anojarēt nẽ ajamexpēr mex pix o ri apa. Kot kaj kormã anyw tã ã mẽ noo mã amnhĩ nhĩpêx anẽ nhũm mẽ hã apumu nẽ kãm akapēr mar prãm nẽ. Anyw ã apumunh tã kãm akapēr mar prãm nẽ.

¹³ Nẽ kêr ka mẽ ate Tĩrtũm kapēr mar kaxyw axpēn wỳr akuprō ka arĩ ixkutēp mẽ kãm Tĩrtũm kapēr tũm ã kagà kamã akapēr rãhã ho apa. Nẽ aprĩ hã tanhmã ho mẽ ahkre hto nẽ ho mẽ ahkre mex nẽ Ximotre.

¹⁴⁻¹⁵ E kêr ka ã amnhĩ nhĩpêx anhỹr o ri mẽ hkôt apa nẽ amã ho anhỹr kaga hkēt nẽ. Mẽ piitã mẽ kot ate Jejus mã amnhĩ nhĩpêx mex o amōr ã apumunh kaxyw. Kormã ate mẽ kãm Jejus jarēnh o apa hkēt ri na pre pastō nhỹ hã mẽ kapēr xwỳnhjaja ate Jejus mã tanhmã amnhĩ nhĩpêx to ho apa kaxyw axãm. Hãmri nẽ anhĩmōk ã mẽ ìhkra jaxwỳ nẽ axàpēnh kukamã tanhmã ajarēnh to nẽ ato Tĩrtũm wỳ. Hãmri nhũm ate mẽ kãm kapēr jarēnh o ri apa kaxyw amã ajamexpēr o hitỳx. Tã kêr ka ã hã ã kãm amnhĩ nhĩpêx anhỹr rãhã ho ri apa.

¹⁶ Nẽ kwa kêr ka amnhĩ pumunh mex nẽ Ximotre. Jao tãm ri amnhĩ nhĩpêx nẽ akatàt kôt Tĩrtũm kapēr o mẽ ahkre ho ri mẽ hkôt apa. Kot kaj ã amnhĩ nhĩpêx anẽ hãmri nhũm mẽ ama nẽ apyrã nẽ Jejus kôt amnhĩ xunhwỳ. Hãmri nẽ pahpyrà nẽ nhỹrmã Tĩrtũm wa kuri htĩr tũm nẽ pa ho pa.

5

Tanhmã mẽ pahte Kris kôt mẽ pahkwỳjê nhĩpêx to kaxyw mẽ pamã karō

Sikũn Ximotre 2.24-25

¹⁻² E kot paj hpãnhã Kris kôt pahkwỳjê hõ kot tanhmã amnhĩ tomnuj to nhũm ate tanhmã ja nẽ kãm akapēr to hã amã karō.

Nã koja mēhõ tanhmã ri amnhĩ tomnuj to ka harēnh ma hãmri nẽ ma hwỳr tẽ nẽ ja nẽ tanhmã kãm akapēr to. Nom kêr ka kãm akapēr mã agēt kêt nẽ.

Koja mēwejjê õ tanhmã amnhĩ tomnuj to ka te kēp anhĩpêxà rỳ akatorxà pyràk o kãm akapēr. Jao hã apijaàm o tanhmã kãm akapēr to.

Rỳ koja apyrã nẽ mẽ nywỳjê hõ tanhmã amnhĩ tomnuj to ka te kēp atõ pyràk o kãm akapēr.

Rỳ mēnijê nyw õ amnhĩ tomnuj japēr ka te kēp atõx pyràk o kãm akapēr. Jao hã apijaàm o kot amnhĩ tomnujja nẽ tanhmã kãm akapēr to.

E kêr ka mẽ kot amnhĩ tomnuj nẽ ã mẽ pahkwỳjê mã akapēr anhỹr o apa Ximotre.

Mẽ kēp mē mjên htyk xwỳnhjê jarēnh Xiakre 1.27

³ Nẽ kot paj hpãnhã Kris kôt pahkwỳ pē mē mjên htyk xwỳnhjê jarē. Nã koja mēhõ nija hkra hkēt nẽ htãmnhwỳ hkēt nẽ pa nhũm mjên kēp ty ka mẽ apē Kris kôt hkwyjaja ja hã omu nẽ mēmoj to kutã anojarēt rãhã ho ri apa. ⁴ Nom koja ra hkra rỳ ra htãmnhwỳ japēr kē mē tãmjaja tanhmã ho ajuta hto ho pa. Kãm õ nẽ kãm mēmoj nhõr o pa. Kormã mēhprĩre ri na pre mẽ õ wōwō nẽ mẽ katorxà

ně mẽ hipêxà mẽ hamār mex pē mẽ kām ò ho pa. Tã ra mẽ àptàr jakamã kê mẽ amnhĩ pyrà mẽ mẽ hamār mex pē mẽmoj to mẽ kutã nojarêt rãhã ho pa. Ja na Tĩrtũm kãm hprãm. Ā mẽ kot hkwyjê kamã ukaprĩ ho pa jakamã te mẽ kot Tĩrtũm mã àpênh pyræk.

⁵ No koja mẽhõ ni ra wejre mẽ ahte ri pa. Nẽ hkra mẽ htãmnhwý hkêt nẽ ri pa. Tã kê ja hã amnhĩ pumu mẽ Tĩrtũm kamnàr rom amnhĩ to hwýr o pa. Nẽ mẽ piitã mẽ ho hwýr o pa. Jao tãm hamaxpêr. Ka mẽ apê Kris kôt hkwyjaja ja hã omu hãmri mẽ mẽ kam nẽ tanhmã kutã anojarêt to ho ri apa.

⁶ No koja mẽ Ā amnhĩ nhĩpêx anhýr kêt nẽ. Nẽ htýx ri mẽ grer wýr mra mẽ hpijaam kêt o ri mra ka mẽ ja hã mẽ omu mẽ mẽ ho ajuta hkêt nẽ. Na htem Ā amnhĩ nhĩpêx anhýr o pa mẽ arĩ htĩr tã te ra htyk mẽ hikwý pyræk.

⁷ E kêr ka Ā ja hã Kris kôt pahkwýjê mã karõ anẽ. Kê mẽ ama mẽ Ā mẽ mjên htyk xwýnhjê nhĩpêx anhýr o pa. ⁸ Nom koja mẽhõ amnhĩ kwýjê ho mex kêt japêr. Nẽ òrkwý kamã hprõ mẽ hkrajaja mẽ hipêxà mẽ katorxà nhũm mẽ kãm mẽ apkur xà nhõr kêt japêr. Koja mẽ Ā amnhĩ nhĩpêx anhýr jao Jejus kaga mẽ te mẽ kot hkôt amnhĩ xunhwýr kêt xwýnhjaja kot amnhĩ nhĩpêx pyræk o amnhĩ nhĩpêx nom amnhĩ tomnuj týx o mẽ hakre.

⁹ Nẽ mẽ mjên htyk mẽ mẽ hkra mẽ mẽ htãmnhwý hkêt xwýnhjaja kêr ka mẽ tanhmã mẽ ho ajuta hto kaxyw hãmri mẽ mẽ hixi piitã hã kagà. Nom kwa kêr ka aprĩ hã tanhmã mẽ amnhĩ nhĩpêx to hã mẽ omu mẽ rĩ kormã mẽ hixi hã kagà.

Koja mẽhõ kormã mjên htĩr ri tãm hipêx mẽ nhãm mẽmyjê ho amnhĩkati hkêt nẽ.

Nẽ ra hã amgrà pè 60 rý ra hã 60 jakre.

¹⁰⁻¹¹ Nẽ tãm mẽ piitã mẽ hipêx o pa. Nẽ hkrajaja kormã htĩr ri nhũm mẽ hamār mex mẽ mẽ ahkre mex o pa.

Nẽ nhãm krĩ hõ nhõ xwýnhjaja ò krĩ hwýr pøj nhũm mẽ omu mẽ amnhĩ nhõrkwý hwýr mẽ kuwý.

Nẽ mẽ kêp amrakati xwýnhjê ho mex o pa.

Koja mẽ Ā amnhĩ nhĩpêx anẽ ka ja hã mẽ omu mẽ rĩ kormã mẽ ho ajuta kaxyw mẽ hixi hã kagà. Nom mẽ hixi hã kagà kaxyw mẽ mẽmoj tã mẽ hkukja mẽ mẽ kãm:

—E kot kaj Ā amnhĩ nhĩpêx anhýr o apa hã inhmã amnhĩ jarẽ pa ama mẽ rĩ kormã anhĩxi hã kagà.

Kot kaj axte amjên kêt nẽ.

Nẽ tanhmã Kris kôt akwýjê ho mex to ho ri apa.

Nhũm mẽhõ mẽmo myrapê hkaprĩ mẽ pa ka ja hã omu mẽ tanhmã ho ajuta hto.

E kot kaj Ā amnhĩ nhĩpêx anhýr o apa hã amnhĩ jarẽ pa ama mẽ anhĩxi hã kagà. Hãmri nhũm Kris kôt akwýjaja amã axàpkur xà nhõr o pa. Anẽ.

Ā mẽ kãm akapêr anẽ nhũm mẽ ama mẽ amã:

—Ý. Ma kot paj Ā amnhĩ nhĩpêx anẽ.

Anhýr Ā amnhĩ jarẽ ka mẽ ama mẽ mẽ hixi hã kagà. No kormã mẽ hã amgrà pè 60 kêt xwýnhjaja kêr ka kormã mẽ hixi hã kagà hkêt nẽ. Koja mẽ tanhmã mẽ kot amnhĩ nhĩpêx to ho pa hã mẽ kãm karõja ma mẽ wam tajê pyrà mẽ amã:

—Ý. Ma kot paj Ā amnhĩ nhĩpêx anẽ. Na pa Jejus Kris noo mã Ā amnhĩ jarênh anẽ.

Anhýr Ā amnhĩ jarênh tã gaa mẽ ra hkurê hapøj mẽ ra kot amnhĩ jarênh ta kwým ri tanhmã amnhĩ nhĩpêx to mẽ axte mjên. ¹² Ra amnhĩ jarênh o:

—Ma kot paj Ām Jejus mã pix mã tanhmã amnhĩ nhĩpêx to ho ri ixpa mẽ axte inhmjên kêt nẽ.

Anhýr tã tanhmã hamaxpêr to mẽ kot amnhĩ jarênh kwým ri axte mjên. Jao te Jejus mã amnhĩ to hêx pyræk nhũm Tĩrtũm pè jamnuj. Ja pymaj kêr ka mẽ kormã mẽ hã amgrà pè 60 kêt xwýnhjê nhĩxi hã kagà hkêt nẽ. Kormã mẽ hã amgrà pè 60 kêt xwýnhjaja arĩ mẽ hkĩnh týx ¹³ jakamã kot kaj mẽ kãm mẽ apkur xà nhõr o apa nhũm mẽ ja hã amnhĩ tã mẽ apumu mẽ axte amnhĩm àpênh kêt nẽ.

Ăm kām kaga nē htỳx ri nhām mẽ hwỳr mra nē nhām mẽ hwỳr mra. Nē amnhĩ pumunh mex kêt nē htỳx ri axpẽn jakwa kamā ri mẽ hixi ho rêt o pa. Nē nhỹri mẽmoj pumu rỳ tanhmā mẽmoj jarênh mar to hāmri nē ma htỳx ri hkwyjê mã harênh o mra. Koja mẽ ã amnhĩ nhĩpêx anhỹr o pa hāmri nhũm mẽ kêp Kris kwỳ hkêt xwỳnhjaja ja hã mẽ omu nē mẽ hkôt mẽ pahpê Kris kôt pahkwỳjê ho kapêr punuj nê. ¹⁴ ã mẽ kot amnhĩ nhĩpêx anhỹr o pa pymaj kêr ka kormā mẽ nyw xwỳnhjê mã anê kê mẽ māmri axte mjên nê o pa. Hāmri nê hkra nê hkrajê jamār o pa. Ja na inhmā hprām. Koja mẽ ã amnhĩ nhĩpêx anê hāmri nhũm mẽ kêp Kris kôt pahkwỳ hkêt xwỳnhjaja mẽ hkôt tanhmā mẽ pahto kapêr punuj to hkêt nê. ¹⁵ Mãn ka ra Kris kôt pahkwỳjê nyw pê mẽ mjên htyk xwỳnh kwỳjaja tanhmā amnhĩ tomnuj to hã mẽ harênh ma. Na prem Jejus kaga nê Satanasti hkôt amnhĩ nhĩpêx o pa.

¹⁶ E kêr ka mẽ ã Kris kwỳ pê mjên htyk xwỳnhjê nhĩpêx o apa anê Ximotre. Nom koja mẽ akwỳ kamā mẽhõ nhõ wôwô mjên rỳ katorxà mjên kêp ty kê tãm kãm õ ho pa. Kêr kê Kris kôt pahkwỳjaja ãm mẽ kêp mẽ mjên htyk xwỳnh pê mẽ hkra nê mẽ htãmnhwỳ hkêt nê ahte ri mẽ pa xwỳnh pixjaja tanhmā mẽ ho ajuta hto ho pa.

Mẽ pahpê Kris kôt pahkwỳjê hkrãhtũm kaxyw mẽ pahtã kãm karõ Atre 14.23; Wam Korit 9.7-14; Karatas 6.6; Wam Tesarõn 5.12; Wam Pêtre 5.1-4

¹⁷⁻¹⁸ Nê kot paj hpãnhã amã Kris kôt mẽ pahkrãhtũmjê jarê. Tĩrtũm kapêr ã kaga htũm kot mẽ harênh kot:

Kêr ka Tĩrtũm kapêr o mẽ ajahkre xwỳnhjaja mẽ ahkre pãnhã mẽ kãm amnhĩre. Anê.

Nê mããnên mẽ harênh ã kuxi nê mẽ harênh o:

Koja akrit amã ãpênh o pa ka ho mex nê kãm õ mex o apa. Anê.

Ă ja jarênh kot anhỹr jakamā koja Kris kôt mẽ akrãhtũmja Kris mã

tanhmā mẽ ato mex to ho pa ka mẽ amnhĩ tã kãm amnhĩrer mex o ri apa. Kot Tĩrtũm kapêr o mẽ ajahkre mex jakamā ka mẽ amnhĩ tã kãm amnhĩrer mex nê.

¹⁹ Nê koja mẽhõ pixi nê mẽ awỳr tẽ nê amã Kris kôt mẽ akrãhtũm kot tanhmā amnhĩ tomnuj to hã harênh to ka ama nê ãm ama. Nom koja wa hamêxkrut rỳ mẽ axkrunêpxi nê mẽ awỳr mra nê axpẽn kôt tanhmā harênh to ka mẽ ama nê ãm hāmri mẽ kot tanhmā kot amnhĩ tomnuj tota kôt ajamaxpêr. ²⁰ Hāmri nê Kris kwỳjê piitã mẽ noo mã kot amnhĩ tomnuj xwỳnhhta mã tanhmā kot amnhĩ tomnuj to nê kãm akapêr kê axte ã amnhĩ nhĩpêx anhỹr kêt nê. Mẽ piitã mẽ kot hã amar nê nhỹrmã tanhmā amnhĩ tomnuj to nhũm ate urak nê hã tanhmā mẽ kãm axakjêr to pymaj tanhmā amnhĩ tomnuj to hkêt nê.

²¹ E Tĩrtũm noo mã na pa ã amã mẽ kaxyw mẽmoj tã karõ anê Ximotre. Nê Jejus Kris mẽ Tĩrtũm kapêr o mẽ wryk xwỳnhjê noo mã pa ã amã karõ anê. Jakamā kêr ka inhmar tỳx nê hkôt amnhĩ nhĩpêx o ri apa. Jao mẽ piitã mẽ hipêx o axpẽn pyrak. Nom kêr ka akrãmnhwỳ kot tanhmā amnhĩ tomnuj to hã omu nê axtem nê ãm omu nê ajamaxpêr o:

—Nà kêp ixkrãmnhwỳ kênã kot paj kêt ja nê tanhmā kãm ixkapêr to. Pa ho anhỹr kêt nê.

Anhỹr o ajamaxpêr kêt nê. Mẽ piitã mẽ hipêx o axpẽn pyrak.

²² Nê kêr ka anojarêt kãm mẽ kot Tĩrtũm mã tanhmā amnhĩ nhĩpêx to ho mẽ pa kaxyw mẽ unhwỳr kêt nê. Aprĩ hã tanhmā mẽ kot amnhĩ nhĩpêx ã hã mẽ omu nê mẽ hkapi nê rĩ kormā mẽ unhwỳ rỳ tee ri mẽmoj tã mẽ omu nê mẽ hkaga.

Nê koja mẽhõ tanhmā amnhĩ tomnuj to ka ja hã omu rỳ harênh ma hāmri nê urak nê ã amnhĩ nhĩpêx anhỹr kêt nê. Arĩ Tĩrtũm kôt amnhĩ nhĩpêx pê tãm ri amnhĩ nhĩpêx pix o apa. ²³⁻²⁵ Na htem tũhã tanhmā amnhĩ tomnuj to nhũm mẽhõ ja hã mẽ omu nê mẽ harênh kurê kumrêx.

Kris kôt mẽ hkrähtüm kormã kot tanhmã hã kãm nẽ hkêt ri nhũm mẽ ja hã mẽ omu nẽ tanhmã mẽ harẽnh to. Nom na htem tõhã hpimxur pẽ tanhmã amnhĩ tomnuj to nhũm Tirtũm pix ja hã mẽ omu. Tã koja nhỹrmã mẽ piitã mẽ kãm ja ho amnhĩrit nhũm mẽ piitã harẽnh ma nẽ hkôt omu.

Nẽ mẽ kot amnhĩ to mex xwýnhjaja haxwýja. Na htem tõhã mẽ noo mã tanhmã mẽhõ ho mex to nhũm hkwyjaja ja hã omu nẽ axpẽn mã mẽ ã mẽ harẽ. Nẽ tõhã hpimxur pẽ tanhmã mẽhõ ho mex to nhũm mẽhõ ja hã omunh kêt nẽ. Âm Tirtũm pix ã kot amnhĩ nhĩpẽx anhỹr ã omu. Tã koja nhỹrmã mẽ piitã mẽ kãm ja ho amnhĩrit nhũm mẽ piitã harẽnh ma nẽ hkôt omu.

Nẽ kwa Ximotre. Axà nẽ anhõhymnuj nẽ ri apa jakamã kwa kër ka gô pix o akõm o apa hkêt nẽ. Mããnẽn wĩhti hkwy ho ixkõ kër ka anhõhy mex japêr.

6

Mẽ kãm mẽ àpênh xwýnhjê kaxyw mẽ hã kãm karõ

Epes 6.5-9; Korosẽ 3.22-4.1; Xitre 2.9-10; Wam Pêtre 2.18-25

¹ E kot paj mẽ akwyjaja mẽ kãm mẽ àpênh o mẽ pa xwýnhjê kaxyw mẽmoj tã amã karõ. Mẽ kãm anẽ kê mẽ õ patrãw ã hpijaam o ri pa. Jao mẽ kapêr ma nẽ hkôt kãm àpênh mex nẽ. Kojã mẽ ã amnhĩ nhĩpẽx anẽ nhũm amnhĩ tã mẽ omu nẽ hamaxpêr o:

—Kwa pêr Tirtũm kapêr na mex kumrêx. Inhmã àpênh xwýnhja na hte hkôt amnhĩ nhĩpẽx pẽ amnhĩ to mex o pa. Pêr ãm hãmri na hte Pawre ho mẽ ahkre ho pa.

Anhỹr o hamaxpêr. ² Nẽ koja mẽ õ patrãw ra Kris kôt amnhĩ xãm japêr ka kãm mẽ àpênh xwýnhjê mã anẽ kê Kris kôt mẽ kệp mẽ htõ hã mẽ kãm àpênh mex o ri pa. Nom kê mẽ urak nẽ kệp Kris kôt hkwy hã mẽ omu nẽ hamaxpêr o:

—Nà Kris kôt ixtõ kênã kot paj kêt ri kapêr kôt amnhĩ nhĩpẽx nẽ kãm ixapênh mex o ri ixpa.

Anhỹr o hamaxpêr kêt nẽ. Kê kệp Kris kôt htõ hã kãm ho mex prãm xãj kãm àpênh mex o pa.

E kër ka mẽ kãm mẽ àpênh o mẽ pa xwýnhjê mã ã tanhmã mẽ àpênh to ho pa hã karõ anẽ Ximotre.

Tirtũm kapêr kwým ri mẽ ahkre xwýnhjê jarênh

Rukre 12.13-21; Xiakre 5.1-6

³ Nẽ na hte Kris kwý hkêt xwýnh kwýjaja Kris kwýjê mã Tirtũm kapêr o hêx o pa. Nẽ htýx ri Jejus kapêr kwým ri tanhmã harẽnh to ho pa. Âm hãmri na Tirtũm mẽ Pahiti Jejus Kris wa kapêr tã nhũm htem htýx ri tanhmã ho hêx to ho ri mẽ hkôt pa. ⁴ Mẽ kot amnhĩ to rũnh xwýnh ã amnhĩ to jarkrar tã mẽ àhpumunh týx kêt. Na htem tanhmã Tirtũm kapêr kute hã axpẽn mã akir nẽ mẽmoj tã axpẽn kãm gryk o pa. Nẽ axpẽn mã kapêr punuj nẽ mẽmoj tã axpẽn kamnhĩx o pa. ⁵ Nẽ hamaxpêr mex kêt jakamã mẽmoj tã axpẽn mã àkjêr pix o pa. Na htem ã amnhĩ nhĩpẽx anhỹr o Tirtũm kapêr mar týx kêt nẽ. Hãmri nẽ htýx ri hamaxpêr nẽ hamaxpêr o:

—Kot paj Tirtũm kapêr o mẽ ahkre ho ixpa nhũm mẽ inhma nẽ inhmã amnhĩrer mex nẽ pa ixkàxpore rax nẽ ri ixpa. Nà kot paj ã amnhĩ nhĩpẽx anhỹr o ri ixpa. Ja inhmã mex.

Anhỹrja o kãm hikàxpore rũnh prãm o amnhĩ to amnhĩrit o pa.

Kàxpore jarênh

⁶⁻⁸ E kot paj hpãnhã amã tanhmã kàxpore jarênh to ka inhma Ximotre. Xà na pu htem pakatorxà nhõhy rũm pajapôj nẽ amnhĩ kôt kàxpore hkwy jamý nẽ ho pajapôj? Nà na pu htem pahkênh nẽ panhỹ kamã pajapôj. Tã kot puj mẽ ja pyrã nẽ nhỹrmã ty nẽ mã ho anẽ nẽ panhỹ kamã ma papa. Jakamã kër pu mẽ kormã pika ja kamã pahtir nẽ papa ri paxàpkur xà nẽ mẽ paxê pix tânopxar pẽ pahkĩnh nẽ ri papa. Pakàxpore rũnh kêt tã na pu htem Tirtũm kamnàr rom pahkĩnh nẽ pajamakêtkati nẽ papa. Jao pajamaxpêr o:

—Nà ixkàxpore rax kêt nê ixkukrêx rax kêt tã na hte Jejus ixkôt pa ho pa nê mẽmoj to ixkutã nojarêt rãhã ho pa. Jakamã ixkàxpore rax kêt tã ixkĩnh nê ijamakêtkati nê ixàmnhĩx ixpa.

Anhỹr o pajamexpêr o papa.

⁹⁻¹⁰ Mẽ kot amnhĩm kàxpore o pikuprõnh rũnh xwýnhjaja na htem kàxpore pix kukamã hamaxpêr o pa nê gaa nê kàxpore rũnh gryk ã amnhĩ tomnuj o pa. Na pre mẽ pahkwýjaja kàxpore rũnh prãm xàj Jejus kaga. Tã ra mẽ hikàxpore rũnh tã hkĩnh nê hamakêtkati nê pa hkêt nê. Na htem omnuj nê hkaprĩ nê pa. ã na htem mẽ hikàxpore rũnh xwýnh kwýjaja amnhĩ nhĩpêx anhỹr o pa. Jao kàxpore pix kukamã hamaxpêr nê gaa nê ra gryk ã mẽ kot amnhĩ to mex xà kaga hpa nê htýx ri tanhmã amnhĩ tomnuj to ho pa. Nê tanhmã hkwýjê nhĩpêx punuj to. Te tutre kot harôj xành ã htýx rapuuti hwýr gjêx nê tee ri kãm kator prãm kaprý pyræk. ã mẽ kot amnhĩ nhĩpêx anhỹr o pa jakamã koja nhỹrmã Tĩrtũm ma mẽ kot amnhĩ xà htýx kamã hamak tũm xà hwýr mẽ kurê.

Pawre kot Ximotre mã mẽmoj tã karõ

Korosẽ 4.17; Wam Ximotre 4.14; Sikũn Ximotre 2.1-7

¹¹ Nê kwa Ximotre kêt ka mẽ uræk nê kàxpore rax prãm xàj amnhĩ tomnuj o apa hkêt nê. Ate Tĩrtũm mã tanhmã amnhĩ nhĩpêx to ho apa xwýnh jakamã kêt ka kãm hprãm xà hkôt pix mã amnhĩ nhĩpêx o ri apa. Jao Tĩrtũm pyrà nê ate amnhĩ jarênh xà hkôt amnhĩ nhĩpêx o ri apa. Nê amã Kris kôt akwýjê hkĩnh pê mẽmoj to mẽ kutã anojarêt o ri apa. Nê Kris kôt mẽ hkwý hkêt xwýnhjaja kot Kris ã tanhmã ato htã ka arĩ hkôt amnhĩ nhĩpêx mex nê mẽ piitã mẽ ho mex o ri mẽ hkôt apa. ¹² Na ka pre Kris kôt mẽ pahkwýjê noo mã tanhmã amnhĩ jarênh to. Tĩrtũm kot amnhĩ wýr awýr nhũm ate Jejus kôt amnhĩ xãm nê amã kãm tanhmã amnhĩ nhĩpêx to ho apa hprãm ã amnhĩ jarê nhũm ikrêsti kamã mẽ piitã ja hã ama. Jakamã

kwa kêt ka arĩ Jejus kôt amnhĩ nhĩpêx mex rãhã ho ri apa. Hãmri nê nhỹrmã Tĩrtũm mẽ Kra wa kuri amex kumrêx nê atĩr tũm nê apa ho apa.

¹³⁻¹⁴ E na pa mẽmoj tã amã karõ rax ka piitã kamã harê nê mar pa. Tã kêt ka inhmã ja hã tanhmã amnhĩ jarênh to. Mẽmoj piitã ho htĩr xwýnh Tĩrtũm mẽ Jejus Kris wa noo mã tanhmã ja hã inhmã amnhĩ jarênh to. Jejus htyk kaxyw nê àmnhĩx kot Pahi Põn Pirat mã amnhĩ jarênh xwýnhhta noo mã amnhĩ jarê nê inhmã amnhĩ jarênh o:

—Nà kot paj ate mẽmoj tã inhmã karõ piitã hkôt amnhĩ nhĩpêx rãhã nhũm Pahihti Jejus Kris akupýn mẽ pahwýr wrý. Am hãmri na pa ã amã amnhĩ jarênh anê Pawre.

Anhỹr o inhmã amnhĩ jarê.

Tĩrtũm mex o mex ã mẽ grer

¹⁵ Nê koja Tĩrtũm akupýn mẽ pahwýr Jejus mẽnh xà hã arĩgro jarê hãmri nhũm kot harênh xàta wýr pøj nhũm akupýn mẽ pahwýr kumê. Tĩrtũmja mex o mex. Tapxipix kêt mẽmoj piitã ho amnhĩptar xwýnh maati. Nê kêt jar mẽ ho amnhĩptar xwýnh piitã mẽ õ Pahi Maati.

¹⁶ Nê tapxipix na rãhã ho rãhã nê mex o mex jakamã puhã hirã rax kumrêx. Tã hkĩnhã mẽ pahte amnhĩ tomnuj xwýnh jakamã kot puj mẽ puhã hirã raxja kutã hkêt nê. Jao hwýr mẽ pamrar kêt nê.

Nê aa mẽhõ kot no ho Tĩrtũm pumunh kêt tã kwa kêt pu mẽ pahpiitã kãm mex o mex nê hihtýx o hihtýx ã harênh rãhã ho papa.

Axte mẽ hikàxpore rũnh xwýnhjê jarênh

Rukre 16.9

¹⁷ Nê kêt ka Kris kwýjê kamã mẽ hikàxpore rũnh xwýnhjê mã anê kê mẽ kot amnhĩ to rũnh kôt amnhĩ to àmra ho pa hkêt nê. Nê amnhĩ kaxyw mẽ hikàxpore rũnh kôt hamaxpêr o pa hkêt nê. Kàxpore na hte hapêx tokyx anê. Mẽ kãm anê kê mẽ hpãnhã amnhĩ kaxyw Tĩrtũm kôt mãn

hamaxpēr tỳx rāhā ho pa. Na hte àmnhĩx tanhmā mẽ pahto mex to ho pa nē mẽ pahpê õxỳ hkêt nē. Jao mẽ pahwỳr na rē nhũm mẽ pahpur go mex nē pu mẽ kamā panhō rũnh o papa. Nē mẽ pamā myyti ho hirā pu mẽ kukwak ri parīt mex pē mẽmoj tã paxàpênh o papa. ã Tĩrtũm kot mẽ pahto mex kot anhỳr pu mẽ kukwak ri pahkĩnh nē pajamakêtkati nē ri papa. Tã kêr ka mẽ hikàxpore rũnh xwỳnhjê mã anê kê mẽ amnhĩ kaxyw kumã pix mã mãn hamaxpēr rāhā ho pa. ¹⁸ Nē mẽ kãm anê kê mẽ hikàxpore ho hkwyjê pē õxỳ hkêt nē ho tanhmā mẽ ho mex to ho pa. Nē àmnhĩx ho tanhmā mẽ kêp amrakati xwỳnhjê ho ajuta hto ho pa. ¹⁹ Koja mẽ ã amnhĩ nhĩpêx anê nhũm Tĩrtũm ja hã mẽ omu nē hkĩnh nē õ krĩ kamā mẽ kutêp mẽ kãm mẽmoj mex o akuprõ. Jakamã nhũm mẽ kormã jar htĩr nē pa ri mex nē pa nē mãănên nhỹrmã kaxkwa kamā mex kumrêx o jar pika ja kamā mex nē pata jakre. E kêr ka ã mẽ hikàxpore rũnh xwỳnhjê mã ja hã karõ anê Ximotre.

Pawre kot Ximotre mã mẽmoj tã karõ jatur xà

Korosê 4.17; Wam Ximotre 6.14; Sikũn Ximotre 1.13, 4.5

²⁰ Nē ra Tĩrtũm kot ate kapêr o mẽ ahkre ho apa kaxyw axãm jakamã kêr ka tãm amnhĩ nhĩpêx pē mẽ ahkre mex rāhā ho ri apa. Jao Tĩrtũm kapêr o hêx o ri mẽ ahkre xwỳnhjê hkôt apa hkêt nē. Na htem mẽ kuma nē mẽ kapêr mex ã mẽ hkamnhĩx nom mẽ kapêr mex kêt. Jakamã kwa kêr ka mẽ kot tanhmā mẽ ahkre hto hã mẽ ama nē ãm mẽ ama. ²¹ Na pre ra mẽ pahkwỳjaja mẽ kuma nē mẽ kapêr gryk ã Jejus kaga.

E ãm ja pix. Kê Tĩrtũm mẽ apiitã mẽ akutã nojarêt rāhā ho pa. Ixpê Pawre na pa ã amã ixkapêr ã kagà anê.

Sikũn Ximotre Pawre kot Ximotre hwỳr wam kagà nẽ mẽn̄h kôt hõ mẽn̄h

Pawre na pre kagàja nhĩpêx. Na pre Jejus kwỳ hket̄ xwỳnhjaja Jejus ã unẽ nẽ krĩ pẽ Rõm kamã haxà nhũm arĩ hkrĩ ho hkrĩ. Tã ra mẽ kot hpĩr kaxyw nhũm Ximotre mã kagàja nhĩpêx nẽ hwỳr kumẽ. Na pre Ximotre Pawre hkôt pa ho pa hã mytwrỳ xohtô nẽ. Tã hpãnhã krĩ pẽ Epes kamã arĩk nẽ Tĩrtũm kapẽr o Jejus kôt hkwỳjẽ jahkre ho ri mẽ hkôt pa. Jakamã nhũm Pawre kagàja nhĩpêx nẽ kamã kãm mẽmoj tã karõ nẽ hwỳr kumẽ. Nẽ nhỹrmã mẽ kot Pawre pyrã nẽ Jejus ã hpĩr mã htã tee ri amnhĩ kukamã hamaxpẽr kêt ã kãm karõ.

Nẽ mẽ hkwỳjaja kęp Tĩrtũm kra hã amnhĩ jarẽnh tã nhũm Pawre Tĩrtũm kãm hprãm xà kuhpa hã mẽ kot tanhmã amnhĩ nhĩpêx to ho pa hã Ximotre mã mẽ harẽ. Kot mẽ harẽnh mar nẽ Jejus kwỳjẽ nẽ mẽ omunh mex o pa kaxyw. Nẽ Ximotre kot Tĩrtũm kãm hprãm xà kot pix mã amnhĩ nhĩpêx o pa hã kãm karõ. ã na pre Pawreja Ximotre mã mẽmoj tã karõ kamã hihtỳx nẽ hã kagà nẽ hwỳr mẽn̄h anẽ. Nẽ kãm:

¹ Pa Ximotre? Xà amex? Ixpê Pawre na pa amã ixkapẽr nẽ hã kagà nẽ awỳr kumẽ. Ixpê Jejus nhỹ hã hkwỳjẽ jahkre ho ixpa xwỳnh na pa. Tĩrtũm na pre ja kaxyw ixãm. Tĩrtũm Kra Jejus Krisja kot puj mẽ pahpê hkwỳjaja nhỹrmã kukwak ri pamex kumrẽx nẽ pahĩr tũm nẽ ri papa ho papa.

Pawre kot Ximotre ho Tĩrtũm mẽ Jejus wa hwỳr ã harẽnh

Atre 16.1-2

²⁻³ Te apê ixkra pyrãk Ximotre. Jakamã na pa hte ato Mẽpanhĩpêxã maati Tĩrtũm mẽ Pahihti Jejus Kris wa hwỳr rãhã ho ri ixpa. Na pa hte mẽ pakukamã mẽ panhĩgêt pyrã nẽ tãm ijamaxpẽr o ixpa pẽ Tĩrtũm mã

tanhmã amnhĩ nhĩpêx to ho ri ixpa. Jakamã na pa hte ato Kra Jejus mẽ wa hwỳr rãhã ho ri ixpa. Arĩgro hã nẽ kamàt kãm amã ijamaxpẽr nẽ ato wa kuwỳ nẽ wa kãm:

—Pa Tĩrtũm mẽ Pahihti wa. E ixte ixkra puro Ximotre ho war awỳr kaxyw war amã ijamaxpẽr. Na ka hte wa ho mex nhũm war akôt amnhĩ nhĩpêx mex o pa. Te õ wõwõ mẽ katorxà wa kot amnhĩ nhĩpêx pyrãk. Na pa hte kot amnhĩ nhĩpêx o paja mã ijamaxpẽr nẽ ÿ hã ixkĩnh nẽ. War ate kamã axukaprĩ ho ri apa kaxyw na pa ho war awỳ. War ate kutã war anojarêt rãhã ho ri war apa nhũm hamakêtcati nẽ àmnhĩx ri pa ho pa kaxyw. Anẽ.

Pawre kot Ximotre nhỹ hã hkĩnh ã harẽnh

⁴ Nẽ na ka pre hte ixkôt ixto ajuta ho ri ixkôt apa htã pa pre nhỹhỹm inhnojarêt nẽ axtem axapênh õ hã amã karõ hãmri nẽ Epes kamã are nẽ ma mõ. Ka amã ijapê xaj tee ri ma inhmõr ã ixpumu nẽ amỳr rax nẽ. Na pa hte arĩ ja hã inhnohtỳx nẽ ri ho ixpa Ximotre. Jao ra ato ama nẽ. Tã kot puj nhỹrmã axte axpẽn pumu nẽ pahkĩnh tỳx nẽ.

⁵ Nẽ na pa hte akatorxà Enĩtre mẽ anhõ wõwõre Rojti wa kãm ijamaxpẽr rãhã ho ri ixpa. Na pre wa kumrẽx amnhĩ kaxyw Jejus kôt hamaxpẽr nẽ hkôt amnhĩ xãm. Tã ka wa hkanrẽhã wa urak nẽ ã amnhĩ nhĩpêx anẽ. Ixte ja hã apumunh mex. ⁶ Na pa pre ate tanhmã Jejus mã amnhĩ nhĩpêx to ho ri apa kaxyw axãm kaxyw anhĩmõk ã inhĩhkra xi nẽ ato Tĩrtũm wỳ. Kot tanhmã akrã hto nhũm ate Karõ nhỹ hã tanhmã amnhĩ nhĩpêx to ho apa kaxyw. Tã kêt ka arĩ ã kãm amnhĩ nhĩpêx anhỹr rãhã ho ri apa. ⁷ Na pu htem Tĩrtũm Karõ nhỹ hã pamã ma ho papa hkêt nẽ. Na pu htem ÿ hã pamã mẽ piitã mẽ hkĩnh pẽ paxãmnhĩx tanhmã mẽ ho ajuta hto ho papa. Nẽ ÿ hã kapẽr o mẽ ahkre htỳx o ri mẽ hkôt papa. Nẽ mẽmoj punujkutã amnhĩ to htỳx rãhã nẽ. Jao amnhĩ to mex pix nẽ.

⁸ Jakamã kwa kêr ka amã mẽ kãm Jejus jarênh o apa pymaj tee ri amnhĩ kukamã ajamaxpêr kêt nê. Nê mẽ kot Jejus ã ijaxâr nhũm arĩ ixkrĩ hã ijarênh ma nê mẽ kot ixkuxwar ajaxâr pymaj mẽ kãm Tĩrtũm kapêr o mẽ ahkre hkukamã tee ri ajamaxpêr kêt nê. Mẽ kot ã anhĩpêx anhỹr mã tã kêr ka amnhĩ kamã akahak kêt nê. Æm Tĩrtũm nhỹ hã hihtỹx xà ho amnhĩ to htỹx nê ixpyrà nê ma mẽ kãm Jejus kot mẽ panê tanhmã amnhĩ nhĩpêx to hã harênh to rãhã ho ri mẽ hkôt apa. Mẽ kot tanhmã hã anhĩpêx to htãã.

⁹ Na pu htem Jejus kôt amnhĩ xunhwỳ nhũm Tĩrtũm ja hã mẽ pahpumu nê Jejus kukwak ri amnhĩ katut kôt mẽ pahte amnhĩ tomnuj piitã rênh pa nê mẽ pahto hkra. Hãmri nê mẽ pahte hkôt pix mã amnhĩ nhĩpêx o papa kaxyw mẽ paxunhwỳ. Æm Jejus pix kukwak ri na hte mẽ pahto hkra nê ã mẽmoj to mẽ pakutã nojarêt rãhã ho pa anê. No na hte mẽ pahte amnhĩ to mex ã mẽ pahpumunh kôt mẽ pahto hkra hkêt nê. Amnepêm kormã mẽmoj piitã hkêt ri na pre mẽ pakukamã hamaxpêr o:

—Koja mẽ nhỹrmã Ixkra Jejus Kris kôt amnhĩ xunhwỳ pa ja hã mẽ omu nê Ixkra kukwak ri mẽ ho mex nê. Anê.

¹⁰ Tã kormã mẽ pahte amnhĩ tã ã kot mẽ pajarênh anhỹrja mar kêt jakamã na pre Jejus mẽ pahwỳr wrỳ nê tanhmã mẽ pahto mex to. Na pre ty nhũm Tĩrtũm akupỹm ho htĩr. Jakamã na pu htem ra amnhĩ kaxyw hkôt pajamaxpêr nê hkôt amnhĩ xunhwỳ hãmri nê nhỹrmã mẽ pahtyk tã nhũm Tĩrtũm kot Kra Jejus nhĩpêx pyrà nê akupỹm mẽ pahto mẽ pahĩr pu mẽ Jejus kukwak ri wa kuri pamex nê pahĩr tũm nê papa ho papa. Jakamã na pu htem mẽ pamã pahĩrky puma ho papa hkêt nê.

¹¹ Amnepêm na pre Tĩrtũm ixãm nê tanhmã inhmã ixápênh ã karõ hto nê inhmã:

—E Pawre kêr ka Jejus nhỹ hã ma hkwyjê jahkre ho ri mẽ hkôt apa. Nê ixkapêr o mẽ ahkre mex nê. Kêr ka

ã amnhĩ nhĩpêx anhỹr rãhã ho ri mẽ hkôt apa. Anê.

¹² Tã ã kot inhmã kapêr anhỹr nhũm ixte kapêr kôt amnhĩ nhĩpêx o ixpaja mỳrapê na htem Jejus ã tanhmã inhĩpêx kati hto ho pa. Pa hte ixpunuj nê amnhĩ xà htỹx kamã ijamak o ri Jejus mã tanhmã amnhĩ nhĩpêx to ho ri mẽ hkôt ixpa. Tã nom tee ri ja hã amnhĩ pumu nê amnhĩ kamã ixpijaãm nê ixkaprĩ hkêt nê. Ixte amnhĩ kaxyw hkôt ijamaxpêr xwỳnhja na ixte tanhmã kot amnhĩ nhĩpêx to hã omunh mex jakamã kot paj ty nhũm mẽ arĩ inhmỳr pê Tĩrtũm kapêr mar o pa. Mẽ kot ja hã ixpĩr tã koja mẽ apê Kris kôt ixkwỳjaja inhmỳr pê arĩ mẽ kãm harênh o apa. Koja mẽ ã axpên mỳr pê amnhĩ nhĩpêx anhỹr o pa rãhã nhũm Pahihti Jejus akupỹn mẽ pahwỳr wrỳ.

¹³ Kwa Ximotre. Ra ixte amã mẽmoj tã karõ rax jakamã kêr ka mar tỹx nê hkôt amnhĩ nhĩpêx rãhã o ri apa. Jao Jejus Kris nhỹ hã mẽ piitã mẽ noo mã amnhĩ kaxyw kãm ajamaxpêr tỹx rãhã nê. Nê mẽ piitã mẽ ho mex o ri apa. ¹⁴ Ate mẽ kãm tanhmã Jejus jarênh to ho ri apaja Æm hãmri na. Tã koja mẽhõ htỹx ri tanhmã ho kapêr punuj to rỳ axtem nê tanhmã harênh to ka ja hã ama nê nê kãm akapêr kãm axihtỹx nê. Tĩrtũm Karõ ra kot akarõ hwỳr àr jakamã kêr ka ÿ hã ã Jejus jarênhja jamãr mex o ri apa anê.

Pawre kot tanhmã amnhĩ jarênh to Sikûn Ximotre 4.16-18

¹⁵ Nê mãn ka pre ra pika pê As kamã Kris kwỳ kot ixkaga hã mẽ harênh ma. Na pre Pijerti mẽ Emosti mẽ mẽ ohtõ nê tanhmã hamaxpêr to nê ixto ajuta hkêt nê. ¹⁶⁻¹⁸ Æm Onësipti pix na pre mẽ kurom ijarênh ma nê man ixwỳr Rõm wỳr mõ nê ijapêr o ri mẽ hkôt mra nê ixwỳr kato. Hãmri nê xatã ixwỳr mra nê tanhmã ixto mex to. Jao akupỹm ijamaxpêr o hihtỹx. Ixpê prês nê ixkrĩ htã kêp ixkrãmnhwỳ hã amnhĩ jarênh ã hpijaãm kêt nê. Nê amnepêm kormã krĩ pê Epes kamã ixpa ri na pre mããnên tanhmã ixto

mex to ho pa. Tã ã kot inhîpêx mex anhÿr o pa jakamã na pa hte ho Pahihti Jejus wÿ nê kãm:

—Pa Pahihti? Onësipti o na pa awÿ. Kot ixto mex rãhã ho pa jakamã kwa kêr ka ixtã omu nê kutã anojarêt rãhã ho apa. Nê òrkwÿ kamã hkwÿjaja mãânên tanhmã mẽ ho mex to. Hãmri nê nhÿrmã akupÿn mẽ ixwÿr wrÿ nê ixtã kamã axukaprî hã tanhmã ho mex to. Anê.

2

Mẽ pahte Jejus kôt amnhî nhîpêx pix prãm ã mẽ pamã karõ

Wam Ximotre 6.11-16

¹ E Ximotre. Jejus Kris kot mẽmoj to mẽ pakutã nojarêt rãhã jakamã kwa kêr ka ÿ hã amnhî to htÿx nê kãm tanhmã amnhî nhîpêx to ho apa hã amnhî kamã akahak o ri apa hkêt nê. ² Ra ate pa tanhmã Tirtûm kapêr o mẽ ahkre htoja mar jakamã kêr ka amnhî xô ri ã Jejus kôt mẽ pahkwÿjê jahkre ho apa anê. Mẽ kot amar nê pahpyràn axpên xô ri ho axpên jahkre ho pa kaxyw.

³⁻⁴ Sôrdat na htem mẽ hkrãhtûm kãm prãm xà hkôt tanhmã amnhî nhîpêx to. Jao tanhmã kute htã kapêr ma nê hkôt amnhî nhîpêx. Tanhmãn à rÿ kãm prãm rÿ tanhmã omnuj to htã kutã amnhî to htÿx nê mẽ hkrãhtûm kôt amnhî nhîpêx. Na htem amnhî xapênh kukamã tee ri hamaxpêr o pa hkêt nê. ãm mẽ hkrãhtûm kapêr kôt pix mã amnhî nhîpêx o pa hprãm. Tã kêr ka mẽ uràk nê Pahihti Jejus kôt amnhî nhîpêx rãhã ho ri apa hprãm. Mẽ kot hã tanhmã atomnuj to htãã.

⁵ Nê mẽ hprôt tÿx xwÿnhjaja na htem hkwÿjê pê amnhî to wa hprãm xàj ãm ja pix kukamã hamaxpêr. Hãmri nê hprôt tÿx prãm xàj mẽmoj kot mẽ ho hirerek kêt nê amnhî jagri htÿx nê. Hãmri nê hprôt tÿx o hkwÿjê jakre nê amnhî to wa nê pøj nê kot amnhî to wa hã mẽmoj to kãnja. Tã kêr ka mẽ uràk nê amã Pahihti Jejus kot amnhî nhîpêx kôt pix mã amã amnhî nhîpêx prãm.

⁶ Nê pur kãm mẽ àpênh xwÿnhjaja na htem mẽ hpur kãm àpênh pix tânopxar o pa nê àpênh rÿnh nê. Kãm kaga hkêt kãm àpênh o pa. Tã àpênh rÿnhja kukwak ri ihpur kãm ò rÿnh nê ho apkur mex o pa. Nom koja mẽ kãm kaga nê àpênh mex kêt nê hãmri nê ò grire nê apkur mex kêt nê. Tã kêr ka pur kãm mẽ àpênh rÿnh xwÿnhjê pyrà nê Pahihti Jejus mã amnhî nhîpêx mex o apa. Nê mẽ uràk nê amã kaga hkêt kãm axapênh pix tânopxar o ri apa.

⁷ E na pa ã ajahkre anê Ximotre. Tã kêr ka ixte ajahkreja ma nê kãm ajamaxpêr rãhã nê. Koja Pahihti tanhmã akrã hto ka aprî hã mar tÿx nê.

⁸ Nê kêr ka Pahihti Jejus Kris mã ajamaxpêr rãhã ho ri apa. Na pre katorxà hkôt kêp Pahi finat Tawi kanrêhã htãmnhwÿ hã mẽ pahpyrà nê ï ho ï nê kato nê panhõ pika kamã pa ho pa. Tã nhÿm prem kupî nhÿm amnhî xà htÿx kamã hamak kãm ty. Hãmri nhÿm Tirtûm akupÿm ho htîr nhÿm akupÿm htîr o htîr. ã na pre hte harênh anhÿr rãhã ho ri mẽ hkôt ixpa. ⁹ Mÿrapê na prem ijaxà pa arî jar ixkrî ho ixkrî. Na htem ixte amnhî tomnuj xwÿnh pyràk o inhîpêx nê axte ixte Jejus kapêr jarênh o ixpa pymaj ijaxà. Tã ã mẽ kot inhîpêx anhÿr tã na hte Kris kôt pahtøjaja arî ixpãnhã mẽ kãm harênh o ri pa. Koja mẽ tee ri kãm Jejus jarênh o hapêx prãm kaprÿ. ¹⁰ Jakamã kwãr mẽ mãmrî ã inhîpêx anê. Koja mẽ arî Jejus kot tanhmã mẽ panê amnhî nhîpêx toja mar o pa nhÿm mẽ hkwÿjaja hkôt amnhî xunhwÿ nê nhÿrmã pahpyrà nê kêp Jejus Kris kwÿ hã Tirtûm mẽ wa kuri mex nê htîr tûm nê pa ho pa.

Kris kwÿ kot tanhmã amnhî tã grer to hã mẽ harênh

¹¹ Na pu htem mẽ pahpê Kris kwÿ hã ã amnhî tã pagrer anê:

Mẽ kot Kris ã mẽ panhîmex tã kot puj mẽ akupÿm pahtîr nê kuri pamex nê pahtîr tûm nê papa ho papa.

12 Mě kot tanhmã Kris ã mẽ pah-tomnuj to htã kot puj mẽ arĩ hkôt amnhĩ nhĩpêx o papa rãhã ty nẽ nhỹrmã ìhkô hã mẽ ho amnhĩptâr o papa.

Nom kot puj mẽ amnhĩ kamã pakahak pê mẽ pahpê Jejus kwý hkêt ã amnhĩ jarẽ hã koja Jejus amnhĩ xwar mẽ pahpê hkwy hkêt ã mẽ pajarẽ.

13 Nẽ mẽ pahte amnhĩ kaxyw Jejus kôt pajamaxpêr kêê tã tanhmã amnhĩ jarẽnh to xà hkôt tanhmã amnhĩ nhĩpêx to.

Aa kot mẽmoj tã amnhĩ jarẽnh kuhpa hã ri tanhmã amnhĩ nhĩpêx to hkêt. Anẽ.

Mě kot Tirtũm kapêr o mẽ ahkre mex xwýnhjê jarẽnh

Wam Pêtre 3.15-16

14 E Ximotre. Ixte ã mẽmoj tã amã karõ anhỹrja kêr ka ho mẽ ahkre rãhã ho ri mẽ hkôt apa. Kê mẽ ama nẽ kãm hamaxpêr rãhã nẽ.

Nẽ mẽ kãm anẽ kê mẽ Tirtũm kapêr o mẽ ahkre mex o ri pa nẽ kapêr ã tanhmã axpên mã àkjêr to hkêt nẽ. Koja mẽ hã axpên mã akir hãmri nẽ amnhĩ to mex kêr nẽ. Hãmri nhũm mẽ kot mẽ kapêr mar xwýnhjaja ja hã mẽ omu nẽ tee ri Tirtũm kapêr kukamã hamaxpêr nẽ hkôt amnhĩ nhĩpêx mex kêr nẽ.

15 Nẽ na htem mẽ kãm mẽ àpênh mex xwýnhjaja mẽ õ patrãw kapêr ma nẽ hkôt mẽmoj tã àpênh mex nẽ. Nhũm õ patrãwja hwýr mra nẽ àpênh ã omu. Hãmri nhũm amnhĩ wýr omu nẽ àmnhix noo mã apê. Kãm àpênh mex jakamã amnhĩ kamã kãm uma hkêt nẽ. Ja pyrã nẽ kêr ka Tirtũm noo mã kãm amnhĩ nhĩpêx mex rãhã nẽ aprĩ hã kapêr o mẽ ahkre mex o ri mẽ hkôt apa. Kê ã ate amnhĩ nhĩpêx anhỹr ã apumu nẽ anhỹ hã hkĩnh nẽ. Ka àpênh xwýnhhta pyrã nẽ amnhĩ kamã amã uma hkêt nẽ noo mã kãm amnhĩ nhĩpêx mex o ri apa.

16 No mẽ kot Tirtũm kapêr o hêx o mẽ pa xwýnhjaja kêr ka mẽ hkôt ri apa hkêt nẽ. Nẽ mẽ kapêr mar nẽ ri mẽ hkôt axãm hkêt nẽ. Na htem mẽ kapêr

ma nẽ mẽ hkôt amnhĩ nhĩpêx o pa nẽ kãm Tirtũm kapêr mar prãm kêr nẽ. Nẽ gaa nẽ te kêp mar pumaj amnhĩ jamak pro pyrãk o amnhĩ nhĩpêx. 17 Týx ri tanhmã mẽ ahkre hto xãja te kot mẽ hkãnhya aa mex kêr nẽ ra omnuj týx o mörja pyrãk. Jao mẽ kot mẽ kapêr mar o mẽ pa xwýnhjaja mẽ mar pê ra mẽ hkôt amnhĩ tomnuj týx o mô. Na hte ra Imẽnew mẽ Pijertija wa ã htýx ri amnhĩ krã hkôt mẽ ahkre anhỹr o pa. 18 Nẽ Tirtũm o hêx o mẽ hkôt pa nẽ nhỹrmã akupým mẽ pahto mẽ pahĩr kêr ã harẽnh o pa. Hãmri nhũm mẽ amnhĩ tã wa kuma nẽ tee ri amnhĩ kukamã hamaxpêr pê Jejus kaga nẽ axte amnhĩ kaxyw hkôt hamaxpêr kêr nẽ. Nom wa kapêrja kot anhỹr kêr. 19 Kêr Tirtũm kapêrja ãm hãmri na. Kot mẽmoj to hêx kêr jakamã na pu htem amnhĩ kaxyw hkôt pajamaxpêr kaprý hkêt nẽ. Kapêr ã kagã htũm kot tanhmã mẽ pahpê hkrajê jarẽnh to nẽ harẽnh kot:

Tirtũm na kot hkrajê piitã omunh mex rãhã ho pa xwýnh.

Anhỹr o mẽ pajarẽnh. Nẽ mẽ pamã mẽmoj tã karõ kot:

Kê mẽ kot Jejus kôt amnhĩ xunhwýr xwýnhjaja amnhĩ tomnuj o pa hkêt nẽ. Anẽ.

Tirtũm krajaja te kêp prat mex pyrãk ã mẽ harẽnh

20 Nẽ mẽ hikàxpore rũnh xwýnhjaja mẽ õ xijere nẽ mẽ õ prat xohtõ. Prat kwý muxre nẽ hkwy omnajre. Prat pynajre na htem mãmrĩ kamã apku no prat muxreja ãm mẽmoj mex pix kaxyw na htem mēsti hã haxwý nẽ kamã apku. Kasamēt ã rý mẽ hkra krã hkênh ã mẽ hkĩnh nhũm htem mēsti hã haxwý nẽ kamã apku.

21 Tã mẽ kot Tirtũm kapêr o hêx o mẽ pa xwýnhjê hkôt hamaxpêr kêr nẽ mẽ hkôt amnhĩ tomnuj kêr xwýnhjaja te mẽ kot prat muxre pyrãk. Na htem tãm amnhĩ nhĩpêx nẽ tanhmã hamaxpêr punuj to ho pa hkêt nẽ. Hãmri nhũm Tirtũm ja hã mẽ omu nẽ mẽ ý hã hkĩnh nẽ. Hãmri nẽ te mẽ kot prat muxre jaxwýr nẽ kamã apkur

pyrà nê mē kot kām tanhmā amnhī nhīpêx to ho pa kaxyw mē unhwÿ.

Mē pahte tām amnhī nhīpêx ã mē pamã karõ

²²Nê mē àptâr nyw jamaxpêr punujja kêr ka te ate hamÿnh nê amnhī katut kôt rênh par pyrâk o hipêx Ximotre. Jao axte ho ajamaxpêr o ri apa hkêt nê. Nom mē hamaxpêr mexja kêr ka hamÿ nê amnhī krã him hagjê nê ho ajamaxpêr rãhã ho ri apa. Jao tãm amnhī nhīpêx nê amnhī kaxyw Tirtûm kôt ajamaxpêr rãhã nê. Nê amã mē kêp Kris kôt akwÿjê hkĩnh pê tanhmã mē ho ajuta hto ho ri mē hkôt apa. Jao mēmoj to mē kutã anjarêt rãhã nê. Na hte ã Pahшти Jejus kôt amnhī nhīpêx xwÿnhjaja amnhī nhīpêx anhÿr o pa.

²³Nê kêr ka mē kot htÿx ri amnhī krã hkôt mē ahkre ho mē pa xwÿnhjê hkôt apa hkêt nê. Te ate mē kêp awry hã ri apa pyrã nê mē kapêr ma nê ãm ama. Na htem mē kapêr mar o pa nê ra hã axpên mã tanhmã àkjêr to ho pa. Jakamã kwarĩ mē hkôt ri apa hkêt nê.

²⁴Mê pahte Tirtûm mã amnhī nhīpêx o papa xwÿnhjaja na pu htem mē kurom mēmoj tã axpên mã paxàkjêr o ri papa hkêt nê. Na pu htem ãm mē piitã mē kamã pagryk tokyx anhÿr kêt nê. Nê Tirtûm kapêr o mē ahkre mex nê. Na hte ã mē pahte Tirtûm mã tanhmã amnhī nhīpêx to xwÿnhjaja amnhī nhīpêx o papa anê.

²⁵⁻²⁶Jakamã koja mēhõ ate Tirtûm kapêr o mē ahkreja ma nê tanhmã ho amã kapêr to ka ama nê amnhī tã tanhmã kãm akapêr punuj to hkêt nê. ãm kamã axukaprĩ ho tanhmã hã kãm akapêr mex to. Na hte Satanasti te kot amnhĩm mē unênh pyrâk o mē hipêx nê tanhmã mē kãm Tirtûm kapêr o hêx to nhũm mē kuma nê hkôt hamaxpêr nê kapêr kôt amnhī nhīpêx. Tã kot kaj mē kamã axukaprĩ ho mē kãm akapêr mex nê nhũm Tirtûm tanhmã mē hkrã hto nhũm mē ama nê hkôt amnhī xunhwÿr japêr. Te Tirtûm kot Satanasti pê amnhĩm

mê utâr pyrâk. Jakamã nhũm mē hpãnhã Tirtûm kapêr mex ã harê nê harênh o:

—Nà pêr ãm hãmri na Tirtûm kapêrja. ãm mex o mex. Anê.

3

Jejus akupÿn wrÿk kukamã mē kot amnhī tomnuj xwÿnhjê jarênh

Matêwre 24.4-13; Korosê 2.16-19; Wam Ximotre 4.1-5; Sikûn Pêtre 2.1-3; Jutre 3-16

¹Nê Jejus akupÿn mē pahwÿr wrÿk xwÿj ri mē kot tanhmã amnhī nhīpêx toja kot paj hpãnhã ixprĩ hã amã harê ka inhmar tÿx nê Ximotre. Koja Jejus akupÿn mē pahwÿr nojarêt pu mē pahpê hkwyjaja pahpunuj nê papa.

²Nê Kris kwÿ hkêt xwÿnhjaja koja mē amnhī pix kukamã hamaxpêr o pa. Jao hikãxpore rax o pikuprõnh pix kukamã hamaxpêr pê hkwyjê pê õxÿ htÿx o pa.

Nê mēmoj tã amnhī to jarkrar o pa. Nê tanhmã hkwyjê japry hto ho pa. Nê mē hipêxã nê mē katorxã hã hpijaàm kêt o pa.

Nê Tirtûm ã hpijaàm kêt o pa.

Nhũm mēhõ tanhmã mē ho mex to nhũm mē amnhī tã mē omu nê ãm mē omu nê amnhī tã tanhmã mē kãm nê hkêt nê. Rÿ mē kãm: “Nà ãm hãmri na ka ã ixto mex anê. Nà ja mex.” Anhÿr o mē kãm kapêr kêt nê.

³Mê ukaprĩ hkêt jakamã koja mēhõ tanhmã mē homnuj to nhũm amnhī tã mē omu nê kamã gryk kurê kumrêx nê aa gryk o hapêx kêt nê.

Nê amnhī tã tanhmã hkwyjê ho hêx to ho pa.

Nê htÿx ri kãm hprãm xà hkôt tanhmã amnhī tomnuj to.

Nê oprê ho pijapu pix kukamã hamaxpêr.

Nê axtem nê kãm mēmoj mex pumunh prãm rÿ mēmoj mex mar prãm kêt nê.

⁴Nê mēhõ ho hkrãmnhwÿ htã axtem nê mē kãm mē hkurê xwÿnhjê nhĩhkram haxã.

Ně hamaxpër mex kêt o tanhmã amnhĩ tomnuj to rãhã ho ri pa.

Ně amnhĩ to rũnh o mẽ piitã mẽ hakrenh par ã amnhĩ to jarkrar o ri pa.

Ně amnhĩ krã hkôt kãm amnhĩ nhĩpêx prãm xà hkôt amnhĩ nhĩpêx o pa nẽ kãm Tĩrtũm kãm prãm xà hkôt amnhĩ nhĩpêx prãm kêt nẽ.

⁵ Hãmri nẽ mẽ kêp hkra hã amnhĩ jarẽnh o pa htã aa hkôt amnhĩ nhĩpêx kêt. ã Tĩrtũm kra hkôt xwýnhjaja amnhĩ nhĩpêx kot anhỹr jakamã kwa kêr ka ã mẽ hkôt apa hkôt nẽ Ximotre.

⁶⁻⁷ Na htem hêx rom hkwýjê nhõrkwý hwýr agjê nẽ kamã tanhmã mênijê mã hêx to. Mẽ kot mẽ mar nẽ tanhmã amnhĩ tomnuj to hãmri nẽ ja hã amnhĩ pumu nẽ tee ri amnhĩ kukamã hamaxpër kaxyw. Nẽ mẽ kãm mẽ kapër nyw mar prãm tã nhãm mẽ kapër ma nẽ nhãm mẽ kapër mar nẽ aa Tĩrtũm kapër mar nẽ amnhĩ kaxyw hkôt hamaxpër kêt nẽ. Jakamã nhũm mẽ kot amnhĩ tomnuj xwýnhjaja hêx rom mẽ hwýr mra nẽ mẽ õrkwý hwýr agjê nẽ tanhmã mẽ kãm mẽmoj to hêx to. ⁸ Te kot amnepêm finat Jãnre mẽ finat Jãmtija wa kot amnhĩ nhĩpêxta pyrãk. Na pre finat Mojestija Tĩrtũm nhỹ hã tanhmã mẽ ahkre hto ho pa nhũm Jãnre mẽ Jãmti wa kãm mar prãm kêt nẽ. Nẽ tanhmã ja nê hkwýjê mã kapër to ho pa. Tã ã mẽ kot amnhĩ tomnuj anhỹr o mẽ pa xwýnhjaja na htem wa urãk nẽ kãm Tĩrtũm kapër mar prãm kêt nẽ kapër nẽ tanhmã hkwýjê mã kapër to ho pa. Nhũm mẽ hamaxpër mex kêt jakamã ãm mẽmoj punuj pix kukamã hamaxpër nẽ mẽ kuma nẽ amnhĩ kaxyw Jejus kôt hamaxpër kêt nẽ. ⁹ Tã nom koja mẽ hkwýjaja tokyx hprĩ hã mẽ kot mẽmoj to hêx ã mẽ omu hãmri nẽ axte mẽ hkôt hamaxpër kêt nẽ nhũm mẽ rĩ amnhĩ pumu. Te amnepêm mẽ kot hprĩ hã Jãnre mẽ Jãmti wa kot tanhmã amnhĩ tomnuj to hã wa omunhta pyrãk.

Mẽ pahte Jejus ã pahpunuj tã hka-aga hkêt ã mẽ pamã karõ

Atre 13.50-14.7, 14.19-22

¹⁰ E Ximotre. Ate ixkôt apa ryy jakamã ra ate tanhmã ixte amnhĩ nhĩpêx ho ixpa hã ixpumunh mex.

Ixte tanhmã Tĩrtũm kapër o mẽ ahkre hto ho ixpaja.

Ně inhmã mẽmoj to anhỹr prãm xwýnhja.

Ně ixte amnhĩ kaxyw Kris kôt ijamaxpërja.

Ně inhgryk tokyx anhỹr kêtja.

Ně ixte tanhmã Kris kôt ixkwýjê ho mex to ho ri ixpaja.

Ně ixpunuj nẽ ixpa htã arĩ Kris kôt amnhĩ nhĩpêx mex o ixpaja.

ã ixte amnhĩ nhĩpêx anhỹr o ixpaja ate ixpumunh mex.

¹¹ Na pa pre krĩ pê ãxiok nẽ Ikõn nẽ Ristija kamã mẽ kãm Jejus jarẽnh o ixpa nhũm mẽ hkwýjaja Jejus ã tanhmã inhĩpêx to pa amnhĩ xà htýx kamã ijamak o ri mẽ hkôt ixpa. Tã nhũm Pahihti Kris xatã mẽ kêp ixpytã pa ixtĩr pê mẽ ãhkra rũm ijapõx o ixpa.

¹² Na hte Kris kwý hkêt xwýnhjaja mẽ pahte Kris kôt amnhĩ nhĩpêx o papa hã mẽ pahtomnuj o pa.

¹³ Nẽ mẽ kot Tĩrtũm kapër o hêx o mẽ pa xwýnhjaja koja arĩ mẽ kêp Kris kwý hã amnhĩ to hêx pê mẽ nokupyr. Nẽ mẽ kãm Tĩrtũm kapër o hêx o pa. Jao ra mẽ tãmjaja amnhĩ nokupyr o pa nẽ amnhĩ tomnuj týx kumrêx.

Pawre kot tanhmã Tĩrtũm kapër ã kagã jarẽnh to

Rõmãn 15.4; Sikûn Pêtre 1.19-21

¹⁴⁻¹⁵ No ka Ximotre. Amnepêm aprĩre rũm na pa pre mẽ ixohtõ nẽ Tĩrtũm kapër o ajahkre ho ixpa. Akatorxã nẽ anhõ wõwõre nẽ pa nẽ Kris kwýjaja pa prem ho ajahkre rãhã ho akôt ixpa ka mẽ inhmãr týx nẽ amnhĩ kaxyw Jejus kôt ajamaxpër. Jakamã kwa kêr ka arĩ hkôt ajamaxpër mex rãhã ho ri apa. Tĩrtũm kapërja na htem mar pê amnhĩ kaxyw Jejus Kris kôt hamaxpër nẽ hkôt amnhĩ xunhwý nhũm Tĩrtũm ja hã mẽ omunh xà hkôt mẽ ho hkra. ¹⁶ Tĩrtũm kapër

ã kagàja Tirtùm kapër na. Na htem ho mẽ ahkre ho pa. Koja mẽhõ hkwým ri tanhmã amnhĩ tomnuj to nẽ kapër ma nẽ tee ri amnhĩ tomnujja kukamã hamaxpër o ra hkaprĩ nẽ. Rỳ tanhmã amnhĩ tomnuj to htã kapër ã kagà kamã kapër nẽ Tirtùm kot ã kot amnhĩ tomnuj anhÿrja nẽ mẽ pamã kapër ã harënh ma nẽ amnhĩ tomnujta kaga kurê kumrëx. Rỳ kamã kapër nẽ Tirtùm kot tanhmã mẽ pahte amnhĩ to mex to hã mẽ pamã karõ kamã harë nẽ kuma. Hãmri nẽ ÿ hã hkõt amnhĩ nhĩpêx mex rãhã nẽ. ã na hte Tirtùm kapër kagàja mẽ kot mar nẽ hkõt amnhĩ nhĩpêx xwýnhjê ho mex anẽ. ¹⁷ Na hte mẽ kot Tirtùm mã amnhĩ nhĩpêx o mẽ pa xwýnhjaja kamã harë nẽ hkõt amnhĩ nhĩpêx mex pẽ mẽ piitã mẽ ho mex nẽ ho mẽ ahkre mex rãhã ho pa.

4

Pawre kot mẽmoj tã Ximotre mã karõ

Korosẽ 4.5-6

¹ Nẽ koja nhÿrmã Jejus Krisja akupÿn mẽ pahwÿr wrỳ hãmri nẽ mẽ pahpiitã tanhmã mẽ pajarënh to. Ra mẽ htyk xwýnhjaja nẽ arĩ mẽ pahtĩr xwýnhjaja nhũm tanhmã mẽ pahte amnhĩ nhĩpêx to ho papa hã mẽ pahpumunh kõt tanhmã mẽ pajarënh to. Jao Tirtùm mẽ wa kuri mẽ pahtĩr tũm nẽ papa ho papa hã mẽ pajarë rỳ wa kuri pahtĩr tũm nẽ papa hkêt ã mẽ pajarë. Jakamã kwa Ximotre kot paj Tirtùm mẽ Jejus Krisja wa noo mã mẽmoj tã amã karõ ka inhmar tÿx nẽ. ²⁻⁴ Koja nhÿrmã mẽ kêp Tirtùm kra hkêt xwýnhjaja axte kãm Tirtùm kapër mar prãm kêt nẽ nhãm mẽ kapër pix mar prãm o ri pa. Jao amnhĩ kukamã hamaxpër o:

—Nã inhmã Tirtùm kapër mar prãm kêt. Kot mẽmoj piitã nẽ mẽ hkurê kênã. Kot paj hpãnhã mẽhõ kot mẽmoj nẽ mẽ hkurê hkêt xwýnhjê kapër pix mar o ri ixpa. Nã kot paj anẽ. Ja na inhmã hprãm. Nom kot paj axte Tirtùm kapër mar kêt nẽ.

Anhÿr jao kapër kaga nẽ hpãnhã htÿx ri nhãm mẽ ujarënh pix ma nẽ hkõt hamaxpër. Koja mẽ ã amnhĩ nhĩpêx anhÿr o pa. Jakamã kwa kêt ka arĩ mẽ kãm Jejus kot tanhmã mẽ panẽ amnhĩ nhĩpêx to hã harënh rãhã ho ri mẽ hkõt apa Ximotre. Mẽ kãm mar prãm kêt tã mãmri ri mẽ kãm harë. Nẽ nhÿri mẽhõ pumu nẽ kãm harë. Mẽ kãm mar prãm xwýnhjê mã harë nẽ mẽ kãm mar prãm kêt xwýnhjaja ka mãânên mẽ kãm harë. Nhũm mẽhõ tanhmã amnhĩ tomnuj to ka hã omu nẽ tanhmã nẽ kãm akapër to kêt hkaga tokyx anẽ nẽ akupÿm tãm amnhĩ nhĩpêx. Rỳ nhũm mẽhõ tãm amnhĩ nhĩpêx o pa ka ja hã omu nẽ hã kãm akapër nẽ kãm:

—Ãm hãmri na ka hte Tirtùm kõt amnhĩ nhĩpêx mex nẽ. Anẽ.

Hãmri nẽ anojarêt kêt kãm mẽ kãm Tirtùm kapër o mẽ ahkre rãhã ho ri apa. ⁵ Nẽ tãm ri amnhĩ nhĩpêx rãhã nẽ. Mẽ kot Jejus ã tanhmã anhĩpêx to htã kêt ka ÿ hã amnhĩ to htÿx nẽ arĩ mẽ kãm kapër jarënh o ri mẽ hkõt apa. Jao Tirtùm mã amnhĩ nhĩpêx mex rãhã nẽ. Kêt ka ã mẽ hkõt amnhĩ nhĩpêx anhÿr o ri apa Ximotre.

Pawre kot ra htyk kaxyw ã amnhĩ jarënh

Atre 20.17-35

⁶ Nẽ mẽ kot ixpĩr xà hã arĩgroja ra hwÿr ahtêp o mõi. Kot paj pêt tokyx ty. Amnepêm na prem Tirtùm mã mẽmoj nhõr kaxyw nẽ mẽ hkõm xà kamã mẽmo kagõja py nẽ mẽ kot Tirtùm mã mẽmoj nhõr xà hã mêtija ã hkapĩr pa nhũm hapêx. Tã te ixpê mẽ hkõm xà kamã mẽmo kagõ pikapĩrta pyræk. Kot paj tokyx ty nẽ jar ijapêx. ⁷ Na pa ra Pahihti Jejus mã amnhĩ nhĩpêx mex o ri ixpa. Mẽ kot tanhmã hã ixtomnuj to htã pa hkaga hkêt nẽ arĩ hkõt amnhĩ nhĩpêx mex rãhã ra ixtyk kaxyw. ⁸ Ixte Pahihti kãm hprãm xà hkõt amnhĩ nhĩpêx mex o ri ixpa jakamã koja amnhĩ tã tanhmã ixto mex to. Nom papxipix ixto mex kêt nẽ. Na hte ãm hãmri tãm mẽ pahpiitã mẽ panhĩpêx. Jakamã nhÿrmã kot mẽ piitã tanhmã mẽ harënh to xà

hã arĩgrota ã koja mẽ pahkĩnh pẽ mẽ pahte amnhĩ wỳr kamã pajamak o papa xwỳnh piitã mẽ pamã mã mẽmoj mex gõ.

Pawre kot amnhĩ wỳr Ximotre hwỳr

⁹ Kwa na pa ra ato ijamak tỳx nẽ Ximotre. Kwa kẽr ka amnhĩm anojarẽt nẽ tokyx tanhmã amnhĩ to hpa nẽ man ixwỳr mõ.

¹⁰ Na pre ra Kresẽx ma Karatas wỳr mõ nhũm Xitre ma pika pẽ Tawmas wỳr mõ. Nhũm Tẽmti ra tanhmã hamaxpẽr to nẽ àpẽnh gryk ã ixkaga nẽ ma akupỳm Tesarõn wỳr mõ. ¹¹ ãm Rukre pix na arĩ ixkõt pa jakamã kẽr ka anojarẽt hãmri nẽ ahte amõr kêt nẽ. Makre mã anẽ kẽ man akõt ixwỳr mõ nẽ tanhmã ixto ajuta hto ho pa.

¹² Nẽ Xikitre na pa pre ra Epes wỳr kumẽ.

¹³ Nẽ Torõt kãm Kapti nhõrkwỳ kamã ixte kry pẽ inhõ kamĩs pa hkà ryti rer jakamã kẽr ka anojarẽt nẽ inhmã apy nẽ man inhmã o mõ. Nẽ inhõ kagàta ka mããnẽn inhmã amỳ nẽ o mõ. Nẽ mẽmo mry kà hã ixte mẽmoj tã kagàta ka mããnẽn apy nẽ mãn inhmã o mõ. E kẽr ka anojarẽt nẽ ixkukrẽxja jamỳ nẽ ixwỳr ho mõ.

Tanhmã Aresãnti kot Pawre nhĩpẽx to hã harẽnh

¹⁴⁻¹⁵ Nẽ na pre kàx o mẽmoj nhĩpẽx xwỳnh Aresãntija ixtomnuj nẽ. Pa pre mẽ kãm Tĩrtũm kapẽr o mẽ ahkre ho ri mẽ hkõt ixpa nhũm tee ri inhma nẽ kãm mar prãm kêt nẽ. Hãmri nẽ ixkutã amnhĩ xãm nẽ inhĩpẽx kati nẽ. Nom koja Pahihti Jejus ixtã tanhmã ho. Kwa kẽr ka amnhĩ nẽ omunh mex nẽ Ximotre.

Pahihti Jejus kot Pawre mã hamaxpẽr o hihtỳx ã harẽnh

¹⁶ Nẽ pahi kot mẽ mar xà hã ixkre kamã wam ixte mẽ kãm amnhĩ jarẽnhta ã na pre mẽhõ ixyr pẽ mẽ kãm tanhmã ijarẽnh to hkêt nẽ. Na prem piitã mẽ umaj ixkaga hpa. Nom kwãr mẽ mãmrĩ ã amnhĩ nhĩpẽx anẽ. Tĩrtũm kot ixtã tanhmã mẽ hoja na inhmã hprãm kêt. ¹⁷ ãm Pahihti

Jejusja pix na pre mẽ kurom ixkaga hkêt nẽ. Na pre ixto ixihtỳx nẽ pa ÿ hã mẽ kãm tanhmã mẽ panẽ kot amnhĩ nhĩpẽx to hã harẽnh pa. Nhũm Ijaew kêt xwỳnh kot inhmar o hkrĩ xwỳnhjaja ixujarẽnh mar o hkrĩ nhũm Tĩrtũm inhnẽ tanhmã mẽ ho nhũm mẽ ixpĩr kêt nẽ. ¹⁸ Koja Pahihti mẽ kutã ixto ixihtỳx rãhã nẽ mẽmo arĩgro hã amnhĩ wỳr ixto api. Pa Tĩrtũm mẽ wa kuri inhmex kumrẽx nẽ ixtĩr tũm nẽ ixpa ho ixpa. Pahihti mex o mex jakamã kẽr pu mẽ kãm mex o mex ã harẽnh rãhã ho papa nẽ aa jam panhũrer kêt nẽ.

Pawre kot tanhmã hkrãmnhwỳjẽ jarẽnh to

¹⁹ Nẽ kẽr ka Prisire mẽ mjẽn Akir wa kãm ijarẽ. Nẽ Onẽspti hprõ nẽ hkrajaja ka mããnẽn mẽ kãm ijarẽ. ²⁰ No Eras kormã Korĩt kãm pa. Nẽ Toropti na pre à nẽ pa Mĩrẽt kãm kure nhũm ixkõt mõr kêt nẽ.

²¹ Kwa kẽr ka amnhĩm anojarẽt nẽ amgrà pẽ man tokyx ixwỳr mõ Ximofre.

Nẽ ota Epti mẽ Prutẽhti mẽ Rĩnre mẽ Krawreja awỳr hpẽr mẽ. Nẽ jar Kris kõt pahkwỳjẽ piitã awỳr hpẽr mẽ.

²² E kẽ Pahihti Jejus ato mex rãhã nẽ mẽ apiitã mẽ akutã nojarẽt rãhã ho pa.

Tã ãm ja pix. Ixpẽ Pawre na pa awỳr kagàja nhĩpẽx nẽ kumẽ.

Xitre Pawre kot Xitre hwÿr kagà nê mênh

Pawre na pre kagàja nhîpêx. Kêp Jejus nhÿ hã hkrajê jahkre ho pa xwÿnhjê hõ na pre. Nhũm pre Xitre Pawre hkôt pa hã mytwrÿ xohtô nê. Tã kêp Jejus kôt hkwÿjê nhõ pastô kaxyw gô hipôk pê Kret ã arîk nê Tirtũm kapêr o mē ahkre ho mē hkôt pa. Jakamã nhũm Pawre kãm kagàja nhîpêx nê kamã kãm mēmoj tã karõ. Tirtũm kapêr o mē hêx xwÿnhjaja tanhmã kot ja nê mē hkurê to hã kãm karõ. Nê mē kot Tirtũm kapêr o mē ahkre mex pix xwÿnhjaja Jejus kwÿjê kaxyw kot mē rênh ã kãm karõ. Nê Jejus kwÿjaja kot axpên to mex o pa hã kot mē kãm karõ kaxyw kagàja kamã mē kaxyw kãm hã kagà. Æ na pre Pawre Xitre mã mēmoj tã karõ nê hã kagà nê hwÿr mênh anê. Nê kãm:

¹ Pa Xitre? Xà amex? Ixpê Pawre na pa awÿr kagà nhîpêx nê kumê. Na pa hte Tirtũm mã tanhmã amnhî nhîpêx to ho ixpa. Nê ixpê Jejus Kris nhÿ hã hkrajê jahkre o ixpa xwÿnh jakamã na pa hte mē kot amnhî kaxyw hkôt hamaxpêr tÿx kaxyw tanhmã mē kãm ixkapêr to ho ri ixpa. Nê mē kot hprî hã mar kaxyw Tirtũm kapêr o mē ahkre mex nê. ² Mē kot inhmar nê nhÿrmã htyk nê ma Tirtũm mē Jejus wa hwÿr àpir nê wa kuri htîr tũm nê pa ho pa hã amnhî kukamã hamaxpêr kaxyw. Amnepêm na pre Tirtũm ã mē pahpê hkrajê hkukamã mē pajarênh anê. Nê ãm hãmri ã mē pajarênh anê. Na hte mēmoj tã amnhî to hêx kêt nê. ³ Tã ra mē pakukamã mē pamã mēmoj to amnhîrit nê inhmã kapêr o:

—E Pawre kêr ka ma mē hpiitã mē hkôt ri apa nê mē kãm ixkapêr jarê nê mē kãm: “Kot kaj mē amnhî kaxyw Tirtũm Kra hkôt ajamaxpêr nê hkôt amnhî xunhwÿ nhũm Tirtũm ja hã mē apumu nê mē ato hkra. Ka mē nhÿrmã atyk tã nhũm amnhî wÿr mē

ato api ka mē wa kuri amex kumrêx nê atîr tũm nê apa ho apa.” Anhÿr o mē kãm ixkapêr jarênh o ri mē hkôt apa Pawre.

⁴ Anhÿr o inhmã kapêr tã pa ã amã ixkapêr nê hã kagà anê Xitre. Pajamê pahte amnhî kaxyw Jejus kôt pajamaxpêr nê hkôt amnhî xãm jakamã te apê ixkra pyrâk. Jakamã na pa hte ato Mēpanhîpêêxà maati Tirtũm mē mē papytâr xwÿnh Jejus Krisja wa hwÿr rãhã ho ri ixpa nê wa kãm:

—Pa Tirtũm mē Pahihtî wa. Nà Xitre ho na pa wa awÿ. Kwa kêr ka wa kutã anojarêt rãhã ho ri apa. Kê wa akukwak ri hamakêtkati nê ãmnhîx pa ho pa. Anê.

Kris kwÿ hkrãhtũmjaja kot tanhmã amnhî nhîpêx to kaxyw mē hã kãm karõ

Wam Ximotre 3.1-13

⁵ Nê na pa pre Kret rũm inhnojarêt hãmri nê amã axapênh ã karõ nê Kret kãm are nê man mō. Na pa pre amã:

—E kêr ka jar arîk nê mē kãm ixkapêr jarênh jatur xãm mênh o mē hkôt apa. Nê Kris kôt pahkwÿjê mã mē hkrãhtũmjê xunhwÿ. Kret kãm krî piitã hkôt. Na pa pre ixprî hã tanhmã amã mē harênh to. Tã kêr ka ate inhmar xà hkôt mē hkwÿjê kapi nê mē unhwÿ. Koja mē ã amnhî nhîpêx anhÿr o pa ka ja hã mē omu nê mē unhwÿ.

⁶ Koja mē tãm amnhî nhîpêx o pa nhũm mē piitã axpên mã mē mex ã mē harê.

Nê mē hprô pix tânopxar o pa nê kuhpa hã nhãm mēnijê ho amnhîkati hkêt nê.

Nê kê mē hkrajaja hipêêxà pyrã nê amnhî kaxyw Jejus kôt hamaxpêr o pa. Jao hipêêxà nê katorxà wa kapêr ma nê wa hkôt amnhî nhîpêx. No ri htÿx ri amnhî tomnuj o pa hkêt nê.

Anhÿr o na pa pre mē hã amã karõ.

⁷ Jejus kôt pahkwÿjê hkrãhtũmjaja kot Tirtũm nhÿ hã hkrajê mã kapêr mex o pa jakamã na htem tãm amnhî nhîpêx o pa.

Nē amnhī pix kukamā hamaxpēr o pa hkêt nē.
 Nē gryk tokyx anhÿr kêt nē.
 Nē kagôxyhti japrôr nē ho pipānh o pa hkêt nē.
 Nē oprê ho pa hkêt nē.
 Nē kàxpore rûnh prām xàj hêx rom tanhmā amnhī nhīpêx to hkêt nē.
 Na htem ā amnhī nhīpêx anhÿr hkêt nē.
 8 Ām àmnhīx amnhī nhōrkwy hwÿr mē hwÿr o pa.
 Nē mē piitā mē kutā nojarêt rāhā nē.
 Nē tām hamaxpēr nē tām mē piitā mē hipêx o pa.
 Nē amnhī tomnuj pymaj amnhī to htÿx pē Tirtūm kôt amnhī nhīpêx mex rāhā ho pa.
 9 Nē mē kot Tirtūm kapēr mar tÿx jakamā kē mē arī hā nohtÿx nē mar tÿx xà hkôt amnhī xō ri ho hkwyjê jahkre mex o pa.
 Nē ho mē piitā mē hamaxpēr o hihtÿx o pa.
 Nhūm mēhō Tirtūm kapēr kwÿm ri tanhmā ujarēnh to nhūm hā kuma nē hprī hā kām tanhmā harēnh to kē mar mex nē.
 E Xitre. Na hte ā Jejus kwÿjê hkrāhtūmjaja amnhī nhīpêx anhÿr o pa. Jakamā kēr ka aprī hā Kret kām Jejus kôt pahkwÿjê kapi nē mē kot tanhmā amnhī nhīpêx to ho pa hā mē omu. Nhūm mēhō ā amnhī nhīpêx anē ka ja hā omu hāmri nē kēp Jejus kwÿjê hkrāhtūm kaxyw ām.

Kret nhō xwÿnhjaja kot tanhmā amnhī tomnuj to hā mē harēnh
Xitre 3.9-11

10 Nē atar Kret kām na hte mē ohtō nē kām mē ō pahī kapēr mar prām kêt nē htÿx ri tanhmā Kris kwÿjê mā kapēr to ho pa. Na hte Ijaew kwÿjjaja ā amnhī nhīpêx anhÿr o pa. Jao Ijaew kêt xwÿnh kot Jejus kôt amnhī xunhwÿr xwÿnhjê mā kām:

—Kwa mē ixpyrà nē mē ixpê Ijaewjê kot amnhī nhīpêx kôt mām amnhī nhīpêx kêt wehe.

11 Anhÿr o mē kām kapēr jakamā kwa kēr ka ā mē kapēr anhÿrja nē

mē kām akapēr kām axihtÿx nē. Na htem hpijaàm kêt o hikàxpore hprām xàj ā mē kām kapēr anhÿr o pa. Jao mē hamaxpēr o ahkà nhūm mē kuma nē tee ri hamaxpēr. 12 Na pre ra mē hkwyjê hō tanhmā mē harēnh to. Mē ahkre xwÿnhjê hōja mē harēnh o:

—Kret nhō xwÿnhjaja na htem hêx pix o pa. Nē oprê nē kām kaga nē apkur xà pix kukamā hamaxpēr o pa. Anē.

13 ām hāmri ā mē harēnh kot anhÿr. Ā mē kot amnhī nhīpêx anhÿr jakamā kwa mē kot amnhī nhīpêxja nē mē kām akapēr kām axihtÿx o ri mē hkôt apa Xitre. Kē mē ā amnhī nhīpêx anhÿr kêt nē. Nē mē kām anē kē mē amnhī kaxyw Tirtūm kôt mām hamaxpēr tÿx nē. 14 Nē kē mē axte Ijaewjê xujarēnh nē mē kot amnhī nhīpêx kôt amnhī nhīpêx kêt nē. Ā mē kot amnhī nhīpêx o pa hā mē kām karō xwÿnhjaja na prem Tirtūm kapēr kaga hpa. 15 Mē kot Jejus kôt amnhī xunhwÿr xwÿnhjaja tām mē hamaxpēr o pa jakamā na htem Tirtūm kot mēmoj piitā ho kator xwÿnh pumu nē piitā mex ā harē. No mē kēp Jejus kwÿ hkêt xwÿnhjaja na htem hamaxpēr punuj pix o pa. Nē mēmoj mex pumu nē mex kêt ā harē. Mex tā nhūm mex kêt ā harēnh o pa. 16 Nē mē kēp Tirtūm kra hā amnhī jarēnh tā amnhī tomnuj pix o pa. Jao kēp hkra hā amnhī jarēnh o hêx nē kapēr kwÿm ri amnhī nhīpêx pix o pa. Nhūm Tirtūm tee ri ja hā mē omu nē kām mē hkīnh kêt nē. Tirtūm mā mē kot amnhī to mex kwÿ mē hā jêt kêt kumrêx.

2

1 E Xitre kot paj tanhmā ate mē ahkre hto hā amā karō ka inhma nē amnhī xō ri mē kām hā karō ho ri apa.

Mēmy wejjaja kot tanhmā amnhī nhīpêx to kaxyw mē hā kām karō

2 Nē kēr ka mēmy wejjê mā anē kē mē amnhī to àptār mex nē pa.

Nē pipānh nē ri pa hkêt nē.

Nē mē gryk kaxyw htÿx ri hkwyjê hā hpēr o pikēnh kêt nē.

Kê mẽ tãm hamaxpêr nê tãm amnhĩ nhĩpêx o pa.

Nê amnhĩ kaxyw Jejus kôt hamaxpêr tỳx rãhã nê.

Nhũm mẽ hkwỳjaja kot mẽmoj tã tanhmã mẽ homnuj to htã kê mẽ arĩ tãm amnhĩ nhĩpêx o pa nê amnhĩ tã tanhmã mẽ ho hkêt nê. E kêr ka ã mẽmy wejjê mã ja hã akarõ anê.

Mêni wejjaja kot tanhmã amnhĩ nhĩpêx to kaxyw mẽ hã kãm karõ

Wam Korõt 14.34-35; Wam Ximotre 2.9-15, 3.11; Wam Pêtre 3.1-6

³⁻⁴ Nê mẽni wejjê mã anê kê mẽ kãm Jejus kĩnh xàj tãm ri amnhĩ nhĩpêx o pa.

Jaو axpên jakwa kamã nhãm mẽ hixi ho rêr o pa hkêt nê.

Nê kagôxyhti ho pipãnh o pa hkêt nê.

Nê mẽ kãm anê kê mẽni xaptàr nywjê jahkre mex o pa. Mẽ kot mẽ mar nê mẽ urak nê tãm amnhĩ nhĩpêx kaxyw. Jaو mẽ kãm mẽ mjên nê mẽ hkrajê japê hã mẽ kãm mẽmoj to anhỹr o mẽ kutã nojarêt rãhã ho pa.

Kêr ka ã mẽni wejjê mã akapêr anê.

Mêni xaptàr nywjaja kot tanhmã amnhĩ nhĩpêx to kaxyw mẽ hã kãm karõ

⁵ Nê mẽni xaptàr nywjê mã anê kê mẽ tãm hamaxpêr pê tãm amnhĩ nhĩpêx o pa.

Nê mẽ ôrkwỳ kamã àpênh mex o pa.

Nê mẽ mjên kapêr ma nê hkôt amnhĩ nhĩpêx.

E. ã mẽni xaptàr nywjê mã karõ anê. Kojã mẽ ã amnhĩ nhĩpêx anhỹr o pa hãmri nhũm mẽ piitã mẽ kot amnhĩ nhĩpêx ã mẽ omu nê mẽ harênh o:

—Tĩrtũm kapêrja mex kumrêx. Mẽ kot hkôt amnhĩ nhĩpêx o mẽ pa xwỳnhjaja na htem tãm amnhĩ nhĩpêx mex o pa. Anê.

Mẽmy xaptàr nywjaja kot tanhmã amnhĩ nhĩpêx to kaxyw mẽ hã kãm karõ

Wam Ximotre 4.12; Sikũn Ximotre 2.22; Wam Pêtre 5.5

⁶ Nê kêr ka mẽmy xaptàr nywjê mã anê kê mẽ mẽmoj punuj pê amnhĩ to htỳx o pa. Mẽ hamaxpêr punuj nê mẽ kot tanhmã amnhĩ tomnuj to pê amnhĩ to htỳx o pa.

⁷ Nê kêr ka ajaxwỳja tãm amnhĩ nhĩpêx rãhã ho ri mẽ hkôt apa Xitre. Mẽ kot ja hã apumunh nê akôt amnhĩ nhĩpêx o pa kaxyw. Nom kêr ka tanhmã mẽ ahkre hto hkwỳm ri tanhmã amnhĩ nhĩpêx to hkêt nê. ãm Tĩrtũm ã apijaàm o akatàt kôt mẽ kãm kapêr o mẽ ahkre pê tãm amnhĩ nhĩpêx o ri apa.

⁸ Nê kêr ka tãm akapêr rãhã ho ri apa. Kêr kê mẽ kãm mẽ pahkurê xwỳnhjaja ja hã ama nê amnhĩ kamã hpijaàm hãmri nê apê Kris kwỳ hã tanhmã ato kapêr punuj to hkêt japêr.

Mẽ kãm mẽ àpênh xwỳnhjaja kot tanhmã amnhĩ nhĩpêx to kaxyw mẽ hã kãm karõ

Epes 6.5-8; Korosê 3.22-25; Wam Ximotre 6.1-2; Wam Pêtre 2.18-25

⁹ Nê kêr ka mẽ kãm mẽ àpênh o mẽ pa xwỳnhjê mã anê kê mẽ õ patrãw kãm hprãm xà hkôt amnhĩ nhĩpêx o pa.

Jaو mẽ kapêr ma nê hkôt amnhĩ nhĩpêx mex nê.

Nê amnhĩ tã tanhmã mẽ kãm kapêr punuj to hkêt nê.

¹⁰ Nê kê mẽ kêp mẽmoj to àhkĩnh kêt nê.

Nê tãm mẽ hipêx rãhã nê.

Nê kãm hkukrêx jamãr mex o pa.

Kojã mẽ ã amnhĩ nhĩpêx anhỹr o pa nhũm mẽ õ patrãw amnhĩ tã mẽ omu nê mẽ ÿ hã hkĩnh nê pa. Hãmri nê hamaxpêr o:

—Hêxta waa nê. Inhmã àpênh xwỳnhhta na hte inhmã àpênh mex o pa. Na hte ixkukrêx nê ixkrit jamãr mex nê ixpê mẽmoj to àhkĩnh kêt nê. Nã mẽ kot Tĩrtũm kapêr kôt amnhĩ nhĩpêx o mẽ pa xwỳnhjaja na htem tãm amnhĩ nhĩpêx o pa. Pêr Tĩrtũm kapêr ãm hãmri na. ãm mex o mex. Anê.

E Xitre kêr ka mẽ kãm mẽ àpênh xwỳnhjê mã ã mẽ kot amnhĩ nhĩpêx anhỹr ã karõ.

Tanhmã Jejus kãm mẽ pajapê xàj amnhĩ nhĩpêx to hã harênh

Epes 2.8-10; Wam Tesarôn 1.9-10

¹¹ Nê Tĩrtũm kot mẽmoj to mẽ pakutã nojarêr rãhã ho pa jakamã na hte mẽ pahte Kra hkôt amnhĩ xunhwỳr xwỳnhjê ho hkra pu mẽ nhỹrmã wa kuri pahtĩr tũm nê papa ho papa. ¹² Na hte ã mẽ pamã kapêr o amnhĩrĩt anê nê mẽ pamã:

–E kêr ka mẽ apê ixkra hã tãm amnhĩ nhĩpêx rãhã ho ri apa nê axte tanhmã amnhĩ tomnuj to nê tanhmã ajamaxpêr punuj to hkêr nê. Mẽ ate amnhĩ tomnuj pê amnhĩ to htỳx nê ixkapêr kôt pix mã ri amnhĩ nhĩpêx rãhã nê. Anê.

¹³ Na pu htem ã amnhĩ nhĩpêx anhỹr o papa jao pahkĩnh nê mẽ papytãr xwỳnh Jejus Kris jamãr o papa. Koja nhỹrmã mẽ panhõ Tĩrtũm xihtỳx xwỳnhja akupỳn mẽ pahwỳr kumẽ pu mẽ mex o mex ã omu.

¹⁴ Na pre Jejus amnhĩ grõnh kôt mẽ pahwỳr wrỳ nê mẽ pahpiitã mẽ pahte amnhĩ tomnuj pãnhã amnhĩrer kaxyw htyk o Tĩrtũm mã amnhĩrer pa. Mẽmo kaxyw na pre ã mẽ panê amnhĩ nhĩpêx anê? Nã mẽ pahpê hkwyja na kãm hprãm. Nê mẽ pahte tãm ri Tĩrtũm kapêr kôt amnhĩ nhĩpêx o papaja na kãm hprãm. Nê mẽ pahte urak nê mẽ piitã mẽ kutã panojarêr rãhã ho papaja na kãm hprãm. Jakamã na pre ã mẽ panê amnhĩ nhĩpêx anê.

¹⁵ E Xitre. Ixte mẽmoj tã amã karõja kêr ka ho Kris kwỳjê jahkre mex o apa kê mẽ ama nê kapêr kôt amnhĩ nhĩpêx o pa. Nhũm mẽhõ tanhmã amnhĩ tomnuj to ka hã omu nê Tĩrtũm nhỹ hã tanhmã nê kãm akapêr to kê axte hkêr nê. Tã mãn ka inhma. Kêr ka ã Kris kwỳjê jahkre mex o apa anê.

3

Tanhmã Kris kwỳ kot amnhĩ nhĩpêx to hã mẽ kãm karõ

Rõmãn 13.1-10; Epes 2.1-10

¹ Nê kêr ka Kris kôt akwỳjê mã anê kê mẽ ho amnhĩptãr xwỳnhjê kapêr ma nê mẽ hkôt amnhĩ nhĩpêx o pa. Nê mẽmoj to mẽ kutã nojarêr rãhã ho pa.

² Nê mẽ kãm anê kê mẽ tanhmã hkwyjê mã kapêr punuj to ho pa hkêr nê. Rỳ mẽmoj tã mẽ kãm àkjêr kêt nê. Kê mẽ tãm mẽ hipêx nê mẽ kamã ukaprĩ pê mẽ ho mex rãhã ho pa. Na hte ã Kris kwỳjaja axpên nhĩpêx o pa anê. ³ Kormã mẽ pahte hkôt amnhĩ xunhwỳr kêt ri na pu prem ã amnhĩ nhĩpêx anhỹr kêt nê. Na pu prem Tĩrtũm mã pajamaxpêr kêt nê kapêr kôt ri amnhĩ nhĩpêx hkêr nê. Nê amnhĩ tomnuj pix kukamã pajamaxpêr o ri papa. Nê amnhĩ pix kukamã pajamaxpêr. Jao mẽ pamã pam amnhĩ nhĩpêx prãm xà kôt pix mã tanhmã amnhĩ nhĩpêx to ho ri papa. Nê axpên tomnuj nê. Nê axpên kãm pagryk rãhã ho papa. ã mẽ pahte amnhĩ nhĩpêx anhỹr ho papa jakamã nhũm pre mẽ piitã kãm mẽ pahkĩnh kêt nê. Pu mẽ pajaxwỳja pamã mẽ hkĩnh kêt nê.

Tanhmã Tĩrtũm kot mẽ pahto mex to hã harênh

Rõmãn 5.6-8; Epes 2.4-10

⁴ Tã pu prem Tĩrtũm kêp mẽ papytãr xwỳnh ã harênh ma. Kot tanhmã mẽ panê amnhĩ nhĩpêx to hã harênh ma nê mex o mex nê mẽ pakamã ukaprĩ hã harênh ma. ⁵⁻⁶ Hãmri nê amnhĩ kaxyw hkôt pajamaxpêr nê hkôt amnhĩ xunhwỳ nhũm amnhĩ tã mẽ pahpumũ nê mẽ pahto hkra. Nom mẽ pahte tanhmã amnhĩ to mex to hã mẽ pahpumunh kôt mẽ pahto hkra hkêr nê. Mẽ pahte tanhmã amnhĩ to mex tore hã. Na pre mẽ pakamã ukaprĩ nê ã mẽ papytãr anê. Tã tanhmã na pre mẽ papytãr to wehe? Nã na pre Jejus Kris kukwak ri te kot mẽ pane mẽ pahte amnhĩ tomnuj piitã kuhõnh par pyrak o mẽ panhĩpêx. Hãmri nê mẽ pahwỳr amnhĩ Karõ rê nhũm mẽ pahwỳr agjê nê mẽ pamã mẽ pahte amnhĩ nhĩpêx nyw gõ. ã na pre Tĩrtũm Jejus Kris kot mẽ panê htyk kukwak ri mẽ pahto mex rax anê hãmri nê mẽ pahwỳr amnhĩ Karõ rênh anê. ⁷ Tã mẽmo kaxyw na pre ã mẽ pahto mex anê? Nã kãm mẽ pajapê jakamã na

pre ã mẽ panhĩpêx anê. Mẽ pahte amnhĩ tomnuj xwýnh tâ kãm mẽ pajapê htýx nê kãm tanhmã mẽ pahto hprãm kêt nê. Nê mẽ pahwýr Kra Jejus mẽ nhũm wrý nê mẽ pahte amnhĩ tomnuj pãnhã mẽ panê ty. Jakamã mẽ pahte amnhĩ kaxyw hkôt pajamaxpêr nê hkôt amnhĩ xunhwýr xwýnhjaja Jejus kukwak ri mẽ pahpê Tĩrtũm kraa. ã na pre Jejus mẽ pahto mex anê. Jakamã kot puj mẽ nhỹrmã Tĩrtũm mẽ wa kuri pahtĩr tũm nê pamex nê papa ho papa. Koja wa nhỹrmã ã mẽ pahto mex anê.

⁸ ãm hãmri na pa amã ã ja jarênh anê Xitre. Jakamã kwa kêr ka inhma nê inhmar týx nê. Nê ho amnhĩ kaxyw Tĩrtũm kôt mẽ hamaxpêr xwýnhjê jahkre mex o ri apa. Kê mẽ amar xà hkôt tãm ri amnhĩ nhĩpêx o pa.

⁹ Nê mẽ kot htýx ri mẽmoj tâ axpên mã àkjêr o mẽ pa xwýnhjaja kêr ka mẽ hkôt apa hkêt nê. Nê mẽ hkukamã mẽ higêt kôt apa hkêt nê. Rý finat Mojes kot Tĩrtũm nhỹ hã kapêr ã axpên mã mẽ àkjêr xwýnhjê hkôt apa hkêt nê. Na htem ã ri axpên mã àkjêr anhỹr o pa nê tãm amnhĩ nhĩpêx kêt nê.

¹⁰ Nê koja mẽ akwýjê hõ amnhĩ krã hkôt tanhmã hkwyjê mã kapêr to nhũm mẽ kuma nê hã axpên mã akir nê axpên pê pikjêr kaxyw. Ka ja hã omu nê ã kapêr anhỹrja nê kãm akapêr kê axte hkêt nê. Hãmri nhũm ama nê ãm ama nê arĩ ã mẽ kãm kapêr anhỹr japêr ka axte nê kãm akapêr. Tã ra ate nê kãm akapêr o axkrut tâ nhũm arĩ ã kapêr anhỹr o axkrunêpxi japêr ka ja hã omu hãmri nê mẽ amnhĩ nê hano kê axte mẽ apê Kris kwýjê hkôt ri pa hkêt nê. ¹¹ ã mẽ kot amnhĩ nhĩpêx anhỹr o mẽ pa xwýnhjaja na mẽ ra Jejus wýr pry kaga nê htýx ri tanhmã amnhĩ tomnuj to ho pa. Nê ã amnhĩ nhĩpêx anhỹr o pa jao kêp Kris kwý hkêt ã amnhĩ to amnhĩrit.

Pawre kot kagà jatur xà kamã tanhmã Xitre mã kapêr to

¹² Nê kot paj tokyx ma Nĩkop wýr mō. Kêr pa tokyx hwýr pōj nê amgrà pê krĩ nhõ xwýnhjê hkôt ixpa. Jakamã kot paj tokyx ma awýr Atêmti rý Xikitre mẽ. Kê mō nê awýr pōj ka tokyx tanhmã amnhĩ to hpa nê man ixwýr mō pu mẽ Nĩkop kamã axpên pumu.

¹³ Nê ota mẽ akuri Apor mẽ axiwōkat Jêntija. Koja wa mẽmo arĩgro hã ma krĩ hõ hwýr nojarêt ka wa kãm mẽ apkur xà hkwy gō kê wa ma ý kamã mōr kêt nê.

¹⁴ Nê kêr ka Kris kwýjê mã anê kê mẽ arĩ ōrkwý pix kãm hkrĩ ho hkrĩ hkêt nê. Kê mẽ tanhmã axpên to mex to ho axpên kôt pa. Nhũm mẽhõ kêp amrakati kê mẽ tanhmã ho ajuta hto. Mẽ kãm anê kê mẽ ã axpên nhĩpêx anhỹr o pa.

¹⁵ Nê ota jar Kris kôt pahkwýjê piitã awýr hpêr mẽ Xitre. Nê kêr ka atar Kris kôt mẽ pahkràmnhwýjê mã mẽ ijarê.

E ãm ja pix. Kê Pahihti Jejus mẽ akutã nojarêt rãhã ho pa. Ixpê Pawre na pa amã ã ixkapêr nê hã kagà nê awýr mẽnh anê.

Piremõ Pawre kot Piremõ hwÿr kagà nê mênh

Pawre na pre kagàja nhîpêx nê hkràmnhwÿ Piremõ hwÿr kumê. Na pre Piremõja amnhîm kãm àpênh xwÿnh Onesti japrô. Kàxpore ho haprô nhûm amarî kãm àpênh o pa. Tã tanhmã hamaxpêr to nê hkaga nê ma umaj krî hõ hwÿr hprôt nê tèn amûxu nê kamã pa ho pa. Hãmri nê Pawre pumu nê kãm amnhî jarê. Pawre arî kêp prês nê hkrî ho hkrî nhûm Onesti omu nê kãm amnhî jarê. Hãmri nhûm Pawre kãm Jejus jarê nhûm kuma nê hkôt amnhî xãm kurê kumrêx. Hãmri nhûm Pawre ja hã omu nê hkràmnhwÿ Piremõ mã kagà nhîpêx nê kamã Onesti xyr pê kãm kapêr. Hãmri nê hipêx pa nê Onesti mã kugô nê ma akupÿm õ patrãw Piremõ wÿr kumê nhûm ma mõi. Nhûm Pawre kagàja kamã kãm kapêr nê kãm:

¹ Pa ixkràmnhwÿ Piremõ? Xà amex? Ixpê Pawre na pa awÿr kagà nhîpêx nê kumê. Apê Kris kôt ixtõ hã inhmã akînh. Na ka hte ixpyrà nê Kris mã tanhmã amnhî nhîpêx to ho apa. Ta ot pa awÿr kagàja kamã ixpêr mê. ² Amã nê anhõrkwÿ kamã Tirtûm kapêr mar kaxyw mê kêp Jejus kwÿ hã mê pikuprõnh xwÿnhjê hwÿr. Nê Kris kôt pahtõx Apti mê Akip wa hwÿr kumê. Akipja na hte mê pahpyrà nê Pahihti Jejus mã tanhmã amnhî nhîpêx to ho pa.

³ Na pa hte mê ato Mëpanhîpêxà maati Tirtûm mê Pahihti Jejus Kris wa hwÿr rãhã ho ri ixpa. Kot mêmõj to mê akutã nojarêr rãhã nhûm wa ÿ hã mê ajamakêtkati nê axàmnhîx apa ho apa kaxyw.

Pawre kot Piremõ nhÿ hã hkînh ã harênh

⁴⁻⁵ Na pa pre ajarênh ma Piremõ. Na htem xatã tanhmã inhmã ajarênh to nê ajarênh o:

—Hêxta waa nê. Piremõ na hte amnhî kaxyw Pahihti Jejus Kris kôt hamaxpêr tÿx nê kãm mê ixpê Kris kôt hkwyjê piitã hkînh pê tanhmã mê ixto mex to ho ri mê ixkôt pa.

Anhÿr o inhmã ajarê pa mê kuma nê anhÿ hã ixkînh nê ato Tirtûm wÿr rãhã ho ixpa nê ato hwÿr o:

—Pa Tirtûm. Na xep hte Piremõ kãm akînh tÿx nê akwyjê ho mex rãhã ho pa. ãm hãmri na hte ã mê hipêx anhÿr o pa. ⁶ Na xep mê piitã mê kãm tanhmã Jejus kot mê inhnê amnhî nhîpêx to hã harênh o ri mê hkôt pa. Jakamã kêr ka tanhmã mê kot mar xwÿnhjê hkrã hto kê mêmprî hã mar tÿx nê Kris kot tanhmã mê ho mex to hã amnhî tã omu.

Anhÿr o ato kuwÿ. ⁷ Ate Kris kwÿjê ho mex o apa jakamã te ate pa ixto mex pyràk Piremõ. Na htem anhÿ hã hkînh nê pa. Pa ijaxwÿja ajarênh ma nê anhÿ hã ixkînh tÿx nê jar mê hagjênh xà kamã ixkrî.

Piremõ kot Onesti kamã ukapri hã Pawre kot kãm karõ Rômãn 15.7; Epes 4.31

⁸ Nã ixte amã mêmõj jarênhja tanhmã kute hkêr. Kot paj ãm amã mêmõj jarê nê hã awÿ. Nom kot paj Kris nhÿ hã amã tanhmã hã karõ hto hkêr nê. ⁹ Kot paj ãm pahte axpên to pahkràmnhwÿ hã hã awÿ. Ra ixwej tÿx nê Kris ã arî mê hagjênh xà kamã ixkrî htã mêmõj tã awÿ ka inhma nê inhmã ho anhÿr japêr ko.

¹⁰ E amã àpênh xwÿnh Onestija na ixte amã harênh kaxyw. Na pre man ixwÿr mõi. Ixpê prês nê ixkrî nhûm ixwÿr mõi. Pa omu nê kãm Jejus jarê nhûm inhma nê pahpyrà nê amnhî kaxyw hkôt hamaxpêr nê hkôt amnhî xãm. Jakamã te kêp ixkra pyràk. Hãmri nê ixto ajuta mex o pa. ¹¹ Xep kormã Jejus kôt amnhî xãm kêt ri na pre amã àpênh mex kêt nê. Nê kãm kaga nê htÿx ri tanhmã àpênh to ho pa. Tã ra Jejus kôt amnhî xãm hãmri nê katàt kôt inhmã àpênh mex o pa. Nê ixto ajuta mex nê. Koja akupÿm amã apê hãmri nê amã àpênh mex nê.

12 Jakamã ot pa akupÿm awÿr kumê ixkràmnhwÿ. Nom inhmã hapê jakamã koja ma akupÿm mõi pa ho ama nê. Tã kot paj akupÿm awÿr kumê. 13 Kot jar ixri arík nê apãnhã tanhmã ixto ajuta hto ho paja na inhmã hprãm. 14 Jakamã kot kaj amã akupÿn ixwÿr mênh prãm nê mãmrĩ ixwÿr amê. Nom ixte ja pumunh kêt. Kam nê amã hprãm xà hkôt tanhmã kãm akapêr to. Kãm anê kê akuri arík nê amã àpênh o pa rÿ akupÿn ixwÿr amê. 15 Nom konên. Mãn akupÿm awÿr mõi nê kêp Kris kôt akwÿr hã amã àpênh mex kaxyw na pre Tirtũm ixwÿr kumê nhũm ixwÿr mõi nê ixri Jejus kôt amnhĩ xãm nê ixri pa hã mytwrÿ hkwy hapêx pa akupÿm awÿr kumê. 16 Nom ra kêp amã àpênh xwÿnh pix kêt mãânên kêp Kris kôt atõõ. Jakamã kot kaj wa atar axpên kôt Pahihti Jejus kôt tãm amnhĩ nhĩpêx o ri apa. Nom mãânên kêp ixkràmnhwÿ mex ã inhmã hapêê. 17 Jakamã kot kaj ixpê Kris kôt akràmnhwÿ hã ijarê hã kot kaj mãânên inhmã ho mex o apa.

18 Nê wam amã àpênh o pata ã mãn pre apê mêmoj to ahkĩ rÿ akàxpore hkwy ho ahkĩnh japêr. Tã pa kot paj hpãnhã amã amnhĩre. Ka inhmã tanhmã kàxpore jarênh to pa amã amnhĩre. 19 Ixpê Pawre kot paj tanhmã kot ato tewên toja pãnhã amã amnhĩre. E pa amnhĩ nhĩhkra ho ã amã amnhĩ jarênh ã kagà anê. Nom ajaxwÿja na ka tanhmã ixto tewên to Piremõ. Na pa pre amã Jejus kot mêm panê htyk ã harê ka pre inhmar xà hkôt hkôt amnhĩ xãm. Jao ixpyrà nê atĩr tũm nê apa ho apa mã xwÿnhhta pãnhã te ate ixto tewên pyræk.

20 E kwa ixkràmnhwÿ. Ixpyrà nê apê Kris kwÿ jakamã kêr ka ixkamã axukapĩ hã inhmã Onesti ho mex nê. Kêr pa ja hã ajarênh ma nê ixkĩnh nê tãm ijamaxpêr. 21 Nà ra ixte apumunh mex kênã. Kot kaj ixte hã awÿrta kôt hipêx. Ja kaxyw na pa amã kagàja nhĩpêx nê awÿr kumê. Nom kot kaj ãm ja pix ho anhÿr kêt nê. Kot kaj ixte

hã awÿrja kôt amnhĩ krã hkôt tanhmã ho mex to. Nà kot kaj ho anê.

Pawre kãm Piremõ hwÿr mõi nê omunh prãm ã harênh

22 Nê Tirtũm kot mêm awÿr inhmênh kaxyw mêm ate ixto hwÿr o apa jakamã koja apu tokyx ma mêm awÿr inhmê. Jakamã kwa kêr ka ixkutêp tanhmã mêmoj to mex to. Kêr pa mêm arĩgro hã mõi awÿr pøj ka ra ixkutêp tanhmã amnhĩ to hpa nê ãm ixpix kãm ajamak o apa.

23 Nê ota Epasja awÿr hpêr mêm. Na hte ixpyrà nê Jejus Kris ã mêm hagjênh xà kamã kêp prês nê hkrĩ ho hkrĩ. 24 Nê Makre nê Aristak nê Têmte nê Rukre mêm awÿr hpêr mêm. Na htem ixpyrà nê Kris mã tanhmã amnhĩ nhĩpêx to ho pa nom ixrom mêm kêp prês kêt.

25 E kê Pahihti Jejus Krisja akutã nojarêt rãhã ho pa. Ta ãm ja pix. Ixpê Pawre na pa amã kagà nê awÿr kumê.

Eprêw Ijaew hwÿr kagà

Kagà ja na pre Ijaew ò amnhî kwÿjê mã hipêx nom mẽ pahte hipêx xwÿnh nhîxi mar kêt. Na pre tanhmã hamaxpêr to nê amnhî nhîxi hã kagà hkêt nê. Apu Pawre rÿ apu axtem mēhōja na pre hipêx. Ijaew kwÿjaja uràk nê Jejus kôt amnhî xunhwÿr xwÿnhjê mã na pre hipêx nê mẽ hwÿr kumê. Ijaewjaja mẽ hixi hō pê Eprêw. Jakamã nhũm kagà nhîpêx xwÿnhja mẽ hwÿr hipêx nê kumê. Nê kamã mẽ kãm mẽmoj jarēnh rax nê tanhmã Jejus jarēnh to.

Nê mẽ hkwÿjaja hkwÿjê hkĩnhã kãm Jejus prãm kêt jakamã na prem hkaga nê mẽ kot amnhî nhîpêx tũm o ujanãr prãm xàj tanhmã mẽ homnuj to ho pa. Jakamã nhũm kagà nhîpêx xwÿnhja tanhmã ja hã mẽ kãm kapêr to.

Nê na pre tanhmã Tirtũm nhōrkwÿ kaàkre hã kagà hto. Nê kaxkwa kamã òrkwÿ mexja nhũm tanhmã hã kagà hto nê mex o òrkwÿ kaàkre jakrenh ã harê.

Nê mẽ kot Jejus ã amnhî xà htÿx kamã hamak o pa htã mẽ kot tee ri ja hã amnhî pumunh nê Jejus kaga nê mẽ hkurê kamã hihtÿx nê. ã mēhōja mẽ kãm kapêr anê nê hã kagà nê mẽ hwÿr kumê. Nê mẽ kãm kapêr o:

1 Pa Kris kôt ixkwÿjaja? Xà mẽ amex? E ot pa mẽ amã kagà nhîpêx nê mẽ awÿr kumê. Amnepê m Tirtũm na pre mẽ panhīgêjtjê hwÿr ÿ hã kapêr jarēnh o ri mẽ pa xwÿnhjê rē nhũm mẽ xatã mẽ kãm kapêr jarēnh o ri mẽ hkôt pa. Ahpÿnhã tanhmã mẽ kãm kapêr to ho amnhîrīt o mẽ hkôt pa. Nhũm Tirtũm xatã mẽ hkanrēhã mẽ hkra nê mẽ htãmnhwÿjê hwÿr mẽ hkwÿjê rē nhũm mẽ kãm kapêr jarēnh o ri mẽ hkôt pa. Nom mẽ kãm kapêr piitã harēnh kurê kumrēx kêt nê. Na prem ãm hkwÿ pix jarē. Tã nhũm hpãnhã mẽ hkwÿjaja wantajê mÿr pê mẽ hwÿr mra nê axte mẽ kãm hkwÿ

jarēnh o ri pa. Jao ra mẽ kãm harēnh jatur xàm mēnh o mō. ²⁻³ Tã nhũm Tirtũm Kraja mẽ pahwÿr wrÿ nê mẽ pamã kapêr jarēnh jatur xàm kumê. Kêp Tirtũm Kra jakamã te kot amnhî nhîpêx pyrã nê pa. Uràk nê mex o mex. Nê wa hihtÿx xàja tipxi. Nê wa àhpumunh tÿxja mããnhēn tipxi. Jakamã mẽ pahte pano ho Tirtũm pumunh kêt tã Jejus pumunh pê te mẽ pahte Tirtũm pumunh pyrãk. Uràk nê kot amnhî to rax o mẽ pahpiitã mẽ pajakrenh par. Amnepê m kormã mẽmoj kêt ri nhũm Jejus Tirtũm kukwak ri mẽmoj piitã ho kator pa. Tã koja Tirtũm nhÿrmã kãm mẽmoj piitã òr pa. Kaxkwa kamã mẽmoj piitã nê jar pika piitã hkôt nhũm kãm piitã òr pa.

Nê Jejus xàhpumunh xà pix kukwak ri na mẽmoja arĩ rãhãã. Na pre mẽ panê mẽ pahte amnhî tomnuj piitã hpãnhã amnhîrer par kaxyw mẽ panê ty. Hãmri akupÿm htĩr hãmri nê ma akupÿm kaxkwa hwÿr api. Tirtũm xihtÿx o hihtÿx xwÿnhja wÿr akupÿm api. Nê ò krĩ kamã upôk rũm pahi maati hkrĩ xà hã kuri hkrĩ ho hkrĩ. Nê ìhkô hã mẽ pahto amnhîptà rãhã ho hkrĩ.

Jejus mẽ Tirtũm kapêr o mẽ wrÿk xwÿnhjê jarēnh

⁴⁻⁵ Nê Jejus kot amnhî to rax o Tirtũm kapêr o mẽ wrÿk xwÿnhjê jakrenh jakamã na pre ã Tirtũm kãm kapêr anê nê kãm:

Na ka amnhî to rax o mẽ kot ixkapêr o mẽ wrÿk xwÿnhjê jakre.

Mê kot inhmã tanhmã amnhî nhîpêx to ho mẽ pa xwÿnh na mẽ.

No mẽ kurom apê Ixkra kumrēx jakamã amex o ate mẽmoj piitã hakrenh par.

Nê apê pika nhō xwÿnhjê hwÿr ixte amēnh mã xwÿnh na ka. Nã apê Ixkra kumrēx.

Kot paj jarãhã ixpê anhîpêêxã hã mẽ piitã mẽ kãm amnhî to amnhîrīt. Pa na ixpê anhîpêêxã.

Anhÿr o Kra Jejus mã kapêr. Na pre kapêr o mẽ wrÿk xwÿnhjê mã ã kapêr

anhÿr kêt nê. Jejus mã pix mã ã kapêr anê.

⁶ Nê koja nhÿrmã akupÿn mẽ pahwÿr Kra mẽnh kaxyw hãmri nê kapêr o mẽ wrÿk xwÿnhjê mã kãm:

E ota Ixkrata. Ixkra kumrêx na. Kot amnhÿ to rax o mẽ piitã mẽ hakrenh par.

Jakamã kêr ka mẽ apiitã kutã arôrôk nê kãm mex o mex ã harê.

Anhÿr o mẽ kãm kapêr. ⁷ Nê kapêr o mẽ wrÿk xwÿnhjê na pre axtem tanhmã mẽ harênh to nê mẽ harênh o:

Ixkapêr o mẽ wrÿk xwÿnhjaja na pa hte nhÿhÿm mẽ kurê nhÿm htem inhmar xà hkôt ma nhÿhÿm mra nê inhmã tanhmã amnhÿ nhÿpêx to.

Te ixte ma nhÿhÿm kôk nê kuwyja mẽnh nhÿm ixkapêr kôt nhÿhÿm môrja pyrâk.

Anhÿr o mẽ harê. ⁸ No ã Krata jarênh anhÿr kêt nê. Na pre tanhmã kãm kapêr to nê amnhÿ pyrâ nê kêp Tÿrtÿm ã harê nê kãm:

Pa Tÿrtÿm? E ka kot kaj mẽ ho amnhÿptâr rãhã ho akrÿ. Nê akatât kôt mẽ ho amnhÿptã.

⁹ Koja mẽ tãm amnhÿ nhÿpêx ka ja mã mẽ omu nhÿm ja amã mex nê.

No koja mẽ tanhmã amnhÿ tomnuj to ka ja mã mẽ omu nhÿm ja apê omnuj nê. Mẽ kot tanhmã amnhÿ tomnuj to ho paja na omnuj tÿx.

Tã ate inhmã hprãm xà hkôt amnhÿ nhÿpêx jakamã na pa mẽ kaxyw axãm ka akÿnh kãm mẽ ho amnhÿptã.

Ixpê anhô Tÿrtÿm na pa ã amã ixkapêr anê. Anê.

¹⁰ Hãmri nê kãm:

Pa Pahihti. Nà amnepêm kormã mẽmoj kêt ri na ka pre ixkukwak ri pika nê kaxkwa ho akato. ãm hãmri na ka pre ã amnhÿ nhÿpêx anê.

¹¹ Tã nom koja nhÿrmã hamê wa hapêx pa. ãm kaxipix kot kaj kurom arÿ arãhãã nê aa ajapêx kêt nê.

Kaxkwa nê pika koja wa nhÿrmã te ixkre mã pô htÿm kot amnhÿ nhÿpêx pyrâk.

¹² Kot kaj wa hipêx o te mẽ kot ixkre nê pô htÿm mã hikranh par nê hpãnhã mã nyw janhôr pyrâk.

Jao pika nê kaxkwa htÿm o ajapêx pa nê hpãnhã nyw nhÿpêx. Kaxkwa nyw nhÿpêx nê pika nyw nhÿpêx.

Nom kot kaj pika nê kaxkwa tÿmta pyrâ nê aa awej nê axirerek kêt nê.

Kot kaj arÿ anyw nê axihtÿx rãhã apa ho apa nê aa ajapêx kêt nê. Arãhã atÿr tÿm nê apa ho apa xwÿnh na ka.

¹³ E jar inhÿhkô mã nhÿ nê inhmã mẽ ho amnhÿptâr o akrÿ.

Kot paj mẽ kãm akurê xwÿnhjê pynênh pa nê man awÿr mẽ o mra nê anhÿhkram mẽ haxâr pa. Anê.

ã na pre Tÿrtÿmja Kra Jejus mã kapêr anê. No kapêr o mẽ wrÿk xwÿnhjê mã ã kapêr anhÿr kêt nê.

¹⁴ E kot paj hpãnhã ixprÿ mã mẽ amã Tÿrtÿm kapêr o mẽ wrÿk xwÿnhjê jarê ka mẽ inhma. Tÿrtÿm mã na htem tanhmã amnhÿ nhÿpêx to ho pa. Na hte nhÿrmã kuri mẽ htÿr tÿm nê mẽ pa mã xwÿnhjê hwÿr mẽ kurê nhÿm mẽ ma mẽ hwÿr wrÿ nê tanhmã mẽ ho ajuta hto ho pa. Na htem ã amnhÿ nhÿpêx anhÿr o pa.

2

Mẽ pahte Jejus kaga hkêt ã mẽ pamã karô

¹ Tã ã Tÿrtÿmja Kra kot amnhÿ to rax o kapêr o mẽ wrÿk xwÿnhjê jakrenh ã harênh kot anhÿr jakamã kwa kêr pu mẽ kapêr mar tÿx rãhã nê hkôt pix mã amnhÿ nhÿpêx o papa. Kot pu mẽ ho anhÿr kêt hãmri nê gaa nê hkaga. ² Na pre Tÿrtÿm kapêr o mẽ wrÿk xwÿnhjaja amnepê mã mẽ panhÿgêjtê hwÿr wrÿ nê Tÿrtÿm nhÿ mã mẽ kot tanhmã amnhÿ nhÿpêx to ho pa mã mẽ kãm karô nê ma akupÿm api. Nê katât kôt ri mẽ kãm Tÿrtÿm kapêr jarênh o pa. Hãmri nhÿm mẽ

kot hkôt amnhĩ nhĩpêx nê mar mex xwýnhjaja nhũm mẽmoj mẽ kãm mex nê. No nhũm mẽ kot mar nê ãm mar xwýnhjaja koja mẽmoj mẽ kêp omnuj nê. ³ Koja nhỹrmã mẽmoj mẽ kêp omnuj tỳx kumrêx nhũm mẽ tee ri amnhĩ tã omu nê tee ri kêp amnhĩptàr prãm kaprỳ nê mex kêt nê pa. Nom mẽ kot Tĩrtũm kapêr mar tỳx xwýnhjaja koja mẽmoj mẽ kãm mex o mex. Koja Tĩrtũm amnhĩ katut kôt mẽ kot amnhĩ tomnuj rênh pa nê axte kãm hamaxpêr kêt nhũm mẽ kuri htĩr tũm nê mex rãhã nê pa ho pa. Na pre Pahihti Jejus mẽ kot kapêr mar o kuhê xwýnhjê kumrêx mã ã ja jarênh anê nê mẽ kãm:

–Nà kot kaj mẽ amnhĩ kaxyw inhmã ajamaxpêr nhũm Tĩrtũm ixtã mẽ apumu nê mẽ anê mẽ ate amnhĩ tomnuj piitã ho hapêx pa nê axte kãm hamaxpêr kêt nê. Anê.

Hãmri nhũm mẽ kot kapêr mar nê hkôt mẽ pa ho mẽ pa nê xwýnhjaja mar tỳx nê amnhĩ xô ri mẽ pamã harênh o ri pa. Nê mẽ pamã:

–Nà ãm hãmri. Nà ã ja jarênh kot anhỹr. Anê.

⁴ Hãmri nê mẽ pamã aa mẽ pahte mẽmoj pumunh kêt kwỳ ho anhỹr o ri mẽ pahkôt pa. Tĩrtũm Karô kot ja kaxyw mẽ ho mẽ ahpumunh tỳx jakamã nhũm mẽ y hã ahpýnhã tanhmã mẽ pamã amnhĩ nhĩpêx to ho pa. Mẽ pahte ja hã mẽ omunh nê kamã pano puma kaxyw. Nê ã mẽ pajamaxpêr anê nê pajamaxpêr o:

–Nà ãm hãmri na mẽ pamã ã Jejus jarênh anê nê y hã ã amnhĩ nhĩpêx anhỹr o pa.

Anhỹr o pajamaxpêr kaxyw na prem ã mẽ pahkôt amnhĩ nhĩpêx anhỹr o pa.

Mẽ pahpê Jejus tō nê htōx ã mẽ pa-jarênh

Juãw 1.14; Rōmãn 8.3-4; Piripos 2.5-11; Korosê 2.9; Wam Juãw 4.2

⁵ Nê na pre Tĩrtũm amnhĩ kukamã tanhmã amnhĩ jarênh to nê nhỹrmã kot akupým mẽmoj piitã ho nyw nê tãm mẽmoj piitã ho amnhĩptàr o pa

hã amnhĩ jarê. No na pre kapêr o mẽ wryk xwýnhjê mã ã mẽ kot amnhĩ nhĩpêx anhỹr ã mẽ kãm karô hkêt nê. Koja jajaja mẽ pahto amnhĩptàr o pa hkêt nê. ⁶ Tĩrtũm kapêr ã kagã htũm kot ja jarênh kot:

Kwa Tĩrtũm. Nà ãm hãmri na ka hte pika ja kamã ri mẽ ixpa xwýnhjê jamãr mex rãhã ho apa.

Akĩnhã amarĩ ri mẽ ixpa xwýnh tã amã mẽ ijapêê.

Nê mẽ ixkutã anojarêr rãhã ho apa.

⁷ Na ka hte tanhmã mẽ inhĩpêx to pa mẽ te mẽ ixpê akapêr o mẽ wryk xwýnhjê pyrãk.

Jao mẽ urak nê akukwak ri mẽ inhmex nê ixpa ho ixpa.

Mẽ uran mẽ ixahpumunh nê ixihitỳx kêt tã mẽ inhmex nê ixpa.

⁸ Na ka pre ra ate mẽmoj to akator xwýnh piitã mẽ inhĩhkram haxã.

Nà ãm hãmri na ka pre ã mẽ inhĩpêx anê Tĩrtũm. Amex o amex. Anê.

Na pre ra mẽmoj piitã mẽ panhĩhkram haxã. Pika nê kaxkwa nê kapêr o mẽ wryk xwýnhjaja nê mẽkarõmnuti nê kot mẽmoj piitã hipêxja nhũm mẽ panhĩhkram haxar pa. Mẽ pahte ìhkô hã ho amnhĩptàr o papa kaxyw. No na pu mẽ kormã piitã ho amnhĩptàr kêt nê. ⁹ No kêt Jejusja na Tĩrtũm mẽ pakurom ìhkram mẽmoj piitã haxar par kumrêx. Kormã pika ja kamã ri pare ri na pre tanhmã amnhĩ nhĩpêx to nê Tĩrtũm kapêr o mẽ wryk xwýnhjê hkĩnhã te amnhĩ to grire pyrã nê amnhĩ xà htỳx kamã hamak kãm ty. Tĩrtũm kãm mẽ pahto mex prãm xaj ã mẽ pahpiitã mẽ panê htyk anê. Tã nhũm Tĩrtũm akupým ho htĩr nê akupým amnhĩ wỳr ho api nê kêp Pahi Maati mex o mex ã harê. Na pre ã Jejusja mẽ panê amnhĩ nhĩpêx anê nhũm Tĩrtũm ja hã omu nê kukwak ri mẽ pahto mex nê.

¹⁰ Nê Tĩrtũm kot mẽmoj piitã ho kator jakamã mẽmoj piitã õ na. Na pre mẽ pakukamã hamaxpêr o:

—Inhmã ixkra xohtô hprãm. Kot paj nhÿrmã man amnhÿ wÿr mẽ ho api kê mẽ ixri mex rãhã nẽ pa ho pa. Nà kot paj ã mẽ hipêx anẽ. Nẽ Ixkra Jejus koja kêp mẽ õ Pahihti. Koja mẽ urak nẽ mẽmoj punuj pumunh o pa hãmri nẽ à htÿx kamã hamak o kêp mẽ õ Pahihti mã tãm. Anẽ.

¹¹ Na hte Jejus mẽ panê mẽ pahte amnhÿ tomnuj rê nẽ hpãnhã mẽ pamã mẽ pahte amnhÿ nhÿpêx nyw jagjê nhÿm Tÿrtÿm ja hã mẽ pahpumunh kôt mẽ pahto hkra. Kêp Jejus Nhÿpêêxà nẽ kêp Mẽpanhÿpêêxà maati jakamã nhÿm Jejusja mẽ pahpê htõ nẽ mẽ pahpê htõx ã mẽ pajarẽ nẽ mẽ panhÿ hã hkÿnh nẽ.

¹² Tÿrtÿm kapêr ã kagà htÿm ã mẽ pajarênh kot anhÿr. Kamã Jejusja Mẽpanhÿpêêxà maati mã mẽ pajarênh kot:

Koja ixtõ nẽ ixtõxjaja akapêr mar kaxyw axpên wÿr akuprõ pa ma mẽ hkôt mra nẽ mẽ kãm akapêr jarê nẽ mẽ ïhkô hã amex ã gre. Anẽ.

¹³ Hãmri nẽ kãm:

Kot paj amnhÿ kaxyw akôt pix mã ijamaxpêr mex o ri ixpa. Anẽ.

Hãmri nẽ hpãnhã kãm:

Ot pa akrajê hkôt ri ixpa ho ixpa.

Ka na ka pre mẽ kêp ixtõ nẽ ixtõx kaxyw inhmã mẽ agõ.

Koja mẽ ixpyrà nẽ amnhÿ kaxyw amã hamaxpêr rãhã ho pa Tÿrtÿm. Anẽ.

¹⁴ Nẽ mẽ pahpê pika nhõ xwÿnhjaja na pu htem ãm ri panhÿ pix ã papa. Nẽ panhÿ kamã pahkamrô hã ri papa. Jakamã na pre Jejus kot mẽ panê htyk kaxyw mẽ pahwÿr wÿr nẽ mẽ pahpyrà nẽ ï ho mẽ pakamã kato. Tã mẽmo kaxyw na pre ï ho ï nẽ mẽ pahkôt pa? Nà ï ho htyk o Satanasti pẽ hihtÿx xà ho hapêx par kaxyw na pre ã amnhÿ nhÿpêx anẽ. Satanasti kêp mẽ kot amnhÿ tomnuj xwÿnhjê hpãm nẽ kêp mẽ htyk xwÿnhjê hpãm.

¹⁵ Jakamã na hte kot mẽ pahtã ïhkra pikamÿr pyrak o mẽ panhÿpêx pu mẽ ÿ hã pamã pahtyk pyma nẽ ri papa. Tã ra Jejus kot mẽ pahwÿr wÿr nẽ te

kêp mẽ papytãr pyrak o mẽ panhÿpêx jakamã pu mẽ tee ri pahtyk kukamã pajamaxpêr o ri pamã ma ho papa hkêt nẽ.

¹⁶ Nẽ Tÿrtÿm kapêr o mẽ wÿrÿk xwÿnhjê ho mex kaxyw na pre Jejus pika hwÿr wÿrÿk kêt nẽ. Mẽ panhÿgêt finat Apraãw pyrã nẽ mẽ panhÿ ho panhÿ xwÿnhjê ho mex kaxyw na pre wÿrÿ. ¹⁷ Ijaew nhõ patrejaja na pre htem mẽ kot amnhÿ tomnuj mÿrapê mẽ hpãnhã Tÿrtÿm mã mry hwÿr pa nẽ hkamrô kapÿ nẽ mẽ ho Tÿrtÿm wÿr. Kot hã mẽ omunh nẽ mẽ mex ã mẽ harênh kaxyw. Tã nhÿm Jejus wÿr nẽ mẽmo mryta pyrã nẽ ã mẽ panê hkamrô pikapÿr anẽ. Kaxyw na pre mẽ pahtõ maatija mẽ pahwÿr ï ho ï nẽ wÿr nẽ mẽ pahpyrà nẽ ni nhõhy rÿm kato. Jao kêp mẽ pahto Tÿrtÿm wÿr xwÿnh maati. Na pre Tÿrtÿm kãm hprãm xà hkôt mẽ panê mẽ pahte amnhÿ tomnuj pãnhã amnhÿrer pa. Tã kot mẽ pahpyrà nẽ mẽmoj punuj pumunh nẽ amnhÿ xà htÿx kamã hamak o pa jakamã kêp mẽ pakamã ukapÿrÿ xwÿnh ã pixi mex na. ¹⁸ Kormã htyk kêt ri na pre mẽ pahpyrà nẽ omnuj nẽ ri pa. Nhÿm mẽkarõmnuti nhõ pahi kot tanhmã amnhÿ tomnuj to hprãm xaj tee ri hkôt kãm ahkrox o pa hkapÿrÿ nhÿm hkôt amnhÿ nhÿpêx kêt nẽ amnhÿ nẽ ho axtem nẽ. Jakamã koja Satanastija urak nẽ tanhmã mẽ panhÿpêx to nhÿm Jejus mẽ pahtã omu nẽ amnhÿ pyrã nẽ tanhmã kêp mẽ panhÿpêx to pu mẽ ÿ hã kutã amnhÿ to htÿx nẽ papa.

3

Jejus kot amnhÿ to rax o Mojes jakrenh ã harênh

Juãw 1.17-18

¹ E ixkrãmnhwÿjaja. Ra Tÿrtÿm kot mẽ pahte kapêr mar nẽ tãm amnhÿ nhÿpêx o ri papa kaxyw mẽ pahto hkra jakamã kwa kêr ka mẽ Jejus kot tanhmã mẽ pamã amnhÿ nhÿpêx toja mã ajamaxpêr rãhã ho ri apa. Na pre Tÿrtÿm mẽ pahwÿr kumẽ nhÿm mẽ pahwÿr wÿr nẽ Tÿrtÿm kapêr o mẽ

pajahkre ho ri mẽ pahkôt pa. Nê te kêp mẽ panhõ patre pyrà nê mẽ pahto Tirtũm wÿr o pa. ² Na pre Tirtũm finat Mojes kwÿ kaxyw Mojesja xãm nhũm kãm hprãm xà hkôt tanhmã mẽ hipêx to ho pa. Tã nhũm hpãnhã mẽ pakaxyw Kra Jejusja xãm nhũm Mojes pyrà nê Tirtũm kãm hprãm xà hkôt pix mã tanhmã mẽ panhĩpêx to ho pa. Hamẽ na pre wa Tirtũm jamaxpêr xà hkôt tanhmã kãm mẽ panhĩpêx to ho pa.

³ Koja mẽhõ amnhĩm ixkre mex nhĩpêx nê hipêx pa nhũm hkwÿjaja hwÿr mra nê omu nê mex kumrêx ã harẽ. Nom kot hipêx xwÿnhhta àhpumunh xà hkôt hipêx jakamã tãm na mex o kot ixkreta jakrenh. Ja pyrà nê finat Mojes kot amnhĩ to rax tã nhũm Jejus kot amnhĩ to rax o kot hakrenh. Mojes te kêp ixkre nhĩpêxta pyræk no Jejus te kêp ixkre nhĩpêx xwÿnhhta pyræk jakamã kot amnhĩ to rax o kot Mojes jakrenh.

⁴ Nê mẽ kot ahpÿnhã amnhĩ krã hkôt tanhmã ixkre nhĩpêx to jakamã kot hipêx xwÿnhhta na mex o ixkreja jakrenh. Tã ja pyrà nê Tirtũm kot mẽmoj piitã ho kator jakamã kot amnhĩ to rax o kot mẽmoj piitã ho kator xwÿnh jakrenh par.

⁵ Nê finat Mojes na pre hte Tirtũm kãm hprãm xà hkôt tanhmã amnhĩ nhĩpêx to ho pa. Nê ma kãm hkwÿjê piitã hkôt mẽ kãm kapêr jarênh o ri pa. Tirtũm tanhmã kot mẽ kãm kapêr tota kukamã nhũm mẽ kãm harênh o mẽ hkôt pa. No ãm Tirtũm mã tanhmã amnhĩ nhĩpêx to ho hpa xwÿnh pix na pre.

⁶ Nê Kris haxwÿja na pre hte Tirtũm kãm hprãm xà hkôt tanhmã amnhĩ nhĩpêx to ho pa. Nom Mojes rom kêp Tirtũm Kra kumrêx jakamã kurom kêp mẽ panhõ Pahшти kumrêx. Tã kwa kêr pu mẽ kãm hprãm xà hkôt pix mã tanhmã kãm amnhĩ nhĩpêx to ho ri papa. Mẽ kot hã tanhmã mẽ panhĩpêx to htã pu mẽ ÿ hã mẽ kutã amnhĩ to htÿx nê papa nê paja-maxpêr o:

—Nà ixpunuj nê ixpa htã kot paj ixpunuj rãhã ixpa ho ixpa hkêt nê. Koja nhÿrmã Tirtũm ixto mex kumrêx pa axte tanhmã ixpunuj to nê ixpa hkêt nê. Hêxta waa nê. Nà ja inhmã hprãm tÿx kumrêx.

Anhÿr o amnhĩ kukamã paja-maxpêr o papa.

Mẽ pahte Tirtũm kaga hkêt ã mẽ pamã karõ

Wam Korõt 10.1-11; Jutre 5

⁷⁻⁸ Amnepêm na pre mẽhõja tanhmã Tirtũm Karõ nhÿ hã kapêr to nê kapêr o:

E kêr ka mẽ Tirtũm kapêr mar tÿx o apa.

No ama nê ãm ama nê ri hã apa hkêt nê. Rÿ kapêr pê akrã hihtÿx o apa hkêt nê.

Mẽ akukamã mẽ anhĩgêjtaja na prem ã amnhĩ nhĩpêx anê nê Tirtũm kapêr pê hkrã hihtÿx o pa. Kapôt ã Mojes kôt mẽ pata ã na prem kãm Tirtũm kapêr mar prãm kêt nê. Nê tee ri amnhĩ kukamã hamaxpêr nê akupÿm Ejit wÿr hkrã nê axpên mã: “Kwa na pu mẽ ra pahpunuj tÿx nê papa nhũm Tirtũm ãm ja hã mẽ pahpumu nê tanhmã mẽ pahto mex to hkêt nê. Mãn ra mẽ pahkaga nà? E kwa pu mẽ awjanã nê ma akupÿm Ejit wÿr mãn papa.” Anê.

⁹⁻¹⁰ Na prem ã axpên mã kapêr anhÿr o ri pa hã amgrà pê 40.

Tirtũm xatã kot tanhmã mẽ ho mex to nhũm mẽ kot amnhĩ tã omunh tã ãm omu nê htÿx ri amnhĩ hkrã hkôt pa.

Nhũm tee ri amnhĩ tã mẽ omu nê mẽ kamã gryk nê.

Hãmri nê hamaxpêr o: “Nà pêr mẽ hamaxpêr kot mẽ hã hkwÿ jêt kêt kumrêx. Te mẽ hamak kre hkêt pyrà nê ixkapêr mar kêt nê.” Anhÿr o hamaxpêr.

¹¹ Hãmri nê mẽ kãm: “E mẽ inhma. ã mẽ ate amnhĩ nhĩpêx anhÿrja mÿrapê kot kaj mẽ ma ixte mẽ amã pika mex nhõr mã

xwÿnhhta wÿr apa hkêt nê.”
Anhÿr o mē kām kapēr. Anē.

Å mēhōja Tirtūm Karō nhÿ hā te Tirtūm tām kot mē kām kapēr pyrāk o mē harēnh anē. ¹² Jakamā kwa mē okora ixkrāmnhwÿjaja. Kêr ka mē amnhÿ to mex o apa. Tirtūm kêp Mēpahpām ā pixi mex tā kot kaj mē tanhmā ajamaxpēr punuj to rÿ amnhÿ kaxyw hkôt ajamaxpēr kêt hāmri nê te ate amnhÿ katut kôt âm pyrāk o hipêx nê hkaga. Kwa mē ā amnhÿ nhÿpêx anhÿr kêt nê. ¹³ Kêt mē Kris kôt axpēn to axihtÿx o ri apa. Nê apkati mē ā axpēn nhÿpêx anhÿr rāhā nê. Kot kaj mē anhÿr kêt hāmri nê mē amā Tirtūm kapēr mar prām kêt ā amnhÿ to amnhÿrīt. Jao tanhmā amnhÿ tomnuj to ho ri apa nê atÿx ajamaxpēr o: —Nà ixte ā amnhÿ tomnuj anhÿr tā nhūm Tirtūm ja hā ixpumu nê âm hā ixpumu.

Anhÿr o ajamaxpēr japēr. Rÿ mē ajamaxpēr o:

—Nà na pa hte ā amnhÿ tomnuj anē nhūm Tirtūm ja hā ixpumu nhūm ja kām mex nê.

Anhÿr o ajamaxpēr japēr. ¹⁴ Kwa mē ri ā ajamaxpēr anhÿr kêt nê. Amnepê mā mē pahte Kris kôt amnhÿ xunhwÿr nhūm kot mē pahto hkrata ā na pu prem amnhÿ kaxyw hkôt pajamaxpēr o papa. Tā kêr pu mē arÿ ā amnhÿ nhÿpêx anhÿr tÿx o papa rāhā ty. ¹⁵ Tirtūm kapēr ā kagà htūm kot ja jarēnh kot:

E kêr ka mē Tirtūm kapēr ma nê mar tÿx nê.

No ama nê âm mar nê ri hā apa hkêt nê.

Rÿ mē kot hkaga xwÿnhjê pyrā nê kêp akrā hihtÿx kêt nê. Anē.

¹⁶ Mē panhÿgêtjaja na prem Mojes kôt pika pê Ejit rūm kato nê hkÿnh nê ma kapôt ā kormā pika mex wÿr pa. Nom Tirtūm kapēr mar nê hkôt amnhÿ nhÿpêx rāhā hkêt nê. Na prem kuma nê hkôt amnhÿ nhÿpêx o hā apkati grêre htā ra mēmoj nhÿ hā omnuj nê pa hā amnhÿ pumu nê tee ri amnhÿ kukamā hamaxpēr. ¹⁷ Jao xatā kapēr nhÿrôp kuhê nê amnhÿ hkrā hkôt pix

mā amnhÿ nhÿpêx o pa ho ra hā amgrā pê 40. Hāmri nhūm tee ri amnhÿ tā mē omu nhūm ja kêp omnuj nê. Jakamā nhūm mē piitā kapôt ā ri pa nê gaa nê pikaprār pa. ¹⁸ Mē kot kapēr mar kêt jakamā nhūm mē kām:

—Nà ā mē ate amnhÿ nhÿpêx anhÿr o ri apaja mÿrapê kot kaj mē ixte mē amā mē amex nhôr mā xwÿnhhta wÿr apa hkêt nê. Anē.

¹⁹ Tā mē kot amnhÿ kaxyw Tirtūm kôt hamaxpēr o pa hkêt jakamā na prem pika mexta wÿr hpôx kêt rāhā pikaprār pa. Nhūm mē hkra nê mē htāmnhwÿjê pixjaja na prem mē mÿr pê hwÿr pōj nê kamā pa.

4

Mē pahte Tirtūm kukwak ri paja-makêtkati nê ri papa hā mē pajarēnh

¹ Mē pahte Tirtūm kukwak ri paja-makêtkati nê ri papa ho papaja Tirtūm kām hprām jakamā kwa kêr pu mē amnhÿ pumunh mex o papa. Nê wam mē panhÿgêt rom Tirtūm kapēr mar tÿx nê hkôt măn kêt ri amnhÿ nhÿpêx mex rāhā nê. Kêr pu mē kurom mē pajamak kām amnhÿ krit xà hā pika mexta wÿr pōj. ² Mē kot mē pahpyrà nê Tirtūm kapēr mar mex tā na htem amnhÿ kaxyw hkôt hamaxpēr kêt nê. Te mē kot mar kêt pyrāk. ³ Âm mē kot amnhÿ kaxyw Kris mā hamaxpēr xwÿnh pixjaja na htem kukwak ri hamakêtkati nê ri pa ho pa. Amnepê mā mēmoj piitā hkêt ri na pre Tirtūm mēmoj piitā ho kator pa hāmri nhūm apkati nhūm axte mēmoj tā àpēnh kêt nê. Âm õ krÿ kamā arÿ hamakêtkati nê hkôkôt o hkrÿ. Tā mē pahte urāk nê pajamakêtkati nê papa ho papaja na kām hprām. No wam ri mē pa xwÿnhjaja mē kot amnhÿ tomnuj mÿrapê na pre Tirtūm mē kot urā nê hamakêtkati nê paja nê mē hkurê. Kapēr ā kagà htūm kot harēnh kot:

Na pre Tirtūm tee ri amnhÿ tā mē kot hipêx ā mē omu nhūm ja kêp omnuj nê. Hāmri nhūm

mê kãm: “Nà kot kaj mê ixkukwak ri axàmnhĩx ajamakêtkati nê apa hkêt nê.” Anê.

⁴ Nê kot harênh kot:

Na pre Tĩrtũm àpênh ã arĩgro kêp 6 hãmri nhũm arĩgro pê 7ta ã nhũm axte mêmoj tâ àpênh kêt nê. Na pre arĩ hkôkôt o nhỹ.

Arĩgro pê 7 ã arĩ hamakêtkati nê hkôkôt o nhỹ. Anê.

⁵ Nê mê kot kapêr mar nê ãm mar xwýnhjê jarênh kot:

Kot kaj mê aa ixkukwak ri axàmnhĩx nê ajamakêtkati nê apa hkêt nê. Anê.

⁶ Mê panhĩgêjtjaja kot amnhĩ kaxyw Tĩrtũm kôt hamaxpêr kêt jakamã na prem hamakêtkati nê ri pa hkêt nê. Tã mê papajaja na Tĩrtũm arĩ kãm mê paxàmnhĩx nê pajamakêtkati nê papa hprãm. ⁷ Amnepê m Ijaew Tĩrtũm kôt hamaxpêr kêt jakamã na prem kapôt ã pikaprãr pa. Hãmri nhũm amgrã xohtô nê hapêx nhũm Tĩrtũm mê hkanrêhã mê htàmnhwýjê hõ pê finat Tawija mã kapêr nhũm kuma nê mê pamã tanhmã kapêr tota ã kagã nê hã kagã kot:

Kwa kêr ka ixkapêr ma nê mar tỳx nê. No mê anhĩgêjtjê pyrã nê akrã hihtỳx ho inhma nê ãm inhmar kêt nê. Anê.

Na pa pre ra mê amã ã ja jarênh anê. ⁸ Na pre finat Jojueja finat Mojes mỳr pê ma pika pê Kanaã hwýr mê hkanrêhã mê hkrajê o pa nê hwýr mê o pøj. Tã nhũm prem Jojue kukwak ri hamakêtkati nê pa ho pa hkêt nê. Kêp ãm kukwak ri ã amnhĩ nhĩpêx anhỹr ronhỹx Tĩrtũm axte mê kãm mê hamakêtkati nê mê hamak kãm amnhĩ krit nê mê pata hkukamã harênh kêt nê. ⁹ Nom mê pahte kukwak ri pajamakêtkati nê pajamak kãm amnhĩ krit nê ri papa ho papaja na Tĩrtũm arĩ kãm hprãm. ¹⁰ Na pre arĩgro pê 6ja ã mêmoj piitã ho kator pa nhũm apkati nhũm hamakêtkati nê hkôkôt o nhỹ. Tã kot puj mê pahpê hkrajaja amnhĩ to kuwý nhũm tanhmã mê pahkrã hto pu mê kukwak ri urãk nê paxàmnhĩx nê pajamakêtkati nê papa

ho papa. Te Tĩrtũm àpênh pa nhũm apkati nhũm hamakêtkati nê hkôkôt o ýrta pyrãk. ¹¹ Jakamã kwa kêr pu mê amnhĩ to kuwý kê ã mê panhĩpêx anê pu mê urãk nê ã amnhĩ nhĩpêx anhỹr rãhã ho papa. Nom kot pu mê pahkwý Ijaewjê pyrã nê kapêr kwým amnhĩ nhĩpêx o papa hãmri nê mê urã nê paxàmnhĩx pajamakêtkati nê papa hkêt nê.

Tĩrtũm kapêr te kot wapo xwa gix pyrãk ã harênh

¹² Nê Tĩrtũm kapêrja te ã ho tanhmã kot mêmoj to kaxyw hihtỳx pyrãk. Nê te wapo xwa gix pyrãk. Kojã mêmõ õ wapo xwa mex nê ho mêmoj jakãr mex nê. Ho mry hi jakãr mex pê kaxwýnh kãm hi kanhĩn o amnhĩrit. Ja pyrã nê na hte Tĩrtũm kapêr mê pajamaxpêr o amnhĩrit nê mex ã harê rỳ omnuj ã harê.

¹³ Nê na htem Tĩrtũm pê mêmoj to pimxur kêt nê. Na hte hprĩ hã mêmoj piitã omunh pa. Nê mê pajamaxpêr kôt mê pahpumunh pa. Na pu htem ã kot mêmoj piitã omunh par anhỹr xwýnhja noo mã tanhmã amnhĩ nhĩpêx to rãhã ho papa.

Jejus kêp mê panhõ patre maati hã harênh

Eprêw 10.19-25; Wam Juãw 2.1-2

¹⁴ Nê Ijaew nhõ patrejaja na pre htem Tĩrtũm mã amnhĩ jarênh xã hã ixkre hwýr agjê nê kamã mê ho Tĩrtũm wýr o pa. Ja pyrã nê na pre ra Jejus Tĩrtũm nhõ krĩ hwýr api nê kamã mê pahto hwýr o hkrĩ. Kêp Kra kumrêx jakamã kêp mê pahto Tĩrtũm wýr xwýnh maati. Jakamã kwa kêr pu mê amnhĩ kaxyw hkôt pajamaxpêr tỳx rãhã ho papa. ¹⁵ Satanasti na pre te kot mê panhĩpêx pyrãk o Jejus nhĩpêx. Nê tee ri kot tanhmã kãm kapêr to nhũm kot mar nê tanhmã amnhĩ tomnuj to hprãm xã ãm ri kãm ahkrox kaprý nhũm kutã amnhĩ to htỳx nê hkôt amnhĩ nhĩpêx kêt nê. Tã kot Satanasti kot amnhĩ nhĩpêx ã omunh mex jakamã na hte kêp mê pahpãnopxar mex o pa. Kot mê paxirerek kôt mê pahpumunh mex.

16 Jakamã kwa kêr pu mẽ amnhĩ tã kamã pahpijaàm kêt kãm paxàmnhĩx ri amnhĩ to hwỳr o papa. Kêp mẽ pakutã nojarêt xwỳnh nê kêp mẽ pakamã ukaprĩ xwỳnh jakamã kêr pu mẽ tee ri mẽmoj tã amnhĩ pumu nê amnhĩ to hwỳr kurê kumrêx. Hãmri nê ÿ hã paxàmnhĩx nê pajamakêtkati nê ri papa.

5

1 Nê mẽ panhõ patre maati Jejusja Tirtũm na pre mẽ pakaxyw ãm. Kêp mẽ pahkwỳ hã mẽ pakaxyw ãm nhũm hte mẽ pahto Tirtũm wỳr o pa. Nê kãm mẽ pahkĩnh xà nhõr o pa. Kot ja hã mẽ pahpumunh nê mẽ pahte kapêr kwỳm tanhmã amnhĩ nhĩpêx to ho papa hã mẽ pakamã gryk o hapêx tokyx anhỳr kaxyw.

2 Mẽ panhĩgêjtjaja na pre htem mẽ õ patre maati hwỳr mra nê kãm tanhmã amnhĩ tomnuj to hã amnhĩ jarê nhũm mẽ kuma nê mẽ kamã ukaprĩ nê. Mẽ urà nê kormã kot Tirtũm kôt amnhĩ nhĩpêx totuj anhỳr jakamã na pre mẽ kot tanhmã amnhĩ jarênh toja ma nê mẽ kamã ukaprĩ nê. 3 Hãmri nê mẽ hpãnhã Tirtũm mã mẽmoj gõ nê mããnen amnhĩ pãnhã kãm mẽmoj gõ. Mẽ uràk nê kot amnhĩ tomnuj o paja mỳrapê amnhĩ pãnhã kãm mẽmoj gõ. 4 No na pre hte patrejaja amnhĩ krã hkôt kêp patre maati kaxyw amnhĩ xunhwỳr kêt nê. Tirtũm kot mẽ kaxyw mẽ unhwỳr jakamã na pre mẽ kaxyw finat Arãwja xãm nhũm kêp mẽ õ patre maati hã mẽ ho Tirtũm wỳr o pa.

5 Nê Kris haxwỳja kêp mẽ panhõ pahi maati hã tãm kot amnhĩ xãm kêt. Tirtũm na pre mẽ pakaxyw ãm nê tanhmã kãm kapêr to nê kãm:

Nà apê Ixkra na ka.
Kot paj jarãhã ixpê Anhĩpêêxà hã mẽ kãm amnhĩ jarê. Anê.

6 Nê hpãnhã kãm:
Kot kaj Mekijetek pyrã nê apê patre maati hã mẽ ho ixwỳr rãhã ho ri apa. Anê.

7 Jejus kormã pika ja kamã pa ri na pre amnhĩ to Tirtũm wỳr rãhã ho pa.

Tõhã hkaprĩ nê tee ri mẽmoj tã amnhĩ pumu nê amnhĩ to kuwỳ. Nê tee ri mẽ kot hpĩrta kukamã hamaxpêr nê mỳr kãm amnhĩ to kuwỳ. Kop apu Tirtũm kãm mẽ kot kêp hpĩr prãm kêt ronhỹx pre tanhmã nê mẽ kãm hkurê xwỳnhjê ho nhũm mẽ hpĩr kêt nê. Jakamã nhũm pre ã amnhĩ to hwỳr anê. No ãm Tirtũm kãm prãm xà hkôt kãm amnhĩ nhĩpêx prãm jakamã nhũm kuma no ãm tanhmã nê mẽ ho hkêt nhũm prem kupĩ.

8 Kêp Tirtũm Kra kumrêx tã amnhĩ xà htỳx kãm hamak kãm ty. Jao Tirtũm kãm hprãm xà hkôt amnhĩ nhĩpêx ã amnhĩ pumunh mex nê.

9 Na pre amnhĩ xà htỳx kãm hamak o amnhĩ mex o amnhĩ mex ã mẽ kãm amnhĩ to amnhĩrit. Jakamã na hte mẽ kot kapêr kôt ri amnhĩ nhĩpêx o mẽ pa xwỳnhjê mã mẽ kot amnhĩ nhĩpêx nyw jagjê nê nhỹrmã Tirtũm mẽ wa kuri mẽ htĩr tũm nê mẽ pa mã xwỳnhjê hã mẽ harê. 10 Jakamã na pre Tirtũm Mekijetek pyrã nê kêp patre maati kaxyw ãm.

Mẽ pahte Kris kaga nê mẽ pahkurê Wam Korõt 3.1-2, 13.11, 14.20; Epes 4.11-16

11 Nê Jejus kêp mẽ pahto Tirtũm wỳr xwỳnh maati hã harênhja inhmã ixprĩ hã mẽ amã harênh par prãm tã ka mẽ kormã inhmar tỳx kêt nê. Pa tee ri ixprĩ hã mẽ amã harênh kaprỳ. Te mẽ amã mar prãm kêt o amõr pyrãk. 12 Amnepê mã mẽ ate Kris kôt amnhĩ xunhwỳr nê kapêr mar tỳx tã kormã nhãm amnhĩ xô ri ho amnhĩ kwỳjê jahkre ho ri apa hkêt nê. Te mẽ ate hã ano hkêt pyrãk jakamã na pa hte arĩ mẽ amã kapêr kot amnhĩrit mex xwỳnh kwỳ ho mẽ ajahkre ho pa. No kot amnhĩrit mex kêt xwỳnh o mẽ ajahkre hkêt nê. Te mẽ hkaràre kot amnhĩ nhĩpêx pyrãk o na ka htem amnhĩ nhĩpêx o apa. Na hte mẽ hkaràre mẽõ mex kur kêt nê. ãm kormã katorxà hkà pix kaõ. Ja pyrã nê ãm Tirtũm kapêr kot amnhĩrit mex xwỳnhhta pix na ka mẽ mar tỳx o apa nom kapêr kot amnhĩrit mex kêt xwỳnhja ka mẽ mar mex kêt nê.

13 Nê mẽ hkaràre kormã Tirtũm kapêr mar kêt jakamã na htem kormã mẽmoj mex nê mẽmoj punuj pumunh kêt nê. Tã te mẽ ate mẽ kot amnhĩ nhĩpêx pyrãk.

14 Mẽ kot Tirtũm kapêr mar mex xwýnhjaja na htem hprĩ hã kapêr piitã mar tỳx nê. Kot amnhĩrĩt mex xwýnhhta mar tỳx nê mãânên kot amnhĩrĩt mex kêt xwýnhja nhũm mẽhprĩ hã piitã mar tỳx nê. Te ho mẽ àptàr kot mẽõ mex kur o pata pyrãk. Jao ra mẽ àptàr jamaxpêr o hamaxpêr o ri pa nê hamaxpêr o:

—Kot paj tãm amnhĩ nhĩpêx o ri ixpa nhũm ja inhmã mex nê. Nom kot paj axtem tanhmã amnhĩ tomnuj to nhũm ja ixpê omnuj nê. Jakamã kot paj tãm amnhĩ nhĩpêx pix o ri ixpa nhũm Tirtũm mã ja mex nê. Anê.

6

1-2 Na pu prem ra Tirtũm kapêr kot amnhĩrĩt mex xwýnhhta kwỳ ma. Tãm na ja:

Kris kot mẽ panê tanhmã amnhĩ nhĩpêx to hã harênhja.

Nê mẽ pahte amnhĩ tomnuj kaga hã kot mẽ pamã karõja.

Nê amnhĩ kaxyw Tirtũm kôt mẽ pajamaxpêr ã mẽ pamã karõja.

Nê mẽ pahpê Tirtũm kra hã amnhĩ to amnhĩrĩt kaxyw mẽ kot mẽ pahkrã kumrãr ã mẽ pamã karõja.

Nê mẽ pahte Tirtũm mã tanhmã amnhĩ nhĩpêx to ho papa hkukamã mẽ kot mẽ pahkrã hã ìhkra jaxwỳr nê mẽ pahto Tirtũm wỳr ã mẽ pamã karõja.

Nê mẽ pahtyk nê akupỳm mẽ pahtĩr ã mẽ pajarênhja.

Nê Tirtũm kot nhỹrmã mẽ kot amnhĩ xà htỳx kãm hamak tũm xà hwỳr mẽ kêp hkra hkêt xwýnhjê janorja.

Mẽmojja piitã pu mẽ ra harênh mar tỳx nê. Prĩ hã kot amnhĩrĩt mex. Tã kwa kêr pu mẽ hpãnhã hijuk ri kot amnhĩrĩt mex kêt xwýnh kwỳ ma. Jao mẽ pahpê Tirtũm kra xàptàr mex nê ri papa. 3 Jakamã kwa kêr pu mẽ kot amnhĩrĩt mex xwýnh kumrêx kwỳ

ma nê hpãnhã hijuk ri kot amnhĩrĩt mex kêt xwýnh kwỳ ma. Nê axpên mã harênh rãhã ho ri papa. Nà koja Tirtũm kãm ja prãm pu mẽ ã amnhĩ nhĩpêx anhỹr rãhã o ri papa.

4-6 Na pre ra mẽ pahkwỳjaja Kris kaga nê htỳx ri amnhĩ nhĩpêx o pa. Mẽ kot kapêr mar tỳx tã axtem nê hkaga jakamã koja mẽ axte kapêr mar kêt nê. Ra mẽ kãm mar prãm kêt. Kot puj mẽ tee ri axte mẽ kãm harênh o papa kaprỳ. Na prem hprĩ hã kuma. Tirtũm kãm mẽ ho hkra hprãm ã harênhja nhũm prem hprĩ hã kuma nê kãm mar prãm nê hkôt amnhĩ xunhwỳ. Hãmri nhũm Tirtũm Karõ te mẽ panhĩpêx pyrã nê mẽ hkarõ mã agjê nê mẽ kot amnhĩ to mex o pa kaxyw tanhmã mẽ hkrã hto nhũm prem ÿ hã tanhmã kãm amnhĩ nhĩpêx to ho pa. Nê kãm Tirtũm kapêr mar prãm nê. Nê axpên mã mex o mex ã harênh o pa. Nê aa mẽ kot mẽmoj pumunh kêt kwỳ pumu nê axpên mã harênh o:

—Nà Krisja ãm hãmri àhpumunh tỳx o àhpumunh tỳx. Koja nhỹrmã akupỳn mẽ pahwỳr wrỳ nê axte mẽ pamã àhpumunh tỳx o amnhĩrĩt pu mẽ omu.

Anhỹr o kapêr tã tanhmã hamaxpêr to nê hkaga. Jakamã te mẽ kot axte Tirtũm pê Krata pĩ hã nhôr nê hpĩr pyrãk. Nê te mẽ piitã mẽ noo mã tanhmã haprỳ hto nê tanhmã kãm kapêr punuj to pyrãk. Jakamã kot pu mẽ tee ri akupỳm tãm mẽ unhwỳr prãm kaprỳ.

7 Na hte Tirtũm mẽ pahto mex rãhã ho pa. Jao mẽ pamã mẽ pahpur ã na rê pu mẽ kamã panhõ rũnh nê. Jakamã mẽ kot amnhĩ kaxyw Kris kôt hamaxpêr nê hkôt amnhĩ xunhwỳr prãm xwýnhjaja te mẽ hpur mex nê kamã mẽmoj ô rũnh pyrãk. Nê urãk nê amnhĩ to mex o pa. 8 Nom koja mẽ hpur kãm mẽmoj nhĩgrõt mex kêt japêr. Kamã mrõnhĩ nê kahpare nê mẽmoj punuj pix hapôj nhũm mẽ tee ri omu nê hkaga kurê kumrêx. Tã mẽ kot Kris kaga xwýnhjaja te pur punuj kot amnhĩ nhĩpêxta pyrãk nhũm Tirtũm te kêp pur nhõ dõn

pyràk. Jao tee ri amnhĩ tã mẽ kot amnhĩ nhĩpêx ã mẽ omu nê mẽ hkaga kurê kumrêx nê ma mẽ kot amnhĩ xà htỳx kãm hamak tũm xà pê kuwyta wỳr mẽ rênh pa.

⁹ E ixkràmnhwỳjaja. Inhmã mẽ akĩnh jakamã na pa ã mẽ amã mẽ kot Kris kaga xwỳnhjê jarênh anê. Nom te mẽ ate mẽ uràk kêt. Kris kôt mẽ ate amnhĩ xunhwỳr xwỳnh mex na ka mẽ. Ra mẽ ate hkôt amnhĩ xunhwỳr tỳx jakamã te mẽ apê pur mexta pyràk. ¹⁰ Na ka htem Kris kôt mẽ akwỳjê ho mex o ri apa. Te mẽ amã amnhĩ tã ma pyràk o axpên nhĩpêx o ri apa nhũm Tĩrtũm ja hã mẽ apumu. Tã koja tanhmã ja hã mẽ ato mex to. Kot tãm mẽ panhĩpêx o pa jakamã koja tanhmã mẽ ate axpên nhĩpêx mex tota ã tanhmã mẽ ato mex to.

¹¹ Tã kêr ka mẽ arĩ ã axpên nhĩpêx anhỳr o ri apa rãhã ty kê nhỹrmã ja hã mẽ ato mex nê. ã mẽ ate amnhĩ nhĩpêx anhỳr o apaja na inhmã hprãm tỳx kumrêx. ¹² Kot kaj mẽ ã amnhĩ nhĩpêx anê hãmri nê amã kaga nê apa hkêt nê. Nê amnhĩ nhĩpêx o te Tĩrtũm kra hkwỳ htyk xwỳnhjaja kormã htĩr ri kot amnhĩ nhĩpêxta pyràk. Na prem amnhĩ kaxyw Tĩrtũm mã hamaxpêr tỳx rãhã ho pa. Kot mẽ ho mex ã mẽ hã amnhĩ jarênhja nhũm prem amnhĩ tã kamã hamak rãhã ho pa. Tã amnhĩ tã kamã hamak o pa ry rax rãhã ty nhũm Tĩrtũm ra kot mẽ hã amnhĩ jarênh xà hkôt mẽ ho mex nê. Tã kêr ka mẽ uràk nê ã amnhĩ nhĩpêx anhỳr o ri apa rãhã ty. ¹³⁻¹⁵ ã na pre finat Apraãwja amnhĩ nhĩpêx anê. Kormã hkra hkêt tã nhũm Tĩrtũm kãm hkra nê kanrêhã htàmnhwỳjê hkukamã tanhmã mẽ harênh to nê kãm:

—Pa Apraãw. E inhma. Kot paj aprõ mẽ war ato mex nê. Kot kaj war akra hãmri nê gaa nhũm akanrêhã war atàmnhwỳjaja ohtô rax kumrêx. ãm hãmri na pa ã mẽ hkukamã amã mẽ harênh anê. Kot paj amã amnhĩ jarênh xà hkôt ã anhĩpêx anê. Ixpê mẽ anhĩpêx xwỳnh na pa ã amã amnhĩ jarênh anê. Anê.

Tã ã kãm wa hkra jarênh anhỳr tã nhũm wa tokyx hkra hkêt nê. Nom tee ri ja hã amnhĩ pumu nê Tĩrtũm kot wa kãm hêx ã hkamnhĩx kêt nê. ãm hkamnàr rom ã hamaxpêr anê nê hamaxpêr o:

—Nà kot paj wa nhỹrmã ixkra. Tĩrtũm tãm kot wa inhmã wa ixkra jarênh kênã. Anê.

Tã nhũm amgrà xohtô rax kumrêx nê hapêx nhũm wa hkra. Nhũm axte amgrà hkwỳ hapêx nhũm wa hkanrêhã htàmnhwỳ hkwỳ. Ra Tĩrtũm kot mẽ hkukamã Apraãw mã mẽ harênh xà hkôt. Tĩrtũmja hihtỳx o hihtỳx nê àhpumunh o àhpumunh jakamã na pre amnhĩ jarênh xà hkôt ã wa kãm wa hkra nê wa htàmnhwỳjê nhõr anê. Kot ra wa kãm hã amnhĩ jarênh xà hkôt. No ri nhãm mēhõ nhĩxi jarênh kôt wa kãm wa hkra jarênh kêt nê. Mēhõ kot we hihtỳx o hihtỳx o Tĩrtũm jakre nhũm we ri hixi jarênh kôt ã wa kãm mẽ harênh anê? Amrakati kumrêx. Jakamã na pre wa kãm amnhĩ jarênh o:

—Nà ixàhpumunh xà hkôt na pa ã war amã war akra jarênh anê. Anê.

¹⁶ No pika ja kamã na htem ã amnhĩ jarênh anhỳr kêt nê. Na htem mēhõ mã tanhmã mẽmoj tã amnhĩ jarênh to kaxyw nê mēhõ hihtỳx o kot hakrenh xwỳnh nhĩxi jarênh kôt amnhĩ jarê. Nê amnhĩ jarênh o:

—Nà ixte jahti noo mã ã amã amnhĩ jarênh anhỳr jakamã ãm hãmri na pa ã amnhĩ jarênh anê. Anê.

Kot hã amnhĩ to hêx nhũm hihtỳx o kot hakrenh xwỳnhnta kot hã harênh mar nê hã tanhmã homnuj to pymaj na htem ã mẽ hixi jarênh kôt mẽmoj tã amnhĩ jarênh anê. Hãmri nê kot tanhmã hã ho pymaj ra kot amnhĩ jarênh xà hkôt tanhmã mẽmoj nhĩpêx to. ¹⁷ Nom Tĩrtũm na hte uràk nê nhãm mēhõ nhĩxi jarênh kôt ri mẽmoj tã amnhĩ jarênh kêt nê. Na hte tãm amnhĩ jarênh xà hkôt mẽmoj to anê nê aa hã amnhĩ to hêx kêt nê. Na pre mẽ pahpê hkrajê mã kãm:

—Kot paj nhỹrmã mẽ ato mex rax nê. ãm hãmri na pa mẽ amã amnhĩ

jarê. Ixte amnhĩ pumunh xà hkôt na pa ã mẽ amã amnhĩ jarênh anê. Anê.

Mẽ pahte ãm hãmri kot amnhĩ jarênhja mar nê amnhĩ to hêx kêt ã omunh kurê kumrêx kaxyw. Koja Tĩrtũm mẽmoj tã ã amnhĩ jarênh anê hãmri nê hijuk ri axtem hpãnhã tanhmã amnhĩ jarênh to hkêt nê. ¹⁸Jakamã koja nhỹrmã ma amnhĩ wỳr mẽ pahto àpir ã amnhĩ jarê hãmri nê ãm hãmri amnhĩ jarê nê amnhĩ jarênh o:

—Nà ãm hãmri ixte amnhĩ pumunh xà hkôt na pa mẽ amã ja hã amnhĩ jarê. Anê.

Koja ã amnhĩ jarênh anê hãmri nê hijuk ri axte hpãnhã tanhmã mẽmoj jarênh to hkêt nê. Ra kot ã amnhĩ jarênh anhỹrja koja arĩ rãhã nê. Jakamã e kwa kêr ka mẽ tee ri amnhĩ kukamã ajamaxpêr o ri apa hkêt nê. Ra mẽ pamex nê ri papa kaxyw Tĩrtũm kôt amnhĩ xunhwỳr jakamã kêr pu mẽ arĩ kot mẽ pahto mex rax xà hã arĩgrota jamãr rãhã ho ri papa.

¹⁹Na hte kanôre ho htỳx xàja kanôre ho htỳx nhũm ma gô hkôt pa hkêt nê. Ja pyrã nê kot puj mẽ Tĩrtũm kot mẽ pahto mex xà kamã pajamak o papa hãmri nê hkaga hkêt nê.

Amnepê mã na pre hte mẽ panhõ patre maatija Tĩrtũm mã amnhĩ jarênh xà hã ixkre hwỳr agjê nê hkôt ã kupêxê ho hitom maati hwỳr agjê nê kamã mẽ ho Tĩrtũm wỳr o kuhê. Tã nhũm Jejus akupỹm kaxkwa hwỳr api nê Tĩrtũm ri hkrĩ hãmri nê patre maatita pãnhã tãm mẽ pahto hwỳr o hkrĩ. ²⁰Na pre ra mẽ pakukamã kaxkwa hwỳr api nê kamã pa ho pa nê finat Mekijetekja pyrã nê kêp mẽ panhõ patre maati. Tã koja mẽ pahto Tĩrtũm wỳr rãhã nê pa ho pa.

7

Patre Mekijetek jarênh

¹⁻³E kot paj ixprĩ hã mẽ amã tanhmã finat Mekijetekja jarênh to ka mẽ inhma. Krĩ pê Sarê kamã na pre kêp mẽ õ pahi nê mãânên kêp mẽõ patre. Sarêja mẽ pakapêr kãm kêp: “Mẽ

hamakêtkati nê ri mẽ pa xwỳnhjê nhõ krĩ.” Jakamã Mekijetekja mẽ pakapêr kãm kêp: “Mẽ hamakêtkati nê ri mẽ pa xwỳnhjê nhõ pahi.” Nê mãânên kêp: “Pahi kot tãm amnhĩ nhĩpêx o pa xwỳnh.” Nê Mekijetek nhĩpêxã nê katorxà nê higêt nhĩxija mẽ pahte harênh mar kêt. Nê kator ã arĩgro nê htyk ã arĩgroja mãânên mẽ pahte harênh mar kêt. Tĩrtũm kapêr ã kagã htũm kot tanhmã ja jarênh to hkêt. ãm Jejus pyrã nê kêp patre hã mẽ ho Tĩrtũm wỳr rãhã ho pa xwỳnh pix ã kot harênh. ãm ja pix na mẽ pahte harênh mar. Nê kot amnhĩ to rax xwỳnh jakamã na pre Apraãw nhỹri omu nê hã hpijaãm kaxyw kãm hikukrêx kwỳ gõ. Na pre hkwyjê mẽ ra mẽ urojê kutã amnhĩ xunhwỳ nê pijapu nê mẽ kêp mẽ õ pahi ho 4 nê mẽ himex. Nê mẽ kêp mẽ hikukrêx kwỳptã nê hamỳ nê ma õ krĩ hwỳr o mõi. Nê kormã pry hã mõi ri Mekijetek kaxpa nhũm amnhĩ wỳr omu nê kãm:

—Pa Apraãw? E kê Tĩrtũm ato mex nê ka amex nê apa. Anê.

Nhũm amnhĩ tã kuma nê hkĩnh nê. Hãmri nê kãm mẽ hikukrêx kwỳptãr xwỳnhhta hkwy gõ nhũm hamỳ nê ma amnhĩm o mõi. ⁴Na pre Apraãw kot amnhĩ to rax ã omu nê kãm mẽmojta kwỳ gõ. Kêp mẽ pahpê Ijaew pãr krax jakamã mãânên kot amnhĩ to rax tã Mekijetekja urak nê kot amnhĩ to rax ã omu nê kãm mẽmota kwỳ gõ. ⁵Finat Mojes kot Ijaew mã Tĩrtũm kapêr jarênh xà hkôt kãm kugõ. Na pre mẽ kãm:

—Mẽ akwỳ pê finat Rewi hkanrêhã htãmnhwỳjaja kêp mẽ anhõ patre jakamã kêr ka mẽ kãm mẽ akukrêx kwỳ nhõr o ri apa. Kot kaj mẽ akrit kêp 10 nê kãm ho pixi nê agõ. Nê mẽ akàxpore kêp 10 nê kãm hõ gõ. Kêr ka mẽ ã mẽ kãm mẽ akukrêx nê mẽ akrit kwỳ nhõr o apa anê. Nê kêr ka mẽ kãm mẽmoj mex pix gõ. Mẽ kêp mẽ akwỳ na mẽ. Mẽ apiitã mẽ apê Apraãw kanrêhã htãmnhwỳ jakamã kêr ka mẽ ã mẽ hipêx anhỹr o apa. Anê.

⁶ Tã Mekijetekja kêp Rewi hkwỳ hkêt tã nhũm Apraãw amarĩ ã hipêx anê nê kãm pahi htyk xwýnhjê kukrêxta kwý gõ. Jao hikukrêxta kamã mêmoj kêp 10 nhũm omu nê kamã kãm ho hpýnh nê kugõ. Na pre ã kãm mêmoj nhõr anê. Hãmri nhũm amnhĩm hamý nê kãm:

—Nà ãm hãmri koja Tĩrtũm ato mex rax nê. Anê.

Ra Tĩrtũm kot Apraãw kanrêhã kãm htãmnhwý ho ohtõ nê mẽ hkukamã mẽ harênh jakamã nhũm Mekijetekja ã kãm Tĩrtũm kot ho mex ã harênh anê. ⁷ Mẽ kot amnhĩ to rũnh o mẽ hakrenh xwýnh pixjaja Tĩrtũm kot mẽ ho mex kaxyw mẽ ho àhwýr o pa jakamã na pre Apraãw o Tĩrtũm wý. Jao kot amnhĩ to rax o kot hakrenh ã amnhĩ to amnhĩrit. ⁸ Hãmri nê Rewi hkanrêhã htãmnhwý kot amnhĩ nhĩpêx pyrã nê Apraãw o Tĩrtũm wý nê kêp mêmojta jamý. Mẽ urak nê mêmoj kamã kêp 10ja rũm ho hpýnh nê amnhĩm hamý. Nom kot amnhĩ to rax o Rewi hkanrêhã htãmnhwýjê jakrenh. Tĩrtũm kapêr ã kagã htũm kot Rewi hkanrêhã htãmnhwýjê htyk par ã mẽ harênh tã tanhmã Mekijetek htyk ã harênh to hkêt jakamã kot amnhĩ to rax o kot Rewi hkwỳjê jakrenh.

⁹⁻¹⁰ Nê kot pry kamã Apraãw kaxparta ã kormã Rewi kator kêt tã kêp Apraãw kanrêhã htãmnhwý mã xwýnh. Jakamã nhũm Apraãwja Mekijetek mã mẽ hikukrêxta kwý nhõr jao te Rewi mã õr pyrãk. Tã nhũm amgrã xohtõ nê hapêx nhũm Rewi hkanrêhã htãmnhwýjaja hapõj nê kêp mẽ õ patre nê ri pa. Jao Mekijetek pyrã nê mẽ kêp mẽ hikukrêx kwý jamýnh o ri pa.

¹¹ Nê finat Mojes na pre Ijaewjê mã tanhmã Rewi hkanrêhã htãmnhwýjê jarênh to. Kormã mẽ hapõx kêt ri nhũm hkwỳjê mã tanhmã mẽ harênh to. Mẽ kêp patre hã mẽ harê. Tã nhũm mẽ hapõj nê hprêk nê mẽ ho Tĩrtũm wýr o ri mẽ hkõt pa. Nom mẽ kot tãm amnhĩ nhĩpêx o pa kaxyw na prem tanhmã mẽ hkrã hto hkêt nê. Tanhmã kot mẽ amnhĩ to nê ã mẽ

hipêx anê? Jakamã nhũm Tĩrtũm mẽ hpãnhã mẽ pahwýr kýj rũm mêmõja mẽ nhũm mẽ pahwýr wrý. Nom kêp Rewi hkanrêhã htãmnhwý hkêt. Nê mãanên kêp Rewi hpãm Arãw kanrêhã htãmnhwý hkêt. Axtem te Mekijetek kot amnhĩ nhĩpêx pyrãk xwýnh na pre. Jejus Krisja. Tãm na pre mẽ pahwýr wrý hãmri nê tanhmã mẽ pahkrã hto pu mẽ ý hã tãm amnhĩ nhĩpêx o papa. ¹² No Mojes kapêr kot Rewi hkanrêhã htãmnhwý pixjaja kêp mẽ ho Tĩrtũm wýr xwýnh ã mẽ harênh. Tã nhũm Krisja mẽ pahwýr wrý nê mẽ hpãnhã kêp mẽ pahto àhwýr o pa xwýnh. Jakamã na pu htem axte Mojes kapêr kõt amnhĩ nhĩpêx kêt nê. Pãnhã Jejus kapêr kõt pix mã amnhĩ nhĩpêx o papa.

¹³⁻¹⁴ Nê Jejus kêp Rewi hkanrêhã htãmnhwý hkêt. Katorxã hkõt kêp Apraãw tãmnhwý Juta hkanrêhã htãmnhwý na pre. Ra mẽ pahte ja mar mex. Aa Juta hkanrêhã htãmnhwýjaja kêp patre hkêt. Na pre Tĩrtũm jajé mã mẽ kot mêmoj nhõr xã hã mести kunĩhtita ã kãm mêmoj nhõr nê hkwỳjê ho hwýr ã mẽ kãm karõ hkêt nê. ãm Apraãw tãmnhwý Rewi hkanrêhã htãmnhwýjê mã pix mã na pre ã mẽ kãm ja hã karõ anê. Tã nhũm Jejus wrý nê mẽ hpãnhã mẽ pahto hwýr o pa. Mẽ urak nê kêp Rewi hkanrêhã htãmnhwý hkêt axtem kêp Juta hkanrêhã htãmnhwý htã Rewi hkwỳjê hpãnhã mẽ pahto Tĩrtũm wýr o pa.

Mekijetek pyrã nê mẽ pahto Tĩrtũm wýr xwýnh jarênh

¹⁵⁻¹⁹ Nê Ijaewja na prem Mojes kapêr mar týx nê hkõt amnhĩ nhĩpêx tã aa amnhĩ to mex kêt nhũm Tĩrtũm tee ri ja hã mẽ omu nê hamaxpêr o:

—Nà Rewi hkanrêhã htãmnhwýjaja kêp mẽ õ patre nê mẽ ho ixwýr o pa htã nhũm mẽ arĩ htyx ri amnhĩ tomnuj pix o pa. Jakamã koja mẽ axte ri mẽ ho ixwýr o pa hkêt nê. Anê.

Hãmri nê mẽ pakaxyw mẽ pahto àhwýr xwýnhja ta nê ãm. Kra Jejusja nhũm kuta nê ãm. Tãm na hte Rewi

hkwÿjê rom tanhmã mē pahkrã hto pu mē kukwak ri tãm amnhĩ nhĩpêx nê Tirtũm kôt amnhĩ nhĩpêx mex nê. Jao nhÿrmã ma mē pahte Tirtũm nhõ krĩ hwÿr paxàpirja jamãr o papa.

Jejus na hte Mekijetek pyrã nê kēp mē panhõ patre maati nē mē pahto Tirtũm wÿr rãhã ho pa. Kēp Rewi hkanrēhã htãmnhwÿ hkēt tã Tirtũm pyrã nê kēp htĩr tũm nē pa ho pa xwÿnh jakamã na pre Tirtũmja mē pakaxyw kuta nē mē pahwÿr kumē. Kapēr ã kagà htũm kot harēnh kot:

Kot kaj Mekijetek pyrã nē mē ho ixwÿr rãhã ho ri apa. Anē.

20-21 No Rewi hkwÿjê mã na pre ã kapēr anhÿr kēt nē. ãm Jesus pix mã ã kapēr anē nē kãm:

E kot kaj apē mē ho ixwÿr rãhã o apa xwÿnh. Kot paj nhÿrmã apãnhã axtem mēhõ xãm kēt nē. ãm kapxipix kot kaj mē ho ixwÿr o apa rãhã ho rãhã. ãm hãmri na pa amã ã ixkapēr anē. Ixpē Pahi Maati hã ã ajarēnh anē.

22 Anhÿr jao Jesus kot amnhĩ to rax o Rewi hkwÿjê jakrenh par ã ho amnhĩrĩt. Mē kot Ijaew mã Tirtũm kapēr jarēnh nhũm mē kot mar nom hkôt amnhĩ nhĩpêx kēt jakamã nhũm Tirtũm mē hpãnhã Jesus xãm. Tapxipix na hte tanhmã mē pahkrã hto pu mē tãm amnhĩ nhĩpêx mex o ri papa.

23 Rewi hkwÿjaja na prem axpēn mÿr pē kēp mēõ patre nē ri pa htã htyk pa nē hapêx. 24 Nom Jesusja htĩr tũm nē pa ho pa xwÿnh jakamã koja mē uràk nē aa hapêx kēt. Koja mē pahto Tirtũm wÿr rãhã ho pa nē aa jam urer kēt nē. 25 ã Jesus kot amnhĩ nhĩpêx anhÿr jakamã te kēp Tirtũm wÿr mē panhõ pry pyrãk. Na pu htem hkôt amnhĩ xunhwÿ nhũm mē panē mē pahte amnhĩ tomnuj piitã rēnh pa nē mē pahpē Tirtũm kra hã mē pajarē.

26 Nē ãm hãmri kēp mē pahto Tirtũm wÿr xwÿnh maati mex na. Mē pakurom tãm kot amnhĩ nhĩpêx mex o pa nē aa kot tanhmã amnhĩ tomnuj to hkēt. Tã ra Tirtũm kot amnhĩ wÿr ho àpir jakamã nhũm ra

kuri mē pahto hwÿr rãhã ho pa. 27 Nē kot amnhĩ to rax o wam mēõ patre maati jê jakrenh. Wamtaja na prem hkwÿjê pyrã nē amnhĩ tomnuj o pa. Jakamã na prem apkati mē amnhĩ tomnuj pãnhã Tirtũm mã mēmoj gõ nē kãm amnhĩ jarē nē amnhĩ to kuwÿ. Hãmri nē rĩ kormã kot nhãm mē hwÿr mē mrar xwÿnhjê mã mē ho anē nē mē hpãnhã Tirtũm mã mēmoj nhõr pē mē ho kuwÿ. No kēt Jesusja wam patre maati rom aa kot amnhĩ tomnuj kēt jakamã na pre hte mē uràk nē amnhĩ tomnuj pãnhã Tirtũm mã mēmoj nhõr o pa hkēt nē. ãm mē papajaja na pre mē pahte amnhĩ tomnuj pãnhã htyk o kãm amnhĩre. ãm htyk tipxi htã mē pahpiitã mē pahpãnhã amnhĩrer pa. Jakamã koja axte ã amnhĩ nhĩpêx anhÿr kēt nē. Mo kaxyw kot kēt axte mē panē ty?

28 Mojes kapēr kôt na pre Ijaew amnhĩm Rewi hkwÿjê xunhwÿ nhũm mē kēp mē õ patre nē ri pa. Tã no nhũm mē uràk nē arĩ amnhĩ tomnuj o pa nhũm Tirtũm tee ri mē omu nē mē hpãnhã mē pakaxyw Krata xãm nē kãm:

—Nã kapxipix mē kurom ate tãm amnhĩ nhĩpêx o apa jakamã kapxipix kot kaj mē hpãnhã mē ho ixwÿr o apa rãhã ho rãhã. Anē.

8

Jejus kēp mē pahto Tirtũm wÿr xwÿnh maati hã harēnh

Rukre 22.20; Sikũn Korĩt 3.6-11

1 E kot paj axtem tanhmã mē amã mē pahto Tirtũm wÿr xwÿnh maati jarēnh to ka mē inhma. Na hte kaxkwa kamã Tirtũm nhĩhkõ hã hkrĩ. ãhkõ hã kēp Pahi Maati hã hkrĩ xã hã upõk rũm hkrĩ ho hkrĩ. 2 Wam patre maati jaja na prem Tirtũm nhõrkwÿ kaàkre wÿr mra nē kamã hitom maati kamã mē ho Tirtũm wÿr o pa. Nom nhũm Jesus na hte mē kurom kaxkwa kamã Tirtũm nhõrkwÿ mex kãm mē pahto àhwÿr o hkrĩ. Õrkwÿ kaàkreja na prem ãhkra ho hipêx nom kaxkwa kamã òrkwÿ mexja na pre mēhõ ãhkra ho hipêx kēt nē. Tirtũm na pre

tanhmã hipêx to nhũm kamã Jejusja mē pahto hwÿr o hkrĩ.

³ Nē mē pahpê Ijaew nhõ patre maatijaja na prem mē ho hwÿr kaxyw nē mē kot amnhĩ tomnuj pãnhã Tĩrtũm mã mēmoj nhõr kõt mē ho kuwÿ. No Kris na hte ã amnhĩ nhĩpêx anhÿr kēt nē. Ra htyk o kot kãm amnhĩ nhĩ nhõr jakamã na hte wam patre maati pyrã nē xatã kãm mēmoj nhõr kēt nē.

⁴ Tã na hte arĩ Ijaew Mojes kapêr kõt amnhĩm Rewi hkwy kēp mē õ patre kaxyw mē unhwÿ nhũm mē ho Tĩrtũm wÿr o pa. No Jejus kēp Rewi hkanrêhã htãmnhwÿ hkēt. Katorxã hkõt kēp Juta hkanrêhã htãmnhwÿ jakamã kop apu arĩ jar pika ja kamã htĩr nē pa ronhÿx Ijaew nhõ patre pyrã nē kēp mē ho Tĩrtũm wÿr o pa xwÿnh kēt. ãm Rewi hkanrêhã htãmnhwÿ pixjaja na htem mē kaxyw kãm mēmoj gõ nē hkõt mē ho kuwÿ.

⁵ Jar na htem arĩ ã amnhĩ nhĩpêx anhÿr o pa nom kaxkwa kamã na htem ã amnhĩ nhĩpêx anhÿr hkēt nē.

Nē jar Tĩrtũm nhõrkwy kaàkreja te kot kaxkwa kamã õrkwy mexta pyrãk. Na pre Mojes õrkwy kaàkre nhĩpêx kaxyw nhũm Tĩrtũm tanhmã kãm hã karõ hto nē kãm:

–E jãã hixêt prêk nhĩmõk ã axãmta ã na pa pre amã ixkreta kukamã ixprĩ hã tanhmã mē ate hipêx to hã amã karõ. Tã kē ka ã hipêx anē. Anē.

Hãmri nhũm kuma nē kot kãm hã karõ xã hkõt hipêx. Hãmri nhũm mē õ patre maati ixkreja kamã mē ho Tĩrtũm wÿr o pa. Na prem ã amnhĩ nhĩpêx anhÿr o pa.

⁶ Tã nhũm ra Tĩrtũm axtem mē hpãnhã mē pakaxyw Kris xãm nhũm hte mē pahto hwÿr mex o wamtajê jakre. Na hte kaxkwa kamã mē pahpiitã mē pahpumunh mex rãhã ho hkrĩ nē wamtajê rom tanhmã mē pahkrã hto pu mē tãm amnhĩ nhĩpêx o ri papa. Tĩrtũm kot finat Mojes mã kapêrja mex nē nom axtem na pre. Tã kapêr nyw na mex o kot wam kapêr jakrenh. Kapêr nyw kõt kot puj mē pahtyk tã akupÿm pahtĩr nē nhÿrmã

Tĩrtũm mē Jejus wa kuri pamex nē pahtĩr tũm nē papa ho papa nē axte pahtyk kēt nē. ⁷ Kēp apu Tĩrtũm kot Mojes mã kapêr kõt mē kot tãm amnhĩ nhĩpêx o pa ronhÿx pre Tĩrtũm axte kapêr nyw ã kagã hkēt nē. ⁸ Nom wam kapêr tũmta na pre mē mar tÿx htã arĩ amnhĩ tomnuj rãhã ho pa nhũm tee ri ja hã mē omu nē mē kãm: Nã kot paj axte nhÿrmã mē apê Ijaew mã axtem tanhmã ixkapêr to.

⁹ Amnepê mē anhĩgêjtê mã na pa pre ixkapêr.

Na pa pre Ejit pē mē kator nē mē kot tanhmã amnhĩ nhĩpêx to ho pa kaxyw tanhmã hã mē kãm karõ hto.

Nom na prem ixkapêr ma nē ãm kuma nē ixkõt amnhĩ nhĩpêx kēt nē. Pa tee ri ja hã mē omu hãmri nē mē hkaga.

¹⁰ Tã kot paj mē apê mē hkanrêhã mē htãmnhwÿ nywjê mã axtem ixkapêr ka mē ixkapêr nywja ma.

Kot paj nhÿrmã tanhmã mē akrã hto ka mē ixkapêr nyw mar tÿx nē hã ano htÿx nē ho apa.

Nē akĩnh nē apa.

Nē ixkõt ri amnhĩ nhĩpêx mex o apa.

Nē axpên mã ijarênh o: “Nã ãm hãmri Tĩrtũm kēp mē panhõ Tĩrtũm na.” Anhÿr o ri axpên mã ijarênh o apa.

Pa amnhĩ tã mē ama nē mē apumu nē amnhĩ xwar mē apê ixkra hã amnhĩm mē ajarê.

¹¹ Kot kaj mē apiitã ixte amnhĩ nhĩpêx kõt ixpumunh mex o ri apa. Mē akãxpore rũnh xwÿnhjaja nē mē akãxpore hkryre xwÿnhjaja mē apiitã ixpumunh mex jakamã kot kaj mē ri axte ixtã tanhmã axpên kukjêr to ho ri apa hkēt nē.

¹² Nē kot paj mē ato mex rax o ixpa.

Nē axte tanhmã mē ate amnhĩ tomnu hto ho apaja mã ijamaxpêr kēt nē. Anē.

¹³ Nē koja mēmoj ra htũm hãmri nē hapêx tokyx anē. Ja pyrã nē na pre Tĩrtũm mē pamã kapêr tũmta jarênh o:

—E kêr ka mē axte ixkapēr tūm mar kêt nē. Pānhā ixkapēr nyw pix mǎn mar o apa nē ām kôt pix mǎ mǎn amnhī nhīpêx rāhā ho ri apa. Anē.

9

Tīrtūm nhōrkwỹ kaàkre jarēnh

1 Nē amnepēm na pre finat Mojesja mē panhīgēt nē mē pahpāmjē mǎ tanhmā Tīrtūm nhōrkwỹ kaàkre jarēnh to. Tanhmā mē kot hipêx to nē kamā tanhmā amnhī nhīpêx to hā mē kām karō. Nē kamā tanhmā mē kot amnhī to Tīrtūm wȳr to hā mē kām karō. Nē tanhmā mē hkwȳjê ho hwȳr toja nhūm pre mǎānēn mē kām hā karō. No Tīrtūm nhōrkwỹ kaàkreja kēp ōrkwỹ kumrēx kêt. Ām mē kot omunh nē kaxkwa kamā ōrkwỹ kumrēx mǎ hamaxpēr kaxyw na pre. ² Jakamā nhūm prem Mojes kapēr ma nē hipêx. Kamā hitom hamēxkrut. Wam hitom kamā na pre kanē hprēēti xām nē kutā mēsti xām. Nē mēsti nhīmōk ā Tīrtūm mǎ ō pāwti jaxwȳ. Mē panhō patre na pre htem Tīrtūm mǎ kugō nē mēsti ā kām haxwȳ hāmri nē hkwȳjê ho kuwȳ. Tā hitom ja na prem kēp Tīrtūm nhō hitom mex ā harē.

³⁻⁴ Nē hitom wa hkaêx kām na pre kupêxê ho hakwakre kahê xāja ajêt. Haturxà kamā hitomja na prem Tīrtūm nhō hitom maati hā harē. Tīrtūm na pre te hirā htȳx kām hwȳr wrȳ nē te kamā hkrī pyrāk. Nē kamā na pre Tīrtūm mǎ mēhkuxwa xà ho xêt xà hā mēs kunīhtija kuhê. Na prem ōr o hipêx nē kamā ām nhūm kuhê. Nhūm pre hte mēō patre hwȳr agjê nē kutā kuhê nē mē ho Tīrtūm wȳ. Nē mēs kunīhti haxwȳja hitom maati kamā kuhê. Na prem pī ho hipêx nē ōr o hpro nē kamā ām. Mēstija kaxwȳnh kām na pre htem mēmoj jagjê.

Tīrtūm kot Ijaew mǎ tanhmā mē kot amnhī nhīpêx to ho pa hā karō nē kēn po hā mē kām hā kagāja nhūm prem kamā kuxà nhūm hikwȳ.

Nē mǎānēn ōr o xijereja xà nhūm hikwȳ. Nē xijere kamā amnepê mǎ Tīrtūm kot kaxkwa rūm mē hwȳr mēō rēnh kwȳ hikwȳ. Mēōja mē kot kām: “Manā” anhȳr xwȳnhja na prem hkwȳ hkawrā nē xijere kamā kugjê hāmri nē mēsti kamā kuxà.

Nē finat Arāw nhō kō kot ho amnhī kaxpar xà htūmta nhūm prem kamā kuxà. Tīrtūm kot tanhmā ho nhūm kurūm pixōrā muxre hapōx xwȳnhhta nhūm prem mǎānēn mēs kunīhti kamā kuxà nhūm hikwȳ.

⁵ Nē himōk ā Tīrtūm kapēr o wrȳk xwȳnh wa hkarō nhīpêxja wa hamēxkrut nē axpēn kutā wa hkōn krā ho hkrī. Axpēn wȳr hara koror nē wa hkrī. Patre maati kot omunh nē Tīrtūm kot mē hkôt pa ho paja mǎ hamaxpēr kaxyw. Nē wa hkaêx kām ahkaprȳja Tīrtūm kot mē nē mē kot amnhī tomnuj rēnh mǎ hamaxpēr xà na pre.

Ā Tīrtūm nhōrkwỹ kaàkre kot anhȳr. No kot paj ixprī hā mē amā piitā harēnh par kêt nē. ⁶ Na pre hte mēō patre apkati mē wam hitom wȳr agjê nē kamā Ijaew ho Tīrtūm wȳr o pa. ⁷ No hitom maati ja ām mē ō patre maati pix na pre hwȳr agjê. Nom apkati mē hwȳr pa nē gjêx kêt ām amgrà pȳnh kām hwȳr gjêx pȳnh nē. Nē hwȳr gjêx kaxyw nē mēmo mry pa nē hkamrō ru nē o pa nē hitom maati hwȳr ho agjê. Hāmri nē ho mēs kunīhti nhīmōk kamī nē Tīrtūm mǎ kām:

—Pa Tīrtūm. E ota mry kamrōta. Mē ixpê akwȳjaja mē ixte amnhī tomnuj jakamā na pa mē amnhī pānhā mēmo mry nhōkre jakà nē kupī nē hkamrō ru nē man awȳr o mra. Te kot mē ixte amnhī tomnuj mȳrapê htyk pyrāk. Jakamā kwa ā mē ixte amnhī nhīpêx anhȳrja ā mē ixpemunh hkôt mē inhnê mē ixte amnhī tomnuj rē.

Anhȳr o mē amnhī to kuwȳ. ⁸ Nē patre maati pix na pre hitom maati ja wȳr agjê nē mē ho Tīrtūm wȳ. Ijaew na prem ixkre kapem hamār o kuhê nē hwȳr gjêx kêt nē. Tīrtūm Karō kot

hã mē kãm karō xà hkôt. Te Tĩrtũm pē amỹm kuhê pyrāk. Tã na htem jarãhã arĩ Ijaew kanrêhã mē hkra nē mē htãmnhwýjaja ã amnhĩ nhĩpêx anhỹr o pa. Jao mē higêtjê pyrã nē Tĩrtũm pē amỹm kuhê.

⁹ Mē kot arĩ Tĩrtũm mã mry hpar nē hkamrô ho mēmoj kamĩr nē amnhĩ to hwýr o pa htã na htem arĩ hamaxpêr punuj pix o pa.

¹⁰ Tĩrtũm kapêr tũm kot tanhmã mēmoj tã mē kãm karō hto.

Na pre tanhmã mē apkur xà hã mē kãm karō hto nhũm htem pix kur o pa.

Nē tanhmã mē hkõm xà hã mē kãm karō hto nhũm htem pix o hkõm o pa.

Nē tanhmã amnhĩmnuj to hã tanhmã mē kot amnhĩ kuhõnh to hã karõja nhũm htem hkôt pix mã tanhmã amnhĩ kuhõnh to ho pa.

Nē tanhmã mē kot ri mē hikukrêx kuhõnh to hã mē kãm karõja nhũm htem kôt pix mã tanhmã kuhõnh to ho pa.

Ã na pre Tĩrtũm Kris kukamã mē kãm mēmoj tã karō rax anê. Kris kutêp pix mã ã mē kot amnhĩ nhĩpêx anhỹr kaxyw. No mē pahte arĩ ã amnhĩ nhĩpêx anhỹr kaxyw kêt. Na pre ra Kris mē pahwýr wrý nē Tĩrtũm kapêr tũm o hapêx nē hpãnhã mē pamã kapêr nyw jarê pu mē hpãnhã nywta kôt pix mã amnhĩ nhĩpêx o papa. Kapêr nywja mex o mex. Nē mex o wanta jakrenh.

Kris htyk o mē pahte amnhĩ tomnuj pãnhã amnhĩrer ã harênh

¹¹ Tã na pre Krisja tãm mē pahwýr wrý nē kêp mē pahto Tĩrtũm wýr xwýnh maati nē patre hpãnhã mē pahto hwýr o pa. Nom jar pika ja kamã mē kot mē ĩhkra ho Tĩrtũm nhõrkwý kaàkre nhĩpêxta wýr àr nē kamã mē pahto hwýr kaxyw na pre wrýk kêt nē. Na pre ra akupým kaxkwa hwýr api nē kamã õrkwý mex wýr axà nē kamã tanhmã mē pahto mex to nē tanhmã mē pahto Tĩrtũm wýr to rãhã ho hkrĩ. ¹² ã kaxkwa kamã Tĩrtũm nhõ hitom

maatija wýr àr tipxi htã mē pahpiitã mē pahte amnhĩ tomnuj pãnhã amnhĩrer pa. Nom mēmo mry kamrô ho mē pahpãnhã amnhĩrer kêt nē. Mõx kamrô rý motre kamrô ho mē pahpãnhã amnhĩrer kêt nē. Amnhĩ kamrô ho na pre mē pahpãnhã amnhĩre. Tyk nē hkamrô pikapĩrta o mē pahpiitã mē pahpãnhã amnhĩrer pa.

¹³ Nē amnepêm Ijaew kot Tĩrtũm kapêr tũm kôt amnhĩ nhĩpêx mex o pa hkêt jakamã nhũm tee ri mē omu nē mē kot amnhĩ tomnuj o mē pa xwýnh ã mē harê. Jakamã na pre mēo patre xatã mry kamrô ho mē hkamĩ. Mõx kamrô nē motre kamrô ho mē hkamĩ. Na pre mõx krare hkwy hpa nē ho hxêt nē hprã ho hkwyjê kamĩ. ã na prem xatã mē hipêx anhỹr o pa. Tĩrtũm kot ja hã mē omunh nē mē mex ã mē harênh kaxyw. Nom te mē krãhkã pix mex pyrã nē mē hkrã kaxwýnh kãm arĩ hamaxpêr punuj o pa. ¹⁴ ã na prem amnhĩ nhĩpêx anhỹr o pa. Nom Krisja mē kurom aa tanhmã amnhĩ tomnuj to hkêt jakamã na pre mē pahte amnhĩ tomnuj xwýnhjê nê ty. Te mē kot amnhĩ nê mõx rý motre hpar nē hkamrô runhta pyrāk o amnhĩ nhĩpêx nē mē panê Tĩrtũm mã amnhĩ gõ nhũm pre mē kãm hkurê xwýnhjaja kupĩ. Na pre Tĩrtũm Karõja ã kot mē panê htyk anhỹr kaxyw tanhmã ho hihtýx to. Karõja aa hapêx kêt kumrêx rãhã nē pa ho pa xwýnh jakamã na pre Kris tykja kukamã tanhmã ho hihtýx to nhũm mē panê ty. Tapxipix na mē pahte tãm amnhĩ nhĩpêx o papa kaxyw kêp tanhmã mē pahkrã hto xwýnh. Jakamã na pu htem ra pajamaxpêr nyw o pajamaxpêr o papa nē pajamaxpêr o:

—Na pa pre tee ri inhmã amnhĩ krã hkôt tãm amnhĩ nhĩpêx o ixpa hprãm kaprý nē ãm amnhĩ tomnuj pix o ri ixpa. Tã Kris kot inhnê htyk o hkamrô pikapĩr ã harênh ma nē amnhĩ kaxyw hkôt ijamaxpêr týx nē nhũm amnhĩ tã ixpumu nē ixte tãm amnhĩ nhĩpêx o ixpa kaxyw ixãm.

Jakamã kot paj ãm Tĩrtũm pix mã kãm tanhmã amnhĩ nhĩpêx to ho ri ixpa. Tĩr rãhã nê pa ho pa xwýnh jakamã kot paj nhỹrmã kuri urak nê ixtĩr tũm nê ixpa ho ixpa. Anê.

¹⁵ Nê amnepê mã na prem piitã Tĩrtũm kapêr tũm kôt amnhĩ nhĩpêx mex o pa hkêt nê. Mê kot xatã hkôt amnhĩ nhĩpêx o pa hã amnhĩ jarênh tã hkôt amnhĩ nhĩpêx kêt nê. Jakamã na pre Kris wrý nê mẽ pahte hkôt amnhĩ xunhwýr mã xwýnhjê mã Tĩrtũm kapêr nyw jarê nê mẽ pamã:

—Kot paj mẽ anê ty nhũm Tĩrtũm ã ixte amnhĩ nhĩpêx anhỹrja kukwak ri mẽ ato mex rãhã ho pa. Anê.

Hãmri nê amnhĩ jarênh xà hkôt mẽ pahte amnhĩ tomnuj piitã hpãnhã amnhĩrer kaxyw mẽ panê ty. ¹⁶⁻¹⁷ Te jar pika ja kamã mēhō htyk kukamã hkrajê mã tanhmã amnhĩ jarênh to pyrãk. Na htem htyk kaxyw nê hkrajê mã:

—Nà kot paj mẽmo arĩgro hã ty ka mẽ inhmýr pē ixpē ixkukrêx kwý o arĩk.

Anhỹr o na htem amnhĩ jarê. Hãmri nê ty nhũm hkrajaja amnhĩm õ mẽmoj to arĩk pa. Mē hipêxà kukwak ri mẽ hikukrêx mex nê mýr pē o pa. No kormã htĩr ri nhũm mẽ kormã kēp hamýnh kêt nê. Ja pyrã nê na pre Tĩrtũmja Jejus htyk kukwak ri tanhmã mẽ pahto mex to pu mẽ kukwak ri mẽ pamex nê pahkĩnh nê ri papa.

¹⁸ Nê Tĩrtũm kapêr tũm kôt na pre hte mẽ õ patre mry pa nê ãm hkamrô runh kôt pix mã mẽ ho Tĩrtũm wýr o pa nhũm amnhĩ tã mẽ omunh xà hkôt mẽ kuma nê tanhmã mẽ ho mex to.

¹⁹ Na pre finat Mojesja Ijaew mã Tĩrtũm kapêr tũm piitã harê nê harênh pa hãmri nê mōx õxpĩ nê kaxyw motre hōxpĩ. Hãmri nê xijere kamã hamē wa hkamrô runh pa nê kamã gō hkwý ru. Hãmri nê kaxyw mẽmo pĩ hpa hkryre pē “isop” jarênhja kwý kukê. Nê kaxyw ôwêhti hkĩ kamrêkre hkwý hpy nê isop mẽ ho pihkàr pa nê mry kamrô o go. Hãmri nê ho hkwýjê kamĩ. Nê ho Tĩrtũm

kapêr ã kagà tũmta kamĩ. ²⁰⁻²² Hãmri nê ho anhỹr pa nê mẽ kãm:

—Nà na Tĩrtũmja ixte mry kamrô ho mẽ akamĩr pumunh kôt mẽ pamã kapêr o: “E kot kaj mẽ ixkapêr kôt amnhĩ nhĩpêx o ri apa hã kot paj tanhmã mẽ ato mex to rãhã ho ri ixpa ka mẽ amex nê akĩnh nê ajamakêtkati nê ri apa. Jakamã kēr ka mẽ mry kamrô ho mẽmoj piitã hkamĩr pa. Nê ho amnhĩ kamĩ. Kēr pa ja hã mẽ apumu hãmri nê axte tanhmã mẽ ate amnhĩ tomnuj tota mã ijamaxpêr kêt nê.” Anê. ã na Tĩrtũm mẽ pamã kapêr anê. Anê.

Hãmri nê hpãnhã mry kamrôta o õrkwý kaàkre kamĩ. Nê hkre kamã mẽmoj kuhê xwýnh piitã nhũm ho hkamĩr pa. ã na pre mẽ õ patre mẽ mex kaxyw mẽ hipêx anhỹr o pa. Mē kot tōhã mẽmoj to hpýnhre nê ho hkamĩr kêt jakamã kironhỹx pre mẽmoj piitã ã hipêx anhỹr o pa. Kōp apu mẽ kot mry hpar nê hkamrô runh kêt ronhỹx pre Tĩrtũm arĩ mẽ kot amnhĩ tomnuj mã hamaxpêr rãhã ho pa.

²³ Na prem ã Tĩrtũm nhõrkwý kaàkre kamã mẽmoj kuhê xwýnh piitã mex kaxyw hipêx anê. Te Tĩrtũm kot mẽ pahto mex nhũm mẽ pahte nhỹrmã ma kaxkwa hwýr õ krĩ hwýr paxãpirta pyrã nê. Nom mẽ kot mry hpar nê hkamrô runhta kukwak ri mẽ pamex nê papa hkêt. ãm mẽhō kamrô kukwak ri mẽ pamex xwýnhhta pix kukwak ri na mẽ pahpê pahĩr tũm nê papa mã xwýnh. Ja na mex o mry kamrô piitã hakrenh pa. ²⁴ Jejus Krisja pix kukwak ri. Tãm na pre patre pyrã nê mẽ pahto Tĩrtũm wýr kaxyw mẽ ĩhkra ho Tĩrtũm nhõrkwý kaàkre nhĩpêxta wýr gjêx kêt nê. ãm ixkre kaàkre pix na pre. Na pre kaxkwa kamã Tĩrtũm nhõ krĩ hwýr axà. Tã arĩ kamã Tĩrtũm nhĩhkō hã mẽ pahto hwýr rãhã ho hkĩr.

²⁵ Nê Ijaew nhõ patre maati na hte amgrã mẽ õrkwý kaàkre kamã hitom maati hwýr gjêx tipxi. Nê amnhĩ kôt mry kamrô ru nê ho agjê. Tĩrtũm kot

hã omunh nê axte mē kot amnhĩ tomnuj mã hamaxpēr hkēt kaxyw. Nom Kris na pre mē urāk nē mēmo mry pa nē Tirtūm mã hkamrô kapĩr kêt nē. Kamrô na pre mē panê axkapĩ. Nom patre pyrã nē amgrã mē ã amnhĩ nhĩpêx anhÿr kêt nē. Na pre htyk o Tirtūm mã amnhĩ nhõr tipxi. ²⁶ Kêp apu patre pyrã nē amgrã mē mē panê htyk o pa ronhÿx ra mē panê htyk xohtô rax kumrêx. Nhÿx pre amnepê mã Tirtūm kot mēmoj piitã ho katorta rūm amgrã mē mē panê htyk o pa ho hkrax. Jao xatã htyk o amgrã xohtô rax kumrêx. Nom ja kot anhÿr kêt. Na pre mē pahwÿr wrÿ nē mē panê htyk tipxi htã htykja o mē pahte amnhĩ tomnuj piitã hpãnhã amnhĩrer par kumrêx. Jakamã mo kaxyw koja axte ty?

²⁷ ãm pahtyk tipxi htã koja Tirtūm nhÿrmã akupÿm mē pahpiitã mē pahto pahťir nē ahpÿnhã tanhmã mē pajarēnh to nē ahpÿnhã tanhmã mē panhĩpêx to. Kormã mē pahťir ri mē pahte amnhĩ nhĩpêx ã mē pahpumunh xà hkôt tanhmã mē panhĩpêx to. ²⁸ Ja pyrã nē na pre Krisja ãm mē panê htyk tipxi htã mē pahto ohtô nē mē panê mē pahte amnhĩ tomnuj piitã rēnh pa. Hãmri nhũm Tirtūm akupÿm ho htĩr nē akupÿm amnhĩ wÿr ho api. Tã koja nhÿrmã akupÿn mē pahwÿr wrÿ. Nom axte mē pahte amnhĩ tomnuj pãnhã amnhĩ rer kaxyw mē panê htyk kaxyw wrÿk kêt nē. Ra kot mē pahte amnhĩ tomnuj pãnhã amnhĩrer kēnã. Koja akupÿn wrÿ nē mē pahte amnhĩ wÿr kamã pajamak o papa xwÿnhjaja ma akupÿm amnhĩ kôt kaxkwa hwÿr mē pahto àpir pa. Ra mē pahtyk tã nhũm akupÿm mē pahto mē pahťir nē ma amnhĩ kôt mē pahto àpir pa pu mē kuri pamex nē pahťir tũm nē papa ho papa.

10

Kris kot mē panê htyk tipxi hã harēnh

¹ Nē arĩ mē kot Tirtūm kapēr tũm kôt amnhĩ nhĩpêx o mē pa xwÿnhjaja

kormã hprĩ hã Tirtūm kot tanhmã mē pahto mex to hã harēnh mar tÿx kêt. Na prem kormã hkwy pix ma. Na hte mē õ patreja amgrã mē kãnhmã kaxkwa hwÿr mry kamrôta pē nē mē amnhĩ to Tirtūm wÿ. Kot ja hã mē omunh nē axte mē kot amnhĩ tomnuj mã hamaxpēr hkēt kaxyw. Tã ã mē kot amnhĩ nhĩpêx anhÿr tã arĩ Tirtūm kapēr kwÿm amnhĩ nhĩpêx rãhã ² jakamã na prem xatã kãm mēmo mry kamrô runh o pa. Kêp apu tãm amnhĩ nhĩpêx nē tãm ri hamaxpēr ronhÿx arĩ ã amnhĩ nhĩpêx anhÿr o pa hkēt nē. Nē xatã amnhĩ pãnhã mry hpar nē hkamrô ho Tirtūm nhõrkwy kaãkre kamã mēmoj kamĩr kêt nē. ³ Nom na prem tãm amnhĩ nhĩpêx o pa hkēt nē. Mē kot amgrã mē Tirtūm kot mē nē mē kot amnhĩ tomnuj rēnh kaxyw mē kot kãm mēmo mry hpar o pa htã no ãm hkôt amnhĩ nhĩpêx xwÿnh ã amnhĩ jarēnh kêt nē. Arĩ mē kot amnhĩ tomnuj o pa jakamã na prem mry hparta ã amnhĩ pumu nē tee ri amnhĩ kukamã hamaxpēr o hkaprĩ nē pa. ⁴ Nom na hte môx kamrô rÿ motre kamrôja mē panê mē pahte amnhĩ tomnuj rēnh kêt nē. ⁵⁻⁸ Jakamã na pre Krisja mē pahwÿr nojarêt nē Tirtūm mã amnhĩ jarēnh o:

Pa Tirtūm? E kot paj ma mē hwÿr wrÿ. Mē kot amnhĩ pãnhã amã mry hparta apê hprãm nõkati nē amã hkĩnh kêt.

Ate mē nē mē kot amnhĩ tomnuj rēnh kaxyw mē kot amã mēmo mry hparta amã hprãm kêt. ãm ixkukamã na ka pre ã mē kot amnhĩ nhĩpêx anhÿr kaxyw mē kãm ja hã karõ.

Mē kot mry nhĩpêx o te pa ixte mē nē ixtyk nē ixkamrô pikapĩr pyrāk o na prem ixkukamã ã amnhĩ nhĩpêx anē.

Jakamã na ka ra mē kaxyw inhmã inhĩ gõ pa mē urāk nē inhĩ ho inhĩ.

Tã kot paj ma mē hwÿr wrÿ. Ixte amã hprãm xà hkôt pix mã ixte tanhmã amã mnhĩ nhĩpêx to

ho ixpa kaxyw. Akapêr ã kagà htùm kot tanhmã ixkukamã ijarênh to xà hkôt kot wrÿ nê ã amã amnhĩ nhĩpêx anê. Anê.

Hãmri nê man mẽ pahwÿr wrÿ. ⁹ Kot Tirtùm kapêr tùm o hapêx par nê hpãnhã tãm mẽ panê htyk kaxyw wrÿ. Jakamã na pre nojarêt nê Tirtùm mã amnhĩ jarênh o:

—E ixte amã hprãm xà hkôt amnhĩ nhĩpêx kaxyw kot paj ma mẽ hwÿr wrÿ.

¹⁰ Anhÿr jakamã wrÿ nê Tirtùm kãm hprãm xà hkôt mẽ panê ty. Na pre nhãm mēhō mẽ kãm hkurê xwÿnhjê mã òr nhùm mẽ kot hpĩr nhùm amarĩ htyk kêt nê. Na pre amnhĩ grõnh kôt mẽ kãm amnhĩ gō nhùm prem kupĩ. Hãmri nhùm htyk o mẽ pahte hkôt amnhĩ xunhwÿr xwÿnhjê o Tirtùm kra. Mẽ kot xatã mry hparta rom htyk tipxi tã mẽ pahpiitã mẽ pahte amnhĩ tomnuj pãnhã amnhĩrer pa.

¹¹ Nê mẽ ò patrejaja na htem apkati mẽ Tirtùm nhõrkwÿ kaàkre kamã kãm tanhmã amnhĩ nhĩpêx to. Nê apkati mẽ hkwÿjê hpãnhã mry hkwÿ hpa nê hkamrô ru nê mẽ ho Tirtùm wÿ. Tã nom ja hã mẽ omunh xà hkôt mẽ nê mẽ kot amnhĩ tomnuj rênh kêt nê. ¹² No kêt Kris na pre mẽ kot xatã mry hpar xwÿnhhta rom ãm htyk tipxi htã mẽ pahte amnhĩ tomnuj piitã hpãnhã amnhĩre. Hãmri nê ma akupÿm kaxkwa hwÿr api nê Tirtùm nhĩhkô hã Pahi Maati hkrĩ xà kamã upòk rùm hkrĩ ho hkrĩ. ¹³ Kojã kuri hkrĩ rãhã nhùm Tirtùmja ìhkram mẽ kot kutã amnhĩ xunhwÿr xwÿnhjê jaxàr pa. Ja kaxyw na kormã kuri hamãr o hkrĩ. ¹⁴ ãm htyk tipxi htã htykja o mẽ pahte hkôt amnhĩ xunhwÿr xwÿnhjê ho Tirtùm kra pu mẽ ra hpãnhã tãm amnhĩ nhĩpêx rãhã ho papa. Nê pajamxpêr mex o ri papa. Tirtùm kãm hprãm xà hkôt.

¹⁵ Amnepêm mẽ kot Tirtùm nhÿ hã kapêr jarênh o mẽ pa xwÿnhjaja na prem mẽ panhĩgêjtê mã kapêr o pa. Tirtùm Karõ nhÿ hã mẽ kãm kapêr nê mẽ kãm:

¹⁶ —E na Tirtùm mẽ pamã amnhĩ jarê nê amnhĩ jarênh o:

Kot paj nhÿrmã axtem ixkapêr nyw o mẽ amã ixkapêr.

Nê mẽ akrãm hagjê ka mẽ mar tÿx pê hã ano htÿx nê ho apa.

Ixkapêr tùm na pa pre mẽ amã kên pota ã hã kagã.

Nom ixkapêr nyw kot paj axtem mẽ akrãm hagjê.

¹⁷ Nê kot paj axte mẽ ate amnhĩ tomnuj mã ijamaxpêr kêt nê.

Anhÿr o mẽ pamã amnhĩ jarênh. Anê.

¹⁸ Tã ra axte mẽ pahte amnhĩ tomnuj mã hamaxpêr kêt ã kot amnhĩ jarênh jakamã mo kaxyw kot pu mẽ arĩ amnhĩ pãnhã kãm mẽmo mry hpar nê hkamrô runh o papa? Tã mẽ pahkwÿjaja na hte arĩ kãm ja ho anhÿr prãm o pa. E kwa mẽ axte ã amnhĩ nhĩpêx anhÿr kêt nê ixkwÿjaja.

Akupÿm mẽ pahte amnhĩ nhĩpêx tùm o paxujanãr kêt ã mẽ pamã karõ

Matêwre 27.51; Rukre 23.45; Rõmãn 5.1-2; Epes 3.12; Eprêw 4.14-16

¹⁹⁻²⁰ E ixkrãmnhwÿjaja. Ra Jejus kot mẽ panê htyk o hkamrô pikapĩr jakamã na pu htem arĩ tee ri amnhĩ kukamã pajamxpêr hkêt nê. Tirtùm axte kot mẽ pahte amnhĩ tomnuj mã hamaxpêr kêt jakamã na pu htem paxãmnhĩx amnhĩ to hwÿr o papa. Te paxãmnhĩx òrkwÿ kaàkre kamã hitom maati hwÿr pagjêx nê kamã amnhĩ to hwÿrta pyrãk. Jao ra mẽ papamjaja amnhĩ to hwÿr o papa nhùm patre axte mẽ pahto hwÿr kêt nê. Jejus na pre htyk o mẽ pamã hitom maati wÿr hakwakre kahêxã hã kupêxêja kôt ã ho axkjê. Jao mẽ paxãmnhĩx hwÿr mẽ pagjêx kaxyw mẽ pamã kahê xà mẽ.

²¹ Tã ra kêp Tirtùm nhõ krĩ kamã mẽ pahto hwÿr xwÿnh maati na. Nê mex kumrêx o jar pika ja kamã patre kot mẽ ho hwÿr o pa xwÿnhhta jakrenh.

²² Jakamã e kwa kêt pu mẽ mãmrĩ paxãmnhĩx amnhĩ to Tirtùm wÿr o papa. Ra Jejus kot mẽ panê htyk nhùm mẽ pahte amnhĩ kaxyw hkôt pajamxpêr rãhã ho papa jakamã kêt pu mẽ axte mẽ pahpê amnhĩ tomnuj

xwÿnh ã amnhĩ jarênh kêt nê. Kêr pu mē nhÿrmã tanhmã pajamaxpêr punuj to rÿ tanhmã amnhĩ tomnuj to hãmri nê tee ri ja hã amnhĩ pumu nê pahkaprĩ kamã amnhĩ to Tĩrtũm wÿr kurê kumrêx. Jejus ra kot mē pahte amnhĩ tomnuj pãnhã amnhĩrer par jakamã kot puj mē Tĩrtũm mã tanhmã mē pahte amnhĩ tomnuj to hã amnhĩ jarê nhũm mē pama nê axte kãm hamaxpêr kêt nê. Pu mē te paxwÿr nê pahte amnhĩ nê pagrã htyk kuhõnh par nê akupÿm pamex pyrãk. Nê axte paxãmnhĩx amnhĩ to Tĩrtũm wÿr o papa.

²³ Nê mē kot Kris ã tanhmã mē pahto htã kwa kêr pu mē tee ri amnhĩ kukamã pajamaxpêr kêt nê. Rÿ pajamaxpêr o:

—Konên. Koja mē tanhmã hamaxpêr to nê Kris ã ixpĩ rÿ ko. Pa apu mē kot ixpĩr pymaj akupÿm ixte amnhĩ nhĩpêx tũm o awjanã nê akupÿm hkõt amnhĩ nhĩpêx japêr rÿ ko. Anê.

Kwa pu mē tee ri ã pajamaxpêr anhÿr hkêt nê. Pu kêt mē pajamaxpêr o:

—Nà mē kot Kris ã tanhmã ixto htã kot paj aa hkaga hkêt nê. Mē kot hã ixpĩr mã tã kot paj hkaga hkêt kumrêx.

Anhÿr ã amnhĩ jarê. ²⁴ Nê kêr ka mē akwÿjê mã anê kê mē mēmoj to axpên kutã nojarêt rãhã ho ri axpên kõt pa. Jao tanhmã axpên to mex to o ri axpên kõt pa.

²⁵ Na pre ra mē pahkwÿjaja tanhmã hamaxpêr to nê axte mē pahkõt pikuprõnh nê Tĩrtũm kapêr mar o hkrĩ hkêt nê. No kêr pu mē ho mē urãk kêt nê. Kêr pu mē arĩ xatã axpên wÿr akuprõ nê mē pahte tee ri amnhĩ kukamã pajamaxpêr nê axpên mã pakapêr o papa. Kêt mē panhõ Pahihtija ra akupÿn mē pahwÿr wrÿk kaxyw jakamã kwa kêr pu mē kutêp arĩ axpên mã pajamaxpêr mex nhõr pê tãm axpên nhĩpêx mex rãhã ho i papa.

²⁶ Mē pahkwÿjaja kot Tĩrtũm kapêr mar mex tã na htem kuma nê ãm kuma. Kwa kêr ka mē ho mē urãk kêt

nê. Kris kot mē panê htyk ã harênhja mē kot mar mex tã na htem kuma nê ãm kuma nê hkaga kumrêx. Jakamã mēhõ koja Kris pyrã nê htyk o mē kot amnhĩ tomnuj pãnhã amnhĩre? Nà amrakati kumrêx. ãm Jejus pix na pre Tĩrtũm ja kaxyw ãm. Tapxipix na pre ã mē panê amnhĩ nhĩpêx anê. Tã nhũm mē kot hkagaja mÿrapê koja mē nhÿrmã mē tãmjaja mē kot amnhĩ tomnuj pãnhã amnhĩre. ²⁷ Mē kot Tĩrtũm kutã amnhĩ xunhwÿr xwÿnh na mē. Amnepêr na pre Tĩrtũm mē kot kutã amnhĩ xunhwÿr xwÿnhjê kaxyw mē kot amnhĩ xà htÿx kamã hamak tũm xãta nhĩpêx. Tã ra mē kot Jejus kaga jakamã koja nhÿrmã ma hwÿr mē rênh pa nhũm mē tee ri kãm hwÿr pa hprãm kêt kaprÿ. ²⁸ Amnepêr finat Mojesja kormã htĩr ri na pre hte mēhõ pixi nê kapêr kaga nê akupÿm kot amnhĩ nhĩpêx tũm o awjanã nê tanhmã amnhĩ tomnuj to nhũm hkwyjaja ja hã omu. Tanhmãan axkrut rÿ axkrunêpxi nê ja hã omu. Hãmri nê ma Mojes wÿr mra nê axpên kõt kãm tanhmã kot amnhĩ tomnuj to hã harê. Hãmri nhũm harênh ma nê mē kãm hã amÿnê nhũm tee ri kãm htĩr prãm kaprÿ. Mē kot akupÿm amnhĩ nhĩpêx tũm o ujanãr nê amnhĩ tomnuj o paja mÿrapê na prem mē kupa. Á na pre htem mē hipêx anhÿr o pa.

²⁹ Nê koja mēhõ tanhmã Tĩrtũm Kra Jejus o kapêr punuj to. Tĩrtũm kapêr ã kagã htũm kot ra mē kot kêp Tĩrtũm Kra hã harênh mar mex tã axtem nê tanhmã ho kapêr punuj to ho pa. Kot mē panê htyk nê hkamrõ pikapĩr kõt kot mē pahte amnhĩ tomnuj pãnhã amnhĩrer ã harênh mar tã kuma nê ãm kuma nê harênh o:

—Nà mē pahpyrã nê kot amnhĩ tomnuj xwÿnh nhũm mē kot hã hpĩr kênã. Na pre mē panê htyk kêt nê.

Anhÿr ã harê. Nê Tĩrtũm Karõja nhũm mããnên tanhmã ho kapêr punuj to. Kêp mē pakutã nojarêt xwÿnh tã nhũm axtem nê tanhmã ho kapêr punuj to. Mÿrapê koja nhÿrmã Tĩrtũm tanhmã homnuj tÿx

to. Homnuj tỳx o mẽ kot Mojes kapêr kaga nhũm mỳrapê kot mẽ hparta jakre. Jakamã kwa kêr ka mẽ ã amnhĩ nhĩpêx anhỹr hkêt nê. ³⁰ Tĩrtũm kapêr ã kagà htũm kot ja jarênh kot:

Ixpê Tĩrtũm kot paj mẽ kot amnhĩ tomnuj xwỳnhjê homnuj tỳx nê. Anê.

Nê mẽ kot tãm amnhĩ nhĩpêx xwỳnhjê jarênh kot:

Mẽ kot amnhĩ to mex o mẽ pa xwỳnhjaja kot paj nhỹrmã mẽ ho mex rax nê. No mẽ kot amnhĩ tomnuj o mẽ pa xwỳnhjaja kot paj nhỹrmã mẽ homnuj tỳx nê. Anê.

Ra mẽ pahte ã kapêr anhỹr xwỳnhja kot amnhĩ nhĩpêx ã omunh mex. ³¹ Jakamã kwa mẽ okora. Kêr ka mẽ amnhĩ to mex rãhã ho ri apa. Tĩrtũm rãhã ho rãhã nê hihtỳx o hihtỳx jakamã koja mẽmoj tã akamã gryk ka amex kêt o amex kêt.

³² Nê amnepêm mẽ ate Jejus kôt amnhĩ xunhwỳr krax kãm na prem Jejus ã mẽ atomnuj tỳx tã ka prem mẽ umaj hkaga hkêt nê. Tã kêr ka mẽ arĩ ã amnhĩ nhĩpêx anhỹrja kukamã mãn ajamaxpêr nê hã anohtỳx rãhã ho apa. Jao arĩ ã amnhĩ nhĩpêx anê nê mẽ umaj Jejus kaga hkêt nê. ³³ Na prem mẽ piitã mẽ noo mã tanhmã mẽ amã kapêr punuj to nê tanhmã mẽ anhĩpêx to. Nê tũhã tanhmã mẽ akwỳjê homnuj tỳx to ka mẽ tee ri ja hã mẽ omu nê mẽ kamã axukaprĩ nê. Nê mẽ hkôt axkamẽ nhũm prem mã mẽ ato anê nê. ³⁴ Na prem mẽ akwỳjê jagjê ka prem ja hã mẽ omu nê ma mẽ hãgjenh xà hã ixkre hwỳr mẽ hwỳr mra nê tanhmã mẽ ho mex to. Nhũm prem mẽ apê mẽ akukrêx kwỳptà nê ma amnhĩm o pa ka mẽ ãm amnhĩ tã mẽ omu nê ajamaxpêr o:

–Kwār mẽ mãmri ma amnhĩm hamỳn o pa. Koja nhỹrmã Tĩrtũm inhmã ixkukrêx mex o kot ja jakrenhta kwỳ nhõr rax nê pa amnhĩm hamỳ nhũm aa ixpê hapêx kêt nê. Hãmri nhũm axte mẽhõ aa ixpê utàr kêt nê. Jar mẽ ixkukrêxta mexti hã. Anê.

Jao mẽ kot mẽ apê utàr tã ka mẽ akaprĩ nã apa hkêt nê. ã amnhĩ kukamã ajamaxpêr anhỹr pê akĩnh nê apa. ãm hãmri na ka prem ã amnhĩ kukamã ajamaxpêr anê. ³⁵ Na ka prem mẽ kutã amnhĩ to htỳx kãm ã apa anê. Tã kwa kêr ka mẽ arĩ ã amnhĩ nhĩpêx anhỹr o ri apa. Kêr kê nhỹrmã Tĩrtũm ja hã mẽ ato mex rax nê.

³⁶ Nê kêr ka mẽ arĩ amnhĩ kaxyw Tĩrtũm mã ajamaxpêr rãhã ho ri apa. Mẽ kot Jejus ã tanhmã mẽ ato htã ka mẽ hkaga hkêt nê. Kot kaj mẽ ã amnhĩ nhĩpêx anhỹr o apa nhũm Tĩrtũm ja hã mẽ apumu nhũm ja kãm mex nê. Hãmri nhũm ra kot amnhĩ jarênh xà hkôt nhỹrmã amã mẽmoj mex nhõr rax nê. Jakamã kwa mẽ kot tanhmã mẽ anhĩpêx to hã amnhĩ pumu nê tee ri amnhĩ kukamã ajamaxpêr o ri akaprĩ hkêt nê. Kot kaj mẽ Kris ã apunuj rãhã apa hkêt nê. ³⁷ Tĩrtũm kapêr ã kagà htũm kot Jejus jarênh kot:

Koja mẽ pahwỳr wrỳk mã xwỳnhhta tokyx wrỳ. Na ra wrỳk kaxyw nojarêt. Anê.

³⁸ Nê harênh kot:

Ixkôt mẽ kot amnhĩ nhĩpêx mex o mẽ pa xwỳnhjaja koja mẽ amnhĩ kaxyw ixkôt hamaxpêr tỳx rãhã nê. Jao nhỹrmã ixri htĩrtũm nê mex rãhã nê pa ho pa.

Nê koja mẽhõ ixkaga pa tee ri kãm ixkĩnh kêt ã omu. Anê.

³⁹ No mẽ papajaja te mẽ pahte mẽ kot Jejus kaga nhũm kot amnhĩ tã mẽ homnuj mã xwỳnhjê pyræk kêt. Arĩ mẽ pahte amnhĩ kaxyw hkôt pajamaxpêr rãhã jakamã koja nhỹrmã amnhĩ wỳr mẽ pahto api.

11

Amnhĩ kaxyw Tĩrtũm kôt mẽ hamaxpêr mex xwỳnhjê jarênh

Sikũn Pêtre 3.5-7

¹ Nê na htem Kris ã mẽ panhĩpêx kati ho pa pu mẽ pahpunuj rãhã nê ri papa. Te Kris kot mẽ pahto mex kêt pyræk pu htem mẽmoj punuj pix kãm ri papa nê kormã Tĩrtũm kot mẽ

pahto mex ã amnhĩ tã omunh kêt nê. Tã ã mẽ pahte anhÿr tã kwa kêr pu mẽ arĩ kapêr kôt amnhĩ nhĩpêx rãhã ho papa. Mẽ pahte pano ho Tĩrtũm pumunh kêt tã kot mẽ pahkôt pa ho pa hã amnhĩ kaxyw kãm pajamaxpêr tÿx rãhã ho papa. Jakamã na pu htem ãm kapêr kôt pix mã amnhĩ nhĩpêx o papa. ² Amnepê mã mẽ pakukamã mẽ panhĩgêjtjaja na prem no ho Tĩrtũm pumunh kêt tã amnhĩ kaxyw kãm hamaxpêr nê kapêr kôt amnhĩ nhĩpêx o pa nhũm amnhĩ tã mẽ omu nhũm ja kãm mex nê.

³ Nê mẽ papajaja na pu htem pajaxwÿja mẽ pano ho omunh kêt tã amnhĩm harênh o:

–Nà amnepêm kormã mẽmoj piitã amrakati ri nhũm Tĩrtũm ãm kapêr pix o mẽmoj piitã ho kato. Ixte inhno ho ja hã omunh kêt tã kot ã amnhĩ nhĩpêx anhÿr ã amnhĩ jarênhja jakamã kot paj hkôt ijamaxpêr tÿx rãhã ho ri ixpa. Anê.

⁴ Na pre finat Atãw nhĩpêx nê kaxyw hprõ Ewa nhĩpêx. Hãmri nhũm wa hkra Apewja htõ Kaĩ rom amnhĩ kaxyw Tĩrtũm kôt hamaxpêr tÿx o pa. Jakamã nhũm wa Tĩrtũm mã mẽmoj gõ. Nhũm Apew kot Kaĩ rom Tĩrtũm kãm hprãm xà hkôt kãm mẽmoj nhõr jakamã nhũm amnhĩ tã omu nê kot amnhĩ to mex xwÿnh ã harê nê kot kãm õr xwÿnhta nhũm mex ã harê. Tã Apew amnepêm htyk tã pu htem arĩ harênh mar rãhã ho papa nê kãm pajamaxpêr o:

–Apew na pre hte amnhĩ kaxyw Tĩrtũm kôt hamaxpêr tÿx rãhã ho pa.

Anhÿr ã kãm pajamaxpêr.

⁵ Nê Atãw kanrêhã htãmnhwÿ Enokja na pre haxwÿja amnhĩ kaxyw Tĩrtũm mã hamaxpêr tÿx o pa. Jao hkamnàr rom kãm hprãm xà hkôt pix mã tanhmã kãm amnhĩ nhĩpêx to ho pa nhũm amnhĩ tã omu nê amnhĩm mex ã harê. Jakamã na pre htyk kêt nê. Na pre Tĩrtũm htĩr rãhã ma amnhĩ wÿr ho api nhũm hkwyjaja tee ri hapêr o pa. Jakamã na pu htem arĩ axpên mã Enok kot amnhĩ kaxyw Tĩrtũm kôt hamaxpêr mex o

pa hã harênh o papa. ⁶ Mẽ kot amnhĩ kaxyw Tĩrtũm mã mẽ hamaxpêr kêt xwÿnhjaja na hte Tĩrtũm mẽ mex ã mẽ harênh kêt nê. Tã mẽ papajaja kêr pu mẽ Enok pyrã nê amnhĩ kaxyw kãm pajamaxpêr tÿx rãhã ho papa. Nê pajamaxpêr o:

–Tĩrtũmja htĩr rãhã ho rãhã. Koja nhÿrmã mẽ ixte amnhĩ kaxyw hkôt ijamaxpêr xwÿnhjê ho mex rax nê. Nà koja mẽ ixto anê.

Anhÿr o mẽ pajamaxpêr nhũm Tĩrtũm amnhĩ tã mẽ pajamaxpêr ã mẽ pahpumu nê mẽ pahte amnhĩ to mex ã mẽ pajarê. No mẽ kot amnhĩ kaxyw kãm hamaxpêr kêt xwÿnhjaja na hte ã mẽ harênh anhÿr kêt nê.

⁷ Nê Enok kanrêhã htãmnhwÿ Noehtija na pre haxwÿja amnhĩ kaxyw Tĩrtũm mã hamaxpêr tÿx o pa. Jao hkamnàr rom amnhĩm pàr raxja nhĩpêx. Na pre ra Tĩrtũm na rax kukamã tanhmã kãm ujarênh to. Kormã aa na wryk nhũm Noehti kot omunh kêt tã Tĩrtũm kapêr ma nê mar xà hkôt amnhĩm pàr rax kumrêxta nhĩpêx. Òrkwy kamã hkwyjê mẽ mẽ amnhĩm hipêx. No mẽ kot Tĩrtũm kapêr mar nê ãm mar xwÿnhjaja na pre Tĩrtũm gô tãm o mẽ hanhi nê mẽ himex pa. Nom Noehtija nhũm kot amnhĩ to mex xwÿnh ã harê. Kot amnhĩ kaxyw hkôt hamaxpêr rãhã ho pa jakamã nhũm pre ã mex ã harênh anê.

⁸ Nê Noehti kanrêhã htãmnhwÿ Apraãwja na pre haxwÿja amnhĩ kaxyw Tĩrtũm mã hamaxpêr tÿx o pa. Na pre Tĩrtũm kot kãm pika nhõr ã kãm amnhĩ jarê nê ra kot ma hwÿr mênh kaxyw. Hãmri nhũm Apraãw kuma nê hkamnàr rom õ pika kaga nê ma pika hõja wÿr pa. Aa kot ma hwÿr mõi nê omunh kêt tã Tĩrtũm kapêr mar xà hkôt õ pika kaga nê ma hwÿr pa ho pa. ⁹ Hãmri nê hwÿr põi nê omu nhũm Tĩrtũm kãm:

–E pika ja kot paj nhÿrmã akanrêhã akra nê atãmnhwÿjê mã kugõ. Anê.

Hãmri nhũm kuma nê pikaja kamã pa ho pa. Ra kamã axtem mẽ uro hkwyjaja ri pa nhũm Tĩrtũm kormã

mê kator kêt ri nhũm mê õ pika hwÿr pøj nê mê kamã pa ho pa. Nom amnhĩm òrkwÿ mex nhĩpêx kêt nê. Kormã kêp õ pika kumrêx kêt ã hkamnhĩx jakamã ãm mry kà o ixkre nhĩpêx nê kamã pa ho pa. Nê nhÿhÿm pa kaxyw nê kugrà nê ma amnhĩ kôt o pa. Amnhĩ kaxyw Tirtũm mã hamaxpêr rãhã jakamã ã amnhĩ nhĩpêx anhÿr o pa.

Nê Apraãw kra Ijak nê htãmnhwÿ Jakoja wa Apraãw pyrã nê mry kà ho òrkwÿ nê ma amnhĩ kôt o pa. Nhũm Tirtũm kot Apraãw mã kapêr pyrã nê wa kãm wa hkanrêhã wa hkra nê wa htãmnhwÿjê mã pika nhõr ã amnhĩ kukamã wa kãm amnhĩ jarê. ¹⁰ Jakamã nhũm Apraãw kormã Tirtũm nhõ krĩ hwÿr àpir xa hã amnhĩ tã hamãr pê kot ho õ pika mã xwÿnhjê kamã pa ho pa. Kaxkwa hwÿr àpir mã xwÿnhta mex kumrêx. Tirtũm kot hipêx jakamã koja mry kà ho ixkre nhĩpêxta rom aa hapêx kêt nê. Jakamã nhũm Apraãw mê pahpyrà nê ma kot hwÿr àpir xa hã amnhĩ tã Tirtũm jamãr rãhã ho pa. ¹¹⁻¹² Tã ra hpigêt tÿx nê hkurê hkêt nê pa. Te ra ri htyk kaxyw pa pyrãk. Nhũm hprõ Sara haxwÿja hpigêx tÿx nê. Kamrõ hkêt ã amgrã xohtõ rax kumrêx. Nhũm wa aa hkra hkêt nê pa htã nhũm Tirtũm nhÿrmã wa hkra hã wa kãm awjarê nhũm wa kuma nê amnhĩ kaxyw hkôt hamaxpêr kurê kumrêx. Nom amnhĩ tã kuma nê tee ri amnhĩ kukamã hamaxpêr hkêt nê. Na pre wa kuma nê axpên mã:

—Nà kot puj xep hãmri tã pahkra. Tirtũm kot hã ã pajarênh anhÿr kênã. Anê.

Tã ã wa kot hkra kaxyw Tirtũm mã hamaxpêr anhÿr jakamã na pre Apraãwja hprõ htu. Ra wa hamê hpigêt tÿx kumrêx tã nhũm htu. Nhũm wa hkra Ijakja gaa nê wa kãm kato. Jakamã nhũm wa gaa nê rĩ wa hkanrêhã wa htãmnhwÿ xohtõ rax o ohtõ rax. Ohtõ ho kaxkwa kamã kanhêti xohtõ jakre. Nê ohtõ ho gô xujanãr mÿri pikahti grã hkryre jakre. Jakamã nhũm mê tee ri mê ho

kõta hpar mã. Nhũm Apraãw kêp mê hpàr krax. ¹³ Tã nhũm Apraãw nê Ijak nê Jakoja mê ri pa tãmtã nê htyk pa nê hapêx. Tirtũm kormã kot mê kãm pika jarênhta nhõr xwÿj ri ra htyk pa. Nom kormã mê htĩr ri tanhmã kãm hamaxpêr to nê hamaxpêr o:

—Nà kormã Tirtũm kot mê inhmã pika jarênhja nhõr kêt tã koja nhÿrmã inhmÿr pê ixkanrêhã ixkra nê ixtãmnhwÿjê mã kugõ. Nà koja mê kãm kugõ. Ra kot hã inhmã amnhĩ jarênh kênã kot kêt mê kãm òr kêt.

Anhÿr o kaxyw kãm hamaxpêr rãhã ho pa. Jao hkĩnh nê hamaxpêr o:

—Nà inhõ krĩja axtem na. Na pa hte jar pika ja kamã ri mê hkôt ri ixpa. Te ixpê mê uro pyrã nê ri mê hkôt ixpa nom jar inhõ krĩ hkêt. Inhõ krĩ na kêt axte mã. Anê.

¹⁴⁻¹⁵ Na prem ã õ krĩ hõ hkukamã hamaxpêr anhÿr o pa. No õ krĩ htũmta mê kot hkaga nê pika hõ hwÿr mõr xwÿnhta na prem ã harênh anhÿr kêt nê. Kop apu mê kot amnhĩm tãm mãn jarênh ronhÿx prem awjanã nê ma akupÿm hwÿr pa. Na prem axtem krĩ hõ jarê nê kormã hwÿr mõr kêt ã amnhĩ jarênh o pa. ¹⁶ Tã nhÿ krĩ na prem ã harênh anê? Nà kaxkwa kamã Tirtũm nhõ krĩja. Tãm na mex kumrêx jakamã nhũm prem kormã hwÿr ma àpir xa hã mê pahpyrà nê amnhĩ tã Tirtũm jamãr rãhã ho pa nhũm amnhĩ tã mê omu nê hkĩnh nê. Nê mê kot tãm amnhĩ nhĩpêx ã mê omu nê mê kêp hkra hã mê harênh ã hpijaàm kêt nê. Hãmri nê mê kutêp tanhmã õ krĩ ho mex to ho pa.

¹⁷⁻¹⁸ Na pre ra tanhmã Apraãw mã hkra Ijakja jarênh to nê kãm:

—Akra Ijak kanrêhã hkra nê htãmnhwÿjaja koja mê kêp ixkra. Anê.

Tã ra kot amnhĩ tã Apraãw kamã hamak kaxyw hkukamã hamaxpêr nê hamaxpêr o:

—Xà we Apraãw kãm ixkĩnh tÿx kumrêx nê kãm ixkôt amnhĩ nhĩpêx rãhã ho pa hprãm nà? Xà we kãm ixkĩnh tÿx o hkrata jakrenh? E pa kop we ja hã amnhĩ tã kamã ama nê omu mãn. Anê.

Hāmri nê kot hkra hpîr nê kām ôr ā kām karō. Hāmri nhūm kuma nê ra kot kām hpîr kaxyw. Kot Tîrtūm kot amnhî nhîpêx ā omunh mex jakamā hkamnār rom kot kām hpîr kaxyw.
¹⁹ Nê hamaxpêr o:

—Nà Tîrtūm akupÿm kot mē ho htîr xwÿnh kênā.

Anhÿr jakamā kām hkra hpîr pyma hkêt nê ra kot kām hpîr mā tā nhūm Tîrtūm amnhî tā omu nê nê kām kapêr nhūm kuma nê hpîr kêt nê wa ma akupÿm ôrkwÿ hwÿr mō. Tā ā kot hkra nhîpêx anhÿr jakamā Apraāw mā te Ijak htyk nê akupÿm htîr pyrāk.

²⁰ Nê Ijakja na pre haxwÿja amnhî kaxyw Tîrtūm mā hamaxpêr tÿx o pa. Jao hkamnār rom amnhî kra wa kām Tîrtūm kot wa ho mex kukamā wa kām harê. Kra Jako mē Ejauta wa kām harê nê wa kām:

—E koja nhÿrmā Tîrtūm inhmÿr pê war ato mex rāhā ho pa. Anê.

²¹ Nê Jakoja na pre haxwÿja amnhî kaxyw Tîrtūm mā hamaxpêr tÿx o pa. Jao hkamnār rom hkra Juje mā Tîrtūm kot mē ho mex kukamā harê. Na pre Jakoja hkra nê htāmnhwÿ mē hpimràatā hprām xāj ma Ejit wÿr pa nê kamā pa ho pa. Tā nhūm Jako hpigêt tÿx nê ra htyk kaxyw. Hāmri nê hkra Juje mē hkra wa mē kām kapêr nê mē kām:

—E na pa tee amnhî kamā ama. Na pa ra ixtyk kaxyw. Nom koja Tîrtūm nhÿrmā inhmÿr pê mē ato mex rax nê. Anê.

Hāmri nê amnhî kaxpar xā hā pî hā amnhî kaxpa nê kànhmā xa nê Tîrtūm mā mex o mex ā harê. Hāmri nê akupÿm nōr xā kamā nōn ty.

²² Nê Jujeja na pre haxwÿja amnhî kaxyw Tîrtūm mā hamaxpêr tÿx o pa. Jao htyk kaxyw nê hkamnār rom hkwyjê mā tanhmā amnhî jarēnh to. Ra hpigêt nê htyk kaxyw nê hkwyjê mā tanhmā amnhî tā karō hto nê mē kām:

—E na pa ra ixtyk kaxyw. Tā koja Tîrtūm inhmÿr pê nhÿrmā Ejit rūm mē akator nê ma akupÿm mē panhō pika hwÿr mē ato pa. Ra kot mē panhîgêt Apraāw mā amnhî jarēnh xā

hkôt. Jakamā kwa mē inhma. Kêr ka mē akupÿm anojarêt nê ma amnhî kôt ixtā kasāwja mÿ nê amnhî kôt ixto mō. Hāmri nê mÿtar mē panhō pika kamā mē anhō krî htā ijaxā pa jawÿ mē akuri ixtā pyka. Anê.

²³ Nê Mojes katorxā mē hipêêxàja na pre wa haxwÿja jajê pyrā nê amnhî kaxyw Tîrtūm mā hamaxpêr tÿx o pa. Juje hkanrêhā htāmnhwÿ na pre wa. Jakamā nhūm Ejit nhō pahija tee ri Ijaew xohtō rax kumrêx ā mē omu nhūm ja kêp omnuj nê. Hāmri nhūm mē hkra myjaja mē hapôx kôt mē hamÿnh xwÿnhjaja kot mē hpar ā mē kām karō. Tā nhūm Mojes kato nhūm hipêêxā mē katorxāja wa omu nhūm muxre nhūm wa tee ri hkukamā hamaxpêr. Hāmri nê pahî Paraohiti mā mē hkra jamÿnh xwÿnh kot wa kêp hpîr pymaj ho pimxur o hā mytwrÿ axkrunêpxi. Tîrtūm kamnār rom wa amnhî tā kām uma hkêt nê ā kêp hkra ho hpimxur anê.

²⁴ Nê Mojes na pre haxwÿja amnhî kaxyw Tîrtūm mā hamaxpêr tÿx o pa. Kormā karàre ri na pre Paraohiti hkra nija omu nê amnhîm kumÿ nê ho hkra nê amnhî kôt o pa. Rāhā nhūm àptār nhūm Ejit nhō xwÿnhjaja kêp pahî Paraohiti htāmnhwÿ hā axpên mā harê. Hāmri nhūm tee ri amnhî tā mē kuma nê amnhî tā mē kām aprā nê mē kām:

—Kwa mē ā ijarēnh anhÿr kêt nê. Ixpê mē akwÿ hkêt. Anê.

²⁵ Ām kām Tîrtūm kwÿjê kôt pix mā ri pa ho pa hprām. Nê kām Ejit nhō pahî hkôt amnhî tomnuj prām kêt nê. Ām mē kot amnhî tomnuj pix o paja na mē kām hprām nhūm ja hā mē omu nê tee ri mē hkukamā hamaxpêr nê hamaxpêr o:

—Nà kot paj mē hkôt ri ixpa hkêt kumrêx. Mē hkînh nê pa htā koja mē gaa nê ty nhūm mē hkînhja mē kêp hapêx. Nà kot paj Tîrtūm kwÿjê hkôt măn ri ixpa ho ixpa. Mē kot Tîrtūm ā mē inhîpêx kati htā pa arî mē hkôt ixpa ho ixpa. ²⁶ Inhmā Ejit nhō xwÿnhjê hkôt ixkukrêx rax nê ri ixpa hprām kêt. Kwār mē māmri Tîrtūm ā

tanhmã inhîpêx to. Koja mẽ ã inhîpêx anê pa ixpunuj nê ri ixpa htã koja Tirtûm nhÿrmã ixto mex rax nê. Nà kot paj Ejit nhõ pahihtî hkôt ri ixpa hkêt nê.

Anhÿr jao ra mẽ pahpyrà nê Kris gryk ã mẽ hkaga. ²⁷ Tã akupÿm mẽõ pika hwÿr Ijaewjê ho môr kaxyw nhÿm Ejit nhõ pahihtija tee ri ja hã omu nê kamã gryk tÿx nê. No nhÿm Mojesja amnhî kaxyw Tirtûm kôt hamaxpêr tÿx o hkamnàr rom kãm mẽ uma hkêt nê. Nê mẽ kêp hkwÿjê kator pa nê ma akupÿm mẽõ pika hwÿr amnhî kôt mẽ o pa. Tirtûm kamnàr rom ã mẽ kêp mẽ ho kator anê. Aa kot no ho omunh kêt tã amnhî kaxyw kãm hamaxpêr tÿx nê hkamnàr rom mẽ kator nê hamakêtkati nê mẽ o pa. ²⁸ Nê hkamnàr rom mẽ hkînh ã arîgro mẽ kot kãm “Pas” anhÿr xwÿnhta ho hkrax. Kormã Ejit rÿm kator kêt ri. Nê kaxyw amnhî kwÿjê mã hã karõ nê mẽ kãm:

—E pa mẽ amã Tirtûm kapêr jarê ka mẽ inhma. Nà kot puj xep mẽ jarãhã ôwêhti hkwÿ pa nê hkamrô ru. Nê hkamrô ho panhôrkwÿ jakwakre hã pî kukõ. Hãmri nê ï kuxôt nê kuku. Koja kamãt nhÿm mẽ kot amnhî tomnuj xwÿnhjê pê mẽ hkra my kot wa piitã mẽ hpar mã xwÿnhja mõi. Hãmri nê mẽ pamÿ ri mõi nê ã mẽ pahte mẽ panhôrkwÿ nhîpêx anhÿrja ã omu nê tanhmã mẽ pahkrajê ho hkêt nê. Tirtûmja ã mẽ pahte amnhî nhîpêx anhÿr kaxyw ã inhmã karõ anê. Jakamã e pu mẽ hkamnàr rom ã amnhî nhîpêx anê kê mẽ pahkrajaja mẽ pahpê htyk kêt nê. Anê.

Hãmri nê ã mẽ kot Ejit rÿm kator xà hã arîgrota ã mẽ hkînh o kator krax anê. Mẽ hkînhja na htem kãm “Pas” anê.

²⁹ Nê Ijaewjaja na prem haxwÿja Ejit rÿm kormã Mojes kôt mẽ pa ri uràk nê amnhî kaxyw Tirtûm mã hamaxpêr. Jakamã na prem ra gô xujanãr pê “Gô Kamrêk” anhÿr xwÿnhja mÿ ri kuhê nhÿm Tirtûm mẽ kãm ho axkjê. Nê mẽ kãm hkôt ã ho amgra

nhÿm mẽ hã hkamnàr rom mex nê rêr pa. No nhÿm mẽ hkôt mẽ kot mẽ himex kaxyw mẽ mrar xwÿnhjaja. Ejit nhõ pôristijaja nhÿm gôja akupÿm mẽ hã axkamur nê mẽ himex pa.

³⁰⁻³¹ Nê Ijaew kot Mojes mÿr pê Jojue hkôt pa ri mẽ uràk nê amnhî kaxyw Tirtûm kôt hamaxpêr o pa. Na prem ra Tirtûm kot mẽ kãm pika nhõr xwÿnhta wÿr pøj nhÿm Tirtûm krî pê Jeriko hwÿr mẽ kurê. Mẽ kot kamã mẽ pa xwÿnh pê utàr kaxyw mẽ hwÿr mẽ kurê. Mẽõ krî pu hã kahêja kên tÿx pix o na pre. Nê hprêk rax kumrêx. Nê krî nhõ xwÿnhjaja kãm Tirtûm kapêr mar prãm kêt. Hãmri nhÿm Tirtûm mẽ hã Ijaewjê mã amÿnê nê mẽ kãm:

—E mẽõ krîja kot paj mẽ amã kugõ nom kêr ka mẽ inhmar kumrêx. Kêr ka mẽ apkati mẽ mẽ õ krî hwÿr mra nê kupu hpÿnh o atã apkati kêp 7 nê rî ma akupÿm mra. Anê.

Hãmri nhÿm mẽ kuma nê mar xà hkôt ma Jeriko hwÿr mra. Hãmri nê hwÿr pøj nê Tirtûm kamnàr rom krî puhã kahêja kupu hpÿnh o hã apkati kêp 7. Hãmri nhÿm apkati pê 7ta ã nhÿm kên tÿx o kahêja mẽ kêp amnhî krakra nê rôrôk pa. Nhÿm mẽ mra nê hkôt krî hwÿr agjê nê krî nhõ xwÿnhjê nhîmex pa. Nom krî kamã kuprÿ pê Raapja Ijaew pyrà nê amnhî kaxyw Tirtûm mã hamaxpêr o pa jakamã nhÿm mẽ kormã mẽ himex kaxyw mẽ hwÿr môr kêt ri amnhî kukamã mẽ hkwÿjaja kot mẽ hã ukapi ho pa kaxyw mẽ hwÿr mẽ kurê. Hãmri nhÿm Raapja mẽ kêp amnhî pyrà nê Tirtûm kôt hamaxpêr ã mẽ omu nê hkwÿ kot mẽ himex pymaj amnhî nhôrkwÿ kamã mẽ kêp mẽ ho amÿxu nhÿm mẽ hkà hkînh pê ma akupÿm hkwÿjê wÿr mõi. Jakamã nhÿm mẽ kot mẽ himex kaxyw mẽ hwÿr mra hãmri nê amnhî pyrà nê tanhmã Raap mẽ õ fãmii ho hkêt nhÿm mẽ arî htîr nê pa. Mẽ uràk nê amnhî kaxyw Tirtûm kôt hamaxpêr o pa hã omunh xà hkôt tanhmã mẽ ho hkêt nê.

³² ã na pre mẽ kot amnhĩ kaxyw Tirtũm kôt mẽ hamaxpêr xwýnhjaja Tirtũm kamnàr rom amnhĩ nhĩpêx anhÿr o pa. Nom jajê pixjaja na prem ã amnhĩ nhĩpêx anhÿr hkêt nê. Mãânên Giteãw nê Parak nê Sãsõ nê Jepte nê Tawi nê Sãmuew nê Tirtũm nhÿ hã mẽ kapêr o pa xwýnhjaja. Jajê piitã na prem wamtajê pyrã nê amnhĩ kaxyw Tirtũm kôt hamaxpêr tÿx rãhã ho pa. Nom kot paj ixprĩ hã tanhmã mẽ kot hkamnàr rom amnhĩ nhĩpêx to hã mẽ harênh kêt nê. Kot pa anê nê tokyx harênh par kêt nê. Mẽ ohtô rax kumrêx jakamã na pa ãm hkwý pix jarê nê hã kagà.

³³ Na prem hkwýjaja Tirtũm kamnàr rom ma mẽ kot amnhĩ tomnuj xwýnhjê nhõ krĩ hwÿr mra nê mẽ kêp mẽ õ pika pytà. Nê mẽ hkwýjaja Tirtũm kamnàr rom mẽ ho amnhĩptãr mex o pa. Nhũm prem kãm Tirtũm kurê xwýnhjaja mẽ hkwýjê pynê nê ahkrehti kamã mry xoprê hkwý nhĩpy mẽ kurê. Nhũm prem amnhĩ tã mẽ omu nê amnhĩ kaxyw Tirtũm mã hamaxpêr kurê kumrêx nhũm amnhĩ tã mẽ omu mẽ nê te mry jakwa ho pikamÿr tÿx pyrãk o mẽ hipêx nhũm ãm mẽ omunh o kuhê nê tanhmã mẽ ho hkêt nê. Æ na prem Tirtũm kamnàr rom amnhĩ nhĩpêx anhÿr o pa.

³⁴ Nhũm mẽ kot kuwy rax kãm mẽ hkwýjê rênh tã nhũm mẽ kot amnhĩ kaxyw Tirtũm mã hamaxpêr tÿx nhũm amnhĩ tã mẽ omu nê mẽ nê tanhmã kuwy ho nhũm mẽ hxêt kêt nê. Nhũm pre mẽ hkwýjaja wapo ho mẽ hkamnhwÿr o mẽ hkwýjê hpar kaxyw nhũm mẽ amnhĩ kaxyw Tirtũm mã hamaxpêr nhũm amnhĩ tã mẽ omu nê mẽ nê tanhmã mẽ ho nhũm mẽ amnhĩ rê nê mẽ umaj hprôt nê ma mra. Mẽ hihtÿx kêt tã Tirtũm kamnàr rom ÿ hã hihtÿx nê mẽ kãm mẽ hkurê xwýnhjê ho krihkrit pa nhũm mẽ ma akupÿm hapêx.

³⁵ Nê mẽni hkwýjaja na prem haxwýja amnhĩ kaxyw Tirtũm mã hamaxpêr tÿx o pa. Jao mẽ hkrajaja mẽ kêp htyk tã nhũm prem Tirtũm

kamnàr rom mẽ ho kuwý nhũm mẽ kuma nê akupÿm mẽ kãm mẽ ho htĩr.

Æ na prem amnhĩ kaxyw Tirtũm mã hamaxpêr pê mex nê pa anê. No na pre mẽ hkwýjaja mẽ urak nê amnhĩ kaxyw kãm hamaxpêr tÿx tã nhũm Tirtũm tokyx mẽ ho mex kêt nê. Na pre mẽ kãm mẽ hkurê xwýnhjaja Tirtũm ã mẽ par kaxyw. Nê mẽ hkwýjaja Tirtũm ã mẽ hipêx kati ho pa nhũm mẽ amnhĩ xà htÿx kãm hamak kãm ty. Nhũm mẽ himex kaxyw nê mẽ kãm:

—Kwa mẽ Tirtũm kaga. Kot kaj mẽ hkaga pa mẽ amã inhÿre nê mẽ anhĩmex kêt nê. Anê.

No nhũm mẽ kuma nê ãm mẽ kuma nê amnhĩ kaxyw kãm hamaxpêr tÿx pê mẽ kãm:

—Nà mẽ kam nê mãmrĩ ixpĩ. Inhmã ixtyk puma hkêt. Kot paj ty nhũm Tirtũm akupÿm ixto ixtĩr pa kuri inhmex kumrêx nê ri ixtĩr tũm nê ixpa ho ixpa.

Anhÿr o mẽ kãm amnhĩ jarênh jakamã hãmri Tirtũm kaga hkêt rãhã nhũm mẽ himex.

³⁶ Nê mẽ kãm mẽ hkurê xwýnhjaja na prem Kris ã mẽ hkwýjê mã hpêr o pikênh pê mẽ htak xà ho mẽ htak rũnh o pa. Nê kàx o mẽ hkwýjê hpa hpre nê mẽ hte hpre nhũm mẽ kêp prês nê hkrĩ ho hkrĩ.

³⁷⁻³⁸ Nhũm prem kên rũnh o mẽ hkwýjê htak o mẽ kupa. Nê mẽ hayr o mẽ hkwýjê pa. Nê mẽ hkamnhwÿr o mẽ hkwýjê pa. Æ na prem Kris kôt mẽ hamaxpêr ã mẽ omunh xà hkôt mẽ hipêx anhÿr o pa. Jakamã na pre mẽ hkwýjaja mẽ umaj mẽõ krĩ rũm hapôj nê ma hprôt nê mra. Nê te mẽ õ krĩ hkêt pyrã nê kapôt ã kêp amrakati nê ri pa. Mẽ ê hkêt nê ôwêhti hkà ho ê nê ri hã pa. Nê motre kà ho amnhĩ pre nê ri hã pa. Nê kên prêk ã api nê kre kamã hpimxur o pa. Nê pika hkre kamã hpimxur o pa. Nhũm mẽ kãm mẽ hkurê xwýnhjaja te mẽ kêp ahponu nê mẽ kêp ahkro pyrãk o mẽ hipêx nê axpên mã mẽ harênh o:

—Nà mẽ nexti hã. Kwa pu mẽ piitã mẽ himex paa ri.

Anhÿr o mẽ harênh tâ nhũm Tĩrtũm mẽ uràk nê ã mẽ harênh anhÿr kêt nê. Na pre mẽ mex kumrêx ã mẽ harê. Nê nhÿrmã kuri mẽ mex nê pa ho pa hkukamã mẽ harê.

³⁹ ã na prem Tĩrtũm kamnàr rom mẽ kãm mẽ hkurê xwÿnhjê kutã amnhĩ to htÿx kãm htyk o pa anê. Nhũm Tĩrtũm ja hã mẽ omu nê hkĩnh nê kãm mẽ hapê htÿx nê. No nhũm mẽ kormã htĩr ri amnhĩm Tĩrtũm kot mẽ ho mex xà jamÿnh kêt rãhã ty. ⁴⁰ Tã mo na pre Tĩrtũm kormã mẽ htĩr ri hkwÿjê pyrã nê mẽ ho mex kêt nê? Nà na pre kormã mẽ hkukamã hamaxpêr o:

—Nà kot paj kormã mẽ ho mex kêt nê. Kot pa mẽ mÿr pê mẽ kot ixkôt amnhĩ xunhwÿr mã xwÿnhjê jamãr grire mãn. Kêr pa inhô krĩ kamã mẽ ho ixpimràatã mẽ ho mex rax kumrêx. Nà kot paj ã mẽ ho mex anê. Ja na kêt inhmã mex o kormã mẽ htĩr ri ixte mẽ ho mexta jakrenh. Anê.

Ja o ra ã mẽ papajaja mẽ pakukamã hamaxpêr anê.

12

Mẽ pahte Jejus pyrã nê mẽmoj kutã amnhĩ to htÿx ã mẽ pamã karõ

Piripos 3.12-21

¹ Na pre mẽ pakukamã mẽ panhĩgêt kwÿjaja amnhĩ kaxyw Tĩrtũm mã hamaxpêr pê ã amnhĩ xà htÿx kamã hamak o pa anê. Tã te ra mẽ kot kÿj rũm kaxkwa rũm mẽ pahpumunh nê tanhmã mẽ pamã kapêr to pyrã nê mẽ pamã kapêr o:

—E mẽ inhma mẽ ixkanrêhã mẽ ixtãmnhwÿjaja. Na pa prem ã Tĩrtũm kamnàr rom amnhĩ nhĩpêx o ixpa anê. Mẽ kot ja hã mẽ inhĩpêx kati htã pa prem Jejus kaga hkêt nê. Tã kêr ka mẽ ixpyrà nê ã mẽ kãm mẽ akurê xwÿnhjê kutã amnhĩ to htÿx anê. Nê mẽ ixpyrà nê amnhĩ kaxyw Tĩrtũm kôt pix mã ajamaxpêr tÿx rãhã ho ri apa. Anê.

Jakamã kwa kêr pu mẽ uràk nê ã amnhĩ nhĩpêx anhÿr rãhã ho mãn ri papa. Te mẽ hprôt xwÿnhjaja kot amnhĩ nhĩpêx pyrãk o amnhĩ nhĩpêx.

Na htem hprôt tÿx kaxyw mẽmoj pytĩ jamÿnh nê ho hprôt hkêt nê. Na htem ÿ kamã hprôt o hprôt tÿx nê wam hkwÿjê mã wa nê mra. Ja pyrã nê kêr pu mẽ pahte Tĩrtũm kapêr kôt amnhĩ nhĩpêx mex o papa kaxyw tanhmã mẽ pahte amnhĩ tomnuj to hã amnhĩ pumu nê hkaga kurê kumrêx. Mẽ pahte amnhĩ tomnuj o papa xàja te mex pyrãk no ãm mex kêt. Te ho mẽ hprôt xwÿnh kot axtem nê mẽmoj pytĩ mÿnh nê tee ri ho hprôt tÿxta pyrãk. Kot puj mẽ tanhmã amnhĩ tomnuj to ho papa nê Tĩrtũm kapêr kôt amnhĩ nhĩpêx mex kêt nê. Jakamã kwa kêr pu mẽ Tĩrtũm kapêr gryk ã amnhĩ tomnuj nê amnhĩ to htÿx rãhã ho papa. Te ho mẽ hprôt nê nhÿri mẽ àhuk xà pix kukamã hamaxpêr rãhã hprôt tÿx xwÿnhhta pyrã nê ãm Jejus mã pajamaxpêr tÿx rãhã ho papa.

² E kot paj mẽ amã Jejus kot tanhmã mẽ panê amnhĩ nhĩpêx toja jarê ka mẽ inhma. Nà kot mẽ panê mẽ pahte amnhĩ tomnuj pãnhã amnhĩrer kaxyw htyk nhũm mẽ pahte hkôt amnhĩ xunhwÿr jakamã na hte mẽ pamã pajamaxpêr nyw gõ pu mẽ amnhĩ kaxyw hkôt pajamaxpêr ho ri papa. Na pre mẽ kãm hkurê xwÿnhjaja kot pĩ kahpa hã nhôr nê hpĩr mã nhũm mẽ kutã mẽ kãm amnhĩ to htÿx nê arĩ mẽ kãm xa nhũm prem kupĩ. Tã tee ri amnhĩ kukamã hamaxpêr o Tĩrtũm kaga hkêt nê. Na pre hamaxpêr o:

—Nà kwãr mẽ mãmri ixpĩ. Kot paj ty nhũm Inhĩpêxà akupÿm ixto ixtĩr pa kuri inhmex kumrêx nê ixtĩr tũm nê ixpa ho ixpa. Anê.

Tã na ra kaxkwa kamã Tĩrtũm xupôk rũm mex nê hkrĩ ho hkrĩ. ³ Jakamã kwa kêr pu mẽ kot ã mẽ panê amnhĩ nhĩpêx anhÿrja mã pajamaxpêr rãhã ho ri papa. Mẽ kot hipêx kati htã nhũm mẽ kutã amnhĩ to htÿx nê xa. Tã kêr pu mẽ uràk nê mẽ kãm mẽ pahkurê xwÿnhjê kutã amnhĩ to htÿx rãhã ri papa. Ja o tee ri amnhĩ kukamã pajamaxpêr o mẽ umaj Tĩrtũm kaga hkêt nê.

4 Na ka htem ma mẽ kot amnhĩ tomnuj xwýnhjê hwýr mra nê mẽ kot amnhĩ tomnuj kaga kaxyw tanhmã mẽ kãm akapêr to nhũm mẽ ja hã mẽ ama nhũm ja mẽ kêp omnuj nhũm mẽ amnhĩ tã tanhmã mẽ atomnuj to. Nom wam mẽ kot mẽ pahkwýjê nhĩpêxta pyrã nê kormã mẽ atõxpĩr kêt nê.

Tĩrtũm kot tanhmã hkrajê nhĩpêx to hã harênh

Juãw 15.1-2; Eprêw 5.7-8; Xiakre 1.2-4

5 Nê mãn ka mẽ arĩ Tĩrtũm kapêr ã kaga htũm kwý hã ano htýx japêr. Mẽ pahpê Tĩrtũm krajê mã kapêr jarênh kot:

Koja Pahi Maati tanhmã mẽ ate amnhĩ tomnuj to nê mẽ amã kapêr ka mẽ ama nê mar týt nê mẽmojta kaga kurê kumrêx. No mẽ ama nê tee ri kot nê akurê xwýnhta kukamã ajamaxpêr o ri akaprĩ o axtem nê Tĩrtũm kaga hkêt nê. Ama nê kot amã mẽmoj nê kapêr xwýnhta kaga kurê kumrêx.

6 Na hte Tĩrtũm kãm mẽ pajapê hã tanhmã mẽ pahte amnhĩ tomnuj to hã mẽ pahpumu nê hã tanhmã mẽ panhĩpêx to. Tãm mẽ pahte amnhĩ nhĩpêx o papa kaxyw. Kot mẽ pahpê hkra hã mẽ pajarênh jakamã na hte ã mẽ pahte tãm amnhĩ nhĩpêx o papa kaxyw mẽ panhĩpêx anê. Anê.

7 Jakamã kot kaj mẽ tanhmã amnhĩ tomnuj toja mýrapê tanhmã apunu kute nê ri apa htã no ãm tee ri amnhĩ kukamã ajamaxpêr hkêt nê. Kêt mẽ ãm ajamaxpêr o:

–Nà ixte tãm amnhĩ nhĩpêx kaxyw na Tĩrtũm ã inhĩpêx anê. Ixpê hkra hã ixte amnhĩ to mex o ixpa prãm xaj ã inhĩpêx anê.

Anhýr o mãn kêt ajamaxpêr. Na hte mẽ hipêêxã mẽ hkra kot amnhĩ to mex kaxyw ã mẽ hipêx anê. Tã Tĩrtũm na hte mẽ urak nê ã mẽ panhĩpêx anê. 8 No koja mẽhõ hkra kot tanhmã amnhĩ tomnuj to hã omu nê ãm omu nê hã tanhmã ho hkêt nê. Hã koja

hkraja te hipêêxã hkêt nê hã awrãre nê ri pa pyrãk. Tã mẽ pahpê Tĩrtũm krajaja kot puj mẽ tanhmã amnhĩ tomnuj to nhũm ja hã mẽ pahpumu nê hã tanhmã mẽ pahto. Nom mẽ kêp hkra hkêt xwýnhjaja nhũm hte ja hã mẽ omu nê ãm hã mẽ omu nê hã kormã tanhmã mẽ hipêx to hkêt nê.

9 Nê na hte mẽ panhĩpêxã mẽmoj tã mẽ pamã karõ pu htem kuma nê hkôt amnhĩ nhĩpêx. Ja mex. Nom kaxkwa kamã Mẽpahpãm maatija mẽ pahte mar nê hkôt amnhĩ nhĩpêxja na kêt mex kumrêx. Kot puj mẽ ã amnhĩ nhĩpêx anê nê nhýrmã kuri pamex nê pahtĩr tũm nê papa ho papa.

10 Nê mẽhprĩre na htem hamaakro nhũm mẽ hipêêxã tanhmã hã mẽ ho. Hã mẽ hkaprêprêk rý hã mẽ kãm akir. Amnhĩ krã hkôt tanhmã mẽ hipêx to. Mẽ kot ja hã amnhĩ pumunh nê axte hkêt kaxyw. Ja mex. Tã mẽ papajaja. Mẽ pahpê Tĩrtũm kra na pu htem tõiã tanhmã amnhĩ tomnuj to nhũm mẽ pahpumu nê tanhmã hã mẽ pahto. Mẽ pahte amnhĩ pumunh nê axte hkêt kaxyw. Urak nê amnhĩ to mex pix o papa kaxyw. 11 Na hte mẽmoj tã tanhmã mẽ panhĩpêx to pu mẽ tee ri amnhĩ pumu nê pahkaprĩ nê pahkĩnh kêt nê ri papa. Nom kot puj mẽ tokyx tanhmã amnhĩ tomnuj tota kaga nê akupým Tĩrtũm kôt tãm amnhĩ nhĩpêx o papa nê akupým pahkĩnh nê pajamakêtkati nê ri papa.

Mẽ pahte Tĩrtũm kaga hkêt ã mẽ pamã karõ

12 Jakamã e kwa kêr ka mẽ amnhĩ to htýt nê apa. Mẽ kot Kris ã tanhmã mẽ anhĩpêx to htãã. ãm Tĩrtũm kôt pix mã amnhĩ nhĩpêx mex pê akĩnh nê apa. 13 Kêr kê Kris kôt atõjê hõ tee ri mẽmoj tã amnhĩ pumunh kôt ra Tĩrtũm kaga kaxyw tã ã mẽ ate amnhĩ nhĩpêx anhýr ã mẽ apumu nê mẽ apyrã nê akupým hkôt amnhĩ xãm týt nê hkaga hkêt nê.

14 Nê kêr ka mẽ tãm ri axpên nhĩpêx o ri apa. Jao axpên kôt ajamakêtkati nê ri apa nê amnhĩ to mex pix kukamã ajamaxpêr. No kot kaj mẽ

anhÿr kêt nê nhÿrmã mẽ panhõ Pahi Maati hwÿr axàpir nê kuri amex nê apa hkêt nê.

¹⁵ Na hte Tÿrtÿm mẽ pahto mex nê mẽmoj to mẽ pakutã nojarêt rãhã o pa. Jakamã kwa kêr ka mẽ hkaga hkêt nê. Nê tanhmã ri ajamaxpêr punuj to ho ri apa hkêt nê. Kot ka mẽ ã amnhÿ nhÿpêx anê nhÿm Kris kôt mẽ pahkwÿjaja ja hã mẽ apumu nê mẽ apyrã nê tanhmã amnhÿ tomnuj.

¹⁶ Nê kêr ka mẽ axpên kãm apijaàm kêt o ri apa hkêt nê. Nê te finat Ejau kot amnhÿ nhÿpêx pyrãk o ri apa hkêt nê. Na pre Tÿrtÿm ã hpijaàm kêt nê hkwyjê kamã hpijaàm kêt o pa. Nê Tÿrtÿm mã hamaxpêr kêt kumrêx. Kêp Ijak kra kot wa jakamã koja nhÿrmã hipêêxà mÿr pê kêp hikukrêx nê ò pika piitã ho àrÿk pa. Hãmri nhÿm hipêêxà kot ho Tÿrtÿm wÿr nhÿm kot ho mex kaxyw mã tã nhÿm axtem nê mẽmo arÿgro hã kãm prãm xaj kot kêp mẽmoj to àrÿk mã xwÿnhhta htõ Jako mã hkaga hpa. Mãnkwÿrtre gôj kãm ãm prãm xaj kãm hkaga hpa. Jakamã nhÿm Jako hpãnhã te kêp Ijak kra kot wa pyrã nê mÿr pê ò mẽmoj piitã ho àrÿk mã. ¹⁷ Gaa nhÿm Ejau tee ri ã amnhÿ nhÿpêx anhÿrja mã hamaxpêr o hkaprÿ nê. Nê tee ri kãm Jako kot akupÿm kãm mẽmojta nhõr prãm kaprÿ. Nê mur nê hã hipêêxà wÿ no nhÿm axte kãm mẽmoj nhõr kêt nê. Nhÿm kot ho Tÿrtÿm wÿr kaxyw tee ri amnhÿ to kuwÿ no nhÿm kuma nê ãm kuma nê kãm ho anhÿr kêt nê.

¹⁸ Nê amnepê mã Tÿrtÿm kot mẽ panhÿgêxjê mã kapêr kaxyw na prem hixêt prêk pê Sinai jarênhja wÿr akuprõ nê hparpê kuhê. Hãmri nhÿm hixêt nhÿmõk ã kuwy hpõk rax kumrêx. Nê kuwy mÿr ri kakrã htyk ajêt. Nê kòk àpêr tÿx nê. Nhÿm Ijaewjaja hixêt krax ã omu nê kãm maa ho htertet o kuhê. ¹⁹⁻²¹ Hãmri nhÿm mẽhõ pifti kakõ nhÿm Tÿrtÿm hixêt nê mẽ kãm kapêr nê mẽ kãm:

—E mẽ inhma. Kêr ka mẽ hixêt ã axàpir kêt nê. Kot kaj mẽ atõ hã api rÿ mẽ akrit ò hã api ka mẽ ja hã omu nê

kaxyw kên rÿnh kwÿ jamÿ nê ho htak o apÿ. Anê.

Hãmri nhÿm mẽ piitã tee ri kuma nê kãm ma htÿx kumrêx nê amnhÿ nê kãm:

—Kwa hãmri Tÿrtÿm. Axte mẽ inhmã mẽmoj jarênh kêt nê. Mojes pix mã mãn mẽ ixkaxyw tanhmã kãm akapêr to. Anê.

Jakamã nhÿm Mojes Tÿrtÿm mã amnhÿ jarênh nê kapêr mar kaxyw hixêtja ã api. Kãm ma nê htertet rãhã mõ nê hã api. ²² Nom mẽ kãm ma ho Tÿrtÿm mã amnhÿ jarênh tã mẽ papajaja na pu htem mẽ kurom paxãmnhÿx kãm amnhÿ jarênh o papa. Na pu htem kãm amnhÿ jarênh kaxyw nê hixêt prêk ã paxàpir kêt nê. Te ra mẽ pahte ma kaxkwa hwÿr ò krÿ hwÿr paxàpir nê pano ho omunh pê kãm amnhÿ jarênh pyrãk. Ò krÿja mex o mex. Kamã kapêr o mẽ wrÿk xwÿnhjaja ohtõ o ohtõ. Na htem kamã hkÿnh rãhã ho pa ho pa.

²³ Nê ò krÿ hwÿr na hte hkra xàpir xwÿnhjaja ri pa. Nê mẽ papajaja na pu htem kãm amnhÿ jarênh kaxyw nê te kaxkwa kamã kuri pakuhê nê kãm amnhÿ jarênh pyrãk o amnhÿ nhÿpêx. Te mẽ pahpê hkra kot wa pyrãk jakamã mẽ pamã uma hkêt. Nhÿm pre Tÿrtÿm ra ò kagã kamã mẽ pakutêp amnhÿm mẽ panhÿxi hã kagã hpa. Na hte mẽmoj piitã hamãr o hkrÿ. Nê krÿja kamã amnepêm kormã Kris kot mẽ pahwÿr wrÿk kêt ri nhÿm ra amnhÿ kaxyw Tÿrtÿm kôt hamaxpêr mex xwÿnhjaja haxwÿja ra kamã ri pa. Ra Tÿrtÿm kot mẽ ho hkra jakamã nhÿm mẽ kuri ri pa ho pa. ²⁴ Nê Jejus haxwÿja kamã pa ho pa. Na pre mẽ panê htyk nê hkamrõ pikapÿrja o mẽ pahte amnhÿ tomnuj pãnhã amnhÿre. Jakamã na pu htem hkôt amnhÿ xunhwÿ nhÿm mẽ pahto hkra pu mẽ paxãmnhÿx ri Tÿrtÿm mã amnhÿ jarênh nê amnhÿ to hwÿr o papa.

Amnepêm na pre Tÿrtÿm tee ri Kaÿ kot htõ Apew pÿr nê hkamrõ pikapÿrja ã omu nê hamaxpêr o:

—Nà ã kot amnhĩ nhĩpêx anhÿr jakamã kot paj hã homnuj tÿx nê. Anê.

Tã ra hpãnhã Jejus kot mē panê htyk nê hkamrô pikapĩrja ã omu nê ra axtem hamaxpêr o:

—Nà ãm hãmri na Ixkraja mē nê ty. Jakamã mē kot hkôt amnhĩ xunhwÿr xwÿnhjaja kot pa Ixkra kukwak ri mē kot amnhĩ tomnuj mÿrapê tanhmã mē ho hkêt nê.

Anhÿr o mē pakukamã hamaxpêr. ã hamaxpêr anhÿrja mex o mex.

²⁵ Na pre Mojes Tĩrtũm nhÿ hã mē panhĩgêxjê mã xatã mē kãm Tĩrtũm kapêr jarênh o ri pa nhũm mē kuma nê hkôt amnhĩ nhĩpêx o pa. Tã gaa nê ra hã nohkêt pa nê akupÿm mē kot amnhĩ nhĩpêx tũm o awjanã nhũm Tĩrtũm tee ri ja hã mē omu nê mÿrapê tanhmã mē hipêx to. Tã nhũm Kraja kaxkwa rũm mē pahwÿr wrÿ nê mē pamã kapêr. Jakamã kwa mē okora kër pu mē panhĩgêjtê pyrã nê mē pahte amnhĩ nhĩpêx tũm o paxujanãr kêt nê. Kot puj mē anê nhũm Tĩrtũm ja hã mē pahpumu nê mē urak nê ja hã tanhmã mē panhĩpêx to.

²⁶ Amnepêm Tĩrtũm kot hixêr prêk pê Sinai kamã mē kãm kapêrja. Na pre kapêr tÿx o pika ho àk nhũm htertê tÿx nê. Tã koja nhÿrmã axte pika ho àk nê kaxkwa ho àk nhũm wa hamê htertê tÿx kumrêx. Koja axte ho anhÿr ho pixi nê axte ho anhÿr kêt nê. ²⁷ Tã nhÿrmã axte mēmoj to àk ã amnhĩ jarênh jakamã koja mēmoj to kator xwÿnhta piitã ho àk. Nê mē pahte panhĩkra ho mēmoj nhĩpêx xwÿnhja nhũm ho àk nhũm htertê tÿx kãm hpigranh pa nê hapêx. Nhũm mēmoj htertê nê hpigranh kêt xwÿnh pixjaja arĩ rãhã ho rãhã. ²⁸ No Tĩrtũm nhõ krĩ koja htertê nê hapêx kêt nê. Nê mē papajaja mē pahpê hkra jakamã te ra kuri õ krĩ kamã ri mē papa pyrãk. Jakamã kot puj mē mē urak nê pajapêx kêt nê. Jakamã e kwa kër pu mē amnhĩ tã Tĩrtũm mã mex o mex ã harênh nê hã pahpijaãm rãhã ho papa. Nê tanhmã amnhĩ tomnuj to hã amnhĩ pumu nê Tĩrtũm pumaj

mēmojta kaga kurê kumrêx. ã mē pahte amnhĩ nhĩpêx anhÿr o papaja na Tĩrtũm kãm hprãm. ²⁹ Hihtÿx o hihtÿx jakamã koja mēmoj tã akamã gryk kot kaj amex kêt o amex kêt.

13

Mē pahte Tĩrtũm kãm hprãm xà hkôt amnhĩ nhĩpêx ã mē pamã karõ

Rõmãn 12.1-2; Epes 4.1-3; Korosê 1.10-11; Wam Tesarõn 4.1-12; Wam Pêtre 2.11-12; Wam Juãw 3.17-18

¹ Nê e kwa Kris kôt ixtõ nê ixtõxjaja. Kër pu mē arĩ Kris kôt pahkwÿjê ho mex o mãn axpên kôt ri papa. Nê kër pu mē tanhmã pahpunuj to hã amnhĩ pumunh tã axpên to mex mã panhÿrer kêt nê. ã axpên nhĩpêx anhÿr rãhã ho papa.

² Nê amnepê mã na pre mēmojaja nhÿhÿnh mra nê mē panhĩgêjtê hõ hwÿr pøj. Hãmri nhũm mē omu nê htÿx axtem krĩ hõ nhõ xwÿnh ã mē hkamnhix tã no nhũm mē kêp Tĩrtũm kapêr o mē wrÿk xwÿnh kwÿ na prem. Hãmri nhũm amnhĩ nhõrkwy hwÿr mē kuwÿ nhũm mē ma hkôt mra nê kuri pøj nê kutã apku. Jakamã kwa koja nhÿhÿnh krĩ hõ rũm mēmojaja ma mē awÿr mō ka mē omu nê axãmnhix amnhĩ nhõrkwy hwÿr mē hwÿr kurê kumrêx kê mē ari pøj. ã mē hipêx anhÿr o apa hãmri nê nhÿrmã mē panhĩgêjtja pyrã nê amnhĩ wÿr Tĩrtũm kapêr o mē wrÿk xwÿnhjê hõ hwÿr japêr. Mē urak nê ja hã mē omunh kêt tã atÿx amnhĩ wÿr mē awÿ nhũm ja mē amã mex o mex.

³ Nê kër ka mē ra mē kot Jejus ã mē akwÿjê pynênh nê mē hagjênh xwÿnhjê mã ajamaxpêr rãhã ho ri apa nê mē ho ajamakêtkati hkêt nê. Te mē kajaja mē ãhkõ hã mē hagjênh xà kamã apunuj nê akrĩ pyrãk o mē kãm ajamaxpêr o ri apa. Jao mē kamã axukaprĩ ho mē hwÿr mra nê mē kãm mēmoj nhõr o ri apa.

⁴ Nê mē kot axpên to hprõja na mex. Nom kër ka mē amyjaja ãm aprõ pix tãnopxar o ri apa. Nê mē anijaja mē ajaxwÿja amjên pix tãnopxar o ri

apa. No mẽ hkupryjê hwÿr mẽ mrar xwÿnhjaja nê nhãm mẽ kêp mẽ hprô ho amnhĩkati xwÿnhjaja nê nhãm mẽ kêp mẽ mjên o amnhĩkati xwÿnhjaja koja Tirtũm ja hã mẽ omu nê mẽ homnuj tÿx kumrêx.

⁵⁻⁶ Nê kêr ka mẽ akàxpore rũnh kêt ã amnhĩ pumu nê tee ri amnhĩ kukamã ajamaxpêr o akaprĩ hkêt nê. Na pre Tirtũm mẽ pamã kapêr o:

Kot paj akôt ri ixpa rãhã ho ixpa nê aa arer rÿ akaga hkêt kumrêx.

Anhÿr jakamã kot kaj mẽ akàxpore grire htã akaprĩ nê apa hkêt nê. Aa Tirtũm kot mẽ pahkaga hkêt ã amnhĩ jarênh jakamã mẽmoj kot pu wem omu nê pamã nhãm ri mẽ uma ho papa? Tirtũm kot mẽ pahkôt pa ho pa kênã. Jakamã na pu htem pajamaxpêr o:

Nà Pahi Maatija ra kot ixkôt pa ho pa xwÿnh jakamã mẽmo kot pa hkêt ri inhmã uma ho ixpa?

Mẽmo kot kêt ri tanhmã kêp ixto?

Anhÿr o pajamaxpêr o papa. ⁷ Nê mẽ kot Kris mã mẽ ajamãr o mẽ pa xwÿnh ra mẽ htyk xwÿnhjaja ka mẽ arĩ mẽ kot tanhmã amnhĩ nhĩpêx to ho paja mã ajamaxpêr rãhã ho ri apa. Na prem Tirtũm kapêr o mẽ ajahkre mex nê. Nê tãm ri amnhĩ nhĩpêx o ri mẽ akôt pa. Nê amnhĩ kaxyw Tirtũm kôt pix mã hamaxpêr rãhã ty. Tã kêr ka mẽ urak nê ã amnhĩ nhĩpêx anhÿr o ri apa rãhã ty.

⁸ Nê Jejus Krisja arĩ rãhãã. Nê amnepê mã kot amnhĩ nhĩpêxja mããnên arĩ rãhãã. Aa kot amnhĩ nhĩpêxja nhĩjuk ri axtem tanhmã amnhĩ nhĩpêx to hkêt.

⁹ Nê kwa kêr ka mẽ Tirtũm kôt amnhĩ nhĩpêx rãhã ho ri apa. Na hte kapêr o hêx xwÿnhjaja mẽ awÿr mra nê mẽ amã:

—Amnepêm mẽ ate Tirtũm kot mẽ amex ã mẽ ajarênh kaxyw mẽ ate kãm mẽmo mry nhôr nê akupÿm hamÿnh nê hkur o apa htã ra ja hõ anhÿr kaga. Kwa mẽ ja ho awjanã nê axte ã amnhĩ nhĩpêx anhÿr o ri apa. Kê Tirtũm ja hã mẽ apumunh kôt mẽ amex ã mẽ ajarê.

Anhÿr o mẽ amã kapêr. Nom xà na hte Tirtũm ã mẽ pahte amnhĩ nhĩpêx anhÿr ã mẽ pahpumunh kôt mẽ pamex ã mẽ pajarê? Xà na htem mẽmo mẽ apkur xà hkur pê amnhĩ kaxyw Jejus kôt hamaxpêr tÿx o pa? Nà na htem anhÿr kêt nê. Na pu htem mẽmoj kur kôt pamã Tirtũm kĩnh kêt nê. Kêt mẽ paxàpkur xàja mẽ panhĩ pix o hihtÿx kaxyw na. Na hte Jejus kôt mẽ pahto paxihtÿx kêt nê. Æm Tirtũm kot amarĩ kãm mẽ pajapê nê mẽmoj to mẽ pakutã nojarêr jakamã na pu htem ja hã amnhĩ pumu nê amnhĩ kaxyw hkôt pajamaxpêr tÿx o papa.

¹⁰ Tirtũmja Jejus kot mẽ panê htyk ã omunh xà hkôt ra kot mẽ pamex ã mẽ pajarênh jakamã mo kaxyw kot pu mẽ axte kot mẽ pamex ã mẽ pajarênh kaxyw kãm mẽmo mry gõ nê hkwÿ hku? Koja mẽhõ akupÿm Tirtũm kapêr tũm o ujanãr jao Jejus kot nê htyk nê hkamrô pikapĩrja kaga.

¹¹ Amnepêm na pre patre maatijaja tõiã mẽ kãm mẽmo mry hpar xwÿnh hkamrô ru nê guhkrax kãm kuru nê hamÿ nê ma o mra nê Tirtũm nhõrkwÿ kaàkre hwÿr hitom maati hwÿr ho agjê. Tirtũm kot mẽ omunh nê axte mẽ kot amnhĩ tomnuj mã hamaxpêr kêt kaxyw. Hãmri nhũm hpãnhã ã mẽ nê krĩ pê ho kato nê ma o mra nê nhÿri amÿm hkwÿjê hkax ã ho hxêt pa. Tirtũm kapêr tũm kôt na prem ã amnhĩ nhĩpêx anhÿr o pa. ¹² Tã ja pyrã nê na prem ma krĩ pê amÿm Jejus o tẽ nê kupĩ nhũm hkamrô axkapĩ. Kot mẽ pahte amnhĩ tomnuj pãnhã amnhĩrer nê mẽ pahto mẽ pahpê Tirtũm kra kaxyw ã htyk nê hkamrô pikapĩr anê. ¹³ Na prem Tirtũm kapêr tũm gryk ã Jejus kaga nê pòristijê mã anê nhũm mẽ ma krĩ pê ho kato nê o tẽ nê kupĩ. Tã kêr pu mẽ jajê rom Jejus gryk ã mãn Tirtũm kapêr tũm kaga. Kwãr mẽ mãmrĩ Jejus pyrã nê Tirtũm ã tanhmã mẽ pahto nê amnhĩ nê nhÿhÿm mẽ pajano. ¹⁴ Kêt jar mẽ papapxàja kêp mẽ papapxà kumrêx kêt. Nê jar mẽ panhõ krĩja kêp mẽ

panhõ krī kumrêx kêt. Mě pamã te kot pô nhĩrõnh o ixkre pix pyrãk. No kêt mẽ panhõ krī kumrêx koja jar mẽ panhõ krī rom aa hapêx kêt nê. Tã tãm na pu mẽ kormã ma hwỳr papa kaxyw arĩ amnhĩ tã Tĩrtũm jamãr o papa.

¹⁵ Nê na htem Ijaew arĩ ohtõ nê amnhĩ pãnhã Tĩrtũm mã mry hpar ho pa. Nom mẽ papajaja kot puj mẽ axte ã amnhĩ nhĩpêx anhỳr hkêt nê. Kot puj mẽ ãm Jesus kukwak ri Tĩrtũm mã mex o mex ã harênh rãhã ho mãn papa. Jao te mẽ pahte kãm hkĩnh xã nhõr pyrãk o amnhĩ nhĩpêx.

¹⁶ Nê kêt pu mẽ arĩ axpên to mex o ri axpên kôt papa. Nê kê mẽhõ kêt amrakati japêr ka ja hã omu nê amnhĩ kutã kãm anhõ mẽmoj kwỳ. ã kot puj mẽ axpên nhĩpêx anhỳr rãhã ho ri axpên kôt papa. Kot puj mẽ anê nê te mẽ pahte Tĩrtũm mã hkĩnh xã nhõr pyrãk o amnhĩ nhĩpêx. ã mẽ pahte amnhĩ nhĩpêx anhỳrja na mex o mex.

¹⁷ Nê kêt ka mẽ Kris kôt mẽ akrãhtũmjê kapêr ma nê mẽ hkôt amnhĩ nhĩpêx mex nê. Na htem Tĩrtũm mã mẽ ajamãr o ri mẽ akôt pa. Koja mẽ nhỹrmã mẽ kot tanhmã mẽ anhĩpêx to hã Tĩrtũm mã amnhĩ jarê. Jakamã mẽ kãm mẽ ato ajuta prãm. Tã kêt ka mẽ kapêr ma nê mẽ hkôt ri amnhĩ nhĩpêx mex o ri apa. Kêt kê mẽ amnhĩ tã mẽ apumu nê hkĩnh nê. No kot kaj mẽ ama nê ãm mẽ ama nhũm mẽ tee ri amnhĩ tã mẽ apumu nê hkaprĩ nê. Jao tee ri kot tanhmã mẽ ato ajuta mex to hkukamã hamaxpêr.

¹⁸ Nê kwa kêt ka mẽ ixto Tĩrtũm wỳr rãhã ho apa. Inhmã Tĩrtũm noo mã tanhmã amnhĩ tomnuj to hprãm kêt. ãm inhmã amnhĩ to mex pix o ri ixpa hprãm.

¹⁹ Nê kêt ka mẽ ixto awỳ kê tokyx akupỳm mẽ awỳr inhmê. Na pa ra inhmã mẽ apumunh prãm tỳx nê.

Kagà nhĩpêx xwỳnh kot tanhmã mẽ ho Tĩrtũm wỳr to hã harênh

Epes 3.14-19; Piripos 1.0-11; Wam Tesarõn 3.9-13, 5.23; Sikũn Tesarõn 1.11-12, 2.16-17

²⁰ Nê mẽ panhõ Pahihti Jejus Krisja na hte mẽ panhĩpêx o te ôwêhti jamãr xwỳnh kot hkrit jamãr pyrãk o pa. Jakamã kêt mẽ pajamãr xwỳnh maati mex na. Na pre mẽ panê ty nhũm Tĩrtũm akupỳm mẽ pamã ho htĩr nê mẽ pamã harênh o:

—E ra Ixkra kot mẽ anê htyk jakamã kêt ka mẽ ãm ixkapêr nyw kôt pix mã ri amnhĩ nhĩpêx o ri apa. Kot kaj mẽ ã amnhĩ nhĩpêx anê hãmri nê nhỹrmã ty pa akupỳm mẽ ato mẽ atĩr ka mẽ ixri atĩr tũm nê apa ho apa. Anê.

Tĩrtũm kêt mẽ pahto mẽ paja-makêtkati nê ri mẽ papa xwỳnh na.

²¹ Tã na pa hte tanhmã mẽ ato hwỳr to ho ixpa nê mẽ ato hwỳr o:

—Pa Tĩrtũm. E kwa tanhmã ixkwỳjê ho mex to kê mẽ kãm akapêr kôt pix mã amnhĩ nhĩpêx o pa hprãm. Nê mẽ kãm tãm amnhĩ nhĩpêx o pa hprãm. Nê kê Jejus haxwỳja tanhmã mẽ ho mex to kê mẽ war amã hprãm xã hkôt pix mã war amã tanhmã ri amnhĩ nhĩpêx to ho pa. Anê.

E kêt pu mẽ arĩ Jejus Kris mã mex o mex ã harênh rãhã ho papa.

Kagà jatur xã kamã mẽmoj jarênh

²² E Kris kôt ixkrãmnhwỳjaja. Nã na pa ã mẽ amã kagà nhĩpêx anê. Jejus kôt mẽ ato mẽ axihtỳx kaxyw. No na pa ho ry nê hipêx kêt nê. Ixte ho grire nê hipêx jakamã kwa kêt ka mẽ kamã harê nê mar tỳx nê hkôt amnhĩ nhĩpêx mex o ri apa.

²³ Nê mãn ka mẽ ra Ximotre jarênh mar japêr. Na pre Kris ã mẽ hagjênh xã kamã hkrĩ hã apkati xohtõ nê. Tã nhũm xep mẽ ra kator. Tã koja kormã mẽ awỳr inhmõr xwỳj ri man ixwỳr mõi nê hpõx japêr kot paj ma amnhĩ kôt mẽ awỳr o mõi ka mẽ omu.

²⁴ Nê kêt ka mẽ kot Kris mã mẽ ajamãr xwỳnhjê mã ijarê. Nê atar Tĩrtũm krajê piitã mẽ kãm ijarê.

Nê ota jar Tĩrtũm kra hkwỳja piitã mẽ awỳr hpêr mẽ.

²⁵ E kê Tĩrtũm mẽ apiitã mẽ ato mex o pa. Tã ãm ja pix. Na pa ã mẽ amã hã kagà ho anê. Na hapêx.

Xiakre Xiakre kot Jejus kôt hkwÿjê piitã hwÿr kagà nê mēnh

Xiakre na pre kagàja nhîpêx. Kêp Jejus tō nê kêp Jerujarê kamã mē kot Jejus kôt amnhî xunhwÿr xwÿnhjê nhõ pastô na pre. Nê kêp Ijaew. Jakamã na pre hkwÿjê mã kagàja nhîpêx nê krî piitã hkôt urak nê Jejus kôt mē kot amnhî xunhwÿr xwÿnhjê hwÿr kurê. Jejus ã mē kãm mē hkurê xwÿnhjaja na prem mē hipêx kati nhũm mē amnhî xà htÿx kamã hamak o pa. Jakamã nhũm Xiakre kot mē hamaxpêr o mē hihtÿx kaxyw kagàja nhîpêx nê mē hwÿr kurê nê mē kãm:

¹ Pa ixkwÿjaja. Xà mē amex? E ixpê Xiakre na pa. Ixte Tirtûm mē Pahiti Jejus Kris wa kãm tanhmã amnhî nhîpêx to xwÿnh na pa. Jakamã kot paj kagàja nhîpêx nê pika piitã hkôt mē apiitã mē awÿr kurê. Mē apê Tirtûm krajê hwÿr.

Mê pahpunuj tã mê pahte amnhî kaxyw Tirtûm kôt pajamaxpêr

Rukre 6.20-23; Rômãn 5.3-5; Korosê 1.11; Wam Pêtre 4.12-19

²⁻³ E ixkwÿjaja. Kêr ka mē atō tanhmã amnhî to rÿ tanhmã apunuj to. Rÿ mēhõ tanhmã Jejus ã mē anhîpêx to. Tã kêr ka mē ja hã amnhî pumu nê tee ri amnhî kukamã ajamaxpêr o ri akaprî hkêt nê. Arî akînh kãm amnhî kaxyw Tirtûm kôt ajamaxpêr tÿx rãhã ho ri apa. Kot kaj mē ã amnhî nhîpêx anê nê gaa nê rî mēmoj punuj pê Jejus kôt amnhî xunhwÿr tÿx nê. Jakamã kwa kêr ka mē tanhmã apunuj to hã amnhî pumu nê ã mē ate amnhî nhîpêx anhÿrja kukamã ajamaxpêr pê akînh nê ri apa. ⁴ Nom kêr ka mē tee ri tanhmã apunuj to hã amnhî pumu nê akaprî xaj Tirtûm kaga hkêt nê. ãm amnhî kaxyw hkôt ajamaxpêr tÿx rãhã ho ri apa. Kot kaj mē ã amnhî nhîpêx anê

nê gaa nê Tirtûm noo mã tãm amnhî nhîpêx mex o ri apa. Nê kãm hprãm xà hkôt pix mã amnhî nhîpêx o apa.

Mê pahte tanhmã amnhî kute hã amnhî pumunh kôt amnhî to Tirtûm wÿr ã mê pamã karõ

Matêwre 21.18-22

⁵ Nê kêr ka mē mēmoj mÿrapê tanhmã apunuj to hãmri nê tee ri ja hã amã Tirtûm mã ajamaxpêr tÿx prãm nhũm apê ja hihtÿx japêr. Rÿ mēmoj tanhmã apê amnhî nhîpêx to ka tee ri hkukamã ajamaxpêr japêr. Kêr ka mē ã ajamaxpêr anhÿr japêr hãmri nê amnhî to Tirtûm wÿr kurê kumrêx. Kot amã ajamaxpêr mex nhõr nhũm ate ÿ hã tãm ajamaxpêr kaxyw amnhî to awÿ. Kot kaj mē ã amnhî to hwÿr anê nhũm amnhî tã mē ama nê mēmojta kutã tanhmã ato axihtÿx to kurê kumrêx ka ÿ hã hkôt ajamaxpêr tÿx mex o ri apa. Jao tanhmã akute htã akînh nê ajamakêtkati nê ri apa. Koja Tirtûm tee ri amã mēmoj kôt ajamaxpêr tÿx prãm kaprÿ hã apumu nê hã amã ãkjêr kêt nê. Koja ate amnhî to hwÿrta ma nê tanhmã ato mex to. ⁶ Nom kêr ka mē amnhî to hwÿr kãm tee ri amnhî kukamã ajamaxpêr kati hkêt nê. Rÿ ajamaxpêr o:

—Koonên. Koja apu Tirtûm inhmã ja ho anhÿr japêr.

Anhÿr o tee ri amnhî kukamã ajamaxpêr kati hkêt nê. ãm akînh kãm tanhmã ate amnhî to hwÿr toja kukamã ajamaxpêr o:

—Nà koja inhmã ho anê. Ixte amnhî kaxyw kãm ijamaxpêr nê amnhî to hwÿr xà hkôt koja inhmã tanhmã amnhî nhîpêx to.

Anhÿr o hkamnâr rom ã amnhî kukamã ajamaxpêr anê.

Nom kot kaj mē tanhmã amnhî to hwÿr to nê tee ri amnhî kukamã ajamaxpêr kati nê hkôt ajamaxpêr tÿx kêt nê. Nê te kôk nhãm àpêr nê nhãm àpêrta pyrã nê nhãm ri ajamaxpêr nê nhãm ri ajamaxpêrja o hkôt ajamaxpêr kêt nê. Kot kaj mē ã amnhî nhîpêx anê nhũm Tirtûm tee

ri ja hã mẽ apumu nhũm ja kãm mex kêt nê. ⁷⁻⁸ ã mẽ hamaxpêr anhÿr xwÿnhjaja na htem nhãm hamaxpêr nê nhãm hamaxpêr jao hamaxpêr mex kêt nê. Jakamã kot kaj mẽ ã ajamaxpêr anhÿr o amnhĩ to Tĩrtũm wÿhãmri nê ãm amnhĩ to hwÿr kaprÿ. Koja ama nê ãm ama. Nom kot kaj mẽ tanhmã akute hã amnhĩ kaxyw hkôt ajamaxpêr tÿx pê amnhĩ to awÿ. Nê tee ri amnhĩ kukamã ajamaxpêr kati hkêt kãm tanhmã amnhĩ to hwÿr to nhũm amnhĩ tã ama nê hkĩnh nê tanhmã amã mẽmoj nhĩpêx to. Mẽ ate hã axàhwÿr xà hkôt tanhmã mẽ amã mẽmoj nhĩpêx to.

Mẽ kêp amrakati xwÿnh mẽ mẽ kot amnhĩ to rũnh xwÿnhjê jarênh

Eprêw 13.5-6; Wam Pêtre 1.24-25

⁹ Nê kwa mẽ akàxpore hkêt xwÿnhjaja. Jar mẽ apê amrakati htã mẽ apê Tĩrtũm kra na ka mẽ. Jakamã kêr ka mẽ akàxpore rũnh kêt tã mẽ apê Tĩrtũm kra hã amnhĩ pumunh kôt ajamakêtkati nê nê akĩnh nê apa.

¹⁰⁻¹¹ Nê mẽ akàxpore rũnh xwÿnhjaja. Mẽ akàxpore rũnh nê mẽ akukrêx rũnh tã kot kaj mẽ nhÿrmã ty nê piitã rer pa nê mẽ kêp amrakati xwÿnhjê pyrã nê anhÿ kamã Tĩrtũm kuri akrĩ nhũm tanhmã mẽ ajarênh to. Te mẽ apê mẽmo pixôrà kot amnhĩ nhĩpêx pyrãk. Na hte kwÿhtã axpên pê axpôt nê muxre nê mex nê harir. Tã gaa nê rĩ hã myt xàhpanh mẽ nhũm ra nhôore. Nê gaa nê ra grã pa nê rôrôk nê hapêx. Tã kot kaj mẽ nhÿrmã urak nê ty nê akukrêx rer pa. Jakamã kwa kêr ka mẽ akàxpore rũnh pumunh kôt akĩnh nê ri apa hkêt nê. Kêt ãm mẽ apê Tĩrtũm kra hã mãn amnhĩ pumunh kôt akĩnh nê apa.

Mẽ pahpunuj kôt pagryk nê mẽ pahkurê

¹² Nê kot kaj mẽ atõ tanhmã apunuj to htã arĩ amnhĩ kaxyw Tĩrtũm mã ajamaxpêr tÿx rãhã ho ri apa. No tanhmã apunuj to hã amnhĩ pumu nê hkaga hkêt nê. Rÿ kot tanhmã ato xwÿnhhta kêr ka mẽ amnhĩ tã kamã agryk nê tanhmã ho hkêt nê. ãm

Jejus kôt pix mã amnhĩ nhĩpêx rãhã ho ri apa. Kêr kê Tĩrtũm amã hkĩnh ã amnhĩ tã apumu nê amex ã ajarê. Ka nhÿrmã kuri amex kumrêx nê atĩr tũm nê apa ho apa. Ra kot mẽ pakukamã mẽ pahtã amnhĩ jarênh xà hkôt. Jakamã kêr ka mẽ tanhmã apunuj to htã ã amnhĩ kukamã ajamaxpêr anhÿr pê akĩnh nê apa.

¹³ Nê Tĩrtũm aa kãm tanhmã amnhĩ tomnuj to hprãm kêt. Nê mẽ papajaja mẽ pahte tanhmã amnhĩ tomnuj to kaxyw na hte mẽ pamã tanhmã àmnênh to rÿ mẽ pamã mẽ pajamaxpêr punuj jagjênh kêt nê. Jakamã kot ka mẽ atõ amã tanhmã amnhĩ tomnuj to hprãm tã kwa kêr ka Tĩrtũm tãm kot ja kaxyw mẽ akrãm mẽ ajamaxpêr punuj jagjênh to hã hkamnhix kêt nê. ¹⁴⁻¹⁵ Mẽ papamjaja na pu htem pajamaxpêr punuj xà hkôt tanhmã amnhĩ tomnuj to. No Tĩrtũm Karõ na hte mẽ pamã mẽ pajamaxpêr punuj jagjênh kêt nê. Mẽ papamjaja na pu htem pajamaxpêr punuj nê gaa nê ra hkôt tanhmã amnhĩ tomnuj to. Hãmri nê gaa nê ã amnhĩ nhĩpêx anhÿr rãhã ho ri papa. Mẽ kot amnhĩ tomnuj o mẽ pa xwÿnhjaja koja mẽ nhÿrmã ty hãmri nê Tĩrtũm mẽ Kra wa kuri htĩr tũm nê pa ho pa hkêt nê.

Tĩrtũm kot tanhmã mẽ pahto mex to hã harênh

Xiakre 3.17-18; Sikũn Pêtre 1.3-4

¹⁶ Nê e ixkwÿjaja. Tĩrtũm kot mẽ pahte amnhĩ tomnuj prãm xaj mẽ pamã mẽ pajamaxpêr punuj jagjênh kêt jakamã kwa kêr ka mẽ ã ajamaxpêr anhÿr kêt nê. ¹⁷ Na hte mẽ pahto mex pix o pa. Na pre myyti ho kato. Kapêr pix o ho kato. Nê mytwrÿre ho kato. Nê kanhêti ho kato. Ja piitã ho kato nhũm mẽ pamã hirã mex o harir. Na hte mytwrÿre tõiã hirã mex o pa. Nê gaa nê nyw kaxyw nê kamàt kô. Nê gaa nê nyw mẽ nhũm akupÿm hirã. ã na hte amnhĩ nhĩpêx anhÿr o pa. No Tĩrtũmja ã kot anhÿr kêt. Kot amnhĩ nhĩpêxja ãm rãhã ho rãhã. Na hte mẽ pahto mex pix o pa. No tõiã tanhmã mẽ

pahto mex to nhũm jãã nhũm tanhmã mẽ pahtomnuj to hkêt nẽ. ¹⁸ Tã kapër pix o kot ã mẽmoj to kator kot anhÿr. Nẽ mẽ pamã kapër o amnhĩrĩt. Kãm mẽ pahto hkra hprãm xaj mẽ pamã Jejus kot tanhmã mẽ panẽ amnhĩ nhĩpêx toja nhũm pre mẽ pamã ho amnhĩrĩt. Na pu prem kuma nẽ hkôt amnhĩ xunhwÿ nhũm amnhĩ tã mẽ pahpumu nẽ mẽ pahto hkra. Mẽ pahpê Ijaew kumrêxjaja na pre mẽ pahto hkra.

Mẽ pagryk o papa nẽ mẽ pahkurê Rômãn 12.17-21; Epes 4.25-5.2

¹⁹ E ixkwÿjaja. Kwa mẽ ixkapër ma nẽ hã anohtÿx nẽ ho apa. Koja mẽhõ Tĩrtũm kapër o mẽ ajahkre kaxyw mẽ awÿr mõ nẽ mẽ amã kapër jarẽ ka mẽ mar tÿx nẽ. Koja mẽ ate tanhmã amnhĩ tomnuj to nẽ mẽ amã kapër ka mẽ amnhĩ tã ama nẽ kamã agryk kêt nẽ. ²⁰ Mẽ gryk o mẽ pa xwÿnhjaja na htem Tĩrtũm kapër kôt ri amnhĩ nhĩpêx kêt nẽ. ²¹ Jakamã kwa kêt ka mẽ axte amnhĩ tomnuj rÿ ajamaxpër punuj o ri apa hkêt nẽ. Na htem ohtõ nẽ ã amnhĩ nhĩpêx anhÿr o pa nom kêt ka mẽ kurom Tĩrtũm kapër mãn amnhĩ krã him haxàr tÿx nẽ. Kapër o mẽ ajahkre xwÿnhjaja na htem ho mẽ ajahkre mex o pa. Tã kêt ka mẽ ama nẽ amã hkôt amnhĩ nhĩpêx prãm rãhã ho ri apa. Na pu htem Tĩrtũm kapër ma nẽ hkôt amnhĩ nhĩpêx o papa hãmri nẽ nhÿrmã Tĩrtũm mẽ Kra wa kuri pahtĩr tũm nẽ pa mex nẽ papa ho papa.

Mẽ pahte Tĩrtũm kapër kôt amnhĩ nhĩpêx ã mẽ pamã karõ

Matêwre 7.24-27; Wam Juãw 2.3-6

²² Nẽ kwa mẽ okora. Kêt ka mẽ ãm Tĩrtũm kapër ma nẽ ãm mar kêt nẽ. Mããnẽn hkôt amnhĩ nhĩpêx rãhã ho ri apa. Kot kaj mẽ ama nẽ ãm ama nẽ hkôt amnhĩ nhĩpêx kêt nẽ hãmri nẽ apê Tĩrtũm kra hã amnhĩ jarênh kaprÿ. Jao nhÿrmã Tĩrtũm mẽ Kra wa kuri atĩr tũm nẽ apa hkêt nẽ. ²³⁻²⁴ Te ho mẽhõ kot amnhĩ pumunh xà hpyr nẽ kamã amnhĩ pumunh nẽ amnhĩ krã hkĩ jaê rÿ amnhĩ kuk tyk

pumunh pyræk. Tã te kot ãm ja hã amnhĩ pumunh nẽ kot amnhĩ to mex kêt rãhã akupÿm amnhĩ pumunh xà xir nẽ ma htẽm nẽ axte amnhĩ kuk tyk rÿ amnhĩ krã kĩ jaërta mã hamaxpër kêt pyræk. Mẽ kot Tĩrtũm kapër mar nẽ ãm mar nẽ hkôt amnhĩ nhĩpêx kêt xwÿnhjaja te kot ja jarênh pyræk. ²⁵ Tã kêt ka mẽ ã amnhĩ nhĩpêx anhÿr kêt nẽ. Mẽ ate Tĩrtũm kapër kôt amnhĩ nhĩpêx o apa kaxyw xatã kamã harẽ nẽ mar tÿx o apa. Jao hkôt amnhĩ nhĩpêx mex o apa. Tĩrtũm kot mẽ pahte tanhmã amnhĩ nhĩpêx to ho papa hã mẽ pamã karõ xaja ãm hãmri na. Na htem hkôt amnhĩ nhĩpêx nhũm Tĩrtũm ja hã mẽ omu nẽ mẽ ho mex nẽ nhũm mẽ ãmnhix hamakêtkati nẽ hkôt amnhĩ nhĩpêx o pa. ²⁶ Nom koja mẽhõ kêt Tĩrtũm kra hã amnhĩ jarênh tã htÿx ri kapër punuj o ri pa hãmri nẽ ãm kêt hkra hã amnhĩ jarênh kaprÿ. Mẽ pahpê Tĩrtũm krajaja na pu htem ã pakapër anhÿr kêt nẽ. ²⁷ Axtem mẽ pahte amnhĩ nhĩpêx. Na pu htem mẽ hã awrã rÿ mẽ kêt mẽ mjên tyk xwÿnhjê ho mex nẽ mẽ hã pahpër o pahpikênh o papa hkêt nẽ. Nẽ tanhmã mẽ kute hã mẽ omu nẽ mẽ ho ajuta ho papa. Æ na pu htem pahpê Tĩrtũm krajaja amnhĩ nhĩpêx anhÿr o papa nhũm Mẽpanhĩpêxà Maati Tĩrtũm ja hã mẽ pahpumu nẽ hkĩnh nẽ. No na pu htem mẽ kot amnhĩ tomnuj o mẽ pa xwÿnhjê hkôt ri amnhĩ nhĩpêx kêt nẽ ãm Tĩrtũm kapër xà kôt pix mã amnhĩ nhĩpêx nhũm amnhĩ tã mẽ pahpumu nẽ hkĩnh nẽ.

2

Mẽ pahte mẽ piitã mẽ hipêx o axpên pyræk ã mẽ pamã karõ

Rômãn 2.11; Korosẽ 3.25

¹ E ixkwÿjaja. Pahihti Jejus Krisja mex o mex. Tã ra mẽ ate hkôt amnhĩ xunhwÿr jakamã kwa kêt ka mẽ apê hkwy hã mẽ piitã tãm mẽ hipêx o apa. Nẽ mẽ hipêx o axpên pyræk. ² Jakamã kot kaj mẽ nhÿrmã Tĩrtũm kapër mar kaxyw axpên wÿr akuprõ nhũm hikàxpore rax xwÿnhhta mẽ akôt

axà. ê mex nê ôr o ïhkra kamã kàx hãmri nê mẽ akôt axà. Nhũm hkôt mēhō pē amrakati xwýnhja tē nē axà. Nom wamta kīnhã kēp amrakati nē ê omnajti nē pikaxônhti. Hãmri nē hikàxpore rax xwýnhhta hkôt mẽ awýr tēn axà. ³ Tã tanhmã kot kaj wem ri wa hipêx to? Xà kot kaj mẽ wa hipêx o axpēn pyræk nà? Nà xà kot kaj mẽ ã wa hipêx anē nē wam àr xwýnhhta ê mex ã omunh xà hkôt kãm kadēre hō gō nē kãm:

—E ota kadēre. Mãmri hã nhỹ. Anē.

Hãmri nē ê pynajti xwýnhhta pumu nē axtem nē kãm:

—E atar pikap nhỹ.

Anhỹr o ahpýnhã wa kãm akapēr?
⁴ Kot kaj mẽ ahpýnhã ã wa hipêx anē nē amnhĩ tomnuj nē. Wam àr xwýnhhta ka kãm akapēr mex nē tanhmã ho mex to. No hkôt hōta omnajti hã omunh xà hkôt te kamã anhōkre kahak pyræk o hipêx. Kot kaj mẽ ã ahpýnhã wa hipêx anē nhũm Tirtũm tee ri ja hã mẽ apumu nhũm ja kēp omnuj nē. ⁵ Kwa mẽ inhma ixkwýjaja. Mē kēp amrakati xwýnhjaja mẽ hikàxpore hkôt tã na hte mẽ hkwýjaja amnhĩ kaxyw Tirtũm kôt hamaxpēr nē hkôt amnhĩ xunhwý nhũm amnhĩ tã mẽ omu nē kot mẽ panhipêx pyræk nē mẽ ho hkra. Jakamã jar mẽ kēp amrakati htã na htem amnhĩ kaxyw Tirtũm kôt hamaxpēr tỳx rãhã ho pa. Jakamã koja mẽ nhỹrmã kuri htĩr tũm nē mex kumrēx nē pa ho pa. Mē kãm Tirtũm kīnh o mẽ pa xwýnh piitã koja mẽ nhỹrmã ã mex nē ri pa anē. ⁶ Nom kot kaj mẽ ahpýnhã mẽ hipêx nē amnhĩ tomnuj nē. E pa mẽmoj tã mẽ akukja. Mẽmojaja na htem tanhmã mẽ ato hēx to? Nē mẽmojaja na htem juisti mã tanhmã mẽ ato kapēr punuj to? Xà mẽ kēp amrakati xwýnhjaja? Nà mẽ tãm kêt. Mē hikàxpore rũnh xwýnhjaja na htem ã mẽ anhĩpêx anhỹr o pa. ⁷ Nē ra mẽ ate hkôt amnhĩ xunhwýr xwýnhja nhũm mẽ axtem nē tanhmã mẽ apé ho kapēr to ho pa. Tã ka htem mẽ kēp amrakati xwýnhjê rom mẽ kãm akapēr mex nē mẽ kãm kadēre

mex gō nhũm mẽ hã hkrĩ. ⁸ Tirtũm kapēr ã kagà htũm kot ja jarēnh kot:

Kēr ka mẽ piitã mẽ hipêx o te ka amã amnhĩ tã ma pyræk. Anē.

Ã kot mẽ pamã karō kot anhỹr. Kapērja mex kumrēx. Kot puj mẽ ã axpēn nhĩpêx anhỹr jao Tirtũm kãm hprãm xà hkôt amnhĩ nhĩpêx mex nē.

⁹ Nom kot puj mẽ ã amnhĩ nhĩpêx anhỹr kêt nē ahpýnhã tanhmã mẽ hikàxpore rũnh xwýnhjê ho mex to nē ahpýnhã tanhmã mẽ kēp amrakati xwýnhjê nhĩpêx to japēr. Hã kot puj mẽ Tirtũm kapēr htũmta nhĩrôp pakuhê nē amnhĩ tomnuj nē. ¹⁰ Kot pu mẽ kapēr tũm piitã hkôt ri amnhĩ nhĩpêx mex o ri papa htã ãm pixire nē hirôp pakuhê. Jao te pahte kapēr piitã hirôp pakuhê pyræk. ¹¹ Na pre Tirtũm mẽ pahte mẽ pahprō pix tãnopxar o papa hã mẽ pamã karō. Nē mẽ pamjên pix tãnopxar o papa hã mẽ pamã karō. Nē mẽ pahte axpēn par nē mẽ pahkurê. Jakamã kot puj mẽ pahprō pix tãnopxar mex o ri papa japēr. Nē mẽ pamjên pix tãnopxar mex o ri papa japēr tã tanhmã pajamaxpēr to nē pahkwýjê hōxpĩ. Jao te Tirtũm kapēr tũm piitã hirôp pakuhê hpar pyræk o amnhĩ nhĩpêx.

¹²⁻¹³ Koja nhỹrmã Tirtũm mẽ pahĩr ri tanhmã axpēn nhĩpêx to ho papa hã mẽ pahpumunh kôt tanhmã mẽ pajarēnh to. Mē pamã axpēn kīnh ã axpēn to mex o papa hã mẽ pahpumunh kôt mẽ pajarē rỳ mẽ pamã axpēn kīnh kêt ã axpēn nhĩpêx o papa hã mẽ pahpumunh kôt mẽ pajarē. Jakamã mẽ kamã mẽ ukapri kêt xwýnhjaja koja nhỹrmã ja hã mẽ omu nē mẽ uræk nē mẽ kamã ukapri hkôt nē. Nom mẽ kamã mẽ ukapri ho mẽ pa xwýnhjaja koja ja hã mẽ omu nē mẽ uræk nē mẽ kamã ukapri nē mẽ nē mẽ kot amnhĩ tomnuj piitã rēnh pa. Jakamã kwa kēr ka mẽ amnhĩ to mex nē tãm axpēn nhĩpêx o ri axpēn kôt apa. Nē axpēn mã akapēr mex nē axpēn kamã axukapri pix kukamã ajamaxpēr o apa.

Amnhĩ kaxyw Tirtũm kôt mẽ

*hamaxpër xwÿnhjê jarënh**Rukre 3.8-14*

¹⁴ Nê kwa ixkwÿjaja. Koja mēhō kot amnhī kaxyw Jejus kōt hamaxpēr nē hkōt amnhī xām ā amnhī jarënh tā hkōt ri amnhī nhīpêx kêt nê. Hā koja nhÿrmā ty hāmri nē tanhmā kot we amnhī to nē Tirtūm mē Jejus wa kuri htīr tūm nē pa ho pa? Nà koja anhÿr kêt nê. Kêp hkra hā amnhī jarënh tā hkōt amnhī nhīpêx kêt jakamā koja nhÿrmā wa hwÿr āpir kêt nê.

¹⁵ Nê xà koja mēhō kêp amrakati nē ri pa. Nê ê pynajre pix jagjê nē ri hā pa. Nê ō hkêt nē ri kām prām nē pa.

¹⁶ Ka mē ja hā omu nē tanhmā kām akapēr to nē kām:

—Kwa ā amnhī nhīpêx anhÿr kêt nê. Anhōrkwÿ hwÿr tēn axê mex japêr nē axà nē amnhīm mēmoj japêr nē aku. Koja Tirtūm ato mex rax nê.

Anhÿr o kām akapēr tā kām mēmoj nhōr kêt nê. Tā xà koja we ama nē amar xà hkōt ê mex jagjê nē apkur mex o ri pa? Nà kot ka mē ā kām akapēr anē nē ho ajuta hkêt nē nhūm arī kām prām nē ê hkêt nē omnuj nē ri pa. Na htem mē kapêr pix o mē ho mex kêt nê. Kot kaj mē ā kām akapēr anē nē ām kām mēmoj tā karō kaprÿ. ¹⁷ Ja pyrā nē koja mēhō ra amnhī kaxyw Jejus kōt hamaxpēr nē hkōt amnhī xām ā amnhī jarënh tā kapêr kōt ri amnhī nhīpêx kêt japêr. Hā koja ām kêp hkra hā amnhī jarënh kaprÿ.

¹⁸ Nê kot kaj mē atō ā ajamaxpēr anē nē ajamaxpēr o:

—Nà Jejus kwÿjaja na htem ahpÿnhā tanhmā amnhī nhīpêx to ho pa. Na hte mē hkwyjaja amnhī kaxyw Jejus kōt hamaxpēr tÿx pix o ri pa. Nê mē hkwyjaja tanhmā hkwyjê ho mex to ho ri pa. Ā na htem ahpÿnhā tanhmā amnhī nhīpêx anhÿr to ho pa. Anē.

Kwa mē ri ā ajamaxpēr anhÿr kêt nê. Mē hkwyjê ho mex o mē pa xwÿnhjaja na htem Tirtūm hkōt hamaxpēr pē määnēn hkōt amnhī nhīpêx nē hkwyjê ho mex o pa. Koja mēhō amnhī kaxyw Jejus kōt

hamaxpēr hā koja määnēn hkōt amnhī nhīpêx pē tanhmā hkwyjê ho mex to ho pa. Na htem amnhī kaxyw hkōt hamaxpēr pix o pa hkêt nê. Na htem määnēn hkōt mē piitā mē ho mex o ri pa.

¹⁹ Na ka hte mē akwyjaja ā ajamaxpēr anē nē ajamaxpēr o:

—Nà Tirtūmja pyxi mex o pyxi mex. Tā kot paj jam ijamaxpēr rāhā ho ri ixpa nē ra ixpê hkra hā ri ixpa. Nom kot paj kapêr kōt amnhī nhīpêx o ri ixpa hkêt nê.

Anhÿr o ajamaxpēr nē ā ajamaxpēr anhÿr kaprÿ.

Nē ām hāmri na ka htem Tirtūm pyxi mex o pyxi mex ā harê. Nom na htem jam hamaxpēr kōt pix mā kêp hkra hkêt nê. Mēkarōmnutijaja na htem haxwÿja Tirtūm pyxi mex o pyxi mex kōt hamaxpēr tā mē kêp hkra hkêt. Na htem ā hamaxpēr anhÿr pē kām uma ho pa. ²⁰ ā mē ajamaxpēr anhÿrja mex kêt. Koja mēhō amnhī kaxyw Tirtūm kōt hamaxpēr ā amnhī jarënh tā hkōt amnhī nhīpêx o pa hkêt japêr. Hāmri nē ām amnhī kaxyw hkōt hamaxpēr ā amnhī jarënh hkaprÿ. E kot paj ixprī hā mē amā ja jarê ka mē inhma. ²¹ Mē panhīgēt finat Apraāw na pre amnhī kaxyw Tirtūm mā hamaxpēr nē hkōt ri amnhī nhīpêx mex o pa. Tā nhūm amnhī tā kamā hamak kaxyw hkra Ijak ā kuwÿ nhūm kuma nē ra kot kām hpīr nē ōr kaxyw nhūm Tirtūm amnhī tā omu nē amnhīm mex ā harê. Hāmri nē kot hkra hpīr nē kām kapêr. ²² Ra kot amnhī kaxyw hkōt hamaxpēr nē hkōt amnhī xām jakamā määnēn hkōt amnhī nhīpêx nē ra kot kām hkra nhōr kaxyw Tirtūm amnhī tā omu nē amnhīm mex ā harê. Na pre ā finat Apraāw Tirtūm kapêr kōt amnhī nhīpêx mex anhÿr o pa. Jao amnhī kaxyw hkōt hamaxpēr mex ā amnhī to amnhīrīt.

²³ Nê kormā Apraāw wa hkra hkêt ri nhūm Tirtūm wa kām hkra jarê nhūm kuma nē hkra hkukamā amnhī kaxyw Tirtūm kōt hamaxpēr tÿx o pa nhūm amnhī tā omu nē mex ā harê.

Ně kęp hkràmnhwỳ hã harē. Kapēr ā kagā htūm kot ja jarēnh kot:

Na pre Apraāw hkra hkukamā amnhī kaxyw Tīrtūm kôt hamaxpēr tỳx nhūm amnhī tā omu nē amnhīm mex ā harē. Anē.

²⁴ ā na pre finat Apraāwja hkra kaxyw Tīrtūm kôt hamaxpēr anhỳrja o ra hkôt amnhī nhīpēx nē ra kot kām hpīr kaxyw. Nom kop apu amnhī kaxyw hkôt hamaxpēr pix nē hkôt amnhī nhīpēx kêt ronhỹx pre Tīrtūm tee ri amnhī tā omu nē amnhīm mex ā harēnh kêt nē. Na htem amnhī kaxyw Tīrtūm mā hamaxpēr nē mǎānēnh hkôt ri amnhī nhīpēx mex o pa nhūm amnhī tā mẽ omu nē amnhīm mẽ mex ā mẽ harē. ²⁵ Mēhō ni kuprỳ finat Raapja na pre ā amnhī nhīpēx anē nē amnhī kaxyw Tīrtūm kôt hamaxpēr pē tanhmā hkôt amnhī nhīpēx to ho pa. Na pre Ijaew myja wa hamēxkrut nē ma Raap nhō krī hwỳr wa tē. Mē hã ukapi nē kot mẽ hkurē kaxàr kaxyw mẽ hwỳr wa tē. Hāmri nhūm Raap Tīrtūm kot wa mēnh ā wa omunh kurē kumrēx nē pōristi kot tanhmā wa ho pymaj amnhī nhōrkwỳ kamā mẽ kęp wa ho amūxu nē wa nē mẽ kām tanhmā hēx to. Nē hpānhã nhām pry hō hkôt akupỹm wa kumē nhūm wa hkà hkīnh pē ma akupỹm mex nē tē. Hāmri nhūm Tīrtūm wa hã Raap pumu nē amnhīm mex ā harē.

²⁶ Tã kot kaj mẽ atō amnhī kaxyw Tīrtūm kôt ajamaxpēr ā amnhī jarēnh tã hkôt amnhī nhīpēx kêt japēr. Hāmri nē apē hkra hã amnhī jarēnh kaprỳ. Te ra mēhō htyk nē nōr tã nhūm mẽ kot arī htīr ā harēnh kaprỳta pyrāk.

3

Mē kot Tīrtūm kapēr o mẽ ahkre xwỳnhjē jarēnh

¹ Nē kwa Kris kôt ixkwỳjaja. Mē axohtō nē mẽ amā Tīrtūm kapēr o mẽ ahkre hprām tã kormā ja kaxyw mẽ apiitā mẽ amex kêt. Mē ixte Tīrtūm kapēr o mẽ ajahkre xwỳnhjaja kot paj mẽ tanhmā amnhī tomnuj to japēr nhūm Tīrtūm ja hã mẽ ixpumu nhūm ja kęp omnuj nē. Mē ixte kapēr o mẽ

ajahkre ho mẽ ixpa kēnā kot pa hkêt mẽ ri tanhmā amnhī tomnuj to ho ri ixpa. Jakamā kot kaj mẽ Tīrtūm kapēr piitā hkôt ri amnhī nhīpēx mex nē rī kormā ho akwỳjē jahkre ho ri apa.

² Nē mẽ pahpiitā na pu htem tōhã mẽ pajakwa ho tanhmā amnhī tomnuj to. Měmoj tã axpēn kām pagryk nē tanhmā mẽ kām pakapēr punuj to. Nom koja mēhō tanhmā kapēr punuj toja nē amnhī to htỳx nē hāmri nē tām amnhī nhīpēx o pa.

*Mē pajakwa jarēnh
Epes 4.29*

³ Na htem nhỹhỹm kawar o juk kaxyw hakwam kàx jagjē nē kām nhỹhỹm o htēm prām xà hkôt ma nhỹhỹm ho juk o tē. Kàxja hkryre nhūm kawar rūnh tã no nhūm kām ma nhỹhỹm ho mrar prām xà hkôt ho juk o mra.

⁴ Nē gō xujanār kām pàr rūnhhta rūnh tã na hte kók àpēr tỳx nē ma nhỹhỹm o pa. Nē pī ho pàr o juk xàta hkryre htã ma nhỹhỹm ho juk o mō. Nhỹhỹm pàr o mrar xwỳnh kām o mōr prām xà hkôt o mō.

⁵ Ja pyrà nē mẽ pajakwaja hkryre htã na htem ho kapēr o tanhmā mẽ hipēx to ho pa. Tōhã ho kapēr mex nē nhūm mẽ kuma nē hkīnh nē. Nē tōhã ho kapēr punuj nē nhūm mẽ tee ri mẽ kapēr ā mẽ kuma nē hkaprī nē rỳ kapēr xwỳnhhta kamā gryk nē. Mē pajakwa hkryreja te kot kuwy jakrax kryre pyrāk. Kot ka kuwy jakrax grire ho tē nē nhỹri pōti kamā amē nhūm kók ho apē nhūm hpòk rax tokyx anē. Hāmri nē ma pà ho hkaxàr par o mō nē ho hkaxàr pa. ⁶ Mē pajakwaja mã kot anhỳr. Kot kaj atỳx ri tanhmā ho akapēr punuj to nhūm mẽ ama nē axpēn mã anhīxi ho krī nhīpēx ka amex kêt nē apa. Rỳ ka atỳx ri ajakwa ho tanhmā akwỳjē ho akapēr to nhūm mẽ tee ri amnhī tã ama nē hkaprī nē rỳ akamā gryk nē. Satanasti nhỹ hã na htem ā mẽ hakwa ho kapēr punuj anē.

⁷ Na htem tōhã mẽmo mry xoprē pynē nē tanhmā ho nē ra ho kām ma hkêt. Kagã rỳ hagrôre rỳ àati rỳ gôx

kãm mēmo mryja nhũm htem unê nê tanhmã ho nhũm kãm ma hkêt nê mē hkôt pa ho pa. Nom na htem mry piitã ã hipêx anhÿr kêt nê. ⁸ Tã mē pajakwa te mē kot tee ri mēmo mry ho kãm ma hkêt kaprÿ xwÿnhhta pyrãk. Na pu htem amnhĩ krã hkôt pajakwa ho pakapêr mex pix kêt nê. Tanhmã kot puj mē pakapêr punuj kêt kaxyw amnhĩ jakwa hto? Mē pakapêr punuj te kot kagã xoprê kot mē hkamhar nê õ wenên o mē hparta pyrãk. ⁹⁻¹⁰ Na pu htem tõhã pajakwa ho tãm pakapêr nê tõhã pakapêr punuj nê. Nê tõhã Pahi Maati Tirtũm mã mex o mex ã harênh tã ra axtem nê tanhmã mēhõ japrÿ hto. Tirtũm kot mē pahto amnhĩ pyrã nê mē panhipêx tã pu htem axtem nê tanhmã axpên japrÿ hto ho ri papa. Jao te pahte Tirtũm japrÿ pyrãk. Kwa ixkwÿjaja. Kêr pu mē pahpê Tirtũm krajaja ã pakapêr punuj anhÿr hkêt nê. ãm mē pajakwa ho mēmoj mex pix jarênh o ri papa.

¹¹⁻¹² Xà koja pà kamã hinore pyxi htã kamã gô xành nê mãânên kamã gô xenh nõkati? Nà koja anhÿr kêt nê. Na hte kamã gô mex pix nê rÿ kamã gô xenh nõkati pix nê.

Nê xà koja jàaxô hpàr ã rãrãj harir? Rÿ ahkrô xô hã mànkwrÿtre harir? Nà na hte ahpÿnhã hpàr ã harir. Ja pyrã nê kêr pu mē pahpê Tirtũm krajaja pajakwa ho pakapêr punuj pê ho papikamÿr tÿx nê. Nê te hinore kamã gô mex pixta pyrã nê ãmoj mex pix jarênh o ri papa. No mē pajakwa nhĩkjê ho tãm pakapêr nê hikjê ho pakapêr punuj kêt nê. ãm pakapêr mex pix o pakapêr o ri papa. Kwa kêr pu mē ã amnhĩ nhĩpêx anhÿr rãhã ho papa.

Tirtũm kôt mē àhpumunh xwÿnhjê jarênh

Wam Korĩt 2.6-16

¹³ Nê kwa mē axàhpumunh tÿx xwÿnhjaja kêr ka mē amnhĩ to mex o ri apa. Nê mē piitã tãm mē hipêx mex nê mē amã axpên japê hã axpên to ajuta mex o ri apa. Tirtũm kapêr xà hkôt. Kot kaj mē ã amnhĩ nhĩpêx anê nê axàhpumunh mex ã amnhĩ to

amnhĩrĩt. ¹⁴ Nom kot ka mē mēmoj tã axpên kamã agryk o ri apa. Rÿ amnhĩ pix kukamã ajamaxpêr o ri apa hãmri nê ãm ate Tirtũm kapêr kôt amnhĩ nhĩpêx ã amnhĩ jarênh kaprÿ. ¹⁵ ã mē kot amnhĩ nhĩpêx anhÿr xwÿnhjaja na htem Tirtũm kôt amnhĩ nhĩpêx kêt nê. Mē kêp Tirtũm kra hkêt xwÿnh pixjaja na htem ã amnhĩ nhĩpêx anhÿr o pa. Jao mēkarõmnuti kot amnhĩ nhĩpêx kôt pix mã amnhĩ nhĩpêx o pa. ¹⁶ Axpên kamã mē gryk o mē pa xwÿnhjaja na htem amnhĩ pix kukamã hamaxpêr jao tanhmã amnhĩ tomnuj to ho pa. Nê amnhĩ tã mē kamã mē gryk xwÿnhjê homnuj o pa. Tã ã mē pahte amnhĩ nhĩpêx anhÿr pumaj kwa kêr pu mē mēmoj tã axpên kamã pagryk o ri papa hkêt nê. ¹⁷ Mē kot Tirtũm kôt amnhĩ nhĩpêx xwÿnhjaja na htem jajê rom tãm axpên nhĩpêx rãhã o pa.

Nê axpên kamã ukapri pix o ri axpên kôt pa.

Nê tãm hamaxpêr o pa.

Nê mē piitã mē hipêx o axpên pyrãk.

Nê axpên tã hpijaàm o ri pa.

Nê tanhmã ri axpên nõ kupyrtõ hkêt nê.

Nê ri oprê ho pa hkêt nê.

Nê mē axpên kamã õkre kahak kêt nê.

Nê mē piitã mē ho mex o axpên pyrãk.

Nê tãm mē piitã mē hipêx rãhã nê.

ã na htem Tirtũm kôt mē kot amnhĩ nhĩpêx xwÿnhjaja amnhĩ nhĩpêx anhÿr o pa. ¹⁸ Kot puj mē ã amnhĩ nhĩpêx anê nê pajamakêtkati nê paxãmnhĩx pahkĩnh nê ri papa. Nhũm nhÿri mēhõ wa axpên kãm gryk pu mē wa omu rÿ wa harênh ma hãmri nê mē pahtõ ma wa hwÿr tẽ nê wa kãm pakapêr nê tãm akupÿm wa ãm. Hãmri nhũm wa ra mē pahpyrà nê tãm amnhĩ nhĩpêx pê hamakêtkati nê wa ri pa. àmnhĩx ri hkĩnh nê wa ri pa.

4

Mē kot amnhĩ pix kukamã mē

*hamaxpēr xwýnhjê jarēnh**Matêwre 20.20-28; Juãw 16.24*

¹ Nē kwa mon ka hte mẽ akwýjaja axpēn mã akapēr mã agēt o axpēn kām agryk pix o apa? Na ka htem ã amnhĩ nhĩpêx anhÿr o amnhĩ pix kukamã ajamaxpēr. Nē mẽ amã amnhĩ jamaxpēr kôt pix mã ri amnhĩ nhĩpêx prãm. No Tĩrtũm kãm hprãm xà hkôt amnhĩ nhĩpêx prãm kêt nē.
² Na ka htem nhÿri mẽmoj pumu nē tee ri ho amã anhõ hprãm kaprÿ. Nē amã ho anhõ hprãm xàj õ xwýnhhta pĩr nē kēp utàr mã.

Nē na ka htem tanhmã axpēn kukrêx kute hã omu nē amã ho anhõ hprãm nē hã õ xwýnhhta mẽ wa axpu. No mẽ amã hprãm xwýnhhta mẽ ate hõ hã Tĩrtũm wÿr ronhÿx ra mẽ ama nē mẽ amã hõ gõ. Tã mẽ ate hã axàhwÿr kêt jakamã nhũm mẽ amã õr kêt nē.

³ Rÿ ka mẽ tōhã mẽmoj tã awý nhũm kot mẽ amar tã mẽ amã õr kêt nē. Kot mẽ amã õr nhũm mẽ ate ho anhõxy ho apa pymaj na hte tōhã mẽ amã mẽ ate hã axàhwÿr xwýnhhta nhõr kêt nē.

⁴ Kormã mẽ ate hkôt amnhĩ nhĩpêx mex kêt. Te mẽni hõ ra mjên tã nhãm kot mẽhõ my ho amnhĩkati pyræk o na ka htem amnhĩ nhĩpêx o apa. Jao mẽ amã mẽ apê Tĩrtũm kra hprãm tã axtem nē mẽ kãm hprãm kêt xwýnhjê hkôt amnhĩ nhĩpêx o ri apa nē mẽ uræk nē tanhmã amnhĩ tomnuj to ho ri apa. Nē mẽ ate amnhĩ tomnuj gryk ã mẽ amã Tĩrtũm prãm kêt ã amnhĩ to amnhĩrĩt.

⁵ Tĩrtũm kapēr ã kagà htũm kot tanhmã Karõ jarēnh to nē harēnh kot: Na pre Tĩrtũm mẽ pahwÿr amnhĩ Karõ rē nhũm mẽ pahwÿr wry nē mẽ pakamã agjê nē mẽ pahkôt pa ho pa. Mẽ pahte hkôt pix mã amnhĩ nhĩpêx o papaja na kãm hprãm. Anē.

Ãm hãmri ã harēnh kot anhÿr jakamã kwa kēr ka mẽ harēnh ma nē kãm ajamaxpēr tÿx rãhã ho ri apa.

⁶ Na hte Tĩrtũm mẽmoj to mẽ pakutã nojarêt rãhã pu mẽ ÿ hã tãm amnhĩ nhĩpêx o ri papa. Kapēr ã kagà kot ja jarēnh kot:

Mẽ kãm Tĩrtũm kôt amnhĩ nhĩpêx prãm kêt xwýnhjaja na hte Tĩrtũm amnhĩ tã mẽ omu nē mẽ kutã amnhĩ xunhwÿ.

No mẽ kãm hkôt ri amnhĩ nhĩpêx prãm xwýnhjaja na hte amnhĩ tã mẽ omu nē mẽ ho mex o pa nhũm htem hihtÿx xà nhÿ hã mẽ kãm hprãm kêt xwýnhjê hkôt ri amnhĩ nhĩpêx kêt nē. Anē.

⁷ Jakamã kwa kēr ka mẽ Tĩrtũm kapēr kôt pix mã mãn ri amnhĩ nhĩpêx o ri apa. Kēr kē Satanasti tanhmã mẽ ate amnhĩ tomnuj to hprãm xàj tanhmã mẽ ato ka mẽ Tĩrtũm Karõ nhÿ hã ãm ama nē hkôt amnhĩ nhĩpêx kêt nē. Nhũm tee ri amã àhkrox kaprÿ nē akaga nē ma tē.

⁸ Nē kot kaj mẽ Tĩrtũm kapēr kôt pix mã ri amnhĩ nhĩpêx o apa nhũm amnhĩ tã mẽ apumu nē te kot mẽ apa hã mẽ ajamÿnh nē mẽ ato pa pyræk o mẽ anhĩpêx. Jao mẽ ato mex o ri mẽ akôt pa ho pa. Nē mẽ atãnopxar rãhã ka mẽ ajamakêtkati nē akĩnh nē ri apa.

Nē kēr ka mẽ tanhmã amnhĩ tomnuj to hãmri nē tee ri ja hã amnhĩ pumu nē hkaga kurê kumrêx nē axte ã amnhĩ nhĩpêx anhÿr kêt nē. Rÿ ka mẽ tanhmã ajamaxpēr punuj to hãmri nē ja hã amnhĩ pumu nē hkaga nē hpãnhã tãm ajamaxpēr pix o ri apa. Mẽ apê Tĩrtũm kra hã kēr ka mẽ ãm hkôt pix mã ri tãm amnhĩ nhĩpêx o ri apa.

Mẽ pahte amnhĩ tomnuj ã tanhmã amnhĩ nhĩpêx to hã mẽ pamã karõ

Wam Juãw 1.5-10

⁹ Nē kēr ka mẽ tee ri ate tanhmã amnhĩ tomnuj to hã amnhĩ pumu nē akaprĩ xàj mur nē akĩnh kêt nē. Nē akaprĩ xàj amÿr rax nē. ¹⁰ Hãmri nē Tĩrtũm mã amnhĩ jarēnh o:

—Pa Tĩrtũm. Na pa ã amnhĩ tomnuj anē. Nom kot paj axte hkêt nē. Ãm inhmã akapēr kôt pix mã ri amnhĩ nhĩpêx prãm.

Anhÿr o kãm akapēr kē mẽ ama nē mẽ ate amnhĩ tomnujta ã tanhmã mẽ ato hkêt nē. Ãm mẽ ato mex

ně ka mẽ akupỹm ajamakêtkati ně axàmnhĩx akĩnh ně ri apa.

Mě pahte axpẽn to pakapěr ně mẽ pahkurê

Matêwre 7.1-5; Rômãn 2.1-3, 14.10-13; Wam Korĩt 4.5

¹¹ E ixkwỳjaja. Kwa kêr ka mẽ anhĩõ kot tanhmã amnhĩ tomnuj to hã omu ně tanhmã ho akapěr punuj to hkêt ně. Tĩrtũm kapěr ã kagà htũm kot ja ně mẽ pahkurê kamã hihtỳx jakamã kot ka mẽ ri ã amnhĩ nhĩpêx aně ně te ate Tĩrtũm kapěr tũm kwỳ omnuj ã harênh pyrãk. Rỳ te axàhpumunh tỳx o ate Tĩrtũm jakrenh ã amnhĩ to jarkrar pyrãk. Jao kapěr kôt amnhĩ nhĩpêx kêt ně. Na htem Tĩrtũm kapěr ã kagà htũm kwỳ mex ã harê ně hkwỳ omnuj ã harênh kêt ně. Piitã mex kênã.

¹² Ně Tĩrtũmja tapxipix na kêp mẽ pahto amnhĩptàr xwỳnh maati. Ně tapxipix na hte mẽ pahte tanhmã amnhĩ nhĩpêx to hã mẽ pahpumunh hkôt tanhmã mẽ pajarênh to. Mě pahte amnhĩ to mex xwỳnh ã mẽ pajarê rỳ mẽ pahte amnhĩ tomnuj xwỳnh ã mẽ pajarê. ãm tapxipix kot ã mẽ pajarênh kot anhỹr xwỳnh. Tã ka mẽ axtem ně kapěr kwỳm ri tanhmã akwỳjê ho akapěr punuj to ho ri apa.

Mě pahte Tĩrtũm mã pajamaxpěr pê kãm amnhĩ jarênh ã mẽ pamã karõ

Rukre 12.13-21

¹³ E kwa mẽ inhma ixkwỳjaja. Na ka hte mẽ akwỳjaja tanhmã amnhĩ kukamã ajamaxpěr to ně akwỳjê mã amnhĩ jarênh o:

—Koja apkati pa ma krĩ hõ hwỳr mõ ně kamã mẽ kãm ixàpênh o ixpa hã ixtã amgrà pyxi ně hpãnhã kàxpore jamỳnh rax ně man akupỹn mõ.

Anhỹr o amnhĩ jarê. ¹⁴ Kwa mẽ ã amnhĩ kukamã amnhĩ jarênh anhỹr kêt ně. Mě pahtõ mẽ pahte amnhĩ kukamã paxàhpumunh mex? Amrakati kênã. Kot ka mẽ ã amnhĩ kukamã amnhĩ jarênh anhỹr tã kormã ã amnhĩ nhĩpêx anhỹr kêt ri tanhmã amnhĩ to ně ty. Rỳ tanhmã amnhĩ to ně axà hãmri ně nhỹhỹm amõr kêt ně. Te mẽ pahpê namé

pyrãk na pu htem ri papa ně tanhmã amnhĩ to ně ty ně pajapêx tokyx aně. ¹⁵ Jakamã mẽ ã amnhĩ kukamã amnhĩ jarênh anhỹr kêt ně. Kêt amnhĩ jarênh o:

—Koja Tĩrtũm kãm ja prãm koja apkati pa ã amnhĩ nhĩpêx aně ně ã amnhĩ nhĩpêx aně.

Anhỹr o Tĩrtũm kamnàr o tanhmã amnhĩ kukamã amnhĩ jarênh to. ¹⁶ No mẽ ate amnhĩ krã hkôt amnhĩ kukamã amnhĩ jarênhhta Tĩrtũm jamaxpěr xà hkôt kêt. ãm amnhĩ krã hkôt mẽ ate amnhĩ kukamã amnhĩ jarênh kênã. ã mẽ ate amnhĩ jarênh anhỹrja mex kêt.

¹⁷ Ně mẽ kot tãm amnhĩ nhĩpêxja kot kaj mẽ ate mar mex tã hkôt amnhĩ nhĩpêx kêt japêr hãmri ně amnhĩ tomnuj o apa.

5

Mě hikàxpore rũnh xwỳnhjê jarênh Rukre 12.13-21; Wam Ximotre 6.9-10; Apokarip 18.14

¹ Ně kwa mẽ akàxpore rũnh xwỳnhjaja. Mě inhma ně inhmar tỳx ně. Nhỹrmã mẽ amex kêt jakamã kwa mẽ tee ri amnhĩ kukamã ajamaxpěr o ra akaprĩ ně amỳr o apa kurê kumrêx.

² Tĩrtũm noo mã mẽ akàxpore te ra mẽ apê hapêx par pyrãk. Te ra mẽ anhỹ kamã mẽ ate amnhĩ tomnuj xwỳnh ã kutã akrĩ pyrãk. ³ Mě ate mẽ akukrêx ně mẽ akàxpore ho apikuprõnh rũnh tã ka htem mẽ akwỳjê pê ho anhõxỳ ho ri apa. Mỳrapê koja nhỹrmã tanhmã mẽ apê amnhĩ to ně omnu pa ka mẽ ho apikuprõnh rax kaprỳ. Hãmri ně mẽ ate amnhĩ tomnuj mỳrapê Tĩrtũm mẽ Kra wa kuri atĩr tũm ně apa ho apa hkêt ně. ãm kuwy kamã mẽ amnhĩ xà htỳx kamã ajamak rãhã ho ri apa. ⁴ Na ka htem apur kãm mẽ àpênh xwỳnhjê mã amnhĩrer kêt ně. Nhũm mẽ tee ri amnhĩ tã mẽ ajamã hãmri ně mẽ atã amnhĩ to Pahĩ Maati Tĩrtũm xihtỳx xwỳnhhta wỳr o pa nhũm mẽ atã mẽ kuma. ⁵ Mě akĩnhã mẽ kêp amrakati htã ka htem ãm ja hã mẽ omu ně mẽ

àpênh pânãhã mẽ kãm amnhîrer kêt nê amnhî pix kukamã ajamaxpêr. Nê amã prãm xà hpix kukamã amnhîm mẽmoj japrôr pê akînh o ri apa. Jao te mẽ apê môx htwým nhũm mẽ kot hpîr nê hkrêr mã mex ã harênh xwýnhã pyràk. Mýrapê kot kaj mẽ môxta pyrà nê nhýrmã ty hãmri nê Tirtũm mẽ Kra wa kuri atîr tũm nê apa ho apa hkêt nê. ⁶ Nom ja pix kêt. Na ka htem mẽ anhõ krî kamã mẽ anhõ pahi mã tanhmã akwýjê ho axêx to ho ri apa. Mẽ kot tanhmã atomnuj to hkêt tã ka mẽ kãm mẽ ho axêx rũnh nê. Tã koja nhýrmã Tirtũm mẽ hã tanhmã mẽ ato rax kumrêx ka mẽ rî amnhî pumu.

Mẽ pahte Jejus kutêp amnhî kaxyw kãm pajamaxpêr o papa hã mẽ pamã karõ

Sikũn Pêtre 3.1-13

⁷ E ixkwýjaja. Koja mêmõ tanhmã mẽ atomnuj to htã ka mẽ arî amnhî kaxyw Jejus mã ajamaxpêr rãhã ho ri apa. Pê akupýn hpôx xà hã arîgro jamãr rãhã nê. Te pur nhõ dõn kot amnhî nhîpêx pyràk. Koja hpur kãm ahkre nê ahkre hpa hãmri nê arî hamãr o pa nê kãm nojarêt kêt nê hã na wrýk jamãr o pa. Jao hamakêtkati nê ô jamãr rãhã ho pa. ⁸ Tã kêr ka mẽ urak nê arî Pahihti akupýn hpôx xà hã arîgro jamãr rãhã ho ri apa. Koja tokyx akupýn mẽ pahwýr wrý. Jakamã kêr ka mẽ kutêp mẽ kot mẽ atomnuj xwýnhjê kutã amnhî to htýx nê ri apa. Nom tee ri amnhî kukamã ajamaxpêr o Jejus kaga hkêt nê. Arî hamãr pê akînh nê ajamakêtkati nê ri apa. Koja akupýn mẽ pahwýr wrý nê mẽ pahto mex rax kumrêx.

⁹ Nê kêr ka mẽ axpên to akapêr o ri apa hkêt nê. Kot ka mẽ ã amnhî nhîpêx anê nhũm Tirtũm mẽ ama nê tanhmã mẽ ajarênh to. Kot mẽ pahpumunh xà hkôt tanhmã mẽ pajarênh to xwýnh na. Tã ra tanhmã kot mẽ pahpiitã mẽ pajarênh to xà hã arîgroja ra ahtêp o mõ.

¹⁰ E ixkwýjaja. Kêr ka mẽ wam mẽ kot Tirtũm nhý hã kapêr jarênh

xwýnhjaja kot amnhî nhîpêx mã ajamaxpêr rãhã nê. Na prem Tirtũm nhý hã mẽ kãm kapêr o ri mẽ hkôt pa nhũm mẽ hkwyjaja ja hã tanhmã mẽ hipêx to nhũm mẽ amnhî xà htýx kamã hamak rãhã ho pa. Tã tee ri amnhî kukamã hamaxpêr pê Tirtũm kaga hkêt nê. Na prem arî ý hã kapêr jarênh rãhã ho ri mẽ hkôt pa. Tã kêr ka mẽ kot amnhî nhîpêx pyràk o amnhî nhîpêx nê Tirtũm kaga hkêt nê. ¹¹ Na prem amnhî xà htýx kamã hamak o pa rãhã ty hãmri nê Tirtũm kuri mex nê hkînh nê pa ho pa. Ra mẽ ate finat Johti jarênh mar mex. Na pre omnuj týx nê pa htã amnhî tã Pahi Maati Tirtũm kamã gryk nê hkaga hkêt nê. Hãmri nhũm amnhî tã omu nê gaa nê ho mex rax nê nhũm akupým mex kumrêx nê pa. Pahi Maatija ukaprî ho ukaprî nê mex o mex jakamã na pre ã Johti ho mex anê. Tã koja ho mexta pyrà nê ã mẽ pahto mex anê.

Mẽ pahte tanhmã amnhî nhîpêx to hã mẽ pamã karõ

Matêwre 5.33-37, 18.15; Rõmãn 12.15; Karatas 6.1-2; Jutre 22-23

¹² E ixkwýjaja. Pa mẽ amã mẽmoj jarê ka mẽ inhma nê inhmar týx nê. Kêr ka mẽ mẽmoj tã amnhî jarênh kaxyw hãmri nê akatãt kôt amnhî jarênh kurê kumrêx. Nê amnhî jarênh o: “Nà kot paj ja ho anê.” Anê. Rý amnhî jarênh o: “Nà kwarî pa ja ho anhýr kêt nê.” Anhýr o amnhî jarênh kurê kumrêx. Kê mẽ akwýjaja ãm hãmri mẽ ate amnhî jarênh ã mẽ apumunh kurê kumrêx nê axêx ã mẽ akamnhîx kêt nê. Mẽ apê Tirtũm kra kênã kot ka kêt mẽ ri axtem nê amnhî jarênh o axêx.

¹³ Nê koja mẽ anhîõ mẽmoj tã tanhmã amnhî to nê omnuj nê. Ka mẽ ja hã omu nê kãm anê kê amnhî kaxyw Tirtũm mã hamaxpêr pê amnhî to hwýr rãhã ho pa. Rý koja hkînh nê ri pa ka mẽ ja hã omu nê kãm anê kê hkînh kãm mex o mex ã grer o pa. ¹⁴ Rý koja ã nê nõ ka mẽ ja hã omu nê kãm anê kê amnhî wýr pastõ nhý hã mẽ kapêr xwýnh kwýjê

hã karõ. Kê mẽ hwỳr mra nê Jejus nhỹ hã mẽmo twỳm kwỳ ho hkukõ nê ho Tĩrtũm wỳ. ¹⁵ Kê mẽ ã mẽ à xwỳnhjê hwỳr mra nê mẽ ho Tĩrtũm wỳr o pa anê. Koja mẽ ho kuwỳ nhũm mẽ kuma nê akupỹm mẽ ho mex. Nhũm mẽ tanhmã amnhĩ tomnuj to japêr kê mẽ ja hã amnhĩ jarê kê Tĩrtũm mẽ kuma nê ja hã tanhmã mẽ ho hkêt nê. ¹⁶ Jakamã kêr ka mẽ atõ tanhmã amnhĩ tomnuj to nê tee ri ja hã amnhĩ pumu hãmri nê tokyx akwỳjê mã amnhĩ jarê kê mẽ tokyx ato Tĩrtũm wỳ. Kê atã mẽ kuma nê tanhmã akrã hto ka axte ã amnhĩ nhĩpêx anhỹr kêr nê. Nê ra amex nê apa.

Nê koja mẽhõ Tĩrtũm kôt pix mã amnhĩ nhĩpêx mex rãhã ho pa. Hãmri nê mẽmoj tã kuwỳ nhũm kuma nê kãm tanhmã mẽmoj to. ¹⁷ Te finat Eris kot mẽmoj tã hwỳr nhũm kot mar nê kãm ho anhỹrta pyrãk. Erisja kêp mẽ panhĩõ na pre. Tã na pre hkwỳjaja amnhĩ tomnuj pix o pa nhũm tee ri mẽ omu nê mẽ hã na wrỳk kêr kaxyw ho Tĩrtũm wỳr kãm hihtỳx nê. Hãmri nhũm kuma nê kãm ho anê nhũm na wrỳk kêr ry rax kumrêx. Hã amgrã axkrunêpxi nê hkôt mytwrỳ kêp 6. Mẽ kot amnhĩ tomnuj tỳx o paja mỳrapê. ¹⁸ Tã nhũm Eris axte mẽ ho kuwỳ nhũm axte mẽ hwỳr na rê nhũm akupỹm katat kôt wrỳk mex nê. Nhũm akupỹm mẽ hpur kãm mẽ òja mẽ kãm mex nê akupỹm mẽ kãm ô rũnh nê. Tã ã Tĩrtũm kot Eris mar nê kãm mẽmoj nhĩpêx anhỹrja pyrã nê koja mẽ pama nê mẽ pamã mẽmoj tanhmã ho.

¹⁹ Nê e mẽ inhma ixkwỳjaja. Koja mẽhõ Tĩrtũm kapêr mar tỳx nê te kêp hkra pyrãk o amnhĩ nhĩpêx. Tã tanhmã hamaxpêr to nê kapêr kaga nê htỳx ri amnhĩ tomnuj pix o pa. Ka mẽ ja hã omu nê hwỳr mra nê kot amnhĩ tomnuj nê kãm akapêr kãm axihtỳx kê tokyx hkaga nê akupỹm Tĩrtũm kôt amnhĩ xãm tỳx nê ãm hkôt pix mã amnhĩ nhĩpêx. ²⁰ Koja amnhĩ tã mẽ ama nê Tĩrtũm kôt amnhĩ xãm tỳx nhũm amnhĩ tã omu nê kot tanhmã amnhĩ tomnuj tota ho

hamakêtkati nê amnhĩ katut kôt kurê nhũm nhỹrmã kuri htĩr tũm nê mex nê pa ho pa. Koja amnhĩ tomnuj tỳx o pa htã hkaga hpa nhũm Tĩrtũm ja hã omu nê hã tanhmã ho hkêt nê axte tanhmã kot amnhĩ tomnuj tota mã hamaxpêr kêr nê.

Tã ãm ja pix. Ixpê Xiakre na pa ã mẽ awỳr kagã nhĩpêx nê mẽnh anê.

Wam Pêtre Simãw Pêtre kot Jejus kôt hkwýjê hwýr kagà nê mênh

Simãw Pêtre na pre kagàja nhîpêx. Kêp tep pynênh o pa xwýnh tâ hpãnhã kêp Jejus nhý hã hkrajê jahkre ho pa xwýnh. Nê krî pê Jerujarê kamã kêp Jejus krajê nhõ pastô. Na pre krî piitã hkôt Jejus ã mê kãm mê hkurê xwýnhjaja tanhmã hã mê hipêx to nhùm Pêtre mê harênh ma nê mê hamaxpêr o hihtýx kaxyw mê kãm kagàja nhîpêx nê krî piitã hkôt mê hwýr kurê. Mê kot kamã harênh nê mar nê amnhî kamã kahak kêt nê arî Tirtüm kôt amnhî nhîpêx mex o pa kaxyw. Nê Jejus ã mê kot amnhî xà htýx kamã hamak tâ nhýrmã kaxkwa kamã mex nê pa ho pa hã mê kãm awjarê. Æ mê kãm mëmoj jarê nê hã kagà anê. Nê mê kãm:

¹ Pa mê ate Jejus kôt amnhî xunhwýr nhùm Tirtüm kot mê ato hkra xwýnhjaja. Xà mê amex? Ot pa mê awýr kagà nhîpêx nê kumê. Ixpê Simãw Pêtre na pa. Ixte Jejus nhý hã hkrajê jahkre ho mê ixpa xwýnhjê hõ na pa mê awýr kagà nê kumê.

Na xep pre Kris ã mê kãm mê pahkurê xwýnhjaja tanhmã mê anhîpêx to ka mê panhõ pika rüm mê umaj anhrã nê ma ahpýnhã krî hkôt ri apa.

Jao mê akwýjaja ma pika pê Põt kamã krî hkwý hkôt apa.

Nê mê akwýjaja pika pê Karatas wýr apa.

Nê mê akwýjaja pika pê Kapatos wýr apa.

Nê mê akwýjaja pika pê As wýr apa.

Nê mê akwýjaja Pitín wýr apa.

Æ ahpýnhã pika hkôt mê apigrãnh par anê. Tã ot pa mê awýr kagà nhîpêx nê mê apiitã mê awýr kurê. Mê apýnh nê mê ate kamã harênh nê ixkapêr mar kaxyw. ² Na pre Mëpahpãm Tirtümja amnhîm mê pahte amnhî kaxyw kãm

pajamaxpêr xwýnhjê rê nê mê pahtã amnhî jarênh o:

—Kot paj jajê ho ixkra. Na pre ra Ixkra Jejus Kris ixpê mê nê ty nê htyk o hkamrô axkapî nhùm mê harênh ma nê hkôt amnhî xunhwý. Tã nhùm Ixkarõ mê hkarõ mã agjê nhùm mê ra inhmã hprãm xà kôt pix mã ri inhmã tanhmã amnhî nhîpêx to ho pa.

Anhýr o mê pahtã amnhî jarênh. Tã kê mê akutã nojarêr rãhã ho ri mê akôt pa ka mê ý hã axãmnhix aja-makêtkati nê akînh nê ri apa.

Mê pahte amnhî kukamã pajamaxpêr pê pahkînh o papa hã mê pamã karõ

Rukre 12.32-34; Rõmãn 8.18-25; Sikün Korît 4.16-18

³ Nê na pre mê panhõ Pahihti Jejus Krisja ty nhùm Hipêêxã Tirtüm akupým ho htír. Tã kot mê pakutã nojarêr rãhã ho pa jakamã na pre mê pahpê hkrajê mã mê pajamaxpêr nyw jagjê pu mê ý hã pahte amnhî nhîpêx nyw o amnhî nhîpêx o papa. Hãmri nê Jejus akupým htírja mã pajamaxpêr nê amnhî kukamã pajamaxpêr o:

—Kot paj nhýrmã ty nhùm Tirtüm kot Jejus nhîpêx pyrà nê akupým ixto ixtír pa wa kuri ixtír tüm nê inhmex kumrêx rãhã ixpa ho ixpa. Nã koja Æ inhîpêx anê.

Anhýr o pajamaxpêr jakamã kwa kêr pu mê Tirtüm mã mex o mex Æ mãn harênh rãhã ho papa. ⁴ Na ra mê pakutêp õ krî kamã mëmoj piitã ho mex nê. Õ krî kamã mëmoj kot omnu nê hapêx kêt jakamã na pu htem amnhî tâ hamãr rãhã ho papa.

⁵ Nê mê kot Kris ã mê atomnuj mýrapê na ka mê amnhî xà htýx kamã ajamak o ri apa nom arî amnhî kaxyw Tirtüm mã ajamaxpêr rãhã ho ri apa. Hihtýx o hihtýx jakamã koja mê pahkôt pa ho pa nê mê pamã pajamaxpêr o hihtýx rãhã nhùm nhýrmã Jejus akupým mê pahwýr wrý. Hãmri pu mê hkôt ri amnhî nhîpêx mex rãhã ho ri papa. Ra Tirtüm kot mê pakukamã mê pajarênh xà hkôt.

6 Jar mẽ pahte arĩ amnhĩ xà htỳx kãm pajamak o papa htã na pu htem Tĩrtũm nhỹrmã kot mẽ pahto mexta kukamã pajamaxpẽr hãmri nẽ tee ri amnhĩ kukamã pajamaxpẽr kêt nẽ. Mẽ pahpê mẽ pahpunuj tũm nẽ ri papa ho papa mã xwỳnh kêt. ⁷ Na hte Tĩrtũm mẽ panhĩpêx o te mẽ kot ôr nhĩpêx pyrãk. Na htem hprĩ hã tanhmã ôr kute hã omu. Kêp ôr kumrêx ã omu rỳ mẽmoj mẽ ho pihkãr ã omunh kaxyw kuwy kamã kurê. Nhũm piitã ôr nẽ pigãnh pa japêr nhũm mẽ omu nẽ harênh o:

—Nà ãm hãmri. Kêp ôr kumrêx nẽ mẽmoj mẽ ho pihkãr kêt. Anẽ.

Na hte Tĩrtũm ã mẽ panhĩpêx anẽ. Jakamã mẽ pahpê Jesus kôt amnhĩ nhĩpêx o mẽ papa xwỳnhjaja mẽ pahte tũhã tanhmã pahpunuj to htã no nhũm mẽ panê ja rênh kêt nẽ. Na hte amnhĩ tã mẽ pahpumu nẽ hamaxpẽr o:

—Kot paj kormã ja hã mẽ hamã nẽ tokyx akupỹm mẽ ho mex kêt nẽ. Koja mẽ omnuj nẽ pa htã tee ri amnhĩ kukamã hamaxpẽr nẽ ixkaga hkêt nẽ arĩ amnhĩ kaxyw ixkôt hamaxpẽr rãhã ho pa. Hãmri nhũm mẽ hkwyjaja ja hã mẽ omu nẽ mẽ kêp ixkra hã mẽ omunh kurê kumrêx. Te mẽ kot hprĩ hã ôr pumunh nẽ kêp ôr kumrêx ã omunhta pyrãk. Anẽ.

Jakamã kêr pu mẽ arĩ amnhĩ kaxyw hkôt pajamaxpẽr rãhã ho papa. Mẽmo mỳrapê mẽ pahpunuj nẽ ri papa htã arĩ hkôt pajamaxpẽr rãhã nhũm Jesus nhỹrmã akupỹn mẽ pahwỳr wrỳ. Hãmri nhũm Tĩrtũm mẽ pahpumu nẽ mẽ pamã:

—Nà ãm hãmri na ka prem amnhĩ kaxyw ixpix mã ajamaxpẽr rãhã ho ri apa. Mẽ kot ixtã tanhmã mẽ atomnuj to nhũm mẽ ate amnhĩ xà htỳx kamã ajamak o apa htã aa ixkaga hkêt nẽ arĩ amnhĩ kaxyw inhmã ajamaxpẽr rãhã ho ri apa. Nà ãm hãmri mẽ ate amnhĩ to mex kumrêx xwỳnh na ka mẽ. Kot paj mẽ piitã mẽ kãm ja hã mẽ ajarê.

Anhỹr o mẽ pamã kapêr.

Nẽ ôr o mẽ hikukrêxja mex tã koja arĩ mex rãhã hkêt nẽ. Koja mẽhõ kãm tanhmã homnu hto hprãm nẽ homnu hpa. No mẽ papajaja kot puj mẽ arĩ amnhĩ kaxyw Tĩrtũm mã pajamaxpẽr rãhã ho papa hãmri nẽ ôrta pyrã nẽ pajapêx kêt nẽ. Kurom mẽ pamex tũm nẽ aa pajapêx kêt nẽ papa ho papa.

⁸⁻⁹ Nẽ Jesusja aa mẽ ate ano ho omunh kêt tã na ka htem kãm mẽ ajapê htỳx nẽ kot mẽ panê tanhmã amnhĩ nhĩpêx to hã harênh ma nẽ mẽ amã hkĩnh nẽ. Nẽ amnhĩ kaxyw hkôt ajamaxpẽr mex rãhã ho ri apa. Jakamã na pre Tĩrtũm ja hã mẽ apumu nẽ mẽ ato hkra nẽ mẽ apê õ krĩ kamã wa kuri amex nẽ apa mã xwỳnh ã mẽ ajarê. Ja kaxyw na pu prem amnhĩ kaxyw hkôt pajamaxpẽr rãhã jao pahkĩnh nẽ ri papa. Nẽ tee ri tanhmã amnhĩ kĩnh tỳx ã amnhĩ jarênh to hkukamã pajamaxpẽr. Kormã aa ã mẽ pahkĩnh anhỹr kêt tã mẽ pahkĩnh tỳx nẽ ri papa.

¹⁰ Nẽ Tĩrtũm kot mẽ pahto mex pê mẽ panê mẽ pahte amnhĩ tomnuj rênh par nhũm kuri mẽ pahtĩr tũm nẽ mẽ papa hã mẽ pajarênhja. Amnepê mã Tĩrtũm nhỹ hã kapêr jarênh o ri mẽ pa xwỳnhjaja na pre mẽ pakukamã ã mẽ pajarênh anhỹrja ma nẽ tee ri hamaxpẽr nẽ tee ri hã axpên kukjêr o ri axpên kôt pa. Nom hprĩ hã mar mex kêt nẽ. Tã arĩ ri mẽ pakukamã hkwyjê mã ja hã mẽ pajarênh o ri pa.

¹¹ Na pre Tĩrtũm Karõja Kris tyk kukamã mẽ kãm ã mẽ pajarênh anhỹr o amnhĩrĩt. Kormã Kris kaxkwa kamã pa ri. Kormã wrỳk nẽ katorxà nhõxàhkre rũm kator kêt ri nhũm pre hkukamã mẽ kãm tanhmã ho amnhĩrĩt to. Mẽ kot hpĩr nhũm kot amnhĩ xà htỳx kãm hamak kãm mẽ panê htykja ã hkukamã mẽ kãm harênh o amnhĩrĩt. Nhũm Tĩrtũm kot akupỹm ho htĩr nẽ kãm mex o mex ã harênhja nhũm hkukamã mẽ kãm harênh o amnhĩrĩt. No ãm hprĩ hã mẽ kãm mẽhõ nhĩxi hkôt harênh kêt jakamã nhũm prem harênh ma nẽ tee ri hkukamã ri hamaxpẽr nẽ tee ri hã

axpên kujêr o ri axpên kôt pa. Nê hã axpên kujêr o:

–Kwa mēhō koja we ã amnhī nhīpêx anê? Xà koja tokyx ã amnhī nhīpêx anê nà kormã?

Anhÿr o hã axpên kujêr o ri pa. ¹² Hāmri nhūm Tirtūm axte mē kām Jejus jarēnh kwÿ ho amnhīrīt nē mē kām:

–Nà mē anoo mā koja ã amnhī nhīpêx anhÿr hkêt nē. Mē amÿr pê mē akanrēhã mē akra nē mē atāmnhwÿjē noo mā koja kato nē mē hkôt ã amnhī nhīpêx anhÿr o pa. Anē.

Mē papamjaja mē panoo mā kator nē ã kot amnhī nhīpêx anhÿr o paja o ã mē kām ho amnhīrīt anē.

Amnepēm Tirtūm nhÿ hã kapēr o ri mē pa xwÿnhjaja nē jarāhã mē ixte Jejus nhÿ hã mē ahkre ho ri ixpa xwÿnhjaja mē ixkapēr ãm pixii. Na pa htem wamtajē pyrã nē Tirtūm Karō nhÿ hã ahpumunh tÿx xà ho mē amā tanhmã Jejus jarēnh to ho ri mē akôt ixpa. Nhūm hte Tirtūm kapēr o mē wrÿk xwÿnhjaja mē ixkapēr ma nē tee ri hamaxpēr o mē pahpyrã nē kām hprī hã harēnh mar par prām nē.

Mē pahte Tirtūm pyrã nē tām amnhī nhīpêx ã mē pamã karō

Epes 4.1-3; Korosē 1.10-12; Sikūn Pêtre 3.10-13; Wam Juãw 3.1-6

¹³ E kwa Kris kôt ixtō nē ixtōxjaja. Kêr ka mē Jejus kutêp mēmoj punuj kutã amnhī to htÿx rāhã ho ri apa. Nē Tirtūm mā amnhī nhīpêx mex rāhã nē. Pê tām ajamaxpēr nē tām amnhī nhīpêx o apa. Nē mē ã ajamaxpēr anhÿr o:

–Nà koja nhÿrmã Jejus akupÿn mē ixwÿr wrÿ hāmri nhūm Tirtūm ixto mex rax nē. Nà koja ã inhīpêx anē. Anē.

¹⁴ Nē kêr ka mē Tirtūm kapēr kôt pix mā mǎn ri amnhī nhīpêx mex rāhã ho ri apa. Te mēhprīre kot mē hipêêxã kapēr mar nē hkôt amnhī nhīpêx pyrãk. Kormã mē ate Kris kôt amnhī xunhwÿr kêt ri na ka prem ate amnhī nhīpêx tūm kôt ri tanhmã amnhī tomnuj to ho ri apa. ¹⁵ Tã kêr ka mē hpānhã amnhī to mex o mǎn

ajamaxpēr o apa nē Tirtūm pyrã nē amnhī tomnuj o apa hkêt nē. Tirtūmja kot amnhī to mex pix o pa xwÿnh na.

¹⁶ Kapēr ã kagà htūm kot ja jarēnh kot:

Kêr ka mē ixpyrã nē amnhī to mex pix o ri apa. Anē.

¹⁷ Tã koja nhÿrmã kêp Mēpahpām maati hã hprī hã mē pahte amnhī nhīpêx ã mē pahpumunh hkôt tanhmã mē pajarēnh to. Tām mē pahte amnhī nhīpêx kôt mē pajarē rÿ mē pahte amnhī tomnuj kôt mē pajarē. Hāmri nē ahpÿnhã mē panhīpêx. Mē pahto mex nē rÿ mē pahtomnuj nē. Jakamã kwa pu mē nhÿrmã kot tanhmã mē pahtomnuj to pymaj hkôt pix mā amnhī nhīpêx o ri papa rāhã nē.

¹⁸ Nē kormã mē pahte Jejus kôt amnhī xunhwÿr kêt ri na pu prem mē panhīgêt pyrã nē pahtÿx ri amnhī tomnuj o ri papa. Tã nhūm Krisja te amnhīm mē pajaprôr pyrãk o mē panhīpêx. Mē pahte hpānhã kapēr kôt pix mā amnhī nhīpêx o papa kaxyw. No mēmoj to na pre mē pahpānhã amnhīre? Nà ra mē pahte ja jarēnh mar tÿx. Na pre kãxpore ho mē pahpānhã amnhīrer kêt nē. Rÿ ôr o mē hikukrêx ã ohtô ho mē pahpānhã amnhīrer kêt nē. Rÿ prat o mē hikukrêx ã ohtô ho mē pahpānhã amnhīrer kêt nē. Jajaja hapêx tokyx anhÿr mā xwÿnh na. ¹⁹ Na pre ã mē hpānhã amnhīrer anē nē tām mē panê ty nē htyk o amnhī nhī ho mē pahpānhã amnhīrer pa. Nhūm hkamrô axkapī. Te amnepê mā mē panhīgêt kot amnhī pānhã Tirtūm mā ôwêhti hkrare hpar nhūm hkamrô pikapīrta pyrãk. ôwêhti krare mexre pix na prem kām kupa. Mex nē tanhmã kute hkêt xwÿnh pix. Tã Krisja aa tanhmã amnhī tomnuj to hkêt kumrêx nē mē panê ty nē htyk o Tirtūm mā mē pahte amnhī tomnuj piitã hpānhã amnhīrer pa. ²⁰ Amnepê mā kormã mēmoj kêt ri na pre Tirtūm kot ã mē pahpānhã amnhīrer anhÿr kaxyw mē pakukamã kuta nē ãm. Tã nhūm amgrã ohtô nē hapêx nhūm mē

pahwÿr kumê nhùm man mẽ pahwÿr wrÿ. Kot ã mẽ pahpãnhã amnhĩ nhĩpêx anhÿr kaxyw. ²¹ Tã nhùm prem kupĩ nhùm Tĩrtũm akupÿm ho htĩr nê mex o mex ã harê. Mẽ pahte ja hã harênh mar kôt amnhĩ kaxyw Tĩrtũm pix mã pajamaxpêr o ri papa kaxyw. Nê mẽ pahte amnhĩ wÿr Jejus jamãr rãhã ho ri papa kaxyw.

²² Tã pu prem ra kot ã mẽ panê amnhĩ nhĩpêx anhÿr ã harênh ma nê mẽ pahte amnhĩ tomnuj kaga nê hkôt amnhĩ xunhwÿ. Jao amnhĩ to mex pix o ri papa. Nê mẽ pamã Kris kôt mẽ pahkwÿjê hkĩnh o papa. Tã kwa kêr pu mẽ arĩ pamã axpên kĩnh tÿx rãhã ho papa.

Te mẽ pakatorxà rũm mẽ pajapôx pyrãk o axte mẽ pajapôx ã mẽ pajarênh Juãw 3.1-21

²³ Nê na pu prem mẽ pakatorxà nhõxàhkre rũm mẽ pajapôx pyrã nê axte mẽ pajapôx pyrãk o amnhĩ nhĩpêx. Jao ra mẽ pahpê Tĩrtũm kra nê ri papa. Na hte mẽ pakatorxà nê mẽ panhĩpêêxaja wa ri pa nê gaa nê mẽ pahpê ty. No kêt Mẽpanhĩpêêxà maati Tĩrtũmja wa kurom rãhã ho rãhã. Tã ra mẽ pahte amnhĩ kaxyw kapêr kôt pajamaxpêr o pahpê hkra jakamã kot puj mẽ urãk nê nhÿrmã pahpêr tũm nê papa rãhã ho papa.

Nê Tĩrtũm kapêrja Tĩrtũm pyrã nê rãhãã. Koja aa hapêx kêt nê. ²⁴ Kapêr ã kaga htũm kot ja jarênh kot:

Pika piitã hkôt mẽ pa xwÿnhjaja te mẽ kot pōti grã pyrãk.

Nê mẽ kot amnhĩ to mex xàja te kot kapôt ã pixôrà pyrãk.

Na hte pōti tokyx grã nê hapêx.

Nê pixôràja haxwÿja arĩgro htÿx mẽ nhùm grã tokyx anê nê rarak pa nê hapêx.

²⁵ No Tĩrtũm kapêr koja pōti mẽ pixôràta wa kurom aa hapêx kêt nê. Koja arĩ rãhã ho rãhã. Anê.

Tã kapêrja tãm na htem mẽ pamã kamã harê pu mẽ pahpiitã mar o papa.

2

Mẽ pahte Tĩrtũm kot amnhĩ nhĩpêx kôt amnhĩ nhĩpêx ã mẽ pamã karō

Rômãn 12.2; Wam Korĩt 3.16-17; Epes 2.19-22

¹ Nê kwa kêr pu mẽ axte tanhmã amnhĩ tomnuj to ho ri papa hkêt nê.

Rÿ tanhmã axpên mã paxêx to hkêt nê.

Nê paxêx rom tanhmã ri axpên nokupyr to hkêt nê.

Nê mẽmoj tã axpên kãm pagryk kêt nê.

Nê tanhmã axpên japrÿ hto hkêt nê. Kêr pu mẽ ã amnhĩ nhĩpêx anhÿr o papa hkêt kumrêx.

² Mẽ hkaràre na htem ãm kãm pijaôr pix prãm. Nê gaa nê htÿxre nê ra hprêk o mō. Tã kêr ka mẽ pijaôr pix prãm xwÿnhjê pyrã nê amã Tĩrtũm kapêr mar nê hkôt pix mã amnhĩ nhĩpêx o apa hprãm. Jao mar tÿx pê ra hkôt amnhĩ nhĩpêx mex o mō nê gaa nê hkôt amnhĩ nhĩpêx mex o apa. Te mẽ karàre pijaôr nê gaa nê ra hprêk o mōrta pyrãk. ³ Ra mẽ ate Jejus kot mẽ pahto mex ã omunh mex kênã.

⁴ Nê na htem kên o ixkre nhĩpêx kaxyw hãmri nê hkwy kawrà nê ri hkapi. Nhùm hō mex kêt nhùm mẽ tee ri omu nê nhãm kumê. Tã ja pyrã nê na pre mẽ pahkwÿjaja tee ri Kris pumu nê htÿx mex kêt ã hkamnhĩx nê te mẽ kot kên mênhta pyrãk o hipêx nê hkaga. No nhùm Tĩrtũmja amnhĩm Kris mex o mex ã harê. Te ho mẽhō kot kên mex kêt ã hkamnhĩx nê mênh nhùm mẽhō kot mex ã omunh nê amnhĩm mÿnhta pyrãk. Nom Krisja kên rom kêp htĩr tũm nê pa xwÿnh jakamã nhùm pre Tĩrtũm mẽ pakaxyw ãm pu prem hkôt amnhĩ xunhwÿ.

⁵ Nê Tĩrtũm na hte nhÿrmã mẽ pahpêr tũm nê wa kuri mẽ papa mã xwÿnh ã mẽ pajarê. Te mẽ pahpê kên nhùm Tĩrtũm te kot amnhĩ Karō mã mẽ pahto ixkre nhĩpêx pyrãk. Jakamã na hte Jejus Kris tanhmã mẽ pahkrã hto pu mẽ Tĩrtũm kôt amnhĩ nhĩpêx mex rãhã ho ri papa. Nê tanhmã kãm

amnhĩ nhĩpêx mex to nhũm ja hã mẽ pahpumu nê hkĩnh nê.

⁶ Tĩrtũm kapêr ã kagà htũm kot tanhmã Kris jarênh to. Nê hã kuxi nê tanhmã harênh to. Te kêp kên pyrãk ã harê nê harênh kot:

Kot paj nhỹrmã Ijaew wỳr mễhõ mẽ nhũm mẽ hkôt pa ho pa.

Koja te kêp kên o inhõrkwỹ nhĩpêx kaxyw kên maati mex kumrêxta pyrãk.

Koja amnhĩ kaxyw hkôt mẽ hamaxpêr xwỳnhjaja nhỹrmã ma inhõ krĩ hwỳr api nê hkĩnh nê mex rãhã nê pa ho pa. Anê.

⁷ Tã ra amnhĩ kaxyw hkôt mẽ pajamaxpêr xwỳnhjaja. Kên pyrãk xwỳnh pê Jesusja na mẽ pamã mex o mex. No mẽ kot hkaga xwỳnhjaja na htem hamaxpêr punuj xwỳnh ã hkamnhĩx nê hkaga nê kãm hkĩnh kêt nê. Tĩrtũm kapêr ã kagà htũm kot mẽ harênh kot:

Na prem kên o amnhĩm õrkwỹ nhĩpêx kaxyw hkawrà ho pa nê kên maati ja pumu nê htỳx omnuj ã hkamnhĩx nê hkaga.

Mẽ kot hkaga htã nhũm Tĩrtũm mẽ kurom mex o kot kên piitã hakrenh par ã omunh kurê kumrêx. Anê.

⁸ Nê mãnên harênh kot:

Koja mẽ kapêr mar kêt kumrêx.

Te pry kamã kên nõi nhũm mẽ kot nhãm pry nê mễnh kaxyw hkamnãr o amnhĩ par krã hi kukênh pyrãk o koja mẽ amnhĩ nhĩpêx. Anê.

Mẽ kot Kris kapêr mar tã hkôt amnhĩ xunhwỳr kêt jakamã te ho mẽ kot amnhĩ nê kên kamnãr o amnhĩ par krã hi kukênh pyrãk o koja mẽ amnhĩ nhĩpêx. Jakamã koja nhỹrmã Tĩrtũmja ja hã tanhmã mẽ ho htỳx kumrêx. Ra kot amnhĩ kukamã mẽ kãm amnhĩ jarênh xã hkôt. ⁹ No mẽ papajaja na pre Tĩrtũm jajê rom amnhĩ kôt mẽ paxunhwỳ. Nhỹrmã õ krĩ kamã mẽ papa ho papa kaxyw. Nê mẽ pahte mex o mex ã harênh kaxyw. Na pu htem Ijaew nhõ patre pyrã nê Pahi Maati Tĩrtũm mã tanhmã amnhĩ nhĩpêx to ho papa. Nom kormã mẽ

pahte Kris kôt amnhĩ xunhwỳr kêt ri te mẽ pahpê kamàt kô kamã mẽ pahtỳx ri mẽ papa xwỳnh pyrãk. Tã Jesus kôt amnhĩ xunhwỳ nê hpãnhã te mẽ pahpê hirã mex kãm ri mẽ papa xwỳnh pyrã nê tãm amnhĩ nhĩpêx rãhã ho papa. Ra mẽ pahpê Tĩrtũm kra jakamã na pu htem amnhĩ to mex rãhã ho ri papa. Nê Mễpahpãm maati Tĩrtũm mã tanhmã amnhĩ nhĩpêx to ho ri papa. Te mẽ kot mẽ ho àhwỳr xwỳnhjaja kot kãm amnhĩ nhĩpêx o pata pyrãk. ã na pre Tĩrtũm mẽ pahte amnhĩ nhĩpêx anhỳr o papa kaxyw mẽ panhĩpêx.

¹⁰ Amnepêm kormã mẽ pahpê hkra hkêt ri na pre mễhõ mẽ pakamã ukaprĩ hkêt kumrêx pu htem pahpunuj nê ri papa. Tã Jesus kôt amnhĩ xunhwỳ nhũm Tĩrtũm mẽ pahto hkra pu mẽ pahpê hkra hã ri papa nhũm mẽ pakamã ukaprĩ rãhã ho mẽ pahkôt pa.

Mễ pahpê Tĩrtũm mã tanhmã amnhĩ nhĩpêx to xwỳnh ã mẽ pajarênh Rõmãn 13.1-7; Xitre 3.1

¹¹ E ixkrãmnhwỳjaja. Ra mẽ pahpê Tĩrtũm kra jakamã mẽ pahpê õ krĩ nhõ xwỳnh. Te mẽ pahpê jar pika nhõ xwỳnh kêt pyrãk jakamã kwa kêr pu mẽ arĩ mẽ pahte amnhĩ nhĩpêx tũm o amnhĩ nhĩpêx kêt nê. Nê mẽ pajamaxpêr tũm o pajamaxpêr kêt nê. Ra axtem mẽ pajamaxpêr nyw nê axtem mẽ pahte amnhĩ nhĩpêx nyw kênã. Mễ pahte amnhĩ nhĩpêx tũmja te kãm akupỹm mẽ pahte hkôt amnhĩ to paxujanãr prãm pyrãk. Mễ pahte axte hkôt amnhĩ nhĩpêx o ri papa kaxyw. Tã nom kêr pu mẽ anhỳr kêt nê. ¹² E kwa kêr ka mẽ anhõ krĩ kamã akwỳ kot Kris kôt amnhĩ xunhwỳr kêt xwỳnhjê noo mã tãm ri amnhĩ nhĩpêx o ri apa. Mễ kot Kris ã tanhmã mẽ anhĩpêx to rỳ tanhmã hã mẽ ato kapêr punuj to htãã. Kot kaj mẽ ã mẽ hkôt amnhĩ nhĩpêx anhỳr o ri apa hãmri nhũm mẽ tee ri mẽ apumu nê hamaxpêr o:

—Kwa mẽ ixte mẽ kot amnhĩ tomnuj xwỳnh ã mẽ harēnh tã mẽ kot amnhĩ to mex pix xwỳnh na mẽ. Anē.

Hāmri nē nhỹrmã mẽ pahpyrà nē Tĩrtũm kôt amnhĩ xunhwỳ nē kãm mex o mex ã harē nē kãm:

—Kwa Tĩrtũm. Na pre hte akrajaja anhỹ hã amnhĩ to mex rãhã nē pa ho pa pa ja hã mẽ omu. Nà xep amex o amex Tĩrtũm. Anē.

¹³ Nē mẽ apê Pahĩti Jejus Kris kôt amnhĩ nhĩpêx xwỳnh jakamã kêr ka mẽ anhõ krĩ kamã mẽ anhõ pahĩti kapêr ma nē kapêr kôt mãn amnhĩ nhĩpêx mex o ri apa. Nē mẽ anhõ pika kamã mẽ anhõ prêjitēnja ka mẽ kapêr ma nē hkôt amnhĩ nhĩpêx. Mẽ kot mẽ ato amnhĩptàr xwỳnhjaja ka mẽ piitã mẽ kapêr ma nē mẽ kapêr kôt pix mã amnhĩ nhĩpêx rãhã ho ri apa. ¹⁴ Nē mẽ anhõ pahĩ nhỹ hã mẽ kapêr o mẽ pa xwỳnhjaja na htem mẽ akaxyw mẽ unhwỳ. Mẽ kot amnhĩ tomnuj xwỳnhjaja nhũm tanhmã mẽ kot mẽ ho kaxyw. Nē tãm mẽ kot amnhĩ nhĩpêx o ri mẽ pa xwỳnhjaja nhũm mẽ kot mẽ õ pahĩ mã mex ã mẽ harēnh kaxyw. ¹⁵ Tã kêr ka mẽ kapêr ma nē mẽ hkôt tãm amnhĩ nhĩpêx rãhã ho ri apa. Hāmri nhũm mẽ ato kapêr punuj xwỳnhjaja ja hã mẽ apumu nē axte tanhmã mẽ ato kapêr to hkêt nē. ã mẽ ate amnhĩ nhĩpêx anhỹr o apaja na Tĩrtũm kãm hprãm.

¹⁶ Nē mẽ pahpê Tĩrtũm kra jakamã na pu htem paxãmnhĩx kãm tanhmã amnhĩ nhĩpêx to ho ri papa. Nom kêr pu mẽ pahpê hkra hã pahtỳx ri amnhĩ nhĩpêx kêt nē.

¹⁷ Nē kêr ka mẽ piitã mẽ ho mex o ri apa.

Nē mẽ ato amnhĩptàr xwỳnhjê ho mex nē mẽ hã apijaàm rãhã ho ri apa.

Nē mẽ apê Kris kôt mẽ ate axpên to mẽ atõ nē mẽ atõxjê hã amã axpên kĩnh pê axpên to mex nē.

Nē Tĩrtũm ã apijaàm rãhã nē.

Mẽ kãm mẽ apênh xwỳnhjaja kot tanhmã amnhĩ nhĩpêx to hã mẽ kãm

karõ

Epes 6.5-8; Korosẽ 3.22-25; Wam Ximotre 6.1-2; Xitre 2.9-10

¹⁸ Nē mẽ apê mẽ kãm mẽ axapênh xwỳnhjaja kêr ka mẽ anhõ patrãw kapêr ma nē hkôt ri amnhĩ nhĩpêx. Kot mẽ ato mex o pa rỳ mẽ atomnuj o pa htã ka mẽ arĩ mẽ hã apijaàm pê hkôt ri amnhĩ nhĩpêx. ¹⁹ Tanhmã kot mẽ anhĩpêx punuj to htã ka mẽ arĩ kãm axapênh mex rãhã nē. Kêr kê Tĩrtũm ja hã mẽ apumu nē mẽ ato mex nē ka mẽ ajamakêtkati nē axãmnhĩx ri kãm axapênh o apa. ²⁰ Nom kot kaj tanhmã amnhĩ tomnuj to nhũm anhõ patrãw ja hã apumu nē hã atak ka amnhĩ xà htỳx kamã ama nē rĩ amnhĩ pumu. No kot kaj akatàt kôt kãm axapênh mex tã nhũm amarĩ atak japêr tã kêr ka amnhĩ tã kamã agryk kêt nē. Arĩ kãm amnhĩ to htỳx kamã kãm xa nē amnhĩ tã tanhmã ho hkêt nē. Hāmri nhũm Tĩrtũm ja hã apumu nē ato mex nē. ²¹ Amnepêm na pre mẽ pahte hkôt amnhĩ xunhwỳr xwỳnhjaja Kris pyrà nē mẽ paxà htỳx kamã pajamak o papa hkukamã ja hã mẽ pahpumunh mex. Na pre Kris mẽ pakaxyw amnhĩ xà htỳx kãm hamak tỳx tã amnhĩ to htỳx nē mẽ kãm xa. Tã kêr pu amnhĩ xà htỳx kamã pajamak tã y hã urak nē amnhĩ to htỳx nē papa. ²² Krisja aa tanhmã amnhĩ tomnuj to hkêt nē pa ho pa. Nē aa mẽmoj tã amnhĩ to hêx o pa hkêt. ²³ Mẽ kot kãm kapêr punuj tã nhũm amnhĩ tã tanhmã mẽ kãm nē hkêt nē. Nē mẽ kãm kapêr punuj kêt nē. Nhũm prem homnuj tỳx kumrêx nhũm amnhĩ xà htỳx kamã hamak tã amnhĩ tã mẽ kãm àkjêr nē tanhmã mẽ haprỳ hto hkêt nē. Na pre ãm hamaxpêr o: “Nà Tĩrtũm kot ixtã mẽ omunh mex kênã. Koja nhỹrmã mẽ piitã tanhmã mẽ kot amnhĩ nhĩpêx to hã mẽ omunh xà hkôt tanhmã mẽ hipêx to. Tãm koja àhpumunh tỳx xà hkôt tanhmã ixtã mẽ harēnh to. Mẽ kurom àhpumunh tỳx o àhpumunh tỳx xwỳnh kênã.” Anē.

²⁴ Kris na pre te kawà kamã mẽ pahte amnhĩ tomnuj piitã gjênh nē

ho nýt nê htur rãhã pĩ kahpa hã mē panê htyk pyrãk o amnhĩ nhĩpêx. Mē pahte axte tanhmã amnhĩ tomnuj to hkêt prãm xaj. Pãnhã mē pahte amnhĩ to mex pix o ri papa kaxyw. Tã ã kot amnhĩ xà htýx kãm hamak anhÿr o jêt jakamã kot puj mē pahte hkôt amnhĩ xunhwÿr xwÿnhjaja aa mē pahte amnhĩ tomnuj pãnhã amnhĩrer kêt nê. Ra Jejus htyk o kot mē panê amnhĩrer par kênã.

²⁵ Na pu pre te mē pahpê ôwêhti pikunor pyrã nê pahtýx ri papa. Tanhmã amnhĩ tomnuj to rãhã ho ri papa. Tã nhũm Kris te kot ôwêhti jamãr xwÿnh kot ôwêhti pikunor mã katorta pyrãk o mē panhĩpêx. Pu mē hkôt amnhĩ xunhwÿ nê hkôt amnhĩ nhĩpêx mex o ri papa. Jao hkôt papa ho papa.

3

Mē mjên mē mē hprô kot tanhmã axpên nhĩpêx to hã mē kãm karô

Wam Korõt 7; Epes 5.22-25; Korosê 3.18-19; Wam Ximotre 2.9-15

¹ Nê kêr ka mē anijaja mē amjên kapêr ma nê hkôt amnhĩ nhĩpêx. Akĩnhã kormã kot Tĩrtũm kôt amnhĩ nhĩpêx kêt japêr tã arĩ kapêr ma nê hkôt amnhĩ nhĩpêx mex o ri apa. Kê mē ate amnhĩ nhĩpêx ã mē apumu nê mē apyrã nê Kris kôt amnhĩ xunhwÿr japêr. Mē kãm Tĩrtũm kapêr mar prãm kêt tã koja mē ã mē ate amnhĩ nhĩpêx anhÿr ã mē apumunh kôt mē apyrã nê amnhĩ kaxyw hkôt hamaxpêr japêr. ² Na htem mē ate Tĩrtũm kapêr kôt tãm ri amnhĩ nhĩpêx o apa hã mē apumunh o ri mē akôt pa.

³ Jakamã kêr ka mē anijaja amnhĩ mex pix kukamã ajamaxpêr o ri apa hkêt nê. Rÿ ajamaxpêr o:

—Ma kot paj mē hkuxwaxà ho amnhĩ krã hkĩ kuxwa mex nê inhökrexê mex jagjê nê ri hã mra. Nê kupêxê mex kwÿ japrô nê ho amnhĩm ixê mex nhĩpêx hãmri nê hagjê nê ri hã mra. Kot paj ã amnhĩ nhĩpêx anê nhũm mē piitã ja hã ixpumu nê kãm ixkĩnh nê inhmex ã ijarê. Ma kot paj ã amnhĩ nhĩpêx anê.

Anhÿr o ri amnhĩ kukamã ajamaxpêr kêt nê. ⁴ Tĩrtũm na hte ã mē pahte amnhĩ nhĩpêx anhÿr ã mē pahpumu nê ãm hã mē pahpumu. Mē ôkrexê nê mē ê mex na hte hapêx tokyx anê. No mē panhõpinhã kaxwÿnh kãm tãm ri mē pajamaxpêr nê pakamã amnhĩkrit nê papaja. Kot kaj mē ã amnhĩ nhĩpêx anhÿr o ri apa hãmri nhũm Tĩrtũm ja hã mē apumu nhũm ja kãm mex nê. ⁵ Amnepê mã mē pakukamã mē panhõ wôwô nê mē panãjaja. Mē hkwy kot Tĩrtũm kôt amnhĩ nhĩpêx xwÿnhjaja na prem ã amnhĩ nhĩpêx anhÿr o pa. Mē kot mjên kôt amnhĩ nhĩpêx o pa jakamã na prem amnhĩ tã mē omu nê mē ho mex nê kãm mē hapê nê. ⁶ Mē panhõ wôwô finat Saraja na pre ã amnhĩ nhĩpêx anhÿr o pa. Jao mjên Apraãw kapêr ma nê hkôt amnhĩ nhĩpêx. Nê kêp õ pahi hã harê nê hkôt pix mã amnhĩ nhĩpêx o ri pa. Tã kot kaj mē urãk nê amnhĩ to htýx nê ã amnhĩ nhĩpêx anhÿr o apa. Hãmri nê amnhĩ tã amã amjên puma hkêt nê apa nê te apê Sara hkra pyrãk.

⁷ Nê mē amyjaja kêr ka mē tãm mē aprô nhĩpêx o ri mē hkôt apa. Mē akĩnhã mē hihtýx kêt jakamã mē kamã axukaprĩ rãhã ho ri mē hkôt apa. War ajamê war apê Jejus kukwak ri war atĩr tũm nê apa mã xwÿnh jakamã kêr ka mē ho mex rãhã ho ri mē hkôt apa. Tĩrtũm kãm war ajamê war ajapê jakamã kot kaj mē ã mē hipêx anhÿr o ri apa hãmri nê ra axãmnhix mẽmoj tã amnhĩ to Tĩrtũm wÿ nhũm mē amar kurê kumrêx.

Tĩrtũm krajaja kot amnhĩ xà htýx kamã hamak ã mē harênh

Rômãn 12.9-21; Korosê 1.10; Wam Tesarôn 5.14-15

⁸ E Kris kôt ixkrãmnhwÿjaja. Nà ixkapêr jatur xà na ja. Kêr ka mē ri axpên kôt ajamaxpêr mex pê axpên to mex rãhã ho ri apa. Nê mē ate Kris kôt axpên to atô nê atôx ã amã axpên kĩnh o ri apa. Jao axpên kamã axukaprĩ nê mẽmoj to axpên kutã anojarêr rãhã nê. ⁹ Na pu prem Jejus kôt amnhĩ xunhwÿ nhũm Tĩrtũm mē pahto hkra

ně mẽ pahto mex ã amnhĩ jarẽ. Tã koja mēhõ tanhmã mẽ anhĩpêx to rý tanhmã mẽ ato kapêr punuj to. Nom kêr ka mẽ ama nẽ amnhĩ tã tanhmã ho rý tanhmã ho akapêr punuj to hkêt nẽ. ãm te Tĩrtũm kot mẽ panhĩpêx pyràk o mẽ hipêx nẽ mẽ ho mex pix o ri mẽ hkôt apa. Ja na Tĩrtũm kãm hprãm. ¹⁰ Kapêr ã kagà htũm kot ja jarẽnh kot:

Kot kaj mẽ amã amex nẽ akĩnh nẽ ri apa hprãm hã kot kaj mẽ ã amnhĩ nhĩpêx anẽ:

Kot kaj mẽ ri akapêr punuj o ri apa hkêt nẽ.

Nẽ mẽmoj tã amnhĩ to axêx o ri apa hkêt nẽ.

¹¹ Nẽ te mẽ ate amnhĩ katut kôt ate amnhĩ tomnuj rēnh o apa pyrà nẽ hpãnhã amnhĩ to mex pix o ri apa.

Nẽ mẽ amã tãm axpēn nhĩpêx pix prãm o ri axpēn kôt apa.

Nẽ mẽ amã ajamakêtkati nẽ axpēn kôt apa hprãm rãhã ho ri apa.

¹² Na hte Tĩrtũmja ã mẽ kot amnhĩ nhĩpêx anhỹr o pa xwỹnhjê jamãr mex rãhã ho pa.

Nhũm mẽ tanhmã amnhĩ to hwýr to nhũm mẽ mar kurê kumrêx.

No mẽ kot amnhĩ tomnuj o mẽ pa xwỹnhjaja na hte mẽ kutã amnhĩ xãm nẽ ãm mẽ omu nẽ mẽ ho mex kêt nẽ. Anẽ.

Tĩrtũm kapêr ã kagà htũm kot ã mẽ harēnh kot anhỹr.

¹³ Nẽ kot kaj mẽ amã amnhĩ to mex pix o apa hprãm nhũm mēhõ ja hã tanhmã mẽ atomnuj to hkêt nẽ. ¹⁴ No kot kaj mẽ amnhĩ to mex pix o apa htã nhũm mēhõ ja hã apumu nẽ tanhmã hamaxpêr to nẽ atomnuj ka amnhĩ xà htýx kamã ajamak japêr. Tã koja Tĩrtũm nhỹrmã ja hã tanhmã mẽ ato mex to. Jakamã kwa kêr ka mẽ tee ri mēhõ kot tanhmã mẽ atomnuj to hkukamã ajamaxpêr pẽ amã mẽ uma ho ri apa hkêt nẽ. Nẽ tee ri amnhĩ kukamã ajamaxpêr o akaprĩ nẽ ri apa hkêt nẽ. ¹⁵ ãm amnhĩ kaxyw Kris mã mãn ajamaxpêr týx rãhã nẽ mẽ panhõ Pahihti hã apijaàm rãhã ho ri

apa. Nhũm mēhõ ja hã mẽ apumu nẽ tanhmã hã mẽ akukjêr to nẽ mẽ amã:

—Kwa mẽmo kaxyw na ka pre Kris kôt amnhĩ xãm nẽ hkôt ri amnhĩ nhĩpêx o apa? Anẽ.

Ka mẽ ama hãmri nẽ aprĩ hã kãm amnhĩ jarēnh kurê kumrêx. ¹⁶ Nom kêr ka mẽ akapêr mã aprĩ kamã kãm amnhĩ jarẽ. Tĩrtũm kapêr kôt amnhĩ nhĩpêx o apa hã mẽ kãm amnhĩ jarẽ. Koja mẽ Kris ã mẽ ato kapêr punuj rý hã mẽ atã hpêr o axkê nẽ pikunhar japêr ka mẽ ãm amnhĩ tã mẽ ama nẽ ãm mẽ ama. Kwãr mẽ mãmrĩ ã mẽ anhĩpêx anẽ. Kêr ka mẽ amnhĩ tã mẽ omu nẽ arĩ amnhĩ to mex rãhã ho ri apa. Kêr kê mẽ tee ri amnhĩ tã mẽ apumu nẽ hpijaàm nẽ.

¹⁷ Nẽ koja mẽ akwýjaja mẽ ate Tĩrtũm kapêr kôt amnhĩ nhĩpêx mex o apa hã mẽ apumu nẽ hã tanhmã mẽ anhĩpêx to htã kêr ka mẽ arĩ Tĩrtũm kôt amnhĩ nhĩpêx o ri apa. Ja na kãm hprãm. Nom kot kaj mẽ tanhmã amnhĩ tomnuj to nhũm mẽ ja hã mẽ apumu nẽ pahihti mã mẽ ajarẽ nhũm kuma nẽ ja hã tanhmã mẽ amã àkjêr to ka mẽ ra apijaàm nẽ.

¹⁸ Nẽ Krisja na pre mẽ panê ty. ãm htyk tipxi tã mẽ pahpiitã mẽ pahpãnhã amnhĩre. Mẽ pakurom aa kot tanhmã amnhĩ tomnuj to hkêt tã mẽ pahte amnhĩ tomnuj piitã hpãnhã amnhĩrer pa. Mẽ pahte hkôt amnhĩ xunhwýr nẽ nhỹrmã ma Tĩrtũm nhõ krĩ hwýr paxàpir nẽ kamã pahtĩr tũm nẽ papa ho papa kaxyw. Mẽ kot hpĩr tã nhũm Tĩrtũm akupým ho htĩr nhũm htĩr o htĩr. ¹⁹⁻²⁰ Nom kormã akupým htĩr kêt ri na pre hkarõ pix o mẽ htyk xwỹnhjê hwýr mõ. Ahpunu kamã mẽ hkarõ kęp prês nẽ hkrĩ xwỹnhjê hwýr mõ nẽ mẽ kot Noehti kapêr mar nẽ hkôt amnhĩ nhĩpêx kêt nhũm gô htãm kot mẽ hanhir par xwỹnhjê mã kapêr. Tĩrtũm kot nhỹrmã mẽ kot amnhĩ tomnuj mýrapê kuwy maati wýr mẽ rēnh ã mẽ hkukamã mẽ kãm awjarẽ. Amnepêm kormã Noehti kot pàr raxta nhĩpêx o kuhê ri na prem kãm Tĩrtũm kapêr mar prãm kêt nẽ. Nhũm amnhĩ tã mẽ omu nẽ mẽ kamã

gryk tokyx anhÿr kêt nê. Arĩ amnhĩ tã mẽ hamãr o pa. Mẽ kot hkôt amnhĩ xunhwÿr nê hkôt amnhĩ nhĩpêx prãm xàj arĩ mẽ hamãr ry ho pa. No ãm tee ri mẽ hamãr kaprÿ nhũm mẽ amnhĩ kaxyw hkôt hamaxpêr kêt nê htÿx ri amnhĩ tomnuj o pa. Mẽ ãm grêre nê Noehti kapêr ma nê gô htàm pymaj hkôt pàr raxta wÿr agjê. ãm mẽ kêp 8 pix nê hwÿr agjê nhũm gô htàm mẽ hanhir kêt nê. Tĩrtũm na pre mẽ nê omunh mex nê. No mẽ kot amnhĩ tomnuj xwÿnhjaja nhũm gô htàmja mẽ hanhir o mẽ himex pa. Nhũm mẽ kêp 8ja pix arĩ htĩr nê mex nê pàr raxta kamã gô krãhkà hã mex rãhã pa.

²¹ Gô tàmja kêp hprĩ hã mẽ pahte Jejus kôt amnhĩ xunhwÿr ã mẽ pahto amnhĩrĩt xà na. Mẽ pahte amnhĩ nhĩpêx tũm kaga nê hpãnhã amnhĩ nhĩpêx nyw o amnhĩ nhĩpêx o papa hã mẽ pahto amnhĩrĩt xà. Jakamã na htem mẽ pahkrã kumrã. Nom mẽ kot mẽ panê mẽ pagrã kugrãnh kaxyw kêt ra mẽ pahte Jejus kôt amnhĩ xunhwÿr ã amnhĩ to amnhĩrĩt kaxyw na htem mẽ pahkrã kumrã. Ra mẽ pahte Tĩrtũm kapêr kôt amnhĩ nhĩpêx o papa hã amnhĩ to amnhĩrĩt kaxyw. Pu mẽ ra mẽ pahte amnhĩ nhĩpêx nyw o amnhĩ nhĩpêx ã amnhĩ to amnhĩrĩt. Te mẽ pahte gôx kãm mẽ pahte amnhĩ tomnuj rer par pyrã nê hpãnhã amnhĩ nhĩpêx nyw o amnhĩ nhĩpêx o papa.

²² Nê na pre Jejus akupÿm htĩr nê ma akupÿm Tĩrtũm nhõ krĩ hwÿr api nê Tĩrtũm nhĩhkô hã pahihtĩ hã mẽ hkrĩ xà kamã hkrĩ ho hkrĩ. Hãmri nê ra Tĩrtũm kapêr o mẽ wrÿk xwÿnh nê pahĩ piitã mẽ ho amnhĩptàr o hkrĩ.

4

*Mẽ pahte amnhĩ nhĩpêx nyw o amnhĩ nhĩpêx ã mẽ pamã karõ
Epes 4.17-24; Korosê 3.1-11*

¹ Nê na prem Kris pĩ nhũm amnhĩ xà htÿx kãm hamak kãm htyk kaxyw tã arĩ mẽ kãm xa. Ra kot amnhĩ xà hkukamã amnhĩ tã mẽ omunh tã tee ri amnhĩ kukamã hamaxpêr o amnhĩ tã tanhmã ri mẽ kot hpĩr mã xwÿnhjê

homnuj to hkêt nê. Arĩ mẽ kãm xa nhũm prem kupĩ. Tã kêt pu mẽ uràk nê ã amnhĩ nhĩpêx anhÿr o ri papa. Mẽ kot hã tanhmã mẽ panhĩpêx to htã pu mẽ uràk nê amnhĩ xà htÿx kãm pajamak tã tanhmã amnhĩ tã mẽ ho hkêt nê. Na hte ra mẽ htyk nê mẽ hikwÿ xwÿnhjaja axte amnhĩ tomnuj kêt nê. Tã kêt pu mẽ uràk nê axte tanhmã amnhĩ tomnuj to ho ri papa hkêt nê. ² Jakamã kêt pu mẽ axte mẽ pahte amnhĩ nhĩpêx tũm kôt amnhĩ nhĩpêx o papa hkêt nê. Nê mẽ pajamaxpêr tũm kôt axte pajamaxpêr o papa hkêt nê. ãm Tĩrtũm kãm hprãm xà hkôt pix mã tanhmã amnhĩ nhĩpêx to ho papa rãhã ty.

³ Amnepêm kormã mẽ pahte Jejus kôt amnhĩ xunhwÿr kêt ri na pu prem mẽ kêp Tĩrtũm kra hkêt xwÿnhjê hkôt amnhĩ nhĩpêx.

Jao nhãm mênijê pumu nê mẽ kamã pahpijaàm kêt hprãm.

Nê pahpipãnh o ri papa.

Nê mẽ pahpipãnh kaxyw axpên wÿr akuprõ nê mênijê kamã pahpijaàm kêt.

Nê sãnti hwÿr pahkõnkrã ho pahkrĩ nê kãm amnhĩ jagrer.

⁴ Tã Kris kôt amnhĩ xunhwÿ hãmri nê mẽ pahte amnhĩ nhĩpêx nyw o amnhĩ nhĩpêx o papa. Hãmri nhũm arĩ mẽ kot amnhĩ nhĩpêx tũm o amnhĩ nhĩpêx xwÿnhjaja tee ri ja hã mẽ pahpumu nê hêx rom amnhĩ kôt mẽ pamã tanhmã ri àhkrox to ho pa. Pu mẽ axte mẽ hkôt amnhĩ nhĩpêx kêt nhũm mẽ tee ri ja hã mẽ pahpumu nê mẽ pakamã gryk kato nê tanhmã mẽ pahto kapêr punuj to. ⁵ Tã koja Tĩrtũm nhÿrmã amnhĩ wÿr mẽ hã karõ nhũm mẽ ma hwÿr mra nê kutã hkrĩ. Nê kormã mẽ htĩr ri tanhmã mẽ kot amnhĩ nhĩpêx to ho pa hã kãm amnhĩ jarênh pa. Hãmri nhũm mẽ kot amnhĩ nhĩpêx ã tanhmã mẽ hipêx to. Koja mẽ pahpiitã tanhmã mẽ pajarênh to. Mẽ htyk xwÿnhjaja nê kormã mẽ pahĩr nê mẽ papa xwÿnhjaja nhũm mẽ pahpiitã tanhmã mẽ pajarênh to.

⁶ Na pre Jejus ty hãmri nê kormã

akupÿm htîr kêt rāhā hkarō pix o ma amex wÿr tē nē kamā mē htîr ri amnhî kaxyw Tîrtûm mā hamaxpêr xwÿnhjê mā awjarē. Na prem mē kot amnhî tomnuj mÿrapê ra wej nē ty nē arî amex kām ri pa. Jakamā nhûm Jejusja hkarō ho ma mē hwÿr tē nē mē kām:

—E na pa ra mē ate amnhî tomnuj pānhā amnhîrer pa. Tā kormā mē atîr ri mē ate amnhî kaxyw Tîrtûm kôt ajamaxpêr jakamā kot kaj mē ma hwÿr api nē wa ixkuri wa ixpyrà nē atîr tûm nē amex nē apa ho apa. Anē.

Mē pahpê Kris kwÿ hā tanhmā mē pahte axpên nhîpêx to hā mē pamā karō

Rômān 12.6-8; Wam Korît 12.1-11

⁷ Nē koja tokyx mē panhō pikaja mē pahpê hapêx nē kamā mēmoj piitā hapêx pa. Jakamā kwa kêr ka mē ate amnhî nhîpêx ā amnhî pumunh mex o apa.

Nē mē atÿx ri ajamaxpêr ri apa hkêt nē.

Nē mēmoj punuj nē amnhî to htÿx o ri apa ho ajamaxpêr nyw pix o amnhî to Tîrtûm wÿr rāhā ho ri apa.

⁸ Nē kwa kêr ka mē amā axpên kînh o ri axpên kôt apa. Ja na mex o mex. Kot kaj mē ā axpên nhîpêx anē nhûm Kris kôt atō rÿ atōxjê hō tanhmā atomnuj to japêr ka amnhî tā omu nē ām omu. Amā hkînh o ām amnhî tā omu. Jao axte kot tanhmā atoja mā ajamaxpêr kêt nē.

⁹ Nē kêr ka mē axāmnhîx ajamakêtkati nē amnhî nhōrkwÿ hwÿr axpên wÿ nē axpên to mex o ri apa. Nom kêr ka mē agryk kām amnhî wÿr mē hwÿr kêt nē. ¹⁰ Na pre ra Tîrtûm mē pahpê hkra hā ahpÿnhā tanhmā mē pamā mēmoj tā karō hto nē ā mē pahte amnhî nhîpêx anhÿr o papa kaxyw mē pahto mē paxihtÿx. Mē pahte ahpÿnhā tanhmā axpên to mex to ho ri axpên kôt papa kaxyw. Tā kêr ka mē ra kot mēmoj tā mē amā karō hkôt axpên nhîpêx o ri axpên kôt apa. ¹¹ Kojā ma mē ate akwÿjê mā kapêr jarēnh o ri apa kaxyw mē

amā karō ka mē ama nē akatāt kôt ŷ hā mē kām harēnh mex o ri mē hkôt apa. Rÿ tanhmā axpên to ajuta hto ho ri apa kaxyw mē axunhwÿr japêr ka mē amnhî tā omu nē hkamnār rom mē ho ajuta mex rāhā ho ri apa. Mē apiitā Jejus nhÿ hā ā amnhî nhîpêx anhÿr o ri apa. Kêr kê Jejus kôt mē akwÿjaja amnhî tā mē apumu nē mē anhÿ hā Tîrtûm mā mex o mex ā harē.

Jejus kwÿjaja kot amnhî xā htÿx kamā hamak o pa hā mē harēnh

Rukre 6.20-23; Juāw 16.1-4; Sikûn Tesarōn 1.3-12; Sikûn Ximotre 3.13; Eprêw 12.3; Xiakre 1.2-4

¹² E Kris kôt ixkrāmnhwÿjaja. Kojā Kris kwÿ kêt xwÿnhjaja Kris ā tanhmā mē anhîpêx to nom kwa kêr ka mē tee ri amnhî kukamā ajamaxpêr o akaprî nē apa hkêt nē. Kêt mē akînh rāhā axpên kôt ri apa. Na htem ā mē pahpê Kris kwÿjê nhîpêx anhÿr o pa. Jakamā kwa mē amnhî tā mē omu nē tee ri amnhî kukamā ajamaxpêr kêt nē. ¹³ Mē arî akînh nē ri apa. Mē kot Kris pyrà nē mē panhîpêx punuj tādā. Kêr kê Jejus nhÿrmā akupÿn mē pahwÿr wrÿ pu mē omu nē pahkînh tÿx o pahkînh tÿx. ¹⁴ Kwār mē māmri mē pahpê Kris kwÿ hā tanhmā mē panhîpêx to. Na htem ā Tîrtûm Karō kot mē pahkarō mā gjêx xwÿnhjê nhîpêx o pa anē.

¹⁵ Nē mē apê Kris kwÿ jakamā kwa kêr ka mē amnhî to mex rāhā o ri apa.

Jao mē hpar o ri apa hkêt nē.

Nē ri axāhkînh o ri apa hkêt nē.

Nē nhām mē hkaêx mā agjêx o ri apa hkêt nē.

Nē tanhmā mē homnuj to ho ri apa hkêt nē.

Kot kaj mē ā amnhî nhîpêx anhÿr o ri apa nhûm mē anhō pahihtî ja hā tanhmā mē ato ka mē amnhî kamā apijaām tÿx nē. ¹⁶ Nom koja mē apê Kris kwÿ hā tanhmā mē anhîpêx to ka mē ja hā amnhî tā mē omu nē amnhî kamā apijaām kêt nē. Ām Tîrtûm pix mā amnhî jarē nē kām:

—Pa Tîrtûm. Ixpê akra Kris kwÿ hā na mē ā ixtomnuj anē. Nom ixpê akra jakamā kwār mē māmri

tanhmã inhîpêx to. Amex o amex o ate ixto akra jakamã kwâr mē māmri ã inhîpêx anhÿr o pa. Anē.

¹⁷ Nē koja Tirtūm tokyx mē pahpitiã tanhmã mē pahte amnhî nhîpêx to hã mē pahpumu nē tanhmã mē panhîpêx to. Mē pahpê hkrajaja koja tanhmã mē pahte amnhî nhîpêx to hã tanhmã mē pahto mex to. Hãmri nē hpãnhã mē kēp hkra hkêt xwÿnhjê ho hapu nē tanhmã mē hipêx to. Mē kot amnhî kaxyw hkêt hamaxpêr kêt jakamã nhūm mē pahkînhã tanhmã mē homnuj tÿx to. ¹⁸ Kapêr ã kagã htūm kot ja hã mē pajarēnh kot:

Mē kot Tirtūm kapêr kôt amnhî to mex xwÿnhjaja na htem àmnhîx amnhî xà htÿx kamã hamak o pa kamã ty nhūm Tirtūm ma õ krî hwÿr amnhî wÿr mē ho àpir kurê kumrêx.

Nom mē kot amnhî tomnuj xwÿnhjaja koja mē hkînhã amnhî xà htÿx kamã hamak rãhã nē pa ho pa nē aa mex kêt nē. Anē.

¹⁹ Tã koja Tirtūm kãm ja prãm japêr kwâr mē māmri Kris ã tanhmã mē pahptomnuj to. Nom kêr pu mē Tirtūm kamnãr rom amnhî to mex pix o ri papa. Kêp mē panhîpêx xwÿnh maati jakamã ra kot amnhî jarēnh xà hkêt koja tanhmã ri mē pamã amnhî nhîpêx to ho pa.

5

Tirtūm krajaja kot tanhmã amnhî nhîpêx to hã mē kãm karõ

Atre 20.28-31

¹ E kot paj hpãnhã mē apê Kris kwÿ hkrãhtūmjê mã ixkapêr ka mē inhma. Ijaxwÿja ixpê mē akrãhtūmjê hõ na pa. Na pa pre mē akurom Kris htyk kãm omu. Nom kot puj mē nhÿrmã pahpimràatã mex o mex ã omu nē urak nē mē pamex nē ri papa ho papa. ²⁻³ Jakamã e Kris kôt mē hkrãhtūmjaja kêr ka mē atar Kris kôt pahkwÿjê jamãr mex nē. Ra Tirtūm kot mē ate kãm hkwyjê jamãr kaxyw mē axunhwÿr jakamã kêr ka mē omunh mex rãhã ho mē hkêt ri apa. Te ho ôwêhti jamãr xwÿnh kot

ôwêhti jamãr mexta pyrãk. Te mē kēp Tirtūm krit ôwêhti nhūm mē ate kãm mē hamãr o apa xwÿnh pyrã nē kãm mē omunh mex rãhã ho ri mē hkêt apa. Nē akînh pê tanhmã ri mē ho ajuta hto ho ri mē hkêt apa. Ja na Tirtūm kãm hprãm. Nom kêr ka mē ano hkã karôt kãm mē ho ajuta hkêt nē. Rÿ kãxpore hprãm xaj mē kãm tanhmã amnhî nhîpêx to hkêt nē. ãm amarî tanhmã mē kutã anojarêt to pix kukamã ajamaxpêr o ri mē hkêt apa.

Nē kêr ka mē kãm mēmoj tã karõ kamã axihtÿx kêt nē. Mē akapêr mã aprî kamã mē kãm mēmoj jarê kē mē amnhî tã mē apumu nē mē apyrã nē ã axpēn nhîpêx anhÿr o pa.

⁴ E kêr ka mē ã Kris kôt mē akwÿjê jamãr mex pê mē hipêx o apa anē. Hãmri nhūm mē pajamãr xwÿnh maati ja hã mē apumu nē nhÿrmã akupÿn mē pahwÿr wrÿ nē mē ato mex rax nē.

⁵ Nē e mē amy xaptãr nywjaja. Kêr ka mē Kris kôt mē akrãhtūmjê kapêr ma nē mē hkêt ri amnhî nhîpêx mex o ri apa.

Nē kwa kêr ka mē apiitã axpēn nhîpêx o te anhîõ kot amnhî to rax o ajakrenh pyrãk. Tirtūm kapêr ã kagã htūm kot ja jarēnh kot:

Mē kot amnhî to jarkrar o ri mē pa xwÿnhjaja na hte Tirtūm mē kutã amnhî xunhwÿ.

No mē kot amnhî to hkryre nē axpēn tã hpijaãm o mē pa xwÿnhjaja na hte mē ho mex o pa.

⁶ Anhÿr ã mē harēnh jakamã kwa kêr ka mē Tirtūm ã apijaãm rãhã ho ri apa ixkwÿjaja. Nē axpēn mã ri amnhî to jarkrar o ri apa hkêt nē. Kêr kē Tirtūm xihtÿx xwÿnhja ja hã mē apumu hãmri nē nhÿrmã kot mē pahto mex xã hã arÿgroja kato nhūm mē ate amnhî to mex xwÿnh ã mē ajarē nē mē ato mex rax nē.

⁷ Nē kêr ka mē tee ri amnhî kukamã ajamaxpêr pê akapri ho ri apa hkêt nē. ãm te mē ate Tirtūm mã akapri nhõr pyrãk o amnhî nhîpêx nē axãmnhîx akînh nē akapri hkêt nē

apa. Tirtûm kêp mē pajamār xwýnh maati kēnā kot ka kêt mē ri akapri nē ri apa.

⁸ Nē kwa mē okora. Kêr ka mē amnhî nē kot mē pakutā amnhî xunhwýr xwýnh maati Satanastija pumunh mex rāhā ho ri apa. Na hte mē panhîpêx o te ropkror kot akunî kamā mry ho krihkrit o ri mrar pyrāk o mē panhîpêx. Jao mē pahte Kris kaga hprām xāj apkati mē tanhmā nē mē pahto ho ri mē pahkôt pa. ⁹ Na hte ā pika piitā hkôt Kris kôt mē pahtō nē mē pahtōxjê nhîpêx anhýr o pa nhūm mē pahpyrà nē amnhî xā htýx kamā hamak o pa pê omnuj nē pa. Jakamā kwa kêr ka mē Kris kôt amnhî xunhwýr týx nē kutā amnhî to htýx rāhā ho ri apa. ¹⁰ Tirtûm kām mē pajapê jakamā na hte mēmoj to mē pakutā nojarêt rāhā ho ri pa. Na pre mē pamex nē nhýrmā mē pahte kuri tām amnhî nhîpêx o papa mā xwýnh ā mē pajarē. Kris kukwak ri ā mē pajarēnh anhýr jakamā mē ate jar Kris ā apunuj nē ri apa htā kot kaj mē kritpêm ā amnhî nhîpêx anhýr ry hkêt nē. Kojā Tirtûm mē akrā kamā mē ajamaxpêr xihtýx jagjê ka mē akupým amex nē axihtýx pê ate amnhî nhîpêx nyw o amnhî nhîpêx rāhā ho ri apa.

¹¹ Tirtûmja hihtýx o hihtýx nē àhpumunh o àhpumunh. Nē hihtýx xā nē àhpumunh xā koja aa kêp hirerek nē hapêx kêt kumrêx. Ām hāmri na mē kot harēnh kot anhýrja.

Pêtre kapêr jatur xā

¹² Nē ota Kris kôt mē pahtō Sirastija na inhmā mē akaxyw kagàja nhîpêx pa mē awýr mēnh kaxyw. Na pa hte kām ixkapêr nhūm inhma nē inhmā hā kagà. Na hte Kris kapêr kôt amnhî nhîpêx rāhā ho ri pa. Tā inhmā kagàja nhîpêx. Mē ate kamā harēnh nē mar nē tām ajamaxpêr kaxyw. Nē Tirtûm kām mē ajapê nē kot mēmoj to mē akutā nojarêt ā mē ate kamā harēnh kaxyw. Tā kêr ka mē kām mē ajapê hā amnhî tā harēnh ma nē kapêr kôt pix mā amnhî nhîpêx mex rāhā ho ri

apa. Mē akwýjaja kot tanhmā hā mē ato htāā.

¹³ Nē ota jar Papirōn kamā Kris kôt mē pahtō nē mē pahtōxjaja mē awýr hpêr mē. Tirtûm kot mē pahpyrà nē mē ho hkra jakamā mē kêp mē atō nē mē atōx ā mē awýr hpêr mē. Nē Xiakre määnēn mē awýr hpêr mē. Te kêp ixkra pyrāk.

¹⁴ Nē kêr ka mē nhýri apê Kris kwý hā axpên pumu nē mē axpên to atō nē atōx ā axpên mā akapêr mex kurê kumrêx.

E kê Tirtûm mē apê Kris kwý hā mē amā mē ajamakêtkati nē mē apa xā gō ka mē axamnhîx ajamakêtkati nē amex nē ri apa ho apa.

Tā ām ja pix. Ixpê Simāw Pêtre na pa ā mē awýr kagà nē mēnh anē.

Sikūn Pêtre
Simāw Pêtre kot Jejus kôt
hkwýjê hwýr wam kagà
ně mēnh kôt hō mēnh

Simāw Pêtre na pre kagàja nhîpêx. Jejus nhỹ hã hkrajê jahkre ho mẽ pa xwýnhjê hō na pre. Mẽ kêp Jejus kra hkêt xwýnhjaja ra kot Jejus ã hprî kaxyw nhũm pre kagàja nhîpêx nẽ krî piitã hkôt Jejus kwýjê hwýr kurê nẽ kamã hprî hã mẽ kãm mẽmoj tã karõ. Mẽ kot arî Tirtũm kot amnhî nhîpêx kôt amnhî nhîpêx rãhã ho pa hã mẽ kãm karõ. Nẽ hamaxpêr o mẽ hamaxpêr rãhã ho pa hã mẽ kãm karõ.

Nẽ mẽ hkwý kot Tirtũm kôt amnhî nhîpêx ã amnhî jarênh tã hkôt amnhî nhîpêx kêt xwýnhjaja nhũm pre tanhmã mẽ harênh to. ã na pre mẽ kãm mẽmoj jarênh nẽ hã kagà nẽ krî piitã hkôt mẽ hwýr rênh anê. Nẽ mẽ kãm:

¹ Pa Kris kôt ixtõ nẽ ixtõxjaja. Xà mẽ amex? Ot pa mẽ awýr kagà nhîpêx nẽ krî piitã hkôt mẽ awýr kurê. Ixpê Simāw Pêtre na pa wam ixte kagà nhîpêx nẽ mẽ awýr mẽnh tã axte hō nhîpêx. Ixte Jejus Kris nhỹ hã mẽ ajahkre ho ixpa xwýnh ã mẽ amã hipêx nẽ kumê. Na pa hte Jejus mã amnhî nhîpêx mex o ri ixpa.

Nẽ mẽ papytâr xwýnh Jejus Krisja Tirtũm pyrã nẽ mex o mex. Nẽ wa kot amnhî nhîpêxja mex o mex. Jakamã na pre wa tanhmã mẽ pahkrã hto pu mẽ amnhî kaxyw wa hkôt pajamaxpêr tỳx rãhã ho ri papa. Na ka htem ixpyrà nẽ ã amnhî nhîpêx anê. Tã pa mẽ amã kagàja nhîpêx.

² Nã Tirtũm mẽ mẽ panhō Pahihti Jejus wa kot amnhî nhîpêxja na ka mẽ ra harênh mar tỳx nẽ. Wa kot tanhmã amnhî nhîpêx to nẽ tanhmã wa hamaxpêr toja ka mẽ mar tỳx nẽ wa hkôt pix mã amnhî nhîpêx. Tã kêr ka mẽ arî ã amnhî nhîpêx anhỹr rãhã ho ri apa. Jao axãmnhîx ajamakêtkati nẽ akĩnh nẽ apa ho apa. Na pa hte ã

mẽ ato Tirtũm mẽ Pahihti Jejus Kris wa hwýr o ri ixpa anê. Na hte Tirtũm mẽ ato mex nẽ mẽ akutã nojarêr rãhã ho pa.

Tirtũm kot mẽ pahto mex o pa hã harênh

Epes 2.12-13; Wam Tesarõn 1.2-4; Sikūn Pêtre 3.18

³ Nẽ Tirtũmja àhpumunh tỳx o àhpumunh tỳx jakamã na pu htem hkôt amnhî xunhwý nhũm amnhî tã mẽ pahpumu nẽ mẽ pamã àhpumunh tỳx xà hkwý gō. Hãmri pu mẽ ra urak nẽ amnhî to mex nẽ tãm amnhî nhîpêx o ri papa. Tã kot puj mẽ nhỹrmã ma õ krî hwýr api. ⁴ Na pre mẽ pakukamã amnhî jarênh o:

–Kot paj nhỹrmã ixkrajê mã ixte amnhî nhîpêx mex kwý gō nhũm mẽ inhỹ hã ho tãm ri amnhî nhîpêx mex o pa. Nẽ ixpyrà nẽ hamaxpêr mex o pa.

Anhỹr jao te ra mẽ pamã hkĩnh xà mex kwý nhõr pyrak o mẽ panhîpêx. Nẽ te ra kot mẽ pahkrãm hamaxpêr mex jagjênh nẽ mẽ pamã kot amnhî nhîpêx mex jagjênh pyrak. Mẽmo kaxyw na pre ã mẽ panhîpêx mex anê? Nã urak nẽ tãm mẽ pahte amnhî nhîpêx mex rãhã o ri papa kaxyw. Jao mẽ pahte mẽ kêp hkwý hkêt xwýnhjê hkôt amnhî nhîpêx kêt nẽ. Nẽ mẽ hamaxpêr punuj o pajamaxpêr kêt nẽ. Nẽ hpãnhã mẽ pahte Tirtũm kôt pix mã amnhî nhîpêx rãhã ho papa. ã mẽ pahte amnhî nhîpêx anhỹrja na mex o mex. ⁵ Tã ã Tirtũm kot mẽ panhîpêx mex anhỹr jakamã kwa kêr ka mẽ kapêr mar tỳx nẽ hkôt pix mã amnhî nhîpêx mex o ri apa. Jao amnhî kaxyw hkôt ajamaxpêr rãhã nẽ. Kot kaj mẽ ã amã amnhî nhîpêx anhỹr o apa hprãm hã kot kaj mẽ mããnên amã tãm amnhî nhîpêx o apa hprãm. Nẽ mẽ amã Tirtũm kapêr piitã mar prãm o ri apa. ⁶ Hãmri nẽ piitã mar pa nẽ mẽmoj punuj piitã nẽ amnhî to htỳx nẽ. Nhũm mẽ kêp Kris kwý hkêt xwýnhjaja Kris ã tanhmã mẽ anhîpêx to htã ka mẽ ãm amnhî tã mẽ omu nẽ mẽ umaj mẽ amã Kris kaga hprãm kêt nẽ.

Nē mẽ amã Tĩrtũm mã amnhĩ jarēnh rãhã ho apa hprãm.

Nē mẽ amã kapēr mar rãhã ho apa hprãm.

⁷ Nē mẽ amã Kris kôt mẽ atõ nē mẽ atõxjê ho mex pix o ri apa hprãm. Jao te mẽ amã amnhĩ tã ma pyrãk o mẽ piitã mẽ hipêx o ri mẽ hkôt apa.

⁸ E kêr ka mẽ ã amnhĩ nhĩpêx anhỹr o ri apa. Kot ka mẽ ã amnhĩ nhĩpêx anē nē mẽ panhõ Pahihti Jejus Kris kôt amnhĩ nhĩpêx mex o mō. Hãmri nhũm mẽ akwýjaja mẽ apumu nē mẽ apê Kris kwý há mẽ ajarēnh kurê kumrêx.

⁹ No kot ka mẽ atõ ixkapēr mar tã hkôt amnhĩ nhĩpêx kêt nē hãmri te Tĩrtũm kot anē ate amnhĩ tomnuj rēnh par mã ajamaxpēr kêt pyrãk. ¹⁰⁻¹¹ No na ka htem ã amnhĩ nhĩpêx anhỹr kêt nē. Ra mẽ ate Pahihti Jejus Kris kôt amnhĩ nhĩpêx mex jakamã na htem ja há mẽ apumu nē Tĩrtũm kot mẽ ato hkra há mẽ ajarēnh kurê kumrêx. Kot kaj mẽ ã hkôt amnhĩ nhĩpêx anhỹr o apa nē mẽmo arĩgro há apunuj nē apa htã Jejus kaga hkêt nē. Hãmri nē nhỹrmã ma Tĩrtũm nhõ krĩ hwýr api nhũm mẽ apumu nē mẽ ato mex rax nē. Hãmri ka mẽ õ krĩ kamã mẽ panhõ Pahihti Jejus Kris wa kuri atĩr tũm nē amex nē apa ho apa.

¹² Nē na ka mẽ ra Tĩrtũm kot amnhĩ nhĩpêx mar tỳx nē amnhĩ krã kamã kot amnhĩ nhĩpêx mã ajamaxpēr tỳx o ri apa. Tã nom kot paj arĩ mẽ amã ja jarēnh rãhã ho ri ixpa. ¹³ Kormã ixtĩr ri kot paj xatã mẽ amã harēnh o amnhĩrĩt. Ja na kêt inhmã hprãm. Mẽ ate nhỹrmã tanhmã ri ajamaxpēr to nē hkaga pumaj. ¹⁴ Na pre mẽ panhõ Pahihti Jejus Krisja inhmã tokyx ixtyk ã ijarē. Kot paj xep kritpēm ri ixtĩr nē ixpa hkêt nē. ¹⁵ Jakamã na pa kormã ixtĩr ri ã mẽ amã kagã nhĩpêx anē. Mẽ ate inhmýr pē arĩ omunh nē kamã harēnh nē Tĩrtũm kot amnhĩ nhĩpêx mã ajamaxpēr tỳx rãhã ho ri apa kaxyw.

Pêtre kot no ho Jejus pumunh ã amnhĩ jarēnh

Matêwre 17.1-5; Makre 9.1-8; Sikūn

Ximotre 3.16-17

¹⁶ Nē na pa pre ra tanhmã mẽ amã mẽ panhõ Pahihti Jejus Krisja jarēnh to. Hihtỳx o hihtỳx ã harē nē àhpumunh tỳx o àhpumunh tỳx ã harē. Nē nhỹrmã akupýn mẽ pahwýr wrýk ã harē. No na pa pre amnhĩ krã hkôt ã harēnh anhỹr kêt nē. Na pa pre inhno ho Jejus hihtỳx o hihtỳx ã omunh o hkôt ixpa nē ixte omunh xà hkôt ã mẽ amã harēnh anē. ¹⁷⁻¹⁸ Amnepê mã kormã ixkwýjê mẽ mẽ ixte arĩ hkôt ixpa ri pa prem hkôt hixêt prêk nhĩmõk wýr api. Pa nē kaxyw Xiakre nē Juãw mẽ pa mẽ hkôt ixpimràatã hixêt ã api nē himõk ã ixkuhê. Hãmri nhũm Tĩrtũm tanhmã Jejus to nhũm hirã htỳx kãm xa. Hãmri nhũm Mẽpahpãm Tĩrtũmja mẽ inhmã kapēr. Kaxkwa kamã hirã htỳx rax rũm mẽ inhmã kapēr o:

—E ota Ixkrata xa. Inhmã hapê ho inhmã hapê. Anē.

Tã ra ixte mar xà hkôt pa amnhĩ xõ ri mẽ amã harē nē há kagã. ¹⁹ Na pa prem ã hixêt prêk nhĩmõk ã Jejus pumunh nē Tĩrtũm kot tanhmã harēnh to há mar anē. Hãmri nē ija-maxpēr o:

—Nà ãm hãmri na pre amnepēm Tĩrtũm nhỹ há kapēr jarēnh o mẽ pa xwýnhjaja Jejus kukamã ã harēnh anhỹr o pa. Anē.

Mẽ kot tanhmã Jejus kukamã harēnh toja te kot kamãt kô kamã kanê hpók nhĩrã hkryre pyrãk. Tã koja nhỹrmã akupýn wrý hãmri nē te myt kator nē hirã mex nhũm mẽ pahte mẽmoj pumunh mex pyrãk. Jakamã kwa kêr pu mẽ kot tanhmã Jejus kukamã harēnh toja mar tỳx rãhã nhũm nhỹrmã te myt kator pyrã nē akupýn mẽ pahwýr wrý. ²⁰ Tĩrtũm kapēr ã kagã htũm kot tanhmã ý há kapēr jarēnh xwýnhjê jarēnh to. Mẽ kot mẽmoj kukamã ujarēnh ã mẽ harē. Nē Jejus kukamã tanhmã ujarēnh to há mẽ harē. ã mẽ kot mẽmoj kukamã harēnh kot anhỹr. Nom na pu htem amnhĩ krã hkôt ã mẽ ujarēnh anhỹrja mar tỳx kêt nē. Koja Tĩrtũm Karõ hprĩ há mẽ pamã

ho amnhîrît pu mẽ rî kormã pahprî hã mar tỳx nê. ²¹ Na pre ÿ hã kapêr jarênh o mẽ pa xwỳnhjaja amnhî krã hkôt hkwỳjê mã ujarênh o pa hkêr nê. Tĩrtũm Karõ na pre tanhmã mẽ hkrã hto nhũm mẽ ÿ hã hkwỳjê mã tanhmã harênh to ho pa nê ÿ hã mẽ pamã hã kagã.

2

Tĩrtũm kapêr jarênh o hêx xwỳnhjê jarênh

Korosê 2.16-17; Wam Ximotre 4.1-5; Sikûn Ximotre 3.1-9; Jutre 3-16

¹ Nê amnepêm na pre Ijaew kwỳjaja te mẽ kêp Tĩrtũm nhỹ hã kapêr jarênh xwỳnh pyrãk. Nom Tĩrtũm kapêr kwỳm ri hkwỳjê mã tanhmã ho hêx to ho pa. Tã koja nhỹrmã mẽmojaja mẽ urãk nê mẽ awỳr mra nê ã mẽ amã Tĩrtũm kapêr o hêx o pa anê. Nê kapêr kwỳm ri tanhmã mẽ ajahkre hto ho mẽ amã hêx o mẽ akôt pa. Mẽ ate mẽ mar nê amnhî nhĩpêx nyw kaga nê hpãnhã mẽ kot amnhî tomnuj kôt apa hprãm xàj nhũm mẽ hêx rom tanhmã mẽ ajahkre hto ho pa. Pahihti Jejus kot mẽ nê htyk tã nhũm mẽ hkôt amnhî nhĩpêx kêt nê axtem nê ri kapêr o hêx o pa. Mỳrapê koja Tĩrtũm tokyx mẽ kot amnhî xà htỳx kamã hamak tũm xà hwỳr mẽ rênh pa.

² Koja mẽ ohtô nê mẽ kapêr ma nê kãm mẽ mar prãm nê. Nê mẽ hkôt hamaxpêr nê mẽ hkôt amnhî nhĩpêx o pa. Jao ra hpijaàm kêt nê mẽ hkôt htỳx ri tanhmã amnhî tomnuj to ho ri pa. Tã ã mẽ kot Tĩrtũm kapêr o mẽ hêx xwỳnhjê mar nê mẽ hkôt amnhî nhĩpêx anhỹr jakamã koja mẽ kãm Tĩrtũm kapêr mar prãm xwỳnhjaja mẽ kot amnhî nhĩpêx ã mẽ omu nê Tĩrtũm kapêrja mex kêt ã harênh japêr. ³ Tĩrtũm kapêr o mẽ hêx o mẽ pa xwỳnhjaja na htem kàxpore pix prãm xàj mẽ awỳr mra nê tanhmã mẽ amã kapêr jarênh o hêx to ho pa nhũm Tĩrtũm ja hã mẽ omunh rãhã ho hkrĩ. Na hte nhỹhỹm mrrar kêt nê rỳ htỳx òt o hikwỳ hkrêr nê. Na hte arĩ mẽ kot amnhî nhĩpêx ã mẽ omunh

rãhã ho hkrĩ. Tã koja nhỹrmã ma mẽ kot amnhî xà htỳx kamã hamak tũm xàta hwỳr mẽ kurê nhũm mẽ ma hwỳr hapêx pa.

⁴ Nê amnepê mã kaxkwa kamã Tĩrtũm kapêr o mẽ wryk xwỳnh kwỳjaja na prem axtem nê Tĩrtũm kapêr nhĩrôp kuhê nhũm tee ri amnhî tã mẽ omu hãmri nê amnhî nê mẽ kator pa. Mẽ kamã ukaprĩ hkêr nê amnhî nê mẽ kator pa hãmri nê mẽ kot amnhî xà htỳx kamã hamak tũm xàta wỳr mẽ hano. Nhũm prem ma hwỳr pa nê ahkre xupỳm kãm kamãt kô kamã arĩ hkrĩ ho hkrĩ. Tĩrtũm kot mẽ piitã tanhmã mẽ harênh to xà hã arĩgroja jamãr o hkrĩ. Nê tee ri kãm hapôx prãm kaprỳ ho hkrĩ.

⁵ Nê amnepêm pika kamã ri mẽ pa xwỳnhjaja na prem haxwỳja piitã amnhî tomnuj pix o ri pa. Jakamã nhũm Tĩrtũm ja hã mẽ omu nê mẽ kamã ukaprĩ hkêr nê. Nê mẽ hwỳr na rax mẽ. Mẽ kãm kapêr mar prãm kêt jakamã nhũm mẽ hwỳr kumê nhũm wryk rax kumrêx nê mẽ hanhir pa nê mẽ himex. ãm Noehti mẽ hkwỳ pê 7 pixjaja nhũm mẽ kurom htĩr nê hkã hkĩnh nê mex nê pa. Noehti kormã na xwỳj ri kot mẽ kãm Tĩrtũm kapêr jarênh o ri mẽ hkôt pa htã nhũm mẽ kuma nê ãm kuma. Mỳrapê na prem piitã pikaprãr pa.

⁶ Nê Sotõ mẽ Gomo wa kamã mẽ pa xwỳnhjaja haxwỳja na prem amnhî tomnuj tỳx kumrêx o pa nhũm Tĩrtũm wamtajê pyrã nê mẽ kamã ukaprĩ hkêr nê. Na pre kaxkwa rũm mẽ hipy mẽmo hpôk kwỳ rê nê ho mẽ ho hapêx pa. Tã mẽmo kaxyw na pre ã mẽ hipêx anê? Nà mẽ piitã mẽ kot mẽ harênh mar nê hamaxpêr o:

—Na hte ã Tĩrtũm mẽ kot amnhî tomnuj xwỳnhjê nhĩpêx anê.

Anhỹr o hamaxpêr kaxyw na pre ã mẽ hipêx anê. ⁷⁻⁸ Nom Rohtija na pre Tĩrtũm Sotõ nê kator jakamã nhũm htyk kêt nê. Na pre hkwỳjê rom tãm amnhî nhĩpêx tã mẽ kot amnhî tomnuj tỳx xwỳnhjê nhõ krĩ kamã òrkwỳ nê ri pa. Nê apkati mẽ tee ri mẽ kot amnhî nhĩpêx ã mẽ omu nê mẽ

ÿ hã hkaprĩ nẽ tee ri mẽ hkukamã hamaxpêr o pa. No nhũm mẽ amnhĩ tomnuj ã amnhĩ pumunh nẽ tokyx tãm amnhĩ nhĩpêx kêt nẽ. Nẽ apkati mẽ tanhmã amnhĩ tomnuj to nẽ kapêr punuj o pa nhũm Rohti tee ri mẽ omu nẽ hkaprĩ htỳx nẽ pa. ⁹ Tã nhũm Tĩrtũm mẽ himex kaxyw nẽ mẽ nê kator nẽ mẽ himex pa. Na hte ã Tĩrtũm mẽmoj punuj pê mẽ kot amnhĩ kaxyw kãm hamaxpêr nẽ hkôt amnhĩ nhĩpêx xwỳnhjê pytãr anẽ. No mẽ kot amnhĩ tomnuj xwỳnhjaja na hte axtem mẽ hipêx. Tã koja nhỹrmã mẽ pahpiitã tanhmã mẽ pajarênh to xà hã arĩgro kato nhũm ma mẽ kot amnhĩ xà htỳx kamã hamak tũm xà wỳr mẽ rênh pa. ãm tapxipix kot ã mẽ hipêx anhỹr kaxyw ãhpumunh tỳx. ¹⁰ Tã mẽ hpijaàm kêt kãm amnhĩ tomnuj o mẽ pa xwỳnhjaja nẽ mẽ kot Tĩrtũm kapêr mar nẽ ãm mar xwỳnhjaja koja nhỹrmã mẽ homnuj tỳx nẽ.

Nẽ Tĩrtũm kapêr o hêx o ri mẽ pa xwỳnhjaja na htem amnhĩ to jarkrar pix o pa. Nẽ Tĩrtũm kapêr o mẽ wryk xwỳnhjê hã hpijaàm kêt nẽ. Nẽ axtem nẽ mẽ ho kapêr punuj pê tanhmã mẽ haprỳ hto ho pa. ¹¹ Tã nhũm htem amnhĩ tã mẽ kuma nẽ ãm mẽ kuma. Mẽ kurom mẽ hihtỳx kumrêx tã no ãm amnhĩ tã Tĩrtũm mã tanhmã mẽ ho kapêr to hkêt nẽ.

¹² Nẽ mry xoprê na hte htỳx ri pa ho pa. Tã Tĩrtũm kapêr o mẽ hêx o mẽ pa xwỳnhjaja htem mry xoprêta pyrã nẽ htỳx ri hamaxpêr mex kêt o pa. Jao hprĩ hã mẽmoj mar kêt tã htỳx ri hijuk ri tanhmã mẽmoj jarênh to.

Nẽ mry xoprêja htỳx pa nhũm mẽ kot hparja pyrã nẽ mẽ kot Tĩrtũm kapêr o hêx o mẽ pa xwỳnhjaja koja Tĩrtũm nhỹrmã kuwy hwỳr mẽ ho hapêx nẽ kamã mẽ rênh pa.

¹³ Nẽ koja nhỹrmã Tĩrtũm mẽ kot tanhmã mẽ ama hêx to ho pa hã mẽ omunh xà hkôt mẽ homnuj tỳx nẽ. Na htem hpijaàm kêt nẽ mẽ piitã mẽ noo mã tanhmã amnhĩ tomnuj to ho pa. Kamãt kãm nẽ arĩgro hã. Nẽ mẽ

kãm tanhmã amnhĩ nhĩpêx to hprãm xà hkôt pix mã amnhĩ tomnuj o pa.

Na htem te mẽ kêp Kris kôt mẽ atôjê pyrã nẽ mẽ akôt Tĩrtũm kapêr mar xà hã ixkre hwỳr agjê nẽ mẽ anhĩhkô hã mẽ kot Jejus tyk mã hamaxpêr kaxyw pãwti hkwy hku. Nom htỳx hkur o hkrĩ nẽ htyk mã hamaxpêr kêt nẽ. Kãm Jejus kĩnh kêt tã hêx rom hpijaàm kêt kãm mẽ anhĩhkô hã htỳx ri hkur o hkrĩ.

¹⁴ Nẽ nhỹri krĩ hwỳr pôj nẽ mênijê pumu nẽ kãm mẽ hkĩnh nẽ. Ra mẽ mjên ri pa htã nhũm mẽ kãm mẽ ho amnhĩkati hprãm nẽ mẽ kamã hpijaàm kêt o ri pa.

Nẽ kormã mẽ kot Kris kôt amnhĩ xunhwỳr tohtuj anhỹr xwỳnhjê hwỳr mra nẽ hêx rom tanhmã mẽ kãm kapêr to pê mẽ no kupyri o ri mẽ hkôt pa. Mẽ kot mẽ mar nẽ Kris kaga nẽ mẽ hkôt ri amnhĩ nhĩpêx prãm xàj ã mẽ hipêx anhỹr o pa.

Na htem hikãxpore rũnh o pikuprõnh pix kukamã hamaxpêr o ra ho õxỳ nẽ.

ã na htem amnhĩ nhĩpêx anhỹr o pa. Tã ra Tĩrtũm kot mẽ homnuj tỳx kaxyw mẽ hã amnhĩ jarê. ¹⁵⁻¹⁶ Te mẽ kot kamãt kô kamã pry juk ã hpikunor nẽ htỳx ri pa pyrãk o na htem amnhĩ nhĩpêx nẽ kãm Tĩrtũm kapêr mar prãm kêt nẽ amnhĩ tomnuj pix o pa.

Amnepêm Peo hkra Paraãwta kêp Tĩrtũm nhỹ hã kapêr jarênh o pa xwỳnh tã axtem nẽ kãxpore rax prãm xàj tanhmã amnhĩ tomnuj to kaxyw. Nhũm Tĩrtũm tee ri ja hã omu nẽ Paraãw krit jumênreja tanhmã hakwa hto nhũm kãm kapêr. Jumênre kapêr kêt tã nhũm Tĩrtũm tanhmã hakwa hto nhũm kãm kapêr nẽ tanhmã kot amnhĩ tomnuj to kaxywta ã kãm akir nhũm amnhĩ tã kuma hãmri nẽ ã amnhĩ nhĩpêx anhỹr kêt nẽ. Tã mẽ kot Tĩrtũm kapêr o mẽ hêx ho mẽ pa xwỳnhjaja na htem Paraãw pyrã nẽ kãxpore rax prãm xàj tanhmã amnhĩ tomnuj to pix prãm. ¹⁷ Te hino ra grã nhũm mẽ tee ri kamã gô japêr pyrãk o na htem amnhĩ nhĩpêx. Rỳ te

kakrã hapôx nhũm mẽ kot omunh nê na wrýk ã hkamnhix kaprý pyrãk. Tã ra Tirtũm mẽ kaxyw kamãt kô htýx pê mẽ kot amnhĩ xã htýx kamã hamak tũm xãta o mẽ nê. ¹⁸ Na htem htýx ri amnhĩ tomnuj o pa hã mẽ amã amnhĩ to jarkrar o ri pa. Jakamã nhũm mẽhõ ra amnhĩ tomnuj kaga kaxyw nhũm mẽ tee ri ja hã omu nê kot ã amnhĩ nhĩpêx anhÿr pymaj tanhmã nê kãm kapêr to nê mẽ kãm:

–Kwa ixte amnhĩ tomnuj o ixpa htã nhũm Tirtũm ja hã ixpumu nê ãm ixpumu nê arĩ inhmex ã ijarê. Na pa hte mẽ hkuprýjê hwÿr mra nhũm ja hã ixpumu nê ãm ixpumu nê hã tanhmã ixto hkêt nê. Jakamã kwa mẽ ixpyrà nê arĩ ã amnhĩ nhĩpêx anhÿr o ri apa. Koja Tirtũm tanhmã hã ato hkêt nê. Anê.

Hãmri nhũm mẽ tee ri kuma nê ra hamaxpêr kati nê. ¹⁹ Na htem mẽ kãm kapêr o:

–Kwa mẽ ixpyrà nê mãmrĩ amã tanhmã amnhĩ tomnuj to hprãm xã hkôt amnhĩ nhĩpêx o ri apa. Mẽhõ kot kêt ja nê tanhmã amã kapêr to? Anê.

Mẽ kot amnhĩ tomnuj xãja te kêp mẽ õ patrãw pyrãk jakamã na htem ãm kôt pix mã amnhĩ nhĩpêx o pa. Jakamã kot pu mẽ tanhmã amnhĩ tomnuj to. Nê gaa nê axte. Nê gaa nê ra ho amnhĩ pyrãk. Hãmri nê tee ri pamã hkaga hprãm kaprý nhũm te kêp mẽ panhõ patrãw pyrãk o mẽ panhĩpêx pu mẽ ãm kôt pix mã ri amnhĩ nhĩpêx o ri papa.

²⁰ Nê koja mẽhõ ra Tirtũm kapêr ma. Nê mẽ panhõ Pahihti Jejus Kris jarênhja nhũm hprĩ hã kuma. Kêp mẽ pahte amnhĩ tomnuj pê mẽ papytãr xwÿnh ã harênh ma. Tã nhũm mẽ kot Tirtũm kapêr o mẽ hêx xwÿnhjaja hwÿr mra nê tanhmã kãm ho hêx to nhũm mẽ kuma nê kot amnhĩ nhĩpêx tũm o awjanã. Jao amnhĩ tomnuj tÿx o kormã kot Tirtũm kapêr mar kêt ri kot amnhĩ tomnujta jakre. ²¹ Kêp ãm aa kot Tirtũm kapêr mar kêt rãhã htyk ronhÿx ja kãm mex nê. Nom ra kot mar mex tã ãm kuma nê hkaga jakamã koja mex kêt kumrêx. ²² Mẽ

kot ã mẽ kot amnhĩ nhĩpêx anhÿr ã mẽ harênh kot:

Rop na hte ôjaïr nê akupÿm ôjaïrta ku. Nê hagrô na htem unê nê hkumrã nhũm muxre. Tã nhũm mẽ kãm ure nhũm akupÿm hprôt nê mra nê akupÿm gyw o amnhĩ tomnu pa. Anê.

Tã mẽ kot Tirtũm kapêr o mẽ hêx xwÿnhjê mar nê mẽ hkôt amnhĩ nhĩpêx xwÿnhjaja te mẽ kot rop mẽ hagrô wa kot amnhĩ nhĩpêxta pyrã nê Tirtũm kapêr kaga nê akupÿm mẽ kot amnhĩ nhĩpêx tũm o awjanã nê htýx ri amnhĩ nhĩpêx o pa.

3

Tirtũm kot pika ho hapêx kaxyw kormã amnhĩ tã mẽ pajamãr ã harênh

Matêwre 24.29-31; Xiakre 5.7-11; Apokarip 19.11-16, 21.1-8

¹ E Kris kôt ixkrãmnhwÿjaja. Na pa pre ra wam kagãta nhĩpêx nê mẽ awÿr kurê. Tã ra axte hkôt ja nhĩpêx. Hamê wa kamã na pa mẽ amã Tirtũm kot tanhmã amnhĩ nhĩpêx to hã harê. Nê Jejus Kris nhÿrmã akupÿn mẽ pahwÿr wrýk ã harê. Mẽ ate mar nê tãm amnhĩ nhĩpêx nê tãm ajamaxpêr o kutêp mẽ apa kaxyw.

² Amnepê mã Tirtũm nhÿ hã kapêr jarênh o ri mẽ pa xwÿnhjaja na prem Tirtũm kot nhÿrmã mẽ pahwÿr mẽhõ mênh mã xwÿnhja jarênh o pa. Kot nhÿrmã mẽ pahwÿr wrýk nê mẽ pahto amnhĩptãr o pa hã harênh o pa. Tã kêr ka mẽ kapêr ma nê hã ano htýx nê hkôt ajamaxpêr tÿx rãhã ho ri apa. Nê Jejus kot mẽ awÿr mẽ rênh xwÿnhjaja ka mẽ kapêr ma. Mẽ kot mẽ amã mẽmoj jarênh o mẽ pa xwÿnhjaja na htem tanhmã mẽ amã Pahihti Kris jarênh to ho ri mẽ akôt pa. Nê tanhmã kot mẽ panê amnhĩ nhĩpêx to hã harê. Tã kêr ka mẽ kapêr ma nê hã ano htýx nê kãm ajamaxpêr tÿx rãhã ho ri apa.

³ Nê kwa mẽ inhma. Nhÿrmã Kris akupÿn mẽ pahwÿr wrýk xwÿj ri koja mẽ kot amnhĩ tomnuj tÿx xwÿnhjaja mẽ awÿr mra. Mẽ hpijaãm kêt o pa xwÿnh jakamã koja mẽ tanhmã mẽ akamã amnhĩ tomnuj to ho pa. Nê mẽ

apê Kris kwÿ hã mē apumu nē mē atã hpēr o pikēnh o pa. ⁴ Nē htÿx ri Kris ã mē akukja nē mē amã:

—Kwa no Krisja? Amnepēm akupÿn wrÿk nē mēmoj piitã tanhmã hipêx to hã amnhÿ jarēnh tã arÿ Tÿrtÿm kot mēmoj to kator krax rÿm mēmoj amarÿ rãhãã. Ra mē panhÿgêjtaja pikaprãr par tã nhÿm kormã akupÿn wrÿk kêt nē. Kot mē pamã amnhÿ to hêx kênã. Mo kaxyw koja kêt akupÿn mē pahwÿr wrÿ? Kot mē pamã amnhÿ to hêx kênã. Anē.

⁵⁻⁶ Nom ã mē kot harēnh anhÿrja kot anhÿr kêt. Tÿrtÿm kot mēmoj to kator krax rÿm mēmoj amarÿ rãhã hã mē kot harēnhja kot anhÿr kêt. Na pre Tÿrtÿm kapēr pix o kaxkwa nē pika ho kato. Nhÿm gô hkwÿja kapēr mar xà hkôt pika hã amnhÿ jahkre. Nhÿm hpãnhã panhÿ nhÿpêx. Tã no nhÿm mē kapēr mar kêt kumrêx. Nē mē kot amnhÿ tomnuj tÿx mÿrapê na pre Tÿrtÿm gô ho mē himex pa. Jao mē hwÿr na rax mē nhÿm mē hanhir o mē ho hapêx. No nhÿm mē kot Jejus wrÿk ã hpēr o pikēnh xwÿnhtaja kãm ã mē harēnh anhÿrja mar prãm kêt. Ra mē kot mar tã kãm mar prãm kêt nē arÿ mēmoj piitã rãhã hã ri harēnh o pa. ⁷ Pika nē kaxkwaja arÿ rãhã htã koja Tÿrtÿm nhÿrmã mē pahpiitã mē pahte tanhmã amnhÿ nhÿpêx to hã mē pahpumunh kôt tanhmã mē pajarēnh to. Nē mē kot amnhÿ xà htÿx kamã hamak tÿm xà hwÿr mē kot amnhÿ tomnuj xwÿnhjê rēnh pa. Hãmri nhÿm rÿ kormã kaxkwa nē pikaja wa pôr nhÿm himôk ã mēmoj piitã hkaxàr pa nē hapêx.

⁸ Nē amgrã pē 1.000ja mē pamã amgrã xohtô rax kumrêx no Tÿrtÿm mã te arÿgro pixire pyrãk. ⁹ Tã ra kot mē pamã tokyx Jejus akupÿn wrÿk ã harēnh tã nhÿm kormã wrÿk kêt jakamã nhÿm htem tōhã tee ri hamãr o pa nē hamaxpēr o:

—Hêxta waa nē. Tÿrtÿm kot tokyx akupÿn mē pahwÿr Jejus mēnh ã amnhÿ jarēnh tã tokyx mēnh kêt nē.

Anhÿr o harēnh tã no ãm kot anhÿr kêt. Na kormã amnhÿ tã mē kot amnhÿ tomnuj xwÿnhjê jamãr o pa. Mē kot amnhÿ tomnuj kaga nē hkôt amnhÿ xunhwÿr prãm xàj kormã amnhÿ tã mē hamã. Kãm mē kot amnhÿ xà htÿx kamã hamak tÿm xàta wÿr mēhō ho pixire nē mōr prãm kêt jakamã na kormã amnhÿ tã mē hamã. ¹⁰ Tã koja nhÿrmã mē panhō Pahihtija akupÿn mē pahwÿr wrÿ. Te mē àhkÿnh xwÿnh kot amnhÿ nhÿpêx pyrãk o mē pajaêr pē akupÿn wrÿ. Pu mē pahtÿx ri tanhmã paxapēnh to ho ri papa nē akupÿn wrÿk ã hkamnhÿx kêt rãhã nhÿm mē pajaêr pē akupÿn wrÿ. Hãmri nē ma akupÿm amnhÿ kôt mē pahte hkôt amnhÿ xunhwÿr xwÿnhjê ho àpir par kurê kumrêx. Hãmri nhÿm rÿ kormã kaxkwa kaxàr o hkrihkrit tÿx kãm hapêx pa. Nē kanhêti mē myt nē mytwrÿre kaxàr pa. Nē pikaja nē mãânēn kamã mēmoj piitã kaxàr pa. ¹¹⁻¹² Koja nhÿrmã ã mēmoj hapêx par anē. Jakamã kwa kêr pu mē Jejus kutêp tãm ri amnhÿ nhÿpêx rãhã ho ri papa. Nē Tÿrtÿm kapēr kôt pix mã amnhÿ nhÿpêx rãhã nē. Nē kãm hprãm xà hkôt tanhmã kãm amnhÿ nhÿpêx to ho ri papa. Kêr kê Jejus akupÿn wrÿ nē ã mē pahte amnhÿ nhÿpêx anhÿr ã mē pahpumu. Koja wrÿ nhÿm rÿ kormã kaxkwa nē pikaja wa kaxàr pa. Nhÿm kuwy mÿri kaxkwa kamã mēmoj harir xwÿnhja xêr nē ôr pa nē hapêx. ¹³ Tã kwãr mãmrÿ mēmoj ã amnhÿ nhÿpêx anē. Koja Tÿrtÿm axte mēmoj mex nhÿpêx. Na pre amnhÿ kukamã ja jarēnh o:

Kot paj axte pika nē kaxkwa hō nhÿpêx nhÿm mex o mex. Nhÿm mē kot amnhÿ kaxyw Jejus mã hamaxpēr nē hkôt amnhÿ xunhwÿr nhÿm ixte mē mex ã mē harēnh xwÿnh pixjaja koja mē pika nywja kamã mex nē pa ho pa. Anē.

¹⁴ Jakamã kwa ixkrãmnhwÿjaja. Kêr ka mē Kris kutêp kapēr kôt amnhÿ nhÿpêx mex rãhã ho ri apa. Jao kutêp ajamakêtkati nē axãmnhÿx axpēn kôt apa. Kêr ka mē nhÿrmã amnhÿ wÿr

omu nê tee ri amnhĩ kukamã aja-maxpêr kêt nê. Ate tãm amnhĩ nhĩpêx o apa hã amnhĩ pumu nê akĩnh nê amnhĩ wÿr omunh o akuhê.

¹⁵ Nom arĩ Jejus kãm mē pahkwÿjê ho hkra hprãm jakamã na kormã amnhĩ tã mē hamã nê tokyx akupÿn wryk kêt nê. Na pre Jejus kôt mē pahō Pawre Tirtũm nhÿ hã ã mē pamã ja hã kagà anê. Pawreja ixkrãmnhwÿ mex na. ¹⁶ Na hte mē pakaxyw kagà nhĩpêx nê kamã mē pahte Jejus kutêp tãm amnhĩ nhĩpêx o papa hã mē pamã karō. Na hte tōhã mēmoj tã kagà pu mē kamã harê nê tee ri pahprĩ hã mar mã no ãm mar mex kêt nê. Hãmri nhũm Tirtũm kapêr o mē hêx o mē pa xwÿnhtaja haxwÿja kuma hãmri nê amnhĩ krã hkôt hijuk ri tanhmã ho hêx to. Te mē kot hprĩ hã mar nê harênh pyrãk nom hprĩ hã mar kêt nê. ã na htem Tirtũm kapêr ã kagà piitã ho hêx o pa anê. Mÿrapê koja mē nhÿrmã amnhĩ xã kamã hamak tÿx kumrêx.

¹⁷ Tã e Kris kôt ixkrãmnhwÿjaja. Ra mē ate mē harênh mar jakamã kwa mē okora. Mē amnhĩ né mē omunh mex nê mē hkôt amnhĩ nhĩpêx kêt nê. Kot kaj mē anê nê Tirtũm kôt amnhĩ nhĩpêx mex kêt nê. ¹⁸ Na ka htem mē papytãr xwÿnh Pahiti Jejus Kris kôt ri amnhĩ nhĩpêx o apa. Tã kêr ka mē arĩ hkôt amnhĩ nhĩpêx mex rãhã ho ri apa. Nê hkôt amnhĩ xunhwÿr tÿx nê. Kêr kê amnhĩ tã mē apumu nê mēmoj to mē akutã nojarêt nê. Krisja mex o mex nê hihtÿx o hihtÿx. Tã kêr pu mē kãm mex o mex ã mãn harênh rãhã ho ri papa.

Tã ãm ja pix. Ixpê Simãw Pêtre na pa ã mē amã ja hã kagà nê mē awÿr mēnh anê.

Wam Juãw Juãw kot Jejus kôt hkwyjê hwÿr kagà nê mênh

Juãw na pre kagàja nhîpêx. Na pre kagà hkwy nhîpêx rax nê. Na pre mãânên Juãw kot tanhmã Jejus kot amnhî nhîpêx to ho pa ã kagà nê Apokarip nê Sikûn Juãw nê Hapuhã Juãw nhûm pre ja piitã Tirtûm nhÿ hã hã kagà.

Juãwja Jejus nhÿ hã hkrajê jahkre ho mē pa xwÿnhjê hõ na pre. Nê kēp Xiakre htõ na pre. Tã ra hpigêt tÿx nê kagàja nhîpêx. Urak nê mē kot Tirtûm kôt amnhî xunhwÿr xwÿnhjê mã hipêx. Mē kot kamã harēnh nē mar nē kãm axpēn kīnh o pa kaxyw. Nē mē kot amnhî tomnuj ã amnhî pumunh kôt tanhmã amnhî nhîpêx to hã mē kãm karõ nē hã kagà. ã na pre Juãw mē kãm mēmoj jarēnh nē hã kagà anē nē mē hwÿr kumē. Nē mē kãm:

Jejus kēp Tirtûm kapēr o amnhîrit xwÿnh ã harēnh

Juãw 1.1-4; Eprêw 1.1-4

¹ Pa ixpyrà nē mē ate Jejus kôt amnhî xunhwÿr xwÿnhjaja? Xà mē amex? E ot pa mē amã kagàja nhîpêx nē mē awÿr kumē. Ixte mē amã Tirtûm kapēr o amnhîrit xwÿnh jarēnh kaxyw. Amnepê mã kormã mēmoj amrakati ri nhûm pre ra rãhã ri pa ho pa. ãm kukwak ri pix mã na pu htem Tirtûm mē wa kuri pahitir tûm nē papa ho papa mã xwÿnh. Tã ÿ hã mē ixte kapēr o mē ajahkre ho ri mē ixpa xwÿnhjaja na pa prem ixpiitã kormã akupÿm kaxkwa hwÿr àpir kêt ri inhno ho omunh o ri hkôt ixpa. Nē mē ijamak o kapēr mar o ri hkôt ixpa. Nē mē inhîhkra ho hkupēnh o ri hkôt ixpa. ² Na pre kaxkwa kamã Hipêxã hkôt ri pa ho pa htã amnē pika hwÿr mē pahwÿr wrÿ. Hãmri nē jar mē pakamã kato pa pre mē ixkwÿjaja omu. Tã mē ixte omunh xà hkôt na pa htem amnhî xô ri tanhmã mē amã

harēnh to. Kojã nhÿrmã akupÿm mē pahto mē pahitir pu mē kuri pahitir tûm nē pamex nē papa ho papa. ³ Na pa prem tanhmã kapēr to hã mar o ri hkôt ixpa. Nē kot tanhmã mē kãm amnhî nhîpêx to hã omunh o ri hkôt ixpa. Ta kagàja kamã amnhî xô ri ixprî hã mē amã harē nē hã kagà. Mē ate ixpyrà nē aprî hã kot tanhmã amnhî nhîpêx to ho pa hã harēnh mar kaxyw. Jao mē pahpiitã te ixkre tipxi kamã mē papa pyrãk o amnhî nhîpêx o papa nē axpēn kôt pajamaxpēr o ri papa. Jao Mēpanhîpêxã Maati mē Kra Jejus Kris wa hkôt amnhî nhîpêx mex o ri papa. ⁴ Tã pa mē amã kagàja nhîpêx nē mē awÿr kumē. Mē ate kamã harēnh nē mar hãmri nē mē ixpyrà nē ajamakêtkati nē akīnh nē ri apa kaxyw.

*Tirtûm mex o mex ã harēnh
Juãw 8.12; Epes 5.3-21; Wam
Tesarõn 5.5; Eprêw 4.14-16, 9.11-14*

⁵ Nē Jejus kot tanhmã mē inhmã Tirtûm jarēnh toja kot paj amnhî xô ri mē amã hã kagà. Nã Tirtûm kot amnhî nhîpêxja mex o mex. Aa kot tanhmã amnhî tomnuj to hkêt. Mex o mex jakamã na hte tanhmã mē kot amnhî tomnuj to mã amnhî jagjēnh kêt. ãm kot amnhî to mex o kot amnhî to mexrãhã nē pa ho pa xwÿnh na. ⁶ Kot mē pahte amnhî tomnuj kêt ã mē pamã karõ jakamã kot puj mē pahpê hkra hã amnhî jarēnh tã amnhî tomnuj pix o ri papa nē ãm pahpê hkra hã amnhî jarēnh kaprÿ nē amnhî to paxêx. Tirtûm krajaja na htem amnhî tomnuj o pa hkêt nē. ⁷ Nom kot puj mē hkôt amnhî nhîpêx nē urak nē tãm ri amnhî nhîpêx o papa. Nē kapēr kôt ri amnhî nhîpêx. Hãmri nē te ixkre tipxi kamã ri Tirtûm mē Kra Jejus Kris wa hkôt axpēn to papa pyrãk o amnhî nhîpêx. Na pre Jejus mē panê ty nē hkamrõ axkapî. Jao mē pahte hkôt amnhî xunhwÿr xwÿnhjaja mē panê mē pahte amnhî tomnuj piitã hpãnhã amnhîrer pa. Jakamã ãm kukwak ri pix mã na pu htem tãm amnhî nhîpêx o ri papa.

Mě pahpiitã mẽ pahte amnhĩ tomnuj xwýnh ã mẽ pajarēnh

⁸ Ně mẽ pahte tōhã tanhmã amnhĩ tomnuj to jakamã kot puj mẽ aa pahte amnhĩ tomnuj kêt ã amnhĩ jarē hãmri nē ã amnhĩ jarēnh anhỹr o paxêx. Tĩrtũm kot mẽ pahpiitã mẽ pahte amnhĩ tomnuj ã mẽ pahpumu xwýnh kênã.

Mě pahte amnhĩ tomnuj nē tanhmã amnhĩ nhĩpêx to hã mẽ pamã karõ

Xiakre 4.9-10

⁹ Ně mẽ pahpê Tĩrtũm krajaja na pu htem tanhmã amnhĩ tomnuj to hãmri nē tee ri ja hã amnhĩ pumu nē pahkaprĩ nē. Ně tokyx amnhĩ to Tĩrtũm wý. Hãmri nhũm mẽ pama nē Jejus kukwak ri tanhmã hã mẽ pahto hkêt nē. ãm amnhĩ katut kôt tanhmã mẽ pahte amnhĩ tomnuj tota rē nē axte kãm hamaxpêr kêt nē. Ra kot mẽ pahtã amnhĩ jarēnh xà hkôt. Na hte Tĩrtũm amnhĩ jarēnh xà hkôt tanhmã amnhĩ nhĩpêx to. Tã ra kot mẽ pahpê hkrajaja mẽ pahte amnhĩ tomnuj piitã amnhĩ katut kôt rēnh par ã amnhĩ jarēnh jakamã na pre ã mẽ panhĩpêx anē. Na hte mẽmoj tã tanhmã amnhĩ jarēnh to hãmri nhũm apkati nhũm ihkjê ho kumē nē axtem tanhmã mẽmoj jarēnh to hkêt nē. ¹⁰ Ra kot mẽ pahpiitã mẽ pahte amnhĩ tomnuj xwýnh ã mẽ pajarēnh jakamã kot puj mẽ pahtõ ã mẽ pajarēnh anhỹrja ma nē hkôt pajamaxpêr kêt japêr. Rý kuma nē ãm kuma nē pajamaxpêr o:

–Nà ixte tanhmã amnhĩ tomnuj tore hã.

Anhỹr o amnhĩ jarē. Hãmri nē te ate Tĩrtũm hêx xwýnh ã harēnh pyrãk. Jao amã kapêr mar prãm kêt ã amnhĩ to amnhĩrĩt.

2

Jejus kêp mẽ paxyr pê Tĩrtũm mã kapêr xwýnh ã harēnh

Wam Ximotre 2.5; Eprêw 9.11-14

¹⁻² E mẽ ate amnhĩ tomnuj o apa hkêt kaxyw na pa ã mẽ amã ixkapêr nē hã kagà anē. Mě ate kamã harēnh nē mar hãmri nē tanhmã amnhĩ tomnuj to hkêt kaxyw. Jejus Kris na pre

mě pahpiitã mẽ pahte amnhĩ tomnuj pãnhã amnhĩrer kaxyw mẽ panê ty. Jakamã kot puj mẽ pahpê hkrajaja tanhmã amnhĩ tomnuj to nhũm ja hã mẽ pahpumu nē te kêp mẽ paxyr pê Tĩrtũm mã kapêr xwýnh pyrãk o amnhĩ nhĩpêx. Mě pakurom aa kot amnhĩ tomnuj kêt jakamã na hte mẽ paxyr pê Tĩrtũm mã kapêr nhũm kuma. Hãmri nē kukwak ri pix mã mẽ pahte tanhmã amnhĩ tomnuj to piitã amnhĩ katut kôt rēnh pa nē axte kãm hamaxpêr kêt nē.

Tĩrtũm krajaja kot Tĩrtũm kôt amnhĩ nhĩpêx ã mẽ kãm karõ

³ Ně na pu htem Tĩrtũm kôt ri amnhĩ nhĩpêx o papa hã amnhĩ pumu kôt pahpê hkra hã amnhĩ pumu mex nē. ⁴ Nom koja mēhõ kêp hkra hã amnhĩ jarēnh tã hkôt amnhĩ nhĩpêx kêt nē ãm kêp hkra hã amnhĩ to hêx. ⁵ Na htem Tĩrtũm kapêr kôt amnhĩ nhĩpêx o pa pê kãm hkĩnh týx ã amnhĩ to amnhĩrĩt. Nē kêp hkra hã amnhĩ to amnhĩrĩt mex o pa. ⁶ Jakamã kêr ka mẽ apê Jejus Kris kwý hã amnhĩ jarēnh xwýnhjaja hkôt pix mã amnhĩ nhĩpêx mex o ri apa.

Mě pamã axpên kĩnh ã mẽ pamã karõ

Juãw 13.34-35; Wam Juãw 3.14-18

⁷ E Kris kôt ixkrãnnhwýjaja. Inhmã mẽ akĩnh jakamã na pa ã mẽ amã mẽmoj jarēnh nē hã kagà anē. Kot paj mẽ amã mẽmoj nyw jarēnh kêt nē. Ra mẽ ate mẽmoj mar xwýnhhta kot paj axte mẽ amã harē. Mě pamã axpên kĩnh nē tãm axpên nhĩpêx o papa hã Tĩrtũm kot mẽ pamã karõta. Ra mẽ ate mar tã kot paj axte mẽ amã harē nē hã kagà. ⁸ Wam Tĩrtũm kot mẽ pamã axpên kĩnh ã mẽ pamã karõja kormã Jejus kot mẽ panê htyk hkêt ri kot mẽ pamã hã karõta na. Tã ra Jejus kãm mẽ pajapê xàj mẽ panê htyk jakamã na pa axte ã mẽ ate axpên nhĩpêx anhỹr o apa hã mẽ amã karõ nē hã kagà. Mě ate Kris pyrã nē amã axpên kĩnh xàj tanhmã axpên kutã anojarêt to ho ri apa kaxyw. Nom kormã mẽ pahte Jejus kôt amnhĩ xunhwýr kêt ri

na pu prem ã axpën nhîpêx anhÿr kêt nê. Tã hkôt amnhî xunhwÿ hãmri nê ã axpën to mex o papa anê. ⁹⁻¹¹ Tã koja mêhõ kot Jejus kôt amnhî nhîpêx ã amnhî jarênh tã kãm hkwÿjê hkînh kãm àmnhîx ri mē kutā nojarêt o pa hkêt nê. Hãmri nê kot Jejus kôt amnhî nhîpêx ã amnhî jarênh ã amnhî to hêx. Jao te htÿx ri kamàt kô kamã pa pyrãk. No koja mêhõ kãm hkwÿjê hkînh kãm mē kutā nojarêt o pa nê mãânên Jejus kôt amnhî nhîpêx mex o pa. Jao te hirã kamã ri pa pyrãk. Jakamã tanhmã hkwÿjê homnuj to ho pa hkêt nê mē piitã mē ho mex o axpën pyrãk o pa.

Juãw kot mē piitã ahpÿnhã tanhmã mē kãm kapêr to

¹²⁻¹⁴ E kot pa ahpÿnhã tanhmã mē amã ixkapêr to nê hã kagà. Mē apiitã te mē apê ixkra pyrãk. Na ka prem Jejus kôt amnhî xunhwÿ nhũm Tirtũm ja hã mē apumu nê Kra kukwak ri mē ate amnhî tomnuj piitã amnhî katut kôt rênh pa nê axte kãm hamaxpêr kêt nê. Jakamã ra mē ate Tirtũm kêp Mēpanhîpêxà Maati hã omunh mex.

Nê mē ate Jejus kôt amnhî xunhwÿr ã amgrã xohtõ xwÿnhjaja. Amnepêm amrakati ri Jejus ra rãhã ri pa ho pa xwÿnhja kôt mē ate amnhî xunhwÿr xwÿnhjaja kot paj mē amã tanhmã ixkapêr to nê hã kagà.

Nê mē akwÿjaja ham Jejus kôt mē ate amnhî xunhwÿr xwÿnhjaja ra mē ate Tirtũm kapêr mã ajamaxpêr rãhã ho ri apa. Jakamã na hte Satanasti mē ate amnhî tomnuj prãm xàj tee ri tanhmã mē akrã hto ka mē Jejus nhÿ hã kutã amnhî to htÿx pē hkôt amnhî nhîpêx kêt nê.

Mē kot amnhî tomnuj xwÿnhjaja tanhmã kot amnhî nhîpêx to

Matêwre 6.24; Eprêw 11.24-26; Xiakre 4.4

¹⁵ Nê kêr ka mē amã Tirtũm kôt amnhî nhîpêx prãm xàj mē kot amnhî tomnuj xwÿnhjê hkôt amnhî nhîpêx kêt nê. Nê mē hamaxpêr punuj xwÿnhjê hkôt ri amnhî nhîpêx kêt nê. Kot kaj mē hkôt amnhî nhîpêx

hãmri nê amã Tirtũm kînh kêt ã amnhî to amnhîrit. ¹⁶ Mē kot amnhî tomnuj xwÿnhjaja na htem mēmoj punuj mã hamaxpêr nê hkôt tanhmã amnhî tomnuj to. Nê mēmoj pumu nê ra kãm ho õ hprãm nom Tirtũm pē ja omnuj ã hkamnhîx kêt nê. Rÿ tanhmã mêhõ kot amnhî tomnuj to hã omu nê hkôt kãm amnhî nhîpêx prãm. Nê tanhmã amnhî to jarkrar to ho ri pa. ã na hte mē kot amnhî tomnuj xwÿnhjaja amnhî nhîpêx anhÿr o pa. Mē kot amnhî nhîpêxja Mēpanhîpêxà Tirtũm kãm hprãm kêt. ¹⁷ Koja nhÿrmã mē kot tanhmã amnhî tomnuj toja piitã hapêx pa. Nê mē hamaxpêr punujja mãânên nhÿrmã hapêx pa. Nê mē kot amnhî tomnuj o mē pa xwÿnhjaja koja mē amnhî xà htÿx kamã hamak rãhã ho pa ho pa. No Tirtũm kôt mē kot amnhî nhîpêx o mē pa xwÿnhjaja koja mē kurom kuri htÿr tũm nê mex nê hkînh nê pa ho pa.

Kãm Kris kurê xwÿnh maati jarênh Wam Juãw 4.1-6; Sikũn Juãw 7-11

¹⁸ E Kris kôt ixkwÿjaja. Kris akupÿn mē pahwÿr wrÿk kukamã koja mēmoj tanhmã amnhî nhîpêx to. Na pre ra Kris kôt mē panhîõja mē pamã ã harênh anê nê harênh o:

—Koja mē panhõ Pahihti Kris akupÿn mē pahwÿr wrÿk kaxyw hãmri nhũm kêp Kris ã amnhî to hêx xwÿnh maati kumrêx nhÿhÿnh kato. Hãmri nê hêx rom te Kris pyrã nê tanhmã mē kãm kapêr to nê tanhmã mē hipêx to ho pa nhũm rÿ kormã Kris akupÿn mē pahwÿr wrÿ. Anê.

Na pre hkukamã ã harênh anê ka mē harênh ma. Tã ra mē kêp Kris ã amnhî to hêx xwÿnhjaja ohtõ nê mra nê kãm hkurê xwÿnh maatita kukamã tanhmã amnhî nhîpêx to pē mē kãm amnhî to hêx o pa. Jakamã na pa ixprÿ hã mē amã tanhmã mē harênh to. Koja tokyx kêp Kris ã amnhî to hêx xwÿnh maatita nhÿhÿnh mē pahwÿr kato. ¹⁹ Na pre hkwÿjaja mē pahpê Kris kwÿjê hkôt ri pa htã mē pahkînhã kêp Kris kwÿ hkêt. Kêp hkwÿ ronhÿx arÿ mē pahkôt Kris kôt amnhî nhîpêx o pa. Nom axtem nê

àhpumunh tỳx pyrà nê mẽ pahkaga nê htỳx tanhmã amnhĩ tomnuj to ho pa. Jao kêp Jejus kwỳ hkêt ã amnhĩ to amnhĩrit.

²⁰ No kêt mẽ pahpê Tĩrtũm krajaja na pre Jejus mẽ pahwỳr Karõ rê nhũm mẽ pahkarõ mã agjê nê mẽ pahkrãm kapêr mex jagjê. Jakamã na pu mẽ mẽ kêp Kris kwỳ hkêt xwỳnhjê rom Tĩrtũm kapêr mar mex nê.

²¹ Xà mẽ ate Tĩrtũm kapêr ã kaga pumunh kêt kôt na pa ã mẽ amã ixkapêr nê hã kaga anê? Nà ra mẽ ate omunh nê mar mex kênã. Tã mẽ ate mẽ kot tanhmã Jejus o hêx to xwỳnhjê pumunh mex nê mẽ harênh mar mex kaxyw na pa ã mẽ awỳr kaga nhĩpêx nê mẽnh anê. Kêr kê mẽ mẽmo arĩgro hã mẽ awỳr agjê nê tanhmã mẽ amã Jejus o hêx to ka mẽ aprĩ hã mẽ omunh mex kurê kumrêx.

²² Tanhmã na htem Jejus o hêx to? E kot paj ixprĩ hã mẽ amã tanhmã mẽ harênh to ka mẽ inhma. Nà koja mẽhõ mẽ amã tanhmã harênh to nê harênh o:

—Nà Jejus kêp Tĩrtũm Kra hkêt. Tĩrtũm kot mẽ pahwỳr mẽnh kêt tã ka htem atỳx kapêr kôt ri amnhĩ nhĩpêx o ri apa. Kwa kêt mẽ ixkapêr kôt mãn ri amnhĩ nhĩpêx o ri apa.

Anhỳr o mẽ amã kapêr ka mẽ ama nê kãm Kris mẽ Tĩrtũm wa hkĩnh kêt xwỳnh ã omunh kurê kumrêx.

²³ Koja mẽhõ Tĩrtũm Kra Jejus kaga nê mãânên Hipêêxà kaga. No koja mẽhõ Tĩrtũm Kra hkôt amnhĩ xãm nê mãânên Hipêêxà hkôt amnhĩ xãm.

Mẽ pahte Kris kaga pymaj tanhmã amnhĩ nhĩpêx to hã mẽ pamã karõ

²⁴ Amnepêm mẽ ate Jejus kôt amnhĩ xunhwỳrta ã na ka prem kêp Tĩrtũm Kra hã Tĩrtũm kot mẽ pahwỳr mẽnh xwỳnh ã harênh ma. Tã kêr ka mẽ arĩ amnhĩ kaxyw hkôt ajamxpêr nê hkôt pix mã amnhĩ nhĩpêx o ri apa. Kot kaj mẽ anê nê Mẽpanhĩpêêxà Maati mẽ Kra wa hkôt amnhĩ nhĩpêx mex o apa rãhã ty. ²⁵ Hãmri nê wa kuri atĩr tũm nê amex kumrêx nê apa ho apa. Ra Jejus kot ja jarênh xà hkôt.

²⁶ Na pa ã mẽ amã ixkapêr nê hã kaga anê. Mẽ aprĩ hã mẽ amã Jejus o hêx xwỳnhjê kapêr mar nê mẽ kot mẽ amã hêx kôt mẽ omunh mex kaxyw.

²⁷ Tĩrtũm Karõ na pre mẽ akarõ mã gjêx pa nê mẽ amã Tĩrtũm kapêr piitã o amnhĩrit mex o mẽ akôt pa. Jakamã mẽmo kaxyw kot kaj mẽ Tĩrtũm kapêr o hêx xwỳnhjaja kot tanhmã harênh toja ma? Ra Tĩrtũm Karõ kot mẽ amã ho amnhĩrit o mẽ ajahkre mex o pa kênã kot ka kêt mẽ nhãm mẽ kapêr ma. Na hte Tĩrtũm Karõja mẽ urà nê Tĩrtũm kapêr ho hêx kêt nê. ãm katat kôt kot ho amnhĩrit mex jakamã kwa kêr ka mẽ mar tỳx nê hkôt ri amnhĩ nhĩpêx mex rãhã ho ri apa.

Mẽ pahte tãm ri amnhĩ nhĩpêx ã mẽ pamã karõ

Juãw 14.25-26, 15.1-8

²⁸ E Jejus kôt ixkrajaja. Kêr ka mẽ arĩ Kris kôt amnhĩ nhĩpêx mex rãhã ho ri apa. Kê nhỹrmã akupỳn mẽ pahwỳr wryk o tẽ ka mẽ amnhĩ wỳr omu nê akĩnh nê. Nê akĩnh kãm axãmnhĩx kutã mra nê hkaxpa nê amnhĩ kamã amã uma hkêt nê. Rỳ mẽmoj tã amnhĩ tã apijaam kêt nê. ãm axãmnhĩx akĩnh nê ma kutã mra. ²⁹ Krisja mex o mex jakamã na pu htem urak nê amnhĩ to mex o ri papa. Mẽ pahte amnhĩ to mex o papa xwỳnhjaja urak nê mẽ pahpê Tĩrtũm kra na pu mẽ.

3

Tĩrtũm krajê hkukamã tanhmã mẽ harênh to

Rõmãn 8.18; Sikũn Korĩt 3.18; Sikũn Pêtre 3.11-14

¹ Nê Mẽpanhĩpêêxà Maati kãm mẽ pajapê htỳx kumrêx jakamã na pre mẽ pahte hkôt amnhĩ xunhwỳr ã mẽ pahpumunh kôt mẽ pahpê hkra hã mẽ pajarê pu mẽ pahpê hkra nê ri papa. Ja na mẽ pamã mex o mex. Nom mẽ kot hkôt amnhĩ xunhwỳr kêt xwỳnhjaja kot hprĩ hã ja hã mẽ pahpumunh kêt jakamã na htem mẽ pahte tãm amnhĩ nhĩpêx ã mẽ pahpumu nê tee ri hamaxpêr.

2 E Kris kôt ixkwỳjaja. Ra mẽ pahpê Tĩrtũm kra htã kormã mẽ pahte amnhĩ kukamã mẽ pahprĩ hã ja hã amnhĩ pumunh mex kêt. Koja nhỹrmã Jejus akupỹn mẽ pahwỳr wrỳ pu mẽ pano ho tanhmã kute hã omunh mex nẽ. Hãmri nẽ tã te kot amnhĩ nhĩpêx pyrãk o amnhĩ nhĩpêx mex o papa. Ra mẽ pahte ja mar mex. 3 ã mẽ pahte amnhĩ kukamã pajamaxpêr anhỹr o papa xwỳnhjaja na pu htem kormã amnhĩ wỳr Jejus kamã pajamak o papa. Pê urãk nẽ mẽmoj punuj mã pajamaxpêr kêt o papa. Nẽ urãk nẽ tanhmã amnhĩ tomnuj to hkêt nẽ.

Tĩrtũm krajaja kot amnhĩ tomnuj o pa hkêt ã mẽ kãm karõ

4 Nẽ mẽ kot amnhĩ tomnuj o mẽ pa xwỳnhjaja na htem Tĩrtũm kapêr kwỳm ri amnhĩ nhĩpêx o pa. Tã kot puj mẽ tanhmã amnhĩ tomnuj to hãmri nẽ mẽ urãk nẽ kapêr kwỳm ri amnhĩ nhĩpêx. 5 No Jejus na pre mẽ pahte amnhĩ tomnuj pãnhã amnhĩrer kaxyw mẽ pahwỳr wrỳ. Aa kot amnhĩ tomnuj kêt jakamã tapxipix kot mẽ pahpãnhã amnhĩrer mã tãm. Ra mẽ pahte ja jarênh mar mex. 6 Jakamã mẽ pahpê hkwyjaja na pu htem ri pahtỳx tanhmã amnhĩ tomnuj to ho papa hkêt nẽ. ã mẽ kot amnhĩ nhĩpêx anhỹr xwỳnhjaja kêp hkwy hkêt. 7 Nom koja mẽhõ Kris pyrã nẽ tãm amnhĩ nhĩpêx o pa hãmri nẽ kêp Tĩrtũm kraa. Jakamã kwa koja mẽhõ Tĩrtũm kapêr kwỳm ri tanhmã mẽ amã kapêr to ka mẽ ama nẽ ãm ama. 8 Mẽ kot amnhĩ tomnuj o mẽ pa xwỳnhjaja na htem Satanasti hkôt ã amnhĩ nhĩpêx anhỹr o pa. Satanastija Tĩrtũm kot mẽmoj to kator krax rũm nhũm ã kot amnhĩ tomnuj anhỹr o pa xwỳnh na. Tã ã kot amnhĩ nhĩpêx anhỹr o paja o hapêx par kaxyw na pre Tĩrtũm Kra Jejusja amnẽ pika hwỳr wrỳ.

9 Nom mẽ papajaja mẽ pahpê Tĩrtũm kra na pu mẽ. Na pre mẽ pahwỳr amnhĩ Karõ rẽ nhũm mẽ pahkarõ mã gjêx pa nẽ mẽ pahkôt

pa ho pa. Jakamã tanhmã kot puj wem amnhĩ to nẽ Satanasti pyrã nẽ pahtỳx ri amnhĩ tomnuj o papa? Nã kot puj mẽ ã amnhĩ nhĩpêx anhỹr kêt nẽ. 10 Koja mẽhõ tãm amnhĩ nhĩpêx kêt nẽ hãmri nẽ mããnên hkwyjê kamã ukapri hkêt nẽ. Hãmri nẽ ã amnhĩ nhĩpêx anhỹr o kêp Tĩrtũm kra hkêt ã amnhĩ to amnhĩrit. ãm kêp Satanasti hkra hã amnhĩ to amnhĩrit kurê kumrêx.

Mẽ pamã axpên kĩnh o te Jejus kãm mẽ pahkĩnh pyrãk ã mẽ pamã karõ
Matêwre 22.39; Rukre 10.25-37; Juāw 13.31-35

11 Nẽ kêr ka mẽ arĩ amã axpên kĩnh pê tãm axpên nhĩpêx o ri apa rãhã nẽ. Te amnepê mã mẽ ate Jejus kôt amnhĩ xunhwỳr ã arĩgrota ã mẽ kot mẽ amã ja hã karõ pyrã nẽ. 12 No mẽ ri finat Kaĩ kot amnhĩ nhĩpêx pyrãk o amnhĩ nhĩpêx kêt nẽ. Kêp Satanasti hkra jakamã na pre htõja pĩ. Kurom kot tãm amnhĩ nhĩpêx ã omu nẽ kamã gryk nẽ kupĩ. 13 Tã koja mẽ kêp Tĩrtũm kra hkêt xwỳnhjaja Kaĩ pyrã nẽ kêp mẽ aprãm nõkati nom kêr ka mẽ amnhĩ tã mẽ omu nẽ tee ri amnhĩ kukamã ajamaxpêr kêt nẽ. 14 Kormã mẽ pahte Jejus kôt amnhĩ xunhwỳr kêt ri na pu prem mẽ urãk nẽ amnhĩ tomnuj o papa. Jao mẽ pahpê kuwy hwỳr papa mã xwỳnh. Tã mẽ pahte Jejus kôt amnhĩ xunhwỳr jakamã ra pahpê Tĩrtũm mẽ Kra wa kuri pahtĩr tũm nẽ papa mã xwỳnh. Jakamã na pu htem mẽ kêp hkra hkêt xwỳnhjê kurom pamã mẽ piitã mẽ hkĩnh o tanhmã mẽ ho mex to ho papa. Mẽ kãm amnhĩ kwỳjê hkĩnh kêt xwỳnhjaja arĩ mẽ kêp kuwy hwỳr mẽ pa mã xwỳnh na mẽ. Ra mẽ pahte ja jarênh mar mex. 15 Mẽ kãm mẽ hpar prãm o mẽ pa xwỳnhjaja koja nhỹrmã Tĩrtũm mẽ Kra wa kuri htĩr tũm nẽ pa ho pa hkêt nẽ. Ra mẽ pahte mããnên ja mar mex. Jakamã kwa mẽ amã akwỳjê hprãm nõkati ho ri mẽ apa xwỳnhjaja. Tĩrtũm noo mã te ra mẽ ate mẽ hpar pyrãk jakamã kot kaj mẽ arĩ ã amnhĩ nhĩpêx anhỹr o ri apa hãmri nẽ nhỹrmã Tĩrtũm nhõ krĩ hwỳr axàpir kêt nẽ.

16-18 E ixkwýjaja. Kwa kêr pu mē pajakwa pix o pamã axpēn kīnh ã amnhī jarēnh kêt nē. Mããnēn axpēn kutã panojarēt o ri papa. Nē tanhmã axpēn to mex to. Tanhmã na pre Jejus kãm mē pajapê hã amnhī nhīpêx to? Nà na pre kãm mē pamex prãm xàj mē panê ty. Kãm amnhī tã ma hkêt kãm mē pakamã ukaprī xàj mē panê ty. Tã kêr pu mē uràk nē pahkwýjê kamã paxukaprī ho mē kutã panojarēt rãhã ho papa. Jao mē paxàpkur xà hã panhõ pumu nē nhýri pahkwýjê hõ pumu nhũm kêp amrakati. Pu mē tee ri ja hã omu hãmri nē kãm mē panhõta kwý gõ. Kot pu mē ã amnhī nhīpêx anhýr kêt nē hãmri nē pamã Tĩrtũm kīnh ã amnhī jarēnh kaprý. ¹⁹ Nē kot puj mē ã axpēn to mex o papa anē nē ra pahte Tĩrtũm kôt amnhī nhīpêx mex ã amnhī to amnhĩrīt. Hãmri nē ra paxàmnhĩx kãm tanhmã amnhī jarēnh to ho papa. Amnhī kamã pamã uma hkêt nē paxàmnhĩx pajamakêtkati nē kãm tanhmã amnhī jarēnh to.

Mē paxàmnhĩx amnhī to Tĩrtũm wýr ã mē pamã karõ

²⁰ Nē kot puj mē mēmo arĩgro hã tanhmã amnhī tomnuj to hãmri nē tee ri ja hã amnhī pumu nē amnhī kamã pagryk nē. Na hte Tĩrtũm tanhmã mē pahte amnhī tomnuj to hã mē pahpumu nom arĩ kãm mē pajapêê. Mē parom àhpumunh o àhpumunh jakamã kot mē pahte amnhī tomnuj prãm kêt ã mē pahpumunh mex. ²¹ Jakamã puj mē ã kãm pajamaxpēr anē nē amnhī kamã pamã uma hkêt kãm paxàmnhĩx tanhmã ri amnhī to hwýr to ho ri papa. ²² Kot puj mē hkôt amnhī nhīpêx o papa rãhã nē mēmoj tã kuwý. Nē kãm hprãm xà hkôt amnhī nhīpêx o papa hã amnhī pumunh kôt mēmoj tã kuwý. Hãmri nhũm mē pama nē tanhmã mē pamã mēmoj to rý mē pamã mēmoj gõ.

Te ixkre pixi kamã mē pahtipxi pyrãk ã mē pamã karõ

²³ Nē tanhmã mē pahte amnhī nhīpêx to ho papa hã na hte Tĩrtũm mē pamã karõ? Nà mē pahte amnhī kaxyw Kra Jejus Kris kôt pajamaxpēr nē hkôt amnhī nhīpêx o papa hã na hte mē pamã karõ. Nē kapēr xà hkôt pamã axpēn kīnh o mēmoj to axpēn kutã panojarēt o papa hã na hte mē pamã karõ. Na hte ã mē pahte amnhī nhīpêx anhýr ã mē pamã karõ anē. ²⁴ Jakamã kot puj mē kapēr xà hkôt axpēn nhīpêx o papa nē te ixkre tipxi kamã mē pahte axpēn kôt Tĩrtũm kôt ri papa pyrãk. Ra kot mē pahwýr Karõ rēnh nhũm kot mē pahkarõ mã gjêx jakamã na hte mē pahkôt pa ho pa hã amnhī to amnhĩrīt.

4

Mē kot Kris kapēr jarēnh ã amnhī to hêx xwýnhjê jarēnh

Wam Korõt 12.1-3; Wam Juãw 2.18-26; Sikũn Juãw 7-11

¹⁻³ Nē koja mēhõ Tĩrtũm kapēr o mē ajahkre kaxyw mē amã tanhmã Jejus Kris jarēnh to nē ãm hãmri harē nē harēnh o:

—Na pre Tĩrtũm Kra Jejus mē pahwýr wrý nē ĩ ho ĩ ho mē pakamã kato. Tĩrtũm tãm na pre mē pahwýr kumē nhũm wrý.

Anhýr o mē amã harē ka mē ama nē kapēr kôt ajamaxpēr kurê kumrêx. ãm hãmri na hte Tĩrtũm Karõ nhý ã harēnh anē. No koja Jejus kêp Tĩrtũm Kra hkêt ã harē ka mē ama nē ãm ama nē hkôt ajamaxpēr kêt nē. Kãm Kris kurê xwýnh maati nhý hã kapēr xwýnhjaja na hte ã harēnh anhýr o pa. Na ka prem ra kãm Kris kurê xwýnh maatija tokyx hpõx ã harēnh ma. Tã na ra ý hã kapēr xwýnhjaja ohtõ nē pika piitã hkôt mē hkôt pa nē te Tĩrtũm Karõ nhý hã mē kãm kapēr pyrãk o amnhī nhīpêx o pa. Nom ãm amnhī to hêx o pa. Jakamã e kwa ixkwýjaja. Koja mēhõ mē awýr mra nē tanhmã mē amã Tĩrtũm kapēr jarēnh to ka mē aprĩ hã ama nē rĩ kormã kêp Tĩrtũm nhý hã kapēr jarēnh xwýnh ã harē rý kot amnhī to hêx xwýnh ã harē.

4 Kêť mē papajaja jajē rom mē pahpē Tirtūm kra na pu mē. Nē Tirtūm Karō kot ra mē pahkarō mā gjêx xwýnh̄ta hihtýx o jajē piitā mē hakrenh. Jakamā na pu htem ý hā mē kutā amnhī to htýx o papa nhūm mē tee ri tanhmā mē pamā Jejus o hêx to kaprý. Pu mē kuma nē am mē kuma. 5 Mē kēp Tirtūm kra hkêť jakamā na htem hkôt amnhī nhīpêx kêt nē. Mē kot amnhī nhīpêxja axtem na. Jakamā na htem Tirtūm kapêr kwým ri tanhmā hkra hkêť xwýnh̄jē mā kapêr to ho pa nhūm mē kuma nē kām mē mar prām nē. 6 Nom mē ixte Tirtūm kapêr o mē ajahkre xwýnh̄jaja na pa htem mē kurom Tirtūm nhý hā ixkatāt kôt am hāmri mē amā kapêr jarēnh o ri ixpa. Jakamā ka mē apê hkra hā mē amā mē inhmar prām nē. No mē kēp hkra hkêť xwýnh̄jaja kām mē inhmar prām kêt.

Na pu htem pahprī hā mē kapêr ā mē kuma nē rī kormā tanhmā mē harēnh to. Tirtūm nhý hā kapêr ā mē harē rý kām hkurē xwýnh̄ maati nhý hā kapêr ā mē harē.

Tirtūm kām mē pajapê hā tanhmā amnhī nhīpêx to hā harēnh

Juāw 3.16-21; Rōmān 5.5-9, 8.35-37

7 E ixkwýjaja. Na hte Tirtūm tanhmā mē pahpē hkrajē ho pu mē pamā axpēn kīnh nē. Jakamā kēr pu mē ā axpēn nhīpêx anhýr jao axpēn to mex pix nē. Á Tirtūm kot mē panhīpêx anhýr jakamā kēr pu mē pahpē hkra-jaja ý hā ā axpēn nhīpêx anhýr o ri papa.

8 Koja mēhō Tirtūm kīnhā kām mē hkwýjē hkīnh kêt hāmri nē mē kamā ukapri hkêť o pa. Hāmri nē kēp Tirtūm kra hkêť ā amnhī to amnhīrīt mex nē.

9-10 Tirtūm kām mē pajapê htýx kumrêx. Kormā mē pamā hkīnh kêt ri nhūm kumrêx amnhī rom kām mē pajapê ho pa. Nē kām mē pajapê xāj mē pahwýr Kra pyxita mē. Mē pahte amnhī tomnuj pānhā kot mē panē htyk kaxyw. Mē pahte kukwak ri amnhī nhīpêx nyw o amnhī nhīpêx nē nhýrmā wa kuri pahtír tūm nē pamex nē papa ho papa kaxyw. Á na pre

Tirtūm mē pahwýr Kra mēnh anhýr o kām mē pajapê hā amnhī to amnhīrīt.

11 E ixkwýjaja. Tirtūm kām mē pajapê htýx jakamā kwa kēr pu mē urāk nē pamā axpēn kīnh o papa. Nē axpēn kamā paxukapri nē. 12 Aa mē pahtō pahte pano ho Tirtūm pumunh kêt tā na hte mē pakamā pa ho pa. Pu mē kām mē pajapêta pyrā nē ý hā pamā axpēn kīnh o papa. 13 Na pre mē pahwýr Karō rē nhūm mē pahkarō mā agjē pu mē ý hā kot amnhī nhīpêx o amnhī nhīpêx o papa.

14 Nē mē ixpê Jejus nhý hā mē ajahkre xwýnh̄jaja. Mē ixte kot amnhī nhīpêx nē kot mēmoj tanhmā ho hā omunh o ri hkôt ixpa jakamā na pa htem ma mē piitā mē kām harēnh o ri mē hkôt ixpa. Nē mē kām harēnh o:

—Tirtūm na pre mē pahwýr Kraja mē. Kot mē pahpiitā mē panē htyk kaxyw mē pahwýr kumē. Anē.

15 Mē kot Jejus kēp Tirtūm Kra hā harēnh o pa xwýnh̄jaja na hte Tirtūm mē kamā pa ho pa nhūm htem ý hā ā Kra jarēnh anhýr o pa.

16 Na pu mē ra pahprī hā Tirtūm kām mē pajapê hā amnhī tā omu. Kām mē pajapê htýx kumrêx ā amnhī tā omu. Jakamā kot puj mē urāk nē ý hā pamā mē piitā mē hkīnh o papa. Tirtūm mē mē pahtipxi nē ri papa kēnā.

Mē kām axpēn kīnh xwýnh̄jaja kām Tirtūm puma hkêť ā mē harēnh

17 Nē kot puj mē pamā axpēn kīnh o papa nē määnēn Kris kôt amnhī nhīpêx ho papa. Hāmri nhūm nhýrmā Tirtūm kot Kra mē wa kuri mē htír tūm nē mē pa ho mē pa mā xwýnh̄jē nhīxi jarēnh kaxyw pu mē tee ri amnhī kukamā pajamaxpêr kêt nē. Ra amnhī nhīxi jarēnh ma nē pahkīnh nē.

18 Nē koja mēhō kām hkwýjē hkīnh kêt nē tanhmā hō homnuj to. Hāmri nē kot amnhī tā tanhmā ho pymaj kām uma ho hwýr mrar kêt nē. No koja kām hkwýjē hkīnh nē tanhmā mē ho mex to ho pa nē kām mē uma hkêť nē. 19 Tirtūm kumrêx na pre kām mē

pajapê nê mẽ pakukamã tanhmã mẽ pahto mex to. Tã pu mẽ ra amnhĩ pyrà nê pamã hkĩnh o papa. Nê pamã mẽ piitã mẽ hkĩnh o papa.

²⁰ Nê koja mēhō kām Tĩrtũm kĩnh ã amnhĩ jarēnh tã kām hkwỳjê hō hprãm nōkati hāmri nê ra kām Tĩrtũm prãm kêt ã amnhĩ to amnhĩrĩt. Kot kaj mẽ ano ho akwỳjê pumunh o apa xwỳnhhta amã hkĩnh kēê tã tanhmã kot ka we amnhĩ to nê ate ano ho Tĩrtũm pumunh kēeta amã hkĩnh ã amnhĩ jarē? Nà ka ã amnhĩ jarēnh anhỹr o amnhĩ to axēx. ²¹ Na pre Tĩrtũm mẽ pamã kapēr o amnhĩrĩt o:

Kot kaj mẽ amã ixkĩnh hã kot kaj mẽ määnēn amã akwỳjê hkĩnh o mẽ ho mex o ri apa. Anē.

5

Tĩrtũm nhỹ hã mẽ pamã axpēn kĩnh ã mẽ pamã karō

¹ Nê Tĩrtũm kot mẽ pahwỳr Jejus mēnh ã harēnhja. Koja mēhō kuma nê amnhĩ kaxyw hkôt hamaxpēr nê Jejus kôt amnhĩ xãm hã koja Tĩrtũm ja hã omu nê ho hkra.

Nê koja mēhō kām Tĩrtũm kĩnh hã koja määnēn kām hkwỳjê hkĩnh o pa. ² Ja pyrà nê kot puj mẽ pamã Tĩrtũm kĩnh nê kapēr kôt amnhĩ nhĩpēx. Hāmri nê määnēn pamã krajê piitã mẽ hkĩnh ho papa.

³ Nê kot puj mẽ pamã Tĩrtũm kĩnh nê nhũm kapērja mẽ pahpê hihtỳx kêt nê. Pu mẽ pamã Tĩrtũm kĩnh ã kapēr kôt amnhĩ nhĩpēx mex o ri papa.

⁴⁻⁵ Na pu prem amnhĩ kaxyw Tĩrtũm Kra Jejus kôt pajamaxpēr nê hkôt amnhĩ xunhwỳ nhũm Tĩrtũm ja hã mẽ pahpumu nê mẽ pahto hkra pu mẽ ý hã amnhĩ nhĩpēx nyw o amnhĩ nhĩpēx o papa. No ri tanhmã amnhĩ tomnuj to ho ri papa hkêt nê.

*Měmoj axkrunēpxi nê kot Jejus kēp Tĩrtũm Kra hã ho amnhĩrĩt
Juāw 1.32-34, 3.36, 5.31, 15.26*

⁶ Nê Jejus pix na pre Tĩrtũm mẽ pakaxyw ãm nhũm kēp Kra hã mẽ pahwỳr wrỳ. Hāmri nhũm Juāw Pax- isja pyhti kamã hkrã kumrã. Kēp

Tĩrtũm Kra hã hkrã kumrã. Tã nhũm Tĩrtũm kapēr kôt ma tanhmã amnhĩ nhĩpēx to ho pa. Nê ri hkwỳjê mã kapēr jarēnh o ri mẽ hkôt pa. Tã nhũm mẽ kupĩ nhũm kēp Tĩrtũm Kra hã pĩ kahpa hã ajēt nê ty nê hkamrō axkapĩ. Æ mẽ panē amnhĩ nhĩpēx anē nhũm Tĩrtũm Karōja kēp Kra hã mẽ pamã ho amnhĩrĩt. Æm hāmri na hte ã tanhmã mẽmoj to amnhĩrĩt to anē. Měmoj to hēx kêt jakamã na pre Jejus kēp Tĩrtũm Kra hã mẽ pamã ho amnhĩrĩt.

⁷ Nê kēp Tĩrtũm Kra hã mẽ pamã mẽmoj to axkrunēpxi nê ho amnhĩrĩt.

⁸ Tĩrtũm Karō na pre kēp Kra hã mẽ pamã ho amnhĩrĩt pu prem kēp Kra hã omu. Nê Juāw Paxis kot hkrã kumrãrta ã pu mẽ määnēn kēp Tĩrtũm Kra hã kot ho amnhĩrĩtja ã omu. Nê määnēn kēp Tĩrtũm Kra hã pĩ kahpa hã jēt nê htyk nê hkamrō pikapĩrta ã mẽ pamã ho amnhĩrĩt pu mẽ kēp Kra hã omu. E mẽ pamã mẽmoj to axkrunēpxi nê Jejus kēp Tĩrtũm Kra hã kot ho amnhĩrĩt xwỳnh na jajaja.

⁹ Nê na pu htem jar pahkwỳjaja kot axpēn mar xà hã ixkre kamã mẽ kapēr ma nê mẽ hkôt pajamaxpēr. Tã koja Tĩrtũm tanhmã mẽ pamã mẽmoj to amnhĩrĩt to pu mẽ hkôt pajamaxpēr kurê kumrēx. Kēp Tĩrtũm kēnã kot pu kêt mẽ kapēr prã nê hkôt pajamaxpēr kêt. Tãm na pre mẽ pamã Jejus kēp Kra hã ã ho amnhĩrĩt anē. ¹⁰ Jakamã mẽ pahte Tĩrtũm Kra hkôt amnhĩ xunhwỳr xwỳnhjaja na pu prem Jejus kēp Kra hã harēnh ma nê hkôt pajamaxpēr kurê kumrēx. No mẽ kēp hkra hkêt xwỳnhjaja na htem Tĩrtũm kot kēp Kra hã harēnh ma nê ãm kuma nê amnhĩ kaxyw hkôt hamaxpēr kêt nê. Jao te Tĩrtũm kēp Hipēêxà hã amnhĩ to hēx pyràk ã harē.

¹¹ E kot paj ixprĩ hã mẽ amã tanhmã ja jarēnh to ka mẽ inhma. Nà na pre Tĩrtũm Krata mẽ pahpiitã panē ty. Jakamã kot puj mẽ pahte hkôt amnhĩ xunhwỳr xwỳnhjaja nhỹrmã ty nhũm Tĩrtũm akupỳm mẽ pahto mẽ pahtĩr. Pu mẽ wa kuri pamex nê

pahtīr tūm nē papa ho papa. ¹² Mē pahpê Jejus kwỳjaja kot puj mē ã pahtīr tūm nē papa anē. No mē kēp hkwỳ hkēt xwỳnhjaja koja mē nhỹrmã ty nē mē pahpyrà nē wa hwỳr àpir kēt nē.

¹³ Na ka prem ixpyrà nē amnhĩ kaxyw Tĩrtūm Kra hkôt ajamaxpēr nē hkôt amnhĩ xunhwỳ. Tã pa ã mē amã kagàja nhĩpêx anē. Mē ate kamã harēnh nē mē pahte nhỹrmã Tĩrtūm mē Kra wa hwỳr mē paxàpir ã mē pajarēnhja mar nē amnhĩ kaxyw hkôt ajamaxpēr o ri apa kaxyw nē kapēr prār o ri apa hkēt nē.

Mē pahte paxàmnhĩx mēmoj tã Tĩrtūm wỳr ã mē pajarēnh Juāw 14.13-14

¹⁴ Nē mē pahpê Tĩrtūm krajaja na pu htem paxàmnhĩx pajamakêtkati nē mēmoj tã tanhmã hwỳr to ho papa. Kot puj mē kãm hprãm xà hkôt mēmoj tã kuwỳ nhũm mē pama. ¹⁵ Na pu htem mēmoj tã kuwỳ nhũm mē pamar mex nē mē pahte mēmoj tã hwỳr xà hkôt tanhmã mē pamã mēmoj nhõr to rỳ tanhmã mēmoj to. Ra mē pahte ja mar mex.

Tĩrtūm kot tanhmã hkra hkēt xwỳnhjê nhĩpêx to hã harēnh Rukre 22.31-32

¹⁶⁻¹⁷ Nē koja Kris kôt mē anhĩõ tanhmã amnhĩ tomnuj to ka mē atõ tee ri ja hã omu nē ho Tĩrtūm wỳ. Ho awỳ kê nē tanhmã kot amnhĩ tomnuj tota o hapêx nē ja nē ho htỳx kê axte ã amnhĩ nhĩpêx anhỹr kēt nē. Kot puj mē pahtõ tanhmã amnhĩ tomnuj to nhũm Tĩrtūm tee ri ja hã mē pahpumu nhũm ja kēp omnuj nē. Tã kot puj mē amnhĩ tomnujta kaga nhũm ja hã mē pahpumunh kôt tanhmã hã mē pahto hkēt nē. ãm mē kot amnhĩ nhĩpêx pixi koja ho hamakêtkati hkēt nē. Koja mēhõ Tĩrtūm kaga ho hkaga nē aa hkôt amnhĩ xãm kēt nē. Hãmri nhũm tee ri amnhĩ tã omu nhũm ja kēp omnuj tỳx kumrêx. Jakamã koja aa ho hkra hkēt nē. Nē aa kot hkaga ho hamakêtkati hkēt nē pa ho pa. Jakamã koja hkaga xwỳnhhta nhỹrmã

ty nē kuri htīr tūm nē pa ho pa hkēt nē.

¹⁸ Nē mē pahpê Tĩrtūm krajaja na pu htem amnhĩ tomnuj o papa hkēt nē. Tĩrtūm Kra Jejus kot ja pymaj mē panê Satanasti pumunh mex jakamã nhũm tee ri mē pahte tanhmã amnhĩ tomnuj to hprãm xàj mē pano kupy r kaprỳ ho ri pa. Ra mē pahte ja mar mex. ¹⁹ Mē pahpê Tĩrtūm kra na pu mē. No mē kēp hkra hkēt xwỳnhjaja Satanasti kot amnhĩ tã mē ho htỳx pyrak o mē hipêx jakamã nhũm htem tanhmã amnhĩ tomnuj to ho pa. Mē pahte ja mar mex.

²⁰ Nē mãnēn ja mē pahte mar mex. Na pre Tĩrtūm Kra mē pahwỳr wrỳ nē mē pamã tanhmã Tĩrtūm o amnhĩrīt to ho pa. Tapxipix kēp Mēpahpãm ã mē pamã ho amnhĩrīt. Tã Jejus kukwak ri mē pahpê Tĩrtūm kra jakamã kot puj mē nhỹrmã wa kuri pahtīr tūm nē pa mex nē papa ho papa.

²¹ E Kris kôt ixkwỳjaja. Kēr ka mē Tĩrtūm kapēr kôt pix mã mãn ri amnhĩ nhĩpêx o ri apa rãhã nē. No nhãm mē kot Tĩrtūm kapēr kwỳm ri mē amã kapēr o hêx xwỳnhjê kapēr ma nē ãm mē ama nē mē hkôt amnhĩ nhĩpêx hkēt nē.

Tã ãm ja pix. Ixpê Juāw na pa krĩ piitã hkôt mē amã kagà nhĩpêx nē kurê.

Sikūn Juāw Juāw kot Jejus kôt hkwyjê hwyr wam kagà nê mēnh kôt hō mēnh

Juāw na pre kagàja nhīpêx. Jejus nhỹ hã hkrajê jahkre ho ri pa xwýnhjê hō na pre. Jakamã na pre hkrī hō kamã Kris kôt htōx mē ò fãmii mã kagàja nhīpêx nê mē hwyr kumê. Na pre hte Tirtūm kapêr o mē hêx o pa xwýnhjê hō mē ò krī hwyr mra nhūm Juāw kràmnhwý nita omu nê htýx kot mē ahkre mex ã hkamnhīx. Hāmri nê kot Tirtūm kapêr o hkwyjê jahkre kaxyw amnhī nhōrkwy hwyr kuwý. Hāmri nhūm Juāw tee ri harēnh ma nê kãm kagàja nhīpêx nê kamã kot amnhī wýr hwyr nê kãm kapêr nê hprī hã kãm tanhmã mē kot Tirtūm o hêx to ho pa hã tanhmã mē harēnh to. Kot kamã harēnh nê mē harēnh mar hāmri nê mē axkãm hamak rom nê ri pa kaxyw. ã na pre Juāwja hkràmnhwý ni mē hkwyjê mã mēmoj jarēnh nê hã kagà nê mē hwyr mēnh anê. Nê mē kãm:

¹ Pa Jejus kôt ixtōx. Xà mē amex? E ot pa mē amã kagà nhīpêx nê mē awýr kumê. Akrajaja nê apê mē hkatorxà mē mē ato ixpimràatã mē awýr kumê. Ixpê Juāw pigêtre na pa. Inhmã mē akīnh nom papx-ípix inhmã mē akīnh kêt. Mē pahpyrà nê mē kot Tirtūm kôt amnhī xunhwýr xwýnhjaja haxwýja kãm mē akīnh. ² Mē pahte Tirtūm kapêr kôt ri amnhī nhīpêx rãhã ho ri papa jakamã na pu htem pamã axpên kīnh o ri papa.

³ Na pa hte mē pahto Mēpanhīpêxà maati Tirtūm wýr o ixpa nê kãm:

—Pa Tirtūm. Ot pa mē amnhī to awý. Akra Jejus Kris mē mē amnhī to war awý. Kêr ka wa mē ixkamã axukaprī nê mē ixkutã war anojarêr rãhã ho ri apa. Nê tanhmã mē ixkrã hto pa mē ixãmnhīx ijamakêtkati nê ixkīnh nê mē inhmã axpên kīnh nê

axpên to mex o ri axpên kôt ixpa. Nê tãm ri amnhī nhīpêx. Anê.

Mê pamã axpên kīnh kãm axpên to mex ã mê pamã karõ

Juāw 13.34-35; Wam Juāw 2.7-9, 3.14-18

⁴ Nê na pa pre akra hkwyjê pumu nhūm mē inhmã amnhī jarê pa mē kuma nê mē ý hã ixkīnh nê. Na xep prem Tirtūm kôt amnhī xunhwý nê hkôt ri amnhī nhīpêx mex o pa. Mē kot Mēpanhīpêxà Maati Tirtūm kapêr ã kagà hkôt amnhī nhīpêx ã inhmã amnhī jarê pa mē kuma nê ixkīnh nê. ⁵⁻⁶ Jakamã na pa ã amã ixkapêr nê hã kagà anê. E kwa Kris kôt ixtōx. Kêr pu mē pamã axpên kīnh o ri papa hã mēmoj to axpên kutã panojarêr rãhã ho ri papa. ã ixujarēnh anhýrja nyw kêt. Amnepê mã mē ate Jejus kôt amnhī xunhwýr ã arıgrota ã na prem ã mē amã karõ anê. Tã kêr pu mē arı pamã axpên kīnh pê Tirtūm kapêr pi-itã hkôt amnhī nhīpêx mex o ri papa. Kapêr ã kagà kot ã mē pahte amnhī nhīpêx anhýr ã mē pamã karõ.

Tirtūm kapêr o mē hêx xwýnhjê jarēnh

Rômãn 16.17-18; Wam Ximotre 5.22; Wam Juāw 2.18-26, 4.1

⁷ Nê mē kot Tirtūm kapêr o hêx o ri mē pa xwýnhjaja na mē ra ma krī piitã hkôt mē kãm tanhmã ho hêx to ho pa nê mē kãm:

—Jejus kêp Tirtūm Kra hkêt ãm mē panhĩõ na pre. Na pre Tirtūm mē pahwýr mēnh kêt nê. ãm mē panhĩõ rŭm na pre kato.

Anhýr o mē kãm ho hêx o pa. Kãm Kris kurê xwýnh maati ja nhỹ hã na htem ã ri ho hêx o pa anê. ⁸ Jakamã kwa mē amnhī nê mē omunh mex nê mē ama nê ãm mē ama. Kot kaj mē kapêr ma nê mē hkôt ajamaxpêr hāmri nê mē ixte Tirtūm kapêr o mē ajahkreta kaga. Kwa mē arı mē ate amnhī nhīpêx nyw pix o mãn amnhī nhīpêx rãhã o ri apa. Nê arı mē amã axpên kīnh kãm tanhmã axpên to ajuta hto rãhã ho ri apa. Kêr kê Tirtūmja hã mē apumu nê nhýrmã mē

ato mex nē. ⁹ Nom kot kaj mē nhām mē kapēr punujja kôt amnhĩ nhĩpêx nē Kris kôt amnhĩ nhĩpêx kêt nē nhũm Tĩrtũm mē akôt pa hkêt nē. Nom kot ka mē arĩ Kris kôt amnhĩ nhĩpêx mex nē hāmri nhũm Tĩrtũm mē Kra Jejusja wa mē akôt ri pa ho pa rāhā nē. ¹⁰ Jakamā koja ā Tĩrtũm kapēr ā kagà kuhpa hā Jejus o hêx xwỳnhjaja mēmo arĩgro hā mē anhō krĩ hwỳr pōj ka mē omu nē amnhĩ nhōrkwỹ hwỳr mē hwỳr kêt nē. Nē tanhmā mē kām akapēr to hkêt nē. ām ri mē hkàx ā ri mra. ¹¹ No kot kaj mē ā mē hipêx anhỹr kêt nē mē hwỳr mra nē mē mar o akuhê hāmri nē te mē ate mē hkôt amnhĩ nhĩpêx o amnhĩ nhĩpêx pyrāk. Ja pumaj kêr ka mē nhỹri mē omu nē mē htêp kêt kumrêx.

Kagà jatur xà

Hapuhã Juāw 13-15

¹² E Kris kôt ixtōx. Ixkapēr jatur xà na ja. Ixkapēr ā kagàja ām hakotre nom inhmā mē amā ixkapēr ry hprām. Jakamā kot paj mēmo arĩgro hā ma mē awỳr mō pu mē axpên pumu nē pahkĩnh nē. Pa rĩ kormā mē amā ixkapēr jatur xām kumē ka mē aprĩ hā inhma.

¹³ Nē ota jar Kris kôt atōx krajaja awỳr hpēr mē.

E ixpê Juāw pigêtre na pa ā awỳr kagàja nhĩpêx nē mēnh anē.

Hapuhã Juãw Juãw kot Jejus kôt hkwýjê hwýr kagà nê mênh o axkrut kôt hõ mênh

Juãw na pre mãânên kagàja nhípêx. Jejus nhỹ hã hkrajê jahkre ho mẽ pa xwýnhjê hõ na pre. Tã hkràmnhwý Gajore mã kagàja nhípêx nê hwýr kumê. Na pre Jejus kwýjaja ma krĩ piitã hkôt mẽ kãm Jejus kapêr jarênh o ri mẽ hkôt pa. Jao Gajore nhõ krĩ hwýr pøj nhũm Gajore mẽ hpôx ã mẽ harênh ma nê amnhĩ nhõrkwý hwýr mẽ kuwý. Jakamã nhũm pre htem ma õ krĩ hwýr pa hãmri nê kuri pøj. Nhũm Juãw ã Gajore kot amnhĩ nhípêx anhỹr ã harênh ma nê hkĩnh nê hwýr kagàja nhípêx nê kumê. Nê kamã kãm mēhõ pê Xotre kot tanhmã amnhĩ tomnuj to ho pa hã harê. ã na pre Juãwja Gajore mã mẽmoj jarênh nê hã kagà nê hwýr mênh anê. Nê kãm:

¹ Pa ixkràmnhwý Gajore? Xà amex? E ot pa awýr kagàja nhípêx nê kumê. Apê ixkràmnhwý mex na ka. Inhmã akĩnh.

²⁻³ Na pre ra Kris kôt pahtõ hkwýjaja ixwýr pøj nê tanhmã inhmã ajarênh to. Na ka xep hte Tĩrtũm kôt amnhĩ nhípêx mex rãhã ho ri apa. Pa ajarênh ma nê anhỹ hã ixkĩnh nê. Nê ato Tĩrtũm wýr o ixpa. Kot ato mex nhũm amex nê ajamakêtkati nê apa ho apa kaxyw. Nê axà hkêt nê amex nê ri apa kaxyw.

⁴ Ixte Tĩrtũm kapêr o mẽ ajahkre o ri ixpa jakamã te mẽ apê ixkra pyrãk. Tã pa tanhmã ate mẽ pahkwýjê nhípêx to ho apa hã ajarênh ma nê ixkĩnh nê.

*Gajore kot tanhmã Jejus kôt hkwýjê
ho mex to hã harênh
Wam Korĩt 16.10-11*

⁵ E ixkràmnhwý. Na ka xep hte Jejus kôt pahtõjê ho mex o ri apa. Aa ate mẽ omunh kêt tã nhũm htem ma anhõ krĩ hwýr pa ka mẽ omu nê apê Jejus kôt mẽ htõ hã mẽ ho mex nê. ãm

hãmri na ka hte ã mẽ hipêx anhỹr o ri apa Gajore. ⁶ Na pre ra mẽ hkwýjaja akupýn ixwýr pøj nê mẽ ixpê Kris kwýjê mã amnhĩ tã ajarê. Amã mẽ hkĩnh nê ate tanhmã mẽ ho mex to hã ajarê. Nhũm prem nojarêk ka xep pre mẽ kãm pry hã mẽ apkur xà hã mẽmoj gõ nhũm mẽ inhmã ajarê. Na ãm hãmri na ka hte ã mẽ ho mex o apa anê. ã ate mẽ hipêx anhỹr o apata ã na hte Tĩrtũm apumu nê hkĩnh nê. ⁷ Na htem krĩ piitã hkôt mẽ kãm Kris kot tanhmã mẽ panê amnhĩ nhípêx to hã harênh kaxyw ma mẽ hwýr pa. Nom mẽ apkur xà hprãm xàj mẽ kot Kris kôt amnhĩ xunhwýr kêt xwýnhjê hwýr pa hkêt nê. ⁸ Jakamã kwa kêr pu mẽ papajaja mẽ pahpê Jejus kôt mẽ htõ hã mẽ kãm mẽõ hkwý nhõr o papa. Kot puj mẽ ã mẽ ho ajuta anê nê te mẽ pajaxwýja mẽ ãhkõ hã ri mẽ kãm Kris jarênh o ri papa pyrãk.

*Xotre kãm Juãw kapêr mar prãm kêt
ã harênh
Matêwre 20.25-28, 23.1-12*

⁹ Nê ra ixte anhõ krĩ kamã mẽ apê Kris kwýjê mã kagà nê mênh nhũm mẽ ate kamã harênhta. Na xep pre Xotreja kuma nê ãm kuma. Kêp mẽ akrãhtũm prãm xàj kãm ixkapêr mar prãm kêt nê. ¹⁰ Na xep hte tanhmã ixto hêx to ho pa. Nom papxipix ixto hêx kêt nê. Mãânên Kris kôt mẽ pahtõjaja nhỹhỹnh krĩ hõ rũm mẽ awýr pan pøj nhũm xep tanhmã mẽ amã mẽ ho hêx to. Nê mẽ hpôx ã mẽ omu nom amnhĩ nhõrkwý hwýr mẽ hwýr kêt nê. Tã ka mẽ kurom amnhĩ nhõrkwý hwýr mẽ awý nhũm xep tee ri ja hã mẽ apumu nê mẽ akamã gryk nê mẽ hã mẽ amã akir nê Tĩrtũm mã amnhĩ jarênh xà hã ixkre nê mẽ ajano. Na xep hte ã amnhĩ nhípêx anhỹr o pa. Jakamã kot paj nhỹrmã ma mẽ awýr mõ hãmri nê mẽ apiitã mẽ anoo mã hã kãm akir. Tanhmã kot mẽ ixto hêx to nê tanhmã kot amnhĩ tomnuj to hã kãm akir ka mẽ apiitã hã inhma.

*Mẽ pahte mẽ kot amnhĩ tomnuj
xwýnhjê hkôt amnhĩ nhípêx kêt ã mẽ*

*pamã karõ**Rukre 6.45; Rõmãn 12.9*

¹¹ E kwa ixkràmnhwỳ. Kêr ka ã Xotre kot amnhĩ tomnuj o pa anhỹrja kôt amnhĩ nhĩpêx kêt nê. Mẽ kot amnhĩ tomnuj o mẽ pa xwýnhjaja na htem Tĩrtũm kôt amnhĩ nhĩpêx kêt nê. No kêt mẽ kot amnhĩ to mex o ri mẽ pa xwýnhjaja na mẽ kêp Tĩrtũm kra jakamã kêr ka mẽ ã mẽ kot amnhĩ nhĩpêx anhỹr xwýnhjê kôt pix mã amnhĩ nhĩpêx.

Temẽtre jarẽnh

¹² Nẽ Temẽtre na hte tãm ri amnhĩ nhĩpêx nê ãm hãmri Tĩrtũm kapêr o mẽ ahkre mex nê nhũm mẽ piitã axpẽn mã mex ã harê. Pa hte ijaxwýja mẽ kãm mex ã harênh o ri mẽ hkôt ixpa ka htem inhma. ãm hãmri na pa hte tanhmã harênh to ho ri ixpa.

*Kagà jatur xà**Sikũn Juãw 12-13*

¹³ E kagàja kamã na pa ãm ja pix jarẽ nê hã kagà nê awỳr kumẽ Gajore. Na pa kormã harênh jatur xà mẽn kêt nê. ¹⁴ Nom kot paj tokyx ma awỳr mõi hãmri nê rĩ kormã amã hatur xàm kumẽ.

E kê Tĩrtũm akutã nojarêt rãhã ho pa.

Nẽ ota jar Kris kôt akràmnhwỳjaja awỳr hpêr mẽ. Nẽ kêr ka atar Kris kôt ixkràmnhwỳjê mã ijarẽ.

Tã ãm ja pix. Ixpê Juãw pigêtre na pa ã awỳr kagà nhĩpêx nê mẽn anê.

Jutre

Jutre kot Jejus kôt hkwýjê piitã hwýr kagà nê mênh

Jutre na pre kagàja nhípêx. Xiakre pyrã nê kêp Jejus tō na pre. Tã kagàja nhípêx nê krī piitã hkôt Jejus kôt hkwýjê hwýr kurê. Na pre mē hkwýjaja kêp Jejus kwý hã amnhī jarēnh tã axtem nê tanhmã amnhī tomnuj to ho pa. Jakamã nhūm Jutre kagàja kamã Jejus kwýjê mã hprī hã tanhmã mē harēnh to nê mē kot mē hkôt amnhī nhípêx nê mē kãm kapêr kãm hihtýx nê. Nê mē kãm:

¹ Pa Jejus kôt ixtō nê ixtōxjaja. Xà mē amex? E ot pa mē amã kagà nhípêx nê mē awýr kurê. Tirtūm kot ixpyrã nê amnhī kaxyw mē axunhwýr xwýnhjê hwýr. Mēpanhīpêxã Maati Tirtūm kãm mē pahpiitã mē pajapê jakamã na hte Kra Jejus Kris mē wa mē pahtãnopxar mex rãhã ho pa.

Ixpê Jutre na pa hte Jejus Kris mã tanhmã amnhī nhípêx to ho ri ixpa. Nê ixpê Xiakre htō na pa.

² Na pa hte mē ato Tirtūm wýr ho ixpa nê kãm:

—Pa Tirtūm. Kwa mē kot Akra Jejus kôt amnhī xunhwýr xwýnhjê pumu nê amã mē hapê hã mē kamã axukaprī rãhã ho apa. Kê mē kamã amnhī krit nê àmnhīx hamakêtkati nê ri tanhmã amnhī nhípêx to ho pa. Nê mē kãm axpên kīnh o ri axpên kôt pa. Anê.

Mē kot Tirtūm kapêr o hêx xwýnhjê jarēnh

Wam Ximotre 1.18-20, 6.12

³ E ixkrãmnhwýjaja. Nã inhã mē akīnh. Na pa pre jãã mē amã kagà hkwý nhípêx kaxyw. Mē pahte Jejus Kris kukwak ri amnhī nhípêx nyw ã tanhmã mē pajarēnh to nê hã kagà kaxyw tã kormã harēnh kêt nê. Kot paj axtem mēmoj jarê. Na pre Tirtūm mē pamã kot amnhī nhípêx o amnhīrit pa. Nê kapêr o amnhīrit pa. Mē pahte mar nê hkôt amnhī nhípêx

kaxyw. Jakamã kêr pu mē kapêr mar týx nê amnhī krã hī kamã haxàr týx nê hã papa. Nom koja mēhō kapêr kuhpa hã tanhmã mē amã kapêr o hêx to ka mē ama nê ãm ama.

⁴ Na xep ra kapêr o mē hêx xwýnhjaja mē akôt pa nê mē apyrã nê Jejus kôt amnhī xunhwýr ã amnhī jarê nom amnhī to hêx. Ka xep mē aprī hã mē hêx ã mē omunh kêt nê mē kêp Jejus kôt mē atō hã mē hkamnhīx nê atýx amnhī nhōrkwy hwýr mē awý. Nom mē kot Tirtūm kapêr o hêx pix kaxyw na htem mē akôt pa nê mē amã kapêr o:

—Tirtūm kãm mē pajapê htýx kumrêx nê mē pakutã nojarêt ho pa jakamã kwa kêr pu mē mãmrī nhãm mēnijê ho amnhīkati ho papa. Koja ja hã mē pahpumu nê tanhmã hã mē pahto hkêt nê. Kãm mē pajapê kênã kot kêt hã tanhmã mē pahto. No kêt Jejus Krisja mē ate kêp mē panhō Pahihtī hã harê nom kêp mē panhō patrãw rý kêp mē panhō Pahihtī hkêt. Anê.

Ã Tirtūm kapêr kuhpa hã mē amã harēnh anhýr o pa. Tirtūm kapêr ã kagà htūm kot amnepê mē hkukamã tanhmã mē harēnh to nê mē harēnh kot:

Ã mē kapêr anhýr o paja mýrapê koja mē mex kêt nê pa. Koja Tirtūm mē homnuj týx kumrêx.

Anhýr o kot mē harēnh. Tã pa mē amã ixprī hã mē harê nê hã kagà. Mē ate inhmar nê amnhī nê mē omunh mex kaxyw.

Tirtūm kot tanhmã mē kot amnhī tomnuj xwýnhjê nhípêx to hã harēnh

Sikūn Pêtre 2.1-17; Sikūn Ximotre 3.1-9

⁵ Nê amnepê mã mē panhīgêjtaja kormã Ejit kamã mē pa ri nhūm Tirtūm Ejit nhō xwýnhjê rūm mē kator pa. Hãmri nhūm mē hkwýjaja tanhmã hamaxpêr to nê axtem nê amnhī kaxyw hkôt hamaxpêr kêt nê. Nhūm tee ri amnhī tã mē omu nê ã mē kot amnhī nhípêx anhýr xwýnhjê nhīmex pa. Ra mē ate mē harēnh mar mex tã pa axte mē amã mē harê.

⁶ Nē Tirtūm kapēr o mē wryk xwýnh kwýjaja. Na prem Tirtūm nhý hã kapēr o pa htã tanhmã hamaxpēr punuj to nē ra kãm ja ho anhyr prãm nõkati nē Tirtūm kaga. Jakamã nhũm mē hã amýné nhũm mē unē nē kàx o mē hkaxpre pa. Nē nhýri pika kaxwýnh kãm kamàt kô htyk kãm mē kurē nhũm mē arĩ kamã hkrĩ ho hkrĩ. Nom koja nhýrmã Tirtūm kot tanhmã mē pahpiitã mē pajarēnh to xà hã arĩgro kato nhũm mē rĩ kormã hapôx pa. Hãmri nē kot amnhĩ tomnuj mýrapê ma mē kot amnhĩ xà htýx kamã hamak tũm xàta wýr ma hapêx.

⁷ Nē krĩ pē Sotõ nē Komo nhõ xwýnhjaja na prem haxwýja kãm Tirtūm kapēr kôt amnhĩ nhĩpêx prãm kêt nē. Nē krĩja wa hpuhã krĩ hkwý kamã ri mē pa xwýnhjaja haxwýja mē urak nē nē kãm kapēr mar prãm kêt nē. Na prem amnhĩ tomnuj týx rãhã ho pa. Nē axtem nē axpēn pē ri mē hprõ ho amnhĩkati ho pa. Nē mēmy hkwýjaja ri axtem nē axpēn to amnhĩkati ho pa. Hãmri nhũm Tirtūm tee ri mē kot amnhĩ nhĩpêxja ã omu nē mē hipy kuwy hpôk kwý rē nhũm mē amnhĩ wýr omu nē kãm ma xàj tee ri hprõt kaprý. Nē hprõt kaxyw òrkwý rũm hapôj nē hxêt pa nē hapêx. Na hte ã Tirtūm mē kot amnhĩ tomnuj o mē pa xwýnhjê nhĩpêx anē. Jakamã koja nhýrmã kuwy hpôk rãhã xwýnhhta wýr mē piitã mē rēnh pa nhũm mē kamã amnhĩ xà htýx kamã hamak rãhã ho pa ho pa nē aa à hapêx kêt nē. Nē à htýx rãhã papa ho pa. Tã mē pahte Sotõ mē Komo nhõ xwýnhjê jarēnh mar nē mē pahte amnhĩ tomnuj kaga kurē kumrêx kaxyw na pre Tirtūm ã mē pamã mē harēnh o amnhĩrĩt anē.

*Mē hpijaàm kêt xwýnhjê jarēnh
Sikũn Pêtre 2.10*

⁸ Nē mē kot Tirtūm kapēr o pihkàr xwýnhjaja na htem ã mē kot amnhĩ nhĩpêx anhyr xwýnhjê pyrã nē amnhĩ tomnuj týx pix o ri pa. Jakamã na htem tanhmã hpimtir punuj to hãmri nē hkrã hapôj nē hpimtir xà hkôt tanhmã amnhĩ tomnuj to. Jao hkwýjê

kamã hpijaàm kêt o pa. Rý mēnijê hõ rý mēmyjê hõ nhũm mē axpēn kãm hpijaàm kêt o pa. Rý Tirtūm kapēr o mē wryk xwýnhjê ho kapēr punuj nē. Kapēr mã gêt o tanhmã mē ho kapēr punuj to. ã na htem hpimtir punuj xà hkôt amnhĩ tomnuj o pa anē. ⁹ Tirtūm kapēr o mē wryk xwýnh krãhtũm Mikewja. Kêp mē hkrãhtũm tã aa mē kãm kapēr mã gêt kêt nē. Na pre Mojes ty nhũm Mikew ra ma hwýr tēn wry. Nē kuri Satanasti pumu hãmri nē Mojes nhĩ nē tanhmã kãm kapēr to. Nom kapēr mã gêt o kãm kapēr kêt nē. ãm kapēr mã hprĩ ho kãm kapēr nē kãm:

—Kwa ãm omu kê nõ. Kot kaj tanhmã ho nhũm Tirtūm apumu nē hã tanhmã hã ato. Anē.

¹⁰⁻¹¹ Nom ixte mē amã mē hpimtir punuj jarēnh xwýnhjaja. Mē kot Tirtūm kapēr o pihkàr xwýnhjaja kot hprĩ hã Tirtūm kot amnhĩ nhĩpêx ã harēnh mar kêt jakamã na htem htýx ri ho kapēr o haprý ho pa. Te ho mry xoprêja hamaxpēr kêt nē htýx ri amnhĩ nhĩpêx o pa pyrãk. Nom koja nhýrmã Tirtūm mē homnuj týx nē.

Te mē kot finat Kaĩ kot amnhĩ tõ hpĩr xwýnh kot amnhĩ nhĩpêxta pyrãk. Nē te mē kot finat Paraãw kot amnhĩ nhĩpêx pyrã nē kãxpore rũnh prãm xàj Tirtūm kapēr kuhpa hã tanhmã amnhĩ nhĩpêx to ho pa. Nē te mē kot finat Kore kot amnhĩ nhĩpêx pyrã nē Tirtūm kot mē kaxyw mē õ pahi xãm xwýnhhta kutã amnhĩ xunhwý. Mýrapê koja mē jajê pyrã nē kuwy hpôk rãhã xwýnhhta wýr ma hapêx pa.

¹² Na ka htem apê Jejus kwý hã axpēn wýr akuprõ. Nē tõhã mē apê hkwý hã amã axpēn kĩnh ã axàpkur kaxyw axpēn wýr akuprõ. Nhũm ixte mē amã mē harēnh xwýnhjaja mē akôt agjê nē mē akutã apku. Jakamã kwa mē o kora mē amnhĩ nē mē omunh mex nē. Mē hipêx o te mē ate mē axàpkur xà hã mē anhõ kamã kēnre pumunh nē hanhir nē rēnh pyrã nē amnhĩ nhĩhkô hã mē pumu nē amnhĩ nē hanor kurē kumrêx. Na htem

hpijaam kêt kãm amnhĩ pix kukamã hamaxpêr pê apkur rũnh o pa.

Te na wrÿk kaxyw htyk rax nê môr nhũm mẽ kot omunh nê wrÿk ã hkamnhĩx tã nhũm kôk kot nhãm mênh nhũm wrÿk kêeta pyrãk o na htem amnhĩ nhĩpêx. Jao te mẽ kot ãm hãmri mẽ amã Tĩrtũm kapêr jarênh mex pyrãk tã mẽ amã ho hêx.

Nê te mẽ kêp mẽmo pĩ hpàr ra ô mã tãm tã ãm htÿx rã nê aa ô hkêt nhũm mẽ kot krãhyr nê mênh nhũm grã parta pyrãk.

¹³ Nê te mẽ kêp gô xujanãr kot amnhĩ nhĩpêx pyrãk. Na hte gô xujanãrja hakãx wÿr kapê nê mra nhũm hamrô kýxpê amgrã kamã arĩk nhũm gô awjanã nê ma akupÿm hipôk wÿr mra. Ja pyrãk na htem ma nhÿhÿm mra nê mẽ kãm mẽmojarê nê nhãm mra nê mẽ kãm mẽmojarê nê ma akupÿm mẽ kurũm mra. Nhũm mẽ mar xà hkôt amnhĩ tomnuj rãhã ho pa.

Nê te mẽ kot kaxkwa hã kanhêre nhÿhÿm htêm nhũm mẽ kot nhÿhÿm htêm xà hkôt omunh kêeta pyrãk. Jakamã koja Tĩrtũm nhÿrmã kamãt kô kamã mẽ rênh pa nhũm mẽ aa hapôx kêt nê.

*Mê kot amnhĩ tomnuj xwÿnhjê hkukamã mẽ harênh
Apokarip 20.11-15*

¹⁴ Nê na pre finat Enokja anepê mã ã mẽ kot amnhĩ tomnuj anhÿr xwÿnhjê hkukamã tanhmã mẽ harênh to. Mẽ kot Tĩrtũm kapêr o pihkàr o ri mẽ pa xwÿnhjaja nhũm mẽ hkukamã mẽ harê. Enokja finat Atãw kanrêhã htãmnhwÿ na pre. Tã ã mẽ kot amnhĩ tomnuj anhÿr xwÿnhjê hkukamã mẽ harênh o:

Koja nhÿrmã Pahihtija man pika hwÿr akupÿn wrÿ. Kapêr o mẽ wrÿk xwÿnh xohtô rax mẽ mẽ hpimràatã akupÿn wrÿ.

¹⁵ Hãmri nê mẽ pahpiitã kormã mẽ pahtır ri mẽ pahte tanhmã amnhĩ nhĩpêx to ho papa hã mẽ pahpumunh xà hkôt tanhmã mẽ pajarênh to. Hãmri nê mẽ kot Tĩrtũm kapêr o hêx o pa xwÿnhjê pumu nê tanhmã mẽ

harênh to nê mẽ harênh o: “Jajaja na pre mẽ kãm Inhĩpêxà Tĩrtũm prãm kêt nê ri kapêr kwÿm pix mã amnhĩ nhĩpêx o pa. Nê kapêr punuj o pa. ã na prem amnhĩ nhĩpêx anhÿr rãhã ho pa.” Anhÿr o mẽ harê nê amnhĩ nê kuwy hwÿr mẽ kurê nhũm mẽ amnhĩ xà htÿx kãm hamak o pa rãhã nê pa ho pa. Anê.

ã na pre finat Enokja mẽ hkukamã mẽ harênh anê. ¹⁶ ãm hãmri na mẽ harê. Tã na hte arĩ mẽ hkwÿjaja ã amnhĩ nhĩpêx anê. Nê hamaxpêr mex kêt nê. Na htem nhãm tanhmã mẽ ho kapêr punuj to pix kukamã hamaxpêr. Nê amnhĩ krã hkôt htÿx ri tanhmã amnhĩ tomnuj to ho pa. Nê amnhĩ to jarkrar rãhã nê. Nê hêx rom mẽ kêp mẽmojarê jamÿnh kaxyw tanhmã mẽ kãm hêx to.

¹⁷ E Kris kôt ixkrãmnhwÿjaja. Koja mẽ ã mẽ amã Tĩrtũm kapêr o hêx anhÿr o mẽ akôt pa ka mẽ ama nê ãm mẽ ama nê mẽ kapêr mar kêt nê. ãm mẽ panhõ Pahihti Jejus Kris nhÿ hã mẽ ajahkre o mẽ pa xwÿnhjaja kot tanhmã mẽ amã mẽ harênh toja mã mãn kêt ajamaxpêr tÿx rãhã o ri apa. ¹⁸ Na prem mẽ amã mẽ harênh o:

—Jesús akupÿn wrÿk xwÿj ri koja mẽmojaja mẽ awÿr mran pôj. Nom mẽ kot Jejus kapêr kwÿm amnhĩ krã hkôt tanhmã amnhĩ nhĩpêx to xwÿnhjaja koja mẽ. Hãmri nê mẽ apê Jejus kwÿ hã mẽ apumu nê mẽ atã akunha nê mẽ atã hpêr o axkê nê Tĩrtũm ã hpêr o axkê nê kapêr ã kagã hã hpêr o axkê. Anê.

¹⁹ ã mẽ kot amnhĩ nhĩpêx anhÿr xwÿnhjaja mẽ pahpê Jejus kwÿjaja mẽ pahte axpên kutã amnhĩ xunhwÿrja na mẽ kãm hprãm. Mẽ kamã Tĩrtũm Karõ gjêx kêt jakamã mẽ kãm amnhĩ krã hkôt pix mã tanhmã amnhĩ tomnuj to ho pa hprãm.

Mê pahte Kris akupÿn wrÿk jamãr pê tanhmã amnhĩ nhĩpêx to hã mẽ pamã karõ

Matêwre 24.45-51; Rukre 12.25-40; Karatas 6.1-2; Xiakre 5.19-20; Sikũn Pêtre 3.12-15

20 Kwa mẽ apê Jejus kôt ixtõ nê ixtõxjaja kêr ka mẽ ã mẽ kot amnhĩ nhĩpêx anhỹr o mẽ pa xwýnhjê rom apkati mẽ amnhĩ kaxyw Jejus pix mã mân ajamxpêr rãhã ho ri apa. Te mẽ kot mẽ hakre hã ra àptàr nê amnhĩ krãm mẽ hakre xà jagjênh tỳxta pyràk.

Jao Tirtũm kapêr mar tỳx nê hkôt amnhĩ nhĩpêx mex o ri apa.

Nê Karõ nhỹ hã amnhĩ to hwỳr rãhã nê.

21 Nê Tirtũm kãm mẽ pajapê hã kãm ajamxpêr rãhã ho ri apa.

Nê Pahihti Jejus Kris kãm mẽ pajapê hã kãm ajamxpêr tỳx rãhã ho apa.

Koja nhỹrmã kãm mẽ pajapê hã akupỹn mẽ pahwỳr wrỳ nê tanhmã mẽ pahto mex to pu mẽ kuri pahĩr tũm nê pahkĩnh nê papa ho papa. Tã kêr pu mẽ arĩ akupỹn mẽ pahwỳr wrỳk xà hã arĩgro jamãr rãhã ho papa.

22 Nê mẽ pahkwỳjaja kormã mẽ kot Jejus kôt amnhĩ xunhwỳr tỳx kêt xwýnhjaja kêr ka mẽ kamã axukapĩ nê aprĩ hã mẽ kãm Tirtũm kapêr jarênh o ri mẽ hkôt apa. 23 Na pre ra mẽ hkwỳjaja mẽ kot Tirtũm kapêr o pihkàr xwýnhjê kapêr ma nê mẽ hkôt amnhĩ nhĩpêx. Jakamã kêr ka mẽ ja hã mẽ omu nê te mẽ ate kuwy hpòk rũnh nê mẽ hpa hã mẽ hamýnh nê nhãm mẽ rênh pyràk o mẽ hipêx. Jao mẽ kot nhỹrmã Tirtũm kapêr o pihkàr xwýnhjê hkôt kuwy hpòk rũnhhta wỳr pa pymaj mẽ nê mẽ kãm akapêr kãm axihtỳx o ri mẽ hkôt apa. Kê mẽ ama nê mẽ hkaga nê mẽ hkôt ri amnhĩ nhĩpêx kêt nê.

Nê htỳx ri mẽ kot amnhĩ tomnuj o mẽ pa xwýnhjaja kêr ka mẽ kamã axukapĩ ho ri apa nê mẽ kamã agryk tokyx anhỹr kêt nê. Xatã mẽ kãm Tirtũm kapêr jarênh rãhã ho ri mẽ hkôt apa. Nom kwa mẽ okora kêr ka mẽ kot amnhĩ nhĩpêx o amnhĩ nhĩpêx o ri apa hkêt nê. Kwarĩ ho kwarĩ.

24 Nê kêr pu mẽ Tirtũm mã amnhĩ jarênh kaxyw nê ã kãm amnhĩ jarênh anê nê kãm:

—Pa Tirtũm. Nà ãm hãmri na ka hte amnhĩ kôt mẽ ixunhwỳr tỳx nê pa mẽ akaga hkêt nê akôt amnhĩ nhĩpêx rãhã ho ri ixpa. Kot kaj nhỹrmã amnhĩ wỳr mẽ ixto api pa mẽ Akra mẽ war akuri axte tanhmã amnhĩ tomnuj to hkêt nê. Nê amnhĩ to mex pê anhĩrã htỳx rax kãm ixpa. Jao ixkĩnh tỳx nê ixpa ho ixpa.

25 —Apê mẽ inhõ Tirtũm ã apyxi mex kumrêx na ka. Na ka pre Pahihti Jejus Kris kukwak ri mẽ ixpiitã mẽ ixte amnhĩ tomnuj pê mẽ ixpytã. Nê na ka hte anhĩrã htỳx rax rãhã ri apa. Nê amex o amex nê axihtỳx o axihtỳx nê axàhpumunh o axàhpumunh. Nê apê mẽ inhõ Pahi Maati hã apyxi mex na ka. Amnepê mã kormã mẽmoj kêt ri ka pre ã amnhĩ nhĩpêx anhỹr o apa rãhã nê. Tã arĩ ã ate amnhĩ nhĩpêx anhỹr ho apa ho rãhãã. Nê kot kaj apkati mẽ ã ate amnhĩ nhĩpêx anhỹr ho rãhãã. ã ate amnhĩ nhĩpêx anhỹr o apa ho rãhã ho rãhã. Tã ãm ja pix na hapêx. Anê.

E kêr pu mẽ ã Tirtũm mã mex o mex ã harênh anhỹr o papa.

Ãm ja pix. Ixpê Jutre na pa mẽ awỳr kagàja nhĩpêx nê kumê.

*Jutre kot Tirtũm mã mex o mex ã
harênh
Wam Pêtre 1.5-7*

Apokarip

Juãw kot Jejus nhỹ hã mẽmoj kukamã harẽnh

Juãw na pre mẽ pamã kagàja nhĩpêx. Juãw Paxis kêt axtem Jejus nhỹ hã hkrajê jahkre ho mẽ pa xwýnhjê hõ pè Juãw na pre hipêx. Na pre Jejus ã mẽ kãm hkurê xwýnhjaja unê nê ma gô hipôk pè Patos wýr kumê nhũm kêp prês nê gô hipôk kãm pa ho pa nê aa kurũm kator kêt rãhã ty.

Jakamã kormã htĩr ri nhũm Tĩrtũm kapêr o wrýk xwýnhjê hõ gô hipôkja wýr wrý nê kãm mẽmoj kukamã awjarê nhũm kuma nê hkôt mẽmoj pumu. Te hpimtir kãm mẽmoj pumunh pyrãk. Hãmri nê omu nê kuma nê amnhĩ xô ri mẽ pamã hã kagà. Na pre mẽmoj to axkrunêpxi nê hã kagà. Mẽ kot Jejus kutã amnhĩ xunhwýr xwýnhjaja kot Jejus ã tanhmã kêp hkwyjê to ho pa nhũm mẽ hkwyjaja pikaprãr ã kagà. Nê Jejus kêp Pahi Maati hã kot nhỹrmã mẽ kot Tĩrtũm kutã amnhĩ xunhwýr xwýnh piitã ma mẽ kot amnhĩ xà htýx kamã hamak tũm xà hwýr mẽ rẽnh par ã kagà. Nê Tĩrtũm kot nhỹrmã hkrajê ho mex kumrêx ã nhũm mããnên hã kagà. Hãmri nê mẽ pamã hã kagà o:

1-2 E kot paj mẽ amã awjarê nê hã kagà. Ixpê Juãw ixte Tĩrtũm mã tanhmã amnhĩ anhĩpêx to ho ixpa xwýnh kot paj mẽmoj jarê nê hã kagà. Na pre Tĩrtũmja Jejus mã mẽmoj kukamã tanhmã ujarênh to ho ra kãm ho amnhĩrĩt pa. Kot amnhĩ xô ri mẽ pahte hkôt amnhĩ xunhwýr xwýnhjê mã harẽnh kaxyw. Hãmri nhũm kuma nê kot amnhĩ xô ri inhmã ujarênh kaxyw man ixwýr kapêr o wrýk xwýnh mẽ nhũm man ixwýr wrý nê ô ri inhmã mẽmoj to amnhĩrĩt pa. ãm hãmri ã inhmã mẽmoj to amnhĩrĩt anê. Tã kot paj amnhĩ xwar mẽ apê Jejus kôt ri mẽ apa xwýnhjê mã harẽ nê hã kagà. Mẽ ate

mar nê axkãm ajamak rom nê ri apa kaxyw. Nà ixte hã kagà mã xwýnhja koja tanhmã amnhĩ to nê tokyx mẽ pahwýr wrý. ³ Jakamã kwa kêr ka mẽ aprĩ hã kagàja kamã harẽ nê ama nê hkôt pix mã amnhĩ nhĩpêx nê mẽ piitã mẽ kãm kamã harẽnh o ri mẽ hkôt apa. Kot kaj mẽ ã amnhĩ nhĩpêx anê nhũm Tĩrtũm ja hã mẽ ato mex ka mẽ akĩnh nê apa ho apa. Nê mẽ kot mẽ axujarênh mar nê hkôt amnhĩ nhĩpêx xwýnhjaja koja Tĩrtũm ja hã mẽ omu nê mẽ ho mex nê nhũm mẽ apyrã nê hkĩnh nê pa ho pa.

*Juãw kot krĩ pè 7 kôt Jejus kwýjê
hwýr kagà rẽnh*

⁴ E ixpê Juãw kot paj atar pika pè As kamã krĩ pè 7 piitã hkôt mẽ apê Jejus kwý hã axpên wýr mẽ apikuprõnh xwýnhjê hwýr kagà nê kurê ka mẽ kamã harẽ nê ama.

Na pa hte mẽ ato Tĩrtũm wýr rãhã ho ri ixpa. Nê mẽ ato hwýr o:

—Pa Tĩrtũm. Kwa kêr ka pika pè As kamã akrajê ho mex nê mẽmoj to mẽ kutã anojarêt rãhã ho apa. Kê mẽ hamakêtkati nê àmnhĩx ri pa ho pa. Ja na inhmã hprãm. Anê.

Tĩrtũmja rãhã ho rãhã. Amnepêm kormã mẽmoj kêt ri nhũm pre ra rãhã ho rãhã. Nê koja nhỹrmã mẽmoj akupým hapêx par tã nhũm Tĩrtũm aa hapêx kêt kumrêx. Koja arĩ rãhã ho rãhã. Na hte kaxkwa kamã kot mẽ pahto amnhĩptãr ã hkrĩ xà kamã mẽ papytãr rãhã ho hkrĩ.

Nê Tĩrtũm Karõ te kot Tĩrtũm kot mẽ pahto amnhĩptãr xà hã hkrĩ xà kapem kanê maati pixi kamã kwryt pè 7 xãm xwýnhhta pyrãk. Na hte Tĩrtũm nhĩhkô hã hkrĩ ho hkrĩ. Tã kê mẽ ato mex rãhã ho pa.

⁵ Nê Jejusja na pre hte Tĩrtũm kapêr o mẽ ahkre mex o pa nê aa hkaga hkêt nê. Tã nhũm prem axtem nê kupĩ. Hãmri nhũm Tĩrtũm akupým ho htĩr. Jejus kumrêx ho htĩr nhũm htĩr o htĩr. Nê kêp pika piitã hkôt pahi piitã nhõ Pahihti. Kãm mẽ pajapê htýx jakamã na pre mẽ panê ty nê hkamrôja te mẽ panê hpikapĩr pyrãk o amnhĩ nhĩpêx. Nê htyk o mẽ pahte

amnhĩ tomnuj pãnhã amnhĩre. Jao te mẽ pahte amnhĩ tomnuj pê mẽ papytâr par pyrâk o mẽ panhĩpêx. ⁶ Nê na pre mẽ pahpê patre nê mẽ piitã mẽ ho Hipêêxã Tĩrtũm wỳr o papa kaxyw mẽ paxunhwỳ. Nê kêp mẽ panhõ Pahi Maati hã kãm hprãm xà hkôt mẽ pahte kãm tanhmã amnhĩ nhĩpêx to ho papa kaxyw mẽ paxunhwỳ. Jakamã kwa kër pu mẽ kãm mex o mex nê hihtỳx o hihtỳx ã mãn harênh rãhã ho papa.

⁷ Nê koja tokyx akupỹn mẽ pahwỳr kakrã kamã wrỳ pu mẽ pahpiitã wrỳk kãm omu. Nhũm mẽ kot hpir xwỳnhjaja tee ri amnhĩ wỳr omu. Nê pika piitã hkôt ri mẽ pa xwỳnhjaja omu nê mẽ kot amnhĩ tomnuj jakamã tee ri amnhĩ kukamã hamaxpêr o kãm ma htỳx kumrêx. Hãmri nê kãm ma xàj mur nê htertet o kuhê. Koja nhỹrmã Jejus akupỹn wrỳ nhũm mẽ amnhĩ wỳr omu nê ã amnhĩ nhĩpêx anê.

⁸ Nê Tĩrtũm na hihtỳx o hihtỳx nê àhpumunh o àhpumunh. Nê aa kot mēhõ ni rũm kator kêt. Na hte amnhĩ jarênh o:

—Ixrãhã ixpa xwỳnh na pa. Amnepê mã kormã mẽmoj piitã hkêt ri pa pre ra ixrãhã ri ixpa ho ixpa. Nê koja nhỹrmã mẽmoj akupỹm hapêx tã pa arĩ ixrãhãã. Anê.

Juãw kot Jejus akupỹm htĩr ã omunh

⁹ Nê ixpê Jejus kôt mẽ atõ Juãw na pa hte mẽ apyrã nê Jejus kôt amnhĩ nhĩpêx nhũm hte mẽ kãm Jejus kurê xwỳnhjaja mẽ apyrã nê hã inhĩpêx kati ho pa. Mẽ pahte hkôt ri amnhĩ nhĩpêx o papa jakamã na htem hã mẽ pahtomnuj tỳx rãhã ho pa. Tã pu htem y hã mẽ kutã amnhĩ to htỳx nê arĩ hkôt amnhĩ nhĩpêx. Jakamã na pa pre Tĩrtũm kapêr o mẽ ajahkre rãhã ho ri mẽ akôt ixpa. Nê Jejus kêp mẽ panhõ Pahihti hã mẽ amã harê. Mỳrapê na prem hã ixpynê nê man amnê ixto tẽ nê jar gô hipôk pê Patos kãm inhmẽ pa kamã ixpê prês nê ixpa ho ixpa.

¹⁰ Tã nhũm tômĩk pa Tĩrtũm mã amnhĩ jarênh o nhỹ. Hãmri nhũm Karõ tanhmã ixkrã hto pa te ixpimtir kãm mẽmoj pumunh pyrã nê amnhĩ katut kôt mēhõ kapêr ma. Te kot pifti kakôr tỳx pyrâk pa kuma. ¹¹ Hãmri nhũm inhmã kapêr nê inhmã:

—Pa Juãw? E kot paj amã mẽmoj to amnhĩrit ka omu nê akwỳjê mã hã kagã. Nê hã kagã hpa hãmri nê ahpỹnhã krĩ hkwy hkôt mẽ kêp ixkwỳ hã axpên wỳr mẽ pikuprõnh xwỳnhjê hwỳr arê. Mẽ kot kamã harênh nê mar nê axkãm hamak rom nê ri pa kaxyw. Epes wỳr nê Emĩnã hwỳr nê Pekamõ hwỳr nê Xijaxir wỳr nê Satre hwỳr nê Pirate hwỳr nê Raxisej wỳr. Krĩ pê 7ja piitã hwỳr ixkapêr ã kagã nê mẽ hwỳr arê kê mẽ apyrã nê mẽmoj jarênhja ma. Anê.

¹² Hãmri pa ixte mēhõja pumunh kaxyw ho ijakêx nê kanê hkwy pumu. Kanê kêp 7 nê piitã ôr o.

¹³ Nê kanê nhĩpôk ri mēhõja te panhĩ pyrã nê pahi hã ê mex kãm xa. êja hpar kôn kôt hitep nhũm xa. Nê pahi hã mẽ hinô hpre xà ho amnhĩ nhĩnô hpre nê xa. Hinô pre xàja ôr pix o. ¹⁴ Nê hkrã hkĩ te kaxat nhĩ jaka pyrã nê hakaajre. Nê no te kuwy hpôk pyrã nê hkarỳr tỳx nê. ¹⁵ Nê hpar te mẽmo kax karỳr tỳx pyrâk. Nê kapêr te gô hprôt tỳx koko pyrâk. ¹⁶ Na pre upôk rũm kanhêti ho 7 nê hamỳ nê o xa. Nê hakwa rũm wapo pôm kato nê akutã wa gixre nê ajêt. Nê hkuk kamã hirã htỳx kumrêx. Te myt kot mẽ pano hã harir nhũm gêk tỳx pyrâk. ã mēhõja kot anhỹr.

¹⁷ Pa tee ri tanhmã kute hã omu nê inhmã ma htỳx kumrêx nê umaj tēm nê hpar pê te ixyk pyrã nê nõ. Hãmri nhũm ixtã upôk rũm ãhkraja xi nê inhmã kapêr nê inhmã:

—Kwa amã ixpuma hkêt nê. Pa na pa. Amnepê mã kormã mẽmoj kator kêt ri pa pre raa. Nê ixrãhãã. Koja nhỹrmã mẽmoj akupỹm hapêx pa arĩ ixrãhã ixpa ho ixpa.

¹⁸ —Na pa pre ty tã akupỹm ixtĩr. Nê ixtĩr o ixtĩr. Kam ixpumu. Kot paj

axte ixtyk kêt nê. Ixpê mēhtykjê hpâm jakamã papxpix na pa hte mē htyk ã arĩgro jarê nhũm mē hã ty nê ma mēhtykjê papxà hwỳr ma pa.

¹⁹ —E kêt ka ate mēmoj pumunh xwỳnhhta pumunh tỳx nê akwỳjê mã hã kagà. Nê mēmoj kormã kot amnhĩ nhĩpêx kêt nhũm ate omunh mã xwỳnhhta ka inhỹ hã mē kãm hã kagà. Mē kot kamã harênh nê mar tỳx kaxyw.

²⁰ —Nê kot paj axte ixprĩ hã ate mēmoj pumunh xwỳnhhta jarê ka inhma. Nà kanê pê 7ta te mē kot krĩ hkwy pê 7 kamã mē kêp ixkwỳ hã axpên wỳr mē pikuprõnh xwỳnhjê pyrãk. Nê inhĩkra kamã kanhêti pê 7ta te kêp inhmã mē kot mē hamãr xwỳnhjê pyrãk. Anê.

2

Epes kamã Jejus kwỳjê hwỳr kagà

¹ Nhũm Jejus arĩ inhmã kapêr nê inhmã:

—E kêt ka krĩ pê Epes kamã ixkwỳjê jamãr xwỳnh wỳr kagà nê amê. Nê kagàja kamã mē kãm ixkapêr jarê nê mē kãm:

Pa Epes kamã ixkapêr mar kaxyw axpên wỳr apikuprõnh xwỳnhjaja. Ot pa mē awỳr ixpêr mē. Ixpê ixupòk o kanhêti ho 7 nê hamỳnh nê ho ixãm xwỳnhhta na pa. Nê ixpê ôr o kanê pê 7 nhĩpòk ri ixpa xwỳnhhta na pa ã mē awỳr ixpêr mēnh anê.

² Na pa hte tanhmã mē ate amnhĩ nhĩpêx to ho apa hã mē apumunh mex o ixpa. Na ka htem inhmã amnhĩ nhĩpêx mex nê pa ja hã mē apumu. Mē kot ixtã mē anhĩpêx kati htã ka mē kutã amnhĩ to htỳx nê ixkaga hkêt nê. Nê mē kot amnhĩ tomnuj xwỳnhjê hkôt amnhĩ nhĩpêx o ri apa hkêt nê. Nhũm ixte mē awỳr mē rênh ã amnhĩ to hêx xwỳnhjaja mē awỳr pan pøj ka mē aprĩ hã mē kot amnhĩ to hêx ã mē omu. Hãmri nê tee ri mē kot amnhĩ nhĩpêx ã mē omu nê amnhĩ nê mē hanor kurê kumrêx. Æm hãmri na ka htem ã mē hipêx anê.

³ Nê mē kãm ixkurê xwỳnhjaja kot tanhmã ixtã mē atomnuj tỳx to htã ka mē kutã amnhĩ to htỳx nê aa ixkaga hkêt nê. Nê ixkôt amnhĩ nhĩpêx mex rãhã ho ri apa. Æm hãmri na ka htem ã amnhĩ nhĩpêx anhỹr o ri apa.

⁴ Æm mēmoj pixi na ixpê omnuj. Amnepê mã kormã mē ate ixkôt amnhĩ xunhwỳr nyw ri na ka prem amã axpên kĩnh nê axpên to mex o ri apa. Nê mē amã axpên tã ma ho te mē amã amnhĩ tã ma pyrãk o axpên nhĩpêx. Tã tanhmã ajamaxpêr to nê axte ã axpên nhĩpêx anhỹr kêt nê. Jao te mē amã ixkĩnh kêt pyrãk o amnhĩ nhĩpêx. Pa tee ri ja hã mē apumu nhũm ja inhmã mex kêt nê.

⁵ Kwa mē tokyx ja hã amnhĩ pumu nê akupỳm mē ate ixkôt amnhĩ xunhwỳr nyw ri mē ate axpên nhĩpêxta o akupỳm axpên nhĩpêx o apa. Kot kaj mē anhỹr kêt kot paj te mē apê mē anhõ kanê hpỳr nê kapôt ã mēnh pyrãk o mē anhĩpêx ka mē ri apa nê gaa nê apikaprãr pa. Tã mēhõ koja mē amỳr pê mē anhõ krĩ kamã mē kãm ijarênh o pa?

⁶ Nê mē kêp Nikoraw nhõ xwỳnhjaja na ka htem mē kot tanhmã amnhĩ tomnuj to hã mē omu nê ixpyrà nê apê ja hprãm nõkati nê mē hkôt ri amnhĩ nhĩpêx kêt nê. Pa ja hã mē apumu nê ixkĩnh nê.

⁷ Tã ixte mē amã ixkapêr jatur xà na ja. Kot kaj mē amã ixkapêr mar prãm hã kot kaj mē ã Tĩrtũm mē wa Ixkarõ nhỹ hã ixte mē amã ixkapêr anhỹrja ma nê kãm ajamaxpêr tỳx rãhã ho ri apa.

Tĩrtũm nhõ krĩ kamã mēmo pĩ hpàr kuhê xwỳnh. Mē kot ô hkur nê axte htyk kêt nê pa ho pa mã xwỳnhhta. Kot kaj mē ate amnhĩ tomnuj nê amnhĩ to htỳx nê arĩ inhmã hprãm xà hkôt amnhĩ nhĩpêx rãhã ty pa akupỳm mē ato mē atĩr nê ma pĩ hpàrta wỳr mē arê. Ka mē ma hwỳr mra nê ô hõ hta

nē akrē nē axte atyk kêt kumrēx nē apa ho apa.

E ãm ja pix na hapêx. Anē.

—E Juãw. Kêr ka Epes kamã ixkwÿjê jamâr o pa xwÿnhhta wÿr ã ixkapêr ã kagà anē nē mē hwÿr amē. Anē.

Hãmri pa kuma nē ô ri mē kãm hã kagà hpa.

Emĩnã kamã Jejus kwÿjê hwÿr kagà

⁸ Hãmri nhũm hpãnhã Emĩnã nhõ xwÿnhjê kaxyw inhmã kapêr nē inhmã:

—Nē hpãnhã Emĩnã kamã ixkwÿjê jamâr xwÿnh wÿr kagà nē mē hwÿr amē. Nē mē kãm ixkapêr jarē nē nē mē kãm:

Pa Emĩnã kamã ixkapêr mar kaxyw axpên wÿr mē apikuprõnh xwÿnhjaja. Ot pa mē awÿr ixpêr mē. Ixrãhã ho ixrãhã ixpa xwÿnhhta na pa. Amnepêem kormã mēmoj piitã hkêt ri na pa pre ixrãhã nē ri ixpa. Koja nhÿrmã mēmoj akupÿm hapêx pa arĩ ixrãhã ho ixrãhã nē ri ixpa. Na pa pre ty no ãm akupÿm ixtîr o ixtîr. Tã pa ã mē awÿr ixpêr mēnh anē.

⁹ Nã na pa hte mē ate tanhmã amnhĩ nhĩpêx to ho apa hã mē apumunh rãhã ho ixpa. Na hte mē kãm ixkurê xwÿnhjaja ixtã mē atomnuj to ka mē apê amrakati nē ri apa. Nom mē ate tãm amnhĩ nhĩpêx jakamã te mē apê mē hikukrêx rũnh kumrêx xwÿnhjê kot amnhĩ nhĩpêx pyrã nē ixkukwak ri akĩnh rãhã ri apa. Na hte mē kêp Ijaew ã amnhĩ to hêx xwÿnhjaja mē ato kapêr punuj rũnh o pa. Mē kot Tirtũm kôt amnhĩ nhĩpêx ã amnhĩ jarēnh tã no ãm hkôt amnhĩ nhĩpêx kêt nē. ãm Satanasti kôt pix mã na htem amnhĩ nhĩpêx o pa.

¹⁰ Tã mē kãm ixkurê xwÿnhjaja kot ixtã mē atomnuj tÿx o pa htã kêr ka mē amnhĩ tã mē omu nē tee ri amnhĩ kukamã ajamxpêr kêt nē. Nē arĩ mē kutã amnhĩ to htÿx nē. Koja Satanasti mē akwÿjê pynê nē mē ajagjê. Hãmri nē mē ate ixkaga hprãm xàj tanhmã mē anhĩpêx kati hto ka mē hagjênh xà kamã amnhĩ

xà htÿx kamã ajamak o atã arĩgro pê 10. Nom kêr ka mē kutã amnhĩ to htÿx nē ixkaga hkêt nē. Mē kot mē apar mã tã ka mē kutã amnhĩ to htÿx nē. Kot kaj mē aa ixkaga hkêt nē ixkôt ri amnhĩ nhĩpêx rãhã ty pa akupÿm mē ato mē atîr nē ma amnhĩ wÿr mē ato api. Hãmri ka mē Tirtũm mē wa ixri amex nē atîr tũm nē apa ho apa nē axte atyk kêt nē apa.

¹¹ E ixkrajaja. Kot kaj mē amã ixkapêr mar prãm hã kot kaj mē ã Tirtũm mē wa Ixkarõ nhÿ hã ixte mē amã ixkapêrja anhÿr ma nē kãm ajamxpêr tÿx rãhã ho ri apa. Kot kaj mē ate amnhĩ tomnuj nē amnhĩ to htÿx nē inhmã hprãm xà hkôt pix mã amnhĩ nhĩpêx rãhã ty. Hã kot paj akupÿm mē ato mē atîr ka mē ma kuwyta wÿr apa hkêt nē.

E. ãm ja pix. Na hapêx. Anē.

—E Juãw. Kêr ka Emĩnã kamã ã ixkrajê mã ixkapêr ã kagà anē. Anē.

Hãmri pa kuma nē ô ri mē kãm hã kagà.

Pekamõ kamã Jejus kwÿjê hwÿr kagà

Sikũn Korõt 6.14-7.1

¹² Nhũm Jejus arĩ inhmã kapêr nē hpãnhã inhmã:

—E hpãnhã Pekamõ kamã ixkrajê jamâr o pa xwÿnhja wÿr kagà nē mē hwÿr amē. Nē mē kãm ixkapêr jarē nē mē kãm:

Pa Pekamõ kamã ixkapêr mar kaxyw axpên wÿr mē apikuprõnh xwÿnhjaja. Ot pa mē awÿr ixpêr mē. Ixpê ijakwa rũm põm wapo akutã wa gix nē kator nē ãm xwÿnhhta na pa mē awÿr ixpêr mē.

¹³ Na pa hte mē anhõ krĩ nhõ xwÿnhjaja kot tanhmã amnhĩ tomnuj to ho pa hã mē omunh mex nē. Mē kot Satanasti kôt pix mã ri amnhĩ nhĩpêx o pa jakamã mē anhõ krĩ te kêp Satanasti nhõ krĩ pyrãk. ãxipas kot mē hkôt mē kãm ixkapêr o mē ahkre ho pa nē aa hkaga hkêt tã nhũm prem axtem nē ixtã kupĩ. Ka mē ja hã mē omunh tã mē umaj ixkaga hkêt nē arĩ ixkôt

amnhĩ nhĩpêx rãhã ho ri apa. ãm hãmri na ka htem ã amnhĩ nhĩpêx anê.

¹⁴ Měmoj pixi na ixpê omnuj. Na hte mẽ akwỳjaja axtem nê Paraãw kapêr kôt amnhĩ nhĩpêx o pa. Na pre Paraãwja Parak mã tanhmã kapêr to nhũm kuma nê amnhĩ xô ri tanhmã mẽ anhĩgêť mã kapêr to ho pa. Nom ixkapêr kôt kêt ixkapêr kuhpa hã tanhmã mẽ kãm kapêr to nê mẽ kãm: “Mě mãmri ma sãnti hã mẽ hkĩnh mã xwỳnhjê hkôt mra nê sãnti hã apku nê hã akĩnh. Nê mẽ urak nê axpên pê axpên prô ho amnhĩkati nê axpên pê ri axpên mjên o amnhĩkati nê mẽ ã ri amnhĩ nhĩpêx anhỹr o ri apa. Ja mex kênã.” Anhỹr o mẽ anhĩgêť mã kapêr o pa nhũm mẽ kuma nê mẽ hkôt amnhĩ nhĩpêx. Tã ka mẽ akwỳjaja mẽ urak nê ã amnhĩ nhĩpêx anhỹr o apa. Kwa ja mex kêt.

¹⁵ Na hte mẽ akwỳjaja Nikorawjê kapêr kôt ixkapêr kuhpa hã tanhmã amnhĩ nhĩpêx to ho pa. Ja mããnên mex kêt. ¹⁶ Tã ra mẽ akwỳjaja ã amnhĩ tomnuj anhỹr o pa ka mẽ ja hã mẽ omu nê ãm mẽ omu nê nê tanhmã mẽ kãm akapêr to hkêt nê. Kwa mẽ ate ã amnhĩ nhĩpêx anhỹr xwỳnhjaja. Kêr ka mẽ tokyx ja kaga nê akupỹm ixkôt ri amnhĩ nhĩpêx mex nê. Kot kaj mẽ anhỹr kêt kot paj tokyx mẽ awỳr wrỳ nê te ijakwa rũm pôm wapo kator xwỳnhta o mẽ hkanhwỳr pyrak o mẽ anhĩpêx. Nom ixkapêr xihtỳx pix o tanhmã mẽ anhĩpêx to.

¹⁷ E kot kaj mẽ amã ixkapêr mar prãm hã kot kaj mẽ ã Tĩrtũm mẽ wa Ixkarô nhỹ hã ixte mẽ amã ixkapêr anhỹrja ma nê kãm ajamxpêr tỳx rãhã ho ri apa.

Nê kot kaj mẽ ate amnhĩ tomnuj nê amnhĩ to htỳx nê inhmã hprãm xã hkôt amnhĩ nhĩpêx rãhã ty. Hã kot paj akupỹm mẽ ato mẽ atĩr hãmri nê ra pam mẽ amã mẽ anhô ka mẽ hkur o apa. Te amnepêm Ijaew kapôt ã pa nhũm ixte mẽ hwỳr “manã” anhỹr xwỳnhta rênh

nhũm mẽ kot hkur o pata pyrak. Nom ixte mẽ amã mẽ anhôja na hpimxur. ãm papxipix na pa hte mẽ kãm ôr o ixpa.

Nê kot paj mẽ atã mẽ anhĩxi nyw rê. Jao kên jakare hkwỳ hã ahpỹnhã mẽ anhĩxi nyw jaxwỳ nê mẽ amã kugô. Ka mẽ hamỳ nê kapxipix amnhĩ nhĩxi nyw pumunh o apa.

E ãm ja pix. Na hapêx. Anê.

—E Juãw. Kêr ka Pekamô kamã ixkrajê hwỳr ã ixkapêr anhỹr ã kaga nê mẽ hwỳr amê. Anê.

Hãmri pa kuma nê ô ri mẽ kãm hã kagã.

Xijaxir kamã Jejus kwỳjê hwỳr kagã

Jutre 3-23

¹⁸ Nhũm Jejus arĩ inhmã kapêr nê inhmã:

—E hpãnhã Xijaxir kamã ixkwỳjê jamãr xwỳnh wỳr kagã nê amê nê mẽ kãm ixkapêr jarê nê mẽ kãm:

Pa Xijaxir kamã ixkapêr mar kaxyw mẽ apikuprôn h xwỳnhjaja. E ot pa mẽ awỳr ixpêr mẽ. Ixpê Tĩrtũm Kra na pa. Ixpê inhno te kot kuwy hpôk karỳr tỳx pyrak xwỳnhta na pa. Nê ixpê ixpar te kot kãx karỳr tỳx pyrak xwỳnhta na pa mẽ awỳr ixpêr mẽ.

¹⁹ Na pa hte mẽ ate amnhĩ nhĩpêx kôt mẽ apumunh mex o ri ixpa. Na ka htem amnhĩ kaxyw inhmã ajamxpêr pê inhmã amnhĩ to mex o ri apa. Mě akwỳ kot ixtã tanhmã mẽ anhĩpêx to htã ka mẽ umaj aa ixkaga hkêt nê. Nê arĩ amã ixkĩnh tỳx kãm tanhmã amnhĩ nhĩpêx to ho ri apa. Nê axpên to mex nê ixkôt pix mã amnhĩ nhĩpêx o ri apa. Jao ra ixkôt amnhĩ nhĩpêx mex o wam mẽ ate ixkôt amnhĩ nhĩpêxta jakre. Nã ja inhmã mex kumrêx.

²⁰ ãm mẽmoj pixi na ixpê omnuj. Mě akôt niti ri pa xwỳnh Jejapewtita. Kêp Tĩrtũm nhỹ hã kapêr jarênh o pa xwỳnh ã amnhĩ to hêx xwỳnhntita. Na hte ixkapêr kupa hã tanhmã mẽ ajahkre hto ka htem ama nê nê tanhmã kãm nê

hkêt nê. Na hte mẽ amã: “Xê mẽ mãmri ri mẽ hkuprýjê hwýr mra nê mẽ ho amnhĩkati. Nê axpên pê mẽ aprõ nê mẽ amjên o amnhĩkati. Nê mẽ kot sãnti hã mẽ hkĩnh nê hã apkur xwýnhjê hkôt mra nê mẽ hkôt amnhĩ nhĩpêx. Tĩrtũm kãm ja mex kênã.” Anhýr o mẽ amã kapêr o pa. Nê inhmã ja mex ã ijarê nom inhmã ja mex kêt. Tã ra mẽ akwýjaja kapêr ma nê hkôt amnhĩ nhĩpêx ka mẽ ja hã mẽ omunh tã amnhĩ nê nitita janor kêt nê nhũm arĩ ri mẽ amã hêx o ri mẽ akôt pa. ²¹ Ra kot ã amnhĩ nhĩpêx anhýr o mẽ akôt pa ry rax kumrêx tã pa kormã ja hã tanhmã ho hkêt nê kormã amnhĩ tã hamã. Kot ã amnhĩ nhĩpêx anhýr kaga kaxyw na pa kormã hamãr o ri ixpa. No nhũm aa hkaga hkêt nê.

²² Mýrapê kot paj tokyx tanhmã ho nhũm amnhĩ xà htýx kamã hamak o hikwý. Tã mẽ kot kapêr mar nê hkôt amnhĩ nhĩpêx xwýnhjaja kot amnhĩ tomnuj ã amnhĩ pumu nê hkaga hkêt hã kot paj mã mẽ ho anê nê. Mããnên tanhmã mẽ homnuj to nhũm mẽ nitita pyrã nê amnhĩ xà htýx kamã hamak o hikwý.

²³ Nê nitita kot paj kêp hkrajê nhĩmex pa. Ka mẽ apê ixkrajaja ja hã ixpumu nê ixte mẽ apiitã ahpýnhã tanhmã mẽ ajamaxpêr to hkôt mẽ apumunh ã ixpumu. Nê ixte ahpýnhã mẽ apiitã tanhmã mẽ ate amnhĩ nhĩpêx to ho apa hã mẽ apumunh xà hkôt tanhmã mẽ anhĩpêx to hã ixpumu.

²⁴ Na hte mẽ akwýjaja akwýjê rom nita kapêr ma nê ãm kuma nê hkôt amnhĩ nhĩpêx kêt nê. Nê mẽ kapêrja mẽ kot kãm: “Satanasti kapêr pimxur” anhýr xwýnhhta kôt nhũm mẽ amnhĩ nhĩpêx kêt nê. Na htem ixkôt pix mã amnhĩ nhĩpêx mex o ri pa. Tã ã mẽ ate ixkôt amnhĩ nhĩpêx anhýr o apa xwýnhjaja kot paj mẽ amã ja pix ã karõ ka mẽ inhma. ²⁵ Kêr ka mẽ arĩ ixkôt pix mã amnhĩ nhĩpêx o ri apa

rãhã pa akupýn mẽ awýr wrý. Æm ja pix ã kot paj mẽ amã karõ.

²⁶ Nê kot kaj mẽ ate amnhĩ tomnuj nê amnhĩ to htýx nê arĩ inhmã hprãm xà hkôt amnhĩ nhĩpêx rãhã ty. Hãmri pa ja hã mẽ apumu nê nhýrmã mẽ ate krĩ hkwý hkôt mẽ pa xwýnhjê ho amnhĩptàr o apa kaxyw mẽ axunhwý. Ka mẽ apê mẽ õ pahiti nê inhmã mẽ ho amnhĩptàr o ri apa.

²⁷ Na pre Inhĩpêêxà ixte pika piitã hkôt ri mẽ pa xwýnhjê ho amnhĩptàr kaxyw ixãm.

Tã kot paj nhýrmã amnhĩ pyrã nê mẽ kaxyw mẽ axunhwý ka mẽ inhmã mẽ hamãr o apa.

Nhũm mēhō ixkapêr kwým ri tanhmã amnhĩ nhĩpêx to ka mẽ ja hã omu nê hã tanhmã ho. Te mẽ kot poti punuj mýnh nê mēnh nê hkrakrak pyrãk.

²⁸ Kot paj ã mẽ ate mẽ hipêx anhýr o apa kaxyw mẽ axunhwý. No ãm ja pix kêt. Kot paj te ixte mẽ amã kanhêti hõ nhõr pyrãk o mẽ anhĩpêx. Arĩgro hkôt kanhêti no hpõk rax japõx xwýnhhta kot paj te ixte mẽ amã õr pyrãk ka mẽ ixri atĩr tũm nê apa ho apa.

²⁹ E ixkrajaja. Kot kaj mẽ amã ixkapêr mar prãm hã kot kaj mẽ ã Tĩrtũm mẽ wa Ixkarõ nhý hã ixte mẽ amã ixkapêr anhýrja ma nê kãm ajamaxpêr týx rãhã ho ri apa. Anê. —E Juãw. Kêr ka ã Xijaxir kamã ixkrajê kaxyw ixkapêr ã kaga nê mẽ hwýr mēnh anê. Anê.

Hãmri pa kuma nê ô ri mẽ kãm hipêx nê mẽ hwýr kumê.

3

Satre kamã Jejus kwýjê hwýr kaga Rukre 12.35-40

¹ Nhũm Jejus arĩ inhmã kapêr nê inhmã:

—E hpãnhã Satre kamã ixkwýjê jamãr xwýnh wýr kaga nê mẽ kãm ixkapêr jarê nê mẽ kãm:

Pa Satre kamã ixkrajaja. E ot pa mẽ awýr ixpêr mẽ. Ixpê inhĩkra ho kanhêti pê 7 jamýnh nê xãm

xwýnhhta na pa. Nê ixpê inhîhkra ho Tirtûm Karô ãm pyxi htã te kamã kêp 7 jamýnh nê ho ixãm xwýnhhta na pa mẽ amã ixkapêr.

Na pa hte mẽ ate tanhmã ri amnhî nhîpêx to hã mẽ apumunh rãhã ho ixpa. Mẽ piitã kot axpên mã mẽ ate ixkôt amnhî nhîpêx ã mẽ ajarênh tã ã mẽ ate amnhî nhîpêx anhÿr kêt. Na ka htem ixkuhpa hã pix mã amnhî nhîpêx o apa. Jakamã te inhmã ra mẽ atyk nê mẽ anhîkwÿ pyrãk.

² Na ka htem ãm akrãnh mã ixkôt ri amnhî nhîpêx nom Tirtûm mẽ wa ixkôt amnhî nhîpêx mex kêt nê. Ra Tirtûm mẽ wa ixte ja hã mẽ apumunh mex. Mẽ ate kormã wa inhnoo mã tãm ri amnhî nhîpêx kêt jakamã kwa mẽ tokyx ja hã amnhî pumu nê ate amnhî tomnuj mã anhÿre nê wa ixkôt amnhî xunhwÿr tÿx nê.

³ Kêr ka mẽ amnepê mã kormã mẽ ate ixkôt amnhî nhîpêx nyw ri mẽ kot ixkapêr o tanhmã mẽ ajahkre htoja mã ajamaxpêr nê amnhî tomnuj mã anhÿre. Nê ixkapêr kôt pix mã mãn amnhî nhîpêx o ri apa. Kot kaj mẽ anhÿr kêt kot paj nhÿrmã mẽ ajaêr pê akupÿn mẽ awÿr wrÿ nê ja hã tanhmã mẽ ato.

⁴ ãm mẽ agrêre nê amã ixkôt amnhî nhîpêx prãm. Jao tãm ri amnhî nhîpêx nê mẽ kot amnhî tomnuj xwýnhjê hkôt amnhî nhîpêx kêt nê. Te mẽ axê jakare kamã apa nê tanhmã amnhî pê htyk to hkêt pyrãk. Tã kot kaj mẽ nhÿrmã ixri mẽ axê jakare kamã apa ho apa. Ra mẽ ate ja ho anhÿr mã tãm kênã. Ja na Tirtûm kãm hprãm.

⁵ Nê krî piitã hkôt mẽ ate amnhî tomnuj nê amnhî to htÿx nê inhmã hprãm xà hkôt amnhî nhîpêx rãhã atyk xwýnh piitã kot ka mẽ nhÿrmã Tirtûm mẽ wa ixri amex nê atÿr tûm nê apa ho apa. Ra mẽ hixija Mëpahpãm Maati nhô kagàja kamã na. Kamã mẽ atÿr o mẽ atÿr mã

xwýnhjê nhîxi piitã hã kagà. Kot paj kagàta kamã aa mẽ anhîxi grãnh kêt nê. Hãmri nê Inhîpêxà mẽ kapêr o mẽ wrÿk xwýnhjê mã mẽ ajarênh o: “E mẽ jajê pumu. Ixkwÿ na mẽ.” Anhÿr o mẽ kãm mẽ ajarê.

⁶ E ixkwÿjaja. Kot kaj mẽ amã ixkapêr mar prãm hã kot kaj mẽ ã Tirtûm mẽ wa Ixkarô nhÿ hã ixte mẽ amã ixkapêr anhÿrja ma nê kãm ajamaxpêr tÿx rãhã ho ri apa.

Tã ãm ja pix. Na hapêx. Anê.

—E Juãw. Kêr ka ã Satrejê mã ixkapêr ã kagà nê mẽ hwÿr mẽnh anê. Anê.

Hãmri pa kuma nê ô ri mẽ kãm hã kagà.

Pirate kamã Jejus kwÿjê hwÿr kagà Wam Tesarôn 2.13-16

⁷ Nhũm Jejus arî inhmã kapêr nê inhmã:

—E hpãnhã Pirate kamã ixkwÿjê jamãr xwýnh hwÿr kagà nhîpêx nê amê nê mẽ kãm ixkapêr jarê nê mẽ kãm kãm:

Pa Pirate kamã mẽ ate ixkapêr mar kaxyw mẽ apikuprõnh xwýnhjaja. E ot pa mẽ awÿr ixpêr mẽ. Inhmex o inhmex xwýnh na pa. Aa ixêx kêt nê ixpa xwýnh. Amnepê mã na pre mēhõja pahi Tawi mã ôrkwÿ mex ã saf jamãr o pa. Tã pa hte urãk nê Inhîpêxà Tirtûm nhô krî hwÿr mẽ gjêx xà hã saf jamÿ nê ho ixpa. ãm papxipix inhô saf jakamã papxipix na pa hte mẽ ate ixkôt amnhî xunhwÿr xwýnhjaja mẽ agjêx kaxyw mẽ amã kahê xà rê nê ixkra hkêt xwýnhjê pê kahê. Kot paj mẽ apê ixkrajê mã kahê xà rê ka mẽ hwÿr agjê. Hãmri pa mẽ atã kahê nhũm ixkra hkêt xwýnhjaja tee ri kãm mẽ akôt gjêx prãm kaprÿ.

⁸ Na pa hte tanhmã mẽ ate amnhî nhîpêx to ho apa hã mẽ apumunh mex o ri ixpa. Mẽ agrêre htã na ka htem ixkapêr kôt amnhî nhîpêx mex nê aa ixkaga hkêt nê. Jakamã kot paj te ixte mẽ amã Tirtûm nhô hakwakre kahê xà mẽnh pyrãk o

mê anhîpêx ka mê axàmnhîx aja-makêtkati nê ma mê kãm Tirtûm kapêr o mê ahkre ho ri mê hkôt apa. Nhûm mê hkwÿjaja tee ri ã mê ate amnhî nhîpêx anhÿrja nê mê amã kapêr kaprÿ ka mê arî ho mê ahkre ho ri mê hkôt apa.

⁹ Nê mê anhõ krî kamã mê akwÿjaja na prem ra Satanasti hkôt amnhî xunhwÿ nê hêx rom mê amã amnhî to hêx nê mê amã: “E mê ixpê Ijaew mex jakamã kwa mê ixkapêr ma nê mê ixkôt amnhî nhîpêx.” Anhÿr o mê amã karõ htã no ãm mê kot Satanasti hkôt amnhî nhîpêx xwÿnh na mê. Tã kot paj nhÿrmã tanhmã mê homnuj to nhûm mê tee ri amnhî pumu nê akupÿm mê awÿr mra nê mê akutã hkônkrã ho rôrôk nê hkrî nê mê amã: “Nã mê kajaja na ka pêr mê ixrom Jesus kôt amnhî nhîpêx. Mãn kãm mê ajapêê.” Anê.

¹⁰ Mê kot ixtã mê atomnuj tÿx nhûm mê ate amnhî xà htÿx kamã ajamak tã aa mê umaj ixkaga hkêt nê. Nê arî ixte mê amã mẽmoj tã karõ xà hkôt mê kutã amnhî to htÿx rãhã arî ixkôt ri amnhî nhîpêx o apa. Jakamã mê kot nhÿrmã mê kãm ixkurê xwÿnhjaja pika pi-itã hkôt tanhmã mê homnuj tÿx to nhûm mê amnhî xà htÿx kamã ama. Tã kot paj mê anê mê omunh mex nê nhûm mê tanhmã mê ato hkêt nê ka mê amex nê ri apa ho apa.

¹¹ E kot paj tokyx akupÿn mê awÿr wrÿ nê mê ate ixkôt pix mã amnhî nhîpêx ã mê ato mex rax kumrêx. Jakamã kwa mê mãmri ã amnhî nhîpêx anhÿr o inhmã hprãm xà hkôt pix mã amnhî nhîpêx rãhã ty. Kot ka mê anhÿr kêt kot pa mê amã mẽmoj mex nhõr kêt nê.

¹² Nê kot kaj mê kot amnhî tomnuj xwÿnhjê kutã amnhî to htÿx nê inhmã hprãm xà hkôt pix mã amnhî nhîpêx rãhã ty. Hã kot paj amnhî kôt mê ato mê axi-htÿx nê ka mê aa ixkaga hkêt nê. Nê kot paj nhÿhÿnh mê atã mê

inhîxi ho axkrunêpxi nê haxwÿ. Inhîpêxã nhîxi nê inhîxi nyw nê Inhîpêxã nhõ krî nhîxija kot paj nhÿhÿnh mê atã haxwÿ. Tirtûm nhõ krî mê kot kãm: “Jerujarê nyw” anhÿr xwÿnhhta koja nhÿrmã tanhmã amnhî to nê ra kaxkwa rûm pika wÿr wrÿ.

¹³ E ixkwÿjaja. Kot kaj mê amã ixkapêr mar prãm hã kot kaj mê ã Tirtûm mê wa Ixkarõ nhÿ hã ixte mê amã ixkapêr anhÿrja ma nê kãm ajamaxpêr tÿx rãhã ho ri apa.

Tã ãm ja pix. Na ra hapêx. Anê.
—E Juãw. Kêr ka ã Pirate kamã ixkrajê mã ixkapêr ã kagà anê. Anê.

Hãmri pa kuma nê ô ri mê kãm hã kagà.

Raxisej kamã Jesus kwÿjê hwÿr kagà

¹⁴ Nhûm pre Jesus arî inhmã kapêr nê inhmã:

—E hpãnhã krî pê Raxisej kamã ixkrajê jamãr xwÿnh wÿr kagà nhîpêx nê amê. Nê mê kãm ixkapêr jarênh o:

Pa Raxisej kamã ixkrajaja. Ot pa mê awÿr ixpêr mê. ãm hãmri ixkapêr o ixpa nê aa ixêx kêt xwÿnhhta na pa. Jakamã ãm hãmri na pa hte Tirtûm kapêr o mê ajahkre o ixpa nê aa ja kaga hkêt nê. Pa na ixpê mẽmoj piitã hpãr krax.

¹⁵⁻¹⁶ Na pa hte mê ate tanhmã amnhî nhîpêx to ho apa hã mê apumunh rãhã ho ixpa. Kop apu mê ate ixkôt amnhî nhîpêx mex ronhÿx pa ja hã mê apumu nê ixkînh nê. Nom mê ate ã amnhî nhîpêx anhÿr kêt. No mãânên aa ixkaga hkêt nê. Na ka htem ri atÿx amnhî krã hkôt pix mã tanhmã amnhî nhîpêx to ho apa nhûm ja ixpê omnuj nê. Kot kaj mê arî ã amnhî nhîpêx anhÿr o apa pa hpãnhã amnhî nê mê akurê. Te mê kot gô xenh nôkati janhir nê tee hkakinh nê akupÿm hkapîr pyrãk.

¹⁷ Mê ate inhmã hprãm xà hkôt amnhî nhîpêx ã amnhî jarênh tã ã amnhî nhîpêx anhÿr kêt nê. Nê

ixkapēr mar tỳx nē amnhĩ kaxyw inhmã ajamaxpēr mex kêt nē.

18 Kwa mẽ tokyx ja hã amnhĩ pumu nē akupỹm ixkôt amnhĩ xunhwỳr tỳx nē. Kêr pa ja hã mẽ apumu nē amnhĩ katut kôt mẽ ate amnhĩ tomnuj rē nē tanhmã mẽ akrã hto ka mẽ inhnoo mã tãm amnhĩ nhĩpêx mex o ri apa. Hãmri pa mẽ amã tanhmã amnhĩ to amnhĩrit to ka mẽ aprĩ hã ixte amnhĩ nhĩpêx ã ixpumunh mex nē ixkôt amnhĩ nhĩpêx mex rãhã o ri apa.

19 Xà inhmã mẽ ajapê hkêt ã na pa ã mẽ amã ixkapēr anē? Nà inhmã mẽ apiitã mẽ ajapê htỳx kênã. Nom inhmã mẽ ajapê htã ka htem ixkôt amnhĩ nhĩpêx kêt nē. Na pa tee ri amnhĩ tã mẽ apumu nē ja hã tanhmã mẽ atomnuj tỳx to. Tokyx mẽ ate amnhĩ tomnuj mã anhũrer nē hpãnhã tãm amnhĩ nhĩpêx kaxyw. Jakamã kwa mẽ tokyx ate amnhĩ tomnuj kaga nē akupỹm amnhĩ kaxyw inhmã ajamaxpēr ho ri apa.

20 Na htem hkwyjê nhõrkwy hwỳr gjêx kaxyw hakwa krem kãm àkjêr o kuhê nhũm mẽ kuma nē mẽ kãm anē nhũm mẽ hwỳr agjê. Nē mẽ ixkre hkre kamã axpên mã kapēr o hkrĩ rỳ axpên mã kapēr pê mẽmoj to hkôm o hkrĩ. Ja pyrã nē ot pa mẽ ajamãr o ixpa. Mẽ ate inhmã anhỳr nhũm ixte mẽ akôt ixpa ho ixpa nhũm mẽ pahte axpên to mex o papa kaxyw.

21 Kormã mẽ kot ixpĩr kêt ri na pa pre mẽ kot amnhĩ tomnuj xwỳnhjê kutã amnhĩ to htỳx o ixpa. Amnhĩ to htỳx nē ri ixpa kamã ixtyk jakamã nhũm Inhĩpêxã akupỹm ixto ixtĩr nē akupỹm amnhĩ wỳr ixto api. Hãmri nē amnhĩ nhĩhkô hã mẽ ho amnhĩptàr ã hkrĩ xà kamã inhỳr pa ixkrĩ ho ixkrĩ nē ìhkô hã mẽ piitã mẽ ho amnhĩptàr o ixkrĩ. Tã kot kaj mẽ atõ ixpyrà nē ate amnhĩ tomnuj nē amnhĩ to htỳx nē. Nē inhmã hprãm xà hkôt pix mã amnhĩ nhĩpêx rãhã ty. Hã kot paj amnhĩ pyrã nē wa ixte mẽ

ato amnhĩptàr ã ixkrĩ xàja kamã amnhĩ nhĩhkô hã mẽ akrĩ ka mẽ wa inhĩhkô hã wa inhmã mẽ ho amnhĩptàr o akrĩ.

22 E ixkwỳjaja. Kot kaj mẽ amã ixkapēr mar prãm hã kot kaj mẽ ã Tĩrtũm mẽ wa Ixkarõ nhỹ hã ixte mẽ amã ixkapēr anhỳrja ma nē kãm ajamaxpēr tỳx rãhã ho ri apa.

Tã ãm ja pix. Na hapêx. Anē. —E Juãw. Kêr ka Raxisej kamã ixkrajê mã ixkapēr ã kagà nē mẽ hwỳr amẽ. Nē kagàja piitã krĩ hkwy kamã ahpỹnhã ixkwỳjê hwỳr arẽ kê mẽ kamã harẽ nē ixkapēr ma. Anē.

Nhũm pre ã Jejus inhmã kapēr anē. Pa kuma nē ô ri mẽ piitã mẽ kãm hã kagà hpa.

4

Tĩrtũm kot mẽ ho amnhĩptàr ã hkrĩ xà jarênh

1 Tã pa axte mẽmoj pumu nhũm kaxkwa hwỳr mẽ gjêx xà hã hakwakreja amnhĩ kahê xà mẽ pa omu. Hãmri nhũm axte mẽhõ kapēr tỳx xwỳnhta. Te kot pifti kakõr tỳx pyrãk xwỳnhta axte inhmã kapēr nē inhmã:

—E amnẽ ixwỳr api pa mẽmoj nhỹrmã kot tanhmã amnhĩ nhĩpêx to hkukamã amã ho amnhĩrit ka omu. Anē.

2 Hãmri nhũm Tĩrtũm Karõ tanhmã ixto nē ixto api pa kaxkwa kamã mẽmoj pumunh o xa. Tĩrtũm kot mẽ ho amnhĩptàr ã hkrĩ xà maatita pa pre omu. Nhũm kamã mẽhõja nhỹ.

3 Kuk kamã hirã htỳx kumrêx. Te mẽmo kên kamrêk karỳr jaxênh tỳx pyrãk. Nē kot mẽ ho amnhĩptàr ã hkrĩ xà puhã màxwỳxti grãgrãreja kãm hipõk nē harir pa omunh o xa.

4 Nhũm hkrĩ xà maati puhã mẽ ho amnhĩptàr o hkrĩ xà kêp 24. Kamã mẽ àptàr tũmjaja hkrĩ. Mẽ piitã ôr o mẽ ahkà htu nē ê jakare nē hkrĩ.

5 Nē Tĩrtũm hkrĩ xà maati rũm na katõtõk nē hkrakrak nē haxênh japã nē hikwỹ. Nē hkrĩ xà kapem kanê maati pixi kamã kwryt pê 7ja põk rãhã ho kuhê. Kanêja te Tĩrtũm Karõ pyrãk.

⁶ Nē hkrī xà kapem mēmo te gô rax pyrākja hkarÿr jaxênh tÿx kumrêx nē nō. Te ho kàx karÿr jaxênh tÿx pyrà nē hkarÿy're. Nē hkrī xà puhã mēmoj tÿr nē kuhê pê kwat kuhê. Nē ôkwa nē katut piitã hkôt no. ãm no xohtô rax kumrêx. Na pre ã mēmoj kêp kwatja no xohtô anê pa omu.

⁷ Wamta te kot mry pê rêãwti pyrāk. Nē hkôt ja te kot môx myti pyrāk. Nē hapu hã hkuk te panhĩ hkuk pyrāk. No hapu hã ja te kot àanhãhti htor kaxyw hara koror pyrāk.

⁸ Nē piitã hara kêp 6. Nē ï piitã kamã no. Nhũm prem Tÿrtũm mã mex o mex ã grer rãhã ho kuhê nē aa pinhkrênh kêt nē. Nē kãm grer o:

Amex o amex Tÿrtũm.

Nē axihtÿx o axihtÿx.

Nē aa ate amnhĩ tomnuj kêt kumrêx.

Amnepê mã kormã mēmoj kêt ri ka ra arãhã ri apa. Tã arĩ arãhã ri apa xwÿnh na ka. Kot kaj aa ajapêx kêt nē.

ãm hãmri na ka hte mē ixto mex rãhã ho apa.

Nē amex o amex Tÿrtũm. Anê.

⁹⁻¹⁰ Nhũm prem xatã mē ho amnhĩptàr hkrī xà kamã hkrī xwÿnhja mē kot kãm "Rãhã pa xwÿnh" anhÿr xwÿnhhta mã ã grer anhÿr o kuhê. Kãm mex o mex ã grer pê tanhmã kot mē ho mex to hã harê. Hãmri nhũm mē àptàr tũm pê 24jaja mãânên kutã hkôn krã ho rôrôk nē hipô hpa nē hkrī. Nē amnhĩ krã rũm ôr o mē ahkàja kwry nē hpar pê haxwÿ. Kêp mē ô Pahi Maati hã hã hpijaàm kaxyw wamtajê pyrã nē mex o mex ã harênh o hkrī nē kãm:

¹¹ ãm hãmri na pa htem amex o amex ã ajarê Tÿrtũm

Apê mē inhõ Pahi Maati na ka.

Nē apê mē inhõ Tÿrtũm na ka.

Na ka pre mēmoj piitã ho akato. Axàhpumunh tÿx nē ajamxpêr tÿx o mēmoj piitã amã hprãm xã hkôt ho akator pa.

Jakamã na pa htem ã amex o amex ã ajarênh anê. Mē ixrom axihtÿx mex kumrêx na ka hte apa Tÿrtũm. Anê.

5

Mē pahte amnhĩ tomnuj pãnhã amnhĩrer xwÿnh jarênh

Juãw 1.29; Piripos 2.5-11

¹ Tã pa pre arĩ te kaxkwa kamã mēmoj pumu. Mē ho amnhĩptàr ã hkrī xà maatita kamã hkrī xwÿnh nhĩhkra kamã kagà pa omunh o xa. Upôk rũm omu. No ãm axtem kagà kaxkep na pre. Nē akutã hã kagà nē menh ê ho ho htÿx xàja kêp 7.

² Hãmri nhũm Tÿrtũm kapêr o wryk xwÿnh xihtÿx xwÿnhja kapêr tÿx kãm kapêr o:

—E mē atõ na ate kagà mÿj pyr nē ho htÿx xà hpôt mã tãm? Anê.

³ Hãmri nē tee ri mē piitã mē hkapi nom nhũm ja kaxyw mēhõ amrakati kumrêx. Kaxkwa kamã amrakati nē pika kamã mãânên amrakati nē pika hkrak ri amrakati. Nhÿri mēhõ kot kagà kaxkepta pyr nē hpôt nē omunh mã tãm xwÿnhja amrakati ho amrakati.

⁴ Nhũm tee ri mēhõ japêr nom mēhõ pumunh kêt nē. Pa tee ri ja hã omu nē ixkaprĩ htÿx nē inhmÿr o xa.

⁵ Hãmri nhũm pahi hõja ixpumu nē inhmã:

—Kwa amÿr kêt nē. E mēhõ mÿj pumu. Juta kanrêhã htãmnhwÿ xihtÿx xwÿnhhta. Pahi Tawi kanrêhã htãmnhwÿ te kêp mry pê rêãw xihtÿx pyrāk o hihtÿx xwÿnh mÿj pumu. Kot mē kãm hkurê xwÿnhjê kutã amnhĩ to htÿx nē mēmoj punuj piitã ho hapêx kaxyw mã xwÿnh jakamã tapxipix na kot kagàta hpyr nē ho htÿx xà hpôt par mã tãm. E ka omu. Anê.

⁶ Hãmri pa kuma nē hwÿr rÿt nē Jesusja pumu. Kot mē pahte amnhĩ tomnuj pãnhã amnhĩrer xwÿnhhta mē ho amnhĩptàr o hkrī xà maati kapem xa. Mēmoj htÿr pê kwat mē àptàr tũm pê 24jê nhĩpôk ri xa. Mē kãm hkurê xwÿnhjaja kot hpÿr nhũm ra akupÿm htÿr nē xa. Nôm ra axtem nē xa. àhpumunh tÿxja te kot pahi xàhpumunh pyrāk. Nē hpàr kêp 7. Nē no mãânên kêp 7. Noja te Tÿrtũm Karõ pyrã nē kêp pika piitã hkôt pa xwÿnh. ã Jesusja axtem nē ãm anê pa omu.

7 Hāmri nhūm mē pahto amnhīptār o hkrī xwýnhhta wýr tē nē ĩhkra kamā kēp kagà kaxkepta py.

8 Hāmri nhūm mē htír pē kwat mē mē àptār tūmjaja hpar pē hkōn krā ho rôrôk nē hkrī hpa nē hipô nē hkrī. Piitā wiorāwti jamý nē ôr o xijere kamā mēhkuxwa xà jamý nē o hkrī. Nhūm Tirtūm krajaja Tirtūm mā tanhmā amnhī jarēnh to nhūm mē mar o hkrī. Te xijere kamā mēhkuxwa xà hpār o hkrī pyrā nē mē kuma.

9-10 Jakamā nhūm mē hkōn krā ho hkrī xwýnhjaja mē pahte amnhī tomnuj pānhā amnhīrer xwýnhhta kutā kām grer o hkrī. Mē grer nyw o kām gre nē kām:

Na prem apī ka atyk o mē piitā mē kot amnhī tomnuj pānhā amnhīrer pa.

Ahpýnhā pika piitā hkôt mē urojē piitā hpānhā amnhīrer pa.

Nē ahpýnhā ri mē kapēr xwýnh kwýjē piitā mē hpānhā amnhīrer pa. Atyk o mē kot amnhī tomnuj piitā hpānhā amnhīrer pa.

Jakamā nhūm mē kot akôt amnhī xunhwýr xwýnhjaja kēp Tirtūm kra nē ri pa.

Ka ra mē panhō Tirtūm mā mē kēp patre kaxyw mē unhwý nhūm htem pika piitā hkôt mē ho amnhīptār o pa.

Tā atyk o ate pika piitā hkôt mē hpānhā amnhīrer jakamā kapxipix na ate kagàta pyr nē ho htýx xà hpôt mā tām. Anē.

11 Hāmri nhūm Tirtūm kapēr o mē wrýk xwýnhjaja nhýhýnh hapôj nē kuhê. Mē ohtô rax o ohtô rax. Ohtô rax o mē pajamaxpēr jakrenh. Hāmri nē Tirtūm kot mē ho amnhīptār ā hkrī xà maatija wýr mra nē kām hipôk pa. Nē mēmoj tír nē kuhê xwýnhjê mē mē àptār tūmjê mā hipôk pa nē mē pahte amnhī tomnuj pānhā amnhīrer xwýnhhta mā kapēr.

12 Kàx pē kām kapēr nē kām:

Ām hāmri na pa htem amex o amex ā inhgrer o ixkuhê.

Mē ixrom axihtýx o axihtýx.

Nē mēmoj piitā anhō.

Nē ate mēmoj piitā hkukamā axàhpumunh par.

Nē amex o amex jakamā na pa htem amā amex pix ā inhgrer o ri ixpa. Anē.

13 Tā nhūm mēmoj piitā Tirtūm mē Jejus wa kām wa mex o wa mex ā harê. Pika hkôt panhī nē mry nē àk nē mēmoj piitā. Nē pika hkrak ri nē gô hkrak ri mēmoj piitā. Nē mē htykjaja. Nhūm mē piitā wa kām wa mex o wa mex ā wa harê nē wa kām: E ate mē ixto amnhīptār ā akrī xà kamā akrī xwýnh mē kot mē ixte amnhī tomnuj pānhā amnhīrer xwýnh mē war amex o wa amex.

Nē war axihtýx o war axihtýx.

Nē war axàhpumunh o war axàhpumunh.

Na pa htem ā war ajarēnh anhýr rāhā ixpa ho ixpa. Anē.

14 Hāmri nhūm mēmoj tír pē kwatjaja mē kuma nē mē kām:

—Nā ām hāmri na ka mē ā wa harēnh anē.

Wa mex o wa mex kumrêx. Anē.

Hāmri nhūm mē àptār tūmjaja Tirtūm mē Jejus wa hpar pē hkōn krā ho rôrôk nē hkrī hpa nē haxwýja wa kām wa mex o wa mex ā wa harê.

6

Kagà ho htýx xà pē 7 jarēnh

Matêwre 24.3-14; Sikün Tesarôn 2.3; Wam Juāw 2.18

1 Tā pa arī kaxkwa kamā mē pahte amnhī tomnuj pānhā amnhīrer xwýnh kot tanhmā amnhī nhīpêx to hā omunh o xa. Nhūm kagà kaxkepta py nē wam ho htýx xà pôt. Hāmri nhūm mēmo tír pē kwatjê hōja kapēr týx kumrêx. Te na katôtôk týx pyrāk o mēhōj mā kapēr nē kām:

—E amnē mē ixwýr tē. Anē.

2 Hāmri nhūm kawar jakajre nhýhýnh hwýr hpôx o tē. Nhūm mēhōja ô kuxê mý nē hā nhý nē tē. Hāmri nhūm nhām mēhōja hwýr tē nē kām pahi hā mē ahkà htú. Hāmri nē kām tanhmā kapēr to nhūm kuma nē mē kot kām Tirtūm mē Jejus wa kurê xwýnhjê nhímex par kaxyw hakêx nē ma pika hwýr tēn wrý.

³ Hāmri nhūm mē pahte amnhī tomnuj pānhā amnhīrer xwýnhja wam kagà ho htýx xàta kôt axte ja pôt. Hāmri nhūm mēmoj tīr pē kwatjê hōja axtem mēhōj mā kapēr nē kām:

—E amnē mē ixwýr tē. Anē.

⁴ Hāmri nhūm kawar kamrêk mē hwýr hpôx o tē. Nhūm mēhō hā nhý nē tē. Nhūm nhām mēhōja kām wapo gō nē ma pika hwýr htēm nē wrýk kaxyw hano. Kot hwýr wrýk nē pikap mē pa xwýnhjê kurê huk kaxyw. Mē kot axpēn par kaxyw ma mē hwýr kumē. Hāmri nhūm kuma nē wapota py nē hakēx nē ma mē hwýr tēn wrý.

⁵ Hāmri nhūm mē pahte amnhī tomnuj pānhā amnhīrer xwýnhja kagà ho htýx xà hō hpôt. Na pre ra ho axkrut nē hpôt tā hpānhā axte hkôt ja pôt. Hāmri nhūm mēmoj tīr pē 4jê hōta mēhōj mā kapēr nē kām:

—E amnē mē ixwýr tē. Anē

Hāmri nhūm kawar tykre mē hwýr hpôx o tē. Nhūm hā ýr xwýnhja mēmoj to peja xà hā parās mý nē o tē.

⁶ Hāmri nhūm mē htīr pē kwatjê rūm mēhōja kām kapēr nē kām:

—E kêr ka ma pika hwýr mē hwýr tēn wrý nē mē kām myt pyxi kamā mē àpēnh pānhā mē kām mēmoj to hkryre nē anhō parāsta kamā ho peja nē mē kām ōr o apa. Nom mē apkur xà hā orti nē wīhti ka mē kēp tanhmā ho hkêt nē. Anē.

Hāmri nhūm kuma nē hakēx nē ma tēn mē hwýr wrý.

⁷ Tā nhūm mē pahte amnhī tomnuj pānhā amnhīrer xwýnhja axte kagà ho htýx xà hō hpôt. Na pre ra ho axkrunēpxi nē hpôt tā hpānhā axte hkôt ja pôt. Hāmri nhūm mēmoj tīr pē kwat kot hitep xwýnhja mēhōj mā kām:

—E amnē mē ixwýr tē. Anē.

⁸ Hāmri nhūm kawar rārààre mē hwýr hpôx o tē. Nhūm mēhō hā nhý nē tē. Hā ýr xwýnh nhīxi na pre kēp “Mēhtyk” anē. Hāmri nhūm mēhōja kām kapēr nē kām:

—E ma pika hwýr wrý nē tanhmā mē ho kê mē ohtô nē tanhmā amnhī to nē axkaprā. Kê mē hkwýjaja pijapu

kamā axpēn pa nē mē hkwýjaja prām xà ty nē mē hkwýjaja tanhmā à htýx kute kamā ty. Nē mēmo mry xoprēja mē hkwýjê pa. E ma mē hwýr wrý nē tanhmā mē ho ho apa. Anē.

Hāmri nhūm kuma nē hakēx nē ma pika hwýr tēn wrý. Hāmri nhūm mē htykjê papxàja tanhmā amnhī to nē te kot hā jēt nē ma hkôt mōr nē pika hwýr wrýk pyrāk pa pre arī omunh o xa.

⁹ Hāmri nhūm mē pahte amnhī tomnuj pānhā amnhīrer xwýnhja axte kagà ho htýx xà hō hpôt. Na pre ra ho kwat nē hpôt tā hpānhā axte ja pôt. Hāmri nē hpôtja kôt pa ra mē kot Tīrtūm mā mēmoj nhōr xà hā mēsti pumu. Nē hkrak ri mē hkarōjê pumu. Mē kot hkwýjê hkôt ri mē kām Tīrtūm kapēr jarēnh nē Jejus kēp mē ō Pahihtī hā harēnh o pa nhūm mē kot hā mē hpar xwýnhjê karōja pa pre mē omu. Nhūm mē mēsti hkrak ri amnhī to Tīrtūm wýr o hkrī. ¹⁰ Kýx pē kām kapēr nē kām:

—Ām hāmri amex o amex Pahi Maati. Aa ate mēmoj tā tanhmā amnhī to axēx to hkêt kumrēx. Kwa xà kot kaj tokyx pika hkôt mē kot mē inhīmex xwýnhjaja tanhmā mē ixtā mē ho nà? Anē.

¹¹ Hāmri nhūm mēhōja mē hwýr tē nē mē kām mē ê jakajre gō nhūm mē hagjê. Hāmri nhūm mē kām:

—E mē mamrī atar akôkôt o akrī. Koja Tīrtūm kormā tanhmā mē kot mē atomnuj xwýnhjê ho hkêt nē. Kê mē axte mē apyrā nē mē akwýjê nhūmex mǎn. Koja mē Tīrtūm jamaxpēr xà hkôt axte mē akwýjê pa nhūm rī kormā mē ato hpimràatā tanhmā mē atā mē hipēx to. Jakamā e mē atar kutēp māmri akôkôt o akrī. Anē.

¹² Hāmri nhūm mē pahte amnhī tomnuj pānhā amnhīrer xwýnhja axte kagà ho htýx xà hō hpôt pa omu. Na pre ra ho 5 nē hpôt tā hpānhā hkôt axte ja pôt. Hāmri nhūm pika htertēt týx kumrēx. Nē myyti ahtyk nē mytwrýre te kēp mē hkamrô kamrêk týx pyrā nē ajêt.

¹³ Nē kanhēti tanhmā amnhī to nē axrē nē pikap rôrôk pa. Te kôk xapêr tỳx nē kot pàrerekre kormā ràx tâ kot kām hikranh par pyrà nē piitā rēnh pa nhūm rôrôk.

¹⁴ Hāmri nhūm kaxkwaja te kagà kaxkep pyrà nē amnhī to kaxkep o tē. Nē pika piitā hkôt kēn prēk nē hixēt prēk maati piitā te hkrī xà rūm hapôx nē mrrar nē nhām hkrī pyrāk. Nhūm gô hipôk piitā haxwýja te hikwý xà rūm hapôx nē mrrar nē nhām hikwý pyrāk. Pika htertēt tỳx nhý hã ã mēmoj amnhī nhīpêx anē. ¹⁵ Hāmri nhūm pika hkôt mē piitā tee ri mēmoj ã amnhī nhīpêx anhýr ã omu nē kām ma nē htertēt tỳx kumrēx. Mē ho amnhīptār xwýnhjaja nē pôristi krāhtūmjaja nē mē kot amnhī to rūnh xwýnhjaja nē mē hihtỳx xwýnhjaja nē mē kām mē àpēnh xwýnhjaja nē amnhī mã mē àpēnh xwýnhjaja. ãm piitā mēmoj ã kot amnhī nhīpêx anhýr ã omu nē tee ri amnhī kukamā hamaxpēr nē kām ma ho kām ma. Hāmri nē hpimxur kaxyw ma kēn prēk kre japêr o hprôt nē mra. ¹⁶⁻¹⁷ Hāmri nē amnhī to kēn prēk wý nē kām:

—Kwa na ra mē ixto amnhīptār ã hkrī xà maati kamā hkrī xwýnh mē kot mē ixte amnhī tomnuj pānhã amnhīrer xwýnhhta wa mē ixkamā gryk tỳx kumrēx. Ra wa kot tanhmā mē ixtomnuj to xà hã arīgrota kato. Koja wa mē ixtomnuj tỳx nē pa mē kutā hkēt nē. Kwa tokyx mē inhīpy arôrôk nē wa kēp mē ixto amūxu. Anē.

7

Mē kot Tirtūm mã hkrajê kagà Apokarip 9.4

¹ Tã pa arī kaxkwa kamā mēmoj pumu. Nhūm Tirtūm kapêr o mē wrýk xwýnh pē kwatja piitā ahpýnhã pika nhītep xà hkôt kôk jatur xà hã hamý nē ho kuhê. Pika piitā hkôt kôk hpinhkrēnh par nē àpêr kēt nē gô xujanār kôt àpêr kēt kaxyw hatur xà hã hamý nē ho kuhê. Nē pà piitā hkôt àpêr nē tanhmã pī hkwy ho pymaj nhūm mē ã amnhī nhīpêx anē nē nē

hatur xà hã hamý nē ho kuhê. ² Na pre ra Tirtūm ja hã mē kām karō nē mē kām:

—E kêr ka mē ma pika hwýr wrý nē pika nē gô xujanārja tanhmã wa homnu hto. Anē.

Hāmri nhūm mē kuma nē hwýr wrý nē kormã nē kôk ho htỳx. Hāmri nhūm Tirtūm kapêr o wrýk xwýnhjê hōja myt japôx xà rūm mē hwýr hpôx o tē. Nē ìhkra kamã mē kot Tirtūm kra hã mē hixi jarēnh xà hã kagàta py nē o tē. Hāmri nē kàx pē mē kot pika mē gô xujanār homnu mã xwýnhjê mã kapêr nē mē kām:

³—Kwa taxy pa Tirtūm krajê nhōkrã kagà hpa măn. Kêr ka mē omu nē mē tapxipixjaja tanhmã mē ho hkēt nē. Anē.

⁴⁻⁸ Hāmri nē mē hkagà pa. Ahpýnhã Ijaew pigrành xwýnhjaja mē ho ohtô rax kumrēx nē tanhmã mē hkagà hto. Pa tanhmã mē kute hã mē harēnh ma nhūm xep mē ohtô rax kumrēx.

Juta kamã mē kēp 12.000.

Nē Rupê kamã mē kēp 12.000.

Nē Gax kamã mē kēp 12.000.

Nē As kamã mē kēp 12.000.

Nē Natari kamã mē kēp 12.000.

Nē Manase kamã mē kēp 12.000.

Nē Simeãw kamã mē kēp 12.000.

Nē Rewi kamã mē kēp 12.000.

Nē Isaka kamã mē kēp 12.000.

Nē Jepurō kamã mē kēp 12.000.

Nē Juje kamã mē kēp 12.000.

Nē Pējamī kamã mē kēp 12.000.

ã mē ohtô rax kot anhýr. Hāmri nē mē piitā mē pikamýr par kām mē kēp 144.000. Piitā kēp Apraãw kanrēhã htàmnhwý na pre mē. Tã ã axpēn kaxyw mē ohtô rax kumrēx kot anhýr tã nhūm mē hkagà pa.

Tirtūm kra hkwyjê jarēnh Apokarip 14.1-5

⁹ Tã pa axtem mēmoj pumu. Nhūm mē ohtô rax nē Tirtūm nhō krī kamã kuhê. Ahpýnhã ri pika piitā hkôt mē urojaja. Nē ahpýnhã ri mē kapêr xwýnhjaja nhūm prem pika piitā kurūm kot mē ho amnhīptār ã hkrī xà maatija kamã hkrī xwýnh pē Tirtūm mē mē pahte amnhī tomnuj pānhã

amnhîrer xwÿnhja wa kutâ kuhê. Mē ohtô rax kumrêx jakamã pa tee ri mē piitã mē ho kôta hpar prãm kaprÿ. Nē piitã ê jakare kamã kuhê. Nē hkĩnh nē hkĩnh xàj pô hkwÿ jamÿ nē ho àpêr o kuhê. ¹⁰ Hãmri nē kÿx pēê Tirtũm mē Jesus wa kãm kapêr nē wa kãm:

Hêxta waa nē. War amex o war amex Pahi Maati.

Na ka pre Akra Jesus kukwak ri mē ixte amnhĩ tomnuj ã tanhmã mē ixto hkêt nē.

War ajamē mē ixkamã axukaprĩ rãhã ho apa xwÿnh na ka wa.

Jakamã pa mē inhmex nē war awÿr api nē war akuri inhmex nē ijamakêtkati nē ixpa ho ixpa.

Ãm hãmri na ka hte wa mē ixto mex rax kumrêx o apa. War amex o war amex. Anē.

¹¹ Hãmri nhũm Tirtũm kapêr o mē wrÿk xwÿnhjaja Tirtũm krĩ xà mã hipôk nē hkôn krã ho rôrôk nē hkrĩ hpa. Nē mē àptâr tũmjê mē mē htĩr nē kuhê xwÿnhjaja mē ãhkô hã kãm hipôk nē wam tajê pyrãk nē hkôn krã ho rôrôk nē hkrĩ. Hãmri nē mē ohtô kot Tirtũm mē Jesus wa kãm kapêr ã mē kuma hãmri nē Tirtũm ã hpijaãm kaxyw hpar pē htũ mÿr pē hikwÿ hpa nē kãm mex o mex ã harê nē kãm:

¹² “Ãm hãmri na mē ã ajarênh anē Tirtũm. Amex o amex.

Na ka hte mē ixto mex o apa.

Mē ixrom axàhpumunh o axàhpumunh. Nē mē ixrom axihtÿx o axihtÿx.

Jakamã na ka hte mē ixpiitã mē ixto mex kumrêx rãhã ho apa.

Ã ate anhÿr rãhã o rãhã jakamã na pa htem amã amex o amex ã ajarênh rãhã ho ixpa.” Anē.

¹³ Hãmri pa mē omunh o ixãm rôm nhũm mē àptâr tũmjê hõja ixwÿr tē nē mē ê jaka kamã mē hkĩnh xàj pô jamÿnh nē ho kuhê xwÿnhjê hã ixkukja nē inhmã:

–E mãn ate mē ê jakare kamã mē kuhê xwÿnh mÿjjê pumunh nà? Tanhmã na prem amnhĩ nhĩpêx to nē amnē api? Xà ate mē omunh? Anē.

¹⁴ Hãmri pa kuma nē kãm:

–Nà ixte mē omunh kêt. Kêt ka na ixrom ate mē omunh. Anē.

Hãmri nhũm inhmã mē harênh o:

–Nà na pre mē hkwÿjaja Jesus ã mē homnuj tÿx kumrêx nē mē kupa. Tã mē kêp Jesus kwÿ jakamã na pre mē nē mē kot amnhĩ tomnuj o hapêx nē te amnhĩ kamrô ho mē nē mē kot amnhĩ tomnuj piitã kuhõnh par pyrãk o mē hipêx. Jakamã nhũm mē ê jaka kamã mex nē hkĩnh tÿx nē pa.

¹⁵ Nē Tirtũm kot mē pahto amnhĩptâr ã hkrĩ xà maati kutã kãm mex o mex ã harênh rãhã ho kuhê.

Na hte mē ho mex rãhã ho pa. Mē hkôt pa ho pa jakamã koja mēmoj tanhmã kêp mē ho hkêt nē.

¹⁶⁻¹⁷ Nē mē pahte amnhĩ tomnuj pãnhã amnhîrer xwÿnh kot Tirtũm krĩ xà maati kamã ãm xwÿnhhta na hte mē hamãr mex rãhã ho mē hkôt pa.

Te mē kot mē hkrit jamãr mex pyrãk. Nē te mē kot mē hkrit kôm o pa nhũm htĩr nē pa pyrãk.

Koja mē kuri htĩr tũm nē hkôt pa ho pa.

Nē axte kãm prãm kêt nē.

Nē axte kãm kôr kêt nē.

Nhũm arĩgro htÿxja axte mē hkà ho hxêt kêt nē.

Koja Tirtũm te mē kot mē hkra no kagô nhĩnhĩnh par pyrãk o mē hipêx nhũm mē axte hkaprĩ nē mÿr o pa hkêt nē.

Pãnhã hkĩnh nē mex rãhã kuri pa ho pa. Anē.

8

Kagà kaxkep o htÿx xà kot hitep jarênh

¹ Tã pa arĩ kaxkwa kamã mēmoj pumu nhũm mē pahte amnhĩ tomnuj pãnhã amnhîrer xwÿnhja kagà kaxkep o htÿx xà kot hitepta pôt. Hãmri nhũm kaxkwa kamã mēmoj piitã hpinkrênh pa nhũm mēhõ kapêr kêt kumrêx. Nē hpinkrênh par o ra hã ahtũm ry mex nē.

² Hãmri nhũm Tirtũm kutã kapêr o wrÿk xwÿnh pē 7 nē mē kuhê xwÿnhjaja. Nhũm kapêr o wrÿk xwÿnhjê hõja mē hwÿr tē nē mē piitã mē kãm pifti gõ.

3-4 Hāmri nhūm kapēr o wrÿk xwÿnhjê hōja ôr o xijere py nē Tirtūm mā mēhkuxwa xà ho xēt xà hā mēs kunīhti hwÿr o tē. Mē ho amnhīptār ā hkrī xà maati kutā ôr o mēstija wÿr o tē nē kuri o xa. Hāmri nhūm mē kām kamā mēhkuxwa xà hkwÿ runh rax nē nhūm mēsti hā ho xēt o xa. Rôm nhūm Tirtūm krajaja Tirtūm mā tanhmā amnhī jarēnh to. Jakamā nhūm mēhkuxwa xà xēt kūm mē mē kot Tirtūm mā amnhī jarēnh xāja mē nhūm ahkà nē Tirtūm kapēr o wrÿk xwÿnh nhīhkra kamā xijere rūm Tirtūm kutā kàx mā àpir o pa.

5 Hāmri nhūm kapēr o wrÿk xwÿnhja xijere kamā kuwy hpōk kwÿ ho nÿt nē ahpar mā pika hwÿr kumē nhūm ma tē nē pikap tēm nhūm pika htertēt tÿx nē kamā na katōtōk nē haxēnh nē hkrakrak.

Mē kot pifti kakōr ā mē harēnh

6 Hāmri nhūm Tirtūm kapēr o wrÿk xwÿnh pē 7 kot pifti jamÿnh xwÿnhjaja ra kot pafti kakōr mā.

7 Jakamā nhūm wamta ò pifti kakō nhūm na mē te kot jēr krā jakot pyrāk xwÿnh mē kuwy te kot mēmo kamrō kamrēk pyrāk xwÿnhhta pikap rôrōk pa. Nē nhÿhÿnh pika hkwÿ ho rax nē ho kaxār pa. Nē pōti nē akunī hkwÿ ho rax kumrēx nē ho kaxār pa. 8 Hāmri nhūm wam ām xwÿnh nhījuk ri ām xwÿnhja ò pifti kakō nhūm mēmoj te kēn krā hprēk pōk pyrā nē kaxkwa rūm ahpar mā tē nē gō xujanār nhīkjē kamā hpōk rāhā tēn mrō. Hāmri nhūm gō nhīkjē kamā gōja mēmo hkamrō hā amnhī jahkre hpa.

9 Jakamā nhūm gōx kām mēmoj htīr nē ri mrar xwÿnhjaja pikaprār pa. Nē gōx kām pār gō krāhkà hā pa xwÿnhja haxwÿja gjēx pa. Nē pār kām mē pa xwÿnhjaja haxwÿja hājē nē pikaprār pa. No nhūm gō mex kām pār kām mē pa xwÿnhjaja mē kurom arī htīr nē.

10 Tā nhūm wam ām xwÿnhhta wa hi-juk ri ām xwÿnhja ò pifti kakō. Hāmri nhūm kanhēti rax kumrēxja axta nē hpōk o ma ahpar mā tēn pikap tēm nē pyhti nē hino hkwÿ ho ohtō nē homnu hpa. 11 Kanhēti nhīxi pē

na pre “mēmoj xÿ xà” anhÿr jakamā nhūm tēm nē pyhti nē hino hkwÿ ho ohtō nē homnu pa. Nhūm prem hwÿr mra nē hkwÿ janhi nē ho ixkō nhūm ÿ nē nhūm mē ohtō nē ho ixkō nē axkaprā.

12 Hāmri nhūm hpānhā Tirtūm kapēr o wrÿk xwÿnhjê hōja ò pifti kakō. Na pre ra ho axkrunēpxi nē hkakōr tā hpānhā ra axte hō ja kakō. Hāmri nhūm mēhōja tē nē myyti kura nhūm hkwÿ ahtyk nē hirā hkēt nē. Nhūm mytwÿre nē kanhēti mā ho anē nē myyti pyrā nē hkwÿ ahtyk nē hirā hkēt nē harir. Jakamā nhūm kamāt kām hirā mex kēt nē. Nē arīgro hā myytija haxwÿja hirā mex kēt nē.

13 Hāmri pa kaxkwa kamā àanhāhti pumu nhūm kÿx pē ri htor o pa pē tanhmā kapēr to nē kapēr o:

—Hēxta waa nē. Kormā kot pifti kakōr xwÿnhjaja axkrunēpxi nē kormā hkakōr kēt nē. Koja mē tokyx hkakō nhūm pika hkōt ri mē pa xwÿnhjaja amnhī xà htÿx kamā hamak tÿx o pa. Na pa tee ri mē hkukamā ijamaxpēr nē inhmā mē hkaprī htÿx nē. Hēxta waa nē. Koja mē omnuj tÿx kumrēx. Anē.

9

1 Tā pa axte mēmoj pumu. Nhūm Tirtūm kapēr o wrÿk xwÿnhjê hō ò pifti kakō. Na prem ra ho kwat nē hkakōr tā hpānhā axte hōja ja kakō. Hāmri nhūm kanhēti hō axta nē pikap tēm kurē kumrēx nhūm mēhōja omu nē hwÿr tē nē kām mēmoj tā saf gō. Satanasti jagjēnh xà hā ahkre xupÿm o htÿx xà hā safja nhūm kanhēti mā kugō.

2 Hāmri nhūm kupy nē ahkrehtita wÿr o tē nē kahē xà mē nhūm kurūm kuwy hkūm hapōx rax nē. Nē ma kàx mā àpir o pa nē myyti hpro hpa nhūm kamāt kō rax kumrēx.

3-11 Nē kuwy hkūmja rūm mēmoj te krit pyrāk xwÿnh kwÿjaja pikap rôrōk nē kuhē. Te kot krit pyrāk tā mē hkuk te panhī hkuk pyrāk. Nē mē hkrā hkī te mēnijē hkrā hkī japjē pyrāk. Nē ôr o mē ahkà jagjē. Nē mē wa japjē htÿx

kumrêx. Te rêãwti xwa japjê pyrâk. Nê kàx o mẽ hinô hkà. Nhũm mẽ htor o hara hkoko htỳx o mra. Te ho kawar xohtô pijapu kaxyw kot mẽ hkjênh xà kamã mẽ htur nê mẽ hkjênh o hprôt nhũm hkoko htỳx pyrâk. Nê mẽ hkamnhwỳr o pa kaxyw mẽ hanhyja te kot makre janhy pyrâk. Æ kriitija kot anhỳr. Nê te nhỹhỹm oprê kaxyw nojarêt nê mẽ hkrit kawar hã hikukrêx mex rênh pyrâk. Mẽo pahija ahkre xupỳmta kamã kêp mẽ hkrãhtũm. Ijaew kapêr kãm hixi pê “Apatô.” No Gres kapêr kãm kêp “Aporiãw.” No mẽ pakapêr kãm kêp “mẽ hpar o pa xwỳnh.” Hãmri nhũm Tĩrtũm kriiti mã kapêr nê mẽ kãm:

—E kêr ka mẽ ma pika piitã hkôt te makre kot amnhĩ nhĩpêx pyrã nê ri mẽ hkôt mẽ hkamnhwỳr o apa. Æ amnhĩ nhĩpêx anhỳr o mẽ atã mytwrỳ pê sĩk. No ãm kêr ka mẽ hpar kumrêx kêt nê. Æm mẽ kot amnhĩ xà htỳx kãm hamak pix kaxyw tanhmã mẽ ho ho apa. Te makre kot mẽ hkamnhwỳr nhũm à htỳx kumrêxta pyrâk. No mẽ ate mẽ hkamnhwỳr nhũm mẽ hkamnhwỳr xãja koja à htỳx o makre kot mẽ hkamnhwỳr jakre. Nom ra mẽ kot Tĩrtũm kra hã mẽ hkagã xwỳnhjaja kêr ka mẽ omu nê ãm mẽ omu nê tanhmã mẽ ho hkêt nê. Mẽ kêp ixkwỳ na mẽ. Nê pō nê prãt ka mẽ ãm omu nê tanhmã ho hkêt nê. Æm mẽ kot panhĩ nhõkrã kagã hkêt xwỳnh pixjaja ka ã mẽ hipêx anhỳr o ri mẽ hkôt apa. Nom kêr ka mẽ hpar kêt nê. Kê mẽ tee ri amnhĩ xà hã maj kãm tokyx htyk nê hapêx prãm hkaprỳ ho pa. E ma mẽ hwỳr mra nê ã mẽ hipêx anhỳr o ri apa. Anê.

Hãmri nhũm mẽ kuma nê ma mẽ hwỳr mra.

¹² Na ra pika hkôt wam mẽ homnu xà pyxi nê hapêx. No ãm arĩ hamêxkrut.

¹³ Jakamã nhũm Tĩrtũm kapêr o wrỳk xwỳnhjê hõja axte õ pifti kakô. Na prem ra ho sĩk nê hkakôr tã axte hkôt hõja hkakô. Nhũm Tĩrtũm kutã ôr o mẽsti rũm mẽhõja tanhmã kapêr to.

Mêsti janhà rũm kapêr. ¹⁴ Pifti kakôr xwỳnhhta mã kapêr nê kãm:

—E na ra mẽ kot mẽ hkwỳjê nhĩmex ã arĩgrota kato. Jakamã kêr ka ma pyhti pê Erax wỳr wrỳ nê gô mỳ ri Satanasti mã mẽ àpênh xwỳnh pê kwatja pumu. Na prem ra mẽ hpa hpre nhũm mẽ gô mỳr ri arĩ hkrĩ ho hkrĩ. Ka mẽ omu nê mẽ kãm mẽ hpa hpre xà hpôt pa kê mẽ ma mẽ hkôt ri mẽ hpar o pa. Anê.

¹⁵ Na pre ra Tĩrtũm mẽ kot mẽ hkwỳjê nhĩmex o pa kaxyw mẽ kurê nê gô mỳ ri mẽ unhwỳ nhũm mẽ kormã mẽ hpar xà hã arĩgro jamãr o hkrĩ. Jakamã nhũm ã pifti kakôr xwỳnhhta mã mẽ harênh anê nhũm kuma nê ma tẽ nê mẽ hwỳr wrỳ nê mẽ kãm mẽ hpa hpre xà hpôt pa. Hãmri nhũm mẽ ma pika piitã hkôt ri mẽ hpar o mẽ hkôt pa. Nê mẽ ho ohtô rax kumrêx nê mẽ himex. ¹⁶ Nê ma amnhĩ kôt pōristi ho ohtô rax nê o pa. Piitã kawar ã hkrĩ nê mẽ hkôt hprôt nê hkoko ho mra. Mẽ kêp 200.000.000 hã mẽ harê pa mẽ harênh ma. Mẽ ohtô rax o mẽ ohtô rax.

¹⁷ Na pa pre arĩ te ixpimtir kãm mẽ omunh pyrâk. Nhũm kawar ã mẽ hkrĩ xwỳnhjaja. Mẽ hinô kãja axtem kàx o. Nê hkamrêkja te kuwy hpôk kamrêk pyrâk. Nê rãrãrja te mẽ hkurôt kane xà pê êsôf rãrãr pyrâk. Nê kakrã htyk. Æ kàx o mẽ hinô hkà kot anhỳr. Nê mẽ hkrit kawarti hkrãja te rêãwti krã pyrâk. Nê mẽ hakwa rũm kuwy hpôk mẽ êsôfti mẽ kuwy hkũm axpên kôt hapôx o pa. ¹⁸⁻¹⁹ Nê kawarti jamy axtem te kêp kagã xoprê hkrã pyrâk nhũm mẽ hamy ho mẽ hkamnhar o mẽ kupa. Nê mẽ hakwa rũm kuwy hkũm mẽ kuwy hpôk mẽ êsôfti hapôx xwỳnhhta mã mẽ ho anê nê. Jakamã nhũm kawartijaja mẽ hkôt ri hamy mẽ hakwa ho mẽ hpar o pa nê mẽ ohtô rax kumrêx nê mẽ himex.

²⁰⁻²¹ Tã nom nhũm arĩ mẽ htĩr nê ri mẽ pa xwỳnhjaja. Mẽ kot mẽ hkwỳjê hpar kêt xwỳnhjaja hãmri ja hã mẽ omunh tã arĩ amnhĩ tomnuj o pa nê kãm urer kêt nê. Arĩ tanhmã amnhĩ tomnuj to ho pa. Axpên pê hprô nê

mjên o amnhĩkati nê axpên pê ahkĩ. Nê axpên par o ri pa nê tanhmã axpên xy hto ho pa. ã htỳx ri amnhĩ nhĩpêx anhỹr o pa nê kãm urer kêt nê. ãm Satanasti hkôt pix mã ri amnhĩ nhĩpêx o pa. Nê amnhĩm sãnti hkwy nhĩpêx. Pĩ ho hipêx nê kàx o hipêx nê kên o hipêx. Nê hipêx pa nê amnhĩ to hwỳr o pa. Nom mo kot mẽ mar kaxyw sãnti jamak kre? Nê kot mẽ omunh kaxyw mo no? Nê ri mrar nê mẽ ho utàr kaxyw mo hte? Na htem arĩ ã amnhĩ to hwỳr kaprỳ anhỹr o pa.

10

Kagà kaxkep grire jarênh

¹ Tã pa arĩ mẽmoj pumu. Nhũm axte Tĩrtũm kapêr o wrỳk xwỳnh xihỳxjê hõja pika hwỳr wrỳk o tẽ. Nê êja kakrã ho na pre. Nê hkrã mỳ ri màxwỳxti ajêt. Nê hkuk te myt no kamã hirã htỳx pyrãk. Nê akutã hte kamã te kuwy hpòk pyrãk. ² Nê ìhkra kamã kagà kaxkep grire ra pipôt nhũm ma o tẽ nê o wrỳ nê o xa. Nê gô xujanãr kãm upòk rũm hte xãm nê kỳx pê amgrà kamã apke rũm hte xãm nê o xa pa ixprĩ hã omu.

³ Hãmri nhũm kàx pêt amỹra. Te rêãw hkàr tỳx pyrãk. Nhũm hpãnhã kaxkwa kamã mẽhõja kãm kapêr. Te na katõtòk o 7 wês pyrãk pa ixprĩ hã tanhmã kapêr to hã kuma. ⁴ Hãmri nê ra mẽ amã ã kagà kaxyw nhũm mẽ ja nê inhmã kapêr nê inhmã:

—Kwa nà kwarĩ ja kot kaj hã kagà hkêt nê. ãm ja pix kot kaj akwỳjê mã hã kagà hkêt nê. ãm kapxipix mãn ama nê ri hã apa.

Anhỹr jakamã pa mẽ amã hã kagà hkêt nê. ãm papxipix kuma nê ri hã ixpa.

⁵ Tã nhũm Tĩrtũm kapêr o wrỳk xwỳnh kot gô xujanãr kãm upòk rũm hte xãm nê apke amgrà kamã ãm xwỳnhta hãmri Tĩrtũm nhỹ hã kapêr kaxyw nê kànhmã ìhkra pẽ. ⁶⁻⁷ Tĩrtũm pẽ kaxkwa nê pika nê gô xujanãr o kator nê kamã kot mẽmoj piitã ho kator xwỳnhja. Nê htĩr rãhã nê pa

ho pa xwỳnhja. Nhũm ÿ hã kapêr nê kapêr o:

—E hãmri. Amnepê mã na pre Tĩrtũm ÿ hã mẽ kãm kapêr o ri mẽ pa xwỳnhjê mã tanhmã amnhĩ kukamã amnhĩ jarênh to. Tanhmã kot pika piitã hkôt mẽ pa xwỳnhjê nhĩpêx to hã amnhĩ jarê. Nê mẽmo arĩgro hã mẽ kot amnhĩ tomnuj mỳrapê tanhmã kot mẽ hipêx to hã mẽ hkukamã mẽ hã amnhĩ jarê. Tã ra ã mẽ hipêx anhỹr xà hã arĩgro kato. Jakamã koja kapêr o wrỳk xwỳnh kot hitepta ò pifti kakò hãmri nhũm mẽmojja ã amnhĩ nhĩpêx anhỹr kurê kumrêx. ãm hãmri na pa mẽ amã ja jarê. Anẽ.

⁸ Pa mar o ixãm rôm nhũm wam inhmã kapêr xwỳnhta axte inhmã kapêr nê inhmã:

—E ma pika hwỳr wrỳ nê gô xujanãr kãm upòk rũm hte xãm nê amgrà kamã apke rũm hte xãm xwỳnhta wỳr tẽ nê kèp kagà kaxkep grire pipôt xwỳnhta py. Anẽ.

⁹ Hãmri pa kuma nê ma hwỳr wrỳ nê hã kuwỳ nhũm inhmã kugò nê inhmã:

—E mĩ. Apy nê akrẽ. ànhre. Te kot menh xành pyrãk. Nom kot kaj akrẽ nê anhõhy xà. Nom mãmrĩ apy nê akrẽ. E mĩ. Anẽ.

¹⁰ Hãmri pa kèp kupy nê hkaki nhũm ànhre. Pa hkrêr pa hãmri nê inhõhy xà kurê kumrêx.

¹¹ Hãmri nhũm kot inhmã òr xwỳnhta inhmã:

—Nà ãm hãmri na ka apy nê akrẽ. Jakamã kèr ka ano ho ate mẽmoj piitã omunh xwỳnhja nê ajamak o ate mẽmoj mar xwỳnhja nê ate tanhmã Tĩrtũm kapêr mar toja ka piitã hã kagà hpa. Hãmri nê ate omunh xà hkôt akwỳjê mã piitã harênh o apa. Mẽ kot nhỹrmã Tĩrtũm kot tanhmã mẽ piitã mẽ hipêx to hã harênh mar kaxyw. Ahpỹnhã ri pika piitã hkôt mẽ urojê piitã koja nhỹrmã ã mẽ hipêx anẽ. Ahpỹnhã ri mẽ kapêr xwỳnh piitã. Nê mẽ ò pahijaja. ãm mẽ piitã koja nhỹrmã ã mẽ hipêx anẽ. Anẽ.

11

Tirtūm nhỹ hã kapēr xwýnh pijakrut wa harēnh

¹ Tã nhũm mēhōj inhmã mēmoj to mīdi xà hã pī ryre gō nē inhmã:

—E ja py nē Jerujarē hwýr wrý nē kamã Tirtūm mã amnhĩ jarēnh xà hã ixkreja o mīdi. Nē ixkre kamã amnepēm mē kot amnhĩ tomnuj pãnhã Tirtūm mã ôwēhti nhōr xà hã mēstita mã ho anē nē ho mīdi. Nē ixkre kamã mē kot Tirtūm mã amnhĩ jarēnh o mē hkrĩ xwýnhjaja ka aprĩ hã mē ho kōta.

² —No ixkre kapem pikaja ka ho mīdi hkēt nē. Ra Tirtūm kot mē kot amnhĩ tomnuj xwýnhjē mã hkaga jakamã koja mē htýx ri kãm hprãm xà hkôt tanhmã homnu hto ho pa. Nē Jerujarē piitã hkôt ri homnu ho paja ã hã amgrà axkrunēpxi nē hkôt mytwrý kēp 6.

³ —Koja Tirtūm ma ŷ hã kapēr xwýnh ho hamēxkrut nē mē hwýr wa kumē nhũm wa ma mē hwýr wrý nē mē kãm Tirtūm kapēr jarēnh o ri mē hkôt pa. Hãmri nē tee ri mē kot tanhmã amnhĩ tomnuj to hã mē omu nē hkaprĩ nē. Hãmri nē wa hkaprĩ xàj xak punure kaxô nē haxà nē mē kãm Tirtūm kapēr jarēnh o ri wa pa hã amgrà axkrunēpxi nē hkôt mytwrý kēp 6. Jakamã e. Pija py nē ma mē hwýr wrý nē ixkreta o mīdi. Anē.

⁴ Wa pijakrut wa kot Tirtūm nhỹ hã kapēr jarēnh o wa pa xwýnhhta wa. Na htem wa kot amnhĩ nhĩpēx ã wa harēnh ma nē mēmo pī hpàr pē oriwēhti kot tanhmã amnhĩ nhĩpēx toja mã hamaxpēr kurē kumrēx. Nē amnepēm Tirtūm nhỹ hã kapēr o pa xwýnh pē Jakaris kot kanē hpôk xãmta mã mãânēn hamaxpēr. Oriwēhti xôja htwým rax kumrēx nhũm htem htwým opôj nē ho kanē ho nyt nē hpôk nē kýx pē unhwý nhũm mē piitã hirã kamã rīt mex o ri mra. Nē kanē hpôk mexja te kot Tirtūm kapēr pyræk. Nē kanē xãm xàja te kot Tirtūm nhỹ hã kapēr jarēnh o wa pa xwýnhhta wa uræk. Nē oriwēhtija haxwýja te kot wa uræk. Ra Tirtūm Karō kot wa hkarō mã àr jakamã

na hte wa hprĩ hã mē kãm Tirtūm kapēr jarēnh o pa nhũm mē kot mar xwýnhjaja te kanē nhĩrã kamã ri rīt mex nē ri pa pyrà nē hprĩ hã mar týx nē.

⁵ Tã koja mēhō tanhmã wa hipēx to kaxyw wa hwýr tē nhũm wa hakwa rŭm kuwy hpôk kato nē kot tanhmã wa ho mã xwýnhhta o hxêt o kupĩ.

⁶ Nē koja wa Tirtūm xàhpumunh týx xà ho tanhmã ri mē hã mēmoj nhĩpēx to pē mē kãm kapēr jarēnh o ri mē hkôt pa. Jao tanhmã na hto nhũm mē hã wrýk kêt ry nē. Rý tanhmã mē kēp gō hto nhũm mē hkamrô hã mē kēp amnhĩ jahkre. Koja wa ã Tirtūm nhỹ hã mē kēp mēmoj nhĩpēx anhýr ho wa pa. Nē xatã wa kãm hprãm xà hkôt tanhmã mēmoj tomnu hto. ⁷ Nē mē kãm kapēr o pa pē ã mē hipēx anhýr o wa hã amgrà axkrunēpxi nē hkôt mytwrý kēp 6 nē rĩ kormã ho hapēx. Hãmri nhũm ahkre xupým rŭm Satanasti nhō kôwenatôja kato nē ma wa hwýr tē nē nhỹri pry kahti ri wa unē nē wa kupĩ nhũm wa pry kamã ty nē nō. ⁸ Hãmri nhũm mē wa haxàr kêt nē nhũm wa arĩ pry kamã nō. Krĩ kapem na prem pī kahpa hã Jejus nhô nē kupĩ. Krĩ nhô xwýnhjaja mē kot amnhĩ tomnuj týx xwýnh na mē. Te ho amnepēm krĩ pē Sotō mē pika pē Ejit kamã mē kot amnhĩ tomnuj xwýnhjē kot amnhĩ nhĩpēx pyræk. ⁹ Jakamã nhũm mē kot wa haxàr nē axpēn kurē nhũm wa pry kamã arĩ ty nē nō nhũm mē piitã wa hwýr mra nē wa omu. Nē ahpýnhã krĩ piitã hkôt mē pa xwýnhjaja tanhmã amnhĩ to nē ja hã wa omu. Ahpýnhã ri pika piitã hkôt mē urojaja. Nē ahpýnhã ri mē kapēr xwýnh piitã. Hãmri arĩ ahpýnhã mē ò krĩ kamã pa htã tanhmã amnhĩ to nē wa htyk ã wa omunh ã hã apkati axkrunēpxi nē hkôt hã myt apha. ¹⁰ Koja mē wa htyk ã wa omu hãmri nē hkĩnh nē. Nē hkĩnh xàj axpēn mã hkĩnh xà nhōr o pa. Wa kot kormã htĩr ri tanhmã mē homnuj to ho ri mē hkôt paja mã hamaxpēr nē wa htyk ã wa omu nē hkĩnh týx nē.

11 Tã koja wa htyk ã apkati axkrunêpxi nê hkôt hã myt apha hãmri nhũm Tirtũm wa kamã htyxà rê nê akupỹm wa ho wa htĩr nhũm wa kãhmã xa nê ri mra. Hãmri nhũm mē kot wa omunh xwỹnhjaja tee ri hã wa omu nê kãm wa uma htỹx kumrêx. Æm kãm wa uma ho kãm wa uma.

12 Hãmri nhũm kaxkwa kamã mēhõja wa kãm kapêr nê wa kãm:

—E war amnê mē ixwỹr war api. Anê.

Hãmri nhũm wa kuma nê ma kakrã kamã àpir o mō. Nhũm mē kãm wa hkurê xwỹnhjaja tee ri wa àpir ã wa omu.

13 Hãmri nhũm pika htertet tỹx nê. Nê krĩ kamã ixkre ohtô nê grãnh pa nê mē hkwỹ nhĩmex rax nê nhũm mē ohtô rax kumrêx nê axkaprã. Mē kêp 7.000 nê pikaprãr pa. Hãmri nhũm arĩ mē htĩr nê ri mē pa xwỹnhjaja tee ri mē omu nê kãm ma xaj htertet tỹx nê axpên mã:

—Kwa Tirtũm mãn ã mē panhĩpêx anê. Hihtỹx o hihtỹx jakamã kaxkwa rũm ã mē panhĩpêx anê pu mē pahpitiã pano ho ixkre pigrãnh ã omu. Anê.

14 E na ra amnhĩ xà htỹx kamã hamak xàja hamêxkrut nê hapêx. Tã no ãm arĩ mē kaxyw pyxi nê arĩk.

Mē kot pifti kot hitep kakôr ã harênh

Apokarip 4.8, 5.9-14, 7.9-12, 14.2-5, 15.3-4, 19.1-2

15 Tã nhũm Tirtũm kapêr o wrỹk xwỹnh kot hitepja õ pifti kakô nhũm kaxkwa kamã mē pa xwỹnhjaja kax pē kapêr o:

E ãm hãmri. Na ra Mēpahpãm Maati mē Jesus Krisja wa kêp krĩ piitã hkôt mē piitã mē õ Pahihtĩ na wa.

Koja Mēpahpãm Maatija kêp Pahi Maati rãhã nê pa ho pa xwỹnh. Anê.

16 Hãmri nhũm mē àptàr tũm pē 24jaja. Tirtũm kot mē pahto amnhĩptàr o hkrĩ xà mã hipòk nê mē hkrĩ xwỹnhjaja. Hãmri ã mē kapêr anhỹrja ma nê Tirtũm ã hpijaàm kaxyw hpar pē rôròk pa nê htũ myr pē hikwỹ. Hãmri nê kãm mex o mex ã harê nê kãm:

17 Pa Pahi Maati Tirtũm. Nà ãm hãmri mē ixrom axàhpumunh o axàhpumunh nê axihtỹx o axihtỹx.

Amnepê mã kormã mēmoj kêt ri na ka pre arãhã apa ho apa.

Tã arĩ arãhã apa ho apa.

Æm hãmri apê mē ixpiitã mē ixto amnhĩptàr xwỹnh. Nà ãm hãmri amex o amex.

18 Kot kaj tokyx mē piitã tanhmã mē kot amnhĩ nhĩpêx to ho pa hã mē omunh xà hkôt tanhmã mē harênh to.

Nê ra mē htyk xwỹnhjaja kot kaj mē piitã akupỹm mē ho mē htĩr pa nhũm mē pika rũm hapôx pa nê ma mra nê arĩ mē htĩr xwỹnhjê nhĩhkô hã akutã hkrĩ pa.

Ka mē piitã mē omu nê tanhmã mē kot amnhĩ nhĩpêx to ho pa hã mē omunh hkôt tanhmã mē harênh to.

Mē kot amnhĩ tomnuj xwỹnhjaja kot kaj ma mē kot amnhĩ xà htỹx kamã hamak o pa htũm xà hwỹr amnhĩ nê mē arê nhũm mē ma hwỹr hapêx. Hãmri nê tee ri amnhĩ kukamã hamaxpêr nê gryk tỹx kumrêx.

Ka hpãnhã mē kot akôt amnhĩ xunhwỹr nê akapêr kôt amnhĩ nhĩpêx o mē pa xwỹnh piitã mē omu nê tanhmã mē ho mex to.

Mē kot amnhĩ to rũnh xwỹnhjaja nê mē kot amnhĩ to hkryre xwỹnhjaja.

Nê amnepêm mē kot anhỹ hã mē kapêr o mē pa xwỹnhjaja.

Akrajê piitã kot atã hpijaàm xwỹnhjaja kot kaj kormã mē htĩr ri tanhmã amnhĩ to mex hã mē omunh xà hkôt tanhmã mē ho mex to.

Æ kot kaj tokyx mē piitã ahpỹnhã mē omunh xà hkôt mē hipêx anê. Anê.

19 Hãmri nhũm kaxkwa kamã Tirtũm nhõrkwỹ hã hakwakre kahê xà amnhĩ mē pa kamã ôr o mēs kunĩhtita pumu. Pu nhũm na hkatõtòk nê haxênh nê hkrakrak nê na mē te kot jêr krã hakotre pyrãk xwỹnhja pikap rôròk

rax nê. Nê pika htertet tÿx o htertet tÿx pa arĩ omunh o xa.

12

Mêhõ ni mẽ kagãmnuti wa harênh

¹ Tã pa axte mẽmoj pumu. Kaxkwa kamã aa mẽ pahte mẽmoj pumunh kêt xwÿnhja pa omu. Nhũm mẽhõ nija xê te myt no mã hirã htÿx pyrãk. Nê hpar nhõkwa kamã mytwrÿre ajêt. Nê kanhêti ho 12 o mẽ ahkã tu nê o xa.

² Na ra htujarõ nê hpijagri kaxyw õhy xã nê amnhĩ kamnhêr o xa.

³ Tã pa axte mẽmoj pumu. Aa mẽ pahte mẽmoj ã kot anhÿr pumunh kêt xwÿnh õja pa omu. Kagãmnuti nom ãm axtem hkã kamrêk tÿx kumrêx. Nê rax kumrêx. Nê hkrã kêp 7. Nê hkrã piitã kamã õr o pahi hã mẽ ahkã htu nê o nõ. Nê hkrã kamã pãr kêp 10.

⁴ Tã nhũm hamy ho apêr o kaxkwa kamã kanhêti ho ohtõ nê pikap kurê. Hãmri nê õhy xã nê amnhĩ kamnhêr o ãm xwÿnhhta wÿr tẽ nê hkra kator nhũm kot kêp krêr kaxyw kutã hamãr o nõ.

⁵ Hãmri nhũm hkra kato nê myre. Hihtÿx o hihtÿx ã kot pika piitã hkõt mẽ piitã mẽ ho amnhĩptãr mã xwÿnh na pre. Nhũm kagãmnutija kot kêp utãr nê hkrêr mã tã nhũm Tĩrtũm kapêr o wrÿk xwÿnhjê hõja hwÿr wrÿ nê kêp kumÿ nê ma Tĩrtũm wÿr kaxkwa kamã kot mẽ pahto amnhĩptãr ã hkrĩ xã maatija wÿr ho api.

⁶ Hãmri nhũm kagãmnuti tee ri ma kot kêp o mõi ã omu nê hpãnhã nita o apkjê nê kot tanhmã ho kaxyw nhũm amnhĩ tã omu nê umaj hprõt nê ma tẽ nê nhÿri kapõt ã amũxu. Ra Tĩrtũm kot hkukamã kãm hpimxur xã nhĩpêx xã hwÿr hprõt nê ma tẽ nê kamã kêp amũxu. Nhũm Tĩrtũmja nê kagã pumunh mex nhũm kêp hpimxur mex ã amgrã axkrunêpxi nê hkõt hã mytwrÿr kêp 6.

Mê kot kaxkwa kamã mẽkarõmnuti kurê kaxãr ã mẽ harênh

⁷ Tã nhũm mẽ ra kaxkwa kamã kurê kaxãr kaxyw. Kagãmnuti mẽ hkwyjaja nhũm mẽ ra Tĩrtũm kurê

kaxãr kaxyw kutã amnhĩ xunhwÿ. Jakamã nhũm Tĩrtũm kapêr o mẽ wrÿk xwÿnhjê hkrãhtũm Mikewja ma mẽ hwÿr amnhĩ kõt hkwyjê o mra nê mẽ pijapu ho kuhê.

⁸ Hãmri nhũm kagãmnuti tee mẽ kutã amnhĩ to htÿx kaprÿ nhũm Tĩrtũm kapêr o mẽ wrÿk xwÿnhjaja amnhĩ nê mẽ ho axtem nê kaxkwa rũm mẽ kator o mẽ kator.

⁹ Satanasti pê kagãmnutita kagã kot ni kator ewa mã hêx xwÿnh na pre. Nê hêx rom tanhmã hêx to ho pa xwÿnh. Jakamã nhũm Mikew mẽ hkwyjaja hkwyjê mẽ mẽ ho hpimrãatã amnhĩ nê pikap mẽ rênh pa.

¹⁰ Hãmri nhũm kaxkwa kamã mẽhõja axte kãxpê kapêr nê kapêr o: E ãm hãmri. Na ra Tĩrtũm hihtÿx o hihtÿx o mẽ panê mẽmoj punuj piitã ho hapêx par kumrêx.

Na pre hte Satanasti pê mẽkarõmnutija xatã hwÿr mra nê kãm tanhmã Jejus kwÿjê ho kapêr punuj to ho pa.

Tã koja axte mẽ ho kapêr kêt kumrêx. Ra Tĩrtũm kot amnhĩ nê kator o kator nhũm ra ma mõi o mõi kênã.

Koja Tĩrtũm pika piitã hkõt mẽ ho amnhĩptãr xwÿnhjê japõx pa nê hpãnhã mẽ kaxyw Kra Krisja xãm nhũm pika piitã hkõt mẽ ho amnhĩptãr rãhã ho pa.

Nã ãm hãmri. Ja mex o mex.

¹¹ Na pre Jejus kõt mẽ pahtõ nê mẽ pahtõxjaja mẽkarõmnuti kutã amnhĩ to htÿx nê pa. No ãm amnhĩ nhÿ hã ã kutã amnhĩ nhĩpêx anhÿr kêt.

Mê pahte amnhĩ tomnuj pãnhã amnhĩrer xwÿnhhta na pre ty nê hkamrõ ho mẽ kuhõ nê mẽ nê mẽ kot amnhĩ tomnuj o hapêx.

Jakamã nhũm prem kukwak ri Satanasti kutã amnhĩ to htÿx rãhã pa.

Nhũm mẽ kot Jejus ã mẽ himex par kaxyw tã nhũm mẽ kãm htyk pyma hkêt nê. ãm Jejus kõt arĩ amnhĩ to htÿx nê mẽ hkõt pa rãhã nê.

Jao arī mẽ kām Jejus kot mẽ panê tanhmã amnhĩ nhĩpêx to hã harênh o ri mẽ hkôt pa.

12 Tã Tĩrtũm ra kot mẽ panê mẽmoj punuj o hapêx par jakamã kwa kaxkwa kamã mẽ apa xwỳnhjaja kêr ka mẽ akĩnh nê apa.

Nom gô xujanãr kãm nê pika kamã mẽ pa xwỳnhjaja hêxta waa nê. Kojã mẽ mex kêt nê.

Nê ra Mikew mẽ hkwyjaja kot amnhĩ nê kaxkwa rũm mẽkarõmnuti mẽ hkwyjê kator nê pikap mẽ rênh par jakamã nhũm Satanastija gryk tỳx kumrêx.

Tĩrtũm kot ma mẽ kot amnhĩ xà htỳx kamã hamak o pa tũm xàta wỳr mênh xà hã arĩgro hwỳr amgrà grêre nhũm tee ri amnhĩ kukamã hamaxpêr nê gryk tỳx o gryk tỳx. Anê.

13 Hãmri nhũm kagãmnutija mẽ kot amnhĩ nê kaxkwa rũm kator ã amnhĩ pumu nê gryk tỳx nê. Nê gryk xà ma akupỹm ni kot hkra myre ho pijagri xwỳnhhta wỳr tẽ nê tanhmã ho kaxyw hkôt ho krihkrit.

14-16 Hãmri nhũm Tĩrtũm kapêr o mẽ wrỳk xwỳnhjê hõja omu nê nija mã àanhàhti jara gõ. Kot kagãmnuti pẽ ho htor nê ma nhỹri hpimxur xà wỳr htêm kaxyw. Nê kormã htor kaxyw nhũm kagãmnuti omu nê kot gô ho hanhir kaxyw hkôt hakwa rũm gô kapĩ nhũm hpikapĩr rax kumrêx. Te pyhti hprõt tỳx pyræk. Hãmri nhũm Tĩrtũm omu nê nija nê tanhmã pika hto nhũm kãm axkjê nhũm gô hprõt nê kamã pikapĩr pa. Jakamã nhũm mex pẽ àanhàhti jara ho to nê ma kapôt ã pimxur xà hwỳr ma tẽ. Nê kamã pa hã amgrà axkrunẽpxi nê hkôt mytwrỳ kệp 6 nhũm prem hamãr mex rãhã ho pa.

17 Hãmri nhũm kagãmnuti tee ri kãm hpĩr prãm kaprỳ nê gryk tỳx kumrêx. Hãmri nê ma ni hkwyjê hwỳr mõi. Mẽ kot Tĩrtũm mẽ Jejus wa hkôt amnhĩ nhĩpêx o mẽ pa xwỳnhjê hwỳr tanhmã mẽ homnuj to kaxyw ma mẽ

hwỳr mõi. Hãmri nê tanhmã kot mẽ ho kaxyw gô xujanãr mỳ ri nõi.

13

Satanasti nhõ kôwenatô wa kot gô xujanãr rũm kator ã wa harênh

Sikũn Tesarõn 2.3-5

1 Tã pa axte mẽmoj pumu. Nhũm gô xujanãr rũm Satanasti nhõ kôwenatõjê hõja te mrymnuti pyrã nê àpir o mõi. Kagãmnuti pyrã nê hkrã kệp 7. Nê uræk nê hpàr kệp 10. Nê hpàr piitã kamã pahi hã mẽ ahkã. Nê ahkã piitã hã axtem tanhmã Tĩrtũm o kapêr punuj to nê tanhmã haprỳ hto hã kagãja hikwỹ.

2 Nê hkã te kệp ropkrorti kà pyræk. Nê hakwa te kot rêãwti jakwa pyræk. Nê ìhkra te kot pàati nhĩhkra pyræk. Jakamã na pre kagãmnuti nhỹ hã hihtỳx o kệp pahi hã pika nhõ xwỳnhjê ho amnhĩptàr o pa.

3 Nê hkrã hõ te mẽ kot hayr o hpĩr nhũm ra akupỹm htĩr nê arĩ hayr xà wakre rã nyw pyræk. Jakamã nhũm pika kamã mẽ pa xwỳnhjaja amnhĩ jaêr pẽ omu nê kamã no pyma nê. Hãmri nê hkôt amnhĩ nhĩpêx o pa.

4 Hãmri nê kagãmnuti kot tanhmã mrymnuti ho nhũm ÿ hã mẽ ho amnhĩptàr jakamã nhũm mẽ piitã hamẽ wa hã hpijaàm kaxyw wa kãm wa mex o wa mex ã wa harênh o pa. Nê mrymnuti hã axpẽn mã:

—Hêxta waa nê. Mẽ pahtõ na mẽ pahte mrymnutita pyrã nê ã mẽ pahte amnhĩ nhĩpêx kot anhỹr? Mẽ pahtõ kot pu kutã xa nê paxihtỳx o hkurê kapa? Nà amrakati kumrêx. Anê.

5-6 Hãmri nhũm Satanasti tanhmã mrymnuti ho nhũm kapêr o ri mẽ hkôt pa nê mẽ ho amnhĩptàr o hã amgrà axkrunẽpxi nê hkôt mytwrỳ kệp 6. No ãm axtem nê Tĩrtũm o kapêr punuj o ri mẽ hkôt pa. Nê ri tanhmã haprỳ hto nê õ krĩja mex kêt ã harênh o ri mẽ hkôt pa.

7 Hãmri nhũm Satanasti ra kot mẽ hkurê kaxàr kaxyw kãm anê nhũm axtem nê Tĩrtũm pẽ hkrajê kutã amnhĩ xãm nê mẽ hwỳr hprõt

ně tanhmã hpijapu hto ho pa nẽ mẽ ho axtem nẽ mẽ ho krihkrit pa nẽ ahpÿnhã ri pika piitã hkôt mẽ uro hkwyjê ho amnhĩptâr o pa. Nẽ ahpÿnhã mẽ kapër xwÿnh piitã mẽ ho amnhĩptã.

⁸ Jakamã nhũm mẽ ohtô rax kumrêx nẽ mrymnuti hkôt amnhĩ nhĩpêx. Nẽ kutã hkôn krã ho rôrôk nẽ hkrĩ nẽ kãm mex o mex ã harê. No ãm mẽ piitã hkêt. Kot mẽ pahte amnhĩ tomnuj pãnhã amnhĩrer xwÿnh kôt ra mẽ kot amnhĩ xunhwÿr xwÿnhjaja tapxipixjaja na prem hkôt amnhĩ xunhwÿr kêt nẽ. Amnepê mã kormã amrakati ri Tirtũm mẽ Jesus wa õ kagã kamã mẽ htĩr tũm nẽ mẽ pa mã xwÿnh nhĩxi xwÿnh pixjaja na prem mrymnuti pumu nẽ hkwyjê rom hprĩ hã kot amnhĩ nhĩpêx ã omunh kurê kumrêx nẽ hkôt amnhĩ nhĩpêx kêt nẽ.

⁹ E ka mẽ atõ axumar kaxyw ajamak kre hã kot kaj ixujarênh piitã ama nẽ kãm ajamxpêr tÿx rãhã ho apa.

¹⁰ Jakamã kwa Tirtũm kôt ixkwÿjaja. Kwãr mẽ mãmrĩ mẽ apyné nẽ mẽ ajagjê.

Nẽ kwãr mẽ mãmrĩ wapo ho mẽ ajayr o mẽ apa.

Nom kêr ka mẽ umaj ixkaga hkêt nẽ. Ixkaga hkêt o ixkaga hkêt.

Mẽ ãm ixkôt pix mã amnhĩ nhĩpêx o ri apa rãhã ty.

Pika rũm mrymnuti hõ kator ã harênh

Makre 13.22

¹¹ Tã pa mrymnuti hõ pumu. Nom wamta pyrã nẽ gô xujanãr rũm kator kêt axtem pika rũm kato. Nẽ ôwêhti hkrare pyrã nẽ hpãr pijakrutre. Nẽ te ho kagãmnuti kapër tÿx pyrã nẽ kapër tÿx kumrêx o pa.

¹² Gô xujanãr rũm mrymnuti xãpir xwÿnhhta nhÿ hã pika nhõ xwÿnhjê mã kapër tÿx nẽ mẽ kãm:

—E pika piitã hkôt mẽ apa xwÿnhjaja mẽ inhma. Kêr ka mẽ kot hkrã hõ jayr o hpĩr nhũm akupÿm htĩr xwÿnhhta kôt pix mã amnhĩ nhĩpêx rãhã ho ri apa. Nẽ kãm mex o mex ã harênh rãhã nẽ.

Anhÿr o mẽ kãm kapër. ¹³ Hãmri nẽ Satanasti nhÿ hã mẽ kãm aa mẽ kot mẽmoj pumunh kêt kwÿ ho anhÿr o pa. Jao kaxkwa rũm tanhmã mẽ kãm kuwy ho wrÿk to nhũm pikap rôrôk nhũm mẽ amnhĩ jaêr pê omu nẽ kamã no puma nẽ. ¹⁴ ã ri mẽ noo mã mẽ kãm amnhĩ nhĩpêx anhÿr o ri mẽ hkôt pa. Gô xujanãr rũm mrymnutija noo mã ã hêx rom amnhĩ nhĩpêx anhÿr o mẽ no kupyro pa nhũm mẽ omu nẽ hkôt amnhĩ nhĩpêx. Hãmri nhũm mẽ kãm mẽmoj tã karõ nẽ mẽ kãm:

—E wam mrymnutita. Mẽ kot hkrã hõ jayr o hpĩr nhũm akupÿm htĩr xwÿnhhta kêr ka mẽ kãm hkarõ nhĩpêx nẽ ho mẽ anhõ sãnti. Kê mẽ piitã hwÿr mra nẽ kutã hkôn krã ho rôrôk nẽ hkrĩ nẽ amnhĩ to kuwy nẽ kãm mex o mex ã harê.

Anhÿr o mẽ kãm hã karõ. ¹⁵ Hãmri nhũm mẽ kuma nẽ mar xã hkôt hipêx nẽ ãm nhũm xa. Hãmri nhũm mrymnuti kot hitepta omu nẽ hwÿr tẽ nẽ tanhmã ho nhũm ra kapër nẽ mẽ kãm:

—E kêr ka mẽ kot inhmex ã ijarênh kêt xwÿnhjê pyné nẽ mẽ himex pa. Anê.

¹⁶ Hãmri nhũm pika rũm mrymnuti kator xwÿnhhta haxwÿja mẽ kãm kapër nẽ mẽ kãm:

—E koja ixkwÿjaja inhÿ hã mẽ apitã mẽ apê ixkwÿ hã mẽ akagã. Mẽ ate amnhĩ to rũnh xwÿnhjaja nẽ mẽ ate amnhĩ to hkryre xwÿnhjaja. Nẽ amarĩ mẽ kãm mẽ axãpênh xwÿnhjaja nẽ amnhĩ mã mẽ axãpênh xwÿnhjaja. Nẽ mẽ akãxpore rũnh xwÿnhjaja nẽ mẽ apê amrakati xwÿnhjaja. Kojã mẽ apiitã mẽ akagã hpa. Mẽ akwÿ nhõkrã kagã nẽ mẽ akwÿ xupôk rũm mẽ anhĩkra katut kagã.

¹⁷ —Gô xujanãr rũm mrymnutita nhĩxi kot paj mẽ atã hipêx. Rÿ hixi hã nũm nhĩpêx. Hãmri ka mẽ axãpkur xã japrôr kaxyw nhÿhÿm mra nhũm mẽ atã hixita pumu nẽ rĩ kormã mẽ amã mẽmoj kwÿ ho wênê ka mẽ amnhĩm haprô nẽ ho axãpkur o ri apa. Nẽ mẽ ate mẽmoj to wênê xwÿnhjaja koja mẽ apê mẽmoj japrôr kaxyw mẽ awÿr mra ka mẽ tee ri nhÿhÿnh mẽ hã hixi

javêr hãmri nê mê kãm mêmoj to wênê hkêt nê. Âm nhỹhỹnh mê atã hixi hã kagàta pumunh pix kukwak ri kot kaj mê awjaprô rý mêmoj to wênê. Anê.

¹⁸ E kwa kêr ka mê ixte mêmoj pumunh nê mê amã hã kagàta pumu nê ama nê kãm ajamaxpêr tỳx o apa. Mrymnutita nhĩxi na kêp nũm. Nũmja kêp 666. E kaj mê akrã hi mex xwýnhjaja kot kaj mê aprĩ hã ja mar tỳx kuré kumrêx.

14

Tĩrtũm mex ã mê grer Apokarip 7.1-8

¹ Tã pa axte mêmoj pumu. Nhũm mê pahte amnhĩ tomnuj pãnhã amnhĩrer xwýnhja hixêt pê Siãwja nhĩmõk ã xa. Nê puhã mê ohtô rax kumrêx nê kuhê. Mê ohtô ho mê ohtô. Piitã kamã mê kêp 144.000. Nê piitã ôkrã hã mê pahte amnhĩ tomnuj pãnhã amnhĩrer xwýnh mê Hipêêxã wa hixi jaxwýr pa mê omu.

² Nhũm mê kaxkwa kamã grer o kuhê. Mê grerja mex o mex. Te kot gô hprôt tỳx hkoko htỳx pyrãk. Nê te na katõtõk tỳx pyrãk. Nê te wiorãw môr xwýnhjaja kot hkakrênh mex pyrãk pa mê mar o xa.

³ Nê mê grer xwýnhjaja. Jejus puhã mê ohtô rax kumrêx nê mê kuhê xwýnhjaja na prem Tĩrtũm kot mê ho amnhĩptãr ã hkrĩ xãta kuri grer o kuhê. Nê mêmoj tĩr pê kwat xwýnhjê mê mê àptãr tũm pê 24jê kuri grer o kuhê. Mê grer nyw o gre. Âm mê tapxipixjaja mê kot mê grer nywja mar. Ra mê kêp Tĩrtũm kra hã mê kot mê ôkrã hã Tĩrtũm mê Kra Jejus wa hixi ã kagã nhũm Tĩrtũm kot ra mrymnuti mê hõta wa kêp mê utãr nê amnhĩ wýr mê ho àpir xwýnh na pre mê. Âm mê tapxipixjaja mê grer nywja ma nê wa kãm ho grer o kuhê.

⁴⁻⁵ Na prem tãm amnhĩ nhĩpêx nê Tĩrtũm kôt amnhĩ nhĩpêx rãhã ho pa. Te mê kot amnhĩ prõ pix tânopxar rãhã ho pata pyrãk. Nê ri tanhmã hêx to rý tanhmã ri amnhĩ tomnuj to ho pa hkêt nê. Âm tãm ri amnhĩ nhĩpêx

mex o pa. Mê kêp Tĩrtũm mê mê pahte amnhĩ tomnuj pãnhã amnhĩrer xwýnh kwý jakamã na prem mê pahte amnhĩ tomnuj pãnhã amnhĩrer xwýnhhta kôt pix mã amnhĩ nhĩpêx o pa. Jakamã na prem mrymnuti kutã rôrõk nê kãm mex o mex ã harênh kêt nê. Tã mê kumrêxjaja Tĩrtũm mê Kra wa kuri wa kãm grer o kuhê.

Tĩrtũm kapêr o wrýk xwýnh pi- jakrunêpxi jarênh

⁶ Tã pa axte Tĩrtũm kapêr o wrýk xwýnhjê hõ pumu nhũm kýx pê ri htor o pa. Ahpýnhã ri pika piitã hkôt mê uro hkwýjê hkôt. Na ahpýnhã ri mê kapêr xwýnhjê piitã mê hkôt mê kãm Tĩrtũm kot tanhmã mê hipêx to hã harênh kaxyw. Ahpýnhã mê kapêr xwýnh piitã mê kãm harênh o pa. Nê htor o pa pê kýx pê mê kãm kapêr nê mê kãm:

⁷ “E na ra Tĩrtũm mê ate amnhĩ tomnuj mýrapê tanhmã mê ato kaxyw. Jakamã kwa mê tokyx hã apijaãm kaxyw akõn krã ho arõrõk nê akrĩ nê kãm mex o mex ã harê. Kêp mêmoj piitã ho kator xwýnh na. Na pre kaxkwa ho kato nê pika ho kato nê gô xujanãr o kato nê hino ho kato nê mêmoj piitã ho kator pa. Jakamã kwa kêr ka mê tapxipix ã mãn apijaãm nê kãm mex o mex hã harênh rãhã ho apa.”

Anhýr o mê kãm kapêr. ⁸ Hãmri nhũm hõja wamta kôt tẽ nê urãk nê kýx pê mê kãm kapêr o:

—Koja Tĩrtũm tokyx Papirõn grãnh pa. Na hte krĩ nhõ xwýnhjaja amnhĩ tomnuj pix rãhã ho pa. Mê kot amnhĩ nhĩpêx te mê kot kagõxýhti ho hkõm nê amnhĩ mê mê piitã mê kãm õr nê ho mê ho pipãnh pyrãk. Na htem mênijê piitã ho amnhĩkati o pa. Nê amnhĩ kwýjê pê mê hprõ ho amnhĩkati. Nê amnhĩ mê pika piitã hkôt mê pa xwýnhjê mã anhýr o pa. Mê kot mê urãk nê ã amnhĩ nhĩpêx anhýr o pa kaxyw mê kãm anhýr o pa. Ja mýrapê na ra Tĩrtũm kot tanhmã mê ho kaxyw mê hã amnhĩ jarê. Anê.

⁹ Tã nhũm wa hkôt hõja tẽ nẽ wa uràk nẽ kàx pẽ pika nhõ xwýnhjê mã kapër nẽ mẽ kãm:

—E mẽ ate mrymnuti kutã akõn krã ho arôròk nẽ akrĩ nẽ kãm mex ã harẽnh xwýnhjaja. Nẽ mẽ ate karõ nhĩpêx nẽ kutã akõn krã ho akrĩ nẽ kãm mex ã harẽnh xwýnhjaja. Nẽ mẽ anhõkrã nẽ mẽ anhĩhkra hã hixi hã kaga xwýnhjaja.

¹⁰⁻¹¹ —Tĩrtũm na tee ja hã mẽ apumu nẽ mẽ akamã gryk tỳx kumrêx. Mẽ ate kapër kuhpa hã mrymnuti hkôt amnhĩ xunhwýr jakamã nhũm mẽ akamã gryk tỳx o mẽ akamã gryk tỳx. Jakamã koja kuwy hpòk rãhã ho rãhã xwýnhhta kamã mẽ arẽnh pa ka mẽ amnhĩ xà htỳx kamã ajamak rãhã apa ho apa. Koja kuwy hpòkja aa hapêx kêt nẽ kurũm kàx mã hkũm àpir o pa rãhã nẽ. Koja ã mẽ ate amnhĩ tomnuj o mẽ apa xwýnhjê nhĩpêx anẽ ka mẽ kamã apa ho apa nẽ aa kurũm ajapòx kêt nẽ kamã amnhĩ xà htỳx kãm ajamak rãhã apa ho apa. Arĩgro hãn kamàt kãm arĩ ã amnhĩ nhĩpêx anhỹr rãhã apa ho apa. Mẽ ate gój rũm mrymnuti mẽ hkarõ ho sãnti wa kutã akõn krã ho arôròk nẽ akrĩ nẽ wa kãm wa mex ã wa harẽnhja mýrapê kot kaj mẽ ã amnhĩ nhĩpêx anẽ. Kot mẽ pahte amnhĩ tomnuj pãnhã amnhĩrer xwýnh mẽ Tĩrtũm kapër o mẽ wrỳk xwýnhjê noo mã kot kaj mẽ ã amnhĩ nhĩpêx anhỹr o apa.

¹² Anhỹr o mẽ kãm kapër jakamã kwa kêr pu mẽ pahte Tĩrtũm kôt amnhĩ xunhwýr xwýnhjaja mẽ hkukamã mẽ harẽnhja ma nẽ Tĩrtũm kapër kôt pix mã amnhĩ nhĩpêx rãhã ho ri papa. Mẽ kot tanhmã hã mẽ pahto htã pu mẽ hkaga hkêt nẽ amnhĩ kaxyw Jejus kôt pajamaxpër tỳx rãhã nẽ. Hãmri nẽ nhỹrmã mẽ kurom ma õ krĩ hwýr api nẽ kamã pamex kumrêx nẽ papa ho papa.

Mẽ kêp Jejus kwỳ hã mẽ htyk xwýnhjê jarẽnh

Wam Tesarõn 4.16

¹³ Tã nhũm kaxkwa kamã mẽhõja axte inhmã kapër nẽ inhmã:

E Juãw. Kêr ka ã akwýjê mã mẽmoj tã kaga anẽ nẽ mẽ kãm hã kaga ho: “E mẽ ate Tĩrtũm kôt ri amnhĩ nhĩpêx xwýnhjaja. Mẽ kot Tĩrtũm ã mẽ apar nhũm mẽ atyk tã koja amnhĩ tã mẽ ato mex rax kumrêx.” Anhỹr o mẽ kãm hã kaga.

Anhỹr o inhmã kapër. Hãmri nhũm Tĩrtũm Karõja kuma nẽ kãm:

—Nà ãm hãmri na ka ã mẽ harẽnh anẽ. Ra Tĩrtũm kot amnhĩ tã mẽ omunh rãhã ho pa. Mẽ kot kôt pix mã amnhĩ nhĩpêx o pa pẽ mẽ kãm mẽ hkurê xwýnhjê kutã amnhĩ to htỳx rãhã htykja nhũm Tĩrtũm kot amnhĩ tã mẽ omunh mex. Koja mẽ ho mex kumrêx. Mẽ kot Jejus ã mẽ hpar tã koja mẽ ho mex rax nẽ nhũm mẽ kuri mex rãhã nẽ pa ho pa nhũm mẽhõ axte tanhmã mẽ ho hkêt nẽ. Anẽ.

Tĩrtũm kot tanhmã mẽ kãm hkĩnh xwýnhjê nhĩpêx to

¹⁴ Tã pa axte mẽmoj pumu. Kaxkwa kamã kakrã jakajre pumu. Nẽ kamã mẽhõj te panhĩ pyrã nẽ nhỹ. Nhũm ôr o pahi hã mẽ ahkà htu nẽ kuteere xwagixre py nẽ o nhỹ.

¹⁵ Hãmri nhũm kaxkwa kamã Tĩrtũm kapër o mẽ wrỳk xwýnhjê hõja Tĩrtũm mã amnhĩ jarẽnh xà hã ixkre rũm kato nẽ kakrã jaka kamã ýr xwýnhhta mã kapër. Kàx pẽ kãm kapër nẽ kãm:

—E pika nhõ xwýnhjaja te mẽ hpur kãm mẽmo hy ra hkamrêk nẽ hikẽnh mã mex pyrãk. Jakamã anhõ kuteere ata py nẽ ma mẽ hkôt tanhmã ri mẽ ho ho ri mẽ hkôt apa. Te mẽ kot mẽmo hy nhĩkẽnh o ri pa pyrãk o mẽ hipêx nẽ ma ho mẽ himex o ri apa. Anẽ.

¹⁶ Hãmri nhũm kuma nẽ pika piitã mýri õ kuteere ho apê nẽ te mẽmo hy jakar pyrãk o mẽ hipêx.

¹⁷ Hãmri nhũm axte Tĩrtũm mã amnhĩ jarẽnh xà hã ixkre rũm kapër o mẽ wrỳkjê hõja kato. ĩhkra kamã kuteere xwa gixre py nẽ o xa. ¹⁸ Hãmri nhũm axte hõja ixkre rũm kê hkôt kato nẽ hkukamã kator xwýnhhta mã kapër. Kàx pẽ kãm kapër nẽ kãm:

—E na ra Tĩrtũm tanhmã mẽ kot amnhĩ tomnuj to hã tanhmã mẽ

hipêx to kaxyw. Te mẽ kêp mẽ hpur kãm mẽmo xô pê uwa ra hkamrêk nê rênh mã tãm pyrâk. Jakamã ma pika hwÿr mẽ hwÿr wrÿ nê mẽ hkôt ri anhô kuteere ho mẽ himex o ri apa. Anê.

¹⁹ Hãmri nhũm kuma nê ma pika hwÿr wrÿ nê mẽ hipêx o te mẽ kot uwa xô rênh nê prês kãm hkapÿr nê kagô janênh pyrã nê mẽ hkôt ri kuteere ho mẽ hpar o pa. Tÿrtũm ra mẽ kamã gryk tÿx o mẽ kamã gryk tÿx jakamã nhũm ã mẽ hkôt mẽ hipêx anhÿr o ri pa.

²⁰ Jakamã nhũm mẽ hkamrô hpikapÿr rax kumrêx o uwa kagô jakre. Te ho pyhti hprôt o nôr pyrâk. Jao upÿm o 2 met nê hkôt ho mẽj met. Nom hprôt xà hkôt ry rax o ry rax. Ho 300 kirôm. Nhũm ã mẽ kamrô hprôt rax anê.

15

Tÿrtũm mex ã mẽ grer

¹ Tã pa axte kaxkwa kamã mẽmoj pumu. Hãmri nê amnhĩ jaêr pê omu nê tee ri hkukamã ijamaxpêr. Aa mẽ pahte mẽmoj ã kot anhÿr pumunh kêt xwÿnh pa pre omu. Nhũm Tÿrtũm kapêr o mẽ wrÿk xwÿnh pê 7jaja ahpÿnhã pika hkôt mẽ kot amnhĩ tomnuj xwÿnhjê homnuj kaxyw akuprô nê kuhê. ãm jajê pixjaja koja Tÿrtũm nhÿ hã axte tanhmã mẽ homnuj to nê ho anhÿr pa hãmri nhũm ra ja hapêx o hapêx.

² Jakamã pa axte Tÿrtũm kapem gô rax pumu. Te kot kax karÿr jaxênh mẽ kuwy hpôk o pihkâr pyrâk xwÿnhja hprôt o nô. Nhũm Tÿrtũm kra hkwyjaja gô mÿ ri ohtô rax kumrêx nê kuhê. Na pre ra mrymnutija tee ri amnhĩ kôt mẽ rênh mã nê tee ri mẽ hã amnhĩ nhÿxi hã kagà hprãm kaprÿ nom nhũm mẽ hkaga nê Jejus kôt amnhĩ nhÿpêx rãhã ho pa. Nê mrymnuti karô ho sãnti mã mex ã harênh kêt rãhã ty nê kaxkwa hwÿr api. Jakamã nhũm Tÿrtũm amnhĩ tã mẽ omu nê mẽ kãm wiorãwti hkwy gô nhũm mẽ piitã hamÿ nê gô rax mÿ ri ho kuhê.

³ Hãmri nê Tÿrtũm mã tanhmã amnhĩ to ho pa xwÿnh pê Mojes mẽ mẽ pahte amnhĩ tomnuj pãnhã amnhÿrer xwÿnhhta wa kot Tÿrtũm mã grerta nhũm mẽ Tÿrtũm mã ho grer o kuhê nê grer o:

E Pahi Maati Tÿrtũm. Na pa mẽ ra inhmex pê awÿr ixàpir pa.

ãm hãmri na ka hte tanhmã amnhĩ nhÿpêx to ho ri apa.

Aa tanhmã axêx to hkêt.

Nê mẽ ixrom axihtÿx o axihtÿx.

Nê mẽ ixrom axàhpumunh o axàhpumunh.

Jakamã na ka hte mẽ inhmã aa mẽ ixte mẽmoj pumunh kêt kwÿ ho anhÿr o apa.

Pika piitã hkôt ahpÿnhã mẽ ho amnhÿptâr xwÿnhjê nhô Pahi Maati na ka.

Nê ate tãm amnhĩ nhÿpêx xwÿnh na ka.

⁴ Jakamã na htem piitã atã hpijaam o pa.

Nê amã mẽ kapêr xàptâr pix o amã kapêr.

Nê amã amex o amex ã ajarênh rãhã nê. ãm hãmri mẽ ixrom kapxipix amex o amex.

Jakamã koja ahpÿnhã pika piitã hkôt akrajê piitã ate tãm amnhĩ nhÿpêx nê tãm mẽ piitã tanhmã mẽ harênh to hã ajarênh ma nê awÿr mra nê akutã hkôn krã ho rôrôk nê hkrÿ nê amã amex o amex ã ajarê. Anê.

Mẽ homnu xà hã xijere jamÿnh xwÿnh jarênh

⁵ Tã na pa axte mẽmoj pumu. Kaxkwa kamã Tÿrtũm nhôrkwy hã hitom xà piitã amnhĩ kahê xà rê nê kuhê pa omu. Nê ixkre kamã ô hitom mex maati haxwÿja amnhĩ kahê xà mẽ nê xa.

⁶ Hãmri nhũm ixkreja rũm Tÿrtũm kapêr o mẽ wrÿk xwÿnh pê 7jaja hapôj nê kuhê. Mẽ ê hakajre nê hirã htÿx kumrêx. Nê mẽ hinô pre xàja ôr pix o. Nê piitã Tÿrtũm mã tanhmã kot mẽ homnuj to xà hã xijere pê 7ta jamÿnh kaxyw kuhê.

⁷ Hāmri nhūm mēmoj tīr pē kwatjê ôja mē kām xijere hkwy jamy nē mē hwyr o tē. Xijere kēp 7 nē piitā ôr o. Nhūm hamy nē Tirtūm kapēr o mē wryk xwýnh tajê hwyr o tē nē ho mē hipêx nhūm mē ahpýnhā hamy. Xijere kamā Tirtūm gryk xà jamy nē o kuhê.

⁸ Pu nhūm Tirtūm rūm kuwy hkūm hapôj. Tirtūm mex nē hihtyx xwýnh ta rūm hapôx rax o ixkreta kunor pa nhūm mē tee ri hwyr gjêx prām kapry.

16

Xijere kamā mē homnu xà pē 7 jarēnh

¹ Tā pa arī mēmoj pumu nhūm Tirtūm nhōrkwy kamā mēhōja kapēr o wryk xwýnh pē 7jê mā kàx pē kapēr nē mē kām:

—E na pa ra mē kot ixkapēr kwým ri amnhī nhīpêx xwýnhjê pumu nhūm ixpê ja omnuj tỳx o ixpê omnuj tỳx. Jakamā e mē anhō xijereta jamy nē ma pika hwyr mē hwyr wry nē axpēn pānhā mē hā xijere kamā mē homnu xà kapī. E mē tokyx ma mē hwyr wry. Anē.

² Hāmri nhūm mē kuma nē axpēn pānhā mē hwyr wry. Nhūm wamta kumrêx pika piitā hkôt mē homnu xàta kapī. Pu nhūm mē kot mrymnuti mē ô sânti wa kām mex ā harēnh nē amnhī tā wa hixi jaxwyr xwýnh piitā hkānhy hpa nē à htỳx kumrêx nē ri pa.

³ Hāmri nhūm wamta kôt hōja ô xijere py nē gô xujanār kām hkapīr pa nhūm gô te mē htykjê kamrô pyrā nē kamā mēmo mry htyyxà rēnh xwýnh piitā pikaprār pa.

⁴ Tā ra xijere kapīr xwýnh o axkrut nē ô xijere kapī hāmri nhūm hkôt hōta ô xijere py nē hpānhā gô hkryre piitā hkôt hkapīr pa. Pyhti nē ri hino piitā hkôt hkapīr pa nhūm piitā gô xujanār pyrā nē mē hkamrô hā amnhī jahkre hpa.

⁵ Hāmri nhūm axtem Tirtūm kapēr o mē wryk xwýnhjê hō kot kām gô piitā hamār xwýnh ta ja hā omu nē Tirtūm mā kām:

Pa amex rāhā apa ho apa xwýnh. Nē arāhā apa ho apa xwýnh.

Nà ām hāmri na ka ā mē kēp gôta nhīpêx anē.

⁶ Na prem mē kot akôt amnhī nhīpêx xwýnhjê mē mē kām ri akapēr jarēnh xwýnhjê hpar o pa nhūm mē hkamrô hpikapīr rax nē.

Tā ka ra mē hā mē kēp mē hkôm xà homnu hpa nhūm mē kēp mē hkamrô ā amnhī jahkre nhūm mē tee ri ho hkôm mā. Nà ām hāmri na ka ā mē kēp gô nhīpêx anē Tirtūm. Anē.

⁷ Hāmri nhūm mē kot Tirtūm mā mēmoj nhōr xà hā mēsti hpar pē hkrī xwýnhjê hōja kuma nē kām:

Nà ām hāmri na ā ajarēnh anē Tirtūm. Ām hāmri na ka ā akrajê hā mē hipêx anē.

Ra ate mē hā amnhī jarēnh xà hkôt na ka hte tanhmā mē hipêx to.

Nà apê mē inhō Tirtūm Maati na ka. Mē ixrom axihtỳx o axihtỳx nē axāhpumunh o axāhpumunh. Anē.

⁸ Tā ra axkrunēpxi nē ô xijere kapī. Jakamā nhūm mē hpānhā hōja ô xijere o tē nē myyti hā hkapīr pa nhūm hkagro htỳx nē pika hkôt mē pa xwýnhjê hkà ho hxêt o pa.

⁹ Kagro htỳx o hkagro htỳx jakamā mē hkà ho hxêt nhūm mē kamā hkà kajê hpa. Hāmri nē tee ri amnhī pumu nē hamaxpēr o:

—Nà Tirtūmtija na ā mē pahtomnuj tỳx anē. Anē.

Hāmri nē kamā gryk tỳx nē hapry nē tanhmā ho kapēr punuj to ho pa. Nom mē kot amnhī tomnuj kaga nē kām mex o mex ā harēnh kêt nē arī tanhmā amnhī tomnuj to ho pa.

¹⁰ Nhūm ra kēp kwat nē ô xijere kamā mēmoja kapī. Jakamā nhūm ra hpānhā hōja ô xijere o tē nē gôj rūm mrymnuti kot mē ho amnhīptār xà hā hkrī xà hā hkapīr pa. Jakamā nhūm ra kot mē ho amnhīptār xà hā pikaja kamā kamāt kô htyk par kumrêx. Hāmri nhūm mrymnuti mē hkôt mē kot amnhī nhīpêx xwýnhjê hā kamāt kô hpa nhūm mē amnhī xà htỳx ā maj

amnhĩ nham o axpẽn kamnhar tỳx kumrẽx. ¹¹ Nẽ ã Tĩrtũm kot mẽ hipêx anhỹr ã amnhĩ tã omu nẽ kamã gryk tỳx nẽ tanhmã ho kapêr punuj to ho pa. No ãm kot amnhĩ tomnuj xwỳnh ã amnhĩ pumunh nẽ kot amnhĩ tomnuj kaga hkêt nẽ.

¹² Nhũm prem ra kêp sĩk nẽ ò xijere kamã mẽmoj kapĩ. Jakamã nhũm hpãnhã hõja ò xijere kamã mẽmojta o tẽ nẽ pyhti pê Erax kamã hkapĩr pa nhũm gõja grà pa nẽ te kêp prý pyrà nẽ nõ. Jakamã nhũm myt japõx xà rũm mẽ ho amnhĩptàr xwỳnhjaja nẽ pòristijaja hãmri pijapu kaxyw Jeru-jarẽ hwỳr nojarêt nẽ hã hwỳr pa.

¹³ Tã nhũm kagãmnuti mẽ ỹ hã mẽ kãm hêx o pa xwỳnh mẽ mrymnutita wa mẽ hakwa rũm mẽmoj te priti pyrà nẽ hapõx o pa. No ãm priti hkêt mẽ kêp Satanasti mã mẽ àpênh xwỳnh kwỳy.

¹⁴ Jakamã na prem pika piitã hkôt mẽ kot aa mẽmoj pumunh kêt kwỳ ho anhỹr o hêx rom mẽ no kupyr o mẽ hkôt pa. Tã pika piitã hkôt mẽ ho amnhĩptàr xwỳnhjê mẽ ho pikuprõnh kaxyw mẽ hapêr o pa. Mẽ kot Tĩrtũm xihtỳx o hihtỳx kurê kaxàr kaxyw mẽ pijapu xà hã arĩgro kukamã mẽ ho pikuprõnh o pa.

Jejus kot amnhĩ kwỳjê mã kapêr ã harênh

¹⁵ Tã nhũm Jejus pika hkôt hkrajaja arĩ mẽ htĩr nẽ pa xwỳnhjê mã kapêr nẽ mẽ kãm:

E mẽ inhma ixkwỳjaja. Akupỹm ixte mẽ awỳr ixwryk xà hã arĩgroja ã kot paj te mẽ àhkĩnh xwỳnh kot amnhĩ nhĩpêx pyrà nẽ mẽ ajaêr pê mẽ awỳr wrỳ. Jakamã kêt ka mẽ amnhĩ wỳr ijamãr rãhã ho apa. Kêt pa akupỹn wrỳ ka mẽ amnhĩ wỳr ixpumu nẽ akĩnh nẽ amnhĩ kamã mã ixpuma hkêt nẽ. Anẽ.

Mẽ kot axpẽn kurê kaxàr kaxyw mẽ pikuprõnh ã mẽ harênh

¹⁶ Tã nhũm Satanasti hkwyjaja pika piitã hkôt mẽ ho amnhĩptàr xwỳnhjê ho pikuprõnh pa nẽ mẽ hkurê kaxàr

kaxyw ma Ijaew kot kãm “Amaketõ” jarênhja wỳr mra.

¹⁷ Hãmri nhũm Tĩrtũm kapêr o mẽ wryk xwỳnh pê 7 kot hitepta ò xijere py nẽ kàx mã kamã mẽmoj kapĩr pa. Jakamã nhũm Tĩrtũm nhõrkwỳ kamã mẽ ho amnhĩptàr ã hkrĩ xà rũm Tĩrtũm kàx pê kapêr o:

—E hãmri. Na pa ra mẽ kot amnhĩ tomnuj mỳrapê tanhmã mẽ ho jatur xàm mênh kaxyw. Anẽ.

¹⁸ Pu nhũm na hkatõtõk nẽ hkrakrak nẽ haxênh nhũm pika htertet tỳx nẽ. Aa mẽ kot pika htertet tỳx kot anhỹr ã omunh kêt kumrẽx.

¹⁹ Jakamã nhũm Papirõnja kaje axkrunẽpxi. Papirõn nhõ xwỳnhjaja kot amnhĩ tomnuj tỳx o paja mỳrapê nhũm Tĩrtũm ã mẽ hipêx anẽ. Nẽ pika htertet o pika piitã hkôt krĩ grành pa. ²⁰ Nhũm gõ hipòk piitã gõja hã axkamur nhũm hapêx pa. Nẽ kên prêk nẽ hkrã hixêt rôròk nẽ hpigrành pa. Pika htertet tỳx kumrẽx jakamã ã mẽmoj amnhĩ nhĩpêx anẽ. ²¹ Nẽ na mẽ pê jêr krã jakootija mẽ piitã mẽ hipy rôròk. No ãm hkrã hkryre hkêt hkrã rũnh kumrẽx. ãm hpỹnh nẽ kamã kêp 40 kir nẽ mẽ hã rôròk nhũm mẽ tee ri amnhĩ tã ã omu nẽ Tĩrtũm kamã gryk tỳx nẽ haprỳ nẽ ho kapêr punuj nẽ.

17

Tĩrtũm kra hkêt xwỳnhjê jarênh

¹ Tã pa pre kê axte mẽmoj pumu. Nhũm kot xijere jamỳnh xwỳnhjê hõja ixwỳr tẽ nẽ inhmã:

—E ma ixkôt tẽ nẽ mẽmoj pumu. Anẽ.

Hãmri pa kuma nẽ ma hkôt tẽ nhũm inhmã:

—Nà ahpỹnhã gõ rax mỳri krĩ nhõ xwỳnhjaja te ho ni hkuprỳ gõ mỳ ri ỹr nẽ kãm mẽmyjê piitã hkĩnh o ỹr xwỳnhhta pyràk. Na htem uràk nẽ Tĩrtũm kapêr kôt ri amnhĩ nhĩpêx kêt nẽ. ãm htỳx ri tanhmã amnhĩ tomnuj to ho pa. Jakamã koja Tĩrtũm tanhmã mẽ homnuj tỳx to nẽ mẽ ho hapêx.

² Krĩ piitã hkôt mẽ ho amnhĩptàr xwỳnhjaja na hte ma mẽ ò krĩ hwỳr mra nẽ te mẽ kot mẽ hkuprỳjê ho

amnhĩkati pyræk o amnhĩ nhĩpêx. Nê te pipãnh nê htỳx ri amnhĩ nhĩpêx pyræk o amnhĩ nhĩpêx o pa. Nhũm krĩ nhõ xwỳnhjaja mẽ uræk nê amnhĩ krã hkôt pix mã tanhmã amnhĩ tomnuj to ho ri pa. E ma ixkôt tẽ nê ja hã mẽ omu. Anẽ.

³⁻⁴ Hãmri nhũm Tĩrtũm Karõ tanhmã ixto nhũm kapêr o wrỳk xwỳnhja ma kapôt wỳr ixto mỗ pa kapôt ã mrymnuti hkrã kêp 7 nê kamã hpàr kêp 10 xwỳnhta pumu nhũm hkamrêeti nê xa. Nê í piitã hã tanhmã Tĩrtũm o kapêr punuj to hã kagà. Nhũm katut ã mẽhõ ni kuprỳta nhỹ. Mẽ ho amnhĩptàr xwỳnh ã mẽ ê kakrã htyk nê hkamrêk o hkukàr jaxà nê hã nhỹ. Nê ôr o ôkrexê. Nê ôr o hinwỳyêxê nê ìhkra kamã kàx. ãm ôr pix o hikukrêx. Nê kên mex karỳr pix o amnhĩ jamrêx. Nê ôr o kopti hõ py nê hã nhỹ. Kopti kamã ni kuprỳ kot amnhĩ tomnuj xà. ãm kot mẽ kêp mẽ mjên o amnhĩkati ho pa xà pix nhũm kupy nê o nhỹ.

⁵ Nê ôkrã hã amnhĩ nhĩxi hã kagà kot:

Inhĩxi pimxur pê PAPIRÕN RAXTI.

Nê ixpê mẽ kêp mẽ mjênjê ho amnhĩkati ho mẽ pa xwỳnhjê nã na pa.

Nê ixpê mẽ kot axpên prõ ho amnhĩkati o mẽ pa xwỳnhjê nã na pa.

Nê ixpê mẽ kot Tĩrtũm nê mẽ kãm hêx o ri mẽ pa xwỳnhjê nã na pa.

Nê ixpê mẽ kot Tĩrtũm kapêr kôt amnhĩ nhĩpêx o pa hkêt xwỳnhjê nã na pa.

Anhỹr o ôkrã hã amnhĩ nhĩxi hã kagà kot anhỹr. ⁶ Nhũm axpã nê nhỹ pa omu. No ãm kagôxyhti ho hpipãnh kêt. Mẽ kot Jesus kôt amnhĩ xunhwỳr nê ri mẽ kãm Jesus kêp mẽ õ pahiti hã harênh xwỳnhjê kamnhwỳr o mẽ hpar nhũm mẽ hkamrô pikapĩr xwỳnhjê kamrô ho na pre axpã nê nhỹ. Pa ã kot amnhĩ nhĩpêx anhỹr ã omu nê tee ri ijamaxpêr.

⁷ Hãmri nhũm Tĩrtũm kapêr o wrỳk xwỳnhja inhãmã:

—Kwa mon ka ri ja pumu nê tee ri ajamaxpêr? E kot paj ixprĩ hã amã harê ka inhma. Niti mẽ hã ãr xwỳnh pê mrymnutita. Krã pê 7 nê kamã hpàr pê 10 xwỳnhta kot paj ixprĩ hã amã hamê wa harê ka wa harênh ma.

⁸ —Nã mrymnutija na pre htĩr nê ri pa tã ty nê ahkre xupỳmti kamã hikwỹ. Nom koja akupỳm htĩr nê kurũm kato nhũm mẽ piitã omu nê ahpỳnhã tanhmã hamaxpêr to. Amnepêm kormã amrakati ri Tĩrtũm kot õ kagà kamã mẽ htĩr tũm nê mẽ pa mã xwỳnhjê nhĩxi jaxwỳr xwỳnhjaja koja kator ã omu nê ãm omu nê tanhmã hamaxpêr to hkêt nê. No mẽ kot Jesus kôt amnhĩ xunhwỳr kêt xwỳnhjaja koja mẽ amnhĩ jaêr pê akupỳm kator ã omu nê tee ri hkukamã hamaxpêr. Hãmri nê axpên mã: “Kwa amnepêm htyk tã ra tanhmã amnhĩ to nê akupỳm htĩr nê api nê mỗ.” Anhỹr o axpên mã harê. Hãmri nhũm kato nê ma tẽ nhũm Tĩrtũm tã ho hapêx kumrêx nhũm hapêx o hapêx.

⁹ —Kwa inhma nê jam ajamaxpêr tỳx nê. Mrymnuti krã pê 7ta te kêp hixêt prêk pê 7 pyrà nê hã ãr xwỳnh ni kuprỳta te hixêt prêk pê 7ta ã ãr pyræk.

¹⁰ —Nê mrymnuti hkrã pê 7ja te kêp mẽ ho amnhĩptàr xwỳnh pê 7 pyræk. Nhũm mẽ ho amnhĩptàr xwỳnhjaja te mẽ kêp 5 nê ra htyk pyræk nhũm hkôt hõja arĩ mẽ ho amnhĩptàr o pa. No kot hitepta kormã. Nom koja mẽ ho amnhĩptàr ry hkêt nê.

¹¹ —Mrymnuti htĩr nê pa htã htyk nê ra akupỳm htĩr nê àpir xwỳnhta koja hkrã hitepta pãnhã mẽ ho amnhĩptàr o pa. Jakamã te mẽ ho amnhĩptàr xwỳnh pê 7jê hõ pyræk. Koja hkrã pê 7ja mẽ ho amnhĩptà nê gaa nê htyk mẽ nhũm hpãnhã mrymnutita hpãnhã mẽ ho amnhĩptà. Hãmri nhũm rĩ kormã Tĩrtũm tã mẽ ho hapêx par kumrêx.

¹² —Nê ate mrymnuti hkrã kamã pàr pê 10 pumunh xwỳnhta te mẽ kêp mẽ ho amnhĩptàr xwỳnh pê 10 pyræk. No ãm jaja na kormã mẽ ho amnhĩptàr kêt nê. Koja mẽ nhỹrmã

anhîpê mrymnuti nhÿ hã ahpÿnhã ri mē ho amnhîptâr o pa nom mē ho amnhîptâr japjê hkêt nē. ¹³ Koja mē tanhmã ja hã axpēn mar to hãmri nē mrymnuti mã anē nhūm mē hpānhã mē piitã mē ho amnhîptã.

¹⁴ —Nē mē ho amnhîptâr xwÿnh pê 10jaja koja mē pahte amnhî tomnuj pānhã amnhîrer xwÿnh kurê kaxâr kaxyw hwÿr mra nē kutã pijapu ho kuhê. No ãm tee ri kãm tanhmã ho hprãm hkapyrÿ nhūm mē ho axtem nē amnhî tã mē himex pa. Hihtÿx o hihtÿx o kot mē ho hpimràatã mē hakrenh par. Nē kēp pika piitã hkôt mē ho amnhîptâr xwÿnhjê nhõ Pahihtî. Tãm na pre amnhî wÿr mē kot hkôt amnhî nhîpêx o mē pa xwÿnhjê wÿ nhūm htem amnhî kaxyw hkôt hamaxpêr mex rãhã ho pa. ¹⁵ —Nē krî pê Papirôn kapem gô xohtô mÿ ri ni kuprÿ hkrî xwÿnhhta. Gô xohtôja te kēp ahpÿnhã ri pika piitã hkôt mē uro hkwy pyrãk. Nē te ahpÿnhã ri mē kapêr xwÿnh kwÿ pyrãk.

¹⁶ —Nē mrymnuti hpâr pê 10ta kēp mē ho amnhîptâr xwÿnh pê 10 pyrãk. Jakamã koja mē kãm ni kuprÿta prãm nõkati nē kamã gryk tÿx kumrêx. Hãmri nē hwÿr mra nē kēp hikukrêx piitã utã nē kēp ê hkwrÿnh pa nhūm hkênh mex nē xa. Hãmri nhūm mē kupî nē ï hkrêr pa nē kuwy kamã hi rē nhūm kaxâr pa nē hapêx.

¹⁷ —Na pre pahî pê 10jaja mrymnuti hkôt amnhî xunhwÿ nhūm Tirtûm ãm ja hã mē omu nē tanhmã nē mē kãm nē hkêt nē. Jakamã koja mē ãm hkôt pix mã amnhî nhîpêx o pa rãhã nhūm Tirtûm mē ho hapêx. Nē mē ô krî mē mē ho hpimràatã mē ho hapêx pa. Hãmri nē mē ho hapêx o mē ho hapêx.

¹⁸ —Nē ate mēhõ ni kuprÿ pumunh xwÿnhhta te kēp krî rax pê Papirôn nhõ xwÿnhjê pyrãk. Nē mē ho amnhîptâr xwÿnhja pika piitã hkôt mē ho amnhîptâr xwÿnhjê hkrãhtûm na. Anē.

Ã Tirtûm kapêr o mē wrÿk xwÿnhja inhmã mē harênh anē. Pa kuma nē

ô ri mē amã hã kagã. Mē ate kamã harênh nē aprî hã mar tÿx kaxyw.

18

Tirtûm kot Papirôn grãnh par ã harênh

¹ Tã pa kē axte mēmoj pumu. Nhūm axte Tirtûm kapêr o mē wrÿk xwÿnhjê hõja kaxkwa rûm ahpar mã wrÿk o tē. Tirtûm nhÿ hã hihtÿx nē kamã hirã rax kumrêx o pika piitã hkôt mē kãm hirã pa. ² Nē ahpar mã tēn wrÿ nē kãx pê kapêr o:

E koja Papirônja pigrãnh pa nē hpānhã kēp Satanasti mã mē ãpēnh xwÿnhjê papxã nē kēp nhõnhti papxã. Hãmri nē aa kamã mēmoj mex kêt kumrêx.

³ Krî nhõ xwÿnhjaja na htem Tirtûm kapêr kôt amnhî nhîpêx kêt nē amnhî krã hkôt kãm prãm xã hkôt pix mã tanhmã amnhî tomnuj to ho pa. Te mēhõ pipãnh nē htÿx ri amnhî nhîpêx o pa pyrãk.

Nhūm krî piitã hkôt mē ho amnhîptâr xwÿnhjaja mē hwÿr mra nē mēnijê ho amnhîkati ho pa.

Nē krî nhõ xwÿnhjaja mēmoj pumu nē kãm hkînh nē haprôr kurê kumrêx o pa nē aa uaprôr o hapêx kêt nē.

Jakamã na hte krî hkwy nhõ xwÿnhjaja mē hwÿr mēmoj to pa nē xatã mē kãm ho wēnê nē mē kukwak ri mē hikãxpore rûnh nē pa.

Anhÿr o kapêr. ⁴ Hãmri nhūm Tirtûm Papirôn kamã hkrajê mã kapêr nē mē kãm:

E mē tokyx mē kot ri htÿx amnhî nhîpêx xwÿnhjê nhõ krîta rûm ajapôj ixkrajaja.

Kot kaj mē anhÿr kêt nē ra mē hkôt amnhî nhîpêx pa mē ato apimràatã mē ate amnhî tomnuj ã mē atomnuj tÿx nē.

⁵ Krî nhõ xwÿnhjaja na htem amnhî tomnuj rûnh o pa.

Mē kot amnhî tomnuj xã te mē kot kēn katutxô nhūm hprêk rax

o kot kaxkwa kanhwÿr kaxyw pyræk.
 Na pa hte ã mẽ kot amnhĩ nhĩpêx anhÿr ã mẽ omunh rãhã ho ri ixpa. Jakamã kwa ixkrajaja mẽ tokyx mẽ kurũm ajapôj.
 Anhÿr o hkrajê mã kapêr. Hãmri nê kapêr o mẽ wrÿk xwÿnhjê mã kãm:
 6 E kwa mẽ ma mẽ hwÿr wrÿ nê tanhmã ixkrajê hã mẽ ho.
 No ãm kêr ka mẽ tanhmã mẽ ho htÿx o mẽ kot ra tanhmã ixpê ixkrajê nhĩpêx tota jakre.
 Kê mẽ tanhmã ixpê mẽ ho grille htã ka mẽ hã tanhmã mẽ ho htÿx kumrêx o mẽ kot mẽ hipêxta jakre.
 7 Krĩ nhõ xwÿnhjaja na prem mex nê pa.
 Nê mẽ hikukrêx rũnh nê hkĩnh nê pa.
 Nê tanhmã amnhĩ to jarkrar to ho ri pa nê amnhĩ jarênh o:
 “Ot pa mẽ te pahi ni kot amnhĩ nhĩpêxta pyrã nê ixkrĩ xà mex pix kãm ixkrĩ pyræk.
 Nê te Tĩrtũm kot amnhĩ nhĩpêx pyræk o na pa htem amnhĩ nhĩpêx o ri ixpa.
 Nê mẽ ixkĩnh nê mẽ inhmex rãhã ri ixpa.
 ã mẽ ixte amnhĩ nhĩpêx anhÿr xwÿnh na pa mẽ.”
 Anhÿr ã amnhĩ to jarkrar o pa.
 Tã kêr ka mẽ tanhmã mẽ homnuj to kê mẽ mexta pãnhã omnuj tÿx nê pa.
 Nê kê mẽ hkaprĩ nê amnhĩ xà htÿx kãm hamak rãhã nê pa ho pa.
 8 E kê mẽ ã amnhĩ nhĩpêx anhÿr o pa. Jakamã koja mẽ arĩgro hpÿnh kãm mẽ hkwyjaja hpikaprãr rũnh nê nhũm arĩ mẽ htĩr xwÿnhjaja omnuj nê pa.
 Nê tee ri amnhĩ pumu nê hkaprĩ xàj mÿr o pa.
 Nê amnhĩ xà htÿx kãm hamak o pa.
 Nê tee ri amnhĩ nhĩpêx o pa.
 Nê kãm prãm nê pa rãhã ty nhũm kuwy mẽ ho hkaxàr pa.
 Ixpê Pahi Maati Tĩrtũm kot paj ixihtÿx kãm ã mẽ hipêx anê. Anê.

9 Hãmri nhũm krĩ piitã kurũm mẽ ho amnhĩptàr xwÿnhjaja. Mẽ kot mẽ hwÿr mrar nê mẽ hkuprÿjê ho amnhĩkati nê mẽ uræk nê mẽmoj pumunh nê haprôr rãhã ho pa xwÿnhjaja tee ri krĩ kaxàr nê kàx mã kuwy hkũm àpir o paja pumu nê hkaprĩ nê mÿr o kuhê.

10 Nê Tĩrtũm kot mẽ ho hapêx par ã mẽ omu nê kãm ma htÿx kumrêx. Amÿm mẽ omunh o kuhê nê tee ri amnhĩ kukamã hamaxpêr nê httert tÿx nê. Nê mÿr kãm kapêr o:

Hêxta waa nê Papirõn nhõ xwÿnhjaja. Mẽ amex nê axihtÿx mex nê apa htã nhũm Tĩrtũm mẽ anhĩmex pa. Hêxta waa nê. Anê.

11 Nê mẽ hwÿr mrar nê mẽ kãm mẽmoj to wênê ho mẽ pa xwÿnhjaja haxwÿja krĩ pumu nê tee ri amnhĩ kukamã hamaxpêr nê hkaprĩ nê mÿr o kuhê. Nhÿri koja mẽ tokyx axte mẽmoj to wênê? Mẽ kêp mẽmoj japrôr rũnh xwÿnhjaja hkaxàr par kumrêx kênã.

12 Na prem mẽmoj piitã ho pa nê mẽ kãm ho wênê. Mẽmoj mex piitã. ôr o mẽ hkukrêx nê prat o mẽ hkukrêx nê kên jaxênh ã kàxpore xohtôô. Nê kupêxê mex. Kakrã htyk nê hkamrêk nê hkroore nê hã hapjê. Nê mẽmo pĩ kuxware nê pĩ htÿx nê kên jakàr nê kàx o ri mẽmo nhĩpêxja nhũm prem mẽ kãm ho wênê ho pa. 13 Nê mẽmo htwÿm nê mẽ hkuxwa xà. Nê mẽ ô ho ành xà nê mẽ ô kuxwa xà nê xwÿgrã nê harôj. Nê môx nê ôwêhti nê kawar nê kaxyw kawarti hkjênh xà hã karrotre. Nê nhÿhÿnh krĩ hõ kamã panhĩ hkwy pynê nê mẽ hwÿr mẽ o pa nê mẽ kãm mẽ ho wênê nhũm mẽ amarĩ mẽ hkôt ri àpênh rũnh o pa. Na prem ã mẽ kãm mẽmoj to wênê anhÿr o pa. Tã ra mẽ kot mẽ haprôr xwÿnh mẽ mẽ pimràatã hapêx pa.

14 Jakamã nhũm mẽ tee ri mẽ hkukamã hamaxpêr nê te kot mẽ kãm kapêr pyrã nê mẽ kãm:

Hêxta waa nê. Mẽ amã mẽmoj prãm nê amnhĩm haprôr xwÿnhhta na mẽ apê hapêx par kumrêx. Nê mẽ akàxpore rũnh nê mẽ akukrêx rũnhhta mẽ mẽ apimràatã

ajapêx pa. Kot kaj mẽ axte tanhmã amnhĩ nhĩpêx to ho apa hkêt nê. Anê.

15 Hãmri nê amým ri Tĩrtũm kot tanhmã mẽ hipêx to hã mẽ omu nê kãm ma xàj mur nê htertet o kuhê.

16 Nê mýr kãm kapêr o:

Hêxta waa nê. Na pre htem ê mex pix jagjê nê ri hã mra. Kakrã htykre nê hkamrêkre.

Nê mẽ hikukrêx mex o amnhĩ jamrêx nê ri hã mra.

Nê ôr nê kên mex ã ohtô xwýnh o amnhĩ jamrêx nê ri hã mra.

17 Tã ra hapêx par kumrêx. Anê.

Hãmri nhũm gô xujanãr kãm pãr nhõ dõn nê mẽ kot mẽ kãm pãr o ri mrar xwýnhjaja nê mẽ kot kamã tep pynênh xà ho tep pynênh o ri mẽ pa xwýnhjaja nê pãr kãm amarĩ mẽ pa xwýnhjaja hãmri mẽ hwýr mra nê wamtajê pyrã nê tee ri amým ri mẽ ô krĩ pumu nê mýr o kuhê. 18 Nê kurũm kuwy hkũm xàpir o pa hã omu nê tee ri mẽ hkukamã hamaxpêr nê axpên mã:

Hêxta waa nê. Krĩ mũj na pre mex o mex. Mex o krĩ piitã hakrenh par htã hapêx pa. Anê.

19 Hãmri nê mur nê hkaprĩ xàj pika hkwý jamý nê ho amnhĩ kamĩ nê mýr kãm kapêr o:

Hêxta waa nê. Krĩ mũj na pre rax o rax.

Nhũm pre nhỹhỹnh pãr kãm mẽmoj to wênê ho pa xwýnhjaja mẽ hwýr mẽmoj to pa nê mẽ kãm ho wênê nê mẽ hkukwak ri hikãxpore rũnh nê ri pa.

Tã hãmri mẽ hapêx pa. Anê.

20 Hãmri nhũm Tĩrtũmja krajê piitã mẽ kãm kapêr nê mẽ kãm:

E ixpê Tĩrtũm na pa ã mẽ hipêx anê.

Mẽ kot mẽ apê ixkrajaja tanhmã mẽ atomnuj to ho paja mýrapê na pa mẽ atã ã mẽ hipêx anê.

Jakamã e kaxkwa kamã mẽ apê ixri mẽ apa xwýnhjaja.

Nê mẽ ate inhỹ hã ri mẽ kãm ixkapêr jarênh o mẽ apa xwýnhjaja.

Nê Jesus nhỹ hã mẽ akapêr o ri mẽ apa xwýnhjaja. Mẽ apiitã mẽ apê ixkra na ka mẽ.

E mẽ amnhĩ tã ja pumu nê akĩnh nê axpên mã apikunhar o akuhê. Pa na pa mẽ atã ã mẽ ho ijapêx anê. Anê.

21 Tã nhũm kapêr o mẽ wrýk xwýnhjê hõja hihtýx o kên rax kumrêxja mý nê o tẽ nê gô xujanãr kamã kãm gêt nê kumê nhũm mrõ nê akunok. Hãmri nhũm kapêr o:

E krĩta koja Tĩrtũm te ho ixte gôx kãm kên mênh nhũm mrõr nê hpikunor pyrãk o hipêx nhũm hapêx par kumrêx.

22-24 Na pre hte krĩja kamã mẽ kot ri mẽ kãm mẽmoj to wênê xwýnhjaja amnhĩ to rũnh o krĩ piitã hkôt mẽ hakrenh pa.

Nê krĩ nhõ xwýnhjaja na prem pika piitã hkôt hêx rom tanhmã mẽ no kupyr to ho ri pa. Jakamã ra mẽmoj to wênê xwýnhjê pyrã nê mẽ hikukrêx rũnh gryk ã Tĩrtũm kaga.

No ãm ja pix kêt. Tĩrtũm krajê mẽ Tĩrtũm nhỹ hã kapêr o mẽ pa xwýnhjaja na prem mẽ himex rax nê. Hãmri nhũm krĩ piitã kamã mẽ pa xwýnhjaja mẽ kot mẽ hipêx ã mẽ omu nê mẽ urãk nê ã mẽ hipêx anhýr o pa.

Tã Papirõn nhõ xwýnhjaja kot mẽ hipêx anhýrja mýrapê koja Tĩrtũm mẽ himex par kumrêx.

Jakamã koja mẽ axte hkĩnh nê hkĩnh xàj ri grer kêt nê.

Nê axte hkĩnh nê grer kãm hakwa kôr o ri pa kêt nê.

Nê axte ri wiorãw kakrênh hkêt nê.

Nê axte ri amnhĩm kawà hyr o hkrĩ hkêt nê.

Nê axte harôj kahuk o kuhê hkêt nê.

Nê axte mẽ ôrkwý kamã kanê hpôk kêt nê.

Nê axte axpên mã ri hkrajê rer o ri pa hkêt nê. Koja ã mẽmoj kot anhýr piitã hapêx pa. Anê.

19

Mẽ kot Tĩrtũm mex ã mẽ harênh

1 Tã pa kê axte mẽmoj pumu. Nê kaxkwa kamã mẽ kapêr mã nhũm mẽ ohtô rax kumrêx nê tanhmã axpên

mã kapêr to. Nê anhîpê kàx pê kapêr tỳx nê kapêr o:

E pu mẽ pahpiitã Tirtũm mã mex o mex ã harê.

Tapxipix na hihtỳx o hihtỳx.

Nê tapxipix na àhpumunh o àhpumunh.

Nê tapxipix na mex o mex.

Tapxipix na mex o kot mẽmoj piitã hakrenh par.

Ra kot mẽmoj punuj pê mẽ papytãr par jakamã kêp mẽ papytãr xwỳnh ã pixi mex na.

² Na hte amnhĩ jarênh xà hkôt tanhmã mẽmoj to ho pa.

Nê amnhĩ to hêx kêt nê.

Tã ãm hãmri na ã Papirõn nhõ xwỳnhjê nhîpêx anê.

Na prem mẽ kãm Tirtũm kapêr jarênh o mẽ pa xwỳnhjê nhîmex rax kumrêx.

Nê krĩ piitã hkôt ri pa nê amnhĩ kôt mẽ kurê nhũm mẽ kuma nê mẽ hkôt amnhĩ tomnuj o pa.

Nhũm Tirtũm tee ri hã mẽ omu nê ã hkrajê hã mẽ hipêx kati anê. ãm hãmri na ã mẽ hipêx anê.

Anhỳr o axpên mã harê. ³ Hãmri nê xatã axpên mã:

Nà ãm hãmri na ã mẽ panhõ Tirtũmja mẽ hipêx anê nhũm mẽ kurũm kuwy hkũm kàx mã àpir o pa.

Koja krĩ nhõ xwỳnhjaja amnhĩ xà htỳx kamã hamak rãhã ho pa nê aa à htỳx hapêx kêt.

E pu mẽ hã Tirtũm mã mex o mex ã harê. Anê.

⁴ Hãmri nhũm mẽ àptãr tũm pê 24 mẽ mẽmoj tĩr pê kwatjaja hãmri Tirtũm kot mẽ ho amnhĩptãr ã hkrĩ xà maati kutã rôrôk nê kãm hipô hpa. Hãmri nê ã mẽ kapêr anhỳr xwỳnhjê mã kapêr nê kãm:

Nà ãm hãmri na ka mẽ ã Tirtũm mex ã harênh anê. E pu mẽ pahpiitã kãm mex o mex ã harê. Anê.

⁵ Hãmri nhũm mẽhõja Tirtũm krĩ xà maati kamã kapêr o:

E mẽ axte Tirtũm mã mex o mex ã harê.

Mẽ ate Mẽpahpãm kôt amnhĩ nhîpêx o mẽ apa xwỳnhjaja.

Nê mẽ apê mẽ ho amnhĩptãr xwỳnhjaja nê amarĩ ri mẽ apa

xwỳnhjaja nê mẽ apiitã mẽ ate Tirtũm ã apijaãm o mẽ apa xwỳnhjaja kãm mex o mex ã harê. Anê.

Kot mẽ pahpãnhã amnhĩrer xwỳnh mẽ hkwỳjê jarênh

⁶ Tã pa tanhmã mẽ kapêr to hã mẽ kuma nhũm mẽ kàx pê kapêr tỳx nê. Te mẽ ohtô rax kumrêx kapêr pyrãk. Nê te gô koko htỳx rỳ na katôtôk tỳx pyrãk. Hãmri nê mẽ kapêr o:

E na ra Tirtũm kêp mẽmoj piitã ho amnhĩptãr xwỳnh.

Nê kêp mẽ panhõ Pahi Maati.

Nê hihtỳx o hihtỳx nê àhpumunh o àhpumunh.

E pu mẽ kãm mex o mex ã mãn harê.

⁷⁻⁸ Nê hã pahkĩnh nê.

Nê kãm hihtỳx o hihtỳx ã harê.

Te mẽ kot axpên mã mẽ rer xwỳnh kot amnhĩ nhîpêx pyrãk.

Jao mẽ pahte amnhĩ tomnuj pãnhã amnhĩrer xwỳnhhta te kêp myja pyrãk.

Nê mẽ kot hkôt amnhĩ nhîpêx xwỳnh piitã te mẽ kêp nija pyrãk.

Nê te mẽ kot axpên mã wa rer nhũm wa kot axpên kôt pa ho pa pyrãk o koja mẽ amnhĩ nhîpêx.

Nê te mẽ kot mjên mã xwỳnh mã ê mex jakare nhõr nhũm kot hagjênh pyrãk. Nê ê mexja te mẽ kot tãm amnhĩ nhîpêx xà pyrãk. Anê.

⁹ Hãmri nhũm Tirtũm kapêr o wryk xwỳnhja inhmã:

—E Juãw. Pa amã mẽmoj jarê ka mar tỳx nê akwỳjê mã hã kagà. Tirtũm kapêr kwỳ kot paj amã harê. Kêp Tirtũm kapêr jakamã ãm hãmri na. Na hte mẽmoj jarênh o hêx kêt nê. E kapêr ã kagà ho:

Na htem axpên mã mẽ rer kaxyw nê amnhĩ wỳr hkwỳjê wỳ nhũm mẽ hwỳr mra nê wa hã hkĩnh nê apkur mex nê.

Ja pyrã nê Tirtũm kot amnhĩ wỳr mẽ hwỳr xwỳnhjaja koja mẽ nhỹrmã mẽ pahte amnhĩ tomnuj pãnhã amnhĩrer xwỳnhhta

wÿr api nê ã amnhĩ nhĩpêx anê
nê hkĩnh nê apkur mex nê.

Hãmri nhũm Tĩrtũm mẽ ho mex rax
kumrêx. Anê.

—E kêr ka ã akwÿjê mã ja hã kagà anê
Juãw. Anê.

Hãmri pa kuma nê kagà ja kamã
mẽ amã hã kagà. ¹⁰ Hãmri nê hã
kagà hpa nê ra ixte kãm mex o mex ã
harênh kaxyw kutã ixkõn krã ho tẽm
nê nhỹ nhũm tee ri amnhĩ tã ixpumu
nê inhmã:

—Kwa ã ri inhĩpêx anhÿr kêt nê.
Apyrà nê ixte Jejus mã tanhmã amnhĩ
nhĩpêx to xwÿnh kênã. Jejusja apyrà
nê kêp inhõ pahшти na. Jejus kapêr na
prem hkukamã mẽ kot Tĩrtũm nhỹ hã
kapêr o mẽ pa xwÿnhjaja hã kagà nê
mẽ kãm harênh o pa. Jakamã kwa pu
mẽ Tĩrtũm pix kutã mãn pahkõn krã
ho parôrok nê pahkrĩ nê kãm mex o
mex ã harê. Anê.

Kawar jaka hã ÿr xwÿnh jarênh

¹¹⁻¹⁶ Tã pa kê axte mẽmoj pumu.
Nhũm kaxkwa axkjê nhũm kamã
kawar jakajre xa nhũm mẽhõja hã
nhỹ. Hixi na pre kêp “Aa kot Tĩrtũm
kaga hkêt xwÿnh.” Anê nê hixi hõ na
pre kêp: “Tĩrtũm kôt pix mã amnhĩ
nhĩpêx o pa xwÿnh.” Anê. ã hixi
kot anhÿr jakamã na hte katãt kôt
ahpÿnhã mẽ kot amnhĩ nhĩpêx ã mẽ
omunh xà hkôt tanhmã mẽ harênh to.
Mẽ kot amnhĩ to mex ã mẽ omunh xà
hkôt tanhmã mẽ hkwÿjê jarênh to nê
mẽ kot amnhĩ tomnuj ã mẽ omunh xà
hkôt ahpÿnhã tanhmã hkwÿjê jarênh
to. Na pre mẽ kot tanhmã hkwÿjê
nhĩpêx to ho pa xwÿnhjê kutã amnhĩ
xunhwÿ nê mẽ hã tanhmã mẽ ho.
ã na pre kawar ã ÿr xwÿnhja amnhĩ
nhĩpêx anhÿr o pa.

Nê no te kot kuwy hpôk pyrãk
jakamã hprĩ hã mẽmoj piitã omu
nhũm mẽmoj kêp hpimxur kêt nê. Nê
kêp pahi hã mẽ ahkà ho ohtô nê kutu.
Nê nhỹhÿnh ï hã hixi hõ hã kagà
nom ãm tapxipix kot amnhĩ tã amnhĩ
nhĩxija pumunh. Na pre ra amnhĩ
kamrô ho ê xy hpa nê xa. Nê hixi hõ
pê:

TĨRTŪM KAPĚR O AMNHĨRĪT XWŸNH

Nê ê ryti hã hixi hõ hã kagà. Nê ihkjê
hã ãm tãm. Hã kagà jarênh kot:

Ixpê mẽ ho amnhĩptãr xwÿnh piitã
mẽ õ Pahi Maati na pa.

Nê hakwa rũm wapo xwa gixre
põm katon ajêt. Kot ho tanhmã
mẽ kot Tĩrtũm mẽ wa kutã amnhĩ
xunhwÿr xwÿnhjê nhĩpêx to kaxyw.
Jakamã ra mẽ piitã mẽ ho pikuprõnh
pa nê mẽ hipêx o te mẽ kot prês kãm
uwa xô kagô janênh pyrãk nhũm mẽ
hkamrô hpikapĩr rax kumrêx. Tĩrtũm
xihtÿx xwÿnh kot mẽ kamã gryk tÿx
jakamã nhũm ã kãm mẽ hipêx anê.
Mẽ kot amnhĩ tomnuj o paja mÿrapê.

Nhũm õ pôristi piitã urãk nê kawar
jakare hã hkrĩ nê hkôt ri pa. Mẽ ê jaka
muxre jagjê nê hã ma hkôt ri pa.

¹⁷⁻¹⁸ Tã pa axte Tĩrtũm kapêr o mẽ
wrÿk xwÿnh õja pumu nhũm myyti
kutã xa nê kax pẽ nhõnhti mã kapêr
nê mẽ kãm:

—E mẽ amnê mẽ ixwÿr wrÿ nê
Tĩrtũm ã akĩnh nê mẽ htyk nê mẽ
hikwÿ xwÿnhjê hã atu nê aku. Mẽ
ho amnhĩptãr xwÿnhjaja nê pôristijaja
nê mẽ hkrãhtũm nê kawar nê kawar
ã mẽ hkrĩ nê ri mrar xwÿnhjaja nê
mẽ kot amnhĩ to rũnh xwÿnhjaja nê
mẽ kot amnhĩ to hkryre xwÿnhjaja.
Nê mẽ kãm mẽ àpênh xwÿnhjaja nê
amnhĩ mã ri mẽ àpênh xwÿnhjaja. ãm
mẽ htyk nê mẽ hikwÿ xwÿnh mÿj pi-
itã mãmrĩ mẽ hwÿr wrÿ nê mẽ hã atu
nê mẽ aku. E mẽ tokyx nhõnhti. Anê.

¹⁹ Tã nhũm mrymnuti nê krĩ piitã
hkôt mẽ õ pahi nê mẽ õ pôristijaja
piitã axpên wÿr akuprõ. Wam kawar
jakare hã ÿr nê htẽm xwÿnh mẽ õ
pôristijê hwÿr hprõt nê mẽ hkurê
kaxàr kaxyw axpên mar kaxyw
akuprõ.

²⁰⁻²¹ Hãmri nê mẽ hwÿr mra nê mẽ
hkurê kapa. No ãm tee ri amnhĩ
nhĩpêx nê tee ri kãm tanhmã mẽ ho
hprãm hkapyrÿ nhũm wam kawar
jakare hã ÿr nê htẽm xwÿnhhta hakwa
rũm wapo xwagixre kator o mẽ
himex pa. Hãmri nhũm mẽ hkwÿjê
pyrãn htyk pa nê hikwÿ. Nhũm
nhõnhti mẽ omu nê mẽ hwÿr wrÿk
o mra nê mẽ kuku hãmri nê kãm mẽ

hkur kaga nê mē hkaga. No nhūm mrymnuti nê ŷ hā mē kām hēx o pa xwýnhhta wa nhūm mē axtem nê htír rāhā wa unē nē ma wa o tē nē ēsôf o kuwy maati kamā wa kumē. Hāmri nhūm wa kamā htír tūm nē hxēt rāhā nē pa ho pa nē aa htyk kēt nē.

20

Mē kot Satanasti hpa hpre hā mē harēnh

Wam Korīt 15.20-28

¹ Tā pa kê axte mēmoj pumu. Nhūm Tirtūm kapēr o mē wrýk xwýnhjê hōja kaxkwa rūm wrý nē ahkre xupýmti hpro xā ho htýx xā hā safja py nē kàx pytíhti ho mē hpre xāja ō py. ²⁻³ Hāmri nē kagāmnuti pē hēx xwýnh maati Satanastija pynē. Amnepēm Atāw mē Ewa wa kām hēx xwýnhhta pynē nē kàx pytí o hpa hpre nē hte hpre hāmri nē ahkre xupýmti nhítom xā mē nē kamā kumē. Hāmri nē akupým hpro xā ho hpro nē saf o hā ho htýx. Kot pika piitā hkôt mē kām hēx o pa pymaj ā hipēx anē. Koja tokyx kator kēt ry rax kumrēx. Koja kamā arī hkrī hā amgrā xohtō nē. Hā amgrā pē 1.000 nhūm rī kormā Tirtūm akupým kator nhūm kato nē ri pa. Nom pa hkrānre.

⁴ Tā pa mē htyk nē akupým mē htír xwýnh kwýjê pumu. Kormā mē htír ri na prem Tirtūm kapēr kôt pix mā amnhī nhīpēx o pa. Nē Jejus kēp mē ō pahíhti hā harēnh rāhā ho pa. Aa mē kot mrymnuti kutā hkōnkrā ho rôrôk nē kām mex ā harēnh kēt. Nhūm prem tee mē ōkrā hā nē mē ihkra katut ā mrymnuti nhīxi nhīpēx kaxyw nom nhūm prem hkaga kamā hihtýx nhūm prem kām mē hkurē xwýnhjaja tee ri ja hā mē omu nē mē mut jakār o mē kupa. Hāmri nhūm Tirtūm akupým mē ho mē htír nē mē kot mē ho amnhīptār ā hkrī xā kamā mē hkrī. Jejus nhīhkô hā mē hkrī hā amgrā pē 1.000 kaxyw. ⁵ Mē kumrēx na pre Tirtūm akupým mē ho mē htír nhūm mē hkwýjaja mē hkīnh ā arī ty nē hikwý hā amgrā pē 1.000 jakre nhūm rī kormā akupým mē ho mē htír.

⁶ Wam akupým mē htír xwýnhjaja kēp Tirtūm kra jakamā koja mē Tirtūm kra hkēt xwýnhjê kurom hkīnh nē pa ho pa. Nē mē kurom mē kot amnhī xā htýx kamā hamak o pa htūm xā wýr pa hkēt nē. Nē mē kurom Tirtūm mē Kra Jejus Kris wa kuri mex kumrēx nē wa kām tanhmā ri amnhī nhīpēx to ho pa. Nē Jejus nhīhkô hā mē ho amnhīptār o pa hā amgrā pē 1.000.

Tirtūm kot kuwy hwýr Satanasti mēnh ā harēnh

⁷ Tā koja amgrā pē 1.000 hapēx nhūm rī kormā Tirtūm kapēr o wrýk xwýnhja akupým ahkre xupým wýr tē nē Satanasti mā kahē xā mē nhūm kato. ⁸ Hāmri nē kê axte pika piitā hkôt tanhmā mē kām hēx to ho ri pa. Gorti nhō xwýnhjê mā nē Makok nhō xwýnhjê mā nē krī piitā hkôt Tirtūm nē tanhmā mē kām hēx to ho mē hkôt pa. Hāmri nē mē kot Tirtūm krajê kutā amnhī xunhwýr nē mē hkurē kaxār kaxyw amnhī kwýjê ho akuprō nhūm mē ohtō rax kumrēx nē axpēn wýr akuprō. Te pikahti grā xohtō pyrāk.

⁹ Hāmri nē ma Tirtūm krajê nhīmex par kaxyw mē hwýr mra nē mē ō krī mā hipôk pa nē kuhē. Mē ō krīja Tirtūm mā mex tā nhūm mē kot kēp grānh par kaxyw ma hwýr mra. Hāmri nhūm kaxkwa rūm kuwy hpôkja mē haēr pē mē hā rôrôk nē mē ho hxēt pa.

¹⁰ No mē kām hēx xwýnh maati Satanastita nhūm Tirtūm kapēr o wrýk xwýnhja axte unē nē ma ēsôf o kuwy maatita wýr o tē nē kamā kumē. Ra mē kot kamā mrymnuti wa kot Tirtūm nē mē nokupyr o pa xwýnh wa mēnh tā wa hkôt Satanasti mā ho anē nē kamā kumē nhūm kamā pa ho pa. Koja mē aa kator kēt kumrēx. Nē arī kamā amnhī xā htýx kamā hamak rāhā nē pa ho pa.

Tirtūm kot ahpýnhā tanhmā mē piitā mē harēnh to kaxyw

Matêwre 25.31-46; Juāw 5.25-29

¹¹ Tā pa axte mēmoj pumu nhūm kaxkwa mē pikaja wa ra hapēx pa.

Pa Tirtûm kot tanhmã mẽ piitã mẽ harênh to hã hkrĩ xà raxja pumu. Nhũm hakajre nhũm Tirtûm kamã nhỹ.

12-13 Hãmri nhũm ra mẽ htyk nẽ mẽ hikwỹ xwýnh piitã akupỹm hapôx pa nẽ Tirtûm kot tanhmã mẽ harênh to hã hkrĩ xàta kutã hkrĩ pa. Mẽ piitã. Mẽ kot amnhĩ to rũnh xwýnhjaja nẽ mẽ kot amnhĩ to hkryre xwýnhjaja nẽ mẽ ho amnhĩptâr xwýnhjaja nẽ gô xujanâr kãm mẽ mrôr nẽ mẽ htyk xwýnhjaja. Ra mẽ htyk nhũm mẽ kot mẽ hagjênh xwýnhjaja piitã mẽ htykjê papxà rũm hapôx pa nẽ Tirtûm kutã ohtô ho ohtô nẽ hkrĩ. Hãmri nhũm Tirtûm ô kagà py nẽ kamã mẽ piitã mẽ hixi japêr. Kagà kamã ra mẽ hkukamã mẽ htĩr tũm nẽ mẽ pa ho mẽ pa mã xwýnhjê nhĩxi japêr. Nẽ kagà hõ kamã mẽ htĩr ri tanhmã mẽ kot amnhĩ nhĩpêx to ho pa hã mẽ piitã mẽ hã kagàja. Nhũm kupy nẽ kamã tanhmã mẽ harênh to nẽ hkôt hprĩ hã mẽ piitã mẽ omunh pa nẽ rĩ kormã ahpýnhã tanhmã mẽ harênh to.

14-15 Hãmri nẽ mẽ htĩr tũm nẽ mẽ pa mã xwýnhjê nhĩxi hã kagàja kamã tee ri mẽ hkwyjê nhĩxi japêr nhũm kamã amrakati. Jakamã nhũm mẽ ma kuwy maatita wýr mẽ o mra nẽ kamã mẽ rênh pa. Te axte mẽ htyk nhũm mẽ kot kuwy kamã mẽ hagjênh pyrãk nhũm mẽ kamã rôrôk nẽ tee ri amnhĩ xà htýx kamã hamak rãhã nẽ pa ho pa nẽ aa kator kêt kumrêx.

21

Pika mẽ kaxkwa wa nyw jarênh Sikũn Pêtre 3.8-13

¹ Tã pa axte mẽmoj pumu. Nhũm Tirtûm ra pika mẽ kaxkwa nyw wa ho kato. Ra pika nẽ kaxkwa nẽ gô xujanâr tũmja hapêx pa nhũm kaxkwa mẽ pika nyw wa ho kato. Nom axte gô xujanâr o kator kêt nẽ.

² Hãmri nhũm Tirtûm nhõ krĩ mex pê Jerujarê nywja tanhmã amnhĩ to nẽ pika nyw wýr wrýk o mō. Krĩja mex kumrêx. Mex o mex. Te mjên mã xwýnh ê mex jaxàr nẽ amnhĩ to

muxre nẽ mjên wýr htêm pyrã nẽ pika nyw wýr mex kumrêx nẽ wrýk o mō.

³ Hãmri nhũm Tirtûm kot mẽ ho amnhĩptâr ã hkrĩ xà maatija kamã mẽhõja kapêr o:

—Nà ãm hãmri. Na ra Tirtûm hkrajê hkôt pa ho pa. Pika nyw kamã mẽ hkôt pa ho pa nhũm mẽ tã no ho omu nẽ hkôt pa ho pa rãhã nẽ. Nà ãm hãmri. Ja mex o mex.

⁴ —Koja hkrajaja hkôt pa ho pa nẽ axte htyk kêt kumrêx. Nhũm Tirtûm mẽ nẽ mẽ no kagô nhĩnhĩnh pa nhũm mẽ axte hkaprĩ nẽ mýr kêt nẽ. Nẽ ri axte amnhĩ xà kamã hamak kêt nẽ. Nẽ axte ri tanhmã omnu hto hkêt nẽ. Ra mẽ hkaprĩ nẽ ã nẽ mýr o pata hapêx par kumrêx nhũm hpãnhã mẽmoj nyw pix. Anẽ.

⁵ Hãmri nhũm Tirtûm tãm tanhmã inhmã kapêr to. Krĩ xà maati kamã ýr xwýnhnta tãm inhmã kapêr o:

—E na pa ra akupỹm mẽmoj piitã ho nyw pa. Jakamã e Juãw. ãm hãmri na pa ã amnhĩ kukamã amã mẽmoj jarênh anẽ. Ixêx kêt. Jakamã kêt ka akwýjê mã piitã hã kagà hpa. Kê mẽ kamã harê nẽ tokyx kuma nẽ hkôt hamaxpêr rãhã ho pa.

⁶ —Ra ixte amnhĩ kukamã mẽmoj mã ijamaxpêr xwýnhja na pa ra ho anhýr pa. Ixpê mẽmoj piitã ho anhýr o hkrax xwýnh nẽ mããnen ixpê mẽmoj piitã ho ijapêx par xwýnh. Nẽ ixrãhã ixpa xwýnh. Amnepêm kormã mẽmoj kator kêt ri na pa pre ixrãhã ixpa. Nẽ ot pa arĩ ixrãhã ixpa. Tã mẽ kãm kôr nẽ kãm gô hkwy ho hkôm hprãm xwýnhjê pyrã nẽ mẽ kãm ixpix prãm xwýnhjaja kot paj te mẽ kãm inhõ hino rũm gô hkwy nhõr nhũm mẽ kot ho hkôm pyrãk o mẽ hipêx. Hãmri nhũm mẽ htĩr tũm nẽ ixri pa ho pa nẽ axte htyk kêt nẽ. Kot paj ã mẽ hipêx mex anẽ.

⁷ —Mẽ ate tanhmã amnhĩ tomnuj to nẽ amnhĩ to htýx nẽ ixkôt pix mã amnhĩ nhĩpêx o mẽ apa rãhã mẽ atyk xwýnhjaja kot paj ã mẽ anhĩpêx mex anẽ. Ka mẽ apê ixkra hã amex nẽ ixkôt ri apa rãhã ho apa. Pa ixpê mẽ

anhõ Tirtüm ã tanhmã mẽ ato mex to rãhã ho ixpa.

⁸ –No mẽ kot amnhĩ kaxyw ixkõt hamaxpër kêt xwýnhjaja. Nẽ mẽ kot amnhĩ tomnuj xwýnhjaja nẽ mẽ kot ri mẽ hpar prãm xwýnhjaja. Nẽ mẽ kot nhãm ri mēnijê ho amnhĩkati xwýnhjaja. Nẽ wajagajaja. Nẽ mẽ kot amnhĩ to sãnti hwýr o pa xwýnhjaja. Nẽ ri mẽ hêx nhi xwýnhjaja. ã mẽ kot amnhĩ nhĩpêx anhýr xwýnh piitã koja mẽ apê ixkrajê hkĩnhã ma kuwy maati wýr hapêx par kumrêx. Te axte mẽ htyk pyrãk nom koja mẽ axte htyk kêt nẽ. Anẽ.

Jerujarẽ nyw jarẽnh

Sikũn Korõt 6.16; Karatas 4.26; Eprêw 12.22-24

⁹ Tã nhũm mẽ kot xijere pẽ 7 kamã Tirtüm gryk xà jamýnh xwýnhjê hõja hãmri ixwýr tẽ nẽ inhmã:

–E ma ixkõt tẽ nẽ mẽmoj pumu. Na ra krĩ nywja pika nyw wýr wrýk o mõ. Te mjên mã xwýnh ê mex jaxàr nẽ amnhĩ to muxre nẽ mjên wýr htēm pyrã nẽ mex kumrêx nẽ kaxkwa rũm pika nyw wýr wrýk o mõ. Nẽ kot ho mjên mã xwýnh ta te mẽ pahte amnhĩ tomnuj pãnhã amnhĩrer xwýnh ta pyrãk. E tokyx tẽ nẽ omu. Anẽ.

¹⁰ Hãmri nhũm Tirtüm Karõ tanhmã ixto pa ma kot inhmã kapër xwýnh ta kõt tẽ nhũm ma ixto mõ nẽ kēn krã hprêeti hwýr ixto api nẽ himõk ã ixãm. Pa Tirtüm nhõ krĩ mex pẽ Jerujarẽ nywja pumunh o xa. Nhũm mex o mex. Am hãmri te mjên mã xwýnh kot ê mex jaxàr nẽ amnhĩ to muxre nẽ mjên wýr htēm pyrã nẽ ahpar mã wrýk o mõ pa ixprĩ hã omu.

¹¹ Na pre rax o rax nẽ mex o mex. Tirtüm kamã pa ho pa jakamã nhũm kamã hirã htýx kumrêx. Te kēn mex ã kãxpore xohtõ jaxênh mex týx pyrãk.

¹²⁻¹³ Nẽ krĩ puhã kahêja hprêk rax nẽ. Nẽ hwýr mẽ gjêx xà kęp 12. Na pre myt japõx xà rũm axkrunêpxi. Nẽ myt gjêx xà rũm haxwýja axkrunêpxi. Nẽ akutã kahpa hkõt haxwýja axkrunêpxi. Nẽ ahpýnhã hakwakre hã Tirtüm kapër

o wrýk xwýnhjaja hamãr o kuhê. Nẽ hakwa kre piitã hã Ijaew pẽ ahpýnhã mẽ pikjêr kãm mẽ kęp 12jaja mẽ hixi hã kagã.

¹⁴ Nẽ kahê xunhwýr xà hkukamã kēn pytyrja ahpýnhã kęp 12. Kēn pytyrta ã na mẽ kot Jesus nhỹ hã mẽ ahkre o mẽ pa xwýnh maati pẽ 12jê nhĩxi hikwý.

¹⁵ Tã nhũm kot ixto mõr nẽ inhmã mẽmoj jahkre xwýnh ta ôr o mẽmo pi py nẽ kot ho krĩ ho mĩdi kaxyw xa. Nẽ ho kahê piitã ho mĩdi kaxyw. Nẽ mẽ gjêx xàja ho mĩdi kaxyw.

¹⁶⁻¹⁷ Hãmri nẽ ho mĩdi hpa. Krĩja ry nẽ kahpa piitã axpēn pyrãk. Nẽ hprêk piitã mãânēn axpēn pyrãk. Kamã mẽmoj piitã ahpýnhã kęp 2.200 kirõm. No puhã kahêja hprêk o 64 met pix nẽ.

¹⁸ Nẽ kahêja kēn jaxênh pix o kot amnhĩ nhĩpêx jakamã mex o mex. Nẽ hkarýr týx kumrêx. Nẽ kahê hkre kamã krĩ kamã ahpýnhã ri ixkreja ôr pix o kot amnhĩ nhĩpêx. Nẽ piitã hkarýr týx.

¹⁹⁻²⁰ Nẽ kahê xunhwýr xà hkukamã kēn pytyrta ahpýnhã ri kēn mex pix o kot amnhĩ nhĩpêx. Piitã mex kumrêx nẽ hkarýrti.

Wamta kawax pẽ grãgrãre.

Nẽ hkõt ja kawax pẽ grãgrã kakrã htyk.

Nẽ hkõt ja kakrã htyk.

Nẽ hkõt hõja grãgrã karýr.

Nẽ hkõt ja hkamrêk pihkãrti.

Nẽ hkõt ja grãgrã kakrã htyk.

Nẽ hkõt ja hkamrêk týx kumrêx.

Nẽ hkõt ja rãràare.

Nẽ hkõt ja grãgrã mẽ pihkàr.

Nẽ hkõt ja rãràr mẽ pihkàr.

Nẽ hkõt ja grãgrã karýyre.

Nẽ hkõt ja kakrã htyk pihkàr.

ã kēn pytyr mex kot anhýr.

²¹ Nẽ mẽ gjêx xà hã hakwakre kahê xà pẽ 12ja mẽmo kēn jakooti rũnh kumrêx pix o. Nẽ krĩ kahti hkõt pry nhĩkwý xwýnhja ãm ôr pix o. Nẽ hkarýyre.

²² Pa pre tee ri krĩ kamã Tirtüm mã amnhĩ jarẽnh xà hã ixkre japêr nhũm amrakati. Mo kaxyw koja mẽ

axte ixkreja hwÿr mra? Ra Pahi Maati Tirtÿm xihtÿx xwÿnh mẽ mẽ pahte amnhÿ tomnuj pãnhã amnhÿrer xwÿnhhta ra hkrajê kamã pa ho pa kênã kot kêt mẽ axte ri ixkreta o presija. Koja mẽ kãm wa mex ã wa kãm harênh prãm nê nhÿri tãm wa hwÿr mra nê ã wa kãm kapêr anê. Te mẽ pahte pahi hwÿr pamrar nê kãm pakapêrta pyrã nê wa hwÿr mra nê wa kãm kapêr.

²³ Nê koja krÿja kamã myyti nê mytwrÿre hkêt. Mo kaxyw kot kêt myyti nê mytwrÿreja arÿ ri hirã ho pa? Krÿ kamã Tirtÿm pa ho pa jakamã kamã hirã mex kumrêx. Nê mẽ pahte amnhÿ tomnuj pãnhã amnhÿrer xwÿnhhta haxwÿja kamã pa ho pa. Te kêp kanê hpôk rax kumrêx pyrã nê hirã mex o pa. Kot hirã mex o kot myyti jakrenh. ã Tirtÿm mẽ Kra wa krÿja kamã pa ho pa jakamã nhÿm mẽ axte myyti ho presija hkêt nê.

²⁴ Koja krÿ nhõ xwÿnhjaja hirã mex pix kãm ri pa ho pa nê tãm ri amnhÿ nhÿpêx o ri pa. Tã koja mẽ ho amnhÿptar xwÿnhjaja Tirtÿm wÿr mra nê amnhÿ rom kãm mex o mex ã harê nê kãm:

–Na pre mẽ ixkwÿjaja mẽ ixpê mẽ ho amnhÿptar xwÿnh ã axpên mã mẽ inhmex nê mẽ ixàhpumunh ã ri axpên mã mẽ ijarê. Nom mẽ ixrom amex o amex nê axàhpumunh o axàhpumunh. Jakamã ãm hãmri na htem amã amex o amex ã ajarê Tirtÿm. Anê.

²⁵ Nê krÿ hwÿr hakwakre koja amnhÿ kahê xà rênh rãhã kuhê nê aa amnhÿ kahê hkêt nê. Jar mẽ panhõ pika kamã na hte kamàt kaxyw nhÿm htem amnhÿ tã hakwakre kahê hpa. No mo kaxyw koja mẽ axte pika nywja kamã ã amnhÿ nhÿpêx anê? Koja kamàt kêt nê hirã rãhã ho rãhã jakamã nhÿm mẽ amnhÿ tã kahê hkêt rãhã nê pa ho pa.

²⁶ Nê koja mẽ piitã Tirtÿm wÿr mra nê kãm mex o mex ã harê nê kãm:

–Pa Tirtÿm. Hêxta waa nê. Anhõ krÿja mex kumrêx. Mex o mex. Nê mẽ ixrom amex o amex nê axihtÿx o axihtÿx. Nê mẽ ixrom axàhpumunh o

axàhpumunh. ãm hãmri na ka ra mẽ ixpê akrajê kamã apa ho apa Tirtÿm. Anê.

²⁷ Nê koja mẽmoj punuj krÿja wÿr gjêx kêt kumrêx. Mẽ hpijaam kêt xwÿnhjaja nê ri mẽ hêx xwÿnhjaja hwÿr gjêx kêt nê. ãm mẽ pahte amnhÿ tomnuj pãnhã amnhÿrer xwÿnhhta nhõ kagã kamã Tirtÿm ri mẽ htÿr tÿm nê mẽ pa mã xwÿnhjê nhÿxi nhÿpêx xwÿnh pixjaja koja mẽ hwÿr agjê nê kamã pa ho pa.

22

¹⁻² Tã pa pre axte mẽmoj pumu. Nhÿm Tirtÿm kapêr o wrÿk xwÿnhja axte inhmã mẽmoj jahkre. Nhÿm Tirtÿm mẽ kot mẽ pahpãnhã amnhÿrer xwÿnhja wa kot mẽ ho amnhÿptar ã hkrÿ xà maati rÿm pyhti hprôt. Krÿ kahti hkôt pry pohti nôr xwÿnhhta kahti hkôt hprôt o nõ. Pyhti kamã gôja na htem ho ixkõ nê htÿr tÿm nê pa ho pa. Gô karÿÿre. Nhÿm mẽmo pÿ hpàr muxre xwÿnhja akutã hijê nê xa. Pÿ xôja na htem kuwô nê htÿr tÿm nê pa ho pa. Na hte apkati mẽ ô rãhã nê kuhê. Nê axtem hôja mẽ piitã mẽ mex nê à hkêt kaxyw na hôja.

³ Annepêm na pre Tirtÿm Atãw mã kapêr nê kãm:

–Ate amnhÿ tomnuj mÿrapê kot paj tanhmã pika homnu hto nhÿm apê mex kêt nê. Ka kamã apur nê kamã axàpênh rÿnh o apa rãhã nê rÿ kormã kamã axàpkur o ri apa. Apê jamnuj tã kot kaj mẽ ã amnhÿ nhÿpêx anhÿr o apa rãhã ty. Anê.

Tã ra Tirtÿm nhõ krÿ nyw kamã mẽ omnuj xàja amrakati kumrêx. Nê Tirtÿm mẽ kot mẽ pahpãnhã amnhÿrer xwÿnhhta wa ô krÿ kamã pa ho pa jakamã mẽ pahte kamã mẽ papa xwÿnhjaja kot puj mẽ wa kãm tanhmã amnhÿ nhÿpêx to ho ri papa.

⁴ Kot puj mẽ tã pano ho Tirtÿm pumunh o papa. Hãmri nhÿm te mẽ pahpiitã mẽ panhõkrã hã amnhÿ nhÿxi nhÿpêx pyrãk o mẽ panhÿpêx.

⁵ Nê kot puj mẽ Pahi Maati Tirtÿm nhÿrã kamã ri papa nê axte myyti nhÿrã ho presija hkêt nê. Koja kamàt

hapêx pa pu mē axte kanê ho presija hkêt nê. Nê Jejus nhîhkô hã hirã kamã mēmoj to amnhîptâr rãhã ho papa.

Jejus tokyx akupÿn wryk ã harênh Apokarip 1.1-3

⁶ Tã nhÿm Tirtÿm kapêr o mē wryk xwÿnh kot ixto mör xwÿnhhta axte inhmã kapêr nê inhmã:

—E nã ãm hãmri na ixte amã mēmoj piitã harênh xwÿnhja. ãm hãmri na. Jakamã kwa kêr ka arî hã ano htÿx rãhã ho apa. Amnepê m Tirtÿmja ÿ hã mē kapêr o pa xwÿnhjê mã tanhmã kapêr o amnhîrit to. Kot tanhmã amnhî nhîpêx to hkukamã mē kãm ho amnhîrit nhÿm prem kuma nê ô ri ma hkwyjê mã harênh o ri mē hkôt pa. Tã ra mē hpãnhã pa mē awÿr inhmê. Mē ate Tirtÿm mã tanhmã amnhî to ho apa xwÿnhjê mã ixte ja jarênh kaxyw Pahihti Tirtÿmja mē awÿr inhmê pa wry. Nã koja mēmoj tokyx ã amnhî nhîpêx anê.
⁷ Na pre Jejus mē amã amnhî jarênh o: “Kot paj tokyx akupÿm mē awÿr wry. Tã mē ate ijarênh ã kagã kamã harênh nê mar nê amnhî kaxyw hkôt ajamaxpêr nê hkôt amnhî nhîpêx xwÿnhjaja kot kaj mē akînh nê ri apa.” Anhÿr o amnhî jarê. Anê.

⁸ Nã ixpê Juãw na pa pre ã inhno ho mēmoj pumunh anê. Hãmri nê omunh pa nê Tirtÿm kapêr o wryk xwÿnh kot inhmã harênh xwÿnhhta kutã ixkôn krã ho ixtêm nê inhÿr kaxyw. Nom nhÿm amnhî nê inhmã kapêr kãm hihtÿx nê inhmã:

⁹ —Kwa nã ri ã inhîpêx anhÿr kêt nê. ãm Tirtÿm pix kutã na pu htem ã amnhî nhîpêx anê. Apyrà nê ixpê Jejus kwÿ kênã. Na pa hte apyrã nê ÿ hã tanhmã amnhî nhîpêx to ho ixpa. Nê mē apyrã nê kapêr ã kagã hkôt pix mã amnhî nhîpêx. Na pu htem axpên kutã pahkôn krã ho parôrokêt nê. ãm Tirtÿm pix kutã na pu htem ã amnhî nhîpêx anê.

¹⁰ —E ã ate mēmoj pumunh nê mar anhÿr xwÿnhja koja tokyx ã amnhî nhîpêx anê. Jakamã kwa kêr ka akwyjê pê ho apimxur kêt nê. Piitã hã

kagã hpa kê mē kamã harê nê kuma nê mēmoj kot ã amnhî nhîpêx anhÿr mã xwÿnhhta piitã hkukamã harênh ma. Koja tokyx mēmoj ã amnhî nhîpêx anê.

¹¹ —Jakamã kwãr mē mãmri piitã tanhmã kãm amnhî nhîpêx to ho pa hprãm xà hkôt amnhî nhîpêx o pa. Kwãr mē mē kot amnhî tomnuj xwÿnhjaja ã amnhî anhîpêx anhÿr o pa. Nê kwãr mē kot tanhmã kapêr punuj to xwÿnhjaja mãmri ã amnhî nhîpêx anhÿr o pa. Nê kwãr mē kot tãm amnhî nhîpêx o ri mē pa xwÿnhjaja mãmri Tirtÿm kôt pix mã ri tãm amnhî nhîpêx o pa. Anê.

Nhÿm pre ã kaxkwa hwÿr ixto àpir xwÿnhhta inhmã kapêr anê.

¹² Hãmri nhÿm hpãnhã Jejus tãm inhmã kapêr nê inhmã:

—E kot paj tokyx akupÿm mē awÿr wry. Nê akupÿm pøj hãmri nê mē kot amnhî tomnuj o mē pa xwÿnhjaja pa ja mÿrapê ma mē kot amnhî xà htÿx kamã hamak tÿm xàta wÿr mē rênh pa. No mē kot ixkôt amnhî nhîpêx xwÿnhjaja kot paj akupÿn inhô krî hwÿr amnhî kôt mē ho api.

¹³ —Nê ixrãhãã xwÿnh na pa. Amnepê mã kormã mēmoj kêt ri na pa pre ra ixrãhãã. Nê koja nhÿrmã mēmoj piitã akupÿm hapêx pa arî ixrãhã nê ixpa ho ixpa.

¹⁴ —Nê Tirtÿm kot mē anê mē ate amnhî tomnuj kuhôn par xwÿnhjaja kot kaj mē amex kumrêx nê apa ho apa. Nê akînh nê ajamakêtkati nê ri atÿx apa ho apa. Te ho mē kot amnhî xê kahôn nê mex jagjênh nê ri hã pata pyrãk. Koja Tirtÿm mē amã anê ka mē ajamakêtkati nê ô krî hwÿr agjê nê kamã ri amex kumrêx nê ri apa ho apa. Nê kamã mēmo pÿ xô mē kot kur nê htîr tÿm nê pa mã xwÿnhhta wÿr mra nê amnhîm ô rê nê hkur o ri apa. Ra mē ate Jejus kôt amnhî xunhwÿr jakamã kot kaj mē axãmnhîx hwÿr mra nê amnhîm hkwyjê rê nê hkur o ri apa. Kot kaj mē ã amnhî nhîpêx anê.

¹⁵ —Nom mē kot amnhî tomnuj o mē pa xwÿnhjaja koja mē akînhã inhô krî hwÿr gjêx kêt nê. Mē kot ri mē

y ho mẽ pa xwỳnhjaja. Nễ mẽ kot nhãm ri mẽnijê ho amnhĩkati ho mẽ pa xwỳnhjaja. Nễ mẽ kot ri mẽ hpar o mẽ pa xwỳnhjaja. Nễ mẽ kot ri sãnti nhĩpêx o te Tĩrtũm nhĩpêx pyrãk o mẽ pa xwỳnhjaja. Nễ mẽ kãm ri hêx prãm o ri mẽ pa xwỳnhjaja. Koja mẽ akĩnhã inhõ krĩ hwỳr pa hkêt nễ.

¹⁶ –E Juãw. Nà ixpê Jejus na pa awỳr ixkapêr o mẽ wrỳk xwỳnhhta mẽ. Kot ixkwỳjê kaxyw amã ixkapêr jarênh kaxyw. Ixpê Tawi pàr krax na pa. Te ixpê arĩgro hkôt kanhêti hpôk rax kot arĩgro ho mõi ã ho amnhĩrit xwỳnhhta pyrãk. Anễ.

Nhũm pre ã Jejus inhmã kapêr anễ.
¹⁷ Tĩrtũm Karõ mẽ Jejus kwỳjaja na htem ã Jejus kot amnhĩ jarênh anhỹrja ma nễ hkĩnh nễ. Nễ kãm kapêr o:

–Hêxta waa nễ. Kwa amnhĩm anojarêr nễ tokyx akupỹn mẽ ixwỳr wrỳ Pahшти. Pa mẽ tokyx ã amnhĩ nhĩpêx anhỹr o ri war akôt ixpa. Anễ.

Nễ mẽ ate ja mar xwỳnhjaja kêr ka mẽ urãk nễ ã kãm akapêr anễ.

Nễ te mẽ amã kôr nễ ri mẽ apa pyrãk xwỳnhjaja kêr ka mẽ te Jejus wỳr amrar nễ õ gô ho akõm pyrà nễ hkôt amnhĩ xunhwỳ. Te Jejus amarĩ mẽ pamã õ gô nhõi pyrãk o mẽ panhĩpêx pu mẽ hkôt amnhĩ xunhwỳ nễ ra pahpê pahĩr tũm nễ papa mã xwỳnh. Hãmri nễ amnhĩ pãnhã tanhmã kãm amnhĩrer to hkêt nễ.

Nhỹrmã mẽmoj nyw par ã harênh jatur xà

¹⁸ E ixpê Juãw na pa Jejus nhỹhã mẽ amã mẽmoj tanhmã kot amnhĩ nhĩpêx to hkukamã ã mẽ amã hã kagà anễ. Tã kwa mẽ o kora. Kêr ka mẽ atõ amnhĩ krã hkôt ri ajamaxpêr o te ho ja pyrà nễ hijuk ri axte mẽmoj nhĩpêx

kêt nễ. ãm kwarĩ ho kwarĩ. Kot ka mẽ atõ anễ nhũm Tĩrtũm ja hã apumu nễ kagàja kamã tanhmã mẽ hipêx kati hto xàta o tanhmã anhĩpêx to ka arĩ amnhĩ pumu.

¹⁹ Rỳ ka mẽ atõ kagà kamã harê nễ ama nễ tanhmã ajamaxpêr to nễ ajamaxpêr o:

–Nà ja kot anhỹr kêt. Na mẽ ãm harênh o hêx. Kot paj kuma nễ ãm kuma.

Anhỹr o ajamaxpêr japêr. Hãmri nhũm Tĩrtũm amnhĩ tã ama nễ kagà mexta kamã kot tanhmã mẽ ho mex toja o ato mex kêt nễ. Ka õ krĩ hwỳr axàpir nễ mẽmo pĩ xõ mẽ kot hkur nễ htĩr tũm nễ pa kaxyw mã xwỳnhhta ka amnhĩm hõ hyr nễ hkrêr kêt nễ. Jakamã e kwa mẽ o kora. Kêr ka mẽ kagàta kamã ã mẽmoj kot amnhĩ nhĩpêx anhỹr mã xwỳnhhta jarênh ma nễ aprĩ hã piitã hkôt ajamaxpêr tỳx rãhã ho ri apa.

²⁰ E Jejus kot inhmã mẽmoj kukamã tanhmã ujarênh to xwỳnhhta na pre inhmã amnhĩ jarênh o: “Kot paj tokyx akupỹn mẽ awỳr wrỳ.” Anễ. ãm hãmri na pre ã amnhĩ jarênh anễ. Koja tokyx akupỹn mẽ pahwỳr wrỳ hãmri nhũm mẽmoj piitã mex o mex.

Jakamã kwa kêr ka amnhĩm anojarêr nễ tokyx akupỹn mẽ ixwỳr wrỳ Pahшти Jejus.

²¹ Nễ ixpyrà nễ mẽ apê Tĩrtũm krajaja na pa hte mẽ ato Pahшти Jejus wỳr rãhã ho ri ixpa nễ kãm:

–Kwa akwỳjê pumu nễ mẽ kutã anojarêr rãhã ho ri apa Pahшти. Anễ.

E mẽ ujarênhja na hapêx. Ixpê Juãw na pa Jejus kot inhmã tanhmã ujarênh toja pa amnhĩ xõ ri mẽ amã hã kagà hpa. E na hapêx.